


Saontsin' Añahare



The Holy Bible in the Tandroy language of Madagascar

Saontsin' Añahare
The Holy Bible in the Tandroy language of Madagascar
La Sainte Bible en langue tandroy de Madagascar

Copyright © 2023 Steve Lellelid

Language: Tandroy (Malagasy, Tandroy-Mahafaly)

DRAFT VERSION

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2024-05-03

PDF generated using Haiola and XeLaTeX on 3 May 2024 from source files dated 3 May 2024
25d648f1-3cb3-5c21-a9e0-49038eca9d1c

Contents

Foto'e	1
Avotse	64
Soroñe	116
Volily	151
Indra-Tsara	201
Iehosoa	247
Mpizaka	276
Rote	306
Samoele I	311
Samoele II	349
Mpanjaka I	382
Mpanjaka II	419
Fiantoñoñe I	454
Fiantoñoñe II	487
Ezra	526
Nekemia	538
Estere	555
Iobe	565
Sabo	619
Razan-tSaontsy	761
Mpañoke	810
Sabo Talango'e	823
Iesaià	833
Iirmeà	946
Firovetañe	1050
Iekezkèlé	1062
Daniele	1124
Hosèa	1143
Ioèle	1160
Amose	1166
Obadià	1178
Ionà	1180
Mikà	1183
Nakòme	1192
Kabakòke	1196
Tsefania	1201
Kagày	1206
Zekarià	1208
Malaky	1220
Matio	1226
Marka	1274
Lioke	1302
Jaona	1346
Tolom-Piràhe'e	1378
Roma	1420
Korinto I	1438
Korinto II	1454
Galate	1465
Efesosy	1471

Filipy	1477
Kolosia	1481
Tesalonika I	1485
Tesalonika II	1489
Timoty I	1491
Timoty II	1496
Titosy	1500
Filemona	1502
Hebreo	1503
Iakobe	1517
Petera I	1522
Petera II	1527
Jaona I	1530
Jaona II	1535
Jaona III	1536
Joda	1537
Bentatse	1539

Foto'e

*Ty Fitoloñañe Eneñ' andro
Fot 2.4b-9; Iob 38.4-11; Jao 1.1-5*

¹ Tam-pifotorañ' aña, namboaren' Añahare o likerañe o naho ty tane toy,
² ie amy zay tsy amam-bintañe naho kòake ty tane toy naho nimoromoro-
ñe ty an-tarehe' i lalekey, vaho nihelahela ambone' o ranoo t'i Arofon'
Añahare.

³ Hoe t'i Andrianañahare: Ampiloneahan-kazavàñe; le nisodehan-
kazavàñe. ⁴ Nivazohon' Añahare i hazavañey te nisoa, le navahen'
Añahare amy ieñey i hazavàñey, ⁵ nataon' Añahare ty hoe Andro i
hazavàñey vaho nanoe'e ty hoe Haleñe i ieñey. I haleñey vaho i
antoandroy—ty andro valoha'e.

⁶ Le hoe t'i Andrianañahare: Ampiboahan-dañelañe añivo' o ranoo
hisitaha' ty rano ami'ty rano. ⁷ Aa le namboaren' Añahare i lañelañey
vaho navì'e amy rano ambone' i lañelañey ty rano ambane' i lañelañey.
Le zay ty ie. ⁸ Nataon' Añahare ty hoe likerañe i lañelañey. I haleñey vaho
i antoandroy—ty andro faharoe.

⁹ Le hoe t'i Andrianañahare: Hatontoñe antoetse raike o rano ambane'
i likerañeio hiboaha' ty tane maike. Le zay ty ie. ¹⁰ Nataon' Añahare
ty hoe Tane i maikey, naho ty hoe Riake o rano nifanontoñe, le
nivazohon' Añahare te soa.

¹¹ Aa le hoe t'i Andrianañahare: Ampitiriañ' ahetsé i taney, rongoñe
mamoa voa naho hatae mamoa voa rekets' àta'e ty amy karaza'ey. Le
zay ty ie. ¹² Aa le nitirian' ahetsé ty tane toy, rongoñe mamoa voa ty
amy karaza'ey, vaho hatae mamoa voa rekets' àta'e, ty amy karaza'ey.
Le nivazohon' Añahare te soa. ¹³ I haleñey vaho i antoandroy—ty andro
fahatelo.

¹⁴ Le hoe t'i Andrianañahare: Ampiboahéñ failo i lañelañen-dikerañey
hañavake ty antoandro ami'ty haleñé ho vintañe naho famotoañañe naho
andro vaho taoñe; ¹⁵ ho jiro amy lañelañen-dikerañey hañilo ty tane toy.
Le zay ty ie. ¹⁶ Le namboaren' Añahare ty jiro roe jabajaba—hifehe ty
andro ty jiro bey naho hifehe ty haleñé ty jiro zai'e—vaho o vasiañeo.
¹⁷ Aa le napon' Añahare amy lañelañen-dikerañey iereo hañilo ty tane toy
¹⁸ hamehe ty andro naho ty haleñé vaho hañavake i ieñey amy hazavàñey.
Nivazohon' Añahare te soa. ¹⁹ I haleñey vaho i antoandroy—ty andro fah'
efatse.

²⁰ Le hoe t'i Andrianañahare: Ampifamorohoteñe raha veloñe
hangetseketeke o ranoo, naho ampitiliñem-boroñe ty ambone' tane
toy an-tarehe' i lañelañen-dindin'ey. ²¹ Le namboaren' Añahare o
fañanen-driakeo naho ze hene raha veloñe mihetseke, mifamorohotse
amo ranoo, ty amy karaza'ey, naho ze hene voroñe reketsé elatse ty amy
karaza'ey. Le nivazohon' Añahare te soa. ²² Nitatan' Añahare iereo
ami' ty hoe : Manaranàha le mangetseketeha, atsafo o ranon-driakeo,
vaho ampangorokitsiheñe voroñe ty an-tane atoy. ²³ I haleñey vaho i
antoandroy —ty andro faha-lime.

²⁴ Le hoe t'i Andrianañahare: Hampanaranàheñe an-tane atoy ze raha
veloñe iaby ty amy karaza'ey: o hareo, naho o raha milalio naho ze hene
bibi' ty tane toy, ty amo karaza'eo. Vaho zay ty ie. ²⁵ Le namboaren'
Añahare o bibi' ty tane toio amo karaza'eo, naho ze karazan' añombe iaby

vaho ze hene karaza-biby misitsitse an-tane atoy. Le nivazohon' Añahare te soa.

²⁶ Le hoe t'i Andrianañahare: Antao hamboatse ondaty* hambambintañ' aman-tikañe, hifañoronkoroñe aman-tika, hifehe o fian-driakeo naho o voron-tiokeo naho o bibio naho ty tane toy iaby vaho ze biby misitsitse an-tane atoy. ²⁷ Aa le namboaren' Añahare mirai-bintañe ama'e t'indaty, hambam-bintañe aman' Añahare ty namboare'e aze, lahilahy naho ampela ty nitsene'e iareo.

²⁸ Nitataen' Añahare iereo, le hoe t'i Andrianañahare ama'e: Manaranàha le mangetseketseha naho atsefo ty tane toy vaho feleho; le feheo o fian-driakeo naho o voron-tiokeo vaho ze biby misitsitse an-tane atoy.

²⁹ Le hoe t'i Andrianañahare, Heheke te natoloko anahareo ze hene ahetsé mamaoa ambone' ty tane toy, naho ze fonga hatae mamaoa rekets' àta'e ty am-po'e ao, ho fikama'areo. ³⁰ Aa ty amo hene bibi' ty tane toio naho ze fonga voron-tioke vaho ze raha misitsitse an-tane atoy, ze kila raha veloñe, le nimeako ze hene ahets'antsetra ho haneñe. Le zay ty ie.

³¹ Nivazohon' Añahare o raha namboare'e iabio le hehe te soa. I haleñey vaho i antoandroy—ty andro fah' eneñe.

2

*Fitofañe**

¹ Aa le nifonitse ty tane toy naho o likerañe o naho ty fitozantoza' iareo.

² Nifoniren' Añahare ami'ty andro faha-fito i fitoloña'ey, le nitroatse ami'ty andro faha-fito amo hene tolon-draha nanoe'eo; ³ Le nitahien' Añahare ty andro faha-fito vaho nimasiñe'e, amy te ama'e ro nitroara'e amy ze nitsenèn' Añahare iaby, hamokara'e ka.

Soniam-Panokitse Valoha'e

⁴ Inay ty fanoñonañe o likerañe o naho ty tane toy amy fañamboarañe iareoy.

Talily Tovo'e amy Fañamboarañey

Tamy sa namboare' IEHOVÀ Andrianañahare ty tane toy naho o likerañeyo ⁵ naho mbe tsy tan-tane ao ze hataen-kivoke naho taolo' ty nitiria' ze ahetsé am-patrañe ao, vaho mboe tsy nampahavie' IEHOVÀ Andrianañahare orañe ty tane, fa tsy teo ty ondaty hahava i taney; ⁶ fe niboahan-jono ty tane ze nahatondra-drano ty ambone' ty tane toy iaby; ⁷ le namboare' IEHOVÀ Andrianañahare ami'ty lembon-tane t'indaty naho nikofoha'e tion-kaveloñe o lalam-piantsona'eo vaho ninjare fañova veloñe indatiy. ⁸ Le nañalahala goloboñe maniñanañe e Edene ao t'IEHOVÀ Andrianañahare, vaho navotra'e ao indaty namboare'ey. ⁹ Le nampitirie' IEHOVÀ Andrianañahare boak' an-tane ao ze karazan-katae soa am-pivazohoña naho mafiry am-pikamañe, le añivo' i goloboñey ao ty hataen-kaveloñe naho ty hataem-paharendrehañe ty soa naho ty raty.

¹⁰ Nikavavàke boak' Edene ao ty oñe handeñe i goloboñey, ie boak' ao le nivaky efatse. ¹¹ Pisone† ty añara' ty valoha'e, mañariari' i hene tane' Kavilà‡, ie amam-bolamena; ¹² soa ty volamena' i taney; aña ty bedolake§ naho ty vato antsetra. ¹³ Gihone* ty añara' i oñe faharoe mitsikarioke era'

* ^{1:26} Heb. Adàme * ^{2:} Heb. SABATA (SBT), boak' ama'e ty hoe Sabotse (SBT) fitofañe, ty andro faha-7. † ^{2:11} Pisone: miparaitake ‡ ^{2:11} Kavilà: fasiheñe; mifeake firifiry; § ^{2:12} Litén-katae mañitse, ndra hange. * ^{2:13} Gihone: torahañe; vavatanem-palalàñe

i tane Kosiy[†]. ¹⁴ Hidikl[‡] ty añara' i fahateloy ze miary atiñana' i Asore[§]; vaho i Perate^{*} t'y oñe fah'efatse.

¹⁵ Navotra' IEHOVÀ Andrianañahare an-Golobo' i Edene ao indatiy hañalahala naho hañambeñ' aze. ¹⁶ Le hoe ty linili' IEHOVÀ Andrianañahare am'indatiy, Azo'o ikamañe ze hene hatae amy goloboñey ao; ¹⁷ fe ko ikamà'o ty hataem-paharendrehañe ty soa naho ty raty, fa toe hivetrake rehe ami'ty andro ikama'o aze.

¹⁸ Le hoe t'IEHOVÀ Andrianañahare, Tsy mahasoa indatiy te ho tokañe, hamboarako mpañimba mañeva. ¹⁹ Aa le boak' amo taneo ty namboare' IEHOVÀ Andrianañahare ze kila bibin-kivoke, naho ze hene voron-tioke vaho nendese'e am' indatiy hivazoho ze sindre ho tokava' indatiy aze; aa le ze nitokava' indatiy ty raha veloñe, le zay ty añara'e. ²⁰ Nimea' indatiy añarañe ze hene hare naho voron-tioke, vaho ze biby am-patrañe aña iaby; fa naho indatiy, tsy nioniñe ty mpañolotse mañeva aze. ²¹ Aa le nampifetsaha' IEHOVÀ Andrianañahare am'indatiy ty rotse miheatse, naho ie nirotse le nafaha'e ty pa'e raike vaho nakite'e amy toe'ey ty nofotse. ²² Nitsene ampela t'IEHOVÀ Andrianañahare amy rinambe'e aña'ila' indatiy vaho nasese'e am'indatiy. ²³ Le hoe indatiy, Itoy henaneo ty taola' o taolakoo naho ty nofo' o nofokoo; le hatao Rakemb[†] re amy te lahilahy[‡] ro nañakarañe aze.

²⁴ Aa le mienga ty rae'e naho i rene'e t'indaty le mipitek' ami'ty vali'e vaho nofotse raike iereo. ²⁵ Ie amy zay, songa nibongy indatiy naho i vali'ey fe tsy nimeñatse.

3

ty Hakeo Valoha'e

Rom 5.12-21

¹ Nahay farñahy mandikoatse ze kila karaza-biby namboare' IEHOVÀ Andrianañahare an-kivok' ao ty mereñe. Hoe re amy rakembay: Toe nanao ty hoe hao t'i Andrianañahare: Tsy ikama' areo ze hatae amy goloboñey ao?

² Hoe ty natoi' i rakembay amy mereñey: Azo'ay haneñe o voan-katae amy goloboñeyio. ³ Fe hoe ty nitsaraen' Añahare ty amy hatae raik' anteñateña' i goloboñey: Tsy iihihinana' areo vaho tsy ho tsapae' areo, tsy mone hivetrake.

⁴ Le hoe ty asa' i mereñey amy rakembay, Toe tsy hihomake nahareo, ⁵ fa arofoanan' Añahare te hibolanake ty fihaino' areo amy andro ikama' areo aze le ho hambañ' aman' Añahare mahafohiñe ty soa naho ty raty.

⁶ Aa naho nioni' i rakembay te soa kamaeñe i hatae zay, naho nahasinda am-pihaino naho hatae salalaeñe kanao mampahilala, le nampipototse ty voa'e naho nikama le nanjotsoa'e ka t'i vali'e nindre ama'e, vaho nikama re. ⁷ Nibeak' amy zao ty fihaino' iareo roroe naho naharendreke te sambe niboridañe le navitra' iareo an-jaitse ty raven-tsakoa vaho nanoa' iareo kitambe. ⁸ Jinanji' iareo ty fiarañanaña' IEHOVÀ Andrianañahare, ie nidratraitse an-goloboñ' ao naho nitiotio-drikoñe i àndroy, le nipalitse amo hatae an-goloboñeo indatiy naho i tañanjomba'ey tsy hiatreke am'IEHOVÀ Andrianañahare.

[†] 2:13 Kose: mainte; o nte-Kosio, Etiopia [‡] 2:14 Idikl[‡]: Ty saka Tigrisy misorotombake § 2:14 Asore: mpamandroñe; mpisamba ^{*} 2:14 Perate: mitotsake; maha-tobake [†] 2:23 Heb. isà [‡] 2:23 Heb. ìse

⁹ Le kinanji' IEHOVÀ Andrianañahare indatiy amy ty hoe: Aia v'iheo?
¹⁰ Tinoi'e ty hoe: Tsinanoko amy goloboñey Rehe, le nihemban-draho fa nibongy vaho nietake. ¹¹ Le hoe Re: Nivolaña' ia te ihe nihalo? Nihinana'o hao i hatae nandrarako azo tsy ihinanañey? ¹² I rakemba natolo'o ho mpiamakoy, hoe indatiy, ie ty nanjotso amako boak'amy hataey vaho nihaneko. ¹³ Aa le hoe t'IEHOVÀ Andrianañahare amy rakembay: Inoñ' o nanoe'oo? Kinalita' i mereñey, hoe i rakembay, le nihinan-draho. ¹⁴ Hoe t'IEHOVÀ Andrianañahare amy mereñey :
 Amy te ihe nanao zao,
 le fàtse rehe
 amy ze kila hare naho ze hene bibin-kivoke.
 Hilalilaly an-tro'o rehe, le deboke ty ho filintse'o amy ze fonga andro hiveloma'o.
¹⁵ Le hampirafelahioko amy rakembay,
 naho o tarira'oo amy tarira'ey.
 Ho demohe'e ty loha'o
 vaho ho vonotrobohe'o i tomi'ey.
¹⁶ Hoe Re amy rakembay :
 Ho silofeko ty fioremeña'o,
 le hanivontivoñe ty fitsongoa'o,
 t'ie misamak' anake.
 Ho fañiriña'o ty vali'o, vaho ie ty hifehe azo.
¹⁷ Le hoe ka Re tamy Dame :
 Amy te nihaoñe'o i vali'oy vaho
 nikama'o i hatae nandraràko azoy
 ami'ty hoe : Ko ikama'o;
 le ho hotohotoeko ty ama'o o taneo.
 Le an-kamokorañe ty hikama'o ama'e
 ze hene andro hiveloma'o.
¹⁸ Hitiria'e fatike naho hisatse,
 le hikamae'o ze tirin-traka am-patrañe ao.
¹⁹ Ami'ty liñe' o lahara'oo ro hikama'o mahakama ampara' t'ie himpoly
 an-debok' ao;
 fa tama'e ty nandrambesañ' azo,
 lemboke rehe;
 le mb'an-deboke ty himpolia'o.
²⁰ Natao' indatiy Haova* ty añara' i vali'ey, amy t'ie ro rene' ze hene veloñe. ²¹ Namboara' IEHOVÀ Andrianañahare saron-kolitse indatiy naho i vali'ey le naombe'e am'iareo.
²² Le hoe t'IEHOVÀ Andrianañahare, Ingo te ninjare hoe raik' aman-tika indatiy, maharendreke ty soa naho ty raty. Aa tsy mone hahiti'e ty taña'e hampipototse amy hataen-kaveloñey ka, hikama'e ho veloñe nainai'e; ²³ le nampiavote' IEHOVÀ Andrianañahare amy goloboñey Edaney re handrokake i tane nandrambesañ' azey. ²⁴ Aa le sinoi'e aña indatiy vaho nampijadoñe'e kerobe reke-pibara nibela niviombioñe ty atiñana' i goloboñey Edaney higaritse ty lala' i hataen-kaveloñey.

4

Mañe-doza amy Hèbele t'i Kàine

¹ Nandrèndreke i Haova, vali'e t'i Dame, le nivesatse naho nisamake i Kàine vaho nanao ty hoe: Nahazoako lahilahy t'IEHOVÀ. ² Nisamake

* ^{3:20} Havoa: mpañomey haveloñe

indraike re, le i Hèbele zai'e. Nimpihare añondry t'i Hèbele le nimpiaava tane t'i Kàine. ³ Ie te indraike, nibanabana ty lengom-boñe' i taney am' IEHOVÀ t'i Kàine, ⁴ le ninday ty valohan' ana' o hare'eo naho ty sabora'e t'i Hèbele. Aa le nitoliha' IEHOVÀ t'i Hèbele naho i banabana'ey, ⁵ fe tsy hinao'e t'i Kàine naho i enga'ey. Niforoforo ami'ty habose'e amy zao t'i Kàine vaho nilonjom-bintañé ⁶ Inoñé ty iviñera'o hoe t'IEHOVÀ amy Kàine vaho ino ty mahalonjets' azo? ⁷ Tsy hiampokòfañé hao rehe naho toloñe'o ty hiti'e? Aa naho tsy soa ty noe'o le mangonònoke anjili-dalañé ao ty hakeo milelalela te hahazo azo, f'ie feheo.

⁸ Nifanaontsy amy Hèbele rahalahi'e t'i Kàine, aa ie nimb'an-teteke mb' eo, niambotraha' i Kàine t'i Hèbele naho nañohofa'e loza. ⁹ Aa le hoe t'IEHOVÀ amy Kàine, Aia t'i Hèbele rahalahi'o? Tsy fantako, hoe re, mpiambeñ' an-drahalahiko hao raho? ¹⁰ Hoe re: Ino o nanoe'oo? Inao! mitoreo amako boak' an-tane ao ty feon-dion-drahalahi'o; ¹¹ le fa nafà' i taney rehe henane zao, ie nanoka-bava handrambe an-tañá'o i lion-drahalahi'oy. ¹² Aa ie miava tane henane zao le tsy hafoe'e ama'o ty haozara'e; ie ho mpirererere naho mpitralantralañé an-tane atoy. ¹³ Hoe t'i Kàine am' IEHOVÀ, Tsy leoko babeñé o fandilovañé ahio; ¹⁴ anindroany Rehe nanao soik' ahy amo tarehe' ty tane toio, naho hampietahéñé amy lahará'oy raho, le ho mpiriorio naho mpirererere an-tane atoy, vaho songa hañoho-doza amako ze mifanojeha amako. ¹⁵ Le hoe t'IEHOVÀ ama'e, Aiy! ho valeñé im-pito ze mamono i Kàine; vaho namiloñé i Kàine t'i Andrianañahare tsy ho vonoe' ze hifanalaka ama'e. ¹⁶ Aa le nienga boak' añatrefa' IEHOVÀ t'i Kàine, noly an-tane Rererere*, atiñana' i Edene aña.

Ty Fitomboa' Ondatio

¹⁷ Nifohi' i Kàine ty vali'e, le niareñé, nisamake i Kanòke; ie nañoren-drova vaho nitokave'e ami'ty añara' i Kanoke ana'e. ¹⁸ Nisamake Irade t'i Kanoke; le nisamak' i Méhojaèle t'Irade le nisamak' i Metosaele t'i Méhojaèle vaho nisamake i Lemeke t'i Metosaele. ¹⁹ Nampirafe roe t'i Lemeke; le natao ty hoe Adae ty raike naho i Zilae ty raike. ²⁰ Nisamake Iabale t'i Adae; ie ty raem-pimoneñé an-kibohotse naho miphare. ²¹ Natao Iobale ty rahalahi'e, ie ty rae' o mpititike kararàke naho solio. ²² Nisamake i Tobale-kaine t'i Zilae, ie ty nitsene ze hene haraotse torisike naho viñé. I Naamae ty rahavave' i Tobale-kaine.

²³ Hoe t'i Lemek' amo vali'eo:

Tsanoño ty feoko ry Adae naho Zilae;
Ry vali' i Lemeke: mitsendreñá o entakoo:
Vinonoko t'indaty nandratse ahy,
naho ty ajalahy nandafa ahiko.

²⁴ Aa naho i Kàine ro valeñé im-pito,
Le toe impitompolo fito amby ka
t'i Lemeke.

²⁵ Nifohi' i Dame indraike i vali'ey, le nisamak' ana-dahy vaho natao'e Sete ty añara'e, fa hoe i rakembay: Fa nanendre anake ho ahy t'i Andrianañahare handimbe i Hèbele vinono' i Kàine. ²⁶ Nahatoly anake ka t'i Sete, le natao'e Enose ty añara'e. Nifototse amy zay te nikanjy ty tahina' IEHOVÀ ondatio.

Soniam-Panokitse Faharoe†

Zay ty takelam-piantoño' i Dame.

* ^{4:16} Heb: Nod † ^{4:26} Toe: Dame avao fe tafara bey

5

*Fiantoñoñe i Nòake
1 Tan 1.1-4; Lke 3.36-38*

¹ Amy andro namboaren' Añahare ondatiyo le nihambam-bintañe aman' Añahare ty namboare'e iareo. ² Lahilahy naho ampela ty namboare'e iareo naho nitahie'e vaho natao'e ty hoe Ondaty* amy andro namboareñe iareoy.

³ Ie zato-tsi-telopolo tao t'i Dame, le nahatoly anake hambam-bintañe ama'e vaho natao'e Sete ty añara'e. ⁴ Aa ie nisamake i Sete le mbe niveloñe valon-jato taoñe t'i Dame naho nahatoly lahilahy naho ampela. ⁵ Aa le sivan-jato tsy telopolo taoñe o hene andro' i Dame te nivilasy.

⁶ Ie niveloñe zato taoñe lim' amby t'i Sete le nisamake i Enose. ⁷ Mbe niveloñe valon-jato taoñe fito amby t'i Sete mifototse amy Enose le nisamake lahilahy naho ampela. ⁸ Aa le sivan-jato tsy folo-ro'amby taoñe o hene andro' i Sete te nivilasy.

⁹ Ie niveloñe 90 taoñe t'i Enose le nisamake i Kanàne. ¹⁰ Mifototse amy nahatolia'e i Kanàney le mbe niveloñe 815 taoñe t'i Enose vaho nisamake lahilahy naho ampela. ¹¹ Aa le 905 taoñe o hene andro' i Enose te nivilasy.

¹² Ie niveloñe 70 taoñe t'i Kanàne le nisamake i Mahalalila. ¹³ Mifototse amy nahatolia'e i Mahalalilay le mbe niveloñe 840 taoñe t'i Kanàne vaho nisamake lahilahy naho ampela. ¹⁴ Aa le 910 taoñe o hene andro' i Kanàne te nivilasy.

¹⁵ Ie niveloñe 65 taoñe t'i Mahalalila le nisamake Ierede. ¹⁶ Mifototse amy nahatolia'e i Kanokey le mbe niveloñe 830 taoñe t'i Mahalalila le nisamake lahilahy naho ampela. ¹⁷ Aa le 895 taoñe o hene andro' i Mahalalila, vaho nivilasy.

¹⁸ Ie niveloñe 162 taoñe t'i Kanokey le nisamake i Kanokey. ¹⁹ Mifototse amy nahatolia'e i Kanokey le mbe niveloñe 800 taoñe t'i Kanokey vaho nisamake lahilahy naho ampela. ²⁰ Aa le 962 taoñe o hene andro' i Ierede te nivilasy.

²¹ Ie niveloñe 65 taoñe t'i Kanokey le nisamake i Metoselake. ²² Mifototse amy nahatolia'e i Metoselake le mbe nindre fañavelo aman' Añahare 300 taoñe t'i Kanokey vaho nisamake lahilahy naho ampela. ²³ Aa le 365 taoñe o hene andro' i Kanokey. ²⁴ Niñdre fañavelo aman' Andrianañahare t'i Kanokey, le lia'e tsy teo, amy te rinamben' Añahare.

²⁵ Ie niveloñe 187 taoñe t'i Metoselake le nisamake i Lemeke. ²⁶ Mifototse amy nahatolia'e i Lemeke le mbe niveloñe 782 taoñe t'i Metoselake vaho nisamake lahilahy naho ampela. ²⁷ Aa le 969 taoñe o hene andro' i Metoselake vaho nivilasy.

²⁸ Ie niveloñe 182 taoñe t'i Lemeke le nisamake lahilahy. ²⁹ Natao'e Nòake ty añara'e le nanao ty hoe: Hañohò antika re ami'ty fifanehafantika naho ami'ty fitromaham-pitàn-tika boak' an-tane' nafà' IEHOVÀ toy.

³⁰ Mifototse amy nisamaha' i Nòakey le mbe niveloñe 595 taoñe t'i Lemeke vaho nisamake lahilahy naho ampela. ³¹ Aa le 777 taoñe o hene andro' i Lemeke te nivilasy.

³² Lim'anjato taoñe t'i Nòake, le nisamake i Seme naho i Kame vaho lèfete t'i Nòake.

6

Ty Hatsereha' Ondatio

* ^{5:2} Heb: Adàme

¹ Nangetseketeke ty ia' ondaty an-tane atoy vaho nisamak' ampela ² le nioni' o anan' Añahareo te montramontra o anak' ampela' ondatio naho nañenga ze nitea'e. ³ Aa le hoe t'IEHOVÀ, Tsy hifanjomotse am' ondatio nainai'e ty Troko, amy t'ie nofotse, le ho zato-tsi-roapolo taoñe ty andro'e.

⁴ Ambone' tane atoy tañ'andro zay o Nefalèo naho mbe tafara ka, le vinonje' o anan' Añahareo o anak' ampela' ondatio vaho nanaranake. Toe nifanalolahy haehae iereo, nilahitsiay.

⁵ Nivazoho' IEHOVÀ ty halosoran-katsereha' ty tane toy naho te nitolon-karatiañe avao ty fivetsevetsen-tro' iareo. ⁶ Le naneñena' IEHOVÀ te namboatse ondaty an-tane atoy vaho nanahelo añ' arofo'e ao. ⁷ Aa le hoe t'IEHOVÀ, Ho faopaoheko ami'ty tane toy ondaty nitsenèkoo, fonga ondaty naho biby naho o raha misitsitseo vaho o voron-tiokeo fa aneñenako t'ie namboareñe. ⁸ Fe nahaoni-pañisohañe am-pihaino' IEHOVÀ t'i Nòake.

Soniam-Panokitse Fahatelo

⁹ Zay ty fanoñona' i Nòake.

Fanoñona' o Ana' i Nòakeo

Heb 11.7; 1 Pet 3.20

Vantañe t'i Nòake, tsy nanan-tahiñe amo foko'eo, vaho nindre fañavelo aman' Añahare t'i Noake. ¹⁰ Nisamake telo t'i Nòake: i Seme, i Kame vaho Ièfete. ¹¹ Ie amy zay nilo-tserek' añatrefan' Añahare naho nilifotse ty hapiaroteñe ty tane toy. ¹² Nivazoho i Andrianañahare ty tane toy le naheo'e te lò-tsereke naho songa nimontamontan-tsata ondatio. ¹³ Aa le hoe t'i Andrianañahare amy Nòake, Fa miatrek' ahy ty figadoña' ze atao nofotse, amy te lifo-kapiaroteñe ty tane toy ty am' iereo, Inao, t'ie hatraoko rotsake an-tane atoy. ¹⁴ Aa le mandranjia lakam-poloay ami'ty mendoraveñe*, le mandranjia efetsefetse amy lakañey vaho hosoro harahake naho solike ty alafe'e vaho ty añate'e. ¹⁵ Zao ty hamboare'o aze. Ho kiho telon-jato ty an-dava' i lakam-poloaiy naho kiho limampolo ty am-pohe'e vaho kiho telo-polo ty haabo'e. ¹⁶ Andranjio tafo i lakam-poloaiy vaho ampijebaño kiho raike ty ambone'e; le ano lalambey añ'ila' i lakam-poloaiy; le andranjio vatsa ambane naho añivo vaho ambone. ¹⁷ Toe Zaho le izaho ty hinday fisorotombahan-drano an-tane atoy handrotsake ze nofotse mikofò-beloñe ambane' i likerañey; kila ho mongotse ze an-tane atoy. ¹⁸ Fe ihe ty hañorizako fañina, le himoaha'o i lakam-poloaiy rekets' o ana-dahi'oo naho i vali'oy vaho o valin' ana-dahi'oo. ¹⁹ Hendese'o mb'an-dakam-poloay ao ty kiroe kiroe amy ze hene raha veloñe, amy ze kila nofotse; le ho velome'o mindre ama'areo, ty lahi'e naho ty vave'e. ²⁰ Amo voroñeo ty amo karaza'eo, naho o hareo ty amo karaza'eo, naho ze fonga biby misitsitsy an-tane atoy ty amo karaza'eo, songa roe ama'e ty hiheo mb'ama'o mb'eo hameloma'o. ²¹ Fonga añandeso ze karaza-mahakama le atontono ho azo, ho kamae' areo vaho ho hène' iareo. ²² Nanoe' i Nòake, i nandilian' Añaharey ty nanoe'e.

I Fiempoempoañey

Lio 17.26-27

¹ Hoe t'IEHOVÀ amy Nòake, Miziliha an-dakam-polo'ay ao, ihe naho o keleia'o iabio, amy te ihe avao ty nitreako vantañe ami'ty tariratse toy. ² Ampindrezo ama'o ki-fito-fito amy ze hene karazam-biby malio, ty

* ^{6:14} Heb: gofera

lahy naho vave, le roe amy ze karazam-biby faly, ty lahy naho i vave'ey
³ naho sindre fito kiroe-roe amy ze karazam-boron-dikerañe, lahy naho
vave, hameloma'e tiry ambone' ty tane toy. ⁴ Ie mongotse ty fito andro
garagadiñe le hampiaviako orañe efa-polo andro naho efa-polo haleñe ty
an-tane-bey atoy; vaho ho faopaoheko ami'ty tarehe' ty tane toy ze fonga
raha veloñe namboareko. ⁵ Nihenefe' i Nòake ze hene nandilia' IEHOVÀ.

⁶ Nienen-jato taoñe t'i Nòake te nisorotombak' ambone' ty tane toy o
ranoo; ⁷ le nizilik' am-po' i lakam-polo-aiy t'i Nòake rekets' o ana-dahi'eo
naho i vali'e vaho o valin' ana'iareoo ty amy fiempoempoa-dranoy. ⁸ Le
amo biby malioo naho amo biby fàlio naho amo voroñe vaho amo raha
misitsitse an-tane atoio, ⁹ kiroekiroe, lahy naho vave, songa nizilik' an-
dakam-poloay mindre amy Nòake, amy nandilian'Añahare i Nòakey. ¹⁰ Ie
modo ty fito andro le fa an-tane atoy o rano fiempoempoañe.

¹¹ Amy taom-pah' enen-jato niveloma' i Nòake, am-bola'e faharoe, amy
andro faha folo-fito-ambi' i volañeiy, amy andro zay le hene nitorotositse
ze fihanañañ-dranon-tsikeokeoke vaho nisokake o lalan-dikerañe iabio.
¹² An-tane atoy efa-polo andro naho efa-polo haleñe i orañey. ¹³ Amy
andro zay ty nimoaha' i Nòake naho i Seme, i Kàme naho Ièfete, ana-
dahi' i Nòake rey, naho i vali' i Nòake vaho ty vali' i ana'e telo rey amy
lakam-poloaiy ao; ¹⁴ ie naho ze hene bibi-ly amy karaza'ey, naho ze fonga
hare amy karaza'ey, naho ze mpisitsitse misitsitse an-tane atoy iaby amy
karaza'ey, vaho ze hene voroñe amy karaza'ey, toe ze kila aman' elatse.
¹⁵ Nizilike mb'amy Nòak' amy lakam-poloaiy ao, kiroekiroe boak' amy ze
nofotse aman-kofò-beloñe iaby; ¹⁶ le nizilike, lahy naho vave amy ze hene
nofotse ty nimoak' ao, ami'ty nandilian'Añahare aze vaho narindri' IEHOVÀ
ao. ¹⁷ Efapolo andro tambone' ty tane toy i fisorotombañaey; nihamaro
o ranoo le nonjone'e i lakam-poloaiy vaho nitoabotse an-tiotio' ty tane toy
eñe i lakam-poloaiy. ¹⁸ Nitolom-pionjoñe naho nienène ambone' ty tane
toy i ranoy vaho nihafoñ' ambone' rano ey i lakam-poloaiy. ¹⁹ Akore ty
fionjona' o rano ambone' ty tane toio kanao nahalipotse ze atao vohitse
abo ambanen-dikerañe ey; ²⁰ toe nilikoare' i ranoy kiho folo-lim' amby o
vohtiseo. ²¹ Le fonga niopo ze nofotse nisitsitse an-tane atoy ndra voroñe
ndra hare ndra biby ly, naho ze fifamorohotam-biby mifamorohotse an-
tane atoy, vaho ze fonga ondaty; ²² le kila nimongotse ze tambone' i
tane nimaikay, ze aman-kofòn-kaveloñe am-piantsona'e ao. ²³ Fonga
finaopao'e ze raha namboareñe ambone' ty tane toy, naho ondaty, naho
hare, naho ze raha misitsitse, vaho o voron-tiokeo; toe finao'e an-tane atoy.
I Nòak' avao ty nihonka'e miharo amo nindre ama'e an-dakam-poloai.
²⁴ Tambatse ambone' ty tane toy zato-tsi-limampolo andro o ranoo.

8

Mitaketrake i Ranoy

¹ Nitiahin'Andrianañahare t'i Nòake naho ze raha veloñe iaby naho
ze hene biby nindre ama'e an-dakam-polo-ay ao. Le nampitiofen'
Añahare ambone' ty tane toy ty tioke vaho nipendreñe i ranoy; ² najihetse
iaby ze nitorotositse boak' an-tsikeokeok' ao naho o lalan-dikerañe, naho
nisebañeñe ty rano boak'an-dindiñe eñe; ³ vaho nitolom-piketrak' an-tane
atoy i ranoy. Ie modo ty zato tsy limampolo andro le fa nizetse i ranoy;
⁴ le ami'ty volam-paha-fito, ami'ty andro faha folo-fito' ambi' i volañey le
nisampe ambone' ty vohits' Ararate eo i lakam-poloaiy. ⁵ Nitolom-pizetse

avao i ranoy am-para' ty volam-paha-folo; ie am-baloha' i volam-pahafoloy le niboake o lengom-bohitseo.

⁶ Ie nimodo ka ty efa-polo andro le sinoka' i Nòake i lalan-kede namboare'e amy lakam-poloaiiy ⁷ vaho nañirake koàke; nihelahela avao re ampara' te nimaike ty rano ambone' tane atoy. ⁸ Nampandènà'e boak'ama'e ka ty deho ho mb'eo hahaoniñe hera nizetse an-tane atoy i ranoy; ⁹ fe tsy nahatrea ty hipetahan-tombo'e i dehoy, le nimpoly mb'an-dakam-poloay ao fa mboe nihanañe ambone' ty tane toy iaby i ranoy. Aa le nahiti'e ty fità'e naho rinambe'e vaho nazili'e ho ama'e an-dakañe ao. ¹⁰ Mbe nandiñe fito andro ka le nampisangitrife'e mb'eo boak' amy lakañey indraike i dehoy; ¹¹ ie amy harivay, nimpoly ama'e i dehoy, ambava'e ao ty raven-olive nipotore'e * anianike; aa le nirendre' i Nòake te nitaketatrak' an-tane atoy o ranoo. ¹² Ie nandiñe fito andro ka le nirahe'e mb'eo i dehoy f'ie tsy nimpoly.

¹³ Ie amy taom-pahaenen-jato-raik' ambiy, amy volam-baloha'ey, amy andro valoha' i volañei, le nimaike o rano ambone' tane atoio; le nakatra' i Nòake ty lombo' i lakam-poloaiy naho nisary, vaho niisa'e te nimaike ty ambone' i taney. ¹⁴ Amy volam-paha-roey, amy andro faha roa-polo-fito-ambi' i volañei le nimaike ty tane toy. ¹⁵ Aa hoe t'i Andrianañahare amy Nòake, ¹⁶ Iengao o lakam-poloao, ihe naho ty vali'o naho o ana'oo vaho o valin' ana'oo. ¹⁷ Akaro mindre ama'o ze fonga raha veloñe ama'nofotse, o voroñeo naho o hareo naho ze hene mpisitsitse misariosario an-tane atoy, hibodobodo an-tane atoy naho hitomambao vaho hanarànaké an-tane atoy. ¹⁸ Aa le niavotse t'i Nòake rekets' o ana-dahi'eo naho i vali'ey naho o valin' ana'eo. ¹⁹ Le sambe niakatse i lakañey ze biby naho raha milaly, naho o voroñeo naho ze misitsitse ambone' ty tane toy amo karaza'eo.

Nisoroña' i Nòake

²⁰ Aa le nañoreñe kitrely[†] ho am' IEHOVÀ t'i Nòake vaho sindre nandrambesa'e ze biby malio naho ze voroñe malio vaho nañenga soroñë[‡] amy kitreliy. ²¹ Ie naha'antsoñe i harifondrifonañey t'IEHOVÀ le hoe t'IEHOVÀ añ'arofo'e ao, Tsy hafàko ka o taneo ty am'ondatio, fa raty boak'ami'ty faha-ajaja'e ty fisafirin' arofo' ondatio; vaho tsy ho rotsaheko ka ze kila raha veloñe manahake i nanoekoy.

²² Aa naho mbe eo ty tane toy, le tsy ho modo ka
ty sam-pitongisañe naho fitatahañe,
ty hanintsiñe naho hatrovohañe,
ty asara naho asotry,
ty handro vaho haleñe.

9

Ty Fañina amy Nòake

¹ Nitatan'Añahare t'i Nòake naho o ana-dahi'eo ami'ty hoe: Mitomboa naho mangetseketahe vaho liforo ty tane toy. ² Le amy ze kila biby ambone' ty tane toy naho amy ze voron-tioke naho amy ze mpisitsitse an-tane atoy, vaho amy ze fiañe an-driak' ao ty fihembañañe naho ty firevendreveñañe anahareo, fa natolotse am-pitá' areo. ³ Ho fikama' areo ze hene raha veloñe; manahake ty nanolorako anahareo o ahetsé

* **8:11** Olive: voan-katae, menake azo kamaeñé † **8:20** Kitrele: Alitara: rafi-bato fisoroñañé
‡ **8:20** Soroñë: ie atoy: ze enga oroañe añ'afó.

maindoñindoñeo ty anolorako ze satan' Añahare. ⁴ Fe tsy ho kamae' areo zenofotse reketse ty havelo'e—i lio'ey.

⁵ Toe ho paiaeko an-taña' ze fonga biby naho am-pitā'ondaty naho am-pitān-drahalahi' ondaty ty lio'areo, ty havelo'areo. Ho paiako ty fiai'indatiy.

⁶ Ze mampiori-dio ondaty,
Le hampiorihe'ondaty ka ty lio'e.
Fa ami'ty vintan'Añahare
ty nitseneañe ondatio.

⁷ Aa le mahavokara vaho mangetseketseha, miraoraòa an-tane atoy vaho mihamaroa ama'e.

⁸ Le hoe t'i Andrianañahare amy Nòake naho amo ana-dahi'e nindre ama'eo: ⁹ Ingo te mañori-pañina ama'areo naho amo tarira'areo hanonjohio raho, ¹⁰ naho amy ze kila raha veloñe mindre ama'areo, o voroñeo, o hareo, naho ze fonga bibi' ty tane toy, ze niakatse i lakam-poloaiy, ze kila'bibi' ty tane toy. ¹¹ Horizako ama'areo ty fañinako te tsy hampaitoeñe an-drano fiempoempoañe ka ze kilanofotse, vaho tsy ho rotsahe' ty fiempoempoañ-drano ka ty tane toy. ¹² Hoe t'i Andrianañahare, Zao ty vilo' ty fañina ifañinako ama'areo naho amo kila raha veloñe mindre ama'areoo pak'amy ze hene tariratse aña: ¹³ Ho reketeko amo rahoñeo ty àvako ho vilo' ty fañinako ami'ty tane toy. ¹⁴ Ie ampandrahoñeko ty ambone' ty tane toy, le hiboak' amo rahoñeo i avañey ¹⁵ le ho tiahiko i fañinako ama'areo naho amo raha veloñe ama'nofotse iabioy; vaho tsy ho empoempoe'o ranoo ka ze henenofotse handrotsake aze. ¹⁶ Ie amo rahoñeo i avañey, le ho treako vaho ho tiahiko i fañina tsy ho modo añivon' Añahare naho ze hene raha veloñe ama'nofotse an-tane atoiy. ¹⁷ Hoe t'i Andrianañahare amy Nòake, Zay ty ho vilo' i fañina norizeko añivo' Ahy naho ze kilanofotse an-tane atoiy.

I Nòake naho o Ana-dahi'eo

¹⁸ O ana' i Nòake niakatse i lakam-poloai, le i Seme naho i Kame vaho Ièfete. Rae' i Kanàne t'i Kame. ¹⁹ I telo rey ro ana-dahi' i Nòake; le boak' am' iereo ty nanitsihañe ty tane toy.

²⁰ Niorotse niava tane t'i Nòake vaho nambole valoboke. ²¹ Ie nikama ty divai'e le nimamo vaho tsy aman-tsaroñe t'ie an-kiboho'e ao. ²² Nizoe' i Kame, rae' i Kanàne, ty fihalon-drae'e le vinola'e ty rahalahi'e roe alafe ao. ²³ Aa le rinambe' i Seme naho Ièfete ty lamba, le nasampe an-tsoro' iareo roe le nidisa-voly nanaroñe ty fihalon-drae'e; nitolike ty lahara'iareo tsy nahatrea i fihaloa'ey. ²⁴ Ie nivañoñe amy divai'ey t'i Nòake naho nahafohiñe i nanoa' i ana-tsits'o'ey, ²⁵ le hoe re,

Afàtse t'i Kanàne fa ho mpitorom-pitoroñe amo roahalahi'eo.

Hoe ka re,
²⁶ Rengèñe t'IHOVÀ, Andrianañahare' i Seme,
fa ho mpitoro'e t'i Kanàne.

²⁷ Hampientaren'Añahare t'Ièfete,
ie himoneñe an-kiboho' i Seme,
vaho ho mpitoro'e t'i Kanàne.

²⁸ Niveloeñe telon-jato tsy limampolo taoñe tafara' i fiempoempoañey t'i Nòake. ²⁹ Nañeneke sivan-jato-tsi-limampolo taoñe ty hene andro' i Nòake, vaho nihomake.

Sonia' o ana' i Noakeo

Zay ty fanoñona' o ana' i Nòakeo

10

*O Tarira' i Semeo
1 Tant 1.5-27*

¹ Naho fa aña i fiempoempoañey le nahatoly anake t'i Seme, i Kame vaho Ièfete; ² O tarira' Ièfeteo le i Gomere, i Magoge, i Madae, Iavane, i Tobale, i Meseke, vaho i Tirase. ³ O tarira' i Gomereo le i Askenaze, i Rifate, vaho i Togarmà. ⁴ O tarira' Iavaneo le i Elisà, i Tarsise, i Kitime vaho i Dodanime*. ⁵ Boak'am'iereo ty nampifañavakavaheñe o kilakila'ndatio hifanjarà' iareo o taneo; songa amam-pisaontsi'e naho hasavereña'e vaho fifehea'e.

⁶ O tarira' i Kameo: i Kose, i Mitsraime, i Pota vaho i Kanàne. ⁷ O tarira' i Koseo: i Sebà, i Havilà, i Sabtà, i Ramà, vaho i Sabtekà. O tarira' i Ramào: i Sebà naho i Dedane.

⁸ Nisamake i Nimrode t'i Kose; ie nihalahitsiay an-tane atoy, ⁹ nimpitsatsa ra'elahy añatrefa' IEHOVÀ ty amy saontsy ty hoe: Manahake i Nimrode, mpangoroñe lahitsiay añatrefa' IEHOVÀ. ¹⁰ Nifototse e Bavele ty fifehea'e, le nitakats' i Sinare naho i Ereke naho i Akade vaho i Kalnè. ¹¹ Niavotse amy taney t'i Asore naho nañoreñe i Ninevè naho i rova atao Rehobotey, i Kèlake vaho ¹² i Resene añivo' i Ninevè naho i Kèlake—rova jabajaba. ¹³ I Mitsraime† nisamake i Lody naho i Anamy, naho i Lehaby, i Naftohy, i ¹⁴ Patrosy, i Kaslohy (i niboaha' o nte-Pilistioy), vaho i Kaftore.

¹⁵ Nisamake i Tsidone tañoloñoloña'e t'i Kanàne, naho i Khete ¹⁶ naho i nte-Jebosey, i nte-Emorey, i nte-Girgasey, ¹⁷ i nte-Khivey, i nte-Arkey, i nte-Siney, ¹⁸ i nte-Arvadey, i nte-Tsemarey vaho i nte-Khamatey. Ie aña le niparaitake alafe'e aña o nte-Kanàneo. ¹⁹ Nifototse e Tsidone ty efeefe' o nte-Kanàneo mioza amy Gerare mb'e Azà, naho mb'e Sedome naho Amorà naho Adamà naho Tseboime am-para' i Lesà aña. ²⁰ Ie ro tarira' i Kame amo hasavereña'eo naho o fisaontsi'eo amo tane'eo vaho amo fifehea'eo.

²¹ Amy Seme, rae'o nte-Evre iabio naho rahalahi' Ièfete zoke'e, ro nisamahañe : ²² Inao o tarira' i Semeo: i Elame, i Asore, i Arpaksade, i Lode vaho i Arame. ²³ O tarira' i Arameo, i Oze, i Kole, i Getere, vaho i Mase. ²⁴ Nisamake i Selake t'i Arpaksade le nisamake i Evre t'i Selake. ²⁵ Nisamak' ana-dahy roe t'i Evre, i Pèlege‡ ty tahina' ty raike, ty amy fizarazaran-tane tañ'andro'e; Ioktane ty tahinan-drahalahi'e. ²⁶ Ioktane nisamake i Almodade naho i Sèlefè, i Khazaremavete, Ierake, ²⁷ i Hadorame, i Ozale, i Diklà, ²⁸ i Obale, i Abimaele, i Sebà, ²⁹ i Ofire, i Khavilà, vaho Iobabe; songa tarira' Ioktane. ³⁰ Mifototse e Mesà eo ty tane nimoneña' iareo le miranga mb'e Sefare mb'eo, i vohitse atiñanañey. ³¹ Ie ro tarira' i Seme amo hasavereña'eo naho o fisaontsi'eo, o tane'eo vaho o fifehea'eo.

³² Ie iaby ro tarira' o ana-dahi' i Nòakeo, amo fanoñona'eo, naho amo fifehea'eo; ie ro niparaitaha' ze kila'ondaty an-tane atoy, naho fa aña i fiempoempoañeo.

11

Ty Rafe-Joalajoala' i Bavele

¹ Ie henane zay, raike ty fivimby naho fisaontsi' ze kila ondaty. ² Aa ie niombotse boak' atiñanañey le nandoak' an-tane atao Sinare naho nanjo motombey vaho nañialo eo. ³ Le nifanaontsy ty hoe: Antao hamboatse birike oroañe soa. Nisolo vato ty birike' iareo vaho solintane ty fanosoha'e. ⁴ Le hoe iereo: Antao hañoren-drova naho fitilik' abo

* **10:4** Ndرا ty hoe: Dodanima † **10:13** Mitsraime: Forekekeñañe añivo rano ‡ **10:25** Fizarañe

aman-dengo mitiotiotse an-dikerañe aña vaho hanoeñe tahinañe tika, tsy mone hivarakaike an-tarehe' ty tane toy. ⁵ Nizotso mb'eo t'IEHOVÀ hivazoho i rovay naho i fitilik'abo ranjie' o ana' ondatioo. ⁶ Le hoe t'IEHOVÀ, Hehe t'ie ondaty mitokañe, songa aman-tsaontsy raike, le ingo ty fifotorandraha'e, ie henaneo tsy eo ty hahasebañe ze safirie' iereo hanoeñe. ⁷ Aa le antao hizotso mb'eo hañalikàlike ty fivimbi' iareo tsy hifankahazo saontsy ⁸ aa le nampiparatsiahe' IEHOVÀ ambone' ty tane toy iereo vaho nijihetse ty fañoreñañe i rovay. ⁹ Ie nanoeñe: Bavèle*, amy te navalitsikota' IEHOVÀ ze hene saontsi' ty tane toy vaho nampiparaitahe' IEHOVÀ ambone' ty tane bey toy iereo.

Sonia' i Seme

¹⁰ Zay ty fanoñona' i Seme.

I Seme pak'amy Avrame

Ie roe taoñe aña i fiempoempoañey, le ni-zato taoñe t'i Seme naho nisamake i Arpaksade. ¹¹ Ie nahatoly i Arpaksade t'i Seme le mbe niveloñe 500 taoñe nisamak' ana-dahy naho anak'ampela.

¹² Ie niveloñe 35 taoñe t'i Arpaksade le nisamake i Selake, ¹³ ie nahatoly i Selake le mbe niveloñe 403 taoñe nisamak' ana-dahy naho anak'ampela.[†]

¹⁴ Ie niveloñe 30 taoñe t'i Selake le nisamake i Evre, ¹⁵ ie nahatoly i Evre t'i Selake, le mbe niveloñe 403 taoñe nisamak' ana-dahy naho anak'ampela.

¹⁶ Niveloñe 34 taoñe t'i Evre vaho nisamake i Pelege, ¹⁷ ie nahatoly i Pelege t'i Evre le mbe niveloñe 430 taoñe nisamak' ana-dahy naho anak'ampela.

¹⁸ Niveloñe 30 taoñe t'i Pelege vaho nisamake i Rehò, ¹⁹ ie nahatoly i Rehò t'i Pelege le mbe niveloñe 209 taoñe nisamak' ana-dahy naho anak'ampela.

²⁰ Niveloñe 32 taoñe t'i Rehò vaho nisamake i Seroge, ²¹ ie nahatoly i Seroge t'i Rehò le niveloñe 207 taoñe nisamak' ana-dahy naho anak'ampela.

²² Niveloñe 30 taoñe t'i Seroge vaho nisamake i Nakhore, ²³ aa naho nahatoly i Nakhore t'i Seroge le niveloñe 200 taoñe nisamak' ana-dahy naho anak'ampela.

²⁴ Niveloñe 29 taoñe t'i Nakore te nisamake i Tèrake, ²⁵ aa naho nahatoly i Terake t'i Nakore le niveloñe 119 taoñe nisamak' ana-dahy naho anak'ampela.

²⁶ Ie niveloñe 70 taoñe t'i Terakhke le nisamake i Avrame, naho i Nakhore, vaho i Kharane.

Sonia' i Terake

²⁷ Zay ty famoliliañe i Terake.

i Avrame

Nisamake i Avrame naho i Nakhore naho i Kharane t'i Terahke. Le nisamake i Lote t'i Kharane. ²⁸ Ie mbe veloñe i Terakhke Rae'ey le nihomake e Ore' o nte-Kasdio t'i Kharane, an-tane nisamaha'e ao. ²⁹ Songa nañenga valy t'i Avrame naho i Nakhore. Sarae ty tahina' ty vali' i Avrame, vaho Milkae, ana' i Kharane ty tahina' ty vali' i Nakhore. Rae' i Milkae naho Iskà t'i Kharane.. ³⁰ Betsiterake t'i Sarae, tsy aman' anake.

* **11:9** Bavele: fifandrakarakañe † **11:13** Septoagenta: Oni: Lke 3.35-36; Fot 10.24

³¹ Ninday i Avrame ana'e naho i Lote ana' i Kharane, anan'ana'e, vaho i Sarae vinanto'e ampela, vali' i Avrame ana'e, t'i Terake, vaho nienga i Ore' o nte-Kasdìo hionjom-b'e Kanàne fe nivotrake e Kharane, vaho nimoneñe ao.

³² Ty andro niveloma' i Terahke le 205 taoñe. Nihomake e Kharane ao t'i Terahke.

12

Ty Fikanjiañe i Avrame

¹ Hoe t'IEHOVÀ amy Avrame, Mañaveloa mb'eo; iengao ty tane'o, boak' amo rolongo'oo naho isitaho ty anjomban-drae'o, vaho mionjona mb'an-tane hatoroko azo aña;

² le hanoeko tariratse ra'elahi,
naho ho tahieko,
le ho bangoeko ty tahina'o,
yaho ho fañanintsin-drehe.

³ Ho tahieko ze mitat'azo
naho hafako ze mamatse azo;
vaho ama'o ro hitapiañe
ze hene hasavereña' ty tane toy.

⁴ Aa le nienga ty amy nitsarà' IEHOVÀ t'i Avrame, vaho nindreza' i Lote. Nifitompolo taoñe lim'amby t'i Avrame te niakatse i Kharane.

⁵ Nente' i Avrame t'i Sarae vali'e naho ty ana-drahalahi'e Lote, naho ze vara natonto'e vaho ondaty niazo'e e Kharane iabio, le nionjoñe mb'e Kanàne mb' eo vaho nandoak' an-tane Kanàne ao.

⁶ Niranga i taney t'i Avrame am-para' te nitoetse e Sikeme amo hatae bei' i Morèo. An-tane eo henane zay ty nte-Kanàne. ⁷ Nisodeha amy Avrame t'IEHOVÀ nanao ty hoe: Hatoloko amo tarira'oo ty tane toy, le teo ty nañoreña'e kitrely am'IEHOVÀ niheo ama'ey.

⁸ Nienga re nionjomb'am-bohitse atiñana' i Betele aña le nañoren-kiboho, ahandrefa'e ty Betele, atiñana'e ty Aý. Teo ty nañoreña'e kitrely am' IEHOVÀ vaho nikanjy ty tahina' IEHOVÀ. ⁹ Le mbe nionjoñe mb'amy fañaveloa'e mb'e Nègeve* mb'eoy t'i Avrame.

I Avrame e Mitsraime aña

¹⁰ Nimosare i taney, le nizotso mb'e Mitsraime mb'eo hey t'i Avrame nitaveañe aña ty amy fanindria' i hasalikoañey. ¹¹ Ie fa himoak'e Mitsraime ao, le hoe re amy Sarae vali'e: Inao, apotako ty hasoa vinta'o te isaheñe. ¹² Aa naho mahaisak' azo o nte-Mitsraimeo le, inao: Vali'e iroa, ty ho asa'iareo, naho hañe-doza amako naho hahaen-ko velon-drehe. ¹³ Ehe, ano ty hoe rahavaveko, hanintsiñako ty ama'o hameloma'o ty fiaiko.

¹⁴ Ie niavy e Mitsraime aña t'i Avrame le nioni' o nte-Mitsraimeo ty hamozohozo' i rakembay. ¹⁵ Ie niisa' o menafoe' i Parò, le nitsiririe'iareo amy Parò, vaho nasese añañomba' i Parò ao. ¹⁶ Nirambese'e antatalatasaba ty ama'e t'i Avrame, vaho nanontoñe añondry naho añombe t'i Avrame naho borike lahi'e, naho mpitoron-dahy naho ampela, naho borike vave vaho rameva.

¹⁷ Fe nampivolevolè' IEHOVÀ añañ angorosy t'i Parò naho ze añañomba'e ao iaby ty amy Sarae, vali' i Avrame. ¹⁸ Aa le kinanji' i Parò t'i Avrame, le hoe ty asa'e: Ino o nanoa'o ahio. Manakore te tsy natao'o amako t'ie vali'o?

¹⁹ Ino ty nanoa'o ty hoe, Rahavaveko? hera ho rinambeko ho valiko? Ie amy zao, ingo i vali'oy rambeso vaho akia! ²⁰ Aa le nafanto' i Parò amo

* ^{12:9} Negev: Tane atimo

mpitoro'eo ty Avrame, naho nampionjone' iereo mb'eo rekets' i vali'ey vaho ze hene fanaña'e.

13

Mifampiria t'i Avrame naho i Lote

¹ Aa le nionjoñe boake Mitsraime ao t'i Avrame naho i vali'ey naho ze vara'e iaby, mb' atimoy aña, vaho nindre ama'e t'i Lote. ² Fa nimpañarivo an-kare naho volafoty vaho volamena t'i Avrame.

³ Ie boak' amy atimoy aña le nionjoñe sikal' amy Betele, amy namboare'e kibohotse añivo' i Betele naho i Aý am-pifotora'ey, ⁴ amy nañoreña'e kitrely valoha'ey. Teo ty nikanjia' i Avrame ty tahina' IEHOVÀ.

⁵ Nanam-pirai-stroke naho mpirai-lia naho kibohotse ka t'i Lote mpindre fañavelo ama'e. ⁶ Fe tsy nahatsapake iareo roe i taney, hitraofa' iareo, fa loho bey ty vara' iareo kanao tsy nahafiharo toboke. ⁷ Nifampibozizy amy zao o mpiara-lia-rai' i Avrimeo naho o mpiara' i Loteo. Nimoneñe amy taney henane zay o nte-Kanàneo naho o nte-Perizeo.

⁸ Aa le hoe t'i Avrame amy Lote, Ee te tsy hifañolañe tika naho o mpiara'oo naho o ahikoo, amy te mpirahalahy tika. ⁹ Aa vaho tsy hene miatrek' azo o taneo? Misitaha amako arè, aa ihe homb' am-pitàn-kavia mb'eo, le ho mb'an-kavana raho; ke ihe mb' am-pitàn-kavana, le zaho mb' an-kavia. ¹⁰ Nampiandra-pihaino t'i Lote, nahatalake te soa fitondrake iaby ty vavatane' Iordaney eñe manahake ty golobo' IEHOVÀ, hambañe an-tane Mitsraime amy figodañañe mb'e Tsoare* mb'eoy, (taolo' ty nandrotsaha' IEHOVÀ i Sedome† naho i Amorà‡). ¹¹ Jinobo' i Lote i vavatane' Iordaney iabiy naho nañavelo mb'atiñanañe mb'eo t'i Lote, ie nifampiria.

¹² Nimoneñe an-tane Kanàney t'i Avrame vaho nimoneñe amo rova' i vavataneio t'i Lote vaho nañoren-kiboho mb'e Sedome aña. ¹³ Ni-lo tsereke o nte-Sedomeo, vata'e bei-hakeo am' IEHOVÀ.

¹⁴ Hoe t'IEHOVÀ amy Avrame, naho fa nisitaha' i Lote. Ampiandrao fihaino henaneo vaho mitalakesa boak' amo iambesara'oo mañavaratse naho mañatimo naho maniñana vaho mañandrefa; ¹⁵ amy te hatoloko azo naho amo tarira'o kitro-añ' afe'eo ze hene tane isa'o. ¹⁶ Hampiraeko ami'ty lembo' ty tane toy o tarira'oo; aa naho mahaiake ty debo' ty tane toy t'indaty le mete hiaheñe ka o tarira'oo. ¹⁷ Miongaha arè le rangao ty andàva' o taneo naho ty am-pohe'e, fa hene hatoloko azo. ¹⁸ Aa le nasi' i Avrame ty kijà'e le nimb'eo naho nitobe amo hatae jabajaba' i Mamrè e Khebroneo vaho nañoreña kitrely am' IEHOVÀ.

14

¹ Tañ'andro'i Amrafele*, mpanjaka' i Sinare†, naho i Arioke‡ mpanjaka' i Elasare§, naho i Kedorelaomere* mpanjaka' i Elame†, vaho i Tidale‡ mpanjaka' o Goio§; ² t'ie nifañotake amy Bera* mpanjaka' i Se-dome iereo naho amy Birsà† mpanjaka' i Amorà‡ naho amy Sinabe§ mpanjaka' i Admà* naho amy Sem'everet† mpanjaka' o nte-Tsebio‡ vaho amy mpanjaka'

* **13:10** Tsoare: kedekedeke, bory † **13:10** Sedome: ty tsy ambara-telo' iareo ‡ **13:10** Amorà: mpiola * **14:1** Amrafele: mpitangogo † **14:1** Sinare: fijilo' ty mirotse ‡ **14:1** Arioke: mijaoala § **14:1** Elasare: miola aman'Añahare * **14:1** Kedorelaomere: ty habontili' ty fibora'e † **14:1** Elame: ajalahy, somondrara, mietake ‡ **14:1** Tidale: i mampipekañe ty joka § **14:1** Goyim: Goy: kilakila'onday (im: maro) * **14:2** Bera: vovoñe; mitsey, mitaroñe † **14:2** Birsà; ty raty; anake mañente ‡ **14:2** Amorà: ondaty miola § **14:2** Sinabe: ty engen-drae * **14:2** Admà: (Adame): mena, , hoe lio † **14:2** Semebere: tahina' i maozatsey ‡ **14:2** Tsiby: ose

i Bela§ (toe Tsoare). ³ Fonga nifanontoñe am-bavatane' i Sidime (i Oñ-Siray) ao i mpanjaka rey.

⁴ Ie fa nitoroñe i Kedorelaomere folo taoñe ro'amby, le niola amy taom-paha-folo-telo ambiy. ⁵ Ie tan-taom-paha folo-efats' ambi' i Kedorelaomere, ie reketse i mpanjaka mitraok' ama'e rey ro namotsake o nte-Rafao e Asterote-karnaime ao naho o nte-Zòzeo e Hame ao, naho o nte-Emeo e Save-kiriataime ao ⁶ naho o nte-Khoreo am-bohibohi' i Seire pak' Eilparane añ' olo' i fatrambeiy ao, ⁷ vaho nibalike nandoake e Ein-mispàte, (i Kadese zay) le fonga linafa' iareo ty tane' o nte-Amalekeo naho ty a o nte-Emore nimoneñe e Khatsatsone-tamareo.

⁸ Nionjoñe mb'eo amy zao ty mpanjaka' i Sedome, naho ty mpanjaka' i Amorà, naho ty mpanjaka' i Admà, naho ty mpanjaka' i Tseboime, naho ty mpanjaka' i Belà (toe i Tsoare), nilahatse hihotakotake am-bavatane' i Sidime ao ⁹ amy Kedoreaomere mpanjaka' i Elame naho Amy Tidale mpanjaka' o Goio naho amy Amrafele mpanjaka' i Sinare vaho amy Ariokhe mpanjaka' i Elsara, ty mpanjaka efatse miatreke lime. ¹⁰ Ie amy zao nitsitsike kadahan-tslike mainte ty vava-tane' i Sidime; aa naho nitrimban-day ty mpanjaka' i Sedome naho i Amorà le nikorovok' ao vaho nivongaritse mb'am-bohibohitse mb'eo o nisisao. ¹¹ Aa le fonga finao' o naha-reketseo ze vara' i Sedome naho i Amorà naho ty mahakama' iareo vaho nienga; ¹² aa ie niavotse le tinava' iareo ka t'i Lote, ana-drahalahi' i Avrame, nimoneñe e Sedome ao, naho o vara'eo.

¹³ Teo ty niponiotse mb' amy Avrame nte-Evre mb'eo nitalily; ie nimoneñe amo hatae ra'elahi' i Mamrè nte-Amore, rahalahi' i Eskole naho rahalahi' i Anereo. Ie songa mpirimboñe amy Avrame. ¹⁴ Aa naho jinanji' i Avrame te tsinepake i rahalahi'ey le kinoi'e o ajalahi'e 318 voa-oke, sinamake aña'akiba'eo vaho hinorida'e pake Dane aña. ¹⁵ Zinara' i Avrame amy haleñey ondati'eo le zinevo'e vaho hinorida'e pak'e Khobà an-kavia' i Damesèk' aña, ¹⁶ naho nahere'e iaby i varay le nendese'e moly t'i Lote longo'e naho o vara'eo, naho o rakembao vaho ondatio.

Tinata' i Melkitsedeke t'i Avrame (Heb. 7.1-2)

¹⁷ Ie nimpoly amy fanjamana'e i Kedoreaomere naho o mpanjaka mpiama'eo t'i Avrame, le niakatse hifanalaka ama'e am-bavatane' i Save, toe Vavatanem-Panjaka, ty mpanjaka' i Sedome.

¹⁸ Le nañakatse mofo naho divay t'i Melkitsedeke, mpanjaka' i Salème, Mpisoron' Añahare Andindimoneñey, ¹⁹ le nitat' aze ami'ty hoe:
Ho tahien' Añahare Abo-Tia,
Andrianamboatse o likerañeo
naho ty tane toy t'i Avrame. ²⁰ Andriañene t'i Andrianañahare
Mitiotiotse
nanjots o rafelahi'oo am-pità'oy.

Le natolo' i Avrame aze ty fahafolo' ze he'e.

²¹ Nanao ty hoe amy zao ty mpanjaka' i Sedome, Atoloro ahiko ondatio, le tano ho azo o varao. ²² Fa hoe t'i Avrame amy mpanjaka' i Sedomey, fa nonjoneko am-panta am' IEHOVÀ, Andrianañahare Andindimoneñey ty sirako, ²³ t'ie tsy handrambe ndra fole ndra talin-kana ndra inoñ' inoñ' amo azoo, tsy mone hanoa'o ty hoe: Zaho ty naha-mpañarivo i Avrame, ²⁴ naho tsy ze nikama' o lahilahikoo naho ty anjara' ondaty nindre lia amakoo—i

Anere, naho i Eskole, naho i Mamrè; apoho sindre hangalake ty anjara'e irezay.

15

Ty Fañina amo Nisalalàheñe

Heb. 11.8-10

¹ Modo izay le nañento an' aroñaroñe amy Avrame ty tsara' IEHOVÀ: Ko hemban-drehe, Avrame. Zaho ro fikalan-defo'o naho tambe'o ra'elisy.

² Le hoe t'i Avrame, Ry Talè IEHOVÀ, ino ty ho mea'o ahiko kanao betsiterake, vaho i Elièzere nte-Damaskose ro mpamandroñe ty akibako.

³ Le tinovo' i Avrame ty hoe: Tsy nimea'o tiry raho; aa le mpandovako i nitoly an-kibohokoy.

⁴ Le hoe ty tsara' IEHOVÀ ama'e: Tsy ie ty ho mpandova'o, fa ty hiboake am-bania'o ao ty ho mpandova'o. ⁵ Nendese'e alafe ao le nanoa'e ty hoe: Miandrindrà mb' andikerañi eñe vaho iaho o vasiañeo naho lefe'o iaheñe. Le hoe re tama'e, Mira amy zay ty ho tarira'o.

⁶ Niantofa'e t'IEHOVÀ, le vinolili'e ho havantañañe ama'e.

⁷ Hoe ka Re tama'e: Zaho IEHOVÀ ty nañakatse azo amy Ora' o nte-Kasdò hanolorako azo ty tane toa handrambesa'o aze. ⁸ Fa hoe t'i Avrame, Ry Talè IEHOVÀ, aia ty haharendrehako ty hatò t'ie ho fanañako?

⁹ Aa le hoe re tama'e: Añendeso ty kiloa telo-ay, naho ty ose-vave telo-taoñe, vaho ty añondrilahy telo-taoñe, naho ty deho vaho ty ana-boromahilala. ¹⁰ Aa le nandesa' i Avrame naho nisalàhe'e vaho nalaha'e hifañatreke i tampa'e rey fe tsy nisalahe'e o voroñeo. ¹¹ Ie nivotrak' amy henay o koàkeo le sinoi' i Avrame aña.

¹² Nitsofotse i àndroy, le nilampon-drotse t'i Avrame, vaho ingo nandrongoñe aze ty hamoromoroñañe nampangebahebake. ¹³ Le hoe Re amy Avrame, Mahafohina an-katò te ho ambahiny an-tane tsy a' iareo o tarira'oo naho hitoroñe iareo vaho hampisotrieñe efa-jato taoñe. ¹⁴ Le ho zakàko i tane mañondevo iareoy vaho hinday vara tsifotofoto t'ie hiakatse boak' ao. ¹⁵ Fa homb' aman-droae'o mb'eo am-pierañeràñandrehe vaho haleveñe ami'ty taoñe soa haantetse. ¹⁶ Hitampoly atoy iereo ami'ty tariratse fah' efatse, amy te mbe tsy heneke ty hakeo' o nte-Emoreo.

¹⁷ Ie nimotake i àndroy vaho nimañeñe, le niheo mb'eo ty valàñe nahatoeñe naho ty foroha nibela niranga añaivo o linili'eo. ¹⁸ Amy andro zay ty nanoa' IEHOVÀ fañina amy Avrame ami'ty hoe, Atoloko amo tarira'oo ty tane hirik'amy saka' i Mitsraime pak' amy oñe jabajabay, i oñe Eofratay; ¹⁹ naho o nte-Keneo, o nte-Kenizeo, o nte-Kadmoneo, ²⁰ o nte-Kheteo, o nte-Perizeo, o nte-Rafào, ²¹ o nte-Emoreo, o nte-Kanàneo, o nte-Grigaseo, vaho o nte-Ieboseo.

16

I Khagare naho Iesmaèle

¹ Ie amy zao, mbe tsy nahatoly anake ho aze t'i Sarae, vali' i Avrame, f'ie aman' ondevo nte-Mitsraime atao Khagare, ² aa le hoe t'i Sarae amy Avrame, Heheke henaneo te kinala' IEHOVÀ raho tsy hiterake. Ehe, mimoaha amy fetrek' orokoy, kera hasavereña'e.

Niantofa' i Avrame ty enta' i Sarae. ³ Aa naho fa nimoneñe e Kanàne folo taoñe t'i Avrame, le nala' i Sarae vali'e t'i Khagare mpitoro'e vaho natolo'e amy vali'ey hialoza'e. ⁴ Le nimoaha'e t'i Khagare, vaho niareñe.

Aa ie nifohi'e te nivesatse le nisirikae' o maso'eo i temp'o'ey. ⁵ Le hoe t'i Sarae amy Avrame, Ama'o ty fisotriako. Napoko am-pitâ'o i mpitorokoy, aa kanao apota'e te mivesatse, le sirikaeñe a-maso'eo raho. Ee te hizaka añivon-tika t'IEHOVÀ.

⁶ An-taña'o i mpitoro'oy, hoe t'i Avrame. Ano ama'e ze no' ty tro'o. Aa le nampisoañe' i Sarae t'i Khagare vaho nibotatsake amy fiatrefa'ey re.

⁷ Tendrek'amy Khagare t'i anjeli' IEHOVÀ marine ty rano migoangoañe an-dratraratra aña, ty figoangoan-drano an-dalaña mb'e Sore mb'eo. ⁸ Le hoe re, O Khagare, mpitoro' i Sarae, boak' aia v'iheo vaho homb'aia? Hoe re, Milay an-dahara' i tompoko Saraey raho. ⁹ Aa hoe ty anjeli' IEHOVÀ ama'e, Mimpolia mb'amy temp'o'oy vaho miambanea am-pitâ'eo. ¹⁰ Hoe ka ty anjeli' IEHOVÀ ama'e, Toe hampitomboako o tarira'oo kanao tsy ho hay iaheñe ami'ty fangitsikitsiha'e. ¹¹ Le hoe ty anjeli' IEHOVÀ ama'e, Fa miareñe rehe vaho hisamak' anadahy; hatao'o Iesmaèle ty añara'e, amy te nihaoñe' IEHOVÀ ty fisotria'o.

¹² Ho borike hako indatiy hañonjoñe sirañe amy ze hene ondaty, le ondaty iabio ty hañonjon-tsirañe ama'e; vaho himoneñe añatrefa' o longo'e iabio re.

¹³ Aa le kinanji'e ty hoe Elroy* t'IEHOVÀ nitsara ama'ey: fa hoe re, Ihe ro Andrianañahare mahavazoho ahy, le hoe re: Aa vaho toe nitreako hao i Mahavazoho ahy? ¹⁴ Le natao ty hoe Bire-lakhai-roy† i vovoñe añivo' i Kadese naho i Beredey.

¹⁵ Nisamak' ana-dahy ho a i Avrame t'i Khagare vaho nimea' i Avrame añarañe ty hoe Iesmaèle i ana-dahi'e nasama' i Kagarey. ¹⁶ Valompolo taoñe eneñ' amby t'i Avrame te nisamake Iesmaèle t'i Khagare.

17

Ty Vilo' i Fañinay

Avo. 12.43 - 13.2

¹ Naho ni-sivampolo taoñe sive' amby t'i Avrame le niboak' amy Avrame t'IEHOVÀ nanao ama'e ty hoe, Zaho i El-Saday*; mañaveloa añatrefako an-kalio-tahiñe, ² le hifanao fañina, ihe naho Zaho, hampa-hatsifofoto azo. ³ Nibabok' an-dahara'e t'i Avrame; naho nifanaontsy ama'e t'i Andrianañahare, ⁴ Naho zaho, inao, ty ifañinako ama'o: Ho rae' ty foko maro rehe. ⁵ Le tsy hatao Avrame† ka ty añara'o, fa Avrahame‡ ty ho tahina'o amy te hanoeko raem-poko tsiefa. ⁶ Hampibodobodoeko naho hanoeko rofoko maro, vaho mpanjaka maro ty hiboak' ama'o. ⁷ Le hajadoko añivoko naho ihe naho ze hene tiry manonjohy azo, tariratse an-tariratse, ty fañinako, ho fañina nainai'e, le ho Andrianañahare'o naho amo tarira'o manonjohy azoo. ⁸ Le hatoloko azo naho o tariratse manonjohio ty tane ambahinie'o henaneo, naho ty tane Kanàne iaby ho fanaña'o nainai'e vaho ho Andrianañahare' iareo raho.

⁹ Hoe t'i Andrianañahare amy Avrahame, Aa le hitañe ty fañinako rehe, ihe naho o tarira'oo naho ze hene hanonjohio. ¹⁰ Intoy ty fañinako ho vontitire'areo añivoko naho ihe vaho o tariratse hanonjohy azoo te songa ho savareñe ze lahilahy ama'areo. ¹¹ Ho tampahe' areo ty ofo'areo; zay

* **16:13** El-roy: Andrianañahare mahavazoho † **16:14** Bire-lahai-roy: ty vovo' i Veloñe Mahavazoho ahikoy * **17:1** El Saday : Andriampañotroñe, Tsitongereñe, kila lefe ‡ **17:5** Rae onjoneñe ‡ **17:5** Raem-poko maro

ty ho vilo' i fañina añivo anahareo naho zahoy. ¹² Ho savareñe ami'ty andro fahavaloo' ze lahilahy amo tarira'o iabio, ty nisamak' añ' anjomba' areo ao, naho ty vinily drala amo ambahiny tsy tiri'oo. ¹³ Tsy mete tsy songa savareñe ze nitoly añ' anjomba'o ao ndra vinilin-drala'o; fa ho vilom-pañinako nainai'e ami'ty nofo' areo. ¹⁴ Ze lahilahy tsy afa-boy, tsy tinampak'ofoke, le haitoañe amo longo'eo indatiy, amy te nivalik' amy fañinakoy.

¹⁵ Hoe t'i Andrianañahare amy Avrahame, Aa naho i Sarae vali'o, tsy hatao'o Sarae ka ty añara'e fa Sarà[§] ty ho tahina'e. ¹⁶ Hampanintsîeko re naho ho meako anadahy ama'e rehe. Toe ho tahieko, le hahatoly foko maro re, vaho mpanjakam-poko maro ro hiboak' ama'e. ¹⁷ Nibabok' andahara'e amy zao t'i Avrahame naho niankahake, nanao ty hoe an-tro'e ao, Hisamak' anake hao ty fa zato taoñe? Hahatoly anake hao t'i Sarà, ie sivampolo taoñe? ¹⁸ Le hoe t'i Avrahame amy Andrianañahare, Ee te ho veloñe añatrefa'o t'Iesmaèle.

¹⁹ Hoe t'i Andrianañahare, Aiy! toe hisamak' anake ho azo t'i Sarà vali'o naho hatao'o Ietsâke* ty añara'e, vaho horizako ama'e i fañinakoy ho fañina nainai'e tsy modo ho aze naho o tarira'e hanonjohy azeo. ²⁰ Le ty am' Iesmaèle, fa tsinanoko rehe; ho tahieko naho hampiraoraoeko ho tsifotofoto o tarira'eo; hisamak' ana-donake folo ro' amby re vaho hanoeko foko ra'elisy. ²¹ Fe Ietsâke ty hañorizako i fañinakoy, ie ho samahe' i Sarà ami'ty andro nifantañeñe toy ami'ty taoñe manonjohy. ²² Ie nagado'e i nitsara'ey, le nienga i Avrahame t'i Andrianañahare.

²³ Aa le rinambe' i Avrahame ty anadahi'e Iesmaèle rekets' o naterak' añ'anjomba'eo naho o vinili'e an-drala'eo naho ze lahilahy añ' anjomba' i Avrahame ao vaho tinampa'e amy andro nitsaraen' Añaharey ty ofo'iareo.

²⁴ Ni-sivampolo sive-amby taoñe t'i Avrahame te sinavatse ty nofo' i ofo'ey.

²⁵ Ni-folo telo-amby taoñe ka t'Iesmaèle te tinampake ty nofo' i ofo'ey.

²⁶ Sambe sinavatse amy àndroy avao t'i Avrahame naho Iesmaèle ana'e,

²⁷ songa nindre sinavatse ama'e ze lahilahy añ' anjomba'e naho ze nitoly añ' anjomba'e ao vaho ze vinili-drala ami'ty ambahiny.

Nampitaman' ana-dahy t'i Avrahame naho i Sarà

18

¹ Niheo ama'e marine o hatae jabajaba' i Mamrèo t'IEHOVÀ, ie niambesatse an-dalambein-kiboho'e eo an-kavotrohañ' andro. ² Nampiandra fihaino re nahaoniñe ondaty telo nijohañe ey. Ie niisa'e, le nihitrike boak' an-dala' i kiboho'ey nifanalaka am'iereo vaho niondrek'an-tane,

³ le nanao ty hoe: Naho nanjo fañisohañe am-pihaino'o raho henaneo ry Talè, ko rioñe'o ty mpitoro'o. ⁴ Angao haneseañe rano kedekede hanasà'areo fandia, ie mitofà ambane' o hatae eio, ⁵ le hanjotsoako mahakama minjilate'e hampanintsîñe ty arofo'o, heneke zay t'ie hañavelo, fa zay ty niaria' areo mb'ami'ty mpitoro'o toy. Le hoe iereo, Ano i sinaontsi'oy. ⁶ Aa le nihitrike mb'amy Sarà an-kiboho'e ao: Masikà hoe re, halankaño mona telo fañaranañe*: kobao le anoñafo mofo.

⁷ Nilay mb'an-troke raike mb'eo amy zao t'i Avrahame nijoboñe dronga maleme hena vaho natolo'e ami'ty ajalahy hañalankaña'e masika.

⁸ Nendese'e amy zao ty venten-kabobo naho ronono naho i dronga

§ ^{17:15} Sarà: Rakemba iasiañe * ^{17:19} Toe Iets'hake: miankahake re * ^{18:6} Mete ho 22 litatse zay

nihalankañeñey, vaho nazotso'e am' iereo, le nijohañe marine' iereo añ' alo' i hatae'ey t'ie nikama.

⁹ Hoe iereo tama'e. Aia ty vali'o Sarà? Le hoe re, Indroañe amo kibohotseo. ¹⁰ Le hoe re, Toe hibalihako, homb' etoan-draho ami'ty sa-mañeva vaho Inao! hisamake ana-dahy t'i Sarà tañanjomba'o. Nahajanjiñe zay t'i Sarà an-dala' i kibohotsey, toe amboho'e ao. ¹¹ Nibey t'i Avrahame naho i Sarà henane zay, nigain-kantetse vaho tsy ni-ampela ka t'i Sarà. ¹² Aa le nisomobohe' i Sarà añ'arofo ao ty hoe: Zaho fa bey hao ro mbe hinembanembañe, naho fa bey ka i talékoy? ¹³ Le hoe t'IEHOVÀ amy Avrahame, Inoñe ty nampitohake i Sarà t'ie nanao ty hoe, Toe hahatoly anake hao, zaho fa bey? ¹⁴ Eo hao ty tsy lefe' IEHOVÀ? Hibalike mb'ama'o raho amy andro nifantañañey, an-tsa mañeva vaho hitendreke ana-dahy amy Sarà. ¹⁵ Niliere' i Sarà ami'ty hoe, Zaho tsy nihehe! ie nihembañe. Aiy, hoe re, toe nitohàke.

Nañalañaña ho a i Sodome

¹⁶ Nienga amy zao indaty rey, nitalake ty tarehe' i Sedome; le nindreza' i Avrahame hasese'e mb'eo. ¹⁷ Aa hoe t'IEHOVÀ, Haètako amy Avrahame hao ty hanoeko, ¹⁸ fa toe ho foko ra'elahy naho maozatse t'i Avrahame, vaho ie ty hahasoa-tata ze kila foko' ty tane toy? ¹⁹ Apotako te hitoroa'e o ana'eo naho i hasavereña'e hanonjohy azey ty hifahatse amo sata' IEHOVÀO hañorike ty hiti'e naho ty hatò; vaho ho henefe' IEHOVÀ i nitsarae'e amy Avrahamey. ²⁰ Le hoe t'IEHOVÀ, Mireoreo ty fitoreova' i Sedome naho i Amorà, vaho loho mampioje o hakeo'eo! ²¹ Tsy mete tsy hizotsoako handrendreke hera toe nanoeñe o hene toreo nahatakatse ahikoo; fa naho tsie le ho fantako.

²² Aa le nitolike mb'eo indaty rey nimb'e Sedome aña, fe mbe nijohañe añatrefa' IEHOVÀ eo t'i Avrahame. ²³ Niharinea' i Avrahame le nanoa'e ty hoe, Haitoa'o mindre amo tsereheñeо hao ty vantañe? ²⁴ He amy rovay ty limam-polo mahity, haitoa'o hao vaho tsy hapo'o i toetsey ty amy vantañe limampolo ama'e rey? ²⁵ Lavits' azo ty hanao zay, ty hampitraofe'o fanjamanañe amo lo tserekeo o vañoñeо, hampamirañañe amo ratio ty toli' o mahitio! Tsy marine azo zay! Tsy hanao ty hatò hao ty Mpizaka' ty tane bey toy? ²⁶ Le hoe t'IEHOVÀ, Naho hanjo ondaty mahity limampolo amy rovay, le hene hiheveako ty am'iereo i rovay. ²⁷ Tinoi' i Avrahame ty hoe: Ie zao, fa rinambeko ty hitaroñe entam-bolañe amy Talè, zaho debole naho lavenoke. ²⁸ Hera ho po-lime i limampolo vantañe rey, ho fonga rotsahe'o hao i rovay ty amy limey? Le hoe Re, Naho manjo efapololim' amby ao le tsy ho rotsaheko. ²⁹ Nindrae'e ty hoe, Ke te ho efapololty zoeñe ao? Tinoi'e ty hoe: Ty amy efapoloy tsy hanoeko. ³⁰ Le hoe re, Ee te tsy ho viñera' i Talè t'ie mivolañe. Hera telo-polo ty ho zoeñe ao? Tinoi'e ty hoe, Tsy hanoeko ka te tendrek' ahy ty telopolo. ³¹ Hoe re, Kanao rinambeko ty hinday entañe amy Talè; atao t'ie roapolo ty ho oniñe ao? Tinoi'e ty hoe, Ty amy roapolo rezay, tsy harotsako. ³² Le hoe re. Ee any te tsy ho viñetse amako t'i Talè ami'ty entako honka'e toy; atao t'ie folo ty ho zoeñe ao. Tinoi'e ty hoe, Tsy ho rotsaheko ty amy folo rey. ³³ Ie niheneke i tsara'e amy Avrahamey, le nienga t'IEHOVÀ; vaho nimpoly mb'an-toe'e mb'eo t'i Avrahame.

¹ Nandoake e Sedome amy harivay ianjely roe rey, naho niambesatse an-dalam-bei' i Sedome ey t'i Lote. Niisa' i Lote, le niongake hifanalaka am'iereo vaho naboko'e an-tane ty lahara'e. ² Hoe re: Eo hey, ry roandriañeo, Ehe, mivevea mb' an-traño' o mpitoroo'oo mb'eo hialeñe ao naho hanasa fandia; le mañaleñaleña hanonjohy ty lia' areo. Hoe iereo, Aiy, apoho hialeñe an-kiririsa atoy. ³ Fe nimanea'e fiboliboly le nitolike iareo nimoak' añ'anjomba'e ao; le nañalankaña'e sabadidake naho nitono mofo po-dalivay vaho nikama iereo. ⁴ Aa ie mbe tsy nàndre, inao o lahilahi' i rovaio, ondati' i Sedomeo, ty ajalahy naho ty bey, ze kila lahilahy pak'am-pifaritsoha'e ro niarikoboñe amy anjombay, ⁵ nikaike ty hoe amy Lote, Aia i lahilahy niheo mb'ama'o hariva zao rey? Akaro ama'ay haharendreha'ay. ⁶ Niakatse an-tsarirañe t'i Lote le narindri'e amboho'ey i lalañe ⁷ vaho nanao ty hoe, O ry rahalahikoo, ko anoe' areo o halò-tsereke zao. ⁸ Ingo hey, aman' anak' ampela roe mbe tsy mahavany lahy raho; ehe angao hakareko mb'ama'areo atoy vaho ano am'iereo ze atao soa am-pihaino' areo; fa ko anoa' areo ndra inoñ' inoñe amy lahilahy rey kanao mipalitse ambane tafo-trañoko ao. ⁹ Fa hoe ka iereo, Misitaha! le tinovo' iareo ty hoe, Niambahiny atoy itia te niavy, aa vaho mipay ho mpizaka! Aa le ihe ty ho silofe'ay hisolo iareo. Le zineha' iereo mafe t'i Lote vaho didy tsy nampipoñake i lalambeiy. ¹⁰ Aa le nahiti' i lahilahy rey o fità'eo le tinari'areo hizilike mb'am'iereo añ'anjomba ao t'i Lote, naho narindri' iereo i lalañey, ¹¹ vaho zinevo' iareo an-kagoañe o lahilahy an-dala' i anjombaio, ty kede naho ty bey, vaho nimokots' avao iereo nipay i lalañey.

Ty Firotsa' i Sedome naho i Amorà

Mat 11.23-24; Lk 17.28-32

¹² Le hoe i lahilahy rey amy Lote, Ia ka ty ama'o atoañe? He vinanto'o ke ana-dahi'o, ke anak' ampela'o, ndra iaia ama'o an-drova atoa—akaro boak' an-toetse atoy ¹³ fa harotsa'ay ty rova toy, amy te nionjoñ' añatrefa' IEHOVÀ ty fikointsa' ondati'eo, vaho nirahe' IEHOVÀ zahay handrotsak' aze. ¹⁴ Aa le niavotse t'i Lote nanao ty hoe amo vinanto nañenga o anak' ampela'eoo, Miongaha le iakaro ty toetse toy, fa ho rotsahe' IEHOVÀ ty rova toy. Fe natao' o vinanto'eo t'ie nisole.

¹⁵ Ie nanjirike ty maraindray, nanaeñe i Lote i anjely rey ami'ty hoe: Mitroara, taono t'i vali'o naho o anak' ampela'o roe toañe, tsy mone ho mongoreñe ami'ty halo-tsere' ty rova toy. ¹⁶ F'ie nihenekenek' avao, le rinambe' o lahilahio ty fita'e naho ty fita' i vali'ey vaho ty taña' i anak' ampela'e roe rey, ie niferenaiña' IEHOVÀ, le nendese' iereo vaho napok' alafe' i rovay. ¹⁷ Ie fa nasese alafe ao le hoe re, Mirombaha fiay, le ko mitoliboho vaho ko tambatse am-bavatane atoa; miherereaha mb'am-bohitse mb'eo tsy mone ho faopaoheñe. ¹⁸ Le hoe t'i Lote am' iereo: Ehe! tsie, ry talèko; ¹⁹ ingo te nisohe'o ty mpitoro'o, naho nonjone'o ty fitretreza'o ahy amy te rinomba'o ty haveloko; f'ie tsy hahafilay mb' am-bohitse mb'eo, tsy mone hizo hankàñe vaho hikenkañe. ²⁰ Hehe ty marine naho mete rifiteñe o rova ey hoek' eo, fa kede 'nio. Angao hihitrifako, tsy raha kede hao, soa te ho veloñe ty fiaiko? ²¹ Aa le hoe re tama'e, Ingo, fa nandraeko ty lahara'o amo raha zao, fa tsy ho rotsaheñe i rovay ty amy saontsi'oy. ²² Masikà, itribaho an-day, fa tsy hahapi-draha raho ampara' t'ie mandoak' ey. Aa le natao ty hoe Tsoare i rovay. ²³ Fa nanjirik' an-tane atoy i androy te niavy e Tsoare ao t'i Lote.

²⁴ Heneke zay, le nañiliña' IEHOVÀ solifara naho afo boak' am' IEHOVÀ andikerañe ao ty Sedome naho i Amorà, ²⁵ vaho narotsa'e i rova rey, naho

i vava-tane iabiy naho ze mpimoneñe amy rova rey vaho ze nitiry amy taney. ²⁶ Fe nitoli-boho ty vali'e, vaho ninjare vongan-tsira.

²⁷ Nañaleñale mb'amy toetse nijohaña'e añatrefa' IEHOVÀY mb'eo t'i Avrahame ²⁸ vaho nitalake mañambane eñe mb'amy Sedome naho i Amorà naho i vavatane iabiy le nahaoniñe ty hatoe' i taney nionjoñe manahake ty fifororoaha' ty hatoem-pitranahañe.

²⁹ Aa ie narotsan' Añahare o rova amy vavataneio, le nitiahin' Añahare t'i Avrahame vaho nirahe'e hiakatse boak' añivo' i fandrotsahañey t'i Lote, ie finongo'e o rova nimoneña' i Loteo.

Ty Fiavi' i Mòabe naho i Amona

³⁰ Ie amy zao, niavotse boak'e Tsoare t'i Lote vaho nitobe ambohitse ey, ie naho i anak' ampela'e roe ama'e rey, amy te nanembañe aze ty himoneñe e Tsoare; aa le nimoneñe am-po lakato ao, ie naho i anak' ampela'e roe rey. ³¹ Le hoe ty tañoloñoloña'e aman-jai'e, Fa bey 'nio ty raentika, vaho tsy eo t'indaty an-tane atoy ty himoak' aman-tika an-tsata' ty tane bey toy. ³² Aa le antao hampikamaen-tika divay ty raentika vaho hiolots' ama'e, hañajàn-tika tariratse ty raentika. ³³ Nampikamae' iereo divay ty rae'e amy haleñey; le nimoak' aman-drae'e ao ty tañoloñoloña'e nifandia-tihy ama'e, f'ie tsy nahaftohiñe ty nandrea'e ndra ty nitroara'e. ³⁴ Ie niloak'andro, le hoe i tañoloñoloña'ey aman-jai'e, Niilotse amandraeko raho; antao hampikamaentika divay indraike te hariva; le ihe ka ro hizilik' ao hifandia'o tihy, hañajañe tariratse ho aman-draen-tika. ³⁵ Aa le nampikamae' iereo divay indraike ty rae' iareo amy haleñey; le niongake ty zai'e naho niolora'e; fe namoea'e ty fandrea'e naho ty fitroara'e. ³⁶ Aa le sindre nampiareñe' i Lote rae'e i anak'ampela'e roe rey. ³⁷ Nisamake ana-dahy i tañoloñoloña'ey le natao Mòabe ty añara'e; Ie ty rae' o nte-Mòabeo pa-kenaneo. ³⁸ Nahatoly ana-dahy ka ty zai'e vaho natao'e Benamý ty añara'e; ie ty rae' o anak'Amoneo pak'androany.

20

Avrahame naho i Sarà e Gerare

¹ Nañavelo boak'ao t'i Avrahame mb'an-tane atao Nègeve, le nitobe añivo' i Kadèse naho i Sore vaho nañialo e Gerare ao, ² vaho hoe t'i Avrahame ty amy Sarà vali'e, Rahavaveko re. Aa le nampañitrike t'i Abimeleke mpanjaka' i Gerare vaho rinambe'e t'i Sarà. ³ Le niheo amy Abimelek' ama'nofy te haleñe t'i Andrianañahare nanao ty hoe ama'e. Inao! ondaty vetrake rehe, ty amy rakemba nalae'oy, amy te vali' ondaty. ⁴ Ie amy zao tsy nañarine aze t'i Abimeleke; le hoe re, Ry Talè, ho vetrahe'o ka hao ty fifeheañe vantañe? ⁵ Tsy ie hao ty nanao amako ty hoe, Rahavaveko re, vaho ie ka ty hoe Rahalahiko. Nanoeko an-katsòn-troke naho an-kahitin-tañako. ⁶ Aa le hoe t'i Andrianañahare ama'e ama'nofy, Eka, apotako te nanoe'o an-kavantañan' arofo; mbore kinalako rehe tsy handilara'o, le tsy nimeteko t'ie hitsapa aze. ⁷ Ie amy zao, ampolio am'indatiy ty vali'e; mpitoky re, le hihalalia'e t'ie ho veloñe. Fe naho tsy hampoli'o, le mahafohina te toe havetrake, ihe naho o ao iabio.

⁸ Aa le nañaleñale t'i Abimeleke nikanjy ze hene mpitoro'e naho nitalilie'e an-dravembia' iereo; vaho fonga nangebahebake o lahilahio.

⁹ Kinanji' i Abimeleke t'i Avrahame le nanoa'e ty hoe, Inon-koahé ty nanoa'o ama'ay? Ino ty hakeoko ama'o te nendesa'o amako naho amo fehekoo ty tahiñe jabajaba toy? Toe tsy fanao o raha nanoa' o ahikoo.

¹⁰ Hoe ka t'i Abimelek' amy Avrahame, Ino ty nisafiri'o t'ie nanao o raha zao? ¹¹ Hoe t'i Avrahame, Foto'e, nataoko tsy ho ami'ty toetse toy ty fañeveñañe aman' Añahare vaho ho nañe-doza amako iereo ty amy valikoy.

¹² Mbore toe rahavaveko re, anak' ampelan-draeko fa tsy anan-dreneko, vaho nivalieko. ¹³ Aa ie nampandifik' ahy añ' anjomban-draeko t'i Andrianañahare, le hoe ty nanoako, Inao ty hasoa hanoa'o ahy amy ze toetse ivotrahan-tika, te hatao'o ty amako : Rahalahiko re. ¹⁴ Nangalak' añondry naho añombe, naho ondevo-lahy naho ampela t'i Abimeleke vaho natolo'e amy Avrahame le nampoli'e ama'e t'i Sarà vali'e. ¹⁵ Hoe t'i Abimeleke, Heheke, añatrefa'o o tanekoo; mimoneña amy ze satri'o. ¹⁶ Hoe re amy Sarà, Ingo, te nimeako volafoty arivo ty rahalahi'o ho tako-maso amo hene mindre ama'oo; nahazo to re añatrefa ondaty iabio. ¹⁷ Nihalaly aman' Añahare t'i Avrahame le nampijangañen' Añahare t'i Abimeleke naho ty vali'e vaho ondevo ampela'eo, t'ie hahasamake, ¹⁸ amy te fonga nakite' IEHOVÀ heike ze hoviñe añañomba' i Abimeleke ty amy Sarà vali' i Avrahame.

21

Ty Fisamahañe Ietsàke

¹ Aa le nitilike i Sarà t'IEHOVÀ amy nitsara'ey, le nanoe' IEHOVÀ amy Sarà i nitsarae'ey. ² Niareñe t'i Sarà vaho nahatoly ana-dahy ho a i Avrahame ami'ty haanterae amy andro namantañañ' azey ty amy tsinaran' Añaharey. ³ Nimea' i Avrahame añarañañe ty hoe Ietsàke i ana-dahy nitoly ama'ey, i nasama' i Sarà ho azey. ⁴ Nisavare' i Avrahame t'Ietsàk' ana'e ami'ty andro'e fahavallo amy nandilian' Añahare azey. ⁵ Zato taoñe t'i Avrahame te nitoly ama'e t'Ietsàk' ana'e.

⁶ Hoe t'i Sarà, Nampihehen' Añahare raho, vaho mitrao-piankahak' amako ze hene mahajanjiñe ty amako. ⁷ Tinovo'e ty hoe, Ia ty ho nanao ty hoe amy Avrahame te hampinono ajaja t'i Sarà? Ie nahatoly anake amy haanterae'ey.

Sinoik' aña t'i Khagare naho Iesmaèle

⁸ Nitombo i ajajay vaho niotàñe, le nanao takataka t'i Avrahame amy andro nañota'e azey, ⁹ fe niisa' i Sarà te ninje' Iesmaèle ana' i Khagare nte-Mitsraime nisamahe'e ho a i Avrahamey, ¹⁰ le hoe re amy Avrahame, Soho aña i ondevo-ampelai naho i ana'ey, fa le lia'e tsy hitrao-dova am' Ietsàk' anako ty ana' i ondevo-ampelai.

¹¹ Haloviloviañe am-pahaoniña' i Avrahame i hoe zay ty amy ana-dahi'ey. ¹² Fa hoe t'i Andrianañahare ama'e, Ko apo'o hampioremeñ' azo i jolingay naho i ampela mpitoro'oy. Janjiño ze saontsie' i Sarà, ze feo'e iaby ama'o, amy te Ietsàke ty hikanjiañe o tarira'oo. ¹³ Hanoeko fifeheañe ka ty ana' i mpitoro'o ampelai amy te tiri'o.

¹⁴ Ie nañampitso amy loak' àndroy, le nandrambe mofo t'i Avrahame naho rano an-kolitsena naho natolo'e amy Khagare, nasampe'e an-tsoro'e; le natolo'e aze ka i jolingay vaho nirahe'e mb'eo. Nienga re vaho nirere-rere am-patrambei' i Beersevà aña.

¹⁵ Ie nikapaike i rano an-kolitsenay le nakafi'e ambane rongoñe ao i kimosoy. ¹⁶ Le nisitsitse, niambesatse tandrife aze amy ze ho tako-pilereñe ey fa hoe re: Lonike te tsy hahatreia ty fivetrahan' anakoo. Aa le nitobòke marine eo re vaho nañonjo-peo nangololoike.

¹⁷ Jinanjin' Añahare ty feo' i jolingay, le kinanji' ty anjelin' Añahare boak' andikerañe ao t'i Khagare vaho nanoa'e ty hoe, O Khagare, ino o mañore azoo? Ko hemban-drehe, fa jinanjin' Añahare ty feo' i jolingay eyi. ¹⁸ Miongaha, atroaro i jolingay le rambeso am-pit  o, amy te hanoeko foko ra'elisy. ¹⁹ Aa le sinokan' Añahare o fihaino'eo vaho nioni'e ty vovo  e aman-drano. Aa le nimb' eo re, nampipea rano amy holits  nay vaho nampino  e i jolingay. ²⁰ Taman' Añahare i jolingay, le nihabey naho nimone  e andratraratra a  e vaho ninjare mpit  m-pale. ²¹ Ie nitobok' am-patrambei' i Parane ao, le nangala' i rene'e valy boak' e Mitsraime a  e.

Ty Fa  ina te Beersev  

²² Ie henane zay nanao ty hoe amy Avrahame t'i Abimeleke naho i Pikole mpifehe o lahindefo'eo, Ama'o t'i Andriana  nahare amy ze fanoe'o iaby. ²³ Aa le mifant   amako etoa  e aman' Añahare te tsy ho fa  nahie'o raho naho i anakoy naho ty anan' anako; fa i fitretrezako ama'oy naho i tane na  ialoa'oy ty anoa'o amako. ²⁴ Le hoe t'i Avrahame: Ifant  ko!

²⁵ Le nendaha' i Avrahame t'i Abimeleke ty amy vovon-drano tinava' o mpitoro'eyo, ²⁶ le hoe t'i Abimeleke, amoeako ze nanao izay, tsy sinaontsi'o amako 'nio, fa androany te tsinanoko. ²⁷ Aa le nandrambe a  ondry naho a  ombe t'i Avrahame vaho natolo'e amy Abimeleke le nifa  ina ie roe. ²⁸ Nav   i Avrahame amo a  ondri'eo ty vi'e vave fito. ²⁹ Le hoe t'i Abimelek' amy Avrahame, Ino o vi'e vave fito navi'oo? ³⁰ Hoe re, Rambeso an-ta  ako o v  k' a  ondry vave fito retia  e ho valolombelo  e amako te zaho ro nihaly ty vovo  e toy. ³¹ Aa le natao ty hoe Beersev  * i toetse zay; amy te nifa  ina eo iereo roe.

³² Aa ie fa nifa  ina e Beersev   ao, le nimpoly mb'an-tane' o nte-Pilistio mb'eo t'i Abimeleke naho i Pikole mpifehen-dahin-defo'eo. ³³ Nambole kile raike e Beersev   ao t'i Avrahame vaho eo ro nikanja'e ty tahina' IEHOV   Andriana  nahare nainay donia. ³⁴ Le na  ialo an-tane nte-Pilisty a  e andro maro t'i Avrahame.

22

Tsinoke t'i Avrahame

¹ A  e irezay, le nitsohen' Andriana  nahare t'i Avrahame, le nanao'e ty hoe, O Avrahame! Itoan-draho, hoe re. ² Le hoe re: Endeso henaneo i ana'o Iets  ke bako toka'o kokoa'oy, le ma  aveloa mb' an-tane Moria a  e vaho iengao ho soron-koro  e ami'ty vohitse hivola  ako.

³ Na  ale  ale  e amy loak'androy t'i Avrahame le nanampeza'e fitobo-ha  e amy borike'ey. Nindese'e mindre ama'e ty roe amo mpitoro'eo naho Iets  k' ana'e, le tsinera'e ty hatae' i soro  ey, le nionganake vaho nionjo  e mb'amy toetse nitsaraen' Añahare mb'eo. ⁴ Ie amy andro faha-teloy, niandra t'i Avrahame nahatalake i vohitsey e  e. ⁵ Hoe re amo mpitoro'eo, Etoa  e hey nahareo naho i borikey; homb' eroan-draho naho i ajalahiy, hitalaho vaho hibalike.

⁶ Rinambe' i Avrahame ty hatae ha  oro  e i soro  ey naho nasampe'e amy Iets  k' ana'e, vaho ninday afo naho mesolava am-pita'e, le niharo lia mb'eo iereo roe, ⁷ le hoe ty asa' Iets  ke aman-drae'e: O aba? hoe t'i Avrahame, En' anako intoy raho? Etia ty afo naho ty hatae fa aia ka ty vik'a  ondry hisoro  a  e? ⁸ Hoe t'i Avrahame, I Andriana  nahare, anako, ro hanolotse ty vi'e hisoro  a  e. Aa le niharo-lia iereo roe, ⁹ naho nandoak' amy toetse natoron' Añaharey, naho nitsene kitrely eo t'i Avrahame naho

* **21:31** Beersev  : Vovo ty fito, vovom-pani  a

nalaha'e ama'e ty hatae, naho narohi'e i ana'e Ietsàkey vaho nasampe'e amy kitreliy, amo hataeo. ¹⁰ Nahiti' i Avrahame amy zao ty fità'e nandrambe i fibaray handenta i ana'ey. ¹¹ F'ie kinanji' ty anjeli' IEHOVÀ boak' andikerañe ao ami'ty hoe, O Avrahame, Avrahame! Le hoe re, Intoy raho. ¹² Hoe re, Ko apao'o amo ajalahio ty fità'o hanoa'o inoñ' inoñe, amy te apotako henaneo t'ie mpirevendreveñ' aman' Añahare amy te tsy nazi'o amako ty anadahy bako-toka'oy. ¹³ Nampiandrae' i Avrahame amy zao o fihaino'eo nañisake, le hehe amboho'e ao ty añondrilahy nivahoran-drongoñe an-tsifa'e. Nimb'eo t'i Avrahame nandrambe i añondrilahiy le nengae'e ho soroñe hisolo i anadahi'ey. ¹⁴ Aa le natao i Avrahame ty hoe, IEHOVÀ Mahavazoho, vaho ie i tsaraeñe henaneo ami'ty hoe, Ambohi' IEHOVÀ ao ty hahaoniñañe aze.

¹⁵ Nikanjy boak'amo likerañe fañin-droe'e amy Avrahame ty anjeli' IEHOVÀ, ¹⁶ nanao ty hoe, Nifanta ami'ty vatako raho, hoe t'IEHOVÀ: Kanao nanoe'o o raha zao naho tsy nitana'o amako i ana-dahi'oy, i bako-lahi-toka'oy, ¹⁷ le am-pitahiañe ty hitahiako azo vaho am-pitomboeñe ty hampitomboeko o tarira'oo ho mira amo vasian-dikerañe naho mira amo faseñe añ'olon-driakeo, naho ho fanaña' o tarira'oo o lalambeindrafelahi'eo, ¹⁸ vaho i tarira'oy ty hañanintsiñe ze kila foko' ty tane toy, amy te norihe'o ty feoko. ¹⁹ Aa le nimpoly mb'amo ajalahio t'i Avrahame le nióngake iereo nitrao-dia mb'e Beersevà mb'eo; vaho nimoneñe e Beerseva aña t'i Avrahame.

O Ana'o Nakoreo

²⁰ Ie nimodo, le natalily amy Avrahame ty hoe, Nahatoly anak' añaamy Nakore rahalahi'o ka t'i Milkae: ²¹ i Otse ty tañoloñoloña'e naho rahalahi'e t'i Boze vaho i Kemoele rae' i Arame, ²² naho i Kesede, i Kazò, i Pildase, Iedlafe, vaho i Betoele. ²³ Nisamake i Ribkae t'i Betoele. I valo rey ty nasama' i Milkae amy Nakore, rahalahi' i Avrahame. ²⁴ Mbore nahatoly ka i sakeza'e atao Reomàey le i Tèbake, i Gàkame, i Tàkase, vaho i Maakà.

23

Ty Havilasi' i Sarà

¹ Zato tsi-roapolo fito'amby taoñe ty haanterà' i Sarà, ty taon-kavelo' i Sarà, ² ie nivilasy e Kiriàte-arbà (toe i Kebrònè) an-tane' Kanàne ao; le nimbeo t'i Avrahame handala i Sarà vaho hirovetse aze. ³ Niongak' amy vilasi'ey t'i Avrahame vaho nisaontsy amo nte-Kheteo, ami'ty hoe, ⁴ Renetane naho mpañialo ama' areo raho; anoloro hanañañe ama' areo handentehako i vilasikoy tsy ho aolom-pihaino. ⁵ Le hoe ty natoi' o nte-Kheteo amy Avrahame, ⁶ Ijanjiño roandriako; Mpifeleke ama'ay rehe. Alenteho an-kibory lengo'e ama'ay i vilasi'oy, tsy ia ama'ay ty hitañe azo amy lona'ey tsy handeveña'o i vilasi'oy. ⁷ Niongake t'i Avrahame vaho nibokok' am' ondati' i taneio, amo ana' i Kheteo, ⁸ le nisaontsia'e ty hoe, Naho no'areo ty handentehako tsy ho aolom-pihainoko i vilasikoy, le janjiño, vaho halalio t'i Efrone ana' i Tsokare ⁹ ty hanolora'e ahiko i lakato' i Makpelà ama'ey; i aña' ila' i tete'ey. Ami'ty vola-foty do'e ty hanolora'e ahy ho fanañako añivo' areo ao ho fandentehako. ¹⁰ Niambesatse añivo' o nte-Kheteo t'i Efrone; vaho hoe ty natoi' i Efrone nte-Khete amy Avrahame am-pijanjiña' ze hene nte-Khete mpiheo mb'an-dalam-bei' i rovaio: ¹¹ Aiy! ry Androanavio: Janjiño raho, fa omeiko azo i tonday, naho atoloko azo i lakato ama'ey. Añatrefa' o ana' ondatiko etoñañe ty anolorako azo; aleveño i vilasi'o. ¹² Aa le nibokok' añatrefa' ondati' i taneio t'i Avrahame, ¹³ vaho

nanao ty hoe amy Efrone am-pijanjiña' ondati' i taneio, Aa naho mete le janjiño o ahikoo! Hitolorako drala amy tetekey; andrambeso amako le haleveko ao i vilasikoy. ¹⁴ Nanoñe i Avrahame t'i Efrone ami'ty hoe, ¹⁵ O talèko, Inao ; mañeva 400 sekelem-bolafoty i taney, fa inon-jay añivontika? Aleveño i vilasi'oy. ¹⁶ Niantofa' i Avrahame t'i Efrone le linanja'e amy Efrone i volafoty tsinara'e am-pijanjiña' o nte-Kheteoy, i sekele volafoty 400 an-danjam-pandetake rey.

¹⁷ Aa le tsitsike voalily ty tonda' i Efrone e Makpelà ao atiñana' i Mamrè aña, i tetekey reketsé ty lakato'e ao, naho ze hatae amy tetekey naho ze mifahetse amy taney, ¹⁸ amy Avrahame ho fanaña'e añatrefa' o ana' i Kheteo, aolo' ze mpimoak' an-dalambei' i rovay. ¹⁹ Aña zay le naleve' i Avrahame amy lakato an-tete' i Makpelà miatreke i Mamrè (toe i Khebrone) an-tane Kanàne ao t'i Sarà. ²⁰ Songa pinate' o ana' i Kheteo ho a i Avrahame i tonday rekets' i lakato ama'e ao ho fandetehañe.

24

Nañenga' Letsàke t'i Ribkae

¹ Ie amy zao, nigain-kantetse t'i Avrahame, lifots' andro; vaho nitahie' IEHOVÀ amy ze he'e t'i Avrahame. ² Hoe t'i Avrahame amy zokem-pitoro'e añ' anjomba'ey, ie mpamandroñe ze hene vara'e, Ano ambane feko atoa ty fità'o, ³ fa hampifantako añam' IEHOVÀ, Andrianañaharen-dikerañe naho Andrianamboatse ty tane toiy rehe te tsy hangala-baly ho a i anakoy amo anak'ampela nte-Kanàne itraofako fimoneñe ⁴ fe mañaveloa mb'an-taneko naho mb'aman-dongoko mb'eo hangala-baly ho a' Letsàk' anako. ⁵ Aa hoe i mpitoro'ey ama'e, Hera tsy mete hañorik' ahy mb'an-tane atoy i ampelai; ie amy zao hendeseko mimpoly mb'amy tane nihirifa'o añey hao i ana'oy? ⁶ Hoe t'i Avrahame tama'e, Mitaoa tsy hampoli'o aña i anadahikoy. ⁷ IEHOVÀ Andrianañaharen-dikerañe ninday ahy niakatse ty anjomban-draeko naho i tanen-dongokoy vaho nifanta ty hoe amako, Hatoloko amo tarira'oo o tane toio, ie ty hañitrike i anjeli'ey aolo'o hangalà'o valy aña ho amy ana-dahikoy. ⁸ Aa naho tsy mete hañorik' azo i ampelai, le ho afak' amo nampifantàkoo; fe tsy hampoli'o aña i anadahikoy. ⁹ Aa le nanoe' i mpitoroñey ambanen-tso' i Avrahame talè'ey ty fità'e vaho nitsokòse ama'e i hoe zay.

¹⁰ Nalae' i mpitoro'ey amy zao ty rameva folo amo ramevan-talè'eo le niavotse, naho hene am-pita'e ao ze varan-talè'e, ie nióngake nionjoñe mb'e Arame-naharaime, mb'an-drova' i Nakore aña. ¹¹ Nampitongalefe'e alafe' i rovay marine ty vovoñe ey o ramevao, naho fa hiroñe i àndroy, ami'ty fiavota' o ampela hitarikeo. ¹² Le hoe re, Ry IEHOVÀ, Andrianañahare' i Avrahame talèkoy, miambane ama'o, anoloro fahatafeterañe te anito vaho ferenaiño t'i Avrahame talèko. ¹³ Vazohò t'ie mijohañe marine rano migoangoañ' atoy vaho fa mitoha rano mb'etoa o anak'ampela' ondati' i rovao, ¹⁴ le ehe te ty ampela hataoko ty hoe, Ehe azotso amo kiboloha'oo hinomako, vaho hanoe'e ty hoe, Mikamà le hampinomeko ka o rameva'oo, le toe ie ty nedre'o ho a i mpitoro'o Letsàkey, haharendrehako te niferenaiñe'o i talèkoy.

¹⁵ Mbe tsy nigadoñe i saontsi'ey, te ingo nitoha mb'eo t'i Ribkae, nasama' i Betoele ana' i Milkae, vali' i Nakore rahalahi' i Avrahame, ninday ty amboara'e an-tsoro'e. ¹⁶ Somondrara* trenotreno'e am-pahoniñan-dre,

* 24:16 Somondrara: ze atao tsy nahavany lahy

ampela miehañe mbe tsy nahavany lahy, nizotso mb'an-drano mb'eo, le nipeae'e i amboara'ey vaho niañambone mb'eo. ¹⁷ Nihitrihitry hifanalaka ama'e i mpitoroñey, nanao ty hoe, Ehe anjotsò, hitsopeke rano amo kiboloha'oo. ¹⁸ Mikamà, roandria hoe re, le nazè'e aniany an-taña'e i kiboloha'ey le nanjotsoa'e. ¹⁹ Ie niheneke ty nampikama'e aze, le hoe re, Ho tarihako ka o rameva'oo ampara' te etsa-drano. ²⁰ Aa le nalonga'e amy zao an-dabaoga ao i amboara'ey naho nilay mb'am-bovom-b'eo indraike hitarike le songa nitariba'e o rameva'eo. ²¹ Nilatsa' indatiy, nianjiñe avao haharendreha'e ke nampihenefa' IEHOVÀ i lia'ey he tsie.

²² Ie hene enen-drano o ramevao, le rinambe' indatiy ty bangen-oroñe volamena nilanja vakin-tsekele naho ty ravake roe ho an-tsira'e nilanja volamena folo ²³ vaho nanao ty hoe, Toñono amako, ana'ia rehe. Ehe mete tsahatse anay hialeñe hao ty añ'akiban-drae'o? ²⁴ Hoe re tama'e, Ana' i Betoele, ana' i Milkae raho, nasama'e amy Nakore.

²⁵ Nitovoña'e ty hoe, Amañ' ahetse naho hanen-kare mahaheneke zahay vaho traño ialeñañe. ²⁶ Nabotre' indatiy ty añambone'e nitalaho am' IEHOVÀ, ²⁷ ami'ty hoe, Andriañeñe abey t'IEHOVÀ Andrianañahare' i Avrahame talèko, te tsy nitana'e amy talèkoy ty fiferenaiña'e naho ty figahiña'e, naho niaolo ahiko mb'añ'anjomban-dongo' i talèkoy t'IEHOVÀ.

²⁸ Nilay mb'añ'anjomban-drene'e mb'eo amy zao i somondraray nitalily irezay. ²⁹ Aman' drahalahy atao Labàne t'i Ribkae, le nihitrike ty lay mb' am' indaty am-bovoñey t'i Labàne, ³⁰ ie nioni'e i bangen-oroñey, naho o ravak' an-tsiran-drahavave'eo, naho nitalilia'e ty hoe: Inao ty nisaontsia' indatiy, le nimb' am' indatiy mb'eo vaho naheo'e t'ie nijohañe marine o rameva'eo amy vovoñey. ³¹ Hoe re, Miheova, ry tahie' IEHOVÀ. Ino ty ijohaña'o alafe atoy? fa nihajarieko traño naho toetse o ramevao. ³² Aa le nimoak' añ' anjomba ao indatiy naho nafaha' i Labàne amo ramevao i kilankañey, naho tinolo'e ahetse naho haneñe o rameva'eo, naho rano hanasañe ty fandia'e naho o fandia' ondaty nindre ama'eo. ³³ Nanjotsoañe hikama, fa hoe ka re, Tsy hihinañe naho tsy taroñeko hey i namantohañ' ahiy. Hoe ty natoi'e, Itaroño.

³⁴ Aa le hoe re, Mpitoro' i Avrahame raho. ³⁵ Fa ra'elahy ty fitahia' IEHOVÀ i talèkoy, vaho mpañaleale re henaneo; ie nitolora'e añondry naho añombe naho volafoty naho volamena, ondevo lahy naho ampela, rameva naho borìke, ³⁶ mbore nisamak' ana-dahy añamy talèkoy t'i Sarà vali'e ie fa bey, vaho natolo'e aze ze he'e ama'e. ³⁷ Nampifantan-talèko ahy ty hoe, Ko angala'o valy amo anak' ampela nte-Kanàne, tempò' ty tane imoneñako atoio i anakoy; ³⁸ fa ty anjomban-draeko ty homba'o; amo rolongokoo ty hangala'o valy ho a i anakoy. ³⁹ Le hoe raho amy talèkoy, Kera tsy hañorik' ahy i ampela zay. ⁴⁰ Fa hoe re amako, IEHOVÀ iatrefako lia ro hañitrike ty anjeli'e ama'o hampitafetetse ty lia'o, hangala'o valy aman-dongoko aña, añ' anjomban-draeko ao, i anakoy. ⁴¹ Le ho afak' amy nifantàkoy rehe lehe mivotrak' aman-drolongoko ao fe tsy hitolora' iareo, vaho toe ho haha amy nifantàkoy.

⁴² Niheo mb'amy vovoñey raho anindroany, nanao ty hoe, Ry IEHOVÀ, Andrianañahare' i Avrahame talèkoy, ee te ho tafetere'o henanekeo ty liako! ⁴³ Hehe te mijohañe am-bovon-drano atoy raho; le ze somondra-ra miakatse hitari-drano volañeko ty hoe, Anjotsò rano hitsopehako amo dabakera'oo; ⁴⁴ le ie hanao amako ty hoe, Mikamà vaho hitarihako ka o rameva'oo, ehe t'ie i somondrara nitendre' IEHOVÀ ho amy ana' i talèkoiy.

⁴⁵ Aa mbe tsy nimodo i entako an-trokoy, hehe te pok'eo t'i Ribkae, i favinta'ey an-tsoro'e eo naho nizotso mb' an-drano mb'eo hitarike, le hoe ty nanoako, Ehe, ampinomo; ⁴⁶ nalisa re nampizotso i kiboloha'ey le nanao ty hoe, Mikamà, vaho hampinomeko ka o rameva'oo. Aa le ninoñe raho vaho nanesea'e iaby o ramevao. ⁴⁷ Le hoe ty ontaneko ama'e, Ana' ia v'iheo? Hoe re, Ana' i Betoele, ana' i Nakore nisamaha' i Milkae. Aa le nanoeko añ'oro'e eo i bangey naho amo sira'eo o ravakeo. ⁴⁸ Le nabotreko ty lohako nitalaho am' IEHOVÀ vaho nandriañeko t'IEHOVÀ Andrianañahare' i Avrahame talèkoy, i nanehak' ahy andalam-bantañe hangalako ty ana-dongo' i talèkoy ho a i ana'ey. ⁴⁹ Ie amy zao, naho mete hifandahatse an-kavañonañe naho an-kahiti'e amy talèkoy le isaontsio, fa naho tsy zay, isaontsio, hivihako mb'an-tañan-kavana ndra mb'an-kavia.

⁵⁰ Le hoe ty natoi' i Labàne naho i Betoele, Toe boak' am' IEHOVÀ o raha zao; tsy mete ivolaña'ay ndra ty soa ndra ty raty. ⁵¹ Ingo, añatrefa'o t'i Ribkae, rambeso; mañaveloa vaho ampañengao i anan-talè'oy ty amy tsara' IEHOVÀy.

⁵² Ie nahajanjiñe i enta' iareoy i mpitoro' i Avrahamey, le niankohoke an-tane am' IEHOVÀ; ⁵³ vaho naaka' i mpitoroñey amy zao ty bije volafoty naho ty voatsiriry volamena naho saroñe, le natolo'e amy Ribkae; nomei'e raha sarobily ka i rahalahi'ey naho i rene'e. ⁵⁴ Nikama naho ninoñe amy zao re naho ondaty nitraok' ama'eo, vaho nialeñe ao. Ie nitroatse maraindray le hoe re, Ampionjono mb' amy talèkoy mb'eo. ⁵⁵ Hoe ka ty rahalahi'ey naho i rene'e, Angao hitobok' ama'ay atoy hey re, va'e folo andro vaho hienga. ⁵⁶ Fa hoe re tam'iereo, Ko ampiroñonen-draho; kanao nampihenefe' IEHOVÀ ty liako, iraho mb'eo himpoly mb'an-talèko mb'eo. ⁵⁷ Hoe iereo, Ho tokave'ay i ampelay, hañontane am-bava'e. ⁵⁸ Aa le kinanji'iareo t'i Ribkae, vaho nanoa'e ty hoe, No'o hao ty hindre lia am' ondatio? Handeha raho, hoe re. ⁵⁹ Aa le nampionjone' iereo mb'eo t'i Ribkae, rahavave' iareo naho i mpiatra'ey, naho i mpitoro' i Avrahamey naho ondati'eo. ⁶⁰ Le tinata' iareo t'i Ribkae naho nanoa' iareo ty hoe, Ee te ihe, rahavave'ay ro hitombo añ'arivo naho añ'ale; naho ho fanaña' o tarira'oo o lalam-beim-palaiñ' azoo.

⁶¹ Niongak' amy zao t'i Ribkae naho o mpiatra'eo, nijoñe an-drameva nañorike indatiy; aa le nendese' i mpitoroñey t'i Ribkae vaho nañavelo mb'eo.

⁶² Ie henane zay niakatse amy lala' i Vovon-Daka'iroiy t'Ietsàke, ie fa nimoneñe an-tane' Nègeve ao. ⁶³ Niavotse amy harivay t'Ietsàke hitalaho an-kivok' ao, aa ie niandra, le naheo'e te rameva ty nimb'ama'e mb'eo. ⁶⁴ Niandra ka t'i Ribkae nahaoniñe Ietsàke le nizotso amy ramevay, ⁶⁵ nañontane amy mpitoroñey ty hoe, Iam-bao ondaty midraidraitse an-kivoke ey hifanalaka aman-tikañe? Hoe i mpitoroñey, Ty talèko 'nio. Rinambe'e amy zao i sarimbo'e mangarakarakey le nisaroñe. ⁶⁶ Hene natalili' i mpitoroñey am' Ietsàke o nanoe'eo. ⁶⁷ Le nendese' Ietsàke nizilik' an-kibohon-drene'e ao naho nengae'e ho vali'e t'i Ribkae; naho nikokoa'e vaho nitendreke hanintsiñe amy havilasin-drene'ey t'Ietsàke.

25

Nañenga i Ketora t'i Avrahame

¹ Nangala-baly indraike t'i Avrahame, i Ketoràe ty tahina'e. ² Le nisamaha'e t'i Zimrànè naho Ioksane naho i Medane naho i Midiane naho Isbake vaho i Sòahke. ³ Nisamake i Sebà naho i Dedane t'i Joksane. I

Asorý ty ana-dahi' i Dedane, le i Letosý vaho i Leomý. ⁴ O ana-dahi' i Midianeo le i Efà naho i Èfere naho i Kanòke naho i Abidà vaho i Eldaa, songa ana' i Kotorà. ⁵ Natolo' i Avrahame am' Ietsàke iaby ze vara'e. ⁶ Le tinolo'e ravoravo o anan' tsakeza'eo, ie mbe niveloñe, le nampifokofokoe'e maniñanañe mb'an-tane atiñanañe aña hisitake am'Ietsàke.

Ty Havilasi' i Avrahame

⁷ Aa le zao o andron-taon-kavelo' i Avrahame, o niveloña'eo: zato-tsi-fitompolo lim' amby taoñe. ⁸ Nipetroke fara'e t'i Avrahame vaho nivilasy an-kasoan-kantera'e, bey naho lifotse andro, vaho natontoñe am' ondati'eo. ⁹ Naleve' Ietsàke naho Iesmaèle ana'e amy lakato' i Makpelày re, amy tonda' i Efrone, ana' i Tsòkhare nte-Kheteiy, aolo' i Mamrè ao, ¹⁰ i teteke vinili' i Avrahame amo nte-Kheteoy. Naleveñe ao t'i Avrahame naho i Sarà vali'ey. ¹¹ Ie aña ty fihomaha' i Avrahame, le nitahien' Añahare t'Ietsàk' ana'e; vaho nimoneñe marine ty vovo' i Laka'iroý eo t'Ietsake.

O ana' Iesmaèle

1 Ta 1.29-31

¹² Intoy o tarira'Iesmaèle, ana' i Avrahame nasama' i Khagare nte-Mitsraime, fetrek' oro' i Sarà amy Avrahameo. ¹³ Zao ty tahina' o ana' Iesmaèle, amo tahina'eo, ie toñoneñe amo tarira'eo : le i Nebaote tañoloñolo' Iesmaèle naho i Kedare, i Adbeeèle, i Mibsame, ¹⁴ i Mismà, i Domà, i Masà, ¹⁵ i Khadade, i Temà, Ietore, i Nafise, vaho i Kedemà. ¹⁶ Zay o ana' Iesmaèle naho o tahina' iareeo amo rova'eo, naho amo kialo'eo, roandriañe folo-ro' amby o fifokoa'eo. ¹⁷ Zato tsy telopolo fito amby taoñe ty halava-havelo' Iesmaèle, te nikofòke ty fara-pipetro'e naho nivilasy vaho natontoñe am'ondati'eo. ¹⁸ Nitonetse boak'e Havilà pak'e Sòre tandrife' i Mitsraime aña iereo amy fombañe mb'e Asòre mb'eoy. Nidoñe tandrife' o rahalahi'e iabio re.

Fanoñona' i Iesmaele naho Ietsàke

¹⁹ Zay ty fanoñona' Ietsàk' ana' i Avrahame.

I Iakòbe naho i Esave

Nisamake Ietsàke t'i Avrahame; le ²⁰ efa-polo taoñe t'Ietsàke te nañenga i Ribkae ana' i Betoele nte-Arame boake Padan' arame, rahavave' i Labàne nte-Arame.

²¹ Nihalaly am' IEHOVÀ t'Ietsàke ty amy vali'e, ie betsiterake. Tinoi' IEHOVÀ i halali'ey vaho niareñe t'i Ribkae. ²² Nifaniotsiotse an-kovi'e ao o ajajao, le hoe re: Aa naho zao ty ie, ino ty hanoeko? Aa le nimb'eo re nañontane IEHOVÀ. ²³ Le hoe t'IEHOVÀ ama'e:
Foko roe ty an-kovi'o ao,
hiambake ondaty ho samahe'oo;
Haozatse te ami'ty raike ty raike,
Vaho hitoroñ'an-jai'e ty zoke'e.

²⁴ Ie tondroke ty andro nisamaha'e, le ajaja hambañe ty an-kovi'e ao. ²⁵ Nimena iaby ty zoke te niakatse, hoe nisarom-bolovoloeñe ty sandri'e; le natao' iereo Esave* ty añara'e. ²⁶ Nanonjohy aze i rahalahi'ey; nivontitise an-tomi' i Esave ty taña'e le natao Iakòbe† ty añara'e. Enempolo taoñe t'Ietsàke te nahatoly iareo t'i Ribkàe. ²⁷ Nitombo i lahilahy rey, le nimpitsindroke am-bantam-pitañe t'i Esave, mpian-kivoke; fe ondaty saoneñe t'Iakòbe, mpimoneñe an-kibohotse. ²⁸ Nikokoa' Ietsàke t'i Esave, amy t'ie nikama o tsindro'eo; fe nikokoa' i Ribkae t'Iakòbe.

* 25:25 Esave: ty mpitoloñe ndra mpamonitse † 25:26 Iakobe: mpitan-tomitse; mpibaliketsake

*Naleta' i Esave ty Hatañoloñoloña'e
(Heb 12.16)*

²⁹ Teo te nahandro antake t'Iakòbe, le nilimpoañe t'i Esave te boak' an-kivok' aña. ³⁰ Aa hoe t'i Esave am' Iakòbe, Anjotso o raha menao, fa midaliendalieñe. (Aa le natao Edome[‡] ty tahina'e.) ³¹ Hoe t'Iakòbe, Aletaho amako henane ty hatañoloñoloña'o, ³² Hoe t'i Esave, toe hikenkandraho, inoñe amako ze o hatañoloñoloñañe zao? ³³ Hoe t'Iakòbe, Mifantà amako heike. Aa le nifanta ama'e vaho naleta'e am' Iakòbe i hatañoloñoloña'ey. ³⁴ Le nazotso' Iakòbe amy Esave ty mofo naho i ahandro antakey; ie nikama naho ninoñe le nióngake vaho niribotse mb'eo. Toe nañonjitse i hatañoloñoloña'ey t'i Esave.

26

Ietsàke naho i Abimeleke

¹ Ie amy zao nikerè ty tane, nandimbe i hasalikoañe nifetsake tañandro' i Avrahamey. Le noly mb'e Gerare mb' amy Abimèleke nte-Pilisty mb'eo t'Ietsàke. ² Ie amy zao, nisodehañe am' Letsàke t'IEHOVÀ nanao ty hoe, Ko mitaveam-b'e Mitsraime aña; fa mitobe a n-tane hatoroko azo. ³ Mimoneña an-tane atoy, le himbaeko vaho ho tahieko; amy te hatoloko azo naho amo tarira'o iabio o tane retoñañe; le ho henefeko ty fanta nifantàko amy Avrahame rae'o. ⁴ Hampiraeko amo vasian-dikerañe o tarira'oo naho hatoloko amo tarira'oo o hene tane toaño vaho amo tarira'oo ty hitahiañe ze hene foko a n-tane atoy ⁵ amy te nihaoñe' i Avrahame ty feoko le nitambozore'e i namantohakoy, o fepèkoo, o fañekoo vaho o Fanoroakoo*.

⁶ Aa le nitoetse e Gerare ao t'Ietsàke. ⁷ Ie nañontane i vali'ey ondati' i rovaio, le hoe re, Rahavaveko toke, amy t'ie nihembañe tsy te hanao ty hoe, Valiko, fa natao'e te hañe-doza ama'e ondatio, ty amy hamontramontre' i Ribkae. ⁸ Ie tambatse ela ao t'Ietsàke le nitilihitse ami'ty lalan-kede t'i Abimeleke mpanjaka' o nte-Pelistio: niisa'e te heheke nitsapatsapa i Ribkae vali' e t'Ietsàke. ⁹ Aa le nampikanjie' i Abimeleke t'Ietsàke vaho nanoa'e ty hoe, Toe vali'o re! Ino ty nanoe'o ty hoe Rahavaveko? Hoe t'Ietsàke tama'e, Nataoko hera hikenkañe ty ama'e raho. ¹⁰ Hoe ty Abimeleke, Inoñe arè ty nanoe'o ama'ay? Kera niolots' amy vali'oy t'indaty le ho nañakeo anay rehe. ¹¹ Aa le hinatahata' i Abimeleke ondati'e iabio ami'ty hoe, Toe havetrake ze mitsapa t'indaty toy ndra i vali'ey.

¹² Nitongy amy taney t'Ietsàke le nanatake in-jato amy taoñey avao, amy te nitahie' IEHOVÀ, ¹³ vaho niha-mpañarivo indatiy le mbe nionjoñe avao ty firaoraoa'e ampara' te nimpañaleale. ¹⁴ Ie amam-pirai-lia naho mpirai-troke vaho tsiefa o pitoro'eo, le nikirañe aze o nte-Pelistio. ¹⁵ Aa le finempe' o nte-Pelistio naho linembeke tane o vovoñe hinali' o mpitoron-dra'e eo tañandro' i Avrahameo. ¹⁶ Le hoe t'i Abimelek' amy Ietsàke, Misitaha, fa loho maozatse te ama'ay rehe.

¹⁷ Aa le nienga boak'ao t'Ietsàke naho nitobe am-bavatane' i Gerare vaho nitoetse eo; ¹⁸ le sinoka' Ietsàke indraike o vovon-drano nihali-eñe tañandro' i Avrahame rae'eo, o linembe' o nte-Pilisty iabio naho fa nihomake t'i Avrahame; vaho nitokave'e amo añarañe nitokavandrae'e. ¹⁹ Le nihaly amy vavataney o mpitoro' Ietsàkeo le nanjo vovoñe nigoangoan-drano. ²⁰ Fe nifandietse amo mpiara' Ietsàkeo o mpiarake nte-Gerareo ami'ty hoe, Anay o ranoo, le natao'e ty hoe Eseke[†] i vovoñey kanao

* 25:30 Edome: mena * 26:5 Toe Hake † 26:20 Eseka: fifandierañe

nifandiera' iereo. ²¹ Nihaly vovoñe indraike iereo vaho nifanjomorañe ka, aa le nitokave'e Sitnà‡. ²² Ie niveve mb'eo le nihaly vovoñe indraike, f'ie tsy am-pifanoïñe, le natao'e ty hoe Rehobota§ ami'ty hoe, Fa nañivake ho anay t'IEHOVÀ le hiraorao an-tane atoy.

²³ Boak' ao re nionjoñe mb'e Beersevà mb'eo. ²⁴ Le nisodehañe ama'e amy haleñey t'IEHOVÀ nanao ty hoe, Zaho ro Andrianañahare' i Avrahame rae'o; ko hemban-drehe fa ama'o raho le ho tahieko vaho hampitozantozañeko o tarira'oo ty amy Avrahame mpitorokoy. ²⁵ Aa le nandrafetse kitrely eo naho nikanyjy ty tahina' IEHOVÀ naho naore'e eo ty kiboho'e vaho nihaly vovoñe eo o mpitoro' Ietsàkeo.

²⁶ Nomb' ama'e mb'eo amy zao t'i Abimèleke boake Gerare, miharo amy Akozàte mpanolo-keve'e naho i Pikole, mpifehe o lahindefo'eo. ²⁷ Hoe t'Ietsak' am'iereo, Inom-bao ty nomba'areo mb' amako mb'etoa kanao malaiñe ahy, toe natao' areo soike? ²⁸ Hoe iereo, Trea'ay malange te ama'o t'IEHOVÀ, le hoe zahay, Antao hifanitike, añivo'ay naho ihe, aa le iantofo te hifañina, ²⁹ soa te ihe tsy hijoy anay, hambañe amy te zahay tsy nitsapa azo, fa tsy ino ty nanoe'ay naho tsy ty soa, naho nampañaveloe'ay ampanintsïñañe; toe tahie' IEHOVÀ rehe henaneo. ³⁰ Aa le nañalankaña'e sabadidake, le nikama naho ninoñe. ³¹ Nitroatse marain-tsikiake iereo le nifañina am-panta, naho nasese' Ietsàke mb'eo vaho nienga aze an-kanintsïñañe. ³² Nitotsak' ama'e amy àndroy ka ty mpitoro' Ietsake nitalily i vovoñe hinali' iereo anianiy, ty hoe, Nahatrea rano zahay! ³³ Natao'e Sivà ty añara'e; aa le Beer-Sevà ty añara' i rovay henaneo.

O Vali' i Esave nte-Kheteo

³⁴ Ie niefapolao taoñe t'i Esave, le nañenga Iehoditè ana' i Bierý nte-Khete, naho i Basmàte ana' i Elònè nte-Khete; ³⁵ f'ie nampioremeñe ty arofo' Ietsàke naho i Ribkae.

27

Mitata Iakòbe t'Ietsàke

¹ Ie roñoñe aña, naho fa bey t'Ietsàke naho nitalo fhaino vaho tsy nahavazoho soa, le kinanji'e t'i Esave zoken' ana'e ami'ty ty hoe, O anako, le tinoi'e ty hoe, Intoy raho. ² Hoe re, Hehe te bey raho henaneo; naho amoeako ty andro hikenkañako, ³ aa ehe rambeso o harao'oo: ty kotra'o naho fale'o le akia mb'an-kivok' aña hitsindroke hena ho ahiko. ⁴ Le anokono mahakama mafiry, amy teakoy, le anjotso ho haneko, hitatàko azo an-troko aolo' ty hivetrahako.

⁵ Jinanji' i Ribkae ty nataon-drae'e amy ana'e Esave. Aa naho niavotse mb' am-patrañe aña t'i Esave hitsindroke hanesea'e. ⁶ le hoe t'i Ribkae am' Iakòbe ana'e, Inao, tsinanoko amy saontsin-drae'o amandrahalahi'o Esavy, ty hoe, ⁷ Añendeso tsindroke, le anokono haneñe mafiry hihinanako hitatàko azo añatrefa' IEHOVÀ aolo' ty hikenkañako. ⁸ Inao arè, anako, haoño o volam-pamantohako azoo. ⁹ Akia mb'amy lia raikey le andeso vik' ose roe hañalankañako mahakama mafiry ho an-drae'o, amy tea'ey; ¹⁰ le ihe ty hanjotso aze aman-drae'o hikama'e, hitata'e aolo' ty hihomaha'e. ¹¹ Fa hoe ka t'Iakòbe amy Ribkae rene'e, Oniño te ondaty volovoloeñe t'i Esave rahalahiko; zaho lahilahy pando; ¹² hera hitsapa ahy t'i raeko le hatao'e te nirabioñeko, le mone fatse ty hanoa'e fa tsy tata. ¹³ Hoe t'i rene'e ama'e, Ee te ho amako ze o fatse'o

‡ 26:21 Sitnà: fifankalaiñañe § 26:22 Rehobota: midada

zao, anako; fe oriho avao i volakoy, akia, angalao ho ahy. ¹⁴ Aa le nimb'eo re nangalake naho nendese'e aman-drene'e; vaho nihalankañen-drene'e ty mahakama mafiry manahake ty teàn-drae'e. ¹⁵ Nalae' i Ribkae amy zao ty sarimbo fanjaka' i Esave zoke'ey ze tama'e añ' anjomba'e ao vaho nampiombea'e amy Iakòbe, ana-tsits'o'e ¹⁶ le napeta'e an-tsira'e ty holi' i vik' osey naho ami'ty malama am-pititia'e eo. ¹⁷ Tinolo'e am-pità' Iakòbe ana'e i mahakama mafiriy naho ty mofo hinalanka'e.

¹⁸ Le nizilik' aman-drae'e ao re nanao ty hoe, O aba, le tinoi'e ty hoe, Intoy raho; Ia rehe, anako? ¹⁹ Hoe t'Iakòbe aman-drae'e, Zaho i Esave Tañoloñoloña'o. Fa nanoeko iaby i nañiraha'o ahiy, mitroara arè, miambesara vaho ikamao o tsindrokoo, hitatà' ty arofo'o. ²⁰ Aa hoe t'Ietsàk' amy ana'ey, Akore anako, t'ie nahatrean anianik' avao? Hoe ty natoi'e: Nampitotohe' IEHOVÀ Andrianañahare'o amako. ²¹ Le hoe t'Ietsàk' am'Iakòbe, Harineo, hitsapako azo, anako, haharendrehako te toe i Esave anako ke tsie. ²² Aa le nitotok' aman-drae'e Ietsàke t'Iakòbe, le nitsapae'e vaho hoe ty asa'e, Feo' Iakòbe o feo zao, fe taña' i Esave o taña'eo. ²³ Le tsy nifohi'e amy te nivolovoloeñe manahake o fitàn-joke'e Esaveo o taña'eo, aa le tinata'e. ²⁴ Hoe re, Toe anako Esave v'i-heo? Le tinoi'e ty hoe: Zaho. ²⁵ Aa hoe re, Anjotsø hihinanako i tsindron' anakoy vaho hitat' azo ty troko. Aa le nazotsø'e naho nikamae'e naho nanjotsø'a'e divay vaho ninoma'e. ²⁶ Le hoe ty rae'e Ietsàk' ama'e, Mañarinea ahy anako vaho orofo. ²⁷ Aa le niharinea'e naho norofa'e, le nantsoñe'e ty hañi' o lamba'eo vaho nitata'e ami'ty hoe,

Inao ty hañin' anako
manahake ty harifondrifon-kivoke
nitahie' IEHOVÀ.

²⁸ Ee te hanoloran' Añahare azo
ty zonon-dikerañe,
naho ty havondra' ty tane toy
vaho ampemba naho-divay vao maha-eneñe.

²⁹ Lonike te hitoroñe azo ondatio,
vaho hibokoboko ama'o o rofokoo.

Feleho o rahalahi'oo,
le hiondrek' ama'o o anan-drene'oo. Fonga afàtse ze mamatse azo,
Hene tahieñe ze mitat' azo!

Po-Tata t'i Esave (Heb 12.17)

³⁰ Ie nifonire'Ietsàke i fitata'e Iakòbey, vaho didy tsy tafakatse boak' añatrefan-drae'e t'Iakòbe, te pok'eo t'i Esave amy tsindro'ey. ³¹ Ie ka ro nañalankañe mahakama mafiry vaho nazotsø'e aman-drae'e ami'ty hoe, Mitroara ry Raeko, ikamao ty tsindron' ana'o, hitata' ty arofo'o. ³² Ia v'iheo, hoe t'Ietsàke rae'e ama'e. Tinoi'e ty hoe, Ana'o raho, i Esave tañoloñoloña'oy. ³³ Nihobitse an-gebahebake t'Ietsàke, nanao ty hoe: Ia arè i nitsindroke hena naho nanjotsø amakoy, ie fonga nihaneko aolo' ty niavia'o etoañe vaho fa nitataeko?—eka ho soa tata re! ³⁴ Ie nahajanjiñe i saontsin-drae'ey t'i Esave, le nampipoñake fañgoihoy añ' afero naho nanao ty hoe aman-drae'e, Tatao raho, zaho ka, ry Raeko! ³⁵ Fa hoe re, Niavy etoa am-pamañahiañe ty zai'o, vaho tinava'e i tata'oy. ³⁶ Hoe re, Tsy to hao i añara'e, Iakobey, kanao indroe ty nañaramamoa'e antomitse. Sininto'e amako ty hatañoloñoloñako, le hehe te tinava'e aniany ka i tatakoy. Le hoe re, Tsy nañaja'o tata hao raho? ³⁷ Hoe ty natoi' Ietsàk' amy Esave, Ingo te nanoeko talè'o re vaho hene natoloko ama'e

o rahalahi'eo ho mpitoro'e, le ampemba naho divay vao ty namahanako aze. Inoñe ka ty hanoeko ama'o, anako? ³⁸ Hoe t'i Esave aman-drae'e, Tsy aman-tata raik' avao hao rehe, ry Aba? Tatao raho, zaho ka, ry raeko! Naonjo' i Esave amy zao ty fiarañanaña'e le nangololoike ty rovetse.

³⁹ Le hoe ty nitoiña' Letsàke rae'e:
 Ingo, hihànkäne ami'ty havondra'
 ty tane toy ty akiba'o,
 naho amo zonon-dikerañe
 añ' abo eñe.
⁴⁰ Ty fibara'o ro hiveloma'o,
 le ho toroñe'o ty zai'o,
 fe aña rehe ho tsitoboboly,
 vaho hapoza'o ty joka an-kàto'o eo.

Nivoratsaha'e i hangosasaha'ey

⁴¹ Nalaim-bintañ'amy Iakòbe amy zao t'i Esave ty amy tata nitatàndrae'e azey, le hoe ty natao' i Esave an-tro'e ao, Mitotoke ty andro fandalàñe an-draeko; le ho vonoeko t'Iakòbe zaiko. ⁴² F'ie natalily amy Ribkae i volan-joken' ana'ey; le nirahe'e ty hitoka Iakòbe tsitson' ana'e, le hoe re tama'e, Inao mameren-troke t'i Esave zoke'o ty ama'o ami'ty fikililia'e hañè-doza ama'o. ⁴³ Ie amy zao ry anako, oriho o volakoo, le miongaha, mibioña mb' amy Labàne rahalahiko e Kharane aña, ⁴⁴ le molia ama'e ao heike*, ampara' te mitolike ty fitrotrofiahán-joke'o, ⁴⁵ ampara' te hiesoñe ama'o ty haviñeran-joke'o vaho handikofa'e i nanoe'o ama'ey; le mbe hampihitrifeko rehe, hampolieko boak' aña. Ataoko akore te ho nirerek' amako ami'ty andro raike nahareo roroe?

⁴⁶ Le hoe t'i Ribkae am' Letsàke, Mañalike ty haveloko o anak'ampela Kheteo. Aa naho mañenga amo anak'ampela Kheteo t'Iakòbe, manahake o anak'ampela an-tane atoio le ho inoñ'amako ty fiaiko?

28

¹ Tinoka' Letsàk' amy zao t'Iakòbe naho tinata'e vaho nafanto'e ami'ty hoe, Ko mañenga valy amo anak'ampela nte-Kanàneo. ² Mionjona mb'e Padan' arame, mb'añ' anjomba' i Betoele, raen-drene'o aña, vaho mañengà amo anak'ampela' i Labàne, rahalahin-drene'oo. ³ Ehe te hitahy azo t'i El-Sadai*, hampibodobodo naho hañamaro azo, soa te ho firimboñam-pifokoañe. ⁴ Le hatolo'e azo naho amo tarira'o mindre ama'oo o fitahiañe i Avrahameo, handovà'o i tane maha-renetane azoy, i natolon' Añahare amy Avrahamey. ⁵ Aa le nirahe' Letsàke mb' eo t'Iakòbe, hañavelo mb'e Padan' arame, mb' amy Labàne ana' i Betoele nte-Arame, rahalahi' i Ribkae rene' i Esave naho Iakòbe aña.

⁶ Ie nirendre' i Esave te nitatae' Letsake t'Iakòbe naho nirahe'e mb'e Padan' arame mb'eo hañenga valy boak'aña, ie nitata aze ro namantoke ty hoe, Ko mañenga amo anak'ampela' i Kanàneo, ⁷ le nihaõñe' Iakòbe i nafanton-drae'e naho i rene'ey vaho nitaveañe mb'e Padan' Arame aña, ⁸ le napota' i Esave te tsy nòn-drae'e Letsake o anak'ampela' i Kanàneo; ⁹ aa le nimb' am' Iesmaèle mb'eo re nañenga i Makalate, rahavave' i Nebaiote, ana' Iesmaèle ana' i Avrahame, ho tovo' o vali'eo.

Nañinofy e Betele ao

¹⁰ Nienga i Beersevà t'Iakòbe naho nionjo mb'e Kharane aña. ¹¹ Ie nahaisake toetse, le nialeñë ao fa nimotake i àndroy. Nangalak' amo

* 27:44 Heb: andro raike * 28:3 Fot 17:1

vato eio re naho napo'e ho ankala' ty añambone'e vaho nandre niròtse amy toetsey. ¹² Nañinofy re, le ingo ty fanongà nitroatse an-tane eo, ty ambone'e naha-takatse an-digiligin-dikerañe eñe vaho inge, niañambone naho nizotsoa' o anjelin'Añahareo. ¹³ Naheo'e te nijohañe ambone'e ey t'IÉHOVÀ, nanao ty hoe: Zaho IÉHOVÀ Andrianañaharen-drae'o Avrahame naho Andrianañahare' Jets'ake. Hatoloko azo naho amo tarira'oo o tane andrea'o henaneo. ¹⁴ Ho mira ami'ty debo' ty tane toy o tarira'oo, ie hangetseketeke mañandrefa naho maniñana naho mañavaratse vaho mañatimo, le ihe naho o tarira'oo ro hitahiañe ze hene hasavereña' ty tane toy. ¹⁵ Inao, mpindre ama'o raho, hañambeñe azo ndra aia'aia ty hañaveloa'o, vaho hampoliko an-tane atoy, le tsy hieng' azo naho tsy benefeko o vinolako ama'oo.

¹⁶ Ie nivañoñe amy firota'ey t'Iakobe le hoe re, Toe an-toetse atoy t'IÉHOVÀ fe tsy napotako. ¹⁷ Nihemban-dre le nanao ty hoe, Akore ty harevendreveñañe etoañe! Ts'inoñe naho tsy anjomban' Añahare ty etoa vaho itoy i lalambein-dikerañey.

¹⁸ Nitroatse marain-tsikiake t'Iakòbe le rinambe'e i vato napo'e ho ankala' ty añambone'ey naho natroa'e ho ajiba, vaho nañiliña'e solike ambone'e eo. ¹⁹ Natao'e ty hoe Betele[†] ty añara' i toetsey, fa nitokaveñe ty hoe Loze i tanàney taolo. ²⁰ Nifanta amy zao t'Iakòbe ami'ty hoe, Naho hañimbañ' ahiko t'i Andrianañahare, hañaro ahy ami'ty liako toy naho hamahañe ahy hànен-ko haneñe naho lamba hisikinañe, ²¹ hibalihako an-kanintsiñe mb'añ' anjomban-draeko aña, le ho Andrianañahareko t'IÉHOVÀ, ²² naho ho anjomban' Añahare ty vato natroako ho ajiba toy, vaho toe homeako Azo ty faha-folo' ze hene hatolo'o ahiko.

29

Mifañaoñe t'Iakòbe naho i Rahkele

¹ Niongake am-pandia amy zao t'Iakòbe nimb' an-tane' o anantatiñanañe. ² Tinalake'e te heheke ty vovoñe an-kivoke ey aman' añondry telo troke mandre marine aze, amy te fampinomañe o mpirai-liao i vovoñey; le vato jabajaba ty nikapeke i vovoñey. ³ Ie hene vory o mpirai-liao le adariso' o mpiarakeo i vato fikape' i vovoñeyi, vaho ampinomeñe o añondrio; heneke zay vaho ampolie' iareo am-bava' i vovoñey i vatoy.

⁴ Hoe t'Iakòbe am'iereo, O rahalahikoo, boak' aia nahareo? Hoe iereo, Hirik'e Kharane aña. ⁵ Hoe re tam' iereo, Fohi' areo hao t'i Labàne ana' i Nakore? Hoe iereo, Eka apota'ay. ⁶ Hoe re tam' iereo, Jangam-bao? Janga, hoe iereo, le ingo t'i Rahkele, anak' ampela'e minday o añondrio. ⁷ Hoe re, Hehe, mbe tsingilingilieñe ty àndro, tsy fanontoñañe añondry hey henaneo. Ampinomo o añondrio vaho akia andrazo. ⁸ Fa hoe ka iereo, Tsy mete zahay naho tsy fa vory iaby o mpirai-liao naho avarimbari' iareo boak' am-bava' o vovoñeo o vatoo; zay vaho ampinome'ay o añondrio.

⁹ Ie mbe nifanaontsy, pok' eo t'i Rahkele ninday o añondrin-drae'eo, amy t'ie mpiarake.

¹⁰ Ie nahaoniñe i Rahkele, ana' i Labàne renelahi'e, naho o añondri' i Labàne renelahi'eo t'Iakòbe le niharinea'e naho navari'e boak' am-bava' i vovoñey i vatoy vaho nampinome'e i lia-rai' i Labàne renelahi'ey.

¹¹ Le norofa' Iakòbe t'i Rahkele vaho nipoña-peo an-drovetse, ¹² naho nitoñone' Iakòbe amy Rahkele t'ie longon-drae'e naho ana' i Ribkae; le

[†] 28:19 Betele: Anjomban'Añahare

nilay re hitalily aman-drae'e. ¹³ Ie jinanji' i Labàne ty talili' Iakòbe ana-drahavave'e, le nihitrihitry hifañaoñe ama'e; finorokoko'e naho norofa'e vaho nendese'e mb' añ' anjomba'e ao vaho hene natalili'e amy Labàne i nifetsake rezay, ¹⁴ le hoe t'i Labàne ama'e, Toe taolako naho nofoko rehe! Aa le niambesara'e volañe raike.

Vinali' Iakòbe o ana' i Labàne

¹⁵ Le hoe t'i Labàne am' Iakòbe, Aa ndra t'ie longoko, hifanehake ho ahy tsy aman-tambe hao? Volaño arè, ino ty ho tambe'o. ¹⁶ Ie amy zao, roe ty anak' ampela' i Labàne; Leae ty añara' ty zoke'e naho i Rahkele ty añaran-jai'e. ¹⁷ Naleme ty maso' i Leae, le nimontramona naho soa vintañe t'i Rahkele. ¹⁸ Nikokoa' Iakòbe t'i Rahkele, le hoe re, Ho toroñeko fito taondrehe ho a i Rahkele, anak' ampela'o zai'e. ¹⁹ Hoe t'i Labàne, Hamake hatoloko azo ta te hatoloko amy ze ondaty ila'e; mimoneña amako. ²⁰ Aa le nitoroñe fito taoñe t'Iakòbe hahazoa'e i Rahkele, le nihoe andro tsy ampe-ampe am-pihaino'eo ty amy fikokoa'e azey.

²¹ Le hoe t'Iakòbe amy Labàne, Atoloro ahy i valikoy hiharoako fa heneke o androkoo. ²² Aa le natonto' i Labàne ze hene ondati' i tanañey vaho nañalankañe takataka. ²³ Ie hariva i àndroy le nasese' i Labàne am'Iakòbe t'i Leae vaho niolare'e. ²⁴ Le natolo' i Labàne amy Leae ty mpitoro-ampela'e Zilpae ho mpiatrak' aze. ²⁵ Aa ie nanjirike ty hamaray, hehe te i Leae! le hoe t'Iakòbe amy Labàne: Ino o nanoe'o amakoo? Tsy i Rahkele hao ty nitoroñako azo? Akore arè ty namitaha'o ahy? ²⁶ Hoe t'i Labàne, Tsy sata an-tane atoy ty anolorañe ty zai'e aolo' ty tañoloñoloñan-ampela'e. ²⁷ Foniro i hafitoa'ey, le hatolo'ay azo ka i raikey, ho ami'ty fito taoñe tovo'e hitoroña'o ahy.

²⁸ Aa le nanoe' Iakòbe. Nihenefe'e i hereñandroy, vaho natolo'e aze ty anak'ampela'e Rahkele ho vali'e. ²⁹ Natolo' i Labàne amy Rahkele ana'e t'i Bilhae mpiatra'ey ho mpiatrak' aze. ³⁰ Niilotse amy Rahkele ka t'Iakòbe le ie ty nikokoa'e te amy Leae, vaho nitoroñe i Labàne fito taoñe indraike.

O Ana' Iakòbeo

³¹ Ie nivazoho' IEHOVÀ te tsy nikokoañe t'i Leae, le sinoka'e ty trañon' ana'e, fe betsiterake t'i Rahkele. ³² Niareñe t'i Leae vaho nahatoly ana-dahy. Natao'e Reòbene ty añara'e fa hoe ty asa'e, Amy te nivazoho' IEHOVÀ ty haferenaiñako*. Aa le hikoko ahy ty valiko henanekeo.

³³ Niareñe indraike re nisamak' ana-dahy, vaho hoe re, Jinanji' IEHOVÀ t'ie firihi'a'e le nomei'e itoañe ka, le natao'e Simònē† ty añara'e.

³⁴ Mbe niareñe indraike re, nahatoly ana-dahy, le hoe ty asa'e, Sandrake henane zao te hipiteham-baliko, zaho nisamake telo ho aze. Aa le natao'e Levy‡ ty añara'e.

³⁵ Mbe niareñe indraike re, le nisamak' ana-dahy vaho nanao ty hoe, Handrenge IEHOVÀ raho henane zao. Le natao'e Iehodà§ ty añara'e vaho nitampsets' anake.

30

¹ Ie nioni' i Rahkele t'ie tsy nahatoly ho a Iakòbe, le nikirañe an-joke'e, naho hoe re am' Iakòbe. Ehe meo anake raho tsy mone hikenkañe!

² Nisolebotse amy Rahkele ty haboseha' Iakòbe le hoe ty asa'e, Zaho hao ty hisolo an' Andrianañahare nitañe ama'o ty vokan-koviñe? ³ Le hoe re,

* ^{29:32} Reobene: hehe, ana-dahy † ^{29:33} Simeone: mahajanjiñe ‡ ^{29:34} Levy: mpireketse
§ ^{29:35} Iehodà: Rengène

Intoy t'i Bilhae mpitoroko, imoaho hisamaha'e amo ongokoo soa t'ie ty hampionjoñené ahy.

⁴ Aa le natolo'e aze t'i Bilhae mpitoro'e hialoza'e, naho niziliha' Iakòbe ⁵ vaho niaren-dre, nahatoly anadahy ho a Iakòbe. ⁶ Le hoe t'i Rahkele, Nañomey to ahiko t'i Andrianañahare; toe jinanji'e i fitoreokoy naho nitolora'e ana-dahy. Aa le natao'e Dane* ty añara'e.

⁷ Niareñe indraike t'i Bilhae mpitoro' i Rahkele, naho nahatoly ana-dahy faha roe ho a Iakòbe. ⁸ Le hoe t'i Rahkele, Am-pifangatorañe mafe ty nifangatòrako aman-jokeko le nahalefe, vaho natao'e Naftalý† ty añara'e.

⁹ Ie rendre' i Leae te nijihetse ty fisamaha'e, le rinambe'e t'i Zilpae mpitoroñ' ampela'e vaho natolo'e am' Iakòbe hialoza'e. ¹⁰ Nisamak' ana-dahy ho a Iakòbe t'i Zilpae mpitoro' i Leae. ¹¹ Le hoe t'i Leae, Hasoa tata! Aa le natao'e Gade‡ ty añara'e.

¹² Mbe nisamak' ana-dahy fañindroe'e ho a Iakòbe t'i Zilpae mpitoro' i Leae. ¹³ Le hoe t'i Leae, Hete! ty haehako! Hatao' o anak' ampelao haha raho. Aa le natao'e Asere§ ty añara'e.

¹⁴ Ie an-tsam-pitatahañe vare-bolè, nomb'an-tetek' ao t'i Reòbene le nahatendreke fañanintsíñe vaho nañandesa'e t'i Leae, rene'e. Le hoe t'i Rahkele amy Leae, Añomezo amo fañanintsin' ana'oo. ¹⁵ Fe hoe re ama'e, Raha kede ama'o hao te nasinta'o amako i valikoy, te hitavaña'o ty fañanintsin' anako ka? Le hoe t'i Rahkele, Aa le ho meako azo hiolora'o te anito ty amo fañanintsin' ana'oo. ¹⁶ Ie boak' an-teteke ey t'Iakòbe amy harivay, le niakatse hanalaka aze t'i Leae nanao ty hoe, Ahiko rehe te anito fa fifofoañe ty nifofoako azo amo fañanintsin' anakoo. Aa le niolora'e amy haleñey. ¹⁷ Nihaoñen' Añahare t'i Leae vaho niaren-dre, le nahatoly ana-dahy faha-lime ho a Iakòbe. ¹⁸ Hoe t'i Leae, Nitambezan' Añahare raho ty amy nanolorako i mpitoro-ampelakoiy amy valeko. Le natao'e Iisakare* ty añara'e.

¹⁹ Niareñe indraike t'i Leae le nisamake ty ana-dahi'e fah' eneñe ho a Iakòbe. ²⁰ Le hoe t'i Leae, Nitoloran' Añahare ravoravo fanjàka raho. Tsy mahay tsy himoneñe amako ty valiko henane zao, amy te nahatoly ana-dahy eneñe ho aze. Le natao'e Zebolònē† ty añara'e.

²¹ Ie aña le nahatoly anak' ampela re vaho natao'e Dinae‡ ty añara'e.

²² Nitiahien'Añahare amy zao t'i Rahkele le nahajanjiñe aze t'i Andrianañahare vaho sinoka'e ty hovi'e. ²³ Niaren-dre le nahatoly ana-dahy vaho nanao ty hoe, Fa nafahan' Añahare amako ty ìnje. ²⁴ Natao'e Iosefe§ ty añara'e ami'ty hoe: Ehe t'ie ho tovoña' IEHOVÀ ana-dahy.

Mihamaro ty Añondri' Iakòbe

²⁵ Ie nasama' i Rahkele t'Iosefe, le hoe t'Iakòbe amy Labàne. Ampionjono mb'eo raho himpoliako mb'an-toeko naho mb'an-taneko aña.

²⁶ Meo ahiko o valiko naho anako nitoroñako azoo, vaho ampionjono. Fohi'o i fifanehafako nitoroñako azoy.

²⁷ Aa hoe t'i Labàne ama'e, Naho nahatendreke fañisohañe a' maso'o raho, le mitoboha hey. Fa am-pitsikarahañe ty naharendrehako te nitahie' IEHOVÀ raho ty ama'o. ²⁸ Tinovo'e ty hoe, Ano ty ho tambe'o le hatoloko.

²⁹ Hoe t'Iakòbe ama'e, Fohi'o ty fifanehafako ho azo naho ty hasoa' o hare'oo t'ie amako. ³⁰ Ty kedekede tama'o taolo' i fiavikoy le fa nitombo ho

* **30:6** Dane: nañomey to † **30:8** Naftalý: mifangatotse ‡ **30:11** Gade; Mpirimboñe; mpifañosoñené § **30:13** Asere: fale * **30:18** Iisakare: hambam-peo ami'ty valesoa † **30:20** Zebolònē: asiñe ‡ **30:21** Dinae: ható § **30:24** Iosefe: ho tovoña'e abey

maro, vaho nitahy azo t'IEHOVÀ ndra aia aia ty nombako. Aa ie henaneo, ombia ty hanoeko ho a i trañokoy, zaho ka? ³¹ Aa hoe re: Ino ty homeako azo? Le hoe ty natoi' Iakòbe, Ko añomeza'o ndra inoñ' inoñe, fa naho o raha zao ty hanoe'o amako, le handrazeko vaho hambenako indraike o mpirai-lia'oo. ³² Angao ho tsitsifeko o mpirai-lia'oo te anito le fonga haviko ze añondry merembitike naho voanato, naho ze vik' añondry mainteinte, vaho ze ose poapoake ndra varevare; irezay ty ho tambeko. ³³ Hitalily ahy ty havantañako te aña, naho hiatreke o lahara'oo o tambekoo. Ze ose tsy varevare ndra poapoake oniñe amako, ndra ze vik'añondry tsy mainte le hatao kinametse.

³⁴ Noko zay, hoe t'i Labàne. Ie i vinola'oy. ³⁵ Fe amy àndroy avao le naveve' i Labàne ze hene oselahy varevare ndra poapoake naho ze ose-vave varevare ndra poake (naho ze aman-kafotiañe) naho ze vik' añondry mainte vaho natolo'e an-taña' o ana'eo; ³⁶ le nasitake lia telo andro amy Iakòbe, naho nandraze' Iakòbe ty ila' o mpirai-lia' i Labàneo. ³⁷ Nangalake ran-talý naho sohihy naho hatae tsotra t'Iakobe vaho niholire'e o ran-kataeo hampiboake ty foy amo ran-kataeo. ³⁸ Le napo'e aolo' o mpirai-liao o ran-kataeo añ'ila' o dabaoga finoma' o mpirai-liaoo t'ie avy hinondrano, ie toe mitongoa naho minon-drano. ³⁹ Aa ie nisahe añ' atrefa' o ran-kataeo o mpirai-liao le nampipoke anake tanteharañe ndra varevare, ndra poapoake. ⁴⁰ Navi' Iakòbe o ana'eo, le nampisahe'e amo misoritsoritseo naho amy ze mainte amo lia'rai' i Labaneo, toe naveve'e o mpirai-lia'eo, tsy naharo'e amo mpirai-lia' i Labaneo. ⁴¹ Ie te hisahe o hare maozatseo, le nasampe'e ey o ran-kataeo ho trea' o häreo amo dabaogao, soa te hisahe aolo' o ran-kataeo, ⁴² fa naho naleme o hareo, tsy nampipoha'e ao zay. Aa le ninjare maleme ty fanaña' i Labàne vaho naozatse o a Iakòbeo. ⁴³ Aa le vata'e niraorao indatiy, nihatsifotofoto o mpirai' lia'eo, ie amam-pitoro lahy naho ampela, rameva vaho borike.

31

Nandribotse amy Labàne t'Iakòbe

¹ Jinanji'e ty enta' o ana-dahi' i Labaneo, nanao ty hoe, Finao' Iakòbe ze fonga fanañan-drae'ay; le ty varan-drae'ay ty nampañefoefo aze. ² Ie niisa' Iakòbe ty vinta' i Labàne le naheo'e te tsy niatrefa'e manahake te taolo.

³ Aa le hoe t'IEHOVÀ am' Iakòbe, Mibaliha mb'an-tanen-droae'o mb'aman-drolongo'o mb'eo fa indrezako.

⁴ Aa le nampihitrife'e an-koike t'i Rahkele naho i Leae t'ie homb' am-piandrazañe mb'am-pirai-lia'e mb'eo. ⁵ Le nanao'e ty hoe, Treako ty vintan-drae'areo te tsy iatrefa'e manahake taolo, fe mañimb' ahy t'i Andri-anañaharen-draeko. ⁶ Fohi'areo t'ie nitoroñ' an-drae'areo an-kaozarako iaby, ⁷ fe nifañahian-drae'areo naho novae'e im-polo o tambekoo, f'ie tsy nimetean' Añahare hijoy ahy. ⁸ Ie nanao ty hoe: O varevareo ro tambe'o, le songa niterake varevare o hare'eo, aa ie nanao ty hoe, O tanteharañe ro tambe'o. Le hene nampipoke tanteharañe o hareo. ⁹ Aa le sininton' Añahare aman-drae'areo o hare'eo vaho natolo'e ahy.

¹⁰ Teo te indraik' amy sam-pisaheañey le nañinofy raho naho niandra vaho nahatreo te hene tanteharañe ndra varevare ndra poake o oselahy nitongoa amo mpirai-liao. ¹¹ Le hoe t'i anjelin' Añahare amako ama' nofy, O Iakòbe, vaho natoiko ty hoe, Intoy raho. ¹² Le hoe re, Ampiandrao fihaino vaho mahaoniña te songa tanteharañe ndra varevare ndra poake

ty oselahy misahe o hareo, amy te nitreako iaby ze nanoe' i Labàne ama'o. ¹³ Zaho i Andrianañahare' i Beteley, i nañoriza'o i vatomahay naho nifanta'oy. Miongaha arè, engao ty toetse toy vaho mimpolia mb'an-tanendongo'o aña.

¹⁴ Aa le hoe ty natoi' i Rahkele naho i Leae, Mbe aman' anjara ndra lova aña'anjomban-drae'ay hao zahay? ¹⁵ Tsy mone atao'e te ambahiny kanao naleta'e? mbore nabotse'e iaby o lafitih'i'ao. ¹⁶ Toe anay naho a o keleia'aio ze fonga hanaña'e nasintan' Añahare aman-drae'ay; aa le ano ze tsinaran' Añahare ama'o.

¹⁷ Niongak' amy zao t'Iakòbe naho nampiningire'e an-drameva o vali'eo naho o ana'eo, ¹⁸ vaho niroahe'e mb'eo ze hene hare'e naho o vara fa natonto'eo, o hanaña'e naho hare niazo'e e Padan' arameo, vaho nitehaf'e mb'amaman-drae'e Ietsake an-tane Kanàne aña. ¹⁹ Aa ie fa nimb'am-pañitsifan' añondri'e mb'eo t'i Labàne, le kinizo' i Rahkele o ndraharen' anjomba an-drae'eo. ²⁰ Toe nifañahie' Iakòbe t'i Labàne t'ie tsy nitalily ama'e te nienga, ²¹ ie nimotiotse mb'eo naho ze ama'e iaby. Niongake re nitsake i sakay,* le nitandrifie'e mb'am-bohibohi' i Gilade[†] mb'eo ty lahara'e.

Heañe' i Labàne t'Iakòbe

²² Natalily amy Labàne amy andro fahateloy te nibioñe t'Iakòbe. ²³ Aa le nendese'e o longo'eo naho nihoridañe'e fito andro vaho nahatratse aze am-bohibohi' i Gilade eo. ²⁴ Le niheo amy Labàne nte-Arame ami'tynofy t'i Andrianañahare nanao ama'e ty hoe, Mitomira, tsy hisaontsy am' Iakòbe ndra ty soa ndra ty raty.

²⁵ Aa le nitra' i Labàne t'Iakòbe. Fa nañoren-kibohotse am-bohitse ey t'Iakòbe, le nitobe am-bohibohi' i Gilade ao t'i Labàne mirolongo.

²⁶ Hoe t'i Labàne am' Iakòbe, Ino o nanoe'oo? Ie niponiora'o am-pamañahiañe vaho namaoke o anak' ampelakoo hoe miprohy nitsepahem-pibara. ²⁷ Ino ty nibioña'o am-pañahy naho nivokake amako tsy nitalily, ie ho nampionjoneko an-drebeke naho sabo vaho kantsàñe miharo kararàke. ²⁸ Tsy nimea'o ty hañondrohako o ana-dahiko naho anak' ampelakoo? Toe nanao hagegean-drehe te nanoa'o. ²⁹ An-tañako ty haozarañe hañoho-doza ama' areo fe nitsara amako ami'tynofy aniankale t'i Andrianañaharen-drae'o, ty hoe, Mitomira tsy hivolañe ndra soa ndra raty am' Iakòbe. ³⁰ Ie amy zao, ndra te tsy nete tsy nionjom-b'eo rehe ami'ty hamaniña'o ty anjomban-drae'o, manao akore te nikamere'o o ndraharekoo?

³¹ Le hoe ty natoi' Iakobe amy Labane, Toe nihemban-draho, nataoko ho nitavane'o amako o anak' ampela'oo. ³² Fe tsy ho veloñe ze isa'o mitañe o ndrahare'oo. Itsikaraho añatrefa' o longon-tikañe le endeso ze fanaña'o amako. Toe tsy nifohi' Iakòbe t'ie kinizo' i Rahkele.

³³ Aa le nimoake an-kiboho' Iakòbe ao t'i Labàne, naho an-kiboho' i Leae, vaho an-kiboho' i mpitoro-ampela roe rey fe tsy nahaisake. Niakatse an-kiboho' i Leae naho nizilik' an-kiboho' i Rahkele. ³⁴ Ie amy zao fa rinambe' i Rahkele o ndrahareo naho napo'e ambanen-pitobohañe an-drameva ao vaho nitoboha'e. Nitsitsife' i Labàne kodaba i kibohotsey fe tsy nahaoniñe.

³⁵ Le hoe re aman-drae'e, Ehe tsy ho viñera' ty talèko te tsy imeteako ongake añatrefa'o, fa miampela. Aa le nikodebe re fe tsy nitendreke o sampsampon-drahaao.

* **31:21** i saka jabajaba Eofratay † **31:21** Gilade: votre, taroñe maro mifehe

³⁶ Niviñetse amy zao t'Iakòbe le nendaha'e t'i Labàne; hoe t'Iakòbe amy Labàne. Ino o fiolàko? Ino o hakeoko nañoridaña'o ahy an-kelokeo?
³⁷ Aa ndra te nitsitsife'o tsoeke o haraokoo, ino amo haraon' anjomba'oo ty niisa'o? Apoho añatrefa' o longokoo naho o longo'oo etoañe, hizaka' iareo añivon-tika roe. ³⁸ Fa roapololo taoñe henanekeo ty nitraofako ama'o, le lia'e tsy nañary anake o añondri-vave'o naho o ose-vave'oo vaho tsy nihinanako o añondri-lahin-dia-rai'oo. ³⁹ Tsy nendeseko ama'o ze nirimitem-biby fa nivavèko i hamotsoañey; pinai'o an-tañako ndra ty kinametse antoandro ndra ty kinizo haleñe. ⁴⁰ Ie nabotse' ty fipisañañe te handro, nangoratsake te haleñe vaho nibiòña' ty roro o masokoo. ⁴¹ Inay i roapololo taoñe naha-mpiàmañ' anjomba'oo ahy rezay; nitoroñe azo folo-tao-efats' amby hahazoako i anak' ampela'o roe rey, vaho enen-taoñe o hare'oo, mbore novae'o im-polo i tambekoy. ⁴² Aa naho tsy nimpiamako t'i Andrianañaharen-draeko, t'i Andrianañahare' i Avrahame, naho i nampañeveñe Letsàkey le toe ho nampolie'o mañomaño. Nahavazoho o hasotriakoo naho o fitoloñan-tañakoo t'i Andrianañahare vaho nañendak' azo aniankale.

Mifañina t'i Labàne naho Iakòbe

⁴³ Aa le hoe ty natoi' i Labàne am' Iakòbe: Anak' ampelako o anak' ampelao, anadahiko o anadahio, hàreko o hareo vaho hene ahiko naho a i anakampelako rey ze isa'o. Fe ino ty hanoeko anito amo anak'ampelakoo, naho amo ana-dahy nisamahe'eo? ⁴⁴ Mbetoa arè hifañina, zaho naho ihe; le ie ty ho valolombeloñe añivon-tikañe. ⁴⁵ Aa le nandrambe vato t'Iakòbe vaho natroa'e ho ajiba. ⁴⁶ Le hoe t'Iakòbe aman-drolongo'e, Amorio vato, le nandrambe vato iereo naho navotre, vaho nikama amy votrem-batoy. ⁴⁷ Nanoe' i Labàne ty hoe Iegare-Sahadotà‡, f'ie natao Iakòbe Galedé. ⁴⁸ Hoe t'i Labàne, Valolombeloñe añivoko naho ihe androany ty votre toy. Aa le natao Galedé ty añara'e, ⁴⁹ naho Mizpa, fa hoe re, Hivazoho añivo'o naho zaho t'IEHOVÀ naho tsy amy ila'ey ty raike. ⁵⁰ Naho sarerahe'o o anak' ampelakoo, ndra mañenga valy mandikoatse o anakoo, itika tsy amampañalañalañe, tiahio te valolombeloñe añivon-tika t'i Andrianañahare.

⁵¹ Le hoe t'i Labàne am'Iakòbe, Hehe ty votre tia naho ty ajiba najadoko añivo'o naho zaho. ⁵² Valolombeloñe ty votre tia, naho valolombeloñe ty ajiba toy te tsy handilarako mb' ama'o mb'eo, vaho tsy ho lika'o ty votre toy ndra ty ajiba toy homb'amako, hañeloke. ⁵³ T'i Andrianañahare' i Avrahame, naho t'i Andrianañahare' i Nakore, t'i Andrianañaharen-droae' iareo ty hizaka añivon-tika. Aa le nifanta amy Fañeñeñan-drae'e Letsàke t'Iakòbe, ⁵⁴ le nañenga soroñe ambohitse eo t'Iakòbe naho kinoi'e o longo'eo hikama, le nikama vaho nialeñe amy vohitsey.

32

¹ Nañaleñaleñe t'i Labàne t'ie nitroatse naho norofa'e o ana'eo naho o anak'ampela'eo vaho nitata'e. Niavotse amy zao t'i Labane nimpoly mb'ama'e aña. ² Nanonjohy i lia'ey t'Iakòbe le nifanalaka ama'e o anjelin' Añahareo; ³ aa ie niisa' Iakòbe le nanao ty hoe, Toben'Añahare itoy, le natao'e ty hoe Makanaime* i toetse zay.

Nañitrife'e Ravoravo t'Esave

⁴ Nirahe' Iakòbe ty hiaolo aze mb' amy Esave rahalahi'e mb'an-tane Seira, tane' i Edome aña, ⁵ le nafanto'e ami'ty hoe, Endeso mb'amy talèko

‡ 31:47 Iegare-sahadotà, Galedé: ty votrem-balolombeloñe * 32:3 Makanaime : tobe roe

Esave aña o entañe zao, Hoe ty enta' Iakòbe mpitoro'o, Nañialo amy Labàne ao raho, le nitambatse aña ampara' henane; ⁶ Amañ' añombe naho borike, mpirai-lia naho ondevo ampela naho lahy; le nampihitrifeko mb' amy talèkoy mb'eo ty saontsy hahatreavako fañisohañe am-pahaïsa' o.

⁷ Nibalike mb'am'Iakòbe i irake rey nitalily ty hoe, Nivotrak' amy Esave rahalahi'o zahay, le mb'etoan-dre hifanalaka ama'o rekets'ondaty efa-jato.

⁸ Nirevendreveñe naho nangebahebak' amy zao t'Iakòbe; le zinara'e ho lia roe ze hene ondaty ama'eo naho o mpirai-liao naho o mpirai-trokeo vaho o ramevao ⁹ fa hoe re, Aa naho pok'ami'ty lia-raike t'i Esave vaho horidañe'e, le hifiora' i sehanga'ey.

¹⁰ Le hoe t'Iakòbe, O ry Andrianañahare' i Avrahame raeko naho Andrianañahare' ietsàke raeko, ry IEHOVÀ nanao tamako ty hoe, Mimpolia mb' an-tane'o mb'amo longo'oo mb'eo vaho hanoako soa. ¹¹ Tsy mañeva ahiko ty piliti'e amo fiferenaiña'oo naho amo figahiña'o amo mpitoro'oo, kanao reketse kobaiñe raho te nitsake ty Iordane toy vaho fa aman-dia'e roe henaneo. ¹² Mihalaly ama'o, hahao am-pitàn-drahalahiko, am-pità'i Esave, fa ihembañako, hera homb'eto re handafa ahy naho rakemba reketse keleiañe. ¹³ Ihe fa nitsara ty hoe, Toe hañasoa azo raho, vaho hampiraeko amo fasen-driakeo o tarira'oo, ze tsy mete iaheñe ty amo fifamorohota'eo.

¹⁴ Aa le nitobe eo re amy haleñey, vaho nilivae'e amo raha rinambem-pitá'eo ty ho ravoravo amy Esave zoke'e: ¹⁵ ose-vave roanjato, naho oselahy roa-polo, añondri-vave roanjato naho añondri-lahy roapolo, ¹⁶ rameva minono rekets' ana'e telopolo, añombe-vave efapolo, añombe-lahy folo, borike vave roapolo, vaho ana-borike folo. ¹⁷ Natolo'e an-taña' o mpitoro'eo irezay, sindre lia'e, vaho hoe re amo mpitoro'eo, Iaolò raho naho adaradiso ami'ty lia-raike ty lia-raike.

¹⁸ Le hoe re amy aoloy, Ie mifanampe ama'o t'i Esave zokeko, manao ty hoe, Ama'ia rehe? Homb'aia v'iheo? vaho ho ama' ia o aolo'oo? ¹⁹ le hoe ty hatoi'o: A i Iakòbe mpitoro'oy, ravoravo nampisangitrife'e amy Esave talekoy; Indroy ie! manonjohy anay. ²⁰ Zay ty nafanto'e amy faharoey naho amy fahateloy, vaho amo nanonjohy i mpirai-lia rey iabio, ami'ty hoe: Ty hoe zao ty ho saontsie' areo amy Esave te mizo aze ²¹ le tovoño ty hoe, Ingo, manonjohy anay t'Iakòbe mpitoro'o; ty amy asa'e ty hoe, Hampanintsiñeko amo ravoravo miaolo ahio ty haviñera'e; ie aña le ho treako ty lahara'e, ke ho no'e. ²² Aa le nitsake aolo' aze i banabana'ey, ie nialeñe an-kialo atoy.

Ifandrapaha' Iakòbe

²³ Nitroatse amy haleñey re, ninday i vali'e roe rey naho i mpitoro'e roe rey, vaho i ana-dahy folo-raik' amby rey nitsake ami'ty fitsaha' Iabòke.

²⁴ Nasese'e mb'eo naho nampitsahe'e i torahañey vaho nampitsahe'e ze tama'e.

²⁵ Aa le nidoke ho vahiny t'Iakòbe vaho nigarabiñe ama'e ty lahilahy ampara' te nipore'a ty maraindray. ²⁶ Ie nioni'e te tsy hahagiok' aze, le pinao'e ty fikatsoha' ty moja'e, vaho nikatsoke ty moja' Iakòbe amy fifandrapaha'ey. ²⁷ Le hoe re, Avotsoro fa hanjirike i àndroy. Fe hoe re, Tsy havotsoko naho tsy itata'o hey.

²⁸ Aa le nanoa'e ty hoe, Ia ty añaara'o? Iakòbe, hoe re. ²⁹ Le hoe re, Tsy hatao Iakòbe ka ty tahina'o, fa Israele[†], amy t'ie nifanehak' aman' Andrianañahare naho am'ondate vaho nahatañe. ³⁰ Hoe ty nañontanea'

[†] 32:29 Israele: Mifanehake aman' Añahare

Iakòbe, Ehe, itsarao ty tahina'o. Fa hoe re, Ino ty añontanea'o ty añarako? Le nitata'e eo. ³¹ Aa le natao' Iakòbe ty hoe Penoele i toetsey, ami'ty hoe, Nifañatre-daharañe aman' Añahare raho, fe narova'e ty fiaiko. ³² Nanjirike i àndroy t'ie nitsake e Penoele ty amy moja'ey. ³³ Aa le tsy fikamà' o nte-Israeleo pake henane ty oza' i moja mipitek' am-pikatsohañey, amy te nipaohe'e ty oza' i fikatsoha'i moja' Iakòbey ami'ty lahin-oza' i tohakeiy.

33

Mifañaoñe t'i Esave naho Iakòbe

¹ Le nampiandrà' Iakòbe o fihaino'eo naho niisa'e te nimb' ama'e mb'eo t'i Esave reketse ty lahilahyefa-jato. Aa le zinara'e amy Leae naho amy Rahkele vaho amy mpitoro'e ampela roe rey o ajajao. ² Nanoe'e aolo'e ey o mpitoroñeo rekets' o ana'eo, le nanonjohy iereo t'i Leae naho o ana'eo vaho amboly ao t'i Rahkele naho Iosefe. ³ Niary mb'aolo' iereo mb'eo re nibokok' an-tane im-pito am-pañarineña i zoke'ey ⁴ Aa le nilay mb'ama'e mb'eo t'i Esave niambotrak' amy fititia'ey le norofa'e vaho sambe nangoihoy. ⁵ Niandra t'i Esave nahaoniñe o rakemba reketse keleiañeo, le hoe re, Ia o mindre lia ama'oo? Hoe re: O anake natolon'Añahare am-patarihañe amo mpitoro'oo. ⁶ Nitotoke mb'eo amy zao o mpitoroñ' ampela rekets' anakeo, le nibokok' ambane; ⁷ nimb'eo ka t'i Leae rekets' anake naho nibokoke; nañarine amy zao t'Iosefe naho i Rahkele sindre niondreke.

⁸ Hoe t'i Esave, Ino ty dika' i lia'e maro nikovovoke nifanalaka amakoy? Tinoi' Iakòbe ty hoe, Ty hahatendrehañe fañisohañe am-pivazoho'a' i talèkoy. ⁹ Fa hoe t'i Esave, Mahàtsek' ahy o ahikoo, ry rahalahiko, tano ho azo o azoo. ¹⁰ Hoe t'Iakòbe, Aiy, ie nahatrea isok' am-pahaisaha'o, le rambeso an-tañako o ravoravoo; amy te zaho mahaisake o laharoo, le hoe mahatrea ty laharan' Añahare, vaho t'ie nino'o. ¹¹ Ehe rambeso i ravoravo binanabanako, fa niferenaiñan' Añahare, naho maro o amakoo. Le nosihe'e vaho rinambe'e. ¹² Le hoe re, Antao hitrao-dia, le hiaolo anahareo raho. ¹³ Fe hoe ty natoi'e, Fohi' ty talèko te kamba o ajajao, vaho amako o rene'e naho añombe-vave rohy, aa naho ilosoran-tehake ndra andro raike le fonga ho mate o hareo. ¹⁴ Ehe te hañavelo aolo' i mpitoro'ey mb'eo ty talèko, hisitsirako mora mb'eo ty amo hare mangovovok' aolo ahio naho ty amy filesalesa' o ajajao, ampara' te pok' amy talèko e Seire aña. ¹⁵ Aa le hoe t'i Esave, Angao handivako ama'o ondaty amakoo. Fa hoe re, Fa akore? Ee t'ie hahatrea fañisohañe am-pahaisaha' i talèkoy. ¹⁶ Aa le nimpoly mb'e Seire aña amy àndro zay t'i Esave.

¹⁷ Le nimb'e Sokote* aña t'Iakòbe le nañoren-kivoho, naho namboara'e fialofañe o añombe'eo, vaho natao Sokote i toetsey.

Nandoake e Sikeme t'Iakòbe

¹⁸ Niavy tsy añañañe an-drova' i Sikeme an-tane Kanàne eo t'Iakòbe boake Padan' arama aña, vaho nañoren-kivoho aolo' i rovay ey. ¹⁹ Le vinili'e bogady zato amo ana' i Khamòre rae' i Sikemeo ty ila' i teteké nampipoha'e i kivoho'ey. ²⁰ Le nañoren-kitrely eo ze natao'e El-Elohe-Israele†.

* ^{33:17} sokote: soke maroan-Tandroy: sokemitraha. † ^{33:20} El-Elohe-Israely: El' Tsitongerè' Israely

34

Ty Fanakalirañe i Dina

¹ Niakatse hitilike o ampela' i taneio t'i Dinae, anak'ampela' i Leae, nisamake ama' Iakòbey. ² Ie nahaisak' aze t'i Sikeme, ana' i Khamòre nte-Khive, mpifehe' i taney, le rinambe'e naho vinaho'e vaho nanimba aze. ³ Fe niptek' amy Dinae ana' Iakòbe ty tro'e; nitea'e i ampelay, toe nihonkoñe'e an-drehake i somondraray. ⁴ Aa le hoe t'i Sikeme amy Khamòre rae'e, Alao ho ahiko i ampelay ho valiko.

⁵ Jinanji' Iakòbe te nitivae'e t'i Dinae anak'ampela'e fe niarak' añombe am-piandrazañe aña o ana-dahi'eo le nianjiñe hey t'Iakòbe ampara' t'ie nimpoly.

⁶ Niavotse mb'am' Iakòbe mb'eo t'i Khamòre hifanaontsy, ⁷ le boak' an-kivok'aña o ana' Iakòbeo te nahatsanoñe, ie niompo' ty fombo amy hagegeam-bey nanoe'e am' Israeley, t'ie namahotse i ana' Iakòbey, fa vata'e tsy fanao.

⁸ Aa hoe ty enta' i Khamòre am' iereo, Mifamitran-trok' amy anak'ampela' areoy t'i Sikeme anako; ehe, atoloro' aze ho vali'e.

⁹ Mifanambalia ama'ay; meo anay o anak' ampela' areoo le engao ho anahareo o anak' ampela'ao, ¹⁰ le mitraofa fimoneñe, fa añatrefa' areo o taneo; imoneño le mikaloa ao vaho manontona vara ama'e.

¹¹ Hoe ka t'i Sikeme aman-drae'e naho amo rahalahi'eo, Ehe t'ie hahatreo fañisohaña am-pihaino'areo, ze saontsie' areo le homeako. ¹² Aonjono naho alosoro amako ty lafitihy naho ty ravoravo le ho tolorako ze hampanoe' areo, fa, ehe, meo ahiko i somondraray ho valy.

¹³ Fe vinale' o ana'Iakòbeo am-pamañahiañe t'i Sikeme naho i Khamòre (ie nameta i Dinae, zai' iareo.) ¹⁴ Hoe ty asa' iareo tama'e, Tsy mete'ay o raha zao, ty manolotse ty zai'ay ampela ami' ty tsy afa-boy fa fañinjeañe ama'ay.

¹⁵ Aa kanao hiantofa'ay, le hifanahake ama'ay nahareo, te songa hafahañ' ofoke ze atao lahilahy ama' areo; ¹⁶ vaho hitolora'ay o anak' ampela'ao, naho hangala'ay o anak' ampela' areoo naho hiharoa'ay fimoneñañe vaho ho ondaty raike tika. ¹⁷ Fa naho tsy mete mañaoñe anay tsy hisavatse, le hendese'ay ty anak'ampela'ay, hienga.

¹⁸ Ninò' i Khamòre naho i Sikeme ana' i Khamòre i saontsy zay; ¹⁹ le tsy nihenekenek' amy rahay i ajalahiy, amy te nampinembanembañ' aze i anak' ampela' Iakòbey. Toe ie ty nanañ' asy amo hene añañombandrae'eo.

²⁰ Aa le nivotrak' an-dalambein-drova' iareo t'i Khamòre naho i Sikeme ana'e le nilañoñe am' ondati' i rova' iareoio ami'ty hoe, ²¹ Ondaty mora aman-tika iereo; angao himoneñe an-tane atoy, hihezeñe ama'e, fa heheke, tsahatse iareo ty habei' o taneo; hengaen-tika ho valy o anak' ampela' iareoo vaho hitoloran-tika o anak' ampelan-tikañe. ²² Fa ami'ty fetse toy avao ty hitraofa' iareo fimoneñe aman-tika h'onday raike: te songa hisavatse ze lahilahy amantika amy t'ie ro afa-boy. ²³ Tsy ho antika hao o añañombe' iareoo naho o vara' iareoo naho ze hene hare'iareo? Aa le antao hiantoke, hitraofa'iareo fimoneñe aman-tika.

²⁴ Jinanji' ze mpienga an-dalambei' i rovay ty saontsi' i Khamòre naho i Sikeme ana'e; le songa sinavatse o lahilahio, ze hene mpienga an-dalambei' i rovay.

²⁵ Aa ie amy andro fahateloy, naho mbe nitivontivoñe iereo, le sindre nandrambe ty fibara'e ty ana' Iakòbe roe, i Simone naho i Levy, rahalahi' i Dinae, naho nitoañe mb'amy rovay mb'eo, vaho fonga zinamañe ze atao lahilahy. ²⁶ Zinevo' iareo am-pibara t'i Khamòre naho i Sikeme naho rinambe'iereo boak'añ'anjomba' i Sikeme ao t'i Dinae vaho niavotse. ²⁷ Nitendreke o loloo i ana' Iakòbe ila'e rey vaho kinopa'iereo i rovay ty amy zai'e ampela vinètay. ²⁸ Fonga finao' iereo o mpirai-lia' iareoo naho o tro-rai' iareoo, o borike' iareoo, ze an-drova ao naho ze an-kivoke ey; ²⁹ naho ze hene vara'iareo naho o keleia' iareoo naho o vali' iareoo vaho fonga nikopahé' iereo ze añañombá ao.

³⁰ Le hoe t'Iakòbe amy Simone naho i Levy, Nanolo-tsotry ahiko nahareo le mitròtrotse amo mpimone' ty tane toio raho, amo nte-Kanàneo, amo nte-Perèzeo; aa kanao tsy ampeampe ondatikoo, hifanontoñe iereo, hamono ahy, le ho rotsake reketse hasavereñañe. ³¹ Fa hoe ka iereo, Aa vaho ho nanoe'e tsimirirañe hao i zai'aiy?

35

Mibalike mb'e Betele t'Iakòbe

¹ Le hoe t'i Andrianañahare am'Iakòbe, Miongaha, le mionjona mb'e Betele mb'eo vaho imoneño. Mandranjia kitrely aman' Añahare nisode-hàñe ama'o ie nibioñe an-daharan-joke'o Esave. ² Aa le hoe t'Iakòbe amy hasavereña'ey naho amo mpiama'e iabio, Apoho ze fonga ndrahare ambahiny ama' areo, miliova, naho mañova saroñe; ³ vaho antao hionjoñe mb'e Betele mb'eo handranjiako kitrely amy Andrianañahare nanoíne ahiko an-tsan-kaloviloviako vaho nindre amako amy ze lala-nombàko. ⁴ Aa le fonga natolo' iareo am' Iakòbe o sampsampon-draha an-taña' iereo naho o kiviro an-dravembia' iareoo vaho nakafi' Iakòbe ambane' ty kile marine' i Sikeme ao.

⁵ Ie nañavelo, le fa amo rova mañohoke iareoo ty firevendreveñañe aman' Añahare, vaho tsy nihoridañe' iareo o ana Iakòbeo. ⁶ Nandoake e Loze an-tane-Kanàne ao, toe i Betele, t'Iakòbe, ie naho ondaty nindre ama'e iabio, ⁷ le nandranjy kitrely eo vaho natao'e ty hoe El-Betele* i toetsey amy te teo ty niboahan' Añahare ama'e amy fibioña'e andrahalahi'ey. ⁸ Nihomake eo t'i Deboraе, mpiatra' i Ribkaе, vaho naleveña ambane' ty kile ambane' i Betele ao; le nanoe'e Alòne-Bakòte†.

⁹ Niboak' am' Iakòbe indraike t'i Andrianañahare amy nienga'e i Padan' arame naho nitata azey, ¹⁰ le nanao ty hoe ama'e t'i Andrianañahare: Iakòbe ty añara'o, le tsy hatao Iakòbe ka, fa Israele ty ho tahina'o; aa le natao'e Israele ty tahina'e. ¹¹ Le hoe t'i Andrianañahare ama'e, Zaho ro El-Sadai‡; miraoraòa naho mamorohota; hiboak' ama'o ty foko naho firimboñam-poko, vaho mpanjaka maro ro hiboak' an-tsandri'o. ¹² Le hatoloko azo i tane' natoloko i Avrahame naho Ietsàke vaho hatoloko amo tarira'o hanonjohy azoo i taney. ¹³ Aa le nienga aze t'i Andrianañahare, amy toetse nitsara'e ama'ey. ¹⁴ Nampitroara' Iakòbe ajiba i toetse nitsara'e ama'ey, ajiba vato, naho nampidoaña'e enga-rano vaho nañiliña'e solike. ¹⁵ Aa le natao Iakòbe ty hoe Betele i toetse nitsaran' Añahare ama'ey.

Toly t'i Beniamine, Mihomake t'i Rahkele

¹⁶ Nañavelo boak'e Betele iereo, naho didý tsy nipotítse Efrata te nitsongo t'i Rahkele vaho nisilofe' ty fañeña'e. ¹⁷ Ie añate' i fitsongoa'ey

* 35:7 El-Betele: Andrianañahare' i Betela † 35:8 Alone-bakote: Kilem-pandalañe ‡ 35:11 Andriampañotroñe, kila lefe'e

le hoe i mpiatra'ey ama'e, ko hembañe fa ana-dahy tovo'e toy. ¹⁸ Ie ho nirofotse ty arofo'e (toe nihomake), le natao'e Benoný§ ty añara'e, f'ie nitokaven-drae'e Beniamine*. ¹⁹ Aa le nihomake t'i Rahkele le naleveñe an-dalañe mb'e Efrata (i Betlèkheme) ao, ²⁰ vaho nampijadoña' Iakòbe vatolahy an-kibori'e eo; i vatolahin-kiborin-dRahkele henaney. ²¹ Nionjom'beo t'Iakòbe vaho nañoreñe ty kiboho'e ambali' ty fitalakesañ' abo' i Edère ey.

²² Ie nimoneñe amy taney t'Israele, le niheo amy Bilhae, sakezan-drae'e ao t'i Reòbene le niolora'e vaho jinanji' Israele.

Ie amy zao, folo-ro'amby ty ana-dahi' Iakòbe. ²³ O ana' i Leaeo: i Reòbene (tañoloñoloña' Iakòbe), i Simone, i Levy, Iehodà, Isakare, vaho i Zebolone. ²⁴ O ana' i Rahkeleo: Iosefe naho i Beniamine. ²⁵ O ana' i Bilhae, mpitoro' i Rahkeleo: i Dane naho i Naftalý. ²⁶ O ana' i Zilpahe, mpitoro' i Leaeo: i Gade naho i Asère. Irezay ro ana' Iakòbe nitoly e Padan' arame aña.

Ty Havilasi' Ietsàke

²⁷ Niheo mb' aman-drae'e Ietsàke e Mamrè aña t'Iakòbe, an-drova' i Harbà atao Khebroney, i nañialoa' i Avrahame naho Ietsàkey. ²⁸ Ie amy zao, zato-tsi-valom-polo taoñe ty ian' andro' Ietsàke. ²⁹ Nigadoñe ty fipetro' Ietsàke le nivilasy vaho natontoñe am' ondati'eo, androanavy henek' andro; nandentek' aze t'i Esave naho Iakòbe ana'e.

36

O Tarira i Esaveo

¹ Iretoy ro tarira' i Esave (i Edòme). ² Nangala-baly amo anak'ampela nte-Kanàneo t'i Esave: i Adàe ana' i Elòne nte-Kite, i Oholibamà ana' i Anà ana' i Tsibòne nte-Kive, ³ naho i Bosemàte ana' Iesmaèle, rahavave' i Nebaiòte. ⁴ Nisamake i Elifàze amy Esave t'i Adàe; nisamake i Reoèle t'i Bosemate; ⁵ le nisamake i Elifaze, Ieise, Ialàme, naho i Kòrahke t'i Oholibamà. Ie ro ana' i Esave nasama'e an-tane Kanàne ao.

⁶ Nendese' i Esave o vali'eo, o ana-dahi'eo, o anak' ampela'eo, naho ze hene añañomba'e, naho o añombe'eo, o hare fiandraz'e iabio naho ze fonga vara natonto'e an-tane Kanàne ao vaho nisese mb'an-tane hisitaha'e an-daharan-drahalahi'e Iakòbe aña, ⁷ amy te loho maro ty fanaña' iareo roe, tsy haha-fiharo-pimoneñañe; tsy nitsahatse iareo i tane nañialoa'iareoy ty amo hare' iareoo. ⁸ Aa le nitoetse am-bohi' Seire ao t'i Esave; Edome 'nio t'i Esave.

⁹ Iretoañe ro tarira' i Esave, rae' o nte-Edomeo, am-bohi' Seire ao. ¹⁰ Ty tahina' o ana' i Esaveo le: i Elifaze ana' i Adàe, vali' i Esave; i Reoèle, ana' i Bosmate vali' i Esave. ¹¹ O ana' i Elifazeo: i Temane, i Omare, i Tsefò, naho i Gatame, vaho i Kenaze. ¹² (Sakeza' i Elifaze, ana' i Esave t'i Timnàe nisamake i Amalek' amy Elifaze.) Iereo ro ana' i Adae, vali' i Esave. ¹³ Iretoy ro ana' i Reoèle: i Nàkate, naho i Zèrake, i Samà, vaho i Mizà. Iereo ro ana' i Bosemate, vali' i Esave. ¹⁴ Iretoy ro ana' i Oholibamàe, ana' i Anà, ana' i Tsibone, vali' i Esave: nisamahe'e amy Esave t'Ieose naho Ialame vaho i Korake.

Fifokoa naho Mpanjaka' i Edome

¹⁵ Iretoy ro fifokoa' o ana' i Esaveo. O ana' i Elifaze, tañoloñoloña' i Esaveo: i Temane talè, i Omare talè, i Zefò talè, i Kenaze talè, ¹⁶ i Korake talè, i Gatame talè, i Amaleke talè; ie o talè boak'amy Elifaze ana' i Adae

§ 35:18 Ben-Ony: Anadahim-paoreako * 35:18 Beniamine: Anam-pitàn-kavana

an-tane Edomeo. ¹⁷ Iretoy ro ana' i Reoèle ana' Esave: i Nakàte talè, i Zeràke talè, i Samà talè, vaho i Mizà talè; ie ro talè boak' i Reoèle an-tane Edome ao, ana' i Basemate vali' i Esave. ¹⁸ Intoy o ana' i Oholibamàe, vali' i Esaveo: t'Ieòse talè, Ialame talè, vaho i Kòrake talè; ie ro talè nasama' i Oholibamàe, vali' i Esave naho ana' i Anà. ¹⁹ Ie ro ana' i Esave (i Edome), naho o talè'eo.

²⁰ Intoy o ana' i Seire nte-Khorý mpimoneñe amy taneio: i Lotane naho i Sòbale naho i Tsibòne naho i Anà, ²¹ naho i Disone, naho i E'tsere, vaho i Disane; ie ro talè' o nte-Khorio, ana' i Seire an-tane' Edome ao. ²² Le o ana' i Lotàneo: i Khorý, naho i Hemame vaho i Timnae rahavave' i Lotane. ²³ O ana' i Sòbaleo : i Alvane naho i Manakate, naho i Ebale, i Sefò vaho i Oname. ²⁴ O ana' i Tsiboneo: i Aià naho i Anà ie roe; i Anà ty nahatendreke o rano mae am-patrañeo ie niarake o borike' i Tsibone rae'eo. ²⁵ O ana' i Anào: i Disone naho i Oholibamàe anak' ampela' i Anà. ²⁶ O ana' i Disoneo: i Kemdane, naho i Esbane, naho iit'rane, vaho i Kerane. ²⁷ O ana' i E'tsereo: i Bilhane, naho i Zaavane, vaho i Akane. ²⁸ O ana' i Disaneo: i Otse naho i Arane. ²⁹ O talè' o nte-Khorio: i Lotane talè, i Sobale talè, i Tsibone talè, i Anà talè, ³⁰ i Disone talè, i Etsere talè, i Disane talè; ie ro talè' o nte-Kkorio; o mpiaolon-tane Seireo.

³¹ Intoy o mpanjaka nifehe an-tane' Edome ao aolo' te amam-panjaka nifehe o ana' Israeleoo. ³² Nifehe ty rova atao Dinhabà e Edome ao t'i Belà ana' i Beore. ³³ Nivilasy t'i Belà le nandimbe aze ho mpanjaka t'Iobabe ana' i Zeràke nte-Botsrà. ³⁴ Nivilasy t'Iobabe le nandimbe aze ho mpanjaka t'i Khosàme tan-tane' o Temanio. ³⁵ Nivilasy t'i Khosàme, le nandimbe aze ho mpanjaka t'i Hadade ana' i Bedade, i nahagioke i Midiane a monto' i Moabey; atao Avite i rova'ey. ³⁶ Nivilasy t'i Hadade, le nandimbe aze ho mpanjaka t'i Samlà nte-Masrekà. ³⁷ Nivilasy t'i Samlà, le nandimbe aze ho mpanjaka t'i Saòle nte-Rekhobòte boak' amy sakay aña. ³⁸ Nivilasy t'i Saole, le nandimbe aze ho mpanjaka t'i Baal-kanàne ana' i Akbore. ³⁹ Nivilasy t'i Baal-kanàne ana' i Akbore, le nandimbe aze ho mpanjaka t'i Hadare; natao Paò i rova'ey; Mehetabèlè anak' ampela i Matrède, anak' ampela' i Mezahabe ty vali'.

⁴⁰ Zao o tahina' o talè' i Esave amo hasavereña'eo naho o rova'eo; ty tahina' iareo: i Timnà talè, i Alvà talè, Ietète talè, ⁴¹ i Aholibamae talè, i Elà talè, i Pinone talè, ⁴² i Kenaze talè, i Temane talè, i Mibtsare talè, ⁴³ i Magdiele talè, Irame talè; ie ro mpiaolo' i Edome ty amo akiba' iareo an-tane fanaña' iareoo. (rae' o nte-Edomeo t'i Esave)

37

Sonia' i Esave naho Iakobe

¹ Nitotse an-tane Kanàne nañialoan-drae'e ao t'Iakòbe. ² Ie ty talili' ty hasavereña' Iakòbe.

Mañinofy ty Haroandriañañe t'Iosefe

Ie nifolo-tao-fito-amby t'Iosefe le niarake añondry mindre amo raha-lahi'eo, ie mbe niajalahy naho nindre amo ana' i Bilhae naho amo ana' i Zilpae, valin-drae'eo, vaho ninday talily raty iareo aman-drae'e aña t'Iosefe. ³ Nikokoa' Israele mandikoatse o ana'e iabio t'Iosefe, amy t'ie ty ana' i haanterá'ey vaho namboara'e saroñe lava soa vahotse*. ⁴ Ie nioni' o rahalahi'eo te nisohen-drae'e mandikoatse iareo le nalaim-bintañe aze vaho tsy nahafirehak' am-panintsíñañe ama'e.

* 37:3 lamba maro volo ndra reketse taña'e

⁵ Teo te nañinofy t'Iosefe, le natalili'e amo rahalahi'eo, f'ie nañindra ty falai' iareo aze. ⁶ Hoe ty asa'e ama'e, Ehe janjiño tynofy ninofiseko toy. ⁷ Teo tika namehe taho an-tetek' ao. Nitroatse amy zao i fehekoy le niadaoro eo, le ingo niariseho ahy ey ty fehe' areo nibokok' amy fehetahokoy. ⁸ Hoe o rahalahi'eo ama'e, Toe ihe hao ty hamelek' anay? Vata'e hifehe anay v'iheo? Aa le niindra ty falaim-binta' iareo ty amo nofi'eo nahoh o asa'eo.

⁹ Nañinofy indraike, vaho natalili'e amo rahalahi'eo. Inao ty nofiko tovo'e: naheoko te nibotrek' amako i àndroy, i volañey vaho ty vasiañe folo raik'amby. ¹⁰ Aa ie natalili'e aman-drae'e naho amo rahalahi'eo le nañendak' aze ty rae'e ami'ty hoe: Nofy manao akore o nofise'oo? Toe hene hidrakadrakak' an-tane ama'o hao zahay naho i rene'o vaho o rahalahi'oo? ¹¹ Aa le nitsikirìk' aze o rahalahi'eo, fe nitsakorèn-drae'e i asa'ey.

Naletan-drahalahi'e t'Iosefe

¹² Nañavelo mb'e Sikeme aña o rahalahi'eo hampiandrazeñe i lia-rain-drae'ey. ¹³ Le hoe t'Israele am'Iosefe, Tsy miarake i lia-raikey e Sikeme aña hao o rahalahi'oo? Antao arè, hiraheko mb'am'iereo mb'eo. Tinoi'e ty hoe, Intoy raho. ¹⁴ Aa le hoe re ama'e, Akia, sario ke mbe soa avao iereo naho mbe soa ka o mpirai-liao; le mibaliha mb'amako mb'etoa amantality. Aa le nampihitrife'e mb'eo boak' am-bavatane' i Khebrone ao mb'e Sikeme mb'eo, ¹⁵ le teo ty ondaty nanjo aze nirererere an-kivok' ey, vaho nañontanea' indatiy, Ino ty paia'o. ¹⁶ Mipay o rahalahikoo 'ni-raho, hoe re, Ehe, ampahafohino ahy ty fiandraza' iareo añondry. ¹⁷ Hoe indatiy, Fa nienga iereo, Inao ty tsinanoko am' iereo, Antao ho mb'e Dotane mb'eo. Aa le nihitrike mb' amo rahalahi'eo re vaho tendrek' am'iereo e Dotane aña. ¹⁸ Nitalakese' iereo, le ie mbe tsy marine ro nikilily hañohofan-doza ama'e. ¹⁹ Hoe ty vesoveso' iareo, Hehe, mb'etoa i mpañinofiy, ²⁰ antao arè hamono aze naho hagodon-tika an-kadaha ao; naho hatalilin-tika te nabotse' ty biby romotse, vaho ho onin-tika ty figadoña' o nofi'eo. ²¹ F'ie jinanji' i Reòbene, le navotso'e am-pità' iareo ami'ty hoe, Tsy hamitak' ate aze tika. ²² Tinovo' i Reòbene am'iereo ty hoe, Ko mampiori-dio; afetsaho an-kadaha an-jerezere tane atoy, fa ko mipao-tañañe ama'e—ie te hamotsotse aze am-pità' iareo hampolia'e aman-drae'e. ²³ Aa naho pok' amo rahalahi'eo t'Iosefe, le hinalo' iareo am' Iosefe i saro'ey, i saroñe lava ama'ey, ²⁴ le rinambe' iereo vaho nafetsa' iereo an-kadaha ao. Nikapaike i kadahay, tsy aman-drano.

²⁵ Niambesatse amy zao iereo nikama; fa ie nampiandra fihaino le nahaisake lia-rain-te-Iesmaèle nangovovòke boak' e Gileade aña andrameva ninday fisomantsaïke na ho fihosotse vaho lite, nizotso mb'e Mitsraime mb'eo. ²⁶ Le hoe t'Ièhodà amo rahalahi'eo, Ino ty tombo'e ho an-tika te vonoeñe i rahalahin-tikañey na ho etaheñe i lio'ey? ²⁷ Antao handetak' aze amo nte-Iesmaèleo le tsy hampidoñan-tañantika, amy te rahalahintika, toe nofon-tikañe. Le nihañoñe' o rahalahi'eo. ²⁸ Ie nimbeo o mpanao takinake nte-Midianeo le tinari' iereo, nañakatse Iosefe amy kadahay vaho naleta' iereo volafoty roapolo amo nte-Iesmaèleo vaho nendese' iareo mb'e Mitsraime aña t'Iosefe.

²⁹ Nibalike mb'amy kadahay mb'eo t'i Reòbene naho naheo'e te tsy an-kadaha ao t'Iosefe, vaho rinia'e o saro'eo. ³⁰ Nivalike mb'amo rahalahi'eo re nanao ty hoe, Tsy eo i ajalahiy, le zaho! aia ty hombako? ³¹ Aa le rinambe' iareo i saro'ey, le nandenta vik'ose, vaho nalo' iareo ami'ty lio'e

ao i saroñey. ³² Nahitrik' aña i saro-vinahotsey, naho nendese' iareo amandrae'e ami'ty hoe, Ingo ty nizoe'ay, ehe vazoho ke ie i saron' ana'oy, ke tsie. ³³ Napota'e, le nanao ty hoe, Saron' anak' toy! Navorembore' ty biby hako, tsy mikalafo te rinomidromitse t'Iosefe. ³⁴ Rinia' Iakòbe amy zao o saro'eo naho nisadia gony vaho nandala i ana-dahi'ey andro maro. ³⁵ Hene niongake hañohoñé aze o ana-dahi'eo naho o anak' ampela'e iabio, f'ie nifoneñé tsy hohoñeñé, ami'ty hoe, Aiy, hizotso mb'an-tsikeokeoke mb' aman' ana-dahiko raho an-kontoke. Zay ty fangoihoian-drae'e aze; ³⁶ Toe naleta' o nte-Midianeo e Mitsraime aña re, amy Potifare, roandria' i Parò, talèm-pigaritse.

38

I Iehodà naho i Tamara

¹ Le henane zay, nienga amo rahalahi'eo t'Iehodà nitsile mb' ami'ty nte-Adolame atao Hirà. ² Le nitendreke anak'ampela nte-Kanàne atao Soae t'Iehodà; le nengae'e vaho nimoak' ama'e. ³ Niaren-dre, nisamak' anadahy; le natao'e Ere ty añara'e. ⁴ Niareñe indraike re nahatoly ana-dahy, le natao'e Onane ty añara'e. ⁵ Mbe nahatoly ana-dahy indraike re le natao'e Selà ty añara'e. Te Kezibe aña t'ie nahatoly aze. ⁶ Nangala-baly ho a i Ere, tañoloñoloña'ey t'Iehodà; Tamare ty añara'e. ⁷ Fe nilo-tserek' am-pivazohoa' IEHOVÀ t'i Ere, tañoloñoloña' Iehodà, vaho navetra' IEHOVÀ. ⁸ Le hoe t'Iehodà amy Onane, Mimoaha amy valin-joke'oy vaho rañao, hampitroara'o tariratse ho a i rahalahi'oy. ⁹ Aa kanao napota' i Onane te tsy ho aze i tiry zay, le ie nizilik' amy valin-joke'ey ao, naria'e an-tane ty rompilahia'e, tsy mone hanolo-tariratse aman-drahalahi'e. ¹⁰ Tsy nino' IEHOVÀ i sata'ey, le navetra'e ka. ¹¹ Aa hoe t'Iehodà amy Tamare vinanto'e, Mitoboha ho ramavoiñe añañjomban-drae'o ao ampara' te añoñ'ay t'i Selà, ie niereñere'e ty hoe: Hera ho simba ka re manahake i zoke'ey. Aa le nimb'eo t'i Tamare nimoneñe añañjomban-drae'e aña.

¹² Le roñoñe aña, le nihomake ka ty vali' Iehodà, anak' ampela' i Soae; aa ie nanintsiñe t'Iehodà, le nionjoñé mb'e Timnà mb'amo mpañitsibolon' añañdri'eo mb'eo rekets' i Hirà nte-Adolame rañe'ey. ¹³ Le nitalilieñ' amy Tamare ty hoe, Inao, mionjomb'e Timnà ty rae'o hañitsike o añañdri'eo. ¹⁴ Aa le nafaha'e o lamban-dramavoi'eo, naho nanakondaharañe an-damba marerarerera, naho nifolonkoñé, vaho nitobok' andalam-bei' i Enaime*, amy lala-mb'e Timnà. Toe niisa'e fa ajalahy t'i Selà f'ie tsy nampañengaeñe aze ho vali'e. ¹⁵ Tendrek' aze t'Iehodà, le natao'e ho tsimirirañe amy t'ie nisaron-doha. ¹⁶ Nivike mb'ama'e añañolo' i lalañe mb'eo re, nanao ty hoe, Mimetea hiolorako, fe ninofi'e t'ie vinanto ampela'e. Hoe re, Ino ty anangea'o ahy, hiharoa'o? ¹⁷ Hoe ty natoi'e, Hampisangitrifeko vi'e boak' amy lia-raickey. Le hoe re, Tsy ho mea'o tsoake hey hao ampara' te hahitri'o? ¹⁸ Hoe re, Tsoake manao akore ty hatoloko azo? Natoi'e ty hoe, O bangem-pitombo'oo naho i tali'oy vaho o kobaiñe am-pità'oo. Aa le natolo'e aze, naho niolots' ama'e; vaho nampiareñe'e. ¹⁹ Niongake re, nienga; le nafaha'e i marerareray, vaho naombe'e indraike o lamban-dramavoi'eo. ²⁰ Nampihitrife' Iehodà am-pità' i nte-Adolame rañe'ey ty vi'e, hañavake i tsoak' an-taña' i rakembaiy, f'ie tsy nirendreke. ²¹ Aa le nañontanea'e ondaty amy toetseio ty hoe, Aia i tsimiriran-kazomanga te Enaime tañ' olon-dalañey? le hoe iereo, Tsy aman-tsimiriran-kazomanga ty atoy. ²² Aa le nibalike mb' am' Iehodà aña

* **38:14** Enaime: Lala mb'amo ranoo

re nitalily ty hoe: Tsy nirendreko, vaho nanao ty hoe amako ondaty androva ao, Tsy aman-tsimiriran-kazomanga ty atoy. ²³ Hoe ty natoi' Iehodà, Angao rambese'e ho ama'e i raha rezay tsy mone hiankahafañe; hehe te nampihitrifeko mb'ama'e ty vi'e f'ie tsy nioni'o.

²⁴ Ie aña ty telo volañe, le natalily am' Iehodà ty hoe, Nañarapilo t'i Tamare vinanto'oy, ie mivesatse ty amy hatsimirira'ey. Le hoe t'Iehodà, Akaro re ho forototoeñe. ²⁵ Ie nakareñe, le nañitrifa'e saontsy i rafoza'ey, ami'ty hoe, Ty temp'o' o raha rezao ro nampivesatse ahiko. Natovo'e ty hoe, Ehe hotsohotso hey, ia ty temp'o' o bange-pitombokeo, o talio, vaho o kobaiñe? ²⁶ Niantofa' Iehodà i raha rey vaho nanao ty hoe, Mahity te amako re amy te tsy natoloko aze i Selà anakoy. Fe tsy niolora'e ka.

²⁷ Tondroke amy fisamaha'e te inay, hambañe ty an-kovi'e ao. ²⁸ Aa ie nitsongo, nakare' ty raike ty taña'e vaho finehe' i mpanahay fole mena i tañañey le nanao ty hoe, Itoy ty niakatse valoha'e. ²⁹ Aa ie nanintoñe i taña'ey, le hehe te nipotitse eo ty zai'e, vaho hoe re, Akore ty niboroboñafa'o? ho ama'o o jebañe zao. Aa le natao ty hoe Perètse[†] ty añara'e. ³⁰ Niboake nandimbe aze i rahalahi'ey ninday i fole menay an-taña'ey, le natao Zeràke[‡] ty añara'e.

39

I Iosefe naho ty vali' i Potifare

¹ Ie amy zao, fa nendeseñe nizotso mb'e Mitsraime aña t'Iosefe, vaho vinili' i Potifare nte-Mitsraime, roandria' i Parò, talè o mpigaritseo, amo nte-Iesmaèle ninday aze nizotso mb'eo. ² Nindre am' Iosefe t'IEHOVÀ, le niraorao indatiy, ie nimoneñe aña anjomban-tempo'e nte-Mitsraime ao. ³ Ie nioni' i temp'o'ey te nitahy aze t'i IEHOVÀ naho nampihene'e IEHOVÀ ze hene nanoen-taña'e, ⁴ le nisoheñe am-pihaino'e t'Iosefe amy fitoroña'e naho nanoe'm pamandroñe i anjomba'ey vaho hene napo'e an-taña'e ao ze fanaña'e. ⁵ Mifototse amy nampifeheañe aze i anjomba'ey naho ze hene vara'ey, le nitahie' IEHOVÀ ty anjomba' i nte-Mitsraimey ty am' Iosefe. Le tamo fanaña'e iabio naho aña'anjomba ao vaho an-tetek' ey ty hanintsi' IEHOVÀ. ⁶ Aa le nado'e an-taña' Iosefey ze hanaña'e iaby, le tsy eo ty nidarè'e naho tsy ty mahakama nikamae'e avao.

Nimontsotsòre naho naram-bintañe t'Iosefe. ⁷ Aa ie roñoñe aña, nikiroke Iosefe ty vali' i temp'o'ey vaho nanao'e ty hoe, Miharoa tihy amako. ⁸ F'ie nifoneñe, naho nanao ty hoe amy vali' i temp'o'ey, Inao! kanao etoan-draho, tsy aña'anjomba'e ao ty idarea' i tompokoy, vaho napo'e an-tañako ze hene hanaña'e. ⁹ Tsy aman-joke raho aña'anjomba atoy, vaho tsy eo ty nazi'e amako naho tsy ihe, kanao vali'e. Aa le akore ty hanoako o halò-tsereke zao, hampanan-kakeo ahy aman' Añahare? ¹⁰ Aa ndra t'ie nañedre Iosefe boak' andro, tsy nihaõne'e, tsy niolora'e, tsy nindreza'e. ¹¹ Aa teo te indraike, ie nizilik' aña'anjomba ao hitoloñe, naho tsy ama'ondaty i anjombay ¹² le vinontiti' i rakembay i saro'ey, nanao ama'e ty hoe, Miolora amako! F'ie nado'e am-pitá'e i saro' ey vaho napolotse mb'alafe'e ao. ¹³ Ie nanjo' i saro'ey an-taña'e amy napolitira'e mb'alafe'aoy ¹⁴ le kinaikai'e o mpiañ' anjomba'eo vaho nanao'e ty hoe, Hehe, ninday nte-Evre aman-tika atoy i valikoy hañonjitse an-tika. Nimoak' amako ao re hamahotse ahiko, le nikaike raho; ¹⁵ ie tsinano'e i koiakoy, le nado'e amako i saro'ey vaho nibotitsike mb'alafe

[†] 38:29 Peretse: jebañe hoe an-kijoly vaky [‡] 38:30 Zerà: mireandreañe

ao. ¹⁶ Nahaja'e ama'e ao i saro'ey ampara' te nimpoly i vali'ey, ¹⁷ le nindrai'e i talili'ey, ami'ty hoe, Nizilik' amako ao hanitse ahiko i ondevo nte-Evre nendese'o ama'ay atoiy; ¹⁸ fe nampipoña-peo raho le nikoiake, naho napo'e amako i saro'ey vaho nibioñe alafe ao.

¹⁹ Ie jinanji' i tempo'ey ty enta' i vali'ey nanao ty hoe: Zao ty nanoa' i mpitoro'oy ahiko; le niforoforo ty haviñera'e, ²⁰ naho rinambe' i tempo' Iosefey re vaho najo'e am-porozò ao, an-toem-pijoñam-pirohim-panjaka ao; aa le tam-balabey ao re, ²¹ fe nindre am' Iosefe t'IEHOVÀ vaho niferenaiña'e; nisohe'e añatrefa' ty mpifehe' i kijam-pigaritañey. ²² Aa le napo' i mpifehey am-pitá' Iosefe ze hene mpirohy am-balabey ao, le ndra inoñ' ino ty nanoeñe ao, ie ty nitoloñe. ²³ Tsy nidarè' i mpigari-beiy ze nado'e am-pitá' Iosefe, amy te nindreza' IEHOVÀ; vaho nampibodobodoe' IEHOVÀ ze hene nanoe'e.

40

Ty Nofim-Pirohy Roe

¹ Ie roñoñe aña, le nandilatse amy tale'ey, amy mpanjaka' i Mitsraimey ty mpanjotso fitovy naho ty mpanoña' i mpanjaka' i Mitsarimey.

² Nibosek' amy mpitoro'e roe rey t'i Parò, toe amy beim-panjotso fitovi y naho amy beim-panoñakey, ³ le najo'e am-porozò añañ anjomba' i mpifehem-pigaritsey amy valabey nandrohizañe Iosefey. ⁴ Nampifeheze' i mpifehey Iosefe iereo vaho niatrahe'e, ie nitambatse andro maro am-pandrohizañe ao. ⁵ Teo te nañinofy i mpanjotso fitovi y naho i mpanoñam-panjaka' i Mitsarimey, i sindre nidoñe am-po' valabey rey, ie roe—sambe nañinofy amy haleñey, songa aman-dika'e i nofi'ey. ⁶ Niheo mb'am'iereo mb'eo t'Iosefe te maraindray hisary le naheo'e te nimonjetse. ⁷ Aa le nañontanea'e i mpitoro' i Parò nitrao-pirohy ama'e am-po' ty anjomba' i talè'ey rey, Ino ty mampihohokòhoke ty lahaba' areo henaneo? ⁸ Aa hoe ty asa' iareo tama'e, Songa nañinofy, vaho tsy eo ty mahavaky aze. Le hoe t'Iosefe am' iereo, Tsy an' Andrianañahare hao ty vaki-nofy? Ehe, atalilio ahy.

⁹ Aa le natalili' i beim-panjotso fitovi y am' Iosefe ty nofi'e, ami'ty hoe, Amy nofikoy ao: Inao! tañatrefako ty vahe, ¹⁰ telo ty tsampañe amy vahey; le hoe te nibotiboty naho nandriake o voñe'eo naho nampiboake valòboke matoe o nivorovoroo, ¹¹ vaho an-tañako ty fitovi' i Parò; aa le rinambeko o valobo keo naho pinine pineko am-pitovi' i Parò ao vaho nazotsoko am-pitá' i Parò i fitovi y. ¹² Le hoe t'Iosefe ama'e, Intoy ty vaki'e, i tsempa'e telo rey ro telo andro, ¹³ ie modo ty telo andro, le hampiandrà' i Parò ty añaambone'o naho hampolie'e amy fitoloña'oy, vaho hazotso'o am-pitá' i Parò ty fitovi'e, manahake i lili'o taolo ihe ni-mpanjotso fitovy ama'e.

¹⁴ Ehe tiahio raho t'ie manintsiñe; tretrezo vaho misaontsia amy Parò ty hañakarañe ahy ami' ty valabey toañe. ¹⁵ Fa toe tinavañe an-tane' nte-Evre aña raho; le ndra atoa, tsy nanao ze ho nampijoñe ahiko am-porozò atoa.

¹⁶ Ie nioni' i beim-panoñakey te nisoa i vaki-nofiy, le hoe re am' Iosefe, Ama' nofy ka raho, naho nahatre a tsikelo telo an-dohako eo, ¹⁷ amo sikelo amboneo ty karaza-mahakama maro natoñake ho a i Parò fe tsinimo' o voroñe o an-tsikelo an-dohakoo. ¹⁸ Hoe ty natoi' Iosefe, Intoy ty vaki'e: telo andro i tsikelo telo rey, ¹⁹ añaate' ty telo andro le hampionjone' i Parò ama'o ty añaambone'o vaho haradorado' i Parò an-katae mijadoñe ey vaho ho tsimohe' o voroñe o ama'o ty nofo'o.

²⁰ Ie amy andro fahateloy, tondroke ty andro fitiahiam-pisamahañe i Parò, le nanao sabadidake ho a o mpitoro'e iabio t'i Parò vaho naonjo'e amo mpitoro'eo ty añambone' i beim-panjotso fitoviy naho i beim-panoñakey. ²¹ Nampoli'e amy maha beim-panjotso fitovi'ey i mpanjotso fitoviy, vaho nazotso'e am-pitâ' i Parò ao i fitoviy; ²² le naradorado'e i beim-panoñakey, ty amy vinaki' Iosefe am' iereoy. ²³ Fe tsy nahatiahy aze i beim-panjotso fitoviy, toe nihaliño'e.

41

Vinaki' Iosefe ty Nofi' i Parò

¹ Ie peake ty taoñe roe, le nañinofy t'i Parò, inao! ie nijohañe marine i saka Nailey, ² le inge nitroatse amy Nailey ty añombe rene'e fito mendo naho niogoðgo vaho nihinañe amo vondroñeo. ³ Nitroatse nanonjohy irezay ty tamanañe fito niriverive naho boroka njagarodoñe marine i fito ila'e añ'olo' i Nailey rey. ⁴ Nabotse' i añombe rene'e fito molonko naho boroka rey i añombe rene'e fito mendo naho vondrake rey, le nivañoñe t'i Parò. ⁵ Nirotse indraike re nañinofy fañindroe'e: Hehe te sambe amantaho'e raike ty voto tsako fito vañoñe toe daoza'e. ⁶ Inge ka ty voto-tsako lolondo'e fito, manifitse, finorototo' ty tiok' atiñana nitiry afara. ⁷ Nagodra' i voto manifitse rey i voto fito daoza'e vokatse rey. Nivañoñe amy zao t'i Parò le nizoe'e tenofy. ⁸ Ie nimaraiñe le niembetse ty arofo'e; aa le nirahe'e ty hikoike ze fonga tsimaito' i Mitsraime naho ze hene mahihitse ama'e ao. Natalili' i Parò ama'e o nofi'eo fe leo raike tsy nahavaky irezay amy Parò.

⁹ Aa le hoe ty asa' i beim-panjotso fitoviy amy Parò, Nampitiahie' ty andro toy ahiko o tahikoo. ¹⁰ Teo te niviñera' i Parò o mpitoro'eo vaho sindre najo'e am-balabey añ'anjomba' i beim-pigaratsey, izaho naho i beim-panoñakey. ¹¹ Songa nañinofy amy haleñey, ie naho zaho, sindre amandika'e i ninofise'ey. ¹² Nitraok' ama'ay ty ajalahy nte-Evre, mpitoro' i beim-pigaratsey. Natalili'ay ama'e, le nadika'e ama'ay o nofi'aio, sambe nadika'e ama'e i ninofise'ey. ¹³ Ie amy zay, i nandika'e ama'aiy ty nefetsake: nahereñe amy tolon-drahakoy raho vaho nanoan-tsingere mañaty i mpanoñakey.

¹⁴ Aa le nampañitrife' i Parò t'Iosefe, le navota' iareo masìka am-balabey ao; nihitsike re naho nañova saroñe vaho niheo mb'amy Parò mb'eo. ¹⁵ Aa hoe t'i Parò am' Iosefe, Nañinofy raho, vaho tsy eo ty mahafandika aze. Fe tsinanoko ty ama'o te ihe ty mahavaky nofy naho maha-dika aze. ¹⁶ Tinoi' Iosefe t'i Parò ami'ty hoe, Tsy amako fa i Andrianañahare ty hanoñe i Parò an-kanintsiñe. ¹⁷ Aa hoe t'i Parò am' Iosefe, Ie nijohañe añ'olo' i Nailey amy nofikoy le ¹⁸ naheoko te niakatse i Nailey ty añombe rene'e fito mendo naho vondrake nihinañe amo vondroñeo. ¹⁹ Inge amy zao te nitroatse boak' ao nanonjohy iareo ty añombe fito raty, loho molonko, naho boròka. Mbe liako tsy nahatre a i haraty zay an-tane Mitsraime atoy. ²⁰ Nagodra' i añombe rene'e molonko naho boroka rey i añombe rene'e vondrake rey, ²¹ fe ndra t'ie nampibotseke tsy ho naharendre' ondaty te nahabeake kanao mbe nihambañe amy teoy ty harati' iereoy. Le nitsekake raho. ²² Ie amy nofikoy le mbore nahatre a voto tsako fito vañoñe naho soa, sambe niboak' ami'ty taho'e raike. ²³ Indrok' amy zao te niboake manonjohy iereoy ty voto-tsako fito jiba, kifo'e, finorototo' ty tiok' atiñanañe, ²⁴ le nabotse' i

voto beikolopoke rey i voto fito soa rey. Aa ie nataliliko amo ambiasao, leo raike tsy nahabejañ'aze amako.

²⁵ Aa hoe t'Iosefe amy Parò, Raike ty nofi' i Parò; fa nabentan' Añahare amy Parò ty hanoe'e aniany. ²⁶ I añombe fito soa rey ro fito taoñe; vaho fito taoñe ka i voto tsako fito soa rey; hambañe inofy rey. ²⁷ I añombe fito boroka naho molònko rey ro fito taoñe, manahake zay i kifo'e fito jinoi' i tiok' atiñanañey rey. San-tsalikoañe fito taoñe zay. ²⁸ Ie i vinolako amy Parò, te nabentan' Añahare amy Parò i hanoe'ey. ²⁹ Inao! handrambañe an-tane Mitsraime atoy fito taoñe ty san-kavokaram-bey. ³⁰ Hanonjohy zay te hitroatse ty san-kasalikoañe fito taoñe; le fonga ho haliño an-tane Mitsraime atoy i havokarañey; vaho habotse' ty san-kerè i taney. ³¹ Tsy ho tiahy an-tane atoy ka i havokarañey amy hasalikoañe hanonjohy azey ami'ty hamafe' i haoreñañey. ³² Aa kanao nifañin-droe'e i nofi' i Parò le fa natsaton' Añahare i rahay vaho antitotse ty andro hametsahan'Añahare aze. ³³ Aa soa re te ho joboñe' i Parò t'indaty mahatsikarake naho mahihitse hampifehea'e ty tane Mitsraime, ³⁴ vaho hamototse higene mpisary amy taney t'i Parò handrambe ty faha-lime' i taney amy fito taoñe vokatse rey. ³⁵ Le hatonto' iareo ze hene mahakama amy taon-joba hitotsake rey, naho hahaja ambanem-pitâ' i Parò i tsakoy hañajàñe mahakama amo rovao. ³⁶ Ahaja ho a i taney i mahakamay, ho amy taon-kerè fito hifetsak' an-tane Mitsraime atoy rey tsy haitoa' ty san-kasalikoañe ty tane toy.

Ty Nañonjonañe Iosefe

³⁷ Ni-no' i Parò naho ze hene mpitoro'e i saontsy zay. ³⁸ Le hoe t'i Parò amo mpitoro'eo, Hahaoniñe ondaty mañirinkiriñe itoy hao tika—ie aman' Arofon' Añahare? ³⁹ Aa hoe t'i Parò am'Iosefe, Kanao nabentan' Añahare ama'o i he'e zay, tsy eo ty mahatsikarake naho mahihitse te ama'o. ⁴⁰ Feheo ty trañoko, ihe 'nio, vaho ty falie'o ro hampitsaoke ondatiko iabio; i fiambesam-panjakañey avao ty mahabey ahy te ama'o. ⁴¹ Le hoe t'i Parò am'Iosefe, Hehe, fonga nampifeheko azo ty tane Mitsraime; ⁴² le nafaha' i Parò am-pitâ'e i bange-fitombo'ey naho naombe'e am-pitâ' Iosefe naho sinaro'e siki-leny naho niravahe'e tohi-rozañe volamena ty fititia'e ⁴³ vaho nampijoñe'e amy sareten-tsorotâ'ey le nikoikoiheñe aolo'e mb'eo ty hoe: Mitongalefa! Le nampandilie'e iaby i tane Mitsraimey. ⁴⁴ Nanao ty hoe am' Iosefe t'i Parò, Zaho o Parò zao, fe naho tsy ihe, le tsy eo ty hañonjo fitâñe ndra fandia an-tane Mitsraime atoy iaby. ⁴⁵ Nomei' i Parò ty tahina Tsofnate-paneàke* t'Iosefe le natolots' aze ho vali'e t'i Asenate†, ana' i Potifera, mpisoro' i One; vaho nionjom-beo nanitsike i tane Mitsraimey t'Iosefe.

⁴⁶ Ni-telopolo taoñe t'Iosefe te nijohañe aolo' i Parò mpanjaka' i Mitsraime. Niavotse añ'atrefa' i Parò t'Iosefe vaho nitsitsihe'e ty tane Mitsraime. ⁴⁷ Namokatse am-botri'e i taney amy taoñe fito vañoñe rey. ⁴⁸ Aa le hene natonto'e ze mahakama an-tane Mitsraime ao amy fito taoñe rey vaho nahaja'e amo rovao o mahakama; songa rova ro nañajañe ty mahakama boak' amo teteke mañohok' azeo. ⁴⁹ Nañaja tsako mira amo fasen-driakeo t'Iosefe, tsifotofoto kanao tsy nahafañiak' aze, amy te loho bey tsy nilefe volily.

* ^{41:45} Tsofnate-paneàke: Mpampiborake ty raha mietake † ^{41:45} Asenate: Norizañe amy talen-kihitse

⁵⁰ Nahatoly ana-dahy roe t'Iosefe aolo' o taom-polakeo, toe nisamaha' i Asenate, ana' i Potifera mpisoro' i One. ⁵¹ Natao' Iosefe Menasè‡ ty añara' i tañoloñoloña'ey, fa hoe re, Nampandikofen' Añahare ahy i hene fisotriakoy naho ty anjomban-draeko iaby. ⁵² Natao'e Efraime§ ty faharoe, Amy te: Nampiraorao ahy an-tane nampiore ahy ao t'i Andrianañahare.

⁵³ Nimodo amy zao i taoñe fito vokatse an-tane Mitsraimey rey; ⁵⁴ le niorotse nitsatoke i fito taon-tsan-kerè rey ty amy saontsi' Iosefey. Hene nikerè ze tane aña fe hene ama' mahakama o an-tane Mitsraimeo. ⁵⁵ Ie fonga nisalikoeñe ty antane Mitsraime, le nitoreo mahakama amy Parò ondatio. Aa hoe t'i Parò amo nte-Mitsraime iabio, Akia mb'am' Iosefe mb'eo le ze taroñe'e ama' areo ty hanoe' areo. ⁵⁶ Aa naho nandrambañe ty tane toy i san-kerèy, le sinoka' Iosefe o riha iabio vaho naleta'e amo nte-Mitsraimeo, amy te nimafe ty kerè an-tane Mitsraime ao. ⁵⁷ Niheo am'Iosefe e Mitsraime ao iaby ty tane toy hivily tsako, amy te nanitsike ty tane bey toy ty hamafe' i hasalikoañey.

42

Mb'e Mitsraime aña o Rahalahi' Iosefeo

¹ Naho nioni' Iakòbe te e Mitsraime aña ty mahakama, le hoe t'Iakòbe amo ana'eo, Ino ty ifangarefa' areo? ² Inao, hoe re, tsinanoko te aman-tsako ty Mitsraime; akia mizotsoa mb'eo vaho iviliaño ho an-tika, hiveloman-tika fa tsy hivetrake. ³ Aa le nizotso mb'e Mitsraime mb'eo ty rahalahi' Iosefe folo hikalo mahakama aña. ⁴ Fe tsy nampindreze' Iakòbe amo zoke'eo t'i Beniamine zai' Iosefe fa hoe re, ke ho zoem-boiñe. ⁵ Aa le nindre amo nañavelo mb'eo hikaloo, o ana'Israeleo, amy te an-tane' Kanàne ao ka i san-kèrey.

⁶ Toe nimpifehe i taney t'Iosefe, mpandetak' amy ze fonga ondati' i taney. Le nimb'eo o rahalahi' Iosefeo nibaboke an-tane aolo'e eo. ⁷ Aa naho nahaisake o rahalahi'eo t'Iosefe, le nifohi'e, fe nimintse ho ambahiny am'iereo, vaho nendakenda'hе, Boak'aia v'inahareoo? hoe re. Hoe iereo, Hirik'an-tane Kanàne aña hikalo mahakama. ⁸ Toe nirendre' Iosefe o rahalahi'eo, f'ie tsy naharendreke aze. ⁹ Nitiahi' Iosefe o ninofise'e iareoo, le hoe re am' iereo, Mpifilo nahareo, nivotrak' atoy hahaisake ty fihaloa' o taneo! ¹⁰ Le hoe iereo tama'e, Aiy, ry talèko, ty hikalo mahakama ty nitsatoha' o mpitoro'oo atoy. ¹¹ Songa ana' t'indaty raike zahay; ondaty vantañe, fa tsy mpisary tane o mpitoro'oo. ¹² Hoe re am' iereo: Aiy, toe nimb'atoy nahareo handrendreke ty fiboridaña' o taneo! ¹³ Hoe iereo, Mpitoro'o zahay, roahalahy folo-ro' amby, ana' t'indaty e Kanàne ao, fe an-drae'ay aña ty tsitso'e vaho tsy eo ty raike. ¹⁴ Aa hoe t'Iosefe am' iereo: Ie i vinolako ama'areoy, toe mpisary nahareo. ¹⁵ Inao t'ie tsoheko: kanao veloñe t'i Parò, tsy hiavotse atoy nahareo naho tsy pok' atoy heik' i tsitso'areoy! ¹⁶ Ampihitrico ami'ty raik' ama' areo i zai' areoy le hambenañe an-drohy ao nahareo, hitsohañe ty enta' areo ke ama'areo ty hato, fa naho tsie, kanao veloñe t'i Parò, le mpiapiapia. ¹⁷ Aa le fonga natonto'e am-balabey ao telo andro.

¹⁸ Ie amy andro fahateloy, le ty hoe ty nanoa' Iosefe, Ano zao soa te ho veloñe, amy te mpañeveñ' aman' Añahare raho: ¹⁹ aa naho ondaty vañoñe nahareo, angao an-traño nandrohizañe anahareo atoy ty rahalahi' areo raike. Le akia, añendeso mahakama ty amy hasalikoañey o keleia' areoo, ²⁰ vaho endeso mb'etoa i tsitso' areoy, hañato o enta' areoo, le tsy

‡ 41:51 Menasè: mampahaliño § 41:52 Efraime: mahavokatse

hikoromake. Aa le nanoe' iereo. ²¹ Hoe ty vesoveso' iareo, Inao, toly amantika ty nanoen-tika amy rahalahin-tikañey, nionin-tika i halovilovimpiai'ey, ie nitoreo aman-tikañe, ie tsy nete nitsanoñe. Toly ndra hehe ty fangovitañe mifetsak' aman-tikañe. ²² Natoi' i Reòbene ty hoe, Tsy vinolako hao te tsy hanoan-draty i ajalahiy? F'ie tsy nañaoñe vaho hehe te paiaeñe i lio'ey. ²³ Namoea' iareo te nirendre' Iosefe iaby i hoe zay fa ampañivoa' iareo ty mpandika. ²⁴ Nivìk' am'iareo hey re nirovetse, naho nibalike le nisaontsy, naho jinobo'e am' iereo t'i Simone vaho rinohi'e aolom-pihaino' iareo. ²⁵ Nandily t'Iosefe le natsafeñe tsako o goni' iareoo naho songa nahereñe am'ondatio an-goni'e ao ty drala'e vaho nivatieñe amy liay. Nanoëñe ho a' iareo zay.

Mimpoly mb'e Kanàne aña

²⁶ Nalogologo' iereo ambone' o borìke'eo o mahakamao vaho nienga. ²⁷ Aa teo ty nanokak' i goni'ey hivaty i borìke'ey t'ie nitobe, nizoe'e i drala'ey, inge t'ie am-bava' i goniy eo. ²⁸ Hoe re amo rahalahi'eo, Nabalik' amako i dralakoy, ie o an-gonikoo. Ho namoe'ay iereo fa nirevendreveñe, le nifanao ty hoe, Ino ty nanoan' Añahare aman-tikañe?

²⁹ Ie pok' aman-drae'e an-tane' Kanàne aña, le natalily ama'e ze hene nifetsak' am'iereo, ami'ty hoe, ³⁰ Nañomey tsipeha anay indatiy, ty talè' i taney nanisy anay te inao mpijekejeke amy taney. ³¹ Fe hoe ty natoi'ay ama'e, Ondaty mahity zahay fa tsy mpitingañe. ³² Mpirahalahy folo ro' amby zahay, foetse raik' aman-drae'ay; tsy eo ty raike, vaho amandrae'e an-tane' Kanàne aña ty tsitso'e henaneo. ³³ Le hoe indatiy, i mpifehe' i taney ama'aiy, Amy hoe zao ty haharendrehako te ondaty vantañe nahareo: angao amako atoy ty raik' amo rahalahi' areoo, indeso mahakama ty amo hasalikoñaño o añañomb'a' areoo, vaho mañaveloa; ³⁴ fe hitrifo mb'atoy i tsitso' areoy haharendrehako te tsy mpifilo nahareo fa ondaty vañoña. Ie amy zay, havotsoko ama'areo i rahalahi'oy vaho hikalo an-tane atoy nahareo.

³⁵ Ie sambe nampidoañe ty goni'e, le hehe te amy goni'ey ty kotrandala'e. Aa naho niisa' iereo naho i rae' iareo o kotran-drala' iareoo, le nangebahebake. ³⁶ Le hoe ty nanoa' Iakòbe rae' iareo, Toe nampihontoha' areo ahy o anakoo, tsy eo t'Iosefe, tsy eo t'i Simone vaho te hampisintone' areo ka t'i Beniamine. Fonga nidoñ' amako! ³⁷ Aa hoe ty asa' i Reòbene aman-drae'e, Vonò i ana-dahiko roe rey naho tsy hendeseko mimpoly ama'o atoy. Apoho an-tañako ato le zaho ty hampipoly aze ama'o. ³⁸ Fe hoe re, Tsy hizotso mb'eo i anakoy, mate i rahalahi'ey le ie ty honka'e. Aa ie mizo voiñe amy lia handena' areoy le hazotso'areo an-kontoke mb'antsikeokeok'ao o volo-fotikoo.

43

Mitoha mbe Mitsraime Fañindroe'e

¹ Mbe nizeke mafe amy taney ty san-kerè. ² Aa naho fa nikamae' iereo i mahakama nendese' iereo boake Mitsraimey, le hoe ty rae' iareo ama'e, Akia ihereño, mikaloa mahakama tsy ampeampe ho antika.

³ Aa hoe t'Iehodà ama'e, Nañatahata anay aman-titike indatiy, ami'ty hoe, Tsy ho oni' areo ka ty tareheko naho tsy indreza' i zai' areoy. ⁴ Aa naho ampihitrife'o hindre ama'ay ty zai'ay, le hizotso mb'eo zahay hivily mahakama ho azo; ⁵ fa naho tsy haha'o handeha re, le tsy hizotso mb'eo zahay, amy nihatahata' indatiy, ty hoe, Tsy ho isa'areo ty tareheko naho tsy ama' areo ty zai' areo. ⁶ Hoe t'Israele, Ino ty nijoia' areo ahiko ami'ty

fivola' areo am'indatiy t'ie mbe aman-drahalahy? ⁷ Hoe ty natoi' iareo, Nandohy anay ty ama'ay naho o longo'aio indatiy, nanao ty hoe, Mbe velom-bao ty Rae' areo? Manañe ana-dahy ila'e hao? Aa kanao nañontane re, vinale'ay. Ho nihai'ay aia te ho nisaontsie'e ty hoe, Ampizotsò mb' atoy i rahalahi'oy? ⁸ Le hoe t'Iehodà am' Israele rae'e, Ampindrezo amako i ajalahiy, le hionjon-jahay, soa te ho veloñe tika fa tsy hivetrake—Ihe naho zahay vaho o keleian-tikañe. ⁹ Zaho avao ty ho tsoake ho aze; hamolilie'o an-tañako. Aa naho tsy habaliko ama'o atoy, havotrako añatrefa'o, le ee ty ho amako nainai'e i hakeo zay. ¹⁰ Aa naho tsy nihenekenek' avao tika le fa ho n'indroe nimpoly.

¹¹ Aa le hoe ty nanoa' Israele rae' iareo, Naho izay, le ano zao, Añendeso amo goni' areoo o vokatse soa' ty tane toio, vaho ahitrifo amy 'ndatiy ho ravoravo ty aoly fihosotse tsy ampeampe naho tantele kede naho fisike naho fampafirañe naho rame naho katra vaho sakoañe. ¹² Endeso an-taña' areo in-droe' o dralao. Tintino hibalike mb'eo an-taña'areo i drala nabalik' amo goni' areoo; kera nilosoreñe. ¹³ Endeso ka ty zai'areo le miongaha, mibaliha mb'am' indatiy; ¹⁴ lonike te ho tretreze' i El-Sadai abey nahareo añatrefa' indatiy, hamotsora'e i rahalahi'areoy naho i Beniamine. Aa naho zaho, lehe ampihontohañe le hihontoke. ¹⁵ Aa le nendese' o lahilahio i ravoravoy naho indroe' ty drala'e am-pit  'iareo vaho i Beniamine le niongake naho nizotso mb'e Mitsraime a  e vaho nijoha  e añatrefa' Iosefe eo.

¹⁶ Ie niisa' Iosefe te am'iereo t'i Beniamine, le hoe re ami'ty mpitoro' i anjomba'ey, andentao hare le halanka  o sabadidake, fa hitrao-pikama amako ondati-reo te tsipindemena. ¹⁷ Nanoe' indatiy i nafanto' Iosefe ama'ey, le nampihovae'e a  'anjomba' Iosefe ao indaty rey. ¹⁸ Nihemba  e amy zao i lahilahy rey kanao nendese  e mb'a  'anjomba' Iosefe ao, le nanao ty hoe, Hera i dralay, i nampoly an-goni'ay am-baloha'ey ro nampiziliha  e anay, hikaboha'e raha, hiambotraha'e, naho hondevoze'e rekets' o bor  ken-tika  eo. ¹⁹ Aa le niheo amy mpitoro  ' anjomba' Iosefey mb'eo iereo nisaontsy ama'e an-tsarira' i anjombay eo, ²⁰ ami'ty hoe, Ry Taleko, toe nizotso mb'atoa hikalo mahakama zahay tam-baloha'ey; ²¹ f'ie nandoak' amy nitof  'aiy a  e, nanokake o goni'aio le songa nanjo ty drala'e ambava' i goni'ey t'indaty, ty drala'ay ami'ty lanja'e. Aa le nendese'ay mb'atoy an-ta  a'ay, ²² mbore nandesa'ay drala fa  nampe'e an-ta  a  e hikaloa'ay mahakama. Nofi'ay ty nampizilike i dralay angoni'ay ao. ²³ Hoe ty natoi'e, Manints  a, ko hemba  e; i Andriana  nahare' areo naho Andriana  naharen-dra  e areoy ty nampipoke ty vara' areo amo goni' areoo; fa nasese amako i drala'areoy. Le naaka'e mb'am'iereo t'i Simone. ²⁴ Aa le nampihove' i mpitoro  ey a  'anjomba' Iosefe ao indaty rey le nanjotsoa'e rano, hanasa'e fandia, vaho nifahana'e o bor  ke'eo, ²⁵ le nampihentse  e iereo ho amy flavi' Iosefe amy tsipinde-menaiy i ravoravoy, fa jinanji' iareo te hikama ao.

²⁶ Ie nimpoly a  'anjomba'ao t'Iosefe le nibanabanae' iereo ama'e a  'anjomba'ao o ravoravo am-pit  'iareoo vaho nibokoboko an-tane a  'atrefa'eo. ²⁷ Nañontanea'e ty hajanga  a' iareo, naho ty hoe, Jangambao ty rae'areo, i androanavy bey tino  o' areoy? Mbe velo  e hao? ²⁸ Soa avao i mpitoro'oy, ty rae'ay, mbe velon-dre. Le niondreke iereo, niambane. ²⁹ Niandra amy zao re vaho nahaoni  e i Beniamine rahalahi'ay, i anandrene'ay, le hoe re, Rahalahy tsits'o' areo hao itia-hoekey? i natalili'areo amakoy? Ama'o abey anako, ty fatarihan' A  nahare! ³⁰ Le nibio  e a  e t'Iosefe ty amy hamani  a'e an-jai'ay, nipay hirovetse. Nizilik' an-tra  o'e

ao re niharovetse. ³¹ Nanasa laharan-dre naho nilie-batañe vaho niakatse, le nanao ty hoe: Azotsò i mahakamay. ³² Nanjotsoa' iareo hey re, ie raike, naho natokañe am' iereo ka, le nanjotsoañe manokañe o nte-Mitsraime mpitrap-pikama ama'eo, amy te tsy mete miharo-fikama amo nte-Evreo o nte-Mitsraimeo fa faly e Mitsraime ao. ³³ Le nampiambesareñe añatrefa'e, ty tañoloñoloña'e aolo ty amy zo'ey pak'an-jai'e ty amy hatsitso'ey, le nifampijilojilo an-kalatsañe o mpirahalahio. ³⁴ Nanjotsoañe boak' am-pandambaña' Iosefe iereo, fe indime' ty mahakama niazo' ty raike ty nazotso amy Beniamine. Aa le nitrao-pikama naho finoñe ama'e iereo.

44

Tana' i Iosefe t'i Beniamine

¹ Linili'e amy zao i mpamandro' i anjomba'eyi ami'ty hoe, Atsefo mahakama o goni' ondatio, ze leo'e logologoeñe, le songa apoho am-bava' ty goni'e ao i drala' indaty reiy; ² le apoho amy goni' i Beniamine ao i fitoviko volafotiy rekets' ty drala' i tsako'ey. Aa le nanoe'e i sinaontsi' Iosefey. ³ Ie nazava amy loak' àndroy le nampionjonem-b'eo i lahilahy rey rekets' o borìke'eo. ⁴ Aa ie vaho nienga i rovay, mb'e tsy nañavelo lavitse, le hoe t'Iosefe amy mpamandro' i anjomba'eyi, Miongaha, horidaño ondatio, le ie ifanampea'o, ano ty hoe, Akore ty namalea' areo raty ty soa? ⁵ Tsy atoy hao ty finoma' i talèkoy, toe i fisikilia'ey? Ie nanao hakelohañe amy nanoe'areoy.

⁶ Ie nitra'e iereo, le tinaro'e am'iereo i entañe zay. ⁷ Le vinale' iareo ty hoe: Ino ty isaontsian-talèko o entañe zao? Tsy marine' o mpitoroo ty manao i tsaraeñey. ⁸ Heheke te nahere'ay ama'o boak' an-tane Kanàne añe o drala nizoe'ay am-po'o goni'ao; inoñe arè ty hikizoa'ay volafoty ndra volamena añ'anjomba' i talè'oy? ⁹ Ie zoeñe ami'ty raik' amo mpitoroo'retoy i raha zay le ie ty hikenkañe, vaho ho ondevo' i talè'ayi ka zahay. ¹⁰ Hoe re, Ie zay, amy fivola' areoy, fe ze anjoàñe i rahay ro hondevoko vaho hidada nahareo. ¹¹ Aa le nalisa iareo songa nanjotso ty goni'e antane, vaho sindre nanokake i goni'ey. ¹² Kinodebe'e, nifototse aman-joke'e pak'an-tsits'e; le nioniñe an-goni' i Beniamine ao i fitovi. ¹³ Songa nandria-tsaroña amy zao, sambe nampijiny ty borìke'e indraike vaho nimpoly mb'an-drova mb'eo.

¹⁴ Pok' añ'anjomba' Iosefe t'Iehodà naho o rahalahi'eo ie mbe tao, le nibaboke an-tane añatrefa'e. ¹⁵ Hoe t'Iosefe am'iereo, Ino o nanoe' areo zao? Amoea' areo te toe mpisikily ondaty manahak' ahikoo? ¹⁶ Le hoe t'Iehodà, Ino ty ho volañe'ay aman-talè'ay? Ino ty ho talilie'ay? Akore ty hiveroha'ay? Fa naboon' Añahare ty hamengoha' o mpitoroo; intoy arè zahay ondevo' ty talè'ay, Izahay mitraok' amy nanjoañe i fitovi. ¹⁷ Fa hoe re, Tsy marine' ahy ty hanao zay. I nahaisahañe i fitovi, ie ty hondevoko; f'inahareo ka, mañaveloa am-panintsiñañe mb' aman-drae'areo aña.

Mihalaly ty amy Beniamine t'Iehodà

¹⁸ Nitotok' aze t'Iehodà nanao ty hoe, O talèko, angao hivolañe kede an-dravembian-talèko ao ty mpitoroo, le ehe tsy hiforoforo ty haviñera'o amo mpitoroo kanao mira amy Parò rehe. ¹⁹ Nañontanea' ty talè'ay o mpitoroo ty hoe, Aman-drae ndra rahalahy hao nahareo? ²⁰ Le hoe zahay amy talè'ayi, Manan-drae zahay, androanavy bey, vaho ty rahalahy tora' i haanterae'ey. Nivetrake i rahalahi'ey, le ie ty honka'e amo anan-drene'e o vaho ikokoan-drae'e. ²¹ Le nanoe'o ty hoe o mpitoroo, Ampizotsò

mb'etoan-dre ho trea' o masokoo. ²² Le hoe zahay amy talèkoy, Tsy mete mienga an-drae'e i ajalahiy, tsy mone hihomake t'i rae'e. ²³ Le nanoe'o ty hoe o mpitoro'oo, Naho tsy mindre mizotso ama' areo mb'etoa i tsitsondrahalahi' areoy le tsy ho oni' areo ka ty tareheko. ²⁴ Ie nimpoly amandrae'ay mpitoro'oy aña vaho natalili'ay i saontsin-talèkoy, ²⁵ le nanao ty hoe ty rae'ay, Mibalinha, ikalò mahakama tsy ampeampe tika. ²⁶ Aa hoe zahay, Tsy mete ty hizotsoa'ay; f'ie ama'ay i zai'aiy, le hizotso mb'eo. Fa tsy hahaoniñe ty lahara' indatiy zahay naho tsy rekets'ama'ay i tsitso'aiy. ²⁷ Le hoe ty rae'ay mpitoro'o ama'ay, Fohi' areo te nahatoly ana-dahy roe ho ahiko i valikoy; ²⁸ nieng' ahy ty raike, le hoe raho, Toe nirimitem-biby, vaho tsy treako ka. ²⁹ Aa naho endese' areo aña boak' amako ka itoy, vaho manjo-voiñe le hampidrodrète' areo an-kontoke mb'an-tsikeokeok' ao o volo-fotikoo. ³⁰ Aa naho himpoly mb'aman-draeko mpitoro'o mb'eo raho tsy rekets'e i tsitso'ey, kanao mifandrohy ami'ty havelo' i ajalahiy ty arofo'e, ³¹ ie mahaoniñe te tsy ama'ay i ajalahiy vaho hihomake; le hampidrodrète' o mpitoro'oo mb'an-tsikeokeok' ao o maròy fotin-drae'ay mpitoro'oo, ³² fa nitsoake i ajalahiy aman-drae'e o mpitoro'oo, ie nanoako ty hoe, Naho tsy hampoliko ama'o i ajalahiy—le zaho ty hivave i hakeo zay añatrefandraeko kitro katroke. ³³ Ie amy zao, ehe meteo ho ondevo' i talèko raho hisolo i ajalahiy; vaho angao hionjomb'eo mindre amo rahalahi'eo i ajalahiy. ³⁴ Fa aia ty himpoliako aman-draeko aña naho tsy mindre amako i ajalahiy? Irevendreveñako ty hahatre a o haloviloviañe hifetsak' amandraekoo.

45

Mibentatse aman-drahalahi'e

¹ Tsy naха-lie-batañe ty amy maro niarikoboñe azey t'Iosefe, le pinaza'e ty hoe, Ampisitaho amako ondaty iabio. Aa ie tsy ama' ondaty le nibenta-batañe aman-drahalahi'e t'Iosefe. ² Le akore ty fangololoiha'e kanao tsinano' o nte-Mitsraimeo naho ty anjomba' i Parò. ³ Hoe t'Iosefe aman-drahalahi'e, Zaho 'n-o Iosefeo. Mbe velom-bao ty raeko? Fa tsy nahatoiñ' aze o rahalahi'eo ami'ty fangovita' iareo amy fiatrefa'ey.

⁴ Aa hoe t'Iosefe aman-drahalahi'e, Ehe, harivò! Le niharivoa' iareo. Hoe re, Zaho nio Iosefe rahalahi'areo, naleta' areo mb'e Mitsraimey. ⁵ Aa le ko mañore ndra mañinje vatañe ty amy nandetaha' areo ahy atoy, amy te i Andrianañahare ty nañirak' ahy hiaolo anahareo handrombak' aiñe; ⁶ fa nisaliko roe taoñe ty tane toy vaho mbe hanonjohy zay ty lime taoñe tsy aman' ava tsy amam-bokatse. ⁷ Nirahen' Añahare hiaoloako hañajañe tariratse ho anahareo an-tane atoy vaho hampitambeloñe anahareo andrombake ra'elisy. ⁸ Aa le tsy inahareo ty nañitrik' ahy mb'etoa fa i Andrianañahare, ie ty nanao ahy ho rae' i Parò naho talè' i anjomba'e iabiy vaho mpifehe i hene tane Mitsraimey. ⁹ Misangitrifa mb' amandraeko mb'eo arè vaho ano ama'e ty hoe, Hoe ty ana'o Iosefe, Nanoen' Añahare talè' i Mitsraime iaby raho; mizotsoa mb' amako mb'etoy le ko mihenekeneke. ¹⁰ Hitoetse marine ahy an-tane' Gosena aña rehe, ihe naho o keleia'oo naho o anan' ana'oo, naho o mpirai-lia'oo naho o mpiraitro'oo vaho ze hene hanaña'o. ¹¹ Ho fahanako ey nahareo amy te mbe hitovoñe lime taoñe i hasalikoañey, tsy mone hifotsak' an-kararahan-drehe naho o aña anjomba'oo. ¹² Ie amy zao, Hehe te o fihaino' areoo naho ty mason-jaiko Beniamine ro mahaisake te ty vavako ro mivolañe ama' areo henaneo. ¹³ Saontsio aman-draeko ty hara' elahim-piasiañe

ahiko e Mitsraime atoa, le ze hene nioni'areo. Malisà hampizotso andraeko mb'etoy. ¹⁴ Niforokokoe'e amy zao ty hào' i Beniamine rahalahi'e le nangoihoy vaho nirovetse am-pititia'eo t'i Beniamine. ¹⁵ Hene norofa'e o rahalahi'eo nahohiroveta'e; vaho nahafisaontsy ama'e amy zao o rahalahi'eo.

¹⁶ Ie jinanjiñe añ'anjomba' i Parò ao ty talily te fa totsake o rahalahi' Iosefe, le niehake t'i Parò nahohiroveta'e. ¹⁷ Le hoe t'i Parò am' Iosefe, Saontsio ty hoe o rahalahi'oo: Ano zao: ampilogologò o bibi' areoo vaho miziliha an-tànè Kanàne. ¹⁸ Indeso mb'amako mb'etoya ty rae' areo nahohiroveta'e areoo nahohiroveta'e hatoloko ty tane soa e Mitsraime atoa vaho hikama' areo ty havondra' o taneo. ¹⁹ Amantohañe amy zao nahareo: le ano zao: Añandeso sarete boak' an-tane Mitsraime atoya o keleia'areoo nahohiroveta'e vali'areoo nahohiroveta'e rambeso ty rae' areo vaho mb'etoya. ²⁰ Ko itsakorea' areo o fanaña' areoo, fa anahareo ty soa amy ze hene tane e Mitsraime ao.

²¹ Aa le nanoe' o ana' Israeleo. Nitolora' Iosefe sarete ty amy saontsi' i Parò vaho nivatia'e ho amy liay. ²² Songa tinolo'e sikiñe vao t'indaty; fe tinolo'e bogady volafoty telon-jato nahohiroveta'e. ²³ Nampihitrife'e mb'aman-drae'e mb'eo o retoañe: borìke folo nilogologo kilankañe soa' i Mitsraime, borìke-vave'e folo ninday tsako, mofo vaho fivatiañe ho an-drae'e amy fañaveloa'ey. ²⁴ Le nampionjone'e mb'eo o rahalahi'eo, nahohiroveta'e, nahohiroveta'e nañavelo, vaho hoe re tam'iareo, Ko mifandietse andalañe mb'eo.

²⁵ Aa le nienga i Mitsraime iereo vaho nitotsak' aman-drae'e an-tane' Kanàne aña. ²⁶ Le hoe iereo tama'e, Mbe veloñe t'Iosefe. Hene fehe'e ty tane Mitsraime. Nitoirañe ty arofo'e, le tsy niantofa'e. ²⁷ Fe natalily ama'e ty hene enta' Iosefe nisaontsia'e, nahohiroveta'e nahahare' iosefe hinday azeo, le nisotrake ty arofo' Iakòbe rae' iareo. ²⁸ Hoe t'Israele, Heneke! Kanao mbe veloñe t'Iosefe anako, le tsy mete tsy handeha mb'eo raho hahatreavako aze aolo' ty fivetrahako.

46

Fitaveaña' Iakòbe mb'e Mitsraime

¹ Ie nionjoñe amy fañaveloa'ey t'Israele ninday o fanaña'e iabio nahohiroveta'e Beersevà ao, le nañenga soroñe aman' Añahare' Ietsàke rae'e re. ² Nitsara am' Israele añ' aroñaron-kaleñe t'i Andrianañahare nanao ty hoe, O Iakòbe, Iakòbe. Intoy raho, hoe re. ³ Le hoe Re, Zaho o Andrianañahareo, t'i Andrianañaharen-drae'o; ko hembañe ami'ty fañaveloa'o mb'e Mitsraime mb'eo amy t'ie hanoeko foko ra'elisy te aña. ⁴ Hindre lia ama'o mb'e Mitsraime mb'eo raho vaho toe hampoliko indraike, le ty tañan' Ana'o, Iosefe, ro hampirompo o fihaino'oo.

⁵ Aa le nienga i Beersevà t'Iakòbe, vaho nendese' o ana-dahi' Israeleo t'i rae'e Iakòbe rekets' o keleia'eo nahohiroveta'e amo sarete nahahare' i Parò hindesañe azeo. ⁶ Nendese' iereo o hare' iareo nahohiroveta'e vara'iareo, o niazo' iareo an-tane Kanàneo, vaho nandoak'e Mitsraime ao: t'Iakòbe rekets' i hasavereña'e iabiy; ⁷ nendese' e mb'e Mitsraime mb'eo ze hene ana-dahi' e nahohiroveta'e lahys nahohiroveta'e anak'ampela'e nahohiroveta'e ana-dahi' e vaho o tarira'e iabio.

⁸ Aa le zao o tahinan' ana' Israele nandoak'e Mitsraimeo: Iakòbe nahohiroveta'e I Reòbene tañoloñoloña' Iakòbe, ⁹ le o ana' i Reòbeneo: i Kanòke nahohiroveta'e Palò nahohiroveta'e Ketsrone vaho i Karmý. ¹⁰ O ana' i Simoneo: Iemoèle nahohiroveta'e Iamìnne nahohiroveta'e Ohade nahohiroveta'e Iakìne nahohiroveta'e Tsòkare vaho i Saòle ana'ty rakemba nte-Kanàne. ¹¹ O ana' i Levio: i Gersòne, i Kehàte nahohiroveta'e Merarý. ¹² O ana' Iehodào: I Ere nahohiroveta'e Onane nahohiroveta'e Selà nahohiroveta'e

i Perètse vaho i Zèrake (fe nivetrak' an-tane Kanàne aña t'i Ere naho i Onane;) vaho ty ana' i Perètse: i Ketsrone naho i Kamòle. ¹³ O ana' Isakareo: i Tolà, naho i Povà, naho Iòbe vaho i Simròn. ¹⁴ O ana' i Zebolone: i Sèrede, naho i Elònë vaho Iak' leèle ¹⁵ (ana' i Leae iaby rezay, o nasama'e ho a Iakòbe e Padan' arameo rekets' i Dinae anak' ampela'ey, le ni-telo-polo telo amby ty ana-dahi'e miharo anak' ampela.) ¹⁶ O ana' i Gadeo: i Tsifiòne, naho i Kagý, i Soný, naho i Etsbòne, i Erý, naho i Arodý vaho i Arely. ¹⁷ O ana' i Asereo: Iimnà, naho Iisvà, naho Iisvý, naho i Berìa vaho i Sèrake rahavave' iareo. O ana' i Beriao: i Kebère naho i Malkièle; ¹⁸ (irezay ro ana' i Zilpae, i nomei' i Labàne i ana'e Leae vaho nasama'e ho a' Iakòbe—ondaty folo eneñ' amby.) ¹⁹ O ana' i Rahkele vali' Iakòbeo: I Iosefe naho i Beniamine. ²⁰ Nahatoly i Menasè naho i Efraime an-tane Mitsraime ao t'Iosefe, i nasama' i Asenate ana' i Potifera, mpisoro' i Oney, ho aze rey. ²¹ O ana' i Beniamineo: i Bèla, naho i Bèkere, naho i Asbèle, i Gerà, naho i Naamàne, i Eký, naho i Ròse, i Mopime, naho i Khopime vaho i Arde, ²² (nasama' i Rahkele am' Iakòbe i ana'e rey: ondaty folo efats'amby.) ²³ Ty ana' i Dane: i Kosime. ²⁴ O ana' i Naftalio: Iaktseèle, naho i Goný, naho Ietsère vaho i Sileme, ²⁵ (i Bilhae, natolo' i Labàne amy ana'e Rahkele ty nahatoly irezay ho a' Iakobe—nitonto h'ondaty fito). ²⁶ Ze hene ondati' Iakòbe nitotsake Mitsraime aña, o boak'am-bania'e ao naho tsy o valin' ana'eo, le ondaty enim-polo eneñ' amby. ²⁷ Roe ty ana' Iosefe nisamake e Mitsraime ao; aa le fitompolo ty an-kasavereña' Iakòbe nandoake e Mitsraime aña.

Mitoetse e Gosena ao t'Iakòbe

²⁸ Nirahe'e aolo'e mb'am'Iosefe mb'eo t'Iehodà hatoro'e aze hey ty lalañe mb'e Gosena mb'eo, vaho nimoak' an-tane Gosena ao iereo. ²⁹ Nampihentseñé' Iosefe ty sarete'e le nionjom-b'eo hifanalaka am' Israele rae'e e Gosena ao. Niheo ama'e mb'eo re, le namorokoko am-pititia'e vaho nangololoike ela am-pititia'e eo. ³⁰ Hoe t'Israele am' Iosefe, Apoho hikenkañe henaneo, fa nitreako ty tarehe'o t'ie mbe veloñe. ³¹ Hoe t'Iosefe aman-drahalahi'e naho añ'anjomban-drae'e, Hiavotse mb'eo raho hitalily ty hoe amy Parò: Fa totsak' amako atoy o rahalahikoo naho ty anjomban-draeko boak' an-tane Kanàne aña. ³² Mpiarak' añondry o lahilahio, fa mpihare, le hene nendese' iereo o mpirai-lia'eo naho o mpirai-tro'eo vaho ze he'e am'iareoo. ³³ Ie koiha' i Parò manao ty hoe, Inom-bao ty tolondraha' areo? ³⁴ le hanoa'areo ty hoe, Fa mpihare boak' amy te niajalahy pake henane o mpitoro'oo, zahay naho o roae'aio—soa t'ie hitoetse an-tane Gosena, amy te mampangorý o nte-Mitsraimeo ze atao mpiarak' añondry.

47

¹ Aa le nimb'amy Parò ao t'Iosefe le nanoa'e ty hoe: Fa totsak' atoy boak'an-tane' Kanàne aña ty raeko naho o rahalahikoo, rekets' o mpirai-lia'eo naho o mpirai-tro'eo vaho o fanaña' iareo iabio; oniño t'ie fa mitoetse an-tane Gosena aña. ² Nendese'e t'indaty lime amo rahalahi'eo vaho nampiatrefe'e amy Parò. ³ Hoe t'i Parò amy rahalahi'eo rey, Ino ty fitoloña' areo? Le hoe iereo amy Parò, Mpiarak' añondry o mpitoro'oo, zahay naho o roae'aio. ⁴ Hoe iereo amy Parò, Pok'etoan-jahay hañialo an-tane atoy; amy te tsy aman-tane hiandraza'e o mpirai-liam-pitoro'oo ami'ty hamafe' i hasalikoaña an-tane Kanàney. Aa ehe, angao hitoetse an-tane Gosena aña o mpitoro'oo. ⁵ Le hoe t'i Parò am' Iosefe, Fa totsak' ama'o

ty rae'o naho o rahalahi'oo. ⁶ Añatrefa'o ty tane Mitsraime, ampañialo an-tane kobokara iereo; angao hitoetse an-tane Gosena aña; aa naho rendre'o ze mahatafetetse am'iereo, le ampamandroñeñe iareo o harekoo.

⁷ Nampihovae' Iosefe amy zao ty rae'e vaho nampiatrefe'e amy Parò, le nitata i Parò t'Iakòbe. ⁸ Hoe t'i Parò am' Iakòbe, Fire ty taoñe nivelo'ma'o? ⁹ Hoe t'Iakòbe amy Parò, Zato-tsi-telo-polo ty andro' o taoñe nañialoako an-tane atoy; tsy ampeampe vaho nampifeak' ahy ty andro' o taoñe nivelo'makoo fa tsy nahatàkatse ty andro' o taon-droaekoo, o andro nañialoa' iareeo. ¹⁰ Tinata' Iakòbe t'i Parò vaho nienga boak' añatrefa' i Parò. ¹¹ Aa le nampimoneña' Iosefe t'i rae'e naho o rahalahi'eo vaho tinolo'e fanañañe an-tane Mitsraime ao, ty tane hoba amy taney, an-tane Ramsese ao ty amy saontsi' i Parò. ¹² Le nifahana' Iosefe ty rae'e naho o rahalahi'eo, naho ty aña'anjomban-drae'e iaby ami'ty mahakama ho ambava' o keleia'eo.

Ty Kerè e Mitsraime Ao

¹³ Ie amy zay tsy ama' mahakama i tane iabiy, amy te nimafe i san-kerey. Nikantaña ty an-tane Mitsraime ao naho an tane' Kanàne aña ty amy hasalikoañey. ¹⁴ Natonto' Iosefe ze hene drala nioniñe an-tane Mitsraime ao naho an-tane Kanàne ao, ampitsalohaña ty mahakama nikaloa' iareo vaho nasese' Iosefe aña'anjomba' i Parò ao o dralao. ¹⁵ Ie nikapaike ze hene drala an-tane Mitsraime naho an-tane Kanàne aña, le nivotrak' am' Iosefe o hene nte-Mitsraimeo nanao ty hoe, Añomezo mahakama! Hatao akore ty hivetraha'ay añatrefa'o? Fa kòake o dralao. ¹⁶ Le hoe ty natoi' Iosefe, Meo ahiko ty hare' areo, le ho tolorako mahakama ampitsalohaña hare kanao kapai-drala. ¹⁷ Aa le nendese' iareo am' Iosefe ty hare' iareo vaho tinolo' Iosefe mahakama ampikaloña soavala naho o añondri' iareo naho o añombe' iareo naho o birikeo, le finaha'e mahakama amy taoñey o hare' iareeo. ¹⁸ Ie nimodo i taoñey le niheo ama'e mb'eo amy taoñe nanonjohiy iereo, nanao ty hoe, Tsy hai'ay aetak' amy talè'ayi te fa kapioke o drala'aio naho fa amy talè'ay ze stroke añombe. Le tsy eo ty añatrefam-pihaino' o talè'aio naho tsy o sandri'aio naho o tane'aio. ¹⁹ Inoñe ty hikoromaha'ay naho o tane'aio añatrefam-pihaino'o? Vilio zahay naho o tane'aio hatakalo i mahakamay. Ho ondevo' i Parò zahay naho o tane'ay iabio; fe meo tabiry tsy hivetraha'ay vaho te tsy hangoakoake i taney.

²⁰ Aa le hene kinalo' Iosefe ty tane Mitsraime ho a i Parò. Fa songa nandetake i tete'ey o nte-Mitsraimeo ami'ty hamafe' i san-kerey ama'e; aa le niazo' i Parò i taney. ²¹ Le ty am' ondatio, naveve'e mb'an-drova ao, sikal' ami'ty efe' i Mitsraime aña pak' aña'efe'e ila'e ka. ²² Ty tane' o mpisoroñe'o avao ty tsy vinili'e; amy te nahazo vati-jadoñe erik' amy Parò naho nikama i vaty namahana' i Parò iareoy vaho tsy naleta' iareo o taneo. ²³ Le hoe t'Iosefe am'ondatio, Kanao nikaloeko ama'areo anindroany ho a i Parò o sandri' areoo naho ty tane'areo, intoy ty tabiry ho anahareo; tongiso i taney. ²⁴ Le hatolo' areo amy Parò am-pitatahaña aña ty faha-lime'e naho ho tana'areo ty faha-lime'e efatse ho tabiry amo tonda' areoo, le ho mahakama' areo naho ho a o aña'anjomba' areoo vaho ho a o keleia' areoo. ²⁵ Hoe iereo, Fa rinomba'o ty fiai'ay, aa ehe te hahatendrek' isoke am-pahaoniñan-talekoy, le ho mpitoro' i Parò zahay. ²⁶ Aa le nanoe' Iosefe fañè an-tane Mitsraime pak' androany te a i Parò ty faha-lime'e naho tsy ty tane' o mpisoroñe'o avao, ie tsy nivalike ho amy Parò.

O Andro Sengaha' Iakòbeo

²⁷ Aa le nitoetse an-tane Mitsraime, an-tane Gosena aña t'Israele vaho nanontoñe vara ao, le namokatse vaho nangetseketeke. ²⁸ Nimoneñe an-tane Mitsraime ao folo-tao-fito'amby t'Iakòbe. Aa le zato-tsi-efapolo-fito'amby taoñe ty andro niveloma' Iakòbe.

²⁹ Ie nitotoke ty fañitoza' Israele, le kinanji'e t'Iosefe ana-dahi'e le hoe ty nafè'e: Ie nahaonim-pañisohañe am-pahaisaha'o, le ehe aziliho ambane' foto-peko ao ty fità'o havana vaho atraho am-patarihañe nahohavantañañe. Ko mandeveñe ahy e Mitsraime atoy; ³⁰ aa kanao hindre hitsalalampatse aman-droaeko ao, le takono hiakatse i Mitsraime vaho alenteho an-kibori' iareo ao. Hoe ty natoi'e, Hene hanoeko o nisaontsie'oo, ³¹ le hoe re, Mifantà amako, le nifanta'e, vaho nibokok' antondohàmpandrea'e eo t'Israele.

48

I Menasè naho i Efraime

¹ Ie roñoñe aña, le nisaontsieñe am' Iosefe ty hoe, Fa deme'e ty rae'o. Aa le nente'e mindre ama'e ty ana-dahi'e roe, i Menasè naho i Efraime,

² le nisaontsieñe am' Iakòbe ty hoe, Ingo fa pok' etoa t'Iosefe ana'o, le nañaly haozaran-dre nitroatse amy fandrea'ey, ³ vaho nanao ty hoe am' Iosefe, Nañento amako t'i El-Sadai* e Loze, an-tane Kanàne aña, ie nitata ahy ⁴ ami'ty hoe, Inao, hampiraoraoeko rehe vaho hampitomboeko. Hanoeko foko am-poko, vaho hatoloko amo tarira'oo ty tane toy ho fanañañe tsy ho modo nainai'e.

⁵ Ie amy zay, ho ahiko t'i Efraime naho i Menasè, i ana'o roe nitoly ama'o an-tane Mitsraime atoy aolo' ty nimbako mb'ama'o mb'e Mitsraime atoy rey; hambañe ami'ty maha-ahiko i Reòbene naho i Simone; ⁶ le ho azo ze samahe'o manonjohy iareo, vaho ho volilieñe ambane' ty tahina' o rahalahi'eo iereo amo lova'iareoo. ⁷ Aa izaho nimpoly boak'e Padana aña, le nihomak' amako an-tane Kanàne aña t'i Rahkele, an-dalaña eo ie didý tsy nimoake Efràta ao; aa le naleveko añ'olon-dala' i Efràta eo. (e Betlèkheme zay.)

⁸ Ie nioni' Iakòbe i ana' Iosefe rey, le hoe re, Ia o retiañe? ⁹ Hoe t'Iosefe aman-drae'e, Ie o anako natolon' Añahare ahy atoio. Le hoe re, Ehe endeso mb'etoa ho tataeko. ¹⁰ Ie amy zao, nitàlo am-pihaino t'Iakòbe ami'ty fahantera'e, tsy nahaisake soa. Aa le navi' Iosefe marine aze eo iereo le norofa'e vaho niforokokoe'e.

¹¹ Hoe t'Israele am'Iosefe, Tsy nitamako ty hahatrea o tarehe'oo; fa hehe, nampañisahen' Añahare ahy ka o ana'oo. ¹² Le nakare' Iosefe añ'ongo'e iereo vaho nampiondrehe'e mb'an-tane ty lahaba'e. ¹³ Rinambe' Iosefe i roroey, i Efraime am-pità'e havana ho mb'an-kavia' Israele, le i Menasè am-pità'e havia mb'an-kavana' Israele vaho nampañarinea'e. ¹⁴ Fe nahiti' Israele ty fità'e havana naho nasampe'e an-doha i Efraime zai'e vaho ty fità'e havia an-doha' i Menasè, toe nampitivalañe'e o fità'eo ndra te i Menasè ty tañoloñoloña'e. ¹⁵ Nitatae'e t'Iosefe, ami'ty hoe:

Ry Andrianañahare niatrefan-droaeko
Avrahame naho Ietsàke am-pañaveloañe,
Ry Andrianañahare namahañañe ahy
ami'ty fiaiko iaby pak' androany,
¹⁶ Ry anjely namotsots' ahy
amy ze fonga haratiañe,

* 48:3 Fot 17:1

tahio o ajalahy retoañe,
le ampitokavo ami'ty añarako,
naho ami'ty tahina' i Avrahame
naho Ietsàke roaeko;
vaho ampivasiaño an-tane atoy.

¹⁷ Ie nioni' Iosefe te an-doha' i Efraime ty nampitongoàn-drae'e i fità'e havanay, le tsy ninò'e vaho rinambe'e ty fitàn-drae'e hampipitsok' aze an-doha' i Efraime ho amy loha' i Menasèy. ¹⁸ Hoe t'Iosefe aman-drae'e, Tsy zay ry raeko! Ano ami'ty raike toy ty fità'o, ie ty tañoloñoloñako. ¹⁹ Fe nifoneñe ty rae'e nanao ty hoe, Fantako ry anako, apotako t'ie ho fifokoñañe ka, mbore ho ra'elisy. Fe handikoatse aze ty zai'e, fa ho halifora' o fifeheañe o tarira'eo. ²⁰ Aa le nitatae'e iereo amy andro zay ami'ty hoe: Ihe ty hitatà' Israele, ami'ty hoe,
Ehe t'ie hampanahafen'Añahare amy Efraime naho amy Menasè.

Aa le najado'e ho lohà' i Menasè t'i Efraime. ²¹ Le hoe t'Israele am' Iosefe, Inao te hikenkan-draho, fe hindre ama' areo t'i Andrianañahare vaho hampoli'e mb'an-tanen-droae' areo mb'eo. ²² Tovo' izay, fa natoloko anjara raik' ambone' o rahalahi'oo rehe, i tinavako am-pibarako naho faleko am-pità' o nte-Emoreoy.

49

Fitata' Iakobe o Ana'eo

¹ Le kinanji' Iakòbe o ana'eo, vaho nanao ty hoe, Miropaha amako etoy, ho talilieko ze hifetsak' ama' areo amo andro añeo.

² Mivoria vaho mitsanoña, ry ana' Iakòbe; tsendreño Israele rae'areo.

³ O Reòbene, tañoloñoloñako rehe,
ty haozarako naho
ty loha-voan-kafatrarako,
miniginingy an-dohàñe,
miligiligy am-panjofahaña.

⁴ mihalingaliñe hoe rano, tsy hionjoñe ka,
amy te nanganinha'o ty fandream-drae'o;
nitivàeñe—ie nijoñe an-tihiko eo!

⁵ Miharo-foetse t'i Simone naho i Levy;
haraom-piaroteñe o fialia' iareoo.

⁶ Ee te tsy hitrao-pikinia' am'iareo ty troko,
Lonike te tsy hirekets' am-pivori'areo ty asiko,
Fa an-kabosehaña ty namono'a'areo ondaty,
Naho an-tsatri' iareo ro namirasintake añombe,

⁷ Hafàtse ty haboseha'areo,
amy te mandoviake,
naho ty fiforoforoa'areo,
amy te manitra!

Ho zaraeko am' Iakòbe ao iereo,
vaho hampiparaitaheko e Israele ao.

⁸ O Iehodà, mandrenge azo o rahalahi'oo;
An-trehon-drafelahi'o ty fità'o;
Milokoloko ama'o o ana-dahin-drae'oo.

⁹ Ana-diona t'Iehodà;
Nitsàtsa rehe le nitroatse.
Mitsakononoke eo re,
mangolotoke hoe liona, hoe liona-vave,

ia ty hampitsekak' aze?

¹⁰ Tsy hipitsok' am' Iehodà
ty kobain-drazañe,
ndra ty fitoñom-panjaka
añivo' o fandia'eo,
ampara' ty fitotsaha' i Talè'ey*

vaho ie ty hivohora' o kilakila'ndatio.

¹¹ Vahora'e am-bahe ty borìke'e tarabao,
naho ty ana-borìke'e am-bahe miloeloe,
le sinasa'e an-divay o siki'eo,
naho o saro'eo an-dirom-balobok' ao;

¹² Menae' ty divay o maso'eo,
vaho hafotin-dronono ty nife'e.

¹³ Hitoetse añolon-driake t'i Zebolone ho fitolian-dakañe,
hiefetse amy Tsidòne aña.

¹⁴ Borìke maozatse t'Isakare
miondrek' añivon-kilankañe roe,

¹⁵ Naheo'e te soa i fitofàñey
naho te naindoñindoñe i taney,
aa le nabokoboko'e o soro'eo hinday
vaho ninjare nitoroñe haba.

¹⁶ Hizaka ondati'eo t'i Dane,
Kanao mpiamo foko Israeleo.

¹⁷ Ho mereñe an-dalañe eo t'i Dane,
menarà mandiñe an-dalan-tsileke eo,
Mpihehetse tomin-tsovala

Hampitafatsilañelañe i piningi'ey.

¹⁸ Mandiñe ty fandrombaha'o raho
ry IEHOVÀ.

¹⁹ Haname i Gade ty fifañosoñañe,
Fa hihoridañ'a'e an-tomi'e.

²⁰ Boak'amy Asere ty mahakama matave,
hazotso'e ty hafiriam-panjakay.

²¹ Renem-panaloke nampidadañe t'i Naftaly,
mitaroñe razan-tsaontsy.

²² Tirin-katae mamoa t'Iosefe,
toran-katae miregorego
añ'olon-drano manganañana;
mamokon-kijoly o tora'eo.

²³ Nampioje aze an-kafairañe o mpitàm-paleo;
Hiniriri'iareo ana-pale fa nalaiñe aze.

²⁴ Fe nitan-kaozarañe i fale'ey
vaho nampigañe' o fitàn-Tsitongerè' Iakòbeo, o siram-pità'eo,
Boak' ao ty Mpiarake, i Lamilami' Israeley,

²⁵ hirik' aman' Añaharen-drae'o
mpañimb'azoy,
naho amy El-Sadai mpitahy azo,
amo fitahia' i andikerañe amboneio,
amo fitahia' i laleke mandre ambane aoio,
amo fitahiam-patroa naho hoviñeo.

²⁶ Maozatse te ami'ty tata' o vohitse tsy modoo o tatan-drae'oo,

* ^{49:10} Heb: Siloa (i banabanaeñey)

Pak' añ'efe' o haboañe nainai'eo
ty ho an-kevo' Iosefe,
naho añambone' i naambake[†]
amo rahalahi'eyo

²⁷ Farasy romotse t'i Beniamine,
maraiñe re mampibotseke ty nitsatsà'e,
haleñe re mandiva o kinopa'eo.

²⁸ I tsaraeñe rezay ro fifokoa folo-ro' ambi' Israele, le i saontsieñey ro
nafèn-drae' iareo t'ie nitata; toe songa nitatae'e an-tata mañeva.

Ty Havilasi' Iakòbe

²⁹ Le hoe ty nafè'e am'iereo: Fa antitotse te hifanontoñe am' ondatikoo
raho. Aleveño aman-droaeko an-dakato an-tete' i Efrone nte-Khete ao
³⁰ amy lakato an-tonda' i Makpelà, aolo' i Mamrè, an-tane Kanàne aña,
vinili' i Avrahame reketsé tonda amy Efrone nte-Khete ho tanen-donake
ho azey. ³¹ Tao ty nandentehañe i Avrahame naho i Sarà vali'e le ty
nandentehañe Ietsàke naho i vali'e Ribkae, vaho tao ty nandeveñako i
Leae ³² I tetekey naho i lakato ama'ey ty vinylly amo ana' i Kheteo. ³³ Ie
nagado' Iakòbe i nafè'e amo ana'eyo, le naonjo'e am-pandrea'e o fandia'eo
le nikofòke fara'e vaho natontoñe am' ondati'eo.

50

¹ Nihotrak' an-daharan-drae'eo t'Iosefe le nangoihoy ama'e vaho
nañorok' aze. ² Linili' Iosefe o mpanaha mpitoro'eo hañoloñe an-drae'e.
Le hinolonkolo' o mpanahao t'Israele; ³ efa-polo andro ty nirì' iereo ama'e,
amy te zay o andro mahafonitse ty fañolonkoloñan-jañahareo. Nandala
fitom-polo andro ho aze o nte-Mitsraimeo.

⁴ Ie niheneke o androm-pandalàñe azeo le hoe ty lañona' Iosefe amo
añ'anjomba' i Parò, Aa naho nahatendreke isoke am-pahaisaha'areo raho
le saontsio an-dravembia' i Parò ty hoe: ⁵ Nampifantàn-draeko ahy ty hoe:
Ingo fa hikenkan-draho. Le aleveño an-kibory hinaliko ho am-batako an-
tane Kanàne ao. Aa le angao raho hionjom-b'eo handeveñe an-draeko
vaho himpoly. ⁶ Hoe ty natoi' i Parò, Mionjona, aleveño ty rae'o amy
nampifantà'e azoy.

⁷ Aa le nionjoñe t'Iosefe handeveñe an-drae'e. Fonga nindre ama'e ze
mpitoro' i Parò naho o roandria aña' anjomba'e ao naho o roandria' ty
tane Mitsraime iabio, ⁸ naho ty aña' anjomba' Iosefe iaby, o rahalahi'eo
vaho ty aña' anjomban-drae'e. Fe napok' an-tane Gosena ao o ana'iareoo
naho o mpirai-strokeo naho o lia-raikeo. ⁹ Nindre-lia ama'e o sarete reketsé
mpindaio. Nivalobohòke jabajaba. ¹⁰ Ie nivotrak' an-toem-pamofoha' i
Atade, alafe' Iordaney, le nanao fandalàñe jabajaba nampioremeñe; fito
andro ty nandalà'e an-drae'e. ¹¹ Ie niisa' o nte-Kanàne mpimoneñe amy
taneio i fandalàñe an-tanem-pamofoha' i Atadey le hoe iereo. Fandalàñe
mampioje o noe' o nte-Mitsraimeo. Aa le natao Abele Mitsraime i
tane andafe' Iordaney zay, ¹² naho nihenefe' o ana-dahi'eo i nafè'ey:
¹³ Nitakone' iereo mb' an-tane Kanàne mb'eo vaho naleve' iareo an-dakato
an-tete' i Makpelà ao, i vinili' i Avrahame rekets' i tonday marine i Mamrè
amy Efrone nte-Khete ho tanen-dona'ey. ¹⁴ Ie nandeveñey an-drae'e t'Iosefe
le nimpoly mb'e Mitsraime aña rekets' o rahalahi'eo naho i maro nindre
nionjoñe ama'e mb'eo nandeveñey an-drae'ey.

Miheve an-dRoahalahi'e t'Iosefe

[†] 49:26 Ndra: nte-Nazare

¹⁵ Aa ie nioni' o rahalahi' Iosefeo te nivilasy ty rae' iareo le hoe ty fitsakorea' iareo: Hera mitan-kabò aman-tika t'Iosefe hañondroha'e amantikañe ze fonga raty nanoan-tika? ¹⁶ Aa le nañitrik' am'Iosefe iereo nanao ty hoe, Hoe ty nafèn-drae'o aolo' t'ie nihomake, ¹⁷ Zao ty ho enta' areo am' Iosefe: Ehe apoho ty tahiñe nanoa' o rahalahi'oo naho i hakeo nanoe' iereo nijoy azoy. Aa ie henaneo, ehe apoho ty hakeo' o mpitoron' Añaharen-drae'oo. Nirovetse t'Iosefe ty amy enta' iareo ama'ey. ¹⁸ Nimb'eo amy zao o rahalahi'eo, nibabok' aña'trefa'eo, nanao ty hoe, Intoan-jahay fa ondevo'o. ¹⁹ Aa hoe t'Iosefe am' iereo, Ko hembañe, mpisolo an' Andrianañahare v'o ahoo? ²⁰ Inahareo ka, toe nikinia raty amako fe sinafirin' Añahare ho soa, hiboaha' o oniñe henaneo, hampitambeloma'e ondaty mitozantoza. ²¹ Aa le ko mahimahiñe, fa ho fahanako nahareo naho o keleia' areoo. Amy hoe zay ty nampanintsiña'e, ie nisaontsy aña'arofo' iareo ao.

O Andro Sengaha'Iosefeo

Heb 11.22

²² Nimoneñe e Mitsraime ao t'Iosefe, ie naho ty hasavereñan-drae'e; vaho niveloñe zato-tsi-folo taoñe. ²³ Niisa' Iosefe o ana' i Efraimeo pak' ami'ty tariratse faha telo; nibeizeñe aña' ongo' Iosefe ka o ana' i Makire, ana' i Menasèo. ²⁴ Le hoe t'Iosefe aman-drahalahi'e, fa hikenkan-draho; le toe hitotsak' ama'areo t'i Andrianañahare hinday anahareo hienga an-tane atoy homb'an-tane nifantà'e amy Avrahame, am' Letsàke naho am'Iakòbe. ²⁵ Aa le nampifantà' Iosefe amo ana' Israeleo ty hoe, Toe hañimba anahareo t'i Andrianañahare, vaho hakare' areo an-tane atoy o taolakoo. ²⁶ Nihomake t'Iosefe, ie ni-zato-tsi-folo taoñe, le naholonkoloñe naho napololòtse an-tsandòke e Mitsraime ao.

Avotse

¹ Iretoañe ty tahina' o ana' Israele nivotrake e Mitsraime ao nindre amy Iakòbeo songa an-kasavereña'e: ² i Reòbene, i Simone, i Levy naho Iehodà, ³ Isakare, i Zebolone naho i Beniamene, ⁴ i Dane naho i Naftalý, i Gade naho i Asere. ⁵ Fitom-polo ty ia' ondaty nasama' Iakòbeo. Fa te Mitsraime aña ka t'Iosefe. ⁶ Ie nivilasy t'Iosefe naho i rahalahi'e rey iaby naho ze hene nimpirai-nono ama'e, ⁷ le niraorao o ana' Israeleo, nanarànaake naho nitombo ho maro naho toe niha-ra'elahi vaho nahatsitsike i taney.

Niforekekeñe

⁸ Ie amy zao, nitroatse hifehe i Mitsraime ty mpanjaka tsy nafohiñe Iosefe. ⁹ Hoe re am'ondati'eo. Heheke, mandikoatse naho maozatse te aman-tika o ana' Israeleo. ¹⁰ Antao arè hinday iareo an-kihitse ke hitombo, hera mifetsak' atoy ty aly le mete hirekets' amo rafelahintikañeo iereo hialy aman-tika hienga an-tane atoy. ¹¹ Aa le nampijadoña' iareo mpifelek' ondevo, hamorekeke iareo an-kilankañe, le namboara' iereo rova famandroñañe t'i Parò: i Pitòme naho i Raamèse. ¹² Aa ndra te nañindra i fampisilofañey, mbe nitombo naho nangetseketeke avao ondatio; toly ndra nampangebahebake iareo o ana' Israeleo, ¹³ le nampitoroñe' o nte-Mitsraimeo an-kabodongero'e o ana' Israeleo. ¹⁴ Naho nanoeña afero ty fiai'iareo, am-pifanehafañañe mafe ami'ty birike naho lalotse vaho amy ze hene fitoloñañe an-kivoke ey, le fonga an-tsenge-hery ty fampitromahañañe nampanoeña iareo.

¹⁵ Le hoe ty mpanjaka' i Mitsraime amo mpanaha-mampiterake o nte-Evreoo (i Siprahae ty añara' ty raike naho i Poahae ty añara' ty raike): ¹⁶ Hoe re: Ie mampiterake ty rakemba nte-Evre naho mahaisak' aze am-pitoboham-pisamahañañe, ie lahila, vonò; fa naho ampela, apoho ho veloñe. ¹⁷ Fe nimpañeveña aman' Añahare o mpanähao, le tsy nanoe' iareo i nandilia' i mpanjaka' i Mitsraimeiy, fa nenga' iareo veloñe o lahila. ¹⁸ Aa le kinoi' i mpanjaka' i Mitsraimey i mpanaha rey naho nanoa'e ty hoe, Akore ty anoa' areo zao, te apo' areo veloñe o lahila. ¹⁹ Hoe i mpanaha rey amy Parò, Toe tsy hambaña amo rakemba nte-Mitsraimeo o rakemba ana' Israeleo fa mavitrike mahatoly aolo' ty ivotraha' ty mpanaha. ²⁰ Aa le nanoan' Añahare soa o mpanahao; vaho niha-tsiefa naho nitombo an-kaozarañañe ondatio. ²¹ Aa kanao nañeveña aman' Añahare o mpanahao le nampisavereña'e. ²² Le hoe ty nafanto' i Parò am'ondati'e iabio: Afetsaho amy Nailey ze hene anadahy samake, fa tano ho veloñe o anak'ampelao.

2

Tinarike boak' ao Heb.11.23

¹ Ie amy zao, nañenga ty anak' ampela' i Levy t'indaty boak' añ' anjomba' i Levy. ² Niareña i rakembay, nitoly ana-dahy, le nioni'e te soa i ajajamenay vaho naeta'e telo volañe. ³ Aa ie tsy nahafañetak' aze ka, le nangala'e vakoa-vinda naho nipakora'e mozòtse naho lite-laka vaho najo'e ao i anak' ajajay vaho natsorofo'e am-bindia añolon-drano ey. ⁴ Nijohañe ey ty zoke'e ampela nisamba ze hanoañe aze. ⁵ Nizotso mb'an-tsaka mb'eo amy zao ty anak' ampela' i Parò hiandro, le nijelanjelaña aña'lotse ey

o somondrara'eo. Aa naho nitrea'e añate-vinda ao i vakoay le nirahe'e hangalak' aze ty mpitoro'e ampela,⁶ vaho sinoka'e le nahaisake i anak' ajajay. Nitañy i ajajamenay vaho niferenaiña'e, ami'ty hoe: Toe anan-te-Evre toke.⁷ Le hoe i rahavave'ey amy ana' i Parò, Akore t'ie añañtrifako mpampinono amo rakemba nte-Evreo hampinono i ajajay?⁸ Akia, hoe i anak' ampela' i Parò; aa le nimb'eo i ajajampelat nitoka ty rene' i ajajay.⁹ Hoe i ana' i Parò ama'e, Endeso ty ajaja toy le ampinonò ho ahiko vaho ho tambezeko rehe. Aa le nendese' i rakembay i anak' ajajay vaho nampinonoe'e.¹⁰ itombo i ajajay le nendese'e mb'amy anak'ampela' i Parò aña vaho rinambe'e ho ana-dahi'e. Natao'e Mosè* ty añara'e amy ty hoe, Tinariko boak'an-drano.

Nibotatsake mb'e Midiane mb'eo

¹¹ Ie te indraik' andro naho fa niañoñ' ay t'i Mosè, le niakatse mb' am' ondati'eo nahaoniñe ty nijinia'iareo naho nioni'e ty nte-Mitsraime namofoke ty nte-Evre, raik' amo longo'eo.¹² Nijilojilo mb' etia mb' eroy, aa ie tsy nahatreo ondaty, le nañohofa'e loza i nte-Mitsraimey vaho naeta'e am-paseñe ao.¹³ Ie niakatse mb'eo naho loak' andro le nanjo ty nte-Evre roe nifandrapake ty aly, le hoe re ami'ty aman-kakeo, Ino ty andafà'o o longo'oo?¹⁴ Le hoe re. Ia ty nañoriñ' azo ho mpifehe naho mpizaka anay? Hañe-doza amako ka hao rehe manahake i namonoa'o i nte-Mitsraimey? Nihembañ' amy zao t'i Mosè nitsakore ty hoe, Toe nirendreke i rahay.¹⁵ Jinanji' i Parò, le nipay ty hañe-doza amy Mosè.

Le nibioñe ami'ty tarehe' i Parò t'i Mosè, noly mb'an-tane Midiane aña vaho niambesatse am-bovoñe eo.¹⁶ Aman-anak' ampela fito ty mpisoro' i Midiane. Nimb' eo iereo nitari-drano nañatsake o dabaogao hampinomeñe ty lia-rain-drae'e.¹⁷ Pok'eo amy zao o mpiarak' añondrio nanao soike iareo. Niongake t'i Mosè le rinomba'e le nampinome'e i lia-rai'iareoy.¹⁸ Ie nimpoly mb'an-drae'e Reoele[†] mb'eo le hoe re, Ino ty nampasika ty fimpoli' areo androany?

¹⁹ Hoe iereo, Nañolots' anay amo mpiarak' añondrio ty nte-Mitsraime vaho nitariha'e rano mbore nampinome'e i lia-raikey.²⁰ Hoe re amo anak' ampela'eo, Aia re? Ino ty nienga' areo indatiy? Ambarao hikama.²¹ Niantofa' i Mosè t'ie holy amy 'ndatiy vaho natolo'e amy Mosè t'i Tsiporàe anak' ampela'e ho vali'e.²² Nahatoly ana-dahy ho aze re vaho natao'e Geresòme, ami'ty hoe, Renetane raho mañialo an-tanen' ambahiny.

²³ Ie roñoñe aña, nihomake i mpanjaka' i Mitsraimey naho nampise-lekaiñe o ana' Israeleo i fandrohizañey, le nirohadrohake vaho nionjoñe mb' aman' Añahare boak' amy fitromahañey ty fitoreo' iareo.²⁴ Jinanjin' Añahare ty toreo' iareo vaho nitiahin' Añahare i fañina'e amy Avrahame naho am' ietsàke vaho am' Iakòbey.²⁵ Nivazohon' Añahare o ana' Israeleo vaho nihaoñen' Andrianañahare.

3

I Rongoñe Nisodotsey

¹ Ie niarake ty lia-rai' Iit'rò, rafoza'e, mpisoro' i Midiane, t'i Mosè, le niaoloe'e mb'an-kalo' i ratraratray mb'eo i lia-raikey vaho pok' e Korèbe vohin' Añahare eo.² Nisodehañe ama'e an-delan'afó an-drongoñe ao ty anjeli' IEHOVÀ; nisaria'e, le ndra te nirebarebaen' afó i rongoñey tsy

* **2:10** Mosè: Tinarike boak' ao † **2:18** Itro: Roandria

nahatomontoñe aze. ³ Le hoe t'i Mosè, Het! hitsile raho hisamba o raha fanjaka eroan-koekeo, handrendreke ty tsy mahamae o rongoñeo. ⁴ Nivazoho' IEHOVÀ t'ie nitsile mb'eo hisamba, le nikanjian' Añahare boak' amy rongoñey, ami'ty hoe: O Mosè, Mosè! Hoe re, Intoy raho, ⁵ Le hoe re, Ko mañarivo mb'etoañe, afaho hey o hana am-pandia'oo amy te masiñe o tane ijohaña'oo. ⁶ Tinovo'e ty hoe, Zaho t'i Andrianañaharen-droae'o, t'i Andrianañahare' i Avrahame naho t'i Andrianañahare' Ietsàke vaho t'i Andrianañahare' Iakòbe. Le nanakon-daharañe t'i Mosè fa nihembañe tsy te hahaisak' an' Andrianañahare.

⁷ Le hoe t'IEHOVÀ, Toe nisarieko ty hasotria' ondatiko e Mitsraimeo; le tsinanoko ty fitoreo' iareo ty amo mpanao bozisy iareoo; toe apotako ty halovilovia' iareo, ⁸ le nizotsoako handrombak' iareo amo nte-Mitsraimeo, hañakatse iereo amy taney naho hendeseko mb' am-patram-bey soa, mb' an-tane orikorihen-dronono naho tantele, mb' an-tane' o nte-Kanàneo naho o nte-Kheteo naho o nte-Emoreo naho o nte-Perizeo naho o nte-Kiveo vaho o nte-Iebosìo. ⁹ Ie amy zao, inao! fa pok' amako ty fibabababa' o ana' Israeleo; vaho nitreako ty famorekekeea' o nte-Mitsraime manindry iareoo. ¹⁰ Akia, mamantok' azo raho homb' amy Parò mb'eo hañavotse o ana' Israele ondatikoo amy Mitsraime. ¹¹ Aa hoe t'i Mosè aman' Añahare, Ia v-iraho te homb' amy Parò hañakatse o ana' Israeleo boake Mitsraime ao? ¹² Hoe re, Toe hindrezako; vaho zao ty haharendreha'o an-kató te Zaho ty nañirak' azo: naho navota'o boake Mitsraime ao ondatio, le hitalaho aman' Añahare ami'ty vohitse toy nahareo.

Nibentareñe i Tahinañey

¹³ Aa hoe t'i Mosè aman' Añahare, Ingo, homb' amo ana' Israeleo mb'eo raho hanao ty hoe, Nirahen' Añaharen-droae' areo homb' ama' areo mb' etoan-draho, vaho hañontanea' iereo ty hoe, Ia ty tahina'e? aa le inoñe ty havaleko? ¹⁴ Hoe t'i Andrianañahare amy Mosè, EHIÈ ZE EHIÈ,* Le tinovo'e ty hoe, Hoe ty ho saontsie'o amo ana' Israeleo, EHIÈ, ty nañitrik' ahy homb'ama' areo mb'etoa. ¹⁵ Hoe ka t'i Andrianañahare amy Mosè, Hoe ty hatao'o amo ana' Israeleo, IEHOVÀ, Andrianañaharen-droae' areo, t'i Andrianañahare' i Avrahame, i Andrianañahare' Ietsàke naho i Andrianañahare' Iakòbe ro nañirak' ahy homb'ama' areo mb'etoa.

Zay ty añarako nainai'e,
vaho zay ty fanoñonañe ahy
nainai'e an-tsà an-tsà.

¹⁶ Akia, atontono o androanavi' Israeleo vaho ano ty hoe, Nisodehañe' amako t'IEHOVÀ Andrianañaharen-droae' areo, t'i Andrianañahare' i Avrahame naho Ietsàke vaho Iakòbey, nanao ty hoe: Toe nitilik' anahareo raho naho nitreako o anoañe e Mitsraimeo. ¹⁷ Le hoe raho: havotako ami'ty halovilovia' i Mitsraime nahareo, homb' an-tane' i nte-Kanàney naho i nte-Khetey naho i nte-Emorey naho i nte-Periziy naho i nte-Kivey vaho i nte-Iebosi, mb'tane orikorihen-dronono naho tantele aña. ¹⁸ Ho haoñe' iareo ty fiarañana'a le hihéo mb'amy mpanjaka' i Mitsraimey rehe rekets' o androanavi' Israeleo hanao ty hoe, Fa nifañaoñe ama'ay t'IEHOVÀ Andrianañahare' o nte-Evreo, aa le angao hañavelo lia telo andro am-patrambey aña hañenga soroñe am' IEHOVÀ Andrianañahare'ay. ¹⁹ Toe fantako t'ie tsy hapo' ty mpanjaka' i Mitsraime hañavelo naho tsy am-pitâñe maozatse. ²⁰ Aa le hahitiko ty tañako hipaoke i Mitsraime amy ze hene fitoloñañe mahalatsa hanoeko ao. Mandimbe zay t'ie hapo'e hienga. ²¹ Toe hampañisohako am-pihaino' o nte-Mitsraimeo ondatio, aa

* **3:14** Ehiè-Aser-Ehiè : Zaho eo Izaho eo',

ie mienga, le tsy hañavelo an-tañam-polo; ²² fa songa hihalaly fanake volafoty naho volamena naho saroñe amo mpiharo tanàñe ama'eo naho amy ze ambahiny añ' anjomba'e ao ze rakemba vaho haombe' areo amo ana-dahy naho anakampela' areoo vaho ho volose' areo o nte-Mitsraimeo.

4

O Raha Tsitantane Nampanoeñe i Mosè

¹ Le hoe ty natoi' i Mosè, Aa naho tsy miantok' ahy iereo, tsy mijanjiñe ty feoko, fe hanao ty hoe, Tsy niheo ama'o t'IEHOVÀ? ² Hoe t'IEHOVÀ ama'e, Ino o am-pită'oo? Hoe re, Kobaiñe. ³ Le hoe re, Afetsaho antane eo. Aa le nafetsa'e an-tane naho ninjare mereñe vaho nidisaha' i Mosè. ⁴ Le hoe t'IEHOVÀ amy Mosè, Ampitakaro ty fità'o, tsepaho añ'ohi'e—aa le nahiti'e ty fità'e nitsipaok' aze vaho niheren-ko kobaiñe am-pită'e ao—⁵ hiantofa' iareo te niheo ama'o t'IEHOVÀ, Andrianañaharen-droae' iareo, t'i Andrianañahare' i Avrahame, i Andrianañahare' Ietsàke vaho i Andrianañahare' Iakòbe.

⁶ Natovo' IEHOVÀ ama'e ty hoe, Aziliho aña-araña'o ao ty fità'o, le nazili'e aña-araña'e ao ty fità'e le ie nakare'e; hehe te angamae i fità'ey, hafotimbolovaso. ⁷ Le hoe re, Ampolio aña-araña'o ao o fità'oo; aa le nazili'e aña-araña'e ao indraike i fità'ey naho nakare'e boak' aña-araña'e ao, ie fa nibali-ko hambañe ami-ty sandri'e. ⁸ Aa naho tsy miantok' azo ndra mijanjiñe ty feo' i viloñe valoha'ey le hiantofe'iereo ty feo' i viloñe faharoey. ⁹ Ie mboe tsy miantoke i viloñe roe rey naho tsy mañaoñe ty feo'o le anovizo rano boak' amy Nailey naho adoñaño an-tane maike eo, fa hinjare lio an-tane maike eo i rano rinambe'o amy sakaiy.

¹⁰ Aa hoe t'i Mosè amy IEHOVÀ, Ry Talèko, tsy mahafilañon-draho; ndra taolo ndra hirik' amy nitsara'o amo mpitoro'oo, te mone midàm-bolañe vaho bedo-lela. ¹¹ Aa le hoe t'IEHOVÀ ama'e, Ia ro namboatse ty falie' ondaty? Ia ro mamboatse ty bobo, ty giñe, ty mahaisake, vaho ty Fey? Tsy Zaho IEHOVÀ hao? ¹² Akia arè; himbaeko ty falie'o vaho hanareko azo ze ho saontsie'o. ¹³ Fe hoe re, Ry Talèko, ehe iraho am-pită' i hirahe'oy. ¹⁴ Niviañe amy Mosè amy zao ty haviñera' IEHOVÀ, le hoe re, Tsy apotako hao i rahalahi'o Aharone nte-Leviy, t'ie mahafirehake? Inao, mionjomb' ama'o mb'etoa re hifañaoñe ama'o vaho hifale aña'arofo'e te mahaoniñe azo. ¹⁵ Hisaontsy ama'e rehe vaho hajo'o am-palie'e o tsarao. Himbaeko ty falie'o naho i falie'ey vaho hañohako ama' areo ze hanoe' areo. ¹⁶ Ie ty hisolo-falie azo am' ondatio; ie ty ho falie ama'o vaho ho fanalolahy ama'e rehe. ¹⁷ Rambeso am-pită'o o kobaiñe, fa añama'e ty hanoe'o o viloñe.

Mimpoly mb'e Mitsraime mb'e

¹⁸ Nienga t'i Mosè naho nibalike mb' aman-drafoza'e Iitrò mb'eo nanao ty hoe, Ehe angao himpoly mb'amo rolongoko e Mitsraimeo handrèndreke hera mbe veloñe. Le hoe t'i Iitrò amy Mosè, Akia am-panintsíñañe, ¹⁹ Hoe t'IEHOVÀ amy Mosè e Midiane ao, Akia, mimpolia mb'e Mitsraime mb'eo fa fonga nihomake ondaty nipay ty fiai'oo. ²⁰ Aa le nendese' i Mosè i val'ey naho o ana-dahi'eo naho nampiningire'e ami'ty borike, le nimpoly mb' antane Mitsraime mb'eo; le nitintiñe' i Mosè am-pită'e i kobain'Añaharey.

²¹ Aa hoe t'IEHOVÀ amy Mosè, Ie miheo mb'e Mitsraime aña, asoao te hanoe'o aña'atrefa' i Parò ze hene viloñe napoko am-pita'o, fa hampandiereko ty arofo'e tsy hapo'e hañavelo ondatio. ²² Le hoe ty hanoe'o amy Parò, Hoe t'IEHOVÀ: Anako naho tañoloñoloñako t'Israele; ²³ le hoe raho ama'o,

Angao hañavelo i anakoy hitoroñe* ahy. F'ie mifoneñe tsy hampañavelo aze, inao arè: havetrako ty ana-dahi'o, i tañoloñoloña'oy.

²⁴ Ie amy liay, amy nialeña' iareoy, le nifanampe ama'e t'IEHOVÀ, ho nañè-doza ama'e. ²⁵ Le rinambe' i Tsiporàe ty vato masioñe le tinampa'e ty ofon' ana-dahi'e naho nahifi'e am-pandia'eo vaho hoe re, Toe mpañenga-an-dio amako rehe! ²⁶ Aa le navots'o'e vaho nanao ty hoe i rakembay, Ty valiko an-dio ty amy savatsey.

²⁷ Hoe t'IEHOVÀ amy Aharone, Akia mb' am-patrambey aña hifanalaka amy Mosè. Aa le nimb'eo re nifanalaka ama'e am-bohin' Añahare eo vaho norofa'e. ²⁸ Nitaroñe' i Mosè amy Aharone ze hene nitsarae' IEHOVÀ nañirak' azey vaho i vi洛ne iaby nafanto'e ama'e rezay. ²⁹ Nimb' eo amy zao t'i Mosè naho i Aharone nanontoñe ze hene androanavi' o ana' Israeleo; ³⁰ le nisaontsie' i Aharone o nitsarae' IEHOVÀ amy Mosè iabio vaho nanoe'e am-pahaisaha' ondatio o vi洛neo. ³¹ Niantoke ondatio, aa naho jinanji' o ana' Israeleo te nisary iareo t'IEHOVÀ naho nivazohoe'e ty fisotria' iareo, le niondreke vaho nitalaho.

5

Tsy Vatien' ahets'e o Birikeo

¹ Tampetse zay le niheo mb'amy Parò mb'eo t'i Mosè naho i Aharone, nanao ty hoe, Hoe t'IEHOVÀ Andrianañahare' Israele: Angao hañavelo mb'eo ondatikoo hanoe' iereo sabadidak' amako am-patrambey aña. ² Aa hoe t'i Parò, Ia ze o IEHOVÀ zao te ho haoñeko ty feo'e hampiavotako Israele. Amoeako ze o IEHOVÀ zao vaho tsy hapoko hionjoñe ka t'Israele.

³ Le hoe iereo, Nifañaoñe ama'ay t'i Andrianañahare' o nte-Evreo; aa le hañavelo lia telo andro mb' ampatrañe aña zahay hisoroñe am' IEHOVÀ Andrianañahare'ay, tsy mone hampiambotraha'e am' angorosy ndra fibara. ⁴ Fe hoe ty mpanjaka' i Mitsraime am' iereo. O Mosè naho Aharone, inom-bao ty hampisitahañe ondatio amo fitoloña'eo? Mimpolia amo fijinia'reooo! ⁵ Tinovo' i Parò ty hoe, Ingo te maro t'indaty an-tane ao henaneo vaho ipaia' areo hitroatse tsy hitoloñe! ⁶ Aa le linili' i Parò amy andro zay o mpanao bozizi' iareoo naho o mpisari' iareoo, ty hoe: ⁷ Tsy hatolotse ahets'e ka ondatio fe hamboatse birike mira amy teoy; angao hatonto' iareo ze ahets'e paiaeñe. ⁸ Le ampano' areo birike mira amy nanoeñe taoloy, tsy haketrake, amy t'ie votro, zay ty mampitoreo iareo ami'ty hoe: Apoho hiavotse aña hisoroñe aman' Añahare'ay. ⁹ Anovoño asa ondatio, hifanehafa' iareo tsy hitsanom-bolam-bande.

¹⁰ Aa le niakatse mb'eo o mpanao bozizio naho o mpisari' ondatiooo, nanao ty hoe am'ondatio, Hoe t'i Parò, Tsy hitolorako ahets'e. ¹¹ Akia, atontono ahets'e amy ze hahatendreha' areo, fe tsy haketrake ty fitoloña' areo. ¹² Aa le fonga niparaitak' an-tane Mitsraime ao ondatio nanontone tain-ava hasolo i bokay. ¹³ Tinaentae' o mpanao bozizio ka ami'ty hoe, Henefo ty fitoloña' areo lomoñandro ho mira amy fasiañ' ahets'e teoy. ¹⁴ Finofoke ka o talèm-pitoloña' o ana' Israele najado' o mpanao bozizi' i Parò am' iareoo, ami'ty hoe, Akore te tsy nihenefa' areo anindroany naho omale ty lili'areo amo birike manahake te taoloo?

¹⁵ Aa le niheo mb'amy Parò mb'eo o talè ana' Israeleo nitoreo ty hoe, Ino ty anoa'o hoe zao o mpitoro'oo? ¹⁶ Tsy ho tolorañe boka o mpitoro'oo, fa hoe iereo ama'ay, Mañamboara birike! Hehe te finofoke zahay vaho

* ^{4:23} Heb: mitoroñe, miava; mitalaho

manao hakeo ondati'oo. ¹⁷ Hoe re, Mikopiso avao ty tembo retia, zay ty atao' areo ty hoe, Angao hisoroñe amy IEHOVÀ. ¹⁸ Akia, arè, mitromaha fe tsy homeañe ahetse vaho mbe hasese' areo ty anjara' birike. ¹⁹ Nirendre' o talè, ana' Israeleo, t'ie am-poheke amy saontsi'ey, ty hoe, Tsy haketra' areo ty anjara birike lomoñandro. ²⁰ Ie nienga i Parò, le nifanjò amy Mosè naho i Aharone nijohañe ey hifanalaka am'iereo, ²¹ vaho hoe ty nanoa' iareo, Ee t'ie ho vazohoe' IEHOVÀ naho hizaka! Akore ty nañaimboa' areo anay am-pihaino' i Parò naho am-pihaino o mpitoro'eo, hanolorañe fibara am-pità' iareo hañohofa'e loza.

²² Nitolik' am' IEHOVÀ indraike t'i Mosè nanao ty hoe, Ry Talè, akore ty fanilofañe ondaty retoña? Ino o namantoha'o ahio? ²³ Fa boak' ami'ty niheovako amy Parò hivolañe amy tahina'oy, le nanoe'e samporerake ondaty retoa vaho tsy rinomba'o ondati'oo.

6

Ty amy Famotsorañe o ana' Israeleo

¹ Aa le hoe t'IEHOVÀ amy Mosè, Mahaoniña henaneo ty hanoako amy Parò. Eka, fitañe maozatse ty hampienga'e iareo, sirañe fatratse ty handroaha'e an-tane'e.

² Mbe nitsara amy Mosè t'i Andrianañahare nanao ty hoe: Zaho IEHOVÀ, ³ ty niboak' amy Avrahame naho am' Ietsàke naho amy Iakòbe ami'ty hoe El-Sadai*, fe tsy nitoñom-batañe am'iareo ami'ty hoe: IEHOVÀ†. ⁴ Toe norizako am' iereo ty fañinako, hanolorako ty tane Kanàne, i tane fañaveloa' iareo toe nañialoa' iareo. ⁵ Fe tsinanoko ty fiñeoñeo' o ana' Israeleo ty amy fañondevoza' o nte-Mitsraimeoy vaho nitiahiko i fañinakoy. ⁶ Anò ty hoe arè amo ana' Israeleo: Zaho IEHOVÀ, le havotsoko boak' ambane' ty fampijinia' o nte-Mitsraimeo naho habalako o fandrophizañe vaho ho jebañeko an-tsira natora-kitsy, an-jaka ra'elahi. ⁷ Ho rambeseko h'ondatiko vaho ho Andrianañahare' areo raho. Ho fohi' areo te zaho IEHOVÀ Andrianañahare' areo, ty mampienga anahareo ami'ty fampijinia' o nte Mitsraimeo. ⁸ Le hendeseko mb' an-tane nañonjonako sirañe hanolorako aze amy Avrahame naho am' Ietsàke vaho am' Iakòbe aña; le hatoloko anahareo ho fanañañe, Zaho IEHOVÀ. ⁹ Le nisaontsy amo ana' Israeleo t'i Mosè, fa tsy nihaõñe' iareo t'i Mosè, ty amy fikoretan' arofo naho i fampisoañam-pañondevozañey.

¹⁰ Aa hoe t'IEHOVÀ amy Mosè, ¹¹ Akia, saontsio t'i Parò, mpanjaka' i Mitsraime hampiavota'e an-tane'e o ana' Israeleo. ¹² Aa hoe ty asa' i Mosè am' IEHOVÀ, Kanao tsy nañaoñe ahiko o ana' Israeleo, akore ty hijanjiña' i Parò, zaho aman-tsoñy tsy nisavareñe? ¹³ Aa le nitsara amy Mosè naho i Aharone t'IEHOVÀ, nanolotse lily ho amo Ana' Israeleo naho ho amy Parò mpanjaka' i Mitsraime, hampiavotañe an-tane Mitsraime ao o ana' Israeleo.

Ty Toñon-draza' i Mosè naho i Aharone

Fot 46.8-27

¹⁴ Inao o talèn' anjomban-droaeo: o ana' i Reòbene, tañoloñoloña' Israeleo: i Kanòke naho i Palò naho i Ketsròne vaho i Karemý; irezay ro fifokoa' i Reòbene. ¹⁵ O ana' i Simoneo: Iemoèle naho Iamìne naho i Ohade naho Iakìne naho i Tsòkare vaho i Saòle ana' ty rakemba nte-Kanàne; ie ro fifokoa' i Simone. ¹⁶ Irezao ka o tahinan' ana' i Levio ty amo fifokoa'eo:

* **6:3** Andriampañotroñe, kila lefe'e † **6:3** Heb: i, he, o ndra v, he: IEHOVÀ

i Geresòne‡ naho i Kehàte vaho i Merarý; le ni-zato tsy telopolo fito amby taoñe ty halava havelo' i Levy. ¹⁷ O ana' i Geresoneo: i Libný naho i Semý, amo fifokoa'eo. ¹⁸ O ana' i Kehàteo: i Amràme naho Iitshàre naho i Kebrone vaho i Ozièle le ni-zato-tsi-telopolo-telo amby ty taon-kavelo' i Kehàte. ¹⁹ O ana' i Merario: i Makly naho i Mosý, ie ro fifokoa' i Merarý hasavereña' i Levý. ²⁰ Nañenga' Iokèbede rahavaven-drae'e t'i Amrame vaho nahatoly i Aharone naho i Mosè, le niveloñe zato-tsi-telopolo taoñe fito amby t'i Amrame. ²¹ O ana' Iitshàre: i Koràke, i Nèfege vaho i Zikrý. ²² O ana' i Ozièleo, i Misaèle naho i Elitsafàne vaho i Sitrý. ²³ Nañenga i Elisèbae ana' i Aminadabe, rahavave' i Naksòne t'i Aharone le nisamaha'e i Nadabe naho i Abihò, i Elazare vaho Itamare. ²⁴ O ana' i Korakeo: i Asire naho i Elkanà vaho i Abiasàfe; ie ro hasavereña' o nte-Korakeo. ²⁵ Nañenga amo ana' i Potièleo t'i Elazare ana' i Aharone, le nisamaha'e t'i Pinekase§. Ie ro anjomban-droae' o nte-Levio amo fifokoa'eo.

²⁶ Ie i Aharone naho i Mosè nitsarà' IEHOVÀ ty hoe, Ampiengao an-tane Mitsraime ampoko-ampoko o ana' Israeleo. ²⁷ Ie ro nisaontsy amy Parò mpanjaka' i Mitsraime hampiavotse o ana' Israeleo an-tane Mitsraime, toe i Mosè naho i Aharone zay.

Ie Mañeneke ty Linilin'Añahare

²⁸ Ie amy andro nitsarà' IEHOVÀ amy Mosè an-tane Mitsraimey, ²⁹ le nanao ty hoe amy Mosè t'IEHOVÀ: Zaho IEHOVÀ, hene saontsio amy Parò mpanjaka' i Mitsraime ze taroñeko ama'o. ³⁰ Aa hoe t'i Mosè añatrefa' IEHOVÀ, Ino ty hijanjiña' i Parò ahiko, zaho aman-tsoñy tsy afa-boiñeo?

7

¹ Hoe t'IEHOVÀ amy Mosè, Hehe t'ie najadoko ho fanalolahy amy Parò, vaho ho mpitoki'o t'i Aharone rahalahi'o. ² Hene isaontsio ze taroñeko ama'o, le i Aharone rahalahi'o ty hisaontsy amy Parò hampiavote'e an-tane'e o ana' Israeleo. ³ Fe ho gàñeko hey ty arofo' i Parò hampitomboako an-tane Mitsraime ao o vilokoo naho o halatsàko. ⁴ Toe tsy hañaoñe anahareo t'i Parò, le hapaoko amy Mitsraime ty tañako vaho hampiavoteko an-tane Mitsraime an-jaka ra'elahi o valobohòkoo, ondatikoo, o ana' Israeleo. ⁵ Ho fohi' o nte-Mitsraimeo te Zaho IEHOVÀ, naho ahitiko amy Mitsraime ty sirako hampiavoteko boak' am' iereo ao o ana' Israeleo. ⁶ Aa le nanoe' i Mosè naho i Aharone; ze nandilia' IEHOVÀ iareo ty nanoe' iereo. ⁷ Ni-valom-polo taoñe t'i Mosè naho aman-taoñe valom-polo-telo' amby t'i Aharone t'ie nisaontsy amy Parò.

I Kobay Tsitantaney

4.1-5

⁸ Hoe ty tsara' IEHOVÀ amy Mosè naho i Aharone, ⁹ Ie anoa' i Parò ty hoe, Ampibooaho raha tsitantane, le hoe ty ho asa'o amy Aharone, Rambeso ty kobai'o vaho afetsaho añatrefa' i Parò hinjarea'e fañaneñe. ¹⁰ Aa le nimb' amy Parò mb'eo t'i Mosè naho i Aharone, le nanoe' iereo i nandilia' IEHOVÀ; nafetsa' i Aharone añatrefa' i Parò naho aolo' o mpitoro'eo i kobai'ey vaho ninjare bajy. ¹¹ Kinai' i Parò amy zao ondaty mahihitseo naho o mpamorekeo vaho nitoloñe an-tsahàtse o ambiasa' i Mitsraimeo. ¹² Songa nañifi-kobaiñe ambane eo vaho ninjare mereñe, le sindre natele' ty kobai' i Aharone o kobai' iareoo. ¹³ Fe nihagàñe avao ty arofo' i Parò, tsy hinao'e iareo, amy nitsarae' IEHOVÀ.

‡ 6:16 Ndرا: Gersome : ambahiny atoy

§ 6:25 Pinekase: amam-binta mirearea

1. Nampañovaeñe ho lio ty rano

¹⁴ Le hoe t'IEHOVÀ amy Mosè, gañe ty arofo' i Parò; ie mifoneñe tsy hampienga ondatio. ¹⁵ Aa le akia, mb' amy Parò mb'eo maraindray t'ie miavotse mb'an-drano mb'eo, le tintino am-pit  o i kobai  e nampan-jarie  e fa  ane  ey, ¹⁶ le isaontsio ty hoe, Na  irak' ahy homb' ama'o mb' etoa t'IEHOVÀ, Andriana  ahare' o nte-Evreo hinday o enta  e zao: Apoho ha  avelo ondatikoo, hitoro  e ahy am-patrambey a  e. Inao t'ie mbe tsy na  ao  e pake henane. ¹⁷ Aa hoe ty nitsarae' IEHOVÀ, Zao ty hahafohina'o te zaho IEHOVÀ. Inao, havangoko amo rano amy s  akaio ty kobai  e anta  ako toy, hiova'e ho lio. ¹⁸ Ho mate ze fia  e amo s  akaio le hitrotrotse i s  akay vaho hampangor  y o nte-Mitsraimeo ty hinon-drano amy s  akay. ¹⁹ Aa hoe t'IEHOVÀ amy Mos  e, Saontsio t'i Aharone, Rambeso o kobai'oo le ahitio ambone' o rano' i Mitsraimeo ty fit  o, ambone' o saka'eo naho o talaha'eo naho o sihana'eo vaho ze hene kiantara-antaran-drano'e, hiova'e ho lio, le lio avao ty hanitsike ty tane Mitsraime, ndra an-tsajoa hatae ndra am-bato.

²⁰ Nanoe' i Mos  e naho i Aharone hamba  e amy nandilia' IEHOV  y. Naonjo'e am-pahaisaha' i Parò naho o mpitoro'eo i kobai'ey vaho trin  abo'e ty rano amy sakay, le niova ho lio ze hene rano amy sakay; ²¹ nimate o fia  e amy sakaio, le na  antifofotse i sakay naho tsy nahay nikama ty rano' i s  akay o nte-Mitsraimeo fa nitsitsike lio ty tane Mitsraime. ²² Fe tsinikombe' o ambiasa' i Mitsraimeo an-tsah  tse, le nihag  e ty arofo' i Parò naho nihiritsirita'e, ty amy nitsarae' IEHOV  y. ²³ Te mone nitolike t'i Parò, nimoak' a  anjomba'e ao, tsy nihao  e ty arofo'e i raha zay. ²⁴ Aa le fonga nihaly vovo  e a  olo' i s  akay o nte-Mitsraimeo, fa tsy nimete n  ome  e ty rano' i s  akay.

2. Saho  e

²⁵ Ie nimodo ty fito andro le nipaoha' IEHOVÀ i s  akay, ²⁶ le nitsara amy Mos  e t'IEHOVÀ, Akia miheova mb' amy Parò mb'eo vaho ano ty hoe ama'e, Hoe ty tsinara' IEHOVÀ: Ampiavoto ondatikoo, hitoro  e ahiko. ²⁷ Aa ie mitoky, tsy hampienga, le inao, ho tsitsifeko saho  e o tane'oo. ²⁸ Hifamorohotse amy Nailey o saho  eo. Hiakatse boak'ao hizilik' a  n' anjomba'o ao naho an-tra  o firota'o ao naho am-pandrea'o ao naho a  n' anjomba' o mpitoro'oo naho amo ondati'oo naho amo fanokona'oo vaho amo finga fitroboan-kobao. ²⁹ Hanganik' ama'o naho am'ondati'oo vaho amo mpitoro'oo o saho  eo.

8

¹ Le hoe t'IEHOVÀ amy Mos  e, Saontsio t'i Aharone, Ahitio ambone' o toraha  eo naho o talahao vaho o antarao ty fit  o rekets' i kobai'oy hampiakatse o saho  eo mb'an-tane Mitsraime mb'eo. ² Aa le natora-kitsi' i Aharone ambone' o rano' i Mitsraimeo ty fit  e vaho nitroatse mb'an-tamboho mb'eo o saho  eo nanafotse ty tane Mitsraime. ³ Fe tsinikombe' o ambiasao amo sah  a' iareoo, le na  akatse saho  e an-tane Mitsraime ka.

⁴ Nikanje' i Parò t'i Mos  e naho i Aharone le nanao ty hoe: Mihalalia am'IEHOVÀ te hakare  e amako naho am' ondatikoo o saho  eo vaho hengako homb'eo ondatio hisoro  e am' IEHOVÀ.

⁵ Hoe ty Mos  e amy Parò, Inao ty enge  e atoloko azo: Ombia ty hihalaliako ho azo naho o mpitoro'oo naho ondati'oo te hasoike ama' areo vaho a  n' anjomba' areo o saho  eo, hampipoke iareo amy s  akay avao?

⁶ Le hoe re, Hamaray. Hoe t'i Mos  e, Ie o sinaontsi'oo! Hahafohina'o te tsy amam-pa  irinkiri  e aze t'IEHOVÀ Andriana  ahare'ay. ⁷ Ie misitak'azo

naho o anjomba'oo naho o mpitoro'oo naho ondati'oo, le hidok' amy sàkay avao. ⁸ Nienga i Parò amy zao t'i Mosè naho i Aharone vaho nikaike IEHOVÀ t'i Mosè ty amo sahoñe nitsobore' i Parò. ⁹ Le nanoe' IEHOVÀ i nihalalie' i Mosèy, nimate añ' anjomba ao o sahoñeo naho an-kiririsa ey naho an-tetek' ao. ¹⁰ Aa le natonto' iareo an-kivotri-kivotry ampara' te nitrotròtse i taney. ¹¹ Aa naho nioni' i Parò t'ie nikepake le nampientetse arofo, nihirtsitse am' iereo, ty amy nitsara' IEHOVÀ.

3. Boròm-pìhetse

¹² Le hoe t'IEHOVÀ amy Mosè, Anò ty hoe t'i Aharone, Ahitio o kobai'oo vaho paoho ty lembo' o taneo, hanjaria'e boròm-pìhetse hanitsike ty tane' i Mitsraime. ¹³ Nanoe' iereo; nahiti' i Aharone ty fità'e reke-kobaiñe vaho pinao'e ty debo' i taney, le nirodañe am' ondatio naho amo hàreo ty boròm-pìhetse, ze atao debok' an-tane eo fonga ninjare boròm-pìhetse nanitsike ty tane Mitsraime. ¹⁴ Nimanea' o ambiasao ty hañakatse boròm-pìhetse amo sahà' iareoo fe tsy nahalefe. Nipetak' am'ondatio naho amo hareo o boròm-pìhetseo. ¹⁵ Le hoe o ambiasao amy Parò, Rambom-pitàn' Añahare toy! fe nihagàñe avao ty arofo' i Parò le tsy nihaoña'e, ty amy tsara' IEHOVÀ.

4. Laletse

¹⁶ Le hoe t'IEHOVÀ amy Mosè, Mañaleñaleña le mijohaña añatrefa' i Parò, t'ie miavotse mb'an-drano mb'eo vaho ano ty hoe, Hoe ty tsinara' IEHOVÀ: Angao hiavotse mb'eo ondatikoo hitalaho amako. ¹⁷ Aa hera tsy hengà'o homb'eo ondatikoo, le haropako ama'o ty laletse mifamorohotse naho amo mpitoro'oo naho am'ondati'oo naho añ'anjomba' areo ao, le hifamorohotse añ' anjomba' o nte-Mitsraimeo o laletseo vaho an-tane ijohaña' iareo. ¹⁸ Fe haviko amy andro zay ty tane Gosena imoneña' ondatikoo, tsy hiropahan-daletse, hahafohina'o te añivo ty tane atoy raho, IEHOVÀ. ¹⁹ Eka, hampijadoñako jebañe añivo' ondatikoo naho ondati'oo. Hipoteake maray i viloñe zay. ²⁰ Nanoe' IEHOVÀ, le havasiañan-dale-dero ty nifoak' añ' anjomba' i Parò naho añ' anjomba' o mpitoro'e iabio; vaho hene nampiantoe' i fifamorohotan-daletsey ty tane Mitsraime.

²¹ Kinoi' i Parò amy zao t'i Mosè naho i Aharone le nanao ty hoe, Akia, misoroña aman' Añahare' areo an-tane atoy. ²² Aa hoe t'i Mosè, Tsy mete t'ie hanoe'ay fa sirika amo nte-Mitsraimeo o fisoroña'ay am' IEHOVÀ Andrianañahare'aio. Aa naho isoroña'ay am-pahaisaha' o nte-Mitsraimeo ty raha tiva, tsy ho fetsahe' iareo vato hao? ²³ Hañavelo telo andro mb' am-patrambey aña zahay, hisoroñe am' IEHOVÀ Andrianañahare'ay, amy ze hitsarae'e ama'ay. ²⁴ Aa le hoe t'i Parò, Hengako hiavotse mb' am-patrambey ao nahareo hisoroñe am' IEHOVÀ Andrianañahare' areo naho tsy loho lavitse ty añaveloa' areo. Mihalalia ho ahiko. ²⁵ Le hoe t'i Mosè, Vata'e mienga azo raho le hihalaly am' IEHOVÀ te hasitake amy Parò naho amo mpitoro'eo vaho am'ondati'eo hamaray o laletse mifamorohotseo le asoao tsy ho fañahie' i Parò avao, tsy hampienga'e hisoroñe am' IEHOVÀ ondatio.

²⁶ Aa le nienga i Parò t'i Mosè vaho nihalaly am' IEHOVÀ. ²⁷ Le nanoe' IEHOVÀ i nihalalie'ey: nafaha'e amy Parò naho amo mpitoro'eo naho am' ondati'eo o laletse nifamorohotseo, leo raike tsy napoke. ²⁸ Le mbe nampientere' i Parò ty arofo'e henane zay, tsy nenga'e hiavotse ondatio.

9***5. Angorosim-biby***

¹ Le hoe t'IEHOVÀ amy Mosè, Miziliha amy Parò ao le ano ty hoe, Hoe t'IEHOVÀ Andrianañahare' o nte-Evreo: Ampiengao ondatikoo hitoroñe ahy. ² Aa naho tsy apo'o hañavelo, fa mbe tambozore'o ³ le ingo ho amo hare'oo ty fità' IEHOVÀ, amo an-kivokeo, amo soavalao, amo borikeo, amo ramevao, amo lia-raikeo naho amo añombeo ty kolàñe mandrokènkañe. ⁴ Fe hampiambahe' IEHOVÀ o hare' Israeleo, amo hare' i Mitsraimeo, le ndra inoñ inoñ tsy ho mate amo ana' Israeleo. ⁵ Nifotoña'e IEHOVÀ ami'ty hoe, Hamaray ty hanoa' IEHOVÀ i hoe zay an-tane atoy. ⁶ Aa le nanoe' IEHOVÀ amy loak'androy; fonga niatantiry ty hare' i Mitsraime, fe leo raik' amo hare' o ana' Israeleo tsy nimate.

⁷ Nampañontane t'i Parò le nirendre'e te ndra raik' amo haren' ana' Israeleo tsy nimate; fe nientetse ty arofo' i Parò vaho tsy nampiengae'e mb'eo ondatio.

6. Bae-tovoaa*Its 28.27*

⁸ Le hoe t'IEHOVÀ amy Mosè naho amy Aharone, Songa mangalà lavenoke mahapea fitàñe boak' an-toñak' ao le habobò' i Mosè mb' andikeram-beo am-pahaisha' i Parò; ⁹ le hinjare deboke era' i tane Mitsraimey, le hampitovoña'e bae mangorakorake amy ze ondaty naho biby hanitsike an-tane Mitsraime. ¹⁰ Aa le nandrambe lavenok' an-toñak' ao iareo naho nijohañe añatrefa' i Parò naho nadoveve' i Mosè an-tioke zay vaho nampitovoña'e bae am'ondatio naho amo bibio. ¹¹ Tsy nahafijohañe añatrefa' i Mosè o ambiasao ty amo baeo, fa nipetak' amo ambiasao naho amo nte-Mitsraime ila'eo ka o baeo. ¹² Fe nampijadiriñe' IEHOVÀ ty arofo' i Parò vaho tsy nihaño'a'e, amy tsinara' IEHOVÀ amy Mosèy.

7. Ampiñe naho Havandra

¹³ Le hoe t'IEHOVÀ amy Mosè, Mañaleñalèña, le mijohàña añatrefa' i Parò vaho anò ty hoe, Hoe t'IEHOVÀ, Andrianañahare' o nte-Evreo: Ampiengao ondatikoo, hitalaho amako. ¹⁴ Aa ie henane zao, hahitriko an-tro'o ao naho amo roandria'oo vaho amo ondati'oo ze hene tolombóiñe amako, hahafohina'o te tsy eo ty mañirinkiriñe ahy an-tane-bey atoy. ¹⁵ Aa naho nahitiko henaneo ty tañako, hipao' azo naho ondati'oo ami'ty angorosy le ho naito an-tane atoy, ¹⁶ fe toe nadoko, soa te ihe ty hampiboaña'e ty haozarako le hanitsike ty tane toy ty fitaroñañe ty añarako. ¹⁷ Ie amy zao, hiebotsebotse am' ondatikoo hao? tsy hampiengà'o. ¹⁸ Aa ie hamaray hoe zao, le hampigadaboñeko ty havandra jabajaba te amy ze le lia'e tsy nizoeñe e Mitsraime ao mifototse ami'ty andro nañorizañe aze pake henaneo ¹⁹ Mampihitrifa arè, le ampipaliro ze hare'o naho ze raha'o an-kivok' ao, fa hivalenkañe ze ondaty ndra biby zoeñe an-diolio ey tsy nampolieñe, t'ie idoindoiña' i havandray. ²⁰ Ze mpitoro' i Parò nihembañe amy tsara' IEHOVÀy, songa nihenekeneke nampipalitse o mpitoro'eo naho o häre'eo. ²¹ Aa ze tsy nañaoñe ty tsara' IEHOVÀ ka, le nado'e an-kivok' aña avao o mpitoro'eo naho o häre'eo.

²² Hoe t'IEHOVÀ amy Mosè, Ahitio mb' andikerañe ey ty fità'o hampipon-ake havandra era' ty tane Mitsraime, amy ze ondaty naho biby vaho ze hene hatae an-kivok' ey, an-tane Mitsraime ao. ²³ Aa le nampitakare' i Mosè mb' andikerañey ty kobai'e le nampidoindoiña' IEHOVÀ ty àmpiñe

naho havandra vaho nirifatse mb'an-tane mb'eo ty afo. Le nampigad-abòñe' IEHOVÀ havandra ty an-tane Mitsraime ao; ²⁴ havandra nibilobiloen-kelatse añivo'e ao, figadabon-kavandra mbe lia'e tsy nideboñe an-tane Mitsraime ao sikal' amy te nififeheañe. ²⁵ Zinama'i havandray ze hene antameañe an-tane Mitsraime ao ndra ondaty ndra hare; fonga navitavita'e ze rongoñe a montoñe ao vaho fonga pinozapiza'e o hatae an-kivokeo. ²⁶ Fe tsy nipaochen-kavandra o Ana' Israeleo an-tane Gosenao.

²⁷ Aa le kinoi' i Parò t'i Mosè naho i Aharone le nanao'e ty hoe, Toe nandilatse raho henaneo; IEHOVÀ ro vantañe vaho aman-tahin-draho naho ondatikoo. ²⁸ Mihalalia am' IEHOVÀ! Ampihankaño o hotroke naho havandran' Añahareo! Le hampiengako, le tsy hampitambatse anahareo ka. ²⁹ Hoe t'i Mosè ama'e, Ie vata'e miakatse ty rova toy le hahitiko mb' am' IEHOVÀ o tañakoo vaho hijihetse i àmpiñey le tsy ho eo i havandray, haharendreha'o te a IEHOVÀ ty tane toy. ³⁰ Fa ihe naho o mpitoro'oo, apotako te mboe tsy mañeveñe am' IEHOVÀ Andrianañahare avao. ³¹ (Ie amy zao, fa nianto iaby ty *vare-leny naho ty vare-hordea, fa niregorego i hordeay vaho namòñe i vare-leni.) ³² Fe tsy nijioeñe ty vare-bolè naho ty bolè-lahi'e fa malaom-pitovoñañe.) ³³ Aa le niavotse boak' amy Parò t'i Mosè, niakatse i rovay. Nahiti'e mb' amy IEHOVÀ o fità'eo le songa nijihetse i àmpiñey naho i havandray vaho tsy nampikojojoahañe an-tane i orañey. ³⁴ Aa vata'e nioni' i Parò te nijihetse i orañey naho i havandray naho i àmpiñey le mbe nanovon-kakeo; nampigañe'e ty arofo'e, ie naho o mpitoro'eo. ³⁵ Aa le niha-jadiriñe ty arofo' i Parò le tsy nampiengae'e o ana' Israeleo, amy tsinara' IEHOVÀ amy Mosèy.

10

8. O Valalao Joe 1.2-4

¹ Le hoe t'IEHOVÀ amy Mosè, Akia mb' amy Parò mb'eo, amy te nampigañeko ty arofo'e naho ty tro' o mpitoro'eo, hampipohako añivo' iareo ao o viloko retoñañe, ² hahafitalilia'o amo ana'oo naho amo àfe'oo o raha nanoeko e Mitsraimeo naho o viloñe nitoloñeko añivo' iereoo, hahafolina' areo te zaho IEHOVÀ.

³ Aa le niheo mb'amy Parò mb'eo t'i Mosè naho i Aharone, le nanao ty hoe ama'e, Hoe ty tsara' IEHOVÀ, Andrianañahare' o nte-Evreo, Pak' ombia ty mbe hitokia'o tsy hirèke añatrefako? Ampiengao ondatikoo hitoroñe ahiko. ⁴ Fa naho mifonen-drehe tsy hampiavotse ondatikoo, le hampivotrahako valala ty an-tane' areo etoy te maray. ⁵ Ho kopofe'e ty maso' i taney tsy hahaisaha' iaia o taneo, le habotse'e ty sisa nahafipoliotse, o nasisa' i havandraio vaho havorembore'e ze hatae'areo mamoa an-kivoke ey. ⁶ Hatsefe'e o anjomba'oo naho o anjombam-pitoro'eo naho ty a o hene nte-Mitsraimeo, ie mboe tsy niisan-droae'o ndra o roaen-droae'oo mifototse ami'ty andro naha-tan-tane atoy iareo pake henaneo. Nitolik' amy zao re nienga i Parò.

⁷ Hoe o mpitoro'' i Parò ama'e, Pak' ombia t'ie mbe ho fandrik' amantika? Ampiengao ondatio hitoroñe IEHOVÀ Andrianañahare'e; mbe tsy rendre'o hao te mianto t'i Mitsraime? ⁸ Aa le nampibaliheñe mb'amy Parò mb'eo t'i Mosè naho i Aharone vaho hoe re tama'e, Akia, toroño t'IEHOVÀ Andrianañahare' areo! Le ia naho ia ty homb'eo? ⁹ Hoe t'i Mosè, Hindre lia ama'ay o keleia'aio naho o bei'aio; rekets' o ana-dahi'aio naho o

* 9:31 Vare-leny: karaza'bare ahazoñañe fole leny

anak'ampela'aio vaho hitraok' ama'ay o mpirai-lia'aio naho o añombe'aio, hanoe'ay sabadidak' am' IEHOVÀ. ¹⁰ Hoe re tam' iereo, Toe hitahy anahareo t'IEHOVÀ naho hengako hindre lia ama' areo o keleia' areoo! Hehe ty fikitrohan-draty aolon-dahara' areo. ¹¹ Aiy avao! O lahilahio avao ty hañavelo mb'eo henaneo hitoroñe IEHOVÀ, fa zay ty nipaia' areo. Le sinoike mb'eo iereo hidisak' ami'ty fiatrefañe i Parò.

¹² Le hoe t'IEHOVÀ amy Mosè, Ahitio ambone' o tane Mitsraimeo ty fità'o, hivotraha' o valalao, hipetaha' iareo an-tane Mitsraime, hampibotseke ze he'e mitiry an-tane eo, ze nisisa' i havandray. ¹³ Aa le nahiti' i Mosè ambone' tane Mitsraime i kobai'ey vaho ninday tiok' atiñanañe amy taney amy lomoñändroy naho amy haleñe iabiy t'IEHOVÀ; ie nanjirike i àndroy le fa nonjone' i tiok' atiñanañey mb'eo o valalao. ¹⁴ Le nionjoñe nanitsike ty tane Mitsraime o valalao, nandrambañe ty fifaritsoha' i Mitsraime ty nipetaha' iareo, nitozantozaña; mboe lia'e tsy nizoem-pifamorohotam-balala hoe zay vaho tsy ho zoeñe ka. ¹⁵ Natsahe'e ty maso' i taney, le nikò-maieñe i taney; naho fonga nabotse'e ze niniñaniña amy taney naho ze voan-katae nisisa' i havandray vaho tsy nanisa raha antsetra ankatae ndra an-drongoñe an-kivoke ndra aia'aia an-tane Mitsraime ao iaby. ¹⁶ Kinoi' i Parò amy zao t'i Mosè naho i Aharone le nanao ty hoe, Toe nanao hakeo amy IEHOVÀ Andrianañahare' areo naho ama' areo raho. ¹⁷ Aa le miambane ama'o ty hiheve ami'ty henane toy i hakeokoy vaho halilio am' IEHOVÀ Andrianañahare' areo te hafahañe amako ty fihomahañe toy avao. ¹⁸ Nienga i Parò re, nihalaly am' IEHOVÀ; ¹⁹ Nafote' IEHOVÀ i tiokey ho tiokey hirik' ahandrefañe; nongaha' i tiokey o valalao vaho sinoi'e mb'amy Riam-Binday aña; leo raike amo valalao tsy napoke an-tane Mitsraime ao iaby. ²⁰ Fe nampientere' IEHOVÀ ty arofo' i Parò, le tsy nampiengae'e mb'eo o ana' Israeleo.

9. *Haiené*

²¹ Aa le hoe t'IEHOVÀ amy Mosè, Ahitio mb'andikeram-b'eo ty fità'o hañatseke ty hamoromoroñe an-tane Mitsraime ao, ieñé mete tsapaeñe. ²² Aa le nahiti' i Mosè mb'andindìñey ty fità'e, le nandrambañe ty tane Mitsraime telo andro ty hamoromoroñe. ²³ Songa tsy nahay nifañisake, naho sindre tsy naha-ongake telo andro amy nidona'ey; fe amo hene ana' Israeleo le nazava amo kiboho' iareoo. ²⁴ Aa le kinoi' i Parò t'i Mosè nanao ty hoe, Akia, toroño t'IEHOVÀ. Fe apoho atoy o lia-rai' areoo naho o mpirai-tro areoo. Mete hindre ama'o o keleia' areoo. ²⁵ Aa hoe t'i Mosè, Tsi-mete tsy hatolo'o ty hisoroñañe naho ty ho èngan-koroañe, hañalankaña'ay ho am' IEHOVÀ Andrianañahare'ay. ²⁶ Aa le hindre lia ama'ay o hare'aio; leo tombo'e raike tsy hapo'ay, fa hendese'ay hitoroñe IEHOVÀ Andrianañahare'ay, tsy apota'ay te inoñe ty hitoroña'ay IEHOVÀ naho tsy fa pok'añe. ²⁷ Fe nampigañe' IEHOVÀ ty arofo' i Parò vaho tsy nisatrie'e ty hampienga iareo. ²⁸ Le hoe ty Parò tama'e, Soik' aña! Misitaha amako! Mitaoa tsy ho isa'o ka ty tareheko, fa amy andro hahaisaha'o azey ty hihomaha'o. ²⁹ Hoe ty Mosè, Soa i saontsi'oy! Tsy ho treako ka o lahara'oo.

11

Hatahata ami'ty Tolom-boiñe Fara'e

Avo. 3.21-22; 12.35-60

¹ Hoe t'IEHOVÀ amy Mosè, Ho tovoñako feh'ohatse raike amy Parò naho i Mitsraime, zay vaho hapo'e hienga nahareo, eka, hampiavote'e vaho

vata'e hatao'e soike. ² Saontsio an-dravembia ondatio te songa hihalaly, sindre ondaty amo mpirai-tanañe ama'eo, fanake volafoty naho fanake volamena. ³ Toe nampañisohe' IEHOVÀ ampahaisaha' o nte Mitsraimeo ondatio. Mbore nilahitsiay an-tane Mitsraime ao t'i ondaty Mosè am-pihaino' o mpitoro'' i Parò naho ampahaisaha'ondatio.

⁴ Hoe t'i Mosè, Inao ty tsara' IEHOVÀ, Hiakatse petsakalen-dRaho haneñateña i Mitsraime. ⁵ Le fonga hivetrake ze hene valohan' anak' an-tane Mitsraime ao, boak' amy tañoloñoloña' i Parò mpiambesatse am-piambesam-panjaka'ey, pak' ami' ty tañoloñoloñan' ondevo ampela amboho' i fandisanañey vaho ty valohan' anan-kare. ⁶ Hanitsike ty tane Mitsraime ty fikoaihañe mbe lia'e tsy ni-añ' ohatse vaho le lia'e tsy hanahafañe ka. ⁷ Fe amo ana' Israeleo, le tsy hihiake ama'ondaty ndra aman-kare ty amboa, hahafohina' areo te ampiambahe' IEHOVÀ amy Mitsraime t'Israele. ⁸ Ie amy zay hizotso mb'amako o mpitoro'o retoañe hibokoboko amako hanao ty hoe, Miengà anay, ihe naho ze hene ondaty am-pandia'o. Zay raho vaho hiavotse, le nienga i Parò am-piforoforoankeloke.

⁹ Hoe t'IEHOVÀ amy Mosè, Tsy hañaoñe azo t'i Parò soa te hampito-mboañe an-tane Mitsraime ao o halatsàñe hanoekoo.

¹⁰ Nanoe' i Mosè naho i Aharone aña' atrefa' i Parò i hene raha tsitantane rezay; fe nampientere' IAHOÉ ty arofo' i Parò vaho tsy nampiengae'e an-tane'e o ana' Israeleo.

12

Ty Pèsake Valoha'e Vol 9.1-14; Ezek 45.21-25

¹ Hoe ty tsara' IEHOVÀ amy Mosè naho Aharone an-tane Mitsraime ao: ² Hatao' areo fifotoram-bolañe ty volañe toy; ie ty hatao' areo valohambolan-taoñe. ³ Aa le tseizo amy valobohò' Israele te, amy fahafolo' ty volañe toy, songa handrambe ty vi'e ho aña'anjomban-drae'e ze lahilahy, ty vi'e ze hasavereñañe. ⁴ Aa naho loho kede te ami'ty vi'e raike ty hasavereñañe, le hangala'e raike hatraok' amo marine' i anjomba'eio ty ami'ty ia' ondaty, ze hahafikamà' ondatio ty hamolilia'o ty vi'e. ⁵ Tsy hanan-kandra i vi'ey; lahi'e an-tao'e valoha'e ty ho rambeseñe ke amo añondrio he amo oseo. ⁶ Ho tana'o pak' ami'ty andro fahafolo-efats' ambi' i volañey; le songa hamono ty aze amy folak' àndroy* ze amy valobohò' Israele. ⁷ Handrambesa' iareo ty lio'e vaho hafitse ami'ty lahindalañe roe naho ami'ty ambone' ze anjomba ikamañe azey. ⁸ Ho kamae' iereo amy haleñey i hena natono aña'afoy naho ty mofo po-dalivay, le ampitraofo àña-mafaitse t'ie kamaeñe. ⁹ Tsy ho kamaeñe manta, tsy ho sambaiheñe, fa atono aña' aflo ty loha'e naho o tombo'eo vaho o aova'eo. ¹⁰ Tsy ho sisaeñe ami'ty maraiñe; fa fonga horoañe amy maraiñey ze sisa. ¹¹ Zao ty hikama'o aze: misikiñe ty vania'o, mihana o fandia'oo naho am-pità'o ty kobaiñe; le ikamañe masika. I Fihelañ'Ambone†' IEHOVÀ zay. ¹² Fa hiranga an-tane Mitsraime raho te haleñe, le ho lihiñeko kàboke ze valohan' anak' an-tane Mitsraime ao ndra ondaty ndra hare vaho hametsake zaka amo ndrahare' i Mitsraimeo: Zaho Iehovà. ¹³ Viloñe ho anahareo amo anjomba' imoneña' areoo i lioy; aa naho treako ty lio, le hiary ambone' areo raho vaho tsy ho zevoñe' ty angorosy te lihiñeko ty an-tane Mitsraime.

* 12:6 Folakandro do'e: añaivo' i mandialohay naho i tsofots'androy; † 12:11 Ndra: Pèsake

¹⁴ Ho andro faniahiañe anahareo ty andro toy. Hambena' areo ho sabadidak' am' IEHOVÀ; amo hene tarira' areoo ty hañambena' areo aze ho fañè tsy modo nainai'e. ¹⁵ Fito andro ty hikamà' areo mofo po-dalivay; le fonga hafaha' areo añ' anjomba' areo ze atao lalivay aolo' i andro valoha'ey; amy t'ie mikama lalivay amy andro valoha'ey pak'ami'ty andro faha-fito, le haitoañe am' Israele indatiy. ¹⁶ Amantaño fivory miavake i andro valoha'ey, le fivory miavake ho anahareo ka i andro fahafitoy, le tsy mitoloñe ndra inoñ'inoñe amy andro rey naho tsy ty amy ho kamaeñe: zay avao ty ho fitoloña' areo. ¹⁷ Ambeno i sabadidake mofo po-dalivaiy amy t'ie ty andro nampiengàko amy Mitsraime i valobohò' areoy: aa le hambena' areo amo hene tarira' areoo ty andro toy ho fañè tsy modo kitro añ'afe'e. ¹⁸ Amy volam-baloha'ey, amy andro faha folo-efats'ambi' i volañeiy naho hariva, ty hikama' areo mofo po-dalivay pak' ami'ty hariva' i andro faharapolo-raik' ambiy. ¹⁹ Fito andro te tsy hanjoan-dalivay ty añ' anjomba' areo ao, amy t'ie mikama raha nanoen-dalivay ro haitoañe amy valobohò' Israelely indatiy, ndra t'ie mpañialo ndra te nitoly amy taney. ²⁰ Tsy hikama raha aman-dalivay fa mofo po-dalivay ty ho kamae' areo amo hene akiba' areoo.

²¹ Aa le fonga kinoi' i Mosè o roandria' Israeleo, nanao'e ty hoe, Añakaro vi'e le andrambeso ty amo hasavereña' areoo vaho lentao i Fihelañ' amboney. ²² Rambeso ty tsampan-tseva‡, le aloño amy lio am-panakey naho afitsezo an-dahin-dalañe roe eo naho an-tokonañe ambone eo i lio am-panakey vaho tsy ia ty hiakatse an-dalañ' anjomba'e ampara' te maray. ²³ Amy te hitoañe mb'eo t'IEHOVÀ hanjevoñe o nte-Mitsraimeo; aa ie mahavazoho ty lio amy tokonañe amboney naho amy lahindalañe roe rey, le hiary ambone' i lalañey t'IEHOVÀ vaho tsy henga'e hizilik' ankiboho' areo ao i mpandrotsakey hanjevoñe.

²⁴ Hambena' areo nainai'e zay ho fañè tsy modo ama'o naho amo tarira'oo. ²⁵ Ie mivotrake an-tane hatolo' IEHOVÀ anahareo ty amy tsara'ey le ho henefe' areo ty fitoroñañe toy. ²⁶ Aa naho añontanea' o ana' areoo ty hoe: Ino ty fitoroñ'areo toy? ²⁷ Le hanoa' areo ty hoe, Ie ty fisoroñañe i Fiariañ' Ambone' IEHOVÀy, amy t'ie niary ambone' o kibohon' ana' Israele e Mitsraimeo naho zinevo'e o nte-Mitsraimeo vaho nado'e o kibohon-tikañeo. Aa le niondreke ondatio, nitalaho.

²⁸ Nimb'eo o ana' Israeleo nanao hambañe amy nandilia' IEHOVÀ i Mosè naho i Aharoney; zay ty nanoe' iareo.

10. Ty Fihomaha' o Valohan'anakeo Avo. 11.1-10

²⁹ Ie petsakaleñe, le linihi' IEHOVÀ ze hene valohan' anak' an-tane Mitsraime ao, mifototse amy tañoloñoloña' i Parò niambesatse amy fiambesam-pifehea'ey pak'ami'ty mpirhy amy nampigabeñañe azey naho ze valohan' anan-kàre iaby. ³⁰ Nitroatse haleñe t'i Parò, ie naho ze hene mpitoro'e naho o nte-Mitsraime iabio vaho akore ty fangololoihañe e Mitsraime ao, kanao tsy eo ty anjomba tsy aman-dolo. ³¹ Aa le kinoi'e t'i Mosè naho i Aharone amy haleñey le nanao ty hoe, Miongaha, Iengao ondatikoo, inahareo naho o ana'Israeleo! Akia, toroño t'IEHOVÀ, amy nisaontsie' areoy. ³² Endeso o mpirai-lia' areoo naho o añombe' areoo, amy nisaontsie' areoy vaho mañaveloa. Le tatao ka raho!

Ramsese pak'e Sokote

‡ 12:22 Heb: Hyssop

³³ Tinaentae' o nte-Mitsraimeo ondatio hampalisa ty hampiakarañe iareo amy taney, fa hoe iereo, Fonga mate zahay. ³⁴ Aa le rinambe' ondatio o koba' iareo po-dalivaio, ie nikolopofeñe saroñe an-tsoro'e ao miharo amo fanake fampikobâneo. ³⁵ Norihe' o ana' Israeleo ty saontsi' i Mosè le nihalaly bange volafoty naho volamena vaho sikiñe amo nte-Mitsraimeo, ³⁶ le nosihe' IEHOVÀ o nte-Mitsraimeo t'ie hatarike am' iereo, le nomei' iareo ze hene nihalalieñe. Aa le nifongane' iareo o nte-Mitsraimeo.

³⁷ Nañavelo boak' e Ramesèse pak' e Sokòte o ana' Israeleo, ondaty enen-ketse am-pandia fa tsy niaheñe o keleiañeo. ³⁸ Valobohòke mifangaro ty nitrao-pienga am' iereo naho o lia-raikeo naho o mpirai-trokeo naho ty hanañañe tsy fotofoto. ³⁹ Natoña' iareo i mofo po-dalivay amy koba nendese' iereo boake Mitsraimey, Tsy nian-dalivay i kobay amy t'ie natao' o nte-Mitsraimeo soike le nihepakepake fa tsy eo ty hañalankaña' iareo vaty.

⁴⁰ Ty fitaveaña' o ana' Israele nimoneñe e Mitsraimeo le efa-jato-tsitelopolo taoñe. ⁴¹ Ie nimodo i 430 taoñe rezay amy andro zay, le hene nienga an-tane Mitsraime o lahiale' IEHOVÀ o. ⁴² Halem-pijilova' IEHOVÀ toy, i nampiengà'e iareo an-tane Mitsraimey, aa le ho fijilova' o ana' Israele iabio am' IEHOVÀ amo hene tarira' iareoo ty haleñe toy.

Fañè amy Fiariañ' Amboney

Fot. 17.9-14; Avo. 12.1-13

⁴³ Hoe t'IEHOVÀ amy Mosè naho i Aharone: Zao ty fañè' i Fiariañ' Amboney: Tsy ho kamae' ty ambahiny, ⁴⁴ fe azo kamae' ze ondevo vinily; o nisavare'oo ty hihinañe aze. ⁴⁵ Tsy ho kamae' ty mpañialo ndra ty mpikarama. ⁴⁶ Añ' anjomba raike ty ikamañe aze, tsy añakarañe amy anjombay i henay vaho tsy hapènkañe o taola'eo. ⁴⁷ Hambena' ty valobohò' Israele zay. ⁴⁸ Aa naho te hitraok' amy sabadidam-Pihelaña' IEHOVÀ ka ty renetane ama' areo, le tsy mahay tsy ho savareñe hey ze fonga lahilahi'e; ie amy zay ro mete mitotoke mb'eo hañambeñe aze; hanahake t'ie nisamak' amy taney. Fe tsy mete ikama ze ondaty tsy votso-boiñe; ⁴⁹ raike ty fetse amo renetane mañialo ama' areoo naho amo nisamak' amy taneio.

⁵⁰ Le nanoe' o ana' Israeleo, nihenefa' o ana' Israeleo ze nandilia' IEHOVÀ i Mosè naho i Aharoney. ⁵¹ I androy avao ty nampiengà' IEHOVÀ an-tane Mitsraime ao o ana' Israeleo am-poko am-poko.

13

¹ Nitsara ty hoe amy Mosè t'IEHOVÀ: ² Avaho ho ahy ze hene lahilahy valohan' anake. I manoka-koviñe amo ana' Israeleo, ke ondaty he hare, ahiko irezay.

Ty Sabadidak' i Mofo po-Dalivaey

Avo. 12.14-20

³ Hoe t'i Mosè am'ondatio, Tiahio ty andro toy, ty niavota' areo i Mitsraime, boak' an-trañom-pañondevozañe ao; amy t'ie nampiengà' IEHOVÀ atoy an-kaozaram-pità'e; le tsy ho kamaeñe ty mofo aman-dalivay.

⁴ Androany ami'ty volan-*kofahofa, ty niavota' areo. ⁵ Aa naho minday azo mb'an-tane' o nte-Kanâneo naho o nte-Kheteo naho o nte-Emòreo naho o nte-Kiveo vaho mb'amo nte-Iebosio aña t'IEHOVÀ, ie nampitamae'e androae'o am-pànta hatolots' azo; tane orikorihen-dronono naho tantele, le

* **13:4** Volankofahofa: Abibe: Volam-balohan'A'hare

hambena'o ami'ty volañe toy o fitalahoña zao. ⁶ Fito andro ty hikama'o mofo po-dalivay vaho amy andro faha-fitoy ty sabadidake am' IEHOVÀ. ⁷ Ho kamaeñe fito andro ty mofo po-dalivay, le tsy ho tendrek' ama'o ty mofo aman-dalivay vaho tsy ho zoeñe ama'o, an-toe'o iaby ty lalivay . ⁸ Ty hoe ty hatoro'o ami'ty ana-dahi'o amy andro zay, Ie i nanoe' IEHOVÀ ho ahikoy, t'ie niavotse i Mitsraime. ⁹ Ho viloñe ama'o am-pità'o naho tiahy añivom-pihaino'o eo soa te ho am-palie'o ty Ha' IEHOVÀ, amy te am-pitàñe maozatse ty nampiavota' IEHOVÀ azo amy Mitsraime. ¹⁰ Aa le hambena'o amy namotoaña'e azey boa-taoñe o fañè zao.

Ty Fañorizañe o Tañoloñoloñañe

¹¹ Naho ninday azo an-tane' o nte-Kanàneo t'IEHOVÀ, ie nifañina ama'o naho an-droae'o vaho fa natolo'e azo, ¹² le havì'o ho a IEHOVÀ ze hene manoka-koviñe naho ze fonga valohan' anan-kare'o, a IEHOVÀ o lahi'eo. ¹³ Fa ho jebañe'o ami'ty añondry ka ty valohan' ana-borike, aa naho tsy lefe'o jebañeñe, le tsi-mete tsy kitsihe'o ty loha'e. Aa le ho jebañe'o ty tañoloñoloñan-anadahi'o. ¹⁴ Ie aña naho mañontane azo ty ana'o ami'ty hoe: Ino zao. Le hatoi'o ty hoe, An-kaozaram-pità'e ro nampiengà' IEHOVÀ anay i Mitsraime, boak' an-trañom-pañondevozañe ao. ¹⁵ Ie nifoneñe tsy hampienga anay t'i Parò, le vinono' IEHOVÀ ze fonga valohan' anake an-tane Mitsraime ao, ty tañoloñoloña' ondaty naho ty valohan' anan-kare. Aa le soroñeko am' IEHOVÀ ze lahi'e manokake ty hoviñe, fe ho jebañeko ze tañoloñoloñan' anadahiko. ¹⁶ Le ho sokitse am-pità'o eo zay vaho alama aolo' o maso'oo te ninday antika niavotse e Mitsraime am-pità'e maozatse t'IEHOVÀ.

Fitsahañe

¹⁷ Naho nampienga' i Parò ondatio, le tsy niaoloan' Añahare mb'an-tane o nte-Pilistio mb'eo ndra t'ie narine. Fa hoe t'i Andrianañahare, hera hibalintoa ondatio te miatrek' aly naho hibalike mb'e Mitsraime aña. ¹⁸ Te mone nampiarien' Añahare mb' an-dalan-diolio' i Riake Menay ondatio. Le nangovovoke boake Mitsraime o ana' Israeleo.

¹⁹ Le nendese' i Mosè mindre ama'e ty taola' Iosefe ty amy nampifantà'e o ana' Israeleo, ami'ty hoe: Toe hitilik' anahareo t'i Andrianañahare vaho hampindreze' areo ama'areo boak' atoa o taolakoo.[†]

²⁰ Ie niavotse i Sokote iereo le nitobe Etame aña'olo' i ratrаратray. ²¹ Niaoloa' IEHOVÀ an-drahoña mitiotiotse te antoandro nitarike i liay vaho an'afó miojalajoala te haleñe hañomea'e hazavàñe hañaveloañe handro naho haleñe. ²² Tsy nisitak' ami'ty fiaoloa'e ondatio i rahoña nitiotiotsey te antoandro, ndra i afo nijoalay te haleñe.

14

¹ Hoe ty nitsarae' IEHOVÀ amy Mosè, ² Misaontsia amo ana' Israeleo ty hibalike naho hitobe aolo' i Pi-Hakirôte; añaivo' i Migdôle naho i riakey, tandrife i Baal' Tsefone; eo ty hitobea' areo marine i riakey. ³ Le hatao' i Parò te mikariokariok' an-tamberen-tane ey avao ana' Israeleo fa arikatoha' i ratrаратray. ⁴ Aa le ho gañeko ty arofo' i Parò vaho hihoridaña'e. Fe hahazo engeñe amy Parò naho amo fonga lahindefo'eo raho, le ho fohi' o nte-Mitsraimeo te Zaho IEHOVÀ. Aa le nanoe' iereo zay.

⁵ Ie nampandrendreheñe i mpanjaka' i Mitsraimey te nibotatsak' aña ondatio, le nibalintoa am' ondatio ty fivetsevetse' i Parò naho o mpitoro'eo vaho hoe iereo, Inoñe i nanoentika namotsotse o ana' Israeleo tsy hitoroñ'

[†] 13:19 Fot. 50.25

antikañey? ⁶ Aa le nampihentseñe'e i sarete'ey vaho nampindreza'e ondati'eo. ⁷ Ninday sarete enen-jato nijoboñen-dre vaho ze kila sarete' i Mitsraime rekets' o mpifehe'eo iaby. ⁸ Le nampientere' IEHOVÀ ty arofo' i Parò mpanjaka' i Mitsraime vaho nihoridañe'e o ana' Israeleo, ie fa nienga am-pitañ' abo o ana' Israeleo. ⁹ Nihoridañe' o nte-Mitsraimeo amy ze hene soavalà naho sarete' i Parò, o mpiningi-tsoavalao naho o lahindefo' e iabio vaho nitrà'iareo nitobe marine' i riakey iereo marine i Pi-Hakiròte tandrife i Baal' Tsefone.

¹⁰ Ie nañarivo mb'eo t'i Parò, le nampiandra fihaino o ana' Israeleo, le indroy, nionjoñe mb'am' iereo o nte-Mitsraimeo. Vata'e nirevendreveñe iereo vaho nikoiak' am' IEHOVÀ o ana' Israeleo. ¹¹ Le nanao ty hoe amy Mosè, Ie tsy aman-kibory e Mitsraime ao hao ty nanesea'o anay mb'etoa hikoromak' am-patrambey atoy? Ino o nanoa'o anaio, ihe nampiakatse anay amy Mitsraime! ¹² Tsy zao hao ty vinola'ay ama'o e Mitsraime aña t'ie apoke hitoroñe o nte-Mitsraimeo? fe hàmake mitoroñe o nte-Mitsraimeo ta t'ie hivetrak' an-jerezere tane atoy. ¹³ Aa hoe t'i Mosè am'ondatio, Ko hembañe, mijadoña vaho isaho ty fandrombaha' IEHOVÀ hatoro'e anahareo anito, fa o nte-Mitsraime isa' areo androany tsy ho isa' areo kitro-katroke ka. ¹⁴ Hialy ho anahareo t'IEHOVÀ, aa le mianjiña.

¹⁵ Le hoe t'IEHOVÀ amy Mosè, Ino ty ikoiha'o ahy? Misaontsia amo ana' Israeleo ty hionjom-b'eo. ¹⁶ Le aonjono o kobai'oo vaho ahitio ambone' o riakeo ty fità'o, le isalahao, hitsaha' o ana' Israeleo añivo' o riakeo antane maike. ¹⁷ Inao, hampigañeko ty tro' o nte-Mitsraimeo, ie hañorike, hahazoako engeñe amy Parò naho i valobohò'ey naho amo sarete'eo naho amo mpiningi-tsoavalà'eo. ¹⁸ Ho fohi' o nte-Mitsraimeo te zaho IEHOVÀ, naho ahazoako engeñe t'i Parò naho o sarete'eo vaho o mpiningi-tsoavalà'eo.

¹⁹ Ie amy zao, nisitake i anjelin' Añahare niaolo' i tobe' Israeleiy, nivike mb' am-boli' iareo ao. Toe nisitsitse boak' aolo' iareo i rahoñe nijoalay le nijohañe am-boho'e ao ²⁰ nitsatope añivo' o lahindefo' i Mitsraimeo naho i tobe' Israeley; naho ninday ieñe mb'aroa i rahoñey fe nihazavae'e atoa i haleñey, soa tsy nifankarine amy haleñe iabiy ty raike mb'ami'ty ila'e.

²¹ Aa le nahiti' i Mosè ambone' i riakey ty fità'e, le nampivevè' IEHOVÀ amy haleñe iabiy an-tiobey atiñanañe i riakey naho navalí'e ho tane maike i riakey vaho nizara o ranoo, ²² le nijoñe amy riakey an-tane maike o ana' Israeleo, ty rindrin-drano an-kavana' iereo naho an-kavia'e.

²³ Hinorida' o nte-Mitsraimeo iereo, mb'an-teñateña' i riakey, o soavala' i Parò iabio, ze hene sarete'e naho o mpiningi-tsoavalà'eo. ²⁴ Ie amy fijilovañe marain-draiñey, le nijilove' IEHOVÀ boak' amy afo nijoalay naho amy rahoñey ty valobohò' i Mitsraime vaho navalitsikota'e i valobohò' i Mitsraimey. ²⁵ Nakatra'e o laron-tsarete'eo nanebatsebañe ty fionjona' iareo vaho hoe ty asa' o nte-Mitsraimeo, Antao hibioñe ami'ty lahara' Israele! amy te mialy amy Mitsraime ho a iareo t'IEHOVÀ.

²⁶ Le hoe t'IEHOVÀ amy Mosè, Ahitio ambone' i riakey ty fità'o hibaliha' o ranoo amo nte-Mitsraimeo, amo sarete'eo vaho amo mpiningi-tsoavalà'eo.

²⁷ Nahiti' i Mosè ambone' i riakey amy zao ty fità'e le nimpoly amy fikararaha'e taoloy i riakey te nanjirike i androy. Nitriban-day ama'e o nte-Mitsraimeo fe navalitaboa' IEHOVÀ añivo' i riakey. ²⁸ Nitabattroake mb'eo i ranoy nañàmpo o sareteo naho o mpiningitseo naho i valobohò' i Parò nañorike o ana' Israeleo mb'an-driake mb'eo iabiy, ie tsy nengantsehang'a'e.

²⁹ Fe nitsake i riakey an-tane maike ka o ana' Israeleo añivo i riakey amy te nirindriñe am'iereo i ranoy, ankavana'e naho ankavia'e eo.. ³⁰ Zay ty nandrombaha' IEHOVÀ am-pitá' o nte-Mitsraimeo t'Israele amy andro zay vaho niisa' Israele nifitak' añ' olon-drano ey o fàten-te Mitsraimeo. ³¹ Nahaisake i hara' elahin-kaozara' IEHOVÀ naboa'e amo nte-Mitsraimeoy t'Israele, le nañeveñe am' IEHOVÀ ondatio vaho niantoke amy IEHOVÀ naho i Mosè mpitoro'ey.

15

Ty Sabo' i Mosè naho i Miriamae

¹ Le nisabo ty takasy toy am' IEHOVÀ t'i Mosè naho o ana' Israeleo, nipoña-peo ami'ty hoe:

Ho saboeko t'IEHOVÀ,
onjono an-tiotiotse ey,
Nafetsa'e an-driak' ao
ty soavala reke-mpiningi'e. ² Haozarako naho saboko t'IEHOVÀ,
Ie fandrombahañe* ahiko henaneo.
Andrianañahareko re, le ho rengeko,
Andrianañaharen-draeko,
vaho honjoñeko.

³ Fanalolahy añ' aly t'IEHOVÀ,
IEHOVÀ ty Tahina'e.

⁴ Navokovoko'e an-driak' ao
o sarete' i Paròo naho i valobohò'ey.
Nampiopoe'e an-dRia-Binda ao
o roandria jinobo'eo.

⁵ Manafots'iareo i lalekey,
nilempotse an-dalek' ao hoe vato.

⁶ Toe engeñe an-kaozarañe o fita'o havanao, ry IEHOVÀ.
Fa dinorodemom-pitàn-kavana'o
i rafelahiy, ry IEHOVÀ.

⁷ Ami'ty hajabahinam-bolonahe'o
ty anjevoña'o ambane o mivoala ama'oo.
Ampihibitife'o mb'eo ty haviñera'o
mahatomonto iareo hoe tain' ava.

⁸ Ami'ty fikofòm-piantsona'o ty nivotria' i ranoy.
Nitroatse hoe rindriñe i sorotombahañey;
Nizitse an-tro' i riakey o lalekeo.

⁹ Hoe ty asa' i rafelahiy:
Ho horidañeko, ho trako,
Ho zaraeko o dinohitseo;
ie hañeneke ty haveloko.
Hapontsoako ty fibarako,
handrotsaha' ty tañako.

¹⁰ Fe nitiofe'o an-kofò'o
Le nandipotse iareo i riakey.
Nilempotse hoe firake

An-drano nitabohazake ao.
¹¹ Ia amo ndrahareo ty mañirinkiriñe Azo ry IEHOVÀ? Ia ty hambañe ama'o?
Tsomerentsereñe an-kamasiñañe,
mampañeveñe an-drenge,

* **15:2** Sab 118:14, Ies 12:2

ry mpitolon-kalatsàñe!
¹² Nahiti'o ty fità'o havana
 vaho nabea' i taney iereo.
¹³ Am-pikokoa-migahiñe
 ty niaoloa'o ondaty nijebañe'oo.
 An-kafatrara'o ty nitehafa'o
 mb'añ'akiban-kamasiña'o mb'eo.
¹⁴ Nahajanjiñe o kilakila ondatio
 vaho nititititike;
 Fineveneverañe ty nametreke o nte-Pilistio
¹⁵ Nirevendreveñe o mpifehe' i Edomeo
 nihondrahondra o roandria' i Moabeo,
 fonga nitranake o nte-Kanàneo;
¹⁶ nivotraha' ty havorombeloñe
 naho ty hetraketrake,
 ami'ty haozaram-pità'o
 nizitse hoe vato iereo—
 Ampara' te nitsake ondati'oo ry IEHOVÀ, ampara' te nitsake ondaty
 vinili'oo.
¹⁷ Hampimoahé'o ao iereo vaho haore'o am-bohi' i lova'oy—
 i toem-pimoneña'o hinalanka'oy,
 ry IEHOVÀ,
 i fipalirañe naorem-pità'oy ry Talè.
¹⁸ Mifehe nainai'e donia t'IEHOVÀ.
¹⁹ Fa nisorogodañ' an-driak' ao o soavala i Paròo rekets' o sarete'eo naho
 o mpiningi'eo, le nampoli' IEHOVÀ am' iereo o ranon-driakeo vaho nitsake
 añivo' i riakey an-tane maike o ana' Israeleo. ²⁰ Nandrambe kantsàñe amy
 zao t'i Miriamae mpitoky, rahavave' i Aharone, le nañorik' aze an-kantsàñe
 naho tsinjake o rakemba iabio ²¹ vaho nitakasie' i Miriamae:
 Misaboa am' IEHOVÀ
 fa nandreketse am-pandreketam-bolonahetse.
 Navokovoko'e an-driak' ao ty soavala reke-piningi'e.

O Rano i Marà naho i Elima

²² Aa le nendese' i Mosè nienga i Ria-Binday t'Israele naho nionjomb'
 an-dRatraratra' i Sore. Nañavelo telo andro am-patrambey ao iereo fe tsy
 nahatendreke rano. ²³ Ie pok'e Marà[†] ao, le tsy nihay kamaeñe i rano' i
 Marà fa nafaitse. (Zay ty nanoañe ty hoe Marà i aoy.) ²⁴ Aa le niñeoñeo
 amy Mosè ondatio ami'ty hoe: Ino ty hinome'ay? ²⁵ Le nitoreo am'IEHOVÀ
 re naho nitoroa' IEHOVÀ ty hatae, ze nahifi'e an-drano ao nahamamy i
 ranoy.

Teo ty nanoa' IEHOVÀ fañè naho zaka vaho teo ty nitsoha'e iareo. ²⁶ Hoe
 re: Naho imanea'o haoñe ty fiarañanaña' IEHOVÀ Andrianañahare'o naho
 manao ty hahiti'e am-pivazohoa'e naho mijanjiñe o fandilia'eo vaho
 miambeñe o fañè'e iabio, le tsy hapoko ama'o o areteñe nafetsako amo
 nte-Mitsraimeoo, fa Izaho IEHOVÀ Mpampijangañe azo.

²⁷ Le nitotsake Elime ao iereo, toetse an-dohan-drano manganahana folo
 ro' amby naho satrañe fitom-polo; vaho nañialo marine' o ranoo eo.

16

Mahakama hirik' andikerañey

[†] 15:23 Marà: mafaitse

¹ Ami'ty andro fahafolo lime ambi' i volam-paha-roe niavota' iareo antane Mitsraimey, le nañavelo boak' Elime ty valobohò' Israele vaho nivotrak' am-patrambei' i Sine añivo' i Elime naho i Sinày. ² Nitoreo amy Mosè naho i Aharone am-patrambey ao i valobohò' Israeley; ³ le nanoa' o ana' Israeleo ty hoe, Hamake te navetram-pità' IEHOVÀ an-tane Mitsraime ao, ie nitoboke marine' o valañen-kenao vaho nikama mahakama ampara' te nietsake; fe nasese'o ampatrambey atoy ty favoribey toy ho zamane'o an-kasalikoañe.

⁴ Le hoe t'IEHOVÀ amy Mosè, Ingo, hampikojojahako mahakama boak' andikerañe aña vaho hiavotse mb'eo boak' andro ondatio hanontoñe i tsaraeñey, ze mahatsàke i àndroy, hitsohako iareo, ke hañveloa' iareo i Hake natolokoy ke ts'ie. ⁵ Ie amy andro fah' eneñey le halankañe' iereo o natonto'eo, fa ho indroe'ty famoria' iareo boak' andro. ⁶ Aa le hoe t'i Mosè naho i Aharone amo hene ana' Israeleo, Ho fohi' areo hariva te IEHOVÀ ty nañavotse anahareo an-tane Mitsraimey, ⁷ le ie maraindray ho isa' areo ty enge' IEHOVÀ, fa jinanji'e ty fitoreo' areo am' IEHOVÀ. Aa inon-jahay te itoreova' areo? ⁸ Le hoe t'i Mosè, hanjotsoa' IEHOVÀ hena ho kamae' areo te hariva naho mahakama mahaanjañe te maraindraiñe, amy te janji' IEHOVÀ ty fimenomeno' areo te miñeõeoñeoñe—fa inon-jahay? Tsy ama'ay ty fiñeõeoñeoñe' areo fa am' IEHOVÀ.

⁹ Le hoe t'i Mosè amy Aharone, Saontsio o valobohò' Israeleo, Miharinea am' IEHOVÀ, fa jinanji'e ty fitoreo' areo. ¹⁰ Aa naho nilañoñe amy valobohò' Israeley t'i Aharone, ie nitolike mb' ampatrambey eñe, ingo, niboak' amy rahoñey ty enge' IEHOVÀ. ¹¹ Nitsara amy Mosè t'IEHOVÀ nanao ty hoe, ¹² Fa tsinanoko ty fitoreova' o ana' Israeleo; aa le taroño am' iereo ty hoe, hikama hena iereo te hariva, naho ho ànja-mahakama iereo te maraindray vaho hapota' areo te Zaho IEHOVÀ Andrianañahare' areo.

¹³ Ie amy harivay, nionjom-b'eo o hatrakatrakeo nañatseke i tobey; le ie maraindraiñe hoe nizotsoan-jono ty añ'ariari' i tobey. ¹⁴ Ie nionjoñe i zonoy, le ingo ty raha bory nilamak' am-patrambey ey, hoe sisi'e, matify hoe tihin-tà* an-tane eo. ¹⁵ Ie niisa' o ana' Israeleo i raha zay, le hoe ty nifanoïña' iereo, Ino zao?[†] Amy t'ie naahaalik' iareo. Le hoe t'i Mosè am' iereo, Ie ty mahakama nazotsø' IEHOVÀ ama' areo ho kamaeñe. ¹⁶ Inao ty nandilia' IEHOVÀ: Atontono ty hikama'areo, sindre omere raike, ty ami'ty ia' ondati'o, sindre hangalake ty mahaeneñe. ¹⁷ Nanoe' o ana' Israeleo zay, le namory, teo ty nanontoñe maro, teo ty nanontoñe kede. ¹⁸ Aa ie nikapoahé' iareo ami'ty omere, le tsy nanisa ty nanontoñe maro vaho tsy niereñe ty nanontoñe potrapotra'e, songa nanontoñe ty naahaeneñe aze. ¹⁹ Le hoe ty nanao' i Mosè, Asoao tsy hanisaeñe ty maraiñe. ²⁰ Fe tsy hinao' iareo t'i Mosè, teo ty nanisa ami'ty maraiñe, le nipoahan' oletse vaho nitrotrotse. Aa le niviñera' i Mosè. ²¹ Boa-maraiñe ty natonto' iareo, ty amo falie mikamao; ie nipisañe ty àndro le nimosaoñe. ²² Fa ami'ty andro fah' eneñe, songa nitoha indroe' ty mahakama'e, sindre omere roe vaho hene niheo mb'eo o androanavi' i favoribeiiro nitalily amy Mosè, ²³ le hoe re am' iereo, Hoe ty nitsarae' IEHOVÀ: Fitofañe ty hamaray, SABATA masiñe am' IEHOVÀ; atoñaho ze hatoña' areo naho ahandrò ze ahandroeñe te anito, le anisao ty maraiñe. ²⁴ Aa le nanisa ho ami'ty maraiñe, amy nitoroa' i Mosèy fa tsy nimantiñe vaho tsy aman-oletse. ²⁵ Hoe t'i Mosè, Mikama anito, fa Fitofañe am' IEHOVÀ ty androany vaho tsy ho zoeñe ankivok' aña zay te anito.

* ^{16:14} Heb: fanala † ^{16:15} Mane ho: Ino zao?

²⁶ Eneñ' andro ty hanontona' areo, f'ie tsy ho tendreke ami'ty andro fahafito, i Sabatay. ²⁷ Ie amy andro fahafitoy, teo t'indaty nitoha fe tsy naharendreke. ²⁸ Hoe t'IEHOVÀ amy Mosè, Pak' ombia ty mbe hifoneña' areo tsy hañorike o likoo naho i Fetsekoy? ²⁹ Inao, te natolo' IEHOVÀ anahareo ty Sabotse; zay ty anjotsoa'e mofo mahatsàk' andro roe amy andro fahaeneñey. Songa midok' an-toe'e, Ko apo'o ndra iaia hiavotse amy toe'e ami'ty andro faha-fito. ³⁰ Aa le songa nitofa ami'ty andro fahafito[‡] ondatio. ³¹ Natao' o ana' Israeleo mène i mofoy. Nifoty hoe kabaro maike naho hoe mofo pisake nanoeña an-tantele.

³² Hoe t'i Mosè, Zao ty linili' IEHOVÀ, Añatsafo omere raik' ama'e, hahaja ho amo tarira'areo mifandimbeo, hahaoniña' iereo i mahakama nama-hanako anahareo am-patrambey ao t'ie nampiengàko an-tane Mitsraimey. ³³ Le hoe t'i Mosè amy Aharone, Andrambeso korojy le agodoño ao ty mène mahatsàke ty omere vaho ahajao añatrefa' IEHOVÀ ho fihaja amo tarira'areoo. ³⁴ Amy nandilia' IEHOVÀ i Mosèy, ty nampipoha' i Aharone aze aolo' i fañinay ho fihaja. ³⁵ Nikama mène efapolo taoñe o ana' Israeleo, ampara' te nivotrak' an-tane fimoneñañe aña; nikama mène ampara' t'ie nitotsake aña'efetane Kanàne ao.

³⁶ Toe fahafolo ty efà ty omere.

17

ty Vato Fidoañan-drano

Vol. 20.1-13

¹ Nienga i fatrambey Siney mb' ami'ty lia' iareo ty valobohò' o ana' Israeleo ty ami'ty falie' IEHOVÀ vaho nañialo e Refidime fe tsy aman-drano ho kamae' ondatio. ² Le nidoha raha amy Mosè ondatio nanao ty hoe, Meo rano hinome'ay. Hoe t'i Mosè am' iereo, Ino ty idabasidà' areo amako? Ino ty itsoha' areo t'IEHOVÀ? ³ Fe nifeake hataliñiereñe ondatio vaho nitoreo amy Mosè ami'ty hoe, Ino ty nampiavota'o anay amy Mitsraime hamonoa'o anay naho o keleia'aio naho o hare'aio an-karan-dranoñañe? ⁴ Aa le nitoreo am' IEHOVÀ t'i Mosè, ami'ty hoe: Ino ty hanoeko am'ondaty retoñañe? Didý tsy ametsaha' iareo vato. ⁵ Hoe t'IEHOVÀ amy Mosè, Miaria aolo' ondatio, le ampindrezo o androanavi' Israeleo; tintino am-pitañe i kobay napao'o i Naileiy, le akia. ⁶ Inao, hijohañe añatrefa'o ambone' i vato' i Korèbey raho. Paoho i vato, le hiakaran-drano, hikamà' ondatio. Nanoe' i Mosè zay, ampahaisaha' o androanavi' Israeleo. ⁷ Natao'e *Masà naho Meribà i toetsey amy te nidoha raha naho nitsoke IEHOVÀ o ana'Israeleo ami' ty hoe, Amantika hao t'IEHOVÀ ke ts'ie?

Hinorida' i Amalèke

Fot 14.7; Vol. 13.29; 14.25

⁸ Niheo mb'eo amy zao t'i Amalèke nifañotak' am'Israele e Refidime eo. ⁹ Hoe t'i Mosè am' Iehosoa, Joboño ondaty ho antika, le mionjona hialy amy Amalèke. Hijohañe ambone' o vohitseo raho te hamaray le ho antañako i kobain' Añaharey. ¹⁰ Le nanoe' Iehosoa i nampanoe' i Mosèy vaho nialy amy Amalèke, le nañambone' i vohitsey t'i Mosè naho i Aharone vaho i Khòre. ¹¹ Aa ndra mbiambia te nahafañonga-pitâñe t'i Mosè le nahagioke t'Israele, fa ie nazè'e i fitâñey le nahareketse ka t'i Amalèke. ¹² Nihamokotse amy zao o fitâ' i Mosèo le nandrambe vato naho napo' iereo ambane'e hiambesara'e, naho nongahe' i Aharone naho i Khòre o

[‡] **16:30** Fot 2:2-3 * **17:7** Masà: zizy; Meribà: fifandierañe

fità'eo, ty raik' añ' ila'e etia le ty raik' atia vaho tsy nitroetroe o fità'eo ampara' te nitsofotse i àndroy. ¹³ Le ginio' Iehosoa am-bavam-pibara t'i Amalèke naho ondati'eo.

¹⁴ Le hoe t'IEHOVÀ amy Mosè, Sokiro am-boke ao zay ho tiahys vaho apoho an-dravembia' Iehosoa te ho faoheko ambanen-dikerañe ty fitiahiañe i Amalèke. ¹⁵ Le nandrafitse kitrely t'i Mosè vaho natao'e ty hoe, IEHOVÀ Nissy†, ¹⁶ le hoe re, Aa kanao nañonjom-pitàñe amy fiambesa' IEHOVÀY t'i Amalèke, le hifañotak' ama'e t'IEHOVÀ, tarirats' an-tariratse.

18

Ty Fanoroa' Iitrò

Its 1.9-18

¹ Aa naho jinanji' i Iitrò mpisoro' i Midiane, rafoza' i Mosè, ze hene nanoen' Añahare ho a i Mosè naho ho a ondati'e Israeleo vaho ty nampiengà' IEHOVÀ boake Mitsraime ao t'Israele, ² le rinambe' Iitrò t'i Tsiporàe, vali' i Mosè, ie fa nampolie'e, ³ naho i ana'e roe rey. I Geresòme ty añara' ty raike (amy asa'e ty hoe: Fa niambahiny* antanen' ambahiny raho), ⁴ le natao'e Elièzere† ka ty añara' ty raike (fa hoe re, Nañimb'ahy t'i Andrianañaharen-draeko vaho rinomba'e ami'ty fibara' i Parò.) ⁵ Nimb'am-patrambey nitobe'a' i Mosè marine' i vohin' Añaharey mb'eo t'Iitrò rafoza' i Mosè naho i ana' i Mosè rey vaho i vali'ey. ⁶ Nampañitrife'e amy Mosè ty hoe, Fa tsatok'ama'o raho, Iitrò, rafoza'o, rekets' i vali'oy naho i ana'o roe rey. ⁷ Nimb'eo amy zao t'i Mosè nifanalaka amy rafoza'ey le nibokobokoa'e naho norofa'e naho nifañontane fanintsiñañe vaho nimoak' an-kibohots' ao. ⁸ Aa le hene natalili' i Mosè aman-drafoza'e ty nanoe' IEHOVÀ amy Parò naho amo nte-Mitsraimeo ty amo ana' Israeleo, le o fonga haoreñañe nizo' iareo amy lalañeio naho ty nandrombaha' IEHOVÀ. ⁹ Nahafale' Iitrò ze hene hasoa nanoe' IEHOVÀ am' Israele ie nihaha'e am-pita' i Mitsraimeoy.

¹⁰ Hoe t'Iitrò, Andrianañehne t'IEHOVÀ nañaha anahareo am-pità' i Mitsraime naho am-pità' i Parò, ie namotsotse ondatio ambanem-pità' i Mitsraime. ¹¹ Apotako to henaneo te lombolombo ze atao 'ndrahare iaby t'IEHOVÀ, ami'ty nandrombaha'e amo nanotratsotrake iareoo. ¹² Aa le nañenga horoañe naho soroñe aman' Añahare t'Iitrò rafoza' i Mosè, le niheo mb'eo t'i Aharone reketse ze hene roandria' Israele nitrao-pikama amy rafoza' i Mosèy aolon' Añahare.

¹³ Ie loakandro, le niambesatse nizaka añivo' ondatio t'i Mosè, le nijohañe aolo' i Mosè ey ondaty iabio ami'ty maraindray pak' amy harivay. ¹⁴ Ie hene niisa' i rafoza' i Mosèy o nanoe'e am' ondatio le hoe ty asa'e, Inoñe ze o anoe'o am'ondatio? Inoñe ty iambesara'o, ihe avao, vaho mizorazora aolo'o ey ondaty iabio boak' andro ampara' te hariva? ¹⁵ Hoe t'i Mosè aman-drafoza'e, Amy te miheo mb' amako mb' etoa ondatio hañontane aman' Añahare. ¹⁶ Ie mifandietse le mb' amako mb'etoy, hizakako añivo' ty raike naho ty ila'e, le ampandrendrehako o fañèn' Añahareo naho o Nafe'eo. ¹⁷ Hoe ty rafoza' i Mosè ama'e, Tsy mete o anoe'oo. ¹⁸ Toe mamoza-batan-drehe, ihe naho ondaty ama'o retoñañe, amy t'ie loho mavesatse ama'o, le tsy lefe'o toloñeñe, ihe raike. ¹⁹ Aa le haoño ty feoko, fa ho toroako, le hañimb' azo t'i Andrianañahare! Solò añ' atrefan' Añahare ondatio, hanolora'o aman' Añahare o fitoreo' iareoo. ²⁰ Ianaro

† **17:15** Nissy: Vorovoro fañelahelañe
Mpañomba

* **18:3** Ger: ambahiny † **18:4** Eli: A'hareko, Ezera:

o fañèo naho i Hake vaho ampahafohino iareo ty lalan-kombàñe naho ze fitoroñañe hanoeñe. ²¹ Le paiao ondaty mahimbañe añivo' ondatio, mpañeveñe aman' Añahare, ondaty vantañe, malaimbokañe; ajadoño hifehe indaty rezay ho mpamelek' arivo naho mpinday zato naho mpiaolo limampolo vaho mpifehe-folo. ²² Le adono iareo hizaka ondatio nainai'e, ie amy zao hasese' iareo mb'ama'o ze enta-mavesatse le o maivañivañeo ro ho tampahe' iareo. Haivañe ama'o henane zay ie hindre hivave ama'o. ²³ Naho anoe'o zay, vaho andilian' Añahare azo, le ho lefe'o vaho himpoly mb'an-kiboho' iareo am-panintsiañae ondaty retoa.

²⁴ Nihaoñe' i Mosè i rafoza'ey vaho hene nihene'e i natoro'ey. ²⁵ Jinobo' i Mosè amo ana' Israele iabio ty ondaty mahimbañe le nampifehe'e ondatio, ho mpamelek' arivo naho mpifehe zato naho mpifehe limampolo vaho mpifehe folo.

²⁶ Le nizaka ondatio boak' andro amy zao iereo naho nasese' iareo amy Mosè ze zaka tsy nileo vaho nitampa' iereo o raha maivañeo. ²⁷ Aa le tinata' i Mosè i rafoza'ey ie nienga mb'an-tane'e aña.

19

Israele am-Bohi-Sinay Ey

¹ Amy volam-paha-telo niengà' o ana' Israeleo an-tane Mitsraimey, le tsatok' amy àdro zay t'ie nivotrake am-patrambei' i Sinay eo. ² Fa niakara' iareo ty Refidime le nipok' am-patrambei' i Sinay vaho nitobe andratraratra ey. Aa le nañialo aolo' i vohitsey t'Israele. ³ Niañambone mb'aman' Añahare mb'eo amy zao t'i Mosè, le nikanjy aze boak' am-bohitsey t'IEHOVÀ ami'ty hoe, Ty hoe ty ho saontsie'o amy hasavereña' Iakòbey vaho ty hatao'o amo ana' Israeleo: ⁴ Fa niisa' areo ty nanoeko amy Mitsraime naho nibabeako añ'elam-bantio ninday anahareo mb'amako mb'atoy. ⁵ Ie amy zao naho toe janjiñe' areo ty feoko naho mañambeñe i fañinakoy, le ho varako miambake te amy ze hene ondaty. Fonga ahiko ty tane toy. ⁶ Le ho fifeheam-pisoroñe amako naho fifelehañe miavake nahareo. Zay ty entañe ho saontsie'o amo ana' Israeleo.

⁷ Aa le nimb'eo t'i Mosè nikoike o androanavi' ondatio vaho natrefe'e am' iereo i nampitsara' IEHOVÀ azey. ⁸ Le fonga nanoiñe an-kapindre ondatio, ty hoe, Ho henefa'ay ze tsinara' IEHOVÀ. Aa le nabali' i Mosè am' IEHOVÀ i saontsi' ondatiyo. ⁹ Le hoe t'IEHOVÀ amy Mosè, Hehe, te miheo mb'ama'o an-drahoñe milodolodo ao raho, soa t'ie mivolañe, le ho janjiñe' ondatio rehe vaho hatokisa' iareo nainai'e.

Ty Nampiavahañe Ondatio

Ie tinaro' i Mosè am' IEHOVÀ i saontsi' ondatiyo, ¹⁰ le hoe t'IEHOVÀ amy Mosè, Akia mb' am' ondatio mb'eo naho ampiavaho te anito naho hamaray vaho ampanasao iareo o lamba'eo. ¹¹ Le ampihentseño ho ami'ty andro faha-telo fa herone ty hizotsoa' IEHOVÀ am-Bohi-Sinay am-pahaisaha' ze hene ondaty. ¹² Ampiarikoboño efetefetse ty am'ondatio ty vohitse toy vaho ano ty hoe, Mitaoa tsy hiañambone mb'ambohitsey le ko tsapaeñe ty indra'e, fa havetrake ze mitsapa o vohitseo. ¹³ Tsy ho tsapaem-pitâñe, fa ho fetsaham-bato ndra tomboheñe ndra t'ie ondaty ndra biby, fa tsy ho veloñe. Naho mivolañe i antsivay le hitoke amy vohitsey iereo. ¹⁴ Aa le nizotso i vohitsey mb' am' ondatio t'i Mosè naho nampiavaha'e ondatio vaho nanasa lamba iereo. ¹⁵ Le hoe re am' ondatio, Mihentseña ho ami'ty herone, le ko mitotoke ami'ty valy.

¹⁶ Ie maraindrai' i andro fahateloy, le niparapapiake ty àmpiñe miharo helatse vaho ty rahoñe jabajaba amy vohitsey, le akore ty fipoñafa' i antsivay kanao hene nihondrahondra ondaty an-tobeo. ¹⁷ Nendese' i Mosè niakatse i tobey ondatio hifañaoñ' aman' Añahare le nijohañe *ambane' i vohitsey.

¹⁸ Kinolopon-katoeñe amy zao i vohitsey amy te nizotso ama'e ami'ty afo t'IEHOVÀ; le nifororoake nañambone manahake ty hatoe' o votrim-birìke sodorañeo ty hatoeñe vaho niozoñozoñe mafe i vohitsey. ¹⁹ Ie nitolom-pipopo ty feo i antsivay, nihadamsiañe, le nisaontsy t'i Mosè vaho nanoiñe an-kotroke t'i Andrianañahare. ²⁰ Ie nizotso mb'amy Vohi-Sinaiy mb'eo t'IEHOVÀ, ambone' i vohitsey eo, le kinanji' IEHOVÀ t'i Mosè hiañambone' i vohitsey vaho niañambone mb'eo t'i Mosè. ²¹ Le hoe t'IEHOVÀ amy Mosè, Mizotsoa mb'eo le hatahatao ondatio tsy mone hisosoke mb'eo hisamba IEHOVÀ; vaho hifitafita eo ty maro. ²² Le tsi-mete tsy mañefe-batañe hey o mpisoroñeo te hañarine IEHOVÀ hera hiboroboñak' ama'e t'IEHOVÀ. ²³ Hoe t'i Mosè amy IEHOVÀ, Tsy mete ondatio ty homb' am-Bohi-Sinay mb' atoy; amy te Ihe ro nañatahata anay ami'ty hoe, Ampijadoño efetse hañarikatoke i vohitsey vaho ampiambaho. ²⁴ Hoe t'IEHOVÀ ama'e, Akia, mizotsoa, le mañambonea mb' etoy, ihe mindre amy Aharone; le ko ado'o hiboroboñake hiañambone mb'am' IEHOVÀ o mpiaoloo ndra ondatio; tsy mone hitorotosira'e. ²⁵ Aa le nizotso mb'am' ondatio mb'eo t'i Mosè ninday i tsaray.

20

Ty Tsara Folo

Its. 5.1-22

- ¹ Le nanao o hene tsara zao t'i Andrianañahare:
- ² Zaho IEHOVÀ Andrianañahare'o nampieng' azo an-tane Mitsraime boak' an-trañom-pandrohizañe ao.
- ³ Ko ho aman-drahare hatovoñ' ahy rehe. ⁴ Ko mandranjy raham-pahasive, ndra sareñ' inoñ' inoñe andikerañe ambone eñe, ndra an-tane ambane atoy, ndra an-drano ambane tane ao. ⁵ Ko ibokobokoa'o ndra itoroña'o; fa Andrianañahare mpamarahy raho IEHOVÀ Andrianañahare'o, mpandilo anake ty amo hakeon-drae'eo pak' an-tarira'e fahefatse naho fahatelo' o tsy mañaoñe Ahikoo, ⁶ vaho mampiboake fikokoa-migahiñe ami' ty tariratse fah' arivo' o mpikoko ahiko naho mañàmbeñe o lilikoo.
- ⁷ Ko vavè'o tsy vente'e ty tahina' IEHOVÀ Andrianañahare'o, amy te tsy hihevea' IEHOVÀ ze mivave i tahina'ey ami'ty tsy fanjofaha'e.
- ⁸ Tiahio ty andro Sabotse hañavaheñe aze.
- ⁹ Eneñ' andro ty hitoloña'o hanao ze hene tolon-draha'o.
- ¹⁰ Fa Fitofàñe am' IEHOVÀ Andrianañahare'o ty andro fahafito; ko mitoloñ' ama'e rehe; ihe, ndra ty ana-dahi'o ndra ty anak'ampela'o ndra ty ondevo'o lahy naho ampela,

* ^{19:17} nonjonen' A're ambone' i màroy i vohitsey.

ndra o hare'oo ndra o renetane mpimoneñe an-dalambei'oo.

¹¹ Amy te eneñ' andro ty namboare' IEHOVÀ o likerañeo naho ty tane toy naho i riakey naho ze hene am' iereo ao vaho nitroatse ami'ty andro faha-fito; le nitahie' IEHOVÀ ty andro Sabotse vaho nimasiñe'e.

¹² Miasia an-drae'o naho an-drene'o soa t'ie ho lava ohatse an-tane hatolo' IEHOVÀ Andrianañahare'o azo.

¹³ Ko mañe-doza.

¹⁴ Ko mañarapilo.

¹⁵ Ko mampikametse.

¹⁶ Ko mitalily vilañe ondaty.

¹⁷ Ko mihàñe ty anjomba' ondaty; ko mikiroke ty vali'ondaty, ndra ty mpitoro'e lahilahy ndra ampela, ndra ty añombe'e ndra ty birike'e ndra inoñ'inoñe amo fanaña' ondatio.

¹⁸ Niisa' ondatio o fipazakeo naho o helatseo naho ty hamatsiaña' i antsivay naho i vohitse nañatoeñey, toe nahaisake ondatio le nititititike naho nijohañe ey avao, ¹⁹ vaho nanao ty hoe amy Mosè, Misaontsia ama'ay, le ho janjiñe'ay, fe ko ampitsarae'o ama'ay t'i Andrianañahare tsy mone hikoromake. ²⁰ Aa hoe t'i Mosè am'ondatio, Ko hembañe; Ie hitsok' anahareo ty nivotrahan' Añahare, hañeveña' areo, tsy handilara' areo. ²¹ Fe nijohañe ey avao ondatio vaho nitotoke mb'amy filodolodoandrahõne nitoeran' Anaharey ao t'i Mosè.

²² Hoe t'IEHOVÀ amy Mosè: Ty hoe ty hatao'o amo ana' Israeleo, Toe nioni' areo ty nivolañako boak' amo likerañeo: ²³ Ko mamboatse saren-drahare volafoty hatovoñ' ahy ndra mitsene saresaren-drahare volamena ho anahareo.

Ty Lili' o Kitrelio

²⁴ Kitrely tane ty hamboara'o ahy, le ama'e ty hisoroña'o o enga horoa'o naho o sorom-panintsiña'oo, o añondri'oo naho o añombe'oo; amy ze tane ampitiahiaiko ty añarako, le homb' ama'o mb'eo raho hitahy azo. ²⁵ Aa naho amboara'o kitrelim-bato le ko anoe'o am-bato finandrake; amy te mahativa aze te añoharam-pàndrake. ²⁶ Vaho ko mitroatse am-panongañe tsy mone hiboake ty heña'o.

21

O Lili' Ondevoo

Its 15.12-18

¹ Iretoañ' o fètse ho taroñe'o am' iereoo: ² Ie mivily ondevo lahilahy nte-Evre le enen-taoñe ty hitoroña'e, f'ie hiavotse hidada ami'ty fahafito, afa-tsongo. ³ Ie dogalahy te mizilik' ao le i hadogà'ey ty hiakara'e; ie manam-baly te mizilike le amam-bali'e ka te hiavotse. ⁴ Ie tolora' ty talè'e valy vaho mahatoly ana-dahy ndra anak' ampela ama'e le ho a i talè'ey i vali'ey naho o ana'eo, le doga re te hiakatse ao. ⁵ Fe naho mitsey ty hoe i mpitoro'ey, Kokoako ty talèko naho ty valiko vaho o anakoo; tsy te hiakatse ampidadàn-draho, ⁶ le hasese' i talè'ey añatrefan' Añahare*. Hendeseñe mb'an-tsarirañe mb'eo ndra am-pikalan-dalañe eo le ho trofahe' ty talè'e fañity ty ravembia'e vaho ho toroñe'e kitro añ'afe'e.

⁷ Ie aleta' t'indaty ho ondevo ty anak' ampela'e, le tsy hanahake ondevo lahilahy ty hiakara'e. ⁸ Naho heje' ty talè'e, ie jinobo'e ho am-bata'e, le azo

* **21:6** Mpizaka misolo an'Andrianañahare

jebañeñe; fe tsy hanan-jo handetak' aze ami'ty ambahiny naho heje'e, ie nifañahia'e. ⁹ Aa naho fofoe'e ho a i ana-dahi'ey le hampanahafe'e amo anak' ampelao. ¹⁰ Ie mañenga valy tovo'e le tsy aketrake ty mahakama'e ndra ty lamba'e ndra ty fialoza'e. ¹¹ F'ie tsy hañeneke i telo rezay le hiakatse ampidadàñe re tsy an-tsongo, tsy mandoa vola-foty.

Ty Lili' o Firombahaneo

¹² Tsi-mete tsy havetrake ty namofoke ondaty nampikoromak' aze. ¹³ Aa naho tsy nikililieñe, fe nasesen' Añahare am-pit  e, le ho toroako toetse hirombah  e. ¹⁴ Fe naho iambotraha' t'indaty am-pamañahia  e t'indaty hamonoa'e am-pitak'ate, le hasita' areo amy kitrelikoy re hivetrake.

¹⁵ Tsi-mete tsy havetrake ze mandafa rae ndra rene. ¹⁶ Tsi-mete tsy havetrake ze mampikametse ondaty, he t'ie naleta'e ke te zoe  e am-pit  eo. ¹⁷ Tsi-mete tsy havetrake ze mam  tse rae ndra rene.

¹⁸ Naho mifa  notake t'indaty vaho dasire' ty raike am-bato ty raike ndra lihi  e an-toto-fetreke, f'ie tsy mivetrake, fa mikopake an-tihy, ¹⁹ aa naho mitroatse indatiy naho midratraitse alafe'e ao am-pito  o  e, le avotsotse i nandafay, fe havaha'e i fitoboha'ey vaho tsi-mete tsy hatrafe'e ampara' t'ie janga  e.

²⁰ Naho fofoh   ondaty an-kobai  e ty ondevo'e lahilahy ndra ampela, ie mikoromak' am-pit  eo, le toe ho lilova  e. ²¹ Fa naho mbe mitambelo  e andro roe ndra raike re le tsy ho lilove  e ka, kanao fana  a'e.

²² Naho mijoy ty ampela mivesatse t'indaty mifandrapake vaho mabholo  e ty ana'e tsy a  nom-bola  e, fe tsy orihem-boy, le toe ho lilove  e re ami'ty hampanoa' ty vali' i rakembay vaho hampa  ondrohe' o mpizakao. ²³ F'ie orihem-boy le soloam-piay ty fiay, ²⁴ fihaino ty fihaino, famotsy ty famotsy, fit  e ty fit  e, fandia ty fandia, ²⁵ soba ty soba, fere ty fere, fofoke ty fofoke.

²⁶ Aa naho trofahe' ty tal  e ty maso' ondevo'e lahilahy ndra ampela vaho mijoy aze, le havotso' i tal  ey hidada i ondevoy, ho solo' i masoy.

²⁷ Naho apiro' ty tal  e ty nife' ondevo'e ke lahilahy he ampela, le havotsotse i ondevoy; hasolo i nifey ty fihah  e.

Lili' o Varao

²⁸ Naho mitomboke ondaty ty a  nombe naho mampihomak' aze le tsi-mete tsy ho retsahem-bato i a  ombey vaho tsy ho kama  e ty nofo'e; fa votsotse ty tempo' i a  ombey. ²⁹ Aa naho nilili' i a  ombey omale ndra fak'omale ty mandronjeronje amo tsifa'eo ie nampandrendrehe  e i tempo'ey, fe tsy kinala' i tempo'ey am-pahetse vaho ma  e-doza amy t'indaty ndra rakemba i a  ombey, le ho fetsahem-bato i a  ombey vaho havetrake i tempo'ey. ³⁰ Fa naho ampa  ondrohe  e drala ka i tempo'ey, le havaha' i tempo'ey ho fijeba  am-piai' ty amy ze ampa  ava  a  e iaby. ³¹ Ie mitombok' ajalahy ndra ampela, le hampa  avahe  e an-jaka. ³² Naho mitomboke ondevo lahilahy ndra ampela ka i a  ombey le ampa  avahe  e volafoty sekele 30 i tempo'ey vaho retsahem-bato i a  ombey.

³³ Naho sokafe' t'indaty ty kobo  e, he mihaly kadaha fa tsy kapefa'e vaho mikorovok' ao ty a  ombe ndra birike, ³⁴ le ty tempo' i haliy ro ha  avake vaho ha  ondroke drala ami' ty tempo' i harey, fe aze i matey.

³⁵ Naho joie' ty a  ombe' ondaty ty aze, le haleta' iareo i velo  ey naho ho zarae' iereo roe i vili'ey vaho ifanjara  e i matey. ³⁶ Fe naho nifohi  e te lili' i a  ombey ty mandronje, fe tsy kinala' i tempo'ey am-pahetse, le havaha' i tempo'ey a  ombe i a  ombey vaho aze i matey. ³⁷ Naho mampikametse

añombe ndra ose t'indaty he alèta'e ke lentae'e, le hampañavaheñe añombe lime ty añombe raike naho ose efatse ty ose raike.

22

Lili' o Fañavahañeo

¹ Naho zoeñe te mampipoñake ty mpampikametse ie trinabotraboke vaho navetrake, le tsy havahan-dio. ² F'ie nanjiriha' i àndroy le ho valeam-pate ty lio. Tsi-mete tsy avahañe, aa ie poi'e, le haletake hasolo i finao'ey. ³ Aa naho tendrek' am-pitâ'e ty nikamere'e, ke te añombe, ke borìke, he añondry: le havaha'e roe.

⁴ Ie iandraza' ondaty ty teteke ndra ty tanem-bahe naho adare'e ama'e o hare'eo vaho iandraza'e ty tonda'ondaty, le tsi-mete tsy avaha'e boak'an-tete'e ami'ty soa an-tete'e ao naho an-tanem-bahe'e ao.

⁵ Naho mirehetse naho mandakak' an-drongoñe ty afo vaho mamorototo tsako navotry ndra mizorazora ke mampianto teteke, le toe havaha' i namiañe i afoiy.

⁶ Naho andivà' t'indaty an-drañetse ty drala ndra vara hahaja'e; aa ie kamereñe amy anjomba'ey, le havaha' i nampikametsey roe t'ie oniñe.

⁷ Naho tsy oniñe ka i nampikametsey le hasese mb'an-jaka i tempo-trañoy handohiañe, hera ie ty nampijom-pitâñe am-baran-drañe'e ao.

⁸ Naho eo ty mifandietse ty ami' ty añombe, he borìke, ke añondry, ke lamba, he inoñ' inoñe nimotsø, ie atao ty raike te aze, le songa hiatreke mpizaka; vaho hañavake in-droe amy rañe'ey i nafam-pizakay*.

⁹ Aa naho atolo' ondaty an-drañetse hambena'e ty borìke ndra añombe, ke añondry he ze hare, le ie mate, he fere, ke rinoak' aña tsy nion'i ondaty,

¹⁰ le hanoeñe fanta am' IEHOVÀ, añaivo iereo roe, te tsy nikamere' i rañetsey ty hare' indatiy naho ho no' ty tempo'e i fantay vaho tsy hañavake re. ¹¹ Fe naho nikamerañe i rahay le havaha'e amy tempo'ey. ¹² Naho nirimitem-biby, le tsi-mete tsy hendese'e i matey ho rendreke, fa tsy havaha'e i nijoy.

¹³ Naho mindran-draha an-drañetse t'indaty, he mianto ke te mate, ie tsi-ao-tempo, le havaha' i mpindrañey. ¹⁴ Fa naho eo tempo'e le tsy havahañe; naho nifondroeñe le avaha' i fondroy.

¹⁵ Naho mañedre somondrara[†] mboe tsy nifofoeñe t'indaty, ie miolots' ama'e, le tsy mahay tsy engae'e ho valie'e. ¹⁶ Aa naho ifoneñan-drae'e tsy hanolotse aze, le tsi-mete tsy hondrohe'e ty fañengan-tsomondrara.

¹⁷ Ko adoke ho veloñe ty mpamòreke.

¹⁸ Ho vonoeñe ze misàhe biby. ¹⁹ Havetrake ze manao soroñe amy ze atao ndrahare naho tsy am' IEHOVÀ avao.

²⁰ Ko mamorefore ty renetane ndra mamorekeke aze, amy te niambahiny an-tane Mitsraime aña ka nahareo.

²¹ Ko silofe' areo ze atao vantotse ndra bode, ²² Aa ie helofe'o vaho mitoreo amako, le toe ho tsanoñeko ty fitoreo' iareo; ²³ hisolebotse ty haboseko le ho zevoñeko fibara, le ho remavoiñe o vali' areoo vaho ho bode o ana' areoo.

²⁴ Naho ampisongoe'o ondatikoo ndra ami'ty rarake ama'o ao, ko manao mpampisongo ama'e, le ko angala'o ana'e. ²⁵ Ndra mbia ty andrambesa'o ho tsoake ty saro' ondaty le abaliho aolo' ty tsfot's andro, ²⁶ hera zay avao ty fisafora'e naho ty filafin-tsandri'e te mirotse. Le ie mitoreo amako, hitsanon-dRaho fa mpiferenaiñe.

²⁷ Ko onjirañe o mpizakao, le ko mamàtse ty mpifehe' ondati'oo.

* ^{22:8} Toe mpizaka misolo an'A'hare † ^{22:15} Somondra: Tsy nahavany lahy atoy.

²⁸ Ko mihenekenke tsy hibanabana ty lengom-boan-kavokaran-tete'o naho ty lengom-pipineha'o. Atoloro ahiko ty tañoloñoloña'o. ²⁹ Ano zay ka o añombe'oo naho o añondri'oo: ho fito andro an-drene'e re vaho atoloro ahiko ami'ty andro faha-valo.

³⁰ Hondaty miavake amako nahareo; aa le ko kamae' areo ze nofotse rinimitem-biby an-kivoke ey, fa ahifiho amo amboao.

23

¹ Ko minday tolom-boetse, ko manò-pitâñe ami'ty tsereheñe hitaroña'o entam-bilañe.

² Ko orihe'o ty maro hikabo-draha; naho ko mireketse amy màroy handesa'o talily mampiolake ty hato; ³ vaho ko osihe'o ami'ty kabò'e ty rarake.

⁴ Ihe mifanojeha ami'ty añomben-drafelahi'o, ndra ami'ty borìke'e nandifike, le tsi-mete tsy hampolia'o. ⁵ Naho mifanjò ami'ty borì'i i mpalaiñ' azoy tafahohok' ambane' o kilanka'eo, ko rioñeñe, fa tsi-mahay tsy holora'o hampibalak' aze.

⁶ Ko mengohe'o ty fizakañe i rarake ama'oy ty amy naneseha'ey.

⁷ Mihankaña ami'ty raha tsy to; ko mañoho-doza amo vantañeо naho amo vañoñeо. Fe tsy ho meako to i tsereheñey.

⁸ Ko mandrambe vokañe, fa mahagoa ty mahavazoho ty ravoravo, naho mañamengoke ty saontsi' o mahitio.

⁹ Ko forekeke'o ty renetane amy te fohi' areo ty tron-drenetane, fa ni-renetane an-tane Mitsraime aña ka nahareo.

O Hafitoañeо

¹⁰ Enen-taoñe ty hambolea'o ty tane'o hanontoñe ty voka'e, ¹¹ fe ko irangàm-pangaly amy faha-fitoy, hitofà'e, hikamà' ondaty rarake ama'oo; le ho hane' o bibin-kivokeo ty nasisa. Ampanahafo amy zay ty tanem-balobo'o naho ty golobon-olive'o.

¹² Eneñ' andro ty hitoloña'o, le hitofa ami'ty andro fahafito, soa te hitofa ka ty añombe'oo naho ty borìke'o vaho ho haha ka ty anam-pitoro'o ampela naho ty renetane.

¹³ Ambeno i vinolako rezay, le ko toñone' areo ty añara' ze o ndrahare ila'e zao vaho ko apo'o ho janjiñeñe am-palie'o.

Takataka Telo

¹⁴ In-telo ami'ty taoñe ty hanoa'o takataka amako: ¹⁵ Hambena'o ty Sabadidake Mofo po-Dalivay; fito andro ty hikama'o mofo po-dalivay, amy nandiliako azoy, amy namantañako aze am-bolan-Kofahofay, fa ama'e ty nienga'o i Mitsraime: vaho tsy hatrefeñe an-tañam-polo raho; ¹⁶ le i Sabadidam-pitatahañey, ty lengom-boa' o fitoloña'oo, o nambole'o antetekeo; vaho i Takataka-Panontonañey, amy figadoñan-taoñe anontona'o sabo an-tete'o ao. ¹⁷ Homb' añatrefa' IEHOVÀ Talè in-telo ami'ty taoñe ze hene lahilahy.

¹⁸ Ko atraok' an-dio soroñeñe amako ty mofo aman-dalivay le tsy hampialeñeñe ho sisaeñe hamaray ty havondra' o famantañakoo.

¹⁹ Aseseo mb'añ'anjomba' IEHOVÀ Andrianañahare'o ty loha'e, toe ty lengom-boan-tane'o.

Ko ahandroeñe an-drononon-drene'e ty anak'ose.

Ty Anjely naho o Fampitamañeо

²⁰ Ingo, hampiaolèko ty anjely hañimb' azo amy lalañey, hanese azo mb' amy tane nihalankañekoy. ²¹ Itaò vaho oriho ty fiarañanaña'e, le

ko iolañe, toe tsy hapo'e o fandilara' areoo fa ama'e ty añarako. ²² Aa naho toe ambena'o i fiarañanaña'ey naho anoe'o o itaroñako iabio, le ho rafelahiko o rafelahi'oo vaho hifankalaiñe amo mpifankalaiñe ama'o raho. ²³ Le hiaolo azo i Sorotàkoy hanese azo mb' amo nte-Emoreo naho amo nte-Kheteo naho amo nte-Perizeo naho amo nte-Kanàneo naho amo nte-Kiveo vaho amo nte-Iebòseo mb'eo, fa haitoako.

²⁴ Ko milokoloko amo 'ndrahare'eo, le ko itoroña'o, ndra mitsikombe o sata'eo; fa toe ho fonga rotsahe'o vaho ho fira'e'o o hazomanga'eo.

²⁵ Toroño t'IEHOVÀ Andrianañahare' areo, le ho tahie'e ty mahakama'o naho ty rano'o vaho hampihankàñeko ze atao hasilofañe añivo'o ao, ²⁶ le tsy ho aman-drakemba hañafake ndra ty ho betsiterak' an-tane'o ao; vaho ho heneffeko o andro'oo. ²⁷ Hampihitrifeko hiaolo azo ty fihembañañe ahy, le hampitsamborohotaheko iaby t'indaty hivotraha'o vaho fonga hampiambohoeko azo o rafelahi'oo. ²⁸ Hiraheko fanene-bola hiaolo azo hampibaibay o nte-Kiveo naho o nte-Kanàneo naho o nte-Kheteo aolo'o ey. ²⁹ F'ie tsy hataoko soik' ami'ty taoñe raike tsy mone hangoakoake i taney vaho hifamorohotse ama'o o biby hakoo. ³⁰ Ho roaheko boak' ama'o erike ampara' te nihamaro rehe hahalova i taney.

³¹ Hajadoko boak' amy Riake Menay pak' an-dRia' o nte-Pilstio ty eftane'o naho boak' amy fatrambeiy pak'amy sakay; le haseseko am-pitá' areo ty mpimoneñe amy taney haronje'o mb'aolo'o mb'eo. ³² Tsy hifañina ama'e ndra amo ndrahare'eo rehe. ³³ Tsy himoneña'e ty tane'o, hera hampanan-kakeo azo amako, fa naho toroñe'o o 'ndrahare'eo, le toe ho fandrik' ama'o.

24

No' Israele ty Fañina' IEHOVÀ

¹ Le hoe re amy Mosè, Mionjona mb' am' IEHOVÀ mb'etoy, ihe naho i Aharone, i Nadabe naho i Abiho naho ty fitompolo amo androanavi' Israeleo vaho mitalahoa ey nahareo. ² I Mosè avao ty hañarivo IEHOVÀ, le tsy hañarine ey iereo vaho tsy hindre ama'e hañambone mb'eo ondatio.

³ Nomb'eo amy zao t'i Mosè nitalily am'ondatio ze hene tsara' IEHOVÀ naho o fañè'eo; le songa nanoñe am-piarañanañañe raike ondatio, ty hoe, Ho henefa'ay ty tsara iaby nanoe' IEHOVÀ.

⁴ Aa le sinoki' i Mosè o hene tsara' IEHOVÀ naho nañaleñaleñe namboatse kitrely am-poto' i vohitsey vaho nampitroatse anakòreñe foloro'amby ty ami'ty ia' o rofoko folo-roe-ambi' Israeleo, ⁵ le nañiraha'e ajalahy ana' Israele hibanabana enga horoañe naho añombe ho sorompanintsinañe am'IEHOVÀ.

⁶ Nav'i i Mosè am-pinga ao ty vaki' i lioy vaho naretsa'e amy kitreliy ty ila'e. ⁷ Rinambe'e amy zao i bokem-pañinay le vinaki'e am-pijaniña' ondatio; le hoe iereo, Hanoe'ay ze hene tsara' IEHOVÀ vaho ho haoñé'ay.

⁸ Le rinambe' i Mosè i lioy naho nafitse'e am'ondatio vaho nanao ty hoe, Ingo ty liom-pañina nanoe' IEHOVÀ ama' areo ty amy hene tsara rezay.

Mindre aman'Añahare ambone' i Vohitsey

⁹ Niañambone amy zao t'i Mosè naho i Aharone, i Nadabe naho i Abiho vaho ty androanavy fitompolo' Israele; ¹⁰ le niisa' iereo t'i Andrianañahare' Israele; le hoe linamike safira ty ambane' o fandia'eo vaho nanahake o likerañeо ami' ty fikantsokantsoña'e. ¹¹ Le ie tsy napao-pitáñe amo androanavi' Israeleo, f'ie nahaisake i Andrianañahare naho nikama vaho ninoñe.

¹² Hoe t'IEHOVÀ amy Mosè, Miañambonea mb'amako mb'etoa, le mitambara atoy, fa ho tolorako ravem-bato reketsé Hake naho lily sinokiko hañòhañé iareo.

¹³ Aa le niongake t'i Mosè naho Iehosoa mpitoro'e vaho nionjoñe mb' amy vohin' Añahare amboney mb'eo t'i Mosè. ¹⁴ Le hoe re amy androanavy rey, Liñiso etoan-jahay, ampara' ty impolia'ay; ama' areo t'i Aharone naho i Khòre, hiheova' ze aman-kalahatse.

¹⁵ Aa le niañambone' i vohitsey t'i Mosè vaho kinolopo' ty rahoñé i vohitsey. ¹⁶ Nivotrak' ambohi-Sinay eo ty enge' IEHOVÀ, le nanaroñé aze eneñ' andro i rahoñey; ie ami'ty andro fahafito, nikanjie'e boak'amy rahoñey t'i Mosè. ¹⁷ Le nihoe afo nisolebotse ambone' i vohitsey ty Enge' IEHOVÀ am-pihaino' o ana'Israeleo. ¹⁸ Nizilik' amy rahoñey t'i Mosè, niañambone i vohitsey. Le tambatse am-bohitse ao efapolo andro naho efapolo haleñé t'i Mosè.

25

Banabana ho a i Kivohoy

¹ Nitsara amy Mosè t'IEHOVÀ nanao ty hoe, ² Misaontsia amo ana' Israeleo, ty hañenga raha amako. Toe ze ondaty manolotse an-tsatri'e ro andrambesañé enga ho amakoy. ³ Zao ty enga ho rambese'o am'iareo : volamena naho volafoty vaho torosike; ⁴ le manga naho malòmavo naho mena mañabarà naho leny marerarera vaho volon-ose; ⁵ le holin' añondri-lahy linoko mena naho holin-trozofisoitse vaho mendoraveñé; ⁶ solike ho amy jiroy, emboke ho amy menake fañorizañey naho ho amy fañembohañé mandrifondrifóñey; ⁷ vato sohàme* naho vato soa hapetake ami'ty kitambe naho ami'ty takon' araña. ⁸ Le ampandranjio kivoho himoneñako am' iereo ao, ⁹ hilahatse amy ze he'e hatoroko azo, le ty sare' i kivohoy naho ty sare' o harao'e iabio ty handranjia' aze.

Ty Vatam-Pañina

¹⁰ Ho tsenè' iereo ami'ty mendoraveñé ty vata; kiho roe naho tampa'e ty ho andava'e le kiho raike naho tampa'e ty ho ampohe'e vaho kiho raike naho tampa'e ty haabo'e. ¹¹ Ipakoro volamena ki'e, ao naho eo ty ampipakora'o aze, le ampiarikoboño soñi'e volamena ty andrina'e. ¹² Iramerameo ravake volamena efatse, le ampireketo an-kotso'e efatse; ravake roe etia vaho ravake roe atia. ¹³ Le andranjio baoñé mendoraveñé vaho ipakoro volamena. ¹⁴ Atsorofoto amy ravake añ' ila' i vatay rey i baoñé rey hitarazoña i vatay. ¹⁵ Hadoñé amo ravakeo avao i baoñé rey le tsy hafahañé. ¹⁶ Hajo'o amy vatay i Fañinay, i hatoloko azoy.

¹⁷ Itseneo toem-pijebañañé volamena ki'e; kiho roe naho tampa'e ty andava'e vaho kiho raike naho tampa'e ty ampohe'e. ¹⁸ Le andranjio kerobe volamena roe, am-pipepehañé añ' ila roe i toem-pijebañañey; ¹⁹ kerobe raike etoañé naho kerobe raike eroañe. Tseneo am-bongambolamena raike i toem-pijebañañey naho i kerobe rey. ²⁰ Hamelatse elatse ambone'e i kerobe rey, hanakoñé i toem-pijebañañey an-elatse, sindre hifañatre-daharañé naho hitolike amy toem-pijebañañey ty lahara' i kerobe rey. ²¹ Apoho ambone' i vatay boak' ambone i toem-pijebañañey, le ajoñó amy vatay i Fañinay, i hatoloko azoy, ²² le hihaoñé ama'o raho ambone' i toem-pijebañañey, boak' añivo' i kerobe roe ambone' i vatam-pañinay rey naho ho taroneko ze hene ho lilieko amo ana' Israeleo.

* 25:7 Sohame: vato soa bandieñé

Ty Rairay

²³ Mandranjia rairay ami'ty roy, kihō roe ty andava'e naho kihō raike ty ampohe'e vaho kihō raike naho tampa'e ty haabo'e. ²⁴ Ipakoro volamena ki'e vaho itseneo soñy ty andrira'e hañarikatok' aze. ²⁵ Le andranjio rira'e mizehe treham-pitāñe hañarikatofa'e fehe, vaho tseneo soñy andrira'e hañariary aze. ²⁶ Itseneo ravake volamena efatse, le areketo an-kotso'e efatse, toe an-tombo'e efatse i ravake rey, ²⁷ ho marine i rira'ey o ravake fitana' o bao-pitakonañe i rairaiio. ²⁸ Ranjio ami'ty mendoraveñe i baoñe rey vaho ipakoro volamena ho fitakonañe i rairaiy. ²⁹ Le itseneo fanake volamena ki'e: fioke, endraendra naho fitovy. ³⁰ Le hapoke ambone'i rairay añatrefako nainai'ey i mofo miatrekey.

Ty Fitàn-Jiro

³¹ Tseneo am-bolamena ki'e ty fitàn-jiro; pepeheñe i fitàn-jiro; ho raik' ama'e ty foto'e rekets' i taho'ey, o korobo'eo, o rava-drave'eo vaho o voñe'eo; ³² ho eneñe ty tsampa miakatse amo ila'eo, ty tsampa telo' i fitàn-jiro ty hilositse ami'ty ila'e raike naho ty tsampa telo' i fitàn-jiro ty hilositse aña'ilae ka; ³³ korobo telo hoe boti-mahabibo ty an-tsampa'e raike songa aman-drava-draveñe naho ravem-boñe, le korobo telo hoe boti-mahabibo sindre aman-drava-draveñe naho ravem-boñe amy tsampa tandrife azey; sambe hoe zay i tsampa'e eneñe miakatse ami'ty taho' i fitàn-jiro rey.

³⁴ Amy taho' i fitàn-jiroiy ty ho korobo efatse nitsenen-ko sarem-botimahabibo rekets' o rava-drave'eo naho o ravem-boñe'eo. ³⁵ Ami'ty fireketa' ty tsempa'e ki-roe-roe amy taho'ey ty ho rava-draveñe miray ami'ty tsampa'e roe, ho amy tsampa'e eneñe rey. ³⁶ Ho raik' amy taho'ey o rava-drave'eo naho o tsampa'eo, aa le ho vongam-bolamena ki'e raike nipepeheñe i fitàn-jiro fonitsey. ³⁷ Itseneo jiro fito, le hatsatoke hipasàk' aolo'e mb'eo i jiro rey. ³⁸ Ho volamena ki'e o fiharata'eo naho o sadrò'eo. ³⁹ Talènta† volamena ki'e raike ty itseneañe aze naho i harao'e iaby rezay. ⁴⁰ Henteo arè, le itseneao hambañe amy sare'e natoro azo ambohitsey.

26

I Lamba Fikopoke

Avo 36.8 - 38

¹ Tovo'e zay le hanoa'o lamba fañefetse folo i kivohoy, am-pole leny rinorotse matify naho manga malòmavo naho mena mañabasà; vaho kerobe satam-pamahotse. ² Sindre ho kihō roapololo-valo' amby ty halava' ty lamba-fañefetse le songa kihō efatse ty ampohe'e; hamban-jehe'e iaby o fañefe'eo. ³ Lamba-firindry lime ty hifamitrañe naho lamba-firindry lime ka ty hifamitrañe. ⁴ Tseneo ravake manga ty andrira fara' ty namitrañeñe valoha'e naho ravake manga ty andrira fara' ty namitrañeñe faharoe. ⁵ Tseneo ravake limampolo ty lamba-firindriy raike vaho tseneo ravake limampolo andrira fara' i fiharoa'e faharoe, ampanandrifeo o ravakeo. ⁶ Itseneo famitrañe volamena limampolo, le ampivitraño amy ravake rey i lamba-firindry rey le hifampikatoke ho raike i kivohoy.

⁷ Anjairo lamba-fikopoke am-bolon-ose ho kibohotse hakopoke i kivohoy; ano lamba-fikopoke folo raik' amby. ⁸ Sindre telopoloo kihō ty halava' ty lamba-fikopoke vaho songa efatse kihō ty ampohe'e; hindray habey i lamba-fikopoke folo-ro'amby rey. ⁹ Ampivitraño ty lamba-fikopoke lime

† 25:39 talenta raike = 30 kilao

naho ampivitrañeñe ty lamba-fikòpoke eneñe vaho avaloño mira i fah' eneñey an-tsarira' i kibohotsey. ¹⁰ Itseneo ravake limampolo ty andrira' i lamba-fikopoke fara' e amy fifamitrañañe raikey vaho ravake limampolo andrira' i lamba-fañefetse fara' i faharoey. ¹¹ Tseneo famitrañañe torisike limampolo le areketo amy ravake rey i famitrañañe rey vaho hikatoke ho raike i kibohotsey. ¹² Ty ila' i fikopa' i kibohotsey milapiy, ty vaki' i lamba-fikopoke sisay, le haraviravy amboho' i kivohoy. ¹³ Ty kihoe' etoy naho ty kihoe' eroy, ty sisa' amy halava' o lamba-fakopa' i kibohotseio ro haraviravy andrindri' i kivohoy etia naho aroa hañalok' aze. ¹⁴ Tseneo rakok' an-kolits' añondrilahy linoko mena i kibohotsey le ano holintrozofisoitse handrakoke ambone'e ka.

I Rafitsey

¹⁵ Mandranjia varambañe ami'ty mendoraveñe hitroatse amy kivohoy. ¹⁶ Folo kihoe' ty halava' ty varambañe vaho kihoe' raike naho tampa'e ty ampohe' ty varambañe. ¹⁷ Songa aman-tsatoke roe ty varambañe hamitrañañe aze amy rahavave'ey, zay ty anoañe ze hene varamba' i kivohoy. ¹⁸ Aa le andranjio varambañe i kivohoy: varambañe roapololo ami'ty atimo mañatimo; ¹⁹ le tseneo vave'e efapolo volafoty ho ambane' i varambañe roapololo rey; vave'e roe ty ambane' ty varambañe ho amy tsato'e roe rey vaho vave'e roe ambane' ty varambañe ila'e ho amy tsato'e roe rey. ²⁰ Ami'ty ila faharoe i kivohoy, i avara'ey, le ty varambañe roapololo, ²¹ naho ty vave'e volafoty efapolo; vave'e roe ambane' ty varambañe raike naho vave'e roe ambane' ty varambañe ila'e. ²² Le tseneo varambañe eneñe ty añ' ila' i kivoho ahandrefañey. ²³ Ranjio varambañe roe ankots'o i kivoho ila'e roe rey; ²⁴ le ifandreketo boak' ambane pak' ambone, fa hifampipiteke ami'ty ravake raike; songa anoeñe hoe zay iereo roroe; zay ty ho rafi' i kotso'e roe rey. ²⁵ Aa le valo ty varambañe naho o vave'e volafotio, vave'e folo eneñ' amby; vave'e roe ambane' ty varambañe valoha'e vaho vave'e roe ami'ty varambañe manonjohy.

²⁶ Ranjio saka'e mendoraveñe lime ho amo varambañe añ'ila raike i kivohoio, ²⁷ naho saka'e lime ty varambañe añ'ila faharoe' i kivohoy vaho saka'e lime o varambañe amboho' i kivohoy ahandrefañeo. ²⁸ Haneñateña boak' ami'ty ila'e pak' ami'ty ila'e ty saka'e añivo'e ao, añivo' o varambañeo. ²⁹ Pakoro volamena o varambañeo, le itseneo ravake volamena hiziliha' o saka'eo vaho pakoro volamena o saka'eo.

³⁰ Aa le hatroa'o amy lili'e nanoroañe azo ambohitse eyi i kivohoy. ³¹ Le trebeho lamba fañefetse am-pole leny niroroteñe matify: manga naho malòmavo naho mena mañabarà; vaho kerobe an-tsamat-pamahotse. ³² Iradoradò ami'ty anakòreñe mendorave efatse pinakotse volamena; volamena o porengo'eo, mitsatoke am-bave'e volafoty efatse. ³³ Aradoradò amo porengo'eo i lamba fañefetsey naho aziliho an-kalo' i lambay i vatam-pañinay, le ho fahera' i lambay ho anahareo i toem-miavakey amy masi-do'ey. ³⁴ Le hakape'o amy vatam-pañinay i toem-pijebañey amy masi-do'ey.

³⁵ Apoho alafe' i lambay i rairaiy vaho tandrife i rairaiy i fitàn-jiroy ami'ty ila atimo' i kivohoy le hapo'o ami'ty ila'e avaratse i rairaiy.

³⁶ Le tseneo lala-miradorado i kibohotsey ami'ty manga naho malòmavo naho mena mañabasà am-pole leny rinorotse matify nivahorem-pitrebeke.

³⁷ Le ranjio anakòreñe mendoraveñe lime i miradoradoy, ipakoro volamena, ho volamena ka o fiporengo'eo; vaho ampitranaho vave'e lime torisike.

27

Ty Kitrelim-Pisoroñañe

¹ Tseneo kitrely am-barama mendoraveñe, lime kiho ty halava'e naho lime kiho ty ampohe'e; hatao efa-mira i kitreliy vaho telo kiho ty haabo'e.
² Le itseneo tsifa i hotso'e efatse rey; ho raik' ama'e i tsifa'e rey vaho ipakoro torisike. ³ Le andranjio ty fana'e fañafahan-davenoke naho o sadròm-poroha'eo naho o antova'eo, o firango'eo naho o finga'eo; ano torisike o harao'e iabio. ⁴ Le andranjio harato torisike tsingarakarake; le tseneo ravake torisike efatse i tsingarakarakey ankotso'e efatse. ⁵ Reketo ambane' ty soñi' i kitreliy i tsingarakarakey hahatakara'e ty havaki-miran-kaabo' i kitreliy mañambane. ⁶ Andranjio baoñe i kitreliy, baoñe ami'ty mendoraveñe, le ipakoro torisike. ⁷ Aziliho amo ravakeo i bao'e rey le songa hifamalahañañe añ'ila' roe' i kitreliy i bao rey hitarazoñañe aze.
⁸ Itseneo koake am-barambañe, amy nanoroañ' azo ambohitse eyi ty handranjiañ' aze.

Ty Kiririsa i Kivohoy

⁹ Itseneo kiririsa i kivohoy: mb'amy Negeve mañatimo le lamba tinenon-kèreñe am-pole leny matify ty firadorado amy kiririsay; zato kiho ty halava'e ami'ty lafe'e raike; ¹⁰ ty anakòre'e roapolonahoty vave'e torisike roapolon; ty porengovolafoty amo anakòreñenahobandi'eo. ¹¹ Ie ka ty avaratse ami'ty andava'e: ty firadoradoa'e zato kiho, ty anakòre'e roapolonahoty vave'e torisike roapolonvahoo o fiporengon'anakòreñeo naho o bandi'eo am-bolafoty. ¹² Le ty ampohe'i kiririsay ahandrefañey, limampolokiho ty firadorado'e, folo ty anakòre'e naho foloty vave'e. ¹³ Le ty andava'i kiririsay, limampolokiho ty añ'ila' i fanjirihañey mianiñànañe. ¹⁴ Ty firadoradoa'e ami'ty ila'i lalambeiy, folo-lime amby kiho, ty anakòre'e telovahoty vave'e telo. ¹⁵ Le ty firadorado'e añ'ila'ekafolo-lime amby naho ty anakòre'e telovahoty vave'e telo. ¹⁶ Ty lalambeiy i kiririsay, firadoradoñeroapolonahokiho: ami'tymanga, malòmavonahomena mañabasà vahoty leny rinorotse am-pole matify nivahorem-pitrebeke; ty anakòre'e efatse naho ty vave'e efatse. ¹⁷ Songabandieñevolafoty o anakòre'mañohoke i kiririsao, volafoty o porengoe'ovahoty torisike o vave'eo. ¹⁸ Kiho zato ty andava'i kiririsay naho limampoloty ampohe'e etoanahoheroanahokiho lime ty haabo'oaman-denyrinorotsematifio, vahoty vave'e torisikeo. ¹⁹ Hene torisikeofana'i kivohoio amy ze fitoloñañezahoto tsato'eo vahoty tsato'i kiririsao.

Ty Fañalahalañe i Jiroy

²⁰ Amantoho amo ana'Israeleo ty hinday menak'olive ki'e finofoke hireheta'i jiroy nainai'e ²¹ amy kibohom-pamantañañey alafe'i lambafañefetse aolo'i fañinaiy, le ho hajarie'i Aharone naho o ana'eo ty hireheta'e añatrefa' IEHOVÀboa-kariva ampara'teporeaty maraindray: ho fañè amo hene'tariran'ana' Israeleo.

28

Saro' o Mpisoroñañe

¹ Le ampiharineo ama'o t'i Aharone rahalahi'o rekets'o ana'eo boak'amo ana' Israeleo hitoroñañe amako ho mpisoroñañe: i Aharone, i Nadabe naho i Abiho, i Elazare naho Itamare—i ana'i Aharone rey.

² Anjairo saroñe miavake aman' engeñe naho volonahetse t'i Aharone rahalahi'o. ³ Le misaontsia amo mahimbañeo, o nikofohako haliforan-kikitseo, hitsene o saro' i Aharoneo hañorizañe aze hitoroñe ahy ho mpisoroko. ⁴ Le o saroñe hanoe' iereoo: ty takon' araña, ty kitambe naho ty saroñ' alafe, ty saroñ' añate vinahotse naho ty sabaka vaho ty koloty; le hitsenea' iareo saroñe miavake t'i Aharone rahalahi'o naho i ana'e rey hitoroñ' ahy ho mpisoroñe.

Ty Kitambe

⁵ Ho rambese' iereo ty volamena naho ty fole manga naho ty malòmavo naho ty mena mañabarà vaho ty leny matify, ⁶ le ho tsenè' iareo ambolamena naho fole manga naho malòmavo naho mena mañabarà vaho leny rinorotse matify an-tsamat-pamahotse i kitambey. ⁷ Le hanoeñe sazoke ty an-tsoro'e roe mirekets' ankots'o'e roe, hampipitehañe aze. ⁸ Le ty fiè' i kitambe soa vahotsey ro hindray sata ama'e: volamena naho manga naho malòmavo naho mena mañabasà vaho fole leny rinorotse matify. ⁹ Le angalao vato sohàme roe naho anokiro ty tahina' i ana' Israele rey; ¹⁰ ty tahina' iareo eneñe ami'ty raike le ty tahinañe eneñe sisa ami'ty ila'e, ty amo hazoke'eo, ¹¹ le sokireñe amy vato roe rey an-tsamat-panokibato manahake ty fanokirañe voli-fitomboke, ty tahina' i ana' Israele rey vaho ampivontitram-bolamena. ¹² Le apiteho amy sazo' i kitambeiy i vato roe rey ho vato faniahiañe o ana' Israeleo, le hanoe' i Aharone ega an-tsoro'e roe añatrefa' IEHOVÀ o tahina' iareoo ho tiahys.

¹³ Le itseneo fampireketañe volamena an-tsata vanditse, ¹⁴ naho anantsilisily volamena ki'e roe an-tsata vanditse ty itsenea'o iareo vaho hareketse amo famontitira'eo i silisili' vinanditse rey.

Ty Takon' arañañe

¹⁵ Itseneo takon' arañam-pizakàñe; manahake ty nanoeñe i kitambey ty anoeñ' aze: le volamena naho fole manga naho malòmavo naho mena mañabaràñe vaho leny rinorotse matify ty itenoñañ' aze. ¹⁶ Efa-mira t'ie avaloñe; zehe raike ty andava'e naho zehe raike ty ampohe'e; ¹⁷ le itsitsih firiritam-bato efatse; ahiriritse ami'ty fidadaña'e valoha'e ty odème*, ty pitedà† naho ty barèkete‡; ¹⁸ le ty fidadaña'e faharoe: ty nòfeke§, ty safira naho ty iàhalòme*; ¹⁹ le ty fidadaña'e faha-telo: ty lèsemet†, ty sebò‡ naho ty aklàma§; ²⁰ le ty fidadaña'e fahefatse: ty tarsìse* ty sòhame† vaho ty iasefà‡: le ampireketañe am-bolamena hampivontititse irezay. ²¹ Le i tahinan' ana' Israele folo-ro' amby rey ro amy vato rey; an-tsatan-tsòkibangem-pitomboke, songa milahatse ami'ty tahina' ondaty ty amy rofoko folo-ro' amby rey.

²² Le tseneo añ'ila' i takon' arañañey ty silisily volamena hiringiri'e mifamandibanditse. ²³ Anefeo ravake volamena roe i takon' arañañey vaho apiteho añ' ila'e roe' i takon'arañañey i ravake roe rey. ²⁴ Le aziliho amy ravake roe rey i silisily roe rey añ' ila' roe' i takon'arañañey; ²⁵ le areketo ami'ty fiatrefa' i kitambey, an-tsazo'e, ty ila'e roe' i silisily roe nivandiseñey rey. ²⁶ Anefeo ravake volamena roe vaho areketo añ'ila roe' i takon'arañañey, an-drira'e, añ'indra'e miatreke i kitambey. ²⁷ Anefeo ravake volamena roe le areketo ambane' i sazoke roe' i kitambe rey amy

* **28:17** Va'e robie, ami'ty hamena'e † **28:17** Va'e topaze ‡ **28:17** Va'e emarode § **28:18**
Va'e garnete * **28:18** Va'e diamondra † **28:19** Va'e jasinte ‡ **28:19** Va'e agate § **28:19**
Va'e ametiste * **28:20** Va'e berile † **28:20** Va'e onikse ‡ **28:20** Jaspera

fiatrefa'ey tandrife ty fivitraña'e, ambone' ty fiè' i kitambey. ²⁸ Le rohizo ami'ty fole manga amo rava'eo amy rava' i kitambey rey i takon' arañañey, hipiteha'e amy fièn-kitambey soa tsy habalak' amy kitambey i takon' arañañey.

²⁹ Aa le hendese' i Aharone ty tahina' i ana' Israele rey amy takon' arañam-pizakañey ambone' ty arofo'e, ie mizilik' amy toe-miavakey, ho faniahiañe nainai'e añatrefa' IEHOVÀ.

³⁰ Ajò amy takon' arañam-pizakañey ty Orimae[§] naho ty Tomimae^{*}; le ho añ' arofo' i Aharone zay ie mizilik' añatrefa' IEHOVÀ: le ho vavè' i Aharone añ'arofo'e añatrefa' IEHOVÀ nainai'e ty fizakàñe o ana'Israeleo.

O Saro-Mpisoroñañe Ila'eo

³¹ Hanoe'o ami'ty manga avao ty saro' i kitambey; ³² añivo'e ty loa' i añamboney; le ho fahareñe am-pitenoñe miariari' i loakey ty lifi'e manahake ty loake an-tsarom-piaro, soa tsy ho riatsé. ³³ Le itseneo sarevoan-dagoa[†] manga naho malòmavo naho mena mañabarà hiariary andrina'e ambane isabadidahañe fikoriñe volamena. ³⁴ Fikoriñe volamena naho ty dagoa vaho ty fikoriñe volamena naho ty dagoa; zay ty fiafaria'e amy lifin-tsaroñey, ³⁵ le haombea' i Aharone zay naho mitoroñe vaho ho janjiñeñe ty fikoriña'e ami'ty fiziliha'e an-toe-miavake ao añ' atrefa' IEHOVÀ naho amo fiakara'eo tsy mone hivetrake.

³⁶ Le itseneo takelake volamena ki'e vaho isokiro an-tsatan-tsokimpitomboke, ty hoe: Miavake am' IEHOVÀ. ³⁷ Ampireketo amy sabakay antaly manga; am-piatrefa' i sabakay ty andreketañ' aze. ³⁸ Le ho an-dahara' i Aharone, le hivave ze hakeo' o raha miavake havì' o ana' Israeleo ho enga masi' iareoo t'i Aharone vaho ho nainai'e an-dahara'e zay soa t'ie ho frankatoavañe iareo añatrefa'IEHOVÀ.

³⁹ Tenoño an-dený marerarerera vinahotse i saroñe añate'ey, le tenoño an-dený maeratseratse i sabakay vaho an-tsamat-pitenoñe ty fiè'e.

⁴⁰ Amboara'o saroñe ka o ana' i Aharoneo, le hamboara'o fiètse naho itsenea'o satro-bory ho amam-bolonahetse naho hatsomerentsereñe. ⁴¹ Le aombeo amy Aharone rahalahi'o naho amo ana'eo; le orizo naho atokaño vaho ambaño, hitoroñe ahiko ho mpisoroñe. ⁴² Le amboaro koloty leny hanaroñe ty fimeñara' iareo boak' an-tohake pak' am-pè. ⁴³ Le ho sikine' i Aharone naho o ana'eo naho mimoak' an-kibohom-pamantañañe ao naho miarine i kitreliy hitoroñe amy miavakey, soa tsy hivave ty fandilovañe mahavetrake: fañè tsy ho modo ama'e zay naho amo tarira'e mandimbe azeo.

29

Ty Fañorizañe i Aharone naho o Ana'eo

¹ Le zao ty hanoe'o hañeferañe iareo hitoroñe ahy ho mpisoroñe. Andrambeso bania naho añondrilahy roe tsy aman-kandra; ² le mofo po-dalivay naho mofo vonga'e po-dalivay nilaroañe menake vaho mofo pisake po-dalivay hinosotse menake: nanoeñe ami'ty monam-bare-bolè. ³ Ajoñe ami'ty håröñe irezay le aseseo mb'etoa an-karoñe naho i baniay vaho i añondrilahy roe rey.

⁴ Endeso mb' an-dalan-kibohom-pamantañam-b' etoy t'i Aharone naho o ana'eo vaho isasao an-drano. ⁵ Le rambeso i saroñe rey vaho aombeo amy Aharone i sikiñey naho ty saro' i kitambey naho i kitambey naho

[§] **28:30** Orimae: ty fireandream-baton-takon'araña' i Aharone. * **28:30** Tomimae: vilo' ty toe hatò † **28:33** voa: toe ampongambeindañitse

i takon' arañañey vaho aombeo ama'e i fièn-kitambe vinahotsey; ⁶ le aombeo añ' ambone'e i sabakay vaho asampezo amy sabakay i viloñe miavakey. ⁷ Rambeso i mena-pañorizañey le adoaño añ'ambone'e vaho orizo.

⁸ Aseseo mb'eo ka i ana'e rey le aombeo am' iereo o saro'iareoo; ⁹ le ampidiaño fiète t'i Aharone naho o ana'eo, le feheo am' iereo o sabakao; ie fañe nainai'e tsy modo ho a iareo i fisoroñañey.

Le orizo t'i Aharone naho o ana'eo. ¹⁰ Aseseo aolo' i kibohom-pamantañañey i baniay le hanampe fitàñe andoha' i baniay t'i Aharone naho o ana'eo. ¹¹ Le lentao añatrefa' IEHOVÀ i baniay, an-dalan-kibohom-pamantañañe eo. ¹² Andrambeso ty lio' i baniay le apetaho an-drambo-pitá'o amo tsifan-kitrelio vaho adoaño am-poto' i kitreliy iaby ze lio sis. ¹³ Le rambeso o safo'e mañohoñe o aova'eo naho ty ova mipetak' ambone' i ate'ey, ty tsapavoa'e roe reke-tsafó'e vaho orò amy kitreliy. ¹⁴ Le sodoro añ'afó alafe' i tobey ty vata' i baniay naho ty holi'e vaho ty tai'e. Soron-kakeo zay.

¹⁵ Rambeso amy zao ty añondrilahy, le hampitongoa fitàñe ami'ty loha' i añondrilahiy t'i Aharone naho o ana'eo; ¹⁶ Le lentao i añondrilahiy naho rambeso ty lio'e vaho afitsezo amy kitreliy añariary aze. ¹⁷ Lilio i añondrilahiy, sasao o aova'eo naho o tombo'eo le asampezo amo linilio naho amy loha'ey, ¹⁸ fonga soroñañey amy kitreliy i añondrilahiy, ho enga horoañey am' IEHOVÀ; hànítse mandrifondrifoñe, nisoroñañey añ'afó am' IEHOVÀ.

¹⁹ Rambeso ka i añondrilahy raikey, le hanampe-pitá' amy añondrilahiy t'i Aharone naho o ana'eo. ²⁰ Lentao amy zao i añondrilahiy; le andrambeso ty lio'e naho atenteno andengon-dravembia havana' i Aharone naho andengon-dravembia havana' o ana'eo naho an-tondrobeim-pitán-kavana naho an-tondrobeim-pandia havana' iareo vaho afitsezo añ'ariari' i kitreliy i lio'ey. ²¹ Andrambeso ty lio amy kitreliy naho i menake fañorizañey, le afitsezo amy Aharone naho an-tsaro'e naho amo ana'eo naho an-tsaro' o ana'e mindre ama'eo; le hiavake re naho o saro'eo naho o ana'e mindre ama'eo vaho o saron' ana'eo.

²² Rambeso ka ty safo' i añondrilahiy naho ty hofa'e naho ty safo'e mañohok' o ova'eo naho ty lengon' ate'e, ty voa'e roe reketse ty solik' ama'e vaho ty tso'e havana, ie añondrilahy fitokanañey; ²³ le ty mofo vonga'e naho ty mofomamy nihosorañey menake vaho ty mofo pisake boak' an-karo' o mofo po-dalivay añatrefa' IEHOVÀ; ²⁴ le apoho am-pitá' i Aharone naho an-tañan' ana'e irezay vaho ahelakelaño ho engan-kelahela añ' atrefa' IEHOVÀ. ²⁵ Rambeso am-pitá' iareo zay vaho orò amy kitreliy ambone' i enga horoañey ho hànítse mandrifondrifoñe añ'atrefa' IEHOVÀ ho soroñañey añ'afó amy IEHOVÀ.

²⁶ Le rambeso ty tratra' i añondrilahim-pitokana' i Aharoney vaho ahelakelaño ho engan-kelahela añ'atrefa' IEHOVÀ, ie o anjara'oo. ²⁷ Aa le aviho ty tratra' i engan-kelahelay naho i feim-pitokanañey, i nahelahelay vaho i navoñañey boak' amy añondrilahim-pitokanañey, ho anjara' i Aharone naho o ana'eo; ²⁸ ie ty anjara' i Aharone naho o ana'eo, ho fañè nainai'e boak' amo ana' Israeleo, zay ty fanolora' o ana' Israeleo boak' amo engam-panintsiña' iareoo, toe o engan-kavoa' iareo am' IEHOVÀ.

²⁹ Le ho limbezañey amo ana'e manonjohy azeo o saro-masi' i Aharoneo, horizañ' ama'e iereo vaho ho tokanañ' ama'e. ³⁰ Ho sikina' i anadahy mandimbe aze ho mpisoroñe fito àndroy zay, ie mimoak' amy kibohom-pamantañañey hitoroñe amy miavakey.

³¹ Rambeso i añondrilahim-pitokanañey le ahandrò an-toe-miavake ao o hena'eo; ³² vaho ho kamae' i Aharone naho o ana'eo ty hena' i añondrilahiy naho i mofo an-karoñey, an-dalan-kibohom-pamantañañe ao. ³³ Ho kamae' iereo o raha nanoeñe fañeferañe, hanokanañe naho hampiavahañe iareo; fe tsy hikama' ze alafe'e ao amy te miavake. ³⁴ Aa naho eo ty tsy ri'e amy henam-pañorizañey, ndra amy mofoy, ie miporea' ty maraindray, le horoa'o añ'afó ao i sisay; tsy ho kamaeñe fa miavake.

³⁵ Zay ty hanoe'o amy Aharone naho amo ana'eo, i hene nandiliako azoy. Fito andro ty hanokanañe iareo. ³⁶ Le hentseño boak' andro ty bania ho soron-kakeo fañeferañe. Ho lioveñe i kitreliy, le hefero vaho orizo hampiavahañe aze. ³⁷ Fito andro ty hañefera'o i kitreliy hañavak' aze vaho hiava-do'e i kitreliy. Hiavake ze hene mitsapa i kitreliy.

O Soroñe Boak' Androo

³⁸ Zao ty hisoroña'o amy kitreliy: vik'añondry roe boak' andro nainai'e. ³⁹ Hengae'o maraindraiñe ty vi'e, le hisoroñañe folakandro ka ty vi'e. ⁴⁰ Hampindreze'o soroñe amy vi'e valoha'ey ty mona'e faha-folo ty *efà linaro menake linisañe fahefa' ty †hine vaho divay fahefa' ty hine ho enga-rano. ⁴¹ Le hisoroña'o folakandro ka ty vi'e raike; le ampanahafo amy enga-mahakama naho amy enga-rano' i maraindraiñeiy, ho hànítse mandrifondrifoñe, enga horoañe am' IEHOVÀ.

⁴² Ho enga horoañe nainai'e zay amo hene tarira' areo mifandimbeo, amy lalan-kibohom-pamantañañey, añatrefa' IEHOVÀ, amy hifañaoñantikañe naho fitaroñako ama'oy. ⁴³ Eo ty hifañaoñako amo ana' Israeleo le hampiavahe' ty engeko i toetsey. ⁴⁴ Ho tokaneko i kibohom-pamantañañey naho i kitreliy vaho horizako ka t'i Aharone naho o ana'eo hitoroñ' ahy ho mpisoroñe.

⁴⁵ Le himoneñe amo ana' Israeleo raho vaho ho Andrianañahare' iareo. ⁴⁶ Le ho fohi' iareo te Zaho IEHOVÀ Andrianañahare' iareo ro nañavotse iareo an-tane Mitsraime aña himoneñako am' iereo ao. Zaho IEHOVÀ Andrianañahare' iareo.

30

Kitrelin' emboke

¹ Andrafito kitrely, toem-pañembobañe; mendoraveñe ty itsenea'o aze. ² Ho kiho raike ty andava'e naho kiho raike ty ampohe'e, ho efa-mira, kiho roe ty haabo'e vaho raik' ama'e o tsifa'eo. ³ Ipakoro am-bolamena ki'e: ty ambone'e naho o ila'e mañarikatok' azeo naho o tsifa'eo vaho itefeo soñi'e volamena hamahetse aze. ⁴ Anefeo ravake volamena roe ambane' i soñi'ey, le añ'ila'e roe ty itsenea'o iareo ho fitanañe o bao-pitakonañe. ⁵ Rafito ami'ty mendoraveñe o bao'eo le ipakoro volamena; ⁶ le apoho aolo' i lamba-fañefe' i vatam-pañinay aolo' i toem-pijebañañe fikape' i fañinay, amy hifañaoñako ama'oy.

⁷ Hañoro emboke mañitse ama'e boa-maraindray t'i Aharone; ie mañalahala jiro ro hañemboke ama'e. ⁸ Hañembok' ama'e ka t'i Aharone amy fameloman-jiro harivay, le ho nainai'e añatrefa' IEHOVÀ amo hene tarira' areo mifandimbeo i embokey. ⁹ Ko mañenga emboke ila'e ama'e, ndra enga horoañe, he mahakama, le ko añiliña'o engan-drano.

¹⁰ Le hañefetse amo tsifa'eo boa-taoñe t'i Aharone, ami'ty lion-tsoron-kakeo-pañeferañey, indraike boa-taoñe amo tarira' areo mifandimbe iabio, t'ie añaferañe. Miava-do'e amy IEHOVÀ zay.

* 29:40 efà raike=2,5 litatse † 29:40 hine = 5,6 litatse

Drala Vili-aiñe

¹¹ Le nanao ty hoe amy Mosè t'IEHOVÀ: ¹² Ihe mamolily o ana-dahi' Israeleo ami'ty ia' iareo, le songa hanolotse ty vilin'ai'e amy IEHOVÀ amy fañiahañey, tsy mone hisilofañ' angorosy ty amy famoliliañey. ¹³ Sindre hanolotse zao te iaheñe: ty vakin-tsekele ty amy* sekelen-toe-mivakeiy (roapolo gerà ty sekele raike). Ho banabana am' IEHOVÀ i vakin-tsekeley. ¹⁴ Ze hene niaheñe roapolo taoñe mañambone ro hañenga am' IEHOVÀ. ¹⁵ Ie mañenga i vilin' aiñey am' IEHOVÀ, le tsy hanolotse maro ty mpañaleale vaho tsy hanolotse ambane' i vakin-tsekeley ty rarake.

¹⁶ Ho rambese'o amo ana' Israeleo i bogadim-bilin' aiñey vaho havì'o ho fitoroñañe i kibohom-pamantañañey; le ho tiah y amo ana' Israeleo añatrefa' IEHOVÀ, hijebañañe anahareo.

I Fanasañey

¹⁷ Le nanao ty hoe amy Mosè t'IEHOVÀ, ¹⁸ Anefeo fanasàñe torisike reke-poto'e torisike, ho fisasàñe, le apoho añivo' i kibohom-pamantañañey naho i kitreliy zay vaho añiliño rano, ¹⁹ le boak' ama'e ty hanasà' i Aharone miroanake fitàñe naho fandia. ²⁰ Ie mimoak' amy kibohom-pamantañañey ndra mañarine i kitreliy hitoroñe, hañoro enga am' IEHOVÀ, ro hisasa andrano hey tsy mone hikenkañe; ²¹ le hanasa fitàñe naho fandia tsy mone hivetrake. Ho fañè tsy modo ho a iareo—ho aze naho o hene tarira'e mifandimbeo.

²² Nitsara amy Mosè t'IEHOVÀ, nanao ty hoe: ²³ Rambeso ty emboke soa jinoboñe: ty ron-drame[†] limanjato naho ty kanely mañitse vaki' izay: roan-jato tsy limampolo, le varemañitse roan-jato tsy limampolo, ²⁴ le ty roi-mañitse limanjato amy sekelen-toe-miavakey vaho menak' olive hine raike. ²⁵ Le ano menake fañorizañe miavake i raha rey, raha mañitse aharo an-tsata' o mpanao tsòtseo, ho mena-pañorizañe miavake. ²⁶ Ie ty hañoriza'o i kibohom-pamantañañey naho i vatam-pañinay, ²⁷ i rairaiy naho ze hene fanake naho i fitàñ-jiroy naho o harao'eo vaho i kitrelim-pañoroañ' embokey, ²⁸ ty kitrelim-pisoroñañe naho o harao'e iabio vaho i fanasàñey rekets' i foto'ey. ²⁹ Atokano ho loho masiñ' irezay; miavake ze mitsapa aze. ³⁰ Le horiza'o ty Aharone naho o ana'eo hamihà'o hitoroñe ahy ho mpisoroko.

³¹ Le ty hoe ty hatao'o amo ana' Israeleo: Itoy ty mena-pañorizañe miavake amako amo hene tarira' areo mifandimbeo. ³² Tsy ailiñe ant-sandri' ondaty, le tsy tsikombeñe ty fampitraofañe aze, fa miavake, vaho havahe' areo. ³³ Ze mampilaro manahak' aze, ndra mañiliñ' aze am'ondaty ila'e, ro haitoañe am'ondatio.

I Embokey

³⁴ Le hoe t'IEHOVÀ amy Mosè: Rambeso o emboke mañitse zao: [‡]sike-mañitse naho [§]sabiba naho *taven-tsike; naho [†]tsotse-foty ki'e, i raha mañitse rezay; le ampimirao lanja. ³⁵ Le mitsenea emboke, am-pilaroañe, satam-panao emboke, siraeñe, malio naho miavake. ³⁶ Lisano ho bo'e ty ila'e, le ano aolo' i fañinay an-kibohom-pamantañañ' ao ty ila'e, amy hifañaoñako ama'oy, loho miavake ama' areo zay. ³⁷ Le i emboke tsenè'oy, tsy hanoe' areo ho am-batañe amy filaroa'ey, fa miavake am' IEHOVÀ ho anahareo zay. ³⁸ Haitoañe am'ondati'eo ze mitsene ty hambañ' ama'e hañantsoña'e.

* ^{30:13} Sekele raike = 10 grama † ^{30:23} Heb; miora ‡ ^{30:34} sike-mañitse: natafa § ^{30:34} sabiba: sekehailete * ^{30:34} taven-tsike: kelbenaha † ^{30:34} tsotse-foty: lebonaha

31

O Mpamboatseo

¹ Le nanao ty hoe amy Mosè t'IEHOVÀ: ² Ingo, fa kinoiko amy tahina'ey ty Betsalale ana' i Ory, ana' i Kore, fifokoa' Iehodà; ³ le niliforako amy Arofon' Añaharey, aman-kihitse naho hilala hahafohina'e ze hene satam-pitoloñañe, ⁴ ie hamoroñe sarem-pitoloñañe naho hitoloñe ami'ty volamena naho volafoty vaho torisìke; ⁵ le hampireketse vato vinàñe naho handranjy an-katae vaho hifanehake amy ze hene tolon-draha.

⁶ Inao te zaho, le zaho ty nanolotse aze ho mpiama'e t'i Oholiabe ana' i Akisamake, fifokoa' i Dane; le songa tinoloko hihitse an-stroke ze mahihi-tro, hitsene i nandiliako azo rezao: ⁷ i kibohom-pamantañañey, i vatam-pañinay rekets' i toem-pijebañañe mitakoñe azey naho o harao' i kivohoio ⁸ le i rairaiy rekets' o fanakeo, i fitàn-jiro ki'ey rekets' o harao'e iabio vaho i kitrelim-pañembohañey; ⁹ naho i kitrelim-pisoroñañey reketse ze hene harao'e naho i fanasàñe reke-poto'ey, ¹⁰ le o fisikiñe vinahotseo; o sarmiava' i Aharon mpisoroñaño naho o saro' o ana'eo hitoloña' iareo ho mpisoroñaño, ¹¹ le i mena-pañorizañañe vaho i emboke mandrifondrifoñe ho a i miavakeiy vaho hanoe' iareo ze hene nandiliako azo.

O Sabatao

¹² Hoe ty natovo' IEHOVÀ amy Mosè: ¹³ Saontsio amo ana' Israeleo ty hoe:
Toe hambena'areo o SABATAKOO,
amy te ie ty viloñe* añivontika
amy ze hene sa' areo.
hahafohina' areo te Zaho, IEHOVÀ
ro Mpamike anahareo ho ahiko.

¹⁴ Aa le tambozoro o SABATAO
amy t'ie miavake ama' areo.
Havetrake ze manivativa aze,
haitoañañe am'ondatio ze mitolon-draha ama'e.
¹⁵ Eneñ' andro ty fitoloñañe
fa masiñe am' IEHOVÀ ty andro fahafito,
ty SABOTSEM-pitofàñe;
toe havetrake ze manao tolon-draha
ami'ty andro Sabotse.

¹⁶ Aa le hitàñe o SABATAO o ana' Israeleo; hambena' iareo o SABOTSEO
amo hene tarira' iareo mifandimbeo
ho fañina nainai'e tsy modo.

¹⁷ Viloñe nainai'e añivoko naho o ana' Israeleo zay
amy te eneñ' andro ty nitsene' IEHOVÀ
o likerañaño naho ty tane toy
naho nitroatse amy andro fahafitoy
vaho nitofa vaho nitomambao.

¹⁸ Aa ie nagado'e i nitsara'ey le natolo'e amy Mosè ambohi-Sinay i rave'
i Fañinay roe rey, ravem-bato sinoki' ty rambom-pitàn'Añahare.

32

I Bania Volamenay

¹ Aa naho nirendre' ondatio te nalaom-pizotso boak' ambohitse aña t'i Mosè, le niropak' amy Aharon ondatio nanao ty hoe, Miongaha, andranjio

* **31:13** Iek 20:12,20

ndrahare zahay, hiaolo anay; fa i Mosè zay, indaty ninday antika niavotse an-tane Mitsraimey, nofi'ay ty nizò aze.

² Aa hoe t'i Aharone am' iereo, Apitsoho an-tsofim-bali' areo naho amo ana-dahy naho anak' ampela' areoo o bange volamenao, le endeso amako.

³ Aa le napitso' ondaty iabio o bange volamena an-dravembia' iareeo vaho nendese' iereo mb' amy Aharone mb'eo. ⁴ Rinambe'e am-pità' iareo naho nitsene'e amam-pisokirañe naho namboare'e bania nitranahañe, vaho hoe iereo, Intoy o ndrahare'oo, ry Israele, i ninday azo niakatse an-tane Mitsraimey.

⁵ Aa naho nioni' i Aharone, le nandranjy kitrely aolo'eo vaho nikoike ty hoe: Hamaray ty ho takataka am' IEHOVÀ. ⁶ Le nitroatse maraindrain-tsikiake iereo te loak' andro nisoroña naho nanese engam-panintsiñañe; le niambesatse ondatio nikama naho ninoña vaho niongake le nihisa.

⁷ Le hoe t'IEHOVÀ amy Mosè, Akia mizotsoa! Fa naniva vatañe ondaty nendese'o niavotse an-tane Mitsraimeo ⁸ fa nivike aniany amy làlañe linilikoy; ie nampitranake sare bania naho nitalaho'a'e naho nisoroña'e vaho nanao ty hoe, Intoy o ndrahare'oo, ry Israele, i ninday azo nienga an-tane Mitsraimey!

⁹ Hoe t'IEHOVÀ amy Mosè, Fa nitreako ondatio; inao! toe ondaty gam-pititia! ¹⁰ Ie amy zao, angao raho, hiforoforoa' ty haboseko, ho forototoeko, vaho ihe ty hanoeko foko ra'elisy.

¹¹ Fe niambane am' IEHOVÀ Andrianañahare'e t'i Mosè nanao ty hoe: Ry IEHOVÀ, ino ty isolebora' ty fifombo'o am'ondati'o nindese'o niakatse an-tane Mitsraime aña an-kaozaran-dra'elisy vaho an-kafatraram-pitàñe.

¹² Aa vaho tsy hatao' o nte-Mitsraimeo ty hoe te Nakare'e hijoia'e, hañohofa'e loza ambohitseo vaho ho mongore'e an-tane atoy? Iambohò o fifombo'o miloroloroo vaho ferenaiño tsy hampianto ondati'oo. ¹³ Tiahio i Avrahame, Ietsàke vaho Israele mpitoro'o nifantà'o am-pañova'o naho nitsara'o ty hoe: Hampitomboeko ho mira amo vasian-dikerañe ty ia' o tarira' areoo naho ze hene tane nivolañeko te hatoloko an-tarira' areo vaho ho lovae' iareo nainai'ey.

¹⁴ Aa le niheve' IEHOVÀ ty fandrotsahañe nisafirie'e hanoeñe am'ondati'eo.

¹⁵ Nitolik' amy zao t'i Mosè nizotso amy vohitsey, am-pità'eo i ravem-bato roe' i fañinay rey, rave'e sinokitse ami'ty lafe'e roe, aolo'e vaho amboho'e.

¹⁶ Sàtan' Añahare i rave'e rey vaho sokin' Añahare i sokitse finandrak' amo rave'eoy.

¹⁷ Ie jinanji' Iehosoa ty korà' ondatio ami'ty fikontsiaña'e le hoe re amy Mosè: Hoe fikorahan'aly ty an-tobe ao. ¹⁸ Fa hoe re, Tsy ty fitreñam-pandrebake naho tsy ty fangoihoia' o giokeo, fa ty fivolam-pihisa ty tsanoñeko.

¹⁹ Aa ie narine i tobey naho nahaisake i baniay naho i tsinjakey, le niforoforo ty haviñera' i Mosè naho navokovokom-pità'e i rave'e rey le nivolentsa am-poto' i vohitsey. ²⁰ Rinambe'e i bania tsinène' iereoy le tineno'e añ'afó ao naho nilisane'e ho debole naho nafitse'e an-tarehe' i ranoy vaho nampinome'e o ana' Israeleo.

²¹ Le hoe t'i Mosè amy Aharone, Ino ty nanoa' ondaty retia te nampanoe'o hakeo jabajaba hoe zao. ²² Aa hoe t'i Aharone, Ko anga'o hangosasàke ty fifombo' i talèkoy; fohi'o ondatio, te raty tsereke. ²³ Ie nanao ty hoe amako, Itseneo ndrahare hiaolo anay; fa i Mosè zay, indaty ninday anay niavotse an-tane Mitsraimey, nofi'ay ty nizo aze. ²⁴ Le

nanoako ty hoe, Ze am-bolamena, afaho; natolo' iereo le nafetsako añate-afó ao vaho niboake ty bania tia.

²⁵ Aa naho nioni' i Mosè te nitsamborohotake ondatio (amy t'ie nampidadae' i Aharone hitsikiha' o rafelahi' iareoo), ²⁶ le nijohañe am-pizilihañe an-tobe ao t'i Mosè nanao ty hoe, Ze mpiam' IEHOVÀ, mb' amako mb' etoa! Le hene nifanontoñe ama'e o ana' i Levio. ²⁷ Le hoe re am' iereo, Hoe t'IEHOVÀ Andrianañahare' Israele: Songa mañombea fibara aña'ila'e, le mibelobeloa boak' an-dalambez pak' an-dalambei' ty tobe toy le manjevoña: sindre an-drahalahi'e, songa an-drañe'e vaho fonga andongo'e. ²⁸ Aa le nanoe' o ana' i Levio i nisaontsia' i Mosè vaho miha-telo arivo t'indaty nikoromak' amy andro zay. ²⁹ Aa hoe t'i Mosè, Fa nanokambatañe am' IEHOVÀ nahareo anindraoany, amy te fonga niatatre anadahy naho rahalahy, hanoloram-pitahiañe ama' areo anito.

³⁰ Ie amy loak' àndroy, hoe t'i Mosè am' ondatio, Inao! Inahareo 'nio, fa nandilatse an-kakeo jabajaba! aa le hiañambone mb' am' IEHOVÀ mb'eo hey raho; hera hahafijebañe i tahi' areoy. ³¹ Aa le nibalike mb'am' IEHOVÀ mb'eo t'i Mosè nanao ty hoe, Hoy Aba! ty habey hakeo' ondatio te namboatse ndrahare volamena. ³² Aa ie henane zao naho mete, apoho ty tahi' iareo, fa naho tsie, faopaho amy boke sinoki'oy ty añaarako. ³³ Le hoe t'IEHOVÀ amy Mosè, Ze nandilatse amako, ie ty ho faoheko amy bokekoy. ³⁴ Aa le akia hey, Iaolò mb' amy toetse natoroko azoy mb'eo ondatio; hehe, hiaolo azo i irakoy vaho amy andro fitilihañey ty hampitilihako i tahi' iareoy. ³⁵ Aa le nahitri' IEHOVÀ am'ondatio ty angorosy ty amy bania namboare' iereoy, i tsinene' i Aharoney.

33

Linily Hienga i Sinay

¹ Le hoe t'IEHOVÀ amy Mosè, Mionjona, angao ty atoy, ihe naho ondaty nampiavote'o an-tane Mitsraimeo, homb' an-tane nifantàko amy Avrahame, am' ietsàke naho am' Iakòbe ami'ty hoe: Hatoloko amo tarira'oo zay. ² Le hahitriko hiaolo anahareo t'i Sorotàko, handroahako i nte-Kanàney, i nte-Amòrey naho i nte-Kitey naho i nte-Perizey, i nte-Kivey vaho i nte-Iebòsey, ³ mb'an-tane kararahan-dronono naho tantele aña; fa tsy hionjom-beo aña'ivo'o ao raho kera habotseko an-dalambez, ie ondaty gan-katoke.

⁴ Ie nahajanjiñe i tsara maràñe zay ondatio le nangoihoy vaho tsy ama'e ty niravake, ⁵ amy natao' IEHOVÀ amy Mosè ty hoe, Ano ty hoe o ana' Israeleo: Ondaty gam-pititia nahareo; aa naho nihelatse aña'ivo' areo ao raho tsy ho nagodrako aniany hao? Ko miravak' arè, hisafiriako ty hanoako. ⁶ Aa le hinalo' o ana' Israeleo am'iereo ze ravake naho bange ambohi-Koreba.

Ty Kivoho Alafe' i Tobey Ey

⁷ Ie amy zay, nendese' i Mosè i kibohoy vaho naore'e alafe' i tobey, lavitse i tobey eñe, le nitokave'e ty hoe kibohom-pamantañañe. Aa le songa niavotse mb' amy kivohom-pamantañañe alafe' i tobey eiy ze nipay IEHOVÀ.

⁸ Aa naho nienga mb'amy kibohotsey mb' eo t'i Mosè, le hene niongake ondatio sambe nijohañe an-dala' i kiboho'ey nandrèndreke i Mose ampara-piziliha'e an-kibohotse ao. ⁹ Aa naho nizilik' an-kibohotse ao t'i Mosè, le nizotso mb'eo i rahoñe nijoalay nijohañe an-dala' i kibohotsey, le nifanaontsy amy Mosè t'IEHOVÀ. ¹⁰ Ie hene nahaisake i rahoñe nijoalay

nijohañe an-dala' i kibohotsey ondatio le sindre niongake ondatio vaho songa niambane an-dalan-kiboho'e. ¹¹ Vaho nifanaontsy am-piatrefan-daharaña t'IEHOVÀ naho i Mosè, manahake ty fifañohahohàm-pirañetse. Aa ie nimpoly mb'an-tobe mb'eo, tsy nienga i kibohoy ty ajalahy atao Iehosoa ana' i None mpitoro'e.

Ty Fañalañalaña' i Mosè

¹² Hoe t'i Mosè am' IEHOVÀ: Ingo, i tsinara'o amako ty hoe: Ampionjono ondaty retoa; fa tsy nampandrendrehe'o ahy o hampindreze'o amakoo. Fa nanao ty hoe Rehe, Fantako ami'ty tahina'o rehe vaho isoheñe am-pivazohoako. ¹³ Aa naho nitendreke fañisohaña am-pihaino'o raho le mihalaly ama'o, Atorò ahy o lala'oo, haharendrehako Azo, hahazoako falalàñe am-pihaino'o vaho ereñerèño te ondati'o ty fifeheañe toy.

¹⁴ Le hoe re: Hindre lia ama'o ty fiatrefako vaho hampitofàko. ¹⁵ Aa le hoe ty navale'e: Naho tsy hiaolo anay ty fiatrefa'o le ko ampionjone'o boak' etoa. ¹⁶ Aa ino ty hahafohinako henaneo t'ie nitendreke fañisohaña am-pihaino'o, zaho naho ondati'oo, lehe tsy mindre ama'ay rehe? ie hampiavaheñe amy ze hene ondaty ambone' ty tane atoy, zaho naho ondati'oo?

¹⁷ Hoe t'IEHOVÀ amy Mosè, Toe hanoeko ka o sinaontsi'o anianio; amy te ihe nahaisa-pañosihaña am-pañenteako, toe fantako ami'ty añara'o.

¹⁸ Le hoe re, Mihalaly ama'o, Ehe aboaho amako ty asi'o.

¹⁹ Le hoe re: Hene hampiarieko añatrefa'o ty hasoako naho ho taroñeko aolo'o eo ty tahinaña ty hoe IEHOVÀ; le hisoheko ze hisoheko vaho ho tretrezeko ze ho tretrezeko. ²⁰ Hoe ka re: Tsy mete hañisake ty tareheko rehe; amy te tsy ho veloñe t'indaty mahaisak' aze. ²¹ Aa hoe t'IEHOVÀ, Ingo ty toetse marine' ahy etia, mijohaña amo vatoo; ²² vaho ie miary eo ty engeko le hifireko an-tsifitsifi' o vatoo rehe naho ho lombofa' ty tañako t'ie miary; ²³ le hasintako amy zao ty tañako vaho ho isa'o ty vòhoko fe tsy isahéñe ty tareheko.

34

Ravem-bato Vao

Its 10.1-5

¹ Hoe t'IEHOVÀ amy Mosè, Amakio ravem-bato roe hambaña amy teo rey, le ho sokireko amy rave'e rey i tsara sinokitse amy rave'e valoha'e nifoie'o rey. ² Aa le mihentseña ho ami'ty maraindray naho mañambonea mb'ambohi' Sinay mb'etoa te maray vaho miatrefa amako andengo' i vohitsey. ³ Le tsy hindreze' ondaty t'ie miañambone, le ko anga'o ho isake ndra aia' aia ambohitse ey t'indaty, le ko ampiandrazeñe aolo' i vohitsey o mpirai-liao naho o añombeo.

⁴ Aa le nampitsilake ravem-bato roe hambaña amy teo rey vaho nitroatse maraindrail-tsikiakte t'i Mosè niañambone' i Vohi-Sinay mb'eo, amy nandilia' IEHOVÀ azey le notroñe'e am-pitâ'e ao i ravem-bato roe rey.

⁵ Nizotso an-drahoñ' ao t'IEHOVÀ vaho nitrao-pijohaña ama'e nikoike ty tahina' IEHOVÀ. ⁶ Le niary aolo'e t'IEHOVÀ nikoike ty hoe: IEHOVÀ, IEHOVÀ, Andrianañahare, mpiferenaiñe naho matarike, malaon-kaboseke, miotrotro an-kasoa naho hatò, ⁷ mitan-kafatraram-pikokoañe ami'ty arivo'e, le mampipoke hila naho tahiñe vaho fiolàñe, f'ie tsy hadoko tsy ho liloveñe*, fa hafetsako amo anakeo naho amo ana' o anakeoo ty hakeondroae pak' ami'ty faha telo naho fahefatse.

* 34:7 Vol 4:18, Iir 30:11

⁸ Aa le nalisa nibokok' an-tane t'i Mosè niambane. ⁹ Le hoe re: Naho nahatendreke hasoa am-pivazohoa'o, ry Talè, le mihalaly aman-Talèko t'ie hañavelo añivo'ay ao. Toe gam-pititia ondaty retiañe, fe apoho o hakeo'aio naho o tahi'aio vaho rambeso ho hanaña'o.

¹⁰ Le hoe re, Ingo, te manao fañina añ'atrefa' ondati'o iabio raho; Hanoako raha tsitantane mboe lia'e tsy nanoeñe an-tane atoy ndra am-pifeheañe aia; le songa hahaisake ty fitoloña' IEHOVÀ ama' areo ondaty mañohok' azoo, fa ho raha mampañeveñe ty hanoeko añama'o.

¹¹ Ambeno koahe o andiliako azo anitoo. Inao! ho roaheko añatrefa'o i nte-Emorey naho i nte-Kanàney naho i nte-Khetey naho i nte-Perizey naho i nte-Kivey vaho i nte-Iebosey. ¹² Mitomira, tsy mone hanao fañina amo mpimone' i tane añaveloa'io kera ho fandrik' añivo'o ao. ¹³ Fe rotsaho ty kitreli' iareeo, le pozaho o hazomanga'eo vaho fira o Aserà[†] iareeo ¹⁴ le ko mitalaho aman-drahare ila'e, amy te Andrianañahare mpamarahy t'IEHOVÀ, toe Mpamarahy ty tahina'e. ¹⁵ Kera hifañina amo mpimone' i taneio rehe, le hañarapilo amo ndrahare'eo iereo naho hisoroñe amo ndrahare' iareeo naho hañambara azo hikama'o i nisoroñañey, ¹⁶ naho hangala'o amo anak' ampela' iareeo ho amo anadahi'oo naho hañarapilo amo ndrahare' iareeo o anak' ampela' iareeo, hampañarapilo o anadahi'oo amo ndrahare' iareeo.

¹⁷ Ko ampitranaha'o saren-drahare,

¹⁸ Ambeno ty Sabadidake Mofo Po-dalivay: Fito andro ty hikama'o mofo tsy aman-dalivay; i nandiliako azoy, amy namantañañe aze am-bolan-kofahofay; fa amy volan-kofay ty niakara'o i Mitsraime. ¹⁹ Hene ahiko ze manoka-koviñe naho ze valohan-dahin' anan-kare'o, amo añombeo naho amo añondrio. ²⁰ Ho soloa'o fiay ami'ty vik' añondry ty valohan' anamborike. Aa naho tsy soloa'o fiaiñe le folaho ty hato'e. Ho hene soloam-piay o ana'oo. Vaho tsy hatrefeñe an-tañam-polo raho.

²¹ Eneñ' andro ty hitoloña'o naho hitofa ami'ty andro faha-fito, ndra t'ie sam-pitrobahan-tane ndra te san-kavokarañe le hitofa rehe.

²² Le hambena'o ty Sabadidan-kereñandro ie manese lengom-boambare-bolè, vaho ty sabadida-panontonan-tsabo ami'ty fivariña' i taoñey.

²³ In-telo ami'ty taoñe ty hiatrefa' o lahilahi'oo am' IEHOVÀ Talè, Andrianañahare' Israele. ²⁴ Le ho roaheko añ' atrefa'o o kilakila ondatio; naho hitareko ty faritso'o; vaho tsy eo ty hikirañe ty tane'o te ionjona'o hiatreke IEHOVÀ Andrianañahare'o in-telo ami'ty taoñe.

²⁵ Ko alaro lalivay ty liom-pisoroñañe amako, le ko sisañe ami' ty maraiñe i soron-tSabadidam-Pihelañey.

²⁶ Ho banabanae'o mb'añ'anjomba' IEHOVÀ Andrianañahare'o ao ze lengom-boa' ty tane'o.

Ko ahandroeñe an-drononon-drene'e ty anak'ose.

²⁷ Hoe t'IEHOVÀ amy Mosè: Sokiro i tsara zay, fa ami'ty fanoñonañe i tsaray ty nifañinàko ama'o naho am' Israele.

²⁸ Efapolu andro naho efapolu haleñe ty nitraofa'e am' IEHOVÀ; tsy nikama mofo tsy nikama rano; vaho sinoki'e amy ravem-bato rey o tsara' i fañinaio: i Tsara Folo rey.

Ty Fireandrea' ty Lahara' i Mosè

²⁹ Aa naho nizotso boak'ambohi-Sinay t'i Mosè, (ie tam-pità' i Mosè i fañina an-dravem-bato roe rey t'ie nizotso amy vohitsey), le tsy nifohi'e te nireandreañe ty holin-dahara'e amy nifanaontsia'ey. ³⁰ Aa

[†] 34:13 Aserà: a'hare ampela' o nte-Pilistio

naho nahaoniñe i Mosè t'i Aharone naho o hene ana' Israeleo, hehe te nireandreañe ty holin-dahara'e le nihembañe iereo tsy nahasibeke hañarivo aze. ³¹ Kinoi' i Mosè amy zao iereo, le nibalike mb'ama'e mb'eo t'i Aharone naho o mpiaolo' i valobohòkeio vaho nifanaontsy am'iereo t'i Mosè. ³² Niharine mb'eo amy zao o ana' Israele iabio vaho hene nandilia'e i nitsarae' IEHOVÀ ama'e ambohi-Sinaiy.

³³ Ampara' te heneke ty nilañonaña' i Mosè le kinolopo'e ty lahara'e. ³⁴ Fa naho nizilik' añatrefa' IEHOVÀ ao t'i Mosè hifanaontsy, le nafaha'e i lamba marerareray ampara' te niakatse; ie niakatse le nilañoñe amo ana' Israeleo o raha nafantok' ama'eo. ³⁵ Aa naho niisa' o ana' Israeleo ty lahara' i Mosè, te nitsopelatse i holin-dahara'ey le kinolopo' i Mosè indraike ty lahara'e ampara' t'ie nizilik' ao hifanaontsy ama'e.

35

Fañè' o SABATAO

¹ Natonto' i Mosè i valobohò' Israele iabiy vaho nanoa'e ty hoe, Hoe ty tsara linili' IEHOVÀ hanoe' areo. ² Eneñ' andro ty fitoloñan-draha, fe andro havahe' areo ty andro fahafito, i SABATAM-pitofà am' IEHOVÀ. Hakoromake ze ondaty mifanehak' ama'e. ³ Ko mamiañe afo ndra aia'aia amo kivoho' areoo ami'ty andro Sabotse.

Mihentseñe Hamboatse i Kivohoy

⁴ Le nisaontsie' i Mosè i hene valobohò' Israele: Inao ty nandilia' IEHOVÀ: ⁵ Aneseo boak' ama' areo ao, le ibanabanao am' IEHOVÀ; ze mirearea an-troke ro hañenga am' IEHOVÀ: ty volamena naho volafoty vaho torisike; ⁶ naho manga naho malòmavo naho mena mañabarà naho leny marerarerera vaho volon' ose; ⁷ le holi' añondrilahy linoko mena naho holin-trozofisoitse naho mendorave; ⁸ naho solike ho ami'ty hazavañe naho hafiriañe ho ami'ty menake fañorizañe naho ho ami' ty emboke mandrifondrifofone; ⁹ naho vato sohàme naho vatosoa ho reketeñe amy kitambey naho amy takon' arañañey.

¹⁰ Le homb'etoañ' iaby ze mahihi-tro hitsene o raha linili' IEHOVÀ iabio: ¹¹ i kivohoy, i kibohotsey naho i rako'ey, o vitra'eo naho o varambañeo, o saka'eo, o ana-kòre'eo naho o vave'eo; ¹² i vatam-pañinay naho o bao-pitakona'eo, i toem-pijebañañey naho i lamba fañefetsey; ¹³ i rairaiy naho o bao'eo naho o harao'eo naho o mofo-miatrekeo; ¹⁴ le i fitàn-jiroj ho amy hazavàñey naho o harao'eo naho o jiro'eo naho ty mena' i hazavàñey; ¹⁵ naho i kitrelim-pañembohañey naho o bao'eo naho i mena-pañorizañey naho i menake mañitsey naho i lamba fañefe' i lalapizilihañe amy kivohoiy; ¹⁶ ty kitrely fisoroñañe rekets' i tsingarakara'e torisike, o bao'eo naho o hene fanakeo, i fanasàñey rekets' i foto'ey; ¹⁷ o firadoradoañe an-kiririsao, o anakòre'eo naho o vave'eo naho ty lamba fañefe' i lalambein-kiririsay; ¹⁸ o tsato' i kivohio naho o tsato' i kiririsao vaho o tali' iareoo; ¹⁹ o fisiky hitoloñañe amy toe-miavakeio: o saro-miava' i Aharone mpisoroñeo; ty fisaro' o ana'eo hitoloña' iareo ho mpisoroñeo.

Banabana amy Kivohoy

²⁰ Aa le nienga boak' aolo' i Mosè o ana' Israele iabio. ²¹ Le nimb'eo ze hene niroroten-troke naho ze nampirearean-arofo, nanese banabana am' IEHOVÀ ho ami'ty fitoloñañe i kibohom-pamantañañey naho ho amy ze hene fitoroñañe ama'e vaho amo saro-miavakeo. ²² Songa nimb'eo an-joton-troke ty lahilahy naho ampela, ninday ravake naho kiviron-oroñe

naho kiviron-tsofy, bange fitomboke naho hareañe, ze bijim-bolamena iaby; vaho ze nanokañe engam-bolamena am' IEHOVÀ. ²³ Ze ondaty amam-pole manga ndra malòmavo ndra mena mañabarà ndra fole leny matify ndra volon' ose ndra holin' añondrilahy linoko mena ndra holintrozofisoitse, le sambe ninday. ²⁴ Ze ondaty nañenga volafoty ndra torisike songa nibanabana aze am' IEHOVÀ; naho ze nahatendrehañe mendoraveñe ho amy fitoloñañe i asaiy, sindre ninday.

²⁵ Nandrorotse fole am-pit  e ze rakemba nahihi-tro, le nendese'e i nirorote'ey, ty manga naho ty malòmavo naho ty mena mañabarà vaho ty leny matify. ²⁶ Le nandrorotse volon-ose ze rakemba nonjone' ty tro'e an-kihitse.

²⁷ O mpifeheo ninday vato soh  me naho vato soa harekets' amy kitambey naho amy kalan' ara  n  ey; ²⁸ ty emboke; naho ty menake ho amy hazav  n  ey, ho amy mena-pa  noriza  ey vaho ho amy emboke ma  nitsey. ²⁹ Nibanabana enga an-tsattrin' arofo am' IEHOVÀ ze hene ana' Israele ndra lahilahy ndra rakemba nihav  tse a  n' arofo, hanolora'e amo tolon-draha linili' IEHOVÀ hanoe  ne am-pit  e i Mos  o.

Kinanji'e o Mavitrikeo

³⁰ Le hoe t'i Mos  e amo ana' Israeleo: Ingo te kinanji' IEHOVÀ ami'ty tahina'e t'i Betsalale, ana'i Or  y, ana' i Kore, fifokoa' Iehod  ; ³¹ naho nilifore'e ami'ty Arofon' A  nahare an-kihitse naho faharendreha  ne, an-kilala naho amy ze satam-pitoloña  ne iaby, ³² hisafiry naho hamoro  ne, hitolo  ne am-bolamena naho volafoty vaho torisike ³³ naho hampisilake vatosoa ho rekete  ne naho hanokitse an-katae vaho hitolo  ne amy ze hene karaza satam-pit  ne. ³⁴ Le napo'e a  n' arofo'e ao ty ha  n  ke, ie naho i Oholiabe ana' i Ahisamake, fifokoa' i Dane. ³⁵ Ie songa lilifore'e hihitse a  n' arofo hanoa'e ze satam-panokitse naho mpamoro  ne, le hamahotse am-pole manga naho mal   mavo naho mena mañabar   naho leny matify hitolo  ne am-panenoña  ne; hitolo  ne amy ze hene tolon-draha vaho hamoro  ne o nisafirie  eo.

36

¹ Aa le nitolo  ne amo he'e linili' IEHOV  o t'i Betsalale naho i Oholiabe naho ze ondaty nahihi-troke tinolo' IEHOV   hilala naho faharendreha  ne hahafitolo  ne ze fonga karaza fitsenea  ne am-pitoro  ne amy toe-miavakeiy.

² Aa le kinai' i Mos  e t'i Betsalale naho i Oholiabe naho ze ondaty mahihits' arofo nitolora' IEHOV   hilala naho ze nentoe'e a  n' arofo'e ty homb'eo hifanehake, ³ vaho rinambe' iareo a  natrefa' i Mos  e ze fonga raha binanabana' o ana' Israeleo hitolo  na' iareo ami'ty fandranja  ne i toe-miavakey.

Mbe nitolom-panese banabana ama'e boa-marai  ne ondatio. ⁴ Aa akore ty hamaro'e kanao nijoha  ne hey o mahihitse nifanehak' amo tolon-draha' i toe-miavake nitolo  ne e iabiio, ⁵ le ninday o saontsy zao amy Mos  e, Fa ninday loho mandikoatse ze hahatsake i fitoloña  ne o tolon-draha' linili' IEHOV   anay hanoe  ey ondatio. ⁶ Aa le nandily t'i Mos  e naho nikoihe  ne amy tobey ty hoe, Ehe te tsy hitsene raha hengae  ne amy toe-miavakey ka t'indaty ndra rakemba. Aa le niseba  ne ondatio tsy hanese ka; ⁷ fa nahaheneke vaho nandikoatse ty hahafonira  ne ze hene fitoloña  ne o raha tam' iereoo.

Fa  namboara  ne i Kivo hoy Avo 26.1-37

⁸ Ie amy zao, tsinene' o mahihitse amo mpifanehak' amy kivohoiio i lamba folo fañefetse am-pole leny ronorotse matify rey ami'ty manga naho malòmavo naho mena mañabarà, vinhahotse an-tsare kerobe; ⁹ songa koho roapolovalo' amby ty andava' i lamba rey, sindre koho efatse ty ampohe'e, mira habey i lamba rey. ¹⁰ Nifampivitrañe'e ho raike ty lamba lime le nifampivitrañe'e i lime ila'e rey. ¹¹ Nitsene'e ravake manga añ' indra' ty lamba fañefetse añ'ila' i tolà'e valoha'ey; mindray amy zay ty nitsene'e añ'indra' i lamba añ'ila' i tolà'e faharoey; ¹² ravake limampolo ty nanoe'e amy lamba fañefetse raikey, le ravake limampolo ty nanoe'e añ'indra' i lamba fañefetse añ'ila' i tolà'e faharoey; nifañatreke i ravake rey. ¹³ Tsinene'e ty fikavitse volamena limampolo, le nampirekete'e amy fikavitse rey i lamba fañefetse rey, hampikatohañe i kivohoy ho raike.

¹⁴ Nitsenè'e lamba-lava ambolon' ose ho fandombohañe i kivohoy; folorai' amby ty lamba-lava nanoe'e. ¹⁵ Kihō telo-polo ty andava' i lambalava rey, kihō efatse ty ampohe'e; le mira i lambalava folo-raik' amby rey. ¹⁶ Navitra'e ho raike ty lambalava lime naho ho raike ty lambalava eneñe. ¹⁷ Nitsene'e ravake limampolo ho añ'indra' ty lamba-lava añ'ila' i valoha'ey; le ravake limam-polo añ'indra' i lambalava añ'ila' i tolà'e faharoey. ¹⁸ Nitsenè'e fikavitse torisike limampolo hifampireketañe i kibohotsey ho raike.

¹⁹ Le nitsenea'e rako ke an-kolin' añondrilahy linoko mena i kibohotsey vaho holin-trozofisoitse ty ambone'e.

²⁰ Nandranjia'e rafi-tolàñe i kivohoy, varambañe mendoraveñe mitroatse. ²¹ Folo kihō ty andava' o varambañe naho kihō raike naho tampa'e ty ampohe'e. ²² Songa aman-dahi'e roe o varambañe hifamitrañe. Hene nanoe'e hoe zay ty rafí' i kivohoy. ²³ Le nitsenea'e rafi-tolàñ' i kivohoy: roapololo ty varambañe atimo, miatrek' atimo, ²⁴ le nitsene'e vave'e volafoty efapolo ho ambane' i varambañe roapololo rey; vave'e roe ambane' ty varambañe raike ho ami'ty lahi'e roe vaho vave'e roe ambane' ty varambañe raike ka ho a ty lahi'e roe. ²⁵ Nandranjia'e rafi-tolàñe roapololo añ'ila' i kivohoy avaratse. ²⁶ naho ty vave'e volafoty efapolo: vave'e roe ambane' ty varambañe le vave'e roe ami'ty varambañe ila'e. ²⁷ Niranjie'e varambañe eneñe ho añ'ila' i kivohoy ahandreña. ²⁸ Nandranjia'e varambañe roe an-kotsoke roe amboho' i kivohoy, ²⁹ le nifampireketse pak' ambone iereo vaho nampivitrañe' ty ravake raike; zay ty nanoe'e ty roe amy hotso'e roe rey. ³⁰ Nivalo ty varambañe, naho folo-eneñ'amby ty vave'e volafoty— sindre amam-bave'e roe ambane'e ty varambañe.

³¹ Niranjie'e saka ami'ty mendoraveñe: lime amo varambañe añ'ila' i kivohoy etoa, ³² naho saka lime amo varambañe añ'ila' i kivohoy eroa vaho saka lime amo varambañe amboho ahandreña i kivohoiio. ³³ Nanoe'e hitsorofotse añivo' o varambañe boak' añ'ila'e pak' añ'ila'e ty saka. ³⁴ Le nipakora'e volamena o varambañe, naho nitsene'e ravake volamena hitañe o sakao vaho nipakora'e volamena o saka'eo.

³⁵ Le manga naho malòmavo naho mena mañabarà vaho leny ronorotse matify ty nanoe'e i lamba-lavay; naho nanoe'e sare kerobe an-tsamatam-pamahotse; ³⁶ le nandranjia'e anakòreñe efatse ami'ty mendoraveñe naho nipakora'e volamena; le volamena o porengo'eo; vaho nampitranaha'e fototse volafoty efatse. ³⁷ Mbore fole manga naho malòmavo naho mena mañabarà naho leny ronorotse matify, an-tsamatam-panenoñe mahay marovolo ty nanoe'e ty lamba fañefe' i lalam-bein-kibohotsey, ³⁸ miharo ami'ty

anakòre'e lime rekets' o porengo'eo. Nipakora'e volamena o tokona'e ambone naho o ana-tolà'eo le nanoeñe torisìke i vave'e lime rey.

37

I Vatam-Pañinay

Avo 25.10-22

¹ Rinanji' i Betsalale ami'ty mendoraveñe i vatam-pañinay: kiho roe naho tampa'e ty andava'e le kiho raike naho tampa'e ty ampohe'e vaho kiho raike naho tampa'e ty haabo'e. ² Pinako'e volamena ki'e, añate'e naho alafe'e vaho nitsenea'e soñy volamena nañarikatok' aze. ³ Nampitranaha'e ravake volamena efatse, harekets' an-kotso'e efatse: ravake roe etoa vaho ravake roe eroa. ⁴ Nandranjia'e bao-pitakonañe ami'ty mendoraveñe vaho pinako'e volamena, ⁵ le natsorofo'e amo ravake añ' ila' i vatam-pañinaio i baoñe rey hitakonañe i vatam-pañinay. ⁶ Tsinene'e volamena ki'e i toem-pijebañañey; kiho roe naho tampa'e ty andava'e naho kiho raike naho tampa'e ty ampohe'e. ⁷ Niranjie'e kerobe volamena roe; pinepè'e ami'ty vonga'e raike, ho añ' ila roe' i toem-pijebañañeyio: ⁸ ty kerobe etoa, le ty kerobe eroa; rinanji'e ho raik' amy toem-pijebañañey i kerobe rey songa añ'ila'e. ⁹ Navela' i kerobe rey mañambone o ela'eo; nañaloke i toem-pijebañañey o ela'eo; nifañatre-daharañe iereo, nitolike mb' amy toem-pijebañañey ty tarehe' i kerobe rey.

Ty Rairai' i Mofo-Piatrefañey

Avo 25.23-30

¹⁰ Rinanji'e ami'ty mendoraveñe i rairaiy: kiho roe ty andava'e, kiho raike ty ampohe'e naho kiho raike naho tampa'e ty haabo'e. ¹¹ Nipakora'e volamena ki'e vaho nandrafeta'e fiètse vola-mena hañarikoboñe aze. ¹² Mbore nitsenea'e rira ampohe-pitâñe hañarikatok' aze vaho nanoa'e indram-bolamena añ'olo'e hañariary aze. ¹³ Le nampitranaha'e ravake volamena efatse vaho nareke'e ankotso'e efatse tandrife i tombo'e efatse rey. ¹⁴ Nanoeñe marine i rira'ey i ravake rey hitâñe i bao-pitakonan-drairay rey. ¹⁵ Rinanji'e ami'ty mendoraveñe i bao-pitakonan-drairay rey le pinako'e volamena. ¹⁶ Volamena ki'e ty nitsenea'e o fanak' ambone' i rairaiio: o fingao, o fitovio, o soakazoo vaho o tako'eo hanakonañe irezay.

I Fitàn-Jiroy

Avo. 25.31-40

¹⁷ Le tsinene'e i fitàn-jiro volamena ki'ey; am-pipepehañe ty nanoa'e i fitàn-jiro. Songa nanoen-ko raik' ama'e ty taho'eo, o tsampa'eo, o vatavo'eo, o rava-drave'eo naho o voñe'eo. ¹⁸ Eneñe ty tsampa'e niakatse amo ila'eo: tsampa'e telo ty niakatse am-pitàn-jiro etia naho tsampa'e telo ty niakatse am-pitàn-jiro atia. ¹⁹ Le an-tsampa'e etia ty vatavo telo sarem-botí-mahabibo, ty rava-draveñe naho ty ravem-boñe vaho an-tsampa'e tandrife atia ty vatavo telo sarem-botí-mahabibo sindre amandrava-draveñe naho ravem-boñe'e; irezay ty ho a' i tsampa'e eneñe miakatse ty taho' i fitàn-jiro rey. ²⁰ Le nanoeñe vatavo efatse misare botí-mahabibo, sindre reketse rava-draveñe naho ravam-botí'e, an-taho' i fitàn-jiro; ²¹ le ty rava-draveñe miray ami'ty fireketa' ty tsempa'e roe amy tahoy, ie ho amy tsampa'e eneñe miakatse ama'e rey. ²² Raik' amy taho'ey o rava-drave'eo naho o tsampa'eo, hene pinepèke am-bongam-bolamena ki'e raike. ²³ Le tsinene'e volamena ki'e ty jiro'e fito naho

o fiharatan-tsokotsoko'eo vaho o sadròm-baen' afo'eo. ²⁴ Nanoe'e am-bongam-bolamena ki'e talenta raike, ie naho o fana'e iabio.

I Kitrelim-pañembohañey

Avo 30.1-5

²⁵ Rinanji'e ami'ty mendoraveñe ty kitrelim-pañembohañey: kiho raike ty andava'e, kiho raike ty ampohe'e, efa-mira, vaho kiho roe ty haabo'e. Raik' ama'e o tsifa'eo. ²⁶ Nipakora'e volamena ki'e, ty tako'e naho o ila'e niarifehe azeo vaho o tsifa'e miariary azeo. Le nitsenea'e soñy volamena nañarikatok' aze. ²⁷ Nitsene'e ravake volamena roe ho ambane' i soñi'ey, an-kotso'e roe atoy naho ami'ty roe aroy, hitañe o bao-pitakonañ'azeo. ²⁸ Rinanji'e ami'ty mendoraveñe o bao'eo le nipakora'e volamena.

Ty Mena-pañorizañe naho ty Emboke

²⁹ Nanoe'e i mena-pañorizañe miavakey naho i emboke ki'e marifondri-foñe an-kafiriañe an-tsamat-panao embokey.

38

I Kitrelim-Pisoroñañey

¹ Rinanji'e ami'ty mendoraveñe i kitrelim-pisoroñañey: kiho lime ty andava'e; naho kiho lime ty ampohe'e, efa-mira; vaho telo kiho ty haabo'e. ² Tsinene'e ankotso'e efatse o tsifa'eo; raik' ama'e i tsifa'e rey, le nipakora'e torisike. ³ Tsineñe'e iaby ty fana' i kitreliy: o valàñe'eo naho o sadrò'eo naho o koveta'eo naho o firango'eo vaho o endraendra'eo; hene nanoeñe torisike o fana'eo. ⁴ Le nanoa'e tsikarakarake torisike i kitreliy, mifototse ambane' i soñi'ey miefetse ami'ty fivaki-mirà' ty haabo'e. ⁵ Nampitranaha'e ravake efatse ho an-kotso'e efa' i tsikarakarake torisike hitañe o bao'eo. ⁶ Le rinanji'e ami'ty mendoraveñe o bao'eo vaho nipakora'e torisike. ⁷ Le nazili'e amo ravake añ' ila' i kitreliio o bao-pitakonaño. Nanoe'e koake am-barambañey.

⁸ Tsinene'e an-torisike i fanasàñey naho torisike i foto'ey, boak' amo hetsoro natolo' o rakemba mpitoroñe an-dalan-kibohom-pamantañañey.

⁹ Le nihajarie'e ty kiririsa; naradorado'e aña' ila'e atimo ty lamba leny rinorotse marerarera; zato kiho. ¹⁰ Roapolty ty anakòre'e naho roapolo ty foto'e torisike. Volafoty ty porengo' o ana-koreñeo naho o bandi'eo. ¹¹ Zato kiho ka ty avaratse; ty anakòre'e roapolo naho ty tombo'e torisike roapolo vaho volafoty ty porengo' o anakoreñeo naho o bandi'eo. ¹² Limampolo kiho ty firadoradoña ahandrefañey; folo ty anakòre'e naho folo ty tombo'e. Volafoty ty porengo' i anakòre'e rey naho o bandi'eo. ¹³ Le atiñana miatrek' atiñanañe: limampolo kiho.

¹⁴ Folo lime-amby kiho ty andava' ty firadoradoña etoa, telo ty anakòre'e naho telo ty foto'e. ¹⁵ Añ'ila' i lalan-kiririsay eroa ty firadoradoña folo lime amby kiho, etoa naho eroa naho ty anakore'e telo naho tombo'e telo. ¹⁶ Sindre aman-dený rinorotse matify o firadoradoan-dambalava nañarikatoke i kiririsao. ¹⁷ An-torisike ty vave' o anakòre'eo; volafoty ty porengo' o anakoreñeo naho o bande'eo, pinakotse volafoty ka o honko'eo; songa amam-bandy volafoty o anakòre' i kiririsao. ¹⁸ Satam-pamahotse i lambalamba fañefetse an-dalambein-kiririsay: am-pole manga naho malòmavo naho mena mañabarà vaho leny rinorotse marerarera; roapolo kiho ty andava'e naho lime kiho ty haabo'e manahake ty am-pohe' o firadoradoña an-kiririsao. ¹⁹ Efatse ty anakòre'e reketsa ty vave'e torisike efatse; volafoty o porengo'eo, naho nipakorañe volafoty o honko'eo naho o

bandi'eo. ²⁰ Songa torisìke ty tsato' i kivohoy naho i kiririsa mañarikatok' azey.

Ty Haraotse Nanoañe amy Kivohoy

²¹ Intoy ty famolilañe' i kivohoy, i kivohom-pañinay, amy namantoha' i Mosèy, nisokire o nte-Levio, ambanem-pità' Itamare ana' i Aharone mpisoroñe.

²² Namboare' i Betsalale ana' i Ory, ana' i Kore, fifokoa' Iehodà, ze hene nandilia' IEHOVÀ amy Mosè hamboareñe. ²³ Nañolotse aze t'i Oholiabe ana' i Ahisamake, fifokoa' i Dane, mpandranjy naho mpanao sare naho mpanenoñe mahay volo: ami'ty manga naho ty malòmavo naho ty fole mena mañabarà vaho ty leny matify.

²⁴ Nahatakatse talenta roapolosive' amby naho sekele fitonjato-tsilopololo, toe sekele' i toe-miavakey, ty volamena nitseneñe ze hene raha amy toe-miavakey, amy volamena binanabanay.

²⁵ Le talenta* zato naho sekele arivo-tsi-fitonjato-tsi-fitompolo lime amby, toe sekele' i toe-miavakey, ty volafoty amo niaheñe amy favoribeijo; ²⁶ bëka raike ty vili-loha' (toe vakin-tsekele' i toe-miavakey raike), ze hene ondaty nitsake mb'amo niaheñe amo niroapolao taoñe mañamboneo, aa le enenketse-tsi-telo-arivo-tsi-limanjato-tsi-limampolo. ²⁷ Volafoty zato talenta ty natranake ho a o vave' i toe-miavakeio naho o vave' i lamba fañefetse reio: talenta zato ty vave'e zato, talenta raike ty vave'e raike. ²⁸ Le amy sekele arivo-tsi-fiton-jato-tsi-fitompolo lime amby rey ty nitsenea'e ty porengo' o anakòreñe naho nipakora'e o honko'eo vaho nanoe'e o bandi'eo. ²⁹ Fitompolo talenta naho ro-arivo-tsi-efajato sekele† ty torisìke nengaeñe; ³⁰ ama'e ty nitsenea'e o vave' i lalan-kibohom-pamantañañeio, i kitrely torisìkey, i tsikarakara'e torisìkey naho o fana' i kitreliy iabio, ³¹ naho ty vave' i kiririsa miarikatokey, o foto' i lalambein-kiririsai, ze hene tsato' i kivohoy vaho ze fonga tsatoke amy kiririsa miarifehe azey..

39

O Sarom-Pisoroñañe

Avo 28.1-43

¹ Nanao sarom-pitoroñañe am-pole manga naho malòmavo naho mena mañabarà ho ami'ty fitoloñañe amy toe-miavakey, zay ty nanjairañe o saroñe miava' i Aharoneo ami'ty nandilia' IEHOVÀ i Mosè.

² Tineno'e am-pole volamena naho manga naho malòmavo naho mena mañabasà vaho leny rinorotse matify i kitambey. ³ Pinepè' iereo i volamenay ho endraendra matify le linily ho fole hitraoke amy fole mangay naho i malòmavoy naho i mena mañabaràney vaho i leny matify; an-tsamat-pamahotse. ⁴ Tsinene' iareo i an-tsoro'e rey hifampireketse: ami'ty indra'e roe t'ie nampireketañe. ⁵ Le nindray fitenoñe amy kitambey i sadia ama'ey, am-bolamena naho fole manga naho malòmavo naho mena mañabarà vaho leny rinorotse matify, ami'ty nandilia' IEHOVÀ i Mosè.

⁶ Tsinene' iareo o vato sohàmeo, nireketañe am-bolamena vinanditse vaho nisokirañe i tahinan' ana' Israele rey manahake ty fisokiram-bolipitomboke. ⁷ Napeta'e an-tsoro' i kitambey irezay ho vato faniahiañe o ana' Israeleo, amy nandilia' IEHOVÀ amy Mosèy.

⁸ Le tsinene'e an-tsamat-pamahotse i takon' arañañey hambañe ami'ty sata' i kitambey ami'ty fole volamena naho manga naho malòmavo naho

* **38:25** 3000 sekele = Talènta 1: aa le 877kg i eoy. † **38:29** 2124 kg zay.

mena mañabarà vaho leny rinorotse matify. ⁹ Efa-mira zay, le nanoe' iereo roe mikopoke i takon' arañañey, zehe raike ty andava'e naho zehe raike ty ampohe'e t'ie akopake. ¹⁰ Napeta' iereo ama'e am-piriritañe efatse o vatoo: ty firirita'e valoha'e, le ty òdeme, ty pitdà vaho ty barèkete. ¹¹ Ty firirita'e faharoe: ty nofèke, ty safira vaho ty iahalòme. ¹² Ty firirita'e fahatelo: ty lèseme, ty sebò vaho ty aklàma; ¹³ le ty firirita'e fah'efatse: ty tarsise, ty sohàme vaho ty iasefày; sindre nivontitire' ty volim-boñe volamena tsingarakarake. ¹⁴ Nilahatse ami'ty tahina' o ana' Israeleo i vato rey, folo-ro'amby ty amo tahina'eo; nisokireñe an-tsatan-tsokim-pitomboke, songa ninday ty tahinañe raik' amy fifokoa folo-ro'ambi' Israele rey.

¹⁵ Nitsenea' iereo silisily volamena ki'e vinandivanditse ty añ' ila' i takon' arañañey. ¹⁶ Le tsinene' iareo ty volim-boñe volamena roe naho bange volamena roe vaho napite' iareo ami'ty ila' i takon' arañañe roey i bange roe rey. ¹⁷ Le nazili' iareo amy bange añ' ila' i takon' arañañeiy i silisily volamena vinanditse roe rey. ¹⁸ Nampirekete' iareo amy volim-boñe roe rey ty ila' i silisily vinanditse roe rey vaho napeta' iareo an-tsoro' i kitambey, aolo'e eo. ¹⁹ Le nitsene' iereo bange volamena roe vaho napetak' ami'ty ila'e roe' i takon' arañañey, andrira'e ambane' i kitambey. ²⁰ Le nitsene' iareo bange volamena roe napetak' ambane' i talin-tsoro'ey aolo i kitambey, an-difi'e ambone' ty fireketañe i fièn-kitambe vinahotsey. ²¹ Aa le finehe' iereo i takon' arañañey amy bange' rey amy bange' i kitambey rey ami'ty fole manga, soa t'ie ho ambone' i fièn-kitambey vaho tsy hibalak' amy kitambey i takon' arañañey; amy nandilia' IEHOVÀ i Mosèy.

²² Le tsinene'e an-tsatan-tenoñe ty saro' i kitambey, fonga manga, ²³ le añivo'e ty fisokafañe i saroñey, manahake ty loak' an-tsarom-pikalañe, nifahareñe am-pitrebeke ty lifi'e añ'ariary aze tsy ho riatse. ²⁴ Le vinaho' iereo an-difi' i saroñey ty sarem-boan-dagoa ami'ty manga naho malòmavo naho mena mañabarà vaho leny rinorotse. ²⁵ Le nitsene' iereo fikorintsañe volamena ki'e nasabadiga amo dagoao an-difi' i sarom-pitoroñañey miariary aze, añivo' o voan-dagoao. ²⁶ Fikorintsañe naho voan-dagoa, fikorintsañe naho voan-dagoa añariary ty lifi' i saroñey, ho amy fitoroñañey, amy nandilia' IEHOVÀ i Mosèy.

²⁷ Le trinebe' iareo o saron-dený tinenoñe matify ho a i Aharone naho o ana'eo ²⁸ naho i sabaka leny marerareray naho i fikopoke leny matify vaho o kiloty leny rinorotse matifio, ²⁹ le i fiètsey leny rinorotse matify am-pole manga naho malòmavo vaho mena mañabarà nivahorem-pitrebeke; ami'ty nandilia' IEHOVÀ i Mosè.

³⁰ Le nitsenè' iereo i vilon-daharañe volamena ki'e miavakey vaho nisokirañe an-tsatan-tsokim-pitomboke ty hoe: Miavak' am' IEHOVÀ. ³¹ Le nametaha' iareo talimanga handreketse aze amy sabakay, ambone'e; amy nandilia' IEHOVÀ i Mosèy.

Fonitse

³² Aa le hene nifonitse i fitoloñañey amy kivohoiy, amy kibohom-pamantañañey; ie nanoe' o ana' Israeleo hambañe amy nandilia' IEHOVÀ i Mosèy, zay ty nanoe' iareo. ³³ Le nendese' iareo mb'amy Mosè mb'eo i kivohoy, i kibohotsey rekets' o harao'e iabio: o fikavitseo, o varambañeo, o saka'eo, o anakòre'eo naho o vave'eo; ³⁴ i rakoke holits' añondrilahy linoko menay naho i fikopo'e holin-trozofisoitsey naho i lamba marerarerera fañefetsey; ³⁵ i vatam-pañinay rekets' o bao'eo naho i toem-pijebañañey; ³⁶ i rairaiy naho o fana'e iabio naho i mofo-piatrefañe rey; ³⁷ i fitàn-jiro

ki'ey rekets' o jiro'eo, i jiro'e ho hajarieñe rey, o harao'e iabio naho ty mena' o jiroo; ³⁸ i kitrely volamenay, i mena-pañorizañey, i emboke mañitsey, i lamba fañefe' ty lalambein-kibohotsey; ³⁹ i kitrely torisikey, i tsingarakara'e torisikey, i bao'e rey, o harao'e iabio, i fanasàñey naho i tombo'ey; ⁴⁰ o lamba firadorado an-kiririsa eio, o anakòre'eo naho o vave'eo; i lamba fañefe' i lalambein-kiririsaiy; o tali'eo, o tsato'eo, o haraotse iaby fitoroñañe amy kivohoy, amy kibohom-pamantañañeio; ⁴¹ le o saroñe tinenoñañe, hitoroñañe amy toe-miavakeio: o saroñe miava' i Aharone mpisoroñañe naho o saron' anadahi'eo hitoroñañe ho mpisoroñañe.

⁴² Nanoe' o ana' Israeleo iaby i fitoloñañey hambañe amy ze hene linili' IEHOVÀ amy Mosè. ⁴³ Fonga nisarie' i Mosè i fitoloñañey, le ingo nifonire' iereo hambañe amy nandilia' IEHOVÀ, ie i nanoñañey. Le nandriaña' i Mosè.

40

Ty Fitroara' i Kivohoy

¹ Nitsara amy Mosè t'IEHOVÀ nanao ty hoe: ² Atroaro ami'ty andro valoha' i volam-baloha'ey i kivohon-kibohom-pamantañañey. ³ Apoho ao i vatam-pañinay vaho ampiavaho amy lamba fañefetsey i vatay. ⁴ Aziliho ao i rairaiy le hajario ama'e o harao'eo naho endeso ao i fitàn-jirov vaho areheto i jiro'e rey. ⁵ Apoho aolo' i vatam-pañinay i kitreli-pañembahañe volamenay vaho apetaho ami'ty lala' i kivohoy i lamba-fañefe'ey. ⁶ Le apoho aolo' ty lala' i kivohon-kibohom-pamantañañey i kitrely fisoroñañey. ⁷ Le apoho añivo' i kibohom-pamantañañey naho i kitreliy i fanasàñey vaho ampidoaño rano; ⁸ hajario ty añ'ariari' i kiririsay vaho aradoradò amy lalan-kiririsay i lamba fañefe'ey.

⁹ Rambeso amy zao i mena-pañorizañey naho hene orizo i kivohoy naho ze ama'e ao vaho tokano rekets' o fana'e iabio hiavake; ¹⁰ le orizo i kitrely fisoroñañey naho ze hene harao'e vaho tokano i kitreliy, hiavahe' i kitreliy do'e. ¹¹ Le orizo ka i fanasàñey naho o tombo'eo vaho ampiavaho.

¹² Endeso mb'amy lalan-kibohom-pamantañañey mb'eo t'i Aharone naho o anadahi'eo vaho ampandrò an-drano; ¹³ le aombeo amy Aharone o saro miavakeo naho orizo vaho ampiavaho hitoroñ' ahy ho mpisoroñañe. ¹⁴ Ampombao mb'eo o ana'eo vaho añombeo saroñe. ¹⁵ Orizo manahake i nañoriza'o an-drae' iareoy hitoroñ' ahy ho mpisoroñañe; fa ho fisoroñañe tsy modo amo fifokoa' iareo mifandimbeo ty fañorizañe iareo. ¹⁶ Nanoe' i Mosè irezay hambañe amy nandilia' IEHOVÀ azey.

¹⁷ Aa le natroatse ami'ty andro valoha' i volam-baloha' i taoñe faha-roey i kivohoy. ¹⁸ Natroa' i Mosè i kivohoy naho najado'e an-toe'e o tombo'eo, hinalanka'e o varambañañe, nazili'e o saka'eo vaho natroa'e o anakòre'eo. ¹⁹ Le vinela'e ambone' i kivohoy i kibohotsey naho nalafi'e ambone' zay i rakokey, amy nandilia' IEHOVÀ amy Mosèy.

²⁰ Rinambe'e i fañinay le najo'e amy vatay, le nazili'e amo ravake amy vataio i baoñe rey vaho napo'e ambone' i vatay i toem-pijebañañey; ²¹ le nendese'e amy kivohoy i vatay, nahanto'e i lamba fañefetsey vaho nefera'e i vatam-pañinay amy nandilia' IEHOVÀ i Mosèy.

²² Napo'e amy kibohom-pamantañañeio i rairaiy, avara' i kivohoy, alafe' i lamba fañefetsey, ²³ le hinajari'e hiriritse ama'e ty mofo añatrefa' IEHOVÀ, amy nandilia' IEHOVÀ i Mosèy.

²⁴ Napo'e amy kibohom-pamantañañeio i fitàñ-jiroy, tandrife i rairaiy, aña'ila atimo' i kivohoy, ²⁵ le narehe'e i jiro rey añatrefa' IEHOVÀ ami'ty nandilia' IEHOVÀ i Mosè.

²⁶ Napo'e aolo' i lamba fañefetsey amy kibohom-pamantañañeio i kitrely volamenay ²⁷ le natsotse ama'e i emboke aman-kafiriañe mañitsey, amy nandilia' IEHOVÀ amy Mosè.

²⁸ Natroa'e an-dalambei' i kivohoy i lamba fañefetsey. ²⁹ Napo'e an-dalam-pimoahañe amy kivohoy—i kibohom-pamantañañey—i kitreli-pisoroñañey, le nañenga soroñe nahoh enga-mahakama ama'e, amy nandilia' IEHOVÀ amy Mosè.

³⁰ Napo'e añivo' i kibohom-pamantañañey nahoh i kitreliy i fanasàñey vaho nañiliña'e rano fanasàñey; ³¹ hanasa' i Mosè nahoh i Aharone vaho o ana'eo fitàñe nahoh fandia; ³² hisasa' iareo nahoh hizilike amy kibohom-pamantañañeio ndra hañarine i kitreliy, amy nandilia' IEHOVÀ amy Mosè.

³³ Vaho, natroa'e ty fahe' i kiririsa añariari' i kivohoy nahoh i kitreliy vaho naradorado'e i lamba fañefetse an-dalambein-kiririsaiy. Aa le nifonira' i Mosè i fitoloñañey.

*Ty Rahoñe nahoh ty Engeñé
Avo 13.21,22; Vol 9.15-23*

³⁴ Nakopo' i rahoñey amy zao i kibohom-pamantañañey vaho nandifotse i kivohoy ty enge' IEHOVÀ. ³⁵ Aa le tsy nimete nizilik' amy kibohom-pamantañañeio t'i Mosè amy te nivotrak' ama'e i rahoñey vaho nandifotse i kivohoy ty enge' IEHOVÀ.

³⁶ Ndra mbia'mbia nionjoñe ambone' i kivohoy i rahoñey, le nionjoñe mb'amo hene fañaveloa' iareoo mb'eo o nte' Israeleo. ³⁷ Fa nahoh tsy nionjoñe i rahoñey le tsy nionjon-dia ka iereo ampara' ty andro ionjona'e.

³⁸ Tambone' i kivohoy ty raho' IEHOVÀ nahoh antoandro, le afo ty tama'e nahoh haleñe aolom-pihaino ze hene anjomba' Israele amo fiavota' iareo iabio.

Soroñe

¹ Aa le kinanji'IEHOVÀ t'i Mosè vaho nisaontsia'e boak' amy kibohom-pamantañañey ty hoe: ² Misaontsia amo ana' Israeleo le ano ty hoe: Naho ama' areo ty hañenga soroñe am' IEHOVÀ, le añandeso amo hare' areoo: he amo lia-raikeo ke amo añombeo.

³ Aa ie hañenga soroñe boak' am-pirai-trokey, le lahi'e tsy aman-kandra, an-tsattrin-tro'e t'ie hañenga añatrefa'IEHOVÀ an-dalan-kibohom-pamantañañe eo. ⁴ Hasampe'e an-doha' i hisoroñañey o fità'eo, soa te ho rambeseñe ama'e ho fañeferañe aze. ⁵ Ho lentae'e añatrefa'IEHOVÀ i baniay; le hendese' o ana' i Aharone mpisoroñeo ty lio'e vaho hadasi' iareo añariary i kitrely an-dalan-kibohom-pamantañañey ty lio'e. ⁶ Le ho holire'e i hisoroñañey vaho ho patepatere'e. ⁷ Le hampipok' afo amy kitreliy o ana'i Aharone, Mpisoroñeo, vaho handahatse ty hatae amy afoy. ⁸ Ho hajarie' o mpisoroñe, ana' i Aharoneo, amo hatae añ' afo ambone' i kitreliio o tori-henao naho i lohay vaho i safots-ènay; ⁹ le ho sasà'e andrano o aova'eo naho o tombo'eo, naho ho forototoe' i mpisoroñey irezay ho hatoñe ambone' i kitreliy, ho soroñe, enga oroañe añ' afo, hàñim-pañanintsiñe am' IEHOVÀ.

¹⁰ Aa naho boak' amo mpirai-liao—ke añondry he ose—ty hisoroñañe, le ho lahi'e tsy aman-kandra ty hengae'e. ¹¹ Ho lentà'e avara' i kitrely añatrefa' IEHOVÀ, vaho hadàsi' o ana' i Aharone mpisoroñeo añ'ariari' i kitreliy ty lio'e. ¹² Ho lilie'e i henay; vaho halaha' i mpisoroñey ami'ty hatae amy afo ambone' i kitreliiy ty loha'e naho ty safo'e, ¹³ le ho sasà'e rano o ova'eo naho o tombo'eo naho ho fonga engae' i mpisoroñey, hengae'e an-katoñe amy kitreliy ho soroñe, enga oroañe añ' afo, hàñim-pañanintsiñe am' IEHOVÀ.

¹⁴ Aa naho voroñe ty hengae'e ho soroñañe am' IEHOVÀ; he deho ke ana-boromahilala ty ho banabanae'e. ¹⁵ Hendese' i mpisoroñey mb' amy kitreliy mb'eo, le haola'e i lohay, naho hengae'e an-katoñe amy kitreliy; vaho hampiorihe'e añ'ila' i kitreliy o lio'eo. ¹⁶ Hafaha'e ty tsibokò'e naho o volo'eo vaho hahifi'e ami'ty ila atiñana' i kitreliy mb'amy toen-davenokey. ¹⁷ Ho vorahé'e amo ela'eo fe tsy ho riate'e roe, le hengae' i mpisoroñey ho hatoñe amy kitreliy amy hatae ambone' i afoiy; ho soroñe, enga oroañe añ' afo, hàñim-pañanintsiñe am' IEHOVÀ.

2

Soron' ampemba

¹ Aa naho eo ty mibanabana enga-mahakama am' IEHOVÀ, le mona-disañe ty hengae'e, naho hañiliña'e menake, vaho hampipoha'e emboke; ² hendese' e amo ana' i Aharone mpisoroñeo, le hañakatse ty mahàtsapitañe amo monao naho amo mena'eo mitraok' amy ze hene embo'e, le hengae' i mpisoroñey ho tiah, hatoñe amy kitreliy, enga oroañe an' afo, hàñim-pañanintsiñe am' IEHOVÀ. ³ Ho a i Aharone naho o ana'eo ty tsy ri' i mona nengaeñey; ie miava-do'e amo soroñañe am'IEHOVÀ.

⁴ Aa ihe mibanabana enga-mahakama nimasuheñe an-toñake, le mofo tsy aman-dalivay ama' mona linaro menake; ndra mofo tseake matify po-dalivay hinoso-menake.

⁵ Aa naho banabanae'o ty enga-mahakama nimasaheñe am-pinga, le ho mona tsy aman-dalivay linalo menake. ⁶ Peñapeñafo vaho añiliño menake: enga-mahakama zay.

⁷ Aa naho banabanae'o ty enga-mahakama nimasaheñe am-balâñe, le hanoeñe ami'ty mona linalo menake. ⁸ Ie banabanae'o ho enga-mahakama am' IEHOVÀ, amy nanoeñe rezay, le hatolotse amy mpisoroñey le ie ty hanese aze mb'amy kitreliy mb'eo, ⁹ le hangalà' i mpisoroñey tiahy i enga mahakamay vaho hengae'e an-katoeñe amy kitreliy; ho enga oroañe añ'afó, hàñim-pañanintsiñe am' IEHOVÀ. ¹⁰ Le ho a i Aharone naho o ana'eo ty tsy ri' i enga-mahakamay, ie miava-do'e amo soroñañe am'IEHOVÀ.

¹¹ Tsy anoeñe aman-dalivay ze mahakama engaeñe am' IEHOVÀ; toe tsy hengaeñe an-katoeñe ho enga oroañe añ'afó am'IEHOVÀ ty lalivay ndra tantele. ¹² Mete engaeñe ho lengom-boa am' IEHOVÀ, f'ie tsy hengaeñe ho hàñim-pañanintsiñe an-kitrely. ¹³ Mbore ho sirae'o aman-tsira ze hene mahakama engae'o, tsy hado'o tsy ho amy ze enga mahakama'o iaby ty siram-pañinan' Añahare'o. Engao aman-tsira ze hene engae'o.

¹⁴ Ie banabanae'o am'IEHOVÀ ty enga-mahakama anoeñe loha-voñe, le ampemba vao natono an' afó, voam-bora'e vao nilisaneñe ro hengaeñe ho enga-mahakaman-dengo'e. ¹⁵ Hosoro menake le ampiroho emboke, enga-mahakama zay. ¹⁶ Hengae' i mpisoroñey an-katoeñe ty tiahy amy ampemba-lisañey naho ty tampa' i menakey vaho ty embo'e iaby ho enga oroañ' an' afó am' IEHOVÀ.

3

Engam-pañanintsiñe

¹ Aa ie mañenga sorom-pañanintsiñe, le boak' ampirai-trok' ao, ke vave he lahy, ie tsy aman-kandra ty hampiatrefa'e am' IEHOVÀ. ² Hasampe'e an-doha' i enga'ey ty fità'e vaho ho lentà'e an-dalan-kibohom-pamantañañe ey; le hadasi' o ana' i Aharoneo añariari' i kitreliy ty lio'e; ³ vaho ho soroña'e am'IEHOVÀ ty tsila' i engam-pañanintsiñey: Ty safo'e manaroñe o ova'eo, toe ze hene safo'e amo ova'eo; ⁴ naho ty voa'e roe mitraok' amo safo'eo, o an-deme'eo, naho i kambinate'ey ze hafaha'e rekets' i voa'e rey, ⁵ ro hengae' o ana' i Aharoneo an-katoeñe amy kitreliy, ambone i soroñañe an-katae añ'afoy, toe enga-koroañe an' afó ho hàñim-pañanintsiñe am' IEHOVÀ.

⁶ Aa naho boak'amo lia-raikeo ty engam-pañanintsiñe ho soroña'e am'IEHOVÀ ke t'ie lahy he vave, le ty tsy aman-kandra ty hengae'e. ⁷ Ie mibanabana ty vi'e hisoroña'e, le hengae'e añatrefa' IEHOVÀ, ⁸ naho hampitongoae'e an-doha' i banabanay ty fità'e le ho lentae'e aolo' i kibohom-pamantañañey; vaho hadasi' o ana' i Aharoneo añariari' i kitreliy ty lio'e. ⁹ Ho banabanae'e boak' amy engam-pañanintsiñey ty ho soroñañe am' IEHOVÀ: o safo'eo, i hofa'e vondrakey ie hafahañe reketse ty lambosim-pohe'e naho ty sabora manaroñe o ova'eo, toe ze hene sabora amo ova'eo, ¹⁰ naho ty voa'e roe mitraok' amo safo'eo, o an-demeo, naho i kambinatey ie hafaha'e rekets' o voa'eo ¹¹ vaho hengae' i mpisoroñey an-katoeñe amy kitreliy, fa mahakama, enga oroañe añ'afó am' IEHOVÀ.

¹² Aa naho ose ty hisoroña'e, le ho banabanae'e añatrefa' IEHOVÀ; ¹³ hanampeza'e fitàñe i loha'ey, le ho lentae'e aolo' i kibohom-pamantañañey eo, vaho hadasi' o ana' i Aharoneo añariari' i kitreliy ty lio. ¹⁴ Le ho soroña'e ho enga oroañe an' afó am' IEHOVÀ: ty safo'e manaroñe o ova'eo,

toe ze hene safo'e amo ova'eo; ¹⁵ naho ty voa'e roe mitraok' amo safo'e an-demeo, naho hafaha'e i kambinatey rekets' i voa'e rey, ¹⁶ vaho hengae' i mpisoroñey amy kitreliy ho mahakama, enga orañe aña'fo, hañim-pañanintsíñe; aIEHOVÀ ty safo'e iaby. ¹⁷ Ho fañè tsy modo amo hene tarira' areo mifandimbeo, am-pitobe'a' areo iaby, te tsy ho kamae' areo ty safo'e ndra ty lio.

4

Soron-Kakeo

¹ Hoe ty nitsara'IEHOVÀ amy Mosè, ² Misaontsia amo ana' Israeleo ty hoe, Naho eo t'indaty manao hakeo tsy nisatrie'e amo hene raha linili'IEHOVÀ tsy anoeñeo, vaho anoe'e ty raike; ³ aa naho manao hakeo ty norizan-ko mpisoroñe, ie mañakeo ondatio, le bania tsy aman-kandra ty hengae'e ty amy tahiñe nanoe'ey, ho engan-kakeo am' IEHOVÀ, ty amy hakeo'ey. ⁴ Hendese'e mb'an-dalan-kibohom-pamantañañe mb'añatrefa'IEHOVÀ mb'eo i baniay le hanampeza'e fitàñe ty loha' i baniay; vaho ho lentae'e aolo'IEHOVÀ i baniay. ⁵ Hangalà' i mpisoroñe norizañey ty lio' i baniay vaho hendese'e mb'amy kibohom-pamantañañey mb'eo. ⁶ Le halò' i mpisoroñey amy lioy ty rambo-pità'e naho hafitse'e im-pito añatrefa'IEHOVÀ aolo' i lamba fañefe' i toe-miavakeiy i lioy ⁷ naho hatente' i mpisoroñey amo tsifa' i kitrelin-emboke mañitse amy kibohom-pamantañañey añatrefa' IEHOVÀio ty ila' i lioy; le hadoa'e am-poto' i kitrelim-pisoroñañe an-dalan-kibohom-pamantañañey ty tsy ri' i lio' i baniay. ⁸ Hafaha'e ze hene safo' i banian-engan-kakeoy: ty safo'e misaroñe o ova'eo naho ze safo'e iaby amo ova'eo; ⁹ naho ty voa'e roe mitraok' amo safo'e an-demeo, naho i kambinatey ze hafaha'e rekets' i voa'e rey, ¹⁰ hambarne amy nañafahañ' aze amy banian-tsorom-pañanintsíney, vaho hengae' i mpisoroñey an-katoeñe amy kitrelim-pisoroñañey. ¹¹ Le ty amy holi' i baniay naho o hena'e iabio mitraok' ami'ty loha'e, miharo amo tombo'eo naho o ova'eo vaho ty tai'e, ¹² toe i tsi-ri' i baniay iabiy, ro hendese'e mb'an-diolio alafe' i tobey, mb'amy fañarian-davenokey mb'eo ho forototoeñe aña'fo an-katae; amy fañarian-davenokey ty hañoroañ' aze.

¹³ Aa naho manao hakeo tsy nisatrie'e ty valobohò' Israele, ie nietak' am-pihaino' i favoribeiy, ie nandilatse aman-dra' inoñ' inoñe linili' IEHOVÀ tsy hanoeñe vaho voa hakeo ¹⁴ aa naho rendreke i tahiñe nanoe'iereo, le hañenga bania ho soron-kakeo i favoribeiy vaho hendesa' iereo aolo' i kibohom-pamantañañey eo. ¹⁵ Hanampeza' o roandria' i tobeio fitàñe añatrefa'IEHOVÀ ty loha' i baniay, le ho lentaeñe añatrefa'IEHOVÀ i baniay. ¹⁶ Hañandesá' i mpisoroñe norizañey mb'amy kibohom-pamantañañey mb'eo ty lio' i baniay, ¹⁷ le handò i mpisoroñey amy lioy ty rambo-pità'e vaho hamitse aze im-pito añatrefa'IEHOVÀ aolo' i lamba fañefetsey. ¹⁸ Le hatente'e amo tsifa' i kitreliio amy kibohom-pamantañañey añatrefa'IEHOVÀ ty ila' i lioy vaho hadoa'e ampoto' i kitrelim-pisoroñañe an-dalambem-kibohom-pamantañañey ty sisa' i lioy. ¹⁹ Hafaha'e iaby ty safo'e naho hengae'e an-katoeñe amy kitreliy; ²⁰ le hanoe'e hambarne amy nanoe'e i bania soron-kakeoiy i baniay, zay ty hanoe'e ty bania toy. Zay ty hañefera' i mpisoroñey vaho ho vototse amy hakeoy iereo. ²¹ Hendese'e alafe' i tobey i baniay vaho ho forototoe'e manahake ty nañoroa'e i bania valoha'ey, soron-kakeo' i valobohòkey zay.

²² Ie manao hakeo ty mpifehe' ondaty, vaho mandilatse tsy satrie'e amandra' inoñ' inoñe linili'IEHOVÀ Andrianañahare'e tsy hanoëne naho voatahiñe, ²³ ie ampandrendreheñe i hakeo nililare'ey, le hendese'e ho enga ty vik'oselahy tsy aman-kandra. ²⁴ Le hanampeza'e fitàñe i ose-lahiy vaho ho lentae'e amy toem-pendantàn-tsoroñey am' IEHOVÀ, soron-kakeo zay. ²⁵ Handrambesa' i mpisoroñey an-drambom-pitâ'e ty lio' i soron-kakeoy naho hatente'e amo tsifa' i kitrelim-pisoroñañeio vaho hadoa'e am-poto' i kitrelim-pisoroñañey ty lio'ey sisa. ²⁶ Hengae'e an-katoeñe amy kitreliy ze hene safo'e manahake ty safo' i engam-pañanintsiñey; le hefera' i mpisoroñey ty amy tahi'ey vaho hapoke i tahi'ey.

²⁷ Aa naho mandilatse tsy satrie'e ty ndaty amy taney, ndra inoñ' inoñe linili'IEHOVÀ tsy hanoëneo vaho voa hakeo, ²⁸ aa naho fohi'e i hakeo nanoe'ey, le hinday ose ho enga'e, ty vave'e tsy aman-kandra ty amy tahiñe nanoe'ey. ²⁹ Hampitongoà'e fitàñe ty loha' i engan-kakeoy vaho ho lentae'e amy toem-pisoroñañey i engan-kakeoy. ³⁰ Handrambesa' i mpisoroñey an-drambom-pitâ'e ty lio' e naho hatente'e amo tsifa' i kitrelim-pisoroñañeio vaho hadoa'e am-poto' i kitreliy ty sisa' i lio'ey. ³¹ Hafaha'e iaby ty safo'e, hambañe amy fañafahañe i safon' engam-pañanintsiñey, vaho hengae'i mpisoroñey an-katoeñe amy kitreliy ho hàñim-pañanintsiñe am' IEHOVÀ. Zay ty hañefera' i mpisoroñey aze hañahà'e i tahi'ey.

³² Aa naho vik' añondry ty hendese'e ho engan-kakeo, le ho vâve'e tsy aman-kandra ty hendese'e. ³³ Hanampeza'e fitàñe ty loha' i engan-kakeoy, vaho ho lentae'e ho soron-kakeo amy toem-pendantà' iareo o isoroñañeoy. ³⁴ Handrambesa' i mpisoroñey an-drambom-pitâ'e ty lio' i engan-kakeoy le hatente'e amo tsifa' i kitrelim-pisoroñañeio, vaho hadoa'e am-poto' i kitreliy ty sisa' i lio'ey. ³⁵ Hafaha'e iaby ty safo'e, hambañe ami'ty nañafahañe ty safo' i vik' añondry amy engam-pañanintsiñey; le hengae'i mpisoroñey amy kitreliy amo hisoroñañe am' IEHOVÀ, zay ty hañefera' i mpisoroñey aze ty amy hakeo nanoe'ey vaho ho hahâñe i tahi'ey.

5

¹ Aa naho eo ty manao hakeo amy te jinanji'e ty koim-pitaroñe, ie nivalolombeloñe ke te nahaoniñe he nahafohiñe, fe tsy nabora'e, le ho vavè'e i tahiñey. ² He eo ty mitsapa raha faly, ke te fatem-biby faly, he faten' añombe tsy malio, ke fatem-biby faly mifamorohotse, ie nietak' ama'e, vaho maleotse re, aman-tahiñe. ³ Ke tsapae'e ty haleora' ondaty, ndra ino ty tsy falio'e mahaleotse aze, naho tsy fohi'e, fe amy andrendreha'e aze ro voa hakeo. ⁴ He eo ty mifanta tsy nisatrie'e, mivolañe tsi-nahi'e an-tsoñi'e ke hanao raty he hanao soa, ze halosorañe mete hifantà' ondatio, fe mietak'ama'e, le ie maharendreke ro voa hakeo ami'ty raik' ama'e. ⁵ Aa ie voa hakeo amy raik' amy rezay le hiantofa'e i nandilara'ey. ⁶ Hendese'e mb' am' IEHOVÀ mb'eo ty engan-kakeo'e ty amy tahiñe nanoe'ey, ty vave'e boak' amy mpirai-liay, ke vik' añondry ke ose, ho engan-dilatse, vaho hefera' i mpisoroñey ty amy hakeo'ey.

⁷ Aa naho tsy lefe'e ty minday vik'añondry, le hengae'e am' IEHOVÀ ho engan-kakeo'e ty amy lilatse nanoe'ey, ty deho roe, he ty voromahilala tora'e roe; ty raike ho engan-kakeo, le ty raike ho soroñe. ⁸ Hasese'e mb' amy mpisoroñey mb' eo, le hengae'e heike i engan-kakeoy; ho lentae'e am-bozo'e fa tsy salâhañe. ⁹ Hafitse'e añ'ilá' i kitreliy ty ila' i lio' i engan-kakeoiy vaho hampiorihe'e am-poto' i kitreliy ty ila'e. Soron-kakeo zay.

¹⁰ Hengae'e ho soroñe ka i faharoey ty amy fañè'ey. Aa le hañefets' aze i mpisoroñey ty amy hakeo nanoe'ey vaho ho hahañ' ama'e.

¹¹ Aa naho tsy lefe'e ty deho roe ndra ana-boromahilala roe, le hengae'e ty amy hakeo nanoe'ey ty mona fahafolo' ty efà ho engan-kakeo. Tsy hasia'e menake ndra emboke fa engan-tahiñe. ¹² Hendese'e mb'amy mpisoroñey mb'eo i banabanay, le handrambesa' i mpisoroñey ty mahàtsam-pità'e ho tiahý vaho hengae'e an-katoeñe amy kitreliy, ambone' o hisoroñañe am' IEHOVÀO; soron-kakeo zay. ¹³ Inay ty hañefera' i mpisoroñey aze ty amy tahiñe nanoe'ey amy rezay, vaho hahàñe ama'e. A' i mpisoroñey ty sisa'e manahake i enga-mahakamay.

Fisolohoañe

¹⁴ Hoe ty nitsara' IEHOVÀ amy Mosè: ¹⁵ Naho mandilatse t'indaty, manao hakeo tsy nisatrie'e amo raha miava' IEHOVÀO, le ho banabanae'e am' IEHOVÀ ho engan-kakeo'e ty añondrilahy tsy aman-kandra boak' amy mpirai-liay mindre ami'ty anjoanjo'o an-tsekele volafoty amy sekele' i toe-miavakeiy ho engan-dilatse. ¹⁶ Havaha'e i nijoia'e amy raha niavakeiy, naho ho tovoña'e ty am-paha-lime'e vaho hatolo'e amy mpisoroñey. Aa le hefera' i mpisoroñey re amy añondrilahin-engan-dilatsey, le ho hahañe ama'e.

¹⁷ Naho eo ty manao hakeo aman-dra inoñ' inoñ' amo nandrarà' IEHOVÀ tsy hanoeñeo, ndra te tsy nifohi'e le voa tahiñe vaho ho vavè'e i hakeo'ey.

¹⁸ Hendese'e mb'amy mpisoroñey mb'eo ty añondrilahy tsy aman-kandra boak' amy mpirai-liay naho ty anjoanjoe'o ho engan-kakeo, le hañefetse aze ty amy lilatse tsy ni-satrie'e ndra tsy nifohi'ey, i mpisoroñey vaho ho hahañe ama'e. ¹⁹ Engan-kakeo zay, ie nandilatse am' IEHOVÀ.

²⁰ Le hoe ty nitsara' IEHOVÀ amy Mosè: ²¹ Aa naho eo ty mandilatse am' IEHOVÀ amy te nifañahie'e ty mpiama'e ami'te nahaja, ke nampitsoaheñe, he nikizoeñe; ke nidramoteñe i mpiama'ey, ²² hera nirendreke ty nimotsø fe mamañahy ty ama'e, naho nandañitse aman-titike, hanaña'e hakeo aman-dra' inoñ' inoñ' mete hanoe' ondaty amy rezay, ²³ le ie nandilatse naho voa-zaka, le havaha'e i nikamere'ey, ndra i nidramote'ey, ndra i nahaja'ey, ndra i nimotsø nioni'ey ²⁴ ndra inoñ' inoñ' nifantà'e vilañe. Le havaha'e mira naho hitompea'e ty faha-lime'e, vaho hatolo'e amy tompo'ey amy andro banabanae'e i engan-dila'ey. ²⁵ Hendese'e amy IEHOVÀ ty engan-kakeo'e, ty añondrilahy tsy aman-kandra boak' am-pirailia, naho ty hanjoanjoe'o ho engan-dilatse, mb'amy mpisoroñey. ²⁶ Le hañefetse aze añatrefa' IEHOVÀ i mpisoroñey ty amy tahiñe nanoe'e nahavo-a-zaka azey, vaho ho hahañe.

6

Ty amo Soroñeo

¹ Hoe ty nitsara' IEHOVÀ amy Mosè: ² Lilio t'i Aharone naho o ana'eo ami'ty hoe: Zao ty fepè' o fisoroñañe: hapok' amo hatae amy kitreliio i engaeñe harivay hialeñe ampara' te porea' ty maraindray vaho hirehetse nainai'e i afó ambone' i kitrelii. ³ Ie fa niforototoeñe an' afó amy kitrelii y i soroñey, le haombe' i mpisoroñey i saro'e leniy, ie fa nisikina'e i kiloti'e manaroña i sandri'ey, le ho rambese'e ty laveno'e vaho hapo'e añ' ila' i kitreliy. ⁴ Hafaha'e hey o saro'eo, hisikiñe ty ila'e, vaho hendese'e alafe' i tobey an-toetse malio aña i lavenokey. ⁵ Zay ty hampitolom-pirehetse ty afó amy kitreliy, tsy hikipeke. Hanoron-katae ama'e boak' andro i mpisoroñey, halaha'e ama'e ze hisoroñañe vaho hengae'e an-katoeñe

ama'e ty safo' o engam-pañanintsiñe. ⁶ Tanan-kirehetse nainai'e amy kitreliy ty afo, vaho tsy hakipeke.

⁷ Zao ty fetse' o enga-mahakamao: ho banabanae' o ana' i Aharoneo añatrefa' IEHOVÀ aolo' i kitreliy. ⁸ Handrambesa'e ty mona' i enga-mahakama mahàtsa-pitañey miharo amy mena'ey naho ze hene embok' amy enga-mahakamay, le hengae'e an-katoeñe amy kitreliy ho tiahy, ho hèñim-pañanintsiñe am' IEHOVÀ. ⁹ Ho kamae' i Aharone naho o ana'eo ty tsi-ri'e; ho kamaeñe tsy aman-dalivay an-toe-miavake ao; an-kiririsan-kibohom-pamantañañe eo ty hikama' iareo aze. ¹⁰ Tsy hatoñak' aman-dalivay re. Fa nandivako am' iareo boak' amo nisoroñañ' amakoo; ie miava-do'e, manahake i engan-kakeoy naho i engan-dilatsey. ¹¹ Ie ho fikama' ze hene ana-dahi' i Aharone, ho fañè nainai'e amo tariratse mifandimbeo, amo fisoroñañe am' IEHOVÀO; fonga hiavake ze mitsapa aze.

¹² Hoe ty nitsara' IEHOVÀ amy Mosè: ¹³ Zao ty ho enga' i Aharone naho o ana'eo, ty hengae'e am' IEHOVÀ amy andro fañorizañe azey: mona fahafolo' ty efà ho enga-mahakama nainai'e donia, ty vaki'e maraindraiñe vaho ty vaki'e hariva. ¹⁴ Hanoeñe ami'ty kapeke miharo menake ie fa nigoñahe' ty menake, le hendese'o ao, ho banabanae'o am-pìla'e natoñake ho enga-mahakama, hèñim-pañanintsiñe am' IEHOVÀ. ¹⁵ I mpisoroñe norizañe handimbe aze boak' amo ana'eo ty hañenga i rahay; fañè nainai'e zay, le hene hengaeñe an-katoeñe am' IEHOVÀ. ¹⁶ Fonga ho forototoeñe ze enga-mahakama' o mpisoroñe, fa tsy ho kamaeñe.

¹⁷ Le hoe ty nitsara' IEHOVÀ amy Mosè: ¹⁸ Saontsio amy Aharone naho o ana'eo, ty hoe: Zao ty fetse' i engan-kakeoy: amy fandentañe o hisoroñañeoy ty handentañe o engan-kakeoo añatrefa' IEHOVÀ; ie miava-do'e. ¹⁹ Ty mpisoroñe misoroñe aze ty amo hakeoo ty hikama aze. An-toe-miavake ty fikamà'e aze, an-kiririsan-kibohom-pamantañañe ao. ²⁰ Hiavake ze mitsapa ty nofo'e. Naho mipitsik' an-tsaroñe ty lio'e le ho sasà'o amy toe-miavakey i nipitsiha'ey. ²¹ Ho foieñe ka ze valàñetane nahandroañ' aze; fa naho valàñe torisike ty nahandroañ' aze le ho kotriñeñe vaho kintsañen-drano. ²² Songa mete mikama ama'e ze lahilahy amo mpisoroñe. Miavake zay. ²³ Fe tsy azo kamaeñe ze soron-kakeo nangalan-dio, nendeseñe amy kibohom-pamantañañey hanoem-pañeferañe amy toe-miavakey, ie tsy mete tsy forototoeñe añ'afó.

7

¹ Intoy ty fetse o engan-dilatseo, ie miava-do'e; ² amy fandentañe o hisoroñañeoy ty fandentañe ty engan-dilatse; le hadasi'e añariari' i kitreliy ty lio. ³ Ty hengae'e, le ty safo'e iaby: i hofa'e vondrakey naho ze safo'e mañohoñe o ova'eo, ⁴ naho ty voa roe mitraok' amo safo'e an-demeo, vaho hafaha'e rekets' i voa rey i kambinatey; ⁵ le hengae' i mpisoroñey an-katoeñe amy kitreliy, hisoroñañe am' IEHOVÀ, soron-dilatse zay. ⁶ Ho fikamà' ze hene lahilahy amo mpisoroñe; ho kamaeñe amy toe-miavakey ao; ie miava-do'e.

⁷ Tsy mifañova amy engan-kakeoy ty engan-dilatse; fetse raike ty a' i roroey; a i mpisoroñe mañefetse ama'ey izay. ⁸ Ty mpisoroñe mañenga ty fisoroña' ondaty, le a i mpisoroñey ty holi' i nisoroñañey. ⁹ Le ze hene enga-mahakama atoñak' an-toñak' ao naho ze hene endazeñe am-balàñe ndra an-kapeke, le a i mpisoroñe mañenga azey. ¹⁰ Ze enga-mahakama ila'e, ke linaro menake ke maike, le ho zaraeñe mira amo ana' i Aharoneo.

¹¹ Intoy ty fetsem-pisoroñañe o engam-pañanintsiñe banabanaeñe am' IEHOVÀ: ¹² naho engae'e ho fañandriañañe, le hatrao'e amy engam-pañandriañañey ty mofo po-dalivay linalo menake naho mofo pisake po-dalivay nihosorañe menake, ndra mofo ami'ty mona nigoñahe' ty menake. ¹³ Le vonga-mofo aman-dalivay ty ho banabanae'e miharo amy engam-pañanintsiñe ho fañandriañañey. ¹⁴ Boak' amy ze hengae'e iaby sindre andivà'e raike ho banabanae'e am' IEHOVÀ. A i mpisoroñe nametsake ty lio' i engam-pañanintsiñey amy kitreliiy zay. ¹⁵ Ho kamaeñe amy andro añengañ' azey ty hena' i soron-kanintsiñe ho fañandriañañey; tsy ho sisàñe ami'ty loak' andro. ¹⁶ Fe naho engam-panta he engan-tsatin' arofo i soroñey le ho kamaeñe amy andro nisoroñañe azey, mbore mete kamaeñe ami' ty loak' andro ze nisia; ¹⁷ fe horoañe añ'afó ami'ty andro fahatelo ze tsy ri'e amy hena' i soroñey. ¹⁸ Aa naho eo ty hena nisoroñañe amy engam-pañanintsiñey ze kamaeñe amy andro fahatelo, tsy ho no'e, vaho tsy ho volilieñe ama'e; toe tiva zay; le ho vavè' ze ondaty mikama ama'ey i tahi'ey. ¹⁹ Tsy ho kamaeñe ze nofotse nioza ami'ty raha tsy malio, fa ho forototoeñe añ'afó. Fa naho o nofotseo, ho kamae' ze malio. ²⁰ Fe haitoeñe am'onati'eo t'indaty mikama amy hena engam-pañanintsi' IEHOVÀ ie ama'e ty tsy falio'e. ²¹ Ze ondaty mitsapa raha maloto: ke haleora' ondaty, ke biby maloto, ke inoñ' inoñe amo raha mampangorìñeo, naho ikama'e ty hena' i engam-pañanintsi' IEHOVÀ, le haitoañe am'onati'eo indatiy.

²² Le hoe ty nitsarae' IEHOVÀ amy Mosè: ²³ Misaontsia amo ana' Israeleo ty hoe: Tsy ho kamae' areo ty safon' añombe ndra añondry ndra ose. ²⁴ Le ty amo safom-biby mate bobokeo ndra t'ie nirimitem-biby le azo anoandraha, fe tsy ho kamae' areo. ²⁵ Ze ondaty mikama ty safom-biby, amo fañenga' ondaty ho soroñañe am' IEHOVÀ ro haitoañe am'onati'eo. ²⁶ Tsy ho kamae' areo ty liom-boroñe ndra biby, ndra aia'aia amo fitobea' areoo. ²⁷ Ze ondaty mihinan-dio, le haitoañe am'onati'eo indatiy.

²⁸ Hoe ty nitsara' IEHOVÀ amy Mosè, ²⁹ Misaontsia amo ana' Israeleo ty hoe: Ty minday ty isoroña'e ho engam-pañanintsiñe am' IEHOVÀ, le amy engam-pañanintsi'ey ty ho banabanae'e am' IEHOVÀ. ³⁰ O fità'eo ty hanese ze hisoroña'e am' IEHOVÀ. Hasese'e ty safo'e rekets' i tratra'ey le hahelahela'e i tratra'ey ho engan-kelahela añatrefa' IEHOVÀ. ³¹ Le hisoroña' i mpisoroñey ho hatoeñe amy kitreliy ty safo'e fa a i Aharone naho o ana'eo i tratra'ey. ³² Le hano'e'o engan-kelahela amy mpisoroñey ty tso'e havàna boak'amo engam-pañanintsiñe fisoroña' areoo. ³³ Anjara ty ana' i Aharone mañenga ty lio' i engam-pañanintsiñey naho o safo'ey i tso'e. ³⁴ Fa rinambeko amo engam-pañanintsi' o ana' Israeleoo ty tratran-kelahela naho ty tsom-pañè vaho natoloko amy Aharone mpisoroñe naho amo ana'eo ho anjara' iareo boak' amo ana' Israeleo nainai'e donia.

³⁵ Amy andro naneseañe iareo hitoroñe IEHOVÀ ho mpisoroñey, ty nañambahañe i anjara zay ho a i Aharone naho ho a o ana'eo amo fisoroñañe am' IEHOVÀ; ³⁶ inay i nandilia' IEHOVÀ te hatolo' o ana' Israeleo am' iareo amy andro nañorizañe iareoiy ho fañè tsy modo amo tarira' iareo mifandimbe nainai'eo.

³⁷ Zay ty fetse' o soroñeo, naho o enga-mahakamao, o engan-kakeoo, o engan-dilatseo, o engam-pañorizañe, vaho o engam-pañanintsiñe ³⁸ nandilia' IEHOVÀ i Mosè am-bohi-Sinay amy andro linili'e o ana' Israeleo ty hanese enga am' IEHOVÀ am-patrambey Sinaiio.

8

*O Fañorizañeo
Avo. 29.1-37*

¹ Hoe ty nitsara' IEHOVÀ amy Mosè: ² Rambeso t'i Aharone naho o ana'e ama'eo, o saro'eo, i mena-pañorizañey, i banian-engan-kakeoy, i añondrilahy roe rey vaho i haroñe ama' mofo po-dalivaiy, ³ le atontoño an-dalam-bein-kibohom-pamantañañe eo i favoribeiy. ⁴ Aa le nanoe' i Mosè i nandilia' IEHOVÀ, naho nifanontoñe an-dalan-kibohom-pamantañañe eo i favori-beiy; ⁵ le hoe t'i Mosè amy favori-beiy, Inao ty nandilia' IEHOVÀ hanoeñe.

⁶ Nendese' i Mosè mb'eo t'i Aharone naho o ana'eo vaho nampandroa'e an-drano. ⁷ Naombe'e ama'e i sikiñey, naho nidiaña'e i sadiay, nanikina'e i saroñey, naombe'e i kitambey, le nadia'e i fièn-kitambe soa-vahotsey vaho nifeheza'e. ⁸ Le napeta'e ama'e i takon' arañañey vaho nazili'e amy takon' arañañey ty Orimae naho i Tomimae; ⁹ naho nasabaka'e añ' ambone'e i sabakay vaho napeta'e amy sabakay, aolo'e eo, i bogady volamenay; i ravan-daharañañe miavake linili' IEHOVÀ i Mosèy.

¹⁰ Rinambe' i Mosè amy zao i mena-pañorizañey le noriza'e i kivohoy naho ze he'e ama'e ao vaho nefera'e. ¹¹ Nafitse'e amy kitreliy im-pito ty ila'e, le noriza'e i kitreliy naho ze hene harao'e vaho i fanasàñey rekets' i foto'ey, hañefera'e. ¹² Nañiliña'e menake ty añambone' i Aharone le noriza'e hampiavahañ' aze.

¹³ Nendese' i Mosè mb'eo ka o ana' i Aharoneo vaho naombe'e o sikiñeo le nadia'e sadia, le nifehe'e o sabaka' iareoo amy nandilia' IEHOVÀ i Mosèy.

¹⁴ Nitantalie'e mb'eo i banian-engan-kakeoy, le nanampeza' i Aharone naho o ana'eo fitàñe ty loha' i banian-engan-kakeoy, ¹⁵ ie linenta, le nandrambesa' i Mosè i lioy naho natente'e amy tsifa' i kitreliy rey añ'ariary aze an-drambom-pità'e vaho nefera'e i kitreliy; nadoa'e am-poto' i kitreliy i lioy, le nefera'e, hañefera'e. ¹⁶ Le fonga rinambe'e ty safotsena amo ova'eo, i kambinatey, ty voa roe reke-tsafo'e naho nengae' i Mosè an-katoeñe amy kitreliy, ¹⁷ naho noroa'e alafe' i tobey i baniay, ty holi'e, ty nofo'e, vaho ty tai'e; ami'ty nandilia' IEHOVÀ i Mosè.

¹⁸ Nampitotoheñe amy zao i añondrilahy hisoroñañey vaho nanampeza' i Aharone naho o ana'eo fitàñe ty loha' i añondrilahiy, ¹⁹ le linenta, naho nafetsa' i Mosè amy kitreliy añ'ariariy aze i lioy; ²⁰ le nifatepatere'e i añondrilahiy, naho nengae' i Mosè an-katoeñe ty loha'e, naho o fatets' enao, vaho o safo'eo. ²¹ Le nisasae'e aman-drano o ova'eo naho o tombo'eo, vaho nengae' i Mosè an-katoeñe ambone' i kitreliy i añondrilahy iabiy, fa soroñe, hañim-pañanintsiñe, nisoroñañe am' IEHOVÀ, amy nandilia' IEHOVÀ i Mosèy.

²² Nasese'e ka i añondrilahy faharoey, i añondrilahim-panokanañey, le nampitongoà' i Aharone naho o ana'eo fitàñe ty loha' i añondrilahiy.

²³ Le linenta naho nandrambesa' i Mosè ty lio'e naho natente'e an-dengon-dravembia' havana' i Aharone naho an-tondrobeim-pità'e havana vaho an-tondrobeim-pandia'e havana. ²⁴ Nampomba'e mb'eo o ana' i Aharoneo le natente' i Mosè an-dengon-dravembia-havana' iareo ty ila' i lioy, naho ami'ty tondrobeim-pitàn-kavana' iareo, naho an-tondrobeim-pandia havana' iareo; vaho nafetsa' i Mosè añaariariy i kitreliy i lioy.

²⁵ Le rinambe'e i safotsenay naho i hofake vondrakey, naho ze safotsena amo ovao naho i kambinatey naho i voa roe reke-tsafo'e vaho ty

tso'e havana. ²⁶ Le nandrambe mofo po-dalivay raik' amy haroñe po-dalivay aolo' IEHOVÀ, rinambe'e ty mofo nañiliñañe menake naho ty mofo pisake, vaho napo'e amy safo'ey naho amy tso'e havanay. ²⁷ Napo'e am-pitâ' i Aharone naho am-pitâ' o ana'eo i he'e rezay, vaho nahelahela ho engan-kelahela am' IEHOVÀ. ²⁸ Le rinambe' i Mosè am-pitâ' iareo irezay vaho nengae'e an-katoeñe amy kitreliy mitraok' amy soroñey, ho sorom-panokanañe mañonjoñe hñim-pañanintsiñe, nengaeñe añ'afó am' IEHOVÀ. ²⁹ Le rinambe' i Mosè i tratra'ey vaho nahelahela'e ho engan-kelahela am' IEHOVÀ. Anjara' i Mosè amy añondrilahi-panokanañey zay ami'ty nandilia' IEHOVÀ i Mosè.

³⁰ Nandrambesa' i Mosè i mena-pañorizañey naho ty lio amy kitreliy le nafitse'e amy Aharone naho amo saro'eo naho amo ana'eo naho amo saro' iareoo. Le noriza'e t'i Aharone rekets' o saro'eo naho o ana'eo rekets' o saro' iareoo.

³¹ Le hoe t'i Mosè amy Aharone naho amo ana'eo, Ahandrò an-dalan-kibohom-pamantañañe eo i henay vaho ikamao ey naho ty mofo amy harom-pañengam-panokanañey, ami'ty nandiliako ty hoe, Ho kamae' i Aharone naho o ana'eo; ³² le ho forototoe' areo an' afó ao ze tsi-ri' i henay naho i mofoy. ³³ Le tsy hiakatse i lalan-kibohom-pamantañañey nahareo naho tsy modo ty fito andro, am-para' te heneke o androm-pañorizañey anahareoo. Fito andro ty añoriza'e anahareo. ³⁴ I nanoeñe anindroaniy, ty nandilia' IEHOVÀ hanoeñe; hañeferañe anahareo. ³⁵ Aa le hidoeñ an-dalan-kitrelin-kibohom-pamantañañe eo handro an-kaleñe fito andro nahareo, hitañe ty namantoha' IEHOVÀ, tsy hivetrake; fa zay ty nandiliañey ahy.

³⁶ Le nanoe' i Aharone naho o ana'eo ze hene nandilia' IEHOVÀ am-pitâ' i Mosèo.

9

Fañorizañey ty Fisoroña' i Aharone

¹ Ie tsatoke ty andro fahavalو, le kinoi' i Mosè t'i Aharone naho o ana'eo vaho o androanavi' Israeleo. ² Le hoe re amy Aharone, Angalao bania raike ho engan-kakeo naho ty añondrilahy hisoroñañe, tsy aman-kandra, le aseseo añañatrefa' IEHOVÀ. ³ Le misaontsia ty hoe amo ana' Israeleo, Andrambeso vik'ose ho engan-kakeo naho ty dronga naho ty vik' añondry tsy aman-kandra, songa rai-taoñe, hisoroñañe; ⁴ naho ty bania vaho ty añondrilahy ho engam-pañanintsiñe, hengaeñe añañatrefa' IEHOVÀ; naho ty enga-mahakama linaro menake. Amy te ho isake anito t'IEHOVÀ.

⁵ Aa le nandese' iereo aolo' i kibohom-pamantañañey i nandilia' i Mosè rezay. Le nitotoke mb'eo i valobohòkey nijohañe añañatrefa' IEHOVÀ. ⁶ Le hoe t'i Mosè, Zao ty nandilia' IEHOVÀ hanoe' areo, hitotsaha' ty volonahe' IEHOVÀ.

⁷ Le hoe ty Mosè amy Aharone, Harineo i kitreliy naho soroño i engan-kakeo'oy naho i hisoroña'oy, hañeferañe azo naho ondatio. Le soroño i nengae' ondatio hañeferañe iareo, ty amy nandilia' IEHOVÀ.

⁸ Aa le niharinea' i Aharone i kitreliy vaho linenta'e i drongan' engan-kakeo ho azey. ⁹ Le nandesa' o ana' i Aharoneo ama'e ty lio. Nalo'e amy lioy ty rambo-pitâ'e, le natente'e amo tsifa' i kitreliio vaho nadoa'e am-poto' i kitreliy i lioy. ¹⁰ Nengae'e an-katoeñe amy kitreliy i safotsenay naho o voa'eo vaho i kambinate' i engan-kakeoiy, amy nandilia' IEHOVÀ i Mosèy. ¹¹ Finorototo an' afó alafe' i tobey i henay naho i holitsey.

¹² Linenta'e amy zao i hisoroñañey; le nasese' o ana' i Aharoneo ama'e i lioy, vaho nadasi'e añariary i kitreliy. ¹³ Le nasese' iareo ama'e i hisoroñañey: o fatets-enao naho i lohay vaho nengae'e an-katoeñe amy kitreliy. ¹⁴ Sinasa'e o ovao naho o tombokeo vaho nengae'e an-katoeñe ambone' i soroñe amy kitreliy.

¹⁵ Le nasese mb'eo ty nengae' ondatio. Rinambe'e i osen' engan-kakeo' ondatioy le linenta'e vaho nanoe'e soron-kakeo manahake i valoha'ey. ¹⁶ Nasese ka i engan-koroañey vaho nisoroña'e ty amy fepé'ey. ¹⁷ Nendese'e i enga-mahakamay le nandrambesa'e ty nahàtsa-pità'e vaho finorototo'e amy kitreliy, tovo' i nisoroñañe animaraiñey. ¹⁸ Le linenta'e i baniay naho i añondrilahiy, engam-pañanintsiñe ho a ondatio. Nasese' o ana' i Aharoneo ama'e ty lio'e vaho nafetsa'e añariariy i kitreliy i lioy; ¹⁹ le ty safo' i baniay naho i añondrilahiy: i hofa'ey, ty safo'e mañohoñe o aova'eo, ty voa'e roe rekets' i kambin'atey, ²⁰ napo' iareo an-tratra'e eo o safo'eo le nengae'e an-katoeñe amy kitreliy ty safo'e; ²¹ naho nahelahela' i Aharone o tratra'eo naho ty tso'e havana ho engan-kelahela añatrefa' IEHOVÀ amy nandilia' i Mosèy.

²² Nañonjom-pitáñe am'ondatio amy zao t'i Aharone, nitata, vaho nizotso amy nanoe'e i engan-kakeoy naho i soroñey vaho i engam-pañanintsiñey. ²³ Nizilik' amy kibohom-pamantañañey t'i Mosè naho i Aharone, le niavotse vaho nitata ondatio le nisodeha am' ondaty iabio ty enge' IEHOVÀ. ²⁴ Niforoake boak' añatrefa' IEHOVÀ ty afo namorototo i soroñey naho ty safo'e an-kitrely eo, le fonga nahaoniñe zay ondatio naho nikoiake vaho nibabok' an-daharañe.

10

Nadabe naho i Abiho

¹ Songa nandrambe ty sadron' afo'e t'i Nadabe naho i Abiho, ana' i Aharone, naho nasia' iareo afo, naho nampipohañ' emboke vaho ninday afo tsie añatrefa' IEHOVÀ, ie tsy nandilia'e. ² Aa le niforoake boak' am' IEHOVÀ ty afo namorototo iareo, vaho nikoromak' añatrefa' IEHOVÀ.

³ Le hoe t'i Mosè amy Aharone, Zay ty talin-tsara' IEHOVÀ, ie nanao ty hoe: Hampiavahe' o mpañarine ahikoo raho, vaho ho rengène añatrefa' ondaty iabio. Fe nianjiñe t'i Aharone.

⁴ Kinanji' i Mosè t'i Misaele naho i Eltsafane, ana' i Oziele, rahalahindrae' i Aharone, le natao'e ty hoe: Mb' etoa, takono boak' aolo' i toetse miavakey mb' alafen-tobe aña o longo'oo. ⁵ Aa le nimb'eo iereo nitakoñe aze aman-tsikiñe mb' alafe' i tobey mb'eo, amy nitsarae' i Mosèy.

⁶ Le hoe t'i Mosè amy Aharone naho amy Elazare naho Itamare, ana'e, Ko añafahan-tsabaka ty añambone' areo, naho ko mandria-tsaroñe tsy mone hihomake vaho hifetsak' am'ondaty iabio ty haviñerañe. Fe o longo' areoo, i anjomba' Israele iabiy ty handala i famorototoañe niviañe' IEHOVÀ. ⁷ Le ko mienga ty lalan-kibohom-pamantañañey tsy mone hihomake, amy te ama' areo ty mena-pañoriza' IEHOVÀ. Le nanoe' iareo ty nitsarae' i Mosè.

⁸ Le hoe ty nitsarae' IEHOVÀ amy Aharone, ⁹ Ko mikama divay ndra toake, ihe naho o ana'o miharo ama'oo, t'ie mizilik' amy kibohom-pamantañañey ao, tsy mone hikoromake. Fañè nainaie amo tarira' areo mifandimbeo zay, ¹⁰ hampiavahañe ty masiñe ami'ty tsotra naho ty maleotse ami'ty malio, ¹¹ naho hañanarañe o ana' Israeleo ze hene fañè nitsarae' IEHOVÀ am' iereo am-pitá' i Mosè.

¹² Le hoe t'i Mosè amy Aharone naho amy Elazare vaho Itamare, sehangan' ana'e rey: Rambeso ty enga-mahakama nisisa amy nisoroñañe am' IEHOVÀ, vaho ikamao po-dalivay marine'i kitreliy fa miava-do'e. ¹³ Ho kamae' areo amy toe-miavakey amy t'ie anjara'o naho anjara' o ana'oo boak' amy soroñañe am' IEHOVÀ, amy nandiliañ' ahikoy. ¹⁴ Ho kamae'o ami'ty malio ka ty tratra' i engan-kelahelay naho ty tso' i enga-kavoañey, ihe naho o ana-dahi'oo naho o anak-ampela'o miharo ama'oo, amy t'ie natolotse ho zo'o naho zo' o keleia'oo boak' amo engam-pañanintsiñe fisoroña'o ana' Israeleo. ¹⁵ Hasese' iareo mindre amo safo'e hisoroñañeо ty tson' engan-kavoñaе naho ty tratra' i engan-kelahelay, hahelahela ho engan-kelahela añatrefa' IEHOVÀ. Le ho azo naho o ana' areo mindre ama'oo ho fañè tsy modo ami'ty nandilia' IEHOVÀ.

¹⁶ Nitsoehe' i Mosè amy zao i osen' engan-kakeoy; inao finorototo! Niviñera'e t'i Elazare naho Itamare, ana' i Aharone honka'e rey, ami'ty hoe: ¹⁷ Ino ty tsy nihinana' areo i engan-kakeoy amy toe-miavakey ao? Miavake zay vaho natolon' Añahare anahareo hivave ty hilà' i màroy hañeferañe iareo añatrefa' IEHOVÀ. ¹⁸ Inao, tsy nasese amy toe-miavakey ty lio'e, aa le ho nihinana' areo amy toe-miavakey ao, amy nandiliakoy.

¹⁹ Le hoe t'i Aharone amy Mosè: Ingo te binanabana' iareo anindroany i engan-kakeo' iareoy naho o fisoroña'iareo añatrefa' IEHOVÀ; aa ty amy hene nizo ahiko anianiy, naho nihinanako i engan-kakeoy anindroany ampivazoho'a' IEHOVÀ, ho ni-nò'e hao? ²⁰ Ie jinanji' i Mosè zay le nisoa am-pihaino'e ao.

11

Ty Malio naho ty tsy Malio

¹ Hoe ty nitsara' IEHOVÀ amy Mosè naho amy Aharone: ² Saontsio amo ana' Israeleo ty hoe: Iretoañe o raha veloñe ho fikama' areo amy ze hene bibi' ty tane toy. ³ Ze vaki-hotro, ie misarake do'e o hotro'eo, naho mihota haneñe (amo bibio) le mahakama' areo. ⁴ Fe tsy ho kamae' areo o mpihota naho o vaki-hotro retoñañe: o ramevao, amy te tsy vaki-hotro ndra t'ie mihota, aa le faly ama' areo. ⁵ O trandrakeo, amy te tsy vaki-hotro ndra t'ie mihota le faly ama' areo. ⁶ O bitroo, amy te tsy vaki-hotro ndra t'ie mihota, le faly ama' areo. ⁷ O lamboo, toe misarake o hotro'eo naho vaki-hotro f'ie tsy mihota, le faly ama' areo. ⁸ Tsy ho kamae' areo o nofo'eo le tsy ho tsapae' areo o fate'eo, faly ama' areo.

⁹ Iretoy ty ho fikama' areo amy ze he'e an-drano ao. Ndra inoñ' inoñe aman' elatse naho sisy, he andrano he an-driake ke an-tsaka ao—le azo' areo kamaeñe. ¹⁰ Fe ze raha iaby an-driake ndra an-tsaka ao tsy aman' elatse ndra sisi'e amo fonga raha mifamorohotse an-drano naho amy ze hene raha veloñe an-drano, le tiva ama' areo; ¹¹ veta ama' areo irezay. Tsy ho kamae' areo ty nofo'e, fa tiva ama' areo ty fate'e. ¹² Ze raha an-drano ao tsy aman' elatse ndra sisy le tiva ama' areo.

¹³ Intoy ty tiva ama' areo amo voroñeо. O tsy ho kamaeñeо, o atao tivao: ty tratràke, ty bevorotse naho ty salale; ¹⁴ ty fañaoke, naho ze atao vantio; ¹⁵ ze hene koàke naho o rahamba'eo; ¹⁶ ty voron-tsatra, ty langopake, ty vorom-potsy, naho ze hene karazan-kitikitike; ¹⁷ ty voron-dolo kede; ty voron-dolo mpañao-piañe naho ty voron-dolo mpikodritse; ¹⁸ ty vorondolo foyt, ty voron-dolon-tane maike, ty hondria; ¹⁹ ty sama naho ze karaza-dangoro, ty kotrohake vaho ty kananavy.

²⁰ Tiva ama' areo ze hene bibi-kede aman' elatse, misitse aman-tombo'e efatse. ²¹ Fe o bibi-kede aman' elatse, mpisitsitse aman-tomboke efatseo le azo kamaeñe o amam-pange'e ambone' o piko'eo naho mitsindrèko antaneo. ²² Iretoañe o azo kamaeñe ama'eo: ty beitratra ty amo karaza'eo, ty andrombile ty amo karaza'eo, ty antsìñe ty amo karaza'eo, naho ty valala ty amo karaza'eo. ²³ Le tiva ama' areo ze hene biby ila'e mifamorohotse naho mitiliñe, aman-tomboke efatse.

Biby Faly

²⁴ Inay o mahaleotse anahareo; ze mitsapa ty fate'e le maleotse pak' amy harivay, ²⁵ le ze mañongake ty fate am' irezay ro hanasa o siki'eo vaho haleotse pak' amy harivay. ²⁶ Ty amy ze hene biby vaky hotro naho tsy mizara, ndra o tsy mihotao, le faly ama' areo, fonga maleotse ty mitsapa irezay. ²⁷ Faly ama' areo ze biby mandia an-delatomboke maleme amo mpandeha an-tomboke efatseo. Haleotse pak' amy harivay ze mitsapa ty fate' irezay. ²⁸ Hanasa o siki'eo ze mandrambe ty fate'e vaho haleotse pak' amy harivay; ie faly ama' areo.

²⁹ Intoy ka o raha faly amo biby milaly an-tane atoio: ty fanaloke, ty kotika, ze karazan-droso, ³⁰ ty tràtrake, ty jirifòñe, ty voae, ty roson' añombelahy vaho ty tañe. ³¹ Songa faly ama' areo i raha milaly zay. Maleotse pak' amy harivay ze mitsapa ty fate'e.

³² Le fonga haleotse ze raha ipaoha' ty mate amy rezay, ke hatae, ke lamba, ke holitse, he haroñe—ze raha manañ' asa, le tsy mahay tsy ajorobo an-drano ao, naho haleotse pak' amy harivay, vaho halio; ³³ Ho foieñe ze valàñe tane ijoña' ty raik' am' iereo; fonga haloto ze ama'e ao. ³⁴ Haloto ze hene mahakama mete ho nikamaeñe te ipaoha' i rano'ey, vaho haloto ka ze rano ho ninomeñe boak' amy fanakey. ³⁵ Fonga maloto ze ipoha' ty fate'e, ndra te toñake, ndra valàñe, le tsy mete tsy koromaheñe fa maleotse. Songa maloto ama' areo irezay. ³⁶ Ndra te zay, halio ty vovoñe ndra ty kadaha ivorian-drano, fe haloto ze mitsapa ty fate'e. ³⁷ Aa naho mipok' ami'ty tabiry hamboleñe ze ho tongiseñe, ty ila' i fate'ey, malio i tabiri. ³⁸ Fa naho nañiliñan-drano i tabiri vaho mipok' ama'e ty ila' i fatey, le maleotse ama'o.

³⁹ Haleotse pak'amy harivay ka ze mitsapa ty fatem-biby fihinañe, mate boboke. ⁴⁰ Tsy mete tsy manasa o lamba'eo ze mikama amy fatey vaho haleotse pak' amy harivay; mbore hanasa ty lamba'e ze mañongake i fatey vaho haleotse pak' amy harivay.

⁴¹ Tiva iaby ze biby mifamorohotse ambone' ty tane toy—tsy ho kamaeñe. ⁴² Ze milaly an-tro'e, ke misitsitse an-tombo'e efatse, he maro tomboke, amo biby mangetseksetsek' an-tane atoio, tsy ho kamae' areo, fa tiva. ⁴³ Ko mando-batañe amo biby mifamorohotseo nahareo le ko andotoa'areo vatañe vaho ko mileotse ama'e. ⁴⁴ Zaho IEHOVÀ Andrianañahare' areo. Aa le, miefera vaho miavaha, amy te masin-dRaho. Ko mando-batañe amy ze mifamorohotse an-tane atoy. ⁴⁵ Zaho IEHOVÀ nañavotse anahareo an-tane Mitsraime aña ho Andrianañahare' areo. Aa le miavaha amy te masin-dRaho.

⁴⁶ Zay o fetse amo biby ndra voroñe ndra ze raha veloñe mpandeha amo ranoo ndra mifamorohotse ambone' ty tane toio, ⁴⁷ hañavahañe ty maleotse ami'ty malio, naho hamìhañe o biby tsy kamaeñeo amo mete kamaeñeo.

12

Ty Fañeferan' Ampela nahatoly

Lke. 2.22-24

¹ Hoe ty nitsara' IEHOVÀ amy Mosè, ² Misaontsia amo ana'Israeleo, ty hoe: Ie miareñe ty ampela naho misamak' ana-dahy, le haleotse re am-para' ty andro faha-fito, manahake o androm-piambola'eo ty ho faleora'e. ³ Le ho tampaheñe ami'ty andro fahavalo ty ofo'e. ⁴ Hidoñe am-pitaià'e ao re hiefetse ami'ty lio'e telopolo andro telo amby, le tsy hitsapa raha miavake naho tsy hizilik' amy toe-miavakey ampara' te heneke o andro fitaià'eo. ⁵ Aa naho mone misamak' ampela re le haleotse hereñandro roe manahake i fiambola'ey, le hiefe-batañe andro enempolo-eneñ'amby ty amy lio'ey.

⁶ Ie heneke ty androm-piefera'e, ke te lahilahy ke te anak'ampela, le hengae'e amy mpisoroñe an-dalan-kibohom-pamantañañey ty vik' añondry, lahi'e taoñe raike, hisoroñañe, naho ana-boromahilala ndra deho ho engan-kakeo. ⁷ Le hengae'e añatrefa' IEHOVÀ, naho hañefetse aze, vaho halio re amy fiorihan-dio'ey. Zay ty fetse ami' ty rakemba nisamake lahilahy ndra ampela. ⁸ Aa naho tsy lefe'e ty añondry le hindesa'e ana-boromahilala roe he deho roe; ty raike hisoroñañe vaho ty raike ho engan-kakeo; le hañefetse aze i mpisoroñey vaho halio re.

13

O Angamaeo

¹ Hoe ty nitsara' IEHOVÀ amy Mosè naho i Aharone: ² Ie mibotan-kolitse ke te olatse amy t'indaty, he pepo maviake, ie hoe angamae amy holi'ey, le hasese mb'amy Aharone mpisoroñe ndra mb'ami'ty raik' amo ana'e mpisoroñeo mb'eo. ³ Ho biribirie' i mpisoroñey ty handra ami'ty holi' i sandri'ey; aa naho foty ty maròy miakatse amy handray vaho oni'e laleke te amy holi' i sandri'ey i handray le angamae zay; ie savae' i mpisoroñey le ho tseize'e te maleotse. ⁴ Aa naho foty i pepo maviak' amy holin-tsandri'eoiy naho isake t'ie tsy laleke te amy holitsey naho tsy nikò-foty ty maroi'e, le hampiambahe' i mpisoroñey fito andro indaty voa' i handray. ⁵ Ho savae' i mpisoroñey re amy andro fahafitoy, aa ie tsy niova ampahaisaha'e aze i handray naho tsy nandakak' amy holi'ey i handray, le havi' i mpisoroñey fito andro indraike. ⁶ Mbe ho savae' i mpisoroñey indraike amy andro fahafitoy; aa naho toe nikepake i handray vaho tsy nandakak' amy holi'ey i handray, le ho tseize' i mpisoroñey t'ie malio. Heza'e avao zay le ho sasà'e o siki'eo vaho halio. ⁷ Aa naho mone nandakak' amy holitsey i baey, ie fa nioni' i mpisoroñey ty amy fañaliova'ey le hiheo mb'amy mpisoroñey mb'eo indraike re. ⁸ Ie isa' i mpisoroñey te toe nandakake i bae amy holi'ey, le ho tseize'e t'ie maleotse; angamae zay.

⁹ Ie silofe' ty handra t'indaty le hasese mb'amy mpisoroñey mb'eo, ¹⁰ le hisava aze i mpisoroñey; aa naho isa'e te mibontam-poty i holi'ey naho nampifotie' ty maròy ama'e, mbore ama'e ty nofotse veloñe miboak' amy nienatsey, ¹¹ le fa lili'e i angamae an-koli-tsandri'e; ho tseize' i mpisoroñey t'ie maleotse, fe tsy hagabeñe ao, toe faleora'e. ¹² Aa ie mandakak' amy holitsey i angamaey, naho mipàtsake boak' añ'ambone pak' am-pandia an-koli' i aman-kandray ndra aia'aia isahe' i mpisoroñey i angamaey, ¹³ le ho savae' i mpisoroñey hey, aa ie isake te nahatsitsike i sandri'ey i angamaey, le ho tseize'e te malio i aman-kandray; kanao nikò-foty iaby le malio. ¹⁴ Fe ndra mbia'mbia te miboak' ama'e ty nofotse veloñe, le haleotse re. ¹⁵ Ho

savae' i mpisoroñey i nofo-beloñey vaho ho tseize'e t'ie maleotse; amy te maloto i nofo-beloñey. Angamae re. ¹⁶ Ie mivalike indraike i nofo-beloñey, miova ho foy, le homb' amy mpisoroñey mb'eo re. ¹⁷ Ho savae' i mpisoroñey, ie toe nikò-foy i handray, le ho tseize' i mpisoroñey te malio i aman-kandray. Malio re.

¹⁸ Ie teo ty nitovoñañe an-koli' i sandriñey, fe nimelañe ¹⁹ naho mandimbe i baey ty fivontoñañe foy ndra ty pepo maviake, mena minday foy, le haboak' amy mpisoroñey; ²⁰ aa ie isa' i mpisoroñey te laleke ta' i holitsey zay, vaho fa foy o maroi'eo, le ho tseize' i mpisoroñey te maleotse. Angamae ty nirofotse amy baey. ²¹ F'ie misava aze i mpisoroñey naho isa'e te tsy ama'e ao i maròy fotiy naho tsy laleke te amy holitsey mbore nitsiteke, le hazoizoi' i mpisoroñey fito andro. ²² Aa naho mandakak' amy holitsey, le ho tseize' i mpisoroñey t'ie maleotse. Angorosy zay. ²³ Aa naho tambatse eo i pepo maviakey, tsy mandakake; le heza' i baey avao zay vaho ho tseize' i mpisoroñey t'ie malio.

²⁴ Naho amy holin-tsandriñe eo t'ie mae hoe afo vaho miboak' amy nimelañe amy nima'eiy ty pepo maviake, foy minday mena, ndra foy; ²⁵ le ho savae' i mpisoroñey, ie isa'e te foy ty maròy miakatse amy pepo maviakey naho hoe laleke te amy holitsey, le angamae zay, fa nirofotse boak' amy nimaey; vaho ho tseize' i mpisoroñey t'ie maleotse, angamae zay. ²⁶ F'ie isa' i mpisoroñey te tsy a' maròy foy i pepo maviakey naho tsy laleke te amy holitsey vaho niko-mavo; le havi' i mpisoroñey fito andro. ²⁷ Hisava aze amy andro faha-fitoy i mpisoroñey, le ie nandakak' amy holitsey, ho tseize' i mpisoroñey t'ie maleotse, angamae zay. ²⁸ Aa naho tambatse amy toe'ey i pepo maviakey fa tsy nandakak' amy holitsey, naho niko-mavo, le nitombolatse i hamaey; ho tseize' i mpisoroñey te malio indatiy, fa heza' i hamaey avao.

²⁹ Naho eo ty lahilahy ndra ampela aman-kandra añambone'e ndra antanteah'e, ³⁰ le ho savae' i mpisoroñey i handray; aa naho isake t'ie laleke te amy holitsey, naho a' maròy matify maviake ty ao le ho tseize' i mpisoroñey te maleotse. Angamae mirofotse zay, añambone ndra antsomotse ao. ³¹ Aa naho savae' i mpisoroñey i handra mañezañey, le isa'e t'ie tsy laleke te amy holitsey naho tsy ama'e ty volo mainte, fe havi' i mpisoroñey fito andro i aman-kandra mañezañey. ³² Ie amy andro fahafitoy le ho savae' i mpisoroñey i handray; aa naho tsy nandakake o hezao, naho tsy ama'e ty volo mavoñe, vaho tsy laleke te amy holitsey i mañezañey, ³³ le hiharatse re fe tsy harate'e o hezao. Le havi' i mpisoroñey fito andro indraike i aman-kezay. ³⁴ Ho savae' i mpisoroñey amy andro fahafitoy o hezao; ie onin-te tsy nandakak' amy holi'ey o mañezañeo, naho tsy laleke te amy holi'ey le ho tseize' i mpisoroñey t'ie malio. Ho sasà'e o siki'eo le halio re. ³⁵ Fa naho toe mandakak' amy holitsey o hezao ie fa nolio, ³⁶ le ho savae' i mpisoroñey; aa naho toe nandakak' amy holitsey o hezao le tsy hipay maròy mavoñe ka. Tsy malio re. ³⁷ Fe naho isake te mizitse eo avao o heza'eo naho mitiry ama'e ty maròy mainte, le fa melañe o hezao. Malio le ho tseize' i mpisoroñey t'ie malio.

³⁸ Naho pepo maviake ty an-koli' ondaty ndra ampela, toe pepo foy maviake, ³⁹ le ho savae' i mpisoroñey; aa ie mavomavo ty hamendo' o pepo amy holi' i sandriñeio, le akiry avao zay. Malio indatiy.

⁴⁰ Naho nihintsa-maròy t'indaty, ie mondoy añambone, le malio. ⁴¹ Naho mihintsañe ty maroin-dahara' ondaty, tsiamaroin-daharan-dre, fe malio.

⁴² Aa naho miboak' añambone ndra an-daharañe tsiamaròy ty handra foyt minday mena, le angamae ty mirofotse amy añambone'e bodoy ndra amy lahar'a'e solay. ⁴³ Ho savae' i mpisoroñey, aa naho toe foyt mikò-mena ty fibontaña' i handra añambone'e tsiamaròy ndra an-dahara'e tsiamaròiy, hambañe ami'ty fiboaha' ty angamae an-koli-tsandriñe, ⁴⁴ le voa' ty angamae indatiy, tsy malio. Tsy mete tsy hitsey ty haleora'e i mpisoroñey; añambone'e i hasilofa'ey.

⁴⁵ Aa ie angamae aman-kandra, hapoke hiniñaniña o maroi'eo, naho ho rakofe'e ty fivimbi'e ambone vaho hikoikoike ty hoe: Tsy malio, Tsy malio. ⁴⁶ Haleotse re amo hene andron-kasilofa'eo; tsy malio. Am-bangiñe ao ty himoneña'e; vaho ho alafe' i tobey ty akiba'e.

⁴⁷ Ty amo sikiñeo: naho ama'e ty handran' angamae ke an-damba volon' añañondry he an-tsiky leny; ⁴⁸ ke an-tenoñe, he añañisañe, an-dený ndra am-bolon' añañondry, ke an' angozy hera an-tsatan-kolitsena inoñe, ⁴⁹ aa naho miboake amy handray ty antsetra ndra mena an-tsikiñe ndra an-kolitse, ke an-tenoñe, he añañisañe, ke an' angozy, he an-kolitsena inoñe, le angamae zay vaho hatoro amy mpisoroñey. ⁵⁰ Ho savae' i mpisoroñey i handray vaho hakafi'e ao fito andro i aman-kandray. ⁵¹ Ho sarie'e ami'ty andro faha-fito i handray. Aa naho nandakak' amy lambay i handray hera an-tenoñe, ke añañisañe, he añañangozy ke an-kolits-ena inoñe, le angamae mifindra i handray, maleotse zay. ⁵² Ho forototoe'e i sikiñey ; aa ke te an-tenoñe, he añañisañe, ke am-bolon' añañondry he an-dený, hera an-kolitsena inoñe ty angamae mifindra, le ho hotomomoheña añañaflo.

⁵³ Aa ie savae' i mpisoroñey naho isa'e te tsy nandakak' amy sikiñey i handray, ke an-tenoñe, he añañisañe, he an-kolits-ena inoñe, ⁵⁴ le ho lilie' i mpisoroñey te ho sasaeñe i sikiñe niboaha' i handray, vaho hakafi'e ao fito andro ka. ⁵⁵ Ie fa sinasa i aman-kandray le ho savae' i mpisoroñey. Aa ie tsy niova ty volo' i handray ndra te tsy nandakake i handray, le maleotse; ho forototoe'o añañaflo, ke te ambone'e i fisolañey he am-panda'e.

⁵⁶ Aa naho sarie'e i mpisoroñey le zoe'e te nikepake i handray, ie sinasay, le ho riate'e amy sikiñey ndra amy angoziy, ndra an-tenoñe, ndra añañisañe.

⁵⁷ Aa ie miboake indraik' amy sikiñey ke an-tenoñe ke añañisañe he amankolitse inoñe o firofotañeo, le ho forototoe'o añañaflo i aman-kandray. ⁵⁸ Aa naho sasaeñe i sikiñey le nimosañoñe i handra an-tenoñe he añañisañe, he añañinoñe holits-ena, le ho sasañe fañindroe'e vaho halio.

⁵⁹ Zay ty Fetse' o handran' angamae an-tsikiñeo ke te an-tenoñe he añañisañe, hera inoñe añañangozy, ty handrendrehañe t'ie malio he t'ie maleotse.

14

Ty Angamae' Ondaty naho Akiba

Mat 8:1; Lk 5.12-14

¹ Hoe ty nitsara' IEHOVÀ amy Mosè: ² Zao ty ho fetsen' angamae amy andro añañeferañe azey, t'ie hasese mb'amy mpisoroñey mb'eo; ³ hiavotse i tobey i mpisoroñey, le hisava aze ey i mpisoroñey, aa ie isa'e te melañe ty handran' angamae amy 'ndatiy, ⁴ le ho lilie' i mpisoroñey ty haneseañe voroñe roe malio naho ty mendoraveñe naho ty fole mena vaho ty seva ho amy heferañey. ⁵ Ho lilie' i mpisoroñey ty handentàñe am-balàñe tane ao ambone rano mikararake ty voroñe raike. ⁶ Ho rambese'e ty voroñe veloñe naho i mendoraveñey naho i fole menay naho i sevay vaho halò'e mindre amy voroñe veloñey ami'ty lio' i voroñe linenta ambone' i rano

veloñey. ⁷ Le ho fitseza'e im-pito i heferañe amy angamaei, naho hitsey t'ie malio, vaho havotso'e an-kivoke malalake ey i voroñe veloñey.

⁸ Ho sasà'i heferañey o siki'eo, le hitsifa'e iaby o maroi'eo, naho hiandro an-drano, vaho halio. Añe zay, le mete mimoak' an-tobe re, fe hitoetse alafe' i kiboho'ey fito andro. ⁹ Ie amy andro faha-fitoy ro hañitsike o maroi'e iabio, naho ty tanteahe'e, naho o hie'eo; fonga ho harate'e ze atao volo ama'e. Ho sasà'e o saro'eo naho hampiandroe'e ty sandri'e vaho halio.

¹⁰ Amy andro fahavaloy ty handrambesa'e vik'añondrilahy roe tsy aman-kandra, naho añondri-vave vanto'e tsy aman-kandra naho mona telo ampaha-folo' ty famarañe ho ravoravo, linaro menake, vaho menake *loge raike. ¹¹ Sindre hijadoñe añatrefa' IEHOVÀ an-dala' i kibohom-pamantañañey i mpisoroñey mañefetse azey naho indaty heferañey vaho i raha rezay. ¹² Handrambe raik' amy vik' añondrilahy rey i mpisoroñey le hampañarinea'e, naho hengae'e ho engan-dilatse, naho i menake loge raikey, vaho hahelahela'e ho engan-kelahela añatrefa' IEHOVÀ. ¹³ Le ho lenta'e i anak' añondrilahiy ami'ty fandentañe o engan-kakeo naho enga-oroañe amy toe-miavakeio, fa a i mpisoroñey i engan-dilatsey manahake o engan-kakeoo; ie miava-do'e. ¹⁴ Le handrambesa' i mpisoroñey ty lio' i engan-dilatsey naho hatente'e an-dengon-dravembia havana' i heferañey naho an-tondro-beim-pitá'e havana vaho an-tondro-beim-pandia'e havana. ¹⁵ Handrambesa' i mpisoroñey i menake loge raikey vaho añaliña'e an-dela-pitá'e havia. ¹⁶ Le halò' i mpisoroñey amy menake am-pitá'e havia i rambo-pitá'e havanay vaho hapitsipitsin-drambo-pitá'e im-pito añatrefa' IEHOVÀ i menakey. ¹⁷ Hangala' i mpisoroñey i menak' am-pitá'e havia i rambo-pitá'e havanay vaho hapitsipitsin-drambo-pitá'e im-pito añatrefa' IEHOVÀ i menakey. ¹⁸ Hapeta' i mpisoroñey amy añambone' i heferañey ty menake sisa am-pitá'e ao; le hefera' i mpisoroñey añatrefa' IEHOVÀ: ¹⁹ Hengae' i mpisoroñey i engan-kakeoy hañefetse ty haleora' i heferañey. Heneke zay le ho lentae'e i hisoroñañey; ²⁰ Hengae' i mpisoroñey amy kitreliy i soroñañey naho i enga-mahakamay, zay ty hañefera' i mpisoroñey aze, vaho halio.

²¹ Aa ie rarake, tsy taka' o fanaña'eo, le handrambesa'e añondrilahy vi'e raike ho engan-dilatse hahelahela, hañeferañe aze, naho mona fahafolo' ty efà linaro menake ho enga-mahakama, naho ty menake loge raike, ²² vaho deho roe ndra ana-boromahilala roe—ze takam-pita'e: ty raike ho engan-kakeo le ty raike hisoroñañe. ²³ Ie amy andro fahavaloy ro hinday irezay mb'amy mpisoroñey hañeferañe aze, an-dalan-kibohom-pamantañañe eo, añatrefa' IEHOVÀ; ²⁴ ho rambese' i mpisoroñey i vik'añondrin' engan-dilatsey naho i loge menakey vaho hahelahela' i mpisoroñey añatrefa' IEHOVÀ ho engan-kelahela. ²⁵ Ho lentae'e amy zao i vik' añondrin' engan-dilatsey le hangala' i mpisoroñey amy lion' engan-dilatsey ty hatente'e an-dengon-dravembia havana' i heferañey, naho an-tondro-beim-pitá'e havana vaho an-tondro-beim-pandia'e. ²⁶ Le hañiliña' i mpisoroñey an-dela-pitá'e havia i menakey, ²⁷ le hafitse' i mpisoroñey andrambo-pitá'e havana im-pito añatrefa' IEHOVÀ ty ila' i menake am-pitá'e havia. ²⁸ Le i menak' am-pitá'ey ty hatente' i mpisoroñey an-dengon-dravembia havana' i heferañey, naho amy tondro-beim-pitá'e havanay

* **14:10** loge = kapoake raike; famarañe rano

naho amy tondro-beim-pandia'e havanay amy nanenteña'e i lion-enganalatseiy. ²⁹ Hapeta' i mpisoroñey ami'ty añambone' i heferañey ty sisa' i menak' am-pitá'e haviay, hañeferañe aze añatrefa' IEHOVÀ. ³⁰ Le ho banabanae' ty raik' amy deho rey ndra amy ana-boromahilala rey, ze lefe'e, ³¹ ze takam-pita'e, engan-kakeo ty raike le soroñe ty raike, tovo' i enga-mahakamay; vaho hefera' i mpisoroñey añatrefa' IEHOVÀ i eferañey. ³² Zay ty fetse amy handran' angamae naho tsy lefem-pitá'e ty hañenga ho amy fañeferañe azeiy.

³³ Le hoe ty tsara' IEHOVÀ amy Mosè naho Aharone: ³⁴ Ie mizilik' an-tane Kanàne aña, i hatoloko ho fanañañey naho hapoko an-kiboho' areo an-tane-panaña' areo ao ty handran' angamae, ³⁵ le hiheo mb' amy mpisoroñey mb'eo ty templo' i anjombay hanao ty hoe, Naho amako, le hoe angorosy ty an-trañoko ao. ³⁶ Aa le ho lilie' i mpisoroñey ty hampikoahañe i anjombay aolo' ty iziliha' i mpisoroñey hibiribiry i handray, soa tsy ho leoreñe iaby ze amy anjombay ao; ie heneke zay le hizilik' amy anjombay i mpisoroñey hisava aze. ³⁷ Le ho biribirie'e i handray; aa naho tendreke te toe andrindri' i trañoy ty handra an-toe'e mikafokafoke menamena ndra antsetra, naho hoe laleke te amy tarehe' i rindriñey, ³⁸ le hiavotse amy lala' i anjombay i mpisoroñey vaho harindri'e fito andro i anjombay. ³⁹ Homb'eo indraike i mpisoroñey amy andro faha-fitoy hisava; aa naho nandakak' amo rindri' i akibaio i handray, ⁴⁰ le ho lilie' i mpisoroñey te hakareñe o vato nanjoañe i handraio vaho hariañe an-tane tiva alafe' i rovay aña. ⁴¹ Le fonga hampikiae' i mpisoroñey ty añariari' ty am-po' i anjombay vaho hariañe an-deotse alafe' i rovay aña i deboke nikiaeñey. ⁴² Hampijõña' iereo vato hafa hasolo o vato teoo, vaho hangalà' iereo pakotse hapakotse i anjombay.

⁴³ Aa naho mirofotse amy anjombay indraike i handray, ie fa nakatra'e o vatoo, naho nikiaeñey i trañoy vaho nipakora'e, ⁴⁴ le hizilik' ao i mpisoroñey hisava; ie oni'e te nandakak' amy anjombay i handray, le angamae mipatsake amy anjombay ao zay, maleotse. ⁴⁵ Le ho robahe'e i anjombay, o vato'eo, o hatae'eo, naho ze pakotse ama'e iaby, vaho hendese'e mb' an-deotse alafe' i rovay aña; ⁴⁶ vaho haleotse pak' amy harivay ze ondaty nizilik' amy akiba maleotsey amy ze andro naha-katoke aze. ⁴⁷ Hanasa o siki'eo ze nandre amy anjombay vaho hanasa o siki'eo ka ze nikama amy anjombay ao.

⁴⁸ Fe naho mizilik' ao i mpisoroñey misava aze vaho toe tsy nandakak' amy anjombay i handray naho fa nipakorañe i anjombay, le ho tseize' i mpisoroñey te malio i anjombay, amy te melañe i handra'ey. ⁴⁹ Le ty hañeferañe i anjombay, handrambe voroñe roe re naho mendoraveñe naho mena vaho seva. ⁵⁰ Ho lentae'e am-balañe tane ambone' rano mikararake ty voroñe raike, ⁵¹ le ho rambese'e i mendoraveñey, naho i sevay naho i fole menay rekets' i voroñe veloñey naho halò'e amy lio' i voroñe linentay naho amy rano mikararakey, vaho hafitsi'e im-pito amy anjombay. ⁵² Zay ty hañaliova'e i anjombay ami'ty lio' i voroñey naho amy rano mikararakey naho amy mendoraveñey naho amy sevay vaho amy menay. ⁵³ Havotso'e alafe' i rovay an-kivoke malalake ey ka i voroñe veloñey, zay ty hañefera'e i anjombay, le halio.

⁵⁴ Izay ro fetse amy ze hene handran' angamae naho o mandrekedreket-seo, ⁵⁵ naho ami'ty angamae an-tsikiñe naho añ'akiba ⁵⁶ naho ami'ty tombolatse ndra ty firofotse ndra ty pepo mendo, ⁵⁷ hañohañe ty haleora'e naho ty haliova'e. Zay o fetsen' angamaeo.

15

O Ranoke Miakatse an-tSandriñeo

¹ Hoe ty nitsara' IEHOVÀ amy Mosè naho Aharone: ² Saontsio amo ana' Israeleo ty hoe:

Ie mandranoke ty sandrin-dahilahy le maleotse i fandranohañey. ³ Hoe zao ty fandeora' i fioriha'ey: ke ampiorihe' i sandri'ey, ke jenjeñé' i sandriñey tsy handrano, fa songa haleora'e. ⁴ Fonga haleotse ze fandrea andrea' i mandranoy, sindre haleotse ze iambesara'e. ⁵ Hanasa o siki'eo ze mitsapa i tihi'ey, naho hiandro an-drano, le ie tsy halio ampara' te hariva.

⁶ Hanasa o siki'eo ka ze miambesatse amy niambesara' i mandranoiy, vaho hiandro an-drano, le tsy halio ampara' te hariva. ⁷ Hanasa o siki'eo naho hiandro an-drano ka ze mitsapa ty sandri' i mandranoy vaho tsy halio am-para' te hariva. ⁸ Aa naho androrà' i mandranoy ty malio, le hanasa o siki'eo naho hiandro an-drano re vaho tsy halio ampara' te hariva.

⁹ Haleotse ka ze sarete ijoña' i mandranoy. ¹⁰ Tsy halio am-para' te hariva ty mitsapa ze raha tambane'e ao, hanasa o siki'eo re; le hiandro an-drano ze minday i rahay vaho haleotse ampara' te hariva. ¹¹ Hanasa o siki'eo, naho hiandro an-drano, le tsy halio ampara' te hariva ze hene tsapae' i mandranoy naho tsy sasà'e an-drano hey o fità'eo. ¹² Ho foieñe ze valàñetane nitsapae' i mandranoy, le hene ho popohen-drano ze finga hatae.

¹³ Ie nilioveñe amy fandranoa'ey indaty nandranoy, le hañiake fito andro ho amy fañaliová'ey; ho sasà'e o siki'eo naho hampiandroe'e an-drano mikararake* i sandri'ey, vaho halio. ¹⁴ Ie amy andro fahavaloy, le handrambe deho roe ndra ana-boromahilala roe re naho hiheo mb' añatrefa' IEHOVÀ mb'an-dalan-kibohom-pamantañañe mb'eo, vaho hatolo'e amy mpisoroñey. ¹⁵ Le hengae' i mpisoroñey, ty raike ho engan-kakeo, ty raike hisoroñañe, vaho hañefetse aze añatrefa' IEHOVÀ i mpisoroñey ty amy fandranoa'ey.

¹⁶ Aa naho iakaran-drom-pilahiañe t'indaty, le hampiandroe'e an-drano i sandri'e iabiy, vaho haleotse am-para' te hariva. ¹⁷ Fonga ho sasañe an-drano ze lamba ndra holitse nipoha' i rompilahiañey, vaho tsy halio am-para' te hariva. ¹⁸ Ie miilotse ami'ty ampela ty lahilahy naho miakatse ty rom-pilahiañe, le hiandro an-drano iereo roroe vaho tsy halio am-para' te hariva.

¹⁹ Naho mañaka-ranoke ty ampela, le lio ty miakatse i sandri'ey le ho tambatse amy haleoram-piambola'ey fito andro re, vaho haleotse ze mitsapa aze ampara' te hariva. ²⁰ Sindre haleotse ze andrea'e amy fiambahá'ey; songa haleotse ka ze iambesara'e. ²¹ Hanasa o siki'eo naho hiandro an-drano ze mitsapa ty fandrea'e vaho tsy halio am-para' te hariva. ²² Hanasa o siki'eo naho hiandro an-drano ka ze mitsapa ty niambesara'e, vaho tsy halio am-para' te hariva. ²³ Vata'e tsapae' e ty fandrea'e ndra ze niambesara'e le maleotse ampara' te hariva. ²⁴ Naho mitrao-sarimbo ama'e ty lahilahy, le midoñe ama'e i haleora'ey le haleotse fito andro, vaho haloto ka ze andrea'e.

²⁵ Naho miaka-dio andro maro tsy amy fiambola'ey ty ampela, he andro mandikoatse i fiambola'ey, le ampanahafeñe amy haleoram-piambola'ey ze hene andro iakaran-deotse ama'e. Tsy halio re. ²⁶ Hanahake ty fandream-piambola'e ze fandreañe andrea'e amy fiakaran-dio'ey; vaho haleotse ka ze iambesara'e, manahake i haleoram-piambola'ey. ²⁷ Songa haleotse ze mitsapa irezay; ho sasa'e ty siki'e le hiandro an-drano, vaho

* ^{15:13} toe "rano veloñe" manahake ty filiporañe an-tsaka ao

tsy halio ampara' te hariva. ²⁸ Ie malio amy fiakaran-dio'ey, le hañiake fito andro, tampetse zay vaho halio. ²⁹ Ie amy andro fahavaloy, hangalake deho roe ndra ana-boromahilala roe ho ambata'e, le hasese'e amy mpisoroñe an-dalan-kibohom-pamantañañey. ³⁰ Le hengae' i mpisoroñey ho engan-kakeo ty raike le hisoroñañe ty raike, zay ty hañefera' i mpisoroñey aze añatrefa' IEHOVÀ ty amy fiakaran-kaleora'ey.

³¹ Zay ty hampiambaha' areo o ana' Israeleo amo haleora'eo, tsy mone hikoromak' amo haleora'eo ty amy fanivàñe i kivohoko añivo' iereoy.

³² Zay ty fetse i mandranokey, naho indaty iakaran-drom-pilahiañe mampaleotse azey, ³³ naho i rakemba silofe' ty haleoram-piambola'ey, naho i iakaran-dranokey ke lahy he ampela, vaho indaty mifandia-tihy ami'ty ampela amy haleora'eyi.

16

I Andro-pañeferañey

¹ Hoe ty nitsara' IEHOVÀ amy Mosè naho fa nikoromake i ana-dahi' i Aharone roe rey, ie nañarine am' IEHOVÀ vaho nivetrake; ² aa hoe t'IEHOVÀ amy Mosè: Saontsio aman-drahalahi'o Aharone ty tsy himoake tsi-nahy amy toe-miavake añate' i lamba-fañefetsey ao, hiatrek' am' i toem-pijebañañe ambone' i vatam-pañinaiy, tsy mone hihomake, fa miboak' amy rahoñañe ambone' i toem-pijebañañeiy raho. ³ Zao ty hiziliha' i Aharone amy Toe-miavakey ao: reketse ty bania ho engan-kakeo, naho ty añondrilahy hisoroñañe. ⁴ Hiombea'e i saroñañe leny miavakey naho o saroñañe leny manaroñañe i sandri'eo; ho diañe'e i fiëtse leniy, vaho hiombea'e i sabaka leniy; ie sindre sikiñe miavake; ho sasà'e an-drano hey i sandri'ey, vaho hañombe irezay.

⁵ Le hangalake vik'oselahy roe amy favori' bein' ana' Israeley re ho engan-kakeo, naho ty añondrilahy hisoroñañe.

⁶ Le hasese' i Aharone i banian' engan-kakeo ho am-bata'ey, hañefera'e ty vata'e naho i anjomba'ey. ⁷ Ho rambese'e i ose roe rey, vaho hampijohaña'e aolo' IEHOVÀ an-dalan-kibohom-pamantañañe eo. ⁸ Le hanao kitsapake amy ose roe rey t'i Aharone; ty tsapake raike ho a IEHOVÀ vaho ty tsapake raike ho a i Azazele. ⁹ Ho banabanae' i Aharone i ose niazo an-tsapake ho a' IEHOVÀ le hengae' e ho engan-kakeo, ¹⁰ fe hampijohañañe veloña'e aolo' IEHOVÀ i ose niazo an-tsapake ho a i Azazeley, hanoañañe fañeferañe vaho hampihitrifeñe mb'am-patrambey mb'am-patrambey aña.

¹¹ Hengae' i Aharone amy zao i banian' engan-kakeo ho am-bata'ey, hañefetse ty vata'e naho o añañomba'ey, vaho ho lenta'e i banian' engan-kakeo ho am-bata'ey. ¹² Ho rambese'e ty sadro pea vae mirekake boak' amy kitrely añatrefa' IEHOVÀ, naho ty emboke mañitse dinemoke mahaatsa-pitàn-droe vaho hasese'e mb'am-py lamba-fañefetsey ao, ¹³ hapo'e ambone' i afó añañatrefa' IEHOVÀ i embokey, hañàmpoa'e i toem-pijebañañe ambone' i fañinaiy i hatoen-embokey, tsy mone hivetrase re. ¹⁴ Handrambesa'e ty lio' i baniay le hafitsen-drambo-pitá'e añañila atiñana' i toem-pijebañañey, vaho hafitsen-drambo-pitá'e im-pito aolo' i toem-pijebañañey i lioy.

¹⁵ Ho lentae'e amy zao i osen-engan-kakeo ho a ondatiyo vaho hendese'e mb'am-po i lamba fañefetsey ao ty lio'e, le hambañañe amy nanoa'e amy liom-baniaiy ty hanoa'e amy lioy: hafitse'e amy kapekey naho aolo' i kapekey, ¹⁶ le hañefetse i toe-miavakey re ty amo haleora' o ana' Israeleoo,

naho ty amo fiolàñe nampanan-tahiñe iareo iabio; zay ka ty hanoe'e amy kibohom-pamantañañe mitoboke añivo' ty haleora' iareoy.

¹⁷ Ko apeke te ho ama' ondaty ty an-kibohom-pamantañañe ao ie mimoak' ao hañefetse amy toe-miavakey ampara' te miavotse, ie fa nañefetse ty vata'e naho i anjomba'ey vaho i valobohò' Israele iabiy.

¹⁸ Hiavotse mb'amy kitreliy añañatrefa' IEHOVÀ mb'eo re hañefetse aze, naho hangalak' ami' ty lio' i baniay naho ami'ty lio' i osey, vaho hatente'e amo tsifa miariari' i kitreliio. ¹⁹ Le hamitseza'e lio im-pito an-drambo-pità'e, hañaliova'e hiavake ami'ty haleora' o ana' Israeleo.

²⁰ Ie heneke ty fañefera'e i toe-miavakey naho i kibohom-pamantañañey naho i kitreliy, le hampiatrefe'e i ose veloñey. ²¹ Hasampe' i Aharone an-doha' i ose' veloñey ty fità'e roe le hiantofa'e ama'e ze hene hìla' o ana' Israeleo, naho o fiodiañe nampanan-kakeo iareo iabio le hapo'e an-doha' i osey, vaho hampanesefeñe mb'am-patrambey aña, am-pitá' t'indaty nihentseñeñe. ²² Fonga ho wavè' i osey am-bata'e mb' am-bangìñe aña o hakeo' iareoo; le hampidada'e an-dratraratra aña i osey.

²³ Ie aña, le hizilik' an-kibohom-pamantañañe ao t'i Aharone hañafake o siki-leny nisaroña'e amy fiziliha'e amy toe-miavakeiio vaho hapo'e ao; ²⁴ le hanasa sandriñe an-drano amy toe-miavakey re, le hañombe saroñe ila'e naho hiavotse vaho hañenga i soroñe ho am-bata'ey naho i soroñe ho a ondatiyo hañefera'e ty vata'e naho ondatio, ²⁵ hengae'e an-katoeñe amy kitreliy ty safo' i engan-kakeoy.

²⁶ Le ho sasà' i nanese i ose mb'amy Azazeley o saro'eo vaho hiandro an-drano, heneke zay le himoak' an-tobe ao. ²⁷ Ho jinieñe alafe' i tobey i banian-engan-kakeoy naho i osen-engan-kakeoy; i nañandesandio hañeferañe i toe-miavakey rey, le fonga horoañe ty holi'iareo, ty nofo'iareo vaho ty tai' iareo. ²⁸ Ho sasà' i mpañoro' irezaiy o siki'eo, naho hampandroa'e an-drano i sandri'ey; zay re vaho hizilik' an-tobe ao.

²⁹ Hambena' areo ho fañè nainai'e zao: ami'ty volam-paha fito*, ami'ty andro faha folo' i volañey, le hilie-batañe nahareo tsy hitoloñe amandra inoñ'inoñe, ke t'ie samak' an-tane, he t'ie renetane mimoneñe ama' areo ao. ³⁰ Fañeferañe anahareo i andro zay, fañaliovañe; soa t'ie halio añañatrefa' IEHOVÀ amo fonga hakeo' areoo. ³¹ Ho SABATAM-pitofàñe do'e ho anahareo izay, hiliera' areo vatañe; ie fañè nainai'e tsy modo.

³² I mpisoroñe norizañe naho natokañe hitoloñe ho mpisoroñe handimbe an-drae'ey ty hanao i fañeferañey, ie hañombe o saroñe lenio, o saro-miavakeo, ³³ naho hañefetse i toe-miavakey, naho hañefetse i kibohom-pamantañañey naho i kitreliy, eka naho o mpisoroñeo naho ondaty amy valobohòkey iabio. ³⁴ Ho fañè nainai'e tsy modo ho anahareo izay, hañeferañe o ana' Israeleo amo tahi' iareo iabio boa-taoñe.

Le nanoe' i Mosè i nandilia' IEHOVÀY

17

Ty Fandentañe Hare

¹ Hoe ty nitsara' IEHOVÀ amy Mosè: ² Saontsio amy Aharone naho amo ana'eo naho amo ana' Israele iabio ty hoe: Hoe ty nandilia' IEHOVÀ: ³ Ze ondaty boak' aña' anjomba' Israele mandenta añañombe ndra vik' añañondry ndra ose an-tobe ao, he te lentae'e alafe' i tobey ey, ⁴ naho tsy nendese'e an-dalan-kibohom-pamantañañe eo hañeng'aze

* **16:29** Volam-paha fito: Saramañitse

am' IEHOVÀ, aolo' i kivoho' IEHOVÀ le hanan-tahin-dio indaty nampiori-dioy vaho haitoañe am'ondati'eo, ⁵ soa te hasese' o ana' Israeleo o soroñe ho nisoroña' iareo an-dioliōo, mb'am' IEHOVÀ an-dalan-kibohom-pamantañañe mb'eo, mb' amy mpisoroñey, hisoroñe irezay ho engampañanintsīne am' IEHOVÀ. ⁶ Le hafitse' i mpisoroñey amy kitreli' IEHOVÀ an-dalan-kibohom-pamantañañey i lioy, vaho hengae'e an-katoeñe i safo'ey ho hàñim-pañanintsīne am' IEHOVÀ. ⁷ Tsy hañenga soroñe amo kokolampao ka iereo, o nanoa' iereo hakarapiloañe. Ho fañè nainai'e am' iareo amo hene tariratse mifandimbeo. ⁸ Tovoño ty hoe am' iereo: Ze ondaty, ke boak' añ'anjomba' Israele ao, he renetane mimoneñe ama' areo ao, misoroñe ndra mañenga, ⁹ naho tsy endese'e mb'an-dalan-kibohom-pamantañañe mb'eo, hañenga aze am' IEHOVÀ le ho sasàñe am'ondatio indatiy.

Faly ty Mikama Lio

¹⁰ Le ze ondaty, ke boak' añ'anjomba' Israele ao he hirik' amo renetane mañialo am'iareoo, ty mikama lioñ-inoñ' inoñe, le hiatreatre am' indaty mikama lioy ty laharako vaho haitoako am'ondati'eo. ¹¹ Toe lio ty havelo' o nofotseo; ie ty natoroko anahareo amy kitreliy ho fañeferañe ty fiai' areo; toe lio ro mañefetse ho an-kaveloñe. ¹² Zay ty talim-panoako amo ana' Israeleo ty hoe: Leo ondaty raik' ama' areo tsy hikama lio, vaho tsy hikama lio ka ze renetane mañialo ama' areo ao.

¹³ Aa ndra iaia t'indaty amo ana' Israeleo, ke amo renetane mimoneñe ama'eo ze mitsindroke naho mitsepake biby ndra voroñe azo kamaeñe, le tsy mete tsy hampiorihe'e ty lio'e vaho lembefañe amo debokeo, ¹⁴ fa ie ty fiai' ze kila nofotse, naho raik' amy havelo'ey ty lio'e; zay ty nitaroñeko amo ana' Israeleo ty hoe: Tsy ho kamaeñe ty lio' ze atao nofotse, fa ty lio ro fiai' ze hene nofotse, fonga haitoañe ze mikama aze.

¹⁵ Le ze ondaty mikama ty mate boboke ndra ty nirimitem-biby, ke t'ie foko he renetane, ho sasà'e ty siki'e naho hiandro an-drano, le tsy halio ampara' te hariva; zay vaho halio. ¹⁶ Fa naho tsy isasà'e ndra tsy manasa sandriñe le ho vavè'e ty tahi'e.

18

Fifandian-Tihy

¹ Hoe ty nitsara' IEHOVÀ amy Mosè: ² Misaontsia amo ana' Israeleo, taroño ty hoe: Zaho IEHOVÀ Andrianañahare' areo. ³ Ko anoe' areo o satan-tane Mitsraime nimoneña' areoo; le tsy hanoe' areo ka o satan-tane Kanàne aneseako anahareoo, tsy hañaveloa' areo o fañè' iareoo. ⁴ Hanoe' areo o fepèkoo vaho hambena' areo o fañèkoo, hañaveloa' areo: Zaho IEHOVÀ Andrianañahare' areo. ⁵ Aa le ambeno o fañèkoo naho o fepèkoo, kanao mahaveloñe ondaty t'ie anoe'e: Zaho IEHOVÀ.

⁶ Tsy ama' areo ty hitotoke an-dongo'e marine, hañafa-tsaron-kameñarañe: Zaho IEHOVÀ. ⁷ Tsy hafaha'o ty heñan-drae'o ndra ty heñan-drene'o. Rene'o re, tsy haboa'o ty heña'e. ⁸ Ko aboa'o ty heñam-balindrae'o, fa heñan-drae'o. ⁹ Le ty heñan-drahavave'o, he anak' ampelan-drae'o ke anak' ampelan-drene'o, he t'ie terak' añ'anjomba ke te terak' amontoñe, tsy haboa'o ty heña'e. ¹⁰ Ty heñan' anak' ampelan' anadahi'o ke anak' ampelan' anak' ampela'o, le tsy haboa'o amy te heña'o ty a' iareo. ¹¹ Ty heñan' anak' ampelan-balindrae'o, i nasaman-drae'oy, tsy haboa'o fa rahavave'o. ¹² Tsy haboa'o ty heñan-drahavaven-drae'o, amy

t'ie longon-drae'o. ¹³ Tsy haboa'o ty heñan-drahavaven-drene'o, amy te longon-drene'o. ¹⁴ Tsy haboa'o ty heñan-drahalahin-drae'o. Ko vonje'o i vali'ey, fa rahavaven-drae'o. ¹⁵ Tsy haboa'o ty heñam-binanto'o, fa valin'ana-dahi'o; tsy haboa'o ty heña'e. ¹⁶ Tsy haboa'o ty heñam-balindrahalahi'o, fa heñan-drahalahi'o. ¹⁷ Tsy songa haboa'o ty fimeñaran-drakemba naho ty anak' ampela'e, tsy ho rambese'o ty anak' ampelan' anadahi'e ndra ty anak' ampelan' anak' ampela'e hañafahañe ty heña'e; longo'o iereo, hativâne zay. ¹⁸ Tsy halae'o ka ty ampela hampirafese'o aman-drahavave'e, haboa'o ty heña'e naho mbe veloñe i rahavave'ey. ¹⁹ Tsy hijarinea'o ka ty ampela hañafaha'o ty heña'e amy faleoram-piambola'ey; ²⁰ vaho tsy rantove'o ty vali' ondaty, hanivà'o vatañe.

²¹ Ko mañenga ho soroheñe amy Moleka o tarira'oo, hanivà'o ty tahinan' Añahare'o: Zaho IEHOVÀ.

²² Tsy hiolotse ami'ty lahilahy rehe, manahake te aman' ampela. Tiva zay. ²³ Tsy hisahe biby rehe hanivà'o vatañe. Le tsy hijohañe añatrefa' ty biby ty ampela hisahe ama'e; fa ota-faly.

²⁴ Ko maniva-vatañe an-dra' inoñ' inoñe amy rezay, fa ie ty nahativa o hene foko roàheko aolo' areoo. ²⁵ Zay ty nahaveta i taney; aa le nametsahako fandilovañe, vaho naboloa' i taney o mpimoneñe ama'eo. ²⁶ Inahareo arè, tambozoro o fañèkoo naho o fepèkoo, ko manao i hativâne rezay, ndra t'ie foko ndra renetane mañialo ama' areo ao, ²⁷ (amy te nifanoe' ondati' i taneio, o taolo' areoo, i hativâne rezay: vaho nihaveta i taney) ²⁸ tsy mone haboloa' i taney ka nahareo naho itivà' areo, manahake ty nampiboloña'e i foko limbeze' areoy? ²⁹ Aa ndra ia' ia manao ndra inoñ' inoñe amy raha tiva rezay, le haitoañe am'ondati'eo indaty manao zay. ³⁰ Aa le ambeno o fañèkoo, tsy mone hanoe' areo o sata' tiva nanoeñe aolo' areoo, tsy hanivà' areo vatañe; Zaho IEHOVÀ Andrianañahare' areo.

19

Fiavahañe Fòmba naho Fombà

¹ Hoe ty nitsara' IEHOVÀ amy Mosè: ² Misaontsia amy valobohòn' ana' Israeley, le ano ty hoe: Miavaha, amy te masin-dRaho, IEHOVÀ Andrianañahare' areo.

³ Songa miasia rene naho rae, naho ambeno o SABOTSEKOO: Zaho IEHOVÀ Andrianañahare' areo.

⁴ Ko mitolike mb'amo saposampon-drahao ndra mampitranake sarendrahare; Zaho IEHOVÀ Andrianañahare' areo.

⁵ Ie mañenga soron-kanintsiñe am' IEHOVÀ, le engao an-tsata no'e.

⁶ Ho kamaeñe amy andro añenga' areo azey naho an-doak'andro'e le ho forototoeñe an' afo ze sisa'e te herone. ⁷ Ho tiva re te kamaeñe amy andro fahateloy; tsy ho no'e. ⁸ Songa hivave i tahi'ey ze mikama ama'e, amy te nitivà'e ty raha miava' IEHOVÀ, vaho haitoañe am' ondati'eo indatiy.

⁹ Ie manatake ty havokaran-tane' areo, tsy ho tatahe'o ty añ' olontete'o, tsy hatonto'o ze nipopok' amo tinata'oo. ¹⁰ Tsy ho rofota'o ze sisan-tondam-balòbo'o; ndra timponeñe o voan-tanem-bahe'o nipopokeo, fa hado'o ho a o rarakeo naho o renetaneo: Zaho IEHOVÀ Andrianañahare' areo.

¹¹ Ko mikametse nahareo, ndra mikatramo, ndra mifandañitse. ¹² Ko manao fanta vilañe ami'ty añarako, hanivà'o ty tahinan' Añahare'o. Zaho IEHOVÀ. ¹³ Ko katramoe'o ondatio; ndra mikizo ama'e; le ko tana'o ankiboho'o ao ampara' te maraiñe ty tambem-pièke.

¹⁴ Ko manimbo ty moañe ndra mampipoke fitsikapiañe aolo' ty fey. Mañeveña aman' Añahare'o: Zaho IEHOVÀ.

¹⁵ Ko manao zaka vilañe; tsy honjone'o ty lahara' ty rarake, vaho tsy hiasia'o ty fanalolahy, fa an-kavantañañe ty hizaka'o ondatio.

¹⁶ Ko mangarèdake mb'eo mb'eo am' ondati'oo; le ko mijohanjohañe marine' ty lio' ondatio, Zaho IEHOVÀ.

¹⁷ Ko malain-dongo an-tro'o ao. Toe hendaha'o an-kahiti'e ondatio, tsy hivavea'o hakeo. ¹⁸ Ko mamale-fate, le ko mitan-kabò amo ana-dongo'oo; fe kokò ondatio manahake ty vata'o; Zaho IEHOVÀ ¹⁹ Oriho' areo o fañèkoo. Ko ampisahè'o an-karazan-kare ila'e ty hare' area. Ko mitongy doria roe karaza'e an-tete'o ao; vaho ko misikin-tsaroñe tinenoñe am-pole roe.

²⁰ Ze mañarapilo ami'ty ampela, ie ondevo nifofoe' t' indaty, fa tsy nijebañene naho tsy nihahañe. Hanoeñe balie, fe tsy havetrake iereo amy t'ie tsy nidada. ²¹ Hasese' indatiy mb'am' IEHOVÀ ty engan-dila'e mb' an-dalan-kibohom-pamantañañe mb'eo; añondrilahy ty ho engan-dilatse.

²² Hañefetse aze amy añondrilahin-engan-dilatsey añatrefa' IEHOVÀ i mpisoroñey ty amy tahiñe nanoe'ey, vaho hapoke i hakeo nanoe'ey.

²³ Ie mimoak' amy taney nahareo vaho fa nambole hatae maro karaza'e ho haneñe, le ho savare' areo o hataeo. Ho falie' areo telo taoñe, tsy ho kamaeñe. ²⁴ Ie amy taom-paha-efatsey le hiavake iaby o voa'eo, handrengeañe IEHOVÀ. ²⁵ Amy taom-paha-lime'ey ty hikama' areo o voa'eo, hiregoregoa' ty havokara'e: Zaho IEHOVÀ Andrianañahare' areo.

²⁶ Tsy ho kamae' areo ze aman-dio'e; le tsy hanikily nahareo ndra hamoreke. ²⁷ Tsy haratañe ty maròy miroroñe am-panda, vaho ko kovoheñe ty morare' areo. ²⁸ Ko lilie' areo ty holi' areo ty amo vilasio vaho ko anokirañe o sandri' areoo; Zaho IEHOVÀ.

²⁹ Ko maniva ty anak'ampela'o an-katsimirirañe, tsy mone hikapotrake an-karapiloañe ty tane, vaho ho tsitsike halò-tsereke i taney. ³⁰ Hambena' areo o SABATAKOO vaho hiasia' areo i toeko miavakey: Zaho IEHOVÀ.

³¹ Ko mitolik' amo mpamorekeo ndra mitsoeke jiny hanivàñ' azo; Zaho IEHOVÀ Andrianañahare' areo.

³² Miongaha añatrefa' ty a-maròy foy, le iasio ty laharan' androanavy, vaho mañeveña aman' Añahare' areo; Zaho IEHOVÀ.

³³ Aa naho mitrao-pimoneñe ama' areo an-tane' areo ao ty renetane le ko foreforèñe. ³⁴ Hatao' areo hambañe amy te nisamak' ama' areo ao o renetaneo, le ikoko manahake ty vata'o, fa niambahiny an-tane Mitsraime añe nahareo; Zaho IEHOVÀ Andrianañahare' areo.

³⁵ Tsy hanao zaka-vilañe nahareo, ke ami'ty zehe, ke ami'ty lanja, he ami' ty kapoake. ³⁶ Manaña balàntsyo to naho vato'e to naho *kapoake to naho litatse to; Zaho IEHOVÀ Andrianañahare' areo nañavotse anahareo an-tane Mitsraime. ³⁷ Aa le ambeno iaby o fañèkoo naho ze hene fepèko vaho oriho; Zaho IEHOVÀ.

20

Lilo te Lilareñe ty Miavake

¹ Hoe ty nitsara' IEHOVÀ amy Mosè: ² Saontsio ty hoe ka o ana' Israeleo: Ndرا iaia amo ana' Israeleo ke amo renetane mimoneñe e Israeleo ze manolotse ty raik' amo tariraeo amy Moleka ro havetrake; le ondati' i taneio ro handretsa-bato ama'e. ³ Hatreatrèn-tarehekò indatiy le haitoako am' ondati'eo, amy nanolora'e anake amy Molekay,

* 19:36 Efà : fañaranan-draha maike

hanivà'e i toeko miavakey vaho hanimbo ty añarako miavake. ⁴ Aa naho akipe' ondati' i taneio am' indatiy ty fihaino' iareo ie manolo-tiry amy Moleka, vaho tsy navetrake, ⁵ le hatreatrén-tareheko indatiy naho i hasavereña'ey, le haitoako am' ondati'eo rekets' o nindre nañarapilo ama'e vaho nitsinginiotse amy Molekao.

⁶ Le hatreatrén-tareheko ty mpitolik' amo mpamorekeo naho amo jinio hañarapilo vatañe, hatreatrén-tareheko indatiy, vaho haitoako am'ondati'eo. ⁷ Miefera arè, naho miavaha, fa Zaho IEHOVÀ Andrianañahare' areo. ⁸ Mifahara amo fañekoo vaho oriho: amy te Zaho i IEHOVÀ mampiambak' anahareo.

⁹ Tsy mahay tsy havetrake ze mamàtse rae ndra rene; ie nañozon-drae ndra rene, le ho ama'e ty lio'e.

¹⁰ T'indaty miharo sarimbo ami'ty vali' ondaty, ie miilotse amy tañanjomban-drañe'ey, le sindre havetrake i namonjey naho i vinonjey.

¹¹ Ze lahilahy mifandia-tihy ami'ty tañanjomban-drae'e le fa nañalo ty heñan-drae'e; songa havetrake iereon-droroe; am' iereo ty lio' iareo.

¹² Naho miharo sarimbo ami'ty vinanto'e ampela t'indaty le havetrake ie roe. Nanao hativàñe* le am' iereo ty lio' iareo.

¹³ Naho iharoa' ty lahilahy ty lahilahy manahake ty fiolorañe ami'ty ampela, songa nanao hativàñe. Sindre havetrake, songa ama'e ty lio'e.

¹⁴ Naho valie' ondaty ty ampela naho ty rene' i ampelay, haloloañe izay, songa ho forototoeñ-añ'afó, ie naho iereo, tsy mone hanjilihan-katserehañe ama' areo.

¹⁵ Naho misahe hare t'indaty le toe hañohofan-doza, le ho lentañe i bibiy. ¹⁶ Naho miarine ami'ty hare ty ampela hisahe le ho vonoe'o i ampelay naho i bibiy. Tsy mete tsy havetrake; songa ho ama'e ty lio'e.

¹⁷ Naho rambese'ondaty ty rahavave'e ke ty anak' ampelan-drae'e he ty anan-drene'e vaho isa'e ty heña'e le mahaisake i heña'ey ka i ampelay, le haloloañe zay. Vonoeñe añatrefa' o ana' ondati'eo ie roe, amy te hinalo'e ty heñan-drahavave'e. Ho vavè'e i hakeo'ey.

¹⁸ Ie miharo sarimbo ami'ty ampela miambolañe t'indaty naho mampi-boake ty heña'e—ie nampiboake i fioriha'ey, vaho niborahe' i ampelay ty fiorihan-dio'e, le haitoañe am'ondati'eo i roroey.

¹⁹ Tsy haboa'o ty heñan-drahavaven-drene'o, ndra ty rahavaven-drae'o; ie mañalo longo marine. Songa hivave ty tahi'e. ²⁰ Naho mifandia-tihy ami'ty valin-drahalahin-drae'e t'indaty, le fa nafaha'e ty heñan-drahalahin-drae'e; sindre hivave ty hakeo'e, songa hikoromake betsiterake. ²¹ Naho tsindrohe' ondaty ty valin-drahalahi'e, hativàñe zay. Fa nampikorendahe'e ty heñan-drahalahi'e; ho betsiterake iereo.

²² Aa le hene ambeno o fañekoo, naho o fepèko iabio, vaho anò, tsy mone haboloa' i tane aneseako anahareo himoneñañey. ²³ Le tsy hañaveloa' areo o sata' i foko soiheko aolo' areoio; amy te lili' iareo irezay vaho mampangoriñ' ahy. ²⁴ Toe nitaroñeko ama' areo te ho lovae' areo ty tane' iareo, le hatoloko ho tavane' areo i tane orikorihen-dronono naho tanteley. Zaho IEHOVÀ Andrianañahare' areo ty nañavak' anahareo amo kilakila ondatio.

²⁵ Aa le ampiavaho ami'ty biby faly ty malio naho ty vorom-paly ami'ty malio, vaho ko maniva vatañe amo bibio ke amo voroñeo he amy ze karazan-draha veloñe misitsitse an-tane atoy, ie nambahako ama' areo

* **20:12** Heb: mampitrapo-tiry

hambena' areo ho faly. ²⁶ Aa le hiavake ho ahy nahareo, amy te masiñe Raho IEHOVÀ vaho navaheko amo kilakila ondatio ho ahiko.

²⁷ Tsy mete tsy havetrake ty jiny naho ty doany, ke t'ie lahilahy he rakemba, ho retsahem-bato, sindre ho ama'e ty lio'e.

21

Ty Fiavaha' o Mpisoroñeo Ezek 44.15-31

¹ Hoe ty nitsara' IEHOVÀ amy Mosè: Misaontsia amo mpisoroñeo, o ana' i Aharoneo, le itaroño ty hoe: Asoao tsy ho am'iereo ty haniva vatañe ami'ty lolo am'ondati'eo, ² naho tsy t'ie longo marine: ty rene'e ndra i rae'e, ty anadahi'e ndra ty anak' ampela'e ndra ty rahalahi'e ³ ndra ty rahavave'e somondrara marine aze tsy amam-baly; ie ro azo anivam-batañe. ⁴ Tsy handeo-batañe re, ie talè añivo' ondati'eo, haniva'e vatañe. ⁵ Tsy hanoe' iareo peake ty añambone' iareo le tsy ho harateñe ty indran-tanteahe' iareo ndra hanoritory sandriñe. ⁶ Ie hiavake ho aman' Añahare'e, naho tsy hiteratera ty tahinan' Añahare' iareo; f'ie ro mpañenga an' afo am' IEHOVÀ ty mahakaman' Añahare' iareo, toe miavake iereo.

⁷ Tsy hangala-baly ami'ty kàrapilo ndra ami'ty maleotse iereo, le tsy hañenga rakemba narian-dahy; amy t'ie miavake aman'Añahare'e. ⁸ Aa le atokano, fa ie ty mpanjotsa mahakama aman' Añahare'o. Hiavake ama'o re, amy te masin-dRaho IEHOVÀ, mpampiavake anahareo. ⁹ Ie manao hatsimirirañe ty anak' ampelam-pisoroñeo ro maniva an-drae'e, ho forototoeñe añ'afó.

¹⁰ I mpisoroñe zoke' o rahalahi'ey, i nañiliñañe mena-pañorizañe añambone'e eo naho naambake hisikiñe o saroñeoy ro tsy handoly sabaka vaho tsy handriatse ty saro'e. ¹¹ Tsy hiziliha'e ty aman-dolo, tsy hanivà'e sandriñe ndra t'ie rae'e ndra te rene'e; ¹² vaho tsy hienga i miavakey ndra haniva i toe-miava' Nañahare'ey; fa ama'e i mena-pañorizañe nañavahañe aze aman' Añahare'ey: Zaho IEHOVÀ. ¹³ Somondrara ty hengae'e ho vali'e, ¹⁴ tsy hengae'e ty vantotse ndra ty nitseizeñe ndra ty ampela nileoreñe, ndra ty tsimirirañe; fa ty ampela tsy nahavanilahy boak' amo longo'eo ty hengae'e ¹⁵ tsy mone haniva o tarira'eo amo longo'eo; Zaho IEHOVÀ Mpampiavak' aze.

¹⁶ Le hoe ty nitsarae' IEHOVÀ amy Mosè: ¹⁷ Saontsio amy Aharone ty hoe: Tsy mahazo miharine hañenga ty mahakaman' Añahare'e ty tiri'o aman-kandra amo tarira'o mifandimbeo. ¹⁸ Le tsy mahazo mitotoke mb'eo t'indaty aman-kandra: ke te fey, he te kepeke, he aman-kandran-tarehe, ke kombimba, ¹⁹ ke te ondaty fola-pandia, he fola-pitâñe, ²⁰ ke langa, he kana, ke aman-kandram-pihaino, he aman-kâteñe, ke hezam-bae, hera aman-tabiry dinemoke. ²¹ Aa le tsy hiharivo hañenga soroñe am' IEHOVÀ ze ondaty aman-kandra amo tarira' i Aharone mpisoroñeo. Ie aman-kandra, ro tsy hañarine hañenga o mahakaman' Añahare'eo. ²² Mete ikama'e ty mahakaman' Añahare'e: o miava-do'eo naho o miavakeo. ²³ F'ie tsy hizilik' amy lamba fañefetsey ndra hiharine i kitreliy, ty amy hândra'ey; tsy mone ho tivae'e i toeko miavakey; amy te Zaho IEHOVÀ Mpampiavak' iareo. ²⁴ Aa le nitaroñe' i Mosè amy Aharone naho amo ana'eo vaho amo hene ana' Israeleo zay.

22

Ty Sata' o Enga Miavakeo

¹ Hoe ty nitsara' IEHOVÀ amy Mosè: ² Saontsio amy Aharone naho amo ana'eo ty hidare soa o enga avi' o ana' Israeleo tsy mone ho tivae' iereo ty añarako masiñe amo raha avi' iareo ho amakoo; Zaho IEHOVÀ. ³ Ano ty hoe am' iereo: Naho amy ze hene tarira'areo mifandimbe ty mitotok' ami'ty enga miavake navì' o ana' Israeleo am' IEHOVÀ ie mbe aman-kaleorañe, le haitoañe tsy hiatrek' ahiko indatiy: Zaho IEHOVÀ.

⁴ Tsy hikama amo enga miavakeo ze tarira' i Aharone voa' ty angamae ndra miori-tsiranoke ampara' t'ie malio. Ze mitsapa ndra iaia nileore' ty lolo, ndra t'indaty iakaran-drom-pilahia, ⁵ ndra ze 'ndaty mitsapa raha mifamorohotse mete handeotse aze ndra ze ondaty mete handeotse aze, ty amy ze haleorañe ama'e, ⁶ le haleotse ampara' te hariva indaty nitsapa zaiy le tsy ho kamae'e o raha miavakeo naho tsy miandro aman-drano hey. ⁷ Ie tsofots' àndro le halio re vaho azo'e kamaeñe o enga miavakeo, fa toe mahakama'e. ⁸ Tsy ho kamae'e ty raha mate a montoñe aña ndra ty nirimitem-biby amy te maleotse: Zaho IEHOVÀ. ⁹ Aa le hambena' iareo o nafantokoo tsy mone hivave hakeo vaho hikoromake kanao nitivañe: Zaho i IEHOVÀ mpampiavak' iareo.

¹⁰ Tsy hikama amo miavakeo o borizàñe; le sambe tsy hikama amo miavakeo ty mpifondro amy mpisoroñey, naho ty mpitoroñe tambezañe.

¹¹ Fe mete mikama ao t'indaty vinili' i mpisoroñey an-drala, vaho mahazo mikama amy mahakama'ey o nasamak' aña'anjomba'eo. ¹² Naho tañanjomba' t'indaty tsotra ty anak' ampelam-pisoroñe le tsy hikama'e o navik' amo raha miavakeo. ¹³ Fe naho ramavoïñe ndra narian-dahy i anak' ampelam-pisoroñey naho tsy manañ' anake vaho mimpoly aña'anjomban-drae'e ao manahake t'ie nitora'e, le hikama amy mahakaman-drae'ey. Fe tsy ho kamae' ty tsotra. ¹⁴ Aa naho ikama' t'indaty tsy satrie'e o enga miavakeo, le hitovoña'e ty ampha-lime'e vaho hatolo'e amy mpisoroñey rekets' i raha miavakey. ¹⁵ Asoao tsy ho tivà' iareo ze enga' miava' o ana' Israeleo engae' iareo am' IEHOVÀ ¹⁶ tsy mone hivave hakeo hampañengañe engan-dilatse amy fikama' iareo o raha miava' iareoo: amy te Zaho IEHOVÀ Mpampiavak' iareo.

Enga Mete

¹⁷ Le hoe ty nitsarae'IEHOVÀ amy Mosè, ¹⁸ Saontsio amy Aharone naho amo ana'eo naho amy ze hene ana' Israele ty hoe: Ze ondaty amy anjomba' Israeley ndra amo renetane mpimoneñe e Israeleo minday ty hengae'e, ke amo nifantà'eo, he amo engan-tsatin' trokeo ty ho banabanae' iereo am' IEHOVÀ hisoroñañe, ¹⁹ soa t'ie ho no'e, le lahi'e tsy aman-kandra, ke amo añombeo ke amo añondrio he amo oseo. ²⁰ Le tsy hengae' areo ndra inoñ' inoñe aman-kandra; fa tsy ho no'e ho anahareo.

²¹ Aa naho mañenga engam-pañanintsiñe am'IEHOVÀ t'indaty, ke hibababana ava-panta ke engan-tsatrie'e, he boak' amo mpirai-trokeo ke amo mpirai-liao, le tsy ho aman-kandra t'ie ho no'e, vaho tsy ho aman-kila.

²² Aa ke te goa, he folake, ke mikotraitse, he ampàre, ke mandramboñe, hera aman-kezam-bae—le tsy hengaeñe am' IEHOVÀ vaho tsy ho soroñañe am' IEHOVÀ amy kitreliy. ²³ Ke aman-kamba, he aman-tsihotse ty añombe ndra ty añondry le mete engaeñe ho engan-tsatin' arofo, fe tsy ho no'e t'ie am-panta. ²⁴ Tsy hengaeñe am' IEHOVÀ ka ze vondròkoke ndra demoke ndra riatsé ndra linily; tsy hanoe' areo an-tane' areo ka zay. ²⁵ Le ko apo' areo t'ie ho banabanaem-pitá' o anan-drenetaneo ho mahakaman' Añahare' areo, kanao ama'e ty hilà'e, ndra ama'e ty handra'e, fa tsy ho no'e ho anahareo.

²⁶ Le hoe ty nitsarae' IEHOVÀ amy Mosè: ²⁷ Ie terake ty añombe ndra añondry ndra ose le ho fito andro amy rene'ey hey, ie mifototse amy andro fahavaloy ro mete engaeñe hisoroñañe am' IEHOVÀ. ²⁸ Aa naho añombe vave ndra añondry vave, le ko songa lentaeñe ami'ty andro raike, ie naho ty ana'e.

²⁹ Ie misoroñe engam-pañandriañañe am' IEHOVÀ, mañengà ty ho no'e, ³⁰ le ikamao amy àndro zay, vaho tsy anisañe ho ami'ty maraiñe: Zaho IEHOVÀ.

³¹ Asoao hambena' areo o likoo, vaho anoeñe; Zaho IEHOVÀ. ³² Tsy ho tivae' areo i añarako masiñey, fa havahe' o ana' Israeleo: Zaho IEHOVÀ Mpampiavak' anahareo, ³³ nañakatse anahareo an-tane Mitsraimey, ho Andrianañahare' areo: Zaho IEHOVÀ.

23

Sabadike Natolotse

¹ Hoe ty nitsara'IEHOVÀ amy Mosè, ² misaontsia amo ana' Israeleo naho itaroño ty hoe: Ho kouhe' areo o fañoharañañe miava' IEHOVÀO, famantañañe miavake, Inao o andro namotoañakoo.

Ty SABATA

³ Eneñ' andro ty fitoloñan-draha; le Sabotse fitofàñe ty andro fahafito, fitontoñañe miavake. Tsy hitoloña' areo, fa Sabata am' IEHOVÀ amo fitobea' areo iabio. ⁴ Inao o famantàña' IEHOVÀO, fañoharañañe miavake ho kouhe' areo an-tsa'e tinendre.

ty Pèsake naho ty Mofo tsy Po-dalivae

Vol 28.16-25

⁵ Ami'ty andro faha folo-efats' ambi' i volam-baloha'ey, ie miroñe ty andro le engam-pihelañ' ambone' IEHOVÀ. ⁶ Amy andro faha folo-lime-ambi' i volañeiy ty sabadidak' i mofo tsi-aman-dalivay am' IEHOVÀY; fito andro ty hikama' areo mofo po-dalivay. ⁷ Hanoe' areo fañoharañañe miavake amy andro valoha'ey; le tsy hitolon-draha. ⁸ Fito andro ty hañenga' areo soroñe am' IEHOVÀ. Le Fañòharañañe Miavake ty andro faha-fito, tsy itoloñan-draha.

Ty Engan-Dengom-Boa

⁹ Hoe ty nitsara' IEHOVÀ amy Mosè: ¹⁰ Saontsio amo ana' Israeleo ty hoe: Ie mizilik' an-tane hitolorako, vaho manonton-tsabo, le hindesa' areo mb' amy mpisoroñey mb'eo ty *lengom-bora' i fanataha' areoy. ¹¹ Le hahelahela'e añatrefa' IEHOVÀ i lohavoay soa te ho no'e; amy loak' andro' i Sabataiy ty añelahelà' i mpisoroñey aze. ¹² Le hengae'o amy andro añelahelà'o i bora'ey ty vik' añondrilahy tsy aman-kandra, ho soroñañe am' IEHOVÀ. ¹³ Zao ty ho enga-mahakama'e: ty mona fahafolo' ty efà roe linaro menake, ho soroñañe am' IEHOVÀ ho hñim-pañanintsiñe; divay ty ho enga-rano mpindre ama'e, fahèfa' ty hine. ¹⁴ Tsy hikama mofo ndra tsako natono ndra tsako-le nahareo ampara' i andro zay, ampara' ty añenga' areo aman' Añahare' areo i engay; ho fañè nainai'e amo tarira' areoo amo hene fitobea' areoo.

Ty Takatakan-Kereñandro

Avo 34.22; Sor. 28.26-31; Fts 16.9-10

¹⁵ Mifototse amy loak'andro' i SABOTSEY, i andro nindesa' areo i lohavoan' engan-kelahelaiy ty hañiaha' areo SABOTSE fonitse fito. ¹⁶ Añiaho

* **23:10** lengom-bora: vare hordea valoham-boa

andro limampolo pak'amy loak'andro' i SABATA fahafitoy; le añengao †lengom-boa am' IEHOVÀ. ¹⁷ Hendeseñe boak' aña' akiba' areo ao ty mofonkelahela roe songa nanoeñe ami'ty mona fahafolo' ty efà roe; natoñak' an-dalivay ho engam-boa am' IEHOVÀ. ¹⁸ Le tovo' i mofoy añengao vik' añondry fito tsy aman-kandra, ty bania, naho ty añondrilahy roe, ho enga soroñeñe am' IEHOVÀ rekets' o enga-mahakama' iareoo naho o enga rano' iareoo, hisoroñañe ho hñim-pañanintsiñe am' IEHOVÀ. ¹⁹ Le hengae' areo ty vik' oselahy ho engan-kakeo naho ty vik' añondry roe hisoroñañe ho engam-pañanintsiñe. ²⁰ Hahelahela' i mpisoroñey, ie naho i mofo lengom-boay ho engan-kelahela aña'trefa' IEHOVÀ, vaho i vik' añondry roe rey; hene avahe' IEHOVÀ ho a i mpisoroñey. ²¹ Le ho koihe'areo amy andro zay ty fifanontoñañe miavake, tsy itoloñan-draha. Ho fañè nainai'e amo fitobea' areo iabio zay amo hene tarira' areoo.

²² Aa ie manonton-tsabo an-tane' areo ao, ko mitatake pak' aña' olo-teteke ey, le ko manontoñe ze nipopok' amy fitatahañey; apoho ho a o rarakeo naho o ambahinio; Zaho IEHOVÀ Andrianañahare' areo.

Ty Sabadik' antsiva

²³ Le hoe ty nitsara' IEHOVÀ amy Mosè: ²⁴ Saontsio ty hoe amo ana'Israeleo: I volam-pahafitoy, i androm-baloha' i volañeiy, le ho Fitofam-bey ho anahareo, fampitiahiañe am-pitiofan-kankàñe naho fifanontoñañe miavake. ²⁵ Tsy hitolon-draha ama'e nahareo; fe hañenga soroñe am' IEHOVÀ.

Ty Andro Fañeferañe

²⁶ Hoe ty nitsara' IEHOVÀ amy Mosè: ²⁷ Ho tondrok' amy andro fahafolo' i volam-paha-fitoy ty androm-pijebañañe, fifanontoñañe miavake ho anahareo: miliera vatañe vaho mañengà soroñe am' IEHOVÀ. ²⁸ Ko mitoloñe amy andro zay, amy te androm-pijebañañe, hijebañañe anahareo aña'trefa' IEHOVÀ Andrianañahare' areo. ²⁹ Haitoañe am'onati'eo ze tsy milie-batañe amy andro zay. ³⁰ Aa ndra iaia t'indaty mitoloñe ndra inoñ'ino amy andro zay le Zaho ty handrotsake indatiy am' ondati'eo. ³¹ Toe tsy hanao ndra inoñe atao fitoloñañe amy andro zay nahareo, ie fañè tsy ho modo amo tarira' areoo, amo hene fitobea' areoo. ³² Ho SABATA‡ fitofañe añañe ama' areo zay le hilie-batañe ama'e nahareo—ty hariva' i andro fahasive' i volañeiy; i harivay pak' ami'ty hariva ty hañambena' areo i Fitofà' areoy.

Ty Sabadida-Kibohotse

Sor. 29.12-40; Fts 16.13-17

³³ Le hoe ty nitsarae' IEHOVÀ amy Mosè: ³⁴ Saontsio amo ana' Israeleo ty hoe: Amy andro fahafolo-lime ambi' i volam-pahafitoi ty sabadida-kibohotse am' IEHOVÀ, ho fito andro. ³⁵ Fitontoñañe miavake i andro valoha'ey. Tsy hitoloñe ndra inoñ' inoñe atao asa nahareo. ³⁶ Fito andro t'ie hañenga soroñe am' IEHOVÀ. Amy andro fahavaloy ty hanoa' areo fitontoñañe miavake vaho hañenga soroñe am' IEHOVÀ. Sabadidake bey zay le tsy hitoloñ' ama'e nahareo.

³⁷ Famantaña' IEHOVÀ irezay, ikooha' areo ho fitontoñañe miavake, hañengañe soroñe am' IEHOVÀ: enga oroañe naho enga mahakama, soroñe naho enga rano, songa ami'ty andro'e, ³⁸ ho tovo' o SABOTSEO'

† 23:16 lengom-boa faharoe: vare bilè ‡ 23:32 Sabata: fitofà amantañañe ami'ty taoñe

IEHOVÀO, naho o fañenga' areoo, naho ze hene enga' areo am-panta naho an-tsatin' arofo ho banabanae' areo am' IEHOVÀ.

³⁹ Aa ie amy andro fahafolo-lime ambi' i volam-pahafitoy, ie fa natonto' areo ty voka' i taney, le hambena'areo i sabadidak' IEHOVÀ fito andro; fitofàñe ty andro valoha'e vaho fitofàñe ty andro faha-valo. ⁴⁰ Ie amy andro valoha'ey ro hitoha ran-katae reke-boa'e amo hatae fanjakao naho ran-tsatrañe naho ratse mandrevake naho ran-tsohihy añ' olon-drano ey; vaho hirebeke añatrefa' IEHOVÀ Andrianañahare' areo fito andro. ⁴¹ Hambena' areo i Sabadidake am' IEHOVÀ fito andro boa-taoñe, ho fañè nainai'e amo tarira' areoo, hitsinjaha' areo amy volam-pahafitoy. ⁴² Hitobe an-kibohotse fito andro nahareo; ze nisamaheñe e Israele ao iaby ty hañialo an-tsokemitrahañ' ao, ⁴³ hahafohina' o tarira' areoo te nampitobèko an-kibohotse ao o ana' Israeleo ie nampiavoteko an-tane Mitsraime añe: Zaho IEHOVÀ Andrianañahare' areo.

⁴⁴ Aa le tinaro' i Mosè amo ana' Israeleo o famantaña' IEHOVÀO.

24

I Jiroy

Avo 27.20-21

¹ Hoe ty nitsara'IEHOVÀ amy Mosè: ² Lilio amo ana' Israeleo ty hindesa'iareo ama'o ty menake olive ki'e niplineheñe ho amo jiroo hireheta' i jiro rey nainai'e. ³ Hajarie' i Aharone amy kibohom-pamantañañey alafe' i lamba fañefe' i fañinaiy zay te hariva ampara' te porea' ty maraindray añatrefa' IEHOVÀ nainai'e; fañè tsy ho modo ama' areo zay amo hene tarira' areoo.

Ty Mofo i Kivohoy

⁴ Hampiririte'e amy fitàn-jiro volamena ki'ey boak' andro o jiro añatrefa' IEHOVÀO. ⁵ Le hangala'o mona hanoñafa'o vonga-mofo folo ro' amby; songa fahafolo' ty efà roe i mofo rey. ⁶ Hampifamalahañey' o roe, eneñe naho eneñe ty firirita'e, amy rairay malio añatrefa' IEHOVÀY. ⁷ Le hasia'o emboke ki'e o firirita'eo ho tiahys hasolo o mofoo, enga horoañe añ' afó am'IEHOVÀ. ⁸ Boak'andro Sabotse ro fandaharañe irezay añatrefa' IEHOVÀ ho fañè nainai'e amo ana'Israeleo. ⁹ Ho a i Aharone naho o tarira'eo, ho kamae' iareo an-toetse miavake ao; fa miava-do'e ama'e amo fisoroñañe am' IEHOVÀO; ie aze am-pañè tsy ho modo.

Teratera naho ty Vale'e

¹⁰ Ie henane zay niakatse mb'amo ana' Israeleo mb'eo ty lahilahy; ana' Israele ty rene'e naho nte-Mitsraime ty rae'e, nifandrapak' ami'ty ana' Israele an-tobe ao. ¹¹ Niteratera i Tahinañey ty ana' i rakemba ana' Israele, naho namàtse, vaho nasese mb'amy Mosè mb'eo; Selomite, ana' i Dibry, fifokoa' i Dane, ty tahinan-drene'e; ¹² aa le najo am-pandrohizañe ao hey re handrendreha' iareo ty safiri' IEHOVÀ.

¹³ Le hoe ty nitsarae' IEHOVÀ amy Mosè: ¹⁴ Aseseo alafe' i tobey re; le manampe fitàñe ama'e ze hene nahajanjiñe aze vaho ho retsahe' i valobohòkey vato. ¹⁵ Aa le saontsio ty hoe o ana' Israeleo: Ze miteratera an' Andrianañahare'e ro hivave i tahi'ey. ¹⁶ Toe havetrake ze miteratera ty tahina' IEHOVÀ. Ho retsahe' i valobohòke iabiy vato i niterateray, ke te renetane he fokontokoñe, ho vonoeñe re kanao niteratera i tahinañey.

¹⁷ Havetrake ka ze mañe-doza ama' ondaty. ¹⁸ Hañavake ze mamono hare, fiaiñe ty hasolo fiaiñe. ¹⁹ Ze mampanan-kandra t'indaty le i nanoe'ey ty hanoeñe ama'e; ²⁰ folake ty hasolo folake, fihaino ty fihaino, fihitsike ty

fihitsike; hambañe ami'ty nijoia'e t'indaty ty hijoiañe aze. ²¹ Hañavake ty mamono hare, fe havetrake ty mamono ondaty. ²² Raike ty lili' areo: hambañe ty a i renetaney naho ty a i fokontokoñey, amy te Zaho IEHOVÀ Andrianañahare' areo.

²³ Aa le nisaontsie' i Mosè amo ana' Israeleo, le nasese' iereo alafe' i tobey i niterateray, vaho rinetsa' iareo vato. Nanoe' o ana' Israeleo i nandilia' IEHOVÀ amy Mosèy.

25

Ty Taom-Pitofàñe

Fts 15.1-11

¹ Hoe ty nitsara' IEHOVÀ amy Mosè ambohi-Sinay aña: ² Misaontsia amo ana' Israeleo, le ano ty hoe: Ie mimoak' an-tane hatoloko anahareo ao le hambena' i taney ty fitofàñe am' IEHOVÀ. ³ Enen-taoñe ty hitongisa'o ami'ty tete'o, naho enen-taoñe ty hañetefa'o o valobo'oo vaho ty hanontoña'o ty voka'e, ⁴ fe ho Sabata àñom-pitofà'i taney i taom-pahafitoy, Sabata am' IEHOVÀ. Tsy hitongisa'o ty tete'o ndra hetefa'o o valobo'oo. ⁵ Tsy ho tataheñe o misonjoñeo naho fa afake ty fitataha'o, le tsy hatontoñe ze valoboke mitiry amo vahe tsy nañetefañeo, amy t'ie taom-pitofàñe heneke ho a i taney. ⁶ Fe ho fikama' areo ty voka' i fitofà'i taneiy, ihe naho ty mpitoro'o lahy naho ty mpitoro'o ampela, naho ty mpièke, naho ty renetane mañialo ama'o, ⁷ vaho hihinana' o hare'oo naho ze biby lý an-tane'o ao ze hene voka'e.

Taon-Jobily

⁸ Mañiahia taom-pitofàñe fito ho azo, fito taoñe atombo fito; le ty fitontoña' i taom-pitofàñe fito rey ro mañomey efa-polo siv'amby taoñe.

⁹ Ie amy zay, ampipopoeñe antsiva-paniahiañe ty andro faha-folo' i volam-pahafitoy, i andro fijebañañey, le ho tsitsihe' areo fipopòn' antsiva ty tane' areo.

¹⁰ Le ampiambaho i taom-paha limampoloy naho tsitsiho koimpidadàñe i taney, amo mpimoneñe ama'e iabio. Ho Jobily ama' areo, sindre himpoly amo fanaña'eo, songa himpoly aman-dongo'e. ¹¹ Jobily ho anahareo i taom-paha-limampoloy: tsy hitongy ama'e, le tsy ho tatahe' areo ze sonjo'e vaho tsy hatonto'o ze am-bahe tsy hineteke, ¹² amy te Jobily, le hiavake ho anahareo izay; ho kamae' areo ze mipike an-tetek' ao. ¹³ Songa hibalik' amy lova'ey amy taon-Jobiliy nahareo.

¹⁴ Aa ie mandetake inoñ'inoñe am' ondatio ndra mikalo am-pità' ondaty, le asoao tsy hifampikatramo. ¹⁵ Ty ami' ty ia' o taoñe manonjohy i Jobilio ty ho vilie'o am'ondatio le ty ami'ty ia' o taom-pamokarañe sisao ty handetaha'e. ¹⁶ Ty ami'ty hamaro' o taoñe ty hañonjona'o ty vili'e vaho ami'ty hatsiampe' o taoñe ty hampiketraha'o ty vili'e; ty ia' o fitatahañeo ro haleta'e ama'o. ¹⁷ Aa le ko mifamorekeke, fa i Andrianañahare'o ro hañeveña'o; Zaho IEHOVÀ Andrianañahare' areo.

¹⁸ Aa le ambeno o fañèkoo naho oriho aman-dili-po o fepèkoo, vaho hiañ' añoleñañe amy taney nahareo, ¹⁹ le ho toly ty sabo' i taney naho ho anjam-pikamañe nahareo vaho himoneñe ao tsy aman' ore.

²⁰ Aa naho hanoa'areo ty hoe, Ino ty ho hane'ay amy taom-pahafitoy, zahay tsy hitongy, tsy hanontoñañe an-driha? ²¹ Fa ho lilieko ho anahareo ty fanintsiñako amy taom-paha-eneñey, hanataha' areo ty mahakama tsahatse telo taoñe. ²² Ie hitongy ami'ty taom-paha-valo, le ho kamae' areo ty voka'e nivokats' ela; pak' amy taom-pahasivey, ampara' i fitatahañeo ama'ey, ty hikama' areo i elay.

²³ Tsy haletake ho nainai'e i taney amy te ahiko o taneo; mpañialo naho renetane amako nahareo. ²⁴ Aa ty amo hene tanem-panaña' areoo, añajào ty hijebañañe aze. ²⁵ Ie mifotsak' an-kararahañe ty longo'o naho mandetake i hanaña'ey, le homb'eo ty longo'e marine aze, hijebaña i tane naletan-dongo'ey. ²⁶ Aa naho tsy amam-pijebaña t'indaty, fe am-pahimbañam-pitá'e ro mahatontoñe ty hijebaña'e, ²⁷ le hiahe'e o taoñe mifototse amy nandetaha'e azeio, le havaha'e amy nivily azey ty tsi'ri'e amo tao'eo vaho hibalik' amy fanaña'ey re. ²⁸ Aa naho tsy lefe'e ty hañitia'e fitàñe hahaeneñe ty hampibalihañe aze le hidok' am-pitá' i nikalo azey i naletakey ampara' ty Taon-Jobily; havotsotse amy Jobiliy zay le himpolia'e i fanaña'ey.

²⁹ Aa naho aleta' t'indaty ty anjomba-pimoneñañe an-drova finahetse ao le azo'e jebañeñe i anjombay añate' ty taoñe mifototse amy nandetahañe azey; taoñe raike do'e ty mete hijebañañe aze. ³⁰ F'ie tsy jebañe'e añate' ty taoñe raike le mijadoñe ho fanaña' i nikalo azey nainai'e pak' añ' afeafe'e i anjomba an-drova mifahetsey. Ie tsy havotsotse amo Jobilio. ³¹ Fe ty anjomba tsy mifahetse ro volilieñe manahake o tetekeo: azo jebañeñe zay vaho havotsotse ami'ty Jobily.

³² Fe ty amo rova' o nte-Levio, toe manan-jo nainai'e o nte-Levio hijebañe o anjomba an-drovam-panaña' iareoo. ³³ Aa naho mivily anjomba amo nte-Levio t'indaty, le i anjomba naletak' an-drova ao ho vara'ey ro havotso'e amy Jobiliy; amy te fanaña' i nte-Leviý añivo' o ana' Israeleo ze anjomba'e an-drova' o nte-Levio. ³⁴ Fe tsy azo aletake o tanem-piandrazaña mañohoke o rova' iareoo, amy t'ie fanaña' iareo nainai'e.

³⁵ Aa naho mivariñ' an-tsotry ty longo'o vaho moly ama'o, rambeso himoneñe ama'o manahake t'ie renetane ndra mpañialo. ³⁶ Ko angala'o anan-tsongo ndra ampandivà'o, fe añeveño t'i Andrianañahare'o, le angao himoneña'e. ³⁷ Ko ampisongoen-drala hangala'o ana'e vaho ko ampanovoñe'o aze ze hanton-karo'e. ³⁸ Zaho IEHOVÀ Andrianañahare' areo nañavotse anahareo an-tane Mitsraime aña hitolorako i tane Kanàney, vaho ho Andrianañahare' areo.

³⁹ Aa naho mifotsak' an-kasotriañe ty longo'o ama'o, hera havili'e ama'o ty fiai'e, ko ampitoroñe'o hoe ondevo. ⁴⁰ Hoe mpikarama naho mpañialo ty hitraofa'e, hitoroñe ampara' ty taon-Jobily; ⁴¹ ie amy zay ro hieng' azo rekets' o keleia'eo, himpoly mb' aman-drolongo'e mb'eo, mb'am-panañandroae'e aña. ⁴² Ahiko iereo, mpitoroko nampiavoteko an-tane Mitsraime aña; tsy haletake ho ondevo. ⁴³ Ko silofe'o ami'ty famehea'o aze, fe añeveño t'i Andrianañahare'o. ⁴⁴ Aa ty am' ondevo lahilahy ndra ampela fanaña'oo; le boak' amo fifeheañe mañohokeo ty ivilia' areo ondevo. ⁴⁵ Azo' areo vilieñe ka ty anan-drenetane mañialo ama' areo, naho amo hasavereña' iareo nissamak' an-tane' areoo; mete ho fanaña' areo ka iereo. ⁴⁶ Azo' areo ampandovaeñe amo ana' areo mandimbeo ho fanaña'e, ho ondevo' areo nainai'e. Fe o longo' areo ana' Israeleo, le tsy ho fehe' ty raike ty raike am-pisengean-kery.

⁴⁷ Aa naho miraorao ty renetane ndra ty mpañialo ama'o, le ie mivariñ' an-tsotry ty longo'o marine aze vaho mandeta vatañe ke amy renetaney he amy mpañialo ama'oy, hera ami'ty tarira' i ambahiniy, ⁴⁸ ie naletake ro mete jebañeñe. Hijebañe aze ty raik' amo rahalahi'eo; ⁴⁹ mete hijebañ'aze ka i rahalahin-drae'ey ndra i ana-drahalahin-drae'ey; ndra ze amy fifokoa'ey ty hijebañe aze; he ie miraorao ro hahaava-piaiñe. ⁵⁰ Ty hifamolilia'e amy nivily azey, le boak' amy taoñe nandetaha'e vatañey

pak'amy Jobiliy; ty amo taoñeо ty vilin' aim-pijebañañe aze; ampiraeñe ami'ty taom-pikarama i nitraofa'ey. ⁵¹ Ie mbe maro taoñe ty aña, le izay ty añavaha'e ty vilin' ai'e ty amy drala nikaloñañe azey; ⁵² ie tsy ampe ty taoñe pak' amy taon-Jobiliy le inao ty hamoliliañe iareo roe: ty amo tao'eo ty añavahañe ty vilin'ai'e. ⁵³ Ho ama'e re manahake ty mpikarama mpitoloñañe taoñ' an-taoñe; tsy hisengean-kery am-pahaisaha'o. ⁵⁴ Aa naho tsy jebañeñe amy hoe zay, mbe hienga avao amy taon-Jobiliy, ie rekets' o keleia'eo. ⁵⁵ Ahiko o ana' Israeleo; mpitoroko nakareko an-tane Mitsraime aña: Zaho IEHOVÀ Andrianañahare' areo.

26

Tambem-Pivohorañe *Fts 7.12-24; 28.1-14*

¹ Ko mamboatse sareñ-drahare, ndra mampitroatse sare-sokitse ndra hazomanga, ndra mampipoke vato-lahy hiambaneañañe an-tane' areo; amy te Zaho IEHOVÀ Andrianañahare' areo.

² Ambeno o SABATAKOO le añeveño i toeko miavakey: Zaho IEHOVÀ.

³ Aa naho orihe' areo o fañèkoo naho ambena' areo o lilikoo, t'ie anoëñe, ⁴ le hampahaviako orañe an-tsa'e le hampibodobodoe' i taney ty voka'e vaho hiegoego o voan-katae an-kivokeo. ⁵ Hitakatse ty sampanontoña'a areo ty sam-pamofohañañe, naho ho takare' i fanontoñañey ty sam-pitongisañañe; ho ànjañe mahakama nahareo vaho hiaññañoleñañe an-tane' areo ao. ⁶ Hampanintsiñeko i taney, ie handre tsy eo ty hañembañañe; hafahako amy taney ze biby mpijoy, vaho tsy ho rangàem-pibara ty tane' areo. ⁷ Ho horidaña'e areo o rafelahi' areoo, le hampsingoritrireñ-pibara añatrefa' areo eo. ⁸ Hañinjake zato ty lime ama' areo naho hañoridañañe ty alen-dahy ty zato ama' areo; hampsingorom-pibara aolo' areo o rafelahi' areoo.

⁹ Ho toliheko, le hampibodobodoeko naho hañaretaheko; vaho hajadoko ama' areo ty fañinako. ¹⁰ Ho kamae' areo i nahaja elay le hakare' areo i elay aolo' i vaoy. ¹¹ Hapoko añivo' areo ao i kivohokoy le tsy ho falaintroko. ¹² Hijelanjelañañe ama' areo ao raho le ho Andrianañahare' areo vaho hondatiko nahareo.

¹³ Zaho i IEHOVÀ Andrianañahare' areo ninday anahareo nienga an-tane Mitsraime aña tsy ho ondevo' iareo; fa nipozaheko ty baon-joka' areo vaho nampijaradoñeko.

Lilo te Manjehatse *Fts 28.14-68*

¹⁴ F'ie manjehatse ahiko, tsy miameñe o hene liliko retoñañe, ¹⁵ naho sirikàe' areo o fañèkoo, naho heje' ty tro' areo o fepèkoo, tsy ho henefe' areo o fandiliakoo, fe mivalik' amy fañinakoy, ¹⁶ le inao ka ty hanoeko ama' areo: Hanendreako feh' ohatse; hike naho angorosy ty hampandò o fihaino' areoo vaho hampitìke ty sandriñe. Tsy hanjofake ty tabiry ho tongise' areo, fa habotse' o rafelahi' areoo. ¹⁷ Hatreatrèn-daharako, ie ho zevoñeñe aolo' o rafelahi' areoo. Hifehea' ty malaiñe anahareo naho hivoratsake ty lay ndra te tsy horidañañe.

¹⁸ Ie amy zay, naho mbe tsy mañaoñe ahy ty am'irezay, le hatomboko impito ty fandilovako ty amo hakeo' areoo. ¹⁹ Ho pozahoko ty engen-kaozara' areo; le hanoeko viñe ty likera' areo naho torisìke ty tane' areo. ²⁰ Le ho mokoreñe tsy vente'e ty hafatrara' areo; naho tsy hahatoly sabo ty tane' areo, vaho tsy hamoa o hatae an-taneo.

²¹ Ie amy zay, naho mifandietse amako, tsy mete mijanjiñe, le hatomboko ama' areo im-pito ty lafa ty amo tahi' areoo. ²² Hahitriko ama' areo o bibin-kivokeo hitavañe amo ana' areoo, naho hamono o hare' areoo naho hadoñe tsy ampeampe nahareo vaho ho bangiñe o lalan-damo' areoo.

²³ Aa ie mbe tsy mañaom-panoroañe amako amy rezay vaho mbe manjehatse ahy, ²⁴ le ho zehareko ka, naho ho fofoheko im-pito indraike ty amo fandilara' areoo. ²⁵ Le hindesako fibaram-pamaleañe, hamaleako ty amy fañinay; ie mihipok' an-drova' areo ao, le hañirahako angorosy, vaho hasese am-pitân-drafelahy. ²⁶ Ie pozaheko ty mahakama fitoño' areo le rakemba folo ty hanoñake ty mofo' areo an-toñake raike, vaho hazotso'e an-danja'e i mahakay; hikama nahareo fa tsy ho anjañe.

²⁷ Ie amy zay, naho mboe tsy hañaoñ' ahy fe manjehatse avao, ²⁸ le zaho ka ty hanjehatse am-poroforo; Zaho, eka zaho, ty handilo anahareo im-pito ty amo sata-rati' areoo. ²⁹ Ho kamae' areo ty nofon' ana-dahi' areo, eka, ty nofon' anak' ampela' areo ty ho hane' areo. ³⁰ Harotsako o toets' abo' areoo, ho firaeko o ajiba' i àndroio, le havokovokoko amo lolo niatoa' areoo ty lolo' areo, vaho halaim-bintañe anahareo ty troko. ³¹ Ho koàheko o rova' areoo, le hampangoakoahoko o toe-miava' areoo vaho tsy hantsoñeko ty hamañi' o embo-areoo. ³² Hampanjarieko bangý i taney vaho ho latsa ty rafelahi' areo mivotrak' ao, ³³ ie ampivarakaiheko amo fifeheañeo, naho hapontoako ama' areo ty fibara; ho bangý ty tane' areo vaho ho kòake o rova' areoo.

³⁴ Zay vaho havahañe amy taney o fitofà'eo amo hene andro idoña'e ho kòakeo, ie an-tanen-drafelahy aña; eka hitofa i taney vaho havahañe ama'e o Sabata'eo. ³⁵ Ie midòñe amy habangì'ey ro hitofa, i fitofañe tsy niazo'e amo Sabata' iareooy, ie nimoneñe ama'e ao nahareo.

³⁶ Aa ty amo sehanga' areoo, le hañitrifako havakà ty añ'arofo' iareo an-tanen-drafelahy aña kanao higoridañe anahareo ty feon-draven-katae mikatsakatsàñe; ie hirimatse mb'eo hoe hinjahem-pibara le hikatràboke eo f'ie tsy amam-pañoridañe. ³⁷ Hifampihotrake iereo hoe aolom-pibara, t'ie tsy eo mpañoridañe, le ho po-kaozarañe tsy hahafijohañe añatrefa' o rafelahi' areoo. ³⁸ Hikoromak' amo kilakila ondatio aña nahareo vaho hagodra' ty tanen-drafelahi' areo. ³⁹ Aa le hitike an-tanen-drafelahi' areo aña o hongaha' areoo ty amo hakeo' areoo; vaho o tahin-droae' iareoo ty hitraofa' iareo fimomooke.

⁴⁰ Naho isolohoa' iareo o hakeo'eo naho o tahin-droae'eo ty amo fandilara' iareo nandilarañe amakoo naho ty fanjehara' iareo; ⁴¹ ie nifankalaiñe am'iereo, nanese iareo an-tanen-drafelahy aña; fa naho hirèke o arofo' iareo tsy sinavatseo naho miantoke lilo ty amo hakeo' iareoo, ⁴² le ho tiahiko ty fañinako am' Iakòbe naho i fañinako am' Ietsàkey naho i fañinako amy Avrahamey vaho ho tiahiko i taney, ⁴³ i tane nifarie' iareo ho bangiñey, hañavahañe o Sabata'eo ie màndre kòake ty am'iereo tsy ao, vaho hondrohañe am'iereo ty valen-kakeo, ty amy nanjehara' iareo o lilikoo, naho nisirikae' iareo o pepékoo naho nihejen-tro' iareo o fañèkoo.

⁴⁴ Ndra te eo iaby zay, ie an-tanen-drafelahy ao, le tsy haforintseko tsy ho hejeko t'ie handrotsahako ho mongotse, hivalihako amy fañinako am' iereoy, amy te Zaho IEHOVÀ Andrianañahare' iareo. ⁴⁵ Le ho tiahiko ty ama' iareo i fañinako aman-droae' iareo t'ie nakareko an-tane Mitsraime aña am-pahaisaha' o kilakila ondatioy, le ho Andrianañahare' iareo; Zaho IEHOVÀ.

⁴⁶ Ie o fañè naho pepètse naho fetse nanoe' IEHOVÀ añivo'e naho o ana' Israeleo ambohi-Sinay aña am-pitâ' i Mosèo.

27

Ava-pitangeñañe

¹ Hoe ty nitsara' IEHOVÀ amy Mosè: ² Saontsio amo ana' Israeleo ty hoe, Naho mitangèñe am' IEHOVÀ t'indaty, ty ami'ty fisafiria'o ho vilin'ai' ondaty: ³ le zao ty hamolilia'o ty lahilahy roapolo taoñe pak' amy faha' nem-polo taoñey, ho sekele limampolo volafoty amy sekelen-toe-miavakey ty hamolilia'o aze. ⁴ Naho rakemba, le ho telopolo sekele ty hamolilia'o aze; ⁵ aa ie lime taoñe pake roapolo taoñe le sekele roapolo ty hamoliliañe ty lahilahy vaho sekele folo ty ampela; ⁶ ie vola'e raike pak'ami'ty halime tao'e, le amolilio sekele volafoty lime ty lahilahy vaho amolilio sekele volafoty telo ty ampela; ⁷ ie nem-polo taoñe mañambone, naho ondaty, le amolilio sekele folo-lim' amby, vaho folo sekele ty rakemba. ⁸ Ie rarake te amy namolilia'o azey, le hampiatrefeñe amy mpisoroñey, vaho hampsatohe' i mpisoroñey ty ava'e; ty fahahenefa' i nifantày ty hamolilia' i mpisoroñey.

⁹ Aa naho biby fañengà' ondaty am' IEHOVÀ ty hengaeñe, le hiavake ze hene hare engae' ondaty am' IEHOVÀ. ¹⁰ Tsy hovae'e, tsy hatsalo'e ty raty hasolo ty soa ndra ty soa ty raty; aa naho toe ampitsalohe'e biby ty biby le songa hiavake i raikey naho i solo'ey. ¹¹ Aa naho biby tsy malio, ie tsy fisoroñañe am' IEHOVÀ, le hasese'e aolo' i mpisoroñey; ¹² le ho volilie' i mpisoroñey ty vili'e: ke t'ie soa he raty; ze amolilia' i mpisoroñey aze, le zay ty ie. ¹³ F'ie te hijebañe aze, le hatovo'e amy anjoanjo'e ty ampaha-lime'e.

¹⁴ Aa naho havahe' t'indaty ty anjomba'e hampiavaha'e am' IEHOVÀ, le hampsatohe' i mpisoroñey ty vili'e, ke t'ie soa ke raty, ze amolilia' i mpisoroñey aze ty hijadoñe. ¹⁵ Aa ie te hijebañe i anjomba navahe'ey, le tsy mahay tsy anovoña'e ty ampaha-lime' i namoliliañe azey, vaho himpolia'e.

¹⁶ Aa naho añenga' ondaty am' IEHOVÀ o tane fanaña'eo, le ho volilie'o ty amy tabiri'ey: hatao sekele volafoty limampolo ty *homere' tabirimbare hordea. ¹⁷ Aa naho boak' an-taon-Jobily ty añenga' ondaty ty tane'e, le ty amolilia'o aze ty mijadoñe. ¹⁸ Aa ie aña i Jobiliy te añenga' ondaty i tete'ey, le ho volilie' i mpisoroñey ty vili'e amo taoñe tsy ri'e am-pará'i taon-Jobiliio le haketrake ty amy amolilia'oy. ¹⁹ Aa naho te hañavake i tane'ey i nañenga azey, le tsy mete tsy tovoña'e ty ampaha-limem-bili'e vaho hibalik' ama'e. ²⁰ Fa naho tsy hijebañe i tane'ey re, ke t'ie naletak' ama' ondaty, le tsy ho mete jebañeñe ka, ²¹ f'ie votsotse amy Jobiliy i tetekey, hiavake ho am' IEHOVÀ i taney ho tane miavake; le a' i mpisoroñey zay ho fanaña'e.

²² Aa ie avi'e am' IEHOVÀ ty teteke vinili'e fa tsy ty tane linova'e, ²³ le ho volilie' i mpisoroñey o taoñe tsy ri'e ampara' ty Jobilio, ho vili'e, le hatolo'e amy àndro zay i vinolili'oy ho enga miavake am' IEHOVÀ. ²⁴ Himpoly amy nikaloañ' azey, toe amy mpandova i taneiy, i tetekey ami'ty taon-Jobily. ²⁵ Fonga an-tsekele' i toe-miavakey o famolilia'oo: gerà roapolo ty ho sekele raike.

²⁶ Aa ty amo valohan' anan-kàreo, a IEHOVÀ zay kanao terake valohan' anake, le tsy hengae' ondaty; ke t'ie añombe hera añondry, a IEHOVÀ. ²⁷ Aa naho biby tsy malio, le ho jebañe'e amy namolilia'oy, vaho hitovoña'e ty ampaha-lime'e; naho tsy jebañeñe zay le haletak' amy namolilia'oy.

* 27:16 Homere = 234 litatse

²⁸ Ie amy zao, tsy azo aletake o raha navìkeo, ze havì' ondaty ho am' IEHOVÀ boak' amy ze hene vara'e; ke ondaty he biby, ke tetek' an-tane'e ao, le tsy mete aletake tsy mete jebañeñe; fa miava-do'e am' IEHOVÀ ze hene raha navìke. ²⁹ Tsy mete jebañeñe t'indaty navaheñe, fa nafatse ho vonoeñe, le toe havetrake.

³⁰ A IEHOVÀ ze hene faha-folo' i taney, ke ty tabiri' i taney, ke ty voankatae; miavake ho am' IEHOVÀ zay; ³¹ aa naho te hijebañe i faha-folo'ey t'indaty, le hatovo'e ama'e ty ampha-lime'e. ³² Ze fahafolo' o añombeo ndra o mpirai-liao, ze miranga ambane' i kobaiy, le songa miavake ho am' IEHOVÀ i faha-folo'ey. ³³ Tsy ho darè'e ke soa he raty, tsy ho soloa'e; ie soloa'e le songa hiavake i solo'ey naho i sinoloy fa tsy mete jebañeñe.

³⁴ I lily rezay ro nandilia' IEHOVÀ amy Mosè ambohi-Sinay aña ho a o ana' Israeleo.

Volily

*Ty Famoliliañe Valoha' Israele
2 Sam 24.1-9;1 Its 21.1-6*

¹ Ty tsara' IEHOVÀ amy Mosè an-dratraratra' i Sinay aña, amy kibohom-pamantañañey ao, am-baloham-bolam-paharoe' i taom-paharoe niavota' iareo an-tane Mitsraimey, ami'ty hoe, ² Tsitsiho vali-boke i valobohòn' ana' Israeley, amo fifokoa' iareoo, naho amo anjomban-droae'eo hamoliliañe o tahina'eo, ze hene lahilahy ki-loha'e ki-loha'e, ³ roapolao taoñe mañambone mahafionjo hialy ho a Israele. Ihe naho i Aharone ty hañiake iareo ty amo mpirai-lian-defo'eo. ⁴ Le hindre ama' areo t'indaty boak' amy ze hene fifokoa'e, songa talèn' anjomban-droae'eo. ⁵ Le zao ty tahina' ondaty hifanehak' ama' areo: amy Reòbene: i Elitsore ana' i Sedeore; ⁶ amy Simone, i Selomiele ana' i Tsorisaday; ⁷ am' Iehodà: i Nakesone ana' i Aminadabe; ⁸ am' Isakàre: i Netanale ana' i Tsoare; ⁹ amy Zebolone: i Eliabe ana' i Kelone; ¹⁰ amy ana' Iosefe rey: amy Efraime, i Elisama ana' i Amihode; amy Menasè, i Gamaliele ana' i Pedatsore; ¹¹ amy Beniamène, i Abidane ana' i Gedony; ¹² amy Dane: i Akièzere, ana' i Amisedahy; ¹³ amy Asere: i Pejiele ana'i Okrane; ¹⁴ amy Gade: i Eliasafe ana' i Dehoele; ¹⁵ amy Naftaly, i Akirà ana' i Ainane; ¹⁶ Ie ro jinoboñe amy valobohòkey, ie mpiaolo o fifokoañ-droae'eo, mpifelek' arivo' Israele.

¹⁷ Aa le rinambe' i Mosè naho i Aharone indaty tinoñon-tahinañe rey, ¹⁸ naho natonto' iareo i hene valobohòkey ami'ty andro valoha' i volam-paharoey vaho niantoñoñe an-tariratse aña' anjomban-droae'eo, naho nisokiran-tahinañe vaho nivolileñe mifototse ami'ty roapolao taoñe mañambone, ki-loha ki-loha, ¹⁹ ami'ty nandilia' IEHOVÀ amy Mosè ty nanoe'e valiboke an-dratraratra' i Sinay aña.

²⁰ Le amo tarira' i Reòbene tañoloñoloña' Israeleo, ty fiantoño'e, amo fifokoa'eo, amo anjomban-droae'eo, ty ia' o tahina'eo, ze lahilahy ki-loha ki-loha, niaheñe roapolao taoñe mañambone, ze hene nahafionjom-bañ'aly; ²¹ ty vinolily am-pifokoa' i Reòbene, efats' ale tsi-eneñ' arivo-tsiliman-jato.

²² Amo tarira' i Simoneo, ty fiantoño'e amo fifokoa'eo, amo anjomban-droae'eo, ze niaheñe ama'e ty ia' o tahina'eo, ze lahilahy ami'ty añambone'e roapolao taoñe mañambone, ze nahafionjom-bañ'aly iaby; ²³ ty vinolily am-pifokoa' i Simone: lime ale-tsi-sive-arivo-tsi-telon-jato.

²⁴ Amo tarira' i Gadeo, ty fiantoño'e amo fifokoa'eo amo anjomban-droae'eo ty ia' o tahina'eo, ze lahilahy ami'ty añambone'e roapolao taoñe mañambone, ze hene nahafionjom-bañ'aly; ²⁵ ty vinolily am-pifokoa' i Gade, efats' ale-tsi-lime-arivo-tsi-enen-jato-tsi-limampolo.

²⁶ Amo tarira' Iehodà, ty fiantoño'e, amo fifokoa'eo amo anjomban-droae'eo ty ia' o tahina'eo, ze roapolao taoñe mañambone, ze hene nahafionjom-bañ'aly; ²⁷ ty vinolily am-pifokoa' Iehodà, fito-ale-tsi-efats' arivo-tsi-enen-jato.

²⁸ Amo tarira' Isakàreo, ty fiantoño'e, amo fifokoa'eo amo anjomban-droae'eo ty ia' o tahina'eo, ze roapolao taoñe mañambone, ze hene nahafionjom-bañ'aly; ²⁹ ty vinolily am-pifokoa' Isakhare, le lime-ale-tsi-efats' arivo-tsi-efa-jato.

³⁰ Amo tarira' i Zeboloneo ty fiantoño'e, am-pifokoa'e, amo anjomban-droae'eo, ty ia' o tahina'eo, ze roapololo taoñe mañambone, ze hene nahafionjom-bañ'aly; ³¹ ty vinolily am-pifokoa'i Zebolone, lime-ale-tsi-fito-arivo-tsi-efa-jato.

³² Amo tarira' Iosefeo, amo ana' i Efraimeo, ty fiantoño'e, amo fifokoa'eo, amo anjomban-droae'eo ty ia' o tahina'eo, ze roapololo taoñe mañambone nahafionjom-bañ'aly; ³³ ty vinolily am-pifokoa' i Efraime le efats' ale-tsi-liman-jato.

³⁴ Amo tarira'i Menaseo, ty fiantoño'e, amo fifokoa'eo amo anjomban-droae'eo ty ia' o tahina'eo, ze roapololo taoñe mañambone, ze nahafionjom-bañ' aly iaby; ³⁵ ty vinolily am-pifokoa' i Menasè, telo-ale-tsi-ro-arivo-tsi-roan-jato.

³⁶ Amo tarira'i Beniamèneo, ty fiantoño'e, am-pifokoa'e, amo anjomban-droae'eo, ty ia' o tahina'eo, ze roapololo taoñe mañambone, ze hene nahafionjom-bañ'aly; ³⁷ ty vinolily am-pifokoa' i Beniamène, telo-ale-tsi-lime-arivo-tsi-efa-jato.

³⁸ Amo tarira' i Daneo, ty fiantoño'e, am-pifokoa'e amo anjomban-droae'eo ty ia' o tahina'eo, ze roapololo taoñe mañambone, ze hene nahafionjom-bañ'aly; ³⁹ ze vinolily am-pifokoa' i Dane ao le eneñ' ale-tsi-ro-arivo-tsi-fiton-jato.

⁴⁰ Amo tarira' i Asereo, ty fiantoño'e, am-pifokoa'e amo anjomban-droae'eo ty ia' o tahina'eo, ze roapololo taoñe mañambone, ze hene nahafionjom-bañ' aly; ⁴¹ ze vinolily am-pifokoa' i Asere, efats'ale-tsi-arivo-tsi-liman-jato.

⁴² Amo tarira' i Naftalio, ty fiantoño'e, ampifokoa'e amo anjomban-droae'eo ty ia' o tahina'eo, ze roapololo taoñe mañambone, ze hene nahafionjom-bañ'aly; ⁴³ ze vinolily am-pifokoa' i Naftaly, lime-ale-tsi-telo-arivo-tsi-efa-jato.

⁴⁴ Ie o vinolilio, o niahe' i Mosè naho i Aharone, naho o mpiaolo' Israeleoo, ondaty folo ro' amby, songa sorotàn' anjomban-droae'e. ⁴⁵ Aa le ze niaheñe amo ana' Israeleo, amo anjomban-droae'eo, ie niroapololo taoñe mañambone, o nahafionjom-bañ'aly ho a Israeleo; ⁴⁶ ze hene vinolily, le enen-ketse-tsi-telo arivo-tsi-liman-jato-tsi-limampolo. ⁴⁷ Tsy niaheñe am' iereo ami'ty fifokoan-droae' iareo o nte-Levio. ⁴⁸ Fa hoe ty nitsarae' IEHOVÀ amy Mosè: ⁴⁹ Ko iahe'o ty fifokoa' i Levy, le tsy ho volilie'o amo ana' Israeleo, ⁵⁰ f'ie ho tendrè'o amy kibohom-pañinay, amo harao'e iabio naho amy ze he'e ama'e, hitarazo i kivohoy naho o harao'e iabio; ho vandroñe' iereo vaho hitobe hiarikoboñe aze. ⁵¹ Aa ie hionjom-beo i kivohoy le o nte-Levio ro hampikatrak' aze; ie haoreñe ka i kivohoy le o nte-Levio ty hampitroatse aze. Havetrake t'indaty ila'e mañarivo ama'e. ⁵² Hañoreñe o kiboho' iareoo o ana' Israeleo songa an-kitòbe'e; sindre aman-tsai'e, amo mpirai-lia'eo; ⁵³ fe hitobe añariari' i kibohom-pañinay o nte-Levio, tsy hifetsahan-kaviñerañe i valobohò' Israeley; le ho mpamandroñe i kibohom-pañinay o nte-Levio. ⁵⁴ Nanoe' o ana' Israeleo zay; ze hene nandilia' IEHOVÀ i Mosè ty nanoe' iereo.

2

Ty Filahara' i Fitobeñaey

¹ Hoe ty nitsara' IEHOVÀ amy Mosè naho i Aharone: ² songa hitobe am-pijadoña' i sai'ey marine' ty vilon-droae'e o ana' Israeleo. Añ'ariari' i kibohom-pamantañañey ty hitobe'a' iareo. ³ Atiñana'e, mb' am-panjiriha'

i àndroy, ty hitobe'a' o mpañonjoñe ty sai' Iehodào amo mpirai-lia'eo; i Naksone, ana'i Aminadabe ty mpiaolo' o ana' Iehodao. ⁴ Ty mpirai-lia'e, o niaheñe ama'eo, le fito-ale-tsi-efats' arivo-tsi-enen-jato. ⁵ Hanonjohy toetse ama'e ty fifokoa' Isakhare; i Netanelà ana' i Tsoare ty mpiaolo' o ana' Isakhareo. ⁶ Ty mpirai-lia'e, o niaheñe ama'eo, le lime ale-tsi-efats' arivo-tsi-efa-jato. ⁷ Le ty fifokoa' i Zebolone; Eliabe ana' i Kelone ty mpiaolo' o ana' i Zeboloneo; ⁸ ty mpirai-lia'e, o niaheñe ama'eo, le lime-ale-tsi-fito-arivo-tsi-efa-jato. ⁹ O vinolily an-tobe' Iehodao nitontoñe ho rai-hetse-tsi-valo-ale-tsi-eneñ' arivo-tsi-efa-jato amo mpirai-lia'eo; hionjoñe valoha'e iereo.

¹⁰ Ami'ty ila'e atimo ty hijadoña' ty sain-tobe' i Reòbene ty amo mpirai-lia'eo; i Elitsore ana' i Sedeore ty mpiaolo' o ana' i Reòbeneo. ¹¹ Ty mpirai-lia'e, o niaheñe ama'eo, le efats' ale-tsi-eneñ' arivo-tsi-liman-jato. ¹² Ty fifokoa'i Simone ty hitobe marine iareo; i Semoliale ana' i Tsorisadahy ty mpiaolo' o ana' i Simoneo. ¹³ Ty mpirai-lia'e, o niaheñe ama'eo, le lime-ale-tsi-sive-arivo-tsi-telon-jato. ¹⁴ Manonjohy iereo ty fifokoa' i Gade, i Eliasafe ana' i Rehoele ty mpiaolo' o ana' i Gadeo. ¹⁵ Ty mpirai-lia'e, o niaheñe ama'eo le efats' ale-tsi-lime-arivo-tsi-enen-jato-tsi-limampolo. ¹⁶ O vinolily an-tobe' i Reòbeneio le rai-hetse-tsi-lime-ale-tsi-arivo-tsi-efa-jato-tsi-limampolo amo mpirai-lia'eo; faharoe te mienga iereo.

¹⁷ Hionjoñe amy zao i kibohom-pamantañañey mindre amo kitoben-te-Levio, añivo' o kitobeo; le amo fitobe'a'eo ty hiavota' iareo, songa ondaty ami'ty filahara'e ty amo sai'eo.

¹⁸ Añ'ila'e ahandrefañe ty hijadoña' ty sain-tobe' i Efraime ty amo mpirai-lia'eo, i Elisama ana' i Amihode ty mpiaolo' o ana' i Efraimeo, ¹⁹ naho i mpirai-lia'ey, o niaheñe ama'eo le efats' ale-tsi-liman-jato. ²⁰ Marine aze ty fifokoa' i Menasè le i Gamliele ana' i Pedatsore ty mpiaolo' o ana' i Menaseo; ²¹ ty mpirai-lia'e, o niaheñe ama'eo, telo ale-tsi-ro' arivo-tsi-roan-jato. ²² Le ty fifokoa' i Beniamène; i Abidane ana' i Gedoný ty ho mpiaolo' o ana'i Beniamèneo; ²³ ty mpirai-lia'e, o niaheñe ama'eo, telo-ale-tsi-lime-arivo-tsi-efa-jato. ²⁴ O vinolily an-tobe' i Efraimeo amo mpirai-lia'eo le rai-hetse-tsi-valo-arivo-tsi-zato; fahatelo te mienga iereo.

²⁵ Añ'ila'e avaratse ty hijadoña' ty sain-tobe' i Dane ty amo mpirai-lia'eo, le i Akièzere, ana' i Amisedahy ty mpiaolo'e; ²⁶ ty mpirai-lia'e, o niaheñe ama'eo, eneñ' ale-tsi-ro' arivo-tsi-fiton-jato. ²⁷ Ty fifokoa' i Asere ty hitobe marine aze, le i Pejiele ana' i Okrane ty mpiaolo' o ana' i Asereo; ²⁸ ty mpirai-lia'e, o niaheñe ama'eo, efats' ale-tsi-arivo-tsi-liman-jato o lahindefo'eo. ²⁹ Le ty fifokoa' i Naftaly, i Akirà ana' i Ainane ty mpiaolo' o ana' i Naftalio; ³⁰ ty mpirai-lia'e, o niaheñe ama'eo, lime-ale-tsi-telo-arivo-tsi-efa-jato. ³¹ O vinolily an-tobe' i Daneo le rai-hetse-tsi-lime-ale-tsi-fito-arivo-tsi-enen-jato; miavotse am-boli'e iereo, am-pañoriheñe ty sai' iareoo.

³² O niaheñe amo ana' Israeleo ty amo anjomban-droae'eo, ze vinolily kitobe-kitobeo ty amo mpirai-lia'eo, enen-ketse-tsi-telo-arivo-tsi-liman-jato-tsi-limampolo. ³³ Tsy niaheñe amo ana' Israeleo o nte-Levio, ami'ty nandilia' IEHOVÀ i Mosè.

³⁴ Nanoe' o ana' Israeleo ze hene nandilia' IEHOVÀ i Mosè; ie ty nitobe'a' iareo amo sai'eo le ie ty nionjona' iareo, songa am-pifokoa'e añ'anjomban-droae'e.

¹ Zao o tarira' i Aharone naho i Mosè tamy andro nitsarae' IEHOVÀ amy Mosè am-bohi-Sinaiy. ² Iretoy o tahinan' ana' i Aharoneo: Tañoloñoloña'e t'i Nadabe naho i Abiho, i Elazare, vaho Itamare. ³ Ie ro tahina' i ana' i Aharone rey, o mpisoroñe norizañe, i noriza'e hitoroñe ho mpisoroñe rey. ⁴ Fe nihomak' añatrefa' IEHOVÀ t'i Nadabe naho i Abiho, ie nañenga afo tsie aolo' IEHOVÀ ampatram-bei' i Sinay aña, ie tsy nanañ' anake. Aa le nitoroñe ho mpisoroñe añatrefa' i Aharone rae'e t'i Elazare naho Itamare.

Ty Fitoloña' o nte-Levio

⁵ Le nanao ty hoe amy Mosè t'IEHOVÀ: ⁶ Ampañarineo ty fifokoa' i Levy, vaho ampiatrefo i Aharone mpisoroñe, hitoroña' iareo. ⁷ Ho henefe' iareo o fitoloña'eo naho ty fitoloña' i valobohòke aolo' i kibohom-pamantañañey hitoloñe amy kivohoy. ⁸ Ho vandroñe' iereo ty harao' i kibohom-pamantañañey le ho henefe' iareo ty fiatrahañe o ana' Israele mioza amy fitoroñañe i kivohoy. ⁹ Le tendreo ho amy Aharone naho o ana'eo o nte-Levio; ie hene nitolorañe boak' amo ana' Israeleo. ¹⁰ Aa le tendreo t'i Aharone naho o ana'eo hitolon-ko mpisoroñe; fe havetrake ze ondaty ila'e miarine eo.

¹¹ Le hoe t'IEHOVÀ amy Mosè: ¹² Ingo, zaho ty nandrambe o nte-Levio amo ana' Israeleo hisolo ze tañoloñoloña' o ana' Israele manoka-koviñeo. Aa le ahiko o nte-Levio, ¹³ amy te fonga ahiko ze valohan' anake: Mifototse amy andro nipaohako ze hene valohan' anak' an-tane Mitsraimey le songa naviko ho ahiko ze valohan' ana' o ana' Israeleo, ke ondaty he hare. Ahy iereo, Zaho IEHOVÀ.

¹⁴ Le nanao ty hoe amy Mosè an-dratraratra' i Sinay aña t'IEHOVÀ, ¹⁵ Volilio o ana' i Levio, amo anjomban-droae'eo, naho amo hasavereña'eo; fonga iaho ze lahilahy vola'e raike mañambone. ¹⁶ Aa le niahe' i Mosè amy tsara' IEHOVÀ, amy nandiliañe azey. ¹⁷ Intoañe o ana' i Levio ty amo tahina'eo: i Geresone naho i Kehàte vaho i Merary. ¹⁸ Intoañe o tahinan' ana' i Geresone amo hasavereña'eo: i Libný naho i Simý. ¹⁹ Naho o ana' i Kehàteo amo hasavereña'eo: i Amrame, naho Izehare, i Khebrone vaho i Oziele. ²⁰ Naho o ana' i Merario amo hasavereña'eo: i Maklý naho i Mosý. Ie ro hasavereña' i Levy amo anjomban-droae'eo.

²¹ I Geresone ty niboaha' o hasavereña' i Libnio naho o hasavereña' i Simio; Ie o amori' i Geresoneo. ²² Ty niaheñe am' iereo, ami'ty ia' ze hene lahilahy vola'e raike mañambone le fito-arivo-tsi-liman-jato. ²³ Natobe amboho' i kivohoy ahandrefañe ey o amori' o nte-Geresoneo. ²⁴ I Elisafe ana' i Laede ty mpiaolo' ty anjomban-droae' o amori' i Geresoneo. ²⁵ Ty fitoloña' o amori' i Geresoneo le amy kibohom-pamantañañey, le i kivohoy naho i kibohotsey, i tako'ey naho i lamba-pañefe' i lalan-kibohom-pamantañañey, ²⁶ naho o lamba miradorado an-kiririsa eio, naho o lamba fañefe' i lalam-bein-kiririsai, i miarikatoke i kivohoiy naho i kitreliy naho o tali'eo: vaho ze fitoloñañe amy rezay.

²⁷ I Kehàte ty niboaha' o hasavereña' i Amrameo, naho o hasavereña' Izehareo, naho o hasavereña' i Khebroneo vaho o hasavereña' i Ozieleo: ie o amori' i Kehàteo; ²⁸ am' iereo ty niaheñe ze fonga lahilahy vola'e raike mañambone, aa le valo-arivo-tsi-enen-jato ty mpitoloñe amy famandroñañe i efe-miavakey. ²⁹ Atimo' i kivohoy ty fitobea' o amori' i Kehàteo, ³⁰ i Elitsafane ana' i Oziele ty mpiaolo' ty anjomban-droae' o amori' i Kehàteo. ³¹ Ty lili' iareo, le i vatay, naho i rairaiy, naho i fitàñ-jiroy, naho o kitrelio, naho o fanake itoroñañe amy efe-miavakeo, naho i lamba fañefetsey vaho ze fampikasokasohañe irezay. ³² I Elazare ana' i Aharone

mpisoroñe, ro talè' o mpiaolo nte-Levio, ie ty mpisari' o mpamandroñe amy efe-miavakeio.

³³ I Merarý ty niboaha' ty hasavereña' i Makly naho ty hasavereña' i Mosy: ie o amori'i Merario. ³⁴ Ty ia' iareo, ie niaheñe ze hene lahilahy vola'e raike mañambone le eneñ' arivo-tsi-roan-jato. ³⁵ I Tsoriele ana' i Abikaille ty talèn' anjomban-droae' o amori' i Merario; avara' i kivohoy ty fitobe'a' iereo. ³⁶ Zao ty fitoroñañe nafantok' amo amori' i Merario: o varamba i kivohoio, o sàka'eo, o anakòre'eo, o tombo'eo, o harao'eo, naho ze hene fitoloñañe amy rezay, ³⁷ naho o ana-kòreñe miarikatoke i kiririsai rekets' o tombo'eo naho o tsato'eo vaho o tali'eo.

³⁸ Aolo' i kivohoy atiñanaña ey, aolo' i kibohom-pamantañañey mb'amy fanjirihan'androy—ty fitobe'a' i Mosè naho i Aharone naho o ana' i Aharoneo, hañambeñe i toetse miavakey, vaho ty fiatrafáñe o ana' Israeleo, le havetrake ze ila'e miharine eo. ³⁹ Ty ia' o niaheñe amo nte-Levio; o niahe' i Mosè naho i Aharone ami'ty lili' IEHOVÀ amo hasavereña'eoo, ze lahilahy vola'e raike mañambone, le ro'ale-tsi-ro'arivo.

Vilin'ai o Valohan'Anakeo

⁴⁰ Le hoe t'IEHOVÀ amy Mosè: Volilio ze hene tañoloñoloña' o ana' Israele vola'e raike mañamboneo, songa iaheñe ami'ty tahina'e. ⁴¹ Le rambeso ho ahy, IEHOVÀ, o nte-Levio hasolo ze hene tañoloñoloña' o ana' Israeleo; le ty hare' o nte-Levio ty hasolo ze hene valohan' anankare' o ana' Israeleo. ⁴² Aa le fonga niahe' i Mosè o ana' Israeleo ami'ty nandilia' IEHOVÀ. ⁴³ Ty nañiahaña o hene tañoloñoloñan-dahilahy vola'e raike mañamboneo, am-pañiahaña o tahina'eo, le niro' ale-tsi-ro' arivo-tsi-roan-jato-tsi-fitopololo-telo' amby.

⁴⁴ Le hoe ty tsara' IEHOVÀ amy Mosè: ⁴⁵ Rambeso ho ahiko o nte-Levio hasolo ze hene tañoloñoloña' o ana' Israeleo naho ty hare' o nte-Levio hasolo ty hare' iareo. Ho ahiko o nte-Levio, Zaho IEHOVÀ. ⁴⁶ Aa ty hijebañañe i roan-jato-tsi-fitopololo-telo-ambi' o tañoloñoloñan' ana' Israele nandikoatse ty ia' o nte-Levio rey, ⁴⁷ le songa handrambesa'o *sekele lime ho vili-loha'e; ami'ty vili' i sekelen' efe-miavakey, roapolgerà ty sekele raike. ⁴⁸ Le hatolo'o amy Aharone naho amo ana'eo i drala nijebañañe o ila'e nandikoatseyo. ⁴⁹ Aa le rinambe' i Mosè i dralam-pijebañañey amo nandikoatse ze nijebañe' o nte-Levio; ⁵⁰ amo tañoloñoloña' o ana' Israeleo ty nandrambesa'e ty drala arivo-tsi-telon-jato-tsi-enempolo-lime amby amo sekelen-toe-miavakeo; ⁵¹ vaho natolo' i Mosè amy Aharone naho amo ana'eo i dralay, ty amy tsara' IEHOVÀ, amy nandilia' IEHOVÀ i Mosè.

4

O nte-Kehàteo

¹ Hoe ty nitsara' IEHOVÀ amy Mosè naho i Aharone: ² Volilio o ana' i Kehàte boak' amo nte-Leviooo, amo hasavereña'eo naho amo anjomban-droae'eo, ³ ze telopolo taoñe pake limampolo taoñe; ze hene hizilik' amy firimboñañey, hitoloñe amy kibohom-pamantañañey. ⁴ Zao ty ho fitoloña' o ana' i Kehàteo amy kibohom-pamantañañey amo miava-do'eo: ⁵ Naho hionjoñe i tobey, le homb'eo t'i Aharone naho o ana'eo hanjetse i lamba fañefetsey, hanaroña'e i vatam-pañinay ⁶ naho ho rakofa' iareo holintrozofisoitse naho ho lamahe' iereo lamba manga ki'e ty ambone'e vaho hatsorofo' iareo ama'e o bao'eo. ⁷ Ho lamahe' iereo lamba manga i

* ^{3:47} sekele raike = 10 grama

rairai' i mofom-piatrefañey, le hapoke ama'e o fanakeo naho o sadròo naho o soakazoo, o fitovy fañiliñañeo; hidoe ama'e avao i mofo tsi-modoy. ⁸ Hilafiha' iareo lamba mena mañabara vaho hirakofa' iareo holin-trozofisoitse; le hatsorofo' iareo ama'e o bao'eo. ⁹ Ho rambese' iareo ty lamba manga hanaroñañe i fitàn-jiron-kazavàñey, naho i jiro'e rey, o fiharatan-tsokotsoko'eo, o sadrom-baen' afo'eo, naho o fitavona-menake famahanañ' azeo. ¹⁰ Le haholonkolo' iereo an-kolin-trozofisoitse ie naho o harao'e iabio, vaho hasampe ambone o bao-pitarazoñañe. ¹¹ Ho lamahe' iareo lamba manga ka i kitrely volamenay naho ho rakofañe holin-trozofisoitse vaho hatsorofotse ama'e o bao'eo. ¹² Ho rambese' iareo ze hene harao-pitoloñañe, o fitoloña' iareo amy miavakeio, le ho kolopofañe añate lamba manga naho ho rakofañe holi-trozofisoitse vaho hajò ambone' o bao fitarazoñañe. ¹³ Haveve' iareo aña o lavenok' amy kitreliio vaho handamiha' iareo lamba malo-mavo. ¹⁴ Hapo' iereo ambone'e ze hene haraoitse fitoloña' iareo ama'e: o endraendrao, o fitsipokeo, o sadròo, o fitovio, naho o hene harao' i kitreliio: le ho rakofa' iareo holi-trozofisoitse, vaho hatsorofotse ama'e o bao'eo. ¹⁵ Aa ie nihenefa' i Aharone naho o ana'eo ty fandrakofañe o fanake miavakeo naho o finga miavake iabio, naho fa hionjoñe mb'eo i tobey le homb'eo o ana-dahi' i Kehàteo hitarazo o rahao; fe tsy ho tsapae' iereo o raha miavakeo tsy mone hivetrake. Irezay ro enta' o ana' i Kehàteo an-kibohom-pamantañañe ao.

¹⁶ Nafantok' amy Elazare ana' i Aharone mpisoroñe ty mena' i jiroy, naho i emboke mañitsey, naho i enga-mahakama boak' àndroy, naho i mena-pañorizañey; aze ka ty lily amy kivohoy, ze am-po'e ao iaby, naho amy toe-miavakey rekets' o hene fana'eo.

¹⁷ Le hoe ty nitsara' IEHOVÀ amy Mosè naho i Aharone, ¹⁸ Asoao tsy haitoñañe amo nte-Levio ty fifokoa' o hasavereña' o nte-Kehàteoo. ¹⁹ Zao ty hanoe' areo ty am' iereo soa te ho veloñe fa tsy hivetrake naho harinea' iareo o raha miavakeo: Homb'eo t'i Aharone naho o ana'eo vaho ho tendrè' iareo songa ami'ty fitoroña'e naho ty kilanka'e. ²⁰ Fe tsy hizilik' ao o nte-Kehàteo hisamba ty fandrakofañe o raha miavakeo tsy mone hihomake.

O nte-Geresone naho nte-Merario

²¹ Le hoe ty nitsara' IEHOVÀ amy Mosè: ²² volilio ka o ana' i Geresoneo ami'ty anjomban-droae'e naho o hasavereña'eo; ²³ ie telopolu taoñe mañambone pake limampolo taoñe ty añaiaha'o, ze hizilike hitoroñe, hitoloñe amy kibohom-pamantañañey ao. ²⁴ Zao ty fitoloña' o hasavereña' i Geresoneo ami'ty fitoroñañe naho fijinian-kilankañe. ²⁵ Hendese' iereo o lamba fañefe' i kibohom-pamantañañeio rekets' i rako'ey, naho i rako'e holin-trozofisoitse ambone'ey, naho ty lamba fañefe' i lalan-kibohom-pamantañañey, ²⁶ le o lamba miradorado an-kiririsao naho o lamba fañefe' i lalam-bein-kiririsao, i miarikatoke i kivohoy naho i kitreliiy naho o tali'eo naho ze hene haraom-pitoloña' iareo vaho ze raha mioza amy rezay; zay ty ho fitoroña'e. ²⁷ Am-palie' i Aharone naho o ana'eo ze hene fitoroña' o ana' i Geresoneo, amy kilanka' iareo iabiy naho amo fitoloña' iareo iabio, vaho hene hitendrea' areo o fitoloña'iareoo naho o kilanka' iareoo. ²⁸ Ie ro fitoroña' o nte-Geresoneo amy kibohom-pamantañañey, le ambanem-pità' Itamare ana' i Aharone mpisoroñe ty fitoloña' iareo.

²⁹ Aa ty amo ana-dahi' i Merario, le ho volilie'o iereo amo hasavereña'eo naho o anjomban-droae'eo; ³⁰ ze telopolu taoñe mañambone pake limampolo taoñe ty hañiaha'o, ze hizilike amy fitoroñañey hifanehak'

amy kibohom-pamantañañey. ³¹ Le inao ty hafantok' am' iereo ho kilanka' iareo amy fitoroña' iareo i kibohom-pamantañañey: o varamba i kivohoio naho o saka'eo, o anakòre'eo naho o vave'eo ³² naho o anakòreñe miarikatoke i kiririsaio rekets' o vave'eo, o tsato'eo naho o tali'eo naho o hene harao'eo vaho ze harao-pitoloña'e iaby, le ho tolora'o ami'ty tahina' ondaty ty anjara kilanka'e. ³³ Ie ro fitoroña' o nte-Merario amy kibohom-pamantañañey; ambanem-pità' Itamare ana' i Aharone mpisoroñey ty fitoloña' iareo.

Famoliliañe o nte-Levio

³⁴ Aa le vinolili' i Mosè naho i Aharone vaho o talèm-balobohòkeo o nte-Kehàteo, an-kasavereñañe naho añ'anjomban-droae, ³⁵ mifototse amo telopolo taoñeo pak' amo limam-polo taoñeo, ze mizilik' am-pitoroñañe ao, am-pitoloñañe amy kibohom-pamantañañey, ³⁶ le ro'arivo-tsi-fiton-jato-tsi-limampolo o niaheñe amo hasavereña'eo. ³⁷ Ie ro niaheñe amo hasavereña' o nte-Kehàteo, o mpitoroñe amy kibohom-pamantañañeio ze nivolilie' i Mosè naho i Aharone ami'ty lili' IEHOVÀ am-pità' i Mosè.

³⁸ Aa ty nivolilieñe o nte-Geresoneo, amo hasavereña' e naho anjomban-droae'eo, ³⁹ mifototse amy ze telopolo taoñe mañambone pak' amy ze limampolo taoñe, o hizilik' am-pitoroñañe i kibohom-pamantañañeio — ⁴⁰ o niaheñe amo hasavereña'eo naho amo anjomban-droae'eo le ro'arivo-tsi-enen-jato-tsi-telopolo. ⁴¹ Ie ro niaheñe amo nte-Geresoneo amo hasavereña'eo, ze mitoroñe an-kibohom-pamantañañe ao; o nivolilie' i Mosè naho i Aharone ami'ty lili' IEHOVÀ.

⁴² Le o nivolilieñe an-kasavereña' o nte-Merario ty amo hasavereña'eo naho o anjomban-droae'eo, ⁴³ ie telopolo taoñe am-para' te limampolo taoñe ze mizilik' am-pitoroñañe hitoloñe an-kibohom-pamantañañe ao— ⁴⁴ o niaheñe amo hasavereña'eo le ni-telo-arivo-tsi-roan-jato. ⁴⁵ Ie ro niaheñe amo hasavereña' o nte-Merario, ze nivolilie' i Mosè naho i Aharone ami'ty lili' IEHOVÀ am-pità' i Mosè.

⁴⁶ Ze niaheñe amo nte-Levio, o nivolilie' i Mosè naho i Aharone naho o talè' Israeleo amo hasavereña'eo naho o anjomban-droae'eo, ⁴⁷ amo telopolo taoñeo pak' amo limampolo taoñeo, ze mizilik' ao mifanehak' am-pitoloñañe naho am-pitarazoñañe kilankañe amy kibohom-pamantañañey ao; ⁴⁸ valo-arivo-tsi-liman-jato-tsi-valompolo ty niaheñe ⁴⁹ ami'ty lili' IEHOVÀ am-pità' i Mosè ty nanendreañe iareo, songa am-pitoroña'e naho an-kilanka'e; vinolily ami'ty nandilia' IEHOVÀ i Mosè.

5

Ondaty Tsy Malio

Sor 15.1-33

¹ Hoe ty nitsara' IEHOVÀ amy Mosè: ² Lilio o ana' Israeleo te hasese alafe' i tobey ze angamae, naho ze mañaka-dranoke vaho ze nileora' ty havilasy; ³ sambe hasese ze lahilahy ndra ampela; alafe' i tobey ty hampipohañe iareo, tsy handeotse ty tobe' iareo, zaho mpimoneñe añivo'e ao. ⁴ Aa le nanoe' o ana' Israeleo zay, ie nasese alafe' i tobey ey; amy nandilia' IEHOVÀ i Mosèty nanoe' o ana'Israeleo.

Soloho naho Avake

⁵ Le hoe ty nitsara' IEHOVÀ amy Mosè, ⁶ Misaontsia amo ana' Israeleo: Naho eo ty lahilahy ndra ampela manao ze atao fandilara' ondaty, am-pijeharañe am' IEHOVÀ, mampanan-tahiñe indatiy; ⁷ le hisolohoa'e i hakeo nanoe'e, naho ho henefa'e avake i tahi'ey naho ho tovoña'e ty

ampaha-lime'e vaho hatolo'e amy nandilara'ey. ⁸ Aa naho tsy aman-dongo hañavahañe i sata ratiy indatiy, le hengae'e am' IEHOVÀ ho a i mpisoroñey ty ava' i hakeoy ho tovo' i añondrilahi-pañeferañey hañeferañe aze. ⁹ Ho aze ka o engan-kavoñañe atoka' o ana' Israeleoo, ze atolo' iareo amy mpisoroñey. ¹⁰ Aze ze hene engae' ondatio, ze atolo' ondaty amy mpisoroñey ro aze.

Ke Nifotetse ami'ty Vali'e

¹¹ Hoe ty nitsara' IEHOVÀ amy Mosè: ¹² Saontsio amo ana' Israeleo ty hoe: ie mandifike ty tañanjomba' ondaty naho mitomaly ama'e, ¹³ naho iolora' ondaty, ie nietak' am-pihaino' i vali'ey, naho tsy nionin-dre ke te nandeobatañ' an-kafitse, vaho tsy vinamba, tsy tsinepake te nanoe'e; ¹⁴ f'ie angara' ty famarahiañe, naho farahie'e i vali'e nandeobatañey, he t'ie nangara' ty famarahiañe, le farahie'e ty tañanjomba' e tsy nandeobatañe; ¹⁵ le hasese' indatiy mb' amy mpisoroñey mb'eo i tañanjomba'ey. Hendese'e ka ty enga ty ama'e: ty bom-bare hordea fahafolo' ty efà; tsy hañiliña'e menake ndra hamitseza'e emboke amy t'ie enga-mahakamam-pamarahiañe, engapaniahiañe, fampatiahian-kamengohañe.

¹⁶ Le hampiharinè' i mpisoroñey i rakembay vaho hampiatrefe'e am' IEHOVÀ. ¹⁷ Hendese' i mpisoroñey ty rano miavake am-pitovi-tane, le handrambesa'e debok' an-tane' i kibohotsey vaho hafitse'e amy ranoy. ¹⁸ Le hajoha' i mpisoroney añatrefa' IEHOVÀ i rakembay, le habala'e ty maroi'e, le hapo'e an-taña' i rakembay i engam-pitiahiañey, i engamahakama-pamarahiañey, ie am-pitá' i mpisoroñey i rano mafaitse minday fatsey. ¹⁹ Le hampifantà' i mpisoroñey i rakembay, ami'ty hoe, Naho tsy niharo tihy ama' ondaty rehe, naho tsy nivio mb'an-kaleorañe, ie fehè' i vali'oy, le miyahà ami'ty rano mafaitse minday fatse toy. ²⁰ F'ie mone nandrike ambane' ty lilim-bali'o, nandeobatañe, amy te nahazoandro-pilahiañe ty 'ndaty tsy vali'o. ²¹ Ie amy zao hampititihe' i mpisoroñey am-patse i rakembay: Le hanao ty hoe amy rakembay i mpisoroñey: Hanoe' IEHOVÀ titse naho fatse am' ondati'oo, le ampivoroke' IEHOVÀ ty vania'o vaho hampientare'e ty tro'o, ²² ami'ty rano minday i fatsey toy, ie hijoñe an-kovi'o ao hampivoroke ty vania naho hampienatse ty troke. Le hanao ty hoe i rakembay: Amena, Ie zay.

²³ Le ho sokire' i mpisoroñey am-boke peleke ao i fatsey vaho ho faopaohe'e amy rano mafaitsey ao. ²⁴ Le hampinome'e i rakembay i rano mafaitse minday fatsey le hafaitse ama'e i rano minday fatse migologodrañ' aoy. ²⁵ Le ho rambese' i mpisoroñey am-pitá'e amy zao i engam-pamarahiañey, naho hahelahela'e añatrefa' IEHOVÀ, vaho hasese'e mb'amy kitreliy mb'eo; ²⁶ le handrambesa' i mpisoroñey ty mahàtsa-pitáñie ho enga-tiay, le hampañatoe'e amy kitreliy, heneke zay le hampikamae'e i rakembay i ranoy. ²⁷ Ie nampikamaeñe i ranoy, le ho tendreke, naho toe nandeobatañe naho nivalik' amy vali'ey, te hafaitse i rano minday fatse nigodrañe ama'ey, naho hienatse i fisafoa'ey naho ho voroke i vania'ey vaho ho injè' ondati'eo i rakembay. ²⁸ Fe naho tsy nandeobatañe i rakembay naho malio, le ho votsotse vaho hiaren-tiry.

²⁹ Zay ty fetsem-pamarahiañe, ie zehare' ty tañanjomba'e ty lilim-bali'e vaho mivio mb'am-pandeorañe, ³⁰ hera añangara' ty famarahiañe t'indaty naho farahie'e ty tañanjomba'e; le hampijohañe'e añatrefa' IEHOVÀ vaho hanoe' i mpisoroñey ama'e o hene Hake zao. ³¹ Le halio tahiñe indatiy, fe hivave hakeo i rakembay.

6

O Nazireo

¹ Hoe ty nitsara' IEHOVÀ amy Mosè: ² Misaontsia amo ana'Israeleo le ano ty hoe: Naho mitangèñe, manao ty fanta' o Nazireo, ndra ty lahilahy ndra ampela, hiambake ho am' IEHOVÀ, ³ le hifoneña'e ty divay naho ze rano mahery; tsy hikama vinegran-divay ndra vinegran-toake, vaho tsy ho kamae'e ty ranom-baloboke, ndra ty voam-baloboke ke te mandrano he maike. ⁴ Tsy ho kamae'e ndra inoñe boak' ami'ty vahem-baloboke ndra o ata'eo ndra o holi'eo amo hene andro maha Nazire azeo.

⁵ Amo hene andro maha Nazire azeo, tsy hiozam-piharatse i añambone'ey; ampara' te heneke o andro niambaha'e ho a IEHOVÀ; hiavake re; le henga'e hitombo avao o ori-maroin'añambone'eo.

⁶ Tsy hiharine lolo re amy ze hene andro hiambaha'e ho a' IEHOVÀ. ⁷ Tsy handeo-batan-dre ndra aman-drae'e ndra rene'e, ndra aman-drahalahi'e ndra rahavave'e t'ie mihomake, amy te añambone'e eo ty fiambaha'e ho aman' Añahare. ⁸ Hiavake am' IEHOVÀ re amo hene andro fiambaha'eo.

⁹ Ie mitojeha te mihomake marine aze t'indaty, naho leore'e i añambone'e norizañey, le ho harate'e i añambone'ey ami'ty andro fañeferañe aze; hiharata'e ami'ty andro fahafito'e. ¹⁰ Amy andro fahavaloy re ro handay deho roe ndra ana-boromahilala roe mb'amy mpisoroñie an-dalan-kibohom-pamantañañey mb'eo, ¹¹ le ho hentseñie'i mpisoroñey ty raike ho engan-kakeo, le hisoroña'e ty raike ho amy nandilatse amy fateiy, vaho havache'e amy àndroy ty añambone'e. ¹² Havi'e am' IEHOVÀ o andro fiambaha'eo vaho ho banabanae'e ty vik' añondrilahy engan-dilatse; fe ho modo o andro taoloo kanao nileoreñie i fiambaha'ey.

¹³ Inao ty fetse' o Nazireo: Ie heneke o andro fiambaha'eo le hasese mb'an-dalan-kibohom-pamantañam-beo, ¹⁴ le ho banabanae'e am' IEHOVÀ o enga'eo: ty vik' añondrilahy tsy aman-kandra hisoroñañe naho ty vik' añondri-vave tsy aman-kila ho engan-kakeo, naho ty añondrilahy tsy aman-kandra ho engan-kanintsiñe, ¹⁵ naho mofo po-dalivay an-karoñie, mofo vonga'e ami'ty mona linaro menake, naho mofo pisake nihosorañe menake, naho o enga-mahakama'eo vaho o enga-rano'eo. ¹⁶ Le hasese' i mpisoroñey añañatrefa' IEHOVÀ zay vaho hengae'e i engan-kakeoy naho i enga hisoroñañey, ¹⁷ le hengae'e ho engam-pañanintsiñe am' IEHOVÀ i añondrilahiy miharo amy haro-mofo po-dalivaiy; hengae'i mpisoroñey ka i enga-mahakama'ey naho i enga-rano'ey. ¹⁸ Le ho harate' i Nazirey andalan-kibohom-pamantañañ' ao i añambone'e norizañey le ho rambese'e o maroi'eo vaho hapo'e amy afo ambane' i soron-kanintsiñey. ¹⁹ Le ho rambese' i mpisoroñey ty soro' i añondrilahy nahandroeñey naho ty vonga mofo po-dalivay raike naho ty mofo pisake po-dalivay boak' amy haroñey vaho hatolo'e am-pitá' i Nazirey, ie fa niharate'e i añambone'e norizañey, ²⁰ le hahelahela' i mpisoroñey irezay ho enga-kelahela añañatrefa' IEHOVÀ; ie avaheñe ho a i mpisoroñey, mitraok' ami'ty tratra' i engan-kelahelay naho ty tso' i engan-kavoñey. Heneke zay le mete mikama divay i Nazirey.

²¹ Zay ty fetse' ty Nazire mifanta, ie mañenga am' IEHOVÀ amy ha-Nazire'ey, ambone' ze satrie'e amy hanaña'ey; i nifanta'ey ro hanoe'e i lilim-piambaha'ey.

²² Hoe ty nitsara' IEHOVÀ amy Mosè: ²³ Misaontsia amy Aharone naho o ana'eo le ano ty hoe: Zao ty fitatà' areo o ana' Israeleo. Ano ty hoe am' iereo:

²⁴ Hitahy azo t'IEHOVÀ,

naho hañaro azo;

²⁵ Hampireandreàñe' IEHOVÀ ama'o ty vinta'e, naho hatarik' ama'o;

²⁶ Hampiandrà' IEHOVÀ ama'o ty lahara'e vaho hampanintsîñe azo.

²⁷ Zay ty hampipetaha'e amo ana' Israeleo ty añarako hitahiako iareo.

7

Fañenga o Taleo

¹ Tamy andro nahafonira' i Mosè ty fampitroarañe i kivohoy, le noriza'e naho nefera'e rekets' o harao'e iabio, naho i kitreliy vaho o harao'e iabio; ie fa noriza'e naho neferañe ² le nañenga ka o mpiaolo' Israeleo, o talèn' anjomban-droae'eo, o mpiaolom-pifokoa'eo, o nijohañ' ambone' o niaheñéoo; ³ binanabana' iereo añatrefa' IEHOVÀ o enga' iareoo, ty sarete milomboke eneñe naho katràka folo-ro' amby, ty sarete raike boak' am-piaolo roe, naho songa ninday ty añombe vaho nengae' iereo aolo' i kivohoy eo. ⁴ Le hoe ty nitsara' IEHOVÀ amy Mosè: ⁵ Rambeso am' iereo o raha zao, hitoloñe am-pitoroñañe i kibohom-pamantañañey vaho atoloro amo nte-Levio, songa ty amy fitoroña'ey. ⁶ Aa le rinambe' i Mosè i sarete rey naho i katraka rey vaho natolo'e amo nte-Levio. ⁷ Natolo'e amo ana' i Geresoneo ty sarete roe naho ty añombe efatse ty amo fitoroña' iareoo, ⁸ le natolo'e amo ana' i Merario ty sarete efatse rekets' añombe valo ty amo fitoroña' iareo ambane' ty fehe' Itamare ana' i Aharone mpisoroñaeo. ⁹ Tsy nimea'e ka o ana' i Kehàteo, amy t'ie mpitoroñe amo raha miavakeo, le tarazoeñe ty a iareo.

¹⁰ Nañenga amy fanokanañe i kitreliy i mpiaolo rey amy andro nañorizañ' azey, binanabana' o mpiaoloo mb'aolo' i kitreliy mb'eo o enga' iareoo. ¹¹ Le hoe t'IEHOVÀ amy Mosè: Hengae' iareo, songa añ' andro'e o enga'eo amy fanokanañe i kitreliiy.

¹² I Naksone ana' i Aminadabe talèm-pifokoa' Iehodà, ty nañenga i enga'ey ami'ty andro valoha'e; ¹³ o nengae'eo: ty antova volafoty nilanja sekele zato-tsi-telo-polo naho soakazo volafoty fitopololo sekele an-tsekelen-toe-miavake songa pea ty mona linalo menake ho enga-mahakama; ¹⁴ naho ty antova volamena folo sekele pea ty emboke; ¹⁵ ty bania naho ty añondrilahy vaho vik' añondrilahy hisoroñañe; ¹⁶ ty oselahy ho engan-kakeo; ¹⁷ ty añombe roe naho añondrilahy lime, oselahy lime, vaho vik' añondrilahy lime ho engan-kanintsîñe. Zay ty nengae' i Naksone ana' i Aminadabe.

¹⁸ Zao ty nengae' i Netanele, ana' i Tsoare, talè' ty fifokoa' Isakhare amy andro faharoey: ¹⁹ nañenga ty antova volafoty nilanja zato-tsi-telopolo sekele, naho ty soakazo volafoty fitopololo sekele an-tsekelen-toetse miavake, songa pea ty mona linalo menake ho enga-mahakama; ²⁰ ty fanake volamena folo sekele, pea ty emboke; ²¹ ty bania naho ty añondrilahy naho vik' añondrilahy hisoroñañe ²² vaho ty vik' ose ho engan-kakeo; ²³ le ho engan-kanintsîñe: ty añombe roe, ty añondrilahy lime, ty oselahy lime vaho vik' añondrilahy lime. Zay ty nengae' i Netanele ana' i Tsoare.

²⁴ I Eliabe ana'i Kelone talèm-pifokoa' i Zebolone ty nañenga amy andro fahateloy: ²⁵ nengae'e ty antova volafoty nilanja zato-tsi-telopolo

sekele, naho ty soakazo volafoty fitompolo sekele an-tsekelen-toe-miavake, songa pea ty mona linaro menake ho enga-mahakama; ²⁶ ty fanake volamena folo sekele, pea ty emboke; ²⁷ ty bania, naho ty añondrilahy vaho vik'añondrilahy hisoroñañe; ²⁸ vaho ty vik' ose ho engan-kakeo; ²⁹ le ho engan-kanintsiñe: ty añombe roe, ty añondrilahy lime, ty oselahy lime, vaho ty vik' añondrilahy lime. Zay ty nengae' i Eliabe ana' i Kelone.

³⁰ I Elitsore ana' i Sedeore, talèm-pifokoa' i Reòbene ty nañenga amy andro fah' efatsey: ³¹ Nengae'e ty antova volafoty nilanja zato-tsi-telopolo sekele, naho ty soakazo volafoty fitompolo sekele an-tsekelen-toe-miavake, songa pea ty mona linaro menake ho enga-mahakama; ³² ty fanake volamena folo sekele, pea ty emboke; ³³ ty bania naho ty añondrilahy vaho vik'añondrilahy hisoroñañe; ³⁴ vaho ty vik' ose ho engan-kakeo; ³⁵ le ho engan-kanintsiñe: ty añombe roe, ty añondrilahy lime, ty oselahy lime vaho vik' añondrilahy lime. Zay ty nengae' i Elitsore ana' i Sedeore.

³⁶ I Selomiele ana' i Tsorisadahy talè' ty fifokoa' i Simone ty nañenga amy andro faha limey. ³⁷ Nengae'e ty antova volafoty nilanja zato-tsi-telopolo sekele, naho ty soakazo volafoty fitompolo sekele an-tsekelen-toe-miavake, songa pea ty mona linaro menake ho enga-mahakama; ³⁸ ty fanake volamena folo sekele, pea ty emboke; ³⁹ ty bania, naho ty añondrilahy vaho vik' añondrilahy hisoroñañe; ⁴⁰ vaho ty vik'ose ho engan-kakeo; ⁴¹ le ho engan-kanintsiñe: ty añombe roe, ty añondrilahy lime, ty oselahy lime vaho vik' añondrilahy lime. Zay ty nengae' i Selomiele ana' i Tsorisadahy.

⁴² I Eliasafe ana' i Dehoele talèm-pifokoa' i Gade ty nañenga amy andro fah'eneñey. ⁴³ Nengae'e ty antova volafoty nilanja zato-tsi-telopolo sekele, naho ty soakazo volafoty fitompolo sekele an-tsekelen-toe-miavake, songa pea ty mona linaro menake ho enga-mahakama; ⁴⁴ ty fanake volamena folo sekele, pea ty emboke; ⁴⁵ ty bania naho ty añondrilahy vaho vik' añondrilahy hisoroñañe; ⁴⁶ vaho ty vik' ose ho engan-kakeo; ⁴⁷ le ho engan-kanintsiñe: ty añombe roe, ty añondrilahy lime, ty oselahy lime vaho vik' añondrilahy lime. Zay ty nengae' i Eliasafe ana' i Dehoele.

⁴⁸ I Elisama ana' i Amihode talèm-pifokoa' i Efraime ty nañenga amy andro faha-fitoy. ⁴⁹ Nengae'e ty antova volafoty nilanja zato-tsi-telopolo sekele, naho ty soakazo volafoty fitompolo sekele an-tsekelen-toe-miavake, songa pea ty mona linaro menake ho enga-mahakama; ⁵⁰ ty fanake volamena folo sekele, pea ty emboke; ⁵¹ ty bania, naho ty añondrilahy vaho vik' añondrilahy hisoroñañe; ⁵² vaho ty vik' ose ho engan-kakeo; ⁵³ le ho engan-kanintsiñe: ty añombe roe, ty añondrilahy lime, ty oselahy lime vaho vik' añondrilahy lime. Zay ty nengae' i Elisama ana' i Amihode.

⁵⁴ I Gamliele ana' i Pedatsore talè' ty fifokoa' i Menasè ty nañenga amy andro fahavaloy. ⁵⁵ Nengae'e ty antova volafoty nilanja zato-tsi-telopolo sekele, naho ty soakazo volafoty fitompolo sekele an-tsekelen-toe-miavake, songa pea ty mona linaro menake ho enga-mahakama; ⁵⁶ ty fanake volamena folo sekele, pea ty emboke; ⁵⁷ ty bania naho ty añondrilahy vaho vik' añondrilahy hisoroñañe; ⁵⁸ vaho ty vik' osen' engan-kakeo; ⁵⁹ le ho engan-kanintsiñe: ty añombe roe naho ty añondrilahy lime, ty oselahy lime vaho vik' añondrilahy lime. Ie o nengae' i Gamliele ana' i Pedatsoreo.

⁶⁰ I Abidane ana' i Gedoný talè' ty fifokoa' i Beniamène ty nañenga amy andro fahasivey. ⁶¹ Nengae'e ty antova volafoty nilanja zato-tsi-telopolo sekele, naho ty soakazo volafoty fitompolo sekele an-tsekelen-toe-miavake, songa pea ty mona linaro menake ho enga-mahakama; ⁶² ty fanake volamena folo sekele, pea' ty emboke; ⁶³ ty bania naho añondrilahy

vaho vik' añondrilahy hisoroñañe ⁶⁴ vaho ty vik'ose ho engan-kakeo; ⁶⁵ le ho engan-kanintsiñe: ty añombe roe, ty añondrilahy lime, ty oselahy lime vaho vik' añondrilahy lime. Zay ty nengae' i Abidane ana' i Gedony.

⁶⁶ I Akièzere, ana' i Amisedahy talèm-pifokoa' i Dane ty nañenga amy andro faha-foloy. ⁶⁷ Nengae'e ty antova volafoty nilanja zato-tsi-telopolo sekele, naho ty soakazo volafoty fitompolo sekele an-tsekelen-toe-miavake, songa pea ty mona linaro menake ho enga-mahakama; ⁶⁸ ty fanake volamena folo sekele, pea' ty emboke; ⁶⁹ ty bania, naho ty añondrilahy vaho vik' añondrilahy hisoroñañe; ⁷⁰ vaho ty vik'ose ho engan-kakeo; ⁷¹ le ho engan-kanintsiñe: ty añombe roe, ty añondrilahy lime, ty oselahy lime vaho vik' añondrilahy lime. Zay ty nengae' i Akièzere, ana' i Amisedahy.

⁷² I Pejiele ana' i Okrane talè' ty fifokoa' i Asere ty nañenga amy andro folo-raik' ambiy. ⁷³ Nengae'e ty antova volafoty nilanja zato-tsi-telopolo sekele, naho ty soakazo volafoty fitompolo sekele an-tsekelen-toe-miavake, songa pea ty mona linaro menake ho enga-mahakama; ⁷⁴ ty fanake volamena folo sekele, pea' ty emboke; ⁷⁵ ty bania, naho ty añondrilahy naho vik' añondrilahy hisoroñañe; ⁷⁶ vaho ty vik'ose ho engan-kakeo; ⁷⁷ le ho engan-kanintsiñe: ty añombe roe, ty añondrilahy lime, ty oselahy lime vaho vik' añondrilahy lime. Zay ty nengae' i Pejiele ana' i Okrane.

⁷⁸ I Akirà ana' i Ainane talè' ty fifokoa' i Naftaly ty nañenga amy andro faha folo-ro-ambiy. ⁷⁹ Nengae'e ty antova volafoty nilanja zato-tsi-telopolo sekele, naho ty soakazo volafoty fitompolo sekele an-tsekelen-toe-miavake, songa pea ty mona linaro menake ho enga-mahakama; ⁸⁰ ty fanake volamena folo sekele, pea ty emboke; ⁸¹ ty bania naho ty añondrilahy vaho vik' añondrilahy hisoroñañe; ⁸² vaho ty vik'ose ho engan-kakeo; ⁸³ le ho engan-kanintsiñe: ty añombe roe, ty añondrilahy lime, ty oselahy lime vaho vik' añondrilahy lime. Zay ty nengae' i Akirà ana' i Ainane.

⁸⁴ Zao ty engam-panokanañe i kitreliy boak' amo mpiaolo' Israeleo, tamy nañorizañe azey: ty antova volafoty folo-ro'amby le soakazo folo-ro' amby le fanake volamena folo-ro'amby. ⁸⁵ Songa nilanja zato-tsi-telo-polo sekele i antova rey, sindre fitom-polos sekele i soakazo rey, ty tontom-bolafoty amy fanake rey le ro'arivo-tsi-efa-jato sekele an-tsekelen-toe-miavake; ⁸⁶ i fanake volamena pea ty emboke folo-ro' amby rey songa nilanja folo sekele an-tsekelen-toetse miavake, le zato-tsi-roapolos sekele ty tontom-bolamena amy fanake rey; ⁸⁷ le nitonto ho bania folo-ro' amby i añombe nengaen-kisoroñañe rey, le folo-ro' amby i añondrilahy rey, le folo-ro' amby ty vik' añondrilahy naho o enga-mahakama'eo vaho folo-ro'amby ty vik'ose nanoeñe engan-kakeo. ⁸⁸ Roapolo-efats' amby ty tontoñan' añombelahy nengaen-ko soron-kanintsiñe, nem-polo ty añondrilahy, nem-polo ty oselahy vaho nem-polo ty vik' añondry. Zay o engam-panokanañe i kitreliio, ie orizañe.

⁸⁹ Aa naho nizilik' amy kibohom-pamantañañey t'i Mosè hifanaontsia'e, le jinanji'e i fiarañanañañe nitsara ama'e boak' ambone' i toem-pijebañañe mikapeke i vatam-pañinay añivo' i kerobe roe reiy; zay ty fitsara'e ama'e.

8

*I Jiro Fito Rey
Avo. 25.31-40*

¹ Le hoe ty nitsara' IEHOVÀ amy Mosè: ² Saontsio amy Aharone vaho ano ty hoe: Ie hañajary o jiroo, le ampañazavao mb'aolo mb'eo i fitàn-jiroy

i jiro fito rey. ³ Le nanoe' i Aharone zay; nalaha'e i jiro rey hañazava'e mañaoło i fitàn-jiroy ty amy nandilia' IEHOVÀ i Mosè. ⁴ Inao ty nanoeñe i fitàn-jiroy: volamena pinepeke i taho'ey pak' amboñe'e eo; toe satam-pipepehañe, ty amy sare natoro' IEHOVÀ amy Mosèy, zay ty nanoe'e i fitàn-jiroy.

Ty Fañorizañe o nte-Levio

⁵ Le hoe ty nitsara' IEHOVÀ amy Mosè: ⁶ Aviho amo ana' Israeleo o nte-Levio vaho efero. ⁷ Zao ty hañefera'o iareo: amitsezo am' iereo ty ranon' enga-kakeo, le ampiozáñem-piharatse ty fañòva' iareo iaby, naho ampanasao sikiñe vaho ampiliovo. ⁸ Le ampangalao iareo ty bania rekets' i enga-mahakama'ey, i mona linaro menakey, vaho ampangalao bania raike ho engan-kakeo. ⁹ Le aseseo mb' añatrefa' i kibohom-pamantañañey mb'eo o nte-Levio vaho atontono ty valobohò' Israele; ¹⁰ Aa naho fa navori'o añatrefa' IEHOVÀ o nte-Levio le hanampe fitàñe amo nte-Levio o ana' Israeleo; ¹¹ le hengae' i Aharone ho engan-kelahela am' IEHOVÀ o nte-Levy boak' amo ana' Israeleoo hitoroñe IEHOVÀ. ¹² Le hanampeza' o nte-Levio fitàñe i bania rey, naho hengae'o ho engan-kakeo ty raike vaho ho soroñañe am' IEHOVÀ ty raike, hañefera'o o nte-Levio. ¹³ Aa le ajohaño añatrefa' i Aharone naho o ana'eo o nte-Levio vaho engao am' IEHOVÀ ho engan-kelahela.

¹⁴ Zay ty hañambahá'o amo ana' Israeleo o nte-Levio le ho ahiko o nte-Levio. ¹⁵ Henane zay, himoake hitoroñe amy kibohom-pamantañañey o nte-Levio, ie fa neferañe naho nengaeñe ho engan-kelahela. ¹⁶ Songa natolotse ahiko boak' amo ana' Israeleo; fa rinambeko ho amako ho solo' ze hene manoka-koviñe; ze fonga tañoloñoloñan' ana' Israele. ¹⁷ Toe anjarako ze hene valohan' ana' o ana' Israeleo, ondaty naho hare; tamy andro nipaohako ze fonga valohan' ana' i Mitsraimey ty nañambahako iareo ho ahy. ¹⁸ Le rinambeko ho soleo' o nte-Levio o tañoloñoloñan' ana' Israeleo; ¹⁹ vaho natoloko amy Aharone naho amo ana'eo aivo o ana' Israeleo ho ravoravo o nte-Levio, hitoloñe ami'ty fitoloña' o ana' Israeleo amy kibohom-pamantañañey, naho hañefetse o ana' Israeleo tsy mone hiboak' amo ana' Israeleo ty angorosy naho harinea' o ana' Israeleo i efe-miavakey.

²⁰ Zay ty nanoe' i Mosè naho i Aharone vaho ty valobohò' Israele amo nte-Levio; ze hene nandilia' IEHOVÀ i Mosè ty amo nte-Levio ty nanoe' o ana' Israeleo. ²¹ Le nañalio vatañe o nte-Levio naho nanasa' o siki'eo iareo, naho nengae' i Aharone am' IEHOVÀ ho ravoravo miavake, vaho nefera'i Aharone hañaliova'e iareo. ²² Ie henane zay nimoak' an-kibohom-pamantañañe ao o nte-Levio hitoloñe añatrefa' i Aharone naho o ana'eo; i nandilia' IEHOVÀ amy Mosè ty amo nte-Levio ty nanoñañe am'iareo.

²³ Le hoe ty nitsara' IEHOVÀ amy Mosè: ²⁴ Inao ty amo nte-Levio: ie roapololo-taoñe lim' amby mañambone ro hizilike hitoloñe an-kibohom-pamantañañe ao; ²⁵ ie limampolo taoñe ro hitroatse amo fitoroña'eo, le tsy hitoloñe ao ka. ²⁶ F'ie mete hañimba o rahalahi'eo an-kibohom-pamantañañe ao, hisary o tolon-draha'eo fa tsy hitromake. Zay ty hanoe'o amo nte-Levio amo fitoloña'eo.

¹ Nitsara amy Mosè t'IEHOVÀ an-dratraratra' i Sinay aña ami'ty volam-balohan-taom-paharoe' fienga' iareo an-tane Mitsraime, ami'ty hoe: ² Hambena' o ana' Israeleo i Fihelañey amy namotoañañe azey, ³ ami'ty andro faha-folo-efats' ambi' ty volañe toy naho hariva ty hambena' areo aze amy namantañañe azey; o fañè'e iabio naho ze hene fepe'e ty hambena' areo. ⁴ Aa le sinaontsi' i Mosè amo ana' Israeleo ty hiamebeñe i Fihelañey. ⁵ Le nambena' iareo te folakandro-miroñe amy andro faha-folo-efats' ambi' i volam-baloha'ey am-patrambei' i Sinay i Fihelañey; amy nandilia' IEHOVÀ i Mosè ty nanoe' o ana' Israeleo. ⁶ Ie amy zao teo t'indaty nandeo-batañe ami' ty lolo vaho tsy nete niatreke i Fihelañey amy andro zay; aa le nimb' amy Mosè naho i Aharone amy àndroy, ⁷ le nanoe' indaty rey ty hoe, Maleotse ami'ty fate' ondaty zahay. Aa vaho ho sebañeñe tsy hitraok' amo ana' Israeleo hibanabana i enga' IEHOVÀ amy namantañañe azey hao? ⁸ Le hoe t'i Mosè am' iereo, Mahaliñisa heike hitsanoñako ty ho lylie' IEHOVÀ ty ama' areo.

⁹ Le hoe t'IEHOVÀ amy Mosè, ¹⁰ Misaontsia amo ana' Israeleo, ty hoe: Ndra iaia t'indaty ama' areo ndra amo tarira' areoo maleotse ami'ty lolo, ndra t'ie am-pitaveañañe aña, le mbe hambena'e i Fihelañ'Ambone' IEHOVÀ; ¹¹ ami'ty andro miroñe' i faha-folo-efats' ambi' i volam-paharoe'y ty hañambena'e aze. Ho kamae' iareo ama'e ty mofo po-dalivay mitraok' aña-mafaitse. ¹² Ie tsy hanisa ami'ty maraiñe, le tsy ho pozacheñe o taola'eo. Amo fañè' i Fihelañey iabio ty hañambena' iareo aze. ¹³ Fe t'indaty malio, tsy am-pañaveloañañe aña, ie ado'e i Fihelañey tsy ambena'e; toe haitoeñe am'ondati'eo indatiy, amy t'ie tsy nibanabana i enga' IEHOVÀ amy namantañañe azey; ho vavè' indatiy ty hakeo'e. ¹⁴ Aa naho mañialo ama' areo ao ty ambahiny, ie te hañambeñe i Fihelañe am' IEHOVÀ, le i fañèm-Pèsakey naho o fepé'eo ty anoñañe aze, ho raike ty fañè' areo naho ty amy ambahiniy vaho ty amy nisamak' amy taney.

*I Rahoñey naho i Afoy
Avo. 13.21-22; 40.34-38*

¹⁵ Amy andro nampitroareñe i kivohoiy le nakopo' i rahoñey i kivohoy, i kibohom-pañinay; amy harivay pak' ami' ty maraiñe, ie ambone' i kivohoy hoe afo. ¹⁶ Zay ty nilili'e: nikolopofe' i rahoñey te antoandro vaho nihoe afo te haleñe. ¹⁷ Naho nonjoneñe tsy ho ambone' i kivohoy i rahoñey, le nionjomb'eo o ana' Israeleo; Aa naho nitsangañe i rahoñey le nitobe eo o ana' Israeleo. ¹⁸ Nandily t'IEHOVÀ, le nienga o ana' Israeleo, le nandily t'IEHOVÀ vaho nitobe iereo; naho nijohañe ambone' i kivohoy i rahoñey, le mbe nitobe eo avao. ¹⁹ Ndra te nitolom-pijohañe ambone' i kivohoy andro maro i rahoñey le nambena' o ana' Israeleo ty hatoro' IEHOVÀ, vaho tsy nañavelo. ²⁰ Le amy zay, he nipetake ambone' i kivohoy andro tsy ampeampe i rahoñey, le ami'ty lili' IEHOVÀ, nijohañe amy tobey iareo, vaho ami'ty lili' IEHOVÀ, nañavelo. ²¹ Teo i rahoñey te nitoboke hariva pak' ami'ty maraiñe, naho nionjoñe i rahoñey le nienga iereo, ke te tambatse ey andro raike naho haleñe raike i rahoñey vaho nionjoñe, le nienga iereo. ²² Ke roe andro, he volañe raike, kera taoñe raike ty nijohaña' i rahoñey ambone' i kivohoy, le nitolon-kitobe ey avao o ana' Israeleo, tsy nañavelo; ie naonjoñe, vaho nañavelo. ²³ Am-palie' IEHOVÀ, le nitobe iereo, vaho am-palie' IEHOVÀ, nañavelo iereo; nambena' iareo ze nafanto' IEHOVÀ, ze nitsarae' IEHOVÀ am-pitá' i Mosèy.

10

Antsiva Volafoty

¹ Hoe ty nitsara' IEHOVÀ amy Mosè: ² Tseneo trompetra volafoty roe am-pipepèhañé; hanontonañé i valobohokey naho hikoihañé ty fiavotañé amy tobey. ³ Ie tiofeñé in-droe le fonga hifanontoñé ama'o an-dalan-kibohom-pamantañé eo i valobohòkey. ⁴ F'ie tiofeñé in-draike, le o mpiaoloo, o talèm-pifokoa' Israeleo, ty hiropak' ama'o. ⁵ Ie itiofan-koike le hiavotse o mpitobe atiñanañé eio. ⁶ Ie tiofen-koike fañindroe'e le o mpitobe atimoo ro hienga; mionjoñé iereo te itiofan-koike. ⁷ Naho hatontoñé i valobohòkey, le mitiofa fe tsy an-koike. ⁸ O ana' i Aharoneo, o mpisoroñeo, ro hitioke i trompetray; ho fañé' areo hanitsike o hene tarira' areo mifandimbeo. ⁹ Ie mionjoñé mb' añ'aly an-tane' areo ao mb' ami'ty rafelahy mañembetse anahareo, le hitiofan-koike amo trompetrao, vaho ho tiah y añatrefa' IEHOVÀ Andrianañahare' areo vaho ho rombaheñé amo rafelahi'areoo. ¹⁰ Ie amo andro firebeha' areoo, naho amo andro nifantañenéo, naho amo jiri-bolañeo le ho tiofe' areo ambone' o fisoroña' areoo naho ambone' o engam-pañanintsi' areoo o trompetrao, ho faniahiañé anahareo añatrefan' Andrianañahare' areo.

Zaho IEHOVÀ Andrianañahare' areo.

Mienga' i Sinay

¹¹ Ie amy andro faha roapolo' ty volam-paharoe' i taom-paharoeiy, le naonjoñé ambone' i kibohom-pañinay i rahoñey. ¹² Le nionjom-beo ankifange'e o ana' Israeleo, nienga i fatram-bei' i Sinaiy vaho nitsangañé am-patrambei' i Parane eo i rahoñey. ¹³ Zay ty fienga' iareo valoha'e ami'ty nandilia' IEHOVÀ am-pità' i Mosè. ¹⁴ Ty sain-tobe' Iehodà ty niavotse valoha'e, an-ki-lia' ki-lian-dahin-defoñé, talè' i firimboñan-dahindefo'ey t'i Nakesone ana' i Aminadabe, ¹⁵ naho talè' i firimboñan-dahin-defom-pifokoa' o ana' Isakhareoy t'i Netanele ana' i Tsoare, ¹⁶ vaho talè' o lahodefom-pifokoa' o nte-Zeboloneo t'i Eliabe ana' i Kelone.

¹⁷ Nazotso amy zao i kivohoy vaho nionjoñé o ana' i Geresoneo naho o ana' i Merario, ninday i kivohoy. ¹⁸ Nionjom-beo ka ty sain-tobe' i Reòbene, naho nitalèm-pirimboñam-pifokoa'e t'i Eltsore ana' i Sedeore, ty amo lian-dahin-defo'eo, ¹⁹ naho talè' o lahodefom-pifokoan' ana' i Simoneo t'i Selomiele ana' i Tsorisadahy, ²⁰ vaho talè' o lahodefom-pifokoan' ana' i Gadeo t'i Eliasafe ana' i Rehoele.

²¹ Nionjoñé amy zao o nte-Kehàteo ninday o raha miavakeo, fa naoreñé aolo' ty fiavi' iareo i kivohoy. ²² Nionjoñé amy zao ty sain-tobe' o ana' i Efraimeo ty amo lian-dahin-defo'eo, i Elisama ana'i Amihode ty talèm-pirimboña'e, ²³ naho talèn-dahin-defom-pifokoan' ana' i Menase t'i Gamlièle ana' i Pedatsore, ²⁴ vaho talèn-dahin-defom-pifokoa' o nte-Beniamèneo t'i Abidane ana' i Gedony.

²⁵ Nionjoñé ami'ty naha-mpivoli' i tobey ty sain-tobe' o ana' i Daneo ty amo lian-dahin-defo'eo; talè' i firimboña'ey t'i Akièzere, ana' i Amisedahy, ²⁶ naho talèn-dahin-defom-pifokoan' ana' i Asere t'i Pejiele ana' i Okrane, ²⁷ vaho talèn-dahin-defom-pifokoan' ana' i Naftaly t'i Akirà ana' i Ainane. ²⁸ Zay ty nionjona' o ana' Israeleo, ty amo lia-rain-dahin-defo'eo—ie nionjoñé.

²⁹ Le hoe t'i Mosè amy Kobabe ana' i Reoele nte-Midiane, rafoza' i Mosè, Mionjoñé mb'an-tane' nitsarae' IEHOVÀ ty hoe: Hatoloko azo. Mindreza ama'ay, le hanoe'ay soa; amy te nitsara soa ho am' Israele t'IEHOVÀ. ³⁰ Le

hoe ty natoi'e, Tsy homb'eo raho, fa hienga mb'an-taneko naho mb'an-drolongoko aña. ³¹ Aa hoe re, Miambane ama'o, ko mienga kanao fohi'o te hitobe ampatrambey aña vaho ho solom-pihaino'ay rehe. ³² Ie amy zao, naho indreza'o lia, le ze hasoa hanoe' IEHOVÀ ama'ay ro hanoe'ay ama'o.

³³ Aa le nenga' iareo telo andro ty vohi' IEHOVÀ le niaolo iareo telo andro ty vatam-pañina' IEHOVÀ hipay fitobeañe. ³⁴ Tambone' iereo ey i raho' IEHOVÀ amy antoandro niengà' iereo i tobeiy. ³⁵ Aa ndra mbia' mbia ty nionjona' i vatam-pañinay le nióngake t'i Mosè nanao ty ti-hoe: Miongaha, ry IEHOVÀ, abaibaio o rafelahi'oo vaho ampitribaho an-day añatrefa'o o malaiñe Azoo. ³⁶ Ie nitsangañe, le ty hoe ka ty nanoe'e: Mimpolia ry IEHOVÀ amo alealem-pifokoa' Israeleo.

11

Mitoreo an-Dratraratra ao

¹ Ie aña, le niñeñoñeñe hoe mpitoreo an-kasotriañe, an-dravembia' IEHOVÀ ondatio, aa ie jinanji' IEHOVÀ, le niviañe ty haviñera'e, naho nisolebotse am' iareo ty afo' IEHOVÀ, namorototo ty aña' olo' i tobey. ² Aa le nikaikaik' amy Mosè ondatio naho nihalaly am' IEHOVÀ t'i Mosè vaho nakipeke i afoy. ³ Aa le natao'e ty hoe Tabera* i taney amy te niforehetse am'iareo ty afo' IEHOVÀ.

⁴ Teo te nivariñe an-kasijy opiaroteñe am'iareoo; mbore nibabababa ka o ana' Israeleo ami'ty hoe: Ia ty hanjotso hena ama'ay? ⁵ Tiah'iay o fiañe nikamae'ay tsy amam-bili'e e Mitsraime añaeo naho ty kiseny, ty vazavo, ty foti-voly, ty tangolo vaho o tangolo-laio; ⁶ fe mifoezapoezake henaneo; tsy ino ty aolom-pihaino'ay, naho tsy ty màne tiañ' avao!

⁷ Nanahake voan' ahepoty i maney fe nimena hoe vañemba. ⁸ Namory aze mbeo' mbeo ondatio, le ke dinemodemo'e am-bato fandisañañe, he nilisane'e an-deoñe, naho nahandroeñe am-balàñe vaho namboareñe mofo-vonga'e; ty hafiri'e le hoe mofo natoñak' ami'ty menake. ⁹ Nivotrak' amy tobey ty zono te haleñe le nindre nihintsañe ama'e i maney.

¹⁰ Ie jinanji' i Mosè ty fangoihoi' ondatio, nanitsike o hasavereña'eo, songa lahilahy an-dalan-kiboho'e eo, le nisolebotse ty haviñera' IEHOVÀ; toe niboseke ka t'i Mosè. ¹¹ Aa le hoe t'i Mosè am' IEHOVÀ, Ino ty nanotria'o i mpitoro'oy? Le manao akore t'ie tsy nahaonim-pañisoñañe am-pivazoho'a'o, kanao nampijinia'o o kilanka' ondaty iaby retiañe?

¹² Zaho hao ty nampitsonkèreñe ondatio? Zaho hao ty rae' iareo, kanao anoa'o ty hoe: Otroño aña'araña'o ao manahake ty fiotroña' ty mpiatrak' ajaja, pak'an-tane nifanta'o aman-droae' iareo? ¹³ Aia ty hahatreavako hena hazotsoko am' ondatio? Ami'ty fitoreova' iareo ty hoe, Meo hena ho kamae'ay! ¹⁴ Tsy leoko vavèñe ondaty retia, zaho raike, fa loho mavesatse amako. ¹⁵ Aa naho zao ty anoa'o ahy le ehe avetraho am-pañohofan-doza, naho toe nahatreia fañisoñañe am-pivazoho'a'o, fa ko apo'o ho treako o faloviloviakoo!

Ty Roandriañe Fitompolo

¹⁶ Aa le hoe t'IEHOVÀ amy Mosè: Anontoño ondaty fitompolo amo roandria' Israeleo, ze fohi'o te mpiaolo' ondatio naho mpameleke iareo; le ampihovao mb'an-kibohom-pamantañam-beo, hitrao-pijohañe ama'o.

¹⁷ Le hizotso mb'eo raho hifanaontsy ama'o, le handivako am' iereo i Arofo ama'oy vaho hitrao-pivave ama'o ondatio, soa te tsy ihe avao ty hivave.

* **11:3** taberà: niforehetse

¹⁸ Le ano ty hoe amy màroy, Miefera vatañe ho ami' ty hamaray, fa hikama hena amy niroveta' areo am-pijanjiña' IEHOVÀ ami'ty hoe, Ia ty hanjotso hena ama'ay? Ie nierañerañe' e Mitsraime aña. Aa le hanjotsoa' IEHOVÀ hena, vaho hikama nahareo. ¹⁹ Tsy indraik' andro ty hikama'areo, tsy roe andro, tsy lime andro, tsy folo andro, tsy roapolo andro, ²⁰ fa volañe raike, ampara' te miakatse am-piantsona' areo vaho hampangorý anahareo, amy te nisirikae' areo t'IEHOVÀ añivo' areo ao, ie nangololoike añatrefa'e ami'ty hoe, Ino ty niavotan-tika amy Mitsraime? ²¹ Aa hoe t'i Mosè, Lahin-defo enen-ketse o mañariseho ahio; Ihe manao amako ty hoe, Hanjotsoako hena hikama' iareo volañe raike. ²² Handentàñe añondry naho añombe hao, hahatsake iareo? Ke hanontonañe ze hene fiañe an-driak' ao? ²³ Le hoe t'IEHOVÀ amy Mosè, Nitomoreñe hao ty fità' IEHOVÀ? Mbe ho oni'o aniany ke ho tafetetse i rehakoy ke tsie.

²⁴ Aa le niakatse aña t'i Mosè naho sinaontsi'e am' iereo i tsara' IEHOVÀ, le natonto'e t'indaty fitompolo amo roandria' ondatio vaho najado'e añariari' i kivohoy. ²⁵ Le nizotso amy rahoñey t'IEHOVÀ nangalak' amy Arofo ama'ey vaho natolo'e amy roandriañe fitompolo rey; ie nivotraha' i Arofoy le nitoky, fe tsy ho nainai'e.

²⁶ Toe mbe nitambatse an-tobe ao t'indaty roe ama'e: i Eldade ty tahina ty raike naho i Medade ty tahina' ty raike, vaho nivotrak' am'iereo i Arofoy. Toe sinokitse iereo fe tsy nañavelo mb' amy kivohoy mb'eo, fa nitoky an-tobe ao. ²⁷ Le nihitrihitry mb'amy Mosè mb'eo ty ajalahy nitalily ama'e ty hoe: Mitoky an-tobe ao t'i Eldade naho i Medade. ²⁸ Aa le hoe ty natoi' Iehosoa ana' i None, mpiamy Mosè ampara' ty nahaajalahy aze: O talèko, rarao iereo! ²⁹ Le hoe t'i Mosè ama'e, Mamarahy ahy v-iheo? Ee te songa nimpitoky ondati' IEHOVÀ, naho sindre nampivotraha' IEHOVÀ i Arofo'ey!

³⁰ Aa le nimpoly mb'an-tobe mb'eo t'i Mosè naho o roandria' Israeleo.

O Hatrakatrakeo

³¹ Aa le boak' am' IEHOVÀ ty tioke ninday hatrakatrake hirik' an-driak' aña, le nampipoha'e marine i tobey ie nahatakate lia' andro raike mb'atia vaho lia'andro raike mb'eroa añariari' i tobey; ni-roe kiho ambone' i taney varañe ty fitoabo'e. ³² Aa le nifanehak' amy àndroy naho amy haleñey naho amy loakandroy ondatio nijohañe ey nanontoñe o hatrakatrakeo le ze nanontoñe tsy ampe mbe nahatsake folo homere; vaho songa nandafike ty aze marine i tobey. ³³ Fe mbe añivom-pamotsi'e ao i henay ie mbe tsy nitotoe'e, le nisolebotse am' iereo ty haviñera' IEHOVÀ vaho pinao' IEHOVÀ ami'ty angorosy loza. ³⁴ Aa le natao'e [†]Kibrate Hata'avà i taney amy te eo ty nandenteñañe ondaty aman-kadrao. ³⁵ Boake Kibrate Hata'avà ao ondatio ro nangovovòke imb'e Katserote mb'eo vaho nitobe e Katserote aña.

12

Farahi' i Aharone naho i Miriame

¹ Ie amy zao, nifosae' i Miriame naho i Aharone t'i Mosè ty amy nte-Kose nengae'ey; ie nañenga ampela nte-Kose ho tañanjomba'e. ² Le hoe iereo, I Mosè avao hao ty nampitsara' IEHOVÀ? Tsy itika ka hao ty nilañonà'e. Jinanji' IEHOVÀ zay. ³ Toe ondaty nimpirè-batañe t'i Mosè, lombolombo ze hene ondaty ambone ty tane toy. ⁴ Aa le nanao ty hoe amy Mosè naho i Aharone vaho i Miriame amy zao t'IEHOVÀ, Akia nahareo telo, mb' ankibohom-pamantañañe mb'eo! Aa le niavotse mb'eo i telo rey. ⁵ Nizotso

[†] **11:34** Kibrate Hatàava: kiborin-kadrao

amy rahoñe nijoalay t'IEHOVÀ naho nijohañe an-dalambei' i kivohoy vaho kinanji'e t'i Aharone naho i Miriame le niheo mb'eo iereo roe. ⁶ Le hoe re, Janjiño o entakoo: naho ama' IEHOVÀ ty mpitoky le anoñonako vatañe añ' aroñaroñe vaho itaroñako ami'tynofy. ⁷ Fe tsy zay amy Mosè mpitoroko; Ie matoe amy hene trañokoy. ⁸ Ie ty taroñako falie am-palie, an-kazavàñe fa tsy aman-drazan-tsara; ie ty mahaisake ty talinjo' IEHOVÀ. Tsy nahahembañe anahareo hao ty nañinje i Mosè mpitorokoy? ⁹ Aa le nisolebotse am' iereo ty haviñera' IEHOVÀ, le nienga re.

¹⁰ Aa naho nienga boak' ambone' i kivohoy i rahoñey le nizoeñe te angamae t'i Miriame, foy mikatsatsaoke. Ie nitolik' amy Miriame t'i Aharone, nizoe'e te angamae. ¹¹ Le hoe t'i Aharone amy Mosè, O ry talèko! miambane ama'o, ko apo'o ama'ay i fandilara'ay, i hakeo nanoe'ay an-kagegeañey. ¹² Ehe ko ampihambañe'o ami'ty lolo niboloñañe boak' an-tron-drene'e ao, ie fa voroke ty antsasa' o nofo'eo. ¹³ Aa le nitoreo am' IEHOVÀ t'i Mosè nanao ty hoe, Ry Andrianañahare, mihalaly ama'o: Jangaño re! ¹⁴ Le hoe t'i IEHOVÀ amy Mosè, Naho nitsorihan-drae'e antarehe'e, tsy ho nivavè'e fito andro hao ty hasalara'e? Aa le adono re hagabeñe alafe' i tobey fito andro; ie modo le rambeseñe indraike. ¹⁵ Aa le narindriñe alafe' i tobey fito andro t'i Miriame; le tsy nionjoñe ka ondatio am-para' te nampihovaeñe ao indraike t'i Miriame.

¹⁶ Añe zay le nienga i Katserote ondatio nitobe am-patrambei' i Parane aña.

13

Namantoke Mpitingañe

Its 1.19-33

¹ Hoe ty nitsara' IEHOVÀ amy Mosè, ² Añiraho ondaty hitingañe an-tane Kanàne aña, ie hatoloko amo ana' Israeleo, songa amantoho ondaty raike o fifokoan-droae'eo, fonga mpamelek' am' iereo. ³ Aa le nampionjone' i Mosè boak' am-patrambei' i Parane ao iereo ami' ty nandilia' IEHOVÀ, songa mpiaolo' o ana' Israeleo indaty rey. ⁴ Aa le zao o tahina' iareoo: tam-pifokoa' i Reòbene, t'i Samoà ana' i Zakore; ⁵ tam-pifokoa' i Simone t'i Safate ana' i Horý; ⁶ tam-pifokoa' Iehodà t'i Kalebe ana' Iefonè; ⁷ tam-pifokoa' Isakhare t'Igale ana' Iosefe; ⁸ tam-pifokoa' i Efraime t'i *Hoseà ana' i None; ⁹ tam-pifokoa' i Beniamène t'i Palty ana'i Rafò; ¹⁰ tam-pifokoa' i Zebolone t'i Gadiele ana'i Sodý; ¹¹ tam-pifokoa' Iosefe, tam-pifokoa' i Menasè: t'i Gadý ana' i Sosý; ¹² tam-pifokoa' i Dane, t'i Amiele ana' i Gemalý; ¹³ tam-pifokoa' i Asere t'i Setore ana' i Mikhaele; ¹⁴ tam-pifokoa' i Naftalý t'i Nakhbý ana' i Vofsý; ¹⁵ tam-pifokoa' i Gade, t'i Geoele ana' i Makhý; ¹⁶ Ie ro tahina' ondaty nafanto' i Mosè hitingañe i taneio, le novae' i Mosè ty tahina' i Hoseà ho [†]Iehosòa.

¹⁷ Aa le nirahe' i Mosè iereo hitingañe an-tane Kanàne aña naho nafanto'e ty hoe: Mionjona mb' amo Negeveo mb'eo vaho mañambonea mb' am-bohibohitse aña, ¹⁸ le isaho te inoñe i taney naho ondaty mimoneñe aoo ke maozatse ke maifoifo, he tsy ampeampe he maro; ¹⁹ le i tane imoneña' iareoy, ke soa he raty; naho o rova itoboha' iareoo ke t'ie tobe he arikoboñen-kijoly; ²⁰ le i taney ke kobokara he tsy mamokatse; ke mitiry hatae he tsie. Aa le mahasibeha vaho añandesó ty voka' i taney. Toe san-doha-voam-balòboke henane zay.

* 13:8 Hosea: fandrombaha † 13:16 Iehosoa: Fandrombahan' Añahare

²¹ Aa le nienga iereo nijoko boak' am-patrambei' i Tsine mb'e Rekhobe[‡] am-pimoaha' i Hamate[§] mb'eo. ²² Le nionjoñe mañatimo naho nigodam-b'e Kebrone naho Akimane naho e Sesaý vaho e Talmay, mb'amo ana' i Anàkeo mb'eo. (Naoreñe fito taoñe taolo' i Tsoane e Mitsraime aña ty Kebrone.) ²³ Le nivotrak' am-bavatane' Eskole eo iereo vaho nibira tsampam-baloboke rekets' angaroza'e raike nampitarazoeñe ondaty roe am-baoñe, naho nangalak' ampongabeindañitse vaho aviavy. ²⁴ Natao Vavatane' i Eskole* i taney ty amy angaroza nihitsife' o ana' Israeleoy.

Ty Talily o Mpitingañeō

²⁵ Ieefa-polo andro aña le nimpoly i nitampoñe i taney rey, ²⁶ le niheo mb'amy Mosè naho i Aharone vaho i valobohò' Israele am-patram-bei' i Parane e Kadese mb'eo ninday saontsy ama'e naho amy valobohò' Israele iabiy, vaho naboa' iereo ty voka' i taney. ²⁷ Le hoe ty natalili' iareo ama'e, Nigodañe'ay i tane' nañiraha'o anaiy. Toe iorikorihan-dronono naho tantele, hehe ty voka'e. ²⁸ Fe misañatse ondaty mimoneñe amo taneo; le faheran-kijoly fatratse o rova'eo vaho jabajaba; mbore nioni'ay ao o ana' i Anàkeo. ²⁹ Mimoneñe an-tane atimo ao o nte-Amalekeo; le mimoneñe am-bohibohitse ao o nte-Kheteo[†] naho o nte-Iebosèo vaho o nte-Amareo; le mimoneñe añ' olo' i riakey naho añ' olo' i saka Iardeney o nte-Kanàneo.

³⁰ Nampianjiñe' i Kalebe añatrefa' i Mosè ondatio, nanao ty hoe: Antao hionjoñe mb'eo amy zao hitavañe i taney, tsy kalafo te mahagiok' aze tika. ³¹ Fe nanao ty hoe ondaty niharo-lia ama'eo: Tsy lefen-tika ty hionjoñe haname ondatio amy t'ie maozatse te aman-tika. ³² Le naboele' iereo ty talily nahatsonevotse o ana' Israeleo ty amy tane nitingane' iereoy, ami'ty hoe: I tane niranga'ay mpitingañey, le tane mampibotseke o mpimone'eo, vaho mijoalajoala ze hene ondaty niisa'ay ama'e. ³³ Nioni'ay ondaty [‡]joakeo (toe tarira' ondaty joake o nte-Anàkeo); le nihoe valala am-pañentea'ay zahay vaho zahay am-pahaisaha' iareo.

14

Miola Ondatio

¹ Aa le nañonjom-peo am-pangolalaihañe i valobohòkey, naho nangololoike ty rovetse amy haleñey ondatio, ² vaho nitoreo amy Mosè naho amy Aharone o ana' Israele iabio; le nanoe' i valobohòkey ty hoe, Ee t'ie nivetrak' an-tane Mitsraime ao! Ndra kitra'e nikoromak' am-patrambey atoa! ³ Ino ty nandesa' IEHOVÀ mb'an-tane atoy ho tsingoritriem-pibara reke-keleiañe ho tsindroke; tsy hàmake t'ie himpoly mb'e Mitsraime mb'eo? ⁴ Aa le hoe ty fivesoveso' iareo, Antao hijoboñe mpiaolo vaho himpoly mb'e Mitsraime aña.

⁵ Nibabok' an-daharañe añatrefa' i favorim-balobohò' o ana' Israeleoy amy zao t'i Mosè naho i Aharone. ⁶ le nandriatse sarimbo t'Iehosoa ana' i None naho i Kalebe ana' Iefonè, i nimpiamo nitingañe i taneio rey; ⁷ le hoe ty enta' iareo amy valobohò' Israele, I tane nirangà'ay mpitingañeo le tane loho fanjaka. ⁸ Aa naho noro' IEHOVÀ tika, le ie ty hanese naho hanolotse antika i taney, toe tane orikorihen-dronono naho tantele. ⁹ Aa ko miola am' IEHOVÀ, ko mirevendreveñe am'ondati' i taneio, ie fitsindrohan-tika; toe nisitak' am' iereo ty fañarova'e vaho amantika

[‡] **13:21** Rekhobe: fatrambey [§] **13:21** Hamate: aman-kijoly fatratse * **13:24** Eskole: vavatane ndra torahañe † **13:29** Khete: tsololoke, hetraketrake [‡] **13:33** Heb: nte-Nefile

t'IEHOVÀ. Ko ihembañañe. ¹⁰ Fe vinola' i favoribey iabiy t'ie haretsumbato, vaho niboak' amo ana' Israele iabio, an-kibohom-pamantañañe ey, ty enge' IEHOVÀ.

¹¹ Le hoe t'IEHOVÀ amy Mosè, Pak' ombia ty mbe hañinjea' ondaty retiañe ahy? Ampara' ombia t'ie mbe tsy hahafiatu amako ty amo hene viloñe nanoeko añivo' iereoo. ¹² Ho paoheko angorosy naho harotsako, vaho ihe ty hanoeko foko ra'elahi mandikoatse naho maozatse te ama'e.

Mañalañañe t'i Mosè

¹³ Aa hoe t'i Mosè am' IEHOVÀ, Le ho tsanòñe' o nte-Mitsraimeo, te i haozara'oy ty nañavota'o ondaty retiañe boak' añivo' iareo ao, ¹⁴ le hatao' iareo amo mpimone' ty tane toio, te tsinano' iereeo te ihe ry IEHOVÀ ro añivo' ondaty retoñañe, amy te Ihe ry IEHOVÀ ro ifañatrefandaharañañe naho mitroatse ambone' iereeo i raho'oy, vaho ihe ro Fiaolo' iareo amy rahoñe mijoalay te handro naho añafo mitiotiotse te haleñe.

¹⁵ Aa naho zamane'o hoe ondaty raike ondaty retiañe, le hanao ty hoe o tane iaby nahajanjiñe ty hara'elahi'oo, ¹⁶ Kanao tsy nahafanese ondaty retiañe mb'an-tane nitolora'e am-panta mb'eo t'IEHOVÀ, le nimongore'e an-dratraratra aña. ¹⁷ Aa le ihalaliako, ehe ho ra'elahi ty haozara' i Talè amy nitsarae'o ty hoe, ¹⁸ Malaon-kaviñerañe t'IEHOVÀ naho lifo-pikokoa-migahiñe, mpampipoke hila naho fiòla, fe tsy apo'e ty manao hakeo*, fa afetsa'e amo anakeo o tahin-droae'eo ami'ty tariratse faha-telo naho fahefatse. ¹⁹ Miambane ama'o, apoho ty hakeo' ondaty retiañe amy hara' elahin-kafatraram-pikokoa'oy, manahake ty nampidòn'a'o ty hakeo' ondaty retiañe e Mitsraime aña pake henane.

²⁰ Aa le hoe t'IEHOVÀ, Fa napoko ty amy enta'oy; ²¹ fe kanao velon-dRaho, ho lifore' ty enge' IEHOVÀ ty tane toy, ²² le ze hene ondaty nahaisake o engekoo naho o viloñe nanoeko e Mitsraime naho am-patram-beio, ie fa nitso-pañahy ahiko fañimpolo'e henaneo, vaho tsy nañaoñe ty feoko, ²³ toe tsy ho isa' iareo i tane nifantako aman-droae' iareoy, toe tsy ho isa' o nañinje Ahio, ²⁴ naho tsy i Kalebe mpitorokoy amy te hafa ty arofo ama'e le nivent'e t'ie mpañorik' ahiko, aa le hendeseko mb'an-tane nañaveloa'e mb'eo vaho ho lovae' o tarira'eo. ²⁵ Aa kanao mimoneñe am-bavatane ao o nte-Amalekeo naho o nte-Kanàneo, le mivioña nahareo te hamaray, vaho mionjona mb'am-patrambey mb'amy lalañe migodañe mb'an-dRia-Binda mb'eyo.

Nikalañañe i Fanameañey

Fts 1.41-45

²⁶ Le hoe ty nitsara' IEHOVÀ amy Mosè naho amy Aharone: ²⁷ Pak'ombia ty hivateako ty valobohòke lo-tsereke mañinje ahiko tia? Fa tsinanoko ty fiñeoñe'o ana' Israeleo, ty fañinjea' iareo ahiko. ²⁸ Saontsio am' iereeo, Kanao velon-dRaho, hoe t'IEHOVÀ, le hanoeko ama' areo i sinaontsi' areo an-tsofikoy; ²⁹ toe hipopok' am-patram-bey atoa ty lolo' areo, ze fonga nivolilieñe ama' areo, ze hene niaheñe ama' areo mifototse ami'ty roapololo taoñe mañambone amo nañinje Ahikoo. ³⁰ Leo raike tsy himoak' amy tane natoloko anahareo am-panta himoneña' areoy, naho tsy i Kalebe ana' Iefonè naho Iehosoa ana' i None, ³¹ le o amori' areo kedekedeke natao' areo ho tsindroheñe'o; hendeseko ao iereeo le ho fohi' iareo i tane niheje' areoy. ³² Inahareo ka, hifitak' am-patrambey ao ty lolo' areo, ³³ le hirererere am-patrambey ao efapolo taoñe o ana' areoo, hivate ty hakarapiloa' areo, ampara' te vorok' am-patrambey ao ty lolo' areo. ³⁴ Mira ami'ty ia' o andro

* **14:18** Avo 34:7, Iir 30:11

nitingane' areo i taneio, i efa-polo andro rezay, te songa havale taoñe raike i andro rey, ho vave' areo ty tahi' areo, aa le efa-polo taoñe ty hahafohina' areo ty habosehako. ³⁵ Zaho IEHOVÀ ty nitaroñe. Tsy mete tsy henefeko ami'ty valobohòke lo-tsereke nihipoke hiatreatre amako tia, ie habotse' ty fatram-bey toy naho toe hihomak' ao.

³⁶ Le ondaty nirahe' i Mosè hitingañe i taneio, o nimpoly ninday saontsy nampitoreo i valobohòkey ty amy talily raty nendese' iereo ty amy taneiio, ³⁷ le navetra' ty angorosy añatrefa' IEHOVÀ ondaty ninday i talily raty ty amy taneio. ³⁸ Iehosoa ana' i None naho i Kalebe ana' Iefonè avao ty mbe niveloñe amo nitingañe i taneio.

³⁹ Aa le akore ty fihonto' o ana' Israeleo amy nitaroña' i Mosè i entañe zaiy, ⁴⁰ kanao nivañoñe marain-tsikiake iereo niañambone' i vohitsey, ami'ty hoe: Itoan-jahay, hanganike i nampitama' IEHOVÀ anaiy, fa nanao hakeo zahay. ⁴¹ Hoe ka t'i Mosè, Aa vaho akore te lilare' areo ty lili' IEHOVÀ henaneo? Toe tsy ho tafetetse. ⁴² Ko mionjoñe mb'eo tsy mone ho rotsaheñe añatrefan-drafelahi' areo fa tsy mindre ama' areo t'IEHOVÀ. ⁴³ Aolo' areo o nte-Amalekeo naho o nte-Kanàneo, le hampitsingoroem-pibara nahareo; Amy te niambohoá' areo t'IEHOVÀ, vaho tsy hindreza' IEHOVÀ lia. ⁴⁴ F'ie nionjoñe tsinahy mb'an-tiotio' i vohitsey mb'eo; fe tsy niakatse i tobey ka i vatam-pañina' IEHOVÀ ndra i Mosè. ⁴⁵ Aa le nizotso hiatreatre am'iareo o nte-Amalekeo naho o nte-Kanàne mpimoneñe amy vohitseio, nandafa naho nandronje iareo sikala e Khormà aña.

15

Enga Ila'e

¹ Hoe ty nitsara' IEHOVÀ amy Mosè: ² Misaontsia amo ana' Israeleo, le ano ty hoe: Naho mimoak' an-tane himoneña' areo, i hatoloko anahareoy, ³ ie manao soroñe am' IEHOVÀ, ke enga ho lorañe he enga-ava-panta ke enga-tsattrin' arofo he amo andro namantañañe, le ho hèñin-kanintsiñe am' IEHOVÀ, he boak' an-tro-raik' ao ke boak' an-dia-raike ao, ⁴ le ze mibanabana enga añatrefa' IEHOVÀ ty hinday enga-mahakama, mona fahafolo' ty efà linaro menake hine fahèfa'e, ⁵ naho divay fahèfa' ty hine ho enga-rano ihentseñañe, le ke amy soroñey, he amy engay, ho ami'ty vik' añondry. ⁶ Aa naho añondrilahy, le ho hajarie'o ty mona roe ampahafolo' ty efà linaro menak' ampaha-telo' ty hine ho enga-mahakama; ⁷ le ho enga-rano: ibanabanao divay hine ampahatelo'e ho hèñin-kanintsiñe am' IEHOVÀ. ⁸ Aa naho mañenga bania hisoroñañe ke hañenek' ava-panta, he ho fañanintsiñe am' IEHOVÀ, ⁹ le hengaeñe mitraok' amy baniay ty enga-mahakama: telo ampahafolo' ty efà mona linaro menake hine vaki'e, ¹⁰ le hengae'o ty divay hine vaki'e ho enga rano hisoroñañe, hèñin-kanintsiñe am' IEHOVÀ.

¹¹ I hoe zay ty ho sata amy ze añombe ndra añondrilahy, naho ze vik' añondrilahy ndra vik'ose. ¹² Ty ami'ty hamaro ihentseñañe, le sindre anoeñe ty ami'ty ia'e. ¹³ Songa hanao zay ze samak' amy taney, ie mañenga soroñe ho hèñin-kanintsiñe am' IEHOVÀ. ¹⁴ Aa naho mitaveañe ama' areo ty renetane, ke ia ia hom'bama' areo amo tarira' areo iabio, ie te hañenga soroñe ho hèñin-kanintsiñe am' IEHOVÀ; le mira ami'ty fanoe' areo ty hanoe'e. ¹⁵ Ty amy valobohòkey, fañè raike ty hifehe anahareo naho i renetane mpimoneñe aoy, fañè nainai'e tsy modo amo hene tarira' areo mifandimbeo; manahak' anahareo avao ze renetane

añatrefa' IEHOVÀ. ¹⁶ Fetse raike naho fepetse raike ty anahareo naho ze renetane mpitaveañe ama' areo ao.

¹⁷ Hoe ty nitsara' IEHOVÀ amy Mosè: ¹⁸ Saontsio ty hoe amo ana' Israeleo: Ie mimoak' amy tane aneseako anahareoy ao, ¹⁹ naho mikama amy mahakama' i taney le mañengà engan-kavoñañe am' IEHOVÀ. ²⁰ Ami'ty valohan-koba' areo ty hañengà' areo mofo ho engan-kavoñañe; hambañe ami'ty engan-toem-pifofohañañe ty hañengà' areo. ²¹ Hatolo' areo ho enga am' IEHOVÀ ty lengon-koba valoha'e, hengae' o hene tarira' areo mifandimbeo zay.

²² Aa ie mandilatse* tsy mahambeña o lily retiañe, o nitsarae' IEHOVÀ amy Mosèo— ²³ toe ze hene tsara linili' IEHOVÀ am-pità' i Mosè, ampara' i andro nitaroña' IEHOVÀ i liliy pak' amo hene tarira' areoo— ²⁴ ie amy zao, naho mandilatse tsy satrie'e i valobohòkey, ie nietak' am-pihaino'e, le hengae' i valobohòkey ty ana' ty tro'e raike, ty bania hisoroñañe ho hèñin-kanintsiñe am' IEHOVÀ rekets' i enga-mahakama'ey naho i engarano'ey, am-pañè, vaho ty vik'oselahy ho engan-kakeo. ²⁵ Le hefera' i mpisoroñey i valobohò' Israeleley vaho ho haha iereo kanao tsy nisatrieñe, naho fa nasese' iereo i enga' iareoy; enga nisoroñañe am' IEHOVÀ, naho i engan-kakeo nengaeñañe añatrefa' IEHOVÀ, amy fandilara' iareoy. ²⁶ Aa le hapoke t'ie tsy ho ami'ty valobohò' Israele naho tsy ho amo renetane mpimoneñañe ama'eo, amy te songa añate' i lilatse tsy nisatrieñey i màroy.

²⁷ Aa naho ondaty raike ty mandilatse tsy satrie'e , le hengae' e ty vik'ose vave'e ho engan-kakeo, ²⁸ le hefera' i mpisoroñey indaty nandilatse tsy an-tsatrie'ey, ie toe nandilatse fe tsy nitsatrie'e, añatrefa' IEHOVÀ, hañeferaña aze, le halio-tahiñe. ²⁹ Ho raike ty fetse mifehe ze mandilatse tsy satrie'e , ke tarira' o ana' Israeleo, he renetane mpitaveañe am' iereo ao. ³⁰ Fe t'indaty mañonjo haoke handilatse, ke ie samak' amy taney ao, ke renetane, ie manirika IEHOVÀ, le haitoañañe am' ondati'eo indatiy, ³¹ amy te ninjè'e ty tsara' IEHOVÀ naho niotà'e i lili'ey, toe haitoañañe zafezanake indatiy vaho ho vavè'e i hakeo'ey.

Lilatse ami'ty Sabata

Avo 31.12-17

³² Ie tam-patrambey aña o ana' Israeleo le nahaisake ondaty nanontoña hatae ami'ty andro Sabotse. ³³ Aa le nasese' o nahaisak' aze nanontoña hataeo mb' amy Mosè naho i Aharone vaho i valobohòkey mb'eo; ³⁴ le najo' iareo an-drohy ao heike fa mbe tsy tsinara ty hanoaña aze. ³⁵ Le hoe t'IEHOVÀ amy Mosè, tsy mete tsy havetrake indatiy; songa handretsake vato ama'e alafe' i tobey i valobohòkey. ³⁶ Aa le amy nandilia' IEHOVÀ i Mosèy: nasese' i valobohòkey alafe' i tobey re naho rinetsam-bato vaho nihomake.

Riran-Tsarimbo

³⁷ Le hoe ty nitsara' IEHOVÀ amy Mosè: ³⁸ Misaontsia amo ana' Israeleo ty hanoa' iereo fole mirandraña an-kotson-tsaro' iareo nainai'e amo hene tarira' iareo mifandimbeo, songa haharo' iareo amo fole mirandraña an-kotson-tsaroñeo ty fole manga. ³⁹ Ty sata' o boram-poleo ama' areo, le ie isa' areo ro hahatiah y o lili' IEHOVÀ iabio vaho hanoe' areo, soa tsy horihe' areo ty arofo' areo naho o fihaino' areo mampandrìkeo, ⁴⁰ fa ho tiahi' areo le hene hanoe' areo o likoo, vaho hiavake ho aman' Añahare' areo[†]. ⁴¹ Zaho IEHOVÀ Andrianañahare' areo ninday anahareo nienga an-tane

* **15:22** Vol 15:22-31, Sor 4:1-35 † **15:40** Avo 20:6, Its 7:9, 11:1, 30:16, Nek 1:5, Dan 9:4, Jn I 5:2-3, Jn II 1:6

Mitsraime aña ho Andrianañahare' areo: Zaho IEHOVÀ Andrianañahare' areo.

16

Ty Fiola' i Korahke

¹ Ie amy zao, niavotse t'i Korahk' ana' Itsare ana' i Kehàte fifokoa' i Levy reketse i Datane naho i Abirame songa ana' i Eliabe vaho i One, ana' i Pelete tarira' i Reòbene, ² le nijohañe aolo' i Mosè eo mindre ami'ty ila' o ana' Israeleo, mpiaolo' i valobohòkey, roanjato-tsi-limampolo, jinoboñe am-pivory, aman-kasy; ³ nifanontoñe hiatrek' amy Mosè naho i Aharone vaho nanoe' iareo ty hoe, Loho bey ty vavea' areo, amy te fonga miavake i valobohòkey naho am' iareo iaby t'IEHOVÀ. Aa ino ty irengevoha' areo ambone' ty favori' IEHOVÀ? ⁴ Ie jinanji' i Mosè, le nibabok' an-dahara'e, ⁵ nanao ty hoe amy Korahke naho o mpiama'e iabio: Hamaray ty hampiboaha' IEHOVÀ o azeo, ty miavake, le ie ty hampañarinea'e; toe i ho joboñe'ey ty hampitofa'e. ⁶ Ano zao: ry Korahke naho o mpiama'o iabio, andrambeso sadron' afo, ⁷ le apoho ama'e ty afo naho andafihon embok' añatrefa' IEHOVÀ hamaray vaho t'indaty joboñe' IEHOVÀ, ie ty hiavake. Fa loho maro ty vavea' areo ry nte-Levio! ⁸ Le hoe t'i Mosè amy Korahke, Mitsendreña henaneo ry ana' i Levio: ⁹ Loho kede ama' areo hao t'ie nampiambahen' Añahare' Israele amo valobohò' Israeleo hampañarinea'e, hitoloñe amy kivoho' IEHOVÀ ao, hijohañe añatrefa' i valobohòkey hiatrak' iareo, ¹⁰ ie nampañarivoe'e ama'e mitraok' amo rahalahi'o ana' i Levio? Aa mbe hipay ho mpisoroñe ka v'iheo? ¹¹ kanao mifanontoñe hiatatre am' IEHOVÀ, ihe naho o mpiama'o iabio. Le i Aharone, inon-dre te injè' areo?

¹² Nampañitrife' i Mosè amy zao t'i Datane naho i Abirame ana' i Eliabe, fa hoe iereo: Tsy homb'eo zahay! ¹³ raha kede ama'o hao te nakare'o an-tane orikorihen-dronono naho tantele ao hanjamana'o am-patrambey atoy, mbore manao ho mpifehe anay? ¹⁴ Ie amy zao tsy nendese'o amy ze o tane orikorihen-dronono naho tantele zao, tsy nampandovae'o anay ty teteke naho tetem-bahe. Aa vaho havitso'o am'ondaty retiañe o fihaino' iareoo? Zahay tsy homb'eo!

¹⁵ Niforoforo t'i Mosè le hoe re am' IEHOVÀ, Amoeo ty enga' iareo. Mbe liako tsy nandrambe borike raik' am' iereo vaho leo raik' am' iereo tsy jinoiko. ¹⁶ Le hoe t'i Mosè amy Korahke, Miatrefa am' IEHOVÀ, ihe naho o mpiama'oo—ihe naho iereo vaho i Aharone te maray; ¹⁷ songa mindesa sadron' afo vaho apoho ama'e ty emboke, sindre hinday ty sadròn' afo'e añatrefa' IEHOVÀ, sadron' afo roanjato-tsi-limampolo; ihe naho i Aharone ka, sambe aman-tsadron' afo.

¹⁸ Aa le fonga nandrambe ty sadron' afo'e t'indaty, naho napo'e ama'e ty afo naho nandafihan' emboke vaho nijohañe an-dalan-kibohom-pamantañañe eo mindre amy Mosè naho i Aharone. ¹⁹ Le navori' i Korahk' an-dalan-kibohom-pamantañañe ey i valobohòkey hiatatre iareo. Nisodehañe amy màroy amy zao ty enge' IEHOVÀ.

²⁰ Le hoe ty nitsara' IEHOVÀ amy Mosè naho i Aharone: ²¹ Mivevea amo valobohòkeo fa hampangotomomoheko aniany. ²² Nibabok' an-dahara'e amy zao iereo nihalaly ty hoe, O Andrianañahare, Andrianañaharen' arofo' ze hene atao nofotse; hiviñera'o ami'ty lila' ondaty raike hao i valobohòkey?

²³ Aa le hoe ty nitsara' IEHOVÀ amy Mosè, ²⁴ Saontsio amo valobohòkeo ty hoe: Iengao o kiboho' i Korahke naho i Datane vaho i Abirameo. ²⁵ Le niongake t'i Mosè nimb'amy Datane naho i Abirame mb'eo; nanonjohy aze o roandria' Israeleo. ²⁶ Le sinaontsi'e amy valobohòkey ty hoe, Isitaho henaneo o kiboho' ondaty lo-tsereke reroañe! Ko mitsapa ty raha' iareo tsy mone ho faoheñe aña amo hakeo' iareoo. ²⁷ Aa le niviha' iereo o kiboho' i Korahke naho i Datane naho i Abirameo; le niakatse t'i Datane naho i Abirame vaho nijohañe an-dalan-kiboho' e eo rekets' o tañanjomba'eo naho o ana'eo naho o amori'eo. ²⁸ Le hoe t'i Mosè: Inao ty hahafohina' areo t'ie nirahe' IEHOVÀ hanao o tolon-draha rezao, tsy te nisatriko: ²⁹ Aa naho mikoromake manahake ze hene ondaty, ondaty retiañe, naho ho tiliheñe hambañe ami' ty fitilihañe ze kila ondaty, le tsy nirahe' IEHOVÀ raho. ³⁰ Fa naho manao raha vao t'IEHOVÀ, naho sokafe' o taneo ty vava'e, hampibotseke iareo naho ze hene a' iareo vaho hivarigodam-beloñe mb' an-tsikeokeok' ao, le ho fohi' areo te ninjè' ondatio t'IEHOVÀ.

³¹ Ie vaho nimodo i saontsi'ey le nivalaetrake ambane' iereo i taney, ³² vaho sinoka' i taney ty vava'e le fonga nabea'e rekets' o hasavereña' iareoo, ze lahilahy mpiamy Korahke naho o vara'e iabio. ³³ Aa le nigodam-beloñe mb' an-tsikeokeok' ao iereo reke-panañañ' iaby; nikitek' ambone'e i taney, naho fa nimongoreña amy valobohokekey iereo. . ³⁴ Le nitriban-day iaby ze ana' Israele narine eo, namantsiñe ty hoe, Ke hatele' i taney ka zahay! ³⁵ Niboak' am' IEHOVÀ amy zao ty afo nahaftorototo 'indaty roanjato-tsi-limappolo nañemboke rey.

17

¹ Le natoro' IEHOVÀ amy Mosè ty hoe: ² Misaontsia amy Elazare ana' i Aharone Mpisoroñe handrambesa'e o sadron' afo boak' amy afoio, le hampiparatsahe'e ey i afoy, fa miavake irezay. ³ Ampipeho ho endraendra hanaroñe i kitreliy o sadron' afo' ondaty rinotsan-kakeo ty fiai'iareoo, fa miavake amy te nengaeñe am' IEHOVÀ, le ho viloñe amo ana' Israeleo. ⁴ Aa le rinambe' i Elazare mpisoroñe o sadron' afo torisike nengae' i niforototoñe reio, vaho nipepeheñe ho kape' i kitreliy, ⁵ ho faniahiañe o ana' Israeleo te tsy hitotoke mb'eo ty ondaty sotra tsy tarira' i Aharone hañembok' am' IEHOVÀ, tsy mone hanahake i Korahke naho o mpiama'eo, amy nitsara' IEHOVÀ am-pità' i Mosèy.

⁶ Ie amy loakandroy le fonga niñeñeñeoñe amy Mosè naho i Aharone i valobohòn' ana' Israeleley ami'ty hoe, Fa zinama' areo ondati' IEHOVÀo. ⁷ Aa naho nifanontoñe i valobohòkey hiatreatre amy Mosè naho amy Aharone, f'ie nitolike mb' an-kibohom-pamantañañam-b'eo le hehe te nisaroña' i rahoñey vaho niboake ty enge' IEHOVÀ. ⁸ Aa le niheo mb' aolo' i kibohom-pamantañañey mb'eo t'i Mosè naho i Aharone. ⁹ Le nitsara amy Mosè t'IEHOVÀ nanao ty hoe: ¹⁰ Isitaho o valobohòkeo hamorototoako aniany. Ie nibabok' an-daharañe, ¹¹ le hoe t'i Mosè amy Aharone, Angalao sadron' afo le apoho ama'e ty afo boak' amy kitreliy, le ampipoho emboke naho mihitrifa masika mb'amy valobohòkey hañefets' iareo amy te niboak' am' IEHOVÀ ty fombo vaho fa namototse i angorosiy. ¹² Aa ie mbe nisaontsy t'i Mosè, le rinambe' i Aharone zay le nipitsik' an-day naneñateña i valobohòkey; naho tendreke te niorotse am' ondatio i angorosiy; Napo'e ama'e ty emboke vaho nefera'e ondatio. ¹³ Aa ie nijohañe añivo' o mateo naho o veloñeñeo le nijihetse i angorosiy. ¹⁴ Rai-ale-tsi-efats' arivotsi-fitonjato ty nivetrek' amy andro zay mandikoatse o nikoromak' amy

Korahkeio. ¹⁵ Ie nijihetse i angorosiy le nibalike mb' amy Mosè t'i Aharone mb'an-dalan-kibohom-pamantañañe mb'eo.

Nitaroke ty Kobai' i Aharone

¹⁶ Le hoe ty nitsara' IEHOVÀ amy Mosè: ¹⁷ Misaontsia amo ana' Israeleo naho mangala kobay amo anjomban-droae iabio, ze talèn' anjomban-droae—kobay folo-ro'amby, ie songa hanokitse ty tahina'e amy kobai'ey. ¹⁸ Le sokiro an-kobai' i Levy eo ty tahina' i Aharone. Sindre kobain-droae raike ty amy talèn' anjomban-droae'ey, vaho ¹⁹ apoho an-kibohom-pamantañañe aolo' i fañina fifampikaoñan-tikañey. ²⁰ Ie amy zao, hitaroke ty kobai' ondaty ho joboñeko; le hijihetse ty fitoreo' o ana' Israeleo amako, i fiñeñeñoña ama'o lomoñandroy. ²¹ Aa le nisaontsy amo ana' Israeleo t'i Mosè vaho songa nanolotse kobay raike o talèo, ty aman-talèn' anjomban-droae'e; kobay folo-ro' amby; le nitraok' amo kobai' iareoo ty kobai' i Aharone ²² vaho napo' i Mosè añatrefa' IEHOVÀ amy kibohom-pañinay i kobaiñe rey.

²³ Aa naho nimoak' amy kibohom-pañinay t'i Mosè te loak'andro, hehe te nitaroke naho namotiboty naho namõñe vaho namoa mahabibo àñoñe ty kobai' i Aharone añ'anjomba' i Levy. ²⁴ Le naaka' i Mosè boak' añatrefa' IEHOVÀ mb' amo ana' Israele iabio i kobay rey; nahaisake iereo vaho sambe nandrambe ty kobai'e. ²⁵ Le hoe t'IEHOVÀ amy Mosè, Ampolio aolo' i fañinay ty kobai' i Aharone ho viloñe amo manjehatseo, hampigadoñe ty fañinjea' iareo ahy tsy mone hikenkañe. ²⁶ Aa le nanoe' i Mosè zay; i nandilia' IEHOVÀ azey ty nanoe'e.

²⁷ Le hoe o ana'Israeleo amy Mosè, Mihamomoke zahay, motso, fonga mongotse! ²⁸ Ndra iaia mitotoke mb'eo, naho mañarine i kivoho' IEHOVÀ le havetrake. Kila hibanítse hao zahay?

18

Ty Lili' o Mpisoroñe nte-Levio

¹ Hoe ty nitsara' IEHOVÀ amy Aharone: Ihe naho o anadahi'oo miharo amo anjomban-droae'oo ro hivave o hakeo' i efe-miavakey, le ihe rekets' o anadahi'oo ro hivave o tahi' i fisoroñañeyio. ² Aa le endeso mb' etoa ka o rahalahi'oo, i fifokoa' i Levy, i fifokoan-droae'oy, hireketse ama'o, hitoroñe azo, ihe naho o ana'oo, añatrefa' i kibohom-pañinay. ³ Hiatrak' azo iereo vaho hañambeñe i kivoho iabiy, fe tsy harinea' iareo o fana' i efe-miavakeio naho i kitreliy tsy mone hivetrake, ie naho inahareo. ⁴ Hampireketeñe ama'o iereo hamandroñe i kibohom-pamantañañey amy ze hene fitoloñañey amy kivohoy fe tsy hiharinea' t'indaty tsotra. ⁵ Le ho toloñe' areo o raha miavakeo, hatrafe' areo i kitreliy, tsy hifetsahan-kaviñerañe o ana' Israeleo. ⁶ Le Zaho, toe Zaho ty nandrambe o nte-Levy rahalahi' areoo boak'amo ana' Israeleo, ie nengaeñe ho ravoravo am' IEHOVÀ ho anahareo, hanoe'e o fitoroñañey an-kibohom-pamantañañey. ⁷ Le ihe naho o ana'o rekets' ama'oo ro hañambeñe o fisoroñañey areoo amy ze hene mioza amy kitreliy, le ho toroñe' areo ze ankalo' i lamba fañefetsey ao. Atoloko azo ho fitoroñan-karavòañe i fisoroñañey, fe havetrake ze ondaty tsotra miharine eo.

Ty Anjara' i Mpisoroñey

⁸ Hoe ty nitsara' IEHOVÀ amy Aharone: Zaho, toe Zaho ty nanolots' azo o engan-kavoakoo, le naviko ho azo naho o ana'oo ho amy fañorizañey ze hene navi' o ana' Israeleo. Natoloko ami'ty fañorizañey naho amo o ana'oo

ho fañè nainai'e. ⁹ Ho azo amo raha miava-do'e navotsotse amy afoio; ze hene enga' iareo: ze enga-mahakama iaby, ze soron-kakeo iaby; ze hene engan-dilatse mete ho banabanae' iereo amako, ho miava-do'e ama'o naho amo ana'oo. ¹⁰ Ho kamae' areo an-toetse miavake ao, ze lahilahy iaby ty hikama ama'e, fa navaheñe ho ama'o. ¹¹ Ho azo ty enga-kavoñaे amo engae' iareoo, naho ze enga ahelahela' o ana' Israeleo, le fa natoloko azo naho amo ana-dahi'oo naho o anak' ampela'o mindre ama'oo ho fañè nainai'e, ie mete kamae' ze malio añ' anjomba'o ao. ¹² Fa natoloko azo ze hene soa amo menakeo naho ze fonga soa amo divai-vao naho amy ampembay: ty loha-voñe engae' iereo am' IEHOVÀ. ¹³ Azo ze hene lengom-boa an-tane'e aña engae' iereo am' IEHOVÀ, songa mete mikama ama'e ze malio añ'anjomba'o ao. ¹⁴ Hene azo ze atokañe e Israele ao. ¹⁵ Azo ka ze manoka-koviñe valoha'e, ze engaeñe am' IEHOVÀ, he ondaty ke hare; fe toe ho jebañeñe o tañoloñoloña' ondatio, vaho havahañe ka ze valohan' ana' o biby tsy malioo. ¹⁶ Le ty vilin' ai'e, mifototse amy valòham-bola'ey ty ijebañañe aze; ze anjoanjoa' o azey, sekele lime ty vili'e an-tsekelen-toe-miavake (gerà roapolo zay). ¹⁷ Fe tsy havaha' areo ze valohan' anak' añombe naho valohan' anak' añondry naho ty valohan' anak' ose, fa miavake. Hadasi' areo añariari' i kitreliy ty lio vaho hisoroña'o ty safo'e ho enga olorañe, hañin-kanintsîne am' IEHOVÀ. ¹⁸ Le ho azo o hena'eo, ho azo hambañe amy tratran-kelahelay naho i tso'e havanay. ¹⁹ Ze enga avoañe amo raha miavake engae' o ana' Israeleo am' IEHOVÀ le fa natoloko azo naho amo ana-dahi'oo naho amo anak' ampela'o mindre ama'oo ho fañè tsy modo, ho fañinan-tsira nainai'e ama'o naho amo tarira'oo añañatrafa' IEHOVÀ.

²⁰ Le hoe t'IEHOVÀ amy Aharone: tsy hanan-dova an-tane' iareo rehe, naho tsy hanañ' anjara am' iereo ao; Zaho ro anjara'o naho lova'o amo ana' Israeleo.

²¹ Naho o nte-Levio, toe nitolorako ze fonga fahafolo' Israele ho fanañañe hasolo ty fitoroñañe itoroña' iareo, ty fitoloñañe an-kibohom-pamantañañe ao. ²² Tsy ho harinè' o ana' Israeleo ka i kibohom-pamantañañey henane zao tsy mone hivave hakeo vaho hivetrake. ²³ O nte-Levio avao ty hifanehak' amo tolon-draha' i kibohom-pamantañañeyio, le ho vavè' iereo o hakeo'eo; ho fañè nainai'e amo hene tarira' areo mifandimbeo, f'ie tsy hanan-dova añivo o ana' Israeleo, ²⁴ amy te nitolorako ty fahafolo avi' o ana' Israeleo ho engan-kavoñaे am' IEHOVÀ, ie ty lova natoloko amo nte-Levio, toe vinolako t'ie tsy hanan-dova amo ana' Israeleo.

²⁵ Le nitsara amy Mosè t'IEHOVÀ nanao ty hoe: ²⁶ Saontsio amo nte-Levio ty hoe: Naho rambese' areo amo ana' Israeleo i fahafolo natoloko anahareo ho lova'areoy, le añaengào enga-kavoñaे am' IEHOVÀ ty fahafolo' i fahafoloy. ²⁷ Le ho volilieñe ama' areo hambañe amy t'ie i mahakama boak' an-toe-pamofohañey; naho te boak' ami'ty hapea' i fipiritan-divaiy i enga havi' areoy. ²⁸ Aa le havi' areo ho am' IEHOVÀ ty enga-kavoñaे boak' amo fahafolo rambese' areo amo ana' Israeleo le i enga-kavoñaë navike ho am' IEHOVÀ ty hatolo' areo amy Aharone mpisoroñe. ²⁹ Amo hene enga atolotse ama' areoo, le havi' areo ze havike am' IEHOVÀ; ze hene soa ama'e naho ty miavake ama'e. ³⁰ Aa le ano ty hoe: Naho avi' areo ty soa ama'e, le ho volilieñe amo nte-Levio ho mahakama nasisa an-toe-pamofohañey ey naho ty fitomboa' i fipiritan-divaiy. ³¹ Azo' areo kamaeñe ndra aia aia zay, inahareo naho o keleia' areoo amy te tambe' areo ty amy fitoloña' areo amy kibohom-pamantañañeyi. ³² Aa kanao avi' areo ty soa ama'e le tsy

hivavea' areo hakeo, vaho ko leore' areo o enga' miava' o ana' Israeleoo tsy mone hivetrake.

19

Ty Kiloa-mena

¹ Hoe ty nitsara' IEHOVÀ amy Mosè nahō i Aharone: ² Intoy ty fañèm-pètse linili' IEHOVÀ: Misaontsia amo ana' Israeleo ty hindesa' iareo kiloa mena tsy aman-kandra ndra hila mbe lia'e tsy nanampezan-joka. ³ Atoloro i Elazare mpisoroñe, le hasese'e alafe' i tobey ho lentaeñe añatrefa'e; ⁴ le hangala' i Elazare an-drambo-pità'e ty lio'e, vaho hafitse'e impito aolo' i Kibohom-pamantañañey. ⁵ Le horoañe am-pahaisaha'e i kiloay: Fonga forototoñe ty holi'e, ty nofo'e, ty lio'e vaho ty tai'e. ⁶ Le handrambe mendorave nahō seva nahō fole mena mañabarà i mpisoroñey vaho hatora'e añate' i afo mamorototo i kiloaiy. ⁷ Ho sasà' i mpisoroñey amy zao o saro'eo, le hampiandroe'e an-drano i sandri'ey, vaho himoak' antobe ao; fa haleotse am-para' te hariva i mpisoroñey. ⁸ Hanasa o siki'eo nahō hiandro an-drano ka i nañoro azey, ie tsy halio am-para' te hariva. ⁹ Le favori' t'indaty malio ty laveno' i kiloay vaho hahaja'e an-toetse malio alafe' i tobey ey, nahō havandroñe ey ho amy valobohò' o ana' Israeleoy, ho ami'ty ranom-pandeorañe, toe fañeferan-kakeo. ¹⁰ Hanasa ty siki'e i namory o lavenokeoy le tsy halio ampara' te haleñe: ho fañè nainai'e tsy modo amo ana' Israeleo nahō amo renetane mpimoneñe am' iereoo. ¹¹ Ze mitsapa lolo, ndra t'ie fate' ia'ia, ro haleotse fito andro. ¹² Hañefe' batañe amy ranoy re ami'ty tsy haliova'e ami'ty andro fahatelo nahō ami'ty andro faha-fito vaho halio; f'ie tsy mañefe-batañe amy andro fahateloy nahō amy andro fahafitoy le tsy halio. ¹³ Ze mitsapa lolo, ty fañova' ondaty mate, vaho tsy mañefe-batañe, le mandeotse ty kivoho' IEHOVÀ. Haitoañe am' Israele indatiy. Tsy halio re amy te tsy nafitse ama'e i rano-piambahañey, tambats' ama'e i haleora'ey. ¹⁴ Zao ty fetse te mivetrak' añ'akiba ao t'indaty: ze mizilik' añ'akiba ao nahō ze am-po'e ao ro songa maleotse fito andro, ¹⁵ maleotse ka ze fanake tsy mitakoñe soa. ¹⁶ Ze mitsapa ondaty vinonom-pibara an-kivoke ey ke ondaty mate avao, he taola' ondaty, hera kibory, le haleotse fito andro. ¹⁷ Aa nahō i maleotsey: hangalañe ty laveno' i namorototoañe ho fañeferan-kakeoiy, vaho añiliñan-drano malio ty fitovy; ¹⁸ ho rambese' t'indaty malio ty seva le halò'e amy ranoy vaho hafitse'e amy akibay nahō amo fanake iabio nahō am' ondaty nizoeñeo nahō amy nitsapa o taolañeo ndra i vinonoy ndra i loloy ndra i kiboriyy. ¹⁹ Hafitse' i malioy amy tsy malioy ami'ty andro fahatelo nahō ami'ty andro faha-fito; ie amy andro fahafitoy ro hiefetse, le ho sasà'e o siki'eo vaho hiandro an-drano, le halio te harivay. ²⁰ Fe t'indaty maleotse tsy miefetse amy haleora'ey, le haitoeñe amy valobohòkey indatiy, amy te nileore'e ty efe-miava' IEHOVÀ. Tsy nafitse ama'e i rano-kaleorañey; maleotse re. ²¹ Fañè nainai'e ho a iareo zay. Hanasa ty siki'e i namitse i rano-kaleorañey, vaho haleotse am-para' te hariva ze mitsapa i rano-kaleorañey. ²² Haleotse ze raha tsinapa' i maleotsey, le haleotse am-para' te haleñe t'indaty nitsapa aze.

20

Ty Rano i Meribà Avo 17.1-7

¹ Nimoak' am-patram-bei' i *Tsine eo o ana' Israeleo, i valobohòkey, amy volañe valoha'ey le nitobe e Kadese; nihomake eo t'i Miriame vaho nalenteke.

² Tsy nanan-drano i valobohòkey le nifanontoñe hiatreatre amy Mosè naho i Aharone. ³ Le nifandietse amy Mosè ondatio, ami'ty hoe, Hamake t'ie nivetrak' amy nikoromaha' o longo'aio añatrefa' IEHOVÀ! ⁴ Aa vaho ino ty nanesea'o mb' am-patrambey mb'etoy ty favori' IEHOVÀ, hibanitse etoañe, zahay naho o hare'aio? ⁵ Le ino ty nañakara'o anay an-tane Mitsraime aña, hanese anay an-toetse raty atoy? ie tsy mahalefe ampemba ndra sakoañe ndra vahe ndra dagoa[†], mbore tsy aman-drano hinomañe. ⁶ Aa le nienga i valobohòkey t'i Mosè naho i Aharone niheo mb'amy lalan-kibohom-pamantañañey mb'eo; le nibabok' an-daharañe vaho nisodehañe am' iereo ty enge' IEHOVÀ. ⁷ Le nitsara amy Mosè t'IEHOVÀ nanao ty hoe: ⁸ Rambeso i kobaiñey; le atontono i valobohòkey, ihe naho i Aharone rahalahi'o. Saontsio añatrefam-pihaino' iareo i vatox hañakatse ty rano'e, hamahana'o rano boak' amy vatox, hampinoma'o iareo naho o hare' iareoo.

⁹ Aa le rinambe' i Mosè i kobay añatrefa' IEHOVÀ, amy nandiliañe azey. ¹⁰ Le navori' i Mosè naho i Aharone añatrefa' i vatox i favoriy, le nanoe'e ty hoe, Mitsendreña, ry mpiolao. Hañakara'ay rano boak' ami'ty vatox tia hao? ¹¹ Aa le naonjo' i Mosè ty fità'e naho finofo'e indroe amy kobai'ey i vatox, vaho nidoandoañe boak' ao ty rano bey le ninon-drano i valobohòkey naho o hare'eo. ¹² Fe hoe t'IEHOVÀ amy Mosè naho i Aharone, Amy te tsy nonjone' areo hampiboak' amo ana' Israeleo o hamasiñakoo, le tsy hendese' areo hizilik' an-tane natoloko iareo ao ty fivory tia. ¹³ Ie o Ranom-[‡]Piolañe amy te nikotreke am' IEHOVÀ o ana' Israeleo, ie fa nivente'e am' iareo ty hamasiña'e.

¹⁴ Aa le nañitrik' ami'ty mpanjaka' i Edome boake Kadese t'i Mosè. Hoe ty rahalahi'o Israele: Fohi'o o hasotriañe iaby nifetsak' ama'aio: ¹⁵ ty nizotsoa' o rae'aio mbe Mitsraime mb'eo, ty nimoneña'e aña andro maro, vaho te namorekeke anay naho o rae'aio o nte-Mitsraimeo. ¹⁶ Aa ie nikaike IEHOVÀ le jinanji'e o fiarañanaña'aio vaho nirahe'e i Anjeli'ey ninday anay niavotse i Mitsraime; le ingo t'ie e Kadese atoy henaneo, ty rova aña olon' efe-tane'o atoy. ¹⁷ Aa ehe meo lalan-jahay hitoñañe o tane'oo. Tsy hiranga teteke ndra tanem-bahe, le tsy ho kamae'ay ty rano boak' am-bovo' areo ao; fa horihe'ay i Karanangam-Panjakay, vaho tsy hivio mañavia ndra mañavana ampara' te losore'ay o fehe'oo.

¹⁸ Aa hoe ty asa' i Edome ama'e, Tsy hiranga ty tane'ay nahareo, tsy mone hiavota'ay am-pibara. ¹⁹ Le hoe o ana' Israeleo tama'e, I Karanangay avao ty handenako, aa naho hinome'ay o rano'oo, zaho ndra o harekoo, le havahako ty vili'e; adono hirangàko an-tomboke tsy hampianto. ²⁰ Fe hoe re, Tsy hiranga nahareo. Le niavotse mb'am' iareo mb'eo ty Edome an-dahin-defo maro vaho am-pitñañe maozatse. ²¹ Aa le nifoneñe t'i Edome tsy nanolora' o fehe'eo lalañe hitsake t'Israele; aa le nivioñe aña t'Israele.

Ty Havilasi' i Aharone

²² Niavotse i Kadese iereo, le niperopotítse e Vohi-Hore o ana' Israeleo—i valobohòke iabiy. ²³ Le nanao ty hoe amy Mosè naho amy Aharone t'IEHOVÀ e Vohi-Hore ey, aña'efe-tane' i Edome eo: ²⁴ Hatontoñe am' ondati'eo t'i Aharone, ie tsy hizilike amy tane natoloko amo ana' Israeleoy,

* **20:1** Tsine: pisake † **20:5** Dagoa: ampongabeindañitse ‡ **20:13** Heb: Rano' i Meribà

amy te niola amy volakoy nahareo an-drano' i Meribà aña. ²⁵ Endeso t'i Aharone naho i ana'e Elazare vaho aseseo mañambone' i Vohi-Horey mb'eo, ²⁶ le abolio amy Aharone o saro'eo naho asaroño amy Elazare ana-dahi'e fa hatontoñe t'i Aharone toe hivetrake. ²⁷ Aa le nanoe' i Mosè i linili' IEHOVÀ vaho niañambone ty Vohi-Hore ampahaisaha' i valobohòke iabiy. ²⁸ Nafaha' i Mosè o saro' i Aharoneo naho nasaro'e amy Elazare ana'e, le nihomake andengo' i vohitsey t'i Aharone, vaho nizotso amy vohitsey t'i Mosè naho i Elazare. ²⁹ Aa ie nirendre' i valobohòke iabiy te nivilasy t'i Aharone, le fonga nandala aze telopolo andro ty anjomba' Israele.

21

Ty Mereñe Torisike

¹ Ie jinanji' i Arade Mpanjaka nte-Kanàne nimoneñe Atimo aña te niary mb'e Atarime mb'eo t'Israele, le nialy am' Israele re vaho nendese'e am-bahotse ty ila'e. ² Aa le nifanta am' IEHOVÀ t'Israele nanao ty hoe, Naho toe hasese'o am-pitá'ay ondaty rezao le fonga harotsa'ay o rova'eo. ³ Nihañoñe' IEHOVÀ ty fiarañanaña' Israele le nasese'e ama'e o nte-Kanàneo; fonga finongo' iareo o rova'eo; vaho natao *Kormà i taney. ⁴ Niavotse boak' am-Bohi-Hore eo le nionjoñe mb' an-dalañe migodañe mb'amy Ria-Binday mb' eo, hiariañe i tane' Edomey; fe nahangoae ondatio i liay. ⁵ Le nañinje an' Andrianañahare naho i Mosè ondatio ami' ty hoe: Aa vaho akore t'ie nindesa'o niakatse i Mitsraime hivetrake am-patrambey atoy, ie tsy ama' mahakama ndra rano naho mampangorý anay ty mofo maivañe toy. ⁶ Aa le nañiraha' IEHOVÀ merem-boreke ty añivo' ondatio ze nañehetse ondaty vaho maro amo ana' Israeleo ty nifitake. ⁷ Aa le nimb' amy Mosè mb'eo ondatio nanao ty hoe: Nandilatse ami' ty nañinjea'ay azo naho IEHOVÀ; ihalalio am'IEHOVÀ ty hanintaha'e o mereñeo. Aa le nihalaly ho a ondatio t'i Mosè. ⁸ Le hoe t'IEHOVÀ amy Mosè, Itseneo sare merem-boreke le asampezo ami'ty bodan-katae; le ho veloñe ze hene ondaty nihehereñe, mitalahatse ama'e. ⁹ Aa le namboare' i Mosè an-torisike i mereñey naho nasampe'e an-katae, aa naho nihehetse ondaty ty mereñé, ie nañente i mereñé torisike le niveloñe. ¹⁰ Nionjoñe amy zao o ana' Israeleo le nitobe e Obote. ¹¹ Niavota' iareo ty Obote vaho nitobe e Iai'haabarime, am-patrambey atiñana' i Moabe mb' am-panjirihan' andro mb'eo. ¹² Nionjoñe boak' ao iereo le nitobe am-Bavatane' i Zerede ao. ¹³ Hirik' ao iereo niavotse vaho nitobe alafe' i Arnone amy fatrambey mifototse an-tane' o nte-Emoreoy; amy te efe-tane' i Moabe i Arnoney, mañefetse i Moabe amo nte-Emoreo. ¹⁴ Zay ty nanoeñe amo Boke' o Ali' IEHOVÀOO ty hoe: Oahebe e Sofà, o toraha' i Arnoneo, ¹⁵ naho ty teva' o torahañeze mivaríñe mb'an toe' i Are, naho miefetse amy Moabe. ¹⁶ Ie hirik' ao nimb'e Bire mb'eo, i vovoñe nitsarae' IEHOVÀ amy Mosè ty hoe, Atontono ondatio hanjotsoako rano. ¹⁷ Le hoe ty nisaboe' Israele:

Mivoaña ry vovoñeо, isabo!

¹⁸ ty vovo nalente' o talèo,
hinali' ty roandria' ondatio,
an-kobaiñe, an-tsara' i Mpandily.

Ie boak'am-patrambey ao le nañavelo pak'e Matanà, ¹⁹ le boake Matanà mbe Mahaliele mb'eo, le hirike Mahaliele mb'e Bamote mb'eo, ²⁰ vaho boake Bamote am-bavatane' i Moabe mb' an-dengo' i Pisgà mitolike mb'amy ratraratray aña.

* ^{21:3} Kormà: kila fongotse

*Gioke t'i Sihone**Its 2.26-37*

²¹ Le nañitrike mb'amy Sihone mpanjaka' o nte-Emoreo t'Israele, nanao ty hoe: ²² Adono hiranga ty tane'o zahay. Tsy hivike mb' an-teteke ndra mb' an-tane-bahe; tsy hikama rano am-bovoñe. Hañorike i Karanangam-Panjakay avao ampara' te losore'ay ty efe-tane'o. ²³ F'ie tsy napo' i Sihone hiranga i efe'ey. Aa le natonto' i Sihone ondati'e iabio vaho niavotse haname Israele am-patram-bey ey, le nivotrake e Iàhatse re nialy am' Israele. ²⁴ Zinevo' Israele an-delam-pibara vaho tinava'e i tane'ey boak' amy Arnoney pak' ami' ty Iaboke naho pak' amo nte-Amoneo amy te fatratse ty efe-tane' o ana' i Amoneo. ²⁵ Aa le fonga rinambe' Israele o rova'eo vaho songa nimoneña' Israele o rova' o nte-Emoreo, e Khesbone naho o hene ana-drova'eo. ²⁶ Nirova' i Sihone mpanjaka' o nte-Emoreo ty Khesbone; niazo'e te nialy amy mpanjaka' i Moabey taoloy vaho fonga rinambe'e i tane'ek' ampa' Arnoney. ²⁷ Aa le hoe ty onin-tsaontsin-droae: Antao mb'e Khesbone mb'eo, hamboatse naho hañafatratse ty rova' i Sihone

²⁸ Fa niakatse i Kesobone ty afo, lel' afo boak' an-drova' i Sihone, nagodra'e i Are' i Moabey o talen-kaboa' i Arnoneo.

²⁹ Hekoheko ama'o ry Moabe, Rinotsake nahareo nte-Kemose: napo'e ho gike o ana-dahi'eo, naho o anak'ampela'eo ho miprohi' i Sihone, mpanjaka' i Emorey.

³⁰ Linihi'ay ambane iereo: Nihomake t'i Khesbone pak'e Dibone, le natsafe'ay pak'e Nofà, naho pak'e †Medebà.

³¹ Aa le nimoneña an-tane' Emore ao t'Israele. ³² Nampihitrife' i Mosè ty hitingaña Ia'azere le rinambe'e o tanà'eo vaho nanoe'e soike ze nte-Emore tao.

*Gioke t'i Oge**Its 3.1-22*

³³ Nitsile iereo, nañavelo an-dalaña mb'e Basane mb'eo; le niavotse hifanalaka am'iareo t'i Oge mpanjaka' i Basane rekets' ondati'e iabio, hañotakotake e †Edrey. ³⁴ Aa hoe t'IEHOVÀ amy Mosè, Ko ihembaña'o, fa natoloko am-pità'o rekets' ondati'e iabio naho i tane'ey. Ano ama'e hambaña amy nanoa'o amy Sihone mpanjaka' o nte-Emore nimpifehe' i Khesboneoy. ³⁵ Aa le zinevo' iareo naho o ana-dahi'eo naho ondati'eo, ampara t'ie tsy aman-tsengaha'e vaho rinambe'iereo i tane'ey.

22

Kinoi' i Balake t'i Balame

¹ Nionjom-beo o ana' Israeleo nitobe an-tanemira' i Moabe alafe' Iardene tandrife Ierikò ey. ² Ie amy zao hene nioni' i Balak' ana' i Tsipore i nanoe' Israele amo nte-Emoreoy. ³ Aa le nirevendreveña am'ondateo t'i Moabe kanao ninihaniha ty hamaro'e; le nanembetse i Moabe o ana' Israeleo. ⁴ Aa le hoe ty Moabe amo roandria' i Midianeo, Fonga ho tselà' i lahialeñey ze mañohoke an-tika manahake ty famelehan' añombe o ahetsé an-kivok'

† 21:30 Medebà: hadeongaritse † 21:33 Edrey: fiandrazaña

ey. Mpanjaka' o nte-Moabeo henane zay t'i Balak' ana' i Tsipore. ⁵ Le nampisangitrife'e mb'amy Balame ana' i Beore e Petore añolon-tsaka' an-tanen-te-* Arame aña ty irake hikanjiy aze ami'ty hoe: Inao, nivotrake boake Mitsraime aña t'indaty; hehe t'ie manitsike ty ambone' ty tane toy vaho mitobe marine ahiko etoa. ⁶ Mb'etoa aniany koahe, ozoño ho ahy ondatio, ie manjofake te amako. Hera ho gioheñe le ho soiheñe hiakatse an-tane atoy, fa apotako te soa tata o tatae'oo vaho fatran-tane o ozoñé'oo.

⁷ Aa le niavotse mb'eo o roandria' i Moabeo naho o roandria' i Midianeo reketse ty saram-pamorehañe am-pitáñe vaho niheo mb'amy Balame mb'eo ninday ty nisaontsia' i Balake. ⁸ Le hoe re tam' iereo, mialeña atoy te anito, le hañerem-bolañ' ama' areo raho, ze ho tsarae' IEHOVÀ amako. Aa le nialeñe amy Balame ao o roandria' i Moabeo. ⁹ Niheo mb'amy Balame t'i Andrianañahare nanao ty hoe: Ia ondaty mitraok' ama'oo? ¹⁰ Le hoe t'i Balame aman' Añahare, Nampañitrike ty saontsy toy amako t'i Balak' ana' i Tsipore: ¹¹ Heheke ondaty hirike Mitsraime añaeo: tsitsihe' iareo ty ambone' ty tane toy; aa le mb'etoa rehe, ozoño ho ahiko; hera hahalefeako aly vaho haronjeko aña. ¹² Le hoe t'i Andrianañahare amy Balame, Tsy hindreza'o fañaveloañe; tsy hozoñe'o ondatio fa soata. ¹³ Aa le nitroatse maraiñe t'i Balame nanao ty hoe amo roandria' i Balàkeo, Mimpolia mb' an-tane' areo aña, amy te nifoneñe t'IEHOVÀ tsy nañomey ahy lily hindrezako. ¹⁴ Aa le niongake o roandria' i Moabeo nimpoly mb' amy Balàke mb'eo, nanao ty hoe: Tsy nimete nindre ama'ay t'i Balame.

¹⁵ Nañitrik' ana-donake indraike t'i Balake, ondaty maro naho ambone' lohàñe te amo teoo. ¹⁶ Aa le niheo mb' amy Balame mb'eo indaty rey nanao ty hoe, Hoe t'i Balak' ana' i Tsipore, Ko anga'o ndra inoñ' inoñe ty hisebañe azo tsy homb' amako mb'etoa; ¹⁷ toe ho rengèko vaho hanoeko ze saontsia'o. Aa le miambane ama'o t'ie homb'etoa hañozoñe ondatio ho ahiko. ¹⁸ Le hoe ty natoí' i Balame amo mpitoro' i Balakeo, Ndra te natolo' i Balak' amako ty anjomba'e pea volafoty naho volamena le tsy mete handilatse ty tsara' IEHOVÀ Andrianañahareko raho hanao ndra inoñ' inoñe ke t'ie bey he kede. ¹⁹ Aa le mialeña amako etoa manahake ty nanoe' o ila'eo haharendrehako ze tsara hatovo' IEHOVÀ amako. ²⁰ Le niheo mb' amy Balame amy haleñey t'i Andrianañahare nanao ty hoe ama'e, Aa naho nimb'ama'o mb' atoy ondatio hikanjy azo, miavota naho indrezo; fe ze entañe hatoloko azo avao ty hanoe'o. ²¹ Aa le nañaleñaleñe t'i Balame nanampe fitobohañe amy borìke'ey, vaho nitrao-dia amo androanavi' i Moabeo.

I Balame, i Borìkey naho i Anjeliy

²² Fe nampamiañe ty haviñeran' Añahare i fañavelo'ey, vaho nijohañe hikalañe i lala'ey ty Anjeli' IEHOVÀ, hiatreatrea'e hoe rafelahy. Ie amy zao ninigitse borìke naho nindre ama'e ty mpitoro'e roe. ²³ Nahatreia i Anjeli' IEHOVÀ nijohañe an-dalañe ey reketse fibara natsoak' am-pitá'e i borìkey, le nivioñe amy lalañey i borìkey nitsile mb'an-tetek' ao, le finofo' i Balame ty lafa hampibalik' aze mb'amy lalañey. ²⁴ Le nijohañe ami' ty zitse añivo' ty tanem-bahe roe ey i Anjeli' IEHOVÀ, ty kijoly etia naho ty kijoly etia. ²⁵ Ie nitrea' i borìkey i Anjeli' IEHOVÀ le nioza amy rindriñey, vaho nanindry ty kitso' i Balame amy rindriñey, aa le linafa'e indraike. ²⁶ Nihànkäne aolo ey amy zao i Anjeli' IEHOVÀ nijohañe añ' oloñoloñe ey, le tsy eo ty hivioñañe ndra mañavana ndra mañavia. ²⁷ Naho nizoe' i borìkey i Anjeli'

* ^{22:5} Arame: ondati'e

IEHOVÀY le nibabok' ambane' i Balame eo; tsekak' amy zao ty haboseha' i Balame le finofo'e an-kobai'e i borìkey. ²⁸ Aa le sinoka' IEHOVÀ ty vava' i borìkey, vaho hoe re amy Balame, Ino ty nanoeko ama'o kanao linafa'o intelo aniany? ²⁹ Le hoe t'i Balame amy borìkey, Amy t'ie nanalatse ahy, le nainako te ni-reke-pibara ty tañako henaneo hamonoako azo! ³⁰ Aa le hoe i borìkey amy Balame, Tsy zaho hao o borìke'oo, i ningira'o amo hene tao'o pake henaneoy? Liliko hao ty manao zao ama'o? Aiy, hoe re.

³¹ Aa le nampibeabe' IEHOVÀ ty fihaino' i Balame naho niisa'e nijohañe amy lalañey i anjeliy, am-pibara napontsoañe am-pità'e; le nibotreke re nibabok' an-dahara'e. ³² Le hoe i Anjeli' IEHOVÀY ama'e, Inoñe ty nijerà'o i borìke'oy in-telo? Nimb' atoy raho am-pirafelahaña, amy te ihe manao hajangaringaria añatrefako. ³³ Nitrea' i borìkey raho le nivioña'e intelo. Aa naho tsy niholiara'e le toe ho nañe-doza ama'o raho anianikey vaho ho nengako velon-dre. ³⁴ Le hoe t'i Balame amy Anjeli' IEHOVÀY, Nanao hakeo raho fa tsy napotako te nijohañe an-dalañe ey rehe hiatatre ahy. Aa naho joy ty am-pihano'o le himpoly raho. ³⁵ Aa le hoe i Anjeli' IEHOVÀY amy Balame, Akia, mindreza am'ondaty reo, fe ze entañe volañeko ama'o avao ty ho taroñe'o. Aa le nañavelo nindre lia amy androanavi' i Balàke rey t'i Balame.

³⁶ Ie jinanji' i Balake te fa tsatoke t'i Balame le niavotse mb'e Ire[†]-Moabe mb'amy efe-tane eféra' i Arnoney, ty efe'e lavitse ama'e mb'eo hifanalaka ama'e. ³⁷ Le hoe t'i Balak' amy Balame, Aa vaho tsy nimaneako hitrike naho kanjy v'iheo? Ino ty tsy nañaveloa'o mb'amako. Tsy haiko hao ty hiasy azo? ³⁸ Le hoe t'i Balame amy Balake, Intoy fa ama'o! meteko hao ty hanao ndra inoñ' inoñe? Tsy mahay tsy ze tsara apon' Añahare ambavako ao avao ty ho taroñeko. ³⁹ Aa le nindre lia amy Balake t'i Balame vaho nipotítse e [‡]Keriat-kozote eo. ⁴⁰ Nisoroñe añombe naho añondry amy zao t'i Balake vaho nañitrifa'e t'i Balame naho o androanavy nindre ama'eo. ⁴¹ Ie amy maraiñey le nendese' i Balake nañambone' i §Bamà-Baale t'i Balame, le eo re ro nahatalake ty indra' ondatio.

23

¹ Le hoe t'i Balame amy Balake, mandrafeta kitrely fito etoañe vaho hajario ho ahy ty añombelahy fito naho añondrilahy fito. ² Le nihenefa' i Balake i sinaontsi' i Balamey; le songa nisoroña' i Balake naho i Balame amy kitrely rey ty añombelahy naho ty añondrilahy. ³ Le hoe t'i Balame amy Balake, Mijohaña marine o isoroña'oo le hivike raho hera hifampikaoña amako t'IEHOVÀ, le hatalliko azo ze hatoro'e ahiko. Aa le nimb' an-kaboa mb'eo re. ⁴ Le nifañaoñe amy Balame t'i Andrianañahare, vaho hoe t'i Balame ama'e. Fa hinajariko ty kitrely fito naho songa nisoroñako añombelahy naho añondrilahy amy kitreli'e rey. ⁵ Napo' IEHOVÀ am-palie' i Balame ao ty tsara, ami'ty hoe, Mibaliha mb' amy Balake mb'eo le inao ty ho saontsie'o. ⁶ Le nibalike mb'ama'e mb'eo re nanjo aze nijohañe marine o nisoroña'eo, ie naho ze hene roandria' i Moabe. ⁷ Le nonjone'e ami' ty hoe i fandrazaña'ey:

Fa ninday ahy boak' Arame
t'i Balake mpanjaka' i Moabe;
hirik' amo vohitse atiñanañ'eñeo.
Mahavia, Ozoño ho ahiko t'Iakòbe,

[†] 22:36 Ir: Fijilojilovañe [‡] 22:39 Kiriati-kozote: rova aman-dalambey § 22:41 Bamà-Baale: haboan-drahare Baale

Mb'etoa onjiro t'Israele!
 8 Aa vaho akore ty hamàrako
 ty tsy nafàn' Añahare?
 Vaho akore ty hañonjirako
 i tsy nonjira' IEHOVÀ?
 9 Ie talakeko boak' ambone' vato ey,
 sinambako hirik' ankaboañey;
 Hehe t'indaty mizoizoy,
 tsy ho volilieñe amo kilakila 'ndatio!
 10 Ia ty mahaiake ty debo' Iakòbe
 ndra hamolily ty fah'efa' Israele?
 Apoho raho hikenkañe
 am-pihomaha' o vantañeo,
 Ehe ampanahafo amy firompoa'ey ty ahiko.

11 Le hoe t'i Balak' amy Balame, Ino ty nanoe'o amako? Nendeseko mb'
 etoan-drehe hañozoñe o rafelahikoo te mone nitatae'o avao. 12 Le tinoi'e
 ami'ty hoe, Tsy hambenako hao ty hivolañe ze apo' IEHOVÀ am-bavako ao?

Fetse' i Balame faharoe

13 Le hoe t'i Balake tama'e, Antao mb' an-toetse raike ey hahatalakesa'o
 aze; ty ila'e avao ro ho oni'o fa tsy ie iaby, le ozoño boak' ao ho ahiko.
 14 Aa le nendese'e mb'an-tete' i *Tsofime mb'eo re ankaboa' i Pisgà ey naho
 nañoreñe kitrely fito, vaho nisoroñe añombelahy naho añondrilahy amy
 kitreli'e rey. 15 Le hoe re amy Balake, Mijohaña etoa marivo o isoroña'oo,
 le homb' aroan-draho, hifañaoñe. 16 Nifampikaoñe amy Balame t'IEHOVÀ
 le nampipoke ty tsara am-palie'e naho nanao ty hoe: Mibaliha mb'amy
 Balake mb'eo vaho isaontsio zay. 17 Aa le nimb' ama'e mb'eo vaho nizoe'e
 nijohañe amy nisoroña'ey rekets' o roandria' i Moabeo. Le hoe t'i Balak'
 ama'e, Inoñe ty nitsarae' IEHOVÀ? 18 Aa le nonjone'e ami'ty hoe i razan-
 tsaontsi'ey:

Miongaha ry Balake, mijanjiña!
 Anokilaño ravembia ry ana' i Tsipore.

19 Tsy ondaty t'i Andrianañahare t'ie handañitse,
 naho tsy ana'ondaty t'ie haneñeñe.

Aa vaho tsy hanoe'e i nitsarae'ey?
 tsy ho henefe'e hao i nitaroñe'ey?

20 Ingo nanoloran-dily hitata raho;
 aa kanao ie ro nitata tsy meteko afotetse.

21 Tsy nahaoniña'e hakeo t'Iakòbe
 tsy nahaisaha'e tahiñe t'Israele.

Ama'e t'IEHOVÀ Andrianañahare'e,
 naho ama'e ao ty koim-panjaka.

22 I Andrianañahare nampienga aze
 amy Mitsraimey,

ro tsifan-drimo abo ama'e.

23 Toe tsy atreatrem-boreke t'Iakòbe
 vaho tsy trean-tsikily t'Israele,
 Ie henaneo ro tsaraeñe
 ty am'Iakòbe naho am'Israele, ty hoe:
 Heheke ty nanoen'Añahare.

24 Hitroatse hoe liona vave'e ondatio,

* 23:14 Tsofime: Mpijilo

hiongake hoe liona lahi'e:
 Tsy handre am-para' t'ie
 mihinan-tsindroke
 vaho minoñe ty lio' i vinonoy.

²⁵ Le hoe t'i Balak' amy Balame, Ko ozoñe'o ka, naho ko itata'o. ²⁶ Fe hoe ty navale' i Balame i Balake, Tsy vinolako hao te ze tsarae' IEHOVÀ, le tsy mete tsy zay ty hanoeko? ²⁷ Le hoe t'i Balak' amy Balame, Antao, fa hendeseko mb'an-toetse raike ka rehe hera ho non' Añahare ty hañozoñe iareo ho ahiko boake ey. ²⁸ Le nendese' i Balake mb' an-dengo' i Peore, ahatalakesañe mb' am-patrambey eñe, t'i Balame. ²⁹ Le hoe t'i Balame amy Balake, Añoreño kitrely fito ty etoy vaho añajario añombelahy fito naho añondrilahy fito. ³⁰ Le nanoe' i Balake i sinaontsi' i Balamey vaho songa nisoroña'e an-kitrely ty añombelahy naho ty añondrilahy.

24

¹ Aa kanao nioni' i Balame te ninò' IEHOVÀ ty hitata Israele le tsy nisikilie'e nanahake i lili'ey fe nampitolihe'e mb' am-patrambey eñe ty lahara'e. ² Aa naho niandra t'i Balame le nioni'e t'Israele nimoneñe an-kiboho'e ey nilahatse amo fifokoa'eo; le nivotrak' ama'e ty arofon' Andrianañahare; ³ vaho nonjone'e ami'ty hoe ty razan-drehake,
 Hoe ty fetse' i Balame ana' i Beore,
 naho ty lañona' ondaty
 am-pihaino misokake.

⁴ Ty enta' ondaty mahajanjiñe
 ty tsaran'Añahare,
 naho mahaisake ty aroñaro' i El-Sadai*, mibaboke
 fe am-pihaino mibolanake:

⁵ Fanjaka o kiboho'oo ry Iakòbe
 naho o kivoho'oo ry Israele.

⁶ Mivelatse hoe vavatane,
 hoe kodobo añ'olon-tsaka,
 hoe vahoñe nambole' IEHOVÀ
 hoe mendoraveñe añ'olon-drano.

⁷ Hidoandoan-drano o sihoa'eo
 naho ho an-drano maro o tabiri'eo.
 Mitoabotse ambone' i Agage ty mpanjaka'e
 vaho onjoneñe i fifehea'ey.

⁸ Manahake ty tsifan-drimo mitiotiotse
 t'i Andrianañahare nampiavotse aze amy Mitsraime.
 Hampibotseke ze tane malaiñe aze
 hampipozapozake o taola'eo,
 hamptrofahe'e amo ana-pale'eo.

⁹ Nitsakononòke re,
 nanao fandreas-diona
 naho hoe liona rene'e, ia ty hampitsekak' aze?
 Hene soa tata ze mitat'azo
 Fonga ozoñeñe o mañozoñ'azoo.

¹⁰ Nisolebotse amy Balame amy zao ty habose' i Balake, le nifampitra-bohe'e o fità'eo, naho hoe t'i Balak' amy Balame, Nikanjiako hañozoñe o rafelahikoo, vaho hehe te nitsitsihe'o tata in-telo. ¹¹ Mibioña arè mb' an-toe'o aña, ie ho nonjoneko andikerañe eñe ty asi'o; te mone kinala' IEHOVÀ i ho ni-enge'oy. ¹² Le hoe t'i Balame amy Balake, Tsy vinolako hao o ìra'o

* ^{24:4} Andriampañotroñe, kila lefe'e

nampihitrife'o amakoo ty hoe,¹³ Ndra te hatolo' i Balak' ahiko ty volafoty naho volamena mahaatseke i anjomba'ey, tsy ho likoareko ty falie' IEHOVÀ, hanoako ty soa ndra ty raty boak' an-troko, fa ze nitsarae' IEHOVÀ ty ho taroñeko? ¹⁴ Aa le himpoliako ondatikoo henaneo, fe adono hey hitoroako ty hanoe' ondaty reroañe am'ondati'oo amo andro ampara'e añaeo.

Fitokia' i Balame Fahefatse

¹⁵ Aa le nonjone'e ami'ty hoe i fandrazaña'ey:

Ty lañona' i Balame ana' i Beore,
ty taro' ondaty am-pihaino nabeake.

¹⁶ Ty kora' i mpijanjiñe
o tsaran' Añahareoy,
vaho ama'e ty fahafohinañe
i Andindimoneñey,
Oni'e ty aroñaro' i El-Sadai
mibaboke fe am-pihaino mibeake:

¹⁷ Treako fa tsy henaneo;
misamb' aze raho fe tsy mitotoke;
hiboak' am' Iakòbe ty vasiañe,
hionjoñe hirik'am' Israele ty kobaiñe,
ho demohe'e o olon-tane' i Moabeo
le fonga ho rotsahe'e o anam-pifandrakarakañe.

¹⁸ Ho fanañañe t'i Edome,
ho hanaña' o rafelahi'eo t'i Seire,
le hitoloñ' an-kafatrarañe t'Israele.

¹⁹ Hiboak' am' Iakòbe ty hifehe,
handrotsake ty sehanga' i Are.

²⁰ Ie nitalakese'e t'i Amaleke le nonjone'e ty fetse'e ami'ty hoe:
Nilohà' o kilakila taneo t'i Amaleke,
Fe hamongorañe ty ho figadoña'e.

²¹ Nisambae'e amy zao o nte-Keineo, vaho nañonjona'e fetse ami' ty hoe:
Fatratse o fimoneña'oo
naho mioreñe an-damilamy eo ty akiba'o;

²² fe ho forototoeñe t'i Kàine;
ampara' mbia te ho tana' i Asore an-drohy?

²³ Le nonjone'e ty fetse'e nanao ty hoe:
Hedey! Ia ty ho veloñe
naho akipen' Añahare?

²⁴ Hitotsak' eo o lakambey hirik'
añ'olo' i Ketio,
ho silofe' iareo t'i Asore
naho hampiambane'e t'i Aibere,
ampara' t'ie mongotse nainai'e.

²⁵ Aa le niongake t'i Balame, nienga, naho nimpoly mb'an-toe'e aña;
vaho nimb' amy lia'e mb'eo ka t'i Balake.

25

Fiambaneña'e amy Baale' i Peore

¹ Nitobe e Setime eo t'Israele le niorotse nanao hakarapiloña'e amo ampela' i Moabeo ondatio. ² Nambarañe ondatio hiatreke ty fisoroña' iareo amo ndrahare' iareoo, le nikama ao ondatio vaho nibokoboko amo ndrahareo. ³ Aa kanao niharо baoñe amy Baale t'Israele le nisolebotse am' Israele t'IEHOVÀ. ⁴ Aa le hoe t'IEHOVÀ amy Mosè, Endeso

o talè' ondatioo vaho aradoradò an-tariñandroke eo añatrefa' IEHOVÀ o nandilatseo hisitaha' ty haviñerañe miforoforo' IEHOVÀ am' Israele. ⁵ Aa le hoe t'i Mosè amo mpizaka' Israeleo, Songa mamonoa ze ondati'e nitraobaoñe amy Baale' i Peoreo.

⁶ Inge henane zay, te nimb'eo ty ana' Israele ninday ty ampela nte-Midiane mb' amo longo'eo ampahaisaha' i Mosè, naho am-pahaisaha' i valobohò' Israele, ie nirovetse an-dalam-pimoahañe an-kibohom-pamantañañe eo. ⁷ Aa naho niisa' i Pinekase ana'i Elazare ana' i Aharone mpisoroñe, le niongake nienga i valobohòkey ninday lefoñe am-pitá'e; ⁸ le norihe'e pak' an-kiboho'e ao indati' Israele vaho tinombo'e i roroey; tineñateña'e indati' Israele naho i ampelay, le nitsamantak' am-pisafoña. Aa le nijihetse ty angorosy añivo' o ana'Israeleo. ⁹ Ro'ale-tsi-efats' arivo ty navetra' i angorosiy.

¹⁰ Le hoe ty nitsara' IEHOVÀ amy Mosè: ¹¹ Fa nampihankañe' i Pinekase ana' i Elazare, ana'i Aharone Mpisoroñe amo ana' Israeleo ty haboseko amy t'ie nahimbañe amo fahimbañako añivo' iareo ao, le tsy nampangotomomoheko o ana' Israeleo amy famarahiakoy. ¹² Le hoe raho: Atoloko aze ty fañinam-panintsíñako, ¹³ naho ty fañinam-pisoroñañe tsy modo, ho aze naho o tarira'e manonjohy azeo; amy t'ie nimpamarahy aman' Añahare'e le nefere'e o ana' Israeleo.

¹⁴ Ty tahina' indati' Israele tinomboke nindre amy ampela nte-Midianeiy, i Zimry ana' i Salò, mpiaolo' ty anjomban-droae' o nte-Simoneo. ¹⁵ Le ty añara' i ampela nte-Midiane vinonoy, i Kozbý ana' i Tsore mpiaolo' ty anjomban-droae' e Midiane ao.

¹⁶ Aa hoe t'IEHOVÀ amy Mosè, ¹⁷ Hehero o nte-Midianeo le rotsaho; ¹⁸ amy te nihehera' iereo ami'ty fikiniàm-pamañahia' iareo amy Peore naho amy Kozbý, ana' i mpiaolo nte-Midianey, rahavave' iareo tinomboke tañ'andro' i angorosy e Peorey.

26

Famoliliañe o Mpirai-nono Vao

¹ Ie aña i angorosiy le nitsara amy Mosè naho i Elazare ana' i Aharone mpisoroñe t'IEHOVÀ nanao ty hoe: ² Volilio o valobohò' Israeleo, ze roapololo taoñe mañambone, amo anjomban-droae' iareoo, ze hene mahafiatrek' aly e Israele ao. ³ Aa le nisaontsy am' iereo t'i Mosè naho i Elazare a montom-bei' i Moabe marine' Iardeney tandrife Ierikò, ami' ty hoe: ⁴ Volilio ondatioo, ze roapololo taoñe mañambone, ami'ty nandilia' IEHOVÀ i Mosè, naho o ana' Israele niavotse an-tane Mitsraimeo:

⁵ I Reòbene ty tañoloñoloña' Israele. O tarira' i Reòbeneo: boak' amy Hanoke, o nte-Hanokeo; boak' amy Palò o nte-Palòo, ⁶ boak' amy Ketsrone o nte-Ketsroneo, boak' amy Karmy o nte-Karmio. ⁷ Zao o hasavereña' o nte-Reòbeneeo: ze niaheñe ama'e ni-efats' ale-tsi-telo-arivo-tsi-fiton-jato-tsi-telopolo. ⁸ Le o tarira' i Palòo: i Eliabe, ⁹ o ana'i Eliabeo: i Nemoele, i Datane, i Abirame nisolom-bata' i valobohòkey nirekets' amy Korahke, ie niola amy Mosè naho i Aharone vaho niola am' IEHOVÀY, ¹⁰ ie nanokafa' i taney vava, nampigedrañ'e i Korahke naho nañomake i màroy, vaho namorototo indaty roanjato-tsi-limampolo rey añ'afó, hanjaria' iareo hatahata. ¹¹ Fe tsy nihomake o ana' i Korahkeo.

¹² O tarira' i Simone amo hasavereña'eo boak'amy Nemoele o nte-Nemoeleo, boak' am' Iamine o nte-Iamineo, boak' am' Iakine o nte-Iakineo,

¹³ boak'amy Zerake o nte-Zerakeo, boak' amy Saòle o nte-Saòleo; ¹⁴ zao o hasavereña' i Simoneo: ro' ale-tsi-ro' arivo-tsi-roan-jato.

¹⁵ O tarira' i Gade amo hasavereña'eoo: boak' amy Tsefone o nte-Tsefoneo, boak' amy Kagý o nte-Kagio; boak' amy Soný o nte-Sonío; ¹⁶ boak' amy Ozný o nte-Oznio, boak' amy Airý o nte-Airio; ¹⁷ boak' amy Arode o nte-Arodeo, boak' amy Arelý o nte-Arelío; ¹⁸ zao o hasavereña' i Gadeo, amo niaheñe ama'eo, efats'ale-tsi-liman-jato.

¹⁹ Ty ana' Iehodà, i Ere naho i Onane; fe nihomak' an-tane Kanàne añe t'i Ere naho i Onane, ²⁰ le o tarira' Iehodà an-kasavereña'eo: boak'amy Selà o nte-Selao; boak' amy Peretse o nte-Peretseo; boak' amy Zèrake o nte-Zèrakeo. ²¹ Le ty ana' i Peretse: boak' amy Ketsrònè o nte-Ketsroneo; le boak' amy Kamòle o nte-Kamoleo. ²² Zao o hasavereña' Iehodà amo niaheñeo: fito-ale-tsi-eneñ'arivo-tsi-liman-jato.

²³ O tarira' Isakhare amo hasavereña'eoo: boak' amy Tolà o nte-Tolào; boak' amy Poà o nte-Poao; ²⁴ boak'am' Iasòbe o nte-Iasobeo; boak' amy Simrone o nte-Simroneo; ²⁵ zao o hasavereña' Isakhare amo niaheñeo: eneñ'ale-tsi-efats' arivo-tsi-telonjato.

²⁶ O tarira' i Zebolone amo hasavereña'eoo: boak' amy Serede o nte-Seredeo; boak'amy Elone o nte-Eloneo; boak'am' Iakleèle o nte-Iakleleo; ²⁷ zao o hasavereña' i Zeboloneo amo niaheñeo: eneñ' ale-tsi-liman-jato.

²⁸ Ty ana' Iosèfe amo tarira' i Menasè naho i Efraimeo: O tarira' i Menasè amo hasavereña'eoo: ²⁹ boak'amy Makire o nte-Makireo, le nasama' i Makìre t'i Gilàde, o hasavereña' Gilàdeo; ³⁰ zao ro ana' i Gilade: boak' am' Ièzere o nte-Iezereo; boak' amy Kàileke o nte-Kailekeo; ³¹ boak' amy Asrièle o nte-Asrieleo; boak' amy Sèkeme o nte-Sèkemeo; boak' ³² amy Semidà o nte-Semidao; boak' amy Kàifere o nte-Kaifereo; ³³ tsy nanañ' anadahy t'i Tsélofekhàde ana' i Kàifere; ty añara' o anak' ampela'eo le Maklà, i Noà, i Koglà, i Milkà, vaho i Tirtsà. ³⁴ O niaheñe amo hasavereña' i Menasèo: lime-ale-tsi-ro'arivo-tsi-fitonjato.

³⁵ O tarira' i Efraime amo hasavereña'eoo: boak' amy Sotèlake o nte-Sotèlakeo; boak' amy Bèkere o nte-Bekereo; boak' amy Tàkane o nte-Takaneo; ³⁶ le amo ana' i Sotèlakeo: boak' amy Eràne o nte-Eraneo. ³⁷ Aa o niaheñe amo hasavereña' i Efraimeoo: telo-ale-tsi-ro' arivo-tsi-liman-jato. Zay o tarira' Iosèfe amo hasavereña'eoo.

³⁸ O tarira' i Beniamène amo hasavereña'eoo: boak' amy Bèla o nte-Belao; boak' amy Asbèle o nte-Asbeleo; boak' amy Akiràme o nte-Akirameo; ³⁹ boak' amy Sefofàme o nte-Sefofameo; boak' amy Kofàme o nte-Kofameo. ⁴⁰ O ana' i Belao: i Arde naho i Naamàne: boak' amy Arde o nte-Ardeo; boak' amy Naamane o nte-Naamaneo. ⁴¹ Aa o niaheñe amo hasavereña' i Beniamèneoo: efats' ale-tsi-lime-arivo-tsi-enenjato.

⁴² O tarira' i Dane amo hasavereña'eoo: boak' amy Sokàme o nte-Sokameo; Zao o tarira' i Dane amo hasavereña'eoo; ⁴³ le ty ia' o nte-Sokàmeo amo niaheñeo: eneñ' ale-tsi-efats' arivo-tsi-efa-jato.

⁴⁴ O tarira' i Asere amo hasavereña'eoo: boak' am' Imnà o nte-Imnao; boak'am' Isvý o nte-Isvío; boak' amy Beria o nte-Beriao. ⁴⁵ Aa naho o ana' i Beriao: boak' amy Kèbere o nte-Kèbereo; boak' amy Malkièle o nte-Malkieleo; ⁴⁶ le Sèrake ty tahina' ty anak' ampela' i Asere. ⁴⁷ Zao o tarira'i Asere amo hasavereña'e niaheñeo lime-ale-tsi-telo-arivo-tsi-efa-jato.

⁴⁸ O tarira'i Naftalý an-kasavereña'eo: boak' am' Iaktseèle o nte-Iaktseèleo; boak' amy Gony o nte-Gonio; ⁴⁹ boak' am' Iètsere o nte-Iètsereo; boak' amy Silème o nte-Silemeo; ⁵⁰ Zao o tarira' i Asere amo hasavereña'e niaheñeo: efats' ale-tsi-lime-arivo-tsy efa-jato.

⁵¹ Aa le ty ia' o ana' Israele niaheñeo: enen-ketse-tsi-arivo-tsi-fitonjato-tsi-telopolo.

⁵² Le hoe ty nitsara' IEHOVÀ amy Mosè: ⁵³ Amo retiañe ty anjaràñe i taney ho lova ty ami'ty ia' o tahinañe. ⁵⁴ Ho tolora'o lova bey ty maro le hanjarà'o lova kede ty tsy ampe; songa hanoloran-dova ty amy hamaro' o vinolily ama'eo. ⁵⁵ Le an-tsapake ty hanjarañe i taney; ami'ty tahanandroae' o fifokoañeо ty handovà' iareo aze. ⁵⁶ Tsato-piso ty hanjarañe i lovay añivo' ty maro naho ty tsy ampe.

⁵⁷ Le zao ty famoliliañe o nte-Levio amo amori'eo: boak' amy Geresòne o nte-Geresoneo, boak' amy Kehàte o nte-Kehàteo; boak'amy Merarý o nte-Merario; ⁵⁸ le zao ty hasavereña' o nte-Levio: ty hasavereña' o nte-Libniò, ty hasavereña' o nte-Kebronio, ty hasavereña' o nte-Maklìo; ty hasavereña' o nte-Mosio; vaho ty hasavereña' o nte-Korahkìo. Le nisamake i Amrame t'i Kehate; ⁵⁹ Iokèbede ana' i Levy ty tahina' ty vali' i Amrame, nasama' i Amrame t'i Aharone naho i Mosè vaho i Miriamé rahavave' iareo. ⁶⁰ Nasama' i Aharone t'i Nadàbe naho i Abihò naho i Elazare vaho Itamare; ⁶¹ sambe nihomake t'i Nadabe naho i Abiho, ie nañenga afo tsie am' IEHOVÀ. ⁶² Ty ia' o niaheñe am' iereoo: ro'ale-tsi-telo-arivo, songa lahilahy vola'e raike mañambone; ie tsy niaheñe amo ana' Israeleo, amy te tsy nanoloran-dova amo ana'Israeleo.

⁶³ Irezay ty namolilia' i Mosè naho i Elazare mpisoroñe, ie namolily o ana' Israeleo an-tanemira' i Moabe añ'olo' Iardeney tandrife' Ierikò eo.

⁶⁴ Le amo vinolilio, leo raike tsy niahe' i Mosè naho i Aharone mpisoroñe tamy famoliliañe o ana' Israeleo am-patrambey Sinaiy. ⁶⁵ Amy tsinara' IEHOVÀ am' iareo ty hoe: Toe hivetrak' am-patrambey ao iereo, aa le tsy nengàn-dahilahy naho tsy i Kalebe ana' Iefone naho Iehosoa ana' i None avao.

27

O Anak'Ampela' i Tselofekàdeo

¹ Niheo mb'eo amy zao o anak' ampela' i Tselofekhàde ana' i Kèfere, ana' i Gilàde, ana'i Makire, ana'i Menasè ana' Iosefeo; le zao ty tahina' o anak' ampela'eo: i Maklà, i Noae, Koglæ, i Milka, vaho i Tirtsà, ² naho nijohañe añatrefa' i Mosè naho i Elazare mpisoroñe naho o roandriañe naho i hene valobohòkey an-dalan-kibohom-pamantañañe eo, nanao ty hoe: ³ Nivilasy am-patrambey aña ty rae'ay, f'ie tsy ni-mpiame nifanontoñe niatreatre am' IEHOVÀ, tsy ni-mpiame Kòrahke, fa nihomak' amo hakeo'eo avao vaho tsy nanañ' ana-dahy. ⁴ Aa vaho hasintak' amandrolongo'e hao ty tahanan-drae'ay amy te tsy aman' anadahy? Ehe anoloro lova amo longon-droae'aio.

⁵ Nente' i Mosè añatrefa' IEHOVÀ i saontsy zay. ⁶ Le nitsara amy Mosè t'IEHOVÀ nanao ty hoe: ⁷ Mivolantò o anak' ampela' i Tselofekàdeo; toe hitolora'o lova amo lovan-drahalahin-drae'eo, vaho hampandovae'o ty lovan-drae'e. ⁸ Le saontsio amo ana' Israeleo ty hoe: Naho vilasy t'indaty tsy nampipok' ana-dahy, le hampandovae' areo o anak' ampela'eo ty lova'e. ⁹ Aa ie tsy aman' anak'ampela le hatolo'o an-droahalahi'e ty lova'e. ¹⁰ Aa ie tsy aman-drahalahy, le hatolo'o an-droahalahin-drae'e ty

lova'e. ¹¹ Aa naho tsy aman-drahalahy ty rae'e le hatolo'o amy ze longo marine aze amy fifokoa'ey i lova'ey, vaho ie ty handova aze; ho fañè-jaka amo ana' Israeleo zay amy nandilia' IEHOVÀ i Mosèy.

Norizañe handimbe i Mosè t'Iehosoa

¹² Aa le hoe t'IEHOVÀ amy Mosè: Mañambonea am-bohi' Abarime mb' atoy, le oniño i tane atoloko amo ana' Israeleoy. ¹³ Aa ihe mahaisak' aze, le hatontoñe amo longo'oo manahake ty nanontoñañe i Aharone amo rahalahi'eo. ¹⁴ Amy te niola'o i llikoy amy nifandiera' i valobohòkey am-patrambei' i Tsiney, ihe tsy nañonjoñe ty engeko añatrefa' iereo amy ranoy. (Ie i rano natao Meribà e Kadese am-patram-bei' i Tsiney.)

¹⁵ Le nisaontsy am' IEHOVÀ t'i Mosè nanao ty hoe, ¹⁶ Ee te hanendre ondaty hifehe i valobohòkey t'IEHOVÀ Andrianañaharen' arofo' ze hene nofotse, ¹⁷ ie ty hiakatse naho hizilik' añatrefa' iareo, naho hiaolo iareo te mionjoñe, vaho hampipoly iareo, tsy mone hanao lian' añondry tsy amam-piarake ty valobohò' IEHOVÀ.

¹⁸ Le hoe t'IEHOVÀ amy Mosè: Rambeso t'Iehosoa, ana' i None, ondaty aman' arofo, le anampezo fitàñe; ¹⁹ avotraho aolo' i Elazare naho añatrefa' i valobohòkey re le orizo am-pahaoniña' iareo. ²⁰ Le andivao ama'e ty lili'o, hivohora' ty valobohò' Israele. ²¹ Hijohañe añatrefa' i Elazare mpisoroñe re, le ie ty hañontane ho aze ami' ty fizakà' i Orime añatrefan' Añahare. Amy saontsi'ey ty hiavota' iareo vaho amy saontsi'ey ty hiziliha' iareo; ie naho o ana' Israele mindre ama'eo, i valobohòkey. ²² Aa le nanoe' i Mosè i nandilia' IEHOVÀ azey. Rinambe'e t'Iehosoa vaho nampiheove'e añatrefa' i Elazare mpisoroñe naho i valobohòkey; ²³ le nanongoa'e fitàñe vaho namantok' aze, amy natoro' IEHOVÀ am-pitá' i Mosey.

28

O Enga Boak'Androo

Avo. 29.38-46

¹ Hoe ty nitsara' IEHOVÀ amy Mosè: ² Lilio o Ana' Israeleo naho ano ty hoe: Ambeno' areo amy andro famantañañ' azey ty hañengàñe amako i hanekoy, i soroñañe amako ho hèñin-kanintsiñe amakoy. ³ Le ano ty hoe iereo: Zao ty hisoroñañe am' IEHOVÀ andro am-pohatse ho lilim-pisoroñañe: vik' añondrilahy roe tsy aman-kandra. ⁴ Hengae'o maraindray ty vik' añondry vaho hengae'o folakandro ty faharoe, ⁵ reketsé mona fahafolo' ty efà linaro mena-piniritse fahèfa' ty hine ho enga-mahakama. ⁶ Le lilim-pisoroñañe norizañe ambohi-Sinay aña ho hèñin-kanintsiñe, fisoroñañe am' IEHOVÀ. ⁷ Le songa añengañe enga-rano fahèfa' ty hine i añondry roe rey; ailiñe am' IEHOVÀ amy toe-miavakey i divay soay ho enga-rano. ⁸ Engae'o ami' ty folakandro i vik' añondry ila'ey rekets' i enga-mahakama'ey naho i enga-rano'ey, hambañe amy nañengañe amy maraiñei ty hañenga'o aze: soroñe ho hèñin-kanintsiñe am' IEHOVÀ.

Enga-tSABATA

⁹ Ie ami'ty andro Sabotse, le vik' añondrilahy roe tsy aman-kandra, naho mona fahafolo' ty efa roe ho enga-mahakama, linaro menake naho i enga-rano'ey: ¹⁰ zay ty hisoroñañe boa-tSABATA ambone' i enga hisoroñañe boak' àndroy rekets' i enga-rano'ey.

Engam-Pea-bolañe

¹¹ Mañengà soroñe am' IEHOVÀ amo jiri-bola' areoo: bania roe, añondrilahy raike, vik' añondrilahy fito tsy aman-kandra; ¹² naho songa mona fahafolo' ty efà telo linalo menake ty bania; naho fahafolo' ty efà roe linalo menake ho enga-mahakama, i añondrilahiy; ¹³ le sindre mona fahafolo' ty efà linalo menake ho enga-mahakama ty vik' añondry, enga olorañe, hñin-kanintsiñe, soroñañe am' IEHOVÀ. ¹⁴ songa ho divay vaki' ty hine ty bania, sindre fahatelo' ty hine i añondrilahiy vaho fonga fah'efá' ty hine ty vik' añondry. Zay ty hisoroñañe an-jiri-bola' ze hene volañe amo taoñeo. ¹⁵ Le forototò ho engan-kakeo am' IEHOVÀ ty oselahy; ho tovo' i soroñe boak' andro rekets' i enga-rano'eiy.

Enga amy Fihelañey

Its 23.5-14

¹⁶ Ami'ty andro faha-folo-efats'ambi' i volam-baloha'ey ty Pèsa' IEHOVÀ. ¹⁷ Le hanoeñe sabadidake amy andro faha folo-lime-ambi' i volañeiy; ho kamaeñe fito andro ty mofo po-dalivay. ¹⁸ Hanao fañohara-miavake nahareo amy andro valoha'ey; tsy itolonan-draha. ¹⁹ Le mibanabanà enga hisoroñañe am' IEHOVÀ: bania roe, ty añondrilahy, naho ty vik' añondrilahy fito, asoao te tsy aman-kandra. ²⁰ Mona linalo menake ty enga-mahakama' iareo, songa fahafolo' ty efà telo ty bania, naho fahafolo' ty efà roe i añondrilahiy; ²¹ le sindre fahafolo' ty efà ty vik' añondry, ho a i vi'e fito rey; ²² vaho oselahy ty ho engan-kakeo hañeferañe anahareo. ²³ Halankañe' areo ho tovo' i enga maraindraiñey, i enga boak' androy. ²⁴ Zay ty fañengañe boak' andro, fito andro, ty mahakama' i enga fisoroñañey, hñin-kanintsiñe am'IEHOVÀ, engaeñe ho tovo' i enga boak' androy naho i enga-rano'ey. ²⁵ le hanao fañohara-miavake nahareo ami'ty andro fahafito. Tsy itoloñan-draha.

Enga ami'ty Takatakan-Kereñandro

Its 23.15-22

²⁶ Ie amy andron-dengom-boay, le mibanabanà enga-mahakama vao am' IEHOVÀ amy sabadida-kereñandro' areoy, le ano fañohara-miavake vaho ko mitolon-draha. ²⁷ Mibanabanà enga hisoroñañe ho hñin-kanintsiñe am' IEHOVÀ: bania roe, ty añondrilahy raike vaho ty vik' añondrilahy fito, ²⁸ mitraok' ami'ty mona linalo menake ho enga-mahakama'e: songa fahafolo' ty efà telo ty bania, naho fahafolo' ty efà roe i añondrilahiy ²⁹ sindre fahafolo' ty efà ty vik' añondry ho amy vi'e fito rey; ³⁰ vaho ty vik' oselahy hañeferañe anahareo. ³¹ Hengae' areo ho tovo' i soroñañe nainai'ey rezay, naho o enga mahakama'e naho enga-rano'e. Asoao t'ie tsy ho aman-kandra.

29

Enga amy Sabadidak' Antsivay

Its 23.23-25

¹ Amy andro valoha' i volam-pahafitoy, le hanao fañohara-miavake nahareo. Tsy hitolon-draha, fa andro fipoñafam-peo ho anahareo. ² Mañengà soroñe, hñin-kanintsiñe am' IEHOVÀ: ty bania, ty añondrilahy vaho ty vik' añondrilahy fito tsy aman-kandra. ³ Ty enga-mahakama'e le mona linalo menake: telo am-pahafolo' ty efà ho amy baniay, le roe am-pahafolo' ty efà ho amy añondrilahiy, ⁴ le songa fahafolo' ty

efà ty vik' añondrilahy amy fito rey; ⁵ vaho ty vik' oselahy ho engan-kakeo hañeferañe anahareo, ⁶ ho tovo' i enga hisoroñañe amy peabolañey, rekets' i enga-mahakama'ey naho i soroñe boak' àndroy rekets' o enga-mahakama'eo naho o enga-rano'eo ty amy fañè' iareo, ho hàñin-kanintsiñe soroñañe am'IEHOVÀ.

Enga amy Andro Fañeferañey

Its 23.26-32

⁷ Amy andro faha-folo' i volam-paha-fitoy ty hanoa' areo fañoharamiavake, le hilie-batañe tsy hifanehak' amo tolon-draha' areoo. ⁸ Hañenga soroñe am' IEHOVÀ nahareo; hèñin-kanintsiñe: bania raike, añondrilahy raike, naho vik' añondrilahy fito, songa tsy aman-kandra. ⁹ Ty enga-mahakama ama'e le mona linalo menake: fahafolo' ty efà telo i baniay, fahafolo' ty efà roe i añondrilahiy, ¹⁰ naho sindre fahafolo' ty efà ty vik' añondry amy vi'e fito rey; ¹¹ vaho ty vik'oselahy ho engan-kakeo, ho tovo' i engan-kakeo fañeferañey, naho i soroñe boak' àndroy rekets' o enga-mahakama'eo naho o enga-rano'eo.

Enga amo Sabadida-Kibohotseo

Its 23.33-44

¹² Amy andro faha folo-lime-ambi' i volam-paha-fitoy, manoa fañoharamiavake le ko mitolon-draha, vaho ano sabadidak' am' IEHOVÀ fito andro. ¹³ Mañengà soroñe, engan-koroñañe ho hèñin-kanintsiñe am' IEHOVÀ: bania folo-telo' amby, añondrilahy roe naho vik' añondrilahy folo-efats' amby, songa tsy aman-kandra. ¹⁴ Ty enga-mahakama' iareo, le mona linalo menake: songa ty fahafolo'e telo i bania folo-telo'amby rey, sindre ty fahafolo'e roe i añondrilahy roe rey, ¹⁵ vaho sambe ty fahafolo'e i vik' añondrilahy folo-efats' amby rey ¹⁶ le ty vik'ose ho engan-kakeo, tovo' i soroñe boak' andro rey, naho i enga-mahakama'ey naho i enga-rano'ey.

¹⁷ Amy andro faha-roey: bania folo-ro' amby; añondrilahy roe, vik' añondry folo-efats' amby tsy aman-kandra, ¹⁸ naho ty enga-mahakama naho enga-rano amy bania rey naho amy añondrilahy rey vaho amy vik' añondrilahy rey, ty amy ia' iareo naho i fañè'ey; le ty vik'oselahy ho engan-kakeo, ¹⁹ tovo' i soroñe boak' àndroy naho i enga-mahakama'ey vaho i enga-rano'ey.

²⁰ Amy andro faha teloy: bania folo-raik'amby; añondrilahy roe, vik' añondry folo-efats' amby tsy aman-kandra, ²¹ naho ty enga-mahakama naho enga-rano amy bania rey naho amy añondrilahy rey vaho amy vik' añondrilahy rey, ty amy ia' iareo naho i fañè'ey; ²² le ty vik'oselahy ho engan-kakeo, tovo' i soroñe boak' àndroy naho i enga-mahakama'ey vaho i enga-rano'ey.

²³ Amy andro fahefatsey: bania folo, añondrilahy roe, vik' añondry folo-efats' amby tsy aman-kandra, ²⁴ naho ty enga-mahakama naho enga-rano amy bania rey naho amy añondrilahy rey vaho amy vik' añondrilahy rey, ty amy ia' iareo naho i fañè'ey; ²⁵ le ty vik'oselahy ho engan-kakeo, tovo' i soroñe boak' àndroy naho i enga-mahakama'ey vaho i enga-rano'ey.

²⁶ Amy andro fahalimey: bania sive, añondrilahy roe, vik' añondry folo-efats' amby tsy aman-kandra, ²⁷ naho ty enga-mahakama naho enga-rano amy bania rey naho amy añondrilahy rey vaho amy vik' añondrilahy rey, ty amy ia' iareo naho i fañè'ey; ²⁸ le ty vik'oselahy ho engan-kakeo tovo' i soroñe boak' àndroy naho i enga-mahakama'ey vaho i enga-rano'ey.

²⁹ Amy andro faheneñey: bania valo, añondrilahy roe, vik' añondry folo-efats' amby tsy aman-kandra, ³⁰ naho ty enga-mahakama naho enga-rano

amy bania rey naho amy añondrilahy rey vaho amy vik' añondrilahy rey, ty amy ia' iareo naho i fañè'ey; ³¹ le ty vik' oselahy ho engan-kakeo tovo' i soroñe boak' àndroy naho i enga-mahakama'ey vaho i enga-rano'ey.

³² Amy andro faha-fitoy: bania fito, añondrilahy roe, vik' añondry folofats' amby tsy aman-kandra, ³³ naho ty enga-mahakama naho enga-rano amy bania rey naho amy añondrilahy rey vaho amy vik' añondrilahy rey, ty amy ia' iareo naho i fañè'ey; ³⁴ le ty vik' oselahy ho engan-kakeo, tovo' i soroñe boak' àndroy naho i enga-mahakama'ey vaho i enga-rano'ey.

³⁵ Amy andro faha-valoy le manoa fifanontoñañe miavake naho ko mitolon-draha. ³⁶ Mañengà soroñe, banabana oroañe, hèñin-kanintsiñe am' IEHOVÀ: ty bania, le ty añondrilahy naho vik' añondrilahy fito tsy aman-kandra, ³⁷ naho ty enga-mahakama naho enga-rano amy baniay naho amy añondrilahy rey vaho amy vik' añondrilahy rey, ty amy ia' iareo naho i fañè'ey; ³⁸ le vik'oselahy raike ho engan-kakeo, tovo' i soroñe boak' àndroy naho i enga-mahakama'ey vaho i enga-rano'ey.

³⁹ Ie ty hengae' areo am' IEHOVÀ amo andro namantañañe, (mandikoatse ze enga-ava-panta ndra engan-tsattrin' arofo' areo) ho fisoroña' areo naho ho enga-rano' areo vaho ho engam-pañanints'i areoo.

⁴⁰ Aa le nitaroña' i Mosè amo ana' Israeleo, ze hene nafanto' IEHOVÀ amy Mosèy.

30

O Fantao

^{1 2} Le nanao ty hoe amo talèm-pifokoa' o ana' Israeleoo t'i Mosè: Zao ty nandilia' IEHOVÀ: ³ Naho mifanta am' IEHOVÀ t'indaty, ndra mitangèñe hifahara' ty arofo'e ami'ty latatse, le tsy hivalik' amy saontsi'ey re, fa hanoe'e ze hene miakatse am-palie'e.

⁴ Aa naho mifanta am' IEHOVÀ ty ampela, ke mitan-ty vata'e aman-titike, ie añ'anjomban-drae'e ao naho mbe somondrara, ⁵ fa naho mahajanjiñe i nifantà'ey ty rae'e naho i titike namahora'e ty tro'ey vaho mianjiñe avao ty rae'e, le fonga hijadoñe o nifantà'eo, le hifahatse ze titike namahora'e stroke. ⁶ F'ie lieren-drae'e amy andro nahajanjiña'e azey, le tsy hijadoñe i nifantà'ey ndra ze titike namahora'e stroke vaho hapo' IEHOVÀ ty aze, ty amy lien-drae'ey.

⁷ Aa ie nengaen-dahy te vahoram-panta, ke t'ie finehe' ze volañe naakan-tsoñi'e tsy nisatrie'e, ⁸ le ie janji' ty vali'e fe tsy mañaoñe amy andro nijanjiña'e azey, le hijadoñe i nifantà'ey vaho hifahatse ze titike namahora'e stroke. ⁹ F'ie liere' ty vali'e amy andro nijanjiña'e azey le hapo'e i fanta nifehe azey, ndra i volan-tsoñi'e tsy nisatrie'e namahora'e strokey; toe hado' IEHOVÀ. ¹⁰ (Fe ze nifantà' ty vantotse ndra ty nariambaly, ie namahotse ty arofo'e, le hijadoñe hifehe aze zay.) ¹¹ Aa naho nifanta añ'anjombam-bali'e ao, ke namaho-batañe aman-titike ¹² naho nahajanjiñe aze i vali'ey ie tsy nandietse, le hijadoñe iaby o nifantà'eo vaho hifahatse ama'e ze titike namahora'e arofo. ¹³ F'ie avali' ty vali'e amy andro nahajanjiña'ey, le tsy hijadoñe ndra inoñ' inoñe niakats' an-tsoñi'e amo nifantà'eo ndra amy titike namahora'e strokey; fa navalí' ty vali'e, le hapo' IEHOVÀ re ty ama'e. ¹⁴ Ze fanta ndra titike famahoram-batañe, le azo ty vali'e ajadoñe ndra faoheñe. ¹⁵ Fe naho tsy mañaoñe aze handro am-pohatse i vali'ey, le hene hampijadoñe'e o nifantà'eo, naho ze mamahotse ty tro'e; toe niventese'e, kanao tsy nisaontsie'e amy andro nahajanjiña'e

azey. ¹⁶ Aa naho avali'e t'ie aña i nijanjiña'e azey le hivave i tahi'ey i lahilahiy.

¹⁷ Ie o fañè linili' IEHOVÀ amy Mosèo ty amy t'indaty naho i vali'ey, naho ty aman-drae naho ty anak' ampela'e mbe kede aña' anjomban-drae'e ao.

31

Hotakotak' amy Midiane

¹ Hoe ty nitsara' IEHOVÀ amy Mosè, ² Ampamaleo fate amo nte-Midianeo o ana' Israeleo. Ie heneke zay le hatontoñe am'ondati'oo rehe. ³ Aa le nisaontsy am' ondatio t'i Mosè nanao ty hoe: Ampidiaño ty ila'e ama' areo hialy, vaho iraho haname o nte-Midianeo hamale i Midiane ty am' IEHOVÀ. ⁴ Songa hañitrik' arivo mb'amy aliy mb'eo ze fifokoa' Israele. ⁵ Aa le hene nanolotse arivo boak' amy lahiale' Israele o fifokoñaeo, rai-ale-tsi-ro'arivo reke-pialiañe. ⁶ Le nampionjone' i Mosè mb' aña'aly mb'eo kiarivo-kiarivo' o fifokoñaeo; le nampindreze'e am' iereo t'i Pinekàse ana' i Elazare ninday o fanake miavakeo naho o antsiva fikoihañaeo am-pità'e. ⁷ Tiname' iareo t'i Midiane ami'ty nandilia' IEHOVÀ i Mosè vaho vinono ze hene atao lahilahy. ⁸ Fonga naharo vono am' iereo o mpanjaka' i Midianeo: i Evý, naho i Rèkeme naho i Tsore naho i Kòre vaho i Rèba; i mpanjaka' i Midiane lime rey vaho vinono am-pibara ka t'i Balame ana'i Beore. ⁹ Le kinopa' o ana' Israeleo ze hene rakemba naho o keleia' o nte-Midianeoo, naho hene kinopa' iareo o añombeo naho o mpirai-lia'eo naho o vara'eo; ¹⁰ fonga finorototo aña' afo o rova nimoneña' iareoo naho ze hene tobe' iareo, ¹¹ le rinambe' iareo ze dinohitse iaby naho ze fonga kinopake: ondaty naho hare. ¹² Nendese' iareo mb' amy Mosè naho i Elazare mpisoroña naho i valobohò' Israeley mb'eo ondaty iabio naho o varao vaho ze raha kinopake mb' an-tobe a montombei' i Moabe aolo' Iardeney tandrife Ieriko mb'eo.

Fimpoliañe boak' amy Aliy

¹³ Niavotse amy zao t'i Mosè naho i Elazare mpisoroña naho o talè' i valobohòkeio hifanalaka am' iereo alafe' i tobey. ¹⁴ Fe niviñera' i Mosè o mpiaolo' o lahindefoñeo, naho i mpifelek' arivo rey, naho i mpifehe ki-zato rey, o niboak' amy hotakotakeio. ¹⁵ Le hoe t'i Mosè am' iereo: Hene nenga' areo ho veloñe hao o ampelao? ¹⁶ Inao, ie ty nampiola o ana' Israeleo amy IEHOVÀ ie nikililie' i Balame amy raha e Peorey, vaho nametsahaña angorosy ty valobohò' IEHOVÀ. ¹⁷ Aa le fonga vonò ze lahilahy amo keleia'eo naho ze ampela fa niolots' ama' ondaty. ¹⁸ Fe tano ho anahareo ze ampela mbe tsy niharo sarimbo ama' ondaty. ¹⁹ Le ie namono ondaty ndra nitsapa ty vinono ro mitoboha alafe' i tobey fito andro; miefera vatañe ami'ty andro faha-telo naho ami' ty andro faha-fito; inahareo naho o finao' areoo. ²⁰ Le liovo iaby ze sikiñe naho ze nanoeña an' angozy naho ze rinare am-bolon' ose vaho ze raha an-katae.

²¹ Le hoe t'i Elazare mpisoroña amo lahin-defo niatreke i alilio: Zao ty fañèmpètse linili' IEHOVÀ i Mosè: ²² ze volamena naho volafoty naho torisike naho viñe naho endraendra vaho firake— ²³ ze raha mete asitrik' aña' afo avao—ro hampisorohe' areo aña' afo, le halio, f'ie mbe heferañe andranom-pañeferañe. Le ze raha tsy mahaleo afo ro hampisoroheña rano. ²⁴ Le ho sasà' areo ami' ty andro faha-fito ty siki' areo vaho halio, ie heneke zay le mahazo mizilik' an-tobe ao.

Ty Ondaty naho Vara Kinopakeo

²⁵ Le hoe ty nitsara' IEHOVÀ amy Mosè: ²⁶ Volilio, ihe naho i Elazare mpisoroñe naho o talèn-droae'eo ze fonga raha kinopake: ondaty naho hare. ²⁷ Zarao roe o kinopakeo: ty raike ho amo nañavelo niatrek' i aliio le ty raike ho amy valobohòkey. ²⁸ Le ampandivao o lahindefoñe niatre-kotakotakeo ty raik' ami' ty liman-jato ho enga am' IEHOVÀ, ke t'ie ondaty, he te añombe, ke borike he añondry, hera ose. ²⁹ Rambeso ami'ty vaki' iareo, vaho atoloro amy Elazare mpisoroñe ho engan-kavoañe am' IEHOVÀ. ³⁰ Le ampandivao ami'ty anjara' o ana' Israeleo ka ty raik' ami'ty limampolo' ze ondaty naho añombe naho borike naho añondry naho ze hare iaby vaho atoloro amo nte-Levy mpiatrake i kivoho' IEHOVÀ. ³¹ Le nanoe' i Mosè naho i Elazare mpisoroñe i nandilia' IEHOVÀ i Mosey.

³² Ty vara nisia amy nikopahe' o lahindefoñeoy le añondry enenketse-tsi-fito-ale-tsi-lime-arivo, ³³ naho añombe fito-ale-tsi-ro'arivo, ³⁴ naho borike eneñ' ale-tsi-arivo, ³⁵ naho ondaty telo-ale-tsi-ro' arivo: hene somondrara mboe tsy niolots' ama' ondaty.

³⁶ Ty vaki'e raike, ty anjara' o niatre-kotakotakeo, le añondry naho ose telo-hetse-tsi-telo-ale-tsi-fito-arivo-tsi-liman-jato, ³⁷ le o añondry naho ose nengaeñe am'IEHOVÀ enenjato tsy-fitompolo-lim' amby. ³⁸ Le telo-ale-tsi-eneñ' arivo ty añombe, aa le fitom-polo-ro' amby ty nengaeñe am'IEHOVÀ; ³⁹ telo-ale-tsi-liman-jato ty borike vaho enempolo-raik' amby ty nengaeñe am' IEHOVÀ; ⁴⁰ rai-ale-tsi-eneñ' arivo ty ia'ondatio vaho telopol-ro'amby ty nengaeñe am' IEHOVÀ. ⁴¹ Aa le natolo' i Mosè amy Elazare mpisoroñe ty anjara' IEHOVÀ, ami'ty nandilia' IEHOVÀ i Mosè.

⁴² Aa naho ty vaki' i valobohòke navi' i Mosè ami'ty anjara' o lahindefoñeoy; ⁴³ ty vaki' i valobohòkey telo-hetse-tsi-telo-ale-tsi-fito-arivo-tsi-liman-jato añondry naho ose, ⁴⁴ le telo-ale-tsi-eneñ'arivo ty añombe, ⁴⁵ naho telo-ale-tsi-liman-jato ty borike, ⁴⁶ vaho rai-ale-tsi-eneñ' arivo ty ia'ondatio. ⁴⁷ Aa ty amy vaki' o ana' Israeleo, le nangala' i Mosè ty raik' ami'ty limampolo, ondaty naho hare, le natolo'e amo nte-Levio—o mpiatrake i kivoho' IEHOVÀ amy nandilia' IEHOVÀ i Mosè.

⁴⁸ Niheo amy Mosè mb'eo amy zao o mpiaolo nifehe o arivo nialio, toe o mpifelek' arivoo naho o mpifehe zatoo; ⁴⁹ le nanao ty hoe amy Mosè: Fa niahe' o mpitoro'oo o lahindefo nifelehe'aio, leo raike tsy nipoke. ⁵⁰ Aa le mañenga ravoravo am' IEHOVÀ zahay, ze niazo' ondatio ke ravake volamena ke vangovango ke tsiandetse ke bange fitomboke ke kiviro he ètse, ho fañanintsin-stroke añatrefa' IEHOVÀ. ⁵¹ Rinambe' i Mosè naho i Elazare mpisoroñe am' iereo o volamenao naho o bangeo vaho ze hene bijo, ⁵² le ty tontom-bolamena nengae' iareo ho am' IEHOVÀ, boak' amo mpifelek' arivoo vaho o mpifehe zatoo: rai-ale-tsi-eneñ' arivo-tsi-fitonjato-tsi-limampolo sekele, ⁵³ amy te songa nikopake ho am-bata'e o lahindefoñe. ⁵⁴ Aa le rinambe' i Mosè naho i Elazare mpisoroñe amo mpifelek' arivo naho zatoo i volamenay, vaho nendese' iereo am-po' i kibohom-pamantañañey ho fitiahiañe o ana' Israeleo añatrefa' IEHOVÀ.

32

*Ty Fizarañe ty atiñana' Iardeney
Its 3.12-22*

¹ Ie amy zao ni-tsifotofoto ty añombe' i fifokoa' i Reòbene naho i Gade rey; aa ie nahaisake ty tane' Ia'azère naho ty tane' i Gilade, t'ie toe tane fiandrazañe añombe, ² le nimb'amy Mosè naho i Elazare mpisoroñe naho mb'amo talè' i valobohòkeio mb'eo o ana' i Gadeo naho o ana' i Reòbeneo

ninday ty saontsy ty hoe: ³ I Ataròte naho i Dibone, naho Iaazère, naho i Nimrà, naho i Kesbòne, naho i Elalè, naho i Sebàme, naho i Nebò vaho i Beòn; ⁴ i tane gino' IEHOVÀ añatrefa' i valobohò' Israeleiy, le tane fiandrazañe añombe, vaho aman' añombe o mpitoro'oo. ⁵ Tinovo' iereo ty hoe: Aa naho nisoheñe am-pahaisaha'o, le atoloro amo mpitoro'oo i tane zay ho fanaña'e, fa ko minday anay hitsake Iardeney.

⁶ Aa hoe ty navale'i Mosè o ana'i Gadeo naho o ana' i Reobeneo, Aa vaho hiatrek' aly o rahalahi' areoo, le hihànitse atoy avao nahareo? ⁷ Ino ty hampimamoa' areo ty arofo' o ana' Israeleo tsy hitsaha'e mb'an-tane nitolora' IEHOVÀ mb'eo? ⁸ Zay ty nanoen-droae' areo te niraheko boak'e Kadese-Barnea hitilike i taney. ⁹ Amy t'ie nionjoñe mb' am-bavatane' i Eskòle mb'eo vaho nahaoniñe i taney le nahamohake ty arofo' o ana' Israeleo tsy hizilik' an-tane natolo' IEHOVÀ iareo. ¹⁰ Aa le nisolebotse amy andro zay ty haviñera' IEHOVÀ vaho nifanta ty hoe: ¹¹ Toe tsy amo lahilahy roapolو taoñe mañambone niavotse i Mitsraimeo ty hahaisake ty tane nifantàko amy Avrahame naho am' Ietsàke naho am' Iakòbe, amy t'ie tsy nañorik' ahiko añ-kaàmpón-troke, ¹² naho tsy i Kalebe ana' Iefonè nte-Kenàze naho Iehosoa, ana' i None, amy te norihe' iareo an-kaliforan' arofo t'IEHOVÀ. ¹³ Aa le niforoforo am' Israele ty haviñera' IEHOVÀ vaho nampirerererè'e am-patrambey aña efa-polo taoñe, am-para' te nimodo iaby i tariratse nanao raty am-pivazoho' IEHOVÀ. ¹⁴ Le heheke! t'ie nitroatse handimbe an-droae' areo nifirimboñan-kalòn-tserekeo, hanitrà' areo ty haviñerañe mitrotrofiak' IEHOVÀ am' Israele. ¹⁵ Aa ie miambaho, tsy mañorik' aze, le ho farie'e am-patrambey ao indraike iereo, toly ndra harotsa' areo ondaty retiañe.

¹⁶ Aa le niharivoa' iareo nanao ty hoe: Hañamboara'ay goloboñe atoy o hare'aio vaho rova ho a o keleia'aio, ¹⁷ fe hitan-defon-jahay hiaolo o ana' Israeleo ampara' te nasese'ay an-toe' iareo aña. Ie amy zay himoneñe an-drova iarikatohan-kijoly ao ty amo mpimoneñe amy taneio o keleia'aio. ¹⁸ Tsy himpoly mb' añ' anjomba'ay mb'eo zahay naho tsy songa nandrambe ty lova'e o ana' Israeleo. ¹⁹ Tsy hitrao-dova am' iereo alafe' Iardeney aña zahay, amy te nitsatoke ho anay atiñana' Iardeney atoy ty lova'ay.

²⁰ Hoe t'i Mosè am' iereo: Aa naho toe hanoe' areo zay, t'ie hitan-defoñe aolo' IEHOVÀ veka'e hialy, ²¹ naho songa hitsake Iardaney añatrefa' IEHOVÀ o lahin-defo' areoo, ampara' te fonga hanoe'e soike aolo'e eo o rafelahi'eo, ²² naho hene vinahotse añatrefa' IEHOVÀ i taney; zay vaho himpoly nahareo, le ho afa-tahiñe añatrefa' IEHOVÀ naho aolo' Israele, vaho ho fanaña' areo añatrefa' IEHOVÀ ty tane atoy. ²³ F'ie tsy hanoe' areo, le inao! hanan-kakeo am' IEHOVÀ; le iantofo te hifanojo ama' areo ty tahi' areo. ²⁴ Añoreño rova o keleia' areoo vaho goloboñó o añondri' areoo, le ano o nakarem-palie' areo iabio.

²⁵ Aa le nanao ty hoe amy Mosè o nte-Gadeo naho o nte-Reòbeneo: Hanoe' o mpitoro'oo ze andilian-talè'ay. ²⁶ Hitobe amo rova' i Giladeo o keleia'aio naho o vali'aio vaho o hare'ay iabio, ²⁷ fe hitsake mb'eo o mpitoro'oo, songa lahilahy aman-defoñe veka'e hialy hihotakotake ho a IEHOVÀ, amy nandilia' i talèkoiy.

²⁸ Aa le linili'i Mosè t'i Elazare mpisoroñe naho Iehosoa ana' i None vaho o talèn' anjombam-pifokoa' Israeleo ty am' iereo, ²⁹ le nanoe' i Mosè ty hoe: Naho mindre ama' areo mitsake Iardeney añatrefa' IEHOVÀ ze hene mpitan-defo veka'e hialy amo ana' i Gadeo naho amo ana' i Reòbeneo,

naho ampiambanèñe aolo' areo i taney, le atoloro iareo ty tane' i Gilade ho fanaña'e. ³⁰ F'ie tsy mitsake reke-pialiañe mindre ama' areo le hanampanañañe miharo ama' areo an-tane Kanàne ao. ³¹ Le hoe ty natoi' o nte-Gadeo naho o nte-Reòbeneo, Ze nitsara' IEHOVÀ amo mpitoro'oo ro hanoe'ay. ³² Hitsake reke-pialiañe añatrefa' IEHOVÀ zahay mb' an-tane Kanàne mb' eo fe hitobok' atiñana' Iardeney atoy ty hanañañe nilovà'ay.

³³ Aa le natolo' i Mosè amo nte-Gadeo naho amo nte-Reòbeneo yaho ami'ty vakim-pifokoa' i Menasè ana' Iosefe, ty fehe' i Sihone mpanjaka' o nte-Amoreo naho ty fehe' i Oge mpanjaka' i Basàne, i taney rekets' o rova'eo naho o tanàñe mañohokeo rekets' o tane'eo. ³⁴ Le namboare' o nte-Gadeo ty Dibònè, naho i Ataròte, naho i Aroère, ³⁵ naho i Atròtesofàne, naho Ia'azère, naho Iogbehà, ³⁶ naho i Bète Nimrà, vaho i Bete Haràne, songa rova aman-kijoly naho golobon' añondry. ³⁷ Le namboare' o nte-Reòbeneo ty Kesbònè, naho i Elalè, vaho i Kiriataime, ³⁸ naho i Nibò, naho i Baalmeòne, (ie novaeñe o añara' iareoo) vaho i Sebàme, le nomeañe añaraña ze rova namboare' iereo. ³⁹ Le nomb'e Gilade mb'eo o tarira' i Makire ana' i Menasèo le tinava' iereo vaho nanoe' iereo soike o nte-Amore tama'eo. ⁴⁰ Aa le natolo' i Mosè amy Makire ana' i Menasè ty Gilade le nimoneña'e. ⁴¹ Rinambe' Iaire ka o tanà'eo vaho nitokave'e Kavòte Iaire. ⁴² Nomb'eo ka t'i Nòbake nitavaña i Kenàte naho o tanà'eo, le nitokave'e ty hoe Nobake, i tahina'ey avao.

33

O Fangen-dia boake Mitsraimeo

¹ Zao o fangem-pañaveloa' o ana' Israeleo te niavotse an-tane Mitsraime aña am-pivovoran-dahindefoñe ambane' ty fehe' i Mosè naho i Aharonéo. ² Sinoki' i Mosè o fiorotan-dia' iareo ki-fange-fange'e ami' ty lili' IEHOVÀ; le zao o fange'eo ty amo toe-piengà'eo. ³ Nenga' iareo ty Ramesèse ami' ty volam-baloha'e, ami'ty andro faha folo-lime' ambi' i volam-baloha'ey; ami'ty andro nanonjohy i Fihelañ' Ambone' o ana' Israeleoy ty niavota' iareo an-kavokavoke am-pahaisaha' o nte-Mitsraime iabio, ⁴ naho nandeveña o tañoloñoloña'e iabio o nte-Mitsraimeo, o nipaohe' IEHOVÀ añivo' iereoo, vaho nametsaha' IEHOVÀ zaka o ndrahare' iareoo.

⁵ Aa le nienga i Ramesese o ana' Israeleo naho nitobe e Sokòte; ⁶ nienga i Sokòte vaho nitobe Etàme añ'olo' i fatrambeiy. ⁷ Nionjoñe boak' Etàme le niolake mb'e Pihakiròte atiñana' i Baale-Tsefòne mb'eo vaho nitobe marine i Migdòle. ⁸ Ie nenga i Pihakirote, le nisoroke i riakey naho nañavelo telo andro am-patrambey Etame vaho nitobe e Marà. ⁹ Nenga' iareo ty Marà le nipotìtse e Elime ao; aman-drano manganahana folo roe-ambi' ty Elime naho satraña fitompolo vaho nitobeña. ¹⁰ Ie nienga i Elime le nitobe añ'olo' i Ria-Binday, ¹¹ nienga i Ria-Binday le nitobe ampatrambei' i Sine, ¹² niavotse i fatrambei' i Siney le nitobe e Dofkà, ¹³ nienga i Dofkà le nitobe e Alòse, ¹⁴ nienga i Alòse vaho nitobe e Refidime, f'ie tsy aman-drano ho kamae' ondatio. ¹⁵ Ie nienga i Refidime le nitobe am-patrambei' i Sinay, ¹⁶ nienga i Fatrambey Sinay vaho nitobe e Kibròtatahavà. ¹⁷ Ie nienga i Kibròtatahavà le nitobe e Katseròte, ¹⁸ nienga i Katseròte le nitobe e Ritmà, ¹⁹ nienga i Ritmà le nitobe e Rimòne Pèretse, ²⁰ nienga i Rimòne Pèretse le nitobe e Libnà, ²¹ nienga i Libnà le nitobe e Risà, ²² nienga i Risà le nitobe e Kehelàta, ²³ nienga i Kehelàta le nitobe e Vohi-Sèfere, ²⁴ nienga i Vohi-Sèfere le nitobe e Karadà, ²⁵ nienga i Karadà le nitobe e Makelòte, ²⁶ nienga i Makelòte le nitobe e Tàkate,

²⁷ nienga i Tàkate le nitobe e Tèrake. ²⁸ nienga i Tèrake le nitobe e Mitkà, ²⁹ nienga i Mitkà le nitobe e Khasmonà, ³⁰ nienga i Khasmonà le nitobe e Moserà, ³¹ nienga i Moserà le nitobe e Benè'ìà'akàne, ³² nienga i Benè'ìà'akàne le nitobe e Kore Hagid'gàde, ³³ nienga i Kore Hagidgàde le nitobe e Iotbàta, ³⁴ nienga i Iotbàta le nitobe e Ebranà ³⁵ nienga i Ebranà le nitobe e Etsiòne Gèbere, ³⁶ nienga i Etsiòne Gèbere vaho nitobe am-patrambei' i Tsine, atao ty hoe Kadàse. ³⁷ Ie nienga i Kadàse le nitobe e Vohi-Hore añ'olon-tane' i Edome.

³⁸ Niañambone' i Vohi-Hore mb'eo t'i Aharone mpisoroñe ami'ty lili' IEHOVÀ vaho nihomake eo ami'ty taoñe fah'efa-polo' niavota' o ana' Israeleo an-tane Mitsraime ami'ty andro valoha' i volam-pahalimey. ³⁹ Ni-zato-tsi-roapolò taoñe telo' amby t'i Aharone te nivilasy ambone' i Vohi-Hore eo.

⁴⁰ Jinanji' ty mpanjaka' i Arade nte-Kanàne mpimoneñe atimo an-tane Kanàne ao te nomb' ama'e mb'eo o ana' Israeleo.

⁴¹ Aa le niavotse nitobe e Tsalmonà aña iereo. ⁴² Ie nienga i Tsalmonà le nitobe e Ponòn. ⁴³ Ie nienga i Ponòn le nitobe e Obòte. ⁴⁴ Ie nienga i Obòte le nitobe e Ièha Abarìme añ'efe-tane' i Moabe. ⁴⁵ Nenga' iareo t'lîme vaho nitobe e Dibone-Gade. ⁴⁶ Ie nienga i Dibone-Gade le nitobe e Almone-Diblataième. ⁴⁷ Ie nienga i Almone-Diblataième le nitobe amo vohi' i Abarìmeo aolo' i Nebò. ⁴⁸ Ie nienga i am-bohi' Abarìmeo le nitobe a montombei' i Moabe añ'olo' Iardeney tandrife Ierikò. ⁴⁹ Nitobe marine Iardeney iereo, mifototse e Bete' ha' Iesimòte pak'añ'Ala-Roi' i Abele a montombei' i Moabe aña.

Toro-lalañe t'ie Haname i Kanàne

⁵⁰ Aa le nitsara amy Mosè t'IEHOVÀ a montombei' i Moabe añ' olo' Iardeney tandrife' Ierikò eo, nanao ty hoe: ⁵¹ Taroño amo ana' Israeleo ty hoe: Ie mitsake Iardeney mb'an-tane Kanàne mb'eo, ⁵² le fonga hanoe' areo soike ze mpimoneñe amy tane aolo' areoy, arotsaho o vato-sinoki'e iabio, ampiantò o sare tineno' iareo iabio le demoho o tamboho' iareo iabio; ⁵³ ho tavane' areo i taney vaho himoneñe ao, amy te natoloko anahareo i taney ho fanañañe. ⁵⁴ Le ho zarae' areo an-tsapake i taney ho lova' o hasavereña' areoo; ty maro ho tolora' areo lova bey, le ty tsy ampe ho tolora' areo lova kede; ze nitsatoha' i tsapakey ty ho fanaña' indatiy ho lova'e; ty amo fifokoañe ty anjaraña aze. ⁵⁵ Fa naho tsy hatao soike aolo' areo mb'eo o mpimoneñe an-taneo le ho fatik' am-pihaino' areo, naho fitsipok' an-deme' areo o nisia' areo ama'eo, vaho hitsibore anahareo an-tane himoneña' areo ao. ⁵⁶ Le hanoeko ama' areo i sinafiriko hanoeñe am' iareoy.

34

Ty Efe' i Taney

¹ Hoe ty nitsara' IEHOVÀ amy Mosè: ² Afantoho o ana' Israeleo ami'ty hoe: Ie mivotrak' an-tane Kanàne ao (amy t'ie ty tane hitsatoke ho anahareo ho lova: i tane Kanàney, pak' amo efe-tane'eo), ³ le mifototse am-patrambei' i Tsiney aña ty efe' areo atimo le hañorike ty efe' i Edome; aa le hianiñànañe mb' am-boli' i Riake Matey mb'eo i efe' areo atimoy; ⁴ hiolake mb'atimo' ty fionjona' i Akrabime ty efe' areo atimo, le homb'e Tsine mb'eo le hañorike ty atimo' i Kadèse Barnèa le hionjom-b'an-Katsàradàre mb'eo; le hitohy mb'e Atsmòne mb'eo; ⁵ hiolake e Atsmòne i efetsey le hiranga mb'añ'oñe' i Mitsraime aña vaho higadoñe amy Riakey.

⁶ Le i efetse ahandrefañey: ho efe' areo ahandrefañe i olon-dRiake Ra'elahi.

⁷ Le ty efe' areo avaratse: mifototse amy Riake Ra'elahi le tandrifeo ty Vohi-Hore ho efe' areo; ⁸ boak' am-bohi-Hore tandrifeo pak' e Lebò-Kamàte; hitohy mb'e Tsedàde i efetsey; ⁹ hionjomb' e Zifrònè i efetsey vaho higadoñe e Katsàre-Enàne. Zay ty efe' areo avaratse.

¹⁰ Aa le sokiro ka ty efe' areo atiñanañe, boake Katsàre-Enàne pake Sefàme; ¹¹ hitohy boake Sefame le pake Riblà atiñana' i Aine aña i efetsey; le hizotso pak' añ' olotse atiñana' ty Riake Kinerote ey i efetsey; ¹² horihe' i efetsey ty olo' Iardeney am-para' i Riake Matey. Zay ty ho tane' areo naho ty fiarikatoha' i efe-tane'ey. ¹³ Aa linili' i Mosè o ana' Israeleo ami'ty hoe: Zao ty tane ho lovae' areo an-tsapake, i nandilia' IEHOVÀ hatolotse amy fifokoa sive rey naho amy vakim-pifokoay. ¹⁴ Fe sindre nandrambe ty lova' iareo ty fifokoa' i Reòbene ty aman' anjomban-droae'e naho ty fifokoa' i Gade ty aman' anjomban-droae'e vaho nandrambe i lova'ey ka ty vakim-pifokoa' i Menasè. ¹⁵ Songa nandrambe ty lova'e i fifokoa roe rey naho i vakim-pifokoay mifototse an-dafe' Iardene e Ieriko eo maniñanañe mb' am-panjiriha' i àndroy mb'eo.

¹⁶ Le hoe ty nitsarae' IEHOVÀ amy Mosè: ¹⁷ Zao o tahina' ondaty hizara i taney ama' areo ho fanañañe: i Elazare mpisoroñe naho Iehosoa ana' i Nòne. ¹⁸ Le handrambesa' areo mpiaolo kiraikiraike o fifokoañe hanjarañe i taneio ho lova. ¹⁹ Zao ty tahina' ondatio: boak' am-pifokoa' Iehodà: i Kalèbe ana' Iefonè; ²⁰ boak' am-pifokoa' o nte-Simoneo: i Semoàle ana' i Amihòde; ²¹ boak' am-pifokoa' i Beniamène: i Elidàde ana' i Kislòne; ²² ty mpiaolo boak' am-pifokoa' i Dane: i Boký ana' Iogly; ²³ boak' amo ana' Iosefeo: ty mpiaolo boak' amy fifokoa' o nte-Menasèoy: i Kanièle ana' i Efode; ²⁴ le ty mpiaolo boak' am-pifokoa' o nte-Efraimeo: i Kemoele ana' i Seftàne; ²⁵ ty mpiaolo boak' am-pifokoa' o nte-Zeboloneo: i Elitsafàne, ana' i Parnàke; ²⁶ ty mpiaolo boak' am-pifokoa' o nte-Isakhareo: i Paltiele ana' i Atsane; ²⁷ ty mpiaolo boak' am-pifokoa' o nte-Asereo: i Akihòde ana' i Selomý; ²⁸ ty mpiaolo boak' am-pifokoa' o nte-Naftalio, i Pedahèle ana' i Amihode; ²⁹ ie ondaty nandilia' IEHOVÀ hizara ty tane' o ana' Israeleo an-tane Kanàne ao.

35

Rova' o nte-Levio

¹ Le nitsara amy Mosè t'IEHOVÀ a montombei' i Moabe añ' olo' Iardeney tandrife Ierikò eo, ami'ty hoe: ² Lilio o ana' Israeleo ty hanolotse rova amo nte-Levio himoneña'e boak' amo lova fanaña' iareoo, vaho toloro tane mañohoke o rova' iareoo ho fiandraza' o nte-Levio. ³ Ho fimoneña' iareo o rovao naho ho fiandrazañe o añombe'eo naho o mpirai-lia'eo vaho o hare' iareo iabio i tane mañohokey. ⁴ Hifototse an-kijoli' o rova'e eo vaho hitakatse arivo kiho añ' areare i rovay o tane fiandraza'eo. ⁵ Le ho zehè' areo alafe' o rovao ty ro'arivo kiho ami'ty ila'e atiñanañe, le ro'arivo kiho ami'ty ila'e atimo, le ro'arivo kiho ami'ty lafe'e ahandrefañe, le ro'arivo kiho an-dafe'e avaratse. Añivo'e ao i rovay. Zay ty ho fanaña' iareo ho fiandraza' i rovay.

⁶ Le ho rovam-pitsolohañe o rova eneñe hatolo' areo amo nte-Levioo, ie henga' areo ho fitribahan-dai' ze mamono ondaty, mandikoatse zay le ho tolora' areo rova efapolo-ro'amby iereo. ⁷ Aa le mitraoke ho rova efapolo-valo' amby ty hatolo' areo amo nte-Levio rekets' o tane fiandraza'eo. ⁸ Le

boak' ami'ty fanaña' o ana' Israeleo ty hanolora'o i rova rey, hanolotse maro ty fifokoañe bey, naho tsy ampe ka ty boak' ami'ty kede. Songa hanolotse rova amo nte-Levio boak' amo rova'eo ty amy habei' i lova ho rambese'ey.

Rovam-Pipalirañe

Its 19.1-13; Ieho 20.1-9

⁹ Le hoe ty nitsara' IEHOVÀ amy Mosè: ¹⁰ Misaontsia amo ana'Israeleo, le ano ty hoe: ie mitsake Iardeney mb'an-tane Kanàne mb'eo, ¹¹ le mijoboña rova ho rovam-pitsolohañe, hivoratsaha' ty namono ondaty tsy an-tsatri'e. ¹² Rova ho fitsolohañe, hipalira' areo ami'ty mpamale fate, soa tsy hohofan-doza ty namono ondaty ampara' t'ie miatre-jaka añatrefa' i valobohòkey.

¹³ Aa le amo rova atolo' areoo ty hanolora' areo rovam-pitsolohañe eneñe. ¹⁴ Ho tolora' areo rova telo ty alafe' Iardeney atoy naho ho tolora' areo rova telo ty an-tane Kanàne ao ho rovam-pitsolohañe. ¹⁵ Ho rovam-pitsoloha' o ana' Israeleo i rova eneñe rey, naho ho a o ambahinio naho o renetane añivo' iereoo, soa t'ie ty hivongarita' ze mamono ondaty tsy an-tsatri'e.

¹⁶ Aa naho lafae'e ami'ty viñe t'indaty vaho mivetrake indatiy, le mpamono ondaty re, toe ho vonoeñe ty mpamono. ¹⁷ Aa naho fofohe'e ami'ty vato am-pit  'eo, ze mahavetrak' ondaty vaho mihomake indatiy le mpamono re; toe havetrake i mpamonoy. ¹⁸ Aa ie vinango'e ankataem-pialia   am-pit  'eo ao, ze mahavetrak' ondaty, naho mate indatiy, le mpamono re, vaho toe ho vonoeñe i mpamonoy. ¹⁹ Toe i mpamale fatey ty ha  oho-doza amy mpamonoy; ie mifanojo ama'e le ho vonoe'e. ²⁰ Aa ie maniotse aze mafe ami' ty falai'e aze, ke mivo  o  e aze, he andretsaha'e raha, vaho mate, ²¹ he ami'ty fandrafea'e ro mampitrabotrabok' am-pit  'e hampivetrek' aze, le toe ho vonoe  e i nampitrabotraboke. Mpamono re, ho vonoe' ty mpamale fate te ifanojoa'e.

²² F'ie mandronje am-pifanojeha'e fa tsy am-palai  a  , ke mametsdraha ama'e fa tsy am-pivo  ona  , ²³ hera am-bato mete mahafate ondaty, ie ahiriri'e mb'eo fe tsy nioni'e indatiy, le mate indatiy, ie tsy nirafelahi'e vaho tsy nikilily te ha  e-doza ama'e, ²⁴ le ho zakae' i valobohòkey añivo' i namonoy naho i mpamale fatey amy fa  e rezay. ²⁵ Aa le havotso' i valobohòkey boak' am-pit  ' i mpamale fatey i namono ondaty, le hampolie' i valobohòkey mb' amy rova fitsoloha  e nivoratsaha'ey, ao ty hipalira'e am-para' te vilasy ty mpisorom-bei' noriza  e amy menake miavakey. ²⁶ Aa naho eo ty andro a  aveloa' i namonoy alafe' ty efe' i rovam-pitsoloha  e nivotitsiha'ey, ²⁷ le mahaisak' aze alafe' ty efe' i rovam-pitsoloha  ey i mpamale fatey, vaho vonoe' i mpamale fatey, le tsy hanan-tahi  e amy lio'ey re, ²⁸ amy t'ie tsy mete tsy midok' am-po' i rovam-pitsoloha  ey am-para' te mihomake ty mpisorom-bey, le ie vilasy i mpisorom-beiy vaho mete mimpoly an-tanem-pana  a'e a  e i namonoy.

²⁹ Ho fa  e naho fep  tse ho anahareo zay amo hene tarira' areo mifandimbeo ndra aia'aia ty imone  a' areo.

³⁰ Ze mamono ondaty, le ho vonoe  e i mpamonoy ami'ty taro' o nahaisakeo; fa tsy azo amonoa  e ondaty ami'ty taro' ondaty raike; ³¹ vaho tsy azo jeba  e  e ty fiai' ondaty namono, ie fa voa zaka ami' ty vonoondaty; toe tsy mahai-tsy vonoe  e ty mpamono ondaty. ³² Le tsy azo vilie   ay t'indaty nivoratsake mb'an-drovam-pitsoloha  e mb'eo, hampolia  e aze mb'an-tane'e a  e aolo' ty havilasi' i Mpisorom-beiy. ³³ Ko mandeotse

ty tanen' akiba' areo; fa mandeotse tane ty lio, vaho tsy mete eferañe i taney ami'ty lio nadoña ama'e naho tsy ami' ty lio' i nampidoña azey.
³⁴ Aa le ko maniva ty tane' imoneña' areo, fa fimoneñako, amy te mitoboke añivo' o ana' Israeleo ao, zaho IEHOVÀ.

36

Ie Engaeñe ho Valy o Mpandova Ampelao

¹ Niharine mb'eo o mpiaolon' anjomban-droaem-pifokoan-tarira' i Gilade ana' i Makire, ana' i Menasè, hasavereña' o ana' Iosefeoo vaho nilañoñe añatrefa' i Mosè naho o talèo naho o talèn' anjomban-droae' o ana' Israeleoo, ² nanao ty hoe: Linili' IEHOVÀ i talèkoy ty hanolotse i tane lovaeñey an-tsapake; vaho linili' IEHOVÀ i talèkoy ty hanolotse i lovan-drahalahi'ay Tselofekhàdey amo anak' ampela'eo. ³ Aa naho ivalia' ty anam-pifokoa ila'e amo ana' Israeleo, le ho rambeseñé ami'ty lovan-droae'ay ty lova' iareo vaho ho tovoñañe ami'ty lova' i fifokoñañé nivalie'ey; aa le ho liniva amy lova niazo'ay an-tsapakey. ⁴ Le ie avy i Jobili' o ana' Israeleio, ho tovoñañe ami' ty lova' i fifokoñañé nañeng' azey i lova'ey; le ho livaeñé ami' ty lovam-pifokoan-droae'ay i lova'ey.

⁵ Le hoe ty linili' i Mosè amo ana' Israeleo ty amy tsara' IEHOVÀ, To ty saontsi' o tariram-pifokoa' Iosefeo. ⁶ Aa hoe ty linili' IEHOVÀ ty amo anak' ampela' i Tselofekhàdeo: angao hifanambaly amy ze tea'e fe tsy mete tsy amo tariram-pifokoan-droae'eo avao ty anambalia' iareo. ⁷ Aa le tsy hafindra am-pifokoñañé raike ho ami'ty fifokoñañé ila'e o lovao; fa songa hitañe ty lovam-pifokoan-droae' e o ana' Israeleo. ⁸ Le hanambaly ami'ty fifokoan-droae' e ze anak' ampela mitan-dova ami'ty fifokoñañé raik' amo ana' Israeleo, soa te songa hitan-dovan-droae' e o ana' Israeleo. ⁹ Aa le tsy hafindra ho ami'ty fifokoñañé ila'e ty lova fa sambe mitan-ty lova' e o fifokoan' ana' Israeleo. ¹⁰ Nanoe' o anak'ampela' i Tselofekadeo ty nandilia' IEHOVÀ i Mosè. ¹¹ Le nifanambaly ami'ty anan-drahalahindrae' e t'i Maklà, i Tirtsà, naho i Koglà vaho i Noà ana' i Tselofekade. ¹² Nifanambaly amo tarira' o nte-Menasè ana' Iosefeo iereo vaho mireketse am-pifokoan-droae' e ao ty lova' iareo.

¹³ Irezay ro lily naho fepetse linili' IEHOVÀ amo ana' Israeleo am-pità' i Mosè a montom-bei' i Moabe añ' olo' Iordaney tandrife Ierikò eo.

Indra-Tsara

Faniahiañe i te Korèbey

¹ Iretoañe o tsara nilañona' i Mosè am' Israele iaby alafe' Iardeney, am-patrambey ao, an-tane mira tandrife i *Sofe añivo' i Parane naho i Tòfele naho i Labane naho i Katseròte vaho i Dizahabe. ² (Mahamodo andro folo-raik' amby ty lia mb'e Kadàse-Barnèa mb'eo t'ie miary mb'e Vohi-Seire aña.) ³ Aa ie tamy taom-paha efa-poloy, ami'ty vola'e faha-folo-raik'amby, ami'ty andro valoha' i volañey le ninday lañonañe amo ana' Israeleo t'i Mosè, amy nampisaontsie' IEHOVÀ aze; ⁴ naho fa zinevo'e t'i Sihone mpanjaka' o nte-Amore nimoneñe e Khesboneo, naho i Oge mpanjaka' i Basane nimoneñe e Astaròte e Ederèy ao; ⁵ alafe' Iardeney atoy, an-tane' i Moabe, ty nimanea' i Mosè halangesañe i Hake ami'ty hoe: ⁶ Nitsara aman-tika e Korebe aña t'IEHOVÀ Andrianañaharentika nanao ty hoe: Ihe loho tambatse ami'ty vohitse toy: ⁷ mitoliha naho tonjohizo ty lia' areo, le mionjona mb'am-bohi' o nte Amoreo mb'eo; naho mb'an-tane mañohoke aze iaby mb' an-tane-mira[†] ey naho mb'amo vohibohitseo naho mb'am-bavatane[‡] ao naho mb' atimo[§] aña naho mb' añolon-driake mb'eo pak' an-tane' i nte-Kanàney naho pake Lebanonone aña vaho migadoña amy oñe ra'elahi, i oñe Peràtey. ⁸ Ingo, fa nalahako añatrefa' areo o taneo; akia rambeso ho anahareo i tane nifañinà' IEHOVÀ aman-droae' areoy: amy Avrahame naho am' Letsake vaho am' Iakobe, t'ie hatolots' am' iareo naho o tarira' iareo hanonjohio.

Fañedreañe Mpiaolom-pifokoa

Avo 18.13-27

⁹ Ie amy zay nanao ty hoe ama' areo raho, Tsy lefeko ty mivave anahareo, zaho avao, ¹⁰ fa nampañaranàhe' IEHOVÀ Andrianañahare' areo ho mira ami'ty ia' o vasian-dikerañeo androany. ¹¹ Le ee te hampitomboe' IEHOVÀ Andrianañaharen-droae' areo añ' arivo ty ia' areo vaho hitahy anahareo amy nampitamae'ey. ¹² Fa aia ty hahavaveako, t'ie raike, ty fañangara' areo naho ty fampioremeña' areo vaho ty fampihohokohofa' areo ahiko. ¹³ Tendreo o mahilala' areoo, o mahihitseo naho o maharofoanañe amo rofoko' areoo le hanoko mpifehe' areo. ¹⁴ Le natoi' areo ty hoe, Mete i nisaontsia'o hanoeñey. ¹⁵ Aa le rinambeko o mpiaolo' o fifokoa' areoo, o mahihitse naho mahilalao naho najadoko ho talè' areo ho mpifelek' arivo, naho mpifeleke zato, naho mpifeleke limampolo, naho mpifeleke folo, vaho ho mpitoronjo, ki-foko, ki-foko. ¹⁶ Le nafantoko amo mpizaka' areoo amy andro zay, ty hoe: Mijanjiña añivo' o rolongo' areoo vaho mizakà an-katò añivo' ze ondaty naho ty rahalahi'e ndra ze renetane ama'e. ¹⁷ Ko mirihy an-jaka; fe janjiño ty kede naho ty bey; ko hembañe ami'ty lahara' ondaty, fa an'Andrianañahare ty zaka, le ze tsy lefe' areo ro hasese amako ho tsanoñeko. ¹⁸ Aa le nililieko henane zay ze hene raha hanoe' areo.

Mifoneñe tsy Himoak' amy Taney

Vol 13.1-33

¹⁹ Aa ie nienga i Korebe tika, le niranga i fatrañe jabajaba mahareven-dreveñe nioni' areo am-piariañe ty vohi' o nte-Amoreoy, amy nandilia'

* **1:1** Sofe: hàmotse ndra vinda (añolon-drano) † **1:7** Arabà, tane mira liolio atimo i Galile

‡ **1:7** Sefelà § **1:7** Nègeve

IEHOVÀ Andrianañaharentikañey; le nivotrake e Kadese-Barneà eo, ²⁰ vaho hoe ty nanoeko: ie fa nandoak' am-bohi' o nte-Amoreo, i hatolo' IEHOVÀ Andrianañaharen-tika aman-tikañey. ²¹ Ingo fa napo' IEHOVÀ Andrianañahare'o añatrefa'o eo o taneo: aa le mionjona mb'eo naho rambeso ami'ty nitsara' IEHOVÀ Andrianañaharen-droae'o, ko hembañe vaho ko mitsolofiñe.

²² Aa le songa niharine amako nanao ty hoe: hamantoke ondaty hiaolo antika mb'eo zahay hitsikarake i taney vaho hinday saontsy amantika ami'ty lalañe hionjonan-tika mb'eo naho o rova higaoñan-tikañeo. ²³ Toe ninòko i saontsy zay, vaho rinambeko t'indaty folo-ro' amby, songa raike ami'ty fifokoañe; ²⁴ le nitolike iereo nionjoñe mb'am-bohibohitse mb'eo naho nandoak' am-bavatane Eskole vaho nitsoetsoek' ao. ²⁵ Nandrambesa' iareo am-pitâñe ty voka' i taney le nendese' iareo nizotso mb'am-tikañey atoy, vaho ninday saontsy aman-tika nanao ty hoe: Soa i tane natolo' IEHOVÀ Andrianañaharen-tika aman-tikañey.

²⁶ F'ie amy zay, tsy ni-mete nionjom-beo nahareo te mone niola ami'ty nandilia' IEHOVÀ Andrianañahare' areo, ²⁷ vaho niñeõeñe an-kiboho' areo ao ami'ty hoe: ty falai' IEHOVÀ antika ty nañakara'e antika an-tane Mitsraime hanesea'e am-pitâ' o nte-Amoreo harotsake. ²⁸ Aia ty hionjonantika? Nahamohake ty arofo'ay ty enta' o longontikañeo nanao ty hoe, Ra'elisy naho abo te amantika ondatio naho jabajaba o rova' iareo reketse kijoly mitiotiotse mb'andikerañ' eio vaho niisa'ay ao o ana' i Anàkeo.

²⁹ Aa le nanoeko ty hoe, Ko irevendreveñañe, ko ihembañañe. ³⁰ IEHOVÀ Andrianañahare Mpiaolo ro hialy ho anahareo hambañe amy nanoe'e e Mitsraime añae aolom-pihaino' areoy; ³¹ naho tam-patrambey aña; fa niisa' areo ty fiotroña' IEHOVÀ Andrianañahare' areo, manahake ty fiotroña' ondaty i ana-dahi'ey, amo lia' areo iabio ampara' te nivotrak' an-tane atoy. ³² F'ie amy zay, tsy natokisa' areo t'IEHOVÀ Andrianañahare' areo, ³³ i Mpiaolo am-pañaveloañey nipay ze hañoreña' areo o kibohotseo, ie añ'afó ao te haleñe hanoroa'e ty lalan-kombà' areo vaho an-drahoñé ao te handro.

Ty Vale' ty Fiola' Israele Vol 14.20-45

³⁴ Ie jinanji' IEHOVÀ i feon' enta' areo zay, le niviñetse vaho nifanta ty hoe: ³⁵ Leo raik' amo retoñañe—o tariratse raty reo—tsy hahaisake i tane soa nifañinàko hatolotse aman-droae' areoy, ³⁶ naho tsy i Kalèbe ana' Iefonè. Ie ty hahaisake, le hatoloko aze naho amo tarira'eo i tane niliampandia'ey ami'ty fañoriha'e fatratse IEHOVÀ. ³⁷ Izaho ka niviñera' IEHOVÀ ty ama' areo amy tsara'ey, ty hoe: Tsy himoak' ao ka rehe. ³⁸ I Iehosoa ana' i None, mpitoro'oy, ty himoak' ao; osiho amy t'ie ty hampandova Israele aze. ³⁹ Le o keleia' areoo, o natao' areo ho nikopaheñeo, o ana' areoo; i mboe tsy nahilala ty soa naho ty raty henane zay rey ty himoak' ao; le hatoloko iareo vaho ho rambese' iareo ho fanañañe. ⁴⁰ F'inahareo ka, mitoliha naho mionjona mb'am-patrambey miary amy Ria-Binday mb'eo.

⁴¹ Nanoñ' ahy ami'ty hoe nahareo, Toe anaña' IEHOVÀ hakeo! Veka'e hionjoñé hialy zahay ami'ty nandilia' IEHOVÀ Andrianañaharen-tika. Aa le songa nidiamic-pialiañe ondatio fa natao'e ho mora ty hionjoñé mb'am-bohibohitse mb'eo. ⁴² Le hoe t'IEHOVÀ amako, Isaontsio ty hoe: Ko mionjom' beo vaho ko mialy, amy te tsy añivo' areo ao raho tsy mone ho rotsak' aolo' o rafelahi' areoo. ⁴³ Fe ndra te nivolañeko, tsy nihaoñé' areo. Niola amy nandilia' IEHOVÀ, an-tsatin-troke ty nionjona' areo

mb' am-bohibohitse mb'eo. ⁴⁴ Niavotse, niatrek' anahareo amy zao o nte-Amore mpimoneñe am-bohitseo vaho nihoridañe'e hoe rene tantele. Rinotsa' iareo am-pibara e Seire pake Kormà aña. ⁴⁵ Aa le nibalike naho nirovetse añatrefa' IEHOVÀ, fe tsy hinao' IEHOVÀ ty fiarañanaña' areo, tsy nanokilaña'e ravembia. ⁴⁶ Aa le nitobe e Kadese ao ela ty amo andro nitoboha' areoo.

2

O Taoñe An-dratraratralo

¹ Niotak' amy zao tika nionjomb' am-patrambey mb'eo, niary i Ria-Binday, mb'ami'ty nanoroa' IEHOVÀ ahiko vaho nañariary i Vohi-Seirey andro maro. ² Le hoe ty nitsarae' IEHOVÀ amako: ³ Fa losotse ty fiafaria' areo ty vohitse toy. Mitoliha mañavaratse, ⁴ le afantoho ty hoe ondatio: Ho rangae' areo ty tanen-drolongo' areo, o tarira' i Esave mpimoneñe e Seireo, f'ie ho hembañe ama'areo, aa le mitaoa ⁵ tsy mone hihotakotak' am' iereo fa tsy hitalorako ndra zehem-pandia raik' amy tane'iareoy amy te nimeako i Esave ho fanaña'e ty Vohi' Seire. ⁶ Ho vilie' areo an-drala o mahakama'eo hikamà' areo, vaho hikaloa' areo rano an-drala hinoma' areo. ⁷ Toe nitahie' IEHOVÀ Andrianañahare' areo amy ze hene satampità' areo naho arofoana'e ty firanga' areo am-patram-bey atoy. Tsy eo ty nipaia' areo amyefa-polo taoñe nindreza' IEHOVÀ Andrianañahare' areo rezay. ⁸ Aa le niarian-tika o tarira' i Esave longon-tika mimoneñe e Seire ao, le nengan-tika ty lala' i Arabà naho navotson-tika t'i Elate naho i Etsione-Gebere le nitsile vaho niary mb'amy lala' i fatrambei' i Moabeiy mb'eo.

⁹ Le nanao ty hoe amako t'IEHOVÀ: Ko tsiborè'o t'i Moabe ndra hialy ama'e, fa tsy ho meiko ndra kede amo tane'eo ho fanañañe, amy te natoloko amo tarira' i Loteo ty Are ho fanaña'e. ¹⁰ (Nimoneña' o nte-Emeo zay te taolo: ondaty mijoalajoala naho mitozantozañe, mira haabo amo nte-Anàkeo; ¹¹ Betek' atao ty hoe nte-Refae iereo manahake o nte-Anakeo, f'ie atao' o nte-Moabeo ty hoe nte-Emà. ¹² Le nimoneñe e Seire ao o nte-Koreo taolo, fa niroahe' o ana' i Esaveo, rinotsa'e miaolo iareo vaho nitoboke an-tane' iareo ao, manahake ty anoe' Israele amy tane natolotse aze ho fanaña'ey; i natolo' IEHOVÀ iareoy). ¹³ Miongaha arè, le itsaho o toraha' i Tseredeo. Aa le nitsahan-tika i torahan-Tserèdey.

¹⁴ Le o andro nañaveloan-tika boake Kadese-Barneà am-para' t'ie nitsake i torahan-Tseredeo, le taoñe telo-polo-valo' amby, ampara' te fonga nivetrak' añivo' i tobey o lahindefoñe mpiharo-nonoo, amy nifantà' IEHOVÀ am' iereoy. ¹⁵ Toe nañonjona' IEHOVÀ hooke hañombota'e amy màroy am-para' t'ie fonga nimongotse.

¹⁶ Naho hene nikoromake añivo' ondatio i lahindefoñe rezay, ¹⁷ le nitsara ty hoe amako t'IEHOVÀ. ¹⁸ Hitsake i Are, efe-tane' i Moabe rehe te anito. ¹⁹ Ie miarine ty efe-tane' o nte-Amoneo, le ko tsibore'o vaho ko ialiañe, fa tsy hañomeako ty tane' iareo ho fanaña'o, amy te natoloko an-tarira' i Lote ho fanaña'e. ²⁰ (Toe natao t'ie tane' o nte-Refaeo ka; fa nimoneñe ao o nte-Refaeo taolo, ie nitokave' o nte-Amoneo ty hoe Zam'zome, ²¹ ondaty maozatse naho vasiañañe mira amo nte-Anakeo. F'ie narotsa' IEHOVÀ aolo' iareo eo handimbeza' iareo fimoneñañe; ²² manahake ty nanoe'e amo tarira' i Esave mimoneñe e Seireo ami'ty nandrotsaha'e o nte-Koreo aolo' iareo, nandimbe iareo am-pimoneña'e pake henaneo; ²³ naho o nte-Aveo, ie nimoneñe e Katsere pak' Aza aña, le rinotsa' o nte-Kaftore boake Kaftoreo, vaho nandimbe fiambesatse.) ²⁴ Miongaha, tonjohizo ty lia' areo,

itsaho o vavatane' i Arnoneo. Ingo fa natoloko am-pità' areo t'i Sihone nte-Amore mpanjaka' i Khesbone naho ty tane'e. Miorota mitavañe, naho tameo aň'aly. ²⁵ Hampihembañeko naho hampirevendreveñeko ama'o henane zao ze hene ondaty ambanen-dikerañeo; ie mijanjiñe azo le hitititike ami'ty anifañe.

Ty Fandrotsahañe i Sihone Mpanjaka
Vol 21.21-32

²⁶ Aa le nampisangitrifeko irake boak' am-patrambein-Kedemote ao ho mb'e Sihone Mpanjaka' i Khesbone aňe, le hoe ty entam-panintsíñako ama'e: ²⁷ Angao raho hiranga ty tane'o, fa i lalañey avao ty horiheko, tsy hitsile ndra maňavana ndra maňavia. ²⁸ Haleta'o drala amako ty mahakama hihinanako, vaho ie fahana' areo rano hinomako, le ho soloako bogady, fe apoho ho rangaeko an-tomboke ty tane'o— ²⁹ hambañe ami'ty nanoe' o tarira' i Esave mimoneñe e Seireo amako naho ty nanoe' o nte-Moabe mpimoneñe e Areo ka—ampara' te itsahako Iardeney mb'an-tane nitolora' IEHOVÀ Andrianaňahare'ay mb'eo. ³⁰ Fe tsy nimete hampiranga an-tika t'i Sihone Mpanjaka nte-Khesbone fa nampigan-troke aze t'IEHOVÀ Andrianaňahare' areo vaho nampitokie'e ty arofo'e hanolora'e aze am-pità' areo, le ie henaneo.

³¹ Aa hoe t'IEHOVÀ amako: Ingo, fa namototse hanolotse i Sihone naho i tane'ey ama' areo raho, aa le miorota henane zao hangalake i tane'ey ho lova' areo. ³² Aa le niavotse haname an-tika t'i Sihone, ie naho ondati'e iabio, hihotakotake ty aly e Iàhatse aňe, ³³ le natolo' IEHOVÀ Andrianaňaharentika aolon-tika vaho linafa-tika naho o tiri'eo naho ondati'e iabio. ³⁴ Le hene tinavan-tika o rova'eo henane zay, le fonga zinaman-tika ze ondaty ndra rakemba ndra ajaja amo rovao. Tsy napon-tika ndra honka'e. ³⁵ O hareo avao ty rinamben-tika ho fikopahañe rekets' o raha kinopak' amo rova tinavan-tikaňeoo. ³⁶ Boak' Arore aolo' i vavatane Arnoney (rekets' i rova am-bavataney) pake Gilàde le tsy teo ty rova loho abo tsy nilefe, fonga natolo' IEHOVÀ Andrianaňaharentika amantika. ³⁷ Fe tsy niharinea' areo o tanen' ana' i Amoneo, ndra aia aia amy saka' Iabokey ndra amo rova ambohibohitseio, ndra aia aia nandrarà' IEHOVÀ Andrianaňaharentika antika.

3

Gioke t'i Oge
Vol 21.33-35

¹ Aa le nitolike tika nionjoñe amy lalañey mb'e Basane mb'eo vaho niavotse hiatrek' antika t'i Oge mpanjaka' i Basane, ie naho ondati'e iabio, hialy Edrey. ² Hoe t'IEHOVÀ amako, Ko ihembaña'o fa natoloko am-pità'o naho ondati'e iabio vaho o tane'eo. Ano ama'e hambañe amy nanoe'o i Sihone, mpanjaka' i Amore nimoneñe e Khesboney.

³ Aa le natolo' IEHOVÀ Andrianaňaharentika am-pitàn-tika ka t'i Oge mpanjaka' i Basane naho ondati'e iabio, le rinotsan-tika vaho tsy nengantsehang'a'e. ⁴ Ie amy zay, tinavan-tika o rova'e iabio; le tsy teo ty rova'e tsy tinavan-tika—rova enempolo, ze hene tane' i Argobe, ty fifehea' i Oge e Basane ao. ⁵ Songa narovañe an-kijoly abo o rovao, lalambez naho sikadaňe, tovo' irezay o tanàñe tsi-fotofoto tsy aman-kijolio.

⁶ Fonga binaibain-tika hambañe ami'ty nanoan-tika i Sihone mpanjaka' i Khesbone, songa zinaman-tika ze lahilahy naho rakemba vaho keleiañe

amy ze rova iaby. ⁷ Fe hene rinamben-tika ze añombe naho vara amo rovao ho tsindroke.

⁸ Le tinavan-tika boak'am-pitàm-panjaka nte-Amore roe amy andro zay ty tane alafe' Iardeney atoy mifototse amy saka Arnoney pak' am-bohi-Kermone aña; ⁹ (Atao' o nte-Tsidoneo ty hoe Sirione ty Kermone, le atao' o nte-Amoreo ty hoe Senire;) ¹⁰ le ze rova an-tanemira ey, naho i Gilàde iaby le i Basane iaby, pake Salkà aña vaho i Edrey, o rova am-pifehea' i Oge nte-Basaneo. ¹¹ I Oge mpanjaka' i Basane ty ni-sengaha' o fanalolahio; inao te fandream-by ty fandrea'e, mbe e Rabate ao zay amo ana' i Amoneo. Sive kiho ty an-dava'e naho efatse kiho ty ampohe'e an-kiho tsotra.

¹² Le natoloko amo nte-Reobeneo naho amo nte-Gadeo i tane rinamben-tika amy andro zaiy, boak' Aroere aña' olo' i saka Arnoney naho ty tampa' i Vohi-Gilàdey, naho o rova'eo. ¹³ Le natoloko amy vakim-pifokoa' i Menasèy ty sisa' i Gilade naho i Basane iaby, toe ty fifehea' i Oge, le nitokaveñe ty hoe tanem-panalolahy ze hene tane' i Argobe mitraoke amy Basane iaby. ¹⁴ Iaire ana' i Menasè ty nandrambe ty tane'i Argobe pak'añ'olo' i Gesory naho i Maàkaty aña vaho nitokave'e amy tahina'ey ty hoe: Basane-kavote-Iaire pake henane. ¹⁵ Le natoloko amy Makire ty Gilade. ¹⁶ Le natoloko amo nte-Reobeneo naho amo nte-Gadeo ty tane boake Gilade pak' an-tsaka' Arnone, ty aivo' i vavataney ro efe'e, pak' an-tsaka' Iabòke eo, ty efe-tane' o ana' i Amoneo; ¹⁷ naho i tane Miray, Iardeney ty efe'e, le boak'e Kinerete pak' an-dria' i antanemira, i ria-tsiray, am-potom-pirororoña' i Asdote-Pisgà maniñanaña.

¹⁸ Le hoe ty nandiliako anahareo henane zay: Fa natolo' IEHOVÀ Andrianañahare' areo ho fanaña' areo o tane atoio le hitsake reke-pialiañe aolo' o rahalahi' areo ana' Israeleo ze mahatan-defo ama' areo iaby. ¹⁹ Fe hidoe amo rova natoloko anahareoo o vali' areoo, o keleia' areoo, naho o añombe' areoo (apotako te maro ty añombe' areo); ²⁰ aa naho nampitofà IEHOVÀ manahak' anahareo o rahalahi' areoo, naho fa nitobe'a' iareo ka ty tane natolo' IEHOVÀ Andrianañahare' areo alafe' Iardeney aña, zay vaho himpoly nahareo—ze fonga ondaty—mb' an-tane'e mb'eo, i natoloko anahareoy.

²¹ Le nafantoko am' Iehosoa amy andro zay ty hoe, Toe hene nioni-pihaino'o ty nanoe' IEHOVÀ Andrianañahare' o i mpanjaka roe rey, le zay ka ty hanoe' IEHOVÀ ze fifeheañe irangà' areo. ²² Ko ihembaña' areo fa IEHOVÀ Andrianañahare' areo ty mialy ho anahareo.

Talake boak'e Pisgà

²³ Ie amy zay, nihalaly am' IEHOVÀ raho ami'ty hoe: ²⁴ O Talè IEHOVÀ, ie vaho niorotse nampiboake ty hajabahina'o naho ty haozara'o ami'ty mpitoro'o, le ia ty ndrahare an-dikerañe ao ndra an-tane atoy ty mahafitoloñe hambañe amo anoe'oo naho o sata'o ra'elohio? ²⁵ Ehe te henga'o hitsake mb'eo raho hahatreavako i tane fanjaka alafe' Iardene añaey, o vohibohitse soao naho i Lebanon. ²⁶ F'ie niviñera' IEHOVÀ ty ama' areo le tsy nihaoñe'e. Hoe t'IEHOVÀ amako, Fa eneñe i azoy! ko isaontsia'o ka. ²⁷ Miañambonea mb' an-dengo' i Pisgà mb'eo le miandrà makandrefa naho mañavaratse naho mañatimo naho maniñanaña eñe. Italakeso am-pihaino, f'ie tsy hitsake Iardeney. ²⁸ Afantoho t'Iehosoa naho osiho vaho haozaro, amy t'ie ro hitsake hiaolo ondaty retia, le ie ty hampandova iareo o tane ho isa'oo. ²⁹ Aa le nitamañe am-bavatane tandrife i Bete-piore eo tika.

4

Mandily Fivohorañe t'i Mosè

¹ Ie amy zao ry Israele, janjiño o fañè naho fepètse añòhako anahareo hanoeñeo, soa t'ie ho veloñe hahafimoake vaho handova i tane atolo' IEHOVÀ Andrianañaharen-droae' areo ama'areoy. ² Ko tovoña' areo o tsara liliekoo naho ko añafahañe*, vaho ambeno o lili' IEHOVÀ Andrianañahare' areo afantoko ama' areoo.

³ Niisam-pihaino'areo ty nanoe' IEHOVÀ amy Baale-Peore, ty amo fonga ondaty nañorike i Baale-Peoreo; fa narotsa' IEHOVÀ Andrianañahare'o ama'areo irezay—indaty nañorike i Baal-peore rey. , ⁴ f'ie nifahatse am' IEHOVÀ Andrianañahare' areo, le songa veloñe androany.

⁵ Ingo te nanareko o fañè naho fepetse nafanto' IEHOVÀ Andrianañahareko amakoo hañoriha' areo an-tane himoaha' areo ho lovae' areo henaneo. ⁶ Aa le oriho naho anò, fa zay ty hihi' areo naho ty hilala' areo am-pahaisaha' ondatio, le ie mahajanjiñe o hene fañèo ro hanao ty hoe: Toe ondaty mahihitse naho mahilala ty foko ra'elahy tiañe.

⁷ Fa ia ty foko aman-drahare hañirinkiriñe IEHOVÀ Andrianañaharen-tika, mpanoiñe ndra mbia' mbia ikanjiantika. ⁸ Ia ka ty foko amam-pañè naho fepètse vantañe manahake i Hake fonitse taroñeko ama' areo androaniy.

⁹ Aa le mitomira, vontitiro añ' arofo tsy mone handikofa' areo o raha niisam-pihaino' areoo vaho ko anga' areo himolaotse am-pitsakoreañe amo hene andro hiveloma' areoo; fe ampaharendreho o ana' areoo naho o afe' areoo, ¹⁰ mentsake i nijohaña' areo añatrefa' IEHOVÀ Andrianañahare' areo e Korebey, ie nanao ty hoe amako t'IEHOVÀ, Atontono ondatio hijanjiñe o fivolakoo, hioha' iareo ty hañeveñ' amako amo hene andro hiveloma' iareo an-tane atoio, vaho hanare' iereo hanao zay ka o keleia'eo. ¹¹ Aa ie nitotoke mb'eo le nijohañe ambane' i vohitsey, naho nilebalebà' ty afo naneñateña i likerañey i vohitsey ie nisaroñan-drahoñe nimoromoroñe. ¹² Le nitsara ama' areo boak'amy afoy t'IEHOVÀ. Jinanji' areo ty feo' i tsaray, fe tsy niisa' areo ty vinta'e, i fiarañanañañey avao.

¹³ Tsinei'e ama' areo i fañina linili'e ama' areo horiheñey: i tsara folopinate'e am-bato roe rey. ¹⁴ Le nafanto' IEHOVÀ amako henane zay ty hañohako anahareo o fañè naho fepètse hañoriha' areo an-tane hitsaha' areo ho lovaeñeo.

¹⁵ Aa kanao tsy nahaonim-bintañe nahareo te nitsara ama' areo e Korebe aña boak'añ' afo ao t'IEHOVÀ, le mitomira, ¹⁶ tsy mone hameta vatañe am-pitseneañe sareñ-draha ho anahareo ami'ty vintañ' inoñ' inoñe—ke lahy he ampela, ¹⁷ ke amam-bintam-bibi' ty tane toy, he amam-bintam-boroñe aman' elatse mitiliñe amo tiokeo, ¹⁸ ke amam-bintan-draha milalilaly an-tane, he amam-binta' ze fiañe an-drano ambane' tane ao. ¹⁹ Le he miandra mb' andikerañey rehe mahaisake i àndroy, i volañey, naho o vasiañeo, naho i valobohòn-dikerañey, vaho mivik' mb'ama'e naho mibabok' ama'e hitoroñe irezay, o natolo' IEHOVÀ Andrianañahare'o amy ze kila ondaty ambanen-dikerañeo. ²⁰ Fe rinambe' IEHOVÀ nahareo le hinaha'e amy fampitranaham-biy ao, boake Mitsraime aña, ho ondatim-panaña'e: le ie henaneo.

²¹ Ie amy zao niviñetse amako t'IEHOVÀ ty ama' areo, ie nametse te tsy hitsahako Iardeney vaho tsy himoahako i tane fanjaka atolo' IEHOVÀ Andrianañahare'o azo ho lovay; ²² f'ie hikenkañe an-tane atoy, tsy hitsake Iardeney; f'inahareo ro hitsake naho hitavañe i tane fanjakay.

* ^{4:2} Its 12:32, Rzs 30:6, Ben 22:18-19

²³ Aa le mitaoa tsy handikofa' areo i fañina nanoe' IEHOVÀ Andrianañahare' areo ama' areoy ke hitsene sarem-bintañe, ke sareñ-inoñ' inoñé nandrarä' IEHOVÀ Andrianañahare'o azo. ²⁴ Fa afo mahaforototo t'IEHOVÀ Andrianañahare'o, Andrianañahare Mpamarahy.

²⁵ Ie nahatoly anake naho afe naho fa nierañerañe ela an-tane ao, naho manao hakarapiloañe am-pitseneañe sarem-bintañe ke sareñ-inoñ' inoñé vaho manao tiva am-pivazoho' IEHOVÀ Andrianañahare'o, hikaiha' areo ty haviñera'e, ²⁶ le ho koiheko henaneo i likerañey naho ty tane toy hitalily ama' areo t'ie kila hihomak' aniany an-tane himoaha' areo am-pitsahañe Iardeney, handova' areo, le tsy ho lava-ohatse fa ho vata'e mongoreñe. ²⁷ Ie hampiparaitahe' IEHOVÀ am' ondatio aña; toe tsy ampeampe ty ho sehanga' areo amo kilakila ondaty handroaha' IEHOVÀ anahareoo. ²⁸ Ho toroñe' areo aña ty 'ndrahare rinanjim-pitâ' ondaty; hatae naho vato, songa tsy mahatreia, tsy mahatsanoñe, tsy maha-filintseñe vaho tsy maha-antsoñe.

²⁹ Aa ie aña ro hipiaia' areo IEHOVÀ Andrianañahare'o, le ho oni'o naho tsoehe'o aña-kaampon'arofo[†] naho an-kaliforam-pañoova. ³⁰ Ie ami'ty falovilovia'o, naho fa hene nifetsaha' irezay amo andro añaeo, le himpoly am' IEHOVÀ Andrianañahare'o vaho ho haoñe'o i fiarañanaña'ey; ³¹ Amy te Andrianañahare tretram-po t'IEHOVÀ Andrianañahare'o, tsy haforintse'e, tsy hampimodoe'e; tsy ho haliño'e i fañina aman-droae'o nifantà'e am' iereoy.

³² Ie amy zao añontaneo o sa haehaeo, o taolo'oo, ampara' i andro nitseenen' Añahare ondaty an-tane atoio; añontaneo boak' aña'olon-dikerañ' aña pak' aña'olo'e ka; he teo ty nifetsahan-draha tsitantane hoe itiañe, ke eo ty nahajanjin-ty mañirinkiriñe aze? ³³ Aa vaho eo hao t'indaty nahajanjiñe ty fiarañanaña' Añahare nitsara ama'e boak' aña'afó ao, manahake i jinanji'oy, t'ie mbe veloñe? ³⁴ Hera teo ty 'ndrahare nimane hangalake foko ho am-bata'e boak' amo kilakila' ondatio am-pitsahañe naho am-biloñe naho an-draha tsitantane vaho aña' aly, andela-pitâne maozatse naho am-pitâne natora-kitsy, am-pampiboahan-kaozarañe mahalatsa manahake o hene nanoe' IEHOVÀ Andrianañahare' areo ho anahareo e Mitsraime aña añatrefam-pihaino'oo? ³⁵ Ie nampiboahené ama'o, hatokisa'o te toe Andrianañahare t'IEHOVÀ; le tsy eo naho tsy ie avao. ³⁶ Nampijanjiñe'e azo boak'andikerañe ao ty fiarañanaña'e hanoroa'e azo, naho nampiboaha'e an-tane atoy ty afo'e jabajaba, vaho jinanji'o boak' amy afoy o tsara'eo. ³⁷ Kanao nikokoa'e o roae'oo, le jinobo'e o tariratse nandimbe iareoo, naho nampiengà'e i Mitsraime amy fiatrefa'e naho an-kaozara'e ra'elahy ³⁸ hanoe'e soik' aolo'o eo o rofoko maozatse naho bey te ama'oo, hampihova'e azo ao, hitolora'e i tane' iareoy ho lova'o, le ie henaneo.

³⁹ Aa le mahafohina androany vaho vontitiro aña' arofo ao te Andrianañahare andikerañe ao naho an-tane ambane'e atoy t'IEHOVÀ, tsy amantovo'e. ⁴⁰ Ambeno o fañè'eo naho o lili'eo; o andiliako azo androanio hahasoa azo naho ty tariratse hanonjohy azo soa t'ie ho tamañe an-tane atolo' IEHOVÀ Andrianañahare'o azo ho nainai'e donia.

Rova Fitsolohañe Atiñana' Iardeney

⁴¹ Le navì' i Mosè ty rova telo alafe' Iardeney mb'am-panjiriha' i àndroy mb' atoy ⁴² hivoratsaha' ty namono-ondaty, ie namono ondaty tsy antsatri'e, ie le lia'e tsy nimpirafelahy ama'e taolo, le mete hitriban-day

[†] 4:29 Iir 29:13

mb'ami'ty raik' amy rova fitsolohañe rey himoneña'e: ⁴³ i Betsere am-patrambey an-tane mira ho a' o nte-Reòbeneo, i Ramote e Gileade ao ho a' o nte-Gadeo, vaho i Golane e Basane ao ho a' o nte-Menasèo.

Taro'e Faharoe

⁴⁴ Zao ty Hake nitaroñe' i Mosè amo ana' Israeleo. ⁴⁵ Zao o taroñe naho fañè naho pepètse nisaontsie' i Mosè amo ana' Israeleo, ie fa niavotse i Mitsraimeo, ⁴⁶ alafe' Iardeney atoy am-bavatane tandrife i Bete-peore, antane' i Sihone mpanjaka' i Amore nimoneñe e Khesbone, i ginio' i Mosè naho o ana' Israeleo, ie fa nienga i Mitsraimey. ⁴⁷ Nimoneña' iereo i taney naho an-tane' i Oge mpanjaka' i Basane, ty mpanjaka roe' o nte-Amoreo alafe' Iardeney mb' am-panjirihan' andro atoañe, ⁴⁸ mifototse e Aroere añ'olom-bavatane Arnone eo pak' am-bohi-Sione añe (i Kermònay) ⁴⁹ naho i ratraratra iaby atiñana' Iardene añey pak' an-dRiak'Arabà ampoton-kerakera' i Pisgà eo.

5

Ty Tsara Folo Avo. 20.1-17

¹ Kinoi' i Mosè t'Israele iaby, le nanoe'e ty hoe: Janjiño ry Israele, o fañè naho fepètse taroñeko an-dravembia' areo androanio: le ianaro naho itomiro vaho anò. ² Nifañina amantika e Korebe aña t'IEHOVÀ Andrianañaharen-tika; ³ tsy o roaen-tikañeò ty nifañina' IEHOVÀ fa itika, eka itikañe, itika veloñ' etoañe henanekeo. ⁴ Nifanaontsy am-piatrefan-daharañe ama' areo t'IEHOVÀ boak' am-bohitse ey; hirik' amy afoy ao, (⁵ Nijohañe añivo' IEHOVÀ naho inahareo raho henane zay hampalangesako ama' areo ty tsara' IEHOVÀ, ie nañembañe anahareo i afoy vaho tsy nete nionjom-b' amy vohitsey mb'eo) nanao ty hoe:

⁶ Zaho IEHOVÀ Andrianañahare'o nampienga azo an-tane Mitsraime aña boak' an-trañom-pañondeyozañe ao.

⁷ Tsy ho aman-drahare ila'e rehe naho tsy Zaho avao.

⁸ Ko mitsene sampsampon-draha, ndra sareñ' inoñ' inoñe andikerañé ao, ndra an-tane ambane'e atoy, ndra an-drano ambane' ty tane toy ao.

⁹ Ko ibokobokoa'o ndra italahoa'o; fa Zaho IEHÔVÀ Andrianañahare'o ro Andrianañahare Mpamarahy, mandilo anake ami'ty hakeon-droae'e pak'an-tariratse faharoe naho fahatelo' o malaiñ' ahio, ¹⁰ f'ie manolotse fikokoa-migahiñe pak'an-tariratse faharivo' o mikoko ahy vaho miambéne o lilikoo.

¹¹ Ko vaseñe tsy vente'e ty tahina' IEHOVÀ Andrianañahare'o, fa tsy havotso' IEHOVÀ ze mañamaivañe i tahina'ey.

¹² Ambeno ty andro Sabotse hampiavahañ' aze, ami'ty nandilia' IEHOVÀ Andrianañahare'o azo. ¹³ Eneñ' andro ty hanoe'o ze hene tolon-draha'o.

¹⁴ Fe andro Fitofa' IEHOVÀ Andrianañahare'o ty andro faha-fito; ko mifanehak' ama'e, ndra ihe ndra ty ana-dahi'o ndra ty anak' ampela'o ndra ty ondevo'o lahy ndra ampela, ndra ty añombe'o ndra ty borìke'o ndra inoñ' inoñe amo hare'oo ndra o renetane mpimoneñe an-drova'oo, soa te songa hitofa ka ondevo-lahy naho ampela'oo. ¹⁵ Tiahio t'ie niondevo an-tane Mitsraime aña le nampiengà IEHOVÀ Andrianañahare'o an-dela-pitâñe maozatse naho am-pitâñe natora-kitsi'e; aa le linili' IEHOVÀ Andrianañahare'o te hambena'o ty andro Sabotse*.

* 5:15 Avo 20:10, 31:13-18, Mar 3:45

¹⁶ Iasio ty rae'o naho i rene'o, ami'ty nandilia' IEHOVÀ Andrianañahare'o azo, soa t'ie ho lava-andro naho ho soa tahi an-tane atolo' IEHOVÀ Andrianañahare'o azo.

¹⁷ Ko mañoho-doza.

Ko mangala-bali' ondaty,

Ko mampikametse,

Ko mitalily vilañe ondaty,

¹⁸ Ko mihañe ty vali' ondaty, le ko mitsikirike ty anjomban-drañe'o ndra ty tete'e ndra ty ondevo'e lahy ndra ampela ndra ty vosi'e ndra ty borike'e ndra inoñ'inoñe a ondatio.

I Mosè, Mpañalañalañe

Avo 20.18-21

¹⁹ Nipazahe' IEHOVÀ ami'ty valobohò' areo hirik' am-bohitse ey boak'añ'afao ao naho amy rahoñey naho amy hamoromoroñañey, am-piarañanañañe abo i tsaray vaho tsy nitovoñañe. Pinate'e an-dravembato roe izay, vaho natolo'e ahiko. ²⁰ Le nahajanjiñe i fiarañanañañe boak' an-kamoromoroñañey nahareo, ie niforehete' ty afo i vohitsey, le nañarine ahy ze hene talèm-pifokoa' areo naho o androanavi' areoo; ²¹ le hoe ty asa' areo, Ingo te naboa' IEHOVÀ Andrianañaharentika amantika ty enge'e naho ty hajabahina'e le jinanjintika i fiarañanaña'ey boak' amy afoy ao, naho nionintika henane zay te toe mitsara ama' ondaty t'i Andrianañahare vaho mitambeloñe iereo. ²² Ie amy zao ino ty hivetraha'ay avao? Toe hamorototo anay o afo jababajao naho mbe hijanjiñe ty fiarañanaña' IEHOVÀ Andrianañaharentika, le vata'e hikoromake. ²³ Fa ia amy ze hene atao nofotse ty nahajanjiñe ty fiarañanañañan' Andrianañahare veloñe boak' añafo ao, manahake i nijanjiñen-tikañey vaho mbe nahatambeloñe? ²⁴ Miharinea mb'eo rehe, le janjiño ze hene tsarae' IEHOVÀ Andrianañaharentika. Le fonga taroño ama'ay ze nitsara' IEHOVÀ Andrianañaharentika ama'o, le hijanjiñe vaho hanoe'ay.

²⁵ Jinanji' IEHOVÀ o fisaontsi' areoo, i nisaontsia' areo amakoy, le hoe t'IEHOVÀ amako: Fa tsinanoko o entañe sinaontsi' ondatio ama'oo; le soa-fehe iaby o saontsi' iareoo. ²⁶ Ee te nanao hoe zao nainai'e ty arofo'iareo t'ie nañeveñe amako, naho nañambeñe o nandiliako iabio, soa te hanintsíñe nainai'e iereo naho o amori'iareoo. ²⁷ Akia arè, isaontsio himpolia' iareo mb'an-kiboho' iareo mb'eo. ²⁸ F'ihe, mijohaña marine ahy atoy le ho taroñeko ama'o ze hene Lily, naho fañè naho fepètse, hañòha'o iareo hañorike irezay an-tane atoloko iareo ho fanañañe aña.

²⁹ Aa asoao te hanoe' areo ze andilia' IEHOVÀ Andrianañahare' areo, tsy hiotake mb'am-pitàn-kavana ndra havia, ³⁰ fe horihe' areo aman-kahiti'e ze hene lala linili' IEHOVÀ Andrianañahare' areo, soa t'ie ho veloñe naho ho tahie'e vaho ho lava haveloñe an-tane fanaña' areo atoy.

6

Ty Lily Ra'elahy

¹ Intoy arè ty lily naho ty fañè naho o fepetse linili' IEHOVÀ Andrianañahare' areo* ahy hañòhañe anahareoo, hambenañe amy tane hitsaha' areo ho tavaneñey, ² soa te hañeveña'o t'IEHOVÀ Andrianañahare'o naho hambena'o ze hene fañè'e naho fepètse andiliako azo, ihe naho i ana'oy naho o anan' ana'oo amo andro hiveloma'o iabio, soa t'ie ho lava haveloñe.

* **6:1** Its 5:22

³ Aa le mijanjiña, ry Israele, ambeno naho ano, soa te ho tahie'e, hibodobodoa'o amy tane orikorihen-dronono naho tanteley, amy nitsara' IEHOVÀ Andrianañaharen-droae'o.

⁴ Mijanjiña ry Israele! IEHOVÀ Andrianañaharentika: raike t'IEHOVÀ.

⁵ Kokò t'IEHOVÀ Andrianañahare'o an-kaàmpon' arofo'o naho an-kaliforam-pañova'o vaho an-kaozara'o iaby.

⁶ Ambeno añ'arofo'o ao o tsara lilieko ama'o androanio. ⁷ Anaro an-kahimbañañe o ana'oo, le taroño naho miambesatse añ' anjomba'o ao naho mañavelo amy lalañey naho am-pandrea'o ao vaho am-pitroara'o.

⁸ Feheo am-pità'o zay ho viloñe naho reketo ho alama an-dahara'o eo

⁹ naho sokiro an-tokonan' anjomba'o eo vaho an-dalambei'o eo.

Hatahata t'ie Manjehatse

¹⁰ Aa naho fa nampihovae' IEHOVÀ Andrianañahare'o amy tane nifantà'e aman-droae'o Avrahame naho Ietsake naho Iaàkobe hatolo'e azo, rekedrova jabajaba naho fanjàka tsy rinanji' areoy, ¹¹ naho anjomba pea ty raha soa tsy natsahe'o, kadaha hinaly tsy nihalie'o, tanem-baloboke naho firiritan-katae olive tsy naketsa'o—aa ie mikama ampara' te anjañe, ¹² asoao tsy handikofa'o t'IEHOVÀ nañavotse azo an-tane Mitsraime aña, boak' an-trañom-pañondevozañe ao. ¹³ IEHOVÀ Andrianañahare'o ty irevendreveña'o, ie ty hitoroña'o, vaho i tahina'ey avao ro ifantà'o.

¹⁴ Ko mañorike ndrahare ila'e, o ndrahare' ondaty mañohok' ana-hareoo, ¹⁵ amy te Andrianañahare mpamarahy añivo'o ao t'IEHOVÀ Andrianañahare'o; ke hiviañe ama'o ty fifombo' IEHOVÀ Andrianañahare'o vaho ho faopaohe'e an-tane atoy.

¹⁶ Ko mitsoke IEHOVÀ Andrianañahare' areo, manahake ty nitsoha' areo aze e Masà aña. ¹⁷ Fe ambeno an-kahimbañañe o lili' IEHOVÀ Andrianañahare' areoo naho o fañè'e naho fepè'e linili'e ama'oo. ¹⁸ Ano am-pivazohoá IEHOVÀ ty hatò naho ty hasoa, hiraoraoa'o naho himoaha'o naho handova'o i tane soa nifantà' IEHOVÀ aman-droae'oy, ¹⁹ vaho haronje'e aolo'o mb'eo ze fonga rafelahi'o, amy nitsarae' IEHOVÀ.

²⁰ Ie mañontane azo ty ana'o amo andro aña ty hoe, Ino ty foto' o taroñe naho fañè vaho fepetse nililie' IEHOVÀ Andrianañaharen-tika ama' areoo? ²¹ Le ty hoe ty ho saontsie'o amo ana'oo, Niondevo' i Parò e Mitsraime aña tika, fe nampiengà IEHOVÀ boake Mitsraime ao an-dela-pitam-patratse. ²² Nampiboake viloñe am-pitoloñañe ra'elahy naho nampalovilovy amy Mitsraime naho amy Parò vaho amo añ'anjomba'e iabio añatrefam-pihainontika t'IEHOVÀ. ²³ Navota'e boak'ao tika hampihovae'e atoy, hanolora'e antika i tane nampitamae'e am-panta te hatolo'e androaen-tikañey. ²⁴ Ie amy zay, linili' IEHOVÀ tika ty hañorike o hene fañèo, ty hañeveñe am' IEHOVÀ Andrianañaharen-tika ho fañasoàñe antika nainai'e, hampitambeloma'e antika, le hehe t'ie henaneo. ²⁵ Aa le havañonan-tika t'ie mañambeñe an-kahimbañañe o lili[†] IEHOVÀ Andrianañaharen-tikañeo, amy nandilia'e antikañey.

¹ Ie asese' IEHOVÀ Andrianañahare'o mb'amy tane himoaha'o naho ho tavane'oy, naho asiotsio'e mb' aolo'o mb'eo ty fifeheañe maro: o nte-Kiteo, o nte-Girgaseo, o nte-Amoreo, o nte-Kanâneo, o nte-Perizeo, o nte-Kiveo, vaho o nte-Iebosèo, fifeheañe fito maozatse naho maro te ama'o, ² naho atolo' IEHOVÀ Andrianañahare'o ama'o vaho giohe'o, le tsy mete tsy mongore'o. Ko ifañina'o naho ko itretreza'o. ³ Ko ifangalam-baly, ko anolora'o anak' ampela o ana-dahi'eo ndra andrambesan' anak' ampela i ana-dahi'oy, ⁴ amy te hampiambohoe'e ty ana'o tsy hañorik' ahy hitoroñe ndrahare ila'e. Le hisolebotse ama'o ty haviñera' IEHOVÀ vaho harotsa'e aniany. ⁵ Fe inao ty hanoa'o iareo; demoho o kitreli' iareoo, kimokimoho o hazomanga' iareoo, naho firao o Asere' iareoo vaho ampiforotò an' afo o vongan-draha sinokitseo. ⁶ Ondaty miavake am' IEHOVÀ Andrianañahare'o rehe, ie jinobo' IEHOVÀ Andrianañahare'o amy ze kila ondaty ambone' ty tane toy ho vara'e.

⁷ Tsy t'ie nimaro ta ondaty ila'eo te napite' IEHOVÀ ama' areo ty fikokoñañe ndra ty fijoboña'e, toe nitsiampe te amy ze hene ondaty; ⁸ fa ty fikokoa' IEHOVÀ anahareo naho ty nañambena'e i fañina nifantà'e aman-droae' areoiy, ty nampiengà' IEHOVÀ anahareo an-dela-pitâ'e maozatse vaho nijebaña'e boak'amy trañom-pañondevozañey, hirik' am-pitâ' i Parò mpanjaka' i Mitsraimey. ⁹ Mahafohina arè te toe Andrianañahare t'IEHOVÀ Andrianañahare'o naho Andrianañahare migahiñe mpitam-pañina naho fiferenaiñañe amo mpikoko azeo vaho mañorike o lili'eo pak'an-tarira'e fah'arivo', ¹⁰ fe avaha'e an-dahara' o manjehatse azeo. Tsy malaon-dre fa valea'e an-tarehe'e eo ze malaiñe aze. ¹¹ Aa le ambeno ty lily naho o fañè naho fepetse andiliako azo androanio, vaho oriho.

*Tata t'ie mivohotse
Vol 26.1-13; Its 28.1-14*

¹² Ie amy zao, naho haoñe'o o fañè rezao naho ambena'o naho orihe'o, le havotinti' IEHOVÀ Andrianañahare'o ama'o i fañina naho fikokoñañe nifantà'e aman-droae'oy; ¹³ ho kokoa'e rehe, ho tahie'e vaho hampibodobodoe'e; ho tahie'e ty vokan-kovi'o naho ty vokan-tane'o, ty ampemba'o, ty divai'o naho ty mena'o naho ty fitomboa' o añombe'oo naho ty famorohotan-dia-rai'o amy tane nifañinà'e aman-droae'o hatolo'e azoy. ¹⁴ Ho soa-tahy amy ze kila ondaty rehe, tsy eo ty ho betsiterak' amandahilahy ndra ampela, vaho tsy ho pok'anake o añombe'oo. ¹⁵ Hafaha' IEHOVÀ ama'o ze hene hasilofañañe naho tsy hafetsa'e ama'o o angorosy nifohi'o e Mitsraime añaeo, fe hapo'e amo malaiñ' azoo. ¹⁶ Fonga habotse'o ze ondaty atolo' IEHOVÀ Andrianañahare'o azo, ko iferenaiñam-pihaino'o vaho ko toroñe'o o ndrahare' iareoo fa ho fandrik' ama'o.

¹⁷ Ie manao ty hoe an-troke ao: Maro te amako o rofoko zao, aia ty hanoako soike iareo. ¹⁸ Ko ihembaña'o, tiahio avao ty nanoe' IEHOVÀ Andrianañahare'o amy Parò naho amy Mitsraime iaby, ¹⁹ o fitsohañañe ra'elahy niisam-pihaino'oo, o viloñeо naho o raha tsitantaneo, i lela-pitâñe maozatsey naho i fitâñe natora-kitsi'e nañavota' IEHOVÀ Andrianañahare'o boak'añey, ro mbe hanoe' IEHOVÀ Andrianañahare'o amy ze hene ondaty irevendreveña'o, ²⁰ vaho hampisangitrife' IEHOVÀ Andrianañahare'o am' iareo ty fanenetse, ampara' te fonga miabantiry ze sehang'a'e mietake. ²¹ Ko miriatsdry am' iareo, amy te añivo'o ao t'IEHOVÀ Andrianañahare'o; Andrianañahare jabahinake naho mampañeveñe. ²² Hasiotsio' IEHOVÀ Andrianañahare'o aolo'o mb'eo erike o rofoko rezay; f'ie tsy ho fonga mongore'o aniany tsy mone ho losotse

ama'o o bibin-kivokeo. ²³ Toe hatolo' IEHOVÀ Andrianañahare'o ama'o iereo, vaho ho rotsahe'e am-pandrebahañe ra'elahy am-para' te zamane'e iaby. ²⁴ Hatolo'e am-pit  'o o mpanjaka'eo vaho ho faopaohe'o ambanendikera   atoy ty tahina' iareo, tsy eo t'indaty hahafiatreatre azo, am-para' te narotsa'o. ²⁵ Ho forototoe' areo ze saren-drahare' iareo. Ko tsikirihe'o ty volafoty ndra volamena ama'e ndra mandrambe aze ho azo, fa ho fandrik' ama'o, toe tiva amy IEHOVÀ Andrianañahare'o. ²⁶ Ko minday raha tiva a  'anjomba'o ao ke hindre haf  tse ama'e rehe. Vata'e hejeo naho apoho hoe mampangory, ie fa navike harotsake.

8

Ko mandikoke an'Andrianañahare

¹ Mitomira, hambena' areo ze hene' lily lilieko ama'o androany, soa t'ie ho velo  e naho hibobobodo te hizilik' ao naho handova i tane nampitama' IEHOVÀ aman-droae' areo am-pantay.

² Tiahio o l  la  e iaby niaoloa' IEHOVÀ Andrianañahare'o azo amy tao  e efa-polo an-dratraratra a  e reio, ie nampireke naho nitsok' azo haharendreke ze a  ' arofo'o ao, he hambena'o o lili'eo ke tsie. ³ Toe nampireha'e, le nampisalikoa'e, vaho nanjotsoa'e mane tsy nifohi'o naho tsy nifohin-droae'o, hampahafohina'e te tsy mahakama avao ty mahavelo  ' ondaty; fa ze tsara miboak' am-palie' IEHOVÀ ro mahavelo  ' ondaty*. ⁴ Tsy nikoneatse ama'o ty saro'o vaho tsy nivonto ty fandia'o i efa-polo tao  e rezay. ⁵ Mahafohina a  ' arofo te manahake ty fandilovandrae ty ana'e ty andilova' IEHOVÀ Andrianañahare'o azo. ⁶ Aa le ambeno o lili' IEHOVÀ Andrianañahare'oo am-pa  aveloa  e an-dala'e eo vaho am-pa  neve  a  e ama'e.

⁷ Amy te manese azo mb'an-tane soa ao t'IEHOVÀ Andrianañahare'o, tane ikararahan-toraha  e naho rano migoangoa  e le rano mionjo  e boak' am-bavatane naho am-bohibohitse, ⁸ tanem-bare-bol  e naho vare hordea, amam-bahe naho sakoa  e vaho [†]raketa, tane aman-katae olive naho tantele, ⁹ tane hikama'o mahakama fa tsy hiere  e, hiai  a'o a  ole  a  e, tane amam-bato vi  e vaho am-bohi'e ao ty hihalia'o torisike.

¹⁰ Ie fa nikama naho a  ja  e le andria  o t'IEHOVÀ Andrianañahare'o ty amy tane fanj  ka natolo'e azoy. ¹¹ Mitomira tsy handikok' am' IEHOVÀ Andrianañahare'o, tsy ha  orike o lili'eo naho o fa  'eo vaho o fep  e lilieko ama'o androanio. ¹² Kera, ie fa nikama vaho a  ja  e, naho fa nandranjy anjomba soa, naho imone  a'o, ¹³ naho mihamaro o a  nombe'oo naho o lia-rai'oo, naho mitombo ty volafoty naho volamena'o, naho miraorao ze he'e ama'o, ¹⁴ le hirengevoke ty arofo'o vaho handikofa'o t'IEHOVÀ Andrianañahare'o na  avotse azo an-tane Mitsraime an-tra  nom-pa  ondevoza  e ao, ¹⁵ i niaolo azo hiranga i fatram-bey henehene naharevendreve  ey; i ratraratra maike lifotse merem-boreke naho kalengo a  ey, le nampidoandoa  e rano boak' am-bato-paike ao, ¹⁶ naho nanjotsoa'e mane tsy nahazatse an-droae'o am-patra  e ao, hampireke vaho hamente azo, ha  aso  e am-pigadoa  e a  e, ¹⁷ ke hitsakore a  ' arofo'o ao rehe ty hoe, Ty haozarako naho ty hafatraran-ta  ako ty nanontonako o varako zao. ¹⁸ Tiahio t'IEHOVÀ Andrianañahare'o, amy t'ie ty mampaozatse azo hahavoria'o vara, hamentea'e i fa  nina nifant  e aman-droae'oy le mbe ie henanekeo.

* **8:3** Mat 4:4, Lke 4:4 † **8:8** toe ampongabeinda  itse

¹⁹ Aa ke ho haliño'o t'IEHOVÀ Andrianañahare'o hañoriha'o ty ndrahare ila'e hitoroña'o naho hiambanea'o, fa ataliliko anahareo androany t'ie tsy mete tsy hivetrake ²⁰ naho hihomake manahake o rofoko rotsahe' IEHOVÀ aolo' areo mb'eo amy te tsy hinao' areo ty fiarañanaña' IEHOVÀ Andrianañahare' areo.

9

*Ty Valem-Piolañe aman' Añahare
Avo 32.1-35*

¹ Mijanjiña ry Israele! Fa hitsake Iardeney rehe te anito himoaha'o, ho tavane'o ty rofoko bey naho maozatse te ama'o, rova jabajaba, aman-kijoly miningongo mb' andikerañe ey; ² ondaty f atratse naho mioalajoala o anan-te-Anakeo, toe fohi'o, vaho jinanji'o ty ama'e ty hoe, Ia ty mahafijohañe aolo' o nte-Anakeo? ³ Aa le mahafohina anito te hiaolo azo hitsake mb'eo manahake ty afo mamorototo t'IEHOVÀ Andrianañahare'o; ho rotsahe'e iereo vaho hampiambanè'e aolo'o eo, handroaha'o naho ho zamane'o aniany, amy nitsarae' IEHOVÀ ama'oy.

⁴ Ie hasiotsio' IEHOVÀ Andrianañahare'o aolo'o eo, le ko manao añ' arofo'o ao ty hoe, Ty havantañako ty nanesea' IEHOVÀ ahy himoneñako an-tane atoy, te mone ty halò-tsere' o fifeheañe ty nandroaha' IEHOVÀ iareo aolo'o mb'eo. ⁵ Tsy ty havañona'o ndra ty havantañan' arofo'o ty hionjona'o hitavañe ty tane' iareo, te mone ty haratia' o fifelehañe retiañe ty aniora' IEHOVÀ Andrianañahare'o iareo aolo'o eo hañenefa' IEHOVÀ i nitsara'e am-panta aman-droae'oy, amy Avrahame, Ietsàke vaho Iakobe. ⁶ Mahafohina te tsy ty hamarentane'o ty anolora' IEHOVÀ Andrianañahare'o ama'o ty tane fiaintane toy hitavana'o, ihe foko gan-katoke.

⁷ Tiahio, le ko haliño ty nampiviñera'o IEHOVÀ Andrianañahare'o am-patrambey aña; toe niola am' IEHOVÀ nahareo mifototse amy andro niavota'o an-tane Mitsraimey am-para' te nipok'atoy. ⁸ Mbore nampiviñere' areo e Korebe aña t'IEHOVÀ, le akore ty haviñera' IEHOVÀ ama' areo kanao ho zinama'e. ⁹ Zaho niañambone' i vohitsey handrambe i ravem-bato rey, i ravem-batom-pañina nanoe' IEHOVÀ ho anahareoy, ie nitambatse am-bohitse eyefa-poloo andro naho efa-poloo haleñe, tsy nihinan-kane tsy ninon-drano. ¹⁰ Le natolo' IEHOVÀ ahy i ravem-bato roe sinokin-drambom-pitàn' Añahare rey; ama'e eo ze hene tsara nitsarae' IEHOVÀ ama' areo boak' añ' afo ao amy vohitsey añ' andro' i valobohòkey. ¹¹ Ie nimodo i efapolo andro naho efa-poloo haleñe rey le natolo' IEHOVÀ ahiko i ravem-bato roe rey, i ravem-pañina rey. ¹² Le hoe t'IEHOVÀ amako, Miongaha, naho mizotsoa mb'eo masika amy te nameta vatañe ondaty nente'o boake Mitsraimeo, nitsile aniany amy lalañe linilikoo am'iareo horiheñey, nampitranake sarendraha.

¹³ Mbore nitsara amako t'IEHOVÀ, ami'ty hoe, Fa nitreako ondaty retiañe, toe gan-katoke ondatio. ¹⁴ Apoho habaibaiko iareo le ho fòrako ambanendikerañe ao ty tahina' iareo vaho hanoeko foko maozatse rehe, ho jabajaba te am' iereo.

¹⁵ Aa le nitolike raho nizotso amy vohitsey ie nisolebotse iaby i vohitsey; an-tañako roe i ravem-pañina roe rey. ¹⁶ Le nitreako t'ie vata'e nanao hakeo am' IEHOVÀ Andrianañahare' areo amy nampitranaha' areo sare baniay; nalisa nandifik' amy lalañe nandilia' IEHOVÀ. ¹⁷ Nivontitreko amy zao i rave'e roe rey le naretsako boak' an-tañako roe vaho nivolentsañe añatrefam-pihaino' areo.

¹⁸ Nibabok' añatrefa' IEHOVÀ amy zao raho, manahake i teoy, efapolo andro naho efa-polo haleñe, tsy nihinan-kane tsy ninon-drano ty amo hakeo nanoe' areo iabio naho nanao haratiañe añatrefa' IEHOVÀ hampiviñetse aze. ¹⁹ Fa nihemban-draho ami'ty filoroloron-kaviñera' IEHOVÀ ama' areo hera harotsa'e, fe nañaoñ' ahy henane zay ka t'IEHOVÀ. ²⁰ Akore ty haviñera' IEHOVÀ amy Aharone kanao ho nañohofa'e loza, fe nihalaliako ka henane zay. ²¹ Rinambeko amy zao ty tahi' areo, i bania maleotse natrana' areoy, le finorototoko añ'afó ao naho dinemodemoko naho linisako ho bo'e, eka ndra pilipito'e ampara' te ni-deboke vaho nahifiko amy torahañe mikararake boak' am-bohitsey i lembo'ey.

²² Mbore nampiviñere' areo t'IEHOVÀ e Taberà naho e Masà, naho e Kibrote-hatavà aña. ²³ Le ie nirahe' IEHOVÀ mb'e Kadese-barnea mb'eo ami'ty hoe, Mionjona, tavano i tane natoloko anahareoy, le niola amy nandilia' IEHOVÀ Andrianañahare' areoy, tsy niantoke vaho tsy nijanjiñe i fiarañanaña'ey. ²⁴ Toe fa zineha' areo t'IEHOVÀ amo hene andro nahafohinako anahareoo.

²⁵ Aa le handro am-pohatse ty nibabohako añatrefa' IEHOVÀ, efa-polo andro naho efa-polo haleñe ty nibabohako ty amy tsinara' IEHOVÀ t'ie hanjamañe anahareo, ²⁶ aa le nihalaly am' IEHOVÀ raho nanao ty hoe, Ry Talè IEHOVÀ, ko ampikoromahe'o ondati'oo—o lova'oo, o nijebañe'o ami'ty hajabahina'o, ie nampiengà'o i Mitsraime am-pitâne maozatseo. ²⁷ Tiahio i mpitoro'o rey, i Avrahame, Ietsàke, naho Iakobe, le ko haoñe'o ty fanjehara' ondatio, ty halò-tsere' iareo naho o hakeo' iareoo, ²⁸ tsy mone hanao ty hoe i tane' nampiengà'o anaiy: Kanao tsy nahafanese iareo mb'an-tane nampitamae'e aña t'IEHOVÀ, mbore ami'ty fihejea'e, le nasese'e am-patrambey ao hikoromake; ²⁹ f'ie ondati'o naho lova'o, o nampiengà'o an-kaozara'o ra'elahy vaho am-pitâ'o natora-kitsio.

10

Ty Ravem-bato Roe faha Roe Avo 34.1-9

¹ Hoe t'IEHOVÀ amako henane zay: Amatsiho vato roe manahake i teo rey, le miañambonea mb'amako mb'am-bohitse atoy, vaho andranjio vata hatae. ² Ho sokireko amy ravem-bato rey i tsara tan-drive'e roe rey, i dinemo'o rey, le agodoño amy vatay ao. ³ Aa le nitsenèko vata ami'ty mendoraveñe naho namatsihako vato roe hambañe amy teo rey, vaho niañambone' i vohitsey raho nañotrotro i vato roe rey an-tañako. ⁴ Le sinoki'e amy vato rey hambañe amy tsara sinokitse taoloy, i tsara folo nitseize' IEHOVÀ ama' areo boak' añ'afó ao amy andro' i favoriy rey; vaho natolo' IEHOVÀ ahiko. ⁵ Aa le nitolike raho nizotso amy vohitsey, vaho najoko amy vata rinanjikoy i rave'e rey; ao iereo henaneo, amy nandilia' IEHOVÀ amakoy.

⁶ (Nañavelo hirik'e Birote-bene-iaakane pak'e Moserà o ana'Israeleo, le eo ty nihomaha' i Aharone, vaho ao ty nandentehañe aze; nandimbe aze ho mpisoroñe t'i Elazare ana'e. ⁷ Boak' ao nañavelo mb'e Godgodà mb'eo iereo, le hirik'e Godgoda mb'e Iotbatà, tane fikararahan-torahañe.)

⁸ Tamy andro zay le navahé' IEHOVÀ ty fifokoa' i Levy ho mpitarazo i vatam-pañina' IEHOVÀ naho hijohañe añatrefa' IEHOVÀ hitoroñe aze vaho hitata ami'ty tahina'e ampara' henane. ⁹ Aa le tsy aman' anjara ndra lova amo rolongo'eo t'i Levy; IEHOVÀ ro lova'e amy nitsara' IEHOVÀ Andrianañahare'o ama'ey.

¹⁰ Nitambatse am-bohitse ao efa-polo andro naho efa-polo halen-draho, manahake tam-baloha'ey. Le mbe nijanjiñe ahy amy andro zay ka t'IEHOVÀ, le tsy nisatrie' IEHOVÀ ty hanjamañe azo. ¹¹ Hoe t'IEHOVÀ amako: Miongaha, akia, mionjona aolo' ondatio mb'eo, himoaha' iareo ao, hitavañe i tane natoloko an-droae' iareo am-pantay.

Ty Figadoña' o Lilio

¹² Ie amy zao ry Israele, inom-bao ty ipaia' IEHOVÀ Andrianañahare'o? Naho tsy ty hañeveñe am' IEHOVÀ Andrianañahare'o, ty hañavelo amo lala'e iabio, ty hikoko aze naho ty hitoroñe IEHOVÀ Andrianañahare'o an-kaampon' arofo naho an-kaliforam-pañòva, ¹³ ty hiambena'o o lili' IEHOVÀ naho o fañè'e lilieko anito hahasoa azoo. ¹⁴ Ingo a' IEHOVÀ Andrianañahare'o i likerañey naho o andindin-dikerañeo, naho ty tane toy reketse ze he'e ama'e, ¹⁵ fe nahafale IEHOVÀ o roae'oo, nikokoa'e naho jinobo'e o tarira' iareo nifandimbeo: inahareo 'nio, ambone' ze kila ondaty*; le ie henaneo. ¹⁶ Savaro arè ty ofon' arofo' areo†, le ko manjehatse ka. ¹⁷ Amy te Andrianañaharen-drahare naho Talèntalè t'IEHOVÀ Andrianañahare' areo; Andrianañahare jabahinake naho maozatse naho mampañeveñe; tsy mpirihy, tsy mandrambe vokàñe; ¹⁸ omea'e to ty bode-rae naho ty vantotse, kokoa'e ty renetane, anjotsoa'e mahakama vaho tolora'e sikiñe. ¹⁹ Aa le kokò o ambahinio, amy t'ie nirenetane an-tane Mitsraime ao ka.

²⁰ Mañeveña am'IEHOVÀ Andrianañahare'o, ie avao ty italahoa'o naho ie ty vontitire'o vaho amy tahina'ey ty anoa'o fanta. ²¹ Ie ty fandrengea'o, ie t'i Andrianañahare'o nahafonitse o raha fiaintane naho halatsàñe nanoe'e am-pahaisaham-pihaino'oo. ²² Ondaty fitom-polo o roae'o nizotso mb'e Mitsraime mb'eo, le hehe t'ie nampamorohote' IEHOVÀ Andrianañahare'o hoe o vasian-dikerañeo.

11

Tambem-Pivohorañe

¹ Aa le kokò t'IEHOVÀ Andrianañahare'o naho tomiro nainai'e o nampiambena'eo*, o fañè'eo, o fepè'eo, vaho o lili'eo. ² Le mahafohina anito te tsy o ana' areoo ty ivolañako, ie mbe tsy maharendreke naho tsy nahatre a ty fanampiha' IEHOVÀ Andrianañahare' areo, naho ty hajabahina'e naho ty fità'e maozatse vaho i sira'e natora-kitsiy, ³ o vilo'eo naho ze hene fitoloñañe nanoe'e e Mitsraime ao amy Parò mpanjaka' i Mitsraime naho amo tane'eo; ⁴ ty nanoe'e o lahindefo' i Mitsraimeo naho o soavala reketse sarete'eo, te najorobo'e an-drano' i Ria-Binday o lahara' iareoo, ie nañoridañe anahareo, toly ndra nandrotsaha' IEHOVÀ pake henane; ⁵ naho o nanoe'e ama' areo ampatrambey ao ampara' ty nivotraha' areo atoio; ⁶ le ty nanoe'e i Datane naho i Abirame, ana'i Eliabe ana'i Reòbene, ie nanokake ty vava'e i taney, nampibotseke iareo rekets' o keleia'eo naho o kiboho'eo vaho ze fonga raha veloñe nañorike iareo, añivo' Israele iaby ao; ⁷ o fihaino' areoo ro nahaisake ze hene fitoloñañe fanjàka nanoe' IEHOVÀ.

⁸ Ambeno arè ze hene lily lilieko androany, soa t'ie ho aman' ozatse hahafionjoñe hitsake mb'an-tane ho tavane' areo mb'eo, ⁹ vaho t'ie ho lava havelo amy tane nifantà' IEHOVÀ aman-droae' areo hatolo'e iareo naho o tarira'ey, tane orikorihen-dronono naho tantele.

* ^{10:15} Its 7:6, 14:2, 26:8, Sab 135:4 † ^{10:16} Its 30:6-8, Rom 2:26-29, 1Ko 7:19 * ^{11:1} Fot 26:5

¹⁰ Tsy hambañe an-tane Mitsraime niavota' areo i tane hiziliha' areo ho tavaneñey, i nitongisa' areo tabiry naho nanondraha' areo rano am-pandia hoe fanondrahan-golobon' añañey, ¹¹ te mone tane amankivohibohitse naho vavatane tondrahen-orañe boak' andikerañe i tane hitsaha' areo ho tavaneñey, ¹² tane ambena' IEHOVÀ Andrianañahare'o. Toe ama'e nainai'e boa-taom-pak' am-paran-taoñe o fhaino' IEHOVÀ Andrianañahare'oo.

¹³ Aa naho hambena' areo ze hene lily lilieko anahareo androany—ty hikoko IEHOVÀ Andrianañahare' areo, hitoroñe aze an-kàampon' arofo naho an-kaliforam-paño—a—¹⁴ le hoe ty tsara'e: Hampahaviako orañe ants'a'e ty tane' areo, i orañ' aloy naho i oram-para-ranoy, hahatontoña'o ty mahakama'o naho ty divai'o naho ty mena'o; ¹⁵ le hampitiriako ahets'e o fiandraza'oo ho a o hare'oo, le hikama rehe vaho ho anjañe. ¹⁶ Aa le mitomira tsy ho fañahieñe añañarofo, hitsile, hitoron-drahare tovo'e naho hiambaneñañe, ¹⁷ toly ndra hisolebotse ama' areo ty haviñera' IEHOVÀ vaho hagabe'e o likerañe tsy hizotsoa' i orañey, tsy hahavokara' i taney mahakama; le hikoromak' aniany nahareo amy tane soa natolo' IEHOVÀ anahareoy.

¹⁸ Aa le ahajao añañarofo' areo ao naho am-paño—a areo ao o taroko zao† le rohizo am-pità' areo ho viloñe, le reketo hoe alama añañovom-pihaino' areo. ¹⁹ Anaro amo amori' areoo, le isaontsio naho miambesatse añañomba'o ao naho midraidraitse an-dalañe ey naho mandre vaho mitroatse. ²⁰ Isokiro an-tokonan-dalañ' anjomba'o eo naho amo lalam-bei'oo, ²¹ soa te hitombo ty andro' areo naho ty andro' o ana' areoo amy tane nifantà' IEHOVÀ aman-droae' areo hatolo'e iareoy, ho mira amo andron-dikerañe ambone' ty tane toy eñe.

²² Ie ambena' areo an-kahimbañañe naho orihe' areo ze hene lily lilieko anahareo, ty hikokoa' areo IEHOVÀ Andrianañahare' areo naho hañavelo amo lala'e iabio vaho hitambozòtse ama'e, ²³ le hanoe' IEHOVÀ soik' aolo' areo mb'eo o fifeheañe iabio vaho ho tavane' areo o foko jabajaba naho maozatse te ama' areoo. ²⁴ Le ho anahareo ze hene tane liàm-pandia' areo; mifototse am-patrambey añañeho e Libanone‡ naho boak' amy oñey; le i oñeho Peràtey pak'an-dRiak' ahandrefañe añañeho ty ho efe-tane' areo. ²⁵ Tsy eo t'indaty hahafiatreatre ama' areo amy te hampihembañañe naho hampirevendreveñañe' IEHOVÀ Andrianañahare' areo ama' areo ze hene tane ho liàm-pandia' areo, amy nitsara'e ama' areoy.

²⁶ Ingo apoko añañatrefa' areo androany ty tata naho ty fatse: ²⁷ i tatay, naho haoñe' areo o lili' IEHOVÀ Andrianañahare' areo lilieko androanio; ²⁸ i fatsey, naho tsy haoñe' areo o lili' IEHOVÀ Andrianañahare' areoo, te mone mitsile hienga o lalañe andiliako androanio, hañoriha' areo o ndrahare ilae tsy nifohi' areoo.

²⁹ Aa ie fa nasese' IEHOVÀ Andrianañahare'o mb'an-tane imoaha'o ho rambese'o ao, le havotra'o amy Vohin-Geriziy ty tata naho amy vohi-Ebàley ty fatse. ³⁰ Aa tsy alafe' Iardeney añañeho irezay, amy fitsofora' i àndroy añañey, an-tane' o nte-Kanàne mimoneñañe an-diolio§ tandrife i Gilgale añañeho ilae tsy nifohi' areoo?

³¹ Fa hitsake Iardeney mb'eo nahareo hitavañañe i tane atolo' IEHOVÀ Andrianañahare' areoy, aa ie tavane' areo le himoneña' areo, ³² le hene ambeno naho oriho o fañè naho fepètse amantohako anahareo androanio.

† 11:18 Its 5:22 ‡ 11:24 Libanone: rame fony § 11:30 Heb: Arabà

12

Harotsake o Hazomanga Tsy ieo

¹ Inao o fañè naho fepètse tsy mahay tsy hambena'areo soa an-tane atolo' IEHOVÀ Andrianañaharen-droae'o azo ho lova'o amy ze hene andro hiveloma' areo an-tane atoy.

² Fonga ho rotsahe' areo ze toe-pitoroña' o rofoko ho tavane' areoo, ze ndrahare' iareo andengo' o vohitse aboo, naho ankaboa' o vohibohitseo vaho añ'alo' ze hene hatae leñe. ³ Ho fongore' areo o kitreli'eo le ho pozahé' areo o hazomanga'eo, le ho forototoe' areo an' afo o Aserimeo, le ho hatsafe' areo o saresaren-drahare'eo vaho ho faohe' areo amy toetsey ty añara' iareo.

⁴ F'ie tsy hanoe' areo am' IEHOVÀ Andrianañahare' areo, ⁵ fa amy ze toetse ho joboñe' IEHOVÀ Andrianañahare' areo amo fifokoa' areo iabio, hampipoha'e ty tahina'e ho akiba'e, le zay ty hipai'a' areo aze, vaho eo ty hiheova'o. ⁶ Eo ty hindesa' areo o hisoroña' areoo, naho o banabanà' areoo, naho o engam-paha-folo' areoo, naho o engaem-pitá' areoo, naho o nifantà' areoo naho o enga satrin' arofo' areoo vaho ty valohan' ana' o añombe' areoo naho o lia-rai' areoo. ⁷ Eo ka ty hikamà' areo naho o keleia' areoo, añatrefa' IEHOVÀ Andrianañahare' areo, le hirebek' amo hene tolom-pitá' areo nitahia' IEHOVÀ Andrianañahare'o azoo.

⁸ Tsy hanoe' areo ka o satan-tika henaneo, t'ie songa manao ze to am-pihaino'e avao, ⁹ amy te mboe tsy niheova' areo i fitofàñe naho lova atolo' IEHOVÀ Andrianañahare' areo azoy. ¹⁰ Ie itsaha' areo Iardene himoneñe amy tane atolo' IEHOVÀ Andrianañahare' areo anahareo ho lovay, le ie ampitofà'e amo rafelahy miarisheho iabio vaho imoneña'areo am-panintsiñañe; ¹¹ le eo ty toetse ho joboñe' IEHOVÀ Andrianañahare' areo hampimoneña'e ty tahina'e, eo ty hanesea' areo ze handiliako anahareo; le o hisoroñañaeo, naho o banabana' areoo naho o faha-folombara' areoo naho o engaem-pitá' areoo, naho ze hene engam-panta nifantà' areo am' IEHOVÀ. ¹² Le hirebeke añatrefa' IEHOVÀ Andrianañahare' areo nahareo, ie naho o anadahi' areoo naho o anak' ampela' areoo naho ondevo lahy naho ampela' areoo naho i nte-Levy am-po-kijoli' areoy, ie tsy aman' anjara ndra lova ama' areo.

¹³ Mitomira tsy hañenga soroñe amy ze toetse isa'o aña, ¹⁴ te mone amy toetse ho joboñe' IEHOVÀ amo fifokoa'oo, ao ty hañenga'o o fisoroña'oo, le eo ty hanoa'o ze hene lileko.

¹⁵ Ie amy zay mahazo mandenta naho mikama ze biby amy ze hene lalam-bei'o ao rehe, ze paia' ty tro'o amo fitahiañe natolo' IEHOVÀ Andrianañahare'o azoo, ie sambe ho kamae' ty malio naho ty tsy malio, manahake t'ie tsebý ndra aiale*. ¹⁶ Fe tsy ho kamae'o ty lio'e; fa hadoa'o an-tane hoe rano.

¹⁷ Tsy ho kamae'o an-dalam-bei'o eo ka ze fahafolo' ty ampemba'o ndra ty divai'o ndra ty mena'o ndra ty valohan' ana' ty mpirai-tro'o ndra ty mpirai-lia'o, ndra ze engam-panta nifantà'o, ndra ze enga satrin' arofo'o, ndra ze engaem-pitá'o. ¹⁸ F'ie ho kamae'o añatrefa' IEHOVÀ Andrianañahare'o amy toetse ho joboñe' IEHOVÀ Andrianañahare'oy, ihe naho ty ana-dahy naho anak' ampela'o naho ty ondevo-lahy naho ampela'o naho i nte-Levy an-tanà'oy; vaho hirebek' añatrefa' IEHOVÀ Andrianañahare'o rehe amy ze hene tolom-pitá'o. ¹⁹ Mitomira tsy haforintse'o i nte-Leviy, te ihe mbe veloñe an-tane atoy.

* **12:15** Biby ly songa aman-tsifa

²⁰ Aa ie ampigadagadañe' IEHOVÀ Andrianañahare'o ty tane'o amy nitsarà'e ama'oy, le hanao ty hoe rehe: Hihinan-kena raho, aa kanao hasijim-bata'o, le mete mikama hena rehe, ze hadrao'o iaby. ²¹ Aa ie lavitse azo i toetse jinobo' IEHOVÀ Andrianañahare'o hampipoha'e i tahina'eiy, le handenta amo mpirai-tro'oo rehe naho amo mpirai-lia'o natolo' IEHOVÀ azoo amy nandiliako azoy, le hikama an-tanà'o ao ze satrie' ty tro'o, ²² manahake ty fikamañe o tsebý naho o aiàleo ty hikama'o aze; le songa mete ikama' ty malio naho ty tsy malio.

²³ Fe mifoneña tsy hikama ty lio'e: fa amy lio'ey ty havelo'e, le tsy hatrao'o fikama ami'ty hena i haveloñey. ²⁴ Tsy ho kamae'o zay fa hadoa'o an-tane eo hoe rano. ²⁵ Tsy hikama'o, soa te ho tahie'e rehe naho o ana'o manonjohy azoo ie manao ty fahiti'e am-pivazoho'a' IEHOVÀ.

²⁶ Fe o raha ama'o mete ho navì'oo naho ze nifantà'o ro hendese'o mb'amy toetse ho joboñe' IEHOVÀ mb'eo. ²⁷ Le hengae'o i hisoroña'oy, ty hena'e naho ty lio'e, amy kitreli' IEHOVÀ Andrianañahare'oy, le hadoa'o amy kitreli' IEHOVÀ Andrianañahare'oy ty lion' enga'o vaho ho kamae'o ty hena'e.

²⁸ Ambeno naho janjiño o tsara iaby lilieko azoo, soa t'ie hiraorao naho o ana'o handimbe azo kitro añ'afe'eo; ano ty soa naho ty hiti'e am-pivazoho'a' IEHOVÀ Andrianañahare'o.

²⁹ Aa ie aitoa' IEHOVÀ Andrianañahare'o aolo'o o fifeheañe handenà'o ho tavane'oo naho limbeza'o vaho fa mimoneñ' an-tane' iareo ao, ³⁰ le mitaoa tsy ho tra-pandrike ami'ty fitsikombea'o iareo, ie mongoreñe aolo'o eo, le ko añontanea'o o ndrahare' iareoo ami'ty hoe, Aa vaho akore ty fitoroña' ondaty retìa o ndrahare' iareoo? hanoeko ka†. ³¹ Ko manao zay am' IEHOVÀ Andrianañahare'o, amy te ze atao hativàñe am' IEHOVÀ, o raha vata'e heje'eo le fonga nanoe' iereo amo ndrahare' iareoo mbore sinodo' iareo añ'afó ao amo ndrahare'eo o ana-dahi'eo naho o anak'ampela'eo.

13

¹ Aa le ambeno naho oriho ze hene andiliako anahareo: ko anovoña'o vaho ko añafaha'o*.

Fampitsileañe mb'amy Fahasivey

² Aa naho mióngak' ama'o ao ty mpitoky ndra ty mpañinofynofy mitalily viloñe ndra raha tsitantane, ³ naho heneke i viloñey ndra i raha tsitantane natalili'ey vaho manao ty hoe re: Antao hañorike 'ndrahare ila'e (ze tsy nifohi' areo) naho hitoroñe iareo ⁴ Le ko iantofa'o i mpitokiy ndra i mpañinofiy, amy t'ie fitsoha' IEHOVÀ Andrianañahare' areo, haharofoana'e he toe kokoa' areo an-kaampon' arofo naho an-kaliforam-pañova t'IEHOVÀ Andrianañahare' areo. ⁵ IEHOVÀ Andrianañahare' areo ty horihe' areo, ie avao ty hañeveña' areo le o lili'eo ty hambena' areo, naho i fiarañanaña'ey ro haoñeñe, ie ty toroñe' areo vaho ie ty vontitire' areo. ⁶ Aa le havetrake i mpitokiy ndra i mpañinofynofy, ie nivolam-piolàñe am' IEHOVÀ Andrianañahare' areo nañavotse anahareo an-tane Mitsraime aña naho nijebañe anahareo amy trañom-pañondevozañey, handronjea'e azo hisitak' amy lala' linili' IEHOVÀ Andrianañahare'o hañaveloa'oy. Aa le mongoro o sata raty ama'oo.

⁷ Aa naho mitangogo hanigìke azo ty rahalahi'o, ke ty anan-drene'o, he ty ana-dahi'o, ke ty anak' ampela'o, he i valy fetrehe'oy, ke i atehena'o longo-sarotsey, manao ama'o ty hoe, Antao hitoron-drahare ila'e (ze mbe

† **12:30** Its 18:9, Sor 18:3, Iir 10:2, Iek 20:32, Efe 4:17, Pe I 4:3 * **13:1** Its 4:2, Rzs 30:6, Ben 22:18-19

lia'e tsy niisa'o ndra o roae'oo, ⁸ te mone ndrahare' ondaty mañohok' azoo, marine azo, ke lavitse azo, aña'olo' ty tane toy pak'añ'il'a'e aña,) ⁹ le ko miantok' aze ndra mañaoñe aze, ko tretrezem-pihaino'o, ko arova'o vaho ko mañetak' aze, ¹⁰ f'ie tsy mete tsy vonoe'o le ty fità'o ro hionjoñe hamofok' aze valoha'e ho rotsaheñe vaho ho tonjohiza' ty fità' ondaty iabio. ¹¹ Retsaho vato hivetraha'e amy t'ie nipay hanintak' azo am' IEHOVÀ Andrianañahare'o nañavotse azo an-tane Mitsraime aña naho an-trañom-pañondevozañe ao, ¹² le ho janjiñe' o ana' Israele iabio vaho ho hembañe tsy hanao i haloloañe zay ka añaivo'o ao.

¹³ Aa naho janji'o ty ami'ty rova raike natolo' IEHOVÀ Andrianañahare'o himoneña'o ty hoe, ¹⁴ Niakatse boak' ama' areo ao ze o ana' i Beliale zao nitaoñe ty mpimone' i rova' iareoy, ami'ty hoe: Antao hitoroñe ndrahare il'a'e, ze tsy nifohi' areo. ¹⁵ Le hotsohotsò, naho tsikaraho, vaho audio. Aa naho rekets' i sisiý te toe nanoeñe ama'o ao i hativañe zay, ¹⁶ le toe ho zevoñe'o an-dela-pibara o mpimone' i rovaio, hamongorañe aze andela-pibara, naho ze he'e ama'e ao naho o hare iabio. ¹⁷ Le hatonto'o an-kiririsam-pivory ao o nikopahe'o iabio; le orò aña'fo i rovay naho o fonga kinopakeo, ie iaby, ho am' IEHOVÀ Andrianañahare'o, ie ho votre kòake kitro katroke; tsy haoreñe ka. ¹⁸ Asoao tsy hipiteham-pità'o o raha navike ho rotsaheñe, soa te hitolik' amy fifombo'e miforoforoy t'IEHOVÀ, hitretreza'e, naho hiferenaiña'e vaho hamorohota'e manahake i nitsarae'e aman-droae'oy, ¹⁹ naho toe tsendreñe'o ty fiarañanaña' IEHOVÀ Andrianañahare'o, hambena'o o lili'e lilieko azo androanio, hanoe'o ty hiti'e am-pihaino' IEHOVÀ Andrianañahare'o.

14

Nifaliañe o Satan-Kilakila'ondate

¹ Ie fa ana' IEHOVÀ Andrianañahare' areo, ko mandriadria-tsandriñe ndra mampipeake ty ambonem-pihaino' areo ty amo vilasio. ² Amy t'ie ondaty-miavake am' IEHOVÀ Andrianañahare'o, naho jinobo' IEHOVÀ h'ondaty an-koroji'e ao boak' amy ze foko ambone' ty tane toy.

Mahakama Malio naho Faly

Sab 11.1-47

³ Ko kamae' areo ty raha tiva. ⁴ Inao o biby mete kamae' areoo: ty añaombe, ty añaondry, naho ty ose, ⁵ ty aiale, tsebý, iakemore, ose-lý, disone, osem-bohitse vaho añaondrim-bohitse. ⁶ Ze biby mivaki-hotro, ie misarakotro roe amo biby mivazakotao, ie ty ho kamae' areo. ⁷ Fe tsy ho kamae' areo ze mpihota haneñe avao, ke vaki-hotroo avao manahake ty rameva, ty bitro naho ty trandrake, fa ndra t'ie mihota haneñe zay, tsy vaki-hotro, aa le faly ama' areo izay. ⁸ le ty lambo, ndra t'ie vaki-hotro, tsy mihota haneñe, le faly ama' areo. Tsy ho hane' areo ty hena'e le tsy ho tsapaeñe ty fate'e.

⁹ Le inao ty mete kamaeñe amy ze hene raha veloñe an-drano ao: ze rekets' ela'e naho sisi'e, mete kamae' areo, ¹⁰ fe tsy ho kamae' areo ze tsy aman'ela'e ndra sisi'e, maleotse ama' areo zay.

¹¹ Mete kamae' areo ze hene voroñe malio. ¹² Fa tsy ho kamae' areo ka iretoy: ty tratràke, ty beivorotse naho ty salale; ¹³ ty hitikitike, ty vantio naho ty fañaoke ty amo karaza'eo, ¹⁴ le ze hene koàke ty amo karaza'eo; ¹⁵ ty voron-tsatrañe, ty voron-dolo-bori-sofy, ty vorom-potsy naho ze karazan-tsimalaho; ¹⁶ ty voron-dolo kede, ty voron-dolom-pikodrítse naho ty voron-dolo foyt ¹⁷ naho ty voron-dolon-tane maike, ty hondria naho ty

voron-dolom-pipao-piañe; ¹⁸ ty sama naho ze karaza-dangoro, ty kotrohake vaho ty kananavy. ¹⁹ Fonga faly ama' areo ka ze bibi-kede miropake naho mitiliñe, tsy ho kamaeñe zay. ²⁰ Fe mete kamaeñe ty voroñe malio.

²¹ Tsy ho kamae' areo ze nimate boboke; mete atolotse ami'ty renetane mimoneñe an-drova'o ao ho kamae'e, ke haleta'o ami'ty ambahiny. F'ie ondaty-miavake am' IEHOVÀ Andrianañahare'o. Vaho tsy hahandroe'o an-drononon-drene'e ty vik'ose.

Ty Faha-folo

²² Toe handivà'o ty fahafolo' ze hene voka' o tongise'oo, ze vokare' o tete'o boa-taoñeo; ²³ le ho kamae'o añatrefa' IEHOVÀ Andrianañahare'o, amy toetse ho joboñe'e hampipoha'e i tahina'ey ty fahafolo' o mahakama'oo, ty divai'o, ty mena'o vaho ty valohan' ana' o añombe'oo naho o mpirai-lia'oo, hioha'o ty hañeveñe am' IEHOVÀ Andrianañahare'o nainai'e.

²⁴ Aa naho loho lava i liay, tsy hahasese i rahay, naho lavitse azo ty toetse ho joboñe' IEHOVÀ Andrianañahare'o hampipoha'e i tahina'ey, ie fa nitahia' IEHOVÀ Andrianañahare'o ²⁵ le itsaloho drala, le vontitiro am-pitâñe ao i dralay, vaho akia mb'amy toetse ho joboñe' IEHOVÀ Andrianañahare'oy mb'eo; ²⁶ kalò ze tea'o amy dralay: he añombe ke añondry, ke divai-vao ke divai-ela, ze satri' ty tro'o. Le eo ty hikama'o añatrefa' IEHOVÀ Andrianañahare'o, vaho mirebeha, ihe naho o keleia'oo. ²⁷ Ko aforintse'o i nte-Levy mpimoneñe an-drova'oy, ie tsy aman' anjara ndra lova ama'o.

²⁸ Ie modo ty taom-paha-telo, le hene hakare'o amy taoñey ty fahafolo' ty hapeam-boka'o vaho ahajao an-drova'o ao ²⁹ le homb'eo i nte-Leviy, ie tsy aman' anjara ndra lova ama'o, naho i renetane mpimoneñe ama'oy naho i bode-raey vaho i vantotsey, o añaten-dalambei'oo, le hikama ampara' t'ie anjañe, soa te hitahy azo t'IEHOVÀ Andrianañahare'o amy ze hene fitoloñam-pitâ'o.

15

Taom-Pitofâñe

Avo 21.2-11; Sab 25.1-7

¹ Ie amy ze fipeaha' ty taom-paha-fito, le mañahà rehe. ² Intoy ty satam-pañahàñe: havotso' ze kila mpampisongo am'ondate ty nampisongoe'e; tsy ho paiae'e am'indatiy ndra aman-drahalahi'e, amy te kinoike ty fañahà' IEHOVÀ. ³ Aa naho ty renetane, le azo'o ampañavahañe, fe havotsom-pitâ'o ze azo aman-dongo'o; ⁴ ie amy zao, tsy ho ama' areo ao ty rarake; amy te vata'e hampibodobodoe' IEHOVÀ an-tane atolo' IEHOVÀ Andrianañahare'o azo ho tavaneñe ho lova; ⁵ naho toe haoñe'o horiheñe ty fiarañanaña' IEHOVÀ Andrianañahare'o hambena'o hanoeñe ze hene lily lileko azo androany. ⁶ Amy te hitahy azo t'IEHOVÀ Andrianañahare'o, amy nitsarae'e ama'oy, naho hampisongo foko maro rehe fa ihe tsy hisongo, vaho hifehe foko maro rehe f'ie tsy hamelek' azo.

⁷ Aa naho ama'o ao ty longo'o rarake ndra an-tanàñe aia'aia an-tane atolo' IEHOVÀ Andrianañahare'o azo, le ko azì'o ty arofo'o ndra mamore-pitañe amy longo'o rarakey. ⁸ Fe adañadañao ama'e ty fitâ'o le ampisongò aze ze hahaatsake i paia'e tsy ama'ey. ⁹ Asoao tsy ho añ'arofo'o ao ty fikiniàñ-draty manao ty hoe, Fa an-titotse ty taom-pahafito, i taom-pañahàñey; le tsy hihevea'o maso i longo'o rarakey, hitolora'o, vaho ie mitoreo azo am' IEHOVÀ le hakeo ama'o. ¹⁰ Toe ho tolora'o, naho

tsy hiore ty arofo'o amy natolo'o ama'ey amy t'ie ro hampiraoraò' IEHOVÀ Andrianañahare'o azo amy ze hene tolon-draha'o, ze fitoloñam-pità'o iaby. ¹¹ Aa kanao le lia'e tsy himiañe an-tane ao o rarakeo, le hoe ty andiliako azo, Ampidañadañao amy longo'o rarakey naho amy mpitavañ'ay an-tane'oy ty fità'o.

¹² Aa naho aletak' ama'o ty longo'o lahilahy nte-Evre ndra ty ampela nte-Evre vaho mitoroñé azo enen-taon-dre, le avotsoro amy taom-pahafito. ¹³ Le ie haha'o ama'o, ko ado'o hienga azo an-tañam-polo. ¹⁴ Ho fahana'o am-patarihañe boak' amy lia-rai'oy naho boak' an-driha'o ao, vaho boak' am-pipiritan-divai'o ao; amo nitahia' IEHOVÀ Andrianañahare'o azoo ty handiva'o ama'e. ¹⁵ Tiahio t'ie niondevo an-tane Mitsraime aña, vaho nijebañ' azo t'IEHOVÀ Andrianañahare'o; izay ty andiliako ama'o androany.

¹⁶ F'ie manao ty hoe ama'o, Tsy hienga azo raho; amy te ikokoa'e naho i hasavereña'oy vaho mierañerañe ao. ¹⁷ Le andrambeso fitsindrike le trofaho an-dalambei'o eo ty ravembia'e vaho ho fetrek'oro'o nainai'e re, le ano zay ka ty ondevo'o ampela; ¹⁸ vaho tsy hañembets' azo ty hañaha aze ama'o hidada mb'eo amy t'ie nanahake ty mpieke roe ama'o amy nitoroñá'e azo enen-taoñey: le hitahy azo amy ze hene fitoloñá'o t'IEHOVÀ Andrianañahare'o.

Valohan'an-an-Kare

¹⁹ Havahe'o ho am' IEHOVÀ Andrianañahare'o ze hene valohan' anake lahi'e natera' o añombe'oo naho o lia-rai'oo, naho tsy hampitoloñé'o ty valohan' anak' añombe'o, vaho tsy ho kitsihe'o ty valohan' anak' añondri'o. ²⁰ Ho kamae'o añatrefa' IEHOVÀ Andrianañahare'o boa-taoñé zay amy toetse ho joboñe' IEHOVÀ, ihe naho o añ'anjomba'oo.

²¹ Aa ihe aman-kandra, ke mbiko ke goa he aman-kila, le tsy hisoroñé am' IEHOVÀ Andrianañahare'o. ²² Hikama'o an-drova'o ao: songa hitrao-pikama ama'e ty tsy malio naho ty malio, manahake t'ie tsebý ndra aiàle. ²³ Fe tsy ho kamae'o ka ty lio'e fa hadoa'o hoe rano an-tane eo.

16

¹ Ambeno ty volan-kofahofa, vaho ano am' IEHOVÀ Andrianañahare'o i fihelañ' amboney; fa amy volan-kofay ty nañavota' IEHOVÀ Andrianañahare'o azo an-kaleñe. ² Aa le hisoroñá'o am' IEHOVÀ Andrianañahare'o i fihelañ' amboney, boak' amo añombeo ndra amo mpirailiao, amy toetse ho joboñe' IEHOVÀ hampipoha'e i tahina'eiy. ³ Tsy hatrao'o fikama ama'e ty mofo aman-dalivay; fito andro ty hikama'o mofo po-dalivay, toe mofom-pisotriañe, amy t'ie nalisa nienga an-tane Mitsraime aña; soa te ho tiahi'o amo hene andron-kavelo'oo i andro niengà'o i tane Mitsraimeiy. ⁴ Le tsy ho oniñe ndra aia aia am-pifehea'o ao amy fito àndroy ty mofo aman-dalivay vaho tsy hanisàñe am-para-piporea' ty maraindray i hena nisoroñáñe amy hariva' i andro valoha'eiy.

⁵ Tsy hisoroñáñe amy ze rova hatolo' IEHOVÀ Andrianañahare'o azo i fihelañ' amboney; ⁶ fa amy toetse ho joboñe' IEHOVÀ Andrianañahare'o hampipoha'e i tahina'eiy; hisoroñé i fihelañey rehe te hariva àndro miroñé, amy sa niavota'o i Mitsraimey. ⁷ Hatono'o naho ho kamae'o amy toetse ho joboñe' IEHOVÀ Andrianañahare'o eo, ie vaho maraindray, le himpoly an-kivoho'o ao. ⁸ Eneñ' andro ty hikama'o mofo po-dalivay le hanoe'o fivory-miavake am' IEHOVÀ Andrianañahare'o i andro fahafitoy; ko mitoloñé ama'e.

⁹ Hereñandro fito ty hiahe'o ho azo; mifototse amy andro valoham-pañohara'o meso-panatahañe amy varey ty hañiaha'o fito hereñandro. ¹⁰ Le ambeno ho am' IEHOVÀ Andrianañahare'o ty sabadidan-kereñandro le ho banabanaem-pità'o an-tsatin'arofo ama'e ty mañeva i nitahia' IEHOVÀ Andrianañahare'o azoy. ¹¹ Le hirebek' añatrefa' IEHOVÀ Andrianañahare'o, ihe naho ty ana-dahi'o naho ty anak' ampela'o naho ty ondevo-lahi'o naho ty ondevo-ampela'o, naho i nte-Levy an-tanà'oy naho i renetaney naho i bode-raey vaho i vantotse ama' areoy, amy toetse jinobo' IEHOVÀ Andrianañahare'o hampipoha'e i tahina'eiy. ¹² Tiahio t'ie niondevo e Mitsraime aña, vaho mitomira hambenañe i fañè rezay.

¹³ Ie fa natonto'o an-driha ao ty mahakama'o naho ty divai'o le anò fito andro i sabadida-kivohoy. ¹⁴ Le mirebeha amy takataka'oy, ihe naho ty ana-dahi'o naho ty anak' ampela' o naho ty ondevo-lahi'o naho ty ondevo-ampela'o naho i nte-Levy naho i renetaney naho i bode-raey vaho i vantotse an-tanà'oy. ¹⁵ Fito andro ty hanoe'o i sabadidake miavakey am' IEHOVÀ Andrianañahare'o amy toetse ho joboñe' IEHOVÀ ty amy fitahia' IEHOVÀ Andrianañahare'o ty firaorao'a'o naho ze hene fitoloñam-pità'o, vaho handia taroba rehe. ¹⁶ In-telo ami'ty taoñe ty hihovà' ze hene lahilahy mb' añatrefa' IEHOVÀ Andrianañahare'o mb'amy toetse ho joboñe'ey mb'eo; i sabadidak' i mofo tsy aman-dalivaiy, le i takatakan-kereñandroy vaho i sabadida-kivohoy, le tsy atrefeñe an-tañampolo t'IEHOVÀ. ¹⁷ Songa hañenga ze mete ama'e ze lahilahy ty amo fitahiañe natolo' IEHOVÀ Andrianañahare'o azoy.

¹⁸ Hajado'o amy ze rova hatolo' IEHOVÀ Andrianañahare'o azo amy ze hene fifokoañe ty mpizaka naho ty mpifehe, vaho ho zakae' iereo an-jaka vantañe ondatio.

¹⁹ Ko manao zaka vilañe, le ko mirihy ondaty, naho ko mandrambe vokàñe, amy te haripe' ty vokàñe ty fihaino' o mahihitseo vaho ampi-kelohe'e ty saontsi' o vañoñeo. ²⁰ Ty hatò, ty hatò avao ty horihe'o, soa te ho veloñe, handovà'o i tane atolo' IEHOVÀ Andrianañahare'o azoy.

²¹ Ko añoreña'o bodan-kataeñ' inoñ' inoñe marine i kitrely ho ranjie'o ho a IEHOVÀ Andrianañahare'oy; ²² le ko ampitroara'o boda-iambaneañe, ie heje' IEHOVÀ Andrianañahare'o.

17

¹ Asoao tsy hisoroña'o am' IEHOVÀ Andrianañahare'o ty bania ndra añondry aman-kandra ndra aman-kila amy t'ie tiva am' IEHOVÀ Andrianañahare'o.

² Aa naho oniñe ama' areo ao, amo rova natolo' IEHOVÀ Andrianañahare'o azoo ty lahilahy ndra ty ampela manao hakeo ampivazoho' IEHOVÀ Andrianañahare'o, ie mandilatse amy fañina'ey; ³ ie nimb' andrahare ila'e hitoroñe naho hitalaho ke amy àndroy, he amy volañey, hera amo fifamorohotan-dikerañeo, ze tsy nandiliako; ⁴ aa ie nitaroñeñe ama'o le jinanji'o naho hinotsohotso'o soa naho nioniñe t'ie to, vaho tsy kalafo te nanoeñe e Israele ao i hativàñe zay, ⁵ le hasese'o mb'an-dalan-drova'o mb'eo i lahilahy ndra ampela nanao i haratiañeiy vaho ho retsahe'o vato i lahilahiy ndra i ampelay hampibabòke iareo.

⁶ Am-paliem-pitalily telo ndra mpitalily roe ty hañohofan-doza i mañeva havetrakey, f'ie tsy ho vonoeñe am-palie' ty mpitalily raike. ⁷ Ho ama'e hey ty fità' o nitalily azeo hañohofa' iareo loza, zay vaho ty fità' ondaty iabio. Ie ty hañitoa'o ama'o o haratiañeo.

Ty Fizakam-Pisoroñe naho Mpizaka

⁸ Aa naho ama'o ty raha tsy lefe'o zakaeñe añivo' ty lio naho lio, añivo' ty halaly naho halaly, añivo' ty lafa naho lafa, ty amy ze fifandierañe androva'o ao le miongaha vaho mionjona mb'amy toetse ho joboñe' IEHOVÀ Andrianañahare'oy mb'eo; ⁹ le miheova mb' amo mpisoroñeo naho mb'amo nte-Levio vaho mb'amy mpizaka amy andro zay le mañontanea, vaho ho taroñe' iereo ama'o ty hizakàñe aze. ¹⁰ Aa le hanoe'o i hitoroa' iareo boak' amy toetse ho joboñe' IEHOVÀ vaho hambena'o te hanoeñe ze hene taroñe' iereo ama'o; ¹¹ le i Hake hañòha' iareo azo, le ho henefe'o i lily hisaontsia' iereo te hanoe'o, le tsy hivike ndra mañavana ndra mañavia rehe amy zaka taroñe' iereo ama'oy. ¹² Fa i lahilahy manao ze satri'e vaho tsy mañaoñe i mpisoroñe mijohañe am-pitoroñañe añatrefa' IEHOVÀ Andrianañahare'oy ndra i mpizakay, le havetrake i lahiy; haitoñañe am' Israele i haloloañey, ¹³ le hahajanjiñe ondaty iabio vaho ho hembañe tsy hanao ze satri'e avao.

Ty Efetsefen-dily o Mpanjakao

¹⁴ Aa ie fa nivotrak' an-tane hatolo' IEHOVÀ Andrianañahare'oz naho tavane'o, naho mimoneñe ao, vaho manao ty hoe: hañory mpanjaka hifehe ahy raho manahake o rofoko iaby mañohok' ahikoo, ¹⁵ le toe i ho joboñe' IEHOVÀ Andrianañahare'oy ty hedrè'o ho mpanjaka ama'o; ty hirik' amo rolongo'oo ty hajado'o ho mpanjaka hifehe azo, fa tsy hampifehè'o azo ty renetane tsy longo'o.

¹⁶ Asoao tsy hamorohotaha'e soavala ho am-bata'e, ndra hampibalihe'e mb'e Mitsraime mb'eo ondatio hampitomboa'e soavala amy nitsarae' IEHOVÀ ama' areoy ty hoe: Tsy himpoly mb'eo ka nahareo. ¹⁷ Le ie tsy hañenga valy maro, tsy mone hitsile ty arofo'e, vaho tsy hanontoña'e volafoty naho volamena mitoabotse.

¹⁸ Aa ie miambesatse amy fiambesam-panjakam-pifehea'ey, le ho tsikombe'e an-tsokitse ty Hake toy, ami'ty boke añatrefa' o nte-Levio mpisoroñeo. ¹⁹ Hirekets' ama'e zay vaho ho vakie'e amo hene andro hiveloma'eo, hioha'e ty hañeveñe am' IEHOVÀ Andrianañahare'e, fonga hambena'e o tsara ami' ty Hake toio naho o fañè retoñañe; ²⁰ tsy hirengevoha' ty arofo'e ambone' o longo'eo, naho tsy hivio mañavàna ndra mañavia' ty lily toy, soa te ho lava-haveloñe am-pifehea'e ao, ie naho o tarira'eo añivo' Israele ao.

18

o Mpisoroñeo naho o nte-Levio

¹ Tsy hanañ'anjara ndra lova am' Israele ao o mpisoroñe nte-Levio ndra i hene fifokoa' i Levii. Fe ho kamae' iereo ze soroñañe am' IEHOVÀ, naho ze mete ho anjara'e. ² Tsy hanan-dova amo rolongo'eo iereo fa IEHOVÀ ro lova' iareo, amy nitsara'ey. ³ Zao ty anjara'o mpisoroñeo boak' am' ondatio, hirik' amo mañenga soroñeo ke bania ke añondry: hatolo' iereo amy mpisoroñey ty sokataña'e, o valañorà'eo naho ty tsimarano'e.* ⁴ Ty lengom-boa' o mahakama'oo naho ty divai'o naho ty mena'o vaho ty valoham-bolo' o añondri'oo ty hatolo'o aze. ⁵ Amy t'ie jinobo' IEHOVÀ Andrianañahare'oz amo fifokoa'o iabio hijohaña'e hitoroñe nainai'e amy tahina' IEHOVÀ, ie naho o tarira'eo.

* 18:3 Sor 7:30-34

⁶ Aa naho miavotse an-drova'o ndra aia'aia e Israele ao amy nañialoa'ey, t'i nte-Levy, hionjomb' amy toetse ho joboñe' IEHOVÀ mb'eo an-kaliforam-pisalalàn-tro'e; ⁷ le ie ro hitoroñe amy tahina' IEHOVÀ Andrianañahare'ey hambañe amo longo'e nte-Levy mpijohañe añatrefa' IEHOVÀ. ⁸ Hanañ' anjara mahakama mira am' iereo re, ho tovo' ze rinambe'e ami'ty nandetaha'e i lovan-droae'ey.

Sata Faly

⁹ Ie mivotrak' an-tane' atolo' IEHOVÀ Andrianañahare'o azo, ko tsikombe'o o sata mampangori' o fifeheañeoo[†]. ¹⁰ Tsy ho oniñe ama' areo ao ty mpampitoañ' ana-dahy ndra anak' ampela añafo ao, ndra ty mpisikily, ndra ty mpitoky vilañe, ndra ty mpañori-binta ndra ty mpamoreke ¹¹ ndra ty jinilahy, ndra ty mpampizèke, ndra ty aman-kokolampa, ndra ty mpañontane lolo. ¹² Amy te tiva am' IEHOVÀ ze manao zay; le i sata tiva rey ty anoiha' IEHOVÀ Andrianañahare'o iareo aolo'o mb'eo. ¹³ Mivañona am' IEHOVÀ Andrianañahare'o.

¹⁴ Toe haoñe' o rofoko ho tavane'o tane ty mpamoreke naho ty mpisikily, fa ihe, tsy hapo' IEHOVÀ Andrianañahare'o hanao zay.

Mpitoky vao manahake i Mosè

¹⁵ Hampitroare' IEHOVÀ Andrianañahare'o ho azo ty mpitoky añaivo'o ao, boak' aman-drolongo'o, manahak' ahy; ie ty ho haoñe'o; ¹⁶ ty amo hene nihalalie'o am' IEHOVÀ Andrianañahare'o e Korebe aña amy andro i favoribeiiio ami'ty hoe: Ee tsy ho tsanoñeko ka ty fiarañanaña' IEHOVÀ Andrianañahareko ndra hahatreo o afo jabajaba roke, tsy hivetrahako. ¹⁷ Le inao ty natoi' IEHOVÀ ahy: Noko i entañe nitaroñe' iereoy. ¹⁸ Aa le hatroako ho a' iareo ty mpitoky[‡] hambañe ama'o boak' amo longo' iareoo; hajoko am-palie'e ao o fivolakoo le ho tsarae'e am' iereo ze afantoko ama'e. ¹⁹ Ie amy zao, hanañako kabò ze tsy mañaoñe o fivolako ho tsarae'e ami'ty añarakoo.

²⁰ Le ze mpitoky mieva misaontsy ami'ty añarako ie tsy nililiako hisaontsy; he hivolañe ami'ty añaran' drahare ila'e, le havetrake i mpitoky zay. ²¹ Hera hatao'o ty hoe an-troke ao: Aia ty haharendreha'ay ty entañe tsy nisaontsie' IEHOVÀ? ²² Naho misaontsy amy tahina' IEHOVÀ ty mpitoky f'ie tsy pok'eo mbore tsy mifetsake, le tsy nitsarae' IEHOVÀ i entañe zay. Nanao ty nisatri'e avao i mpitokiy, ko ihembaña'o.

19

o Rova Fitsolohañeо Vol 35.9-28; Ieh 20.1-9

¹ Naho fa finongo' IEHOVÀ Andrianañahare'o o rofoko nitompo' i tane hatolo' IEHOVÀ Andrianañahare'o azoio, naho nilimbeze'o vaho mimoneñe amo rova naho anjomba' iareoo, ² le aviho ty rova telo añaivo' i tane hatolo' IEHOVÀ Andrianañahare'o ho tavane'oy ao, ³ le anataho lalañe vaho amaritsoho toetse telo i tane' hatolo' IEHOVÀ Andrianañahare'o ho lovay; hirombaha' ze hene namono.

⁴ Zao ty am'onday mamono naho miherereake mb'eo handrombaha'e aiñeо—ie namono ty marine aze fe tsy nitsatrie'e, vaho tsy nalaim-bintañ' aze taolo; ⁵ manahake t'ie mindre lia aman-drañe'e mb'añ'ala ao hampitsera-katae, le ie mañohatse ty feko'e hamira hataey, hera hipitsik' amy taho'ey i lelam-pekoñey hipaoke i rañe'ey hamono aze. Mete

[†] 18:9 Its 12:30 [‡] 18:18 Jao 7:40, Top 3:22-26, 7:37

hiborifitse mb'ami'ty raik' amy rova rey indatiy hiveloma'e, ⁶ tsy mone hañoridañe aze an-keloke ty mpamale fate hitsepak' aze naho loho lavitse i liay, hañohofa'e loza ndra t'ie tsy mañeva havetrake, ie tsy nimpalaiñe aze.

⁷ Zay ty andiliako azo ty hoe: Añivaho rova telo ho azo. ⁸ Aa naho itare' IEHOVÀ Andrianañahare'o ty fifaritsoha'o amy nitsarae'e amandroae'oy naho fonga hatolo'e azo i tane nitsarae'e aman-droae'oy, ⁹ naho ambena'o vaho orihe'o ze hene lily lilieko azo androany—ty hikoko IEHOVÀ Andrianañahare'o naho hañavelo nainai'e amo lala'eo—le ho tovoña'o rova telo ho tokaneñe mandikoatse i telo rey; ¹⁰ soa tsy hiorik' an-tane hatolo' IEHOVÀ Andrianañahare'o azo ho lova ty lio-màliñe, naho tsy hipetahan-dio rehe.

¹¹ Aa naho mone falai'ondaty i marine azey, le voñoñe'e, naho kabohe'e an-keloke le mikenkan-dre vaho tambikovikoe'e an-day ty raik' amy rova rezay ¹² vaho hampañitrik' aze o roandria' i rova'eo le hasese boak' amy rovay re hatolots' am-pità' ty mpamale fate hikenkaña'e. ¹³ Ko iferenaiñam-pihaino'o, fa ho fòra'o am'Israele ty lio-maliñe soa te ho tahie'e.

¹⁴ Ko asinta'o ty fañefen-tanen-dongo'o fa najado' o ntaoloo andova'o eo, i ho fanaña'o an-tane atolo' IEHOVÀ Andrianañahare'o azo ho tavaneñey.

Mpitaily

¹⁵ Tsy hitroatse hanisý ondaty ty mpitalily raike ke tahiñ' inoñe he hakeo inoñe mete nililare'e. Ty faliem-pitalily telo ndra ty faliem-pitalily roe ty hampijadoñe zaka.

¹⁶ Naho mitroatse hitalily ondaty ami' ty tsy to ty mpitalily vilañe, ¹⁷ le songa hijohañe añatrefa' IEHOVÀ, añatrefa' o mpisoroñe naho o mpizaka henane zaio indaty roe mifandietse rey. ¹⁸ Le hañotsohotso o mpizakao, aa naho tendreke te mpitalily vilañe i mpitaliliy, nitaroñe raha tsy to i rahalahi'ey, ¹⁹ le hanoe'o ama'e ty ho nanoe'e amy rahalahi'ey; zay ty hamongorañe ty hakeo añivo'o ao; ²⁰ le hijanjiñe o ila'eo vaho ho hembañe tsy hanao i tahiñe zay añivo'o ao ka. ²¹ Le ko iferenaiñam-pihaino; fiay ty hasolo fiay, fihaino ty fihaino, famotsy ty famotsy, fitañe ty fitañe, fandia ty fandia.

20

¹ Ie mionjo-mb'an-kotakotake mb' amo rafelahi'oo mb'eo vaho ma-haoniñe soavala naho sarete naho ondaty maro te ama'o, ko ihembaña'o, fa hañolots' azo t'IEHOVÀ Andrianañahare'o nañavotse azo an-tane Mitsraime aña. ² Aa ie harinè'o i aliy le homb'eo ty mpisoroñe hisaontsy am'ondatio ³ hanao ty hoe: Mijanjiña r'Israele, ie mitontoñe hihotakotak' amo rafelahi' areoo te anito, aa le asoao tsy hilealea, ko hembañe, ko mangebahebake, vaho ko irevendreveñañe; ⁴ fa IEHOVÀ Andrianañahare' areo ro mindre ama' areo hialy ho anahareo amo rafelahi' areoo, handrombake. ⁵ Le hisaontsy am'ondatio o mpiaoloo hanao ty hoe, Ia t'indaty nandranjy anjomba fe mboe tsy nitamea'e? Ampiengao himpoly mb'añ' akiba'e aña tsy mone hivetrap' an-kotakotak' ao vaho ho tamè' ondaty hafa. ⁶ Ia t'indaty nambole an-tanem-balòboke fe mbe tsy nitoloña'e? Angao himpoly mb' aña akiba'e mb'eo, hera hikoromak' aña aly vaho ondaty ila'e ty hañalahala aze. ⁷ Ia ka t'indaty nifofo valy fa mbe tsy nengae'e? Ampiavoto himpoly mb'an-kiboho'e aña tsy mone hikorovok' aña aly vaho halae' ondaty ila'e. ⁸ Hanovon-tsaontsy

am' ondatio o mpiaoloo ty hoe: Ia t'indaty hembañe ndra mianifañe? Ampiavoto himpoly mb' añ' anjomba'e aña tsy mone hitranake manahake i azey ty tron-droahalahi'e. ⁹ Ie modo ty saontsi' o mpiaoloo am'ondatio le ho tendrèñe o mpifehem-pirimboñan-dahindefoñe.

¹⁰ Ie marine ty rova hialia'o, taroño fañanintsiñe heike, ¹¹ le ie toiñe'e am-pilongoañe, naho misokak' ama'o, le ho fetrek-oro'o ze ondaty iaby tendrek'ao vaho hitoroñe azo. ¹² Aa ie tsy mifampilongo ama'o, te mone hialia'e, le arikoboño. ¹³ Ie asese' IEHOVÀ Andrianañahare'o am-pit  o, le ho fonga lafae' o an-dela-pibara ze lahilahy ama'e ao; ¹⁴ fe ho rambese'o ho tsindro'o o rakembao naho o keleia'eo naho o a  ombe'eo naho ze he'e an-drova ao, o fikopaha  e iabio; le ho kamae'o ze kinopa'o amo rafelahi'o natolo' IEHOVÀ Andrianañahare'o azoo.

¹⁵ Zay ty hanoa'o amy ze hene rova lavits' azo tsy mpiamo rovan-drofoko ma  ohok' azoo. ¹⁶ Fe o rovan-drofoko atolo' IEHOVÀ Andrianañahare'o azo ho lovao, ko apo'o ho velo  e ze raha mikof  ke ama'e. ¹⁷ Fonga mongoro: o nte-Kiteo, naho o nte-Amoreo, o nte-Kan  neo, naho o nte-Perizeo, o nte-Kiveo vaho o nte-Ieboseo, Amy nandilia' IEHOVÀ Andrianañahare'o azoy, ¹⁸ tsy mone ha  ha'e anahareo ty ha  orike o sata tiva' iareoo, o anoe' iereo amo ndrahare' iareoo, hanoa' areo hakeo am' IEHOVÀ Andrianañahare' areo.

¹⁹ Naho arikobo  e ela ty rova hialia'o hitavana'o, ko rotsahe'o am-pamatsham-peko  e o hatae'eo, amy te azo'o kamae  e o voa'eo, ko fira  e'o. Atao'o h'ondaty hao o hatae an-kivokeo hanoe'o fa  rikobo  a  e? ²⁰ F'ie naho hatae fohi'o te tsy fihanem-boao le azo'o rotsahe  e vaho fira  e handrafeta'o rafi-panamea  e i rova ialia'oy, ampara' te rotsake.

21

Vono-Ondaty

¹ Ie zoe  e mibab  ke an-kivoke ey, an-tane atolo' IEHOVÀ Andrianañahare'o azo, ho rambese'o t'indaty, ie tsy fohi  e te ia ty nanjevo  ' aze, ² le hiavotse mb'eo o androanavi'oo naho o mpizaka'oo hanjehe pak'amo rova ma  ohoke i na  ohofan-dozaio. ³ Ie oni  e ty rova marine' i vinonoy le o androanavi' i rovaio ro handrambe kiloa mbe tsy nampitolo  e  e, mbe tsy nitari-joka, ⁴ le hendese' o androanavi' i rovaio hizotso mb' am-bavatane aman-toraha  e tsy mai-drano mb' an-toetse tsy nirokafe  e tsy nitongise  e mb'eo i kiloay vaho ho folah  e iereo ty loha' i kiloay ambavatane eo; ⁵ le hitotoke mb'eo amy zao o mpisoro  e ana' i Levio, amy t'ie jinobo' IEHOVÀ Andrianañahare'o hitoro  e aze naho hitata ami' ty tahina' IEHOVÀ, vaho mahavoa zaka amy ze ali-vava naho lafa ty saontsi' iareo; ⁶ le hanasa fit  e ambone' i kiloa finola-doha am-bavataney i androanavi' i rova marine i vinonoy rey; ⁷ le ty hoe ty ho la  ona' iareo: Tsy nampiorike ty lio tia  e o fit  aio vaho tsy niisam-pihaino'ay. ⁸ Apoho ondati'o Israele nijeba  e'oo ry IEHOVÀ vaho ko apo'o a  ivo'ondati'o Israeleo ty hakeondio-m  li  e. Le ho hah  e am' iereo i lioy. ⁹ Zay ty hamongora'o ama'o ty lio-m  li  e, ihe mitolon-kavanta  e am-pivazoho'a' IEHOVÀ.

Ampela Tsinepak' a   Aly

¹⁰ Ie mionjo  e hialy amo rafelahi'oo mb'eo, naho atolo' IEHOVÀ Andrianañahare'o am-pit  o ao iereo vaho asese'o mb'eo o tsinepakeo, ¹¹ le zoe'o amo mirohio ty ampela maintel  , naho harinea'o, vaho te handrambe aze ho vali'o; ¹² le hasese'o mb' añ' akiba'o mb'eo naho ho hitsife'e ty volo'e vaho ho tomore'e o hoho'eo, ¹³ le hafaha'e ama'e i fisikim-pandrohiza  ey

naho hitobok' añañanjomba'o ao re handala an-drae'e naho an-drene'e volañe raike do'e, modo zay le mete himoak' ama'e rehe hanambaly aze vaho ie ty ho tañamjomba'o. ¹⁴ Ie amy zay he malaiñ' aze rehe, apoho handeha mb'an-tsatrie'e mb'eo; f'ie tsy haleta'o drala, vaho tsy ampisoañeñe fa narè'o.

Zon-Tañoloñoloña'e

¹⁵ Ie mampirafe roe t'indaty, le tea'e ty raike naho heje'e ty raike, vaho songa mampipok' anake ho aze i kokoa'ey naho i heje'ey; aa naho amy heje'ey i tañoloñoloña'ey, ¹⁶ le ie amy andro ampandova'e o ana'eo o fanaña'ey le tsy mete hatao'e valohan' ana'e ty ana-dahi' i vali-iso'ey hasolo i ana-dahim-baly heje'ey, ie toe tañoloñoloña'e. ¹⁷ Tsy mahai-tsy iantofe'e ho tañoloñoloña'e ty ana-dahi' i heje'ey, am-panolorañe ama'e ty anjara roe amy ze hene fanaña'e; amy te ie ty valohan-tolin-kaozara'e, vaho aze ty zon-tañoloñoloñañe.

Anake Miola

¹⁸ Naho eo ty manañ'ana-dahy miola, naho manjehatse tsy mañaoñe ty fiarañanañan-drae'e ndra ty fiarañanañan-drene'e, mbore tsy haoñe'e ty fandilova' iareo aze, ¹⁹ le ho rambese' ty rae naho i rene'e, naho hasese mb'amo roandria' i rovaio mb'andalambei' i tanà'ey mb'eo; ²⁰ le hanao ty hoe amo roandria' i rovaio: Manjehatse naho miola ty ana-dahi'ay toy, tsy mañaoñe anay fa màhake naho jike. ²¹ Le ho retsahe' o hene lahilahi' i rova'gio vato hañohofan-doza ama'e. Zay ty hamongora'o ty hatserahañe ama'o; le ho janjiñe' Israele iaby vaho ho hembañe.

Lily Tovo'e

²² Naho eo t'indaty voa zaka ami'ty hakeo mahafate vaho vonoeñe, aa ie aradorado'o an-katae, ²³ asoao tsy hapok' amy hataey ampara' te pore'a' ty maraindray i fañova'ey; tsy mete tsy haleve'o amy àndroy avao fa onjitse aman' Añahare ze ampiradoradoñe an-katae, tsy handeora'o ty tane atolo' IEHOVÀ Andrianañahare'o azo ho lova.

22

¹ Naho zoe'o mandifike ty añombe ndra añondrin-dongo'o, ko amoea'o fa ampolio amy longo'oy. ² Aa naho tsy marine azo i longo'oy hera alik'ama'o, le endeso moly hey i harey naho tano ama'o ampara' t'ie paia' i longo'oy, vaho ampolio ama'e. ³ Zay ty hanoa'o i borike'ey, naho zay ty hanoa'o i sarimbo'ey, vaho zay ty hanoa'o ze hene fanañan-dongo'o nimotsa fa niisa'o. Ko itsidaredareañe.

⁴ Naho isa'o mikorovok' an-dalañe eo ty boriken-dongo'o ndra ty añombe'e, ko amoea'o, f'ie tsy mete tsy hañimb' aze hampitroatse zay.

⁵ Asoao tsy ho sikinen' ampela ty fisikinan-dahilahy, ndra añombean-dahilahy ty saron' ampela, fa tiva am' IEHOVÀ Andrianañahare'o ty manao zay.

⁶ Naho zoe'o an-dalañe eo ty trañom-boroñe ke ambone hatae ey he antane eo, rekets' ana'e ndra atoly vaho mamana o atoli'eo ndra o ana'eo ty rene'e le ko mandrambe ty rene'e rekets' o ana'eo. ⁷ Mete angala'o ty ana'e, fa avotsoro i rene'e, soa te ho tahie'e vaho ho lava haveloñe.

⁸ Naho mañoreñ' anjomba rehe le andranjio ana-kijoly hiarikatoke ty tafo'e tsy mone hanan-tahin-dio ty anjomba'o te mideboñe boak' an-tafo'e ey t'indaty.

⁹ Ko mitongy tabiry maro karaza'e amy tetem-balobo'oy; tsy mone hotiva ty haliforan-tabiry nambolè'o naho ty havokara' i tetekey. ¹⁰ Ko aharobaoñe an-dasarý ty añombe naho ty borike. ¹¹ Ko misikin-damba natraopitenoñe volonañondry naho lamba-leny.

¹² Androroto fole telo an-kotsok' èfa' i lamba fisaro'oy.

Lilatse ami'ty Fanambaliañe

¹³ Naho mañenga valy t'indaty, le ie iolora'e ro heje'e, ¹⁴ naho manambaitambaiñe aze vaho mandoto ty añañara'e ami'ty hoe: Nañenga ty ampela tia raho le ie niharineako, nioniñe te tsy somondrara. ¹⁵ Le hinday ty vente' ty nahasomondrara aze mb' amo roandriañe an-dalambeio ty rae naho i rene' i somondraray, ¹⁶ le hanao ty hoe amo roandriañeo ty rae'e i somondraray: Natoloko am' ondaty tia ty anako ho vali'e, fa heje'e, ¹⁷ mbore anaintsaiña'e ami'ty hoe, Tsy nitreako t'ie somondrara. Fe intoy o famentean-kasomondraran' anakoo; Le halafi' iareo añañatrefo' o roandria' i rovaio i lambay, ¹⁸ le ho rambese' o roandriañeo indatiy vaho handilo aze. ¹⁹ Ho sazè' iereo volafoty zato sekele le hatolo' iereo an-drae' i somondraray ty ami'ty nanolora' ondaty tia añañaran-draty i somondrara ana' Israeleý. Mbe ho valie'e avao vaho tsy hanan-jo hañary aze indatiy ampara' te modo o andro'eo. ²⁰ Aa naho mone to i sisý zay te tsy rendreke ty maha-tsinahavani-lahy i ampeloy, ²¹ le hasese an-dalam-bein-drae'e eo i ampeloy, vaho ho retsahe' ondati' i rova'eio vato am-para-pivatraha'e, ami'ty hakeo nanoe'e e Israele ao, ie nanao hakarapiloña añañombandrae'e ao. Zay ty hamongora'o ama'o o hatserehañeo.

²² Naho vinamba niolotse ami'ty rakemba vali' ondaty t'indaty, le tsy mete tsy songa havetrake i rakembay naho i lahilañy nifandia-tihy ama'ey, hamongora'o am' Israele ao i halò-tsereke zay.

²³ Naho tendreke somondrara nifofoe' ondaty an-drova ao t'indaty vaho mifandia tihy ama'e, ²⁴ le tsy mahay tsy hasese'o mb'an-dalambei' i rovay mb'eo ie roe vaho handretsaham-bato hikenkañe—i somondraray amy te tsy nikai-drombak' an-drova ao, naho indatiy, amy te narè'e ty vali' ondaty. Tsy mete tsy mongore'o ty haloloña ama'o ao.

²⁵ F'ie an-kivok' aña te zoe' t'indaty ty somondrara nifofoe' ondaty vaho mamahotse aze, le indaty nifandia-tihy ama'ey avao ty havetrake. ²⁶ Ko anoañ' inoñ' inoñe amy somondraray fa tsy anañan-kakeo mañeva fate, fa manahake t'indaty mitroatse mañoho-doza aman-dongo'e, zay o tsaraeñeo, ²⁷ amy te nizoe' indatiy an-kalok' aña i somondraray; nikaikaike i somondrara nifofoeñey, fe tsy teo ty handrombake.

²⁸ Aa naho tendreke somondrara tsy nifofoeñe t'indaty le azi'e naho vahora'e vaho vamba iereo; ²⁹ le tsy mahay tsy mañondroke drala volafoty limampolo aman-drae'e indaty namahots' azey, le ho vali'e i ampeloy kanao narè'e; tsy mahazo mañary aze re ampara-pigadoña' o andro'eo.

23

¹ Ao tsy ho rambese' ondaty ty valin-drae'e, hamotera'e ty zon-drae'e.

Tsy Manan-jo Mivory

² Tsy hiheo am-pivori' IEHOVÀ ty aman-tabiry dinemoke ndra filahiañenianto.

³ Tsy hitraok' ami'ty favori' IEHOVÀ ty anak' amontoñe; tsy hizilik' am-pivori' IEHOVÀ ao re pak'an-tarira'e faha folo.

⁴ Tsy himoak' am-pivori' IEHOVÀ ao t'i nte-Amone ndra t'i nte-Moabe; tsy hizilik' am-pivori' IEHOVÀ ao re pak' an-tarira'e faha folo, ⁵ amy t'ie tsy nanalaka anahareo ninday mahakama naho rano amy lalañe niakara' areo i Mitsraimey; mbore tinambe' iereo ty ama'o i Balame ana' i Beore nte-Petore boak' arame-Naharaime hañozoñe azo. ⁶ Fe tsy nihaoñe' IEHOVÀ Andrianañahare'o t'i Balame; le nafote' IEHOVÀ Andrianañahare'o ho tata ama'o o ozoñeо ami'ty fikokoa' IEHOVÀ Andrianañahare'o azo. ⁷ Tsy hipiaia'o fañanintsiñe, ndra firaoraoñaе, amo fonga andro'oo.

⁸ Tsy ho heje'o ty nte-Edome fa rahalahi'o; le tsy ho heje'o ty nte-Mitsraime fa nirenetane an-tane'e ao. ⁹ Mete mitraok' am-pivori' IEHOVÀ ao o anake nasama' iereoo ami'ty tarira'e faha telo.

Ty tsy Faliovañe an-Tobe ao

¹⁰ Ie mionjoñe mb'eo am-pirimboñan-dahin-defoñe hiatreatre andrafelahi'o, le ifoneño ze atao haratiañe. ¹¹ Aa naho ama' areo ao t'indaty tsy malio ty amy fiorihan-kaleñey, le hiavotse i tobey re, vaho tsy himoak' amy tobey ao; ¹² ie miroñe ty andro le hiandro re vaho hizilik' an-tobe ao te motak'andro.

¹³ Le tsy mete tsy amam-piveñañe alafe' i tobey rehe hiamontoña'o; ¹⁴ naho an-karo'o ao ty pitre, aa le ie hitsotake ro hitrabake, vaho hitolike handembefa'o o niamontoñe'oo. ¹⁵ Amy te midraidraitse añivo' i tobe'oy t'IEHOVÀ Andrianañahare'o, handrombak' azo, hañitoa'e aolo'o eo o rafelahi'oo; aa le hiavake ty tobe'o, tsy hahavazoho'a'e raha maleotse ama'o ao hiamboho'a'e.

¹⁶ Tsy hasese'o ami'ty tempo'e ty ondevo niborofotse amy tempo'ey naho nimb' ama'o mb'eo. ¹⁷ Himoneñe ama'o ao re, añivo'o ao amy ze toetse joboñe'e, naho amy ze rova mahafale ty tro'e, vaho ko ampisoñañeñe.

¹⁸ Tsy ho amo anak' ampela' Israeleo ty tsimirirañe, ndra ty ana-dahi' Israele mpiharo aman-dahy. ¹⁹ Tsy ho banabanae'o añ' anjomba' IEHOVÀ Andrianañahare'o ao ty tamben-kakarapiloñañe ndra ty tamben' amboa* hañavaha'o fànta, fa songa tiva am' IEHOVÀ Andrianañahare'o i roe rey.

²⁰ Ko ampisongoeñe hitake ana'e aman-dongo'o, ndra fitomboan-drala, ndra fitomboam-baty ndra fitomboañ' inoñ' inoñe mete ampisongoeñe rekets' ana'e. ²¹ Azo'o angalañ' ana'e ty renetane nampisongoe'o, f'ie longo, tsy hangala'o ana'e ze ampisongoe'o soa te hitahy azo t'IEHOVÀ Andrianañahare'o am-pitoloña'o iaby an-tane hiziliha'o ho tavane'o ao.

²² Ie mifanta am' IEHOVÀ Andrianañahare'o, ko aïke ty hañenefa'o aze amy te tsy mete tsy hipiaia' IEHOVÀ Andrianañahare'o, vaho ho hakeo ama'o. ²³ F'ie tsy hanan-tahiñe te mifoneñe tsy hifanta. ²⁴ Ano am-pahimbañañe ze miakatse am-pivimbi'o; manahake te fanta nisatrie'o am' IEHOVÀ Andrianañahare'o, i nampitamam-palie'oy.

²⁵ Naho iziliha'o ty tanem-balobo' ondatio le azo'o kamaeñe o valobo'eo ampara' te ànjañe, ze satrie'o, f'ie tsy ampijoña'o an-karo'o ao.

²⁶ Ie miranga tonda' ondaty miriñariña mahakama, le azo'o tifoeñe an-taña'o ty loha'e fe tsy añoharam-pitatahañe i mahakaman-drañe'o miriñariñay.

24

Enga-valy naho Tsie-valy

* **23:19** lahihahy miolotse lahilahy Sor 18:22;20:23

¹ Naho mangala-baly t'indaty, naho engae'e ho tañanjomba'e, ie añe, malaiñe aze ami'ty hila* nizoeñe ama'e, le hanokira'e taratasimpifanarahañe, le ajò'e am-pit 'e ao, vaho am-pomba'e hiakatse i anjomba'ey mb'eo; ² ie mienga i anjombay, le ondaty hafa ro mifanambaly ama'e, ³ aa ie heje' indaty faharoey naho anokira'e ravem-pifanarahañe, naho ampijo 'e am-pit 'e, vaho ampiavote'e amy anjomba'ey mb'eo (ke te nivilasy indaty faharoe na  nega azey); ⁴ le tsy azo' i vali'e valoha'ey engae 'e ho vali'e ka, ie fa nileore 'e, fa tiva am' IEHOV  Andriana ahare'o, vaho ko ampana 'o hakeo i tane atolo' IEHOV  Andriana ahare'o azo ho lova'oy.

Lily ila'e

⁵ Naho na  nega-vao t'indaty, le tsy hitrao-lia hialy amo lahin-defo eo vaho tsy hampitolo ne . Hampidada e  an-kiboho'e ao tao e raike hampifalea'e i vali'e nengae'ey.

⁶ Ko rambese e ho tsoake ty †leo ne ndra ty akalo, amy te i havelo'ey ty ho nanoe'e tsoake.

⁷ Naho zoe' ondaty ty ana' Israele mitava ne longo, ndra ma ondeva aze, ndra mandetak' aze le havetrake i mpitava ey. Zay ty amongora'o ty raty ama'o ao.

⁸ Mitomira amo angamaeo le ambeno am-pahimba  ne vaho fonga ano ze hene toroa' o mpisoro ne nte-Levio azo; ze nandiliako iareo ty hitsonte  a'o hanoe ne. ⁹ Tiahio i nanoe' IEHOV  Andriana ahare'o amy Miriame an-dala ne eo ihe niavotse i Mitsraimey.

¹⁰ Ie nampisongo an-dra  e'o ko imoaha'o i kiboho'ey hikodebe i tsoa'ey.

¹¹ Alafe'e ao avao rehe, le indaty nampisongoe'oy ty ha  nakatse i tsoakey ama'o. ¹² Naho rarake indatiy, le tsy hindese'o hirotse ama'o i tsoa'ey,

¹³ fa tsy mete tsy hasese'o ama'e i tsoa'ey naho miro ne i androy soa te hirota'e i saro'ey vaho hitat' azo, le ho havanta  ne ama'o a natrefa' IEHOV  Andriana ahare'o.

¹⁴ Ko ampiso  e'o ty mpitava ay rarake ni  he'o, ke t'ie longo he renetane an-tane'o, an-drova'o ao. ¹⁵ Amy andro'ey avao, aolo' ty tsofots' andro ty hanolora'o ty rima'e, fa rarake re le ho salalaen' tro'e, tsy mone hitoreo am' IEHOV  ty ama'o re, vaho ho hakeo ama'o.

¹⁶ Tsy havetrake ty amo ana'eo o roaeo vaho tsy ho vonoe ne ty amandroae' iareo o anakeo; songa havetrake ty amy tahi'ey t'indaty. ¹⁷ Ko mengohe'o ty fizaka  ne o renetaneo, naho o tsy aman-draeo; vaho ko mandrambe ty lambam-bantotse ho tsoake. ¹⁸ Tiahio t'ie niondevo e Mitsraime a  e vaho nijeba  ne' IEHOV  Andriana ahare'o hiavota'o, aa le afantoko ama'o ty hanao izay.

¹⁹ Ie manatak' an-tete'o ao naho andikofa'o an-tetek' ao ty voto-tsako, ko mibalike mb'eo hangalak' aze, fa angao ey ho a i renetaney naho i bode-raey vaho i vantotsey, soa te hitahy azo t'IEHOV  Andriana ahare'o amy ze hene fitolo  nam-pit 'o.

²⁰ Ie mamofoke ty foton-olive'o, ko indrae'o fofoke o ra'eo: fa a i renetaney naho a i bode-raey vaho a i vantotsey. ²¹ Ihe manonto ne valobok' an-tanem-bahe'o ao, ko ihere  a'o ty lailai'e, fa ho a i renetaney naho i bode-raey vaho i vantotsey. ²² Tiahio t'ie niondevo e Mitsraime a  e; aa le lilieko rehe hanao zay.

* ^{24:1} hila: fa nandra  nato; Mat 5:32, 19:9 † ^{24:6} Heb: fandisana  ne ndra ty vato'e ambone'

25

¹ Naho mifandietse t'indaty roe naho miatre-jaka hizakà' o mpizakao, le mañatò ty to iereo vaho mañozoñe ty nanao raty, ² ie amy zao naho mañeva lafaeñe i nanao ratiy le hampibabohe' i mpizakay añatrefa'e vaho ho lafaeñe ami'ty hamaro'e mañeva i haratiañey. ³ Mete ho lafae'e infapolo fa tsy handikoarañe hera, ie mandafa mandikoatse i somoritse rezay le ho po-engeñe am-pihaino'o i longo'oy.

⁴ Ko feoze'o ty añombe mandisañe.

⁵ Naho mitraok' anjomba ty miproahalahy, vaho vilasy tsy aman-tiry ty raike, le tsy hengaen-dahy alafen-dongo'e i ramavoiñey. I rahalahim-bali'ey ty hañenga aze ho vali'e hañenefa'e i lilin-drahalahim-bali'ey. ⁶ Ie amy zao, hatao amy tahinan-drahalahi'e nivilasiy ty tañoloñoloñan' ana'e soa tsy ho faoheñe am' Israele i tahina'ey. ⁷ Aa naho malaiñe tsy te hañenga ty ramavoin-drahalahi'e indatiy, le soa re te hionjoñe mb'an-dalambez mb' amo androanavio mb'eo i valin-drahalahi'ey hanao ty hoe, Mifoneñe tsy hañonjoñe ty tahinan-drahalahi'e am' Israele ao i rahalahim-balikoy; tsy mete hanoe'e amako i lilim-balin-drahalahiy. ⁸ Le hikanjia' o roandria' i rovaio, vaho hisaontsiañe, f'ie mitoky ami'ty hoe, Tsy te hangalak' aze raho; ⁹ le hiheo ama'e añatrefa' o androanavio i ramavoin-drahalahi'ey le hafaha'e am-pandia' indatiy i hana'ey le handrorà'e ty lahara'e, vaho hitsey ty hoe: Zao ty hanoañe t'indaty tsy mamboatse i akiban-drahalahi'ey. ¹⁰ Le hatao ty hoe: Ty kijà' i nañafahan-kànay re e Israele ao.

¹¹ Naho mifangatotse t'indaty roe naho harinè' ty vali' ty raike hamotsora'e am-pità' i mamofokev i vali'ey, vaho mañity tañañe mandrambe o tabiri'eo, ¹² le ho tampahe'o ty taña'e, fa tsy ho tretrezem-pihaino'o.

¹³ Ao tsy hanam-bato-pandanja tsy mira an-kontra'o ao: ty bey naho ty kede. ¹⁴ Ko mampisy fañaranañe tsy mira aña'akiba'o ao: ty bey naho ty kede. ¹⁵ Vato-pandanjàñe do'e naho mahity vaho fañaranañe do'e naho vantañe ty ho ama'o, soa t'ie ho lava haveloñe an-tane atolo' IEHOVÀ Andrianañahare' azo. ¹⁶ Toe tiva am' IEHOVÀ Andrianañahare' oze manao irezay, ze fonga mitolon-katsivokarañe.

¹⁷ Tiahio i nanoe' i Amalek' azo amy lia'o niavotse i Mitsraimeiy, ¹⁸ ie nifanampe ama'o an-dalañe eo naho nandafa o nitakatrotse ama'oo, o tamboli'oo, ihe nidazidazitse naho nitoirañe; ie tsy nañeveñe aman' Añahare.

¹⁹ Aa ie nampitofà' IEHOVÀ Andrianañahare' amo fonga rafelahi'o mañohok' azoo an-tane nampandovae' IEHOVÀ Andrianañahare' azo ho tavane'o le ho faopaohe'o ambane' i likerañey ty faniahiañe i Amaleke; ko andikofa'o.

26

¹ Aa ie fa nivotrak' amy tane nampandovae' IEHOVÀ Andrianañahare' azoy naho nitavane'o vaho imoneña'o: ² le ho rambese'o ty loha-voa' ze voka' i taney, le hendese'o boak'an-tane atolo' IEHOVÀ Andrianañahare' azo le hajo'o an-karoñie ao vaho hasese'o mb'amy toetse ho joboñie' IEHOVÀ Andrianañahare' o hampipoha'e i Tahina'ey mb'eo. ³ Le hiheo mb'amy mpisoroñe mitoloñe amy andro zaiy rehe, hanao ty hoe ama'e : Taroñeko am' IEHOVÀ Andrianañahare' o androany, fa nivotrak' an-tane nifantà' IEHOVÀ an-droaentika t'ie hatolo'e antika. ⁴ Le ho rambese' i mpisoroñey am-pità'o i haroñey vaho hapò'e aolo' i kitreli' IEHOVÀ Andrianañahare' oy.

⁵ Le hanao ty ti-hoe rehe añatrefa' IEHOVÀ Andrianañahare' o: Nte-Arame, mpirererere ty raeko t'ie nionjoñe mb'e Mitsraime mb'eo, nitaveañe

añe rekets' ondaty tsy ampeampe vaho nitombo ho foko ra'elahy naho maozatse naho nifamorohotse. ⁶ Le nanao samporerake naho nampisoañe antika o nte-Mitsraimeo vaho niforekekè' iereo ampandrohizañ' ajale; ⁷ f'ie nikanjy am' IEHOVÀ Andrianañaharen-droaentika le jinanji' IEHOVÀ ty fiarañanañan-tika naho nivazohoe'e i fampisoañañey naho i fitromahañey vaho i famorekekeñañey antikañey. ⁸ Le nampiavote' IEHOVÀ amy Mitsraime tika an-dela-pitâñe maozatse, naho am-pitâñe nitora-kitsy naho am-pangebahebahañey naho am-biloñe vaho am-pitoloñañey tsitantane. ⁹ Le nendese'e mb' an-toetse atoy, vaho natolo'e antika o tane atoio, tane orikorihen-dronono naho tantele. ¹⁰ Aa ingo, engaeko ty loha-voa' i tane natolo'o ahiy ry IEHOVÀ.

Le hapo'o añatrefa' IEHOVÀ Andrianañahare'o vaho mitalahoa am' IEHOVÀ Andrianañahare'o. ¹¹ Le mirebeha amo hene hasoa natolo' IEHOVÀ Andrianañahare'o ama'o naho amy anjomba'gio, ihe naho i nte-Leviy, vaho i renetane ama'oy.

¹² Aa naho nihenefe'o ty fañengañey ty faha-folom-bòka'o amy taompahateloy, i taom-pañengam-pahafoloy, naho fa finaha'o o nte-Levio, o renetaneo, naho o bode-raeo, vaho o vantotse an-drova'oo hikama' iareo ho anjañey, ¹³ le hanao ty hoe rehe añatrefa' IEHOVÀ Andrianañahare'o, Fa nakareko an-trañoko ao o raha navahekoo, naho fa natoloko amo nte-Levio naho amo renetaneo naho amo bode-raeo naho amo vantotseo, ty amo hene lily nililie'o ahikoo; tsy nililareko ndra nihaliñoko o lili'oo. ¹⁴ Tsy nihinanako te nandala, naho tsy nahajako t'ie naleotse, naho tsy nengaeko amo havilasio, fe nihaoñeko ty fiarañanaña' IEHOVÀ Andrianañahareko vaho nanoeko iaby o nandilia'o ahikoo. ¹⁵ Mivazoho boak' añ' anjomba'o masiñe andikerañey ao, le tahio ondati'o Israeleo naho i tane natolo'o anaiy, ty amy nifantà'o aman-droae'ay, i tane orikorihen-dronono naho tanteley.

¹⁶ Afanto' IEHOVÀ Andrianañahare'o azo androany te hanoe'o o fañè naho fepetse zao: le hambena'o naho hanoe'o an-kaampon' arofo'o vaho an-kaliforam-pañova'o. ¹⁷ Fa tinaro'o anindroany te Andrianañahare'o t'IEHOVÀ, hañaveloa'o o lala'eo; naho hambena'o o fañè'eo, naho o lili'eo naho o fepè'eo vaho ho janjiñe'o i fiarañanaña'ey. ¹⁸ Nafè' IEHOVÀ anindroany te ihe ro vara-iso'e, ty amy nampitamae'e azoy, aa le hambena'o iaby o lili'eo. ¹⁹ Fa haonjo'e andigiligi' ze hene foko namboare'e, am-pandrengea naho tahinañe naho hasiñe, vaho h'ondaty navaheñ' am' IEHOVÀ Andrianañahare'o rehe, ty amy tsara'ey.

27

¹ Le linili' i Mosè naho o roandria' Israele iabio ondatio ami'ty hoe: Ambeno iaby o lily andiliako androanio. ² Le amy andro itsaha' areo Iardeney mb'an-tane atolo' IEHOVÀ Andrianañahare'o azo, ty hañoreña'o vato jabajaba ho patrora'o sokay. ³ Aa ihe fa nitsake le sokiro ama'e o enta' ty Hake toio, himoaha'o i tane atolo' IEHOVÀ Andrianañahare'o azo, tane orikorihen-dronono naho tantele; i nitsara' IEHOVÀ Andrianañaharen-droae'oy.

⁴ Le ihe nitsake Iardeney ro hampitroatse i vato liniliko azo anindroany, am-bohi' i Ebale eiy vaho ho patrora'o sokay. ⁵ Le ranjio eo ty kitrely ho a IEHOVÀ Andrianañahare'o, kitreli-vato; le tsy haonjo'o ama'e ty viñe.

⁶ Hitsenea'o vato boko'e tsy nivàñeñey i kitreli' IEHOVÀ Andrianañahare'oy vaho hengae'o ama'e ty soroñe am' IEHOVÀ Andrianañahare'o. ⁷ Le hañenga soron-kanintsiñe naho hikama naho hirebek' añatrefa' IEHOVÀ

Andrianañahare'o; ⁸ vaho ho sokire'o amy vato rezay am-bakabaka ze hene enta' ty Hake toy.

⁹ Le hoe ty lañona' i Mosè naho o nte-Levy mpisoroñeo am' Israele iaby: Mianjiña naho mijanjiña ry Israele, androany t'ie fa ondati' IEHOVÀ Andrianañahare'o. ¹⁰ Aa le oriho ty fiarañanaña' IEHOVÀ Andrianañahare'o, vaho ano o lili'eo naho o fañè'e lilieko azo androanio.

¹¹ Le hoe ka ty namantoha' i Mosè ondatio amy àndroy: ¹² Hitroatse ambone' ty vohi-Gerizime iretoañe hitata ondatio naho fa nitsake Iardeney: i Simone, i Levy, Iehodà, Isakhare, Iosefe, vaho i Beniamine. ¹³ Le hitroatse ambone' i vohi-Ebaley ka retoñañe, hañozoñañe; i Reòbene, i Gade, i Asere, i Zebolone, i Dane vaho i Naftalý. ¹⁴ Le hipazak' am' ondati' Israele iabio o nte-Levio ami'ty hoe:

¹⁵ Afâtse ze ondaty mandranjy saren-drahare tiva am' IEHOVÀ an-tsokitse ndra am-pitranahañañe, an-tsatam-pità-mahimbañañe mampitroatse aze an-kàfitse ao. Le ty hoe ty hatoi' ondaty iabio: Ie zay*.

¹⁶ Afâtse ze mañavasoke rae naho rene.

Le hene hanao ty hoe ondatio: Ie zay.

¹⁷ Afâtse ze mameve †vorovoro'ondaty.

Le hene hanao ty hoe ondatio: Ie zay.

¹⁸ Afâtse ty mampiolake ty goa amy lia'ey.

Le hene hanao ty hoe ondatio: Ie zay.

¹⁹ Afâtse ty mañola-jaka amy renetaney naho amy bode-raey vaho amy vantotsey.

Le hene hanao ty hoe ondatio: Ie zay.

²⁰ Afâtse ty mifandiatihy ami'ty valin-drae'e; ie mañafake ty kitambendrae'e.

Le hene hanao ty hoe ondatio: Ie zay.

²¹ Afâtse ze misahe ndra biby inoñ' inoñe.

Le hene hanao ty hoe ondatio: Ie zay.

²² Afâtse ze miolotse ami'ty rahavave'e, ke anan-drae'e he anan-drene'e.

Le hene hanao ty hoe ondatio: Ie zay.

²³ Afâtse ze mitrao sarimbo ami'ty rafoza-ampela'e.

Le hene hanao ty hoe ondatio: Ie zay.

²⁴ Afâtse ze mitombo-tambioñañe aman-drañe'e.

Le hene hanao ty hoe ondatio: Ie zay.

²⁵ Afâtse ze mandrambe tambe hanjevoñe ty vañoñe.

Le hene hanao ty hoe ondatio: Ie zay.

²⁶ Afâtse ze tsy miantoke o hene enta' ty Hake toio hañorik' aze. Le hanao ty hoe iaby ondatio: Ie zay

28

¹ Aa ie amy zao, naho janjiñe'o ty fiarañanaña' IEHOVÀ Andrianañahare'o hañorike vaho hanao ze hene lili'e lilieko azo androany le honjone' IEHOVÀ Andrianañahare'o ambone' ze hene foko' ty tane toy.

² Le hitotsak' ama'o o fitahiañe rezao, toe hivotrak' ama'o naho haoñe'o t'IEHOVÀ Andrianañahare'o.

³ Ho tahie'e an-drova ao rehe, le ho tahie'e an-tonda ao.

⁴ Ho tahie'e ty vokam-pañova'o, naho ty voka' ty tane'o, naho ty voka' o hare'oo, ty fibodobodoa' o añombe'oo, naho ty fitomboa' o anak' añondri'oo.

* ^{27:15} Amene: Ie zay † ^{27:17} Famantarañ'efe-tane

⁵ Ho tahie'e ty zahe'o naho ty akalam-bokoboko'o. ⁶ Ho tahie'e ty fiziliha'o naho ho tahie'e ty fiengà'o.

⁷ Hampizevoñe' IEHOVÀ añatrefa'o eo ze rafelahi'o hitroatse haname azo; hiboahe'e an-koe, le mb'an-dalam-pito mb'eo ty hitribaña'e an-day.

⁸ Handily fitahiañe ama'o t'IEHOVÀ, an-driha'o ao naho amy ze hene toloñem-pità'o, le ho tahie'e rehe an-tane atolo' IEHOVÀ Andrianañahare'o azo.

⁹ Ho ventè' IEHOVÀ t'ie ondati'e miavake, amy nifantà'e ama'oy naho ambena'o o lili' IEHOVÀ Andrianañahare'oo vaho añaveloa'o o lala'eo.

¹⁰ Ho oni' ze kila ondati' ty tane toy t'ie kanjieñe amy tahina' IEHOVÀ vaho hañeveña' iareo.

¹¹ Hampiraoraoe' IEHOVÀ o havokara'oo, ty vokam-pañova'o, naho ty fitomboa' o añombe'oo naho ty havokara' ty tete'o amy tane nifantà' IEHOVÀ an-droae'o hatolo'e azoy. ¹² Ho sokafe' IEHOVÀ ama'o o riha'e fanjàkao: hampahavia' i likerañey orañe an-tane'o eo an-tsa'e, le ho tahie'e ze hene fitoloñam-pità'o.

Le hampisongo rofoko maro rehe fa tsy hisongo. ¹³ Hanoe' IEHOVÀ lohà'e rehe fa tsy voli'e; le ho ambone avao rehe fa tsy ho ambane, naho tsatsihe'o o lili' IEHOVÀ Andrianañahare'o lilieko androanio naho hanoe'o an-tsontèñeñe ¹⁴ naho tsy hivik' ami'ty tsara inoñ' inoñe lilieko anito, mb'am-pitàn-kavana, ndra mb'ankavia hañorike 'ndrahare hafa hitoroña'o.

¹⁵ Fe ho avy ama'o, naho tsy haoñe'o ty fiarañanaña' IEHOVÀ Andrianañahare'o hambena'o naho hanoe'o o lili'eo naho o fañè'e lilieko azo androanio; eka hifetsak' ama'o vaho hiambotraha' o fonga fatse rezao:

¹⁶ Hafâtse rehe te an-drova vaho hafâtse te an-tetek' ao.

¹⁷ Hafâtse ty haro'o naho ty akala fampibokobokoa'o mofo.

¹⁸ Hafâtse ty vokam-pañova'o naho ty voka' ty tane'o naho ty fitombo' o hare'oo vaho o anak'añondrio'oo.

¹⁹ Hafâtse t'ie mimoake vaho hafâtse te miavotse.

²⁰ Haobo' IEHOVÀ ama'o ty ozoñe, ty hasalarañe, naho ty endake, amy ze toloñem-pità'o iaby am-para' te rotsake, hikoromaha'o aniany, ty amo halòn-tseren-tsata'oo, ty amy niamboho'o ahiy.

²¹ Hapite' IEHOVÀ ama'o ty angorosy am-para' t'ie nabotse'e an-tane imoaha'o ho tavane'o aña.

²² Haretса' IEHOVÀ ama'o ty hiehie, ty firemboremboañe, ty sandri-mena, ty hatsovovohañe, ty fibara, ty mpikoli'e, ty bobongolo, hañoridañe azo am-para' t'ie mongotse.

²³ Ho torisike i likerañe ambonen' aña' ambone'o eiy vaho ho viñe ty tane ambane'o eo.

²⁴ Hampinjarè' IEHOVÀ bo naho debole ty orañ' an-tane'o; boak' andikerañe ty hiavia'e am-para' te mianto rehe.

²⁵ Hampigiohe' IEHOVÀ rehe añatrefa' o rafelahi'oo, hiavotse mb' andalañe raike rehe hañoridañe iareo, f'ie hivoratsake mb'an-dalam-pito aolo' iareo mb'eo, le ho fangebakebahañe amo fonga fifehea' ty tane toio.

²⁶ Ho fihina' o fonga voron-tiokeo ty fate'o, naho o biby an-kivok' ao le tsy eo ty hanao soike.

²⁷ Hapao' IEHOVÀ ama'o ty bae-tovoa' i Mitsraime, naho ty bohìñe naho ty hèteñe vaho ty hìly tsy mete janganeñe.

²⁸ Ho kabohé' IEHOVÀ hadagolañe naho hagoan-drehe vaho hatsiboro-hetohan' stroke. ²⁹ Hitsapatsapa an-tsingilingiliñeñe rehe manahake ty fijebujebea' ty tòfak' an-kamoromoroña'e ao, le tsy hiraorao amo sata'oo, f'ie ho forekekeñe naho ho tavaneñe avao fa pitso-pandrombake. ³⁰ Hifofo

valy rehe f'ie hiolora' ondaty; hañoren-traño f'ie tsy himoneña'o, hambole tetem-bahe fe tsy ho toloñe'o o valobo'eo. ³¹ Ho lentàñe aolom-pihaino'o eo ty vosi'o f'ie tsy hikama'o, ho tavaneñe añatrefan-dahara'o eo ty borike'o fa tsy himpoly ama'o; hatolotse an-drafelahi'o o añondri'oo le tsy eo ty handrombake. ³² Hatolotse ami'ty foko ila'e o anadahi'oo naho o anak' ampela'oo le ho jilojiloem-pihaino'o lomoñandro iareo f'ie hilesa, vaho ho po-kaozarañe ty fità'o. ³³ Habotsem-poko tsy fohi'o ze fonga havokara' o tane'oo naho ze hene fitoloña'o naho hampisoñañe vaho ho demodemoheñe nainai'e, ³⁴ le ho seretse rehe am-pahaisaham-pihaino'o ty amo ho isa'oo.

³⁵ Ho paohe' IEHOVÀ an-kòna tsy lefe melañeñe ty ongo'o naho kitso'o, toe boak' an-dela-pandia'o pak'an-kevo'o eo.

³⁶ Hasese' IEHOVÀ mb'am-pifeheañe tsy nifohi'o, ihe ndra o roae'oo, rekets' i mpanjaka najado'o ho mpifelek' azoy; vaho aña ty hitoroña'o ty ndrahare ila'e: hatae naho vato. ³⁷ Le ho firevendreveñan-drehe, ho razan-drehake naho fañonjira' ze hene foko hitehafa' IEHOVÀ azo aña.

³⁸ Hilogologo tabiry mb' an-tetek' ao rehe fe tsy ampeampe ty hatonto'o an-driha, fa habotse' ty valala. ³⁹ Hambole naho hañalahala tetem-bahe, fe tsy hinome'o ty divai'e, tsy hatonto'o o valobo'eo fa havorembore' ty oletse. ⁴⁰ Ho tsitsihen-katae olive ty tane'o fa ihe tsy hihoso-menake, amy te hihintsam-boa o hatae oliveo. ⁴¹ Hitoly ana-dahy naho anak'ampela fa tsy ho ama'o, homb' am-pandrohizañe aña iereo. ⁴² Fonga ho tavane' o valalao o hatae'oo naho ty voka' o tane'oo. ⁴³ Hitoabotoabotse ambone'o ty renetane ama'o ao, ihe mirèke mañambane avao. ⁴⁴ Hampisongo ama'o re, fa ihe tsy hampisongo ama'e, ie ty ho lohà'e le ihe ty ho ohi'e.

⁴⁵ Hifetsak' ama'o i fàtse rezay naho hiridarida hanjòmotse azo ampara' t'ie rotsake, amy te tsy nihaõne'o ty fiarañanaña' IEHOVÀ Andrianañahare'o, tsy nambena'o o lili'e naho fañè'e nandilia'e azoo.

⁴⁶ Le ho viloñe naho halatsañe ama'o naho amo tarira'oo nainai'e kitro katroke irezay; ⁴⁷ amy t'ie tsy nitorioñe IEHOVÀ Andrianañahare'o am-pirebehañe naho an-kafalean' arofo'o ty amo fitobahan-kavokarañe iabio.

⁴⁸ Aa le ho toroñe'o ty rafelahi'o nampañoridañe' IEHOVÀ ama'o, an-kasalikoañe, an-taliñiereñe, am-pihaloañe naho an-kararahañe vaho hanampeza'e joka vy ty fititia'o am-para te rotsake.

⁴⁹ Hendese' IEHOVÀ hirik' an-tsietoitane, boak' añ'olo-ty tane toy aña, manahake ty fitsirtsion-tsimalaho; ty foko tsy fohi'o fisontsy; ⁵⁰ t'indaty mihelok' an-tarehe'e, tsy mañaoñe ondaty bey, tsy miferenaiñe ty kede.

⁵¹ Mbore habotse'e ty tiri' o añombe'oo, naho ty havokara' ty tane'o ampara' t'ie rotsake; tsy hapo'e ty tsako, ty divai-vao, ty menake, vaho ty fitomboa' o bibi'oo naho o anan-dia-rai'oo ampara' t'ie nampimomohe'e.

⁵² Le hiarikoboña'e o fonga rova'oo ampara' te mihotrake o kijoli-abo niatoa'o an-tane'oo; vaho hamalañ' azo re an-dalam-bein-drova'o iaby, hanitsike i tane' natolo' IEHOVÀ Andrianañahare'o azoy. ⁵³ Le ho kamae'o ty vokam-pañova'o, ty nofo' o ana-dahi'o naho o anak'ampela'o natolo' IEHOVÀ Andrianañahare'o azoo, amy fiarikoboñañey naho amy haemberañe hanotria' o rafelahi'oo. ⁵⁴ Handofiry aman-drolongo'e naho ami'ty vali'e aña' araña'e eo naho amo amory honka'eo ty fihaino' ondaty tsotra naho mora-arofo ama' areo ao, ⁵⁵ amy ty fatiti'e tsy hanisa am' iareo ty nofon' ana'e ho kamae'e; ami'ty hapoi'e amy haemberañe hanotria' o rafelahi'eo aze an-drova'o ao iabiy. ⁵⁶ Le ty rakemba maleme naho tretrañe ama'o ao i tsy mahavany handia tane an-delam-pandia'e ami'ty

hatretra'e naho ami'ty fitrotrotrotra'e ro hanao fihaino mena amy valin' araña'ey naho ami'ty ana-dahi'e naho ami'ty anak'ampela'e,⁵⁷ naho ami'ty enta'e miboak' añivom-pandia'eo, naho amo anake ho samahe'eo, amy t'ie ho kamae'e añ'etake ami'ty hapoi'e amy fiarikoboñañey naho amy fanjira' i rafelahi'oiy, ie hembera'e amo fonga rova'oo.

⁵⁸ Aa naho tsy hene ambena'o hanoeñe ze enta'i Tsara sinokitse ami'ty boke toiy, hañeveña'o i tahinañe rengène naho mampañeveñey, IEHOVÀ Andrianañahare'o;⁵⁹ le hafetsa' IEHOVÀ ama'o ty angorosy mahadaba, naho ty hatarareañe o tiri'oo, naho rare raty mitoboke ela, vaho ho tokoen-kasilofañe manaentaeña nainai'e.⁶⁰ Mbore hampifetsahe'e ama'o ze fonga arete' i Mitsraime nihembaña'oo, le hapiteke ama'o.⁶¹ Le hapo' IEHOVÀ ama'o ka ze arete aman' angorosy tsy sinokitse ami'ty Boke Hake toy ampara' te hikoromake.⁶² Le hengañe tsy ampeampe rehe, ihe nifamorohotse mira amo vasian-dikerañe taolo, amy te tsy nihaoñe'o ty fiarañanaña' IEHOVÀ Andrianañahare'o.

⁶³ Ie amy zay, hambañe ami'ty nirebeha' IEHOVÀ ama'o, hañaso'a'e azo naho hampamorohota'e, ro hirebeha' IEHOVÀ ami'ty fandrotsaha'e, naho ty hampamongora'e azo, ie ho karohe'e amy tane nandena'o nitavane'oy.

⁶⁴ Le hampiparaitahe' IEHOVÀ amo hene foko' ty tane toio, boak' añ'olo'e aña sikal' aña'olots' ila'e aña, le hitoron-drahare ankafaankafa aña ze mboe lia'e tsy nifohi'o ndra o rae'oo: hatae naho vato.⁶⁵ Le tsy hierañerañe amy tane rezay rehe, naho tsy hahatrea fitofañe ao ty lelam-pandia'o; f'ie ho tolora' IEHOVÀ arofo mihitikitike naho fihaino milesa vaho fivetsevetse mioremèñe.⁶⁶ Hiradorado am-pimarimarihañe aolo'o eo ty fiai'o le hampirevendreveñe azo ty tariñ' andro naho ty haleñe le ho po-kazavàñ' arofo ty ami'ty fiai'o.⁶⁷ Hanao ty hoe rehe te maraindray: Ee any t'ie nihariva, naho an-kariva, ty hoe, Ehe t'ie nimaraindraiñe! ty amy fihembañañ' arofo'oy, amy inevenevera'oy, naho ty amo isahem-pihaino'o ho isa'oo.

⁶⁸ Le hampolie' IEHOVÀ mb'e Mitsraime an-tsambo, amy lalañe nitarnéko azoy te: Tsy handena'o ka! aña rehe ro handeta sandriñe andrafelahi'o h'ondevo-lahy naho ondevo-ampela, fe tsy eo ty hikalo azo.

⁶⁹ Zao ty tsaram-pañina nampanoe' IEHOVÀ i Mosè amo ana' Israeleo an-tane Moabe ao ho tovo' i fañina nanoe'e am'iereo e Korebey.

29

¹ Le kinoi'i Mosè t'Israele iaby vaho nanoe'e ty hoe, Fa niisa' areo ze hene fitoloña' IEHOVÀ aña'trefam-pihaino' areo an-tane Mitsraime ao amy Parò naho amo fonga mpitoro'eo vaho amy hene tane'ey.² O fitsohañe ra'elahy niisam-pihaino'oo, naho o viloñe vaho o halatsàñeo.

³ F'ie mboe tsy tinolo' IEHOVÀ arofo mahaoniñe, ndra fihaino mahaisake, ndra ravembia mahajanjiñe pake henanekeo.⁴ Mbore niaoloako efapolo taoñe am-patrambey ao, le tsy nikoneats' ama' areo o saro' areoo, vaho tsy nihahambo am-pandia'o eo ty hana'o.⁵ Tsy nikama mofo nahareo, tsy nikama divay ndra toake, hahafohina' areo te Zaho IEHOVÀ Andrianañahare' areo.

⁶ Ie nivotrak' an-toetse atoy, le naname antika t'i Sikone mpanjaka' i Khesbone, naho i Oge mpanjaka' i Basane hifañotakotak' aman-tika f'ie kinabokabon-tika.⁷ Le rinamben-tika ty tane' iareo naho natolotse ho lovae' o nte-Reòbeneo naho o nte-Gadeo vaho i vakim-pifokoa' i Menasèy.

⁸ Ambeno arè o tsara' ty fañina toio, vaho ano, soa te hiraorao amy ze hene fitoloña' areo.

⁹ Mijohañe androany, inahareo iaby, añatrefa' IEHOVÀ Andrianañahare' areo; o mpiaolo' areoo, o fifokoa' areoo, o androanavi' areoo, o mpifehe' areoo, naho ze hene lahilahi' Israele, ¹⁰ o amori' areoo, o vali' areoo, ty renetane an-tobe'o ao, ty mpañatsa-katae'o, vaho ty mpitari-drano'o, ¹¹ soa te hifañina am' IEHOVÀ Andrianañahare'o naho ami'ty fanitik' anoe' IEHOVÀ Andrianañahare'o ama'o androany; ¹² fa horiza'e h'ondati'e anito, le ie ty ho Andrianañahare'o, amy nitsarae'e ama'oy, naho nifantà'e amandroae'o, amy Avrahame, naho am' Ietsàke, vaho am' Iakobey.

¹³ Tsy ihe avao ty anoako ty fañina toy naho ty titike toy, ¹⁴ fa o mi-haro mijohañe aman-tika etoañe añatrefa' IEHOVÀ Andrianañaharentika androanio, naho o tsy aman-tika etoañe androanio ka. ¹⁵ (Amy te fohi' areo i nitaveañantika e Mitsraimey; naho ty firangan-tika o rofoko nitsaha' areoo, ¹⁶ naho niisa' areo ty hativa'e, naho o sareñ-drahare an-katae naho am-bato naho am-bolafoty vaho am-bolamenao.) ¹⁷ Kera ama' areo t'indaty ndra rakemba ndra hasavereñañe ndra fifokoañe hi-amboho am'IEHOVÀ Andrianañaharentika aña'rofo'e androany handenà'e hañorike i 'ndraharen-drofoko zay; hera ama' areo ty vahatse mampitiry mañendrake ndra lombiry; ¹⁸ le ie mahajanjiñe o tsara' ty fatse toio, ro hiebotse an-tro'e ao, hanao ty hoe, Hierañeran-draho ndra te mandeha an-kagàn-stroke, soa t'ie ndra tane maike ro hahazo leñe añivo o tane soa tondra-drano. ¹⁹ Tsy ho satri' IEHOVÀ ty hiheve aze, te mone ty haviñera' IEHOVÀ naho ty famarahia'e ro hiforoforo am' indatiy, hametsaha' ze fonga fatse sinokitse ami'ty boke toy, vaho ho faopaohe' IEHOVÀ ambane' i likerañey ty tahina'e. ²⁰ Ie havì' IEHOVÀ amo hene fifokoa' Israeleo ho an-doza ty amo fonga ozo' i fañina sinokitse ami'ty Boke Hake toio. ²¹ Ie aña, homb'eo o tariratse hanonjohio, o ana'oo, mitraok' ami'ty ambahiny handoak' atoy hirik' an-tsietoitane aña, le ie isa' iareo ty angorosi' i taney naho o areteñe nanilofa' IEHOVÀ ama'eo ro hanao ty hoe, ²² Fonga vato-tranake naho sira, naho fiforehetañe o taneo: tsy tinongy, tsy mamoa, tsy itirian' ahetsé, manahake ty fandrotsahañe i Sedome naho i Amorà, i Admà naho i Tseboime ty nandrotsaha' IEHOVÀ iareo an-kaviñera'e naho am-piloroloroa'e; ²³ le hanao ty hoe o hene fifeheañeo: Aa vaho ino ty nanoe' IEHOVÀ ty tane toy? Akore ty hamoroforoa' ty haviñerañe ra'elahy toy? ²⁴ eo ty hanoiñe ty hoe: Toe ie nifary ty fañina' IEHOVÀ Andrianañaharentroae' iareo, i nanoe'e amy nampiengà'e an-tane Mitsraimey; ²⁵ naho nimb' amo ndrahare ila'eo, nitoroñe irezay, ndrahare tsy nifohi' iareoo vaho tsy natolo'e am'iareo. ²⁶ Toly ndra nisolebotse amo taneo ty haviñera' IEHOVÀ hametsaha'e ama'e ze fonga fatse sinokitse ami'ty boke toy. ²⁷ Le nombota' IEHOVÀ an-keloke naho an-kaviñerañe vaho am-pifomboañe antane' iareo ao vaho sinoi'e mb'an-tane hafa aña am-para-henaneo.

²⁸ A IEHOVÀ Andrianañaharentika o raha mietakeo le an-tikañe naho amo anan-tikañe nainai'eo o raha naboakeo, soa te hanoentika o hene enta' ty Hake toio.

30

¹ Aa naho fa nifetsak' ama'o i he'e rezay, ty tata naho ty fatse napoko añatrefa'o, naho ho tiahi'o an-stroke ao, amo hene tane nandroaha' IEHOVÀ Andrianañahare'o azoo, ² naho ie mimpoly mb' am' IEHOVÀ Andrianañahare'o, vaho horihe'o i fiarañanaña'ey, o raha iaby lilieko azo androanio, ihe naho o keleia'oo, an-kaampon' arofo vaho an-kaliforam-paño, ³ le hafote' IEHOVÀ Andrianañahare'o ama'o i fandrophizañey ho

fitretrezañe, le hibalike hanontoñe azo amo rofoko iaby nampiparaitahe' IEHOVÀ Andrianañahare'oo. ⁴ Aa ndra te naronje mb'am-para' o likerañeo aña ty ila'o, le hirik' aña ty hangala' IEHOVÀ Andrianañahare'o azo; ⁵ naho hindese' IEHOVÀ Andrianañahare'o mb'an-tane tinavan-droae'o mb'eo le ho lovae'o, naho ho soae'e, vaho hampanaranàhe'e mandikoatse o roae'oo. ⁶ Le ho savare' IEHOVÀ Andrianañahare'o ty arofo'o naho ty arofo' o tiri'oo, hikokoa'o t'IEHOVÀ Andrianañahare'o an-kaampon' arofo'o naho an-kaliforam-pañova'o soa te ho velon-drehe.

⁷ Le hafetsa' IEHOVÀ Andrianañahare'o amo rafelahi'oo naho amo malaim-bintañe azoo vaho amo nanao sarererak' azoo o fatse iaby retiañe. ⁸ Le hibalike rehe vaho ho haoñe'o ty fiarañanaña' IEHOVÀ, le hene horihe'o o tsara lylieko azo androanio. ⁹ Le hampiraoraoe' IEHOVÀ Andrianañahare'o amy ze fitoloñam-pitá'o iaby, ami' ty tirim-pañòva'o, naho ami' ty fanaranaha' o añombe'oo naho ami'ty voka' ty tane'o, ho ami'ty hasoa; amy te hirebeha' IEHOVÀ indraike manahake ty nandia'e taroba amo roae'o; ¹⁰ naho toe tsendreñe'o ty fiarañanaña' IEHOVÀ Andrianañahare'o, hañambeñe o lili'e naho fañè'e sinokitse ami'ty boke Hake toio, hitolike am'IEHOVÀ Andrianañahare'o an-kaampon'arofo'o vaho an-kaliforam-pañova'o.

¹¹ Le tsy loho sarotse, tsy lavitse' aña, ty lily lylieko azo androany. ¹² Ie tsy andikerañe aña hanoa'o ty hoe: Ia ty hionjoñe mb'andindim-b'eo hangalak' aze ho antika, hijanjiñan-tika, hambenan-tika? ¹³ Toe tsy alafe' i riakey aña te hanoe'o ty hoe, Ia ty hitsake i riakey hangalak' aze ho antika, hijanjiñan-tika hañorihan-tika? ¹⁴ Fe marine azo i tsaray, am-palie'o, naho aña'arofo'o, hañoriha'o aze.

¹⁵ Ingo apoko añatrefa'o androany ty haveloñe naho ty hasoa, ty fihomahañe vaho ty hankàñe. ¹⁶ Ami'ty andiliako azo androany ty hikokoa'o t'IEHOVÀ Andrianañahare'o: ty hañaveloa'o o lala'eo, ty hambena'o o lili'eo naho o fañè'eo naho o fepe'eo, soa t'ie ho veloñe naho hanaranake vaho hitahy azo amy tane andena'o ho tavane'oy t'IEHOVÀ Andrianañahare'o. ¹⁷ Fa naho mitolike ty arofo'o tsy hijanjiñe, ie hisitake hitalaho amo ndrahare ila'eo, hitoroñe iereo; ¹⁸ le taroñeko ama'o androany t'ie toe hihomake, tsy ho lava-haveloñe amy tane itsaha'o Iardeney hionjona'o mb'eo hitavana'o azey.

¹⁹ Aa le koiheko henaneo te ho valolombeloñe hanisý anahareo i likerañey naho ty tane toy naho apoko añatrefa' areo ty haveloñe naho ty fihomahañe, ty tata naho ty fatse; aa le joboño ty haveloñe, soa te ho velon-drehe naho o tarira'oo; ²⁰ kokò t'IEHOVÀ Andrianañahare'o, tsatsiho i fiarañanaña'ey, hipiteha'o, fa zay ro havelo'o naho halava-havelo'o, soa te himoneña'o i tane nifantà' IEHOVÀ aman-droae'o, amy Avrahame naho Ietsàke vaho Iakobe, hatolo'e iareoy.

31

¹ Nimb'eo amy zao t'i Mosè, ninday o saontsy zao am' Israele iaby. ² Le hoe re am' iareo, Zato tsy roapolo taoñe androany raho; aa tsy lefeko ka ty miakatse naho ty mimoake; vaho fa nanoe' IEHOVÀ ty hoe: Tsy hitsake Iardeney rehe. ³ IEHOVÀ Andrianañahare'o ty hitsak' aolo, ie ro handrotsake o rofoko iabio añatrefa'o, le ihe ty hitavañe iareo ho fanaña'o; vaho Iehosoa ty hitsak' aolo amy tsinara' IEHOVÀ. ⁴ Le hanoe' IEHOVÀ am' iereo hambañe amy nanoe'e amy Sihone naho i Oge mpanjaka' o nte-Amoreo vaho amo tane' iareoo, ie nandrotsak' iareo. ⁵ Le hasese' IEHOVÀ ama' areo, vaho hanoe' areo ama'e ze hene lily nandiliako. ⁶ Aa

le mihaozara, naho mavitriha, ko mihakahaka naho ko ihembaña'o amy te hindre ama'o t'IEHOVÀ Andrianañahare'o, tsy hado'e rehe vaho tsy haforintse'e.

⁷ Kinoi' i Mosè t'Iehosoa vaho nanoe'e ty hoe am-pahaisaha' Israele iaby: Mihaftara naho mahasibeha, amy te tsy mete tsy hindreza'o lia ondaty retiañe mb'an-tane nifantà' IEHOVÀ aman-droae' iareo hatolo'e iareo, le ihe ty hampandova iareo aze. ⁸ Hiaolo azo t'IEHOVÀ; ie ty hindre ama'o, tsy hilesa ama'o, naho tsy ho farie'e, aa le ko hemban-drehe, ko miroreke.

⁹ Sinoki' i Mosè ty Hake toy le natolo'e amo mpisoroñe nte-Levy mpinday i vatam-pañina' IEHOVÀio, vaho amo hene androanavi' Israeleo. ¹⁰ Le hoe ty nandilia' i Mosè am'iareo, ie peake ze taom-paha-fito, amy andro namantañañe amy taom-pamotsorañeiy, amy sabadidan-tsokemitrahay, ¹¹ ie miheo mb' añatrefa' IEHOVÀ Andrianañahare'oy mb'amy toetse ho joboñe'ey mb'eo t'Israele iaby, le ho vakie'o añatrefa' Israele iaby am-pijanjiña' iareo ty Hake toy. ¹² Atontono ondatio, o lahilahio naho o rakembao naho o keleiañe naho i renetane an-drova'oy, hijanjiña' iareo, handrendreke naho hañeveñe am' IEHOVÀ Andrianañahare' areo vaho hene hambena' iareo orike o enta' ty Hake toio. ¹³ Le hitsanoñe naho hioha' o amori' iareo mboe tsy mahilalao ty hañeveñe am' IEHOVÀ Andrianañahare' areo, amo andro iaby hiveloma' areo an-tane hitsaha' areo Iardeney hitavana' areoo.

¹⁴ Le hoe t'IEHOVÀ amy Mosè: Ingo, mitotoke ty andro tsy mete tsy hivetraha'o; kanjio t'Iehosoa vaho miatrefa amy kibohom-pamantañañey nahareo hamantohako aze. Aa le nimb'eo t'i Mosè naho Iehosoa, niatreke i kibohom-pivoriy; ¹⁵ le niboak' amy kivohoy t'IEHOVÀ am-po' ty rahoñe mioala ao, le nijohañe ambone' i lalan-kibohom-pamantañañey i rahoñe mioalay.

¹⁶ Le hoe t'IEHOVÀ amy Mosè: Ingo, hitrao-pihity aman-droae'o ao rehe fe hiongake hañarapilo aman-drahare ankafankafa' i taney ondaty retiañe, ie homb'eo hiharo am' iereo ao, naho hienga ahy vaho hifotetse amy fañinako nanoeko am' iereoy. ¹⁷ Le hisolebotse am'iereo amy andro zay ty habosehako, le haforintseko, vaho haetako am'iereo ty tareheko; havoremboreñe iereo, hisamboria' ty hekoheko naho ty hankàñe maro, soa te hanao ty hoe iereo amy andro zay: Hera, ie tsy mindre aman-tika t'i Andrianañaharentika, ty mampidoñe o hankàñe aman-tikañe? ¹⁸ Fe toe haetako amy andro zay ty tareheko amo fonga haleorañe nanoe' iereo ami'ty fitoliha' iareo mb'an-drahare ila'eo.

¹⁹ Aa le sokiro ho anahareo ty sabo toy vaho anaro o ana-Israeleo: ajoño am-palie' iareo ao soa te ho valolombeloko hanisiañe o ana' Israeleo ty sabo toy. ²⁰ Amy te, ie fa naseseko mb'an-tane nifantàko aman-droae'e mb'eo, i orikorihen-dronono naho tanteley; le ie fa nikama naho ànjañe mbore fa sometsètse le hitolik' aman' drahare ila'e, hitoroñe iareo naho hañinje ahy, vaho hifotetse amy fañinakoy. ²¹ Ie amy zay, naho fa nañangaran-kankàñe naho hekoheko, le hitaron-tsisý am' iareo ty sabo toy ho valolombeloñe; (amy te tsy handikofa' ty falie' o tarira' iareoo), fa apotako ty fikililian-tro' iareo ie mikitrok' ama'e ao henanekeo, aolo' ty aneseako iareo an-tane nifantàkoy.

²² Aa le sinoki' i Mosè amy andro zay ty sabo toy, vaho nanare'e o ana' Israeleo. ²³ Le nafanto'e am' Iehosoa ana' i None ty hoe: Mihaftara naho mahasibeha amy te ihe ro hinday o ana'Israeleo mb'an-tane nifantàko am' iareo mb'eo vaho hañimb'azo raho.

²⁴ Aa ie nifonire' i Mosè ty nanokire'e am-boke o enta' ty Hake toio t'ie nigadoñe, ²⁵ le nililie' i Mosè o nte-Levy mpitarazo i vatam-pañina' IEHOVÀIO ty hoe: ²⁶ Rambeso ty Boke Hake toy vaho apoho añ'ila' i vatam-pañina' IEHOVÀ Andrianañahare' areoy ao, soa t'ie ho valolombeloñe ama'o. ²⁷ Amy te fantako ty fiolà'o, naho ty hagàm-pititia'o; heheke, ndra te zaho veloñe ama' areo atoy henanekeo, le fa miola am' IEHOVÀ nahareo, àntsake t'ie fa nikenkañe. ²⁸ Atontono amako ze hene androanavim-pifokoa' areo naho o mpifehe' areoo, ho taroñeko an-dravembia' iareo ao o tsara retiañe hikanjiako i likerañey naho ty tane toy hanisý iareo. ²⁹ Amy te apotako t'ie fa nikenkañe le ho vorahé' ty halò-tsereke, naho hivìke amy lalañe linilikò azoy vaho hankàñe ty hizò anahareo amo andro añaeo, ami'ty haratiañe hanoe' areo am-pivazohoa' IEHOVÀ, hikaiha' areo ty haviñera'e ty amo satam-pità' areoo.

³⁰ Aa le nisaontsie' i Mosè an-dravembia' i valobohò' Israelely o tsara' o sabo zao am-para' te nigadoñe. Anokilaño ravembia ry likerañeo, le hivolán-draho;

32

Janjiño ry tane toy o entam-bavakoo.

² Ee te himiamia manahake ty fiavi' i orañey o tarokoo, le hitsopatsopake hoe zono o rehakoo, hambañe ami'ty fimitemiteha'e amo ahetseo naho ty finiziniziha'e amo rongoñe.

³ Fa ho tseizeko ty tahina' IEHOVÀ, onjono ty hara'elahi'

i Andrianañaharen-tikañey.

⁴ I Lamilamiy: Faintane o fitoloña'eo, hene marentane o lala'eo: Andrianañahare migahiñe tsy aman-tahy, vañoñe naho vantañe.

⁵ Fa nanoa'iareo hamengohañe, toe tsy ana'e ty amy hila' iareo, ty tariratse vilañe naho mengoke tia.

⁶ Zay hao ty añavaha' areo am' IEHOVÀ ry dagola, ry ondaty tsi-mahilalao? tsy ie hao ty Rae'o nivily azo?

Tsy ie hao ty nitsene azo, vaho nañoreñ' azo?

⁷ Tiahio o andro haehaeo; haraharao o taon-tariratse tsi-efao, añaontaneo aman-drae'o hanoroa'e, naho aman-androanävi'o hitaroña'iareo.

⁸ Ie zinara' i Andindimoneñey amo rofokoo ty lova' iareo; naho naparaita'e o ana' i Dameo, le nefetsefere'e ty ami'ty ia' o ana' Israeleo.

⁹ Fa anjara' IEHOVÀ ondati'eo; Iakobe ro anjara' lova'e.

¹⁰ Nifanendrek'ama'e an-diolio aña re, am-babangoañe mangoañe mangolalaik' ao; nohoñe'e naho niatrak'aze,

nambena'e hoe t'ie saintem-pihaino'e*.

¹¹ Hoe vantio mitsobore ty traño'e, mihefahefa ambone' o ana'eo,

* 32:10 Zek 2:8

akopakopa'e o ela'eo,
 vaho rambese'e añ'ela'eo,
¹² IEHOVÀ avao ty niaolo aze,
 ie tsy ama'ndrahare ila'e.
¹³ Nampijoñe'e ambonen-kaboa'
 ty tane toy,
 le nihinana'e ty voka' o tetekeo;
 nampininihe'e tantele an-tevañe ao,
 naho menake am-bato-paik' ao;
¹⁴ Habobon'añombe naho rononon'ose,
 ty safom-bik' añondry,
 le ty kobatron- dia-rain-tirim-Basaneo,
 o ose-lahio reketse
 ty safom-boam-bare-bolè;
 aman-diom-baloboke
 ty ninoma'o divay mamore.
¹⁵ Fe niha-vondrake t'Iesorone†
 le nikambia; niha-vondrake rehe,
 niha-mateve, vaho nisometsètse;
 napo'e t'i Andrianañahare nitsene aze,
 namoea'e i Lamilamim-pandrombahañ'azey.
¹⁶ Nitrabihe' iareo, hamarahia'e
 o 'ndrahare ila'eo,
 nanikisiky aze an-draha tiva.
¹⁷ Nisoroña' iereo amo kokolampao,
 amo ndrahare ts'i'eo
 'ndrahare tsy nifohi' iareo,
 'ndrahare vaho niboak' aniany
 tsy nampañeveñe an-droae' areo.
¹⁸ Namoea'o ty Lamilamy nampiareñe azo,
 nandikofa'o t'i Andrianañahare niolakolak' am-pitsongoañe azo.
¹⁹ Ie nivazohoe' IEHOVÀ, le niamboho'a'e,
 ami'ty fanigiha' o ana-dahi'eo
 naho o anak'ampela'eo.
²⁰ Le hoe re: Haetako am' iereo ty tareheko,
 ho treako ty fimodoa' iareo,
 fa tariratse mengoke, ajaja tsy atokisañe.
²¹ Nampamarahy ahiko iereo,
 amo 'ndrahare tsie'eo;
 sigi' iareo amo sampsampon-drahaao ty habosehako
 aa le hampamarahieko ondati-tsie iereo;
 hampisigiheko foko mengoke.
²² Afo misolebotse ty an-doakoroko ao,
 mamorototo pak' an-tsikeokeom-paha-sive ao,
 ampangotomomohe'e ty tane toy
 naho o vorohota'eo,
 ampirehete'e o faham-bohitseo.
²³ Hañoboñako hekoheko,
 Ho kapaiheko am' iereo o ana-palekoo.
²⁴ Ho sihe' ty halimpoañe iereo,
 habotse' ty lel-afó;
 naho ty harotsahañe mafaitse.

† 32:15 Iesorone: Tahina rai' Israely

Hirahoko ama'e ty famotsim-biby,
ty vorehe' o milaly an-debokeo.

²⁵ Hampandala ty fibara o alafe'eo,
firevendreveñañe ty añate ao
songa zamane'e ty ajalahy
naho ty tomoenono, ty anak'ajaja,
vaho ty androanavy ama-maroi-foty.

²⁶ Nataoko ho nampimodoeko,
vaho ho najihoko am'ondatio
ty faniahiañe iareo.

²⁷ Fe nimahimahiñeko
ty fiforoforon-drafelahi'e,
hera ho hafa hente o malaiñe iareoo,
kera hanao ty hoe:
Ty fità'ay ro abo, fa tsy:
IEHOVÀ ty nanao ie iaby zao.

²⁸ Fifeheañe po-anatse iereo,
toe ondaty po-faharendrehañe.

²⁹ Ee t'ie ho nahihitse,
soa te ho naharendreke,
le ho nitsikarahe'iareo ty figadoña'e.

³⁰ Akore ty hañinjafa' ty raike ty arivo, ty hampivoratsahe' ty roe ty
aman'ale'e, naho tsy naleta' i Lamilami' iareoy, naho tsy IEHOVÀ ty
nanese iereo?

³¹ Toe tsy i Lamilami'aiy ty vato' iareo,
ndra o rafelahi'aio ro mahatsikarake zay.

³² Boak' am-bahe' i Sedome ty vahe' iareo,
boak'an-tete' i Amorà ao;
valòbok' afero ty valòbo' iareo, mafaitse ty angaroza' iareo;

³³ vorem-pañaneñe ty divai' iareo
ty voren-kankàm-pandrefeala.

³⁴ Tsy mihaja amako ao hao zao?
he mihily an-korojiko ao?

³⁵ Ahiko o vale-fateo naho ty avake;
mbe hibolatitse o fandia' iareoo,
fa antitotse ty andron-kankà' iareo,
vaho malisa ty fihelaña' o hifetsak' am'iereo.

³⁶ IEHOVÀ ty hizaka ondati'eo
le hiferenaiña'e o mpitoro'eo
ie vazoho'e te ritse ty haozara'e
naho tsy aman-tsehanga'e,
ke ty mirohy he ty midada;

³⁷ Le hanao ty hoe re:
Aia o ndrahare' iareoo,
i vato niatoa' iareoy?

³⁸ Ia ty nilintseñañe ty safom-pisoroña' iareo,
naho nigenoke ty divain-enga rano'e?
angao hitroatse iereo hañolora'e anahareo.

Apho re ho fitsoloha' iareo.

³⁹ Inao te zaho, zaho avao ro ie,
tsy ama' ndrahare hatovoñ'ahy:
zaho ty mamono, zaho ty mameño;

mandratse raho le mañamelañe;
tsy eo ty mahasintoñe ty an-tañako.

⁴⁰ Aonjoko mb'andikerañe ey ty tañako
manao ty hoe, veloñe nainai'e raho.

⁴¹ Ie sioñeko i fibarako mipelatsey,
naho mandrambe zaka ty tañako;
le ho valeako o rafelahikoo,
vaho hondroheko o malaiñ' Ahikoo.

⁴² Ho mamoeko an-dio o ana-palekoo,
le hamotseke nofotse ty fibarako;
ty lio' o zinamañe o naho o an-drohio;
boak' an-doha miogogo'

o mpiaolo' i rafelahiiio.
⁴³ Ipoñafo sabo ondati'eo, ry kilakila ondaty,
fa ho valea'e fate ty lio' o mpitoro'eo,
le havaha'e an-keloke o rafelahi'eo,
vaho ho jebañe'e ty tane ondati'eo.

⁴⁴ Nimb'eo amy zao t'i Mosè vaho hene nisaontsie'e an-tsabo an-dravembia' ondatio i tsara zay, ie naho Iehosoa ana' i None. ⁴⁵ Aa ie nagado' i Mosè i hene fitaroña'e am' Israele rezay, ⁴⁶ le hoe re am' iereo: Fonga faharo añ' arofo' areo ao ze tsara taroñeko androany, le ampañambeno o amori' areoo o hene enta' ty Hake toio, hañorike ze hene tsara amy Hake ao. ⁴⁷ Ko atao' areo ho tsara kafoake ama' areo, amy t'ie o havelo' areoo, le ama'e ty hahalava andro anahareo amy tane añaveloa' areo ampitsahañe Iardeney hitavana' areoy.

⁴⁸ Le hoe ty nitsara' IEHOVÀ amy Mosè amy andro zay. ⁴⁹ Mañambonea mb'am-bohitse Avarime mb'eo pak' am-bohi-Nebo an-tane' i Moabe tandrife Ieriko aña; le isaho ty tane' Kanàne atoloko amo ana' Israeleo ho fanañañe; ⁵⁰ le mihomaha amy vohitse itroara'oy, hitontona'o am'ondati'oo, hambañe ami'ty nivetraha' i Aharone, rahalahi'o e Hore aña vaho nifanontoñe am'ondati'eo; ⁵¹ amy t'ie nandilatse amako añivo' o ana' Israeleo an-drano' i Meribà-Kadese eo, an-dratraratra' i Zine aña; zaho tsy navahe'o añivo' o ana' Israeleo. ⁵² Ho talake'o eñe i taney, fe tsy homba'o o tane atoloko amo ana' Israeleoo.

33

¹ Intoy ty tata nitata' i Mosè, androanavin' Añahare, o ana' Israeleo aolo'
ty nihomaha'e. ² Hoe re,
Nihiriike Sinay t'IEHOVÀ
nanjirik' am' iereo boak' e Seire, nitsavavake boak'am-Bohi-Parane,
nim'b' atoy mitraok' aman' aleale o noro'eo;
am-pitâ'e havana ty lilin-afô ho a iareo.

³ Eka, kokoa'e ondatio, o masi'e iabio—
le am-pitâ'o iereo
miambesatse am-pandia'o eo,
mininike o tsara'oo,

⁴ Nitaroñe' i Mosè aman' tika ty Hake,
ho lova' ty valobohò' Iakòbe.

⁵ Ie ty ni-mpanjaka' Iesorone,
te nivory ty mpiaolo' ondatio,
rekets' o fifokoa' Israeleo.

⁶ Ee te ho veloñe t'i Reobene
le tsy hihomake,

vaho tsy ho tsi-ampe ondati'eo.

⁷ Le hoe re ty am' Iehoda:

Janjiño ry IEHOVÀ,
ty fiarañanaña' Iehoda,
endeso mb'am' ondati'eo mb'eo.
Hitoloñe aze o fità'eo,
le Ihe ty hañolots'aze amo rafelahi'eo.

⁸ Le hoe re ty amy Levy:

Ee te ho amy Masi'oy
ty Tomime'o naho ty Orime'o;
i niventea'o e Masà naho
nitsohe'o an-drano' i Meribà;

⁹ hoe re ty aman-drae'e naho i rene'e:

'Amoeako.'
tsy nihaõñe'e o roahalahi'eo,
nialik'ama'e o ana'eo;
amy te norihe'e o tsara'oo
vaho nambena'e i fañina'oy.

¹⁰ Hanare' iereo am'Iakobe o lili'oo,
naho am'Israele i Tsara'oy;

le hapo' iareo añatrefa'o eo ty emboke, naho soroñe añoñe an-kitreli'o eo.

¹¹ O ry IEHOVÀ, tahio ty fijangana'e

naho ty fitoloñam-pitá'e,
fofoho am-baniañe o miatreatre azeo,
naho o malaiñe azeo,
tsy hitroara' iareo ka.

¹² Le hoe re ty amy Beniamine,

Himoneñe añ'ilá'e eo am-pierañerañañe
i kokoa' IEHOVÀy;

saroña'e lomoñandro,
ie mimoneñe añivo' o soro'eo.

¹³ Le hoe re ty am' Iosefe:

Ho tahie' IEHOVÀ ty tane'e,
amo vara' fanjàka' i likerañeio, i mikay,
amy laleke mitrokotroko ambane'ey,

¹⁴ naho amo fivokara talango' i àndroio, naho amo lengo'e banabanae' i
volañejo,

¹⁵ naho amo hatsomerentsere' o vohitse haehaeoo,
amo vara fanjàka' o tamboho hatrela'eo;

¹⁶ naho amo harea' ty tane toy

amy halifora'eio,
naho amy fatariha'

i nimoneñe an-drongoñe aoiy,

ho tata ami'ty añ'ambone' Iosefe, ambone' ty añambone' i miambak' amo
roandrian-droahalahi'eo.

¹⁷ Añombelahy ty valohan' ana'e,

volonahetse ty aze;

tsifan-drimo o tsifa'eo,

ama'e ty handronjeronjea'e ondaty iabio sikal'añ'olo-ty tane toy,

ie o aleale' i Efraimeo,

naho o arivo-arivo' i Menasèo.

¹⁸ Le hoe re ty amy Zebolone:

Mirebeha ry Zebolone, amo fionjona'oo

naho ry Isakhare, amo kiboho'oo.

¹⁹ Ho koihe' iareo
homb' amy haboañey mb'eo ondatio,
eo ro hañenga' iareo soron-kavañonañe;
fa ho karae' iareo ty havokara' o riakeo,
naho ty vara mikafitse am-paseñe ao.

²⁰ Le hoe re ty amy Gade,
Soa tata ty mampitratrañake ty a i Gade;
hoe liona ty imoneña'e,
rimite'e ty fitàñe naho ty hevo.

²¹ Rinambe'e ho aze ty anjara valoha'e;
Fa tao ty nañajañe ty anjaram-pandily.
Naho nívory ty mpiaolo' ondatio
le ie ty nitoloñe ty zaka-to' IEHOVÀ,
naho o fepe'eo am' Israele.

²² Le hoe re ty amy Dane,
anan-diona t'i Dane,
mitsamboañe boak'e Basane aña.

²³ Le hoe re ty amy Naftalý,
O Naftalý: Ihe ene-pañisohañeo,
atsake ty fitahia' IEHOVÀ,
lovao i riakey naho ty atimo.

²⁴ Le hoe re ty amy Asere,
soa-tata te amy ze atao anake t'i Asere,
hisohe' o rahalahi'eo;
hajo'e an-tsolk' ao ty fandia'e.

²⁵ Viñe naho torisike ty ho sikada'o,
vaho hañeneke o andro'oo ty haozara'o.

²⁶ Tsy añohatse t'i Andrianañahare,
ry Iesorone,
i miningitse andikerañey hañolora'e,
naho amo rahoñeo am-bolonahé'e.

²⁷ Fitsolohañe t'i Andrianañahare Haehae,
ambane eo o fitàñe nainai'eo.
Hasio'e aolo'o mb'eo o rafelahi'oo
le hanao ty hoe, 'Arotsaho,'

²⁸ Mimoneñe am-bangiñe soa'aro ao t'Israele,
miereñereñe ty rano manganhana' Iakobe, an-tanen-tsako naho divay
vao;

eka, mampitsopatsopa-jono ama'e o andindi'ey.

²⁹ Haha rehe ry Israele,
ia ty mañirinkiriñe azo?
Ondaty rinomba' IEHOVÀ,
ty Fikalan-defo-pañolorañe azo,
naho ty Fibara-pisengea'o,
le hitsilofiñe aolo'o ao o rafelahi'oo,
vaho ho lialià'o iaby o toets-abo' iareoo.

34

Ty Havilasi' i Mosè

¹ Niañambone ty vohi-Nìbo amy zao t'i Mosè, boak' an-tanemira' i
Moabe pak' antiotio' i Pisgà, tandrife Ieriko; vaho natoro' IEHOVÀ aze i

hene taney—boake Gilade pake Dane; ² le i Naftalý iaby, naho ty tane' i Efraime, naho ty a i Menasè, naho ze hene tane' Iehoda pak' amy riak' ahandrefañey ³ naho i Atimoy, naho ty tane pisak' am-bavatane' Ieriko ey, i rovan-tsatrañey pake Tsoare. ⁴ Le hoe t'IEHOVÀ ama'e, Ingo ty tane nifantàko amy Avrahame naho am' Ietsàke naho am' Iakobe ami'ty hoe, Hatoloko amo tarira'oo; nampahaisahako azo am-pihaino'o f'ie tsy hitsake mb'eo.

⁵ Aa le nihomak' an-tane Moabe eo t'i Mosè, mpitoro' IEHOVÀ ami'ty tsara' IEHOVÀ; ⁶ vaho nalente'e am-bavatane an-tane' i Moabe tandrife i Bet'peore ao, fe tsy fohi' ondaty pake henane i kibori'ey.

⁷ Zato-tsi-roapolo-taoñe t'i Mosè te nihorogodoboke, tsy nirombitse o fihaino'eo, vaho tsy niketrake ty haozara'e. ⁸ Nandala aze telo-polo andro an-tanemira' i Moabe eo o ana' Israeleo, am' para' te niritse o andro firovetañe naho fandalàñe.

⁹ Nilifotse ty arofon-kihitse t'Iehosoa ana' i None; ami'ty nanampeza' i Mosè fitàñe, le nitsendreñe aze o ana' Israeleo, vaho nanoe' iareo ze nandilia' IEHOVÀ i Mosè.

¹⁰ Ampara' izay tsy teo ty mpitoky nitroatse e Israele ao nañirinkiriñe i Mosè, ie niarofoana' IEHOVÀ am-piatrefan-daharaña, ¹¹ amo hene vi洛ñe naho raha tsitantane nañiraha' IEHOVÀ aze hanoe'e an-tane Mitsraime ao amy Paro naho amo mpitoro'e iabio vaho amy hene tane'ey; ¹² am-pitâñe ra'elahy an-kaozaraña naho amy fampangetraketrahañe folo'ay naboa' i Mosè am-pahaisaha' o ana' Israele iabioy.

Iehosoa

¹ Ie aña te nihomake t'i Mosè mpitoro' IEHOVÀ, le nitsara am' Iehosoa* ana' i None†, mpitoro' i Mosè, t'IEHOVÀ, ami'ty hoe: ² Fa vilasy t'i Mosè mpitoroko; aa le miengaha, itsaho Iardeney‡, ihe naho ze hene ondaty retiañe, mb' an-tane atoloko iareo, toe ho amo ana' Israeleo; ³ fa natoloko anahareo ze toetse lian-delam-pandia' areo, ty amy asako amy Mosèy. ⁴ Mifototse am-patrambey aña miharo amy Lebanon§ etia, pak' amy saka beiy, i Peratey*, naho ze hene tanen-te-Kete†, pak' amy Riake beiy, mb' amy firoña' i androy añaey ty ho efe-tane' areo.

⁵ Leo raike t'indaty tsy hiongake hiatrek' azo amo hene andro hiveloma'oo; manahake ty nindrezako amy Mosè ty hindrezako ama'o; tsy hilesa ama'o raho, tsy haforintseko ka. ⁶ Mihafatrara vaho mahasibeha; fa ihe ty hampandova ondaty retoañe i tane nifantàko aman-droae' iareo hatoloko iareoy. ⁷ Aa le mihaozara naho mahavania, hañambeñe naho hañorike i Tsara iaby linili' i Mosè mpitoroko azoy; ko mitolike mb' am-pitän-kavana ndra havia, soa te hiraorao ndra aia' aia ty homba'o. ⁸ Tsy hienga am-palie'o ty Boke Hake toy, ie haereñere'o handro naho haleñe, hañambeñe naho hanao ze hene misokitse ao; le hiraorao o sata'oo, vaho haharongatse. ⁹ Aa vaho tsy liniliko hao? Mihafatrara naho mahasibeha; ko hemban-drehe ko miroreke: fa ama'o t'IEHOVÀ Andrianañahare'o ndra aia'aia ty homba'o.

¹⁰ Aa le linili' Iehosoa o mpiaolo' ondatio ami'ty hoe: ¹¹ Mirangà anteñateña' i tobey mb'eo le afantoho ondatio ami'ty hoe: Mañalankaña fivatiañe, fa hitsake Iardeney nahareo añate' ty telo andro, himoak' amy taney, hitavañe ze natolo' IEHOVÀ Andrianañahare' areo ho fanañañe.

¹² Le nisaontsy amo nte-Reobeneo‡ naho amo nte-Gadeo naho amo vakin-te Menasèo t'Iehosoa ami'ty hoe: ¹³ Tiahio i tsara linili' i Mosè mpitoro' IEHOVÀ anahareoy, ami'ty hoe: Manolotse fitofañe ama' areo t'IEHOVÀ Andrianañahare' areo vaho hatolo'e ama' areo o tane atoio. ¹⁴ Hitobok' an-tane natolo' i Mosè anahareo alafe' Iardeney atoy o vali' areoo naho o keleia' areoo naho o añombe' areoo, f'ie hitsak' aolo' o rahalahi' areoo reke-pialiañe, songa fanalolahy maozatse hañolorañe iareo; ¹⁵ ampara' te hampitofa' IEHOVÀ o rahalahi' areoo, manahake ty nanoa'e anahareo, ie fa tinava' iareo ka i tane nitolora' IEHOVÀ Andrianañahare' areo; le himpoly an-tane fanaña' areo atoa nahareo vaho ho tavane' areo i natolo' i Mosè mpitoro' IEHOVÀ anahareo alafe' Iardeney atoa mb'am-panjirihan' andro aña. ¹⁶ Tinoi' iareo ami'ty hoe t'Iehosoa: Hene hanoe'ay ze nandilia'o anay vaho hañaveloa'ay ndra aia aia ty añiraha'o. ¹⁷ Manahake ty nañaoña'ay amy Mosè amy ze he'e, ty hañaoña'ay azo naho indreza' IEHOVÀ Andrianañahare' o hambañe amy nindreza'e amy Mosèy. ¹⁸ Aa ndra ia'ia ty hiola amy andilia'oy, tsy hañaoñe ze hene saontsy amantoha'o aze, le havetrake, f'ihe mihaozara vaho mahasibeha.

* **1:1** Iehosoa: Mpandrombake † **1:1** None: tariratse; fia; nainaie tsy modo ‡ **1:2** Iardene: Sakam-pizakañe § **1:4** Lebanon: rame foyt * **1:4** Perate: Sakabey: mahavokatse; mitotsake † **1:4** Kete: i folakey; i mirevendreveñey ‡ **1:12** Reobene: ty fahaoniñañe i anakey

2

¹ Nirahe'Iehosoa ana' i None, boake Sitime aman' etake ty mpitingañe, ami'ty hoe: Akia, tiliho i taney naho Ierikò. Aa le nienga mb'eo iereo naho nivotrak' añ' anjomba' ty karapilo atao Rakabe, vaho nandre ao. ² Sinaontsy amy mpanjaka' Ierikooy, ty hoe: Inao pok' atoy amo haleñe zao ty boak' amo ana' Israeleo hitsoetsoek' an-tane atoy. ³ Aa le nañirak' amy Rakabe ty mpanjaka' Ieriko, nanao ty hoe: Akaro ondaty nimb'ama'o mb'eoo, o nimoak' an-traño'oo, ie te hifilo an-tane atoy ty niziliha' iareo atoa. ⁴ Fe nendese' i rakembay indaty roe rey naho naeta'e, aa le nanoe'e ty hoe: Eka, nimb' amako atoy ondatio, fa nosiko ty nihirifa' iareo; ⁵ ie amy fandrindriñañe i lalam-beiy naho fa nimaieñe, le niavotse indaty rey; fe tsy apotako ty nomba' indaty rey; horidaño aniany le ho trà' areo. ⁶ Toe nendese'e an-tafo traño vaho naeta'e an-tahon-dène ao, o fa nalafi'e an-tafoo. ⁷ Aa le hinorida' ondatio mb'an-dala' Iardeney mb'eo pak'amo fitsahañe o aña; ie vata'e niènga o nañoridañe, le narindriñe i lalam-beiy. ⁸ Aa ie mbe tsy nandre iareo le nanganike mb' am' iereo an-tafo mb'eo; ⁹ le hoe re am'indaty rey: Fantako te natolo' IEHOVÀ ama' areo o taneo, fa nidok' ama'ay ty firevendreveñañe ama'areo vaho mitsolofiñe aolo' areo ze fonga mpimoneñe an-tane atoy. ¹⁰ Fa jinanji'ay te nimaihe' IEHOVÀ aolo' areo i Ria-Binday, amy niavota' areo amy Mitsaraimey; naho i nanoe' areo amy mpanjaka roe nte-Amore*, alafe' Iardeney aña reiy, i Sihone naho i Oge, ie vata'e narotsa' areo. ¹¹ Ie nahajanjiñe zay le nitranake o tro'aio, leo ondaty raike tsy aman-joton' arofo ty ama' areo amy te toe Andrianañahare andikerañe ambone ao naho an-tane ambane atoy t'IEHOVÀ Andrianañahare' areo. ¹² Aa le miambane ama' areo, mifantà amako añaam' IEHOVÀ, kanao nitretrèzko, le ho tretreze' areo ka ty akibandraeko—ehe anoloro antoke-to— ¹³ te havotso' areo ho veloñe ty raeko naho i reneko naho o rahalahikoo naho o rahavavekoo naho o vara' iareo iabio vaho ho hahà' areo ty fiai'ay tsy hivetrake. ¹⁴ Le hoe indaty rey ama'e, Hasolo ty fiai'areo ty anay, naho tsy talilie' areo o fitoloña'aiio; ie amy zao, naho atolo' IEHOVÀ anay o taneo, le hatarik' ama'o an-kavañonanjahay. ¹⁵ Aa le nazotso'e an-taly amy lafinety iereo; amy te añate' i kijoliy ty anjomba'e, fa ambone' i rindriñey ty nitoboha'e. ¹⁶ Le hoe re am' iereo, Akia mb' an-kaboam-b'eo, tsy mone hifanalaka ama' areo o mpañoridañe, naho mietaha aña telo andro, ampara' te mitampoly o mpañotrokeo; zay vaho hañavelo mb'eo nahareo. ¹⁷ Aa hoe ondatio ama'e, Ho haha amy fanta nampifantà'o anaiy zahay, ¹⁸ naho tsy arohi'o amy lafinety nanjotsoa'o anaiy ty fole mena toy, t'ie mimoak' an-tane atoy; le hendese'o aña'akiba'o ao ty rae'o naho i rene'o naho o longo'oo vaho o anjomban-drae'o iabio. ¹⁹ Ie amy zao, ze hiakatse o lalan' anjomba'oo mb' an-damoke mb'eo, le ho an-doha'e ty lio'e, vaho ho afakakeo zahay; f'ie hitraok' ama'o amy akibay ao, le ho an-doha'ay ty lio ze paohem-pitáñe. ²⁰ Aa naho saontsie'o o fitoloña'ay zao, le halio-tahin-jahay amy fanta nampititihe'o anaiy. ²¹ Le hoe re: O saontsi' areoo ro ie. Nirahe'e mb'eo le niavotse iereo vaho nrohi'e amy lafineti'ey i fole menay. ²² Ie nañavelo, le nipok' am-bohitsey vaho nañialo ao telo andro, ampara' te nitampoly o mpañotrokeo; tsinoetsoe' o mpañoridañe mb'eo mb'eo amy lalañey fe tsy nahaisake. ²³ Aa le niavotse indaty rey, nizotso boak' ambohibohitse ao, le nitsake, naho niheo mb'am' Iehosoa ana' i None mb'eo, vaho nitalily i nifetsak' ama' iareoy. ²⁴ Le hoe ty asa' iareo am' Iehosoa:

* ^{2:10} Amore: mafaitse; mpiola; mpidababoo

Toe natolo' IEHOVÀ am-pitàn-tikañe i tane iabiy vaho mitsolofiñe aolon-tikañe ze hene mpimoneñe amy taney.

3

¹ Nañaleñale t'Iehosoa te nitroatse, le nienga i Sitime rekets' o ana' Israele iabio naho niheo mb'am' Iardeney mb'eo, vaho nitobe eo aolo' t'ie hitsake. ² Ie nimodo ty telo andro, le nimb'eo mb'eo amy tobey o mpiaoloo; ³ naho linili' iareo ondatio ami'ty hoe: Naho oni' areo i vatam-pañina' IEHOVÀ Andrianañahare' areoy, naho o mpisoroñe nte-Levy mitarazo azeo, le miavota an-toe'o, vaho oriho. ⁴ Fe engao heba'e mizehe kihò ro'arivo varañe añivo' areo naho ie, ko harinea' areo, soa te ho fohi' areo ty lakan-komba' areo; fa mboe tsy niary mb' atoy nahareo. ⁵ Le hoe t'Iehosoa am' ondatio: Miefera fa hanao raha tsitantane añivo' areo ao t'IEHOVÀ hamaray. ⁶ Nisaontsy amo mpisoroñe t'Iehosoa ami'ty hoe: Rambeso i vatam-pañinay le mitsàha aolo ondatio. Rinambe' iereo i vatam-pañinay vaho nimb' aolo ondatio mb'eo.

⁷ Le hoe t'IEHOVÀ am' Iehosoa, Hiorotse hampionjoñe azo ampahaoniña' Israele iaby raho te anito, hahafohina' iareo te, manahake ty nindrezako amy Mosè ty hindrezako ama'o. ⁸ Aa le afantoho o mpisoroñe mitarazo i vatam-pañinaio, ami'ty hoe: Ie tsatok' añ'olon-drano' Iardeney le mijohaña am' Iardeney. ⁹ Le hoe t'Iehosoa amo ana' Israeleo: Mb'etoa hijanjiñe ty tsara' IEHOVÀ Andrianañahare' areo. ¹⁰ Le hoe t'Iehosoa: Ho fohi' areo henane zao te añivo' areo ao t'i Andrianañahare veloñe le tsy mete tsy roahe'e aolo' areo mb'eo o nte-Kanàneo, naho o nte Kiteo, naho o nte-Kiveo, naho o nte-Perizeo, naho o nte-Girgasio, naho o nte-Amoreo vaho o nte-Iebosio. ¹¹ Hehe te mitsak' aolo' areo mb' am' Iardeney ty vatam-pañina' i Talè' ty tane toy iaby. ¹² Aa le joboño ondaty folo-ro' amby boak' amy fifokoa' Israele rey, songa ondaty raike i fifokoañe rey. ¹³ Amy te, ie mijohaña an-drano' Iardeney ty lelam-pandia' o mpisoroñe mitarazo i vatam-pañina' IEHOVÀ, Talè' ty tane bey toijo, le ho tampake ty rano' Iardeney vaho hivotry ho haboañe o rano mikararake boak' ambone añeo. ¹⁴ Aa naho niavotse an-kiboho'e ondatio hitsake Iardeney, le aolo ondatio o mpisoroñe nitarazo i vatam-pañinaio, ¹⁵ le vata'e nivotrak' añ' olo-drano' Iardeney ty fandia' o mpitarazo i vatam-pañinaio—toe mangahanahana añ'olo' Iardeney iaby o rano' Iardeneio amo hene andro an-tsam-pamokarañe— ¹⁶ le nijihetse o rano nizotso boak' ambone eio naho nionjoñe ho haboañe nitakatse ty atao Adame añe, i rova marine' i Tsaretàne; le vata'e nitampake o ho nizotso mb'an-dRiak-Arabà naho mb'amy Riake Siray mb'eo, vaho nitsake tandrife Ierikò ey ondatio. ¹⁷ Nijohaña an-tane maik' anteñateña' Iardeney o mpisoroñe nitarazo i vatam-pañina' IEHOVÀ, le hene nitsak' an-tane maike t'Israele, ampara' te tafatsàke Iardeney iaby i valobohòkey.

4

¹ Naho fa hene tafatsàke Iardeney i valobohòkey, le nitsara ty hoe am' Iehosoa t'IEHOVÀ: ² Rambeso ondaty folo-ro' amby boak' am' ondatio; songa ondaty raike ze fifokoañe, ³ le ifantoho ty hoe: Mandrambesa vato folo-ro' amby boak' am' Iardeney ao, amy ijohañam-pandia' i mpisoroñe reiy, naho endeso hitsake mindre ama' areo vaho apoho amy tobe hialeña' areo te anitoy. ⁴ Aa le kinanji' Iehosoa indaty folo-ro' amby nedre'e amo ana' Israeleo rey; sindre ondaty raike ze fifokoa'e. ⁵ Le hoe t'Iehosoa am' iereo, Mitsàha aolo' i vatam-pañina' IEHOVÀ Andrianañahare' areoy

an-teñateña' Iardeney vaho songa mandrambesa vato raik' an-tsoro'e ty ami' ty ia' o fifokoa' o ana' Israeleoo; ⁶ ho viloñe ama' areo, aa naho mañontane anahareo o ana' areoo amy añey, ty hoe: Inoñ' ama' areo o vato retoañeo? ⁷ Le ty hoe ty hatalili' areo: Amy te nitampak' aolo' i vatam-pañina' IEHOVÀ o rano Iardeneio; ie nitsake Iardeney, le nitampake o rano' Iardeneio; vaho ho faniahiañe o ana' Israeleo nainai'e o vato retoañeo. ⁸ Aa le nanoe' o ana' Israeleo i namantoha' Iehosoay, naho rinambe' iereo ty vato folo-ro' amby boak' anteñateña' Iardeney ao, ty amy tsinara' IEHOVÀ am' Iehosoay, ty ami'ty ia' o fifokoa' o ana' Israeleo, naho nendese' iereo nitsake mindre am' iereo mb' an-tobe mb'eo vaho napo' iereo ey. ⁹ Natroa' Iehosoa añivo' Iardeney ka ty vato folo-ro' amby amy nijohañam-pandia' i mpisoroñe nitarazo i vatam-pañinay rey vaho mbe eo zay henaneo. ¹⁰ Aa le nijohañe añivo' Iardeney o mpisoroñe nitarazo i vataio ampara' te niheneke i nampitaroñe' IEHOVÀ Iehosoa am' ondatioy ty amy nandilia' i Mosè Iehosoa iabiy; vaho nalisa nitsake mb'eo ondatio. ¹¹ Naho fa tafatsàke ondaty iabio, le nitsake ka i vatam-pañinan' Añaharey naho i mpisoroñe rey añatrefa' ondatio. ¹² Nitsake reke-pialiañe aolo' o ana' Israeleo o ana' i Reobeneo naho o ana' i Gadeo naho i vakimpifokoa' i Menasèy ty amy nisaontsie' i Mosè am' iereoy; ¹³ va'e efats' ale reke-pialiañe veka'e hialy ty nionjoñe mb'an-kotakotak' añatrefa' IEHOVÀ, mb'a monto' Ieriko mb'eo. ¹⁴ Naonjo' IEHOVÀ ampahaoniña' Israele iaby t'Iehosoa amy andro zay; vaho nañeveñe ama'e manahake ty nañeveña' iareo amy Mosè amo hene andro niveloma'eo.

¹⁵ Nitsara amy Iehosoa t'IEHOVÀ, ami'ty hoe: ¹⁶ Ampitroaro boak' am' Iardeney o mpisoroñe mitarazo i vatam-pañinaio. ¹⁷ Aa le nandily amy mpisoroñe rey t'Iehosoa, nanao ty hoe: Mitroara amo Iardeneio. ¹⁸ Naho niakatse boak' an-teñateña' Iardene ao i mpisoroñe rey nitarazo i vatam-pañina' IEHOVÀ, vata'e nitroatse an-tamboho eo o lelam-pandia' i mpisoroñe reio le nimpoly an-toe'e o rano' Iardeneio, nanginahina añ'olo'e iabio manahake te taolo. ¹⁹ Nitroatse Iardeney amy andro fahafolo' i volam-baloha'eiy ondatio vaho nitobe e Gilgale an-dafe atiñana' Ieriko eo. ²⁰ Le natroa' Iehosoa e Gilgale eo i vato folo-ro'amby nakare' iareo am' Iardeney rey; ²¹ vaho nitaroñe'e amo ana' Israeleo ty hoe: Aa naho añontanea' o ana' areoo an-droae'e añ' andro aña ty hoe: Ino o vato retoañeo? ²² le hampandrendrehe' areo o ana' areoo ty hoe: Nitsake Iardeney an-tane mipintampintañe t'Israele. ²³ Amy te nimaihe' IEHOVÀ Andrianañahare' areo aolo' areo ty rano Iardene ampara' t'ie tafatsàke, manahake ty nanoe' IEHOVÀ Andrianañahare' areo i Ria-Binday, ie nimaihe'e añatrefan-tikañe ampara' te tafatsake, ²⁴ hahafohina' ze kila ondati' ty tane toy te maozatse ty fità' IEHOVÀ, hañeveña'e am' IEHOVÀ Andrianañahare' areo nainai'e.

5

¹ Aa naho jinanji' o hene mpanjaka' o nte-Amore alafe' Iardeney mañandrefañe, naho ze hene mpanjaka' o nte Kanàne marine i riakey te nimaihe' IEHOVÀ aolo' o ana' Israeleo o rano' Iardeneo ampara' t'ie tafatsàke, le nitronake ty arofo' iareo vaho tsy nahakofòke ty amo ana' Israeleo. ² Ie henane zay, hoe t'IEHOVÀ am' Iehosoa: Tseneo meso am-bato pilake vaho savaro indraike o ana' Israeleo ho fañindroe'e. ³ Aa le nitsene mesom-bato pilake t'Iehosoa, vaho nisavare'e e Gibeate-ha-aralote eo o ana' Israeleo. ⁴ Zao ty talim-panavara' Iehosoa iareo: toe nihomak' ampatrambey an-dalañe eo ze hene ondaty niakatse i Mitsraimeo; o lahilahio,

o lahindefoñeo, ie fa niavotse i Mitsraime. ⁵ Fa nivotso-boy ondaty iaby niakatse boak'ao, fe tsy nisavareñe ze hene ondaty nasamak' am-patrambey amy lalañe niakara' iareo i Mitsraimey, ⁶ amy te efa-polo taoñe ty nañaveloa' o ana' Israeleo am-patrambey aña, ampara' te nihomake i fifeheañe iabiy, o lahindefoñe niavotse i Mitsraimeo, ie tsy nañaoñe ty fiarañanaña' IEHOVÀ; i nifantà' IEHOVÀ te tsy hapò'e hahaoniñe i tane nifantà' IEHOVÀ aman-droae' iareo te hatolo'e antikañey, tane orikorihen-dronono naho tanteley. ⁷ Aa le nibeize'e o ana' iareoo handimbe iareo, ie ty nisavare' Iehosoa, tinampake kanao tsy nivotso-boy amy lalañey. ⁸ Naho niheneke ty fanavarañe i valobohòke iabiy le nitofa an-tobe'e ao ampara' te nimelañe.

⁹ Hoe ty tsara'IEHOVÀ am'Iehosoa: Anindroany t'ie namarimbariñe ty injé i Mitsraime tsy ho ama' areo. Aa le nitokaveñe ty hoe Gilgale i toetsey, ampara' te henane. ¹⁰ Ie nitobe e Gilgale ao o ana' Israeleo le nambena' iareo i Fihelañ' amboney ami'ty hariva' i andro faha folo-efats' ambi' i volañeiy amonto' Ieriko ey. ¹¹ Nikamà' iareo ty voka' ela' i taney amy loak' andro' i Fihelañ' Amboney: mofo po-dalivay naho tsako tono amy àndroy. ¹² Nijihetse amy andro nañoriike i nikamà' iareo ty voka' i taneiy i maney vaho tsy nahazo mane ka o ana' Israeleo, f'ie nikama ty vokan-tane Kanàne amy taoñe zay.

¹³ Narine' Ieriko t'Iehosoa t'ie nampiandra fihaino naho nahaisake te inge t'indaty aolo'e, am-pitá'e ty fibara tsinoake; vaho nimb' ama'e mb'eo t'Iehosoa, nanao ty hoe: Ama'ay v'iheo ke amo rafelahi'aio? ¹⁴ Le hoe re, Aiy! Zaho mpifehe o lahindefo' IEHOVÀO ty nivotrahako etoa. Aa le nibabok' an-dahara'e an-tane eo t'Iehosoa le niambane nanao ty hoe: Ino o ho saontsie' ty talèko amy mpitoro'gio? ¹⁵ Le hoe ty mpifehen-dahindefo' IEHOVÀO tam' Iehosoa: Afaho am-pandia'o o hana'oo; amy te miavake o toetse johañe'oo. Le nanoe' Iehosoa.

6

¹ Ie amy zao, nigabeñe fatratse t'Ieriko ty amo ana' Israeleo: leo raike tsy niakatse, ndra raike tsy nimoak' ao— ² Le hoe t'IEHOVÀ amy Iehosoa: Inao te natoloko am-pitá'o t'Ieriko, naho i mpanjaka'ey vaho o fanalolahio.

³ Hiarikatoha' areo i rovay; ze hene lahindefoñe ty hiariari' i rovay indraike. Andro eneñe ty hanoa'o zay. ⁴ Hitintiñe tsifan' añondrilahy fito ty mpisoroñe fito aolo' i vatam-pañinay; ie ami'ty andro faha-fito le hiaria' areo im-pito i rovay vaho hampipopò o tsifan' añondrio i mpisoroñe rey.

⁵ Ie amy zao, naho tiofe' iareo ela i tsifan' añondry rey, naho janji' areo ty feo' i antsivay, le sindre hampipoñake ty pazake ondatio naho hikoromake ho pisake ty kijoli' i rovay vaho songa hiranga an-kahiti'e miaolo mb'eo t'indaty.

⁶ Kinanji' Iehosoa ana' i None o mpisoroñe, le hoe ty asa'e tama'e: Ongaho i vatam-pañinay vaho mpisoroñe fito ty hinday tsifan' añondrilahy fito aolo' i vatam-pañina' IEHOVÀY. ⁷ Le hoe ty asa'e am' ondatio: Mionjona mb'eo le arikatoho i rovay vaho ampiadolò o lahin-defoñeo i vatam-pañina' IEHOVÀY. ⁸ Ie amy zao: nisaontsy am' ondatio t'Iehosoa, le nionjom-beo i mpisoroñe fito nitañe tsifan' añondrilahy fito añatrefa' IEHOVÀ rey, le nitiofe' iereo o tsifao vaho nanonjohy iareo i vatam-pañina' IEHOVÀY.

⁹ Niaolo o mpisoroñe nitiok' antsivao amy zao ondaty nitam-pialiañe, le nanonjohy i vatam-pañinay o mpivolio; vaho nitolom-pipopò avao o tsifao.

¹⁰ Linili' Iehosoa amy zao ondatio ami'ty hoe: Ko mikoràke, ee te tsy ho

janjiñeñe hey ty fiarañanaña' areo, vaho tsy hiakatse am-palie' areo ndra saontsy raike ampara' ty andro koiheko te hipazake; le hene hipozak' amy zay. ¹¹ Aa le nampiariarie'e i vatam-pañina' IEHOVÀY i rovay, indraike t'ie niarikatoheñe nahō nibalik' an-tobe iareo vaho nialeñe an-tobe ao. ¹² Nitroatse marain-tsi-kiake t'Iehosoa vaho rinambe' o mpisoroñeo i vatam-pañina' IEHOVÀY. ¹³ Aa le nainai'e nimb'eo nampipopò o tsifao i mpisoroñe fito ninday tsifan' añondry fito añatrefa' i vatam-pañina' IEHOVÀY rey; niaolo iareo o lahindefoñeo vaho nanonjohy i vatam-pañina' IEHOVÀY o nivolio, nainai'e am-pipopoeñe o antsivao. ¹⁴ Ie amy andro faharoey le nañariari' i rovay indraike iereo vaho nimpoly an-tobe ao; nanoe' iereo andro eneñe zay. ¹⁵ Ie amy andro fahafitoy le nitroatse te manjirik' andro nahō narierie' iareo i rovay vaho nitoloña' iareo im-pito; amy àndroy avao ty nañariaria' iareo i rovay im-pito. ¹⁶ Aa ie amy fahafitoy nahō nampipopò i tsifa rey o mpisoroñeo le nanao ty hoe am' ondatio t'Iehosoa: Mipoñafa, fa natolo' IEHOVÀ ama' areo i rovay.

¹⁷ Hatokañe amy IEHOVÀ i rovay, ie nahō ze kolotoin-draha ama'e ao; i Rakabe karapilo avao ty ho veloñe nahō ze mitraok' ama'e añ'anjomba'e ao amy te naeta'e o ìrake nampihitifen-tikañeo. ¹⁸ Ie amy zao ifoneño o raha navìkeo tsy mone mamà-batañe, fa nahō rambese' areo ho fanañañe o raha navikeo, le hafà' areo ho am-poheke ka ty tobe' Israele. ¹⁹ Kila miavake am' IEHOVÀ i volafotiy, i volamenay vaho o fanake torisike nahō viñeo; ie hazilik' an-driha' IEHOVÀ ao.

²⁰ Aa le nampipoñake ty koike ondatio, nitiofeñe o tsifao. Nahō nahajanjiñe ty feo' o tsifao ondatio, le pinaza' ondatio ty koke, nahō nikoromake ho pisake i kijoliy vaho nitoañe mb' an-drova ao ondatio, sindre gaon-dahy niaolo mb'eo nitavañe i rovay. ²¹ Ie fonga nandrotsake an-dela-pibara ze tan-drova ao, ndra lahilahy ndra rakemba, o tora'eo nahō o beio, o añombeo nahō o añondrio vaho o borìkeo. ²² Le hoe t'Iehosoa am' indaty roe nipiapia amy taney rey: Akia mb' añ' anjomba' i karapiloy vaho akaro i rakembay nahō ze hene aze ty amy nifantà' areo. ²³ Aa le nimoak' ao i ajalahy nitampoñe rey nahō nakare' iereo t'i Rakabe nahō ty rae'e nahō i rene'e nahō o rahalahi'eo nahō ze vara'e iaby; nakare' iareo ze hene longo'e vaho nampitobèñe alafe' i tobe' Israeley. ²⁴ Finorototo' iereo afo i rovay nahō ze he'e ama'e ao; nahō tsy ty volafoty, ty volamena nahō o fanake torisike nahō viñeo avao ze napò' iareo am-panontoñam-barankiboho' IEHOVÀ ao. ²⁵ Le rinomba' Iehosoa veloñe t'i Rakabe karapilo nahō o añ'anjomban-drae'eo vaho o aze iabio; ie mimoneñe añivo' Israele ao ampara' te henane; ami'te naeta'e i nampihitife' Iehosoa hanampoñe Ieriko rey. ²⁶ Aa le nampifantà' Iehosoa ondatio henane zay ami'ty hoe: Voa-fâtse añatrefa' IEHOVÀ t'indaty miongake hañamboatse ty rova Ieriko toy; ami'ty fihomahan-tañoloñoloña'e ty hampipoha'e o mananta'eo vaho ami'ty fivetraha' i tsitso'ey ty hampijadoña'e o lalam-bei'eo. ²⁷ Aa le nitahie' IEHOVÀ t'Iehosoa; vaho nanitsike i taney ty enge'e.

7

¹ Fe nandilatse amo raha navikeo o ana' Israeleo; amy te nandrambe raha navike t'i Akane, ana'i Karmý, ana' i Zabdý, ana'i Zerake, fifikoka' Iehodà; vaho nisolebatse amo ana' Israeleo ty haviñera' IEHOVÀ.

² Nañirake ondaty boake Ieriko mb'amy Ày marine i Bete-avene, atiñana' i Betele* mb'eo t'Iehosoa, le hoe ty nanoe'e: Akia, tampono i taney. Aa le

* 7:2 Betele: Anjomban'Añahare

nionjoñe mb'eo ondatio nanampoñe i Ày. ³ Ie nibalike mb'amy Iehosoa mb'eo le nitalily ty hoe: Ko ampionjoneñe mb'eo iaby ondatio; fe añiraho ondaty telo arivo ndra ro' arivo hionjoñe mb'eo handafa i Ày; ko votsora'o hifanehake mb'eo i maro iabiy, amy t'ie tsy ampeampe. ⁴ Va'e lahilahy telo-arivo amy màroy ty nionjomb'eo; f'ie nitriban-day añatrefa' ondati' i Àio, ⁵ naho nañohofa' ondati' i Àio loza t'indaty telopolo eneñ' amby; le hinorida'e boak'amy lalam-beiy pake Sebarime aña, naho linafa' iareo amy fizotsoañey mb' eo vaho nalorè aman' arofo ondatio, nitranake hoe rano. ⁶ Rinia' Iehosoa i saro'ey naho nibabok' an-tane an-dahara'e añatrefa' i vatam-pañina' IEHOVÀ ampara' te haleñe, ie naho o androanavi' Israeleo songa nampibobò debole añambone'e. ⁷ Le hoe t'Iehosoa: Hoke! ry Rañandria IEHOVÀ, aa vaho akore ty nampitsaha'o Iardeney ondaty retoañe hanesea'o am-pitá' o nte-Amoreo, hampihomaha'o anay? Hamake t'ie nilesa naho nitobok' alafe' Iardeney aña! ⁸ O Rañandria, ino ty ho asako, kanao niamboho'a Israele o rafelahi'eo! ⁹ Ie mahajanjiñe zay o nte-Kanàneo naho o hene mpimoneñe an-tane atoio, le hijariseho anay, vaho hapitso' iareo an-tane atoy ty tahina'ay, le hatao'o akore i Tahina'o jabahinakey? ¹⁰ Le hoe t'IEHOVÀ am' Iehosoa: Miongaha, ino ty ibaboha'o an-dahara'o? ¹¹ Toe nanao hakeo t'Israele; nililare' iareo i fañinako nandiliako am'iareoy; nangalake amo raha navikeo; naho nampikametse naho nañetake vaho napoke amo harao'eo. ¹² Aa le tsy nahafitroatse añatrefan-drafelahi'e o ana' Israeleo; niamboho'a iareo o rafelahi'eo amy t'ie ninjare fokom-patse; tsy hindre ama' areo raho naho tsy mongore' areo hey o nozoñeñe ama' areoo. ¹³ Miongaha, ampiavaho ondatio, ano ty hoe: Miefera ho ami'ty maray; fa hoe ty tsara' IEHOVÀ Andrianañahare' Israele: Aman' onjitse ty añivo'o ao, ry Israele; tsy mahafijohañe añatrefa' o rafelahi'oo rehe ampara' te akareñe ama' areo hey i natokañey. ¹⁴ Aa ie maraindray, miheova mb'eo am-pifokoañe; vaho ze fifokoa rambese' IEHOVÀ ro hañarine an-kasavereña'e; le ty hasavereñañe edrè' IEHOVÀ ro hañarine mb'eo ki-anjomba'e; le ty anjomba edrè' IEHOVÀ ro hitotoke ki' ondaty. ¹⁵ Ie amy zay, ho forototoeñe añ'afó ao ty nandrambe o raha navikeo rekets' o fanaña'e iabio; amy te nililare'e ty fañina' IEHOVÀ, vaho nanao hatsivokarañe e Israele ao. ¹⁶ Aa le nañaleñaleñe amy maraiñey t'Iehosoa vaho nampitotohe'e t'Israele am-pifokoa'e le nivoa ty fifokoa' Iehoda. ¹⁷ Nampitotohe'e ty fifokoa' Iehoda, le voa ty hasavereña'i Zerake; nampitotohe'e ty hasavereña'i Zerake, lahilahy an-dahilahy le voa ty Zabdy. ¹⁸ Nampitotohe'e ki' ondaty ki'ondate i anjomba'ey le voa t'i Akane, ana' i Karmi, ana' i Zabdy, ana' i Zerake, fifokoa' Iehoda. ¹⁹ Aa le hoe t'Iehosoa amy Akane, O anako, ehe toloro engeñe t'IEHOVÀ Andrianañahare' Israele, vaho andriaño; atalilio ahy henaneo i nanoe'oy; le ko aetake. ²⁰ Le hoe ty natoi' i Akane am' Iehosoa: Toe nandilatse am' IEHOVÀ Andrianañahare' Israele raho vaho zao naho zao ty nanoeko. ²¹ Naho nitreako amo fikopahañeo ty sarimbo soa boake Sinare naho ty volafoty sekele roanjato, naho ty tseram-bolamena milanja sekele limampolo, le nihañeko, naho rinambeko; vaho ingo, mikafitse an-tane añivon-kibohoko ao, ambane ao i volafotiy. ²² Aa le nampañitrike irake t'Iehosoa, naho nilay mb' amy kibohotsey iereo, le ingo t'ie nikafitse an-kiboho'e ao, vaho ambane'e ao i volafotiy. ²³ Rinambe' iereo boak' an-kibohotse ao zay le nendese'e mb' amy Iehosoa, naho mb'amo hene ana' Israeleo mb'eo vaho napo' iereo añatrefa' IEHOVÀ. ²⁴ Rinambe' Iehosoa naho Israele iaby t'i Akane ana' i Zerake naho i volafotiy, i sarimboy

naho i tseram-bolamenay naho o ana-dahi'eo, o anak' ampela'eo naho o añombe'eo naho o borike'eo naho o añondri'eo naho i kiboho'ey naho ze ama'e iaby; le nampionjone' iereo mb' am-bavatane' Akore mb'eo. ²⁵ Le hoe t'Iehosoa: Ino ty nanolora'o sotry anay? IEHOVÀ ty hanolo-sotry ama'o te anito. Aa le nametsaha' Israele vato, naho namorototo iareo an' afo vaho nametsa-bato ama'e. ²⁶ Nampitoabora' iareo votrim-bato jabajaba ty ambone' iereo, ze mbe eo henaneo, le nitolik' amy haviñera'ey t'IEHOVÀ. Aa le natao Vavatane' i Akore ty añara' i toetsey, pake henane.

8

¹ Le hoe t'IEHOVÀ am'Iehosoa: Ko hemban-drehe, ko manahelo; miavota naho endeso mindre ama'o mb'e Ày mb'eo ze hene lahin-defoñe, Inao fa natoloko am-pità'o ty mpanjaka' i Ày naho ondati'eo naho i rova'ey vaho i tane'ey. ² Hanoe'o amy Ày naho amy mpanjaka'ey hambarne amy nanoa'o am' Ieriko naho i mpanjaka'ey; fe ho tana' areo ho tsindro' areo o vara'eo, naho o añombe'eo, Vandroño boak' am-boho'e ao i rovay.

³ Aa le niongake t'Iehosoa rekets' o hene' lahin-defoñe, hionjoñe mb'e Ày mb'eo; jinobo' Iehosoa ty lahilahy telo-ale, fanalolahy mahavany, vaho nirahe'e mb'eo haleñe. ⁴ Nafanto'e ami'ty hoe: Inao! hiampitse amboho' i rovay nahareo hamandroñe i rovay, ko halavira' areo i rovay, vaho fonga mihentseña. ⁵ Zaho reketse ze hene' ondaty amako ro higodañe mb' amy rovay mb'eo; ie amy zao, naho miakatse hañoridañe anay iereo manahake i teoy, le handripak' an-day añatrefa' iareo zahay. ⁶ Ie miakatse hañoridañe anay, naho fa tinari'ay hisitak' amy rovay le hanao ty hoe: Hehe t'ie milay an-tikañe manahake tam-pifotora'ey. Zay ty hilaisa'ay aolo' iareo mb'eo. ⁷ Hiongak' am-piampirañe amy zao nahareo hitavañe i rovay; fa hatolo' IEHOVÀ Andrianañahare' areo am-pità' areo. ⁸ Ie nivotrake amy rovay, le ampiforeheto añ' afo i rovay; i tsinara' IEHOVÀ ty hanoa' areo aze; inay, fa liniliko. ⁹ Aa le nampionjone' Iehosa; le nimb'eo iereo niampitse, naho nitobe añivo' i Betele naho i Ày ahandrefa' i Ày ao; nialeñe am' ondatio avao t'Iehosoa. ¹⁰ Nañampitso amy loak' àndroy t'Iehosoa, le nitehafe'e ondatio vaho nionjoñe mb'eo, ie naho o mpiaolo' Israeleo ty niaolo ondatio mb'e Ày aña. ¹¹ Aa le nionjom' beo iaby ondaty nindre ama'eo, o lahindefoñe, naho nañarine mb'eo, le nijohañe tandrife i rovay, vaho nitobe avara' i Ày ey; toe añivo'e naho i Ày eo ty vavatane. ¹² Nandrambe lahilahy va'e lime-arivo re vaho nampiampire'e añivo' i Betele naho i Ày ahandrefa' i rovay. ¹³ Aa le nisalahàñe i maroiy: i lahialeñe avara' i rovaiy naho o nivolio am-piampirañe ahandrefa' i rovay ao; le nimb' aña' ivo' i vavataney hialeñe t'Iehosoa. ¹⁴ Ie amy zao, naho nahaoniñe zay ty mpanjaka' i Ay le nalisa niongake maraindray o lahilihi' i rovaio vaho niakatse hiambotrak' am' Israele an-kotakotake, ie naho ondati'e iabio, mb' amy namotañañey, aolo' i Arabày; fe tsy napota'e te amboho' i rovay ty nivoñoñe aze. ¹⁵ Nanao sare gioke aolo' iareo t'Iehosoa naho Israele iaby, le nandripàke mb' an-dala' i fatrambeiy mb'eo. ¹⁶ Aa le kinoike iaby ondati' i Aio hifanontoñe, hañoridàñe; le nihoridà' iareo t'Iehosoa, nisitake amy rovay. ¹⁷ Tsy nengaeñe ondaty ty e Ay ndra e Betele ao ze tsy niakatse hañotroke Israele; napo' iareo nisokake i rovay le nañoridañe Israele. ¹⁸ Aa le hoe t'IEHOVÀ am' Iehosoa: Atora-kitsio mb'amy Ay i lefoñe am-pità'oy; fa hatoloko am-pità'o. Aa le nahiti' Iehosoa mb' amy rovay i lefoñe am-pità'ey. ¹⁹ Nivoratsake boak' an-toe'e ao amy zao

o niampitseo; namorehetse ty lay mb'eo ty amy nañitia'e i fità'eyi naho nimoak' amy rovay ao, nitavañe aze, vaho namiañe afo amy rovay. ²⁰ Aa ie nitolike naho niisake mañamboho o lahilahi' i Aio, ingo nañatoeñe mb' an-dikeramb'eo i rovay, le tsy nioniñe ty hipotatsaha' iareo ke mb' atia he mb' etia amy te nibalike mb' amo nañoridañe iareoo mb'eo o nilay mb' ampatrambeio. ²¹ Naho nioni' Iehosoa naho Israele iaby te tinava' o nanàmpokeo i rovay naho te nionjoñe mañambone ty hatoe' i rovay, le nibalike, vaho zinama' iareo o lahilahi' i Aio. ²² Niakatse i rovay ka o ila'eo hifañatrek' am' iareo; aa le niarikoboña' Israele, etia ty ila'e, atia ty ila'e, vaho binaibai'e iereo ampara' t'ie po-sehang'a e leo raike tsy nahapoliotse.

²³ Nenga' iereo veloñe ty mpanjaka' i Ay vaho nasese mb' am' Iehosoa mb'eo. ²⁴ Ie nihene'e Israele zamañe o mpimone' i Ay an-kivoke eio naho i ampatrañe ey nañoridañe iareo rezay, toe nampsingoritriempibara ampara' t'ie nimongotse, le hene nitolike mb'e Ay mb'eo t'Israele, nanjevoñ' aze an-dela-pibara. ²⁵ Ty hamaro nikorovok' amy andro zay amo lahilahy naho rakembao, le rai-ale-tsi-ro'arivo—ze hene'ondati' i Ay. ²⁶ Tsy nafore' Iehosoa ty fità'e nañity i lefoñey ampara' te nimongore'e ze fonga mpimone' i Ay. ²⁷ O añombeo naho i vara-fikopa' i rovay avao ty tinava' Israele ho fitsindro'e ty amy tsara linili' IEHOVÀ am'Iehosoay. ²⁸ Aa le finorototo' Iehosoa ty Ay naho nanoe'e tamboho tsy modo, toe hoake ampara' henane. ²⁹ Naradorado'e an-katae ty mpanjaka' i Ay ampara' te hariva; ie tsofots' andro le nandily t'Iehosoa naho nazotso' iareo amy hataey i lolo'ey, naho navokovoko an-dalam-bei' i rovay vaho naonjoñe ama'e ty votrim-bato jabajaba mbe eo henanekeo.

³⁰ Le namboara' Iehosoa kitrely t'IEHOVÀ, Andrianañahare' Israele, ambohi' Ebale eo ³¹ ty amy nandilia' i Mosè mpitoro' IEHOVÀ o ana' Israeleoy, manahake i sinokitse amy boke Hà' i Mosèiy, kitrely vato tsy pinèke, tsy nañonjonañe viñe; naho nibanabanae' iareo soroñe am' IEHOVÀ, vaho nandenta engan-kanintsiñe. ³² Sinoki'e amo vatoo ty hambañe amy Tsara' i Mosèy, nisokire'e añatrefa' o ana' Israeleo. ³³ Hene nijohañe añ'ila' i vatam-pañinay etoy naho añ' ila'e eroy añatrefa' o mpisoroñe nte-Levy nitarazo i vatam-pañina' IEHOVÀio t'Israele naho o mpiaolo'eo naho o mpifehe'eo vaho o mpizaka'eo sindre tao ty renetane naho t'indaty; ty ila'e aolo' i vohi-Gerizimey naho ty ila'e aolo' i vohi-Ebaley; ty amy nandilia' i Mosè mpitoro' IEHOVÀ am-baloha'ey, hitatàñe o ana' Israeleo.

³⁴ Modo zay le vinaki'e o enta' i Hake iabio, o tatao naho o fatseo, ze hene sinokitse amy boke' i Hake ao. ³⁵ Ndra raik' amo tsara linili' i Mosèo tsy nado' Iehosoa fa hene nivakie añatrefam-pivori-bei' Israele, naho amo rakembao, naho amo keleiañe vaho amo renetane niharо am' iereoo.

9

¹ Ie aña, naho fa jinanji' o mpanjaka iaby alafe' Iardeney, am-bohibohitse naho am-bavatane ey naho añolo' i Riake Jababajay pak' e Lebanon añaeo; i nte-Kete naho i nte-Amore, i nte-Kanàne, i nte-Perizý, i nte-Kivý, vaho i nte-Iebosý; ² le nikabija, nifañosoñe hialy amy Iehosoa naho am'Israele.

³ Fe jinanji' o mpimone' i Giboneo ty nanoe' Iehosoa am' Ieriko naho amy Ay, ⁴ le nikilily famañahiañe: nimb'eo iereo nisare sorotà; ninday voro-gony am-borike naho kontran-divay toro naho rota nitakefeñe; ⁵ naho tsoron-kana sinosok' am-pandia'e naho sikiñe voroboro'e ho saro' iareo; mbore nimaike vaho nivoravora ty mofo iaby fivati' iareo. ⁶ Niheo mb' amy Iehosoa an-tobe e Gilgale ao iereo, nanao ty hoe ama'e naho amo

lahilahi' Israeleo; Boake tsietoitane aña zahay; aa ehe ifañinào. ⁷ Le hoe ondaty ana' Israeleo amo nte-Kiveo: Hera t'ie mpimoneñe ama'ay atoy; aa le aia ty hifañinà'ay. ⁸ Le hoe ty asa' iareo am' Iehosoa: Mpitoro' areo zahay. Le hoe ty nanoe' Iehosoa: Ia v'inahareo naho boak'aia? ⁹ Le hoe ty asa' iareo ama'e: Boake tsietoitane aña o mpitoro'oo t'ie nivotrak' atoy ty tahina' IEHOVÀ Andrianañahare' areoy; fa jinanji'ay ty enge'e naho ze hene fitoloña'e e Mitsraime ao, ¹⁰ naho ze he'e nanoe'e amy mpanjaka roe nte-Amore alafe' Iardeney aña rey, toe amy Sihone mpanjaka i Khesbone naho amy Oge mpanjaka' i Basane e Astarote aña. ¹¹ Aa le nisaontsy ama'ay o mpiaolo'aio naho o fonga mpimoneñe antane'aio, nanao ty hoe: Mindesa vaty amy liay, le akia mifañaoña am' iereo vaho ano am' iereo ty hoe: Mpitoro' areo zahay; ie amy zao, ehe ifañinao. ¹² Intoy ty mofo nendese'ay ho vaty ie mbe nimae boak' añ' akiba'ay amy andro nionjona'ay hihitrifa'ay mb'ama' areo mb' etoay, hehe t'ie maike vaho demodemoke. ¹³ Le nivao o kontran-divay retoa t'ie fineno'ay, ingo te mikoneatse; hehe ka o siki'aio naho o hana'aio, ie fa modo iaby ty amy halavi' i liay. ¹⁴ Nangala' o lahilahio ty vati' iareo, f'ie tsy nihalaly fanoroña am-palie' IEHOVÀ.

¹⁵ Aa le nifampilongo am' iereo t'Iehosoa vaho nifañina t'ie hengañe ho veloñe le nifanta ama'e ka o roandria' i valobohòkeio. ¹⁶ Ie telo andro aña te nifañina le jinanji' iareo t'ie mpañohoke naho mpimoneñe añivo' iareo ao avao. ¹⁷ Ie nañavelo le nivotrak' amo rova' iareoo amy andro faha-teloy o ana' Israeleo. Ty rova' iareo: i Gibone, le i Kefirà, i Birote vaho i Kiriate-inearime. ¹⁸ Tsy pinao' o ana' Israeleo iereo, ty amy nifantà' o roandria' i valobohòkeio amy IEHOVÀ Andrianañahare' Israele. Aa le niñeñeñoña amo roandriañeo i valobohòkey. ¹⁹ Fe hoe o roandriañeo amy valobohòkey: Fa nifanta'ay amy IEHOVÀ Andrianañahare' Israele; aa le ko paoheñe. ²⁰ Zao ty hanoan-tika: hadoñe ho veloñe; tsy mone ho aman-tika ty haviñerañe, ty amy fanta nifantà'ay am' iereoy. ²¹ Le hoe o roandriañeo ty am' iereo: Angao ho veloñe; le nanoeñe mpamatsi-katae naho mpitari-drano ho a i valobohòkey, ty amy nitaroña' o roandriañeo.

²² Kinoi' Iehosoa, vaho nisaontsie ty hoe: Akore ty namañahia' areo anay ami'ty hoe: Boa-davitse anahareo zahay, ie mpimoneñe añivo'ay atoy avao? ²³ Aa le fokom-patse nahareo; nainai'e tsy ho modo t'ie ho mpitoroñe, mpamatsike hatae vaho mpitari-drano ho añ' anjomban' Añahareko. ²⁴ Nanoiñe Iehosoa ami'ty hoe iereo; Amy te toe natalily amo mpitoro'oo te linili' IEHOVÀ Andrianañahare'o i mpitoro'e Mosèy te hatolo'e anahareo i tane iabiy le ho mongoreñe aolo' areo ze fonga mpimone' i taney, aa le nampirevendreveñe anay o fiai'aio ty ama' areo; zay ty nanoe'ay o raha zao. ²⁵ Ie henane zao, ingo, am-pitá'o zahay: aa le ano ama'ay ze atao'o soa naho to am-pivazoho'a areo. ²⁶ Aa le zay ty nanoe'e am' iereo, vaho rinomba'e am-pitá'o ana' Israeleo, fa tsy vinono; ²⁷ ie nanoe' Iehosoa mpamatsi-katae naho mpitari-drano amy andro zay ho amy valobohòkey naho ho a i kitreli' IEHOVÀ ampara henaneo, amy toetse ho joboñe'ey.

10

¹ Aa ie jinanji' i Adoni-tsedeke mpanjaka' Ierosalaime te rinambe' i Iehosoa ty Ay naho nandrotsak' aze; le manahake ty nanoe'e Ieriko rekets' i mpanjaka'ey, ty nanoe'e i Ay rekets' i mpanjaka'ey; naho nifampilongo amy Israele o mpimone' i Giboneo vaho fa aivo' iereo

ao. ² Le nangebahebake iereo kanao posetse jabajaba ty Gibone, rovampanjaka mandikoats' i Ay, vaho fanalolahy iaby o lahilahi'eo. ³ Aa le nahitri' i Adoni-tsedeke mpanjaka' Ierosalaime amy Hohame, mpanjaka' i Kebrone naho amy Pirame, mpanjaka' Iarmote naho am' Iafia, mpanjaka' i Lakise vaho amy Debire*, mpanjaka' i Eglone, ty hoe: ⁴ Mionjona mb' amako mb'etoa; antao tika handafa i Gibone amy t'ie nifampilongo amy Iehosoa naho amo ana' Israeleo. ⁵ Aa le nifañosoñe i mpanjaka lime' o nte-Amoreo rey, ty mpanjaka' Ierosalaime, ty mpanjaka' i Kebrone, ty mpanjaka' Iarmote, ty mpanjaka' i Lakise vaho ty mpanjaka' i Eglone rekets' o valobohò' iareo iabio, nitobe tandrife i Gibone ey vaho nialia'e. ⁶ Aa le nañitrik' am' Iehosoa e Gilgale aña ondati' i Giboneo nanao ty hoe: Ko ageba'o amo mpitoro'oo o fità'oo; malisà! mionjona mb' ama'ay mb'etoy, rombahō vaho oloro; amy te nifanontoñe haname anay ze hene mpanjaka nte-Amore mpimoneñe am-bohibohitse ao. ⁷ Aa le niavotse i Gilgale t'Iehosoa reketse ze hene lahindefo'e, toe o fanalolahī'e iabio. ⁸ Le hoe t'IEHOVÀ amy Iehosoa, Ko hembañe, ie fa natoloko am-pità'o; leo raik' am'ondati'eo tsy hahafijohañe ama'o. ⁹ Aa le nivovo am' iereo t'Iehosoa fa nikatsakatsake haleñe boake Gilgale aña, ¹⁰ vaho navalitsikota' IEHOVÀ añatrefa' Israele eo, le binaibai'e e Gibone am-pizamanam-bey; naho hinorida'e mb' amy fitroara' i Bete-koroney mb' eo, vaho finof'e pak' Azekà naho Makedà aña. ¹¹ Aa ie nandripàke ty lay am' Israele, amy fizotsoa' i Bete-koroney le nahiriri' IEHOVÀ ama' iereo ty vato gadaboñe boak' an-dikerañey pak' Azekà, vaho nikoromake; maro ty nampivetrahe' i havandra gadaboñey te amo vinono' o ana' Israeleo am-pibarao. ¹² Le hoe t'Iehosoa am' IEHOVÀ amy andro nanolora' IEHOVÀ o nte-Amoreo añatrefa' o ana' Israeleoy; hoe re ampahaisaha' Israele, Ry andro, mijihera amy Gibone ey, naho ry volañe, am-bavatane' i Aialone ey. ¹³ Aa le nijihetse i àndroy vaho nitsangañe i volañey, ampara' te niheneke ty fañondroha' iareo amo rafelahi' iareoo. Tsy fa sinokitse amy boke Iasarey hao? Nijohañe an-teñateñan-dikerañe ey i àndroy, va'e andro raike t'ie tsy nalisa niroñe. ¹⁴ Mboe lia'e tsy teo ty andro taolo ndra nanonjohy ty nanahake aze, te nihañoñe' IEHOVÀ ty feo' ondaty raike; amy te nialy ho a Israele t'IEHOVÀ.

¹⁵ Nimpoly amy zao t'Iehosoa, naho Israele iaby nindre ama'e mb'an-tobe e Gilgale aña. ¹⁶ Fe nipoliotse i mpanjaka lime rey nietak' an-dakato' i Makedà[†] ao. ¹⁷ Aa le nitaroñeñe am' Iehosoa ty hoe: Nioniñe mietak' an-dakato' i Makedà ao i mpanjaka lime rey. ¹⁸ Le hoe t'Iehosoa: Amariño vato jabajaba am-bava' i lakatoy le ajadoño eo t'indaty hañambeñe iareo ¹⁹ le ko tambatse eo, fa horidaño o rafelahi' areoo vaho lafao o amboli'eo; ko engañe hizilik' amo rova'eo; amy t'ie natolo' IEHOVÀ Andrianañahare' areo am-pità' areo. ²⁰ Naho nihenefe' Iehosoa naho o ana' Israeleo ty fanjamanañe iareo am-pañohofan-doza ra'elahy, ampara' t'ie fonga nimongotse vaho fa nimoak' amo rova fatratseo o sehanga'eo, ²¹ le nimpoly mb'an-tobe mb'eo am-panintsíñañe ondaty iabio mb' amy Iehosoa e Makedà mb'eo; tsy teo ka ty naniom-pameleke hitreatre ndra iaia amo ana' Israeleo. ²² Le hoe t'Iehosoa, Sokafo ty vava' i lakatoy vaho aseseo amako boak' an-dakato ao i mpanjaka lime rey. ²³ Aa le nanoe' iereo; nakare' iareo boak' an-dakato ao i mpanjaka lime rey: ty mpanjaka' Ierosalaime, ty mpanjaka' i Kebrone, ty mpanjaka' Iarmote, ty mpanjaka'

* **10:3** Debire: mpanao lañonañe; entam-bolañe † **10:16** Makedà: mitalaho; mirehetse; mionjo; mengoke; fiandrazan' añondry

i Lakise, ty mpanjaka' i Eglone. ²⁴ Le nakare' iareo mb' am' Iehosoa i mpanjaka rey, naho kinanji' Iehosoa o lahindefo' Israele iabio, le nanao ty hoe amo mpifelen-dahin-defo mpindre ama'eo: Mañarinea; apetaho am-pititia' o mpanjakao o fandia' areoo. Nañarine amy zao iereo vaho nanoe' iereo am-pititia' i mpanjaka rey o fandia' iereoo. ²⁵ Le hoe t'Iehosoa am' iereo: Ko hembañe, ko mihakahaka, mihaozara naho mahavania; fa zao ty hanoa' IEHOVÀ ze rafelahy iaby hialia' areo. ²⁶ Linafa' Iehosoa amy zao iereo, vinono'e vaho nampandradoradoe'e an-katae lime; niradorado amy hatae rey am-para' te haleñe. ²⁷ Ie nitsofots' andro, le nandily t'Iehosoa, naho nazotso amo hataeo, naho navokovoko amy lakato nietaha' iareoy, vaho nampipohañe vato jabajaba maro am-bava' i lakatoy—pak'ami'ty andro toy. ²⁸ Ie amy àndroy, rinambe' Iehosoa ka t'i Makedà naho linafa'e an-dela-pibara naho nimongore'e i mpanjaka'ey, naho ze fonga ondaty ao; leo raike tsy nisia; vaho nanoe'e amy mpanjaka' i Makedà hambañe amy nanoa'e i mpanjaka' Ierikoy. ²⁹ Nienga' i Makedà t'Iehosoa rekets' Israele iaby naho nimb'e Libnà mb'eo vaho nialy amy Libnà; ³⁰ natolo' IEHOVÀ am-pità' Israele ka zay naho i mpanjaka'ey le linafa'e an-dela-pibara naho ze fonga ondaty ao; tsy nampipoke sengaha'e, le nanoe'e amy mpanjaka'ey hambañe amy nanoe'e amy mpanjaka' Ierikoy. ³¹ Nienga i Libnà t'Iehosoa naho Israele iaby, nomb'e Lakise mb'eo naho nitobe marine aze vaho nialia'e; ³² le natolo' IEHOVÀ am-pità' Israele t'i Lakise; rinambe' amy andro faha roey vaho linafa'e an-dela-pibara naho ze fonga ondaty ao, hambañe amy nanoe'e i Libnà. ³³ Aa le nionjoñe mb'e Lakise mb'eo t'i Korame mpanjaka' i Gezere hañolots' aze, le linafa' Iehosoa ka naho ondati'eo am-para te tsy aman-tsehanga'e. ³⁴ Nienga i Lakise t'Iehosoa rekets' Israele iaby le nimb'e Eglone mb'eo naho nitobe eo vaho nialia'e. ³⁵ Rinambe' iereo amy àndroy avao, vaho linafa'e an-dela-pibara; ie naho o fonga ondati'eo ro zinama'e amy àndroy, hambañe amy nanoe'e i Lakisey. ³⁶ Nienga i Eglone t'Iehosoa naho nindre ama'e t'Israele iaby, nimb'e Kebrone mb' eo le nialia'e. ³⁷ Rinambe zay naho linafa'e an-dela-pibara rekets' i mpanjaka'ey naho ze hene rova'e naho ondati'eo iabio; leo sehanga'e tsy napo'e, hambañe amy nanoe'e i Egloney, ie vata'e narotsa'e reketse ze fonga ondaty ama'e ao. ³⁸ Nibalike mb'e Debire mb'eo t'Iehosoa naho nindre ama'e t'Israele iaby vaho nialia'e; ³⁹ rinambe' rekets' i mpanjaka'ey naho o rova'eo le linafa' iareo an-dela-pibara naho namongotse ze fonga ondaty ao; leo sehanga'e tsy napo'e; manahake ty nanoe'e Amy Kebrone ty nanoa'e Amy Debire naho i mpanjaka'ey, hambañe amy nanoe'e amy Libnà naho i mpanjaka'ey. ⁴⁰ Aa le hene finofo' Iehosoa o am-bohibohitseo naho i Atimoy naho i vavatanen-drano manganahanay naho o mpanjaka'e iabio; tsy napo'e sehanga'e fa fonga nimongore'e ze raha nikofòke, ty amy linili' IEHOVÀ Andrianañahare' Israele. ⁴¹ Fonga linafa' Iehosoa boake Kadesse-barnea pak' Aza naho an-tane Gosene iaby pake Gibone. ⁴² Rinambe' Iehosoa indrai-mipaoke i mpanjaka rey naho o tane'eo amy te nialy ho a Israele t'IEHOVÀ Andrianañahare' Israele. ⁴³ Aa le nimpoly mb'an-tobe' i Gilgale mb'eo t'Iehosoa naho Israele iaby.

11

¹ Naho nahajanjiñe zay t'Iabene mpanjaka' i Katsore le nampi-sangitrife'e t' Iobabe, mpanjaka'i Madone, naho i mpanjaka' i Simroney, naho i mpanjaka' i Aksafey, ² naho o mpanjaka avara' o vohibohitseo naho

o e Arabà atimo' i Kinerote naho an-tane Dore ahandrefañ' año 3 naho o nte-Kanàne atiñanañe naho ahandrefañ' año naho i nte-Amorey naho i nte-Ketey naho i nte-Periziy, naho i nte-Iebosý ambohibohitsey naho i nte-Kive am-poto' i Kermone an-tane' i Mitspày. 4 Nionjomb'eo iereo rekets' o hamaro'eo, ondaty mitozantozañe! valobohòke mira ami'ty faseñe añ' olo-driake ey miharo soavala naho srete tsifotofoto. 5 Nifamantañe i mpanjaka rey le nitrao-pitobe an-drano Merome, hialy am' Israele. 6 Le hoe ty tsara' IEHOVÀ am' Iehosoa: Ko ihembañañe; ie hamaray, amo ora zao, te hatoloko zamañe añatrefa' Israele iereo; hatao fira-sintake o tombon-tsoavala'eo le ho forototoe' areo an' afo o sarete'eo. 7 Aa le nomb'eo t'Iehosoa rekets' o lahin-defo'e iabio haname iareo le nivovo'a'e marine' o rano' i Merome eio vaho niambotraha'e. 8 Le natolo' IEHOVÀ am-pità' Israele, zinevo' iareo, nihoridàñeñe mb'e Tsidone Ra'elahy mb'eo naho pake Misrepote-maime naho pak' am-bavatane' i Mizpè maniñanañe; zinama' iareo am-para' t'ie tsy nenga'e honka'e.

9 Aa le nihenefe' Iehosoa am' iereo ze natoro' IEHOVÀ; finirasinta'e ty tombo' o soavala'eo naho finorototo'e an' afo o sareteo. 10 Nibalik' amy zao t'Iehosoa le rinambe'e ty Hazore vaho vinono'e am-pibara' i mpanjakay: amy te ni-lohà' i fifeheañe rey ty Hazore te taolo. 11 Fonga zinama'e am-pibara ze fonga ondaty ao, vata'e nimongore'e; leo raike tsy nengañe hikofòke; le nihotomomohen' afo ty Hazore. 12 Fonga tinava' Iehosoa ze rova' i mpanjaka rey naho o mpanjaka'e iabio; linafa'e an-dela-pibara vaho nimongore'e; amy nandilia' i Mosè mpitoro' IEHOVÀ. 13 Fe ty amo rova nitobok' an-kaboañe eio le tsy ama'e ty noroa' Israele naho tsy i Hazore sinodo' Iehosoay. 14 Nendese' o ana' Israeleo ze hene vara' i rova rey naho o añombe'eo ho tsindro'e; fe hene linafa' iareo an-dela-pibara ondatio, ampara' t'ie nimongotse, tsy napo' iareo ndra raike ty nikofòke.

15 Ze nandilia' IEHOVÀ amy Mosè mpitoro'ey, ty nafepe' i Mosè am' Iehosoa; le nanoe' Iehosoa; tsy ao ty tsy nihenefe' amy ze hene nandilia' IEHOVÀ i Mosé. 16 Aa le fonga rinambe' Iehosoa i taney naho i ambohibohitse eiy naho i atimoy naho o hene tane' i Goseneo naho i vavataney naho i Arabày naho o haboa' Israeleo vaho o vavatane'eo; 17 boak' amy haboañe peakey mañambone mb'e Seire mb'eo pake Baal-gade am-bavatane' i Lebanon ambane' i Kermone; le rinambe'e o mpanjaka'e iabio naho linafa'e vaho navetra'e. 18 Nitolom-pifandraparapak' amo mpanjakao andro maro t'Iehosoa. 19 Leo raik' amy rova rey tsy nipay hifampilongo am' Israele, naho tsy o nte-Kive mpimone' i Giboneo avao, kila pinao' iareo an-kotakotake. 20 Sata' IEHOVÀ ty nampigañe ty arofo' iareo, hañotakotake am' Israele, soa te ho vata'e mongoreñe, tsy mone ho tretrezeñe fa ho fongoreñe iaby ami' ty nandilia' IEHOVÀ i Mosè. 21 Ie henane zay, nimb'eo t'Iehosoa le naitoa'e am-bohibohits'ey o nte-Anàkeo, boake Kebrone, boake Debire, boak' Anabe, naho boak' am-bohibohi' Iehodà ao iaby vaho am-bohibohi' Israele ao iaby; nimongore'e naho o rova'eo. 22 Leo raik' amo nte-Anakeo tsy nengañe an-tane' o ana' Israeleo, naho tsy o sehanga'e e Gaza naho e Gate vaho e Asdodeo avao. 23 Aa le tinava' Iehosoa i hene taney, ty amy tsinara' IEHOVÀ amy Mosèy; natolo' Iehosoa amy Israele zay ho lova ty amo vilo'eo naho o fifokoa'eo. Vaho nitofa amy aliy i taney.

12

1 Irezao o mpanjaka' o tane linafa' o ana' Israeleo te tinava' iareo o tane'eo alafe' Iardeneio mb'amy fanjiriha' i àndroy añe; boak' am-

bavatane' i Arnone pak'am-bohi' i Kermone, naho i Arabà maniñanañe mb'eoo: ² I Sihone mpanjaka' o nte-Amore nimoneñe e Khesboneo naho nifehe boak'e Aroere, añ' olom-bavatane' i Arnone an-teñateña' i vavataney, naho ty vaki' i Gilade* pak' an-tsaka' Iabok' añ' efe' o nte-Amoneo; ³ naho i Arabà pak' an-dRia-Kinerote, maniñanañe, naho mb' an-dRiak' Arabá, i Riake Siray maniñanañe, mb' am-Bete-Iesimote naho atimo ambane' o hereretsa' i Pisgào; ⁴ naho ty fari' i Oge mpanjaka' i Basane, ty sehang'a' o nte-Refà† nimoneñe e Astarote naho e Edreio, ⁵ naho nifehe ty vohi-Kermone, naho i Salkà, naho i Basane iaby pak' am-pari' o nte-Gesoreo naho o nte-Maakateo, naho ty vaki' i Gilade pak' aña' efe tane' i Sihone mpanjaka' i Khesbone. ⁶ Linafa' i Mosè mpitoro' IEHOVÀ naho o ana' Israeleo iereo; le natolo' i Mosè mpitoro' IEHOVÀ amo nte-Reobeneo naho amo nte-Gadeo vaho amy vakim-pifokoa' i Menasèy i taney ho fanañañe.

⁷ Intoy ka o mpanjaka' ty tane linafa' Iehosoa naho o ana' Israeleo alafe' Iardeney mañandrefañeо, boake Baal-Gade am-bavatane' i Lebanonone pak' amo haboañe peakeo, i mionjomb'e Seire mb'eoy; natolo' Iehosoa amo fifokoa' Israeleo zay ho fanañañe ty amo firimboña'eo; ⁸ Ambohibohitsey, naho an-tane kolemake naho amy Arabà aña naho am-panongam-bohitseo naho am-patrambey aña, naho atimo aña; i nte-Khetey, i nte-Amorey, i nte-Kanàney, i nte-Kivey, vaho i nte-Iebosiý; ⁹ i mpanjaka' Ierikoy, raike; ty mpanjaka' i Ay aña' ila' i Betele eo, raike; ¹⁰ ty mpanjaka' Ierosalaime, raike; ty mpanjaka' i Kebrone, raike; ¹¹ ty mpanjaka' Iaremove, raike; ty mpanjaka' i Lakise, raike; ¹² ty mpanjaka' i Eglone, raike; ty mpanjaka' i Gezere, raike; ¹³ ty mpanjaka' i Debire, raike; ty mpanjaka' i Gedere, raike; ¹⁴ ty mpanjaka' i Kormà, raike; ty mpanjaka' i Arade, raike; ¹⁵ ty mpanjaka' i Libnà, raike; ty mpanjaka' i Adolame, raike; ¹⁶ ty mpanjaka' i Makedà, raike; ty mpanjaka' i Betele, raike; ¹⁷ ty mpanjaka' i Tapoà raike; ty mpanjaka' i Hefere, raike; ¹⁸ ty mpanjaka' i Afeke, raike; ty mpanjaka' i Lesarone, raike; ¹⁹ ty mpanjaka' i Madone, raike; ty mpanjaka' i Katsore, raike; ²⁰ ty mpanjaka' i Simeron-merone, raike; ty mpanjaka' i Aksafe, raike; ²¹ ty mpanjaka' i Tànake, raike; ty mpanjaka' i Megido, raike; ²² ty mpanjaka' i Kedese, raike; ty mpanjaka' Iokneame e Karmele, raike; ²³ ty mpanjaka' i Dore am-pari' i Dore, raike; ty mpanjaka' i Goìme e Gilgale, raike; ²⁴ ty mpanjaka' i Tirzà, raike. I mpanjaka rey: telo-polo-raik'amby.

13

¹ Naho fa nigain-kantetse t'Iehosoa ie fa nanjo taoñe maro; le hoe ty nitsarae' IEHOVÀ ama'e: Fa bey rehe, naho maro taoñe, vaho mbe bey o tane mbe ho tavaneñeо. ² Inao ty tane mbe sisa: ze hene efe-tane' o nte Pilistio naho o nte-Gesore iabio; ³ boak'e Sihore aolo' i Mitsraime pak'aña'efe-tane Ekrone mañavaratse, i volilieñe amo nte-Kanàneo; i mpifeleke lime' o nte-Pilistio: i nte Gazay, i nte-Asdodey naho i nte-Askeloney, i nte-Gitiy, vaho i nte-Ekrony; tovo'e i nte-Avý ⁴ atimoy; ty hene tane' o nte-Kanàneo, naho i Mearà a' o nte-Tsidoneo, pak' Afeke, pak' aña' efe-tane' o nte-Amoreo; ⁵ naho ty tane' o nte-Gebaleo, naho i Lebanonone iaby mb'amy fanjirihan' àndroy mb'eo, boake Baal-gade ambane' i Vohi-Kermoney pak' am-pimoahañe mb'e Kamate; ⁶ ze hene mpimoneñe ambohibohitse boake Lebanonone pake Misrefote-maime, o nte

* **12:2** Gilade: ty antontan-talily † **12:4** Refà: Gen. 6:2,4 fitraofa'ondaty &anjely

Tsidone iabio; ho roahoko aolo' o ana' Israeleo; f'ie zarao amy Israele hey, ho lova, amy nandiliako azoy.

⁷ Ie amy zao, zarao ho lova amy fifokoa sive rey naho amy vakim-pifokoa' i Menasèy i tane zay. ⁸ Miharo amy vaki'e ila'ey ka ty nandrambesa' o nte-Reobeneo naho o nte-Gadeo ty lova' iareo, i natolo' i Mosè iareo alafe' Iardeney maniñanam-b'eoy, i natolo' i Mosè mpitoro' IEHOVÀ am' iareoy; ⁹ boak' Aroere, añ'olo' i vavatane Arnoney naho i rova añivo' i vavataneiy naho i haboañe pisake boake Medebà pake Dibone aña; ¹⁰ ze hene rova' i Sihone mpanjaka' o nte-Amore nifehe e Khesboneoy, pak' aña' efe-tane' o ana'Amoneo; ¹¹ naho i Gilade naho ty ampari' o nte-Gergosio miharo amo nte-Maakatio naho ty vohi-Kermone iaby, naho i Basane iaby pake Salkà; ¹² ze fonga' fifehea' i Oge e Basane ao, ie nifeleke e Astarote naho Edrey—i sehanga' o nte-Refaoy—o linafa'i Mosè vaho rinoa'eo. ¹³ Fe tsy rinoa' o ana' Israeleo o nte-Gesoreo naho o nte-Màkatio; toe mitrao-pimoneñe am' Israele pake henaneo t'i Gesore naho i Màkaty. ¹⁴ I fifokoa' i Leviv avao ty tsy nitolora'e lova; fa lova'e o engaeñe aña' afo am' IEHOVÀ Andrianañahare' Israele, ty amy nitsara'ey. ¹⁵ Nanolotse amy fifokoa' o ana' i Reobeneoy ty amo hasavereña'eo t'i Mosè. ¹⁶ Nifototse e Aroere ty efe-tane' iareo, aña'olo' i vavatane' i Armoney, naho i rova añivo' i vavataneiy, naho ze hene haboam-petrak' aña'ila' i Medebà aña; ¹⁷ i Khesbone naho ze hene rova'e an-kaboa-petrakeo; i Dibone naho i Bamote-Baale, naho i Bet-baal-meone; ¹⁸ naho Iahatse, naho i Kedemote naho i Mepaate; ¹⁹ naho i Kiriataime naho i Sibmà, naho i Zeretsahare an-kaboa' i vavataney; ²⁰ naho i Bete-peore, naho o firoroña' i Pisgào naho i Bete-iesimote; ²¹ naho o hene rova' i haboam-petrakeio naho o fonga fifehea' i Sihone mpanjaka' o nte-Amoreo nifehe e Khesboneo, ie linafa' i Mosè, naho o mpiaolo' i Midianeo, i Evý, naho i Rekeme, naho i Zore, naho i Hore, naho i Reba, o roandria' i Sihone nimoneñe amy taneio. ²² Vinono o ana' Israeleo am-pibara añivo' o ila'e zinamañe am' iareoo ka t'i Balame mpisikily ana' i Beore. ²³ Aa naho i efe-tane' o ana' i Reobeneoy, le Iardeney ty efe'e. Zay ty lova o ana' i Reobeneo ty amo hasavereña'eo, o rova naho tanà'eo. ²⁴ Le nitolora' i Mosè ka ty fifokoa' i Gade, amo ana' i Gadeo, ty amo hasavereña'eo. ²⁵ Ty tane' iareo, le Iazere, naho ze hene rova' i Gilade naho ty vaki' i tanen-te-Amone pak' Aroere aolo' i Rabà; ²⁶ naho boake Khesbone pake Ramate-hamitsepé naho i Betonime; vaho boake Makanaime pak' an-tane Debire; ²⁷ naho am-bavatane ao: i Betarame naho i Betenimrà naho i Sokote, naho i Tsafone, ty sis'a' i tane' i Sihone, mpanjaka' i Khesbone, vaho Iardeney ro efe'e pak' aña' olon-driake e Kinerete alafe' Iardeney maniñanañe. ²⁸ Zay ty lova' o ana' i Gadeo ty amo hasavereña'eo, i rova rey naho o tanà'eo.

²⁹ Nanolotse amy vakim-pifokoa' i Menasèy ka t'i Mosè, ho amy vakim-pifokoa' o ana' i Menasèoy ty amo hasavereña'eo. ³⁰ Zao ty tane' iareo: Boak'e Mahanaime le i Basane iaby, o hene fifehea' i Oge mpanjaka' i Basaneo, naho ze fonga tana' Iaire, rova enim-polo; ³¹ naho ty vaki' i Gilade, naho i Astarote, naho i Edrey; o rovam-pifehea' i Oge e Basaneo le ho a o ana' i Makire* ana' i Menasèo; ty vaki' o ana' i Makireo ty amo hasavereña'eo.

³² Zay o lova zinara' i Mosè a monto' i Moabeo†, alafe' Iardene e Ieriko, maniñanañe. ³³ Fe tsy tinolo' i Mosè lova ty fifokoa' i Levy; fa IEHOVÀ Andrianañahare' Israele ro lova'e, ty amy tsinara'e am' iereo.

* **13:31** Makire: ana' i Menasè: mamarotse: † **13:32** Moabe: an-drae'e

14

¹ Irezao o linova' o ana' Israeleo an-tane Kanàneo, o zinara' i Eleazare mpisoroñe naho Iehosoa ana' i None naho o talèn' anjomban-droaem-pifokoan' ana' Israeleo am' iereo ho fanañañe; ² an-tsapake ty nahazonañe o lovao, ty amy linili' IEHOVÀ am-pità' i Mosèy ho a i fifokoñañe sive rey naho i vaki'eiy— ³ amy te natolo' i Mosè ty lova' i fifokoa roe naho vaki'e rey alafe' Iardeney aña; fe tsy nanolora'e anjara am' iareo ao o nte-Levio. ⁴ Roe 'nio ty fifokoa' i ana' Iosefe rey, i Menasè naho i Efraime; vaho tsy nimea' iareo anjara o nte-Levio naho tsy o rova fimoneña' iareoo naho ty tane fiandrazañe mañohoke iareo ho amo hare'eo naho ho famahanañe iareo; ⁵ ze nandilia' IEHOVÀ i Mosèy, le nanoe' o ana' Israeleo, amy fanjaraña i taneiy.

⁶ Nifanontoñe am' Iehosoa amy zao o ana' Iehoda e Gilgaleo; le hoe t'i Kalebe ana' Iefonè nte-Kenize ama'e: Fohi'o i entañe tsinara' IEHOVÀ amy Mosè ondatin' Añahare ty amako naho ama'o e Kadese-barnea añaey.

⁷ Ni-efa-polo taon-draho te nirahe' i Mosè mpitoro' IEHOVÀ boake Kadese-barnea hitampoñe amy taney ao; vaho nimpoly ninday ty entan-troko.

⁸ Toe nampitronake ty arofo' ondatio o rahalahy nindre lia amakoo; fe IEHOVÀ Andrianañahareko avao ty noriheko. ⁹ Nifanta amy andro zay t'i Mosè, ami'ty hoe: Toe ho lovae'o naho o ana'oo nainai'e o tane liniam-pandia'oo, amy te norihe'o ami'ty halifora'e t'IEHOVÀ Andrianañahareko.

¹⁰ Ie amy zao, hehe te nitana' IEHOVÀ velon-draho, amy tsara'ey, i efa-polo-lim' amby taoñe boak' amy andro nitsarà' IEHOVÀ amy Mosè i entañe zaiy, ie nirererere am-patrambey aña t'Israele; aa le an-taom-balo-polo-lim' amby raho henaneo. ¹¹ Fe mira amy andro nañiraha' i Mosè ahiy ty hafatrarako androany; manahake ty haozarako henane zay ty haozarako henane zao, hahafialiako naho hiavotako vaho himoahako. ¹² Aa ie henaneo, atoloro ahy ty vohitse toy, i tsinara' IEHOVÀ amy andro zaiy, ie jinanji'o amy andro zay te ao o nte-Anàkeo, aman-drova jabajaba naho fatratse; hera hañimb' ahy t'IEHOVÀ vaho ho roaheko, ty amy tsara' IEHOVÀ. ¹³ Aa le tinata' Iehosoa; vaho natolo'e amy Kalebe ana' Iefonè ty Kebrone ho lova. ¹⁴ Aa le ninjare lova' i Kalebe ana' Iefonè nte-Kenize t'i Kebrone, ampara o andro zao; amy te norihe'e an-kaliforan-troke t'IEHOVÀ Andrianañahare' Israele. ¹⁵ Kiriate-arbà ty añara' i Kebrone taolo, fa nifanalolahy amo nte-Anàke iabio t'i Arbà. Nitofa amy aliy i taney henane zay.

15

¹ Ty anjara' i fifokoan' ana' Iehoda ty amo hasavereña'eo an-tsapake le pak' an-tane' i Edome naho ty fatrambei' i Tsine mb' amy Negeve* mb'eo ho efe'e atimo. ² Ty efe-tane' iareo atimo, le boak' añ' olo' i Riake Siray hirik' amy fitolian-dakañañe mitolike mañatimoy; ³ le mb'e Negeve mb'eo pak'amy fitroara' i Akrabime sikal' amy Tsine naho mionjomb' ami'ty ila atimo' i Kadese-barnea an-kalo' i Ketsrone naho mionjoñe mb'e Adare vaho mitolike mb'e Karkà mb'eo, ⁴ ie boak' ao le miary mb'e Atsmone vaho miakatse mb' amy oñe' i Mitsraimey, le mitakatse i riak' ahandrefañey i efe'ey. Zay ty efe'o atimo. ⁵ I Riake Siray ty efe'e atiñanañe pak' am' Iardeney. Le ty efe'e avaratse boak' am-pitolian-daka' i riakey, am-binàñe' Iardeney, ⁶ le mitohy mb'e Betehoglà naho miary avara' i Bete' arabà; ie boak' ao mionjomb' am-bato' i Bohane, ana' i Reobene mb'eo i efetsey. ⁷ Mibalike mb'e Debire boak' am-bavatane' i Akore i efetsey le

* **15:1** Negeve: Atimo

mañavaratse, mitolike mb'e Gilgale, aolo' ty fitroara' i Adomime, atimo i sakay; miary amo rano' i Ensemeseo i efetsey vaho miakatse amy rano migoangoa' i Rogeley, ⁸ le mionjomb' amy vavatanen' ana' i Hinome añ' ila' i nte-Iebosiý mañatimo; zay t'Ierosalaime, naho manganike mb' andengom-bohitse aolo' i vavatane' i Hinomey mañandrefa ami'ty figadoña' i vavatanen-dRafay, mañavaratse; ⁹ miary ambone' i vohitsey i efetsey pak' amy rano migoangoa' i Neftoà[†] naho miakatse mb' amo rova' am-bohi' i Efroneo[‡] mb'eo; le miary Efrone i efetsey pake Baalà; ie i Kiriat-inearime[§]. ¹⁰ Ie amy zay miolake boake Baalà mañandrefa pak' am-bohi-Seire naho miary mb' añila' avara' i vohi' Iearimey mb'eo—i Kesalone zay, le mizotso mb'e Bete-Semese mb'eo vaho miary mb'e Timnà mb'eo. ¹¹ Le miary añ' ila' i Ekrone mañavaratse i efetsey; le miary mb'e Sirkone mb'eo ty efe'e naho mb' amy Baalà naho miakatse mb'e Iabnile; vaho miakatse mb' andriak' añe i efe'ey. ¹² Ty efe'e ahandrefa, le i olon-driake jabajabay. Ie ty efe-tane' o ana' Iehodao mb'eo ty amo hasavereña'eo.

¹³ Natolo'e amy Kalebe' ana' Iefonè ty ila' o anjara' o ana' Iehodao, ty amy nandilia' IEHOVÀ Iehosoay, rekets' i Kiriate-Arbà, toe rae' i Anàke t'i Arbà; ty rova atao Kebrone. ¹⁴ Natao i Kalebe soike i ana-dahi' telo' i Anàke rey: i Sesay* naho i Ahimane[†] naho i Talmay[‡], i ana' i Anàke rey. ¹⁵ Ie boak' ao le nionjomb' amo mpimone' i Debireo mb'eo; natao Kiriate-sefere[§] ty añara' i Debire taolo. ¹⁶ Le hoe t'i Kalebe, Hatoloko amy ze manjevoñe i Kiriate-sefere vaho mahatavañe aze t'i Aksae* anak' ampelako ho vali'e. ¹⁷ Aa le tinava' i Otniele[†] ana'i Kenaze[‡] rahalahi' i Kalebe vaho natolo'e aze t'i Aksae anak' ampela'e ho tañanjomba'e. ¹⁸ Ie amy zao, naho nasese ama'e i ampelay, le nosihe'e ty hihalaly tetek' aman-drae'e; aa ie nizotso amy borìke'ey, le hoe ty asa' i Kalebe ama'e: Ino o paia'oo? ¹⁹ Hoe re: Tatao raho, kanao tinolo'o tane atimo ao, ehe itoloro rano manganahana. Aa le natolo'e aze i Rano Manganahana Amboney naho i Rano Manganahana Ambaney.

²⁰ Zao ty lova ty fifokoa' Iehoda ty amo hasavereña'eo. ²¹ O rovam-pifokoa' o ana' Iehodao mañatimo mb' añ'efe-tane' Edome[§] mb'eo le i Kab-tseel naho i Eder naho Iagore ²² naho i Kinà naho i Dimonà naho i Adadà ²³ naho i Kedese naho i Katsore naho Iitnàne; ²⁴ i Zife naho i Teleme naho i Bealote ²⁵ naho i Katsore-kadatà naho i Keriote naho i Ketsrone ze toe Katsore, ²⁶ i Amame naho i Semà naho i Moladà, ²⁷ naho i Katsar-gadà naho i Kesmone naho i Betepalete ²⁸ naho i Katsar-soale naho i Beersevà naho i Beziotià, ²⁹ i Baalà naho Iime naho i Etseme ³⁰ naho i Eltolade naho i Kesile naho i Kormà ³¹ naho i Tsiklage naho i Madmanà naho i Sansanà ³² naho i Lebaote naho i Silehime naho i Aine vaho i Rimone; rova roapolitive' amby rekets' o tanà'eo. ³³ Aa naho an-tane pisake, i Estaole naho i Tsoreà naho i Asnà, ³⁴ naho i Tsanoà naho i Enganime, i Tapoà naho i Ename, ³⁵ Iarmote naho i Adolame, i Sokò naho i Azekà, ³⁶ naho i Saraime naho i Aitaime naho i Gederà vaho i Gederotaime: rova folo-efats' amby rekets' o tanà'eo. ³⁷ I Tsenane naho i Kadasà naho i Migdal-gade ³⁸ naho i Dileane naho i Mitspe naho Ioktile, ³⁹ i Lakise naho i Bots-kate naho i Eglone ⁴⁰ naho i Kabone naho i Lamame naho i Kitlse ⁴¹ naho i Gederote,

* 15:9 Neftoà: misokake ‡ 15:9 Efrone: deboke § 15:9 Kiriat-inearime: rova bey ala * 15:14 Sesay: eneñe; fitretrezañe † 15:14 Ahimane: rahalahim-pitàn-kavana ‡ 15:14 Talmay: rano mitoabotse; § 15:15 Kiriate-sefere: Rovan-taratasy * 15:16 Aksae: ravak' an-tsokose; mihamiñe † 15:17 Otniele; ty fotoam-pitsatohan'Añahare ‡ 15:17 Kenaze: ty fikaloña toy; ty firovetañe § 15:21 Edome; mena, hoe lio ndra tane

i Bete-dagone, naho i Naamà vaho i Makedà; rova folo-eneñ' amby rekets' o tanà'eo. ⁴² I Libnà, naho i Etere naho i Asane ⁴³ naho Iptà, naho i Asnà naho i Netsibe, ⁴⁴ naho i Keilà naho i Akzeebe vaho i Maresà: rova sive rekets' o tanà'eo. ⁴⁵ I Ekrone, rekets' o rova'eo naho o tanà'eo. ⁴⁶ Le boak' Ekrone pak' an-driakey mañohoke i Asdode naho o tanà'e iabio. ⁴⁷ I Asdode rekets' o rova'eo naho o tanà'eo naho i Aza rekets' o rova'eo naho o tanà'eo pak' an-tsaka' i Mitsraime aña, i riake jabajabay ro efe-tane'e. ⁴⁸ Le amo vohitseo: i Samire, Iatire naho i Sokò, naho ⁴⁹ i Danà, naho i Kiriate-sanà (i Debire zay), ⁵⁰ i Anabe naho i Estemò naho i Enime, ⁵¹ naho i Gosene naho i Kolone vaho i Gilò; rova folo-raik' amby rekets' o tanà'eo. ⁵² I Arabe naho i Doma naho i Eseane, ⁵³ naho Ianome naho i Bete-tapoà naho i Afekà, ⁵⁴ naho i Kamotà naho i Kiriate-arbà (i Kebrone zay) vaho i Tsiore: rova sive naho o tanà'eo; ⁵⁵ i Maone, i Karmele naho i Zife naho Iotà ⁵⁶ naho Iezreele naho Iokdeame naho i Zanoàke, ⁵⁷ i Kaine, i Gibà vaho i Timnà: rova folo rekets' o tanà'eo. ⁵⁸ I Kalkole, i Bete-tsore naho i Gedore ⁵⁹ naho i Maarate naho i Betanote vaho i Eltekone: rova eneñ' rekets' o tanà'eo. ⁶⁰ I Kiriabat-baale, toe Kiriate-Iearime naho i Rabà: rova roe rekets' o tanà'eo; ⁶¹ aa naho am-patrambey aña: i Bete-arabà, i Midine, naho i Sekakà, ⁶² i Nisbane, naho i rovan-tSiray, vaho i Engedy: rova eneñ' rekets' o tanà'eo. ⁶³ Aa naho o nte-Iebosý mpimoneñe e Ierosalaime ao, tsy naharoake iareo o nte' Iehodao, fa mbe tambatse e Ierosalaime ao miharo amo ana' Iehodao pak' androany o nte-Iebosio.

16

¹ Nitsatok' am' Iardene' Ieriko le boak'amo rano' Ierikoo maniñanañe mb' am-patrambey miakatse boak' Ieriko ao pak' am-bohitse Betele mb'eo ty tsapake niazo' Iosefe*, ² le boake Betele mb'e Loze† miary amy efe' i Arký e Atarotey, ³ le miotake mizotso mb' an-driake mb' añ'efe' Iafletý mb'eo, mb' añ'efe' i Bete-korone ambane, le mb'e Gezere mb'eo vaho mandoak' an-driak' aña. ⁴ Aa le nandrambe ty lova' iareo i ana' Iosefe rey: i Menasè naho i Efraime. ⁵ Zao ty efe' o ana' Efraimeo ty amo hasavereña' iareoo; ty efe' i lova' iareo ami'ty ila'e atiñana boak' Atarotekadare, pake Bete-korone amboney; ⁶ le nimb' ahandrefam-b'eo i efetse zay; i Mikmetà ty añ' ila'e avaratse; maniñanañe amy zao i efetsey pake Taanate-silò aña, le milikoatse aze mb' atiñana mb'e Ianoake mb'eo: ⁷ le boake Ianoake re mizotso mb'e Atarote naho mb'e Naarate naho mioza am' Ieriko vaho mandoak' am' Iardeney mb'eo. ⁸ Ie boake Tapoà eo, le miotake mañandrefa mb'an-driake mb'amy saka Kanàvaho mipotítse amy riakey. Zay ty lovam-pifokoa' o ana' i Efraimeo ty amo hasavereña'eo, ⁹ naho o rova navaheñe ho a' o ana' i Efraimeo amo ana' i Menasèo, i rova iaby rey rekets' o tanà'eo. ¹⁰ Tsy rinoa' iareo o nte-Kanàne nimoneñe e Gezereo, fa tambatse añivo' o nte-Efraimeo pake henaneo o nte-Kanàneo mitoroñe aman-kàba.

17

¹ Nahazo anjara an-tsapake ka ty fifokoa' i Menasè; toe ie ty tañoloñoloña' Iosefe; I Makire ty tañoloñoloña' i Menasè naho ty rae' i Gilade, aa kanao nilahin-defoñe, ie ty nahazo i Gilade naho i Basane*. ² Nahazo tane an-tsapake ka o ana' i Menasè ila'eo ty amo hasavereña'eo; ho amo ana' i Abiezereo†, naho o ana' i Kelekeo‡, naho o ana' i Asrieleo§,

* **16:1** Iosefe: Fitomboañe; fitompeañe; † **16:2** Loze: fifampiriàñe, fiengañe; mahabibo * **17:1** Basane: ama nife ao; fonitse aman-tsifa ‡ **17:2** Abiezere: Raen-imba § **17:2** Keleke: anjara

§ **17:2** Asriele: Imban'Añahare

naho o ana' i Sekemeo*, naho o ana' i Hefereo†, vaho o ana' i Semidao‡; ie ro ana-dahi' i Menasè, ana' Iosefe, ty amo hasavereña'eo. ³ Fe tsy nanañ' ana-dahy t'i Tsélofekhade§, ana' i Hefere, ana' i Gilade, ana' i Makire, ana' i Menasè, fa anak' ampela avao, inao ty añara' o anak' ampela'eo: i Maklae*, i Noae†, i Koglae‡, i Milkae§ naho i Tirtsae*. ⁴ Nimb' añatrefa' i Eleatsare† mpisoroñe mb'eo iereo naho añatrefa' Iehosoa ana' i None, naho añatrefa' o roandriañe nanao ty hoe: Linili' IEHOVÀ t'i Mosè t'ie hitoloran-dova amo rahalahi'aio. Aa le amy lili' IEHOVÀ, nitolora'e lova amo longon-droae'eo. ⁵ Anjara folo ty nitsatoke ho a i Menasè mandikoatse i tane Gilade naho i Basaney, alafe' Iardeney aña; ⁶ amy te nanañ' anjara amo ana-dahi'eo i anak' ampela' i Menasè rey; nahazo ty tane Gilade o ana' i Menasè ila'eo.

⁷ Boak' Asere‡ pake Mikemetà§ aolo' i Sekeme ty efe' i Menasè; mionjomb'eo i efetsey añ'ilae ankavana mb' an-kiboho' i En-Tapoà* mb'eo. ⁸ A i Menasè ty tane' i Tapoà' fe a o ana' i Efraimeo ty ila' i Tapoà mifañefetse amy Menasè. ⁹ Mizotso mb' an-tsaka Kanà mb'eo i efetsey, atimo' i sakay, (a i Efraime añivo' i Menasè ao i rova rey), mañolotse ty avara' i sakay ty efe' i Menasè vaho mandoak' an-driakey. ¹⁰ Mañatimo ty a' i Efraime naho mañavaratse ty a' i Menasè, le i riakey ro efe'e; mahatakatse i Asere t'ie avaratse naho Isakhare te atiñanañe. ¹¹ Hoe zao o rova' i Menasè e Isakhare naho e Asereo: i Beteseane† naho o tanà'eo naho Ibleame‡ naho o tanà'eo naho o mpimone' i Dore§ naho o tanà'eo naho o mpimone' i Endore* rekets' o tanà'eo, naho o mpimone' i Taanàke† rekets' o tanà'eo vaho o mpimone' i Megido‡ rekets' o tanà'eo, fifeheñañ telo. ¹² Tsy nahafandroake o mpimone' i rova reio t'i Menasè; fe nifonem-pitobok' amy taney o nte-Kanàneo. ¹³ Aa naho nitombo ty haozara' o ana' Israeleo le nametsaha' iareo haba o nte-Kanàneo, fa tsy fonga rinoake.

¹⁴ Ninday saontsy am' Iehosoa ka o ana' Iosefeo nanao ty hoe: Aa vaho akore te tinolo'o anjara raike naho vaki'e ho lovako, ie oniñe te ondaty jabajaba ami'ty fitahia' IEHOVÀ ahy? ¹⁵ Le hoe ty natoi' Iehosoa: Aa kanao ondaty ra'elisy rehe, akia mb' aña'ala mb'eo vaho hatsafo ho azo ty tanente Perize§ naho ty a o Rafào, ie maifitse ama'o o vohibohi' i Efraimeo. ¹⁶ Le hoe o ana' Iosefeo: Tsy mahatsak' anay o vohibohitseo, naho songa manan-tsarete viñe o nte-Kanàne mimoneña am-bavataneo, o e Beteseane naho amo tanà'eo vaho o amy vavatane' Iizreeleio. ¹⁷ Tinoi' Iehosoa i anjomba' Iosefey, i Efraime naho i Menasè, ty hoe: Kanao ondaty jabajaba rehe, lifots-aozarañañ; tsy ho anjara raik' avao ty ho azo; ¹⁸ fe ho azo i vohibohitsey, fa ndra t'ie ala, ho hatsafe'o, le ho azo pak'añ' efe'e lavitse aña; fa ho roahe'o o nte-Kanàneo ndra t'ie aman-tsarete viñe, ndra te maozatse.

18

¹ Nifanontoñe e Silò* i valobohò' o ana'Israeleoy vaho natroa' iereo

* **17:2** Sekeme: anjara; nimpoly maraindray † **17:2** Hefere: mpihaly ‡ **17:2** Semidà: tahina' i mahilala § **17:3** Tsélof-kade: ty talinjom-pitititike * **17:3** Maklae: kepeke; marovany; solofo

† **17:3** Noae: fitofàñe; fañohòñe ‡ **17:3** Koglae: ty fitsinjaha'e § **17:3** Milkae: mpanjaka ampela * **17:3** Tirtsae: matarike, tso-po † **17:4** Eleatsare: toem-pizakàñ'Añahare ‡ **17:7**

Asere: Hafaleañe § **17:7** Mikemetà: Tambem-pamaoke; * **17:7** En-tapoà: ondaty siloke; amoeañ' ay; † **17:11** Beteseane: Anjomba nife; ndra firotaña. ‡ **17:11** Ibleame: ondaty haehae; i nifotsake § **17:11** Dore: tariratse; akiba * **17:11** Endore: rano manganahana' i Dore

† **17:11** Taanake: ty mampireke azo ‡ **17:11** Megiddo: ty voka'e sarotse: mitaroñe § **17:15** Perize: mpimoneña an-tanà-kede * **18:1** Silò: niraheña

i kibohom-pamantañañey, naho fa niambaneañe i taney. ² Fifokoañe fito amo ana' Israeleo ty nisisa mboe tsy nandrambe o lova'eo. ³ Le hoe t'Iehosoa amo ana' Israeleo, Pak' ombia t'ie mbe hihànskañe, tsy hizilike hitavañe i tane nitolora' IEHOVÀ Andrianañaharen-droae' areoy? ⁴ Anoloro ondaty telo ia' o fifokoa' areoo, hañirahako; hionjoñe mb'eo mb'eo amy taney hanokitse aze ty amo lovao; vaho himpoly amako. ⁵ Ho zarae' iereo fito; himoneñe an-tane'e atimo ey t'Iehodà, vaho himoneñe an-tane' iareo avaratse ey ty anjomba' Iosefe. ⁶ Sokire' areo fito i taney vaho handese' areo atoy le ho zaraeko an-tsapak' añatrefa' IEHOVÀ Andrianañaharen-tika. ⁷ Toe tsy hanañ' anjara ama' areo o nte-Levio, amy te lova' iareo ty fisoroña' IEHOVÀ; naho rinambe' i Gade naho i Reobene vaho ty vakim-pifokoa' i Menasè i lova natolo' i Mosè mpitoro' IEHOVÀ iareo alafe' Iardene atiñanañey. ⁸ Aa le niongake indaty rey vaho nionjoñe mb'eo; toe nafanto' Iehosoa i nimb'eo hamolily i taney rey ami'ty hoe, Akia, tsitsifo fañaveloañe i taney hamoliliañe aze naho mibaliha amako hanjaràko aze an-tsapake ho anahareo añatrefa' IEHOVÀ e Silò etoa. ⁹ Aa le nienga nanitsike i taney i lahilahy rey; sinoki' iareo am-boke ty ho anjara fito ty amo rova'eo naho nibalike mb' am' Iehosoa an-tobe e Silò mb'eo. ¹⁰ Le nanao tsatopiso ho a iareo añatrefa' IEHOVÀ e Silò ao t'Iehosoa; vaho zinara' Iehosoa amo ana' Israeleo i taney ty amo fifokoa' iareoo.

¹¹ Niazo' i fifokoa' o ana' i Beniamineoy ty amo hasavereña'eo an-tsapake ty anjara tane' iareo añivo' o ana' Iehodao naho o ana' Iosefeo. ¹² Nifototse am' Iardeney ty efe' iareo avaratse, le mioza ami'ty avara' Ieriko i efetsey, mañambone' o vohibohitseo mañandrefa vaho mandoak' am-patrambei' i Beitavene[†]; ¹³ boak'ao, miranga mb'e Loze i efetsey, mioza ami'ty ila' i Loze atao Betele mañatimo. Mizotso mb'e Atarotadare[‡] i efetsey mañarine i vohitse atimo' i Bete-korone ambaney[§] mb'eo. ¹⁴ Miolak' amy zao i efetsey miary mañatimo ahandrefa' i vohitse añatrefa' ty atimo' i Bete-koroney vaho mandoake e Kiriate-baale*, atao Kiriatiarime, rova' o ana' Iehodao. Zay ty efe'e ahandrefa. ¹⁵ Añ'ila' i Kiriatiarime ey ty efe'e atimo, mañandrefa amy zao i efetsey mandoak' andrano mangahanahana' i Nefotoà[†]; ¹⁶ mizotso mb'añ'olo' i vohitse aolo' ty vavatane' i ana' i Hinomey[‡] mb'eo i efetsey, ie i vavatane' o nte-Refao, mañavaratse, naho mizotso mb'am-bavatane' i Hinome mb' añ' olo' ty tazoa' i nte-Iebosiý mañatimo, vaho mizotso mb'e En-Rogele[§] mb'eo; ¹⁷ le sinokitse mañavaratse le nimb' En-semese*, naho nitohy mb'e Geliotet[†] tandrife ty fitroara' i Adomime[‡] vaho mizotso mb'amy vato' i Bohane[§], ana' i Reobeney mb'eo, ¹⁸ le mb'añ'ila avara' i Bete-Arabà* naho mizotso mb'añ'Arabà mb'eo; ¹⁹ naho mb' añ'ila' i Bete-koglà mañavaratse mb'eo i efetsey vaho mandoak' am-pitolihañe avara' i riake Siray, am-binañe' Iardene atimoy; zay ty efe'e atimo. ²⁰ Iardeney ka ty efe'e atiñanañey, zay ty lova' o ana' i Beniamineo, ty amo efe'e miarikatok' azeo, ty amo hasavereña'eo. ²¹ O rova' i fifokoa' o ana' i Beniamineo ty amo hasavereña'eo: Ieriko, i Bete-koglà naho ty vavatane Kezize[†], ²² i Bete-

[†] **18:12** Beitavene: anjomban-kakeo [‡] **18:13** Atarotadore: sabakan-kaozarañe [§] **18:13**
Beterone: anjomban-dakato, fitretrezañe * **18:14** Kiriate-baale: Rova' i Baale [†] **18:15**
Nefotoà: misokake; fisokafaña [‡] **18:16** Hinome: Heheke iereo; o vara'eo [§] **18:16** En: rano
manganahana; Rogele: fandia: * **18:17** En-semese: fipororoahan-drano' i àndroy [†] **18:17**
Geliote: fivarimbariñañe; votre [‡] **18:17** Adomime: mena, ankamena; maleon-dio [§] **18:17**
Bohane: am' iereo ao; tondro-bey * **18:18** Bete-arabà: anjomba' an-diolio [†] **18:21** Kezize:
figadoña'e

Arabà naho i Zemaraime[‡] naho i Betele ²³ naho i Avime[§] naho i Parà* naho i Oprà[†] ²⁴ naho i Kefar-kaamonay[‡] naho i Ofný[§] vaho i Gabà*; rova folo-ro' amby rekets' o tanà'eo. ²⁵ I Gibone naho Ramà[†] naho i Birote[‡] ²⁶ naho i Mitspè[§] naho i Kefirà* naho i Motsà[†] ²⁷ naho i Rekeme[‡] naho Irpile[§] naho i Taralà* ²⁸ naho i Tselà[†] naho i Elefe[‡] naho Iebosý[§], toe Ierosalaime, i Gibeate* naho i Kiriate[†]: rova folo-efats' amby rekets' o tanà'eo. Ie o rovan' ana' i Beniamineo ty amo hasavereña'eo.

19

¹ Nitsatok' amy Simone* ty tsapake faha-roe ho a i fifokoa' i Simoney ty amo hasavereña'eo; le añivo' ty lova' o ana' Iehodao ty lova' iareo.

² Aa le ty lova' iareo: i Beer-seva, naho i Sebà, naho i Moladà; ³ naho i Hatsar-soale, naho i Balà naho i Atseme, ⁴ naho i Eltolade, naho i Betole, naho i Kormà, ⁵ naho i Tsiklage, naho i Bete-markabote, naho i Katsàresosà, ⁶ naho i Bete-lebaote, vaho i Sarohene: rova folo-telo' amby rekets' o tanà'eo. ⁷ I Aine, i Remone, naho i Etere vaho i Asane; rova efatse rekets' o tanà'eo, ⁸ naho ze tanàñe mañohoke i rova rey pake Baal-atbeere, i Ramate' i Atimoy. Ie ty lovam-pifokoan' ana' i Simoneo ty amo hasavereña'eo.

⁹ Nandivàñe amy anjara' o ana' Iehodao ty lova' o ana' i Simoneo; amy te niloho bey ama'e ty anjara' Iehoda; aa le tañivo' ty lova' iareo ao ty lova' o ana' i Simoneo.

¹⁰ Nitsatok' amo ana' i Zeboloneo[†] ty tsapake faha-telo ty amo hasavereña'eo, le nahatakatse i Saride ty efe' i lova' iareoy. ¹¹ Mionjoñe mb'amy riakey naho mb'e Maralà mb'eo i efetsey pake Dabasete vaho mitakatse i saka aolo' Iokneamey; ¹² miolake boake Saride re maniñanañe mb' amy fanjiriha' i àndroy mb'eo pak' amy efe' i Kislotabore vaho miakatse mb'e Daberate naho mañambone mb'e Iafìà, ¹³ boak'ao re manonjohy maniñana pake Gita-kefere naho i Eta-katsine mb'eo vaho miakatse mb'e Remone-metoare mb'e Neà aña; ¹⁴ miary avara'e eo i efetsey pake Kanatone vaho mandoak' am-bavatane' Iiftakèle eo; ¹⁵ mitraok' ao ty Katàte naho i Nahalàle, naho i Simrone, naho Idalà vaho i Betlekhemet[‡]: rova folo-ro' amby naho o tanà'eo. ¹⁶ Zay ty lova' o ana' i Zeboloneo ty amo hasavereña'eo, i rova rey naho o tanà'eo.

¹⁷ Nitsatok' amy Isakhare[§] ty tsapake fah' efetsee, ho a o ana' Isakhareo ty amo hasavereña'eo. ¹⁸ Ty efe' iareo le pake Iizreele, naho i Kesolote naho i Soneme, ¹⁹ naho i Kafaraime, naho i Sione, naho i Anakarate, ²⁰ naho i Rabite, naho i Kisione, naho i Ebetse, ²¹ naho i Remete, naho i En-ganime, naho i En-kadà, vaho i Bete-pats'tsatese; ²² mahatakatse i Tabore i efetsey naho i Sakatsome naho i Bete-semese; le mandoak' am' Iardeney i efe' iareoy; rova folo-eneñ' amby rekets' o tanà'eo. ²³ Ie ty lovam-pifokoa' o ana' Isakhareo ty amo hasavereña'eo; i rova rey rekets' o tanà'eo.

[‡] **18:22** Zemaraime: volon'Añondry [§] **18:23** Tanàn-koake * **18:23** Parà: rovan-tamàna

[†] **18:23** Oprà: deboke; ana-panaloke [‡] **18:24** Kefarkaamonay: Fipalira'o nte-Amoneo [§] **18:24**

Ofný: mahamokotse; tromambotrambo * **18:24** Geba: tamboho; fitovy [†] **18:25** Ramà: ambone

eo; miereñereña [‡] **18:25** Birote: vovoñe; mampidodea [§] **18:26** Mitspè: fitalakesañ'abo;

anjoanjo * **18:26** Kefirà: ana-diona vave'e [†] **18:26** Motsà: tsy aman-dalivae [‡] **18:27**

Rekeme: sare tsy manjofake; [§] **18:27** Irpile: ty fampijangana'e, ty aoli'e; * **18:27** Taralà:

mitsoeke inje, ndra haozaraña [†] **18:28** Tselà: pake; leme; mijihejihetse [‡] **18:28** Elefe: fiohañe

[§] **18:28** Iebosý: hinitaksitake; lokaloka * **18:28** Gibeate: haboañe [†] **18:28** Kiriate: rova;

tolon-draha; fivory * **19:1** Simone: i mahajanjiñey; i janjiñañey [†] **19:10** Zebolone: akiba;

kivoho; fimoneñañe [‡] **19:15** Bet-lekeme; anjomba-mofo [§] **19:17** Isakhare: tambe; ondroke

²⁴ Nitsatok' amy fifokoa' o ana' i Asereoy i tsapake faha-limey ty amo hasavereña'eo. ²⁵ Ty efe' iareo le i Kelkate, naho i Kalý, naho i Betene, naho i Aksafe, ²⁶ naho i Alameleke, naho i Amade, naho i Miseale, naho mitakatse i Karmeles ahandrefa'e aña vaho mb'e Sikore-libnate mb'eo; ²⁷ miolake mb'amy fanjiriha' i àndroy re pake Bete-dagone le mahatakatse i Zebolone naho i vavatane' Liftakèy le mañavaratse, mb'e Bete-meke, naho i Neiele vaho mandoake e Kabole am-pitàn-kavia eo, ²⁸ naho i Abrane, naho i Rekobe, naho i Kamone vaho i Kanà, pake Tsidone bey; ²⁹ miolake mb'amy Kormà amy zao i efetsey naho mb'an-drova fatratse atao Tsore; miolake mb' amy Kosà amy zao i efetsey vaho mandoak' amy riakey; boake Hebel pak' Akzibe, ³⁰ naho i Omà, naho i Afeke, vaho i Rehobe: rova roa-pololo-ro' amby rekets' o tanà'eo. ³¹ Ie ty lovam-pifokoan' ana' i Asere ty amo hasavereña'eo, i rova rey vaho o tanà'eo.

³² Nitsatok' amo ana' i Naftalio i tsapake faha-eneñey, ho a o ana' i Naftalio ty amo hasavereña'eo. ³³ Ty efe-tane' iareo le boake Kelefe amy sarongaza' i Tsànanàmey, naho i Adamý, i Nekebe, naho Iagnile, pake Lakome le mandoak' am' Iardeney ³⁴ miolake mañandrefa amy zao i efetsey mb' Aznote-tabore naho miranga mb'e Kokoke le mahatakatse i Zebolone atimo'e naho mitakatse i Asere ahandrefañe aña vaho am' Iehodà mb'am-panjiriha' i àndroy mb' am' Iardeney mb'eo. ³⁵ O rova' iareo fatratseo le i Tsidime, i Tsare, naho i Kamate, i Rakate, vaho i Kinerete, ³⁶ naho i Adamà naho i Ramà, naho i Katsore, ³⁷ naho i Kedese, naho i Edrey, naho i En-katsore, ³⁸ naho Irone, naho i Migdal'El, naho i Koreme, naho i Betanate vaho i Bete-semese: rova folo-sive' amby rekets' o tanà'eo. ³⁹ Ie ty lovam-pifokoan' ana' i Naftaliy ty amo hasavereña'eo; i rova rey rekets' o tanà'eo.

⁴⁰ Nitsatok' am-pifokoan' ana' i Dane ty tsapake faha-fito ty amo hasavereña'eo. ⁴¹ Ty efe-tane' iareo le i Tsorà, naho i Estaole, naho Ire-semese, ⁴² naho i Saal-bine, naho i Aialone, naho Ietelà, ⁴³ naho i Elone, naho i Timnatà, naho i Ekrone, ⁴⁴ naho i Eltekè, naho i Gibetone, naho i Baalate, ⁴⁵ naho Iehoda, naho i Bene-berake, naho i Gatrimone, ⁴⁶ naho i Me-iarkone, vaho i Rakone, rekets' i tane aolo' Iafòy. ⁴⁷ Tsy niampe ty nitakara' ty efe-tane' i Dane; aa le nionjoñe haname i Leseme* o ana' i Daneo le tinava' iereo naho linafa' iareo an-dela-pibara naho nanoe' iereo fanañañe vaho nimoneña ao; natao iereo Dane ty Leseme ty amy Dane rae' iareoy. ⁴⁸ Ie ty lova' o ana' i Dane ty amo hasavereña'eo, i rova'e rey naho o tanà'eo.

⁴⁹ Aa ie nihenefe' iareo ty fizarañe i taney ho lova ty amo efe'eo, le tinolo' o ana' Israeleo lova añivo' iareo ao t'Iehosoa ana' i None; ⁵⁰ le natolo' iareo aze i rova nihalalie'ey ty amy tsara' IEHOVÀ; i Timnatserà† am-bohi' i Efraime ey; le namboare'e i rovay vaho nimoneña'e. ⁵¹ Zay o lova zinara' i Elazare‡ mpisoroñe naho Iehosoa ana' i Noneo naho o talem-pifokoa' o ana' Israeleoo, ho lova an-tsapake e Silò añatrefa' IEHOVÀ, an-dala'i kibohom-pamantañañey. Aa le nihenefe' iareo i zara-taney.

20

¹ Nitsara am' Iehosoa t'IEHOVÀ ami'ty hoe: ² Saontsio amo ana' Israeleo ty hoe: Tendreo o rovam-pitsolohañe nitaroñeko ama' areo am-pità' i Mosèo; ³ ie amy zay, i mañoho-doza ama' ondaty tsy nitsatrie'ey, ty hilay mb'eo, toe ho fitsoloham-pamale-fate. ⁴ Ie hitriban-day mb' ami'ty raik'

* ^{19:47} Leseme: tahinañe; vatosoa † ^{19:50} Timnatsera: sare' i àndroy; ‡ ^{19:51} Elazare: Imban'Añahare;

amy rova rezay, naho hijohañe an-dalambei' i rovay, naho hitaroñe ty aze an-dravembia' o androanavi' i rovaio; le hampihovae' iareo amy rovay vaho ho tolora' iareo toetse himoneña'e am' iareo. ⁵ Naho mañoridañe aze i mpamale-fatey le tsy hasese' iereo am-pit  e i namonoy amy te tsy ni-satrie'e ty nanjevo  e i ra  e'ey ie tsy niheje'e taolo. ⁶ Himoneña'e i rovay ampara' te mijoha  e a  atrefa' ty fivory ty hizaka aze; am-para' ty fihomaha' ty mpisorom-bey henane zay; himpoly amy zao i mpamonoy mb' an-drova'e naho mb'a  'akiba'e, mb' amy rova nimirifa'e an-daiy.

⁷ Aa le nav   iareo ty Kedese e Galil  * am-bohibohi' i Naftal  † ao naho i Sekeme am-bohibohi' i Efraime ao, vaho i Kiriate-arb  ‡ (i Kebrone§ zay), am-bohibohi' Iehoda ao. ⁸ Naho alafe' Iardeney, ati  ana' Ieriko, le tinoro' iereo i Betsere* am-patrambey an-tane pisakey boak' am-pifokoa' i Reobene ao, naho i Ramote† e Gilade amy fifokoa' i Gadey, vaho i Golane‡ e Basane amy fifokoa' i Menas  . ⁹ Ie o rova natoro amo hene ana' Israeleo naho amo renetane ma  nialo am' iareoo, te eo ty ma  noho-doza ama' ondaty tsy nitsatrie'e le a  e ty itribaha'e an-day tsy hivetrake am-pit   i mpamale-fatey am-para' ty ijoha  e a  atrefam-pivory.

21

¹ Na  arine amy Elatsare mpisoro  e naho amy Iehosoa ana' i None, naho amo tal  m-pifokoa' o ana' Israeleo o talen-droaen-te-Levio; ² le nisaontsy am' iereo e Sil   an-tane Kena  ne ao ami'ty hoe: Nandilia' IEHOV   am-pit   i Mos   ty hanolora  e anay rova himoneña'ay rekets' o fiandraza  e ma  nohok' aze ho amo hare'aio. ³ Aa le natolo' o ana' Israeleo amo nte-Levio, boak' amo fana  a' iareoo ty amy tsara' IEHOV  Y, o rova retoa naho o fiandraza'eo. ⁴ Aa le niboak' an-tsapake ty ho a o hasavere  a' o nte-Keh  teo: Le niazo' o ana' i Aharone* mpisoro  e, nte-Levio, an-tsapake, am-pifokoa' Iehod   naho am-pifokoa' i Simone, naho am-pifokoa' i Beniamine, ty rova folo-telo amby. ⁵ Ty ila' o ana' i Keh  teo ro nandrambe an-tsapake boak' an-kasavere  am-pifokoa' i Efraime naho am-pifokoa' i Dane, naho amy vakim-pifokoa' i Menas  : rova folo. ⁶ Le niazo' o ana' i Gersoneo† an-tsapake boak' an-kasavere  am-pifokoa' Isakhare naho boak' am-pifokoa' i Asere, naho boak' am-pifokoa' i Naftal  , vaho boak' ami'ty vakim-pifokoa' i Menas   e Basane, ty rova folo-telo' amby. ⁷ Le niazo o ana' i Merario ty amo hasavere  a'eo, an-tsapake, tam-pifokoa' i Reobene, naho tam-pifokoa' i Gade, naho tam-pifokoa' i Zebolone, ty rova folo-ro' amby. ⁸ Aa le natolo' o ana' Israeleo amo nte-Levio an-tsapake i rova rey rekets'e ty tane fiandraza  e ma  nohoke iareo, ty amy lili' IEHOV   am-pit   i Mos  .

⁹ Aa le natolotse boak' am-pifokoa' o ana' Iehodao naho am-pifokoa' o ana' i Simoneo o rova to  one  e ami'ty a  ara'e rezao: ¹⁰ Ho amo ana' i Aharoneo, raik' amo hasavere  an-te-Keh  te ana' i Levio; fa a' iareo i kitsapake valoha'ey, ¹¹ natolotse iareo ty Kiriate-Arba, (ana' i An  ke t'i Arba) —i Kebrone zay—am-bohibohi' Iehoda ao, rekets' o tane fiandraza  e ma  nohok' azeo. ¹² Fe natolo' iareo amy Kalebe ana' Iefon   ho fana  a' e ka o teteke naho tan  ' i rovaio. ¹³ Natolo' iareo amo ana' i Aharone mpisoro  eo t'i Kebrone naho o fiandraza'eo ho fitsoloham-pamono, naho

* **20:7** Galil  : laro; mivarimbari  e † **20:7** Naftal  : manao ringa ‡ **20:7** Kiriate-arb  : rova efatse; rova fah-efatse § **20:7** Kebrone: fifampilongoa  e; fira  eta  e * **20:8** Betsere: tsampam-bahe † **20:8** Ramote: miere  ere  e an-kaboa  e ‡ **20:8** Golane: areare, bontoly, fivari  a' e * **21:4** Arone: mpa  oke; haozara  e mitoabotse † **21:6** Gersone: fa  itoa  e; Fiova' i fitavea  a  ey

i Libnà reke-piandrazañe; ¹⁴ naho Iatire reke-piandrazañe naho i Estemoa reke-piandrazañe ¹⁵ naho i Kolone reke-piandrazañe naho i Debire reke-piandrazañe; ¹⁶ naho i Aine reke-piandrazañe naho Iotà reke-piandrazañe naho i Bete-semese reke-piandrazañe; rova sive boak' amy fifokoa roe rey. ¹⁷ Naho boak' am-pifokoa' i Beniamine, i Gibone reke-piandrazañe naho i Gebà reke-piandrazañe, ¹⁸ naho i Anatote reke-piandrazañe naho i Almone reke-piandrazañe: rova efatse. ¹⁹ I hene rovan' ana' i Aharone mpisoroña rey: rova folo-telo' amby reke-piandrazañe. ²⁰ Aa le o hasavereñan' ana' i Kehàte, nte-Levio, o ilan' ana' i Kehàteo: i rova niazo' iareo an-tsapake boak' am-pifokoa' i Efraime rey: ²¹ natolotse iareo ty Sekeme am-bohibohi' i Efraime ao reke-piandrazañe ho rovam-pitsoloha' ty namono naho i Gezere reke-piandrazañe ²² naho i Kib' tsaimre reke-piandrazañe, naho i Bete-korone reke-piandrazañe: rova efatse. ²³ Le boak' am-pifokoa' i Dane, i Eltekè reke-piandrazañe, naho i Gibetone reke-piandrazañe ²⁴ naho i Ai'ialone reke-piandrazañe naho i Gat-rimòne reke-piandrazañe: rova efatse. ²⁵ Le boak' ami' ty vakim-pifokoa' i Menasè, i Tanake reke-piandrazañe, naho i Gat-rimòne reke-piandrazañe: rova roe. ²⁶ I hene rova' o ana' i Kehàte ila'eo le folo reke-piandrazañe. ²⁷ Le boak' amy vakim-pifokoa' ila' i Menasè ka ty nanoloraña o ana' i Gersone amo hasavereña' i Levio, i Golane e Basane ao reke-piandrazañe, ho rovam-pitsoloha' ty namono ondaty naho i Bisterà reke-piandrazañe: rova roe. ²⁸ Le boak' am-pifokoa' Isakhare, i Kisone reke-piandrazañe naho i Dabarè reke-piandrazañe, ²⁹ Iarmote reke-piandrazañe, i Enganime reke-piandrazañe, rova efatse. ³⁰ Le boak' am-pifokoa' i Asere: i Misale reke-piandrazañe naho i Abdone reke-piandrazañe, ³¹ i Kelkate reke-piandrazañe, naho i Rekobe reke-piandrazañe: rova efatse. ³² Le tam-pifokoa' i Naftalý, i Kedese e Galilà reke-piandrazañe ho rovam-pitsoloha' ty namono ondaty naho i Kamote' dore reke-piandrazañe naho i Kartane reke-piandrazañe: rova telo. ³³ Ze hene rova' o nte-Gersoneo ty amo hasavereña'eo: rova folo-telo' amby reke-piandrazañe.

³⁴ Le ho amo hasavereñan' ana' i Merario, ty sisa' amo nte-Levio: Boak' am-pifokoa' i Zebolone, Iok'neame reke-piandrazañe, naho i Kartà reke-piandrazañe, ³⁵ i Dimnà reke-piandrazañe, vaho i Nahalale reke-piandrazañe: rova efatse. ³⁶ Le boak' am-pifokoa Reobene: i Betsere reke-piandrazañe, naho Iatsà reke-piandrazañe, ³⁷ i Kedemote reke-piandrazañe, naho i Mefaate reke-piandrazañe: rova efatse; ³⁸ le tam-pifokoa' i Gade, i Ramote e Gilade ao reke-piandrazañe, ho rovam-pitsoloha' ty namono ondaty, naho i Mahanaime reke-piandrazañe, ³⁹ naho i Khesbone reke-piandrazañe, Iaazere reke-piandrazañe: rova efatse ty tonto'e. ⁴⁰ Aa le o rova natolotse amo ana' i Merario iabio, sisa' o nte Levio ty amo hasavereña'eo: rova folo-ro' amby ty niazo' iareo an-tsapake. ⁴¹ Ze hene rova' o nte-Levio: rova efa-polo-valo' amby reke-piandrazañe, añivom-panaña' o ana' Israeleo ao; ⁴² I rova rezay ro songa reke-piandrazañe; le zay ty ie amy fonga rova rey.

⁴³ Aa le hene natolo' IEHOVÀ am' Israele i tane nifantà'e hatolotse androae' iareoy le nitavane' iereo vaho nimoneñañe. ⁴⁴ Le nampitofà' IEHOVÀ o nañohoke iareoo ty amo hene nifantà'e aman-droae' iareoo; vaho leo raik' amo rafelahi'eo tsy nitroatse am' iereo, fa natolo' IEHOVÀ am-pità' iareo ze fonga rafelahi' iareo. ⁴⁵ Tsy teo ty hasoa nipoke ze nampitama' IEHOVÀ amy anjomba' Israele, songa nitendreke.

22

¹ Aa le kinanji' Iehosoa o nte-Reobeneo naho o nte Gadeo, naho i vakim-pifokoa' i Menasèy, ² le hoe re am' iereo: Fa hene nambena' areo ze nandilia' i Mosè mpitoro' IEHOVÀ anahareo, naho hinao' areo ty feoko amy ze hene nandiliako; ³ tsy naforintse' areo o rahalahi' areoo amy hene andro rezay pake henanekeo, fa nitana' areo ty namantoha' IEHOVÀ Andrianañahare' areo. ⁴ Aa ie henane zao, fa tinolo' IEHOVÀ Andrianañahare' areo fitofàñe o rahalahi' areoo hambañe amy tsinara'e am' iereoy; aa le mimpolia, naho mionjona mb' an-kiboho' areo aña, mb'an-tane fanaña' areo, i natolo' i Mosè mpitoro' IEHOVÀ alafe' Iardene aney. ⁵ Ehe mitomira hañoriha' areo o pepètseo naho i Hake namantoha' i Mosè mpitoro' IEHOVÀY, ty hikoko IEHOVÀ Andrianañahare' areo naho hañavelo amo lala'e iabio, hañambeñe o pepè'eo naho hivontititse ama'e, hitoroñe aze an-kaampon' arofo naho an-kaliforam-pañova. ⁶ Zay ty nitatà' Iehosoa iareo, le nampolie'e, vaho noly an-kiboho' iareo aña. ⁷ Ie amy zao, fa natolo' i Mosè amy vakim-pifokoa' i Menasèy ty lova'e e Basane ao; fa ami'ty vaky ila'ey ka ty nanolora' Iehosoa añivon-droahalahi' iareo, alafe' Iardeney ahandrefañe aña. Le nitata iareo t'Iehosoa, naho nampolie'e mb' an-kiboho' iareo aña, ⁸ le hoe ty asa'e tam' iereo: Mimpolia mb' an-kiboho' areo mb'eo reketse vara bey naho añombe maro naho volafoty naho volamena naho torisike naho viñe vaho milogologoa sikiñe tsi-efa; le ifanjarao amo longo' areoo i nikopahe' areo amo rafelahi' areoo. ⁹ Aa le nienga amo ana' Israele e Silò an-tane Kanàneo o ana' i Reobeneo naho o ana' i Gadeo naho ty vakim-pifokoa' i Menasè nimb'an-tane Gilade, mb' an-tane' iareo mb'eo, i tane nitavane' iereo ty amy lili' IEHOVÀ am-pità' i Mosèiy.

¹⁰ Aa ie nivotrak' an-toetse marine Iardeney, an-tane' i Kanàne eo, le rinanji' o ana' i Reobeneo, naho o ana' i Gadeo, naho ty vakim-pifokoa' i Menasè kitrely marine Iardeney, ty kitrely jabajaba ho sambaeñe. ¹¹ Jinanji' o ana' Israeleo amy zao ty hoe: Hehe te namboatse kitrely añ'efe-tane' i Kanàne, marine Iardene, ami'ty lafi' o ana' Israeleo o ana' i Reobeneo naho o ana' i Gadeo, naho ty vakim-pifokoa' i Menasè. ¹² Naho nahajanjiñe zay o ana' Israeleo, le nifanontoñe e Silò eo i hene valobohòn' ana' Israeley haname iareo aña aly. ¹³ Aa le nirahe' o ana' Israeleo mb' amo ana' i Reobeneo naho o ana' i Gadeo vaho i vakim-pifokoa' i Menasèy, mb'an-tane Gilade mb'eo t'i Pinekase ana' i Elazare mpisoroñe, ¹⁴ reketse roandria folo, songa raik' amo mpiaolon' anjomba' o fifokoa' Israeleoo; hene talen' anjomban-droae'e amo Israele aña arivo'eo. ¹⁵ Niheo mb' amo ana' i Reobeneo naho o ana' i Gadeo naho i vakim-pifokoa' i Menasèy an-tane Gilade mb'eo iereo, vaho nilañoñe ty hoe ama'e: ¹⁶ Hoe i valobohò' IEHOVÀY: Ino ze o fikitrohañe nanoe' areo aman' Añahare' Israele zao kanao niambohoa' areo anindroany ty fañorihañe IEHOVÀ ie nandranjy kitrely hiolà' areo am' IEHOVÀ henane zao? ¹⁷ Tsy naahaeneñe antika hao i hakeo e Peorey, ie mb'e tsy neferan-tika pake henane, ndra te nifetsak' amy valobohò' IEHOVÀY ty angorosy? ¹⁸ te hitsambolitio' areo anito ty fañorihañe IEHOVÀ? Aa kanao miola am' IEHOVÀ henaneo, le ho viñera'e te maray ty valobohò' Israele. ¹⁹ Akore arè t'ie niota-faly antanem-panaña' areo, te tsy hitsaha' areo mb'an-tanem-panaña' IEHOVÀ, mb' am-pimoneñan-kivoho' IEHOVÀ mb'eo vaho mangala-panaña ama'ay ao, fa ko miola am' IEHOVÀ ndra ama'ay handranjia' areo kitrely tovo' i kitreli' IEHOVÀ Andrianañaharen-tikañey. ²⁰ Tsy nandilatse hao t'i Akane

ana' i Tserà amo raha navaheñeo ie nifetsahan-kaviñerañe ty valobohò' Israele iaby? vaho tsy indatiy avao ty nikoromake ty amy tahi'ey.

²¹ Nanoïñe amy zao o ana' i Reobeneo naho o ana' i Gadeo, naho i vakim-pifokoa' i Menasèy, nanao ty hoe amo mpifelek' arivo' Israeleo.

²² IEHOVÀ Andrianañahare Andrianamboatse! IEHOVÀ Andrianañahare Andrianamboatse ro maharofoanañe, naho ho fohi' Israele; naho fiola ndra fikitrohan-draty am' IEHOVÀ—le ko rombahen-jahay te anito—²³ ty nandranjia'ay ty kitrely toy hiamboho'a'y am' IEHOVÀ; hisoroña ama'e ndra enga-mahakama, ndra engan-kanintsïñe, le ee t'ie ho tsoehe' IEHOVÀ; ²⁴ hera nanoe'ay ami'ty fivazobazora'ay t'ie amy ze aña mete hivolañe amo ana'aio o ana' areoo hanao ty hoe: Ino ama' areo hao t'IEHOVÀ, Andrianañahare' Israele, ²⁵ ie nampañefere' IEHOVÀ an-tika Iardeney? Aa le tsy manañ' anjara amy IEHOVÀ nahareo ana' i Reobene naho ana' i Gade; ke zay ty hampanjehara' o ana' areoo o ana'aio tsy hañeveña' iareo amy IEHOVÀ? ²⁶ Aa le hoe ty asa'ay: handranjy kitrely, tsy hisoroñañe, tsy hañengäñe; ²⁷ f'ie valolombeloñe añivo anahareo naho zahay naho o tariratse manonjohy antikañeo, hahazoa'ay mitolompitoroña añatrefa' IEHOVÀ amy fisoroña'aio naho amo engae'aio, naho amo engam-pañanintsi'aio; vaho tsy hanao ty hoe amo ana'aio o ana' areoo amy ze aña zay, ty hoe: Tsy aman' anjara am' IEHOVÀ nahareo. ²⁸ Aa le hoe ty asa'ay: Ie manao i hoe zay aman-tika ndra amo tarira'aio amy ze aña zay, le hanao ty hoe tika: hehe te nitsikombea'ay i kitreli' IEHOVÀ rinanjin-droaen-tikañey, tsy ho fisoroñañe fa ho valolombeloñe añivo inahareo naho zahay. ²⁹ Lavitse anay ty hiola am' IEHOVÀ naho ty hiamboho'a'y am' IEHOVÀ tsy hañoriha'ay aze te anito, handranjia'ay kitrely hisoroña'ay ndra engan-koroañe naho tsy amy kitreli' IEHOVÀ Andrianañaharen-tika añatrefa' i kivoho'ey avao.

³⁰ Ie jinanji'i Pinekase mpisoroña naho o roandria' i valobohòkey naho o mpifelek' arivo' o ana' Israele nindre ama'eo i lañona' o ana' i Reobeneo naho o ana' i Gadeo naho o ana' i Menasèo zay, le ni-no' iereo. ³¹ Le hoe t'i Pinekase ana' i Elazare, mpisoroña amo ana' i Reobeneo naho amo ana' i Gadeo vaho amo ana' i Menasèo, Oni'ay androany te amantika t'IEHOVÀ amy te tsy nanoe' areo ze o fiolàñe am' IEHOVÀ zao, vaho navotso' areo ampitâ' IEHOVÀ o ana' Israeleo. ³² Aa le nibalike boak' amo ana' i Reobene naho amo ana' i Gade an-tane Giladeo, mb' an-tane Kanàne mb'amo ana' Israeleo mb'eo t'i Pinekase ana' i Elazare mpisoroña naho o roandriañeo, ninday i saontsiy am' iereo. ³³ Nino' o ana' Israeleo i entañe zay, le nañandriañe an' Andrianañahare o ana' Israeleo naho tsy natao' iereo ka ty hionjon-kialy naho hanjevoñe i tane imoneña' o ana' i Reobeneo naho o ana' i Gadeoy. ³⁴ Aa le nitokave' o ana' i Reobeneo naho o ana' i Gadeo ty hoe Ede* i kitreliy: fa valolombelo añivontika, te IEHOVÀ ro Andrianañahare.

23

¹ Ie andro maro aña, naho fa nampitofà' IEHOVÀ amo rafelahi'e iaby mañohoke iareoo t'Israele vaho nigain-kantetse t'Iehosoa, nisilofenkàanterañe, ² le fonga kinoi' Iehosoa t'Israele naho o talè'eo naho o mpiaolo'eo naho o mpizaka'eo naho o mpifehe'eo le nanoe'e ty hoe: Fa bey raho, mihaantetse; ³ fa nioni' areo ze hene nanoe' IEHOVÀ Andrianañahare' areo amo kilakila' ndatio ty ama' areo; te nialy ho anahareo t'IEHOVÀ Andrianañahare' areo. ⁴ Ingo fa nizarako lova nahareo ty amo fifokoa'

* **22:34** Ede: valolombeloñe

areoo, o fifeheañe sisao, boak' am' Iardeney, mitraok' amo fifeheañe fa naitoakoo, ampara' i Riake Jabajaba mb' am-pitsofora' i àndroy aney. ⁵ IEHOVÀ Andrianañahare' areo, ie ty handronje iareo añatrefa' areo mb'eo vaho ho roahe'e tsy ho ampahaisaha' areo; le ho fanaña' areo i tane' iareoy, amy tsinara' IEHOVÀ Andrianañahare' areo ama' areoy. ⁶ Aa le mihafatrara hahavontititse ami'ty fañorihañe ze hene misokitse amy boke Hà i Mosèy ao, tsy hitsileañe ndra mb' am-pitàn-kavana ndra havia; ⁷ tsy hitraofa' areo o kilakila' ndatio, o sisa ama' areoo; naho tsy ho toñoneñe ty añaran' ndrahare' iareoo*, ko ampifantàñe, ko itoroñañe, vaho ko iambaneañe; ⁸ fe tambozoro t'IEHOVÀ Andrianañahare' areo, manahake ty nanoe' areo ampara' henaneo, ⁹ ie fa nandroake fifeheañe ra'elahy naho maozatse añatrefa' areo t'IEHOVÀ; le inahareo, toe leo ondaty raike tsy nitroatse ama' areo ampara' henane. ¹⁰ Mañoridañe arivo t'indaty raik' ama' areo, kanao IEHOVÀ Andrianañahare' areo ty mialy ho anahareo, ty amy nitsara'ey. ¹¹ Aa le mitaoa am-pilozohañe ty hikoko IEHOVÀ Andrianañahare' areo. ¹² F'ie hibalintoa, hipitek' amo sisa' o fifeheañe, o honka'e ama' areoo, hañenga valy, himoaha' areo, vaho iereo ama' areo, ¹³ le maharendreha an-katò te tsy ho roahe' IEHOVÀ Andrianañahare' areo am-pahaisaha' areo ka o fifeheañe retiañe; f'ie ho fandrike naho koboñe ama' areo, naho fifiaké an-deme' areo, vaho fatik' am-pihaino' areo, ampara' t'ie mihomak' amy tane soa natolo' IEHOVÀ Andrianañahare' areoy. ¹⁴ Hehe, te mb' amy fañaveloa' ty tane bey toy raho henaneo; le fohi' areo an-kaliforam-pañova naho an-kaampon' arofo te tsy eo ty nilesa amo hene saontsy soa tsinara' IEHOVÀ Andrianañahare' areo ty ama' areoo; songa nitendreke, tsy ama'e ty nipoke. ¹⁵ Ho tondroke te, manahake te sindre nitendrek' ama' areo o entan-tsoa tsinara' IEHOVÀ Andrianañahare' areo ama' areoo, le songa hampifetsahe' IEHOVÀ ama' areo ka o nahatahata'eo ampara' te rinotsa'e an-tane soa natolo' IEHOVÀ Andrianañahare' areo atoy. ¹⁶ Ie andilara' areo i fañina' IEHOVÀ Andrianañahare' areo linili'ey naho miveve hitoroñe ndrahare ila'e vaho hitalaho ama'e le hisolebotse ama' areo ty haviñera' IEHOVÀ vaho hivetrake aniany an-tane soa natolo'e anahareo atoy.

24

¹ Aa le natonto' Iehosoa e Sekeme ao o fifokoa' Israele iabio, le kinoi'e o talè' Israeleo naho o mpiaolo'eo naho o mpizaka'eo, naho o mpifehe' iareoo; vaho niatrek' añatrefan' Añahare. ² Le hoe t'Iehosoa am'ondaty iabio: Hoe ty tsara' IEHOVÀ, i Andrianañahare' Israele: Nimoneñe alafe' i Sakay aña o rae' areoo taolo; i Teràke rae' i Avrahame naho ty rae' i Nakore; songa nitoron-drahare ila'e. ³ Rinambeko amy zao t'i Avrahame rae' areo boak' alafe' i Sakay le niaoloako nanitsike i tane Kanàne naho nampitomboeko o tiri'eo vaho natoloko aze t'Ietsake. ⁴ Natoloko am' Ietsake t'Iakobe naho i Esave, natoloko amy Esave ty Vohi-Seire* ho fanaña'e; nañavelo mb'e Mitsraime mb'eo ka t'Iakobe naho o ana'eo. ⁵ Niraheko t'i Mosè naho i Aharon vaho nametsahako angorosy ty Mitsraime amo fonga raha nanoako am'iareoo; ie modo zay le nakareko boak' ao nahareo. ⁶ Eka navotako boake Mitsraime ao o roae' areoo; aa ie nipok' amy sakay, le nañoridañe o roae' areoo an-tsarete naho mpiningi-tsoavalà mb' amy Ria-Binday ao o nte-Mitsraimeo. ⁷ Aa le nitoreo

* 23:7 Avo 23:13 * 24:4 Seire: volovoloe; ose; anga-draty; tio-bey

am' IEHOVÀ iereo naho nampivotraha'e ieñe ty añivo' areo naho o nte-Mitsraimeo, le nendese'e ama'e i riakey, nañopo iareo; le nahaisake o fitoloñako e Mitsraime añeo o fihaino' areoo; vaho nimoneñe sa lava an-dratraratra ao. ⁸ Nendeseko mb'an-tanen-te-Amore mb'eo nahareo, mb'amo mpimoneñe alafe' Iardeneio; nialia' iareo, fe natoloko am-pitá' areo ho fanañañe o tane' iareoo i zinevoko añatrefa' areoy. ⁹ Nitroatse amy zao t'i Balake[†] ana' i Tsipore[‡], mpanjaka' o nte-Moabeo, nialy am' Israele, le nañirake naho kinanji'e t'i Balame ana' i Beore, hañozoñe anahareo, ¹⁰ fe nifoneñako tsy hañaoñe i Balame; te mone nitolom-pitata anahareo re vaho nivotsorako am-pitá'e. ¹¹ Nitsaha' areo Iardeney naho nivotrake e Ierikò eo; le nialy ama' areo o nte-Ierikoo, naho o nte-Amoreo, naho o nte Perizio, naho o nte Kanàneo, naho o nte-Kiteo, naho o nte Gargasio, naho o nte-Kivio vaho o nte-Iebosio; f'ie natoloko am-pitá' areo ao. ¹² Nampiaoloko anahareo ty fanenetse nandroake iereo aolo' areo mb'eo naho ty mpanjaka roe' o nte Amoreo, fa tsy ami'ty fibara'o, tsy ami'ty fâle'o. ¹³ Le natoloko anahareo ty tane tsy nimokora' areo, naho rova tsy naore' areo, vaho fa imoneña' areo; songa mikama an-tanem-bahe naho an-tonda olive tsy nambole'e. ¹⁴ Ie amy zao añaeveño t'IEHOVÀ le toroño an-kavañonañe naho an-katò; aitò o 'ndrahare nitoroñen-droae' areo alafe' i Sakay naho e Mitsraime añaeo; le toroño t'IEHOVÀ.

¹⁵ Aa naho raty am-pahaisaha' areo ty mitoroñe IEHOVÀ, le joboño anito te ia ty ho toroñe' areo; ke o ndrahare nitoroñen-droae' areo alafe' i Sakaio ndra o ndrahare' o nte-Amore an-tane imoneña' areoo; fa naho zaho rekets' i akibakoy, le IEHOVÀ ro itoroña'ay. ¹⁶ Natoi' ondatio ami'ty hoe: Lavitse anay ty hifary IEHOVÀ, hitoron-drahare ila'e; ¹⁷ IEHOVÀ Andrianañahare, ie ty nanese antika naho o roaen-tikañeo niakatse an-tane Mitsraime, boak' an-trañom-pañondevozañe ao, naho nanao o fitoloñañe ra'elgio ampahaisahan-tika naho nañaro antika amo hene lia nañaveloan-tikañeo vaho añivo' ondaty nirangan-tikañeo; ¹⁸ IEHOVÀ ty nandroake o kilakila' ondatio aolon-tika mb'eo, o nte-Amore nimoneñe an-tane atoio; aa le hitoroñe IEHOVÀ ka zahay; amy te ie t'i Andrianañahare'ay. ¹⁹ Le hoe t'Iehosoa am'ondatio: Tsy mahafitoroñe IEHOVÀ nahareo; Andrianañahare masin-dRe; Andrianañahare mpamarahy; tsy hapo'e o hakeo naho tahi' areoo ²⁰ naho farie' areo t'IEHOVÀ, hitoron-drahare ankafankafa, fa hitolike hañoho-doza ama' areo, ho mongore'e, ie fa nañasoa'e. ²¹ Le hoe ondatio am' Iehosoa: Aiy avao! toe ho toroñe'ay t'IEHOVÀ. ²² Aa hoe t'Iehosoa am'ondatio: Valolombeloñe ama' areo nahareo te jinobo' areo t'IEHOVÀ hitoroñe aze. Le hoe iereo: Toe valolombelon-jahay. ²³ Aa le apoho o ndrahare ankafankafa añivo' areoo, le ampirampio am'IEHOVÀ Andrianañahare' Israele ty arofo' areo.

²⁴ Le hoe ondatio am' Iehosoa: Hitoroñe IEHOVÀ Andrianañahare'ay zahay, le ho haoñe'ay i fiarañanaña'ey. ²⁵ Aa le nifañina am'ondatio t'Iehosoa amy andro zay vaho nampijadoña'e fañè naho fèpètse e Sekeme ao. ²⁶ Sinoki' Iehosoa amy boke' i Han' Añaharey i saontsiy, naho rinambe'e ty vato jabajaba vaho natroa'e ambane' ty kile an-toe-miava' IEHOVÀ ao. ²⁷ Le hoe t'Iehosoa am'ondaty iabio, Ingo, ho valolombeloñe aman-tika ty vato tiañe, fa tsinano'e i hene lañonañe tsinara' IEHOVÀ aman-tikañey, aa le ho valolombeloñe ama' areo re soa t'ie tsy hitety an' Andrianañahare' areo. ²⁸ Aa le nampolie' Iehosoa ondatio songa mb' an-dova'e mb'eo. ²⁹ Ie aña, le nivilasy t'Iehosoa ana' i None, mpitoro'

[†] 24:9 Balake: ty mpandrotsake [‡] 24:9 Tsipore: voroñe; foly; sabaka; liolio

IEHOVÀ, ie aman-taon-jato tsy folo. ³⁰ Le naleve' iareo an-tane linova'e e Timnatserà, am-bohi' i Efraime, avara' i Vohi-Gaase eo. ³¹ Nitoroñé IEHOVÀ t'Israele amy ze hene andro' Iehosoa naho amo fonga andro' o androanavy nenga' Iehosoao, o naahafohiñé ze hene fitoloñá' IEHOVÀ am' Israeleo.

³² Le naleve' iereo e Sekeme añ' ila' i teteke vinili' Iakobe amo ana' i Kamore, rae' i Sekemeoy ami'ty volafoty zato o taola' Iosefe nitakone' o ana'Israeleo boake Mitsraimeo le nandov' aze o ana' Iosefeo. ³³ Nihomake ka t'i Eleazare, ana' i Aharone vaho naleve' iareo an-tamboho i Pinekase, ana'e, amy natolots' aze am-bohibohi' i Efraimey.

Mpizaka

¹ Ie fa nivilasy t'Iehosoa, le nihalaly am' IEHOVÀ o ana' Israeleo ami'ty hoe: Ia ty hionjoñe valoha'e mb'amo nte-Khanàneo ho anay, hialy?
² Le hoe t'IEHOVÀ, Iehodà ty hionjomb'eo fa natoloko am-pità'e i taney.
³ Le hoe t'Iehoda amy Simone rahalahi'e, Mindreza amako mb'amy anjarakoy hialy amo nte-Khanàneo; le hindre ama'o ka raho mb'amy anjara'oy. Aa le nindre lia ama'e t'i Simone. ⁴ Nionjom-beo t'Iehoda; naho nasese' IEHOVÀ am-pità' iareo o nte-Khanàneo naho o nte-Perizeo*, vaho binaibai' iereo e Bezeke† ty lahilahy rai-ale. ⁵ Nizoe' iareo e Bezek' ao t'i Adonibezeke‡, le nialy ama'e, vaho zinama' iareo t'i nte-Khanàne naho t'i nte-Perize. ⁶ Fe nipoliotse añe t'i Adonibezeke, le hinorida' iareo naho tsinepa'iareo vaho fonga kinitsi' iareo ty tondro-beim-pità'e naho tondrobeim-pandia'e. ⁷ Le hoe t'i Adonibezeke, Nitsindrok' ambanen-datàbako ao ty mpanjaka fitompolo kinitsin-tondrobeim-pitâñe naho tondrobeim-pandia, aa le nafoten' Añahare amako i nanoekoy. Aa le napo' iareo e Ierosalaime ao re, vaho ao ty nihomaha'e. ⁸ Toe fa nialy am' Ierosalaime o ana' Iehodao, le fa tinava' iareo naho linafa' iareo an-delapibara, vaho namiañe afo amy rovay.

⁹ Ie amy zay, nizotso hialy amo nte-Khanàne mpimoneñe am-bohibohitse ao naho Atimo ao vaho an-tane petrak' ao o ana' Iehodao. ¹⁰ Naname o nte-Khanàne nimoneñe e Kebroneo t'Iehoda (toe natao Kiriate'arba ty Kebrone taolo), le vinono' iareo t'i Sesay§, naho i Akimane* vaho i Talmay†. ¹¹ Boak'ao re nañoridañe o mpimone' i Debireo‡ (toe natao Kiriate-sefere§ ty Debire taolo). ¹² Le hoe t'i Kalebe, Ze mandafa i Kiriate-sefere vaho mandrambe aze, ty hitolorako i Aksae* anak' ampelako ho vali'e. ¹³ I Otnielet†, ana'i Kenaze‡ zai' i Kalebe ty nandrambe aze; vaho natolo'e ama'e t'i Aksae anak'ampela'e ho tañanjomba'e. ¹⁴ Ie amy zao, naho nimb'ama'e, le nosihe'e hihalaly tane aman-drae'e hambolea'e. Aa ie nizotso amy borìke'ey, le hoe ty asa' i Kalebe ama'e, Ino o paia'oo? ¹⁵ Le hoe re tama'e: Fitsezo rano raho fa tane maike ty natolo'o ahy; ehe toloro rano manganahana ka. Aa le natolo' i Kalebe aze o manganahana amboneo naho o manganahana ambaneo.

¹⁶ Nionjoñe boak' an-drovan-tsatrañe ao o ana' i Keny§, rafoza' i Mosèo, mindre amo ana' Iehodao, mb' am-patram-bei' Iehoda mb'eo, atimo' i Arade* ey vaho nindre nimoneñe am' ondatio. ¹⁷ Le nindre aman-joke'e Simone t'Iehoda, le linafa' iareo o nte-Khanàne nimoneñe e Tsefate† ao le vata'e narotsa'e. Natao Kormà‡ ty añara' i rovay. ¹⁸ Rinambe' Iehoda ka t'i Azà§ rekets' i tane'ey naho i Askelone* rekets' i tane'ey, vaho i Ekrone† rekets' i tane'ey. ¹⁹ Nindre am' Iehoda t'IEHOVÀ, nandroake o am-bohibohitseo, fe tsy nahafaniotse o an-tane petrakeo ty amo saretem-bi'

* **1:4** Perize; mpañialo † **1:4** Bezeke: helatse ‡ **1:5** Adonibezeke: hela' IEHOVÀ; talèn-kelatse § **1:10** Sesay: eneñe; tretre * **1:10** Akimane: rahalahim-pitâ' ankavana † **1:10** Talmay:

mikalañe o ranoo; ‡ **1:11** Debire: mpilañoñe; tsara § **1:11** Kiriate-sefere: Rovam-boke

* **1:12** Aksae: mihamiñe: mizilik' a' marerarera † **1:13** Otniele: fotoan'Añahare ‡ **1:13** Kenaze: mpangoroñe § **1:16** Kený: fanaña; fivilianañe; firovetañe * **1:16** Arade: borike ly † **1:17** Tsefate: i mioniñe; miatreke, manaroñe ‡ **1:17** Kormà: natokañe aman'Añahare; § **1:18** Azà: maozatse, ose * **1:18** Askelone: havesarañe; balantsy; afo bey † **1:18** Ekrone: miholitse; hinolitse

iareoo. ²⁰ Le natolo'e amy Kalebe ty Kebrone[‡] ty amy saontsi' i Mosèy; vaho rinoa'e boak'ao i ana-dahi' i Anake[§] telo rey.

²¹ Tsy nahafandroake o nte-Iebosý nimoneñe e Ierosalaimeo t'i Beniamine; le mitrao-pimoneñe amo ana' i Beniamineo pake henane o nte Iebosio. ²² Aa naho i anjomba' Iosefey, naname i Betele ka iereo vaho nolora' IEHOVÀ. ²³ Nirahe' i anjomba' Iosefey ty hisarisary i Betele, i nitokaveñe ty hoe Loze taoloy. ²⁴ Nahaoniñe ondaty niakatse i rovay i mpisary rey, le hoe iereo tama'e, Atorò anay ty lalam-pimoahañe amo rovao, le hitretreza'ay. ²⁵ Aa ie natoro'e ty fizilihañe amy rovay, le linafa' iareo am-pibara i rovay, fe napo' iareo hañavelo mb'eo indatiy reketse ty hasavereña'e iaby. ²⁶ Nomb' an-tane' o nte Kiteo indatiy le namboatse rova vaho natao'e Loze ty añara'e, le mbe ie henaneo. ²⁷ Fe tsy nahafaniotse o mpimone i Betseane* naho o tanà'eo ndra i Tànake[†] naho o tanà'eo, ndra o mpimone' i Dore naho o tanà'eo, ndra o mpimone' Ibleame naho o tanà'eo, ndra i Megido naho o tanà'eo t'i Menasè; amy te nifahatse amy taney o nte-Khanàne nimoneñ' aoo. ²⁸ Ie aña naho naozatse t'Israele le nampandoa'e haba o nte-Khanàneo fa tsy fonga niroaheñe. ²⁹ Tsy nahafaniotse o nte-Khanàne nimoneñe e Gezereo ka t'i Efraime, fe nitrao-pimoneñe am' iereo e Gezere ao o nte-Khanàneo. ³⁰ Tsy niroahe' i Zebolone ka o mpimone' i Kitroneo, ndra o mpimone' i Nahaloleo, le nitrao-pimoneñe am' iereo o nte-Khanàneo vaho nampandoàñe haba. ³¹ Tsy niroahe' i Asere ka o mpimone' i Akò ndra o mpimone' i Tsidoneo, ndra o Aklabeo, ndra i Kelbà, ndra i Afike, ndra i Rekobe; ³² te mone nitrao-pimoneñe amo nte-Khanàne mpimoneñe amy taneio t'i Asere; fa tsy nilefe'e ty naniotse iareo. ³³ Tsy niroahe' i Naftalý ka o mpimone' i Bete'semeseo, ndra o mpimone' i Bet'anateo; te mone nitrao-pimoneñe amo nte-Khanàne mpimoneñe amy taneio; aa le nampandoa'e haba o mpimone' i Bete-semese naho Bet'anateo. ³⁴ Nazi' o nte-Amoreo mb' am-bohibohitse ao o ana' i Daneo, le tsy nenga' iareo hizotso mb'am-bavatane mb'eo. ³⁵ Nimanea' o nte-Amoreo ty himoneñe am-bohi-Karese e Ai'ialone naho e Saalbime ao; fe nahagioke ty fità' Iosefe vaho nanoe'e mpandoa haba. ³⁶ Nifototse amy fitroara' i Akrabimey ty efe-tane' o nte-Amoreo, boak' amy vatoy mañambone.

2

¹ Nionjom-be Bokime* boake Gilgale ty anjeli' IEHOVÀ le nanao ty hoe: Nakareko boake Mitsraime aña, naho nampimoaheko an-tane nifantàko aman-droae' areo ao; vaho nanoeko ty hoe: Le lia'e tsy hifotetse amy fañinako ama' areoy raho; ² fe tsy hanoa' areo fañina o mpimone' ty tane toio; fa harotsa' areo o kitreli' iareoo, f'ie tsy nijanjiñe ty feoko; akore o nanoe' areo zao? ³ Aa le natovoko ty hoe: Tsy ho roaheko aolo' areo mb'eo fa ho fatik' an-deme' areo, naho ho fandrik' ama' areo o 'ndrahare' iareoo. ⁴ Ie nagado' i anjeli' IEHOVÀ i tsara amo ana' Israeleoy le nipoñä-peo androvetse ondatio. ⁵ Natao' iareo Bokime amy zao i toetsey, vaho nanao soroñe am' IEHOVÀ eo.

⁶ Le nenga' Iehosoa hañavelo mb'eo ondatio, vaho songa nionjomb' amy lova'ey mb'eo o ana' Israeleo handrambe o tane'eo. ⁷ Toe nitoroñe IEHOVÀ ondatio amo hene' andro' Iehosoa naho amo andro' o androanavy iaby nisia veloñe amy fihomaha' Iehosoaio, o nahaoniñe ty fitoloña'

* 1:20 Kebrone: fifampilongoañe § 1:20 Anake: ravam-bozo * 1:27 Betseane: anjomba an-tsifa; † 1:27 Tànake: i mampirek' azo; i manoiñe azo * 2:1 Bokime: toe-pirovetañe

IEHOVÀ ra'elahy nanoe'e ho a Israeleo. ⁸ Nivilasy amy zao t'Iehosoa, ana'i None, mpitoro' IEHOVÀ, ie ni-zato-tsi-folo taoñe ty ha'antera'e. ⁹ Le nalenteke añ'ate' o efe' i tane linova'eio, e Timna-trese am-bohi' i Efraime aña'ila' avara' ty vohi-Gaase[†] ao. ¹⁰ Ie fa natontoñe aman-droae'e o mpirai-nono ama'eo, le nitroatse amy zao ty tariratse tsy nahafohiñe IEHOVÀ ndra o fitoloñañe nanoe'e am' Israeleo. ¹¹ Aa le nanao ty hatsivokarañe am-pivazoho' IEHOVÀ o ana'Israeleo amy fitoroña' iareo i Baaley. ¹² Naforintse' iareo t'IEHOVÀ Andrianañaharen-droae' iareo, i nampiakatse iereo tan-tane Mitsraimy, amy fañoriha' iareo o 'ndrahare ankafankafao, o 'ndrahare' ondaty nañohoke iareoo naho nibokobokokoa' iareo le nahaviñetse IEHOVÀ. ¹³ Toe niamboho' iareo t'IEHOVÀ le nitoroñe i Baale[‡] naho i Astarote. ¹⁴ Le niforoforo am' Israele ty haviñera' IEHOVÀ, le nasese'e am-pitam-pamaoke hamaoha'e, le naleta'e am-pità' o rafelahi'e mbeombeoo, toly ndra tsy nahafitroatse amo rafelahi'eo iereo. ¹⁵ Aa ndra ombia-mbia ty nionjona' iareo, le natrèt're ty fità' IEHOVÀ ho ami'ty raty, ty amy tsinara' IEHOVÀ naho i nifantà' IEHOVÀy, vaho ni-vata'e ampoheke iereo. ¹⁶ Nampitroatse mpizaka amy zao t'IEHOVÀ handrombake iareo am-pità' o mpamaokeo. ¹⁷ F'ie tsy nañaoñe o mpizakao, te mone niveve mb'ama' 'ndrahare ila'e, vaho nitalaho'a'e; ie nalisa nivik' amy lala' nañaveloan-droae'e mpijanjiñe o lili' IEHOVÀy, toe tsy nipaoke. ¹⁸ Ie nampitroatse mpizaka t'IEHOVÀ, le nindre amy mpizakay t'IEHOVÀ nandrombake iareo am-pità' o rafelahi'eo amo hene' andro' i mpizakaio; amy te niferenaiña' IEHOVÀ ty fiñeóneo' iareo ty amo namorekeke vaho nanotry iareoo. ¹⁹ Ie nihomake i mpizakay, le niamboho ka iereo, nañindra ty hatsivokara' iareo mandikoatse o satan-droae'eo, ie nañorike 'ndrahare ila'e hitoroñañe naho hitalahoñañe; Leo raike amo sata-rati'eo tsy napo' iareo, ndra ty fitangingì' iareo. ²⁰ Aa le nisolebatse am' Israele ty haviñera' IEHOVÀ, vaho hoe ty natao'e: Kanao nandilatse i fañinako linilikò an-droae' iareoy ty fifeheañe toy, vaho tsy nihaoñe' iereo ty feoko; ²¹ le tsy hasioko aolo' iereo o fifelehañe nenga' Iehosao, ie nihomake; ²² soa te iereo ty hitsoehako[§] Israele, he ho ambena' iareo ty lala' IEHOVÀ hañaveloa'e, manahake ty nañambenan-droae'e, hera tsie. ²³ Aa le nenga' IEHOVÀ o fifelehañe, tsy niroahe'e aniany; vaho tsy nasese'e am-pita' Iehosoa.

3

¹ Zao o fifelehañe nenga' IEHOVÀ hitsoha'e Israele amy te tsy maro ty teo amo filhotakotahañe amy Khanàneio; ² soa te ho fohi' o tarira' Israeleo, hampiòha'e hialy, o tsy naharendreke ndra inoñ' inoñe ama'e taoloo; ³ aa ie toñoneñe: le teo o talè' lime' o nte Pilistio naho o nte-Khanàne iabio naho o nte-Tsidoneo vaho o nte-Kiye nimoneñe am-bohi' i Libanoneo boak' am-bohim-Baale-kermone ao pak' am-pimoahañe e Kamate aña. ⁴ Toe ie ty fitsohañe Israele, hampaharofoanañe ke ho haoñe' iereo o lili' IEHOVÀ linili'e an-droae' iareo am-pità' i Mosèo. ⁵ Aa le nitrao-pimoneñe amo nte-Khanàneo naho amo nte-Kiteo naho amo nte-Amoreo naho amo nte-Perizeo naho amo nte-Kivio vaho amo nte Iebosio o ana' Israeleo; ⁶ nengae' iareo o anak' ampela'eo ho valy naho natolo' iereo amo ana-dahi'eo o anak'ampela' iareoo naho nitoroñe o 'ndrahare' iareoo ⁷ naho nitolon-karatiañe añatrefa' IEHOVÀ o ana' Israeleo, ie nañaliño IEHOVÀ Andrianañahare' iareo vaho nitoroñe o Baaleo naho o hazomangao.

[†] 2:9 Gaase: tio-bey; fifandraparapahañe [‡] 2:13 Baale: tale (talen-kokolampa) § 2:22 Its 8:2

⁸ Aa le niforoforo am' Israele ty haviñera' IEHOVÀ naho naleta'e am-pità' i Kosane'risataime* mpanjaka' i Arame-naharaime†, vaho nitoroñe i Kosane' risataime valo taoñe o ana' Israeleo. ⁹ Ie nitoreo am' IEHOVÀ o ana' Israeleo le nampitroara' IEHOVÀ mpandrombake o ana' Israeleo hañaha iareo, toe i Otniele‡ ana' i Kenaze§ zai' i Kalebe. ¹⁰ Nivotrak' ama'e ty Arofo' IEHOVÀ, le nizaka Israele naho nionjom-bañ' aly; le nasese' IEHOVÀ am-pità'e t'i Kosane' risataime, mpanjaka' i Arame' naharamime vaho zinevom-pità'e t'i Kosane' risataime. ¹¹ Nitofa efa-polo taoñe i taney vaho nihomake t'i Otniele ana' i Kenaze.

¹² Aa le nanao haloloña am-pivazohoa' IEHOVÀ indraike o ana' Israeleo; vaho nampaozare' IEHOVÀ amy Israele ty fità' i Eglone*, mpanjaka' i Moabet† ty amo hatsivokarañe nanoe' iereo am-pivazohoa' IEHOVÀ. ¹³ Natonto'e ama'e o ana' i Amone naho i Amalekeo; le nionjombañ' aly am' Israele vaho tinava'e i rovan-tsatrañey; ¹⁴ vaho nitoroñe i Eglone mpanjaka' i Moabe folo-tao-valo' amby o ana' Israeleo. ¹⁵ Fe nikoaik' am' IEHOVÀ o ana' Israeleo le nampitroara' IEHOVÀ mpandrombake, toe i Ehode‡, ana' i Gerà§ nte-Beniamine, ondaty fitàn-kavia; ie ty nañitrifa' o ana' Israeleo ravoravo amy Eglone mpanjaka' i Moabe. ¹⁶ Nitsene fibara sambe-lela'e ho ambata'e t'i Ehode, kiho raike ty andava'e vaho nasitri'e ambane' o siki'eo, am-pè'e ankavana ao. ¹⁷ Nendese'e amy Eglone mpanjaka' i Moabe aña amy zao i ravoravoy—toe loho sometsetse t'i Eglone. ¹⁸ Ie niheneke ty fibanabanàñe i ravoravoy, le nampienga'e o nanese i ravoravoio, ¹⁹ fa ie ka nibalike amo saposampo añ' ila' i Gilgaleo, le nanao ty hoe, manan-ko bisibisiheñe ama'o raho, ry mpanjaka; le hoe re: Mianjiña! Vaho niakatse aña iaby o mpijohañe marine azeo. ²⁰ Le niheo mb'ama'e mb'eo ty Ehode, ie niambesatse am-bangý añ'efe'e ambone ao, le hoe t'i Ehode ama'e, minday tsara ho azo raho boak' aman' Añahare. Niongak' amy fiambesa'ey amy zao re, ²¹ le nampitakare' i Ehode amy zao ty fitan-kavia'e handrambesa'e i fibara am-pè'e havanay vaho tinombo'e an-tro' i Eglone, ²² le nitsorofotse reke-taho'e i lela'ey naho nakite' i havondra'ey i lela'ey vaho tsy nahafakare'e boak' an-tro'e ao i fibaray, te mone leotse ty niakatse. ²³ Niavotse mb'am-pimoaham-beo t'i Ehode le narindri'e ama'e ty lala' i efetse amboney vaho nahili'e. ²⁴ Ie niavotse le nimb'eo o mpitoro'eo, fe nahatendreke te nihily o lala' i efetseio le hoe ty asa' iareo: Hera misafo-pandia re añ'anjomban' asara'e ao. ²⁵ Aa ie nandiñe eo am-para' te nidaba, akore! ie tsy manokake o lalan' anjombaio, le nangala' iareo lahin-dakilè naho nanokake, Vaho hehe te neforetrake, fa nihomake eo i talè' iareoy. ²⁶ Aa kanao nitambatse ela, nahabotitsike t'i Ehode le nirangae'e o saposampoo vaho nipitsike mb'e Seirate* mb'eo. ²⁷ Ie nimoak' ao le nampipopò tsifan' añondry am-bohi' Efraime ey vaho nizotso nindre ama'e mb'eo o ana' Israeleo boak' an-kaboaña ao, ie niaolo, ²⁸ naho nanoa'e ty hoe, Oriho raho, fa natolo' IEHOVÀ am-pità' areo o nte-Moabe rafelahi' areoo. Aa le norihe' iereo naho nandrambe ty fitsaha' Iordane tandrife i Moabe vaho tsy nenga' iareo hitsahañe. ²⁹ Zinama' iareo amy Moabe tañ' andro zay ty lahilahy rai-ale, songa vondrake, fonga lahindefoñe, leo raike tsy nahapoliotse. ³⁰ Aa le nafotsak' ambanem-pità' Israele t'i Moabe amy andro zay vaho nitofa valompolo taoñe i taney.

* 3:8 Kosane-risataime: hamainten-kakeo † 3:8 Arame-naharaime; Arame-Saka roe ‡ 3:9 Otniele: fotoran'Añahare § 3:9 Kenaze: o vinily zao; o firovetañe zao * 3:12 Eglone: tamana; sarete; bontoly † 3:12 Moabe: an-drae'e ‡ 3:15 Ehode: i mandrengey § 3:15 Gera: misese; hotakotake; fifandierañe * 3:26 Seirate: volovoloe; ose; kokolampa;

³¹ Nanonjohy zay t'i Samgare[†] ana' i Anate[‡]. Nandafa lahilahy nte-Pilisty enen-jato ami'ty faroa-bosy; ie ka ty nandrombake Israele.

4

¹ m Aa ie nivilasy t'i Ehode le nanao haratiañe am-pivazohoа' IEHOVÀ indraike o ana' Israeleo. ² Le naleta' IEHOVÀ am-pità' Iabine*, mpanjaka' i Khanàne, mpifehe' i Kastore[†] iereo; i Siserà[‡] ty nifeleke o lahindefo'eo nahohimoneñe e Karosete'Sambahiny. ³ Nikaikaik' amy IEHOVÀ o ana' Israeleo, amy t'ie aman-tsarete vy sivan-jato, vaho vata'e namorekeke o ana' Israeleo roapolo taoñe.

⁴ Nizaka Israele tañ' andro zay ty rakemba atao Deboraе*, mpitoky, vali' i Lapidote[†]. ⁵ Nimoneñe ambane satrañe añivo' i Ramà[‡] naho i Betele am-bohi' i Efraime eo t'i Deboraе, vaho nionjomb' ama'e mb'eo o ana' Israeleo ho zakae'e. ⁶ Nampihitrife'e naho nikanjie'e t'i Barake§, ana' i Abinoame*, boake Kedese e Naftalý aña le nanoa'e ty hoe, Tsy fa nandily azo hao t'IEHOVÀ Andrianañahare' Israele: ami'ty hoe: Akia harineo ty vohi-Tabore naho endeso lahindefo rai-ale amo ana' i Naftalio naho amo ana' i Zeboloneo? ⁷ Le ho tariheko mb' ama'o mb' amy saka Kisoney mb'eo t'i Siserà, mpifele' i mpirai-lahin-defo' Iabiney, rekets' o sarete'eo naho i valobohò'ey; vaho hatoloko am-pità'o. ⁸ Le hoe t'i Barake tama'e, Kanao hindreza'o lia, le handeha raho; fe naho tsy indreza'o, zaho tsy homb'eo. ⁹ Le hoe re, Toe hindrezako, fe tsy hahazoa'o engeñe ty lala homba'o; fa haleta' IEHOVÀ am-pitàn-drakemba t'i Siserà. Niongak' amy zao t'i Deboraе, nindre lia amy Barake mb'e Kedese mb'eo.

¹⁰ Kinai' i Barake t'i Zebolone naho i Naftalý hifanontoñe ama'e e Kedese ao; aa le nionjom-beo am-pandia ty rai-alen-dahy vaho nindre ama'e t'i Deboraе. ¹¹ Ie amy zao fa nifampiria amo nte-Kenio[†] t'i Kevere[‡], nte-Kený, ana' i Kobabe§ rafoza' i Mosè vaho nañoren-kibohotse a monto' i Tsa'ananime* aña' ila' i Kedese eo. ¹² Natalily amy Siserà te nionjomb' am-bohi' Tabore mb'eo t'i Barak' ana' i Abinoame. ¹³ Natonto' i Siserà amy zao o sarete'e iabio, i sarete viñe sivan-jato rey, naho nindre ama'e i valobohò'boake Karosete-goime añaey pak' an-tsaka Kisone eo. ¹⁴ Aa le hoe t'i Deboraе amy Barake. Miogaha, itoy ty andro nanolora' IEHOVÀ i Siserà am-pità'o. Tsy fa niaolo Azo hao t'IEHOVÀ? Aa le nizotso boak' am-bohi-Tabore ao t'i Barak' am-pañorihañe ty rai-alen-dahy. ¹⁵ Navalitsikota' IEHOVÀ amy zao t'i Siserà naho o sarete'e iabio, naho i valobohò'ey andela-pibara añatrefa' i Barake, aa le nizotso amy sarete'ey t'i Siserà vaho nibolititse mb'eo am-pandia. ¹⁶ Hinorida' i Barake o sareteo naho i valobohòkey pake Karosete-goime aña naho fonga zinama'e an-delapibara ty valobohò' i Siserà vaho tsy napo'e sehanga'e. ¹⁷ F'ie nipoliotse am-pandia mb'an-kiboho' Iaele[†] tañanjomba' i Kevere nte-Kený mb'eo, amy te nifampilongo ty anjomba' Iabine mpanjaka' i Katsore naho ty anjomba' i Kevere nte-Kený. ¹⁸ Niakatse mb'eo t'Iaele nifanalaka amy Siserà, vaho hoe re tama'e, Mitoliha, ry talèko, mitsilea mb' amako

* 3:31 Samgare: renetane; ambahiny atoy ‡ 3:31 Anate: Vale'e * 4:2 Jabine: ty mahafohiñe; mamboatse † 4:2 Kastore: kiririsa: ahetse maike; ‡ 4:2 Siserà: ty hahaoniñe soavalà § 4:2 Kasorete: ala; ava;; moañe; fianjiñañe * 4:4 Deboraе: tsara: rene tantele † 4:4 Lapidote: failo ‡ 4:5 Ramà: haboañe, manoro hakarapiloñañe § 4:6 Barake: helatse; ndra enge * 4:6 Abinoame: raen-kasoa † 4:11 Kený: fanaña; fivilia; hontoke ‡ 4:11 Kevere; i mihelañey; habosehañe § 4:11 Kobabe: isohañe; kokoañe * 4:11 Tsa'ananime; mañitse; fifotsahañe † 4:17 Iaele: i mitroatsey; vik-ose

mb'etoa; le ko hembañe. Aa ie nitsile mb'ama'e mb' an-kiboho'e ao, le sinaro'e bodo mateveñe. ¹⁹ Le hoe re tama'e, Ehe anjotsò rano tsy ampeampe hinomako fa marandrano. Aa le sinoka'e ty korobon-dronono naho nazotso'e hikama vaho sinaro'e indraike. ²⁰ Le hoe re ama'e, Mitroara an-dalan-kibohotse ey, le ie mivotrak' ama'o t'indaty hañontane azo ami'ty hoe: Ama' ondaty hao ty ao? Le hoe ty hatoi'o: Aiy! ²¹ Rinambe' Iaele vali' i Kevere amy zao ty tsaton-kibohotse naho ty ana-bato am-pità'e le niapiapia mb' ama'e ao le tinombo'e am-pitendreanaoli'e amy tsatokey naho natrofa'e pak'an-tane, amy t'ie nilampo' ty rotse fa nimokotse, vaho nihomake. ²² Aa ie nañoridañe i Siserà t'i Barake, le nifanalaka' Iaele nanao ama'e ty hoe, Mb'etoa le hatoroko azo indaty paia'oy.

Aa ie nizilik' ama'e ao, ingo t'ie nihity eo mate, tinombon-tsatok' am-pitendrean' aoli'e. ²³ Aa le nampiambanen' Añahare amy andro zay añañatrefa' o ana' Israeleo t'Iabine mpanjaka' i Khanàne. ²⁴ Nandreketse erike am' Iabine mpifehe' i Khanàne ty fità' o ana' Israeleo, ampara' te narotsa' iareo t'Iabine mpifehe' i Khanàne.

5

¹ Nisabo ty hoe amy andro zay t'i Deboraе naho i Barak' ana' i Abinoame:

² Andriaño t'IEHOVÀ
te nonjoneñe ty lohà' Israele,
naho nanolo-batañe an-tsatri'e ondatio.

³ Mijanjiña ry mpanjaka,
manokilaña ravembia ry roandriañeo;
zaho eka zaho ty hisabo am'IEHOVÀ,
ho rengeko an-tsabo t'IEHOVÀ,
Andrianañahare' Israele.

⁴ Ry IEHOVÀ, ihe nionjoñe boake Seire ao
ihe niroborobo boak'an-tete' i Edome ao, nanginikinike i taney,
nifororoake o an-dikerañeo,
eka nampikojojake rano o rahoñeo.

⁵ Nitranak' aolo' IEHOVÀ o vohitseo,
naho i Sinaiy* añañatrefa' IEHOVÀ
Andrianañahare' Israele eo.

⁶ Ie tañ'andro i Samgare ana' i Anate,
faha' Iaele, ie nikoake o damokeo;
ninokitse an-dalan-tsileke
ze atao mpañavelo.

⁷ Hene nijihetse o mpimone' o tanañeo,
nijohañe t'Israele
ampara' te nitroatse t'i Deboraе,
ie niongake ho rene' Israele.

⁸ Fe nijoboñe 'ndrahare vao iereo,
vaho an-dalambez eo ty aly;

nitendrek' amo efats' ale' Israeleo hao ty fikalandefo ndra ty lefoñe?

⁹ Mitolik' amo roandria' Israeleo ty troko,
o nanolo-batañe an-tsatri'e boak' am'ondati'eo; andriaño t'IEHOVÀ.

¹⁰ Misaontsia ry mpiningi-borike fotio,
o mpiaolo an-jakao,
naho mañavelo amy lalañey.

¹¹ Ambone' ty feom-pitam-pale
am-pitarihan-drano eo,

* ^{5:5} Sinay: rongoñe; firafelahiñañe

ty hitalilia' iareo
o fitoloñam-banta' IEHOVÀO,
ty asa'e mahity amo tanàñe e Israeleo,
le hizotso mb'an-dalam-bey mb'eo
ondati' IEHOVÀO henane zao.

¹² Mivañona, mivañona, ry Deboraе,
mitroara, mitroara, le andaharo sabo,
miongaha ry Barake, le kozozoto
mb' am-pandrohizam-b'eo
o mpirohi'oo ry ana-dahi' i Abinoame.

¹³ Nizotso mb'etoa o fanalolahy sehang'a'eo;
nampifehe' IEHOVÀ ahy o maozatseo.

¹⁴ Niboake Efraime i vaha'ey
hiatreke i Amaleke;
nanonjohy aze t'i Beniamine haname ondati'oo;
niakatse i Makire o mpandilio;
naho boake Zebolone
o mahafitan-tsatilòm-panokitseo.

¹⁵ Nindre amy Deboraе ka o roandria' Isakareo
nañorik' an-tomi' i Barake t'Isakare
mb'am-bavatane mb'eo;
toe ra'elahy ty fitsakorean' arofo'
o mpirai-lia' i Reobeneo.

¹⁶ Ino ty nimoneña'o an-goloboñ' ao,
hijanjiña'o ty fibabababà'
o lia-raikeo?
Toe ra'elahy ty fitsikarahan' arofo'
o mpirai-lia' i Reobeneo.

¹⁷ Nitambatse alafe' Iordaney t'i Gilade,
nañino ka ty fitsoloha' i Dane
ankalo' o lakañeo?
Nidoñe añolon-driake aña t'i Asere,
nimoneñe am-pitolian-dakañe eo. ¹⁸ I Zebolone ty rofoko namoe'aiñe
ampara' ty fivetrahañe,
naho i Naftalý an-kaboa' o hivokeo. ¹⁹ Nimb'eo o mpanjakao nialy;
nañotakotake e Taanake
o mpanjaka' i Khanàne marine'
o rano' i Megidòo,
tsy nandrambe vola ho tambe.

²⁰ Nialy o boak' an-dikerañeo,
nialy amy Siserà o vasiañeo
boak' amo lala'eo.

²¹ Sinao' ty saka Kisone iereo,
i saka haehaey, i saka' Kisoney.
Mañitsaha an-kaozarañe, ry troko.

²² Hotron-tsoavalà amy zao,
godogodoin-drimatse,
ty fandrimata' o fanalohahi'eo.

²³ Afatse t'i Meroze[†] hoe ty anjeli' IEHOVÀ,
ozoño mena o mpimone'eo,
amy t'ie tsy niavy hañolotse IEHOVÀ,
tsy nolora'iareo t'IEHOVÀ hiatrek' o lahidefoñeo.

[†] 5:23 Meroze: raha mietake; boròke

24 Haha amo rakembao t'Iaele,
 tañanjomba' i Kevere, nte-Keny;
 haha re amo rakemba an-kibohotseo.
 25 Rano ty nihalalie'e fe ronono ty nazotso'e;
 nanjotsoa'e dero am-pinga mañeva.
 26 Rinambem-pitâ'e i tsatokey,
 ty fitâ'e havana rekets' ana-batom-pitoloñañe;
 finofo'e amy ana-batoy t'i Sisera,
 nampipotire'e ty añambone'e,
 Eka, tinombo'e naho trinofa'e
 o fitendrean'aoli'eo.
 27 Am-pandia'e eo ty nibokobokoa'e;
 nikorovoke, nandre;
 am-pandia'e eo ty niondreha'e,
 nilantsiñe eo, amy nihotraha'ey,
 teo ty nidona'e mate.
 28 Nitalake an-dalan-kede'e aña ty rene' i Siserà
 nikoaik' an-tsingarakarake:
 Ino ty nahatambatse i sarete'ey aña?
 Akore te mihenekenek' aña avao
 o laròn-tsarete'eo?
 29 Nanoïñe aze o ana-donak' ampela'e mahihitseo,
 Eka nifanointoiñe ama'e o fivola'eo,
 30 Hera t'ie nitendreke fikopahañae,
 vaho mifanjara?
 Songa ondaty aman-tsomondrara'e ndra roe;
 le amy Siserà ty vara maro volo;
 fikopahañae am-bolo'e ankafankafa,
 satam-pitrebeke,
 volom-pitoloñam-pitrebeke
 ami'ty lafi'e roe,
 mañeva ty fititia' o mpamaookeo?
 31 Zay ty hivetraha' o rafelahi'o iabio
 ry IEHOVÀ;
 le hanahake i àndroy am-pionjona'e
 an-kaozarañae, o mikoko Azeo.
 Le nitofa efa-polo taoñe i taney.

6

1 Ie amy zao nanao haratiañae am-pivazohoá IEHOVÀ o ana' Israeleo, naho
 nitolora' IEHOVÀ am-pitâ' i Midiane* fito taoñe. 2 Le nitan-kagâñe am'
 Israele ty fitâ' o nte-Midianeo kanao nihaly lakato ambohitsey naho kobom-
 pipalirañae ty amo nte-Midianeo o ana' Israeleo. 3 Amy te, ie vata'e nitongy
 o ana' Israeleo, le nionjomb'eo o nte-Midianeo naho o nte-Amalekeo vaho
 o anan-tatiñanañaeo haname iareo, 4 hitobe'a'e, hampiantoe'e ty voka' i
 tane' Israele pak' Azà aña, le tsy apo' iareo e Israele ao ty hañaveloñe
 añondry ndra añombe ndra borìke. 5 Ie nionjoñe mb'eo reketse hare naho
 kibohotse ami'ty havalobohò'e hoe valala, ie naho o rameva' iareo tsy
 nihay iaheñeo, te nimoak' an-tane ao hamongots' aze. 6 Nafotsak' ambane
 bey t'Israele ty amy Midiane; vaho nikoaik' am' IEHOVÀ o ana' Israeleo.
 7 Aa ie nitoreo am' IEHOVÀ o ana' Israeleo ty amy Midiane, 8 le nañitrifa'

* 6:1 Midiane: zaka; saroñe; lilitse

IEHOVÀ mpitoky o ana' Israeleo, le hoe re am' iereo, Hoe ty tsara' IEHOVÀ, Andrianañahare' Israele; Nakareko boake Mitsraime aña nahareo vaho nampionjoneko hirik' an-trañom-pañondevozañe ao; ⁹ le nivotsorako ampità' o nte-Mitsraimeo, naho am-pità' o namorekekeo naho nataoko soik' añatrefa' areo vaho natoloko anahareo o tane'eo. ¹⁰ Aa hoe ty asako ama' areo: Zaho IEHOVÀ Andrianañahare' areo; ko añaeveña' areo o 'ndraharen-te-Amoreo, ie mimoneñe an-tane'e ao, fe tsy hinao' areo ty feoko.

¹¹ Aa le nivotrake eo ty anjeli' IEHOVÀ niambesatse ambane' ty kile' Ioase[†] nte-Abiezere[‡] e Ofrà aña; namofoke vare-bolè ampipiritan-divay ao t'i Gidone[§] ana'e haeta'e amo nte-Midianeo. ¹² Niheo ama'e i anjeli' IEHOVÀ, le nanoe'e ty hoe: Ama'o t'IEHOVÀ ry fanalolahio. ¹³ Le hoe t'i Gidone ama'e, O Talèko, kanao ama'ay t'IEHOVÀ, ino ty nametsaha'e ze he'e zao? Aa vaho aia iaby o raha tsitantane'e natalilin-droae'ay ama'aio, ami'ty hoe: Tsy nakare' IEHOVÀ boake Mitsraime aña hao tika? fe naforintse' IEHOVÀ henaneo, vaho nasese'e am-pità' o nte-Midianeo. ¹⁴ Nitolik' ama'e t'IEHOVÀ nanao ty hoe: Akia ami'ty haozara'o hañaha Israele am-pità' i Midiane; tsy fa niraheko? ¹⁵ Le hoe re tama'e: O Talèko, akore ty haharombahako Israele? hehe te boroka amy Menasè o taminga'aio vaho tsitso'e aña' anjomban-draeko raho. ¹⁶ Le hoe t'IEHOVÀ ama'e. Toe ho ama'o raho, le ho lafae'o hoe ondaty raike o nte-Midianeo. ¹⁷ Aa le hoe ty natoi'e aze: Aa ie nahaoni-palalàñe am-pivazohoa'o eo, ehe toloro viloñe te Ihe ro nitsara amako. ¹⁸ Ehe, ko mienga atoy, ampara' te harineako, hibananabana naho hanjotsoako. Le hoe re, ho liñasako ty fibali'o. ¹⁹ Aa le nimoak' ao t'i Gidone, nañalankañe vik' ose naho mofo tsy aman-dalivay ami'ty mona'e efà raike; napo'e an-karoña ao i henay naho am-pinga-kodoboña ao i ro'ey naho nibanabanae'e ambane' i kiley vaho nazotso'e. ²⁰ Aa hoe i anjeli' IEHOVÀ ama'e, Rambeso o henao naho o mofo pisakeo vaho apoho amo vato tiañe le adoaño ama'e ty ro'e. Aa le nanoe'e. ²¹ Natondro' i anjeli' IEHOVÀ mb' ama'e i kobay am-pità'ey le natsovo'e i henay naho i mofo tsy aman-dalivaiy, le nisolebotse boak' amy vato ty afo namorototo i henay naho i mofo pisakey. Nienga am-pahaoniña'e amy zao t'IEHOVÀ. ²² Aa le nioni' i Gidone t'ie anjeli' IEHOVÀ; le hoe t'i Gidone, Hoy abey! ry Talè IEHOVÀ! te zaho nahatrea ty laharan' anjeli' IEHOVÀ, tarehe naho laharané. ²³ Le hoe t'IEHOVÀ ama'e: Fanintsiñañe ama'o; ko hemban-drehe fa tsy hihomake. ²⁴ Nandranjy kitrely ho am' IEHOVÀ eo t'i Gidone vaho natao'e IEHOVÀ-salome* ty añaara'e; ie e Ofrà' o nte-Abiezeo henaneo.

²⁵ Ie amy haleñey, le nitsara' IEHOVÀ ty hoe: Andrambeso bania raike ami'ty anjomban-drae'o naho añombe fito-ay ho faharoe'e, le afetsaho ambane i kitreli' i Baale aman-drae'oy vaho firao i Aserà marine azey; ²⁶ le mandrajia kitrely ambone' o lamilamio amy IEHOVÀ Andrianañahare'o, am-pilahara'e do'e naho rambeso i añaombelahy faharoe vaho engao am-pisoroñañe amy hataen' Aserà finira'oy. ²⁷ Aa le rinambe' i Gidone ty lahilahy folo amo mpitoro'eo vaho nanoe'e i tsinara' IEHOVÀ. Fe nihembañe tsy nimete nanoe'e antoandro ty amy anjomban-drae'ey naho ty am' ondati' i rovaio, fa nanoe'e haleñey. ²⁸ Aa ie nitroatse maraindraiñe ondati' i rovaio, hehe te nirotsak' ambane ty kitreli' i Baale, naho finira ka i Aserà marine azey, vaho fa nisoroñañe amy kitrely niranjeñey i añaombelahy faharoe. ²⁹ Le hoe ty nifanoa' iereo: Ia ty nanao o raha zao? Aa naho nañontane iereo, le hoe ty asa'e: Sata' i Gidone ana' Ioase zao.

[†] 6:11 Ioase: mioremeñe ndra miforehetse [‡] 6:11 Abiezere: Raem-pañolotse [§] 6:11 Gidone: vonotroboke pozake rotsake, ^{*} 6:24 Salome: salama; fanintsiñañe

³⁰ Aa le hoe ty asa' ondati' i rovaio am' Ioase; Akaro i ana'oy, havetrake; amy te rinotsa'e ty kitreli' i Baale; vaho finira'e i Aserà marine azey. ³¹ Aa le hoe t'Iose amo nijohañe ama'eo: Hialy ho a i Baale hao nahareo? Hañaro aze hao? Havetrake aolo' ty maraiñe ze hialy ho aze; aa naho 'ndrahare re, angao harova'e kanao eo ty nandrotsake i kitreli'ey. ³² Aa le natao Ierob' baale[†] i tahina'ey ami'ty hoe: Angao hiatrek' aze t'i Baale amy t'ie nandrotsak' i kitreli'ey.

³³ Ie amy zao fa nifanontoñe iaby o nte-Midianeo naho o nte-Amalekeo naho o ana' tatiñanañeо; nitsake vaho nitobe am-bavatane' Iizreele ao. ³⁴ Fe nivotrak' amy Gidone t'i Arofo' IEHOVÀ le nitiofe'e i tsifay[‡] le nañampea' o nte-Abiezereo. ³⁵ Le nampihitrife'e ty hanitsike i Menasè, naho nireketa'e, nampihitrifa'e ka t'i Asere naho i Zebolone vaho i Naftaly; le nionjomb' ama'e mb'eo ka iereo nifanampe ama'e. ³⁶ Le hoe t'i Gidone aman' Añahare, Ho rombahe'o an-tañako hao t'Israele ty amy tsara'oy? ³⁷ Hehe te hapoko an-toem-pifofohañe eo ty volon' añondry; aa naho amy volon' añondriy avao ty zono vaho maike iaby o taneo, le hapotako te ho rombahe'o an-tañako t'Israele ty amy tsara'oy. ³⁸ Aa ie zay; nañaleñaleñe re, le nifeahe'e i volon' añondriy nañafake i zonoy vaho nahapea ty soakazo. ³⁹ Fe hoe t'i Gidone aman' Añahare, Ko ampisolebore'o amako ty haviñera'o naho mbe ivolañako henaneo; angao hamentesako indraik' amy volon' añondriy. Ehe te i volon'añondriy avao ty ho maike, vaho ho tsitsike zono o taneo. ⁴⁰ Aa le nanoen' Añahare zay amy haleñey; i volon' añondriy avao ty nimaike vaho nitsitsihen-jono o taneo.

7

¹ Aa ie marain-tsikiake, nitroatse t'Ierob'baale, toe i Gidone, naho i valobohòke nindre ama'ey vaho nañialo añ' ila' ty vovo' i Karode* eo; ie amy zao ro tavar'a i tobe' o nte-Midianeoy, añ' ila' ty haboa' i Morè, am-bavatane ao. ² Le hoe t'IEHOVÀ amy Gidone, Loho maro amako ondaty mindre ama'oo, te hatoloko am-pitá' iareo o nte-Midianeo hera hiebotsebora'e ami'ty hoe: Ty tañako avao ty nandrombak' ahy. ³ Ie amy zao, taroño an-dravembia' ondatio ke t'ie mahimahiñe he mititititike: apoho himpoly, hañaleñaleñe boak' am-bohi-Gilade ao. Aa le Ro' ale-tsirro' arivo am'ondatio ty nimpoly, vaho rai-ale ty nisia. ⁴ Le hoe t'IEHOVÀ amy Gidone, Mbe loho maro ondatio; ampizotsò mb'an-drano mb'eo, le ho tsoheko ho azo; ie amy zao, naho anoeko ama'o ty hoe, ie ty hindre ama'o, le ho mpiama'o, vaho ze anoeko ty hoe: Tsy hindre ama'o re, le tsy hionjoñe ka. ⁵ Aa le nampizotsoe'e mb'an-drano mb'eo ondatio, le hoe t'IEHOVÀ amy Gidone, Ze misao-drano am-pameleke hoe filelan' amboa ro hasita'o; manahake zay o mitongaleke naho mibokoke hitohofa'eo. ⁶ Aa le ty ia' ondaty nisao-drano am-pitáñe naho ninoñe am-palieo ro telon-jato; o ila'eo fonga nitongaleke naho nibotreke te nitoho-drano. ⁷ Le hoe t'IEHOVÀ amy Gidone, Ho rombaheko am'ondaty telon-jato nisaokeo, vaho hatoloko am-pitá'o o nte-Midianeo; aa le avotsoro himpoly mb' an-toe'e aña iaby ondaty ila'eo, ⁸ fe rinambe' iareo am-pitáñe ty fivati' ondatio naho o tsifan' añondri' iareoo; le hene nampolie'e mb'an-kiboho'e aña o ana' Israele ila'eo vaho tama'e i telon-jato rey; le am-bavatane ambane'e ey ty tobe' o nte-Midianeo.

* 6:32 Ierob'baale: adono hiaro-bata'e t'i Baale † 6:34 Tsifa: sofare: antsivan-tsifan'ose/añondry

* 7:1 Karode: dabán-draha; hembañe

⁹ Ie amy haleñey, nanao ty hoe ama'e t'IEHOVÀ: Miongaha naho mizotsoa mb' an-tobe mb'eo fa natoloko am-pit  'o. ¹⁰ F'ie hemba  e tsy te hizotso mb'eo, le endeso hindre ama'o mb' an-tobe mb'eo t'i Por  † mpitoro'o; ¹¹ le ho janji  e'o o saontsie'eo, hampahafatrare'e o fit  'oo, hizotsoa'o mb' an-tobe mb'eo. Aa le nindre nizotso amy Por   mpitoro'e re mb'al  fe' o mpitan-defo' i tobeio. ¹² Nilafike hoe kijeja mifamorohotse am-bavatane ey o nte-Midianeo naho o nte-Amalekeo naho o anan-tati  ana  eo; vaho tsy nihay iahe  e o rameva'eo fa nitozantoza mira amo fase  e a  n' olondriakeo. ¹³ Ie nivotrak'eo t'i Gidone, inay t'indaty nitalilynofy ami'ty ra  e'e, nanao ty hoe: Na  inofynofy raho te nahatre a vonga-mofom-bare hordea nivarimbary mb'an-tobe' o nte-Midianeo naho mb'amo kibohotseo mb'eo le nidasira'e kanao nihotrake naho nivarihohoke vaho neforetrake o kibohotseo. ¹⁴ Hoe ty natoi' i ra  e'ey aze: Ts'ino  e zay naho tsy ty fibara' i Gidone ana' Ioase, ana' Israele, amy te fonga natolon' A  nahare am-pit  'e o nte-Midianeo rekets' i valoboh  ey. ¹⁵ Ie jinanji' i Gidone ty talili' inofy naho i fandraza  a  ey, le nitalaho; aa ie tafampoly an-tobe' Israele ao, hoe ty asa'e: Miongaha, fa natolo' IEHOVÀ am-pit  'areo ty tobe' o nte-Midianeo.

¹⁶ Aa le zinara'e ampirimbo  a  ne telo indaty telon-jato rey, le songa nampipoha'e tsifan' a  ondry raik' am-pit  ' ondatio rekets'e sini-hara k  ake, naho ty failo mirekake am-po' o sini-harao ao. ¹⁷ Le hoe re tam' iereo: Henteo raho, vaho tsikombeo; ie pok' alafe' i tobey raho, le hanoe' areo ze anoeko. ¹⁸ Ie popoeko i tsifay, naho o mindre amako iabio, le tiofo ka amy ze lafe' i tobe iabiy o tsifao, vaho ano ty hoe: Ty fibara' IEHOVÀ naho i Gidone! ¹⁹ Aa le nigado  e ami' ty efe' i tobeio t'i Gidone naho i lahilahy mpiama'e zato rey, amy fifotoram-pijilova  e a  ivoy, aa vata'e nijado  e o mpijiloo le pinop  ' iareo o tsifao vaho dinemo' iareo o sini-hara am-pit  ' iareoo. ²⁰ Fonga nampipop  ' antsiva i mpirai-lia telo rey; naho dinemo' iareo o sini-harao, naho nizonjo failo am-pit  'e havia, naho tsifa am-pit  'e havana, nitioke, vaho nikoike ty hoe: Ty fibara' IEHOVÀ naho i Gidone. ²¹ Songa nijoha  e an-toe'e ey avao indaty rey na  rikatoke i tobey, le nitriban-day i valoboh  key; nikoikoike vaho nivoratsake. ²² Ie nipop  ' i tsifa telon-jato rey, le nampizonjoe' IEHOVÀ ze hene' ondaty an-tobe ao, sindre mb'aman-dra  e vaho nilay pake Betesit  ‡ mb'e Tserer  § mb'eo, sikal' a  n'efe' i Abel-mehol  *, marine' i Tabate† a  ne i valoboh  key.

²³ Hene kinoike boake Naftal  y naho boak' Asere naho boake Menas   o ana' Israeleo le nifanonto  e vaho nihorida  e iareo t'i Midiane. ²⁴ Nampanitsihe' i Gidone ty am-bohibohi' i Efraime ao ty hoe: Mizotsoa haname i Midiane le tsepaho aolo' iareo o rano pake Bete-bar  o† naho Iordaney ka. Aa le nifanonto  e iaby o nte-Efraimeo vaho nitana' iareo o rano pake Bete-bar  o naho Iordaney. ²⁵ Le tsinepa' iareo ty roandria roe' i Midiane, t'i Orebe  § naho i Ze  be*; vinono' iareo am-bato'i Orebe eo t'i Orebe, vaho vinono' iereo am-pipiritan-divai' i Zeebe eo t'i Zeebe, le ie nihorid  a' iareo t'i Midiane, nasese' iareo mb' amy Gidone alafe' Iordaney mb'eo ty a  ambone' i Orebe naho i Zeebe.

8

¹ Le hoe o nte-Efraimeo ama'e, Ino o nanoe'o anay t'ie tsy kinanji'o, ihe nionjomb'eo hialy amy Midiane? Le nitrevohe' iareo an-keloke. ² Le hoe ty

† 7:10 Por  : ty mamoa; ty mitombo ‡ 7:22 Bete'sit  : anjomba' i androy § 7:22 Tserer  : fiambotraha  e * 7:22 Abel-mehol  : fi  eo  eon-kasilofa  e † 7:22 Tabate: hasoa ‡ 7:24 Bete-bar  : ty anjomba jinobo § 7:25 Orebe: koake; * 7:25 Ze  be: amboa hako

natoi'e, Ino ty nanoeko, te amy nanoe'oy? Tsy lombolombo te amo valòbo' i Abiezereo hao ty fitsindroham-bahe' i Efraime? ³ Ie fa natolon' Añahare am-pitâ' areo i roandria' i Midiane rey: t'i Orebe naho i Zeèbe? Aa le ino ty nilefeko mandikoatse i anahareoy? Niketrak' amy zao ty haviñera' iareo amy saontsi'ey.

⁴ Nomb' am-pitsaha' Iordaney mb'eo t'i Gidone le nitsake, ie rekets' indaty telon-jato rey, nidazidazitse f'ie mbe nañoridañe avao. ⁵ Le hoe re amo nte-Sokoteo*, Anjotso boko-mofo i lia-raike mañorik' ahiy, fa mikolempañe hañoridaña'ay i Zebake[†] naho i Tsalmonà‡, mpanjaka' i Midiane. ⁶ Le hoe o roandria' i Sokoteo: Am-pitâ'o hao ty fitâ' i Zebâke naho i Tsalmonà hamahana'ay mofo o lahin-defo'oo? ⁷ Le hoe t'i Gidone, Aa ie fa natolo' IEHOVÀ an-tañako t'i Zebâke naho i Tsalmonà, le ho riateko am-patin-kivoke naho ropiteke ty nofo' areo. ⁸ Boak'ao re nionjomb'e Penoele§ mb'eo le nahere'e am' iereo i saontsiy; vaho nanoïñe aze manahake i natoi' o lahilahi' i Sokoteoy. ⁹ Aa le hoe ty asa'e amo lahilahi' i Penoeleo: Ie mibalik' atoy am-panintsiñañe, le harotsako o fitalakesañ' aboo. ¹⁰ Ie amy zao, te Karkore aña reketsé lahin-defoñe va'e rai-ale-tsi-lime-arivo t'i Zebake naho i Tsalmonà. Zay ty nisia' i lia-rain-tatiñanañey, fa nikoromak' an-kotakotak'ao ty lahindefo rai-hetse-tsi-ro' ale. ¹¹ Aa le nionjomb' amy Lalam-Pimoneñ' an-Kibohotsey t'i Gidone, atiñana' i Nobà naho Iogbehà, vaho linafa'e i lia-raikey, amy te nierañerañe avao i firimboñañey. ¹² Nilay aña t'i Zebake naho i Tsalmonà fe hinorida' iereo naho tsinepake i mpanjaka roe rey, i Zebake naho i Tsalmonà, vaho navalitsikota'e i valobohòkey. ¹³ Nibalik' amy hotakotakey t'i Gidone, ana' Ioase aolo' ty fanjiriha' i androy, ¹⁴ le tsinepa'e ty ajalahy boak' amo nte-Sokoteo nañontane aze naho nampandrendreha'e o roandria' i Sokote naho o talè'eo, ondaty fitompolo-fito' amby. ¹⁵ Nivotrak' am' ondati' i Sokoteo re, nanao ty hoe: Ingo t'i Zebake naho i Tsalmonà, o nañendaha' areo ahio ami' ty hoe: am-pitâ'o hao ty fitâ' i Zebake naho i Tsalmonà hamahana'ay ondati'o màmakeo? ¹⁶ Aa le nendese'e o roandria' i rovaio, miharo fatike naho ropiteke vaho nanare'e amy rezay o lahilahi' i Sokoteo. ¹⁷ Finofopòfo' e ka ty fitalakesañ' abo' i Penoele vaho navetra'e o lahilahi' i rovaio.

¹⁸ Le hoe re amy Zebake naho i Tsalmonà: Akore v'ondaty vinono' areo e Taboreo? Le hoe ty toi' iareo: Nihambañe ama'o iereo, vintañe raik' amo anam-panjakao. ¹⁹ Le hoe re, Nilongoko iereo, anan-dreneko; amy te veloñe t'IEHOVÀ, naho rinomba' areo veloñe iereo le tsy ho vinonoko nahareo. ²⁰ Le hoe ty asa'e am' Ietère tañoloñoloña'e: Miongaha vonò. Fe tsy nakare' i ajalahiy ty fibara'e; amy t'ie nihembañe fa mbe tòra'e. ²¹ Le hoe t'i Zebake naho i Tsalmonà, Miongaha le miambotraha ama'ay fa mira ami'ty lahilahy ty haozara'e. Aa le nitroatse t'i Gidone naho vinono'e t'i Zebake naho i Tsalmone vaho rinambe'e o sareñ-jirim-bolañe am-bozon-drameva' iareeo.

²² Le hoe o ana' Israeleo amy Gidone: Mifehea anay, ihe naho i ana'oy, naho ty anan' ana'o; fa rinomba'o am-pitâ' i Midiane. ²³ Hoe ty natoi' i Gidone: Tsy ho feleheko, naho tsy ho fehe' o anakoo, fa ho fehe' IEHOVÀ. ²⁴ Le hoe t'i Gidone am' iereo, Mihalaly ama' areo raho te songa hanolotse ahy o bangen-tsotîne nikoahé'eo. (Toe nivolamena o bangen-tsotî' iareeo amy t'ie nte Ismaele.) ²⁵ Le hoe ty natoi' iareo, Hatolo'ay

* ^{8:5} Sokote: kibohotse maro † ^{8:5} Zebake: voa; soroñe ‡ ^{8:5} Tsalmonà: talinjo; sare; hazomanga faly § ^{8:8} Penoele: ty mahaoniñe Ia!

an-joton-troke; Nalafi' iareo eo amy zao ty lamba vaho songa nampipoke o bange kinopa'eo ze lahilahy. ²⁶ Arivo tsy fiton-jato sekele ty lanja' o bange volamena nihalalie'eo, tsy añate' zay o bange naho firavake vaho saroñe malo-mavo tamy mpanjaka' i Midiane reio, le tsy tama'e ka o silisily nandravake ty vozon-drameva'eo. ²⁷ Nitsene efode* ama'e t'i Gidone naho nitana'e e Ofrà, an-drova'e ao naho fonga nanao hakarapiloña ama'e amy toetsey t'Israele; ie ni-fandrik' amy Gidone naho amy hasavereña'ey. ²⁸ Aa le nampiambanèñe añatrefa' o ana' Israeleo t'i Midiane tsy nahafandra ty añambone'e ka. Nitofa efa-polo taoñe faha' i Gidone i taney.

²⁹ Aa le nisitake t'lerobaale ana' Ioase, nimoneñe añ'anjomba'e ao. ³⁰ Nahatoly anadahy fitompolo am-bata'e t'i Gidone, fa nimaro ty vali'e. ³¹ Nisamak' ana-dahy ho aze ka i sakeza'e e Sekeme† añey, le natao'e Abimeleke‡ ty añara'e. ³² Nivilasy am-pahantera'e soa t'i Gidone ana' Ioase, vaho nalentek' an-kibori' Ioase rae'e, e Ofrà' o nte-Abiezereo. ³³ Aa ie nihomake t'i Gidone le nandifike mb' amo Baaleo indraike o ana' Israeleo, vaho nanoe' iareo ho 'ndrahare' iareo ty Baale-berite§. ³⁴ Le tsy nitiahi' o ana' Israeleo t'IEHOVÀ Andrianañahare' iareo nandrombake iareo am-pità' o rafelahi' iareo niariseho iareo mb' etiam-beroañeo; ³⁵ mbore tsy nanoe' iereo vali-kare ty anjomba' Ierobaale, toe i Gidone, ty amy ze hene soa nanoe'e e Israeleo.

9

¹ Nimb'e Sekeme mb' aman-drolongon-drene'e mb'eo t'i Abimelek' ana' Ierobaale, ninday entañe am' iereo naho amo añ' anjomban-draen-drene'e iabio, le hoe ty asa'e: ² Ehe misaontsia an-dravembia' ze hene' ondati' i Sekeme: Ty aia ro soa ama' areo: he te hifelek' anahareo o ana' Ierobaaleo, indaty fitompolo rey, ke hifeleha' ty raike? Tiahio ka te taolañ' ama' nofo' areo raho. ³ Aa le nitalily aze an-dravembia' ze hene ondati' i Sekeme o longon-drene'eo, nanao i hoe zay iaby; le niroñe mb' am-pañorihañe i Abimeleke ty arofo' iareo, nanao ty hoe: Rahalahin-tika 'nio. ⁴ Aa le nitolora' iereo drala volafoty fitompolo boak' añ'anjomba' i Baale-berite ao, le nañeke ondaty mpibohaboha naho kafoake hañorik' aze t'i Abimeleke. ⁵ Nimb' añ' anjomban-drae'e e Ofrà amy zao re le zinama'e o rahalahi'eo, o ana' Ierobaaleo, i fitom-polo rey, ambone ty vato eo; fe nietake t'Iotame tsitson' ana' Ierobaâle, ie ty honka'e. ⁶ Aa le hene nifanontoñe o lahilahi' i Sekemeo, naho i Bere-milò* vaho nimb'eo nañory i Abimeleke ho mpanjaka, marine' i kile am-batolahy e Sekemey.

⁷ Aa ie natalily am' Iotane, le nimbeo re nijohañe ambone vohi-Gerizime ey, naho nipoña-peo nipazake ty hoe: Janjiño raho ry roandria' i Sekemeo soa te hijanjiñe anahareo ka t'i Andrianañahare. ⁸ Niavotse mb'eo o hataeo te indraike hañori-panjaka hifehe iareo le hoe iereo amy andranahakey†, Feleho zahay. ⁹ Fa hoe ty natoi' i andranahakey: Hapoko hao i menakoy, zaho iasiañe aman' Añahare naho ondatio, handenàko hitrezontrezo ambone' o hatae ila'eo? ¹⁰ Aa le hoe o hataeo amy sakoañey, Antao hifelek' anay. ¹¹ Fa hoe i sakoañey am' iereo, Haforintseko hao ty hamamiko naho o voako soao, handenako hiletraletra ambone' o hatae'eo? ¹² Le hoe o hatae'eo amy vahey, Antao hamelek' anay? ¹³ Le hoe i vahey am' iereo, Hadoko hao o divaikoo, i mahafale an' Andrianañahare

* 8:27 Efode: akanjom-pisoroñe mitan-kareañe † 8:31 Sekeme: anjara'e; nimpoly maraindray

‡ 8:31 Abimeleke: raeko mpanjaka § 8:33 Baale-berite: Talem-pañina * 9:6 Bete-milo: Anjomban-kaliforañe † 9:8 Zeite: Baiboly Gasy, (Anglè) : Oliva

naho ondatioy, handenako hionjoñe ambone' o hataeo? ¹⁴ Le hoe o hataeo amy roipitekey, Antao hifelek' anay. ¹⁵ Le hoe ty roipitek' amo hataeo, Naho horiza' areo ho mpanjaka' areo raho, le mb'etoa mirimboña añ'alo ko etoa; fa naho tsie, le ee te hiakatse amy roipitekey ty afo hamorototo o mendorave' i Lebanoneo. ¹⁶ Aa naho an-kahitiañe naho havantañañe ty nanoe' areo mpanjaka t'i Abimeleke naho nanoe' areo soa t'Ierobaale naho i anjomba'ey vaho nanoe' areo mañevam-pitá'e— ¹⁷ kanao nialy ho anahareo ty raeko, ie nitifa-by mae te nirombahe'e am-pitá' i Midiane— ¹⁸ ie nitroatse añ' anjomban-draeko anindroany nanjamañe o ana'eo, i fitopol o rey ambone' i vatoy, vaho nanoe' areo mpanjaka amo roandria' i Sekemeo t'i Abimelek' ana' i mpitoro'e ampelay, amy t'ie rahalahi' areo— ¹⁹ aa naho toe nanoe' areo ty hatò naho ty havañonañe am' Ierobaale naho amy anjomba'ey anindroany, le mirebeha amy Abimeleke vaho ee t'ie ty hiankahak' ama' areo ka. ²⁰ Aa naho tsie, le ee te hiakatse amy Abimeleke ty afo hamorototo o roandria' i Sekemeo naho i Bete-milò; vaho hiboak' amo roandria' i Sekemeo naho i Bete-milò ty afo hampangotomomoke i Abimeleke. ²¹ Nitribanday amy zao t'Iotane, nibotitsike mb'e Beere aña le nimoneñe ao ty amy fihembaña'e i Abimeleke rahalahi'ey.

²² Aa ie nifelek' Israele telo taoñe t'i Abimeleke, ²³ le nahitrin' Añahare fañahy raty ty añivo' i Abimeleke naho o roandria' i Sekemeo, vaho namitak' ate i Abimeleke o roandria' i Sekemeo, ²⁴ soa te ho tondroke i heloke nanoeñe amy ana-dahy fitopol o Ierobaaley, te hapok' amy Abimeleke rahalahi' iareo ty lio' i vinono'e rey, vaho amo roandria' i Sekeme nampaozatse o fitá'eo hañohofa'e loza amo rahalahi'eo. ²⁵ Ie amy zao, nirahe' o roandria' i Sekemeo ty hamandroñe aze an-kaboa' o vohitseo, le fonga nikamere' iareo ze niary marine' iareo, vaho natalily amy Abimeleke. ²⁶ Nivotrake eo t'i Gaale[‡] ana' i Ebede[§] rekets' o longo'eo nomb'e Sekeme mb'eo; vaho niantofa' o roandria' i Sekemeo. ²⁷ Aa le niavotse mb' an-tetek' aña iereo, le natonto' iareo ze an-tanem-bahe ao, naho linialia' iareo o voalobokeo naho nanao sabadidake, le nimoak' añ' anjomban' drahare' iareo ao naho nikama naho ninoñe, vaho namatse i Abimeleke. ²⁸ Le hoe t'i Gaale ana' i Ebede: Ia ze o Abimeleke zao? le akore te itika nte-Sekeme ro mitoroñe aze? Tsy ana' Ierobaale hao re, naho i Zebole* ty sorotá'e? Toroño o mpiamy Kamore[†] rae' i Sekemeo, fa ino ty itoroñan-tikañ' aze? ²⁹ Aa naho tambanen-tañako ondaty retoañe, le ho nafahako t'i Abimeleke. Le hoe re amy Abimeleke, Tovoño o lahin-defo'oo vaho miakara. ³⁰ Ie jinanji' i Zebole, mpifehe' i rovay i enta' i Gaaley le niforoforo ty haviñera'e; ³¹ vaho nampihirtrife' ampamañahiañe amy Abimeleke, ty hoe: Ingo nivotrake e Sekeme ao t'i Gaale ana' i Ebede, rekets' o longo'eo le nihafatrare' iareo i rovay hifotets' azo. ³² Ie amy zao miongaha halen-drehe naho o mpiama'oo vaho vandroño an-kivok' ao. ³³ Ie maraindray naho manjurik' andro le mañaleñaleña vaho tameo i rovay; aa ie miakatse hifanehak' ama' areo rekets' o lahindefo'eo, le ano' am' iereo ze mete. ³⁴ Aa le niongak' amy haleñey t'i Abimeleke rekets' ondaty iaby ama'eo namandroñe i Sekeme am-pirai-lia efatse. ³⁵ Ie niavotse naho nijohañe am-pimoaha' i lalambeiy t'i Gaale ana' i Ebede, le nilonadonàke boak' am-piampirañe ao t'i Abimeleke rekets' o mpiama'e iabio; ³⁶ aa ie niisa' i Gaale ondaty iabio, le hoe re amy Zebole; Heheke ondaty mizotso boak' an-kaboa' o vohitseoo. Le hoe ty Zebole ama'e:

[‡] 9:26 Gaale: fifosañe; tiva [§] 9:26 Ebede: mpitoroñe; ajalahy * 9:28 Zebole: akiba, kibohotse
[†] 9:28 Kamore: borike; lietse; debole

Mahaoniñe o talinjo' i vohitseio rehe manahake t'ie ondaty. ³⁷ Nindrae' i Gaale i saontsi'ey ami'ty hoe: Hehe ondaty mizotso añivon-tane mb' etoañeo, naho ty lia'e raike miary e Elone-meonenime[‡] mb'etoa. ³⁸ Aa hoe t'i Zebole ama'e: Aia henaneo ty vava'o nanao ty hoe: Ia ze o Abimeleke zao hitoroñan-tika aze? Tsy ondaty heje'oo hao o echoke eio? Mizotsoa arè hialia'o. ³⁹ Aa le nionjomb'eo aolo' ondati' i Sekemeo t'i Gaale nifandrapak' amy Abimeleke. ⁴⁰ Hinorida' i Abimeleke, le nitribanday aolo'e mb'eo, vaho maro ty fere nitsingoritritse, pak' am-pimoahañe an-dalambe eo. ⁴¹ Aa le nimoneñe e Aromà[§] ao t'i Abimeleke; vaho rinoa' i Zebole t'i Gaale naho o longo'eo, tsy hitoboke e Sekeme ao. ⁴² Ie amy loak' àndroy le niakatse mb' an-kivoke mb'eo ondatio; naho natalily amy Abimeleke. ⁴³ Aa le nendese'e ondatio naho zinara'e ho firimboñantelo, naho niampitse an-kivok' ao; ie rendre'e te ingo niakatse i rovay ondatio; le nilonadonake mb'am' iereo vaho binaibai'e. ⁴⁴ Nañitrike mb'eo amy zao t'i Abimeleke naho o mpiama'eo naho nijohañe an-dalambe eo; le niambotraha' ty mpirai-lia'e roe ka ondaty an-kivok' ao vaho nanjamañe. ⁴⁵ Aa le naха lomoñ' andro ty nalia' i Abimelek' amy rovay; naho rinambe'e i rovay naho binaibai'e ondatio; naho dinemodemo'e i rovay vaho nandrarah'a'e sira. ⁴⁶ Ie jinanji' ondaty am-pitalakesañ' abo' i Sekemeo, le niziliha' iareo ty fipalirañe an-trañon-drahare' i Berite* ao. ⁴⁷ Natalily amy Abimeleke te fa vory iaby ty mpiaolo' i fitalakesañ' abo' i Sekemey. ⁴⁸ Le niañambone' ty vohi-Tsalmone amy zao t'i Abimeleke, ie naho ze hene mpiama'e; nandrambe fekoñe t'i Abimeleke naho binira'e ty ran-katae raike le rinambe'e naho nasampe'e an-tsoro'e eo vaho nanao ty hoe am'ondatio: I nirendre' areo nanoekoy, masikà, ano ka. ⁴⁹ Aa le songa nibira hatae ondatio naho nañorike i Abimeleke naho napo' iareo añ' ila' i fitalakesañ'aboy vaho narehe' iareo añ' afo i anjomba nitañe iareoy; le fonga nihomake o am-pitalakesa' i Sekemeo, va'e lahilahy naho ampela arivo.

⁵⁰ Nomb'e Tebetse[†] mb'eo t'i Abimeleke naho nitobe eo le naname i Tebetse vaho rinambe'e. ⁵¹ Fe añivo' i rovay ty fitalakesañ' abo fatratse; le fonga nivoratsake mb'eo ondaty naho rakembao, toe ze tan-drova ao; sinikada' iareo am-boho' iareo i lalañey vaho nanganike mb'an-digiligi' i fitalakesañ'aboy ey. ⁵² Le nimb' amy fitalakesañ' aboy mb'eo t'i Abimeleke; aa ie pok' an-dalambei'e eo hanodots' aze añ'afó, ⁵³ le navokovoko' ty rakemba añambone'e ey ty vato fandisañ' ambone, namoy ty harandoha'e. ⁵⁴ Tinoka'e amy zao i ajalahy mpitam-pikalan-defo'ey, le nanoa'e ty hoe: Tsoaho o fibara'oo le vonò raho tsy mone hatao t'ie vinonondrakemba; aa le tinombo' i ajalahiy vaho nikoromake. ⁵⁵ Ie nirendre' o ana' Israeleo te mate t'i Abimeleke, le nimpoly songa mb'an-toe'e mb'eo. ⁵⁶ Zay ty namalean' Añahare ty halò-tsere' i Abimeleke, i nanoa'e amandrae'ey, ie namono i fonga rahalahi'e fitompolo rey; ⁵⁷ naho nondrohan' Añahare añ'ambone' o nte-Sekemeo ka ty haloloa' iareo; vaho toly am' iereoy ty fatse nanoa' Iotame ana' Ierobaale.

10

¹ Ie aña t'i Abimeleke, le nitroatse handrombake Israele ka t'i Tolà*, ana' i Poà[†], ana' i Dodò[‡], nte-Isakare; mpimoneñe e Samire[§] am-bohi' i

[‡] 9:37 Elone-meonenime: Varom-pamoreke § 9:41 Aromà: ankaboa, naonjoñe, * 9:46 Berite: fañina † 9:50 Tebetse: fotaheñe, atoly, landy matify * 10:1 Tola: oletse mena; mañabarà † 10:1 Poà: Fanjaka, ‡ 10:1 Dodò: rahalahin-drae'e ndra rene'e § 10:1 Samire: mpanalatse; valabey; rongoñe;

Efraime. ² Nizaka e Israele taoñe roapololo' amby re naho nihomake vaho nacenteke e Samire ao. ³ Ie aña, nitroatse ka t'Iaire* nte Gilade le nizaka taoñe roapololo-ro' amby. ⁴ Nanañ' anadahy telo-polo re niningitse añ' ana-borike telo-polo, ie aman-drova telo-polo, o atao rova' Iaire sikala henaneo; an-tane Gilade ao irezay. ⁵ Nivilasy t'Iaire vaho nacenteke e Kamone† ao.

⁶ Nanao haloloañe am-pivazoho' IEHOVÀ indraike o ana' Israeleo ie nitoroñe o Baaleo naho o Hazomangao naho o 'ndrahare' i Arameo naho o 'ndrahare' i Tsidoneo naho o 'ndrahare' i Moabeo naho o 'ndraharen' ana' i Amoneo naho o 'ndraharen-te-Pilistio vaho naforintse' iareo t'IEHOVÀ, tsy nitoroñe aze. ⁷ Aa le nisolebotse am' Israele ty haviñera' IEHOVÀ le natolo'e am-pitá' o nte-Pilistio, vaho am-pitá' o ana' i Amoneo. ⁸ Finorekeke' iareo naho dinemo' iareo taoñe folo-valo' amby o ana' Israeleo, toe o ana' Israele alafe' Iordaney an-tane' o nte-Amoreo e Giladeo. ⁹ Nitsaha' o ana' i Amoneo ka Iordaney hialy am' Iehoda, naho amy Beniamine, naho amy anjomba' i Efraimey, vaho vata'e nalovilovy t'Israele.

¹⁰ Nitoreo amy IEHOVÀ amy zao o ana' Israeleo, nanao ty hoe: Aman-kakeo ama'o zahay, fa niamboho'a'y t'i Andrianañahare'ay, vaho nitoroñe o Baaleo. ¹¹ Aa le hoe t'IEHOVÀ amo ana' Israeleo: Tsy nirombahoko amo nte-Mitsraimeo hao naho amo nte-Amoreo naho amo ana' i Amoneo, naho amo nte-Pilistio? ¹² Niforekeke' o nte-Tsidoneo ka, naho o nte-Amalekeo, naho o nte Amoneo le nitoreova' areo vaho rinombako am-pitá' iareo. ¹³ Fe niamboho'a' areo, vaho nitoroñe 'ndrahare ila'e; zay ty tsy andrombahako anahareo. ¹⁴ Akia koiho o 'ndrahare jinobo' areoo; angao handrombaha' iareo amo hasotria' areoo. ¹⁵ Le hoe o ana' Israeleo amy IEHOVÀ: Toe nanao hakeo zahay, ano ama'ay ze hatao'o soa; fa ehe hahao te anito. ¹⁶ Aa le nadò' iareo aña o 'ndrahare ankafankafa añivo' iareo ao, naho nitoroñe IEHOVÀ; vaho niferenaiña' ty arofo'e o nte' Israeleo amo falovilovia'e. ¹⁷ Kinoik' amy zao o nte-Amoneo naho nitobe e Gilade ao. Nifanontoñe ka o ana' Israeleo le nitobe e Mitspà ao. ¹⁸ Le hoe ty nifanaontsia' ondatio naho o roandria' i Giladeo: Ia mb' arè ty hiorots' aly amo ana' i Amoneo? Ie ty hatao lohà' o hene' mpimone' i Giladeo.

11

¹ Teo henane zay t'Ieftake*, nte-Gilade, fanalolahy, ana' ty tsimirirañe; nasama' i Gilade t'Ieftake. ² Nahatoly ana-dahy ka ty tañanjomba' i Gilade, aa ie nibey le rinoa' iareo aña t'Ieftake, ami'ty hoe: Tsy ho lovae'o ty anjoman-drae'ay; ihe ana-drakemba ambahiny. ³ Aa le nipotatsak' amo rahalahi'eo nimoneñe an-tane Tobe† ao t'Ieftake; vaho nirekets' amy Ieftake ondaty tsy manjofake mpiharo fiavotse ama'e.

⁴ Ie aña le tondroke te nialy am' Israele o ana' i Amoneo. ⁵ Ie amy zay, kanao nialy am' Israele o ana' i Amoneo, le nañitrike hangalake Ieftak' an-tane Tobe aña o mpiaolo' i Giladeo. ⁶ Le hoe iereo am' Ieftake, Antao ho mpifelek' anay, hialy amo ana' i Amoneo. ⁷ Aa hoe t'Ieftak' amo roandria' i Giladeo: Tsy mpalaiñ' ahy hao nahareo, kanao rinoa' areo añ' anjoman-draeko? Inoñ' arè ty nomba' areo mb'amako henaneo t'ie am-poheke? ⁸ Le hoe o mpiaolo' i Giladeo am' Ieftake: Mimpoly ama'o henaneo, hindreza'o ama'ay hifanehak' amo ana' i Amoneo, vaho ho fehe'o ze hene mpimone' i Gilade. ⁹ Le hoe t'Ieftak' amo roae' i Giladeo: Aa naho endese'o moly raho

* **10:3** Iaire: hazavako; i mijo hazavañey † **10:5** Kamone: ty fiherenkovelo'e * **11:1** Ieftake: Navotson'Añahare; mahasoroke † **11:3** Tobe: hasoa

hialy amo ana' i Amoneo vaho hatolo' IEHOVÀ aoloko iereo, ho mpifehe' areo hao? ¹⁰ Le hoe o roae' i Giladeo am' Ieftake, Ho valolombeloñ' añivontika t'IEHOVÀ, toe hanoe'ay i nitaroñe'oy. ¹¹ Aa le nindre lia amo roae' i Giladeo t'Ieftake, naho nanoe' ondatio lohâñe naho mpiaolo' iareo; vaho nitaroñe' Ieftak' añatrefa' IEHOVÀ e Mitspà i saontsi'ey.

¹² Nañitrik' amy mpanjaka' o ana' i Amoneoy t'Ieftake, nanao ty hoe: Inoñ' ama'o raho t'ie nomb' amako mb' etoa hialy amy tanekoy? ¹³ Le hoe ty natoi' i mpanjaka' o ana' i Amoneoy amo ira' Ieftakeo: Amy te tinava' Israele ty taneko, ie niakatse boake Mitsraime aña boak' amy Arnoney pak' am' Iabokey eo naho mb' am' Iordaney mb'eoy; ie amy zao ampolio amako am-panintsîñañe i rova rey. ¹⁴ Nañitrik' amy mpanjaka' o ana' i Amoneoy indraike t'Ieftake, ¹⁵ nanao ty hoe, Hoe t'Ieftake; Tsy tinava' Israele ty tane' i Moabe ndra ty tane' o ana' i Amoneo. ¹⁶ Fa ie niakatse i Mitsraime aña, naho nañavelo am-pirangâñe i ratraratray sikal' amy riake Menay t'Israele, vaho nivotrake e Kadese eo; ¹⁷ le nampisangitrik' amy mpanjaka' i Edomey t'Israele nanao ty hoe: Ehe, angao raho hiranga o tane'oo; fe tsy nañaoñe ty mpifehe Edome. Nañitrife'e ka ty mpifehe i Moabe; fe tsy nimete; vaho nañialo e Kadese ao t'Israele. ¹⁸ Aa le niranga i ratraratray niary an-tane Edome naho an-tane Moabe iereo, nañavelo atiñanan-tane Moabe aña, le nitobe alafe' i Arnone eo, fa tsy nandilatse i efe-tane Moabey, amy te efe' i Moabe ty Arnone. ¹⁹ Le nampañitrik' amy Sihone mpanjaka' o nte-Amoreo, mpanjaka' i Kesbone, t'Israele nanao ty hoe: Ehe, angao homb'eo, hiranga an-tane'o mb'an-toeko mb'eo. ²⁰ Fe tsy niantofa' i Sihone ty hirangâ' Israele i tane'ey, te mone fonga natonto' i Sihone ondati'eo, naho nitobe e Iahatse[‡] vaho nialy am' Israele. ²¹ Fe hene natolo' IEHOVÀ Andrianañahare' Israele am-pità' Israele t'i Sihone naho ondati'eo vaho linafa' iareo; aa le fanaña' Israele ty tane' o nte-Amore nimoneñe an-tane ao iabio. ²² Le fanaña' iareo ze hene tane' o nte-Amoreo boak' amy Arnoney pak' am' Iabokey vaho boak'am-patrambey aña pak' am' Iordaney. ²³ Ie amy zay rinoa' IEHOVÀ Andrianañahare' Israele aolo' ondati'e Israeleo mb'eo o nte-Amoreo, aa vaho ho fanaña' areo hao zay? ²⁴ Naho mahafandroake ondaty ho anahareo ty Kemose§ 'ndrahare' areo, tsy ho fanaña' areo hao? Aa le ze roahe' IEHOVÀ Andrianañahare'ay aolo'ay, ro fanaña'ay. ²⁵ Likoare'o hao t'i Balak' ana' i Tsipore, mpanjaka' i Moabe? Nitamea'e hao t'Israele? Naname iereo an' aly hao? ²⁶ ie fa nimoneñe e Kesbone naho amo tanà'eo, naho e Areore naho amo tanà'eo naho amy ze hene rova añ' olo' i Arnoney, o taoñe telon-jato zao, t'Israele. Inoñ' arè ty tsy nandambesa' areo aze hatrela zay? ²⁷ Ie amy zao tsy anaña'o hakeo, fa mandilatse ahy ka t'ie hialy amako; angao, hizaka añivo' o ana' Israeleo naho o ana' i Amoneo t'IEHOVÀ Mpizaka te anito. ²⁸ Fe tsy hinao' i mpanjaka' o ana' i Amoneoy i saontsy nihitrifa' Ieftakey.

²⁹ Niheo am' Ieftak' amy zao t'i Arofo' IEHOVÀ, le rinanga'e ty Mitspà i Gilade, le boake Mitspà i Gilade re nitoañe mb' amo ana' i Amoneo mb'eo. ³⁰ Le nanao fanta amy IEHOVÀ t'Ieftak' ami'ty hoe: Naho toe hatolo'o antañako o ana' i Amoneo, ³¹ le ndra inoñ' inoñe ty miakatse an-dalan-kibohoko hifanalaka amako, ie mimpoly am-panintsînan-draho boak' amo ana' i Amoneo, le ho a IEHOVÀ, vaho hengaeko ho soroñe. ³² Aa le nitsake mb' amo ana' i Amoneo mb'eo haname iareo t'Ieftake; vaho natolo' IEHOVÀ am-pità'e. ³³ Le linafa'e boak' Aroere, ampara' ty figadoñañe e Minite aña,

‡ 11:20 Iahatse: fifandierañe § 11:24 Kemose: mitañe; mitavañe

rova roapolo naho mb' Abele-keramine mb'eo am-panjamanam-bey. Aa le niambane amo ana' Israeleo o ana' i Amoneo.

³⁴ Ie nivotrak' añ' anjomba'e e Mitspà eo t'Ieftake, hehe te i anak' ampela'ey ty niakatse hifanalaka ama'e ninday fikoriñañe an-tsinjake; i bako-toka'ey; tsy nanañ' anadahy ndra anak' ampela re naho tsy ie. ³⁵ Ie naхаониñе азе, le nandriatse o siki'eo, nanao ty hoe: Hoy abey! anako! Vata'e nampiambane'o! nanoe'o am-poheke, amy te sinokako amy IEHOVÀ ty vavako, vaho tsy ifoterañe.

³⁶ Le hoe re ama'e, O raeko, kanao nanoka-palie am' IEHOVÀ, le ano amako i niakatse am-palie'oy, amy te namale fate ho azo, amo rafelahi'o ana' i Amoneo, t'IEHOVÀ. ³⁷ Le tinovo'e aman-drae'e ty hoe: Ehe te hanoeñe amako o raha zao t'ie ho vahiny volan-droe hañambone-ambane' o vohitseo hangoihoy ty hasomondrarako, izaho naho o mpiamakoo. ³⁸ Le hoe re: Akia, le nirahe'e mb'eo volañe roe, le nionjomb'eo rekets' o rañe'eo nirovetse i hasomondrara'ey an-kaboañe ey. ³⁹ Ie modo i volañe roe rey, le nimpoly aman-drae'e vaho nanoe'e ama'e i nifantà'ey, ie mbe tsy nahavany lahy. Zay ty nifotora' ty lilitse e Israele ao, ⁴⁰ te mb'eo boa-taoñe o anak' ampela' Israeleo hirovetse i anak' ampela' Ieftake nte-Giladey, efatse andro ami' ty taoñe.

12

¹ Nifanontoñe o nte-Efraimeo naho nimb'e Tsafone* mb'eo, nanao ty hoe amy Ieftake, Ino ty nitsaha' areo mb'eo hialia'o amo nte-Amoneo f'ie tsy nitoka anay hindreza'ay? Ho forototoe'ay añ' afo ama'o ty anjomba'o.

² Le hoe ty natoi' Ieftake am' iareo, Toe niampahek' amo ana' i Amoneo naho ondatiko raho te nikanjy anahareo, f'ie tsy nañaro ahy am-pitá' iareo.

³ Aa kanao tsy narova' areo le namoeako fiay nitsake mb' amo ana' i Amoneo mb'eo, vaho natolo' IEHOVÀ an-tañako. Aa le ino ty nitroara' areo amako androany hialia' areo? ⁴ Natonto' Ieftake o lahilahi' i Gilade iabio naho nialy amy Efraime; vaho linafa' o nte-Giladeo t'i Efraime, ami'ty natao' iareo ty hoe: Ondaty gike e Efraime nahareo nte Gilade añivo' i Efraime naho i Menasè ao. ⁵ Rinambe' o nte-Giladeo amy Efraime o fitsaha' Iordaney boake Efraimeo, ie amy zao naho teo ty nipoliotse amo nte-Efraimeo nanao ty hoe: Ehe angao hitsake? Le nañontane aze o nte-Giladeo ty hoe: nte Efraime hao? Aa naho Tsie ty natao'e; ⁶ le nanoe' iareo ama'e ty hoe: Ano ty hoe: Sibolete[†], te mone nanao ty hoe Tsibolete[‡]—ie toe tsy nahafanoñoñe'e—le nitsepaheñe vaho vinono' iareo amo fitsaha' Iordaney; nte Efraime efats' ale-tsi-ro' arivo ty nikorovoke henane zay. ⁷ Enen-taoñe ty nizakà' Ieftake Israele, le nivilasy t'Ieftake nte-Gilade, vaho nalenteke' an-drova' o nte-Giladeo.

⁸ Nanonjohy aze, t'Ibtsane[§] nte-Betleheme nizaka Israele. ⁹ Nanañ' anadahy telo-polo re naho anak' ampela telopolo naho naondra'e aña vaho nampimoahе' boak' aña ka ty anak' ampela ho a o ana-dahi'eo. Nizaka Israele fito taoñe ¹⁰ le nivilasy t'Ibtsane, vaho nalenteke e Betleheme ao. ¹¹ Ie aña le nizaka Israele folo taoñe t'i Elone* nte-Zebolone. ¹² Ie nihomake t'i Elone nte-Zebolone, le nalenteke Aialone[†] an-tane Zebolone

* ^{12:1} Tsafone: maieñe, mañavaratse † ^{12:6} Sibolete: kilanka ‡ ^{12:6} Tsibolete: torahañe

§ ^{12:8} Ibtsane: raem-panolarañe; raen-tsintsíñe * ^{12:11} Elone: varo: ala-vondro, maozatse

† ^{12:12} Aialone: toem-panaloke

ao. ¹³ Nanonjohy aze nizaka Israele t'i Abdone[‡] ana' i Mpandrenge[§] nte-Piratone*. ¹⁴ Nanañ'ana-dahy efa-polo re naho afe telo-polo mpiningitse ana-borike fitom-polo, nizaka valo taoñe. ¹⁵ Nivilasy t'i Abdone ana' i Mpandrenge nte-Piratone vaho nalenteke e Piratone an-tane Efraime am-bohi' i Amaleke ao.

13

¹ Nanao haratiañe indraik' am-pivazoho' IEHOVÀ eo o ana' Israeleo vaho natolo' IEHOVÀ am-pità' o nte-Pilistio efa-polo taoñe. ² Teo t'indaty boake Tsorà*, fifokoa' i Dane, natao Manoàke[†], beitsiterake ty tañanjomba'e, mbe tsy nisamake. ³ Nisodehañe amy rakembay ty anjeli' IEHOVÀ nanao ty hoe: Toe beitsiterake rehe, mbe tsy nahatoly, f'ie hiareñe hisamak' ana-dahy. ⁴ Ie amy zao mitaòa, asoao tsy hikama divay ndra toake, naho ko mikama raha faly. ⁵ Inao, hiaren-drehe naho hisamak' ana-dahy; le tsy hozàm-pihàratse ty loha'e amy te ho nte-Nazire aman' Añahare boak' an-koviñe ao i ajajay; vaho ie ty hiorotse handrombake Israele hiavotse am-pità' o nte-Pilistio. ⁶ Nimb' amy vali'ey amy zao i rakembay nitalily ty hoe: Nivotrak' amako ty ondatin' Añahare, le nanahake ty vintan' anjelin' Añahare ty vinta'e, toe nampañeveñe; fa tsy nañontaneako ty nihirifa'e, vaho tsy nitaroñe'e amako ty tahina'e; ⁷ fe hoe re tamako, Inao! hiareñe vaho hisamak' ana-dahy rehe le ko minon-divay ndra toake henane zao, ndra hihinan-draha faly; fa ho nte-Nazire aman' Añahare boak' an-koviñe ao pak' añ' andro hihomaha'e i ajajay.

⁸ Aa le nihalaly am' IEHOVÀ t'i Manoàke, nanao ty hoe: Ry Talè, Ampombao mb' ama'ay mb' etoa indraike indatin' Añahare nirahe'oy, hañòha'e ze hanoa'ay amy ajaja hasamakey. ⁹ Hinaon' Añahare ty fiarañanaña' i Manoàke, vaho nivotrak' amy rakembay indraike i anjelin' Añaharey ie niambesatse an-teteke ey, fe tsy tama'e i vali'ey. ¹⁰ Nihitrike ty lay mb' amy vali'ey mb'eo amy zao i rakembay nanao ty hoe: Ingo fa niheo amako aniany indaty nisodehañe amakoy. ¹¹ Aa le niongake t'i Manoàke nañorike i vali'ey naho niheo mb' am' indatiy mb'eo, le nanoa' ty hoe: Ihe hao indaty nisaontsy amy rakembaiy? Le hoe re, Zaho. ¹² Le hoe t'i Manoake, Ehe te ho tondroke i saontsi'oy. Akore ty andahara'ay i ajajay, vaho ino ty hanoe'ay ama'e? ¹³ Le hoe ty natoi' i anjeli' IEHOVÀ amy Manoake, Ee te hilie-batañe amy nitaroñeko iabiy o rakembao, ¹⁴ t'ie tsy hikama ndra inoñ' inoñe boak' amy vahey, le ko mei'o hinon-divay ndra toake, ndra ty hikama raha faly; hene ampiambeneñe aze o nandiliakoo.

¹⁵ Le hoe t'i Manoak' amy anjeli' IEHOVÀ, Ehe'e te hisebañ' azo zahay hañalankañe vik'ose. ¹⁶ Aa le tinoi' i anjeli' IEHOVÀ t'i Manoàke ami'ty hoe: Ndra te sebañe'o, tsy ho kamaeko o mahakama'oo, fe naho hañenga horoañe, le misoroña am' IEHOVÀ; amy te tsy napota' i Manoàke t'ie anjeli' IEHOVÀ. ¹⁷ Le hoe t'i Manoàke amy anjeli' IEHOVÀ, Ia' ty tahina'o, hiasia'ay naho tondroke o saontsi'oo? ¹⁸ Le hoe ty natoi' i Anjeli' IEHOVÀ: Ino ty añontanea'o ty añarako, kanao tsikentañe? ¹⁹ Aa le rinambe' i Manoake ty vik' ose rekets' enga-mahakama naho nisoroña'e amy IEHOVÀ am-bato eo, vaho nanoe' i anjeliy halatsañe am-pisamba' i Manoàke mirovaly, ²⁰ amy te, ie nionjomb' an-dikeram-beo i lel' afo boak' amy kitreliiy, le nionjoñe amy lel' afo boak' an-kitreliy i anjeli' IEHOVÀ. Aa ie niisa' i Manoake

^{‡ 12:13} Abdone: mpitoroñe: rahon-jaka ^{§ 12:13} Hilèl': mpandrenge ^{*} ^{12:13} Piratone: ha'tsivokara'e, havotroa'e ^{*} ^{13:2} Tsorà: angamae; olatse; fanene-bey ^{† 13:2} Manoàke: fitofañe; falalañe

mirovaly zay le nibabok' an-daharañe an-tane. ²¹ Le tsy niboak' amy Manoàke naho amy vali'ey ka i anjeli' IEHOVÀ, fe napota' i Manoàke t'ie anjeli' IEHOVÀ. ²² Le hoe t'i Manoàke amy tañanjomba'ey, Toe hivetrake tika kanao nahaisak' an' Andrianañahare. ²³ Fa hoe ka ty asa' i vali'ey ama'e: Naho nipay hañoho-doza aman-tika t'IEHOVÀ, tsy ho rinambe'e am-pitan-tika i soroñey naho i banabanay, naho tsy ho naboa'e amantika, vaho tsy ho tinaro'e aman-tika henaneo i hoe zay.

²⁴ Nisamak' ana-dahy i rakembay naho natao'e Simsone[‡] ty añara'e. Nitombo' i ajajay vaho nitahie' IEHOVÀ. ²⁵ Namototse nañetsek' aze betek' an-kialo' i Dane añivo' i Tsorà naho i Estaole[§] ty Arofo' IEHOVÀ.

14

¹ Nizotso mb'e Timnate* t'i Simsone le nahaisake somondrara e Timnate ao, anak' ampela' o nte-Pilistio. ² Nimb' aman-drae'e mb'eo re nitalily ama'e naho aman-drene'e, ty hoe: Nahatreampela e Timnate raho, anak' ampela' o nte-Pilistio; ehe alao ho valiko. ³ Le hoe ty rae'e naho i rene'e tama'e, Tsy mahatreampela amo anak' amelan-dongo'oo ndra am' ondatiko iabio hao, te o nte-Pilisty tsy nisavareñeo ty ipaia'o valy? Le hoe t'i Simsone aman-drae'e, Alao ho ahy re fa mahafale ty troko. ⁴ Tsy nifohin-drae'e ndra i rene'e te IEHOVÀ ty nipay aze hiaträtre amo nte-Pilistio, amy te nandily Israele o nte-Pilistio tañ' andro zay. ⁵ Aa le nitrao-pizotso aman-drae'e naho i rene'e mb'e Timnate mb'eo t'i Simsone, ie avy an-tanem-bahe' i Timnate eo, hehe ty anan-diona nitroñe mb' ama'e mb'eo. ⁶ Nitotsak' ama'e t'i Arofo' IEHOVÀ, le rinia'e manahake ty fandriatañe vik'ose, leo raha raike tsy tam-pitá'e; fe tsy natalili'e aman-drae'e ndra an-drene'e i nanoe'ey. ⁷ Le nizotso mb'eo re nifanaontsy amy somondraray naho vata'e nitea' i Simsone. ⁸ Ie aña, nibalike hangalak' aze fe nitsile hey hahaisake ty fate' i lionay, naho naheo'e te nisamborien-drene-tantele i faten-dionay vaho aman-tantele. ⁹ Kinaro'e am-pitá'e le nikama t'ie nañavelo; aa ie nifanampe aman-drae'e naho i rene'e le nanjotsoa'e, f'ie tsy nitalily am'iareo te nakare'e an-karankan-diona ao.

¹⁰ Aa le nizotso mb'amy somondraray ty rae'e vaho nanao sabadidak' ao t'i Simsone, amy t'ie nilili' o ajalahio. ¹¹ Ie naharendrek' aze iereo le mbe nandesañe rañetse telo-polo ila'e hitraok' ama'e; ¹² le hoe t'i Simsone am' iereo, ho taroñeko tafatoño nahareo henaneo, aa naho eo ty mahatoiñe naho mahafandrendrek' aze amako añate' ty fito andro' i sabadidakey, le hatoloko anahareo ty lamba leny telopolo, miharo sarimbo telopolo. ¹³ Aa ie tsy mahafitaroñe aze amako, le inahareo ro hanolotse ahy lamba leny telopolo naho sarimbo telopolo. Le hoe ty asa' iareo ama'e: Akaro i razandreha'oy hijanjiña'ay. ¹⁴ Hoe re tam' iereo, Boak' ami'ty mpihinañe ty niakaran-kaneñe naho boak' ami'ty maozatse ty niakara' ty mamy. Fe tsy nahabejañe i tafatoñoy iereo añate' ty telo andro. ¹⁵ Ie amy andro fahafitoy, le nanoe' iereo ty hoe i vali' i Simsoney: Sigiho ty vali'o hitaroña'e i tafatoñoy tsy mone ho forototoe'ay aña' afo rehe naho ty anjomban-drae'o; handrarak' anay hao ty nañambara'o anay? Ie zay. ¹⁶ Aa le niharovetse amy Simsone ty vali'e, nanao ty hoe: Toe heje'o raho naho tsy kokoa'o, amy te nitaron-drazan-drehak' amo ana' ondatikoo fe tsy natalili'o amako. Le hoe re tama'e, Inao, ie tsy vinolako aman-draeko ndra amy reneko, ho volañeko ama'o hao? ¹⁷ F'ie nirovetse añatrefa'e avao amy fito andro'

[‡] 13:24 Simsone: masoandro'e; fitoroña'e; indroe [§] 13:25 Estaole: Rakemba maozatse * 14:1 Timnate: sare; vintañe

i sabadida' iareoy, le ty amy fañembera'e aze, nampandrendrehe'e amy andro faha-fitoy, vaho nabora'e am'ondatio i razan-drehakey. ¹⁸ Aa le hoe o roandria' i rovaio ama'e amy andro fahafitoy aolo' i tsofots' àndroy: Ino ty mamy te amo tanteleo? vaho ino ty maozatse te amo lionao? Le hoe re am' iereo. Naho tsy hinaotsao' areo i kiloakoy, le tsy ho nioni' areo i tafatoñokoy. ¹⁹ Nitotsak' ama'e amy zao ty Arofo'IEHOVÀ, le nizotso mb'e Askelone mb'eo nanjamañe ondaty telopolo naho nikopahe'e vaho natolo'e amo nahavale i tafatoñoio o saroñeo. Nisolebotse amy zao ty haviñera'e, le nionjomb' añ' anjomban-drae'e mb'eo. ²⁰ Le natolotse amy mpiama'e nanoe'e mpandrrotsey i vali'ey.

15

¹ Ie aña, an-tsam-pamokarañe vare-bolè, te nanese vik' ose amy vali'ey t'i Simsone; le hoe re: Te homb' amy valiko an-traño'e aña. Fe tsy nimeindrae'e t'ie hizilik' ao, ² fa hoe ty rae'e: Toe nataoko t'ie niheje'o vintañe; le natoloko an-drañe'o; aa vaho tsy soa te ama'e ty zai'e? endeso hisolo aze. ³ Aa hoe t'i Simsone am' iereo: Halio-tahiñe amo nte-Pilistio raho henaneo, ndra t'ie hanolorako sotry. ⁴ Aa le tsinepa' i Simsone ty fanaloke* telonjato, naho nandrambe failo; le nifanohize'e añ'ohi'e añ'ohi'e vaho nanoa'e failo ty añivo' ty ohy roe. ⁵ Narehe'e amy zao o failoo le navotso'e amy vare nizorazora' o nte-Pilistiooy naho fonga finorototo' iareo o fitoboro'eo naho o nizorazorao reketse ty tanem-bahe vaho olive†. ⁶ Le hoe o nte-Pilistio, Ia ty nanao zao? le hoe iereo: I Simsone, vinanto' i nte-Timney, amy te nalae'e ty vali'ey, vaho natolo'e amy mpandroro'ey. Nionjoñe mb'eo amy zao o nte-Pilistio vaho nampangotomomohe' iereo añafo re naho i rae'e. ⁷ Aa hoe t'i Simsone am' iereo, Naho zao ty sata' areo, le toe hamaleako kabò, vaho hitofa. ⁸ Le linafa'e iereo an-kitsok'am-pe am-panjamanambey; vaho nizotso mb' an-tevam-bato' Etame‡ mb'eo, nimoneñe ambone ey.

⁹ Nionjom-beo naho nitobe e Iehoda ao o nte-Pilistio vaho nivelatse niatatre i Lehý§. ¹⁰ Le hoe o nte-Iehodao: Ino ty nionjona' areo haname anay? Le hoe iereo: Ty hamahotse i Simsone ty nionjona'ay, hanoe'ay ama'e i nanoa'e ama'ay. ¹¹ Aa le nizotso mb' an-tevam-bato' i Etame mb'eo ty nte-Iehoda telo-arivo vaho nanoa ty hoe amy Simsone: Tsy fohi'o hao te manandily amantika o nte-Pilistio? Ino ze o nanoe'o ama'ay zao? Le hoe re: I nanoe' iareo amakoy ty nanoeko am' iereo. ¹² Le hoe iereo tama'e, Nizotso etoan-jahay hamahotse azo, hanese azo am-pità' o nte-Pilistio. Le hoe t'i Simsone, Mifantà amako te tsy hiambotraha' areo. ¹³ Le hoe iereo tama'e: Aiy: fa ho vihine'ay am-bahotse, le hatolo'ay am-pità' iareo fa tsy ho vonoe'ay. Aa le vinaho' iareo an-taly vao roe vaho nampiavote' iareo amy vatoy, ¹⁴ Ie nipoteake e Lehý eo, le rinambe' o nte-Pilistio an-koràke; aa le nivotrak' ama'e ty Arofo' IEHOVÀ, naho ninjare boka niforototoeñ' afo o taly am-pità'eo, vaho nihitsañe o talirandrañe an-tsira'eo. ¹⁵ Nahatrea taolam-balañoràm-borìke vao re, naho nahiti'e ty fità'e nandrambe aze le nanjamañe ondaty arivo, ¹⁶ vaho hoe t'i Simsone: Amam-balañoràm-borìke, fitoboroñañe am-pitoboroñañe, valañoram-borìke ty nanjamanako ty arivo. ¹⁷ Aa naho nagado'e i saontsi'ey le nahifim-pità'e aña i valañoray vaho natao ty hoe Ramate*-Lehý i toetsey.

* ^{15:4} Heb: soàle: an-davak' ao ty traño'e † ^{15:5} Olive: mañome menake hoe andranahake

‡ ^{15:8} Etame: voro' iareo; saro' iareo § ^{15:9} Lehý: valañorà * ^{15:17} Ramate: Fañonjonañe

18 Vata'e nitaliñieren-dre henane zay, le nikanie'e t'IEHOVÀ, nanao ty hoe: Fa natolo'o am-pitâ' ty mpitoro'o ty fandrombahañe ra'elahy; aa vaho ho vonoe' ty aran-drano raho henaneo hiforetrahako am-pitâ' o tsy sinavatseo? **19** Aa le tsineran' Añahare i nangoake e Lehiy, le niakaran-drano; ie ninoñe le nibalike i arofo'ey vaho nisotrake; aa le natao En'hakorè[†] ty ao; mbe e Lehý ao zay henanekeo. **20** Nizaka Israele roa-polo taoñe tañ'andro' o nte-Pilstio re.

16

1 Nimb'e Azà mb'eo t'i Simsone, le nanjo ty tsimirirañe, vaho nizilik' ao. **2** Natalily amo nte-Gazeo ty hoe: Fa nomb' atoy t'i Simsone. Aa le nivoñone' iereo naho nialeñe nandiñe aze an-dalambez eo, f'ie nianjiñe amy haleñe iabiy, le hoe ty asa' iareo: Angao re ampara' te mazava i maraiñey, vaho hañohofan-tika loza. **3** Nàndre ao t'i Simsone ampara' te antets' ale le nitroatse te petsak-aleñe naho nandrambe o lalambeindrovaao reketsé ty tokona'e roe, naho nombota'e reketsé sikadañe amankarao'e, naho nanoe'e an-tsoroke vaho jinini'e mb'an-kaboa' ty vohitse aolo' i Kebrone eñe.

4 Ie aña, le nikokoa'e ty rakemba am-bavatane' i Soreke* ao, i Delilà[†] ty añara'e. **5** Aa le nomb' ama'e mb'eo o talem-Pilstio, nanao ty hoe ama'e: Sigiho, hahaoniñañe te aia i haozara'e ra'elahi, naho an-tsata akore ty hahafitroara'ay, hamahots' aze, hanolora'ay sotry, vaho songa hanolotse drala arivo-tsi-zato ama'o zahay.

6 Aa le hoe t'i Delilà amy Simsone: Atalilio amako te aia ty idoña' o haozara'o ra'elahio, vaho manao akore ty hamahorañe azo hiambanea'o?

7 Le hoe t'i Simsone ama'e, Ie vahora' iareo an-tàlim-pale leñe fito mbe tsy nimaheñe le hihalème manahake ondaty ila'eo. **8** Aa le nanese vahotse fito mbe tsy nimaheñe ama'e o talèm-Pilstio vaho finehe'e. **9** Ie amy zao, nasia'e mpamandroñe am-po' ty traño raik' ao, le hoe re: O Simsone, fa ama'o o nte-Pilstio! Fe tinampa'e hoe ty fitampahan-karafon-denyo mioza afo o tàlim-paleo. Tsy nirendrek' amy zao ty foto' i haozara'ey. **10** Aa le nanao ty hoe amy Simsone t'i Delilà, Toe nifañahia'o, vaho nandañira'o; ehe saontsio amako, inoñe ty hamahorañe azo? **11** Le hoe re tama'e: Naho fehe' iereo mafe an-taly vao mbe lia'e tsy niasa, le havòzo manahake ondaty ila'eo. **12** Aa le nangalake taly vao t'i Delilà, namahots' aze vaho nanao ty hoe ama'e: O Simsone, ama'o o nte-Pilstio. Ie amy zao an-traño ao o mpamandroñe. Fe tinampa'e hoe fole o taly am-pitâ'eo.

13 Aa le hoe t'i Delilà amy Simsone: Ampara' henane nikobihe'o avao naho nitaroña'o vande; atalilio amako aré ty handrohizañe azo. Le hoe re ama'e: Naho ranjie'o an-tenoñe o randram-piton-dohakoo. **14** Aa le vinandri'e ami'ty harake, naho hoe ty koi'e ama'e: O Simsone, ama'o o nte-Pilstio: Nibarakakaok' amy firota'ey amy zao re vaho sininto amo komboo i harakey rekets' i tenoñey. **15** Le hoe re ama'e, Aia ty hatao'o ty hoe: Kokoako, kanao tsy amako ty arofo'o? Ie fa nikobik' ahy intelo vaho mb'e tsy natalili'o amako ty talin-kaozara'o. **16** Aa kanao tinindri'e lomoñandro lomoñandro an-drehake, naho nitolom-pañosik' aze, le nirintike te hamoe'ay, **17** naho fonga nabora'e ama'e o añ' arofo'eo ami'ty hoe: Mbe lia'e tsy nirangàm-piharatse ty lohako; ie nte-Nazire aman' Añahare boak' an-kovin-dreneko; aa naho harateñe le hienga ahy o hafatrarakoo vaho hihamavozo manahake ondaty ila'eo.

* 15:19 En'hakorè: rano figoangoa' i mpikanjiy * 16:4 Soreke: vahe; kosisike; hoe mavoñe
† 16:4 Delilà: rarake; bory

¹⁸ Aa ie nioni' i Delilà te hene nabora'e ty arofo'e, le nihitrife'e ankoike o talèm-Pilstio, ami'ty hoe: Mb'etoa aniany fa fonga binora'e amako ty an-tro'e ao, Aa le nihitrike mb'eo o talem-Pilstio reke-drala am-pità'e ao. ¹⁹ Nampirote'e añ'ongo'e eo le kinanji'e t'indaty naho niharate'e i randrañe fito añambone'e rey naho niorotse nanolo-tsotry aze, fe nisitak' ama'e i haozara'ey. ²⁰ Le hoe re, O Simsone, fa ama'o o nte-Pilstio. Tsekak' amy firota'ey amy zao le nanao ty hoe: Hiavotse manahake tamo ila'eo, le hivoamboañe; fe tsy napota'e te nieng' aze t'IEHOVÀ. ²¹ Aa le rinambe' o nte-Pilstio, naho napoliti' iareo o fihaino'eo; nendese' iareo mb'e Azà mb'eo naho vinaho' iareo an-daborìdy torisike; vaho nandisañe am-porozò ao.

²² Ie aña, namototse nitombo o maroi'e niharateñe. ²³ Nampamorie' o talèm-Pilstio amy zao ondatio hanao sorom-bey amy Dagone‡ 'ndrahare' iareo vaho hirebeke; fa hoe iereo: Natolon' añaharentika am-pitàn-tika t'i Simsone rafelahintikañey. ²⁴ Aa ie nahaisak' aze ondatio, le nandrenge an-drahare' iareo, ami'ty hoe: Fa natolon-draharentika am-pitàntika i rafelahintikañey, i mpijoy o tànen-tikañey, i nanjamañe maro amantikañey. ²⁵ Ie nifale añ'arofo, le nanao ty hoe: Hitrifo am-balabey ao t'i Simsone, hihisa'ay. Aa le kinoi' iareo boak' am-porozò ao t'i Simsone hitohafa' iareo le napo' iareo añivo' o fahañe. ²⁶ Le hoe t'i Simsone amy ajalahy nitañe ty fità'ey, ehe apoho raho hitsapa o fahañe mitohañe ty anjomba toio, hiatoako. ²⁷ Ie amy zao nialindretse t'indaty naho rakemba amy anjombay; tao iaby o talem-Pilstio, vaho tan-tafo'e ey nisamba ty fikobihañe i Simsone ty lahilahy naho rakemba telo arivo varañe. ²⁸ Aa le nikany IEHOVÀ t'i Simsone ami' ty hoe: Ry IEHOVÀ Talè, ehe tiahio raho amy henaneo avao, ehe ampaozaro ry Andrianañahare, soa te ami'ty indraike toy avao ty hamaleako o nte-Pilstio ty amy masoko roey. ²⁹ Rinambe' i Simsone amy zao o fahañe añivo ao mitohañe i anjombaio, nampionjonañe aze, vaho naronje'e, ty raike am-pità'e havana naho ty raike am-pità'e havia. ³⁰ Le hoe t'i Simsone: Angao hitrao-pikenkañe amo nte-Pilstio raho, le naronje'e ami' ty haozara'e iaby, vaho nikorovok' amo talèo naho amy ze hene' ondaty tam-po'e ao. Aa le nandikoatse ze vinono'e amy hene havelo'ey o zinama'e amy fikoromaha'eo. ³¹ Le songa nizotso mb'eo o longo'eo naho ty anjomban-drae'e nandrambe aze naho nakare' iareo vaho nalentekе añivo' i Tsorà naho i Estaole, an-kibori' i Manoà rae'e. Nizaka Israele roapolo taon-dre.

17

¹ Tam-bohibohi' i Efraime amy zay t'indaty atao Mikà*. ² Le hoe re aman-drene'e, I volafoty arivo-tsi-zato nikamereñe ama'oy, i nititihe'o am-pitsanoñakoy, ingo te amako i volafotiy; zaho ty nandrambe aze. Le hoe ty rene'e, Tahie' IEHOVÀ rehe anako. ³ Aa ie nahere'e aman-drene'e i volafoty arivo-tsi-zatoy, le hoe ty rene'e: Toe hene naviko am' IEHOVÀ boak' antañako ho a i ana-dahikoy i volafotiy, hitsenea'e sare pinàtepàtetse naho sare trinanake; aa le habaliko ama'o. ⁴ Aa ie nampoly ama'e i volafotiy, le nandrambesan-drene'e ty volafoty roanjato naho natolo'e ami'ty mpanao volafoty le namboare'e sare pinatetse naho sare trinanake, vaho tan-kiboho' i Mikà ao zay. ⁵ Ie niañoñ'ay t'i Mikà, le nanan-kivohon-drahare, le nitsene hareañe naho terafime† vaho nañory ty ana'e ho mpisoroñe ⁶ Ie

‡ 16:23 Dagone: tsako; fiañe * 17:1 Mikà: rarake; mpireke † 17:5 Terafime: saren-draham-paha-sive

henane zay, tsy amam-panjaka t'Israele vaho songa nanao ze tea'e am-pihaino'e ao ondatio[‡].

⁷ Nisy ajalahy nte-Betleheme e Iehoda, fifokoa' Iehoda, nte-Levý, nañialo ao. ⁸ Niakatse an-drova Betleheme e Iehoda re, hañialo amy ze toetse ho zoe'e; vaho ie amy lia'ey nivotrake Efraime an-kiboho' i Mikà. ⁹ Le hoe t'i Mikà ama'e: Boak' aia v'iheo? vaho hoe re ama'e: nte Levý raho boake Betleheme e Iehoda ao, mitaveañe mb' amy ze mete hañialoako. ¹⁰ Le hoe t'i Mikà ama'e: Mimoneña amako atoa, soa t'ie ho rae naho mpisoroñe amako, le ho tolorako volafoty folo boa-taoñe naho fisikiñe vaho ty mahakama'o. Aa le nimoak' ao i nte-Leviy. ¹¹ Ninò' i nte-Leviy ty himoneñe amy 'ndatiy; vaho ni-hoe anak'ama'e i ajalahiy. ¹² Aa le noriza' i Mikà i nte-Leviy vaho nanoeñe mpisoroñe i ajalahiy an-kiboho' i Mikà ao. ¹³ Le hoe t'i Mikà: Fantako te hañasoa ahiko t'IEHOVÀ kanao aman-te-Levý ho mpisoroñe.

18

¹ Tsy amam-panjaka t'Israele tañ' andro rezay; le nipay lova himoneña'e ty fifokoa' i Dane henane zay; amy te mboe tsy niazo' iareo tañ' andro zay ty anjara' lova' iareo añivo' o fifokoa' Israeleo. ² Aa le nirahe' i Dane boak' am-pifokoa'e ao ty lahilahy lime amy valobohò' iareoy, ondaty mahasibeke, boake Tsorà naho i Estaole hitinoñe amy taney, hitsoek' aze; ami'ty hoe: Akia, hotsohotsò i taney; aa le nivotrak' am-bohibohi' i Efraime an-kiboho' i Mikà iereo vaho nialeñe ao. ³ Ie nañarine i kiboho' i Mikà, le nifohi' iareo ty feo' i ajalahy nte-Leviy, naho nitsile mb'eo, vaho nanao tama'e ty hoe: Ia ty ninday azo atoa? le ino ty anoe'o atoy? ⁴ Le hoe re am' iereo, Hoe zao naho zao ty nanao' i Mikà ahy, naho karamae'e, vaho fa mpisoro'e raho henaneo. ⁵ Aa le hoe iereo tama'e, Ehe, ihalalio toro-lalañe aman'Añahare, hahafohina'ay he ho heneke o lia' añaveloa'aio. ⁶ Le hoe i mpisoroñey am' iereo: Mañaveloa am-panintsiñañe; fa añatrefa' IEHOVÀ o lalañe hombà' areoo.

⁷ Nienga amy zao indaty lime rey, naho nivotrake e Laise*, le nirendre' iereo ondaty ama'eo te nierañerañe ty fimoneña' iareo, manahake o nte Tsidoneo, nianjiñe naho nanintsiñe; amy te tsy amy taney ty aman-dily hañinje iareo aman-dra inoñ'inoñe, fa ilavitse o nte-Tsidoneo, vaho tsy eo t'indaty iharoa'e balibalike. ⁸ Aa le nimpoly mb' aman-droahalahi' iareo e Tsorà naho Estaole ao, vaho hoe o rolongo' iareoo ama'e, Atalilio arè! ⁹ Le hoe iereo, Miongaha, antao hiavotse haname iareo; fa nioni'ay i taney naho nirendreke t'ie fanjaka; aa vaho hijihetse avao nahareo? ko mihenekeneke fa akia mb'amy taney, imoaho naho tavano. ¹⁰ Ie mb'eo, le hivotrak' am' ondaty mierañerañe, tane milañelañe natolon' Añahare am-pitá' areo; tane miaiñ' añoleñañe; ama'e ao ze kolotoin' Añahare. ¹¹ Aa le nionjomb'eo, boak' am-pifokoa' i Dane, hirike Tsorà naho i Estaole ty lahilahy enen-jato nidiam-pialiañe hihotakotake. ¹² Niañambone mb'e Kiriate-Iearime[†] e Iehoda ao iereo vaho nitobe; aa le nitokave' iareo Tobe' i Dane i toetsey pake henaneo; ambalike i Kiriate-iarime ao. ¹³ Boak' ao iereo, niavotse mb'am-bohi' i Efraime mb'eo nivotrak' an-kiboho'i Mikà eo.

¹⁴ Le hoe i lahilahy lime niraheña hitingañe an-tane' i Laise aña rey amo longo'eo, Fohi' areo hao te ao ty hareñañe naho terafime, naho hatae-sinokitse vaho sare trinanake? Tsakoreo arè ty hanoe' areo. ¹⁵ Aa le

[‡] 17:6 Mpz 21:25, Its 12:8 * 18:7 Laise: liona † 18:12 Kiriate-iarime: kanjy; fifanampeña

niveve mb' eo iereo, nivotrak' amy kiboho' i ajalahy nte-Levio, an-kiboho' i Mikà eo vaho nañontane aze. ¹⁶ Nijohañe an-dalambey eo indaty ana' i Dane enen-jato nidian-karaom-pialiañe rey, ¹⁷ le nimoak' ao i lahilahy lime niary mb'eo hitingañe amy taney rey naho rinambe' iareo i hatae sinokitsey naho i hareañey naho i terafimey vaho i sare trinanakey; ie nijohañe an-dalam-bey eo am' indaty enen-jato nidian-karaom-pialiañe rey i mpisoroñey. ¹⁸ Aa ie nizilik' an-kiboho' i Mikà ao hangalake i hatae sinokitsey naho i hareañey naho i terafimey vaho i sare trinanakey, le hoe i mpisoroñey am' iereo, Ino o anoe' areoo? ¹⁹ Le hoe iereo ama'e: Mianjiña koahe, vihino fitañe ty falie'o vaho mindreza ama'ay, ho rae'ay naho ho mpisoro'ay; mahaso azo hao ty ho mpisoroñe añañomb'a' ondaty raike, ta te ho mpisoroñe ami'ty fifokoa naho hasavereña' Israele? ²⁰ Nifale amy zao ty arofo' i mpisoroñey, le rinambe' i hareañey naho i terafimey naho i hatae sinokitsey vaho nañaivo' ondatio ao. ²¹ Aa le nitolike iereo naho nienga mb'eo, naho nanoe' iereo aolo ey o keleiañe naho o añombeo, vaho o varao. ²² Ie lavitse i kiboho' i Mikà aña, le nivovo amo ana' i Daneo ondaty mpañohoke i kiboho' i Mikaio nifandrimboñe ²³ vaho nikoik' amo ana' i Daneo. Nitolik' amy zao iereo nanao amy Mikà ty hoe: Ino o mañolañe azoo te mifañosoñe? ²⁴ Le hoe re: Tinava' areo i 'ndrahare tsinenekoy naho i mpisoroñey vaho nienga, le ino ty sisa amako? Aa ino arè ty anoa' areo amako ty hoe? Inoñ' o mañolañe azoo? ²⁵ Le hoe o ana' i Daneo ama'e: Ehe tsy ho janjiñeñe añaivo'ay atoa ty fiarañanaña'o, hera hiambotraha' t'indaty boseke vaho hikenkan-drehe rekets' o añañomb'a'oo. ²⁶ Aa le nionjomb'eo o ana' i Daneo naho napota' i Mikà t'ie maozatse te ama'e vaho nitolike nimpoly mb' an-kiboho' e aña.

²⁷ Rinambe' iareo o nitsene' i Mikao, naho i mpisoro'ey, naho nivotrake e Laise, am'ondaty mianjiñe naho mierañerañe, naho linafa' iareo an-delapibara, vaho finorototo' iereo añañob' afo i rovay. ²⁸ Tsy nanam-pandrombake iereo, fa lavitse ty Tsidone, le tsy ama' ondaty mpifañaoñe; ie am-bavatane marine i Bete-rekhobe[‡]. Aa le namboare' iareo i Rovay vaho nimoneñe ao. ²⁹ Natao' iereo Dane ty añara' i rovay, ty amy Dane rae' iareo nisamahe' Israele; fa Laise hey ty añara' i rovay. ³⁰ Aa le natroa' o ana' i Daneo ho a iareo i hazomangay; vaho nimpisoro' i fifokoa' i Daney t'Ionatane, ana' i Gersome, ana' i Menasè, ie naho o ana'eo, ampara' ty andro nandrohizañe i taney. ³¹ Aa le natroa' iareo i sarekatae pinatepatetse tsinene' i Mikay; amo hene andro naha-te Silò§ ao i kivohon' Añahareio.

19

¹ Tañ'andro zay, ie tsy amam-panjaka t'Israele, le teo ty nte-Levy nañialo ankalo' o vohi-bohi' i Efraimeo, nangalake sakeza e Betleheme' Iehoda aña, ² fe nanao hatsimirirañe ama'e i amato'ey vaho nisitak' aze nimpoly mb' añañomb'an-drae' e Betleheme' Iehoda aña le nandrare tobok' añañob' afa-bolañe. ³ Niavotse hañorik' aze mb'eo amy zao i vali'ey, hamere aze vaho hampoli'ey; nindre ama'e ty mpitoro'ey naho ty borike roe; le nampihovae' i ampelat añañomb'an-drae' e ao; aa ie nionindrae' i ampelat, le niehake te nifandrendrek' ama'e; ⁴ nitañ' aze eo i rafoza'ey, ty rae' i ampelat, naho niambesatse telo andro ama'e re nikama naho ninoñe, vaho nialeñ' ao. ⁵ Aa amy andro fahefatsey, ie nitroatse marain-dray, le niongake hañavelo mb'eo i nte-Leviy; fa hoe ty rae' i ampelat amy vinanto'ey, Ampaozaro ty arofo'o ami'ty mofo pitie, vaho

‡ 18:28 Bete-rekhobe: traño bey malalake § 18:31 Silò: niraheñe

hiavotse. ⁶ Niambesatse amy zao iereo roroe, nikama naho ninoñe, le hoe ty rae' i ampelai amy 'ndatiy, Ehe te hahafale azo ty hitambatse atoy, hampihaha ty arofo'o. ⁷ Aa ie niongake hañavelo indatiy, le nanjitse aze ty rafoza'e hitambatse ao hey hialeñe. ⁸ Niampitso amy andro faha-limey re hañavelo, fa hoe ty rae'i ampelai: Ehe, ampitofào ty arofo'o, vaho mahaliñisa ampara' te miroñe ty andro; aa le nikama iereo roe. ⁹ Ie niongake hienga mb'eo indatiy, ie naho i sakeza'ey vaho i mpitoro'ey; le hoe ty asa' i rafoza'e, rae' i ampelaiy ama'e: Hehe te ho haleñe i àndroy; Ehe mialeña atoa, hahafale ty arofo'o, le hañaleñalen-drehe te maray hañavelo mb' an-kiboho'o mb'eo. ¹⁰ Fe tsy nimete nialeñe ao ka indatiy; niongake re, niavotse vaho niary e Iebose, toe Ierosalaime; ama'e i borìke roe reke-pitobohañe rey, naho i sakeza'ey. ¹¹ Aa ie narine Iebose, le fa ho nitsofotse i àndroy vaho hoe i mpitoroñey amy talè'ey, Antao hitsile mb' amo rova' o nte-Ieboseo mb'eo, hialeñe ao. ¹² Fa hoe i talè'ey tama'e: Tsy hitsile etoa tika, himoak' an-drovan' ambahiny ao ie tsy a o ana' Israeleo; hionjomb'e Gebà* mb'eo tika. ¹³ Le hoe re amy mpitoro'ey, Antao hañarine ty raik' amo toetse zao hialeñan-tika: ke e Gebà he e Ramà† ao. ¹⁴ Aa le nionjoñe iereo nanjotike mb'eo, ampara' te nitsofotse ty àndro, ie marine' i Gebà i Beniamine. ¹⁵ Niveve mb'eo iereo, nimoake, hialeñe e Gebà ao; le nizilik' ao nitoboke an-kiririsa' i rovay amy te tsy eo ty nampihova iareo añ'anjomba'e.

¹⁶ Ingo amy zao, ty androanavy boak' añ'ava, an-tete'e aña amy harivay, boak' am-bohi' i Efraime nañialo e Gebà ao, fa ana' Iemený ka ondaty an-toetseo. ¹⁷ Niandra amy zao i androanaviy, nahaoniñe i mpañavelo an-tamea' i rovay vaho hoe re tama'e: Homb'aia rehe, naho boak'aia? ¹⁸ Le hoe re tama'e: Fiboha'a'y ty Betlekhemé' Iehoda mionjoñe mb'añ' ila' i vohi' Efraimey mb'eo, i nihirifakoy, te Betlekhemé' Iehoda hey, le mb'an-kiboho' IEHOVÀ mb'eo, fe tsy eo ty mampihova anay añañ anjomba'e, ¹⁹ ndra te aman' ahetsé naho haneñe o borìke'aio vaho ao ty mofo naho divay ho anay naho o mpitoro'o ampelao naho i ajalahy mindre amo mpitoro'oy; toe tsy amam-pipaiañe. ²⁰ Le hoe i androanaviy, Fañanintsiñe ama'o; hene apoho amako ze mete ho paia'o fe ko mialeñe an-tameañe atoy. ²¹ Aa le nampihovae'e añañ anjomba'e ao, naho finaha'e ahetsé o borìkeo. Nanasa fandia iareo, le nikama vaho ninoñe.

²² Aa ie nampifale arofo le niheo mb'eo ondati' i rovaio, ondaty tsy manjofakeo haname i anjombay mb' atia mb' aroa naho namofoke i lala'ey vaho nanao amy tompon' anjombay, amy androanaviy ty hoe, akaro indaty nizilik' an-kiboho'oy, haharendreha'ay aze. ²³ Niakatse mb'am' iereo ao amy zao indatiy, i tompon' anjombay, nanao ty hoe ama'e, Tsie, ry longokoo, ehe, ko manao o halò-tsereke zao, oniñe te nizilik' añañ akibako atoy indatiy, ko anoe' areo o hatsivokarañe zao. ²⁴ Ingo ty somondrara anak' ampelako naho i sakeza'ey; hakareko iereo henaneo, ampiambaneo, le ano ze atao' areo ho soa; fa ko manao o hagegeañe zao amy 'ndatiy. ²⁵ Fe tsy hinao' ondatio, aa le rinambe' indatiy i sakeza'ey naho nasese'e mb'am' iereo; le nandrendrek' aze iareo vaho nivahora' iareo ampara' te niporeá ty maray; aa ie ho nanjirike i àndroy, le navots'o iareo. ²⁶ Aa le nimb'eo ami'ty mielizava i ampelai nikorovoke an-dalan' anjomba' indaty niheove' i talè'ey ampara' te nazava. ²⁷ Nitroatse te manjirik' àndro i talè'ey nanokake o lalan' anjombao vaho niakatse hiavota'e mb'eo fe heheke i ampela sakeza'ey nibabok' an-dala' i anjombay eo, o taña'eo an'

* ^{19:12} Gibà; tamboho † ^{19:13} Ramà; miereñereñe ambone;

tokonañe eo. ²⁸ Le hoe re ama'e, miongaha, fa hionjomb'eo tika; f'ie tsy amam-panoiñe; aa le niongake indatiy naho nasampe'e amy borikev, vaho noly mb'an-toe'e mb' eo. ²⁹ Aa ie pok'an-kiboho'e ao, nangalake meso naho rinambe'e i sakeza'ey le tinori'e folo-ro'amby, fange am-pange'e, vaho hene nampihitrife'e mb' amo efe' Israeleo mb'eo. ³⁰ Aa le hoe ty natao' o nandrendrek' azeo, Mbe lia'e tsy nanoeñe, tsy nioniñe o sata zao sikal' amy andro niavota' o ana' Israeleo an-tane Mitsraimey ampara' te henane, ivetsevetseo, isafirio, vaho ifanaontsio.

20

¹ Aa le hene nienga mb'eo o ana' Israeleo; nifanontoñe hoe ondaty raike i valobohòke boake Dane pake Bir'sebà naho an-tane Giladeiy, nimb'am' IEHOVÀ e Mitspà aña. ² Aa le niatreke i favoribe'i ondatin' Añahareoy o mpiaolo' ondaty iabio, ze hene fifokoa' Israele, lahin-defo efats-etse songa mpitam-pibara. ³ Jinanji' o ana' i Beniamineo ka te nionjom-be Mitspà mb'eo o ana' Israeleo. Le hoe o ana' Israeleo, Atalilio ama'ay o haloloañe zao. ⁴ Aa le hoe ty natoi' i nte-Levy vali' i rakemba vinonoiy, Nimoake e Gebà' i Beniamine raho rekets' i sakezakoy hialeñ' ao. ⁵ Nitroatse hiatreatre amako amy haleñey ondati' i Gebào, le ho naname ahy añariari' i anjombay, hañoho-doza amako, fe nazi' iareo i sakezakoy, ie mate henaneo. ⁶ Aa le rinambeko i sakezakoy naho tinoritoriko vaho nampisangitrifeko hanitsike ze fonga tane linova' Israele; ty amy halòtserehañe naho hagegeañe e Israele ao. ⁷ Aa ie henaneo ry ana' Israeleo, inahareo iaby, taroño etoñañe ty fanoroa' areo, ty safiri' areo. ⁸ Aa le songa niongake hoe ondaty raike i màroy nanao ty hoe, Leo raik' aman-tika tsy homb' añ'akiba'e mb'eo, naho tsy ama'ay ty hitsile mb' an-kiboho'e aña. ⁹ Fe zao ty hanoentika amy Gebà: ho tamè'ay an-kitsapake; ¹⁰ vaho hangalà'ay ondaty folo ami'ty zato boak'amy ze hene fifokoa' Israele, naho zato ami'ty arivo, naho arivo ty añ'ale, hitoha vaty ho a ondaty ho mb'e Gebà' i Beniamine aña hiatrek' aze ty amy fonga hagegeañe nanoe' iereo e Israele. ¹¹ Aa le nifanontoñe hañatreatre i rovay ondati' Israele iabio, vinanditse h'ondatey raike. ¹² Nahitri' o fifokoa' Israeleo ondaty hanitsike ty fifokoa' i Beniamineo hañontane ty hoe: Ino ze o haloloañe nifetsak' ama' areo zao? ¹³ Ie amy zao akaro indaty rey, o tsivokatse e Gebào, hañohofa'ay loza, hañaria'ay amy Israele o haloloañe zao. F'ie tsy hinao' i Beniamine ty fiarañanaña' o longo'e ana' Israeleo. ¹⁴ Te mone nifanontoñe e Gebà ao boak' amo rova'eo o ana' i Beniamineo hialy amo ana' Israeleo. ¹⁵ Vinolily tañ' andro zay te ro'ale-tsi-eneñ' arivo ty mpitam-pibara amo ana' i Beniamineo niboak' amo rova'eo, mandikoatse o mpimoneñ' e Gebào; nifiton-jato t'indaty ao. ¹⁶ Fiton-jato am' ondaty iabio ty ni-fitàn-kavia; songa nahafipiletse vato ami'ty treham-bolo le tsy nivio. ¹⁷ Niaheñe ho efats-etse ondaty mpitam-pibara' Israeleo, (tsy ama'e t'i Beniamine); songa lahin-defoñe. ¹⁸ Aa le niongake vaho nionjomb'eo Betele mb'eo o ana' Israeleo, nañontane ze hatoron' Añahare, ami'ty hoe, Ia ama'ay ty hionjon-kialy amo Ana' i Beniamineo valoha'e? Le hoe t'IEHOVÀ: Iehoda ty hiaolo. ¹⁹ Aa le nañaleñaleñe o ana' Israeleo nitobe ampiatrefañe i Gebà ey. ²⁰ Le nionjon-kialy amy Beniamine mb'eo o ana' Israeleo; nalaha' o nte-Israeleo amo nte-Gebao ty hotakotake. ²¹ Niakatse boake Gebà amy zao o ana'i Beniamineo vaho narotsa' iareo an-tane amy andro zay t'indaty ro-ale-tsi-ro-arivo amo ana' Israeleo. ²² Nifañosike ondatio, o ana' Israeleo, vaho nalaha' iareo amy toetse nilahara' iareo tamy andro valoha'eiy

indraike hihotakotake. ²³ Aa le nionjoñe mb'eo o ana' Israeleo nirovets'e añatrefa' IEHOVÀ ampara' te haleñe, le nihalaly am' IEHOVÀ ami'ty hoe, Aa vaho harineako amañ'aly indraike hao o ana' i Benamine rahalahikoo? Le hoe t'IEHOVÀ, Mionjona mb' ama'e. ²⁴ Aa le niharinea' o ana' Israeleo o ana' i Benamineo amy andro faharoey. ²⁵ Le niavotse hiatreke iareo boake Gebà t'i Benamine amy andro faha-roey vaho rinotsa'e an-tane indraike o ana' Israeleo ty lahindefoñe rai-ale-tsi-valoarivo songa mpitam-pibara. ²⁶ Nionjomb'e Betele mb'eo o ana' Israeleo naho ondaty iabio le nangololoike ty rovetse naho niambesatse añatrefa' IEHOVÀ, naho nililitse amy andro zay ampara' te haleñe vaho nañenga soroñe naho engampanintsñañe añatrefa' IEHOVÀ. ²⁷ Le nañontanea' o ana' Israeleo t'IEHOVÀ (amy te tao i vatam-pañinan'Añaharey tañ' andro zay; ²⁸ vaho nijohañe añatrefa'e t'i Pinekase ana'i Elazare ana' i Aharone fahe-zay) ami'ty hoe: Mbe hionjo hifandraparapak' amo ana' i Benamine rahalahikoo hao raho? Le hoe t'IEHOVÀ: Mionjona amy t'ie hatoloko am-pit'a'o te hamaray. ²⁹ Aa le niarikatohe' Israele mpamandroñe ty Gebà. ³⁰ Le nionjoñe haname o ana' i Benamineo o ana' Israeleo amy andro fahateloy vaho nidadañe niatreke i Gebà manahake i nanoe'ey. ³¹ Aa le niavotse hiatrek' ondatio o ana' i Benamineo, le nasitak' amy rovay; toe nigarabiñ' aly naho namono an-damoke ey nanahak' i aney, amy mionjomb'e Betele mb'eyo naho amy mb'e Gebà mb'eyo, naho an-tetekey, ondati' nte' Israele telopolo varañe. ³² Le hoe ty asa'o ana' i Benamineo: Fa mibaibay aolon-tikañe eo iereo manahake tam-baloha'ey; ami'ty nanoa' o ana' Israeleo ty hoe: Antao hitriban-day hanitake iereo amy rovay mb'an-damoke mb'eo. ³³ Ie amy zao hene niongak' an-toe'e eo o ana' Israeleo naho nijohañe am-piriritañe i Baale Tamare* ey; le niboroboñak' amo toe'eo amy zao o mpivandroñe, naho boak' an-kivo' i Gebà ao. ³⁴ Aa le rai-ale amo jinoboñe amy ze hene ana' Israele ty naname i Gebà, naho nifandrapake an' aly; fe namoea' i Benamine te nitotofen-kankàñe. ³⁵ Aa le linafa' IEHOVÀ añatrefa' Israele t'i Benamine; le nanjamañe nte-Benamine ro' ale-tsi-lime-arivo-tsi-zato o ana' Israeleo, songa mpitam-pibara. ³⁶ Nioni' o nte-Benamineo amy zao t'ie gioke, ie nanao te tsy hahafitroatse amy Benamine o ana' Israeleo; fe niantofa' iereo o mpamandroñe najado' iareo marine i Gebà. ³⁷ Aa le nimirritse mb'eo o namandroñe, nipitsike ty lay mb'e Gebà mb'eo; nikovovoke mb'eo o namandroñe, nandafa i rova iabiy an-dela-pibara. ³⁸ Ie amy zao ty viloñe tinendre añivo' o ana' Israeleo naho o namandroñe, le t'ie hampionjoñe hatoeñe mandrahoñe boak' an-drova ao. ³⁹ Aa le nitolik' amy hotakotakey o ana' Israeleo, ie fa niorotse nandafa naho namono ondaty telopolo varañe t'i Benamine, le natao' iereo ty hoe: toe mifitak' aolon-tikañe eo iereo manahak' i fifandraparapahañe valoha'ey. ⁴⁰ Fe nioro-pionjoñe boak' an-drova ao i rahon-katoeñe mioalay, le nitolike o nte-Benamineo: vaho hehe te nionjoñe an-katoeñe mb'an-dikerañe ey ty famorototoañe i rovay. ⁴¹ Nitolik' amy zao ka o ana' Israeleo vaho nioreke o nte-Benamineo, fa naharendreke te nizo hankàñe. ⁴² Aa le niamboho'a iareo o ana' Israeleo, nimb' ampatrambey mb'eo, fe nañoridañe iareo i aliy, nanjamañe boak' am-boho ka o niavotse o rovao. ⁴³ Le hinoro' iareo o nte-Benamineo naho nañinjake tsy am-pitofañe, vaho maro ty nandalià' iareo pak' e Gebà mb'am-panjirihan' andro mb'eo. ⁴⁴ Le rai-ale-tsi-valo-arivo ty nihotrak' amo nte-Benamineo; songa fanalolahy. ⁴⁵ Nitolike iereo le nilay mb'

* **20:33** Tamare: satrañe

am-patrambey mb'eo mb'amy vato' i Rimoney[†] mb'eo; aa le tsinindro' iareo an-dalañe mb'eo t'indaty lime-arivo, naho nangoroñe iareo pake Gidome[‡] aña vaho nandafa ondaty ro-arivo. ⁴⁶ Aa le nte-Beniamine ro-ale-tsi-lime-arivo ty nikorovoke tañ' andro zay, songa mpitam-pibara, ondaty maozatse. ⁴⁷ Fe nitolike naho nitriban-day mb'am-Bato Rimone am-patrambey mb'eo ty lahindefo enenjato nipalitse am-Bato Rimone ao efa-bolañe. ⁴⁸ Nitolike mb'amo ana' i Beniamineo amy zao o ana' Israeleo le linafa'e an-dela-pibara iaby o rova'eo naho o añombe'eo ze fonga nioni' iareo; vaho fonga namiañañ' afo ze rova nizoeñe.

21

¹ Ie amy zao, fa nifanta e Mitspà aña o lahilahy ana' Israeleo ami'ty hoe: Leo raik' amantika tsy hanolotse ty anak' ampela'e amy Beniamine ho vali'e. ² Aa le nomb'e Betele mb'eo ondatio naho niambesatse añatrefan' Añahare ampara' te hariva vaho nampipoña-peo nangololoike ty rovets'e ³ ami'ty hoe: Ry IEHOVÀ, Andrianañahare' Israele, Akore te nitendreke e Israele ao t'ie ho po-pifokoañe raike t'Israele te anito? ⁴ Ie amy loak' àndroy, nañaleñaleñe ondatio, le nandranjy kitrely vaho nañenga soroñe naho engam-panintsiñañe. ⁵ Le hoe ty enta' o ana' Israeleo: Ia amo hene fifokoa' Israeleo hao ty tsy nimb' amy favori' IEHOVÀ mb'eo? Amy t'ie nititike do'e te ze tsy nionjoñe mb' am-pivori-bei' IEHOVÀ e Mitspà ao ro havetrake. ⁶ Aa ie naneñeñe i Beniamine rahalahi' iareo o ana' Israeleo le nanao ty hoe: Nifañito amy Israele ty fifokoañe raike' anindroany. ⁷ Hatao akore ty hampanambalieñe o sisao, kanao nititik' amy IEHOVÀ tika te tsy hitolorañe o anak' ampelan-tikañe? ⁸ Le hoe iereo: Ia amo fifokoa' Israeleo ty tsy nimb' amy IEHOVÀ e Mitspà mb'eo? Toe tsy an-tobe' Iabese-Gilade ao ty nimb' am-pivoriy mb'eo. ⁹ Amy te ie vinolily ondatio, inao, leo raik' amo mpimone' Iabese-Gilade tsy nizoeñe. ¹⁰ Aa le nampihitrife' i valobohòkey mb'eo ty rai-ale-tsi-ro'arivo amo fanalolahio vaho nafantok' ama'e ty hoe: Akia, zamano an-dela-pibara o mpimone' Iabese-Giladeo rekets' o ampelao naho o ajajao. ¹¹ Le zao ty hanoe' areo: ho mongore' areo ze lahilahy naho ze rakemba fa nifandia-tiyh ama' ondaty.

¹² Tendreke iareo amy zao amo mpimone' Iabese-Giladeo ty somondrara efa-jato, tsy nahaftohiñe ondaty, mboe tsy niolots' aman-dahilahy, le nendese' iareo mb' an-tobe e Silò, an-tane Khanàne aña. ¹³ Le nirahé' i favoribey iabiy, ty hisaontsy amo ana' i Beniamine am-bato Rimoneo, hikoike iareo an-kanintsiña. ¹⁴ Aa le nimpoly t'i Beniamine henane zay, vaho natolots' iareo o somondrara' Iabese-Gilade nirombahe' iereo veloñeo; f'ie tsy nahaeneke. ¹⁵ Aa le nisoloha' ondatio t'i Beniamine amy jebañe nanoe' IEHOVÀ amo fifokoa'Israeleo. ¹⁶ Le hoe o talè' i valobohòkeio: Hanoen-tika ino ka ty hanambalia' o sisao kanao nimongoreñe amy Beniamine ze atao ampela? ¹⁷ Le hoe iareo: Tsy mete tsy ho lova' i Beniamine o nahapolititseo, tsy mone ho mongotse am' Israele ty fifokoañe raike. ¹⁸ Ie amy zao, tsy mete manolotse o anak' ampelan-tikañe ho vali' iareo tika, amy titike nifantà' o ana' Israeleoy ami' ty hoe: Fatse ty manolotse valy amy Beniamine. ¹⁹ Le nitsaraeñe ty hoe: Inao! e Silò avara' i Betele naho atiñanan-damoke miboak' e Betele mb'e Sekeme mb'eo, vaho mañatimo i Lebonà mb'eo ty sabadidak' amy IEHOVÀ boa-taoñe. ²⁰ Aa le nafanto' iareo amo ana' i Beniamineo ty hoe: Akia mietaha an-tanem-bahe ao; ²¹ le mandrendreha naho miakatse mb' eo o anak' ampela' i Silò

[†] 20:45 Rimone: miereñereñe; [‡] 20:45 Gidome: fangoakoahañe

hitsinjak' an-tsikidola, le miavota amo tanem-baheo songa hitsepake ty ho tañanjomba'e boak' amo anak' ampela' i Silóo, vaho akia mb' an-tane Beniamine aña. ²² Ie amy zao, naho mb' atoy o roae'eo ndra o rahalahi'eo hitoreo ama'ay, le hanoe'ay ty hoe, Iferenaiño, amy te tsy nañeneke o ampela rinambe'ay amy hotakotakeio songa hahazoa' iareo valy; mbore tsy ho tinolo' areo ka tsy mone ho nanan-kakeo henaneo. ²³ Aa le nanoe' o ana' i Beniamineo, nangala-baly nahaeneñe ty ia' iareo amo nitsnjakeo; le nienga naho nimpoly mb'an-dova' iareo aña naho namboatse rova vaho nimoneñe ao. ²⁴ Aa le nienga boak' ao amy zao o ana'Israeleo songa mb'ampifokoa'e mb'eo naho mb' amo keleia'eo; sindre niavotse hirik' ao namonje ty lova'e.

²⁵ Ie tañ'andro zay tsy amam-panjaka t'Israele; songa nanao ze natao'e ho mahity am-pihaino'e ao*.

* **21:25** Mpz 17:6, Its 12:8

Rote

¹ Tañ'andro nifehea' o mpizakao, le nisalikoeñe i taney vaho nitaveañe mb'an-tane Moabe t'i nte-Betlekhemē* e Iehoda, ie naho i tañanjomba'ey reketse ty ana-dahi'e roe. ² I Elimeleke† ty tahina' indatiy naho i Noomie‡ ty tahina' i vali'ey vaho natao ty hoe Maklone§ naho Kilionā* i ana-dahi'e roe rey. Nte Efratà e Betlekhemē Iehoda iereo, nimb'an-tane Moabe mb'eo vaho nitambatse aña. ³ Nihomak' amy zao t'i Elimeleke, vali' i Noomie; nifary aze naho i ana-dahi'e roe rey ⁴ ie songa nañenga ampela nte-Moabe ho vali'e; i Orpae† ty añara'ty raike naho i Rote‡ ty añara' ty raike le nimoneñe ao folo taoñe varañe, ⁵ vaho sindre nihomake t'i Maklone naho i Kilionā, aa le pok' ana-dahy roe naho i vali'ey i rakembay. ⁶ Niongake amy zao re himpoly rekets' o vinanto'eo boak' an-tane Moabe aña, amy t'ie nahajanjiñe an-tane Moabe ao te nihaoñe' IEHOVÀ ondati'eo le fa nifahana'e mahakama. ⁷ Aa le niavotse i fimoneña'ey, ie naho i vinanto'eo ampela roe rey vaho nionjomb' an-tane Iehoda mb'eo; ⁸ le hoe ty asa' i Noomie amy vinanto'eo roe rey, Akia, mimpolia songa mb' añ' anjomban-drene'e mb'eo. Hitahy anahareo t'IEHOVÀ mira ami'ty nañasoa' areo ahy naho i nivilasy rey. ⁹ Hitolora' IEHOVÀ abey t'ie songa handrèndreke fañanintsiñe an-kibohom-bali'e ao. Norofa'e amy zao le sindre nangololoike; ¹⁰ vaho hoe ty lie' iareo aze: Aiy! hindre fimpoly ama'o mb'am' ondati'oo mb'eo zahay. ¹¹ Hoe ka t'i Noomie, Mibaliha ry anake, aia ty hindreza' areo lia amako? Mbe aman' ana-dahy an-koviko ao hao ho valie' areo indraike? ¹² Mimpolia ry anako, akia! fa loho bey raho te hanam-baly. Aa naho nanoeko ty hoe, Amam-pitamàn-draho, naho toe hanam-baly anito haleñe, vaho nahasamake ana-dahy, ¹³ ho lìñe' areo hao te añoñ'ay? hifoneña' areo te tsy hengaeñe? Aiy, ry anako, loho mafaitse amako ty ama' areo zay, amy te nafote' IEHOVÀ amako ty fità'e. ¹⁴ Nirovetse indraike iereo. Norofa' i Orpae ty rafoza'e fe nipitek' ama'e t'i Rote.

¹⁵ Aa hoe re, Hehe te nimpoly mb'am' ondati'eo naho mb'andrahare'e mb'eo ty rañao'o; ehe oriho i rañao'oy. ¹⁶ Fe hoe ty asa' i Rote:

Ko osihe'o hieng' azo,
ndra hibalike tsy hañorihako ka!
Ze ombo'a hombako,
ze imoneña'o himoneñako;
ho ondatiko ondati'oo,
le ho Andrianañahareko
t'i Andrianañahare'o.

¹⁷ Ze ihomaha'o ty hikenkañako,
le ao ty hampigodoñañ'ahy.
Ee te hanoe' IEHOVÀ amako
vaho lombolombo zay ka,
naho tsy ty havilasy avao
ty hifampiriañ' antika!

¹⁸ Ie nioni'e te niharoke, te hindre lia ama'e, le tsy nisaontsie'e ka.
¹⁹ Aa le nitrao-pañavelo, ie roe ampara' te nigodañe e Betlekhemē ao. Ie

* ^{1:1} Betlekhemē: Anjomba-mahakama (mofo) † ^{1:2} Elimeleke: Andrianañahare Mpanjakako

‡ ^{1:2} Noomie: Fanjaka § ^{1:2} Maklone: Siloke * ^{1:2} Kilionā: Minike † ^{1:4} Orpae: gan-katoke

‡ ^{1:4} Rote: rañetse

pok'e Betlekhemè le nangetseketeke iaby i rovay ty am' iereo; le hoe o rakembao: I Noomie hao? ²⁰ Le hoe re am' iereo:
 Ko atao' areo Noomie ka,
 te mone ŠMàra ty hanoa' areo ahy,
 ty amy hafairañe nanoe'
 i El-Sadai amakoy.

²¹ Nianjan-draho te nionjoñe,
 fe nampolie' IEHOVÀ kapaike;
 ino ty anoa' areo ahy Noomie
 kanao nanesek' ahy t'IEHOVÀ,
 vaho hankàñe ty nafetsa'
 i El-Sadai amako?

²² Aa le nimpoly t'i Noomie rekets' i Rote nte Moabe vinanto'e nindre-lia
 ama'e boak' an-tane Moabe aña, niheo e Betlekhemè ao ami'ty fifotoram-
 pitatahañe vare hordea.

2

¹ Ie amy zao, nanan-dongo amy vali'ey t'i Noomie, ondaty jòmake
 vaho mpañaleale, fifokoa' i Elimeleke; *Boaze ty tahina'e. ² Le hoe
 t'i Rote nte Moabe amy Noomie, Angao homb' an-teteke mb'eo raho
 henaneo, hitimponako, ampanonjohizañe ty hitendrehako fañisohañe am-
 pahäisaha'e. Aa le hoe re tama'e, Akia, anako! ³ Nimb'eo re nitimpoñe,
 nañorike o mpanatak' an-tetekeo: vaho tendreke te nivotrak' aña' ila' ty
 tonda' i Boaze i tam-pifokoa' i Elimelekey.

⁴ Pok'eo amy zao t'i Boaze boake Betlekhemè aña, le hoe re amo
 mpanatakeo, Ho ama' areo t'IEHOVÀ, le hoe ty natoi' iereo, Hitahy azo
 t'IEHOVÀ. ⁵ Aa le hoe t'i Boaze amy mpitoro'e nampisarie'e o mpanatakeoy,
 Ana' ia o ampelao?

⁶ Tinoi' i mpisarim-panatakey ami'ty hoe, Ie i ampela nte Moabe noly
 atoy nindre amy Noomie boak'an-tane Moabe aney: ⁷ ty hoe ty nata'e:
 Mihalaly ama'o, ehe apoho raho hitimpoñe am-pañorihañe o mpanatakeo
 naho hanontoñe añivo' o fitoboroña'eo. Aa le nimb'eo animaray re
 nitoloñe pake henane, naho tsy t'ie nitofa kedekede an-kibohotse ao.

⁸ Aa le hoe t'i Boaze amy Rote, Mahafitsanom-bao, anako? Ko mitimpoñe
 an-tete' o ila'eo naho ko iavota'o ty atoy vaho mirampia amo ampelakoo.

⁹ Isaho soa i teteke timpona' iareoy naho oriho; tsy fa nafàntoko hao o
 ajalahio tsy hañedre azo? le ie maran-drano, mandenà mb' amo fitovio
 vaho minoma amo tinari' o ajalahioo, ¹⁰ Nibabok' an-tarehe'e re, toe
 nibokok' an-tane, le nanoa'e ty hoe, Inoñe ty nahatreavako fañisohañe
 am-pahaoniña'o, t'ie ho haoñe'o, oniñe te renetane?

¹¹ Nanoiñe aze t'i Boaze nanao ty hoe: fa naborak' amako ze he'e
 nanoe'o amy rafoza'o ampelay boak'amy nihomaham-bali'oy; naho t'ie
 nienga rae naho rene, naho i tane nahatoly azoy, vaho nivotrak' am'
 ondaty nialik'ama'oo. ¹² IEHOVÀ abey ty hanambe ty fitoloña'o; vaho
 hañondrok' azo an-kalifora'e t'IEHOVÀ Andrianañahare' Israele fa ambane'
 o ela'eo ty nomba'o mb'etoa hitsoloke.

¹³ Aa le hoe re, Ehe t'ie hahatreva fañisohañe am-pahaoniña'o, ry talè, fa
 nampanintsiñe'o, vaho toe nitaroñe an-tro' o mpitoro'o ampela toio, ndra
 te tsy ampanahafeñe ami'ty raik' amo mpitoro'o ampelao.

¹⁴ Ie am-pikamañe ao, hoe t'i Boaze ama'e, Mb'etoa, mitendrea mofo naho alõño amo vinaigrao ty romo-mofo'o. Nitoboke marine o mpanatakeo re, vaho nanjotsoa' iareo ampemba tono. Nikama re le nianjañe vaho nanisa. ¹⁵ Ie niongake hitimpoñe, le hoe t'i Boaze amo ajalahi'eo, Angao re hitimpoñe amo mitoboroñeo, vaho ko onjireñe. ¹⁶ Tsongò ho aze ka amo nitoboroñeo, le apoho eo ho timpone'e vaho ko trevoheñe. ¹⁷ Aa le nitimpoñe amy tetekey re ampara' te hariva; vaho finofo'e i nitimpone'ey le naahaatsake ty efà i ampembay. ¹⁸ Rinambe'e naho niheo mb'an-drova mb'eo, le niisa' i rafoza'e ampelay i tinimpo'ey; nakare'e ka i nasisa'e te nieneñey vaho nazotso'e. ¹⁹ Le hoe i rafoza'e ampelay ama'e, Aia ty nitimpona'o anindroany? Le aia i nitoloña'oy? Ho tahieñe abey i nandrendrek' azoy. Aa le tinaro'e amy rafoza'e ampelay i nitoloña'ey vaho nanao ty hoe: i Boaze ty tahina' indaty amy nitoloñakoiy. ²⁰ Le hoe t'i Noomie amy vinanto'ey, ho tahie' IEHOVÀ, amy te tsy napo'e ty fatariha'e ke ami'ty veloñe he ami'ty mate. Aa hoe t'i Noomie ama'e: Longo marine antika indatiy, raik' amo mahajebañe an-tikañe.

²¹ Le hoe t'i Rote nte Moabe, Eka, inao i asa'e amakoy: Harineo nainai'e o ajalahikoo ampara' te henefe' iareo i fitatahañey. ²² Aa le hoe t'i Noomie amy Rote vinanto'e, mete, anako, ty indreza'o amo mpitoroñ' ampela'eo tsy mone ho tsoboreñe t'ie an-tetek' ila'e aña. ²³ Aa le nimanea'e orike o mpitoro-ampela' i Boazeo, nitimpoñe am-para te niheneke ty fitatahañ' i ampembay vaho ty fitataham-bare-bolè; ie nimoneñey amy rafoza'e ampelay.

3

¹ Le hoe t'i Noomie rafoza'e ampela ama'e: O anako, tsy hipaiako fitsolohañe hao hañasoña azo? ² Aa tsy longon-tikañe hao t'i Boaze nindreza'o amo mpitoroñ-ampela'ey? Hamofoke vare-hordea an-tane famofohañe eo re te haleñe. ³ Aa le miandroa rehe, naho mihosora, naho aombeo ty saro'o soa, vaho mizotsoa mb' an-tane-pamofohañe mb'eo, fe ko ampandrendrehe'o aze, ampara' t'ie anjañe mahakama naho rano. ⁴ Ie amy zao, naho mandre re, isaho i andrea'ey, le iziliho; afaho ty am-pandia'e eo, le mandrea eo, vaho ho saontsie'e ama'o ty hanoe'o.

⁵ Le hoe re tama'e: Hanoeko iaby i linaño'o amakoy, ⁶ aa le nizotso mb' am-pamofohañe mb'eo re nanao i nitoroa' i rafoza'e ampelaiy.

⁷ Ie fa nikama naho ninoñe t'i Boaze, vaho nifale ty tro'e, le niavotse handre aña'ila' ty fitoboroñam-bare ey; niapiapia mb'eo re nañafake ty am-pandia'e vaho nandre eo. ⁸ Ie niantets' aleñe, nitsekake indatiy le nañorirañe vaho hehe te ampela ty nandre an-tombo'e eo. ⁹ Aa hoe re, Ia v'iheo? Le hoe re, I Rote mpitoro'o ampelay; ehe, alafiho amo mpitoro-ampela'oo ty saro'o amy t'ie longo mahafijebañe.

¹⁰ Le hoe re, Ho tahie' IEHOVÀ rehe, anako; lombolombo te amy fatariha'o am-baloha'ey ty fatariha'o am-para'e, amy te tsy norihe'o o ajalahio ke t'ie mpañarivo he te rarake. ¹¹ Ie amy zao, anako, ko hembañe, fa hene hanoeko ama'o i vinola'oy; fa fohi' i favori' ondaty an-dalambey iabiy te ampela vañon-drehe. ¹² Aa le ndra te to t'ie longo mpijkebañe, mbe eo ty longo-mpijkebañe marine te amako. ¹³ Eo hey rehe ami'ty haleñe toy le ie maraiñe, naho mete hijebañe azo re, angao hijebañe, fa naho tsy mete hijebañ' azo, le kanao veloñe t'IEHOVÀ, zaho ty hijebañe; mandrea ampara' te maraindray. ¹⁴ Aa le nandre am-pandia'e eo re ampara' te niporea' ty maraindray; vaho nañaleñaleñe aolo' ty hahafifankaoniña' ondaty, ty amy

saontsi'ey ty hoe: Ao tsy hapota' ondaty te niheo am-pamofohañe atoy ty ampela.

¹⁵ Le hoe re, Tano o sarom-pikolopofa'oo, naho atantezo; le vinela'e naho narane'e ama'e ty vare-hordea nem-pañaranañe, le nampilohaze'e vaho niavotse mb' an-drova mb'eo. ¹⁶ Aa hoe ty asa' i rafoza'e ampelatama'e t'ie pok'eo, Akore henaneo, anako? le natalili'e ama'e i nanoa' indatiy azey, ¹⁷ vaho hoe re: Natolo'e ahy o vare-hordea fañaranañe eneñe toañe ami'ty hoe, Ko mimpoly mañomaño mb' aman-drafoza'o ampela ao.

¹⁸ Le hoe re, Eo hey anako, ampara' te fohi'o ty figadoña'e; fa tsy hitofa indatiy ampara' te henefe'e anito i rahay.

4

¹ Ie amy zay, nionjom-ban-dalambeey mb'eo t'i Boaze le niambesatse vaho inge niary eo i longo-mpijebañe nisaontsie' i Boazey, le hoe re tama'e, O, koahe! miviha, miambesara etoa. Aa le nivike mb'eo re niambesatse. ² Nedre'e amy zao ty androanavy folo' i rovay vaho natao'e ty hoe: Miambesara atoy. Le niambesatse iereo. ³ Le hoe re amy longo-mpijebañey: Fa nivotrak' atoy t'i Noomie boak'an-tane-Moabe aña, le fa haleta'e ty tane' i Elimeleke rahalahin-tikañey, ⁴ le nataoko ho soa ty hampiboañko ama'o, ami' ty hoe; Kalò añatrefa' o miambesatse etoañeo aolo' o androanavi' ondatikoo. Aa naho ho jebañe'o le jebaño; fa naho tsy hijebañe le saontsio, ho fantako; fa tsy eo ty hijebañe aze naho tsy ihe; le zaho ty manonjohy. Le hoe re: Ho jebañeko.

⁵ Aa hoe t'i Boaze: Amy andro ivilia'o am-pitá' i Noomie i taney, tsy ho nikaloë'o ka hao t'i Rote nte Moabe, vali' i nihomakey, hampitroara'o amy lova'ey ty tahina' i nivilasiy?

⁶ Aa hoe i longo-mpijebañey, Tsy lefeko ty hijebañe aze ho ahiko, tsy mone hampiantoeko ty lovako; aa le rambeso ty zom-pijebañe; fa tsy meteko ty hijebañe aze.

⁷ Zao ty nililitse taolo e Israele ao ty amy fijebañey naho o fanakaloañeo, hañatò ze he'e: Afaha' t'indaty ty hana'e vaho atolo'e am'ondatio; zay ty fitaliliañe e Israele ao. ⁸ Aa ie nanao ty hoe amy Boaze i longo-mpijebañey: Vilio ho azo, le nafaha'e i hana'ey. ⁹ Le hoe ty enta' i Boaze amo androanavio: Valolombeloñe nahareo androany te viniliko am-pitá' i Noomie ze a i Elimeleke iaby naho ze hene vara' i Killiona naho i Malone, ¹⁰ mbore fa mandrame i Rote nte Moabe, vali' i Maklone, ho valiko hampitroarako an-dova'e ty tahina' i nihomakey, tsy havitsok' amo rahalahi'eo, ndra an-dalambeey i toe'ey ty tahina' i nihomakey. Valolombeloñe nahareo henane zao.

¹¹ Aa le songa nanao ty hoe o androanavy naho ondaty an-dalambeio, Eka, valolombeloñe zahay. Ehe te hampanahafe' IEHOVÀ amy Rakel naho i Leàe i rakemba niheo añ'anjomba'oy, i roe nandranjy ty anjomba' Israele rey; hanarànake e Efratà rehe vaho hanan-tahinañe e Betleheme ao; ¹² le ee te ho hambañe amy anjomba' i Peretse nasama' i Tamare ho a Iehodày, i tiry hatolo' IEHOVÀ azo añamy rakemba tora'eyi. ¹³ Aa le nengae' i Boaze t'i Rote, ie ty tañ'anjomba'e; aa ie nimoak' ama'e le nampiareñe' IEHOVÀ vaho nahatoly ana-dahy.

¹⁴ Le hoe o rakembao amy Noomie: Andriañeñe t'IEHOVÀ, te tsy nifarie'e tsy ho amam-pijeban-drehe, lonike te ho arofoanañe e Israele ao ty tahina'e. ¹⁵ T'ie ho fampisotrafen-kavelo'o, hameloñe ty haanterao; fa toe lombolombo' ty ana-dahy fito i vinanto'o mikoko azo nisamak' azey.

¹⁶ Aa le rinambe' i Noomie i anak' ajajay naho notroñe'e añ'araña'e eo, vaho ie ty nimpampinono aze. ¹⁷ Le o rakemba rañe'eo ro nañomey aze ty añara'e, ami'ty hoe: Nahatoly ana-dahy t'i Noomie; le natao' iereo Ovede*; ie ty rae' Iisaý, rae' i Davide.

¹⁸ Zao o tarira' i Pèretseo; nisamake i Ketsrone t'i Pèretse; ¹⁹ le nisamake i Rame t'i Ketsrone; le nisamake i Aminadabe t'Rame; ²⁰ le nisamake i Naksone t'i Aminadabe, naho nisamake i Salmà t'i Naksone ²¹ le nisamake i Boaze t'i Salmà; vaho nisamake i Ovede t'i Boaze, ²² le nisamake Iisaý t'i Ovede, le nisamahe' Iisaý t'i Davide.

* ^{4:17} Ovede: fitoroñañe ndra fiambaneañe

Samoele I

1 Ie henane zay, teo t'indaty e Ramataime-zofime*, am-bohibohi'i Efraime ao atao Elkanà†, ana' Ierohame‡, ana' i Elihò§, ana' i Tohò* ana' i Tsofe†, nte-Efraime. **2** Roe ty vali'e, ty añara' ty raike, Khanà‡, ty añara'ty raike, Peninà§; nanañ' anake t'i Peninà, fe mbetsiterake t'i Khanà. **3** Ie amy zay niavotse i rova'ey boa-taoñe indatiy nitalaho naho nisoroñe am' IEHOVÀ i Mâroy e Silò* año. Mpisoroñe amy IEHOVÀ henane zay t'i Kofený† naho i Pinekase‡. **4** Ie tsatoke ty andro hanoen-tsoroñe le songa nanjotsoa'e t'i Peninà tañanjomba'e naho o ana-dahi'e naho anak' ampela'e iabio; **5** tinolo'e anjara mañeva t'i Khanà, fa i Khanà ty nikokoa'e, fe kinape' IEHOVÀ ty hovi'e. **6** Le nanolo-tsotry aze nainai'e i rafe'ey, nembere'e amy te nampikitihe' IEHOVÀ i hovi'ey. **7** Aa le nitolom-panao zay an-taoñ'an-taondre, ie nionjomb' amy anjomba' IEHOVÀ mb'eo, le nampisoañe'e avao; ie nirovetse, tsy nete nikama. **8** Aa le hoe t'i Elkanà vali'e ama'e, O Khanà, ino o iroveta'oo? akore te tsy mihinañe? ino ty mampalorè ty tro'o? tsy lombolombo' ty ana-dahy folo ama'o v'irahoo?

9 Aa ie fa nikama naho ninoñe e Silò ao iereo le niongake t'i Khanà,— ie amy zao niambesatse amy fiambesa'e an-tokonan-dalambein' anjomba' IEHOVÀ t'i Elý§ mpisoroñe; **10** le nitalaho amy IEHOVÀ an-kafairan' arofo i rakembay vaho nangololoike ty rovetse. **11** Le nifanta an-titike ty hoe: O ry IEHOVÀ i Mâroy, naho toe ho vazoho'o ty fisotrian' anak' ampata'o toy, naho hahatiah y, naho tsy handikofa'o o fetrek'oro'oo naho ho tolora'o ana-dahy ty mpitoro'o ampela, le hatoloko am'IEHOVÀ ho amo hene andro hiveloma'eo vaho tsy hozaem-piharatse ty añambone'e. **12** Aa ie nitolonalaly añatrefa' IEHOVÀ, le nioni' i Elý i falie'ey. **13** Nisaontsy añ' arofo'e ao t'i Khanà, o fivimbi'eo avao ty nihetseke, le tsy nirey i fiarañanaña'ey; aa le natao' i Elý t'ie nijke. **14** Le hoe t'i Elý tama'e, Ampara' te ombia t'ihe ho màmo avao? adono año o divai'oo. **15** Nanoñe aze ty Khanà, amy ty hoe: Aiy! ry talèko, ampela mioremène 'no-ahoo; tsy mpinon-divay ndra tòake, fe nadoako añatrefa' IEHOVÀ ty troko. **16** Ko atao'o ho anam-Beliale ty anak' ampata'o, fa ami'ty hamaro-toreoko naho amy fanaheloakoy ty nivolañeko. **17** Aa le nanoñe aze t'i Elý ami'ty hoe, akia ampanintsiñañe, i Andrianañahare' Israele ty hamale soa i nihalalia'oy. **18** Aa le hoe re, Ehe te haharendre-pañisohañe am-pahaoniña'o o anak' ampata'oo. Le niavotse i rakembay, nikama, vaho tsy nanahelo ka ty lahara'e.

19 Nañampitso iereo te nitroatse naho nitalaho añatrefa' IEHOVÀ naho nimpoly mb'añ'anjomba' iareo e Ramà año; le nifañaoñe amy Khanà vali'e t'i Elkanà vaho nahatiah y aze t'IEHOVÀ. **20** Ie año, tondroke te niareñe t'i Khanà, le nisamake ana-dahy vaho natao'e Samoele* ty añara'e, Amy te nihalalieko amy IEHOVÀ. **21** Nitolom-pionjo hañenga i sorom-boataoñey naho hañava-pànta am' IEHOVÀ t'i Elkaná roandriañe rekets' o añ'anjomba'eo. **22** Fe tsy nañavelo mb'eo t'i Kaná; hoe re amy vali'ey:

* **1:1** Ramataime-zofime; fitalakesañ' abo roe † **1:1** Elkanà: Fahimbañan'Añahare ‡ **1:1** Ierohame: abo; mitretre; ikokoañe § **1:1** Elihò: Ie avao ro Andrianañahareko * **1:1** Tohò: veloñe; mitaroñe † **1:1** Tsofe: mañisake, mijilojilo; tafo; saroñe ‡ **1:2** Khanà: Matarike; miferenaiñe; tolotsé § **1:2** Peninà: hange; vatosoa; tarehe * **1:3** Silò: niraheñe † **1:3** Kofený: mpampisaroñe; komondiko ‡ **1:3** Pinekase: tarehe mirearea ndra fañarova § **1:9** Elý: ty soroñe; ty fañenga'e * **1:20** Samoele: Jinanjin'Añahare

Ie otàñe i ajajay, le hendeseko mb'eo, hiatrefa'e am' IEHOVÀ, vaho ao ty himoneña'e nainai'e. ²³ Aa le hoe t'i Elkanà, vali'e ama'e: Ano ze atao'o ho soa; Mahaliñisa ampara' t'ie notàñe; hajado' IEHOVÀ abey i tsara'ey. Aa le nandrare tobok' ao re nampinono i ana'ey, ampara' te notae'e. ²⁴ Aa ie notàñe i ajajay le nendese'e mindre ama'e nionjoñe mb'eo, reketse ty bania telo ay[†], naho mahakama efà raike, vaho ty zonjòn-divay, le nendese'e mb' añ' anjomba' IEHOVÀ e Silò ao, mbe nitora'e i ajajay. ²⁵ Ie linenta i baniay le nendeseñe amy Elý mb'eo i ajajay. ²⁶ Le hoe re: O talèkoo, kanao veloñ' ain-drehe, ry talèko, zaho i ampela nijohañe marine azo etoa, nilolok' amy IEHOVÀy. ²⁷ Ty ajaja toy i nihalalieko; vaho natolo' IEHOVÀ amako i nihalaliakoy; ²⁸ aa le ingo fa hahereko am' IEHOVÀ, kanao velon-dre le a IEHOVÀ. Aa le niambane añatrefa' IEHOVÀ re.

2

¹ Nitalaho t'i Khanà, ami'ty hoe:
Mirebek' am' IEHOVÀ ty troko,
mionjoñe am' IEHOVÀ ty tsifako;
misokak' amo rafelahikoo ty vavako;
le jejoeko ty fandrombahañe ahy.

² Leo raike tsy masiñe manahak' IEHOVÀ
toe tsy ie naho ts' Ihe;
vaho tsy eo ty lamilamy
hambañe aman' Añaharen-tika.

³ Ko mivolam-pirengevohañe avao;
ko metea'o hiakatse am-palie'o
ty fitoeborañe;
amy te Andrianañahare mahilala t'IEHOVÀ;
ama'e ty andanjàñe o satao.

⁴ Nipozake ty fale' o fanalolahio,
le nampiombeañe haozarañe o nikoletrao.

⁵ Nikarama hahazoa'e mofo o nivontsiñe;
anjañe ka o nilingoao;
nisamake fito ty betsiterake,
vaho ninìke i nimaro anakey.

⁶ Mamono t'IEHOVÀ, mbore mameloñe;
manjotsø mb'an-tsikeokeok' ao,
vaho mañakatse boak'ao.

⁷ Maha poi'e t'IEHOVÀ naho mampañaleale;
mamotsake vaho mañonjoñe.

⁸ Atroa'e boak' an-debok' ao o poie'eo,
naho ongaha'e boak'am-porompots' ao
ty rarake,
hampiambesare'e amo roandriañe,
handova'e i fiambesan-engeñey;
IEHOVÀ ro faha-ty voatse toy,
vaho najado'e ama'e ty tane toy.

⁹ Hambena'e ty fandia' o masi'eo, fe hampitsiñeñe añ'ieñ' ao o lo-tserekeo;
fa tsy haozarañe ty handreketa' ondatio.

¹⁰ Ho demodemoheñe
o mifandietse amy IEHOVÀo;
hangotroha'e boak' an-dikerañe ao;
ho zakae' IEHOVÀ o olon-taneo;

[†] 1:24 Fot 15:9

le hampaozare'e i mpanjaka'ey, vaho haonjo'e ty tsifa' i noriza'ey.

¹¹ Aa le nimpoly mb'añ'anjomba'e mb'e Ramà mb'eo t'i Elkanà; vaho nitoroñe IEHOVÀ añatrefa' i Elý mpisoroñe i ajajay.

¹² Ondaty tsivokatse i ana-dahi' i Ely rey, tsy naahafohiñe IEHOVÀ. ¹³ Inao ty sata' i mpisoroñe rey am' ondatio: Naho mañenga soroñe t'indaty, ie mbe mandeve i henay, le mb'eo ty mpitoro' i mpisoroñe rey reketse fitsovohan-kena telo fitsipoke am-pitâ'e; ¹⁴ vaho atsovo'e ke an-kitra ao, ke añaana-kalañe, ke am-balâñe, hera an-tsajoa; le ze akare' i fitsovohan-kenay ty endese' i mpisoroñey ho aze. Nanoe' iareo amy ze hene ana' Israele niheo mb'e Silò mb'eo zay. ¹⁵ Eka, ie mbe tsy nahatoeñe i solikey le nimb'eo ty mpitoro' i mpisoroñey nanao ty hoe amy 'ndaty nanao soroñey: Anoloro hena hatono'ay ho a i mpisoroñey; fa tsy ho no'e ama'o ty hena nahandroeñe; i mantay ty paiae'e. ¹⁶ Aa naho nanoa' indatiy ty hoe: Angao hahatoeñe hey o henao, vaho alao ze satrin' arofo'o; le nanoa'e ty hoe: Aiy! atoloro ahy hey tsy mone ho tavaneko. ¹⁷ Toe jabajaba añatrefa' IEHOVÀ ty hakeo' i ajalahy rey; amy te nimavoe' iareo o engaeñe amy IEHOVÀ.

¹⁸ Ie amy zao nitoroñe añatrefa' IEHOVÀ t'i Samoele, an-kitambe leny, ie mb'e ajaja. ¹⁹ Le zinain-drene'e ho aze ty saroñe kedekedeke vaho natolo'e aze boa-taoñe amy lia'e mb'eo mindre amy vali'e mpañenga sorom-boa-taoñey. ²⁰ Nitatae' i Elý t'i Elkanà naho i tañanjomba'ey ami'ty hoe: Hatolo' IEHOVÀ ama'o abey añami'ty rakemba toy ty tiry hisolo i nihalaliañe am' IEHOVÀ. Le nimpoly mb'añ'anjomba' iareo mb'eo.

²¹ Aa le nahatiah y i Khanà t'IEHOVÀ, le niaren-dre, vaho nahasamak' ana-dahy telo naho anak'ampela roe. Nitombo añatrefa' IEHOVÀ t'i Samoele.

²² Nigain-kantetse t'i Elý; naho jinanji'e iaby o sata' i ana'e rey amy Israeleo, naho t'ie nifandia tiyh amo rakemba mpitoroñe an-dalan-kivohom-pamantañañe. ²³ Le nanoe'e ty hoe: Ino ty anoe' areo ze o raha zao? Raty ty italilia' ondaty iabio. ²⁴ Tsy mete zay, ry anako; toe tsy soa ty talily tsanoñeko te ampandilare' areo ondati' IEHOVÀ. ²⁵ Naho aman-kakeo ama' ondaty t'indaty, le ho zakaem-pizaka; fe naho amantahiñe am'IEHOVÀ t'indaty, ia ty hañalañalañe ho aze? Fe tsy hinao' iareo ty fiarañanañan-drae' iareo, fa toe satri' IEHOVÀ t'ie hampihomaheñe. ²⁶ Mbe nitombo erike t'i Samoele ajajay, nionjoñe am-pañisoha' IEHOVÀ vaho am'ondatio.

²⁷ Nomb'amy Elý amy zao ty ondatin' Añahare, le nanoa'e ty hoe: Hoe t'IEHOVÀ: Tsy niboake malange añañomban-droae'o hao raho, ie te Mitsraime añañañafan' anjomba' i Parò*? ²⁸ Tsy jinoboko amo hene' fifokoa' Israeleo hao re ho mpisoroko, hionjoñe mb' amy kitrelikoy mb'eo hañemboke naho hisikiñe kitambe añatrefako? Mbore fonga natoloko aman' anjomban-drae'o o nengae' o ana' Israeleo horoañe añañafao? ²⁹ Ino arè ty itimpaha' areo o fisoroñañe ahikoo naho o engaeñe amakoo, o nandiliako hanoeñe amy fimoneñakoio, vaho iasia'o ambone ahy o ana'oo, amondraha' areo sandriñe amy ze hene voli-hena engae' ondatiko Israeleo? ³⁰ Aa le hoe t'IEHOVÀ, Andrianañahare' Israele: Toe vinolako i anjomba'oy, naho i anjomban-droae'oy, ty hañavelo añatrefako eo nainai'e; fa hoe ka t'IEHOVÀ henane zao: ho lavitse amako zay; hiasiako ze miasy ahy, le tsy honjoneko ze manirika ahy. ³¹ Inao! ho tondroke ty andro, te haitoako ama'o ty fita'o havana, naho ty fitan' anjomban-drae'o le tsy ho ama' ondaty antetse ka ty añañomban'ao. ³² Hahaisake

* ^{2:27} Parò: mpampibaratsake; mpamaooke

rafelahy an-kibohoko ao rehe, amy ze hene hasoa hanoe'e am'Israele; ihe tsy ho ama' ondaty bey añ'anjomba'o ao kitro-katroke. ³³ Toe tsy hene haitoako amy kitrelikoy o ondati'oo, fa ho nampilesa ty fihaino'o naho hampioremeñeñe ty arofo'o fe fonga hihomake o tirin' anjomba'oo t'ie mbe ajalahy. ³⁴ Aa zao ty ho viloñe ama'o: Hifetsak' amy ana-dahi'o roe rey, amy Kofný naho i Pinekàse, te toe hitrao-pivetrak' ami'ty andro raike—ie roe. ³⁵ Fe hatroako ty mpisoroñe migahiñé, ie ty hañeneke ze an-troko naho am-pitsakoreako; le handranjiako anjomba fatratse vaho hitoroñe añañatrafa'i norizakoy nainai'e re. ³⁶ Ie amy zao, songa homb'eo ze sehanga'e añ'akiba'o ao, hidrakadrakak' ama'e hahazoa'e ty volafoty naho ty vonga-mofo ami'ty hoe: ehe gineo hitoloñeko ho mpisoroñe hihinanako mofo pilipito'e.

3

¹ Nitoroñe IEHOVÀ ambane' i Elý eo t'i Samoele ajaja. Tsy siake nampiboake tsara t'IEHOVÀ henane zay; tsy nahaoniñañ' aroñaroñe. ² Aa teo te indraike haleñé, naho nàndre añ'efe'e ao t'i Elý, ie niha-fè o fihaino'e tsy nahaisake soa; ³ mboe tsy nakipeke ty failo an-kivohon' Añahare ao te niroro añ'anjomba' IEHOVÀ t'i Samoele amy toe' i vatampañinan' Añahareiy. ⁴ Aa le kinanji' IEHOVÀ t'i Samoele, Intoy raho, hoe re. ⁵ Nivotivoty mb'amy Elý mb'eo re nanao ty hoe: Intoy raho, amy te kinanji'o. Tsy nitok' azo raho, hoe t'i Elý, Mandrea indraike. Aa le nibalike re, nàndre. ⁶ Kinanji' IEHOVÀ indraike t'i Samoele; le nitroatse t'i Samoele, nimb' amy Elý mb'eo nanao ty hoe: Intoy raho, amy kanji'oy. Tsy tinokako rehe, anako, hoe re, Akia mandrea. ⁷ Nialik' amy Samoele t'IEHOVÀ, amy te mboe tsy nabentatse ama'e ty tsara' IEHOVÀ. ⁸ Kinanji' IEHOVÀ fañintelo'e t'i Samoele. Nitroatse t'i Samoele, nimb' amy Elý mb'eo, nanao ty hoe: Intoy raho, fa kinanji'o. Nifohi' i Elý amy zao te IEHOVÀ ty nikanjy i ajalahiy. ⁹ Akia, mandrea, hoe ty asa' i Elý amy Samoele, Ie mikanjy azo, anò ty hoe: Mitsarà ry IEHOVÀ, fa itsanoña' ty mpitoro'o. Aa le nimb'eo t'i Samoele nàndre an-traño'e ao. ¹⁰ Nimb'eo amy zao t'IEHOVÀ nijohañe eo, nikanjy amy hoe rezay: Samoele, Samoele! le hoe t'i Samoele, Mitsarà fa mitsanoñe o mpitoro'oo.

¹¹ Le hoe t'IEHOVÀ amy Samoele: Hampijadoñeko tsara e Israele ao hampiñiñiñiñe ty ravembia roe' ze mahajanjiñe aze. ¹² Amy andro zay, le hafetsako amy Elý naho amy hasavereña'e iabiy i vinolakoy sikal'am-baloha'e pak'am-para'e. ¹³ Fa vinolako ama'e te hametsahako zaka i añanjomba'ey, amy te napota'e ty hakeon' ana'e—ie namà-batañe—f'ie tsy nimane hampijihetse iareo. ¹⁴ Zay ty nifantàko ty amy hasavereña' i Elíy, t'ie: Ndra enga ino ndra soroñ' ino tsy hahafañefetse o tahiñe anoe' ty hasavereña' i Elio. ¹⁵ Nàndre am-pandrea'e ao avao t'i Samoele am-para' te maraiñe, vaho sinoka'e o lalam-bein' anjomba' IEHOVÀO. F'ie nihembandre tsy te hitalily amy Elý i aroñaroñey. ¹⁶ Aa le kinanji' i Elý t'i Samoele: O Samoele, anako! hoe re, Intoy raho, hoe ty natoi'e. ¹⁷ Ino ty tsinara'e ama'o? hoe re. Ehe, ko añañataha'o amako. Ee te hanoen' Añahare ama'o naho mandikoatse, naho akafi'o amako ndra inoñ' inoñ' amo tsinara'e ama'oo. ¹⁸ Aa le natalili' i Samoele ama'e ze hene nitsaraeñe, tsy eo ty naeta'e; le hoe t'i Elý: Ie IEHOVÀ! Ehe te hanoe'e ze soa am-pihaino'e.

¹⁹ Nitombo t'i Samoele, le tama'e t'IEHOVÀ vaho leo raike amo tsara'eo tsy napo'e an-tane. ²⁰ Songa nifohi' Israele boake Dane pake Be'er-sevà

añe te mpitoky noriza' IEHOVÀ t'i Samoele. ²¹ Nitolom-piboake e Silò ao t'IEHOVÀ le niatreke i Samoele e Silò t'IEHOVÀ, ty amy tsara' IEHOVÀ.

4

¹ Nanitsike Israele ty saontsi' i Samoele; ie amy zao nionjoñe hiatrek' amo nte-Pilistio* t'Israele naho nitobe añ' ila'i Ebene'ha'ezere[†] ey; vaho nitobe e Afeke[‡] ey ka o nte-Pilistio. ² Niriritse hiatrek' am'Israele añ' aly o nte-Pilistio; aa ie nitangilihiliñe an-kotakotake iereo, le linafa añatrefa' o nte-Pilistio t'Israele, va'e efats' arivo amo lahindefo'eo ty zinevo' iareo amy montoñey. ³ Ie nimpoly an-tobe ao ondatio, le hoe ty ontane' o roandria' Israeleo, Aa vaho manao akore te namofok' antika añatrefa' o nte-Pilistio t'IEHOVÀ? Antao hakaren-tika mb'etoa i vatam-pañina' IEHOVÀ boake Silò ao, le ie aman-tika, va'e ho rombahe'e am-pitàndrafelahintika. ⁴ Aa le nañitrike mbe Silò ondatio ninday i vatam-pañina' IEHOVÀ mpimoneñe añivo' i kerobe[§] reiy boak' ao; nindre amy vatam-pañinan' Añaharey i ana-dahi' i Elý roe rey, i Kofný naho i Pinekase. ⁵ Aa ie nivotrak' an-tobe ao ty vatam-pañina' IEHOVÀ, le akore ty fipazapazake pinoña' Israele iaby kanao nanginikinike i taney. ⁶ Ie jinanji' o nte-Pilistio ty fikoraha' i pazapazakey, le hoe iereo: Ino o fañenotsatsak' an-tobe' o nte-Evreo*? Le nirendre' iareo te nivotrak' an-tobe ao ty vatam-pañina' IEHOVÀ. ⁷ Niholi-balà amy zao o nte-Pilistio, le hoe iereo: Nivotrak' an-tobe ao t'i Andrianañahare. Hoe iereo, Hankàñe aman-tika! fa tsy zay te omale naho fakomale-bey. ⁸ Hekoheko aman-tika! Ia ty handrombak' an-tika am-pitá' o 'ndrahare maozatseo? O 'ndrahare nandafa o nte-Mitsraimeo amo angorosy iaby an-dratraratrao. ⁹ Mifatrara ho bakalàhy ry nte-Pilistio tsy hitoroña' areo o nte-Evreo manahake ty fitoroña' iareo an-tika; mihaozara hoe t'ie ondaty, le mialia.

¹⁰ Aa le nialy o nte-Pilistio naho nigoike t'Israele vaho songa nitriban-day mb' an-kiboho'e mb'eo t'indaty; le tsu-fotofoto ty nizamañe; toe lahindefo telo-ale ty nikorovok' amy hotakotakey. ¹¹ Tinavañe i vatam-pañinan' Añaharey; vaho zinevo t'i Kofný naho i Pinekase, i ana-dahi' i Elý roe rey.

¹² Nihitrihitry boak' amy hotakotakey t'i nte-Beniamine niheo mb'e Silò mb'eo amy andro zay, riatus iaby o saro'eo, vaho debole ty añaambone'e. ¹³ Ie pok'eo, ingo t'i Elý niambesatse amy fiambesa'e añ'olón-dalañey nijilojilo; ie nihitikitik' aña'rofo ty amy vatan' Añaharey. Aa naho nizilik' an-drova ao t'indaty, le nikoaika iaby i rovay. ¹⁴ Ie jinanji' i Elý ty fikoraha' i fitoreovañey, le hoe re, Ino ze o fikontsiañañe zao? Nihitrike mb'amy Elý indatiy, nitalily. ¹⁵ Ie amy zao ni-sivampolo-valo' amby taoñe t'i Elý, vaho nifè-pihaino, tsy nahaisake. ¹⁶ Le hoe indatiy amy Elý: Vaho niboak' amy fifandraparapahañey raho anindroany, nihitrike boak' amy hotakotakey. Aa le hoe re ama'e, O anako, ino i tsaraeñey? ¹⁷ Le hoe ty natoi' i nihitrikey, Nandripàke aolo' o nte-Pilistio t'Israele, le tsifotofoto ty nizamañe am' ondatio naho i ana-dahi'o roe rey, nihomake t'i Kofný naho i Pinekase vaho tinavañe i vatan' Añaharey. ¹⁸ Aa ie nitalily i vatan' Añaharey, le niponake nañamboho amy fiambesa'ey aña' ila'i lalambeiy re, le nipozake ty fititia'e vaho nihomake, amy t'ie ondaty bey naho navesatse. Fa efa-polo taoñe ty nizaka'e Israele.

* ^{4:1} Pilisty: mpañialo † ^{4:1} Ebene ha'ezere: ty vato fañolorañe ‡ ^{4:1} Afeke: haozarañe; sorotombake § ^{4:4} Kerobe: henteo: Ftv. 25:22 * ^{4:6} Evre: añaara'e raike o ana' Israeleo

¹⁹ Ie amy zao, nivesatse ty vinanto'e ampela, ty vali' i Pinekase, naho fa hisamake; aa ie jinanji'e i taliliy te tinavañe i vatam-pañinan' Añaharey naho te nihomake iaby ty rafoza'e naho i vali'ey, le nibokoke vaho nisamake; amy te nifetsaha' ty fitsongoa'e. ²⁰ Aa ie amy fivetraha'ey, hoe ty rakemba nijohañe añ'ila'e eo: Ko hemban-drehe, fa nahatoly ana-dahy. F'ie tsy nanoiñe, tsy nañaoñe. ²¹ Natao'e Ikabòde[†] ty añara' i ajajay, ami'ty hoe: Fa nienga Israele ty engeñe; amy te tinavañe i vatam-pañinan' Añaharey, naho ty amy rafoza'ey naho i vali'ey, ²² ie nanao ty hoe: Nienga Israele ty engeñe, amy te tinavañe i vatam-pañinan' Añaharey.

5

¹ Aa ie tinava' o nte-Pilistio i vatan' Añaharey, le nente' iareo boak' Ebene-ha' ezere mb'e Asdode* mb'eo. ² Rinambe' o nte-Pilistio i vatan'Añaharey le nazili' iareo añ'anjomba' i Dagone[†] ao vaho napo' iareo marine' i Dagone eo. ³ Ie nitroatse maraindraiñe o nte-Asdodeo, hehe te nideroñe an-tarehe'e an-tane añatrefa' i vata' IEHOVÀ t'i Dagone. Rinambe' iareo t'i Dagone vaho natroa' iareo an-toe'e indraike. ⁴ Ie nañampitso, hehe te nihotrak' an-tarehe'e an-tane añatrefa' i vata' IEHOVÀ t'i Dagone vaho nikitsik' ama'e ty loha' i Dagone naho ty taña'e roe an-tokonañe eo; ty vata' i Dagone avao ty nisia. ⁵ Aa le tsy lia' o mpisoro' i Dagone mimoak' añ'anjomba' i Dagone ao ty tokona' i Dagone e Asdode ao ampara henane.

⁶ Navesatse amo nte-Asdodeo ty fità' IEHOVÀ, ie binaibai'e, naho linafa'e am-pibokalitan' akobo ty Asdode naho o mañohok' azeo. ⁷ Aa naho nitendrek' amo nte-Asdodeo i rahay, le hoe iereo, Tsy himoneñe amantikañe atoy ka i vatam-pañinan' Añahare' Israeley, amy te maràñe amantika naho amy Dagone 'ndraharen-tika ty fità'e. ⁸ Aa le nañitrike naho natontoñe iaby o roandria' o nte-Pilistio vaho nanao ty hoe: Hanoentika ino i vatam-pañinan' Añahare' Israeley? le hoe ty natoi' iareo, Ampitarazoeñe mb'e Gate[‡] mb'eo i vatam-pañinan' Añahare' Israeley. Aa le nendese' iareo mb'eo i vatam-pañinan' Añahare' Israeley. ⁹ Ie amy zao, naho fa nitarazoeñe mb'eo, le nanilofe' ty fità' IEHOVÀ i rovay, nampangebahebahe'e naho linafa'e ondati' i rovaio, ty bey naho ty kede iaby vaho niborak' am-pimeñara' iareo ao o fibokaliran' akoboo. ¹⁰ Aa le nahitri' iereo mb'e Ekrone[§] mb'eo i vatam-pañinan' Añaharey. Aa ie nivotrake Ekrone eo i vatam-pañinan' Añaharey, le nikoaike ty hoe o nte-Ekroneo: Nendese' iareo mb'etoa i vatam-pañinan' Añahare' Israeley, hanjamana'e antika naho ondatin-tikañe.

¹¹ Nampañitrife' iareo amy zao o hene' talèn-te-Pilistio*, le nanao ty hoe, Iraho aña i vatam-pañinan' Añahare' Israeley, vaho angao himpolia'e mb'an-toe'e mb'eo, tsy mone hanjevoñ' antika naho ondatin-tikañe; amy te fañohofan-doza ty nandrambañe i rovay; fa navesatse ama'e ty fità' Añahare. ¹² Nanilofeñe fibokalirañe nitsovovòke ondaty tsy nihomakeo; vaho nionjomb' an-dikeram-b'eo ty fitoreova' i rovay.

6

¹ Tan-tane' o nte-Pilistio fito volañe ty vatam-pañina' IEHOVÀ. ² Le kinanji' o nte-Pilistio o mpisoroñe naho o mpisikilio, ami'ty hoe: Hataontika akore i vatam-pañina' IEHOVÀ? itaroño te akore ty hañitrifa'ay aze

[†] 4:21 Ikabode: pok'engeñe * 5:1 Asdode: fiborahañe; fañiriañe; halatse † 5:2 Dagone: 'ndraharen-te-Pilistio: tsako, fia ‡ 5:8 Gate: Fipiritan-divay § 5:10 Ekrone: liolio; riniatse ama'e * 5:11 Pilisti: mpañialo

mb'an-toe'e mb'eo. ³ Hoe iereo: Aa naho ahitri' areo mb'eo i vatam-pañinan' Añaharey, ko ampandenàñe mb'eo kapaike; fe ampolio rekets' engan-kakeo; le ho jangañe nahareo, vaho ho fohi' areo ty foto' ty tsy nampipitsohañe ama' areo i fità'ey. ⁴ Aa le hoe iereo: Ino o engan-kakeo hampolieñe ama'eo? Le hoe iereo: Fibokalirañe volamena lime, naho kotika volamena lime ty ami'ty ia' o talèn-te-Pilistio; fa angorosy raike ty tama' areo iaby naho amo talè' areoo. ⁵ Aa le tseneo an-tsare ty fibokaliran' akobo'areo, sareo ka o kotika' areo mijoy i taneio; vaho toloro engeñe t'i Andrianañahare' Israele; hera hamaivañe'e ama' areo naho amo 'ndrahare' areoo, naho an-tane' areo ty fità'e. ⁶ Ino arè ty ampigàñe' areo arofo, manahake ty nanjira' o nte-Mitsraimeo naho i Parò arofo? Ie nanilofe'e, tsy navotso' iareo hao ondatio hiavotse mb'eo? ⁷ Ie amy zao, mandrambesa le ihentseño sarete vao, naho añombe rene'e roe mb'e tsy ninday joka, rohizo amy saretey i añombe-rene'e rey, vaho adono an-jolok' ao o ana'eo. ⁸ Rambeso am' izao i vatam-pañina' IEHOVÀy le ajoño amy saretey. Le apoho an-karoñe añ'ila'e ao o bange volamena mivike ama'e ho engan-kakeoo; vaho iraho handena'e mb'eo. ⁹ Isaho amy zao, ke homb'an-tane'e mb'e Bete'semese* mb'eo, le ie ty nametsake i hankàñey aman-tika; fe naho tsie, le ho fohi' areo te tsy i fità'ey ty nanjevoñe antika, fa nisendre-draha.

¹⁰ Aa le nanoe' ondatio; rinambe' iereo ty añombe mampinono roe, naho rinohi' iareo an-tsarete, vaho narindriñ' an-jolok' ao o ana'eo; ¹¹ le najo' iareo an-tsarete ao i vatam-pañina' IEHOVÀy, naho i häröñe rekets' i kotika volamena rey naho o sarem-pibokalira' iareoo. ¹² Nivantañe' o añombeo ty lalañe migodamb'e Bete-semese mb'eo; nitrakotrako amy damokey nihóñe avao, le tsy nitsile mb'am-pitan-kavana ndra mb'ankavia, vaho nañorike iareo pak' añ'efe-tane' i Bete-semese mb'eo o talè nte-Pilistio. ¹³ Nanatake vare-bolè am-bavatane ey o nte-Bete-semeseo; aa ie nampiandra-pihaino naho nahaisake i vatam-pañinay, le nirebeke t'ie nioniñe. ¹⁴ Aa le niheo mb'an-tete' Iehosoa nte-Bete-semese mb'eo i saretey naho nitsangañe marine ty vato jabajaba eo; natsafe' iareo ty hatae i saretey vaho nengae' iareo an-tsoroñe am' IEHOVÀ i añombe rene'e rey. ¹⁵ Nazotso' o nte-Levio i vatam-pañina' IEHOVÀy, rekets' i häröñe ninday o bange volamenaoy, naho napò' iereo ambone' i vato jabajabayo; naho nañenga horoña vaho nandroroche vaho nisoroñe am' IEHOVÀ ondaty nte-Bete-semeseo amy andro zay. ¹⁶ Ie nahaisake zay i talen-te-Pilisty limey le nimpoly mb'e Akrone mb'eo amy àndroy. ¹⁷ Zao o fibokaliran' akobo volamena nabali' o nte-Pilistio ho engan-kakeo amy IEHOVÀO: a i Asdode t'y raike, a i Aza† ty a i Askelone‡ le ty a i Gate vaho ty a i Ekrone; ¹⁸ mira ami'ty ia' o rovan-talè nte-Pilisty lime reio i kotika volamena rey; mpiama' iareo o rova aman-kijolio naho o kialoo. Valolombeloñe henanekeo i vato jabajaba nampipoha' iareo i vatam-pañina' IEHOVÀy. Le lia'e an-tonda' Iehosoa nte-Bete-semese eo re pake henaneo.

¹⁹ Linihin' Añahare ty ila' o nte-Bete-semeseo amy te nisamba i vatam-pañina' IEHOVÀy. Ondaty lime ale tsi-fitompolo ty zinama'e. Aa le nandala' ondatio ty hamafem-panjevoña' IEHOVÀ iareo. ²⁰ Le hoe ondaty nte-Bete-semeseo, Ia ty hahafijohañe añatrefa' IEHOVÀ, Andrianañahare masiñe? Vaho homb' am'ondate' ia zay te mienga anay? ²¹ Aa le nampihitrife' iereo amo mpimoneñe e Kiriate Iearimeo§ ty hoe: Fa nampolie' o nte-Pilistio ty

* **6:9** Bete'semese: Anjomba' i Àndroy † **6:17** Aza: Maozatse: ose ‡ **6:17** Askelone: balantsy; afo po-engeñe § **6:21** Kiriate Iearime: rova añ'ala

vatam-pañina' IEHOVÀ. Mb'atoy nahareo hinday aze moly mb'ama' areo aña.

7

¹ Nimb'eo o nte-Kiriate-Iearimeo nangalake i vatam-pañina' IEHOVÀ y vaho nasese' iareo mb' aña' anjomba' i Abinadabe* mb' an-kaboam-b'eo. Nafanto' iareo amy Eleatsare[†] ty fitoloñañe miavake hañambena'e i vatam-pañina' IEHOVÀy. ² Taoñe maro ty nimodo te nitoboke e Kiriate-Iearime ao i vatam-pañinay, toe roapolo taoñe; le nitoreo am' IEHOVÀ ty valobohò' Israele.

³ Hoe t'i Samoele amy valobohò' Israele, Naho toe himpoly amy IEHOVÀ an-kaampon' arofo nahareo, le apitsoho aña o 'ndrahare hafao, naho o Astarote[‡] añivo' areoo, le hentseño ho am' IEHOVÀ o arofo' areoo vaho ie avao ty toroñeñe, vaho ho haha'e am-pità' o nte-Pilstio. ⁴ Aa le naria' o ana' Israeleo o hazomanga' i Baaleo, naho o Astaroteo, vaho nitoroñe IEHOVÀ avao. ⁵ Le hoe t'i Samoele, Atontono mb'e Mitspè§ t'Israele iaby, vaho hihalaliako amy IEHOVÀ. ⁶ Aa le nifanontoñe e Mitspè iereo naho nitari-drano, naho nadoa'e añatrefa'IEHOVÀ, le nililitse amy andro zay, vaho nanao ty hoe: Toe aman-kakeo amy IEHOVÀ zahay. Aa le nizaka o ana' Israeleo e Mitspè ao t'i Samoele.

⁷ Ie jinanji' o nte-Pilstio te nivory e Mitspè ao o ana' Israeleo, le nionjo haname Israele o talèm-Pilstio. Jinanji' o ana' Israeleo le nirevendreveñe amo nte-Pilstio. ⁸ Le hoe o ana' Israeleo amy Samoele: Ko mitofa amy fikoiha'o IEHOVÀ Andrianañaharen-tikañey ho anay, te ho rombahe'e am-pità' o nte-Pilstio. ⁹ Aa le nangalak' anak' añondry t'i Samoele naho nengae'e ho soron-koroñañe am' IEHOVÀ, le nikany IEHOVÀ ty am' Israele t'i Samoele, vaho nanoñe aze t'IEHOVÀ. ¹⁰ Aa naho nisoroña' i Samoele i engan-koroñañe, naho ie niheo mb'eo o nte-Pilstio hifañotakotak' am' Israele, vaho nampiparapapiaha' IEHOVÀ àmpiñe jabajaba amo nte-Pilstio, nampibaibay iareo henane zay, zinevoñ' aolo' Israele. ¹¹ Niakatse i Mitspè o ana' Israeleo nañoridañe o nte-Pilstio vaho linafa' iereo mb' am-para' i Bete-kare* aña. ¹² Nandrambe vato amy zao t'i Samoele le natroa'e añivo' i Mitspè naho i Sene[†] eo vaho natao'e Ebene ha'izere, ami'ty hoe: Efets'eo ty nañolora' IEHOVÀ antika.

¹³ Aa le nianjiñe o nte-Pilstio, naho tsy nomb' an-tane' Israele mb'eo ka; vaho niatreatre o nte-Pilstio amo hene andro' i Samoeleo ty fità' IEHOVÀ; ¹⁴ Nampoly amy Israele o rova iaby tinava' o nte-Pilstio am'Israeleo; boak' Ekrone pake Gate; le navotsø' Israele am-pità' o nte-Pilstio o tane'eo. Niharo rehak' am' Israele ka o nte-Amoreo. ¹⁵ Nizakae' i Samoele amo hene andro'eo t'Israele. ¹⁶ Nitolom-piary mb'e Betele[‡] naho mb'e Gilgale§ vaho mb'e Mitspè mb'eo re boa-taom-boa-taoñe; le hene nizakae' amy toetse rey t'Israele. ¹⁷ I Ramà* ty fiolia'e, amy te tao i anjomba'ey; nizaka Israele ao re vaho naore'e eo ty kitreli' IEHOVÀ.

8

¹ Ie nigain-kantetse t'i Samoele, le nanoe'e mpizaka' Israele o ana-dahi'eo. ² Ty tahina' i tañoloñoloña'ey le Ioele*; i Abià[†] ty faharoe; nizaka e

* ^{7:1} Abinadabe: Raem-pañina -kavitrihañe † ^{7:1} Eleatsare: imban'Añahare, ‡ ^{7:3} Astarote: fihare; vara § ^{7:5} Mitspè: fitalakesañ'abo; fañanjoanjoñañe * ^{7:11} Bete-kare: ty akiba i anak' añondriy † ^{7:12} Sene: nife; fiovañe ‡ ^{7:16} Betele: Anjomban'Añahare § ^{7:16} Gilgale: Larò; mivarimbariñe; votre * ^{7:17} Ramà: abo, mitiotiotse * ^{8:2} Ioele: I mimane ndra mandily † ^{8:2} Abià: IEHOVÀ ro Raeko

Be'er-sevà‡ ao iereo. ³ Fe tsy nañorike o sata'eo i ana'e rey, te mone nivike mb'an-dRavola naho nandrambe vokàñe vaho nolahe' iareo ty hatò.

⁴ Nifanontoñe amy zao o mpiaolo' Israele iabio vaho niheo mb' amy Samoele e Ramà mb'eo ⁵ nanao ty hoe ama'e: Oniño te bey rehe vaho tsy mañorike o lia'oo o ana'oo; aa le añorizo mpanjaka hizaka anay manahake o kilakila 'ndatio. ⁶ Fe tsy nino' i Samoele zay, ty enta' iareo ty hoe: Itoloro mpanjaka hizaka. Le nihalaly am' IEHOVÀ t'i Samoele. ⁷ Le hoe t'IEHOVÀ amy Samoele: Haoño ty fiarañanaña' ondatio amo hene nisaontsia' iareoo; ie tsy namorintseñe azo, toe Zaho ty napo' iareo tsy ho mpanjaka' iareo. ⁸ Hambañ' amo fitoloña' iareo sikal' amy nañakarako amy Mitsraime aña pake henanekeo, ie namorintseñe ahy naho nitoroñe 'ndrahare ila'e, ty hanoe' iareo ama'o ka. ⁹ Ie amy zao, haoño ty fiarañanaña' iareo, f'ie hatahatao vaho taroño o satam-pifeheam-panjaka' iareoo. ¹⁰ Aa le tinaro' i Samoele am'ondaty nipay mpanjaka ama'e iabio i tsara' IEHOVÀ zay. ¹¹ Le hoe re: Zao ty ho sata' o mpanjaka hamelek' anahareoo: ho rambese'e o ana-dahi' areoo, le ho tendrè'e ho aze naho ho a o sarete'eo naho ho mpiningi-tsoaval'a'e vaho ho mpilay aolo' o sarete'eo. ¹² Le ho tendrè'e ty mpifelek' arivo naho ty mpifehe limampolo hiava i tete'ey naho hanatake i voka'ey, vaho handranjy o fialia'eo naho o haraontsarete'eo. ¹³ Ho rambese'e ka o anak' ampela' areoo ho mpanao rano mañitse, ho mpanokoñe vaho mpanoñake. ¹⁴ Ho rambese'e ka o tete' areoo naho o tanembahe' areoo naho o golobon' olive' areoo, o soa ama'eo, le hatolo'e amo mpitoro'eo. ¹⁵ Hampandiva'e anahareo ty faha-folo' ty tabiri' areo, naho o tanem-bahe' areoo vaho hatolo'e amo mpifehe'eo naho o mpitoro'eo. ¹⁶ Ho rambese'e o mpitoro' areo lahilahio, naho o anak' ampata' areoo naho ze volovoloeñe amo ajalahi' areoo naho o borìkeo hampitoroñe' amo fitoloña'eo. ¹⁷ Hampandivà'e ty ampahafolo' o lia-rai' areoo vaho hinjare mpitoro'e nahareo. ¹⁸ Le hkoihe' areo amy andro zay i mpanjaka nijoboñe' areoy, fe tsy hanoïne t'IEHOVÀ. ¹⁹ Fa nifoneñe tsy hañaoñe ty fiarañanaña' i Samoele ondatio; le hoe iereo: Aiy! fa ho fehè' i mpanjakay zahay; ²⁰ soa te ho hambañ' amo kilakila' ndatio; le hizaka anay ty mpanjaka'ay naho hionjoñe aolo'ay vaho hialy amo fihotakotaha'aio. ²¹ Jinanji' i Samoele ze hene enta' ondato le nisaontsie'e an-dravembia' IEHOVÀ, ²² vaho hoe t'IEHOVÀ amy Samoele: Haoño avao ty fiarañanaña' iareo le anendreo mpanjaka. Aa le hoe t'i Samoele amo ana' Israeleo: Akia songa mb' an-drova'e mb'eo.

9

¹ Ie amy zao, teo t'ondaty nte-Beniamine atao Kise*, ana' i Abiele†, ana' i Tserore‡, ana' i Bekorate§, ana' i Afiake*, ana' Ieminý†, ondaty fatratse. ² Amañ' ana-dahy re, i Saôle‡ ty tahina'e, ajalahy montsotsòre. Tsy amo ana' Israele iabio ty nisoa vintañe te ama'e, le an-tsoro'e mañambone ty nilikoare'e ondaty iabio. ³ Nimotso amy zao o borìke-rene' i Kise, rae' i Saoleo. Le hoe t'i Kise amy Saole ana'e, Endeso ty mpitoroñe vaho miongaha, akia, paiao i borìke rey. ⁴ Nisoroke ty vohi' Efraime re vaho

‡ 8:2 Beer'seba; vovom-pañina; vovo faha-fito * 9:1 Kise: sarotse; gañe; boka; antetse † 9:1 Abiele; Andrianañahare ty Raeko ‡ 9:1 Tserore: vahatse; mamahotse; mamihiné § 9:1 Bekorate: loha voa * 9:1 Afiake: misaontsy; mikofoke † 9:1 Ieminý: soa-vinta, manahake i androy ‡ 9:2 Saôle: nampisongoañe; haly; havilasy

niranga mb'an-tane' Salisà§ aña, f'ie tsy nioniñe. Aa le niary mb' an-tane Salime* fe tsy tao, niranga ty tane' o nte-Beniamineo†, f'ie tsy niisa' iareo. ⁵ Aa ie nivotrak' an-tane' Tsofaý‡ aña le hoe re amy mpitoro'ey, Antao hibalike hera hapon-draeko ty fihakahakà'e amo borìkeo vaho itika ka ty himarimariha'e. ⁶ Le hoe re ama'e, Inao te an-drova aroa-hoekeo ty ondatin' Añahare aman-kasy le tsy mete tsy mifetsake ze hene saontsie'e; antao ho mb'eo, hera hatalili'e ty lala-komban-tika. ⁷ Aa hoe t'i Saole amy mpitoro'ey, Aa naho miheo mb'eo tika, ino ty ho banabanaen-tika am'indatiy? fa ritse ty mofo an-karon-tikañ' ao vaho tsy eo ty ravoravo hatolotse am'indatin' Añaharey; ino ty aman-tika? ⁸ Le hoe ty natovo' i mpitoroñey amy Saole, Intoy an-tañako ty fah' efa' ty bogady volafoty, hatoloko am' indatin' Añaharey hitoroa'e ty homban-tikañe, ⁹ (Ie te taolo e Israele ao, naho nimb'eo t'indaty hañontane aman' Añahare, le hoe re: Antao homb' amy mpioniñey: fa natao mpioniñe henane zay ty atao mpitoky henaneo.) ¹⁰ Aa le hoe t'i Saole amy mpitoro'ey, To o reha'oo, antao hizilike, le nimoak' an-drova' indatin' Añaharey ao.

¹¹ Aa ie nañambone' i fitroarañe mb' amy rovay mb'ey, le nitendreke somondrara niakatse hitoha rano, vaho nanoa'e ty hoe: Eo v'i mpioniñey?

¹² Le hoe ty natoi'e, Eo re; toe aolo' areo; ihitrifo henaneo, ie nimb' an-drova mb'eo anindroany, amy te fisoroñañe ho a ondatio ty an-kaboña ey te anito. ¹³ Ie mimoak' an-drova nahareo le ho tendrek' ama'e aolo' ty hitroara'e mb' an-kaboña mb'eo hikama; fa tsy hikama ondatio naho tsy miheo mb'eo hey re, amy t'ie ty mpitata i soroñey; zay vaho mikama o nambaràñe. Aa le mionjona henaneo; fa ho oni' areo. ¹⁴ Aa le nionjom-b'an-drova mb'eo iereo; le ie nimoak' amy rovay, hehe te boak' ao hifanampe am' iereo t'i Samoele, mihitrike mb'an' kaboaña mb'eo. ¹⁵ Ie amy zao fa nabenta' IEHOVÀ amy Samoele, an-dravembia'e omale te hivotrake t'i Saole, ami'ty hoe: ¹⁶ Hamaray hoe zao, ty hañirahako ama'o t'indaty boak'an-tane Beniamine, ie ty horiza'o ho mpanjaka hifehe' ondatiko Israeleo, le ie ty handrombake ondatikoo am-pitâ' o nte Pilistio; fa nisarieko ondatikoo, le niheo amako ty fitoreova' iareo. ¹⁷ Aa ie niisa' i Samoele t'i Saole, le hoe t'IEHOVÀ ama'e, Hehek' indaty nanoeko ama'o ty hoe: Io hoekeo ty hifeleke ondatikoo.

¹⁸ Nitotok' amy Samoele t'i Saole an-dalambez eo, nanao ty hoe: Ehe, isaontsio te aia ty anjomba' i mpioniñey. ¹⁹ Aa le hoe ty natoi' i Samoele, Zaho o mpioniñeo; miaoloa ahy mb' ankaboña ey, amy t'ie hitrao-pikama amako anito; le hapoko hañavelo te maray vaho hene ho taroñeko ama'o ze añ'arofo'o. ²⁰ Le i bori'o ni-motso telo andro zay, ko vetsevetse'o; fa nirendreke. Aa vaho ama' ia ty fidalala' Israele iaby? Tsy ama'o hao naho amy anjomban-drae'oy? ²¹ Nanoïñe ami' ty hoe t'i Saole: Tsy nte-Beniamine hao raho, ty kede amo fifokoa' Israele iabio? ty hasavereña'ay ka ro kede amo hene' hasavereña' i Beniamineo? aa vaho ino o saontsia'oo? ²² Nendese' i Samoele t'i Saole naho i mpitoro'ey, naho nampihovae'e añ'anjomba'e vaho nampiambesare'e andohâ' o nambaràñe iabio; nitelo-polo varañe ondatio. ²³ Le hoe t'i Samoele amy mpanokoñey, Azotsò i fate-kena natoloko azoy, i nataoko ty hoe: Apoho añ'ila'o. ²⁴ Aa le rinambe' i mpanokoñey ty sokataña'e reketsé ze ama'e vaho nazotso'e amy Saole. Le hoe t'i Samoele: Ingo o navìkeo! apoho añatrefa'o le mikamà; fa nahaja ho azo amo famantañañe zao;

§ 9:4 Salisà: telo; fahatelo; roandria; mpifehe * 9:4 Salime: fanaloke; komondry; lala-tsileke

† 9:4 Beniamine: anam-pitân-kavâna ‡ 9:5 Tsofe: misamba, mañisake; tafo; saroñe

hoe ka ty asako: Fa nambaràko ondaty reo. Aa le nitrao-pikama amy Samoele t'i Saole amy andro zay. ²⁵ Aa ie nizotso mb' an-drova mb'eo boak' an-kaboañey, le nifanaontsy amy Saole an-tafon'anjomba. ²⁶ Aa le nañaleñaleñe iereo, naho kinanji' i Samoele t'i Saole homb' an-tafo mb'eo te manjirike àndro, ami'ty hoe: Mitroara fa haseseko. Aa le niongake t'i Saole naho niavotse mb'eo ie roe. ²⁷ Ie nizotso mb'am-pigadoña' i rovay mb'eo le hoe t'i Samoele amy Saole: Ampandena aolon-tika mb'eo o mpitoroo—aa le nionjom-beo re; fa ihe mijohaña hey, hampijanjiñako ty tsaran' Añahare.

10

¹ Rinambe' i Samoele amy zao ty paki-menake naho nadoa'e amy añambone'ey vaho norofa'e, le nanoe'e ty hoe: Tsy IEHOVÀ hao ty nañory azo ho mpifeleke i lova'ey? ² Ihe mienga ahy te anito, le hañisake ondaty roe marine ty kibori' i Rakele* añ' efe-tane' i Beniamine e Tselzà† eo; le hanao ty hoe ama'o iereo: Fa nirendreke o borìke nihitrife'o ho tsoeheñeo, vaho fa napon-drae'o ty fimarimariha'e iareo, te mone ihe ty imarimariha'e, ami'ty hoe, Hataoko akore i anakoy? ³ Hionjoñe mb'eo rehe le ie pok' añ-kile' i Tabore‡ ro hifanampe amy t'indaty telo mionjomb' aman' Añahare e Betele mb'eo, minday vik'ose telo ty raike, naho minday mofo telo ty raike vaho mitintiñe zonjon-divay ty raike. ⁴ Hañontane azo iereo vaho hanolotse azo boko-mofo roe; rambeso am-pitá'e eo zay. ⁵ Ie aña, le higodañe am-bohin' Añahare rehe amy toem-pirai-lian-dahin-defon-te-Pilistiy eo; aa ihe fa nigodañe amy rovay, le hifanalaka ami'ty firimboñam-pitoky mizotso boak' an-kaboañe ey, hiaoloa' ty jejo-bory naho ty fikorintsäne naho ty soly naho ty marovany le hitoky iereo. ⁶ Ho entoan' Arofo' IEHOVÀ an-kaozara'e rehe le hiharoa'o fitoky vaho hiova ho ondaty hafa. ⁷ Ie tendrek' azo i viloñe rezay, le anò ze zoem-pitá'o amy te mindre ama'o t'i Andrianañahare. ⁸ Hiaolo ahy mb'e Gilgale mb'eo rehe; le hizotso mb'ama'o mb'eo raho hañenga horoañe naho hisoroñe naho hañenga fanintsiñañe: hitofa ao fito andro rehe am-para' te ifanampeako hitaroñe ama'o ty hanoe'o.

⁹ Aa ie niamboho, hienga i Samoele, le tinolon' Añahare arofo vao; vaho nitendrek' amy andro zay i viloñe iaby rey. ¹⁰ Ie nigodañe am-bohitse ey, inge ty mpirimbom-pitoky nifanalaka ama'e; le niroto'e i Arofón' Añaharey re vaho nitrao-pitoky am' iereo. ¹¹ Ie nioni' o mpahafohiñe Azeo te heheke! nitoky miharo amo mpitokio, le hoe ty nifanaontsia' ondatio: Ino ze o nivotrak' amy ana' i Kiseio? Mpiamo mpitokio ka hao t'i Saole? ¹² Nanoñe zay ty mpiam' iereo ami'ty hoe: Aa ia ka ty rae' iareo? aa le nanjare razan-drehake ty hoe: Mpiamo mpitokio ka hao t'i Saole? ¹³ Ie nihenefe'e i fitokiañey le niheo mb' an-toetse an-kaboam-beo. ¹⁴ Le hoe ty rahalahin-drae' i Saole ama'e naho amy mpitoro'ey: Nimb' aia v'inahareoo? Le hoe re: Nipay i borìke rey zahay; aa ie nifohiñe te tsy ho rendreke, le nomb' amy Samoele mb'eo. ¹⁵ Le hoe ty rahalahin-drae' i Saole: Ehe, atalilio amako: Ino ty nisaontsia' i Samoele? ¹⁶ Le hoe t'i Saole amy rahalahin-drae'ey: Tinaro'e ama'ay an-tsaontsy mora te nirendreke i borìke rey. Fe tsy nabeo'e ama'e i fifeheañe tinaro' i Samoeley.

¹⁷ Kinoi' i Samoele ondatio hifanontoñe amy IEHOVÀ e Mitspè ao. ¹⁸ Le hoe re amo ana' Israeleo: Hoe t'IIEHOVÀ Andrianañahare' Israele: Navotako

* ^{10:2} Rakele: añondry † ^{10:2} Tselzà: tsingilingilieñe ‡ ^{10:3} Tabore: jinobo; hiringiri'e; vonotroboke

amy Mitsraime t'Israele, toe navotsoko am-pitá' o nte-Mitsraimeo, vaho am-pitá' o fifeheañe namorekeke anahareoo. ¹⁹ Fe naforintse' areo anindroany t'i Andrianañahare' areo mpandrombak' anahareo amo hankàñeо naho amo maha-ampohék' anahareoo: vaho nanao ama'e ty hoe: Aiy! fa mpanjaka ty hajado'o hifehe anay. Ie amy zao, miatrefa amy IEHOVÀ am-pifokoa'e, naho añ' arivo'e. ²⁰ Aa le nampañarinea' i Samoele iaby o fifokoa' Israeleo; rinambe t'i Beniamine. ²¹ Nampañarinea'e ty fifokoa' i Beniamine amo hasavereña'eo, le rinambe ty hasavereña' i Matrý§; vaho rinambe'e t'i Saole ana' i Kise; aa le pinay re fa tsy nioniñe. ²² Nañontanea' iareo indraike t'IEHOVÀ: Fa pok'atoy hao indatiy? Le hoe ty natoi' IEHOVÀ, Ingo ie mietak' amo kilankañeо. ²³ Aa le nihitrihitry mb'eo iereo nangalak' aze; ie nijohañe añivo' ondatio, le niabo te amy ze ondaty eo, mifototse an-tsoro'e mañambone. ²⁴ Le hoe t'i Samoele am' ondaty iabio: Hehe ty jinobo' IEHOVÀ, vaho tsy ama' ondaty iabio ty mañirinkiriñe aze. Le nipazake ty hoe ondaty iabio: Lava havelo o mpanjakao. ²⁵ Tinaro' i Samoele am' ondatio amy zao ty sata' o fifeheañeо naho sinoki'e am-boke, vaho nahaja'e añatrefa' IEHOVÀ. Nampolie' i Samoele amy zao ondatio songa mb' añ' anjomba'e mb'eo. ²⁶ Le nimb'añ' akiba'e mb'e Gibeà* ka t'i Saole; vaho nindre ama'e mb'eo o fanalolahy nedrèn' Añahareo. ²⁷ Fa hoe ka o tsivokatseo: Aia ty haharombaha' ondatio antika? Nisirikae' iareo, ie tsy nañendesañe ravoravo, f'ie nitàm-pianjiñañe avao.

11

¹ Nionjoñe mb'eo amy zao t'i Nakase* nte-Amone†, nitobe am-piatrefañe Iabese‡-Gilade§ eo: le nanao ty hoe amy Nakase iaby o nte-Iabeseo: Mifañinà ama'ay vaho hitoroña'ay. ² Le hoe t'i Nakase nte-Amone am' iereo: Inao arè ty fepètse hanoeko ama' areo, te songa hakatrake o fihaino' areo ankavanao ho fañinjeañe am' Israele iaby. ³ Le hoe o mpiaolo' Iabeseo ama'e: Toloro fito androm-panintsian-jahay hañitrifa'ay mb'an-tane' Israele iaby; ie amy zay naho tsy eo ty handrombak' anay le hiakatse mb'ama'o mb'eo. ⁴ Nivotrake e Gibàn-tSaole ao o ìrakeo le nisaontsie'e andravembia'ondatio i entañe zay vaho fonga nipoñake ty rovetse ondatio.

⁵ Nañorike mpirai-stroke boak' an-tetek' ao t'i Saole, le hoe t'i Saole: Ino ty mañore ondatio t'ie mirovetse? Aa le nitalilia' iareo ty saontsi' o nte-Iabeseo. ⁶ Ie nahajanjiñe i entañe zay t'i Saole le nentoe' ty Arofon' Añahare, vaho nisolebotse ty haviñera'e. ⁷ Rinambe'e i katràka mpirai-joka rey, le linili-lili'e, naho nahitri'e mb'an-tane' Israele mb'eo mb'eo am-pitan' ìrake, ami'ty hoe: Ze tsy mionjoñe mb'eo am-panonjohizañe i Saole naho am-pañorihañe i Samoele, le zao ka ty hanoañe o katràka'eo. Aa le nifetsak' am'ondatio ty fañeveñañe am' IEHOVÀ, vaho niakatse mb'eo hoe ondaty raike. ⁸ Niahe'e e Betseke* ao: telo hetse ty ana' Israele vaho telo-ale o nte-Iehodao. ⁹ Aa le hoe ty asa' iareo amo ìrake nivotrakeo: Zao ty ho enta' areo amo nte-Iabese-giladeo: hamaray aolo' ty mafana-voho t'ie hitendreke rombake. Nibalike naho nitalily amo nte-Iabeseo o irakeo le niehake, ¹⁰ vaho hoe o nte-Iabeseo: Hamaray ty hiakara'ay mb' ama' areo vaho hanoe' areo ana'ay ze satrin' arofo' areo. ¹¹ Aa ie maraiñe, zinara' i Saole an-dia-rai'e telo ondatio le nimoak' an-tobe ao am-pijilovañe

§ **10:21** Matrý: Orañe; porozò * **10:26** Gibeà: Tamboho * **11:1** Nakase: mereñe; lapetake

† **11:1** Amone: ondaty; ana' ondatikoo ‡ **11:1** Iabese: hamaihañe; aly; hasalarañe § **11:1** Gilade: votrin-talily * **11:8** Betseke; helatse; an-tsivilisily

maraindraiñey vaho zinevo' iereo o nte-Amoneo am-para' te mafana-voho; neparaitake iaby ze nisisa kanao tsy nahaisahañe roe miharo lia.

¹² Le hoe ondatio amy Samoele; Ia o nivolañe ty hoe: Hahafehe antika hao t'i Saoleo? Aseseo mb'atoa indaty rezay hañohofan-doza. ¹³ Fe hoe t'i Saole: Leo raik' am'ondatio tsy havetrake te anito, fa nanao fandrombahañe e Israele ao t'IEHOVÀ anindroany. ¹⁴ Le hoe t'i Samoele am'ondatio, Antao homb' e Gilgale mb'eo hamentesan-tika ty fifeheañe. ¹⁵ Aa le niheo mb'e Gilgale mb'eo ondaty iabio naho nanoe' iereo mpanjaka añatrefa' IEHOVÀ e Gilgale t'i Saole; le nisoroñe engam-panintsíñañe añatrefa' IEHOVÀ; vaho nandia taroba t'i Saole naho o ana' Israele iabio.

12

¹ Hoe t'i Samoele tam' Israele iaby: Nihaoñeko o fiarañanaña' areoo amo nisaontsia' areo iabio, vaho nanoako mpanjaka. ² Inao arè te mañavelo aolo' areo i mpanjakay henane zao, zaho fa bey naho fotivolo; ingo, mpiama' areo o ana-dahikoo, vaho fa nanjotik' aolo' areo raho boak' ankatorako am-para' te henaneo. ³ Intoy raho, miasia ahy añatrefa' IEHOVÀ naho aolo' i noriza'ey: vosi' ia ty nalaeko? ndra borì' ia ty rinambeko? ia ty nikatramoeko? ia ty finorekekeko? am-pitá' ia ty nitavanako vokàñe hampikipe o masokoo? le havahako ama' areo. ⁴ Le hoe iereo: Tsy nikatramo anay rehe, tsy niforekeke'o, tsy rinambe'o ty am-pitá' ondaty. ⁵ Le hoe re ama'e: Valolombeloñ' ama' areo t'IEHOVÀ, valolombelon-ka i norizañ' anianikekey te tsy nahaonin-draha an-tañako nahareo. Le hoe iereo, Ie ty valolombeloñe.

⁶ Le hoe t'i Samoele am'ondatio: IEHOVÀ ty nanendre i Mosè naho i Aharone, naho nañakatse an-droae' areo an-tane Mitsraime aña. ⁷ Aa le mihindrea, fa miveroke ama' areo iaby añatrefa' IEHOVÀ o fitoloñañe vanta' IEHOVÀ nanoe'e ama' areo naho aman-droae' areoo. ⁸ Naho nivotrak' e Mitsraime ao t'Iakobe, le nitoreo amy IEHOVÀ o roae' areoo, vaho nirahe' IEHOVÀ t'i Mosè naho i Aharone; ie ty nañavotse o roae' areoo boak' e Mitsraime aña, naho nampimoneña'e an-tane atoy. ⁹ Fe nihalíño' iereo t'IEHOVÀ Andrianañahare' iareo vaho natolo'e am-pitá' i Sisere, mpifehe ty valobohò' i Katsore, naho am-pitá' o nte-Pilistio naho am-pitá' i mpanjaka' i Moabey*, le nialia' iareo. ¹⁰ Aa le nikoiak' am' IEHOVÀ iereo ami'ty hoe: Manan-tahin-jahay, fa naforintse'ay t'IEHOVÀ, naho nitoroñe o Baaleo naho o Asteroteo; fe avotsoro am-pitá' o rafelahi'aio le hitoroña'ay. ¹¹ Aa le nirahe' IEHOVÀ t'Ierobaale, naho i Bedane, naho Ieptà, naho i Samoele naho rinomba' iereo am-pitàn-drafelahi' areo mb'etia mb'eroa, vaho nimoneñe am-panintsíñañe nahareo. ¹² Aa ie nizoe' areo te naname anahareo t'i Nakase mpanjaka' o ana' i Amoneo le nanao ty hoe amako: Aiy, fa mpanjaka ty hifehe anay, ie ni-Mpanjaka' areo t'IEHOVÀ Andrianañahare' areo. ¹³ Aa ie henanekeo isaho o mpanjaka jinobo' areoo, i nihalalie' areoy le oniño te nampijadoñe mpanjaka hamehe anahareo t'IEHOVÀ. ¹⁴ Aa naho añeveña' areo t'IEHOVÀ, naho mitoroñe aze naho mañaoñe i fiarañanaña'ey naho tsy miola amo lili' IEHOVÀ, vaho songa mañorike IEHOVÀ Andrianañahare' areo naho i mpanjaka mifehe anahareoy— ¹⁵ aa hera tsy haoñe' areo ty fiarañanaña' IEHOVÀ naho miola amo lili' IEHOVÀ le hatreatré' ty fità' IEHOVÀ manahake ty niatrefa'e androae' areo.

* 12:9 Moabe: an-drae'e

¹⁶ Ie amy zao, mijohaña eo vaho mahaisaha ty raha jabajaba hanoe' IEHOVÀ añatrefam-pihaino' areo. ¹⁷ Tsy anito hao ty fitataham-barebolè? Hikanjy IEHOVÀ raho, hañitrifa'e àmpiñe miharo orañe; hahafohina' areo naho hahaisaha' areo te ra'elahy ty haloloañe nanoe' areo am-pivazohoa' IEHOVÀ amy nihalalia' areo mpanjakay. ¹⁸ Aa le kinanji' i Samoele t'IEHOVÀ; vaho nañiraha' IEHOVÀ hotroke naho orañe amy andro zay; le nirevendreveñe am' IEHOVÀ naho i Samoele ondatio, ¹⁹ vaho hoe ondaty iabio amy Samoele: Mihalalia am' IEHOVÀ Andrianañahare'o ho a o mpitoro'oo, tsy hivetrake; fa nitovoña'ay amo hakeo'ay iabio ty hatsivokarañe toy, t'ie nipay mpanjaka.

²⁰ Le hoe t'i Samoele am' ondatio: Ko hembañe; Toe nanoe' areo i haratiañe zay, fe ko mivike tsy hañorike IEHOVÀ vaho toroño an-kaliforan' arofo t'IEHOVÀ; ²¹ le ko mitsile hitoha raha kafoake tsy mahasoa tsy maharombake, amy t'ie kòake. ²² Toe tsy haforintse' IEHOVÀ ondati'eo ty amy tahina'e ra'elahiy; amy te mahafale IEHOVÀ t'ie hanoe'e ondati'e. ²³ Aa naho ty amako, ee te ho lavitse ahy ty hanao hakeo am' IEHOVÀ fa tsy hadòko ty hihalaly ho anahareo vaho mboe hañòhako ty sata-soa naho vantañe. ²⁴ Ie amy zao mañeveña am' IEHOVÀ naho toroño an-katò naho an-kaliforañ' arofo le tsakoreo o fitoloñañe jabajaba nanoa'e. ²⁵ F'ie mbe hanao haloloañe le ho faohe'e aña reke-panjaka.

13

¹ Nifehe rai-taoñe t'i Saole, aa ie nifehe Israele roe taoñe, ² le jinobo' i Saole ty lahilahy telo arivo boake Israele ao. Nindre amy Saole e Mikmase* naho ambohibohi' i Betele ty ro'arivo, naho nindre am' Ionatane† e Gibeate-Beniamine ty arivo; songa nirahe'e mb' an-kiboho'e aña ze ondaty sisa. ³ Pinao' Ionatane amy zao ty mpirai-lian-dahin-defoñe e Geba‡; le jinanji' o nte Pilistio. Aa le pinopò' i Saole amy tane iabiy i antsivay nanao ty hoe: mijanjiña ry nte-Evre. ⁴ Aa le jinanji' Israele iaby te zinevo' i Saole i mpirai-lian-te-Pilistiy, naho te mitrotròtse amo nte-Pilistio t'Israele. Aa le nifanontoñe amy Saole e Gilgale aña ondatio. ⁵ Nifamory ka o nte-Pilistio hialy amy Israele, sarete telo-ale naho mpiningi-tsoavalà eneñ' arivo naho ondaty mira amo faseñe añ' olon-driakeo ty hamaro'e ro nionjom-beo nitobe e Mikmase atiñana' i Bete-Avene ey. ⁶ Nioni' o ana' Israeleo te niampuheke—toe nalovilovy ondatio—sata' ondatio ty nietak' an-dakato, an-drongoñe, am-bato, an-kadaha, vaho an-koboñe ao. ⁷ Nitsake Iordaney ka ty ila' o nte Evreo mb'an-tane Gade e Gilgale aña; fe mbe te Gilgale t'i Saole, vaho nitititike iaby o mpiama'eo.

⁸ Nihenekenek' ao fito andro re ty amy namantaña' i Samoeley; fe tsy niavy e Gilgale t'i Samoele; le nihabaratsiak' ama'e ondatio. ⁹ Aa hoe t'i Saole: Endeso mb'amako mb'etoa i enga hisoroñañey naho o engam-panintsíñañeo; vaho nisoroña'e o engan-koroñañeo. ¹⁰ Aa ie vaho nihenefe'e soróñe i engan-koroñañey rey, hehe te pok'eo t'i Samoele; naho nimb'ama'e mb'eo t'i Saole hifanalaka ama'e hañontane aze. ¹¹ Le hoe t'i Samoele: Ino o nanoe'oo? le hoe t'i Saole: Ie nitreako te neparaitak' amako ondatio naho tsy niheo mb'eo rehe amy nifotoñañey, naho te mifanontoñe haname i Mikmase o nte-Pilistio, ¹² le nataoko ty hoe: Hiambotrak' amako e Gilgale amy zao o nte-Pilistio vaho mb'e tsy nihalaliako isoke am'IEHOVÀ; aa le nanji-batan-draho nañenga i soróñey. ¹³ Aa hoe t'i Samoele amy Saole: Nanao hadagolàñe; tsy nambena'o ty

* ^{13:2} Mikmase: mpamofoke † ^{13:2} Ionatane: Natolon'Añahare ‡ ^{13:3} Geba: tamboho; fitovy

lili' IEHOVÀ Andrianañahare'o, i nandilia'e azoy; ie ho najado' IEHOVÀ ho nainai'e donia i fifehea'o Israeley. ¹⁴ Fe tsy hijadoñe i fifehea'oy; fa nitsoeke ondaty mindre arofo ama'e§ t'IEHOVÀ vaho fa tinendre' IEHOVÀ ho mpifehe ondati'eo, amy te tsy nambena'o i nandilia' IEHOVÀ azoy.

¹⁵ Niongak' amy zao t'i Samoele, nionjo boake Gilgale mb'e Gibeate-Beniamine. Niahe' i Saole ondaty ama'eo te ni-enen-jato varañe. ¹⁶ le nañialo e Gibeate-Beniamine t'i Saole naho Ionatane ana'ey naho ondaty ama'eo; vaho nitobe e Mikmase ka o nte-Pilistio. ¹⁷ Niakatse an-tobe' o nte-Pilistio amy zao ty mpijoy am-pirimboña'e telo: ty mpirai-lia'e raike nitsile mb'amy lala-migodañe mb'e Ofrà*, mb'an-tane' i Soale† mb'eo; ¹⁸ nitolike mb' amy Bete-korone‡ ka ty mpirai-lia'e raike; vaho nitolike mb'añ' efetane ahatalakesañe ty vava-tane Zeboime§ mb' am-patram-bey mb'eo ty mpirai-lia'e raike. ¹⁹ Ie amy zao, tsy amam-panefe ndra raike ty an-tane Israele ao; ami'ty nanoe' o nte-Pilistio ty hoe: Hera hanefe fibara ndra lefoñe o nte-Evreo, ²⁰ fa nizotso mb'amo nte-Pilisty iabio ze hene ana' Israele hanioñe ty lelan-dasarý naho ty fangaly, naho ty fekoñe, vaho ty fibira. ²¹ Nitake roe-ampaha-telo' ty sekele hanañira'e ty lelan-dasarý ndra ty fitrabahan-tane; naho ty ampaha-telo'e ho a o fekoñeo; vaho ho ami'ty fanañiran-kitro. ²² Aa ie amy andron-kotakotakey, leo fibara ndra lefoñe raike tsy nizoeñe am-pitá' o mpiamy Saole naho Ionataneo; naho tsy i nizoeñe amy Saole naho Ionataney avao. ²³ Aa le nionjomb' an-kebam-bohi' i Mikmase mb'eo ty raik' amo mpirai-lia' o nte-Pilistioo.

14

¹ Aa teo ty andro te nanao ty hoe amy mpinday fikala'ey t'Ionatane ana' i Saole: Antao hitsake mb' ampirai-lia' o nte-Pilisty an-kalo' o e hoekeo mb'eo. F'ie tsy nampandrendrek' an-drae'e. ² Nihenekenek' añ' ila' i Gibeà aña t'i Saole ambane' i ampongabendañitse e Migroney*; va'e enen-jato t'indaty nirekets' ama'e ³ naho i Ahiià†, ana' i Ahitobe‡, rahalahi' Ikabode, Ana' i Pinekase, ana'i Elý mpisoro' IEHOVÀ e Silò ao, nisikiñe i kitambey. Le tsy napota' ondatio te tsy teo t'Ionatane. ⁴ Añivo' i hebam-bohitse nipaia' Ionatane hitsahañe mb' amy firimboñam-Pilistiy mb'eo ty tevañe vatoeñe añ' ila'e raike naho ty tevam-bato añ'ila'e ka; i Bozeze§ ty añara' ty raike, naho Seneke* ty añara' ty raike. ⁵ Nionjoñ' añ'ila'e avaratse tandrife i Mikmase ty tevañe raike naho atimo tandrife i Geba ty ila'e. ⁶ Le hoe t'Ionatane amy ajalahy ninday o fikala'eyo: Antao, hitsake mb' amy mpirai-lia' o tsy sinavatseyo hera hañolotse antika t'IEHOVÀ amy te tsy sebañeñe t'IEHOVÀ handrombake he ami'ty maro ke ami'ty tsy ampe. ⁷ Le hoe i mpinday fikala'ey: Anò iaby ze añ'arofo'o; mitoliha, hehe te ama'o raho ty amo arofo'oo. ⁸ Aa le hoe t'Ionatane, Inao! hitsake mb' am' ondaty reo tika, hiatreatre iareo. ⁹ Aa naho anoe' iareo ty hoe, Ey avao ampara' te pok' ama' areo eo zahay; le hijohañe eo avao tika, fa tsy hiañambone mb' ama'e. ¹⁰ F'ie manao ty hoe: Mionjona mb' ama'ay mb'atoy. Le hionjomb'eo tika, fa tinolo' IEHOVÀ an-tañan-tika; zay ty ho viloñe aman-tika. ¹¹ Le nivotrak' amy mpirai-liam-Pilistiy,

§ **13:14** Top 13:22 * **13:17** Ofrà: debole; anam-panaloke † **13:17** Soale: farasy; lalan-tsileke; valoha'e ‡ **13:18** Bete-korone: akiban-kabosehañe, korake § **13:18** Zeboime: ose * **14:2** Migrone: revendreveñe; tonda; tretrake † **14:3** Ahiià: Rahalahi' IEHOVÀ ‡ **14:3** Ahitobe: Rahalahin-kasoa § **14:4** Bozeze: fotake; antara * **14:4** Seneke: fatike; rafelahy

iereo roe; le hoe ty asa' o nte-Pilstio: Hehe te mipororoake boak' ankoboñe fipalira'e ao o nte-Evreo. ¹² Aa le hoe ty asa' ondati' i mpirai-liaio am' Ionatane naho i mpitam-pikala'ey: Mionjona mb' ama'ay mb'etoa, hanoroa'ay raha. Aa le hoe t'Ionatane amy mpitam-pikala'ey, Oriho raho te hionjoñe; fa natolo' IEHOVÀ am-pità' Israele iereo. ¹³ Aa le nanganike mb'eo am-pitâne naho am-pandia t'Ionatane, le nañorike aze i mpinday fikala'ey; vaho nikorovoke aolo' Ionatane iereo; le namono am-boho'e eo i mpinday fikala'ey. ¹⁴ Va'e roapolo ty zinama' Ionatane naho i mpitam-pikala'ey amy valoha'e zay, an-tampan-tonda mete ho fola' ty katraka roe an-dasarý. ¹⁵ Inay ty fihondrahondrâne an-tobe ao naho an-kivoke ey, naho am' ondaty iabio; i mpirai-liay naho o mpijoio songa nitititike vaho nanginikinike i taney; aa le nionjo ho firevendreveñañe aman' Añahare.

¹⁶ Tinalake' o mpijilo' i Saole e Gibeate-Beniamineo; le hehe te nitranak' aña i valobohòkey nifanjevoñe avao. ¹⁷ Le hoe t'i Saole am'ondaty nirekets' ama'eo: Volilio henaneo, haharendreke te ia ty nienga antika. Aa ie namolily, inao tsy eo t'Ionatane naho i mpinday fikala'ey. ¹⁸ Aa le hoe t'i Saole amy Akià: Endeso mb'etoa ty vatam-pañinan' Añahare. Amy te tamo ana' Israeleo i vatam-pañinan' Añaharey henane zay. ¹⁹ Ie amy zao, naho nisaontsy amy mpisoroñey t'i Saole le nitolom-pivalitaboak' an-tobe'e ao avao o nte-Pilstio vaho niindra; le nanao ty hoe amy mpisoroñey t'i Saole. Ahankaño o fità'oo. ²⁰ Nifanontoñe eo rekets' i valobohò'ey t'i Saole naho nionjom-ban-kotakotake mb'eo vaho nizoeñe te songa nifanjamañe am-pibara o mpirañetseo, nifamalitsikotake. ²¹ Ie amy zao nitolike hirekets' amo ana' Israele mpiamy Saole naho Ionataneo o nte-Evre niharó amo nte-Pilsty nimpindre fionjo ama'e mb'an-tobe ao boak' am-pariparitse aña taoloo. ²² Hambañe amy zay, o hene ondati' Israele nietak' am-bohibohi' i Efraimeo; ie nahajanjiñe te nivoratsake mb'eo o nte-Pilstio, le nihoridà' iareo fatratse am-pifandraparapahañe. ²³ Aa le rinomba' IEHOVÀ t'Israele amy andro zay, vaho nivelatse pak' e Bete-avene i hotakotakey.

²⁴ Toe ni-ampopheke ondati' Israeleo amy andro zay; ty amy fetse natao' i Saole am'ondatio an-titike ty hoe: Fàtse t'indaty mikama ze atao haneñe am-para' te hariva, hañondrohako an-drafelahiko ty avake. Aa le tsy eo ty nitsopeke mahakama. ²⁵ Hene nitandroake mb'amy alay o an-tane eio, ie an-tane eo ty tantele. ²⁶ Naho nizilik' amy alay ondatio, hehe te nitsopetsopéhen-tanteley, fa leo raik' am'ondatio tsy nanao fitâne am-palie amy fihembaña' iareo i fetseyi. ²⁷ Fe tsy napota' Ionatane i fantok' am-pàtse nanoen-drae'e am'ondatio; aa le natoho'e mb'eo ty kobay am-pitâ'e naho najo'e amy papi-tanteley, naho nanoe'e am-palie i fitâ'ey, vaho nahiratse o fihaino'eo. ²⁸ Aa le hoe ty asa' ty raik' am' ondatio: Fa nafanton-drae'o am-pànta te: Fàtse ze ondaty mitsopeke mahakama anito; fe midazidazítse ondatio. ²⁹ Le hoe t'Ionatane: Nanolo-tsotry amo taneo ty raeko: Hehe fa mahiratse o masokoo, ie nitsopeke amo tanteleo, ³⁰ antsake te songa nidada am-pikamañe o raha kinopake nitendrek' amo rafelahi'eo ondatio. Tsy ho nimaro hao ty nizamañe amo nte-Pilstio? ³¹ Aa le linafa' iareo o nte-Pilstio boake Mikmase pak' Aialone[†] aña; fe toe nikolempa ondatio. ³² Niambotrak' amy kinopakey ondatio, nandrambe añondry naho añombe naho sarake, naho linenta' iareo an-tane, vaho nikama' ondatio ie mbe aman-dio. ³³ Aa le nataily amy Saole, ty hoe: Inao! manao hakeo am' IEHOVÀ ondatio, mikama reke-dio. Le hoe re: Nandilatse nahareo: Amariño vato jabajaba amako aniany. ³⁴ Le hoe t'i

[†] 14:31 Aialone: toem-panaloke

Saole: Tsitsiho ondatio le anò ty hoe: Songa mindesa vosy mb' amako mb'etoa ondatio, sindre mindesa ty añondri'e ho lentaeñe etoa vaho ho kamae'e fa ko manao hakeo am' IEHOVÀ am-pikamàñ' aze aman-dio. Aa le fonga ninday ty añombe'e mb'eo ondatio vaho nandenta aze eo. ³⁵ Le namboatse kitrely am'IEHOVÀ t'i Saole, toe ie ty kitrely valoha'e niranje'e am'IEHOVÀ.

³⁶ Le hoe t'i Saole: Antao hizotso mb' amo nte-Pilistio mb'eo haleñe hikopake ampara' te porea' ty maraindray, vaho tsy hapon-tika leo raik' am'ondati'eo. Le hoe iereo: Ano ze satri' ty arofo'o. Fa hoe i mpisoroñey, antao hey hañarine aman' Añahare. ³⁷ Aa le nihalaly fanoroañe aman' Añahare t'i Saole: Hizotso mb' amo nte-Pilistio hao raho? Hatolo'o am-pitá' Israele hao? Fe tsy natoi'e amy andro zay. ³⁸ Le hoe t'i Saole: Miharinea iaby ry mpiaolo' ondatio; itsikaraho ty nametsahañe i hakeo anindroaniy. ³⁹ Aa kanao veloñe t'IEHOVÀ mpandrombake Israele, ndra t'ie am' Ionatane ana-dahikoy, le toe havetrake. Fe leo raik' am' ondaty iabio tsy nanoiñe. ⁴⁰ Aa le hoe re amy Israele iaby: Añ'ila'e nahareo, vaho añ' ila'e atoy raho naho Ionatane anakoy. Le hoe ondatio amy Saole: Ano ze atao'o ho soa. ⁴¹ Le hoe t'i Saole amy IEHOVÀ Andrianañahare' Israele: Taroño ty hato. Jinoboñe an-kitsapak' amy zao t'Ionatane naho i Saole; le nivotsotse i mároy. ⁴² Aa hoe t'i Saole: Ano an-tsapake ka, zaho naho Ionatane anakoy. Nivoa t'Ionatane. ⁴³ Aa hoe t'i Saole am' Ionatane: Atalilio ahiko o nanoe'oo. Le natalili' Ionatane ama'e ty hoe: Toe nitsopeke tantele tsy ampe añ' ilan-kobaiko an-tañako; intoy, zaho ty hikenkañe. ⁴⁴ Le hoe t'i Saole: Ehe hanoan' Añahare amako naho mandikoatse zay naho tsy hihomake rehe Ionatane. ⁴⁵ Fe hoe ondatio amy Saole: Havetrake hao t'Ionatane, ie nañeneke fandrombahañe jabajaba e Israele atoa? Lavits' aze zay; Kanao veloñe t'IEHOVÀ, leo raik' amo maròy añ'ambone'eo tsy hihintsañe an-tane; amy t'ie nitoloñe an' Andrianañahare anindroany. Aa le navotso' ondatireo t'Ionatane tsy hihomake, ⁴⁶ le nienga tsy nañorike o nte-Pilistio ka t'i Saole; vaho nimpoly mb'an-toe'e mb'eo o nte-Pilistio.

⁴⁷ Aa le rinambe i Saole ty fifeheañe Israele, naho nialia'e iaby mb'atia mb'eroa o rafelahi'eo; e Moabe naho amo ana' i Amoneo, Edome naho amo mpanjaka' i Tsobao‡, vaho amo nte-Pilistio; aa ndra aia ty nitoliha'e le nampisotrie'e. ⁴⁸ Nanontoñe lahialen-dre le zinevo'e o nte Amalekeo vaho navotso'e am-pitá' o mpikopake iareoo t'Israele. ⁴⁹ Zao o ana-dahi' i Saoleo, Ionatane, naho Isvý§ vaho i Malki-soà*; le ty añara' ty anak' ampela'e roe: i Merabe† ty zoke'e, naho Mikale‡ ty zai'e; ⁵⁰ naho ty tahinan-tañanjomba' i Saole: i Akinoame§, ana' i Akimatse*; ty tahina' i mpifeleke i valobohò'eyi: i Abnere†, ana' i Nere‡, anan-drahalahin-drae' i Saole. ⁵¹ I Kise§ ty rae'i Saole; vaho ana' i Abiele* t'i Nere rae' i Abnere. ⁵² Nitolom-pialy amo nte-Pilistio nainai'e t'i Saole amo hene andro'eo, aa ndra mb'ia nahaisake fanalolahy t'i Saole, le rinambe'e ho ama'e.

15

¹ Hoe t'i Samoele amy Saole: Nirahe' IEHOVÀ raho hañory azo ho mpanjaka' ondati'e Israeleo; aa le janjiño ty feon-tsara' IEHOVÀ. ² Hoe

‡ **14:47** Tsobao: lian-dahindefo; mifañotakotake § **14:49** Isvý: sotra; mitsiñe; mira * **14:49** Malki-soà: mpanjaka manolotse † **14:49** Merabe: mpialy, mpandietse ‡ **14:49** Mikale: Ia ty ginoke? § **14:50** Akinoame: hatsomerentsere' ty longo; * **14:50** Akimatse: rahalahi' i favoriy

† **14:50** Abnere: raem-pahazavañe ‡ **14:50** Nere: jiro; tane mboe tsy trinabake § **14:51** Kisy: gañe; sarotse; boka; haanterea'e * **14:51** Abiele: Andrianañahare raeko

t'IEHOVÀ' i Màroy: Tiahiko i nanoe' i Amalek' am' Israeley, ie niatreatre aze amy lalañey te niakats' i Mitsraime aña. ³ Aa le akia lafao t'i Amaleke, naho mongoro o fanaña'e iabio naho ko anga'o sehanga'e; zamano ze atao lahilahy naho ampela, ty anak' ajaja ndra te minono, ty añombe naho añondry, ty rameva vaho ty borike. ⁴ Kinoi' i Saole amy zao ondatio vaho niahe'e e Telaime* ao, roe-hetse ty am-pandia le nitovoñe rai-ale boake Iehoda.

⁵ Niheo mb'an-drova' i Amaleke mb'eo t'i Saole, naho niampitse ambavatane ao. ⁶ Vaho hoe t'i Saole amo nte-Keneo†: Akia, mizotsoa, hisitake o nte-Amalekeo, tsy mone ho mongoreko mindre ama'e, amy te nisohe' areo o ana' Israele niavotse i Mitsraimeo. Aa le nisitahe' o nte-Keneo o nte-Amalekeo; ⁷ vaho linafa' i Saole o nte-Amalekeo, boake Kavilà‡ am-piranga'o mb'e Sorey§ tandrife i Mitsraime. ⁸ Rinambe'e veloñe ty Agage* mpanjaka' o nte-Amalekeo, fa fonga zinama'e an-dela-pibara ondatio.

⁹ Nenga' i Saole naho ondati'eo t'i Agage, naho ty soa amo mpirai-liao naho o mpirai-trokeo naho o vositseo vaho o vik'añondrio, toe ze raha soa iaby, ie tsy nete nimongoreñe; o sirikaeñeo naho o tsy vente'eo ty nimongore' iareo.

¹⁰ Aa le niheo amy Samoele ty tsara' IEHOVÀ nanao ty hoe: ¹¹ Aneñenako t'ie nampijadoñe i Saole ho mpanjaka; fa niamboho'a'e, tsy norihe'e naho tsy nanoe'e o nandiliakoo. Nioremèñe amy zao t'i Samoele; le nirovetse amy IEHOVÀ avao amy haleñey. ¹² Ie nitroatse maraindray hanalaka amy Saole; le teo ty nisaontsy amy Samoele ty hoe: Nivotrake e Karmelet† t'i Saole, le nioniñe te nampijadoñe'e eo ty faniahiañe ty vata'e, le nienga boak'ao re nizotso mb'e Gilgale mb'eo. ¹³ Niheo mb' amy Saole mb'eo t'i Samoele; le hoe t'i Saole ama'e: Tahie' IEHOVÀ rehe; fa nanoeko ty linili' IEHOVÀ. ¹⁴ Le hoe t'i Samoele: Aa ino arè o fibabababan' añondry an-tsofikoo naho ty firohafa' o añombe tsanoñeko henaneoo? ¹⁵ Le hoe t'i Saole: nendese' iareo boak' amo nte Amalekeo, nasisa' ondatio ty soa amo añondrio naho amo añombeo hisoroña' iareo am' IEHOVÀ Andrianañahare'o; vata'e finongo'ay ty ila'e. ¹⁶ Le hoe t'i Samoele amy Saole: Eo hey, fa ho volañeko ama'o ty nitsarae' IEHOVÀ amako aniankale. Le hoe re ama'e, Misaontsia. ¹⁷ Le hoe t'i Samoele: Ndra te kede am-pihaino'o rehe, tsy lohà amo fifokoa' Israeleo hao? ihe noriza' IEHOVÀ ho mpanjaka' Israeley? ¹⁸ Nafanto' IEHOVÀ ama'o ty lia'o, ami' ty hoe: Akia, zamano iaby o nte-Amaleke mpanan-kakeoo, naho ialio ampara' te mongotse. ¹⁹ Aa vaho akore te tsy nihaoñe'o ty fiarañanaña' IEHOVÀ, te mone niambotraha'o i nikopaheñey naho nanao ty hatsivokarañe am-pivazoho'a' IEHOVÀ?

²⁰ Le hoe t'i Saole amy Samoele: Toe nihaoñeko ty fiarañanaña' IEHOVÀ, kanao fa nandenàko i nañiraha' IEHOVÀ ahiy, naho naseseko atoy t'i Agage mpanjaka' o nte-Amalekeo, vaho nimongoreko o nte-Amalekeo. ²¹ Fe nangala' ondatio boak' amy kinopakey ty añondry, naho añombe, ty soa amo raha nafatseo hisoroñañe am' IEHOVÀ Andrianañahare'o e Gilgale. ²² Le hoe t'i Samoele: Tea' IEHOVÀ mandikoatse ty fañaoñañe i fiarañanaña' IEHOVÀ hao o enga oroañeo naho o soroñeo? Toe zoke' ty soroñe ty fañorihañe naho lombolombo' ty solin' añondrilahy ty fañaoñañe. ²³ Fa hakeom-pamorehañe ty fiola naho hatsivokarañe

* ^{15:4} Telà: mandè; maindoindoñe † ^{15:6} Kene: fanaña; vinily; hontoke ‡ ^{15:7} Kavilà: manaintaiñe; mampiboake § ^{15:7} Sore: kijoly; añombe; ty misamba * ^{15:8} Gage: Tafo; am-batse † ^{15:12} Karmelete: vosy; fitatahañe; tsako voririke

mitrao-pahasive ty fanjeharañe. Kanao napo'o ty tsara' IEHOVÀ le naforintse'e ka ty maha-mpanjaka azo.

²⁴ Aa hoe t'i Saole amy Samoele, toe aman-kakeo raho, nandilatse amy lili' IEHOVÀY naho amo saontsi'oo; toe nihembañako ondatio, naho nihaoñeko o feo'eo. ²⁵ Aa ehe iheveo i tahikoy vaho mindreza fimpoly amako hitalaho am' IEHOVÀ. ²⁶ Fa hoe t'i Samoele amy Saole: Tsy himpoliako; fa nado'o ty tsara' IEHOVÀ naho nado' IEHOVÀ rehe tsy ho mpanjaka' Israele ka! ²⁷ Nitolike mb'eo amy zao t'i Samoele hañavelo, fe nivontitire'e i saro'ey vaho niriatse. ²⁸ Le hoe t'i Samoele ama'e: Fa rinia' IEHOVÀ ama'o anindroany ty fifeheañe Israele vaho natolo'e ami'ty mpiama'o, ty soa te ama'o ²⁹ vaho tsy mandañitse, tsy maneñeñe ty Enge' Israele, ie tsy ondaty hikinañe. ³⁰ Le hoe re: Aman-kakeo raho; fe miambane ama'o, miasia ahy añatrefa' o roandria' ondatikoo naho aolo' Israele vaho mindreza fimpoly amako hitalaho am' IEHOVÀ Andrianañahare'oy. ³¹ Aa le niharo fibalik' amy Saole t'i Samoele vaho nitalaho am' IEHOVÀ t'i Saole.

³² Le hoe t'i Samoele: Aseseo mb'etoa t'i Agage mpanjaka' o nte-Amalekeo. Aa le nigolengole mb'ama'e mb'eo t'i Agage, fa hoe ty natao' i Agage: Toe fa aña ty hafairan-kavilasy. ³³ Fe hoe t'i Samoele ama'e: Manahake ty tsy nañengà' i fibara'oy ho aman' anake o rakembao ty hanoañe tsy ho aman' anake ka i rene'o añivo' o rakembao. Vaho tinoritori' i Samoele t'i Agage añatrefa' IEHOVÀ e Gilgale. ³⁴ Nimpoly mb'e Ramà mb'eo amy zao t'i Samoele; vaho nionjo mb' añañomb'a'e e Gibeate-Saole mb'eo t'i Saole. ³⁵ Le lia'e tsy nitilike i Saole ka t'i Samoele ampara' ty andro nihomaha'e; nandala i Saole t'i Samoele vaho niselekaiña' IEHOVÀ te nanoe'e Mpanjaka' Israele t'i Saole.

16

¹ Hoe t'IEHOVÀ amy Samoele: Pak'ombia t'ie mbe handala i Saole kanao fa nadòko tsy ho mpanjaka' Israele ka? lipolipò menake i tsifa'oy le akia, fa hiraheko mb'am' Iisay nte-Betleheme* mb'eo fa nijoboñeko mpanjaka ho ahy ty raik' amo ana'eo. ² Le hoe t'i Samoele, Akore ty handenàko mb'eo? ke ho rendre' i Saole, hañohofa'e loza. Le hoe t'IEHOVÀ. Andeso tamana vaho anò ty hoe: Pok' atoy raho hanao soroñe am' IEHOVÀ. ³ Kanjio t'Iisay† hiatrefa'e i soroñey, le hatoroko azo ze hanoe'o, vaho horiza'o ho ahy ty hitoñonako añarañe. ⁴ Le nanoe' i Samoele i tsinara' IEHOVÀY vaho niheo mb'e Betleheme mb'eo. Le ninevenevetse amy fitotsaha'ey o androanavi' i rovaio nanao ty hoe: An-kanintsiñe hao ty ivotraha'o atoy? ⁵ Le hoe re, Fañanintsiñe, pok' eo raho hisoroñe amy IEHOVÀ; mañefera vatañe, naho mindreza amako mb' amy soroñey; le nefera'e ka t'Iisay naho o ana'eo vaho nambara'e homb' amy soroñey.

⁶ Ie nihirike, le nitalare'e t'i Eliabe, nitsakore ty hoe; Toe añañatrefa' IEHOVÀ eo i horiza'ey. ⁷ Fe hoe t'IEHOVÀ amy Samoele; Ko mandrèndreke ty lahara'e ndra ty haabo' ty fijohaña'e, amy t'ie fa nadòko; toe tsy ami'ty fahaisaha' ondatio ro ie, amy te mandrèndreke ty vinta'e alafe'e ondatio, vaho mandrendrek' arofo t'IEHOVÀ. ⁸ Kinanji' Iisay t'i Abinadabe‡ vaho nampiarie'e añañatrefa' i Samoele. Fa hoe re, Tsy jinobo' IEHOVÀ toke. ⁹ Nampiarie' Iisay ama'e ka t'i Samà§, fa hoe re, toe tsy jinobo' IEHOVÀ ka toke. ¹⁰ Aa le nampiarie' Iisay añañatrefa' i Samoele ty ana-dahi'e fito,

* **16:1** Betleheme: Anjomba-mofo † **16:3** Iisaiy: tolotse; ravoravo ‡ **16:8** Aminadabe; raem-panta, fahimbañañe § **16:9** Samà: motso; mangoakoake; halatsañe

fa hoe t'i Samoele am' Iisay, Tsy jinobo' IEHOVÀ o retoañe. ¹¹ Le hoe t'i Samoele am'Iisay, Etoañ' iaby hao o ana'oo? le hoe re: Mbe aña ty tsitso'e; toe miarak' añondry. Le hoe t'i Samoele am' Iisay: Ampañitrifo; fa tsy hivory* tika ampara' t'ie pok'eo. ¹² Aa le nampañitrife'e naho nampizilihe'e. Volovoloen-dre, niloeloe o maso'eo naho naràm-bintañe; vaho hoe t'IEHOVÀ: Miongaha orizo, ie toke. ¹³ Aa le rinambe' i Samoele i tsifa ama' menakey naho noriza'e añivo' o longo'eo; vaho namparingatse i Davide henane zay ty Arofo' IEHOVÀ. Le niongake t'i Samoele nimb' e Ramà mb'eo.

¹⁴ Ie amy zao, fa nienga i Saole ty Arofo' IEHOVÀ, vaho nañangara' ty fañahy raty boak' am' IEHOVÀ. ¹⁵ Le hoe o mpitoro' i Saoleo ama'e: Eo hey, toe fañahy raty boak' aman' Añahare ty mañangatse azo henaneo; ¹⁶ ee te hafanto' i talè'ay henaneo o mpitoro'e miatrek' azeo, ty hitsoeke mpititike maro-taly mahimbañe; aa ie mañangats' ama'o i fañahy raty boak' aman' Añaharey, le hititiha'e am-pità'e, hampanintsíñ' azo. ¹⁷ Le hoe t'i Saole amo mpitoro'eo: Paiao ho ahy henaneo t'indaty mahafititike, le endeso mb'amako mb'etoa. ¹⁸ Aa hoe ty natoi' ty ajalahy, Inao, nitrea'ay ty ana' Iisay nte-Betlekhem, mpititike mahay, ie fanalolahy naho lahindefoñe, mahity am-pitoloñañe, ondaty soa vintañe vaho ama'e t'IEHOVÀ. ¹⁹ Aa le nahitri' i Saole am'Iisay ty hoe: Iraho mb' amako mb'etoa i Davide ana'o mpiarak' añondriy. ²⁰ Le nandrambe borìke t'Iisay naho nampilogologoe'e mofo naho ty zonjòn-divay naho ty vik'ose vaho nampihitrife'e mb' amy Saole mb'eo añamy Davide, ana'e. ²¹ Nimb' amy Saole mb'eo t'i Davide naho nijohañe añatrefa'e; le vata'e nikokoa'e; vaho nanoe'e mpinday ty fikala'e. ²² Le nahitri' i Saole am' Iisay ty hoe: Ehe, iantofo te hijohañe añatrefako t'i Davide, ie nanjo fañisohañe am-pahatreavako. ²³ Aa ndra mb'ia nañangaram-pañahy boak' aman' Añahare t'i Saole le rinambe' i Davide i marovaniy naho nititihe'e am-pità'e; le nitotòtse t'i Saole, vaho nanintsiñe fa nisitak' ama'e i anga-dratiy.

17

¹ Natonto' o nte-Pilistio amy zao o lahindefo'eo hañotakotake vaho nifamory e Sokò* Iehoda ey le nitobe añivo' i Sokò naho i Azekà† e Efe-damime‡ ao. ² Nifanontoñe naho nitobe am-bavatane' i Elà§ ao t'i Saole naho o ana' Israeleo vaho nilahatse hifañotakotak' amo nte-Pilistio. ³ Nitrobàke ami'ty vohitse añ'ila'e eo o nte-Pilistio vaho nizorazora am-bohitse añ'ila'e eo ka o ana' Israeleo; añivo' iereo ty vavatane. ⁴ Niavotse an-tobe' o nte-Pilistio ty fanalolahy atao Goliate* nte-Gate, enen-kiho mitovon-jehe-pitàñe ty haabo'e. ⁵ Sabaka torisìke ty tañambone'e, nisikiñe fiero torisìke; lime arivo sekelen-torisìke ty lanja' i fiero zay. ⁶ Fikalañe torisike ka ty an-kitso'e vaho fikalan-defon-torisike ty an-tsoro'e. ⁷ Hoe taram-pitenoñe i taran-defo'ey, nilanja enen-jato sekelem-by ty lohan-defo'e vaho niaolo aze ty mpijiny fikalan-defoñe. ⁸ Nijagarodoñe ey re nikoikoike amo lahindefon' ana' Israeleo ty hoe: Ino ty iakara'areo am-piriritañe hialy? Tsy nte-Pilisty hao raho, naho mpitoro' i Saole nahareo? Aa le joboño t'indaty ama' areo hizotso mb' amako mb'etoa. ⁹ Ie mahafialy amako, naho mahagiok' ahy, le ho mpitoro' areo zahay, fe naho maharekets' aze raho le ho mpitoro'ay nahareo. ¹⁰ Hoe ka i

* **16:11** Toe: tsy hiharo am-pandambañañe eo * **17:1** Sokò: Fiaro † **17:1** Azekà: Hafatraran-kijoly ‡ **17:1** Efe-damime; fiorihan-dio § **17:2** Elà: Kile; fatse; fandañirañe * **17:4** Goliate: fitsahañe, fivariñañe; votre

nte-Pilstiy: Mañatreatre o lahindefon-te-Israeleo raho androany, anoloro ondaty hifandraparapaha'ay. ¹¹ Ie jinanji' i Saole naho Israele iaby ty saontsi' i nte-Pilstiy, le nitsololoke naho nirevendreveñe.

¹² Ie amy zao ana' ty nte-Efrate[†] atao Iisay nte Betlekhem e Iehoda t'i Davide, valo o ana-dahi' indatio; ie fa bey tañ' andro' i Saole, nigainkantetse am' ondatio. ¹³ Nomb' añ'aly hañorike i Saole ty zoken' ana'e telo. Ty tahina' i telo nomb' an-kotakotake rey le i Eliabe, tañoloñoloña'e, naho i Abinadabe nanonjohy aze, vaho i Samà ty fahatelo'e. ¹⁴ I Davide ty tsitso'e; nañorike i Saole aña i zoke'e telo rey. ¹⁵ Fe nibalike boak' amy nindreza'e amy Saoley t'i Davide hiandraza'e o añondrin-drae'e e Betlekhemeo. ¹⁶ Nitotoke mb'eo boa-maraiñe naho hariva, efa-polo andro, i nte-Pilstiy.

¹⁷ Aa hoe t'Iisay amy Davide ana'ey, Endeso henaneo ty ampemba-tono efà raike toy naho ty vonga-mofo folo retoy, le mihitrifa mb' aman-drahalahi'o an-tobe aña; ¹⁸ naho tintino mb' amy mpifehe arivo' iareoy mb'eo ty habobo maike folo retoy, le añontaneo o rahalahi'oo, vaho ampitalilio ahy. ¹⁹ Am-bavatane' i Elà ao t'i Saole rekets' iereo naho o ana' Israele iaby miały amo nte-Pilstioo. ²⁰ Aa le nañaleñaleñe t'i Davide; nenga'e ami'ty mpiarake, o añondri'eo naho nionjomb' amy nañiraha' Iisaiy vaho nivotrak' amy tobey, ie nivovotse mb' an-kotakotake mb'eo o lahindefoñe nikoikoik' alio. ²¹ Songa nandahatse lahindefoñe t'Israele naho o nte-Pilstio, lahindefo miatre-dahindefoñe. ²² Aa le napo' i Davide amy mpamandron-kilankañey o enta'eo vaho nipsitsike mb'amo lahindefoñe mb'eo; ie pok'eo le nañontane o rahalahi'eo, ²³ nifanaontsy am' iereo naho hehe te boak' amy nte-Pilstiy māroy i fanalolahy nte-Pilstiy nte-Gatey, Goliate ty tahina' i nitsey i entañeyi vaho tsinano' i Davide. ²⁴ Ie nahaisak' aze o lahindefo' Israele iabio le nivoratsake hisitak' ama'e, fa loho nihembañe. ²⁵ Le hoe o ana' Israeleo: Nirendre'o hao ondaty pok' atoio? Ty hampisoaña'e Israele ty nihirifa'e; ie amy zao, ze ondaty hamono aze ro hañoboña' i mpanjakay vara hampañaleale aze naho hatolo'e aze i anak' ampela'ey vaho ho haha'e[‡] am' Israele ty akiban-drae'e. ²⁶ Le hoe ty asa' i Davide amo nijohañe marine azeo: Ino ty ho tambe' t'indaty mahafañoho-doza amo nte-Pilstiy e hoeke eio hañafaha'e ty fañinjea'e Israele? fa ia o nte-Pilstiy tsy nisavareñe te godabae'e o lahindefon' Añahare veloñe? ²⁷ Le tinoi' ondatio amo hoe zao, t'ie: Zay ty hanoañe indaty mahavono azey. ²⁸ Jinanji' i Eliabe, zoken-drahalahi'e, i reha'e am' ondatiyo; le nisolebotse amy Davide ty haboseha'e, vaho nanoa'e ty hoe: Ino ty nizotsoa'o mb'etoa? naho nenga'o ama' ia o añondry tsy ampeampe an-dratraratrao? Haiko ty fiebotsebon-tro'o naho ty halotsere'o; ihe nizotso mb'etoa hisamba i hotakotakey. ²⁹ Hoe t'i Davide: Ino ze o nanoeko, tsy nirehak' avao hao? ³⁰ Le niamboho'a'e naho nitolik' ami'ty ila'e naho nañontane i hoe zay indraike; fe natoi' ondatio aze ty manahake i teoy.

³¹ Aa ie nijanjiñe o saontsi' i Davideo, le nahereñe aolo' i Saole i enta'ey; vaho nasese mb'eo re. ³² Le hoe t'i Davide amy Saole; Ehe te tsy eo ty ondaty hamoe ay ty ama'e, fa hionjomb'eo o mpitoro'oo hifandrapak' amy nte-Pilstiy. ³³ Le hoe t'i Saole amy Davide: Tsy ho lefe'o ty hionjomb' amy nte-Pilstiy hialia'o; ihe mbe tora'e, ie lahindefoñe sikal' ami' ty nahajalahy aze. ³⁴ Aa hoe t'i Davide amy Saole: Niarake

[†] 17:12 Efrate: miregorego; mahavokatse [‡] 17:25 Tsy handoa'e haba

o añondrin-drae'eo o mpitoro'oo; le ie pok'eo ty liona§ ndra ty dobe* nitavañe vik'añondry amy lia-raikey, ³⁵ le nañeañe aze raho le vinonoko naho navotsoko am-bava'e; aa ie nitroatse amako le rinambeko o volon-tsoma'eo naho linafako vaho vinonoko. ³⁶ Fa hene vinono' o mpitoro'oo ty liona naho ty dobe le ho hambañe ami'ty raik' amy zay ty nte-Pilistysy nisavareñe roa, oniñe t'ie nanalatse o lahindefon' Añahare veloñeo. ³⁷ Tinovo' i Davide ty hoe, IEHOVÀ nandrombak' ahy an-dela-tombon-diona naho an-dela-tombon-dobey, ty handrombak' ahy an-taña' t'i nte-Pilistysy toañe. Aa hoe t'i Saole amy Davide, Akia, hitahy azo t'IEHOVÀ.

³⁸ Nasaro' i Saole amy Davide o saro'eo, naombe'e an-doha'e eo i saba-ka'e torisikey vaho nanoe'e ama'e o gozò'eo. ³⁹ Le nadia' i Davide amo saro'eo i fibara'ey naho nimanea'e ty hitsontike amo tsy nañohara'eo, le hoe t'i Davide amy Saole; Tsy ho lefe i liakoy amo raha retiañe, fa tsy niventèko. Le nafaha' i Davide irezay.

⁴⁰ Rinambe'e am-pitâ'e i kobai'ey, naho nijoboñe vato lime malama antorahañ' ao vaho najo'e amy mozete'ey, toe an-kotra'e ao; tam-pitâ'e i pile'ey; le nitotofe'e i nte-Pilistiy. ⁴¹ Niheo mb'amy Davide mb'eo i nte-Pilistiy, niharine, niaolo aze i mpinday fikala'ey. ⁴² Jinilojilo i nte-Pilistiy le naharendreke i Davide naho nitorifîha'e fa ajalahy mena, soa-vintañe. ⁴³ Le hoe i nte-Pilistiy amy Davide: Amboa v'o aho te harinea'o an-kobaiñe? Le nozoñe' i nte-Pilistiy amo 'ndrahare'eo t'i Davide. ⁴⁴ Le hoe i nte-Pilistiy amy Davide: Mb'amako mb'etoa le hatoloko amo voron-tiokeo o nofo'oo naho amo bibin-kivokeo. ⁴⁵ Le hoe t'i Davide amy nte-Pilistiy: Itotoha'o am-pibara naho lefoñe vaho ana-defoñe, f'ihe ty harivoeko ami'ty tahina' IEHOVÀ i Mâroy, t'i Andrianañahare' o lahindefo' Israele sigîhe'oo. ⁴⁶ Hatolo' IEHOVÀ an-tañako rehe te anito; le ho zevoñeko, naho ho kitsihoko ama'o ty añambone'o vaho hatoloko amo voron-tiokeo naho amo bibin-kivokeo anito o lolo' i valobohò nte-Pilistio; hahafohina' ty tane bey toy te aman' Añahare ty e Israele ao. ⁴⁷ Le ho fohi' ze hene ondaty vory atoy te maharombake tsy amam-pibara tsy aman-defoñe t'IEHOVÀ, toe a' IEHOVÀ ty hotakotake, fa natolo'e an-taña'ay nahareo. ⁴⁸ Niongake le nimb'eo i nte-Pilistiy niharine amy Davide, le nipitsike ty lay mb' amo mpiatreatreо t'i Davide higaoñe amy nte-Pilistiy, ⁴⁹ le nampijom-pitâñ' an-kotra'e ao t'i Davide nañakatse vato, naho nipilere'e amy pile'ey le nipelañe am-pela-handri' i nte-Pilistiy i vatoy le nilentek' am-panda'e ao, vaho nitafahohoke re, laharâñe an-tane. ⁵⁰ Aa le naozatse te amy Pilistiy t'i Davide am-piletse naho vato. Zinevo'e vaho vinono'e i nte-Pilistiy ndra te tsy amam-pibara ty fitâ' i Davide. ⁵¹ Nilay t'i Davide nijohañe amy nte-Pilistiy eo naho rinambe'e ty fibara'e naho napontsoa'e amy traño'ey naho finatsi'e, nampikitsike i añambone'ey.

Aa ie naharendreke te mate i fanalolahi'ey o nte-Pilistio, le nitribanday. ⁵² Niongak' amy zao o lahindefo' Israele naho Iehodao, nampipoña-koikoin' aly vaho nañoridañe o nte-Pilistio pake Gate naho ampara' o lalambei' i Ekroneo. Nifitak' amy lalañey pake Saaraime naho sikal'amy Gate naho i Ekrone o nte-Pilistysy nifereo. ⁵³ Ie nimpoly amy fañoridâ' iareo o nte-Pilistioy o ana' Israeleo le fonga kinopa' iareo ty vara antobe' o nte-Pilistio. ⁵⁴ Rinambe i Davide ty añambone' i nte-Pilistiy, vaho nendese'e mb'e Ierosalaime mb'eo, fe nahaja'e an-kiboho'e ao o fikala' i Goliateo. ⁵⁵ Ie niisa' i Saole t'i Davide nionjo hifañatrek' amy nte-Pilistiy, le

§ 17:34 Liona: hoe farasy bey mihina' ondaty * 17:34 Dobe: biby jabajaba te ama'ondatey

nañontanea'e t'i Abnere, mpifehe' i màroy: Ana' ia o ajalahio? aa hoe ty natoi' i Abnere: Amy te veloñe ty arofo'o ry mpanjaka, toe tsy fantako. ⁵⁶ Hoe i mpanjakay, Rendreho te ana' ia i ajalahiy. ⁵⁷ Ie nibalik' amy nañohofa'e loza amy nte-Pilistiy t'i Davide le nendese' i Abnere mb'amy Saole mb'eo, am-pitâ'e ty loha' i nte-Pilistiy. ⁵⁸ Nañontane aze t'i Saole: O ajalahio, ana' ia v'iheo? Ana' i mpitoro'o Iisay nte-Betelekemey, hoe t'i Davide.

18

¹ Ie niheneke ty saontsi'e amy Saole, le nifamitrañe an-tro' i Davide ty tro' Ionatane. Nikokoa'e manahake ty vata'e. ² Mifototse amy andro zay t'ie nitana' i Saole, tsy nenga'e himpoly aman-drae'e aña. ³ Nanao fiatehenàñe amy Davide t'Ionatane amy te nikokoa'e manahake ty vata'e. ⁴ Nafaha' Ionatane ty sarimbo ama'e le natolo'e amy Davide rekets' i saron' ali'ey, i fibara'ey, i fâle'ey, vaho i sadia'ey. ⁵ Le niavotse mb'amy ze nañiraha' i Saole aze aña t'i Davide naho nitoloñe an-kahimbañe; le najado' i Saole ho mpifehe o lahindefoñe, ie niantofañe am-pahaisaha' ze hene ondaty naho am-pahaoniña' o mpitoro' i Saoleo.

⁶ Ie pok' eo t'i Davide naho o mpiama'eo, nimpoly boak' añ'aly amo nte-Pilistioy, le niakatse amy ze rova' i Israele iaby o ampelao nisabo antsinjake, hifanalaka amy Saole Mpanjaka an-pikoriñañe naho nirebeke an-jejo-bory*. ⁷ Nisabo ty hoe an-kafaleañe o rakembao: Fa nanjamañe ty arivo'e t'i Saole vaho ty aleale'e t'i Davide. ⁸ Nitorifike amy zao t'i Saole fa natao'e t'ie fampifotsahañ' aze. Amoliliañe añ' aleale'e t'i Davide fe añ' arivo'e avao ty ahiko. I fifeheañey avao ty mbe tsy aze. ⁹ Ie henane zay nikirofe' i Saole t'i Davide. ¹⁰ Aa ie amy loak' àndroy, nangare' ty fañahi' raty boak' aman' Añahare an-kafatrara'e t'i Saole, le nitazataza am-po' i anjombay ao, naho nititike am-pitâñe t'i Davide ami'ty lili'e lomoñandro, ie am-pitâ'e i Saole ty lefo'e. ¹¹ Hiniriri' i Saole i lefoñey, ie nitsakore ty hoe: Ho tomboheko an-drindriñe eo t'i Davide. Indroe niholiatse aze t'i Davide.

¹² Nampihembañe i Saole t'i Davide, amy te nindre ama'e t'IEHOVÀ, ie fa nienga i Saole. ¹³ Aa le nasita' i Saole ama'e, vaho nanoe'e mpifehe-arivo; niavotse naho nizilik' añatrefa' ondatio. ¹⁴ Nilefe iaby ze raha nanoe' i Davide; fa tama'e t'IEHOVÀ. ¹⁵ Ie nioni' i Saole t'ie nitoloñ' an-kihitse, le nihembaña'e. ¹⁶ Fe nikokoa' Israele naho Iehodà iaby t'i Davide, amy t'ie niavotse naho nizilik' añatrefa' iareo. ¹⁷ Le hoe t'i Saole amy Davide: Ingo, hatoloko azo t'i Merabe zoken' anak' ampelako; fe mahimbàña ho ahy, vaho ialio o ali' IEHOVÀO; ami'ty natao' i Saole ty hoe: Tsy ty tañako ty hiatrek' aze, fa hiatreفا' ty fitâ' o nte-Pilistio. ¹⁸ Le hoe t'i Davide amy Saole, Ia v'irahoo, ino ty fiaiko naho ty fiain-dongon-draeko e Israele ao t'ie ho vinanto' ty mpanjaka? ¹⁹ Aa ie ho natolotse amy Davide t'i Merabe anak' ampela' i Saole te mone natolo'e amy Adriele nte Meholatite ho tañanjomba'e. ²⁰ Fe nikokoa' i Mikale anak' ampela' i Saole t'i Davide; natalily amy Saole zay le ninò'e. ²¹ Aa hoe t'i Saole, Hatoloko aze re ho fandrik' ama'e, hatreatré'e o nte-Pilistio. Aa le hoe t'i Saole amy Davide. Ho vinantoko rehe amy faharoey. ²² Le nandily o mpitoro'eo t'i Saole, ty hoe: Bisibisiho amy Davide ty hoe: Inao! ifalea' i mpanjakay vaho mikoko azo o mpitoro'e iabio, aa le miantofa t'ie ho vinanto'e. ²³ Aa le sinaontsi' o mpitoro' i Saoleo an-dravembia' i Davide i entañe zay. Aa hoe t'i Davide, Atao' areo ho raha maivañe hao t'ie ho vinantom-panjaka,

* ^{18:6} Heb: taly-telo

zaho ondaty rarake naho mavomavo. ²⁴ Natalili' o mpitoro' i Saoleo ama'e zay ami'ty hoe: Inao ty entañe sinaontsi' i Davide. ²⁵ Le hoe t'i Saole: Zao ty ho saontsie' areo amy Davide: Tsy mipay lafitihy i mpanjakay, fa ofoke zato boak' amo nte-Pilistio, ho fañavahañe o rafelahi' i mpanjakaio. Amy te kinilili' i Saole ty hampihotrase i Davide am-pitàn-te-Pilisty. ²⁶ Aa ie nisaontsie' o mpitoro'eo amy Davide i entañe zay, le ninò' i Davide ty ho vinanto' i mpanjakay, aolo' ty fepèn' andro; ²⁷ aa le niavotse mb'eo t'i Davide, ie naho o mpiama'eo, naho zinama' iareo t'i nte-Pilisty roan-jato, vaho nendese' i Davide o ofo'eo, le natolo'e amy mpanjakay ami'ty ia'e do'e, soa t'ie ho vinanto' i mpanjakay. Le natolo' i Saole aze t'i Mikale anak' ampela'e ho vali'e. ²⁸ Napota' i Saole te amy Davide t'IEHOVÀ mbore nikoko aze t'i Mikale anak' ampela'e; ²⁹ aa antsake te nihembañe amy Davide t'i Saole, vaho nitolon-ko rafelahi' i Davide t'i Saole. ³⁰ Mpiavotse mb'eo o talèm-Pilistio; fe, ndra mbia mbia niakatse, le niraorao ambone' o mpitoro' i Saole iabio t'i Davide vaho nonjoneñe añ'abo i tahina'ey.

19

¹ Le nisaontsy am' Ionatane ana'e naho amo mpitoro'e iabio t'i Saole, hañohofa' iareo loza amy Davide; fe mpirañetse amy Davide t'Ionatane ana' i Saole. ² Le natalili' Ionatane amy Davide ty hoe: Mipay hamono azo ty raeko; aa ehe mitaoa te maraindray le mipalira añetake, ³ fa hiakatse raho hijohañe marine an-draeko an-kivoke ietaha'o, hitalily azo amandraeko; le hataliliko azo ze treako. ⁴ Nisaontsy soa i Davide amy Saole rae'e t'Ionatane, ami'ty hoe: Ehe te tsy hanan-tahiñe amy Davide mpitoro'ey, i mpanjakay; amy t'ie tsy nandilatse ama'o, naho nisoa iaby ty fitoloña'e ama'o; ⁵ naho nado'e an-taña'e ao ty fiai'e t'ie nandafa i nte-Pilistiy, ie ninday fandreketa-bey ho a Israele t'IEHOVÀ; nioni'o zay, vaho nirebeke; aa le manao akore t'ihe hanan-kakeo an-dio-maliñe, hamono'a tsy amantali'e t'i Davide? ⁶ Hinao' i Saole ty fiarañanaña' Ionatane; le nifanta ami'ty hoe: Kanao veloñe t'IEHOVÀ tsy havetrake re. ⁷ Kinoi' Ionatane amy zao t'i Davide le nitalilia'e; vaho nendese' Ionatane añatrefa' i Saole eo manahake te taolo.

⁸ Nirehetse indraike ty aly; le niavotse mb'eo t'i Davide, nialy amo nte-Pilistio vaho ra'elisy i fizamanañey, kanao nandripàke aolo'eo. ⁹ Nivotrak' amy Saole amy zao ty fañahy raty boak' amy IEHOVÀ, ie niambesatse añ' anjomba'e ao reketse lefoñe am-pitâ'e, naho nititik' am-pitâ'e t'i Davide. ¹⁰ Le nimanea' i Saole tombo-defoñe t'i Davide hipiteha'e amy rindriñey, f'ie nipoliotse am-piatrefa'e le tinombo' i lefoñey i rindriñey naho nibotiotse t'i Davide, nienga amy haleñey. ¹¹ Namantoke irake homb' an-traño' i Davide ao t'i Saole, hamono aze naho maraindray; fa nitalilia' i Mikale vali' i Davide ty hoe: Naho tsy mandrombak' ain-drehe te anito haleñey le havetrake te maray.

¹² Aa le nazotso' i Mikale ami'ty lalan-kede t'i Davide vaho nienga, le niherereak' aña. ¹³ Rinambe'i Mikale ty terafime* naho nampandre'e am-pandreañe eo, le napo'e an-doha'e eo ty fikalam-bolon-ose vaho kinolopo'e lamba. ¹⁴ Aa ie nañitrifa' i Saole t'i Davide, le hoe t'i Mikale, Siloke re. ¹⁵ Le nañitrike indraike t'i Saole handrèndreke i Davide, ami'ty hoe: Aseseo amako am-pandrea'e hamonoako aze. ¹⁶ Ie nimoak' ao i mpihitrike rey, hehe te sarendraha ty am-pandreañe ao vaho fikalam-bolon-ose ty natao loha'e. ¹⁷ Le hoe t'i Saole amy Mikale, Ino ty namañahia'o ahy, te nasinta'o

* 19:13 Terafime: sarendraha ihalaliañe

i rafelahikoy, ie nimonazake mb'eo? Le hoe ty natoi' i Mikale amy Saole, Hoe re tamako, Apoho hiavotse raho, tsy mone havetrako.

¹⁸ Aa le nioratse ty lay t'i Davide naho nivotrak' amy Samoele e Ramà aña; le hene natalili'e ama'e ty nanoa' i Saole aze. Nañavelo mb'e Naiote[†] re mindre amy Samoele vaho nimoneñe ao. ¹⁹ Natalily amy Saole ty hoe: Inao! e Naiote e Ramà ao t'i Davide. ²⁰ Nañitrike mb' amy Davide mb'eo t'i Saole; aa ie tendrek' am' iereo o mpitoky nitokio, naho nijohañe ho mpiaolo' iareo t'i Samoele le nivotrak' amo ira' i Saoleo ty Arofon' Añahare vaho nitoky ka. ²¹ Ie natalily amy Saole, le nañirake ty ila'e fe mbe nitoky avao. Nañitrike fañintelo'e vaho nitoky ka. ²² Aa le nañavelo mb'e Ramà ka re naho nipok' an-kadaha jabajaba' i Sekò eo; vaho nañontane ami'ty hoe: Aia t'i Samoele naho i Davide? Le hoe ty raike: Inao, e Naiote e Ramà aña. ²³ Aa le nimb'e Naiote e Ramà re le nivotrak' ama'e amy lia'ey ka i Arofon' Añaharey vaho nitolom-pitoky am-para' te pok'e Naiote e Ramà ao. ²⁴ Hinalo'e iaby o saro'eo vaho nitoky añatrefa' i Samoele, le nàndre niboridañe ey avao re amy àndroy naho amy haleñey. Aa le hoe ty sinaontsy:

Mpiamo mpitokio ka hao t'i Saole?

20

¹ Nitriban-day boake Naiote e Ramà aña t'i Davide vaho nivotrak' am' Ionatane, le nanoa'e ty hoe: Ino ze o nanoeko zao? Ino o hakeokoo? naho ino ty tahiko añatrefan-drae'o, ie mipay ty fiaiko? ² Le hoe re tama'e: Sondo'e; tsy hihomake rehe; oniño te tsy manao ndra kede ndra bey ty raeko naho tsy aboa'e amako heike; aa vaho ino ty hampikafiran-draeko amako o raha zao? Tsy to zay. ³ Mbore nititike t'i Davide nanao ty hoe: Toe fohin-drae'o t'ie nahaoni-pañisohañe am-pihaino'o, le hoe ty atao'e, Ko ampahafohineñe Ionatane zao hera hihontoke; fe kanao veloñe t'IEHOVÀ naho veloñe ty fiai'o le toe lika raike ty añivoko naho ty fikenkañañe. ⁴ Le hoe t'Ionatane amy Davide; Ino ty salalan-tro'o hanoeko ama'o? ⁵ Le hoe t'i Davide am' Ionatane: Inao te pea-bolañe ty hamaray, le tsy ho napoko ty hitoboke hitrao-pikama amy mpanjakay; aa le angao homb'eo raho hietak' an-kivok' ao ampara' te haleñé amy andro faha teloy. ⁶ Aa naho mipay ahy ndra kede ty rae'o, le anò ty hoe: Nimane halaly amako t'i Davide ty hihitrica'e mb'e Betlekhem rova'e; fa tondroke i soron-tsavereña'e boataoñey. ⁷ Aa naho manao ty hoe re: Soa zay. Le hanintsíñe ty mpitoro'o; f'ie viñetse, le fohino te ikinia'e raty. ⁸ Aa le isoho o mpitoro'oo; amy fañina' IEHOVÀ nanoe' i mpitoro'oy ama'oy; f'ie aman-kakeo le vonò; fa ino ty hanesea'o ahy mb'aman-drae'o mb'eo?

⁹ Le hoe t'Ionatane: Atòtse ama'o zay fa naho vata'e napotako te nikililien-draeko raty, tsy ho nampandrendreheko hao? ¹⁰ Aa le hoe t'i Davide am' Ionatane, Ia ty hitalily amako te nanoiñe azo an-keloke ty rae'o? ¹¹ Le hoe t'Ionatane amy Davide: Antao homb' an-kivoke ey. Le nimb'an-kivoke ey iereon-dro-ro. ¹² Aa hoe t'Ionatane amy Davide: aolo' IEHOVÀ Andrianañahare' Israele: Zaho fa nitsok' an-draeko ty amo raha zao te maray, ndra herone, le inao, naho fañisohañe amy Davide ty ao, lehe tsy hahitriko ama'o, vaho hitalily azo, ¹³ le ee te hanoe' IEHOVÀ am' Ionatane naho mandikoatse; fa naho mahafale an-draeko ty mañoho-doza ama'o, le hitaliliako, hañirahako azo homb'eo, hañaveloa'o am-panintsíñañe; vaho hindre ama'o t'IEHOVÀ manahake ty nindreza'e

[†] 19:18 Naiote: akiba, fimoneñañe

aman-draeko. ¹⁴ Aa naho mbe velon-draho tsy haboa'o amako hao ty fiferenaiña' IEHOVÀ, tsy hihomahako? ¹⁵ Le tsy hapitso'o an-trañoko nainai'e ty fañisoha'o; ndra te naitoa' IEHOVÀ o rafelahi' i Davideo, fonga finao'e an-tane atoy. ¹⁶ Aa le nifañina ami'ty anjomba' i Davide t'Ionatane, t'ie ho paia' IEHOVÀ am-pità' o rafelahi' i Davideo. ¹⁷ Le nampifantà' Ionatane indraike t'i Davide, ami'ty fikokoa'e; amy te nikokoa'e manahake ty nikokoa'e ty vata'e. ¹⁸ Le hoe t'Ionatane ama'e: Hiri-bolañe te maray: le ho paian-drehe; amy te ho kòake i fiambesa'oy. ¹⁹ Aa le mietaha soa rehe te herone, le miheova mb'amy fikafira'o amy androm-pitoloñañey le ey avao rehe marine ty vato' i Ezele. ²⁰ Hahiririko ty ana-pale telo añ'ila'e eo, hoe mañohatse fanolarañe. ²¹ Ie amy zao, hañitrifako ajalahy: Akia paiao o ana-paleo. Aa naho ataoko ty hoe: Ingo, añ'ila'o atoy o ana-paleo, rambeso vaho mb'etoa; le fañanintsiñe ty ho ama'o fa tsy joy, kanao veloñe t'IEHOVÀ. ²² F'ie ataoko ty hoe i ajalahiy: Inge, mbe aolo'o aña o ana-paleo; le akia, fa nirahe' IEHOVÀ mb'eo. ²³ Aa i nisaontsien-tikañey, Inao! añivon-tikañe nainai'e t'IEHOVÀ.

²⁴ Le nietak' an-kivok' ao t'i Davide; aa ie nipea-bolañe, niambesatse hikama i mpanjakay. ²⁵ Niambesatse amy fiambesa'ey i mpanjakay, manahake ty lili'e, amy fiambesatse mioza amy rindriñey; nijohañe t'Ionatane, vaho niambesatse aña'ila' i Saole eo ty Abnere; fe nikòake ty fiambesa' i Davide. ²⁶ Tsy nisaontsy ndra inoñ' inoñe amy andro zay t'i Saole, fa hoe ty natao'e: Va'e nifetsahan-draha; he t'ie maleotse; tsy malio. ²⁷ Ie amy loak' andro manonjohy i pea-bolañeiy, i andro faharoey, naho nikoake ty fiambesa' i Davide; le hoe t'i Saole am' Ionatane ana'e: Akore te tsy nimb' am-pikamàñe mb'etoa i ana' Iisay, ndra omale ndra androany? ²⁸ Le hoe ty natoi' Ionatane amy Saole: Nihalalia' i Davide t'ie hienga mb'e Betlekhemé mb'eo; ²⁹ ami'ty hoe: Ehe, angao hiavotse raho, fa misoroñe an-drova ao o longokoo vaho nañambara' ty rahalahiko hiatreke; aa naho nahatendreke fañisohañe am-pihaino'o le adono hihitrike mb'eo handrendreke an-drolongoko. Aa le tsy niheo mb' am-pandambaña' i mpanjakay atoa re. ³⁰ Nisolebotse am' Ionatane ty haviñera' i Saole, ami'ty hoe: Ty anan-drakemba-piola mengoke tia, tsy apotako hao te jinobo'o ho an-kasalara'o naho ho ami'ty fimeñaram-piboridañañan-drene'o i ana' Iisaiiy? ³¹ Fa naho mbe veloñe ambone tane atoy i ana' Iisaiiy, le tsy horizan-drehe, ndra ty fifehea'o. Aa le ahitriko mb' amako mb'etoa re, fa mañeva ho mate. ³² Le hoe ty natoi' Ionatane amy Saole rae'e: Aa vaho ino ty hañohofan-doza ama'e? Nanao inon-dre? ³³ Aa le nahiriri' i Saole ama'e i lefo'ey; vaho napota' Ionatane te tampa-kevetse ty rae'e hanjevoñ' i Davide. ³⁴ Niavotse i fandambañañey t'Ionatane ampiforoforoñañe, naho tsy nikama amy andro faharoe' i volañeiy; ami'tie nirovetse i Davide vaho nisalaren-drae'e.

³⁵ Ie amy loak' àndroy, le niavotse mb' an-kivoke aña t'Ionatane reketse ty anak' ajalahy ty amy namantaña'e i Davidey. ³⁶ Le hoe re amy ajalahiy: Akia, hitriko an-day o ana-pale hahiririkoo. Aa ie nilay i ajalahiy le nahiriri'e ty ana-pale hilosora'e amy ajalahiy. ³⁷ Le nipok'an-toe' i ana-pale nahiriri' Ionataney i ajalahiy, le hoe ty koi' Ionatane amy ajalahiy, Tsy ambali'o ey hao i ana-paley? ³⁸ Le hoe ty fipaza' Ionatane amy ajalahiy: Malisà rehe, masikà, ko mitoboke ey. Le natonto' i ajalahiy o ana-paleo vaho nimb' amy talè'ey mb'eo. ³⁹ Fe tsy napota' i ajalahiy; Ionatane naho i Davide avao ty nahafohiñe. ⁴⁰ Natolo' Ionatane amy ajalahiy o fialia'eo le nanoa'e ty hoe: Akia, endeso an-drova ao retoy. ⁴¹ Ie aña i ajalahiy, le

niongak' an-toe'e atimo ao t'i Davide, naho nibabok' an-dahara'e an-tane, niondreke intelo; naho nifañoroke iereo vaho nifampirovetse, i Davide ty nandikoatse. ⁴² Le hoe t'Ionatane amy Davide: Akia am-panintsñañe, amy nititihan-tika an-tahina' IEHOVÀ ty hoe: Ho añivon-tika roe t'IEHOVÀ, naho añivo' o tirikoo naho o tiri'oo nainai'e.

21

¹ Aa le nienga re nañavelo mb'eo vaho nimoak' an-drova ao t'Ionatane. ² Niheo mb'amy Nobe* mb' amy Akimeleket[†] mpisoroñe mb'eo t'i Davide le nihondrahondra mb'amy Davide mb'eo t'i Akimeleke, nanao ty hoe: Manao akore te ihe jòriñe tsy ama'ondaty? ³ Le hoe t'i Davide amy Akimeleke mpisoroñe; namantok' ahy i mpanjakay ami'ty hoe: Ko ampahoniñe'o ndra ia'ia o añirahako azoo, i nandiliako azoy; vaho fa niraheko mb'an-koe' an-koe o ajalahio. ⁴ Aa le ino ty ambane fità'o? vongamofe lime? atoloro an-tañako, ndra ze zoeñe ao. ⁵ Le hoe ty natoi' i mpisoroñey amy Davide: Tsy ama' mofo tsotra, fa mofo miavake avao naho toe tsy nañarine ampela o ajalahio.

⁶ Le hoe ty natoi' i Davide amy mpisoroñey, Toe sinebañe tsy ho ama'ay o ampelao ze andro telo zay; ie niakatse mb'etoa, le miavake ty horo' o ajalahio ndra te tsotra ty lia, àntsak' anito te hiavake o horo' iareoo. ⁷ Aa le tinolo' i mpisoroñey mofo miavake; fa tsy tao ty mofo naho tsy i mofo miatreke natsoake boak' añatrefa' IEHOVÀ nasolo ty mofo mafana amy andro nampitsoahañe azeiy. ⁸ (Teo amy andro zay ty mpitoro' i Saole, tambatse aolo' IEHOVÀ; i Doege ty tahina'e, nte-Edome, mpiaolo o mpiara' i Saoleo.) ⁹ Le hoe t'i Davide amy Akimeleke: Tsy ho ambanem-pità'o atoa hao ty lefoñe ndra fibara? zaho tsy ninday ndra fibara ndra o fialiakoo amy te nimeke ty raha' i mpanjakay. ¹⁰ Le hoe i mpisoroñey: ty fibara' i Goliate nte-Pilisty zinevo'o am-bavatane' i Elà, ingo, miforokoko an-damba an-kalo' o kitambeo; rambeso t'ie no'o; fa tsy aman-tovo'e ty atoa. Le hoe t'i Davide, Tsy eo ty mañirinkiriñe aze, atoloro ahy.

¹¹ Niongak' amy zao t'i Davide, nibioñe mb'eo ami'ty fihembaña'e i Saole vaho nimb'e Akise‡ mpanjaka' i Gate mb'eo. ¹² Le hoe ty asa' o mpitoro' i Akiseo ama'e: Tsy i Davide mpanjaka' i taney hao toke? Tsy ie ty nitakasie' iereo an-tsinqake, ty hoe: Fa namono ty arivo'e t'i Saole, naho ty aleale'e t'i Davide? ¹³ Nahaja' i Davide an-tro'e ao i entañe zay, vaho nihembaña'e t'i Akise mpanjaka' i Gate. ¹⁴ Aa le novae'e añatrefa' iereo ty vinta'e nanao sare gege am-pità' iareo, nanokitsokitse an-dalam-bey eo naho nampiorihe'e am-bolon-tsoma'e ty ïve'e. ¹⁵ Le hoe t'i Akise amo mpitoro'eo, Heheke te seretse t'indaty tiañe; ino ty nandesa' areo aze amako? ¹⁶ Mipay ondaty gege hao raho te nandesa' areo atoy hihisa ami'ty hagegea'e añatrefako etoa? Himoak' añ' anjombako ao hao t'indaty tia?

22

¹ Aa le nienga t'i Davide, niherereake mb'an-dakato' i Adolame* ao, le ie jinanji' o longo'eo naho i anjomban-drae'e iabiy le nizotso mb'ama'e mb'eo. ² Ze hene niampopheke, naho o mpisongoo, naho o nafaitse antrokeo ro nifanontoñe ama'e ao, le nifehè'e; va'e efajato o nirekets' ama'eo. ³ Niakatse boak'ao t'i Davide nimb'e Mitspè e Moabe mb'eo, le nanao ty hoe amy mpanjaka' i Moabey. Ehe apoho holy mb' etoa hey ty

* ^{21:2} Nobe: ankaboña † ^{21:2} Akimeleke: rahalahim-mpanjaka ‡ ^{21:11} Akise: boseke

* ^{22:1} Adolame: taro'e; tsindro'e, rava'e

raeko naho i reneko ho ama'o ampara' te fantako ty hanoen' Añahare amako. ⁴ Aa le nasese'e añatrefa' i mpanjaka' i Moabey iereo vaho nimoneñe ama'e ao amy ze andro iaby naха am-pipalirañ' ao t'i Davide. ⁵ Le hoe ty Gade,[†] mpitoky, amy Davide, ko mipalitse an-kijoly ao; iengao le akia mb'an-tane' Iehodà aňe. Aa le nienga t'i Davide naho nimoak' amy ala' i Keretey[‡] ao.

⁶ Jinanji' i Saole te nioniñe t'i Davide rekets' o mpiama'eo; niambesatse e Gibà t'i Saole ambane' ty hatae e Ramà ao, am-pit 'e ty lefo'e, vaho nijohanjoha e a ariseho aze iaby o mpitoro'eo; ⁷ le hoe t'i Saole amo mpitoro'eo mijoha e ama'eo, Mijanji a ry nte-Beniamineo, Tinolo' i ana' Iisaiiy teteke naho tanem-bahe iaby hao nahareo; songa hanoe'e mpifelek' arivo naho mpifehe-zato hao? ⁸ kanao sindre mikilily ahy, leo raike tsy nampiboak' amako te nifa ina amy ana' Iisaiy i anakoy, le tsy eo ty manahelo ahy hitalilia'e te nitroboe' i anakoy i mpitorokoy, hamandro a'e ahiko, manahake androany? ⁹ Le hoe ty natoi' i Doege[§] nte Edome, i natao ambone' o mpitoro' i Saoleoy: Nitreako te nimb'e Nobe mb'e Akimelek' ana' i Ahitobe mb'eo ty ana' Iisay. ¹⁰ Ie na ontane am' IEHOV A ho aze naho nivatie'e vaho natolo'e aze ty fibara' i Goliate nte-Pilstiy. ¹¹ Aa le nampa ntrife' i mpanjakay t'i Akimeleke mpisoro ne ana' i Ahitobe naho i anjomban-drae'e iabiy, o mpisoro ne e Nobeo; le fonga niheo mb' amy mpanjakay mb'eo. ¹² Le hoe t'i Saole: Mijanji a henaneo ry ana' i Ahitobe; le hoe ty natoi'e, Intoy raho tal ko. ¹³ Le hoe t'i Saole ama'e: Akore ty nikini a'reo ahiko, ihe naho i ana' Isaiy, kanao tinolo'o mofo naho fibara vaho na ontane aman' Añahare ty ama'e, soa t'ie hitroatse amako, hiampira'e, manahake androany. ¹⁴ Tinoi' i Akimeleke i mpanjakay ami'ty hoe: Aa vaho ia amo mpitoro'oo ty atokisa ne mandikoatse i Davide, vinanto' i mpanjakay, i ma ao ne o fandilia'o iabio naho iasia ne a anjomba'o ao? ¹⁵ Androany hao ty na ontaneako aman'Añahare ho aze? mitotse ahy zay; ehe te tsy asar ' i mpanjakay ndra ino ' ino ne amy mpitoro'ey naho aman' anjomban-droaeko; fa ke maro he tsy ampe tsy apota' o mpitoro'oo o raha zao. ¹⁶ Le hoe i mpanjakay: Tsy mete tsy havetrake rehe Akimeleke rekets' o anjomban-drae'o iabio. ¹⁷ Le hoe i mpanjakay amo mpigaritse nijohanjoha e ama'e eo iabio; Mitoliha, fonga zamano o mpisoro' IEHOV O; amy te mpiamy Davide ka ty fit ' iareo naho napota' iareo t'ie nibio ne fa tsy naboa' iareo amako. Fe tsy nimete na nity fit ne hiambotrake amo mpisoro' IEHOV O o mpitoro' i mpanjakaio. ¹⁸ Le hoe i mpanjakay amy Doege: Mitoliha, ambotraho o mpisoro ne. Aa le nitolike t'i Doege nte Edome, niambotrak' amo mpisoro ne vaho zinama'e amy  ndroy t'indaty valompolo-lim' amby mpisiki ne i kitambe l niy. ¹⁹ Le fonga binaibai'e an-dela-pibara ty Nobe, i rova' i mpisoro ne reiy, lahilahy naho ampela, ajaja naho anak' ajaja minono, a nombe naho bor ke vaho a ondry an-dela-pibara.

²⁰ Nipoliotse a e ty raik' amo ana' i Akimelek' ana' i Ahitobeo, Abiatare ty tahina'e, nitriban-day mb'amy Davide mb'eo. ²¹ Natalili' i Abiatare* amy Davide te zinama' i Saole o mpisoro' IEHOV O. ²² Le hoe t'i Davide amy Abiatare, Napotako amy andro zay, kanao tao t'i Doege nte Edome le tsy mete tsy hitalily amy Saole; zaho ty nahavilasy o hene ondatin' anjomban-drae'oo. ²³ Mimone a amako, le ko hemba ne fa i mipay ty fiaikoy ro mipay ty azo ka; le am-pitsolohan-drehe te amako.

[†] 22:5 Gade: mpirai-lian-dahin-defo ne [‡] 22:5 Kerete: ala mikiteke [§] 22:9 Doege: mpihakahaka

* 22:21 Abiatare: rae fanjaka; rae' o sehanaga'eo

23

¹ Natalily amy Davide ty hoe: Inao te maname i Keilà* o nte-Pilstio, vaho tavane' iareo o toe-pifofohañeo. ² Aa le nañontane am' IEHOVÀ t'i Davide, ami' ty hoe: Homb'eo hao raho, handafa o nte-Pilstio? Aa hoe t'IEHOVÀ amy Davide, Akia lafao o nte-Pilstio vaho rombaho t'i Keilà. ³ Fe hoe o mpiamy Davideo ama'e, Toe mahahembañ' anay ty e Iehodà atoa, antsake t'ie mb'e Keilà naho mb' amo lahindefon-te-Pilstio. ⁴ Aa le nañontane IEHOVÀ indraike t'i Davide, le hoe t'IEHOVÀ ama'e, Miongaha, mizotsoa mb'e Keilà mb'eo vaho hatoloko am-pitâ'o o nte-Pilstio. ⁵ Aa le nimb'e Keilà mb'eo t'i Davide rekets' o mpiama'eo, naho nialy amo nte-Pilstio vaho tinava' iareo o añombe' iareo iabio; linafa am-pizamanañe jabajaba. Toe rinomba' i Davide o mpimone' i Keilào. ⁶ Ie nipoliotse mb' amy Davide mb'e Keilà mb'eo t'i Abiatare ana' i Akimeleke, le nizotso reketse kitambe am-pitâ'e.

⁷ Natalily amy Saole te nimb'e Keilà t'i Davide, le hoe t'i Saole: Fa natolon' Añahare an-tañako; ie migabeñe an-drova aman-dalam-bey naho sikadañe ao. ⁸ Songa natonto' i Saole hihotakotake ondatio, hizotso mb'e Keilà mb'eo hijarikatoke i Davide naho ondati'eo. ⁹ Napota' i Davide te nikinia raty aze t'i Saole le hoe re amy Abiatare mpisoroñe: Endeso atoy i kitambey. ¹⁰ Le hoe t'i Davide: Ry IEHOVÀ Andrianañahare' Israele, Toe jinanji' i mpitoro'oy te mipay ho mb'e Keilà mb'atoa t'i Saole, handrotsake ty rova toy ty amako. ¹¹ Hatolo' ondati' i Keilào am-pitâ'e hao raho? Hizotso mb'etoa hao t'i Saole ty amy tsinanokoy? Ry IEHOVÀ Andrianañahare' Israele, miambane ama'o, atalilio amo mpitoro'oo. Le hoe t'IEHOVÀ: Hizotso re. ¹² Le hoe t'i Davide: Hatolo' ondati' i Keilào am-pitâ' i Saole hao raho? Le hoe t'IEHOVÀ, Hatolo' iareo. ¹³ Aa le nibioñe mb' amy ze nimete aña t'i Davide naho ondati'eo, ie ni-enen-jato varâñe. Natalily amy Saole te nienga i Keilà t'i Davide, le nado'e ty lia'e mb'eo.

¹⁴ Nimoneñe am-patrambey aña am-pipalirañe ao t'i Davide, le nitambatse am-bohibohim-patrambei' i Zife[†] aña. Nitsoek' aze boak' andro boak' andro t'i Saole f'ie tsy natolon' Añahare am-pitâ'e. ¹⁵ Nioni' i Davide te niavotse mb'eo hipay ty fiai'e t'i Saole; ie am-patrambei' i Zife amy alay t'i Davide. ¹⁶ Niavotse amy zao t'Ionatane ana' i Saole vaho nimb' amy Davide amy alay ao; le nampahaozare'e ty fitâ'e aman' Añahare; ¹⁷ ie nisaontsie'e ty hoe: Ko hemban-drehe; fa tsy ho oni-pitâ' i Saole raeko; le ihe ty ho mpifehe Israele vaho ho mpiama'o raho; toe fohi' i Saole raeko. ¹⁸ Aa le nifañina añatrefa' IEHOVÀ eo iereo roe; nimoneñe aña' ala ao t'i Davide, vaho nimpoly mb' an-kiboho'e aña t'Ionatane.

¹⁹ Niheo mb'amy Saole e Gibà mb'eo o nte-Zifeo nanao ty hoe: Tsy mietak' ama'ay, amo fipalirañe amy alaio hao t'i Davide? an-kaboa' i Kakilà[‡] atimo' Iesimone[§] ao? ²⁰ Aa le mizotsoa mb'eo ry mpanjaka, mizotsoa an-kapean-tsattrin' arofo'o, le hatolo'ay am-pitâ' i mpanjakay. ²¹ Le hoe t'i Saole; Ho tahie' IEHOVÀ, ami'ty fitretreza' areo ahy. ²² Akia arè, venteo le arendreho indraike, vaho oniño i toem-pipalira'ey; fa inao, toe mpamañahy re. ²³ Aa le arendreho naho fohino o toem-pipalira'eo, le mibaliha mb'amako mb'etoa reketse i niventeñey vaho hindrezako; ie amy zay, kanao an-tane ao re, le ho kodebèko amo arivo' Iehodao. ²⁴ Aa le niavotse iereo niaolo i Saole mb'e Zife mb'eo; fe tan-dratraratra' i Maone*

* 23:1 Keilà; manampake, manjara; aman-kijoly † 23:14 Zife: ty vava tia; fandañirañe ‡ 23:19 kakilà: ama'e ao ty fitamako § 23:19 Iesimone: bañgiñe; mangoakoake * 23:24 Maone: anjomba: toen-kakeo

añe t'i Davide naho ondati'eo, aña'Arabà atimo' Iesimone ao. ²⁵ Nimb'eo t'i Saole rekets' o mpiama'eo hitsoek' aze. Nitalilieñe t'i Davide; aa le nizotso mb'an-damilamy mb'eo re niambesatse an-dratraratra' i Maone ao. Ie jinanji' i Saole zay le nihoridàñe'e t'i Davide an-dratraratra' i Maone aña. ²⁶ Añ' ila' i vohitsey atoy t'i Saole le aña' ila'e aroa t'i Davide naho o mpiama'eo; nalisa nienga ty fiatrefa' i Saole t'i Davide, fa hiarikoboñe i Davide naho ondati'eo t'i Saole naho ondati'eo hitsepak' aze. ²⁷ Fe nivotrak' amy Saole ty mpihitrike, nanao ty hoe: Masikà, mihavia, fa mitavañe ty tanen-tika o nte-Pilstio. ²⁸ Aa le nimpoly t'i Saole tsy nañoridañe i Davide fa nionjomb' amo nte-Pilstio mb'eo; aa le natao Sela-Kamalekote[†] i toetsey.

24

¹ Nionjoñe boak' ao t'i Davide vaho nimoneñe an-kijoli' i En-gedy* ao. ² Aa ie nimpoly amy nañorihañe o nte-Pilstioy t'i Saole le natalily aze ty hoe: Inao! am-patrambey En-Gedy aña t'i Davide. ³ Rinambe' i Saole amy zao t'indaty telo arivo jinoboñe amy Israele, hipay i Davide am-batovatoe' o ose-lìo. ⁴ Nivotrak' an-dian' añondry ao re le teo ty lakato añolon-dalañe ey, nizilik' ao t'i Saole hanaroñe o fandia'eo ie am-po' ao t'i Davide naho o mpiama'eo. ⁵ Le hoe o mpiamy Davideo ama'e: Intoy ty andro nafè' IEHOVÀ ama'o ty hoe: Inao! hatoloko am-pità'o i rafelahi'oy, hanoe'o ama'e ze satrie'o. Aa le niongake t'i Davide le tinampa'e am-pianiñane ty riran-tsarimbo'e. ⁶ Ie amy zao, namofoke i Davide ty arofo'e ty amy nanampaña'e i riran-tsarimbo' i Saoleiy. ⁷ Le hoe re amo mpiama'eo: Sondo'e am'IEHOVÀ, te hanoko amy talèkoy o raha zao, amy najado' IEHOVÀ, t'ie hañity tañañe amy noriza' IEHOVÀ. ⁸ Aa le sineba' i Davide amy entañe zay ondati'eo, tsy nenga'e hiambotrak' amy Saole. Niavotse amy lakatoy amy zao t'i Saole nimb' amy lia'ey mb'eo. ⁹ Aña zay, le niongake ka t'i Davide niakatse i lakatoy naho nikoihe'e amy Saole ty hoe: Ry talèko mpanjaka. Ie nitolike t'i Saole hioniñe mañamboho, le nababo' i Davide mb'an-tane ty lahara'e vaho nidrakadrakake.

¹⁰ Le hoe t'i Davide amy Saole: Aa vaho akore te haoñe'o o enta' ondatio manao ty hoe: Inao! mipay hijoy azo t'i Davide? ¹¹ Heheke! isam-pihaino'o henaneke te natolo' IEHOVÀ an-tañako amy lakatoy rehe anindroany; eo ty nañosik' ahy hañooho-doza ama'o, f'ie niferenaiña' o masokoo vaho hoe raho: Tsy hahitiko mb' amy talèkoy ty tañako; amy t'ie noriza' IEHOVÀ. ¹² Tovo'e ry aba, hehe ty riran-tsarimbo'o an-tañako toy; amy nanampañako o sarimbo'oy, fe tsy vinonoko; arendreho naho mahaoniña te tsy an-karatiañe ndra fiolàñe o tañakoo vaho tsy nandilatse ama'o ndra te voñone'o ty fiaiko hitavañe aze. ¹³ IEHOVÀ ty hizaka añivo'o naho zaho, le IEHOVÀ ty hamale fate ahy ama'o; fa tsy ho ama'o ka ty tañako. ¹⁴ Fa hoe ty razan-tsaontsi' o taoloo: Boak' amo lo-tserekeo ty iboaha' ty halò-tserehañe; fe tsy ho ama'o ty tañako. ¹⁵ Hañoridañ' ia ty niakara' i mpanjaka' Israeley? ty amboa mate, he ty pia. ¹⁶ IEHOVÀ arè ty hizaka, hinday tsara añivoko naho ihe, hivazoho, hitaroñe ahy, hamotsora'e am-pità'o.

¹⁷ Ie amy zao, naho fa nagado' i Davide i lañona'e amy Saoley, le hoe t'i Saole: Feo'o hao zao ry anako Davide? Nipoñña-peo amy zao t'i Saole, nirovetse. ¹⁸ Le hoe re amy Davide: Vantañe te amako rehe; soa ty nanoa'o ahy vaho raty ty nanoako azo; ¹⁹ vaho nitalilie'o anindroany ty nanoa'o

* 23:28 Sela-Kamalekote: Vato fisarahañe * 24:1 En-gedy: rano totsake, a i osey, fale

ahy, te natolo' IEHOVÀ am-pità'o, le tsy zinevo'o. ²⁰ Aa naho tendrek' am' ondaty i rafelahi'ey, henga'e hienga hao? Ee t'ie ho tambeza' IEHOVÀ amy hasoa nanoe'o amako anindroaniy. ²¹ Aa inao, apotako t'ie ho mpanjaka, vaho hajadoñe am-pità'o ty fifeheañe Israele. ²² Mifañinà amako arè, amy IEHOVÀ, te tsy haitoa'o o tiriko manonjohy ahio vaho tsy ho mongore'o añ'anjomban-draeko ty añarako. ²³ Le nifanta amy Saole t'i Davide vaho nimpoly t'i Saole; fe nionjomb' amy fipalirañe fatratsey t'i Davide naho ondati'eo.

25

¹ Nihomake t'i Samoele; le hene nifanontoñe ama'e t'Israele nandala aze vaho nalenteke an-kiboho'e e Ramà ao. Niongak' amy zao t'i Davide nizotso mb'am-patrambei' i Parane* mb'eo.

² Teo t'indaty e Moanet[†] ao, e Karmele[‡] aña ty vara'e; mpañaleale indatiy; telo arivo ty añondri'e naho arivo ty ose'e; ie nañitsike o añondri'eo e Karmele aña henane zay. ³ I Nabale[§] ty tahina' indatiy naho Abigàle* ty tahinan-tañanjomba'e. Nahilala naho soa vintañe i rakembay, fe nigañe indatiy, lo-tsereke iaby ze sata'e; tarira' i Kalibò[†]. ⁴ Jinanji' i Davide am-patrambey aña te nañitsike o añondri'eo t'i Nabale, ⁵ le nampihitrik' ajalahy folo mb'eo t'i Davide, naho hoe ty namantoha' i Davide i ajalahy rey: Mionjona mb'e Karmele mb' amy Nabale mb'eo vaho añontaneo ami'ty añarako. ⁶ Le isaontsio ty hoe, Mahaveloñe, fañanintsiñe ama'o, fierañerañañe ami'ty anjomba'o naho himoneñe soa iaby o vara'oo. ⁷ Tsinanoko aniany t'ie mañitsike[‡]. Tama'ay o mpiara'oo le tsy jinoi'ay, Leo raha raike tsy nipitsok' am' iereo amo hene andro naha te Karmele ao anay. ⁸ Añontaneo o mpitoro'oo hitaliliy azo, Aa ehe te hahaoniñ' isok' am-pihaino'o o ajalahi'oo, kanao pok'eo aña'andro soa; ehe anoloro o mpitoro'oo naho amy Davide ana'oy ze miheo am-pità'o. ⁹ Aa ie nivotrak' eo i mpitoro' i Davide rey, le linaño' iareo amy Nabale i entañe zay ami' ty tahina' i Davide, ie nagado' iareo ¹⁰ le hoe ty natoi' i Nabale amo mpitoro' i Davideo, Ia ze o Davide zao? Ia ze o ana' Iisay zao? Tsiefa ty mpitoroñe mipitsok' amo talè'eo henaneo, ¹¹ aa vaho hangalàko hao o mofo, o ranokoo naho i hena vinonoko ho amo pañitsikooy vaho hatoloko ama' ondaty tsy fohiñe te hirik' aia?

¹² Aa le nitolike o ajalahi' i Davideo, nimpoly vaho nitalilia'e iaby i saontsi'ey. ¹³ Le hoe t'i Davide am' ondati'eo: Songa mampidiàña fibara; nampidiañe fibara ka t'i Davide; le va'e ondaty efa-jato ty nionjoñe mb'eo ampañorihañe i Davide vaho nidok' amo vara'eo ty roan-jato. ¹⁴ Ie amy zao, nitaroñ' amy Abigale, tañanjomba' i Nabale, ty ajalahy, ty hoe: Inao, nampihitrike boak' am-patrambey aña hañontane amy talè'ay t'i Davide; f'ie nitabohazake an-keloke. ¹⁵ Toe nañasoa anay ondatio, tsy nijoie'e vaho ndra kede tsy nipok' ama'ay sikal' amy niharoa'ay am' iareoy; izahay tan-kivok' ao, ¹⁶ le iereo ty nikijoli'ay handro an-kaleñe amo hene andro nitraofa'ay, izahay niarak' o añaondrio. ¹⁷ Aa le mahaoniñà naho tsakoreo ty hanoe'o; fa hankàñe ty ho toly aman-talè'ay naho aña'anjomba'e, amy t'ie ana' i Beliale[§] vaho leo raike tsy mahafisaontsy ama'e.

* ^{25:1} Parane: Fanintsiña' o lakatoo † ^{25:2} Moane: anjomba; toen-kakeo ‡ ^{25:2} Karmele; añaondri-vosy; tata voririke § ^{25:3} Nabale: dagola; tsy mañaoñe * ^{25:3} Abigale: hafalean-drae'e † ^{25:3} Kalibò: amboa, koake; haroñe ‡ ^{25:7} Mañitsik' añaondry § ^{25:17} Beliale: Kokolampa raza'e, Satana

¹⁸ Nihepakepak' amy zao ty Abigale, nandrambe mofo roan-jato naho zonjon-divay roe, naho ty henan' añondry lime hinalankañe, naho famaran-tonon-tsako lime naho angarozam-baloboke maike zato naho garatòn-tsakoa maike roan-jato vaho najò'e am-borìke'e. ¹⁹ Le hoe re amo ajalahi'eo: Akia, miaoloa mb'eo, le horiheko, f'ie tsy nitalily amy Nabale vali'e. ²⁰ Ie amy zao niningi-borìke, nizotso mb'an-kalo' i vohitsey mb'eo le ingo t'i Davide naho o mpiama'eo nifanojo ama'e le nigaoña'e. ²¹ Ie vaho nanao ty hoe t'i Davide: Toe tsy vente'e ty nañambenako o fonga vara' indatiy am-patrambey atoio, ie ndra raik' amo fanaña'eo tsy nipoke, le hehe te raty ty navale'e ahy ty amy soay. ²² Aa ehe te hanoen' Añahare amo rafelahi' i Davideo naho mandikoatse zay naho eo ty hadoko amo azeo ampara' te porea' ty maraindray ze mamany an-kijoly iaby. ²³ Tendrek' amy Davide amy zao t'i Abigale, le nizotso amy borìkey naho nibabok' aolo' i Davide an-dahara'e vaho nidrakadrakak' an-tane, ²⁴ nikorovok' ampandia'e nanao ty hoe: Anò amako talèko, ehe te ho amako o tahiñe zao, le ehe t'ie henga'o hivolañe añatrefa'o etoa; hijanjiña'o ty fivolam' anak' ampata'o. ²⁵ Ehe tsy ho haoñen-talèko i tsy-jefa'e atao Nabale tia; fa i tahina'ey ro ie; hadagolàñe ty ama'e; fa naho izaho mpitoro'o ampela, tsy nitreako o mpitoron-talèko nampañitrife'oo. ²⁶ Ie amy zao ry talèko kanao veloñe t'IEHOVÀ naho veloñe ka ty arofo'o, oniñe te nisebañe azo t'IEHOVÀ tsy homb' etoa hampiori-dio, naho tsy hamale fate am-pit  o, le ee te hanahake i Nabale o rafelahi'oo vaho ze hipay hañoho-doza amy tal  koy. ²⁷ Ingo ka ry talèko ty ravoravo nandese' i mpitoro  n' ampela'oy amy tal  koy; atoloro amo mpitoro  ne mpiamy tal  koo. ²⁸ Miambane ama'o ehe apoho ty fiol  ' o mpitoro  n' ampela'oo, fa toe hanoe' IEHOVÀ anjomba fatratse ty tal  ko amy te mpifanehak' an-kotakotake ho a IEHOVÀ i tal  koy, vaho mboe tsy nioni  e ama'o amo hene' andro'oo ty hatsivokara  e. ²⁹ Aa ndra te niongake hañorida  e azo t'indaty hipay ty fiai'o, le ho rohiza  e am-pandro  n-kavelo' IEHOVÀ Andriana  nahare' ao ty fiai'o vaho hihiriri  e mb'eo ty fiai' o rafelahi'oo manahake t'ie boak' an-korom-piletse. ³⁰ Ie amy zao, naho fa nanoe' IEHOVÀ iaby ty hasoa nitsarae'e ty ama'o vaho fa noriza'e ho mpifelek' Israele; ³¹ le ehe tsy ho boloko hampitsikapy azo o raha zao, tsy ho sirika a  ' arofon-tal  ko ao, t'ie nampiorike lio tsy aman-tali'e, ke hamale fate am-bata'e ty tal  ko; aa naho fa na  asoa i tal  koy t'IEHOVÀ, le tiahio o anak' ampata'oo.

³² Le hoe t'i Davide amy Abigale: Andria  ne  e t'IEHOVÀ Andriana  nahare' Israele; amy t'ie nirahe'e hifanalaka amako anindroany; ³³ reng  ne ka ty faharendreha'o, naho reng  n-drehe nita  ' ahy tsy homb'eo hampiori-dio ndra hamale fate an-ta  ako. ³⁴ Fa ho nivata'e to, kanao velo  ne t'IEHOVÀ Andriana  nahare' Israele naneba  e ahy tsy hijoy azo, ami'ty falisa'o nifanalaka amako, te leo raik' amo mpamany an-kijolio tsy ho nenga  e amy Nabale ampara' te porea' ty handro. ³⁵ Aa le rinambe' i Davide am-pit  e o nandese'e ama'eo, le hoe re ama'e. Mimpolia ampanints  na  e mb'a  ' anjomba'o mb'eo; ingo fa hinaoko o feo'oo vaho nin  ko ty fiatrefa'o.

³⁶ Nomb' amy Nabale amy zao t'i Abigale; le hehe t'ie nanao sabadidake a  'anjomba'e ao; manahake ty sabadidam-panjaka; le nifale a  ' arofo'e t'i Nabale, amy t'ie nijike; aa le tsy nitalilia'e, ndra kede ndra maro ampara' te porea' ty maraindray. ³⁷ Ie maraidrai  ne, naho fa nijea  e amy Nabale i divaiy, te natalili' i vali'e ama'e i raha rezay vaho nihomak' am-po'e ao ty arofo'e, nijiriga  e hoe vato. ³⁸ Ie modo ty folo andro

varàñe le linafa' IEHOVÀ t'i Nabale vaho nikoromake. ³⁹ Aa naho jinanji' i Davide te nibanitse t'i Nabale, le hoe re; Andriañeñe t'IEHOVÀ, ie nañato ty ahy amy fañinjeañe am-pità' i Nabaley, naho nitana'e tsy hanao raty ty mpitoro'e; vaho nafote' IEHOVÀ ami'ty añambone' i Nabale o hatsivokara'eo, le nampañitrike saontsy amy Abigale t'i Davide t'ie hengae'e ho tañanjomba'e. ⁴⁰ Aa ie nivotrak' amy Abigale e Karmele ao o mpitoro' i Davideo, le nisaontsie'e ty hoe: Nirahe' i Davide ama'o zahay, handrorotse azo ho vali'e. ⁴¹ Niongak' amy zao re, vaho naondre'e mb'an-tane ty lahará'e nanao ty hoe: Oniño te mpitoroñe hanasa o fandiam-pitoro' i talèkoio o anak' ampata'eo. ⁴² Nihepakepak' amy zao t'i Abigale naho niavotse le nijom-borike reketse ty somondrara lime ho mpiama'e; le norihe'e o ira' i Davideo vaho nanoeñe tañanjomba'e. ⁴³ Nengae' i Davide ka t'i Akinoame nte-iezreele, le nivalie'e iereo roe. ⁴⁴ Fa natolo' i Saole amy Faltý ana' i Laise nte Galime i Mikale anak' ampela'e, vali' i Davidey.

26

¹ Niheo amy Saole e Gibà mb'eo o nte Zifeo nanao ty hoe: Tsy mietak' an-kaboa' i Kakilà* aolo' Iesimone ao hao t'i Davide? ² Aa le niavotse mb' am-patrambei' i Zife mb'eo t'i Saole, reketse ty ana' Israele telo-arivo jinoboñe, hikodebe i Davide am-patrambei' i Zife ao. ³ Nitobe an-kaboa' i Kakilà aolo' i fatrambei y añ' olon-dalañe eo t'i Saole. Nipalitse am-patrambey ao t'i Davide vaho nirendre'e te nañoridañe aze mb'am-patrambey mb'eo t'i Saole. ⁴ Aa le nañirake mpitingañe t'i Davide hamente te toe nivotrak' ao t'i Saole. ⁵ Niongake le nimb' amy toetse nitobe'a' i Saole mb'eo t'i Davide vaho nioni' i Davide ty nandrea' i Saole naho i Abnere ana' i Nere, mpifehe' i valobohòkey, te nàndre am-piarikatohañe ao t'i Saole ie nitobe añariary aze ondatio.

⁶ Le hoe t'i Davide amy Akimeleke, nte-Kete naho amy Abisay†, ana' i Tseroià‡, rahalahi' Ioabe, Ia ty hindre amako hizotso mb' amy Saole antobe mb'eo? Le hoe t'i Abisay, Hindrezako. ⁷ Aa le niheo mb' am' ondatio mb'eo haleñe t'i Davide naho i Abisay, le ingo t'i Saole mandre, mirotse añivo' i toetsey eo, i lefo'ey nitsatok' an-tane marine' i añambone'ey vaho nandre niarikoboñe aze t'i Abnere naho ondaty iabio. ⁸ Le hoe t'i Abisay amy Davide: Toe natolon' Añahare am-pità'o androany i rafelahi'oy; aa ehe, angao hataoko tombok' avots' an-defon-dre an-tane eo, vaho tsy hindroeko. ⁹ Fa hoe t'i Davide amy Abisay: Ko joie'o; ia ty hañonjo haok' amy noriza' IEHOVÀ t'ie tsy hanañ' kakeo? ¹⁰ Le hoe t'i Davide; Kanao veloñe t'IEHOVÀ, Aiy! ke ho lafa' IEHOVÀ, he ho avy ty androm-pihomaha'e, he t'ie hizotso an-kotakotake ao hihomake. ¹¹ Sondo'e am' IEHOVÀ te zaho ro hañiti-tañañe amy noriza' IEHOVÀ; fe ehe rambeso i lefoñe añ'ambone'ey naho i zonjon-drano'ey le hienga tika. ¹² Aa le nendese' i Davide i lefoñe naho zonjoñe añambone' i Saoley eo le nienga, leo raik' am'ondateo tsy nahaisake, tsy nahafohiñe vaho tsy nitsekake, songa nirotse amy t'e nampilañahe' IEHOVÀ.

¹³ Aa le nitsake mb'añ'ila'e ey hoeke ey t'i Davide, le nijohañe an-kaboañe eñe; heba'e jabajaba ty añivo' iereo. ¹⁴ Le nikoik' am'ondateo naho amy Abnere ana' i Nere t'i Davide, ami'ty hoe: Tsy manoiñe v'iheo, Abnere? Le hoe ty natoi' i Abnere: Ia-mbao o mikoi' amy mpanjakaio? ¹⁵ Le hoe t'i Davide amy Abnere: Tsy lahitsiay v'iheo? ia ty mañirinkiriñe azo e Israele ao? Aa vaho akore t'ie tsy nahafañambeñe i

* **26:1** Kakilà: ama'e ty fitamako † **26:6** Abisay: raen-dravoravo ‡ **26:6** Tseroià: fanaintaiña' IEHOVÀ

talè'o mpanjakay? Kanao nimb'eo t'indaty hanjevoñe i talè'o mpanjakay. ¹⁶ Tsy soa o nanoe'oo. Kanao veloñe t'IEHOVÀ mañeva harotsake rehe, amy te tsy nahafigaritse ty talè'o noriza' IEHOVÀ. Henteo arè: Aia ty lefo' i mpanjakay, naho i zonjon-drano tam-pikala'ey? ¹⁷ Napota' i Saole ty fiarañanaña' i Davide, le hoe re: Feo'o hao zao ry anako Davide? Le hoe t'i Davide: Feoko 'nio, ry talèko mpanjaka. ¹⁸ Le hoe re: Ino ty hañoridaña' i talèkoy i mpitoro'ey? Ino o nanoekoo? Ino ty hakeo an-tañako ao? ¹⁹ Aa le miambane ama'o raho, ehe te hijanjiñe o vola' i mpitoro'eio ty talè mpanjakako. Naho IEHOVÀ ty nitrobo azo amako le ehe te ho no'e t'ie hisoroñañe; fe naho o ana' ondatio le fatse añatrefa' IEHOVÀ iereo; ie nanao soik' ahy henaneo tsy hifaharako amy lova' IEHOVÀ ami'ty hoe: Akia, mitoroña 'ndrahare ila'e. ²⁰ Aa le ko ampiorihe'o an-tane añatrefa' IEHOVÀ ty lioko; fa toe nimb' etoa ty mpanjaka' Israele hikodebe ty pia, manahake ty fikeheañe kibo am-bohitse ey.

²¹ Aa le hoe t'i Saole: Toe nandilatse raho; mimpolia rehe Davide, anako, fa tsy ho robaheko ka; amy te nisarotse am-pahaoniña'o ty fiaiko anindroany; ingo t'ie nanao sare-gege, le loho nandilatse. ²² Aa hoe ty natoi' i Davide: Ingo ty lefo' i mpanjakay! ampañitrifo aze atoy ty ajalahy. ²³ Toe songa ho valea' IEHOVÀ ondatio ami'ty havañona'e, naho ami'ty figahiña'e; fa natolo' IEHOVÀ an-tañako rehe anindroany, le nifoneñako tsy hañity tañañe hijoy ty noriza' IEHOVÀ. ²⁴ Aa kanao nonjoneñe ami'ty masoko ty fiai'o anindroany le ehe te honjoneñe am-pihaino' IEHOVÀ ka ty aiko hamotsora'e ahy amy ze fangovitañe iaby. ²⁵ Le hoe t'i Saole amy Davide: Ho tahie'e rehe Davide anako; toe hitoloñe an-kaozaran-drehe vaho handreketse. Aa le nienga t'i Davide naho nimpoly añ'akiba'e aña t'i Saole.

27

¹ Aa hoe ty fitsakorean-tro' i Davide: Indraik' andro ke ho faopaohem-pità' i Saole raho; aa ino ty hahasoa ahy mandikoatse te hibioñe mb'an-tane' o nte-Pilistio mb'eo; toe hafoe' i Saole raho tsy hipay ahy an-tane Israele ao ka; aa le ho poliorako o fità'eo. ² Niavotse amy zao t'i Davide nitsake mb'eo rekets' i lahilahy enenjato mpiama'e rey; mb' amy Akise, ana' i Maòke, mpanjaka' i Gate mb'eo. ³ Aa le nindre nimoneña amy Akise e Gate ao t'i Davide, ie naho ondati'eo, songa an-kasavereña'e naho i Davide rekets' i vali'e roe rey, i Akinoame nte-Iezreele, vaho i Abigale nte Karmeles, nivali' i Nabaley. ⁴ Ie natalily amy Saole te nivoratsake mb'e Gate aña t'i Davide; le tsy nipaia'e ka. ⁵ Le hoe t'i Davide amy Akise: Aa naho nahatrean fañisohañe am-pihaino'o raho, le anoloro toetse raik' amo rova an-kalokeo; fa ino ty himoneña' ty mpitoro'o an-drovam-panjaka mindre ama'o atoa? ⁶ Natolo' i Akise aze ty Tsiklage* amy andro zay; aa le atao hanañam-panjaka' Iehodao pak' androany ty Tsiklage. ⁷ Le ty hamaro' ty andro nimoneña' i Davide an-tane' o nte-Pilistio: taoñe raike-tsi-efabolañe.

⁸ Nionjoñe mb'eo amy zao t'i Davide rekets' o mpiama'eo, naname o nte-Gesorio† naho o nte-Gizrio‡ vaho o nte-Amalekeo, amy t'ie nimoneña an-tane haehae, amy fañaveloa'o boak'e Sore pak'an-tane Mitsraimey.

⁹ Zinevo' i Davide i taney, le tsy napo'e ho veloñe ndra lahilahy ndra ampela, naho tinava'e iaby o añondrio naho o añombeo naho o borìkeo naho o ramevao vaho o saroñe. Le nimpoly mb'e Akise mb'eo. ¹⁰ Le

* 27:6 Tsiklage: fañaranañe hinotsokotsoke † 27:8 Gesory: fitalakesañe; vavatane mifahetse
‡ 27:8 Gizry: manjara

hoe t'i Akise: Aia ty nañatsafa'o lalañe anindroany? Le hoe t'i Davide: Añ'ila' Iehodà atimo aña, naho atimo' o nte-Ierakmileo§ mb' atimo' o nte-Kenio. ¹¹ Ndra lahilahy ndra ampela tsy nado' i Davide ho veloñe hera hitaroñeñe amy Gate ty hoe: Zao ty nanoe' i Davide. Ie ty nanoe'e amo hene andro naha-tan-tane' o nte-Pilstio azeo. ¹² Niantok' i Davide t'i Akise, ie nanao ty hoe: Toe nampitrotrotse vatan-dre am'ondati'e Israeleo; aa le ho mpitoroko nainai'e.

28

¹ Ie amy andro zay, nifanontoñe hifañotakotak' añ' aly am'Israele o lahin-defon-te-Pilstio; le hoe t'i Akise amy Davide, Mahafohina an-katò t'ie ro hindre amako mb'an-kotakotake rekets' ondati'oo. ² Le hoe t'i Davide amy Akise, Toe ho isa'o ty hanoe' o mpitoro'oo. Le hoe t'i Akise amy Davide: Aa le ihe ho mpañambeñe ty lohako nainai'e.

³ Ie amy zao fa nivilasy t'i Samoele le hene nandala aze t'Israele naho nalente' iareo e Ramà an-drova'e ao.

Toe fa natao' i Saole soike amy taney ze jiny naho mpandrombo. ⁴ Aa le nifanontoñe naho nimb'e Soneme* mb'eo o nte-Pilstio naho nitobe eo; fonga natonto' i Saole ka t'Israele vaho nitobe e Gilboa† ao. ⁵ Aa ie nioni' i Saole ty hatsifotofoto' o nte-Pilstio, le nihembañe vaho nangebahebake añ' arofo. ⁶ Nañontanea' i Saole t'IEHOVÀ, fe tsy nanoiñe aze t'IEHOVÀ, ndra ami'tynofy ndra ami'ty #Orime ndra am-pitoky. ⁷ Aa le hoe t'i Saole amo mpitoro'eo: Ipaiao rakemba jiny hombàko hañontaneako. Le hoe o mpitoro'eo ama'e: Inao, te Endore ao ty rakemba jiny\$. ⁸ Aa le nañova vintañe t'i Saole naho nañova saroñe naho nindre lia ami'ty lahilahy roe vaho nivotrak' amy rakembay haleñe; le hoe re, ehe miambane ama'o mizekèa ho ahy naho tropòho hiakara' i ho toñoneko tahinañe ama'oy. ⁹ Le hoe i rakembay ama'e, Inao, toe fohi'o i nanoe' i Saoley, te niroahe'e an-tane atoy o jinio naho o doanio; aa le ino ty andamaha'o fandrik' ami'ty fiaiko, hampikenkañe ahy? ¹⁰ Aa le nifanta ama'e t'i Saole amy IEHOVÀ ami'ty hoe: Kanao veloñe t'IEHOVÀ, tsy hanan-kakeo rehe amo raha zao. ¹¹ Le hoe i rakembay: Ia ty hakareko? Le hoe re: ampionjono t'i Samoele.

¹² Aa ie nahaoniñe i Samoele i rakembay le nikoaik' am-peo mafe; le hoe i rakembay amy Saole, Ino ty namañahia'o ahy? Toe ihe o Saoleo! ¹³ le hoe i mpanjakay ama'e, Ko hemban-drehe. Ino o oni'oo? Le hoe i rakembay amy Saole, nahatrea zañahare mionjoñe boak' an-tane ao. ¹⁴ Le hoe re, Manao akore ty vinta'e? Le hoe re: Mb'et oa t'indaty bey mikolopoke sarimbo. Le nifohi' i Saole t'ie i Samoele vaho nidrakadrakak' an-tane niambane ama'e. ¹⁵ Le hoe t'i Samoele amy Saole, Ino ty nitsoborea'o ahy hampionjona'o? Le hoe t'i Saole, Am-poheke raho; mialy amako o nte-Pilstio fe nienga ahy t'i Andrianañahare, tsy manoiñe ahy ka ndra am-pitoky ndra ama'nofy; aa le nikoiheko rehe hampahafohiñ' ahy ty hanoeko. ¹⁶ Aa le hoe t'i Samoele, ino arè ty hañontanea'o ahy kanao namorintseñ' azo t'IEHOVÀ vaho fa rafelahi'o re henaneo? ¹⁷ Fa toe nanoe' IEHOVÀ i nitsarae'e amakoy! Toe tinava' IEHOVÀ ama'o ty fifehea'o vaho fa natolo'e an-drañe'o Davide; ¹⁸ amy te tsy nihaoñe'o ty fiarañanaña' IEHOVÀ, tsy nihenefe'o amy Amaleke ty haviñera'e miforoforo; toly ndra nampifetsaha' IEHOVÀ o raha zao anindroany. ¹⁹ Aa le hatolo' IEHOVÀ am-pit'a'o nte-Pilstio t'Israele naho ihe ka, le hitraok' amako rehe naho o

§ **27:10** Ierakmile: fitretrezan' Añahare, fikokoa'e * **28:4** Soneme: Fitofañe roe † **28:4** Gilboa: fañody mivarimbariñe ‡ **28:6** Orime: vatosoa fikanjiañe an' A'hare § **28:7** Endore: rano figoangoañe an-tsa'e

ana-dahi'oo te maray; vaho hasese' IEHOVÀ am-pità' o nte-Pilstio i tobe' Israeley.

²⁰ Nilàntsiñe an-tane eo ami'ty hajoalan-tsandri'e t'i Saole fa nireven-dreveñé, ty amy enta' i Samoeley; ie tsy aman-kaozarañe, fa tsy nikama mofo amy àndroy ndra amy haleñé iabiy. ²¹ Aa le nañarine amy Saole i rakembay vaho nioni'e te nangebahebake ty fiai'e, le hoe re ama'e: Inay! hinao' o mpitoroñ' ampela'oo ty fiarañanaña'o, naho napoko an-tañako ty fiaiko le nihaoñeko o saontsy nanoe'o amakoo; ²² aa ehe te ho haoñe'o ka ty feo' o anak' ampata'oo, le angao hanjotsaoko mofo minjilite'e; vaho mikamà hihaozara'o, hañaveloa'o mb' am-pomba'o mb'eo. ²³ F'ie nifoneñé, ami'ty hoe: Tsy hihinan-draho. Aa le sambe nandrisik' aze o mpitoro'eo rekets' i rakembay vaho hinao'e o fiarañanaña' iareoo. Nitroatse boak' an-tane re le niambesatse am-pandreañé eo. ²⁴ Nanañe bania vinondrak' añ' anjomba'e ao i rakembay, le nihepakepake nandenta aze; le rinambe'e ty mona, naho nibokobokoe'e naho nitoñafe'e ama'e ty mofo tsy aman-dalivay; ²⁵ vaho nazotso'e amy Saole, naho amo mpitoro'eo; le nikama iereo. Niongak' amy zao iereo niavotse mb'eo haleñé.

29

¹ Natonto' o nte-Pilstio e Afeke eo ty valobohò' iareo vaho nitobe marine i rano migoangoa' Iezreeley o ana' Israeleo. ² Aa ie nandahatse o mpirailia'e zato naho arivoo o talèm-Pilstio, le nivoly i Akise t'i Davide naho ondati'eo. ³ Le hoe o talèm-Pilstio; Manao inoñ' atoy o nte-Evreo? Le hoe ty natoi' i Akise amo talèm-Pilstio, Tsy i Davide hao i mpitoro' i Saoley nimpiamako tamy andro zay, o taoñe rezaoy? Ie mboe tsy nahatreavako hila mifototse amy nivotraha'e amako pake henaneo. ⁴ F'ie niboseha' o talèm-Pilstio le hoe ty asa' o talèm-Pilisitio ama'e: Ampolio hibalike mb'amy toetse natolo'o azey mb'eo tsy hindre aman-tika an-kotakotak' ao tsy mone hivalike ho rafelahy t'ie mialy, inoñe ty ho fifampilongoña soa ama'e naho i talè'ey naho tsy o loha' ondaty retiañeo? ⁵ Tsy ie hao i Davide nitakasie' iereo an-tsinjake ty hoe: Zinama' i Saole o arivo'eo naho i Davide o aleale'eo?

⁶ Kinoi' i Akise ama'e amy zao t'i Davide le nanao ama'e ty hoe: Kanao veloñe t'IEHOVÀ, vañon-drehe, le soa am-pahatreavako ty fiavota'o naho ty fimpolia'o amy valobohòkey pak' amy ihe nindre amakoy; le tsy nahatre a hila ama'o raho sikal' amy andro nomba'o amako pake henaneo; f'ie tsy no' o talèo. ⁷ Aa le mimpolia, le mañaveloa ampanintsíñañe, tsy hanjehara'o o talèm-Pilstio. ⁸ Aa hoe t'i Davide amy Akise, Ino o nanoekoo? Ino ty nioni'o amy mpitoro'oy amo hene andro nindrezako ama'o pak' androanio, te tsy hionjonako hialy amo rafelahn-talèko mpanjakao? ⁹ Le hoe ty natoi' i Akise amy Davide: Fantako t'ie soa am-pahatreavako, manahake ty anjelin' Añahare; fe sinaotsi' o talèm-Pilstio ty hoe t'ie tsy hitraok' aman-tika hionjom-ban-kotakotake mb'eo. ¹⁰ Aa le mañaleñaleña rekets' o mpitoro' i talè nindre ama'oo; le mañampitsoa, ie mazava, le miavota. ¹¹ Aa le niampitso t'i Davide, ie naho ondati'eo niavotse amy maraiñey, nimpoly mb'an-tane' o nte-Pilstio mb'eo; vaho nionjomb'e Iezreele mb'eo o nte-Pilstio.

30

¹ Ie pok'e Tsiklage t'i Davide naho o mpiama'eo te herone le nizoe'e te tiname o nte Amalekeo i Atimoy naho i Tsiklage, toe rinotsa' iareo ty Tsiklage vaho finorototo'e añ'afó. ² Fonga rinambe' iereo o ampela

nizoeñeo, ty tora'e pak'ami' ty bey; tsy vinono' iareo fa nendese' iareo amy lia' iareoy. ³ Aa ie pok' an-drova'e ao t'i Davide naho ondati'eo, hehe t'ie tineno' ty afo, le fa hene nasese an-drohy o vali'eo naho o ana-dahi'eo vaho o anak' ampela'eo. ⁴ Nampipoñake ty rovetse amy zao t'i Davide naho o mpiama'eo, ampara' te nidrifi' i harovetsey ty fiai'e. ⁵ Tinavañe am-pandrohizañe aña ty vali' i Davide roe, i Akinoame nte Iezreele naho i Abigale nte Karmelete, nivali' i Nabaley. ⁶ Niampaheke t'i Davide kanao ho nametsa-bato ama'e ondatio ty amy hafain' arofo' iareo amo ana-dahi'eo naho o anak' ampela'eo, fe nañosi-batañe am' IEHOVÀ Andrianañahare'e t'i Davide.

⁷ Le hoe t'i Davide amy Abiatare mpisoroñe, Ehe, endeso atoy i kitambey. Le nendese' i Abiatare mb'amy Davide mb'eo i kitambey. ⁸ Nañontane ty hoe am' IEHOVÀ t'i Davide: Ho horidañeko hao i mpirai-lia zay, hiambotrahako? Le hoe ty natoi'e: Horidaño fa tsi-mete tsy ho tra'o, vaho tsi-mahay tsy ho haha'o iaby. ⁹ Aa le nionjomb'eo t'i Davide rekets' indaty enen-jato mpiama'e rey, naho nimb'an-torahañe Besore* mb'eo vaho nitofa eo ty ila'e. ¹⁰ Fe nañoridam-b'eo t'i Davide reketse ty lahilahy efa-jato; le nidoñe eo ty roan-jato amy t'ie loho nidazidazitse tsy nahafitsake i torahañe Besorey. ¹¹ Tendrek' am' iereo an-kivoke ey t'i nte-Mitsraime, le nasese amy Davide naho nanjotsoañe mofo hikama'e naho rano hinoma'e ¹² vaho nanjotsoa' iareo garaton-tsakoa naho valoboke angaroza'e maike roe; aa ie nikama, nimpoly ama'e ty fiai'e, fa telo andro, telo haleñe re tsy nikama mofo ndra ninon-drano. ¹³ Le hoe t'i Davide ama'e: An'ia rehe? vaho boak' aia? Le hoe re: Ajalahy nte-Mitsraime raho, mpitoro' ty nte-Amaleke, le nado' i talèkoy amy t'ie natindry telo andro. ¹⁴ Nitamea'ay i Atimo' o nte-Kereteoy†, naho amy fanaña' Iehoday naho amy Atimo' i Kalebe‡ vaho finorototo'ay aña' afo ty Tsiklage. ¹⁵ Le hoe t'i Davide ama'e: Mete hinday ahy mb'amy lia-raike zay v'iheo? Le hoe re: Mifantà amako aman' Añahare te tsy hañohofa'o loza, ndra hanolotse ahy am-pitàn-talèko, le ampanjotsoeko mb' amy mpirai-liay mb'eo. ¹⁶ Aa ie nampizotsoe'e mb'eo heheke t'ie niparaitake mb' eo mb'eo an-tane ey, nifanjotse naho nitohoke an-tsabadidake, ty amy fikopaham-bey nitavane' iereo an-tane' o nte-Pilstiroy, naho an-tane Iehoday. ¹⁷ Linafa' i Davide amy palipalitsieñey pak'ami'ty hariva' i loak' androy iereo; tsy teo ty nipoliotse am' iereo naho tsy ty ajalahy efa-jato nijoñe an-drameva vaho nivoratsak' aña. ¹⁸ Rinomba' i Davide o nipaoha' o nte-Amalekeo iabio; vaho hinaha' i Davide i vali'e roe rey. ¹⁹ Tsy eo ty nipok' ama'e, ndra ty kede ndra ty bey, ndra ana-dahy ndra anak' ampela; ndra vara ndra inoñ' inoñe nitavaneñe am' iereo; niazo' i Davide iaby. ²⁰ Hene nendese' i Davide o mpirai-lia naho mpiharo-trokeo, le niroahe' iareo aolo o añombe ila'eo, le hoe ty saontsy: Fikopaha' i Davide.

²¹ Nivotrak' amy lahilahy roan-jato nimamake tsy nahafañorike i Davide rey t'i Davide, i nampitofañe an-toraha' i Besore rey; nionjomb' amy Davide mb'eo iereo hifanalaka ama'e, naho hifañaoñe am' ondaty nindre ama'eo; le ie nifanotok' am'ondatio t'i Davide le nañontanea'e. ²² Le hoe ty enta' ondaty tsivokatse naho rati-tserek' amo mpiamy Davideo: Kanao tsy nindre aman-tika, tsy handiva'ay ndra kede amo vara kinopake rinomba'aio, naho tsy ty vali' ondaty naho o keleia'eo, hiaoloa' iereo mb'eo. ²³ Le hoe t'i Davide, Ko manao zao ry longoko, amo nanolora'

* **30:9** Besore: Tally mahafale; fiheren-ko velo † **30:14** Kerete: manampake ndra mandrimotse
‡ **30:14** Kalebe: amboa; koake; haroñe

IEHOVÀ antikañeo, ie nañaro antikañe, vaho nanolotse i lia-raike naname antikañey am-pitân-tika. ²⁴ Ia ty hañaoñe anahareo amo raha zao? Fa ho mira ami'ty anjara' i nizotso mb'añ'aly mb'eoy ty anjara' i nitambatse amy kilankañei; hifanjara mira iereo. ²⁵ Zay ty ie mifototse amy andro zay le nanoe'e fañè naho fepètse e Israele ao ampara' te henane. ²⁶ Aa ie pok'e Tsiklage ao t'i Davide, nampañitrife'e amo roandria' Iehodao naho amo rañe'eo ty ila' i varay ami'ty hoe: Ravoravo ho anahareo ami'ty nikopaheñe amo rafelahi' IEHOVÀO; ²⁷ naho amo am-Beteleo naho o an-dRamote Atimoo naho o am-Iatireo ²⁸ naho o an'Aroereo naho o an-Tsipmoteo naho o an'Estemoao ²⁹ naho o an-dRakaleo naho o an-drova' o nte-Ieakmeeleo naho o androva' o nte-Kaineoo ³⁰ naho o an-Kormao naho o an-Korasaneo naho o nte-Atakeo ³¹ naho o nte-Kebroneo vaho o an-kene toetse fomba' i Davide naho ondati'eo.

31

¹ Ie amy zao, nialy amy Israele o nte-Pilistio, le nandripàke ty lay aolo' o nte-Pilistio o ana' Israeleo vaho nikoromak' am-pizamanañe an-kaboa' i Gilboà ey. ² Hinorida' o nte-Pilistio mafe t'i Saole naho o ana'eo naho vinono' o nte-Pilistio t'Ionatane naho i Abinadabe vaho i Malkisoa, ana-dahi' i Saole. ³ Nifandraparapake ty aly amy Saole le nijoy aze o mpitâm-paleo, toe nampitsingoro aze o mpitâm-paleo. ⁴ Le hoe t'i Saole amy mpitâm-pikala'ey, apontsoàño o fibara'oo, le atrebeho amako tsy mone hitomboke naho hijoy ahy o tsy nisavareñe retoañe. Fe tsy nimete i mpitâm-pikala'ey, fa loho nirevendreveñe. Aa le rinambe' i Saole i fibara'ey vaho nihotraha'e. ⁵ Ie nizoe' i mpitâm-pikala'ey te nihomake t'i Saole le nihotrak' amy fibara'ey ka, nitrao-pivetrak' ama'e.

⁶ Aa le nitrao-pihomake amy andro zay ty Saole naho i ana'e telo rey, naho i mpitâm-pikala'ey vaho o fonga ondati'eo. ⁷ Ie niisa' o ana' Israele añ' ila' i vavataneio naho o alafe' Iordaneio te nilay o ana' Israeleo naho nihomake t'i Saole naho o ana'eo, le naforintse' iareo o rova' iareoo naho nitriban-day, vaho nimb'eo o nte-Pilistio nimoneñe ama'e.

⁸ Ie amy loak-androy, nimb'eo o nte-Pilistio hañolitse o zinamañe, le nizoe' iereo te nikorovok' an-kaboa' i Gilboà t'i Saole naho i ana'e telo rey. ⁹ Kinitsi' iareo i añambone'ey naho hinalo' iareo o sarom-pikala'eo vaho nañitrike i raha rezay mb'eo mb'eo aña'akiban-drahare' iareo naho am'onatio.

¹⁰ Nasampe' iereo aña'anjomba' i Astarote ao o sarom-pikala'eo vaho napite' iareo an-drindri' i Bete-Sane eo i fañova'ey. ¹¹ Aa ie jinanji' o nte-Iabese-Giladeo i nanoe' o nte-Pilistio amy Saoley, ¹² le niongake o fanalolahi' iereo, nikatsakatsake haleñe mb'eo nandrambe ty fañova' i Saole naho i ana'e rey boak' an-drindri' i Betesàne eo naho nimpoly mb'e Iabese mb'eo vaho noroa' iareo. ¹³ Le rinambe' iareo o taola' iareoo naho nalente' iareo ambane' ty kile' Iabese ao vaho niliitse fito andro.

Samoele II

¹ Ie fa vilasy t'i Saole naho fa nimpoly amy fanjamana'e o nte-Amalekeoy t'i Davide, naho fa nitoboke roe andro e Tsiklage* t'i Davide, ² le pok'eo amy andro faha-teloy ty lahilahy boak' an-tobe' i Saole aña niriatsi iaby o siki'eo, naho deboke ty añ'ambone'e; aa ie niheo mb' amy Davide mb'eo, le nibabok' an-tane niambane ama'e. ³ Le hoe t'i Davide ama'e: Boak'aia v'iheo? le hoe re ama'e, Nipoliotse boak' an-tobe' Israele ao. ⁴ Le hoe t'i Davide ama'e: Manao akore i rahay? Ehe talilio. Le hoe re, Nifandripak' amy hotakotakey ondatio, naho maro t'indaty nihotrake vaho nivetrake; songa nihomake t'i Saole naho Ionatane ana'e. ⁵ Le hoe t'i Davide amy ajalahy nitalily ama'ey: Akore ty ahafohina'o te nihomake t'i Saole naho Ionatane ana'ey? ⁶ Le hoe i ajalahy nitalily ama'ey: Zaho nitojeha' an-kaboa' i Gilboa[†] eo, hehe te niato amy lefo'ey t'i Saole vaho nifanindry ama'e mafe o sarete naho mpiningi-tsoavalao. ⁷ Aa ie nitolike mañamboho le nioni'e raho, naho nikoiha'e, vaho vinaliko ty hoe: Intoy raho. ⁸ Le hoe re tamako: Ia v' iheo? le hoe ty natoiko: nte-Amaleke raho. ⁹ Le hoe re tamako: Mijohaña añ' ilako etoa, le vono, fa haoreañe ty mamihiñe ahy te mbe amako ty fiaiko. ¹⁰ Aa le nijohaña añ' ila'e eo raho naho vinonoko fa niantofako ty hatò te tsy ho velon-dre ie fa nihotrake eo; aa le rinambeko i sabaka'e añ' ambone'ey naho i ravak' am-pitá'ey vaho naseseko mb'amy talèko mb'etoa.

¹¹ Finetre' i Davide amy zao o siki'eo vaho nirate'e; nanao zay iaby ondaty nindre ama'eo, ¹² nangoihoy ty rovetse, nililitse am-para' te haleñe ho a i Saole naho Ionatane ana'ey naho ondati' IEHOVÀO, vaho ho a i anjomba' Israeley, ie fonga zinevom-pibara. ¹³ Le hoe t'i Davide amy ajalahiy: Boak' aia rehe? le hoe ty natoi'e: Ana-drenetane nte-Amaleke raho. ¹⁴ Le hoe t'i Davide ama'e: Aa vaho akore te ihe tsy nihembañe hañiti' tañañe handrotsake i noriza' IEHOVÀY? ¹⁵ Kinanji'i Davide amy zao ty gaon-dahy, ami'ty hoe: Mb'eo kahe, iambotraho: Le vinono'e ampanjevoañe. ¹⁶ Le hoe t'i Davide ama'e: An-doha'o ty lio'o; fa nitalily azo ty vava'o ami'ty hoe: Zaho ty namono ty noriza' IEHOVÀ.

¹⁷ Nirovetse t'i Davide ami'ty fandalà'e i Saole naho i ana'e Ionatane, ¹⁸ vaho linili'e t'ie hooke amo ana' Iehodao ty sabo atao ty hoe: I Faley. Ingo t'ie sinokitse am-boke' Iasare ao:

¹⁹ Fa zinamañe an-kaboañe ey
ty hatsomerentsere' Israele!

Akore ty fikorovoha' o fanalolahio!

²⁰ Ko talilieñe e Gate ao,
ko tseizeñe an-damo' i Askelone ey;
tsy mone hirebeke o anak' ampela
o nte-Pilistioo
hera handia taroba o anak' ampela'
o tsy nisavareñeoo.

²¹ O ry haboa' i Giboà,
ee t'ie tsy hivotrahan-jono ndra orañe,
ndra teteke miregorego voa soa;
amy te ao ty nañifihañe an-tsereheñe

* **1:1** Tsiklage: Fañaranañe hinotsokotsoke † **1:6** Gilboa: ty fañody mivariñe

ty fikala' o maozatseo,
 ty fikalan-defo' i Saole,
 hoe t'ie tsy norizañ' an-tsolike.
²² Boak' ami'ty lio' o zinamañeо,
 naho ami'ty havondra' o fatratseo
 tsy nivike ty fâle' Ionatane,
 tsy nimpoly mañomaño ty fibara' i Saole.
²³ I Saole naho Ionatane,
 ty hatsomerentsere'e naho
 ty hamaràm-bintañe t'ie niveloñe,
 mbe nifampipiteke iereo te nihomake;
 nalisa ta ty vantioñe,
 naozatse ta ty liona.
²⁴ O ry anak' ampela' Israele,
 mangololoiha ho a i Saole,
 i nampisikiñe anahareo mena
 naho ravoravo ila'ey,
 i nametake bange volamena
 an-tsaro' areoy.
²⁵ Akore te nitsingoritritse
 an-teñateñan-kotakotak' ao o maozatseo!
 Zinevo an-kaboañe ey t'Ionatane!
²⁶ Mioremeñe raho ty ama'o
 ry Ionatane rahalahiko;
 nifanjâka amako;
 fiañ-tane ty fikokoa'o ahy,
 mandikoatse ty hatea' ampela.
²⁷ Akore ty fihotraha' o fanalolahio,
 nirotsake o haraom-pialiañeо.

2

¹ Ie aña zay, le nañontane IEHOVÀ t'i Davide ami'ty hoe: Hionjonako hao o rova' Israeleo? le hoe t'IEHOVÀ ama'e: Mionjona. Aa le hoe t'i Davide: Ty aia ty handenàko? le hoe re: Mbe Kebrone* mb'eo. ² Aa le nionjomb'eo t'i Davide rekets' i vali'e roe rey, i Akinoame nte Iezreele† naho i Abigale vali'i Nabale nte-Karmele. ³ Le nampionjone' i Davide ondaty mpiama'eo songa rekets' o keleia'eo vaho nimoneña' iareo o rova' i Kebroneo. ⁴ Nimb'eo amy zao o roandria' Iehodao, le noriza' iareo eo t'i Davide ho mpanjaka' i anjomba' Iehoday. Le natalily amy Davide te o nte-Iabese‡-Giladeo§ ty nandenteke i Saole. ⁵ Nañitrik' amy Iabese-Gilade t'i Davide, le nanoe'e ty hoe, Andriañeñe t'IEHOVÀ ami'ty fitretreza' areo i talè' areoy, amy nandenteha' areo i Saoley. ⁶ Aa le ho ferenaiña' IEHOVÀ naho haboa'e ama' areo ty hatò; vaho handroroñako ama' areo i hasoa nanoe' areoy. ⁷ Aa le ampaozaro o fità' areoo, le mahasibeha; fa vilasy t'i Saole talè' areo vaho fa noriza' Iehoda raho ho mpanjaka' iareo.

⁸ Ie amy zao, rinambe' i Abnere ana' i Nere, mpifehe' ty valobohò' i Saole, t'Is'bosete* ana'i Saole vaho nendese'e nitsake mb'e Maknaime† mb'eo; ⁹ le nanoe'e mpanjaka' i Gilade naho o nte-Asoreo‡ naho Iezreele

* ^{2:1} Kebrone: Fifampilongoañe; firañetañe † ^{2:2} Iezreele: fitroara' IEHOVÀ; hazavà' IEHOVÀ

‡ ^{2:4} Iabese: Hamaiha'e; fisalarañe § ^{2:4} Gilade: talily mitoabotse * ^{2:8} Is'bosete: ondaty

salareñe, mavoeñe † ^{2:8} Maknaime: kibohotse, tonda, firimboña ‡ ^{2:9} Asore: ehake; i manjotikey; i mañisakey

naho Efraime[§] naho i Beniamine* naho Israele iaby. ¹⁰ Ni-efa-polo taoñe t'Is'bosete t'ie niorotse nifehe Israele, le nifeleke roe taoñe. Fe nañorike i Davide ty anjomba' Iehoda. ¹¹ Le fito-tao-tsi-enem-bolañe ty nahampanjaka' i anjomba' Iehoday e Kebrone ao i Davide. ¹² Niavotse boake Maknaime t'i Abnere ana' i Nere rekets' o mpitoro' Is' Bosete ana'i Saoleo le nomb'e Gibone mb'eo. ¹³ Niavotse t'Ioabe†, ana'i Tseroià‡ naho o mpitoro' i Davideo nifanalaka am' iereo amy antara' i Giboney; ie nifampigaoñe le añ'ila' i antara etoañey ty firimboña'e raike vaho alafe' i antara eroañey ty firimboña'e raike. ¹⁴ Le hoe t'i Abnere am' Ioabe, Angao hiongake o gaon-dahio hihisa añatrefan-tikañe. Le hoe t'Ioabe: Angao hiongake.

¹⁵ Niongak' amy zao t'i nte-Beniamine, folo-ro'amby ty mpiam' Is'bosete, ana' i Saole, naho folo-ro'amby ty mpitoro' i Davide. ¹⁶ Sindre nitan-ty lohan-drahalahi'e naho natsorofo'e an-deme' i rahalahi'ey ty fibara'e vaho songa nitsingoritritse eo; aa le natao ty hoe Kelkate-kats' tsorime[§] i toetse e Gibone zay. ¹⁷ Nampalovilovy ty hotakotak' amy andro zay; le nigioke t'i Abnere naho o ana' Israeleo añatrefam-pitoro' i Davide.

¹⁸ Teo ty ana-dahy telo' i Tseroià; Ioabe, naho i Abisày, vaho i Asaele*, le nalisa am-pandia t'i Asaele manahake ty fanaloke tora'e. ¹⁹ Nañinjake i Abnere t'i Asaele; tsy niviombioñe mb'an-taña'e havana ndra havia amy fañitrihitriañ' orike i Abnerey. ²⁰ Nitoli-boho amy zao t'i Abnere nanao ty hoe: I Asaele v'iheo? hoe ty natoi'e: Zaho. ²¹ Le hoe t'i Abnere tama'e: Mitsilea, mb'an-taña'o havana ndra havia, naho tsepaho ty gaon-dahy vaho holiro o fikala'eo, f'ie tsy nete tsy nañorik' aze avao. ²² Nindrae' i Abnere amy Asaele ty hoe: Mivioña tsy hañorik' ahy; ino ty hanjevoñako azo an-tane? Aia amy zao ty hiatrefako laharañe am' Ioabe rahalahi'oy? ²³ F'ie nifoneñe tsy hivioñe, aa le tinombo' i Abnera amy kitron-defo'ey ambane' ty pa'e faha lime eo le nipotitse am-boho'e ao i lefoñey vaho nitsingorokoron-ko mate eo. Ie amy zao, ze nizo i nikorovoha' i Asaele nivetrakey, le nijohañe eo. ²⁴ Fe nañoridañe i Abnere t'Ioabe naho i Abisày; le nitsofots' andro t'ie pok' an-kaboa' i Amà†, i aolo' i Già‡ an-dala' mb' am-patrambei' i Giboney.

²⁵ Nifanontoñe amy Abnere amy zao o ana' i Beniamineo vaho nijohañe an-kaboañe ey. ²⁶ Kinoi' i Abnere amy zao t'Ioabe ami'ty hoe: Hamotseke nainai'e hao i fibaray? Tsy fohi'o hao t'ie higadoñe an-kafairañe avao? Ampara' te mb'ia vaho halalie'o ondatio ty tsy hañoridañe i rahalahi'ey? ²⁷ Le hoe t'Ioabe: Kanao veloñe t'i Andrianañahare, naho tsy nisaontsy rehe, le ampara' te naporea' ty maraindray leo raike tsy ho nimpoly ampañinjaha'e i rahalahi'ey. ²⁸ Aa le nampipopò antsiva t'Ioabe vaho ni-tsangañe ondaty iabio, tsy nañoridañe Israele ka, tsy nifanehak' añ'aly ka.

²⁹ Nikatsakatsake niranga i Arabà amy haleñe iabiy t'i Abnere naho ondati'eo; nitsake Iordaney naho niranga i Bitrone[§] vaho nigodañe e Maknaime. ³⁰ Nimpoly amy fañoridaña'e i Abnerey t'Ioabe; le ie natonto' iareo i mpitoro' i Davide rey le tsy niampé folo-sive' amby naho i Asaele. ³¹ Fe zinevo' o mpitoro' i Davideo amo lahilahi' i Beniamine naho a i Abnereo: t'indaty telon-jato-tsi-enem-polo, fonga nikorokomake.

§ 2:9 Efraime: Mamokatse; mitombo * 2:9 Beniamine: anam-pitan-kavana † 2:13 Ioabe: maha-rae; satrie'e ‡ 2:13 Tseroià: fandovilovia' IEHOVÀ § 2:16 Kelkate-kats'tsorime: tete' o maozatseo, * 2:18 Asaele: sata' i Andrianamboatse † 2:24 Amà: Ondatiko, ndra Ondati'e ‡ 2:24 Già: miaolo; mamokatse; miselekaiñe § 2:29 Bitrone: Fizarañe

³² Nitakone' iereo t'i Asaele vaho nalente'e an-donan-drae'e e Betlekhemé ao. Nikatsakatsak' amy haleñey ka t'Ioabe, am-para' te niporeá am' iereo e Kebrone añe i androy.

3

¹ Nitolom-pialy avao ty anjomba' i Saole naho ty anjomba' i Davide; le nihaftatratse erike t'i Davide vaho ninike erike ty anjomba' i Saole. ² Nisamak' anadahy e Kebrone ao t'i Davide; i Amnone* ty tañoloñoloña'e boak' amy Akinoame nte-Iezreele; ³ i Kilabé†, ty faharoe, nasama' i Abigale vali' i Nabale nte-Karmele; ty fahatelo: i Abisalome‡, ana' i Maakà§ ana' i Talmay* mpanjaka' i Gesore†; ⁴ ty fah'efatse i Adonià‡, ana' i Kagite§; ty faha-lime, i Sefatià* ana' i Abitale†; ⁵ vaho ty faha-eneñé, Itreame‡, amy Eglà§ vali' i Davide. Songa nasama' i Davide e Kebrone ao. ⁶ Ie nitolom-pialy avao ty anjomba' i Saole naho ty anjomba' i Davide, le nampaozambatañe añ' anjomba' i Saole t'i Abnere.

⁷ Nisakeza' i Saole t'i Ritspà* anak' ampela' i Aià. Le hoe t'Isbosete amy Abnere, Ino ty nimoaha'o amy sakezan-draekoy? ⁸ Nampiforoforo i Abnere i enta' Isbosete zay, le hoe re: Lohan' amboa' Iehoda hao raho? Niferenaiñako anindroany hao ty anjomba' i Saole, rae'o, naho o longo'eo naho o rañe'eo, te ihe tsy naseseko am-pitá' i Davide; t'ie nasisi'o ho aman-kakeo amy rakembay androany? ⁹ Ee te hanoen' Añahare amy Abnere naho mandikoatse, naho tsy hanoeko ty nifanta' IEHOVÀ amy Davide; ¹⁰ ty hampamindrañe boak' añ'anjomba' i Saole i fifeheañey naho hampitroareñe ambone' Israele naho Iehoda boake Dane† pake Beersevà‡ ty fiambesa' i Davide. ¹¹ Tsy nahavale i Abnere ndra volan-draike re ty amy fihembaña'ey. ¹² Nañitrik' amy Davide amy zao t'i Abnere nanao ty hoe: An' ia o tanéo? naho ty hoe: Mifañinà amako fa inao, ama'o ty tañako hanese Israele iaby. ¹³ Le hoe re, Antao arè, hifañina; fe hafantoko ama'o, te tsy ho isa'o ty tareheko naho tsy endese'o heike t'i Mikale§ anak' ampela' i Saole, t'ie miheo mb' amako mb'etoa hañisake ty tareheko. ¹⁴ Le nañitrik' am' Isbosete ana' i Saole t'i Davide nanao ty hoe: Aseseo amako i Mikale tañanjombako nifofoeñ' añ' ofon-te-Pilisty zatoy. ¹⁵ Aa le nampihitrife' Isbosete vaho rinambe'e amy Paltiele* ana' i Laise†, vali'ey. ¹⁶ Nangololoike ty rovetse i vali'ey, ie nañorik' aze mb'e Bakorime‡ mb'eo. Le hoe t'i Abnere ama'e: Akia, iamboho; le nimpoly re. ¹⁷ Ie amy zao fa nifañaoñe amo talè' Israeleo t'i Abnere, nanao ty hoe: Ie taolo ro nipay i Davide ho mpanjaka hifehe anahareo, ¹⁸ Aa le ano henaneo; amy te nafè' IEHOVÀ amy Davide ty hoe: Ty fitàm-pitoroko Davide ty handrombahako ondatiko Israeleo am-pitá' o nte-Pilistio, naho am-pitá' o rafelahi' iareo iabio. ¹⁹ Tinaro' i Abnere an-dravembia i Beniamine ka zay, le nañavelo t'i Abnere nisaontsy an-dravembia' i Davide e Kebrone ao t'ie ninò' Israele iaby naho ty anjomba' i Beniamine iaby; ²⁰ le nimb' amy Davide e Kebrone aña t'i Abnere rekets' ondaty roapolo vaho nanao' i Davide sabadidake t'i

* ^{3:2} Amnone: Migahiñé naho to; mpañoke † ^{3:3} Kilabe: arovan-drae ‡ ^{3:3} Absalome: raen-kazavàñe § ^{3:3} Maakà: forekekeñé * ^{3:3} Talmay: vavahaliko; rano mivotre † ^{3:3} Gesory: vavatane: fisarea'e; mikijoly ‡ ^{3:4} Adonià: IEHOVÀ ro taleko § ^{3:4} Kagite: mirebeke

* ^{3:4} Sefatià: IEHOVÀ mpizaka † ^{3:4} Abitale: raen-jono, ndra raen-talinjo ‡ ^{3:5} Itreame: hafanjàka' ondatio § ^{3:5} Eglà: Tamana; sarete; bontoly * ^{3:7} Ritspà: fandreañé; tovo'e; saribòm-bato † ^{3:10} Dane: zaka; mpizaka ‡ ^{3:10} Be'er-sevà: vovom-panta; vovo faha-fito § ^{3:13} Mikale: Tareheko * ^{3:15} Paltiele: Famotsora' IEHOVÀ † ^{3:15} Laise: Liona ‡ ^{3:16} Bakorime: jinobo; tea-aly; mahasibeke

Abnere naho ondaty nindre ama'eo. ²¹ Le hoe t'i Abnere amy Davide: Hiongake raho hiavotse le hatontoko amy talèko mpanjakay t'Israele iaby, hifañina ama'o, hifeleha'o ze satrin'arofo'o iaby. Aa le nirahe' i Davide mb'eo t'i Abnere hañavelo am-panintsñañe.

²² Ingo te boak' an-kotakotak' aña amy zao o mpitoro' i Davideo naho Ioabe, ninday fikopaham-bey; fe tsy amy Davide e Kebrone ao t'i Abnere, ie niraheñe aña naho niavotse an-kanintsñañe. ²³ Aa ie pok'eo t'Ioabe naho i valobohòke nindre ama'e iabiy, le natalily am' Ioabe ty hoe: Fa niheo amy mpanjakay t'i Abnere ana' i Nere vaho nampiavote'e mb'eo le nienga am-panintsñañe. ²⁴ Aa le nomb' amy mpanjakay t'Ioabe nanao ty hoe: Ino ze o nanoe'oo? Inao niheo mb'ama'o mb'etoa t'i Abnere; akore te nirahe'o mb'eo, ie vata'e aña? ²⁵ Fohi'o t'i Abnere ana'i Nere, te nimb' etoa hamañahy azo, hahafohiñe ty fiengà'o naho ty fiziliha'o, haharendreha'e ze anoe'o iaby. ²⁶ Ie niavotse amy Davide t'Ioabe le nampihitrike ìrak' amy Abnere nampibalike aze boake Bor'sirà; fe tsy nifohi' i Davide. ²⁷ Aa ie nimpoly mb'e Kebrone mb'eo t'i Abnere, le natola' Ioabe hisitak' i lalam-beiy hibisibisiha'e vaho tinombo'e ambane-pa'e fahalime, le nihomake ty amy lion-drahalahi'e Asaeley. ²⁸ Ie jinanji' i Davide le hoe re, Malio tahiñe am' IEHOVÀ, amy lio' i Abnere ana' i Nerey raho naho ty fifeheako. ²⁹ Ee te hipetak' añambone' Ioabe naho aña' anjomban-drae'e le tsy hasitak' ami'ty anjomba' Ioabe ty aman-dio-lava, ke ty angamae, he ty miato am-pitoñoñe, ke ty ampitsingorom-pibara, he ty tsy aman-kàneñe. ³⁰ Vinono' Ioabe naho i rahalahi'e Abisaiy t'i Abnere ty amy namonoa'e i rahalahi' iareo Asaele an-kotakotake e Gibone aña. ³¹ Le hoe t'i Davide am' Ioabe naho amo hene ondaty nindre ama'eo, Mandriata saroñe naho misikina gony vaho miroveta añatrefa' i Abnere. Le nañorike i horantsañey t'i Davide. ³² Nalente' iereo e Kebrone ao t'i Abnere; le naonjo' i mpanjakay ty fiarañanaña'e nangololoike ty rovetse an-kibori' i Abnere eo vaho fonga nangoihoy ondatio. ³³ Aa le nandala i Abnere i mpanjakay, ami'ty hoe: Nihomake manahake ty fikenkañan-dagola t'i Abnere?

³⁴ Tsy nisingoreñe o fità'oo,
tsy ni-an-dongoke o fandia'oo;
nikorovoke hoe ondaty zinevo añatrefa' o lo-tserekeo.

Le niroveta' ondatio indraike. ³⁵ Nimb' amy Davide amy zao ondatio nanjotsø mofo, ie mbe niantoandro, fe nifanta ami'ty hoe t'i Davide; Hanoen' Añahare amako ndra losore'e naho mitsopeke mofo ndra inoñe am-para' te tsofotse i àndroy. ³⁶ Nihaoñe' ondatio zay le ninò'e; niantofa' ondaty iabio ze nanoe' i mpanjakay. ³⁷ Aa le nifohi' ze hene ondaty naho Israele iaby amy andro zay te tsy nampivetraha' i mpanjakay t'i Abnere ana' i Nere. ³⁸ Le hoe i mpanjakay amo mpitoro'eo: Tsy fohi' areo hao te nihotrake e Israele ao anindroany ty roandria fanalolahy? ³⁹ Mamake raho androany, ie vaho norizañe ho mpanjaka; toe loho gañe amako i ana' i Tseroià rey; ehe ho vale' IEHOVÀ amy raty tserekey o hatsivokara'eo.

4

¹ Ie jinanji' i ana' i Saole e Kebroney te nivilasy t'i Abnere, le nigebañe ty fità'e vaho ninevenevetse iaby o ana' Israeleo. ² Ondaty roe ty nimpifehem-pirimboñañe amy ana' i Saoley; ty raike natao Baanà*, naho ty tahina' ty raike: Rekabe†, sambe ana' i Rimone‡ nte Beerote§, ana' i Beniamine; amy

* ^{4:2} Baanà: amy vale-fatey; an-kasotriañe † ^{4:2} Rekabe:efa mira: tarihen-tsoavalà efatse

‡ ^{4:2} Rimone: Nonjoneñe; ampongabendañitse § ^{4:2} Beerote: vovoñe; fampalangesañe

te nivolilieñe amy Beniamine t'i Beerote; ³ aa le nibioñe mb'e Gitaime* mb'eo o nte-Beeroteo, vaho nañialo ho renetane aña pake henaneo. ⁴ Nanañ' anadahy kepek' am-pandia t'Ionatane ana' i Saole, ie lime taoñe te pok'eo i talily i Saole naho Ionatane e Iezreeley le rinambe' i mpiatrak' azey naho nandrifitse ty lay; aa ie nitaentaeñe hipitsike le nidorasitse nahakepeke i natao Mefibosetey†. ⁵ Niheo mb'eo i ana' i Rimone nte-Beerote rey, i Rekabe naho i Baanà, le nivotrak' aña anjomba' Isbosete an-tsingilingilien' andro, ie nandre am-pandreañe ao. ⁶ Nimoak' am-po i anjombay iereo nanao ho mpampibalike vare-bolè, le tinombo' iareo ambane' ty pa'e faha-lime ao; vaho nivoratsake t'i Rekabe naho i Baanà rahalahi'ey. ⁷ Ie nimoak' aña anjomba ao iereo, ie nandre am-pandrea'e an-trañom-pandrea'e ao, le tinombo' iareo, vinono, naho kinitsi' iereo ty añambone'e vaho nikatsakatsak' amy haleñey niranga i montoñey. ⁸ Nendese' iereo mb'amy Davide e Kebrone mb'eo ty añambone' Isbosete le nanao ty hoe amy mpanjakay, Ingo ty añambone' Isbosete ana' i Saole rafelahi'oy, i nipay ty fiai'oy, fa nondroha' IEHOVÀ ty kabò' i talèko mpanjakay amy Saole naho amy tiríey anindroany. ⁹ Aa hoe ty natoi' i Davide amy Rakabe naho i Baanà rahalahi'e, ana' i Rimone nte-Beerote: Kanao veloñe t'IEHOVÀ nijebañe ty fiaiko amy ze atao rafelahy iaby, ¹⁰ naho nitalily amako ty nanao ty hoe: Inao, vilasy t'i Saole. Ie natao'e te nanday talily soa. Fe rinambeko vaho zinevoko e Tsiklage ao ho tambe' i talili'ey. ¹¹ Tsy antsake hao ondaty lo-tsereke namono indaty marentane aña anjomba'e am-pandrea'ey? Tsy hampañavahako am-pitá' areo hao ty lio'e hanintak' anahareo an-tane atoy? ¹² Aa le linili' i Davide o gaondahi'eo, le vinono' iereo naho kinitsike o fitañe naho fandia' iareoo naho naradorado ambone' i antara' i Kebroney. Nitakone' iereo ty añambone' Isbosete vaho nalenteke an-kibori' i Abnere e Kebrone ao.

5

¹ Nivotrak' amy Davide e Kebrone amy zao ze fifokoa' Israele iaby nanao ty hoe: Oniño te taola'o naho nofo'o zahay. ² Ie omale naho fakomale-bey le nimpanjaka'ay t'i Saole naho ihe ty niaolo vaho nampipoly Israele; le hoe t'IEHOVÀ ama'o, Ho fahana'o ondatiko Israeleo naho ihe ty hifelek' Israele. ³ Aa le niheo mb' amy mpanjakay e Kebrone mb'eo o roandria' Israeleo; le nifañina am' iereo t'i Davide mpanjaka e Kebrone ao añatrefa' IEHOVÀ; vaho noriza' iareo ho mpanjaka' Israele t'i Davide. ⁴ Telopolo taoñe t'i Davide te niorotse nifehe; le nifeleke efapolo taoñe, ⁵ nifehe Iehoda e Kebrone ao fito taoñe tsi-enem-bolañe re naho nifeleke Israele naho Iehoda e Ierosalaime* ao telopolo taoñe telo' amby.

⁶ Nomb'e Ierosalaime mb'eo i mpanjakay rekets' ondati'eo, haname o nte Iebosio, o mpimoneñe amy taneio, ze nanao amy Davide ty hoe: Ndra ty goa naho i kepekey ty hampiamboho azo tsy himoak' atoy; ie natao' iereo te tsy hahafizilik' ao t'i Davide. ⁷ Fe rinambe' i Davide ty rova' i Tsione†; i atao rova' i Davidey. ⁸ Fa hoe t'i Davide amy andro zay: Ia ty mahafandafa o nte-Iebosy am-pionjonañe amy firoroñan-dranoy, ie mongore'e heike ze o kepeke naho goa heje' ty tro' i Davide zao—ie atao' iereo ty hoe: Ndra ty goa naho i kepekey tsy hahafimoaha'e aña anjomba atoy. ⁹ Nimoneñe amy rovay t'i Davide vaho natao'e ty hoe Rova' i Davide. Namboatse mb'eo

* **4:3** Gitaime: Fipiritan-divay † **4:4** Mefibosete: miboak'am-bavako ty injé * **5:5** Ierosalaime: aroñarom-panintsíñañe † **5:7** Tsione: Fampitiahivañe natroatse; lonake

mb'eo boake Milò [‡]mb'añate'e ao t'i Davide. ¹⁰ Nitabotse erike t'i Davide amy te nindre ama'e t'IEHOVÀ Andrianañahare' i Måroy.

¹¹ Aa le nañitrifa' i Kirame[§] nte-Tsore* irake t'i Davide naho mendo-raveñe naho mpandranjy naho mpamboatse am-bato, le nandranja' iereo anjomba t'i Davide. ¹² Nioni' i Davide t'ie noriza' IEHOVÀ ho mpanjaka' Israele; naho nonjone'e am' ondati'e Israeleo ty fifehea'e. ¹³ Mbe nañenga sakeza naho valy boake Ierosalaime t'i Davide ie fa nivotrake boake Kebrone aña; teo ka te nahasamake ana-dahy naho anak' ampela t'i Davide. ¹⁴ Zao ty añara' o nasama'e e Ierosalaimeo: i Samoa[†] naho Sobabe[‡] naho Natane[§] naho i Selomò*, ¹⁵ naho Iebkare[†] naho Elisoa[‡] naho Nèfege[§] naho Iafìà*, ¹⁶ naho i Elisamà[†] naho Eliadà[‡] vaho i Elifelete[§].

¹⁷ Aa ie jinanji' o nte-Pilistio te norizañe ho mpanjaka' Israele iaby t'i Davide, le fonga nionjomb'eo o nte-Pilistio hitsoeke i Davide. Ie jinanji' i Davide, le nigodañe am-pipalirañe fatratse ao. ¹⁸ Nimb' am-bavatane' i Refaime* ey ka o nte' Pilistio vaho nivelatse. ¹⁹ Aa le nañontane IEHOVÀ t'i Davide ami'ty hoe: Hionjoñe mb'amo nte-Pilistio hao raho? Hatolo'o an-tanako hao? Le hoe t'IEHOVÀ amy Davide, Mionjona, fa tsy mete tsy hatoloko am-pitâ'o o nte-Pilistio. ²⁰ Nimb'e Baale-peratsime[†] mb'eo t'i Davide naho zinama'e iereo vaho nanao ty hoe: Niboroboñak' amo rafelahikoo t'IEHOVÀ manahake ty fisorotombahan-drano. Aa le natao'e ty hoe Baal-peratsime i toetsey. ²¹ Napo' iareo eo o sampsampa' iareoo le sinodo[‡] i Davide naho ondati'eo. ²² Niheo mb'eo indraike o nte-Pilistio vaho nihanak' am-bavatane Refaime ey. ²³ Aa ie nañontane IEHOVÀ t'i Davide, le hoe re: Ko mionjomb'eo fa miaria mb'am-boho' iareo tandrife o sohihio[§], ²⁴ aa ie mahajanjiñe ty feom-pangidigidiñañe andigiligi' o sohihio le mionjona amy te hiaoloa' IEHOVÀ nahareo handafa i valobohòn-te-Pilistiy. ²⁵ Aa le nanoe' i Davide i nandilia' IEHOVÀ vaho zinevo'e boake Gebà* pake Gezere[†] o nte-Pilistio.

6

¹ Natonto' i Davide indraike ze hene jinoboñe amy Israele ao, telo ale. ² Niavotse amy zao t'i Davide rekets' i maro ama'e boake Baale-Iehoday* hañakatse i vatam-pañinan' Añaharey boak' ao, i fikanjiañe ty tahina' IEHOVÀ i Måroy, ie mimoneñe añatrefa' o kerobeo. ³ Aa le najoñe an-tsarete vao i vatan' Añaharey naho nakare' iereo añ'anjomba' i Abinadabe[†] e Gibà[‡] ao vaho nendese' i Ozà[§] naho i Akiò* ana' i Abinadabe i sarete vaoy. ⁴ Toe nakare' iereo añ'anjomba' i Abinadabe e Gibà ao i vatam-pañinan' Añaharey vaho niaolo i vatam-pañinay t'i Akiò. ⁵ Nitsinjake añatrefa' IEHOVÀ t'i Davide naho i anjomba' Israele iabiy, am-pañarahañe ze karazan-draha titiheñe nanoeñe an-kazombatango,

[‡] 5:9 Milò: Haliporañe § 5:11 Kirame: Fionjona' ty havelo; mpijoy * 5:11 Tsore: Haozarañe; vato; masioñe [†] 5:14 Samoa: i janjiñañey; i oriheñey [‡] 5:14 Sobabe: tafampoly; tolike; pitsik'afø § 5:14 Natane: tolotsé; nitambezañe * 5:14 Selomone: mpampilongo; ginoke; [†] 5:15 Iebkare: Fijoboñañe; i jinoboñey [‡] 5:15 Elisoa; I A'harem-pandrombahako § 5:15 Nèfege: maleme; migebañe * 5:15 Iafìà: mampahazava; miborake [†] 5:16 Elisamà: I Andrianañahare mijanjiñe [‡] 5:16 Eliadà: mahafohinañe an'Andrianañahare § 5:16 Elifelete: t'i A'harem-pamotsorañe * 5:18 Refaime: Fanalolahy mijoala maro [†] 5:20 Baal-peratsime: Talè mampizara [‡] 5:21 Heb: nengae' § 5:23 Bakà: Hatae mitañy, tsampa miradorado * 5:25 Gebà: tamboho; fitovy [†] 5:25 Gezere: fizarañe, lilin-jaka * 6:2 Baale-Iehoda: Roandria-Iehoda (toetse) [†] 6:3 Abinadabe: raem-pañina -pahimbañañe [‡] 6:3 Gibà: Tamboho § 6:3 Ozà: haozarañe; ose * 6:3 Akiò: rahalahi'e, longo'e

naho an-jejobory naho marovany naho fikorintsañe naho kantsàñe vaho fikoriñañe.

⁶ Ie nivotrak' an-toem-pifofoha' i Nakone[†] eo, le nitakare' i Ozà i vatam-pañinan' Añaharey amy t'ie hinetseketse' o katrakao. ⁷ Aa le nisolebotse amy Ozà ty haviñera' IEHOVÀ, naho zinevon' Añahare ty amy fandilara'ey, vaho nihomak' añ' ila' i vatam-pañinan' Añaharey eo. ⁸ Nanahelo t'i Davide te finanto' IEHOVÀ t'i Ozà, aa le natao'e ty hoe Peretsozà[‡] ty añara' i toetsey pake henaneo. ⁹ Nirevendreveñe amy IEHOVÀ t'i Davide henane zay le nanao ty hoe, Ami'ty akore ty hampombañe i vatam-pañina' IEHOVÀ mb' amako mb'etoa? ¹⁰ le tsy nendese' i Davide mb'an-drova' i Davide mb'eo ty vatam-pañina' IEHOVÀ fe navi' i Davide mb'añ'anjomba' i Ovededome§, nte-Gate* ao. ¹¹ Nitolom-pitobok' añ'anjomba' i Ovededome nte-Gate ao telo volañe i vatam-pañina' IEHOVÀ; le nitahie' IEHOVÀ t'i Ovededome naho o añ'anjomba'e iabio. ¹² Natalily amy Davide mpanjaka ty hoe, Toe nitahie' IEHOVÀ ty anjomba' i Ovededome naho ze ama'e ty amy vatam-pañinan' Añaharey. Aa le nimb'eo t'i Davide vaho nendese'e boak' añ'anjomba' i Ovededome ao pak' an-drova' i Davide an-kafaleañe i vatan' Añaharey. ¹³ Ie amy zao, naho fa nandeha enen-dika o ninday i vatam-pañina' IEHOVÀ, le nisoroñe ty añombelahy naho ty bania vinondrake. ¹⁴ Nitsinjak' añatrefa' IEHOVÀ an-kaozara'e iaby t'i Davide, ie nisikiñe kitambe leny t'i Davide. ¹⁵ Aa le nendese' i Davide naho ty anjomba' Israele iaby am-pipazapazahañe naho fipopohañe o tsifan' añondrio ty vatam-pañina' IEHOVÀ. ¹⁶ Ie nimoak' an-drova' i Davide ao ty vatam-pañina' IEHOVÀ, le nitilihitse an-dalan-kede ty Mikale ana' i Saole naho niisa'e t'i Davide mpanjaka nitribatribake naho nitsinjak' añatrefa' IEHOVÀ le nitorifihe'e an-tro'e. ¹⁷ Aa le nazili' iereo i vatam-pañina' IEHOVÀ vaho napo'e an-toe'e añivo' i kivoho naore' i Davide ho azey le nisoroña' i Davide engan-koroañe naho engam-panintsíñañe añatrefa' IEHOVÀ. ¹⁸ Ie nihenefe' i Davide ty fisoroñañe o enga oroañe naho o engam-panintsíñañe le nitatae'e ondatio ami'ty tahina' IEHOVÀ i Måroy. ¹⁹ Le hene nanjotsoa'e boko-mofo naho fatets-ena naho garatom-balòboke ondatio, i valobohò' Israele, lahilahy naho rakemba; vaho nimpoly iaby ondatio, songa mb'añ' anjomba'e aña.

²⁰ Nimpoly ka t'i Davide hitata o añ' anjomba'eo. Le niakatse nifanalaka amy Davide t'i Mikale anak' ampela' i Saole, nanao ty hoe: Akore ty enge' i mpanjaka' Israele anindroany, ie nañafa-tsaroñe aolo' maso' o anak' ampatam-pitoro'eo manahake ty fibongia' o tsivokatse tsy aman-keñatseo! ²¹ Le hoe t'i Davide amy Mikale, Toe tañatrefa' IEHOVÀ, ie nijoboñe ahy ambonen-drae'o naho ambone' i anjomba'e iabiy vaho noriza'e ho mpifelek' ondati' IEHOVÀ, hifehe Israele; Aa le hitsinjak' añatrefa' IEHOVÀ raho. ²² Toe mbe ho losorako i hatsivokarakoy naho hireke ampahaisahako, fe o mpitoroñ' ampela nivolañe'oo, ie ro hiasy ahy. ²³ Toly ndra tsy nanañ' anake ampara' ty androm-pivetraha'e t'i Mikale anak' ampela' i Saole.

7

¹ Ie amy zao, fa nimoneñe añ' anjomba'e ao i mpanjakay vaho hene nampitofae' IEHOVÀ ze rafelahi'e mb' etia mb'etia, ² le hoe i mpanjakay amy Natane, mpitoky: Eo hey! Mimoneñe añ' anjomba mendoraven-draho, fe mimoneñe an-damba miradorado ao ty vatam-pañinan' Añahare. ³ Le

[†] 6:6 Nakone; maike; faramparañe, matrovoke [‡] 6:8 Peretsozà: finatsike t'i Ozà § 6:10 Ovededome: mpitoro' i Edome * 6:10 Gate: fipiritan-divay

hoe t'i Natane amy mpanjakay: Akia, ano ze hene añ' arofo'o; fa ama'o t'IEHOVÀ.

⁴ Fe amy haleñey avao, niheo amy Natane ty tsara' IEHOVÀ nanao ty hoe: ⁵ Akia, saontsio t'i Davide mpitoroko: Hoe ty nafè' IEHOVÀ: Ihe hao ty hamboatse anjomba himoneñako? ⁶ Zaho tsy nimoneñe an-traño sikal' amy nampiavotako boake Mitsraime aña o ana' Israeleoy, pak' androany, fa i kibohotsey naho i kivohoy ty nombako. ⁷ Aa vaho fa nametse tsara raike hao raho am-pifokoa' Israele ndra aman' iaia amo hene tane nombako mindre amo ana' Israeleo, o nandiliako hamahañe ondatiko Israeleoo, ty hoe: Manao akore te tsy nandranjia'o anjomba mendoraven-draho? ⁸ Aa le zao ty ho saontsie'o amy mpitoroko Davidey: Hoe t'IEHOVÀ i Måroy: Rinambeko am-piandrazañe ao rehe, am-pañorihañe añondry, ho mpifelek' ondatiko Israeleo. ⁹ Fa nindre ama'o raho ndra aia' aia ty nañaveloa'o, naho zinamako aolo'o ey o rafelahi'o iabio; mbore hitolorako tahinañe ra'elisy, manahake o jabajaba an-tane atoio. ¹⁰ Le hanendreako toetse ondatiko Israeleo, le hajadoko iereo, songa himoneñe an-toe'e, tsy ho tsoboreñe ka; vaho tsy hanolo-tsotry am'iareo ka o anan-katsivokarañeo, manahake te taolo, ¹¹ sikal' amy andro nililieko mpizaka hifehe ondatiko Israeleio. Le hampitofàko amo rafelahi'o iabio rehe. Tovo izay, Mitaroñe ama'o t'IEHOVÀ t'ie hanoa' IEHOVÀ anjomba. ¹² Ie heneke o andro'oo, naho hirotsa aman-droae'o ao, le horizako ty tiri'o hanonjohy azo, ty hiboak' an-tsandi'o, le hajadoko i fifeleha'ey. ¹³ Ie ty handranjy anjomba ho amy añaarakoy, le horizako ho nainai'e i fifeleha'ey. ¹⁴ Ho rae ama'e raho, le ho anake amako re; aa ie mandilatse le ho lafaeko an-kobai' ondatio, naho am-pamofoha' o ana' ondatio; ¹⁵ fe tsy hasintak' ama'e ty fitretrezako, manahake ty nampisintahako aze amy Saole, i naviko aolo'o. ¹⁶ Hioreñe ho fatratse nainai'e añatrefa'o ty fifehea'o vaho hajadoñe ho kitro añ'afe'e ty fiambesa'o. ¹⁷ Nitaroñe' i Natane amy Davide i tsara zay naho i hene aroñaroñey.

¹⁸ Aa le nizilik' ao t'i Davide mpanjaka niambesatse añatrefa' IEHOVÀ, nanao ty hoe; Ia v'iraho ry Talè IEHOVÀ vaho ino i trañokoy te nendese'o pak'eo? ¹⁹ f'ie mbe loho kede am-pihaino'o, ry Talè IEHOVÀ, kanao nitsarae'o i akibam-pitoro'oy t'ie ho haehae aña ka; ie toe fañoha ondaty, ry Talè IEHOVÀ? ²⁰ Aa ino ka ty hivolañña' i Davide? amy te Ihe ro maharofoanañe o mpitoro'oo ry Talè IEHOVÀ. ²¹ O tsara'oo naho o arofo'oo ty nanao'o o raha ra'elisy iaby zao, naho nampibentara'o amo mpitoro'oo. ²² Aa le onjonen-dRehe ry Rañandria IEHOVÀ, fa tsy amam-pihambañe, vaho tsy eo t'i Andrianañahare hatovoñ' Azo, ty amy ze he'e jinanjin-dravembia'ay. ²³ Aa ia ka ty fifeheañe ambone' ty tane toy mañirinkiriñe ondati'o Israeleo, ie navoten' Andrianañahare hijebañe aze hondati'e, hanoa'e tahinañe, hitoloña'e raha fanjaka naho tsitantane ho an-tane'o añatrefa' ondaty jineba'o amo fifeheañeo naho amo 'ndrahare'eo ho azo boak' an-tane Mitsraimeo? ²⁴ naho najado'o ho azo ondati'o Israeleo ho foko'o nainai'e, ry IEHOVÀ vaho te Ihe ro Andrianañahare' iareo. ²⁵ Ie amy zao, ry IEHOVÀ Andrianañahare, ajadoño ho nainai'e i nitsarae'o o mpitoro'oo naho i anjomba'ey; aa le ano i linaño'oy. ²⁶ Honjoneñe nainai'e ty tahina'o, soa te ho saontsieñe ty hoe: IEHOVÀ i Måroy ro Andrianañahare' Israele; vaho hioreñe nainai'e añatrefa'o ty anjomba' o mpitoro'o Davideo. ²⁷ Fa nabenta'o amo mpitoro'oo, ry IEHOVÀ i Måroy, Andrianañahare' Israeleo ami'ty hoe: Handranjiako anjomba; aa le nahasibek' an-troke ty mpitoro'o hitaroñe o halaly zao. ²⁸ Toe Ihe ry

Talè IEHOVÀ, Ihe avao ro Andrianañahare, naho o tsara'oo ro to vaho nampitamae'o amo mpitoro'oo o raha soa zao; ²⁹ ie henaneo, ehe te ho no'o ty hitahy ty akibam-pitoro'o hitoloña'e nainai'e añatrefa'o, ty amy nitsara'oy ry Talè IEHOVÀ; le lonik' abey te ho soa-tahy nainai'e ty akibam-pitoro'o am-pitahia'o.

8

¹ Ie aña, linafa' i Davide o nte-Pilstio le navoho'e ambane vaho tinava' i Davide am-pità' o nte Pilistio ty renen-drova' iareo. ² Linafa'e ka o nte-Moabeo le zinehe'e an-taly, ie nampibaboheñe an-tane eo; nanjehe taly roe ho zamañe, le nitana'e ho veloñe ty taly raike. Aa le nitoroñe i Davide o nte-Moabeo, nañenga ama'e. ³ Linafa' i Davide ka t'i Kadadetsere ana' i Rekobe, mpanjaka' i Tsobà, amy nionjona'e mb' an-tsaka Eofrata mb'eo hampijadoñe ty fifehea'e. ⁴ Tinava' i Davide ama'e ty mpiningi-tsoavalà arivo-tsi-fiton-jato, naho lahindefoñe ro' ale; le nanoe' i Davide fira-sintake iaby o soavalan-tsareteo naho tsy ty zato nahaja'e ho an-tsarete zato. ⁵ Aa ie pok'eo o nte-Arame boake Damasek' añaeo hañolotse i Kadadetsere mpanjaka' i Tsobà, le zinevo' i Davide ty ro-ale-tsi-ro-arivo lahindefo' o nte-Arameo. ⁶ Nampipoha' i Davide e Arame' i Damasek' ao ty mpirailian-dahindefoñe naho nanoeñe mpitoro' i Davide o nte-Arameo, vaho nañenga ama'e. Tinolo' IEHOVÀ fandreketañe amy ze nomba'e iaby t'i Davide. ⁷ Rinambe' i Davide ze fikalan-defo volamena amo mpitoro' i Kadadetsere vaho nasese'e e Ierosalaime aña. ⁸ Le nangalà' i Davide torisike tsifotofoto ty Betà naho i Berotae, rova' i Kadadetsere.

⁹ Aa ie jinanji' i Toy, mpanjaka' i Kamate te fonga zinevo' i Davide ty valobohò' i Kadadetsere, ¹⁰ le nampihitrife' i Toy amy Davide mpanjaka ty ana'e Iorame, hañontane aze naho hitata aze ty amy nialia'e i Kadadetsere naho nahagioke; fa nimpialy amy Toy t'i Kadadetsere, le nandesa' Iorame fanake volafoty naho fanake volamena vaho fanake torisike. ¹¹ Nengae' i Davide mpanjaka am' IEHOVÀ zay, mindre amo volafoty naho volamena navi'e boak' amo hene fifeheañe nampiambanea'eo: ¹² boak' Arame naho i Moabe naho amo ana' i Amoneo naho amo nte-Pilstio naho amy Amaleke vaho amo nikopahenê amy Kadadetsere, ana' i Rekobe, mpanjaka' i Tsobàio. ¹³ Nahazo asiñe t'i Davide te nimpoly amy nandafaña'e o nte-Arameo am-bavatanen-tsira ao, ondaty rai-ale-tsi-valoarivo. ¹⁴ Nampipoha'e mpirai' lia t'i Edome, toe nitsitsihe'e mpirai-lia ty Edome vaho hene natao mpitoro' i Davide o nte-Edomeo. Natolo' IEHOVÀ amy Davide ty fandreketañe ndra aia'aia ty nomba'e.

¹⁵ Nifelehe' i Davide t'Israele iaby naho nizaka ze hene ondati'e an-kavantañañe naho an-kavañonañe. ¹⁶ Ioabe ana' i Tseroia ty nifehe i valobohòkey; naho mpamolily t'Iehosafate, ana'i Akilode; ¹⁷ mpisoroñe t'i Tsadoke* ana' i Akitobe naho i Akimelek' ana' i Abiatare; naho mpitan-tsokitse t'i Sereià; ¹⁸ naho mpifehe' o nte-Keretio naho o nte-Peletio t'i Benaià, ana' Iehodaià; vaho talèm-pifehe o ana' i Davideo.

9

¹ Aa hoe t'i Davide: Mbe aman-tsehang'a'e hao ty anjomba' i Saole hampi-boahako fañisohañe Ionatane? ² Ie amy zao teo ty boak' añaanjomba' i Saole, ty mpitoroñe atao Tsibà, le kinanji' iereo ho mb'amy Davide mb'eo, le hoe i mpanjakay ama'e: Ihe hao o Tsiba zao? le hoe re: Ie o mpitoro'oo.

* ^{8:17} Tsadoke: to, nañatoñañe; fokom-pisoroñe

³ Le hoe i mpanjakay tama'e: Aa vaho tsy nampipoke sehanga'e hao ty anjomba' i Saole hañasoako am-patarihan' Añahare? Le hoe t'i Tsibà amy mpanjakay. Toe mbe aman' anake kepek' am-pandia'e t'Ionatane. ⁴ Le hoe i mpanjakay tama'e: Aia re? Le hoe t'i Tsibà amy mpanjakay, Oniño t'ie añ'anjomba' i Makire ana' i Amiele e Lo-debare aña. ⁵ Aa le nampañitrife' i Davide, mpanjaka boak' añ' anjomba' i Makire e Lo-debare ao. ⁶ Niheo mb'amy Davide mb'eo t'i Mefibosete, ana' Ionatane, ana' i Saole, nibabok' an-dahara'e naho nidrakadrakake. Le hoe t'i Davide: O Mefibosete! Hoe ty natoi'e: Intoy o mpitoro'oo! ⁷ Le hoe t'i Davide ama'e: Ko hembandrehe, fa toe hisoheko ty am' Ionatane rae'o, naho hene hampoliko ama'o ty tane' i Saole rae'o vaho hikama am-pandambañako eo nainai'e rehe. ⁸ Niambanea'e le nanao ty hoe: Ino o mpitoro'oo te haoñe'o o amboa mate manahak' ahio?

⁹ Kinanji' i mpanjakay amy zao t'i Tsibà mpitoro' i Saole, le nanao'e ty hoe: Fa hene natoloko amy anan-talè'oy ty fanaña' i Saole naho i anjomba'ey. ¹⁰ Havae'o naho o ana'o naho mpitoro'oo ho aze i taney vaho hatonto' areo o voka'eo soa te hanañe mahakama ho kamae'e i anan-talè'oy; fe hikama nainai'e am-pandambañako t'i Mefibosete anan-talè'o. Toe nanañ' ana-dahy folo-lim' amby naho mpitoroñe roapolo t'i Tsibà. ¹¹ Aa le hoe ty asa' i Tsibà amy mpanjakay: Hanoe' o mpitoro'oo i nandilia' i talèko mpanjakay amo mpitoro'oo; aa le nikama ampandambaña'e eo re manahake te raik' amo ana-dahi' i mpanjakaio t'i Mefibosete. ¹² Nanañ' anadahy tora'e ka t'i Mefibosete, Mika ty añara'e. Songa nimpitoro' i Mefibosete o mpimoneñe aña' anjomba' i Tsibào. ¹³ Fe nimoneñe e Ierosalaime ao t'i Mefibosete, amy te mpikama am-pandambaña' i mpanjakay, ie nikepek' am-pandia'e roe.

10

¹ Ie aña, le nivilasy ty mpanjaka' o ana' i Amoneo, vaho nandimbe aze ho mpifehe t'i Khanone, anadahi'ey. ² Le hoe t'i Davide: Hanolorako isoke t'i Khanone ana' i Nakase, amy te nañasoa ahy ty rae'e. Aa le nahitri' i Davide am-pitam-pitoro'e ty rano manintsíñe hañohòa'e ty aman-drae'e. Le niheo mb'an-tanen' ana' i Amone mb'eo o mpitoro' i Davideo. ³ Fe hoe o ana-dona' i Amoneo amy Khanone, talè' iareo: Hiisy an-drae'o hao ty nañitrifa' i Davide mpañohò ama'o? Te mone nampihitrife' i Davide hisarisary i rovay o mpitoro'eo handrotsaha'e. ⁴ Aa le rinambe' i Khanone o mpitoro' i Davideo naho niharate'e ty vaki' o somo'eo naho tinampa'e añivo'e o siki'eo pak' am-piambesara' iareo, vaho niroahe'e mb'eo. ⁵ Ie natalily amy Davide, le nampisangitrifa'e aña, fa nivata'e salatse indaty rey. Le hoe i mpanjakay tama'e: Mandiñisa e Ieriko aña ampara' te mitombo o tanteahe' areoo vaho mimpolia.

⁶ Aa ie nioni' o ana'i Amoneo t'ie nihamantiñe amy Davide, le nañirake o ana' i Amoneo naho nikaramà'e o nte-Arame e Bete-Rehobeo, naho o nte-Arame e Tsobào, lahindefo ro' ale, naho ty mpanjaka' i Maakà reketse lahindefo arivo, vaho o nte-Tobe rai-ale-tsi-ro-arivo. ⁷ Aa ie jinanji' i Davide, le nirahe'e t'Ioabe, naho ty valobohò' o fanalolahio. ⁸ Niavotse o ana' i Amoneo naho hinajari' iareo am-pimoahañe an-dalambey ey i hotakotakey; le nitokañe an-kivoke ey ka o nte-Arame' i Tsobào, naho o a i Rekobeo, naho ondati' i Tobe vaho i Maakà. ⁹ Ie nioni' Ioabe te nilahatse aolo'e naho amboho'e i aliy, le jinobo'e iaby ze fanalolahii' Israeleo, vaho riniri'e hiatreke amo nte-Arameo; ¹⁰ nafanto'e am-pitá' i Abisay rahalahi'e ty ila' ondatio, vaho nalaha'e hiatreke o nte-Amoneo. ¹¹ Le hoe re: Naho

maozatse te amako o nte-Arameo le oloro, fe nahoh fatratse te ama'o o ana' i Amoneo le homb'eo raho hañimba azo. ¹² Mahavania, ehe te ho ventèñe am' ondatin-tikañeo nahoh amo rovan' Añaharen-tikañeo te maozatse tika; vaho te hanoe' IEHOVÀ ze arofoana'e ho soa. ¹³ Aa le nañarine hiatreatre amo nte-Arameo t'Ioabe nahoh o mpiama'eo vaho nitriban-day aolo'eo iereo. ¹⁴ Ie nitrea' o ana' i Amone te nibañe aña o nte-Arameo, le nitriban-day añatrefa' i Abisay ka iereo nimoak' an-drova ao. Aa le napo' Ioabe o ana' i Amoneo nahoh nimpoly mb'e Ierosalaime mb'eo.

¹⁵ Ie trea' o nte-Arameo te ginio' Israele, le nifanontoñe. ¹⁶ Le nañirake t'i Kadadetsere, nahoh nakare'e o nte-Arame alafe' i sakaio; le nimb'e Kelame mb'eo rekets' i Sobake, mifehe ty valobohò' i Kadadetsere ho mpiaolo. ¹⁷ Nitaliliañ' amy Davide, le natonto'e iaby t' Israele, nahoh nitsake Iordaney nahoh nivotrake e Kelame eo. Nihajarie' o nte-Arameo ty fanamea' iareo i Davide vaho nialia'e. ¹⁸ Nitriban-day aolo' Israele o nte-Arameo; le zinama' i Davide ty mpinday sarete fiton-jato, nahoh mpiningi-tsoavalta efats' ale amo nte-Arameo, nahoh vinono'e t'i Sobake mpiaolo' ty valobohò' iareo vaho nihomak' eo. ¹⁹ Aa ie nioni' o mpanjaka mpitoro' i Kadadetsereo te nahagioke t'Israele, le nifampilongo am' Israele vaho nitoroñ' aze. Aa le nihembañe tsy handrombake o ana' i Amoneo ka o nte-Arameo.

11

¹ Ie an-tsam-pamalihan-taoñe, i sam-piavotam-panjaka hihotakotakey, le nirahe' i Davide t'Ioabe, rekets' o mpitoro'eo, nahoh Israele iaby; le rinotsa' iereo o ana' i Amoneo vaho niarikatohe' iereo t'i Ramà. F'ie nitambatse e Ierosalaime ao t'i Davide. ² Aa teo ty hariva te nitroatse am-pandrea'e t'i Davide, nahoh nidratraitse an-tafon' anjomba' i mpanjakay; ie an-tafo ey ro nahatalake ty rakemba niandro; nimontramontre i rakembay, hasoavintañe. ³ Nampañitrike hañontane i rakembay t'i Davide. Le hoe re: Tsy ie hao i Batesevae, ana' i Eliame, tañanjomba' i Orià nte-Kite? ⁴ Aa le nampihitrife' i Davide; ie niheo mb'ama'e ao, niolora'e, aa ie fa nañefebatañe amy haleora'ey ro nimpoly aña'anjomba'eo. ⁵ Niareñe i rakembay vaho nirahe' amy Davide ty hoe: Mivesatse raho.

⁶ Aa le nafanto' i Davide amy Ioabe ty hoe: Iraho mb'amako mb'etoa t'i Orià nte-Kite. Aa le nirahe' Ioabe mb' amy Davide t'i Orià. ⁷ Aa ie pok' ama'e t'i Orià, le nañontanea' i Davide te nanao akore t'Ioabe, nahoh ondatio nahoh i fañotakotaha' i aliy. ⁸ Le hoe t'i Davide amy Orià: Akia, mizotsoa mb'añ' akiba'o mb'eo, nahoh manasà fandia. Aa le niavotse aña'anjomba' i mpanjakay t'i Orià vaho nampañoriheñ' aze ty mahakama, ravoravo boak' amy mpanjakay. ⁹ Fe nirotse an-dalan' anjomba' i mpanjakay t'i Orià mindre amo mpitoro' i talè'ey iabio vaho tsy nizotso mb' aña'anjomba'eo. ¹⁰ Aa ie natalily amy Davide ty hoe: Tsy nizotso mb'añ' anjomba'eo mb'eo t'i Orià. Le hoe t'i Davide amy Orià, Tsy vaho nihirik' an-dia-lava v'iheo? Aa vaho akore t'ie tsy nizotso mb' aña'anjomba'eo? ¹¹ Le hoe t'i Orià amy Davide: Songa mimoneñe an-kibohotse i vatam-pañinay, nahoh Israele, vaho Iehodà; mbore mitobe an-kivok' ey t'Ioabe talèko mindre amo mpitoron-talèkoo; aa le himoak' aña'anjombako ao hao raho hihinañe nahoh hinoñe, vaho handre amy valikoy? Kanao velon-drehe nahoh veloñe ty arofo'o, tsy hanoeko. ¹² Le hoe t'i Davide amy Orià: Mahaliñisa atoy hey te anito, le hengako hiavotse te maray. Aa le niambesatse e Ierosalaime ao t'i Orià amy andro zay; le ie loakandro ¹³ nikanjie' i Davide nahoh nikama nahoh ninoñe ama'e; vaho

nimamoe'e; le niakatse aña re te hariva nandre am-pandreañe mindre amo mpitoro' i taleio, fe tsy nizotso mb' aña' anjomba'e mb'eo.

¹⁴ Aa ie maraiñe, nanokitse taratasy am' Ioabe t'i Davide, vaho nampisangitrifa'e am-pitá' i Orià. ¹⁵ Le hoe ty sinoki'e amy taratasiy: Apoho aolo amy hotakotake miforoforoy t'i Orià, le isitaho, soa t'ie ho fofohéñe hivetrake. ¹⁶ Ie amy zao, naho nisary i aliy t'Ioabe le nafanto'e hitoetse amo fanalolahio t'i Orià. ¹⁷ Aa le niavotse ondati' i rovaio, nifandraparapak' am' Ioabe; nitsingoro eo ty ila' ondatio, naho ty ila' o mpitoro' i Davideo; vaho nihomake ka t'i Orià nte-Kite. ¹⁸ Le nañirake t'Ioabe naho nitalily i aliy amy Davide; ¹⁹ le hoe ty nafanto'e amy nampihitrifa'ey: Ie fa nitalilie'o amy mpanjakay i aly iabiy, ²⁰ naho miforoforo ty haviñera' i mpanjakay, manao ama'o ty hoe: Aa vaho akore t'ie niheo mb'eo hialy marine i rovay hoe zao? Tsy nifohi' areo t'ie hitifitse boak' ambone' i kijoliy ey? ²¹ ia ty nañoho-doza amy Akimelek' ana' Ierobesete? tsy roakemba hao ty nametsake vato-fandisanañe-ambone ama'e boak' an-kijoly ey nampihomak' aze e Tebetse aña? Aa vaho manao akore te niharinea' areo i rindriñey? le hoe ty hatao'o: Nihomake ka i mpitoro'o Orià nte-Kitey. ²² Aa le nimb'eo i nafantokey vaho natalili'e amy Davide iaby i nampañitrife' Ioabe azey. ²³ Le hoe i irakey amy Davide: Toe naname anay ondatio naho niakatse mb' ama'ay an-kivoke ey fe nampolie'ay pak' am-pimoahañe an-dalam-bey eo. ²⁴ Le hiniriri' o mpitam-paleo o mpitoro'oo boak' amy kijoliy, naho amo mpitoro' i mpanjakaio ty nivetrake, vaho nihomake ka t'i Orià nte-Kite mpitoro'oy. ²⁵ Aa le hoe t'i Davide amy nihitrikey: Ty hoe ty ho enta'o am' Ioabe: Ehe te tsy hampioremene azo o raha zao fa tsy mete tsy mampibotseke mb'eo mb'eo avao i fibaray; ampaozaro ty fihotakotaha'o amy rovay vaho rotsaho. Osiho re. ²⁶ Ie jinanji' i tañanjomba' i Orià te vilasy t'i Orià vali'e le nandala'e. ²⁷ Ie aña i fandalà'ey le nahitri' i Davide ty holia'e aña'anjomba'e ao naho nengae'e ho vali'e vaho nisamak' ana-dahy ho aze. Fe tsy ninò' IEHOVÀ i nanoe' i Davidey.

12

¹ Aa le nirahe' IEHOVÀ amy Davide t'i Natane. Le nomb' ama'e mb'eo nanao ty hoe: Teo t'indaty roe androva raike: mpañaleale ty raike, naho rarake ty raike. ² Nitsifotofoto ty lia-raike naho ty mpirai-tro' i mpañalealey; ³ fe nipo'i e i rarakey naho tsy ty anak' añaondry vave raike vinili'e naho nibeize'e; ie nibeizeñe ama'e naho amo keleia'eo, nihinana'e ka i tsindro'ey naho ninoñe amy fitovi'ey vaho nandre aña'araña'e eo vaho nihoe anak' ampela ama'e. ⁴ Pok' amy mpañalealey amy zao ty mpañavelo, le nado'e, tsy nangala'e i lia-rai'ey, hañajaria'e ho a i mpañavelo nivotrak' ama'ey, fe rinambe'e i vik' añaondri' i rarakeiy vaho nihajarie'e ho a indaty nivotrak' ama'ey. ⁵ Niforoforo am' indatiy ty haviñera' i Davide; le hoe re amy Natane: Kanao veloñe t'IEHOVÀ mañeva hakoromake indaty nanao i raha zaiy; ⁶ vaho havaha'e in' empatse i vik' añaondriy, amy nanoa'e o haloloañe zaoy, ie tsy niferenaiñe indatiy. ⁷ Aa hoe t'i Natane amy Davide, Ihe 'nio ondatio. Hoe t'IEHOVÀ Andrianañahare' Israele: Norizako ho mpanjaka' Israele rehe, naho rinombako am-pitá' i Saole; ⁸ natoloko azo ka ty anjomban-talè'o, naho o valin-talè'oo ho aña' araña'o, naho natoloko azo ty anjomba' Israele naho Iehodà; aa naho niloho-kede ama'o zay ho nitompeako zao naho zao iaby. ⁹ Inoñ' arè ty nitsambolitio'a'o ty tsara' IEHOVÀ, hanoa'o

haratiañe am-pahatreavako? Zinevo'o am-pibara t'i Orià nte-Kite naho rinambe'o ho vali'o i tañanjomba'ey, ie vinono'o am-pibara' o ana' i Amoneo. ¹⁰ Le amy zao, le lia'e tsy hienga ty anjomba'o i fibaray amy te nitsambolitio'a Ahiy, vaho rinambe'o ho vali'o ty vali' i Orià. ¹¹ Hoe t'IEHOVÀ: Inao! hampitroboeko añ' anjomba'o ao ty hankàñe, naho ho tavaneko añatrefam-pihaino'o o vali'oo naho hatoloko ami'ty marine azo, ie hifandia tihy amo vali'oo ampahatreava' i àndroy. ¹² Ihe nanao aze añetake fa izaho ka ro hampidodea o raha zao añatrefa' Israele iaby naho añatrefa' i àndroy. ¹³ Le hoe t'i Davide amy Natane: Aman-kakeo am' IEHOVÀ raho. Le hoe t'i Natane amy Davide: Fa napo' IEHOVÀ ka i tahi'oy; tsy hihomake rehe. ¹⁴ Fe amy te nanokafa'o lalañe o rafelahi' IEHOVÀ amy sata'oy, hiteratera, le tsy mete tsy ho simba ty ajaja ho samahe'o.

¹⁵ Nimpoly mb'añ' anjomba'e mb'eo t'i Natane. Le pinao' IEHOVÀ ty ajaja sinama' i vali' i Orià amy Davide, vaho narare mafe. ¹⁶ Nihalalie' i Davide aman Añahare i ajajay, naho niliilara' i D'avide, vaho ie nimoake ao, le mandre an-tane avao amy haleñey. ¹⁷ Niongak' amy zao o androanavi' i anjombaio le nijohañe añ'ila'eo hampitroatse aze boak'an-tane; fe tsy nimete, vaho tsy nitraofa'e fikama. ¹⁸ Ie amy andro fahafitoy, nimate i ajajay. Le nihembañe o mpitoro' i Davideo tsy nahavany hisaontsy ama'e te simba i ajajay; fa hoe iereo: Inay, ie mbe niveloñe i ajajay, naho nisaontsen-tika le tsy hinao'e ty feon-tika; antsake te atalily aze te simba i ajajay, te mone hanolo-tsotry aze? ¹⁹ Fe nioni' i Davide te niharo fivesoveso o mpitoro'eo vaho nifohi' i Davide te nimate i ajajay; le hoe t'i Davide amo mpitoro'eo: Simba hao i ajajay? Le hoe iereo: Simba. ²⁰ Niongake boak' antane amy zao t'i Davide le nisasa naho nihosotse naho novae'e o saro'eo; le nimoak' añ' anjomba' IEHOVÀ, nitalaho; naho nimoak' añ'anjomba'e; le nanjotsoa' iareo mahakama t'ie nanohiñe, vaho nikama. ²¹ Le hoe o mpitoro'eo tama'e: Ino o nanoe'o zao? ihe nililitse naho nirovetse te niveloñe i ajajay; f'ie nisimba i ajajay, le nitroatse rehe vaho mikama. ²² Aa le hoe re: Naho mbe niveloñe i ajajay le nililirako naho nirovetako, fa nataoko te: Ia ty mahafohiñe hera hañisok' ahy t'IEHOVÀ vaho hitambeloñe i ajajay? ²³ F'ie mate henaneo, ino ty hililirako? hahafivañom-beloñe aze hao? Toe homb' ama'e aña raho f'ie tsy himpoly amako. ²⁴ Aa le nihohòe' i Davide t'i Batesevàe vali'e, le nizilik' ama'e ao naho niolora'e, naho nisamak' anadahy vaho natao'e Selomò ty añara'e. Le nikokoa' IEHOVÀ; ²⁵ vaho nirahe'e am-pità' i Natane mpitoky; le tinoka'e ty hoe Iedidià ty añara'e, ty amy IEHOVÀ.

²⁶ Ie henane zay nialy amy Rekabe anak' Amone, t'Ioabe vaho rinambe'e i rovam' panjakay. ²⁷ Aa le nampañitrike ìrak' amy Davide re nanao ty hoe: Fa nialiako ty Rakabe, eka, fa rinambeko i rovan-dranoy. ²⁸ Aa le atontono ty ila'ondatio naho mitobea haname i rovay, naho tavano, kera zaho ty handrambe i rovay, le ho tokaveñe ami'ty añarako. ²⁹ Aa le natonto' i Davide ondaty iabio, naho nionjomb'e Rakabe mb'eo naho nifandraparapak' ama'e vaho rinambe'e, ³⁰ le rinambe'e ami'ty añambone' i Malkame ty sabaka'e; talenta volamena ty lanja'e naho nampipetaham-batosoa; vaho napetak' añambone' i Davide. Tsifotofoto ty vara nikopahe'e amy rovay. ³¹ Nakare'e iaby ondatio naho nampitoloñe'e lasý naho lasarý viñe naho fekom-bý vaho nampanodore'e birike; zay ty nanoe'e amo fonga rova' o nte Amoneo vaho nimpoly mb'e Ierosalaime aña t'i Davide naho ondaty iabio.

13

¹ Ie aña, nanan-drahavave soa vintañe t'i Absalome ana'i Davide, Tamare ty añara'e; le nikokoa' i Amnone ana' i Davide. ² Akore ty fioremèña' i Amnone kanao nisiloke ty amy Tamare rahavave'e; ie mbe tsy nahavany lahy; aa le hoe nisarotse amy Amnone ty hanao ndra inoñ' inoñ'ama'e. Fe nanan-drañetse t'i Amnone, Ionadabe ty tahina'e, ana' i Simeà, rahalahi' i Davide; loho nahay fañahy t'Ionadabe. ⁴ Le hoe re tama'e: Aa vaho akore te ihe anam-panjaka ro minike avao handro am-pohatse? Tsy hatalili'o ahy hao? le hoe t'i Amnone ama'e:

Kokoako t'i Tamare rahavave' i Absalome. ⁵ Aa le hoe t'Ionadabe ama'e: Mandrea am-pandrea'o, le manoa sare siloke; aa ie mb'eo ty rae'o hisary azo, le ano ty hoe: Ehe, ampombao mb'etoa ty rahavaveko Tamare, hamahana'e mofo ahy, naho hañalankañe mahakama añatrefako atoy, hahatreavako aze naho hihinanako an-taña'e. ⁶ Aa le nàndre eo t'i Amnone, mintse narare; le ie nitilik' aze i mpanjakay, hoe t'i Amnone amy mpanjakay: Ehe, angao homb' etoa ty rahavaveko Tamare hamboatse bokoboko mofo tsy ampeampe am-pahatreavako, hihinanako an-taña'e. ⁷ Aa le nampañitrik' añ' akiba' i Tamare aña t'i Davide nanao ty hoe: Akia mb' añ' anjomban-drahalahi'o Amnone mb'eo, vaho añañalankaño mahakama. ⁸ Aa le nimb' añ'anjomba' i Amnone rahalahi'e mb'eo t'i Tamare; ie nandre ao. Nandrambe koba re le trinobotrobo'e naho nanao bokoboko-mofo am-pahaisaha'e vaho natoña'e i mofoy. ⁹ Rinambe'e amy zao ty finga le nazotso'e*; f'ie tsy nimete nikama. Fa hoe t'i Amnone, Mienga ahy ze lahilahy. Le hene niakatse ama'e ondatio.

¹⁰ Le hoe t'i Amnone amy Tamare: Endeso an-traño atoy i haneñey hihinanako an-taña'o. Aa le rinambe' i Tamare o bokomofo nanoe'eo vaho nendese'e mb' an-traño ao hazotso'e amy Amnone rahalahi'ey. ¹¹ Aa ie nañarine aze hanjotsoa'e, hikama, le nivihine'e vaho nanoe'e ty hoe, Antao rahavaveko, miharoa tihy amako. ¹² Le hoe ty natoi'e aze: Aiy! ry rahalahiko, ko azi'o; fa tsy fanoeñe e Israele ao o raha zao; ko anoe'o o haloloña'e zao. ¹³ Le zaho, aia ty hivateako ty hasalarako? ihe ka ty ho mpiamo halò-tsere' Israeleo. Aa le, miambane ama'o, misaontsia amy mpanjakay fa tsy ho tana'e ama'o raho. ¹⁴ Fe tsy hinao'e ty fiarañanaña'e; aa kanao naozatse te ama'e, nazi'e hiolotse. ¹⁵ Nalaiñe aze amy zao t'i Amnone am-palaim-binta-mena; toe nandikoatse i nikokoa'e azey ty falai'e henane zao. Le hoe t'i Amnone ama'e, Mitroara, akia. ¹⁶ Le hoe re tama'e: Aiy avao, fa lombolombo' i raty nanoe'o amakoy o fampisintaha'o ahy ama'oo, fe tsy hinao'e. ¹⁷ Le kinoi'e i mpitoro'e mpiatrak' azey, Apitsoho amako ty ampela toy vaho sikadaño o lalañe o t'ie miakatse ¹⁸ (Ie amy zao nisikiñe lamba maro-volo, toe sikiñe lava mireparepa nisikina' o somondrara ana' i mpanjakaio). Aa le nakare' i mpitoro'ey vaho sinikada'e i lalañey t'ie niakatse, ¹⁹ le nampipoke lavenoke añambone'e t'i Tamare naho rinia'e i siki'e maro-volo nisikina'ey naho nasampe'e añambone'e eo o taña'eo vaho nandeha; nikoaike t'ie nimb'eo. ²⁰ Le hoe t'i Absalome rahalahi'e ama'e, Nindre ama'o hao t'i Amnone rahalahi'oy? aa mitsiñha hey ry rahavaveko: ie rahalahi'o, ko tana'o an-tro'o ao o raha zao. Aa le nitambatse añ' anjomba' i Absalome rahalahi'e ao re, nihontoke.

²¹ Aa ie jinanji' i Davide le niforoforo; ²² vaho tsy nisaontsy ndra soa ndra raty amy Amnone ka t'i Absalome; fa niheje' i Absalome vintañe t'i Amnone, amy namahora'e i Tamare rahavave'ey. ²³ Ie taoñe roe aña, naho e Baale-katsore añ'ila' i Efraime ey o pañitsi-bolon' añondri' i Absalome;

* ^{13:9} Heb: naili'e

le hene nambara' i Absalome o ana-dahi' i mpanjakaio. ²⁴ Aa le niheo amy mpanjakay mb'eo t'i Absalome nanao ty hoe: Inao te amam-paňitsik' aňondry ty mpitoro'o; aa ehe te hindre lia ami'ty mpitoro'o rehe rekets' o mpitoro'oo. ²⁵ Fe hoe i mpanjakay amy Absalome: Aiy, anako, ee te tsy haňavelo mb'eo iaby tika hera havesatse ama'o. Aa ndra t'ie nazi'e tsy nimete ho mb'eo, fe nitatae'e. ²⁶ Aa naho tsie, le apoho hindre ama'ay t'i Amnone rahalahiko. Le hoe i mpanjakay tama'e: Ino ty hindreza'e ama'o? ²⁷ Mbe nazi' i Absalome, vaho nado'e hindre ama'e iaby t'i Amnone naho o ana-dahi' i mpanjakaio. ²⁸ Linili' i Absalome amy zao o mpitoro'eo, ami'ty hoe: Inao, hey, naho falefale amy divaiy ty arofo' i Amnone naho manao ty hoe ama' areo raho, Lafao t'i Amnone, le vonò, ko hembaňe, tsy fa linilik? Mahasibeha, naho mahimbaňa. ²⁹ Aa le nanoe'o mpitoro' i Absalomeo amy Amnone i nandilia' i Absalomey. Le songa niongake o anam-panjakao, ninigitse borìke vaho nitriban-day.

³⁰ Ie mbe an-dala mb'eo, le niheo amy Davide ty rehake nanao ty hoe: Fa zinama' i Absalome iaby o anam-panjakao vaho tsy nengan-konka'e. ³¹ Niongak' amy zao i mpanjakay, nandriatse o saro'eo, le nibabok' mb'an-tane; le nijohaňe eo iaby o mpitoro'eo aman-tsiky riniatse. ³² Aa hoe ty natoi' Ionadabe, ana'i Simeà, rahalahi' i Davide, Ehe tsy hatao' ty talèko te fonga zinama' iareo o ajalahy anam-panjakao; fa i Amnone avao ty nihomake; toe namantaňa' i Absalome 'nio boak' amy andro namahoraňe i Tamare rahavave'ey. ³³ Aa ee tsy ho rambese' i talèko mpanjaka aň'arofo'e te fonga nikoromake o ana-dahi' i mpanjakaio; fa i Amnone avao ty nihomake. ³⁴ Nienga an-day ka t'i Absalome. Niandra amy zao ty ajalahy mpijilojilo le nahatalake ondaty maro nimb'eo amboho aze niary aň' ila' i vohitsey. ³⁵ Le hoe t'Ionadabe amy mpanjakay: Hehe te mb'etoa o ana-dahim-panjakao, manahake i vinolam-pitoro'oy, ie henaneo. ³⁶ Ie vaho nampigadoňe i saontsi'ey le ingo pok'eo o ana-dahim-panjakao; nampipoňa-peo nangololoike, vaho nangoihoy ty rovetse ka i mpanjakay rekets' o mpitoro'e iabio. ³⁷ Fe niherereake mb'e Talmay ana' i Amihode mpanjaka' i Gesore aňe t'i Absalome; vaho nirovetse i ana'ey lomoňandro lomoňandro t'i Davide. ³⁸ Aa le nilay mb'e Gesore t'i Absalome vaho nitambatse aňe telo taoňe. ³⁹ Nahakoretse ty arofo' i Davide ty hamaniňa'e i Absalome; f'ie nanintsiňe ty amy Amnone kanao nihomake.

14

¹ Nioni' Ioabe ana' i Tseroià te amy Absalome ty arofo' i mpanjakay. ² Naňitrik' amy Tekoý* t'Ioabe, nangalake rakemba mahihitse boak' aňe, le nanao ty hoe ama'e: Miambane ama'o, ehe misarea mpandala, le maňombea sarom-pandalàňe, le ko mihosotse menake, fa mintse rakemba ela nandala vilasy; ³ vaho akia mb'amy mpanjakay mb'eo, misaontsia an-tsata zao. Aa le napo' Ioabe am-palie'e ty ho saontsie'e. ⁴ Aa ie nisaontsy amy mpanjakay i rakemba nte-Tekoý, le nibabok' an-tane eo, nidrakadrakake nanao ty hoe: Oloro ry mpanjaka. ⁵ Le hoe i mpanjakay tama'e: Ino ty maňore azo? Le hoe re: Toe vantotse raho, mate valy. ⁶ Nanaň' anadahy roe ty anak' ampata'o, aa ie nifanehak' an-kivok' aňe, tsy teo ty hampifanarake iareo fa zinevo' ty raike ty raike namono aze. ⁷ Ie amy zao, nitroatse niatreatre ami' ty mpitoro'o o longo iabio nanao ty hoe: Aseseo i naňè-doza aman-drahalahi'ey hamonoa'ay ty amy fiain-drahalahi'e zinevo'ey, handrotsaha' iareo ka ty mpandova. Zay ty

* **14:2** Tekoý: antsiva: naňatò

hamonoa' iareo ty sehangam-poroha mirekake, tsy hanañam-baliko ndra tahinañe ndra tariratse ambone tane atoy. ⁸ Le hoe i mpanjakay tamy rakembay: Mimpolia mb'añ' anjomba'o mb'eo, le hamantoke ty ama'o raho. ⁹ Aa le hoe i rakemba nte-Tekoiý tamy mpanjakay: O ry talèko, mpanjaka, ee te ho amako ty hakeo naho ami'ty anjomban-draeko vaho halio tahiñe ty fiambesa' i mpanjakay. ¹⁰ Le hoe i mpanjakay tama'e: Ndra iaia ty hiatreatre azo, aseseo amako le tsy ho tsapae'e. ¹¹ Aa le hoe re: Miambane ama'o, ehe te ho tiah'i i mpanjakay t'IEHOVÀ Andrianañahare'o, le tsy hijoy ka ty mpamale fate, tsy mone harotsa' iereo i anakoy. Le hoe re: Kanao veloñe t'IEHOVÀ, leo raik' ami'ty maroi' i ana'oy tsy hipok' antane. ¹² Le hoe i rakembay: Mihalaly ama'o: adono hinday entañe raik' amy talèko mpanjakay ty anak' ampata'o. Le hoe re Misaontsia. ¹³ Aa hoe i rakembay: Íno arè ty nikililia'o am'ondatin' Añahareo o raha zao, t'ie, amy saontsy zay ty mete nampanan-kakeo i mpanjakay kanao tsy ampihitrife'e himpoly i naitoañey. ¹⁴ Amy te hivetrake zahay, manahake ty rano nadoñañe an-tane, ie tsy mete tovizeñe; tsy mirihy ondaty t'i Andrianañahare; f'ie toe misafiry lalañe, soa tsy hatao añombelahi-mavo i naitoañey. ¹⁵ Aa kanao nimb' etoa raho nanese o entañe zao amy talèko mpanjakay, le amy te nañembañe ahy ondatio; le hoe raho, Ho volañeko amy mpanjakay henaneo, hera hanc'e ty halalim-pitoro'e. ¹⁶ Amy te hijaniñe i mpanjakay, handrombake i mpitoro'ey ampità' indaty te handrotsak' ahy naho i anakoy amy lovan' Añaharey. ¹⁷ Le hoe ty anak' ampata'o: Ehe te hañohò ahy ty saontsin-talèko mpanjaka; fa hambañe ami'ty anjelin' Añahare ty talèko mpanjaka, hahafitsikarake ty soa ami'ty raty; aa le ho ama'o abey t'IEHOVÀ Andrianañahare'o. ¹⁸ Le hoe i mpanjakay amy rakembay: Ehe, ko aetak' amako ty hañontaneako azo. Le hoe i rakembay: Ehe misaontsia, ry talèko mpanjaka. ¹⁹ Le hoe i mpanjakay: Tsy ama'o amo raha zao hao ty fità' Ioabe? Le hoe ty natoi' i rakembay: Kanao veloñe ty arofo'o, ry talèko mpanjaka, tsy eo ty mahafitolike mb'am-pitàn-kavana ndra havia amy nisaontsie' i mpanjakaiy; fa toe nihalaly amako t'i Ioabe mpitoro'o, ie ty nampipoke i entañe iaby zay am-bava' o anak' am-pata'oo; ²⁰ ty hampiova ty tarehe' i rahay ty nanoe' Ioabe mpitoro'o o raha zao; toe mahihitse o talèkoo hoe hihin' anjelin' Añahare, hahafohina'e ze he'e an-tane atoy.

²¹ Aa le hoe i mpanjakay am' Ioabe: Mahaoniña arè, fa nanoeko; aa le akia, hitrifo aña i ajalahy Absalome. ²² Nibabok' an-dahara'e mb'an-tane t'Ioabe naho nidrakadrakake, vaho nañandriañe i mpanjakay, le hoe t'Ioabe: Fohi' ty mpitoro'o henaneo te nahatre añañisoñañe am-pahaoniña'o ry talèko mpanjaka, ami'ty nanoe' i mpanjakay i halalim-pitoro'ey. ²³ Aa le niavotse t'Ioabe nimb'e Gesore mb'eo vaho nendese'e mb'e Ierosalaime mb'eo t'i Absalome. ²⁴ Le hoe i mpanjakay: Ampitoliho mb' añañomba'e mb'eo re tsy hahatre añañambone'e. ²⁵ Aa le nivike mb'añ' anjomba'e mb'eo t'i Absalome; vaho tsy niisa'e ty lahara' i mpanjakay. ²⁶ Ie amy zao, tsy ia e Israele ao ty nahazo engeñe ami'ty faràm-binta'e naho tsy i Absalome, ie tsy nanan-kandra boak' an-delam-pandia'e pak' andengon' añañambone'e. ²⁷ Aa ie harate'e ty añañambone'e—amy t'ie niharatse i añañambone'ey am-pigadoñan-taoñe, amy te navesatse ama'e o maròi'eo, le nañitsifa'e—naho nandanja i maròi'ey le ni-roanjato amy fandanjam-panjakay. ²⁸ Nisamak' ana-dahy telo t'i Absalome, naho anak' ampela raike, natao Tamare ty añañara'e; ampela soa vintañe.

²⁸ Aa le nimoneñe roe taoñe e Ierosalaime ao t'i Absalome vaho tsy

niisa'e ty lahaba' i mpanjakay. ²⁹ Le nampihitrife' i Absalome t'Ioabe, hañirake aze mb' amy mpanjakay mb'eo; f'ie tsy nimete hiheto mb'ama'e; nampisangitrite'e fañindroe'e fe tsy nimete homb'eo. ³⁰ Aa le hoe re amo mpitoro'eo: Inao, marine i tetekoy ty tete' Ioabe, akia ivaño afo. Aa le namiañ' afo an-tete'e ao o mpitoro' i Absalomeo. ³¹ Niongak' amy zao t'Ioabe, nimb' aña' anjomba'i Absalome mb'eo, nanao ty hoe ama'e: Aa vaho akore ty nanodora' o mpitoro'oo i tetekoy? ³² Aa hoe ty natoi' i Absalome Ioabe: Inao! toe nampihitrifeko ami'ty hoe: Mb'etoa, hañirahako azo amy mpanjakay, hanao ty hoe: Ino ty nimpoliako boake Gesore aña? Ndra kitra'e mbe nitambatse aña; aa ehe amphaoniño ahy ty lahaba' i mpanjakay; aa lehe aman-kakeo raho, adono re hañohoho-doza amako. ³³ Niheo amy mpanjakay t'Ioabe, nitalily ama'e; aa le kinanji'e t'i Absalome naho nimb'amy mpanjakay mb'eo nidrodrètse mb'an-tane ty lahaba' e añatrefa' i mpanjakay, vaho norofa' i mpanjakay t'i Absalome.

15

¹ Heneke zay, le nihentseñe' i Absalome ty sarete reketse soavala naho lahilahy lim' ampolo hihitrihitry aolo'e. ² Nitroatse maraindray t'i Absalome naho nijohañe aña' ila' ty lala' i lalambeiy; ie amy zay, naho nanan-kabò t'indaty ze ho nasese'e amy mpanjakay ho zakae'e, le nikanjy aze t'i Absalome, nanao ty hoe: Aia ty rova nihirifa'o? le hoe re: Boak' am-pifokoa' Israele raik' ao raho. ³ Le hoe t'i Absalome ama'e: Inao! soa naho to o azoo; fe tsy aman-tsorotà hijanjiñe azo i mpanjakay. ⁴ Hoe ka ty natovo' i Absalome: Ee te zaho ty nanoeñe mpizaka an-tane' atoy, soa te ho nimeako to ze ondaty miheo amako minday ty sisi'e ndra ty kabò'e. ⁵ Aa ie nañarine aze t'indaty hiambane ama'e, le nahiti'e ama'e ty fita'e, le namihiñe aze, vaho norofa'e. ⁶ Nanoe' i Absalome i sata zay amy ze nomb' amy mpanjakay boake Israele iaby hipay to; aa le kinizo' i Absalome ty arofo'ondate' Israeleo.

⁷ Ie nimodo ty efa-taoñe, le hoe t'i Absalome amy mpanjakay: Mihalaly ama'o, ehe, adono homb'eo hañondroke i nifantàkoy, i nanoeko am' IEHOVÀ e Kebroney. ⁸ Fa nanao fanta ty mpitoro'o t'ie nitoboke e Gesore' Arame aña, ami'ty hoe: Naho toe hampolie' IEHOVÀ mb'e Ierosalaime mb'eo, le hitoroñe IEHOVÀ raho. ⁹ Le hoe i mpanjakay tama'e: Akia am-panintsiñañe. Aa le niavotse mb'e Kebrone mb'eo re, ¹⁰ fe mone nañirake mpitrobo amo hene fifokoa' Israeleo t'i Absalome hanao ty hoe: Ie mahajanjiñe ty feon' antsiva*, le hanao ty hoe nahareo: Mpanjaka e Kebrone ao t'i Absalome. ¹¹ Nindre amy Absalome boake Ierosalaime ao ty lahilahy roanjato, songa nambarañe, f'ie nandeha an-tso-po, tsy nahafohiñe ty lengo'e. ¹² Aa ie nañenga soroñe t'i Absalome le nahitri'e t'i Akitofele nte Gilò, mpanolo-keve' i Davide, boak' an-drova'e e Gilò aña. Le nihaozatse i kililiy amy te nitolom-pitombo ondaty amy Absalomeo.

¹³ Niheo amy Davide amy zao ty mpitalily nanao ty hoe: Fa mañorike i Absalome ty arofo' o nte' Israeleo. ¹⁴ Le hoe t'i Davide amo hene mpitoro'e nindre ama'e e Ierosalaimeo: Miongaha, antao hibijoñe mb'eo tsy mone tsy hahafipoliotse amy Absalome tika; malisà nahareo hienga, hera hiambotraha'e aniany, hañohoho-doza aman-tika, vaho ho lafà'e am-pibara ty rova toy. ¹⁵ Aa le hoe o mpitorom-panjakao amy mpanjakay: Ingo, te veka'e hanao ze satrim-panjaka talèko o mpitoro'oo. ¹⁶ Aa le niavotse i mpanjakay vaho nañorik' aze o aña'anjomba'e iabio. Fe nenga' i

* **15:10** Heb; sofare: antsiva an-tsifan'añondry

mpanjakay ty rakemba sakeza'e folo hañambeñe i anjombay. ¹⁷ Nionjoñe mb'eo i mpanjakay, mitraok' am' ondaty nañorik' azeo, le nitofa e Bete-hamerekàke[†] ao. ¹⁸ Nioza ama'e o mpitoro'e iabio; o nte-Kerete iabio naho o nte-Pilisty iabio naho o nte-Gate iabio, i lahindefo enen-jato nañorik' aze am-pandia boake Gate aña rey songa niary aolo' i mpanjakay mb'eo. ¹⁹ Aa hoe i mpanjakay am' Itaie nte-Gate; Ino ty indreza'o ama'ay? Mibalicha, mimoneña amy mpanjakay; fa renetane rehe, naho sese-tane boak' antoe'o aña. ²⁰ Toe omale avao ty nivotraha'o eo, aa vaho haziko hitrao fitroarañe naho fizotsoañe ama'ay rehe te anito, izaho miheo mb'amy ze mete? Mimpolia, ampibaliho miharo ama'o ka ondati'oo an-kasoa naho hatò. ²¹ Fe hoe ty natoi' Itaie amy mpanjakay: Kanao veloñe t'IEHOVÀ naho veloñe ka ty talèko mpanjaka, le amy ze toetse itoera' ty talèko mpanjaka, ke te fihomahañe he t'ie haveloñe, le toe ho eo ka ty mpitoro'o. ²² Aa le hoe t'i Davide am' Itaie: Akia mitsaha. Le nitsake mb'eo t' Itaie nte-Gate rekets' ondati'e iabio naho o keleiañe nindre ama'eo. ²³ Nipoñafe' i tane iabiy ty fangoihoiañe, le nitsake mb'eo ondaty iabio, naho nitsake i torahañe Kidroney ka i mpanjakay vaho songa nitsake, mb' an-dalam-patrambey aña ondatio.

²⁴ Nionjoñe mb'eo t'i Tsadoke rekets' o nte-Levy iabio, nitarazo i vatam-pañinan' Añaharey; le napo' iareo ambane i vatan' Añaharey vaho nañenga soroñe t'i Abiatare ampara' te niakatse i rovay ondaty iabio. ²⁵ Aa hoe i mpanjakay amy Tsadoke, Endeso mihereñe mb'an-drova ao o vatan' Añahareo; fa naho mahaoni-pañisohañe am-pihaino' IEHOVÀ raho le hampoli'e mb'eo vaho songa hatoro'e ahy zay naho i anjomba'ey, ²⁶ fe naho ty hoe ty hatao'e: Tsy mahafale ahy rehe; le intoy raho; ee te hanoe'e amako ze satri'e. ²⁷ Le hoe ka i mpanjakay amy Tsadoke mpisoroñe: Tsy oni'o hao? Aa le mimpolia mb'amy rovay ao ampanintsiñañe, ihe naho o ana-dahi'o roe mindre ama'oo, i Akimatse ana'o, naho Ionatane ana' i Abiatare. ²⁸ Inao te hihenekeneke amonto' i fatrambeiy raho ampara' te miyotruk' amako ze ho taroñe'o amako. ²⁹ Aa le nitarazoe' i Tsadoke naho i Abiatare mb'e Ierosalaime mb'eo i vatan' Añaharey vaho nitoetse ao. ³⁰ Nionjomb' amy fitroara' i Vohits' Olivey mb'eo t'i Davide nirovetse amy fiañambonea'ey mb'eo; nisaroñe ka ty añambone'e naho nañavelo tsy aman-kana; songa nisaron-doha ondaty nindre ama'eo, aa le nitroatse, sindre nangololoike am-pionjonañe mb'eo.

³¹ Teo ty nitalily amy Davide ty hoe: Mpiamo mpikilily miharo amy Absalomeo t'i Akitofele. Le hoe t'i Davide: O ry IEHOVÀ, mihalaly ama'o, ehe te hafote'o ho hagegeañe ty tolo-keve' i Akitofele. ³² Ie amy zao, fa an-dengo' i fitroarañey t'i Davide, amy fitalahoñañe aman' Añaharey, le ingo, nifanalaka ama'e eo t'i Kosày nte-Ereke, niriatsé iaby ty saro'e, naho debole ty añambone'e eo. ³³ Le hoe t'i Davide ama'e: Aa naho mindre mitsak' amako rehe, le ho entam-bey amako; ³⁴ f'ie mibalike mb'amy rovay ao, vaho manao ty hoe amy Absalome, Ho mpitoro'o raho, ry mpanjaka, hambarñe amy nitoroñako aman-drae'o taoloy ty hitoroñako azo. Ihe amy zay ro hamaoke ty tolo-keve' i Akitofele. ³⁵ Aa vaho tsy hindre ama'o ka t'i Tsadoke naho i Abiatare mpisoroñe? Aa le ze janji'o añañomba' i mpanjakay, ro talilie'o amy Tsadoke naho i Abiatare mpisoroñe. ³⁶ Ingo te mindre am' iereo i ana-dahi' iareo roe rey i Akimatse ana' i Tsadoke naho Ionatane ana' i Abiatare; ie ro hañitrica'o amako ze he'e janjiñe'o. ³⁷ Aa le niheo mb' an-drova ao t'i Kosay rañe' i Davide te antitotse himoake

[†] 15:17 Bete-hamerekake: anjomban-jeba'e;

an-drova ao t'i Absalome.

16

¹ Ie vaho nilosore' i Davide ty lengo' i vohitsey, te nifanalaka ama'e ty Tsibà mpitoro' i Mefibosete reketse borike roe nidiañe; am' iereo ty boko-mofo roan-jato naho firotorotom-baloboke maike zato naho fitsindrohañ' asara zato vaho ty zonjòn-divay. ² Le hoe i mpanjakay amy Tsibà: Hatao'o akore o raha zao? Le hoe t'i Tsibà: Ho amo añ' anjomba' i mpanjakaio, hiningira'e o borìkeo, vaho ho fitendre' o ajalahio o mofoo naho i fitsindrohañ' asaray; le ho finoma' ty midazidazitse am-patrambey añe i divaiy. ³ Le hoe i mpanjakay: Aa vaho aia i anan-talè'oy? Le hoe t'i Tsibà amy mpanjakay: Inao, mitoetse e Ierosalaime ao re, ami'ty asa'e ty hoe: Hampolie' i anjomba' Israele amako te anito ty fifehean-draeko. ⁴ Le hoe i mpanjakay amy Tsibà: Ingo, azo iaby ze a i Mefibosete. Le hoe t'i Tsibà: Miambane ama'o, ehe t'ie hahatre a fañisohañe ama'o ry talèko mpanjaka.

⁵ Aa ie nitotsake e Bahorime t'i Davide mpanjaka, ingo te boak' ao t'indati' i hasavereña' i anjomba' i Saoley, i Simý, ty tahina'e, ana' i Gerà, nionjom-beo nitolom-pamatse. ⁶ Tinora'e vato ka t'i Davide naho o mpitoro' i Davide mpanjaka iabio naho ze hene' ondaty vaho o fanalolahy ankavana'e naho ankavia'eo. ⁷ Le hoe t'i Simý te namatse: Akia, soike! ty ondatin-dio, ty lokoforo tia; ⁸ fa nabali' IEHOVÀ ama'o iaby ty lio' i anjomba' i Saoley, i nisoloa'o fifeheañey; naho natolo' IEHOVÀ amy Absalome ana'o i fifelehañey; vaho hehe t'ie tsinepake am-pikinià'o, amy te ondatin-dio. ⁹ Aa le hoe t'i Abisay ana' i Tseroià amy mpanjakay: Aa vaho akore ty amara' ty amboa-mate tia i talèko mpanjakay? Angao raho hitotok' aze hañitsike ty loha'e. ¹⁰ Le hoe i mpanjakay: Hataoko akore nahareo ana' i Tseroiào? Apoho hamàtse, hera IEHOVÀ ty nanao ama'e ty hoe: Ozoño t'i Davide; ia amy zay ty hanao ama'e ty hoe: Akore ty atao'o zao? ¹¹ Le hoe t'i Davide amy Abisaý naho amo mpitoro'e iabio: Inao! mipay ty fiaiko i ana-dahiko niboak' an-tsandrikoy, mentsake o nte-Beniamineo henanekeo? Apoho re hamatse ke nedrè' IEHOVÀ. ¹² Hera ho vazoho' IEHOVÀ ty hasotriako, vaho havaha' IEHOVÀ soa o famara'e ahy androanio. ¹³ Aa le tinonjohi' i Davide naho ondati'eo i liay, ie nifamalahäne ama'e añ' ila' i haboañey t'i Simeý namatse am-pandenà'e, naho nitora-bato aze vaho nampibobò debole. ¹⁴ Ie amy zao nifozapoezake i mpanjakay naho ze hene ondaty nindre ama'e vaho nañafa-kamokorañe eo.

¹⁵ Fa nivotrake e Ierosalaime ao t'i Absalome naho ondaty iabio, o ana' Israeleo rekets' i Akitofele. ¹⁶ Aa le niheo mb'amy Absalome mb'eo t'i Khosaý nte-Arkite rañe' i Davide; naho nanao ty hoe amy Absalome t'i Khosaý: Lava havelo ry mpanjaka, lava havelo o mpanjakao. ¹⁷ Le hoe t'i Absalome amy Khosaý, Zao hao ty fiferenaiña'o an-drañe'o? Akore t'ie tsy niharo lia aman-drañe'o? ¹⁸ Le hoe t'i Khosaý amy Absalome: Aiy, fe amy jinobo' IEHOVÀ naho am'onati'eo naho amo ana' Israele iabio ty hitoerako. ¹⁹ Tovoñako ty hoe: Ia ty ho toroñeko? Tsy hitoroñe añatrefa' i ana'ey hao raho? Manahake ty nitoroñeko añatrefan-drae'o ty hanoeko añatrefa'o. ²⁰ Aa le hoe t'i Absalome amy Ahitofele: Misafiria; ino ty hanoen-tika? ²¹ Le hoe t'i Ahitofele amy Absalome: Akia, miolora aman-tsakezan-drae'o; o nenga'e hañambeñe i anjombaio le ho janjiñe' Israele iaby t'ie vata'e malain-drae'o; ie amy zay, hene haozatse ty fità' o mpiama'oo. ²² Aa le nandafiha' iereo kibohotse ambone' i anjombay t'i

Absalome; le nimoak' amo sakezan-drae'eo t'i Absalome añatrefa' Israele iaby (²³ Fa nanahake te nañontaneañe amy tsaran' Añaharey, ty toro-heve' i Ahitofele tañ'andro rezay; zay iaby ty fanoroan-keve' i Ahitofele tamy Davide naho i Absalome.)

17

¹ Tinovo' i Ahitofele amy Absalome ty hoe: Angao ho joboñeko ty lahilahy rai-ale-tsi-ro'arivo henaneo, le anito haleñe ² ty hivotrahako ama'e, ie mokotse naho am-pitâñe maleme, hampangebakebak' aze; le hitriban-day ondaty iaby mindre ama'eo vaho i mpanjakay avao ty ho lafaeko; ³ le hapoliko ama'o ondaty iabio; aa ie fonga nitampoly ondatio naho tsy i paia'oy avao, le hene hanintsiñe ondatio. ⁴ Nitea' i Absalome naho ze hene mpiaolo' Israele i saontsy zay.

⁵ Le hoe t'i Absalome: Kanjio henaneo t'i Khosaý nte-Ereke le ho janjiñen-tika ka ty ho saontsie'e. ⁶ Aa ie nipok' amy Absalome eo t'i Khosaý, le hoe t'i Absalome ama'e: Nanao hoe zao ty Ahitofele; Horihen-tika hao i nisaontsie'ey? fa naho tsie le mitaroña. ⁷ Le hoe t'i Khosaý amy Absalome: Tsy soa ty toro-hevetse natolo' i Ahitofele henaneo. ⁸ Tinovo' i Khosaý ty hoe: Fohi'o ty rae'o naho ondati'eo, t'ie fanalolahy, naho manahake ty dobe* tinavañ' anak' an-kivok' ao ty hafain' afero aña'rofo' iareo; toe mpañotakotake ty rae'o, vaho tsy hitoetse am' ondati'eo. ⁹ Oniño t'ie mietak' an-kadaha ndra an-toets' ila'e henaneo; aa ie vaho miambotrak' am'iereo am-baloha'e, le hanao ty hoe ze mahajanjiñe zay: Fizamanañe ty zoeñe am'ondaty mañorike i Absalomeo; ¹⁰ le akore amy zao i fanalolahiy, i aman-tron-dionay, kanao hitranake; fa songa fohi' Israele te ondaty maozatse ty rae'o naho sindre fanalolahy o mpiama'eo. ¹¹ Aa le ty hoe ty fanoroako: te hifanontoñe ama'o t'Israele iaby boake Dane pake Beeresebà manahake ty faseñe aña'olon-driake ey ami'ty hatsifotofoto'e; le ihe ka ro ho mb'an-kotakotak' ao. ¹² Aa le hivotrak' ama'e tika amy ze toetse haharendrehañe aze; hipetak' ama'e manahake ty fipetahan-jono an-tane; leo raike tsy hapon-tika ndra ie ndra o mpiama'eo. ¹³ Tovo izay he ie mitolila mb' an-drova ao, le hene hinday taly t'Israele vaho ho kozozoten-tika mb' am-bavatane ao ampara' te tsy hanjoañe vato kede. ¹⁴ Aa le hoe t'i Absalome naho o hene ondati' Israeleo: Toe soa ty toro-heve' i Khosaý nte-Ereke te amy tolo-keve' i Akitofele—amy te linili' IEHOVÀ ty handreketañe ty toro-hevetse soa' i Akitofele, hametsaha' IEHOVÀ hankàñe amy Absalome.

¹⁵ Aa le hoe t'i Khosaý amy Tsadoke naho i Abiatare mpisoroñe: Zao naho zao ty natoro' i Akitofele amy Absalome naho amo roandria' Israeleo; vaho zao naho zao ka ty natoloko. ¹⁶ Aa le mañitrifa masika, vaho ano ty hoe amy Davide: Ko mitoetse amo montom-patrambeio te anito haleñe, fa mitsàha ndra manao akore; tsy mone habotseke i mpanjakay naho ze hene ondaty mindre ama'e. ¹⁷ Ie amy zao, nitoboke e En-drogele t'Ionatane naho i Akimatse; naho nimpitheo am' iereo ty mpitoroñe nitalily; le nimb' amy Davide mpanjaka aña ka iereo nitalily, soa tsy ho oniñe mimoake amy rovay. ¹⁸ Fe nitrea' ty ajalahy le natalili'e amy Absalome; aa le nivoratsake iereo naho nivotrak' aña'anjomba' ondaty e Bakorime ze amam-bovoñe an-toe'e vaho nizotso ao. ¹⁹ Rinambe' ty rakemba ty tako'e naho nakape'e am-bava' i vovoñey, vaho naparatsa'e ambone'e eo ty tsako lisañe; le tsy nifohiñe. ²⁰ Pok' amy rakembay amy anjombay ty mpitoro' i Absalome

* ^{17:8} Dobe : biby jabajaba malaom-pandeha

nanao ty hoe: Aia t'i Akimatse naho Ionatane? Le hoe i rakembay tam' iereo: Fa nitsake i torahan-dranoy iereo. Aa le nitsoeke fe tsy nahaisake le nimpoly mb'e Ierosalaime mb'eo. ²¹ Aa ie nienga, le niakatse i vovoñey iereo vaho nionjomb'eo nitalily amy Davide; le nanao ty hoe amy Davide: Miongaha, masikà, itsaho i ranoy; fa inao ty toro-heve' i Akitofele ty ama'o.

²² Aa le niongake t'i Davide, rekets' o hene' ondaty nindre ama'eo, vaho nitsake Iordaney; aa ie nipore'a ty maraindray leo raike tsy nipoke tsy tafatsake Iordaney. ²³ Aa naho nioni' i Akitofele te tsy noriheñe i toro-heve'ey, nidiaña'e i borìke'ey naho nimpoly mb' añ' anjomba'e mb' androva'e aña, le nambine'e i anjomba'ey, vaho nameo vatañe; nihomake, naho nalentek' an-kiborin-drae'e ao. ²⁴ Ie pok'e Maknaime aña t'i Davide vaho nitsake Iordaney t'i Absalome, mindre amo fonga' ondati' Israeleo. ²⁵ Nampifehè' i Absalome i valobohòkey t'i Amasà[†] hasolo Ioabe. Ana' t'i ana' Israele atao Iterà[‡] nimoak' amy Abigale ana' i Nakase, rahavave' i Tseroià, rene' Ioabey t'i Amasà. ²⁶ Aa le nañoren-kibohotse an-tane Gilade ao t'Israele naho i Absalome. ²⁷ Ie fa nivotrake e Maknaime t'i Davide le niheo mb'eo t'i Sobý ana' i Nakase afo' i Rabà, nte Amone naho i Makire, ana' i Amiele nte-Lodebare vaho i Barzilas nte-Gilade boake Rogelime ²⁸ ninday tihy naho sajoa naho valañe tane naho vare-bolè naho vare hordea naho lilañe naho tsako-tono naho antake naho mahalay naho poataran' ampemba ²⁹ naho tantele naho ronono dero naho añondry vaho habobon' añombe amy Davide naho ondaty nindre ama'e iabio, hikama, ami'ty asa' iareo ty hoe: Fa saliko naho mifoezapoezake vaho taliñiereñe ondaty am-patrambeio.

18

¹ Niaehe' i Davide amy zao ondaty nindre ama'eo, vaho najado'e am' iereo ty mpifelek' arivo naho mpifehe zato. ² Nirahe' i Davide mb'eo, ambanem-pitá' Ioabe, ty fahatelo' ondatio naho ambanem-pitá' i Abisaý ana' i Tseroia rahalahi' Ioabe ty fahatelo'e vaho ambanem-pitá' Itaie nte-Gate ty fahatelo'e. Le hoe i mpanjakay am'ondatio, toe hindre hionjo ama' areo ka raho. ³ Fe hoe ondatio: Tsy hionjo mb'eo rehe, amy te tsy hahoa' iereo te zahay ro hitriban-day aña, aa ndra te mivetrake ty vaki'ay, tsy ho haoñe' iereo; fa mañeva ty rai-ale ama'ay rehe: ie amy zao hàmake te zahay ro hampionjone'o hiakatse ty rova toy. ⁴ Le hoe i mpanjakay am' iereo: Hanoeko arè ze atao' areo hahasoa. Aa le nijohañe añ' ila' ty lalambey re vaho niavotse mb'eo ki-zato'e naho ki-arivo'e ondatio. ⁵ Le linili' i mpanjakay t'Ioabe naho i Abisaý vaho Itaie ami'ty hoe: Ehe ano' areo mora ty amako i ajalahiy, i Absalome. Songa jinanji' ondatio ty namantoha' i mpanjakay i mpifehe rey ty amy Absalome. ⁶ Aa le neparatsake aña ondatio hiatatre am' Israele; vaho tañ' ala' i Efraime ao i hotakotakey. ⁷ Zinevoñ' añañatrefa' o mpitoro' i Davideo o ana' Israeleo, le akore ty fanjamanañe amy andro zay kanao lahilahy ro'ale ty nivetrake. ⁸ Fa niparaitak' amy tane iabiy i hotakotakey vaho maro ty nabotse' i alay te amy fibaray.

⁹ Ie nifanojo amo mpitoro' i Davideo t'i Absalome, le ninigitse amy borìke'ey t'i Absalome, naho nimb' ambane' ty tsampan-kobaiñe jabajaba mb'eo i borìkey, naho nazi' i kobaiñey ty añañambone'e, naho naonjo'e añañivon-dikerañey naho ty tane toy vaho nitolom-pilay mb'eo i borìke tambane'ey. ¹⁰ Niisa' t'indaty zay le nitalily am' Ioabe, ty hoe: Inao! nitreako niradorado ami' ty kobaiñe t'i Absalome. ¹¹ Le hoe t'Ioabe

[†] 17:25 Amasà: entam-bey vaveñe [‡] 17:25 Iterà: honka'e; hotsohotsoeñe

amy lahilahy nitalily azey: Aa ihe nahaisak' azey: akore t'ie tsy linafa'o mb'an-tane? fa ho nitolorako volafoty folo reke-piètse. ¹² Fe hoe indatiy am' Ioabe: Ndra te ho nandrambe volafoty arivo an-tañako, tsy ho nahitiko mb'amy ana-dahi' i mpanjakaiy ty tañako, fa am-pijanjiña'ay ty namantoha' i mpanjakay ama'o naho amy Abisaý vaho am' Itaie ty hoe: Mitaoa Hera eo ty hitsapa i ajalahy Absalomey. ¹³ Aa le ho nanoeko afero mamitak' ate ty vatako, ie tsy ietahañe amy mpanjakay, le ihe ka ho niatatre ahy. ¹⁴ Aa le hoe t'Ioabe: Tsy hihenekenek' ama'o atoy raho. Le ninday ana-pale telo am-pità'e vaho natrofa'e añ' arofo' i Absalome, ie mbe niveloñe amy kobaiñey. ¹⁵ Niarikoboñe aze amy zao ty ajalahy folo mpitam-pikala' Ioabe, naho linafa' iareo t'i Absalome, toe navetra' iareo. ¹⁶ Aa le pinopò' Ioabe i antsivay, vaho nibalik' ami'ty fañoridañañe Israele ondatio; nitana' Ioabe ondatio. ¹⁷ Rinambe' iareo t'i Absalome naho navokovoko ami'ty koboñe jabajaba aña'ala ao le nampitoabora' iareo ty votrem-bato folo-ay vaho songa nitriban-day mb'an-kiboho'e mb'eo t'Israele. ¹⁸ Natroa' i Absalome, ie mbe niveloñe, ty vatolahy aña' alavondrom-panjaka ao ho am-bata'e, ami'ty hoe: Tsy manañe anadahy raho hitiahiañe ty añarako; vaho nitokave'e ami'ty añara'e i vato; le atao ty hoe Vatolahi' i Absalome pak' androany.

¹⁹ Aa le hoe t'i Akimatse ana' i Tsadoke: Angao hilaisako hitalily amy mpanjakay, te vinale' IEHOVÀ fate o rafelahi'eo. ²⁰ Le hoe t'Ioabe ama'e: Tsy hinday talily rehe te anito, fa andro hafa ty hindesa'o talily; kanao nihomake ty ana-dahi' i mpanjakay tsy ho talilie'o te anito. ²¹ Aa le hoe t'Ioabe amy nte-Kosiy: Akia, atalilio amy mpanjakay o niisa'oo. Niondrekk' amy Ioabe i nte-Kosiy vaho nihitrihitry mb'eo. ²² Le hoe t'i natovo' i Akimatse ana' i Tsadoke am' Ioabe: Ndra te ino ty hifetsake, miambane ama'o, ehe adono hañeañe i Kosiy raho. Le hoe t'Ioabe: Ino ty hilaisa'o, anak, ihe tsy handrambe tambe amy taliliy? ²³ Ndra ino ty hizò, hoe re, Hilay raho. Le hoe re ama'e: Milaisa. Aa le niherereake mb' amontoñe t'i Akimatse vaho nilosore'e i nte-Kosiy. ²⁴ Ie amy zao, niambesatse añivo' ty lalambey roe eo t'i Davide; le ie nanganike mb' an-tafon-dalambey ambone' i kijoliy mb'eo ty mpijilo naho nampiandra fihaino naho nitalake, le naheo'e te ingo ty lahilahy milay mb'eo ie raike. ²⁵ Nikaik' amy zao i mpijiloy, nitalily amy mpanjakay: Le hoe i mpanjakay: Kanao mirery re, minday talily am-palie. Aa le niharine mb'eo re. ²⁶ Nahaisake mpihitrihitry raike ka i mpijiloy: le nikahe'e ty hoe i mpigarin-dalañey: Heheke ondaty raike ka ty mihitrike mb'etoa. Le hoe i mpanjakay: Minday talily ka re. ²⁷ Le hoe i mpijiloy: Ataoko ho filaisa' i Akimatse ana' i Tsadoke i miaoloy. Le hoe i mpanjakay: Ondaty mora minday talily soa zay. ²⁸ Nikoike t'i Akimatse, le hoe re amy mpanjakay, Tsy mañahy. Le nidrakadrakak' añañatreka' i mpanjakay re nanao ty hoe: Andriañeñe abey t'IEHOVÀ Andrianañahare'o, i nampilesa ondaty nañonjo-haok' amy talèko mpanjakaio. ²⁹ Le hoe i mpanjakay: Mbe tsy mañahy hao i ajalahy Absalomey? Le hoe ty natoi' i Akimatse: Ie nañitrike o mpitoroo t'Ioabe, le nahatrea fivoamboan-dra'elahy raho fa tsy apotako ty tali'e. ³⁰ Le hoe i mpanjakay, Misitsira mb'etoa, le mijohaña ey. Aa le niveve re, nijohañe. ³¹ Ingo te niheo mb'eo amy zao i nte-Kosiy; le hoe i nte-Kosiy: Talily ho a i talèko mpanjakay; fa vinale' IEHOVÀ fate ty azo anindroany amo nitroatse ama'o iabio. ³² Le hoe i mpanjakay amy Kosiy: Mbe janga hao i ajalahi' Absalomey? Aa hoe ty natoi' i Kosy: Ee te hanahake i ajalahiy ze hene rafelahi' i talèko mpanjakay naho ze miatatre azo hijoy.

19

¹ Nininininy amy zao i mpanjakay vaho nañambone mb' an-traño ambone' i lalañey mb'eo nirovetse, le nanao ty hoe t'ie nimb'eo: O Absalome anako, tiriko, o Absalome anako! ee te zaho ty nisolompihomake ho azo ry Absalome amoriko, anako!

² Sinaontsy am' Ioabe ty hoe: Inay! mirovetse naho mandala i Absalome ty mpanjaka. ³ Aa le nifotetse ho fandalàñe i fandreketañey, kanao jinanji' ondatio amy andro zay ty hoe, Mirovetse i ana'ey i mpanjakay. ⁴ Aa le ninankañe avao ondatio t'ie nimoak' amy rovay, manahake ty fimeñara' ondaty miponiotse añ'ali. ⁵ Sinaro' i mpanjakay ty lahara'e, vaho nikoaika ty fangoihoy nanao ty hoe: O Absalome anako, O Absalome amoriko, anako! ⁶ Aa le nimoak' amy trañoy t'Ioabe mb'amy mpanjakay ao, nanao ty hoe: Nampisalare'o ty lahara' o mpitoro'o iabio, ie namoe ay ho azo naho ho ami'ty fiai' o ana-dahi'oo naho o anak' ampela'oo naho ty fiai' o tañanjomba'oo vaho ty fiai' o sakeza'oo; ⁷ amy te kokoa'o o malaiñ' azoo, naho heje'o o mikoko azoo. Fa nitseize'o anindroany te tsy vente'e ama'o o roandriañeo naho o mpitoroñeo; le rendreko androany t'ie niveloñe t'i Absalome vaho nikoromake iaby zahay le ho nifale rehe. ⁸ Aa le miongaha, miavota naho misaontsia ami'ty arofo' o mpitoro'oo; fa ifantàko am' IEHOVÀ, naho tsy iavota'o, leo raik' am'ondatio tsy hialeñe ama'o atoy; vaho handikoara' ze haratiañe nifetsak' ama'o ampara' ty nahajalahy azo am-para' te henane ty haloloñañe hizò azo. ⁹ Aa le niongake t'i Mpanjaka, niambesatse an-dalambey eo vaho natalily am'ondaty iabio ty hoe: Inao! miambesatse an-dalambey eo i mpanjakay; le sindre niheo añatrefa' i mpanjakay ondatio, ie fa songa nandrombake ty kiboho'e t'Israele.

¹⁰ Niampohek' amy zao ze hene ondatim-pifokoa' Israele, fa hoe ty asa' iareo: I mpanjakay ty nañafak' an-tika am-pitâ' o rafelahin-tikañeo, naho ie ty nandrombak' an-tika am-pitâ' o nte-Pilistio; ie amy zao fa nibañe aña t'i Absalome niakatse ty tane toy, ¹¹ ie nihomak' ankotakotak' ao i Absalome norizan-tika ho mpifehe antikañey. Aa vaho akore arè te tsy minday saontsy amy fampipoliañe i mpanjakaiy tika?

¹² Fe nampañitrike ty hoe amy Tsadoke naho amy Abiatare mpisoroñeo t'i Davide: Misaontsia amo roandria' Iehodao ty hoe: Manao akore te inahareo ro fara'e manese i mpanjakay holy mb' añ' anjomba'ey?—Amy te fa nivotrak' amy mpanjakay ty saontsi' Israele iaby t'ie hasese' iareo mb' añ' anjomba'e— ¹³ longoko nahareo naho taolako vaho nofoko, aa vaho akore t'ie sehanga'e amy fampipoliañe i mpanjakaiy? ¹⁴ Le ano ty hoe amy Amasà: Tsy taolako ama' nofoko v'heo? Aa le hanoen' Añahare amako, naho mandikoatse, naho tsy ho mpifeleke i valobohòkey hisolo Ioabe rehe. ¹⁵ Le nampiondrehe'e ty arofo ze hene' ondati' Iehoda hoe t'ie arofo' ondaty raike; aa le nañiraha' iereo i mpanjakay: Mimpolia rehe naho o mpitoro'o iabio. ¹⁶ Aa le nimpoly i mpanjakay, nigodañe mb' am' Iordaney mb'eo. Niheo mb'e Gilgale mb'eo t'Iehoda, hifanalaka amy mpanjakay, hampitsahe' iareo am'Iordaney i mpanjakay. ¹⁷ Nihitrike naho nindre nizotso amo nte-Iehodao t'i Simeý ana' i Gerà, nte Beniamine, boake Bakorime hifañaoñe amy Davide mpanjaka. ¹⁸ Nindre ama'e mb'eo t'i nte-Beniamine arivo miharo amy Tsibà mpitoro' ty anjomba' i Saole, reketse ty ana-dahi'e folo-lim' amby, naho ty mpitoro'e roapol. Nihitrihitry mb'am' Iordaney mb'eo iereo aolo' i mpanjakay. ¹⁹ Nibelobelø eo avao iereo nampitsake ty anjomba' i mpanjakay, naho hitoloñe amy ze atao'e soa ampivazoho'a'e. Nibabok' añatrefa' i mpanjakay t'i Simeý ana' i Gerà ie

fa hitsake Iordaney. ²⁰ Le hoe re amy mpanjakay: Ehe te tsy hanan-kabò amako ty talèko; ko tiahi'o abey i haloloañe nanoe' ty mpitoro'o amy andro niavota' ty talèko mpanjaka am' Ierosalaimey, ehe ko tana' i mpanjakay añ'arofo'e ao zay. ²¹ Toe fohi' ty mpitoro'o t'ie nanao hakeo; aa le ingo! zaho ty nizotso mb'etoa valoha'e amy anjomba' Iosefe iabiy hifanalaka amy talèko mpanjakay. ²² Fe hoe ty navale' i Abisaý ana' i Tseroià aze: Tsy mone havetrake hao t'i Simeý, ty amy raha zay, ie namàtse i noriza' IEHOVÀY? ²³ Le hoe t'i Davide: Hatako akore nahareo ana' i Tseroià, t'ie hifandrafelahy amako henaneo? hohofan-doza hao t'indaty e Israele te anito? tsy apotako hao te mpanjaka' Israele raho androany? ²⁴ Le hoe i mpanjakay amy Simeý, Tsy ho mate 'niheo. Le nifanta ama'e i mpanjakay.

²⁵ Nizotso hifanalaka amy mpanjakay ka t'i Mefibosete ana' i Saole; tsy nihamine'e o fandia'eo, tsy niharate'e i somo'ey, tsy nisasà'e o siki'eo, boak' amy andro niavota' i mpanjakaiy ampara' ty nimpolia'e am-panintsïñañe. ²⁶ Ie amy zao, naho fa nivotrake e Ierosalaime ao re hifanalaka amy mpanjakay, le nanoa' i mpanjakay ty hoe: Aa vaho akore te tsy nindre amako rehe Mefibosete? ²⁷ Le hoe ty natoi'e: Ry talèko, mpanjakao, namañahy ahy i mpitorokoy; fa hoe ty mpitoro'o: ampidiaño borike hionjonako mb'amy mpanjakay mb'eo; ami'ty hakepefa' o mpitoro'oo. ²⁸ te mone nifosae'e amy talèko mpanjakay o mpitoro'oo; fe hoe anjelin' Añahare ty talèko mpanjaka; aa le ano amako ze atao'o soa am-pihaino'o. ²⁹ Fa toe mañeva ho mate am-pitàn-talèko mpanjaka ty anjomban-draeko iaby; fe najado'o amo mpikama am-pandambaña'oo ty mpitoro'o. Aa ino ty ho zòko? vaho ino ty hitoreovako amy mpanjakay? ³⁰ Le hoe i mpanjakay ama'e: Ino ty mbe talilie'o o azoo? Hoe raho: ifanjaraao' areo amy Tsibà i taney. ³¹ Le hoe t'i Mefibosete amy mpanjakay, Apoho ho rambese'e iaby kanao nitampoly am-panintsïñañe añ'anjomba'e ty talèko mpanjaka.

³² Nizotso boake Rogelime t'i Barzilaý nte-Gilade vaho nitsake Iordaney ho a i Mpanjakay hanese aze hitsake Iordaney. ³³ Ondaty bey t'i Barzilay, toe valompolo taoñe; ie ty namahañe i mpanjakay amy nipalira'e e Mahanaimey; ondaty jabajaba. ³⁴ Le hoe i mpanjakay amy Barzilay: Antao hiharo fitsak' amako vaho ho fahanako e Ierosalaime ao. ³⁵ Le hoe t'i Barzilay amy mpanjakay: Fire ty andro' o taokoo t'ie hionjomb'e Ierosalaime mb'eo mindre amy mpanjakay? ³⁶ Valopolo taon-draho androany; mb'e hahafijoboñe ty soa ami'ty raty hao? ho rey ty mpitoro'o tave hao ze hane'e ndra nome'e? mbe hahafitsanoñe ty fiarañanaña' ondaty mibeko ndra rakemba misabo hao? aa manao akore arè te ho kilankañe mavesatse amy talèko mpanjakay ty mpitoro'o? ³⁷ Hindre hitsake Iordaney amy mpanjakay avao o mpitoro'oo. Ino ty hanambeza' i mpanjakay ahy hoe zay? ³⁸ Ehe adono himpoly ty mpitoro'o, hivetrake androvako marine' ty kiborin-drae naho reneko ao. Fe ingo ty mpitoro'o Kimhame, angao hampitsahe'o aze ty talèko mpanjaka le ano ama'e ze satrin'arofo'o. ³⁹ Aa le hoe i mpanjakay: Hindre hitsak' amako t'i Kimhame, le hanoeko ama'e ze atao'o hahasoa; ndra inoñ' inoñe ty ho paia'o amako le hanoeko. ⁴⁰ Nitsake Iordaney ondaty iabio, nitsake ka i mpanjakay naho norofa' i mpanjakay t'i Barzilaý naho nitata aze vaho nimpoly mb' an-toe'e aña.

⁴¹ Aa le nigodam-b'e Gilgale i mpanjakay, le nindre ama'e nitsake mb'eo t'i Kimhame vaho songa nampitsake i mpanjakay o nte-Iehodao naho ty vaki' o ana' Israeleo. ⁴² Niheo mb'amy mpanjakay o ana' Israele iabio,

nanao ty hoe amy mpanjakay: Manao akore te nampikametse azo o roahalahi'ay nte-Iehodao, naho nampitsahe' iereo Iordaney i mpanjakay rekets' o añ' anjomba'eo vaho ondati' i Davide iabio? ⁴³ Le hoe ty natoi' o nte-Iehoda iabio amo ana' Israeleo: Amy te marine filongoañe ama'ay i mpanjakay; aa le ino ty mahabosek' anahareo amo raha zao? nikama ami'ty drala' i mpanjakay hao zahay? Nitambezeñe hao? ⁴⁴ Le hoe ty natoi' o ana' Israeleo o nte-Iehodao, Manañe anjara folo amy mpanjakay zahay aa le ambone' ty anahareo ty zo'ay amy Davide; akore arè ty añinjea' areo anay, ie tsy niera ama'ay heike hampipoliañe i mpanjakan-tikañey? Mbe nasiake te amy saontsi' o nte-Israleoy ty enta' o nte-Iehodao.

20

¹ Aa teo t'indaty nte-Belialie*, i Sebà† ty añara'e, ana' i Bikrý nte-Ieminý, ie nampipopo tsifan' añondry nitsey ty hoe: Tsy aman' anjara amy Davide tika, vaho tsy aman-dova amy ana' Iesey. Vonjeo ty kiboho'o ry Israeleo. ² Aa le nisitak' amy Davide o ana' Israele iabio vaho nañorike i Sebà, ana' i Bikrý; fe nipitek' amy mpanjaka'ey t'Iehoda boak' am' Iordaney pake Ierosalaime. ³ Ie nitotsak' añ' anjomba'e Ierosalaime ao t'i Davide le rinambe' i mpanjakay i rakemba folo nisakeza'e rey, i nenga'e ao hañambeñe i anjombay rey naho nagorogoda'e an-traño nigaritañe naho nifahana'e, f'ie tsy nimoak' am' iereo ka. Le songa nigabeñe ao ampara' te nivetrake, ie niveloñe ho vantotse avao.

⁴ Hoe i mpanjakay amy Amasà: Koiho o lahilahy nte-Iehodao hifanon-toñe atoy añate' ty telo andro, le miatrefa ka. ⁵ Aa le nimb'eo t'i Amasà hikanjo o nte-Iehodao hivory; f'ie nitambatse aña mandikoatse i andro nafè'e azey. ⁶ Le hoe t'i Davide amy Abisay: Ie amy zao, handikoara' i Seba ana' i Bikrý ty joy nanoe' i Absalome; rambeso arè o mpitoro' i talè'gio, vaho horidaño, tsy mone ho rambese'e o rova aman-kijolio, vaho hipoliotse tsy ho onin-tika. ⁷ Aa le niavotse hañoridañe aze ondati' Ioabeo, naho o nte-Kereteo naho o nte-Pleteo, vaho o fanalolahy iabio; niakatse Ierosalaime hañoridañe i Sebà ana' i Bikrý. ⁸ Ie nivotrak' an-damilamy jabajaba' i Gibone eo, le nimb'eo t'i Amasà nifanalaka am' iereo. Nisikiñe o sarom-pialiañe fiombea'eo t'Ioabe, ama'e ty fiètse reketse fibara ankotra'e nidiañe an-toha'e ao; aa ie nionjomb'eo le napontsoa'e. ⁹ Le hoe t'Ioabe amy Amasà: Akore v'iheo rahalahiko? Le rinambe' Ioabe am-pità'e havana ty volon-tsomo' i Amasà hañorofa'e aze. ¹⁰ Fe tsy nioni' i Amasà ty fibara am-pità' Ioabe; aa le trinofa'e ambane' ty pa'e fahalime ao, naho nivorotrak' an-tane o aova'eo vaho tsy nipaok' aze fañindroe'e; fa nihomake. Nañinjake i Sebà ana' i Bikrý t'Ioabe naho i Abisay rahalahi'e. ¹¹ Nijohañe eo ty ajalahi' Ioabe nanao ty hoe; Ze miantoke Ioabe naho mpiamy Davide, ee te horihe'e t'Ioabe. ¹² Nilomoloañe an-dio'e añivo' i lalañey t'i Amasà. Aa ie niisa'e te nijohañe ama'e avao ze hene ondaty le nijinie'e t'i Amasà naho nente'e alafe' i lalañey mb' an-teteke mb'eo vaho nañifike saroñe ama'e, amy te nioni'e te fonga nijohañe eo avao ze nañarine aze. ¹³ Aa ie navike tsy ho an-dalañey le norihe' ondaty iabio t'Ioabe, hañoridañe i Sebà ana' i Bikrý.

¹⁴ Niranga ze hene fifokoa' Israele re pak' Abele, naho e Betemaakà, naho amo nte-Berò; aa le nifanontoñe iereo, nanonjohy aze. ¹⁵ Nionjomb' eo iereo haname aze e Abele' i Betemaakà ao, nampitoboarañe tamboho i rovay, le tiname' ondaty iabio i kijoliy; finofo' ze hene' ondati' Ioabe i

* **20:1** Beliale: lo-tsereke, kokolampo bey † **20:1** Sebà: mirohy; ondatibey; fitofañe; fañina

kijoliy handrotsak' aze. ¹⁶ Nikaik' amy zao ty rakemba mahihitse boak' amy rovay, ty hoe: Eo hey nahareo, mijanjiña, taroño am' Ioabe ty hañarine mb'etoa, hivolañako. ¹⁷ Aa ie niharinea'e le hoe i rakembay: Ioabe v'iheo? Le namale re: Zaho 'nio. Le hoe re ama'e: Janjiño ty enta' o anak' ampata'oo. Le hoe ty natoi'e, Mitsanon-draho. ¹⁸ Aa le hoe re, Sinaontsi' o taoloo ty ti-hoe: Ie aman' ontane, añontaneo e Abele ao: zay ty fampigadoña' iareo. ¹⁹ Mpiamo mpampilongo migahiñe e Israeleo atoan-draho; aa mipay handrotsake rova naho ty rene raike e Israele ao v'iheo, Ino ty hampigodraña'o ty lova' IEHOVÀ? ²⁰ Natoi' Ioabe ty hoe: Mitotse amako zay; lavitse ahy t'ie hagodrako ndra harotsako. ²¹ Tsy zay o rahao; fe nañonjo haoke hiatreatre i Davide mpanjaka t'indaty boak' am-bohibohitse ao, i Sebà ana' i Bikrý ty tahina'e. Aa le ie avao ty aseseo. Le hoe i rakembay am' Ioabe: Ingo, hahiririñe ama'o hiranga o kijolio ty añambone'e. ²² Aa le nimb' am' ondaty iabio i rakembay amy fahiti'ey. Le kinitsi' iareo ty añambone' i Sebà ana' i Bikrý vaho natorake mb' am' Ioabe ao. Pinopò'e amy zao i antsivay, le niparaitake boak' amy rovay ondatio, songa mb'an-kiboho'e aña. Nimpoly mb'e Ierosalaime mb' amy mpanjakay mb'eo t'Ioabe.

²³ Ie amy zao: mpifehe' ty valobohò' Israele t'Ioabe vaho nifeleke o nte-Kereteo naho o nte-Peleteo t'i Benaià ana' Iehoiadà; ²⁴ i Adoramé ty mpifelek' i habay vaho mpamolily t'Iehosafate, ana' i Aklude; ²⁵ mpanokitse t'i Seva, le mpisoroñe t'i Tsadoke naho i Abiatare; ²⁶ mpifehe amy Davide ka t'Irà nte-Iaire.

21

¹ Ie amy zao, san-kerè telo taoñe ty nifanonjohy tañ' andro' i Davide, le nihalaly amy IEHOVÀ t'i Davide: le hoe ty natoi' IEHOVÀ: I Saole naho i anjomba'e aman-diyo, ie nanjamañe o nte-Giboneo. ² Kinanji' i mpanjakay amy zao o nte-Giboneo, le hoe re tam' iereo—toe tsy ana' Israele o nte-Giboneo fa sehanga' o nte-Amoreo; toe nifanta am' iereo o ana' Israeleo, fe nipay hanjamañe iereo t'i Saole amy fahimbaña'e amo ana' Israeleo naho Iehodaoy—³ le hoe t'i Davide amo nte-Giboneo: Ino ty hanoeko ho anahareo? naho akore ty hampanintsíñako hitatà' areo ty lova' IEHOVÀ? ⁴ le hoe o nte-Giboneo tama'e: Tsy iozàm-bolafoty ndra volamena ty añivo'ay naho i Saole, ndra i anjomba'ey; le tsy mipay ty hamonoañe ndra iaia amo ana' Israeleo zahay. Aa le hoe re: Saontsio' areo fa hanoeko. ⁵ Le hoe ty natoi' iareo i mpanjakay: Indaty ho namongotse anay naho nikinia raty anay t'ie ho fongoreñe tsy ho aman-tsehang'a'e an-tane Israeley, ⁶ le ee te hasese ama'ay ty ana-dahi'e fito haradorado'ay am' IEHOVÀ e Gibà' i Saole ao, i jinobo' IEHOVÀ. Haseseko iereo, hoe i mpanjakay. ⁷ Fe napo' i mpanjakay t'i Mefibosete, ana' Ionatane, ana' i Saole, ty amy fañina nifanoa' iareo am' IEHOVÀ; i nanoe' i Davide naho Ionatane ana' i Saoley. ⁸ Rinambe' i mpanjakay ty ana-dahy roe' i Ritspà, ana' i Aià, ze nasama'e amy Saole, i Armoný naho i Mefibosete naho ty ana-dahi' i Mikale lime, anak' ampela' i Saole, nasama'e amy Adriele, ana' i Bartsilaý nte-Mekolà; ⁹ le nasese'e am-pitá' o nte-Giboneo naho naradorado' iareo amy vohitsey añatrefa' IEHOVÀ vaho nitrao-pihotrake i fito rey, an-tsam-pitatahañe ty namonoañe iareo, amo andro valoha'eo, am-pamotoram-pitataham-bare hordea. ¹⁰ Nandrambe lamban-gony t'i Ritspà, ana' i Aià, vaho nalafi'e amy vatoy boak' am-pifotora' i fitatahañey am-para' te nidoañan' orañe boak' andikerañey; le tsy napo'e hipetak' am' iereo o voron-tiokeo naho handro,

ndra o bibin-kivokeo naho haleñe. ¹¹ Natalily amy Davide ty nanoe' i Ritspà' anak' ampela' i Aià, sakeza' i Saole. ¹² Aa le nimb'eo t'i Davide nangalake o taola' i Saoleo naho o taola' Ionatane ana'eo amo nte-labses-Giladeo, o nikizoe' iereo boak' an-kiririsa' i Bete-saneo, o nampiradoradoe' o nte-Pilstio tañ' andro nanjevoa' o nte-Pilstio i Saole e Gilboao; ¹³ le nendese'e boak' aña o taola' i Saoleo naho o taola' Ionatane ana'eo; vaho natonto' iareo o taola' i naradorado reio. ¹⁴ Nalente' iareo an-tane' i Benamine e Zelà, an-kibori' i Kise rae'e o taola' i Saole naho Ionataneo; le nanoeñe iaby ze nandilia' i mpanjakay. Ie heneke, le nihalalieñe aman' Añahare i taney.

¹⁵ Nialy amy Israele indraike o nte-Pilstio; le nizotso mb'eo t'i Davide rekets' o mpitoro'eo, nifandraparapak' amo nte-Pilstio; le nihadazidazitse t'i Davide. ¹⁶ Teo amy zao t'Isbibenobe raik' amo ana' i fanalolahy abo mpinday lefoñe nilanja telonjato sekelen-torisikeio, nisikiñe fikalañe vao, le nimanea'e zevo t'i Davide. ¹⁷ Fe nañolotse aze t'i Abisay ana' i Tseroià le linafa'e i nte-Pilstiy vaho vinono'e. Aa le namantok' amy Davide ondati'eo, ty hoe: Tsy hitraok' ama'ay ankotakotake ka rehe, tsy mone hakipe'o ty failo' Israele. ¹⁸ Ie heneke zay, le poake indraik ty aly amo nte-Pilstio e Gobe aña; zinevo' i Sibekaý nte-Kosà t'i Safe, raik' amo ana' i fanalolahy aboio. ¹⁹ Ie nifañotakotak' amo nte-Pilstio e Gobe aña indraike, le zinevo' i Elkanane nte-Betleheme t'i Goliate nte-Gity, nihambañe ami'ty vatritra i taran-defo'ey. ²⁰ Ie aña, nifandrapak' aña'aly indraike e Gate ao; teo ty fanalolahy nijoalajoala, songa aman-drambo'e eneñe o fità'eo naho eneñe ka o rambom-pandia'eo, roapololo-efats' amby ty fitontoña' iareo; nisamahem-panalolahy abo ka. ²¹ Ie nikizake Israele, le linafa' Ionatane ana' i Simea; rahalahi' i Davide. ²² Songa nisamahe' i fanalolahy abo nte-Gatey i efatse rey, nikorovok' ampitá' i Davide naho am-pitá' o mpitoro'eo.

22

¹ Tinaro' i Davide am' IEHOVÀ ty onin-tsabo toy amy andro nandrombaha' IEHOVÀ aze am-pitá' o rafelahi'e iabio naho am-pitá' i Saoley; ² le hoe re: Lamilamiko t'IEHOVÀ;
ty fitsolohako, naho
ty mpandrombak' ahy.

³ T'i Andrianañahare lamilamiko,
Ie ty fipalirako, ty fikalan-defoko,
ty tsìfam-pandrombahañe ahy,
ty fitalakesañ-aboko,
naho ty fiampirako;
t'i Mpandrombak' ahy,
Ihe ro mamotsots' ahy amo hotakotakeo.

⁴ Rengèñe, hoe ty koiko, t'IEHOVÀ,
fa hinaha'e amo rafelahikoo.

⁵ Nandipotse ahy o onjan-kavilasio,
nañoridañe ahy ty fisorotombaha' i Beliale.

⁶ Mivandibanditse amako
o vahoran-tsikeokeokeo;
miatrete ahy o fandrim-pihomahañeо.

⁷ Ie niampoheke le nikanjy IEHOVÀ,
eka, kinanjiko t'i Andrianañahareko;
le jinanji'e an-kivoho'e ao ty feoko,

vaho nimoake amo ravembia'eo ty fitoreoko.

⁸ Nanginikinike naho niozoñozoñe ty tane toy niezeñezeneñ o fahan-dikerañeo; nañondrañe ty amy haviñera'ey.

⁹ Nionjoñe boak' am-piantsona'e ty hatoeñe; afo nahafototo ty hirik' am-palie'e ao; foroha mirekake ty boak' ama'e.

¹⁰ Nampivokoke o likerañeo re vaho nizotso; ieñe nimoromoroñe ty ambane fandia'eo.

¹¹ Nijoñe ambone kerobe eo re le nitiliñe, nitalakeseñe ambone' o elan-tiokeo.

¹² Nampiarikatohe'e ama'e ty ieñe manahake t'ie kibohotse, rano mainte naho rahoñe migobo' i likerañey.

¹³ Ty fireandrea' i fiatrefa'ey ty nahaviañañe vaen' afo.

¹⁴ Nangotroke boak' andikerañe ao t'IEHOVÀ, tinolo' i Andindimoneñey fiarañanañañe.

¹⁵ Nañiririña'e ana-pale, hampibaibay; helatse, hampitsobore iareo.

¹⁶ Niboak' amy zao o goledon-driakeo, piniopioke o faha' ty tane toio ami'ty fañendaha' IEHOVÀ, amy fikofò' o fiantsoña'eoy.

¹⁷ Nahiti'e boak' an-dikerañe ao ty fità'e, rinambe'e raho, tinari'e boak' añ'antara bey ao;

¹⁸ Rinomba'e amo rafelahiko maozatseo, amo malaiñ'ahio, amy t'ie nifatratse te amako.

¹⁹ Niatreatre ahy iereo añ'andron-kankàñe; fe nirampiako t'IEHOVÀ.

²⁰ Nasese'e mb'an-toetse mangadagadamb'eo rinomba'e raho amy te mahafale aze.

²¹ Tinambe' IEHOVÀ ty havañonako, ty falion-tañako ty nanolora'e ahy.

²² Toe nifaharako o lala' IEHOVÀ, vaho tsy nitsile an-kelok' aman' Añahareko.

²³ Tañatrefako eo iaby o fepè'eo, le tsy nisitaheko o fañè'eo.

²⁴ Nigahiñe añatrefa'e eo raho, vaho nilie-batañe tsy handilatse.

²⁵ Aa le tinambe' IEHOVÀ ty amy havantañakoy, ty haliovako am-pihaino'eo.

²⁶ O mpitretreò ro tretreze'o, vañon-dRehe amo vañoñeo.

²⁷ Amo malio arofoo rehe ro ki'e, fe o mengokeo ro helofe'o.

²⁸ Rombuhe'o o mpisotrio; fe amo mpitrotroabokeo o fihaino'oo, hamotsaha'o.

²⁹ Ihe ro failoko, ry IEHOVÀ; hazavae' IEHOVÀ o faiekoo.

³⁰ Ihe ty nañoridañako ty firimboñañe,
i Andrianañaharekoy
ty nanganihako kijoly.

³¹ I Andrianañahare :
vantañe i lala'ey;
niventeseñe ty Tsara' IEHOVÀ;
fikalan-defoñe re
amy ze hene mitsolok' ama'e.

³² Fa ia t'i Andrianañahare
naho tsy IEHOVÀ?
vaho ia ty Lamilamy
naho tsy i Andrianañaharentikañe?

³³ T'i Andrianañaharem-pipalirako fatratse;
i mampavantañe i liakoiy;

³⁴ Ie manao o tombokoo
ho tombom-panaloke,
vaho mamotrak' ahy an-kaboañe eo.

³⁵ Ie mañòke o tañakoo hialy,
hampibitsohan-tañako ty fale torisike.

³⁶ Fa natolo'o ahy ka
ty fikalan-defom-pandrombahañe;
vaho nampitoabotse ahy o fañisoha'oo.

³⁷ Nampangadagadañe'o ty liako;
tsy hititititike o ongokoo.

³⁸ Fa hinoridako o rafelahikoo, vaho narotsako; tsy nimpoly raho ampara'
te finongoko.

³⁹ Nagedrako iereo vaho
trinabotraboko tsy hitroatse;
nikorovok' ambane tomboko eo.

⁴⁰ Fa nampidiañe'o haozarañe
amy hotakotakey raho;
fa nampiambanè'o amako
o nitroatse amakoo.

⁴¹ Natolo'o ahy ka ty hèto' o rafelahikoo,
haitoako amako o malaiñ' ahio.

⁴² Nipay iereo, fe tsy amam-pandrombake;
amy IEHOVÀ, f'ie tsy nanoiñe.

⁴³ Aa le dinemode demoko ho pilipito'e iereo
manahake ty debo' ty tane toy,
linialiako hoe fotak' an-dalañe eo,
toe linialiako ambane.

⁴⁴ Ie rinomba'o am-pikitrohan-drati' ondatikoo;
nambena'o ho mpiaolo' o kilakila' ondatio;
mitoroñe ahy ondaty tsy nahafohiñe ahio.

⁴⁵ Mifimpìñe aoloko eo o anan-drenetaneo;
ie vaho mahajanjiñe ty amako,
le mivohotse.

⁴⁶ Mitsilofiñe o anan' ambahinio,
ie minevenevetse boak' am-piampira'eo.

⁴⁷ Veloñe t'IEHOVÀ;
andriañeñe i Lamilamikoy;
onjoneñe t'i Andrianañahare,
lamilamim-pandrombahako.

48 I Andrianañahare ro mpamale-fate ho ahy,
mamotsake ondatio ho ambaneko.

49 I mamotsotse ahy amo rafelahikooy;
eka onjone'o ambone' o mitroatse amakoo;
haha'o ami'ty 'ndaty mitrotrofiake.

50 Aa le hañandriañe Azo raho, ry IEHOVÀ,
amo kilakila' ondatio, vaho
ho bangoeko an-tsabo ty tahina'o.

51 Hafatraram-pipaliram-
pandrombahan-dRe
amy mpanjaka'ey;
ferenaiña'e i noriza'ey, i Davide
naho i tiri'ey, nainai'e kitro añ'afe'e

23

1 Zao ty figadoñam-petse' i Davide,
Hoe t'i Davide ana' Iesý;
inao ty saontsi' indaty naonjoñe aña'aboy,
i norizan'Andrianañahare' Iakobey,
i mpibeko mami' Israeley.

2 Nitsara añaamako ty Arofo' IEHOVÀ,
tan-delako i lañona'ey.

3 Nitaroñe t'i Andrianañahare' Israele; nitsara amako t'i Maoza' Israeley;
Tsi-mete tsy mahity ty hifelek' ondatio
hifehe am-pañeveñañe aman' Añahare,

4 le manahake ty hazavàñe maraindray
te manjirik'andro,
handro tsy aman-drahoñe,
ahetse maindoñ'indoñe boak' an-tane
ty amy tariñandrokey naho i orañey.

5 Tsy zay hao ty anjombako aman' Añahare,
t'ie nanao fañina amako tsy ho modo?
Hene milahatse naho mijadoñe
ty fandrombahañe ahy naho ze fitamàko iaby?
Tsy hampitiria'e tsampa'e hao?

6 Fe o lo-tserekeo,
le hambañe ami'ty anoeñe o fatikeo,
ie aveve aña, fa tsy lefe rambesem-pitâñe,
7 naho tsy minday vy reke-tara-defoñe
t'indaty hipao' aze;
vaho forototoeñe an-toe'e eo.

8 Zao o tahinam-panalolahy nimpiamy Davideo: Iosefe-basebete nte-Takemone, mpifelek' o mpifeheo natao Adino nte-Ezný, ie nanjamañe valon-jato te indraike. **9** Nanonjohy aze t'i Eleatsare ana' i Dodo ana' t'i nte-Akoke, ty raik' amo fanalolahy telo' i Davideo; ie niatreatre o nte-Pilisty nifanontoñe hialio naho fa nienga iaby o ana' Israeleo. **10** Niongake re nanjevoñe nte-Pilisty am-para' te nimokotse ty sira'e, naho nipitek' amy fibaray ty fità'e; vaho nañeneke fandreketañe jabajaba t'IEHOVÀ amy andro zay; aa kanao nibalike nañorik' aze ondatio, le t'ie hikopak' avao.

11 Nanonjohy aze t'i Samà ana'i Agè nte-Karare. Ie nifandrimboñe an-tane lifotse mahalay ey o nte-Pilistio, naho fa nitriban-day amo nte-Pilistio

ondatio, ¹² t'ie nijohañe añivo' i tetekey, nitañ' aze vaho nandafa o nte-Pilistio; ie nihenefe' IEHOVÀ ty fandreketam-bey. ¹³ Telo amo mpiaolo telopoloo ty nizotso mb'eo vaho nivotrak' amy Davide an-tsam-pitatahañe andakato' i Adolame ao; ie nitobe ambavatane' o nte-Refao o nte-Pilistio. ¹⁴ Tam-pipalirañe ao t'i Davide naho e Betlekhemé aña o nte-Pilistio henane zay. ¹⁵ Nisalala ami'ty hoe t'i Davide, Ehe t'ie ho nanjotsoan-drano boak' am-bovo' i Betlekhemé marine i lalambeiy! ¹⁶ Aa le niboroboñafe' i fanalolahy rey ty valobohòn-te Pilisty naho nitari-drano amy vovom-Betlekhemé, marine i lalambeiy; nendese' iereo vaho nazotso' iereo amy Davide, f'ie tsy nete nikama, te mone nadoa'e am' IEHOVÀ. ¹⁷ Fa hoe re, Ee te ho lavitse ahy, ry IEHOVÀ, ty hanao zao. Hinomeko hao ty lio' ondaty namoe ay amy liaio? aa le tsy nete nikama aze. Zay ty nisata' i fanalolahy telo rey. ¹⁸ Miaolo i telo rey t'i Abisay rahalahi' Ioabe, ana' i Tseroia. Ie ty nañonjon-defoñe ami'ty telon-jato naho nanjamañe ie iaby, vaho nandrambe tahinañe amy telo rey. ¹⁹ Tsy ie hao ty nanan-kasy amy telo rey? aa le nanoeñe mpifehe' iareo, fe tsy nitaka'e i telo valoha'e rey. ²⁰ Teo ka t'i Benaià ana' Iehoiadà, ana'ty fanalolahy nte-Kab'tsele; ie ka ty nanao raha nanjofake: zinevo'e ty ana-dahi' roe' i Ariele nte-Moabe; nizotso mb' an-kadaha ao ka re namono liona an-tsam-panala. ²¹ Vinono'e ka t'i nte-Mitsraime, ondaty manjofake. Nitan-defoñe am-pit  e i nte-Mitsraimey, f'ie nizotso mb' ama'e ao ninday kobai  e, napotsoa'e am-pit  e i nte-Mitsraimey i lefo'ey, vaho zinevo'e amy lefo'ey. ²² Sata' i Benaià ana' Iehoiad   i hoe zay vaho nahazoa'e tahinañe amy fanalolahy telo rey. ²³ Ie ty nanan-kasy amy telo-polo rey, fe tsy nahatakatse i telo valoha'e rey. Nampifeh   i Davide aze o mpigari'eo. ²⁴ Mpiamy telo-polo rey t'i Asaele rahalahi' Ioabe, i Elkanane ana' i Dodo nte Betlekhemé, ²⁵ i Sam   nte-Karode, i Elik   nte-Karode, ²⁶ i Keletse nte-Palty, Ir   ana' Ikese nte-Teko  , ²⁷ i Abiezere nte Anetote, i Mebonay nte-Kos  , ²⁸ i Tsalmone Akoake, i Maharay nte-Netof  , ²⁹ i Kelebe Ban  , nte-Netof  , Itaiy ana' i Ribay nte-Gib   boak' amo ana' i Beniamineo, ³⁰ i Benai   amo Piratoneo, i Hida   boak'an-toraha' i Gase, ³¹ i Abialebone nte-Bete-Arab  , i Azmavete nte Barekorime, ³² i Eliab   nte Sa-albine, tamo ana' Iasene, Iehonatane, ³³ i Sam   nte-Harary, i Akiane ana' i Sarare nte-Harary, ³⁴ i Elifelete ana' i Akasbay, ana' i nte-Maak  , i Eliame ana' i Akitofele nte-Gilone, ³⁵ i Ketsr   nte-Karmele, i Paaray nte-Arabe, ³⁶ Igale ana' i Natane nte-Tsob  , i Ban   ana' i nte-Gade, ³⁷ i Tseleke nte-Amone, i Nakarah   nte-Be-erote mpindai-pikala' Ioabe ana' i Tseroia, ³⁸ Ir   nte-Ietere, i Garebe nte Ietere, ³⁹ i Ori   nte-Kete: ie i telo-polo-fito' amby rey.

24

¹ Nisolebotse am' Israele indraike ty havi  era' IEHOVÀ, le nampitroboe' amy nampanoe   i Davide ty hoe: Akia, volilio ondaty e Israele naho e Iehod  . ² Aa le hoe i mpanjakay am' Ioabe mpifehe' i valoboh  key, ie mpiama'ey: Akia henaneo, tsitsiho ze hene fifokoa' Israele boake Dane pake Beere-sev   hamolily ondatio, hahafantarako ty ia' ondatio. ³ Le hoe t'Ioabe amy mpanjakay, Ehe ho tovo  a' IEHOVÀ Andriana  ahare'o in-jato ondatio, ndra t'ie fire-fire; vaho ho oni-pihainon-tal  ko mpanjaka; fa ino ty ifalean-tal  ko mpanjaka o raha zao? ⁴ Fe nandrekets' Ioabe naho o mpiaolo' i valoboh  keio ty saontsi' i mpanjakay. Aa le niavotse a  natrefa' i mpanjakay t'Ioabe naho o mpiaolo' i valoboh  keio, hamolily ondati' Israeleo. ⁵ Nitsake Iordaney iereo vaho nitobe e Aroere ao, ankavana' i

rova aňivo' i vavatane' i Gade tandrife Iazerey; ⁶ le niheo mb'e Gilade, naho mb' an-tanen-Takime-kodsý, naho nivotrake e Dane-jaane, naho niary mb'e Tsidone mb'eo, ⁷ naho niheo mb'amy rova aman-kijoli' i Tsorey, naho mb'amo hene rova' o nte-Kivò naho o nte-Khanàneo naho nimb' atimo' Iehoda mb'e Beere-sevà mb'eo. ⁸ Aa le nimb'eo mb'eo amy tane iabiy iereo vaho nivotrake e Ierosalaime ao, ie nahamodo sive volaňe mitovoň' andro roa-polo. ⁹ Natolo' Ioabe amy mpanjakay i iake namoliliaňe do'ey, le valo hetse t'indaty manjofake, mpitàm-pibara e Israele ao, le lime-hetse ty lahilahi' Iehoda.

¹⁰ Aa ie fa naňiake ondatio t'i Davide le namofok' aze ty arofo'e. Le hoe t'i Davide amy IEHOVÀ; ra'elahy ty hakeoko amy nanoekoy; fe amy zao ry IEHOVÀ, miambane ama'o, apoho ty tahi' o mpitoroo amy hagegeaňe nanoekoy. ¹¹ Ie nitroatse maraindray t'i Davide le niheo amy Gade mpitoky, i mpitoki' i Davidey, ty tsara' IEHOVÀ nanao ty hoe: ¹² Akia saontsio Amy Davide: Inao ty tsara' IEHOVÀ: Hitolorako telo; joboňo ty hanoako. ¹³ Aa le nimb' amy Davide mb'eo t'i Gade le nanao'e ty hoe: Hivotraha' ty san-kerè fito taoňe an-tane'o ao? hera hitriban-day telo volan-drehe añatrefan-drafelahi'o mañoridaňe azo? ke ho telo andro an-tane'o ao ty angorosy? Mivetsevetsea, vaho itsakoreo ty vale'e habaliko amy naňirak' ahiy. ¹⁴ Aa le hoe t'i Davide amy Gade, vata'e ampoheke raho; hamake hihotrak' am-pitá' IEHOVÀ tika henaneo; fa ra'elahy ty fiferenaiňa'e; le ko anga'o hikorovok' am-pitá' ondaty. ¹⁵ Aa le nirahe' IEHOVÀ am' Israele mifototse amy maraiňey am-para' i namantaňaňey ty angorosy; le fito-ale t'indaty nihomake boake Dane pake Beere-sevà aňe. ¹⁶ Aa ie naňity fitaňe mb'e Ierosalaime mb'eo hamongora'e aze, i anjeliy, le naijihe' IEHOVÀ i hankàňey, vaho nanoe'e ty hoe amy anjely nanjamaňe ondatioy, Soa zay, ajihero ty fità'o. Ie amy zay tan-toem-pifofoha' i Araonà nte-Iebose i anjeli' IEHOVÀ. ¹⁷ Le hoe t'i Davide am' IEHOVÀ, ie nahaoniňe i anjely nampibaibay ondatioy: Toe nanao hakeo raho, zaho ty nanao i hamengohaňey; fa o aňondry retoaňe, ino ty nanoe' iereo? Mihalaly ama'o, lonik' abey te ho amako naho aň' anjomban-draeko ty fità'o.

¹⁸ Aa le niheo mb'amy Davide mb'eo amy àndroy t'i Gade, nanao ty hoe ama'e, ampitroaro kitrely an-toem-pifofoha' i Araonà nte-Iebose eo t'IEHOVÀ. ¹⁹ Aa le nionjoňe mb'eo t'i Davide amy tsara' IEHOVÀ tinaro' i Gadey. ²⁰ Ie niandra t'i Araonà le nahaisake i mpanjakay naho o mpitoro'eo nimb'ama'e mb'eo, naho niavotse mb'eo t'i Araonà nibokobokok' amy mpanjakay, niatre-tane ty lahara'e, ²¹ vaho hoe t'i Araona, Akore te nivotrak' amy mpitoro'ey ty talèko mpanjaka? Le hoe t'i Davide: Ty hikalo ama'o ty toem-pifofoha'o, handranjia'ay kitrely amy IEHOVÀ, hampijihetse i angorosiy am'ondatio. ²² Le hoe t'i Araona amy Davide, Ee te ho rambese' i talèko mpanjakay ze atao'e mahasoa ho enga'e; ingo o aňombe hisoroňaňeo naho o haraom-pamofohaňeo vaho o jokan' aňombeo ho hatae'e. ²³ Ie iaby zao ty atolo' i Araona amy mpanjakay. Natovo' i Araona amy mpanjakay ty hoe, Ee t'ie ho no' IEHOVÀ Andrianaňahare'o. ²⁴ Fe hoe i mpanjakay amy Araona, Aiy; tsy mete tsy hikaloako ami' ty vili'e. Mbore tsy ho soroňeko am' IEHOVÀ Andrianaňahareko ty tsy amam-bily. Aa le kinalo' i Davide ami'ty sekele limam-polo i toem-pifofohaňey naho o aňombeo; ²⁵ teo ty nandranjia' i Davide kitrely am' IEHOVÀ, le nisoroňe engan-koroaňe naho engam-panintsiaňe. Zay ty nisolohoaňe amy IEHOVÀ i taney, nampijihetse i angorosiy am'Israele.

Mpanjaka I

¹ Ie amy zao fa bey naho nigain-kantetse t'i Davide mpanjaka; aa ndra t'ie nisafo-damba tsy nahazo hafanàñe. ² Aa le hoe o mpitoro'eo ama'e: Ho paiañe somondrara ki'e i talèko mpanjakay, ie hijohañe añatrefa' i mpanjakay, hiatrak' aze, naho händre aña'raña'e, hahazoa' i talèko mpanjakay hafanàñe. ³ Aa le nanitsike i tane Israeley iereo nitsoeke ty ampela soa; le nitendreke t'i Abisage* nte-Sonamý† vaho nasese amy mpanjakay. ⁴ Toe nimontramontre i somondraray; naho niatrake i mpanjakay vaho nitoroñ' aze fe tsy niolora' i mpanjakay.

⁵ Nisenge-vatañe amy zao t'i Adonià‡ ana' i Kagite§, ami'ty hoe: Zaho ty ho mpanjaka. Aa le nihentseñe'e sareté naho mpiningi-tsoavalá vaho ondaty limampolo ho mpilay aolo'e. ⁶ Mbe lia'e tsy nibosehan-drae'e ami' ty hoe: Manao akore o anoe'oo? toe ni-ondaty maràm-bintandre, nanonjohy i Absalome te nasamake. ⁷ Nivesoveso am' Ioabe ana' i Tseroia naho amy Abiatare mpisoron-dre; le norihe' iereo t'i Adonià nañolotse aze. ⁸ Fe tsy nimpiami' Adonià t'i Tsadoke* mpisoroñe naho i Benaià† ana' Iehoiada‡ naho i Natane§ mpitoky naho i Simeý naho i Reý vaho o fanalolahi' i Davideio. ⁹ Nandenta añaondry naho añaombe naho kobatròke marine ty lamilami' i Tsokelete aña'ila' i En-drogele eo t'i Adonià; le kinoi'e iaby o longo'eo, o ana' i mpanjakaio vaho o nte-Iehoda mpitoro' i mpanjakaio; ¹⁰ fe tsy kinanji'e t'i Natane mpitoky naho i Benaià, naho o fanalolahio vaho i Selomò rahalahi'e, ¹¹ Aa le nisaontsy amy Betesebà rene' i Selomò t'i Natane ami'ty hoe, Tsy jinanji'o hao te fa mifehe t'i Adonià ana' i Hagite, vaho tsy fohi' i Davide talentika? ¹² Antao arè, angao hitolorako hevetse, handrombaha'o ty fiai'o naho ty fiai' i ana'o Selomò. ¹³ Akia mb'amy Davide mpanjaka mb'eo, le ano ty hoe: Tsy nifantà'o amo mpitoro'o ampelao hao, ry talèko mpanjaka, ty hoe: Toe hanonjohy ahy t'i Selomò ana'o hifehe, hiambesatse am-pitobohako eo? aa vaho akore t'i Adonià, ie mifeheo? ¹⁴ Aa ihe mbe mitaroñe amy mpanjakay, le horihako ao hañonjoñe o saontsi'oo; ¹⁵ Aa le niheo mb' amy mpanjakay aña'efe'e ao t'i Betesebà: toe niloho bey i mpanjakay ie natrafe' i Abisage nte Sonamý i mpanjakay. ¹⁶ Nidrodrètse t'i Betesebà naho niambane amy mpanjakay. Le hoe i mpanjakay: Ino o paia'oo?

¹⁷ Le hoe re tama'e, O ry talèko: Nifanta'o añaamy IEHOVÀ Andrianañahare'o amy anak' ampata'o, ty hoe: Toe hanonjohy ahy am-pifeheañe t'i Selomò ana'o, vaho ie ty hitobok' amy fiambesam-pifeheakoy. ¹⁸ Fe inao te mifehe t'i Adonià henanekeo vaho tsy fohi'o ry talèko mpanjaka; ¹⁹ mbore fa nandenta añaombe naho kobatròke vaho añaondry tsifotofoto re le kinoi'e iaby o anam-panjakao, naho i Abiatare* mpisoroñe, vaho Ioabe mpifelek' i valobohòkey; fe tsy kinanji'e t'i Selomò mpitoro'o. ²⁰ Ie amy zao hene ama'o, ry talèko mpanjaka ty fihaino' Israele, ty hitaroña'o te ia ty hiambesatse amy fiambesan-talèko mpanjakay hanonjohy aze. ²¹ Naho tsy zay, hifetsake te, ie mirotse an-droae'e ao ty talèko mpanjaka,

* **1:3** Abisage: tsy mahafohin-drae'e † **1:3** Sonamý: mampilongo, mpañavake ‡ **1:5** Adonià: taleko t' IEHOVÀ § **1:5** Kagite: rebeké * **1:8** Tsadoke: vantañe, nomein-to † **1:8** Benaià: ana' IEHOVÀ ‡ **1:8** Iehoiadà: fahafohinañe IEHOVÀ § **1:8** Natane: nitambezefé * **1:19** Abiatare: Rae fanjàka; rae' o sehang'a'eo

le hatao mpandilatse raho naho i Selomò anako. ²² Ie mbe nisaontsy amy mpanjakay, le nimoak' ao t'i Natane mpitoky ²³ vaho nitohine'e ami'ty hoe i mpanjakay, Ingo t'i Natane mpitoky. Aa ie tafa-zilik' amy mpanjakay, le nibokobokok' aolo' i mpanjakay, nihohok' an-tane ty lahabra'e. ²⁴ Le hoe t'i Natane, Ry talèko mpanjaka, Nitaroñe ty hoe hao rehe te i Adonià ty hifehe manonjohy azo, le ie ty hiambesatse amy fiambesa'oy? ²⁵ Amy t'ie nizotso mb'eo anindroany nandenta añombe naho kobatroke naho añondry maro vaho nambarà'e iaby o anam-panjakao naho o mpifelek' i valobohòkeio naho i Abiatare mpisoroñe; ie mikama naho mitohok' añañatrefa'e eo, manao ty hoe, Lava havelo ry Adonià mpanjaka. ²⁶ Fe zaho, zaho mpitoro'o, naho i Tsadoke mpisoroñe, naho i Benaià ana' Iehoiadà, vaho i Selomò mpitoro'o—tsy nambara'e. ²⁷ Nanoen-talèko mpanjaka hao izao, ie tsy natoro'o amo mpitoro'oo ty hanonjohy azo hiambesatse am-piambesan-talèko mpanjaka? ²⁸ Aa hoe ty natoi' i Davide mpanjaka, Kanjio homb' amako mb' etoa t'i Betesebà. Le niheo mb' añañatrefa' i mpanjakay mb'eo re, nijohañe aolo' i mpanjakay. ²⁹ Le nifanta ty hoe i mpanjakay: Kanao veloñe t'IEHOVÀ nijebañe ty fiaiko amy ze haoreñañe iaby, ³⁰ tsy kalafo te nifantako ama'o añañam' IEHOVÀ, Andrianañahare' Israele, ty hoe: Hifehe handimbe ahy t'i Selomò ana'o, le ie ty handimbe ahy hiambesatse amy fitobohakoy. Toe hanoeko anito. ³¹ Nindròdreke mb'an-tane ty lahabra' i Bete-sebà, niambane amy mpanjakay, nanao ty hoe: Lonik' abey te ho veloñe nainai'e ty taleko Davide mpanjaka. ³² Le hoe t'i Davide mpanjaka, Kanjio homb' amako mb'etoka t'i Tsadoke mpisoroñe, naho i Natane mpitoky, vaho i Benaià ana' Iehoiadà. Aa le nomb' añañatrefa' i mpanjakay mb'eo iereo. ³³ Le hoe i mpanjakay am' iereo: Endeso ama' areo o mpitoro' i talè' areoio, le ampiningiro amy borikekoy t'i Selomò, le aseseo hizotso mb'e Gihone mb'eo; ³⁴ le hañory aze ho mpanjaka' Israele t'i Tsadoke mpisoroñe naho i Natane mpitoky; le popòho i antsivay, vaho ano ty hoe: Mahavelo t'i Selomò mpanjaka. ³⁵ Le mionjona mb' etoka am-pañorihañ' aze, le homb'eo re hiambesatse amy fitobohakoy, amy te ie ty handimbe ahy ho mpanjaka; ie ty jinoboko hifehe Israele naho Iehodà. ³⁶ Aa le hoe ty natoi' i Benaià ana' Iehoiada amy mpanjakay: Amena! Lonike t'ie ty hanoe' IEHOVÀ Andrianañaharen-talèko mpanjaka. ³⁷ Hambañ' amy nindreza' IEHOVÀ amy taleko mpanjakaiy ty hindreza'e amy Selomò, naho honjone'e ambone' ty fiambesa' i taleko Davide mpanjakay i fiambesa'ey. ³⁸ Aa le nizotso mb'eo t'i Tsadoke mpisoroñe naho i Natane mpitoky naho i Benaià ana' Iehoiada naho o nte-Kereteo naho o nte Peleteo le natongoa' iereo amy borike' i Davide mpanjakay t'i Selomò vaho nasese' iereo mb'e Gihone mb'eo. ³⁹ Le nakare' i Tsadoke i tsifa ama'menake boak' amy Kivochoiy naho noriza'e t'i Selomò vaho nipopoeñe i antsivay; le hene nirihoñe ty hoe ondatio, Mahavelo ry Selomò mpanjaka. ⁴⁰ Nionjomb'eo am-pañorihañ' aze ondaty iabio; nitio-tsoly vaho nirebeke an-kafaleam-bey, kanao nahariatse i taney ty fikontsiaña' ondatio. ⁴¹ Jinanji' i Adonià naho o nambarà'eo, ie vaho nianjam-pikama. Le hoe t'Ioabe naho nahajanjiñe ty feo' i antsivay: Ino o fipoñafan-drañoraño an-drovaao? ⁴² Ie mbe nisaontsy, ingo, pok'eo t'Ionatane ana' i Abiatare mpisoroñe: le hoe t'i Adonià: Miziliha, ry lahy manjofake, mpinday entan-tsoa. ⁴³ Le hoe ty natoi' Ionatane amy Adonià, Toe i Selomò ty nanoe' i Davide mpanjaka talèn-tika, mpanjaka; ⁴⁴ naho nirahe' i mpanjakay hindre ama'e t'i Tsadoke mpisoroñe naho i Natane

mpitoky naho i Benaià ana' Iehoiadà naho o nte-Kereteo[†] naho o nte-Peleteo[‡], le nampiningire' iereo amy borì' i mpanjakaiy; ⁴⁵ vaho noriza' i Tsadoke mpisoroñe naho i Natane mpitoky ho mpanjaka e Gihone ao re; mivoamboañe boak' ao an-drebeke iereo kanao mañeno-tsatsake o rovao. Zay o korakoràke janji' areoo. ⁴⁶ Eka! fa miambesatse amy fiambesam-pifeheañey t'i Selomò. ⁴⁷ Nimb'eo ka o mpitoro' i mpanjakaio hitata i Davide mpanjaka talèn-tika ami'ty hoe: Honjone' i Andrianañahare'o ambone' ty tahina'o ty tahina' i Selomò vaho hampitoabore'e ambone' i fiambesa'oy ty fiambesa'e; le niondrek' am-pandrea'e eo i mpanjakay. ⁴⁸ Tinovo' i mpanjakay ty ti-hoe, Andriañene t'IEHOVÀ, Andrianañahare' Israele, nanolotse ty hiambesatse amy fitobohakoy anindroany, hahatreava' o masokoo. ⁴⁹ Fonga nangebahebak' amy zao o nambarà' i Adoniào, le niongake, songa ninankañe mb' an-dala'e mb'eo. ⁵⁰ Nirevendreveñe amy zao t'i Adonià ty amy Selomò, le niavotse mb'eo nivontititse amo tsifa' i kitreliio. ⁵¹ Aa le nisaontsieñe amy Selomò ty hoe: Inao! mañeveñe amy Selomò mpanjaka t'i Adonià, kanao tambozore'e o tsifan-kitrelio, le hoe ty asa'e, Ehe te hifanta amako anito t'i Selomò mpanjaka tsy hanjevoñe i mpitoro'ey am-pibara. ⁵² Le hoe t'i Selomò, Naho miboake hondaty vañondre, leo raik' amo maroi'eo tsy hipok' an-tane; f'ie tendrehan-kaloloañe le hihomake. ⁵³ Aa le nañirake t'i Selomò mpanjaka, vaho nazotso' iareo amy kitreliy. Nimb'eo re niambane amy Selomò mpanjaka; le hoe ty Selomò ama'e: Akia mb' aña'akiba'o aña.

2

¹ Nitotok' amy zao ty andro hikoromaha' i Davide; le hoe ty nafè'e amy Selomò ana'e, ² Homb' amy fombà' ty tane-bey toy raho: aa le mihafatrara h'ondaty; ³ mifahara amy nafanto' IEHOVÀ Andrianañahare'oy, ty hañavelo amo lala'eo, ty hañambeñe o fañè'eo naho o taro'eo ie misokitse amy Hà' i Mosèy, soa t'ie hahatafetetse amy ze hene toloñe'o, ndra aia aia ty itoliha'o, ⁴ hampijadoña' IEHOVÀ i entañe tsinara'e amakoy, ty hoe, Naho ambena' o ana'oo o lia'eo, hañavelo añatrefako eo an-katò, an-kaampon' arofo vaho an-kaliforam-pañova, le tsy ho-pok' ondaty amy fiambesa' Israeley rehe. ⁵ Fohi'o ka i nanoe' Ioabe ana' i Tseroia amakoy, naho i nanoe'e amy mpifehe roe' i valobohò' Israeley rey, amy Abnere ana' i Nere, naho amy Amasà ana' Ieter, ie vinono'e naho nampiorihe'e lio an-tsan-kanintsiñe hoe an-tsan'aly, vaho nampidiae'e lion' aly o toha'eo hoe sadia naho hoe hana am-pandia'eo. ⁶ Ano arè ami'ty hihi'o, le ko ado'o hizotso mb'an-tsikeokeok' ao am-panintsiñañe i añambone'e fotiy. ⁷ Le ampiboaho falalàñe amo ana' i Bartsilay nte-Giladeo, naho angao ho mpiamo mpikama am-pandambaña'o; fa nimb' amako iereo, ie nitribanday ty amy Absalome rahalahi'oy. ⁸ Oniño te ama'o ka i ana' i Simeiy ana' i Gera nte-Beniamine boake Bakorimey, i namatse ahy an-kaloloañe amy andro nimbàko mb'e Maknaime mb'eyo f'ie nizotso nifanalaka amako am' Iordaney, le nifanta ama'e añamy IEHOVÀ raho t'ie tsy havetrako am-pibara. ⁹ Ie amy zao ko atao'o malio tahiñe, ihe ondaty mahihitse; le ho fohi'o ze hanoe'o le ampigodaño an-dio mb' an-tsikeokeok' ao i añambone'e fotiy. ¹⁰ Aa le nitrao-piròtse an-droae'e t'i Davide vaho nalentek' an-drova' i Davide ao. ¹¹ O andro nifehea' i Davide Israeleo le efa-polo taoñe, fito taoñe ty nifehea'e e Kebrone vaho telopolo-telo' amby toañe ty nifehea'e e Ierosalaime ao.

[†] 1:44 Kerete: Mpigarits'aiñe; mpañambeñe [‡] 1:44 Perete: Mpihitrike, mpinday entam-palie

¹² Niambesatse amy fiambesa' i Davide rae'ey t'i Selomò vaho nisoa oreñe i fifehea'ey. ¹³ Niheo mb'amy Betesebà rene' i Selomò mb'eo t'i Adonià ana' i Kagý, nanao ty hoe: An-kanintsíñe hao ty ihova'o mb'etoa? Le hoe re: Hanintsíñe. ¹⁴ Le hoe re: Aman-entañe ho ama'o raho. Hoe ty natoi'e, Misaontsia arè. ¹⁵ Le hoe re: Fohi'o te ni-ahiko i fifeheañey vaho nitolik' amako o lahara' Israele iabio, te zaho ty hifeleke: fa ie amy zao nifamotetse i fifeheañey t'ie an-drahalahiko, amy te aze añamy IEHOVÀ. ¹⁶ Aa ie henaneo, raik' avao ty halaliko ama'o; ko lane'o. Le hoe re ama'e. Misaontsia. ¹⁷ Le hoe re: Ehe misaontsia amy Selomò mpanjaka (ie tsy handiets' azo), t'ie hanolots' ahy i Abisage nte-Sonamý ho valiko. ¹⁸ Le hoe t'i Betesebà, Ie zay, ho volañeko amy mpanjakay i azoy. ¹⁹ Aa le nimb' amy Selomò mpanjaka t'i Bete-sebà hitaroñe i Adonià. Niongake nifañaoñe ama'e i mpanjakay naho nidròdreke vaho niambesatse am-piambesa'e eo, le nampipoha'e fiambesatse ho a i renem-panjakay; vaho niambesatse an-kavana'e eo. ²⁰ Aa hoe re, Mihalaly raha kede ama'o raho le ko mandietse. Le hoe i mpanjakay ama'e, Mihalalia arè ene, fa tsy ho liereko. ²¹ Le hoe re, Ehe, atoloro ho tañanjomba' i Adonià rahalahi'oy t'i Abisage nte Sonamý. ²² Natoi' i Selomò mpanjaka an-drene'e ty hoe: Aa vaho akore ty ihalalia'o ho a i Adonià i Abisage nte-Sonamý? halalio ho aze ka ty fifeheañe toy fa zokeko; eka ho aze naho i Abiatare mpisoroñe vaho Ioabe ana' i Tseroià. ²³ Nifanta am' IEHOVÀ amy zao t'i Selomò mpanjaka, ami'ty hoe; Ee te hanoen' Añahare amako naho mandikoatse, naho tsy namoea'e ay ty amo enta'e zao. ²⁴ Aa kanao veloñe t'IEHOVÀ nampijadoñe ahy naho nampitobok' ahy am-piambesan-draeko naho namboatse anjomba ho ahy, ty amy tsara'ey, le tsy mete tsy havetrake t'i Adonià te anito. ²⁵ Nirahe' i Selomò mpanjaka am-pitá' i Benaià ana' Iehoiada te hiambotrahañe, vaho nihomake re.

²⁶ Le nanao ty hoe amy Abiatare mpisoroñe i mpanjakay: Akia mb'e Anatote, mb'amo tete'oo mb'eo; toe mañeva ho mate; fe tsy havetrakoo hey, amy te nitarazoe'o añatrefan-draeko ty vata' i Talè IEHOVÀ, naho fonga nisotria'o ze nisilofan-draeko. ²⁷ Aa le sinoi' i Selomò t'i Abiatare tsy ho mpisoroñe am' IEHOVÀ; soa te ho heneke ty tsara' natao' IEHOVÀ amy anjomba' i Elý e Silòy. ²⁸ Natalily am' Ioabe i nanoeñe zay, amy te nandifike mb'amy Adonià t'Ioabe, ndra t'ie tsy nandifike mb'amy Absalome. Le nipsitsike mb'an-Kivoho' IEHOVÀ mb'eo t'Ioabe nivontititse amo tsifa' i kitreliio. ²⁹ Sinaontsy amy Selomò mpanjaka ty hoe: Fa nivoratsake mb'an-Kivoho' IEHOVÀ ao t'Ioabe, inao, amy kitreliy eo. Le nampañitrife' i Selomò t'i Benaià ana' Iehoiada ami'ty hoe: Akia iambotraho. ³⁰ Niheo mb'amy Kivoho' IEHOVÀ mb'eo t'i Benaià le hoe ty asa'e tama'e: Hoe ty saontsi' i mpanjakay: Miavota. Fa hoe re: Aiy! hikenkañe atoy raho. Aa le nabali' i Benaià amy mpanjakay ty hoe: Hoe ty saontsi' Ioabe, vaho zao ty navale'e ahy. ³¹ Le hoe i mpanjakay tama'e: Ano i vinola'ey, iambotraho vaho alenteho; hañafaha'o amako naho añ'anjomban-draeko ty lio nampiorihe' Ioabe tsy vente'e. ³² IEHOVÀ ty hamalike ty lio'e añambone'e, amy t'ie niambotrak' amy t'indaty roe vantañe naho soa te ama'e, vaho zinevo'e am-pibara, ie tsy nifohin-draeko: i Abnere ana' i Nere, mpifehe' ty valobohò' Israele, naho i Amasà ana' Ieter, mpifeleke ty valobohò' Iehoda. ³³ Aa le hibalik' amy añambone' Ioabey, naho andoha' o tiri'eo nainai'e kitro katroke ty lio' iareo; fe fanintsíñañe nainai'e kitro añ'afe'e ty ho amy Davide naho o tiri'eo naho i anjomba'ey vaho i fiambesa'e boak' am' IEHOVÀ. ³⁴ Nionjoñe mb'eo amy zao t'i Benaià ana'

Iehoiada, le niambotraha'e, naho navetra'e; vaho nalentek' añ' anjomba'e am-patrambey aña.

³⁵ Le najado' i mpanjakay an-toe'e ho mpifehe i valobohòkey t'i Benaià; naho an-toe' i Abiatare t'i Tsadoke mpisoroñe. ³⁶ Nampañitrife' i mpanjakay t'i Simeý, le nanoa'e ty hoe: Mandranjia anjomba e Ierosalaime atoy, le imoneño, vaho ko iakara'o homb' aia ndra aia. ³⁷ Fa amy andro iavota'o hitsake i Kidroneiy, le mahafohina an-katò t'ie toe hikenkañe; vaho ho amy añ'ambone'oy ty lio'o. ³⁸ Aa hoe t'i Simeý amy mpanjakay: Noko o saontsi'oo; le i tinaro' i talèko mpanjakay ty hanoe' o mpitoro'oo, vaho nimoneñe e Ierosalaime ao andro maro t'i Simeý. ³⁹ Fa ie nimodo ty telo taoñe le nitriban-day mb'e Akise ana' i Maakà mpanjaka' i Gate ty mpitoro' i Simeý roe. Aa le natalily amy Simeý ty hoe: Inao e Gate aña i mpitoro'o rey. ⁴⁰ Niongak' amy zao t'i Simeý nidiañe i borike'ey, le nañavelo mb'e Akise e Gate aña nipay i mpitoro'e rey; nimb'eo t'i Simeý le nendese'e boake Gate i mpitoro'e rey. ⁴¹ Natalily amy Selomò te niavotse Ierosalaime t'i Simeý nomb'e Gate mb'eo vaho nimpoly. ⁴² Aa le nampañitrife' i mpanjakay naho kinoi'e t'i Simeý, le nanoa'e ty hoe: Tsy nampifantàko am' IEHOVÀ hao rehe, naho nañatahata azo ami'ty hoe: Mahafohina an-katò te ami'ty andro iavota'o vaho añañveloa'o aña le tsy mete tsy hikoromake? vaho hoe rehe tamako: Soa o entañe tsinanokoo. ⁴³ Aa vaho akore arè te tsy nambena'o i nifantà'o amy IEHOVÀ, naho i lily namantohako azoy? ⁴⁴ Tinovo' i mpanjakay amy Simeý ty hoe: Fohi'o iaby ty haloloña iantofan-tro'o, i nanoe'o an-draekoy; aa le habali' IEHOVÀ añañbone'o o halò-tsere'oo. ⁴⁵ Fe ho tahie'e t'i Selomò mpanjaka, vaho hajadoñe añañtrefa' IEHOVÀ kitro añañafe'e ty fiambesa' i Davide. ⁴⁶ Aa le nafanto'e amy Benaià, ana' Iehoiada; niavotse re niambotrap' ama'e le nivetrake. Nijadoñe am-pitá' i Selomò amy zao i fifeheañey.

3

¹ Nanao filongoañe am-panambaliañe amy Parò mpanjaka' i Mitsraime t'i Selomò, ie nañenga ty anak'ampela' i Parò, vaho nendese'e androva' i Davide ampara' te nifonitse ty anjomba nandranjia'e naho ty anjomba' IEHOVÀ naho ty kijoli' Ierosalaime nañarikatoke aze. ² Nanao soroñe ankaboañe eñe ondatio, amy t'ie tsy aman' anjomba rinafitse ho amy tahina' IEHOVÀ tañ'andro zay. ³ Nikokoa' i Selomò t'IEHOVÀ naho nañavelo amo fañèn-drae'eo; f'ie nanao soroñe an-kaboañe eo. ⁴ Nimb'e Gibone aña i mpanjakay hisoroñe amy te zay ty haboañe bey; soroñe arivo ty nengae' i Selomò amy kitrely zay.

⁵ Ie te Gibone aña, le nisodehañe amy Selomò haleñe ami'tynofy t'IEHOVÀ; le hoe t'i Andrianañahare: Mihalalia, Ino ty hatoloko azo? ⁶ Le hoe t'i Selomò: Fañisoham-bey ty natolo'o amy Davide raeko mpitoro'o, ie nañavelo añañtrefa'o an-katò naho an-kavantañañe, naho an-kavañonan' arofo vaho nahaja'o ho aze o fatarinhañe ra'elahy zao te tinolo'o anake hiambesatse amy fiambesa'ey manahake henanekeo. ⁷ Ie henane zao, ry IEHOVÀ Andrianañahareko, fa nanoe'o mpanjaka handimbe i Davide raeko ty mpitoro'o; zaho mbe anak' ajaja, tsy mahay miakatse ndra mimoake. ⁸ Le añañivo' ondati'o jinobo'oo ty mpitoro'o, ondaty mitozantozañe tsy lefe iaheñe ami'ty havasiaña'e. ⁹ Aa le toloro troke mahilala ty mpitoro'o hahafizaka'e ondati'oo, hahafitsakorea'e añañivo' ty soa naho ty raty; fa ia ty hahafizaka ondati'o ra'elahy retoañe? ¹⁰ Nisoa ampihaino' i Talè, i nihalalia' i Selomò. ¹¹ Le hoe t'i Andrianañahare ama'e: Kanao izay ty

nihalalia'o, naho tsy hinalali'o ho azo ty halava-haveloñe, tsy hinalali'o ho azo ty vara-bey, tsy hinalali'o ty fiain-drafelahi'o; fe nihalalie'o ty fahafohinañe hahatsikaritse ty hatò. ¹² Inao, nanoeko i sinaontsi'oy: ingo te nitolorako arofo mahihitse naho mahilala; kanao tsy eo ty nanahak' azo taolo'o, naho tsy ho amam-panonjohy hitroatse hañirinkiriñe azo; ¹³ vaho natoloko azo ka o tsy nihalalie'oo, ty vara naho ty asiñe, soa tsy eo ty mpanjaka hanahak' azo amo hene andro'oo. ¹⁴ Aa naho añaveloa'o o lalakoo, hañambeñe o fañekoo naho o lilikoo, manahake ty fañaveloandrae'o Davide, le halavaeko o andro'oo. ¹⁵ Nivañoñe amy zao t'i Selomò le naheo'e t'ienofy; nomb'e Ierosalaime mb'eo re, nijohañe añatrefa' i vatam-pañina' i Talèy eo le nañenga soroñe naho engam-panintsiñañe, vaho nanoa'e sabadidake o mpitoro'e iabio.

¹⁶ Niheo mb'amy mpanjakay amy zao ty karapilo roe, nijohañe añatrefa'e eo ¹⁷ le hoe ty rakemba raike: O ry talèko, mitrao-pimoneñe an-kibohotse ami'ty rakemba tiañe raho; vaho nahatoly ajaja t'ie an-traño ao. ¹⁸ Aa ie amy andro fahatelo' i niterahakoiy le nahatoly ka o rakembao, vaho niharao zahay; tsy aman' ambahiny i kibohotsey naho tsy zahay roe avao ty an-traño ao. ¹⁹ Nisimba haleñe ty ana' o rakembao, amy te nandrea'e. ²⁰ Nitroatse amy haleñey re nandrambe i anadahiko marine ahiy, ie niroro ty anak' ampata'o, le nampandre'e añ' araña'e; vaho napo'e añ' arañaako eo i ana'e niopoy. ²¹ Aa izaho nañente te maraindray hampinono i anakoy, hehe te mate; f'ie nibiribiriek amy maraiñey; hete! tsy i ana-dahy naterakoy toke. ²² Le hoe ka i rakemba raikey: Aiy! i veloñey ro anako, vaho simba i azoy; Fa hoe ka ty asa' itiañe: Tsie fa toe ana'o i nisimbay, vaho veloñey i anadahiko. Zay ty enta' iareo añ' atrefa' i mpanjakay. ²³ Le hoe i mpanjakay: Hoe ty asa' ty raike: Anadahiko ty veloñey toy, naho mate i ana-dahi'oy; hoe ka i raikey: Aiy! fa i ana'oy ty mate vaho veloñey i anadahikoy. ²⁴ Le hoe i mpanjakay: Angalao fibara, le nindesa' iareo fibara i mpanjakay. ²⁵ Le hoe i mpanjakay: Tampaho roe i ajaja veloñey, le atoloro amy raikey ty vaki'e naho amy ila'ey ty vaki'e. ²⁶ fe nitoreo amy mpanjakay i rakemba rene' i ajaja veloñeyi, ie niferenaiñan-tro'e i anadahi'ey, ami'ty hoe: O talèko, atoloro aze i ajaja veloñey, ehe tsy vonoeñe, Fa hoe ka i raikey, Tsy ho ahy tsy ho azo; salàho! ²⁷ Aa le hoe ty navale' i mpanjakay: Atoloro aze i ajaja veloñey le ko vonoeñe! ie ty rene'e. ²⁸ Jinanji' Israele iaby i zaka tinaro' i mpanjakaiy; vaho nañeveñe amy mpanjakay, amy te nioni' iareo te ama'e ty hihin' Añahare hahahenefa'e zaka.

4

¹ Nifeleke Israele iaby t'i Selomò mpanjaka. ² Le zao o roandria'eo: i Azarià*, ana' i Tsadoke mpisoroñe, ³ i Elikòrefe† naho i Akià‡ ana' i Sisà§, mpanokitse, Iehosafate* ana' i Akilode†, mpamolily; ⁴ i Benaià ana' Iehoiada, mpifehe i valobohòkey, le mpisoroñe t'i Tsadoke naho i Abiatare; ⁵ i Azarià ana' i Natane, ty mpifeleke o mpiaoloo; mpisoroñe naho mpiamy mpanjakay t'i Zabode‡ ana' i Natane; ⁶ talè' i anjombay t'i Akisare§; vaho mpiaolo ty fañondrohan-kàba t'i Abdà*. ⁷ Nanam-pifeleke folo-ro'amby t'i

* ^{4:2} Azarià: ty mahajanjiñe IEHOVÀ † ^{4:3} Elekòrefe; Tale' ty asotry ndra hatora'e ‡ ^{4:3} Akià: rahalahi' IEHOVÀ § ^{4:3} Sisà: atrefe' IEHOVÀ; marbre; fanjàka * ^{4:3} Iehosafate; I IEHOVÀ ro mpanjaka † ^{4:3} Akilode: samake rahalahy ‡ ^{4:5} Zabode, Zabade: entan'ampela: natolotse § ^{4:6} Akisare: rahalahi: roandriañe, sabo * ^{4:6} Abdà: mpitoroñe, fitoroñañe

Selomò nifehe Israele iaby, o namahañe i mpanjakay naho i anjomba'eo. Songa namahañe volañe raik' ami'ty taoñe. ⁸ Zao o tahina' iareoo: I Ben-Kore[†] am-bohibohi' i Efraime; ⁹ i Ben-Dekere[‡] e Makatse[§] naho e Betesemese* naho e Elone-Bete-Khanàne[†]; ¹⁰ i Ben-Kesede[‡] e Arobote[§]; aze ka t'i Sokò* naho ze hene tane e Kefere[†]; ¹¹ i Ben' abinadabe[‡] amy fari' i Dore[§], aze t'i Tafate* anak' ampela' i Selomò tañanjomba'e. ¹² I Baana[†], ana' i Akilode, aze t'i Taanake[‡], i Megidò[§] naho i Beteseane* iaby marine' i Tsaretane ambane' Iizreèl boake Beteseane pak' Abel-mekolà[†] mb'an-kalo' Iokneame[‡] ao; ¹³ i Ben-Gebere[§], e Ramote*-gilade[†], aze o rova' Iaere ana' i Menasè e Giladeo; aze ka ty fari' i Argobe[‡] e Basane[§] ao, rova enempolo jabajaba reketse kijoly naho sikadañe torisike; ¹⁴ i Akinadabe*, ana' Idò[†], e Maknaime[‡]; ¹⁵ i Akimatse[§] e Naftalý ao; nengae'e ka t'i Basmate*, anak' ampela' i Selomò, ¹⁶ i Ba' anà[†], ana' i Kosàý[‡], e Asere[§] naho e Bealote*; ¹⁷ Iehosafate, ana' i Paroà[†] e Isakare; ¹⁸ i Simeý[‡] ana' i Elà[§], e Beniamine; ¹⁹ i Gebere* ana' i Orý[†], an-tane' i Gilade, an-tane' i Sikone[‡] mpanjaka' o nte-Amoreo, naho a i Oge[§] mpanjaka' i Basane; vaho raike ty mpifehe i tane iabiy.

²⁰ Nitozantozañe mira amo faseñe añ' olon-driakeo t'Iehoda naho Israele ami'ty hamaro'e, nikama, ninoñe vaho nifale.

5

¹ Nifehe ze hene fifeheañe boak' amy Sakay pak'an-tane' o nte-Pelistio, sikala añ'efe-tane' i Mitsraime; sindre ninday roroñe vaho nitoroñe i Selomò amo fonga andro niveloma'eo. ² Ty anjara' i Selomò ami'ty andro raike le mona'e telo-polo kore*, vaho mahakama enempolo kore; ³ añombe vondrake folo naho añombe boak' am-piandrazañe roa-polo naho añondry zato, rekets' ayale[†] naho tsebý[‡] naho yakmore[§] vaho voroñe vondrake. ⁴ Amy te nifeheze'e iaby i tane boak' amy Sakay atoiy, boak' e Tipsà pake Gazà; fonga nifehè'e o mpanjaka an-dafe' i Sakay atoio; vaho nierañerañe iaby ty nañohok' aze. ⁵ Aa le niaiñ' añoleñañe t'Iehoda naho Israele, songa ondaty ambane' i vahe'ey naho i sakoa'ey, boake Dane pake Beersebà, amo hene' andro' i Selomò. ⁶ Nanañe kijan-tsoavala efats'

[†] 4:8 Ben: anake; Kore: fidada; hafotia; hirike [‡] 4:9 Dekere: haozarañe [§] 4:9 Makatse: figadoñañe; fitamàñe * 4:9 Betesemese; anjomba' i androy [†] 4:9 Elone-Bete-Khanàne: akiba' ty mafiry [‡] 4:10 Ben-Kesede: Anam-patarihañe [§] 4:10 Arobote; lafinety: lalankede * 4:10 Sokò: kibohotse [†] 4:10 Kefere: mpihaly [‡] 4:11 Abinadabe: raem-pañina,-pavitrihañe [§] 4:11 Dore: tariratse raike, fimoneñañe * 4:11 Tafate: evoñe mitsopake [†] 4:12 Baanà: ami'ty vale'e; an-kasotriañe [‡] 4:12 Taanake: i mampirek'azoy, manoiñe azo [§] 4:12 Megidò: fanjaka o voa'eo; mitsey * 4:12 Beteseane: anjomban-tsifa; [†] 4:12 Abel-mekolà: golobom-pitsinjahañe [‡] 4:12 Iokneame: mampionjoñe ondatio [§] 4:13 Ben-Gebere: Ana-dahilahy/maozatse * 4:13 Ramote: ankaboa [†] 4:13 Gilade: ty votrin-talily [‡] 4:13 Argobe: tane kobokara [§] 4:13 Basane: aman-tsifa * 4:14 Akinadabe: rahalahy pañina mahimbañe [†] 4:14 Idò: o mpirimboñe ama'eo; ozatse; enge [‡] 4:14 Maknaime: Kivoho: teteke/rimboñe roe [§] 4:15 Akimatse: rahalahy ty fivory; * 4:15 Basmate: nanoñañe rano mañitse; [†] 4:16 Ba'anà: ami'ty navale'e; an-kasotriañe [‡] 4:16 Kosàý: ty falisa' iareo; ty fianjiña' iareo [§] 4:16 Asere: hafaleañe * 4:16 Bealone: nahifik' ambane [†] 4:17 Paroà: miraorao; miherañe aña [‡] 4:18 Simeý: mahajanjiñe mañorike; engeko; [§] 4:18 Elà: kobaiñe; fatse; fandañirañe * 4:19 Gebere: Vata'e lahilahy; maozatse [†] 4:19 Orý: ty failoko; ty afoko [‡] 4:19 Sikone: Ombotañe; figadoñañe [§] 4:19 Og: mofo vonga'e natono am-bain'afó * 5:2 kore: haron-kafotse [†] 5:3 Ayale: biby lý bey mahafipitsike [‡] 5:3 Tsebý: manaha-tahake i Ayaley [§] 5:3 yakmore: biby bey manahake ty Tseby

ale ho a o sarete'eo t'i Selomò naho mpiningi-tsoavalà rai-ale-tsi-ro'arivo. ⁷ Namahañe mahakama amy Selomò i mpifeleke rey, ho amy maro nimoak' am-pandambaña' i Selomò mpanjakay, songa ondaty ami'ty vola'e, le tsy ama'e ty nengañe mipoke. ⁸ Vaho nandesa' iareo vare hordea naho ahetsé o soavalao vaho o soavalà mpipitsikeo sindre mb' an-toe'e ao, songa ondaty ty amy lili'ey.

⁹ Tinolon' Añahare hihitse naho hilala ambone, t'i Selomò, naho arofo mangadagadañe, manahake ze hene' faseñe añ' olon-driakey. ¹⁰ Nandikoatse ty hihi' o anan-tatiñanañe iabio naho ty hihi' i Mitsraime iaby ty hihi' i Selomò. ¹¹ Toe nahihitse te amy ze kila ondaty, naho te amy Etane* nte-Zerake† naho i Hemane‡ naho i Kal'kole§ naho i Dardà* vaho o ana' i Makoleot†; le nifohin-tahinañe amy ze hene fifeheañe mb'eo mb'eo. ¹² Telo-arivo ty razan-drehake nitaroñe'e, vaho arivo-lime amby o sabo'eo. ¹³ Nitalilie'e ze hatae iaby, ty mendoraveñe e Lebanone aña naho i seva mitiry an-tsifin-kijoliy; tinaro'e ze biby naho voroñe naho ze raha milalilaly vaho fiañe. ¹⁴ Nimb' eo boak' amy ze kilakila' ndaty ty hijanjiñe o hihi' i Selomò; niboak' amy ze hene mpanjaka' ty tane toy ty nahajanjiñe i hihi'ey.

¹⁵ Nirahe' i Kirame‡, mpanjaka' i Tsore§ mb'amy Selomò mb'eo o mpitoro'eo, ie nahajanjiñe t'ie norizañe ho mpanjaka handimbe an-drae'e; amy te nainai'e nimpirañetse amy Davide t'i Kirame. ¹⁶ Aa le nampihitrife' i Selomò amy Kirame, ty hoe: ¹⁷ Fohi'o te tsy nahafamboatse anjomba ho a i tahina' IEHOVÀ Andrianañahare'ey t'i Davide raeko, ty amo hotakotake niariseho azeo ampara' t'ie napo' IEHOVÀ ambane' o lelam-pandia'eo. ¹⁸ Fe tinolo' IEHOVÀ Andrianañahareko fitofâñe ty miariary ahy iaby henanekeo, amy t'ie tsy aman-drafelahy ndra raha mizo. ¹⁹ Ingo, hoe ty volako, Handranjiako anjomba ty tahina' IEHOVÀ Andrianañahareko, ty amy tsinara' IEHOVÀ an-draeko Davidey, ty hoe: Ty ana'o hampiambesarako am-piambesa'o ty hamboatse anjomba ho ami'ty añarako. ²⁰ Aa le lilio ty hamirâñe mendoraveñe e Lebanone* ao, le hindre amo mpitoro'oo o mpitorokoo vaho hatoloko ama'o ho a o mpitoro'oo ty tambe toñone'o ho a iareo, ie fohi'o te tsy ama'ay ty mahafira hatae manahake o nte-Tsidoneo. ²¹ Ie jinanji' i Kirame i saontsi' i Selomò le vata'e nirebeke vaho nanao ty hoe: Andriañeñe t'IEHOVÀ henane zao, Ie nanolotse i Davide anake mahihitse hifeleke ondaty jabajaba retoñañe. ²² Aa le nahitri' i Kirame amy Selomò ty hoe: Fa tsinanoko i nañitrifa'o ahiy le hene hanoeko o satrien' arofo'oo amo mendoraveñe naho haradrantoo. ²³ Hazotso' o mpitorokoo boake Lebanone pak' an-driak' aña zay; le hamboareko t'ie hihafo amy riakey handenà' iereo mb'amy toetse hatoro'o ahio, naho hakatrak' aña, vaho ho rambese'o; le ihe ty hañeneke i fañiriakoy te hamahana'o mahakama ty akibako.

²⁴ Aa le natolo' i Kirame amy Selomò ze fonga mendoraveñe naho haradranto nipaia'e. ²⁵ Natolo' i Selomò amy Kirame ka ty vare-bolè ro'ale kore hamahana'e o añ'anjomba'eo, naho menake finofoke roapolò kore; zay ty natolo' i Selomò amy Kirame taoñ' an-taoñañe. ²⁶ Tinolo' IEHOVÀ hihitse t'i Selomò, ty amy nitsarae'e ama'ey le nifampilongo t'i

* **5:11** Etane: maozatse; ravoravo' i tokonosey † **5:11** Zerake: olotse; ‡ **5:11** Hemane: ty fasosora' iareo; mialy § **5:11** Kal'kole: mpamahañe, mpampibotseke, * **5:11** Dardà: anjomban-kilala † **5:11** Makole: kepeke, marovany; miheve ‡ **5:15** Kirame: mañonjo-kavelo: mpandrotsake § **5:15** Tsore: haozarañe; lamilamy; masioñe * **5:20** Lebanone: foy: rame

Kirame naho i Selomò; vaho nifanao fañina. ²⁷ Aa le hene nampitsatoha' i Selomò haba t'Israele, ondaty telo-ale i haba zay ²⁸ vaho nampihitrife'e mb'e Lebanonone mb'eo, rai-ale boa-bolañe ty nifandimbe, volañe raike e Lebanonone aña naho roe volañe aña' anjomba'e ao; i Adonirame[†] ty nifehe i hàbay. ²⁹ Fito-ale ty mpijiny kilanka' i Selomò naho valo-ale ty namira am-bohitse aña; ³⁰ mandikoatse zay o mpifehe' i Selomò nifelek' o fitoloñañeo: telo-arivo-tsi-telon-jato ty nifeleke ondatio amo fitoloña'eo. ³¹ Nandily t'i Selomò vaho nihaliañe vato jabajaba, vato soa, handranjiañe o mananta' i anjombaio am-bato pinèke. ³² Aa le rinamerame' o mpandranji' i Selomò naho o mpamboa' i Kirameo naho o nte-Gebaleo[‡] irezay, naho nañalankañe o hatae vaho vato nandranjiañe i anjombaio.

6

¹ Aa ie amy taom-paha-efajato-tsi-valompolo niavota' o ana' Israeleo an-tane' i Mitsraimey, amy taom-paha-efam-pifehea' i Selomò Israeley, amy volantatakey, i volam-paharoey, ty namotorañe ty fañamboara'e i anjomba' IEHOVÀ. ² Ty anjomba rinanji' i Selomò am' IEHOVÀ, ie kiho enim-polo ty andava'e naho kiho roapolo ty am-pohe'e vaho kiho telopolty haabo'e. ³ Ty lavaranga aolo' i efe-bei' i anjombay le roapolo kiho ty andava'e, mira ami'ty am-pohe' i anjombay; vaho folo kiho ty am-pohe'e aolo' i anjombay eo. ⁴ Nandranjia'e lalan-kede i anjombay, bey ty ampohe' ty añate'e naho maifitse ty alafe'e. ⁵ Natratraña'e o rindri' i anjombaio mañarikatoke i anjombay, naho i efetse beiy vaho i efe-miavakey; aa le nandranjia'e efets' efetse ty mañariary aze; ⁶ o efetse ambaneo le kiho lime ty ampohe'e, naho enen-kiho ty añivo'e vaho kiho fito ty fahatelo'e; nandranjia'e soñy i rindriñe alafe' i anjombay mañariary azey, soa tsy hifahatse amo rindri' i anjombaio o manantañeo; amy te, ⁷ ie narafitse i anjombay, le narafitse am-bato nihentseñeñe am-pihaliañe aña; vaho tsy nijanjiñeñe amy anjombay am-pandranjiañe aze ty ana-bato ndra fekoñe ndra haraotse viñe. ⁸ Ty lala' o mizakitse aña'ilà ankavana' i anjombaio, le nionjoñe am-panongañe nivanditse mb'amo mizakitse añivoo, vaho boak' amy añivoy pak' amy fahateloy. ⁹ Aa le rinanji'e i anjombay naho nifonira'e; vaho kinape'e varambañe naho boda mendoraveñe i anjombay. ¹⁰ Le rinanji'e vatsa hañarikatoke i anjombay, songa kiho lime ty haabo'e; ie nirampy amy anjombay am-boda-mendoraveñe.

¹¹ Aa le niheo amy Selomò ty tsara' IEHOVÀ nanao ty hoe: ¹² O anjomba amboare'oo: ie añaveloa'o o fañekoo naho anoe'o o nafepèkoo vaho hene ambena'o o likoo, hañaveloa'o, le hajadoko ama'o i entako nitsaraeko amy Davide rae'oy, ¹³ te himoneñe añivo' o ana' Israeleo raho, vaho tsy haforintseko ondatiko Israeleo. ¹⁴ Aa le rinanji' i Selomò i anjombay vaho nahafonitse.

¹⁵ Le rinanji'e am-baramba mendoraveñe o rindriñe amy anjombaio boak' an-tane pak' an-tsazo'e ambane riha eo; le nilafisha'e hatae o añate'e iabio vaho nilafisha'e haradranto ty ambane eo. ¹⁶ Natratraña'e kiho roapolo ty amboli' i anjombay, am-baramba mendoraveñe mifototse antane pak' an-tapenake, nanoa'e efetse añate'e ao ho toem-pitsarañe, ho toetse masiñe do'e. ¹⁷ I trañoy—i efetse aolo' i masiñe do'eiy, leefa-polo kiho ty an-dava'e. ¹⁸ Sinokitse sarem-bebeke naho voñe miborake o mendoraveñe añate' i anjombaio; ama' mendoraveñe iaby

[†] 5:28 Adonirame: IEHOVÀ andindimoneñey [‡] 5:32 Gebale: voafaritsoke, voa-fehe

zay, tsy nahaisaham-bato. ¹⁹ Hinalanka'e amy anjombay i toe-miavakey, hampidona'e i vatam-pañina' IEHOVÀY. ²⁰ Kiho roapolty andava'e miaolo i toe-miavakey, naho kiho roapolty am-pohe'e le kiho roapolty haabo'e, le nitemere'e volamena ki'e; napo'e ao ka ty kitrely, le sinaro'e mendoraveñe. ²¹ Nitemere' i Selomò am-bolamena ki'e ka i trañoy, naho kinazaza'e silisily volamena ty aolo' i toe-miavakey vaho nandafiha'e volamena. ²² Hene nitemere'e am-bolamena i trañoy, ampara'te nifonitse i trañoy; vaho nipakora'e aolamena iaby ty kitrely' i toe-miavakey. ²³ Nandranjia'e kerobe roe an-talý i toe-miavakey, songa kiho folo ty haabo'e. ²⁴ Kiho lime ty ela' ty kerobe raike, naho kiho lime i ela ila'ey; kiho folo ty boak'an-dengon-ela'e raike pak'an-dengo' i ila'ey. ²⁵ Nivelatse kiho folo ka i kerobe raikey, songa aman-jehe mira naho aman-kabey mira i kerobe roe rey. ²⁶ Folo kiho ty haabo' ty kerobe raike, mira ama'e ty ila'e. ²⁷ Napo'e añivo' i efetse añate'ey i kerobe rey, le nivelareñe ty ela' o kerobeo naho nioza ami'ty rindriñe ty ela' ty raike naho nioza an-drindriñe tandrife'e ka ty ela' i kerobe raike vaho nifañoza añivo' i efetsey ty lengon-ela' iareo ila'e. ²⁸ Pinako'e am-bolamena i kerobe rey. ²⁹ Le nanokira'e sare kerobe naho satrañe mb'eo mb'eo amo rindri' i anjombay iabio, vaho nandafiha'e voñe miborake añate'e naho alafe'e. ³⁰ Nandafiha'e am-bolamena ka ty ambane' i anjombay, i añate'ey naho i alafe'ey. ³¹ Nandranjia'e lalañe an-talý i toe-miavakey, ze napetak' an-dahin-dalañe an-drirañe lime. ³² Aman-talý i lalañe roe rey; le nanokira'e sare-kerobe naho satrañe vaho voñe miborake, le nipakora'e volamena o kerobeo naho o satrañe. ³³ Zay ka ty nanoa'e i fimoahañe i anjombay, lahindalañe an-talý, an-drira'e efatse. ³⁴ Haradranto i lalañe roe rey; miodikodiñ' an-tsoavili'e ty lela roe ty lalañe raike, vaho miodiñe ka ty lela roe' i lalañe ila'ey. ³⁵ Le nanokira'e kerobe naho satrañe naho voñe miborake vaho nipakora'e volamena natsifitse soa amy sinokitsey. ³⁶ Namboare'e am-bato nivañeñe telo sosoke naho soso'e raik' am-boda mendoraveñe ty kiririsa añate'e. ³⁷ Ie am-bolan-tatak' i taom-pah' efatsey ty nampijadoñañe o mananta' i anjomba' IEHOVÀIO; ³⁸ vaho ami'ty vatravatra, volam-paha-valo' i taom-paha-folo-raik' ambiy ty nahafonirañe i anjombay ami'ty lafi'e iaby ty amy ze hene nisafirieñe ama'ey. Aa le fito taoñe ty namboara'e aze.

7

¹ Taoñe folo-telo amby ka ty nandranjia' i Selomò i anjomba'ey le hene nifonire'e i anjomba'ey. ² Namboare'e ka ty anjomban' ala' i Lebanon, kiho zato ty andava'e naho kiho limampolo ty am-pohe'e, vaho kiho telopolo ty haabo'e; nitohaña' o fahañe mendoraveñe miriritse iñ-efatseo o sazoke mendoraveñe. ³ Nandafihañe mendoraveñe ty ambone' o efetse alafe'e nitohaña' i ana-koreñe efa-polo-lime amby am-piririta'e folo-lime amby rey. ⁴ Le nidadañe am-piriritañe telo o lalan-kedeo, naho hazavàñe ty niatre-kazavàñe am-pifamalahàñañe telo. ⁵ Songa efa-mira o lalañe naho o lahin-dala'eo, le nifampiatrek' am-piririta'e telo nifamalahàña.

⁶ Namboare'e ka ty lampalampam' ana-koreñe, kiho limampolo ty andava'e le kiho telopolo ty am-pohe'e; lavaranga ty am-pimoahañe; vaho aolo' iareo o ana-koreñe naho boda'e lahi'eo. ⁷ Namboare'e ty lampalampam-piambesatse hizakà'e, i lampalampam-pizakàñey; vaho nandafihañe mendoraveñe boak' an-gorodo'e pak' an-gorodo'e. ⁸ An-kiririsa am-boli' i lampalampay i anjomba fimoneña'ey, ie hamban-tsata;

namboara'e anjomba manahake zay ka i anak' ampela' i Parò nengae' i Selomò; ⁹ sindre am-batosoa, linily ami' ty zehe'e, tinampa' ty alasý, añate'e naho alafe'e, boak'amo manantañeo pak' an-tsazoke, ie ka ty alafe'e pak' amy kiririsa jabajabay. ¹⁰ Nanoeñe vatosoa o manantañeo, vato ra'elisy, vato kihofolo vaho vato kihovalo. ¹¹ Vato sarotse ka ty ambone eo, songa rinamerame an-jehe'e o vatoo vaho o mendoraveñe. ¹² Vato hinaly nizakitse, telo mifaningitse ty nañariary i kiririsa jabajabay, le firiritam-boda-mendoraveñe ty ambone'e, manahake i an-kiririsa añate' i anjomba' IEHOVÀY naho an-davaranga' i anjombai.

¹³ Nampañitrife' i Selomò boake Tsore t'i Kirame, ¹⁴ ana' ty vantotse fifokoa' i Naftalý; boak'e Tsore ty rae'e, mpitoloñe torisike, lifo-kihitse naho hilala vaho faharendrehañe amy ze hene fitoloñañe torisike. Aa le nomb' amy Selomò mb'eo re vaho nanoe'e iaby o fitoloña'eo. ¹⁵ Niranjie'e ty fahañe roe torisike, songa kihofolo-valo' amby ty haabo'e naho niarikatoha' ty talý kihofolo-ro'amby. ¹⁶ Namboare'e loha'e torisike natranake, hasampe amy fahañe rey, kihoflime ty haabo' ty loha'e raike, vaho kihoflime ty haabo' ty loha' i ila'ey. ¹⁷ Nanoañe harato tsingarakarake, niravahañe silisily navandibanditse i loham-pahañe rey, fito ami'ty loha'e raike naho fito ami'ty loha'e raike. ¹⁸ Ie nifonire'e i fahañe rey le nitsene sare dagoa mitoitoy an-tali'e roe mifamandibanditse amy tsingarakarakey, nandafihahañe dagoa ty loha ambone' i fahañey vaho nanoe'e hambañe amy zay i loham-pahañe raikey. ¹⁹ O lohà'e nasampe amy fahañe rey ro nanoañe saren-talifo ke manahake o an-dampalampao, kihofefatse ty haabo'e. ²⁰ Ty amy lima mihogok' an-dengo' i fahañe roe rey, le voan-dagoa roan-jato nifanoitoy miarikatoke marine' i famitrañañe azey, añ' ila' i tsingarakarakey. ²¹ Natroa' i Kirame an-davarangam-piziliha' i anjombay i fahañe rey; najado'e an-kavàna eo ty fahañe raike le nitokave'e ty hoe Iakine* ty añara'e; vaho natroa'e ankavia'e ty fahañe ila'e le natao'e Boaze† ty añara'e. ²² Asa talifo ke ty ambone' i fahañe rey; aa le nifonitse ty fitoloñañe amy fahañe rey. ²³ Niranjie'e sajoa natranake, kihofolo boak' an-tsoñi'e pak' an-tsoñi'e, bontoly, lime kihoflime ty haabo'e, naho telopolo kihofly nañariary aze. ²⁴ Trongotrongoeñe hoe bereke ty niarikatok' aze ambane' i soñi'ey, folo ami'ty kihofe raike, naho nañariary i sajoay am-piriritañe roe i trongotrongoeñey, natrao-pitranake amo ila'eo. ²⁵ Sare añombe folo-ro' amby ty nitoboha'e, telo ty nitolik' avaratse naho telo ty nitolik' ahandrefa naho telo ty nitolik' atimo vaho telo ty nitolik' atiñanañe; najo'e ambone' iereo i sajoay, ty voli' iareo añivo'e ao. ²⁶ Ampohem-pitâne ty hateve'e; le rinanjy hoe soñim-pitovy i soñi'ey, manahake ty voñen-talifo ke; ro'arivo bate ty naaatsek' aze. ²⁷ Niranjie'e kalesy torisike folo, sindre kihofefatse ty an-dava' ty kalesy naho kihofefatse ty am-pohe'e vaho kihofly ty haabo'e. ²⁸ Zao ty nisata' i kalesy rey: nasiañe lifi'e naho nilifieñe i endraendra fikalañe añivo o tsotsò'eyo. ²⁹ Liona naho añombe naho kerobe ty tamo endraendra añivo' o tsotsò'eyo. Ambone' o tsotsò'eyo ty fanampezañe; vaho ambane' o liona naho añombeo ty nitemerañe am-pipepehañe. ³⁰ Songa aman-darò torisike efatse i kalesy rey, le torisike ka o asi'eo naho ty fitohañañe efatse; nikalañe ty koveta i fitohañañe nitranahéne rey, endrendra pinepeke o añ'ila'eo. ³¹ Kihofly raike boak' an-tsotsò'eyo ty haabo' i vava'ey, bontoly zay, satam-pitobohan-koveta, kihofly raike naho tampa'e; sinokitsokitse; efa-mira

* 7:21 Iakine: mampaozatse † 7:21 Boaze: an-kaozarañe

ty alafe'e, fa tsy bontoly. ³² Ambane' i endraendray i larò'e efatse rey, le am-poto' i kalesiy ty asì' o larò'eo; kiho raike naho tampa'e ty haabo' ty larò'e. ³³ Hambañe ami'ty satan-daròn-tsarete ty sata' i larò rey, songa nitranahañe o asì'eo, o bandazeo, o tañamasoandro'eo vaho o boate'eo. ³⁴ Reketse fitohañañe efatse ty kotso-efa' i kalesy rey, raik' amo kalesio o fitohañañe. ³⁵ Ambone' i kalesiy ty halañe bontoly, tapa-kiho ty haabo'e; raik' ami'ty ambone' i kalesiy o taña'eo naho o lifi'eo. ³⁶ Nanokira'e kerobe naho liona naho satrañe o endraendran-tsotsò'eo naho an-difi'e, amy ze nalalak' ama'e, vaho tali-randra ty niariary aze. ³⁷ Amy sata zay ty nandranjie'e ty kalesy folo, songa lima raike naho zehe mira vaho hambam-bintañe. ³⁸ Namboara'e koveta torisike folo; bate efapolo ty nahtaseke ty koveta raike; sambe kiho efatse i koveta rey; ambone' i kalesy folo rey songa koveta raike. ³⁹ Napo'e an-kavana' i anjombay ty kalesy lime, naho lime ty ankavia' i anjombay; le najado'e ankavana' i anjomba atiñanañey mañatimo i sajoay. ⁴⁰ Nitsenè' i Kirame o valàñe, o endraendra'eo naho o kovetao. Aa le nifonire' i Kirame i fitoloñañe nanoe'e ho a i Selomò mpanjaka aña'anjomba' IEHOVÀY; ⁴¹ i fahañe roe rey; i lima roe an-doha'e ambone' o faha'eo rey; naho i tsingarakarake roe nanaroñe i lima roe an-doha'e ambone' o faha'eo reiy; ⁴² naho i voandagoaefa-jato amy tsingarakarake roe reiy, dagoa indroe mitoitoy ami'ty tsingarakarake raike hanakonañe i lima roe an-doha'e ambone' i fahañe reiy; ⁴³ naho i kalesy folo rey naho i koveta folo ambone' o kalesio rey; ⁴⁴ naho i riakey naho i añombe folo-ro' amby ambane' i riakey rey; ⁴⁵ naho o valàñe, o endraendrao, vaho o kovetao; hene niranjie' i Kirame ho a i Selomò mpanjaka, aña'anjomba' IEHOVÀ ao, songa torisike rinamerame. ⁴⁶ Amonto' Iordaney ty nampitranaha' i mpanjakay iareo, an-tane lietse añaivo' i Sokote‡ naho i Tsaretane§. ⁴⁷ Le nenga' i Selomò tsy ho lanjaeñe i fanake iaby zay amy t'ie niloho maro; tsy nilefe tsikaraheñe ty lanja' o torisikeo.

⁴⁸ Hene niranjie' i Selomò o fanak' aña'anjomba' IEHOVÀO; i kitrely volamenay, naho i rairay volamena fasia-mofom-piatrefañey; ⁴⁹ o fitàn-jiroo-lime ty ankavana'e naho lime ty ankavia'e añaatrefa' i toe-miavakey—volamena ki'e; naho o voñeо, o failoo, vaho o fikavitseo—volamena; ⁵⁰ o soakazoo naho o fiharatan-tsokotsokoo naho o kovetao naho o sadròn'afoo naho o endraendrao—volamena ki'e; naho o soavilio, ho amo lalan-kivoho añaate'eo, i toetse loho-miavakey, vaho ho a o lala' i akibaio (o miatrek' añaate'eo)—volamena. ⁵¹ Aa le nifonitse o fitoloñañe nanoe' i Selomò aña'anjomba' IEHOVÀO. Le hene nendese' i Selomò ao o raha navì' i Davide rae'eo, i volafotiy, i volamenay naho o fanakeo; vaho napo'e amy fanontonam-baran' anjomba' IEHOVÀY.

8

¹ Natonto' i Selomò amy zao o androanavi' Israeleo, naho o mpiaolom-pifokoñañe, o roandrian' anjomban-droaen' ana' Israeleo, mb'amy Selomò Mpanjaka e Ierosalaimey, championjoneñe i vatam-pañina' IEHOVÀY boak' an-drova' i Davide e Tsione ao. ² Aa le fonga nifanontoñe amy Selomò amy sabadidakey o nte Israeleo ami'ty saramañitse*, ty volam-pahafito†. ³ Nimb'eo o roandria' Israele iabio, vaho rinambe' o mpisoroñañe i vatay. ⁴ Nampionjone' iereo i vatam-pañina' IEHOVÀY naho i kibohom-pamantañañey naho ze hene fanake amy kibohotsey; nampionjone' o

‡ 7:46 Sokote: kibohotse § 7:46 Tsaretane: fampisotriañe * 8:2 Heb: Etanime, Torahañe tsy ritse † 8:2 Volam-pahafito: Saramañitse

mpisoroñeo naho o nte-Levio. ⁵ Niharo niaolo i vatay t'i Selomò mpanjaka naho i valobohò' Israele nifamory ama'ey, le nisoroñe añondry naho añombe tsy nilefe talily ndra iake ami'ty fifamorohota'e. ⁶ Le nendese' o mpisoroñeo i vatam-pañina' IEHOVÀY mb'an-toe'e, mb'an-toe-miava' i anjombay, mb'amy masiñe do'ey, ambane' o ela' i kerobe reio. ⁷ Fa nivelare' i kerobe rey ambone' i toe' i vataiy o ela'eo vaho tinako' i kerobe rey i vatay naho o baom-pitarazo'a'eo. ⁸ Aa akore ty halava' i baom-pitarazoña rey kanao isake amy toe-miavakey aolo' i toe-masiñey, f'ie tsy oniñe boak' alafe'e ao; mbe eo irezay henanekeo. ⁹ Vata koake re naho tsy i takelam-bato nagodo' i Mosè ao e Korebe aña rey, ie nifañina amo ana' Israeleo t'IEHOVÀ, t'ie niavotse an-tane Mitsraime. ¹⁰ Aa ie nivovotse boak' amy miavakey o mpisoroñeo, le nañatseke i anjomba' IEHOVÀY i rahoñey; ¹¹ vaho tsy nahafijohañe eo hitoroñe o mpisoroñeo amy te natsafe' ty enge' IEHOVÀ ty anjomba' IEHOVÀ.

¹² Aa le hoe t'i Selomò: Fa nitsarae' IEHOVÀ t'ie himoneñe an-drahoñe milodolodo ao. ¹³ Toe namboarako anjomba fimoneñan-dRehe, toetse himoneña'o nainai'e donia. ¹⁴ Nampitoli-daharañe am' izao i mpanjakay, nitata i valobohò' Israele, vaho hene niongake i valobohò' Israele. ¹⁵ Le hoe re: Andriañeñe t'IEHOVÀ Andrianañahare' Israele, ie nitsara am-palie amy Davide raeko vaho nifonire'e am-pitá'e ami' ty hoe: ¹⁶ Sikal' amy andro nampiavoteko amy Mitsraime ondatiko Israeleoy, le tsy eo ty rova nijoboñeko amo hene fifokoa' Israeleo hañamboarako anjomba, hampipohako ty añarako, naho tsy i Davide ty jinoboko hifehe ondatiko Israeleo. ¹⁷ Toe tañ' arofo' i Davide raeko ty hamboatse anjomba ho a i tahina' IEHOVÀ Andrianañahare' Israele. ¹⁸ Fe nanao ty hoe amy Davide raekoy t'IEHOVÀ: Amy te añ' arofo'o ty handranjy akiba ho ami'ty añarako, le nanao soa kanao tañ' arofo'o; ¹⁹ fe tsy ihe ty hamboatse i anjombay, fa i ana-dahy hiboak' an-tro'oy, ie ty handranjy ty anjomba ho ami'ty añarako. ²⁰ Fa najado' IEHOVÀ i tsara nanoe'ey amy te nitroatse an-toe' i Davide raeko raho naho mitobok' am-piambesa' Israele eo ty amy tsara' IEHOVÀ, vaho namonitse ty anjomba ho a i tahina' IEHOVÀ Andrianañahare' Israele. ²¹ Le nampitoereko ao i vatay, ama'e ao i fañina' IEHOVÀ nanoe'e an-drauentika am-pampiengae'e iereo an-tane Mitsraimeiy.

²² Le nijohañe aolo' i kitreli' IEHOVÀY t'i Selomò añatrefa' i valobohò' Israele, vaho nonjone'e mb'an-dikerañe ey o fità'eo, ²³ nanao ty hoe: Ry IEHOVÀ, Andrianañahare' Israele, tsy eo t'i Andrianañahare manahak' azo andindimoneñe aña ndra an-tane ambane atoy ze mahatambozòtse fañina naho ty fiferenaiñañe amo mpitoro'o mpañavelo añatrefa'o an-kaampon-trokeo; ²⁴ ie naha-tañe i tsinara'o am-pitoro'o Davide raekoy; toe tsinara'o am-palie vaho nihenefa'o am-pitáñe o isake henanekeo. ²⁵ Ie amy zao, ry IEHOVÀ, Andrianañahare' Israele, afaharo amy mpitoro'o Davide raekoy, i tsinara'o ama'ey ami'ty hoe: Tsy ho po-ondaty hiambesatse amy fiambesa' Israele am-pahatreavako rehe, naho toe ambena' o ana'oo ty lala' iareo hañavelo añatrefako manahake o fañaveloa'oo. ²⁶ Ie amy zao ry Andrianañahare' Israele, ehe te ho venteseñe i tsara tsinara'o amy mpitoro'o Davide raeko. ²⁷ Aa vaho himoneñe an-tane atoy vata'e hao t'i Andrianañahare? kanao tsy mahatañ' Azo i likerañey ndra i likerandindimoneñey; sandrake ty anjomba rinanjiko toy! ²⁸ Fa ehe haoño ty halali' i mpitoro'oy, naho i fiambanea'ey ry IEHOVÀ Andrianañahareko, janjiño ty toreo naho hatake saboe' ty mpitoro'o ama'o henaneo; ²⁹ te hisokake handro an-kàleñe mb' ami'ty anjomba toy o fihaino'oo, mb' amy

toetse nitsarae'o ty hoe: Ho ao ty añarako; hahajanjiña'o o halaly ho halalie' ty mpitoro'o mb' ami' ty toetse toio. ³⁰ Janjiño ty fidrakadrakafam-pitoro'o, naho ondati'o Israeleo, ie misabo mb'ami'ty toetse toy; janjiño am-pimoneña'o andindiñe ao; mijanjiña vaho mañahà.

³¹ Naho anañan-drañetse hakeo t'indaty, naho ampitithen-dre, ie mb'eo mifanta añatrefa' ty kitreli'o añ'anjomba atoy; ³² le mijanjiña andindimoneñe ao, naho mitoloña, vaho zakao o mpitoro'oo, taroño amy ratiy t'ie raty, hampibalike o hatsivokara'eo añ' ambone'eo; naho meo tò ty vantañe, hañolorañe aze mañeva i fahiti'ey.

³³ Aa ie zevoeñe aolon-drafelahy ondati'o Israeleo, t'ie aman-tahiñe ama'o; naho mimpoly ama'o naho mamela-pitàn-droe amy tahina'oy, naho misoloho vaho mihalaly ama'o ami'ty anjomba toy, ³⁴ le mijanjiña andindimoneñe ao, naho hahao o hakeo' ondati'o Israeleoo vaho ampolio mb'an-tane' natolo'o an-droae' iareo mb'atoy.

³⁵ Ie migabeñe i likerañey, tsy avy i orañey kanao nandilatse ama'o iereo, le ie misoloho mb'ami'ty toetse toy mamela-pitan-droe amy tahina'oy naho miambaho amy hakeo nampisotria'o iareoy, ³⁶ le mijanjiña andikerañe ao, naho apoho ty tahi' o mpitoro'oo naho ondati'o Israeleo vaho anaro iareo i lalam-bantañe fañaveloañey, hampahavia'o orañe i tane'o natolo'o am'onati'oo ho lovay.

³⁷ Naho kerè i taney, he angorosy ke pozy he tromambo ke valala he beañe, ke forokeken-drafelahi'e o rova an-tane'eo; ke kiria ino, hera areteñ' ino; ³⁸ le ze halaly ndra soloho anoe' t'indaty ndra ze hene ondati'o Israeleo, ie songa fohi'e ty hila an-tro'e ao vaho mamela-pitan-droe mb'ami'ty anjomba toy, ³⁹ le mijanjiña andindiñe aña, amy akibapimoneña'oy, le apoho naho mitoloña, vaho sindre toloro ty amo sata'eo t'indaty, fa arofoana'o ty tro'e (amy te Ihe avao ro maharofoanañe ty arofo' o ana' ondatio), ⁴⁰ hañeveña' iereo ama'o amo hene andro hiveloma' iareo an-tane natolo'o aman-droae'aio.

⁴¹ Le i renetane tsy boak' am' ondati'o Israeleoy, ie hirike tsietoitane aña ty amy tahina'oy — ⁴² kanao ho janjiñe'e i tahina'o ra'elahi naho i fità'o maozatsey vaho i fità'o natorakits'i oy — ie miheo mb' etoa hitalaho mb'ami'ty anjomba toy; ⁴³ le mijanjiña andindimoneñe an-toe-pimoneña'o ao, naho henefo o kanjia' i renetaney azoo; hahafohina' ze kila' ondati' ty tane toy ty tahina'o, hañeveña ama'o, manahake ondati'o Israeleo, hahafohina' iareo te kanjieñe ami'ty anjomba niranjieko toy i tahina'oy.

⁴⁴ Aa ie mionjomb' an-kotakotak' amo rafelahi'e ondati'oo, ndra mb' aia aia ty hañiraha'o iareo, vaho mihalaly am' IEHOVÀ mb'amy rova nijoboñe'oy, mb' amy anjomba namboareko ho amy tahina'oy; ⁴⁵ le janjiño an-dikerañe ao i sabo' iareoy, naho i halali' iareoy vaho meo to.

⁴⁶ Ie miota ama'o—amy te tsy eo ze ondaty tsy mandilatse zao—le iviñera'o vaho atolo'o an-drafelahi' iareo, hasese an-drohy mb'an-tanen-drafelahy aña, ke te lavitse he marine; ⁴⁷ le ie mitsakore an-tane naneseañe iareo an-drohy aña, naho mitolike naho midrakadrakak' ama'o an-tane' o naneseañe iareo an-drohio, manao ty hoe: Nanao hakeo zahay, nanao hatsivokarañe, vaho nitolon-karatiañe; ⁴⁸ ie mimpoly ama'o an' kaampon' arofo naho an-kaliforam-pañova an-tanen-drafelahi' o nanese iareo an-drohio, naho mitalaho ama'o mb'an-tane natolo'o aman-droae' iareo, mb'androva jinobo'o toy; vaho mb'amy anjomba niranjieko ho amy tahina'oy; ⁴⁹ le janjiño ty halali' iareo naho ty fisaboa' iareo mb' an-toe-pimoneña'o andindimoneñe aña, vaho meo to; ⁵⁰ naho apoho o hakeo

nandilara' ondati'o ama'oo, naho o fiolàñe niolà' iareo; le iferenaiño añatrefa' o ninday iareo an-drohy mb'eo hitretreza' iareo; ⁵¹ amy t'ie ondati'o, i lova'o nakare'o amy Mitsraime, boak' añivo i toñake viñey.

⁵² Ehe manokafa fihaino amo halalim-pitoro'oo naho ami'ty fisolohoa' ondati'o Israeleo, hihaoña'o ndra mbia' mbia ty itoreova' iareo. ⁵³ Amy t'ie navahe'o amo hene ondati' ty tane toio, ho lova'o, amy nitsarae'o ampità' i Mosè mpitoro'oy, ie nampiavote'o amy Mitsraime o roae'aio, ry Talè IEHOVÀ.

⁵⁴ Ie nagado' i Selomò ty nitaroñe'e i hene halaly naho solo ho am' IEHOVÀ rezay le nióngak' aolo' i kitrelí' IEHOVÀ, amy nitongalefa'e naho namelatse fitañe mb'an-dindim-b'eoy, ⁵⁵ le nijohañe vaho nitata i hene valobohò' Israele am-pazake ty hoe: ⁵⁶ Andriañeñe t'IEHOVÀ nanolopitofañe am'ondati'eo ty amo tsara'e iabio; leo raike tsy nipok' amo tsara'e soa nampitama'e am-pità' i Mose mpitoro'eo. ⁵⁷ Ho aman-tika t'IEHOVÀ Andrianañaharen-tika, manahake t'ie nimpiaman-droaen-tikañe; lonike t'ie tsy hienga antika, tsy haforintse'e; ⁵⁸ fa hampitolihá'e mb'ama'e o arofon-tikañe, hañaveloan-tika amo lala'eo, hañorike o lili'eo naho o fañè'eo vaho o fepètse linili'e an-droaen-tikañe. ⁵⁹ Le ehe te harine' IEHOVÀ Andrianañaharen-tika handro an-kaleñe o entañe nihalalieko am' IEHOVÀ, hañomea'e to i mpitoro'ey naho ondati'e Israeleo, ami'ty fañeva'e boak' andro; ⁶⁰ hahafohina' ze hene ondati' ty tane toy t'IEHOVÀ, t'ie ro Andrianañahare tsy aman-tovo'e. ⁶¹ Ee abey te ho am' IEHOVÀ Andrianañaharentika an-kaliforan' arofo nahareo, hañavelo amo fañè'eo, naho hañorike o lili'eo, manahake henaneo.

⁶² Le fonga nañenga soroñe añatrefa' IEHOVÀ eo i mpanjakay naho Israele nitraok' ama'e. ⁶³ Binanabana' i Selomò amy engam-panintsíñañe nisoroña'e am' IEHOVÀ ty añombe roe-ale-tsi-ro' arivo, naho añondry rai-hetse-tsi-ro'ale. Zay ty nañoriza' i mpanjakay naho o ana' Israeleo ty anjomba' IEHOVÀ. ⁶⁴ Amy androy ka ty nañoriza' i mpanjakay ty añivo' i kiririsa aolo' i anjomba' IEHOVÀ; fa teo ty nañenga'e o soroñe, naho o enga-mahakamao, naho ty safo' o engam-panintsíñañe; amy te niloho kede ty kitrely torisike añatrefa' IEHOVÀ, tsy ho ni-tsahatse aze i nisoroñañe naho i enga-mahakama vaho safo' o engam-panintsíñañe rezay. ⁶⁵ Aa le nambena' i Selomò miharo am' Israele iaby henane zay i sabadidakey, nivalobohòke jabajaba boak' am-pimoahañe e Kamate[‡], pak' an-toraha' i Mitsraime aña añatrefa' IEHOVÀ Andrianañaharen-tikañe, fito andro nitovoñañe fito; andro folo-efats' amby. ⁶⁶ Nampolie'e amy andro fahavaloy ondatio, naho nandriañe' iareo i mpanjakay naho songa noly mb'an-kiboho'e mb'eo an-drebeke naho aña' arofo mifale ty amo hene hasoa nanoe' IEHOVÀ amy Davide mpitoro'ey vaho am' Israele ondati'eo.

9

¹ Aa ie nifonire' i Selomò ty fandranjiañe i anjomba' IEHOVÀ, naho ty anjomba' i mpanjakay, naho ze fitoloñañe nahafale-troke i Selomò, ² le niheo amy Selomò fañindroe'e t'IEHOVÀ manahake ty niboaha'e e Gibone aña. ³ Le hoe t'IEHOVÀ ama'e: Fa tsinanoko i halali'oy naho i sabo nanoe'o amakoy: Fa navaheko ty anjomba namboare'o toy, ie nampijoñeko tsy mbia tsy ho ama'e i añarakoy; vaho ho ama'e nainai'e donia o masokoo naho ty troko. ⁴ Aa naho ihe ro hañavelo aoloko manahake ty nañaveloa' i Davide rae'o, an-kavantañan' arofo, naho an-kavañonañe, manao ze hene nandiliako azo naho mañambeñe o fañekoo naho o fepèkoo; ⁵ le horizako

[‡] 8:65 Kamate: haviñerañe; fiforoforaoñañe; kijoly

ho nainai'e ty fiambesam-pifehea'o Israele, amy nampitamako i Davide rae'oy, ami'ty hoe: Tsy ho po-ondaty am-piambesa' Israele eo rehe. ⁶ Fe ke iambohoa' areo ty fañorihañ' Ahy, inahareo ndra o ana' areoo ie tsy mitañe o likoo naho o fañèko apoko añatrefa' areoo, te mone mandifike hitoroñe 'ndrahare ila'e vaho hitalaho ama'e; ⁷ le haitoako amy tane natoloko iareoy t'Israele; naho hahifiko tsy ho am-pahaisahako ty anjomba navaheko ho ami'ty añarako toy; le ho razan-drehake t'Israele, fandrabioña' o kilakila' ondatio; ⁸ le akore amy zay ty anjomba miligilgy toy, kanao hilatsà naho hikosiha' ze hene ondaty miary ama'e, hanao ty hoe: Ino ty nanoe' IEHOVÀ ami'ty tane toy naho ami'ty anjomba toy? ⁹ Le ho toiñeñe ty hoe: amy te nitsambolitio' iereo t'IEHOVÀ Andrianañahare' iareo, i nampiavotse o roae' iareoo an-tane' Mitsraimey ie nandrambe 'ndrahare ila'e naho nitalaho'a'e vaho nitoroña'e; zay ty nametsaha' IEHOVÀ am' iereo o fonga hankàñe zao.

¹⁰ Aa ie niritse ty roapolo taoñe namboare' i Selomò i anjomba roe rey, ty anjomba' IEHOVÀ naho ty anjomba' i mpanjakay ¹¹ (ie natolo' i Kirame mpanjaka' i Tsore amy Selomò ze hene mendoraveñe naho kobaiñe naho ze volamena nipaia'e) le natolo' i Selomò amy Kirame ty rova roa-polo antane Galile* ao. ¹² Niavotse amy Tsore t'i Kirame hañisake o rova natolo' i Selomò azeo; fe tsy ni-nò'e. ¹³ Le hoe re: Rova ino ze o natolo'o ahiko zao, rahalahiko? Le natao: Tane' i Kabole† zay pake henaneo. ¹⁴ Volamena zato-tsi-roa-polo ty nampihitrife' i Kirame amy mpanjakay.

¹⁵ Zao ty volilim-pitoloña' i haba nakare' i Selomò mpanjakaiy: namboare'e ty anjomba' IEHOVÀ naho ty anjomba'e, naho i Milo‡, naho ty kijoli' Ierosalaime, naho i Katsore§ naho i Megidònë* vaho i Getsere† ¹⁶ ie fa nionjo-mb'eo t'i Parò mpanjaka' i Mitsraime, nitavañe i Getsere; finorototo'e añ' afo naho fonga zinama'e o nte-Kaanane nimoneñe amy rovaio vaho natolo'e ho enta' i anak' ampela'e, vali' i Selomò. ¹⁷ Aa le namboare' i Selomò ty Getsere naho i Bete-korone‡ ambane ¹⁸ naho i Baalate§ naho i Tadmore* an-dratraratra' i taney; ¹⁹ naho ze hene rovam-pihaja' i Selomò naho o rovan-tsarete'eo naho o rovam-piningi-tsoaval'a'eo, naho ze nitea' i Selomò ranjieñe e Ierosalaime naho e Lebanon ao naho an-tanem-pifehea'e iaby. ²⁰ Le o fonga ondaty nisehang'a' o nte-Amoreo, o nte-Keteo, o nte-Perizeo, o nte-Hiveo vaho o nte-Ieboseo; o tsy ana' Israeleo, ²¹ o tiri' iareo nihonkahonka'e amy taneio, o tsy zinama' o ana' Israeleoo; ie ty nangala' i Selomò mpitoroñe amy vili-lohay pake henane. ²² Tsy nangala' i Selomò habam-pitoroñañe o ana' Israeleo fa nanoeñe lahindefo'e, mpitoro'e, roandria'e, mpifehe'e, mpifele-tsarete'e vaho mpiningi-tsoaval'a'. ²³ Ie o mpiaolo nifehe' ty fitoloña' i Selomò; liman-jato-tsi-limampolo ty nifeleke ondaty nitoloñe amy asaio. ²⁴ Fe niavotse ty rova' i Davide ty anak' ampela' i Parò mb' amy anjomba namboara' i Selomò azey; zay vaho namboare'e ty Milò. ²⁵ Intelo ami'ty taoñe ty nañengà' i Selomò soróñe naho engam-panintsiñañe amy kitrely niranjie'e ho a IEHOVÀ vaho nañembok' añ'atrefa' IEHOVÀ. Aa le nifonire'e i anjombay. ²⁶ Le namboare'e firimboñan-tsambo e Etsione-gebere† añ'ila' i Elote‡ añ' olo' i riake Menay, an-tane Edome aña. ²⁷ Nampihitrife' i Kirame mb'amo sambo'eo o mpitoro'e mpian-dàkañe

* **9:11** Galile: larò; fivariñañe, fiafariñañe † **9:13** Kabole: Falaiñe; maloto ‡ **9:15** Milo: halipora'e § **9:15** Katsore: kiririsa; ahi-maike * **9:15** Megidone: ty voa'e sarotse; mitaroñe † **9:15** Getsere: fanjarañe; lilin-jaka ‡ **9:17** Bete-Korone; anjoman-kabosehañe § **9:18** Baalate; rebeke; ty talen-tika misenge * **9:18** Tadmore; satrañe; hafairañe † **9:26** Etsione-gebere: hazondambosin-dahilahy ‡ **9:26** Elote; ala-vondro

zatse riakeo, hitraok' amo mpitoro' i Selomò. ²⁸ Le nionjoñe mb'e Ofire aña iereo nangalake volamena talenta efajato-tsi-roapolo ze nandesa' i areo amy Selomò.

10

¹ Ie jinanji' ty mpanjaka-ampela' i Seba* ty enge' i Selomò ty amy tahina' IEHOVÀ, le nimb'eo hamente aze an-tafatoño. ² Le am-pivavàrañe jabajaba ty nitotsaha'e e Ierosalaime ao, reketse rameva ninday fampafiriañe naho volamena tsifotofoto naho vatosoa; aa ie tsatoke amy Selomò, le fonga nabora'e ama'e ty arofo'e. ³ Aa le vinale' i Selomò ontane'e iabio; tsy ni-etak' amy mpanjakay ty hatoi'e aze. ⁴ Ie nioni' i mpanjaka ampela' i Sebay ze hene hihi' i Selomò, naho i anjomba niranjie'ey, ⁵ naho ty mahakama am-pandambaña'e eo, naho ty fandaharam-piambesa' o mpitoro'eo naho ty fiatralha' o mpiatra'eo naho o siki'eo naho o mpitàm-pitovi'eo vaho o soroñe fañenga'e añañanjomba' IEHOVÀ, le tsy nahakofòke. ⁶ Aa le hoe re amy mpanjakay: Nitò i talily tsinanoko an-tanekoy ty amo taro'oo naho o hihi'oo. ⁷ Fe tsy niantofako o saontsio ampara te nivotrak' atoy naho nitrea' o masokoo, le hehe te tsy ty vaki'e o natalily ahio; loho mandikoatse i talily tsinanokoy ty hilala'o naho ty firaoraoa'o. ⁸ Haha ondati'oo naho fale o mpitoro'o mijohañe nainai'e añañatrefa'o mahajanjiñe o hihi'oo. ⁹ Andriañeñe t'IEHOVÀ Andrianañahare'o te nahafale Aze ty nampipoke azo am-piambesa' Israele eo amy te nikokoa' IEHOVÀ nainai'e donia t'Israele, ihe nanoe'e mpanjaka, hitoloña'o an-katò vaho an-kavantañañe. ¹⁰ Le natolo'e amy mpanjakay ty volamena talenta zato-tsi-roapolo; naho fampafiriañe tsi-fotofoto vaho vatosoa; le lia'e tsy eo ka ty hamarompampafiriañe nitotsak' ao te amy natolo' i mpanjaka' i Sebaiy amy Selomò mpanjakay. ¹¹ Le ninday volamena boake Ofire naho nilogologo hatae almoge maro boake Ofire aña, vaho vatosoa, o firimbon-tsambo' i Kirameo. ¹² Niranjie' i mpanjakay amy hatae almogey, o fahañe añañanjomba' IEHOVÀ naho añañanjomba' i mpanjakaio vaho o marovany miharo ty fititiha' o sakeraoo, le lia'e tsy nioniñe ampara' te henane ty hatae almoge hoe zay. ¹³ Hene natolo' i Selomò mpanjaka amy mpanjaka-ampela' i Sebay ze nitea'e, ze nihalalia'e, mandikoatse ty natolo'e aze ty amo varampanjaka'eo. Aa le nitolike re, nimpoly mb' an-tane'e aña, ie naho o mpitoro'eo.

¹⁴ Ie amy zao, ty volamena niheo mb' amy Selomò ami'ty taoñe raike le nahatratse talenta volamena enen-jato-tsi-enem-polo-eneñ'amb, ¹⁵ mandikoatse ze nendese' o mpivarotseo, naho o mpanao balikeo, naho boak' amy ze hene mpanjaka' o nte-Araboo, naho amo mpifeleke i taneio. ¹⁶ Le nitsene' i Selomò mpanjaka fikalan-defoñe volamena roanjato pinepèke; sekele enen-jato ty fikalan-defoñe raike. ¹⁷ Le nitsene'e fikalan-defoñe volamena-pinepèke telon-jato; mina[†] telo ty volamena ami'ty fikalan-defoñe ao; vaho napo' i mpanjakay añañanjomba' i Ala-Lebanoney irezay. ¹⁸ Nandranjy fiambesatse jabajaba an-tsifam-biby ka i mpanjakay vaho pinepè'e ama'e ty volamena ki'e. ¹⁹ Fanongà enendia ty nitroatse mb'amy fiambesatsey, le bontoly ty ambone an-dambosi' i fiambesatsey; naho fisampezam-pitâñe ty añañila' i fiambesatsey, vaho liona roe ty mijadoñe añañila' o fisampezam-pitâñe. ²⁰ Liona folo-ro' amby ty nijohañe amy fanongañe enen-diay, añañila'e atoy naho añañila'e aroy;

* **10:1** Seba: an-drohy; ondaty bey; fitofañe † **10:17** Mina: lanjam-bola taolo

vaho tsy eo ty nanoeñe nanahak' aze ndra am-pifeheañe aia. ²¹ Songa tam-bolamena o fitovi' i Selomò vaho hene volamena ki'e o fanak' amy anjomban' Ala-Lebanoneio, leo raike tsy nivolafoty, ie tsy natao vara tañ' andro' i Selomò. ²² Nanañe firimboñan-tsambon-Tarsise[‡] reketse ty firimboñan-tsambo' i Kirame i mpanjakay; nivotrake eo o sambo' i Tarsiseo isa' ty telo taoñe, ninday volamena, volafoty, tsifa naho babakoto vaho remaleñe. ²³ Aa le nilikoare' i Selomò mpanjaka o mpanjaka' ty tane toy iabio ami'ty vara naho hihitse. ²⁴ Le hene nipay ty hiatrek' amy Selomò ty tane toy, ty hijanjiñe ty hilala napon' Añahare añ'arofo'e ao. ²⁵ Songa ninday ty ravoravo'e boa-taoñe ondatio, fanake volafoty naho fanake volamena naho sikiñe, naho fialiañe naho fampifiriañe, naho soavala vaho borike. ²⁶ Namory sarete t'i Selomò naho mpiningi-tsoavala, arivo-tsi-efa-jato ty sarete'e naho mpiningi-tsoavala rai-ale-tsir-ro'arivo ze napo'e amo rovan-tsareteo vaho amy mpanjakay e Ierosalaime ao. ²⁷ Le nanoe' i mpanjakay hoe vato ty volafoty e Ierosalaime ao vaho nanoe'e hoe sakoañe am-bavatane ao o mendoraveñe ty amo hamaro'eo. ²⁸ Nendeseñe boake Mitsraime naho e Kevè aña o soavala' i Selomò; nangalak' amy Kevè ami'ty vili'e o mpanao balibali' i mpanjakaio. ²⁹ Le enen-jato sekelem-bolafoty ty nampiakarañe sarete boake Mitsraime aña, le zato-tsi-limampolo ty soavala; vaho am-pitá' iareoo ty nahazoa' ze hene mpanjaka' o nte-Kiteo naho o mpanjaka' i Arameo§.

11

¹ F'ie nikoko ampela ambahiny maro t'i Selomò, tovo' i anak' ampela' i Paròy, le ampela nte-Moabe, nte-Amone, nte Edome, nte-Tsidone, vaho nte-Kite; ² boak' amo fifeheañe nitsarae' IEHOVÀ amo ana' Israeleo ty hoe: Ko iolora' areo, naho ko apoke hiharo-tihy ama' areo; fa toe hampitolihé' iereo amo 'ndrahare' iareoo ty arofo' areo; ie nisazohe' i Selomò am-pikokoñañe. ³ Nanambaly fiton-jato re ho tañanjomba'e naho sakeza telon-jato; vaho nampandrike ty arofo'e o vali'eo. ⁴ Ie nibey, le nampitolihé' o vali'eo mb'an-drahare ankafankafa, vaho tsy nigahiñe am' IEHOVÀ Andrianañahare' e ka ty tro'e manahake ty arofo' i Davide rae'ey. ⁵ Songa norihe' i Selomò t'i Asterote 'ndrahare' o nte-Tsidoneo, naho i Milkome* ty haloloa' o nte-Amoneo. ⁶ Aa le nanao hatsivokarañe am-pivazohoa' IEHOVÀ t'i Selomò, ie tsy nañorike IEHOVÀ an-kaliforan-troke, manahake i Davide rae'ey. ⁷ Niranje' i Selomò an-kaboñañe ey ty Kemose[†], i haloloa' i Moabey, am-bohitse atiñana' Ierosalaime ey, naho ho amy Moleke[‡], ty haloloa' o nte-Amoneo. ⁸ Nanoa'e zay amo vali'e ambahiny iaby nañoro emboke naho nanao soroñe aman-drahare'eo. ⁹ Toly ndra niviñera' IEHOVÀ t'i Selomò, ty amy arofo'e nandifik' am' IEHOVÀ Andrianañahare' Israeley, ie fa niheo ama'e indroe; ¹⁰ vaho linili'e ama'e ty amo raha zao te tsy horihe'e o 'ndrahare ila'eo; fe tsy nambena'e i nandilia' IEHOVÀ azey. ¹¹ Aa le hoe t'IEHOVÀ amy Selomò, Kanao zao ty an-tro'o, naho tsy tana'o i fañinakoy naho o fañeko linilikozoo, le toe ho riateko ama'o ty fifehea'o vaho hatoloko am-pitam-pitoro'o. ¹² Fe tsy hanoeko amo andro'oo, ty amy Davide rae'o, te mone ho tavaneko an-tañan' ana'o. ¹³ Tsy ho fonga tavaneko i fifeheañey, fa hatoloko ami'ty ana'o ty fifokoñañe raike ty amy Davide mpitoroko; naho ty am' Ierosalaime jinobokoy.

[‡] **10:22** Tarsise: fitsakoreañe; fihotshotsoañe
mpamañahy; * **11:5** Malkome: mpanjaka' iareo
‡ **11:7** Moleke: mpanjaka

§ **10:29** Arame: Antiotiotse, fanjaka,
mitavañe
† **11:7** Kemose: mamorekeke; mitavañe

¹⁴ Le nampitroboe' IEHOVÀ rafelahy t'i Selomò; i Kadade[§] nte-Edome, tirim-panjaka' i Edome. ¹⁵ Ie te Edome aña t'i Davide, naho fa nionjomb'eo handenteke o nikoromakeo t'Ioabe mpifehe i valobohòkey, ie fonga zinevo'e ze atao lahilahy Edome— ¹⁶ toe tåmbatse ao enim-bolañe t'Ioabe rekets' Israele iaby ampara' te naito'e ze fonga lahilahi' i Edome— ¹⁷ le nitriban-day mb'e Mitsraime aña t'i Kadade naho ty ila' o mpitorondrae'eo, ie mbe anak' ajaja t'i Kadade. ¹⁸ Niavotse i Midiane iereo nivotrake e Parane, le nandrambe ondaty e Parane vaho nigodañe mb'e Mitsraime, mb'amy Parò Mpanjaka' i Mitsraime mb'eo, le tinolo'e anjomba naho mahakama vaho tane. ¹⁹ Nanjo fañisohañe ra'elahy am-pahaoniña' i Parò t'i Kadade, kanao natolo'e aze ho tañanjomba'e ty rahavaven-tañanjomba'e, ty rahavave' i Takpanese* mpanjaka ampela. ²⁰ Nisamake i Genobate† ana-dahi'e ho aze ty rahavave' i Takpanese, ze nibeize' i Takpanese añ'anjomba' i Parò; vaho nitraok' amo ana' i Parò añ'anjomba' i Parò t'i Genobate. ²¹ Aa ie jinanji' i Kadade e Mitsraime aña te nitrao-pirotse aman-droae'e t'i Davide naho te nihomake t'Ioabe mpifehe' i màroy, le hoe t'i Kadade amy Parò. Ampiavoto mb' an-taneko aña. ²² Le hoe t'i Parò ama'e, Fa inoñe ty tsy niamp tamako kanao mipay hañavelo mb'an-tane'o aña rehe? Tsy eo, hoe re, Fe apoho handeha avao.

²³ Mbore nampitroboen' Añahare ty rafelahy raike ka, i Rezone‡ ana' i Eliadà§, i nilay amy talè'e Hadadezere* mpanjaka' i Tsobày†, ²⁴ namory ondaty ho mpiama'e vaho nimpifehe firimboñañe, ie fa zinama' i Davide o e Tsobào, le nimb'e Damesèke‡ mb'eo iereo nimoneñe ao, vaho nifehe e Damesèke. ²⁵ Nirafelahi' Israele re amo hene andro' i Selomò, ie nitovoñe'e ty haemberañe nanoe' i Kadadeo; niheje'e t'Israele vaho nifelek' i Arame.

²⁶ Nañonjo fitañe amy mpanjakay ka t'Iarovame§ ana' i Nebate* nte-Efratà† boake Tseredà‡, mpitoro' i Selomò; Tseroà § ty tahanan-drene'e, vantotse. ²⁷ Inao ty nañonjona'e fitañe amy mpanjakay: Niranjie' i Selomò ty Milo vaho namboara'e o heba an-drova' i Davide rae'eo. ²⁸ Nifanalolahy an-kaozarañe t'Iarovame; le nioni' i Selomò te nahimbañe i ajalahiy, vaho nampifehè'e aze o fitoloñañe añ'anjomba' Iosefeo. ²⁹ Ie henane zay, naho niavotse Ierosalaime t'Iarovame, te tendrek' ama'e amy lia'ey t'i Akià nte-Silò, nisikin-damba vao, ie nivahiny an-kivok' aña iereo roe. ³⁰ Rinambe' i Akià i lamba vao ama'ey le niriate'e ho folo-ro'amby; ³¹ le hoe re amy Iarovame, Rambeso ty folo, fa hoe ty nafè' IEHOVÀ Andrianañahare' Israele, Inao te ho riateko am-pità' i Selomò i fifeheañey vaho hatoloko azo ty fifokoñañe folo; ³² le hanañe fifokoñañe raike re ty amy Davide mpitorokoy naho Ierosalaime, rova nijoboñeko amo hene fifokoa' Israeleo, ³³ amy t'ie namorintseñé Ahy vaho mitalaho amy Astoreté, mpanjaka-ampela' o nte-Tsidoneo naho amy Kemose, 'ndrahare' o nte-Moabeo, naho amy Milkome, mpanjaka' o ana' i Amoneo vaho tsy mañavelo amo lalakoo hanoa' iereo ty soa a masoko naho hifahatse amo fañekoo vaho amo fepèkoo manahake i Davide rae'ey. ³⁴ Tsy ho fonga tavaneko am-pità'e i fifeheañey; fa hanoeko mpifehe amo hene andro hiveloma'eo, ty amy

§ **11:14** Kadade: hafalea; koràke * **11:19** Takpanese: Kobain-kelahela; milay; zizy † **11:20** Genobate: fampikamerañe ‡ **11:23** Rezone; boroka; kede; tsikotsiko; § **11:23** Eliadà: Fahafolinañe IEHOVÀ * **11:23** Hadadezere: ty hasoa-vintam-pañolotse † **11:23** Tsobà: mpiromon-dahin-defoñe; mpialy ‡ **11:24** Damaseke: horoñe lifo-dio hoe mirehetse § **11:26** Iarovame: ty mpandietse ondatio * **11:26** Nebate: ty mañisake † **11:26** Efratà: miregrego, mamokatse ‡ **11:26** Tseredà: vandroñe; fiovàm-pifeheañe § **11:26** Tseroà: voa ty angamae; fanenetse

Davide mpitoroko jinobokoy, ie nañambeñe o lilikoo naho o fañèkoo; ³⁵ fe ho rambeseko am-pitâ' i ana'ey i fifeheañey, vaho hatoloko azo i fifokoañe folo rey. ³⁶ Le ho tolorako fifokoañe raike i ana'ey, hanaña' i Davide mpitoroko ty failo añatrefako nainai'e e Ierosalaime ao, i rova jinoboko ho Ahy ampipohako ty añarakoy. ³⁷ Ho rambeseko rehe, le ho hene fehè'o ze satrin-tro'o, vaho ihe ty ho mpanjaka' Israele. ³⁸ Ie amy zao naho hene haoñe'o ze andiliako azo naho hañavelo amo lalakoo naho hanao ty vantañe a masoko, hañambeñe o fañèkoo naho o lilikoo manahake i Davide mpitorokoy le ho mpiama'o raho vaho hanoako anjomba mijadoñe, manahake ty namboarako i Davide, vaho hatoloko ama'o t'Israele. ³⁹ Ie amy zay hampisotriako ty tiri' i Davide fe tsy ho kitro aña'afe'e. ⁴⁰ Aa le nipay hañoho-doza am' Iarovame t'i Selomò; f'ie niongake nitriban-day mb'e Mitsraime aña, mb'amy Sisage* mpanjaka' i Mitsraime vaho nitambatse e Mitsraime aña ampara' te nihomake t'i Selomò.

⁴¹ O fitoloña' i Selomò ila'eo, naho o tolon-draha'e iabio, tsy fa sinokitse amy bokem-pitoloña' i Selomò hao? ⁴² Ty hene andro nifehea' i Selomò Israele e Ierosalaime ao le efa-polo taoñe. ⁴³ Le nitrao-pirotse amandroae'e t'i Selomò, naho nalentek' an-drova' i Davide rae'e ao; vaho nandimbe aze nifehe t'i Rekhavame†, ana'e.

12

¹ Aa le nomb'e Sekeme aña t'i Rekhavame, ie fa niheo mb'e Sekeme mb'eo t'Israele iaby hañory aze ho mpanjaka. ² Ie amy zao, naho jinanji' Iarovame ana' i Nebate e Mitsraime aña—ie fa nitriban-day boak' añatrefa' i Selomò mpanjaka vaho nimoneñe e Mitsraime aña ³ le nañitrike naho nikoik' aze iereo naho niheo mb' amy Rekhavame mb'eo t'Iarovame rekets' i valobohò' Israeley, nanao ty hoe: ⁴ Nanoan-drae'o jokan-tsarererake; aa le hamaivaño ty fitoloñan-tsarererahan-drae'o, naho i joka mavesatse nampitarazoe'e anaiy, le hitoroñ' azo zahay. ⁵ Le hoe re am' iereo: Misitaha telo andro heike, le mibaliha amako. Le nienga ondatio. ⁶ Nisafiry amo androanavy nijohañe añatrefa' i Selomò rae'e, ie mbe niveloñe, t'i Rekhavame, ami'ty hoe: Ino ty fanoroañe hatolo' areo amako hamaleako ondatio? ⁷ Le hoe ty nisaontsia' iareo: Naho toe ho mpitoro' ondatio rehe te anito hitoroña'o naho hihaoña'o vaho hisaontsia'o mora, le ho mpitoro'o nainai'e iereo. ⁸ Fe nifarie'e ty safiry natolo' o androanavio aze, vaho nandrambe ty fanoroa' o ajalahy nindre nibey ama'e naho nijohañe añatrefa'eo. ⁹ Fa hoe re am' iereo: Akore ty safiri' areo, hamalean-tika ondaty nisaontsy amako ami'ty hoe: Hamaivaño ty joka nampitarazoen-drae'o anaio? ¹⁰ Aa le hoe ty asa' o ajalahy nindre nibey ama'eo: Inao ty ho saontsie'o am'ondaty nisaontsy ama'o nanao ty hoe: Nanoen-drae'o mavesatse ty joka'ay, aa le hamaivaño ama'ay; Inao ty hilañona'o: Bey ta i fisafaoan-draekoy ty anakikiko. ¹¹ Aa ndra t'ie nampijinien-draeko joka mavesatse, mbe ho tompeako ka o joka' areoo; ie nandafa anahareo an-karavantsy, fa an-kalengo ka ty ihamofohako. ¹² Aa le nomb' amy Rekhavame amy andro fahateloy t'Iarovame rekets' ondaty iabio, ty amy saontsi' i mpanjakaiy, vaho nanao ty hoe: Mibaliha amako ami'ty andro fahatelo. ¹³ Le sinotra' i mpanjakay ondatio, vaho napo'e i fanoroañe natolo' o androanavioy; ¹⁴ fa i fanoroa' o ajalahioo ty nilañonà'e ami'ty hoe: Nanoen-draeko mavesatse ty joka' areo, fe ho tovoñako o joka' areoo, nandafa anahareo an-karavantsy ty

* **11:40** Sisake: tolote an-karo, valañe; am-pè † **11:43** Rekhavame: ty mamotsotse ondatio

raeko f'ie ho fofoheko an-kalengo. ¹⁵ Aa le tsy hinao' i mpanjakay ondatio; ie toe fandahara' IEHOVÀ, hampijadoñe i enta'ey, i tsinara' IEHOVÀ am-pitâ' i Akià nte Silò am' Iarovame, ana' i Nebatey.

¹⁶ Aa ie nioni' Israele iaby te tsy nihaõne' i mpanjakay, le hoe ty natoi' ondatio amy mpanjakay: Ino ty anay amy Davide ao? Aman-dova amy ana' Isaý hao zahay? Akia mb'an-kivoho' areo ry Israele! Hajario i akiba'oy ry Davide. Aa le niavotse mb' an-kiboho' iareo mb'eo t'Israele. ¹⁷ Fe mbe nifehe o ana' Israele nimoneñe amo rova' Iehodao t'i Rekhavame. ¹⁸ Nirahe' i Rekhavame mpanjaka mb'eo, t'i Adorame*, mpifeleke ty haba; f'ie finetsa' Israele iaby vato le nihomake vaho nipitsike mb' an-tsarete'e aña t'i Rekhavame nitsondemboke mb'e Ierosalaime mb'eo. ¹⁹ Aa le niola amy anjomba' i Davidey t'Israele pake henane. ²⁰ Ie amy zao, naho jinanji' Israele iaby te tafampoly t'Iarovame, le nampisangitrife' iereo mb'am-pivori-bey vaho nanoe' iereo mpanjaka' Israele iaby; leo raike tsy nañorike ty anjomba' i Davide naho tsy Iehodà avao. ²¹ Aa ie niheo mb'e Ierosalaime mb'eo t'i Rekhavame, le hene natonto'e ty anjomba' Iehoda naho ty fifokoa' i Beniamine, lahindefoñe soa-joboñe rai-hetse-tsi-valo-ale, hialy amy anjomba' Israele, hampolia'e amy Rekhavame ana' i Selomò i fifeheañey. ²² Fe niheo amy Semaià†, ondatin' Añahare, ty tsaran' Añahare nanao ty hoe: ²³ Saontsio t'i Rekhavame, ana' i Selomò mpanjaka' Iehoday naho i anjomba' Iehoda naho Beniamine iabiy vaho o ila' ondatio, ty hoe; ²⁴ Hoe ty nafè' IEHOVÀ: Tsy hionjoñe mb'eo nahareo, tsy hialy amo ana' Israele roahalahi' areoo; songa mimpolia mb'an-kiboho'e aña, fa amako o raha zao. Aa le hinao' iereo ty tsara' IEHOVÀ, vaho nimpoly, ty amy tsara' IEHOVÀ.

²⁵ Namboare' Iarovame am-bohibohi' i Efraime ao t'i Sekeme‡, le nimoneñe ao; vaho niavotse ama'e namboatse i Penoele§. ²⁶ Le hoe ty fitsakorean-tro' Iarovame, Himpoly amy anjomba' i Davidey henane zao i fifeheañey, ²⁷ naho hionjomb' amy anjomba' IEHOVÀ e Ierosalaimey ondatio hanao soroñe; le hitolik' amy talè' iareoy, homb'amy Rekhavame mpanjaka' Iehoda ty arofo' ondatio vaho havetra' iareo raho, ie himpoly mb' an-dRekhavame mpanjaka' Iehoda ao. ²⁸ Aa le nisafiry i mpanjakay, naho nandranjy bania volamena roe, vaho nanao ty hoe am'ondatio, Loho sarotse ty fionjona' areo mb'e Ierosalaime mb'eo: ingo o 'ndrahare'oo ry Israele, o ninday azo boak' an-tane Mitsraimeo. ²⁹ Napo'e e Betele ao ty raike le napo'e e Dane ao ty raike. ³⁰ F'ie toe hakeo; amy te nionjoñe hitalaho ami'ty raik' ama'e ondaty pake Daneo. ³¹ Namboara'e kijà ka o haboañeo, vaho boak' am' ondaty tsotra iabio ty nanoe'e mpisoroñe fa tsy amo ana' i Levio. ³² Noriza' Iarovame ty sabadidak' ami'ty volam-paha-valo, ami'ty androm-paha-folo-lime ambi' i volañey, hambañe amy sabadidake e Iehoday, ie nañenga amy kitreliy; zay ty e Betele ao, ie nanoa'e soroñe i bania namboare'e rey; vaho najado'e e Betele ao o mpisoro' o toets' abo namboare'eo. ³³ Aa le niañambone mb'amy kitrely niranjie'e e Betele ao amy faha-folo-lime ambi' i volam-paha-valoiy, i volañey nitsakorè'e an-tro'ey avao; le nañoriza'e sabadidake o ana' Israeleo, vaho niañambone mb'amy kitrely fañemboha'ey.

13

¹ Ie amy zao nihirike e Iehoda ty ondatin' Añahare, ami'ty tsara' IEHOVÀ,

* ^{12:18} Adorame: ty haozara, hasoa-vinta' iareo † ^{12:22} Semaià: i mijanjiñe manao ze satri' IÀ.

‡ ^{12:25} Sekeme: anjara; nibalike maraindray § ^{12:25} Penoele: vintan'Añahare, fahaoniñañe IÀ

mb'e Betele mb'eo; ie nijohañe marine' i kitreliy t'Iarovame hañemboke. ² Le nikoihe'e amy kitreliy ty tsara' IEHOVÀ, ami'ty hoe: Ry kitrely, kitrely, hoe t'IEHOVÀ: Maharendreha te hasamak' añ' anjomba' i Davide ty ana-dahy; Iosià* ty tahina'e; le ama'o ty hisoroña'e o mpisoron-toets' abo misoroñe ama'oo le haforehetse ama'o eo ty taola'ondaty. ³ Nanolo-biloñe ka re amy andro zay, ami'ty hoe: Zao ty viloñe nitsarà' IEHOVÀ; Inao! ho riateñe o kitrelio vaho hadoñaे ty lavenok' ama'e. ⁴ Aa ie jinanji' i mpanjakay ty saontsi' indatin'Añaharey, i nikoiha'e amy kitreli' i Beteleyi, le natora-kitsi' Iarovame boak' amy kitreliy ty fità'e nanao ty hoe: Fihino re. Fe niforejeje i sirañe natora-kitsi'ey, le tsy nahafitarik' aze mb' ama'e. ⁵ Nidreatse ka i kitreliy naho nidoñaे boak'amy kitreliy o laveno'eo ty amy viloñe nitaroñe' indatin' Añaharey tie nitsara' IEHOVÀ. ⁶ Aa le hoe ty natoi' i mpanjakay am' indatin' Añaharey: Mihalalia am' IEHOVÀ Andrianañahare'o ho ahiko, misolohoa ho ahy hañereña'e ty sirako. Aa le nihalaly am' IEHOVÀ indatin' Añaharey naho niareñe ty fità' i mpanjakay vaho nibalike ho amy do'e taoloy. ⁷ Aa hoe i mpanjakay am' indatin' Añaharey; Mihoa amako ao, hanintsiña'o, le ho tolorako ravoravo. ⁸ Le hoe t'indatin'Añahare amy mpanjakay: Ndra te natolo'o ahy ty an-tsasa' i anjomba'oy, tsy ho nindrezako vaho tsy ho nihinañe mofo ndra rano ami' ty toetse toy. ⁹ Amy te nafanto' i tsara' IEHOVÀ amako ty hoe: Ko mikama mofo ndra rano vaho ko mimpoly mb'amy lalañe nimbà'o mb'eoy. ¹⁰ Aa le nionjomb' an-dalan-kafa mb'eo re, tsy nimpoly mb'amy lalañe nionjona'e mb'e Betele mb'eoy.

¹¹ Ie amy zao nimoneñe e Betele ao ty androanavy mpitoky; le niheo ama'e mb'eo ty ana'e raik' nitalily ze hene fitoloñañe nanoe' indatin' Añaharey e Betele ao; naho nitalilie' iereo an-drae' iareo ka i lañonañe sinaontsi'e amy mpanjakaiy. ¹² Le hoe ty nanoen-drae' am'iareo; Nimb'aia re? Toe nitrea' o ana'eo ty lala' nomba' indatin' Añahare hirik'e Iehoday. ¹³ Le hoe re amo ana-dahi'eo: Adiaño ho ahy i borìkey. Aa le nidiañe' iereo i borìkey naho ningira'e; ¹⁴ vaho niheañe'e indatin' Añaharey, le nitendrek' aze niambesatse ambane' ty kobaiñe eo, vaho nanoa'e ty hoe: Ihe hao indatin'Añahare boake Iehoday? Le hoe re, Ie. ¹⁵ Aa le hoe re tama'e, Molia mb'amako vaho mikamà mofo. ¹⁶ Le hoe re: Tsy hindre himpoly ama'o raho, vaho tsy hitraofako lia; mbore tsy hiharo hihinañe mofo ndra hinon-drano ama'o an-toetse atoy. ¹⁷ Fa hoe ty tsara' IEHOVÀ nitsaraeñ' amako: Tsy hikama mofo ndra hikama rano ao rehe, ndra mimpoly amy lalañe nionjona'o mb'eoy. ¹⁸ Le hoe re ama'e: Mpitoky manahak' azo ka 'ni-raho; le nitsara amako ty anjely amy tsara' IEHOVÀ, ty hoe: Ampolio mb'añ' anjomba'o mb'eo re hikama mofo naho hinon-drano; inay ty lañi'e. ¹⁹ Aa le nindreza'e fimpoly, nikama mofo naho ninon-drano. ²⁰ Ie niambesatse am-pandambañañe eo, le niheo amy mpitoky ninday aze noliy ty tsara' IEHOVÀ. ²¹ Le napaza'e ty hoe am' indatin' Añahare hirik'e Iehoday, Hoe ty nafè' IEHOVÀ; Amy te ihe nanjehatse i falie' IEHOVÀ, naho tsy nambena'o i fañè nafanto' IEHOVÀ Andrianañahare'oy, ²² te mone nibalike naho nikama mofo vaho ninon-drano an-toetse nitsarae'e ty hoe: Ko mikama mofo naho ko minon-drano; le tsy higodañe an-kiborin-droae'o ao ty fañova'o.

²³ Aa ie amy zao, naho fa nikama mofo naho ninon-drano, le nadia'e ho aze i borike'ey, ho a i mpitoky nampihovae'ey. ²⁴ Aa ie nienga mb'eo, nitendreke liona nanjevoñ' aze, ie nañifike i fañova'ey an-dalañey;

* ^{13:2} Iosià: mamorototo t' IEHOVÀ; ty afo' IÀ

nitsangañe añ'ila'e eo i borìkey, vaho nijohañe marine' i fañovay i lionay. ²⁵ Inge amy zao ondaty niary eio, ie niisa' iareo i fañova navokovoko an-dalañey, naho i liona nijagarodoñe marine' i fañovaiy, le nimb'eo nitalily an-drova nimoneña' i androanavy mpitokiy. ²⁶ Aa ie jinanji' i mpitoky ninday aze moly boak' amy lalañey, le hoe ty asa'e: Ie t'indatin' Añahare nanjehatse i tsara' IEHOVÀy, toly ndra natolo' IEHOVÀ amy lionay, nirimite'e naho vinono'e ty amy tsara' IEHOVÀ nafe'e ama'ey. ²⁷ Aa hoe ty natao'e amy ana'e rey: Diaño ho ahy i borìkey. Aa le nidiañe' iereo. ²⁸ Ie nimb'eo le nanjo i fañovay te nahifik' an-dalañe eo, naho i borìkey, vaho i liona nijohañe marine' i fañovaiy. Tsy nihane' i lionay i fañovay vaho tsy nirimite'e i borìkey. ²⁹ Rinambe' i mpitokiy ty fañova' indatin' Añaharey, le nasampe'e amy borìkey, vaho nendese'e nibalike mb'eo; ie nivotrak' an-drova' i androanavy mpitokiy, le nandala naho nandentek' aze. ³⁰ Natsalalampa'e amy kibori'ey i fañova'ey; le nandala' iareo ami'ty hoe: Hoke, ry rahalahiko! ³¹ Ie nandentek' aze, le nafanto'e amy ana'e rey ty hoe, Naho mikkenkan-draho, aleveño amy kibory nandentehañe indatin' Añaharey; apoho marine' o taola'eo o taolakoo. ³² Amy te tsy mete tsy hifetsake i tsara' IEHOVÀ nipazahe'e amy kitrely e Beteley naho amo fonga anjomba an-toets' abo an-drova' i Someroneo[†]. ³³ Ie aña, tsy nibalintoa amy sata-rati'ey t'Iarovame, fa nanoe'e mpisoroñe an-toets' abo o boak' am'ondaty tsotra iabio; toe noriza'e ho mpisoroñe an-toets' abo ze hene nimete. ³⁴ Ie nampanan-kakeo ty anjomba' Iarovame, hañitoañe aze, naho hamongorañ' aze ambone' ty tane toy.

14

¹ Ie amy zao, natindri' ty hasilofañe t'i Abià*, ana' Iarovame. ² Le hoe t'Iarovame amy tañanjomba'ey: Ehe, Miongaha, mañonohonoa tsy ho oniñe t'ie vali' Iarovame; le akia mb'e Silò mb'eo; aña t'i Ahià[†] mpitoky, i nisaontsy amakoy t'ie ho mpanjaka mifehe ondaty retoañe. ³ Añandeso boko-mofo folo, naho mokary, naho korobo tantele, le mionjona mb' ama'e mb'eo; ho saontsie'e ama'o ty hifetsak' amy ajajay. ⁴ Aa le nanoe' i vali' Iarovamey; niongake re nomb'e Silò aña vaho niheo mb' amy anjomba' i Ahià mb'eo. Tsy nahaisake t'i Ahià, fa nifè-pihaino amy haanterae'ey. ⁵ Aa le hoe t'IEHOVÀ amy Ahià: Ingo mb'ama'o mb'etoa ty tañanjomba' Iarovame hañontane i ana'ey fa siloke; aa le zao naho zao ty hisaontsia'o; fa ie mimoak' ao le hanao sare rakemba ila'e. ⁶ Aa ie nahajanjiñe ty figodoim-pandia'e an-tokonañe eo t'i Ahià, le hoe re tama'e: Mihovà mb'etoa ry tañanjomba' Iarovame; manao akore t'ie mintse ho ila'e? Fa niraheñe ama'o raho hinday enta mavesatse.

⁷ Akia, saontsio am'Iarovame: Hoe ty nafè' IEHOVÀ Andrianañahare' Israele; Kanao naonjoko am' ondatio rehe, naho nanoeko mpifehe' Israele-ondatikoo, ⁸ niriakteko amy anjomba' i Davidey i fifeheañey, le natoloko azo; f'ihe tsy manahake i Davide mpitoroko, ie nañambeñe o lilikoo naho nañorik' ahy an-kaampon' arofo'e vaho nanoe'e ze mahity a masoko avao; ⁹ te mone haloloañe ambone' ze fonga taolo'o ty anoe'o; nimb'eo rehe nandranjy 'ndrahare ankafankafa naho sareñ-draha natranake, hanigike o habosehakoo, ie nahifi'o amboho'o ao; ¹⁰ toly ndra, hametsahako hankàñe ty anjomba' Iarovame vaho haitoako amy Iarovame ze fonga ondaty mañary rano an-kijoly, ndra ty migabeñe ao ndra ty midada e Israele le

* 13:32 Somerone: an-kaboa fijilovañe * 14:1 Abià: Raeko t' IEHOVÀ † 14:2 Ahià: Rahalahi' IEHOVÀ

ho faopaoheko ty sehanga' i anjomba' Iarovamey, manahake ty fipioha' ondaty ty forompotse am-para' t'ie fonga añe. ¹¹ Ho hanen' amboa ty hivalenkañe amy Iarovame an-drova ao, le ho hanem-boron-tioke ze mitantiritse an-kivok' ao; fa nitsara t'IEHOVÀ. ¹² Miavota arè, akia mb'añ' anjomba'o mb'eo; fe vata'e mimoak' amy rovay o fandia'oo, ho simba i ajajay. ¹³ Handala aze t'Israele iaby vaho handentek' aze, fa ie avao amo tiri' Iarovameo ty hagodoñe an-kibory ao, amy te, ie avao ty nahaoniña' IEHOVÀ Andrianañahare' Israele raha soa añ'anjomba' Iarovame ao. ¹⁴ Le hatroa' IEHOVÀ hifehe Israele ty mpanjaka hañito ty anjomba' Iarovame anito. Aa ino ty hanoeko henanekeo? ¹⁵ toe ho fofohe' IEHOVÀ t'Israele, manahake ty fampitroetroean-drano ty vinda; le hombota'e amy tane soa natolo'e aman-droae' iareoy t'Israele, vaho hampivarakaihe'e alafe' i Sakay añe; ty amo hazomanga namboare' iereoo hanigike IEHOVÀ, hiviñera'e. ¹⁶ Aa le ho farie'e t'Israele ty amo tahi' Iarovameo, ie nanao hakeo vaho nampanan-tahiñe Israele. ¹⁷ Niongak' amy zao ty vali' Iarovame, niavotse vaho nigodañe e Tirtsà‡ ao; aa ie nisorogodañe an-tokonañe eo le nisimba i ajajay. ¹⁸ Nandeveñe naho nandala aze t'Israele iaby, ty amy tsara' IEHOVÀ nitsarae'e am-pità' i Ahìa mpitoky mpitoro'ey. ¹⁹ O fitoloña' Iarovame ila'eo, o fialia'eo, i fifehea'ey, ingo, t'ie sinokitse am-boken-talili' o mpanjaka' Israeleo. ²⁰ O andro nifehea' Iarovameo le taoñe roapololo-ro'amby; vaho nitrao-piròtse aman-droae'e ao; i Nadabe§ ana'ey ty nandimbe aze nifehe.

²¹ Nifehe e Iehoda ao t'i Rekhavame ana' i Selomò. Efa-polo-tao-raik' amby t'i Rekhavame te niorotse nifeleke, le nifehe folo-tao-fito' amby e Ierosalaime, i rova jinobo' IEHOVÀ amo hene fifokoa' Israeleo, hampipoha'e i tahina'eyi; i Naamae* nte-Amore ty tahinan-drene'e, ²² toe nanao haloloñañe am-pivazoho' IEHOVÀ t'Iehoda naho nampamarahy Aze amo hakeo nanoe' iereo mandikoatse o nanoen-droae' iareoo, ²³ amy te namboare' iereo, ho am-bata' iereo, ty toets' abo naho hazomanga vaho Aseraet† ambone' ze fonga haboañe naho ambane' ze hene hatae mandrevake. ²⁴ Tam y taney ka o lahilahy nandeo-batañ' an-dahilahio, le fanoe' iereo ze fonga sata-lo' o kilakila ondaty rinoa' IEHOVÀ aolo' o ana' Israeleo añeo. ²⁵ Ie amy zao, nionjon-kanàme Ierosalaime t'i Sisake mpanjaka' i Mitsraime amy taom-paha lime' i Rekhavamey ²⁶ le nivolose'e o vara añ'anjomba' IEHOVÀ naho o vara añ'anjomba' i mpanjakaio; fonga finao'e; tinava'e ka ze hene fikalan-defo volamena niranjie' i Selomò. ²⁷ Aa le namboare' i Rekhavame fikalan-defoñe torisike hasolo iareo, ze nafanto'e am-pità' o mpifehem-pigaritse mpañambeñe ty lalambein' anjomba' i mpanjakaio. ²⁸ Ie amy zao, ndra mbia' mbia ty nimoaha' i mpanjakay añ' anjomba' IEHOVÀ le nitintine' o mpigaritseo irezay vaho nabali' iereo mb'añ' efem-pigaritse ao. ²⁹ Ty ila' o fitoloña' i Rekhavameo, ze hene tolon-draha'e; tsy fa sinokitse amy bokem-pitoloña' o mpanjaka' Iehodaio hao? ³⁰ Nitolom-pialy avao t'i Rekhavame naho Iarovame. ³¹ Aa le nitrao-piròtse aman-droae'e t'i Rekhavame, naho nalenteke aman-droae'e an-drova' i Davide ao; i Naamae nte-Amore ty tahinan-drene'e. Nandimbe aze nifehe t'i Abiiame‡, ana-dahi'e.

15

¹ Ie amy taom-paha-folo-valo' ambi' Iarovame mpanjaka, ana' i Nebatey,

‡ **14:17** Tirtsà: Fanjaka § **14:20** Nadabe: matarike * **14:21** Naamae: montramontre'e † **14:23** Aserae hataem-piravoravoña‡ § **14:31** Abiiame: rae' i riakey

le niorotse nifehe Iehoda t'i Abiiame ² nifeleke telo taoñe e Ierosalaime ao. I Maakà*, anak' ampela' i Abisalome†, ty tahinan-drene'e. ³ Fonga nañaveloe'e o hakeo nanoen-drae'e taolo'eo; tsy nivantañe amy IEHOVÀ Andrianañahare'e manahake ty arofon-drae'e Davide, ty arofo'e. ⁴ Fe nanolora' IEHOVÀ Andrianañahare failo e Ierosalaime ao t'i Davide hampitroara'e ty ana'e hanonjohy aze, hampijadoña'e t'Ierosalaime; ⁵ amy te nanao ty hiti'e am-pihaino' IEHOVÀ t'i Davide vaho tsy nivike ndra ami' ty inoñ' inoñe linili'e ama'e amo hene andron-kavelo'eo naho tsy ty amy Orià nte-Kitey. ⁶ Nitolom-pialy avao t'i Rekhavame naho Iarovame amo hene andron-kavelo'eo. ⁷ Aa naho o fitoloña' i Abiiame ila'eo, o tolon-draha'e iabio—tsy fa sinokitse amy bokem-pamoliliañe o mpanjaka' Iehodaoy hao? Le hotakotak' avao ty tañivo' i Abiiame naho Iarovame. ⁸ Aa le nitrao-piròtse aman-droae'e t'i Abiime vaho nalente' iereo androva' i Davide ao; nandimbe aze nifehe t'i Asa‡ ana'e.

⁹ Ie amy taom-paha-roapolo' Iarovame mpanjaka' Israele le niorotse nifeleke Iehodà t'i Asa; ¹⁰ nifehe efa-polo taoñe raik' amby e Ierosalaime ao re, i Maakà, anak' ampela' i Abisalome, ty tahinan-drene'e. ¹¹ Nanao havantañe am-pihaino' IEHOVÀ t'i Asa, manahak' an-drae'e Davide. ¹² Naitoa'e amy taney ze lahilahy mpandeo-batañe an-dahilahy vaho nafaha'e o fonga raham-pahasive namboaren-droae'eo. ¹³ Naitoa'e amy naha mpanjaka ampela azey ka t'i Maakà rene'e, ty amy hazomanga nanoe'e añ'ala-vondroy; rinotsa' i Asa i hazomanga'ey vaho niforototoe'e amy torahañe Kidroney§. ¹⁴ O toets' aboo avao ty tsy naveve'e fe nilifotse IEHOVÀ ty arofo' i Asa amo hene andro'eo. ¹⁵ Le nampizilihe'e añ'anjomba' IEHOVÀ ao o raha nengaen-drae'eo naho o nengae'eo; ty fanake naho ty volafoty vaho ty volamena. ¹⁶ Nitolom-pialy t'i Asa naho i Baasa* mpanjaka' Israele amo hene andro' iareoo. ¹⁷ Nionjoñe haname Iehodà mb'eo t'i Baasa mpanjaka' Israele, vaho namboare'e ty Ramà, hikalañe ty flavotañe naho ty fimoahañe mb'amy Asa mpanjaka Iehodà mb'eo. ¹⁸ Rinambe' i Asa amy zao ty vola-foty naho volamena sisa amy fañajam-baran' anjomba' IEHOVÀ naho amy fañajam-baran' anjomba' i mpanjakaiy naho natolo'e am-pità' o mpitoro'eo; le nampihitrife' i Asa amy Benehadade†, ana' i Tabrimone‡, ana' i Keziona§, mpanjaka' i Arame, nimoneñe e Damesèkey, ami'ty hoe: ¹⁹ Ao ty fañina añivo'o naho zaho, añivon-draeko naho ty rae'o; ingo nañitrifako ravoravo, volafoty naho volamena; akia, apitsoho ty fañina'o amy Baasa mpanjaka' Israele, hisitaha'e amako. ²⁰ Hinao' i Benehadade t'i Asa mpanjaka, le nirahe'e haname o rova' Israeleo o roandria' i valobohòkeio le linafa'e t'Ione*, naho i Dane, naho i Abel'bet'maakà† vaho i Kinerote‡ iaby, reketse ty tane' i Naftaly§ iaby. ²¹ Ie jinanji' i Baasa zao le napo'e ty fandranjiañe i Ramà vaho nimoneñe e Tirtsà*. ²² Nitsitsihe' i Asa mpanjaka koike t'Iehoda, tsy nilefereñe; nakare' iereo o vato' i Ramà iabio naho o boda fañamboara' i Baasao; le namboare' i Asa mpanjaka ty Geba† e Beniamine ao naho i Mitspà‡. ²³ Aa naho o fitoloña' i Asa ila'eo, i haozara'e iabiy naho ze

* **15:2** Maakà; tinindry; fa modo; mireketse † **15:2** Abisalome: raen-kanintsîne ‡ **15:8** Asa: mpanaha; fanafahañe § **15:13** Kidrone: mikomainte, mihalonjetse * **15:16** Baasa: mpipay; mpandrotsake † **15:18** Bene-hadade; ana' i Hadade; anan-korake ‡ **15:18** Tibrimone: ampongabe' soa; foetse; aivo § **15:18** Keziona: aroñaroñe * **15:20** Iione: mañente; maso; rano migangoañe † **15:20** Abelbetmaakà: fiandraza toe-pamorekeke ‡ **15:20** Kinerote: marovany; mivariñe § **15:20** Naftaly; mimane ndra mialy * **15:21** Tirtsà: matarike: tea vintañe † **15:22** Geba: tamboho; fitovy ‡ **15:22** Mitspà: Fitalaksañ'abo

hene tolon-draha'e naho o rova namboare'eo; tsy fa sinokitse amy bokem-pamoliliañe o mpanjaka' Iehodaoy hao? Ie nigain-kantetse le narare am-pandia'e. ²⁴ Nitrao-piròtse aman-droae'e t'i Asa vaho nalentek' aman-droae'e an-drova' i Davide rae'e ao; Iehosafate[§] ana'e ty nandimbe aze nifehe.

²⁵ Niorotse nifehe Israele t'i Nadabe* ana' Iarovame amy taom-paha-ro'e i Asa mpanjaka' Iehoday, le nifeleke Israele roe taoñe, ²⁶ nanao ze hatsivokarañe am-pihaino IEHOVÀ naho nañavelo an-tsatan-drae'e vaho amy hakeo'e nampanaña'e tahiñe Israeley. ²⁷ Kinilli' i Baasà, ana' i Ahiià, añ' anjomba' Isakare, vaho zinevo' i Baasà re e [†]Gibetonen-te-Pelistio; ie fa narikatohe' i Nadabe naho Israele iaby ty Gibetone. ²⁸ Amy taom-paha-telo' i Asa mpanjaka' Iehoday ty nanjevoña' i Baasa aze vaho nandimbe aze nifehe. ²⁹ Ie vata'e nimpanjaka le fonga zinama'e ty anjomba' Iarovame; leo raike tsy napo'e hikofòke amy Iarovame ampara' te fonga vinono'e ty amy tsara' IEHOVÀ nitsaraeñe am-pitâ' i Ahiià nte-Silò mpitoro'ey; ³⁰ ty amo tahiñe nanoe' Iarovameo naho nampanaña'e hakeo Israele amy sigihy nisigihe'e IEHOVÀ, Andrianañahare' Israeley, hiviñera'e. ³¹ Aa le o fitoloña' i Nadabeo naho o hene tolon-draha'eo, tsy fa sinokitse amy bokem-pamoliliañe o mpanjaka' Israeleoy hao? ³² Nitolom-pialy avao t'i Asa naho i Baasa mpanjaka' Israele amo hene andro' iareoo.

³³ Amy taom-paha-telo' i Asa mpanjaka' Iehoday, le niorotse nifehe' Israele iaby e Tirtsà ao t'i Baasa ana' i Ahiià, vaho nifeleke taoñe roapololefats' amby. ³⁴ Nanao ze raty am-pivazoho' IEHOVÀ re naho nañavelo ami'ty sata' Iarovame naho amy tahiñe nampanaña'e hakeo Israeley.

16

¹ Aa le niheo am'Ieho* ana' i Kananý[†] ty tsara' IEHOVÀ amy Baasa, nanao ty hoe: ² Kanao naonjoko amy debokey rehe naho nanoeko mpifehe Israele, ondatikoo, naho nañaveloa'o an-tsata' Iarovame nampanan-tahiñe ondatiko Israeleo hanigik' ahy hibosehako amo hakeo'eo, ³ inao! ho faopaoheko aña t'i Baasa naho i anjomba'ey vaho hanoeko hambañe amy anjomba' Iarovame ana' i Nebatey; ⁴ ze amy Baasa mibanitse an-drova ao le ho hanen' amboa vaho habotse' o voron-tiokeo o aze miantantiritse an-teteke eio. ⁵ Ty ila' o fitoloña' i Baasao naho o tolon-draha'eo vaho o haozara'eo; tsy fa sinokitse amy bokem-pamoliliañe o mpanjaka' Israeleoy hao? ⁶ Nitrao-piròtse aman-droae'e t'i Baasa naho nalenteke e Tirtsà ao vaho nandimbe aze ho mpifehe t'i Elà[‡] ana-dahi'e. ⁷ Mbore niatreatre i Baasa naho i anjomba'ey, am-pitâ' Iehò, mpitoky, ana' i Kananý ty tsara' IEHOVÀ, ty amo haloloañe iaby nanoe'e am-pivazoho' IEHOVÀ, hanigik' aze hiforoforo amo fitoloñam-pitâ'eo, ie nanahake i anjomba' Iarovame nañohofa'e lozay. ⁸ Amy taom-paha-roapolo-eneñ' ambi' i Asa mpanjaka' Iehoday, ty namotora' i Elà ana' i Baasa nifehe Israele e Tirtsà ao vaho nifehe roe taoñe. ⁹ Nikinià' i Zimrý[§] mpitoro'ey, mpifeleke ty an-tsasa' o sarete'eo, ie e Tirtsà aña nigenoke ho mamo añ' akiba' i Artsà*, mpamandro' i anjomba'e e Tirtsà, ¹⁰ le nizilik' ao ty Zimrý nanjevoña naho namono aze an-taom-paha-roapolo-fito' ambi' i Asa, mpanjaka' Iehoda vaho nandimbe aze nifeleke. ¹¹ Ie niorotse nifehe naho vata'e

§ **15:24** Iehosafate: Mpizaka t'IEHOVÀ * **15:25** Nadabe: ravoravo; roandria † **15:27** Gibetone: lambosiñe; anjomba abo * **16:1** Ieho: ie veloñe † **16:1** Kananý: matarike ‡ **16:6** Elà: Kobaiñe; fatse; fandañirañe an-jaka § **16:9** Zimry: sabo; mpibeko; vahe * **16:9** Artsà: i taney

niambesatse amy fiambesa'ey, le fonga zinama'e ty anjomba' i Baasa; tsy nenga'e raike amo longo'eo, ndra amo rañe'eo ty namany an-kijoly. ¹² Fonga narotsa' i Zimrý ty anjomba' i Baasa, ty amy tsara' IEHOVÀ nafe'e amy Baasa añamy Iehò, mpitoky, ¹³ ty amo hakeo' i Baasao naho o tahi' i Elà ana'eo, amo hakeo'eo naho ie nampanan-tahiñe Israele vaho nanigike ty haviñera' IEHOVÀ Andrianañahare' Israele amo hakoaha' iareoo. ¹⁴ Aa naho o fitoloña' i Elà ila'eo, o fonga raha nanoe'eo; tsy fa sinokitse amy bokem-pamoliliañe o mpanjaka' Israeleoy hao?

¹⁵ Ie an-taom-paha-roapolo-fito' ambi' i Asa mpanjaka' Iehoda, le nifehe fito andro e Tirtsà ao t'i Zimrý. Nitobe hañatreatre' i Gebetenon-te-Pelistio, ondatio henane zay. ¹⁶ Aa ie jinanji' ondaty an-tobe ao, ty hoe: Nikilily t'i Zimrý namono i mpanjakay, le nanoe' Israele iaby mpanjaka' Israele t'i Omrý[†], mpifehe' i valobohòkey an-tobe ao amy andro zay. ¹⁷ Niavotse boak'e Gibetone t'i Omrý rekets' Israele iaby nañarikatoke i Tirtsà. ¹⁸ Naho nioni' i Zimrý t'ie nandrambe i rovay, le nimoak' amy fitilik' abo' i anjombam-panjakaiy, le finorototo'e ama'e i anjombam-panjakay vaho nihomake, ¹⁹ ty amo hakeo nanoe'e an-karatiañe am-pivazoho'a' IEHOVÀ amy nañaveloa'e an-tsata' Iarovamey vaho amo tahiñe nanoe'e hampandilatse Israeleo. ²⁰ Aa naho o fitoloña' i Zimrý ila'eo; i fikitrohan-draty nanoe'ey; tsy fa sinokitse amy bokem-pamoliliañe o mpanjaka' Israeleoy hao? ²¹ Nizara roe amy zao o nte-Israeleo; nañoriike i Tibný[‡] ana' i Ginate[§] ty vaki' ondatio hanoa' iereo mpanjaka, le nañoriike i Omrý ka ty vaki'e. ²² Fe naharotsake o mpañoriike i Tibný ana' i Ginateo o nañoriike i Omrio; aa le nikoromake t'i Tibný vaho nifehe t'i Omrý. ²³ Amy taom-paha-telopolo-raik' ambi' i Asa mpanjaka' Iehoday ty niorota' i Omrý nifehe' Israele, le nifeleke folo-tao-ro'amby, nifehe enen-taoñe e Tirtsà. ²⁴ Vinili'e talenta volafoty roe amy Semere* ty tamboho atao Somerone, le nandranjy amy haboañey vaho nitokave'e Somerone i rova namboare'ey ty amy tahina' i Semere tempo' i tambohoiy. ²⁵ Nitolon-karatiañe am-pihaino' IEHOVÀ t'i Omrý, lombolombo' o niaolo aze iabio o haloloañe nanoe'eo; ²⁶ amy te fonga nañaveloa'e o sata' Iarovame ana' i Nebateo naho i tahiñe nampanaña'e hakeo Israele, ie nanigike IEHOVÀ Andrianañahare' Israele hiviñera'e amo hakoaha' iareoo. ²⁷ Le o fitoloña' i Omrý ila'eo naho ty haozaraña naboa'e, tsy fa sinokitse amy bokem-pamoliliañe o mpanjaka' Israeleoy hao? ²⁸ Nitrao-piròtse aman-droae'e t'i Omrý naho nalenteke e Somerone ao vaho nandimbe aze nifehe t'i Akabe[†], ana'e.

²⁹ An-taom-paha-telopolo-valo' ambi' i Asa mpanjaka' Iehoda ty niorota' i Akabe ana' i Omrý nifehe Israele le nifeleke Israele e Somerone ao roapolo taoñe ro'amby; ³⁰ nanao haloloañe am-pivazoho'a' IEHOVÀ t'i Akabe ana' i Omrý, mandikoatse o niaolo aze iabio. ³¹ Ie amy zao, hoe nimaivañ' ama'e ty manjotik' amo hakeo' Iarovame ana' i Nebateo t'ie mbore nañenga Iizebele[‡] ho vali'e, ie ana' i Etebaale[§] mpanjaka' o nte-Tsidoneo naho nimb'eo nitoroñe i Baale* vaho nitalahoa'e. ³² Nampitroara'e kitrely ty Baale amy anjomba' i Baale niranjie'e e Someroney. ³³ Namboare' i Akabe ka ty ala-vondro; nilombolombo' o mpanjaka' Israele niaolo aze iabio t'i Akabe ami'ty fanigiha'e ty haviñera' IEHOVÀ Andrianañahare' Israele.

[†] **16:16** Omrý: Mpiana' IEHOVÀ; borak'ampemba [‡] **16:21** Tibný: boka; ahetse [§] **16:21** Ginate: golobom-pamboleañe ^{*} **16:24** Semere: mpigaritse; fatike [†] **16:28** Akabe: rahalahin-drae [‡] **16:31** Iizebele: malio tahiñe [§] **16:31** Ete-baale: mb'amy hazomangay ^{*} **16:31** Baale: Talè

34 Tañ' andro'e ty namboare' i Kiale[†] ty Ierikò. I Abirame[‡] tañoloño-loña'e ty nampipoha'e o mananta'eo le i Segobe[§] tsitso'e ty nampitroara'e o lalambeio ty amy tsara' IEHOVÀ nitsarae'e añam' Iehosoa ana' i Noney.

17

1 Le hoe t'i Elià* nte-Tisbè[†] mpimoneñe e Gilade amy Akabe, Kanao veloñe t'IEHOVÀ Andrianañahare' Israele fijohañako, le tsy hahavy mika ndra orañe o taoñe rezao naho tsy ami'ty rehako avao. **2** Le niheo ama'e ty tsara' IEHOVÀ nanao ty hoe: **3** Isitaho ty etoa le mitoliha maniñanañe, le mietaha amy torahañe atao Kerite[‡] atiñana' Iordaneiy, **4** le hinoñe amy torahañey rehe vaho fa liniliko o koàkeo ty hamahañe azo. **5** Aa le nimb'eo re nanao i nitsarae' IEHOVÀ, nañialo añ' olo' i Kerite atiñana' Iordaneiy. **6** Ninday mofo naho hena ama'e boa-maraiñe o koàkeo naho mofo naho hena te hariva, ie ninoñe an-torahañe ao. **7** Ie aña nimaike i torahañey amy te tsy niavy orañe i taney.

8 Aa le niheo ama'e ty tsara' IEHOVÀ nanao ty hoe: **9** Miongaha, akia mb'e Tsarepate[§] e Tsidone aña, le imoneño; inao, fa liniliko hiatrak' azo ty vantotse. **10** Aa le niongake re nimb'e Tsarepate aña; ie nivotrak' andalambei' i rovay eo, ingo nanontom-pipìke ty vantotse vaho nitokava'e ami'ty hoe: Añandeso rano tsy ampeampe an-jonjòñe hinomeko. **11** Ie nihitrike mb'eo le tinoka'e, nanao ty hoe: Ehe, añandeso pilipito-mofo an-taña'o. **12** Fe hoe re, Kanao veloñe t'IEHOVÀ Andrianañahare'o, zaho tsy amam-bokoboko fa mona'e mahaàtsa-pitàñe raike am-batavo ao naho menake tsiampeampe an-jonjòñe ao; namory tsila-katae roe raho anianikey hañalankañe aze ho ahy naho i anakoy hihinana'ay vaho hivetrake. **13** Le hoe t'i Elià ama'e: Ko hemban-drehe, akia, ano i sinaontsi'oy; f'ie anokono mofo kede heike, le azotsò, ie heneke, anokono ka nahareo miroanake, **14** ami'ty nafè' IEHOVÀ Andrianañahare' Israele ty hoe: Tsy ho ritse ty vatavom-bò, vaho tsy ho kapaike ty zonjò-menak' ampara' ty andro irahe' IEHOVÀ orañe mb' an-tane atoa. **15** Aa le nimb'eo re, hene nanoe'e i nisaontsia' i Elià naho nikama andro maro, ie naho i Elià, vaho i anjomba'ey. **16** Tsy nilany ty vatavom-bò vaho tsy nikapaike ty zonjo-menake, ty amy tsara nampisaontsie' IEHOVÀ i Elià.

17 Ie aña, le natindrin-kasilofañe ty ana' i rakembay, le akore ty fanjekea' i areteñey kanao tsy nahakofoke. **18** Le hoe re amy Elià, Inoñ' ama'o raho, ry ondatin' Añahareo? Nivotrak' amako atoy hao rehe hampaniahiañ' ahy o tahikoo, vaho hañoho-doza amy anakoy? **19** Le hoe re ama'e: Atoloro ahy o ana'oo naho rinambe'e añ'araña'e naho nendese'e mb' am-batsa am-pimoneña'e ao vaho nampandre'e am-pandrea'e. **20** Nitoreove'e am' IEHOVÀ ty hoe: Ry IEHOVÀ, Andrianañahareko, nametsaha'o hankàñe hao i vantotse añialoakoy, ie zinevo'o i ana'ey? **21** Nihity in-telo ambone' i ajajay re vaho nitoreo amy IEHOVÀ, ami'ty hoe: Ry IEHOVÀ Andrianañahareko, miambane ama'o, Ampolio ami'ty ajaja toy ty fiai'e. **22** Le hinao' IEHOVÀ ty fiarañanaña' i Elià, naho nimpoly amy ajajay ty fiai'e vaho nisotrake. **23** Rinambe' i Elià i ajajay, le nazotso'e boak' am-batsa ao mb' añ'anjomba mb'eo, le natolo'e an-drene'e, le hoe t'i Elià; Ingo, veloñe o ana-dahi'oo.

[†] **16:34** Kiale: Veloñe t'i Andrianañahare [‡] **16:34** Abirame: raem-pitake [§] **16:34** Segobe; nihafatrareñe; naonjoñe * **17:1** Elià: Andrianañahare t' IEHOVÀ [†] **17:1** Tisbè: mahagadra; mpandrohy [‡] **17:3** Kerite: tampake; mitrofake; mamono [§] **17:9** Tsarepate: fampitranaham-biñe

24 Le hoe i rakembay amy Elià: Apotako henaneo t'ihe ro toe ondatin' Añahare, vaho to ty tsara' IEHOVÀ am-palie'o.

18

1 Ie andro maro aña, le niheo amy Elià ty tsara' IEHOVÀ, amy taom-pahateloy ami' ty hoe: Akia, miatrefa amy Akabe, fa hampahaviako orañe ty tane toy. **2** Aa le niheo mb'eo t'i Elià hiatrek' amy Akabe.

Toe nampalovilovy ty san-kerè e Somerone ao. **3** Le kinanji' i Akabe t'i Obadià* mpamandroñe i anjombay (toe mpañeveñe am'IEHOVÀ t'i Obadià; **4** fa teo te nañitoa' Iizebele o mpitoki' IEHOVÀO, le rinambe' i Obadià ty mpitoky zato naho naeta'e ki-limampolo an-dakato ao vaho finaha'e mofo naho rano.) **5** Fa hoe ty asa' i Akabe amy Obadià, Akia, tsitsiho i taney, mb' amy ze rano manganahana naho mb'amo torahañeo hera hahaisak' ahetsé tika handrombahañe o soavalao naho o borikeo ho veloñe, tsy mone ho motso aman-tika o hare iabio. **6** Aa le nifanjarà' iereo i taney hirangà' iareo; nanjenge mb' añ' ila'e t'i Akabe, vaho nitakiokioke mb'añ' ila'e t'i Obadià. **7** Aa ie amy fañaveloa'ey t'i Obadia le nifanalaka ama'e t'i Elià; ie niisa'e, le nihotrak' an-dahara'e, nanao ty hoe: Tsy i Elià talèkoy v'iheo? **8** Le hoe ty natoi'e, Zaho 'nio; akia, taroño amy talè'oy ty hoe, Atoy t'i Elià. **9** Le hoe re, Ino o hakeokoo, te hasese'o am-pità' i Akabe ty mpitoro'o hanjevoa'e? **10** Kanao veloñe t'IEHOVÀ Andrianañahare'o, tsy eo ty fifeheañe ndra fifelehañe tsy nañiraha' i talèkoy hitsoeha'e; le ie nanao ty hoe, Tsy atoy re, le nampifantae'e i borizàñey naho i fifeheañey t'ie tsy naharendrek' azo. **11** Ie amy zao, hoe ty saontsi'o: Akia, taroño amy talè'oy. Inao, fa atoy t'i Elià. **12** Ie amy zay, vata'e hienga azo raho le hasese' ty Tio' IEHOVÀ mb'amy amoeko añaey rehe; aa ie miheo mb'amy Akabe mb'eo hatalilikò, vaho tsy mahatendrek' azo, le havetra'e; toe mpañeveñe am' IEHOVÀ ty mpitoro'o sikal' ami' ty nahajalahy ahy. **13** Tsy naboak' amy talèkoy hao ty nanoeko, ie nanjamañe o mpitoki' IEHOVÀO t'Iizebele? t'ie nañetake ondaty zato, mpitoki' IEHOVÀO ki-limampolo an-dakato ao vaho nifahanako mofo naho rano? **14** Le ihe manao ty hoe: Akia, taroño i talè'oy ty hoe: Inao, atoy t'i Elià, hanjevoa'e ahy. **15** Aa le hoe t'i Elià: Kanao veloñe t'IEHOVÀ i Màro fijohañakoy, toe hiatrek' aze raho te anito. **16** Aa le niavotse t'i Obadià hifanalaka amy Akabe, le tinaro'e ama'e vaho nimb'eo t'i Akabe hifañaoñe amy Elià.

17 Ie nitendreke i Elià t'i Akabe, le hoe t'i Akabe ama'e: Ihe v'zao, ty mpitrobo Israele? **18** Le hoe ty natoi'e: Tsy zaho ty mitrobo Israele fa ihe naho ty anjomban-drae'o, kanao tsinambolitio' areo o lili' IEHOVÀO vaho norihe'o o Baaleo. **19** Akia, ampañitrifo, vaho atontono amako mb'etoa iaby t'Israele an-kaboa' i Karmele ey naho i mpitokim-Baaleefa-jato-tsi-limampolo rey, naho i mpitoki' i Aseràefa-jato mpikama am-pandambaña' Iizebele rey. **20** Aa le nampañitrife' i Akabe o ana' Israele iabio vaho natonto'e an-kaboa' i Karmele eo o mpitokio.

21 Nitotofe' i Elià ondatio, le nanoa'e ty hoe: Ampara' te ombia ty mbe hifejofeo añivon-tsafiry roe? Naho IEHOVÀ ro Andrianañahare, oriho, fa naho i Baale ka, le oriho. Tsy nahakofò-bolan-draike ondatio. **22** Le hoe t'i Elià am' ondatio. Zaho le zaho avao ty mpitoky honka' IEHOVÀ; fe ondatyefa-jato-tsi-limampolo ty mpitoki' i Baale. **23** Aa le ampanoloro bania roe zahay, ho joboñe' iereo ty a iareo, naho ho lilie' iareo vaho hasampe amo hatae'eo, fa tsy hasiañ' afo ty ambane'e ao; le zaho ka ty hikotepe ty bania

* **18:3** Obadià: mpitoro' Iehova

ila'e naho hapoko ambone' ty hatae vaho tsy hamiañako afo ty ambane'e ao. ²⁴ Tokavo amy zay ty añaran-drahare' areo, le ho kanjieko ty tahina' IEHOVÀ; vaho ze Andrianañahare manoiñe an'afو, Ie ro Andrianañahare. Hene manoiñe ondatio nanao : Saontsy soa zay. ²⁵ Le hoe t'i Elià amo mpitoki' i Baaleo: Joboño' areo ty bania' areo, le hajario heike, amy t'ie maro, le tokavo ty añaran-drahare' areo, fe ko mamiañ' afo. ²⁶ Aa le rinambe' iareo ty bania natolotse naho hinajari' iereo vaho tinoka' iareo ty añara' i Baale mifototse amy maraindraiñey pak' an-tsipinde mena, ami'ty hoe: O Baale, toiño. Fe leo feo raike tsy manoiñe. Nitsamboatsamboañe an-tsinjake iereo añariari' i kitrely namboare' iereo. ²⁷ Ie tsipinde-mena, le kiniza' i Elià ami'ty hoe: Ipazapazaho, kanao 'ndrahare, he tondrendre, ke miamontoñe, he nifikofoko aña; ke miroro ho tsekafeñe. ²⁸ Aa le pinoña' iereo ty fipazake, naho nandili-vatañe ama-meso naho lefoñe an-tsata' iareo am-para' te nidoandoan-dio. ²⁹ Ie aña i tsingilingilieñey, mbe nitoky avao iereo sikal' amy fisoroñañe harivay, f'ie tsy amam-peo, tsy amam-panoiñe, tsy amam-pañaoñe. ³⁰ Le hoe t'i Elià am' ondatio. Miharinea; le nañarivoa' ondatio, vaho namboare'e i kitreli' IEHOVÀ rinotsakey. ³¹ Nandrambe vato folo-ro' amby t'i Elià ty ami'ty ia' i fifokoan' ana' Iakobe rey; ie niheova' ty tsara' IEHOVÀ nanao ty hoe: Israele ty ho tahina'o; ³² le namboare'e kitrely amy vato rey ami'ty tahina' IEHOVÀ; le nihalie'e talahake niarikatoke i kitreliy, nahaatseke fañaranan-tabiry roe ty habei'e. ³³ Hinajari' amy zao ty hatae, naho rinasa'e i baniay vaho nampipoha'e ambone' o hataeo eo, ³⁴ le nanao ty hoe: Atsafo rano ty sajoa efatse vaho adoaño amo hisoroñañe naho amo hataeo. Le hoe re, Ano fañindroe'e, le nanoe' iereo fañindroe'e. Le hoe re: Ano fañintelo'e, vaho nanoe' iareo fañintelo'e. ³⁵ Aa le nikararak' aña' ariseho' i kitreliy i ranoy, nañatsake i talahay an-drano. ³⁶ Ie amy fisoroñan-karivay le nañarine mb'eo t'i Elià mpitoky nanao ty hoe: Ry IEHOVÀ Andrianañahare' i Avrahame naho Ietsake vaho Israele, ampaharofoano anito te Ihe ro Andrianañahare e Israele ao naho te zaho ro mpitoro'o vaho amy tsara'oy ty nanoeko ze he'e zao. ³⁷ Janjiño raho, ry IEHOVÀ, janjiño, hahafohina' ondaty retoñañe te Ihe ro IEHOVÀ Andrianañahare, mpampipoly ty arofo' iareo. ³⁸ Nipozak' eo amy zao ty afo' IEHOVÀ namorototo i engan-koroñañey naho o hataeo naho o vatoo naho i debokey vaho nitsela ty rano an-kaly ao. ³⁹ Ie nahaisake zay ondatio, le songa niankotrap' an-dahara'e nanao ty hoe: IEHOVÀ, ie ro Andrianañahare; IEHOVÀ, ie ro Andrianañahare. ⁴⁰ Le hoe t'i Elià am' iereo: Vahoro o mpitoki' i Baaleo; ko apo' areo hienga ndra raike; le tsinepa' iareo; nindese' i Elià nizotso mb'amy Kidrone torahañe mb'eo vaho zinama'e. ⁴¹ Le hoe t'i Elià amy Akabe: Mionjona, mikama naho minoma; fa inao ty feon-oram-bey. ⁴² Aa le nañambone ey t'i Akabe nikama naho nitohoke. Nanganike mb'an-kaboa' i Karmele mb'eo ka t'i Elià le nibokoke mb'an-tane, ty lahara'e añivo' o ongo'eo; ⁴³ le hoe re amy mpitoro'ey, Mionjona, le mitalakesa mb' an-driake eñe. Nionjom-beo re vaho nanao ty hoe: Tsy ama'e. Le hoe re: Mibaliha mb'eo im-pito. ⁴⁴ Ie amy faha-fitoy, le hoe ty asa'e: Hehe ty rahoñañe hoe lela-pit ' ondaty miakatse an-driake eñe. Le hoe re, Akia, ano ty hoe amy Akabe: Hentse o i sarete'oy le mizotsoa, soa tsy haneba ' azo i ora ey. ⁴⁵ Ie amy zao nigobon-draho  naho tioke i likera ey vaho nikojooake ty ora e. Aa le ninigitse mb'e Iezreele mb'eo t'i Akabe. ⁴⁶ Tamy Eli a ty fit ' IEHOVÀ, le nidian-tohake vaho nilay aolo' i Akabe mb'eo pak' am-pimoaha e e Iezreele a e.

19

¹ Hene natalili' i Akabe am' Iizebele ty nanoe' i Elià naho i nanjamana'e am-pibara o mpitoky iabioy. ² Aa le nampañitrik' amy Elià t'Iizebele nanao ty hoe: Ee te anoa' o 'ndrahareo amako ndra mandikoatse naho tsy ampanahafeko ami'ty fiai' ty raik' am' iereo ty fiai'o te maray hoe zao. ³ Ie jinanji'e, le niongake nandrombak' aiñe naho nivotrake e Beerseva e Iehoda aña vaho napò'e ao i mpitoro'ey. ⁴ F'ie nañavelo andro raike mb'an-dratraratra aña, le nivike naho niambesatse ambane' talý eo, nañiry hivetrake, le hoe re, soa zay; ie henaneo, ry IEHOVÀ, rambeso ty fiaiko, fa tsy vantañe te aman-droaeko raho. ⁵ Aa le nandre re nirotse ambane' i taliy eo, vaho ingo ty anjely nanohiñ' aze ami'ty hoe: Mitroara, mikamà. ⁶ Niandra re, le hehe te marine' ty añambone'e eo ty vonga-mofo natoñak' ambone' vaen' afo, naho ty zonjon-drano, le nikama naho ninoñe le nirotse indraike. ⁷ Niheo mb'eo fañindroe'e i anjeli' IEHOVÀ, nañedre aze nanao ty hoe: Mitroara, mikamà, fa tsy ho leo'o i liay. ⁸ Aa le nitroatse re, nikama naho ninoñe vaho nañavelo an-kaozarañe efapolo andro naho efapolo haleñe mb'e Korebe vohin' Añahare mb'eo.

⁹ Ie pok'eo le nimoak' an-dakato naho nañialo ao naho niheova' ty tsara' IEHOVÀ nanao ama'e ty hoe: Ino ty anoe'o atoy, ry Elià? ¹⁰ Le hoe re: Toe nifarahieko t'IEHOVÀ, Andrianañahare' i Màroy; amy te tsinambolitio' o ana' Israeleo i fañina'oy, nafetsak' ambane o kitreli'oo naho vinono am-pibara o mpitoki'oo, naho zaho le zaho ty honka'e vaho mipay ty fiaiko iereo, havetrake. ¹¹ Le hoe re: Miavota, mijohaña an-kaboña ey aña' atrefa' IEHOVÀ. Aa inge, niary eo t'IEHOVÀ, le rinia' ty tio-bey manangololahy i vohitsey naho namoy vato añaatrefa' IEHOVÀ; fe tsy tamy tiokey t'IEHOVÀ; ie aña i tiokey le ty fanginikinihan-tane; fe tsy tamy fanginikinihañey t'IEHOVÀ; ¹² ie aña i fanginikinihañey, le ty afo; fe tsy tamy afoy t'IEHOVÀ; ie aña' i afoy le ty fikofohañe mora. ¹³ Ie jinanji' i Elià zay, le kinolopo'e amy sarimbo'ey ty añambone'e, naho niakatse nijohañe am-bava' i lakatoy eo, vaho inao ty fiarañanañañe mb' ama'e nanao ty hoe: Ino o anoe'o etoa, ry Elià? ¹⁴ Le hoe re: Vata'e nifarahieko t'IEHOVÀ, Andrianañahare' i Màroy; amy te tsinambolitio' o ana' Israeleo i fañina'oy, nafetsak' ambane o kitreli'oo, naho vinono am-pibara o mpitoki'oo, le zaho, toe zaho avao ty honka'e, ie mipay ty fiaiko, haitoañe. ¹⁵ Le hoe t'IEHOVÀ ama'e: Akia, mibalihia mb'amy lia'oy mb'eo pak' am-patrambei' i Damesèk' aña; ie mivotrake eo, le orizo ho mpanjaka' i Arame t'i Kazaele* ¹⁶ naho Iehò† ana' i Nimsý‡ ty horiza'o ho mpanjaka' Israele vaho i Elisà§ ana' i Safate* nte-Abelmeholà† ty horiza'o ho mpitoky handimbe azo. ¹⁷ Ie amy zao, ze mipoliotse ami'ty fibara' i Kazaele ho zevoñe' Iehò; le ze mipolatitse am-pibara' Iehò ho zevoñe' i Elisà. ¹⁸ Fa amako e Israele ao ty fito-arivo sehanga'e, ze hene ongotse mb'e lia'e tsy nitongalek' amy Baale vaho ze hene falie mboe tsy nañorok' aze.

¹⁹ Aa le niavotse mb'eo re naho tendrek' aze t'i Elisà ana' i Sefate, nitan-dasarý reketse katràka amam-baoñe folo-ro' amby aolo'e; nindre amy faha folo-ro' ambiy re vaho nahifi'e ama'e i sarimbo'ey. ²⁰ Aa le napo'e i katràka rey naho nilay nañoriike i Elià nanao ty hoe: Angao horofako ty raeko naho i reneko le horihoko. Le hoe re tama'e; Mibalihia; ino ty nanoako azo? ²¹ Aa le nibalik' amy fañoriha'e aze naho rinambe'e ty katràka roe mpiharo

* ^{19:15} Kazaele: i mahaisak' an'Andrianañaharey † ^{19:16} Iehò: ie eo ‡ ^{19:16} Nimsý: rinombak' an-kankañe § ^{19:16} Elisà: fandrombahan'Añahare * ^{19:16} Safate: mpizaka
† ^{19:16} Ebelmeholà: fandalam-patike

baoñe, le linenta'e naho nahandro o hena'eo ami'ty harao' i añombe rey naho nanjotsoa'e ondatio, vaho nikama. Niongak' amy zao re nañorike i Elià, vaho nitoroñe aze.

20

¹ Nanontoñe i hene valobohò'ey amy zao t'i Benehadade mpanjaka' i Arame, reketse mpanjaka telopolo-ro'amby naho soavala vaho sarete le nionjomb'eo nañarikatoke i Somerone hialia'e, ² le nampihitrife'e mb'amy Akabe mpanjaka' Israele an-drova ao, ³ ty nampanoa'e ty hoe: Hoe t'i Benehadade: Ahy o volafoty naho volamena'oo; o vali'oo vaho o ana'oo, ahy ze hene soa ama'e. ⁴ Nanoïñe aze ty mpanjaka' Israele nanao ty hoe: Ie i sinaontsi'oy, ry talèko mpanjaka, azo raho naho ze hene hanañako. ⁵ Nibalike mb'eo indraike o irakeo, nanao ty hoe: Zao ty asa' i Benehadade: Toe nahitriko ama'o ty hoe: Haseseo amako o volafoti'oo, naho o volamena'oo naho o vali'oo vaho o ana'oo; ⁶ fa hiraheko mb' ama'o mb'eo hamaray ami'ty andro hoe zao o mpitorokoo, le ho kodebe' iereo ty anjomba'o, naho o anjombam-pitoro'oo; le ze soa am-pihaino'o ty hapo' iareo am-pità'e vaho hendese'e aña. ⁷ Aa le songa kinoi' i mpanjaka' Israeley o roandria' i taneio, nanao ty hoe: Ehe, isaho naho mahaoniña te midoha raha indatiy; fa pinai'e amako o valikoo naho o anakoo naho o volafotikoo naho o volamenakoo, le tsy niraràko. ⁸ Le hoe o androanavio naho ze hene ondaty ama'e, Ko mañaoñe aze, vaho ko mianteke. ⁹ Aa le hoe re amy ìra' i Benehadade rey: Saontsio ty hoe i talèko mpanjakay: Hene hanoeko o nañiraha'o amy mpitoro'oy am-baloha'eo; fe tsy hanoeko o raha zao. Aa le nienga o irakeo, ninday i entañe zay. ¹⁰ Le hoe ty nañiraha' i Benehadade ama'e: Ee te hanoe' o 'ndrahareo amako ndra mandikoatse naho mahaatsam-pità' ze hene ondaty mañorik' ahikoo ty debo' i Somerone. ¹¹ Le hoe ty natoi' i mpanjaka' Israeley: Taroño ama'e: Ee te tsy hirengevole manahake ty mañafake fikalañe ty mañombe aze.

¹² Ie nahajanjiñe izay t'i Benehadade, ie ninon-toake miharo amy mpanjaka rey an-kibohotse ao, le hoe re amo mpitoro'eo, Midadaña! Le nijadoñe niatreatre i rovay iereo. ¹³ Niheo amy Akabe mpanjaka amy zao ty mpitoky, nanao ty hoe: Hoe ty tsara' IEHOVÀ, Fa niisa'o hao o valobohòke miheneheneo? Ingo, hatoloko am-pità'o te anito, soa te ho fohi'o te Zaho IEHOVÀ. ¹⁴ Le hoe t'i Akabe: Añama' ia? le hoe re: Hoe ty nafè' IEHOVÀ, o ajalahi' o mpifehem-pokotaneo. Le hoe re: Ia ty hamototse i hotakotakey: le hoe ty natoi'e: Ihe. ¹⁵ Aa le tinendre'e ty ajalahi' o mpifehem-pokotaneo: roanjato-tsi-telopolo-ro'amby iereo; ie amy zao tinendre'e ka o fonga ondatio, ze hene ana' Israele: fitoarivo. ¹⁶ Niavotse an-tsingilingilieñe iereo. Fe ninoñe an-kibohotse ao t'i Benehadade himamoa'e, ie naho o mpanjakao, i mpanjaka telopolo-ro' amby mpañolotse aze rey. ¹⁷ Niavotse mb'eo valoha'e i ajalahi' o mpifehem-pokotaneo rey; aa le nañirake t'i Benehadade, le nitaliliañe ty hoe: Ey ondaty miakatse i Someroneo. ¹⁸ Le hoe re, He niakatse an-kanintsiñe iereo, endeso veloñe; ke niakatse hifandrapake, endeso veloñe. ¹⁹ Aa le niavotse i rovay iereo, i ajalahi' o mpifehem-pokotaneo rey naho nañorike iareo o lahindefoñe. ²⁰ Songa zinevo' iareo ty ondati'e; vaho nitriban-day o nte-Arameo, le nihoridañe' Israele; nipoliotse an-tsoavala reke-piningi-tsoavala t'i Benehadade mpanjaka' i Arame. ²¹ Niavotse amy zao i mpanjaka' Israeley le zinama'e o soavala-aman-tsareteo vaho zinevo'e o nte-Arameo am-pizamanam-bey.

²² Nimb'amy mpanjaka' Israeley i mpitokiy, le nanoa'e ty hoe: Akia, mihaozara, le tsikarato naho hotsohotso o hanoe'oo; amy te hionjo-mb'etoa hiatatre azo ty mpanjaka' i Arame ami'ty fibalihan-taoñe. ²³ Fa nanao ty hoe amy mpanjaka' i Aramey o mpitoro'eo: Andrianañahare' o haboañeo t'i Andrianañahare' iareo; aa le naozatse te aman-tika iereo; antao arè hialy ama'e amontoñe aña; fa toe haozatse te am' iereo tika. ²⁴ Le ano zao: Songa asitaho an-toe'e o mpanjakao vaho solò mpifeleke ty an-toe' iareo; ²⁵ mamolilia valobohòke manahake i valobohòke nimotsa ama'oy, soavala hasolo soavala, sareté hasolo sareté; hifandrapak' am' iereo amontoñe ao tika vaho toe ho fatratse te ama'e. Hinao'e ty feo' iareo le nanoe'e. ²⁶ Aa ie nihereñe ty taoñe le natonto' i Benehadade o nte-Arameo, vaho nionjomb'e Afeke* mb'eo hialy am' Israele. ²⁷ Tinendre amy zao o ana' Israeleo naho nivatieñe vaho niavotse niatrek' ama'e; le nitobe aolo' iereo o ana' Israeleo hoe mpirai-liam-bik' ose roe kedekedeke, ie nañatseke i taney o nte-Arameo. ²⁸ Nitotoke mb'eo amy zao ty 'ndatin' Añahare ninday tsara amy mpanjaka' Israeley, ami'ty hoe: Hoe ty nafè' IEHOVÀ: Kanao nanao ty hoe o nte-Arameo : Andrianañahare' o haboañeo t'IEHOVÀ, fa tsy Andrianañahare' o vavataneo; le fonga hatoloko am-pitá'o i valobohòke bey heneheney vaho ho fohi'o te Zaho IEHOVÀ. ²⁹ Aa le nitobe nifañatreke fito andro iereo. Ie amy andro faha-fitoy le nionjoñe ty hotakotake; vaho zinevo' o ana' Israeleo ami'ty andro raike ty rai-hetse amo nte-Arame am-pandiao. ³⁰ Le nitriban-day mb'e Afeke aña o ila'eo, mb' an-drova ao; fe nikorovok' am' ondaty ro' ale-tsi-fito-arivo sehanga'eo i kijoliy. Aa le nipolitise mb' amy rovay t'i Benehadade, ami'ty efe'e am-po'e ao.

³¹ Le hoe o mpitoro'eo ama'e: Mahaoniña, fa tsinano'ay te mpanjaka mpitretre o mpanjakan' anjomba' Israeleo; antao arè, mihalaly ama'o te hidian-gony am-bania tika naho hanampe vahotse aña'ambonen-tika vaho hiavotse mb' amy mpanjaka' Israeley mb'eo; he havotso'e ty fiai'o. ³² Aa le nisikin-gony am-bania iereo naho nanampe vahotse aña'ambone eo, vaho niavotse mb'amy mpanjaka' Israeley mb'eo nanao ty hoe: Manao ty hoe ama'o i mpitoro'o Benehadadey: Miambane ama'o: angao ho velon-draho. Le hoe re: Toe mbe veloñe hao re? Rahalahiko 'nio. ³³ Aa le rinambe' indaty rey ho viloñe, ie tsinepak' am-palie'e i saontsy zay vaho nanao ty hoe: I rahalahi'o Benehadadey 'nio. Le hoe re: Akia hitrifo. Aa le niakatse mb'ama'e mb'eo t'i Benehadade naho najò'e an-tsarete'e ao, ³⁴ vaho hoe t'i Benehadade ama'e: Hampoliko o rova rinamben-draeko aman-drae'oo naho hamboare'o dokany e Damesèk' ao manahake o namboaren-draeko e Someroneo. Zaho ka, hoe t'i Akabe, havotsoko rehe amy fañina zay. Aa le nifañina'e vaho navotso'e.

³⁵ Teo amy zao t'indaty, ana-dahi' o mpitokio, nisaontsy an-drañetse ty amy nitsara' IEHOVÀ, ty hoe: Ehe, lafao raho. Fe tsy nimete handafa aze indatiy. ³⁶ Le hoe re tama'e, Kanao tsy nihaño'e ty fiarañanaña' IEHOVÀ, Inao! vata'e mieng' ahy rehe le ho zevoñe' ty liona. Aa le vata'e niavotse re, tendrek' aze ty liona nañe-doza ama'e. ³⁷ Nanjo ondaty indraike re, le nanoa'e ty hoe: Ehe, Lafao raho. Aa le linafa' indatiy, finofo'e vaho nahafere aze. ³⁸ Le nienga mb'eo i mpitokiy, nandiñe i mpanjakay aña'olon-dalañe eo, ie nihonohono am-bandý ambonem-pihaino'e. ³⁹ Aa ie niary eo i mpanjakay le kinanji'e i mpanjakay, nanoe'e ty hoe: Naneñateña i hotakotakey ty mpitoro'o, le teo te nivike t'indaty nanese t'indaty amako nanao ty hoe: Tano ondatio; fa ndra ino ty maha-tsi-eo aze, le ty fiai'o ho a'

* **20:26** Afeke: Haozarañe; fisorotombahañe

ty fiai'e, ke hondroha'o volafoty talenta raike. ⁴⁰ Aa ie nitoloñe atoy naho aroy ty mpitoro'o, le nimosa re. Le hoe ty mpanjaka' Israele ama'e: Aa le zay ty izakañ' azo; zay ty linaha'o. ⁴¹ Nafaha'e amy zao i bandy ampihaino'eoy; le napota' i mpanjakay t'ie mpiamo mpitokio. ⁴² Le hoe re tama'e: Hoe ty nafè' IEHOVÀ; Kanao navotso'o am-pità'o indaty tinendreko ho rotsaheñey, le ty fiai'o ty amy fiai'ey vaho ondati'oo ty am' ondati'eo. ⁴³ Aa le nimpoly mb' aña'anjomba'e mb'eo i mpanjaka' Israeley, nilonjetse naho nioremèñe t'ie nipoke e Somerone ao.

21

¹ Ie aña, teo t'indaty atao Nabote* nte-Iezreele, ty tanem-bahe'e nifañefetse amy anjomba' i Akabe, mpanjaka' i Someroneiy. ² Le hoe t'i Akabe amy Nabote: Atoloro ahy o tanem-bahe'oo hanoeko gołobon' añañe, amy t'ie marine i trañokoy; ke ho soloako tanem-bahe soa te ama'e, he, naho atao'o ho soa, le hitolorako ty drala mañeva. ³ Aa hoe t'i Nabote amy Akabe: Fa rinara' IEHOVÀ raho tsy hatoloko azo i lovan-droaekoy. ⁴ Aa le nanjetoke naho nanjokòke t'i Akabe te nimoak' aña'anjomba'e ao amy nisaontsie' i Nabote nte-Iezreele ty hoe: Tsy hitolorako ty lovan-droaeko; le nandre am-pandrea'e eo, nitoli-daharañe vaho tsy nete nikama mofo.

⁵ Nimb'ama'e t'Iizebele tañanjomba'e, nanao ama'e ty hoe: Ino ty mahalonjetse o arofo'oo, ihe tsy mahafikama? ⁶ Le hoe re ama'e: Fa vinolako t'i Nabote nte-Iezreele ami'ty hoe: Aletaho amako an-drala o tanem-bahe'oo; he naho tea'o hitolorako tanem-bahe hafa ho solo'e; le hoe ty natoi'e: Tsy hatoloko azo i tanem-bahekoy. ⁷ Le hoe t'Iizebele vali'e ama'e: Tsy ihe hao ty mifehe i fifehea' Israeley? Miongaha, mikamà vaho mirebeha an-troke; fa hatoloko azo i tanem-bahen-te Iezreeley. ⁸ Aa le nanokitse taratasy re ami'ty tahina' i Akabe naho vinoli-tombo'e ambolim-pitombo'e naho nahitri'e amo androanavio naho amo roandriañe an-drova vaho amo nitrao-pimoneñe amy Naboteo. ⁹ Hoe ty sinoki'e amy taratasy rey: Koiho ty lilitse le onjono ho aolo' ondatio t'i Nabote; ¹⁰ naho ampipoho ondaty roe tsivokatse hiatrek' aze, hanisý aze ami'ty hoe: Namatse an' Andrianañahare naho i mpanjakay rehe. Le aseseo alafe ey re vaho ametsaho vato hihomaha'e. ¹¹ Aa le nanoe' ondati' i rovaio, o androanavio naho o roandriañe mpimoneñe an-drova'ao i nahitri' Iizebele am' iereoy, i sinokitse amy taratasy nahitri'e am' iereoy. ¹² Nikoike lilitse iereo naho napoke aolo' ondatio t'i Nabote. ¹³ Le nizilik' ao t'indaty roe tsivokatse niambesatse añatrefa'e; nanara-vande amy Nabote añatrefa' ondatio i tsivokatse rey, ami'ty hoe: Namatse an' Andrianañahare naho i mpanjakay t'i Nabote. Aa le nasese' iareo niakatse i rovay, nametsa-bato ama'e am-para' te nihomake. ¹⁴ Nahitri' iereo amy Iizebele amy zao ty hoe: Fa nametsaham-bato t'i Nabote vaho nihomake. ¹⁵ Aa ie tsinano' Iizebele te finetsa-bato t'i Nabote vaho fa nihomake, le hoe t'Iizebele amy Akabe: Miongaha, rambeso i tanem-bahe' i Nabote nte-Iezreeley, i tsy natolo'e azo an-dralay; amy te tsy veloñe t'i Nabote fa mate. ¹⁶ Aa ie jinanji' i Akabe te nihomake t'i Nabote, le niavotse mb' amy tanem-bahe' i Nabote nte-Iezreeley mb'eo t'i Akabe hanaña'e aze.

¹⁷ Le niheo amy Elià nte-Tisbè ty tsara' IEHOVÀ, nanao ty hoe: ¹⁸ Miavota, mizotsoa hifanalaka amy Akabe mpanjaka' Israele, mpimoneñe e Somerone; inao t'ie an-tanem-bahe' i Nabote ao, nizotso mb'eo hanaña'e. ¹⁹ Le ty hoe ty ho saontsie'o ama'e: Hoe ty nafè' IEHOVÀ: Nañoho-doza

* ^{21:1} Nabote: volañe; toky

hao rehe mbore mitavañe? Le isaontsio ty hoe: Hoe ty tsara' IEHOVÀ: Amy toetse nilelafan' amboa ty lio' i Nabotey ty hitselàñ' amboa o lio'oo—o azoo. ²⁰ Le hoe t'i Akabe amy Elià: Fa nifanojo amako ry rafelahiko? Le hoe re, Mipay azo raho, amy t'ie nanolo-batañe ami'ty hatsivokarañe am-pivazohoà IEHOVÀ. ²¹ Inao! hametsahako hankàñe naho havìko aña ty firaoraoa'o, le fonga haitoko amy Akabe ze mañary rano an-kijoly, ty migabeñe ao naho ty midada e Israele aña. ²² Le hampanahafeko amy anjomba' Iarovame ana' i Nabatey ty anjomba'o naho manahake ty anjomba' i Baasà ana' i Akià, ty amy kai-jaka nikaihe'o amakoy, vaho nampanaña'o hakeo t'Israele. ²³ Le nitsara am' Iizebele ka t'IEHOVÀ, nanao ty hoe: Ho hane' o amboao an-talaha' Iezreele ao t'Iizebele. ²⁴ Ho hanen' amboa ty mitantantirite a i Akabe an-drova ao vaho ho hane' o voron-dikerañeò ty mibabòke an-kivok' ao. ²⁵ Tsy ni-añohatse t'i Akabe ami' ty fanolora'e vatañe hanoa'e hatsivokarañe am-pivazohoà IEHOVÀ, ie nihehere' i vali'e Iizebeley. ²⁶ Norihe'e an-kaloloañe o hazomangao, manahake ty sata' o nte-Amoreo, o rinoa' IEHOVÀ aolo' o ana' Israeleoo. ²⁷ Aa ie nahajanjiñe i tsara zay t'i Akabe le rinia'e o saro'eo naho nisikingony an-tsandri'e naho nililitse vaho nandre antsaron-gony le nijokojoko. ²⁸ Aa niheo amy Elià nte-Tisbý ty tsara' IEHOVÀ, ami'ty hoe: ²⁹ Isa'o hao te mirèke añatrefako t'i Akabe? Aa kanao niambane aoloko re le tsy hafetsako ama'e aña'andro'e i hankàñey, fa aña'andro' o ana'eo ty hañendesako fehohatse amy akiba'ey.

22

¹ Le lia'e tsy nialy telo taoñe ty Arame naho Israele. ² Ie amy taom-pahateloy, le nizotsa mb'amy mpanjaka' Israelely mb'eo t'Iehosafate mpanjaka' Iehoda. ³ Aa hoe ty mpanjaka' Israele amo mpitoro'eo: Fohi' areo hao te antika t'i Ramote-Gilade? fe mbe eo avao tika tsy nandrambe aze am-pitam-panjaka' i Arame. ⁴ Le hoe re am' Iehosafate: Hitraok' amako hao rehe hifandrapake e Ramote-Gilade aña? le hoe t'Iehosafate amy mpanjaka' Israelely: Ama'o raho manahake ty vata'o, ondatikoo hoe ondati'o, o soavalakoo hoe soavala'o. ⁵ Le hoe t'Iehosafate amy mpanjaka' Israelely: Ehe, paiao hey ty tsara' IEHOVÀ. ⁶ Aa le natonto' i mpanjaka' Israelely o mpitokio, va'e ondatyefa-jato, le nanoa'e ty hoe: Homb' e Ramote-Gilade mb'eo hao raho hifañotakotake, he hifoneñe? Le hoe iereo: Miavota; fa hitolora' i TALÈ am-pità' i mpanjakay. ⁷ Aa hoe t'Iehosafate: Tsy amam-pitoki' IEHOVÀ hao ty atoy hañontanean-tika? ⁸ Le hoe ty mpanjaka' Israele am' Iehosafate: Mbe aña t'indaty raike hampañontanean-tika am' IEHOVÀ, i Mikaià* ana' Imlà†; fe hejeko; amy te tsy soa ty fitokia'e amako fa raty. Le hoe t'Iehosafate: Ee te tsy hanao zay ty mpanjaka! ⁹ Aa le kinanji' i mpanjaka' Israelely ty mpifehe, nanao ty hoe: Hitrifo masika t'i Mikaià ana' Imlà. ¹⁰ Ie amy zao songa niambesatse am-piambesa'e, nisarimbo an-toem-pamofohañe an-dalambeim-pimoaha' i Somerone ey ty mpanjaka' Israele naho Iosafate mpanjaka' Iehoda; le nitoky aña'trefa' iereo o mpitoky iabio. ¹¹ Nandranjy tsifa viñe ho aze t'i Tsedekià‡ ana' i Kenaanà§ nanao ty hoe: Hoe t'IEHOVÀ: Ho tombohe'o amo retiañe o nte-Arameo am-para' te mongotse. ¹² Le nitoky hoe zay iaby o mpitokio, nanao ty hoe: Mionjona mb'e Ramote-Gilade mb'eo le miraoraða; fa hatolo' IEHOVÀ am-pità' i mpanjakay. ¹³ Nisaontsie' i

* ^{22:8} Mikaià: ia ty mañirinkiriñe là † ^{22:8} Imlà: maro; fisavarañe ‡ ^{22:11} Tsedekia: ty hatò' IEHOVÀ § ^{22:11} Kenaanà: demoke

nampihitrifeñē amy Mikaià ty hoe: Inao: mikoike hasoa amy mpanjakay am-palie raike ty fisaontsi' o mpitokio, aa, ee te hanahake ty fisaontsi' ty raik' am' iereo o enta'oo, fa ty hasoa ty atao'o. ¹⁴ Aa hoe t'i Mikaià: Kanao veloñe t'IEHOVÀ, ze hafè' IEHOVÀ amako, zay ty ho taroñeko.

¹⁵ Ie pok' amy mpanjakay eo, le hoe i mpanjakay ama'e: O Mikaià, hionjomb' e Ramote-Gilade mb'eo hao tika, he hifoneñē? Le hoe re: Mionjona, miraoraòa, fa hatolo' IEHOVÀ am-pità' i mpanjakay. ¹⁶ Le hoe i mpanjakay ama'e: Im-pire hao t'ie hitolom-pamantoke azo ty tsy hisaontsy amako naho tsy ty hatò ami'ty tahina' IEHOVÀ? ¹⁷ Le hoe re: Nitreako te hene niparaitak' amo vohitseo t'Israele, manahak' añondry tsy amam-piarake; aa le hoe t'IEHOVÀ: Po-talè iereo; apoho songa himpoly mb' an-kiboho'e mb'eo an-kanintsiñē. ¹⁸ Le hoe ty mpanjaka' Israele am' Iehosafate: Aa vaho tsy vinolako ama'o hao te tsy ty soa ty hitokia'e ahy fa ty raty. ¹⁹ Le hoe re: Aa le janjiño ty tsara' IEHOVÀ. Nitreako t'IEHOVÀ niambesatse amy fiambesa'ey naho nijohañe añ' ila'e am-pità'e havana naho an-kavia'e i valobohòn-dikerañey. ²⁰ Le hoe t'IEHOVÀ: Ia ty hanigìke i Akabe, hionjona'e hikorovoke e Ramote-gilade aña. Nanao hoe zao ty raike, naho hoe zay ty ila'e. ²¹ Nionjomb' eo amy zao ty fañahy nijohañe añatrefa' IEHOVÀ ey, nanao ty hoe: Zaho ty hanigik' aze. Le hoe t'IEHOVÀ ama'e: Ami'ty manao akore? ²² Le hoe re, Hionjomb' eo raho ho fañahim-bande am-palie' o mpitoky iabio. Le hoe re: Ihe arè ty hanigik' aze vaho ho tahieñē; akia, anò. ²³ Ie amy zao, mahaoniña te nampipoha' IEHOVÀ am-palie' o hene mpitoky retoañe ty fañahin-dremborake; fe nitsara hànkañe ama'o t'IEHOVÀ. ²⁴ Le nañarine aze t'i Tsedekià ana' i Kenaanà naho tinampifi'e am-pivimbi'e ty Mikaià vaho nanao ty hoe: Nimb' aia i fañahi' IEHOVÀ niboak' amako hampivolañe azoy? ²⁵ Le hoe t'i Mikaià: Mahafohina te ho isa'o ami'ty andro himoaha'o hietak' an-traño añate'e ao. ²⁶ Le hoe ty mpanjaka' Israele, Rambeso t'i Mikaià le aseseo amy Amone mpifelek' i rovay naho am' Ioase ana' i mpanjakay; ²⁷ le ano ty hoe: Hoe ty saontsi' i mpanjakay: Agabeño ampandrohizañe ao t'indaty tia vaho fahano mofon-kasotriañe naho ranon-kaoreañe ampara' te mimpoly an-kanintsin-draho. ²⁸ Le hoe t'i Mikaià, Naho mimpoly an-kanintsin-drehe le tsy nitsara añañako t'IEHOVÀ. Le hoe re: Mijanjiña ondatio; inahareo iaby.

²⁹ Aa le nionjomb'e Ramote-gilade mb'eo ty mpanjaka' Israele naho Iehosafate mpanjaka' Iehoda. ³⁰ Le hoe ty mpanjaka' Israele am' Iehosafate: Hañonohono vatan-draho vaho himoak' ankotakotak' ao; fe ampiombeo o saro'oo. Le nañonohono ty mpanjaka' Israele, t'ie nionjomb' añ' aly mb'eo. ³¹ Ie amy zao fa linili' i mpanjaka' i Aramey i mpifehen-tsarete'e telo-polo-ro' amby rey ami'ty hoe: Ko mialy ami' ty kede ndra ami' ty bey, fa amy mpanjaka Israeley avao. ³² Aa ie nioni' o mpifehen-tsareteo t'Iehosafate, le nanao ty hoe: Inge ie! ty mpanjaka' Israele, le hene nitolike hialy ama'e; vaho nikoike t'Iehosafate. ³³ Aa ie nioni' i mpifehen-tsarete rey t'ie tsy mpanjaka' Israele, le nivio tsy nañoridañ' aze ka. ³⁴ Le teo t'indaty nampibitso-pale tsy nahi'e, vaho trinofa'e ty mpanjaka' Israele añivo' ty fikalañ' ambane naho ty fikalañ' araña'e ao; aa le hoe re amy mpinday sarete'ey: Ampitoliho ty fità'o, le akaro amy valobohòkey raho, fa vata'e fere. ³⁵ Niindra avao ty aly amy andro zay, le nampiatoeñē amy sarete'ey am-piatrefañē o nte-Arameo i mpanjakay, le nihomake te hariva; nikararàke boak' am-pere'e mb'an gorodo' i saretey ty lio'e. ³⁶ Nipoñak' amy zao ty koike niboile amy valobohòkey te tsofots'

àndro nanao ty hoe: Songa ondaty mb' an-drova'e, fonga ondaty mb' antane'e aña. ³⁷ Aa le nihomake i mpanjakay, vaho nendeseñe e Somerone; le nalente' iereo e Somerone ao i mpanjakay. ³⁸ Sinasa marine' i antara' i Someroney i sarete'ey, naho tsinela' o amboao ty lio'e, (toe fiandroa' o tsimirirañe o ty ao), ty amy enta' IEHOVÀ nitsarae'ey. ³⁹ O fitoloña' i Akabe ila'eo naho o nanoe'e iabio naho i anjomba niranjie'e an-tsifay vaho o rova maro namboare'eo, tsy fa sinokitse amy bokem-pamoliliañe o mpanjaka' Israeleoy hao? ⁴⁰ Aa le nitrao-piròtse aman-droae'e t'i Akabe; vaho nandimbe aze nifehe t'i Ahkazià* ana'e.

⁴¹ Niorotse nifehe e Iehoda t'Iehosafate ana' i Asa amy taom-paha-efa' i Akabe mpanjaka' Israele. ⁴² Ni-telopolo taoñe lime amby t'Iehosafate t'ie namototse nifeleke; le taoñe roapololime amby ty nifehea'e e Ierosalaime ao. I Azobà†, ana' i Silký‡ ty tahinan-drene'e. ⁴³ Nañavelo ami'ty lia' i Asà rae'e re, tsy nivik' ama'e le ze mahity am-pihaino' IEHOVÀ avao ty nanoe'e; ⁴⁴ fe tsy nafahañe aña o tambohoo; le mbe nanao soroñe naho nañenga amo tambohoo ondatio. ⁴⁵ Nifampilongo amy mpanjaka' Israele t'Iehosafate. ⁴⁶ Le o fitoloña' Iehosafate ila'eo naho i haozara'e naboa'ey vaho o fialia'eo; tsy fa sinokitse amy bokem-pamoliliañe o mpanjaka' Iehodaoy hao? ⁴⁷ Naho o Tsivoatsolo sehanga'eo, o mbe nisisa faha' i Asa, rae'eo, le finongo'e amy taney. ⁴⁸ Tsy amam-panjaka t'Edome, fa mpifeleke ty nisolo i mpanjakay. ⁴⁹ Nandranjy sambon-Tarsise t'Iehosafate hitoha volamena e Ofira aña; f'ie tsy nionjomb'eo; nifoy e Etsione-gebere ao i sambo rey. ⁵⁰ Le hoe t'i Ahkazià ana' i Akabe am' Iehosafate: Angao hindre lia amo mpitoro'oo an-tsambo' o mpitorokoo. Fe tsy nimete t'Iehosafate. ⁵¹ Le nitrao-piròtse aman-droae'e t'Iehosafate, naho nalentek' amandroae'e an-drova' i Davide, rae'e ao vaho nandimbe aze nifehe t'Iehorame ana'e.

⁵² Niorotse nifehe Israele e Somerone ao t'i Ahkazià amy taom-pahafolo-fito' ambi' Iehosafate mpanjaka' Iehoday, le nifehe Israele roe taoñe, ⁵³ fe nanao halò-tserehañe am-pivazoho' IEHOVÀ naho nañavelo an-tsatan-drae'e naho an-tsatan-drene'e naho an-tsata' Iarovame ana' i Nebate, ie nampanan-kakeo' Israele. Nitoroñe i Baale re naho nitalaho'a'e vaho nisigihe'e t'IEHOVÀ Andrianañahare' Israele, fonga nitsikombè'e o nanoendroae'eo.

* **22:40** Akazia: fitsipahañe; aroñaro' IEHOVÀ † **22:42** Azobà: naforintseñe ‡ **22:42** Silký: ran-katae; fialiañe; fikalañañe

Mpanjaka II

¹ Ie nihomake t'i Akabe, le niola am' Israele t'i Moabe. ² Nitsirikoake boak' amy tsingarakara' i efe'e ambone eo e Someroney t'i Ahkazià le nisiloke vaho nampañitrife'e ty ìrake, ami'ty hoe: Akia. añontaneo amy Baalezebobe*, 'ndrahare' i Ekrone, ke hiambleñe raho amo areteko zao. ³ Fe hoe ty tsara' i anjeli' IEHOVÀ amy Elià nte-Tisbý: Mióngaha, akia mifanalakà amo ìra' i mpanjaka' i Someroneio, le ano ty hoe: Aa vaho tsy aman' Añahare hao t'Israele, t'ie homb' amy Baalezebobe 'ndrahare' i Ekrone hañontane aze? ⁴ Aa le hoe ty nafè' IEHOVÀ: Tsy hizotso amy fandreañe nijoña'oy rehe, fa toe hivetrake. Le nienga t'i Elià. ⁵ Nimpoly ama'e o ìra'eo, le hoe re ama'e: Ino ty nimpolia' areo? ⁶ Le nanoa' iareo ty hoe: Nifanampe ama'ay t'indaty nanao ty hoe: Akia mimpolia mb' amy mpanjaka nañirak' anahareoy, vaho isaontsio ty hoe: Hoe ty nafè' IEHOVÀ: Aa vaho tsy aman' Añahare hao t'Israele te ihe mañitrike hañontane e Baalezebobe 'ndrahare' i Ekrone? Aa le tsy hizotsoa'o i fandreañe nijoña'o, fa toe hihomake. ⁷ Le hoe re am' iereo: T'indaty manao akore ty nifanalaka ama' areo, nisaontsy i entañe zay ama' areo? ⁸ Le hoe ty natoi' iareo: Ondaty volovoloeñe, midian-kolitse an-toha'e. Le hoe re: I Elià nte-Tisbý zay.

⁹ Aa le nañirake ty mpifehe-limampolo rekets' i limampolo'ey i mpanjakay. Niañambone mb'ama'e mb'eo iereo, le ingo ie niambesatse andengom-bohitse ey. Le hoe re ama'e: O ondatin' Añahareo, hoe ty enta' i mpanjakay: Mizotsoa. ¹⁰ Le hoe ty natoi' i Elià i mpifehe limampoloy: Naho toe ondatin' Añahare raho le ee te hizotso boak' andikerañe ey ty afo hamorototo azo naho o limampolo'oo, Aa le nikodoiñe boak' andikerañe aña ty afo namorototo aze rekets' i limampolo rey. ¹¹ Nañirake mpifehe limampolo indraike re rekets' i limampolo'ey. Le nisaontsia'e ty hoe: Ry 'ndatin' Añahareo, hoe i mpanjakay: Mizotsoa ami'ty manao zao. ¹² Le hoe ty natoi' i Elià: Naho toe 'ndatin' Añahare raho, le ee te hizotso boak' an-dikerañe ey ty afo hamorototo azo naho o limampolo'oo. Le nizotso boak' aman' Añahare an-dikerañe aña ty afo namorototo aze rekets' i limampolo'ey. ¹³ Nañirake indraike re, le ty mpifehe limampolo fahatelo rekets' ty limampolo're. Nitroatse mb'eo i mpifehe limampoloy, le nitongalek' añatrefa' i Elià eo vaho nihalalia'e ami'ty hoe: Ry ondatin' Añahare, miambane ama'o, ehe te ho vara am-pahaisaha'o ty fiaiko naho ty fiai' o mpitoro'o limampolo retoña. ¹⁴ Toe nihotrake boak' andikerañe ey ty afo namorototo i mpifehe limampolo taolo rey rekets' i limampolo' iareoy; fe ee te ho sarotse ampahaoniña'o henaneo ty fiaiko. ¹⁵ Le hoe ty tsara' i anjeli' IEHOVÀ amy Elià: Mindreza fizotso ama'e, ko hembañe. Le niongake re nizotso mindre ama'e mb' amy mpanjakay mb'eo. ¹⁶ Le hoe re tama'e: Hoe ty nafè' IEHOVÀ: Ie nañitrik' ìrake hañontane i Baalezebobe, 'ndrahare' i Ekrone; tsy aman' Añahare hao t'Israele hañontanea'o i tsara'ey? Toly ndra tsy hizotsoa'o o fandreañe nijoña'oo fa toe hivetrake. ¹⁷ Aa le nihomake re ty amy tsara' IEHOVÀ nisaontsie' i Elià. Le niorotse nandimbe aze nifehe t'Iehorame amy taompaharoe' Iehorame ana' Iehosafate mpanjaka' Iehoday; amy t'ie tsy nanañ'

* ^{1:2} Baalezebobe: 'ndraharen-daletse

ana-dahy. ¹⁸ Le o fitoloñañe ila'e nanoe' i Ahkaziào, tsy fa sinokitse amy bokem-pamoliliañe o mpanjaka' Israeleoy hao?

2

¹ Ie amy zao, naho fa honjone' IEHOVÀ an-tangololahy mb'an-dikerañe aña t'i Elià, le nindreza' i Elià lia t'i Elisà mb'e Gilgale aña. ² Le hoe t'i Elià amy Elisà: Ehe, eo hey rehe, fa nampihitrife' IEHOVÀ mb'e Betele aña raho. Aa hoe t'i Elisà, Kanao veloñe t'i IEHOVÀ naho veloñe ty arofo'o, zaho tsy hieng' azo. Aa le nizotso mb'e Betele mb'eo iereo. ³ (Nimb' amy Elisà mb'eo o anam-pitoky e Beteleo nanao ama'e ty hoe: Fohi'o hao te hasita' IEHOVÀ boak' ambone'o ty talè'o te anito? Le hoe re: Eka 'nio apotako; mianjina.) ⁴ Le hoe t'i Elià ama'e: O Elisà, Ehe eo hey rehe, fa nampisangitrife' IEHOVÀ mb'e Ieriko mb'eo raho. Aa hoe re, Kanao veloñe t'i IEHOVÀ naho veloñe ty arofo'o, tsy hengako. Aa le nimb'e Ieriko mb'eo iereo. ⁵ (Nimb' amy Elisà mb'eo o anam-pitoky e Ierikoo nanao ty hoe ama'e: Fohi'o hao te hasita' IEHOVÀ tsy ho ambone'o ty talè'o te anito? Le hoe re: Eka, apotako: mianjina.) ⁶ Le hoe t'i Elià ama'e: Ehe, eo hey rehe, fa nirahe' IEHOVÀ mb' am' Iordaney mb' eo raho, le hoe re: Kanao veloñe t'i IEHOVÀ, naho veloñe ty arofo'o, zaho tsy hieng' azo. Aa le nimb'eo i roroey. ⁷ Nimb'eo ka ty limampolo amo anam-pitokio le nijohañe tandrife iareo ey; vaho nijohañe añ' olo' Iordaney i roey. ⁸ Rinambe' i Elià i sarimbo'ey le naholonkolo'e naho linafa'e i ranoy naho nivaky roe mb'atia mb' etia vaho nitsak' an-tane maike ie roe. ⁹ Naho tafatsake, le hoe t'i Elià amy Elisà; Halalio ze hanoeko ho azo, aolo' te ho rambeseñe ama'o. Le hoe t'i Elisà: Ehe, te hanan' anjara roe amy arofo'oy raho. ¹⁰ Le hoe re: Raha sarotse i nihalalia'oy f'ie mahaisak' ahy te ampisitaheñe ama'o, le ho azo'o; fa naho tsy zay, le ho tsie. ¹¹ Aa ie nitolom-pañavelo mb'eo nifanaontsy, le nisodehañe eo ty sareten' afo naho soavalan' afo nampiria iereo roe le nionjoñe an-tangololahy mb' andikerañe aña t'i Elià. ¹² Niisa' i Elisà, le hoe ty fipaza'e: Raeko, Raeko, o sarete' Israeleo, naho o mpiningi'eo! le tsy nioni'e ka; rinambe'e amy zao o siki'eo vaho rinia'e roe.

¹³ Rinambe'e ka i sarimbo' i Elià nipok' ama'ey le nibalike vaho nijohañe añ' olo' Iordaney eo. ¹⁴ Rinambe'e i sarimbo' i Elià nipok'ama'ey le linafa'e i ranoy ami'ty hoe: Aia t'IEHOVÀ Andrianañahare' i Elià? aa ie linafa'e o ranoo, le nifampiria mb'atia, mb'etia; le nitsake t'i Elisà. ¹⁵ Aa ie niisa' o anam-pitoki' Ieriko eio, le hoe iereo: Mipetak' amy Elisà ty arofo' i Elià. Le nimb' ama'e mb'eo nifanalaka ama'e vaho nibokoboko an-tane añatrefa'e. ¹⁶ Le hoe ty asa' iareo ama'e: Ingo hey ty lahilahy maozatse limampolo amo mpitoro'oo; ehe, ampihitrifo, hipay i talè'oy, hera nampionjone' i Kofò' IEHOVÀ vaho nahifi'e an-kaboañ' ey ndra am-bavatane ao. Le hoe re. Ko mañitrike. ¹⁷ F'ie nañosik' aze am-para' t'ie niheve, le hoe re: Iraho! le nirahe' iereo i lahilahy limampolo rey; nitsoeha' iareo telo andro fa tsy nahatre. ¹⁸ Nimpoly ama'e iereo ie nitambatse e Ieriko ao, le hoe re am' iereo, tsy nivolañeko hao ty hoe: Ko mb'eo?

¹⁹ Nanao ty hoe amy Elisà ondati' i rovaio: Ehe mahaisaha te fanjaka ty toe' ty rova toy, amphaoniñan- talèko; fe raty ty rano'e, vaho tsy mamokatse o taneo. ²⁰ Aa le hoe re: Endeso korobo vao raho le ajoño ama'e ty sira. Le nandesa' iereo. ²¹ Le nionjomb' amo rano manganahanao re naho nahifi'e ama'e i siray, vaho nanao ty hoe: Hoe t'IEHOVÀ, fa jinangako o rano retoñañe, tsy ama'e ka henane zao ty fampihomahañe ndra ty tsy havokarañe. ²² Aa le nivoatse i ranoy pake henane ty amy saontsi' i Elisà

nitaroñe'ey. ²³ Nienga re vaho nionjomb'e Betele aña; aa ie nañavelo andalam-b'eo, teo ty ajaja niakatse i rovay nikizak' aze ami' ty hoe: Mionjona ty sola, mionjona ty sola; ²⁴ Nitolike mañamboho re nahaisake iareo le nozoñe'e ami'ty tahina' IEHOVÀ. Aa le niakatse boak' amy alay ty dobe rene'e roe, nandrimitse ty efapolo-ro' amby am' iereo. ²⁵ Boak' ao re nimb'e Karmele aña, le hirik'ao nimpoly mb'e Somerone aña.

3

¹ Niorotse nifehe Israele e Somerone ao t'Iehorame ana' i Akabe amy taom-paha-folo-valo'ambi' Iehosafate, mpanjaka' Iehoday, vaho nifeleke folo-taoñe ro' amby, ² nanao haratiañe am-pivazohoa' IEHOVÀ re fa tsy nanahak' an-drae'e, tsy nañirinkiriñe an-drene'e, amy te songa sininto'e o sarem-Baale niranjien-drae'eo. ³ Fe mbe nivontitire'e o tahi' Iarovame ana' i Nebateo, ie nampanan-kakeo Israele fa tsy nadò'e. ⁴ Mpiarak' añondry t'i Mesà* mpanjaka' i Moabe, vaho natolo'e amy mpanjaka' Israeley ty vik' añondry rai-hetse naho ty volon' añondrilahy rai-hetse. ⁵ Fe naho fa nihomake t'i Akabe le niola amy mpanjaka' Israeley ty mpanjaka' i Moabe.

⁶ Niavotse i Somerone t'Iehorame mpanjaka henane zay le vinolili'e iaby t'Israele, ⁷ vaho nañitrik' am' Iehosafate mpanjaka' Iehoda, ty hoe: Fa niola amako ty mpanjaka' i Moabe; hindre lia amako haname i Moabe an-kotakotake v'iheo? Le hoe re: Hionjomb' eo, hoe te ihe izaho, hoe ondati'oo ondatikoo, hoe soavala'o o soavalakoo. ⁸ Le hoe re, Hiary aia ty hionjonan-tika mb'eo? Le hoe ty natoi'e: Mb'amy lalañe miranga an-dratraratra' i Edomey. ⁹ Aa le nimb'eo i mpanjaka' Israeley, naho i mpanjaka' Iehoday, naho ty mpanjaka' i Edome; fito andro ty niaria' iareo tsy aman-drano ho a i valobohòkey ndra ho a o hare nañorikeo. ¹⁰ Le hoe ty mpanjaka' Israele! Hankàñe! toe kinanji' IEHOVÀ hifanontoñe o mpanjaka telo retoañe hanolora'e am-pità' i Moabe. ¹¹ Fe hoe t'Iehosafate: Tsy amam-pitoki' IEHOVÀ hao ty atoañe hañontanean-tika am' IEHOVÀ? Le nanoïñe aze ty raik' amo mpitoro' i mpanjaka' Israeleio, ami' ty hoe: Atoa t'i Elisà ana' i Sefate, i mpañilin-drano am-pità' i Eliày. ¹² Le hoe t'Iehosafate, Ama'e ty tsara' IEHOVÀ. Aa le nizotso mb'ama'e mb'eo ty mpanjaka' Israele naho Iehosafate, naho ty mpanjaka' i Edome. ¹³ Le hoe t'i Elisà amy mpanjaka' Israeley: Inoñ' ama'o raho? Akia mb'am-pitokin-drae'o naho mpitokin-drene'o aña. Le hoe ty mpanjaka' Israele ama'e: Aiy! fa kinanji' IEHOVÀ hifanontoñe o mpanjaka telo retoañe hanolora'e am-pità' i Moabe. ¹⁴ Le hoe t'i Elisà, Kanao veloñe t'IEHOVÀ i Màroy ijohañako, naho tsy nihaoñeko ty fiatrefa' Iehosafate mpanjaka' Iehoday, le toe tsy ho nitoliheko rehe, tsy ho nitreako. ¹⁵ Indeso mpititike raho henaneo. Aa ie nititike i mpititikey le niheo ama'e ty fità' IEHOVÀ; ¹⁶ le hoe re, Hoe ty natoro' IEHOVÀ: Tsitsiho talahake ty vavatane toy. ¹⁷ Fa hoe ty tsara' IEHOVÀ: Tsy hahaonin-tioke nahareo, tsy hahaisak' orañe, fe ho atsadrano ty vavatane toy vaho hitoho-drano, ie naho o añombe naho hare' areoo. ¹⁸ Toe maivañe am-pivazohoa' IEHOVÀ o raha zao; le hatolo'e am-pità' areo ka o nte-Moabeo. ¹⁹ Ho fofohe' areo ze fonga rova aman-kijoly, naho ze hene rova soa, naho ho fira'e' areo ze atao hatae soa, naho songa hazi' areo ze rano manganahana, vaho sindre hampiantoe' areo am-bato ze toetse an-tane soa.

²⁰ Ie maraindray, va'e amy fisoroñañey, le hehe te nihirike Edome ty rano vaho niatsa-drano i taney. ²¹ Aa ie jinanji' o hene nte-Moabeo te

* **3:4** Mesà: entañe; fandrombahane

nionjomb'eo i mpanjaka rey hialia'e, le sindre nikanjieñe ze nahafiombe fikalañe naho o zoke'eo vaho nijohañe añ'efe-tane eo. ²² Aa ie nañampitso te nitroatse, le nimilemiletse amy ranoy i àndroy, aa naho nioni' o nte-Moabeo i rano eroy le hoe hamenan-dio; ²³ le hoe iereo: Lio 'nio: vata'e nifandrapake o mpanjakao, vaho songa nifanjevo an-drañe'e t'indaty. Antao hikopake ry Moabe. ²⁴ Aa ie nivotrak' an-tobe' Israele eo, nitroatse o nte-Israeleo nandihitse o nte-Moabeo, toly ndra nitriban-day nisitake am'iereo. Le linafa' iareo an-kaozarañe ty tane' i Moabe. ²⁵ Fonga rinotsa' iareo mañambane o rovao; le songa ondaty nandretsake ty vato'e amy ze atao tane soa iaby; vaho natsafeñe; hene zinenje' iareo ze rano manganahana, sindre finira' iareo ze hatae soa; naho tsy i Kir' karese avao ty nisia mbe reketse kijoli-vato; aa le niarikoboñe aze o mpampipiletseo vaho dinemo' iereo. ²⁶ Ie oni' i mpanjaka' i Moabey te loho nampangirifiry aze i hotakotakey, le rinambe'e t'indaty fiton-jato nahafitarike fibara, hiboroboñake mb'amy mpanjaka' i Edomey mb'eo f'ie tsy nahalefe. ²⁷ Rinambe'e amy zao ty tañoloñoloña'e ho nandimbe aze hifehe, vaho nisoroña'e ambone' i kijoliy ey. Akore amy zao ty fitorifiha' Israele kanao nienga, nimpoly mb'an-tane' iareo aña.

4

¹ Nitoreo amy Elisà ty rakemba raik' amo tañanjomba' o anam-pitokio, nanao ty hoe: Nihomake i valiko, mpitoro'oy, le fohi'o te nañeveñe am' IEHOVÀ i mpitoro'oy; vaho nipok' eo ty mpampisongo hangalake ty ana-dahiko roe hondevo'e. ² Le hoe t'i Elisà ama'e: Ino ty hanoeko ho azo? italilio, ino o hanaña'o añ' anjomba'oo. Le hoe re: Tsy aman-draha añ'anjomba ao ty mpitoro'o ampela naho tsy vatavo menake raik' avao. ³ Le hoe re: Akia, indramo vatavo amo mpitraq-tanañe ama'o iabio, vatavo kapaike; le ko mindrañe tsy ampeampe. ⁴ Mimoaha amy zay vaho agabeño ama'o naho amy ana-dahi'o rey i lalañey, le adoaño amo vatavo iabio, vaho aviho ty pea. ⁵ Aa le nieng' aze re naho narindri'e ama'e naho amo ana'eo i lalañey, le nandesa' iereo vatavo vaho nañiliña'e. ⁶ Ie hene nipea o vatavoo, le hoe re amy ana'ey: endeso vatavo tovo'e. Fa hoe re ama'e: Tsy amam-batavo ka. Aa le nijihetse i menakey. ⁷ Nimb'eo re nitalily amy 'ndatin'Añaharey. Le hoe re: Akia, aletaho i menakey, le ondroho i songoy le miveloma amy sisay, ihe naho i ana-dahi'o rey.

⁸ Ie te indraik' andro, naho ho niranga i Sonamý t'i Elisà, le teo ty rakemba mpañarivo; nanjitse aze hikama mofo. Ie amy zao, ndra mbia' mbia niary mb' eo re le nitsile mb'eo hikama mofo. ⁹ Le hoe re amy vali'ey: Inao, apotako te ondaty miavak' aman' Añahare i miary amantika nainai'ey. ¹⁰ Ehe, antao handranjy efetse kedek' an-tafo ey naho hasian-tika fandreañe naho latabatse naho sezta vaho fitàn-jiro ty ao ho aze; aa ie miheo mb' aman-tikañ' atoy, le ao ty hiziliha'e. ¹¹ Teo te indraik' andro, niary eo re nimoak' am-batsa ao le nandre. ¹² Le hoe re amy Gekazý, mpitoro'ey, Kanjio i nte-Sonamiy. Aa le kinanji'e, vaho nijohañe añatrefa'e. ¹³ Le hoe re amy mpitoro'ey, Isaontsio ty hoe: Hehe, niatrak' anay rehe amo fañasoañe iabio; aa le inoñe ty hanoeñe ho azo? ho saontsieñe amy mpanjakay hao, ndra amy mpifehe i valobohòkeiy? Le hoe ty natoi'e: Mimoneñe am'ondatekoo raho. ¹⁴ Le hoe re, Ino arè ty hanoeñe? le hoe t'i Gekazý: Toe tsy aman' ana-dahy re, vaho fa bey ty vali'ey. ¹⁵ Le hoe re, Kanjio. Aa ie nikanjia'e, inge ie nijohañe an-dalam-bey eo. ¹⁶ Le hoe re: Ie mibalike ty taoñe ami'ty andro tinendre toy, le

hiotroñe ana-dahy rehe. Le hoe re: Aiy! ry talèko, ry ondatin' Añahareo, ko mandañitse amo anak'ampata'oo. ¹⁷ Fe niareñe i rakembay, nisamak' ana-dahy amy sa zay, ie nibalike ty taoñe, ty amy saontsi' i Elisà ama'ey.

¹⁸ Ie nibey i ajajay, le teo ty andro, t'ie nihitrike mb'aman-drae'e, mb' amo mpanatakeo mb'eo. ¹⁹ Le hoe re aman-drae'e: Ty lohako, ty lohako. Le hoe re amy mpitoro'ey: Babeo mb' aman-drene'e mb'eo. ²⁰ Le nendese'e naho nasese'e aman-drene'e; ie nitobok' añ'ongo'e eo am-para' te tsipinde mena vaho nikenkañe. ²¹ Niañambone mb'eo re vaho nahitsi'e am-pandrea' indatin' Añaharey le narindri'e i lalañey vaho niakatse. ²² Kinanji'e amy zao i vali'ey nanao ty hoe: Ehe, ahitrifo amako ty mpitoroñe, naho ty borike, hihitrifako mb' indatin' Añaharey mb'eo vaho himpoly. ²³ Le hoe re, Ino ty handenà'o aña te anito? tsy pea-bolañe, tsy SABATA. Le hoe re: Mbe ho soa. ²⁴ Aa le dinia'e i borike'ey, le hoe re amy mpitoro'ey, Endeso, mionjona; le ko malaoñe ty amako naho tsy ivolañako. ²⁵ Le nionjomb' am' indatin' Añahare am-bohi' Karmeley re. Aa ie nahatalake aze indatin' Añaharey te eroy, le hoe re amy Gekazý, mpitoro'ey: Ingo, eroy i nte-Sonamiy. ²⁶ Ehe mihitrihitrifa hifanalaka ama'e le añontaneo ty hoe: Jangam-b'iheo? mbe soa hao i vali'oy? mbe soa hao i ana'oy? le hoe ty navale'e: Mbe soa. ²⁷ Ie pok' amy 'ndatin' Añahare an-kaboañey, le nifihine'e o fandia'eo. Nimb'eo t'i Gekazý hameve aze; fa hoe indatin' Añaharey: Apoho, fa mafaitse ama'e ty fiai'e, naho naeta' IEHOVÀ amako; tsy nitaroña'e. ²⁸ Le hoe re: Nisalala ana-dahy hao raho ry talèko? tsy nanoeko ty hoe hao: Ko mamañahy ahy? ²⁹ Aa le hoe re amy Gekazý: Midiaña vania, rambeso am-pità'o i kobaikoy, le akia mb'eo; ie mifanalaka ama'ondaty, ko mañontane; ie añontaneane, ko manoiñe; le ampandreo an-tarehe' i ajajay i kobaikoy. ³⁰ Hoe ty rene' i ajajay: Kanao veloñe t'IEHOVÀ, naho veloñe ty fiai'o, tsy hieng' azo raho. Aa le niongake re nañorik' aze. ³¹ Niaolo iereo t'i Gekazý, le napo'e antarehe' i ajajay i kobaiñey; fe po-feo naho fitsanoñañe. Nibalik' amy zay re hifanalaka vaho natalili'e ty hoe: Mboe tsy nisotrake i ajajay. ³² Ie nimoak' añ' anjomba ao t'i Elisà zoe'e te nivetrake i ajaja nandre am-pandrea'ey. ³³ Aa le nizilik' ao re naho narindri'e am' ie roe i lalañey, vaho nihalaly amy IEHOVÀ. ³⁴ Niongake re naho nandre amy ajajay, natoho'e am-bava'e ty falie'e; an-tañä'e o fità'eo, amo maso'eo o fihaino'eo naho niatatse ama'e vaho nihamafana ty sandri' i ajajay. ³⁵ Nibalike re, nibelobelio amy trañoy ao, le nibalike, nihitsy ama'e indraike; nihatsihe im-pito i ajajay vaho nabolana' i ajajay o maso'eo. ³⁶ Tinoka'e t'i Gekazý ami'ty hoe: Kanjio i nte-Sonamiy. Le tinoka'e. Aa ie nimoak' ao, hoe re: Intoy o ana'oo. ³⁷ Nizilik' ao re nibabok' am-pandia'e eo, nindròdreke mb'an-tane naho rinambe'e i ana-dahi'ey vaho niavotse.

³⁸ Ie nibalike mb'e Gilgale mb'eo t'i Elisà; nisalikoeñe i taney; naho nitobok' aolo'e o anam-pitokio, le hoe re amy mpitoro'ey, Apoho ama'e i valàñe jabajabay le anokono ahandro o anam-pitokio. ³⁹ Niakatse mb'an-tetek' ey ty raike hitsongo añañe le naharendreke vahen' ala naho tsinongo'e naho natsafe'e sarevazavozavo i siki'ey, vaho pinatepate'e am-balàñe ao, fe tsy napota'e te inoñe. ⁴⁰ Aa le naili' iareo hikama' ondatio. Ie nikama amy natokoñey iereo le nipazake ty hoe, O ondatin' Añahareo, fikoromahañe ty am-balàñe ao. Le tsy nahafikama ama'e iereo. ⁴¹ Aa hoe re, Endeso atoy i lilañey, le nadoa'e am-balàñe ao zay, le hoe re: Amoaro ondatio hikama, le tsy nijoy ka ty am-balàñe ao. ⁴² Pok' eo ka t'indaty

boake Baale-salisà*, ninday mofo boak' amo loha-voao mb'am' indatin' Añaharey, vonga-mofo hordea roapol; naho tsako-le an-koro'e ao. Le hoe re anjotso ondatio hikama. ⁴³ Fa hoe i mpitoro'ey, Akore ty hanjotsoako toy am'ondaty zatoo? Fa hoe re: Anjotsò ondatio hikama, fa hoe ty nafè' IEHOVÀ: Toe hikama iereo vaho hanisa. ⁴⁴ Aa le nanjotsoa'e le nikama iereo vaho nanisa, ty amy tsara' IEHOVÀ.

5

¹ Ni-ondaty ra'elisy aman-talè'e t'i Naamane*, mpifeleke ty valobohò' i Arame, nanan-kasy amy te tinolo' IEHOVÀ fandrebahañe ho a i Arame; fanalolahy nahasibeke ondatio, f'ie niangamae. ² Teo te niakatse am-pirimboñañe o nte-Arameo naho ninday ty ajaja ampela an-drohy boak' an-tane' Israele aña, ie ty niatrake ty tañanjomba' i Naamane. ³ Le hoe re amy rakemba talè'ey, Lonike te tamy mpitoky e Somerone aney ty talèko, le ho nijangañ' amy haangamae'ey. ⁴ Aa le nimb'eo re nitalily aman-talè'e ty hoe: Hoe zao naho ty hoe ty natalili' i anak' ampataña boak' an-tane' Israele. ⁵ Le hoe ty mpanjaka' i Arame. Akia, henaneo, le hañitrifako taratasy ty mpanjaka' Israele. Le nienga re ninday talenta volafoty folo naho bogady volamena eneñ-arivo vaho fiovan-tsaroñe folo. ⁶ Le nendese'e mb'amy mpanjaka' Israele aña i taratasy nanao ty hoe: Ie henaneo, ami'ty fiavi' ty taratasy toy ama'oy, ingo fa niraheko mb'ama'o t'i Naamane mpitoroko, hañafaha'o i haangamae'ey. ⁷ Aa ie namaky i taratasiy i mpanjakay le rinia'e o siki'eo nanao ty hoe, Andrianañahare v'iraho hahafate naho hahaveloñe, te nirahe' ondatio amako t'indaty toy hañafahañe ty haangamae ama'e? Aa le isafirio naho oniño t'ie manao lie-drokoñe amako. ⁸ Aa ie jinanji' i Elisà, ondatin' Añahare, te nandriatse ty saro'e i mpanjakay, le nirahe'e mb'amy mpanjakay ty hoe: Akore ty nandriata'o saroñe? Ampombao mb' amako mb' etoa hahafohina'e te amam-pitoky t'Israele. ⁹ Aa le nimb'eo t'i Naamane rekets' o soavala'eo, naho i sarete'ey, vaho nijohañe an-dala' i Elisà eo. ¹⁰ Nañitrifa' i Elisà irake nanao ty hoe: Akia, misasà im-pito am' Iordaney, le ho jangañe ty sandri'o vaho halio. ¹¹ Fe niavotse mb'eo t'i Naamane, le hoe re amy hatorifi'ey: Inay ie, nataoko te tsy mete tsy ho niakatse amako, ho nijohañe eo nikanjy ty tahina' IEHOVÀ Andrianañahare'e, le hañelahela fitañe ambone' i rarey hañafaha'e i haangamaey. ¹² Tsy lombolombo' ze hene rano' Israele hao ty Amanà† naho ty Par'pare‡, oñe e Damesèk' ao? Tsy hamake hisasa ami'ty raik' am' iereo haliovako? Le nitsambolitio'e fa nitorítotse. ¹³ Niharinea' o mpitoro'eo nanao ty hoe. O roaeko, naho nampanoe' i mpitokiy raha ra'elisy, tsy ho nanoe'o? Àntsake t'ie nanao ty hoe: Misasà, halio? ¹⁴ Aa le nizotso mb'eo re nilipotse im-pito am' Iordaney, ty amy saontsi' indatin' Àñahareiy; le nibalike indraike ho hambañe ami'ty nofon' anak' ajaja ty nofo'e, vaho nalio, ¹⁵ le nibalike mb'am' indatin' Añaharey, ie naho o mpindre-lia ama'e iabio; nimbeo re nijohañe añatrefa'e, nanao ty hoe: Fohiko henaneo te tsy aman-Añahare ty tane toy naho tsy e Israele ao avao. Ie amy zao, ehe, andrambeso ravoravo amo mpitoro'oo. ¹⁶ Fa hoe re: Kanao veloñe t'IEHOVÀ ijohañako, zaho tsy handrambe. Ndra te nosihe'e handrambe, nifoneñe. ¹⁷ Le hoe t'i Naamane, Miambane ama'o, tsy hatolotse amo mpitoro'oo hao ty tane ho entam-borike roe? Amy te le lia'e tsy hañenga horoañe ndra hanao soroñe amo 'ndrahare ila'eo

* **4:42** Baale-salisà; Tale mamehe telo; * **5:1** Naamane: Tsomerentsere'e; soa vinta † **5:12** Amanà: rinafetse vato; anjomba ‡ **5:12** Par'pare: sorotombahañe

o mpitoro'oo henane zao naho tsy am' IEHOVÀ avao. ¹⁸ Fe amo raha zao, ehe, te hapo' IEHOVÀ ty hakeom-pitoro'o, te ie mimoak' an-kiboho' i Rimone ty talèko hitalaho naho manazok' an-tañako hibokoboko an-kiboho' i Rimone ao; te hado' IEHOVÀ i tahi' o mpitoro'ooy, zaho miambane an-kiboho' i Rimone ao. ¹⁹ Le hoe re ama'e Akia, an-kanintsiñe. Aa ie nisitake eroa hoek' eo, ²⁰ le hoe ty natao' i Gekazý mpitoro' i Elisà, indatin' Añaharey, Inge te napo' i talèko t'i Naamane nte-Arame, ie tsy nandrambe am-pità'e o nendese'eo. Aa kanao veloñe t'IEHOVÀ, hihitrihity mb'ama'e raho hangalak' ama'e. ²¹ Aa le niheañe' i Gekazý t'i Naamane, le ie niisa' i Naamane t'ie nañeañe aze, le nizotso an-tsarete'e hifañaoñe ama'e, vaho hoe re: manintsiñe hao? ²² Le hoe re, Mbe soa, fa nañirak' ahy i talèkoy, hinday ty hoe: Inao, pok' amako aniany ty ajalahy roe anam-pitoky boak' am-bohi' Efraime aña, Ehe, anoloro talenta volafoty naho fiovan-tsiky roe. ²³ Le hoe t'i Naamane, Aa naho tea'o rambeso talenta roe. Le nañosik' aze vaho nafato'e an-koroñe roe ao ty talenta volafoty roe mitraok' ami'ty fiovan-tsaroñe roe naho nampipoha'e ami'ty mpitoro'e roe vaho nendese' iareo aolo'e mb'eo. ²⁴ Ie avy an-tamboho ey, le rinambe'e am-pità' iareo o rahao, naho napo'e añ' anjomba ao; naho nirahe'e mb' eo indaty rey vaho nienga. Nimoak' ao re nijohañe añatrefa' i talè'ey. ²⁵ Le hoe t'i Elisà ama'e. Hirik' aia v'iheo Gekazý? Le hoe re: Tsy nimb' aia o mpitoro'oo. ²⁶ Aa hoe re tama'e: Tsy nindre ama'o hao ty troko, ie nitolik' amy sarete'ey indatiy hifanalaka ama'o? Andro handrambesan-drala ke handrambesan-tsikiñe naho tanen' olive naho tanembahe naho añondry naho añombe naho lahilahy mpitoroñe vaho ampela mpitoroñe hao henaneo? ²⁷ Aa le hipitek' ama'o naho amo tiri'oo nainai'e ty haangamae' i Naamane. Aa le angamae foyt mikatsatsaoke re te niavota'e.

6

¹ Hoe o anam-pitokio amy Elisà, Hehe te loho maifitse ama'ay ty findreza'ay fimoneñe ama'o etoañe. ² Ehe, angao handenà'ay mb'am'Iordaney mb'eo, songa hangalake ty boda'e boak' ao handranjia'ay akiba himoneña'ay. Le hoe re, Akia. ³ Le hoe ty raike, Ee te ho no'o ty hindre-lia amo mpitoro'oo. Le hoe ty natoi'e: Homb'eo raho. ⁴ Aa le nindreza'e. Ie pok'am' Iordaney, le namira hatae. ⁵ Fe nadebo' ty raike i boda'ey, le nipitsik' an-drano ao ty lela' i feko'ey vaho hoe re, Hoke, talè, nindrameñe 'nio. ⁶ Le hoe indatin' Añaharey, aia ty nijoroboña'e? Le natoro'e aze i niphoha'ey. Aa le nibira hatae kede re nañifik' aze ey, nampitsikafoñe i viñey. ⁷ Le hoe re ama'e rambeso. Aa le nahiti'e ty fità'e nandrambe aze.

⁸ Nialy amy Israele amy zao ty mpanjaka' i Arame, le nisafiry amo mpitoro'eo, nanao ty hoe; An-koe naho an-koe ao ty hitobeako. ⁹ Le nampañitrike mb' amy mpanjaka' Israelemb'eo indatin' Añaharey, ty hoe: Asoao rehe tsy hiary an-koe eo, amy t'ie homba'o nte-Arameo. ¹⁰ Aa le nañirak' amy toetse natoro naho nahatahata' indatin' Añaharey azey vaho nitaòa'e i toetsey, tsy indroe tsy indraike. ¹¹ Aa le nahatsimboetse ty arofo' i mpanjaka' i Aramey i rahay, le kinoi'e o mpitoro'eo vaho nanoa'e ty hoe: Tsy hatoro' areo amako hao te ia aman-tika ty mpiamy mpanjaka' Israele? ¹² Le hoe ty mpitoro'ee, Tsie, ry talè mpanjakako; i Elisà, mpitoki' Israele ty mitalily amy mpanjaka' Israele ty entañe saontsie'o añ'efem-pandrea'o ao.

¹³ Le hoe re: Akia, rendreho te aia, soa te hampihitrifeko aña ty hangalak' aze. Le natalily ama'e t'ie e Dotane* ao. ¹⁴ Aa le nañiraha'e soavala naho sarete vaho ty lahialeñe ama'e, nañarikoboñe i rovay te haleñe. ¹⁵ Aa ie nitroatse maraindray ty mpitoro' indatin' Añaharey, naho niavotse, indroy ty valobohòke reketsé soavala naho sarete niarikatoke i rovay. Le hoe i mpitoro'ey ama'e, Hankàñe, ry talèko! Akore ty hanoen-tika? ¹⁶ Le hoe ty natoi'e: Ko hembañe, fa maro ty aman-tika te am' iereo. ¹⁷ Aa le niloloke t'i Elisà nanao ty hoe: Ry IEHOVÀ, ihalaliako, ampibeaho o maso'eo hahatre; le sinoka' IEHOVÀ o maso' i mpitoro'eio le nahaisake te indroy, nanitsike i vohitsey ty mpiningi-tsoavalá naho sareten' afo niarikatok' i Elisà. ¹⁸ Aa ie nizotso mb' ama'e mb'eo o nte-Arameo le nihalaly amy IEHOVÀ t'i Elisà ami'ty hoe: Ehe lafao hagoa ondatio. Aa le pinao'e ty hafè iereo ty amy saontsi' i Elisà. ¹⁹ Le hoe t'i Elisà am' iereo, Tsy ie ty lalañe toy, tsy ie ka ty rova toy; oriho raho vaho haseseko mb' amy 'ndaty paiae' areoy. Le kinozozò'e mb'e Somerone mb'eo. ²⁰ Ie amy zao, naho nivotrake e Somerone ao iereo le nanao ty hoe t'i Elisà. Ry IEHOVÀ, sokafo o fihaino ondaty retoaño, hahaisake. Aa le nampibolanahe' IEHOVÀ ty fihaino ondaty reo, vaho nahaisake te heheke, am-po' i Somerone ao. ²¹ Le hoe ty mpanjaka' Israele amy Elisà, ie nioni'e, O aba, ho lafaeko hao? ho zevoñeko ambane hao? ²² Le hoe ty natoi'e: ko lafae'o. Ho nizevoñe'o hao o nitsepahe'o am-pibara naho fale'oo? Anjotsø mahakama naho rano, hikamà'e, hinoma'e, himpolie' iareo mb' an-talè' iareo aña. ²³ Aa le nihalankañe'e takataka, naho nikama naho ninoñe iereo vaho nirahe'e mb' aman-talè' iareo aña. Aa le tsy niheo mb' an-tane Israele mb'eo ka o mpirimbon-dahindefo' i Arameo.

²⁴ Ie aña, le natonto' i Benhadade mpanjaka' i Arame i valobohò'e iabiy, le nionjomb'eo namandroñe i Somerone. ²⁵ Nanilofen-kasalikoañe ty Somerone henane zay; le niarikatoheñe ampara' te naletake volafoty valompolo ty loham-borìke naho volafoty lime ty tain-deho am-pahèfa' ty kabe†. ²⁶ Nidratraitse ambone' i kijoliy ty mpanjaka' Israele, le nitoreo ty hoe ama'e ty rakemba: Rombaho raho talèko, mpanjaka. ²⁷ Le hoe re, Naho tsy mandrombak' azo t'IEHOVÀ, aia ty hañolorako azo? he boak' antoem-pamofohañe, ke boak' am-pipiritan-divay ao? ²⁸ Le hoe ty mpanjaka ama'e: Ino o mañolañe azoo. Le hoe ty natoi'e: Nanao ty hoe amako ty rakemba, Atoloro hey i ana-dahi'oy ho hanentika anito le ho hanentika hamaray i ana-dahikoy. ²⁹ Aa le kinetre'ay i ana-dahikoy naho nihane'ay; le hoe ty asako ama'e amy loakandroy, Atoloro ka i ana-dahi'oy hihinanantikañe; fe naeta'e i ana-dahi'ey. ³⁰ Ie nahajanjiñe ty enta' i rakembay i mpanjakay le rinia'e o saro'eo, le nitonjohize'e ty lia'e amy kijoliy, f'ie nandrendrehe' ondatio, heheke te lamba-gony ty an-tsandri'e. ³¹ Le hoe re: Ee te hafetsan' Añahare amako naho mandikoatse, naho mbe hipetak' amy Elisà ana' i Safate ty añambone'e te anito. ³² Fe niambesatse aña'anjomba'e ao t'i Elisà, naho nitrao-piambesatse ama'e o androanavio; le nañitrike irake hiaolo aze mb'eo i mpanjakay fe mbe tsy pok' eo i nahitrikey, le hoe re amo androanavio: Oni' areo hao te nañitrife' ty anam-pamono tia ty lohako? Inao, ie pok'eo i irakey, arindrino i lalañey naho tano mirindriñe ama'e i lalañey; aa tsy mañorik' aze hao ty fikatseakatseampañdia' i tempó'ey? ³³ Ie mbe nisaontsy am' iereo, le nivotrak' ama'e i irakey nanao ty hoe, Inao, boak' am' IEHOVÀ o hekoheko zao, ino ty mbe handiñisako IEHOVÀ?

* **6:13** Dotane: ty lily; ty lilitse. † **6:25** Kabe: 2 litatse

7

¹ Le hoe t'i Elisà, Mijanjiña ty tsara' IEHOVÀ, Hoe t'IEHOVÀ, Ie manao hoe io te maray le haletake sekele raike' an-dalambe' i Somerone eo ty kapoan' ampemba mona'e, vaho sekele raike ty vare hordea kapoake roe. ² Tinoi' ty mpifehe iatoam-pitá' i mpanjakay amy zao indatin'Añaharey ami'ty hoe: Inao! Ndra te nanoe' IEHOVÀ tsingarakarake ty andikerañe eñe, aia t'ie ho tendreke? Hoe re, Inay! ho isam-pihaino'o, fe tsy hikama'o.

³ Teo ty lahilahy angamae efatse am-pimoahan-dalambey eo; ie nifampivesoveso ty hoe, Ino ty hitobohan-tika etoa am-para' te mate? ⁴ naho manao ty hoe tika: Antao hizilik' an-drova: fe ho zoeñe ao i hasalikoañey vaho hivetrak' ao; ie mboe mitoboke etoa, le hikenkañe ka. Antao arè, hihotrake am-balobohò' o nte-Arameo; he apo' iereo velon-tika le ho veloñe, ke ho vonoe' iereo, le ho mate avao. ⁵ Aa le nióngake te nangoañe, nigodañe mb'an-tobe' o nte-Arameo; aa ie pok' añ' olo' i tobey, hehe t'ie tsy ama' ondaty. ⁶ Amy te nampijanjiñe' i Talè feon-tsarete o nte-Arameo, naho ty feon-tsoavala vaho ty fikoraham-balobohòke, le hoe ty nifanalilia' iereo: Inao, kinarama' i mpanjaka' Israele haname an-tika o mpanjaka' o nte-Kiteoo, naho o mpanjaka' o nte-Mitsraimeoo. ⁷ Aa le nióngake iereo nitriban-day te mangararak' atiñanañe, le nadoke o kiboho'eo naho o soavala'eo naho o borike'eo, naho nado' iareo i tobey hoe i teoy avao vaho niherereake mb'eo handrombak'ay. ⁸ Ie pok' añ'olo' i tobey i angamae rey, le nizilik' ami'ty kibohotse ao nikama naho ninoñe, naho nakare' iereo ty volafoty naho ty volamena naho sikiñe, le nenteñe mb'eo vaho naetake; nimoaha' iareo ty kibohotse raike ka le nangalak' ao naho nente' iereo vaho naetake. ⁹ Le hoe ty fifanaontsia' iareo, Tsy soa o anoen-tikañeo; toe andro fitalilian-tsoa androany, itika mitsiñe avao; aa naho liñisan-tika te manjirike i androy le hiambotrahamañ-pandilovañe; antao arè homb'eo hitalily amo añ'anjomba' i mpanjakaio. ¹⁰ Aa le nimb'eo iereo nitoka o mpitan-dalambeio, nitalily ty hoe; Nimb' an-toben-te Arame aña zahay, le hehe te leo ondaty tsy ao, po-piarañanaña' ondaty, fe soavala mirohy naho borike mirohy, vaho napoke ey avao o kibohotseo. ¹¹ Aa le nikoike o mpitan-dalañe, nitalily añ' anjomba' i Mpanjakay. ¹² Le nitroatse amy haleñey i mpanjakay nanao ty hoe amo mpitoro'eo, Hatoroko anahareo ty nanoa' o nte-Arameo aman-tika. Fohi' iareo t'ie kerè; aa le niakara' iereo i tobey hietak' an-kivok' ao, nikilily ty hoe: Ie miakatse i rovay iereo, le ho tsepahen-tika veloñe vaho himoak' amy rovay. ¹³ Aa hoe ty natoi' ty mpitoro'eo raike: Ehe, angao hendeseñe i soavala lime honka'e an-drova atoa rey—ndra t'ie manahake ty valobohò' Israele sisa ama'e ao; ie ho hambañe amy valobohò' Israele fa nagodrañey—antao hañirake naho handrendreke. ¹⁴ Rinambe' iereo ty sarete roe reketsé soavala; vaho nampihitrife' i mpanjakay hañorike i valobohò' o nte-Arameoy iereo ami'ty hoe: Akia mandrendreha. ¹⁵ Aa le norihe' iereo pak' am' Iordaney aña; le hehe te tsitsike sikiñe naho haraotse i lalañey, ze naria' o nte-Arameo amy falisa' iareoy. Aa le nimpoly o niraheñeo nitalily amy mpanjakay. ¹⁶ Niavotse mb'eo ondatio, nikopake ty tobe' o nte-Arameo. Aa le naetake sekele raike ty kapoak' ampemba mona'e, naho sekele raike ty kapoake vare-hordea roe, ty amy tsara' IEHOVÀ. ¹⁷ Tinendre' i mpanjakay hañambeñe ty lalambe' i mpifehe iatoam-pitá'ey; f'ie linialia' ondatio an-dalambey eo, le nivetrake hambañe amy nitokia' indatin'Añaharey, amy saontsi'e amy fizotsoa' i mpanjakay mb' ama'e mb'eoy. ¹⁸ Aa le nitendreke, hambañe amy sinaontsi' indatin'Añaharey amy mpanjakaiy ty

hoe: Vare-hordea kapoake roe, sekele raike, le ty kapoake bon' ampemba: sekele raike, ty ho zoeñe an-dalambei' i Somerone te hamaray manahake henanekeo. ¹⁹ Tinoi' i mpifehey ty hoe indatin' Añaharey: Eo hey; ndra te nanoe' IEHOVÀ tsingaragarake ty andikerañe eñe, tsy ho nitendreke o raha zao. Le hoe ty navale'e: Inao! ho isam-pihano'o, fe tsy hikama'o. ²⁰ Aa le zay ty nifetsak' ama'e kanao linialia' ondatio an-dalambey eo, vaho nihomake.

8

¹ Ie amy zao nisaontsy ty hoe amy rakemba amañ-anadahy nam-pisotrafe'e t'i Elisà: Miavota, le mañaveloa rekets' o añ'anjomba'oo le mitaveaña amy ze mete itaveaña'o, fa nikaike san-kerè t'IEHOVÀ; vaho hivotrak' an-tane atoy fito taoñe zay. ² Aa le nióngake i rakembay ty amy saontsi' indatin' Añaharey vaho nienga rekets' o añanjomba'eo nitaveaña fito taoñe an-tane' o nte-Pelistio. ³ Ie nimodo i fito taoñey le nimpoly boak' an-tane' o nte-Pelistio i rakembay; naho nimb'eo hitoreo i anjomba naho tane'ey amy mpanjakay. ⁴ Ie amy zao, nisaontsy amy Gekazý mpitoro' indatin' Añaharey i mpanjakay, ami'ty hoe: Ehe, atalilio amako, ze he'e ra'elahy nanoe' i Elisà. ⁵ Natalili'e amy mpanjakay amy zao ty nampihereña'e ho veloñe i nivetrakey, vaho ingo i rakemba nampisotrafeñe i ana-dahi'eiy, hitoreo i anjomba'e naho i tane'ey amy mpanjakay. Le hoe t'i Gekazý: O ry talèko mpanjaka, intoy i rakembay, ingo i ana-dahi'e nampihereña'e i Elisà ho veloñey. ⁶ Aa ie nañontane i rakembay i mpanjakay, le nitalilia'e. Aa le tinendre' i mpanjakay ty mpifehe, ami'ty hoe: Hene ampolio ama'e o niazeo, naho ty voka' i tete'ey sikal' amy andro nienga'e i taney am-para henane.

⁷ Nivotrake e Damesèke t'i Elisà, ie nisiloke t'i Benehadade mpanjaka' i Arame, le natalily ama'e ty hoe: Fa pok' eo indatin'Añaharey. ⁸ Le hoe i mpanjakay amy Kazaele*; endeso ravoravo am-pitá'o le akia mifañaoña amy 'ndatin'Añaharey, vaho ampañontaneo aze t'IEHOVÀ, ty hoe: Hibodañe ami' ty areteko toy hao raho? ⁹ Aa le nimb'eo t'i Kazaele hifañaoña'e reketse ravoravo am-pita'e naho ze hene raha soa' i Damesèke, kilankan-drameva efapolo, vaho nimb'eo re nijohañe añatrefa'e, nanao ty hoe: Nañirak' ahy i ana'o Benehadade mpanjaka' i Aramey hanao ty hoe: Ho jangañe hao raho amo aretekoo? ¹⁰ Le hoe t'i Elisà tama'e, Akia, isaontsio: Toe hibodan-drehe; fe nitoroa' IEHOVÀ t'ie toe hihomake. ¹¹ Le nampifahara'e fiatrehé aze ty lahara'e am-para' t'ie nisalatse; vaho nirovetse indatin' Añaharey. ¹² Le hoe t'i Kazaele: Ino o iroveta'oo ry talèko? le hoe ty natoi'e: Amy te apotako ty hankàñe hanoe'o amo ana' Israeleo; ho forototoe'o o rova' iareoo, ho lafae'o am-pibara o ajalahi'eo, hadasi'o ho demoke o keleia'eo vaho ho riate'o o rakemba mivesatseo. ¹³ Fa hoe t'i Kazaele: Ino ty mpitoro'o? amboa hao t'ie hanao o halosorañe zao? le hoe t'i Elisà: Fa natoro' IEHOVÀ amako te ihe ty ho mpanjaka' i Arame. ¹⁴ Aa le nienga i Elisà re, niheo amy talè'ey mb'eo vaho hoe re ama'e: Ino ty asa' i Elisà tama'o? Le hoe ty natoi'e: Tinaro'e amako t'ie toe hibodañe. ¹⁵ Ie te loak' andro, nandrambe lamba mateveñe, le nalo'e an-drano ao, naho nalama'e an-tarehe'e nametrek' aze vaho nifehe nandimbe aze t'i Kazaele.

¹⁶ Ie tan-taom-paha-lime' Iorame ana' i Akabe mpanjaka' Israele, le niorotse nifehe t'Iehorame† ana' Iehosafate mpanjaka' Iehodà. ¹⁷ Ie

* ^{8:8} Kazaele: nivazohoe' i Andrianañahare † ^{8:16} Iehorame: nampionjone' IEHOVÀ

niajalahy telopolo taoñe roe amby te niorotse nifehe; le nifehe valo taoñe e Ierosalaime ao. ¹⁸ Nañavelo an-tsata' o mpanjaka' Israeleo re, manahake ty nanoe' i anjomba' i Akabey; amy te nitañanjomba'e ty anak' ampela' i Akabe vaho nanao haloloñañe am-pivazohoa' IEHOVÀ. ¹⁹ Fe tsy narotsa' IEHOVÀ t'Iehodà, ty amy mpitoro'e Davidey, fa nafè'e ama'e te hitoroa'e failo hirehetse nainai'e amo tarira'eo. ²⁰ Niola ambanem-pitâ' Iehodà tañ' andro'e t'i Edome vaho nañorem-panjaka hifehe iareo. ²¹ Aa le nitsake mb'e Tsaire[‡] mb'eo t'Iorame rekets' o sarete'e iabio; le nitroatse haleñé naho zinevo'e o nte-Edome niarikoboñé azeo naho o mpifehe sareteo vaho nitriban-day mb' an-kiboho'e mb'eo ondatio. ²² Fe mbe niola ambanem-pitâ' Iehoda pak' androany t'i Edome. Niola ka t'i Libnà[§] henane zay. ²³ Aa naho o fitoloña' Iorameo naho o raha nanoe' iabio; tsy fa sinokitse am-bokem-pamoliliañé o mpanjaka' Iehodao hao? ²⁴ Nitrao-piròtse amandroae'e t'Iorame, le nalentek' aman-droae'e an-drova' i Davide ao; vaho nandimbe aze ho mpifehe t'i Ahkazià* ana'e.

²⁵ Tamy taom-paha-folo-ro' ambi' Iorame ana' i Akabe mpanjaka' Israeley le niorotse nifehe t'i Ahkazià ana' Iehorame mpanjaka' Iehodà. ²⁶ Roapolo-ro'amby taoñe t'i Ahkazià te namototse nifehe; le nifehe raitaoñe e Ierosalaime ao; Atalià[†], anak' ampela' i Omry mpanjaka' Israele, ty tahinan-drene'e. ²⁷ Nañavelo an-tsatan' anjomba' i Akabe re, nanao haloloñañe am-pivazohoa' IEHOVÀ, manahake ty nanoe' i anjomba' i Akabey, amy t'ie vinanton' anjomba' i Akabe. ²⁸ Ie nindre am' Iorame ana' i Akabe hialy amy Kazaele mpanjaka' i Arame e Ramote-gilade aña; le nahafere Iorame o nte-Arameo. ²⁹ Nimpoly mb'e Iezreele ao t'Iorame mpanjaka, himelaña'e amo fere natolo' o nte-Arameo aze e Ramà añaeo, ie nialy amy Kazaele mpanjaka' i Arame. Le nizotso mb'eo hitilike Iehorame ana' i Akabe e Iezreele ao amy hasilo'ey t'i Ahkazià ana' Iehorame mpanjaka' Iehodà.

9

¹ Tinoka' i Elisà mpitokiy ty raik' amo anam-pitokio, le hoe re ama'e: Diaño o toha'oo, le tintino an-taña'o ty paki-menake toy, vaho akia mb'e Ramote-gilade aña. ² Ihe mivotrak' eo, paiao t'Ieho* ana' Iehosafate, ana' i Nimsý, le mimoaha ao vaho ampiongaho añaivo' o rahalahi'eo, le ampiziliho an-traño, añaefe'e ao. ³ Rambeso amy zao i paki-menakey, le adoño añambone'e eo vaho ano ty hoe: Hoe ty nafè' IEHOVÀ; fa norizako ho mpanjaka' Israele rehe. Le sokafo i lalañey naho mivoratsaha vaho ko mihenekeneke. ⁴ Aa le nihitrike mb'e Ramote-Gilade aña i ajalahy anam-pitokiy. ⁵ Ie pok'eo, hehe te niambesatse eo o mpifehe' i valobohòkeio; le hoe re; Nafantok' ama'o raho, ry mpifehe. Le hoe t'Ieho. Ama' ia, amy zahay iaby toa? le hoe re: Ama'o, ry mpifehe. ⁶ Aa le niongake re nimoak' aña'anjomba ao, le nadoa'e amy aña'ambone'ey i menakey, le nanoa'e ty hoe: Hoe ty nafè' IEHOVÀ, Andrianañahare' Israele; fa norizako ho mpanjaka' ondati' IEHOVÀO rehe, hifeleke Israele. ⁷ Le ho zevoñe'o ty anjomba' i Akabe talè'o, hañavahako ty lio' o mpitoroko mpitokio naho ze hene lio' o mpitoro' IEHOVÀ am-pitâ' Iizebeleo. ⁸ Fonga havetrake ty anjomba' i Akabe naho songa haitoako amy Akabe ze mamany an-kijoly ke t'ie mirohy he midada e Israele ao. ⁹ Le hampanahafeko amy anjomba'

[‡] 8:21 Tsaire: kedekedeke; siloke, misotry § 8:22 Libnà: foty; hafotiañé * 8:24 Ahkazià: fitsephañañe; fahaoniñañe IÀ † 8:26 Atalia: ty andro' IEHOVÀ * 9:2 Ieho: Ie t'i Andrianañahare

Iarovame ana' i Nebate naho ty anjomba' i Baasa ana' i Akiiàty anjomba' i Akabe. ¹⁰ O amboao ty hihinañe Iizebele an-tete' Iezreele ey le tsy eo ty handeveñe aze. Sinoka'e amy zao i lalañey le nibotatsake mb'eo.

¹¹ Niavotse mb'amo mpitoro' i talè'eo mb'eo t'Ieho; le hoe ty raik' ama'e; Hene soa hao? Ino ty nomba' i seretsey ama'o? le hoe re am' iereo: Fohi' areo indatiy naho i enta'ey. ¹² Le hoe iereo: Vande zay; ehe atalilio ama'ay. Le hoe re: Hoe zao naho zao ty nisaontsie'e ami'ty hoe; Hoe ty nafè' IEHOVÀ; fa norizako ho mpanjaka' Israele rehe. ¹³ Nalisa amy zao, songa nangalake i sarimbo'ey, le nalafi'e ambane'e eo amy fanongà amboney, vaho pinopò' iereo i antsivay le nanao ty hoe; Mpanjaka t'Ieho! ¹⁴ Aa le kinilili' Ieho ana' Iehosafate, ana' i Nimsý t'Iorame—ie amy zao fa nañambeñe i Ramote-gilade t'Iorame, naho Israele iaby, ty amy Kazaele mpanjaka' i Arame ¹⁵ fe nimpoly mb'e Iezreele ao t'Iorame hijangaña'e amo fere natolo' o nte-Arameo aze t'ie nialy amy Kazaele mpanjaka' i Arameio. —Le hoe t'Ieho, Naho zao ty safiri' areo, le ko apo' areo ndra raike tsy hipoliotse boak' an-drova hañitrike talily e Iezreele aña.

¹⁶ Aa le nijoñ'an-tsarete t'Ieho, nimb' e Iezreele mb'eo; amy te natindry ao t'Iorame; naho nizotso mb'eo ka t'i Ahkazià mpanjaka' Iehodà hitilike Iorame. ¹⁷ Nahatalake i firimboña' Iehoy ie nigodañe mb'eo ty mpijilo am-pitalakesañ' abo' Iezreele ey, le hoe re: Mahatrea mpirai-lia raho. Le hoe t'Iorame, Angalao mpiningi-tsoavala vaho ampihitrifo hifanalaka am' iereo, hanao ty hoe: An-kanintsiñe hao? ¹⁸ Aa le ninigitse an-tsoavala ty hifanalaka am' iereo vaho nanao ty hoe: Hoe i mpanjakay: an-kanintsim-bao? Le hoe t'Ieho: Hanoe'o ino ze o fañanintsiñe zao? Miotaha mb' ambohoko ao. Le hoe i mpijiloy; Niheo am' iereo mb'eo i irakey fe tsy mimpoly. ¹⁹ Niraheñe an-tsoavala ka ty faharoe, ie pok' ama'e eo le nanao ty hoe: Hoe i mpanjakay: Am-pañanintsiñe hao? le hoe ty natoi' Ieho: Hanoe'o ino ze o fañanintsiñe zao? Miotaha mb' ambohoko ao. ²⁰ Le hoe i mpijiloy: Nifanalaka'e, fe tsy mimpoly; toe manahake ty findesa' Ieho ana' i Nimsý i findesa'ey; ie mpitratràñe. ²¹ Le hoe t'Iorame, Halankaño! Le hinalanka' iereo ty sarete'e: Aa le niavotse mb'eo t'Iorame mpanjaka' Israele naho i Ahkazià mpanjaka' Iehodà, songa an-tsarete'e, nionjomb'eo hifanalaka am' Ieho, vaho nisalakaeñe an-tete' i Nabote[†] nte-Iezreele ey. ²² Ie amy zao, naho niisa' Iehorame t'Ieho, le nanao ty hoe: an-kanintsiñe hao, ry Ieho? Le hoe ty natoi'e: Fañanintsiñ' aia? kanao tsifotofoto o hakarapiloa' Iizebele rene'oo naho o famoreha'eo? ²³ Nabali' Iorame i sarete'ey[‡] le nitriban-day le nanoe' ty hoe amy Ahkazià, Fitak' ate ry Ahkazià. ²⁴ Fe nabitso' Ieho an-kaozara'e iaby i fale'ey, naho trinofa'e an-tsakamamovo'e eo t'Iorame naho nipotitse ami'ty fo'e ao i ana-paley, vaho nitsingoritrítse an-tsarete'e ao. ²⁵ Le hoe t'Ieho amy Bidkare[§], mpifehe'ey. Endeso, naho avokovokò an-tete' i Nabote nte-Iezreele ao. Tiahio t'ie nihoridañen-tika t'i Akabe rae'e le hoe ty nitsarae' IEHOVÀ ty ama'e: ²⁶ Toe nitreako omale ty lio' i Nabote naho ty lio' o ana'eo, hoe t'IEHOVÀ, le havahako an-tetek' atoy rehe, hoe t'IEHOVÀ. Aa le endeso re avokovokò amy tetekey ty amy tsara' IEHOVÀ zay. ²⁷ Ie niisa' i Ahkazià mpanjaka' Iehodà le nitsondemboke ty lay mb' an-dala' i trañon-goloboñey mb'eo, le nañorik' aze t'Ieho, nanao ty hoe: Tomboho an-tsarete'e ao, ie ka, le nivoa amy fionjonam-be Gore* mb'eo marine' Ibleame[†] ey naho niherereake

[†] 9:21 Nabote: tsara, toky [‡] 9:23 Heb; i fita'ey [§] 9:25 Bidkare: fere aña'arofo; fanaintai-masioñe * 9:27 Gore: anam-biby [†] 9:27 Ibleame: ondaty haehae; miketrake

mb'e Megidò‡ mb'eo vaho nihomak'ao. ²⁸ Nitakone' o mpitoro'eo mb'e Ierosalaime mb'eo vaho nacenteke an-kiborin-droae'e an-drova' i Davide ao. ²⁹ An-taom-paha-folo-raik' ambi' Iorame ana' i Akabe ty niorota' i Ahkazià nifehe Iehodà.

³⁰ Ie nivotrake e Iezreele ao t'Ieho, le tsinano' Iizebele; le binatra'e o maso'eo naho sinatro'e i loha'ey, vaho nitilihitse an-dalan-kede. ³¹ Aa ie nimoak' an-dalam-bey eo t'Ieho, le hoe i rakembay: Nampanintsiñañe hao t'i Zimrý§ t'ie namono i talè'ey? ³² Niandra laharaña mb' amy lalan-kedey re nanao ty hoe: Ia ty mpiamako? Ia? Nitangarike ama'e ty mpiatrake telo ndra roe. ³³ Le hoe re: Avokovokò. Aa le nafetsa' iareo ambane naho nifitse amy rindriñey naho amo soavalao ty lio'e vaho nilialantomboke. ³⁴ Ie nizilik' ao naho nikama naho ninoñe; le hoe re, Ehe henteo i rakembam-pàtsey, le aleveño; amy t'ie anam-panjaka. ³⁵ Aa ie nimb' eo handeveñe aze, tsy nanjo naho tsy i haran-doha'ey naho o tombo'eo naho o lela-pità'eo, ³⁶ le nimpoly iereo nitalily ama'e; le hoe re: Zay ty nitsara' IEHOVÀ nampisaontsie'e i mpitoro'e Elià nte-Tisbý, ty hoe: An-toe' Iezreele eo ty hihinana' o amboao ty nofo' Iizebele; ³⁷ vaho ho tay ambone' ty toe' Iezreele eo ty lolo'e; tsy mone hatao' ty hoe: Etoa t'Iizebele.

10

¹ Ie amy zao, nanañ' anake fitom-polo e Somerone ao t'i Akabe. Aa le nanokitse taratasy t'Ieho vaho nampihitrife'e mb'e Somerone mb'eo, amo mpifehe' Iezreeleo, naho amo androanavio, vaho amo mpañabey o ana' i Akabeoo, nanao ty hoe: ² Ie mivotrak' ama' areo ty taratasy toy, zoeñe te ama' areo o anan-talè' areoo naho sarete reke-tsoavala naho rova vaho fialiañe; ³ le paiao ty soa mañeva amo anan-talè' areoo, le ajoño am-piambesan-drae'e eo vaho mialia ho a i anjomban-talè' areoy. ⁴ F'ie nangebahebake, nifanao ty hoe: Hehe te roe ty mpanjaka tsy nahafiatatre aze; akore arè ty hijohañan-tika? ⁵ Aa le nañitrik' am' Ieho ty talè' i anjombay naho i bein-drovay naho o androanavio vaho i mpañabey i ajaja reiy, ty hoe; Mpitoro'o zahay, le hene hanoe'ay ze hatoro'o anay; tsy aman-dahilahy hanoe'ay mpanjaka; aa le ano ze soa am-pihaino'o. ⁶ Nanokira'e taratasy fañindroe'e, nanao ty hoe; Aa ie ho mpiamako vaho mahafitsendreñe ty feoko, le rambeso ty loha' o lahilañin' anan-talè' areoo vaho miavia amako e Iezreele atoy hamaray manahake henaneo. O anam-panjakao amy zao, i fitompolo rey, le tam' ondati-bei' i rovaio amo mpañabey iareoo. ⁷ Aa ie pok' am' iereo i taratasiy, le rinambe' iereo i anam-panjaka rey, naho zinevo' iareo indaty fitompolo rey naho najoñe an-koroñe ao o loha' iareoo vaho nampihitrifeñe mb'e Iezreele mb'eo. ⁸ Nandoak' ao amy zao ty ìrake, nitalily ama'e, ty hoe: Fa nendese' iereo ty loha' o ana-dahi' i mpanjakaio. Le hoe re, Apoho am-botry roe am-pimoahañe an-dalambey eo pake maraindray. ⁹ Ie maraindray, niavotse le nijohañe eo, nanao ty hoe am' ondaty iabio: Votsotse nahareo; Heheke, nikilily amy talèkoy raho le nanjevoñ' aze; fa ia ka ty nañoho-doza amo retoañeo? ¹⁰ Mahafohina te ndra loli'e tsy hipok' an-tane amy nitsaràe' IEHOVÀ i anjomba' i Akabeiy, fa nanoe' IEHOVÀ i tsinara'e añamy mpitoro'e Eliàiy. ¹¹ Fonga zinevo' Ieho ze sehanga' ty anjomba' i Akabe e Iezreele ao, naho ondati-bei'eo naho ze hene longo'e naho o mpisoro'e iabio, ampara' te tsy aman-konka'e. ¹² Niavotse amy zao re nienga mb'eo vaho nigodañe e Somerone ao. Ie nioza an-trañom-pañitsifam-bolon' añondry an-dalañe

‡ 9:27 Migido(ne): fifamotoañe; voka'e sarotse; § 9:31 Zimrý: sabo, mpisabo; vahe

ey, ¹³ le nifanampe aman-drolongo' i Ahkazià, mpanjaka' Iehoda, naho nanao ty hoe; Ia v'inahareoo? vaho hoe ty natoi' iareo: Longo' i Ahkazià zahay, mizotso mb'eo hifañontane amo anam-panjakao naho amo ana' i mpanjaka-ampelaio. ¹⁴ Le hoe re: Itsepaho veloñe. Aa le rinambe veloñe vaho zinevo' iereo an-kobo' i trañom-pihitsifañey t'indaty efa-poloro' amby; le tsy napo'e sehanga'e.

¹⁵ Ie nienga ao, le tendreke Iehonadabe* ana' i Rekabe, ie nimb' eo hifanalaka ama'e; le nañontanea'e ty hoe: Mazava hao ty arofo'o manahake ty troko amo arofo'oo? Eka, hoe ty natoi' Iehonadabe. Aa naho zay, atoloro ahy o fità'oo. Le nahiti'e ama'e i fità'ey vaho rinambe'e amy sarete'ey. ¹⁶ Le hoe re: Mindreza amako, hahaisaha'o ty fahimbañako am' IEHOVÀ. Aa le najo'e an-tsarete'e ao. ¹⁷ Ie nivotrake e Somerone le fonga linihi'e ze nisia' i Akabe e Somerone ao, ampara' te nimongore'e, ty amy tsara' IEHOVÀ nitsarae'e amy Eliày. ¹⁸ Hene natonto' Ieho amy zao ondatio le nanoe'e ty hoe; Nitoroñe i Baale tsy ampeampe t'i Akabe; fa hitoroñe aze fatratse ka t'Ieho. ¹⁹ Aa le koiho iaby o mpitoki' i Baaleo, ze hene mpitalaho ama'e, o fonga mpisoro'eo, le ko apo'o ndra raike; fa hanao sorom-bey amy Baale raho, tsy ho veloñe ze tsy eo. Fe am-pamañahiañe ty nanoe' Ieho i hoe zay hanjamana'e o mpitalaho amy Baaleo. ²⁰ Le hoe t'Ieho: Añefero fivory miambake amy Baale. Le kinoi' iereo. ²¹ Aa le nañitrik' am-panitsihañañe Israele t'Ieho; le nimb'eo iaby o mpitalaho amy Baaleo, ampara' t'ie fonga niavy tsy poke raike. Ie nimoak' an-tsokemitraha' i Baaley le ninitse sikal' am-pata'e pak'an-tondohà'e i anjomba' i Baaley. ²² Le hoe re amy mpamandroñe saroñey, Añakaro sikiñe iaby o mpitalaho amy Baaleo. Le sindre nañakara'e saroñe. ²³ Nimoak' añ'anjomba' i Baaley t'Iohabe rekets' Iehonadabe ana' i Rekabe; le hoe re amo mpitalaho amy Baaleo; Paiavo, le rendreho tsy ho zoeñe ama' areo ao ndra raik' amo mpitoro' IEHOVÀ fa mpitoro' i Baale avao. ²⁴ Aa le nimb' ao iereo hañenga naho hisoroñe. Ie amy zao fa nanendre ondaty valompolo alafe'e ao, ami'ty hoe: Naho mipolititse ty raik' am' ondaty hatoloko am-pitá' areoo le ty fiai' i nañaha azey ty hisolo ty fiai'e. ²⁵ Aa ie vata'e nigadoñe i fisoroñañey, le hoe t'Ieho amo mpañambeñeo naho amo mpifeheo. Mimoaha, le zevòño; ko apo' areo hiakatse, leo raike. Aa le zinevo' iereo an-delam-pibara; le navokovoko' o mpañambeñeo naho o mpifeheo alafe'e ao vaho nizilik' añañate' ty efe' i Baale ao. ²⁶ Nakare' iereo o hazomanga añañombaa' i Baaleo, le niforototoeñe. ²⁷ Nakoroma' iereo i hazomanga' i Baaley naho narotsa' iereo i anjomba' i Baaley vaho nanoe' iereo fieveñañe am-para' henanekeo. ²⁸ Zay ty namongora' Ieho i Baale am' Israele. ²⁹ Fe, tsy napo' Ieho ty hakeo' Iarovame ana' i Nebate, i nampanan-tahiñañe Israele amy bania volamena e Betele naho e Dane ao rey. ³⁰ Le hoe t'IEHOVÀ am'Ieho, Ami'ty hasoa nanoe'o a masoko amy nitoloña'o amy anjomba' i Akabeiy, ie hene nanoe'o ze tan-troko, le hiambesatse amy fiambesa' Israeley o ana'oo am-para'ty tariratse fah'efatse. ³¹ Fe tsy nihaõne' Ieho añañampón' arofo ty fañaveloa'e amy Tsara' IEHOVÀ Andrianañahare' Israeley, vaho tsy nisitaha'e o hakeo' Iarovame nampanan-tahiñañe Israeleo.

³² Niorotse nampitomotse Israele t'IEHOVÀ; le linafa' i Kazaele o añañolontane' Israeleo iabio; ³³ boak' am' Iordaney maniñanañañe, i tanen-Gilade iabiy, o nte-Gadeo, naho o nte Reobeneo, vaho o nte-Menasèo, boak' amy Aroere, añañilam-bavatane' Arnone eo le i Gilade naho i Basane. ³⁴ Aa

* **10:15** Iehonadabe Iondadabe: matarike Iir 35:8

naho o fitoloña' Ieho ila'eo naho ze he'e nanoe'e, i haozara'e iabiy, tsy fa sinokitse am-bokem-pamoliliañe o mpanjaka' Israeleo hao? ³⁵ Nitrao-piròtse aman-droa'e t'Ieho, ie nalente' iareo e Somerone ao. Nandimbe aze nifehe t'Iehoakaze[†] ana'e. ³⁶ Roapolo-valo' amby taoñe ty nifehea' Ieho Israele e Somerone ao.

11

¹ Ie nirendre' i Atalià, rene' i Ahkazià te nivetrake i ana-dahi'ey, le niongake, nanjamañe ze hene tabirim-panjaka. ² Fe rinambe' Iehosebae* anak' ampela' Iorame mpanjaka, rahavave' i Ahkazià, t'Ioase[†], ana' i Ahkazià, naho kinizo'e amo anam-panjaka zinamañe, vaho naeta'e tsy ho trea' i Atalià, ie rekets' i mpiatra'ey, an-trañom-pandreañe ao, le tsy vinono. ³ Enen-taoñe t'ie nietake nindre ama'e añ' anjomba' IEHOVÀ ao, ie nimpanjaka-ampela' i taney t'i Atalià. ⁴ Aa naho tsatoke i taompaha-fitoy, le nampihitrike t'Iehoiada‡, rinambe'e o mpifehe zatoo naho o mpifelekeo naho o mpañambeñeo, naho nampihovae'e añ' anjomba' IEHOVÀ naho nifañina'e naho nampifanta'e añ' anjomba' IEHOVÀ ao vaho natoro'e iareo i anam-panjakay. ⁵ Le linili'e ty hoe: Zao ty hanoe' areo, ty am-paha-telo' areo, o himoak' ao amy SABATAIO, ro hañambeñe ty anjomba' i mpanjakaio— ⁶ le nanoeñe an-dalambei' i Sore§ eo ty faharoe'e, naho ty faha-telo'e tan-dalambez amboho' o mpigaritseo ao— higaritse i anjombay ho mpanebañe. ⁷ Le ty ila'e roe amo hiavotse amy SABOTSEY iabio ty hañambeñe i anjomba' IEHOVÀ hañaro i mpanjakay. ⁸ Hañarikatoke i mpanjakay nahareo, songa amam-pialiañe am-pit  e, le zev  o ze mimoak' amy fiafariañey; naho mindreza amy mpanjakay am-piavota'e vaho am-piziliha'e. ⁹ Aa le hene nanoe' o mpifehe zatoo i nandilia' Iehoiada, mpisoroñey; songa nandrambe ondati'eo, o hizilike amy SABATAIO naho o hiavotse boak'ao amy SABOTSEIO vaho niheo am' Iehoiad   mpisoro  e mb'eo. ¹⁰ Le natolo' i mpisoroñey amo mpifehe-zatoo o lefo  e naho fikala' i Davideo, o ta  ' anjomba' IEHOVÀO. ¹¹ Aa le songa nijoha  e eo o mpañambeñeo reke-pialiañe am-pit  e, boak' ankavia' i anjombay pak' ankavana' i anjombay, niari' i kitreliy naho i kivohoy, nañarikatoke i mpanjakay. ¹² Nampiavote'e amy zao i anam-panjakay, le naombe'e ama'e i sabakam-panjakay, naho natolots' aze ty boke Hake, naho nanoe' iereo mpanjaka, naho noriza' iareo, vaho niteha-pit  e nanao ty hoe: Mahavelo  e ry mpanjaka.

¹³ Ie jinanji' i Atalià ty fa  enotsatsaha' o mpañambeñeo naho ondatio, le nimb' am' ondaty añ' anjomba' IEHOVÀO. ¹⁴ Naheo'e te intike nijoha  e marine' i faha  ey i mpanjakay ty amy lilitsey; le niariseho' i mpanjakay o mpifeheo naho o mpitan-trompetrao, naho fonga nirebeke ondati' i taneio vaho nampipop   trompetra. Aa le rinia' i Atalià o saro'eo, nikoaike ty hoe: Kilily! Kinia! ¹⁵ Le linili' Iehoiad   mpisoro  e o mpifehe-zatoo, o mpifelek' i valoboh  keio, ami'ty hoe: Akaro alafe' o miriritseo vaho lihiro am-pibara ze ma  orik' aze. (Ami'ty saontsi' i mpisoroñey nanao ty hoe: Ehe t'ie tsy havetrak' añ'anjomba' IEHOVÀ.) ¹⁶ Tsinepa' iareo am-pit  e le ie pok' am-pimoahan-tsoavala añ' anjombam-panjaka, le zinevo  ' eo re.

¹⁷ Le nanao fa  ina añivo' IEHOVÀ naho i mpanjakay naho ondatio t'Iehoiad  , t'ie fonga hondati' IEHOVÀ; vaho añivo' i mpanjakay naho

* 10:35 Iehoakaze: fana  a' IEHOVÀ; * 11:2 Iehosebae: hahenefa' IEHOVÀ, nifanta'e † 11:2 Ioase: mamoe'ai  e, mamorototo ‡ 11:4 Iehoiada: arofoana' IEHOVÀ § 11:6 Sore: misitake ndra mienga; miola

ondatio. ¹⁸ Nimb' añ' anjomba' i Baale mb'eo ze hene ondati' i taney nandrotsake naho nandorodemoke o kitreli'eo naho o sare'eo, vaho zinevo' iereo t'i Matane* mpisoro' i Baale añatrefa' o kitrelio. Le nanendre mpifehen' anjomba' IEHOVÀ i mpisoroñey. ¹⁹ Rinambe'e amy zao o mpifehe-zatoo naho o mpifeleke mpañambeñeo naho ondati' i taney iabio, le nazotso' iareo boak' añ'anjomba' IEHOVÀ i mpanjakay naho niary mb' an-dalambeim-pigaritse mb' añ' anjomba' i mpanjakay mb'eo. Le niambesara'e i fiambesam-panjakay. ²⁰ Nirebeke iaby ondati' i taneio naho nitofa i rovay ie fa zinevo' iereo am-pibara t'i Atalià añ' anjombam-panjaka ao.

12

¹ Fito taoñe t'Iehoase te niorotse nifehe. ² Tan-taom-paha-fitom-pifehea' Ieho ty namotora' Iehoase nifehe, le nifehe efa-polo taoñe e Ierosalaime ao. I Zibiè* nte Beereseba ty tahinan-drene'e. ³ Le nanao ty havantañañe am-pivazohoa' IEHOVÀ t'Iehoase amo hene andro nañanara' Iehoiada mpisoroñe azeo. ⁴ Fe mbe tsy nafahañe o toets-aboo; nitolom-pisoroñe naho nañembok' an-kaboañe ey avao ondatio.

⁵ Hoe t'Iehoase amo mpisoroñeo : Ze drala' o raha miavake nengaeñeo, o mimoak' añ' anjomba' IEHOVÀ, i vili-lohay, i drala mañeva ondaty kiraikiraikey, vaho ze drala entoen' arofo' ondaty hendese'e mb' añ' anjomba' IEHOVÀ mb'eo, ⁶ le hendesa' o mpisoroñeo, songa ondaty boak' amy nibanabana ama'ey, hamboareñe o vaky amy anjombaio, ndra aia' aia ty aharendrehañe te vaky. ⁷ Fe amy taom-paha roapolo-telo' ambi' Iehoase mpanjakay le mbe tsy namboare' o mpisoroñeo avao o vaky amy anjombaio. ⁸ Aa le kinanji' Iehoase t'Iehoiada mpisoroñe naho o mpisoroñeo, le nanao'e ty hoe: Manao akore te tsy namboare' areo o vaky amy anjombaio? Aa le ko rambese' areo i vola' o mibanabana ama' areooy, fa atoloro ho amo vaky añ' anjombao. ⁹ Aa le niantofa' o mpisoroñeo ty tsy handrambe drala am' ondatio, vaho tsy hanandily amy fañamboareñe o vaky amy anjombaio ka. ¹⁰ Rinambe' Iehoiada, mpisoroñe, ty vata le namosera'e hirik' an-tako'e eo, vaho napo'e marine i kitreliy, aña'ilila havana' ty fimoahañe aña'anjomba' IEHOVÀ ey; le nagorogoda' o mpisoroñe mpañambeñe i lalañaio ze hene drala nasese mb'añ' anjomba' IEHOVÀ mb'eo. ¹¹ Ie zoe' iereo te maro ty drala am-po' i vata aña'anjomba' IEHOVÀ, le nionjomb'eo ty mpitan-tsokim-panjaka naho ty mpisorom-bey nañiake i volay, vaho nandrohy aze an-kòntrañe ao. ¹² Natolo' iereo ampitá' o nanao i fitoloñañeio naho amo mpanandily aña'anjomba' IEHOVÀ i vola linanjay; le nikaramae' iareo o mpandranjo, naho o mpamboatse nitoloñe amy anjomba' IEHOVÀ; ¹³ naho o masò naho mpipèke vatoo naho nikaloñañe hatae naho vato hinaly hanosohañe o vaky aña'anjomba' IEHOVÀ, vaho ze he'e sinafiry hañamboareñe i anjombay. ¹⁴ Fe tsy nitsene fitovy volafoty ndra fampikipehañe ndra sajoa ndra trompetra ndra fanake inoñ' inoñe volamena ndra fanake volafoty ho a i anjomba' IEHOVÀ i drala najoñ' aña'anjomba' IEHOVÀ, ¹⁵ fa natolo' iareo amo nanao i fitoloñañeio, handranjo i anjomba' IEHOVÀ. ¹⁶ Mbore tsy nifamolily am'ondaty nanolorañe i drala am-pitáñe hañaramañe o nifanehakeoy; amy t'ie nitoloñ' an-dili-po. ¹⁷ Tsy nasese aña'anjomba' IEHOVÀ o dralan' engan-kakeo naho engan-dilatseo, amy t'ie fanaña' o mpisoroñeo.

* 11:18 Matane: ravoravo; orañe * 12:2 Zibiè: ose

¹⁸ Nionjomb'eo amy zao t'i Kazaele mpanjaka' i Arame, nialy amy Gate, naho tinava'e; vaho natoli' i Kazele mb'e Ierosalaime ty lahar'a'e.
¹⁹ Le rinambe' Iehoase mpanjaka' Iehoda o raha miavake iaby nengae' Iehosafate naho Iehorame naho i Ahkazià, roae'e, mpanjaka' Iehodao naho o raha nengae'eo vaho ze volamena iaby nizoeñe am-pañajan-drala añ' anjomba' IEHOVÀ naho añ' anjomba' i mpanjakay, vaho nampihitrite'e mb' amy Kazaele mpanjaka' i Arame mb'eo; le napo'e t'Ierosalaime. ²⁰ Ty fitoloña' Ioase ila'e, o tolon-draha'e iabio, tsy fa sinokitse am-bokem-pamoliliañe o mpanjaka' Iehodao hao? ²¹ Niongak' amy zao o mpitoro'eo; nikinia, vaho zinevo' iereo t'Iehoase e Bete-milò†, amy fizotsoañe mb'e Silà‡ mb' eoy. ²² Iozakare§, ana' i Simeate* naho Iehozabade† ana' i Somere‡, mpitoro'e, ty nañoho-doza ama'e, le nihomake vaho nalentek' aman-droae'e an-drova' i Davide ao; le nandimbe aze nifehe t'i Amatsià§ ana'e.

13

¹ Amy taom-paha-roapolo-telo' ambi' Iehoase ana' i Ahkazià, mpanjaka' Iehoday, ty namotora' Iehoakaze* ana' Ieho nifeleke Israele e Somerone ao vaho nifeleke folo-taoñe fito'amby, ² nanao haratiañe am-pivazohoa' IEHOVÀ, nañorike o hakeo' Iarovame ana' i Nebate nampanaña'e tahiñe Israeleo—tsy niviha'e. ³ Le nisolebotse am' Israele ty haviñera' IEHOVÀ, tolin-dra nainai'e nasese'e am-pitâ' i Kazaele mpanjaka' i Arame naho am-pitâ' i Benehadade ana' i Kazaele. ⁴ Aa le nitoreo am' IEHOVÀ t'Iehoakaze vaho hinao' IEHOVÀ; amy te nivazohoe'e ty famorekekeñañe Israele naho ty fanindria' i mpanjaka' i Aramey— ⁵ Le nitolora' IEHOVÀ mpandrombake, naho nivotsotse ambanem-pitâ' o nte-Arameo; vaho nimoneñe an-kibohotse indraike o ana' Israeleo, manahake te taolo. ⁶ Fe tsy napo' iareo o tahin' anjomba' Iarovameo, o nampanañan-kakeo Israeleo, te mone nañaveloa' iareo, ie nitambatse e Somerone ao i hazomangay. ⁷ Tsy nenga'e ondaty ka t'Iehoakaze naho tsy mpiningi-tsoavalalimampolo naho sarete folo vaho lahindefo rai-ale, amy te zinama' i mpanjaka' i Aramey iereo le nanoe'e hoe debok' am-pamofohañe eo. ⁸ Aa ty ila' o fitoloña' Iehoakazeo, o fifanehafa'e iabio naho o haozara'eo, tsy fa sinokitse amy bokem-pamoliliañe o mpanjaka' Israeleoy hao? ⁹ Nirotse aman-droae'e t'Iehoakaze, le nalentek e Somerone ao, vaho nandimbe aze am-pifeheañe t'Iehoase† ana'e.

¹⁰ Amy taom-paha-telopolo-fito' ambi' Ioase mpanjaka' Iehoday ty niorota' Iehoase ana' Iehoakaze nifehe e Israele e Somerone ao, le nifeleha'e folo-tao-eneñ' amby. ¹¹ Nanao raty am-pivazohoa' IEHOVÀ re, le tsy nenga'e ze fonga hakeo' Iarovame ana' i Nebate nampanaña'e tahiñe Israele, te mone nañaveloa'e. ¹² Ie amy zao ty ila' o fitoloña' Iehoaseo naho o fifanehafa'e iabio, naho o haozarañe nialia'e amy Amazià mpanjaka' Iehodao, tsy fa sinokitse amy bokem-pamoliliañe o mpanjaka' Israeleoy hao? ¹³ Nirotse aman-droae'e ao t'Iehoase; le niambesatse am-piambesa'e t'Iarovame vaho nalentek e Somerone ao t'Iehoase mindre amo mpanjaka' Israeleo. ¹⁴ Ie amy zao natindri' ty hasilofañe hampivetrek'aze t'i Elisà; le nizotso mb' ama'e mb'eo t'Iehoase

† **12:21** Bete-milò: kivohon-toem-pimoneñañe ‡ **12:21** Silà: an-damoke § **12:22** Iozakare: manan'enga * **12:22** Simeate: mahajanjiñe naho mañaoñe; † **12:22** Iehozabade: enga' i Talè; manan-engá ‡ **12:22** Somere: mpamandroñe; forompotse § **12:22** Amatsià: haozara' i Talè
* **13:1** Iehoakaze: fanaña' i Talè † **13:9** Ioase: Iehoase: mamoy ay, miforoforo

mpanjaka' Israele, nirovetse aze ami'ty hoe: Ry raeko, ry raeko, o sarete' Israele naho o mpiningi'eo! ¹⁵ le hoe ty Elisà ama'e, Andrambeso fale naho ana-pale; vaho nandesa'e fale aman' ana-pale. ¹⁶ Le hoe re amy mpanjaka' Israeley, Asampezo amo faleo ty fità'o, le nasampe'e ama'e eo i fità'ey. Le nasampe' i Elisà am-pità' i mpanjakay ty fità'e. ¹⁷ Le hoe re, Sokafo i lalan-kede atiñanañey; le sinoka'e. Le hoe t'i Elisà. Ahiririño, le nahiriri'e. Le hoe re: Ty ana-palem-pamotsora' IEHOVÀ, ty ana-palem-pandreketañe i Arame; fa hanjevo o nte-Arameo e Afekeo rehe ampara' te fongore'o. ¹⁸ Aa le hoe re : Rambeso o ana-paleo; le rinambe'e. Le hoe re amy mpanjaka' Israeley: Fofoho o taneo; le finofo'e in-telo vaho nijihetse. ¹⁹ Niviñera' indatin' Añaharey naho nanoa'e ty hoe : Akore te tsy finofo'o in-eneñe ndra in-dime; soa te ho linafa'o ampara te nimongotse t'i Arame; ie henaneo ho lafae'o intelo avao t'i Arame.

²⁰ Nihomake t'i Elisà, le nalenteke. Ie henane zay, mpaname i taney boataoñe o firimboña' i Moabeo. ²¹ Teo t'ie nandeveñe ondaty, le nitalakeseñe ty mpifañoso-malaso; naho nafetsa' iereo an-dona' i Elisà ao i loloy; ie vaho nioza amo taola' i Elisà i loloy le nisotrake vaho nijohañe am-pandia.

²² Finorekeke' i Kazaele amy ze hene andro' Iehoakaze t'Israele. ²³ Fe niferenaiña' IEHOVÀ naho nitretreze'e naho nihaoñe'e ty amy fañina'e amy Avrahame naho Ietsake vaho Iakobey le tsy ninò'e ty hamongotse ndra ty hañifike iareo boak' am-piatrefa'e heike. ²⁴ Nihomak' amy zao t'i Kazaele mpanjaka' i Arame; le nandimbe aze nifehe t'i Benehadade ana'e.

²⁵ Rinambe' Iehoase ana' Iehoakaze indraike boak' am-pità' i Benehadade ana' i Kazaele o rova tinava'e an' aly am-pità' Iehoakaze rae'eo. In-telo ty nandafa' Ioase aze vaho rinambe'e indraike o rova' Israeleo.

14

¹ Amy taom-paha-roe' Iehoase, ana' Iehoakaze mpanjaka' Israeley, ty niorota' i Amatsià ana' Ioase mpanjaka' Iehodà nifehe. ² Roapolo taoñe lime amby re te niorotse nifehe, le nifeleke roapolo taoñe sive amby e Ierosalaime ao. Iehoadinee nte-Ierosalaime, ty tahinan-drene'e. ³ Nanao ty hiti'e am-pivazohoa' IEHOVÀ re, fe tsy nanahake i Davide rae'e fa hambañe an-tsatan-drae'e Ioase ty fitoloña'e. ⁴ Mboe tsy nafaha'e aña o toets' aboo, mbe nanao soroñe naho nañoro tsotse amo toets-aboo avao ondatio. ⁵ Ie vaho nioreñe am-pità'e i fifeheañey le zinevo'e i mpitoroñe nañoho-doza aman-drae'e mpanjaka rey; ⁶ fe tsy vinono'e o ana' i mpamono reio ty amy sinokitse amy boke Hà' i Mosey, ie nandilia' IEHOVÀ ty hoe: Tsy ho vonoeñe ty amo ana'eo o roaeo, naho tsy ho vonoeñe ty aman-droae'e o anakeo; fa sindre i hakeo'ey ty hamonoañe ondaty. ⁷ Nizevoña'e ty rai-ale' i Edome am-bavatanen-tsira ao, le tinava'e añ'aly ty Selà*, ze natao'e ty hoe Ioktile† ampara henane.

⁸ Nampihitrike irak' amy Iehoase ana' Iehoakaze, ana' Ieho, mpanjaka' Israele t'i Amatsià nanao ty hoe: Antao hifañisa-daharañe. ⁹ Aa le nampañitrik' amy Amatsià mpanjaka' Iehoda t'Iehoase mpanjaka' Israele, ty hoe: Nampisangitrife' i hisatse e Lebanon aney amy mendoraveñe e Lebanon aña ty hoe: Atoloro amy ana-dahikoy i anak' ampela'oy ho vali'e; vaho niary eo o biby hako' i Lebanon nandalia i hisatsey. ¹⁰ Toe zinevo'o ty Edome vaho nampitoabotse azo ty arofo'o; isengeo, fe mitoboha aña'akiba'o ao. Ino ty hitoloña'o ty raty hikorovoha'o, ihe naho Iehoda rekets' ama'o? ¹¹ Fe tsy nañaoñe t'i Amatsià. Aa le nionjomb'eo t'Iehoase

* ^{14:7} Sela: vato † ^{14:7} Ioktile: nambanean'Añahare

mpanjaka' Israele, le nifañisa-daharañe amy Amatsià e Betesemese e Iehoda ao. ¹² Fe nikorovok' añ' atrefa' Israele t'Iehoda vaho songa nitriban-day mb'an-kiboho'e mb'eo. ¹³ Mbore tsinepa' Iehoase mpanjaka' Israele t'i Amatsià mpanjaka' Iehoda, ana' Iehoase, ana' i Ahatsià, e Betesemese le nimb'e Ierosalaime mb'eo vaho rinotsa'e i kijoli' Ierosalaimey boak' an-dalambei' i Efraime pak' an-dalambein-kotsoke eo, efa-jato kiho. ¹⁴ Le rinambe'e iaby ze volamena naho volafoty naho fàname nizoeñe añ' anjomba' IEHOVÀ naho amy fañajàm-barà añ' anjomba' i mpanjakaiy naho o ana-dahi'eo ho àntoke vaho nimpoly mb'e Somerone mb'eo. ¹⁵ Aa naho o fitoloña' Iehoase ila'eo, o fifanehafa'eo, ty haozara'e naho ty fialia'e amy Amatsià, mpanjaka' Iehoda, tsy fa sinokitse amy bokem-pamoliliañe o mpanjaka' Israeleoy hao? ¹⁶ Nitrao-pirotse aman-droae'e t'Iehoase, le nalenteke e Somerone ao mindre amo mpanjaka' Israeleo; le nandimbe aze nifehe t'Iarovame ana'e.

¹⁷ Mbe niveloñe folo taoñe lime amby nanonjohy ty fihomaha' Iehoase ana' Iehoakaze, mpanjaka' Israele t'i Amatsià ana' Ioase, mpanjaka' Iehoda. ¹⁸ Le ty ila' o fitoloña' i Amatsiào, tsy fa sinokitse amy bokem-pamoliliañe o mpanjaka' Iehodaoy hao? ¹⁹ Nikililien-dre e Ierosalaime ao le nipolitise mb'e Lakise[‡] aña; f'ie nampañitrifeñe e Lakise aña vaho zinevo ao. ²⁰ Nendese' iereo an-tsoavala, le nalenteke e Ierosalaime amandroae'e, an-drova' i Davide ao. ²¹ Rinambe' ze hene ondati' Iehoda t'i Azarià[§] ie nifolo-taoñ' eneñ' amby, ho mpanjaka handimbe i Amatsià rae'e. ²² Namboare'e t'i Elate naho nahere'e am'Iehoda vaho nirotse amandroae'e ao i mpanjakay.

²³ Ie amy taom-paha folo-lime ambi' i Amatsià ana' Ioase mpanjaka' Iehodà le niorotse nifehe e Somerone ao t'Iarovame ana' Ioase mpanjaka' Israele vaho nifeleke efa-polo taoñe raik' amby. ²⁴ Fe nanao haratiañe ampivazohoa' IEHOVÀ, tsy nisitaha'e o fonga hakeo Iarovame ana' i Nebate, nampanaña'e tahiñe Israeleo. ²⁵ Nahere'e ty efe-tane' Israele boak' amy fimoahañe e Kamatey* pak'an-dria' i Arabà[†] ty amy tsara' IEHOVÀ Andrianañahare' Israele, nitsarae'e am-pità' Ionà[‡] mpitoro'e, ana' i Amitay[§], mpitoky, nte-Gatakeferey*. ²⁶ Amy te nivazoho' IEHOVÀ ty hasotria' Israele, t'ie vata'e nafaitse; fa tsy eo ty nagabeñe ndra ty nadoñe hidada, ndra iaia ty hañolotse Israele; ²⁷ le tsy tsinara' IEHOVÀ ty hamaopohañe ty tahina' Israele ambanen-dikerañe ao; f'ie rinomba'e am-pità' Iarovame, ana' Ioase. ²⁸ Aa naho o fitoloña' Iarovame ila'eo, ze he'e nanoe'e, naho i haozara'ey, o fialia'eo naho ty nampibaliha'e am' Iehodà ho a Israele t'i Damesèke vaho i Kamate; tsy fa sinokitse amy bokem-pamoliliañe o mpanjaka' Israeleoy hao? ²⁹ Nirotse aman-droae'e mpanjaka' Israeleo t'Iarovame, vaho nandimbe aze nifehe t'i Zekarià[†], ana'e.

15

¹ Amy taom-paha roapolo-fito' ambi' Iarovame mpanjaka' Israele, ty niorota' i Azarià* ana' i Amatsià mpanjaka' Iehodà nifehe. ² Ni-folotaoñ'eneñ' amby re te niorotse nifeleke, le nifehe limampolo taoñe ro' amby e Ierosalaime ao; Iekoliae[†] nte-Ierosalaime, ty tahanan-drene'e.

[‡] **14:19** lakise: tsy tongereñe § **14:21** Azaria: olora' i Talè * **14:25** Kamate: Rova fatratse

[†] **14:25** Arabà: (liolio): forototo [‡] **14:25** Ionà: Deho § **14:25** Amitay: to * **14:25** Gata-kefere:

fampipiritañe ampongabé... [†] **14:29** Zekaria: naho Zakaria: fitiahiañe i Talè * **15:1** Azarià: mpianjiñe i Talè [†] **15:2** Iekoliae: maozatse ty am' IEHOVÀ

³ Nitolon-kavantañañe am-pivazohoa' IEHOVÀ re, hambañe amo hene fitoloñan-drae'e Amatsiào. ⁴ Fe mboe tsy nafahañe o toets' aboo; nitolompanao soroñe naho nañoro tsotse amo toets-aboo avao ondatio. ⁵ Linama' IEHOVÀ haangamae i mpanjakay ampara' ty andro nihomaha'e vaho nimoneñe añ' akiba navike ao. Iotame‡, ana' i mpanjakay, ty nifehe' i anjombay, naho nizaka ondati' i taneio. ⁶ Ty ila' o fitoloña' i Azariào, o nanoe'e iabio; tsy fa sinokitse amy bokem-pamoliliañe o mpanjaka' Iehodaoy hao? ⁷ Nitrao-pirotse aman-droae'e t'i Azarià, le nalenteke amandroae'e an-drova' i Davide ao; le nandimbe aze nifehe t'Iotame ana'e.

⁸ Amy taom-paha-telopolo-valo' ambi' i Azarià mpanjaka' Iehoday, te nifeleke Israele t'i Zekarià ana' Iarovame nem-bolañe e Somerone ao. ⁹ Nanao raty am-pivazohoa' IEHOVÀ re, manahak' an-droae'e, tsy nisitaha'e o hakeo nampanaña' Iarovame ana' i Nebate tahiñe Israeleo. ¹⁰ Nikinia aze t'i Salome§, ana' Iabese le zinevo'e añatrefa' ondatio, vaho vinono'e, le nandimbe aze nifeleke. ¹¹ Aa ty ila' o fitoloña' i Zekariào, oniño t'ie sinokitse amy bokem-pamoliliañe o mpanjaka' Israeleoy. ¹² Le niheneke ty nitsarae' IEHOVÀ am' Ieho ami'ty hoe; O ana'o pak' an-tariratse fah' efatseo ty hiambesatse amy fiambesa' Israeley, le zay ty ie. ¹³ Niorotse nifehe amy taom-paha-telo-polo-sive' ambi' i Ozià* mpanjaka' Iehodaiy t'i Salome ana' Iabese† le nifeleke volan-draike do'e e Somerone ao. ¹⁴ Nionjoñe boak'e Tirtsà t'i Menakeme‡ ana' i Gadý§, le nivotrake e Somerone eo, naho zinevo'e t'i Salome, ana' Iabese, e Somerone ao naho vinono'e vaho nandimbe aze nifeleke. ¹⁵ Aa naho o fitoloña' i Salome ila'eo, i kilily nanoe'ey, oniño t'ie sinokitse amy bokem-pamoliliañe o mpanjaka' Israeleoy. ¹⁶ Zinevo' i Menakeme amy zao ty Tifsà*, ze tama'e ao iaby naho o mañohok' azeo pake Tirtsà; amy t'ie tsy nisokafe' iereo; aa le linafa'e vaho niriate'e iaby ze rakemba nivesatse ao. ¹⁷ Amy taom-paha-telopolo-sive' ambi' i Azarià mpanjaka' Iehodà ty niorota' i Menakeme ana' i Gadý nifeleke Israele, le nifehe folo taoñe e Somerone ao. ¹⁸ Nanao raty am-pivazohoa' IEHOVÀ re, le tsy napo'e amo hene andro'eo o hakeo nampanaña' Iarovame ana' i Nebate tahiñe Israeleo. ¹⁹ Naname i taney t'i Pole† mpanjaka' i Asore‡, le natolo' i Menakeme amy Pole ty talenta§ volafoty arivo soa te ho ama'e ty fità'e hamantea'e i fifeheañey. ²⁰ Sinaze' i Menakeme drala t'Israele, boak' amo fanalolahy mpañalealeo, songa hakare' ondatio ty sekele limampolo hatolotse amy mpanjaka' i Asorey, vaho nibalik' aña i mpanjaka' i Asorey le tsy nitambatse amy taney. ²¹ Aa naho o fitoloña' i Menakeme ila'eo, ze hene nanoe'e, tsy fa sinokitse amy bokem-pamoliliañe o mpanjaka' Israeleoy hao? ²² Nitrao-pirotse amandroae'e ao t'i Menakeme, le nandimbe aze nifehe t'i Pekaià*, ana'e. ²³ Amy taom-paha-limampolo' i Azarià mpanjaka' Iehoday, te niorotse nifehe Israele e Somerone ao t'i Pekaià ana' i Menaheme; le nifeleke roe taoñe. ²⁴ Nanao ze raty am-pivazohoa' IEHOVÀ re; tsy nisitaha'e o tahi' Iarovame ana' i Nebate nampanaña'e hakeo Israeleo. ²⁵ Nikinia aze amy zao t'i Pekà† ana' i Remalià‡, sorotà'e, le nanjevoñ' aze e Somerone, amy fitalakesañ'

‡ 15:5 Iotame: Iòe ro vantaña § 15:10 Salome: tamben-kasoa; vale-fate * 15:13 Ozia: haozara' IEHOVÀ † 15:13 Iabese: maike; hasalarane ‡ 15:14 Menakeme: mpañohò § 15:14 Gadý: nte Gade: osen'A', Talèn-kafaleañe * 15:16 Tifsà: falariañe; fitsamboañañe; lia; † 15:19 Pole: voa-maike; fandrotsahañe ‡ 15:19 Asore; tane' i Sore: fale; zotike; hente § 15:19 Talenta: sekele 3000 ty talenta raike * 15:22 Pekaià: i sinoka' IEHOVÀ fihaino † 15:25 Pekà: fihaino misokake ‡ 15:25 Remalià: arova' IEHOVÀ

abo' i anjomba' i mpanjakaiy ao, rekets' i Argobe[§] naho i Ariè * vaho ondaty limampolo nte-Gilade nindre ama'eo; vinono'e, vaho nandimbe aze nifehe. ²⁶ Aa naho o fitoloña' i Pekaià ila'eo, o hene nanoe'eo, tsy fa sinokitse amy bokem-pamoliliañe o mpanjaka' Israeleoy hao?

²⁷ Amy taom-paha-limampolo-ro' ambi' i Azarià, mpanjaka' Iehodà, le niorotse nifehe e Israele e Somerone ao t'i Pekà ana' i Remalià vaho nifeleke roapololo taoñe. ²⁸ Nanao haratiañe am-pivazohoa' IEHOVÀ, tsy nisitaha'e o tahì' Iarovame ana' i Nebate, nampañaña'e hakeo Israeleo.

²⁹ Tañ' andro' i Pekà mpanjaka' Israele, ty nanamea' i Tiglate-pilèsere[†] mpanjaka' i Asore, le tinava'e t'Iione[‡], i Abel-bete-maakà[§], Ianoà*, i Kedeset[†], i Kazore[‡], i Gilade naho ze hene tane Naftalý vaho nendese'e an-drohy mb'e Asore aña. ³⁰ Kinilili' i Hoseà[§], ana' i Elà* t'i Pekà, ana' i Remalià, le linafa'e naho vinono'e vaho nandimbe aze nifehe amy taom-paha-roapololo' Iotame ana' i Ozià. ³¹ Aa naho o fitoloña' i Pekà ila'eo, o nanoe'eo, oniño t'ie misokitse amy bokem-pamoliliañe o mpanjaka' Israeleoy.

³² Amy tom-paharoe' i Pekà, ana' i Remalià, mpanjaka' Israeley, te niorotse nifehe e Iehodà t'Iotame ana' i Ozià. ³³ Roapololo taoñe lime amby re te niorotse nifeleke, le nifehe folo taoñe eneñ' amby e Ierosalaime ao, Ierosoae[†] ana' i Tsadoke, ty tahinan-drene'e. ³⁴ Nanao ty havantañañe am-pihaino' IEHOVÀ re, hene norihe'e ty satan-drae'e Ozià. ³⁵ Fe tsy nafahañañe aña o toets' aboo; mbe nanao soroñe naho nañenga ey ondatio. Namboare'e ty lalambei' ambone' i anjomba' IEHOVÀ. ³⁶ Aa naho o fitoloña' Iotame ila'eo, ze hene nanoe'eo, tsy fa sinokitse amy bokem-pamoliliañe o mpanjaka' Iehodàoy hao? ³⁷ Namototse nañirake i Retsine[‡] mpanjaka' i Arame naho i Pekà ana' i Remalià, haname Iehodà t'IEHOVÀ henane zay. ³⁸ Nitrao-piròtse aman-droae'e t'Iotame le nalentek' aman-droae'e an-drova' i Davide ao; vaho nandimbe aze nifehe t'i Ahkaze[§] ana'e.

16

¹ Niorotse nifehe t'i Ahkaze ana' Iotame mpanjaka' Iehodà amy taom-paha-folo-fito' ambi' i Pekà ana' i Remalià. ² Roapololo taoñe ty Ahkaze t'ie niorotse nifehe, le nifeleke folo taoñe eneñ' amby e Ierosalaime ao; f'ie tsy nanahake i Davide rae'e mpanao ty hiti'e am-pihaino' IEHOVÀ Andrianañahare'e. ³ Te mone nañavelo an-tsata o mpanjaka' Israeleo, mbore nampisorohe'e añafo i ana-dahi'ey, ami'ty haloloa' o kilakila ondaty nandroaha' IEHOVÀ aolo' o ana' Israeleoo. ⁴ Nanao soroñe naho nañenga amo toets' aboo re, naho amo haboañeo, le ambane' ze atao hatae mandrevake iaby.

⁵ Nionjomb'e Ierosalaime mb'eo amy zao t'i Retsine mpanjaka' i Arame, naho i Pekà ana' i Remalià mpanjaka' Israele hialy; le narikatohe' iareo t'i Ahkaze f'ie tsy nahagioke. ⁶ Nampoli' i Retsine amy Arame henane zay t'i Elate*, le rinoa'e boak' Elate ao o nte-Iehodao naho nivotrake Elate o nte-Edomeo vaho nimoneñe ao pak' androany. ⁷ Aa le nañitrike irak'

§ 15:25 Argobe: tane hoba * 15:25 Ariè: liona: farasy jabajaba † 15:29 Tiglate-pilèsere:
mpandrohy mpanese ‡ 15:29 Iione: heheke; fihaino; rano migoaña § 15:29 Abel-bete-maakà:
fiandraza' i Bete: akiba, Maakà: tinindry; tsorodea; mireketse * 15:29 Ianoà: mitofa;
mihenekeneke; mikinia † 15:29 kedese: fipaliraña ‡ 15:29 Kazore: Anjomba fatratse § 15:30
Hoseà: fandrombahaña * 15:30 Elà: kobay (hatae); haozaraña † 15:33 Ierosoae: ombelahy
mavo; fanañañe; lova ‡ 15:37 Retsine: zoton-tro; irake § 15:38 Ahkaze: mpandrambe;
mpanaña * 16:6 Elate: haozaraña; kobay

amy Tiglate-pilesere mpanjaka' i Asore re, nanao ty hoe; Mpitoro'o naho ana'o raho, mionjona mb' etoa naho rombaho am-pitam-panjaka' i Arame vaho am-pitam-panjaka' Israele, ie fa nitroatse amako. ⁸ Aa le rinambe' i Ahkaze ty volafoty naho ty volamena nizoeñe añ' anjomba' IEHOVÀ naho am-pañajam-barã añ' anjombam-panjaka ao le nampisangitrife'e ho ravoravo amy mpanjaka' i Asorey aña. ⁹ Nañaoñe aze ty mpanjaka' i Asore le nionjomb'e Damesèke mb'eo ty mpanjaka' i Asore nitavañe naho nendese'e an-drohy mb'e Kire[†] mb'eo ondati'eo vaho zinevo'e t'i Retsine.

¹⁰ Nimb'e Damesèke mb'eo t'i Ahkaze hifampigaoñe amy Tiglate-pilesere mpanjaka' i Asore, le niisa'e ty kitrely e Damesèk' ao; le nampihitrife' i Ahkaze mpanjaka amy Oriià[‡] mpisoroñe ty sare' i kitreliy, naho ty vinta'e—ty fitseneañe aze iaby. ¹¹ Aa le niranjie' i Oriià i kitreliy; i nañitrifa' i Ahkaze mpanjaka ama'e boake Damesèk' aña ty nitsenea' i Oriià mpisoroñe aze, vaho nimpoly boake Damesèke t'i Ahkaze mpanjaka. ¹² Aa ie pok' eo boake Damesèke i mpanjakay, nizoe' i mpanjakay i kitreliy; le nitotok' amy kitreliy i mpanjakay vaho nañenga ama'e; ¹³ nemboha'e i engan-koroa'ey, naho i engan-tsattrin' arofo'ey, naho nadoa'e eo i enga ranoy, vaho nafitse'e amy kitreliy ty lio' o engam-panintsiñañe. ¹⁴ Le navi'e boak' aolo' i anjombay i kitrely torisike añañatrefa' IEHOVÀ, ie boak' añivo' i kitreli'ey naho i anjomba' IEHOVÀ, vaho napo'e avara' i kitreli'ey eo. ¹⁵ Linili' i Ahkaze mpanjaka t'i Oriià mpisoroñe, ami'ty hoe: Amy kitrely jababajay ty isoroñañe maraindraiñe naho i enga-mahakama harivay naho i fisoroña' i mpanjakaiy naho i enga-mahakama'ey naho o fonga fisoroña' ondati' i taneio naho o enga mahakama' iareoo naho o enga-rano' iareoo, le afitsezo ama'e iaby ty lio' o soroñañe iabio naho ty lio' ze hene engaeñe; fe ho ahy hañontaneako i kitrely torisikey. ¹⁶ Aa le nanoe' i Oriià mpisoroñe iaby ty nandilia' i Ahkaze mpanjaka aze. ¹⁷ Tsinera' i Ahkaze mpanjaka ty lifi' o kalesio, le nakatra'e o kovetao; le nazotso'e boak' amo añombe-torisike ambane'eo i sajoa-beiy vaho napo'e ambone vato linamake eo. ¹⁸ Le nafaha'e amy anjomba' IEHOVÀ i lampalampa niranjieñe amy anjombay ho amo SABATAO naho i fimoahañe mb' añ' anjombam-panjaka alafe'ey, ty amy mpanjaka' i Asorey. ¹⁹ Aa naho o fitoloña' i Ahkaze ila'e nanoe'eo, tsy fa sinokitse amy bokem-pamoliliañe o mpanjaka' Iehodaoy hao? ²⁰ Le nitrao-piròtse aman-droae'e t'i Ahkaze naho nalenteke aman-droae'e an-drova' i Davide ao vaho nandimbe aze nifehe t'i Kezkià[§] ana'e.

17

¹ An-taom-paha folo-ro' ambi' i Ahkaze mpanjaka' Iehodà ty niorota' i Hosea ana' i Elà nifehe Israele e Somerone ao sive taoñe. ² Le nanoe'e haratiañe am-pivazohoa' IEHOVÀ, f'ie tsy nanahake o mpanjaka' Israele taolo'eo. ³ Nionjomb' ama'e mb'eo t'i Salmanesere* mpanjaka' i Asore; le ninjare mpitoro'e t'i Hosea vaho nandroroñe ama'e. ⁴ Fe nahaoniñe kilily amy Hosea ty mpanjaka' i Asore, amy te nañitrifa'e irake t'i So[†], mpanjaka' i Mitsraime vaho tsy ninday rorotse amy mpanjaka' i Asorey manahake ty lili'e boa-taoñe; aa le narindri'e an-drohy am-porozò ao. ⁵ Nionjomb'eo nanitsike i tane iabiy ty mpanjaka' i Asore le nigodañe mb'e Somerone vaho niarikatok' aze telo taoñe. ⁶ Amy taom-paha sive' i Hoseay, le naname i Somerone ty mpanjaka' i Asore vaho nendese'e mb'e Asore

[†] 16:9 Kire; rova; kijoly; fifañaoñañe [‡] 16:10 Oriià: ndra Orià: failoko t'IEHOVÀ § 16:20 Kezkià: haozara' IEHOVÀ * 17:3 Salmanesere: mirohy; fonitse; avake † 17:4 So: fañaranañe; lamba marerarera

mb' eo t'Israele le napo'e e Kalake[‡] vaho e Kabore[§] marine ty rano Gozane* an-drova' o nte-Madaio[†] aña.

⁷ Toly amy zao ty hakeo' o ana' Israeleo amy IEHOVÀ Andrianañahare' iareo, i nañakats' iareo an-tane' Mitsraime boak' am-pità' i Parò mpanjaka' i Mitsraimey, ie nañeveñe amo 'ndrahare ila'eo ⁸ naho nañavelo am-pañè' o kilakila' ondaty rinoa' IEHOVÀ añatrefa' o ana' Israeleoo vaho ty amo sata' o mpanjaka' Israeleo. ⁹ Nanoe' o ana' Israeleo am' IEHOVÀ Andrianañahare' iareo aña'etak' ao o tsy havokarañeo, nandranjy toets' abo an-drova' iareo iaby, boak' am-pitalakesañ' abo pak' an-drova mifahetse. ¹⁰ Naho najado' iareo amy ze atao haboañe naho ambane' ze hatae mandrevake iaby o Aserào naho o hazomangao; ¹¹ le nañembok' ao manahake o kilakila' ondaty sinoi' IEHOVÀ aolo' iareoo, vaho nandranjy raha tsereheñe hampiviñetse IEHOVÀ; ¹² ie nitoroñe o hazomanga nafè' IEHOVÀ am' iereoo ty hoe: Ko manao zao. ¹³ Mbore nanjehazehà' IEHOVÀ t'Israele naho Iehodà, aña'amo mpitokio naho o mpioniñe iabio, ami'ty hoe: Iambohò o sata rati' areoo, naho ambeno o fepèkoo naho o fañèko amy Hake linilikò an-droae' areo vaho nampihitrifeko ama' areo am-pità' o mpitoky mpitorokooy. ¹⁴ Fe tsy hinao' iereoo, te mone nampijiringàm-pititia, manahake o fititian-droae' iareoo, ie mboe lia'e tsy niato amy IEHOVÀ Andrianañahare' iareo. ¹⁵ Natorifi' iereoo o fañè'eo naho i nifañinà'e aman-droae' iareoy naho o taroñe nizehazehà'e am' iereoo; nañorike hakoahañe iere naho ninjare kòake, le nañorike o kilakila' ndaty nañohoke iareoo; o nafanto' IEHOVÀ am' iereoo te tsy itsikombeañe. ¹⁶ Nado' iareo ze hene lili' IEHOVÀ Andrianañahare' iareo, naho nampitranaha' iareo Aserà, naho bania roe, naho nampitroatse hazomanga naho nitalaho amy valobohòn-dindiñey, vaho nitoroñe i Baale. ¹⁷ Nampirangae' iereoo aña' afó o ana-dahy naho anak' ampela' iareoo, naho nanikily vaho namoreke, le nandeta-batañe hanao haloloañe am-pivazoho' IEHOVÀ hiviñera'e. ¹⁸ Aa le niviñera' IEHOVÀ t'Israele vaho nafaha'e am-pivazoho'a'e; leo raike tsy napo'e naho tsy i fifokoa' Iehodà avao. ¹⁹ Toe tsy nambena' Iehoda ka o lili' IEHOVÀ Andrianañahare' iareoo te mone nañavelo amo fañè' nitoloña' Israeleo. ²⁰ Fonga naforintse' IEHOVÀ ty tarira' Israele, le nampisotrie'e naho natolo'e am-pitam-pamaoke vaho nahifi'e boak' am-pivazoho'a'e. ²¹ Rinia'e boak' aña' anjomba' i Davide ao iereoo; le nanoe' iere mpanjaka t'Iarovame ana' i Nebate, le nasinta' Iarovame tsy hañorike IEHOVÀ t'Israele, ie nampanaña'e hakeo jabajaba. ²² Fonga nañavelo amo tahi' Iarovameo; tsy nisitaha' iareo; ²³ ampara' te nasinta' IEHOVÀ am-pivazoho'a'e t'Israele, amy tsinara'e am-pità' ze hene mpitoky mpitoro'ey. Aa le nase'e an-drohy boak' an-tane'e ao t'Israele, mb'e Asore aña am-para' te henane.

²⁴ Ninday ondaty boak'e Bavele naho Kote, naho Avà, naho Kamate, naho Sefarvaine aña ty mpanjaka' i Asore, vaho navotra'e amo rova' i Someroneo handimbe Israele; le nifanaña' iareo t'i Somerone vaho nimoneñe amo rova'eo. ²⁵ Ie namototse nimoneñe ao, naho mboe tsy nañeveñe am' IEHOVÀ, le nañiraha' IEHOVÀ liona nanjevoñe ty ila'e. ²⁶ Aa le nanao ty hoe amy mpanjaka' i Asorey iereoo: Tsy fohi' ze kilakila' ndaty navì'o naho navotra'o amo rova' i Someroneo ty lilin' Andrianañahare' i taney; toly ndra nañiraha'e liona, le inao, ie tsy mahafohiñe o lilin' Añahare' i taneio ty namonoa' o lionao. ²⁷ Le hoe ty nandilia' i mpanjaka'

[‡] 17:6 Kalake: fandambañañe le [§] 17:6 Kabore: mpandray anjara; mpireketse * 17:6 Gozane: volonañondry; mpamahaña [†] 17:6 Meday: tane añivo

i Asorey: Andeso mpisoroñe raike hirik' amo nasese' areo boak'ao; le ampom-bao mb'eo himoneñe ao hañòke iareo ty lilin' Andrianañahare' i taney. ²⁸ Aa le nimb' eo ty raik' amo mpisoroñe nendeseñé boake Someroneo le nimoneñe e Betele ao, vaho nanare'e ty hañeveñé am' IEHOVÀ. ²⁹ Fe fonga namboatse ty 'ndrahare'e i fifeheañe rey, le napo'e amo toets' abo rinanji' o nte-Someroneoo, songa fifeheañe an-drova nimoneña'e ao.

³⁰ Namboare' o nte-Baveleo ty Sokote-benote‡, naho namboare' o nte-Koseo t'i Nergale§, naho namboare' o nte-Kamateo ty Asimae*; ³¹ naho namboare' o nte-Avio ty Nibkaze naho i Tartake vaho sinodo' o nte-Sefarvaineo amy Adrameleke naho i Anameleke, 'ndrahare' o nte-Sefarvaimeo, añ'afó ao o ana' iareoo. ³² Mbore nañeveñé amy IEHOVÀ, mbore noriza' iareo boak' am' iareo ao ty mpisoron-toets' abo hitoloñé amo kibohon-toets' aboo ho a iareo. ³³ Nañondrañé am' IEHOVÀ iereo mbore nitoroñe o 'ndrahare' iareoo, ami'ty sata' o kilakila'ndaty nañakarañé iareo boak' am-pandrohizañé añeo. ³⁴ Mbe mañorike ty sata' iareo taolo pak' androany, tsy añaeveña' iareo t'IEHOVÀ, tsy ambena' iareo o fañè'eo naho o fepè'eo naho i Tsara'ey vaho o fepètse linili' IEHOVÀ o ana' Iakobe nikanie'e ty hoe Israeleoo; ³⁵ ie nanoa' IEHOVÀ fañina, vaho nafanto'e am'iereo ty hoe; Ko hembañe amo 'ndrahare ila'eo, ko ibokobokoña ndra itoroñañé, ndra isoroñañé; ³⁶ fa IEHOVÀ nañakatse anahareo an-tane Mitsraime an-kaozaran-dra'elahy naho am-pitáñé natorakitsi'e, Ie ty añaeveña' areo, le Ie ty italahoa' areo vaho Ie ty hisoroña' areo; ³⁷ le o fañèo naho o fepètseo naho i Hake vaho o lily sinoki'e ama' areoo ro hambena' areo hanoeñe nainai'e; fa tsy añaeveñañé o 'ndrahare ila'eo; ³⁸ le ko haliño i fañina nanoeko ama' areoy; vaho ko hembañe amo 'ndrahare ila'eo; ³⁹ IEHOVÀ Andrianañahare' areo avao ty añaeveña' areo; le Ie ty hamotsotse anahareo am-pitá' o fonga rafelahio. ⁴⁰ F'ie tsy nañaoñé, te mone nanao ty nahazatse. ⁴¹ Aa le nañeveñé am' IEHOVÀ o fifeheañeo mbore nitoroñe o hazomanga' iareoo; orihe' o ana'eo naho o anan' ana'eo ty satan-droae' iareo pak'androany.

18

¹ Ie tan-taom-paha-telo' i Hosea, ana' i Elà mpanjaka' Israele, le niorotse nifehe t'i Kezkià, ana' i Ahkaze, mpanjaka' Iehodà. ² Roapolo toañe lime amby re te niorotse nifehe; le nifeleke roapolo taoñe sive' amby e Ierosalaime. I Abý*, ana' i Zakarià† ty tahinan-drene'e. ³ Nanao ty havantañañé am-pivazohoá IEHOVÀ re, manahake ze hene satandrae'e Davide. ⁴ Nafaha'e o toets' aboo naho dinemo'e o hazomangao, naho finira'e o Aserào, vaho finorefore'e i mereñé torisike niranjie' i Mosèy; amy te nañembok' ama'e o ana' Israeleo ampara' i andro zay, le nitokaveñé ty hoe Nekostane‡. ⁵ Niatoa'e t'IEHOVÀ Andrianañahare' Israele; kanao tsy amo hene' mpanjaka' Iehodao naho amo taolo'eo ty nanahak' aze. ⁶ Nitambozore'e t'IEHOVÀ, le tsy nenga'e ty fañorihañé aze, fa nambena'e o lili'e linili' IEHOVÀ i Mosèo. ⁷ Nindre ama'e t'IEHOVÀ, le niraorao re ndra aia' aia ty nomba'e; niolà'e ty mpanjaka' i Asore le tsy nitoroñé'e. ⁸ Zinevo'e o nte-Pelistio pak' Azà naho o mañohok' azeo; boak' am-pitalakesañ' abo pak' an-drova mikijoly.

‡ 17:30 Sokote-benote: kijan-kakarapiloa' i Bavele § 17:30 Nergale: fanalolahy:
 'ndraharen-Kose * 17:30 Asimae: hakeo; 'ndraharen-Kamate * 18:2 Abý: raeko † 18:2
 Zakarià: nahatiah y t'i Andrianañahare ‡ 18:4 Nekostane: raha torisike tsy jefa'e

9 Ie amy taom-paha-efa' i Kezkià mpanjakay, naho ty taom-paha' fito i Hosea, ana' i Elà mpanjaka' Israele te nionjomb'e Somerone t'i Salmanesere mpanjaka' i Asore, nañarikatok' aze. **10** Nahamodo telo taoñe iereo vaho naharambe aze; amy taom-paha' ene' i Kezkia naho ty taom-paha sive' i Hosea mpanjaka' Israele, ty nitavaneñe i Somerone. **11** Nasese' ty mpanjaka' i Asore mb'e Asore mb'eo t'Israele, vaho napò'e e Kalà añe naho añ' olo' i Kabore, saka' i Gozane, vaho amo rova nte Medaio; **12** amy t'ie tsy nañaoñe ty fiarañanaña' IEHOVÀ Andrianañahare' iareo, te mone nivalik' amy fañina'ey naho ze he'e nandilia' i Mosè mpitoro' IEHOVÀ; tsy jinanji' iareo tsy nanoe' iereo. **13** Amy taom-paha folo-efats'ambi' i Kezkià, le nionjomb' amo rova-fatrats' Iehodao t'i Sankeribe§ mpanjaka' i Asore vaho rinambe'e. **14** Le nampihitrik' amy mpanjaka' i Asore e Lakisey t'i Kezkia mpanjaka' Iehoda nanao ty hoe: Nandilatse raho, miengà ahy, le ho vaseko ze hapò'o amako. Le sinaze' i mpanjaka' i Asorey volafoty telon-jato talenta naho volamena telopolo talenta t'i Kezkià mpanjaka' Iehodà. **15** Fonga natolo' i Kezkià aze ze volafoty nizoeñe añ' anjomba' IEHOVÀ naho am-pañajàm-bará añ' anjombam-panjaka ao. **16** Tinampa' i Kezkia amy zao ty volamena an-dalambein' anjomba' IEHOVÀ naho boak' amo tokonañe nipakore' i Kezkia mpanjakao; vaho natolo'e amy mpanjaka' i Asorey. **17** Nirahe' i mpanjaka' i Asorey boak'e Lakise mb'amy Kezkia mpanjaka e Ierosalaime mb'eo t'i Tartane* naho i Rabsarise†, vaho i Rabsakè‡, reketse lahin-defo tsifotofoto. Nionjomb' eo iereo naho nivotrake e Ierosalaime, ie pok'eo le nimb'an-talahan' antara ambone an-dala' i tondam-panasay mb'eo vaho nijohañe ey. **18** Ie kinanji' iareo i mpanjakay le niakatse mb' am' iereo mb'eo t'i Eliakime§ ana' i Kilkìà*, mpifehe o añ' anjombao naho i Sebnà† mpanokitse vaho Ioà‡ ana' i Asafe§ mpamolily. **19** Le hoe t'i Rabsakè am' iereo: Ano ty hoe t'i Kezkià: Hoe i mpanjaka ra'elahy mpifehe' i Asorey: Ino ze o fiatoañe iatoa'o zao? **20** Atao'o te fanoroañe naho haozarañe ente-mialy hao ty fivolan-tsoñy? Ia arè ty iatoa'o, te ihe niola amako? **21** Inao hey, te niatoa'o i fitoñom-bararata dinemokey, i Mitsraime; ie iatoa' ondaty le ho voa ty taña'e, toe hitomboha'e; zay t'i Parò mpanjaka' i Mitsraime amy ze hene miato ama'e. **22** Fe naho anoa'areo ty hoe: Iatoa'ay t'IEHOVÀ Andrianañahare'ay; Tsy Ie hao ty nañafaha' i Kezkia o toets-abo'eo naho o kitreli'eo, vaho nanao ty hoe am' Iehodà naho am' Ierosalaime: Mitalahoa añatrefa' ty kitrely e Ierosalaime toy? **23** Aa ehe, ano parè amy talèko mpanjaka' i Asorey; fa hatoloko azo ty soavalà ro' arivo naho mahatongoa mpiningitse ama'e rehe. **24** Aa vaho akore ty hampitoliha'o ty laharam-pifehe' i faragidrom-pitoron-talèkoy? vaho iatoa'o t'i Mitsraime hahazoa'o sarete naho mpiningitse! **25** Atao'o te tsy amako hao t'IEHOVÀ, zaho nionjom-b'an-toetse toy handrotsake aze? Nanao ty hoe amako t'IEHOVÀ: Tameo i taney vaho rotsaho. **26** Aa le hoe t'i Eliakime ana' i Kilkìà naho i Sebnà vaho Ioà amy Rab' sakè: Ehe, misaontsia amo mpitoroo an-tsaontsi' i Arame fa fohi'ay, le ko misaontsy an-tsaontsi' o nte-Iehodao an-dravembia' ondaty ambone' o kijolio eio. **27** Fe hoe ty nanoa' Rab'sakè, Nañirak' ahy homb' amy talè'oy naho ama' areo hivolañako o entañe zao, fa tsy amo mitobok' amo kijolioo

§ **18:13** Sankeribe: mandrotsake * **18:17** Tartane: zeneraly; mpifehe bey † **18:17** Rab'sarise: mpifehe o mpiatrakeo ‡ **18:17** Rab'sakè: mpitam-pitovi' i roandriañey § **18:18** Eliakime: fiheren-ko velon' Añahare * **18:18** Kilkìà: anjarako t'i Andrianañahare † **18:18** Sebnà: ty mitofa; ty mirohy ‡ **18:18** Ioà: filongoañe; rahalahi' IEHOVÀ § **18:18** Asafe: mpanontoñe

ka? hahafitraofa' iareo filintseñe ty fiamonto'e naho finoñe ty arirano'e?
²⁸ Niongak' amy zao t'i Rab'sakè, nipazake ty hoe an-tsaontsi' Iehoda: Janjiño ty enta' i mpanjaka ra'elisy, mpifehe' i Asorey. ²⁹ Hoe i mpanjakay: Ko enga' areo hamañahy anahareo t'i Kezkia. Fa tsy ho lefe'e ty hamotsotse anahareo am-pit  e. ³⁰ Le ko enga' areo t'i Kezkia hampiato anahareo am' IEHOV  , ami'ty hoe: Toe handrombak' antika t'IEHOV  , vaho tsy hatolotse am-pit  m-panjaka' i Asore ty rova toy. ³¹ Ko janji  ne t'i Kezkia; fa hoe ty mpanjaka' i Asore: Mifampilongoa amako, le miavota mb'amako; le songa hikama amy vahe'ey, naho amy sakoa'ey vaho sindre hitohoke andranon-kadaha'e; ³² ampara' te homb'eo raho hanese anahareo mb'an-tane manahake ty anahareo, tanen-tsako naho divay, tane ama' mofo naho tanem-bahe, tanen-katae olive naho tantele, soa t'ie ho velo  ne fa tsy hihomake; le ko hao  ne' areo t'i Kezki  , ie sigihe'e ami'ty hoe: Ho hah   IEHOV   tika. ³³ Aa vaho eo hao ty 'ndraharen-kilakila' ndatio nahavotsotse ty tane'e am-pit  m-panjaka' i Asore? ³⁴ Aia o 'ndrahare' i Kamate naho i Arpadeo*? aia o 'ndrahare' i Sefarvaime naho i Hen  † vaho Iv  o‡? Nahahaha' iereo an-ta  nako hao ty Somerone? ³⁵ Ia amo fonga 'ndrahare' o fifeleha  eo ty nahavotsotse i boriz  ey an-ta  nako? te hahafa  aha' IEHOV   an-ta  nako t'Ierosalaime? ³⁶ Fe nianji  ne avao ondatio, leo vola  ne raike tsy natoi' iareo ami'ty nandilia' i mpanjakay ty hoe: Ko manoi  ne aze. ³⁷ Nimb' amy Kezki   mb'eo an-tsiky riniatse t'i Eliakime, ana' i Kilki  , mpifehe' i anjombay naho i Sebna mpanokitsey vaho Io   mpamoliliy nitalily i enta' i Rab'sak  y.

19

¹ Ie jinanji' i Kezki   zay, le rinia'e o saro'eo naho nisikin-gony vaho nizilik' a  n' anjomba'IEHOV   ao. ² Nampihitrife'e mb'am' Iesai  , mpitoky, ana' i Amotse, mb'eo t'i Eliakime mpiaolo' i anjombay, naho i Sebn   mpanokitse, vaho o androanavim-pisoro  eo songa nisaron-gony, ³ ninday ama'e ty hoe: Hoe t'i Kezki  : Andron-kank  ne naho trevoke vaho teratera ty andro toy, fa an-titotse te hisamake o ajajao fe po-haozara  ne. ⁴ Hera, ho janji  ne' IEHOV   Andriana  nahare'o i enta' i Rab'sak   nahitri' i mpanjaka' i Asore, tal  'eiy, nanigike an' Andriana  nahare velo  ne, hitrevoha' IEHOV   Andriana  nahare'o o fivola  ne jinanji'eo; le ihalalio i sehanga'ey. ⁵ Aa le nimb' am' Iesai   mb'eo i mpitoro' i Kezki   rey. ⁶ Le hoe t'Iesai   tama'e: Zao ty ho saontsie' areo amy tal  ' areoy: Hoe ty tsinara' IEHOV  : Ko hemba  ' amo vola  ne jinanji'oo, o niterater  ' o mpitoro' i mpanjaka' i Asoreio ahikoo. ⁷ Oni  o t'ie ho fa  nahieko hijanji  ne tolom-boetse naho himpoly mb'an-tane'e a  ne vaho hampikorovoheko am-pibara an-tane'e ao.

⁸ Nibalik' amy zao t'i Rab'sak  , le zoe'e nialy amy Libn  * ty mpanjaka' i Asore; toe jinanji'e ty fienga'e i Lakise, ⁹ ie jinanji  ne ty amy Tir'hak  † mpanjaka' i Kose ty hoe: Ingo fa niavota'e hialy, aa le na  nitrife'e irake indraike t'i Kezki   nanao ty hoe: ¹⁰ Ty hoe ty ho enta'o my Kezki  , mpanjaka' Iehod  : Ko ado'o hamañahy azo i Andriana  nahare iatoa'oy, hanao ty hoe; Tsy hatolotse am-pit  ' i mpanjaka' i Asorey t'Ierosalaime. ¹¹ Toe jinanji'o i nanoem-panjaka' i Asore ze hene fifehea  ney—fonga ni-mongore'e; aa vaho havotsotse rehe? ¹² Hera namotsotse o nandrotsahan-droakoo o 'ndraharem-pifehe  eo, i Gozane, i Karane, i Retsefe, vaho o

* **18:34** Arpade: hazava-pijeba  ne; rova fatratse † **18:34** Hen  : mitsobore ‡ **18:34** Iv  : rotsake; nianto * **19:8** Libn  : hafotia  ne † **19:9** Tir'hak  ; mpandohy, mpitsikarake

ana' i Edene nte Telasàreo? ¹³ Aia ty mpanjaka' i Kamate, ty mpanjaka' i Arpade, ty mpanjaka' i rova' i Sefarvainey, ty a i Hena, naho Ivà? ¹⁴ Rinambe' i Kezkià i taratasy boak' am-pitâ' i ìrake reiy, le vinaki'e; le nionjoñe mb' añ'anjomba' IEHOVÀ mb'eo t'i Kezkià, vaho vinela'e añatrefa' IEHOVÀ. ¹⁵ Le nihalaly amy IEHOVÀ t'i Kezkià ami'ty hoe: O ry IEHOVÀ, Andrianañahare' Israele, mpiambesatse añivo' o keròbeo, Ihe ro Andrianañahare, Ihe avao, amy ze kila fifehea' ty tane toy; Ihe ty namboatse i likerañey naho ty tane toy. ¹⁶ Manokilaña ravembia ry IEHOVÀ le janjiño, manokafa fihaino ry IEHOVÀ le vazohò, vaho haoño o enta' i Senakeribe nahitri'e hiteratera i Andrianañahare veloñeio. ¹⁷ Vata'e to, ry IEHOVÀ te nampangoakoahé' o mpanjaka' i Asoreo o fifeheañeo naho o tane'eo; ¹⁸ naho nafetsa' iareo añ'afó ao o 'ndrahare' iareoo (o tsy Andrianañahareo, fa satam-pitâ' ondaty, hatae naho vato) vaho rinotsa' iereo. ¹⁹ Ie amy zao, ry IEHOVÀ Andrianañahare'ay, Ehe rombaham-pitâ'e zahay hahafohina' ze hene fifehea' ty tane toy te Ihe ry IEHOVÀ ro Andrianañahare, Ihe avao.

²⁰ Nahitri' Iesaià, ana' i Amotse amy Kezkià, ty hoe: Hoe t'IEHOVÀ Andrianañahare' Israele: Kanao nihalalia'o amako i Senakeribe mpanjaka' i Asorey, le tsinanoko. ²¹ Hoe ty tsara nafè' IEHOVÀ ama'e: Malaim-bintañe azo ty anak' ampela' i Tsione naho itohafa'e an-títse; mikofi-doha ama'o ty anak' ampela' Ierosalaime. ²² Ia ty ninjè'o naho nonjira'o? Ia o nipoñafa'o feo naho niandrandrà'o maso am-pirengevohañeo hatrèt're'o i Masi' Israeley! ²³ O ìra'oo ty nañinjea'o i Talè naho nanao ty hoe, Amo saretekoo ty añaamboneako andigiligi' o haboañeo, pak'an-tsifitsifi' i Lebanon aña; firaeko ty abo amo mendorave'eo, ty soa fijoboñe amo talí'eo; izilihako i fipalira'e lavitse ama'ey, i ala'e loho matahetsey. ²⁴ Nihaly vovon-draho naho ninon-dranon' ambahiny, vaho nimaiheko andela-tomboko o hene saka' i Mitsraimeo. ²⁵ Tsy jinanji'o hao? fa haehae te nanoeko? sinafiriko taolo aña, naho nampifetsahako henanekeo, eka fa fonitse, te havali'o ho votrem-piantoañe o rova fatratseo, ²⁶ le salatse naho malovilovy o mpimone'e nitomoreñeo, ie hoe rongoñe an-kivok' ao naho ahetsé maindoñe, manahake ty boka ambone' kivoho eo vaho ampemba pikole'e ie mbe tsy bey. ²⁷ Fe apotako ty fiongaha'o naho ty fitoboha'o, ty fiakara'o naho ty fiziliha'o vaho o fitroña'o amakoo. ²⁸ Aa kanao itreña'o, vaho niheo an-tsofiko ao ty fitoabora'o, le hatsatoko andoak' oro'o ao ty porengoko naho ami'ty montsili'o ao ty laboridiko; vaho hampipolieko amy lalañe nimba'o mb' etoiy. ²⁹ Inao ty ho viloñe hahafohina' areo zay: Ho kamae' areo ze mitiry ho asa'e ami'ty taoñe toy, le ze mijirik' ama'e ami'ty taom-paha roe; le mitongisa ami'ty taom-pahatelo, mambolea an-tanem-bahe vaho kamao o voa'eo. ³⁰ Mbe hamahatse mañambane naho hamoa mañambone ty sehangan' anjomba' Iehoda; ³¹ fa hiavotse am' Ierosalaime ty sengaha'e, naho boak' ankaboa' i Tsione ao o nahafipolitseo. Hanoe' ty fahimbaña' IEHOVÀ i Màroy zay. ³² Aa le hoe ty tsara' IEHOVÀ amy mpanjaka' i Asorey: T'ie tsy himoak' an-drova atoy, tsy hañiririña'e ana-pale, tsy hiheova'e aolo'e ey reketse fikalañe, vaho tsy haobo'e ama'e ty tambohom-panameañe. ³³ Amy lalañe nigodaña'e mb' etoa ty himpolia'e aña fa tsy hifoak' ami' ty rova toy, hoe t'IEHOVÀ. ³⁴ Toe harovako ty rova toy, ho rombahoko ho Ahiko naho ho a i Davide mpitoroko. ³⁵ Ie amy haleñey, nimb'eo ty anjeli' IEHOVÀ nanjevoñe ty rai-hetse-tsi-valo-ale-tsi-lime-arivo an-tobe' o nte-Asoreo. Ie mañampitso ondatio le nizoeñe t'ie fonga lolo. ³⁶ Nienga amy zao t'i

Senakeribe, mpanjaka' i Asore, nimpoly, vaho nimoneñe e Nineve ao. ³⁷ Ie nitalaho añ' anjomba' i Nisroke, 'ndrahare'e ao, le nanjevoñe aze am-pibara ty ana'e Adrameleke naho i Saretsera vaho napolititse mb'an-tane Ararate aña. Nandimbe aze t'i Esarsadone, ana'e.

20

¹ Ie amy andro rezay, natindry fa heta'e t'i Kezkià, le nimb' ama'e mb'eo t'Iesaià, ana' i Amotse, le nanoe'e ty hoe: Hoe ty nafè' IEHOVÀ: Hajario ty anjomba'o fa hihomake, tsy ho veloñe. ² Nampitolihe'e mb'an-drindriñe ty añ'ambone'e, vaho nihalaly amy IEHOVÀ ami'ty hoe. ³ Midrakadrakak' ama'o ry IEHOVÀ, tiahio hey t'ie nañavelo añ' atrefa'o an-kavañonañe naho an-stroke vantañe vaho nanao ty hasoa am-pivazohoa'o. Le nangololoike ty rovetse t'i Kezkià. ⁴ Aa ie mbe tsy anteñateña' i kiririsay t'Iesaià, le niheo ama'e ty tsara' IEHOVÀ, ami'ty hoe: ⁵ Mibalika indraike le saontsio t'i Kezkià mpifehe ondatikoo, Hoe ty nafè' IEHOVÀ, Andrianañahare' i Davide rae'o, Tsinanoko i halali'oy, fa nitreako o ranom-pihaino'oo, inao te ho jangañeko, Mionjona mb' añanjomba' IEHOVÀ mb'eo ami'ty andro fahatelo. ⁶ Le ho tovoñako taoñe folo-lime amby o andro'oo naho havotsoko am-pità' i mpanjaka' i Asorey, ihe naho ty rova toy, vaho harovako ho Ahy naho ho a i Davide, mpitorokoy, ty rova toy. ⁷ Le hoe t'Iesaià, Angalao garaton-tsakoa. Aa le nangalake le nabatra' iereo amy honay le nisotrake re. ⁸ Le hoe t'i Kezkià am' Iesaià, Ino ty ho viloñe te hampijangañe ahy t'IEHOVÀ, naho himoak' añ' anjomba' IEHOVÀ ao raho te herone? ⁹ Le hoe t'Iesaià, Zao ty viloñe ho azo'o am' IEHOVÀ, te hanoe' IEHOVÀ i tsinara'ey: ke hionjo miaolo fange'e folo i talinjoy, he hibalike fange folo, akore? ¹⁰ Le hoe ty natoi' i Kezkià, Raha maivañe ty hizotsoa' i talinjoy fange'e folo: Aiy! ampibaliho fange folo i talinjoy. ¹¹ Aa le kinanji' Iesaià t'IEHOVÀ, le nahere'e ami' ty fange folo nizotsoa'e amy tarehem-pamatarañ' andro i Ahkazeo i talinjoy.

¹² Ie henane zay, nañitrike taratasy naho ravoravo amy Kezkià t'i Berodake-baladàne, ana' i Baladane, mpanjaka' i Bavele; fa jinanji'e te natindry t'i Kezkià. ¹³ Nihaõe' i Kezkià iereo, le fonga nitoroa'e o am-pañajam-bará'eo, o volafotio, naho o volamenao, naho o raha mafirio, naho o solike sarotseo naho i anjombam-pikalaña'ey, vaho ze nitendrek' am-panontonam-bará'eo; ndra loli'e amy anjomba'ey tsy napo'e, ndra amy fifehea'e iabiy, ze tsy natoro' i Kezkià iareo. ¹⁴ Pok' amy mpanjakay amy zao t'Iesaià mpitoky, le nanao'e ty hoe: Ino ty enta' indaty rey, naho boak' aia iereo te nivotrak' ama'o? Le hoe t'i Kezkià, toe boake tsietoitane aña iereo, hiriike Bavele ao. ¹⁵ Le hoe re: Ino ty nioni' iereo añ'anjomba'ao? Le hoe ty natoi' i Kezkià, Hene niisa' iereo ze an-trañoko ao, tsy eo ty napoko tsy natoroko. ¹⁶ Le hoe t'Iesaià amy Kezkià, Janjiño ty tsara' IEHOVÀ. ¹⁷ Inao! ho avy ty andro te fonga hendeseñe mb'e Bavele mb'eo o añ' anjomba'oo, naho ze vinandron-droae'o pak' androany; tsy eo ty hapoke, hoe t'IEHOVÀ. ¹⁸ Le haneseañe aña o tariratse hiboak' ama'oo, o hasama'oo, ho mpiatrak' añ' anjombam-panjaka' i Bavele ao. ¹⁹ Le hoe t'i Kezkià am' Iesaià, Soa i tsara' IEHOVÀ tinaro'oy. Ie natao'e ty hoe: Aa tsy ho soa zay! te fierañerañañe naho hatò ty ho amo androkoo? ²⁰ Aa naho o fitoloña' i Kezkià ila'eo, i haozara'ey, vaho ie namboatse ty antara naho zoho nampom-ba'e rano mb' an-drova ao; tsy misokitse amy bokem-pamoliliañe o mpanjaka' Iehodaoy hao? ²¹ Nitrao-piròtse aman-droae'e t'i Kezkià; nandimbe aze nifehe t'i Menasè, ana'e.

21

¹ Folo-tao-ro'amby t'i Menasè te namototse nifeleke vaho nifehe limampolo-taoñe lime amby e Ierosalaime ao; i Kefezobà ty tahinandrène'e. ² Nanao haratiañe am-pivazohoa' IEHOVÀ re, manahake ty haloloa' o kilakila' ondaty rinoa' IEHOVÀ aolo' o ana' Israeleoo. ³ Amy te namboare'e indraike o toets' abo rinotsan-drae'e Kezkiào; le nampitroare'e kitrely t'i Baale, naho nandranjie'e hazomanga manahake ty nanoe' i Akabe mpanjaka' Israele; le fonga nitalaho'a'e o valobohòn-dikerañeо vaho nitoroña'e. ⁴ Nandranjie'e kitrely añ'anjomba' IEHOVÀ, ie nanoe' IEHOVÀ ty hoe: E Ierosalaime ao ty hampipohako ty añarako. ⁵ Namboara'e kitrely i valobohòn-dikerañe iabiy, an-kiririsa roe' i anjomba' IEHOVÀ eo. ⁶ Nampirangae'e añ'afó i ana-dahi'ey, naho nañorik' andro, naho namoreke, naho nitrobo angatse vaho nitoloñe amo jinio; halòtsereke ty nanoe'e am-pivazohoa' IEHOVÀ eo, hiviñera'e. ⁷ Natroa'e i hazomanga rinanji'e ho a i Aserày, amy anjomba nanoe' IEHOVÀ amy Davide naho amy Selomò, ana'ey, ty hoe, Ami'ty anjomba toy naho e Ierosalaime jinoboko amo hene fifokoa' Israeleo ty hampipohako ty añarako ho nainai'e donia; ⁸ le tsy hampirerererèko hienga i tane natoloko an-droae' iareoy o fandia' Israeleo naho ambena' iareo hanoeñe ze hene nandiliako vaho i Hake iaby linili' i Mosè mpitorokoy. ⁹ F'ie tsy hinao' iereo, le tinao' i Menasè hanao haloloañe mandikoatse o fifeheañe rinotsa' IEHOVÀ añatrefa' o ana' Israeleoo. ¹⁰ Le nitsara añamo mpitoky mpitoro'eo t'IEHOVÀ, nanao ty hoe, ¹¹ Kanao nanoe' i Menasè o haloloañe zao naho nitolon-katserehañe mandikoatse ty nanoe' o nte-Amore taolo'eo vaho nampanaña'e tahiñe Iehoda amo hazomanga'eo; ¹² le hoe ty nafè' IEHOVÀ, Andrianañahare Israele, Akore ty hankàñe hafetsako am' Ierosalaime naho am' Iehodà kanao hiñiñiñiñe an-dravembia'e roe ze mahajanjiñe. ¹³ Ho kazazaheko am' Ierosalaime ty tali' i Somerone naho ty vato-polombi' ty anjomba' i Akabe, vaho ho faopaoheko manahake ty famaoha' ondaty ty finga'e t'Ierosalaime, ie faopaohe'e naho ababo'e. ¹⁴ Le haforintseko ty sehang'a' i lovakoy, naho hatoloko ampità' o rafelahi' iareoo; vaho ho fitsindrohañe naho fikopaha' o fonga rafelahi'eo, ¹⁵ ty amo haratiañe nanoe' iereo am-pahatreavakoo, ie nikaike ty habosehako boak' amy andro niavotan-droae' iareo i Mitsraimey pak' androany. ¹⁶ Mbore nampidoandoan-dio maliñe t'i Menasè ampara' te natsafe'e boak' antsarira'e pak'an-tondohà'e t'Ierosalaime, ho tovo' ty hakeo'e nampanaña'e tahiñe t'Iehodà, i nanoa'e haloloañe am-pivazohoa' IEHOVÀ. ¹⁷ Aa naho o fitoloña' i Menasè ila'eo, o nanoe'e iabio vaho i hakeo nanoe'ey, tsy fa sinokitse amy bokem-pamoliliañe o mpanjaka' Iehodaoy hao? ¹⁸ Nitrao-piròtse aman-droae'e t'i Menasè, naho nalentek' an-kiririsan' anjomba'e an-golobo' i Ozià ao, vaho nandimbe aze nifehe t'i Amone ana'e. ¹⁹ Roapolo-taoñe ro' amby t'i Amone te niorotse nifeleke, vaho nifehe roe toañe e Ierosalaime ao. I Mesolemetee, ana' i Karotse nte-Iotebà, ty tahinan-drene'e. ²⁰ Nanao haratiañe ampivazohoa' IEHOVÀ re manahake i Menasè rae'ey. ²¹ Le fonga nañaveloa'e ty fañaveloan-drae'e, naho nitoroña'e hazomanga nitoroñen-drae'eo vaho nitalaho'a'e. ²² Naforintse'e t'IEHOVÀ Andrianañaharen-droae'e vaho tsy nañaveloe'e ty lala' IEHOVÀ. ²³ Nikililia' o mpitoro' i Amoneo vaho zinevo' iareo añañomba'e ao. ²⁴ Vinono' ondati' i taneio amy zao ondaty nikinia i Amone mpanjakao le nanoe' ondati' i taneio mpanjaka t'Iosia, ana'e, handimbe aze. ²⁵ Aa naho o fitoloñañe nanoe' i Amone ila'eo, tsy fa sinokits' amy bokem-pamoliliañe

o mpanjaka' Iehodaoy hao? ²⁶ Nalentek' an-kibori'e an-golobo' i Ozà ao re vaho nandimbe aze nifehe t'Iosià* ana'e.

22

¹ Valo taoñe t'Iosià te namototse nifeleke, vaho nifehe telopolو taoñe raik' amby e Ierosalaime ao. Iedidae*, anak' ampela' i Adaià† nte-Bots'kate‡, ty tahinan-drene'e. ² Nanao soa am-pivazohoa' IEHOVÀ re naho nañavelo an-tsata' i Davide rae'e vaho tsy nitsile mb'an-kavana ndra mb'ankavia. ³ Ie amy taom-paha-folo-valo-ambi' Iosià mpanjakay, le nampihitrife' i mpanjakay t'i Safane§, ana' i Atsaliaho* ana' i Mesolame† mpanokitse mb' añ' anjomba' IEHOVÀ mb'eo, ami'ty hoe: ⁴ Akia mb'amy Kilkià‡ mpisoroñe hamolily o volafoty fa naseñe añ'anjomba' IEHOVÀ, o natonto' o mpañambin-dalambeio am' ondatio; ⁵ le ampanesefo am-pità' o mpanao i fitoloñañeio, amo mpisary i anjomba' IEHOVÀ; le hatolo' iereo amo mpifanehak' añ' anjomba' IEHOVÀ hamboareñe o vakivaky amy anjombaio; ⁶ amo mpandranjio, naho amo mpamboatseo naho amo mpandranjy vato naho hiviliañe hatae naho vato pinèke hampisomontieñe i anjombay, ⁷ vaho tsy ampivolilieñe o tolorañe i drala am-pitañeio, amy te matoe ty fitoloña' iareo. ⁸ Le hoe t'i Kilkià, mpisoroñe, amy Safane, mpanokitse; Nitreako añ' anjomba' IEHOVÀ ao ty boke Hake. Le natolo' i Kilkià amy Safane, vaho vinaki'e. ⁹ Nimb' amy mpanjakay mb'eo t'i Safane mpanokitse vaho nahere'e amy mpanjakay ty saontsy manao ty hoe: Fa natonto' o mpitoroñe o drala niisak' añ' anjombao vaho natolo' iereo am-pità' o mpitoloñe misary ty anjomba' IEHOVÀ; ¹⁰ le tinaro' i Safane amy mpanjakay ty hoe: Nanese boke amako t'i Kilkia mpisoroñe. Aa le nivakie' i Safane añatrefa' i mpanjakay.

¹¹ Ie jinanji' i mpanjakay ty enta' i boke Hakey, le rinia'e o saro'eo; ¹² le linili' i mpanjakay t'i Kilkia mpisoroñe, naho i Akikame§, ana' i Safane naho i Akbore* ana' i Mikaià† naho i Safane mpanokitse vaho i Asaià‡ mpitoro' i mpanjakay ami'ty hoe: ¹³ Akia, añontaneo am'IEHOVÀ ho ahy naho ondatio naho Iehoda iaby o tsara' i boke nioniñeio, fa akore ty haviñera' IEHOVÀ misolebotse amantika, ie tsy hinaon-droaen-tika o tsara ami'ty boke toio; hera fonga hanoe'e aman-tikañe o sinokitseo. ¹⁴ Aa le nimoak' amy Koldàe§ mpitoky ampela, vali' i Salome*, ana' i Tikvà†, ana' i Karkase‡ mpañambin-tsikiñe, mpimoneñe e Ierosalaime an-kibohom-panokiram-boke ao, t'i Kilkià mpisoroñe naho i Akikame, naho i Akbore naho i Safane vaho i Asaià, le nifañaoñe ama'e. ¹⁵ Le hoe re am' iereo, Hoe t'IEHOVÀ Andrianañahare' Israele, Saontsio indaty nañirak' anahareo amakoy, ¹⁶ Hoe ty tsara' IEHOVÀ: Mahaoniña te hametsahako hankàñe ty toetse toy naho o mpimoneñe ama'eo; toe ze hene enta' i boke' vinaki' i mpanjaka' Iehoday; ¹⁷ amy te naforintse' iereo raho naho nañenga aman-drahare ila'e, hanigike ty haviñerako amo satam-pità' iareoo; aa le hisolebotse ami'ty toetse toy ty haviñerako vaho tsy hakipeke. ¹⁸ Fe hoe ty ho saontsieñe amy mpanjaka' Iehodà nañirak' anahareo hañontane amy

* ^{21:26} Iosià: ty afó' IEHOVÀ * ^{22:1} Iedidà: ikokoñañe † ^{22:1} Adaià: ty valolombelo' IEHOVÀ
 ‡ ^{22:1} Bots'kate: tambohomboho an-tane mira § ^{22:3} Safane: bitro; valavo; soñi' iareo * ^{22:3}
 Atsaliaho: marine IEHOVÀ † ^{22:3} Mesolame: Mpiamae; mpampilongo; ; ‡ ^{22:4} Kilkià: anjarako
 t'i Andrianañahare § ^{22:12} Akikame: rahalahy mpamale fate * ^{22:12} Akbore: valavo;
 vonotroboke † ^{22:12} Mikaià: (Mikà) rarake; mireke ‡ ^{22:12} Asaià: namboaren'Añahare
 § ^{22:14} Koldà: ty voatse toy * ^{22:14} Salome: fonitse, heneke; tea-vintañe † ^{22:14} Tikvà:
 fitamàñe; taly bory; fivory ‡ ^{22:14} Karkase: habosehañe

IEHOVÀ: Hoe t'IEHOVÀ, Andrianañahare' Israele: ty amo tsara inanji'oo, ¹⁹ kanao mitrotrotroty arofo'o naho nireke añatrefa' IEHOVÀ, ie jinanji'o i vinolako ami' ty toetse toiy naho amo mpimone'eo, t'ie ho fatra naho fatse, vaho te rinia'o o saro'oo vaho nirovetsa añatrefako; le toe tsinanoko rehe, hoe t'IEHOVÀ. ²⁰ Aa le oniño te hatontoko aman-droae'o rehe, le hambineñe an-kibori'o ao an-kanintsiñe, vaho tsy ho isam-pihaino'o ty hankàñe hafetsako ami'ty toetse toy. Aa le nahere' iareo amy mpanjakay i entañe zay.

23

¹ Nampañitrike i mpanjakay, le natontoñ' ama'e ze hene androanavi' Iehoda naho Ierosalaimo. ² Le nionjomb' aña' anjomba' IEHOVÀ mb'eo i mpanjakay rekets' ondati' Iehoda iabio naho ze fonga mpimone' Ierosalaimo naho mpisoroñe naho mpitoky, naho ze kila ondaty, ty kede naho ty bey, vaho hene vinaki'e an-dravembia' iareo ze tsara amy bokem-pañina nitendrek' aña' anjomba' IEHOVÀ. ³ Nijohañe ami'ty fahañe eo i mpanjakay naho nifañina añatrefa' IEHOVÀ, t'ie hañavelo am-pañorihañe IEHOVÀ naho hiameñe o lili'eo naho o taro'eo vaho o fañè'eo aña' ampon' arofo naho an-kaliforam-pañova, hahatafetera'e o tsara' i fañina sinokitse amy bokeio; le niantofa' o fonga ondatio i fañinay.

⁴ Linili' i mpanjakay amy zao t'i Kilkia mpisoroñe naho o mpisoroñe am-pirimboñañe faha-roe naho o mpitan-dalambeio, ty hañakara' iareo an-kivoho' IEHOVÀ ze fanake nanoeñe amy Baale naho an-tsamposampo naho amy valobohòn-dikerañey; le niforototo'e alafe' Ierosalaimo an-kivo' i Kidrone ao vaho nendese'e mb'e Betele aña ty laveno'e. ⁵ Nafotsa'e iaby o mpisorom-pahasive noriza' o mpanjaka' Iehodao hañenga amy ze toets' abo amo rova' Iehodao, naho amo toetse mañohoke Ierosalaimo; le o nañenga amy Baale, amy àndroy, amy volañey, amo vasiañe mifamorohotseo, vaho amy valobohòn-dikerañey. ⁶ Naaka'e aña' anjomba' IEHOVÀ mb' alafe' Ierosalaimo mb'eo, mb'an toraha' i Kidroney o Aserào naho finorototo'e an-toraha' i Kidrone ey naho dinemodemo'e ho bo vaho nafitse'e amo kibori' o ana' ondatio i debokey. ⁷ Narotsa'e o kibohom-borololo* aña'ila' i anjomba' IEHOVÀ amy fanenoñan-drakemba o tèmen' Aseràoy. ⁸ Fonga nakare'e amo rova' Iehodao o mpisoroñe naho nileore'e o toets' abo nañemboha' o mpisoroñe mifototse e Geba pake Beeresebà vaho narotsa'e o toets' abo am-pimoahañe i lalambei' Iehosoa bein-tanañey, am-pitàn-kavia an-dalambei' i rovaio. ⁹ ie amy zao tsy nionjom-b' amy kitreli' IEHOVÀ e Ierosalaimo aña o mpisoron-toets'aboo, f'ie nitrao-pikama mofo tsi-aman-dalivae amo rahalahi'eo. ¹⁰ Nileore'e ty Topete†, am-bavatane' i ana' i Hinomey‡, tsy hampirangà' ondaty aña'af'o' i Moleke§ ao ty ana-dahi'e ndra ty anak' ampela'e. ¹¹ Nafaha'e o soavala noriza' o mpanjaka' Iehodao amy àndroy, am-pimoahañe aña' anjomba' IEHOVÀ, marine' ty efe' i Matane-meleke, vosie, am-pariparitse ey, vaho finorototo'e aña' af'o o sareten' androo. ¹² Le narotsa' i mpanjakay i kitrely an-tafo' i efetse ambone' i Ahkaze namboare' o mpanjaka' Iehodaoy naho o kitreli' i Menasè niranjie'e an-kiririsa roe' i anjomba' IEHOVÀ eio le dinemodemo'e vaho nahifi'e an-torahan-Kidrone ao ty debo'e. ¹³ Le nileore' i mpanjakay o tamboho aolo' Ierosalaimo am-pitàn-kavanana-kaboan-kaleorañeo, i namboare' i Selomò mpanjaka' Israele

* ^{23:7} Borololo: lahy mpipay lahy hiharoa' † ^{23:10} Tobete: langoro; mivalik' ama' ondaty

‡ ^{23:10} Hinome: heheke iereo!; o vara' iareoo § ^{23:10} Moleke: mpanjaka (samosampoe)

amy Astorete, ty haloloa' o nte-Tsidoneo, naho amy Kemose, ty haloloa' o nte-Moabeo vaho amy Milkome, ty haloloa' o ana' i Amoneo. ¹⁴ Dinorodemo'e o sarendraha naho finira'e o hazomangao, vaho natsafe'e taola' ondaty o toe'eo. ¹⁵ Le i kitrely e Beteley, naho i toets' abo' Iarovame namboare' i ana' i Nebate nampanan-kakeo Israeley; fonga narotsa'e i kitreliy naho i toets' aboy, le finorototo'e i toets' aboy, naho dinemodemo'e ho debole vaho hinotomomo'e i Aseray. ¹⁶ Ie nitolike t'Iosià, le niisa'e o kibory an-kaboañeio naho nampañitrife'e naho nakare'e amy kibory rey o taolañeio vaho finorototo'e ambone' i kitreliy handeora'e aze, hambañe amy tsara' IEHOVÀ tsinei' indatin' Añahare nikoike irezaiy. ¹⁷ Aa hoe re, Lona' ia o treakoo? Le hoe ondati' i rovaio ama'e: Kibori' indatin' Añahare niheo mb'etoa boak' Iehoda nitsey o raha anoe'o amy kitreli' i Beteleioy.* ¹⁸ Le hoe re: Adono; ko apo' areo ho tsiborè' ondaty o taola'eo. Aa le nado' iareo o taola'eo, rekets' o taola' i mpitoky boake Someroneio. ¹⁹ Nafaha' Iosià iaby o anjomban-toets' abo an-drova' i Somerone namboare' o mpanjaka' Israeleo nampiviñetse IEHOVÀ, le hene nanoe'e am' iereo i nanoe'e e Beteley. ²⁰ Fonga zinevo'e ambone kitrely eo o mpisoron-toets' abo taaa naho noroa'e ambone' iereo ty taola' ondaty; vaho nimpoly mb'e Ierosalaime mb'eo. ²¹ Linili' i mpanjakay o hene ondatio, ami'ty hoe: Ambeno i fihelañ' ambone' IEHOVÀ Andrianañahare'oy, i sinokitse amy bokem-pañinaiy. ²² Aa le mboe lia'e tsy nanoeñe ty fihelañ' ambone manahake zay boak' añ'andro' o mpizaka nizaka Israeleo ndra amo androm-panjaka' Israeleo naho o mpanjaka' Iehodà; ²³ amy taom-pahafolo-valo' ambi' Iosià mpanjakay ty nañambenañe i fihelañ' ambone am' IEHOVÀ e Ierosalaime ao. ²⁴ Fonga nafaha' Iosià ze mpandrombo angatse naho jiny naho terafime naho hazomanga vaho ze hene haloloañe nizoeñe an-tane' Iehoda naho e Ierosalaime ao hamente ty enta' i Hake sinokitse amy boke nioni' i Kilkia mpisoroñey añ'anjomba' IEHOVÀ aoiy.

²⁵ Le tsy eo ty nañirinkiriñe aze amy ze mpanjaka niaolo aze, ie nitolik' am' IEHOVÀ an-kaampon' arofo naho an-kaliforam-pañova vaho an-kene haozara'e, ty amy Ha'i Mosey; ie tsy amam-panonjohy nitroatse nanahak' aze. ²⁶ Fe tsy nitolik' amy fifombo'e niforoforoy t'IEHOVÀ, amy haviñera'e nisolebotse am' Iehodà, ty amo fonga sigy nisigihe' i Menasè Azeo. ²⁷ Le hoe t'IEHOVÀ, hafahako am-pahatreavako t'Iehoda, manahake ty nañafahako Israele vaho hahifko añe ty rova jinoboko toy naho i anjomba nataoko ty hoe: Ho ao i añarakoiy. ²⁸ Aa naho o fitoloña' Iosià ila'eo, o raha nanoe'e iabio, tsy fa sinokitse amy bokem-pamoliliañe o mpanjaka' Iehodaoy hao? ²⁹ Ie tañ' andro'e le nionjo haname ty mpanjaka' i Asore t'i Parò-Nekò[†] mpanjaka' i Mitsraime mb'an-tsaka Perate añe; nomb' ama'e mb'eo t'Ioase, mpanjaka, fe vata'e niisa'e le zinevo'e e Megidò añe. ³⁰ Nitakone' o mpitoro'eo an-tsarete i fañova'ey, nendese' iereo mb'e Ierosalaime mb'eo vaho nalentek' an-kibori'e ao. Rinambe ondati' i taneio t'Iehoakaze[‡], ie ty noriza' iareo ho mpanjaka handimbe an-drae'e.

³¹ Roapolito-aoñe telo' amby t'Iehoakaze te niorotse nifehe, le nifeleke telo volañe e Ierosalaime ao; i Kamotale[§], ana' Irm-meà* nte-Libnà, ty tahinan-drene'e. ³² Nanao haratiañe am-pivazoho' IEHOVÀ re manahake o fonga satan-droae'eo. ³³ Le vinaho' i Parò-Neko e Ribà an-tane Kamate añe re, tsy hameleha'e t'Ierosalaime; le sinaze'e talenta zato volafoty naho talenta volamena raike i taney. ³⁴ Le nanoe' i Parò-Neko mpanjaka t'i

* 23:17 Mp I 13:1-22, 31 † 23:29 Neko: kepeke ‡ 23:30 Iehoakaze: fanaña' IEHOVÀ § 23:31 Kamotale: ty talinjo' i hatrevoha'ey * 23:31 Jeremià: fañonjonañe i Talè

Eliakime ana' Iosia handimbe an-drae'e Iosia naho novae'e ho Iehoiakime ty tahina'e naho nendese'e mb'e Mitsraime mb'eo t'Iehoakaze, vaho nihomake aña. ³⁵ Natolo' Iehoiakime amy Parò i volafoty naho volamenay, le nangalà'e haba i taney ty amy lili' i Parò; rinambe'e am' ondati' i taneio i volafoty naho volamenay, sambe ty amy vili-loha'ey, hanolotse aze amy Parò-Neko. ³⁶ Roapolo-taoñe lime amby t'Iehoiakime te niorotse nifehe; vaho nifeleke folo-taoñe raik' amby e Ierosalaime ao; i Zebidà[†], ana' i Pedaià[‡] nte-Romà§, ty tahinan-drene'e. ³⁷ Le nanao haratiañe am-pivazoho' IEHOVÀ re manahake o satan-droae'eo.

24

¹ Nionjomb'eo tañ'andro'e t'i Nebokadnetsare*, le nimpitoro'e telo taoñe t'Iehoiakime; naho nivalike vaho niola'e, ² vaho nirahe' IEHOVÀ ama'e ty firimboñan-dahindefon-te-Kasdý, naho ty firimboña' o nte-Arameo naho ty firimboña' o nte-Moabeo, naho ty firimboña' o Ana' i Amoneo; nampihitrife'e am' Iehoda handrotsak' aze, ty amy tsara nafe' IEHOVÀ añamo mpitoro'e mpitokio. ³ Toe i lili' IEHOVÀ ty nivotraha' izay am' Iehoda, hanintake iareo tsy hahavazoho'e, ty amo hakeo' i Menasèo, naho o fitoloña'e iabio, ⁴ naho o lio-maliñe nampiorihe'eo, fa natsafe'e lio-maliñe t'Ierosalaime, ze tsy nimetea' IEHOVÀ hapoke. ⁵ Aa naho o fitoloña' Iehoiakime ila'eo, o nanoe'e iabio, tsy fa sinokitse amy bokem-pamoliliañe o mpanjaka' Iehodaoy hao? ⁶ Nitrao-piròtse aman-droae'e ao t'Iehoiakime le nandimbe aze nifehe t'Iehoiakine[†] ana'e. ⁷ Le tsy nionjo boak' an-tane'e aña ka ty mpanjaka' i Mitsraime, amy te tinava' ty mpanjaka' i Bavele ze hene hanañam-panjaka' i Mitsraime boak' an-Toraha' i Mitsraime pak' an-tSaka-Parate aña.

⁸ Ni-folo-taoñe valo' amby t'Iehoiakine te niorotse nifehe, le nifeleke e Ierosalaime ao telo-volañe. I Nekostà, ana' i Elnatane[‡], nte-Ierosalaime, ty tahinan-drene'e. ⁹ Nanao haratiañe am-pivazoho' IEHOVÀ re manahake o fonga satan-droae'eo. ¹⁰ Nionjomb'e Ierosalaime mb'eo henane zay o mpitoro' i Nebokadnetsare mpanjaka' i Baveleo, nañarikatoke i Rovay. ¹¹ Nivotrak' amy rovay t'i Nebokadnetsare mpanjaka' i Bavele ie fa nañarikatohe' o mpitoro'eo. ¹² Niavotse mb' amy mpanjaka' i Baveley t'Iehoiakine mpanjaka' Iehoda, ie naho i rene'e naho o mpitoro'eo naho o ana-dona'eo naho o mpifehe'eo; vaho ninday aze an-drohy an-taompifehea'e faha-valo ty mpanjaka' i Bavele. ¹³ Hene nakare'e o vara añ' anjomba' IEHOVÀ naho o vara añ' anjomba' i mpanjakaio, le songa pinatepate'e o fanake volamena tsinene' i Selomò mpanjaka' Israele ankivoho' IEHOVÀ, ty amy tsara' IEHOVÀ. ¹⁴ Le nendese'e an-drohy mb'eo iaby t'Ierosalaime naho o roandria'eo naho o fanalolahi'eo, mapirohy rai-ale, vaho ze hene mpandranjy naho mpanefeo, le tsy aman-konka'e naho tsy o rarake am' ondati' i taneio avao. ¹⁵ Aa le nendese'e an-drohy mb'e Bavele mb'eo t'Iehoiakine, naho nente'e ty rene' i mpanjakay naho o valim-panjakao naho o mpifehe'eo vaho o mpiaolo amy taneio boak' Ierosalaime sikala e Bavele aña an-drohy. ¹⁶ Le o fanalolahy iabio: fito arivo, naho o mpandranjio vaho o mpanefeo, arivo, songa naozatse nahafialy, sindre nasese' i mpanjaka' i Baveley an-drohy mb'e Bavele

[†] 23:36 Zebidà: tinolotse; manolotse [‡] 23:36 Pedaià: fijebaña' IEHOVÀ § 23:36 Romà: naonjoñe; mierañe; naforintseñe * 24:1 Nebokadnetsare: fiñeñeon-jaka † 24:6 Iehoiakine: fanalanka' IA, i haozara'e ‡ 24:8 Elnatane: tolots'Añahare

añe. ¹⁷ Nanoe' i mpanjaka' i Baveley mpanjaka t'i Matanià§, rahalahindrae' i Iehoiakine handimbe aze vaho novae'e ho Tsidkià* ty tahina'e. ¹⁸ Roapolo taoñe raik' amby t'i Tsidkià te niorotse nifehe; le nifehe folotaoñe raik' amby e Ierosalaime ao; i Hamotale, ana' Iiremeià nte-Libnà, ty tahinan-drene'e. ¹⁹ Nanao haratiañe am-pivazohoà IEHOVÀ re, hambañe amy nanoe' Iehoiakime iabiy. ²⁰ Toe niatreatre Ierosalaime naho Iehoda ty haviñera' IEHOVÀ ampara' te rinoa'e boak' añ' atrefa'e eo. Toe niola amy mpanjaka' i Baveley t'i Tsidkià.

25

¹ Ie tamy taom-paha-sive' i fifehea'ey, amy andro faha-folo' i volam-paha-folo'ey te nivotrak' eo t'i Nebokadnetsare mpanjaka' i Bavele, ie naho o lahindefo'e iabio, haname Ierosalaime naho nitobe ama'e vaho nandranjy rafim-pamofohañe niarikatok' aze. ² Le niarikatoheñe pak' amy taom-paha-folo-raik' ambi' i Tsidkià y i rovay. ³ Ie tamy andro faha-sive' i volam-pah' efatsei, lineveleve' ty hasalikoñañe o an-drovao, naho tsy ama' mahakama ondati' i taneio. ⁴ Niboroboñafeñe i rovay le fonga napolitise amy haleñey o lahin-defoñeo nimb' amy lalañe añivo' ty kijoly roe marine' i golobom-panjakaiy mb'eo, f'ie natrèt're' o nte-Kasdy nañarikatoke i rovaio te nomb' an-dala' i montoñey mb'eo. ⁵ Nihoridañe' o lahindefoñe nte-Kasdio i mpanjakay le nitrà' iereo amonto' Ierikoo ey; vaho fonga niparaitake ama'e o lahindefo'eo. ⁶ Aa le nasese' iareo amy mpanjaka' i Baveley e Riblà ao i mpanjakay, le zinaka'e. ⁷ Zinevo' iereo añatrefam-pihaino'e o ana-dahi' i Tsidkiào naho napoliti' iareo o fihaino' i Tsidkiào naho vinahotse torisike vaho nasese mb'e Bavele aña.

⁸ Ie amy androm-paha-fito' i volam-paha-limeiy, ty taom-paha-folo-sive' ambi' i Nebokadnetsare mpanjaka' i Bavele, le nivotrake e Ierosalaime ao t'i Nebozaradane, mpifehem-piambeñe, mpitoro' i mpanjaka' i Baveley; ⁹ le finorototo'e ty anjomba' IEHOVÀ naho ty anjomba' i mpanjakay naho ze hene anjomba e Ierosalaime ao; fonga nampangotomomohe'e añ' afó ze anjomba' ondaty bey. ¹⁰ Le rinotsa' o lahindefo nte-Kasdý nindre amy talem-piambeñeio o kijoli' Ierosalaime nañariary azeo. ¹¹ Hene nendese' i Nebozaradane an-drohy ze sehanga' ondaty amy rovay ao, naho ze nikapotrake, o nivalike mb'amy mpanjaka' i Baveleo, vaho o honkahonka' i valobohòkeio. ¹² Fe nenga' i talem-piambeñey o rarake amy taneio ho mpañalahalam-bahe vaho mpihare. ¹³ Dinemodemo' o nte-Kasdio o fahañe torisike añ' anjomba' IEHOVÀ naho i sajoa torisike reke-tombo'e añ'anjomba' IEHOVÀ, vaho nente' iareo mb'e Bavele mb'eo i torisikey. ¹⁴ Nendeseñe aña ka o valàñeо naho o endraendrao, o fampikipehañeо, naho o fingao, naho o fonga fanake torisike fitoroñañeо.

¹⁵ Nendese' i talem-piambeñey aña o fañembohañeо naho o kovetao, ze raha volamena ty ami'ty volamena'e, naho ze volafoty ty ami'ty volafoti'e. ¹⁶ I fahañe roe rey, i sajoa-beiy, naho o kalesy niranje' i Selomò ho a i anjomba' IEHOVÀ; tsy nionin-danja ty torisike amo fanake iabio. ¹⁷ Folo kiho valo' amby ty haabo' ty fahañe raike, le tama'e i satro'e torisikey; telo kiho i satro'ey; tsingarakarake naho dagoa ty nañarikatoke i satro'ey, fonga torisike; nihambañe ama'e i fahañe faharoey naho i tsingarakara'ey. ¹⁸ Rinambe' i talem-pañambeñey t'i Seraìà mpisorom-bey naho i Tsefanià mpisorom-paharoe, naho ty mpitan-dalañe telo; ¹⁹ le rinambe'e ty vosi'e nanoeñe mpifehe' o lahindefoñeo, naho ondaty lime

§ 24:17 Matanià: fampitama' IEHOVÀ * 24:17 Tsidkià; ty haton-jaka' IEHOVÀ

mpiatreke i mpanjakay nizoeñe an-drovao naho i mpanoki' i mpiaolombalobohòke mpikoike ondati' i taneiyo, reketse ty lahilahy enempolo am' ondati' i taney nitendrek' an-drovao. ²⁰ Nendese' i Nebozaradane talèm-piambeñe iereo naho nasese'e mb'amy mpanjaka' i Baveley e Riblà ao, ²¹ vaho zinevo' i mpanjaka' i Baveley, zinama'e e Riblà an-tane' Kamate. Aa le nakareñe an-tane'e vaho nasese an-drohy aña t'Iehodà.

²² Aa ty am'ondaty nengañe an-tane' Iehodào, o napò' i Nebokadnetsare mpanjaka' i Baveleo, le nanoe'e ho mpifehe' iareo t'i Gedalià*, ana' i Akikame, ana' i Safane. ²³ Le hene nahajanjiñe o mpiaolo lahindefoñeo naho ondati'eo te nanoe' i mpanjaka' i Baveley mpifehe t'i Gedalià, le nimb' amy Gedalià e Mitspà mb'eo t'Ismaele, ana' i Netanià, naho Iohanane, ana' i Kareàke, naho i Seraìà, ana' i Tankomete nte-Netofà, vaho Ia'azanià, ana' ty nte-Makà rekets' ondati' iareoo. ²⁴ Le nifañina am' iereo t'i Gedalià naho am'ondati'eo, nanao ty hoe: Ko hembañe amo mpitoro' o nte-Kasdioo; imoneño o taneo vaho toroño i mpanjaka' i Baveley, fa zay ty hahasoa anahareo. ²⁵ Fe ami'ty volam-paha-fito, le nimb'eo t'Ismaele, ana' i Netanià, ana' i Elisama tirim-panjaka rekets' ondaty folo le zinevo' iareo t'i Gedalià, vinono' iereo naho o nte-Iehoda naho nte-Kasdý nitrack' ama'e e Mitspào. ²⁶ Niongak' amy zao ondaty iabio, ty kede naho ty bey, naho o mpifehe lahindefoñeo nimb'e Mitsraime mb'eo amy t'ie nihembañe amo nte-Kasdio.

²⁷ Le amy taom-paha-telopolo-fito' ambi' ty naха mpirohi' Iehoiakine mpanjaka' Iehoda, amy andro faha-roapolofito' ambi' i volam-pahafitoiy, te naonjo' Ivil-merodake mpanjaka' i Bavele amy taom-pamotorampifeleha'ey ty añambone' Iehoiakine mpanjaka Iehoda boak' am-porozò ao, ²⁸ le namere aze vaho napo'e ambone' o fiambesam-panjaka mpindre ama'e e Baveleo i fiambesa'ey. ²⁹ Sinolo'e o sikim-pandrohiza'eo, le nikama aña' atrefa' i mpanjakay nainai'e amo hene andro niveloma'eo. ³⁰ Le i fiveloma'ey, nampamahane' i mpanjakay aze ty anjara mifanoitoy, ty anjara boak' andro amo hene andro niveloma'eo.

* ^{25:22} Gedalià: Engeko t'i Andrianañahare

Fiantoñoñe I

- ¹ I Dame, i Sete, i Enose,
² i Kanàne, i Mahalaile, Ierede,
³ i Kenoke, i Metoselake, i Lameke,
⁴ i Noake, i Seme, i Kame vaho Iefete.
⁵ O ana' Iefeteo: i Gomere naho i Magoge naho i Madaý naho Iavane
 naho i Tobale naho i Meseke vaho i Tirase.
⁶ Le o ana' i Gomereo; i Askenaze naho i Rilate* vaho i Togarmà.
⁷ Le o ana' Iavaneo: i Elisà naho i Tarsise, i Kitime vaho i Rodanime.
⁸ O ana' i Kameo; i Kose naho i Mitsraime, i Pote vaho i Kaanane.
⁹ Le o ana' i Koseo, i Seba naho i Kavilà naho i Sabtà naho i Ramà vaho
 i Sabtekà. Le o ana' i Ramào, i Sebà naho i Dedane.
¹⁰ Nasama' i Kose t'i Nimrode ze niorotse ho maozatse an-tane atoy.
¹¹ Nasama' i Mitsraime o nte-Lodeo, o nte-Anameo, o nte-Lehabeo, o nte-
 Maftokeo, ¹² o nte-Patroseo, o nte-Kaslokeo (ty niboaha' o nte-Pelistio) vaho
 o nte-Kaftoreo.
¹³ Nasama' i Kaanane t'i Tsidone tañoloñoloña'e naho i Kete ¹⁴ naho i
 nte-Iebosý, i nte-Amorey, i nte-Girgasý, ¹⁵ i nte-Kivý, i nte-Erekey, i nte-Siny,
¹⁶ i nte-Arvadey, i nte-Tsemarý vaho i nte-Kamatey.
¹⁷ O ana' i Semeo: i Elame naho i Asore naho i Arpaksade naho i Lode
 naho i Arame naho i Oze naho i Kole naho i Getere vaho i Meseke.
¹⁸ Nasama' i Arpaksade t'i Selà, le nasama' i Selà t'i Evre.
¹⁹ Nahatoly ana-dahy roe t'i Evre: i Pelege† ty tahina' ty raike, amy te
 tañ' andro'e ty fizarañe ty tane toy; Ioktane‡ ty tahinan-drahalahi'e.
²⁰ Nasama' Ioktane t'i Almodade naho i Selefè naho i Katsar'mavete naho
 Ierake ²¹ naho i Hadorame naho i Ozale naho i Diklà ²² naho i Ebale naho
 i Abimaele naho i Sebà ²³ naho i Ofire, i Kavilà vaho Iobabe. Songa ana'
 Ioktane. ²⁴ I Seme, i Arfaksade, i Selà, ²⁵ i Evre, i Pelege, i Rehò, ²⁶ i Seroge,
 i Nakore, i Teràke, ²⁷ i Avrame—toe Avrahame.
²⁸ O ana' i Avrahameo: Jetsake naho Ismaele.
²⁹ Zao o tarira' iareoo: ty tañoloñoloña' Ismaele: i Nebaiote, le i Kedare
 naho i Adbile naho i Mibsame, ³⁰ i Mismà naho i Domà, i Masà, i Kadade
 naho i Temà, ³¹ Ietore, i Nafise vaho i Kedemà. Ie i ana' Ismaele rey.
³² Le o ana' i Ketorà, sakeza' i Avrahameo: nasama'e t'i Zimrame naho
 Ioksane naho i Medane naho i Midiane naho Isbake vaho i Soake. Le o
 ana' Ioksaneo: i Seba naho i Dedane.
³³ Le o ana' i Midianeo: i Efà naho i Efere naho i Kanoke naho i Abidà
 vaho i Eldaà. Songa ana-dahi' i Ketorà.
³⁴ Nasama' i Avrahame t'Ietsake. O ana' Ietsakeo; i Esave naho Israele.
³⁵ O ana' i Esaveo: I Elifaze, i Reoele naho Ieose naho Iaalame vaho i
 Korà.
³⁶ O ana' i Elifazeo: I Temane naho i Omare, i Tsefý naho i Gatame, i
 Kenaze naho i Timnà vaho i Amaleke.
³⁷ O ana' i Reoeleo, i Nakate, i Zerake, i Samà vaho i Mizà.
³⁸ O ana' i Seireo: I Lotane naho i Sobale naho i Tsibone naho i Anànaho
 i Disone naho i Etsere vaho i Disane.
³⁹ O ana' i Lotaneo: i Kory naho i Homame; le rahavave' i Lotane t'i
 Timnà.
⁴⁰ O ana' i Sobaleo; i Aliane naho i Manakate naho i Ebale, i Sefý, vaho
 i Oname. O ana' i Tsiboneo: I Aià naho i Anà.

* ^{1:6} Fot 10:3 † ^{1:19} Pelege: fizarañe ‡ ^{1:19} Ioktane; fifandierañe

⁴¹ O ana' i Anào; I Disone. O ana' i Disoneo: I Khamrame naho i Esbane naho Itrane vaho i Kerane.

⁴² O ana' i Etsereo: i Bilhane naho i Zaavane vaho Iakane. O ana' i Disaneo; i Oze naho i Arane.

⁴³ Zao o mpanjaka nifehe an-tane' Edome t'aolo ty nifeleham-panjaka o ana' Israeleoo; i Bela, ana' i Beore; i Dinhabà ty añaran-drova'e.

⁴⁴ Ie nivilasy t'i Belà, le nandimbe aze nifehe t'Iobabe, ana' i Zerake nte-Botsrà.

⁴⁵ Ie nihomake t'Iobabe, le nandimbe aze nifehe t'i Kosame boak' antane' o nte-Tamaneo.

⁴⁶ Ie nikoromake t'i Kosame le nandimbe aze nifehe t'i Kadade ana' i Bedade, i nanjevo i Midiane an-tete' i Moabey; i Avite ty añaran-drova'e.

⁴⁷ Ie nivilasy t'i Kosame, le nandimbe aze nifehe t'i Samlà nte-Masrekà.

⁴⁸ Ie nihomake t'i Samlà, le nandimbe aze nifehe t'i Saole nte-Rehobote marine' i sakay.

⁴⁹ Ie nikoromake t'i Saole, le nandimbe aze nifehe t'i Baalekanane ana' i Akbore.

⁵⁰ Ie nivilasy t'i Baale'kanane, le nandimbe aze nifehe t'i Hadade; i Pay ty añaran-drova'e naho i Mehetabele, anak' ampela' i Matrede, anak' ampela' i Mezahabe, ty tahinam-bali'e.

⁵¹ Nivilasy ka t'i Hadade. O talè' i Edomeo: i Timnà, talè', i Alià, talè, Ietete, talè, ⁵² i Oholibamà, talè, i Elà, talè naho i Pinone, talè, ⁵³ i Kenaze, talè, i Temane, talè, i Mibzare, talè, ⁵⁴ i Magdiele, talè vaho Irame, talè. Zay o talè' i Edomeo.

2

¹ O ana' Israeleo: i Reobene, i Simone, i Levý naho Iehoda, Iisakare naho i Zebolone, ² i Dane, Iosefe naho i Beniamine, i Naftalý, i Gade vaho i Asere.

³ O ana' Iehodao: i Ere naho i Onane vaho i Selà, nasama'e amy anak' ampela' i Soà nte-Kaananey i telo rey; Niraty ampivazohoá IEHOVÀ t'i Ere tañoloñoloña' Iehodà, le vinono'e.

⁴ Nasama' i Tamare vinanto'e t'i Peretse naho i Zerake. Lime ty ana' Iehodà naho atontoñe. ⁵ O ana' i Peretseo: i Ketsrone naho i Kamole.

⁶ O ana' i Zerakeo: i Zimrý naho i Etane naho i Hemane naho i Kalkole vaho i Darà: lime t'ie atontoñe.

⁷ O ana' i Karmio: i Akare, ty mpitrobo' Israele, i nandilatse amy raha nafatsei.

⁸ O ana' i Etaneo: i Azarià.

⁹ O ana' i Ketsroneo, o nisamak' ama'eo: Ierakemeele naho i Rame naho i Kelobeý.

¹⁰ Le nasama' i Rame t'i Aminadabe; naho nasama' i Aminadabe t'i Naksone, talè o ana' Iehodao;

¹¹ Le nasama' i Naksone t'i Salmà, le nasama' i Salmà t'i Boaze,

¹² Le nasama' i Boaze t'i Ovede; le nasama' i Ovede t'Isaý,

¹³ Le nasama' Isaý t'i Eliabe, tañoloñoloña'e, i Abinadabe ty faharoe, i Simà ty fahatelo, ¹⁴ i Netanele ty fahafatse, i Raday ty fahalime, ¹⁵ i Otseme ty fah' eneñe vaho faha-fito t'i Davide; ¹⁶ ty rahavave' iareo: i Tseroiae naho i Abigale. O ana' i Tseroiae: i Abisaý naho Ioabe naho i Asaele; telo.

¹⁷ Nasama' i Abigale t'i Amasà, Ietere nte-Ismaele ty rae' i Amasa.

¹⁸ Nahatoly anak' amy Azobae vali'e naho amy Ieriotee t'i Kalebe ana' i Ketsrone: le zao o ana-dahi'eo: Iesere naho i Sobabe vaho i Ardone.

¹⁹ Ie nihomake t'i Azobae, le nengae' i Kalebe t'i Efratae ze nahatoly i Kore ho aze. ²⁰ Nasama' i Kore t'i Orý naho nasama' i Orý t'i Betsal'èle.

²¹ Ie amy zay nimoak' amy anak' ampela' i Makire rae' i Giladey t'i Ketsrone le nengae'e ho vali'e ie ni-enem-polo taoñe vaho nisamaha'e t'i Segobe.

²² Le nasama' i Segobe, t'Iaire, ie aman-drova roapolo-telo' amby an-tane Gilade ao.

²³ Rinambe'e t'i Gesore naho i Arame rekets' o rova' Iaireo naho i Kenate naho o rova'eo, rova enempolo. Songa ana' i Makire rae' i Giladeo.

²⁴ Ie nihomake e Kalebe-efratae aña t'i Ketsrone, le nisamaha' i Abià vali' Ketsrone t'i Asore, rae' i Tekoa.

²⁵ O ana-dahi' Ierakmeele tañoloñoloña' i Ketsroneo, le i Rame tañoloñoloña'e naho i Bonà naho i Orene naho i Otseme vaho i Akià.

²⁶ Nanam-baly tovo'e t'Ierakmeele, i Atarà ty tahina'e, ie ty rene' i Oname.

²⁷ O ana' dahi' i Rame, tañoloñoloña' Ierakmeeleo, le i Maatse naho Iamine vaho i Ekere.

²⁸ O ana' i Onameo, le i Samaý naho Iadà. O ana' i Samaò: i Nadabe naho i Abisore.

²⁹ I Abihaile ty tahinam-bali' i Abisore; ie ty nisamake i Akbane vaho i Molide.

³⁰ O ana' i Nadabeo: i Selede naho i Apaime; fe nihomake betsiterake t'i Selede.

³¹ O ana' i Apaimeo: Isý. Le o ana' Isò: i Sesane. Le o ana' i Sesaneo: i Aklaý.

³² O ana' Ietere, rahalahi' i Samaò; Ietere naho Ionatane; nihomake betsiterake t'Ietere.

³³ O ana' Ionataneo: i Pelete naho i Zazà. Ana' Ierakmeele irezay.

³⁴ Tsy nanan' ana-dahy t'i Sesane, fa anak' ampela avao. Le nanam-pitoroñe nte-Mitsraime t'i Sesane, Iarkà ty tahina'e. ³⁵ Natolo' i Sesane am' Iarkà mpitoro'e i anak' ampela'ey ho vali'e, le nisamaha'e t'i Ataý.

³⁶ Nasama' i Ataý t'i Natane le nasama' i Natane t'i Zabade.

³⁷ Nasama' i Zabade t'i Eflale, le nasama' i Eflale t'i Ovede.

³⁸ Nasama' i Ovede t' Iehò, le nasama' Iehò t'i Azarià.

³⁹ Nasama' i Azarià t'i Keletse, le nasama' i Keletse t'i Eleasà.

⁴⁰ Nasama' i Eleasà t'i Sisamaý, le nasama' i Sisamaý t'i Salome.

⁴¹ Nasama' i Salome t'Iekamià vaho nasama' Iekamià t'i Elisamà.

⁴² O ana' i Kalebe, rahalahi' Ierakmeeleo: i Mesà, tañoloñoloña'e, rae' i Zife; naho o ana' i Maresào, rae' i Kebrone.

⁴³ O ana' i Kebroneo: i Korake naho i Tapoàke naho i Rekeme vaho i Semà.

⁴⁴ Nasama' i Semà t'i Rakame, rae' Iorkoame; le nasama' i Rekeme t'i Samaý.

⁴⁵ Ana' i Samaý t'i Maone; le rae' i Bete-tsore t'i Maone.

⁴⁶ Nasama' i Efæe, sakeza' i Kaleba t'i Karane naho i Motsà naho i Gazeze; le nasama' i Karane t'i Gazeze.

⁴⁷ O ana-dahi' Iedahio, i Regeme naho Iotame naho i Gesane naho i Pelete naho i Efà vaho i Saàfe.

⁴⁸ Nasama' i Maakàe sakeza' i Kalebe t'i Sebere naho i Tirkanà.

⁴⁹ Nasama'e ka t'i Saafe, rae' i Madmanà naho i Seva rae' i Makbenà naho rae' i Gibà; i Aksà ty anak' ampela' i Kalebe.

⁵⁰ Ana' i Kalebe irezay. O ana' i Koreo tañoloñoloña' i Efratae, le i Sobale rae' i Kiriate' Iearime ⁵¹ naho i Salmà rae' i Betlekhemé naho i Karefe rae' i Bete-gadere.

⁵² Nanañ' ana-dahy ka t'i Sobale rae' i Kirjiate'Iearime: i Haroae naho ty vaki' o nte-Menokoteo.

⁵³ O fifokoa' i Kiriate' Iearimeo: o nte-Ietroo naho o nte-Poteo naho o nte-Somào vaho o nte-Misrao; le boak' am' iereo o nte-Tsorao naho o nte-Estaoleo.

⁵⁴ O ana' i Salmao: i Betelekheme naho o nte-Netofào naho i Atarote, anjomba' Ioabe naho ty vaki' o nte-Manakhateo, o Tsorào.

⁵⁵ Le o fifokoa' o mpanokitse mpimoneñe e Iabetseoo: O nte-Tiraò naho o nte-Simào vaho o nte-Sokào; nte-Kaine boak'e Kemate, rae' i anjomba' i Rekabey iereo.

3

¹ O ana-dahi' i Davide nitoly ama'e e Kebroneo: i Amnone amy Akinoame nte-Iezreele ty tañoloñoloña'e; i Daniele amy Abigaile nte-Karmeles ty faharoe; ² i Absalome ana' i Maakà anak' ampela' i Talmaý mpanjaka' i Gesore, ty fahatelo'e; i Adonià ana' i Kagite ty fahaefa'e; ³ i Sefatià amy Abitale ty faha lime; Itreame amy Eglæe vali'e, ty fah' eneñe. ⁴ Nisamak' ama'e e Kebrone ao i eneñe rey; ie nifelek' ao fito-taoñe naho enembolañe; vaho nifehe telo-polo taoñe telo amby e Ierosalaime ao.

⁵ O nisamak' ama'e e Ierosalaimeo, le: i Simeà naho i Sobabe naho i Natane naho i Selomò; i efatse rey amy Batesoà* anak' ampela' i Amiele†; ⁶ le Ibhare naho i Elisamà naho i Elipelete, ⁷ naho i Nogà naho i Nefefe naho Iafià, ⁸ naho i Elisama naho i Eliada vaho i Elifelete, sive. ⁹ Ie o ana-dahi' i Davideo, mandikoatse o amo sakeza'eo; vaho rahavave' iareo t'i Tamare.

¹⁰ Ana-dahi' i Selomò t'i Rekoboame; ana'e t'i Abiià, ana'e t'i Asa vaho ana'e t'Iehosafate; ¹¹ ana'e t'Iorame, ana'e t'i Ahkazià, ana'e t'Ioase, ¹² ana'e t'i Amatsià, ana'e t'i Azarià, ana'e t'Iothame ¹³ ana'e t'i Ahkaze, ana'e t'i Kezekià, ana'e t'i Menasè, ¹⁴ ana'e t'i Amone, ana'e t'Iosià. ¹⁵ O ana' Iosià; Iokanane ty tañoloñoloña'e, Iehoiakime ty faharoe, i Tsidki ty fahatelo vaho i Salome ty fahefatse. ¹⁶ O ana' Iekoiakimeo: ana'e t'Iekonia, ana'e t'i Tsidkià. ¹⁷ O ana' Iekonià mpirohio; ana'e t'i Salatiele ¹⁸ naho i Malkirame naho i Pedaià naho i Senats'tsare, Iekamià, i Hosamà vaho i Nedabià. ¹⁹ O ana' i Pedaià: i Zerobabele naho i Simeý; le o ana' i Zerobabeleo: I Mesolame naho i Kananià vaho i Selomìte rahavave' iareo; ²⁰ naho i Kasobà naho i Ohele naho i Berekìà naho i Kasadià vaho Iosabekesede, lime. ²¹ O ana' i Kananià, i Pelatià naho Iesaià, ana'e t'i Refaià; ana'e t'i Arnane; ana'e t'i Obadià; ana'e t'i Sekanià. ²² Le o ana' i Sekanià: i Semaià, le o ana' i Semaià: i Katose naho Igeale naho i Barià naho i Nearià vaho i Safate, eneñe. ²³ O ana' i Nearià: i Elioenay naho i Kezekià vaho i Azrikame, telo. ²⁴ Le o ana' i Elioenaio: i Hodaià naho i Eliasibe naho i Pelaia naho i Akobe naho Iokanane naho i Dalaià vaho i Anany, fito.

4

¹ O ana'Iehodào: i Peretse naho i Ketsrone naho i Karmý naho i Kore vaho i Sobale. ² I Reaià, ana' i Sobale ty nisamake Iakate; le nasama' Iakate t'i Akomàvaho i Lakade. Ie fifokoa' o nte-Tsorào. ³ Zao o anandrae' i Etameo: Iezreele naho Ismà naho Idbase; naho anak' ampela'e t'i Hatseleponý, ⁴ naho i Penoele rae' i Gedore vaho i Ezere rae' i Kosà. Ie ro ana' i Kore, tañoloñoloña' i Efratà rae' i Betlekheme. ⁵ Nanam-baly roe t'i Asore, rae' i Tekoa, i Kelàe naho i Naarae. ⁶ Nasama' i Naarae ho aze t'i Akozame naho i Kefere naho i Temený naho i Haakastarý. Ie ro ana' i Naarae. ⁷ Le o ana' Kelào: i Tserete, Itskàre vaho i Etnane. ⁸ Nasama' i

* ^{3:5} Batesoà: toe i Batesebà † ^{3:5} Amiele: Ondatin'A're; (Sa II 3. 5)

Koze t'i Anobe naho i Tsobebà vaho o fifokoa' i Akarkele ana' i Karomeo. ⁹ Nanan-kasy ambone' o rahalahi'eo t'Iabetse le tinokan-drene'e ty hoe Iabetse amy te, Nahatoly am-panaintaiñan-draho. ¹⁰ Kinanji' Iabetse t'i Andrianañahare' Israele, ami'ty hoe: Ehe tahio Raho naho ampalalaho ty feheko naho ampindrezo amako ty fità'o, hañarova'o ahy amy ze haratiañe mete hanosotse! Le natolon' Añahare aze i nihalalia'ey.

¹¹ Nasama' i Kelobe, rahalahi' i Soà t'i Mekire, rae' i Estone. ¹² Nasama' i Estone t'i Bete-rafà naho i Paseake naho i Tekinà, rae' Irnakase. Ie ro ondati' i Rekào. ¹³ O ana' i Kenazeo: i Otniele naho i Seraià; le o ana' i Otnieleo: i Hatate vaho i Meonotae. ¹⁴ Nasama' i Meonotae t'i Ofrà; le nasama' i Seraià t'Ioabe, ty rae' i vavatane' i Karasimey*; amy t'ie mpandranjy. ¹⁵ O ana' i Kalebeo, ana' Iefonè : Irò naho i Elà vaho i Naame; le o ana' i Elào, i Kenaze. ¹⁶ O ana' Iehalelaleo; i Zife naho i Zifa naho i Tirià vaho i Asarile. ¹⁷ O ana' i Ezrào: Ietere naho i Merede naho i Efere naho Ialone; le ie ty nisamake i Miriame naho i Samaý naho Isbà, rae' i Estemoà. ¹⁸ Nasama' ty vali' Iehodià t' Ierde rae' i Gedore naho i Kevere, rae' i Sokò naho Iekotiele rae' i Zanoake. Ie ro ana' i Bitaiae anak' ampela' i Parò nengae' i Merede. ¹⁹ Le o ana' t'i Hodìa vali'e, rahavave' i Nakameo: rae' i Keilà nte-Garmý naho i Estemoà nte-Maakà. ²⁰ O ana' i Simoneo: i Amnone naho i Rinà naho i Bene-Kanàne vaho i Tilone. O ana' Isio: i Zokete naho i Bene-Zokete. ²¹ O ana' i Selà, ana' Iehodao: i Ere, rae' i Lekà naho i Ladà, rae' i Maresà naho ty anjomba' o mpanenoñe leny boak' añ' anjomba' i As'beào, ²² naho Iokime naho ondati' i Kozebà naho Ioase naho i Sarafe, nimpifeleke e Moabeo naho Iasobi-lekeme (ty amo fiantoño'e haehaeo). ²³ Nimpanao valàñe-tane iereo, nimoneñe an-teteke finahetse hatae veloñe; ie nitobok' ao le nitoloñe am-pitoloña' i mpanjakay.

²⁴ O ana' i Simoneo; i Nemoele naho Iamine, Iaribe, i Zerake, i Saole. ²⁵ I Salome ana'e, i Mibsame ana'e, i Mismà ana'e. ²⁶ O ana' i Mismao; i Kamoele ana'e, i Zakore ana'e, i Simý ana'e. ²⁷ Nanañ' ana-dahy foloeneñ' amby naho anak' ampela eneñe t'i Simý; fe tsy nanañ' anake fire o longo'eo, le tsy nitombo manahake o ana' Iehodào ty fifokoa' iareo. ²⁸ Ie nimoneñe e Beere-sebà ao naho e Moladà naho e Katsare-soale ²⁹ naho e Bilhà naho e Etseme naho e Tolade ³⁰ naho e Betoelé naho e Kormà naho e Tsiklage ³¹ naho e Bete-markabote naho e Katsare-sosime naho e Bete-birý vaho e Saaraime. Ie nirova ampara' ty fifehea' i Davide. ³² O rova' iareoo: i Etame naho i Aine naho i Rimone naho i Tokene vaho i Asane; rova lime; ³³ le nañohoke i rova rey ampara' i Baale eo o tanà' iareoo. Ie o fimoneña' iareo vaho am' iareo ao o fiantoño' iareoo. ³⁴ Le i Mesobabe naho Iamleke naho Iosà, ana' i Amatsià, ³⁵ naho Ioele naho Iehò, ana' Iosibià, ana' i Seraià, ana' i Asiele. ³⁶ Le i Elioë-nahý naho Ia'akobà naho Iesokaià naho i Asaià naho i Adiele naho Iesimiele vaho i Benaià. ³⁷ Naho i Zizà ana' i Sifý, ana' i Alone, ana' Iedaià, ana' i Simrý, ana' i Semaià. ³⁸ Songa nitalè' o fifokoa'eo i tinoñon-tahinañe rezay vaho niraorao ty anjomban-droae' iareo. ³⁹ Nimb' am-pimoahañe e Gedore mb'eo naho atiñana' i vavataney mb'eo iereo nipay ty handrazeñe o lia-rai' iareoo. ⁴⁰ Le tendreke fiandrazañe mitròñe naho tane soa bei-henehene, ie nianjiñe naho nierañerañe amy te nimoneñe ao haehae o nte-Kameo. ⁴¹ Le o sinokitse an-tahinañe retoañe ty nivotrake eo tañ' andro' i Kezekià mpanjaka' Iehoda, le linafa' iereo o kiboho'eo naho ze nte-Meone nizoeñe ao, le vata'e nimongorañe ampara henaneo vaho nimoneñe an-toe' iareo ao amy te am-piandrazañe o lia-rai'eo. ⁴² Ty ila' iareo, o ana' i Simeoneo, ondaty liman-jato nimb' am-bohi' i Seire mb'eo;

* **4:14** Karasime: Mpandranjy

le o mpifehe' iareoo: i Pelatià naho i Nearià naho i Refaià vaho i Oziele, sambe ana' Iisý. ⁴³ Le zinama' iareo ty ila' o nte Ameleke napolititseo vaho mimoneñe ao pak' androany.

5

¹ O ana' i Reobeneo, tañoloñoloña' Israeleo, (toe ie ty valohan' ana'e fe nitivae'e ty fandrean-drae'e le natolotse amo ana' Iosefe, ana' Israeleo ty zom-pisamaha'e, fe tsy i zom-pisamahañey ty fiantoñoñe). ² Naozatse te amo rahalahi'eo t'Iehoda, le boak' ama'e ty talè; fe a Iosefe ty zontañoloñoloñañe. ³ O ana' i Reobene, tañoloñoloña' Israeleo: i Kanoke naho i Palò, i Ketsrone vaho i Karmý. ⁴ O ana' Ioeleo: i Semaià, ana'e t'i Goge, ana'e t'i Simý, ⁵ ana'e t'i Mikà, ana'e t'i Reaia, ana'e t'i Baale, ⁶ ana'e t'i Beerà nendese' i Tilgate-pilnesere mpanjaka' i Asore aña androhy. Ie ty nitalè' o nte-Reobeneo. ⁷ O rahalahi'eo ty amo hasavereña'eo, ty fiantoño' iareo, le Ieiele, mpifehe naho i Zekaria ⁸ naho i Bela ana' i Azaze, ana' i Semà, ana' Ioele nimoneñe e Aroere pake Nebò ao naho e Baale-meone; ⁹ naho maniñanañe, nimoneñe pak' amy fimoahañe am-patrambe boak' an-tsaka Peratey amy te niraorao an-tane Gilade ao o añombe' iareoo. ¹⁰ Nialy amo nte-Hagareo iereo tañ'andro' i Saoile, le nihotrak' am-pitá' iareo vaho nimoneñe an-kiboho' iareo nanitsike i tane atiñana' i Giladey. ¹¹ Nimoneñe tandrife iereo an-tane' i Basane ao pake Salkà aña o ana' i Gadeo. ¹² Ioele, mpiaolo naho i Safame, mpanonjohy naho Iaanàvaho i Safate e Basane ao. ¹³ Le o longo' iareo aña anjombandroae'eo: i Mikaele naho i Mesolame naho i Sebà naho Ioràvaho Iakane naho i Zibà vaho i Evre, fito. ¹⁴ O ana' i Abikaileo, ana' i Korý, ana' Ioroake, ana' i Gilade, ana' i Mikaele, ana Iesisày, ana' Iakdò, ana' i Boze; ¹⁵ i Aky, ana' i Abdiele, ana' i Gony, mpiaoloñ' anjomban-droae' iareo. ¹⁶ Ie nimoneñe e Gilade e Basane ao, amo rova'eo naho am-piandraza' i Sarone pak' aña efe' iareo aña. ¹⁷ Ie ro nivolilieñe am-piantoñoñe tañ' andro' Iotame, mpanjaka' Iehodà naho tañ' andro' Iarovame, mpanjaka' Israele. ¹⁸ Efats'ale-tsi-efats'arivo-tsi-fitonjato-tsi-enempolo ty nionjomb' aña'ly amo ana' i Reobeneo naho o nte-Gadeo naho i vakim-pifokoa' i Menasèy, songa anake nahasibeke, ondaty nahafinday fikalañe naho fibara naho nahafañòhatse fale vaho nahimbañe an-kotakotake, efats' ale-tsi-efats'arivo-tsi-fiton-jato-tsi-enempolo ty nimbañ' aly. ¹⁹ Nialia' iareo o nte-Hagrio naho Ietore naho i Nafise vaho i Nodabe. ²⁰ Nimbaeñe iereo, le natolotse am-pitá' iareo o nte Hagrio rekets' o mpiama'e iabio; amy te nikanie' iareo an-kotakotak' ao t'i Andrianañahare, le vinale'e i halaliy, amy t'ie niato. ²¹ Fonga tinava' iareo o añombe'eo; naho ty rameva' iareo lime-ale naho añondry roe-hetse-tsi-lime-ale naho borìke ro'arivo; naho sandriñe rai-hetse. ²² Le maro ty nitsingoro ho mate amy te an' Andrianañahare i aliy. Le nimoneñe ao iereo nandimbe iareo pak'amy fandrohizañey. ²³ Nimoneñe amy taney o ana' i vakim-pifokoa' i Menasèo, le nihamaro boake Basane pake Baale-kermone naho e Senire vaho pak' am-bohi-Kermone aña. ²⁴ Le o mpiaolon' anjomban-droae' iareoo: i Efere naho Isý naho i Eliele naho i Azriele naho Iiremià naho i Hodavià vaho Iakdiele, fanalolahy, maram-bintañe songa talèn' anjomban-droae'e, ²⁵ f'ie niota aman' Añaharen-droae' iareo, nañarapilo mb' amo ndrahare' ondati' i tane' rinoan' Añahare aolo' iareoo. ²⁶ Aa le nitroboen' Añahare' Israele ty tro' i Pole mpanjaka' i Asore naho ty tro' i Tilgate-Pilnesere mpanjaka' i Asore, le nendese' iereo aña o nte-Reobeneo naho

o nte-Gadeo vaho i vakim-pifokoa' o nte-Menasèoy; nenteñe mb'e Kalake nahoh e Kabore nahoh e Karà vaho mb'an-tsaka' i Gozane aña pak' androany.

²⁷ O ana' i Levio: i Gersone nahoh i Kehàte vaho i Merary. ²⁸ O ana' i Kehàteo: i Amrame nahoh Iitsare nahoh i Kebrone vaho i Oziele. ²⁹ O ana' i Amrameo: i Aharone nahoh i Mosè vaho i Mirieme. O ana' i Aharoneo: i Nadabe nahoh i Abihoo, i Elazare vaho Itamare. ³⁰ Nasama' i Elazare, t'i Pinekase, le nasama' i Pinekase t'i Abisoa. ³¹ Nasama' i Abisoa t'i Boký le nasama' i Boký t'i Ozý. ³² Nasama' i Ozý t'i Zerakià, le nasama' i Zerakià, t'i Meraiote. ³³ Nasama' i Meraiote t'i Amarià, le nasama' i Amarià t'i Akitobe. ³⁴ Nasama' i Akitobe t'i Tsadoke, le nasama' i Tsadoke t'i Akimatse. ³⁵ Nasama' i Akimatse t'i Azarià, le nasama' i Azarià t'Iokanane. ³⁶ Nasama' Iokanane t'i Azarià (ie ty nitoloñe ho mpisoroñe amy anjomban' Añahare rinafi' i Selomò e Ierosalaimey.) ³⁷ Nasama' i Azarià t'i Amarià, le nasama' i Amarià t'i Akitobe. ³⁸ Nasama' i Akitobe t'i Tsadoke, le nasama' i Tsadoke t'i Salome. Nasama' i ³⁹ Salome t'i Kilkia, le nasama' i Kilkia t'i Azarià. ⁴⁰ Nasama' i Azarià t'i Seraià, le nasama' i Seraià t'Iehotsadake. ⁴¹ Nasese an-drohy t'Iehotsadake amy nanesea' IEHOVÀ am-pità' i Nebokadnetsare t'Iehodà nahoh Ierosalaime.

6

¹ O ana' i Levio: i Gersome, i Kehàte vaho i Merary. ² Zao ty tahina' o ana' i Gersomeo: i Libný nahoh i Simý. ³ O ana' i Kehàteo: i Amrame, Itshare nahoh i Kebrone vaho i Oziele. ⁴ O ana' i Merario: i Maklý nahoh i Mosý, le zao o hasavereña' o nte-Levio ty aman-droae'eo. ⁵ I Gersone: ana'e t'i Libný, ana'e t' Iakate, ana'e t'i Zimà, ⁶ ana'e t'Ioà, ana'e t'Idò, ana'e t'i Zerake, ana'e t'leateray. ⁷ O ana' i Kehàteo: ana'e t'i Aminadabe, ana'e t'i Korake, ana'e t'i Asire, ⁸ ana'e t'i Elkanà, ana'e t'i Ebiasafe, ana'e t'i Asire, ⁹ ana'e t'i Takate, ana'e t'i Oriole, ana'e t'i Ozià, ana'e t'i Saole. ¹⁰ O ana' i Elkanao: i Amasay nahoh i Akimote. ¹¹ Ty amy Elkanà: o ana' i Elkanào: ana'e t'i Zofay, ana'e t'i Nakate, ¹² ana'e t'i Eliabe, ana'e t'Ierokame, ana'e Elkanà. ¹³ O ana' i Samoeleo; tañoloñoloña'e t'i Vasný nahoh i Abià. ¹⁴ O ana' i Merario: i Maklý, ana'e t'i Libný, ana'e t'i Shimý, ana'e t'i Ozà. ¹⁵ I Simý: ana'e t'i Kagià, ana'e t'i Asaià.

¹⁶ Iretoañe o najado' i Davide hifeleke ty fisaboañe añ'anjomba' IEHOVÀ, ie fa napok' ao i vatay. ¹⁷ Le nitoroñe an-tsabo añatrefa' i kivohon-kibohom-pamantañañey iereo, am-para' ty nandranja' i Selomò ty anjomba' IEHOVÀ e Ierosalaime ao, le songa nandrambe ty toe'e nahoh ty fitoroña'e amy firirita'ey. ¹⁸ Irezao o nandrambe o toe'eo nahoh o tarira'eo: Amo ana' i Kehàteo: i Hemane mpisabo, ana' Ioele, ana' i Samoele, ¹⁹ ana' i Elkanà, ana' Ierokame, ana' i Eliele, ana' i Toàke, ²⁰ ana' i Zofe, ana' i Elkanà, ana' i Mahate, ana' i Amasay, ²¹ ana' i Elkanà, ana' Ioele, ana' i Azarià, ana' i Tsefana, ²² ana' i Takate, ana' i Asire, ana' i Ebiasafe, ana' i Koràke, ²³ ana' Iitshare, ana' i Kehàte, ana' i Levý, ana' Israele. ²⁴ Nahoh i Asafe rahalahi'ey nijohañe am-pitàn-kavava eo, toe i Asafe ana' i Berakià, ana' i Simeà, ²⁵ ana' i Mikaele, ana' i Baaseià, ana' i Malkià, ²⁶ ana' i Etný, ana' i Tserake, ana' i Adaià, ²⁷ ana' i Etane, ana' i Zimà, ana' i Simý, ²⁸ ana' Iakate, ana' i Gersome, ana' i Levý. ²⁹ Nahoh ty ana' i Merarý rahalahi' iareo, am-pitàn-kavia eo, i Etane ana' i Kisisý, ana' i Abdý, ana' i Maloke, ³⁰ ana' i Kasabià, ana' i Amatsià, ana' i Kilkia, ³¹ ana' i Amtsý, ana' i Baný, ana' i Samere, ³² ana' i Maklý, ana' i Mosý, ana' i Merarý, ana' i Levý. ³³ Le tinendre amo hene fitoroñañe an-kibohon' anjomban' Añahareo o nte-Levy rahalahi' iareoo. ³⁴ Le i Aharone nahoh o

ana-dahi'eo ty nañenga amy kitrelin' engan-koroañey naho amy kitrelim-pañembohañey ho amy ze fitoroñañe iaby amy toetse loho masiñey naho hañeferañe Israele ty amy ze hene nandilia' i Mosè mpitoron' Añahare.

³⁵ Zao o ana' i Aharoneo: i Elazare ana'e, i Pinekase ana'e, i Abisoà ana'e ³⁶ i Boký ana'e, i Ozý ana'e, i Zerakià ana'e, ³⁷ i Meraiote ana'e, i Amarià ana'e, i Akitobe ana'e, ³⁸ i Tsadoke ana'e, i Akimatse ana'e. ³⁹ Le zao o toem-pimoneña' iareo amo rova'eo naho amo efe-tane' o ana' i Aharoneo, amo hasavereña' o nte-Kehàteoo, o niazo' iereo an-kitsapakeo. ⁴⁰ Nitolorañe ty Kebrone an-tane' Iehoda ao naho o tanem-piandraza'eo. ⁴¹ Fe natolotse amy Kalebe, ana' Iefonè o tete' i rovaio naho o tanà'eo. ⁴² Le natolotse amo ana' i Aharoneo o rova' Iehoda rezao: i Kebrone, rovam-pitsolohañe naho i Libnà reke-tanem-piandraza'e naho Iatire vaho i Estemòa rekets' o fiandraza'eo, ⁴³ naho i Kilane reke-piandraza'e, i Debire reke-piandraza'e, ⁴⁴ naho i Asane reke-piandraza'e naho i Bete-semese reke-piandraza'e, ⁴⁵ le boak' amy fifokoa' i Beniaminey: i Gebà reke-piandraza'e naho i Alemete reke-piandraza'e vaho i Anatote reke-piandraza'e. Aa ty hamaro' o rova'eo ty amo hasavereña' iareo iabio: Rova folo-telo' amby. ⁴⁶ Le natolotse an-kitsapak' amo ana' i Kehàte ila'eo, boak' an-kasavereñam-pifokoañe, i vakim-pifokoañe, vaki' i Menasè ty rova folo. ⁴⁷ Le amo ana' i Gersomeo, ty amo hasavereña'eo, boak'am-pifokoa' Isakare naho boak' am-pifokoa' i Asere naho boak' am-pifokoa' i Naftalý vaho boak' am-pifokoa' i Menasè ty rova folo-telo' amby e Basane ao. ⁴⁸ Le amo ana' i Merario, ty natolots' an-tsapake, ty amo hasavereña'eo, boak' am-pifokoa' i Reobene naho am-pifokoa' i Gade naho am-pifokoa' i Zebolone ao, ty rova folo-ro' amby. ⁴⁹ Aa le natolo' o ana' Israeleo amo nte-Levio o rova'eo reke-piandrazañe: ⁵⁰ Tinolotse, an-kitsapake, boak' am-pifokoan' ana' Iehoda naho am-pifokoan' ana' i Simeone naho am-pifokoan' ana' i Beniamine, i rova tokaveñe amo añara'eo rezay. ⁵¹ Toe nanan-drova an' toetse am-pifokoa' i Efraime ao ty ila' o ana' i Kehàteo. ⁵² Natolotse iareo ho rovam-pitsolohañe, t'i Sekeme, am-bohibohi' i Efraime ao reke-piandraza'e naho i Gezere reke-piandraza'e, ⁵³ naho Iokmeame reke-piandraza'e naho i Bete-korone reke-piandraza'e, ⁵⁴ naho i Aialone reke-piandraza'e naho i Gate-rimone reke-piandraza'e; ⁵⁵ le boak' ami'ty vakim-pifokoa' i Menasè ao: i Anere reke-piandraza'e naho i Bileame reke-piandraza'e, ho a ty ila' o hasavereñan' ana' i Kehàteo. ⁵⁶ Natolotse amo ana' i Gersomeo, boak' an-kasavereñam-bakim-pifokoa' i Menasè ao, i Golane e Basane ao reke-piandraza'e naho i Astarote reke-piandraza'e; ⁵⁷ naho boak' am-pifokoa' Isakare: i Kadese, reke-piandraza'e naho i Dobrate reke-piandraza'e, ⁵⁸ naho i Ramote, reke-piandraza'e naho i Aneme reke-piandraza'e; ⁵⁹ le boak' am-pifokoa' i Asere: i Masale reke-piandraza'e naho i Abdone reke-piandraza'e ⁶⁰ naho i Kokoke reke-piandraza'e naho i Rekobe reke-piandraza'e; ⁶¹ le boak' am-pifokoa' i Naftalý: i Kedese e Galile reke-piandraza'e naho i Kamone reke-piandraza'e naho i Kiriatehaime reke-piandraza'e. ⁶² Le natolotse amo ila'eo, amo ana' i Merario, boak' am-pifokoa' i Zebolone: i Rimone reke-piandraza'e naho i Tabore reke-paripari'e. ⁶³ Le alafe' Iordaney e Ierikò, atiñana' Iordaney, boak' am-pifokoa' i Reobene, i Betsere am-patrambey ao, reke-piandraza'e naho Iatsà reke-piandraza'e, ⁶⁴ naho i Kedemote, reke-piandraza'e naho i Mofaate reke-piandraza'e; ⁶⁵ le boak' am-pifokoa' i Gade: i Ramote e Gilade ao reke-piandraza'e naho i Makanaime reke-piandraza'e, ⁶⁶ naho i Kesbone reke-piandraza'e naho

Iazere reke-piandraza'e.

7

¹ Le o ana' Isakareo: i Tolà naho i Poà, Iasobe vaho i Simrone, efatse. ² Le o ana' i Tolao: i Ozý naho i Refaia naho Ieriele naho Iakmaý naho Iibsame vaho i Semoele, songa talèn' anjomban-drae'e o nte-Tolao, fanalolahy maozatse amo tarira'eo; ty ia' iareo tañ' andro' i Davide le ro'ale-tsi-ro'arivo-tsi-enen-jato. ³ Le o ana' i Ozio; Iizrakià; o ana' Iizrakiào: i Mikaele naho i Obadià naho Ioele, Iсиà, lime, songa mpiaolo. ⁴ Le niharo am' iereo ty amo tarira' iareo boak' añ' anjomban-droae'eo ty firimboñanh-dahin-defoñe, telo-ale-tsi-eneñ' arivo; amy t'ie nanambaly naho ana-dahy maro. ⁵ Le nifanalolahy iaby o longo' iareo amo hasavereña' Isakareoo, ondaty maozatse, valo-ale-tsi-fito-arivo ty vinolily amo fiantoño' iareo iabio. ⁶ O ana' i Beniamineo: i Bela naho i Bekere vaho Iediaele, telo. ⁷ Le o ana' i Belao: Ietsbone naho i Ozý naho i Oziele naho Ierimote vaho Irý, lime; mpiaolon' anjomban-droae'eo, fanalolahy maozatse, le vinolily ty amo fiantoño'eo, ni-roe-ale-tsi-ro'arivo-tsi-telopolo-efats' amby. ⁸ Le o ana' i Bekere; i Zemirà naho Ioase naho i Eliezere naho i Elionay naho i Omrý naho Ierimote naho i Abià naho i Anatote vaho i Alamete, songa ana' i Bekere. ⁹ vinolily ty amo fiantoño'eo, ty amo talèn' anjomban-droae'eo, o fanalolahy maozatseo, ro' ale-tsi-roan-jato. ¹⁰ Le o ana' Iediaeleo; i Bilhane; le o ana' i Bilhaneo; Ieose naho i Beniamine naho i Ehode naho i Kenaanà naho i Zetane naho i Tarsise vaho i Akisakare. ¹¹ I hene ana' Iadiaele rey ty amo talèn' anjomban-droae'eo, fanalolahy maozatse, le rai-ale-tsi-fito-arivo-tsi-roanjato veka'e hionjoñe mb'an-kotakotake mitraok' amy valobohòkey. ¹² I Sopime ka naho i Kopime, ana' Ire vaho i Kosime ana' i Akere. ¹³ O ana' i Naftalio: Iaktsiele naho i Goný naho Ietsere naho i Salome, songa ana' i Bilkà. ¹⁴ O ana' i Menasèo: i Asriele nasama'ey, (fe nasama' i Aramitese sakeza'e t'i Makire rae' i Gilade. ¹⁵ Nengae' i Makire ty boak' amy Kopime naho i Sopime; i Maakà ty tahina' i rahavave'ey;) ty tahina' i faharoey le Tselofekade; nanañ' anak' ampela t'i Tselofekade. ¹⁶ Nisamak' ana-dahy t'i Maakà vali' i Makire, le natao'e Parase ty añara'e, le i Serese ty rahalahi'e vaho ana'e t'i Olame naho i Rekeme. ¹⁷ Ty ana' i Olame: i Bedane. Ie ro ana' i Gilade, ana' i Makire, ana' i Menasè. ¹⁸ Nisamake Iishode naho i Abiezere vaho i Mahalà t'i Hamolekete, rahavave'e. ¹⁹ O ana' i Semidào: i Akiane naho i Sekeme naho i Likhý vaho i Aniame.

²⁰ O ana' i Efraimeo: i Sotelake naho i Berede, ana'e naho i Takate, ana'e naho i Eladà, ana'e naho i Takate, ana'e, ²¹ naho i Tsabade, ana'e naho i Sotelà, ana'e naho i Ezere vaho i Eleade, ie vinono' o nte-Gate nisamak' amy taneio, amy t'ie nizotso hitavañe o añombe'eo. ²² Nitolom-pandala andro maro t'i Efraime, le nimb' ama'e mb'eo o rahalahi'eo hañohoñ'aze. ²³ Aa le nimoak' amy vali'ey re, nisamak' anadahy vaho nanoe'e Berià ty añara'e, amy te nizo haratiañe i anjomba'ey. ²⁴ (I Seerae, anak' ampela'e ty namboatse i Bete-korone Ambane naho Ambone vaho i Ozene-Seerae.) ²⁵ Ana-dahi'e t'i Refake naho i Resefe naho i Telàke, ana'e vaho i Takane ana'e. ²⁶ Naho i Laadane Ana'e, i Amihode ana'e, i Elisamà ana'e, ²⁷ i None ana'e, Iehosoa ana'e. ²⁸ Le ty fanañañe naho fimoneña' iareo: i Betele naho o tanà'eo, le i Naarane maniñana naho i Gezere mañandrefa rekets' o tanà'eo; i Sekeme reke-tana'e, pak' Azà reke-tana'e; ²⁹ añ'efets'efe' o ana' i Menasèo, i Beteseane, rekets' o tanà'eo naho i Taanake reke-tana'e naho i Megidò reke-tana'e vaho i Dore reke-tana'e. Nimoneñe amy rezay

o ana' Iosefe, ana' Israeleo. ³⁰ O ana' i Asereo: Imnà naho Isvà naho Isvaý naho i Berià vaho i Serà rahavave'e. ³¹ O ana' i Beriào: i Kevere naho i Malkiele, rae' i Birzote. ³² I Kevere nisamake Iaflete naho i Somere naho i Kotame vaho i Soae, rahavave' iareo. ³³ O ana' Iafleteo: i Pasake naho i Bimhale vaho i Asvate. Ie o ana' Iafleteo. ³⁴ O ana' i Samereo: i Aký naho i Rohagà naho Iekobà vaho i Arame. ³⁵ O anan-drahalahi'e Kelemeo: i Tsofake naho Imnà naho i Selesse vaho i Amale. ³⁶ O ana' i Tsofakeo: i Soà naho i Karnefere naho i Soale naho i Berý naho Imrà; ³⁷ i Betsere naho i Hode naho i Samà naho i Silsà naho Itrane vaho i Bierà. ³⁸ O ana' Ietereo, Iefoneke naho i Pispà vaho i Arà. ³⁹ O ana' i Olào: i Arake naho i Kaniale vaho i Retsià. ⁴⁰ Ie o ana' i Asere, roaen' anjomban-droae'eo, jinoboñe, ondaty maozatse mahavany, mpiaolo' o roandriañeo. Le ty ia' iareo te niantoñoñe, o mahafialy, mahafañotakotakeo: ondaty ro'ale-tsieneñ'arivo.

8

¹ I Beniamine nisamake i Belà, tañoloñoloña'e naho i Asbele faharoe naho i Akarake faha-telo, ² naho i Nokà fahefatse naho i Rafà faha-lime. ³ O ana' i Belao: i Adare naho i Gerà naho i Abihode ⁴ naho i Abisoà naho i Naamane naho i Akoake ⁵ naho i Gerà naho i Sefofane vaho i Korame. ⁶ O ana' i Ehodeo: o talèn' anjomban-droae' o nte-Gebaoo, (o nasese androhy mb'e Manakateo: ⁷ i Naamane naho i Akià naho i Gerà ty nasese an-drohy;) vaho nisamake i Ozà naho i Ahikode. ⁸ Nisamak' ana-dahy a monto' i Moabe ao t'i Sakaraime, ie fa nisaotse i Kosime naho i Baarà vali'e rey. ⁹ Nisamak' amy Kodese, vali'e, t'Iobabe naho i Tsibà naho i Mesà vaho i Malkame, ¹⁰ naho Ie'otse naho i Sokhia vaho i Mirmà. Zao o ana'e, talèn-droae'eo. ¹¹ Nisamake i Abitobe naho i Elpaale amy Kosime re. ¹² O ana' i Elpaaleo, i Evre naho i Misame naho i Samede namboatse i Onò naho i Lode rekets' o tanà'eo; ¹³ naho i Berià naho i Semà, mpiaolon' anjomban-droae' o mpimone' i Aialoneo, o nandroake o mpimone' i Gateoo; ¹⁴ naho i Akiò, i Sasake naho Ieremote, ¹⁵ naho i Zebadià naho i Arade naho i Edere, ¹⁶ naho i Mikaele naho Ispà vaho Iohà, ro ana' i Beriake; ¹⁷ naho i Zebadià naho i Mesolame naho i Kizký naho i Kevere, ¹⁸ naho Ismeray naho Izlià naho Iovave, ro ana' i Elpaale; ¹⁹ naho Iakime, i Zikrý naho i Zabdý, ²⁰ naho i Elienaý naho i Tsiletaý naho i Eliele, ²¹ naho i Adaia naho i Beraia naho i Simrate, ro ana' i Simhý; ²² naho Ispane naho i Kevere naho i Eliele, ²³ naho i Abdone naho i Zikrý naho i Kanàne, ²⁴ naho i Kananià naho i Elame naho i Antotiià; ²⁵ naho Iifdeià naho i Penoele, ro ana' i Sasake ²⁶ naho i Samseray naho i Sekarià naho i Atalià, ²⁷ naho Iaresià naho i Elià vaho i Zikrý, ro ana' Ierohame. ²⁸ Ie ro talèn' anjomban-droae' e ty amo tarira'eo, mpifeleke nimoneñe e Ierosalaime ao. ²⁹ E Gibone ao ty nimoneña' ty rae' i Gibone, i Maakà ty tahinam-bali'e; ³⁰ le i Abdone, tañoloñoloña'e naho i Tsore naho i Kise naho i Baale naho i Nadabe, ³¹ naho i Gedore naho i Akio vaho i Zekere. ³² Nasama' i Miklote t'i Simeà. Nitrao-pimoneñe amo rahalahi'eo e Ierosalaime ao iereo, nifanandrife. ³³ Nasama' i Nere t'i Kise le nasama' i Kise t'i Saole, le nasama' i Saole t'Ionatane naho i Malki-soàe naho i Abinadabe vaho i Ese-baale. ³⁴ Ty ana' Ionatane, i Merib'baale; le nasama' i Merib'baale t'i Mikà. ³⁵ O ana' i Mikào, i Pitone naho i Meleke vaho i Tarea naho i Ahkaze. ³⁶ Nasama' i Ahkaze t'Iehoadà; le nasama' Iehoadà t'i Alemete naho i Azmavete naho i Zimrý; le nasama' i Zimrý t'i Motsà, ³⁷ le nasama' i Motsà t'i Bineà, ana'e t'i Rafà, ana'e t'i Eleasà, ana'e t'i Atsele; ³⁸ Nasama' anadahy eneñe t'i Atsele: ty tahina' iareo: i Azrikame, i Bokerò naho Ismaele naho i Searià naho i Obadià vaho i Kanàne, songa

ana' i Atsele. ³⁹ O ana' i Eseke, rahalahi'eo: i Olame, tañoloñoloña'e, Iekose faharoe vaho i Elifelete fahatelo. ⁴⁰ Ondaty maozatse naho fanalolahy mpitam-pale o ana-dahi' i Olameo vaho maro ty ana'e naho ty zafe'e, zatosi-limampolo. Songa ana' i Beniamine.

9

¹ Aa le sindre vinolily amo fiantoño'eo t' Israele; oniño te hene sinokitse amo bokem-panjaka' Israeleo vaho nasese mb'e Bavele mb'eo t'Iehodà ty amo hatsivokara'eo. ² Ie amy zao, o mpimoneñe valoha'e am-panaña'e ao, an-drova'e e Israele ao: le o mpisoroñe, o nte-Levio vaho o mpitoro' i anjombaio. ³ Le nitoboke e Ierosalaime ao ty ila'e o tarira' Iehodao naho o nte-Beniamineo naho o ana' Efraime naho Menasèo. ⁴ Le i Otày, ana' i Amihode, ana' i Omrý, ana' Imrý, ana' i Baný ana' i Peretse, ana' Iehodao. ⁵ Le boak' amo nte-Silòo: i Asaià, ty tañoloñoloña'e naho o ana'eo. ⁶ Le amo ana' i Zerakeo, Ieolele naho o rahalahi'eo, enen-jato-tsi-sivampolo. ⁷ Le amo ana' i Beniamineo: i Salò, ana' i Mesolame, ana' i Hodavià, ana' i Hasenoà; ⁸ naho Ibneià, ana' Ierohame naho i Elà, ana' i Ozý, ana' i Mikrý; naho i Mesolame ana' i Sefatià, ana' i Reoele, ana' Ibneià; ⁹ naho o rahalahi'eo ty amo tarira'eo sivan-jato-tsi-limampolo-eneñ' amby. Songa talen' anjomban-droae'e añ' anjomban-droae'e. ¹⁰ Le o mpisoroñe: Iedaià naho Iehoiaribe vaho Iakine ¹¹ naho i Azarià, ana' i Hilkià, ana' i Mesolame, ana' i Tsadoke, ana' i Meraiote, ana' i Akitobe, roandria' ty anjomban' Añahare; ¹² naho i Adaià, ana' Ierokame, ana' i Pasore, ana' i Malkiià naho i Maasiay ana' i Adiele, ana' Iakzerà, ana' i Mesolame, ana' i Mesilemite, ana' Imere; ¹³ naho o longo' iareoo, talèn' anjomban-droae'eo, arivo-tsi-fiton-jato-tsi-enem-polo, ondaty mahimbañe am-pitoroñañe añ' anjomban' Añahare ao.

¹⁴ Naho amo nte-Levio; i Semaià, ana' i Kasobe, ana' i Azrikame, ana' i Kasabià, amo ana' i Meraio; ¹⁵ Naho i Bakbakare, i Kerese naho i Galale naho i Matanià, ana' i Mikà, ana' i Zikrý, ana' i Asafe; ¹⁶ Naho i Obadià, ana' i Semaià, ana' i Galale, ana' Iedotone naho i Berekià, ana' i Asà, ana' i Elkanà nimoneñe amo tanà' o nte-Netofào. ¹⁷ Le o mpigarin-dalam-beio: i Salome naho i Akobe naho i Talmone vaho i Akimane vaho o rahalahi' iareoo, i Salome, talè. ¹⁸ Taolo iereo le nijohañe an-dalam-bei' i mpanjakay, maniñanañe, nimpañamben-dalañe am-pirimboña' o ana' i Levio. ¹⁹ Naho i Salome ana' i Kore, ana' i Ebiasafe, ana' i Korà naho o rahalahi'e añ' anjomban-droae'eo, o nte-Korao ty nifehe i fitoroñañey, nañambeñe o lalambein-kivohoo; o rae'eo ty nifehe ty tobe' IEHOVÀ, nimpigaritse i fiziliha'ey; ²⁰ nifeleke iareo taolo t'i Pinekase, ana' i Elatsare; le nimbae' IEHOVÀ. ²¹ I Zekarià, ana' i Meselemià ty nañambeñe i lalan-kibohom-pamantañañey. ²² I jinoboñe ho mpañamben-dalam-bey rey, le roanjato-tsi-folo-ro' amby. Songa amo tanà'eo ty amo fiantoño'eo, o tinendri' i Davide naho i Samoele mpitoky ty amy figahiña' iareoo. ²³ Aa le ie naho o ana'eo ro nisary o lalam-bein' anjomba' IEHOVÀ naho ty anjomba' i kibohotsey am-pifandimbezañe. ²⁴ Le o mpañamben-dalambeio, mb'an-tiok' efatse mb'eo: atiñana, ahandrefa, avaratse vaho atimo. ²⁵ Ie nivotrake eo erike boak' antanà' iareo o longo' iareoo hañolotse fito andro. ²⁶ Amy te nigahiña i nte-Levý efatse mpiaolom-pigarin-dalambeiy rey, nifehe o trañoo naho o fanontoñan-drala añ' anjomban' Añahareo. ²⁷ Ie nialeñe am-piarisehoañe i anjomban' Añaharey fa nanan-dily, naho nisokafe' iareo boak' andro. ²⁸ Nanan-dily amo fàna-pitoroñañe ty ila'e, nañakatse ami'ty ia'e naho

namoake ami'ty ia'e. ²⁹ Ty ila'e ka nanan-dily hamandroñe o fàname naho harao' i toetse masiñeo naho i monay naho i divaiy naho i menakey naho i ramey vaho o raha mañitseo. ³⁰ Ty ila' o anam-pisoroñe o nampilaro o raha mañitseo. ³¹ I Matitià, nte-Levy, tañoloñoloña' i Salome nte-Kora, ty nanandily amo fañendazañe o. ³² Ty ila' o longo' iareoo, o anan-nte-Kohao ty nifeleke i mofo-piatrekey, ty hañalankañe aze boa-tSABATA. ³³ Teo ka o mpisaboo; talèn' anjomba' o nte-Levio, nimoneñe añ' efets' efe' i anjombay vaho nivotsotse amo fitoloñañe ila'eo amy t'ie nifanehake handro an-kale. ³⁴ Ie ro talèn' anjomban-droae' o nte-Levio ty amo tariratseo, mpiaolo, nimoneñe e Ierosalaime ao:

³⁵ E Gibone ao ty nimoneña' Ieiele, rae' i Gibone, i Maakà ty tahina' i vali'ey; ³⁶ i Abdone ty tañoloñoloña' e naho i Tsore naho i Kise naho i Baale naho i Nere vaho i Nadabe; ³⁷ naho i Gedore naho i Akio naho i Zekarià vaho i Miklote. ³⁸ Nasama' i Miklote t'i Simeame. Ie ka nitoboke e Ierosalaime ao tandrife o longo'eo. ³⁹ Nasama' i Nere t'i Kise; le nasama' i Kise t'i Saole, le nasama' i Saole t'Ionatane naho i Malki-soà naho i Abinadabe vaho i Esbaale. ⁴⁰ I Meribe' baale ty ana' Ionatane; le nasama' i Meribebaale t'i Mikà. ⁴¹ Le o ana' i Mikào: i Pitone naho i Meleke naho i Tahareà naho i Ahkaze. ⁴² Le nasama' i Ahkaze t'Iarà; le nasama' Iarà t'i Alemete naho i Azmavete naho i Zimry; le nasama' i Zimry t'i Motsa; ⁴³ Le nasama' i Motsa t'i Binea; i Refaià ty ana'e, i Eleasà ty ana'e, i Atsele ty ana'e. ⁴⁴ Nanañ' anadahy eneñe t'i Atsele: zao o tahina'eo: i Azrikame, i Bokerò naho Ismaele naho i Searià naho i Obadià vaho i Kanàne; ie o ana' i Atselep.

10

¹ Nialy am' Israele o nte-Pelistio; naho nitriban-day amo nte-Pelistio t'Israele vaho nitsingorotritse, zinamañe am-bohi' i Gilboa eo. ² Nitokoe' o nte-Pelistio t'i Saole naho o ana'eo vaho zinevo' o nte-Pelistio t'Ionatane naho i Abinadabe vaho i Malkisoà, ana' i Saole. ³ Nanjomòtse amy Saole i hotakotakey le nitakare' o mpitàm-paleo am-pale naho nahafere aze o mpitàm-paleo. ⁴ Le hoe t'i Saole amy mpitàm-pikala'ey, Apontsoaño o fibara'oo, le atrebeho amako tsy mone homb' etoy o tsy nisavareñe hanao sarerak' ahy. Fe tsy nimete i mpitàm-pikala'ey amy t'ie nangebahebake. Aa le rinambe' i Saole i fibara'ey vaho nikorovoha'e. ⁵ Ie nioni' i mpitàm-pikala'ey te nihomake t'i Saole le niforetrak' amy fibara'ey ka vaho nivetrake. ⁶ Aa le nihomake t'i Saole naho i ana'e telo rey; sindre nitrao-pikoromake o añ' anjomba'eo. ⁷ Ie nioni' ze hene nte-Israele am-bavatane ao te nitriban-day naho nihomake t'i Saole naho o ana'eo, le nenga' iareo o rova'eo, nilay; vaho nimb'eo o nte-Pelistio nimoneñe ama'e ao.

⁸ Ie amy loak'androy naho niheo mb'eo o nte-Pelistio hampikorendake o zinamañe, le nitendrek' amy Saole naho amo ana'e nikorovok' am-bohi' i Gilboao, ⁹ naho hinoli' iereo naho nandrambe i añambone'ey naho o fikala'eo, le nampiariarie' iareo mb' an-tane' o nte-Pelistio mb'eo, ninday i taliliy mb' amo hazomanga'eo vaho mb'am' ondatio. ¹⁰ Nanoe' iereo añ' anjomba' o ndrahare' iareoo o harao'eo vaho napitek' an-kivoho' i Dagone ao ty añambone'e. ¹¹ Aa ie jinanji' Iabese-Gilade ze he'e nanoe' o nte-Pelistio amy Saole, ¹² le fonga niongake o fanalolahio nandrambe ty fañova' i Saole naho ty fañova' o ana'eo le nendese' iareo mb'e Iabese mb'eo vaho nalenteke ambane' ty kobai' Iabese ao o taola' iareoo vaho nililitse fito andro. ¹³ Aa le nihomake t'i Saole ty amy fiolà'e am' IEHOVÀY

naho i tsara' IEHOVÀ tsy nambena'ey naho i namotoaña'e jiny, hañonta-nea'ey, ¹⁴ ie tsy nañontane IEHOVÀ; le zinevo'e vaho nafote'e amy Davide ana' Iisaý i fifelehañey.

11

¹ Nifanontoñe amy Davide e Kebrone ao t'Israele iaby, nanao ty hoe: Intoy, toe taola'o naho nofo'o zahay, ² Ie taolo, ndra te nimpanjaka t'i Saole, le ihe ty niaolo vaho nampimpoly Israele; le nanao ty hoe ama'o t'IEHOVÀ Andrianañahare'o. Ho fahana'o ondatiko Israeleo naho ho mpifehe ondatiko Israeleo. ³ Aa le hene niheo mb'amy mpanjakay e Kebrone mb'eo o mpiaolo' Israeleo vaho nifañina' amy Davide e Kebrone ao añatrefa' IEHOVÀ; le noriza' iareo ho mpanjaka' Israele t'i Davide, ty amy tsara' IEHOVÀ am-pitá' i Samoeley. ⁴ Nimb'e Ierosalaime—i atao Iebosi—t'i Davide naho Israele iaby, ie tao o nte-Iebosio, o mpimoneñe amy taneio. ⁵ Le hoe o nte-Iebosio amy Davide: Tsy himoak' atoy rehe. Fe rinambe' i Davide i rova fatratsey; i atao Rova i Davidey. ⁶ Ie nanoe' i Davide ty hoe: Ze mandafa ty nte-Iebosy valoha'e ty ho mpiaolo naho mpifehe. Ioabe ana' i Tseroià ty nionjoñe valoha'e vaho nanoem-pifeleke. ⁷ Nimoneñe amy fipalirañey t'i Davide, zay ty nitokaveñ' aze ty hoe, Rova' i Davide. ⁸ Namboatse añariari' i rovay re, boak' amy Milòy naho o mañohok'azeo vaho namboare' Ioabe ty ila' i rovay. ⁹ Niraorao erike t'i Davide amy te nindre ama'e t'IEHOVÀ i Mâroy.

¹⁰ Irezao o nimpiaolo' o fanalolahy mpiamy Davideo, nimpirekets' ama'e an-kafatrarañe amy fifehea'io, miharo am' Israele iaby, nanao aze mpanjaka' Israele ty amy tsara' IEHOVÀ. ¹¹ Inao ty famoliliañe o fanalolahy nimpiamy Davideo: Iasobeame, ana' i nte-Kakmoniý mpifehe i telopoloy; nonjone'e ami'ty telon-jato i lefo'ey vaho zinevo'e iaby amy andro zay. ¹² Nanonjohy aze t'i Eleazare ana' i Dodò nte-Akoake, raik' amy fanalolahy telo rey. ¹³ Nindre amy Davide e Pase-Damime ao re, ie nifanontoñe hañotakotake eo o nte-Pelistio, añ'ila' ty teteket lifotse vare-hordea; naho fa nilay añatrefa' o nte-Pelistio ondatio, ¹⁴ le nijohañe añivo' i tetekey iereo, nañaro aze, le zinevo' iareo o nte-Pelistio; vaho rinomba' IEHOVÀ an-drombake jabajaba. ¹⁵ Teo te nizotso mb'amy vato mb'amy Davidey mb'eo, an-dakato' i Adolame ao, ie nitobe am-bavatane' i Refaime ao o nte-Pelistio, ty telo amo mpiaolo telopoloo. ¹⁶ Ie tam-pipalirañe ao t'i Davide, le te Betlekhemé ao o mpirimbo-nte-Pelistio. ¹⁷ Niazo ty hasijy t'i Davide, nanao ty hoe: Ehe te eo ty hanjotso rano amako boak' am-bovom-Betlekhemé marine' i lalambeiy. ¹⁸ Niboroboñafe' i telo rey i toben-te Pilistiy, le nitarike rano boak' am-bovo' i Betlekhemé ao marine' i lalambeiy; nendese' iereo vaho nazotso' iareo amy Davide; fe tsy nimete nikama t'i Davide, te mone nadoa'e añatrefa' IEHOVÀ, ¹⁹ nanao ty hoe: Sondo'e aman' Añahareko te hanoeko o raha zao; hinomeko hao ty lio' ondaty namoe'ay retiañe? Fa am-pamoeam-piay i nañandesa' iareoy. Aa le tsy nimete ninon-dre. Ie o nanoe' i fanalolahy telo reio. ²⁰ I Abisáy, rahalahi' Ioabe, ty nimpiaolo' i telopoloy rey; ie nañonjon-defoñe ami'ty telon-jato naho zinama'e vaho nibangoeñe añivo' i telo rey. ²¹ Ie ty nanañ' asy amy telo antsaranga faha-ro'e y vaho nanoeñe mpiaolo' iareo; fe tsy nitaka'e i telo valoha'e rey. ²² I Benià, ana' Iehoiadà, ana' ty fanalolahy nte-Kabtseele, mpitoloñe an-kafatrarañe, nandafa nte-Moabe roe an-trondiona, le nizotso añivon-koboñe añ' androm-panàla namono ty liona ao. ²³ Zinevo'e t'i nte-Mitsraime, ondaty abo, lime kiho ty haabo'e, am-pitá'

i nte-Mitsraimey ty lefo'e hoe bodam-panenoñe; kobaiñe ty tama'e te nizotso mb'ama'e mb'eo naho tinava'e am-pitâ' i nte-Mitsraimey i lefo'ey vaho vinono'e amy lefo'ey. ²⁴ Izay o nanoe' i Benaià, ana' Iehoiadào, le nibangoe' i fanalolahy telo rey i tahina'ey. ²⁵ Ie ty nanañ' asy amy telopoloy, f'ie tsy nahatakatse i telo valoha'e rey, ro najado' i Davide amo mpañaro azeo. ²⁶ Ty fanalolahy amo lahindefoñeo, le i Asaele rahalahi' Ioabe, i Elkanane, ana' i Dodò nte-Betlekhem; ²⁷ i Samote nte-Harore, i Keletse nte-Pelone, ²⁸ Irà, ana' Ikekezere nte-Tekoe, i Abiezere nte Anatote, ²⁹ i Sibekaý nte-Kosà, Ilaý nte-Akoake, ³⁰ i Mahàre, nte-Netofà, i Kelede ana' i Baanià, nte-Nitofà, ³¹ Itaý ana' i Ribaý nte-Gibà amo ana' i Beniamineo, i Benaià nte Piratone; ³² i Koraý tamy saka Gaasey, i Abiele, nte Arbate, ³³ i Azmavete, nte-Bakorime, i Eliabà nte-Saalbone, ³⁴ o ana' i Haseme nte-Gizòo, Ionatane, ana' i Sagay nte Harare, ³⁵ i Akiane, ana' i Sakare nte Harare, i Elifale ana' i Ore ³⁶ i Kefere nte Mekerate, i Akiià nte Pelone ³⁷ i Ketsrò nte Karmele, i Naaraý ana' i Ezbaý, ³⁸ Ioele rahalahi' i Natane, i Mibkare ana' i Hagrý, ³⁹ i Tseleke nte Amone, i Nakaraý nte Berote, ty mpitâm-pikala' Ioabe ana' i Tseroià, ⁴⁰ Irà nte Ietere, i Garebe nte-Ietere, ⁴¹ i Orià nte Kite, i Zabade ana' i Aklay ⁴² i Adinà ana' i Siza nte Reobene, mpifehe o nte Reobeneo, rekets' i telopolo mpiama'e rey ⁴³ i Kanàne, ana' i Maakà naho Iosafate nte Metene, ⁴⁴ i Ozià, nte Asterate, i Samà naho Iehiele, ana' i Kotane nte Aroere, ⁴⁵ Iediaele, ana' i Simrý naho Iohà rahalahi'e nte Tizite, ⁴⁶ i Eliele nte Makavè naho Ieribaý naho Iosavià ana' i Elnaame naho Itmà nte Moabe, ⁴⁷ i Eliele naho i Ovede vaho Iasiele nte Metsobaià.

12

¹ Iretoañe o niheo amy Davide e Ziklage mb'eo ie mbe nisebaneñe ty amy Saole ana' i Kiseio; mpiamo fanalolahî'e, mpañolotse an-kotakotakeo. ² Nimpitâm-pale le nahafitoloñe am-pitân-kavana naho havia nahafipiletse vato naho nahafiririñe ana-pale am-pale, ie rahalahi' i Saole nte Beniamine. ³ I Akiezere ty nifehe, le Ioase, ana' i Semaà nte Gibate; naho Iziele naho i Pelete, ana' i Azmavete; le i Berakà naho Iehò nte Anatote, ⁴ naho Ismaià nte Gibone, fanalolahy amy telopolo rey naho ambone' i telopoloy; naho Iirmeà naho Iakaziele naho Iokanane naho Iozabade nte Gederà. ⁵ Naho i Elozaý naho Ierimote naho i Bealià naho i Semarià naho i Sefatià nte Karofe, ⁶ naho i Elkanà naho Iesià naho i Azarele naho Ioezere naho Iasobeame, nte Korake, ⁷ naho Ioelà vaho i Zebadià ana' Ierokame nte Gedore. ⁸ Le o nte Gade nivike mb' amy Davide am-pipalira'e am-patrambeio, ondaty nahasibeke, ondaty nioke hialy, nahafitam-pikalañe naho lefoñe; aman-daharañe hoe tarehen-diona, ie hoe tsebý* an-kaboañe ey te nilay; ⁹ i Ezere ty valoha'e naho i Obadià ty faharoe, le i Eliabe ty fahatelo, ¹⁰ i Mismanà ty fahefatse, Iiremià ty fahalime, ¹¹ i Atay ty fah'eneñe naho i Eliele ty faha-fito, ¹² Iokanane ty fahavalô naho i Elzabade ty fahasive, ¹³ Iiremià ty faha-folo vaho i Makbanay ty faha folo-raik' amby. ¹⁴ O ana' i Gade retoñañe le songa mpifehe' i valobohòkey; ty kede ama'e nañeva zato, ty bey nañeva arivo. ¹⁵ Ie o nitsake Iordaney amy volambaloha'eo t'ie nandopatse añ'olotse; ie nampivoratsake ze am-bavatane ao iaby, maniñanañe naho mañandrefa. ¹⁶ Naho nimb'amy fipalira' i Davidey mb'eo ty ila' o ana' i Beniamine naho Iehodao; ¹⁷ niavotse

* **12:8** Tsibý: biby milay, bey hoe tamanañe

hifanalaka am' iereo t'i Davide, le tinoi'e ty hoe: Naho am-panintsiañe hañolotse ahy ty fitotsaha' areo amako, le hivitrañe ama' areo ty troko, fa naho mone pok'eo hamalik' ahy amo rafelahikoo, ie malio tahiñe o tañakoo, le i Andrianañaharen-droaentika ty hivazoho vaho hizaka.

¹⁸ Nivotrak' amy Amasaý, mpifehe i telopoloy, amy zao i Arofoy: Azo zahay ry Davide, mpiama'o zahay ry ana' Iisaý. Fañanintsiñe, fañanintsiñe ama'o naho fierañerañañe amo mpañolotse azoo; amy te mañimb' azo t'i Andrianañahare. Aa le rinambe' i Davide vaho nanoe'e mpifehem-pirimboñe.

¹⁹ Nitsake mb' amy Davide mb'eo ka ty ila' i Menasè, ie nitraok' amo nte-Pelistio hifañotakotak' amy Saole, f'ie tsy nañolotse, amy te tsy nimete' o mpiaolo nte-Pelistio, ie nisafiry, le nirahe' iareo aña ami'ty hoe, Hera hitsake mb'amy Saole talè'e mb'eo re rekets' o añambonen-tikañeo.

²⁰ Ie nimb'e Tsiklage mb'eo, le nitsake ho mpiama'e boak' amy Menasè t'i Adnà naho Iozabade naho Iediaele naho i Mikaele naho Iozabade naho Elihò vaho i Tsiletaý, mpifelek' arivo' o nte-Menasèo.

²¹ Ie ro nañolotse i Davide amo malasoo amy te fonga nifanalolahy nahasibeke vaho niimpifehe amy valobohòkey.

²² Nivotrak' amy Davide boak' andro boak' andro t'indaty hañolotse aze, ampara' t'ie ni-valobohòke ra'elahy manahake ty valobohòn' Añahare.

²³ Zao ty ia' o ni-reke-pialiañe hialio ty amo mpiaolo'eo, o niheo mb'amy Davide e Kebrone aña, hifotera' iareo ami'ty fifehea' i Saole ty amy nafè' IEHOVÀIO.

²⁴ Amo ana' Iehoda mpitàm-pikalañe naho lefoñeo: eneñ' arivo-tsi-valonjato veka'e hialy.

²⁵ Amo ana' i Simoneo, ondaty maozatse mahasibek' aña'ly, fito-arivo-tsi-zato.

²⁶ Amo ana' i Levio, efats'arivo-tsi-enen-jato.

²⁷ Iehoiada ty mpifehe' o nte-Aharoneo, rekets' ama'e ty telo-arivo-tsi-fitonjato;

²⁸ naho i Tsadoke, ajalahy maozatse nahafisoroke vaho aña' anjomban-droae'e, mpifehe roapolo-ro' amby.

²⁹ Amo ana' i Beniamineo, longo' i Saole, telo arivo; fa ampara' te henane, maro am' iareo ty nanan-dily aña'anjomba' i Saole ao.

³⁰ Amo ana' i Efraimeo: ro' ale-tsi-valon-jato ty fanalolahy, nanañ' asy aña'anjomban-droae'e.

³¹ Amy vakim-pifokoa' i Menasèy: rai-ale-tsi-valo-arivo, tinoñon-tahinañe, niheo mb'eo hanao i Davide mpanjaka.

³² Le amo ana' Isakareo, ondaty nahafohin-tsà, naharendreke ty toko'e hanoe' Israele; roanjato ty mpiaolo' iareo vaho ambane' ty fandilia' iareo o longo'e iabio.

³³ Amy Zebolone, o mpionjom-b'añ' alio, nahimbañe an-kotakotake, nahafitoloñe amy ze karaza-pialiañe, lime-ale nahafitàn-dahatse; tsy aman' arofo roe.

³⁴ Le amy Naftalý, mpifehe arivo; nindre am' iereo reke-pikalañe naho lefoñe, ty telo-ale-tsi-fito-arivo.

³⁵ Le amo nte-Dane nahafilahatse aña' alio: roe-ale-tsi-valo-arivo-tsi-enen-jato.

³⁶ Le amy Asere, o mpionjomb' aña' alio, nahafiriritse hiatre-kotakotake, efats-ale.

³⁷ Le o alafe' Iordaneio, amo nte-Reobeneo naho amo nte-Gadeo naho amo vakim-pifokoa' i Menasèo, reketse ze atao haraom-pialiañe ho an-kotakotake, rai-hetse-tsi-roe-ale.

³⁸ Hene niheo mb'e Kebrone mb'eo an-kazavàñ'arofo i lahindefoñe nahafitàm-pilaharañe rezay, hanoe' iereo mpanjaka' Israele t'i Davide mpanjaka.

³⁹ Ie nindre amy Davide ao telo andro nikama naho nigenoke fa nañalankañe ho a iareo o longo'eo.

⁴⁰ Tovo' zay, o marine iareoo, Isakare naho i Zebolone vaho i Naftalý, ty ninday mahakama am-birike naho rameva naho perède[†] naho añombe, le hena naho ampemba naho debelà[‡] naho kirotram-baloboke naho divay naho menake naho añombe

[†] 12:40 Perede: rae'e borike, rene'e soavalá [‡] 12:40 debelà: aviavy vongá'e maike mititse

vaho añondry tsifotofoto; fa firebehañe ty e Israele ao.

13

¹ Aa le nisafiry amo mpifelek' arivo naho zatoo vaho amo mpifehe iabio t'i Davide. ² Le hoe t'i Davide amy valobohò' Israele iaby, Aa naho mete ama' areo naho am' IEHOVÀ Andrianañaharen-tika, antao hañitrike mb'eo mb'eo hikoike o longontika sisa amo hene tane' Israeleo, rekets' o mpisoroñe naho nte-Levý androva naho am-paripari' iareoo, hifanontoñe, ³ hampolian-tika mb'etoa i vatan' Añaharen-tikañey, ie tsy nipaiaen-tika tañ' andro' i Saole. ⁴ Le nanao ty hoe i valobohòkey, t'ie hanoeñe, fa nimete am-pihaino' ze hene ondaty. ⁵ Aa le natonto' i Davide t'Israele iaby, boake Sikore e Mitsraime aña pak' am-pimoahañe e Kamate aña, hindesa' iareo boake Kiriate-Iearime ao i vatan' Añaharey. ⁶ Aa le nindre am' Israele iaby t'i Davide nionjomb'e Baalà—i Kiriate-Iearime' Iehoda—mb'eo hindesa' iareo boak'ao i vatan' Añahare iambesara' IEHOVÀ amo kerobeoy, i fikanjañe i tahina'eyi. ⁷ Le nente' iareo an-tsarete vao boak' añ' anjomba' Abinadabe ao i vatan' Añaharey; vaho ninday i saretey t'i Ozà naho i Akio. ⁸ Le nifale añatrefan' Añahare an-kaliforan-kaozarañe t'i Davide naho Israele; reke-tsabo naho marovany, jejobory, fikorintsañe, fikarantsañe vaho an-trompetra.

⁹ Ie nivotrak' an-tanem-pifofoha' i Kidone eo, le nahiti' i Ozà ty fità'e hikalañ' i vatay, fa ho nabalitaboa' o añombeio. ¹⁰ Le nisolebotse amy Ozà ty haviñera' IEHOVÀ naho zinevo'e amy te nitakare'e fitàñe i vatay vaho nihomak' añatrefan' Añahare. ¹¹ Tsy nahafale i Davide ty fitorotosi' IEHOVÀ amy Ozà; aa le natao Perets' Ozà* i toetsey pak' henaneo. ¹² Nahahembañe i Davide t'i Andrianañahare amy andro zay, le hoe re: Akore ty hampipoliako amako i vatan' Añaharey? ¹³ Aa le tsy nendese' i Davide moly ama'e mb'an-drova' i Davide mb'eo i vatay fa nampitsile'e mb' añ'anjomba' i Ovededomo nte Gate ao. ¹⁴ Nitobok' an-kasavereña' i Ovededomo añ' anjomba'e ao telo volañe i vatan' Añaharey; vaho nitahie' IEHOVÀ ty anjomba' i Ovededomo naho ze hene fanaña'e.

14

¹ Nañitrike irak' amy Davide t'i Korame mpanjaka' i Tsore ninday boda-mendoraveñe naho mpandrafi-bato naho mpandranjy, hamboatse anjomba. ² Ie nifohi' i Davide te niventè' IEHOVÀ ho mpanjaka' Israele naho naonjo'e antiotiotse i fifehea'ey ty am' ondati'e Israeleo, ³ le nañenga valy maromaro indraike e Ierosalaime ao t'i Davide vaho nisamak' ana-dahy naho anak' ampela tovo'e t'i Davide. ⁴ Le zao ty tahina' o ana'e nasamake e Ierosalaimeo: i Samoà naho i Sobabe, i Natane naho i Selomò ⁵ naho Iibkare naho i Elisoà naho i Elpalete ⁶ naho i Nogà naho i Nefege naho Iafià ⁷ naho i Elisama naho i Beliadà vaho i Elifalete.

⁸ Ie jinanji' o nte-Pelistio te norizañe hifehe' Israele iaby t'i Davide, le hene nionjomb'eo o nte-Pelistio hipay i Davide. Ie jinanji' i Davide le niavota'e hifañatreke. ⁹ Nimb'eo o nte-Pelistio niparaitak' am-bavatanen-dRefà ey. ¹⁰ Nañontane aman' Añahare t'i Davide ami'ty hoe: hionjoñako hao o nte-Pelisteo? Hatolo'o an-tañako hao? Le hoe t'IEHOVÀ ama'e: Mionjona; fa hatoloko am-pitá'o. ¹¹ Aa le nionjomb'e Baale-peratsime* mb'eo iereo, le zinevo' i Davide eo. Le hoe t'i Davide, Toe nitotsak' amo rafelahikoo t'i Andrianañahare manahake ty fisorotombahan-drano. Aa le natao Baale-peratsime i toetsey. ¹² Napo' iareo eo o sampsampo'eo

* **13:11** Peretse: tositse * **14:11** Peratsime: totsake, miboroboñake

le nandily t'i Davide vaho finorototo añ' afo irezay. ¹³ Mbe naname i vavataney indraike o nte-Pelistio. ¹⁴ Nañontanea' i Davide indraike t'i Andrianañahare; le hoe t'i Andrianañahare ama'e: Ko mionjomb' am' iereo mb'eo, iambohò vaho ivotraho tandrife o sohihio. ¹⁵ Ie amy zao naho mahajanjam-peo mangidigidiñe an-digiligi' o sohihio, le mionjona mb'añ'aly, fa ho nienga aolo anahareo t'i Andrianañahare hanjevo i valobohòm-Pilstiy. ¹⁶ Nanoe' i Davide i nandilian' Añaharey, le zinevo' iareo i valobohòm-Pilstiy boake Gibone pake Gezere. ¹⁷ Niboele amo hene taneo ty enge' i Davide, le napo' IEHOVÀ amo kilakila' ondatio ty fihembañañe ama'e.

15

¹ Namboatse anjomba ho am-bata'e an-drova' i Davide ao t'i Davide, le nañajaria'e toetse i vatan' Añaharey vaho nañoreña'e kivoho. ² Le hoe t'i Davide: Tsy eo ty hinday i vatan' Añaharey naho tsy o nte-Levio avao; amy t'ie ty jinobo' IEHOVÀ hitarazo i vatan' Añaharey naho ty hitoroñe Aze nainai'e. ³ Natonto' i Davide e Ierosalaime ao t'Israele iaby, haneseañe ty vata' IEHOVÀ mb' an-toe'e nihajarie'e ho aze. ⁴ Le navori' i Davide o ana' i Aharoneo naho o nte-Levio; ⁵ amo ana' i Kehàteo: i Orièle ty talè naho o rahalahi'eo, zato tsy roapol; ⁶ amo ana' i Merario: i Asaià ty talè naho o rahalahi'eo: roanjato-tsi-roapol; ⁷ amo ana' i Gersomeo: Ioele ty talè'e naho o rahalahi'eo; zato-tsi-telopolo; ⁸ amo ana' i Elitsafaneo; i Semaia ty talè naho o rahalahi'eo, roanjato; ⁹ amo ana' i Kebroneo; i Eliele ty talè naho valopolo o rahalahi'eo; ¹⁰ amo ana' i Ozieleo; i Aminadabe ty talè naho zato-tsi-folo-ro' amby o rahalahi'eo. ¹¹ Kinanji' i Davide amy zao t'i Tsadoke naho i Abiatare mpisoroñe naho amo nte-Levio, i Orièle naho i Asaià naho Ioele naho i Semaia naho i Eliele vaho i Aminadabe, ¹² le nanoa'e ty hoe: Inahareo ro talèn' anjomban-droae nte-Levio; mañamasiña vatañe, ie naho o longo' areoo, hanesea' areo mb'etoy i vata' IEHOVÀ Andrianañahare' Israeley, mb'amy nihajariakoy. ¹³ Ie tsy nendesa' areo am-baloha'ey ty nitosira' IEHOVÀ Andrianañahare aman-tika, amy te tsy nihalalian-tika i fañè zay. ¹⁴ Aa le nañefe-batañe o mpisoroñe naho o nte-Levio, hampionjoñe i vata' IEHOVÀ Andrianañahare' Israeley. ¹⁵ Aa le nitarazoe' o ana' i Levio an-tsoroke am-boda'e i vatan' Añaharey, amy nandilia' i Mosè ty amy tsara' IEHOVÀiy. ¹⁶ Le nisaontsy amy mpiaolo' o nte-Levio t'i Davide hijoboña'e amo rahalahi'eo o mpisaboo, reke-pititihañe ara-tsabo, am-pipoñafeñe jejo-bory naho marovany naho fikarantsañe vaho ionjonam-peo an-drebeke. ¹⁷ Aa le jinobo' o nte-Levio t'i Hemane ana' Ioele; naho o rahalahi'eo, i Asafe, ana' i Berekia; naho o ana' i Merario, i Etane ana' i Kosaià; ¹⁸ naho o rahalahi'eo amy saranga faharoeio: i Zekarià, i Bene naho Iaaziele naho i Semiramote naho Iekiele naho i Oný, i Eliabe naho i Benaià naho i Maaseià naho i Matitià naho i Elifeleho vaho i Mikneià naho i Ovededomo naho Ieiele, songa mpiamben-dalambez. ¹⁹ Tinendre hampikorintseñe o katsàñe torisikeo t'i Hemane naho i Asafe vaho i Etane, mpisabo; ²⁰ le songa an-jejobory, am-peo abo t'i Zekarià naho i Aziele naho i Semiramote naho Iehiele naho i Oný naho Eliabe naho i Maaseià vaho i Benaià. ²¹ Le an-tali-valo hitarihañe o feo ambaneo t'i Matitià naho i Elifeleho naho i Mikneià naho i Ovededomo naho Ieiele vaho i Azazià. ²² Natao mpañoniñe t'i Kenanià, talè' o nte-Levio, amy hilala'e onin-tsaboy, toe nahihitse. ²³ Nimpitan-dala' i vatay t'i Berekia naho i Elkanà. ²⁴ I Sebanià naho Iehosafate naho i Netanele naho i Amasay naho i Zekarià naho i Benaià naho i Eliezere, mpisoroñe, songa nampipopò trompetra

aolo' i vatan' Añaharey; vaho nimpitan-dala' i vatay t'i Ovededome naho Iekià.

²⁵ Aa le nimb'eo t'i Davide naho o roandria' Israeleo naho o mpifelek' arivoo, hampionjona' iereo mb'eo i vatam-pañina' IEHOVÀY boak' añ'anjomba' i Ovededome ao an-drebeke. ²⁶ Ie amy zao, kanao nañolotse o nte-Levy nitarazo i vatam-pañina' IEHOVÀIO t'i Andrianañahare, le nisoroñañe bania fito naho añondrilahy fito. ²⁷ Nisaroñe leny mireparepa t'i Davide naho o nte-Levy nitarazo i vataio naho o mpisaboo vaho i Kenanià talè' o mpisabo amo oniñeoo; le nampiombeña kitambe leny t'i Davide. ²⁸ Aa le songa nampionjoñe i vatam-pañina' IEHOVÀY am-pazake t'Israele, am-pitiofañe tsifa naho am-pipopòn-trompetra naho am-pikarantsañe naho am-pipoñafam-peo reke-jejobory naho marovany. ²⁹ Ie nimoak' an-drova' i Davide ao i vatam-pañina' IEHOVÀY, le nitilihitse andalan-kede t'i Mikale ana' i Saole nahaisake i Davide nitsinjake naho niankahake ey vaho nitorifiha'e an-trok' ao.

16

¹ Aa le nendese' iareo i vatan' Añaharey naho najadoñe amy kivoho nihentseña' i Davide ao vaho nañenga soroñe miharo engam-panintsiñañe añatrefan' Añahare. ² Ie nihene'e i Davide ty fañengàñe o soroñe naho engam-panintsiñañe, le nitatae'e ondatio ami'ty tahina' IEHOVÀ. ³ Le nanjotsoa'e iaby t'Israele, hene ondaty naho roakemba, ty vonga-mofa naho venten-kena vaho ty garatom-baloboke maike. ⁴ Tinendre'e hitoroñe añatrefa' i vata' IEHOVÀY ty ila' o nte-Levio haniah y naho hañandriañe vaho handrenge IEHOVÀ Andrianañahare' Israele. ⁵ I Asafe ty talè, faharoe'e t'i Zekarià, Ieiele naho i Semiramote naho Iehiele naho i Matitià naho i Eliabe naho i Benaià naho i Ovededome naho Ieiele ro aman-jejobory naho talivalo; vaho nipoña-peo am-pikarantsañe t'i Asafe; ⁶ le nampipopò trompetra nainai'e añatrefa' i vatam-pañinan' Añaharey t'i Benaià naho Iakaziele.

⁷ Amy andro zay ty nañoriza' i Davide ty fañandriañañe am' IEHOVÀ, am-pitá' i Asafe naho o longo'eo.

⁸ Ehe andriaño t'IEHOVÀ, kanjio ty tahina'e; amphafohino ondatio o fitoloña'eo.

⁹ Isabo, irengeo an-takasy;
taroño am'ondatio
ze hene fitoloña'e fanjaka.

¹⁰ Mitrèña amy tahina'e masiñey;
ampirebeho ty arofo'
o mipay IEHOVÀO.

¹¹ Hotsohotsò t'IEHOVÀ naho o haozara'eo,
tsoeho nainai'e i lahara'ey.

¹² Tiahio o fitoloñañe fanjaka nanoe'eo,
o raha tsitantaneo,
naho o fizakàm-palie'eo,

¹³ Ry tarira' Israele mpitoro'eo,
ry ana' Iakobe jinobo'eo.

¹⁴ Ie t'IEHOVÀ Andrianañaharentika;
manitsike ty tane toy o fizakà'eo.

¹⁵ Tiahio nainai'e i fañina'ey;
i tsara linili'e ami'ty
tariratse faharivo'ey;

- ¹⁶ I nanoe'e amy Avrahamey,
naho i nifantà'e am' Ietsàkey;
- ¹⁷ Ie niventè'e am' Iakobe ho lily,
naho am'Israele ho fañina tsy modo,
- ¹⁸ Ami'ty hoe: Ihe ty hitolorako
ty tane' i Kanàne, ho anjara lova'o;
- ¹⁹ ie mbe tsy niampeampe,
toe potrapotra'e naho renetane ama'e ao.
- ²⁰ Aa ie nirererere mb'an-tane mb'an-tane naho boak' ami'ty fiheheañe,
pak' am-borizañe ila'e,
- ²¹ Le tsy napo'e ho joie'ondatio;
eka, iereo ty nañendaha'e mpanjaka ami'ty hoe:
- ²² Ko tsapae'o o norizakoo,
naho ko joie'o o mpitokikoo.
- ²³ Misaboa am' IEHOVÀ ry tane toy iaby;
talilio boak' andro boak' andro
ty hasoa' i fandrombaha'ey.
- ²⁴ Tseizo amo kilakila'ndatio ty enge'e;
o fitolõña'e fanjakao
amo kilakila ondatio.
- ²⁵ Amy te ra'elahy t'IEHOVÀ,
ho rengèñe añ'abo; hañeveñan-dre
te amo 'ndrahare ila'e iabio.
- ²⁶ Toe kafoake iaby ze ndrahare' ondatio;
IEHOVÀ ty namboatse o likerañeo*.
- ²⁷ Engeñe naho asiñe ro añatrefa'e eo,
haozarañe naho hafaleañe ro an-toe'e ao.
- ²⁸ Manolora am' IEHOVÀ
ry fifokoa' ondatio,
atoloro am' IEHOVÀ ty engeñe
naho haozarañe.
- ²⁹ Atoloro am' IEHOVÀ ty engeñe
mañeva i tahina'ey;
añandeso engeñe, le iatrefo,
mitalahoa am' IEHOVÀ
am-pibangoañe miavake.
- ³⁰ Minevenevera ama'e ry tane toy iaby;
toe mijadoñe ty voatse toy,
tsy hasitsitse.
- ³¹ Ampiehafo o andindiñeo,
ampirebeho ty tane toy;
ampitaroño amo kilakila'ondatio te
mifehe t'IEHOVÀ!
- ³² Ampitroño i riakey an-kalifora'e,
ampandiao taroba i hivokey,
naho ze hene ama'e ao.
- ³³ Le hisabo an-kafaleañe añatrefa' IEHOVÀ o hatae añ'alao,
Ie hitotsake eo hizaka ty tane toy.
- ³⁴ Andriaño t'IEHOVÀ, amy te ie ro soa;
nainai'e ty fiferenaiña'e.
- ³⁵ Le ano ty hoe: Rombaho zahay, ry Andrianañaharem-pandrombaha'ay,
le atontono vaho avotsoro

* 16:26 Sab 96:5

amo kilakila ondatio,
hañandriaña'ay i tahina'o masiñey,
hitreña'ay azo am-pandrengeañe.

³⁶ Andriañeñe t'IEHOVÀ,
Andrianañahare' Israele,
boak' an-kaehae'e pake haehae aña.

hene nirihoñe ty hoe ondatio: Amène vaho nandrenge IEHOVÀ.

³⁷ Aa le nenga'e añatrefa' i vatam-pañina' IEHOVÀ t'i Asafe mirolongo, hitoroñe añatrefa' i vatay nainai'e, amy ze fitoloñañe mañeva ty andro;

³⁸ i Ovededome naho o rahalahi'eo: enempolo-valo amby; naho i Ovededome ana' Ieditone naho i Kosà ro mpañamben-dalañe; ³⁹ i Tsadoke mpisoroñe naho o rahalahi'e mpisoroñe, añatrefa' i kivoho' IEHOVÀ, ankaboañe e Gibone eo, ⁴⁰ ty hisoroñe am' IEHOVÀ nainai'e boak' andro naho hariva, ty amy ze hene sinokitse amy HÀ' IEHOVÀ nandilia'e am' Israeley; ⁴¹ mpiam' iereo t'i Hemane naho Iedotone naho o ila'e jinoboñeo, o tinoñon-tahinañe,

hañandriañe IEHOVÀ, fa nainai'e ty fiferenaiña'e;

⁴² aa le o mindre amy Hemane naho Iedotoneo ro hampipoñake trompetra naho fikarantsañe naho o raha titiheñe am-pisaboañe aman' Añahareo; le an-dalambey eo o ana' Iedotoneo. ⁴³ Aa le songa nimpoly mb'añ' anjomba'e mb'eo ondatio; vaho nimpoly hitata i anjomba'ey t'i Davide.

17

¹ Ie amy zao, nimoneñe aña' anjomba'e ao t'i Davide le nanao ty hoe amy Natane mpitoky t'i Davide: Heheke te mitobok' aña' anjomba mendoraven-draho, fe ambane firadoradoañe ao ty vatam-pañina' IEHOVÀ.

² Le hoe t'i Natane amy Davide, Ano iaby ze aña'arofo'o ao, fa ama'o t'i Andrianañahare. ³ Ie amy haleñey le niheo amy Natane ty tsaran' Añahare nanao ty hoe: ⁴ Akia saontsio amy Davide mpitoroko, Hoe ty tsara' IEHOVÀ, Tsy ihe ty hamboatse akiba ho ahy himoneñako; ⁵ mboe lia'e tsy nimoneñe aña'anjomba raho sikal' amy andro nampionjoneko Israeley ampara' henane, fe boak'an-kivoho mb'an-kivoho vaho boak' ami'ty kibohotse mb' ami'ty ila'e. ⁶ Aa ndra aia' aia ty niharoako lia amy Israele, teo hao ty tsara nivolañeko amo mpitoki' Israele nandiliako hiarake ondatikoo, ty hoe: Aa vaho akore te tsy namboara' areo anjomba mendoraven-draho? ⁷ Aa le hoe ty ho saontsie'o amy mpitoroko Davidey, Hoe t'IEHOVÀ i Màroy, Rinambeko an-jolok' añaondry ao rehe, boak' ampiarahañ' añaondry ho mpifehe ondatiko Israeleo; ⁸ le nimpama'o raho amy ze nimba'o iaby naho fonga zinevoko aolo'o o rafelahi'oo vaho nanoako tahinañe manahake ondaty jabajaba' ty tane toio. ⁹ Mbore hañorizako toetse ondatiko Israeleo naho hajadoko eo himoneña' iareo an-toe' iareo ao, le tsy hasiotse ka; vaho tsy hampiantoe' o tsivokatseo, manahake te taolo, ¹⁰ sikal' amy andro nampifeheko o mpizakao ondatiko Israeleoy. Hampiambaneko iaby o rafelahi'oo vaho itaroñako te IEHOVÀ ty hañoreñe anjomba ho azo. ¹¹ Ie aña naho fa heneke o andro'oo, naho homb'aman-droae'o mb'eo, le hatroako ty tiri'o hanonjohy azo, ty raik' amo ana'oo; le hajadoko i fifehea'ey. ¹² Ie ty hamboatse anjomba ho Ahy, le horizako ho nainai'e tsy modo i fifeleha'ey. ¹³ Ho rae'e Raho, le ho anako re; le tsy hapitsoko ama'e ty fiferenaiñako manahake ty nanintahako aze

amy niaolo azoy, ¹⁴ f'ie hampimoneñako añ' anjombako ao naho am-pifeheako ao nainai'e, le hijadoñe kitro añ'afe'e i fiambesa'ey. ¹⁵ Aa le hene nisaontsie' i Natane amy Davide i tsaray naho i aroñaroñey.

¹⁶ Nizilik' ao t'i Davide niambesatse añatrefa' IEHOVÀ, nanao ty hoe: Ia raho, ry IEHOVÀ Andrianañahare; ino i kivohokoy t'ie nendese'o mb'etoy? ¹⁷ Te mone kede am-pihaino'o izay, ry Andrianañahare kanao nitsarae'o amy akibam-pitoro'o t'ie ho haehaey, vaho nivazohoe'o hoe t'ie hanahake t'i ondaty aña'abo ao, ry IEHOVÀ Andrianañahare. ¹⁸ Ino ka ty hihalalia' i Davide ty amy engeñe natolo'o amo mpitoro'oo? Fa arofoana'o ty mpitoro'o. ¹⁹ Ry IEHOVÀ, o mpitoro'oo naho o arofo'oo ty nanoe'o o raha ra'elahy zao, ty nampaharofoanañe o fonga raha fanjaka rezao. ²⁰ Ry IEHOVÀ, tsy eo ty mañirinkiriñe Azo, tsy eo ty ndrahare naho tsy Ihe, ty amy ze he'e jinanjin-tsofi'ay. ²¹ Le fifeheañe aia an-tane atoy ty manahake ondati'o Israele nijebañen' Añahare hondati'eo, hampanaña'o tahinañe jabahinake aña'mo fitoloña'o ra'elahy naho maharevendreveñeo, ie rino'a'o aolo' ondati'o nijebañe'o amy Mitsraimeio o kilakila' ondatio? ²² Le nanoe'o ondati'o nainai'e, ondati'o Israeleo, vaho Ihe ro Andrianañahare' iareo henane zao, ry IEHOVÀ. ²³ Ie amy zao, ry IEHOVÀ, lonik' abey te hajado'o nainai'e i nitsarae'o amo mpitoro'oo naho i akiba'ey vaho hanoe'o i tsinara'oy. ²⁴ Aa le ajadoño naho ampabajahinaho nainai'e donia ty tahina'o, hitsarañe ty hoe: IEHOVÀ i Màroy ro Andrianañahare' Israele naho Andrianañahare am' Israele; le ehe te hioreñe nainai'e añatrefa'o ty akiba' i Davide mpitoro'o. ²⁵ Fa Ihe, ry Andrianañahareko, ro nitaroñe amo mpitoro'oo te handranjia'o anjomba; zay ty nahasibeke o mpitoro'oo hihalaly ama'o. ²⁶ Toe Ihe, ry IEHOVÀ, ro Andrianañahare vaho nitsarae'o amo mpitoro'oo i hasoa zay; ²⁷ aa le ninò'o ty hitata i akibam-pitoro'oy, t'ie ho añatrefa'o nainai'e; aa kanao Ihe ro nitata ry IEHOVÀ, le ho soatata nainai'e.

18

¹ Ie aña zay, le linafa' i Davide o nte-Pelistio naho nampiambanè'e vaho tinava'e am-pità' o nte-Pelistio t'i Gate naho o tanà'eo. ² Linafa'e ka t'i Moabe vaho nimpitoro' i Davide o nte-Moabeo, nandroroñe ama'e. ³ Linafa' i Davide t'i Hadadezere, mpanjaka' i Tsobà pake Kamate, ie nionjoñe mb' an-tsaka Perate aña hampijadoñe i fifehea'ey. ⁴ Tinava' i Davide ama'e ty sarete arivo naho ty mpiningi-tsoavalala fito arivo naho ty lahindefo ro'ale; vaho nanoe' i Davide firasintake iaby o soavalao fe nahaja'e ty sarete zato. ⁵ Ie avy o nte Arame boak'e Damesèkeo hañolotse i Hadadezere mpanjaka' i Tsobà, le zinama' i Davide ty lahindefoñe ro'aletsi-ro'arivo amo nte Arameo. ⁶ Nampijadoñe' i Davide mpirimboñe amy zao t'i Damesèke' i Arame; vaho ninjare mpitoro' i Davide o nte-Arameo vaho nandroroñe ama'e. Tinolo' IEHOVÀ fandreketañe t'i Davide ndra aia aia ty nomba'e. ⁷ Rinambe' i Davide o fikalan-defo volamena tamo mpitoro' i Hadadezereo vaho nendese'e mb'e Ierosalaime aña. ⁸ Boake Tibkate naho i Kone, rova' i Hadadezere, ty nañandesa' i Davide torisike tsy fotofoto, ie nanoe' i Selomò i sajoabey torisike naho i fahañe rey naho o fanake torisikeo. ⁹ Ie jinanji' i Tô, mpanjaka' i Kamate te zinevo' i Davide ty valobohò' i Hadadezere mpanjaka' i Tsobà ¹⁰ le nirahe'e t'i Hadorame ana'e mb' amy Davide mpanjaka mb'eo hañontane naho hañandriañe aze, ty amy nialia'e amy Hadadezere naho nanjevo aze; ie nimpialy amy Tô t'i Hadadezere; le nampindreza'e fanake volamena naho volafoty vaho torisike maro karaza'e. ¹¹ Noriza' i Davide ho am' IEHOVÀ

irezay, mitraok' ami'ty volafoty naho volamena nakare'e amo fifeheañe iabio; amy Edome naho i Moabe naho amo ana' i Amoneo naho amo nte-Pelistio vaho amy Amaleke. ¹² Mbore namofoke nte-Edome rai-ale-tsi-valoarivo am-bavatanen-Tsira ao t'i Abisay ana' i Tseroià. ¹³ Najado'e Edome ao ty mpirimboñe vaho fonga nimpitoro' i Davide o nte-Edomeo. Zay ty nimbae' IEHOVÀ i Davide ndra aia aia ty nomba'e. ¹⁴ Aa le nifehè' i Davide t'Israele iaby vaho hene nizaka'e an-kavantañañe ondati'eo. ¹⁵ Ioabe ana' i Tseroià ty mpifeleke i valobohòkey naho Iehosafate ana' i Akilode ty mpamolily. ¹⁶ Nimpisoroñe t'i Tsadoke ana' i Akitobe naho i Abimelek' ana' i Abiatare vaho nimpitàn-tsokitse i Savsà; ¹⁷ Nimpifehe o nte-Kereteo naho o nte-Peleteo t'i Benaià ana' Iehoiada; vaho lohàñe amo niariseho i mpanjakay o ana' i Davideo.

19

¹ Ie aña zay le nivilasy t'i Nakase mpanjaka' o ana' i Amoneo, le nandimbe aze nifehe i ana-dahi'ey. ² Le hoe t'i Davide: ho tretrezeko t'i Kanone ana' i Nakase amy te nitretrezen-drae'e. Aa le nañitrifa' i Davide irake hañohò aze ty aman-drae'e. Aa le nimb'an-tane' o ana' i Amoneo mb' amy Kanone ao o mpitoro' i Davideo hañohò' aze, ³ fe hoe o roandria' o ana' i Amoneo amy Kanone; Atao'o te hiisy an-drae'o hao t'i Davide, ie nañihitrifa'e mpañohò? tsy mone nimb' ama'o mb'etoy i mpitoro'e rey hijilojilo naho hitsoetsoke vaho hitingatingañe an-tane atoy? ⁴ Aa le rinambe' i Kanone i mpitoro' i Davide rey vaho niharate'e naho tinampa'e aňivo o saro'eo, pak' am-piambesara'e vaho nanoe'e soike. ⁵ Nimb'eo amy zao ty nitalily amy Davide i nanoañe indaty reiy. Le nirahe'e ty hifanalaka ama'e; fa loho salatse indaty rey. Le hoe i mpanjakay, Mandiñisa e Ieriko ao ampara' te mitombo o tateahe' areoo, zay vaho mimpoly.

⁶ Ie napota' o ana' i Amoneo t'ie mañati-fofots' amy Davide, le nihitrife' i Kanone naho o ana' i Amoneo ty volafoty arivo hañaramà' iareo sarete naho mpiningi-tsoavalà boake Arame-naharaime naho boak'e Arame-maakà vaho boak' amy Tsobà. ⁷ Aa le nañeke sarete telo-ale-tsi-ro'arivo naho ty mpanjaka' i Maakà rekets' ondati'eo; le nimb'e Medebà mb'eo iereo vaho nitobe. Nifanontoñe ka o ana' i Amone boak' an-drova'eo, le nimb'eo hialy. ⁸ Ie jinanji' i Davide, le nirahe'e mb'eo t'Ioabe naho ze fonga fanalolahy amy valobohokey. ⁹ Niavotse o ana' i Amoneo nandahatse i aliy an-dalambei' i rovay vaho niereñereñe an-kivoke ey o mpanjaka niavio. ¹⁰ Ie nizoe' Ioabe te niatrek' aze aolo naho amboho' i hotakotakey, le jinobo'e iaby ty fanalolahì' Israele vaho nampiatrefe'e amo nte-Arameo. ¹¹ Nafanto'e ho am-pità' i Abisay rahalahi'e ondaty ila'eo le sindre nilahatse hiatreke amo ana' i Amoneo. ¹² Aa hoe re, Naho loho maozatse amako o nte-Arameo le ihe ty hañolotse ahy; aa naho maozatse te ama'o ka o ana' i Amoneo le zaho ty hañolotse azo. ¹³ Mahasibeha le antao tika hamente t'ie maozatse ho am'ondatin-tikañeò naho ho amo rovan' Añaharen-tikañeò; le hanoe' IEHOVÀ ze arofoana'e hahasoa. ¹⁴ Aa le niheo mb'eo t'Ioabe naho ondaty mpiama'eo nihotakotak' amo nte Arameo, ie nitriban-day aolo'e eo. ¹⁵ Aa ie nioni' o ana' i Amoneo te nilay aña o nte-Arameo le nilay añatrefa' i Abisay, rahalahi'e ka vaho nimoak' an-drova ao. Aa le nimpoly mb'e Ierosalaime aña t'Ioabe. ¹⁶ Ie nirendre' o nte-Arameo te ginio' Israele, le nañitrike irake, nangalake o nte-Arame alafe' i Sakaio, rekets' i Sopake mpifehe' ty valobohò' i Hadadezere ho mpiaolo. ¹⁷ Natalily amy Davide, le natonto'e iaby t'Israele naho nitsake Iordaney mb'eo naho nivotrak' am' iereo vaho nalaha'e

am' iereo i hotakotakey. Aa ie nalaha' i Davide amo nte-Arameo i aley le nifandrapaha'e. ¹⁸ Nilay añ' atrefa' Israele o nte-Arameo; le zinevo' i Davide ty fito-arivo amo nte-Arame an-tsareteo naho ty efats-ale antomboke vaho vinono'e t'i Sopake mpifehe' i valobohòkey. ¹⁹ Ie tendrek' amo mpitoro' i Haderezereo te ginio' Israele, le nifampilongo amy Davide naho nitoroñe aze vaho tsy nimete handrombake o ana' i Amoneo ka o nte-Arameo.

20

¹ Ie nibalike ty taoñe, an-tsa-piavota' o mpanjakao hialy, le nampionjone' Ioabe ty haozara' o lahindefoñe o nampangoakaheñe ty tane' o ana' i Amoneo, le nimb'e Rabà mb'eo niarikatok' aze. Mbe nihenekeneke e Ierosalaime aña t'i Davide, le Ioabe ty namofoke i Rabà vaho nandrotsak' aze. ² Rinambe' i Davide añ'ambone' i mpanjaka' iareoy ty sabaka'e le nizoe'e t'ie nilanja talentam-bolamena raike reketse vatosoa, le naombe ami' ty añambone' i Davide vaho nakare'e ty nikopaheñe amy rovay, toe tsifotofoto. ³ Nendese'e boak' ao ondatio le nampitromaha'e an-dasý naho lasari-vý vaho fekoñe. Ie ty nanoe' i Davide amo fonga rova' o ana' i Amoneo. Le hene nimpoly mb'e Ierosalaime mb' eo t'i Davide naho o' ondatio.

⁴ Ie aña, le nifandrapake ty aly amo nte-Pelistio e Gezere ao, naho zinevo' i Sibekay nte-Kosate henane zay t'i Sipay, ana' o joalalahio; le nampiambanène iereo. ⁵ Nipoake indraike ty aly amo nte-Pelistio; Le zinevo' i Elkanane ana' Iaire, t'i Lakmý rahalahi' i Goliate nte Gite, i taran-defo'ey nanahake ty bodam-panenoñe. ⁶ Ie nipoak'aly indraike e Gate ao, le teo t'indaty nijoala, ty fitonto' o rambom-pitá'e naho rambom-pandia'eo le roapololo-efats'amby, ki-ene-ki-eneñe; ie nitariran-joalalahy ka. ⁷ Ie nisigihe'e t'Israele, le vinono' Ionatane ana' i Simeà rahalahi' i Davide. ⁸ Songa tarira' ty joalalahy e Gate ao; sindre nizevoñem-pitá'e i Davide naho ty fitá' o mpitoro'eo.

21

¹ Nitroatse am' Israele amy zao i mpañinjey nañosike i Davide hañiake Israele. ² Le hoe t'i Davide am' Ioabe naho amo mpiaolo' ondatio; Akia volilio t'Israele boake Beer-Sevà pake Dane aña; vaho andeso amako ho isako. Fa hoe t'Ioabe: ³ Ehe te hampitomboe' IEHOVÀ in-jato ty hamaro'e, f'ie tsy songa mpitoron-talèko hao ry talèko mpanjaka? ino ty paia' i talèko o raha zao? Ino ty hampanaña'e hakeo Israele? ⁴ Fe naharekets' Ioabe ty saontsi' i mpanjakay. Aa le niavotse t'Ioabe, nanitsike Israele vaho nimpoly mb'e Ierosalaime mb'eo. ⁵ Le natolo' Ioabe amy Davide ty fitonto' i famoliliañe ondatioy. Aa naho Israele iaby, le rai-tampetrisa-tsi-rai-hetse t'indaty nahafitsoa-pibara vaho am'Iehodá, efats-etse-tsi-fito-ale t'indaty nahafitsoa-pibara. ⁶ Fe tsy vinolily am' iereo t'i Levý naho i Beniamine; amy te nampitorifike Ioabe ty saontsi' i mpanjakay.

⁷ Nihejen'Añahare i raha zay; le linafa'e t'Israele. ⁸ Le hoe t'i Davide aman' Añahare: aman-kakeo bey raho, amy nanoeko i rahay; ehe apoho henaneo i tahim-pitoro'oy; amy te nanao hadagolàñe. ⁹ Le nitsara amy Gade, mpitoki' i Davide, t'IEHOVÀ, nanao ty hoe: ¹⁰ Akia saontsio amy Davide ty hoe: Hoe ty nafè' IEHOVÀ: Azotsoko ama'o ty raha telo, ijoboño ty hanoako. ¹¹ Aa le nimb' amy Davide mb'eo t'i Gade le nanoe'e ty hoe; Hoe ty nafè' IEHOVÀ: Joboño ze tea'o, ¹² ke t'ie ho san-kerè telo taoñe, ke hofafàñe aolon-drafelahi'o telo volañe, ie manjomòts' azo ty

fibaran-drafelahi'o, he ho telo andro am-pibara' IEHOVÀ, rekets' angorosy amy taney, ie tsitsife' ty Anjeli' IEHOVÀ rotsake ty an-tane' Israele. Aa le ereñereño henaneo ty vale'e hampoliko amy nañirak' ahiy. ¹³ Le hoe t'i Davide amy Gade, Vata'e dobo raho; apoho hikorovok' am-pitá' IEHOVÀ, amy te ra'elahy o fiferenaiña'eo; fa ko ado'o hivarinjonjok' am-pitá'ondaty. ¹⁴ Aa le nirahe' IEHOVÀ am' Israele ty angorosy; le ondaty fito-ale ty nitsingoritrítse. ¹⁵ Nampihitrifen' Añahare am' Ierosalaime ty anjely handrotsake, aa ie ho nanjevo le najihe' IEHOVÀ; niferenaiña'e tsy hanao i hankàñey vaho nanoe'e ty hoe i anjely mpandrotsakey, Soa zay, agebaño henaneo ty fità'o. Le nijohañe marine' ty tanem-pifofoha' i Ornane nte-Iebosý eo i anjeli' IEHOVÀ. ¹⁶ Nampiandra fihaino amy zao t'i Davide le nioni'e nijohañe añivo' ty tane toy naho i likerañey i anjeli' IEHOVÀ, ie natorakitsi'e ambone' Ierosalaime eo ty fibara tsinoake am-pitá'e. Nibabok' an-daharañe amy zao t'i Davide naho o androanavi' Israeleo songa nisikin-gony. ¹⁷ Le hoe t'i Davide aman' Añahare, Tsy zaho hao ty nandily ty fañiahañe ondatio? Zaho avao ty nandilatse, nanao i haratiañey; fa o añondry retoñañe, ino ty nanoe' iareo? Ehe te ho amako naho añ' anjomban-draeko ty fità'o ry IEHOVÀ Andrianañahareko, fa tsy am'ondati'oo, hanjamañe iareo.

¹⁸ Aa le nampisaontsie' i anjeli' IEHOVÀ i Gade amy Davide, te hampitroare' i Davide am' IEHOVÀ ty kitrely an-tanem-pamofoha' i Ornane nte-Iebosý eo. ¹⁹ Le nionjomb'eo t'i Davide ty amy nitaroña' i Gade ami'ty tahina' IEHOVÀ. ²⁰ Ie nitolike t'i Ornane le nioni'e i anjeliy, le niharo nietake, ie naho ty ana-dahi'e efatse. Namofoke vare-bolè t'i Ornane henane zay. ²¹ Ie nimb'e Ornane mb'eo t'i Davide, le niandra t'i Ornane, nahaisake i Davide, le niavotse mb' an-tanem-pamofohañe mb'eo vaho nibokok' amy Davide, ty lahaba'e mb'an-tane. ²² Le hoe t'i Davide amy Ornane, Atoloro ahy ty toem-pamofohañe toy hañamboarako kitrely am'IEHOVÀ; atoloro ahy ami'ty vili'e do'e, hampijihetse i angorosiy am' ondatio. ²³ Le hoe t'i Ornane amy Davide, Endeso ho azo le hanoa' i talèko mpanjakay ze soa am-pihaino'e. Ingo atoloko azo o añombeo ho soroñe naho o haraom-pamofohañe ho hatae vaho o vare-bolè ho enga mahakama; fonga itolorako. ²⁴ Le hoe t'i Davide mpanjaka amy Ornane, Aiy avao! tsy mete tsy vilieko ami'ty vili'e do'e, fa tsy ho rambeseko ho a IEHOVÀ o azoo, ndra hañenga soroñe tsy amam-bily. ²⁵ Aa le natolo' i Davide amy Ornane ho amy toetsey ty sekelem-bolamena enenjato ami'ty lanja'e ²⁶ naho nandranjy kitrely am' IEHOVÀ eo t'i Davide le nañenga soroñe naho engam-panintsíñañe naho nikanty IEHOVÀ vaho natoi'e boak' andikerañe ey, nampidoiñ' afó ambone' i kitrely fisoroñañey. ²⁷ Ie linili' IEHOVÀ i anjeliy le naombe'e an-kotra'e ao i fibara'ey. ²⁸ Nioni' i Davide henane zay te nanoiñe aze an-toem-pamofoha' i Ornane nte-Iebosý eo t'IEHOVÀ le eo ty nañenga'e soroñe. ²⁹ Amy te mbe an-toets' abo' i Gibone aña ty kivoho' IEHOVÀ niranjie' i Mosè am-patrambey aña naho i kitrelim-pisoroñañey henane zay. ³⁰ Fe tsy nete niatrek' ama'e eo t'i Davide hañontane an' Andrianañahare fa nampirevendreveñe aze i fibaran' anjeli' IEHOVÀ.

22

¹ Le hoe t'i Davide, Etoy ty anjomba' IEHOVÀ Andrianañahare naho itoy ty kitrelim-pisoroña' Israele. ² Linili' i Davide te hatontoñe o renetane' an-tane' Israeleo; le nampijadoñe'e mpandrafi-bato hihaly vato handranjiañe

i anjomban' Añaharey. ³ Hinajari' i Davide ty viñe maro hatao fati-by amo lalambe fimoahañeo naho ho famitrañañe; naho torisike tsifotofoto tsy aman-danja; ⁴ vaho boda mendoraveñe tsy aman' iake, amy te ninday boda mendorave tsiefa amy Davide o nte Tsidoneo naho o nte-Tsoreo. ⁵ Le hoe t'i Davide: Mbe tora'e naho tsy zatse t'i Selomò anako vaho tsy mete tsy ho vata'e fanjaka ty anjomba ho ranjieñe am' IEHOVÀ, rekets' engeñe naho asiñe amo hene fifeheañeo; le hihentseñako. Aa le maro ty nihajarie' i Davide taolo' ty nihomaha'e.

⁶ Tinoka'e amy zao t'i Selomò, ana-dahi'e le nafantopanto'e t'ie ty handranjy i anjomba' IEHOVÀ, Andrianañahare' Israeley. ⁷ Le hoe t'i Davide amy Selomò, O anako, tan-troko ao ty hamboatse anjomba ho amy tahina' IEHOVÀ Andrianañaharekoy. ⁸ Fe niheo amako ty tsara' IEHOVÀ nanao ty hoe: Nampidoandoan-dio rehe, losotse o aly bey nanoe'oo; tsy ihe ty hamboatse akiba ami'ty añarako, amy t'ie nampioridio tsifotofoto an-tane am-pahatreavako eo. ⁹ Oniño te hisamak' anadahy rehe, ondatin-kanintsiñe naho hampitofàko amo rafelahi'e mañohok' aze iabio naho hatao Selomò ty añara'e vaho ho tolorako fierañerañañe naho fañanintsiñe t'Israele amo andro'eo. ¹⁰ Ie ty handranjy akiba ho ami'ty añarako, le ho rae'e raho; vaho hajadoko ambone' Israele eo nainai'e donia ty fiambesam-pifehea'e. ¹¹ Ie amy zao ry anako, hitahy azo t'IEHOVÀ; hampiraoraoa'e, le ranjio ty anjomba' IEHOVÀ Andrianañahare'o amy nitsarae'e ama'oy. ¹² Hatolo' IEHOVÀ azo ty hihatse naho hilala hifehea'o t'Israele; hahavontitira'o ty HÀ' IEHOVÀ Andrianañahare'o. ¹³ Le hihavelon-drehe naho hambena'o o fañè'e naho fepè' linili' IEHOVÀ i Mosè am' Israeleo; mihaozara naho mahasibeha; ko hembañe, ko miroreke. ¹⁴ Mahaoniña te ami'ty hatsimboeko ty nihentseñeko ho amy anjomba' IEHOVÀ ty talenta volamena rai-hetse naho talenta volafoty arivon' arivo vaho viñe naho torisike tsy aman-danja, ami' ty hatsifotofoto'e. Mbore nihajarieko boda naho vato, le mbe ho tovoña'o. ¹⁵ Toe ama'o ka ty mpandranjy tsi-efa naho mpihaly naho mpamàñe vato naho mpandrafitse vaho ondaty mahimbañe amy ze atao fitoloñañe iaby. ¹⁶ Ty amy volamenay, i volafotiy, i torisikey vaho i viñey, le tsy aman' iake, Miongaha naho mifanehafa, fa hitahy azo t'IEHOVÀ.

¹⁷ Nililie' i Davide ka o roandria' Israele iabio ty hañolotse i Selomò ana'e, ami'ty hoe: ¹⁸ Tsy nitahie' IEHOVÀ Andrianañahare' areo hao nahareo? Tsy fonga nampitofà'e o aña'ilà' areoo? Fa natolo'e an-tañako ze hene mpimone' ty tane toy; vaho fa nampiambanèñe añatrefa' IEHOVÀ o taneo naho aolo' ondati'eo. ¹⁹ Aa le ampitsoeho o arofo' areoo naho o fañova' areoo t'IEHOVÀ Andrianañahare' areo; miongaha vaho amboaro i toetse masi' IEHOVÀ Andrianañaharey, hañandesáñe mb' aña' anjomba ho ranjieñe amy tahina' IEHOVÀ mb'eo i vatam-pañina' IEHOVÀ naho o fanake masin'Añahareo.

23

¹ Nigain-kantetse t'i Davide naho nilifots'andro; vaho nanoe'e mpanjaka' Israele t'i Selomò ana-dahi'e. ² Le natonto'e iaby o roandria' Israeleo naho o mpisoroñeo vaho o nte-Levio. ³ Niaheñe amo añambone'eo ki-ondaty-ondaty, o nte-Levy telopolo taoñe mañamboneo, le ni-telo-aletsi-valo-arivo. ⁴ Ro'ale-tsi-efats' arivo am' iereo ty hisary ty fitoloñañe amy anjomba' IEHOVÀ; le eneñ' arivo ty ho mpifeleke naho mpizaka; ⁵ le efats'arivo ty hañamben-dalambey; vaho efats' arivo ty hisabo am'

IEHOVÀ amo fititihañe niranjiekò ho fijejoñaeo. ⁶ Zinara' i Davide am-pirimboñañe o ana' i Levio: i Gersone, i Kehàte vaho i Merary. ⁷ Amo nte-Gersoneo: i Ladane naho i Simey. ⁸ O ana' i Ladaneo: Iekiele ty nimpiaolo naho i Zetame vaho Ioele, telo. ⁹ O ana' i Simeio; i Selomite naho i Kaziele vaho i Harane, telo. Iereo ty nimpiaolo añ' anjomba' i Ladane rae'e. ¹⁰ O ana' i Simeio: Iakate, i Zinà naho Iehose vaho i Beria. I efatse rey ro ana' i Simey. ¹¹ Talè t'Iakate, faha-roe t'i Zizà; le tsy nimaro anake t'Iehose naho i Berià vaho nivolilieñe ho raike iereo ty aman' anjomban-droae. ¹² O ana' i Kehàteo: I Amrame, Iitshare, i Kebrone vaho i Oziele, efatse. ¹³ O ana' i Amrameo: i Aharone naho i Mosè; navike t'i Aharone, nambahañe hiavake do'e, ie naho o ana-dahi'e nainai'e doniao, hañembok' añatrefa' IEHOVÀ naho hitoroñe aze vaho hibango i tahina'ey nainai'e. ¹⁴ Niaheñe am-pifokoa' i Levy ao o ana' i Mosè, ondatin' Añahareo. ¹⁵ O ana' i Mosèo: i Gersome naho i Eliezere. ¹⁶ O ana' i Gersomeo: i Seboele, talè. ¹⁷ Ana' i Eliezere t'i Rekabià, talè. Tsy nanañ' anake ila'e t'i Eliezere fe tsiefa ty anadahi' i Rekabia. ¹⁸ O ana' Iitshareo: i Selomite, talè. ¹⁹ O ana' i Kebroneo: Ierià, tañoloñoloña'e, i Amarià ty faharoe, Iakaziele ty fahatelo vaho Iekameame ty fahefatse. ²⁰ O ana' i Ozieleo: i Mikà, tañoloñoloña'e naho Iesià, faharoe. ²¹ O ana' i Merario: i Maklý naho i Mosy. Le o ana' i Maklò: I Eleazare naho i Kise. ²² Nivilasy tsy aman' ana-dahy t'i Eleazare, f'ie nanañ' anak' ampela, le nengae' o rahalahi'e ana' i Kiseo iereo. ²³ O ana' i Mosio: i Maklý naho i Edere vaho Ieremote, telo.

²⁴ Zay o ana' i Levio amo anjomban-droae'eo; o talèn-droae'eo, ie vinolily an' iake ty amo tahina'eo, ty amo añambone'eo; o nifane-hak' am-pitoloñañe añ' anjomba' IEHOVÀ ao boak'an-tao'e faha-roapolo mañamboneo. ²⁵ Ami'ty nanoe' i Davide ty hoe, Fa tinolo' IEHOVÀ Andrianañahare' Israele fitofañe ondati'eo; ie himoneñe e Ierosalaime ao nainai'e. ²⁶ Le o nte-Levio: tsy ho tarazoe' iereo ka i kivohoy ndra o fana-pitoloñañe. ²⁷ Fa ty tsara' fara' i D'avide, le ty famoliliañe o nte-Levy roapolo taoñe mañamboneo. ²⁸ Amy te nampijadoñeñe am-pità' o ana' i Aharoneo ty fitoloñañe añ'anjomba' IEHOVÀ ao, an-kiririsa'e ao naho amo efets' efe'eo naho amy fañeferañe o raha masiñe iabioy vaho ty fitoroñañe añ' anjomban' Añahare, ²⁹ amy mofo miatrekey naho amy mona'e ho enga-mahakamay naho ty mofo-pila'e tsy aman-dalivay, ke t'ie toñahéne añ' endraendra he alaro menake naho ze hene fañaranañe naho fanjeheañe; ³⁰ naho t'ie hijohañe eo boa-maraiñe, hañandriañe naho handrenge IEHOVÀ, naho hariva ka; ³¹ naho hañenga ze hene soroñe am' IEHOVÀ, amo SABATAO naho amo pea-bolañe naho amo andro namantañañe, ami'ty ia'e nefetse, añatrefa' IEHOVÀ nainai'ey; ³² vaho hañambeñe i kivohom-pamantañañey naho hañambeñe i toetse masiñey naho hiaolo o ana-dahi' i Aharone, roahalahi'eo, ami'ty fitoroñañe añ' anjomba' IEHOVÀ ao.

24

¹ Zao o firimboñan' ana' i Aharoneo: O ana' i Aharoneo: i Nadabe naho i Abihò, i Eleazare naho Itamare. ² Toe nihomake taolon-drae'e t'i Nadabe naho i Abihò, ie mbe tsy nisamake; aa le i Eleazare naho Itamare ty nitoloñe ho mpisoroñe, ³ le nitraok' amy Tsadoke tarira' i Eleazare naho i Akimeleke tarira' Itamare t'i Davide nizara iareo am-pirimboñañe ty amo fitoroñañe. ⁴ Ie amy zao nimaro ty talè amo tarira' i Eleazareo te amo tarira' Itamareo; le zao ty nizarañe iareo: folo-eneñ' amby ty amo talèn-anjomban-droae'eo ty ana' i Eleazare, naho valo ty amo

anjomban-droae'eo ty ana' Itamare. ⁵ Aa le nifanjara an-kitsapake iereo, ty raike naho ty ila'e vaho songa nanañe mpiaolo amy toetse masiñey naho mpiaolo aman' Añahare o ana' i Eleazareo naho o ana' Itamareo. ⁶ I Semaià, ana' i Netanele, nte-Levý, mpanokitse, ty nanokitse iareo añatrefa' i mpanjakay naho o mpiaoloo naho i Tsadoke mpisoroñe naho i Akimelek' ana' i Abiatare naho o talèn-droaem-pisoroñe vaho o nte-Levio; rinambe ami'ty anjomban-droae raike ty ho a i Eleazare vaho rinambe ami'ty ila'e ty ho a Itamare. ⁷ Ty tsapake valoha'e niazo Iehoiaribe, ty faharoe, Iedaià; ⁸ ty faha-telo i Karime, ty fah'efatse, i Seorime, ⁹ ty faha-lime i Malkià, ty fah' eneñe, i Miamine, ¹⁰ ty faha-fito, i Hakotse, ty faha-valo i Abià, ¹¹ ty faha-sive, Iesoà, ty faha-folo, i Sekanià, ¹² ty faha-folo-raik' amby, i Eliasibe, ty faha-folo-ro' amby, Iakime, ¹³ ty faha-folo-telo' amby, i Kopà, ty faha-folo-efats' amby, Iesebeabe, ¹⁴ ty faha-folo-lim' amby, i Bilgà, ty faha-folo-eneñ' amby, Imere, ¹⁵ ty faha-folo-fito' amby, i Kezire, ty faha-folo-valo' amby, i Hapitsetse, ¹⁶ ty fahafolo-siv' amby, i Petakià, ty faha-roapol, Iekezkele ¹⁷ ty faha-roapol-raik' amby Iakine, ty faha-roapol-ro' amby, i Gamole, ¹⁸ ty faha-roapol-telo' amby i Delaià, ty faha-roapol-efats' amby i Mahazià. ¹⁹ Zay o firimboña' iareoo naho ty filaharam-pitoroña' iareo añ'anjomba' IEHOVÀ ao, ty amy lily natolotse am-pitá' i Aharone rae' iareoy, i nandilia' IEHOVÀ Andrianañahare' Israeley.

²⁰ Aa naho o ana' i Levý nisisao: amo ana' i Amrameo: i Sobaele; amo ana' i Sobaeleo, Iedeià. ²¹ Le i Rekabià, amo ana' i Rekabiào: Ies'sià ty talè. ²² Amo nte-Iitsehareo, i Selomote; amo ana' i Selomoteo, Iakate, ²³ Amo ana' i Kebroneo, Ierià talè; faharoe i Amarià, fahatelo Iakaziele, fah' efatse Iekameame. ²⁴ Amo ana' i Oziele, i Mikà; amo ana' i Mikào, i Samire. ²⁵ Rahalahi' i Mikà t'Ies'sià: amo ana' Ies'siao: i Zekarià; ²⁶ o ana' i Merario: i Maklý naho i Mosý; o anan' ana' Iaaziào; ²⁷ toe o ana' i Merario amy ana'e Iaazià, i Sohame naho i Zakore vaho Ivry. ²⁸ Amy Maklý: i Eleazare, tsy nanañ' ana-dahy. ²⁹ Amy Kise: o ana' i Kiseo, Ierakmeele. ³⁰ O ana' i Mosio; i Maklý naho i Edere vaho Ierimote. Ie ro ana' o nte-Levio ty amo anjomban-droae'eo. ³¹ Nifanao kitsapake ka iereo manahake o longo' iareo ana-dahi' i Aharoneo, añatrefa' i Davide mpanjaka naho i Tsadoke naho i Akimeleke naho o talèn' anjomban-droaem-pisoroñe naho o nte-Levio—o talèn-droaeo naho o zai'eo.

25

¹ Mbore zinara' i Davide naho o mpifehe' i valobohòkeio amo fitoloñañe o ana' i Asafeo naho i Hemaneo vaho Iedotoneo, ze hitoky ie ama' marovany naho aman-jejobory vaho amam-pikantsañañe: le ty ia' o nitoloñe amy fitoroñañeio: ² o ana' i Asafeo: i Zakore naho Iosefe naho i Netanià vaho i Asarelà; songa ana' i Asafe ambanem-pitá' i Asafe, mpitoky ambanem-pitá' i mpanjakay. ³ Iedotone: o ana' Iedotoneo, i Gedalià, i Tserý, Iesaià, i Kasabià naho i Matitià, eneñe, ambanem-pitàn-drae'e Iedotone, mpitoky añoza-marovany, mpañandriaña naho mpandrenge IEHOVÀ. ⁴ I Hemane, o ana' i Hemaneo: i Bokià, i Matanià, i Oziele, i Seboele naho Ierimote, i Kananià, i Kananý, i Eliatà, i Gidaltý naho i Romamtiezere, Iosbekasà, i Malotý, i Makaziote. ⁵ Songa ana' i Hemane, mpitoki' i mpanjakay ty amy ze mioza aman' Añahare, hañonjonaña i tsifay. Tinolon' Añahare ana-dahy folo-efats' amby naho anak' ampela telo t'i Hemane. ⁶ Songa ambanem-pitàn-drae'e hisabo añ' anjomba' IEHOVÀ ao reketsé fikantsañañe, jejobory naho marovany, hitoroñe i anjomban' Añaharey, ambanem-pitá' i mpanjakay, amy Asafe, amy Iedotone vaho

amy Hemane. ⁷ Ty ia' iareo naho o rahalahi' iareoo naòke hisabo am' IEHOVÀ, ze hene nahimbañe le roanjato-tsi-valompolo-valo' amby.

⁸ Sindre nanao ki-tsapake ho amy fitoloña'ey, ty kede naho ty bey, ty mpañoke vaho ty mpioke. ⁹ Ty tsapake valoha'e ho a' i Asafe le Iosefe; ty faharoe, a i Gedalià; ie naho o rahalahi'eo naho o ana-dahi'eo, folo-ro' amby.

¹⁰ Ty fahatelo a i Zakore, o rahalahi'eo naho ana-dahi'eo, folo-ro' amby.

¹¹ Ty fahefatse a i Itsrý; o ana'dahi'eo naho o rahalahi'eo, folo-ro' amby.

¹² Ty fahalime, a i Netanià, o ana-dahi'eo naho o rahalahi'eo, folo-ro' amby.

¹³ Ty fah'eneñe, a i Bokià, o ana-dahi'eo naho o rahalahi'eo, folo-ro' amby.

¹⁴ Ty faha-fito a i Iesarelà, o ana-dahi'eo naho o rahalahi'eo, folo-ro' amby.

¹⁵ Ty fahavalو a i Iesaià, o ana-dahi'eo naho o rahalahi'eo, folo-ro' amby.

¹⁶ Ty fahasive a i Matanià, o ana-dahi'eo naho o rahalahi'eo, folo-ro' amby.

¹⁷ Ty fahafolo a i Simey, o ana-dahi'eo naho o rahalahi'eo, folo-ro' amby.

¹⁸ Ty fahafolo-raik'amby, a i Azarele, o ana-dahi'eo naho o rahalahi'eo, folo-ro' amby. ¹⁹ Ty fahafolo-ro' amby, a i Kasabià, o ana-dahi'eo naho o rahalahi'eo, folo-ro' amby. ²⁰ Ty fahafolo-telo'amby, a i Sobaele, o ana-dahi'eo naho o rahalahi'eo, folo-ro' amby. ²¹ Ty fahafolo-efats'amby, a i Matitià, o ana-dahi'eo naho o rahalahi'eo, folo-ro' amby. ²² Ty fahafololim' amby, a i Ieremote, o ana-dahi'eo naho o rahalahi'eo, folo-ro' amby.

²³ Ty fahafolo-eneñ'amby, a i Kananià, o ana-dahi'eo naho o rahalahi'eo, folo-ro' amby. ²⁴ Ty fahafolo-fito'amby, a i Iosbekasà; o ana-dahi'eo naho o rahalahi'eo, folo-ro' amby. ²⁵ Ty fahafolo-valo'amby, a i Kananý, o ana-dahi'eo naho o rahalahi'eo, folo-ro' amby. ²⁶ Ty fahafolo-sive'amby, a i Malotý, o ana-dahi'eo naho o rahalahi'eo, folo-ro' amby. ²⁷ Ty faha-roapolو, a i Eliatà, o ana-dahi'eo naho o rahalahi'eo, folo-ro' amby. ²⁸ Ty faha-roapolو-raik'amby, a i Hotire, o ana-dahi'eo naho o rahalahi'eo, folo-ro' amby. ²⁹ Ty faha-roapolو-ro' amby, a i Gidaltý, o ana-dahi'eo naho o rahalahi'eo, folo-ro' amby. ³⁰ Ty faha-roapolو-telo'amby, a i Makaziote, o ana-dahi'eo naho o rahalahi'eo, folo-ro' amby. ³¹ Ty faha-roapolو-efats'amby, a i Romamtiezere, o ana-dahi'eo naho o rahalahi'eo, folo-ro' amby.

26

¹ Ty amo firimboñam-pitan-dalambeio: Amo nte-Koraheo, i Meselemià, ana' i Kore, tarira' i Asafeo. ² O ana' i Meselemiào: i Zekarià ty tañoloñoloña'e, Iediaele ty faharoe, i Zebadià ty fahatelo, Iatniele ty fah'efatse, ³ i Elame ty fahalime, Iehokanane ty fah'eneñe, i Elioenay ty faha-fito. ⁴ O ana' i Abededomeo: i Semaià ty tañoloñoloña'e, Iehozabade ty faharoe, Ioake ty fahatelo, i Sakare ty fahefatse, i Netanele ty fahalime, ⁵ i Amiele ty fah'eneñe, Isakare ty faha-fito, i Peolètae ty fahavalو amy te nitahien' Añahare. ⁶ Nisamak' ana-dahy ka t'i Semaià ana'e, sindre mpiaolon' anjomban-droae'e, lahilahy maozatse mahasibeke. ⁷ O ana-dahi' i Semaiào: i Otný naho i Refaele; vaho i Ovede naho i Elzabade rahalahi' e, songa fanalolahy; i Elihò ka naho i Semakià. ⁸ Ie ro tamo ana' i Ovededomeo: ie naho o ana-dahi'eo naho o rahalahi'eo songa ondaty mahasibeke naho maozatse amo fitoloñañeo, enem-polo-ro' amby, amy Ovededome. ⁹ Nanañ' anake naho rahalahy t'i Meselemià, fanalolahy, folo-valo' amby. ¹⁰ I Kosà ka, tarira' i Merario: i Simrý talè, (toe tsy tañoloñoloña'e fe nanoen-drae'e talè), ¹¹ i Hilkià ty faharoe, i Tebalia ty fahatelo, i Zekarià ty fahefatse; ze hene ana-dahy naho rahalahi' i Kosà le folo-telo' amby. ¹² I firimboñam-pañambeñe rezay, ambane' o

mpiaoloo, le natolotse fitoloñañe manahake o rahalahi' iareoo, hitoroñe añ'anjomba' IEHOVÀ ao. ¹³ Ie nanao an-kitsapake, ty kede naho ty bey, ty amo anjomban-droae'eo, ho amy ze lalambey iaby. ¹⁴ Nipoke ho a i Selemià ty vato' i atiñanañey le ho a i ana'e Zekariay, mpanolo-kevetse mahihitse, nanoeñe an-kitsapake le nipoke te avaratse i azey. ¹⁵ Ho a i Ovededome ty atimo naho a o ana-dahi'eo ty anjombam-pañajàñe. ¹⁶ Ho a i Sopime naho i Kosà ty ahandrefa amy lalambei' i Saleketey, amy lalañe mañamboney, mpañambeñe miatreke mpañambeñe. ¹⁷ Atiñana, le nte-Levý eneñe; avaratse, le efatse boak' andro; atimo, le efatse boak' andro; vaho amy anjombam-pañajàney, roe naho roe. ¹⁸ Amy trañom-pànamey, mañandrefa, efatse amy lalañey naho roe amy trañoy. ¹⁹ Ie ro firimboñam-pigaritse amo ana' i Koreo naho amo ana' i Merario.

²⁰ Le ty amo nte-Levio: i Akiià ty mpiaolo o fañajam-baran' anjomban' Añahareo naho o fañajàñe o raha masiñe. ²¹ O ana' i Ladaneo, o ana' i Gersone tamo Ladaneo, o talèn' anjomban-droae a i Ladane nte-Gersoneo: o nte-Iekielio. ²² O ana' Iekielio: i Zetame naho Ioele rahalahi'e, mpitam-pañajàm-bara añ' anjomba' IEHOVÀ ao. ²³ Amo nte Amrameo, amo nte Itsareo, amo nte-Kebroneo, amo nte Ozieleo: ²⁴ i Seboele, ana' i Gersone, ana' i Mosè, ty mpiaolo' o fanontonam-barao; ²⁵ o longo'eo amy Eliezere, i Rahabia, ana'e naho Iesaià, ana'e naho Iorame ana'e naho i Zikrý ana'e vaho i Selomote ana'e. ²⁶ I Selomote rekets' o rahalahi'eo ty mpamandroñe ze hene vara masiñe nengae' i Davide mpanjaka naho o talèn-droae naho o mpifelek' arivo naho zatoo naho o mpifehe i valobohòkeio. ²⁷ Amo raha kinopak' an-kotakotakeo ty nengae' iareo hañamboarañe i anjomba' IEHOVÀ; ²⁸ naho ze nengae' i Samoele, mpitoky naho i Saole, ana' i Kise naho i Abnere, ana' i Nere naho Ioabe, ana' i Tseroià vaho ia'ia ka ze nañenga, le tambanem-pità' i Selomote naho o rahalahi'eo.

²⁹ Amo nte Itsareo, i Kenanià naho o ana'eo ty nitoloñe alafe'e ao ho a Israele, ho mpiaolo naho mpizaka. ³⁰ Le amo nte-Kebroneo, i Kasabià naho o rahalahi'eo, ondaty mahimbañe, arivo-tsi-fitonjato nimpisary Israele alafe' Iordaney mañandrefa, amy ze hene fitoloña' IEHOVÀ naho ami'ty fitoroñañe i mpanjakay. ³¹ Amo nte-Kebroneo t'Ierià, tale' o nte-Kebroneo, ty amo tariran-droae'eo. Ie tan-taom-paha-efapolo' i Davide, le nitsoeheñe vaho nitendreke fanalolahy añivo'e ao e Iazere' i Gilade aña. ³² O rahalahi'eo, ondaty mahimbañe, ro'arivo-tsi-fitonjato, talèn-droae ty nanoe' i Davide, mpanjaka, mpisary o nte-Reobeneo naho o nte-Gadeo naho ty vakim-pifokoa' i Menasè, ty amy ze he'e nioza aman' Añahare naho amo raharraham-panjakao.

27

¹ Ty famoliliañe o ana' Israeleo, o talèn' anjomban-droae naho o mpifelek' arivo naho zatoo naho o roandriañe mpitoroñe i mpanjakaio aman-dra inoñ' inoñe amo firimboñañe mimoak' ao naho miavotse mb'eo am-bolañ' am-bolañe amo hene volan-taoñeo, ie songa ro'ale-tsi-efats' arivo ami'ty firimboñañe. ² Ambone' ty firimboñam-bolam-baloha'e t'Iasobeame ana' i Zabdiele, ³ tarira' i Peretse, ie nitalèm-pifehe' i valobohòkey amy volam-baloha'ey. ⁴ Ambone' i firimboñam-bolam-paharoey t'i Doday nte Akoký, i Miklote nitalè' i firimboñañey; ro'ale-tsi-efats' arivo ro amy firimboña'ey. ⁵ I Benaià ana' Iehoiada, mpisoroñe,

mpiaolo, nimpifehe' fahatelo' i valobohòkey ho am-bolam-pahatelo, ro'ale-tsi-efats' arivo ro amy firimboña'ey. ⁶ Ie i Benanià nifanalolahy amy telopoloy naho nifehe i telopoloy; talè i firimboña'ey t'i Amizabade ana'e. ⁷ Ty fah' efatse ho am-bolam-pahefatse le i Asaele, rahalahi' Ioabe naho i Zebadià ana'e ty nandimbe aze; ro' ale-tsi-efats' arivo ro amy firimboña'ey. ⁸ Ty fahalime ho am-bolam-pahalime i Samhote nte Iizrake; ni-ro' ale-tsi-efats' arivo amy firimboña'ey. ⁹ Ty fah' eneñe ho am-bolam-pah' eneñe i Irà ana' Ikese nte-Tekoy; ro'ale-tsi-efats' arivo ro amy firimboña'ey. ¹⁰ Ty faha-fito ho am-bolam-pahafito, i Keletse, nte-Pelone, tarira' i Efraime; ro'ale-tsi-efats' arivo ro amy firimboña'ey. ¹¹ Ty fahavalo ho am-bolam-pahavalo i Sibekay nte Kosate, tarira' i Zerake; ro'ale-tsi-efats' arivo ro amy firimboña'ey. ¹² Ty fahasive ho am-bolam-pahasive, i Abiezere, nte Anatote, tarira' i Beniamine; ro'ale-tsi-efats' arivo ro amy firimboña'ey. ¹³ Ty fahafolo ho am-bolam-pahafolo, i Makray, nte Netofate, tarira' i Zarkry, ro' ale-tsi-efats' arivo ro amy firimboña'ey. ¹⁴ Ty fahafolo-raik' amby ho am-bolam-pahafolo-raik' amby, i Benaià, nte Pirato, tarira' i Efraime; ro'ale-tsi-efats' arivo ro amy firimboña'ey. ¹⁵ Ty fahafolo-ro' amby ho am-bolam-pahafolo-ro' amby, i Keldày nte-Netofate, tarira' i Otniele, ro' ale-tsi-efats' arivo ro amy firimboña'ey.

¹⁶ Aa naho ty nifehe' o fifokoa' Israeleo: Amo nte-Reobeneo, i Eliezere ana' i Zikrý, nitalè; amo nte-Simoneo, i Sefatià, ana' i Maakà; ¹⁷ amy Levý, i Kasabià, ana' i Kemoele; amy Aharone, i Tsadoke; ¹⁸ amy Iehodà, i Elihò, rahalahi' i Davide; amy Isakare, i Omrý ana' i Mikaele; ¹⁹ amy Zebolone, Ismaià ana' i Obadià; amy Naftalý, Ierimote ana' i Azriele; ²⁰ amo ana' i Efraimeo, i Hoseà ana' i Azazià; amy vakim-pifokoa' i Menasèy, Ioele ana' i Pedaià; ²¹ amy vakim-pifokoa' i Menasè e Giladey, Idò ana' i Zekarià; amy Beniamine, Iaasiele, ana' i Abnere; ²² amy Dane, i Azarele, ana' Ierokame. Ie ro mpiaolo o fifokoa' Israeleo. ²³ Tsy niahe' i Davide ze ambane ty roapolo taoñe, ami'ty nafé' IEHOVÀ te hampitomboe'e manahake o vasian-dikerañeo t'Israele. ²⁴ Toe niorotse nañiake t'Ioabe ana' i Tseroià fe tsy nahatafetetse naho nifetsak' am' Israele ty haviñerañe vaho tsy nazilik' amo talili' i Davide, mpanjakao, i iakey. ²⁵ Nifehe o fanontonam-bara' i mpanjakaio t'i Azmavete ana' i Adiele; le nifehe o trañom-bara an-kivok' ey naho amo rovao naho amo tanàñeo vaho amo fitalakesañ' aboo t'Iehonatane, ana' i Otsià. ²⁶ Le nifehe o nitoloñe an-tetek' ao o mpiavataneo, t'i Etsrý ana' i Kelobe; ²⁷ le nifehe o tanem-baheo t'i Simeý nte Ramà; le nifehe ty voka' o tanembaheo ho amo lakaton-divaio t'i Zabdý nte-Sifmý; ²⁸ nifehe o zaite* naho sakoañe amo vavataneoo t'i Baale-kanane nte-Gedere; naho nifehe o lakato-menakeo t'Ioase. ²⁹ Le nifehe o mpiraitroke nandrazeñe e Saroneo t'i Siträy nte-Sarone; naho nifehe o mpiraitroke am-bavataneo t'i Safate, ana' i Adlaý; ³⁰ nifehe o ramevao ka t'i Obile nte-Ismaele; naho nifehe o birikeo t'Iekdeià nte-Meronote; ³¹ le nifehe o lia-raikeo t'Iazize, nte-Hagrý. Ie ro mpifehe ty vara' i Davide mpanjaka. ³² Nimpanoro-kevetse naho ondaty mahihitse vaho mpanokitse t'Ionatane rahalahin-drae' i Davide; mpañabey o anam-panjakao t'Iekiele ana' i Kakmoný. ³³ Nimpanolo-heve' i mpanjakay t'i Akitofele naho mpiamy mpanjakay t'i Kosay nte-Ereke; ³⁴ nandimbe i Akitofele t'Iehoiadà ana' i Benaià naho i Abiatare; vaho nimpifehe o lahindefo' i mpanjakaio t'Ioabe.

* **27:28** Zaite: hatae mañome menake; Olive

28

¹ Le natonto' i Davide e Ierosalaime ao o mpiaolo' Israele iabio, o talèm-pifokoañeo naho o mpiaolom-pirimboñañe nifandimbe am-pitoroñañe i mpanjakaio naho o mpifelek' arivoo naho o mpifehe zatoo naho o mpamandroña ze hene vara naho hare' i mpanjakaio naho o ana'eo, rekets' o roandriañeo naho o fanalolahio vaho o fonga lahitsiàio. ² Le nióngak' am-pandia'e amy zao t'i Davide mpanjaka, nanao ty hoe: Mijanjiña ry longo naho ondatikoo; Tan-troko ao ty handranjy anjomba fitofàña ho a i vatam-pañina' IEHOVÀ ho atimpahé' i Andrianañaharentikañey vaho nihentseñeko i fandranjiañey. ³ Fa hoe ka t'i Andrianañahare amako, Tsy ihe ty hamboatse anjomba ho ami'ty añarako, amy t'ie ondatin' aly nampiori-dio. ⁴ Fe jinobo' IEHOVÀ Andrianañahare' Israele raho aolo' ty anjomban-draeko iaby ho mpanjaka' Israele nainai'e amy te jinobo'e ho mpifehe t'Iehodà; le amy anjomba' Iehoda, anjomban-draekoy, naho amo anan-draekoo, zaho ty nitea'e hanoeñe mpanjaka' Israele; ⁵ le amo hene ana-dahikoo (kanao maro ty ana-dahy natolo' IEHOVÀ), i Selomò anakoy ty jinobo'e hiambesatse amy fiambesam-pifehea' IEHOVÀ hifehe Israele. ⁶ Le hoe re tamako: i Selomò ana'oy ty handranjy i akibakoy naho o kiririsakoo, amy te ie ty jinoboko ho anako vaho izaho ho rae'e. ⁷ Mbore horizako ho nainai'e donia i fifehea'ey naho ifahara'e orike o fepèkoo naho o lilikoo manahake henaneo. ⁸ Ie amy zao, ampahaisaha' Israele iaby, ty valobohò' IEHOVÀ naho am-pijanjiñan' Añaharen-tika, vontitiro vaho hotsohotsò iaby o lili' IEHOVÀ Andrianañahare' areoo, soa te ho fanaña' areo ty tane fanjàka toy, hampandova' areo o ana' areo handimbe nainai'eo. ⁹ Le ihe Selomò anako mahafohina an' Andrianañaharen-drae'o naho toroño an-kaampon' arofo naho an-kazavan-stroke, amy te tsikarahe' IEHOVÀ ze kila arofo vaho arofoana'e iaby ze ereñerem-betsevetse. Ie paia'o, le ho tendrek' azo; f'ie farie'o le ho sasà'e zafezanake. ¹⁰ Mitomira henane zao, fa jinobo' IEHOVÀ rehe hamboatse ty anjomba ho a i toetse masiñey; aa le mifatrara vaho mifanehafa.

¹¹ Le natolo' i Davide amy Selomò ty sare' o lavaranga'eo naho o traño'eo naho o fañajam-bará'eo naho o efetse amboneo naho o efetse añate'eo vaho ty traño' i toem-pijebañañey. ¹² Le ty sare' ze he'e nahaja'e añ'arofo ao, o kiririsan' anjomba' IEHOVÀ naho o traño mañohok' aze iabio, o fañajam-bará' i anjomban' Añahareio naho o fañajàñ-engao; ¹³ naho o firimboñam-pisoroñañe naho nte-Levio naho o fifanehafañe am-pitoroñañe añ'anjomba' IEHOVÀ naho o fàna-pitoroñañe añ'anjomba' IEHOVÀ; ¹⁴ le i volamenay, ty lanjam-bolamena amo fàname ho amy ze hene karaza-pitoroñañe; le i volafotiy, ho amo fonga fanake volafoty ty amy lanja'eo, le ho amo fanake iaby amy ze hene karazam-pitoroñañe; ¹⁵ le ty amy lanja' o mpitan-jiro volameno naho o jiro'e volameno, ty amy lanja' ze hene fitàñ-jiro rekets' o jiro'eo; naho o fitàñ-jiro volafotio, ty lanja' o fonga fitàñ-jiro rekets' o jiro'eo, ty amy asa' ze hene fitàñ-jiro; ¹⁶ naho ty lanjam-bolamena amy rairai-mofo-piatrekey naho amy ze latabatse iaby; naho ty volafoty amo latabatse volafotio; ¹⁷ naho volamena ki'e amo fikavitseo naho o koveteo naho o sajoao naho o fitovy volamena songa fitovy ami'ty lanja'e; naho o fitovy volafotio, sindre fitovy ami' ty lanja'e; ¹⁸ naho amy kitrelim-pañembohañey, volamena natranak' an-danja; naho volamena amo saren-tsareteo naho amo kerobe mpamelatse o ela'eo mpañohoñañe i vatam-pañina' IEHOVÀ. ¹⁹ Le hene nampahafohina' IEHOVÀ ahiko an-tsokitse am-pitá'e amako, ze pilipito'e amo sareo. ²⁰ Le hoe t'i Davide amy Selomò ana'ey: Mihaozara naho

mahasibeha vaho mitoloña; ko hembañe naho ko miotsòtse, fa ama'o t'IEHOVÀ Andrianañahare, Andrianañahareko; Ie tsy hilesa ama'o, tsy haforintse'e, ampara' te fonga fonitse ty fitoloñañe amy fitoroñañe i anjomba' IEHOVÀiy. ²¹ Ingo ka o firimboñam-pisoroñe naho nte-Levio ho amo hene fitoroñañe aň' anjomban' Añahareo; le hindre ama'o amy ze fitoloñañe iaby, songa ondaty mazoto-troke naho mahimbañe amy ze hene fitoroñañe; vaho ho ambanem-pandilia'o o mpifeheo naho ze kila ondaty.

29

¹ Le hoe t'i Davide mpanjaka amy valobohòkey: Mbe tora'e naho maleme t'i Selomò anako, i tokan-dahy jinobon' Añaharey, vaho ra'elahy i asay; amy te tsy ho a' ondaty i anjombay, fa ho a' IEHOVÀ Andrianañahare. ² Ie amy zao fa nihajarieko an-kaozarako iaby o ho amy anjomban' Añahareio, ty volamena ho amo raha volamena naho ty volafoty ho amo raha volafotio naho torisike ho amo raha torisikeo, ty viñe ho amo raha viñeo vaho ty hatae ho amo raha hataeo; ty vato *sohame naho vato hampireketeñe, ty vato mipelatse, sindre volo'e naho vato soa maro karaza'e vaho marbre tsifotofoto. ³ Tovo zay, kanao amy anjomban' Añaharekoy ty fikokoako, le ty varako volamena naho volafoty, hene hatoloko amy anjomban' Añaharekoy, ambone' ze he'e hinajariko ho a i anjomba masiñey, ⁴ volamena telo arivo talenta, volamena boak'e Ofire naho volafoty natranake, fito arivo talenta, hampipakorañe o rindri' o anjombaoo; ⁵ volamena ho amo raha volamena naho volafoty ho amo raha volafotio naho ho amy ze satam-pitoloñañe ho ranjiem-pità' o mpitseneo. Ia arè ty hanolo-batañe an-joton-troke hamìke ho am' IEHOVÀ te anito? ⁶ Aa le nanolotse an-tsatin' arofo o talèn' anjomban-droae'eo naho o mpiaolom-pifokoa' Israeleo naho o mpifelek' arivo naho zatoo vaho o mpisarin-tolon-draha' i mpanjakaio; ⁷ natolo' iereo amy fitoroñañe i anjomban' Añahareiy ty volamena talenta lime arivo naho bogady rai-ale naho volafoty talenta rai-ale naho torisike talenta rai-ale-tsi-valo-arivo vaho viñe talenta rai-hetse. ⁸ Le ze nanjoàñe vatosoa ro nanolotse amy fañajàm-baran' anjomba' IEHOVÀy, ambanem-pità' Iekiale nte-Gersone. ⁹ Nirebeke ondatio amy te nanolotse an-tsatin' arofo; le an-kaliforan-troke ty nanolora' iareo am' IEHOVÀ; vaho nandia taroba an-drebeke ka t'i Davide mpanjaka.

¹⁰ Aa le nañandriañe IEHOVÀ t'i Davide añatrefa' i valobohòkey, le hoe t'i Davide: Andriañen-dRehe ry IEHOVÀ Andrianañahare' Israele Rae'ay, nainai'e donia. ¹¹ Azo ry IEHOVÀ, ty hajabahinake naho ty haozarañe naho ty engeñe naho ty fandrebahañe naho ty volonahetse; Eka, Azo iaby o andikerañe naho o an-tane atoio; Azo ty fifeheañe ry IEHOVÀ, Ihe ro onjoneñe ambone' ze he'e. ¹² Songa boak' ama'o ty vara naho ty asiñe naho kila fehe'o; am-pità'o ty haozarañe naho ty hafatrarañe; naho am-pità'o ty fañonjonañe vaho ty fanoloran-kaozarañe am' iabikey. ¹³ Aa le mañandriañe Azo zahay henanekeo ry Andrianañahare, mibango ty tahina'o lifots' engeñe. ¹⁴ Ia v'o rahoo, ia ondatikoo, t'ie nahafanolotse an-joton-troke manahak' itoñañe? Toe kila boak' ama'o vaho o hirik' am-pita'oo ro anolora'ay ama'o. ¹⁵ Mpañialo añatrefa'o zahay, renetane manahak' an-droae'ay iaby; hoe talinjo o andro'ay an-tane atoio vaho tsy aman-ko tamañe. ¹⁶ Ry IEHOVÀ, Andrianañahare'ay, boak' am-pità'o ze hene vara nihentseñe'ay hañamboara'ay anjomba i tahina'o masiñey,

* ^{29:2} Sohame: vato antsetra antetse

fa Azo ze he'e. ¹⁷ Apotako ka ry Andrianañahareko, te Ihe ro mpitsok' arofo naho mahafale Azo ty havantañañe. Aa naho zaho, an-kazavantroko ty nisatriako tolotse i iaby zay; ie henaneo, le treako an-kafaleañe te songa nanolotse ama'o an-joton' arofo ondati'o miatrekeo. ¹⁸ Ry IEHOVÀ, Andrianañahare' i Avrahame naho Ietsake naho Israele roae'ay, ehe ampifaharo nainai'e añ' ereñeren' arofo ondati'oo irezay, le ampitoliho mb'ama'o o arofo' iareoo. ¹⁹ Le atoloro amy Selomò anako, ty troke ki'e haha-ambeñe o lili'oo, o taro'oo, o fañè'oo, hanoe'e vaho hamboare'e i Anjomba hinajarikoy.

²⁰ Le hoe t'i Davide amy valobohòke iabiy, Andriaño henaneo t'IEHOVÀ Andrianañahare' areo. Le songa nañandriaña IEHOVÀ Andrianañaharen-droae' iareo i valobohòkey, nampiondreke o añ' ambone' iareoo vaho niambane am' IEHOVÀ naho amy mpanjakay. ²¹ Ie amy loak' androy, nañenga am' IEHOVÀ naho nisoroñe añombe arivo am' IEHOVÀ naho añondrilahy arivo naho anak' añondry arivo, rekets' o enga-rano' iareoo naho soroñe tsifotofoto ho am' Israele iaby; ²² vaho nikama naho ninoñe am-pirebehañe añatrefa' IEHOVÀ amy àndroy. Le nanoe' iareo mpanjaka fañindroe'e t'i Selomò ana' i Davide vaho noriza' iareo am' IEHOVÀ ho mpifehe vaho i Tsadoke ho mpisoroñe.

²³ Aa le niambesatse am-piambesa' IEHOVÀ eo ty Selomò ho mpanjaka handimbe an-drae'e Davide, le niraorao; vaho hene nañaoñ' aze t'Israele.

²⁴ Songa niambane amy Selomò mpanjaka o mpiaoloo naho o fanalolahio naho o ana' i Davideo. ²⁵ Le nampionjone' IEHOVÀ andigiligy, am-pahaoniña' Israele iaby t'i Selomò vaho natolo'e ama'e ty volonahem-panjaka mb'e lia'e tsy nanoeñe am-panjaka iaia e Israele ao taolo'e.

²⁶ Nifehe Israele iaby henane zay t'i Davide ana' Iesay. ²⁷ O andro nifehea'e Israeleo, leefa-polo taoñe; fito taoñe ty nifeleha'e e Kebrone ao vaho taoñe telopolo-telo' amby ty nifehea'e e Ierosalaime ao. ²⁸ Le nihomake an-kasoan-kahanteran-dre, atsak' andro naho vara naho engeñe vaho nandimbe aze nifehe t'i Selomò ana'e. ²⁹ Le o fitoloña' i Davide mpanjakao, ty valoha'e pak' am-para'e, oniño te sinokitse amo enta' i Samoele mpitokio naho amo enta' i Natane mpitokio vaho amo enta' i Gade mpitokio; ³⁰ ty fifehea'e iabiy naho i haozara'ey, o raha nifetsak' ama'e naho am' Israele vaho amy ze hene fifeheañe an-taneo.

Fiantoñoñe II

¹ Nampaozareñe am-pifehea'e ao t'i Selomò ana' i Davide naho nañimb' aze vaho nampitoabotse ty enge'e t'IEHOVÀ Andrianañahare'e. ² Le nisaontsy am' Israele iaby t'i Selomò, amo mpifelek' arivo naho zatoo naho amo mpizakao vaho amo mpiaolo' Israeleo, o talèn-droae'eo. ³ Aa le nimb' amy toets' abo' i Giboney mb'eo t'i Selomò rekets' i valobohòkey amy te aña ty toe' i kibohom-pamantañan' Añahare niranjie' i Mosè mpitoro' IEHOVÀ an-dratraratray. ⁴ Fe nampionjone' i Davide boake Kiriate-jearime i vatan' Añaharey mb'amy toetse hinajari' i Davide ho azey, ie fa nampitroare'e kivoho e Ierosalaime ao.) ⁵ Amy te añatrefa' i kivoho' IEHOVÀ i kitrely torisike niranjie' i Bazalile ana' i Orý, ana' i Horey; le zay ty pinai' i Selomò naho i valobohòkey. ⁶ Aa le nionjom-b'amy kitrely torisikey t'i Selomò, añatrefa' IEHOVÀ, mb'amy kibohom-pamantañañey mb'eo vaho nañenga soroñe arivo ama'e. ⁷ Niheo amy Selomò amy haleñey t'i Andrianañahare, nanao ty hoe: Ihalilio le hatoloko azo. ⁸ Le hoe t'i Selomò aman' Añahare: Fa tinoro'o fañisohañe ra'elahy t'i Davide raeko vaho nanoe'o mpanjaka raho handimbe aze. ⁹ Ie amy zao ry IEHOVÀ Andrianañahare, ehe ajadoño i nitsarae'o amy Davide raekoy; fa nanoe'o mpanjaka hifehe ondaty mira ami'ty hamaro' ty deboke an-tane atoio raho. ¹⁰ Ehe toloro hihitse naho hilala henaneo, hiakarako naho himoahako añatrefa' ondaty retoñañe; amy te ia ty hahafizaka ondati'o mitozantozañe? ¹¹ Le hoe t'i Andrianañahare amy Selomò: Aa kanao zay ty añ' arofo'o ao ie tsy nihalalia'o vara, ndra hareañe, ndra asiñe, ndra ty fiaim-palaiñ' azo vaho tsy nihalalia'o andro maro, te mone hihitse naho hilala ty nihalalia'o, hahafizakà'o ondatiko nanoeko azo mpanjakao; ¹² le hatoloko azo ty hihitse naho hilala, mbore hitolorako vara naho hareañe naho asiñe, manahake ze mbe tsy amo mpanjaka taolo'oo vaho tsy hañirinkiriña' o hanonjohio.

¹³ Aa le nimpoly boak' an-toets' abo e Gibone eo t'i Selomò, hirik' aolo' i kibohom-pamantañañey, pake Ierosalaime vaho nifehe Israele. ¹⁴ Nanontoñe sarete naho mpiningi-tsoavala t'i Selomò; le nanan-tsarete arivo-tsi-efajato naho mpiningi-tsoavala rai-ale-tsi-ro' arivo, ze natobe'e amo rovan-tsareteo naho amy mpanjakay e Ierosalaime ao. ¹⁵ Nampirae' i mpanjakay amo vato ty volamena naho ty volafoty e Ierosalaime ao, le nampirae' amo sakoañe am-bavataneo o mendoraveñeo ami'ty hamaro'e. ¹⁶ Le nendese' i Selomò boake Mitsraime naho boake Keve aña o soavalao; o mpanao bali' i mpanjakaio ty nivily iereo amo nte-Keveo ami'ty vili'e. ¹⁷ Tinoha' iereo e Mitsraime aña an-tsekele volafoty enenjato ty sarete naho zato-tsi-limampolo ty soavala; le amy vily zay ka ty nañondroñañe irezay mb'amo mpanjaka' o nte-Keteoo naho o mpanjaka' i Arameo.

¹⁸ Sinafiri' i Selomò am'izao te ho ranjia'e anjomba ty tahina' IEHOVÀ vaho ty akibam-pifeheañe ho am-bata'e.

2

¹ Niahe' i Selomò t'indaty fito-ale hijiny kilankañe naho valo-ale ty hihaly am-bohitse aña vaho telo-arivo-tsi-enenjato ty hisary iareo. ² Nañitrik' amy Korame mpanjaka' i Tsore t'i Selomò nanao ty hoe: Manahake ty nifañaoña'o amy Davide raeko, amy nañitrifa'o mendoraveñeo

handranjia'e anjomba himoneña'ey, ehe, ano ho ahy ka; ³ oniño te hamboarako anjomba ty tahina' IEHOVÀ Andrianañahareko, havaheñe ho aze, hañembohako rame mandrifondrifoñe añatrefa'e naho handaharañe o mofo-piatrekeo nainai'e naho hisoroñañe boa-maraiñe naho hariva, amo SABATAO naho amo pea-bolañeо naho amo andro namantaña' IEHOVÀ Andrianañaharentika ho fañè nainai'e am' Israeleo. ⁴ Le ho jabajaba ty anjomba ho ranjieko ho Aze amy te jabahinake te amo fonga ndrahareo t'i Andrianañaharentika. ⁵ Fa ia ty hahafamboatse anjomba ho ama'e kanao tsy tsahatse aze o likerañeо naho ty tane toy? Aa le ia v'o aho te handranjy anjomba ho aze naho tsy t'ie hisoroñañ añ' atrefa'eo? ⁶ Ie amy zao, ehe ampisangitrifo ondaty mahimban-tsata hitoloña volamena naho volafoty naho torisike naho viñe, naho malo-mavo naho mena mañabarà naho manga vaho mahimbañe mahafanokitse amy ze karazantsokitse iaby, hindreza'e am'ondaty mahimbañe nampihentseñen-draeko Davideo e Iehodà atoy naho e Ierosalaime atoa. ⁷ Añitrifo mendoraveñe ka naho haradranto naho hazombatango, boake Lebanonone aña; fa apotako te mavitrike mahafira ty hatae' i Lebanonone o mpitoroo: vaho ingo o mpitorokoo hindre amo mpitoroo, ⁸ hampihentseñañe hatae maro; amy te ho jabajaba naho fanjäka i anjomba hamboarekoy. ⁹ Aa le ingo hatoloko amo mpitoroo mpamira hataeo, ty vare-bolè lisañe ro'alen-kore naho vare-hordea ro'alen-kore naho zonjòn-divay ro'alem-bate naho dabakera menake ro'alem-bate.

¹⁰ Aa le nanoiñe an-tsokitse t'i Korame mpanjaka' i Tsore vaho nahitri'e amy Selomò: Kanao kokoa' IEHOVÀ ondati'eo le Ihe ty nanoe'e mpanjaka'e.

¹¹ Tinovo' i Korame ty hoe: Andriañeñe t'IEHOVÀ Andrianañahare' Israele, Andrianamboatse o likerañeо naho ty tane toy, ie nanolotse amy Davide mpanjaka ty anake mahihitse, nitoloran-kilala naho faharendrehañe, handranjia'e anjomba IEHOVÀ naho anjomba i fifehea'ey. ¹² Ingo te hañitrifako ondaty mahilala, mahimban-tsata, toe i Korame mpialompitsenekoy, ¹³ anan-drakemba amo anak' ampela' i Daneo, ty rae'e nte-Tsore, mahimban-tsata am-bolamena naho volafoty, torisike, viñe, vato naho hatae vaho ami'ty malòmavo naho manga naho leny marerarera naho ami'ty mena mañabasà; naho ty hanokitse amy ze hene karazantsokitse, handranjy ze haraotse iaby; hanoe'e ze apeoke aolo'e eo, mindre am' ondaty mahimba'oo vaho amo mpiamy talèko Davide rae'gio. ¹⁴ Le i vare-bolè naho vare-hordea naho menake naho divay nisaontsien-talèkoy, le ampañitrifo amo mpitoroo, ¹⁵ vaho hamira hatae boak'e Lebanonone atoy zahay, ty hamaro paia'o; le hendese'ay hihafu mb'andriake mb'e Iopà aña, le Ihe ty hinday aze mb'e Ierosalaime mb'eo. ¹⁶ Vinolili' i Selomò ze hene renetane an-tane Israeleo, ty amy famoliliañe nanoe' i Davide iareoy, le nahatendreke rai-hetse-tsi-lime-ale-tsi-telo-arivo-tsienjato. ¹⁷ Le tinendre'e ho mpijiny ty valo-ale naho mpihali-vato ambohitse ey ty fito-ale vaho mpisary hanoro asa am'irezay ty telo-arivo-tsienjato.

3

¹ Aa le namototse nandranjy i anjomba' IEHOVÀ e Ierosalaime ao t'i Selomò, an-kaboa' i Morià, amy niboaha' IEHOVÀ amy Davide rae'ey; amy nihentseña' i Davidey, an-tanem-pamofoha' i Ornane nte-Iebosý eo. ² Ie namototse namboatse amy andro faharoe' ty volam-paharoe' i taom-paha-efam-pifehea'ey. ³ Zao o mananta napeta' i Selomò amy namboareñe i anjomban' Añahareio: ty andava'e, amy fanjeheañe

haehaey, le kiho enempolo vaho kiho roapolو ty am-pohe'e. ⁴ I lavaranga aolo' i anjombaiy, ty andava'e, mira amy ampohe' i anjombaiy, kiho roapolو, le zato-tsi-roapolو ty haabo'e; vaho nipakora'e volamena ki'e. ⁵ Sinaro'e mendoraveñe ty anjomba bey, le nipakora'e volamena soa vaho niravaha'e satrañe naho silisily. ⁶ Mbore nihamine'e vatosoa i anjombay, le volamena boake Parvaime i volamenay. ⁷ Nipakora'e volamena ka i anjombay, o boda'eo, o fimoaha'eo naho o rindri'eo naho o lala'eo; vaho nisokira'e kerobe o rindriñeо. ⁸ Le nandranjy i toetse loho masiñey, ty andava'e mira ami'ty ampohe' i anjombaiy, kiho roapolو; naho kiho roapolو ty ampohe'e; vaho nipakora'e volamena soa, ami'ty talenta enen-jato. ⁹ Sekele volamena limampolo ka ty lanja' o fantsikeo; vaho nipakora'e volamena o efetse amboneo.

¹⁰ Nandranjia'e kerobe roe am-panokiram-bonga'e i toetse masiñey; le nipakora' iareo volamena. ¹¹ Kiho roapolو ty fivelara' i elan-kerobe rey; ty halava' ty elan-kerobe: kiho lime, nitakatse ty rindri' i trañoy; kiho lime ka i elatse raikey, nitakatse ty ela' i kerobe ila'ey. ¹² Ty ela' i kerobe raikey ka, le kiho lime, nitakatse ty rindri' i trañoy vaho kiho lime ka ty ela'e ila'e nitakatse ty ela' i kerobe raikey. ¹³ Nivelatse kiho roapolو i elan-kerobe rey; songa nijohañe am-pandia, sindre nitolike mb' añate'e ty lahar'a'e. ¹⁴ Nanoe'e ami'ty manga naho malòmavo naho mena mañabarà naho leny marerarera i lamba tsingarakarakey vaho nanoa'e sary kerobe. ¹⁵ Le niranjie'e aolo' i anjombay ty fahañe roe, kiho telopololim' amby ty haabo'e, songa kiho lime ty kapeke ambone'e. ¹⁶ Nandranjia'e silisily i toetse masiñey le nasampe'e ambone' i fahañe rey; le nitsene'e voandagoa napetak' amy silisily rey. ¹⁷ Natroa'e aolo' i anjombay i fahañe rey, ty raik' am-pitàn-kavana naho ty raik' ankavia; le nitokave'e ty hoe Iakine i ankavanay vaho Boaze ty añara' i haviay.

4

¹ Mbore namboara'e kitrely torisike, kiho roapolو ty andava'e naho kiho roapolو ty ampohe'e vaho kiho folo ty haabo'e. ² Namboara'e riake trinanake kiho folo an-tsoñi'e pak' an-tsoñi'e, bontoly zay, kiho lime ty haabo'e vaho taly telopolol kiho ty naха-arikatok' aze. ³ Ambane'e eo ty sare añombe nañariary aze; folo ami'ty kiho raike; nañarikatoke i riakey; trinanak' ama'e ty añombe nifanoitoy, roe mifamalahaañe ty nampitranahañe aze, ⁴ le nasampe ambone' ty añombe folo ro'amby zay, telo ty nitolike mañavaratse, telo ty nitolike mañandrefa naho telo ty nitolike mañatimo vaho telo ty nitolike maniñana; ambone' iareo i riakey; sindre nitolike ao ty voli' iareo. ⁵ Ampohem-pitâne ty hateve'e, le nanoeñe satan-tsoñim-pitovy ty soñi'e nanahake voñem-bindia vaho bate telo-arivo ty naха-pea aze. ⁶ Le namboara'e sajoam-panasâñe folo, napo'e am-pitàn-kavana eo ty lime naho ankavia eo ty lime ho fanasañe; nilioveñe am' iereo o haraom-pisoroñañeо, fe fisasàm-pisoroñe i riakey. ⁷ Le namboara'e fitàn-jiro volamena folo amy sata natoroy, le napo'e amy kivohoy, lime ty an-kavana vaho lime ty ankavia. ⁸ Le nandranjia'e latabatse folo vaho napo'e amy kivohoy, lime ty an-kavana naho lime ty ankavia. Le nitsenea'e kovete volamena zato, ⁹ Le namboare'e ty kiririsam-pisoroñe naho ty kiririsa-bey naho ty lalambei' i kiririsay vaho nipakora'e torisike o lalambei'eo. ¹⁰ Le najado'e an-kavana' i trañoy, mañatimo i riakey.

¹¹ Tsinene' i Korame ka o valâñeо naho o sadròo naho o koveteo. Aa le nifonira' i Korame o fitoloñañe nanoe'e ho a i Selomò mpanjaka

añ' anjomban' Añahareo: ¹² i fahañe roe rey, i lima rey naho i loha roe ambone' i fahañe rey naho ty tsingarakarake roe nanaroñe ty lima roe' i loha'e rey; ¹³ naho ty voan-dagoa efa-jato amy tsingarakarake roe rey; songa tsingarakarake amam-boan-dagoa midadañe roe, hanaroñe ty lima roe' o loha'e ambone' i fahañe reio. ¹⁴ Namboare'e ka o kalesio naho nanoe'e ambone' o kalesio o kovete fanasañeо; ¹⁵ i riakey naho ty añombe folo-ro'amby ambane'e eo. ¹⁶ Le namboare' i Korame mpitsene mahimbañe ho a i Selomò mpanjaka, ho añ'anjomba' IEHOVÀ, an-torisike miloeloe ka o valañeo naho o sadroo naho o fikavitseo vaho o fanake iabio. ¹⁷ Amonto' Iordaney aña ty nampitranaha' i mpanjakay irezay, an-tane lietse añivo' i Sokote naho i Tseredatà eo. ¹⁸ Aa le namboatse fanake maro t'i Selomò; amy te tsy nihay iaheñe ty lanja' o torisikeo. ¹⁹ Le namboare' i Selomò ze hene fanake añ' anjomban'Añahare ao naho i kitrely volamenay naho i rairay fampipohañe o mofo fiatrehkeoy; ²⁰ naho o fitàn-jiroo rekets' o jiro'eo am-bolamena ki'e, hirehetse aolo' i toetse masiñey, ty amy fañèy; ²¹ naho o voñeo naho o failoo naho o fikavitseo, am-bolamena, toe volamena ki'e; ²² naho o mpampikipeo naho o koveteo naho o endraendrao vaho o sadron' afoo, am-bolamena ki'e. Le hene am-bolamena ty fimoahañe añ'anjomba ao, o lalambei' i toetse miavake do'e añate'eo naho o lalambei' i anjombaio (toe i kivohoy).

5

¹ Aa le nifonitse iaby ty fitoloñañe nanoe' i Selomò amy anjomba' IEHOVÀ. Le nente' i Selomò o raha nengae' i Davide rae'eo; naho o volafotio naho o volamena naho o fanakeo vaho napo'e amo fañajambara' i anjomban' Añahareio. ² Hene natonto' i Selomò e Ierosalaime ao amy zao o roandria' Israeleo naho o raem-pifokoañeо, o talèn' anjombandroae' o ana' Israeleoo, hampionjone' iereo boak' an-drova' i Davide, i atao Tsioney, i vatam-pañina' IEHOVÀ. ³ Le nifanontoña amy mpanjakay amy sabadidak' i volam-pahafitoiy ze lahilahi' Israele iaby. ⁴ Nimb'eo iaby o mpiaolo' Israeleo vaho nendese' o nte-Levio i vatay. ⁵ Le nampionjoneñe i vatay naho i kibohom-pamantañañey naho ze hene fanake masiñe amy kibohotsey; ie nendese' o mpisoroñeо naho o nte-Levio mb'eo. ⁶ Tañ' atrefa' i vatay t'i Selomò mpanjaka te nifanontoña' i valobohò' Israele, nisoroñe añondry naho añombe tsy hay niaheñe ami' ty hatsifotofoto'e. ⁷ Aa le nampizilihe' o mpisoroñeо an-toe'e eo i vatam-pañina' IEHOVÀ, amy toetse masi' i anjombaiy, amy toetse loho masiñey, ambane' ty ela' i kerobe rey. ⁸ Amy te navela' i kerobe rey ambone' ty toe' i vatay o ela'eo vaho sinaro' i kerobe rey i vatay naho o bao'eo. ⁹ Akore ty halava' i baoñe rey kanao niisake nitakatse i toetse masiñey boak' amy vatay; f'ie tsy niisak' alafe'e, le mbe ao pak' androany. ¹⁰ Tsy ino ty amy vatay naho tsy i takelam-bato roe napo' i Mosè ao e Korebe aña rey, amy nifañina' IEHOVÀ amo ana' Israeleo, ie vaho niavotse boake Mitsraime aña.

¹¹ Ie niakatse boak' amy toetse masiñey o mpisoroñeо—naho fa nañefe-batañe iaby o mpisoroñeо vaho tsy nitam-pirimboñañe; ¹² le nijohañe atiñana' i kitreliy ze hene nte-Levy mpisabo: i Asafe, i Hemane, Iedotone naho o ana'eo vaho o rahalahi'eo nisaroñe leny foy, am-pikantsañañe naho jejo-bory naho marovany, nitraok' ami'ty mpisoroñe zato-tsi-roapolo nampipopò trompetra. ¹³ Aa ie niharо ho raike o mpitioke trompetrao naho o mpisaboo, ie nirihoñe am-pipoña-peo raike nandrengе naho nañandriañe IEHOVÀ naho nañonjom-peo an-trompetra naho fikantsañañe vaho fititihañe nijejo IEHOVÀ ami'ty hoe:

Ie ty soa, nainai'e ty fiferenaiña'e;

le nilifore' ty rahoñe i kivohoy, i anjomba' IEHOVÀ¹⁴ vaho tsy nahafijohañe hitoroñe ao o mpisoroñe ty amy rahoñey, fa nañàmpo i kivohon' Añaharey ty enge' IEHOVÀ.

6

¹ Le hoe t'i Selomò: Fa nafè' IEHOVÀ t'ie ho nimoneñe añ' ieñe mingeo ao.
² Fe nandranjeko anjombam-pimoneñan-dRehe, toetse hitobea'o nainai'e.
³ Nampitoli-daharañe amy zao i mpanjakay naho nitata i valobohò' Israele iabiy, ie fonga nijohañe eo i favoribei' Israele. ⁴ Le hoe re: Andriañeñe t'IEHOVÀ, Andrianañahare' Israele nitsara am-palie amy Davide raeko vaho nihenefem-pitá'e, ami'ty hoe: ⁵ Sikal' amy andro nampiavotako an-tane Mitsraime aña ondatikooy, tsy eo ty rova jinoboko amo fifokoa' Israeleo hañamboarako anjomba, te ho ao ty añarako; vaho tsy ia t'indaty jinoboko ho mpifehe' ondatiko Israeleo ⁶ naho tsy e Ierosalaime ao ty jinoboko hanoako ty añarako naho tsy i Davide ty jinoboko hifelek' ondatiko Israeleo. ⁷ Ie amy zao tañ' arofo' i Davide raeko t'ie hamboatse anjomba ho amy tahina' IEHOVÀ Andrianañahare' Israele. ⁸ Fe hoe t'IEHOVÀ aman-Davide raeko: Ndra te aña' arofo'o ty handranjy anjomba ho ami'ty añarako toe nanoe'o soa t'ie tami'ty tañ' arofo'o; ⁹ tsy ihe ty hamboatse i anjombay, fa hamboare' i ana'o hiboak' am-bania'oy, ty akiba ho ami'ty añarako. ¹⁰ Aa le najado' IEHOVÀ i tsara' tsinara'ey; izaho ty nitroatse amy toe' i Davide raekoy, le fa mitobok' am-piambesa' Israele, ty amy tsara' IEHOVÀ vaho fa nandranjiako anjomba ho ami'ty tahina' IEHOVÀ Andrianañahare' Israele. ¹¹ Le fa napoko ao i vata amam-pañina nifanoa' IEHOVÀ amo ana' Israeleoy.

¹² Aa le nijohañe aolo' i kitreli' IEHOVÀ añañatrefa' i valobohò' Israele iabiy re namelatse o fità'eo— ¹³ Toe fa nandranjy rairay torisike t'i Selomò, kiho lime ty andava'e, kiho lime ty ampohe'e naho kiho telo ty haabo'e vaho napo'e añaivo' i kiririsay; eo ty nijohaña'e naho nitongalefa'e aña' ongotse añañatrefa' i valobohò' Israele namela-pitáñe mb' andikerañe ey, ¹⁴ vaho nanao ty hoe, Ry IEHOVÀ Andrianañahare' Israeleo, tsy aman' Añahare manahak' azo ty andindiñe ao ndra an-tane atoy, ty mahatampañina vaho manolotse fiferenaiñañe amo mpitoro'o mañavelo añañatrefa'o an-kaliforan'arofoo; ¹⁵ ie fa nifahara'o aman-draeko Davide mpitoro'o i nampitama'o azey, Eka toe tsinara'o am-palie vaho nihenefa'o am-pitáñe, le ie henanekeo. ¹⁶ Ie amy zao ry IEHOVÀ, Andrianañahare' Israele, tambozoro i nitsarae'o amy mpitoro'o Davide raekoy, ty hoe: Tsy ho po-ondaty am-pahaisahako eo ty hiambesatse amy fiambesa' Israeleoy naho songa hañambeñe ty lala'e o ana'oo hañavelo amy Hake natolokoy manahake i nañaveloa'o aolokoy. ¹⁷ Aa le venteo i tsara'oy henaneo ry IEHOVÀ Andrianañahare' Israele, i tsinara'o amy mpitoro'o Davideiy. ¹⁸ Aa vaho toe himoneñe am'ondaty an-tane atoio hao t'i Andrianañahare, ie tsy tsahats' Azo o andindin-dikerañe, àntsake o anjomba rinanjikoo? ¹⁹ Fe mb'e haoñe'o ty filolofam-pitoro'o naho i fihalalia'ey, ry IEHOVÀ Andrianañahareko, hahajanjiñe ty toreo naho solo ho isoloho'a ty mpitoro'o añañatrefa'o etoy; ²⁰ te hisokake mb'ami'ty anjomba toy handro an-kaleñe o fihaino'oo, mb'amy toetse nanoe'o ty hoe te hapo'o ao i tahina'ooy, hijanjiña'o o halaly ihalalia' o mpitoro'oo mb' amy toetse toio; ²¹ naho ho haoñe'o o solo hom-pitoro'oo naho ondati'o

Israeleo, ie hihalaly mb' ami'ty toetse toy; eka, mijanjiña am-pimoneña'o andikerañ' ao; le ie mijanjin-dRehe, afaho.

²² Aa naho manao hakeo ama' ondaty t'indaty naho ampititiheñe am-panta naho miheo mb' añ' anjomba'o mb'etoa vaho mifanta añ' atrefa' i kitreliy; ²³ le mijanjiña andindiñe ao naho ano vaho zakao an-katò o mpitoro'oo, le ondroho an-doha' i tsivokatsey i sata'ey vaho hahao ty vantañe, le anoloro ty amy havantaña'ey.

²⁴ Aa naho linafa ambane aolo' o rafelahi'eo ondati'o Israeleo, ie anaña'o hakeo vaho mitolike mamela-pitàn-droe, miantoke ty tahina'o, mihalaly naho misoloho ama'o mbañ' anjomba'o atoy; ²⁵ le mijanjiña an-dindiñ'ao naho apoho ty tahi' ondati'o Israeleo vaho ampolio mb' an-tane natolo'o iareo naho aman-droae' iareo.

²⁶ Aa naho mirindriñe i likerañey naho tsy avy i orañey, amy te nanao tahiñe ama'o iereo, le ie mihalaly mb'ami'ty toetse toy naho mamela-pitâne miantoke i tahina'o naho mitolik' amy hakeo' iareoy, ie fa nilafae'o, ²⁷ le mijanjiña an-dindiñe ao vaho apoho ty hakeo' o mpitoro'oo naho ondati'o Israeleo, le tehafo mb'an-dalan-tsoa fañaveloañe; le mampahavia orañe an-tane'o nampandovae'o ondati'oo.

²⁸ Aa naho mametsa-kasalikoañe i taney, he te voa ty angorosy, ke ty poz y ndra tromambo, ke ty valala ndra ty oletse; hera arikatoha' o rafelahi'eo an-tane ndra an-drova' iareo ao; ndra kiria inoñe ndra hatindriañ' inoñe; ²⁹ le ze halaly naho soloно anoa' t'indaty, ndra ondati'o Israele iabio, ie songa mahafohiñe i arete'ey naho i fangirifiri'ey vaho mamela-pitâne mb' ami'ty anjomba toy; ³⁰ le mijanjiña boak' am-pimoneña'o andikerañe aña, le songa anoloro ty amo hene sata'eo, ie arofoana'o ty arofo'e —amy te Ihe avao ro maharofoanañe o arofon' ana' ondatio— ³¹ soa te hañeveña'e, hañavelo amo lala'oo amy ze hene andro iveloma'e amy tane natolo'o aman-droae'aiy.

³² Le o renetane tsy am' ondati'o Israeleoo, ie pok'eo boak' an-tsietoitane aña ty amy tahina'o ra'elahi y naho ty fità'o maozatse vaho ty fita'o natorakitsy le ie mb' etoa hihalaly mb' ami'ty anjomba toy; ³³ le mijanjiña am-pimoneña'o an-dikerañe aña, le ano ze hene ikanjia' i renetaney; soa te fonga hahafohiñe ty tahina'o ondati' ty tane toio naho hañeveña'manahake ondati'o Israeleo vaho ho fohi' iereo te kanjiañe ami'ty anjomba namboareko toy i tahina'oy.

³⁴ Aa ie mionjomb' an-kotakotak' amo rafelahi'eo ondati'oo, mb'amy ze lalañe añiraha'o iareo naho mihalaly ama'o mb'ami'ty rova jinobo'o toy naho mb' ami' ty anjomba niranjieko ho amy tahina'o toy; ³⁵ le janjiño i halali' iareoy naho o soloно iareoo vaho henefo ty fitsakorean-tro' iareo.

³⁶ Aa ie anaña'o tahiñe (toe tsy eo t'indaty tsy mandilatse) naho iviñera'o naho atolo'o amo rafelahi' iareoo vaho asese an-drohy mb'an-tane lavits' aña ndra marine eo; ³⁷ f'ie mitsakore an-trok'ao an-tane naneseañe iareo an-drohy aña naho mitolike, misoloho ama'o an-tanem-pandrohiza' iareo ao, manao ty hoe: Nandilatse zahay, nitoloñ' an-tahiñe, nanao hakeo; ³⁸ le ie mimpoly ama'o an-kaampon' arofo naho an-kaliforam-pañova, an-tanem-pandrohizañ' ao, amy naneseañe iareo an-drohiy vaho mihalaly mb' amy tane natolo'o aman-droae' iareoy naho mb'amy rova jinobo'oy, mb'amo anjomba niranjieko amy tahina'oio, ³⁹ le mijanjiña an-dindiñey, am-pimoneña'o ao, o halali' iareoo naho o soloно iareoo, le añomezo to ty amo enta' iareoo; vaho apoho ty hakeo' ondati'o nandilatse ama'oo.

⁴⁰ Ie henane zao, ry Andrianañahareko, ehe te hisokake o fihaino'oo naho ho janjiñen-dravembia'o ty halaly taroñeñe ami'ty toetse toy.

⁴¹ Aa le miengaha mb'an-toem-pitofà'o eo ry IEHOVÀ Andrianañahare, Ihe naho ty vatan-kaozara'o; Ee te hisarom-pandrombahañe abey ry IEHOVÀ Andrianañahare, o mpisoro'oo, le hirebek' ami'ty hasoa o noro'oo. ⁴² O ry IEHOVÀ Andrianañahare, ko ampiolire'o ty lahara' i noriza'oy; tiahio o fiferenaiña i Davide mpitoro'oo.

7

¹ Ie nihene'e i Selomò i filolofa'ey, le nidoindoiñe boak' andikerañe eñe ty afo nampibotseke i enga oroañey naho o soroñeo vaho nandifotse i anjomba' IEHOVÀ ty enge' IEHOVÀ. ² Tsy nahafizilik' añ' anjomba' IEHOVÀ ao o mpisoroñeo amy te nañatseke i anjombay ty enge' IEHOVÀ. ³ Niisa' o ana' Israele iabio ty nivotraha' i afoy naho ty enge' IEHOVÀ amy anjombay; le nibokok' an-damoke eo, nindròdreke mb'an-tane, niambane naho nañandriañe IEHOVÀ: Amy te

Ie ro soa, nainai'e ty fiferenaiña'e.

⁴ Le songa nanao soroñe añatrefa' IEHOVÀ i mpanjakay naho ondatio. ⁵ Nandenta añombe ro'ale-tsi-ro' arivo hisoroñañe t'i Selomò mpanjaka naho boak' an-dia-raik' ao ty rai-hetse-tsi-ro' ale. Aa le noriza' i mpanjakay naho ondaty iabio ty anjomban' Añahare. ⁶ Nijohañe eo o mpisoroñeo, songa fitoloña'e; o nte-Levio rekets' o fititihan-tsabo am' IEHOVÀ niranjie' i Davide mpanjakao, hañandriañe IEHOVÀ, amy te nainai'e ty fiferenaiña'e,

am-pandrengea' i Davide am-pità' iareoo; le nampipopò trompetra tandrife iareo o mpisoroñeo; vaho nijohañe iaby t'Israele. ⁷ Mbore nimasiñe' i Selomò ty añivon-kiririsa aolo' i anjomba' IEHOVÀ; le eo ty nañengà'e i soroñe rey naho o saboran' engam-panintsíñañe; amy te tsy naharambe i soroñe rey naho o engan-kaneñeo naho i saboray i kitrely torisike niranjie' i Selomò. ⁸ Aa le nambena' i Selomò fito andro i sabadidakey naho niharao ama'e iaby t'Israele, toe valobohòke jabajaba, sikal' am-pimoahañ' amy Kamate aña pak' an-toraha' i Mitsraime aña. ⁹ Le hene nivoribey amy andro fahavaloy, amy te nambena' iereo fito andro ty fañorizañe i kitrely vaho fito andro ka i sabadidakey. ¹⁰ Aa ie amy andro faha roapololo-telo'ambi' i volam-pahafitoy, le nampolie'e mb'an-kivoho'e mb'eo ondatio, sambe fale naho nirebek' an-troke ty amy hasoa naboa' IEHOVÀ amy Davide naho amy Selomò vaho am' Israele ondati'eoy. ¹¹ Aa le nifonire' i Selomò i anjomba' IEHOVÀ naho i anjomba' i mpanjakaiy; ze hene nimoak' aña'arofo' i Selomò le niranjie'e aña' anjomba' IEHOVÀ ao naho amy anjomba'ey ho fonitse.

¹² Niboak' amy Selomò haleñe t'IEHOVÀ, nanao ama'e ty hoe: Tsinanoko i halali'oy vaho jinoboko ho ahiko ho anjombam-pisoroñañe ty toetse toy.

¹³ Aa naho arindriko i likerañey tsy hahavia'e orañe, ke lilieko o valalao hampibotseke i taney, he ampihitrifako angorosy am'ondatikoo; ¹⁴ le ie hirè-batañe ondaty tokaveñe ami' ty añarakoo, hihalaly naho hipay ty tareheko vaho hifotetse amo fañaveloa' iareo ratio; le hitsanoñe boak' andindiñe ao Raho, le hapoko o tahi' iareoo vaho ho janganeko o tane' iareoo. ¹⁵ Hisokake henaneo o masokoo, le ho tsanoñe' o sofikoo ze halaly anoeñe ami'ty toetse toy. ¹⁶ Fa jinoboko naho nimasiñeko ty anjomba toy henane zao, soa te ho ao kitro-katroke ty añarako vaho ho ama'e nainai'e donia o masokoo naho ty troko. ¹⁷ Le ie hañavelo aña'atrefako, manahake ty fañaveloa' i Davide rae'o, hanao o fonga nandiliako azoo,

hañambeñe o fañèkoo naho o fepèkoo; ¹⁸ le horizako ty fiambesampifeleha'o, ty amy fañinako amy Davide rae'o, nanao ty hoe: Tsy ho pondaty hifehe Israele rehe. ¹⁹ Fe naho hivike aña rehe hamorintseñe o fañèkoo naho o fepèko najadoko añatrefa' areoo vaho hiavotse hitoroñe ndrahare ila'e hitalahoa' areo; ²⁰ le hombotako reke-bahatse an-taneko natoloko iareo; le ty anjomba nimasinéko ho ami'ty añarako toy ro hahifiko tsy ho am-pahatreavako aña, fa hanoeko razan-drehake naho fandrabioña' ze kilakila' ondaty. ²¹ Le ty anjomba mandigiligy toy, ro hilatsà ze fonga mpiary ama'e, hanao ty hoe; Aa vaho akore te nanoe' IEHOVÀ zao o tane toañoeo naho i anjomba'ey? ²² Le hoe ty havali' iareo: Ie namorintseñe IEHOVÀ Andrianañaharen-droae' iareo nañavotse iareo an-tane Mitsraime aña, mbore nandrambe ndrahare ila'e naho nitalahoa' iareo vaho nitoroña' iareo; toly ndra naobo'e am'iereo o fonga hankàñe zao.

8

¹ Ie aña ty roapolo taoñe namboare' i Selomò i anjomba' IEHOVÀ y naho i anjomba'ey, ² le namboare'e o rova natolo' i Korame azeo vaho nampimoneñe'e ao o ana' Israeleo. ³ Nimb'e Kamate-tsobà mb'eo t'i Selomò nandrekets' aze. ⁴ Le namboare'e i Tadmore am-patrambeiy vaho namboare'e e Kamate ao o rova fihajañe iabio. ⁵ Namboare'e ka ty Bete-Korone ambone naho i Bete-korone ambane; rova fatratse, reketsé kijoly naho lalambey vaho sikadañe; ⁶ naho i Baalate naho ze hene rova-pihaja' i Selomò naho o fonga rovan-tsarete'eo naho o rova' o mpiningi'eo naho ze he'e namboare'e an-tsatin-tro'e e Ierosalaime ao naho e Lebanon aña vaho amo hene tanem-pifehea'eo. ⁷ Le ze hene ondaty nisisa amo nte-Kiteo naho amo nte-Amoreo naho amo nte-Perizeo naho amo nte-Kiveo naho amo nte-Iebosio, o tsy nte-Israeleo, ⁸ o sehangan' ana' iareo amy taney nisisa tsy nimongore' o ana' Israeleo, le nampijinie' i Selomò rorotse pake henàne. ⁹ Fe naho o ana' Israeleo, tsy nanoe' i Selomò mpitoroñe amo fitoloña'eo, fa nilahindefoñe naho mpifehem-pifeleke naho mpifeletsarete'e vaho mpiningi-tsarete'e. ¹⁰ Ie o mpiaolom-pifehe' i Selomò, ty roanjato-tsi-limampolo mpifeleke ondatio. ¹¹ Le nampionjone' i Selomò boak' an-drova' i Davide ao i anak' ampela' i Paròy mb'amy anjomba niranjie'e ho azey; ami'ty saontsi'e ty hoe: Tsy himoneñe aña' anjomba' i Davide mpanjaka' Israeley ty tañanjombako, amy te masiñe ty toetse nivotraha' i vata' IEHOVÀy.

¹² Le nañenga soroñe am' IEHOVÀ amy kitreli' IEHOVÀ y t'i Selomò, i niranjie'e aolo' i lavarangaiy; ¹³ nañenga boak' andro re ty amy lili' i àndroy, ty amy lili' i Mosèy, le amo SABATAO naho amo pea-bolañeо naho amo andro namantañañe in-telo boa-taoñeо, i sabadida-mofo tsy amandalivaiy naho i sabadidan-kereñandroy vaho i sabadidan-kibohotsey. ¹⁴ Tinendre'e ty amy fañè' i Davide rae'ey, ty firimboña' o mpisoroñeo amo fitoroña'eo naho o nte-Levio amo fitoroña'eo, ty handrenge naho hitoroñe añatrefa' o mpisoroñeo, ty amy lili' i àndroy; naho ty firimboña' o mpigarin-dalam-beio, songa an-dalambei'e; amy nandilia' i Davide ondatin' Añaharey. ¹⁵ Le tsy nivik' amy nandilia' i mpanjakay amo mpisoroñeo naho amo nte-Levio aman' inoñ' inoñe ndra amo trañon-kàjao iereo. ¹⁶ Aa le linahatse iaby ty fitoloña' i Selomò ampara' i fañoreñañe o faha' i anjomba' IEHOVÀio, pak' ami'ty nahahenefa'e aze. Aa le nifonitse ty anjomba' IEHOVÀ. ¹⁷ Nomb'e Etsione-gebere naho Elote, aña'olon-driak' an-tane' i Edome mb'eo t'i Selomò. ¹⁸ Le hinitri' i Korame

ama'e am-pitâ' o mpitoro'eo ty sambo naho o mpitoro'e zatse riakeo, le niharo lia amo mpitoro' i Selomò mb'e Ofire mb'eo iareo, nangalake volamena efajato-tsi-limampolo talenta aña vaho nendese' iereo mb'amy Selomò.

9

¹ Ie jinanji'ty mpanjaka-ampela' i Sebà ty enge' i Selomò, le nimb'e Ieros-alaimé mb'eo hitsoke i Selomò am' ontane sarotse; valobohòke ra'elahy ty nikovovòke nindre ama'e mb'eo; ninday raha mafiry o rameva'eo naho volamena tsifotofoto naho vato soa; aa ie nandoak' amy Selomò eo le hene nisaontsia'e ze aña'rofo'e ao. ² Tinoi' i Selomò aze iaby ontane'eo vaho tsy eo ty raha nietak' amy Selomò ty tsy nampandrendreha'e. ³ Ie nioni' i mpanjaka-ampela' i Sebà ty hihi' i Selomò naho i anjomba' niranjie'ey, ⁴ naho o mahakama am-pandambaña'eo naho o fiambesam-pitoro'eo naho ty fiatrafa' o mpiatra'eo naho ty saro' iareo; naho o mpitâm-pitovi'eo naho o siki' iareoo; vaho ty fanongañe nionjona'e mb'añ'anjomba' IEHOVÀ mb' eo, le tsy nahakofòke. ⁵ Le hoe re amy mpanjakay, Tally to ty nitsanoñeko an-taneko aña ty amo fitoloña'oo naho o hihi'oo, ⁶ le tsy nitsanoñeko heike o saontsi'eo naho tsy nivotrake etoan-draho vaho nitrea' o masokoo; le hehe te tsy nisaontsieñ' amako ty vakin-kaliforan-kihi'o; fa nilikoare'o ty enge nitsanoñeko. ⁷ Haha ondati'oo naho fale o mpitoro'o mijohañe nainai'e añatrefa'oo, mijanjiñe o hihi'oo. ⁸ Andriañeñe t'IEHOVÀ Andrianañahare'o nañisok' azo, nampiambesatse azo am-piambesa'e eo, ho mpanjaka' IEHOVÀ Andrianañahare'o, ty amy fikokoan' Añahare Israeley, ie najado'e ho nainai'e donia; zay ty nanoe'e azo mpanjaka' iareo, hanoa'o ty hatò naho ty havantañañe. ⁹ Le natolo'e amy mpanjakay ty volamena talenta zato-tsi-roapolو naho fampafiriañe tsifotofoto vaho vatosoa; kanao le lia'e tsy nioniñe ty fampafiriañe manahake i natolo' i mpanjaka ampela' i Sebà amy Selomò mpanjaka.

¹⁰ Ninday hatae màñitse naho vatosoa ka o mpitoro' i Korame naho mpitoro' i Selomò mpinday volamena boake Ofireo. ¹¹ Le namboara' i mpanjakay fanongañe amy hatae màñitsey o lalañe mionjoñe mb'amy anjomba' IEHOVÀ naho mb'amy anjomba' i mpanjakay mb'eoo mbore nanoa'e marovany naho jejobory o mpisaboo. Mbe lia'e tsy niisak' antane Iehoda i zay. ¹² Le natolo' i Selomò mpanjaka amy mpanjaka-ampela' i Sebà ze hene nirie'e, ze nihalalia'e naho tsy i natolo'e amy mpanjakay. Aa le nitolike re, nimpoly mb'an-tane'e aña, ie naho o mpitoro'eo.

¹³ Ie amy zay, ty lanjam-bolamena niheo mb'amy Selomò ami'ty taoñe le talenta volamena enen-jato-tsi-enem-polo-eneñ' amby, ¹⁴ ambone' ty nendese' o mpanao takinakeo naho o mpanao balibalikeo; vaho songa ninday volamena naho volafoty amy Selomò o mpanjaka' Arabeo naho o mpifehe an-taneo. ¹⁵ Nandranjy fikalan-defo roanjato am-bolamena pinepèke t'i Selomò; nanoeñe volamena pinepèke, le sekele enen-jato ty fikalandefo; ¹⁶ vaho nanoe'e fikalandefo volamena pinepèke telon-jato; sindre sekele bolamena telonjato ty nanoeñe i fikalandefoñe rey; le nampizilihe' i mpanjakay aña' anjomban' Ala' i Lebanon ao. ¹⁷ Mbore namboare' i mpanjakay ty fiambesatse jabajaba an-tsifa vaho nipakora'e volamena ki'e. ¹⁸ Fanongañe eneñe ty nitroatse amy fiambesatsey, volamena ka ty fitimpahañe nirekets' amy fiambesatsey, miharo fisampezam-pitâñe aña' ila'e roe' i fiambesatsey vaho liona roe ty nijohañe marine i fisampezam-pitâñe rey. ¹⁹ Liona folo-ro' amby ty nijohañe aña'ila roe' i fanongañe

eneñe rey, tsy eo ty nanahak' aze ndra am-pifeheañe aia. ²⁰ Songa volamena o fitovim-pikamà' i Selomò mpanjakao vaho hene volamena ki'e o fanake añ' anjomban' ala' i Lebanoneo, ie tsy am-bolafoty, fa tsy natao ho vara tañ' andro' i Selomò ty volafoty. ²¹ Nanan-tsambo nionjomb'e Tarsise mindre amo mpitoro' i Korameo i mpanjakay; boa-telo-taoñe ty nimpolia' o sambo' i Tarsiseo ninday volamena naho volafoty naho tsifa naho kofe* vaho toký†. ²² Aa le nilikoare' i Selomò an-kihitse naho vara ze hene mpanjaka' ty tane toy. ²³ Vaho songa nipay hiatrek' amy Selomò o mpanjaka' ty tane toio, hijanjiñe ze hihi'e najon' Añahare añ'arofo'e ao. ²⁴ Le fonga ninday ravoravo mañevo ondatio: fanake volafoty naho fanake volamena naho sikiñe naho sikim-pikalañe naho fampifiriañe naho soavala vaho borike, boa-tao-boa-taoñe. ²⁵ Nanan-trañon-tsoavala efats' arivo t'i Selomò naho sarete naho mpiningitse rai-ale-tsi-roarivo, ie nampimoneña' amo rovan-tsareteo naho amy mpanjaka e Ierosalaimey. ²⁶ Nifehe'e iaby o mpanjaka boak'amy Sakay pak'an-tane' o nte-Pelistio ampara' ty efe-tane' i Mitsraime aña. ²⁷ Le nanoe' i mpanjakay hoe vato ty volafoty e Ierosalaimo naho hoe sakoañe am-bavatane ao o mendoraveñe amo'i ty hamaro'e. ²⁸ Le nendesa' iareo soavala boake Mitsraime aña naho hirik' amo tane iabio t'i Selomò mpanjaka. ²⁹ Aa naho o fitoloña' i Selomò ila'eo, ty valoha'e pak' am-para'e, tsy fa sinokitse amo vinolili' i Natane mpitokio hao naho amy fitokia' i Akiià nte-Siloney vaho amo aroñaro' Iedò mpitoky am' Iarovame ana' i Nebateo? ³⁰ Nifehe Israele iaby e Ierosalaimo ao efa-polo taoñe t'i Selomò ³¹ le nitrao-piròtse aman-droae'e t'i Selomò naho nalentek' an-drova' i Davide rae'e ao vaho nandimbe aze nifehe t'i Rekoboame ana'e.

10

¹ Le nimb'e Sekeme aña t'i Rekoboame; aa naho nivotrake e Sekeme ao iaby t'Israele hanao aze mpanjaka, ² naho jinanji' Iarovame ana' i Nebate—ie e Mitsraime aña ami'ty niorata'e tsy hiatrefa'e i Selomò mpanjakay fe nimpoly boake Mitsraime t'Iarovame, ³ ie nampisangitufe' iereo—le nimb'eo t'Iarovame naho Israele iaby nisaontsy amy Rekoboame ami'ty hoe: ⁴ Nanoen-drae'o gañe o joka'aio, aa le hamaivaño o fitoroñañe nasampen-drae'o ama'aio naho i joka'e nampijinie'e anaiy vaho hitoroñe azo zahay. ⁵ Le hoe re am' iereo: Mimpolia mb'amako naho modo ty telo andro. Aa le nienga ondatio. ⁶ Le nisafiry amo androanavy nijohañe añatrefa' i Selomò rae'e t'ie niveloñe o t'i Rekoboame ami'ty hoe: Ino ty hanoroa' areo ahy havaleko ondaty retoañe? ⁷ Le nisaontsia' iareo ty hoe: Naho tretreze'o ondaty retoa naho hampifalè'o vaho isaontsia'o volan-tsoa, le ho mpitoro'o nainai'e. ⁸ Fe napo'e i fañereta' o androanavioy, le nitsò-pañahi' o ajalahy nindre nibeizeñe ama'e mpijohañe añatrefa'eo. ⁹ Le hoe re am' iereo: Ino ty hatoro' areo ahy, hamalean-tika ondaty nanao amako ty hoe: Hamaivaño i joka nampijinien-drae'o anaiy? ¹⁰ Le hoe ty saontsi' o ajalahy nindre nibey ama'eo: Ty hoe ty hatao'o am'ondaty nanao ama'o: Nampavesaren-drae'o o joka'aio, aa le hamaivaño ama'ay, Ty hoe ty hanoa'o: Boda'e te aman-tohan-draeko ty anakikiko. ¹¹ Aa kanao nampilogologoen-draeko joka mavesatse, le ho tompeako o joka' areoo; nilafaen-draeko am-pifiakte, fa zaho ka ty handilo an-kalafiañe.

¹² Aa le nimb'amy Rekoboame mb'eo amy andro fahateloy t'Iarovame naho ondaty iabio, amy nefe' i mpanjakaiy ami'ty hoe: Mimpolia mb'etoa

* ^{9:21} Kofe: hirañe jabajaba † ^{9:21} Toký: mete ho voroñe soa volo

ami'ty andro fahatelo. ¹³ Fe nanoïñe an-tsotrake i mpanjakay; nifarie' i mpanjakay ty fanoroa' i androanavy rey, ¹⁴ vaho i entañe natoro' i ajalahy reiy ty nanoe'e, ami'ty hoe; Nampijinie'e joka mavesatse, fe ho tompeako; nilafaen-draeko am-pifiakte fa zaho ka an-kalafiañe. ¹⁵ Aa le tsy hinao' i mpanjakay ondatio, amy t'ie fampivalihan' Añahare, hampijadoña' IEHOVÀ i tsara nitsarae'e am-pitâ' i Akiià nte-Silone am' Iarovame ana' i Nebatey. ¹⁶ Aa ie nioni' Israele iaby te tsy nañaoñe iareo i mpanjakay, le hoe ty natoi' ondatio i mpanjakay: Ino ty anjara'ay amy Davide? Toe tsy aman-dova amy ana' Iisaiy zahay; songa mb'an-kiboho'e mb'eo, ry Israele; le ambeno i anjomba'oy henane zao ry Davide, vaho hene nienga mb' an-kiboho'e mb'eo t'Israele. ¹⁷ Fe o ana' Israele nimoneñe an-drova' Iehodao, mbe nifehe' i Rekoboame. ¹⁸ Nirahe' i Rekoboame amy zao t'i Hadorame mpifehe i habay; f'ie rinetsa' o ana' Israeleo vato, le nihomake. Aa le nihitrihitry mb'amy sarete'ey mb'eo t'i Rekoboame mpanjaka, niherereake mb'e Ierosalaime aña. ¹⁹ Aa le niola amy anjomba' i Davidey t'Israele ampara' te henane.

11

¹ Ie tafam-poly e Ierosalaime ao t'i Rekoboame le natonto'e ty anjomba' Iehoda naho i Beniamine, ondaty jinoboñe rai-hetse-tsi-valo-ale, lahin-defoñe, hialy am' Israele, hampimpolia'e amy Rekoboame i fifeheañey. ² Fe niheo amy Semaia ondatin' Añahare ty tsara' IEHOVÀ nanao ty hoe: ³ Saontsio amy Rekoboame ana' i Selomò mpanjaka' Iehoda naho amy Israele e Iehoda naho e Beniamine ao iaby ty hoe: ⁴ Hoe t'IEHOVÀ: Ko mionjomb'eo, ko mialy aman-droahalahi' areo; fonga mimpolia mb'an-kiboho'e mb'eo, fa amako o raha zao. Aa le hinao' iareo o tsara' IEHOVÀ vaho nimpoly tsy nionjoñe hiatreatre am' Iarovame. ⁵ Nimoneñe e Ierosalaime ao t'i Rekoboame vaho namboatse rovam-piarovañe e Iehoda ao. ⁶ Namboare'e ty Betlekheme naho i Etame naho i Tekoà ⁷ naho i Bete-tsore naho i Sokò naho i Adolame ⁸ naho i Gate naho i Maresà naho i Zife ⁹ naho i Adorame naho i Lakise naho i Azekà ¹⁰ naho i Tsorà naho i Aiialone vaho i Kebrone; ie rova aman-kijoly e Iehodà naho e Beniamine ao. ¹¹ Le nihaftarare'e o rova aman-kijolio naho najo'e am' iereo ao ty mpifeleke naho nañajà'e mahakama naho menake vaho divay. ¹² Le nasia'e fikalandefo naho lefoñe o rova iabio vaho vata'e nihaftarare'e. Iehoda naho i Beniamine avao ty nimpirekets' ama'e.

¹³ Nirekets' ama'e o mpisoroñe naho nte-Levy e Israele iaby hirik' am-paripari'e iabio. ¹⁴ Nado' o nte-Levio o tanem-piandraza' iareoo naho o hanaña' iareoo vaho nivotrake e Iehodà naho e Ierosalaime ao, amy te nifarie' Iarovame naho o ana-dahi'eo, ie tsy nampitoloñe'e o fisoroñañe am' IEHOVÀ, ¹⁵ te mone noriza'e ho am-bata'e ty mpisoroñe amo toets' aboo naho amo kokolampao vaho amo bania niranjie'eo. ¹⁶ Fe nanonjohy iareo ze hene boak' am-pifokoa' Israele nifahatse aña'arofo hipay IEHOVÀ Andrianañahare' Israele, nimb'e Ierosalaime mb'eo hañenga soroñe am' IEHOVÀ Andrianañaharen-droae' iareo. ¹⁷ Aa le nihaftarare' iereo ty fifehea' Iehoda vaho nandrondroñe i Rekoboame ana' i Selomò, telo taoñe, ie nañavelo an-dala' i Davide naho i Selomò telo taoñe. ¹⁸ Nañenga valy t'i Rekoboame: i Makalate anak' ampela' Ierimote ana' i Davide naho a i Abihiale anak' ampela' i Eliabe ana' Iiseiy; ¹⁹ le nisamake ana-dahy: Ieose naho i Semarià vaho i Zahame. ²⁰ Aña zay, le nañenga i Maakà ana' i Abisalome, ze nisamake i Abiià naho i Ataý naho i Ziza vaho i Selomite. ²¹ Nikokoa' i Rekoboame mandikoatse ze hene vali'e naho

sakeza'e t'i Maakà ana' i Abisalome; toe folo-valo' amby ty valy nengae'e naho enempolo ty sakeza'e le nisamak' anadahy roapolo-valo' amby naho anak' ampela enempolo. ²² Tinendre' i Rekoboame ho talè t'i Abiià ana' i Maakà, ho mpifeleke o rahalahi'eo, hihentseña'e ho mpanjaka. ²³ Le an-kihitse ty nampipoha'e amy ze faripari' Iehoda naho i Beniamine iaby o ana-dahi'eo, amy ze rova f atratse iaby; le tinolo'e mahakama nahaeneñe vaho nipaia'e valy maro.

12

¹ Ie nioreñe ty fifehea' i Rekoboame naho naozatse, le naforintse'e ty Tsara' IEHOVÀ, ie naho Israele iaby. ² Aa ie tan-taom-pahalime' i Rekoboame, amy te fonga nandilatse am' IEHOVÀ t'Israele, le naname Ierosalaime t'i Sisake mpanjaka' i Mitsraime, ³ reketse sarete arivo-tsirroanjato naho mpiningi-tsoavala eneñ' ale; naho ondaty tsifotofoto nente'e boake Mitsraimeo: o nte-Libiao, o nte-Sokio vaho o nte-Koseo. ⁴ Le rinambe'e o rova aman-kijoly Iehodao vaho nitakare'e t'Ierosalaime. ⁵ Aa le nimb' amy Rekoboame naho amo roandria' Iehoda nifanontoñe e Ierosalaimeo t'i Semaia mpitoky, ty amy Sisake, le nanoe'e ty hoe: Hoe t'IEHOVÀ: Tsinambolito' areo raho, toly ndra napoko am-pitá' i Sisake. ⁶ Aa le nirè-batañe o roandria' Israeleo naho i mpanjakay vaho nanao ty hoe: Vantañe t'IEHOVÀ. ⁷ Ie nivazoho' IEHOVÀ t'ie nirè-batañe, le niheo amy Semaia ty tsara' IEHOVÀ nanao ty hoe: Kanao nire-batañe le tsy harotsako; fa hitolorako rombake vaho tsy am-pitá' i Sisake ty hampidoañako am'Ierosalaime ty habosehako. ⁸ F'ie h'ondevo'e, hianatse ty fitoroñañe amako ami'ty fitoroñañe o fifehea' ty tane toio. ⁹ Aa le naname Ierosalaime t'i Sisake mpanjaka' i Mitsraime nitavañe ze vara añ' anjomba' IEHOVÀ ao naho ze vara' añ' anjomba' i mpanjakay; fonga nendese'e; tinava'e ka o fikalan-defoñe volamena rinanji' i Selomò. ¹⁰ Le nandranjy fikalandefo torisike hasolo irezay t'i Rekoboame ie nampamandroñe'e o mpifehe-pigaritse mpañambeñe ty lalambei' i mpanjakaio. ¹¹ Ie amy zao, ndra mbia' mbia nimoak' añ' anjomba' IEHOVÀ ao i mpanjakay le rinambe' o mpigaritseo irezay, naombe hey vaho nampoly an-trañom-piambéñe ao. ¹² Aa kanao nirè-batan-dre, le nihánkañ' ama'e ty haviñera' IEHOVÀ, tsy rinotsa'e ho mongotse; nanintsiñe t'Iehodà henane zay.

¹³ Le nihaozatse e Ierosalaime ao t'i Rekoboame naho nifehe; toe ni-efapolu-raik'amby taoñe ty Rekoboame te niorotse nifehe vaho nifehe folo-tao-fito' amby e Ierosalaime ao, i rova jinobo' IEHOVÀ amo hene fifokoa' Israeleo hampipoha'e i tahina'ey; i Naamà nte-Amone ty tahinan-drene'e. ¹⁴ Nanao haratian-dre, amy te tsy nihajarie'e añañ' arofo'e ao ty fipaiñe IEHOVÀ. ¹⁵ Aa naho o fitoloña' i Rekoboameo, ty valoha'e pak'am-para'e, tsy fa sinokitse amo talili' i Semaia mpitoky naho Idò mpitokio hao ty amo fiantoñoñe? Nifañotakotake nainai'e t'i Rekoboame naho Iarovame. ¹⁶ Aa le nitrao-piròtse aman-droae'e t'i Rekoboame naho nalentek' androva' i Davide ao; vaho nandimbe aze nifehe t'i Abiià ana'e.

13

¹ Ie amy taom-paha-folo-valo' ambi' Iarovamey le niorotse nifehe Iehodà t'i Abiià. ² Telo taoñe ty nifehea'e e Ierosalaime ao; i Mikaià ana' i Orielle nte-Gibà ty tahinan-drene'e. Nifañotakotake t'i Abiià naho Iarovame. ³ Nifanontoñe hialy t'i Abiià reketse mpirimbon-dahindefoñe mahimbañe, ondaty jinoboñe efats-etse; naho nilahatse hifañatreatre ama'e t'Iarovame rekets' ondaty jinoboñe valo-hetse, ondaty maozatse

nahasibeke. ⁴ Nijohañe an-kaboa' i Tsemaraime t'i Abiià am-bohibohi' i Efraime eo, nanao ty hoe: Janjiño raho ry Iarovame naho Israele iabio; ⁵ tsy ho napota' areo hao te natolo' IEHOVÀ Andrianañahare' Israele amy Davide ho nainai'e donia ty fifeheañe Israele, ama'e naho amo ana-dahi'eo am-pañinan-tsira? ⁶ Fe nitroatse t'Iarovame ana' i Nebate, mpitoro' i Selomò ana' i Davide vaho niola amy Talè'ey. ⁷ Niropak' ama'e ondaty tsy manjofakeo, ana' i Beliale, naozatse te amy Rekoboame ana' i Selomò, ie mbe nitora'e naho tso-po t'i Rekoboame vaho tsy nahafiatreatre. ⁸ Aa he mitsakore ty hoe nahareo t'ie hahafitroatse amy fifehea' IEHOVÀ am-pità' o ana' i Davideoy; ie valobohòke vasiañeñe vaho ama' areo o bania volamena niranjie' Iarovame ho 'ndrahare' areoo. ⁹ Tsy fa rinoa' areo hao o mpisoro' IEHOVÀ, o ana' i Aharoneo, o nte-Levio vaho nañoriza' areo mpisoroñe an-tsata' ondaty an-tane ila'e aña? Aa ndra ia'ia miheo mb'eo hañori-vatañe reketse bania naho añondrilahy fito, le minjare mpisoron 'drahare tsie. ¹⁰ Fa naho zahay, IEHOVÀ ro Andrianañahare'ay, le tsy naforintse'ay vaho amam-pisoroñe mitoroñe IEHOVÀ, toe mitoloñ' amo fitoloña' iareoo o ana' i Aharoneo naho o nte-Levio, ¹¹ ie misoroñe am' IEHOVÀ boa-maraindray naho hariva, soroñe naho emboke mañitse; naho mampidadañe i mofo miatrekey amy latabatse hiringiri'ey; naho mamelome o jiro am-pitàn-jiro volamenao boa-kariva, amy te tana'ay ty namantoha' IEHOVÀ Andrianañahare'ay; fe nifarie' areo. ¹² Aa le oniño te mindre ama'ay ho mpiaolo anay t'i Andrianañahare naho mitan-trompetra fañatahatañe o mpisoro'eo, hivolan-kekoheko ama' areo. O ry ana' Israeleo, ko mialy am' IEHOVÀ Andrianañaharen-droae' areo fa tsy hiraorao.

¹³ Fe nampamandroñe' Iarovame ty hiboak' am-boho ao; aa le eo o aolo' Iehodà vaho amboho ao o mpamandroñe. ¹⁴ Aa ie nitolik-amboho t'Iehodà, hehe te aolo naho amboho i hotakotakey; aa le nitoreo am' IEHOVÀ iereo vaho nitiofe' o mpisoroñe o trompetrao. ¹⁵ Nampipoña-pazak' amy zao o nte-Iehodao; aa ie nipazapazake o nte-Iehodao, le nifetsake te linihin' Añahare t'Iarovame naho Israele iaby añatrefa' i Abiià naho Iehoda eo, ¹⁶ naho nitriban-day añatrefa' Iehodà eo o ana' Israeleo vaho tinolon' Añahare am-pità' iareo. ¹⁷ Zinama' i Abiià naho ondati'eo am-pizamanañe ra'elahy, kanao lime-hetse am'ondaty jinoboñe o nitsingoron-ko vetrake. ¹⁸ Aa le nampiambanène o ana' Israeleo henane zay vaho nandreketse o ana' Iehodao ami'ty niatoa' iareo am' IEHOVÀ, Andrianañaharen-droae' iareo. ¹⁹ Nihoridañe' i Abiià t'Iarovame, le nandrambesa'e rova: i Betele rekets' o tanà'eo naho Iesanà rekets' o tanà'eo vaho i Efrone rekets' o tanà'eo. ²⁰ Tsy nahafitroatse ka t'Iarovame tañ' andro' i Abiià; le zinevo' IEHOVÀ re vaho nihomake. ²¹ Fe nihamaozatse t'i Abiià, le nañenga valy folo efats' amby vaho nisamak' ana-dahy roapololo-ro' amby naho anak'ampela folo-eneñ'amby. ²² Le o fitoloña' i Abiià naho o sata'eo naho o lañona'eo, tsy fa sinokitse amy fibejaña' Idò mpitokiy hao? ²³ Aa le nitrao-piròtse aman-droae'e t'i Abiià naho nalenteke an-drova' i Davide ao, le nandimbe aze nifehe t'i Asa ana'e; nanintsiñe folo taoñe tañ' andro'e i taney.

14

¹ Nanao ze soa naho vantañe am-pihaino' IEHOVÀ Andrianañahare'e t'i Asa; ² amy te finao'e ze kitrely tsie naho o toets' aboo naho nakoroma'e o vatolahio vaho finira'e o Asereo; ³ naho linili'e te hipay IEHOVÀ Andrianañaharen-droae' iareo t'Iehoda, hañorike Hake naho o

sepètseo. ⁴ Nafaha'e amo hene rova' Iehodao o tambohoo naho o sare' i àndroio; vaho nianjiñe añ'atrefa'e eo i taney. ⁵ Aa le namboare'e rova fatratse e Iehoda ao; amy te nanintsiñe i taney vaho tsy teo ty nialiañe amy taoñe rezay, ie nampitofà' IEHOVÀ. ⁶ Aa hoe ty natao'e am'Iehoda: Antao hamboatse o rova retoa, le harikatohen-tika kijoly naho fitalakesañ' abo naho lalambey vaho sikadañe; añatrefan-tika eo i taney amy te nitsoehentika t'IEHOVÀ Andrianañaharen-tika naho nipaiantika vaho nampitofae'e o mañohok' antika iabio. Aa le namboatse iereo vaho niraorao. ⁷ Le nanam-pirimboñan-dahindefoñe t'i Asa: mpitam-pikalañe naho lefoñe telo-hetse ty boak' Iehodà ao; naho hirike Beniamine ao ty mpitam-pikalañe vaho mpitintim-pale, roe-hetse-tsi-valo-ale; songa maozatse naho nahasibeke.

⁸ Teo te niavotse haname iareo t'i Zerake nte-Kose ninday valobohòke arivon' arivo naho sarete telon-jato; le nivotrake e Maresà eo. ⁹ Niavotse mb'eo t'i Asa hifanalaka ama'e, le nalahatse am-bavatane' i Zefate e Maresà eo i hotakotakey. ¹⁰ Le nikaik' am'IEHOVÀ Andrianañahare'e t'i Asa, nanao ty hoe: Ry IEHOVÀ, tsy eo ty añ'ila'o mahafañolotse añivo' ty maozatse naho ty po-hafatrarañe; oloro zahay ry IEHOVÀ Andrianañahare'ay; amy te Ihe avao ty iatoa'ay vaho i tahina'oy ty ionjona'ay hiatreke o valobohòkeo. Ihe ro IEHOVÀ Andrianañahare'ay; ko apo'o handrekets' azo ondatio. ¹¹ Aa le zinama' IEHOVÀ añatrefa' i Asa naho aolo' Iehoda eo o nte-Koseo vaho nitriban-day o nte-Koseo. ¹² Aa le nihoridañe' i Asa naho ondaty ama'eo pake Gerare; le akore ty hamaro' o nte-Kose nibanibanítseo kanao leo raike tsy nahatam-beloñe, ie neparatsàke añatrefa' IEHOVÀ naho aolo' i valobohò'ey; vaho nendese' iereo ty fikopaham-bey. ¹³ Linafa' iereo o tanañe mañohoke i Gerare iabio; fa nampianifa' IEHOVÀ; naho fonga kinopa' iareo o rovao vaho tsifotofoto ty vara tam' iereo ao. ¹⁴ Linafa' iareo ka o kibohom-pitan-kareo, le tinava' iareo ty añondry naho rameva maro vaho nimpoly mb'e Ierosalaime aña.

15

¹ Nivotrak' amy Azarià ana' i Ovede t'i Arofon' Añahare; ² le niavotse mb'eo hifanalaka amy Asa, le hoe re ama'e: Janjiño raho ry Asa naho ry Iehoda miharo Beniamine iaby; indreza' IEHOVÀ kanao ireketa' areo; itsoeho le ho isa'areo; f'ie aforintse' areo le ho farie'e ka. ³ Hatrela t'ie tsy aman' Añahare to t'Israele naho tsy amam-pisoroñe mpañoke vaho tsy aman-Kàke; ⁴ fe amy haembera' iareo le nitolik' am' IEHOVÀ Andrianañahare' Israele, nipay vaho nahatendreke. ⁵ Ie tañ' andro zay tsy nanintsiñe ty niavotse ndra ty nimoake, fa hasotriam-bey ty nampilovilovi' ze hene mpimone' o taneo. ⁶ Finofoke iereo, fifeheañe miatre-pifeheañe, rova miatre-rova; amy t'ie nametsahan' Añahare ze atao hasotriañe. ⁷ Fe mihaozara, ko apoke higebañe ty fità' areo, fa ho tambezeñe o fitoloña'areoo.

⁸ Ie nahajanjiñe i tsara zay t'i Asa, i nitokia' i Azarià ana' i Ovede, mpitokiy, le nandrobo-batañe naho finao'e an-tane' Iehodà naho e Beniamine iaby ze raha nampangorìñe, naho amo rova rinambe'e am-bohibohi' i Efraimeo; vaho hinavao'e i kitreli' IEHOVÀ, aolo' i lavaranga' IEHOVÀi.

⁹ Le natonto'e iaby t'Iehodà naho i Beniamine naho o mpañialo ama'e boak' Efraime naho e Menasè vaho e Simeoneo; fa maro ty nihintsañe am' Israele ie nioni' iereo te nindre ama'e t'IEHOVÀ Andrianañahare'e.

¹⁰ Aa le nifanontoñe e Ierosalaime ao amy volam-paha-telo, amy taompaha-folo-lim' ambi' i Asay, ¹¹ vaho nanao soroñe amy IEHOVÀ amy andro

zay, boak' amy fikopahañe nendesa' iareoy, añombe fiton-jato naho añondry fito-arivo; ¹² le nifañina hitsoeke IEHOVÀ Andrianañaharen-droae' iareo, an-kaampon' arofo naho an-kaliforam-pañova, ¹³ le havetrake ze tsy mipay IEHOVÀ Andrianañahare' Israele, ke t'ie kedekede he te bey, ke lahilaþy hera ampela. ¹⁴ Aa le nifanta am-pazak' am' IEHOVÀ iereo naho am-pamatsiañe vaho an-trompetra naho antsiva. ¹⁵ Nandia taroba iaby t'Iehoda ty amy fantay, amy te nititiheñe an-kaampon' arofo naho nitsotsehe' iereo vaho nitendreke. Aa le nitsitsihe' IEHOVÀ fañanintsíñe. ¹⁶ Nafaha'e tsy ho renem-panjaka ka t'i Maakà rene' i Asa mpanjaka amy t'ie nandranjy sare tiva i Aserà; le finira' i Asa i sare'e nampangorìñey naho dinemo'e ho deboke vaho noroa'e an-toraha' i Kidrone ao. ¹⁷ Toe tsy nafahañe am' Israele o toets' aboo; fe ni-ary ty arofo' i Asa amo hene andro'eo. ¹⁸ Le nindese'e añ' anjomban' Añahare ao o raha navìn-droae'e naho o raha navì'eo, volafoty naho volamena naho fanake. ¹⁹ Vaho tsy aman' aly i taney pak' an-taom-pifehea' i Asa faha-telopololim' amby.

16

¹ Ie an-taom-pifehea' i Asa faha-telopolol eneñ' amby, le nionjo hiatreatre am'Iehodà t'i Baasà mpanjaka' Israele, le namboare'e ty Ramà, hisebañe ze te hiavotse ndra himoak' mb'amy Asa mpanjaka' Iehodà. ² Aa le nakare' i Asa ty volafoty naho volamena am-pañajam-barä añ' anjomba' IEHOVÀ naho añ' anjomba' i mpanjakay vaho nahitri'e mb' amy Benehadade nte-Arame nimoneñe e Damesèk' ao, ami'ty hoe: ³ Eo ty fañina amako naho ama'o, manahake i tañivon-drae'o naho an-draekoy, Ingo te nañitrifako volafoty naho volamena; Mañaveloa, apitsoho ty fañina'o amy Baasà mpanjaka' Israele, hisitaha'e amako. ⁴ Aa le hinao' i Benehadade t'i Asa mpanjaka naho nirahe'e haname o rova' Israeleo o mpifehen-dahindefo'eo; le linafa' iareo t'iione naho i Dane naho i Abelmaime naho ze fonga rovam-pañaja' i Naftaly. ⁵ Aa ie jinanji' i Baasa zay, le najihe'e ty fañamboarañe i Ramà vaho nado'e i nitoloña'ey. ⁶ Aa le nente' i Asa t'Iehodà iaby hitaoñe o vato' i Ramào naho o boda'e namboare' i Baasao le namboatse i Gebà naho i Mitspà.

⁷ Ie amy zay, nimb' amy Asa mpanjaka' Iehoda mb'eo t'i Kananý mpioniñe, nanao ty hoe, Kanao niatoa'o ty mpanjaka' i Arame, le tsy niatoa'o t'IEHOVÀ Andrianañahare'o, le nipolititse am-pitá'o ty valobohòmpanjaka' i Arame. ⁸ Tsy nivalobohòke vasiañeñe reketse sarete naho mpiningitse nivorentsäñe hao o nte-Koseo naho o nte-Lobeo? Fe kanao niatoa'o t'IEHOVÀ le nitolora'e am-pitá'o. ⁹ Fa mihelañe mb'eo mb'eo an-tane atoy o fihaino' IEHOVÀ, hiboake ho maozatse amo añ'ampon-troke ama'e. Toe nanoe'o hagegeañe i rahay, hanañ'aly rehe henane zao. ¹⁰ Niforoforo amy mpioniñey t'i Asa le nampijoñe'e am-bahorañe ao ami'ty haviñera'e amy rahay. Namorekeke ondaty ka t'i Asa henane zay. ¹¹ Aa ty amo fitoloña' i Asao, ty valoha'e ampara' ty fara'e, ingo te misokitse amo bokem-panjaka' Iehoda naho Israeleo. ¹² Ie an-taom-pifehea'e faha telopolol sive' amby, narare am-pandia'e t'i Asa; toe nanjeke mafe i arete'ey; fe amy hasilo'ey, tsy IEHOVÀ ty pinai'e, fa o mpanahao. ¹³ Aa le nitrao-piròtse aman-droae'e t'i Asa; nivilasy an-taom-pifehea'e fah' efapolo-raik' amby. ¹⁴ Nalente' iareo an-kibori'e hinali'e ho am-bata'e androva' i Davide ao, le natsalalampa' iareo amy fandreañe natsafeñe raha mandrifondrifoñe naho karazan' embok' ankafankafa nitsenèñe ami'ty hilala' o mpanao rano mañitseoy; le nanoa' iareo fañoroañe ra'elahy.

17

¹ Nandimbe aze nifehe t'Iehosafate anadahi'ey, le nihaftatratse am' Israele. ² Nampipoha'e lahindefoñe iaby o rova-fatrats' Iehodao naho nampijadoña'e firimboñañe an-tane Iehoda ao vaho amo rova' i Efraime rinambe' i Asa rae'eo. ³ Nindre am' Iehosafate t'IEHOVÀ, amy te nañaveloe'e o sata' i Davide rae'e valoha'eo, le tsy pinai'e o Baaleo; ⁴ nitsoeha'e t'i Andrianañaharen-drae'e, nañaveloe'e o lili'eo vaho tsy nanoe'e o sata' Israeleo. ⁵ Aa le najado' IEHOVÀ am-pità'e i fifeheañey; le ninday ravoravo am' Iehosafate t'Iehoda iaby ie nanam-bará naho engeñe ra'elahy. ⁶ Le naonjoñe amo sata' IEHOVÀ ty arofo'e; mbore nafaha'e boake Iehoda ao o tambohoo naho o Aserào. ⁷ Le tan-taom-paha-telo' i fifehea'ey, le nirahe'e o roandria'eo, i Benekaile naho i Obadia naho i Zekarià naho i Netanele vaho i Mikaià hañoke amo rova Iehodao. ⁸ Nindre am' iereo o nte-Levio; i Semaia naho i Netanià naho i Zebadià naho i Asahele naho i Semiramote naho Iehonatane naho i Adoniià naho i Tobiià vaho i Tobadonià, nte-Levy; nitraok' am' iereo t'i Elisamà naho Iehorame mpisoroñe, ⁹ nañanatse e Iehodà ao, le am' iereo ty boke' i HÀ' IEHOVÀ; nitsitsihe' iereo o rova' Iehodà iabio, nañoke ondatio.

¹⁰ Nivotrak' amo fonga fifeheañe naho tane mañohoke am' Iehodao ty firevendreveñañe IEHOVÀ vaho tsy eo ty nialy am' Iehosafate. ¹¹ Nandesa' ty ila' o nte-Pelistio ravoravo naho haba am-bolafoty; ninday hare o nte-Arabeo: añondrilahy fito-arivo-tsi-fitonjato naho oselahy fito-arivo-tsi-fitonjato. ¹² Nitabotse avao ty enge' Iehosafate; le namboare'e e Iehoda ao ty rova fatratse naho rovam-pañajàñe. ¹³ Nimaro ty tolondraha'e amo rova' Iehodao vaho inao o lahindefoñe, fanalolahy maozatse e Ierosalaimeo. ¹⁴ Le zao ty famoliliañe iareo ty aman' anjomban-droae'e: am' Iehoda, o mpifelek' arivoo: i Adnà mpiaolo, reketse fanalolahy mahasibeke telo-hetse; ¹⁵ nanonjohy aze t'Iehohanane mpiaolo reketse roe-hetse-tsi-valo-ale; ¹⁶ nañorik' aze t'i Amasià, ana' i Zikrý, mpanolobatañe ho am' IEHOVÀ, fanalolahy maozatse roe-hetse ty tama'e; ¹⁷ le amy Beniamine, i Eliada, lahindefo maozatse nahasibeke, reketse mpitam-pale naho fikalandefoñe roe-hetse; ¹⁸ le añ'ila'e t'Iehozabade reketse rai-hetse-tsi-valo-ale veka'e hialy. ¹⁹ Irezay ro nitoroñe i mpanjakay mandikoatse o napo'e amo rova fatratse nanitsike Iehodà iabio.

18

¹ Nanañ'asy naho vara tsi-efa t'Iehosafate; f'ie nifampilongo amy Akabe am-panambaliañe. ² Ie taoñe maromaro aña, le nizotso mb'amy Akabe e Somerone mb'eo. Nandenta añondry naho añombe ho aze naho ho amo mpiama'eo t'i Akabe vaho sinigì'e hindre-lia ama'e mb'e Ramote-gilade mb'eo. ³ Fa hoe t'i Akabe mpanjaka' Israele am' Iehosafate mpanjaka' Iehoda: Hindre-lia amako hao rehe mb'e Ramote-Gilade mb'eo? Le hoe ty natoi'e: Manahak' azo raho, naho ondatikoo hoe ondati'oo, vaho ho mpiama'o añ'aly zahay.

⁴ Fe hoe t'Iehosafate amy mpanjaka' Israele: Ehe, añontaneo heike ty tsara' IEHOVÀ. ⁵ Natonto' i Akabe amy zao o mpitokio, ondaty efa-jato, le nanoa'e ty hoe; Hionjomb'e Ramote-gilade hihotakotake hao tika, he hifonen-draho? Le hoe iereo: Mionjona, amy t'ie hatolon' Añahare am-pitá' i mpanjakay. ⁶ Fe hoe t'Iehosafate: Tsy amam-pitoki' IEHOVÀ hao ty atoy, hañontanean-tika? ⁷ Le hoe ty mpanjaka' Israele am' Iehosafate: Mbe eo t'indaty mete hampañontanean-tika am' IEHOVÀ, f'ie hejeko; fa le lia'e tsy itokia'e ty hasoa, toe nainai'e raty; i Mikaià ana' Imlà 'nio.

Le hoe t'Iehosafate; Ehe tsy hanao zay ty mpanjaka. ⁸ Aa le tinoka' i mpanjaka' Israeley ty mpifehe ami'ty hoe: Hitrifo masika t'i Mikaià ana' Imlà. ⁹ Songa niambesatse amy fiambesa'ey ty mpanjaka' Israele naho Iehosafate, nisikiñe saro-mireparepa, le niambesatse an-toem-pifofohañe an-dalambei' i Somerone eo vaho sindre nitoky añatrefa' iereo eo o mpitokio. ¹⁰ Le niranjie' i Tsidkià ana' i Kenaanà ty tsifam-biñe vaho nanao ty hoe: Hoe t'IEHOVÀ: Iretoñañe ty hitrofaha'o o nte-Arameo ampara t'ie mongotse. ¹¹ Le sambe nitoky o mpitokio nanao ty hoe: Mionjona mb'e Ramote-Gilade, le mihenefa; fa hatolo' IEHOVÀ am-pità' i mpanjakay. ¹² Nanao ty hoe amy Mikaià i mpihitrike nitok' azey: Inao! songa mitoky hasoa amy mpanjakay o mpitokio, aa ehe te hindray ami'ty raik' am'iereo ty saontsi'o vaho mitaroña hasoa. ¹³ Le hoe t'i Mikaià: Kanao veloñe t'IEHOVÀ, ze tsaraen' Añahareko, zay ty ho volañeko. ¹⁴ Ie pok' amy mpanjakay, le hoe i mpanjakay ama'e: O Mikaià, hañavelo mb'e Ramote-gilade mb'eo hao zahay hialy he hifoneñako? le hoe re; Mionjona le mandreketa, fa hatolotse am-pità'o. ¹⁵ Le hoe i mpanjakay tama'e: Impire ty nandiliako azo ty tsy hivolañe ndra inoñ' inoñe naho tsy ty hahiti'e amy tahina' IEHOVÀ? ¹⁶ Le hoe re: Nitreako te niparaitak' an-kaboañe ey iaby t'Israele hoe añondry tsy amam-piarake; le hoe t'IEHOVÀ; Tsy amam-piarake iretoñañe, apoho songa himpoly mb'an-kiboho'e an-kanintsiñe ondatio. ¹⁷ Le hoe ty mpanjaka' Israele am' Iehosafate; Tsy vinolako hao t'ie tsy hitoky hasoa amako, fa raty? ¹⁸ le natovo'e ty hoe, Janjiño arè ty tsara' IEHOVÀ: Nitreako niambesatse am-piambesa'ey t'IEHOVÀ, le nijohañe ampità'e havana naho havia'e eo iaby i valobohòn-dikerañey. ¹⁹ Le hoe t'IEHOVÀ: Ia ty hanigike i Akabe mpanjaka' Israele, hampionjone'e mb'eo hikorovoke e Ramote-gilade aña? Aa le inao ty raike, le inay ka ty ila'e. ²⁰ Loneake amy zao ty fañahy nijohañe añatrefa' IEHOVÀ, nanao ty hoe: Zaho ty hanjizy aze. Le hoe t'IEHOVÀ ama'e: Akore? ²¹ Le hoe re, Hionjomb'eo raho ho fañahin-dremborake am-palie' o mpitoki'e iabio. Le hoe re: Toe ho sigihe'o vaho hañeneke; akia, ano. ²² Aa le ingo te nampipoha' IEHOVÀ am-palie' o mpitoki'o reo ty fañahy mandañitse*; fa toe hankàñe ty nitsara' IEHOVÀ azo. ²³ Nañarine aze t'i Tsidkià ana' i Kenaanà, le tinampifi'e ty fiambina' i Mikaià vaho nanao ty hoe: Nimb'aia ty fañahi' IEHOVÀ boak' amako hivolañe ama'o? ²⁴ Le hoe t'i Mikaià: Inao! ho isa'o amy andro himoaha'o an-traño añate'e ao hietaha'oy. ²⁵ Le hoe ty mpanjaka' Israele, Endeso t'i Mikaià, le ampolio amy Amone mpifehe' i rovay naho am' Ioase anam-panjaka ao; ²⁶ le ano ty hoe: Hoe i mpanjakay: Apoho an-drohy ao tia; vaho fahano mofon-kasotriañe naho ranom-pijaleañe, ampara' te mimpoly an-kanintsin-draho. ²⁷ Le hoe t'i Mikaià, Aa kanao himpoly an-kanintsin-drehe, tsy nitsara añaamako t'IEHOVÀ. Le hoe re: Janjiño zay ry ondatio, inahareo iaby.

²⁸ Aa le nionjoñe mb'e Ramote-gilade mb'eo i mpanjaka' Israeley naho Iehosafate mpanjaka' Iehoda. ²⁹ Le hoe ty mpanjaka' Israele am' Iehosafate; Hihonohono raho te hizilik' an-kotakotak' ao; f'ihe ka, aombeo o saro'o mireparepao. Aa le nañonohono-vatañe i mpanjaka' Israeley; vaho nimoak' an-kotakotak' ao iereo. ³⁰ Fe hoe ty nafanto' i mpanjaka' i Aramey amo mpifehen-tsarete'eo; Ko ialia'o ty kedeke ndra ty bey naho tsy i mpanjaka' Israeley avao. ³¹ Ie amy zao naho niisa' o mpifehen-tsareteo t'Iehosafate le hoe iereo: Ingo i mpanjaka' Israeley. Aa le nitoliha' iareo hialy; fe nikoike t'Iehosafate le nañolotse aze t'IEHOVÀ

* 18:22 Te II 2:11

vaho niroroten' Añahare iereo hisitake. ³² Aa ie nirendre' o mpifehe sareteo t'ie tsy i mpanjaka' Israeley le nivalike tsy nihoridaña'e. ³³ Fe teo t'indaty nampivoho-pale tsinahi'e nahatrofaké i mpanjaka' Israeley añivo' o fikala'e ambane naho i aron' araña'ey, le hoe re amy mpinday saretey; Ampivioño o fità'oo, le ampiavoto amy valobohòkey raho fa loho-fere. ³⁴ Niindra avao i hotakotakey amy andro zay; ie amy zao nahafijohañe antsarete ao niatreke o nte-Arameo i mpanjaka' Israeley am-para' te hariva; le nihomake te nitsofotse i àndroy.

19

¹ Aa le nimpoly an-kanintsiñe mb' añ'anjomba'e e Ierosalaime aña t'Iehosafate. ² Le niavotse nifanalaka ama'e t'Iehò ana' i Kananý mpioniñe, nanao ty hoe am' Iehosafate mpanjaka: Ho nolora'o hao ty lo-tsereke; ho nikokoa'o hao ty malaiñe IEHOVÀ? Hametsaha' IEHOVÀ haviñerañe! ³ F'ie ahaoniñan-tsoa, kanao naria'o an-tane atoy o hazomangao vaho nitambozora'o arofo hitsoek' an' Andrianañahare. ⁴ Aa le nimoneñe e Ierosalaime ao t'Iehosafate naho niavotse indraike mb'am' ondaty mifotots' e Beersevà pak' ambohibohi' i Efraimeo vaho nampoli'e am' IEHOVÀ Andrianañaharen-droae' iareo. ⁵ Le nampijadoña'e mpizaka an-tane ao; amo rova-fatrata se e Iehoda iabio kirova-drova, ⁶ le hoe re amo mpizakao: Ereñereo o anoe' areoo; toe tsy ama' ondaty ty fizaka'areo, fa ama' IEHOVÀ, Ie ty mañimba anahareo mizakao. ⁷ Ee arè, te ho ama'areo ty fañeveñañe ama' IEHOVÀ; mitaoa vaho mitoloña; fa tsy aman-tahiñe t'IEHOVÀ Andrianañaharen-tika ndra firihiañe ndra fandrambesam-bokàñe. ⁸ Mbore nampijadoñe nte-Levy naho mpisoroñe vaho talèn' anjomban-droae' Israele e Ierosalaime ao t'Iehosafate ho ami'ty fizakà' IEHOVÀ naho ty hizakàñe o mpilie-drokoñe amo mpimoneñe e Ierosalameo. ⁹ Le nafanto'e am' iereo ty hoe: Hanoe' areo am-pañeveñañe ama' IEHOVÀ o raha zao, am-pigahiñañe naho an-kaampon'arofo. ¹⁰ Aa ndra mbia' mbia te tendrek' ama' areo boak' amandrolongo' areo mpimoneñe an-drova' iareo ao, añivo' ty lio naho ty lio, añivo' t'i Hake naho ty faly, ty fañè naho ty fepètse, le ho hatahatae' areo, ehe, tsy hanan-tahiñe am' IEHOVÀ, hampifetsahan-kaviñerañe ama' areo naho aman-drolongo' areo; ano zay, tsy hampanan-kakeo anahareo. ¹¹ Ingo, hifehe anahareo amy ze hene raha' IEHOVÀ t'i Amarià mpisorombey; naho amo raham-panjaka iabio i Zebadià, ana' Ismaele, talèn' anjomba Iehodà; vaho añatrefa' areo o mpifeleke nte-Levio. Mahasibeha am-pitoloñañe le himbae' IEHOVÀ o vantañeо.

20

¹ Añe zay, le nimb'eo hihotakotak' am'Iehosafate o ana' i Moabeo naho o ana' i Amoneo, mitraok' ami'ty ondaty ila'e. ² Le pok' eo ty nitalily am' Iehosafate ty hoe: Fa mb'atoa ty valobohòke boak' alafe' i riakey hirik' Arame aña; le inao fa e Katsetsone-tamare iereo, e En-gedý ey henaneo. ³ Nihembañe amy zao t'Iehosafate, le nifahara'e tsoeke t'IEHOVÀ vaho nanitsike Iehodà nitsèy lilitse. ⁴ Nifanontoñe amy zao t'Iehoda, nipay imba am' IEHOVÀ; le boak' amy ze hene rova' Iehoda ty nivoria' iareo hitsoeke IEHOVÀ. ⁵ Nijohañe amy favori' Iehoda naho Ierosalaimey t'Iehosafate, añ' anjomba' IEHOVÀ aolo' i kiririsa vaoy; ⁶ nanao ty hoe; Ry IEHOVÀ Andrianañaharen-droae'ay, tsy Ihe hao t'i Andrianañahare andindimoneñe ao? Tsy Ihe hao ty Mpifehe ze fonga fifehea' o kilakila'

ondatio? Le am-pità'o ty hafatrarañe naho ty haozarañe vaho tsy eo ty hahafitroatse ama'o. ⁷ Tsy Ihe hao, ry Andrianañahare'ay, ty nandroake o mpimoneñe an-tane atoio aolo' ondati'o Israeleo vaho natolo'o amo tiri' i Avrahame rañe'oo ho nainai'e donia? ⁸ Aa le nimoneñe ao iereo vaho nandranjy toe-masiñe ho amy tahina'oy ami'ty hoe: ⁹ Ie mifetsak' ama'ay ty hankàñe, i fibaray, i zakay, ke angorosy, he hasalikoña, le hijohañe añatrefa' ty anjomba toy naho aolo'o eo zahay (amy te aña'anjomba atoy ty tahina'o) naho itoreova'ay ty haembera'aiy, le hijanjin-dRehe vaho handrombake. ¹⁰ Ie amy zao, vazohò o ana' i Amoneo naho i Moabeo vaho i Vohi-Seirey, ie tsy nado'o ho tamè' Israele niavotse an-tane Mitsraime aña, naho niary tsy nirotsaheñe; ¹¹ hehe ty atolo' iareo ama'ay henaneo, ie mb' etoa hañary anay amy fanaña'o natolo'o anay ho lovay. ¹² Ry Andrianañahare'ay, Tsy Ihe hao ty hametsa-jaka am' iereo? tsy ama'ay ty hafatrarañe hahafitroatse amo valobohòke jabajaba mb' etoañe hiatreatre ama'aio, vaho tsy hai'ay ty hanoeñe, fe ama'o o fihaino'aio. ¹³ Le fonga nijohañe añatrefa' IEHOVÀ t'Iehodà naho o keleia'eo, o vali'eo vaho o amori'eo.

¹⁴ Aa le nivotrak' am' Iakaziele, ana' i Zekarià, ana' i Benaià, ana' Ieiele, ana' i Matanià nte-Levy amo ana' i Asafeo, ty Arofo' IEHOVÀ añaivo' i favoriy; ¹⁵ le hoe re: Mijanjiña, ry Iehoda naho o mpimone' Ierosalaimeo naho ry Iehosafate mpanjaka; Hoe ty nafè' IEHOVÀ ama' areo: Ko hembañe, ko miroreke ty amy valobohòke ra'elahi; toe tsy anahareo i hotakotakey, fa an' Andrianañahare. ¹⁶ Mizotsoa mb'am' iereo mb'eo hamaray; Inao! hionjomb' am-pitroara' i Zize iereo, le ho tendrek'ama' areo amy figadoña' i vavataney, aolo' i fatrambei' Ieroeley. ¹⁷ Tsy inahareo ty hialy amy hotakotakey, mijadoña eo, mijohaña an-kanintsîne vaho isaho ty fandrombaha' IEHOVÀ, ry Iehodà naho Ierosalaime, ko mirevendreveñe, ko mangetraketrake, miavota hiatreke iareo hamaray; fa hañimba anahareo t'IEHOVÀ. ¹⁸ Aa le nindròdreke, lahabañe mb' an-tane t'Iehosafate; le nibabok' añatrefa' IEHOVÀ iaby t'Iehoda naho o mpimone' Ierosalaimeo, nitalaho am' IEHOVÀ. ¹⁹ Nitroatse amy zao o nte-Levio, o anan-te-Kehàteo naho o anan-te-Koraheo handrenge IEHOVÀ Andrianañahare' Israele, am-pipoñafam-peo.

²⁰ Aa le nañaleñaleñe amy loak' androy iereo, nionjomb' an-diolio' i Tekoà mb'eo; ie nañavelo iereo le nijohañe eo t'Iehosafate, nanao ty hoe; Janjiño raho, ry Iehoda naho ry mpimone' Ierosalaimeo; iatò t'IEHOVÀ Andrianañahare' areo le hijadoñe; iantofo o mpitoki'eo le hahatafetetse. ²¹ Ie fa nisafiry am'ondatio le tinendre'e o hisabo amy IEHOVÀ naho o handrenge am-pihaminañe miavakeo, hiaolo o lahindefoñe, ami'ty hoe: Andriaño t'IEHOVÀ, fa nainai'e ty fiferenaiña'e.

²² Aa ie namototse nisabo naho nandrenge iereo, le nampipoha' IEHOVÀ mpamandroñe hanampoke o ana' i Amone naho i Moabe naho o tam-bohi-Seire ho naname Iehodao, le zinevo iereo. ²³ Amy te nitroatse amo mpimoneñe am-bohi-Seireio o ana' i Amone naho Moabeo, nanjamañe naho nandrotsake; aa ie fonga finongo' iereo o mpimone' i Seireo le songa nifanjamañe ka. ²⁴ Aa ie niheo mb'amy fitilik' abom-patrambeiy mb'eo t'Iehodà, le niisa' iereo i valobohòkey; hehe te lolo avao ty nifitak' an-tane eo, leo raike tsy nibotitsike. ²⁵ Ie nivotrake eo t'Iehosafate naho ondati'eo hikopake, le tendreke te tsifotofoto ty vara naho ty lolo niravake vato soa vaho nangozie' iereo, bey ta ty lefe-jinieñe; telo andro t'ie nangalake i kopakey ami'ty hamaro'e. ²⁶ Ie amy andro fahefatsey

le nifanontoñe am-bavatane' i *Berakà ao nañandriañe IEHOVÀ; aa le nitokaveñe ty hoe Vavatanem-Berakà ty añara' i toetsey pak' androany. ²⁷ Songa nimpoly amy zao ze ondati' Iehodà naho Ierosalaime, Iehosafate ty niaolo, nibalike mb'e Ierosalaime am-pirebehañe; ie nampirebehe' IEHOVÀ ty amo rafelahio. ²⁸ Aa le pok' e Ierosalaime ao iereo reketse fikontsañañe naho marovany naho trompetra nimb' añ' anjomba' IEHOVÀ mb'eo. ²⁹ Le nifetsak' amo fifehea' i taney iabio ty firevendreveñañe aman'Añahare, ie jinanjiñe te IEHOVÀ ty nialy amo rafelahi' Israeleo. ³⁰ Toe nianjiñe ty fifehea' Iehosafate; amy te nampitofàn' Añahare'e o añariary azeo.

³¹ Aa le nifehe Iehoda t'Iehosafate; niorotse nifehe amy tao'e faha telopolo-lime ambiy, le nifeleke e Ierosalaime ao roapolo taoñe lime amby, i Azobà ana' i Silhý ty tahinan-drene'e. ³² Nañavelo an-tsata' i Asa, rae'e re, tsy nivike ama'e fa nanao ze fahiti'e am-pihaino' IEHOVÀ. ³³ Fe mboe tsy nafahañaña aña o toets' aboo; amy te tsy najado' ondatio aman' Añaharen-droae' iareo o arofo' iareoo. ³⁴ Aa ty amo fitoloña' Iehosafate ila'eo, ty valoha'e pak' ampara'e, oniño t'ie misokitse amo enta' Ieho ana' i Kananý najoñe amy bokem-panjaka' Israeleo. ³⁵ Ie aña, nipteke amy Ahkazià, mpanjaka' Israele lo tserekey, t'Iehosafate mpanjaka' Iehoda; ³⁶ nirekets' ama'e hamboatse sambo hionjoñe mb'e Tarsise mb'eo; le namboare' iareo e Etsione-gebere ao i sambo rey. ³⁷ Aa le nitoky amy Iehosafate t'i Eliezere, ana' i Doda nte Maresà nanao ty hoe: Kanao nirekets' amy Ahkazià reho le fa nipozahe' IEHOVÀ o fitoloña'oo. Aa le nifoy iaby i sambo rey, tsy nahafionjoñe mb'e Tarsise.

21

¹ Le nitrao-piròtse aman-droae'e t'Iehosafate naho nalentek' amandroae'e an-drova' i Davide ao; Iehorame ana'e ty nandimbe aze nifehe. ² Nanan-droahalahy re, songa ana' Iehosafate: i Azarià naho Iekiele naho i Zekariaho naho i Azariaho naho i Mikaele naho i Sefatià songa ana' Iehosafate mpanjaka' Israele. ³ Nitoloran-drae'e ravoravo maro: volafoty naho volamena naho raha sarotse, reketse rova fatratse e Iehoda ao; fe natolo'e a' Iehorame ty fifeheañaña amy t'ie ty tañoloñoloña'e. ⁴ Aa ie fa nitroatse ambone' ty fifehean-drae'e naho nihafatratse, le fonga zinama'e am-pibara i rahalahi'e rey naho ty ila'o roandria' Israeleo. ⁵ Nitelo-polo taoñe ro' amby t'Iehorame te niorotse nifehe naho nifehe valo-taoñe e Ierosalaime ao, ⁶ naho nañavelo an-state' o mpanjaka' Israeleo manahake ty anjomba' i Akabe, (amy te tañanjomba'e ty anak' ampela' i Akabe) vaho nanao ze raty ampivazohoá' IEHOVÀ. ⁷ Fe tsy nisitra' IEHOVÀ ty handrotsake i anjomba' i Davidey, ty amy fañina nanoe'e amy Davidey, ie nampitama'e te hatolots'aze naho amo ana'eo ty failo hirehetse nainai'e donia. ⁸ Niola ambanem-pità' Iehoda ty Edome tañ' andro'e vaho nañoriñe mpanjaka hifehe iareo. ⁹ Nitsake mb'eo mindre amo mpifehe'eo t'Iehorame naho o sarete'e iabio; le nitroatse haleñe vaho linafa'e o nte Edome niarikatok' azeo naho o mpifehen-tsareteo. ¹⁰ Mbe miola ambanem-pità' Iehoda t'i Edome pak' androany; le niola henane zay ka t'i Libnà tambanem-pità'e; amy te naforintse'e t'IEHOVÀ, Andrianañaharen-droae'e. ¹¹ Mbore namboara'e toets' abo o haboa' Iehodao naho nampiveve o mpimone' Ierosalaimeo hanoa' iareo hakarapiloñañe vaho nazi'e ka t'Iehoda.

¹² Aa le niheo ama'e ty sokitse boak' amy Elià mpitoky, nanao ty hoe: Hoe t'IEHOVÀ Andrianañahare' i Davide rae'o; Kanao tsy nañaveloa'o ty sata'

* **20:26** Berakà: tata, fitongalehañe

Iehosafate rae'o naho ty sata' i Asa mpanjaka' Iehoda; ¹³ te mone mañavelo an-dala' o mpanjaka' Israeleo naho mampañarapilo Iehodà naho o mpimone' Ierosalaimeo, manahake ty nampañarapiloa' ty anjomba' i Akabe Israele; mbore zinama'o o rahalahi'o añ' anjomban-droae'o nisoa te ama'oo; ¹⁴ le Inao! ho lafae' IEHOVÀ angorosy mandrambañe ondati'oo naho o ana'oo naho o vali'oo vaho ze vara'o iaby; ¹⁵ vaho hanjekè' ty areten-troke loza rehe ampara' te mipontsoañ' ama'o o aova'oo ami'ty areteñe lomoñandro lomoñandroy. ¹⁶ Trinobo' IEHOVÀ ty tro' o nte-Pelistio naho o nte-Arabe añ'ila' o nte-Koseoo ty hiatreatre am' Iarovame; ¹⁷ le nionjo haname Iehoda iereo naho niboroboñak' ama'e naho fonga tinava' iareo ty vara añ' anjomba' i mpanjakay naho o ana-dahi'eo naho o vali'eo; vaho tsy nadoke anadahy re naho tsy Iehoakaze tsitson' ana'ey. ¹⁸ Ie aña zay le nampanjekè' IEHOVÀ am-pisafoa re ami'ty rare tsy lefe jangañeñe, ¹⁹ ie aña naho nimodo ty roe taoñe, le nipuroroake boak' ao o aova'eo ty amy arete'ey vaho navetra' i areten-dratiy. Tsy nanao afo bey ho aze ondatio manahake ty nanoa' iereo an-droae'e. ²⁰ Ni-telopolo taoñe ro'amby re te niorotse nifehe, le nifeleke e Ierosalaime ao valo taoñe vaho nienga tsy nikokoañe. Nalente' iareo an-drova' i Davide ao fa tsy amo kiborim-panjakao.

22

¹ Aa le nanoe' o mpimone' Ierosalaimeo mpanjaka t'i Ahkazià tsitson' ana'e handimbe aze, amy te fonga zinama' i firimboña' ondaty nindre amo nte-Arabe naname' i tobeo o zoke'eo; aa le nifehe t'i Ahkazià ana' Iehorame mpanjaka' Iehoda. ² Ni-efapolo taoñe ro'amby ty Ahkazià te niorotse nifehe, le nifehe rai-taoñe e Ierosalaime ao. I Atalià ana' i Omry ty tahinandrene'e. ³ Nanjotik' an-tsatan' anjomba' i Akabe ka re, fa nimpanolohevets' aze ty rene'e hanoa'e haloloañe. ⁴ Aa le nanoe'e haratiañe am-pivazohoá' IEHOVÀ manahake ty anjomba' i Akabe, ty amo mpanoro aze tafaram-pivetrahan-drae'eo, handrotsahañ' aze. ⁵ Ie nitsontik' amo fanoroa' iareoo, naho nindre am'Iehorame ana' i Akabe, mpanjaka' Israele, hialy amy Kazaele mpanjaka' i Arame e Ramote-gilade. Le finatsi' o nte-Arameo t'Iorame ⁶ vaho noly e Iezreele ao hijangañe amo fere'e natolots' aze e Ramào, ie nialy amy Kazaele mpanjaka' i Arame. Le nizotso mb'eo t'i Ahkazià ana' Iehorame mpanjaka' Iehoda hitilike i ana' i Akabey e Iezreele ao ami'ty hasilo'e. ⁷ I Andrianañahare ty nampandrotsake i Ahkazià ty amy nandenà'e mb'e Iorame mb'eo, f'ie nipok' eo le nindreza'e fiavotse am'Iehorame hiatreatre am' Ieho ana' i Nimsy noriza' IEHOVÀ hampipitsoke ty anjomba' i Akabe. ⁸ Aa ie nañeneke ty fizaka' Ieho amy anjomba' i Akabey, le nitendrek' amo ana-dona' Iehodao naho amo ana-drahalahi' i Ahkaziò niatrake i Ahkazià vaho zinama'e. ⁹ Pinai'e t'i Ahkazià le tsinepa' iareo—ie nietake e Somerone ao, le nendese' iereo mb'am' Ieho mb'eo vaho zinevo'e; le nalente' iareo, ami'ty asa' iareo ty hoe; Ana' Iehosafate re, i mpitsoeke IEHOVÀ an-kaampon' arofo'ey. Aa le tsy nanan' ozatse hahafitâñe i fifeheañey ty anjomba' i Ahkazià.

¹⁰ Ie nioni' i Atalià rene' i Ahkazià te nivetrake i ana'ey le niongake, nanjamañe ze fonga tirim-panjaka añ' anjomba' Iehoda ao. ¹¹ Fe rinambe' Iehosabeate anak' ampela' i mpanjakay t'Ioase, ana' i Ahkazià, le tinonga'e boak' amo anam-panjaka nizamaneñeo, le nakafi'e rekets' i mpiatrak' azey an-toem-piroroañe ao; aa le naeta' Iehosabeate anak' ampela' i mpanjaka vali' Iehoiada mpisoroñey, (ie rahavave' i Ahkazià), amy Atalià

re vaho tsy vinono. ¹² Naetake am' iereo añ'anjomban' Añahare ao enen-taoñe re; naho nifehe i taney t'i Atalià.

23

¹ Aa ie amy taom-pahafitoy, le nihafatratse t'Iehoiada, le rinambe'e o mpifehe-zatoo naho i Azarià ana' Ierohame naho Ismaele ana' Iehonane naho i Azarià ana' i Ovede naho i Maaseià ana' i Adaia naho i Elisafate ana' i Zikrý vaho nifañina am' iereo. ² Le nanitsike Iehodà iereo nanontoñe o nte-Levio amo hene' rova' Iehodao naho o talèn' anjomban-droae' Israeleo vaho niheo mb'e Ierosalaime mb'eo. ³ Nifañina amy mpanjakay añ'anjomban' Añahare ao i fivori-bey iabiy, le hoe t'Iehoiada am' iereo: Heheke te hifehe ty ana' i mpanjakay amy tsara' IEHOVÀ ty amo ana' i Davideoy. ⁴ Zao ty hanoe' areo: ty faha-telo' areo mpisoroñe naho nte-Levy mpizilik' ao amy SABATAY ro hañambeñe o lalambeio; ⁵ ty faha-telo'e ty ho añ'anjomba' i mpanjakay; ty faha-telo'e ty ho an-dalambei' i manantañey; vaho ho an-kiririsan' anjomba' IEHOVÀ eo ondaty iabio. ⁶ Ko ado' areo himoak' añañ anjomba' IEHOVÀ ao ndra ia'ia naho tsy o mpisoroñe naho o nte-Levy mpitoroñe avao; ie ro hizilik' ao, amy te miavake; vaho fonga hambena' ondatio o fanoroa' IEHOVÀ. ⁷ Hañarikatoke i mpanjakay o nte-Levio, songa hitañe ty fialia'e am-pitá'e; le ho vonoeñe ze ila'e mimoak' amy anjombay; vaho inahareo, mindreza amy mpanjakay ndra t'ie mizilike ndra te miakatse. ⁸ Aa le nanoe' o nte-Levio naho Iehoda iaby ze linili' Iehoiada, mpisoroñe, le songa rinambe'e ondati'eo, o hizilik' amy SABOTSEIO naho o hiakatse amy SABOTSEIO; amy te tsy navotso' Iehoiada o mpirimboñe. ⁹ Mbore zinara' Iehoiada, mpisoroñe amo mpifehe-zatoo o lefoñe naho fikalañ' araña naho fikalan-defo' i Davide mpanjaka, boak' añañ anjomban' Añahareo. ¹⁰ Le nalaha'e ondaty iabio, songa reke-pialiañe am-pitá'e, boak' ankavana' i anjombay pak' ankavia' i anjombay, am-piozañe amy kitreliy naho amy anjombay, añañisehoañe i mpanjakay. ¹¹ Nampiavote' iereo amy zao i ana-mpanjakay naho naombe ama'e i sabakay naho natolotse aze i fañinay vaho nanoeñe mpanjaka, noriza' Iehoiada naho o ana'eo vaho nanao ty hoe: Mahavelo ry mpanjaka. ¹² Ie tsinano' i Atalià ty fikoraha' ondaty nilay handrenge i mpanjakaio le nimoak' añañ anjomba' IEHOVÀ ao mb'am' ondatio mb'eo. ¹³ Niisa'e te inge nijohañe marine i faha'ey am-pimoahañe eo i mpanjakay naho nitotok' amy mpanjakay o roandriañe naho o mpitan-trompetrao naho nirebeke iaby ondati' i taneio naho nampipopò trompetra naho nitintim-pitihañe o mpisaboo, nisabo vaho nitarike am-pandrengeañe. Aa le niriate' i Atalià o saro'eo nanao ty hoe: Fiola! Fiola! ¹⁴ Nampiakare' Iehoiada amo mpifehe-zato nifeleke i valobohòkeio re, le nanoa'e ty hoe: Akaro añaivo' o firimboñañe añañ anjombao re, le zevò am-pibara ze mañorik' aze; ami'ty nandilia' i mpisoroñey ty hoe: Ko vonoeñe añañ anjomba' IEHOVÀ ao. ¹⁵ Aa le tsinepa' iareo am-pitáñe; le ie pok' amy fimoahan-tsoavalan' anjombam-panjakay le zinevo' iereo. ¹⁶ Le nifañina añaivo'e naho ondaty iabio vaho i mpanjakay t'Iehoida, t'ie ho ondati' IEHOVÀ. ¹⁷ Aa le nomb'an-traño' i Baale mb'eo ondaty iabio nandrotsak' aze, nandemok' o kitreli'eo naho o sare'eo, vaho vinono' iareo t'i Matane mpisoro' i Baale aolo' o kitrelio. ¹⁸ Le tinendre' Iehoiada o mpifehe' i anjomba' IEHOVÀ ho ambanem-pitá' o mpisoroñe nte-Levy zinara' i Davide am-pirimboñañe mifandimbe añañ anjomba' IEHOVÀ ao hañenga soroñe am' IEHOVÀ, ty amy nanokirañe amy Tsara' i Mosèy, am-pirebehañe naho takasy nampanoe' i Davide.

¹⁹ Tinendre'e ka o mpiamben-dala' i anjomba' IEHOVÀio, soa tsy amandalañe hiziliha'e t'indaty tsy malio. ²⁰ Le nendese'e o mpifele-jatoo naho o roandriañeo naho o mpifelek' ondatio naho ze hene ondati' i taney vaho nampizotsoe' boak' añ' anjomba' IEHOVÀ ao i mpanjakay; le nizilik' amy lalambey amboney mb' añ' anjomba' i mpanjakay mb'eo re vaho nampiambesareñe am-piambesam-pifeheañe eo i mpanjakay. ²¹ Le nandia taroba iaby ondati' i taneio vaho nitofa i rovay amy te vinono am-pibara t'i Atalià.

24

¹ Fito taoñe t'Ioase te niorotse nifehe; le nifehe efa-polo taoñe e Ierosalaime ao. I Tsibia nte-Bersebà ty tahinan-drene'e. ² Le nanao ze soa am-pivazoho' IEHOVÀ t'Ioase amy ze hene' andro' Iehoiada mpisoroñe. ³ Nangala-baly roe ho aze t'Iehoiada, le nisamak' ana-dahy naho anak' ampela. ⁴ Ie aña, le tañ' arofo' Ioase ty nanomonty i anjomba' IEHOVÀ. ⁵ Natonto'e o mpisoroñeo naho o nte-Levio le nanao'e ty hoe, Akia, mb'amo rova' Iehodao vaho atontono am' Israele iaby ty drala hampisomontiañe ty anjomban' Añahare boa-taoñe, le ilozoho! Fe tsy nahimbañe amy rahay o nte-Levio. ⁶ Aa le kinanj'i i mpanjakay t'Iehoiada, talè, le hoe re ama'e, Aa vaho akore te tsy nipaia'o amo nte-Levio ty hañakatse am' Iehoda naho am' Ierosalaime ao i haba' i Mosè mpitoro' IEHOVÀ naho amy valobohò' Israele ho amy kibohom-pañinay. ⁷ Amy te dinemodemo' o ana-dahi' i Atalià rakemba lo-tserekeo i anjomban' Añaharey naho nengae' iereo amo Baaleo o raha navaheñe añ'anjomba' IEHOVÀO. ⁸ Aa le nandranjy vata iereo ty amy lili' i mpanjakaiy naho napo' iareo alafe'e ao an-dalam-bein' anjomba' IEHOVÀ eo; ⁹ naho nitsey e Iehoda vaho e Ierosalaime ao ty hindeseñe amy IEHOVÀ i vili-loha nampanoe' i Mosè mpitoron' Añahare am' Israele am-patrambeiy. ¹⁰ Le nirebeke iaby o roandriañeo naho ondatio, songa ninday vaho nampipok' amy vatay ampara' t'ie niheneke. ¹¹ Ie amy zao naho nazilim-pitá' o nte-Levio i vatay vaho nioniñe te maro o dralao, le nimb'eo i mpitan-tsokim-panjakay naho ty sorotá' i mpisorom-beiy le nikoahe' iereo i vatay vaho nampolieñe an-toe'e eo; zay ty nanoe' iareo handro an-kandro vaho nanonton-drala tsifotofoto. ¹² Natolo' i mpanjakay naho Iehoiada amo mpitoloñe am-pitoroñañe i anjomba' IEHOVÀIO zay vaho nañarama mpandrafi-bato naho mpandranjy, hampisomontiañe i anjomba' IEHOVÀY naho mpanefe viñe vaho torisike hikotokotok' añ' anjomba' IEHOVÀY. ¹³ Aa le nifanehake o mpitoloñe naho nifonitse am-pitá' iareo i asay naho nifonire' iareo manahake te taolo i anjomban' Añaharey vaho nañafatratse aze. ¹⁴ Ie nifonitse le nendese' iareo añatrefa' i mpanjakay naho Iehoiada eo o drala tsy nirì'eo vaho ie ty nitsenea' iareo fanake ho a i anjomba' IEHOVÀY, fana-pitoroñañe naho fañengañe naho fioke naho fanake volamena naho volafoty vaho nañenga soroñe añ' anjomba' IEHOVÀ ao nainai'e tañ' andro' Iehoiadà.

¹⁵ Fe nigain-kantetse t'Iehoiada ie ni-lifots' andro le nivilasy; zato-tsitelopolo taoñe t'ie nihomake. ¹⁶ Le nalente' iereo an-drova' i Davide amo mpanjakao, ie nanao soa am' Israele naho aman' Añahare vaho amy anjomba'ey. ¹⁷ Ie aña ty nihomaha' Iehoiada le nomb' amy mpanjakay o roandria' Iehodao niambane ama'e; vaho hinao' i mpanjakay. ¹⁸ Le nadò' iareo i anjomba' IEHOVÀ Andrianañaharen-droae' iareoy naho nitoroñe o Aserào naho o raham-pahasiveo vaho nifetsak' am' Iehoda naho am' Ierosalaime ty haviñerañe ty amy hakeo zay. ¹⁹ Nampihitrifañe

mpitoky hampipoly iareo mb'am' IEHOVÀ, aa ndra t'ie nitolom-pitaroñe tsy nimete nanolo-ravembia iereo. ²⁰ Aa le niheo amy Zekarià, ana' Iehoiada mpisoroñe t'i Arofon' Añahare naho nijohañe am'ondatio nanao ty hoe: Hoe ty tsaràn' Añahare: Akore ty fandilara' areo o lili' IEHOVÀ?* Tsy hiraorao; aa kanao naforintse' areo t'IEHOVÀ le nifarie'e ka nahareo. ²¹ Fe nikinia aze iereo vaho nametsaham-bato an-kiririsan' anjomba' IEHOVÀ eo ami'ty nandilia' i mpanjakay. ²² Aa le tsy nitiahi' Ioase mpanjaka ty fitretreza' Iehoiada rae'e aze, te mone vinono'e i ana-dahi'ey, ze nanao ty hoe amy fitsingoro'ey: Ho vazoho' IEHOVÀ vaho ho valè'e. ²³ Aa ie amy fivariña' i taoñey, naname aze ty valobohò' i Arame; nimb' e Iehoda naho mb'e Ierosalaime mb'eo le zinevo' iereo am'ondatio o mpiaolo' ondaty iabio vaho fonga nahitri' iareo amy mpanjaka' i Damesèkey aña ty nikopahe' iereo. ²⁴ Toe am-pirimboña' ondaty tsy ampeampe i valobohòn' Aramey te naname, fa natolo' IEHOVÀ am-pità'e ty valobohòke jabajaba amy t'ie namorintseñe IEHOVÀ Andrianañaharen-droae' iareo. Aa le nametsa-jaka amy Ioase iereo, ²⁵ naho nieng' aze naho fa navoretra' iareo am-pere, le nikilily aze o mpitoro'eo ty amy lio' i ana' Iehoiada mpisoroñey naho vinono' iareo am-pandrea'e eo, nikoromake; vaho naleveñe an-drova' i Davide ao, fe tsy nalentek' amo kiborim-panjakao. ²⁶ I Zabade, ana' i Simeate, nte-Amone naho Iehozabade ana' i Simerite, nte-Moabe ty nikilily aze. ²⁷ Aa naho o ana'eo naho ty fitoabora' o fetse ama'eo vaho ty nampisomontie'e i anjomban' Añaharey, oniño te sinokitse antalily fonitse amy boke' o mpanjakaoy. I Amatsià ana'e ty nandimbe aze nifehe.

25

¹ Roapolo taoñe lim' amby t'i Amatsià te niorotse nifehe, le nifehe roapolo taoñe sive amby e Ierosalaime ao. Iehoadane nte-Ierosalaime ty tahinan-drene'e. ² Nanao soa am-pivazoho' IEHOVÀ eo re, fe tsy an-kaampon' arofo. ³ Aa, ie vata'e nifejañe i fifehea'ey, le vinono'e i mpitoroñe nañoho-doza aman-drae'e rey, ⁴ fe tsy vinono'e o ana'eo ie nanao ze sinokitse amy Hake, amy boke' i Mosey, amy lili' IEHOVÀ ty hoe: Tsy havetrake ty amo ana'eo o roae'eo vaho tsy havetrake ty amandroae'e o ana'eo, fa songa hivetrake ty amo hakeo'eo. ⁵ Mbore natonto' i Amatsià t'Iehoda naho nanoe'e mpifelek' arivo naho mpifele-jato ty aman' anjomban-droae'e, le nitsitsife'e t'Iehodà naho i Beniamine namolily o roapolo taoñe mañamboneo, nitendreke te telo hetse t'indaty nilefe, na-hafionjoñe mb'añ'aly naho nahatan-defoñe vaho fikalañe. ⁶ Nikarama'e ka ty fanalolahy mahasibeke rai-hetse boake Israele ao ami'ty talenta volafoty zato. ⁷ Fe niheo ama'e mb'eo ty ondatin' Añahare nanao ty hoe: Ry mpanjaka, ko ampindrezeñe ama'o i firimboña' Israeley, ie tsy am' Israele t'IEHOVÀ vaho tsy mpiaman-dra iaia amo ana' i Efraimeo. ⁸ Aa naho mb'eo rehe, le ano! mihafatrara an-kotakotake tsy mone hampitsingoritrien' Añahare aolo' o rafelahi'oo; fa aman' Añahare ty haozarañe, ke hañolotse he handrotsake. ⁹ Le hoe t'i Amatsià am'indatin' Añaharey. Aa vaho atao'ay akore i talenta zato natoloko amy firimboña' Israeley? Le hoe ty natoi' indatin' Añaharey, Mahafanolotse maro mandikoatse zay t'IEHOVÀ. ¹⁰ Aa le nampolie' i Amatsià o lahindefoñe nimb' ama'e boak' Efraimeo; fe nisolebotse am' Iehodà ty haboseha' iareo vaho nimpoly am-piforoforoña. ¹¹ Aa le nihafatrarem-batañe t'i Amatsià,

* **24:20** Mik 3:8, Jao 16:8

le niaoloa'e ondati'eo naho nimb'am-bavatanen-tsira mb'eo vaho zinama'e ty rai-ale amo ana' i Seireo.

¹² Tsinepa' o ana' Iehodao ka ty rai-ale veloñe, le nasese' iereo mb' ambone teva, le nahereretsa' iareo boak' ambone' i herakerakey vaho nifoifoy. ¹³ Nivolose' i firimboñan-dahindefoñe nampolie' i Amatsià tsy hionjoñe mb'an-kotakotakey o rova' Iehodà boake Somerone pake Betekoroneo naho nanjamañe ty telo arivo am' iereo vaho nampikopake vara maro.

¹⁴ Ie nimpoly amy nanjamana'e o nte-Edomeoy t'i Amatsià, le nendese'e o ndrahare' o ana' i Seireo le natroa'e ho 'ndrahare'e vaho nibokobokoa'e naho nañoroa'e emboke. ¹⁵ Aa le nisolebotse amy Amatsià ty haviñera' IEHOVÀ, le nañiraha'e mpitoky nanao ty hoe, Ino ty nipaia'o o ndrahare' ondaty tsy naharombake ondati'eo am-pità'oo? ¹⁶ Ie nisaontsia'e i entañe zay le hoe re tama'e: Tinendre ho mpanolo-kevem-panjaka v'iheo? Mifoneña; akore te ihe ho lafaeñe? le nijihetse i mpitokiy vaho nanao ty hoe: Apotako te sinafirin' Añahare ty handrotsake azo, amy te nanoe'o o raha zao vaho tsy hinao'o i natorokoy.

¹⁷ Nandrambe hevetse amy zao t'i Amatsià, mpanjaka' Iehoda vaho nampañitrike mb'am' Ioase, ana' Iehoahaze, ana' Ieho, mpanjaka' Israele ty hoe: Mb' etoan-drehe hifañatrefan-tika laharañe. ¹⁸ Le nampisangitrife' Ioase mpanjaka' Israele amy Amatsià mpanjaka' Iehoda ty hoe: Nahitri' ty hisatse e Libanone aña amy mendoraveñe e Libanoney ty hoe: Atoloro amy ana-dahikoy i anak' ampela'oy ho vali'e. Fe niary eo o bibi-li' i Libanoneo nandalia i hisatsey. ¹⁹ Manao ty hoe rehe, te, Ingo, fa linafako t'i Edome; aa le mitoabotse añ' arofo ao rehe, mibohaboha; fe imoneño ty akiba'o; ino ty hikaiha'o ty joy, hikorovoke, ihe naho Iehoda mindre ama'oy? ²⁰ Fe tsy hinao' i Amatsià, fa boak' aman' Añahare i rahay, hanolora'e am-pitàn-drafelahi' iareo, ie nipay o 'ndrahare' Edomeo. ²¹ Aa le nionjo mb'eo t'Ioase mpanjaka' Israele; le nifañisa-daharañe, ie naho i Amatsià mpanjaka' Iehoda, e Betesemese' Iehoda eo. ²² Le nikorovok' añañatrefa' Israele eo t'Iehoda vaho nitriban-day, songa mb' an-kiboho'e mb'eo; ²³ naho rinambe' Ioase, mpanjaka' Israele t'i Amatsià mpanjaka' Iehoda, ana' Ioase, ana' Iehoakase, e Betesemese ao naho nendese'e mb'e Ierosalaime mb'eo vaho narotsa'e ty kijoli' Ierosalaime boak' an-dalam-bei' i Efraime ey, pak'an-dalam-bein-kotsok'eo, kihoefa-jato. ²⁴ Le tinava'e iaby o volamena naho volafoty naho o fanake nizoeñe añ' anjomban' Añahare amy Ovede-edome naho am-panontonam-bará' i anjombam-panjakaio naho ninday ondaty an-drohy vaho nimpoly mb'e Somerone mb'eo. ²⁵ Mbe niveloñe folo-taoñe lim' amby tamy fivetraha' Ioase ana' Iehoakaze, mpanjaka' Israeley t'i Amatsià, ana' Ioase, mpanjaka' Iehoda. ²⁶ Aa naho o fitoloña' i Amatsià boak' am-baloha'e pak' am-para'eo, tsy fa sinokitse amy bokem-panjaka' Iehoda naho Israeley hao? ²⁷ Le nikinia aze o e Ierosalaimeo ty amy nitoliha' i Amatsià tsy hañorike IEHOVÀ, ie nipsitsike mb'e Lakise mb'eo, fe nañirahañe e Lakise aña vaho vinono ao. ²⁸ Nendeseñe an-tsoavala vaho naleveñe aman-droae'e an-drova' Iehoda ao.

26

¹ Rinambe' o hene ondati' Iehodao t'i Ozià, ie ni-folo-tao-eneñ' amby, le nanoe'e iereo mpanjaka handimbe an-drae'e Amatsià. ² Namboare'e t'i Elote vaho nahere'e am'Iehoda, ie fa nirotse aman-droae'e i mpanjakay. ³ Folo-taoñe eneñ' amby t'i Ozià te niorotse nifehe, le nifehe limampolo-ro'

amby taoñe e Ierosalaime ao. Iekolià nte-Ierosalaime ty tahinan-drene'e.
⁴ Le nanao ty fahiti'e am-pivazohoa' IEHOVÀ manahake ty nanoen-drae'e Amatsiày. ⁵ Nitolom-pipay an' Andrianañahare re tañ' andro' i Zekarià, le nampahihits' aze o aroñaron' Añahareo; vaho nampiraoraoen' Añahare amo hene andro nipaia'e IEHOVÀO. ⁶ Le nionjomb'eo re nialy amo nte-Pelistio, le rinoba'e ty kijoli' i Gate naho ty kijoli' Iabnè naho ty kijoli' Asdode vaho namboare'e rova mañohoke i Asdode añivo' o nte-Pelistio. ⁷ Le nañolotse aze amo nte-Pelistio naho amo nte-Arabe nimoneñe e Gorbaaleo naho amo nte-Mehoneo t'i Andrianañahare. ⁸ Le nañenga rorotse amy Ozià o nte-Amoneo; vaho niboile mb'eo mb'eo ty tahina'e pak' am-pimoahañe e Mitsraime aña, amy te ra'elahy ty hafatrara'e. ⁹ Mbore namboatse fitalakesañ' abo e Ierosalaime ao t'i Ozià amy lalambeinkotskey naho amy lalambeim-bavataney naho amy lalambein-kotskey vaho nihafatrare'e. ¹⁰ Niranjie'e fitalakesañ' abo ka ty an-dratraratra aña naho nihaly vovoñe maro, ie aman-kare maro, ndra an-tane kepak' ao, ndra a montoñe ao, naho mpiarake naho mpañalahala vahe am-bohitse ao naho e Karmele aña, fa nitea'e ty nitolon-tane. ¹¹ Toe nanan-dahindefoñe t'i Ozià, mpionjomb' aña'ly am-pirimboñañe ty ami'ty ia' nilahare' Ieiele mpanokitse naho i Maaseià mpitoloñe, ambanem-pità' i Kananià, raik' amo mpifehe' i mpanjakaio. ¹² Ty ia' o hene talèn' anjomban-draeo, o fanalalahy nahasibekeo, le ro'arivo-tsi-enenjato. ¹³ Ambanem-pità' iareo ty valobohòm-pialy naòke, telo-hetse-tsi-fito-arivo-tsi-liman-jato, ty mpialy an-kafatrarañe, hañolotse i mpanjakay amy rafelahiy. ¹⁴ Nihentseñe fikalan-defoñe naho lefoñe naho aron-doha naho sarimbo viñe tinenoñe naho fale vaho vato-piletse ho a iareo, toe ho a i valobohòkey, t'i Ozià. ¹⁵ Nandranjia'e masina t'Ierosalaime, sata' ondaty mahimbañe, amo fitalakesañ' aboo naho an-kotske ey, ho fampihirirìñañe ana-pale naho vato jabajaba. Le niboile tsietoitane aña ty tahina'e, amy t'ie nolorañe soa am-para' te naozatse.

¹⁶ Ie naozatse, le nientatse ty arofo'e ho ami'ty fandrotsahañ' aze ie nandilatse amy IEHOVÀ Andrianañahare'e; amy t'ie nimoake an-kiboho' IEHOVÀ ao hañembok' amy kitrelim-pañembohañey. ¹⁷ Nañorik' aze ao t'i Azarià mpisoroñe reketse ty mpisoro' IEHOVÀ valompolo, ondaty mahasibeke; ¹⁸ le natretrè' iareo t'i Ozià mpanjaka, nanao ty hoe ama'e: Tsy ihe, ry Ozià, ty mañembok' am' IEHOVÀ fa o mpisoroñe ana' i Aharone norizañe ro hañemboke; iavoto o toetse masiñe, fa nandilatse; ie tsy hañonjoñ' azo amy IEHOVÀ Andrianañahare. ¹⁹ Niforoforo amy zao t'i Ozià, ie am-pità'e eo ty fañembohañe hañemboha'e, le niloroloroa'e i mpisoroñe rey fe niboak' an-kandri'e eo ty angamae, aña'atrefa' i mpisoroñe rey, aña' ila' i kitrelim-pañembohañey, aña' anjomba' IEHOVÀ ao. ²⁰ Hene niisa' i Azarià mpisorom-bey naho i mpisoroñe rey, te inge, niangamae an-dahara'e eo, le naronje' iareo boak' ao ami'ty manao zao; eka toe nihitrihitry t'ie niavotse, amy nandafa' IEHOVÀ azey. ²¹ Niangamae am-para' ty andro nivetraha'e t'i Ozià mpanjaka, le nimoneñe an-traño navik' ao amy haangamae'ey; ie naitoñañ' amy anjomba' IEHOVÀY; le nifehe ty anjombam-panjaka t'Iotame ana'e, nizaka ondati' i taneio. ²² Ty ila' o fitoloña' i Ozià, boak' am-baloha'e pak' am-para'eo le sinoki' Iesaià mpitoky, ana' i Amotse. ²³ Aa le nitrao firòtse aman-droae'e t'i Ozià; le nalente' iareo marine an-droae'e an-tanem-pandeveñam-panjaka; fa hoe iereo, Angamae re. Le nandimbe aze nifehe t'Iotame, ana'e.

27

¹ Niroapolo taoñe lim' amby t'Iotame te niorotse nifehe, le nifehe folo-taoñe eneñ' amby e Ierosalaime ao; Ierosà, ana' i Tsadoke, ty tahinandrene'e; ² le nanao ty fahiti'e am-pihaino' IEHOVÀ, an-tsatan-drae'e Ozià iaby; f'ie tsy nimoak' an-kiboho' IEHOVÀ ao. Fe mbe nitolon-kaloloañe avao ondatio. ³ Namboare'e ty lalambey ambone' i anjomba' IEHOVÀ, le natratrañahe'e ty kijoli' i Ofele. ⁴ Mbore namboare'e rova am-bohibohi' Iehoda añe naho toetse fatratse reke-pitalakesañ'abo añ'ala ao. ⁵ Nialia'e i mpanjaka' o ana' i Amoneoy vaho nahareketse. Nandroroñe talenta volafoty zato ama'e amy taoñey o ana' i Amoneo naho fañaranam-barebolè rai-ale naho vare-hordea rai-ale. Mira amy zay ty nandroroña' o ana' i Amoneo aze amy taom-paharoe naho taom-pahatelo. ⁶ Aa le nihaftatratse t'Iotame, amy te nalaha'e añatrefa' IEHOVÀ Andrianañahare'e o lia'eo. ⁷ Aa naho o fitoloña' Iotame ila'eo, o ali'e iabio naho o sata'eo, oniño te sinokitse amy bokem-panjaka' Israele naho Iehodà. ⁸ Roapolo taoñe lim' amby re te niorotse nifehe le nifehe folo taoñe eneñ'amby e Ierosalaime ao. ⁹ Le nitrao-piròtse aman-droae'e naho nalenteké an-drova' i Davide ao vaho nandimbe aze nifehe t'i Ahkaze ana'e.

28

¹ Roapolo taoñe t'i Ahkaze te niorotse nifehe; le nifehe folo taoñe eneñ' amby e Ierosalaime ao; fe tsy nanao ty fahiti'e am-pihaino' IEHOVÀ manahake ty rae'e Davide; ² te mone nitsontik' an-dala' o mpanjaka' Israeleo vaho nandranjy sare trinanake ho amo Baaleo, ³ mbore nañembok' am-bavatanen' ana' i Hinome ao naho noroa'e añafo ao o ana'eo, ty amy haloloa' o kilakila' ondaty rinoa' IEHOVÀ añatrefa' o ana' Israeleoo. ⁴ Le nanoe'e soroñe vaho nañenga amo tambohoo naho ankaboañe eo naho ambane' ze hatae mandrevake iaby. ⁵ Toly ndra natolo' IEHOVÀ Andrianañahare'e am-pitam-panjaka' i Aramey; le linafa' iareo, le nasese an-drohy ty ondati'e tsifotofoto, nente' iereo mb'e Damesèke mb'eo. Natolotse am-pitam-panjaka' Israele ka re, ze nandafa aze am-pizamanambey.

⁶ I Pekà ana' i Remalià ty nanjamañe rai-hetse-tsi-ro'ale ami'ty andro raike, songa ondaty mahasibeke; amy t'ie namorintseñe IEHOVÀ Andrianañaharen-droae' iareo. ⁷ Le i Zikrý, fanalolahi' i Efraimey ty nanjevoñe i Maaseià ana' i mpanjakay naho i Azrikame, mpifehe' i anjombay naho i Elkanà mpiamy mpanjakay. ⁸ Le nasese' o ana' Israeleo mb'eo an-drohy ty roe-hetse amo rahalahi'eo: rakemba naho ana-dahy naho anak' ampela vaho nitavañe vara tsifotofoto am' iereo, le nente' iereo mb'e Somerone aña i kinopakey. ⁹ Fe teo ty mpitoki' IEHOVÀ, i Ovede ty tahina'e, niavotse naho nifanalaka amy valobohòke nimb'e Somerone mb'eo, le nanoa'e ty hoe: Inao, niviñera' IEHOVÀ Andrianañaharen-droae' areo t'Iehoda, le nitolora'e am-pitá' areo, fe zinama' areo an-kabosehañe nahatakatse andindiñe aña. ¹⁰ Ie amy zao mipay hinday o ana' Iehodao naho Ierosalaime ambane' areo ho ondevo lahy naho ondevo ampela; fe tsy ama' areo ao hao ty aman-kakeo amy IEHOVÀ Andrianañahare' areo? ¹¹ Aa le janjiño raho, ampolio o mpirohy narohi' areo amo longo' areoo; fa miforoforo ama' areo ty haviñera' IEHOVÀ. ¹² Niongake hiatreatre o niavy boak' amy aliio amy zao ty mpiaolo' i Efraime ila'e, i Azarià ana' Iehonàne naho i Berekìà ana' i Mesilemote naho Iekizkià ana' i Salome naho i Amasa ana' i Hadlay, ¹³ vaho nanao ty hoe am' iereo, Ko endese' areo mb'etoa o narohtio; ie mipay hanaña' IEHOVÀ tahiñe tika, hanovoñe o hakeo naho

tahin-tikañeo; fa ra'elahi o hakeon-tikañeo vaho haviñerañe miforoforo ty am' Israele. ¹⁴ Aa le napo' o lahindefoñe añatrefa' o roandriañeo naho i favoribey iabiy o an-drohio naho i kinopakey. ¹⁵ Le nióngake i niantoñoñe an-tahinañe rey nandrambe o an-drohio naho nangalak' amo kinopakeo hampisikina' iareo o tsi-antsaroñe am' iereoo naho nampisaroñe' iareo naho nañombean-kana naho nanjotsoañe mahakama naho rano naho hinoso' iareo menake naho najo' iareo am-borike o maleme am' iereoo naho nendese' iareo mb'e Ieriko, i rovan-tsatrañey, mb' aman-drolongo' iareo aña vaho nimpoly mb'e Somerone mb'eo.

¹⁶ Nampañitrik' amo mpanjaka' i Asoreo amy zao t'i Ahkaze mpanjaka nipay imba, ¹⁷ amy te pok' eo indraike o nte-Edomeo nandafa Iehoda vaho ninday mpirohy aña. ¹⁸ Naname o rova an-tane petrakeo naho o atimo' Iehodao o nte-Pelistio, le rinambe' iareo ty Betesamese naho i Aiialone naho i Gederote naho i Soko rekets' o tanà'eo naho i Timnà rekets' o tanà'eo naho i Gimzo rekets' o tanà'eo vaho nimoneñe ao. ¹⁹ Toe nafotsa' IEHOVÀ t'Iehoda ty amy Ahkaze mpanjaka' Israele*; ie nampanaña'e tahiñe Iehoda vaho vata'e niola amy IEHOVÀ. ²⁰ Nimb' ama'e mb'eo t'i Tilgatepilnesere, mpanjaka' i Asore, f'ie namorekeke aze fa tsy nampaozatse. ²¹ Aa ndra te nangalà' i Ahkaze añ' anjomba' IEHOVÀ ao naho añ'anjomba' i mpanjakay naho amo roandriañeo vaho natolo'e amy mpanjaka' i Asorey, tsy nolora'e. ²² Mbore nanovoñe hakeo amy IEHOVÀ t'i Ahkaze mpanjaka amy hasotria'ey ²³ amy te nanoa'e soroñe amo 'ndrahare' i Damesèke nandafa azeo, ami'ty hoe: Kanao mañolotse o mpanjaka' i Arameo o ndrahare' iareoo, le hanoako soroñe ka hañolora' iareo ahy. Fe nampianto aze naho Israele iaby zay. ²⁴ Le natonto' i Ahkaze o fanak' añ' anjomban' Añaharo, le tsineratsera'e o fana' i anjomban' Añahareio naho narindri'e o lalambein' anjomba' IEHOVÀ; vaho nandranjy kitrely ho am-bata'e an-kotso' Ierosalaime iaby. ²⁵ Le nanoa'e toets' abo ze hene' rova' Iehoda, hañenga amo ndrahare ila'eo, hanigike IEHOVÀ Andrianañaharen-droae'e. ²⁶ Ty ila' o fitoloña'eo naho o sata'e iabio, ty valoha'e naho ty fara'e, inao t'ie misokitse amy bokempanjaka' Iehoda naho Israele. ²⁷ Le nitrao-piròtse aman-droae'e t'i Ahkaze naho nalenteke an-drova ao, toe e Ierosalaime ao; fa tsy nitakone' iareo mb'amo kiborim-panjaka' Israeleo; Iekizkia ana'e ty nandimbe aze nifehe.

29

¹ Ni-roapolo taoñe lim' amby t'Iekizkia te niorotse nifehe, le nifehe roapolo taoñe sive amby e Ierosalaime ao: i Abiià ana' i Zekarià ty tahinadrene'e. ² Le nanao ty fahiti'e am-pihaino' IEHOVÀ, manahake ze he'e nanoe' i Davide rae'e. ³ Ie amy taom-baloham-pifehea'ey, amy volam-baloha'ey, le sinoka'e o lalambein' anjomba' IEHOVÀ vaho nisomontie'e. ⁴ Nampiheove'e ao o mpisoroñe naho o nte-Levio, le natonto'e ho raik' amy toetse mangadagadañe atiñanañey, ⁵ vaho nanoa'e ty hoe, Mijanjiña ahy ry nte-Levio, mampiavaha vatañe henaneo, le ampiavaho ty anjomba' IEHOVÀ Andrianañaharen-droae' areo vaho ondroho boak' an-toetse miavake ao ze atao leotse. ⁶ Fa nikitro-karatiañe naho nanao haloloañe am-pihaino' IEHOVÀ Andrianañaharentikañe o roaentikañe naho naforintse' iereo naho nitoli-daharañe vaho tsinambolitio' iereo ty fimoneña' IEHOVÀ. ⁷ Mbore narindri' iareo o lalambein-davarangañe naho nakipeke o failoo naho tsy nañemboke, tsy nañenga soroñe aman'

* **28:19** Toe Iehoda, fanoe' i Fian.II

Añahare' Israele amy toetse masiñey. ⁸ Toly ndra nifetsak' am' Iehoda naho am' Ierosalaime ty haviñera' IEHOVÀ, le natolo'e ho fangebahebahañe naho halatsañe naho fikosihañe, manahake o isam-pihaino' areoo. ⁹ Hehe te nakoròvom-pibara o roaen-tikañeo naho am-pandrohizañe aña o ana-dahintikañeo naho o anak' ampelan-tikañeo vaho o tañanjombantikañeo, ty amy zay. ¹⁰ Aa le an-troko ao henaneo ty hifañina am' IEHOVÀ Andrianañahare' Israele, hampihankañe aman-tika i haviñera'e miforoforoy. ¹¹ O ry anako, ko mihenekeneke henaneo; fa jinobo' IEHOVÀ nahareo hijohañe añatrefa'e, hiatrak' aze naho ho mpitoro'e vaho hañembok' ama'e.

¹² Niongak' amy zao o nte-Levio, i Makate, ana' i Amasay naho Ioele ana' i Azarià amo ana' o nte-Kehàteo; le amo ana' i Merario: i Kise, ana' i Abdý naho i Azarià ana' Iehalelale; le amo nte-Gersoneo, Ioak' ana' i Zimà naho i Edene ana' Ioake; ¹³ le amo ana' i Elitsafaneo; i Simrý naho Ieiele; le amo ana' i Asafeo; i Zekarià naho i Matanià; ¹⁴ le amo ana' i Hemaneo; Iehiele naho i Simey; vaho amo ana' Iedotoneo, i Semaià naho i Oziele. ¹⁵ Le navori' iareo o roahalai'eo, le nañamasim-batañe vaho nimoak' ao, ty amy lili' i mpanjakay ty amo tsara' IEHOVÀ, hañalio ty anjomba' IEHOVÀ. ¹⁶ Nizilik' amy toetse añate' i anjomba' IEHOVÀy o mpisoroñeo, hañalio aze, le nakareñe ze fonga leotse nizoe' iereo an-kiboho' IEHOVÀ ao mb' an-kiririsan' anjomba' IEHOVÀ ey, le rinambe' o nte-Levio naho nandese'e mb' an-torahan-Kidrone aña. ¹⁷ Aa ie niorotse nampiavake amy androm-baloha' i volam-baloha'ey, le pok' amy lavaranga' IEHOVÀy iereo amy androm-pahavalو' i volañeiy; le valo andro ty nampiavahe' iereo ty anjomba' IEHOVÀ; vaho nifonire' iareo amy andro faha folo-eneñ' ambi' i volam-baloha'ey. ¹⁸ Aa le niheo mb'am' Iekizkia mpanjaka mb'eo iereo, nanao ty hoe: Fa niliove'ay iaby ty anjomba' IEHOVÀ naho i kitrelim-pisoroñañey naho o fana'e iabio naho i lataba' o mofo-piatrekeoy vaho o fana'e iabio. ¹⁹ Mbore nivaoe'ay naho navahe'ay o fanake iaby nahifi' i Ahkazeo, ie nanao haloloña amy fifehea'ey; le oniño t'ie fa aolo' i kitreli' IEHOVÀy.

²⁰ Nañaleñañe t'Iekizkia, mpanjaka nanontoñe o roandria' i rovaio vaho nionjomb' amy anjomba' IEHOVÀ mb'eo, ²¹ le ninday bania fito naho añondrilahy fito naho vik' añondry fito vaho oselahy fito ho fañeferan-kakeo' i fifeheañey naho i toetse masiñey vaho Iehodà. Le linili'e o mpisoroñeo, o ana' i Aharoneo, t'ie hengaeñe amy kitreli' IEHOVÀy. ²² Aa le linenta' iareo i bania rey naho rinambe' o mpisoroñeo ty lio'e, le nadasi' iereo amy kitreliy; le linenta' iereo i añondrilahy rey naho nadasi' iereo amy kitrelio ty lio'e; linenta' iareo ka i vik'añondry rey vaho nadasi' iareo amy kitreliy ty lio'e. ²³ Le nañarivoe' iereo i oselahy rey ho ami'ty fañeferan-kakeo, añatrefa' i mpanjakay naho i favoriy, le nanampeza' iareo fitañe; ²⁴ naho linenta' o mpisoroñeo le nanao fañeferan-kakeo ambone' i kitreliy amy lio'ey, hañeferañe Israele iaby; fa linili' i mpanjakay te hanoeña ho a Israele iaby i soroñey naho i fañeferan-kakeoy. ²⁵ Le nampijohañe'e aña' anjomba' IEHOVÀ ao o nte-Levio reketse fikontsañañe naho jejo-bory vaho marovany ty amy lili' i Davidey naho i Gade mpioni' i mpanjakay naho i Natane mpitoki vaho toe lili' IEHOVÀ añaamo mpitoki'eo. ²⁶ Aa le nijohañe eo o nte-Levio rekets' o fititiha' i Davideo naho o mpisoroñeo reketse trompetra. ²⁷ Le linili' Iekizkia te hengaeñe ambone' i kitreliy i soroñey. Aa ie namototse i fisoroñañey, le niorotse ka ty fisaboña IEHOVÀ an-trompetra mitraoke

amo fititiha' i Davide mpanjaka' Israeleo. ²⁸ Le nibaboke i fivory iabiy naho nitakasy o mpisaboo naho nitioke o mpampipopò trompetrao; vaho nitolom-panao zay ampara' te niheneke i fisoroñañey. ²⁹ Ie nifonitse i fañengañey, le nindròdreke vaho niambane i mpanjakay naho o mpiama'e iabio. ³⁰ Mbore linili' Iekizkia mpanjaka naho o roandriañeo o nte-Levio ty hitakasy am' IEHOVÀ amo onin-tsabo' i Davide naho i Asafe mpioniñeo. Le nisabo fandrengeañe an-kaehake naho niandaly vaho nitalaho. ³¹ Nampigadoñe' Iekizkia, ami'ty hoe: Fa navahañe am' IEHOVÀ nahareo henaneo; mañarinea le mibanabanà soroñe naho engam-pañandriañañe mb'añ'anjomba' IEHOVÀ. Aa le nanese soroñe naho engam-pañandriañañe i favoriy; vaho ninday engan-koroañe o matarikeo. ³² Aa ty ia' o soroñe nendese' o favorio mb'eoo, le bania fitopoloo naho añondrilahy zato vaho vik' añondry roanjato; hene hisoroñañe am' IEHOVÀ. ³³ Le o enga navaheñe: añombe enen-jato naho añondry teloarivo. ³⁴ Fe tsy niampe ty mpisoroñe hañolitse o hisoroñañeo, aa le nimbae' o nte-Levy roahalahi' iareoo, ampara' te niheneke i fitoloñañey, ampara' te nañamasim-batañe o mpisoroñe ila'eo; amy te nilombolombo' o mpisoroñe o nte-Levio ami'ty havañonan' arofo nampiavahem-batañe. ³⁵ Nimaro o nisoroñañe reketse i saboran' engam-panintsiañeo naho o enga-rano ho amo nisoroñañe. Aa le nijadoñe soa ty fitoroñañe añ' anjomba' IEHOVÀ ao, ³⁶ naho nandia taroba t'Iekizkia naho ondaty iabio, ty amy nampihentseñan' Añahare ho a'ondatio; amy te nitojeha i nanoeñey.

30

¹ Le nampañitrik' am' Israele naho Iehoda iaby t'Iekizkia, nanokitse taratasy amy Efraime naho i Menasè, hañaveloa' iareo mb' añ' anjomba' IEHOVÀ e Ierosalaime ao, hañambeñe ty fihelañ' ambone' IEHOVÀ, Andrianañahare' Israele. ² Fa nilahatse amo roandriañeo naho amy favoribei' Ierosalaime iabiy t'Iekizkia te hambenañe ami'ty volam-paharoe' i fihelañ' amboney, ³ amy t'ie tsy nilefe amy andro'e, mbore tsy niampe o mpisoroñe nampiavahem-batañe vaho mbe tsy nifanontoñe e Ierosalaime ao ondatio. ⁴ Nahity am-pihaino' i mpanjakay naho amy fivory iabiy zay. ⁵ Aa le nafe' iereo te ho tsitsifen-koike t'Israele, boake Beer-Sevà pake Dane, hampihovañe mb'e Ierosalaime ao hañambeñe i fihelañ' ambone am' IEHOVÀ, Andrianañahare' Israele, amy t'ie mboe tsy nambenañe am-pivondronañe manahake i pinatetsey. ⁶ Aa le nimb' eo o mpihitrikeo rekets' i taratasi' i mpanjakay naho o roandria'eoy, nanitsike Israele naho Iehoda, ty amy nandilia' i mpanjakay, nanao ty hoe: Ry ana' Israele, mimpolia am' IEHOVÀ, Andrianañahare' i Avrahame, Letsake naho Israele, hibalicha'e ama' areo nahapolitse am-pità' o mpanjaka' i Asoreo. ⁷ Ko mitsikombe an-droae' areo naho an-droahalahi' areo niola am' IEHOVÀ, Andrianañaharen-droae' iareo, kanao natolo'e ho rotsaheñe; ie o isa' areo henaneo. ⁸ Aa le ko mihogàñ-katoke manahak' an-droae' areo; fe mamoea vatañe am' IEHOVÀ, le mimoaha amy toe-miavake nampiavaheñe ho nainai'ey vaho toroño t'IEHOVÀ Andrianañahare' areo soa te hitolike ty haviñera'e miforoforo. ⁹ Aa naho mimpoly amy IEHOVÀ nahareo le ho tendreke fitretrezañe o longo naho ana' areo nikozozoteñe aña androhio, naho himpoly mb'an-tane atoy; fa matarike naho mpiferenaiñe t'IEHOVÀ Andrianañahare' areo vaho tsy hampitolihe'e ty lahara'e naho impolia'areo. ¹⁰ Aa le nitoañeñe t'i Efraime naho i Menasè pake Zebolone mb'an-drova an-drova o mpañitrikeo; fe nitohafañe amañ-inje naho

kizake. ¹¹ Fe eo ty nirè-batañe am'ondati' i Asere naho i Menasè vaho i Zeboloneo, le nimb'e Ierosalaime mb'eo. ¹² Le tam' Iehoda ka ty fitàn' Añahare nanolots' arofo raike ama'e hañorike ty lili' i mpanjakay naho o roandriañeo ty amy tsara' IEHOVÀ.

¹³ Aa le tsifotofoto t'indaty nifanontoñe e Ierosalaime ao hañambeñe ty sabadidak' i mofo-tsi-aman-dalivaey amy volam-paha-roey, valobohòke nitozantoza. ¹⁴ Niongake le nafaha' iareo o kitrely e Ierosalaime ao naho nendese' iereo aña ka ze hene kitrelim-pañembohañe vaho navokovoko' iareo an-torahan-Kidrone ao. ¹⁵ Linenta' iareo amy andro faha-folo-efats'ambi' i volam-paharoey i vik' añondri' i fhelañ'amboney, ie nisalatse o mpisoroñe o nte-Levio naho nañamasim-batañe vaho nanese engan-koroañe aña' anjomba' IEHOVÀ ao, ¹⁶ le nijohañe amo toetse nalihatse ho a iareoo, ty amy Tsara' i Mosè 'ndatin' Añaharey; nafetsa' o mpisoroñe ty lio rinambe' iareo am-pitá' o nte-Levio; ¹⁷ amy te nimaro amy favoriy ty tsy nañefe-batañe, le tamo nte-Levio ty lily handentàñe o vi' i fhelañ' amboney hasolo ze hene tsy nali, hañeferañe iareo amy IEHOVÀ. ¹⁸ Toe maro t'indaty, àntsake o boak' Efraime naho e Menasè naho e Isakare vaho e Zeboloneo ty tsy nahaefe-batañe, fe nikama' iareo avao i fhelañ' amboney ndra t'ie tsy do'e amy pinatetsey, amy te nihalaly ho a iareo t'Iekizkia ami'ty hoe: Hapò IEHOVÀ, abey ¹⁹ ze mamahatse ty arofo'e hipay an' Andrianañahare; t'IEHOVÀ, Andrianañaharen-droae'e ndra t'ie tsy do'e ty amy fañeferañe amy miavakey. ²⁰ Hinao' IEHOVÀ t'Iekizkia le nijangañe'e ondatio.

²¹ Nanao i sabadida-mofo-tsi-amandalivaey fito andro an-kafaleam-bey o ana' Israeleo e Ierosalaimeo vaho nandrenge IEHOVÀ handro an-kandro o mpisoroñe o nte-Levio, nisabo reketsé fititihañe mangatsiñe amy IEHOVÀ. ²² Le nosihe' Iekizkia an-tsaontsy o nte-Levy nahimbañe amy fitoroñañe IEHOVÀio. Aa le songa nikama amy andro fito namantañañe rey ondatio naho nañenga sorom-pañanintsiñe vaho nañandriañe IEHOVÀ, Andrianañaharen-droae' iareo. ²³ Nilahare' i valobohòkey amy zao t'ie mbe hambenañe andro fito ka; le nitana' iareo an-kafaleañe i andro fito tovo'e rey. ²⁴ Fa natolo' Iekizkia mpanjaka' Iehoda amy favoriy ty añombe arivo naho añondry fito arivo le nanolotse añombe arivo naho añondry rai-ale amy favoriy ka o roandriañeo; vaho maro bey ty mpisoroñe nañefe-batañe. ²⁵ Le nirebeke iaby ty valobohò' Iehoda, miharo amo mpisoroñe o nte-Levio naho i valobohòke boake Israeley naho o renetane boak' an-tane' Israeleo vaho o mpimoneñe e Iehodào. ²⁶ Aa le nitoabotse ty hafaleañe e Ierosalaime ao; amy te sikal' amy andro' i Selomò ana' i Davide mpanjaka' Israeley tsy tama' Ierosalaime ty nanahake zay. ²⁷ Niongak' amy zao o mpisoroñe o nte-Levio, nitata ondatio, le jinanjiñe ty fiarañanaña' iareo; vaho nahatakatse i fimoneña'e masiñe aña'abo andindiñe aña, ty halali' iareo.

31

¹ Ie heneke zay, le niavotse mb' amo rova Iehodao mb'eo t'Israele niatrek' iabioo, le pinozapozake o vatolahio naho nifiraeñe o hazomangao naho rineba' iareo ambane o toets' aboo naho o kitrely e Iehodà naho e Beniamine iaby naho Efraime naho e Menasè ampara' te fonga rinotsake. Le nimpoly amy zao o ana' Israeleo, songa mb'am-panaña'e, mb'an-drova'e aña. ² Le nanendre firimboñam-pisoroñe naho o nte-Levy

t'Iekizkia, sambe firimboñañe, songa fitoroñam-pisoroñe, naho o nte-Levio, ho amo fisoroñañe naho amo engam-panintsñañe, hitoroñe, hañandriañe naho handrenge amo lalambein-tobe' IEHOVÀO. ³ Tinendre'e ka ty anjara' i mpanjakay boak' amo vara'eo ho amo fisoroñañe: o enga-maraindraiñe naho o soron-karivao naho o soron-tSABATAO naho ho amo pea-bolañe vaho ho amo andro namantañañe, ty amy pinatetse amy Ha' IEHOVÀIO. ⁴ Mbore linili'e o mpimone' Ierosalaimeo ty hanolotse ty anjara' o mpisoroñañe naho o nte-Levio, hanolora' iareo vatañe amy tsara' IEHOVÀY. ⁵ Aa ie niboile i liliy, le nampitobahe' o ana' Israeleo ty lohavoan' ampemba, divay naho menake naho tantele naho ze hene voka' i tetekey; vaho natoba' iareo ao iaby ty faha-folom-bar. ⁶ Nasese' o ana' Israele nimoneñe amo rova' Iehodao ty faha-folon' añombe naho añondry naho ty faha-folon-draha navaheñe ze navike ho am' IEHOVÀ Andrianañahare' iareo vaho napopoke am-pitoboroñañe. ⁷ Amy volam-pahateloy ty namotorañe o fitoboroñaeo, le nihenefa' iareo ami'ty volam-pahafito. ⁸ Ie nioni' Iekizkia naho o mpiaoloo o fitoboroñañe le nandrenge IEHOVÀ naho ondati'e Israeleo. ⁹ Nañontanea' Iekizkia o mpisoroñañe naho o nte-Levio o fitoboroñañe, ¹⁰ le hoe t'i Azarià mpisoram-bey, hasavereña' i Tsadoke, Mifototse amy nanesea' ondatio an-kiboho' IEHOVÀ ao o engaoy, le nienen-kanen-jahay vaho nanisa maro. Nitahie' IEHOVÀ ondati'eo, le e hoek'eo o maro nahajao.

¹¹ Aa le nafanto' Iekizkia am' iereo ty hañajary riha añ' anjomba' IEHOVÀ ao; le hinajari' iereo. ¹² Le nampizilihe' iereo ao o engao naho o fahafoloo naho o raha nengaeñaeo, le tsy nihilote; vaho nampifeheña i Konanià nte-Levy zay naho i Simey rahalahi'e ty faharoe, ¹³ naho Iekiele naho i Azazià naho i Nakate naho i Asaele naho Ieriemote naho Iozabade naho i Eliele naho Iismakiaho naho i Makate vaho i Benaià ty nimpisary am-banem-pità' i Kononià naho i Simey rahalahi'e, ty amy fanendrea' Iekizkia mpanjakay vaho nimpifehe i anjomban' Añaharey t'i Azarià. ¹⁴ Le i Kore ana' Imnà nte-Levy, i mpiamben-dalañe maniñanañey, ty nifehe o engan-tsatin' arofo aman' Añahareo hanjarà'e o enga amy IEHOVÀO naho o miava-do'eo. ¹⁵ Le am-pità'e t'i Edene naho i Miniamine naho Iesoa naho i Semaia, i Amarià vaho i Sekanià amo rovam-pisoroñaeo, ty hanolotse am-pigahiñañe amo rahalahi' iareoo ty amo firimboña' iareoo, ty bey mira ami'ty kede; ¹⁶ mandikoatse o volilieñe amy fanoñonañe lahilahy telo taoñe mañamboneo, le o mizilik' añ'anjomba' IEHOVÀO, songa fitoloña'e boak-andro itoroña'e amy nandiliañe azey, Vaho sindre firimboñañe; ¹⁷ naho namolily mpisoroña am-panoñonan-droae, sambe anjomban-drae, naho o nte-Levio, ze ana-dahy roapololo taoñe mañambone, songa fitoloña'e sindre firimboña'e. ¹⁸ ie nivolilieñe am-panoñonan-drae e amo anak'ajaja'e iaby, amo vali'e naho ana-dahy vaho anak'ampela, ho amy favori-bey iabiy, fa am-pigahiñañe ty niavaha'iereo ho am-piavahañe do'e. ¹⁹ Amo ana' i Aharone mpisoroña an-tanem-piandraza' o rova' iareoo naho amo rova iabio, le teo ty ondaty kinanjy hiantoñoñe antahinañe hanolorañe anjara' amy ze lahilahy amo mpisoroñaeo toe ze hene' nivolilieñe ty amy fanoñona'e amo nte-Levio. ²⁰ Nitsitsihe' Iekizkià e Iehodà zay vaho nanoe'e ty soa naho ty mahity vaho vantañe añatrefa' IEHOVÀ Andrianañahare'e. ²¹ Ze fitoloñañe nifotora'e am-pitoroñañe añ' anjomban' Añahare naho amy Hake naho amo fepetseo, le nipaia'e t'i Andrianañahare'e naho nanoe'e añ' añoñ' arofo vaho niraorao.

32

¹ Ie aña i fitoloññañé naho figahiñañé zay, le pok' eo t'i Senakeribe mpanjaka' i Asore naname Iehodà le nañarikatoke o rova fatratseo vaho naereñere'e ty hiboroboñak' ao am-bata'e. ² Aa ie nioni' Iekizkia te pok' eo t'i Senakeribe, misafiry ty hialy am' Ierosalaime, ³ le nilahatse amo roandriañeo naho amo fanalolahio ty hamempeañé o rano migoangoañé alafe' i rovaio vaho nañolots' aze iereo. ⁴ Aa le maro t'indaty nivory nampizenjeñé o rano migoangoañeo naho i torahañé niranga i taney, ami'ty hoe: Aa vaho homb' etoa hao o mpanjaka' i Asoreo hañisake rano maro? ⁵ Nañosi-batan-dre namboatse i nirobak' amy kijoliy naho nampitroatse fitalakesañ' abo ama'e naho i kijoly alafe'ey naho nifatrare'e ty Milo* an-drova' i Davide ao vaho niranjie'e fialiañé naho aron-defo tsifotofoto. ⁶ Le nampijadoña'e am'ondatio ty mpiaolo aña'aly naho nampivoria'e an-tane midañadaña an-dalambei' i rovay vaho nisaontsy fañosihañé am' iereo ami'ty hoe: ⁷ Mihafatrara naho mahasibeha, ko hembañé, ko miroke amy mpanjaka' i Asorey, ndra i valobohòke mindre ama'ey, amy te bey i aman-tikañey ta i ama'ey; ⁸ fitañé nofotse ty ama'e; fe aman-tika t'IEHOVÀ Andrianañaharentika hañolotse an-tika naho hialy amo hotakotan-tikañeo. Le nampanintsiñé ondatio ty enta' Iekizkia mpanjaka' Iehoda.

⁹ Ie aña le nampihitrife' i Senakeribe mpanjaka' i Asore mb'e Ierosalaime—ie niatreatre i Lakise henane zay rekets' i valobohòn-dahin-defo'ey—mb' amy Iekizkia mpanjaka' Iehoda naho mb'e Iehoda vaho Ierosalaime mb'eo o mpitoro'eo nanao ty hoe: ¹⁰ Hoe t'i Senakeribe mpanjaka' i Asore: Ino ty iatoa' areo kanao ifeaha' areo ty fañarikatohañé Ierosalaime. ¹¹ Tsy Iekizkia hao ty mamañahy anahareo, hanolora' areo vatañé hampivetrahe' ty kerè naho ty harandrano, ami'ty hoe: IEHOVÀ Andrianañaharen-tika ty hamotsotse antika am-pitá' i mpanjaka' i Asorey? ¹² Tsy Iekizkiay hao ty nañafake o tamboho'eo naho o kitreli'eo vaho nandily Iehoda naho Ierosalaime ami'ty hoe; Añatrefa' ty kitrely raike ty hitalahoa' areo, le ama'e ty hisoroña' areo? ¹³ Tsy fohi' areo hao o nanoeko naho o roaeko amo hene' ondaty an-taneoo? Ia amo 'ndrahare' o kilakila' ondatioo ty naharombake i tane' iareoy an-tañako? ¹⁴ Ia amo fonga 'ndrahare' o kilakila' ondaty nifongoren-droaekoo ty naharombake ondati'eo an-tañako, te haharombak' anahareo an-tañako ka t'i Andrianañahare' areo? ¹⁵ Ie amy zao, ko apo' areo ho sigihe' Iekizkia, ndra ho risihe'e an-tsata inoñe, ko iantofañe; fa tsy eo ze o ndraharem-pifeheañé ndra fifelehañé naharombake ondati'eo an-tañako naho am-pitán-droaeko zao; somandrake te tsy haharombak' anahareo an-tañako t'i Andrianañahare' areo. ¹⁶ Mbe nanovoñ-inje am' IEHOVÀ Andrianañahare naho niatreatre i mpitoro'e Iekizkiay o mpitoro'eo. ¹⁷ Nanokitse taratasy ka re nanigìke IEHOVÀ Andrianañahare' Israele naho nañabiañé Aze, ami'ty hoe: Hambañé amy te tsy naharombake ondati'eo an-tañako o ndrahare' o fifeheañé an-taneoo ro tsy haharombahan' Añahare' Iekizkia an-tañako ondati'eo. ¹⁸ Le nitazataza am-peo mafe ami'ty saontsin-te-Iehoda am' ondati' Ierosalaime ambone' i kijoliio, hampirevendreveñé naho hañembañé, handrambesa' iareo i rovay. ¹⁹ Le nampanahafe' iareo talily amo ndraharen-kilakila-ndati' ty tane toio, o toe satam-pitá' ondatio, t'i Andrianañahare' Ierosalaime. ²⁰ Aa le zay ty nihalalia' Iekizkia mpanjaka naho Iesaià mpitoky ana' i Amotse, an-toreo mb'an-dindiñ' aña.

* ^{32:5} Milo: Toe-patratse an-drova' i Davide

²¹ Nañirak'anjely amy zao t'IEHOVÀ, nampaito o fanalolahy iabio naho o mpifeheo naho o mpifeleke an-tobem-panjaka' i Asoreo. Aa le nimpoly an-kasalaran-daharan-dre mb'an-tane'e mb'eo. Aa ie nimoak' an-trañondrahare'e ao, le nanjevoñ' aze am-pibara o nimoak' an-kova'eo. ²² Aa le rinomba' IEHOVÀ t'Iekizkia naho o mpimone' Ierosalaimeo am-pitâ' i Senakeribe mpanjaka' i Asore naho am-pitâ' iareo iaby vaho nañaro iareo aña'riary. ²³ Le maro ty ninday ravoravo mb'am' IEHOVÀ e Ierosalaime ao naho raha fanjâka am' Iekizkia mpanjaka' Iehoda, ie nonjoneñe am-pahaisaha' o kilakila'ondatio henane zay.

²⁴ Natindry an-tihy fa heta'e t'Iekizkia tamy andro rezay le nihalaly amy IEHOVÀ naho nanoïne aze t'IEHOVÀ vaho tinolo'e viloñe. ²⁵ Fe nifotetse amy hasoa nanoeñe ama'ey t'Iekizkia, fa nitoabotse ty arofo'e le nivotrak' ama'e naho am'Iehodà vaho am' Ierosalaime ty haviñerañe ²⁶ Aa le nirèke amy fitoaborañ' arofo'ey t'Iekizkia, ie naho o mpimone' Ierosalaimeo vaho tsy nifetsak' am' iereo ty haviñera' IEHOVÀ tañ' andro' Iekizkia. ²⁷ Nanambara naho asiñe ra'elisy t'Iekizkia; le namboare'e fañajâñe volafoty naho volamena naho vatosoa naho fampafiriañe naho fikalañe vaho ze hene karazam-panake soa; ²⁸ riha ho amo nivokareñeo, ty ampemba naho divay vaho menake; naho lapalapa ho a ze hene karazan-kare naho mpirai-stroke vaho mpirai-lia. ²⁹ Mbore nañoren-drova ho am-bata'e naho nanontoñe mpirai-lia naho mpirai-stroke tsifotofoto; fa nitoloran' Añahare vara bey. ³⁰ Iekizkia ty nanampe ty loha-rano' i Gihone vaho nampizotsoe'e mivantañe mañandrefa' i rova' i Davidey. Le niraorao amo fitoloña'e iabio t'Iekizkia. ³¹ Fe o sorotà' i Bavele niraheñe mb'ama'e mb'eo hañontane o halatsâñe nanoeñe amy taneioo, le nengan' Añahare re hitsoha'e aze haharofoana'e ze hene aña'rofo'e ao. ³² Aa naho o fitoloña' Iekizkia naho o fatariha'eo, oniño t'ie misokitse amy aroñaro' Iesaiam pitoky ana' i Amotsey vaho amy bokem-panjaka' Iehodà naho Israeley. ³³ Le nitrao-piròtse aman-droae'e t'Iekizkia naho nalente' iareo amy talèn-kiborin' ana' i Davidey; le hene niasy aze amy havilasi'ey t'Iehodà naho o mpimone' Ierosalaimeo vaho nandimbe aze nifehe t'i Menasè ana'e.

33

¹ Nifolo taoñe ro'amby t'i Menasè te niorotse nifehe, le nifehe limampolo taoñe lim' amby e Ierosalaime ao; ² naho nitolon-karatiañe am-pivazoho'a' IEHOVÀ, manahake ty haloloa' o kilakila' ondaty niroahe' IEHOVÀ aolo' o ana' Israeleoo. ³ Rinanji'e indraike o tamboho rinoba' Iekizkia rae'eo naho nampitroara'e kitrely o Baaleo naho nitsenea'e Asere; naho nitalaho'a'e vaho nitoroñe i valobohòn-dikerañey. ⁴ Le namboara'e kitrely aña' anjomba' IEHOVÀ ao, ie nanao ty hoe t'IEHOVÀ: E Ierosalaime ao nainai'e ty hampipohako ty añarako. ⁵ Le nandranja'e kitrely iaby i valobohòn-dikerañey an-kiririsa roe' i anjomba' IEHOVÀ. ⁶ Nampirangae'e aña'afó am-bavatanen' ana' i Hinome ao o ana'eo naho nañandro naho nanikily naho namoreke naho nitroboen-jiny naho kokolampa; vaho nitolon-kaloloañe am-pivazoho'a' IEHOVÀ, hiviñera'e. ⁷ Le napo'e aña' anjomban' Añahare ao ty saren-drahare nitsene'e, ie fa nanao ty hoe amy Davide naho amy Selomò t'i Andrianañahare, te, Ami'ty anjomba toy, e Ierosalaime etoa, i jinoboko amy ze hene' fifokoa' Israeley ty hampijadoñako ty añarako nainai'e; ⁸ le tsy hasintako an-tane' tinendreko aman-droae' areo ty fandia' Israele naho ambena' iareo ty hanao ze nandiliako iareo amy Hake ao iaby naho amo fañè vaho fepetse am-pitâ' i Mosèo. ⁹ Le nampanan-kakeo o mpimone' Ierosalaimeo t'i Menasè, nandikoara' iareo ty haratia' o kilakila'

ondaty rinotsa' IEHOVÀ aolo' o ana' Israeleoo. ¹⁰ Mbore nitsara amy Menasè naho ondati'eo t'IEHOVÀ, fe tsy nañaoñe.

¹¹ Toly ndra nampivotrahe' IEHOVÀ am' iereo o mpifehem-balobohò' i mpanjaka' i Asoreio naho nendese' iareo am-porengotse t'i Menasè, vinahotse an-torisike vaho nasese mb'e Bavele aña. ¹² Aa ie nisotry, le nipay IEHOVÀ Andrianañahare'e vaho nidrakadrakak' añatrefan' Añaharen-droae'e; ¹³ le nitoreova'e; aa le niferenaiña'e naho jinanji'e i halali'ey naho nendese'e nimpoly mb'e Ierosalaime, mb'am-pifehea'e ao vaho nifohi' i Menasè amy zao te IEHOVÀ ro Andrianañahare. ¹⁴ Ie aña le namboare'e kijoly alafe' i rova' i Davidey, aña' ila' ahandrefa' i Gihone, am-bavatane eo, pak' amy fimoahañe an-dalambeim-piañey, niarikatoke ty Ofele* naho nampitroare'e an-tiotiotsey; le nampijadoña'e mpifehen-dahindefoñe o rova-fatrats' Iehoda iabio. ¹⁵ Le nafaha'e o ndrahare ankafankafao naho i sampsampon-draha aña' anjomba'IEHOVÀ y naho ze fonga kitrely niranje'e an-kaboa' i anjomba' IEHOVÀ y naho e Ierosalaime ao vaho navokovoko'e alafe' i rovay. ¹⁶ Le nisomontie'e ty kitreli' IEHOVÀ naho nañenga sorom-pañanintsiñe naho fañandriañañe añama'e vaho linili'e t'Iehoda ty hitoroñe IEHOVÀ Andrianañahare' Israele. ¹⁷ Fe mb'e nisoroñe amo tambohoo ondatio, fa toe amy IEHOVÀ Andrianañahare' iareo. ¹⁸ Aa le ty ila' o fitoloña' i Menasè naho i halali'eye aman' Añahare'ey naho ty saontsi' o mpioniñe nisaontsy ama'e ami' ty tahina' IEHOVÀ Andrianañahare' Israeleo; oniño t'ie misokitse amo fitoloñam-panjaka' Israeleo. ¹⁹ Le i fitoreo'ey naho i niferenaiña' azey naho o hakeo naho tahi'e iabio naho o toetse namboara'e tambohoo naho nampitroara'e Asere naho sareñ-draha sinokitse aolo' t'ie nire-batañe; inao, t'ie misokitse amo talilim-pioniñe. ²⁰ Aa le nitrao-piròtse aman-droae'e t'i Menasè vaho nandimbe aze nifehe t'i Amone ana'e.

²¹ Roapolo taoñe ro'amby t'i Amone te niorotse nifehe vaho nifehe roe taoñe e Ierosalaime ao, ²² le nanao ze haratiañe ampivazoho' IEHOVÀ manahak' i Menasè rae'e; le nisoroña' i Amone iaby o sare-sokitse niranjien-drae'eo vaho nitoroñe iareo. ²³ Tsy nire-batañe añatrefa' IEHOVÀ re manahake ty fireham-bata' i Menasè rae'e, fe nitombo avao ty hakeo' i Amone. ²⁴ Aa le nikilily aze o mpitoro'eo vaho vinono' iareo aña' anjomba'eo ao. ²⁵ Fe zinevo' ondati' i taneio ka o nikinia i Amone mpanjakao; le nanoe' o mpimone' i taneio mpanjaka' t'Iosià ana'e handimbe aze.

34

¹ Valo taoñe t'Iosià te namototse nifehe, le nifehe telopolo taoñe raik' amby e Ierosalaime ao; ² naho nanao ze fahiti'e am-pihaino' IEHOVÀ naho nañavelo an-tsata' i Davide rae'e vaho tsy nivike mb' am-pitàn-kavana ndra havia. ³ Fa amy taom-paha-valo' i fifehea'ey, ie mbe tora'e, le niorotse nipay an' Andrianañahare' i Davide rae'e; le amy taom-paha-foloro'ambi'ey ty namotora'e fañondrok' am' Iehodà naho am' Ierosalaime ze tamboho naho Asere naho sare-sokitse vaho sare-trinanake. ⁴ Rinoba' iareo añatrefa'e o kitrlem-baaleo, le finira'e o sare' i àndroy ambone' iareoo; le dinemo'e ho debole o Asereo naho o sare-sokitseo naho o sare trinanakeo vaho nabobò'e an-kibori' o nisoroñe ama'eo. ⁵ Le finorototo'e amo kitreli'eo ty taola' o mpisoroñe vaho nondrohe'e t'Iehoda naho Ierosalaime. ⁶ Nanoe'e zay ka o rova' i Menasè naho i Efraime naho i Simeoneo pake Naftalý aña naho o tanan-taolo nañohoke iareoo. ⁷ Le rinoba'e o kitrelio naho dinemo'e ho debole o Asereo naho o sare-sokitseo

* **33:14** Ofele: fitalakesañ'abo

naho fonga finira'e o sare' i àndroy an-tane' Israele iabio vaho nimpoly mb'e Ierosalaime mb'eo.

⁸ Le amy taom-paha-folo-valo' ambi' i fifehea'ey, ie fa nañalio i taney naho i anjombay, le nirahe'e mb'amy Safane ana' i Atsaliaho naho i Maaseià bei' i rovay naho Ioake ana' Ioakaze mpamolily, ty hañamboatse ty anjomba' IEHOVÀ Andrianañahare. ⁹ Le nimb' amy Kilkìà mpisorombey mb'eo iereo nanese o drala nampiziliheñe añ' anjomban' Añahareo, ze natonto' o nte-Levy mpiamben-dalañeо am-pitá' i Menasè naho amy Efraime naho amo sehanga' Israele iabio naho amy Iehodà miharo amy Beniamine iaby vaho amo mpimoneñe e Ierosalaimeo. ¹⁰ Le natolo' iereo am-pitá' o mpitoloñe nisary añ' anjomba' IEHOVÀ; vaho natolo' iereo amo mpamboatse nifanehak' amy anjomba' IEHOVÀ hanosoha'e naho hampisomontie'e i anjombay; ¹¹ natolo' iereo amo mpandranjio naho amo mpamboatseo, hikaloa' iareo vato vinàñe naho hatae ho famitrañañe naho handranjiañe sàzoke o traño narotsa' o mpanjaka' Iehodao. ¹² Nifanehak' am-pigahiñañe ondatio; le nisary iareo t'Ikate naho i Obadià, nte' Levy amo ana' i Merario; le niaolo iareo t'i Zekarià naho i Mesolame anan' te-Kohate naho ze hene nte-Levy naha-fititike sabo. ¹³ Nisarie' iereo ka o mpijiny kilankañeо naho niaolo amy ze fitoloñañe amy ze karazan' asa iaby; le nimpanokitse naho mpifehe vaho mpañambeñe ty ila' o nte-Levio. ¹⁴ Aa ie nakare' iereo i drala nampiziliheñe añ' anjomba' IEHOVÀ, le nioni' i Kilkìà, mpisoroñe ty boke Hà' IEHOVÀ tinolo' i Mosè. ¹⁵ Le hoe ty nisaontsia' i Kilkìà amy Safane, mpanokitse, Fa nitreako añ' anjomba' IEHOVÀ ao i boke Hàkey vaho natolo' i Kilkìà amy Safane i bokey. ¹⁶ Le nendese' i Safane amy mpanjakay i bokey vaho nanovon-tsaontsy amy mpanjakay ami'ty hoe; Fa nihenefa' o mpitoro'o iabio ze nafantok' am'iereo. ¹⁷ Le fa natonto' iareo i drala nitendrek' añ' anjomba' IEHOVÀ vaho fa natolo' iareo am-pitá' o mpisario naho am-pitá' o mpitoloñeо. ¹⁸ Le nitaroñe' i Safane amy mpanjakay ty hoe: Nanolotse boke ahy t'i Kilkìà mpisoroñe. Vaho vinaki' i Safane añatrefa' i mpanjakaio. ¹⁹ Le jinanji' i mpanjakay ty enta' i Hake, le niriante'e o siki'eo. ²⁰ Le linili' i mpanjakay t'i Kilkìà naho i Akikame ana' i Safane naho i Abdone, ana' i Mikà naho i Safane mpanokitse naho i Asaià mpitoro' i mpanjakay, ami'ty hoe, ²¹ Akia, añontaneo IEHOVÀ ho ahy naho ho amy ze sisa' Israele naho Iehoda, o tsara' i boke nitendrekeio; fa ra'elisy ty haviñera' IEHOVÀ hidandoañe amantika, amy te tsy nitana' o roaentikañeо ty tsara' IEHOVÀ, hanoa' iareo ze hene sinokitse amy bokey. ²² Aa le nimb' amy Koldà mpitoky (mpimoneñe amy efe' Ierosalaime faharoe ao), vali' i Salome ana' i Tokate, ana' i Kasrà mpamandroñe i fañajan-tsaroñey, t'i Kilkìà naho i tinendre' i mpanjakay rey nitaroñe izay. ²³ Le hoe re am' iereo: Hoe t'IEHOVÀ, Andrianañahare' Israele, taroño am' indaty nañitrik' anahareo amakoy: ²⁴ Hoe t'IEHOVÀ: Ingo, hametsahako hankàñe ty toetse toy naho o mpimone'eo, le ze hene fatse sinokitse amy boke vinaki' iareo añatrefa' i mpanjaka' Iehodaiy; ²⁵ amy t'ie nifary ahy naho nañemboke aman-drahare ila'e; toly ndra hadoañe ami'ty toetse toy ty habosehako vaho tsy hakipe. ²⁶ Fe i mpanjaka' Iehodà nañirak' anahareo hañontane am' IEHOVÀ, ty hanoe' areo ty hoe: Hoe ty nafè' IEHOVÀ, Andrianañahare' Israele: Ty amo tsara vinaki'oo, ²⁷ kanao nitrotrotrotro añ' arofo rehe naho nirè-bathe añatrefan' Añahare, ihe nijanjiñe i tsaraeñe ty toetse toy zay, naho ty amo mpimone'eo naho nidrakadrakak' amako naho nandria-tsaroñe vaho niroyetse añ' atrefako, le tsinanoko, hoe t'IEHOVÀ. ²⁸ Oniño t'ie favoriko aman-droae'o le hasese mb'an-kibori'o an-kanintsiñe vaho tsy ho isam-pihaino'o ze fonga

hankàñe hafetsako ami'ty toetse toy naho amo mpimone'eo. Aa le nahere' iareo amy mpanjakay i tsaray.

²⁹ Aa le nampañitrike i mpanjakay vaho natonto'e iaby o androanavi' Iehoda naho Ierosalaimeo. ³⁰ Le nimb' amy anjomba' IEHOVÀY mb'eo i mpanjakay naho ondati' Iehoda iabio naho o mpimone' Ierosalaimeo naho o mpisoroñeo naho o nte-Levio naho ze fonga ondaty, ty bey naho ty kede; le vinaki'e an-dravembia' iareo o hene tsara' i bokem-pañina nizoeñe añ' anjomba' IEHOVÀY. ³¹ Nijohañe amy toe'ey i mpanjakay, le nifañina añatrefa' IEHOVÀ, t'ie hañavelo am-pañorihañe IEHOVÀ naho hambenañe o lili'eo naho o fitaroña'eo naho o fañè'eo, an-kaàmpon' arofo naho an-kaliforam-pañova vaho hanao o tsaram-pañina sinokitse amy bokeio. ³² Le nampiongahe'e ze hene nizoeñe e Ierosalaime naho e Beniamine ao. Aa le norihe' o mpimone' Ierosalaimeo i fañinan' Añahare, Andrianañaharen-droae' iareoy. ³³ Le fonga nafaha' Iosià ty haloloañe amy ze hene tane' o ana' Israeleo, le songa nampitoroñe'e o nizoeñe e Israeleo, hitoroñe IEHOVÀ Andrianañahare, vaho tsy nivik' amy fañorihañe IEHOVÀ Andrianañahare' iareoy amo hene andro'eo iereo.

35

¹ Le nambena' Iosià e Ierosalaime ao ty fihelañ' ambone am' IEHOVÀ; vaho linenta amy faha-folo-efats' ambi' i volam-baloha'ey i fihelañ' amboney. ² Le nalaha'e am-pirimboñañe o mpisoroñeo, le nosihe'e amy fitoroñañe i anjomba' IEHOVÀY. ³ Le hoe re amo nte-Levio mpañoke Israele iabio, o navaheñe amy IEHOVÀO: Apoho amy anjomba' rinanji' i Selomò ana' i Davidey i vata masiñey, fa tsy ho kilankañe an-tsoro' areo eo ka, vaho toroño t'IEHOVÀ Andrianañahare' areo naho ondati'e Israeleo henane zao; ⁴ le mihentseña sambe anjomban-droae, songa firimboñañe, ty amy sinoki' i Davide mpanjaka' Israeley naho i sinoki' i Selomò ana'ey; ⁵ le mijohaña an-toe-miavake ao, songa firimboñan' anjomban-droaen-drolongo, naho ami'ty fizarañe o anjomban-droaen-te-Levio. ⁶ Le lentao i fihelañ' amboney naho miavaha, le ampihentseño o longo' areoo, hañorike i tsara' IEHOVÀ ampitá' i Mosèy. ⁷ Le nitolora' Iosià vik' añondry naho vik' ose amo ana'ondatio, ze teo iaby, songa hengaeñe amy fihelañ' amboney, le telo' ale ty hamaro'e naho añombe telo' arivo, boak' am-panaña' i mpanjakay. ⁸ Nañomey an-tsattrin' arofo amo mpisoroñeo naho amo nte-Levio ka o roandriañeo. Le natolo' i Kilkià naho i Zekarià vaho Iekiele, mpiaolo amy anjomban' Añaharey amo mpisoroñeo ty ro'arivo-tsi-enenjato hisoroñañe amy fihelañ' amboney naho añombe telon-jato. ⁹ Nanolotse amo nte-Levio ka t'i Konanià naho i Semaia naho i Netanele, rahalahi'e naho i Kasabià naho Ieiele vaho Iozabade, mpiaolo' o nte-Levio, ty lime-arivo hisoroñañe amy fihelañ' amboney naho ty añombe liman-jato. ¹⁰ Aa le nihalankañeñe i fitoloñañey, songa nijohañe antoe'e eo o mpisoroñeo naho o nte-Levio, sindre firimboñañe, ty amy lili' i mpanjakay. ¹¹ Le linenta' iareo i vik' añondrim-pihelañ' amboney, le nafetsa' o mpisoroñeo boak' ampitá' iareo ty lio'e vaho nolire' o nte-Levio. ¹² Navi' iareo o hisoroñañeo, hanolora' iareo amo fizaran' anjomban-droae' o ana' ondatio, hañenga' iareo am' IEHOVÀ ty amy misokitse am-boke' i Mosèy. Manahake zay o añombeo. ¹³ Natono' iareo añ' afo i fihelañ' amboney ty amy fañèy fe natokoñe ambalàñe naho an-tsajoa ao vaho an-tsiliàñe o soroñe miavakeo vaho nasese' iareo masika amo ana' ondatio. ¹⁴ Ie nañeneke zay le nañajary ho am-bata'e naho amo mpisoroñeo; amy te nañenga o soroñeo naho i saboray pak' amy haleñey

o mpisoroñe ana' i Aharoneo; aa le nifañalankañe ho am-bata'e naho ho amo mpisoroñe ana' i Aharoneo o nte-Levio. ¹⁵ An-toe'e eo ka o mpisabo ana' i Asafeo, ty amy lili' i Davide naho i Asafe naho Iedotone, mpioni' i mpanjakay; le tsy niavota' o mpañambeñeo ty fitoroña' iareo amo lalambey iabio, amy te nañalankañe ho a iareo o nte-Levy longo' iareoo. ¹⁶ Aa le nihenek' amy àndroy ty fitoroñañe am' IEHOVÀ, ty fañambenañe i fihelañ' amboney naho ty fisoroñañe o engan-koroañe an-kitreli' IEHOVÀ, ty amy nefe' Ioase mpanjakay. ¹⁷ Le nambena' o ana' Israele niatreke eo tañ'andro zaio fito andro i fihelañ' amboney naho i sabadidake mofo-po-dalivaiy. ¹⁸ Le tsy teo ty fihelañ' ambone nihajarieñe hambar'ama'e e Israele ao boak' aña' andro' i Samoele mpitoky; vaho tsy tamo mpanjaka' Israeleo ty nahaambeñe fihelañ' ambone manahake ty nanoe' Ioase rekets' o mpisoroñe naho nte-Levio naho Iehodà naho Israele iaby niatrekeo, mitraok' amo mpimone' Ierosalaimeo. ¹⁹ Amy taom-paha-folo-valo-ambim-pifehea' Ioasey ty nañambenañe i fihelañ' amboney.

²⁰ Ie aña, naho fa nihajarie' Iosia i anjombay, te nimbo'eo t'i Nekò, mpanjaka' i Mitsraime hialy e Karkemise e Peratey aña, le niavotse mb'eo t'Iosia hiatreatre. ²¹ Fe nampihitrifa'e irake, nanao ty hoe: Manao inoñ' ama'o raho ry mpanjaka' Iehodà? Tsy ihe ty atretrèko androany, fa i anjomba anañako aliy; vaho nandily ahy hihitrihitry mb'eo t'i Andrianañahare; aa le mifoneña tsy hitsoborea'o i Andrianañahare mpañolotse ahikoy, tsy mone harotsa'e. ²² Fe tsy nimete nitolike tsy ho ama'e t'Iosia fa nañonohono vatañe hialia'e, le tsy hinao'e i saontsi' i Nekò boak' am-palien' Añaharey vaho nimbo' am-bavatane' i Megidò re hialy.

²³ Aa le tinifi' o mpitam-paleo t'Iosia mpanjaka; le hoe i mpanjakay amo mpitoro'eo; Asitaho raho, fa vata'e fere. ²⁴ Aa le nakare' o mpitoro'eo amy saretey vaho najo' iareo amy sarete faharoe nindese'ey naho nasese' iareo mb'e Ierosalaime mb'eo naho nihomake vaho nalentek' an-kiborin-droae'e ao. Le fonga nandala aze t'Iehoda naho Ierosalaime. ²⁵ Nibeko fandalañe am' Iosia t'Ieremià naho hene takasie' o sakeran-dahilahio naho bekoe' o sairy ampelao t'Iosia pak' androany; vaho nanoa' iareo fañè e Israele ao; oniño t'ie misokitse amo Firovetañeo. ²⁶ Aa naho o fitoloña' Iosià ila'eo naho o fatariha'e ty amo pinatetse amy Hâ' IEHOVÀio ²⁷ le o tolondraha'eo, ty valoha'e pak' am-para'e; ingo fonga sinokitse amy bokem-panjakà' Israele naho Iehoday.

36

¹ Rinambe' ondati' i taneio amy zao t'Iehoakaze ana' Iosià vaho nanoeñe mpanjaka handimbe an-drae'e e Ierosalaime ao. ² Roapolo-taoñe telo' amby t'Ioakaze te niorotse nifehe, le nifeleke telo volañe e Ierosalaime ao. ³ Nafotsa' ty mpanjaka' i Mitsraime re tsy ho e Ierosalaime ao vaho sinaze'e talenta volafoty zato naho talenta volamena raike i taney. ⁴ Le nanoe' i mpanjaka' i Mitsraimey mpanjaka' Iehoda naho Ierosalaime t'i Eliakime rahalahi'e vaho novae'e ho Iehoiakime ty añara'e. Le rinambe' i Neko t'Iehoakaze rahalahi'e vaho nasese'e mb'e Mitsraime aña. ⁵ Roapolo-lim' amby taoñe t'Iehoiakime te niorotse nifehe e Ierosalaime ao; le nifehe folo-taoñe raik' amby; vaho nanao haratiañe am-pivazoho'a' IEHOVÀ Andrianañahare'e. ⁶ Nionjomb' ama'e mb'eo niatreke aze t'i Nebokadnetsare mpanjaka' i Bavele, le rinohi'e an-tsivilisily, hanese aze mb'e Bavele aña. ⁷ Nañandesá' i Nebokadnetsare mb'e Bavele aña ka o fana' i anjomba' IEHOVÀio le napo'e an-kibohom-pitalaho'a'e e Bavele ao.

⁸ Aa naho o fitoloña' Iehoiakime ila'eo naho o haloloañe nanoe'eo naho ze nitendrek' ama'e, oniño t'ie misokitse amy bokem-panjaka' Israele naho Iehoday; vaho nandimbe aze ho mpifehe t' Iehoiakine, ana'e. ⁹ Valo taoñe t'Iehoiakine te niorotse nifehe; le nifehe telo volañe naho folo andro e Ierosalaime ao vaho nanao haratiañe ampivazohoа' IEHOVÀ. ¹⁰ Ie nivalike i taoñey le nirahe' i Nebokadnetsare naho nendeseñe mb'e Bavele mb'eo re, rekets' o fanake soa añ' anjomba' IEHOVÀ vaho nanoe'e mpanjaka' Iehoda naho Ierosalaime t'i Tsidkià rahalahi'e.

¹¹ Roapolo taoñe raik' amby t'i Tsidkià te niorotse nifehe; le nifehe folo-raik' amby taoñe e Ierosalaime ao; ¹² le nanao haratiañe am-pivazohoа' IEHOVÀ Andrianañahare'e, tsy nirè-batañe añatrefa' Ieremià mpitoky nampisaontsiem-palie' IEHOVÀ. ¹³ Niolà'e ka t'i Nebokadnetsare mpanjaka nampitangène aze aman' Añahare; f'ie nampigàn-kàtoke, le nampiliets' arofo tsy hitolike amy IEHOVÀ Andrianañahare' Israele. ¹⁴ Mbore songa nandilatse raty o mpiaolo' o mpisoroñe naho ondatioo, sindre nañorike o haloloa' o kilakila' ondatioo vaho nitivae' iareo i anjomba' IEHOVÀ navahe'e e Ierosalaimey. ¹⁵ Nahitri' IEHOVÀ Andrianañaharen-droae' iareo am' iereo añamo ìra'eo, beteke nañaleñaleñe te nampionjone'e mb'eo, amy te niferenaiña'e ondati'eo naho i kiboho'ey; ¹⁶ fe ninjè' iereo o ìran' Añahareo naho nitsambolitio' iereo o tsara'eo naho nonjira' iareo o mpitoki'eo ampara' te nionjoñe am' ondati'eo ty haviñera' IEHOVÀ, sikala amy t'ie tsy aman' aoly ka. ¹⁷ Aa le nendese'e am' iereo ty mpanjaka' o nte-Kasdio, nanjamañe o ajajalahi' iareoo am-pibara amy anjomba fipalira' iareoy, le tsy nitretreze'e ndra ajalahy ndra somondrara, ndra androanavy ndra ty maròy foty; fonga natolo'e am-pità'e. ¹⁸ Le songa nendese'e mb'e Bavele mb'eo o fana' i anjomban' Añahareio, ty bey naho ty kede naho o varan' anjomba' IEHOVÀ naho o vara' i mpanjakaio vaho o roandria'eo—hene nente'e mb'e Bavele añe. ¹⁹ Le noroa' iareo i anjomban' Añaharey naho rinoba' iareo ty kijoli' Ierosalaime naho kila niforototoeñe añ' afó o anjomba'eo naho nirotsaheñe iaby o harao'e soao; ²⁰ naho nendese'e mb'e Bavele añe ze nipolititse amy fibaray, ie nitoroñe aze naho o ana'eo, am-para' te nifehe ty fifehea' i Parasè; ²¹ hampañenefañe ty tsara' IEHOVÀ am-palie' Iirmeày ampara' te navahañe amy taney o SABATA'eo; amy te, ie nangoakoake, ro nañambeñe o SABATA'eo, nañeneke ty fitom-polo taoñe.

²² Aa ie amy taom-baloha' i Korese, mpanjaka' i Parasey, hampañeneke i tsara' IEHOVÀ am-palie' Iirmeàiy, le trinobo' IEHOVÀ ty arofo' i Korese mpanjaka' i Parase, hampitsihe'e am-pifehea'e ty tsei-valo, mbore pinate'e an-tsokitse ty hoe: ²³ Hoe t'i Korese, mpanjaka' i Parase: Fa natolo' IEHOVÀ, Andrianañaharen-dikerañe ahy, ze hene fifehea' ty tane toy; vaho nafanto'e amako ty handranjiañ' aze anjomba e Ierosalaime e Iehodà ao. Aa ndra ia ia ty eo am'ondati'eo—ho ama'e abey t'IEHOVÀ Andrianañahare'e—ehe te hionjomb'eo.

Ezra

¹ Ie tan-taom-baloha' ty fifehea' i Korese mpanjaka' i Parase, le trinobo' IEHOVÀ ty arofo' i Korese mpanjaka' i Parase, hañenefa'e ty tsara' IEHOVÀ am-palie' Iirmeà, le nikoi-dava nanitsike ty fifehea'e iaby mbore nanoe'e an-tsokitse ty hoe: ² Hoe t'i Korese, mpanjaka' i Parase, Fa natolo' IEHOVÀ Andrianañaharen-dikerañey ahy iaby o fifelehañe an-tane atoio; vaho nafanto'e amako ty handranjy anjomba ho Aze e Ierosalaime e Iehoda aña. ³ Ia ty eo amo hene' ondati'eo? Ho ama'e abey t'i Andrianañahare'e, ehe t'ie hionjomb'e Ierosalaime e Iehoda aña hamboatse ty anjomba' IEHOVÀ Andrianañahare' Israele—i toen' Añahare e Ierosalaime ao. ⁴ Le ze mbe sisa amy naneseañey: ehe te hañimb' aze ondaty an-toe'eo am-bolafoty naho volamena vaho vara reketse hare, mandikoatse ty ho banabanae'e amy anjomban' Añahare e Ierosalaimey.

⁵ Niongak' amy zao o talèn' anjomba' Iehodao naho o amy Beniamineo naho o mpisoroñeo naho o nte-Levio vaho ze nitroboen' Arofon' Añahare hionjomb'eo handranjy i anjomba' IEHOVÀ e Ierosalaime aña. ⁶ Le nampihafatrare' o mañohoke iareoo o fità' iareoo ami'ty fanake volafoty naho volamena naho vara naho hare vaho ze raha soa, mandikoatse o nibanabanañeo. ⁷ Nakare' i Kerose ka o fana' i anjomba' IEHOVÀ nendese' i Nebokadnetsare boake Ierosalaime aña naho napoke an-trañondrahare'eo, ⁸ ie naboa' i Korese mpanjaka' i Parase am-pitá' i Mitredate mpamandroñe vaho niahe'e amy Ses-bazare, mpifehe' Iehodà. ⁹ Le zao ty ia'e: koveta volamena telopolo, koveta volafoty arivo, vi-lava roapolosive' amby; ¹⁰ soakazo volamena telopolo, soakazo faharoe volafoty efajato-folo' amby vaho fanake ila'e arivo. ¹¹ Aa le ze hene fanake volamena naho volafoty: lime-arivo tsi-efa-jato. Songa nasese' i Ses-bazare mindre amo niavotse ty fandrophiza' i Bavele, nionjoñe mb'e Ierosalaime aña.

2

¹ Aa le zao o ana' i borizà nionjoñe boak' am-pandrohizañeo, amo nasese mb'eoo, amo nasese' i Nebokadnetsare mpanjaka' i Bavele mb'e Bavele mb'eo, ze nimpoly mb'e Ierosalaime naho Iehodà, songa mb'an-drova'e mb'eo; ² le o nimb'eo nindre amy Zerobabeleo: Iesoa, i Nekemià, i Seraià, i Reelaià, i Mordekay, i Bilsane, i Mispare, i Bigvay, i Rekome, i Baanà. Ty ia' o nte-Israeleo:

³ O ana' i Paroseo, ro-arivo-tsi-zato-tsi-fitopol-ro'amb. ⁴ O ana' i Sefatiào, telon-jato-tsi-fitom-polo-ro'amb. ⁵ O ana' i Arakeo, fiton-jato-tsi-fitopol-lim' amby. ⁶ O ana' i Pakate-moabeo, amo ana' Iesoà naho Ioabeo, ro'arivo-tsi-valon-jato-tsi-folo-ro'amb. ⁷ O ana' i Elameo, arivo-tsi-roanjato-tsi-limampolo-efats' amby. ⁸ O ana' i Zatòo, sivanjato-tsi-efapololime amby. ⁹ O ana' i Zakaio, fitonjato-tsi-enempolo. ¹⁰ O ana' i Banio, enenjato-tsi-efapol-ro'amb. ¹¹ O ana' i Bebaio, enenjato-tsi-roapolotelo' amby. ¹² O ana' i Azgadeo, arivo-tsi-roanjato-tsi-roapol-ro' amb. ¹³ O ana' i Adonikameo, enenjato-tsi-enempolo-eneñ' amby. ¹⁴ O ana' i Bigvao, ro'arivo-tsi-limampolo-eneñ' amby. ¹⁵ O ana' i Adineo, efajato-tsi-limampolo-efats' amby. ¹⁶ O ana' i Atere nte-Kezekiào, sivampolo-valo' amby. ¹⁷ O ana' i Betsaio, telonjato-tsi-roapolotelo' amby. ¹⁸ O ana' Iorào, zato-tsi-folo-ro' amby. ¹⁹ O ana' i Kasomeo, roanjato-tsi-roapolotelo' amby.

²⁰ O ana' i Gibareo, sivampolo-lim' amby, ²¹ O ana' i Betlekhemeo, zato-tsi-roapolo-telo' amby. ²² O nte-Netofao, limampolo-eneñ' amby. ²³ O nte-Anatoteo, zato-tsi-roapolo-valo' amby. ²⁴ O ana' i Azmaveteo, efapolo-ro' amby. ²⁵ O ana' i Kiriate-arimeo, i Kefirè naho i Bierote, fiton-jato-tsi-efapolo-telo' amby. ²⁶ O ana' i Rama naho i Gabao, enen-jato-tsi-roapolo-raik' amby. ²⁷ O nte-Mikmase, zato-tsi-roapolo-ro' amby. ²⁸ O nte-Betele naho Aio, roanjato-tsi-roapolo-telo' amby. ²⁹ O ana' i Neboo, limampolo-ro' amby. ³⁰ O ana' i Magbiseo, zato-tsi-limampolo-eneñ' amby. ³¹ O ana' i Elame raikeo, arivo-tsi-roanjato-tsi-limampolo-efats' amby. ³² O ana' i Karimeo, telonjato-tsi-roapolo. ³³ O ana' i Lodeo, Kadide naho i Ono, fitonjato-tsi-roapolo lim' amby. ³⁴ O ana' Ierikoo, telonjato-tsi-efapolo' lim' amby.

³⁵ O ana' i Senào, telo-arivo-tsi-enenjato-tsi-telopolo. ³⁶ O mpisoroñe: o ana' Iedaià, amy anjomba' Iesoàio, sivanjato-tsi-fitom-polo-telo' amby. ³⁷ O ana' Imereo, arivo-tsi-limampolo-ro' amby. ³⁸ O ana' i Pasoreo, arivo-tsi-roanjato-tsi-efapolo-fito' amby. ³⁹ O ana' i Karimoo, arivo-tsi-folo-fito' amby. ⁴⁰ O nte-Levio: o ana' Iesoa naho i Kadmiele, amo ana' i Hodaviàoo, fitom-polo-efats' amby. ⁴¹ O mpisaboo: o ana' i Asafeo, zato-tsi-roapolo-valo' amby.

⁴² O ana' o mpañambeñeoo; o ana' i Salomeo, o ana' i Atereo, o ana' i Talmoneo, o ana' i Akobeo, o ana' i Hatitào, o ana' i Sobaio; ie iaby zay zato-tsi-telopolo-sive amby.

⁴³ O mpitoroñe añ' anjomban' Añahareo: o ana' i Tsikhào, o ana' i Hasofao, o ana' i Tabaoteo, ⁴⁴ o ana' i Keroseo, o ana' i Siahao, o ana' i Padoneo, ⁴⁵ o ana' i Lebanao, o ana' i Kagabào, o ana' i Akobeo, ⁴⁶ o ana' i Kagabeo, o ana' i Salmaeo, o ana' i Kanàneo, ⁴⁷ o ana' i Gideleo, o ana' i Gahareo, o ana' i Reaiào, ⁴⁸ o ana' i Retsineo, o ana' i Nekodao, o ana' i Gazameo, ⁴⁹ o ana' i Ozao, o ana' i Paseào, o ana' i Besaio, ⁵⁰ o ana' i Asnào, o ana' i Mehonimeo, o ana' i Nefosimeo, ⁵¹ o ana' i Bakbokeo, o Kahofào, o ana' i Karkoreo, ⁵² o ana' i Batsloteo, o ana' i Mehidao, o ana' i Karsào, ⁵³ o ana' i Barkoseo, o ana' i Siserao, o ana' i Tamakeo, ⁵⁴ o ana' i Netsiakeo, o ana' i Katifao.

⁵⁵ O anam-pitoro' i Selomoo: o ana' i Sotaio, o ana' i Sofereteo, o ana' i Perodao, ⁵⁶ o ana' Iaalào, o ana' i Darkoneo, o ana' i Gideleo, ⁵⁷ o ana' i Sefatiào, o ana' i Hatileo, o ana' i Pokerete nte-Tsebaimeo, o ana' i Amio. ⁵⁸ O mpitoro' i kibohoy iabio naho o anam-pitoro' i Selomoo: telon-jato-tsi-sivampolo-ro' amby.

⁵⁹ Inao o nionjoñe boak'e Tel-melà, i Tel-harsà, i Kerobe, i Adane vaho Imereo; f'ie tsy nahafiantoñoñe ty anjomban-droae'e naho ty maha-tarira' Israele iareo. ⁶⁰ O ana' i Delaiào, o ana' i Tobiào, o ana' i Nekodao, enen-jato-tsi-limampolo-ro' amby.

⁶¹ Naho amo anam-pisoroñe: o ana' i Kabaiào, o ana' i Kozeo, o ana' i Barzilaio; ie nañenga valy amo anak' ampela' i Barzilay nte-Giladeo vaho nitokaveñe amy tahina' iareoy. ⁶² Pinai' iareo o famoliliam-piantoño' iareoo, fe tsy nahaisake; aa le natao ho maleotse vaho nafahañe tsy hitolon-ko mpisoroñe. ⁶³ Le nanao ty hoe am'iereo t'i Tirsatà: Tsy mete mikama amo raha niava-do'eo iereo ampara' te miongake ty mpisoroñe reketse orime naho tomime. ⁶⁴ I valobohòke zay le efats' ale-tsi-ro' arivo-tsi-telonjato-tsi-enempolo, ⁶⁵ mbe tovo' zay o mpitoro'eo naho o anak' ampata'eo, ie nitontoñoñe ho fito-arivo-tsi-telonjato-tsi-telopolo-fito' amby; vaho am'iereo ao ty lahilahy mpisabo naho rakemba mpisabo roanjato.

⁶⁶ O soavalà' iareoo: fitonjato-tsi-telopololo-eneñ' amby; o borìke-vosi' iareoo: roanjato-tsi-efapolo-lim' amby; ⁶⁷ o rameva' iareoo: efajato-tsi-telopololo-lim' amby, o borìke iareoo: eneñ' arivo-tsi-fitonjato-tsi-roapolò. ⁶⁸ Tamo talèn-droae niheo mb'añ anjomba' IEHOVÀ e Ierosalaimeo, ty nanolotse an-tsattrin' arofo, hampitroarañe i anjomban' Añaharey an-toe'e eo; ⁶⁹ tinolo'iereo amy fanontoñam-pitoloñañey ar-kalefeañe ty volamena bogady eneñ' ale-tsi-arivo naho volafoty minà lime-arivo naho sarimbom-pisoroñe, zato.

⁷⁰ Aa le nimoneñe amo rova' iareoo ty ila' o mpisoroñeo naho o nte-Levio naho ondatio naho o mpisaboo naho o mpañambéñeo naho o mpitoron-kivohoo; le songa nimoneñe amy rova'ey t'Israele.

3

¹ Ie tsatoke ty volam-paha-fito naho fa an-drova' iareo aña o ana' Israeleo, le hene nifanontoñe hoe ondaty raike e Ierosalaime ao. ² Nitroatse amy zao t'Iesoà ana' Iotsadake naho o rahalahi'e mpisoroñeo naho i Zerobabele, ana' i Sealtiele naho o rahalahi'eo vaho nitsene ty kitrelin' Añahare hañengàñe soroñe ty amy sinokitse amy HÀ' i Mose 'ndatin' Añaharey. ³ Natobò' iereo amo tombo'eo i kitreliy ie nihembañ' am'ondati' o fifeheañeo; le nañenga soroñe ama'e amy IEHOVÀ, soroñe maraiñe naho hariva. ⁴ Le nambena' iareo i sabadida-kibohotsey, ty amy pinatetsey naho nañenga soroñe boak' andro ty amy ia'e nafetsey, ty amy fañè'ey, songa ty amy lili' i andro'ey; ⁵ tovo izay o soroñe nainai'eo naho o soroñe am-pea-bolañeo naho amo andro namantaña' IEHOVÀ naho navaheñeo, vaho songa nañenga an-tsattrin' arofo am' IEHOVÀ ze nazoto. ⁶ Boak' amy andro valoha' i volam-pahafitoiy ty namotora' iareo nañenga soroñe am' IEHOVÀ; fe mboe tsy nioreñe ty mananta' i anjomba' IEHOVÀ. ⁷ Tinolo iareo drala ka o mpihali-vatoo naho o mpandranjio; naho mahakama naho rano naho menak' amo nte-Tsioneo vaho amo nte-Tsoreo, hañendesañe hatae boake Lebanonone mb' andriake mb'e Iopà aña, amy tolotse niazo' iareo amy Korese, mpanjaka' i Parasey.

⁸ Ie amy taom-paha-roe nivotraha' iareo aña anjomban' Añahare e Ierosalaimey; amy volam-paharoe'ey ty niorota' i Zerobabele ana' i Sealtiele naho Iesoa ana' Iotsadake naho o sehangan-droahalahi'e mpisoroñeo naho nte-Levy boak' am-pandrohizañe aña nimb'e Ierosalaime mb'eo, ie nanendre o nte-Levio mifototse ami'ty roapolò taoñe mañambone, ty hamototse ty fitoloñañe aña anjomba' IEHOVÀ ao. ⁹ Niharо niongak' amy zao t'Iesoа naho o ana'eo naho o rahalahi'eo naho i Kadmiele naho o ana'eo vaho o ana' Iehodào, hisary o mpitoloñañe aña anjomban' Añahareo; teo ka o ana' i Kenadadeo naho o ana' iareoo vaho o rahalahi'e nte-Levio. ¹⁰ Aa ie naore' o mpandranjio o mananta' i anjomba' IEHOVÀ, le nampijohañeñe eo an-tsaro'e reketse trompetra o mpisoroñeo naho o nte-Levy ana' i Asafeo am-pikorintsañe, hisabo am' IEHOVÀ ty amy fanoroa' i Davide mpanjaka' Israeley. ¹¹ Le nitakasy iereo, nandrenge naho nañandriañe IEHOVÀ: ami'ty hoe:

Ie ro Soa, nainai'ey ty fiferenaiña'ey am'Israele.

Le nandia-taroba am-pàzake ondaty iabio, nandrenge IEHOVÀ ami'ty fañoreñañe o manatan' anjomba' IEHOVÀ. ¹² Fe nangoihoy ty rovetse o mpisoroñeo naho o nte-Levio vaho o talèn' anjomban-droaeo, o androanavy nahaisake i anjomba valoha'eio, ie nampijadoñañe añaatrefam-pihaino' iareo eo o mananta' ty anjomba toio, fe maro ka ty nipazapazak'

an-kaehake; ¹³ aa le tsy nahatsikara' ondatio ty famatsiña' i fipazapazam-pirebehañey amy fangololoiha' ondatioy; fa pinoña' ondatio ty fipazake kanao jinanjiñe tsietoitane aña i hozakozakey.

4

¹ Ie jinanji' o rafelahi' Iehoda naho i Beniamineo te nandranjy anjomba am' IEHOVÀ, Andrianañahare' Israele o anam-pandrohizañeo, ² le niheo amy Zerobabele naho amo talèn' anjomban-droaeo mb'eo, nanao ty hoe: Antao hindre hamboatse tika; fa paia'ay manahak' anahareo t'i Andrianañahare' areo vaho fa nisoroña'ay sikala' amy andro' i Esarkadone mpanjaka' i Asore nanese anay mb'etoañey. ³ Fe nanoa' i Zerobabele naho Iesòa vaho ty ila' o mpiaoloñ' anjomba' Israeleo, ty hoe: Tsy aman-kanoañe ama'ay nahareo ami' ty fandranjiañe anjomba ho aman' Añahare'ay; zahay ka, ro hitrao-kandranjy ho amy IEHOVÀ, Andrianañahare' Israele, amy nandilia' i Korese, mpanjaka' i Parase anaiy. ⁴ Aa le nampiletraletra ty fità' o nte-Iehoda ondati' i taneio, fa nihehere' iereo o namboatseo, ⁵ ie nanolo-vokàñe amo mpifeheo, hampineña o fisafiri' iareoo amo hene' andro' i Korese, mpanjaka' i Paraseo, pak' amy fifehea' i Dariavese, mpanjaka' i Parasey.

⁶ Ie amy fifehea' i Akasverosey, amy fifotora' i fifeleha'ey, le nisokira' iereo sisý o mpimone' Iehoda naho Ierosalaimeo. ⁷ Le amo andro' i Artaksastào ty nanokira' i Bislame naho i Mitredate naho i Tabile miharo amo rañe'e ila'eo, amy Artaksastà, mpanjaka' i Parase: sinokitse an-tsaontsy nte-Arame i taratasiy vaho nadika boak' ami'ty saontsi' Arame. ⁸ Nanokitse taratasy fandrabioñañe Ierosalaime amy Artaksastà, mpanjaka, t'i Rekome mpizaka naho i Simsay mpanokitse, amo hoe zao: ⁹ Aa hoe ty sinoki' i Rekome mpizaka naho i Simsay mpanokitse naho o rañe'e ila'eo; o mpizakao naho o mpifeleke zai'eo naho o siliketerao naho o nte-Erekeo, o nte-Baveleo, o nte Sosaneo, o nte-Dahavào vaho o nte-Elameo, ¹⁰ naho o kilakila' ondaty ila'e nasese' i Asenapare, mpanañ' asy naho vañoñey vaho navotra'e androva' i Somerone ao naho an-tane' ila'e alafe' i Saka atoiy—inao: ¹¹ intoy ty taratasy hambañ' amy nañitrifa' iareo ama'ey, amy Artaksastà mpanjakay—o mpitoro'oo, ondaty alafe' i Sakay atoio—le zao: ¹² Ee te ho fohi' i mpanjakay, te nivotrak' ama'ay e Ierosalaime atoa o nte-Iehodà nionjoñe boak' ama'oo; amboare' iareo henaneo i rova mpiola naho ratiy, naho fa najado' iareo o kijoli'eo vaho nampivitrañe o mananta'eo. ¹³ Aa ehe te ho fohi' i mpanjakay henane zao te ie mivoatse ty rova toy vaho fonitse o kijoli'eo, le tsy handoa haba ndra vili-loha ndra fondro iereo, toly ndra hampiantoeña ty fanontoña' o mpanjakao. ¹⁴ Aa kanao ikama'ay ty sira' i anjombam-panjakay, le tsy mañeva anay ty hahaoniñe ty fanalarañe i mpanjakay, aa le zay ty nampihitrica'ay taroñe amy mpanjakay, ¹⁵ soa te ho hotsohotsoeñe o bokem-bolilin-droae'o hahaisake amy bokem-boliliy naho hahaoniñe te vata'e rova mpiola ty rova toy naho mpijoy mpanjaka naho fifeheañe, ie fa nitrobo fikitrohañé hatrela'e; le zay ty nampangoakoahañe ty rova toy. ¹⁶ Aa le taroñe'ay amy mpanjakay t'ie mivoatse ty rova toy naho fonitse o kijoli'eo, le tsy ho fanaña'o ka ty an-dafe' i Sakay atoa.

¹⁷ Aa le nampisangitrife' i mpanjakay amy Rekome mpizaka naho amy Sisa mpanokitsey naho amo mpiama' iareo ila'e e Someroneo vaho amo ila'e alafe' i Sakaio, ty vale'e: Fañanintsiñe, le zao; ¹⁸ nadika naho vinaky ama'ay añatrefako i taratasy nahitri' areo ama'aiy. ¹⁹ Le

namantoke raho naho fa heneke i fitsikarahañey, le nizoeñe te nimpiola amo mpanjakao hatrela'e i rovay vaho fikitrofañe naho fikilliañe ty nanoeñe ao. ²⁰ Toe teo ty mpanjaka ra'elahy nifehe Ierosalaime, nifeleke i fonga tane alafe' i Sakaiy; le nitolorañe rorotse naho haba vaho fondro. ²¹ Aa le ametsaho zaka hampijihetse indaty rezay, tsy hamboatse i rovay, ampara' te ampiboahako tsey. ²² Mitomira arè tsy hilesa amy zay; ino ty hitomboa' o fiantoañe hijoy o mpanjakao? ²³ Ie vinaky aolo' i Rekome naho i Sisay mpanokitse naho o mpiama'eo i hambañe amy taratasi' i Artaksastà, mpanjakay, le nihitrihity mb'e Ierosalaime mb'amo nte-Iehodao mb'eo, nanjitse ty ao an-kaozaraña naho senge hèry. ²⁴ Aa le nijihetse i fitoloñañe añ' anjomban' Añahare e Ierosalaimey; le nizitse am-para' ty taom-paha-roem-pifeleha' i Dariavese, mpanjaka' i Parasey.

5

¹ Aa le nitoky amo nte-Iehodà e Iehodà naho Ierosalaimeo amy zao o mpitokio; i Kagaý mpitoky naho i Zekarià, ana' Idò, ie nitoky am' iareo amy tahinan' Añahare Israeley. ² Niongak' amy zao t'i Zerobabele ana' i Sealtiele naho Iesoà, ana' Iotsadake niorotse namboatse i anjomban' Añahare e Ierosalaimey; le nimpiam' iareo nañimba, o mpitokin' Añahareo.,

³ Pok' eo amy zao t'i Tatenay, mpifehe alafe' i Sakay aña naho i Setar-botsenay naho o rañe'eo, nanao ty hoe am' iereo: Ia ty nanolo-dily anahareo handranjy o anjombao vaho ty hamonitse ty rafitse toy? ⁴ naho ia o tahina' ondaty mamboatse ty anjomba toio? ⁵ Fa tamo mpiaolo' o nte-Iehodao ty fihainon' Añahare' iareo, le tsy nazi' iareo hitroatse, ampara' te niheo amy Dareiavese i rahay vaho nimpoly am' iereo an-taratasy ty vale'e. ⁶ Itoy ty taratasy hambañe amy nampihitrife' i Tatenay mpifelek' alafe' i Sakay atoiy naho i Setar-botsenay vaho o rañe'eo nte-Afaresake alafe' i Sakay atoio amy Dareiavese mpanjaka; ⁷ zao ty nisokitse amy taratasy nahitrikey: Ry Dariavese mpanjaka, hene hanintsiñe! ⁸ Ampahafohinaña i mpanjakay te niheo mb' an-tane' Iehodà aña zahay, mb'amy anjomban' Añahare jabahinakey mb'eo, ze amboareñe am-bato jabajaba naho bodan-katae amo rindri'eo, le ifanehafaña an-kahimbañaña i fitoloñañe zay vaho miraorao am-pitá' iareo. ⁹ Aa le nañontanea'ay o mpiaoloo, ami'ty hoe: Ia ty nanolo-dily anahareo handranjy ty anjomba toy naho ty hamonitse o kijolio? ¹⁰ Nañontanea'ay ka o tahina' iareoo, ho taroñeñ' ama'o, hanokira'ay ty tahina' o mpiaolo' iareoo. ¹¹ Le ty hoe ty navale' iareo anay: Mpitoron' Andrianañaharen-dikerañey naho ty tane toy zahay, le amboare'ay ty anjomba nifonitse taoñe maro taolo aña toy, i namboare' ty mpanjaka ra'elahi' Israele vaho nihenefe'ey. ¹² Fe nampaviñeren-droae'ay t'i Andrianañaharen-dindiña aña, le natolo'e am-pitá' i Nebokadnetsare, mpanjaka' i Bavele, i nte-Kasdy nandrotsake ty anjomba toy vaho nanese ondatio mb'e Bavele mb'ey. ¹³ F'ie amy taombaloha' i Korese, mpanjaka' i Baveley, le tsine' i Korese mpanjaka te hamboareñe ty anjomban' Añahare toy. ¹⁴ Tovo'e: o fanake volamena naho volafoti' i anjomban' Añahare nakare' i Nebokadnetsare boak' aña'anjomba e Ierosalaime aña, ie nasese'e mb' amy anjomba e Baveleio, le nakare' i Korese boak' amy anjomba' i Baveley naho natolo'e amy atao Ses' bazare nanoe'e mpifelekey; ¹⁵ naho nanao ty hoe ama'e: Rambeso o fanake retoañe le akia apoho aña'anjomba'e e Ierosalaime ao vaho amboaro amy toe'e eo ty anjomban' Añahare. ¹⁶ Totsake eo amy zao t'i Sesbazare, le

naore'e o mananta' i anjomban' Añahare e Ierosalaime aoio; le sikal' amy andro zay pake henaneo t'ie namboareñe, fe mboe tsy fonitse. ¹⁷ Ie amy zao naho mete añ'arofo' i mpanjakay, te ho tsikaraheñe añ' anjombam-panontona' i mpanjaka e Baveley ty hatò' te teo ze o tsey nanoe' i Korese mpanjaka, hamboareñe i anjomban' Añahare e Ierosalaimey zao, le ehe te hirahe' i mpanjakay ama'ay ty satrin' arofo'e amy rahay.

6

¹ Aa le namantoke t'i Dariavese vaho nihotsohotsoeñe i anjombam-pañajan-taratasiy, am-panontonam-baras e Bavele ao. ² Le nitendrek' amy anjomba e Akmetà ao, amy faritane' o nte-Madaioy ty boke-peleke, le sinokitse ama'e ao ty hoe: Ty talily: ³ Amy taom-baloha' i Korese, mpanjakay, le nanao tsey t'i Korese mpanjaka: I anjomban' Añahare e Ierosalaimey, te hamboareñe i anjombay, i fañengà' iareo soroñey naho añoreñañe fatratse o mananta'eo; ty haabo'e, kiho enempolo naho ty ampohe'e, kiho enempolo; ⁴ naho firiritam-bato jabajaba, telo naho fidadañam-bodan-katae vao, le ho tolorañe boak' añ' anjomba' i mpanjakay ty drala'e; ⁵ le ampolieñe ka o fanake volamena naho volafotin' anjomban' Añahare nakare' i Nebokadnetsare boak' añ' anjomba' e e Ierosalaime ao naho nendese'e mb'e Bavele mb'eo; hahereñe, songa antoe'e añ' anjomba e Ierosalaime vaho hapok' amy anjomban' Añaharey. ⁶ Ie amy zao, ry Tatenay mpifelek' alafe' i Sakay naho i Setar-botsenay naho o mpiama' areo nte Afaresake alafe' i Sakaio, ihalaviro; ⁷ apoho hanoeñe i fitoloñañe amy anjomban' Añaharey; le angao handranjy i anjomban' Añaharey an-toe'e eo ty mpifehe o nte-Iehodao naho o mpiaolo' Iehodao. ⁸ Mbore tseizeko ty hanoa' areo amo mpiaolo' o nte-Iehoda mpamboatse i anjomban' Añahareioo; te hatolotse am-pahimbañañe boak' amo varam-panjaka amy haba alafe' i Sakaio am' indaty rey ze drala paiae'e, vaho tsy ho sebañeñe. ⁹ Le ze paia' iareo, amo baniao naho o añondrilahio naho o vik' añondrio, hisoroñañe amy Andrianañaharen-dikerañey; vare-bolè, sira, divay naho menake. Le ze saontsi' o mpisoroñe e Ierosalaimeo ty amahana'o aze boak' andro boak' andro vaho tsy hilesa; ¹⁰ hañengàñe soroñé marifondrifoñe amy Andrianañaharen-dindiñey naho ihalaliañe ty havelo' i mpanjakay naho o anadahi'eo. ¹¹ Tovoñako ty hoe te ze mañova o entañe zao ro hañakarañañe boda amy anjomba'ey, le honjoñendre hapitek' ama'e; vaho hanoeñe votrim-porompotse i traño'ey; ¹² vaho ehe te harotsan' Añahare nampimoneñe ty tahina'e ao ze mpanjaka ndra ondaty te hañity fitàñe hañova izay, hampianto i anjomban' Añahare e Ierosalaimey. Zaho Dariavese ty mitsey: ee t'ie ho henefañe masika.

¹³ Aa le nihavatse nitoloñe t'i Tatenay, mpifelek' alafe' i Sakay naho i Setar-botsenay naho o mpiama'eo ty amy nampihitrife' i Dariavese mpanjakay. ¹⁴ Le nandranjy naho niraorao o mpiaolo-nte-Iehodao ty amy fitokia' i Kagaý mpitoky naho i Zekarià ana' Idòy. Ie namboatse iereo ro nahafonitse i nandilian' Añahare' Israelely naho nitseize' i Korese naho i Dariavese naho i Artaksastà mpanjaka' i Parase rey. ¹⁵ Le nifonitse amy andro fahatelo' i volan-Kiahiaiy i anjombay, an-taom-paha-ene' i Dariavese, mpanjakay. ¹⁶ Le nitana' o ana' Israeleo naho o mpisoroñe o nte-Levio vaho ty ila' o anam-pandrohizañeo am-pirebeñañe ty fañorizañe i anjomban' Añaharey, ¹⁷ ie nañenga añombelahy zato naho añondri-lahy roanjato naho vik' añondry efa-jato

amy fañorizañe i anjomban' Añahareiy; le oselahy folo-ro' amby ho engankakeo' Israele iaby, ty ami'ty ia' i fifokoa' Israele rey. ¹⁸ Le nalahatse am-pirimboñañe o mpisoroño e nte-Levio, songa am-piosoña'e hitoroñe an' Andrianañahare e Ierosalaime ao; ty amy sinokitse amy boke' i Moseiy. ¹⁹ Le nitana' o anam-pandrohizañe amy andro faha-folo-efats' ambi' i volam-baloha'ey i Fihelañ' Amboney. ²⁰ Le nitrao-pañeferañe o mpisoroño e nte-Levio; songa nali; le linenta' iareo i fihelañ' amboney ho amo anam-pandrohizañe iabio naho o mpisoroño roahalahi' iareoo naho o vata' iareoo. ²¹ Le songa nikama o ana' Israele nimpoly boak' am-pandrohizañe naho o nivike ho am' iereo boak' ami'ty haleora' o kilakila' ondati' i taneio, hipay IEHOVÀ Andrianañahare' Israele, ²² naho nitana' iareo an-kaehake fito andro i sabadida-mofo-tsi-aman-dalivaiy; amy te nampinembanembañ' iareo t'IEHOVÀ vaho nampitolihe'e am' iereo ty arofo' i mpanjaka' i Asorey; nampaozatse ty fità' iareo amy fitoloñañe añ' anjomban' Añahare, Andrianañahare' Israele.

7

¹ Ie aña, le teo tam-pifehea' i Artaksastà, mpanjaka' i Parasey, t'i Ezrà, ana' i Seraià, ana' i Azarià, ana' i Hilkià, ² ana' i Salome, ana' i Tsadoke, ana' i Akitobe, ³ ana' i Amarià, ana' i Azarià, ana' i Meraiote, ⁴ ana' i Zerakià, ana' i Ozý, ana' i Boký, ⁵ ana' i Abisoà, ana' i Pinekasse, ana' i Elazare, ana' i Aharone, mpisorom-bey; ⁶ nionjoñe boake Bavele aña i Ezrà zay, ie mpanokitse mahimbañe amy Tsara' i Mosè natolo' IEHOVÀ Andrianañahare' Israele azey; vaho hene nitolora' i mpanjakay ze nihalalia'e amy te tama'e ty fità' IEHOVÀ Andrianañahare'e. ⁷ Nionjomb'e Ierosalaime mb'eo ty ila' o ana' Israeleo naho o mpisoroño naho o nte-Levio naho o mpisaboo naho o mpañambeñe naho o Natolotseo* antaom-paha-fito' i Artaksastà, ⁸ le nivotrake e Ierosalaime ao amy volam-paha-lime' i taom-paha-fito' i mpanjakaiy, ⁹ ie namototse amy andro valoha' i volam-baloha'ey ty fionjona'e boake Bavele aña le nitotsake e Ierosalaime ao amy andro valoham-bolam-paha-limey ty amy fitàn-tsoan' Añahare ama'ey. ¹⁰ Fa nihentseña' i Ezrà[†] añ' arofo'e ao ty hitsoeke i Tsara' IEHOVÀ naho ty hañorik' aze naho ty hañoha'e e Israele ao o fañè naho fepè'eo.

¹¹ Le zao ty dika-hamban-taratasy natolo' i Artaksastà mpanjaka amy Ezra mpisoroño, mpanokitse, toe nanokitse ty tsara' o lili' IEHOVÀ naho fañè'eo ho a Israele: ¹² Artaksastà mpanjakam-panjaka, amy Ezra mpisoroño, mpanoki-dilin' Añaharen-dindiñey, fañanintsiñe. Ie henaneo ¹³ mikoi-dava raho te ze nte-Israele naho o mpisoro'eo miharo amo nte-Levy am-pifeheako atoio, ze mañiriñe an-tsatin' arofo'e ty hindre lia ama'o mb'e Ierosalaime mb'eo, le mionjona. ¹⁴ Amy te nirahe' i mpanjakay naho i mpanolo-keve'e fito rey ama'o, hañontane Iehoda naho Ierosalaime ty amy lilin' Añahare'o am-pitá'oy; ¹⁵ naho ty hinday ty volamena naho volafoty natolo' i mpanjakay naho i mpanolo-keve'e rey an-tsatin' arofo mb' aman' Añahare' Israele, mpimoneñe e Ierosalaime ao ¹⁶ naho ze hene volafoty naho volamena ho zoe'o am-pifehea' i Bavele ao, reketse ty engan-tsatin' arofo' ondatio naho o mpisoroño, ie songa manolotse an-tsatri'e añ' anjomban' Añahare'e e Ierosalaime ao; ¹⁷ aa le ho vilie'o an-kahimbañañe amy volay o baniao, o añondrilahio, o vik'añondrio, mindre amo enga-mahakama'eo naho o enga-rano'eo ie

* ^{7:7} Natolotse: Mpitoroñ'anjomban'Ahare † ^{7:10} Ezra: Olotse, Imba

hisoroña'o amy kitrelin' Anjomban' Añahare' areo e Ierosalaimey. ¹⁸ Le ze atao'o naho o rahalahi'o ho soa anoeñe ami'ty sisa' i volafoty naho volamenay; le ano ty amy satrin' arofon' Añahare' areo. ¹⁹ Natolotse azo ho amy fitoroñañe i anjomban' Añahare'oy ka o fanakeo, aseseo añatrefan' Añahare' Ierosalaime ao. ²⁰ Aa ze tovo'e ho paiañe amy anjomban' Añahare'oy, ze oni'o te azo tolorañe, le itoloro boak' antrañom-panontonam-baram-panjaka ao. ²¹ Le zaho, eka zaho Artaksastà mpanjaka, ty mitsey amy ze hene mpamandrom-baralafe' i Sakay aña, te ze paia' i Ezrà mpisoroñe, mpanoki-dilin' Añaharen-dindiñey ama' areo, le hanoëñe an-kahimbañañe, ²² pak' ami' ty volafoty zato talenta naho ty vare-bolè zato kore naho ty divay zato bate naho ty menake zato bate vaho ty sira tsy amañ-iake. ²³ Ze lilie' i Andrianañaharen-dikerañey, le ano am-pilozohaña amy anjomban' Añaharen-dindiñey, soa tsy ho ankaviñerañe ty fifehea' i mpanjakay naho o ana'eo. ²⁴ Le afantok' ama' areo ty amo mpisoroñe o nte-Levio, o mpisaboo, o mpañambeñeo, o mpitoroñe o nte-mpitoloñ' aña' anjomban' Añahareo, te faly ty ipaiañe rorotse, ndra fondro ndra haba. ²⁵ Aa Ihe Ezrà, ty amy hihin' Añahare'o am-pitá'oy, le ampijadoño mpandily naho mpizaka, hahafizaka ondaty alafe' i sakay aña iabio, ze hene mahafohiñe o lilin' Añahare'oo; le anaro ze mboe tsy mahafohiñe. ²⁶ Le ze tsy mete mañorike o lilin' Añahare'oo naho ty lilim-panjaka, le afetsaho ama'e aniany ty zaka, ke t'ie havetrake, he hasese, hera hañafahaña vara, ke harohy.

²⁷ Andriañeñe t'IEHOVÀ Andrianañaharen-droaentikañe, te najo'e aña'rofo' i mpanjakay, hampisomontie' ty anjomba' IEHOVÀ e Ierosalaime ao; ²⁸ vaho nañitrike fiferenaiñañe amako aña' atrefa' i mpanjakay naho o mpanolo-keve'eo naho o roandriañe fatratse iabio. Le nampaozatse ahy te tamako ty fità' IEHOVÀ Andrianañahareko vaho namoriako mpiaolo ondaty boak' Israele ao hitraok' amako hionjoñe mb'eo.

8

¹ Ireza ro mpiaolon-droae naho ty fiantoño' o nindre amako boak' am-pifehea' i Artaksastà mpanjaka, nionjomb'eo boake Baveleo: ² Tamo ana' i Pinekaseo; i Gersome; amo ana' Itamareo, i Daniele; tamo ana' i Davideo, i Hatose. ³ Tamo ana' i Sekaniào, amo ana' i Paroseo, i Zekarià reketse ty zato-tsi-limampolo nivolilieñe ami'ty fiantoño' o lahilahio. ⁴ Tamo ana' i Pakate-moabeo; i Elihoenay ana' i Zerakià reketse ty lahilahy roanjato. ⁵ Tamo ana' i Sekaniào, i Zatò, ana' Iakaziele, reketse ty lahilahy telonjato. ⁶ Le tamo ana' i Adineo, i Ebede ana' Ionatane, reketse ty lahilahy limampolo. ⁷ Le tamo ana' i Elameo, Iesaia ana' i Atalia, reketse ty lahilahy fitompolo. ⁸ Le tamo ana' i Sefatiào, i Zebadià, ana' i Mikaele, reketse ty lahilahy valompolo. ⁹ Tamo ana' Ioabeo, i Obadià, ana' Iekiele, reketse ty lahilahy roanjato-tsi-folo-valo' amby. ¹⁰ Le tamo ana' i Banio, i Selomite, ana' Iosifià, rekets ty lahilahy zato-tsi-enempolo. ¹¹ Le tamo ana' i Bebaio; i Zekarià, ana' i Bebay, reketse ty lahilahy roapolovalo' amby. ¹² Le tamo ana' i Azgadeo; Iohanane, ana' i Hakatane, reketse ty lahilahy zato-tsi-folo. ¹³ Le tamo ana' i Adonikameo, o tsits'o'eo; zao o tahina'eo, i Elifelete, Ieiele naho i Semaià, reketse ty lahilahy enempolo. ¹⁴ Le tamo ana' i Bigvaio, i Otay naho i Zakore, reketse ty lahilahy fitompolo. ¹⁵ Le hene natontoko amy saka mivariñe mb'e Ahava mb'eoy; naho nitobe eo telo andro, nisary ondatio naho o mpisoroñe fe leo raik' amo nte-Levio tsy nizoeñe ao. ¹⁶ Aa le tinokako t'i Eliezere, i Arièle, i Semaià naho i Elnatane naho Iaribe naho

i Elnatane naho i Natane naho i Zekarià naho i Mesolame, mpiaolo; naho Ioiaribe vaho i Elnatane, mpañoke. ¹⁷ Le nafantoko am'iareo ty homb' amy Ido mpiaolo mb'an-toetse atao Kasifia naho vinolako am'iereo ty ho asa' iareo amy Ido naho amo rahalahi'e mitoroñe an-toe' i Kasifiao, ty hinday mpitoroñe mb'amy anjomban' Añaharey. ¹⁸ Aa ty am-pitàn-tsoan' Añahare'ay ama'ay le nandesa' iareo ondaty mahihitse, ty ana' i Maklý, ana' i Levy, ana' Israele, toe i Serebià rekets' o ana'eo naho o rahalahi'e, folo-valo' amby; ¹⁹ naho i Kasabià; le nindre ama'e t'Iesaià tamo ana' i Merario, o rahalahy naho ana-dahi' iareoo, roapol; ²⁰ vaho tamo nte-Natoneo*, o natolo' i Davide naho o roandriañe o am-pitoroñañe o nte-Levio; nte-Natone roan-jato-tsi-roapol songa tinoñoñe amy tahina'ey.

²¹ Aa le nitsey fililiran-draho an-tsaka Ahavà eo, hiambanea'ay añatrefan' Añahare'ay, hipay ama'e ty lalan-tsoa ho anay naho o keleia'aio vaho o vara'ay iabio. ²² Fa ho nisalatse raho te nihalaly firimboñan-dahindefoñe naho mpiningi-tsoavala amy mpanjakay, hañolora'e anay amo malaso an-dalañe; ie fa nisaontsy amy mpanjakay, ty hoe: Ty fitàn' Añahare'ay ro amo mipay aze iabio ho an-kasoa; fe atreatré'e an-kaozarañe naho an-kaviñerañe o mamorintseñe azeo. ²³ Aa le ie ty nililira'ay te nitsoek' an' Andrianañahare'ay; vaho vinale'e i halali'ay.

²⁴ Aa le naviko ty mpiaolom-pisoroñe folo-ro'amby—i Serebià naho i Kasabià vaho ty folo amo longo' iareoo. ²⁵ Le linanjako am' iereo i volafotiy naho i volamenay naho o fanakeo, i nengae' i mpanjakay naho o mpanolokeve'eo naho o roandria'e naho o nte-Israele teo iabio, amy anjomban' Añahare'ay. ²⁶ Eka, linanjako am-pitá' iareo ty volafoty talenta enenjato-tsi-limampolo naho ty fanake volafoty talenta zato naho ty volamena talenta zato; ²⁷ naho koveta volamena roapol, vilin-drala arivo; naho fanake roe an-torisike mikinokino, mañeva volamena. ²⁸ Le hoe ty asako am' iereo, Miavake ho amy IEHOVÀ nahareo, miavake ka o fanakeo; vaho nengañe an-tsatin' arofo am' IEHOVÀ Andrianañaharen-droae' areo i volafotiy naho i volamenay. ²⁹ Ijilovo naho ambeno ampara' t'ie lanjae' areo amo mpiaolom-pisoroñe naho amo nte-Levio naho amo roandrian' anjomban-droae' Israeleo e Ierosalaime añ'efen' anjomba' IEHOVÀ ao. ³⁰ Aa le rinambe' i mpisoroñe naho nte-Levy rey i volafoty naho volamena linanjay naho o fanakeo hendesa' iareo mb'e Ierosalaime aña mb'añ' anjomban' Añahare'ay mb'eo.

³¹ Aa le nienga i saka Ahavay zahay amy andro faha folo-ro'ambi' i volam-baloha'ey nionjone mb'e Ierosalaime mb'eo; naho tama'ay ty fitàn'Añahare'ay vaho rinomba'e am-pitàn-drafelahi'ay naho amy ze niampitse an-dalañe, ³² le nivotrake e Ierosalaime ao vaho nitofa telo andro. ³³ Ie amy andro fahefatsey le nandanja i volafotiy naho i volamenay naho o fanakeo, aña'anjomban' Añahare'ay am-pitá' i Meremote, ana' i Orià mpisoroñe; nindre tama'e t'i Elazare, ana' i Pinekase; le nimpama' iareo t'Iozabade ana' Iesoà naho i Noadià, ana' i Binoy, songa nte-Levy; ³⁴ ie iaby ami'ty ia'e naho an-danja'e; le sinokitse henane zay iaby i lanja'ey. ³⁵ Nañenga soroñe aman' Añahare' Israele o anampandrohizañe niboak' am-paneseañe, bania folo-ro'amby ho a Israele iaby, añaondrilahy sivampolo-eneñ' amby, vik'añondry fitompolo-fito' amby vaho oselahy folo-ro'amby ho engan-kakeo; hene nisoroñañe am' IEHOVÀ. ³⁶ Le natolo' iareo amo mpizaka' i mpanjakaio naho amo mpifehe

* ^{8:20} Natone: mpitoroñe

alafe' i Sakaio i nampañitrifañey, vaho nimbae' iereo ondatio naho i anjomban' Añaharey.

9

¹ Aa ie niheneke, le niheo mb' amako mb'eo o roandriañeo nanao ty hoe: Mboe tsy miavak' am'ondati' o taneo o nte-Israeleo naho o mpisoroñeo vaho o nte-Levio, ty amo haloloa' o nte-Kananeo, o nte-Kiteo, o nte Perizeo, o nte-Iebosio, o nte-Amoneo, o nte-Moabeo, o nte-Mitsraimeo vaho o nte-Amoreo. ² Ie nañenga amo anak' ampela' iareoo ho am-bata'e naho ho amo ana-dahi'eo; aa le mitraok' am'ondati' i taneio i tiry miavakey; eka, toe lohà'e amy tsy figahiñañe zay ty fità' o roandriañeo naho o mpiaoloo. ³ Ie nahatsanoñe zay raho le riniako i sarokoy naho i sarimbokoy naho nañonotse ty volon-dohako naho ty somako vaho nitoboke an-kasalarañe. ⁴ Nivory amako ze hene mpinevenevetse amo tsaran' Añahare' Israeleo ty amy tsy figahiña' o tam-pandrohizañeo; le nitoboke eo avao raho ami'ty hadabàko ampara' i fisoroñan-karivay.

⁵ Le niongak' amy fisoroñan-karivay raho, ie riatse i sarokoy naho i sarimbokoy; le nivarahotrek' añ'ongoko eo nañiti-tàñañe amy IEHOVÀ Andrianañahareko ⁶ nanao ty hoe: O Andrianañahareko, salatse raho, meñatse tsy mahaandra' tarehe ama'o, ry Andrianañahareko; fa mittoabotse am-bonen' añambone'ay ey o hakeo'aio vaho mitombo pak' an-dikerañe aña o tahi'aio. ⁷ Toe niliforen-kakeo tañ' andron-droae'ay ampara henaneo zahay, le o tahi'aio ty nanolorañe anay naho o mpanjaka'aio naho o mpisoro'aio am-pitam-panjaka' o taneo; am-pibara, androhy, am-pikopafañe naho an-kasalaran-daharañe manahake androany. ⁸ Ie vaho anianike te nihelañe eo ty fitretreza' IEHOVÀ Andrianañahare'ay, nanisa ama'ay ty sehanga'e napolititse, hitolora'e ty fantake an-toe'e miavakey, hañazavàn' Añahare'ay o fihaino'aio hampisotratsotrase anay amo rohi'aio. ⁹ Toe fetrek' oron-jahay; fe tsy naforintsen' Añahare'ay amy fandrohizañey, te mone niferenaiña'e am-pahaoniña' o mpanjaka' i Paraseo, hanolora'e fañavaòañe hampitroara'ay ty anjomban' Añahare'ay, hampijohaña'ay o nianto ama'eo vaho nitolora'e kijolimpiarovañe e Iehodà naho e Ierosalaime ao. ¹⁰ Aa ie henanekeo ry Andrianañahare'ay, ino ty hanoe'ay? kanao nifarie'ay o lili'oo, ¹¹ o nandilia'o añamo mpitoky mpitoro'oo, ami' ty hoe: Toe tane maleotse i tane ionjona' areo ho tavaneñey, amo haleora' ondati' i taneio, amo haloloa' iareoo; ie nampipeà' iareo ama'e ty hativà' iareo boak' añ'efe'e sikal' añ'ilae'e aña. ¹² Ie amy zao ko atolo' areo amo ana-dahi' iareoo o anak' ampela' areoo naho ko ampañenga' areo o anak' ampela' iareoo o ana-dahi' areoo; ko ipaia' areo kitro-kattrok'e ty fanintsìñañe ndra ty firaoraoañe; soa te ho fatratse nahareo hikama ty hasoa o taneo, hampandovà' areo aze amo ana' areoo nainai'e. ¹³ Aa i hene nifetsak' ama'ay ty amo sata-rati'aio naho o halòn-kakeo' aiyo naho te ihe, Andrianañahare'ay tsy nandafa anay mañeva o tahi'aio vaho natolo'o o sehanga'e zao, ¹⁴ aa vaho hivalik' amo lili'oo indraike zahay, hifanambaly am'ondaty mpanao i halò-tsere'e rezay? Tsy hiviñera'o ampara' te nimongore'o, tsy aman-tsehanga'e, leo raike tsy hahapolititse? ¹⁵ Vantan-dRehe ry IEHOVÀ Andrianañahare' Israele; fa nanisàñe ama'ay o nahapolititseo, ie o androanio; hehe te miatrek' Azo an-kakeo; leo raike tsy hahafitroatse añatrefa'o ty amo raha zao.

10

¹ Ie nihalaly naho nisoloho, nangololoike naho nidrakadrakak' añ'atrefan' anjomban' Añahare eo t'i Ezra, le nifanontoñe ama'e boak' Israele ao ty valobohò-bey, lahilahy naho rakemba naho ajaja, songa nangoihoy ty rovetse. ² Aa le nanoiñe t'i Sekanaià ana' Iehiele, amo ana' i Elameo, ty hoe amy Ezra: Fa nampipitso-patokisañe aman' Añahare'ay zahay, ie nañenga ampela ankafankafa am' ondati' ty tane toio; fe amam-pitamañe t'Israele henane zao ndra te eo izay. ³ Antao arè hifañina aman' Añaharen-tikañe hanasa valy rekets' o nisamak' ama'eo, ty amy nañereta' i Talè naho ty amo minevenevetse amy lilin' Añaharen-tikañeio; le ehe t'ie hanoeñe an-Kàke. ⁴ Miongaha, ama'o o raha zao vaho mpiama'o zahay; mihaftarara le anò. ⁵ Niongak' amy zao t'i Ezra, nampifanta o mpiaolom-pisoroñe o nte-Levio naho Israele iaby, hanoa' iereo i nisaontsieñey. Le nifanta iereo.

⁶ Aa le niavotse boak' añatrefan' Anjomban' Añahare eo t'i Ezra, nizilik' aña' efe' Iehohanane ana' i Eliasibe ao; tsy nikama rano ndra mahakama t'ie tao, ami'ty fandalà'e i tsy fatokisa' o tam-pandrohizañeio.

⁷ Aa le nanitsike Iehoda naho Ierosalaime iereo nanao koim-bohitse amo anam-pandrohizañe iabio hifanontoñe e Ierosalaime ao; ⁸ le ze tsy nitsatoke eo añate' ty telo andro, ty amy fañereta' o roandriañe naho o mpiaoloo, le hafahañe ama'e iaby o vara'eo, le haitoañe amy favorin-tam-pandrohizañey. ⁹ Aa le nifanontoñe e Ierosalaime ao añate' i telo andro rezay ze hene lahilahi' Iehoda naho i Beniamine, amy volam-paha-sivey, amy andro faha-roapoloo' i volañeiy; le songa niambesatse amy tameañe aolo' i anjomban' Añahareiy ondatio, sindre nitititike ty amy raha zay naho amy oram-bey. ¹⁰ Niongak' amy zao t'i Ezra mpitoky, le nanoa'e ty hoe: Fa nampipitso-patokisañe nahareo naho fa nañenga ampela ambahiny, hampitoabotse ty hakeo' Israele. ¹¹ Aa le misolohoa am' IEHOVÀ Andrianañaharen-droae' areo, le anò ty satrin' arofo'e; vaho miavaha am' ondati' i taneio naho amo rakemba ambahinio. ¹² Le nanoiñe am-peo mafe i favoriy, ami'ty hoe: Tsy mete tsy hanoe'ay i nitaroñe'oy. ¹³ Fe maro ondatio, le oram-bey ty eo henaneo naho tsy mahafijohañe an-tamean-jahay vaho tsy fitoloñan' andro roe ndra raike o raha zao; amy te bey ty tahi'ay amy rahay. ¹⁴ Ee te hióngak' amy zao o mpiaolom-balobohòkeo, songa hiheo mb' atoy ami' ty andro tinendre, o an-drova'ay nañenga ampela ambahinio vaho sindre hindrezam-piaolo naho mpizaka boak' amy rova'ey, ampara' te mitolike ty haviñeran' Añaharen-tika miforoforo aman-tikañe, ty amo raha zao.

¹⁵ Ionatane, ana' i Asahele naho Iakzeià ana' i Tikvà avao ty nandietse i rahay le nañolotse iareo t'i Mesolame naho i Sabetà, nte-Levy. ¹⁶ Fe nanoe' o anam-pandrohizañey zay. Le nivike t'i Ezra, mpisoroñe, reketse ty mpiaolo ila' o anjomban-droae'eo, sindre anjomban-droae, songa ondaty amy tahina'ey, niambesatse amy andro valoha' i volam-paha-foloy hitsikarake i rahay. ¹⁷ Le nitsitsihe' iareo ondaty nañenga rakemba ambahinio ampara' ty andro valoha' i volam-baloha'ey. ¹⁸ Le o nizoeñe te nanambaly ampela hafa amo anam-pisoroñeoo: amo ana' Iesoa, o ana' Iozadakeo, le amo rahalahi'eo: i Maaseià naho i Eliezere naho Iaribe vaho i Gedalià, ¹⁹ songa nanolo-pitâñe hifanarake amo vali'eo; aa ty amy tahi' iareoy le songa nañefa añondrilahy boak' an-dia-raik' ao, ho amy hakeo'ey. ²⁰ Naho amo ana' Imereo; i Kananý naho i Zebadià. ²¹ Naho amo ana' i Karimeo, i Maaseià naho i Elilià naho i Semaià naho Iekiele naho i Ozià. ²² Naho amo ana' i Pasoreo; i Elioenay, i Maaseià, Ismaele, i Netanile,

Iozabade vaho i Elasà. ²³ Le amo nte-Levio: Iozabade nahó i Shimey nahó i Kelaia (toe Kelità), i Petahià, Iehoda vaho i Eliezere. ²⁴ Le amo mpisaboo: i Eliasibe; nahó amo mpañambéneo, i Salome nahó i Teleme vaho i Orý. ²⁵ Nahó am' Israele: amo ana' i Paroseo; i Ramià nahó Iezià nahó i Malkià nahó i Miamine nahó i Elazare nahó i Malkià vaho i Benaià. ²⁶ Nahó amo ana' i Elameo: i Matanià, i Zekarià nahó Iekiele nahó i Abdý nahó Ieremote vaho i Elià. ²⁷ Nahó amo ana' i Zatòo: i Elioenay, i Eliasibe, i Matanià nahó Ieremote nahó i Zabade vaho i Azizà. ²⁸ Nahó amo ana' i Bebaio: Iehokanane, i Kananià, i Zabay, i Atlay. ²⁹ Nahó amo ana' i Bany; i Mesolame, i Maloke, i Adaià, Iasobe, i Seale vaho i Ramote. ³⁰ Nahó amo ana' i Pakate-moabeo; i Adnà, i Kelale, i Benaià, i Maaseià, i Matanià, i Bezalile nahó i Binoý vaho i Menasè. ³¹ Nahó amo ana' i Karimeo: i Eliezere, Isià, i Malkià, i Semaià, i Simeone, ³² i Beniamine, i Maloke vaho i Semairà. ³³ Amo ana' i Kasomeo; i Matenaý, i Matatà, i Zabade, i Elifelete, Ieremaý, i Menasè, i Simeý. ³⁴ Amo ana' i Banio: i Maadaý, i Amrame nahó i Oele; ³⁵ i Benaià, i Bedeià, i Keloho; ³⁶ i Vanià, i Meremote, i Eliasibe, ³⁷ i Matanià, i Matenaý nahó Iaasaý; ³⁸ nahó i Baný nahó i Binoý, i Simey; ³⁹ i Selemià nahó i Natane nahó i Adaià; ⁴⁰ i Maknadebaý, i Sasay, i Saray; ⁴¹ i Azarele nahó i Selemià, i Semarià; ⁴² i Salome, i Amarià, Iosefe. ⁴³ Amo ana' i Nebo: Ieiele, i Matitià, i Zabade, i Zebinà, Iadaý nahó Ioele, i Benaià. ⁴⁴ Fonga nangala-baly ambahiny; le am' iereo o rakemba fa nisamak' anakeo.

Nekemia

¹ Ty enta' i Nekemià*, ana' i Hakalià†. Ie tamy volan-tsafarin-taom-paharaoaploy, zaho e Sosane añ' anjomba' i mpanjakay, ² te pok'eo t'i Kanany, raik' amo rahalahikoo naho ondaty boak' Iehodao; le nañontaneako o nte-Iehodà nahapolititse, nahafifeake i fandrohizañeio vaho Ierosalaime. ³ Le nanoa' iareo ty hoe, Vata'e misotry naho injeñe o sehanga'e nisisam-pandrohizañe amy borizàñeio; naho narotsak' ambane ty kijoli' Ierosalaime vaho niforototoen' afo o lalambeio. ⁴ Ie tsinanoko i entañe zay, le nitoboke naho nitañy naho nandala handro an-kandro naho nililitse vaho nisoloho añatrefan' Añaharen-dindiñey ⁵ nanao ty hoe, Mihalaly ama'o raho ry IEHOVÀ Andrianañaharen-dindimoneñe, Andrianañahare jabahinake vaho mampañeveñe, mpitàm-pañina naho fiferenaiñañe amo mikoko Aze vaho mañambeñe o lili'eo. ⁶ Ehe te hañaoñe o ravembia'oo henaneo naho hisokake o fihaino'oo hahafijanjiña'o ty halalim-pitoro'o mitaroñe o ana' Israele mpitoro'oo ama'o handro an-kaleñe, isolohoako o hakeon' ana' Israele nililare'ay ama'oo; songa aman-tahiñe, zaho naho ty anjomban-droaeko. ⁷ F'ie toe nimengok' ama'o, tsy norihe'ay o lili'oo, o fañè'oo vaho o fepètse linili'o añamy Mosèo. ⁸ Ehe tiahio ty tsara nampandilie'o i Mosè ami'ty hoe: Naho mandilatse nahareo, le haparaitako amo kilakila'ondatio aña; ⁹ f'ie naho mitolik' amako, mañambeñe o lilikoo vaho anoeñe; le ndra te ama' areo ty nahifike amparan-dikerañe aña, mbe hatontoko boak' aña vaho hindeseko mb' amy toetse jinoboko hampipohako ty añarakoy mb'etoy.

¹⁰ Ie toe mpitoro'o naho ondati'o, jineba'o an-kaozarañe ra'elahy naho an-kafatraram-pità'o. ¹¹ O Talè, idrakadrakafako, ehe te ho haoñendravembia'o ty halalim-pitoro'o toy naho o halalim-pitoro'o mañeveñe amy tahina'oy an-kafaleañe; le ehe, ampiraoraò ty mpitoro'o te anito, le iferenaiño añatrefa' indatiy. Zaho henane zay nimpitàm-pitovi' i mpanjakay.

2

¹ Ie tamy volan-kofahofa an-taom-paha-roapolo' i Artaksastà, mpanjakay, naho aolo'e eo ty divay, le rinambeko i divaiy vaho nazotsoko amy mpanjakay. Aa kanao mbe liako tsy nimonjetse añatrefa'e eo, ² le hoe i mpanjakay tamako, Ino ty mampanjokòke o laharoo, ihe tsy siloke? Tsi' inoñe zao naho tsy ty hakoretan' arofo. Aa le vata'e nihemban-draho, ³ le hoe ty asako amy mpanjakay, Ee te ho veloñe nainai'e i mpanjakay; ino ty tsy hahalonjetse ty tareheko, kanao nadoke mangoakoake i rovay, i toen-kiborin-droaekoy vaho tinomonto' ty afo o lalambei'eo? ⁴ Le hoe i mpanjakay tamako, Ino o ihalalia'oo? Aa le nihalaly aman' Añaharen-dikeran-draho, ⁵ vaho nanao ty hoe amy mpanjakay, Naho mahafale i mpanjakay vaho nanjo fañisohañe am-pahaisaha'o ty mpitoro'o, le hañiraha'o mb'e Iehoda mb' an-drovan-kiborin-droaeko mb'eo hañamboats' aze. ⁶ Le hoe i mpanjakay tamako, ie niambesatse añ'ila'e eo i mpanjaka' ampelay, Akore ty halava' i lia'oy, ombia rehe te hibalike? Aa le ninò' i mpanjakay ty hampihitrik' ahy; le namantañako andro. ⁷ Tinovoko ty hoe amy mpanjakay, Naho mahafale' i

* **1:1** Nekemià: Fañohòñe; fisolohoañe am'Ià † **1:1** Hakalià: ty fiheora' i Talè

mpanjakay, le ho tolora'e taratasy ho amo mpifehe alafe' i Sakaio, hanese ahy hitsake mb'eo ampara' ty hivotrahako e Iehodà aña⁸ naho ty taratasy ho amy Asafe, mpañambeñe ty ala' i mpanjakay, hitolara'e bodan-katae hamboarako o fahan-dalambein-kijolin' anjombao naho ho ami'ty kijoli' i rovay vaho ho ami'ty anjomba himoahako. Le natolo' i mpanjakay ahiko zay, ty amy fitàn-tsoan' Añahareko amakoy.

⁹ Aa le niheoveko o mpifehe alafe' i Sakaio vaho natoloko iareo o taratasi' i mpanjakaio. Ie amy zao fa nampihitrike mpifehen-dahin-defoñe naho mpiningi-tsoavala hindre amako i mpanjakay. ¹⁰ Ie napota' i Sanbalate nte-Koronaime naho i Tobià nte-Amone, mpitoroñe, le vata'e niboseke te nivotrake eo t'indaty mipay hañasoa o ana' Israeleo. ¹¹ Aa le nandoake e Ierosalaime ao raho naho nitobok' ao telo andro, ¹² naho nitroatse haleñe, rekets' ondaty tsiampeampe; vaho tsy natoroko ondatio heike ty najon' Añahareko an-troko ao hanoeko ho a Ierosalaime; le tsy amambiby raho naho tsy i borìke nijoñakoy. ¹³ Niavotse haleñe raho niakatse i lalam-beim-bavataney mb' amy vovom-pañaneñey mb'eo naho mb' amy lalam-bein-ditsakey nisary o kijoli' Ierosalaime nikoromakeo naho o lalambei'e niforototoen' afoo. ¹⁴ Le tinonjohiko mb' an-dalambein-drano migoangoam-beo naho mb' amy antaram-panjakay mb'eo, fe tsy teo ty homba' i biby niningerekoy. ¹⁵ Le nionjomb' amy torahañey mb'eo amy haleñey, nisary i kijoliy naho nibalike nimoak' amy lalambeim-bavataney vaho nimpoly. ¹⁶ Tsy napota' o mpifeheo ty nombako, ndra ty nanoeko; ie mboe tsy nitalilieko o nte-Iehodao ndra o mpisoroñe o roandriañe o ndra o mpifeheo ndra o ila'e nanao i fitolõñañeio. ¹⁷ Le hoe raho am' iereo: Oni' areo ty falovilovian-tika, ie mangoakoake t'Ierosalaime naho nitomontoñen' afo o lalam-bei'eo; antao hamboatse ty kijoli' Ierosalaime soa t'ie tsy hinjeñe ka. ¹⁸ Le nitaroñeko am' iereo te nañasoa ahy ty fitàn' Añahareko; naho o saontsi' i mpanjakay amakoo. Aa le hoe iereo, Antao hiongake, hamboatse. Aa le nihaozare' iareo fitàñe ho ami'ty hasoa. ¹⁹ F'ie napota' i Sanbalate nte Koronaime naho i Tobià nte Amone, mpitoroñe naho i Geseme nte-Arabe, le niankahafa' iareo an-drabioñe naho nimavoe' iereo ami'ty hoe: Ino o anoe' areo zao? Hiola amy mpanjakay v'inahareoo? ²⁰ Aa le tinoiko ty hoe; I Andrianañaharen-dindiñey ty hañonjoñe anay; aa le hiongake hamboatse zahay mpitoro'e fe tsy aman' anjara ndra zo ndra tiahy e Ierosalaime ao nahareo.

3

¹ Niongak' amy zao t'i Eliasibe rekets' o rahalahi'e mpisoroñe, le niranjie' iareo i lalambein' Añondriy; navahe' iereo naho natroa' iareo o lala'eo; navahe' iareo pak'am-pitalakesañ' abo' i Meà eo, sikal' amy fitalakesañabo' i Kanàneley. ² Nifañefetse am' iereo o nte-Ierikoo t'ie namboatse; le nioza am' iereo ty namboare' i Zakore, ana' Imry. ³ Nandranjy i lalambeim-piañey o ana' i Hasenào, le hene namboare' iereo o faha'eo naho nampitroatse o lala'eo naho o tolà'eo vaho o sikada'eo. ⁴ Nanonjohy iareo ty namboare' i Meremote, ana' i Oriià, ana' i Hakotse. Le nifanoiñe am' iereo ty namboare' i Mesolame, ana' i Berekià, ana' i Mesezabele. Le nifanoiñ' am' iareo ty namboare' i Tsadoke, ana' i Baanà. ⁵ Nañorike iereo o nte-Tekoào, le namboatse, fe tsy najò' o roandria' iareoo amy tolon-draha' i Talèy ty fititia' iareo. ⁶ Le namboare' Ioiadà, ana' i Paseà naho i Mesolàme, ana' i Besodeià i lalambei' i rova haehaey; napeta' iareo o faha'eo, le natroa' iareo o lala'eo naho o tolà'eo vaho o sikada'eo.

⁷ Nifanoiñ' am' iereo ty namboare' i Melatià nte-Gibone naho Iadone nte-Merenote naho o nte-Giboneo vaho o nte-Mitspào, nimpitoroñe o mpiami' bein-tanañe alafe' i sakay atoio. ⁸ Nifanoiñ' ama'e ty namboare' i Oziele, ana' i Karhaià, amo mpanefe volamenao, le nanonjohy aze ty namboare' i Kananià, ana' o mpanao rano-mañitseo, le nihafatrare' iereo t'Ierosalaime pak' amy kijoly mangadagadañey. ⁹ Nanonjohy aze namboatse t'i Refaià ana' i Kore, ty mpifele' ty vakim-pifehea' Ierosalaime. ¹⁰ Nanonjohy aze namboatse t'Iedaìà ana' i Karomafe, tandrife' i anjomba'ey. Le nanonjohy aze namboatse t'i Katose ana' i Kasabneà. ¹¹ Le namboare' i Malkià, ana' i Karime naho i Kasobe, ana' i Pakate-moabe, ty fange'e raike vaho i fitalakesañ' abon-toñakey. ¹² Nanonjohy aze namboatse t'i Salome, ana' i Halokese, mpifehe' ty vakim-pifehea' Ierosalaime, ie naho o anak' ampela'eo. ¹³ Namboatse i lalambeim-bavataney t'i Kanone naho o nte-Zanoakeo; niranjie' iereo naho natroa' iareo o lala'eo, o tolà'eo, o sikada'eo, reketse ty kiho arivo amy kijoliy pak' an-dalambeim-porompotse eo. ¹⁴ Le namboare' i Malkià ana' i Rekabe, mpifehe am-paripari' i Betehakereme i lalambeim-porompotsey; niranjie' le najado'e o lala'eo, o tolà'eo vaho o sikada'eo. ¹⁵ Le namboare' i Salome, ana' i Kolkozè, mpifehe' ty fifehea' i Mitspà i lalambein-drano migoangoñañey; rinanji'e naho nitafoe'e naho najado'e o lala'eo, o tolà'eo vaho o sikada'eo; naho ty kijolin' antara' i Siloake an-golobo' i mpanjakay, pak' amy fanongàñe mizotso boak' an-drova' i Davidey. ¹⁶ Nanonjohy aze t'i Nekemià, ana' i Azboke, mpifehe ty vakim-pifehea' i Bete-tsore, namboatse ampara' t'ie nifanandrife amo kibori' i Davideo, pak' amy antara namboareñey vaho mb' amy anjombam-panalolahiy. ¹⁷ Nanonjohy aze namboatse o nte-Levio, i Rekome ana' i Baný. Nanonjohy aze t'i Kasbià, mpifehe' ty vakim-pifehea' i Keilà, namboatse ho a i fifehea'ey. ¹⁸ Nanonjohy aze namboatse o rahalahi' iareoo, i Bavaý ana' i Kenadade, ty mpifehe' ty vakim-pifehea' i Keilà. ¹⁹ Nanonjohy aze ty namboare' i Ezere, ana' Iesòa, mpifehe' i Mitspà: ty fange'e tandrife' i fitroarañe mb' amy fañajam-pialiañey amy fiolahañey mb'eo. ²⁰ Nanonjohy aze an-kahimbañañe t'i Baroke, ana' i Zabà: namboatse ty ila' i fiolahañey pak' amy lala' ty anjomba' i Eliasibe mpisorombeiy. ²¹ Nanonjohy aze t'i Meremote, ana' i Oriià, ana' i Hakotse, namboatse ty fange tovo'e boak' an-dala' i Eliasibey pak' ampara' i anjomba' i Eliasibey. ²² Nanonjohy aze namboatse o mpisoroñe, ondaty nte-montoñe. ²³ Nanonjohy aze t'i Beniamine naho i Kasobe namboatse tandrife ty anjomba' iareo eo. Nanonjohy iareo t'i Azarià ana' i Maaseià ana' i Ananià namboatse añ' ila' i anjomba'ey. ²⁴ Nanonjohy aze t'i Binoý ana' i Kenadade, namboatse ty fange tovo'e boak' añ' anjomba' i Azarià ampara' i fiolahañey pak' an-kotso'e eo. ²⁵ Le i Palale ana' i Ozay, tandrife i fiolahañey naho i fitalakesañ' abo miboak' ami'ty anjomba ambone' i mpanjakaiy, añ'ila' ty kiririsam-porozò eo. Nanonjohy aze t'i Pedaìà ana' i Parose. ²⁶ O mpitoroñ' anjomban' Añahare nimoneñe e Ofeleo, ty namboatse tandrife ty lalambein-drano maniñana naho i fitalakesañ' abo maningiy. ²⁷ Nanonjohy iareo, namboare' o nte-Tekoao ty fange'e tandrife i fitalakesañ' abo jabajaba maningiy, pak' amy kijoli' i Ofeley. ²⁸ Ambone' i lalam-bein-tsoavalay ty namboare' o mpisoroñe, songa tandrife ty anjomba'e. ²⁹ Le nañorike iareo namboatse tandrife i anjomba'ey t'i Tsadoke ana' Imere. Nanonjohy aze ty namboare' i Semaià ana' i Sekanià, mpañambeñe i lalam-bey atiñanañey. ³⁰ Nanonjohy aze namboatse ty fange tovo'e t'i Kananià ana' i Selemià naho i Kanone ty

ana-dahy fah'ene' i Tsalafe. Nanonjohy eo t'i Mesolame, ana' i Berekia namboatse tandrife i akiba'ey. ³¹ Nanonjohy aze t'i Malakià, raik' amo mpanefe volamenao, namboatse pak'amy fange' o mpitoroñ' anjomba naho o mpanao balikeoy, aolo' i lalam-beim-pisavañe eo pak' amy efetse ambone' i kotsokeiy. ³² Le namboare' o mpanefe volamenao naho o mpanao balikeo ty añivo' i efetse ambone' i kotsokeiy pak' amy lalambein' añondriy.

³³ Aa naho jinanji' i Sanbalate t'ie namboatse i kijoliy, le niboseke vaho am-piforoforoña mandofiry ty nañabiaña'e o nte-Iehodao. ³⁴ Nisaontsie'e añatrefa' o rahalahi'eo naho o lahindefo' i Someroneo ty hoe: Ino ty amboare' o nte-Iehodà mavozoo? Hamboatse an-tsatin-troke hao? Hanao soroñe hao? Ho fonire' iareo ami'ty andro'e hao? Hampisotrafe' iereo amo votrim-porompotse niforototoe' iereoo hao o vatoo? ³⁵ Aa hoe t'i Tobià nte Amore mpiama'e: Toe hirotsake i kijolim-batoy te anganiha' ty fanaloke i amboare' iareoy.

³⁶ Mijanjiña ry Andrianañahare'ay fa sirikaen-jahay, le afotero añ' ambone' iareo o injé' iareoo, le atoloro ho kopaheñe an-tanem-pandrohizañe aña; ³⁷ le ko takonañe o hakeo'eo vaho ko faopaoheñe añatrefa'o o tahi'eo, ie mikai-jaka ama'o añatrefa' o mpamboatseo. ³⁸ Aa le namboare'ay i kijoliy vaho nifampikatoke iaby i kijoliy pak'ami'ty antsasa' ty haabo'e; ie nitoloñeñe an-joton-troke.

4

¹ Ie jinanji' i Sanbalate naho i Tobià naho o nte-Arabeo naho o nte Amoneo naho o nte-Asdodeo te niraorao ty fandrafetañe ty kijoli' Ierosalaime naho fa ho nikiteke iaby o heba'eo, le niforoforo ² vaho fonga nitrao-pikinia ho mb'eo hialy am' Ierosalaime hampifandrakaraka ty ao. ³ F'ie nihalaly aman' Añaharentika, vaho nampijadoñe fijilovañe handro an-kaleñe ty am' iereo. ⁴ Le hoe t'Iehoda: fa nifotsake ty haozara' o mpijinio naho maro o forompotseo; aa le sarotse' ama'ay ty mandranjy i kijoliy. ⁵ Le hoe o rafelahi'aio: Tsy hahafohiñe tsy hahaisake ampara' te añivo ao tika hanjamañe iereo, hanjitse i fitoloñañey. ⁶ Ie amy zao, niheo mb'ama'ay mb'eo o nte-Iehoda nimoneñe marine iereoo, le tinaro' iareo ama'ay im-polo te ho horidañeñe ndra aia'aia ty itolihañe. ⁷ Aa le navotrako ankalo' o fange'e loho ambane amy kijollio, toe amo heba'eo, ty ondaty, sindre ty amo hasavereña'eo, reketse ty fibara'e naho lefo'e vaho fale'e. ⁸ Ie nisary raho le niongake nanao ty hoe amo mpifeheo naho am' ondaty ila'eo, ty hoe: Ko ihembañañe, tiahio i Talè jabahinake naho maharevendreveñey vaho mialia ho an-drolongo' areo, o ana-dahi' areoo naho o anak' ampela' areoo, o tañanjomba' areoo vaho o anjomba' areoo. ⁹ Aa ie jinanji' o rafelahintikañe o napota'ay naho te nikoahen' Añahare i fikililia' iareoy, le songa nihereñe mb'an-kijoly mb'eo zahay, sindre mb' am-pitoloña'e mb'eo.

¹⁰ Aa ie henane zay, nifanehak' amy fitoloñañey ty vaki' o mpitorokoo, le nitan-defoñe naho fikalan-defo naho fale vaho sikim-bý ty vaki'e; le nijadoñe amboho' i anjomba' Iehodà iabio o mpifeheo. ¹¹ Le songa nifanehake am-pitá'e raik' amy fitoloñañey vaho nitàm-pialiañe ty ila' o nandranjy i kijollio naho o mpijiny kilankañaño. ¹² Le o mpandranjio; songa an-deme'e eo ty kotram-pibara'e, ie nitolom-pandranjy avao. Nirekets' amako ty mpampipopò antsiva. ¹³ Aa hoe raho amo mpiaoloo naho amo mpifeheo naho am'onday ila'eo, Jabajaba naho mamalan-tane i

fitoloñañey, le miparaitak' amy kijoliy tika, mifankalavitse. ¹⁴ Aa ndra an-toetse aia aia ty ijanjiña' areo i fivolan' antsivay le mihitrifa mb' ama'ay mb'eo, fa hialy ho antika t'i Andrianañaharen-tika. ¹⁵ Aa le nifanehak' amy fitoloñañey zahay naho nitàn-defoñe ty vaki'e, sikal' ami'ty manjirik' andro ampara' ty fanjoam-basiañe. ¹⁶ Le hoe ka raho henane zay am'ondatio: Ehe te songa hitobe e Ierosalaime atoy reke-mpitoroñe ondatio, hañambenan-tika haleñe vaho hifanehake handro. ¹⁷ Aa le tsy zaho, ndra o mpitorokoo, ndra o mpiamo mpañambeñe nañorik' ahio, eka, leo raik' ama'ay tsy nañafa-tsíky; sindre ninday ty fialia'e mb'an-drano mb'eo.

5

¹ Nampipoña-toreo amy zao ondatio naho o tañanjomba'eo ty amo nte-Iehoda roahalahi' iareoo. ² Teo ty nanao ty hoe: Maro zahay naho o ana-dahi'aio naho o anak' ampela'aio; ehe apoho hangalake mahakama zahay hihinana'ay ho veloñe. ³ Teo ka ty nanao ty hoe: Nampisongoe'ay o tete'aio, o tanembahe'aio vaho o anjomba'aio, hivilia'ay mahakama ty amy hasalikoñañey. ⁴ Hoe ka ty ila'e, Fa nisongoe'ay drala ho amy vililoham-panjakay o tane'aio naho tanem-bahe'aio. ⁵ Ie amy zao, kanao manahake ty nofo'ay ty nofo' o longo'aio naho manahake o ana-dahi' iareoo o ana-dahi'aio, oniño t'ie nampañondevo o ana-dahi'aio naho o anak' ampela'aio, le amo anak' ampela'aio henaneo ty fetrek'oro, fe tsy aman-kery hañavake iareo zahay; fa am'ondaty ila'eo o tete'aio naho o tanem-bahe'aio.

⁶ Aa le vata'e niboseke raho te nahatsanoñe o fitoreova' iareoo naho i saontsy rezay. ⁷ Ie nitsakore, le trinevoko ami'ty hoe, Ry mpiaoloo naho, ry mpifeheo: Songa mangalak' ana'e ami'ty songon-droahalahi'e hao? Le nanontonako favori-bey, ⁸ vaho nanoeko ty hoe, An-kalefeañe ty nijebaña'ay o rahalahin-tikañe, o nte-Iehodao fa naletak' amo kilakila' ondatio; aa le haleta' areo hao o rahalahi' areoo? mbore havily ama'ay? Nianjiñe iereo, fa tsy nanan-kavale. ⁹ Aa hoe raho, Tsy soa o anoe' areoo; tsy ndra kitra'e hañavelo am-pañeveñañe aman' Añaharentika, ty amy sirika' o kilakila'ondaty rafelahin-tikañeoo? ¹⁰ Toe nampisongo drala naho tsako am' iereo o rahalahikoo naho o mpitorokoo. Ehe te apon-tika ty fampanañañ-tsongo. ¹¹ Ehe, ampolio anito o tane'eo naho o tanem-bahe'eo naho o anjomba'eo naho ty volafoty zato naho i tsakoy naho i divaiy vaho i menake nampañavahe'o iareoy. ¹² Aa le hoe iereo: Havaha'ay vaho tsy hipaiay ndra inoñ' inoñe; hanoe'ay ami'ty do'e i nisaontsie'oy. Aa le nitokaveko o mpisoroñe vaho nampanoeko fañina, hanoa' iareo i saontsieñey. ¹³ Aa le nahifiko ty sikim-pèko, nanao ty hoe: Hoe zao ty añifihan' Añahare t'indaty añ'anjomba'e naho ami'ty fitoloña'e ze tsy manao i nitsarae'ey; eka zao ty hañifihañe aze, ho koake. Le hoe i valobohòkey: Amena! vaho nandrenge IEHOVÀ. Le nanoe' ondatio i nitsaraeñey.

¹⁴ Mbore, boak' amy nanendreaña ahy ho bei' iareo an-tane Iehodà, sikal' amy taom-paha-roapoloy pak' amy faha telo-polo-ro'ambi' i Artaksastài, mpanjaka, i folo-tao-ro' amby zay, le tsy nikamà'ay naho o rahalahikoo ty mahakamam-bein-tanañe. ¹⁵ Fa toe nampijinie' o bey taolo' ahio o kilankam-bei' ondatio, le nangalà' iereo mofo naho divay ambone' ty efa-polo sekele ty ondaty; eka, toe nirengerenge ama' iareo o mpitoroñe; fa tsy nanao zay raho, ami' ty fañeveñaako aman' Añahare. ¹⁶ Eka, toe nifanehak' ami'ty kijoly toy avao raho, le tsy nivily tane

zahay vaho fonga nifanontoñe amy asay o mpitorokoo. ¹⁷ Mbore zato-tsilimampolo amo nte-Iehodao naho amo mpifeheo ty tam-pandambañako eo naho tsy volañeñe o rahalahy nivotrak' ama'ay boak' ampariparitseo. ¹⁸ Ty nihalankañeñe ho ahy boak' andro amy zao, le añombe raike naho añondry eneñe jinoboñe; le voroñe ka ty nihajarieñe ho ahy, ie naharitse folo andro le namandroñañe divay maro karaza'e; fe amy iaby zay tsy nipaiaeko ty mahakama' i beiy, amy te navesatse am'ondatio i fitoroñañey. ¹⁹ Ehe ivetseo hasoa ry Andrianañahare amo he'e nanoako amo ondatioo.

6

¹ Aa ie natalily amy Sanbalate naho i Tobià naho amy Geseme nte-Arabe vaho amo rafelahi'ay ila'eo, te namboareko i kijoliy naho tsy amankeba'e—ndra t'ie mboe tsy natroako hey ty raven-dala' o lalam-beio— ² le nañitrik' amako t'i Sanbalate naho i Geseme, ty hoe: Antao hifañaoñe e Keferime amonto' i Onò aña. F'ie nikilily haratiañe amako. ³ Le nañitrifako irake nanao ty hoe: Mitoloñe raha jabajaba raho le tsy eo ty hizotsoako mb'eo; ino ty hanjirañe i fitoloñañey hiavotako ama'e, hizotsoako mb'ama' areo mb'eo? ⁴ Inempatse ty nampihiitrifa' iareo amako i hoe zay; le ie avao ty natoiko. ⁵ Nañitrike ty mpitoro'e amako amy sata zay ho faha-lime'e t'i Sanbalate, ninday taratasy misokane am-pitâ'e; ⁶ le hoe ty sinokitse ao: Fa talilieñe amo kilakila ondatio (vaho fa niventè' i Geseme) te mikitro-piolañe rehe naho o nte-Iehodao; zay ty amboarañe i kijoliy; le ihe ty ho mpanjaka' iareo, ty amy entañe zay. ⁷ Le nanendre mpitoky rehe hitsey ama'o e Ierosalaime ao ty hoe, Amam-panjaka ty e Iehoda ao; aa le hatalily amy mpanjakay o entañe zao. Antao arè hifañaoñe. ⁸ Le nahitriko ama'e ty hoe: Ndra loli'e tsy nanoeñe o nisaontsie'oo, te mone fikitrohan-tro'o avao. ⁹ Fonga te nañembañe anay, ami'ty fitsakorea' iareo, ty hoe: Hirepak' amy fitoloñañey ty fità' iareo le tsy ho fonitse. Aa, ehe, haozaro o tañakoo henaneo!

¹⁰ Aa le nimoak' aña'anjomba' i Semaià ana' i Delaià, ana' i Mehetaele raho, ie nigabeñe ao; le hoe re, Antao hifañaoñe aña'anjomban' Añahare ao le harindrin-tika ty lala' i anjombay; fa toe ho avy hañè doza ama'o iereo; eka, amy haleñey t'ie hivotrak' eo hanjevoñ' azo. ¹¹ Le hoe raho, Hibotitsike hao ty manahak' ahy? Le ia raho te hifoak' amy anjombay hirombak'ay? Zaho tsy himoak' ao. ¹² Le napotako an-troke ao t'ie tsy nirahen' Añahare; amy te nitokia'e haratiañe vaho toe kinarama' i Tobià naho i Sanbalate. ¹³ Nitambezan-dre hañembañ' ahy, soa te hanoeko naho hanan-kakeo vaho hanaña' iareo talily raty hanisiañ' ahy. ¹⁴ Tiahio o fitoloña' iareoo ry Andrianañahareko, t'i Tobià naho i Sanbalate naho i Noadià, mpitoki-ampela naho o mpitoky ila'e ho nañembañe ahikoo.

¹⁵ Aa le nifonitse tañ' andro faha roapololime ambi' i Saramantiñey, i andro faha limampolo-ro' ambi'ey i kijoliy. ¹⁶ Ie amy zao naho songa nahajanjiñe o rafelahi'ay iabio naho sindre nahaisake o fifeheañe nañohok' anaio, le ni-po-pahavaniañe vaho nifohi' iareo te i Andrianañahare'ay ty nañimba i fahafonirañey. ¹⁷ Ie henane zay le nañitrike taratasy maro amy Tobià o roandria' Iehodao vaho niheo am'iereo o boak' amy Tobiào; ¹⁸ amy te nimaro e Iehoda ao ty nifanta ama'e, amy t'ie vinanto' i Sekanià, ana' i Arà; mbore fa nañenga ty anak' ampela' i Mesolame ana' i Berekià ty ana'e Iohanane. ¹⁹ Le natalili' iareo amako o sata'e soao naho ama'e ka o rehakoo vaho nañitrike taratasy hañembañe ahy t'i Tobià.

7

¹ Ie nifonitse i kijoliy naho fa natroako o lalañeо naho fa tinendreko o mpañambeñeo naho o mpisaboo vaho o nte-Levio, ² le nafantoko amy Kananý, rahalahiko naho amy Kananià, mpifelek' i anjombam-panjakay ty fandiliañe Ierosalaime (amy te ondaty vañon-dre, nañeveñe aman' Añahare mandikoatse i màroy); ³ le nanoako ty hoe: Ko sokafe' areo o lalambei' Ierosalaimeo ampara' te mafana-voho ndra te eo o mpigaritseo, arindrino naho agabeño; vaho joboño mpañambeñe amo mpimone' Ierosalaimeo, songa ami'ty fiambena'e naho sindre tandrife' i anjomba'ey. ⁴ Toe bey naho jabajaba o rovao fe tsy niampeampe t'indaty ao vaho mboe tsy namboareñe o anjomba.

⁵ Le najon' Añahareko an-troko ao ty hanontoñe o mpiaoloo naho o mpifehe ondatio, hampiantoñoñe iereo. Le nitreako ty bokem-piantoño' o nionjoñe mb'atoy tam-baloha'e vaho nizoeko sinokitse ao ty hoe: ⁶ Zao o ana' i borizà niavotse am-pandrohizañe amo nasese mb'eo, amo nasese' i Nebokadnetsare mpanjaka' i Baveleo vaho nimpoly mb'e Ierosalaime naho Iehoda aña, songa mb'an-drova'e mb'eo; ⁷ o nindre amy Zerobabele mb' etoao, Iesoa, i Nekemià, i Atsarià, i Raamià, i Nahamanià, i Mordekay, i Bilsane, i Misperete, i Bigvay, i Nekome, i Baanà. Ty ia' ty lahilahy amo nte-Israeleo, le zao:

⁸ O ana' i Paroseo, roarivo-tsi-zato-tsi-fitopoloo-ro'amby. ⁹ O ana' i Sefatiào: telonjato-tsi-fitopoloo-ro'amby. ¹⁰ O ana' i Arào, enenjato-tsi-limampolo-ro'amby. ¹¹ O ana' i Pakate-moabeo, o ana' Iesoào naho Ioabeo, ro'arivo-tsi-valonjato-tsi-folo-valo'amby. ¹² O ana' i Elameo, arivo-tsi-roanjato-tsi-limampolo-efats'amby. ¹³ O ana' i Zatòo, valonjato-tsi-efapololim' amby. ¹⁴ O ana' i Zakaio, fitonjato-tsi-enempolo. ¹⁵ O ana' i Binoio, enenjato-tsi-efapololim' amby. ¹⁶ O ana' i Bebaio, enenjato-tsi-roapololim' amby. ¹⁷ O ana' i Azgadeo: roarivo-tsi-telonjato-tsi-roapoloo-ro'amby. ¹⁸ O ana' i Adonikameo, enen-jato-tsi-enempolo-fito' amby. ¹⁹ O ana' i Bigaio, ro'arivo-tsi-enempolo-fito' amby. ²⁰ O ana' i Adineo, enenjato-tsi-limampolo-lim' amby. ²¹ O ana' i Atere Kizkiào, sivampolo-valo' amby. ²² O ana' i Kasomeo, telonjato-tsi-roapololim' amby. ²³ O ana' i Betsaio, telonjato-tsi-roapololim' amby. ²⁴ O ana' i Karifeo, zato-tsi-folo-ro'amby. ²⁵ O ana' i Giboneo, sivampolo-lim' amby. ²⁶ O nte-Betleheme naho i Netofào, zato-tsi-valopolo-valo' amby. ²⁷ O nte-Anatoteo, zato-tsi-roapololim' amby, ²⁸ O nte-Bete-azemaveteo, efapololim' amby. ²⁹ O nte-Kiriatelearimeo, i Kefirà vaho i Beroteo, fiton-jato-tsi-efapololim' amby. ³⁰ O nte-Ramà naho nte-Gebao, enen-jato-tsi-roapololim' amby. ³¹ O nte-Mikmaseo, zato-tsi-roapololim' amby. ³² O nte-Betele naho Aio, zato-tsi-roapololim' amby. ³³ O nte-Nebo ila'eo, limampolo-ro' amby. ³⁴ O ana' i Elame ila'eo, arivo-tsi-roanjato-tsi-limampolo-efats'amby. ³⁵ O ana' i Karimeo, telonjato-tsi-roapololim' amby. ³⁶ O ana' Ierikoo, telonjato-tsi-efapololim' amby. ³⁷ O ana' i Lodeo, i Kadide vaho i Ono, fitonjato-tsi-roapololim' amby. ³⁸ O ana' i Senàao, teloarivo-tsi-sivanjato-tsi-telopolo.

³⁹ O mpisoroñeо: o ana' Ikedaià, tañ' anjomba' Iesoào, sivanjato-tsi-fitom-polo-telo' amby. ⁴⁰ O ana' Imereo, arivo-tsi-limampolo-ro'amby. ⁴¹ O ana' i Pasoreo, arivo-tsi-roanjato-tsi-efapololim' amby. ⁴² O ana' i Karimeo, arivo-tsi-folo-fito' amby.

⁴³ O nte-Levio: o ana' Iesoao, a i Kadmieleo vaho o ana' i Hodevào, fitom-polo-efats'amby. ⁴⁴ O mpisaboo: o ana' i Asafeo, zato-tsi-efapololim' amby.

⁴⁵ O mpañambeñeo: o ana' i Salomeo, o ana' i Atereo, o ana' i Talmoneo, o ana' i Akobeo, o ana' i Katitào, o ana' i Sobaio, zato-tsi-telopolo-valo'amby.

⁴⁶ O mpitoroñe amy anjombaio: o ana' i Tsikào, o ana' i Kasofào, o ana' i Tabaoteo, ⁴⁷ o ana' i Keroseo, o ana' i Siào, o ana' i Padoneo, ⁴⁸ o ana' i Lebanao, o ana' i Kagabào, o ana' i Salmaio, ⁴⁹ o ana' i Kanàneo, o ana' i Gideleo, o ana' i Gakhareo, ⁵⁰ o ana' i Reaiào, o ana' i Retsineo, o ana' i Nekodao, ⁵¹ o ana' i Gazameo, o ana' i Ozào, o ana' i Paseakeo, ⁵² o ana' i Besaio, o ana' i Meonimeo, o ana' i Nefisesimeo ⁵³ o ana' i Bakokeo, o ana' i Kakofào, o ana' i Karkoreo, ⁵⁴ o ana' i Batsliteo, o ana' i Mekidào, o ana' i Karsào, ⁵⁵ o ana' i Barkoseo, o ana' i Siserao, o ana' i Tamakeo, ⁵⁶ o ana' i Netsiakeo, o ana' i Katifào.

⁵⁷ O anam-pitoro' i Selomòo: o ana' i Sotahio, o ana' i Sofereteo, o ana' i Peridao, ⁵⁸ o ana' Ia'alào, o ana' i Darkoneo, o ana' i Gidelò, ⁵⁹ o ana' i Sefatiào, o ana' i Katileo, o ana' i Pokerete Hatsebaimeo, o ana' i Amoneo.

⁶⁰ O hene mpitoron' anjombao naho o anam-pitoro' i Selomòo: telonjato-tsi-sivampolo-ro' amby. ⁶¹ Iretoañe ty niboak'e Tel-melà, i Tel-karsà, i Kerobe, i Adone vaho Imere: fe tsy nahafitoñoñe ty anjomban-droae'e ndra ty maha-tariratse iareo, ke t'ie nte-Israel: ⁶² O ana' i Delaiào, o ana' i Tobiào, o ana' i Nekodao: enenjato-tsi-efapolo-ro' amby.

⁶³ Le amo mpisoroñe: o ana' i Kabaiao, o ana' i Hakotseo, o ana' i Barzilao i nañenga ty raik' amo anak' ampela' i Barzialy nte-Giladeo ho vali'ey le nitokaveñe ami'ty tahina' iareo. ⁶⁴ Pinay amo sinokitse ampiantoñoñe iareo fe tsy nahaisake; aa le natao ho maleotse vaho nasitak' amy fisoroñañey. ⁶⁵ Le hoe ty nanoa' i Tirsatà, t'ie tsy hikama o miavado'eo ampara' te eo ty mpisoroñe hióngake reketsé Orime naho Tomime.

⁶⁶ Ty fitonto' i valobohòke zay le efats' ale-tsi-ro' arivo-tsi-telonjato-tsi-enempolo, ⁶⁷ mandikoatse o fetrek' oro'eo naho o anak' ampata'eo, le fito-arivo-tsi-telonjato-tsi-telopolo-fito'amby; naho am' iereo ty lahilahy naho rakemba mpisabo roanjato-tsi-efapolo-lim' amby. ⁶⁸ O soavala' iareoo, fiton-jato-tsi-telopolo-eneñ' amby; o borìke vosi'eo, roanjato-tsi-efapolo-lime amby. ⁶⁹ O rameva'eo, efajato-tsi-telopolo-lim' amby naho o borìke'eo, eneñ' arivo-tsi-fitonjato-tsi-roapolo.

⁷⁰ Le amo talèn-droae'eo ty nanolotse amy fitoloñañey: i Tirsatà nanolotse bogady volamena arivo naho koveta limampolo vaho sarom-pisoroñe liman-jato-tsi-telopolo; ⁷¹ o talèn-droae'eo nanolotse bogady volamena ro'ale naho tsanganolo volafoty ro'arivo-tsi-roanjato amy fañajan-drala' i fitoloñañey; ⁷² le natolo' ondaty ila'eo ty bogady volamena ro'ale naho tsanganolo ro'arivo vaho sarom-pisoroñe enempolo-fito' amby. ⁷³ Aa le songa nimoneñe an-drova'e ao o mpisoroñe naho o nte-Levio naho o mpañambeñeo naho o mpisaboo naho ondaty ila'eo naho o mpitoroñ' anjombao vaho o nte-Israel iabio, sindre tan-drova'e ao te tsatoke i volam-pahafitoy.

8

¹ Hene nifanontoñe hoe ondaty raik' an-tameañe aolo' i lalam-bein-dranoy ondatio; le nisaontsy amy Ezra mpanokitse ty handesa'e i boke Hà' i Mosè linili' IEHOVÀ Israele. ² Aa le nendese' i Ezra mpisoroñe añatrefa' i favoriy t'i Hake, amo lahilahio naho rakembao vaho amy ze hene nahajanjiñe am-paharendrehañe, amy androm-baloha' i volam-pahafitoy. ³ Le namaky amy bokey re, aolo' i kiririsan-dalambein-dranoy, nifototse maraindray ampara' te tsipinde-mena, añatrefa' o lahilahio

naho o rakembao naho ze naharendreke; vaho nitsatsike i boke Hàkey o ravembia' ondaty iabio. ⁴ Nijohañe am-panongan-katae eo t'i Ezra, mpanokitse, amy rinanjiñe ho amy raha zaiy, le nijohañe aña'ila'e eo t'i Matitià naho i Semà naho i Oriià naho i Kilkià vaho i Maaseià am-pità'e havana le am-pità'e havia eo t'i Pedaìà naho i Misaele naho i Malkià naho i Kasome naho i Kasbadanà, i Zekarià vaho i Mesolame. ⁵ Le sinoka' i Ezra ampahaoniña' ondaty iabio i boke—amy t'ie ambone' ondatio—aa ie nanokak' aze, songa niongake ondatio; ⁶ naho nañandriañe IEHOVÀ, i Andrianañahare jabahinakey t'i Ezra; vaho sindre nanoiñe ty hoe ondatio: Amene, Ie zay! am-pañonjonam-pitàñe; ie nibaboke. laharañe mb'an-tane, te nitalaho añatrefa' IEHOVÀ; ⁷ le nampibejañe i Hake am'ondatio t'Iesòa naho i Baný naho i Serebià, Iamine, i Akobe, i Sabetay, i Hodìà, i Maaseià, i Kelità, i Azarià, Iozabade, i Kanàne, i Pelaià; songa nte-Levy vaho nitobok' an-toe' iareo eo ondatio. ⁸ Aa le vinaki' iareo i boke HÀ' Añaharey an-dam-bolañe vaho natoro' iereo ty heve'e, hahaoniña' ondatio i nivakieñey.

⁹ Le nanao ty hoe am' ondatio t'i Nekemià, Tirsatà naho i Ezra, mpirosoñe naho mpanokitse, ie nañoke ondatio o nte-Levio: Miavake am' IEHOVÀ Andrianañahare' areo ty andro toy, ko mirovetse, ko mangololoike. Amy te nangoihoy ty tañy ondaty iabio ami'ty fijanjiñañe ty tsara' i Hake. ¹⁰ Le nanoa'e ty hoe, Akia, mikamà ty mafiry, minoma ty mamy, le andivao amo tsy nañalankañeо amy te miavake amy Talèntikañey ty andro toy vaho ko miharovetse; fa haozara' areo te mirebek' am' IEHOVÀ. ¹¹ Aa le nampianjiña' o nte-Levio ondaty iabio, ami'ty hoe: Mianjiña, fa miavake ty androany; le ko manahelo. ¹² Aa le nifampiriaria mb'eo ondatio nikama naho ninoiñe naho nandiva vaho nirebeke, amy te niazo' iareo i tsara nitaroñeñe am' iereoy.

¹³ Nifanontoñe amy Ezra, mpanokitse, amy andro faha-roey o mpiaolon' anjomban-droae'eo, o mpisoroñeо vaho o nte-Levio, hininike ty tsara' i Hake. ¹⁴ Tendrek' am' iereo te sinokitse amy Hake ao i nandilia' IEHOVÀ añamy Mosèy te hitobok' an-tsokemitraha ao o ana' Israeleo amy sabadidam-bolam-paha-fitoy; ¹⁵ le naboele iereo naho nikoiheñe amo rova' iareo iabio naho e Ierosalaime ao ty hoe: Mañitrifa mb'am-bohitse mb'eo le mangalà sampan-olive naho sampan-karadranto aña'ala ao naho sampa mañidè naho tsampan-tsatrañe naho bodan-katae handranjiañe sokemitraha ty amy pinatetsey. ¹⁶ Aa le nitoha aña ondatio, ninday vaho namboatse sokemitraha, songa an-tafon' anjomba'e eo naho ankiririsa'e ey naho an-kiririsan' anjomban' Añahare eo naho an-tameañe an-dalambeindrano ey vaho an-toen-dalambei-Efraime mielatse ey. ¹⁷ Namboatse naho nitobok' amo sokemitraha'eo i valobohòke iaby niavy boak' am-pandrohizañey; fa sikal' aña'andro Iehosoa ana' i None, ampara' i andro zay tsy nanoe' o ana' Israeleo zay; vaho nionjoñe ty firebehañe. ¹⁸ Le nivakie'e boak' andro boak' andro, mifototse amy andro valoha'ey i boke HÀ' Añaharey; nitana' iareo fito andro i sabadidakey; vaho nanoeñe fivory miavake i andro fahavaloy, ty amy sepètsey.

9

¹ Ie amy andro faha-roapolo-efats' ambi' i volañeiy le nivory vaho nililitse o ana' Israeleo, nisaron-gony naho tane. ² Le nifañambak' amy ze hene ambahiny o tiri' Israeleo vaho nijohañe eo nisoloho o hakeo'eo naho o tahin-droae'eo. ³ Le nijohañe an-toe' iareo eo namaky amy boke HÀ' IEHOVÀ Andrianañahare' iareo ami'ty fah'efa' i àndroy; naho ami'ty

fah'efa'e ka, nisoloho vaho nibabok' añatrefa' IEHOVÀ Andrianañahare' iareo.

⁴ Niongak' ambone' i fanongañey amy zao o nte-Levio, Iesòa naho i Baný, i Kadmiele, i Sebanià, i Baný, i Serebià vaho i Kenaný, le nampipoña-piarañanañañe am' IEHOVÀ Andrianañahare' iareo. ⁵ Le hoe i nte-Levy rey, Iesoa, i Kadmiele, i Baný, i Kasabneià, i Serebià, i Hodìà, i Sebanià vaho i Petakià: Miongaha le andriaño t'IEHOVÀ Andrianañahare' areo nainai'e teo, nainai'e eo vaho ano ty hoe: Andriañeñe ty tahina'o lifots' engeñe, onjoneñe ambone' ze atao fañandriañañe naho fandrengeañe.

⁶ Ihe ro IEHOVÀ, Ihe avao; Ihe ty namboatse o likerañe, o andindindikerañe naho o valobohò' iareo iabio, ty tane toy naho ze he'e ama'e ao, o riakeo naho ze hene ama'e ao, Ihe ty mameleoñe iereo; vaho miambane ama'o i fifamorohotan-dikerañey. ⁷ Ihe ro IEHOVÀ Andrianañahare nijoboñe i Avrahame, ninday aze hienga i Ore' o nte-Kasdio naho tinolo'o tahinañe ty hoe Avrahame; ⁸ Ihe nahavazoho te nigahiñe añañatrefa'o ty arofo'e le nifañina ama'e hanolorañe aze ty tane' o nte-Kaànanneo, o nte-Kiteo, o nte-Amoreo naho o nte-Perizeo naho o nte-Ieboseo naho o nte-Girgaseo, hanolora'o aze amo tiri'eo vaho nihenefe'o ami'ty havantaña'o o tsara'oo; ⁹ le nivazoho'o ty fisotrian-droae'ay e Mitsraime ao naho jinanji'o ty fitoreova' iareo añañolo' i Riake Menay; ¹⁰ naho tinolo'o viloñe naho raha tsi-tantane t'i Parò naho o mpitoro'e iabio naho ze hene ondati' i tane'ey; amy te niarofoana'o t'ie nisenge hery; vaho nahazoa'o Tahinañe manahake androany. ¹¹ Vinaki'o añañatrefa' iareo i riakey, hitsaha' iareo añaivo' i riakey an-tane maike; vaho nafetsa'o an-dalek' ao o nañoridañe iareoo, nanahake t'ie vato an-drano mitabohazake. ¹² Mbore an-drahoñe miojalajoala ty niaoloa'o iareo handro; naho añañafotrañe te haleñe, nañazavà'o ho a iareo ty lalañe homba' iareo. ¹³ Nizotso am-bohi-Sinay eo rehe, nitsara am' iereo boak' andikerañ' aña, nanolotse lily to naho i Hake vantañey vaho fepetse naho fañè soa; ¹⁴ naho nampahafohina'o i SABATA'o masiñey naho linili'o fepetse naho fañè vaho i Hake am-pità' i Mosè mpitoro'oy; ¹⁵ naho nitolora'o mofon-dikerañe ho ami'ty hasalikoa' iareo naho nampiboaha'o rano boak' ami' ty vato ho ami'ty hataliñiera' iareo vaho nibilie'o t'ie himoake amy taney, hitavane i nampionjona'o fitañe hanolora'o iareoy. ¹⁶ Fe nirengevole, ie naho o roae'aio, nanjì-kàtoke, tsy nañaoñe o lili'oo, ¹⁷ le nifoneña' iareo ty tsy hijanjiñe, le tsy nitiahi' iareo o raha tsitantane nanoe'o añaivo' iareoo; te mone nizinjin-kàtoke, le ami'ty fiolà' iareo ty nanendreañe mpiaolo hampipoly iareo am-pandrohizañe aña; fe Andrianañahare Mpañaha rehe, matarike, atsa-tretrè, malaon-kaviñerañe, lifo-kafatraram-pikokoañe vaho tsy naforintse'o. ¹⁸ Eka, toe namboatse bania trinanake iereo ami'ty hoe: Intoy ty ndrahare' areo nañavotse anahareo an-tane Mitsraime, le nanao haloloam-bey; ¹⁹ f'Ihe am-pikokoa'o migahiñe, tsy nifary iareo am-patrambey aña; tsy nienga iareo handro i rahoñe nijoalay mpiaolo amy lalañey, ndra i afo nisotratrake haleñey, hañazava ty lalañe hombà' iareo. ²⁰ Natolo'o i Arofo'o soay hañoke* naho tsy nitana'o tsy ho am-palie' iareo i maney vaho nanjotsoa'o rano ami'ty harandranoañe. ²¹ Eka, efapolo taoñe ty nanohaña'o iareo am-patrambey aña; le tsy eo ty nipaia' iareo; tsy nikomavo o siki'eo, tsy nienatse o fandia'eo. ²² Mbore tinolo'o fifeheañe naho borizañe, le zinara'o toetse naho tane, handrambesa' iareo ty tane' i Sikhone naho ty tanem-panjaka' i Hesbone naho ty tane' i Oge mpanjaka'

* ^{9:20} Rzs 1:23, Iek 36:27, Zek 7:12

i Basane. ²³ Nampangetseketehe'o ho mira amo vasian-dikerañeo o ana' iareoo, le nampihovae'o amy tane nafanto'o aman-droae' iareo hizilik' ao hitavañe azey. ²⁴ Aa le nimoak' ao i anake rey nitavañe i taney, le nampiambanea'o añatrefa' iareo o mpimone' i taneio, o nte-Kaananeo vaho natolo'o am-pitá' iareo rekets' o mpanjaka'eo naho ondati' i taneio, hanoañe ze satri' iareo. ²⁵ Ie nandrambe rova fatratse naho tane kobokara naho nitavañ' anjomba lifo-draha soa, kadaha hinaly, tanem-bahe naho golobon' olive naho hatae maro fihinam-boa, le nikama naho nianjañe naho nahazo sandriñe vaho nierañerañe amy hasoa'o ra'elahi. ²⁶ F'ie nanjehatse, niola ama'o, le nitsambolitio' iareo i Ha'oy naho nanjamañe o mpitoki'o nañatahata iareo himpoly ama'oo vaho nitolon-kateraterañe jabajaba. ²⁷ Aa le natolo'o am-pitá' o rafelahi' iareoo; le nampalovilovieñe; vaho nitoreo ama'o iereo an-tsam-pèh'ohatse. Nijanjiñe andindiñe aña rehe naho nitolora'o mpandrombake ami'ty fiferenaiña'o, le navotso'o am-pitan-drafelahy. ²⁸ F'ie nitofa ro mbe nanao haloloañe añatrefa'o avao; aa le napo'o am-pitán-drafelahi' iareo, hifeleha'e; fe naho nitolike iereo naho nitoreo ama'o le nainai'e nahajanjiñe an-dikerañe aña vaho nandrombake ty amy fiferenaiña'oy; ²⁹ mbore hinatahata'o, hampitoliha'o mb'an-Kàke, f'ie nibohaboha tsy nañaoñe o lili'oo naho nandilatse amo fañè'oo, o mahaveloñe ondaty t'ie ambenañeo†, fe nanolotse soroke manjehatse naho nampigàn-katoke vaho tsy nañaoñe. ³⁰ Taoñ' an-taoñe ty nifeaha'o iareo naho hinatahata'o amañ' Arofo'o añaamo mpitoki'oo; f'ie tsy nanolodravembia vaho natolo'e am-pita' o kilakila' ondati' i taneio. ³¹ Fe ami'ty habeim-piferenaiña'o, tsy nimongore'o, tsy hene naforintseñe; ihe Andrianañahare matarike, lifo-pitretrezañe. ³² Ie amy zao ry Andrianañahare'ay, ry Jabahinake, Maozatse, toe Andrianañahare mampañeveñe, Mpitàm-pañina naho fiferenaiñañe, ko enga'o ho kedekedek' ama'o o faloviloviañe nifetsak' ama'ay naho amo mpanjaka'aio naho amo roandria'aio naho amo mpisoro'aio naho amo mpitoki'aio naho aman-droae'aio naho am' ondati'o iabio, sikal' aña'andro' o mpanjaka' i Asoreo pak' androanio. ³³ Toe vantán-dRehe amy ze he'e nifetsak' ama'ay; nanao an-kavañonan-dRehe, zahay ka an-karatiañe; ³⁴ mbore tsy nitana'o mpanjaka'aio, o roandria'aio, o mpisoro'aio vaho o roae' aio i Tsara'oy; tsy hinao' iareo o fepè'oo naho o taro'o nitaroña'o. ³⁵ F'ie tsy nitoroñ' Azo amy fifehea' iareoy naho amy hasoa ra'elahi natolo'oy naho i tane bey henehene naho kobokara nitolora'o añatrefa' iareoo mbore tsy nifotetse amo halò-tsere'eo. ³⁶ Oniño te ondevo zahay androany, le ty amy tane natolo'o aman-droae'ay hikamà' iareo o voka'eo amo hasoa'eo, ingo, ondevo ama'e ao zahay, ³⁷ vaho miveve amo mpanjaka nampijadoña'o ama'ay ty amo hakeo'aio i voka'e nibobobodoy; mbore ananaña'e lily o sandri'aio, o añombe'aio, ze satrin' arofo'e; toe malovilovy zahay.

10

¹ Aa ty amy tsaraeñe rezay, le nampijadoña fañina zahay naho vinolifitombo' o roandria'aio naho o nte-Levi'aio vaho o mpisoro'aio. ² Irezao o namoli-fitombok' azeo: i Nekemià Tirsatà, ana' i Kakalià naho i Tsidekià, ³ i Seraìà, i Azarià, Ieremià; ⁴ i Pasore, i Amarià, i Malkiià, ⁵ i Katose, i Sebanià, i Maloke; ⁶ i Karime, i Meremote, i Obadià; ⁷ i Daniele, i Ginetone, i Baroke; ⁸ i Mesolame, Abiià, i Miamine; ⁹ i Ma'azià, i Bilgay, i Semaià. Ie hene pisoroñe. ¹⁰ Le o nte-Levio: Iehosoa ana' i Azanià, i Binoy amo ana'

† 9:29 Sor 18:5, Mat 19:17, Lke 10:28, Jao 12:50

i Kenadadeo, i Kadmiele; ¹¹ naho o rahalahi' iareoo: i Sebanià, i Hodìà, i Kelita, i Pelaià, i Kanàne; ¹² i Mikà, i Rekobe, i Kasabià, ¹³ i Zakore, i Serebià, i Sebanià; ¹⁴ i Hodìà, i Baný, i Beninò. ¹⁵ Ty mpiaolo' ondatio: i Parose, i Pakate-moabe, i Elame, i Zatò, i Baný; ¹⁶ i Boný, i Azgade, i Bebaý; ¹⁷ i Adoniià, i Bigvay, i Adine; ¹⁸ i Atere, i Kizekià, i Azore; ¹⁹ i Kodià, i Kasome, i Betsay; ²⁰ i Karife, i Anatote, i Nebay, ²¹ i Magpiase, i Mesolame, i Kezire; ²² i Mesezabele, i Tsadoke, Iadoà; ²³ i Pelatià, i Kanàne, i Ananià; ²⁴ i Hoseà, i Kananià, i Kas'sobe; ²⁵ i Halokese, i Pilhà, i Sobeke; ²⁶ i Rekome, i Kasabnà, i Maaseia; ²⁷ naho i Akià, i Kanàne, i Anane; ²⁸ i Maloke, i Karime, i Baanà. ²⁹ Le ty ila' ondatio, o mpisoroñeo, o nte-Levio, o mpañambeñeo, o mpisaboo, o mpitoroñ' anjombao naho o hene ondaty niavak' am'ondati' i taneio ty amy Han' Añaharey, o vali'eo, o ana-dahi'eo naho o anak' ampela'eo, ze nahilala naho naharendreke; ³⁰ ro nirekets' amo longo'eo, amo roandria' iareoo, le nifanta naho nititike, t'ie hañavelo amy Han' Añahare nitolorañe añamy Mosè mpitoron' Añaharey, ty hiameñe naho hanao ze hene lili' IEHOVÀ Talèn-tikañe naho o fepè'eo naho o fañè'eo; ³¹ naho tsy hatolotse am'ondati' i taneio o anak' ampelan-tikañe ndra o anadahin-tikañe; ³² le ie minday kilankañe ndra mahakama haletak' ami'ty andro Sabotse ondati' i taneio, tsy hiviliañan-tika ami'ty SABATA ndra amo andro miavake ila'eo; naho hapòn-tika i tetekey ami'ty taompahafito vaho ze fampañavahan-tsongo am-pitan' iaia.

³³ Nanao fañè ka zahay songa hanolotse ty faha-telon-tsekelye boataoñe ho ami'ty fitoroñañe i anjomban' Añaharentikañey; ³⁴ ho amy mofo-piatrekey naho amo enga-mahakama mitoitoio naho amo engankoroñañe nainai'eo, amo SABOTSEO naho amo pea-bolañeo naho amo andro namantañañe le ho amo raha miavakeo naho o engan-kakeo hañeferañe Israeleo vaho ho amo hene fitoloñañe añ' anjomban' Añahareo. ³⁵ Le nanoeñe an-kitsapake o mpisoroñeo, o nte-Levio, ondatio, ho ami'ty fanoloran-katae, hampizilihañe aze añ' anjomban' Añaharen-tikañe ao, ty amo anjomban-droaen-tikañe, amo andro tinendre boa-taoñeo, harehetse amy kitreli' IEHOVÀ Andrianañaharen-tikañey, ie nipaterañe amy Hake ao; ³⁶ naho ty faneseantika o loha-voan-tanen-tikañe vaho ty lohava' ze volon-katae iaby, boa-taom-boa-taoñe, mb' añ' anjomba' IEHOVÀ; ³⁷ naho ty tañoloñoloñan' ana-dahin-tikañe naho o terake valoha'e amo añomben-tikañe, ty amy nipaterañe amy Hake ao naho ty valohanterak' amo mpirai-trokeo naho o mpirai-liao, haneseañe aze mb' añ' anjomban' Añaharentika, mb' amo mpisoroñe mitoroñe añ' anjomban' Añaharentikañeo ³⁸ naho ty haneseañe ty valohan-koba naho o engaeñeo; naho ty voa' ze hene karazan-katae, ty divay naho menake, mb' amo mpisoroñeo, mb'amo efets' efen' anjomban' Añaharen-tikañe vaho mb'amo nte-Levio ty faha-folom-boka' o tete'aio, amy te mandrambe ty faha-folo amo teten-tika an-drovan-tikañe iabio o nte-Levio. ³⁹ Le hitraok' amo nte-Levio o mpisoroñe ana' i Aharoneo, ie mandrambe ty faha-folo' iareo o nte-Levio; le hendese' o nte-Levio mb' añ'anjomban' Añaharen-tikañe mb' amo efets' efen-trañom-pañajañe ty am-pahafolo' i fahafoloy. ⁴⁰ Aa le hendese' o ana' Israeleo naho o nte-Levio i enga ahelahelay, i ampembay, i divaiy naho i menakey, mb'amo efets-efem-pañajan-karao' i toetse miavakey naho mb'amo mpisoroñe mifanehakeo naho amo mpañambeñeo vaho amo mpisaboo vaho tsy haforintsentika ty anjomban' Añaharentika.

11

¹ Toe nimoneñe e Ierosalaime ao o mpifehe' ondatio, le nifanendre an-kitsapake ka ondaty ila'eo, ty haneseña ty raik' ami'ty folo ho mpimoneñe e Ierosalaime an-drova miavak' ao vaho apok' amo rova ila'eo ty sive. ² Le nitatæ' ondaty iabio o lahilahy nanolo-batañe himoneñe e Ierosalaimeo. ³ Irezao o mpiaolo' i borizà nimoneñe e Ierosalaimeoy, fe songa nimoneñe am-panaña'e amo rova' Iehodao o nte-Israelleo, o mpisoroñeo naho o nte-Levio naho o mpitoroñ' anjombao vaho o anam-pitoro' i Selomò. ⁴ E Ierosalaime ao ty nimoneña' ty ila' o nte-Levio naho o ana' i Beniamineo. Amo ana' Iehodao: i Ataià, ana' i Ozià, ana' i Zekarià, ana' i Amarià, ana' i Sefatià, ana' i Mahalalile, amo tarira' i Peretseo; ⁵ naho i Maaseià, ana' i Baroke, ana' i Kolkozè, ana' i Kazaià, ana' i Adaià, ana' Ioroaribe, ana' i Zekarià, ana' i nte-Siloney. ⁶ O hene ana' i Peretse nimoneñe e Ierosalaimeo: lahilahy maozatse efa-jato-tsi-enempolo-valo'amby. ⁷ Irezao o ana' i Beniamineo: i Salò, ana' i Mesolame, ana' Ioede, ana' i Pedaià, ana' i Kolaià, ana' i Maaseià, ana' Itiele, ana' Iesaià. ⁸ Nanonjohy aze t'i Gabay, i Salay, sivan-jato-tsi-roapolovalo' amby. ⁹ Le Ioele ana' i Zikrý ty nimpisary iareo; vaho nimpifehe faharoe' i rovay t'Iehoda ana' i Hasenoà. ¹⁰ Amo mpisoroñeo: Iedaià, ana' Ioiaribe, Iakine, ¹¹ i Seraìà, ana' i Kilkia, ana' i Mesolame, ana' i Tsadoke, ana' i Meraioye, ana' i Akitobe, mpifehen' anjomban' Añahare, ¹² le o rahalahi' iareo mpitoloñe amy anjombaio: valon-jato-tsi-roapolovalo' amby; naho Adaià, ana' Ierokame, ana' i Pelalià, ana' i Amtsý, ana' i Zekarià, ana' i Paskore, ana' i Malkiià, ¹³ naho o rahalahi'eo, talèn' anjomban-droae: roan-jato-tsi-efapolovalo' amby naho i Amassay, ana' i Azarele, ana' i Akzay, ana' i Mesilemote, ana' Imere, ¹⁴ naho o rahalahi'eo, lahindefo-maozatseo, zato-tsi-roapolovalo' amby, nisaria' i Zabdiele ana' o Hagadoleo. ¹⁵ Le amo nte-Levio: i Semaià, ana' i Kasobe, ana' i Azrikame, ana' i Kasabià, ana' i Boný; ¹⁶ naho i Sabetay naho Iozabade, amo mpiaolo nte-Levy mpisary o raha alafe' i anjomban'Añahareio; ¹⁷ naho i Matanià, ana' i Mikà, ana' i Zabdý, ana' i Asafe mpiaolo, namototse ty fañandriañañe am-pitalahoñañe naho i Bakbokià, ty faharoe amo rahalahi'eo; naho i Abdà, ana' i Samoà, ana' i Galale, ana' Iedotone. ¹⁸ Le o nte-Levy an-drova masiñeо: niroan-jato-tsi-valom-polo-efats' amby. ¹⁹ Le o mpañambeñeo, i Akobe, i Talmone naho o rahalahi'eo mpigari-lalambeio: zato-tsi-fitompolo-ro' amby.

²⁰ Le o sisa' Israelleo, amo mpisoroñeo, amo nte-Levio, ze hene an-drova' Iehoda aña, sindre am-panaña'e ao. ²¹ Fe nimoneñe e Ofele ao o mpitoroñ' anjombao; i Tsikà naho i Gispà ty nimpisary o mpitoroñ' anjombao. ²² Le ty nimpisari' o nte-Levy e Ierosalaimeo t'i Ozý ana' i Baný, ana' i Kasabià, ana' i Matanià, ana' i Mika, amo ana' i Asafeo, songa mpisabo mitoloñe añ' anjomban' Añaharey, ²³ fa am'iereo ty lili' i mpanjakay, ty fanohanañañe o mpisaboo, ze ipaiañañe boak' andro. ²⁴ Naho i Petakià, ana' i Mesezabele, ana' i Zerà, ana' Iehodà ty tam-pità i mpanjakay ty amy ze nioza am' ondatio. ²⁵ Le o tanàñañe rekets teke nimoneña' ty ila' o ana' Iehodao, e Kiriate-arba naho o tanà'eo naho e Dibone naho o tanà'eo vaho e Iekabe-zeele naho o tanà'eo; ²⁶ le e Iehosoa naho e Moladà vaho e Bete-pelete; ²⁷ naho e Katsare-saole naho e Beer-sevà rekets' o tanà'eo ²⁸ naho e Tsiklage naho e Mekonà rekets' o tanà'eo; ²⁹ naho e En-drimone naho e Tsorà naho e Iarmote; ³⁰ e Zanoake, e Adolame naho o tanà'eo, e Lakise rekets' o tete' iareoo, e Azekà rekets' o tanà'eo. Aa le nitobe mifototse e Beer-Sevà eo pak' am-bavatane' i Hinome eo iereo. ³¹ Le o ana' i Beniamineo mifototse e Gibà, le e Mikmase naho e Aiià naho e Betele rekets' o tanà'eo; ³² e Anatote,

e Nobe, e Ananià; ³³ e Kàtsore, e Ramà, e Gitaime; ³⁴ e Kadide, e Tseboime, e Nebalate; ³⁵ e Lode naho e Ono naho am-bavatane' o mpandrafitseo. ³⁶ Le o nte-Levio; nampireketeñe amy Beniamine o firimboña' Iehoda ila'eo.

12

¹ Irezao o mpisoroñe naho nte-Levy nindre nionjoñe amy Zerobabele, ana' i Sealtiele naho Iesoa mb'eo: i Serià, Iiremià, i Ezra, ² i Amarià, i Maloke, i Katose; ³ i Sekanià, i Rekome, i Meremote; ⁴ Idò, i Ginetoy, i Abià; ⁵ i Miamine, i Maadià, i Bilgà; ⁶ i Semaià naho Ioaribe, Iedaià; ⁷ i Salò, i Amoke, i Kilkià, Iedaià, ie mpiaolom-pisoroñe naho o longo'eo tañ' andro' Iesoà. ⁸ Le o nte-Levio: Iehosoa, i Binoý, i Kadmiele, i Serebià, Iehoda naho i Matanià mpiaolom-pañandriañañe, ie vaho o longo'eo. ⁹ Le i Bakbokià naho i Oný, rahalahi' iareo, nifanandrife am' iereo am-pirimboñañe.

¹⁰ Nisamak' Ioiakime t'Iehosoa; le nisamak' i Eliasibe t' Ioiakime; le nisamak' Ioiadà t'i Eliasibe, ¹¹ vaho nisamak' Ionatane t'i Ioiadà. ¹² Le tañ' andro Ioiakime, le nimpisoroñe naho mpiaolo añ' anjomban-droae' i Seraìà t'i Meraìà, ahy Ieremià t'i Kananià; ¹³ ahy Ezra t'i Mesolame; ahy Amarià t'Iehokanane; ¹⁴ ahy Melikò t'Ionatane; ahy Sebanià t'Iosefe; ¹⁵ ahy Karime t'i Adnà; ahy Meraiote t'i Kelkay; ¹⁶ ahy Idò t'i Zekarià; ahy Ginetone t'i Mesolame; ¹⁷ ahy Abiià t'i Zikrý; boake Miniamine; ahy Moadià t'i Piltay; ¹⁸ ahy Bilgà t'i Samoà; ahy Semaià t'Iehonatane; ¹⁹ naho ahy Ioaribe t'i Matenay; ahy Iedaià t'i Ozý; ²⁰ ahy Salay t'i Kalay; ahy Amoke t'i Evre; ²¹ ahy Kilkià t'i Kasabià; ahy Iedià, t'i Netanele.

²² O nte Levy tañ'andro' i Eliasibe, Ioiada naho Iohanane naho Iadoà ty nivolilieñe ho roaen' anjomban-droae; hoe zay ka o mpisoroñe, tañ'andro' i Dareiavese nte-Parsý. ²³ Sinokitse amy boken-taliliy pak' añ' andro' Iokanane ana' i Eliasibe o ana' i Levy, mpiaolon' anjomban-droaeo. ²⁴ Le o mpiaolo nte-Levio: i Kasabià, i Serebià, Iesòa, ana' i Kadmiele, mitraok' amo rahalahi'e nifanandrife am' iareoo, handrengé naho hañandriañañe, ty amy lili' i Davide 'ndatin' Añaharey, firimboñañe miatre-pirimboñañe. ²⁵ Nimpañambem-pizilihañañe nitam-pijilovañe añ' efem-pañaja' o lalambei'eo t'i Matanià naho i Bakbokià, i Obadia, i Mesolame, i Talmone vaho i Akobe. ²⁶ Tañ'andro' Ioiakime ana' Iesòa, ana' Iotsadake naho tañ' andro' i Nekemià mpifehe vaho i Ezra mpisoroñe, mpanokitse, irezay.

²⁷ Le tamy fañorizañe i kijoli' Ierosalaimeiy, le nitsoehe' iareo an-toe' iareo iaby o nte-Levio hitaoñe iareo mb'e Ierosalaime, hitañe i fañorizañey am-pirebehañe naho fañandriañañe naho fisaboañe, am-pikorintsañe naho jejobory vaho marovany. ²⁸ Aa le nifanontoñe boak' am-paripari' Ierosalaime ey naho boak' amo tanàm-pitoroñe añ'anjombao o anam-pisaboo; ²⁹ naho boak'e Bete-gilgale vaho boak' an-tete' i Gebà naho i Atsmavete ao; fa namboatse tanañe mañohoke Ierosalaime o mpisaboo. ³⁰ Le nañefe-batañe o mpisoroñe naho o nte-Levio; le nefera' iereo ondatio naho o lalambeio vaho i kijoliy. ³¹ Le nendeseko mb' ambone' i kijoliy mb'eo o mpiaolo' Iehodao, le nanendreako firimboñam-pisabo jabajaba roe, ty valoha'e hionjomb' an-kavana ambone' i kijoliy mb' an-dalambeim-porompotse mb'eo; ³² nanonjohy iareo t'i Hosaià naho ty vakim-piaolo' Iehodao; ³³ naho i Azarià, i Ezra vaho i Mesolame, ³⁴ Iehoda naho i Beniamine naho i Semaià vaho Ieremià; ³⁵ naho ty ila' o anam-pisoroñe mpinday trompetrao: i Zekarià, ana' Ionatane, ana' i Semaià, ana' i Matanià, ana' i Mikaià, ana' i Zakore, ana' i Asafe; ³⁶ naho o

rahalahi'eo: i Semaià naho i Azarele, i Milalay, i Gilalay, i Maaý, i Netanele vaho Iehodà, i Kananý, rekets' o fititiha' i Davide ondatin' Añaharey; le niaolo iareo t'i Ezra, mpanokitse; ³⁷ Ie an-dalambein-drano migoangoañe eo, le nivantañe nañambone' i fanongàn-drova' i Davidey, amy fanongan-kijoly ambone' ty anjomba' i Davidey, mb' an-dalambein-drano atiñanam-b'eo. ³⁸ Le nimb' ami'ty hifanalakàñe amy raikey i firimboñam-pañandriañañe ila'ey, toe nanonjohy iereo raho, nitraok' amy an-tsasa' ondatoy, ambone' i kijoliy, mb'ambone' i fitalakesañ' abontoñakey, mb' amy kijoly mitratrañakey, ³⁹ le mb' ambone' i lalambei' Efraimey mb'eo naho nioza i lalambein-drova taoloy naho i lalambeimpiañey naho ty fitalakesañ'abo' i Kanànele naho ty fitalakesañ'abo' i Zatoy mb'amy lalambein' añondriy mb'eo, vaho nijohaña an-dalambeimpigaritse eo. ⁴⁰ Teo ty nijohaña' i firimboñañe roe nañandriaña añ' anjomban' Añahare ao rey naho zaho, rekets' i vakim-piaolo nindre amakoy; ⁴¹ naho o mpisoroñeo, i Eliakime, i Maaseià, i Miniamine, i Mikaià, i Elionay, i Zekarià naho i Kananià, rekets' o trompetrao; ⁴² naho i Maaseià naho i Semaià naho i Ozý naho Iehokanane naho i Malkiià naho i Elame vaho i Ezere. Nampipoña-peo o mpisaboo, mpifelek' iareo t'Iizrakà. ⁴³ Le nañenga soroñe ra'elisy iereo amy andro zay naho nirebeke, fa nampirebehen' Añahare an-kafaleam-bey; naho o rakembao naho o ajajao; vaho nijanjiñeñe lavitse aña ty hafalea' Ierosalaime.

⁴⁴ Amy andro zay ty nanendreaña ondaty hifehe o trañom-pañajàñe o varao, o engan-kelahelao, o loha-voao vaho o faha-foloo, te hatontoñe ao ty boak' amo teten-drova ty anjara tinendre' i Hake amo mpisoroñeo naho nte-Levio; amy te nirebeke ty amo mpisoroñeo naho o nte-Levy mpijo-haño t'Iehodà. ⁴⁵ Ie nañambeñe ty fitoroñañe an' Andrianañahare' iareo naho i fañeferañey, le nanahake zay ka o mpisaboo naho o mpigaritseo, ie lili' i Davide naho i Selomò ana'ey. ⁴⁶ Fa teo tañ' andro' i Davide naho i Asafe taolo, o mpiaolom-pisabo naho sabom-pandrengeañe naho fañandriañañe aman' Añahareo. ⁴⁷ Aa le songa nanolotse ty anjara' o mpisaboo naho o mpañambeñeño ami' ty andro'e t'Israele tañ' andro' i Zerobabele naho faha' i Nekemià, le nandiva' iareo amo nte-Levio vaho nandiva' o nte-Levio amo ana' i Aharoneo.

13

¹ Vinaki' iareo amy andro zay ty boke' i Mosè am-pijanjiña' ondatio, le tendrek' ao te tsy mahazo mimoak' am-pivorin' Añahare ao t'i nte-Amone naho t'i nte-Moabe; ² amy t'ie tsy nifanalaka amo ana' Israeleo hinday mofo naho rano, te mone kinarama' iareo t'i Balame hamatse iareo; fe nafoten' Añaharen-tika ho fitahiaña i fatsey. ³ Aa ie nahajanjiñe Hake iereo le nambaha' iareo am' Israele ze hene tamingaña tsy ki'e. ⁴ Ie taolo' zay, i Eliasibe mpisoroñeo tinendre hifehe o efets' efen' anjomban' Añaharen-tikañeo, ie longo i Tobià ⁵ le hinajari'e ho aze ty efetse jabajaba fampipohañe o enga-mahakamao naho i embokey naho o fanakeo naho o fahafolon' ampembao, ty divay vaho ty menake natolotse, ie liliy amo nte-Levio naho amo mpisaboo naho amo mpañambeñeño; vaho o engankelahelam-pisoroñeo. ⁶ Toe tsy e Ierosalaime ao raho henane zay iaby; fa nimb' amy mpanjakay aña amy taom-paha-telopolo-ro' ambi' i Artaksastà mpanjaka' i Baveley; ie modo ty andro tsiampeampe le nihalaly t'ie hienga i mpanjakay; ⁷ aa ie nivotrake e Ierosalaime ao naho naharendreke ty haratiaña nanoe' i Eliasibe ho a i Tobià, ie nañajary efetse amo efets' efen' Anjomban' Añahareo, ⁸ le niforoforo, fonga nahifiko alafe' i efetsey

o kilankan' akiba' i Tobiao. ⁹ Liniliko amy zao, le niliove' iereo o efetseo; le nampoliko ao ze haraotse amy anjomban' Añaharey, miharo amo engamahakamao naho i embokey.

¹⁰ Tendrek' ahy ka te tsy natolotse amo nte-Levio ty anjara' iareo; aa le songa niavotse mb' an-tete'e aña o nte-Levio naho o mpisabo nimpitoloñeo. ¹¹ Natretreko amy zao o mpifeheo ami'ty hoe: Aa vaho akore te naforintsiñe ty anjomban' Añahare? Aa le natontoko iereo naho sindre najadoko an-toe'e eo ¹² vaho ninday ty fahafolon' ampemba naho ty divay naho ty menake mb' am-pañajam-barao t'i Iehoda iaby. ¹³ Le nanoeko mpifehe o fañajam-barao t'i Selemià mpisoroñe naho i Tsadoke mpanokitse, vaho amo nte-Iehodao: i Pedaià naho i Kanàne ana' i Zakore ana' i Matanià ho mpiama'e; amy t'ie natao ho migahiñe, vaho lili' iareo ty fanjarañe amo rahalahi'eo. ¹⁴ Tiahio raho ry Andrianañahareko ty amy zay, le ko fòra'o o sata soa nanoeko amy anjomban' Añaharekoy naho o fitoloñañe azeo.

¹⁵ Nitreako amy andro rezay, e Iehodà ao ty mpandialia fampipiritan-divay ami'ty Sabotse naho ty nimoak' ao nilogologo ampemba naho nampijiny aze ami'ty borike; naho ty divay, ty valoboke naho ty sakoañe naho ze atao kilankañe vaho nazilike am' Ierosalaime ao ami'ty andro Sabata; le nendahako amy andro nandetàha' iareo i mahakamaiy. ¹⁶ Nimoneñe ao ka o nte-Tsore mpinday fiañe naho ze hene kilanka'eo, nandetak' amo ana' Iehodao naho e Ierosalaime ao ami'ty Sabotse. ¹⁷ Aa le nendahako o mpiaolo' Iehodao ami'ty hoe: Ino ze o haloloañe anoe' areo zao? kanao mañota-faly ami'ty andro Sabata. ¹⁸ Tsy zay hao ty nanoen-droae' areo nampifetsahan' Añaharen-tika amantika naho ami'ty rova toy o hankàñe iaby zao? Te mone tompea' areo am' Israele ty haviñerañe t'ie mandilatse amo Sabotseo. ¹⁹ Aa ie fa nihamaiaeñe o lalambei' Ierosalaimeo aolo' ty Sabata, le liniliko te harindriñe o lalambeio naho liniliko t'ie tsy ho sokafeñe ampara' te modo ty Sabotse vaho najadoko hifelek' o lalambeio ty ila' o mpitorokoo tsy mone hazilik' ao ami'ty andro Sabata o kilankañe. ²⁰ Teo te nitobe alafe' Ierosalaime ao indraike ndra indroe o mpandetake naho mpanao takinak' amy ze karaza kilankañe iabio; ²¹ le hinatahatako ami'ty hoe: Ino ty itobea' areo marine' o kijolio? Ie mb'e ahere' areo le ho zevoñeko am-pitâñe. Mifototse amy zay tsy nionjo-mb'eo ami'ty Sabotse iereo. ²² Ie amy zao liniliko o nte-Levio ty hañefe-batañe naho homb' amo lalambeio hañambeñe ty hamasiña' ty andro Sabata. Tiahio ty amako ka zao ry Andrianañahareko vaho arovo ami'ty hara'elahim-pitretreza'o.

²³ Nitreako amy andro rezay ka te nanambaly rakemba nte-Asdode naho nte-Amone vaho nte-Moabe o nte-Iehodào; ²⁴ le o ana'eo, ty ila'e nirehake an-tsaontsi' i Asdode fa tsy nahafirehake an-tsaontsi' Iehoda, songa ami'ty fireha' ondati'eo avao; ²⁵ aa le natreatréko, nafako, linafako ty ila'e naho nonorako o maroi'eo vaho nampifantàko aman' Añahare: Ko atolo' areo amo ana-dahi' iareoo o anak' ampela' areoo, ndra mañenga o anak' ampela' iareo ho amo ana-dahi' areoo ndra ho am-bata' areo. ²⁶ Tsy nanankakeo amy rezay hao t'i Selomò mpanjaka? Ie amo fifeheañe màroy, leo raike tsy nanam-panjaka nañirinkiriñe aze naho nikokoan' Añahare vaho nanoen' Añahare mpanjaka' Israele iaby; fe nampanan-tahiñe aze o rakemba ambahinio. ²⁷ Aa vaho hitrao-drehak' ama' areo hao zahay hanoa' areo o haloloañe zao, ty hikitrofan-draha raty aman' Añaharen-tika am-pañengañe valy ambahiny? ²⁸ Le nataoko soike ty ana' Ioiadà, ana' i Eliasibe mpisorom-bey, amy t'ie vinanto' i Sanbalate nte-Koroneo.

²⁹ Tiahio iereo ry Andrianañahareko, amy t'ie nahativa ty fisoroñañe naho ty fañina amo mpisoroñeo vaho amo nte-Levio. ³⁰ Zay ty nikotriñeko iareo amy ze hene raha ambahiny naho tinendreko ty fitoroña' o mpisoroñeo naho o nte-Levio, songa amo tolon-draha'eo; ³¹ naho ty fanoloran-katae naho o andro tinendreo vaho o loha-voao. Tiahio raho ho ami'ty hasoa ry Andrianañahareko.

Estere

¹ Teo tañandro' i Akasverose, i Akasverose nifehe boake Hodò pake Kose, nifeleke tane zato-tsi-roapolo-fito' ambiy, ² tamy andro rezay, te niambesatse am-piambesam-pifehea'e am-positse e Sosane ao t'i Akasverose, ³ amy taom-paha-telo' i fifehea'ey le nanao sabadidake ho a' o roandria'e naho mpitoro'e iabio, o mpiaolom-balobohò' i Parasè miharo Madaio, o androanavy naho roandriam-pifeleha'e miatrek' azeo; ⁴ le nisengea'e andro maro o vara' i fifehea'e fanjakao naho ty asi' i volonahe'e ra'elahi, toe zato-tsi-valom-polo andro. ⁵ Ie niheneke i andro rezay, le nanao sabadidake e Sosane am-positse ao i mpanjakay, ho amy ze hene ondaty ty bey naho ty kede, fito andro, an-kiririsan-kodobo' i anjombam-panjakay ao; ⁶ niradorado eo ty hasiñe marerarera naho manga, niarifehèñe taly leny malòmavo, ami'ty boda volafoty naho faham-bato-hara'e; naho fiambesatse volamena naho volafoty, an-tane nilafiheñ' antsetra naho foty naho sakatsike vaho vato-haran-gero'e. ⁷ Nanjotsoañe rano ampitovy volamena—fanake sambe mifañambake—naho divaim-panjaka tsifotofoto, ty amy fiotrotòam-panjakay. ⁸ Ty lili' i finomañey, le t'ie tsy an-jitse, ami'ty nafanto' i mpanjakay amy mpifehen' anjomba'ey, te sindre hanao an-tsatri'e ondatio. ⁹ Nanao takataka ho amo rakembao ka t'i Vastý mpanjaka-ampela, añ' anjombam-panjaka' i Akasverose ao. ¹⁰ Ie amy andro faha-fitoy, ie navarimbarin-divay ty arofo' i mpanjakay, le linili'e t'i Mehomane, i Bizzà, i Karbonà, i Bigtà naho i Abagtà, i Zetare vaho i Karkase, i mpiatrake fito mpitoroñe añatrefa' i Akasverose mpanjaka rey, ¹¹ te hasese aolo' i mpanjakay t'i Vastý mpanjaka-ampela rekets' i sabakan-engeñey hisenge ty hamontramontre'e am' ondatio naho amo mpifelekeo, amy t'ie homozohozo am-pahaisahañe. ¹² F'ie nifoneñe tsy nimb' amy linili' i mpanjakay añamo mpiatrakeoy; aa le niforoforo i mpanjakay, nisolebotse ty haviñera'e. ¹³ Le hoe i mpanjakay amo mahihitse mahafohiñe o sào; (toe zay ty nisata' i mpanjakay añatrefa' o mpahay lily naho zakao; ¹⁴ naho o narine azeo: t'i Karsenà, i Setare, i Admata, i Tarsise, i Merese, i Marsenà vaho i Memokane, i mpifehe fito' i Parase naho i Maday mpahaisake ty lahara' i mpanjakay rey, ie mpiambesatse an-dohà' i fifeheañey;) ¹⁵ Ino ty hanoan-tika amy Vastý mpanjaka-ampela ty amy liliy kanao tsy hinao'e ty nandilia' i Akasverose mpanjaka añamo mpiatra'eo? ¹⁶ Le hoe ty natoi' i Memokane añatrefa' i mpanjakay naho o roandriañeo, Tsy vaho amy mpanjakay avao ty nanoa' i Vastý mpanjaka-ampela hakeo, fa toe amo roandriañe iabio naho amy ze hene ondaty am-pifeleha' i Akasverose mpanjaka. ¹⁷ Amy te hiboele amy ze hene rakemba i nanoe' i mpanjaka-ampelaiy vaho songa hanirika' i vali'ey, ami'ty hoe: Linili' i Akasverose mpanjaka te hasese añatrefa' e eo t'i Vastý mpanjaka ampela, f'ie tsy nimb'eo. ¹⁸ Fonga hanao i hoe zay te anito o tañanjomba' i Parase naho i Maday mahajanjiñe ty sata' i mpanjaka ampelaio amo mpifele' i mpanjakaio, le ho ra'elahy ty sirika naho fombo. ¹⁹ Aa naho no' i mpanjakay, ee te haboele'e ty nafèm-panjaka naho ho sokireñe amo lili' i Parase naho i Madaio, tsy hiova'e, te tsy hiheo añatrefa' i Akasverose mpanjaka eo ka t'i Vastý vaho hatolo' i mpanjakay ami'ty lombolombo'e ty fandilia'e. ²⁰ Ie hanitsike ty fifehea'e ty fijanjiñañe i tsey hanoe' i mpanjakaiy, ndra te ie bey henehene, le songa

hiasy ty vali'e o tañanjombao, ty bey naho ty kede. ²¹ Niteà' i mpanjakay naho o roandriañeo i saontsy zay vaho nanoe' i mpanjakay i nitaroñe' i Memokaney; ²² le hene nampihitrife'e amy ze fifeleha' i mpanjakay ty taratasy ty amy sinokitsey naho mb'amy ze karaza' ondaty amy saontsi'ey, soa te songa hanandily añ'anjomba'e ao o lahilahio vaho haboele amy ze fonga saontsi' ondaty zay.

2

¹ Ie aña, naho fa nanintsiñe ty fiforoforoa' i Akasverose mpanjaka, le nitiahie t'i Vastý, i nanoa'ey vaho i nandiliañe azey. ² Le hoe o mpitoro' i mpanjakay niatrak' azeo: Ehe te ho tsoeheñe ho a i mpanjakay ty somondrara soa vintañe t'ie isaheñe; ³ le ehe te hanendre sorotà amo hene fifeleha' i fifehea'io i mpanjakay hanontonañe an-drova' i Sosane atoy, añ' anjomban-drakemba ao, ambane' ty lili' i Hegè, mpiatrak' i mpanjakay, mpañambeñe o ampelao, ze fonga somondrara tsomerentsereñe ho tolorañe ze paia'e ho ami'ty fihaminañe; ⁴ vaho ty somondrara tea' i mpanjakay ty ho mpanjaka-ampela handimbe i Vastý. Nitea' i mpanjakay i entañey le nanoe'e.

⁵ Teo t'i nte-Iehoda an-drova' i Sosane ao, i *Mordekay, ana' Iaire, ana' i Simeý, ana' i Kise, ana' i Beniamine ty tahina'e; ⁶ amo nendeseñe boak' Ierosalaimeo, o nasese an-drohy nindre am' Iekonià mpanjaka' Iehodao, o nasese' i Nebokadnetsare mpanjaka' i Bavele mb'eo. ⁷ Le nibeize'e t'i †Hadase, natao ‡Estere, anak' ampelan-drahalahin-drae'e; fa bode-rae naho tsy aman-drene naho nisoa vintañe vaho trenotreno'e i somondraray; aa kanao fa nihomake ty rae'e naho i rene'e le rinambe' i Mordekay re ho anak' ampela'e.

⁸ Aa ie jinanjiñe ty lily naho tsei' i mpanjakay, le natontoñe androva' i Sosane ao ty somondrara maro ambane' ty fifehea' i Hegey; le nampihovaeñe añ' anjomba' i mpanjakay, ambane' i Hegè mpañambeñe o somondrara, ka t'i Estere. ⁹ Le nahafale aze i somondraray, le naхаониа'e tretre, le nitolora'e aniany ze nipaiaeñe amy fañaliova'ey naho o faha'eo vaho ty somondrara fito nañeva boak' añ' anjombampanjaka ao; le nasi'e mb'amy toetse soay re rekets' i mpiatra'e rey. ¹⁰ Tsy naboa' i Estere ondati'eo ndra i toñon-droae'ey, fa nafanto' i Mordekay ama'e te tsy ho volañe'e. ¹¹ Le nidraidraitse aolon-kiririsán' anjomban-drakemba eo boak' andro t'i Mordekay handrendreke i Estere naho ze nanoañe.

¹² Nitsatoke ho a o somondrara te sindre hiheo añañatrefa' i Akasverose mpanjaka eo naho fa heneke ty volañe folo-ro' amby ty amy lilintsomondraray (fa zay ty nahaheneke o androm-piliovañeo, toe enembolañe an-tslike rame naho nem-bolañe ami'ty mañidè naho o solidrakemba ila'eo), ¹³ Zao ty niheova' ty somondrara mb'amy mpanjakay mb'eo; natolotse aze ndra inoñ' inoñe paiae'e hindeseñe boak' amy anjomban-drakembay mb' amy anjomba' i mpanjakay mb'eo. ¹⁴ Nizilik' ao re te hariva, le niavotse mb'añ' anjomba faharoe' o roakemba mb'eo te loak' andro, ho ambane' ty fifehea' i Sasgaze, mpiatra' i mpanjakay, mpañambeñe o sakezao; le tsy niheo mb'amy mpanjakay ka re naho tsy te nitea'e vaho nikantjie'e ami'ty añara'e. ¹⁵ Ie nitsatok' amy Estere, ana' i Abihaile, rahalahin-drae' i Mordekay nandrambe aze ho ana'ey, ty himoak' amy mpanjakay, le tsy ino ty nipaia'e naho tsy ze natoro' i

* 2:5 Mordekay: firehañe, hafaira; vonotroboke † 2:7 Hadase: mañi-dè; falefale ‡ 2:7 Estere: mietake; nakafitse

Hege, mpiatra' i mpanjakay, mpañamben-droakembay. Le nahaonim-pañisohañe am-pihaino' ze hene nahaisak' aze t'i Estere. ¹⁶ Aa le nasese mb'amy Akasverose mpanjaka mb'añ' anjombam-panjaka mb'eo amy volam-pahafolo, volam-balasira, taom-pahafitom-pifehea'ey t'i Estere. ¹⁷ Le nikokoa' i mpanjakay mandikoatse ze somondrara iaby t'i Estere, ie nahaonim-pañisohañe naho fitretrezañe am-pahaisaha'e eo ambone' o somondrara iabio, aa le nasampe'e an-doha'e eo i sabakam-pifeheañey, le nanoe'e mpanjaka-ampela handimbe i Vastý. ¹⁸ Le nanao betitake, ty takataka' i Estere, ho a ze hene roandria'e naho mpitoro'e i mpanjakay; le nampitofa'e o fifelehañe vaho nitolora'e falalàñe mañeva ty vara' i mpanjakay. ¹⁹ Le natontoñe fañindroe'e o somondrarao le niambesatse an-dalambeim-panjaka eo t'i Mordekay. ²⁰ Mbe tsy vinola' i Estere ty filongoa'e ndra ondati'eo, namantoha' i Mordekaiy; fa mbe nañorike ty lili' i Mordekay t'i Estere manahake tamy nañabeiza'ey.

²¹ Tamy andro rezay, ie niambesatse an-dalambei' i mpanjakay t'i Mordekay; le niboseke t'i Bigtane naho i Terese, roe amo mpiatra' i mpanjakaio, mpañambeñe i lalañey, ie nikilily hampipao-pitáñe amy Akasverose mpanjaka. ²² Fe nioni' i Mordekay i kiniay naho natalili'e amy Estere, mpanjaka-ampelay vaho tinaro' i Estere amy mpanjakay amy tahina' i Mordekaiy. ²³ Ie nitsikaraheñe i kililiy le nirendreke naho songa naradorado an-katae ie roe; vaho nisokireñe am-boken-talily añatrefa' i mpanjakay ao.

3

¹ Ie aña, le nonjone' i Akasverose mpanjaka t'i *Hamane ana' i Hamedatà nte-Agage, le nampilosore'e vaho najado'e ambone' o roandriañe iaby mpiama'eo ty fiambesa'e. ² Le hene nidrodrètse naho niambane amy Hamane o mpitorom-panjaka an-dalambeio, ie nililie' i mpanjakay, fe tsy nibodreke t'i Mordekay, tsy niambane. ³ Aa le nanao ty hoe amy Mordekay o mpitorom-panjaka andalambeim-panjakao: Ino ty andilara'o i lilim-panjakay? ⁴ Nisaontsiañe boak' andro, f'ie tsy nañaoñe, le nitaroñe' iereo amy Hamane, hahaoniñañe hera hijadoñe ty saontsi' i Mordekay; kanao nitalilia'e t'ie nte-Iehoda. ⁵ Aa ie niisa' i Hamane te tsy niondreke tsy niambane ama'e t'i Mordekay, le nilifom-pifombo t'i Hamane, ⁶ fe natao'e ho kede a-maso'e te i Mordekay avao ty hampipaoham-pitáñe; amy te nandrendrehañe aze ondati' i Mordekaio; aa le ie nipay ty hanjamañe ze fonga nte-Iehodà am-pifehea' i Akasverose ao; toe ondati' i Mordekaio.

⁷ Ie am-bolam-baloha'e, am-bolan-kofahofa, an-taom-paha-folo-ro' ambi' i Akasverose, le nandafinhañe voam-pane; nisikilieñe añatrefa' i Hamane handro an-kandro naho volañ' am-bolañe pak' am-bolam-paha-folo-ro'amby, i volan-kiahay. ⁸ Le hoe t'i Hamane amy Akasverose Mpanjaka: Eo ty karaza' ondaty, miparaitsake naho mibarakaik' am' ondati' ze hene fifeleham-pifehea'oo naho aman-dily miambak' amo lili' ondaty iabio vaho tsy tana' iareo o lilim-panjakao; aa le tsy mañeva i mpanjakay te hado'e hitoetse. ⁹ Aa naho no' i mpanjakay, ehe te ho sokireñe t'ie ho mongoreñe; le handivako talenta volafoty rai-ale am-pitá'o mpamandrom-panjakao, handesañe am-pañajàm-bará' i mpanjakay. ¹⁰ Aa le napitso' i mpanjakay am-pitá'e ty bange'e vaho natolo'e amy Hamane ana' i Hamedatà nte Agage, rafelahi' o nte-Iehodao. ¹¹ Le hoe i mpanjakay amy Hamane: Azo avao i volafotiy naho ondatio, hanoa'o ze atao'o

* ^{3:1} Hamane: koràke, fivalitsikotahañe

ho soa. ¹² Kinòike amy androm-paha-folo-telo' ambi' i volam-baloha'eiy o mpanokim-panjakao, le nanokirañe, ami'ty lili' i Hamane, o sorotào naho ze hene mpifele-pifelehañe naho ze fonga mpiaolo' ondaty; sindre faritse amy fisoki'ey naho songa karaza' ondaty amy saontsi'ey; toe nanokirañe ami'ty tahina' i Akasverose mpanjaka vaho vinoli-tombo' ty bange' i mpanjakay. ¹³ Nahitrik' amo hene rovam-pifeleha' i mpanjakaio ty taratasy: te harotsake, ho zamaneñe naho ho mongoreñe, ze atao nte-Iehoda, ty bey naho ty kede, anak' ajaja naho rakemba, ami'ty andro raike, ami'ty andro fahafolo-telo' ambi' i volam-paha-folo-ro'ambiy, i volankiahay, le ho kopaheñe ty vara' iareo ho tambe. ¹⁴ Le haborak' amy ze kila ondaty ty hamban-dika' i sinokitsey, ho tseizeñe amy ze hene fifelehañe, ty hihentseña' iareo i andro zay. ¹⁵ Niherereake mb'eo o mpañitrikeo ty amy nafè' i mpanjakaiy naho zinara an-drova' i Sosane eo i liliy; vaho niambesatse hikama rano i mpanjakay naho i Hamane; fe nitsiborohetoke ty rova' i Sosane.

4

¹ Ie nirendre' i Mordekay i nanoeñe rezay, le niriate' i Mordekay o saro'eo, le nisikin-gony naho lavenoke, le niheo añivo' i rovay, nampipoña-koaike mafaitse. ² Nañavelo pak' an-dalambeim-panjaka eo re, fa tsy eo ty mimoak' amy lalambeim-panjakay misikin-gony. ³ Aa ndra fifelehañe aia aia ty nandoaha' i lily naho tsei' mpanjakaiy, le akore ty habeim-pirovetañe amo nte-Iehodao, reke-lilitse, fangololoihañe naho fangoihoiañe; vaho maro ty nibabok' an-gony naho an-davenoke.

⁴ Aa le niheo mb'amy Estere mb'eo o mpiatra'eo naho o mpifehe'eo nitalily ama'e. Vata'e nalorè amy zao i mpanjaka-ampelay vaho nam-pañitrife'e lamba t'i Mordekay, hañafahañe i goni'ey, fe tsy rinambe'e.

⁵ Tinoka' i Estere t'i Hatàke amo mpiatram-panjakao, i tinendre hiatrak' azey le nafantok' ama'e ty hiheo mb' amy Mordekay mb'eo haharendreke t'ie inoñe ndra manao akore. ⁶ Aa le nimb'amy Mordekay an-dala' i rovay aolo' i lalambeim-panjakay mb'eo t'i Hatàke. ⁷ Le nitalilia' i Mordekay ze fonga nifetsak' ama'e naho ty drala do'e nampitamae' i Hamane hondroha'e amo fañajam-baram-panjakao ty amo nte-Iehoda hamongorañe. ⁸ Natolo'e aze ka ty dika-mira i taratasin-tsey zinara e Sosane ao hanjamanañe iareoy, hatoro'e amy Estere, hampalangesañe ama'e, hamantohañ' aze ty homb' amy mpanjakay, hitoreo fiferenaiñañe, hihalalia'e añatrefa'e eo ondati'eo. ⁹ Aa le nimpoly mb'eo t'i Hatàke nitalily amy Estere i enta' i Mordekaiy. ¹⁰ Le nisaontsie' i Estere amy Hatàke ty hañitrike o entañe zao amy Mordekay: ¹¹ Fohi' ze hene mpitoro' i mpanjakay naho ze fonga ondatim-pifeleha' i mpanjakay, te ndra ia ia, ke lahilahy he rakemba ty miheo mb'amy mpanjakay ankiririsa añate'e ao, ie tsy kinoike, le raik' avao ty lili'e: havetrake naho tsy itolora' i mpanjakay i kobaim-bolamenay, hiveloma'e; fe mboe tsy tinoka ho mb'ama'e mb'eo raho o telo-polo andro zao. ¹² Natalili' iareo amy Mordekay i lañona' i Estere zay. ¹³ Aa le nahere' i Mordekay amy Estere ty hoe: Ko mañarahara te ihe añ'anjomba' i mpanjakay ty hahapolititse mandikoatse ze nte-Iehoda iaby. ¹⁴ Aa naho mitsin-drehe henane zao le hiongake an-toetse ila'e ty famotsorañe naho ty fandrombahaañe o nte-Iehodao, fe hirotsake rehe naho i anjomban-drae'oy; ia ty mahafohiñe, hera te nitsatok' amy mahampanjaka azoy t'ie ho añ'andro hoe zao? ¹⁵ Aa le nampibalike ty hoe amy Mordekay t'i Estere: ¹⁶ Akia, atontono ze hene nte-Iehodà tendreke e

Sosane ao, le mililira ho ahy, ko mikama ndra minoñe telo andro, haleñe naho handro; hililitse manahake zay ka raho naho o somondrararakoo; zay vaho hiheo mb'amy mpanjakay mb'eo, ie tsy milahatse amy liliy; fa naho hikenkan-draho le hikenkañe. ¹⁷ Aa le nienga mb'eo t'i Mordekay, nanao ze hene namantoha' i Estere.

5

¹ Ie amy andro fahateloy, le naombe' i Estere o sarom-panjaka'eo, le nijohañe an-kiririsa añate' i anjombam-panjakay, tandrife i anjombam-panjakay; niambesatse amy fiambesam-panjakay amy anjombam-panjakay i mpanjakay, tandrife ty fizilihañe amy anjombay. ² Aa ie niisa' i mpanjakay te nijohañe an-kiririsa ao t'i Estere, mpanjaka-ampela, le nanjo fañisohañe am-pihaino'e; vaho nahiti' i mpanjakay ama'e i kobaim-bolamena am-pitá'ey, Aa le nañarine aze t'i Estere nitsapa ty loha' i kobaiñey. ³ Le nanoa' i mpanjakay ty hoe: Ino ty ama'o ry Estere, mpanjaka-ampela? fa ndra inoñ' ino ty ihalalia'o pak' an-tsasa i fifeheakoy, le hatoloko. ⁴ Le hoe t'i Estere: Naho atao' i mpanjakay te soa, le ehe te homb' an-takataka hinalankako ho aze i mpanjakay naho i Hamane te anito. ⁵ Aa le hoe i mpanjakay, Taentaeno t'i Hamane, hahahenefañe i saontsi' i Esterey. Aa le nimb' amy takataka nihajarie' i Esterey i mpanjakay naho i Hamane. ⁶ Le hoe i mpanjakay amy Estere ami'ty fanjotsoañe divay, Ndra inoñe ty ihalalia'o, le hatolotse azo; ndra ino ty hata'o, ampara' ty vakim-pifeheako, le hanoeñe. ⁷ Le hoe ty natoi' i Estere: Ty irieko naho ty halaliko—⁸ naho nanjo fañisohañe am-pahaisaha' i mpanjakay, lehe no' i mpanjakay ty hanolotse i hatakoy, hanao i halalikoy—le ehe te hiheo mb' an-tsabadidake hanoeko ho a iareo i mpanjakay naho i Hamane fa hanoeko hamaray i nisaontsiam-panjakay.

⁹ Niavotse an-kafaleñañe naho finembanembañan-troke t'i Hamane amy àndro zay, fa ie niisa'e t'i Mordekay an-dalambei' i mpanjakay, ie tsy niongake, tsy nititititike, le nilifo-piforoforoñañe amy Mordekay. ¹⁰ Fe nilie-batañe t'i Hamane, nimpoly mb'añanjomba'e aña vaho nampañitrife'e o rañe'eo naho i Zerese* vali'e; ¹¹ naho nisengea' i Hamane ty enge' o vara'eo, ty hatsifotofoto' o ana'eo naho ty nampañonjone' i mpanjakay ama'e iaby vaho ty nampiongaha'e ambone' o roandria naho mpitoro' i mpanjakaio. ¹² Le natovo' i Hamane ty hoe: Eka, tsy eo ty napò' i Estere hitrao-pimoak' amy mpanjakay mb' amy takataka hinalanka'ey naho tsy zaho; vaho nambarà'e ka ho ami'ty maray mindre amy mpanjakay. ¹³ Fe tsy mahaeneña ahy i hoe zay iabiy naho mbe treako mitozòke an-dalambeim-panjaka eo t'i Mordekay nte-Iehoda. ¹⁴ Aa le hoe t'i Zerese tañanjomba'e naho o rañe' e iabio ama'e: Ampitroareñe rafipiradoradoñañe, limampolo kiho ty haabo'e; aa ie maraindray, misaontsia amy mpanjakay te haradorado ama'e t'i Mordekay; vaho mihogà an-kazavan' arofo mindre amy mpanjakay mb'an-takataka mb'eo. Ninò' i Hamane i hoe zay, le nampandrafete'e i fampiradoradoñañe.

6

¹ Ie amy haleñey, niazo ty tsareke i mpanjakay; le linili'e te handesañe i bokem-pamoliliañe o talilioy, le vinaky añatrefa' i mpanjakay. ² Sinokitse te nitaroña'e i Mordekay i Bigtanà* naho i Terese†, mpiatra' i mpanjaka

* ^{5:10} Zerese: hasotriañe, alike, lova neparatsake * ^{6:2} Bigtanà: am-piriritañe ao; manolo-hena
† ^{6:2} Terese: masiaké

roe mpañamben-dalañe rey, ie nikinia hampipao-tañañ' amy Akasverose mpanjakay. ³ Hoe i mpanjakay: Aa vaho akore ty niasieñe naho nampionjoneñe i Mordekay ty amy zay? Le hoe o mpitoro' i mpanjakay niatrak' azeo: Toe tsy nanoeñe inoñe.

⁴ Le hoe i mpanjakay, Ia ty an-kiririsa ao?—ie amy zao fa nimoak' an-kiririsa' alafe' i anjombam-panjakay t'i Hamane, hisaontsy amy mpanjakay t'ie handradorado i Mordekay amy rafitse abo hinajari'e ho azey.

⁵ Aa hoe o mpitoro'eo tama'e, Ingo, mijohañe an-kiririsa ao t'i Hamane. Le hoe i mpanjakay: Ampihovao. ⁶ Aa le nimoak' ao t'i Hamane. Le hoe i mpanjakay tama'e, Íno ty hanoañe amy t'indaty tea' i mpanjakay asiñeñe?—naereñere' i Hamane: Ia ty ho tea' i mpanjakay asiñeñe naho tsy zaho? — ⁷ le hoe t'i Hamane amy mpanjakay: Ty am' indaty tea' i mpanjakay asiñeñey, ⁸ le aboake i sarom-panjaka fiombea'ey naho i soavala finingira'ey vaho i sabakam-bolonahetse fiombeañe añambone'e eo; ⁹ le ampiseseheñe ami'ty raik' amo roandriam-bei' i mpanjakao i saroñe rey naho i soavalay, hampisaroña'e indaty tea' i mpanjakay asiñeñey naho nampionjoneñe amy soavalay am-pañaveloañe an-dala' i rovay mb'eo vaho koiheñe aolo'e eo ty hoe: Zao ty hanoañe ondaty tea' i mpanjakay asiñeñeo. ¹⁰ Aa le hoe i mpanjakay amy Hemane: Malisà arè, rambeso i saroñey naho i soavalay amy sinaontsi'oy le ano amy Mordekay nte-Iehoda mpiambesatse an-dalambeim-panjaka eo zay; ko apo'o ndra loli'e amy nitaroñe'oy. ¹¹ Aa le rinambe' i Hamane i saroñey naho i soavalay naho naombe'e amy Mordekay naho nampionjone'e am-pirangàñe i lalan-drovay, nikoik' aolo'e eo, ty hoe: Zao ty hanoañe t'indaty tea' i mpanjakay asiñeñe.

¹² Le nimpoly mb'an-dalambeim-panjaka mb'eo t'i Mordekay. Fe nihitrihitry mb' añ' anjomba'e mb'eo t'i Hamane niojeoje, nitakondoha. ¹³ Natalili' i Hamane amy Zerese vali'ey naho amo rañe'e iabio i fonga nifetsak' ama'ey. Le hoe ondati'e mahihitseo naho i Zerese vali'ey ama'e: Naho tiri' Iehoda t'i Mordekay, ihe nafotsak' aolo'e eo, le tsy hahafitroara'o, fa tsy mete tsy hiridiñe añatrefa'e. ¹⁴ Ie mbe nisaontsieñe, le pok'eo o mpiatram-panjakao nanaentaeñe i Hamane homb'amy sabadidake nihalankañe' i Esterey.

7

¹ Aa le nimb' amy sabadidakey mb'eo i mpanjakay naho i Hamane mitraok' amy Estere mpanjaka-ampela. ² Le nanao ty hoe amy Estere indraike i mpanjakay amy andro faharoey amy fanjotsoañe divaiy: Ndرا inoñe ty halali'o, Estere mpanjaka-ampela, le hatolotse azo; vaho ndra inoñ'inoñ' o salalae'oo, le hanoeñe ampara' ty vakim-pifeheañe.

³ Nanoíñe amy zao t'i Estere mpanjaka-ampela: Aa naho nanjo fañisohañe am-pahaoniña'o raho ry mpanjaka, lehe mahafale i mpanjakay, le inao ty halaliko te hatolotse ahy ty fiaiko; toe ty fiai' ondatikoo ro hatakó; ⁴ amy t'ie naletake, zaho naho ondatikoo, ho mongoreñe, ho zamaneñe vaho hampikoromaheñe; fa naho naletake ho ondevo-lahy naho ondevo-ampela le ho nitsiñe raho ndra te tsy ho nilefe' i rafelahi havahañe ty ho nimotso amy mpanjakay. ⁵ Nisaontsy amy zao t'i Akasverose mpanjaka, nanao ty hoe amy Estere mpanjaka-ampela: Ia v'izao, aia re, te mahavany izay antro'e ao? ⁶ Le hoe t'i Estere: O rafelahy naho sadaviaheo, ty lo-tsereke Hamane tia. Nianifañe aolo' i mpanjakay naho i mpanjaka-ampelay amy zao t'i Hamane.

⁷ Niongak' amy fanjotsoañe divaiy am-piforoforoa'e amy zao i mpanjakay, niakatse mb'an-kiririsa' i anjombay; fe tambatse eo t'i Hamane nihalaly ty fiai'e amy Estere mpanjaka-ampela; fa napota'e te hankàñe ty fisafiria' i mpanjakay. ⁸ Nibalik' amy zao boak' an-kiririsan' anjomba ao mb'amy fanjotsoañe divaiy mb'eo i mpanjakay, ie nibabok' an-tihi'i Estere eo t'i Hamane. Le hoe i mpanjakay: Aa ho vahora'o añ'atrefako etoa ka hao añ' anjomba atoy o mpanjaka-ampelao? Ie nienga i falie'ey i saontsiy le sinaro' iareo ty lahaba' i Hamane. ⁹ Le hoe t'i Harbonà, raik' amo mpiatrak' aolo' i mpanjakaio, Inao! mitroatse añ' anjomba' i Hamane ey ty fampiradoradoañe limampolo kiho mañambone, rinanji' i Hamane ho a i Mordekay nitaron-kasoa i mpanjakaiy. Le hoe i mpanjakay, Aradoradò ama'e. ¹⁰ Aa le naradorado' iereo amy firadoradoañe nihentseña'e ho a i Mordekaiy t'i Hamane; vaho nanintsiñe ty haviñera' i mpanjakay.

8

¹ Amy andro zay ty nanolora' i Akasverose mpanjaka amy Estere mpanjaka-ampela ty anjomba' i Hamane rafelahi' o nte-Iehodao. Le niatreke i mpanjakay t'i Mordekay amy te natoro' i Estere t'ie inoñe ama'e. ² Aa le nafaha' i mpanjakay i bange'e nafaha'e amy Hamaney naho natolo'e amy Mordekay vaho najado' i Estere ho mpifehe' i anjomba' i Hamaney t'i Mordekay.

³ Nisaontsy añatrefa' i mpanjakay indraike t'i Estere, le nibabok' ampandia'e eo naho nihalalia'e an-dranom-pihaino ty hampipoke i fikitroha' i Hamane nte-Agagéy naho i fikililiañe nanoe'e amo nte-Iehodaoy. ⁴ Aa le nahiti' i mpanjakay amy Estere i kobay volamenay. Le nitroatse t'i Estere nijohañe añatrefa' i mpanjakay. ⁵ Le hoe re: Naho no' i mpanjakay naho naħaoni-pañisoħañe amphaoniña'e naho mahity añatrefa' i mpanjakay i rahay vaho soa am-pihaino'e eo raho, le ehe te ho sokireñe ty hamoterañe o taratasy nisafirie' i Hamane ana' i Hamedatà nte-Agagéo, i sinoki'e hamongorañe ze hene nte-Iehoda amo fifeleha' i mpanjakaio; ⁶ amy te aia ty hahafeahako trea ty hankàñe hifetsak' am'ondatikoo? vaho aia ty hahatantezako isake ty fandrotsahañe o longokoo. ⁷ Le hoe t'i Akasverose mpanjaka amy Estere mpanjaka-ampela naho amy Mordekay nte-Iehoda: Ingo fa natoloko amy Estere mpanjaka-ampela ty anjomba' i Hamane, ie fa naradorado amy firadoradoaney, ie nañity fitàñe amo nte-Iehodao. ⁸ Aa le sokiro ka ty amo nte-Iehodao, amy ze tea'o hanoeñe, ami'ty tahina' i mpanjakay, le voli-tomboho amy bange' i mpanjakaiy; amy te tsy mete afotetse ze tsey sinokitse ami'ty tahina' i mpanjakay naho tinombok' amy bange'ey. ⁹ Kinoik' amy zao o mpitan-tsoki' i mpanjakaio, amy volampaħa-teloy, toe volan-tsakamasay, ty andro faha roapolo-telo' ambi'e; le ze nandilia' i Mordekay ro sinokitse amo nte-Iehodao naho amo sorotào naho amo mpifelekeo naho amo roandria' o fifelehañeoo, mifototse an-Karane añe pake Kose aña, fifelehañe zato-tsi-roapolo-fito' amby, ho amy ze songa fifelehañe amy fisoki'ey naho ze hene ondaty amy fisaontsi'ey naho ze nte-Iehoda, ami'ty soki' iareo naho ami'ty fisaontsi' iareo; ¹⁰ naho nisokireñe amy tahina' i Akasverose mpanjakay naho tinombo' iareo amy bangem-panjakay naho nampihitrifeñe añamo mpiningi-tsoavalao naho o mpijoñe an-drameva vaho am-borike vosi'eo; ¹¹ te natolo' i mpanjakay amo nte-Iehodao amo rova iabio ty hifanontoñe, hijadoñe ho ami'ty fiai'e, handrotsake, hanjamañe naho hamongotse ze haozara' ondaty ndra fifeheñañe miatreatre am'iareo naho amo keleia' iareoo naho

amo roakemba' iareoo vaho hampikopaheñe ty hanaña' iareo ho tambe, ¹² ami'ty andro raike, amo fonga fifeleha' i Akasveroseo, le i andro faha folo-telo' ambi' i volam-paha-folo-ro'ambiy, i volan-kiahay. ¹³ Ty dikahamba' i sokitsey le hatolotse ho lily amy ze hene fifelehañe, ho tseizeñe am'ondaty iabio, hampihentseñañe o nte-Iehodao hamalea' iareo fate o rafelahi'eo. ¹⁴ Aa le nionjomb'eo an-tsoavalam-panjaka o mpañitriko, nitaentaeña naho nosiheñe ami'ty nandilia' i mpanjakay; vaho nitaroñeñe an-drova' i Sosane ao i liliy.

¹⁵ Aa ie nienga am-piatrefa' i mpanjakay t'i Mordekay, an-tsarom-panjaka manga naho foty naho sabaka volamena ra'elahy añ'ambone'e eo, an-tsslotse leny matify malòmavo; le nirebeke ty an-drova' i Sosane vaho nifale. ¹⁶ Aa naho o nte Iehodao, fonga hazavañe, hafaleañe, firebehañe, vaho asiñe. ¹⁷ Le hafaleañe naho firebehañe amy ze fifelehañe iaby naho amy ze hene rova nivotraha' i lilim-panjakay naho i koi'ey ty amo nte-Iehodao vaho nanao takataka fa andro soa. Maro am'ondati' i taneio ty niova ho nte-Iehodà; fa nihotrak' am'iereo ty fañeveñañe amo nte-Iehodao.

9

¹ Ie amy volam-paha-folo-ro' ambiy, i volan-kiahay, amy andro fahafolotelo' ambiy, ie fa hanoeñe ty lily naho tsei' i mpanjakay, amy andro nampitaman-drafelahn-te-Iehoda t'ie hiambotrake—fe nifotetse i rahay, fa nanandily amo nalaiñe iareoo o nte-Iehodao; ² le nifandrimboñe amo rova' iareoo, amo fifeleha' i Akasverose mpanjakao iabio o nte-Iehodao, hampipao-pitâñe amy ze nipay hijoy iareo; fe tsy teo ty nahafitroatse am'iereo; fa nihotrak' am'ondaty iabio ty fañeveñañe am'iareo. ³ Le nañolotse o nte-Iehodao ze hene beim-pifelehañe naho o sorotào naho o mpifelekeo vaho ze nitoloñe amy mpanjakay iaby; ie fa nidoiñe am' iereo ty fihembañañe i Mordekay. ⁴ Fa ra'elahy añanjomba' i mpanjakay t'i Mordekay, le fa nanitsike ze hene fifelehañe ty enge'e; fa nitoabotoabotse erike indaty Mordekay zay. ⁵ Fonga linihi' o nte-Iehodao an-kabokabompibara o rafelahi'eo, reke-pizamanañe naho fandrotsahañe, le nanoe'iereo ze tea'e amo nalaiñe iareoo. ⁶ Linafa naho navetra' o nte-Iehodao an-drova' i Sosane ao ty lahilahy liman-jato. ⁷ Le zinama' iareo t'i *Parsandatà naho i Dalfone naho i Aspatà ⁸ naho i Poratà naho i Adalià naho i Aridataà, ⁹ naho i Parmastà naho i Arisay naho i Ariday vaho i Vajezatà, ¹⁰ ana-dahi' folo' i Hamane ana' i Hamedatà[†], rafelahi' o nte-Iehodaoy; fe tsy pinaom-pitâ'iareo o vara'eo. ¹¹ Nasese amy mpanjakay ty ia' o linihiñe an-drova' i Sosane ao tañ'andro zaio. ¹² Le hoe i mpanjakay amy Estere mpanjaka-ampela: Fa nanjevoñe naho namongotse lahilahy liman-jato an-drova' i Sosane ao naho i ana-dahi' i Hamane folo rey o nte-Iehodao; inoñ' arè ty nanoe' iareo amy hene fifeleha' i mpanjakay ila'e rey! Aa ndra ino ty halali'o, le hatolotse azo vaho ndra ino ty hèta'o mandikoatse zao, le hanoeñe. ¹³ Aa le hoe t'i Estere: Naho no' i mpanjakay, le atoloro amo nte-Iehodao e Sosane etoa ty hanoe' iereo hamaray ka hambañe amy kinoike ami'ty andro toiy, le haradorado amo firadoradoañoeo i ana-dahi' i Hamane folo rey. ¹⁴ Le linili'i mpanjakay t'ie hanoeñe; naho nikoiheñe e Sosane ao ty tsey; vaho naradorado i ana-dahi' i Hamane folo rey.

* **9:7** Parsandatà: natolots'an-kalaly; Dalfone: trañon-dakato; Aspatà: lonjetse; hankàñe; Poratà: mamokatse; Adalia: mpitari-drano; Parmastà: bania; Arisay: hoe liona; Ariday: maozatse; Vazejatà: haozara' i tiokey † **9:10** Hamedatà: mpitrobo lily;

¹⁵ Aa le nifandrimboñe amy andro fahafolo-efats' ambi' i volan-kiahay ka o lahilahy nte-Iehodà e Sosaneo vaho nanjamañe lahilahy telonjato e Sosane ao, fa tsy pinaom-pitá' iareo i fikopahañey. ¹⁶ Le nifandrimboñe ka o nte-Iehoda ila'e amo fifeleha' i mpanjakaio naho nijadoñe hañaropiaiñe naho nahazo fitofàñe amo rafelahiō vaho linihi' iereo ty fito-ale-tsilime-arivo amo mpalaiñe iareoo—fe tsy nipaothem-pitáñe o fikopakeo—¹⁷ amy andro faha folo-telo' ambim-bolan-kiahay, le nitofa amy andro faha folo-efats'ambiy iereo vaho nanoe' iareo andron-tsabadidake naho firebehañe. ¹⁸ Fe nifandrimboñe amy andro faha folo-telo'ambiy o nte-Iehoda e Sosaneo naho amy andro faha folo-efats' ambiy vaho nitofa amy andro fahafolo-lim'ambiy, le nanoe' iereo andron-tsabadidake naho firebehañe. ¹⁹ Aa le fanoe' o nte-Iehodà an-tanàñeo, o mpimoneñe an-drova tsy aman-kijolio, ami' ty andro faha folo-efats'ambi' i volan-kiahay ty andron-kafaleañe naho sabadidake; andro fanjaka naho andro fifañitrifan-dravoravo.

²⁰ Aa le nisokira' i Mordekay naho nampañitrife'e taratasy ze hene nte-Iehoda amo fonga fifeleha' i Akasverose mpanjakao, ty marine naho ty lavitse, ²¹ nandily te hambenañe boa-taoñe ty andro faha folo-efats' ambi' i volan-kiahay naho i andro fahafolo-lim' ambi'ey; ²² i andro nahazoa' o nte-Iehodao fitofàñe amo rafelahi'ey, le nafotetse ho volan-kafaleañe ho a iereo i ho nivolam-pandalañey, ty hontoke ho andro fanjaka; t'ie hanoe' iareo andron-tsabadidake naho fifaleañe; fifañitrifañe ravoravo naho fanoloram-palalàñe amo rarakeo. ²³ Aa le rinambe' o nte-Iehodao ty hanao i niorota' iareoy naho i nanokira' i Mordekay am' iereoy; ²⁴ amy te nikitrok' amo nte-Iehodao t'i Hamane ana' i Hamedatà nte-Agage, rafelahi' ze kila nte-Iehoda, hamongora'e, ie nampijòm-boam-pane hisikilia'e, hampiantoa'e, hanjamana'e; ²⁵ fe naho niatrefe'e i mpanjakay, le linili'e an-taratasy te hafotetse ami' ty añambone'e i fikitrohan-drati'e amo nte-Iehodaoy vaho naradorado am-piradoradoña ey, ie naho i ana-dahi'e rey. ²⁶ Aa le nitokave' iareo Porime‡ i andro rey ty ami'ty hoe Pore§. Aa le ze hene entañe an-taratasy toy naho ze nizoe' iereo ty ama'e vaho ze nioza' am' iereo, ²⁷ ty nitroara' o nte-Iehodao naho rinambe' iareo ho am-bata'e naho ho amo tarira' iareoo naho amy ze hirekets' am' iereo, t'ie tsy hapòke fa ho tana' iareo i andro roe rey ty amy sinokitse ama'ey, amy andro namantañañey, boa-tao-boa-taoñe; ²⁸ naho te ho tiahieñe naho ambenañe amo hene tariratseo naho amy ze hene hasavereñañe naho fifelehañe vaho rova, te tsy hipok' amo nte-Iehodao i andro Porime rey naho tsy ho modo an-taminga' iareo ty fitiahiañe iareo. ²⁹ Le sinoki' i Estere mpanjaka-ampela, ana' i Abihale naho i Mordekay nte-Iehoda, an-dili-jadoñe hamenteañe i taratasy faharoe' i Porimey. ³⁰ Le nampihitrife'e amo hene nte-Iehoda am-pifeleha' i Akasverose, zato-tsi-roapolo-fito' ambio; antsaontsim-panintsiañañe naho to, ³¹ hañatò i androm-Porime rey añ'andro nifotoañeñe, i tinendre' i Mordekay nte-Iehoday naho i Estere mpanjaka-ampelaiy, manahake i nikoiha' iareo ho am-bata' iareo naho ho amo tarira'eo ty amy fililirañey naho i fitoreova' iareoy. ³² Aa le nampijadoñe o raham-Porimeo ty lili' i Estere; vaho pinatetse amy bokey.

10

¹ Nampandoa' i Akasverose mpanjaka rorotse i taney naho o tokonose an-driakeo. ² Le ty fitoloñan-kaozara'e naho i hafatrara'ey naho ty talily

‡ 9:26 Porime: jòm-pany (maro) § 9:26 Pore: jom-pany (raike)

heneke amy hara'elahi' i Mordekaiy, ty nampionjona' i mpanjakay aze, tsy fa sinokitse amy bokem-pamoliliam-panjaka' i Meday naho i Parasey hao? ³ Amy te nifaharoe' i Akasverose mpanjakay t'i Mordekay nte-Iehoda, ie nira'elahy amo nte-Iehodao, noron-droahalahi'e maro naho mpipay hañasoa ondati'eo vaho mpitaron-kanintsiñe amo tarira'eo.

Iobe

Fiaolo

¹ Teo t'indaty an-tane Otse aña, Iobe ty tahina'e, ondaty vañoñe naho vantañe, mpañeveñe aman' Añahare, mpalain-karatiañe. ² Nisamake fito lahy re, telo ty anak'ampela'e. ³ I vara'ey: fito arivo ty mpirai-lia'e naho telo arivo ty rameva'e; liman-jato ty katraka'e mpitrap-baoñe naho borike liman-jato vaho nitozantozañe ty aña'anjomba'e ao. Ie t'indaty ni-lohà' ze hene nta-tiñanañe. ⁴ Lili' i ana-dahi'e rey ty nanao takataka aña'anjomba'e, sindre ami'ty andro'e vaho nampañitrike naho nañambara amy rahavave' iareo telo rey ty hitrao-pikama naho rano ama'e. ⁵ Aa ie nimodo ty san-tsabadida' iareo le nitokave' Iobe vaho nefera'e. Nañaleñalen-dre nañenga soróne ty ami'ty ia'iareo iaby, fa hoe t'Iobe, Ke nandilatse o anakoo vaho niteratera an' Andrianañahare an-tro'e ao. Zay ty nilili' Iobe.

Fitsohañe Iobe Valoha'e

⁶ Nitsatok' ami'ty andro niheova' o anak' Andrianañahareo añatrefa' IEHOVÀ te nivotrak' am' iereo ka i mpañinjey. ⁷ Le hoe t'IEHOVÀ amy mpañinjey: Hirik' aia v'iheo? Le hoe ty natoi' i mpañinjey am' IEHOVÀ, Nimbeo' mbeo an-tane ey raho, nijelanjelañe ama'e.

⁸ Aa hoe t'IEHOVÀ amy mpañinjey: Hinarahara'o hao t'Iobe mpitoroko? Te tsitantane ty mañirinkiriñe aze; vañon-dre naho ondaty vantañe mpañeveñe aman' Añahare vaho malain-ty raty.

⁹ Nanoíñe IEHOVÀ ami'ty hoe i mpañinjey: Aa vaho an-tsi-vente'e hao ty añaeveña' Iobe aman' Añahare? ¹⁰ Tsy Ihe hao ty nañarikatok' aze am-pahetse, ie naho ty anjomba'e naho ze hene ama'e miariseho aze? Nitahie'o ty satam-pitá'e vaho manitsike i taney ty vara'e.

¹¹ Ahitio ty fità'o henaneo, paoho o fanaña'e iabio, le toe ho teraterae'e añatrefan-dahara'o. ¹² Aa hoe t'IEHOVÀ amy mpañinjey, Ingo, fa ambane fehe'o eo o fanaña'e iabio, fe adono tsy hahiti'o ama'e ty taña'o. Aa le nisitak' ami'ty fiatrefa' IEHOVÀ i mpañinjey.

¹³ Ie te indraik' andro, nanao takataka naho ninon-divay aña'anjomba' i zoke-lahi'ey i ana'e rey, ¹⁴ le ingo ty nihitrike mb'am' Iobe mb'eo nanao ty hoe: Nitari-dasary o katrakao le nihinañe marine eo o borikeo, ¹⁵ le nañotroke mb'eo o nte-Sabeo naho tinonga' iereo. Zinama' iareo am-pibara o mpiarakeo vaho zaho avao ty nahabotitsike hivolañe ama'o! ¹⁶ Ie mbe nitalily, avy ka ty raike nanao ty hoe: Nidoíñe boak' an-dikerañe ey ty afon' Añahare namorototo o lia raikeo naho o mpiarakeo vaho nimongoreñe, zaho avao ty nivoratsake hitalily ama'o.

¹⁷ Ie mbe nisaontsy, nimb'eo ka ty raike nanao ty hoe: Nizara ho firimboñañe telo o nte-Kaldeao, le hinao' iareo o rameva iabio. Fonga binaibai' iareo ami'ty meso-lava o mpiarakeo le zaho avao ty nipoliotse hitaroñ' ama'o.

¹⁸ Ie mbe nisaontsy, le nimb'eo ka ty raike ninday ty hoe: Nikama naho ninon-divay aña'anjomba' i zoke-lahi'eo o ana-dahi'o naho anak' ampela'oo, ¹⁹ le ingo niavy ty tio-bey boak' am-patrambey aña, nikabokaboke i anjombay ami'ty hotso'e efatse naho nihotrak' am'ondatey tora'eo; fonga nihomake. Zaho avao ty nirombake hitalily ama'o.

²⁰ Niongak' amy zao t'Iobe nandiatse ty saro'e naho nañaratse ty añaambone'e naho nibabok' an-tane eo nisolohlo, ²¹ vaho hoe re:

Niboridan-draho te niboak'
an-kovin-dreneko ao,
le hijangeajangeañe ka t'ie
himpoliako ao.

Nanolotse t'IEHOVÀ,
vaho nañombotse t'IEHOVÀ;
bangoeña ty tahina' IEHOVÀ.

²² Ie amy ze iaby, tsy nandilatse t'Iobe, tsy nanisý raha tsy mañeva aman'
Andrianañahare.

2

¹ Tendreke indraike te ie nitotsak'eo o anan' Añahareo hiatrek' am'
IEHOVÀ, le nitsatok' am' iareo ao ka i mpañinjey hiatrefa'e am' IEHOVÀ.

² Le hoe t'IEHOVÀ amy mpañinjey, Boak' aia v'iheo? Le hoe ty natoi'
i mpañinjey am' IEHOVÀ, Boak' ami'ty fihelahelàko an-tane aña naho ty
fijelanjelañako ama'e. ³ Le hoe t'IEHOVÀ amy mpañinjey, Fa hinarahara'o
hao Iobe mpitorokoy? t'ie tsy añirinkiriñañe an-tane atoy, fa ondaty
vañoñe tsy aman-kila; añaeveña'e t'i Andrianañahare naho ambohoa'e ty
raty; vaho mbe tana'e ty havantaña'e ndra te ihe nañosik' Ahy ama'e,
handrotsak' aze tsy aman-tali'e. ⁴ Le hoe ty natoi' i mpañinjey am'IEHOVÀ,
Holitse hasolo holitse, eka, hatolo' ondaty ze hene fanaña'e ty amy fiai'e.
⁵ Fe ahitio henaneo o fità'oo naho gineo ty taola'e naho ty nofo'e vaho
honjira'e an-dahara'o. ⁶ Le hoe t'IEHOVÀ amy mpañinjey, Ingo an-taña'o re;
fe arovo ty fiai'e. ⁷ Aa le nienga boak' aña'trefa' IEHOVÀ i mpañinjey vaho
zinevo'e am-bae-tovoñañe t'Iobe mifotots' an-dela-pandia'e pak'an-dengo'
i añambone'ey. ⁸ Nandrambe tseram-balàñe re hangaotse ty sandri'e, ie
niambesatse an-davenoke ao.

⁹ Le hoe ty vali'e tama'e: Mbe ifahara'o hao ty havañona'o? Injeo t'i
Andrianañahare vaho mihomaha.

¹⁰ Fa hoe re tama'e, Manao tambaimbain-drakemba deren-drehe. Ty soa
avao hao ty ho rambesentika am-pitàn'Añahare? Tsy hirambesañe ka hao
ty raty? Amy ie iaby zay, tsy nandilatse am-pivimby t'Iobe.

¹¹ Aa naho nahajanjiñe i fonga feh'ohatse nifetsak' ama'ey ty rañe' Iobe
telo, le songa nienga an-toe'e t'i Elifatse* nte-Temane naho i Bildade† nte
Sohe vaho i Tsolare‡ nte Naamate, ie fa nifamotoañe te hiheo mb'ama'e
hiferenaiñe vaho hañohò' aze. ¹² Aa ie nampiandram-pihaino eñe le tsy
nahafahiñe aze vaho nipoñafe' iereo ty fangoihoy; songa nandriatse ty
saro'e naho nampibobo debok' ambone' ty añambone'e mb' an-dikerañe
ey. ¹³ Aa le nindre niambesatse ama'e an-tane eo fito andro naho
fito haleñe iereo, sindre tsy nahakofòke volan-draik' ama'e: amy t'ie
nahaoniñe ty halozan-kaore'a'e.

3

¹ Modo zay le nanoka-palie t'Iobe namatse i andro'ey, ² hoe ty nilañone'
Iobe:

³ Ehe te ho mongoreñe
ty andro nahatoly ahiko,
naho ty haleñe nanoeñe ty hoe:
Inao, niareñe lahilahy.

⁴ Ehe te ho ieñe i andro zay;
lonike te tsy ho vazohon' Añahare

* ^{2:11} Elifatse: Andrianañahare ty haozara'e † ^{2:11} Bildade: Anam-pifandierañe ‡ ^{2:11} Tsolare: Tsikisoisoy

boak' ambone ao,
vaho tsy hipisañā' ty hazavàñe.

⁵ Ehe t'ie ho tsepahe' ty hamoromoroñañe naho ty talinjon-kavilasy;
lonike te hitozòhan-drahoñē;
ee te hampirevendreveñē aze
ze fonga mahamainten-gero' i àndroy

⁶ Le i haleñē zay:
hiambotrahan-kamoromoroñañe,
tsy hitrao-pirebeke
amo andro' i taoñejo;
tsy hizilik' ami'ty ia' o volañeо.

⁷ Hete! ehe ho beitsiterake i haleñē zay,
tsy himoaham-peon-kafaleañē.

⁸ Ee te hamatse aze
o mpamoiñ' androo,
o veka'e hampibarakaoke i fañaneñeo,

⁹ Ho maieñē abey o vasiañē am-palipalitsieñeo:
angao re hipay hazavàñe fa tsy hahatrean;
ee t'ie tsy ho sambae' ty holimaso' i maraiñey;

¹⁰ amy te tsy narindri'e i lalan-koviñey,
naho tsy nakafi'e amo masokoo
ty hasotriañē.

¹¹ Ino ty tsy nahasimb' ahy an-koviñē ao? Akore te tsy namoeako fiay
te niboloañē?

¹² Ino ty nandrambesa' o ongotseo ahiko? naho o fatroa ninonoakoo?

¹³ Ie ho nihity ampitsiñañē ao;
ho niroro naho nitofa avao,

¹⁴ mindre amo mpanjakao
naho o mpisafiri' ty tane toio,
o mamboatse hakoahañē ho am-bata'eo;

¹⁵ naho o ana-donak'
amam-bolamenao,
o mameno akiba am-bolafotio:

¹⁶ hera ho nanahake ty tsi-ambolañē naetake,
anak' ajaja niboloañē
mboe lia'e tsy nahatrean hazavàñe.

¹⁷ Ao ty fitroara' o lo-tserekeo
amo firohandroha'eo;
ao ka ty fitofà' o màmakeo.

¹⁸ Mitraok' am-pierañerañē
o mpirohio,
tsy mahajanjiñē ty fiarañanañā'
i mpamorekekey.

¹⁹ Ao ty bey naho ty kede:
vaho vototse amy talè'ey ty ondevo.

²⁰ Ino ty añomezan-kazavàñe ty misotry,
naho ty haveloñē amo mafaitse añ'ova'eo?

²¹ ze mitama hihomake, fe tsy avy,
ie tsikaraheñē mandikoatse o vara mietakeo;

²² o mandia taroba naho mirebeke
t'ie nahatendreke kiborio?

²³ [Ino ty anoloran-kazavàñe]

amy t'indaty nietahan-dalañē,

ie nigoloboñen'Añahare?

²⁴ Misolo ty fihinanako ty fiselekaiñako,
vaho midoañe hoe rano ty fitoreoko.

²⁵ Amy te mifetsak' amako
o mampangebahebak' ahikoo,
naho mivovo amako i ihembañakoy,
²⁶ tsy mierañeran-draho, tsy mipendreñe, tsy mitsiñe
fa pok'eo ty hekoheko.

4

¹ Le hoe ty natoi' i Elifaze nte-Temane :

² Hampihivivioke azo hao
ty fimanea'ay rehak' ama'o?
fa Ia ty maha-lie-batañe tsy hivolañe?

³ Ingo te maro ty nanare'o,
fa nampaozare'o ty fitañe mavozo.

⁴ Fiatoa' o mitsikapio o saontsi'oo;
nampifatrare'o o ongotse mikoletrao;

⁵ F'ie nizò azo henaneo,
ihe ka ty midazidazitse; nioza ama'o, le minevenevetse;

⁶ Tsy o havañona'oo hao ty fatokisa'o
vaho fitamà'o ty fahitin-dala'o?

⁷ Ehe, tiahio hey:
Ia ty nikoromake te nalion-tahiñe?

Aia ty vañoñe naitoeñe?

⁸ Aa naho o nitreakoo:
hambañe ty tatahe' ty mpitraba-karatiañe,
naho ty mpitongy kilily.

⁹ Ie mihomak' ami'ty kofòn' Añahare,
mikoromak' ami'ty
fiforoaham-pifombo'e.

¹⁰ Mitromoro ty liona
mireñetse ty liona romotse,
fe poñafeñe o nifem-parasy tora'eo,

¹¹ Mate ty liona-lahi'e te po-tsindroke,
mibarakaike ty anan-diona rene'e,

¹² Nasese amako añ'etake ty volañe,
nitsepahen-tsòfiko ty nitangongoe'e.

¹³ Nitsakoreñe añ'aroñaron-kaleñe,
ie lampon-drotse ondatio,

¹⁴ Niazo ty anifan-draho, nirevendreveñe, nampititititihe'e o taolako iabio.

¹⁵ Nihelañe añatrefan-tareheko eo
ty angatse,

niriñariña o volon-tsandrikoo.

¹⁶ Nijohan-dre,
fe tsy nirendreko ty vinta'e;
nitroatse aolo' o masokoo ty vente'e,
nianjiñe, le inao ty fiarañanañañe

nanao ty hoe :

¹⁷ Ho to añatrefan' Añahare hao
t'i raolombelo?
halio te amy Namboatse azey hao ondatio?

18 Heheke ndra o mpitoro'eo tsy atokisa'e,
 mbore anisia'e lilatse o anjeli'eo,
 19 Antsake o mpimoneñe an-traño taneo,
 O faha'eo an-débok' ao, ie ho pineke aolo' ty fizara!
 20 Ie demok' aňivo' ty manjirik'andro naho ty haleñe;
 modo kitro-katroke tsy ihaoñañe.
 21 Tsy nombotañe an-tro'e ao
 hao o talin-kivohoe'o?
 Ie mihomak' avao, tsy aman-kilala!

5

1 Mikoiha arè! ia ty ao t'ie hanoiñe azo!
 Ia amo masiñeo ty hitoliha'o?
 2 Mañe-doza ami'ty minè ty hasosora'e,
 zevoñe' i famarahia'ey ty derendereñe.
 3 Fa nitreako te nivahatse ty dagola,
 fe nozoñeko amy zao ty akiba'e.
 4 Lavi-pipalirañe o tiri'eo,
 demoheñe an-dalambey ey,
 vaho tsy eo ty mpandrombake.
 5 Kamae' o salikoeñe ty nitatahe'e,
 tsindrohe' iereo boak'am-patik'ao;
 midañadaña amo vara'eo ty kòboñe
 6 Tsy miboak' an-debok' ao ty hasotriañe,
 naho tsy mitiry an-tane ao ty hankàñe;
 7 Fe ampoheke t'indaty te samake
 manahake ty fionjona' ty fipitsin'afó.
 8 Zaho ho nipay an'Andrianañahare
 vaho i Andrianamboatse
 ty nitaroñako o entakoo—
 9 amy Mpanao raha mampañeveñe
 tsy taka-tsikaraheñey,
 raha tsitantane tsivatse.
 10 I mampahavy orañe an-tane atoy,
 vaho mañirake rano an-teteke ey;
 11 Hampitongoa'e ambone o mirèkeo,
 le honjonem-b'am-pipalirañe o mandalao.
 12 Avorembo'e ty kilili' o kalitakeo, soa tsy hahapi-draha o taña'eo.
 13 Tsepahé'e ami'ty fikitrofa'e
 o kanteo,
 vaho misaok' aňe ty fikinià'o mengokeo.
 14 Ie manjo ieňe te antoandro,
 mijimenjimè hoe an-kaleñe
 te tsipinde-mena.
 15 Fe rombahe'e am-pibara am-bava'iareo, ty rarake am-pitâ' o maozatseo.
 16 Aa le aman-ko tamae'e o rarakeo,
 fe mampikite-bava ty haratiañe.
 17 Haha t'indaty endahan' Añahare;
 le ko tsambolitio'o* ty fandilova' i El-Sadai.
 18 Ie mandafa, le bandie'e;

* 5:17 Rzs 3:12, Heb 12:6-8

mitrabake, le melañe' o fità'eo.[†]
¹⁹ Ho haha'e rehe
 am-peh'ohatse eneñe;
 Eka, im-pito tsy hipao'k azo ty hankàñe.
²⁰ Ho jebañe'e ami'ty havilasy rehe
 an-tsan-kerè,
 naho ami'ty haozara' i fibaray
 an-tsàn'aly.
²¹ Harovan-drehe ami'ty fifiaham-pameleke, f'ie tsy ho hembañe
 te itsatohan-kekoheko.
²² Hiankahafa'o ty hankàñe naho ty kerè,
 le tsy hatahora'o ze bibi' ty tane toy.
²³ Ie hirai-lia amo vato an-tetkeo
 vaho hiharo-rehak' ama'o
 o biby an-kivokeo.
²⁴ Ho rendre'o te mierañerañe ty akiba'o,
 ho tilihe'o ty golobo'o
 le tsy ho motso ze ama'e ao.
²⁵ Ho fohi'o te maro o ana'oo,
 ho mira ami'ty hatsifotofoto' o ahetse
 an-tane atoio o tarira'oo.
²⁶ Homb'an-kibori'o ao rehe
 ami'ty haañon-kaantero'o,
 manahake ty fitroara' o toboron'
 ampemba o an-tsa'e.
²⁷ Heheke! fa nitsikarahe'ay, le ie zay.
 Inao! irendreho, ho ami'ty hasoa'o.

6

¹ Nanoïñe amy zao t'Iobe:
² Ee te linanja o ha'emberakoo,
 vaho natrao-fipoke am-balantsy ao
 o ha'ampohekoo!
³ Fa ho nandikoatse ty lanja'
 ze kila faseñe an-driak' ao:
 Aa le nitsoretoke t'ie nivolañe.
⁴ Fa amako ao o ana-pale'
 i El-Sadaio;
 inome' ty troko ty vore'e;
 miatatre ahiko o harevendreveñan'
 Añahareo.
⁵ Mitreñe hao ty borike ly
 t'ie amañ'ahetse,
 ke mirohake hao ty añombe
 ambone' i hane'ey?
⁶ Ho kamaeñe tsy aman-tsira hao
 t'ie nàmoñe?
 mafiry hao ty tapotin'atoly?
⁷ Ifoneñan-troko ty hitsopeke;
 hoe lintseñe t'ie siloke.
⁸ Ehe te niazoko i halalikoy; te hatolon'Añahare i salalaekoy,
⁹ ee te ho non' Añahare
 ty handemok' ahiko,

[†] 5:18 Iir 32:42, Frv 3:31-32, Hos 6:1

te ho hahà'e ty fità'e hañitoa'e ahy!
 10 Zao ty ho nañohò ahiko; hahavontitirako tsy aman-tretrè ty fanain-taiñañe;
 te tsy niliereko ty nafè' i Masiñey.
 11 Aia ty haozarako te hitamà?
 Inoñe ty ho figadoñako, t'ie hahaliñe?
 12 Haozaram-bato hao ty hafatrarako?
 Torisike hao ty sandriko?
 13 Hera tsy amako ty fañimbàñe ahiko,
 ke nasiotse amako ty famotsorañe?
 14 Mañeva ho ferenaiñan-drañe'e
 ty mpisotry,
 ndra te napo'e ty fañeveñañe
 amy El-Sadai.
 15 Manao hakalitahan-torahañe
 amako o rañekoo,
 hoe saka misorotombake
 vaho mimosaoñe,
 16 ie angonkòña' i ranon-kavandray,
 naho am-pietaham-panala.
 17 Ie matrovoke le mianjiñe,
 ie faosa vaho mimiañe an-toe'e.
 18 Miolakolak' am-pañaveloañe iereo,
 mb'an-kakoahañe mb'eo vaho mimeatse.
 19 Nipaia' o mpivovotse boak' i Temào,
 nitamà' o mpitavea' i Sebào.
 20 Nilonjetse t'ie nahatoky;
 nitangòke te nipok'eo.
 21 Toe manahake zay nahareo henaneo;
 oni' areo ty hekoheko le miriatsandriñe.
 22 Nanao ty hoe vi'raho?
 Añendeso, ndra,
 Itambezo am-bokàñe
 amo vara' areoo
 23 Ehe, ampipolitiro am-pitàn-drafelahy,
 ke: Jebaño am-pità' o fanalolahio ty fiaiko?
 24 Anaro raho, le hitsiñe; atoro ahy ty nandilarako.
 25 Toe mahasibeke ty saontsy to !
 Fe inoñe ty ho toiñe'
 ty fifanoitoi'areo?
 26 Ke te o reha'oo ro vente'e
 vaho tioke avao ty lañonam-pamoe' piaiñe?
 27 Eka, ndra iambotraha' areo
 ty bode-rae vaho haletake ty rañetse.
 28 Ehe henteo henaneo,
 hera mpandañitse aña'trefa' areo raho.
 29 Mibalintoàña, le ko mandilatse;
 Eka mifosera, fa vantañe o ahikoo.
 30 Manan-tahy hao ty lelako?
 Tsy apota' ty lañilañiko hao ty hankàñe?

Tsy mira ami'ty androm-pièke hao
o andro'eo?
² Manahake ty filelalela' ondevo ty aloke naho ty fitamam-pièke ty rima'e,
³ ty anolorañ' ahy volan-kafoake,
ie nitendreñe halen-kaemberañe.
⁴ Zaho mandre, manao ty hoe:
Ombia ty hitroarako, fa lava i haleñey,
le mivoamboña avao
ampara' te manjirike.
⁵ Misikiñ'oletse naho pakoram-potake
ty sandriko,
mijiri-gañe ty holiko vaho mandrano.
⁶ Masika te amy sozom-panenoñey
o androkoo,
ie mihelañe aña po-pitamàñe.
⁷ Ehe tiahio te kofòke avao ty haveloko:
toe tsy hahatrea hasoa ka o masokoo.
⁸ Tsy ho onim-pihaino' i mahaisak' ahikoy: amako o fihaino'oo fe tsy eo
raho.
⁹ Ie misaoke ty rahoñe, le aña:
zay ty igodaña' ty an-kibory ao,
tsy hiboaña' e ka.
¹⁰ Tsy himpolia'e i anjomba'ey,
ie tsy hapota' i akiba'ey.
¹¹ Aa le tsy hijomohòn-draho;
hivolañe ami'ty falorean-troko,
hitoreo ami'ty hafairañe aña'ovako ao.
¹² I riakey hao raho, ke i fañaneñey
kanao nampijilovañe?
¹³ Ie anoeko ty hoe
te ho hohòe' i tihikoy,
te hampanintsiñe ty toreoko
i fandreakoy,
¹⁴ le ampihembaña'o ami'tynofy naho ampirevendreveña'o
aña'aroñaroñe,
¹⁵ le joboñe' ty fiaiko t'ie dageañeñey,
hamake hikenkañe ty amo taolakoo,
¹⁶ f'ie minike, tsy ho veloñe nainai'e:
apoho, fa kafoak' avao o androkoo.
¹⁷ Inoñ' ondatio te honjone'o?
te hapite'o ama'e ty arofo'o?
¹⁸ T'ie tilihe'o boak'andro,
vaho tsohe'o lomoñandro?
¹⁹ Ombia t'ie hitolike tsy hisamb'ahy,
apoho ho bangiñe hey raho
hahateleñako ty iveko?
²⁰ Nanao hakeo hao raho,
ino o nanoekoo, ry Mpijilo ondatio?
ino ty nanoe'o ahy fanolarañe,
hañavesatse ty sandriko?
²¹ Akore te tsy apo'o o tahikoo,
te tsy haha'o o hakeokoo?
f'ie hiroro an-debok' ao te aniany;

ho paia'o, fa tsy ho eo.

8

- ¹ Nanoïñe amy zao t'i Bildade nte-Sohy:
- ² Pak'ombia te ho saontsie'o o raha zao?
Ampara ombia te ho tio-bey avao
o entam-palie'oo?
- ³ Mengohen' Añahare hao ty zaka?
Ampiolahe' i El-Sadai
hao ty hatò?
- ⁴ Ie nandilats' azo o ana'oo,
le nasese'e ami'ty haozara'
o fiodia'eo.
- ⁵ Aa naho nitsoehe'o t'i Andrianañahare vaho ty fiferenaiña' i El-Sadai,
- ⁶ naho malio naho vantan-drehe,
le hivañona'e
hampipoly i akiban-kavantaña'oy.
- ⁷ Le ndra te nikede ty fifotora'o,
hitombo ho ra'elahy ty figadoña'o.
- ⁸ Ehe añontaneo i sà' taloy vaho imaneo
o nitsikarahan-droae'eo,
- ⁹ Bahimo tika fa toly omale avao,
mbore talinjo ambone' ty tane toy o andron-tikañeo.
- ¹⁰ Aa vaho tsy ho toroa' iareo hao, hisaontsy ama'o, hañakatse entañe
boak' añ'arofo' iareo ao?
- ¹¹ Mahafitiry hao ty vindra
lehe tsy an-tane hinake?
Hitiry tsy aman-drano hao ty vondro?
- ¹² Ie maindoñe, tsy nibiraeñe,
le mbe miheatse aolo' ze hene rongoñe.
- ¹³ Zay ty lala' o mañaliño
an' Andrianañahareo;
toe modo fitamàñe ty tsy aman-Kake.
- ¹⁴ Ie maràntsäne ty fiatoa'e;
naho fararotse ty fatokisa'e.
- ¹⁵ Hiatoa'e ty anjomba'e
fe tsy hahafijadoñe;
vontitire'e fe tsy leo'e.
- ¹⁶ Maindoñindoñe re añatrefa' i àndroy andrevaha' o tsampa'eo i
golobo'ey,
- ¹⁷ vandindire' o vaha'eo ty votrim-bato, i traño-vatoo nitsifira' iareoy.
- ¹⁸ Ie ombotañe amy toe'ey, le ho lañe'e, ami'ty hoe,
Mbe lia tsy nahatrea azo raho.
- ¹⁹ Eka, zay ty haeha' i lia'ey,
mbe hitiry amo deboleo ka ty ila'e.
- ²⁰ Oniño te tsy ho farien' Añahare ty vañoñe vaho tsy ho tohaña'e
o lo-tserekeo.
- ²¹ Mbe ho lifore'e fiankahafañe ty falie'o naho o fivimbi'oo am-pazake.
- ²² Ho saroñen-kasalarañe
ze malaiñe azo,
ho modo ty kivoho' o tsivokatseo.

9

- ¹ Aa hoe ty natoi' Iobe :
- ² Toe apotako ty hatò izay: fe aia te ho to añatrefan' Añahare ondatio?
- ³ Naho teo ty nipay hifandietse ama'e,
tsy ho toiñe'e indraik' ami'ty arivo.
- ⁴ Mahihitse añ'Arofo,
fatratse an-kaozarañe,
ia ty nanjehatse ama'e tsy aman-joy?
- ⁵ Aveve'e o vohitseo, tsy apota' iareo
te avali-hoho'e an-kaviñerañe.
- ⁶ Akofikofi'e tsy an-toe'e ty tane toy, le mitroetroe o faha'eo;
- ⁷ Lilie'e tsy hanjirike i androy,
agobo'e o vasiañe;
- ⁸ Ie avao ty namelatse o likerañe,
naho mandialia o onjan-driakeo;
- ⁹ Ie ty nañoreñe i Arktorose
naho i Telo-milahatsey,
i Bode naho i Koto-kede atimoy.
- ¹⁰ Ie i manao halatsàñe tsy onim-biribiriy,
raha tsitantane tsy taka-voliliy.
- ¹¹ Ie miary amako, tsy ho treako:
Naho ihelaña'e tsy ho rendreko.
- ¹² Ie mandrirotse, ia ty hisebañe.
Hanoa' ia ty hoe, Ino o anoe'oo?
- ¹³ Tsy hampolin' Añahare ty haviñera'e;
mitsolofiñe ama'e ka
o mpañimba' i Rahabeo.*
- ¹⁴ Akore arè ty hahatoiñako aze,
ty hijoboñe o volañe hitaroñakoo;
- ¹⁵ Ndra te to i ahikoy, tsy ho nahatoiñe; ho nihalalieko tretre
i Mpizakakoy.
- ¹⁶ Naho nikany raho vaho nanoiñe ahiko re, tsy ho niantofako te nihaoñe'e
ty feoko.
- ¹⁷ Vinonotrobo'e an-tio-bey raho,
indrae'e tsy amam-poto'e o ferekoo.
- ¹⁸ Tsy hapo'e hikofòke raho,
te mone atsafe'e afero;
- ¹⁹ Ty amo haozarañe,
Inao! Ie ty Maozatse!
Le ty hatò :
Ia ty hifamotoañe ama'e?
- ²⁰ Naho naniom-batan-draho,
ho nanisý ahy ty vavako;
ndra t'ie tsy an-kila,
ho tsarae'e te mengoke.
- ²¹ Malio tahin-draho, tsy haoñe' ty troko,
ho farieko ty fiaiko;
- ²² Toe raike iaby avao: aa hoe raho:
Songa rotsahe'e ty mahity
naho ty lo-tsereke.
- ²³ Naho manjamañe aniany ty angorosy,

* **9:13** Rahabe: i Ndrimon-driakey, i Mitsraime

le kizahē'e ty famoeañ'ay o vañoñeo.
24 Ie atolots'an-taña' o lo-tserekeo
 ty tane,
 le takone'e ty lahara' o mpizakao;
 aa naho tsy ie, le ia ka?
25 Masika te amo mpanao tsikiaviavio o androkoo,
 mihelañe tsy ahaisahan-kasoa.
26 Mitsirtsioke hoe lakam-bezo[†],
 hoe tsimalaho mañao-tsindroke.
27 Aa naho nanao ty hoe raho,
 handikofako i halalikoy,
 hapoko ty tareheko lonjetse toy,
 vaho hisomilake;
28 Ihembañako o fanaintaiñakoo,
 apotako t'ie tsy ho haha'o;
29 Aa kanao atao lo-tsereke raho;
 ino ty ifanehafako tsy vente'e?
30 Naho miandro an-dranom-panala,
 naho kotriñeko an-tsokay o tañakoo;
31 Mbe hagodo'o an-davak' ao,
 vaho halaim-bintañe ahy o sikikoo.
32 Toe tsy ondaty manahak' ahy re
 hahatoiñako,
 t'ie hifañatrek' an-jaka.
33 Tsy amam-pañalañalañe ty añivo'ay ao,
 ze mete ho nanazok' anay roroe.
34 Ehe te hasita'e amako i kobai'ey,
 vaho tsy hampangebahebak' ahy
 i fañeveñañe ama'ey;
35 Le ho nivolan-draho,
 vaho tsy ho nianifañe ama'e;
 fa toe tsy zay ty an-troko ao.

10

1 Hejeko ty haveloko;
 hampidadaeko ty fitoreoko
 hivolañe ami'ty hafairan-troko.
2 Hoe ty ataoko aman'Añahare,
 Ko ozoñe'o;
 ampahafohino ahiko ty lie'o amako.
3 Mahaso azo hao te ihe mamorekeke,
 te mavoe'o ty satam-pitá'o
 vaho ampiloeloea'o ty fikinià'
 o lo-tserekeo?
4 Amam-pihaino nofotse v'iheo?
 Mahavazoho manahake ty fañentea' ondatio hao?
5 Hambañe ami'ty andro' o olombeloñeo hao o andro'oo,
 mira ami'ty tao' ondatio hao o tao'oo,
6 t'ie tsoehe'o o tahikoo,
 vaho kodebe'o o hakeokoo,
7 ndra t'ie arofoana'o te
 tsy tsereheñe,

[†] 9:26 Heb: lakañe nirareañe vindā

tsy eo ty haharombake am-pit 'o.
⁸ Nitsen m-pit 'o raho,
 nifonire 'o ho raike;
 aa vaho ho rotsahe 'o?
⁹ Tiahio te lietse ty nitsenea 'o ahy;
 hampoli 'o ho deboke hao?
¹⁰ Tsy nadoa 'o hoe ronono hao raho
 vaho nampamoae 'o hoe habobo?
¹¹ Nanikina 'o holitse naho nofotse,
 namahera 'o an-taola ne
 naho talin ozatse.
¹² Tinolo 'o havelo an-koko migahi ne,
 vaho nampitambelo ne ty troko
 ty fiatraha 'o.
¹³ Fe naeta 'o a n'arofo 'o ao o raha zao;
 apotako t ie ama 'o:
¹⁴ Ie mandilatse raho, tendre 'o,
 vaho tsy apo 'o i hakeokoy.
¹⁵ Ie manao hakeo; hank ne amako!
 Ie mahity, tsy vaniko ty miandra,
 amy te lifo-kasalara ne,
 tsapako o hasotriakoo.
¹⁶ Aa naho niandrandra:
 Le hoe liona ty hangoro na 'o ahy;
 vaho havale 'o ahy an-kalats ne.
¹⁷ Vaoe 'o amako o mpanis  ahikoo,
 vaho indrae 'o amako ty havi nera 'o;
 hasosora ne mitovon-kaembera ne
 ty amako.
¹⁸ Ino ty na nakara 'o ahy an-kovi ne ao?
 Nainako te ho nisimba
 tsy ho niisam-pihaino,
¹⁹ H make t ie hoe tsy nitoly,
 fa boak an-kovi ne mb an-kibory
²⁰ Tsy ho nap e hao o androko
 tsy ampeampeo?
 Misitaha hey rehe,
 hahatreavako fa nanintsin-kedeke,
²¹ aolo ' te hiampane nako;
 mb amy tsy hahafibaliham-beoy,
 mb an-tane mimoromoro ne,
 mb an-talinjon-kavilasy ao;
²² Tane migobogobo ' ie ne,
 toe firoromoro ne,
 an-tane an-kalon-kavilasy,
 tsy mipendre ne,
 miloeloe hoe ie ne.

11

- ¹ Le hoe ty natoi ' i Tsofare
 nte Naamate:
² Hapoke tsy ho valea ne hao
 i entan-tsy fotofoto rezay,
 hahazo to hao ondaty lifo-da ona ne?

3 Hampijomohòn-ty lahilahy hao
 ty fangaradadaha'o,
 tsy hendaha' ondaty hao
 t'ie manivetive?
 4 ami'ty nanao'a'o ty hoe:
 Ki'e o fañòhakoo,
 naho malio-tahin-draho
 am-pivazoho'a'o.
 5 Aa ehe te hitsara t'i Andrianañahare,
 naho hanokake fivimby ama'o,
 6 hitaroña'e hihitse miheatse! Toe aman' ila roe ty hilala to.
 Aa le mahafohina te apon' Añahare
 ty ila' o hakeo'oo.
 7 Mahafitsikarake o raha miheatse aman' Añahareo v'iheo?
 Mahafañitsokitsoke o efe' efe'
 i El-Sadai hao?
 8 Sikal' an-dindìñe eñe iereo?
 —ino ty ho mete'o?
 laleke ta i Tsikeokeokey
 —ino ty ho fohi'o?
 9 Lava te ami'ty tane toy ty andava'e,
 mihenehene te amy riakey.
 10 Ke miary re, ke mampigabeñe,
 he manontoñe, ia ty hanebañe aze?
 11 Toe arofoana'e ty votro;
 naho vazoho'e ty hakeo,
 ndra t'ie tsy mandohy.
 12 Kanao hahilala ty dagola,
 le mahaterak' ondaty ty borìke-ly.
 13 Avantaño arè ty arofo'o,
 vaho avelaro ama'e o fità'oo,
 14 apoho aña ze hakeo am-pità'o;
 ko ado'o hitobok' aña'akiba'o ao ty tahiñe,
 15 Ie amy zao, hampiandrae'o laharañe tsy aman-kila;
 hijohan-drehe tsy an-kahembañañe.
 16 Ho haliño'o ty fisotria'o;
 ho tiahî'o hoe rano fa nisaok' aña.
 17 Le hazava te amy tsipinde-menay
 ty havelo'o;
 naho manahake ty maraindray i haïe'ey.
 18 Le hahatoky rehe kanao am-pitamàñe;
 mijilojilova aña'ariari'o,
 le mändrea an-kanintsiñe.
 19 Ho nihity tsy an-kahembañañe
 vaho maro ty hipay imba ama'o.
 20 Fe ho tofake ty maso' o lo-tserekeo;
 le tsy aia ty hivoratsaha'e,
 vaho ty fipetro'e avao ty hisalala'e.

12

- ¹ Nanoïñe ami'ty hoe t'Iobe:
² Toe inahareo avao ro ondaty,
 vaho hitrao-pihomak'

ama' areo ty hihitse.

³ Fa toe mahilala ka raho,
tsy inahareo avao;
Tsy zai' areo raho.

Ia ty tsy mahafohiñe o raha rezao?

⁴ Fiankahafa' o rañekoo raho:
Kanjie'e t'i Andrianañahare,
vaho toïñe'e,
Fitohafañe i vañoñe tsy aman-kilay.

⁵ Tsambolitio' ty miagaregañe ty failo,
ie nihentseñañe ho a
o mipolititse am-pandiao.

⁶ Mierañerañe ty kiboho-malaso,
le tsu-añoleñañe ty manigik' an'Andrianañahare,
o mitintiñe ty ndrahare'e am-pità'eo.

⁷ Fe añontaneo o bibio,
hampandrendreha' iareo;
naho o voro-mitiliñeо,
hitalilia' iareo;

⁸ ke misaontsia ami'ty tane toy,
hañòha'e azo,
apoho hitaroña' o fian-driakeo.

⁹ Ia amy rezay ro tsy mahafohiñe t'ie
nanoem-pità' IEHOVÀ?

¹⁰ Kila am-pità'e ao ty fiai' ze veloñe,
naho ty kofò' ze hene ondaty.

¹¹ Tsy mpitsò-bolañe hao ty ravembia, manahake ty fitsopehan-dañilañy
ty mahakama?

¹² Amo antetseo hao ty hihitse,
amo lava' androo hao ty hilala?

¹³ Aman'Añahare o hihitse naho haozarañeо; ama'e o fanoroañe naho
hilalao.

¹⁴ Heheke, mandrotsake re,
le tsy hamboareñe ka;
agabe'e ao t'indaty,
vaho tsy ho hahañe ka.

¹⁵ Hehe te kalaña'e o ranoo, le maike;
irahe'e ka iereo, le añañahinà'e ty tane.

¹⁶ Ama'e ty hafatrarañe naho ty hilala;
aze ty finitake naho ty mpamitake

¹⁷ Ampañaveloa'e tsy aman-kana
o mpanoroo,
vaho ampigege'e o mpizakao.

¹⁸ Abala'e ty kitambem-panjaka
vaho diaña'e sokotry ty vania'e.

¹⁹ Asese'e tsy aman-kana o mpisoroñeо naho gore'e ty fanalolahy.

²⁰ Ampitsiñe'e ty lañona' o matoeo, naho afaha'e ty hilala'o antetseo.

²¹ Ampidoaña'e inje o ana-donakeo naho abala'e ty sadia' o maozatseo.

²² Ventabentare'e o raha mietak' añ'ieñeо, aboa'e an-kazavàñe o talinjon-
kavilasio.

²³ Onjone'e o fifeheañeо naho rotsahe'e; atratrañahé'e o fifelehañeо
vaho asese'e an-drohy aña.

²⁴ Ampimotsoe'e arofo

o mpiaolo' ty tane toio,
 vaho ampirerererè'e an-dratraratra
 tsy aman-dalañe aña.
²⁵ Ie mijimejime añ' ieñe ao
 tsy an-kazavàñe;
 midaleandaleaña hoe jike.

13

- ¹ Inao! fa nitreako iaby zao,
 tsinano' ty sofiko vaho maharendreke.
- ² Ze fohi'areo, apotako ka;
 Zaho tsy zai' areo.
- ³ Fe te hivolañe amy El-Sadai raho,
 te hifanoointoiñe aman' Añahare.
- ⁴ Mpanosoke vande nahareo,
 songa mpanaha tsy manjofake.
- ⁵ Ehe t'ie vata'e nianjiñe,
 le ho natao hihitse!
- ⁶ Ehe janjiño ty havereko,
 vaho janjiño ty fanoroan-tsoñiko
- ⁷ Hisaontsy hamengohañ' aman'Añahare hao,
 hilañona'areo famañahiaña?
- ⁸ Handombok' aze v'inahareoo?
 h'ondati-aivo, mpihalaly ho an'Andrianañahare hao?
- ⁹ Hahasoa anahareo hao te itsikaraha'e?
 Hamañahy Aze hao nahareo
 manahake ty famañahiaña ondaty?
- ¹⁰ Ie ho trevohe'e
 te mirihy aña'etake.
- ¹¹ Tsy hampangebahebak' anahareo hao ty enge'e?
 naho hivotrak' ama' areo ty fañeveñaña.
- ¹² Oha-drehan-davenoke
 ty onin-taro' areo,
 fiaron-dietse ty fikala' areo.
- ¹³ Mianjiña, apoho raho hivolañe
 le adono ho amako ty toly.
- ¹⁴ Ino ty andrambesako?
 ami'ty nifeko ty nofoko,
 vaho apoko an-tañako ty fiaiko.
- ¹⁵ Ndra te havetra'e, ie ty fatokisako
 fe hiverok' aña'atrefa'e raho
 ty amo satakoo,
- ¹⁶ Vaho zao ty ho fandrombahane ahy:
 te tsy hiatrek'aze ty tsy aman-Kake
- ¹⁷ Tsendreño o entakoo,
 naho ty lañonako an-dravembia' areo.
- ¹⁸ Ingo, fa nalahako i tarokoy,
 apotako te hahazo to.
- ¹⁹ Ia ty hifanjomotse amako?
 le ho nitsiñe amy zao raho
 vaho nikenkañe.
- ²⁰ Ehe ty raha roe avao
 ty tsy hanoa'o ahy,

le tsy hietahako o lahara'oo.
21 Ahankaño amako ty fità'o,
 le ehe tsy hampianifañe ahy
 ty fañeveñako ama'o
22 Ie amy zao koiho, le hanoiñe raho,
 ke angao hivolan-draho vaho toïño.
23 Fire o fandilarako naho hakeokoo?
 Ampahafohino ahy ty fiolako
 naho o tahikoo,
24 Akore te añetaha'o laharaña,
 vaho manao ahy ho rafelahi'o?
25 Hampitititihe'o hao ty ravets-atae
 asiotsion-tioke,
 ho heañe'o hao ty kafo maike?
26 Fa anokira'o raha mafaitse raho,
 vaho ampandova'o ahy
 o hakeoko te niajalahy.
27 Añombea'o longòke o tombokoo,
 naho efera'o ty ho nilian-tombokoo.
28 ie mihamomoke hoe raha lo raho,
 hoe saroñe nihanem-bararaoke.

14

1 Ondaty nasaman' ampelao,
 tsy lava-ohatse vaho lifo-kasotriañe,
2 hoe voñen-katae ty fionjona'e
 le miheatse, mihelañe hoe talinjo
 fa tsy mitoetse.
3 Harefa'o vaho hasese'o an-jaka ama'o ao?
4 Ia ty mahaakatse ty malio
 ami'ty maleotse? Leo raike.
5 Kanao fa nalahatse o andro'eo,
 fa ama'o ty ia' o vola'eo vaho fa najado'o
 o efetse tsy handilara'eo,
6 ampitoliho aña ty fijilova'o, hitofa'e,
 ampara' te henefe'e o andro'eo,
 manahake ty mpièke
7 Manan-ko tamae'e ty hatae,
 ie firaëñe ro mbe mitiry avao,
 vaho tsy milesa o tora'eo.
8 Ndra te mihaantetse an-tane ao
 o vaha'eo,
 naho mate an-debok' ao i foto'ey,
9 fa ie mañantson-drano ro hibotiboty
 vaho handrevake hoe ana-katae.
10 Fe mihomake t'i Raolombelo
 vaho mitsalalampatse;
 mipetroke t'indaty, le aia?
11 Hambañe ami'ty fisiha' o sihanakeo
 naho ty fimaiha' o sakao
 ampara' te kapaike,
12 ty fandrea' ondaty tsy hitroatse,
 tsy hivañone ampara' te

mihelañe o likerañe,
vaho tsy ho barakaoféñe amy firota'ey.

¹³ Ehe t'ie haeta'o an-tsikeokeok'ao,
le hakafi'o ampara' te mimpoly ty
haviñera'o, vaho hampitsatoha'o
andro hahatiahia'o ahy!

¹⁴ Ie vilasy ondatio, mbe ho veloñe hao?

Fe ho liñisako amo hene androm-pitoroñakoo ampara' te tondroke ty
fañovàñe ahiko.

¹⁵ Hikanjy rehe le hanoiñe raho;
ho maniña'o ty satam-pitá'o.

¹⁶ Fe henaneo, tinoñe'o o liakoo,
ie mbe tsy vazoho'o ty fandilarako;

¹⁷ rinohy an-karoñe ao o tahikoo,
vaho lombofa'o o hakeokoo.

¹⁸ Mivoravora i vohitse mihotrakey,
naho misitse an-toe'e ty vato;

¹⁹ mivañen-drano o vongam-batoo;
saohe' o rano-vohitseo ty mena' i taney;
zay ty androtsaha'o
ty fitama' ondatio.

²⁰ Iambotraha'o nainai'e, le miherañe aña;
ovae'o ty tarehe'e vaho irahe'o mb'eo.

²¹ Asiñeñe o ana'eo, fa tsy apota'e; mifotsake, fa tsy fohi'e.

²² O marare amy nofo'eio avao ro tsapa'e,
ty tro'e avao ro iroveta'e.

15

¹ Le hoe ty natoi' i Elifatse
nte-Temane:

² Hanoiñe an-kilala-kafoake hao
t'indaty mahihitse,
ho lifora'e tiok'atiñanañe hao ty fisafoa'e?

³ Hisafiry an-drehake tsy vente'e hao,
ndra an-dañonañe tsy hahasoa?

⁴ Eka, apo'o ty fañeveñañe,
sebaña'o ty fiambaneñañe aman' Añahare.

⁵ Anare' o hakeo'oo ty falie'o,
joboñe'o ty famelen-kalitake.

⁶ Mamatse azo o falie'oo, fa tsy zaho;
eka talilie' o fivimbi'oo.

⁷ Ihe hao t'indaty nisamaheñe valoha'e?
Nitoly aolo' o vohitseo v'iheo?

⁸ Janji'o hao o safirin' Añahare
miheotseo?

Haramamoe'o hao ty hihitse?

⁹ Ino ty fohi'o tsy fohi'ay?

Ino ty rendre'o tsy ama'ay?

¹⁰ Songa ama'ay ty maròy foty
naho ty androanavy bey taoñe
te aman-drae'o.

¹¹ Maivañe ama'o hao ty fañohòan' Añahare,
naho o navere'e mora ama'oo?

¹² Ino ty mampihelañe ty arofo'o?
vaho mampandofiry o fihaino'oo?

¹³ T'ie tsambolitoe'o aman'Añahare
ty arofo'o,
ie anga'o hiakatse am-palie'o
i saontsy zay.

¹⁴ Ino t'indaty, t'ie halio?
I nasaman'ampelay, t'ie ho vañoñe?

¹⁵ Ingo, ndra o masi'eo tsy iatoa'e
mbore tsy malio am-pivazohoa'e
o likerañe.

¹⁶ Àntsake ty lo-tsereke naho ty maleotse,
ie mpitohoke tahiñe hoe rano!

¹⁷ Hataliliko azo, janjiño;
vaho ho taroñeko o nitreakoo—

¹⁸ O saontsi' ondaty mahihitseo,
ty tsy naeta'e boak' aman droae' iareo;

¹⁹ Ie am' iereo avao
ty nitolorañe i taney,
ndra ty renetane tsy nihelañe
am'iereo ao.

²⁰ Ampikoretohe'
ty farare'e lomoñandro
ty lo-tsereke,
voaiake o taoñe nahaja
ho a' o mpisenge-herio.

²¹ Feo mañebake
ty an-dravembia'e ao;
ie manintsin-dre,
te ivotraha' ty malaso.

²² Tsy iantofa'e
te hibalike boak'amy ieñey,
tol'i'e i fibaray.

²³ Mirererere mipay hanen-dre ami'ty hoe; Aia zay? Apota'e te am-pità'e
i andro mimoromoroñey.

²⁴ Ampangebahebahe'
ty haloviloviañe naho hasotriañe,
miambotrak' ama'e hoe mpanjaka
veka'e hihotakotake.

²⁵ Amy te natora-kitsi'e aman'Añahare ty fità'e,
mitoandratoandra amy El-Sadai.

²⁶ Horidaña'e ami'ty hagàn-kàto'e,
amy hateven' angozim-pikalan-defo'e.

²⁷ Amy te kinope'e solike i tarehe'ey,
vaho pinako'e havondrahañe ty leme'e;

²⁸ Itoboha'e o rova mangoakoakeo, añ'anjomba tsy fimoneñañe,
ie veka'e ho votre.

²⁹ Tsy ho mpañaleale re,
tsy ho nainai'e ty fijangaña'e,
tsy midrodretse mb'an-tane o ampemba'eo.

³⁰ Tsy hibolitira'e i ieñey;
haforejeje' i lelan' afoy o tora'eo,
vaho hampihelañe' ty kofòm-palie'e.

31 Ee te tsy hiatoa'e ty hakoahañe,
 hamañahia'e vatañe;
 fa hanambezañe aze ty tsy vente'e.
 32 Ho henek' aolo' ty andro'e zay,
 vaho tsy handrevake ty tsampa'e.
 33 Hahifi'e i valobo'e mantay
 manahak' i vahey,
 vaho hahintsa'e i voñe'ey
 hambañ' amo oliveo.
 34 Fa hangoakoake ty fivavea'
 ty tsy aman-Kake,
 vaho ho forototoe' ty afo
 ty kijà' o mpanao vokañeo.
 35 Ie mampiareñe hakalitahañe,
 naho mampiboloñañe hakeo,
 vaho famañahiañe
 ty ihentseñan-tro'e.

16

1 Le hoe ty natoi' Iobe:
 2 Fa maro ty entañe tsinanoko hoe zay,
 songa mpañohò mahamonjetse.
 3 Tsy higadom-bao o reha-kafoakeo?
 ke inoñe ty manigik'azo hanoíne?
 4 Mete ho nivolambolañe manahake
 anahareo raho,
 naho nifandimbe toetse o tron-tikañeo,
 mete ho nanoitoim-bolañe ama' areo,
 vaho nikofikofihako loha.
 5 Ho nampahaozare'
 ty vavako nahareo,
 vaho nampanintsiña'
 ty fihetseñ-tsoñiko.
 6 Fe ndra te mivolan-draho,
 tsy mikepake ty hasotriako,
 hahamaivañ' ahy hao te mifoneñe.
 7 Fe nimokore'e raho henaneo,
 fa nahabangý o mpiamako iabio rehe,
 8 Nampiforejeje ahiko rehe, valolombelo amako izay;
 Mionjoñe amako ato ty faifoifoko,
 ie oniñe an-tareheko.
 9 Nirimita' ty haviñera'e, mitan-kabò amako, nialia'e vazañe; nabohiri' i
 Rafelahikoy amako o fhaino'eo.
 10 Nampibolobe-a-palie amako,
 tinakapi' iareo amañ'inje ty fifiko,
 le nihimpok' amako.
 11 Toe nasesen'Añahare
 amo raty tserekeo raho,
 mbore navokovoko'e am-pitá'
 o tsy vokatseo.
 12 Nierañeran-draho,
 fe nampivaletrahe'e.
 Ginore'e am-bozoko vaho hinotohoto'e,

mbore najado'e ho fanolarañe.

¹³ Miarikoboñe ahy o mpitàm-pale'eo, tseratserahe'e, abenta'e tsy amantretre

o tsapa-voakoo,

vaho adoandoa'e

an-tane eo o aferokoo.

¹⁴ Boroboñake atovom-boroboñake
ty niboroboñaha'e ahy;

hoe fanalohaly t'ie mañoridañe.

¹⁵ Nitrebehako gony ty holiko,
vaho napoko an-deboke ao ty tsifako.

¹⁶ Nampandofiry

ty tareheko o tañikoo,

an-koli-masoko eo

ty talinjon-kavilasy;

¹⁷ ndra te tsy aman-tsenge hery
o tañakoo,

mbore malio o halalikoo.

¹⁸ O ry tane; ko lembefa'o ty lioko,
le ko mea'o fitofàñe o torekoo.

¹⁹ Ie amy zao hehe te an-dikerañe ao
i valolombelokoy, ambone ao i Mpañalañalakoy.

²⁰ Mikizak'ahy o rañekoo,

i Andrianañahare

ty fitsopaha' o masokoo.

²¹ Ehe t'ie nimpañalañalañe añivo' ondatio naho i Andrianañahare,
manahake ty ana'ondaty aman-drañe'e.

²² Aa ie aña ty taoñe tsy ampeampe,
le hionjomb'an-dalañe

tsy impolian-draho.

17

¹ Fa demoke ty troko,

le modo o androkoo; vaho veka'e amako ty kibory.

² Toe amako atoa o mañinje ahikoo;

naho harefe' o masokoo

ty fanigha' iareo?

³ Toloro antoke henaneo, Ihe ro tsoake, ia ka ty hifampipao-pitàñe amako?

⁴ Fa nakite'o ty tro' iareo tsy hahilala,

aa le tsy honjone'o.

⁵ Ie mifosa rañetse hahazoa'e raha,

le hilesa ka o mason' ana'eo.

⁶ Fe nanoa'e mpitolom-bola' ondaty;

firorà' o lahilahio ty tareheko.

⁷ Nampaieñe ty fioremeñako o masokoo,

hoe talinjo avao o fangefangekoo.

⁸ Ilatsa' ondaty vantañeо, hitrobo-vatañe ty vaño
hatreatre'e ty tsy aman-kake.

⁹ Mitan-ty lala'e ty marentane,
naho mihaozatse vaho mihaftatratse

ty malio fitàñe.

¹⁰ Aa inahareo iaby,

mibalihia mb'etoa indraike,

f'ie tsy hahatreo ondaty mahilala ama' areo.

11 Fa modo o androkoo,
 nipeñapeñake o safirikoo;
 naho o fisalalan-trokoo!
 12 Afote' iereo ho andro ty haleñe
 [ami'ty hoe]:
 Mitotoke añatrefa' i ieñey ty hazavàñe,
 13 Ie andiñisako ho akibako
 ty tsikeokeoke, naho añ'ieñe ao
 ty andafihako i tihikoy,
 14 Aa naho tokaveko i koboñey, [ty hoe:] Raeko rehe, naho i oletsey:
 Ihe ty Reneko naho rahavaveko;
 15 Aia arè o fitamakoo?
 I fisalalakoy, ia ty mahaisak' aze?
 16 Hilenteke mb'an-tsikeokeoke ao hao re?
 hitrao-pitofàñe an-debok' ao hao zahay.

18

1 Aa le hoe ty natoi'
 i Bildade nte-Sohy :
 2 Pak' ombia vaho hagado'o o volaño? Mañaraharà heike, le hirehake
 zahay.
 3 Aa vaho akore t'ie atao biby?
 te kàboke am-pihaino'o eo?
 4 Ihe mandrimi-batañe ami'ty hasosora'o,
 haforintseñe ty ama'o hao ty tane toy?
 ke havik' amy toe'ey ty vato?
 5 Eka, hakipeke ty jiro' o tsereheñe, vaho tsy haviake ty fibela' i afo'ey.
 6 Haieñe ty hazavàñe an-kivoho'e ao, vaho hakipeke ty jiro'e ambone'e eo.
 7 Ho tomoreñe ty lian-kaozara'e
 naho hamotsak' aze o kilili'eo.
 8 O fandia'eo ty hampijòn' aze
 an-karato ao, minday aze
 mb'an-tsikarakara mb'eo o lià'eo.
 9 Tsepahé ty fandrim-bikoviko ty tomi'e, mibitsok' ama'e ty bitsoke
 10 Linembeke ho asa'e an-tane ao ty tsingere naho ty fandrik' an-dalañe
 eo.
 11 Mañembañ'aze mb'atia mb'etia
 o mampangetraketrakeo,
 mañoridañ' aze am-pandia'e.
 12 Te hampibotsek' aze ty haemberañe,
 salahàñe' ty hankàñe hikorovoha'e.
 13 Hatao'e tsipeake ty holi'e,
 habotse' ty tañoloñoloñan-kavilasy
 o fangefange'eo.
 14 Hombotañe an-kiboho'e ao
 i niatoa'ey,
 le hasese aolo' ty mpanjakam- pangetraketrahañe eo.
 15 Leo raik' amo azeo
 tsy mimoneñe an-kiboho'e ao,
 famitsezam-ponde i akiba'ey.
 16 Maike o vaha'e ambane ao,
 vaho binira ambone ey ty tsampa'e
 17 Modo an-tane atoy ty fitiahiañe aze;

tsy aman-tahinañe re an-koe aña.

¹⁸ Aronje boak'an-kazavàñe ao re mb'an-kamoromoroñañe ao,
vaho atao soike ami'ty voatse fimoneñañe toy.

¹⁹ Ie tsy hanañ'anake ndra anan'anake
am'ondati'eo,
ho po-sehang'a'e ty an-kijà'e ao.

²⁰ Hilatsà' o mpanonjohy azeo i andro'ey, hambañe ami'ty firia-tsandri' o niaoloo.

²¹ Toe zay o akiban-tsereheñeo;
ty toe' o tsy mahafohiñe
an'Andrianañahareo.

19

¹ Aa le hoe ty natoi' Iobe :

² Pak'ombia nahareo
ro mbe hampiojeoje ty troko naho hampipinepinek'ahy an-tsaontsy?

³ Im-polo ty nañonjira' areo ahiko
vaho tsy mahasalats' anahareo
ty mañaraty ahy.

⁴ Aa naho nitò t'ie nandilatse, le midoñ' amako avao i tahiñey.

⁵ Naho mivongevòngek' amako nahareo manisý ahy amo injekoo,

⁶ Le mahafohina te nifotetse amako,
t'i Andrianañahare

vaho narikato'e amako ty harato'e.

⁷ Mitoreo raho fa nikatramoeñe
fe tsy amam-pañaoñe;

mikanjy, fe tsy añomean-to.

⁸ Finahepahe'e ty lalako tsy handenàko,
naho napo'e aña'oloñoloko ao ty ieñé.

⁹ Nampikorendahe'e amako ty engeko,
vaho nafaha'e an-dohako ao
i sabakam-bolonahetsey.

¹⁰ Narotsa'e mb'etia mb'atia,
le fa aña raho:

ombota'e hoe hatae ty fitamàko.

¹¹ Nasoleba'e amako ka ty haviñera'e
vaho atao'e ho rafelahi'e.

¹² Mitotoke amako o lahindefo'eo,
mitoañe mb'amako
le mitobe añariary i kibohokoy.

¹³ Napo'e lavitse ahy o rahalahikoo,
vaho fonga alik'amako o nimpiamakoo.

¹⁴ Namorintseñe ahy o longokoo,
nañaliño ahy o rañekoo.

¹⁵ O mitobok' aña'anjombakoo,
naho o anak'ampatakoo,
songa manao ahy ho ambahiny,
toe renetane am-pahaisaha'e.

¹⁶ Tokaveko ty mpitoroko, fe tsy manoiñé,
ndra te itoreovam-bavako.

¹⁷ Mampangorý i valiko ty kofòko,
vaho heje' ty amorin-dreneko.

- ¹⁸ Manirik'ahy o anak'ajalahio,
ie miongake raho, onjira' iareo.
- ¹⁹ Malaiñ'ahy iaby o atehenakoo;
tsambolitio' o nikokoakoo.
- ²⁰ Mipitek' ami'ty holiko naho
ami'tynofoko o taolakoo,
vaho an-tain-tsiko avao ty nimolaoreko.
- ²¹ Tretrezo raho, iferenaiño, ry rañeko;
fa nipaok' ahy ty fitàn'Añahare.
- ²² Ino ty ampisoaña' areo ahy hoe t'ie Andrianañahare?
Tsy mahaeneñ' anahareo hao o holikoo?
- ²³ Ee te nisokireñe o volako zao!
Lonike t'ie nipatereñe am-boke ao!
- ²⁴ Ee any t'ie sokirañe
an-tsantilò viñe naho firake
am-bato tsy ho modo!
- ²⁵ Fa naho zaho, apotako te veloñe
i Mpijkebañ'ahikoy,
ie hijohañe ambone'
o lembokeo an-tsengaha'e aña.
- ²⁶ Le ie fa momoke ty holiko—
ty mianto toy, ho treako boak' ami'tynofoko t'i Andrianañahare;
- ²⁷ Eka, hahatre Aze raho;
o masokoo ro hahaisak' aze fa tsy ty ila'e.
Momoke o aña'ovakoo!
- ²⁸ Hera hanao ty hoe nahareo:
Akore ty hampisoañan-tikañ' aze?
Ino ty lengo'e ho tendreke
hanesehañ' aze?
- ²⁹ Mihembaña amy fibaray; amy te minday falilovam-pibara o
haviñerañe,
hahafohina' areo te eo ty zaka.

20

Tsofare

- ¹ Aa le hoe ty natoi' i Tsofare
nte-Naamate:
- ² Mañetsek' ahy hanao o fitsakoreakoo, naho
tokoen-draha ty am-pisafoañ' ao.
- ³ Fa tsinanoko i endake fañinjeañ' ahiy, fe manoiñe ahy
ty arofo tsy takam-pahilàlako.
- ⁴ Tsy fohi'o hao boake haehae zay,
hirik ami'ty nampipohañe ondaty
an-tane atoy?
- ⁵ T'ie anianik' avao ty hafalea'
o tsereheñe,
mihelañe ty firebeha' ty tsy aman-Kàke.
- ⁶ Ndra te mitakatse andikerañe eñe
ty fitoabora'e,
naho mioza rahoñe i añambone'ey,
- ⁷ mbe hihomake manahake o fiamonto'eo kitro-katroke;
hanao ty hoe o mpahatre azeo:
Aia re?

⁸ Himosaoñe hoe nofy re,
tsy ho isake ka,
hasiotse hoe aroñaron-kaleñe.

⁹ Tsy ho isa'
ty fihaino nahaoniñe aze;
tsy hahatrea aze ka i akiba'ey.

¹⁰ Mipay tretre amo rarakeo o ana'eo;
le soloem-pit  e o vara'eo.

¹¹ Lifotse ty havitrihan-katora'e
o taola'eo,
fe hitrao fidok' ama'e an-debok' ao.

¹² Ndra te mamy am-palie'e ao
ty hal  -tsere'e
vaho aeta'e ambane famele'e ao,
¹³ ndra te tea'e, tsy foe'e, tambozore'e am-palie'e ao,
¹⁴ le hiova hafaitse am-pisafoa'e ao
o mahakama'eo;
hoe vorehe' o mere  eo ty ao.

¹⁵ Agedra'e o varao fe haloa'e;
ampa  ili  an' A  ahare
boak' am-pisafoa'e ao.

¹⁶ Sihe'e ty vorem-pa  ane  e;
avetra' ty fitsipom-pandrefeala.

¹⁷ Tsy ho sambae'e o toraha  eo,
o sak   midoandoan-tantele
naho hendron-drononoo.

¹⁸ Havaha'e i nifanehafa'ey, fa tsy hatele'e;
i vara niazo'e an-takinakey
tsy hahafale aze,

¹⁹ Amy te finorekeke'e o rarakeo
vaho nado'e ho poie'e;
nitavane'e ty anjomba tsy rinanji'e.

²⁰ Ty amy tsy fipendre  a  e an-tro'e ao,
tsy apo' i fiha  a'e
te eo ty himolaotse ama'e.

²¹ Po-draha sisa hagodra  e;
toly ndra hihela  e a  e ty firaorao'e.

²² Ami'ty haliforan-kavokara'e
ty hanjoa'e fanjira  e;
fonga atreatre'e ze fit  ' o misotrio.

²³ Ie boboke ty fisafoa'e le hafetsa'e ama'e
ty fiforoforoan-kavi  era'e,
hakojojoa'e ama'e t'ie mihina  e.

²⁴ Ndra te hivoratsaha'e
ty fialiam-b  y, hampitrofak' aze
ty fale toris  ke.

²⁵ Sitone  e, le miakatse an-dambosi'e,
i masio  e milimolimotsey
boak' a  'afero'e ao;

vaho vovoem-pirevendreve  a  e.

²⁶ Fimoromoro  a  e ty vandro  e  e
ho amo vara'eo.
Afo tsy rarafe  e ty hamorototo aze vaho hangotomomooke ty honka'e

añ'akiba'e ao.

²⁷ Ho borahe' o likerañe o hakeo'eo;
hitroatse hiatreatrea' ty tane toy.

²⁸ Ho kopaheñe ty vokatse
an-kivoho'e ao, ie hasoik' aña amy andron-kaviñera'ey.
²⁹ Zay ty toly havalen' Añahare
amy lo-tserekey,
ty ampandovaen' Añahare aze.

21

¹ Le hoe ty natoi' Iobe:

² Tsatsiho o entakoo;
ehe t'ie ro hamere anahareo.

³ Iheveo hey hivolañe,
ie fa nivolañe, le mañinjea.

⁴ Aa naho zaho,
ondaty hao ty itoreovako?
Ino ty tsy hahatsimboetse ahy?

⁵ Isaho raho vaho ilatsao;
akapefo am-pitâne ty falie.

⁶ Ie mahatiah y raho, le embetse;
fitititihañe ty mangazoñe ty vatako.

⁷ Akore te mbe veloñe o tsereheñe o,
miha-bey,

vaho mitombo an-kaozarañe*?

⁸ Mitrao-pimoneñe am'iareo,
am-pahaisaha' iareo o ana'eo,
añatrefam-pihaino' iareo
o tarira'eo.

⁹ Soa-aro tsy an-kahembañañe
o akiba'eo;
tsy am' iereo ty kobain'Añahare.

¹⁰ Mitongoñe o añombelahi'eo fa tsy milesa;
miterake o añombe vave'eo fa tsy mandoly.

¹¹ Ampidadà' iereo
hoe lia raike o ana'eo;
mitrekatreka o keleia'eo.

¹² Kantsáñe naho marovany
ty arahe' iareo takasy,
vaho mifale ami'ty feon-tsoly.

¹³ Gadoñe' iereo am-pibobodoñañe o andro'eo vaho mizotso mb'an-
kibory ao am-pierañerañañe.

¹⁴ Ie nanao ty hoe aman' Añahare:
Adono zahay!

Tsy fañiria'ay ty hahafohiñe o sata'oo.

¹⁵ Ia ze o El-Sadai zao, hitoroña'ay?
Ino ty ho tombo'e ho anay
te ihalalia'ay?

¹⁶ Heheke, tsy am-pitâ' iareo ty hasoa, lavits'ahy
ty famerea' o lo-tserekeo.

¹⁷ Im-pire hao te akipeke
ty failo' o tsivokatseo?

* ^{21:7} Sab 73:3,17, Iir 12:1-2

Im-pire t'ie ivovoa' ty hankàñe?
 Ie anjarà'e ty tivontivoñe
 ty amy haviñera'ey.
¹⁸ Boka-maike miatre-tioke iereo,
 hoe kafo'e aboelen-tio-bey?
¹⁹ [Hoe nahareo:] Ahajan' Añahare
 ho amo ana'eo o tahi'eo.
 Ehe te hañondroke ama'e
 t'i Andrianañahare, hahafohina'e.
²⁰ Apoho ho oni-pihaino'e ty firotsaha'e, hitohofa'e ty haviñera' i El-Sadai.
²¹ Haoñe'e hao i hasavereña'e
 hanonjohy azey,
 apota'e hao te voaiake o vola'eo?
²² Ia ty hañoke hilala aman'Añahare
 kanao Ie ro mizaka o an-dikerañe?
²³ Mihomak' ami'ty haañoña'e ty raike,
 ie miaiñañoleñañe am-panintsiñañe.
²⁴ Pea ronono o korobo'eo,
 lendeñe o betron-taola'eo.
²⁵ Mivetrake ka ty aman-kafairan-troke,
 le lia'e tsy nitsopeke raha mafiry.
²⁶ Songa mandre andebok' ao,
 sindre saroñan-oletse.
²⁷ Eka, fantako ty fikitroha' areo,
 ty fikililia' areo hañaraty ahy.
²⁸ Fa hoe nahareo:
 Aia ty anjomba' i roandriañey?
 Aia ty kivoho, ty fimoneña' o lo-tserekeo?
²⁹ Mboe tsy nañontanea' areo hao
 o mpañaveloo,
 tsy apota' areo hao o talili' iareoo?
³⁰ te arovañe ho an-tsan-kankàñe
 i tsereheñey, ho kozozoteñe mb'eo añ'androm-piforoforoñañe.
³¹ Ia ty hiatatre aze ty amo lala'eo,
 ia ty hañondrok' ama'e o nanoe'eo?
³² Ie takoneñañe mb'an-kibory mb'eo,
 vaho ambenañe i lona'ey.
³³ Mamy ama'e o vongan-tane
 am-bavataneo;
 vaho fonga hañorik' aze ondatio,
 ie mitozantozañe ka ty niaolo.
³⁴ Aia arè ty añohòa' areo
 amañ'entan-kòake,
 le o hatoi' areoo,
 manao hakalitahañe avao.

22

- ¹ Le hoe ty natoi' i Elifaze nte-Temane:
- ² Mahasoa an'Andrianañahare hao t'indaty?
 mahafitoloñ'aze hao t'ie bey moko?
- ³ Mahafale i El-Sadai hao
 t'ie vantañe?
 aman-tambe'e hao te
 fonire'o tsy aman-kila o sata'oo?

4 Ty fañeveña'o ama'e hao
 ty añendaha'e azo hizaka'e?
 5 Tsy mitoabotse hao o tahi'oo?
 Tsi-vatse o hakeo'oo!
 6 Nangala'o tsoake ami'ty tsy
 vente'e i rahalahi'oy,
 vaho hinoli'o hiboridañe.
 7 Tsy nanjotsoa'o rano ty taliñiereñe hinoma'e,
 vaho nitana'o amy salikoeñey
 ty mahakama.
 8 Tompo' ty tane toy ty fanalolahy;
 vaho mpioneñe ao ty aman-kasy.
 9 Nampolie'o hara'e o vantotseo,
 vaho navitso'o ty taña' o bode-raeo.
 10 Toly t'ie arikoboñem-pandrike, naho itsoborean-ka'endrahañe;
 11 an-kamoromoroñañe tsy hahaisaha'o,
 vaho mandipots'azo ty rano bey.
 12 Tsy andindin-dikerañe ao hao
 t'i Andrianañahare?
 Isaho ka ty haabo' o vasiañeo,
 t'ie an-tiotiots' eñe.
 13 Hoe rehe: Ino ty arofoanan' Añahare? hahafiranga
 o ieñe milodolodoo hao ty fizakà'e?
 14 Mañibok' aze o rahoñe mikopokeo
 tsy hahavazoho'a,e,
 vaho an-kivoho' i likerañey ty fidraidraita'e.
 15 Horihe'o hao i lalañe haehae
 nilià' ondaty tsereheñey?
 16 O sinintoñe aolo' ty andro'eo;
 ie sinaon-drano-vohitse o faha'eo,
 17 ie nanao ty hoe aman' Añahare:
 Ihankaño zahay; naho,
 Ino ty mete hanoa' i El-Sadai?
 18 Mbe natsafe'e hasoa avao
 ty anjomba'e.
 Fe lavits' ahy ty famerea' o tsivokatseo.
 19 Oni' o vañoñeо zay, le fale,
 iankahafa' o malioo añ' inje,
 20 [ami'ty hoe]:
 Toe naitoeñe o malaiñe anaio,
 niforototoe' ty afo
 o vara' iareoo.
 21 Aa le mifampilongoa ama'e,
 hanintsiña'o, hitotsaha' ty soa.
 22 Ehe, rambeso am-palie'e
 ty Hake,
 vaho ahajao añ'arofo'o ao
 o tsara'eo.
 23 Mimpolia amy El-Sadai
 le ho vaoen-drehe,
 ampisitaho lavitse
 i kiboho'oy ty tsy to.
 24 Ahajao an-debok' ao ty vara,

ty volamena' i Ofire
amo vato an-torahañeo.
²⁵ Le i El-Sadai ty ho vara'o,
ie ty volafoty ki'e ama'o,
²⁶ vaho hifalea'o t'i El-Sadai,
le hampiandrae'o aman' Añahare
ty lahara'o.
²⁷ Hihalaly ama'e rehe, le hijanjiña'e,
ie havaha'o o nifantà'oo.
²⁸ Hisafiry rehe, le ho tafetetse vaho hireandreañe
amo lala'oo ty hazavàñe.
²⁹ Naho eo ty areke,
le hanoa'o ty hoe: tsiringèvotse!
ty mirè-batañe ro haha.
³⁰ Havotso'e hao ty tsy malio tahiñe,
hañaha azo ty faliom-pitá'o.

23

¹ Hoe ty natoi' Iobe:
² Mafaitse ty toreoko henaneo,
taña-miletraletre ty amy hatreontreoko.
³ Ehe te napotako ty hahatreavako Aze,
hiheovako mb'am-piambesa'e mb'eo.
⁴ Halahako aolo'e eo ty amako,
vaho hatsafeko veroke ty vavako.
⁵ Ho azoko ty entañe havale'e ahy,
vaho ho rendreko ty hitsara'e.
⁶ Hatreatré'e ami'ty hara'elahin-kaozara'e hao?
Aiy, f'ie ho haoñe'e.
⁷ Mete hilahatse ama'e ty vañoñe,
hamotsorañe ahy nainai'e
amy Mpizakakoy.
⁸ Hehe te mionjon-draho, f'ie tsy eo,
midisa-voly, fa tsy isako,
⁹ ie mitoloñ'an-kavia, tsy treako,
ie mitolike mb'àn-kavana,
tsy rendreko.
¹⁰ Fe arofoana'e ty lala fombàko,
ie fa nitsoeha'e le hiboake hoe volamena.
¹¹ Nahafitinoñe i lia'ey ty tomboko,
nifaharako i lala'ey vaho tsy nitsile.
¹² Tsy nisitahako o nafèm-pivimbi'eo;
nahajako o tsaram-palie'eo
mandikoatse ty anjara rimako.
¹³ F'ie tsy roe tsy telo,
ia ty hampitolik' aze?
anoe'e iaby ze satrin'arofo'e.
¹⁴ Ie ro mañeneke o atolots' ahikoo:
maro ty fanoe'e hoe zay.
¹⁵ Aa le hirevendrev-en-draho
añ'atrefa'e eo;
zaho mitsakore, le añeveñako.

- 16** Ampianifan' Añahare ty troko,
ampangebahebae' i El-Sadai,
17 Toe tsy naitoañ' añatrefa' i ieñey raho,
naho nisaroña'e an-tareheko i fimoromoroñañey.

24

- 1** Tsy mikafitse amy El-Sadai
o sa-o,
Akore te tsy mahaoniñe o andro'eo
o mahafohiñe azeo?
2 Ao ty mameve vorovoro:
ie mitavañe naho mampibotseke
lia-raike.
3 Roahe' iareo aña ty borikem-bode-rae,
vaho rambese' iereo ho tsoake
ty vosi' i vantotsey.
4 Ampisitahe' iereo amy lalañey ty poie'e;
mitrao-pietake o rarake an-tane atoio.
5 Hehe te hoe borike-ly
an-dratraratra aña
ty irembea' iareo mitsindroke;
hera hamahan-kaneñe amo ana'eo
ty fatrambey.
6 Tatahe' iereo ze haneñe an-kivok' ao,
vaho timpone' iereo
ty an-tanem-bahen-do-tserek' ao.
7 Miboridañe t'ie mialeñe,
tsy aman-tsaroñe,
tsy amam-bodo amy hanintsiñey.
8 Len-oram-bohitse iereo,
vihineñe ty lamilamy
amy t'ie tsy amam-pipalirañe.
9 Eo ty mitavam-bode-rae am-patroa
vaho andrambesan-tsoak' ty rarake.
10 Ampandenàñe tsy aman-tsikiñe
ty miboridañe,
tavane' iareo ty taho' o salikoeñe,
11 ie mamboatse menake an-kijoly ao;
mandia am-piriritan-divay,
f'ie maran-drano.
12 Miñeõeoñe an-drova ao ondatio,
mikoiake ty fiai' o fereo;
f'ie tsy anesehan' Añahare hagegeañe.
13 Mpiamo mpiola amo hazavàñe,
tsy fohi' iareo o sata'eo,
tsy imoneña' iareo o lala'eo.
14 Mitroatse te mazava i mpañoho-dozay, hanjevoa'e o rarakeo
naho o poie'eo,
ie haleñe manao malaso.
15 Mandiñe mielizava
ty masom-panao havambañe,
hoe re: tsy honiñam-pihaino,
mbore honohonoe'e ty tarehe'e.
16 Ie añaieñe ro mampigorabak' anjomba, antoandro migabeñe ao:

tsy fohi' iereo ty hazavàñe.
17 Talinjom-piantantiritse ama'e
 ty maraindray:
 mahazats' aze ty fampangebahebahan-
 kamoromoroñañe.
18 Vore mikafo an-drano eo iereo;
 fatra an-tane ty anjara'e,
 tsy itsileañe ty mb'an-tanem-bahe'e.
19 Mamotseke ranom-panala
 ty tariñandroke naho ty hain-tane:
 zay ka ty kibory amo manan-tahiñeo.
20 Handikok' aze i hoviñey;
 an-kaehake ty fihinanan' oletse aze
 ampara' te tsy tiahy ka:
 ie pozahéñe hoe hatae i lo-tserekey.
21 Joie'e i betsiterakey,
 tsy soa'e ty vantotse.
22 Kozozote'e amañ-ozatse ty fanalolahy;
 mitroatse re le iatoa' ia ty havelo'e.
23 Tolora'e fañarovañe, le iatoa'iareo;
 mbore jilove'e o lala'iareoo.
24 Onjoneñe betebeteke iereo,
 naho mifiotse aña;
 afotsake naho atontoñe ao
 manahake o ila'e iabio;
 vaho miheatse hoe
 t'ie lengom-boto-tsako.
25 Aa naho tsy zay,
 ia ty hamente t'ie mavande
 hampikoake i entakoy?

25

1 Nanoïñe amy zao t'i Bildade
 nte-Sohy:
2 Aze ty fifeheañe naho ty fañeveñañe;
 ampanintsiña'e ty andindi'e ao.
3 Tsi-vatse o lahin-defo'eo!
 ama'ia ty tsy anjiriha' i hazavà'ey?
4 Aia te ho to aolon'Añahare ondatio?
 Aia te halio ty nasaman-drakemba?
5 Ndra i volañey tsy mazava
 vaho tsy ki'e am-pivazohoa'e o vasiañe,
6 àntsake ondatio, fa oletse,
 naho o ana' ondatio, fa aisañe.

26

1 Ty hoe ty natoi' Iobe:
2 Akore ty nañimba'o ty tsy aman' ozatse?
 ty nandrombaha'o ty sirañe
 tsy an-kafatrarañe?
3 Akore ty nanoroa'o ty tsy aman-kilala;
 ty nitaroñe'o hasoa-anatse ami'ty maro?
4 Ia ty nañakara'o saontsy?

Vaho fañahi' ia ty nitroboeñe ama'o?
5 Mihelohelo ambane rano ao o loloo,
 naho o mpimoneñe.
6 Miboridañe añatrefa'e eo
 ty Tsikeokeoke;
 tsy aman-tsaro'e ty Fandrotsahañe.
7 Alama'e an-dikerañe ambone'
 i hoakoakey i avaratsey;
 aradorado'e ambone
 hakoahañe eo ty tane toy.
8 Aholonkolo'e amo raho'eo ty rano,
 fe tsy mipuritsak' ambane i rahoñey.
9 Takona'e ty tarehe' i zava-volañey,
 alafi'e ama'e i raho'ey.
10 Nañarikatoha'e sokitse
 ty an-tarehe' o ranoo
 hañefera'e amy ieñey i hazavàñey.
11 Miezeñezeñe o fahan-dikerañe,
 mianifañe ami'ty enda'e.
12 An-kaozarañe ty nampipendreña'e i riakey;
 aman-kihitse ty nitomboha'e i Rahàbe.
13 I kofò'ey ty ampisava'e i likerañey;
 trinofam-pitâ'e i mereñe mitsirtsiokey.
14 Inay, romoromom-pitoloña'e irezay,
 le volam-bisibiske ty ijanjiñañe, Fe ia ty mahafohiñe i figorogodoiña'e
 ra'elahi?

27

1 Tinovo' Iobe amy lañona'ey ty hoe:
2 Kanao veloñe t'i Andrianañahare,
 nitavañe ty zoko;
 naho i El-Sadai
 nampafaitse ty troko,
3 ie mbe amako ty fiaiko,
 naho an-doak' oroko ao
 ty kofòn' Añahare,
4 le lia'e tsy hañoratse o soñikoo,
 vaho tsy hiñeõeo famañahiañe ty lelako.
5 Sondia'e te hiantofako ho to ty anahareo; ampara' te hivetrake,
 tsy hapitsoko amako ty fahitiko.
6 Ho faharako ty havañonako
 vaho tsy havotsoko;
 leo raik' amo androkoo tsy inje' ty troko.
7 Ee te hanahake o tsereheñe
 o malaiñe ahikoo,
 naho ho hambañe ami'ty tsivokatse
 ty mitroatse amako.
8 Ino ty fitamà' ty tsy aman-Kake,
 t'ie naito,
 ie tsoahen' Añahare ty fiai'e?
9 Ho janjiñen'Añahare hao ty fikoia'e
 ie mivovo ama'e ty hankàñe?
10 Hifalea'e hao t'i El-Sadai?

Ho kanjie'e nainai'e
hao t'i Andrianañahare?
11 Hampandrendreheko anahareo
ty fitàn' Añahare;
tsy eo ty hapoko ty amy El-Sadai.
12 Toe fonga nahaisake nahareo,
akore arè t'ie mitsingevongevo?
13 Intoy ty toly tsaharen' Añahare
amo tsereheñe,
ty lova azotso' i El-Sadai
amo mampangebahebakeo;
14 Ndra firefire o ana'eo
le ho amy fibaray avao;
le lia'e tsy ho enen-kaneñe o tarira'eo.
15 Halente' ty kiria o sehang'a'eo,
le tsy hahafandala o ramavoi'iareoo.
16 Ndra te ampitoabore'e
hoe deboke ty volafoty,
naho avotri'e hoe lietse o saroñeo—
17 ndra te ihentseña'e,
ho sikina' o vantañeo,
vaho hifanjarà' o malio-tahiñeo
i volafotiy.
18 Tsene'e hoe fararotse ty akiba'e,
hoe kibohotse faorem-pigaritse.
19 Reketse vara t'ie màndre,
fe tsy hamokatse ka;
ie mañente, tsy eo.
20 Imbotraha' ty firevendreveñañe
hoe sorotombake;
itavaña' ty tangololahy haleñe.
21 Ahela' i tiok' atiñanañey; le aña re;
naviovio' i tiobeiy amy toe'ey.
22 Eka mihiririñe mb'ama'e le tsy apo'e;
himanea'e ty hipoliotse am'pità'e.
23 Ho tehafam-pítâñe,
ho kosasaheñe hiakatse i toe'ey.

28

- 1** Toe ao ty lakato fitsikaraham-bolafoty naho ty toem-pitranaham-bolamena.
- 2** Akareñe an-debok' ao ty viñe,
le tranaheñe am-bongam-bato
ty torisike.
- 3** Fongore'e ty ieñe, tsikarahe'e pak'
am-para-piefera'e ao ty vato,
an-kamoromoroñañe naho
an-talinjon-kavilasy ao.
- 4** Anokafa'e lalam-pigodañañe,
lavi-pimoneñañe; andikofam-pandia, miradorado ao, mitsikadròtse lavits'
ondaty.
- 5** Ty tane toy, ama'e ty iboaha' ty mahakama; ambane'e ao
hoe trobotroboen' afo.

- ⁶ Angalan-tsafira o vato'eo,
naho volamena an-debo'e ao.
- ⁷ Tsy hay o voro-pamaokeo i lalañey;
tsy trea' ty maso' i hitikitikey.
- ⁸ Tsy nilià' o bibi-ly mpireñetseo;
mbe tsy niapiapia ambone'e eo ty liona.
- ⁹ Ahiti'e mb'amo vato-pilakeo ty fità'e vaho avalitaboa'e reke-bahatse
o vohitseo.
- ¹⁰ Kaohe'e amo vatoo ty talàha
vaho oni-pihaino'e ze atao vara.
- ¹¹ Sebaña'e o torahañeо tsy hiorike;
aboа'e mb'an-kazavàñe o raha nikafitseo.
- ¹² Fe aia ty hahaoniñañe hihitse?*
- Aia ka ty toe' o hilalao?
- ¹³ Tsy fohi'ondaty ty vili'e,
toe tsy tendrek' an-tane' o veloñeo.
- ¹⁴ hoe i lalekey, Tsy amako atoa;
le hoe i riakey, Tsy amako etoa.
- ¹⁵ Tsy ikaloam-bolamena,
vaho tsy andanjàm-bolafoty.
- ¹⁶ Tsy añoharañe ami'ty
volamena' i Ofire,
ndra an-tsohame sarotse
ndra safira.
- ¹⁷ Tsy añirinkiriña' ty volamena
ndra ty kristaly,
tsy tsalohem-panake volamena ki'e.
- ¹⁸ Tsy ivolañañe
ty vaton-driake ndra vato-soa;
ambone' o hangeo ty fikaloan-kihitse.
- ¹⁹ Tsy oharañe ama'e ty pit-dae†' i Kose,
tsy ibalibalihem-bolamena hiringiri'e.
- ²⁰ Hirik' aia arè o hihitseo?
Vaho aia ty toe' o hilalao?
- ²¹ Ie mikafits' am-pihaino'
ze atao veloñe,
vaho mietak' amo voron-tiokeo.
- ²² Hoe ty Tsikeokeoke naho i Havilasy:
fa nahatsanon-talily aze o sofi'aio.
- ²³ Arofoanan' Añahare i lala'ey,
fohi'e ka i toe'ey.
- ²⁴ Jilove'e pak' añ'olo' ty tane toy,
yazoho'e ze he'e ambanen-dikerañe ao.
- ²⁵ Ie nanolora'e lanja o tiokeo,
vaho nanjara'e an-kapoake o ranoo;
- ²⁶ ie nafepe'e o orañeо,
naho ty lala' o helats'ampiñeo;
- ²⁷ Le nivazohoe'e, nitseize'e;
najado'e vaho tsinikara'e.
- ²⁸ Le hoe re am'ondatio,
Inao: Ty fañeveñañe amy Talè,
Zay ro hihitse;

* 28:12 a.28 † 28:19 Pit-dae: karaza-vatosoa

ty fisitahañe an-karatiañe ro hilala.

29

- ¹ Tinoi'Iobe i lañona'ey, ami'ty hoe:
- ² Ee t'ie nanahake o volañeо,
naho o andro narovan' Añahare ahikoo;
- ³ ie niiloilo ambone' lohako eo ty failo'e,
naho i hazavà'ey ty nirangako añ'ieñe ao;
- ⁴ ie tañ'andro naha añoñ'ay ahy,
vaho tambone' kibohoko eo
ty firañetan' Añahare;
- ⁵ ie mbe tamako t'i El-Sadai,
naho niarikoboñ' ahy o keleiakoo;
- ⁶ ie nisasan-kendron-dronono o liakoo,
vaho nadoandoa' o vatoo amako
ty menake!
- ⁷ Ie niakatse mb'an-dalambein-drova mb'eo raho,
ie rinambeko antameañe eo
i fitobohakoy.
- ⁸ Nisitak' ahiko o ajalahio te zoeñe,
songa niongake ty bey vaho nijohañe;
- ⁹ Nitroatse ami'ty fivesoveso'e
o roandriañeо vaho nitàm-palie.
- ¹⁰ Nianjiñe ty fiarañanaña' o roandriañeо,
le nipitek' an-dañilañy o famele'eo.
- ¹¹ Ie jinanjin-dravembia,
le natao'e haha raho,
ie niisam-pihaino, le nitalily ahy;
- ¹² amy te rinombako ty rarake
nikai-drombake,
i bode-rae tsy amam-pañimbay.
- ¹³ Nivotrak' amako ty tata' i nipetrokey,
vaho nampisaboeko an-kaehake
ty arofo' o vantotseo.
- ¹⁴ Niombeako ty havantañañe,
le nisalora'e;
nanahake ty sabaka reke-tsarimbo
ty havañonako.
- ¹⁵ Ni-fihaino ami'ty fey raho,
naho fandia amo kepekeo.
- ¹⁶ Ni-rae' o poie'eo,
vaho nitsikaraheko
ty nipaia' i alik'amakoy.
- ¹⁷ Pinekako ty famotsi' o tsereheñeо naho tinavako amo nife'eo
i nitsindrohe'ey.
- ¹⁸ Le hoe ty fitsakoreako,
t'ie hikenkañe añ'akibako ao,
naho hampimiràko amo faseñeо ty androko;
- ¹⁹ mitsiriaria mb'an-drano o vahakoo vaho mialeñe amo tsampakoo ty
zono.
- ²⁰ Vao amako nainai'e ty engeko,
vaoeñe an-tañako ao ty faleko.
- ²¹ Nijanjiñe naho nandiñe ahy ondatio,

nianjiñe t'ie namereako.

²² Ie nilañon-draho, tsy nisaontsy iereo,
nitsopatsopak' am'iereo o entakoo.

²³ Hoe orañe ty nandiñisa' iareo ahiko;
ie nipaña-palie
hoe aman' oram-panjaka.

²⁴ Nisomilahako t'ie tsy niantoke;
le tsy nazè' iereo ty filoeloean-tareheko.

²⁵ Jinoboko ty lala hombà' iareo
vaho nitoboke hoe talè,
nimoneñe hoe mpanjaka ami'ty borizà'e,
manahake ty mpañohòm-pandala.

30

¹ Fe itsikihan-jaiko henaneo,
ie tsy ho nimeiko hindrezan-droae' iareo o amboan' añondrikoo.

² Eka! hataoko ino'
ty herin-taña' iareo?
Ie fa modo ty hagañ'oza' iareo?

³ Miheahea naho poie'e
vaho saliko iereo,
draote' iereo ty tane kàンkañe
ie nimontoñe naho tanan-taolo te omale.

⁴ Tsindrohe' iereo ty aña-mafaitse
miharo vahon-tsoty,
fihina'iareo ty vahan-jañapoly.

⁵ Sinoik' an-drolongo'e iareo,
nikoraheñe hoe t'ie malaso.

⁶ Aa le mimoneñe am-bavatane
mampangebahebak' ao iereo,
an-dakatom-bato
naho an-kadahan-tane ao.

⁷ Mikoaike boak'an-drongoñe ao,
mihimpok' añ'antak' ao.

⁸ Anan-dagola, anake po-tahinañe,
nasiotsiotse amy taney.

⁹ Bekobekoe' iareo raho henaneo
toe fandrabioña' iareo.

¹⁰ Heje' iereo vintañe,
ihankaña' iareo,
tsy apo' iareo ty mandrora an-tareheko.

¹¹ Amy te navots'e ty tàlem-pale'e
le nitrofahe'e raho,
vaho ahifi' iereo laboridy
te miatrek' ahy.

¹² Mitroatse an-kavanako eo o tora'eo;
fehefehè' iereo o tombokoo
vaho atroa' iareo amako ty satam-
pandrotsaha' iareo.

¹³ Trobotroboe' iereo o lalakoo,
indrà' iareo amako o feh' ohatseo,
ndra t'ie tsy amam-pañolotse.

¹⁴ Mizilike hoe mb'an-jeba'e
mitañataña ao iareo;

Iboroboñafa' iareo i rinotsakey
le mikidiadia' mb'etoy.

¹⁵ Natolik' amako o
fampirevendreveñañe;
heañe' iereo hoe tioke ty asiko;
fa nihelañe aña hoe rahoñe ty fandrombahako.

¹⁶ Ie henaneo,
fa nadoañe amako ato ty fiaiko;
fa mifelek' ahy o andro
nanotriañe ahikoo.

¹⁷ Tsipohe'e haleñe o taolakoo,
vaho tsy mitofa ty fikotekotehañe ahy.

¹⁸ Mampiroñaroña o sikikoo
i fañindra'e mafey vaho
vihine'e raho manahake
i kolen' akanjokoy.

¹⁹ Fa navokovoko'e am-potak' ao raho,
le ninjare hoe lavenoke naho deboke.

²⁰ Mikai' imba ama'o raho
fe tsy toiñe'o;
miongake fe angarefa'o.

²¹ Toe mpampisoañe ahy rehe:
an-kaozaram-pitâ'o ty isareraha'o.

²² Ampionjone'o mb'amy tiokey mb'eo,
naho ampiningira'o,
fe atrana'o amy tio-beiy.

²³ Apotako t'ie hasese'o mb'an-kavetrahañe mb'eo,
mb'añ'anjombam-pifañaoña' ze kila veloñe.

²⁴ Aa tsy hañity ty fitâ'e hao ty
am-botrim-piantoañe eo?
tsy hikoik' imba hao

t'ie mizò hekoheko?

²⁵ Tsy nitañiako hao ty nian-kòheke?

Tsy nampihontoke
ty troko hao o rarakeo?

²⁶ Zaho nitama hasoa, pok'eo ty raty;
ie nandiñe hazavàñe nihohohe' ty ieñé.

²⁷ Mikokèntrekokèntreñe ty añovako ao le tsy mitofa;
atreatrén-tṣan-kasotriañe.

²⁸ Mijarabajaraba añ' ieñé ao
tsy amam-panjirik' andro,
miongak' am-pivory naho mikaik' imba.

²⁹ Fa rahalahim-panaloke raho,
rañe' o voron-tsatrañe.

³⁰ Mikò-mainte amako ty holiko,
mitsovovoke o taolakoo ami'ty hasilo'e.

³¹ Aa le mivali-ko feon-kontoke
ty marovaniko,
naho feom-pandala ty soliko

31

¹ Fa nifañina amo masokoo raho;
akore arè ty hikirofako ty somondrara?

² Inoñ'amy zao ty anjarako
aman' Añahare ambone ao,
naho ty lovako amy El-Sadai
andikerañe aña?

³ Tsy feh'ohatse ho a o lo-tserekeo hao, hekoheko ho a o mpitolon-
karatiañe?

⁴ Tsy vazoho'e hao o lalakoo,
naho iahe'e iaby o liakoo?

⁵ Aa naho nindrezako lia t'i Remborake,
ndra nalisa mb'am-pamañahiañe
mb'eo o tombokoo—

⁶ Le ehe t'ie ho lanjaeñe
am-pandanjañe to,
hahàrofoanan'Añahare ty havantañako!

⁷ Naho nitsile amy lalañey ty tomboko,
naho nañorike o masokoo ty foko,
naho nipayeha' ty pepo o tañakoo;

⁸ le soa raho te hitongy hikamà' ondaty;
vaho hombotañe ze mitiry ho ahy.

⁹ Naho nisigihe' ty rakemba ty foko,
naho nivoñoñe
an-dalan-drañeko eo;

¹⁰ ee te ho hafa ty handisaña' i valiko,
naho ami'ty ila'e ty hibaboha'e.

¹¹ Ie ho ni-hakeo mena,
tahiñe mañeva mpizaka,

¹² ho ni-afó namorototo
pak'an Tsikeokeok' ao,
ho fonga nombota'e reke-bahatse
o nivokarekoo.

¹³ Aa naho ninjèko ty zo' ondevoko
lahy ndra ampela,
ie naneseke toreo ahy;

¹⁴ le ino ty hanoeko naho mitroatse
t'i Andrianañahare?
ino ty havaleko aze naho ampamolilia'e?

¹⁵ Tsy namboatse aze ka hao i nitsene
ahy an-koviñey?

Tsy Ie avao ty nandranjy anay
an-koviñ' ao?

¹⁶ Aa naho nitanako ami'ty poie'e ty nipaia'e, ndra nampaieñe
ty fihaino' i vantotsey,

¹⁷ naho niareñaren-draho te nitendre,
tsy nanisako ty bode—

¹⁸ Toe ni-ajalahy raho t'ie nibeizeko
manahake té ni-rae'e,
boak'an-kovin-dreneko ao
ty niaoloako i vantotsey—

¹⁹ aa naho nitreako ty mpirererere
tsy aman-tsikiñe,

ndra ty rarake tsy aman-tsaroñe,

²⁰ naho tsy nitahy ahy o toha'eo,
vaho tsy nampafana aze ty

volon' añondriko;

²¹ naho nonjoñeko haoke ty bode,

ie nitreako an-dalambey ey

hañonjonako ty ahiko;

²² le angao hikalatrake

an-tsoroko ao ty fangalin-tsoroko,

vaho hapitsok' am-pikatsoha'e

ty sirako.

²³ Amy te mampangebahebak' ahy

ty hankàñe boak'aman' Añahare,

vaho tsy ho nanoeko ty amy enge'ey.

²⁴ Naho natokisako ty volamena,

ndra nataoko te fiatoako

ty volamena ki'e,

²⁵ aa naho nirebehako ty hamaro o varakoo, ty amy habey natonton-tañakoy;

²⁶ naho nijiloveko i àndroy

amy fipisaña'ey,

ndra i volañey te misitse an' enge'ey,

²⁷ naho sinigìke añ'etake ty troko vaho nañifik'roke boak' am-bavako ty tañako;

²⁸ le ho ni-hakeo fikai-jaka ka!

ie ho nivalik' aman' Añahare

ambone ao.

²⁹ Naho nahafale ahy ty fiantoa' o malaiñe ahikoo,

kera nitrehañe t'ie nivovoan-kankàñe.

³⁰ Tsie, tsy napoko hanan-tahiñe ty vavako hitake ty fiai'e am-pàtse—

³¹ Tsy nanao ty hoe hao

o mpitoron-kivohokoo:

Ia ty mahatrea

ty tsy nanjañe' i mahakama'ey!—

³² Tsy nibabòfok' alafe ao ty ambahiny,

fa nisokafeko amo mpañaveloo o lalakoo.

³³ Aa naho naetako manahake i Dame

ty fiolàko

ndra nakafiko añ'arañako ao o hakeokoo,

³⁴ ie nampiholibalà ahy i màroy,

nampianifaña' ty inje' o miprofokoo,

le nitsiñe avao, tsy niakatse an-dalañe .

³⁵ Ee te eo ty hijanjiñe ahy!

Intoy ty soniako!

Ho toiñe' i El-Sadai abey,

naho i taratasin-tsisý

sinokin-drafelahikoy!

³⁶ Toe ho ni-vavèko an-tsoroko zay;

ho ni-vahoreko amako hoe sabaka;

³⁷ ho volilieko ama'e o liakoo;

ho niatrefako hoe roandriañe.

³⁸ Aa naho mitoreo amako ty taneko,

naho mitrao-pirovetse o vavahali'eo;

³⁹ naho nihaneko ty voka'e fa tsy nandoa drala vaho nampiselekaiñe ty
tompo'e,

⁴⁰ le ee t'ie hitiriam-patike hasolo

ty ampemba,
hisatse hasolo ty tsako.

Nigadoñe amy zao ty lañona'Iobe.

32

¹ nAa le nijihetse tsy nanoïñe Iobe indaty telo rey, ie nivañoñe am-pihaino'e avao. ² Niforoforo amy zao ty haboseha' i Elihò* ana' i Barakele ana' i Bozý† nte-Rame‡; niforoforoe'e t'Iobe amy t'ie mañatò-vatañe añatrefan' Añahare, ³ nahabosek' aze ka i rañe' Iobe telo rey amy te tsy nahavale, fe ndra namatse Iobe. ⁴ Ie amy zao, nandiñe ty hazoke' iareoy t'i Eliho vaho nisaontsy am'Iobe. ⁵ Aa ie nioní' i Eliho te tsy aman-katoi'e ty falie' indaty telo rey, le nifombo an-kaboseke. ⁶ Aa le nanoïñe ami'ty hoe t'i Eliho ana' i Barakele ana' i Bozý: Toe tora'e an-taoñe raho, androanavy nahareo; le nihemban-draho tsy nahavany hitaroñe ty heveko.

⁷ Hoe raho: O androo ro hilãoñe,
ty hamaro taoñe ro hañoke hihitse.

⁸ Fe i arofo am'ondatiyo,

naho i kofòn' El-Sadaiy§

ty manolo-kilala am'iareo.

⁹ Tsy t'ie antetse ro mahihitse,
tsy te zoke ro mahilala ty hatò.

¹⁰ Aa le hoe raho, Janjiño;

hitaroñe o entakoo ka.

¹¹ Ie zao, nahaliñe o asa' areoo raho,
tsinanoko o niereñerea' areoo,
ie nitsikarahe'areo ty ho lañoneñe.

¹² Toe nitsendreñe anahareo raho,
fe leo raike tsy nahafandietse Iobe,
ndra raik' ama' areo tsy nahavale
o enta'eo.

¹³ Ko manao ty hoe:

Nitendreke hihitse zahay;
ho roahen' Añahare, fa tsy ondaty.

¹⁴ Tsy nalaha'e amako o saontsi'eo,
vaho tsy o lañona'areoo ty hatoiko.

¹⁵ Angoae iereo, tsy mamale ka;
nijiañe ty saontsi' iareo.

¹⁶ Aa handiñe avao hao raho?
ie nijohañe, tsy mahafanoïñe.

¹⁷ Hivaleako ka ami'ty ahiko;
hitaroñe ty heveko.

¹⁸ Toe lifo-bolan-draho;
manjitse ahy ty trok' amako atoa.

¹⁹ Toe manahake ty divay
tsy amam-pikofò'e ty troko,
fa hiporitsake hoe zonjòn-divay vao.

²⁰ Adono hivolani-draho hanintsiñako;
Apoho hanoka-tsoñy hitoiñako.

²¹ Ehe te tsy eo ty ho rihieko,
ndra t'indaty ho lombofeko.

* 32:2 Eliho: Ie t'i Andrianañahareko † 32:2 Bozy: teratera ‡ 32:2 Rame: mandigiligy;
naonjoñe § 32:8 Andriampañotroñey, Kila lefe'e

22 Tsy haiko ty mitsiriry
fa ho nasintan' Andrianamboatse aniany.

33

- 1** Ie amy zao, ry Iobe, janjiño o entakoo, tsendreño iaby o volakoo.
- 2** Hehe t'ie misoka-bava;
mirehake ty lela am-bavako ao.
- 3** Habeo' ty havantañan-troko o volakoo,
le hitaron-kilala ki'e o soñikoo.
- 4** Nitsene ahiko t'i Arofon'Añahare,
vaho mameloñe ahy ty kofò' i El-Sadai.
- 5** Toiño raho naho mete'o;
alaharo añ'atrefako etoa; mitroara!
- 6** Hehe t'ie aman' Añahare manahake azo:
nitsenèñe am-bokon-dietse ka.
- 7** Ehe, tsy hahafiriatsandry azo
ty fihembaña'o ahy,
mbore tsy havesatse ama'o te tindrieko.
- 8** Toe nisaontsy am-pitsanoñako rehe,
tsinendreko i fiarañanañan-dañona'oy,
- 9** nanao ty hoe:
Mikanitsoke raho, tsy aman-kakeo;
ki'e tsy aman-tahiñe an-troko ao.
- 10** Ie mipay lengo'e haneseha'e ahy,
Zaho atao'e ho rafelahi'e;
- 11** Ajo'e an-dongòk' ao o tombokoo, vandroñe'e iaby o lalakoo.
- 12** Hete! ambarako azo:
Zao ty tsy maha-to ty azo:
Jabajaba te ama' ondaty
t'i Andrianañahare.
- 13** Ino ty attrete'o aze, te inao,
Tsy hene volilie'e o anoe'eo?
- 14** Indraike ty itsaràn' Añahare, he indroe,
fe tsy haoñe' ondaty.
- 15** amo nofioo, aña'aroñaron-kaleñe,
naho milañake an-drotse ondatio,
ie mihiity an-tihy ao;
- 16** zay ty anokafa'e ty ravembia' ondaty naho ampipiteha'e ao ty
fanoroañe,
- 17** soa te havi'e amo sata'eo t'indaty naho sebaña'e ty firengevohan-
dRaolombelo,
- 18** hitàñ-ty tro'e tsy homb-
an'tsikeokeok' ao
naho ty fiai'e
tsy ho mongorem-pibara.
- 19** Liloveñe am-panaentaeñañe
an-tih'i'e eo ondatio,
itoreova'e nainai'e o taola'eo,
- 20** ampara te heje'e ty mahakama,
vaho tsy nom-pisafoa'e ty raha mafiry.
- 21** Minik' avao ty sandri'e,
le tsy trea;
o taola'eo tsy niisake taolo,

mirikiriky henaneo.

²² Harivoe' ty tro'e ty kibory,
naho ty fiai'e o mpamonomoo.

²³ Aa naho eo ty anjely hañalañalañe ho aze, raik' ami'ty arivo,
hañatoà'e ty havantaña' ondaty,

²⁴ le ee te hiferenaiña'e, hanao ty hoe,
Hahao re tsy higodañe

mb'an-tsikeokeok' ao;
fa nitreako ty vilin' ai'e;

²⁵ le hanahake ty haleme'
ty nofon' ajaja ty sandri'e,
Apho himpolia'e o andron-katòra'eo.

²⁶ Mihalaly aman' Añahare re, le no'e,
isa'e an-kafaleañe i laharayey,
vaho ampolie'e ama' ondaty ty havañona'e.

²⁷ Hibekoa'e ondatio, ami'ty hoe:
Nandilatse raho, nimengoheko

ty hahiti'e vaho tsy sazò ahy;

²⁸ toe jineba'e ty troko tsy hivariña'e
mb'an-koboñ'ao,
ho isa' ty fiaiko i fireandreañey.

²⁹ Inao, fanoen' Añahare iaby rezay,
in-droe, eka in-telo amy t'indaty,

³⁰ hampolie'e boak'an-tsikeokeok' ao
ty tro'e, hiloeloe an-kazavàn-kavelo.

³¹ Mitomira ry Iobe, janjiño raho;
mianjiña le hivolañe.

³² Ihe aman' entañe, toiño;
mitaroña fa te hañatò azo raho.

³³ Naho tsie, mitsatsiha, mianjiña,
vaho hanarako hihitse.

34

¹ Natovo' i Eliho, ty hoe:

² Janjiño o entakoo
ry androanavy mahihitseo,
anokilaño ravembia,
ry mahafohiñeo.

³ fa mitso-tsara ty ravembia manahake
ty fitsohan-dañilañy mahakama.

⁴ Antao tika hijoboñe ty soa,
hisafirian-tika ty atao fanjàka.

⁵ amy nanoe' Iobey, ty hoe: Vañon-draho,
fe nasintan' Añahare amako ty zoko;

⁶ handañirako hao i zokoy;
tsy mete melañe i trinofan-defoñey,
ndra t'ie malio-tahiñe.

⁷ Ondaty ia ty rahamba' Iobe?
ie migenoke inje hoe rano,

⁸ ie mpifañosoñe amo mpitolon-karatiañeo le mitrao-pañavelo
am'ondaty mengokeo?

⁹ ie nanao ty hoe, Tsy vente'e ama'ondatio te ifalea'e t'i Andrianañahare.

- ¹⁰ Aa le janjiño raho, ry aman-kilálao,
Lavits' an' Andrianañahare
ty haratiañe,
naho amy El-Sadai ty fandilarañe.
- ¹¹ Fa o sata'eo ty hanambeza'e ondaty,
o fitoloña'eo ro hanoly aze
ami'ty eva'e.
- ¹² Toe tsy manao raty t'i Andrianañahare,
vaho tsy mañolake ty hatò
t'i El-Sadai.
- ¹³ Ia ty nampamandroñ' aze ty tane toy,
vaho ia ty nampivave aze
ty voatse bey toy?
- ¹⁴ Aa naho nampoli'e ama'e ty fo' ondaty naho natonto'e ama'e i tro'ey
vaho i kofo'ey,
- ¹⁵ le fonga ho nitrao-pihomahañe ze atao nofotse;
vaho kila ho nibalike
ho lemboke ondatio.
- ¹⁶ Fe naho mahilala, janjiño,
tsendreño ty feo' o entakoo.
- ¹⁷ Hifehe hao ty malaiñe to?
Hafà'o hao i Fanalolahy Vañoñey?
- ¹⁸ I manao ty hoe ami'ty mpanjaka:
Ry Votro,
naho amo ana-donakeo, Ty Piaroteñe!
- ¹⁹ Ie tsy miasy roandriañe,
tsy mañaom-pañaleale
mandikoatse ty rarake,
ie fonga satam-pitâ'e.
- ²⁰ Mihomak'aniany iereo, te petsak'ale;
troboeñe ondatio le mihelañe añe,
asintake tsy am-pitâñe o maozatseo.
- ²¹ Fa amo sata' ondatio o fihaino'eo,
vazoho'e iaby o lia'eo.
- ²² Tsy eo ty ieñe ndra ty
fimoromoroñañe hietaha' o tsereheñeo.
- ²³ Le tsy ifotoañan' andro ty hiatrefa' ondaty aman'Añahare ho zakaëñe.
- ²⁴ Demohe'e tsy an-dohy o fatratseo,
le avotra'e an-toe'e eo ty handimbe aze.
- ²⁵ Aa kanao arofoana'e o sata'eo,
le avalitaboa'e te haleñe,
vaho dorodoroe'e.
- ²⁶ Lafà'e manahake o tsereheñeo
an-tameañe eo ho fisambàñe,
- ²⁷ amy t'ie nitsile tsy nañorik' aze,
le tsy teo t'ie nañaoñe o lala'eo,
- ²⁸ toly ndra nampombae' iareo mb'ama'e ty fitoreova' o rarakeo
fa janji'e ty toreo' o silofeñeo—
- ²⁹ naho mianjin-dre, ia ty hanìñe?
Ie aeta'e ty lahara'e,
ia ty hahaisak' aze,
ndra t'ie foko ndra te ondaty—
- ³⁰ soa tsy hifehe ty tsi-aman-Kàke,

vaho tsy ho fandrik' am' ondatio.
31 Ia ty nanao ty hoe aman'Añahare?
 Fa nililoveñe, zaho tsy nandilatse;
32 Anaro ahy o tsy treakoo;
 nahoa niota faly, tsy hanoeko ka?
33 I satri'oy hao ty hamalea'e Azo,
 kanao liere'o?
 Ihe 'nio ty hijoboñe, fa tsy zaho;
 aa le saontsio o fohi'oo.
34 Hanao ty hoe amako ondaty mahilalao, Toe mahafijanjiñe ty androanavy
 mahihitse:
35 Misaontsy tsy aman-kilala t'Iobe,
 vaho tsy hinotsohotso'e o enta'eo.
36 Ee te ho hereherèñe pak'am-para'e t'Iobe ie nanoïñe hoe ondaty lo-
 tsereke.
37 Tompea'e fiolàñe o hakeo'eo;
 miteha-pitàn-dre añivon-tikañe eo,
 le manovon-tsaontsy hatreatre'e
 t'i Andrianañahare.

35

1 Le hoe ty natovo' i Eliho:
2 Atao'o mahity hao
 i nanoe'o ty hoe,
 Zaho ro vantañe te aman' Añahare.
3 Fa hoe rehe, Inoñe ty ho tombo'e ho azo? Ino ty ho tambeko mandikoatse
 te tsy nandilatse?
4 Hanóiñe azo nahoa o rañe'o
 mindre ama'oo raho.
5 Mitalakesa mb'andikerañe ey
 vaho Mahaisaha;
 Heheke o rahoñeo, ambòne'o iereo.
6 Ihe mandilatse, Mijoy aze hao? Ie bey hakeo, Inoñe ty anoë'o ama'e?
7 Ie vantan-drehe, ino ty atolo'o aze,
 ke ino ty rambese'e am-pità'o?
8 Ho ama' ondaty manahak' azo
 ty hatsivokara'o nahoa
 amo ana' ondatio ty havañona'o.
9 O hamarom-pamorekekeñaño
 ty itoreova' iareo,
 ty sira maoza' i maroy ty ikaiha'iareo,
10 fe tsy eo ty manao:
 Aia t'i Andrianamboatse ahy,
 i Mpañomey sabo an-kaleñey,
11 i mañoke raha maro amantika
 te amo bibi' ty tane toioy,
 vaho ampahihire'e ambone'
 o voron-tiokeo?
12 Eo ty mikaike,
 f'ie tsy manoiñe
 ty amy firengevoha' ondaty
 raty tserekeoy,
13 Toe tsy janjin' Añahare ty raha kafoake;

tsy haoñe' i El-Sadai,

¹⁴ Antsake t'ie manao te tsy mahaoniñe aze;
aolo'e eo ty enta'o, aa le liñiso;

¹⁵ Ie henaneo, mbe tsy nitilihe'e an-kaviñera'e, tsy loho nihaoñe'e
o fandilarañeо.

¹⁶ Aa le evoñe ty aakam-palie' Iobe;
ampitomboa'e lañonañe tsy aman-kilala.

36

¹ Natovo' i Eliho ty hoe:

² Iheveo hey raho le hitoroako te mbe aman-ko volañeñe hañonjonañe
an'Andrianañahare.

³ Hitoha hilala tsietoitane aña raho,
tolorako havantañañe i Mpitsene ahiy.

⁴ Toe aman-kila o entakoo;
vaho ama'o i aman-kilala fonitsey.

⁵ Inao maozatse t'i Andrianañahare,
naho tsy mirihy;
ie fatratse an-kaozaram-paharofoanañe.

⁶ Tsy tana'e ho veloñe o tsereheñeo,
fe omei'e to ty tso-stroke.

⁷ Tsy asita'e amo vantañaeo o fihaino'eo;
fa ampiambesare'e ho nainai'e
amo mpanjaka am-piambesa'eo,
vaho onjone'e.

⁸ Aa ie mirohy an-tsivilisily,
naho nivahoran-kasotriañe,

⁹ le itaroña'e o sata' iareoo
naho o fiolà' iareoo, te mitakeboke.

¹⁰ Sokafe'e hianatse o ravembiao,
vaho lilie'e te hiambohoa' iareo
o tsy havokarañeо.

¹¹ Ie mañaoñe naho mitoroñ'aze,
le amam-bokatse ty higadoña' o andro'eo vaho am-pierañerañañe o
tao'eo.

¹² F'ie tsy mañaoñe,
le ho zamanem-pibara,
hiantantiritse tsy aman-kilala,

¹³ ie mañaja si-manty,
tsy aman-Kàke an-stroke;
tsy mikaike olotse te rohiza'e.

¹⁴ Robak' an-katora'e ty sandri'iareo,
ty fiai' iareo an-karapiloan-do.

¹⁵ Haha'e am-pisotria'e ty misotry;
anokafa'e ravembia i forekekeñey.

¹⁶ Eka, tinao'e boak' an-jitse rehe
mb'an-tameañañe tsy aman-tindry;
naho lifo-tsafo'e ty hazotso
am-pandambaña'o eo.

¹⁷ F'ie nañeneke ty fizakañe
o rati-tserekeo;
fihine' ty zaka naho ty hatò.

¹⁸ Itaò tsy hanigìk' azo hañivañiva

ty habosehañe,
vaho apoho tsy hampitsile azo
ty habeim-bokàñe.

¹⁹ Hahatohañ'azo tsy ho am-poheke hao o vara'oo?

ndra ze hene hafatraran-kaozara'o?

²⁰ Ko salalaeñe ty haleñe,

ie aitoañe an-toe'e ondatio.

²¹ Miambena, tsy hitoliha'o ty haratiañe;

toe ie ty nijoboñe'o,

fa tsy hasotriañe.

²² Inao! onjoñe' ty haozara'e t'i Andrianañahare

Ia ty mpañoke mañirinkiriñe Aze?

²³ Ia ty nanendre ty lala homb'e?

Ia ty mahafivolañe ty hoe:

Tsy soa o nanoe'oo?

²⁴ Tiahio hey ty hañonjonañe
o fitoloña'eo, o fisaboa' ondatio.

²⁵ Hene nahaisake ondatio;
talakesa' ondaty an-tsietoitaneo

²⁶ Inao! jabahinake
t'i Andrianañahare,
tsy taka' ty hilalan-tika;
tsy hay volilieñe ty ia' o tao'eo.

²⁷ Aonjo'e o pilipiton-dranoo;
ampanjaria'e orañe i evoñey;

²⁸ Le ampikojoojahe'o rahoñeo,
hitsopatsopake, hañerek' am'ondatio.

²⁹ Hete! Ia ty maharofoanañe
ty fiboelea' o rahoñeo?

ty fangotroha' i sokemitraha'ey?

³⁰ Oniño te ampivarakaihe'e ama'e o fitsipela'eo vaho ampoa'e
ty vaha' i riakey.

³¹ Ie ro izaka'e ondatio;
naho añeneña'e mahakama.

³² Safora'e helatse o fità'eo,
naho lilie'e hitomboke.

³³ Mitalily aze i ampi'ey,
amo añombeo t'ie ho avy.

37

¹ Inao ka, ty mampinevenevetse
ty troko

ty mampitsamboañe aze an-toe'e.

² Tsatsiho ty fipoñam-piarañanaña'e,
naho i hotroke miakatse am-palie'ey.

³ Hahà'e ambanen-kaliforan-dikerañe eo naho i hela'ey pak'añ'olo-ty tane
toy.

⁴ Mandimbe aze ty fitroñam-peo,
mangotrok' amy fiarañanañan' enge'ey vaho tsy ho kalaña'e i helatsey t'ie
janjiñeñe

i fiarañanaña'ey.

⁵ Halatsàñe ty fangotrohan' Añahare
i fiarañanaña'ey;

ra'elahy o fitoloña'eo,
tsy lefen-tika tsikaraheñe.

⁶ Hoe re amy fanalay, Mifiafià an-tane eo; naho amy orañey, Milihira.

⁷ Vihine'e iaby ty fità'ondatio
hahafohina' ze kila ondaty ty fitoloña'e.

⁸ Mimoak' an-dakato ao amy zao o bibio,
miampitse am-pipalira'e ao.

⁹ Boak' atimo ao ty tangololahy,
boak' avaratse aña i tsintsíney.

¹⁰ Ty kofòn' Añahare ro anoloram-panala,
Ajihe'e ty fibanara' o ranoo.

¹¹ Ampijinie'e halèñe
i rahoñe milodolodoy:
Ampiparaitahe'e mb'eo
o rahom-pihelara'eo.

¹² Mibalike re, añodiña' ty fiteha'e,
hanoa'e ze andilia'e
ambone' o tane fimoneñañe.

¹³ Ampahavia'e, ke t'ie kobaiñe,
ke ho an-tane'e, he te fiferenaiñañe.

¹⁴ Inao! ry Iobe, mijohaña vaho haraharao
o fitoloñan'Añahare fanjakao.

¹⁵ Fohi'o hao ty fampijadoñan'
Añahare iareo?
Ty fampipalipalitsie'e o raho'eo
himilemiletse.

¹⁶ Fohi'o hao ty fandanjan-drahoñe,
o halatsañe amy Lifo-kilalaio?

¹⁷ Ihe aman-tsaroñe matrovoke naho
ampitsiñe' i tiok'atimoy ty tane toy?

¹⁸ Lefe'o hao, ihe mitraok' ama'e,
ty mamelatse i likerañey,
an-kagàn-ketsoro natranake.

¹⁹ Añanaro anay ty ho saontsie'ay;
Fa tsy mahafandahatse
zahay ty amy ieñey.

²⁰ Hisaontsiañe hao
te zaho hivolañe?
Ihalalia' t'indaty hao te hagedrañe.

²¹ Tsy ho isa'e henaneo i hazavàñe mireandreañe an-kalo' o rahoñe;
naho tsy ampisavae' i tioke mihelañey.

²² Havolamenañe ty boak' avaratse aña ;
aman'engeñe maharevendreveñe
t'i Andrianañahare.

²³ Tsy lefe'ay tsikaraheñe 'nio i El-Sadai,
Jabahinak' an' ozatse,
fe tsy olañe'e ty zaka
naho ty havantañañe vokatse.

²⁴ Aa le mañeveñe ama'e ondatio;
leo raike tsy haoñe'e
t'ie manao kante an-troke.

38

- ¹ Nanoïñe Iobe boak' an-talio amy zao t'IEHOVÀ
ami'ty hoe:
- ² Ia ze o mampaieñe vere
añ'enta'e tsy aman-kilalao?
- ³ Midiaña vania hoe ondaty;
le hañontaneako,
vaho ho toiñe'o.
- ⁴ Taia v'iheo te najadoko
o faha' ty tane toio?
Taroño kanao mahilala.
- ⁵ Ia ty nisafiry o zehe'eo naho fohi'o?
he ia ty namavatse taly ama'e?
- ⁶ Najadoñe ami'ty inoñ' o faha'eo?
ia ka ty nampitsatoke ty vato-lahi'e?
- ⁷ Ie hene nitrao-pisaboañe o vasia-maraiñeо vaho fonga nipoñak' an-drebeke o anan' Añahareo.
- ⁸ Ke ia ty nampigabeñe i riakey
an-dalam-bey,
ie vaho niboloañe boak'an-koviñe ao.
- ⁹ Ie nitseneako saroñe an-drahoñe,
naho sokotry an-kamoromoroñañe.
- ¹⁰ Ie nafepèko o efe'eo vaho nampijadoñe ty sikada'e naho o lala'eo,
- ¹¹ Ami'ty hoe: Efets' etoa ty homba'o,
le tsy ilikoarañe;
etoañe ty hanjirañe
o onja'o mitoabotseo.
- ¹² Fa linili'o hao i maraiñey,
sikal'am-pifotoran' andro'o añe,
he nampahafohine'o
i fanjirik'androy hao i toe'ey,
- ¹³ hamihina'e o indran-taneo,
hañifihañe ama'e o lo-tserekeo?
- ¹⁴ Ie miova hoe lietse ambanem-boli-pitomboke,
miboake hoe volon-tsaroñe ty vinta'e.
- ¹⁵ Fe tanañe amo tsereheñeо ty hazavà'iareo,
vaho ampipozahéñe ty sira mizonjoñe.
- ¹⁶ Fa niziliha'o hao ty figoangoaña'
i riakey?
hera nijelanjelañe an-goledo' i lalekey?
- ¹⁷ Fa nibentareñ' ama'o hao
o lalam-bein-kavilasio?
fa niisa'o hao
o lalan-talinjom-pihomahañeo?
- ¹⁸ Apota'o hao ty fienene' ty tane toy?
abejaño naho hene fohi'o?
- ¹⁹ Aia ty lalam-bam-pimoneña' i hazavàñey?
Naho i ieñey, aia ty akiba'e?
- ²⁰ Hanesea'o mb'am-pifaritsoha'e añe: hitinoña'o o lalam-ban-kiboho'e
mb'eo?
- ²¹ Fohi'o kanao zay ty nisamahañ' azo,
vaho tsivatse o andro'oo!
- ²² Fa nimoaha'o hao
ty fañajañe i fanalay?

Nioni'o hao ty famandroñañe
o havandrao?

²³ I nahajako ho an-tsan-kasotriañey,
ho amy andron-kotakotake
naho fialiañey?

²⁴ Lalañe aia ty ifampirià' i hazavàñey,
ty ifampitsiriaria' i tiok'atiñanañey
an-tane atoy?

²⁵ Ia ty nihaly talaha ho a
i fisorotombahañey,
ndra ty lalan-kombà'
i àmpin-kotrokey?

²⁶ Hahavia' ty orañe an-tane tsy ama'ondaty, ndra an-diolio
pok' olombeloñe,

²⁷ hahahañe i fatram-bey mangoakoakey hitovoña'a i ahetsay hitiry?

²⁸ Manan-drae hao i orañey?
Ke ia ty nampiareñe o tsopan-jonoo?

²⁹ Boak' an-kovi' ia o fanalao?
Le i pilitem-panalan-dikerañey,
ia ty nisamak' aze?

³⁰ Ie mihogàñe hoe vato ty rano,
vaho mijihetse ty tarehe' i lalekey?

³¹ Lefe' o feheñe hao
o silisili' i *Kimào,
ndra ampibalahañe ty vahots' i [†]Kesileo?

³² Hampiakare'o an-tsà'e hao
t'i [‡]Mazarote?

Ho tehafe'o hao t'i §Aiìse
rekets' o ana'eo?

³³ Fohi'o hao o fañèn-dikerañeo?
Ho lefe'o ajadoñe hao
ty fifehea' iareo ty tane toy?

³⁴ Mahafipoña-peo mb'an-drahoñe
mb'eo v'iheo,
hahaliporañ' azo an-drano bey?

³⁵ Mahafañirake hotroke v'iheo,
hihiririña'e mb'eo,
hanoa'iareo ty hoe: Intoan-jahay?

³⁶ Ia ty nampipoke hihitse an-troke ao?
Ia ka ty nanolotse hilala añ' arofo?

³⁷ Ia ty mahafañiake o rahoñeo
ami'ty hihi'e?
ke mahafañiliñe o zonjon-dikerañeo,

³⁸ ie ampibokobokoeñe ty deboke,
vaho mifampipiteke o vonga'eo?

³⁹ Ho tsatsae'o haneñe hao ty liona?
Ho eneñe'o hao ty hatea-hane'
o liona tora'eo,

⁴⁰ Ie mikoloto an-dakato ao,
ie misimotse ami'ty mangongòñe ao?

* ^{38:31} Kimà: I vasiam-pito rey † ^{38:31} Kesile: Orion (ty ama' i Bode ao) ‡ ^{38:32}
Mazarote: I vilon-dikera 12 rey. § ^{38:32} Aiise: ty viloñe sare bera avaratsey.

⁴¹ Ia ty mamahan-tsindroke o koàkeo,
ie mikoaik' aman'Añahare o ana'eo,
naho mikariokariok' avao
tsy aman-kaneñe?

39

- ¹ Fohi'o hao te ombia ty faneraha'
o ose-lìm-bohitseo?
Ambena'o hao ty fitsongoa' i fanalokey?
- ² Lefe'o iaheñe hao o volañe itohera' iareoo? Rendre'o hao
ty andro faneraha' iareo?
- ³ Mivokoke iereo, hampipoke anake, hampigadoñe o fitsongoa'eo.
- ⁴ Mihagañe o ana'eo,
mitombo an-kivoke ey;
ie mionjom-beo, tsy himpoly ka.
- ⁵ Ia ty nañirake ty borìke ly hidada?
Ia ty nampibalake
ty rohi' i borìke malisay?
- ⁶ Nanoeko ho kiboho'e ty fatram-bey
naho ho fimoneña'e ty tane sira.
- ⁷ Tsambolitio'e
ty fivalitsikotaha' o rovao,
tsy rei'e ty fikoraha' i mapiroakey.
- ⁸ Tsikarahe'e amo vohitseo ty ho fihinana'e vaho tsoetsoehe'e ze hene atao
antsetra.
- ⁹ Hiantofa' ty ndrimo hao
ty hitoroñe azo?
hialeña'e hao ty an-jolo'o ao?
- ¹⁰ Lefe'o hao ty hamahotse i ndrimoy
aman-tàly am-bokavoka eo,
hiava o vavahalio am-pañorihañe azo?
- ¹¹ Hatokisa'o hao,
ty harà'elahn-kaozara'ey?
Hado'o ho aze hao o fitoloña'oo?
- ¹² Hiantofa'o hao te hampoli'e
o mahakama'oo,
te hatonto'e hirik' am-pamofohañe ey?
- ¹³ Mihepakepak' an-kafalea'e o elam-boron-tsatrañe,
ndra te matify o volon'ela'eo,
- ¹⁴ Fa apo'e an-tane eo o atoli'eo,
ampamana'e i debokey?
- ¹⁵ Amoea'e t'ie mete ho demohem-pandia,
hera ho lialiàm-bibi-ly.
- ¹⁶ Ampisoña'e o ana'eo, hoe t'ie tsy aze;
aa ndra te tsy vente'e o fitoloña'eo
tsy ahoa'e;
- ¹⁷ Toe tsy natolon'Añahare hihitse,
vaho tsy nandivà'e hilala.
- ¹⁸ Ie mitroatse hitoabora'e le tohafa'e
ty soavala reke-piningitse.
- ¹⁹ Tinolo'o ozatse hao ty soavala?
Sinaro'o fineveneverañe hao
ty an-kàto'e ao?

20 Ihe hao ty nampitsindrèko aze
 hoe valala?
 Mampañeveñē ty engem-pikofoha'e.
 21 Jaote'e ty am-bavatane,
 irebeha'e i haozara'ey;
 mionjomb'eo re hijoñē
 mb'an-kotakotake.
 22 Iankahafa'e ty tahotse, tsy hemban-dre;
 tsy iambohoa'e ty fibara.
 23 Mikantsakantsàñē ama'e
 ty trañom-pale'e
 i lefoñē mitsopelatsey,
 naho i ana-defoñey.
 24 Abotse'e an-trotrofiake ty tane
 naho an-doroloro;
 tsy ampitsangane' ty fivolan' antsivay.
 25 Ndra mbia'mbia mipopò i antsivay
 le hoe ty kofò'e: Hirity!
 Antsoñē'e aña i hotakotakey, ty fihotrohotro' o mpifeheo,
 vaho i fikorahan' aliy.
 26 Ami'ty hihi'o hao ty itiliñā'
 i tsimalahoy,
 ty amelara'e mañatimo o ela'eo?
 27 Ami'ty taro'o hao ty fañambonea'
 ty vantio
 hañamboara'e traño andigiligy eñē?
 28 Himoneñā'e an-kereretsak' ey;
 hañialoa'e an-tseram-bato tsy takatse eñē.
 29 Talakese'e boak'ao ty tsindro'e;
 mahatre aavitse o maso'eo.
 30 Misike lio o ana'e tora'eo;
 Amy vinonoy ty toe'e.

40

1 Tinovo' IEHOVÀ am'Iobe ty hoe,
 2 Hatretrè' ty mpandietse hao
 t'i El-Sadai?
 Manoiñā, ry mpañeretse
 an' Andrianañahareo.
 3 Nanoñē IEHOVÀ ami'ty hoe t'Iobe:
 4 Intoy o tsy manjofakeo;
 ino ty hahatoiñako azo?
 Hampikapefe' ty tañako ty vavako.
 5 Indraike ty nivolañeko
 fa tsy ho tovoñako;
 eka, indroe, fa tsy ho losoreko.
 6 Aa le nanoñē Iobe t'IEHOVÀ boak'
 an-talio ao, ami'ty hoe,
 7 Midiañā hoe ondaty;
 hañontaneako
 le ihe ty hitaroñē amako.
 8 Hafote'o hao o zakakoo?
 Hamatse ahy rehe, hahazoa'o to?

9 Amam-pitàñe manahake
 aña'Andrianañahare v'iheo?
 Mahafañotrok' am-peo
 hambañ' ama'e hao?
 10 Mihamina amañ'engeñe
 naho havañonañe;
 misaroña asiñe naho volonahetse;
 11 Adoaño o habose'o mandopatseo;
 jilovo ze hene mpirengevoke
 vaho afotsaho.
 12 Fonga rendreho ty mpibohaboha,
 le arèho;
 lialiao ambane o lo-tserekeo.
 13 Akafiro hitraofa'e an-debok' ao;
 vahoro aña'etak' ao o lahará' iareoo.
 14 Le hiantofako ama'o te mahafandrombak' azo o fità'o havanao.
 15 Oniño hey ty Behemote,
 i naharoko fitseneñañe ama'oy;
 mihiñañe ahetse re manahake o añombeo.
 16 Heheke te am-poto-pe'e ao ty haozara'e, amo ozan-tro'eo
 ty hafatrara'e.
 17 Atora-kitsi'e hoe talý ty ohi'e;
 mifamanditse iaby o talin-ozan-toha'eo.
 18 Boda torisike o taola'eo,
 hoe tsotsò-by o kitso'eo
 19 Ie ty lohàñe amo satan' añahareo;
 I namboatse azey
 ro mahafitotok' ama'e am-pibara.
 20 Toe mamahan-kaneñañe aze o vohitseo,
 amy fihisá'o bibin-kivoke iabioy.
 21 Mandre ambane' sohihy eo re,
 am-pipaliram-bindia
 an-tane manginakinak' ao.
 22 Mañalok' aze ty talinjo' o sohihy; miarikoboñ' aze iaby
 o bararata aña'olon-dranoo.
 23 Tsy ihondrahondrà'e
 ty fandipora' i sakay;
 mahasibeke re ndra te isorotombaha'
 Iordaney mb'am-bava'e.
 24 Eo hao ty hahatsepak'aze te mañente; eo hao ty hahafangirike i oro'ey
 hampikavitse aze?
 25 Mahatarike i *Leviatàñe
 am-bintañañe v-iheo?
 hatindri'o ambane an-tàly hao i lela'ey?
 26 Lefe'o hao ty mampikiviro i oro'ey,
 ndra ty hangirike
 i soma'ey am-pengoke?
 27 Hanao lako halaly ama'o hao re?
 Ke hivolañañe mora ama'o?
 28 Hifañina ama'o hao, handrambesa'o aze
 ho fetrek'oro'o kitro katroke?
 29 Ho hisà'o hao hoe voroñe?
 ke ho tantalie'o ho amo anak' ampela'oo.

* 40:25 Leviatane: fañanen-driake bey haehae

³⁰ Hifampihehetse ama'e hao
o mpanao balikeo?
Ho zarae' iareo am'
o mpanao takinakeo hao re?
³¹ Ho tsitsihem-pirango hao i holi'ey?
Ndra i loha'ey an-defom-piañe?
³² Apaoho ama'e ty fità'o vaho tiahio i ho ali'oy te tsy hindroe'o.

41

¹ Hete! Toe tsy vente'e t'ie salalaeñe,
tsy ho tafahohoke hao te isahañe?
² I Tsy eo ty lahitsi'ay mahavany
hitsobore aze;
ia arè ty mahafiatatre amako?
³ Ia ty nanolotse ahy, te havahako?
ahiko ze hene ambanen-dikerañe ao.
⁴ Tsy hitsiñeko o kitso'eo,
ty haozara'e ra'elahi,
vaho i sandri'e tsaratseakey,
⁵ Ia ty hañolitse o sisin-koli'eo?
Ia ty hahafizilik'
añivom-balañorà'e roe ao?
⁶ Ia ty mahafisokake
o lalam-bein-tarehe'eo?
mampangetraketrake ty fañarikatoha' o nife'eo.
⁷ Fisengea'e o sisì'e fatratseo,
ie mikititse hoe linite;
⁸ Akore ty fifampikiteha'e
kanao tsy mahafitsifitse ao ty tioke.
⁹ Nifampireketeñe iereo,
mifampipiteke, tsy lefe akatrake.
¹⁰ Mitsopela-kazavàñe o fihatsìhe'eo,
manahake ty holi-maso'
i maraindraiñey o maso'eo.
¹¹ Failo milebaleba ty miakatse am-bava'e, afo mipelatse ty mipitsike
mb'eo.
¹² Mañatoeñe o loa-koro'eo,
hoe valàñe mamorotse
ambone vinda mirehetse.
¹³ Mamiañe foroha ty kofò'e,
afo misodotse ty miboak' am-bava'e ao.
¹⁴ Mimoneñe an-kàto'e ty haozarañe,
vaho mitsinjak' aolo'e eo ty miroreke.
¹⁵ Mifampirekets' ama'e i holi'e mifanosokeo, gañe ama'e zay tsy mete
asitse.
¹⁶ Gañe hoe vato ty fo'e;
manahake ty hamafem-bato-lisañe ambane.
¹⁷ Ie mivoalatse, miholi-tsandry
o fanalolahio; ie vereñe mamoe'ay.
¹⁸ Tsy lefe t'ie liherem-pibara, ndra lefoñe, ndra ana-defo, ndra
baramino masioñe.
¹⁹ Atao'e ho boka maike ty viñe,
naho hatae voroke ty torisike.

- ²⁰ Tsy mahafandrifitse aze o ana-paleo;
atao'e forompotse o vato-piletseo.
- ²¹ Tonton-drongoñe ama'e o kobaiñeo, tohafa'e o lefoñe mikaratsakarat-sakeo.
- ²² Silam-balañe-tane masioñe ty ambane'e, hoe mamofopofoke ampemba t'ie miranga fotake.
- ²³ Ampitroatroahe'e hoe valañe i lalekey;
ampanahafe'e ami'ty fampitranahañe rano mañitse i riakey.
- ²⁴ Anoe'e lala-miloeloe ty am-boho'e ao
anoe'e hoe a maròy foyt i lalekey.
- ²⁵ Tsy ambone-tane atoy
ty mañirinkiriñe aze,
ie nitsenèñe tsy ho aman-tahotse.
- ²⁶ Jilojilove'e iaby ze atao abo;
ie ty lohà' ze hene anam-pirengvohañe.

42

- ¹ Natoi' Iobe amy zao t'IEHOVÀ,
² Fantako te kila lefe'o,
le tsy azo sebañeñe ze safiri'o.
³ Hoe rehe: Ia ze o mañeta-panoroañe
tsy aman-kilala zao?
Toe nivolañeko ty tsy nirendreko,
o raha loho mandikoatse ahy, tsy napotako.
⁴ Ehe janjiño, [hoe rehe,]
le hivolan-draho,
hañontaneako vaho ho toiñe'o.
⁵ Toe nahatsanoña ty ama'o raho
am-pijanjiñan-dravembia,
fe mahatre Azo o masokoo henaneo;
⁶ Aa le hejeko ty troko vaho
misoloho an-deboke naho lavenoke.

⁷ Ie fa nilañoñe' IEHOVÀ am' Iobe i tsara rezay, le hoe t'IEHOVÀ amy Elifaze nte-Temane: Miforoforo ama'o naho amo rañe'o roe reo ty haboseko; amy te tsy nitaroña' areo ty hatò, manahake ty nanoem-pitoroko Iobe. ⁸ Aa le andrambeso bania fito naho añondrilahy fito, le miheova mb'am' amy Iobe mpitoroko mb'eo naho mañengà soroñe ho anahareo; le hihalalia' Iobe mpitoroko naho ho noko i halali'ey vaho tsy hanoeko ama' areo ty mañeva i hanè' areoy; amy t'ie tsy nilañoñe ahy an-katò, manahake ty nanoe' i mpitoroko Iobey.

⁹ Aa le nimb'eo t'i Elifaze nte-Temane naho i Bildade nte Sohy naho i Tsofare nte-Naamà le nanoe' iereo i tsinara' IEHOVÀ am' iereoy; le ninò' IEHOVÀ ty halali' Iobe. ¹⁰ Aa le nampoli' IEHOVÀ o vara' Iobeo, ie nihalaly ho a i rañe'e rey; vaho natolo' IEHOVÀ am' Iobe indroe' ty nanaña'e taolo. ¹¹ Nomb' ama'e mb'eo amy zao o rahalahi'e iabio naho o rahavave'e iabio naho ze hene nahafohiñe aze taolo vaho nitrao-pikama ama'e añ' anjomba'e ao; nitretreze' iareo vaho nañohò aze amo fonga haoreñañe nafetsa' IEHOVÀ ama'eo; vaho songa nanolotse ty bogady ama'e naho ty bange volamena. ¹² Nitahie' IEHOVÀ o figadoñan' andro' Iobeo mandikoatse te amy nifotora'ey; ie nanañ' añondry rai-ale tsy efats' arivo naho rameva eneñ' arivo naho katraka mpiharo-bao arivo vaho borike-vave arivo. ¹³ Nanañ' anadahy fito re naho anak' ampela telo. ¹⁴ Natao'e

Iemimae ty añara' i valoha'ey naho Keziae ty faharoe vaho Keren-Kapokee ty fahatelo. ¹⁵ Tsy nañirinkiriñeñe amy tane iabiy ty hamozohozo' i anak' ampela' Iobe rey vaho songa tinolon-drae'e lova miharo amo ana-dahi'eo. ¹⁶ Ie aña, mbe niveloñe zato-tsy-efapolo taoñe t'Iobe vaho niisa'e o ana'eo naho o zafe'eo pak'an-tariratse fah'efafatse. ¹⁷ Aa le nivilasy t'Iobe, androanavy bey, lifots' andro.

Sabo Fange I

Sabo 1 - 41

1

- ¹ Haha t'indaty tsy mañavelo am-panoroa' o lo-tserekeo*, naho tsy mijohañe an-dala' o beihakeoo, vaho tsy miambesatse am-pitoboha' o mpañinjeo;
² Fa ty Hà' IEHOVÀ ro mampinembanembañ' aze, ninihe'e handro an-kaleñe i Hà'ey
³ Ie ho hambañe aman-katae namboleñe añ'olon-torahañe eo, mamaoa an-tsa'e naho tsy miheatse o rave'eo, miraorao ze hene ano'e.
⁴ Tsy manahake zay o lo-tserekeo, fa hambañe amo kafokafo aboelen-tiokeo.
⁵ Toly ndra tsy haha-fitroatse amy zakay o tsivokatseo, ndra ami'ty favori' o vañoñeo o mpanan-tahiñeo.
⁶ Arofoana' IEHOVÀ ty fañaveloa' o vantañeo, fe ho modo ty fandenà' o tsivoatsoloo.

2

- Ty Fañorizan' Añahare i Jinobo'ey*
- ¹ Ino ty fidabasida' o kilakila ondatio*, naho ty fikililia' ondatio raha tsy vente'e.
² Mijohañe o mpanjaka' ty tane toio, naho mitrao-kinia o mpifeheo hiatatre am' IEHOVÀ naho i Noriza'ey†, manao ty hoe:
³ Antao handrafadrafatse o talirandra' iareoo, le hahimpan-tika o rohi' iareoo.
⁴ Miankahake i mpiambesatse an-dindiñey; mitsikìke iareo t'i Talè. ⁵ Fa ho trevohe'e an-keloke, vaho hampinevenevere'e am-pifombo'e:
⁶ Toe zaho ty nañoriñe ty Mpanjakako e Tsiône‡ ao amy vohiko miavakey.

* **1:1** rasà: tsy aman-Kake, lo-tsereke * **2:1** Mat 4:25-26; Dan 2:44, 7:13-28, Kag 2:22, Zek 14:9, Ben 11:15; 19:19 † **2:2** Nañiliane Solike : i Norizañey zay ‡ **2:6** Ierosalaime

⁷ Sokireko ho lily:
hoe t'IEHOVÀ amako:
ANAKO rehe, anindroany
ty nampiareñako azo. ⁸ Mihalalia amako le hampandovaeko
Azo o fifeheañeo,
naho ho fanaña'o o olon-taneo.
⁹ Ho pozahé'o am-bodam-by;
Hampijeñajeñahe'e hoe siniharam-panao
valàñe-tane.
¹⁰ Aa le mahihira ry mpanjakao;
Mimetea oke
ry mpizaka' ty tane toio.
¹¹ Toroño am-pañeveñañe t'IEHOVÀ,
vaho mirebeha am-pineveneverañe;
¹² Ondroho i Anakey
tsy mone hiviñera'e,
vaho hihomak' an-dalañe ey nahareo;
fa mete hisolebatse aniany ty fifombo'e.
Hene haha ze mitsolok' ama'e.

3

*Sabo' i Davide t'ie nirifatse ty lay hisitak' amy Absolome** ¹ Ry
IEHOVÀ, Akore ty fitomboa'
o mpamorefore ahikoo !
Maro ty miongake hiatreatre ahy.
² Lako ty manao ty hoe ty amako : Tsy ama'e ty fandrombahan' Añahare.
Selà
³ Fa Ihe, ry IEHOVÀ,
ro kalan-defo mañohoñ' ahy, ty engeko
naho ty Mpampiandra ty lohako.
⁴ Ie koiheko am-peo t'IEHOVÀ,
le janjiñe'e amy vohi'e miavakey. Selà
⁵ Mändre raho vaho miroro; tsekake amy te mpañimba ahy t'IEHOVÀ.
⁶ Tsy hembañako i lahiale
miarikoboñe hiatreatre ahikoy.
⁷ Mióngaha, ry IEHOVÀ! Rombaho raho ry Andrianañahareko,
fa fonga tinampifi'o ty valañorà'
o rafelahikoo;
vaho pinekapeka'o ty nife'
o lo-tserekeo.
⁸ Am' IEHOVÀ ty fandrombahañe;
naho am'ondati'oo ty fitahia'o. Selà

4

Ho a i Talèn' Tsakeray; Ho titiheñé ami'ty Marovany, Sabo' i Davide ¹ Ry
Andrianañaharen-kavañonako
toiño raho te mikanjy Azo
fa Ihe ty nañivake ho ahy te nalovilovy;
isoho vaho janjiño o halalikoo.
² O ry ana'ondatio, Sikala 'mbia ro
hafote' areo ho inje ty asiko?

* 3: Absolome: raem-panintsiñañe

ty hikoko ty tsy vente'e,
hitsoeke ty famaňahiaňe? Selà
³ Fe fohino te navaha' IEHOVÀ
ho ama'e i vaňoňey;
ho janjiňe' IEHOVÀ te kanjieko.
⁴ Minevenevera, le ko mandilatse;
maňereňerea añ'arofo an-tihi'o eo, vaho mianjiňa. Selà
⁵ Maňengà soron-kavantaňaňe,
vaho miatoa am'IEHOVÀ.
⁶ Maro ty mivola :
Ia ty hampiboake hasoa amantika?
Ry IEHOVÀ, onjono ama'ay
ty hazavan-dahara'o.
⁷ Ihe nampipoke haehake an-troko ao, mandikoatse te
an-tsàm-pamokara' iareo
ampemba naho divay.
⁸ Hàndre an-kanintsin-draho le hiroro
amy te Ihe avao ry IEHOVÀ
ro mampimoneňe ahy am-pitsolohaňe.

5

Ho a i Talèn-tsakera : an-Tsoly Sabo' i Davide ¹ O ry IEHOVÀ, toloro
ravembia
o volakoo;
ereňereo o torekoo.
² Haoňo ty feon-koiko ry Mpanjakako
naho Andrianaňahareko :
Ihe ro ihalaliako.
³ Handro ty hijanjiňa'o ty feoko r'IEHOVÀ;
Maraindraiňe te honjoňeko vaho hiandra.
⁴ Tsy mahafale azo ry Andrianaňahare ty haratiaňe;
mbore tsy haňialo ama'o ty haloloaňe.
⁵ Tsy hijohaňe aň'atrefam-pihaino'o
o mpirebodrebokeo;
fonga heje'o ze mitolon-draha kafoake.
⁶ Ho rotsahe'o ze mivolam-bande;
heje' IEHOVÀ
t'indaty mampiori-dio naho ty mamaňahy.
⁷ Fe naho zaho, i fo ferenaiňa'o fonitsey ty himoahako añ'anjomba'o ao,
vaho hiambane mb'aň'anjomba'o
miavake mb'eo, fa maňeveň' ama'o.
⁸ Ry IEHOVÀ, Iaolò ami'ty hatò'o
ty amo mivoňoňe ahikoo;
avantaňo aňatrefako eo ty lala'o.
⁹ Tsy am-pahitiaňe ty vava' iareo;
hatsivokaraňe ty an-tro'e ao;
kibory misokake o tretra'eo,
ie mitsiriry am-pameleke.
¹⁰ Ozoňo iereo, ry Andrianaňahare,
hikorovok' ami'ty fikililia'iareo;
soiho aňe ami'ty habeim-piolà'iareo
amy t'ie niody ama'o.
¹¹ Hene hirebeke ze mipalitse ama'o, hiriňariňa an-kobaiňe nainai'e;

le ampialofo,
handia taroba ama'o o mpikoko ty tahina'oo,
¹² Toe ihe ty mampanintsiñe o vantañeo,
ry IEHOVÀ, ohoñe'o fañisohaña
hoe te am-pikalan-defoñe.

6

Ho a i Talèn-tsakeray ampititiheñe, Titiheñe an-Tali-valo; Sabo' i Davide

- ¹ Ry IEHOVÀ, ko endaha'o ami'ty haviñera'o,
le ko mandilo ahy an-keloke.
- ² Tretrezo, ry IEHOVÀ, fa minike;
jangano ry IEHOVÀ
fa minevenevetse o taolakoo.
- ³ Loho mangebahebake ty troko:
Fa Ihe ry IEHOVÀ—hombia?
- ⁴ Mibaliha, ry IEHOVÀ, Hahao ty fiaiko;
rombahao ty amy fiferenaiña'o.
- ⁵ Tsy mahatiah扬 Azo ty an-kavilasy;
ia ty hañandriañ' Azo an-tsikeokeok' ao?
- ⁶ Mahamàmak' ahy ty fiñeóñeoko;
ampigoribagoribañeko haleñe
ty kidoriko,
ampitranaheko rano maso
ty fandreako.
- ⁷ Mitike o masokoo ami'ty haemberako;
mihamodo ty amo rafelahy iabio.
- ⁸ Soike ry hene mpanao ratio;
fa nahajanjiñe ty feon-tañiko t'IEHOVÀ.
- ⁹ Jinanji' IEHOVÀ ty halaliko;
no' IEHOVÀ ty filolofako.
- ¹⁰ Fonga ho salatse naho hangebahebake
o rafelahikoo;
Ampipolieñe iereo,
vaho hiambovoa' ty fimeñarañe.

7

Nisaboa' i Davide aman'Añahare ty amy saontsi' i Kosy nte-Beniamine

- ¹ Ry IEHOVÀ Andrianañahareko,
Ihe ro fitsolohako, avotsoro
amo mañoridañe ahikoo, le hahao;
- ² Tsy mone ho ritaritae'e
hoe liona ty fiaiko,
hirofodrofota'e tsy
amam-pañolotse.
- ³ Ry IEHOVÀ Andrianañahareko,
naho nanoeko zao :
lehe an-tañako ty hatsivokarañe,
- ⁴ nahó vinaleko haratiañe ty rañeko;
hera nivoloseko tsy amam-poto'e
ty nañembets' ahy;
- ⁵ Le ho hotrohe' ty rafelahiko, hiambotraha'e;

ho lialià'e an-tane ty haveloko, vaho hado'e an-debok' ao
ty engeko. Selà

⁶ Miongaha, ry IEHOVÀ, an-kaviñera'o,
miavota ty amo fitrotrofiaha'
o rafelahikoo.
mivañona ty amako amy zaka kinoi'oy.

⁷ Hiarikatok' ama'o ty favori' ondatio,
vaho mibaliha hifehea'o
boak'añ'abo ey.

⁸ Ry IEHOVÀ Mpizaka o kilakila 'ndatio;
zakao raho ry IEHOVÀ, ty amy havantañako naho ty havañonako an-trok'
ao.

⁹ Hijihetse ty haratia' o lo-tserekeo
naho hajado'o o vañoñeo,
fa mpitsòke arofo naho ova
t'i Andrianañahare vantañe.

¹⁰ Aman'Añahare ao ty fikalako
Ie mpandrombake o vañon-trokeo.

¹¹ Mpizaka to t'i Andrianañahare,
Eka, torifike boak' andro
t'i Andrianañahare;

¹² Aa naho tsy mimpoly t'indaty: le ho sioña'e i fibara'ey;
fa navoho'e ty fale'e
vaho nihajarie'e;

¹³ Fa nihentseñe'e fialiañe mahafate,
ampibelabelae' afo o ana-pàle'eo.

¹⁴ Hehe t'ie tsongoen-tsihavokarañe,
ie nampiareñe kilily
vaho hiterake i remborake;

¹⁵ Nihaly kobon-dre naho nampigorabahe'e,
vaho tafajorobo amy hinali'ey.

¹⁶ Toe hibalik' an-doha'e avao
ty fikitroha'e raty,
vaho hivotrak' an-kevo'e eo
i nandovia'ey.

¹⁷ Andriañeko t'IEHOVÀ
ty amy havantaña'ey,
ho bangoeko an-tsabo ty tahina'
IEHOVÀ Andindimoneñe.

8

Ho a i Talem-Pititike, Anoeñe maro-taly, Sabo' i Davide ¹ Ry IEHOVÀ,
Talè'ay, Oakitia!
ty havolonahe' i Tahina'oy
manitsike ty tane toy,
napò'o ambonen-dikerañe eñe ty enge'o!

² Boak'am-bava' o ajaja-menao
naho o ajaja minonoo
ty nampijadoña'o haozarañe,
ty amo malaiñe Azoo,
hampianjiña'o o rafelahio naho o mpamale-fateo.

3 Ie haraharaeko o likera'oo, ty fitoloñan-drambom-pit  o,
 i vola  ey naho o vasia  e najado'oo.
 4 Ino ondatio, te itsakorea'oo?
 Naho ty ana-ondaty, te hao  e'o?
 5 Fe nanoe'o ambanevane' o anjelio*,
 naho sinab  ka'o enge  ne naho asi  e.
 6 Nampifeh  o aze o tolom-pit  oo;
 kila narongo'o ambanem-pandia'e ao,
 7 Ze hene a  ondry naho a  ombe;
 eka, o biby an-kivokeo:
 8 O voron-dikera  eo, o fian-driakeo,
 ze misoroke o lalan-driakeo.
 9 Ry IEHOV  , Tal  ay, Oasirity!
 ty volonahen-Tahina'o
 manitsike ty tane toy.

9

Ho a i Tal  n' Tsakera, Sabo' i Davide, ami'ty feo : Ty havilasi' i Ana-dahiy

1 Rengeko an-kaliforan-troke rehe r'IEHOV  ;
 ho talilieko iaby o halatsa'oo.
 2 Hifaleako naho hirebehako,
 ho saboeko i tahina'oy,
 ry Andindimone  e.
 3 Ie mimpoly o rafelahikoo,
 le mikorovoke vaho mibaibay
 a  'atrefa'o ey.
 4 Fa nitoha  e'o i naseseko mahitiy,
 ihe miambesatse am-piambesa'o eo,
 mizaka an-kavanta  a  e.
 5 Nendaha'o o kilakila 'ndatio, rinotsa'o o lo-tserekeo;
 finaopao'o kitro katroke ty a  nara' iareo.
 6 O ry rafelahio, fa nampigado  ne  e
 an-koak'ao kitro katroke;
 fa nombota'o o rovao,
 fa momoke ty fitiahiae  e iareo.
 7 Toe am-piambesa'e eo nainai'e t'IEHOV  ,
 fa nihentse  a'e ho an-jaka i fiambesa'ey;
 8 an-kat   ty fizaka'e ty voatse toy,
 ho zakae'e an-kahiti'e ondatio.
 9 Kijoly abo te amo forekeke  eo t'IEHOV  ,
 fitsoloha  e an-tsangkasotria  e;
 10 Hiantok' azo o mahafohi  e
 ty tahina'oo,
 amy te tsy aforintse'o ze mipay Azo,
 ry IEHOV  ,
 11 Misaboa am' IEHOV   ry mpimone  e
 e Tsi  ne ao!
 tseizo am' ondatio o fitolo  a'eo!
 12 Toe ihao  e' i Mpamale Fatey; tsy hali  o'e ty fikoiaha' o mpisotrio.
 13 Isoho raho, ry IEHOV   !
 Vazoh   ty haoreako am-pit  

* 8:5 Elohim: Andriana  ahare, o ndrahareo

o malaiñe ahio;
 Ihe Mpañonjoñe ahy boak' an-
 dalam-bein-kavilasy ao,
¹⁴ ho talilieko iaby ty enge'o
 amo lalam-bei'
 i anak-ampela' i Tsioneio,
 hirebehako o fandrombaha'oo.
¹⁵ Nijoroboñe amy koboñe
 hinali'iereo y fifeheañeo;
 finandri' ty harato naeta'iareo
 o fandia'iareoo.
¹⁶ Fa nampandrendre-batañe t'IEHOVÀ
 fa nametsake zaka:
 tsepaheñ' amo satan-taña'eo avao
 ty lo-tsereke.

[mahantseñantseñe, Selà]

¹⁷ Himpoly mb'an-tsikeokoek' ao
 o tsivokatseo,
 ze kilakila' ondaty mandikok' an'Andrianañahare.
¹⁸ Fe tsy ho haliño nainai'e o rarakeo
 vaho tsy ho modo kitro añ'afe'e
 ty fisalalà' o mpisotrio.
¹⁹ Miongaha ry IEHOVÀ,
 ko anga'o handrekets' ondatio;
 Ho zakaeñe am-pivazohoa'o eo
 o fifeheañeo !
²⁰ Apoho am' iareo ty fangebahebahañe,
 ry IEHOVÀ
 ampahafohino o kilakila'ndatio
 t'ie ondaty avao ! Selà

10

¹ Akore te Ihe mijohañe aña, ry IEHOVÀ?
 Ino ty ietaha'o an-tsan-kasotriaña?
² Am-pirengenvohañe ty añoridaña'
 o raty tserekeo o rarakeo;
 f'ie tsepahe' o fikitroha'eo avao.
³ Sengè' i tsivokatsey o fañirian-tro'eo,
 tata'e ty fatitiañe, naho inje'e t'IEHOVÀ.
⁴ Ty tsivokatse amy fitoeboran-tarehe'ey,
 tsy mitsoek' aze;
 ty hoe avao ro fitsakorea'e:
 Tsy eo ze o Andrianañahare zao.
⁵ Miraorao nainai'e o sata'eo;
 kanao mitiotiotse ambone,
 tsy am-pahaisaha'e eo o fizakà'oo,
 le fonga ibohaboha'e o malaiñ' azeo.
⁶ Hoe ty aereñeren-tro' e :
 Tsy hasiotse raho,
 ndra an-tsa an-tsa tsy ho ampoheke ka.
⁷ Pea hateràñe naho katramo
 naho fisenge-hery i falie'ey;
 kilily naho haloloañe

ty ambane' i famele'ey.

⁸ Itoboha'e o fivoñonañe an-drovao
amo fietahañeo
hamonoa'e ty vantañe;
jilojilovem-pihaino'e
ty tsy amam-pañimba.

⁹ Ie mitingañe añetak' ao
hoe liona ami'ty fitsifira'e;
mitampoñe hitsepake ty rarake,
hiambotrak' ami'ty mpisotry,
hikozozota'e amy harato'ey.

¹⁰ Mibotreke re, mifinake;
vaho mikorovok' amy figorea'ey
i pìtsø-pañolotsey.

¹¹ Hoe re an-troke ao :
Fa nandikofan' Añahare,
fa naeta'e ty lahar'a'e; tsy ho vazoho'e ka.

¹² Mióngaha ry IEHOVÀ;
ry Andrianañahare, zonjò ty Fità'o;
ko amoëa'o o mpirekeo.

¹³ Akore te ati' o tsivokatseo
t'i Andrianañahare,
ie manao an-tro'e ao ty hoe :
Tsy ipaia'e?

¹⁴ Toe vazoho'o; eka fa oni'o
ty ampoheke naho ty embetse
le ho valeam-pit  'o,
ihe ro iatoa' ty tsy aman'imba;
vaho mpañimba ty bode-rae.

¹⁵ Pozaho ty sira' o tsivokatseo naho ipiarote  ey,
karaofo ty haratia'e ie tsy nilefe tsikarahe  ne.

¹⁶ Mpanjaka nainai'e t'IEHOVÀ;
fa mongotse an-tane'e eo o fifehea  eo.

¹⁷ Ry IEHOVÀ,
fa jinanji'o ty halali' o tretram-poo;
hafatraro ty arofo' iareo
atokila  o o ravembia'oo;

¹⁸ Ha  omea'o to o bode-raeo
nah  o forekeke  eo,
tsy hampinevenevera' ondaty
an-tane atoio ka.

11

Ho a i Tal  n-tsakeray, Sabo' i Davide ¹ Amy IEHOVÀ ao ty fipalirako;
akore ty ivola  a' areo an-troko ty hoe :
Mivoratsaha hoe voro  e
mb'am-bohi'o mb'eo;

² Hehe te mampibitsoke f  le
o lo-tserekeo,
le fa ginao' iereo an-taly
o ana-pale'eo,
hahiriri' iereo a  'ie  e ao
mb'amo vanta  'arofoo;

³ Naho rotsake o manàntañeo,
ino ty lefe' o vañoñeo hanoeñe?
⁴ Añ'anjomba'e miavake ao t'IEHOVÀ,
an-dindiñe ao ty iambesara' IEHOVÀ;
mivazoho o fihaino'eo,
mitsoke o ana' ondatio o vohomaso'eo.
⁵ Tsohe' IEHOVÀ o vantañeo,
fe heje' ty arofo'e ty lo-tsereke,
naho ipiaroteñey.
⁶ Hampifororoaha'e vaen'af o mirekake
o tsivokatseo;
af o naho ponde vaho tio-mae
ty ho anjaram-pitovi' iareo.
⁷ Amy te vantañe t'IEHOVÀ;
kokoa'e ty havañonañe
ho isa' o mahitio ty lahara'e.

12

Ho a i Talèn-tsakeray; an-Tali-Valo, Sabo' i Davide ¹ Rombaho, ry IEHOVÀ,
fa tsy eo ondaty matarikeo;
mimosaoñe amo ana' ondatio
o migahiñeo.
² Hene mifandañitse aman-drañetse
ondatio, reke-tsoñy mitsiriry
naho stroke-miroe-rehake.
³ Haitoa' IEHOVÀ
ze hene fivimby mandomboke,
naho ty fameleke mitrè fibohabohàñe,
⁴ ami'ty hoe: O lela'aio ro handreketa'ay; anay o soñi'aio;
ia ty mpifehe anay?
⁵ Ty fampisoñañe o rarakeo,
naho ty fitoreova' o mpisotrio,
ty iongahako henaneo, hoe t'IEHOVÀ,
Fa hampipalireko amy isehasehà'ey.
⁶ Fetse ki'e o fepè' IEHOVÀ,
volafoty nitsoheñe an-toñan-tsini-hara;
nitranuheñe im-pito*.
⁷ Arovo irezay ry IEHOVÀ,
ambeno ami'ty tariratse toy
nainai'e donia,
⁸ Mitsapiotsapioke mbeo' mbeo
o tsivokatseo,
naho onjoneñe amo ana' ondatio
ty haloloñañe.

13

Ho a i Talèn-tsakerera; Sabo' i Davide ¹ Pak' ombia, ry IEHOVÀ?
Ho haliñ'o nainai'e hao raho?
Pak'ombia ty hañetaha'o laharañe amako?
² Sikal'ombia ty hitsakoreako an-troko ao ty haoreako, ie añ'ovako ao
lomoñandro?

* ^{12:6} Sab 18:30, 119:140, Rzs 30:5

Ampara' te ombia ty hañonjonañe
ty rafelahikoo ambone ahy?
³ Vazohò, naho toiño raho,
ry IEHOVÀ Andrianañahareko;
hazavao o masokoo;
tsy mone hiroroako ty firoron-kavilasy;
⁴ Vaho hanao ty hoe i rafelahikoy:
rinebako re; ke hirebeha' o malaiñ' ahikoo t'ie mibolatitse.
⁵ Fe fiatoako ty figahiñan' arofo'o;
hirebeha' ty troko i fandrombaha'oy.
⁶ Ho saboeko t'IEHOVÀ,
amy te nampibodobodoe'e.

14

¹ Ho a i Talèn-tsakera; Sabo' i Davide
Hoe ty mineñe an-tro'e ao:
Tsy eo ze o Andrianañahare zao.
Lo-tsereke irezay, mitoloñe an-kativañe;
leo raike tsy manao soa.
² Misary o ana' ondatio hirik'an-dikerañ' ao t'IEHOVÀ, hahaoniña'e ke eo
ty mahilala mpitsoeke
an' Andrianañahare.
³ Sindre mandifike,
mitrao-kaleorañe;
tsy eo ty manao soa, leo raike.
⁴ Songa tsy aman-kilala o mpitolon-karatiañeo, o mampibotseke ondatikoo
manahake ty filintseña'e mofo,
vaho tsy mitoka IEHOVÀ.
⁵ An-gebahebak' ao iereo,
fe amy tariratse vañoñey
t'i Andrianañahare.
⁶ Ho naoveove' areo ty fikabijà' o rarakeo,
fe fitsoloha'iareo t'IEHOVÀ.
⁷ Toe hiboake Tsioné ao
ty fandrombaha' Israele !
ie ampitolihe' IEHOVÀ
ty fandrohizañe ondati'eo;
le hirebeke t'Iakobe,
vaho hifale t'Israele !

15

Sabo' i Davide ¹ RyIEHOVÀ, ia ty himoneñe
an-Kivocho'o ao?
Ia ty hañialo am-bohi'o miavake eo?
² Ty mañavelo an-kavantañañe,
naho mitoloñe an-kavañonañe;
vaho mitaron-to an-tro'e,
³ ty tsy miteratera am-pamele'e,
naho tsy mañinje i rañe'ey,
vaho tsy mifosa ondatio.
⁴ Mavo am-pihaino'e ty lo-tsereke,
fe iasia'e o mpañeveñe am' IEHOVÀ;
ie mifanta ndra te mijoy vatañe

vaho tsy ivaliha'e;

⁵ Tsy mitake ana'e t'ie mampisongo drala, tsy mandrambe vokàñe haneseke ty vantañe;
le lia'e tsy hitroetroe ty manao zay.

16

Onin-tsabo' i Davide ¹ Tambozoro raho, ry Andrianañahare,
toe ama'o ty fitsolohako.

² Ty hoe ty tinaroko am' IEHOVÀ:
Ihe ro Talèko, zaho tsy aman-kasoa
naho tsy ama'o.

³ O noro'e an-tane atoio:
ie ro talango'e,
toe mampinembanembañe ahiko.

⁴ Hampitomboeñe ty hasotria' ze
mihitrike mb'an-tsamosampo'e aña;
tsy hailiko ty engan-dranon-dio'iareo,
le tsy ho rambesen-tsoñiko
o añara' iareoo.

⁵ IEHOVÀ ro anjara-lovako
naho ty fitoviko.

Tohañe'o ty navike ho ahiko.

⁶ An-toetse fanjaka ty nipoha' o taly
ho ahikoo; Eka, soa i lovakoy.

⁷ Andriañeko t'IEHOVÀ mpamere ahiko,
ie haleñe, anare' ty troko.

⁸ Najadoko aoloko nainai'e t'IEHOVÀ.
Ie ty an-tañako havana eo,
tsy higavingaviñe.

⁹ Aa le tsy mahay avao ty troko,
vaho mirebeke ty havokarako;
mierañerañe ka ty sandriko,

¹⁰ amy te tsy hapo'o an-tsikeokeok' ao ty fiaiko,
vaho tsy hado'o hahaoni-pihomahañe i Masi'oy.

¹¹ Ampaharofoana'o ahiko
ty lalan-kaveloñe;
lifotse hafaleañe ty añatrefa'o;
haravoravoñañe nainai'e
ro am-pitän-kavana'o.

17

Halali' i Davide ¹ Janjiño ty fahiti'e, ry IEHOVÀ,
haoño ty fitoreoko,
anoloro ravembia ty halaliko
boak'an-tsoñy tsy amam-pìtake!

² Ampionjono boak' añatrefa'o eo
ty añomezan-to ahiko !

Ampivazoho mahity o fihaino'oo !

³ Fa nitsohe'o ty troko,
naho nitilihe'o te haleñe
naho nadiñe'o,

vaho tsy nahavazoho
 ty tsy mañeva miakatse am-bavako.

⁴ Aa ty amo sata' ondatio,
 o tsaram-pivimbi'oo ro nambenako
 tsy hombako ty lala' o masia-menao.

⁵ Fa mifahatse amo lala'oo o liakoo, tsy midorasitse o tombokoo,

⁶ Ho kanjieko rehe, amy tetoiñe'o
 ry Andrianañahare;
 atokilaño mb'amako o
 ravembia'oo, janjiño o tarokoo.

⁷ Aboaho an-kasoa ty fiferenaiña'o,
 Le rombahao am-pitá'o havana
 amo miatreatre, o mitsolok'ama'oo.

⁸ Faharo raho hoe te saintem-pihaino'o!
 aetaho añalon-talinjon-ela'o ao;

⁹ ty amo lo-tsereke mamaokeo,
 o rafelahiko mpañoho-doza
 miarikoboñe ahikoo.

¹⁰ Nakiti' iereo o tro' iareo vondrakeo;
 mivola firengevohañe o vava' iareoo.

¹¹ Fa sinarokoho' iareo o lia'aio henaneo;
 nikirofeñe maso hametsake anay an-tane eo;

¹² Manahake ty liona
 milelalela t'ie handrimitse,
 hoe liona tora'e mipiapia añ'etak' ao,

¹³ Miongaha, ry IEHOVÀ,
 atreatréo, goreo ambane!
 Hahao amo lo-tserekeo ty fiaiko,
 amy fibara'oy,

¹⁴ am'ondatio—am-pitá'o ry IEHOVÀ—
 am' ondati' ty tane toio,
 fa an-kaveloñe atoy avao ty anjara'e;
 ie vontsiñe'o amo vara'oo o fisafao'eo; henek' anake iereo; vaho ampan-
 dova' iareo an-tiri' iareo ty nivokara' iareo.

¹⁵ Naho zaho, ho treako an-kavañonañe ao ty lahar'a'o; hifale raho te
 tsekake
 mahatrea ty vinta'o.

18

*Ho a i Talèn-tsakera. Sabo' i Davide mpitoro' IEHOVÀ; nitaroñe'e am'
 IEHOVÀ ty onin-tSabò toy amy andro nandrombaha' IEHOVÀ aze am-pitá'
 o rafelahi'eo naho am-pitá' i Saole; Hoe re : ¹ Kokoako rehe ry IEHOVÀ,
 haozarako.*

² Ry lamilamiko, kijoly fipalirako,
 naho mpañaha ahiko; r'IEHOVÀ,
 ry tseram-bato fitsolohako, fikalan-defoko vaho tsifam-pandrombahañe
 ahiko,
 fitilik' aboko t'i Andrianañahareko.

³ Kanjieko t'IEHOVÀ, fa mañeva ho rengèñe;
 vaho vototse amo rafelahikoo.

⁴ Vinandibandi' o vahen-kavilasio,
 le ho nandimpotse ahy

ty fisorotombaha' i Beliale*;

⁵ Namolonkoñe ahy
o vaham-pihomahañeo,
niatatre ahy o fandrin-kavilasio.

⁶ Nikoike IEHOVÀ t'ie nalovilovy,
nikaik' imba aman' Añahareko;
jinanji'e an-kivoho'e ao ty feoko;
vaho niheo añatrefa'e an-dravembia'e,
ty toreoko.

⁷ Niezeñezeneñ vaho nihitikitike
amy zao ty tane;
niozoñozoñe naho nanginikinike
ty faha' o vohitseo amy fifombo'ey.

⁸ Niforoake hatoeñe o fiantsona'eo
naho boak' am-palie'e ao
ty afó nahaforototo,
nahasolebatse ty foroha.

⁹ Nazè'e ka i likerañey vaho nizotso;
ieñe mangonkòñe
ty tambane' o fandia'eo.

¹⁰ Niningira'e ty kerobe[†] le nitiliñe;
eka nibiririñe añ'ela' i tiokey.

¹¹ Nanoe'e fietahañe
ty hamoromoroñañe;
ho kibohotse hañohok' aze,
ty hangonkòn-drano,
ty rahoñe migoboñe an-dikerañe ey.

¹² Niboroboñak' amo rahoñe milodolodoo ty havandra naho foroha
mirekake
amy fireandreañe añatrefa'ey,

¹³ Nañàmpiñe an-dikerañe ao t'IEHOVÀ,
nampipoña-piarañanañañe
t'i Andindimoneñe;
havandra gadaboñe
naho foroha mirebareba.

¹⁴ Nahì'e mb'eo o ana-pàle'eo,
le nampivarakaihe'e;
nampiriaria'e ty helatse
vaho nampivalitsikotahe'e.

¹⁵ Niboak' amy zao o kadahan-dranoo, nikorendake o faha' ty tane toio,
ami'ty fitrevo'o ry IEHOVÀ,
ami'ty fitorotosi' ty kofòm-piantsona'o.

¹⁶ Nirahe'e boak'añ'abo eñe,
le rinambe'e raho;
sininto'e boak' an-drano maro.

¹⁷ Rinomba'e amy rafelahiko maozatsey,
amo malaiñe ahikoo,
amy t'ie nifatratse te amako.

¹⁸ Natrtré' iereo amy andro naha-ampohek' ahikoy, fe nañolots' ahiko
t'IEHOVÀ.

¹⁹ Nampionjone'e mb'an-toetse
mangadagadan-draho,

* **18:4** Beliale: Halò-tserehañe, i mpañinjey † **18:10** kerobe: anjely masiñe zoke'e

hinaha'e amy te no'e.

²⁰ Nanambe ahiko ami'ty
havantañako t'IEHOVÀ;
ami'ty halio tañako ro nañavaha'e ahiko.

²¹ Amy te ambenako o lala' IEHOVÀO;
vaho tsy mivik' aman'Añahareko
am-bodongeron-draho.

²² Hene tañatrefako o taro'eo,
le tsy nampisitaheko amako o fañè'eo.

²³ Tokan-tro ama'e raho,
vaho milie-batañe tsy hanao sida;

²⁴ Aa le tinambe' IEHOVÀ amy havañonakoy,
ami'ty falio-tañako am-pivazohoa'e.

²⁵ Ami'ty mitretre
ro iboaha'o ho mpiferenaiñe,
ami'ty vañoñe
ro iboaha'o ho vantañe,

²⁶ ami'ty mikanitsoke
ro iboaha'o ho ki'e.
vaho ami'ty mengoke

ro iboaha'o ho minironiroke.
²⁷ Toe rombahe'o ty tretram-po,
fe are'o o maso mitahèbokeo.

²⁸ Ihe ro mamiañe ty jiroko,
mampazava o iekoo
ry IEHOVÀ Andrianañahareko.

²⁹ Ihe ro hañoridañako
ty firimboñan-dahin-defoñe;
mahavokon-jolok' ahy
t'i Andrianañahareko.

³⁰ Aa naho i Andrianañahare!
hiringiri'e ty lala'e‡,
niventeañe§ o pepè' IEHOVÀO;

Ie ty Mpañaro' ze hene miato ama'e
³¹ Ia t'i Andrianañahare
naho tsy IEHOVÀ?

Ia ty lamilamy naho tsy
i Andrianañaharen-tikañey?

³² T'i Andrianañahare mpanikiñe
ahy an-kaozarañe,
vaho mpamantañe ty liako.

³³ Ampanahafe'e amo tombom-panalokeo* o tombokoo,
avotra'e amo haboakoo.

³⁴ Aò'e hifandrapake o tañakoo,
mahavohotse fale torisike o sirakoo.

³⁵ Natolo'o ahy ka
ty fikalan-defom-pandrombaha'o;
naho nanozañe ahy
ty fitàn-kavana'o,
nampionjoñe ahiko
ty hamoran' arofo'o.

‡ **18:30** Sab 12:6, 119:140, Rzs 30:5 § **18:30** am-pitranahañe añ'afo ao * **18:33** hebreo: diera
vave'e

- ³⁶ Nihalavae'o ty fandingàñako ambaneko eo, fe tsy nidorasitse o tombokoo.
- ³⁷ Nihoridañeko o rafelahikoo le nahatratse, tsy himpoly raho naho tsy t'ie fonga rotsake.
- ³⁸ Ie tinomboko tsy hionganaka ka, nikorovok' ambane' tomboko eo.
- ³⁹ Fa nampidiañe'o amako ty haozarañe hialiako naho ampiandalie'o amako o miatreatre ahikoo.
- ⁴⁰ Nampitolihe'o amako ty hato' o rafelahikoo, vaho rinotsako o malaiñ'ahikoo.
- ⁴¹ Nikaike iereo, fe tsy amam-pandrombake—am'IEHOVÀ, fe tsy tinoi'e.
- ⁴² Aa le dinemode demoko ho deboke, haboelen-tioke iereo, nariako hoe litsak' an-dalañe ey.
- ⁴³ Vinotso'o ami'ty fioliñoliña' ondatio raho, le nampifehè'o ahy o fifelehañeo; mitoroñe ahy ondatynofikoo.
- ⁴⁴ Vata'e mahajanjiñe iereo, le manoiñe ahy. mitsolofiñe amako o anan-drenetaneo.
- ⁴⁵ Minik' avao o anan'ambahinio, le mihonrahondra t'ie miakatse am-pitsifira'e ao.
- ⁴⁶ Veloñe t'IEHOVÀ ! Andriaño i lamilamikoy! onjoneñe t'i Andrianañaharem-pandrombahañe ahiko,
- ⁴⁷ i Andrianañahare mpamale-fate ho ahiy, naho mampiandaly ondatio ambaneko eo,
- ⁴⁸ Haha'e amo rafelahikoo raho, toe onjone'o ambone' o mitroatse amakoo, vaho avotso'o am' ondaty mitrofiakeo.
- ⁴⁹ Aa le handriañeko amo fifeheañeo rehe ry IEHOVÀ; vaho ho saboeko ty Tahina'o.
- ⁵⁰ Ra'elahy ty fandrombahañe atolo'e amy mpanjaka'ey; vaho iferenaiña'e i noriza'ey, i Davide naho i tarira'ey nainai'e donia.

19

Ho a i Talèn-tsakera; Sabo' i Davide ¹ Tseize' i likerañey ty engen'Añahare, misenge o tolom-pità'eo i lañelañey.

² Handro an-kandro t'ie midoan-tsaontsy, haleñ' an-kale te mitaron-kihitse.

3 Tsy aman-dañonañe tsy aman-tsara,
 tsy janjiñeñe o fiarañanaña'eo.
 4 Fe manitsike ty tane toy o tali' iareoo,
 pak'añ'olo-ty voatse toy o talili'eo;
 napo'e ama'e ao ty kivoho' i àndroy.
 5 Manahak' i mpañenga miakatse i akiba'ey,
 mitreñe hoe fanalolahy
 miherereake an-day.
 6 Hirik'angadon-dikerañ'eñe i fionjona'ey
 naho ty faria'e pak' añ'olo'eo,
 vaho tsy eo ty mahafietake amy hatrovoha'ey.
 7 Ki'e t'i HÀ' IEHOVÀ,
 mañavao ty haveloñe;
 to ty taro' IEHOVÀ,
 mampahihitse ty sotra;
 8 Mahity o fañè' IEHOVÀO, mampirebek' arofo;
 hiringiri'e ty fandilia' IEHOVÀ,
 mpañazava fihaino;
 9 Malio ty fañeveñañe am' IEHOVÀ,
 tsy mb'ia ho modo;
 vantañe o fizakà' IEHOVÀO
 hene mahity;
 10 Mahasinda te amo volamenao,
 eka ndra volamena maro hiringiri'e;
 vaho mamy te amo tantele
 naho papi'e miorikeo;
 11 mbore hatahatae'e i mpitoro'oy,
 ra'elahy ty tambe t'ie oriheñe.
 12 Ia ty mahatsikarake o hila'eo?
 Livo amo hakeo mietakeo raho.
 13 Afofio amo mpitoro'oo o fisengeañoeo,
 tsy mone hamehe ahy.
 Halio tahiñe amy zao raho,
 vaho ho hahañe ami'ty fiolañe losotse.
 14 Ho no'o aña'trefa'o abey
 o fivolam-bavakoo,
 naho ty fitsakorean-troko
 ry IEHOVÀ, lamilamiko*
 naho mpijebam-piaiko.

20

Ho a i Talèn-tsakerà. Sabo' i Davide
 1 Hanoiñ'azo an-ts'an-kasotriañe t'IEHOVÀ,
 hañonjoñ' azo ankaboañe ey
 ty tahinan' Añahare' Iakobe.
 2 Hañitrifa'e imba
 boak'amy toe-miavakey
 hanohañ' azo hirik'e Tsioné ao.
 3 Ho tiahie'e o enga-mahakama iabio, vaho hiantofa'e o fisoroña'oo! Selà
 4 Hatolots' azo ze salalan' arofo'o
 le ho henefeñe iaby o ereñere'oo.

* 19:14 ndra: haozarako

5 Ho poñafe'ay rebeke ty fandrombaha'o,
ty tahinan'Añahare'ay
ro añelahelà'ay kobaïñe;
ho henefa' IEHOVÀ abey o halali'oo.

6 Apotako henaneo,
te ho rombahe' IEHOVÀ i noriza'ey;
ho toiñe'e boak' an-dindi'e masiñe ao,
amy haozaram-pandrombaha'
i fitàn-kavana'eyi.

7 Miato an-tsarete o ila'eo,
an-tsoavala ka ty ila'e;
fa ho tiahi'ay ty tahina' IEHOVÀ
Andrianañahare'ay.

8 Nibokoke iereo naho nikorovoke
mitroatse zahay vaho mijohañe.

9 Rombaho, ry IEHOVÀ;
hanoïñe abey i mpanjakay te kanjie'ay!

21

Ho a i Talèn-tsakeray, Sabo' i Davide **1** RyIEHOVÀ, mirebeke
ty haozara'o i mpanjakay;
mandia taroba
amy fandrombaha'oy.

2 Fa natolo'o aze ty naïnañ' arofo'e,
le tsy nangazona'o ama'e

o halalin-tsoñi'eo. Selà

3 Salakae'o am-pitahian-tsoa;
apo'o añ'ambone'e eo
ty sabaka volamena ki'e.

4 Nihalalia'e haveloñe, le natolo'o aze,
eka, halava andro kitro añ'afe'e.

5 Mañonjoñe ty enge'e o fandreketa'oo,
nanampeza'o asiñe naho volonahetse.

6 Nampiraoraoe'o nainai'e;
Ampirebehe'o ami'ty hafaleañe
añ'atrefa'o.

7 Iatoa' i mpanjakay t'IEHOVÀ,
ie tsy ho ronjeronjeñe ty amy
fiferenaiña' i Andindimoneñey.

8 Ho onim-pità'o ze hene rafelahi'o;
ho takarem-pitàn-kavana'o
o malaiñe azoo.

9 Hampanahafe'o ami'ty toñake
mirekake iereo
an-tsam-piforoforoa'o;
hagodra' IEHOVÀ an-kaviñerañe,
vaho ho forototoe' ty afo.

10 Ho mongore'o an-tane atoy
o tarira' iereo
naho o tiri'iareeo amo ana'ondatio.

11 Nikilily raty azo iereo,
nikitroke haratiañe ama'o,
f'ie tsy ho lefe,

¹² Hampiambohoe'o iereo
Ampibitsohe'o fale o lahar'a'eo.
¹³ Mionjona ry IEHOVÀ an-kaozara'o !
Ho saboe'ay naho ho bangoa'ay
ty hafatrara'o!

22

y Ho a i Talèn-tsakera ami'ty feo : Ty Hirañe ami'ty manjirik'andro Sabo'i Dayide* ¹ Andrianañahareko,
Andrianañahareko,
ino ty namorintseña'o ahiko?
Ihe nitotse ami'ty fañimbàñ'ahy,
amo volam-pitoreovakoo?
² O Andrianañahareko,
koiheko handro, fe tsy toiñe'o;
haleñe, fe tsy mijanjiñe.
³ Toe masin-dRehe,
imoneña'o ty fandrengea' Israele.
⁴ Ama'o ty niatoan-droae'ay;
niantoke iereo, le navotso'o.
⁵ Nikoaik' ama'o, le nihahàñe;
niato ama'o, le tsy nisalatse.
⁶ Oletse raho, fa tsy ondaty;
fosae' raolombelo, naho mavoe' ondatio.
⁷ Mañinje ahy am-piankahafañe
hene mitari-tsoñy ze mahaoniñ'ahy,
vaho mikofikofi-doha, ami'ty hoe:
⁸ Angao hiatoa'e t'IEHOVÀ!
Ie ro hañaha aze;
apoho hasinta'e kanao noro'e!
⁹ Fa Ihe ro nañakatse Ahy an-koviñe ao;
naho nampatokisa'o
tam-patroan-dreneko eo.
¹⁰ Nafetsak' ama'o raho te niterake.
Andrianañahareko rehe
tan-kovin-dreneko ao.
¹¹ Ko mitotse amako,
fa antitotse o feh' ohatseo,
vaho tsy amam-pañolotse.
¹² Mañarikatok' ahiko o añombe-lahio;
o maoza' i Basaneo ro mañarikoboñ' ahy.
¹³ Itañataña' iareo vava,
manahake ty fireñetan-diona mañaolo.
¹⁴ Nadoañe hoe rano raho,
mikalitroke iaby o taolakoo;
fa karafo' tantele ty troko,
mitranak' añ'ovako ao.
¹⁵ Mipike hoe tsilam-balàñe-tane
o ozakoo,
mipitek' an-dañilañiko ty lelako;
le nampandrea'o an-debo-kavilasy ao.
¹⁶ Miarikoboñe ahy o amboao;

* 22: Heb: diera

misarokohok' amako
ty kidim-panao raty;
fa trinofa' iereo o tañakoo
naho o tombokoo.

¹⁷ Mahaiake o taolako iabio raho,
sambae' iareo, harefe' iareo.

¹⁸ Ifanjarà' iareo o sikikoo,
ifanoe'iereo tsato-piso i sarokoy.

¹⁹ F'ihe, ry IEHOVÀ, ko mihak' amako,
ry Mpañimba, malisà hañolots'ahy!

²⁰ Avotsoro amy fibaray ty fiaiko,
ty troko sarotse
ami'ty fisorodidian' amboa.

²¹ Hahao raho am-bavan-diona!
Toiño ty amo tsifan-drimoo!

²² Ho taroñeko an-drolongoko
ty tahina'o;
ho rengeako añivo' i favoriy.

²³ Ry mpañeveñe am' IEHOVÀ : irengeo !
ry hene' tiri' Iakobeo, ijejò,
irevendreveño, ry afe' Israeleo.

²⁴ Amy te tsy nimavoe'e, tsy nampangorý aze ty hasotria' o misotrio;
naho tsy nañetaha'e laharañe,
vaho jinanji'e t'ie nitoreo.

²⁵ Boak' ama'o ty saboko
am-pivory bey ao;
havahako añatrefa' ze mañeveñ'
ama'o o nifantàkoo.

²⁶ Hikama o rarakeo le ho anjañe;
ho rengè' o mipay azeo t'IEHOVÀ;
ho veloñe nainai'e ty arofo' areo !

²⁷ Songa hahatiah y naho hitolik' am'
IEHOVÀ o olon-taneo,
sindre hitalaho añatrefa'o
ty hasavereña' ze kila' ondaty.

²⁸ A IEHOVÀ i fifeheañey,
Ie ty mpameleke o kilakila ondatio

²⁹ Hikama naho hitalaho
ze hene miraorao an-tane atoy;
fonga hibokok' añatrefa'e
o mizotso mb'an-debokeo;
vaho ze tsy mahatam-beloñe.

³⁰ Hitoroñ' Aze ty tiri'e;
ho talilieñe amy tariratse
manonjohiy i Talè,

³¹ Homb'eo iereo hitalily ty havantaña'e am'ondaty mbe hasamakeo—
t'ie nahafonitse.

23

Sabo' i Davide ¹ Mpiarak' ahy t'IEHOVÀ,
tsy hieran-draho;

² Ampandrea'e an-dovoke maindoñe ao,
tehafe'e mb'añ'olon-drano

mipendreñe mb'eo.

³ Vaòe'e ty fiaiko,
iaoloa'e mb'an-dalam-bantañe,
ty amy tahina'ey.

⁴ Ndra t'ie miranga i vatanen-talinjon-kavilasiy,
tsy ho hemban-karatiañe
amy te Ihe ro amako;
mpañohò ahiko ty kobai'o
naho ty fitoño'o.

⁵ Halàンkañe'o fandambañañe aoloko añatrefan-drafelahiko eo;
añiliña'o solike ty lohako,
mandopatse ty fitoviko.

⁶ Toe hañorik' ahy amo hene andro
hivelomakoo ty hasoa naho
ty fiferenaiñañe;
le hitobok' añ'anjomba' IEHOVÀ ao
nainai'e.

24

Sabo' i Davide ¹ A IEHOVÀ ty tane toy naho ty halifora'e, ty voatse toy,
naho o mpimoneñe ama'eo;

² Fa najado'e ambone' o riakeo,
vaho naore'e am-pisorotombahañe eo.

³ Ia ty hahafitroatse
mb'am-bohi' IEHOVÀ ey?
Ia ty hijohañe an-toe'e miavake ao?

⁴ Ty amam-pitàñe malio
naho amañ'arofo ki'e,
tsy mañonjoñe ty fiai'e
mb'ami'ty tsy vente'e,
vaho tsy mifanta am-pamañahiañe.

⁵ Handrambe fitahiañe am' IEHOVÀ re,
naho havantañañe amy Andrianañaharem-pandrombahañe azey.

⁶ Zay ty tarira' o mipay Azeo,
ie mitsoeke ty lahara'o—
Iakobe 'nio. Selà

⁷ Ampiandrao o loha' areoo, ry lalambey! Miongaha, ry lalañe haehaeo!
Hiziliha' i Mpanjaka rengeñey.

⁸ Ia i Mpanjaka rengeñey?
IEHOVÀ maozatse naho fatratse,
IEHOVÀ Lahifhatiy.

⁹ Ampiandrao o loha' areoo,
ry lalambey !
Eka, miongaha, ry lalañe haehaeo!
Hiziliha' i Mpanjaka rengeñey.

¹⁰ Ia i Mpanjaka rengeñey?
IEHOVÀ i Màroy,
Ie ty Mpanjaka rengeñey. Selà

25

Sabo' i Davide ¹ ¶ Ihe, ry IEHOVÀ !
 ro añonjonako fiaiñe.
² ¶ O ry Andrianañahareko,
 ihe ro fiatoako,
 ko anga'o ho salaren-draho; ko apo'o ho giohe' o rafelahikoo.
³ ¶ Eka ndra ia ia mitamà azo
 tsy hiolitsolitse; fe hilolidolitse
 o mamañahy tsy aman-dengo'eo.
⁴ ¶ Ampahafohino ahy o lala'oo,
 ry IEHOVÀ,
 anaro ahy o oloñolo'oo.
⁵ ¶ Iaolò ami'ty hatò'o, le anaro;
 Ihe Andrianañaharem-
 Pandrombahañe ahy;
 Ihe ro fitamàko lomoñandro.
⁶ ¶ Tiahio ry IEHOVÀ ty fiferenaiña'o
 naho ty hafatram-pikokokoa'o,
 ie fa toe haehae.
⁷ ¶ Ko tiahie'o o hakeom-paha-torakoo
 naho o fiolàkoo,
 fe tiahio ankaleñ'arofo'o,
 ami'ty hatrentra'o, ry IEHOVÀ,
⁸ ¶ Soa naho vantañ'arofo t'IEHOVÀ,
 zay ty anoroa'e o manan-tahiñeo
 i lalañey.
⁹ ¶ Iaoloa'e ami'ty hatò o mpirèkeo, vaho anare'e amo sata'eo ty tretram-
 po.
¹⁰ ¶ Songa fiferenaiñañe
 naho figahiñañe o lala' IEHOVÀo,
 amo mpiambeñe i fañina'ey
 naho o taro'eo.
¹¹ ¶ Amy tahina'oy, ry IEHOVÀ,
 apoho o hakeokoo, fa bey.
¹² ¶ Ia ty' ndaty mañeveñe am'IEHOVÀ?
 ho toroa'e ty lalan-tsoa ho joboñe'e.
¹³ ¶ Hiaiñ'añ'oleñañe ty fiai'e;
 handova i taney o tarira'eo
¹⁴ ¶ Avere' IEHOVÀ o mañeveñe ama'eo;
 le ampahafohine'e iareo i fañina'ey.
¹⁵ ¶ Mitolike mb'am' IEHOVÀ
 nainai'e o masokoo,
 amy te Ie ro mañakats' o tombokoo
 ami'ty harato.
¹⁶ ¶ Mitoliha amako le iferenaiño, fa mijoriñe naho misotry.
¹⁷ ¶ Miebotse ty haemberan-troko,
 afaho amo hasosorakoo.
¹⁸ ¶ Vazohò ty hasotriako
 naho ty falovoloiako;
 vaho apoho o hakeokoo.
¹⁹ ¶ Vazoho o rafelahikoo, te maro;
 heje' iareo am-palai-mena raho.

- 20** ♫ Ambeno o fiaikoo, hahao,
le ko ado'o ho salareñe,
amy te Ihe ro fipalirako.
- 21** ▲ Hañaro ahy o havañonañeo
naho o havantañañeo;
fa mitamà Azo raho.
- 22** □ Jebaño t'Israele,
ry Andrianañahare
amo haembera'e iabio

26

- Sabo' i Davide* **1** Meo to raho, ry IEHOVÀ,
fa mitrantràñe ami'ty havañonako;
tsy nifejofejo ty fiatoako am' IEHOVÀ,
vaho tsy hasiotse raho.
- 2** Biribirio raho ry IEHOVÀ vaho tsoho;
hotsohotsò ty añ'ovako naho an-troko.
- 3** Aolo' o masokoo ty fiferenaiña'o,
vaho manjotik' amo figahiña'oo raho.
- 4** Tsy fitraofako tobole o mpamañahio, naho tsy fiharoako fijelanjelañe
o soamiatrekeo.
- 5** Hejeko ty fifañosoña' o tsivokatseo,
vaho tsy fitraofako tobole
o lo-tserekeo.
- 6** Hanasa tañañ' an-kalio tahin-draho,
vaho harikohoeko ty kitreli'o ry IEHOVÀ,
- 7** Ho poñafeko ty feom-pañandriañañe,
ho talilieko iaby o fitoloña'o fanjakao.
- 8** Ry IEHOVÀ, teako ty fimoneñañe
añ'anjomba'o ao,
naho i kivoho fañialoañ' enge'oy.
- 9** Ko aharo'o fitontoñe amo
mpanan-kakeoo ty troko,
ndra ty fiaiko am'ondaty mampiori-dioo;
- 10** o mitan-kilily an-taña'eo,
ie pea vokàñe ty an-taña'e havana ao;
- 11** Aa naho zaho, hitsontik' an-kalio-tahiko; jebaño,
vaho matariha amako.
- 12** Mijohañe an-tane mira ty tomboko;
andriañeko am-pivory ao t'IEHOVÀ.

27

- Sabo' i Davide* **1** Hazavàko naho fandrombahako t'IEHOVÀ, ia ty ihem-
bañako?
Fipaliram-piaiko t'IEHOVÀ,
ia ty hirevendreveñako?
- 2** Ie niambotrak' amako o lo-tserekeo hampibotseke o nofokoo;
le nitsikapy vaho nikorovoke
o malaiñ'ahio naho o rafelahikoo.
- 3** Ndra te hitobe hiatatre ahy
ty firimboñañe,
tsy ho vorombeloñe ty troko;

ndra te hitroatse amako ty hotakotake, mbe hitam-patokisañe.

⁴ Raha raike ty nihalalieko am' IEHOVÀ,
zay ty ho paiaeko :
ty hitobohako añ'anjomba' IEHOVÀ ao
ze hene andro ivelomako,
hahatre a ty hasoa-vinta' IEHOVÀ,
vaho hañontàne añ'akiba'e ao.

⁵ Ampipalira'e an-kijà'e ao t'ie
an-tsam-poheke,
akafi'e am-poreforetan-Kivoho'e ao;
ampitongoa'e andigiligin-damilamy eo.

⁶ Aa le honjoneñ' ambone' o rafelahiko miariseho ahio ty lohako.
vaho ho banabanako soroñe
an-drebeke mb'an-kivoho'e ao;
ho saboako, eka ho rengèko
an-tsabo t'IEHOVÀ.

⁷ Janjiño ry IEHOVÀ, naho ikaihako am-peo! Iferenaiño vaho toiño.

⁸ Nitaroñe'o ami'ty foko ty hoe:
Paiao ty tareheko;
toe ho tsoeheko ty vinta'o, ry IEHOVÀ.
⁹ Ko aetak' amako ty laharao';
ko apo'o an-kaviñerañe ty mpitoro'o,
Ihe mpañolotse ahy ;
le ko aitoa'o, naho ko farie'o
ry Andrianañaharem-
pandrombahañe ahiko.

¹⁰ Ndra t'ie nadon-drae naho rene,
ho rambese' IEHOVÀ.

¹¹ Anaro ahy ty lala'o, ry IEHOVÀ
vaho tehafo mb'an-dalañe mira
ty amo rafelahikoo.

¹² Ko asese'o an-tsatri'
o malaiñ' ahio;
fa atretréo o mpanara vandeo,
naho o mikofòke hasihañeo.

¹³ Hete! atokisako te ho treako
an-tanen-kaveloñe ao
ty hasoa' IEHOVÀ—

¹⁴ Itamao t'IEHOVÀ, mihaozara,
le mihaftatrara arofo; eka, liñiso t'IEHOVÀ.

28

Sabo' i Davide ¹ Ihe, ry IEHOVÀ ro kanjieko,
ry Lamilamiko, ko mañovok' ahy,
kera, hianjiñe,
le hanahake o mizotso
mb'an-tsikeokeok' aoo raho.

² Janjiño ty feon-kalaliko
naho itoreovako,
ie añonjonako sirañe
mb'amy anjomba'o miavakey.
³ Ko kororohe'o hitraok' amo
lo-tserekeo, amo mpanao raty
mivolan-kanitsiñe an-drañe'eo,

te mone fikinian-draty ty am-po'e ao.
4 Ondroho mira amo sata'eo,
 naho hambañe ami'ty haratia' o fitoloña'eo; eka, avaho mira
 amo satan-taña'eo;
 valeo ama'e ty mañeva.
5 Amy te tsy haoñe' iareo
 o tolon-draha' IEHOVÀ, ndra o fitoloñam-pitá'eo.
 ho rotsahe'e iereo, le tsy hatroa'e ka.
6 Andriañeñe t'IEHOVÀ,
 fa jinanji'e ty feon-kalaliko!
7 IEHOVÀ ro haozarako naho fikalako,
 ty fiatoa' ty troko,
 toe fa nimbaen-draho,
 aa le irebeha' ty troko
 vaho rengèko an-tsabo.
8 Haozara'iareo t'IEHOVÀ,
 kijolim-pandrombahañe i noriza'ey.
9 Rombaho ondati'oo,
 naho ampanintsño o lova'oo;
 Araho iereo vaho otroño nainai'e.

29

Sabo' i Davide **1** Atoloro am' IEHOVÀ,
 ry anam-panalolahy*,
 manoloro engeñe naho haozarañe am'IEHOVÀ.
 Mañengà volonahetse mañeva i tahina'ey,
 mitalahoa am' IEHOVÀ ami'ty hafanjakam-piavahañe.
3 Ambone' o ranoo
 ty fiarañanaña' IEHOVÀ,
 mangotroke i Andrianañahare rengeñey;
 ambone' rano mihenehene t'IEHOVÀ.
4 Maozatse ty fiarañanaña' IEHOVÀ;
 lifotse volonahetse
 ty fiarañanaña' IEHOVÀ.
5 Mampipozapozake o tezao
 ty fiarañanaña' IEHOVÀ,
 eka mamatsimpatsike o mendorave'
 i Lebanoneo t'IEHOVÀ.
6 Ampitsamboañe'e hoe tarabao
 hoe te anan-drimo t'i Lebanonone
 naho i Sirione.
7 Mampiriaria lel' afo
 ty fiarañanaña' IEHOVÀ.
8 Ampanginikinihe' ty fatram-bey
 ty fiarañanaña' IEHOVÀ,
 ampihondrahondrae' IEHOVÀ
 ty fatrambei' i Kadese.
9 Mampiterake o dierao
 ty fiarañanaña' IEHOVÀ,
 vaho ampikorendahe'e o alao;
 le añ'anjomba'e ao,

* **29:1** anan'Añahare, ndra firimboñañ' Anjely

songa miredoñe ty hoe : Engeñe!
¹⁰ Niambesatse ambone' i fiepoepoañey
t'IEHOVÀ.
eka miambesatse ho
mpanjaka nainai'e t'IEHOVÀ.
¹¹ Ho tolora' IEHOVÀ faozarañe ondati'eo;
ho tolora' IEHOVÀ fañanintsiñe ondati'eo.

30

Sabo; Saboeñe ami'ty Fañorizañe i Anjombay; a i Davide ¹ Honjoneko
rehe ry IEHOVÀ,
ami'ty nañongaha'o ahy, vaho
tsy napo'o hitohàke amako o rafelahikoo.
² Ry IEHOVÀ, Andrianañahareko, nitoreovako le jinanga'o;
³ Ry IEHOVÀ, naonjo'o boak'
an-tsikeokeok' ao ty fiaiko;
nahatam-beloñe ahy rehe tsy
hizotsoako mb'an-koboñe ao.
⁴ Sabò t'IEHOVÀ, ry ondaty noro'eo,
andriaño i tahina'e masiñey.
⁵ Amy te aniany avao ty haviñera'e,
pak'an-kaveloñe heneke ty fañosiha'e;
mete mahaporea' ty maraindray
ty firovetañe,
fe ho tendreke maraiñe ty firebehañe.
⁶ Le hoe raho, te niraorao :
tsim-bia hasiotse.
⁷ Ry IEHOVÀ, ty fañisoha'o
ro nampijadoña'o i vohikoy;
ie naeta'o ty lahabra'o
le nimarimarike.
⁸ Ihe ry IEHOVÀ ty nikoihako,
naho i Talè ty nihalaliako;
⁹ Ino ty tombo'e amo liokoo,
t'ie higodoñe mb'an-koboñe ao?
Hibango Azo hao o deboleo?
Ho talilie'e hao ty figahiña'o?
¹⁰ Janjiño ry IEHOVÀ,
le tretrezo raho, ry IEHOVÀ, vaho imbao!
¹¹ Nafote'o ho tsinjake o fandalakoo;
hinalo'o amako o gonikoo, vaho sinaro'o hafaleañe,
¹² Soa te hisabo Azo ty engeko
le tsy hitsiñe;
Ry IEHOVÀ, Andrianañahareko,
handriañeko nainai'e.

31

Ho a i Talè; Sabo' i Davide ¹ Ama'o ao, ry IEHOVÀ, ty fitsolohako;
ko apoho ho salaren-ka,
hahao amo havantaña'oo.
² Atokilaño amako ty ravembia'o, imbao masìka,
t'ie ho lamilamy fipalirako,

kijolim-pandrombahañe ahy.

³ Toe Ihe ro lamilamiko naho kijoliko;
i Tahina'oy ro hanehake naho hiaolo ahy.

⁴ Akaro amy harato naeta'iareo amakoy,
amy te Ihe ro fitsolohako.

⁵ Am-pit 'o ao ro anolorako troke,
fa nijeba e ahy rehe ry IEHOV ,

Andriana aharen-kavanta a e.

⁶ Hejeko* o mpa ao e
ty hakoafan-dRemborakeo;

IEHOV  ro iatoako.

⁷ Hifale naho hirebeke
amo fiferenai  'oo raho,
fa nihao e'o o hasotriakoo;
naho niarofoana'o

ty haferenai ako,

⁸ tsy napo'o an-ta an-drafelahiko ao;
fa navotra'o an-tane mangadagada e
eo o tombokoo.

⁹ Tretrezo ry IEHOV , fa tokoen-draha;
nabotsem-pihontoke o masokoo,
eka, ty fia ko naho ty sandriko.

¹⁰ Fa nir -ty hontoke ty fia ko,
naho ty fiselekai   e o taokoo,
milesa ty haozarako ty amo tahikoo,
yaho minike o taolakoo.

¹¹ Toe finj -draho ty amo rafelahikoo,
mentsake o mpiharo-tan  ' amakoo,
fa emba   e o ra ekoo,
mibotitsik' amako ze mahaoni 'ahy
an-dala e ey.

¹² Hali   hoe lolo raho,
tsy amam-betsevetse;
manahake ty karabiba.

¹³ Tsinanoko ty bisibisi' i m roy,
harevendreve   e mb'etia mb'atia,
mikinia ahy,
ikililia'e ty ha  -doza amako.

¹⁴ Fe zaho, Ihe ro fiatoako ry IEHOV 
hoe raho; Ihe ro Andriana ahareko.

¹⁵ Am-pit 'o o androkoo;
avotsoro an-ta  ' o rafelahikoo,
naho amo mpanao samporerakeo.

¹⁶ Ampaviaho amy mpitoro'oy
ty lahara'o;

hahao amo fiferenai  'oo.

¹⁷ Ko apo'o ho salaren-draho ry IEHOV ,
fa mikanjy Azo,

fe me  aro o lo tserekeo, ampitsi o an-tsikeokeok' ao.

¹⁸ Hampianji   e
o famelen-dremborake
manotratsotrake o vanta eo

* **31:6** ndra: Heje'o

ie mirengevoke naho mañinje.

¹⁹ Akore ty harà' elahin-kasoa'o
nahaja'o ho amo mañeñeñ'ama'oo,
ie nitsene'o ho amo mpitsolok' ama'o
añatrefam-pihaino' o ana'ondatio!

²⁰ Akafi'o am-pipalirañe añatrefa'o iereo, ami'ty fikililia' ondatio; ampit-
solohe'o an-kivoho ao tsy ho vorehe' o famelekeo.

²¹ Andriañeñe t'IEHOVÀ,
fa nilosore'e amako ty fiferenaiña'e,
an-drova niarikatoheñe.

²² Aa naho zaho, hoe raho te niendrake: ho naitoañe aolom-pihaino'o eo.
fe jinanji'o ty fivolan-kalaliko,
te nikaiheko.

²³ Kokò t'IEHOVÀ ry noro'e iabio,
arova' IEHOVÀ o migahiñe,
vaho avarigidi'e amo mpievoñevoñeo ty avake.

²⁴ Mihaozara naho mihafatrara arofo
ry hene mpitamà IEHOVÀ.

32

Sabo' i Davide: Fañeretañe ¹ Haha ty nilioven-kakeo,
ty nitakonan-tahiñe.

² Haha t'indaty tsy anisia' IEHOVÀ tahiñe,
ie po-pamañahiañe an-tro'e ao.

³ Ie nitsiñe raho, le ninike o taolakoo
ty amo fitoreovako lomoñandroo.

⁴ Handro an-kaleñe te nivesara'
ty fità'o,
nalongañe hoe hafaðsan' asara
ty ranom-piaiko. Selà

⁵ Niantofako ama'o o hakeokoo,
tsy naetako o tahikoo.
hoe raho : Ho soloahoeko am' IEHOVÀ
o fiolàkoo; le napo'o

ty halò-tsere' o tahikoo. Selà

⁶ Ie amy zao, songa hihalaly
ama'o o vañoñeo
ami'ty andro hahaoniñañ' Azo,
le tsy hahatakatse aze
ty fisorotombahan-drano bey.

⁷ Ihe ro fipalirako;
harova'o t'ie am-poheke;
sabom-pañahàñe ty añoñoña'o ahy. Selà

⁸ Hanareko naho ampaharendreheko azo ty lala homba'o;
hitoroako, fa ama'o o masokoo.

⁹ Ko misare soavala ndra birìke
tsy mahilala, ie tsy mahay tsy fehen-daboridy viñe ty vava'e,
tsy mone tsy harinea'e.

¹⁰ Lako fihontoke o lo-tserekeo;
fe ohoñe' ty fiferenaiña'
IEHOVÀ ty miato ama'e.

¹¹ Mifalea am' IEHOVÀ,
mandià-taroba ry vantañeо,

ipoñafo rebeke,
ry vañoñ'arofo iabio.

33

- ¹ Mirebeha am'IEHOVÀ, ry vantañeo,
toe mañevo o vañoñeo ty mandrenge.
- ² Andriaño ami'ty marovany t'IEHOVÀ,
rengeo an-tsabo, mititiha folo-taly.
- ³ Isabò sabo vao;
ititiho am-pahimbañañe,
am-pipoñafan-drebeke.
- ⁴ Mahity ty tsara' IEHOVÀ,
hene am-pigahiñañe o fitoloña'eo
- ⁵ No'e ty havantañañe naho ty hatò:
àtseke ty fiferenaiña' IEHOVÀ' ty tane toy.
- ⁶ Ty tsara' IEHOVÀ ro nanoeñe i likerañey;
ty kofom-palie'e i valobohò'ey.
- ⁷ Atonto'e am-botry o ranon-driakeo;
ahaja'e an-driha ao o lalekeo.
- ⁸ Mirevendreveña am' IEHOVÀ ry tane toy; kila mañeveña ama'e
ry mpimone' ty voatse toy.
- ⁹ Tsinara'e le nifonitse; nandily, vaho nijadoñe.
- ¹⁰ Koahe' IEHOVÀ ty fikinia' o fifeheañaeo; afofi'e ty fikilila' ondatio;
- ¹¹ Mijadoñe nainai'e ty famerea' IEHOVÀ, pak'an-tariran-tariratse
o fisafirin' arofo'e.
- ¹² Haha ty fifeheañañe naho IEHOVÀ
ro Andrianañahare'e,
ondaty jinobo'e ho lova'eo.
- ¹³ Mivazòho boak'
an-dikerañe añe t'IEHOVÀ;
oni'e iaby o ana'ondatio.
- ¹⁴ Jilove'e boak' añ'akiba'e ao
ze hene mpimoneñ' an-tane atoy;
- ¹⁵ I mpitsene ty arofo' iareo iaby,
sindre aharofoana'e ty fitoloña'e.
- ¹⁶ Tsy ty fitozantoza' i màroy
ty maharombake i mpanjakay;
tsy i haozara'e ra'elahi
ty mahavotsotse ty fanalolahy.
- ¹⁷ Tsy jefa'e t'ie miato aman-tsoavalan'aly ho fiarovañe;
tsy ty hara'elahin-kafatrara'e
ty hahafipolitira'e.
- ¹⁸ Inao, te itoliham-pihaino' IEHOVÀ
o mañeveña ama'eo,
o mitamà i fiferenaiña'eio,
- ¹⁹ ho votsora'e ty fiai' iareo tsy hihomake, vaho ho velome'e an-tsankérè.
- ²⁰ Mandiñe IEHOVÀ o tron-tikañaeo;
Ie ty mpañimba antika
naho ty fikalan-defon-tika.
- ²¹ Ama'e ty firebehan' arofon-tika,
fiatoan-tika i tahina'e masiñey.
- ²² Ho ama'ay abey ty fiferenaiña'o

ry IEHOVÀ, fa mpitamà Azo.

34

A i Davide, ie nañova vintañe añatrefa' i Abimaleka, le nienga kanao rinoa'e. ¹ Andriañeko an-tsà an-tsà t'IEHOVÀ, am-bavako ao nainai'e ty fandrengeañ' aze.
² Mirenge am' IEHOVÀ ty troko; ie ho janjiñe' o tretram-poo le hifalea'e.
³ Antao hañonjoñe IEHOVÀ, hitrao-pibango i Tahina'ey.
⁴ Nitsoeheko t'IEHOVÀ, le tinoi'e, fonga nafaha'e amako ty fangebahebako.
⁵ Niandra ama'e iereo le niloeloe, tsy ho kolopofen-kameñarañe ka ty tarehe' iareo.
⁶ Nitoreo ty rarake, naho nijanjiñ' aze t'IEHOVÀ, vaho rinomba'e amo hasotria'e iabio.
⁷ Mitobe mañohoke o mpañeveñe ama'eo ty anjeli' IEHOVÀ, vaho haha'e.
⁸ Tsopeho vaho mahaisaha te soa t'IEHOVÀ; fale t'indaty mitsolok' ama'e!
⁹ Mañeveña am' IEHOVÀ, ry navahe'eo! amy te tampe-draha irieñe ze mañeveñ' ama'e.
¹⁰ Mete militise vaho mifeake ty kerè o liona tora'eo; fe tsy ho po-kasoa o mitsoek' IEHOVÀO.
¹¹ Mb'etoa, ry anake, tsendreño; hatoroko anahareo ty fañeveñañe am' IEHOVÀ.
¹² Ia t'indaty misalala ho veloñe, naho mpitea andro, hahaisaha'e ty hasoa?
¹³ Afofio ami'ty raty ty famele'o, naho o soñi'oo tsy hivolam-pìtake.
¹⁴ Iholiaro ty raty, le anò ty soa; mitsoeha filongoañe—le heaño.
¹⁵ Miatreke o vantañeо ty fihaino' IEHOVÀ, naho o fitoreo'eo o ravembia'eo.
¹⁶ Atreatrè' IEHOVÀ an-daharañe o mpanao ratio; aitoa'e an-tane atoy ty fitiahiañe iareo.
¹⁷ Mikaike, le mijanjiñe t'IEHOVÀ, ie haha'e amo hasotriañe iabio.
¹⁸ Marine' ty mikoretse añ'arofo t'IEHOVÀ, vaho rombahe'e o demok' an-trok'aoo.
¹⁹ Maro ty mañembetse o vañoñeo*, fe avots'o' IEHOVÀ ama'e iaby.
²⁰ Ambena'e iaby o taola'eo, leo raike tsy rifotse.

* **34:19** Sab 71:20, Ti II 3:11-12

²¹ Havetra' ty haratiañe ty lo-tsereke,
vaho hafàtse ze malaiñe o vantañeo.
²² Jebañe' IEHOVÀ ty fiai' o mpitoro'eo,
leo raik' amo mitsolok' ama'eo
tsy hafàtse.

35

Sabo' i Davida ¹ Ry IEHOVÀ, atretréo o miatreatre ahio, mialia amo mifandrapak' amakoo.

² Andrambeso fikalan-defoñe
naho fikala-meso,

le miongaha hañolotse ahy.

³ Apontsoaño ty lefo'o naho i fekon' aliy;
hatreatrè'o o mañoridañ'ahikoo
saontsio ami'ty fiaiko ty hoe :

Zaho ro fandrombahañe azo.

⁴ Salatse naho po-asiñe
o mipay ty fiaikoo;
ampiambohò vaho ampimeñaro
o mikilily hijoy ahikoo.

⁵ Ano ho kafo'e aolon-tioke eo,
le hatao' i anjeli' IEHOVÀ soike.

⁶ Ano haieñe naho halamañe
ty fombà' iareo,
horidañe' i anjeli' IEHOVÀ.

⁷ Tsy aman-taly ty nañetaha'iareo harato,
tsy vente'e ty nihalien-koboñe ty fiaiko,

⁸ Hivovò ama'e abey ty firotsahañe,
le ho tsepahe' i harato naeta'ey;
vaho amy firotsahañey ty hivarinjonjoha'e.

⁹ Hirebek' am' IEHOVÀ ty fiaiko,
hirenge amy fandrombaha'ey.

¹⁰ Hanao ty hoe iaby o taolakoo:
Ry IEHOVÀ ia ty hambañ' Ama'o?
Mpandrombake o rarakéo

amy maozatse te ama'ey;
Eka, ty poie'e naho ty mpisotry
amy mpamaok' azey.

¹¹ Mitroatse o mpitalily tsivokatseo,
mañody ahy an-draha amoeako.

¹² Valè' iereo raty ty soa;
mampioremeñe ty fiaiko.

¹³ Aa naho zaho, nisaron-gony
te natindry iereo,
nirè-batañ'aman-dilitse,
fe nimpoly an-troko i halalikoy.

¹⁴ Nandenako hoe t'ie nirañeko ndra nirahalahiko; nidròdreke an-kontoke
manahake te nandala rene.

¹⁵ Fe nirebeke iereo t'ie nikoletra, nifañosoñe,
nifanontoñe hiatreatre ahy
o mpamofoke alik' amakoo,
nandrimitse ahy avao tsy nitroatse;

¹⁶ hoe mpiteratera ts-i-aman-Kake
an-tsabadi-dake,
ty ikodrita' iareo nife;
¹⁷ O Talè, pak' ombia te hisamba avao?
Avotsoro ami'ty fandrotsaha' iareo ty troko; amo lionao ty fiaiko.
¹⁸ Andriañeko am-pivori-bey ao;
mijejo azo am-balobohòk' ao.
¹⁹ Lonike tsy hirebeha' o rafelahiko tsy amam-poto'eo;
tsy hipie maso amako o malaiñe ahy
tsy aman-tali'eo.
²⁰ Tsy mivolam-pilongoaÑe iereo,
te mone mikilily volam-pitake
amo mianjiñe an-tane atoio.
²¹ Eka ivañavaña' iereo vava
manao ty hoe :
Hiy! Hiy! fa nitrea' o maso'aio.
²² Nivazoho'o
ry IEHOVÀ, ko mianjiñe;
ry Talè, ko mitòtse amako
²³ Mitsekafa, mivañona hañomea'o to ! Imbaο i ahikoy ry Andri-
anañahareko
naho Talèko.
²⁴ Izakao ry IEHOVÀ Andrianañahareko
ty amy havantaña'oy;
le ko apo'o hirebeha' iereo.
²⁵ Ko ado'o hanoe'e ty hoe
an-troke:
Hiry! ty fañiria'ay! ndra ty hoe :
Fa nabea'ay.
²⁶ Atraofo salareñe naho meñareñe o mitohàk' amy haemberakoio;
ampisikinen-kameñarañe naho inje
o mirengèvok' amakoo.
²⁷ Hipõnak' an-drebeke naho
handia-taroba
o mifale ami'ty halio tahikoo;
hitolom-panao ty hoe:
Onjono t'IEHOVÀ,
ry mpifale amy fanintsiña' i mpitoro'eiy.
²⁸ Hitaroñe ty havantaña'o ty lelako,
ty enge'o lomoñandro.

36

Ho a i Talè, Sabo' i Davide, mpitoro' IEHOVÀ ¹ Mivolañe an-karatiañe
an-tro'e ao ty Tsivokatse. Toe tsy aolo' o maso'eo ty fañeveñañe aman'
Añahare.

² Mitsiriry ty vata'e o maso'eo,
ie maharendreke te mavoeñe o sata'eo.
³ Tahiñe naho hakalitahañe
o fivolam-bava'eo;
nado'e ty hihitse tsy anoe'e ty hasoa.
⁴ Mikitro-karatiañe an-tihi'e eo,
mijohañ' ami'ty lalañe tsy mahasoa;
tsy rihie'e ty haloloaÑe.

- 5** Ry IEHOVÀ, mahatakatse an-dikerañe ao ty fiferenaiña'o, an-drahoñe eñe ty figahiña'o.
- 6** Manahake o vohitse ra'elahio ty havantaña'o, miheotse o fizaka'oo, ry IEHOVÀ, Hene ambena'o ndra ondaty ndra biby.
- 7** Fanjaka ty fiferenaiña'o, ry Andrianañahare ! vaho mipalitse an-talinjon'ela'o ao o ana' ondatio;
- 8** Ie anjañe ami'ty havokara' o anjomba'oo, vaho ampikamae'o añ'oñen-karavoravoa'o.
- 9** Fa ama'o ty rano itsititiahan-kaveloñe; an-kazavà'o ao ro ahaoniña'ay hazavàñe.
- 10** Toloño amo mahafohiñ'Azoo ty fiferenaiña'o; naho amo vañon-trokeo ty havantaña'o.
- 11** Ee te tsy homb'amako ty tombom-pinevonevoke, vaho tsy hanao soik' ahy ty tañan-do-tsereke.
- 12** Mifitake ey o mpanao ratio, naronje ambane, tsy hitroatse ka.

37

- Sabo' i Davide* **1** Ko embetse amo tsivokatseo, vaho ko tsikirihe'o o mpanao ratio,
- 2** F'ie hiforejeje aniany hoe ahetsé, vaho hiheatse hoe rongo-maindoñe.
- 3** ▷ Miatoa am' IEHOVÀ, le anò ty soa; imoneño i taney vaho rañeto ty figahiñañe.
- 4** Mifalea am' IEHOVÀ; le hatolo'e azo ty fisalalàn' arofo'o.
- 5** ▷ Ampiatò am' IEHOVÀ ty fombà'o, Atokiso, vaho ie ty hitoloñe.
- 6** Le hampionjone'e hoe hazavàñe ty havantaña'o, vaho hoe an-tsipinde-mena ty havañona'o.
- 7** ▷ Manintsiña am' IEHOVÀ naho mahaliñisa; ko ihobira'o ty miraorao an-tsata'e, t'indaty mitoloñ' am-pikitrohan-dratio.
- 8** ▷ Fario o habosehañeo, naho apoho ty fombo; ko embetse kera hañosi-karatiañe.
- 9** Toe haitoña'e o tsy vokatseo, fa handova i taney ze mitamà IEHOVÀ *.
- 10** ▷ Aniany le tsy ho eo i lo-tserekey, ho tsoehe'o i akiba'ey f'ie tsy ho trea.
- 11** Toe handova i Taney o tretram-poo, hifale am-piraoraoañe vokatse.
- 12** ▷ Kililie' i lo-tsereke ty vantañe, vaho ampikodrita'e nife.

* **37:9** Sab 37:11,22,29,34, Mat 5:5

13 Iankahafa' i Talè,
fa arofoana'e te an-titotse ty andro'e.

14 **¶** Fa napontsoa' o tsivokatseo
ty fibara,
vaho nampibitsoke fale
hametsaha'e ambane
o rarakeo naho o misotrio,
hañohofa'e loza
amo an-dala mahitio.

15 Hitrofaha' i fibaray ty tro' iareo,
vaho ho pekañeñe ty fale' iareo.

16 **¶** Hamake ty kedekedek' anaña'
ty vantañe
ta ty havokara' o tsivokatse maroo.

17 Toe ho pozacheñe ty sira' o lo-tserekeo,
fe tohaña' IEHOVÀ o vañoñeо.

18 **'** Arofoana' IEHOVÀ ty andro'
o vantañeо,
tsy ho modo kitro añ'afe'e ty lova'iareo;

19 Tsy ho salatse an-tsan-karatiañe;
le ho anjañe an-tsam-paosa.

20 **¶** Hikoromake o tsy vokatseo,
le hanahake ty safon' añondry
o rafelahi' IEHOVÀ,
ie himosaoñe an-katòeñe,
toe himiañe.

21 **↳** Misongo i tsivokatsey
fe tsy mañavake;
matarike i vantañey vaho mañomey.

22 Toe handova i taney o tahie'eo,
fe haitoañe aña o afà'eo.

23 **¶** Ampijadoña' IEHOVÀ
ty lia' ondaty, ie no'e i lala'ey.

24 Ndra t'ie mikorovoke
tsy hidaboñe,
fa tohaña' IEHOVÀ am-pitàñe.

25 **↓** Nitora'e raho,
fa antetse henaneo,
mboe liako tsy nahatrean te
naforintseñe o vañoñeо,
te nangata-kaneñe o keleia'eo.

26 Matarike lomoñandro re naho
mampisongo, vaho vokatse o tiri'eo.

27 **○** Ihankaño ty raty, le anò ty soa,
vaho himoneñe kitro añ'afe'e.

28 Tea' IEHOVÀ ty hatò,
le tsy ho farie'e o mpañorike i Ha'eio;
soa-fipalitse nainai'e iereo;

fe haitoañe ty tiri' o lo-tserekeo.

29 **↳** Handova i taney o vañoñeо, vaho himoneñe nainai'e.

30 **¶** Mañaka-khitse ty falie' o vantañeо,
manao saontsi-to i famele'ey.

- ³¹ Añ'arofo'e ao ty HÀN'AÑAHARE'e[†],
tsy midorasitse o fandia'eo.
- ³² ♫ Tampone' ty tsivokatse ty vantañe, mipay hañè-doza ama'e.
- ³³ Fe tsy hapo' IEHOVÀ an-tañ'a'e ao,
vaho tsy hado'e hafàtse an-jaka.
- ³⁴ ♪ Itamao t'IEHOVÀ,
naho ambeno i lala'ey,
le honjone'e handova i taney,
vaho ho isa'o ty fañitoañe o tsivokatseo.
- ³⁵ ♩ Fa nitreako ty lahiaga, tsivoatsolo,
nandrevake hoe hatae maindoñe
an-tane'e ao;
- ³⁶ Fe nihelañe aña, le heheke, tsy eo;
pinaiko fa tsy nahatreya.
- ³⁷ ♪ Henteo ty vañoñe, hehe i vantañey, ho soa-figadoñe ty mifampilongo.
- ³⁸ Fe hatrao-karotsake o mpandilatseo
vaho ho tomereñe ty figadoña'
ty lo-tsereke.
- ³⁹ ♩ Boak' am' IEHOVÀ
ty fandrombahañe o vañoñe,
Ie ty fitsoloha' iareo an-tsàm-poheke.
- ⁴⁰ Imbàe' IEHOVÀ naho votsore'e;
haha'e amo tsivokatseo vaho rombahe'e,
amy te Ie ty fipalira' iareo.

38

- Sabo' i Davide, Tiahys* ¹ Ry IEHOVÀ, ko mitrevok'ahy
ami'ty fifombo'o;
naho ko andilova'o
ami'ty fiforoforoa'o.
- ² Fa mitsamantake amako
o ana-pale'oo,
vaho manindry ahy ty fità'o.
- ³ Tararèñe ty fiaiko te hatorifiha'o, naho po-pijanganañe o taolakoo,
ty amy tahikoy.
- ⁴ Fa nalipo' o hakeokoo ty lohako,
hoe kilankañe mavesatse tsy leoko.
- ⁵ Mantiñe naho miborake o ferekoo
ty amy hadagolako.
- ⁶ Mihohokohoke raho naho mibokoke,
toe mandala lomoñandro.
- ⁷ Lifo-pihobobohañe ty vaniako,
tsy aman-kajangañe ty sandriko.
- ⁸ Volevole raho, loho demoke,
miñeñeñeñe ty fioremeñan-troko.
- ⁹ O Talè, fonga añatrefa'o eo ty fisalalàko, naho tsy mietak' ama'o ty
fiselekaiñako.
- ¹⁰ Midebodebo ty troko,
milesa ty haozarako;
naho nieng'ahiko ty hazavà' o masokoo.
- ¹¹ Ampiesoñe' i angorosiko

[†] 37:31 Its 6:6, Sab 40:8, 119:11, Ies 51:7

o mpiamakoo naho o rañekoo;
naho mitrobàke ey o longokoo.

¹² Nampidreñafe' o mipay ty fiaikoo fandrike raho,
ikililia' o mipay hijoy ahikoo,
toe ikinia'e hakalitahañe
lomoñandro.

¹³ F'ie manahake te giñe,
tsy mahatsanoñe raho,
hoe bobo kanao tsy mahasoka-bava.

¹⁴ Eka, manahake ondaty valagìñe,
tsy aman-dietse am-palie.

¹⁵ Ihe ry IEHOVÀ ro fisalalàko,
toe hanoiñe rehe ry Talè
Andrianañahareko.

¹⁶ Fa inao ty ahy :
Tsy mone hirebeke iareo,
ke hirengevoke te
midorasitse o tombokoo.

¹⁷ Toe veka'e hikorovoke raho,
amako lomoñandro ty fanaintaiñako.

¹⁸ Toe iantofako o hakeokoo;
naho lifo-kasosorañe ty amo tahikoo.

¹⁹ Fe maozatse naho mahasibeke
o rafelahikoo,

maro ty malainé ahy tsy vente'e,

²⁰ aa kanao valea'iareo raty ty soa,
heje' iareo ty fañorihako ty hasoa.

²¹ Ko mamorintseñ' ahy ry IEHOVÀ,
ko mitotse amako
ry Andrianañahareko,

²² Malisà hañimb' ahy ry Talè,
Fandrombahañ' ahy.

39

Ho a i Talè, atao Iedotone, Sabo' i Davide ¹ Hoe raho: Hambenako o
lalakoo,

tsy mone handilatse an-delako.

hampidiñeko an-daboridy ty vavako
ie añatrefako eo o lo-tserekeo.

² Nimoañe raho naho nitsiñe,
nijomohòñe, ndra ami'ty soa,
fe nanjeke avao ty haloviloviako.

³ Mitsovovoke ty an-troko ao,
miforehetse i afoy te mitsakore,
vaho hoe ty fivolan-delako :

⁴ Ry IEHOVÀ, ampandrendreho ahy
ty figadoñako,
naho ty zehe' o androkoo—te ino, ampaharofoano ahy
ty habori' o havelokoo.

⁵ Hehe te nanoe'o an-jehe o androkoo,
vaho tsy vente ama'o o taokoo;
toe songa hoe kofòke avao
ndra te añoñ'ay t'indaty. Selà

⁶ Manao firiorion-talinjo ondatio,
tsy vente'e ty fihepakepaha'e,
hampitoabotoàbotse vara,
fe nofi'e ty hangoroñ' aze.
⁷ Aa inom-bao, ry Talè,
ty liñisako henaneo?
Ama'o ty fitamàko.
⁸ Hahao amo fonga fiolàkoo,
ko salare'o amo seretseo.
⁹ Fa mijomohòn-draho
tsy manoka-bava; amy te Ihe ty nanao zay.
¹⁰ Afaho amako ty angorosi'o;
tomontoñe raho ty amy fanindriam-pitá'oy.
¹¹ Añ'endake ty andilova'o ondatio
ty amo tahi'eo,
momohe'o hoe fizara o fisengea'eo.
Toe songa kofòke avao ondatio.
¹² Janjiño o halalikoo ry IEHOVÀ,
vaho toloro ravembia o fitoreoko.
Ko mianjiñe ty amo ranomasokoo,
fa ambahiny ama'o raho, renetane manahak' an-droaeko iaby.
¹³ Atoliho tsy hisamba'o ahy, hisomilahako, aolo' ty fiengako tsy ho eo ka.

40

Ho a i Talè, Sabo' i Davide ¹ Nitamàko am-pahaliñisañe t'IEHOVÀ,
le nitokilaña'e, vaho jinanji'e ty fitoreoko.

² Naaka'e an-koboñe namparikoriko,
naho boak' an-dietse nipaletroke,
vaho nampitongoà'e ambone
lamilamy eo o tombokoo;
le nalaha'e o liakoo.
³ Napo'e am-bavako ao ty sabo vao,
fijejoañe aman'Añaharen-tikañe;
maro ty hahaoniñe le hañeveñe,
vaho hitsolok' am' IEHOVÀ.
⁴ Haha ty manao IEHOVÀ ho fiatoa'e,
naho tsy mitolike
mb'amo mpirengenvokeo,
vaho tsy mitsile mb'an-dremborake.
⁵ Maro, ry IEHOVÀ Andrianañahareko,
o fitoloña'o fanjàkao,
naho ty fivetsevetse'o anay,
tsy eo ty mañirinkiriñe Azo !
Naho nitaroñeko naho nilañoneko,
mbe mandikoatse ze mete ho talilieñe.
⁶ Tsy mahafale Azo o soroñeo* naho
o enga-mahakamao;
sinoka'o o sofikoo;
tsy nipaia'o ty engan-kolorañe
ndra ty engan-kakeo.
⁷ Le hoe raho : Intoy raho, homb'eo,

* **40:6** Heb 10:5-6

fa nisokireñe am-boke-pelek' ao;
⁸ Noko, ry Andrianañahareko,
 ty mitoloñe amo satrin'arofo'oo;
 eka, an-troko ato o Tsara'oo[†].
⁹ Fa nitaroneko am-pivori-bey ao ty talily soan-kavantañañe;
 tsy ho sebañeko o soñikoo,
 ry IEHOVÀ, Ihe ro maharofoanañe.
¹⁰ Tsy naetako an-troko ao
 ty havantaña'o;
 fa nitaroñeko ty figahiña'o
 naho ty fandrombaha'o;
 vaho tsy nakafiko amy favori-beiy
 ty fiferenaiña'o naho ty hatò'o.
¹¹ Ry IEHOVÀ ko hazoñeñ' amako
 ty fitretreza'o;
 añaro ahy nainai'e ty fiferenaiña'o
 naho ty hatò'o.
¹² Miarikoboñe ahy ty haratiañe tsifotofoto; miambotrak' amako o
 hakeokoo,
 le tsy mahafiandra,
 ie maro te amo volon-dohakoo,
 vaho milesa ty troko.
¹³ Ho no'o abey ry IEHOVÀ ty hamotsotse ahy;
 malisà ry IEHOVÀ hañolotse ahy,
¹⁴ Le aharò salareñe naho meñareñe
 o mipay ty fiaiko hasintake;
 ampiamboho vaho injeo
 o te hijoy ahio.
¹⁵ Ehe ampidabao an-kenatse
 ze manao amako ty hoe: Hiy! Hiy!
¹⁶ Hirebeke naho hifale ze mipay Azo,
 vaho hitolon-kanao ty hoe
 o mpitea i fandrombaha'oio:
 Onjoneñe t'IEHOVÀ.
¹⁷ Aa kanao rarake naho misotry raho,
 ee t'ie ho vetsevetse' i Talè;
 Ihe ro mpañimba naho mpañaha ahy,
 ry Andrianañahareko; ko mihenekeneke.

41

Ho a i Talè, Sabo' i Davide ¹ Haha ty mañaoñe o rarakeo;
 ie ho votsore' IEHOVÀ an-tsankankàñe.
² Harova'IEHOVÀ le ho tana'e veloñe naho hatao'e haha amy taney eo,
 naho tsy apo'e an-tsatin-tron-drafelahy
³ Ho tohaña' IEHOVÀ amy tihy tindria'ey;
 hafote'o ho jangan-dre am-pandream-pisilofa'e eo.
⁴ Aa naho zaho, hoe ty asako: ry IEHOVÀ,
 Atariho, jangaño ty fiaiko, fa nandilarako.
⁵ Manambaitambaiñ' ahy o rafelahikoo: ombia t'ie hikoromake,
 hihomaha' i añara'ey?

[†] **40:8** Sab 37:31, 119:11, Ies 51:7, Heb 10:7-9

6 Ie mitilik' ahy,
 manao rehan-dremborake;
 mangoroñé hakeo ama'e ty tro'e;
 ie miavotse, volañe'e.
 7 Ivesovesoa' o malaiñe ahy iabio,
 mikilily joy, ami'ty hoe:
 8 Mipitek' ama'e ty bilokan-kokolampa;
 kanao mitsilañe re, tsy hitroatse ka.
 9 Eka, ndra i rañeko niantehlerakoy,
 i nikama i hanekoiy,
 fa nañonjo tomitse amako.
 10 F'Ihe ry IEHOVÀ, iferenaiño,
 vaho atroaro hamaleako iareo.
 11 Zao ty aharendrehako te no'o,
 t'ie tsy irohafa' o rafelahikoo.
 12 Naho izaho, tozañe'o ami'ty havañonako,
 naho ampañatrefe'o laharañe amako nainai'e.
 13 Andriañeñe t'IEHOVÀ
 Andrianañahare'Israele,
 haehae vaho nainai'e donia. Amena naho Amena.

Fange Faha II

Sabo 42 - 72

42

Ho a i Talè, Fañereñere' o Ana' i Korao ¹ Manahake ty fisehasehàn-temboay
 an-torahañe mitsirtsioke
 ty fisasañan-troko ama'o
 ry Andrianañahare.

² Iheaheàn-troko t'i Andrianañahare,
 i Andrianañahare veloñey;
 ombia ty hombako hiheo mb'añatrefan'Añahare mb'eo?
³ Filintsako handro an-kale,
 o ranomasokoo,
 ie kizaheñe lomoñandro, ami'ty hoe :
 Aia ze o Andrianañahare'o zao?

⁴ Tiahiko o raha zao,
 le haborako ty an-troko ao,
 ie nindrezako lia i màroy,
 ninday iareo nangovovoke
 mb'añ'anjomban' Añahare mb'eo,
 am-peom-pirebehañe
 naho fandrengeañe,
 i lahialeñe mitañ'andro nifotoañeñey

⁵ Ino ty ilonjera'o ry fiaiko?
 ino ty ikoreokoreoha'o añ'ovako ao?
 Mitama an'Andrianañahare;
 fa mbe ho andriañe'o,
 ty fandrombahañe añ'atrefa'o.

⁶ Ry Andrianañahareko,
 Mitsilofiñe añ'ovako ao ty troko,
 tiahiko rehe boak' an-tane Iordane* ao,

* 42:6 Iordane: sakam-pizakàñe

naho an-dengo' i Kermone[†] eñe,
hirik'am-bohi-Mitsarey[‡] aña.

⁷ Tokave' i lalekey ty laleke
ami'ty fitroña' o kinera'eo.
songa mandipotse ahy
o onja naho ren-drano'oo.
⁸ Hafanto' IEHOVÀ an-kandro
ty fiferenaiña'e,
le amako an-kaleñe i sabo'ey,
ty halaliko aman' Añaharen-kaveloko.
⁹ Hoe raho aman' Añahare lamilamiko:
Akore ty nandikofa'o ahiko?
Ino ty andalàko ty famorekekèan-
drafelahy?
¹⁰ Hoe fañotohotoañe ty an-taolako ao,
ty fiteraterà' o rafelahikoo;
ie anoa'e ty hoe lomoñandro,
Aia ze o Andrianañahare'o zao?
¹¹ Ino ty ilonjera'o, ty troko tia?
Ino ty fivalitsikotahañe aña'ovako ao?
Mitamà an'Andrianañahare;
fa mbe handriañe'o
i fandrombahan-tareheko
naho Andrianañaharekoy.

43

¹ Meo to, ry Andrianañahare,
mañalañalaña ho ahy
amy fifeheañe tsy aman-Kàkey;
hahao am'onday mamañahy
naho mengokeo.
² Ihe ro Andrianañaharen-kaozarako;
Ino ty nifaria'o ahiko?
Ino ty ibokobokoako am-pigoboñañe ao
ie forekeken-drafelahy?
³ Ahitrifo ty hazavà'o naho ty hatò'o,
hiaolo, hanese ahy mb'amy
vohi'o miavakey mb'eo,
vaho mb'an-kivoho'o mb'eo.
⁴ Le homb'an-kitrelin' Añahare mb'eo,
mb'aman'Añahare
mampinembanembañ' ahy,
vaho ho saboeko ami'ty marovany,
t'i Abo-Tia, Andrianañahareko.
⁵ Ino ty mahalonjetse azo ty fiaiko tia?
inoñe ty angoihioia'o amako ao?
Mitamà an'Andrianañahare;
fa mbe handriañeko,
i fandrombaham-piatrefako
naho Andrianañaharekoy.

[†] 42:6 Kermone: natokañe ho rotsaheñe [‡] 42:6 Mitsare: kedeke

44

Ho a i Talèn-tsabo,

Sabo o ana' i Korao : Itsakoreañe ¹ Ry Andrianañahare,
 fa jinanjin-dravembia'ay, fa natalilin-droae'ay o fitoloñañe nanoe'o
 tañ' andro' iereoos,
 amo andro faha' matoetoeo.
² Ie am-pitâ'o ty nandroake
 o fifeheañeo le najado'o eo ;
 dinemo'o ondatio, vaho naparatsia'o.
³ Tsy ty fibara' iareo ty nahazoñañe i taney;
 le tsy o fitâ' iareo ty naharombake,
 fa ty fitâ'o havana naho ty sira'o,
 vaho ty hazavan-dahara'o
 amy t'ie nisohe'o.
⁴ Mpanjakako rehe, ry Andrianañahare;
 lilio fandrombahañe t'Iakobe.
⁵ Ihe ro igoreea'y o rafelahi'aio;
 ty tahina'o ty andialià'ay o mitroatse hiatreatre anaio.
⁶ Tsy iatoako ty faleko,
 tsy maharombak' ahy ty fibarako.
⁷ Fa Ihe ro nandrombak' anay
 amo rafelahi'aio,
 naho nanalatse o malaiñe anaio.
⁸ I Andrianañahare ro
 firengea'ay lomoñandro,
 vaho andriañe'ay nainai'e ty tahina'o. Selà
⁹ F'ie nifarier'o henaneo,
 naho ninje'o;
 tsy indreze'o fionjonañe o lahindefo'aio.
¹⁰ Ampiambohoe'o amo rafelahi'aio,
 vaho mamaok' an-tsatri'e avao
 o malaiñe anaio,
¹¹ Fa natolo'o ho añondry kamaeñe,
 vaho nampivarakaïhe'o amo fifeheañeo.
¹² Naleta'o ami'ty minjilite'e ondati'oo,
 tsy nahazoan-tombo'e t'ie naletake.
¹³ Nampañinje'o o mpifankarineo, fanivetiveñañe naho fandrabioñañe
 amo mañohok' anaio.
¹⁴ Anoe'o oha-drehake o fifeheañeo,
 fikoliñan-doha am'ondatio.
¹⁵ Fañinjeñañe lomoñandro ty aoloko eo,
 vaho nampikolopok' ahy
 ty hameñaran-tareheko,
¹⁶ ami'ty fivola' o mikobìke
 naho mamàtseo;
 ty amy fiatrefan-drafelahiy
 vaho i mpamale-fatey.
¹⁷ Toe hene nifetsak' ama'ay,
 f'ie tsy nañaliño Azo,
 vaho tsy nivalik' amy fañina'oy.
¹⁸ Toe tsy niambaho Azo o arofo'aio,
 vaho tsy niveve amy lala'oy o fandia'aio,

- ¹⁹ f'ie dinemo'o an-toem-panalok' eo, vaho kinolopo'o an-talinjon-kavilasy.
²⁰ Aa naho nandikofa'ay
 ty tahinan'Añahare'ay,
 ke namela-pitâñe aman-drahare
 ankafankafa;
²¹ Tsy ho nitsikaraben' Añahare hao?
 Kanao arofoana'e ze mikafitse an-trok'ao.
²² Eka, Ihe ro anjamanañe anay
 handro am-pohatse;
 volilieñe hoe añondry ho lentañe.
²³ Mivañona, ry Talè, Ino ty irota'o?
 Mitsekafa, ko farie'o
 kitro katroke zahay.
²⁴ Akore ty ampietaha'o laharañe,
 naho añaliñoa'o ty hasotria'ay
 vaho ty halovilovia'ay?
²⁵ Fa mibokok' an-debok' ao ty fiai'ay;
 mipitek' an-tane eo ty fisafoa'ay.
²⁶ Mióngaha hañolotse anay, vaho jebaño ty amy fiferenaiña'oy.

45

- Ho a i Talè: ty amy talifokey; Sabo' o ana' i Korao, Fanoroa, Sabom-Pikokoñañe* ¹ Andipore' ty troko i talily soay:
 Hoe raho: I mpanjakay ro fitoloñako;
 fisokim-panokitse mahimbañe ty lelako.
² Tsomerentsereñe ta o ana'ondatio n'Itheo; idoañam-pañisohañe
 o fivimbi'oo,
 aa le nitahien'Añahare kitro añ'afe'e.
³ Adiaño an-toha'o ty fibara'o,
 ry Fanalolahy,
 ty enge'o naho volonahe'o.
⁴ Mionjona am-pandreketañe
 am-bolonahe'o, hañonjonañe ty hatò
 naho ty halèn-arofo,
 vaho ty havantañañe;
 le hañoke azo an-draha mampañeveñe
 ty fità'o havana.
⁵ Masioñe ty ana-pale'o añ'arofon-drafelahi' i mpanjakay ao—
 mihotrakotruk' ambane'o
 ondatio;
⁶ Nainai'e donia, ry Andrianañahare,
 ty fiambesa'o;
 kobain-kavantañañe
 ty kobaim-pifehea'o.
⁷ Fitea'o ty havañonañe,
 falai'o ty hatsivokarañe*;
 aa le nañory azo t'i Andrianañahare, Andrianañahare'o,
 an-tsolin-pirebehañe
 ambone' o rañe'oo.
⁸ Ze hene saro'o ro tsotse naho emboke vaho mañidè!
 marovany boak' amo anjomba nitemereñe nifem-bibio ro ifalea'o.

* **45:7** Heb 1:8-9

- ⁹ Anak'ampelam-panjaka
ro amo noro'oo;
mijohañe am-pitàn-kavana'o eo
ty tañanjomba'o am-bolamena
ki' i Ofire.
- ¹⁰ Mitsendreña ry anak'ampela,
Inao! atokilaño ty sofi'o,
andikofo o rofoko'oo,
naho ty anjomban-drae'o.
- ¹¹ Mahasinda i mpanjakay
ty hamontramontra'o;
iambaneo kanao talè'o.
- ¹² Hibanañabana ama'e
ty anak'ampela' i Tsore,
Hipay fañisoahañ' ama'e o mpañaleale am'ondatio.
- ¹³ Fanjaka añ'anjomba ao
ty anak'ampela' i mpanjakay,
vinahotse am-bolamena o saro'eo.
- ¹⁴ Ho roroteñe mb'amy mpanjakay mb'eo
an-tsaroñe soa vinahotse,
hasese ama'o rekets' o somondrara
mpiama'e mpañotroñe azeo.
- ¹⁵ Amañ'ehake naho an-drebek
ro aneseañe iareo; ie ampiziliheñe añ'anjomba' i mpanjakay.
- ¹⁶ Handimbe'an-droae'o o ana-dahi'oo;
horiza'o ho mpiaolo' i tane iabiy iereo.
- ¹⁷ Hampitiahieko ze hene tariratse
ty tahina'o,
hañandriañe azo nainai'e donia ondatio.

46

- Ho a i Talè, Sabo o ana' i Korao, saboen' Ampela* ¹ Fitsolohañe naho
haozaran-tika
t'i Andrianañahare,
Mpañolotse t'ie ampoheke tendrek' aniany.
- ² Aa le tsy ho hemban-tika
ndra te migrorobañe ty tane,
ndra midorasitse mb'am-po'
i riakey o vohitseo.
- ³ Ndra te mitroñe
naho mamore i riakey,
ndra te miezeñezeñe amy fitoabora'
o alo'eo o vohitseo. Selà
- ⁴ Eo ty oñe mahafale ty rovan' añañahare
amo fitsirtsioha'eo,
ty kivoho masi' i Andindimoneñey.
- ⁵ Añivo'e ao t'i Andrianañahare,
le tsy hasiotse;
hañimb'aze t'i Andrianañahare
te manjirik' andro.
- ⁶ Nidabadoa o kilakila ondatio,
niozoñozoñe o fifeheañeo;
nipazake i fiarañanaña'ey,
nitranake ty tane.

7 Aman-tika t'IEHOVÀ' i Màroy;
 fipaliran-tika t'i Andrianañahare' Iakobe.
 8 Mb'etoa, mahaoniña
 o tolon-draha' IEHOVÀ,
 o raha mampangebahebake
 nanoe'e an-tane atoio.
 9 Ampitsiñe'e sikal'añ'olo-tane aña e o alio;
 peñapeñafe'e o faleo, pozahé'e o lefoñeo,
 sodora'e aña'afó o sareten-tafikeo.
 10 Mijihera, vaho mahafohina te
 zaho ro Andrianañahare;
 onjoneñe amo fifeheañeo raho,
 izonjonaña'e an-tane atoy !
 11 Aman-tika t'IEHOVÀ' i Màroy;
 fipaliran-tika t'i Andrianañahare'
 Iakobe. Selà

47

Ho a i Talè, Sabo' o ana' i Korao 1 Mitehafa fitañe, ry hene ondatio;
 poñafo aman'Añahare
 ty fiarañanañam-pirebehañe.
 2 Mampañeveñe t'IEHOVÀ
 andindimoneñe ey,
 ie mpanjaka jabahina' ty tane toy.
 3 Ampiambane'e aman-tika ondatio,
 ze kilakila ondaty
 ambanem-pandian-tikañ' ao.
 4 Ie i nijoboñe lova ho antikañey,
 ty firengea' Iakobe kokoa'ey. Selà
 5 Nionjoñe am-pipoñafam-pitreñañe
 t'i Andrianañahare;
 ami'ty fivolan'antsiva t'IEHOVÀ.
 6 Takasio t'i Andrianañahare, isabo;
 takasio i mpanjakan-tikañey, isabo.
 7 I Andrianañahare ro mpanjaka'
 ty tane toy;
 mitakasia an-tsabo soa arake.
 8 Fehen' Andrianañahare o fifeheañeo;
 miambesatse am-piambesa'e masiñe
 eo t'i Andrianañahare.
 9 Mifanontoñe o roandria' ondatio;
 ondatin' Andrianañahare' i Avrahameo
 fa an'Andrianañahare
 o fikalan-defo' ty tane toio;
 ie onjoneñ' an-tiotiotse ey.

48

Takasy; Sabo' o ana' i Korao 1 Jabahinake t'IEHOVÀ,
 vaho rengeñe mb'añ'abo;
 an-drovan' Añaharen-tikañe,
 i vohi'e miavakkey.
 2 Fanjàka an-toe'e eo,
 ty hafalea' ty tane toy,

ty vohi' i Tsioné añ'ila'e avaratse ey,
 ty rova' i Mpanjaka hinakinakey.
³ I Andrianañahare an-kijoli'ey,
 ty nampandrèndreke t'ie ro fipalirañe.
⁴ Hehe, nifanontoñe o mpanjakao,
 nitrao-pionjoñe mb'etoañe,
⁵ Nioni' iereo; le nilatsa; nangetraketrake, vaho nitriban-day.
⁶ Namihine iareo ty fhondrahondra,
 ninivonivotse hoe ampela mitsongo.
⁷ I tiok' atiñanañey ty ampivaletrahe'o
 o lakam-bein-Tarsiseo.
⁸ Hambañe amy jinanjin-tikañey
 ty nionin-tika
 an-drova' IEHOVÀ' i Mâroy,
 an-drovan' Añaharentikañe ao;
 ee t'ie hajadon' Añahare tsy ho modo
 nainai'ey. Selà
⁹ Nitsakorea'ay ty fiferenaiña'o
 ry Andrianañahare
 añivo' i anjomba'o miavakey.
¹⁰ Manahake i tahina'oy
 ry Andrianañahare,
 ty fandrengeañe Azo,
 pak' añ'olo' ty tane toy;
 lifo-kavantañañe ty fità'o havana.
¹¹ Ampifaleo i vohitse Tsioney,
 ampirebeho o anak' ampela' Iehodào
 ty amo fizakà'oo.
¹² Mañariaria amy Tsioné,
 ikariokarioho, volilio o fitilik-abo'eo,
¹³ Hehe o kijoli'eo,
 rangao o fitalakesañ'abo'eo;
 hahatalilia'o i tariratse mandimbey.
¹⁴ Zay t'i Andrianañahare,
 Andrianañaharen-tikañey, nainai'e donia.
 Ie ty hiaolo antikañe pak'an-kavilasy.

49

Ho a i Talè, Sabo' o Ana' i Korao ¹ Janjiño zao, ry kilakila ondatio;
 manokilaña ravembia,
 ze hene mpimone' ty tane toy;
² Ty ambane naho ty ambone,
 ty mpañaleale miharo ami'ty rarake.
³ Hivolán-kihitse ty vavako,
 vaho ho ereñeren-troko ty hilala.
⁴ Hatokilako mb'am-
 pandrazañañ-drehake ty sofiko.
 ho ventareko an-dokanga
 ty tafatòñoko,
⁵ Ino ty hahahembañ' ahiko
 an-tsàn-kankàñe,
 ie miarikoboñe ahy ty hatsivokara'

o mpañonjo-tomitse amakoo,
⁶ o mpiato amo fanaña'eo,
 vaho mirengevok' ami'ty habei' o vara'eo?
⁷ Leo ondaty raike, ndra manao akore, tsy hahavoavily ty ain-dongo'e, ndra
 hibabanaba jebañe
 aman'Añahare ho aze—
⁸ Loho sarotse ty vilin' ai'e,
 tsy mete tsy hadoke kitro katroke:
⁹ —t'ie ho veloñe nainai'e,
 tsy hahaoniñ' i koboñey,
¹⁰ ie oni'e te mihomake o mahihitseo;
 songa mikenkañe ty minè naho i dagola,
 vaho apo'e amo ila'eo ty vara'e.
¹¹ Ty fitsakorean-tro' iareo t'ie tsy ho modo o akiba'eo,
 naho ty fimoneña' iareo
 mb'an-tariratse iaby kitro añ'afe'e,
 ie atao'e amy añara'ey i tane'ey.
¹² Toe tsy mahatan-ty asi'e ondatio;
 le manahake o bibio t'ie mate.
¹³ Zay ty fombà' o sèretseo,
 naho o mandimbe iareoo,
 ze mianteke ty enta' iareoo. Selà
¹⁴ Hoe añondry iereo
 tinendry ho mb'an-kibory ao,
 ho mpiara'iareo ty havilasy;
 ho fehe' o vañoñe te maraindray;
 ho a' i tsikeokeokey ty vinta' iareo
 hihomak' ao, tsy hanaña' iareo akiba ka.
¹⁵ Fe ho jebañen' Añahare
 ami'ty haozara' o kiborio ty fiaiko,
 le ho rambese'e. Selà
¹⁶ Ko hemban-drehe naho mihamaro ty vara' ondaty,
 naho mitombo ty enge' i anjomba'ey;
¹⁷ F'ie mihomake, tsy eo ty hendese'e.
 tsy hañorik' aze higodañe ao ty enge'e.
¹⁸ Eka! nitata'e
 ty fiai'e te niveloñe:
 Nitsiririeñe t'ie niraorao.
¹⁹ Homb'am-pimoneñan-droae'e ao re;
 tsy ho isa'e ka ty hazavàñe.
²⁰ T'indaty iasiañe, mete tsy maharendreke t'ie, manahake o bibio,
 hihomake.

50

Sabo' i Asafe ¹ Nitsara t'IEHOVÀ Andrianañahare
 Tsitongerè, nikoike ty tane toy
 boak' am-panjiriha' i àndroy
 sikal' am-pitsofora'e aña.
² Hirik'e Tsiône ao,
 ty hafoniran-kamotsotsoreñe,
 ty fireandreañan' Añahare.
³ Mb' etoy i Andrianañaharen-tikañey,

ie tsy hianjiñe;
mamorototo aolo'e ty afo,
iarisehoa' ty tangololahy.

⁴ Kanjie'e mb'andikerañe añ'abo eñe,
naho mb'an-tane atoy
hizaka'e ondati'eo:

⁵ Atontono amako o norokoo, o nifañina amako an-tsoroñeo.

⁶ Mitsey ty havantaña'e o likerañeо;
amy te Ie ro Andrianañahare,

Ie ty Mpizaka. Selà

⁷ Mijanjiña ry ondatiko,

le hivolan-dRaho;

Ry Israeleo, hisehako,

Zaho ro Andrianañahare, Andrianañahare'o.

⁸ Tsy o fisoroña'oo ro añendahako azo,
ie añatrefako eo nainai'e
o enga fañoroa'oo.

⁹ Tsy ho rambeseko boak'añ'akiba'o ao
ty añombelahy,

ndra hirik'an-golobo'o ao ty oselahy.
¹⁰ Amy te hene ahiko ze biby añ'ala ao,

naho ty añombe am-bohits' arivo.

¹¹ Haiko iaby o voroñe am-bohitseo,
Fonga ahiko ze misitsitse an-kivok' ao.

¹² Naho nikerè Raho, tsy ho nivolañe,
amy te Ahiko ty voatse toy,

naho ty halifora'e.

¹³ Hihinañako hao ty nofo' o añombeo?
hinomako hao ty lio' o oselahio?

¹⁴ Engao aman' Añahare
ty sorom-pañandriañañe,
naho avaho amy Andindimoneñey
o nifantà'oo.

¹⁵ Le koiho Raho añ'andro
maha-an-koheke;

ho hahako rehe, vaho hiasia'o.

¹⁶ Fa hoe t'i Andrianañahare
amo tsivokatseo
Ino ty anoñona'o o fandiliakoo?
vaho endese'o am-bava'o ao i fañinakoy?

¹⁷ Inao t'ie malain-dilo,
naho afetsa'o amboho'o ao o entakoo.

¹⁸ Ie manjo-mpikizo rehe, le no'o,

vaho ireketa'o o karapiloo.

¹⁹ Avots'o an-kaloloñañe ty falie'o,
vaho mikilily fitake ty famele'o.

²⁰ Mitoboke rehe vaho mifosa rahalahy;
dramote'o ty anan-drene'o.

²¹ Ie anoe'o zay, hijomohoñe hao Raho?
natao'o ho hambañe ama'o hao,
toe endahako,
vaho alahako añatrefam-pihaino'o eo
o entako ty ama'oo.

²² Aa le ereñereo zao,
ry mpandikok' an'Andrianañahareo
kera ho rangodrangoteko,
ihe tsy amam-pañaha.

²³ Mañonjoñ' Ahy ty mañenga
sorom-pañandriañañe;
vaho hampalangeseke
amy mamantañe i fañaveloa'eiy
ty fandrombahan' Añahare.

51

*Ho a i Talè: Sabo' i Davide, ami'ty fitiliha' i Natana mpitoky, ie fa niolots'
amy Bat'sebae.* ¹ Ry Andrianañahare,
matariha amy hafatraram-pikokoa'o, faopaoho o fiolàkoo amo

hara'elahim-piferenaiña'oo,

² Kotriño hitoratsike amo tahikoo,
liovo amo fandilarakoo.

³ Apotako o fiolàkoo:
vaho miatrek' ahy nainai'e o hakeokoo.

⁴ Ama'o, le ama'o avao ty nandilarako;
naho nanao hatsivokarañe
am-pivazohoa'o;

soa te ho rendreke to t'ie mitsara,
vaho vantañe te mizaka.

⁵ Toe naterak' an-kakeo raho,
naho an-tahiñe t'ie niareñan-drene.

⁶ Inao, mipay hatò añ'ova ao rehe,
aa le ampandrendreho hìhitse
mietake raho.

⁷ Efero an-tseva* raho, hikotritriake;
ampandrò ho foy matsatsaoke
te amo volovasoo[†].

⁸ Ampitsanoño firebehañe
naho hafalean-draho;
soa te hiankahake o taolañe dinemo'oo.

⁹ Aetaho amo tahikoo ty lahara'o,
ehe fonga forò o hakeokoo.

¹⁰ Itseneo fo vao ry Andrianañahare;
le vaò añ'ovako ao ty troke migahiñe.

¹¹ Ko ahifike tsy ho añatrefa'o eo raho,
le ko apitsok' amako i Arofo'o Masiñey.

¹² Ampolio amako ty hafalea'
i fandrombaha'oy,
itozano ho aman-troke mahimbañe.

¹³ Le hampahafohineko
o aman-kakeoo o lala'oo,
hampioliañe o mpanan-tahiñe.

¹⁴ Hahao ami'ty lio-màlin-draho,
ry Andrianañahare, Andrianañaharem-
pandrombahañ' ahikoy;
le ho saboen-delako o havantaña'oo.

* **51:7** Hysopa: rongoñe famitsen-dio: Avo 12.22 † **51:7** ranom-panala

15 O Talè, sokafo o soñikoo
 hitaroñam-bavako ty fandrengeañ' Azo
 16 Toe tsy mahafale Azo o soroñeo,
 fa ho nibanabanaeko;
 tsy no'o o soroñe oroañeo.
 17 Ty soron' Añahare, le troke mihoto;
 tsy ho sirikae'o ry Andrianañahare,
 ty arofo rofotse naho mikoretse.
 18 Hasoao i Tsionne ami'ty fatariha'o;
 atroaro o kijoli' Ierosalaimeo.
 19 Izay vaho ho no'o
 o sorom-bantañeo:
 o soroñe oroañeo naho soroñ' añoñeo;
 le hengaeñe bania ambone' i kitreli'oy.

52

Ho a i Talè, Sabo' i Davide, naho niheo mb'amy Saole t'i Doege nte Edome, nitalily te noly añ'anjomba' i Ahimeleke t'i Davide. ¹ O Fanalolahio, ino ty firoharohà'o hatsivokarañe?
 Lomoñandro ty fiferenaiñan' Añahare.
² Mikilily fandrotsahañe ty famele'o, manahake ty fiharatse masioñe; ty mpamañahy tia.
³ Tea'o ty raty te ami'ty soa; i lañitsey ta te hivolán-to. Selà
⁴ No'o ze atao fivolán-katramoañe, ty fameleke mamañahy tia.
⁵ Aa le harotsan'Añahare kitro-kattroké, ho sintone'e, le hapitso'e amy kiboho'oy, vaho hombota'e an-tanen-kaveloñe. Selà
⁶ Ho isa' o vantañeo, naho hañeveñe vaho hiankahake ty hoe :
⁷ Hehe t'indaty tsy nanao an'Andrianañahare ho fipalira'e; fe ty habei' o vara'eo ty niatoa'e, vaho o fikinia'eo ty nihaozara'e.
⁸ Aa naho zaho, le hoe sakoa mandrevake añ'anjoman'Añahare ao; iatoako nainai'e donia ty fiferenaiñan' Añahare,
⁹ Andriañeko nainai'e rehe, amy te Ihe ty nanao zay, vaho ho tamaeko i tahina'oy ie ty soa añatrefa' o noro'oo.

53

Ho a i Talè, atao Hasilofañe, Fanoroa' i Davide ¹ Hoe ty dagola an-tro'e ao:
 Tsy ao t'i Andrianañahare.
 Valañe iareo, mpanao hakeo mampangorý; leo raike tsy manao soa.
² Jiloven' Añahare boak'an-dikerañe ao

o ana' ondatio,
hivazohoa'e ke ao ty mahilala,
mpitsoek' an'Andrianañahare.
³ Songa niambaho,
niharo naniva vatañe,
tsy eo ty manao soa, leo raike.
⁴ Tsy maharendreke hao
o mpitolon-karatiañeo?
o mampibotseke ondatiko
hoe mitamboavokake mofo,
vaho tsy mikanjy an'Andrianañahareo.
⁵ Hehe t'ie mirevendreveñe,
ndra te tsy eo ty mahahembañe;
fa navarakain' Añahare ty taola'
o nitobe hiatreatre azoo;
nisalare'o, fa naforintsen'Añahare.
⁶ Toe hiboake amy Tsioné
ty fandrombahañe Israele!
Ie hampolien' Añahare ondati'e mirohio;
Le hirebeke t'Iakobe, vaho hifale t'Israele.

54

Ho a i Talè, ami'ty Marotaly, Fanoroa' i Davide: ie niheo amy Saole o nte-Zifio nanao ty hoe: Aa vaho tsy ama'ay ao hao ty fietaha' i Davide?

¹ Rombaho raho ry Andrianañahare
ty amy tahina'oy,
vaho meo-to amo haozara'oo.
² Ry Andrianañahare, janjiño ty halaliko,
toloro ravembia o entam-bavakoo.
³ Miongake hiatreatre ahy ty ambahiny,
paia' o mitrotrofiakeo ty fiaiko,
tsy nampiaoloe' iareo
t'i Andrianañahare. Selà
⁴ Inao! Mpañimb'ahy t'i Andrianañahare,
Fiatoam-piaiko t'i Talè.
⁵ Hafote'e amo mivoñoñe ahiko
ty haratia' iareo;
Rotsaho iereo ami'ty figahiña'o.
⁶ Mañenga ama'o an-tsattrin-tro raho,
andriañeko i tahina'oy ry IEHOVÀ, amy te ie ty soa;
⁷ Fa nafaha'e amako
ze hene haemberañe,
vaho nisambae' o masokoo o rafelahikoo.

55

Ho a i Talè, Ami'ty Marotaly; Fanoroa' i Davide ¹ Janjiño o filolohakoo
ry Andrianañahare;
ko mietak' amo halalikoo.
² Haoño raho, le toiño;
ie tsitoboboly am-pitoreoko,
toe miñeóñeñe avao
³ ty amy feon-drafelahikoy,
ami'ty fanindria' o lo-tserekeo,

ie mametsa-kasosorañe;
vaho am-piloroloroañe
ty atreatré' iareo ahy.

⁴ Miola ty an-troko ao,
vaho midoiñ' amako
ty fangebahebàn-kavilasy.

⁵ Midoñ'amako ty firevendreveñañe
naho ty fihondrahondràñe,
vaho opoe' ty anifañe.

⁶ Hoe raho : Ee te nanañ' elatse
hoe deho!

le ho nitiliñe aña vaho nitofa;

⁷ Eka, ho niherereake mb'eo,

ho nañialo am-patrambey aña. Selà

⁸ Ho nifiotse mb'am-pipalirako mb'eo,
ty ami'ty tio-bey naho ty afo-rano.

⁹ Votemboteo ry Talè,
tseraho ty famele' iareo,
fa nahatreia piaroteñe naho fiolañe
an-drova ao raho.

¹⁰ Handro an-kaleñe iereo ro
mitingatinga ambone kijoly ey,
añivo'e ao ty hatsivokarañe
naho fikitrohan-draty.

¹¹ Firotsahañe ty añivo'e ao,
tsy mienga o kiririsae'o
ty joy naho ty fitake.

¹² Tsy t'ie rafelahy te mañinje ahy,
fa ho nileoko,
tsy t'ie mpalaiñ' ahy te itoabora'e,
fa ho nietahako.

¹³ Te mone ihe, rahambako,
mpiamako naho rañeko,

¹⁴ nimamy ty fifañohahòhan-tika,
mbore nitrao-pivovotse amy màroy mb'añ'anjomban' Añahare mb'eo.

¹⁵ Ee t'ie ho fañahieñe
mb'am-pihomaham-beo,
agodoño veloñe an-tsikeokeok' ao;
amy te an-kaloloañe ao ty kiboho'e;
añivo'e ao.

¹⁶ Aa naho zaho, ho kanjieko t'Andrianañahare;
vaho handrombak' ahy t'IHOVÀ. ¹⁷ Hariva naho handro vaho an-tsipinde
ty hitoreovako

naho hiñeoñeoñe;
vaho ho janji'e ty feoko.

¹⁸ Hijebaña'e an-kanintsiñe
amy fifandraparapahañe amakoy.

¹⁹ Hijanjiñe t'i Andrianañahare
vaho ho toiñe'e iareo;
I miambesatse am-piambesa'e haehaey, Selà
toe tsy miova iareo,
tsy mañeveñe aman' Añahare.

²⁰ F'ie mañonjo-haoke hañatreatre

amo nifampilongo ama'eo,
ie nifotetse amy fañina'ey,

²¹ Nalama te amo solikeo o entam-palie'eo fe aly avao ty añ' arofo'e ao;
nalea ta o menakeo o saontsi'eo,
te mone fibara napontsoañe.

²² Apoho am' IEHOVÀ o kilanka'oo,
le ho tohaña'e;
tsy hado'e higavingaviñe o vantañeo.

²³ F'ihe ry Andrianañahare:
ro hampijoroboñ' iareo
an-kobon-dalek'ao;
tsy hiveloma' ondaty mampiori-dio
naho mamañahio, ty an-tsasa' o andro'eo, fa naho zaho, Ihe ro hiatoako.

56

Ho a i Talè, Sabo' i Davide naho nitsepak' aze e Gate o nte Pelistio; atao ami'ty feo Deho amy Nonok' aroañey

¹ Tretrezo raho ry Andrianañahare;
fa lialia' ondatio;
forekeke'e amañ'aly handro am-pohatse.

² Te handialia ahy lomoñandro
o mivoñoñ' ahikoo;
amy te maro ty mifandrava amako,
ry Andindimoneñey.

³ Amy andro mampangebahebak' ahy,
Ihe ty hiatoako,

⁴ Aman'Andrianañahare—
—handrengeako o tsara'eo—
fa iatoako t'i Andrianañahare,
tsy ho hemban-draho;

inoñe ty hanoe' o nofotseo amako.

⁵ Embere' iereo lomoñandro
o fitoloñakoo; fikitrohan-draty avao ty ereñeren-tro'iareo.

⁶ Mifañosoñe iereo, mietake, mitinoñe ty liako; mandiñe hitsepake ty fiaiko.

⁷ Ty hatsivokara' iareo—tsy hipoliotse.
Aretsaho an-kaviñerañe ondatio,
ry Andrianañahare.

⁸ Fa vinolili'o o firerererekoo;
apoho an-jonjò'o ao
o ranomasokoo;
tsy amy boke'oy hao irezay?

⁹ Hitolike amy zao o rafelahikoo,
amy andro kanjieko,
Zao ty rendreko,
te mpañimb' ahy t'i Andrianañahare,

¹⁰ I Andrianañahare ro andrengeako o tsara'eo,
IEHOVÀ ro añonjonako o saontsi'eo.

¹¹ I Andrianañahare ro fiatoako,
tsy ho hemban-draho,
inoñe ty hanoe' ondaty amako.

¹² Havahako o nifantàkoo,

ry Andrianañahare;
hañenga fañandriañañe ama'o.

¹³ Amy te vinotso'o ty fiaiko
tsy hikenkañe;
Eka! o tomboko tsy hitsikapy,
ie hijelanjelañe añatrefan'Añahare eo
an-kazavan-kaveloñe.

57

Ho a i Talè, Haja' i Davide, ie nibioñ' amy Saoly mb'an-dakato ao ami'ty feo : Ko Rotsahe'o. ¹ Tretrezo raho ry Andrianañahare, iferenaiño,
fa Ihe ro fitsoloham-piaiko; eka! an-talinjon' ela'o ao ty fipalirako, ampara'
te ihelaña' ty hankàñe.

² Kanjieko t'i Andrianañahare Abo-tia;
Aman' Añahare fahatafeterako.

³ Hahitri'e hirik'an-dikerañe ao
ty fandrombahañe ahy,
endaha'e i mandialia ahikoy. Selà
Ho sangitrihen' Añahare ty fiferenaiña'e naho ty hatò'e.

⁴ An-teñateñan-diona ao ty fiaiko;
itraofako handre o mpikofòke afoo;
toe o ana' ondatio,
lefoñe naho ana-pale o famotsi'eo,
fibara masioñe ty famele'iareo.

⁵ Onjoneñe ambone' i likerañey rehe,
ry Andrianañahare,
ambone' ty tane toy iaby ty enge'o.

⁶ Nikotepe' iareo harato o liakoo;
mibokobokoke ty fiaiko;
nihalia' iereo koboñe ty aoloko eo,
f'ie nigodoñe am-po'e ao. Selà

⁷ Mijadoñe ty troko ry Andrianañahare,
eka, gañe ty troko;
hisabo raho, eka hisabo fandrengeañe.

⁸ Mivañona, ry engeko!
Mitroara ry kararàke naho marovany,
hampitsekafako ty fanjirik'andro!

⁹ Hañandriañe Azo raho ry Talè
añivo' ondatio eo,
ho rengeko an-tsabo
amo kilakila'ndatio ao,

¹⁰ Amy te ra'elahy pak' an-dindiñe aña
ty fiferenaiña'o;
le pak'an-drahoñe eñe ty hatò'o.

¹¹ Onjoneñe ambonen-dikerañ'eñe rehe
ry Andrianañahare,
ty enge'o ambone' ty tane bey toy.

58

Ho a i Talè, Sabo' i Davide ami'ty feo : Ko Rotsahe'o ¹ Toe mitaron-
kavantañañe
hao t'ie mitsiñé?

mizaka an-kahiti'e hao, ry ana' ondatio?
² Hete, te mone hatsivokarañe
 ty itolõña'areo an-troke ao;
 lanjae' areo amy taney
 o fitavanam-pitâ'areoo.
³ Amoean-kovin-drene'e ty lo-tsereke,
 mañariok' aña vata'e miboloañe
 ty mpivolam-bande.
⁴ Hoe vorem-pandrefe'ala ty vore' iareo,
 manahake o meren-kareñeñe
 manentsen-tsofiñeo,
⁵ tsy hahatsanoña'e ty fikoràn'ambiasa
 ndra ty pandrombo-jiny bey.
⁶ Ry Andrianañahare,
 rofoto am-bava'e ao o nife'eo,
 atrankaño ty famotsi' o liona tora'eo,
 ry IEHOVÀ
⁷ Angao hisaok' aña iereo hoe rano vohitse;
 Lonik'abey te ho zoeñe
 domoke o ama-paleo
 t'ie mañohatse o fale'eo.
⁸ Lonike t'ie hanahake ty harevo'
 o sifotse mihamodo te misitseo, hoe ajaja miboloañe tsy mahatrea i àndroy.
⁹ Aolo te hahamae valàñe o afom-patikeo,
 le fonga ho faohe'e an-talio
 ty leñe nahohate mibebañe,
¹⁰ Hirebeke o vañoñeo
 te mahaisake i famaleañey,
 ho sasà'e an-dio' o tsivokatseo o fandia'eo
¹¹ Vaho hanao ty hoe ondatio:
 Toe tsy ho po-tambe o vantañeo;
 toe eo t'i Andrianañahare
 mizaka an-tane atoy.

59

Ho a i Talè, ami'ty Altasete, Sabo' i Davide, ie nampandroñe' i Saole ty anjomba'e hañe-doza ama'e. ¹ Hahao an-drafelahiko raho
 ry Andrianañahare :
 ampitroaro an-kaboañe
 ty amo miatreatre ahikoo.
² Avotsoro amo mitolon-katsivokarañeо,
 vaho rombahao am'ondaty
 mampiori-dioo.
³ Hehe t'ie mamandroñe ty fiaiko,
 robohe' o mpitrotrofiak' amako,
 tsy ty amo fiolakoo ndra o tahikoo, ry IEHOVÀ.
⁴ Tsy o fandilarakoo ty falisa' iareo
 hiatreatre ahy;
 mivañona hañolora'o vaho mivazohoа.
⁵ Ihe arè ry IEHOVÀ,
 Andrianañahare' i màroy,
 Andrianañahare Israele,
 mivañona, handilova'o o fifeheañeo;

ko tretrezeñe o mpiola lo-tserekeo. Selà
⁶ Mibalike haleñe iereo,
mañaolo hoe amboa
vaho mikariokariok' amy rovay.
⁷ Hehe t'ie mamore am-bava,
fibara ty an-tsoñi'e, manao ty hoe:
Ia ty mahajanjiñe.
⁸ F'ihe, ry IEHOVÀ, ro hiankahak' am'iareo, hene sirikae'o o fifeheañeo.
⁹ O ry Haozarako, fitamakoo;
kijoli-aboko t'i Andrianañahare.
¹⁰ Hiaolo ahy t'i Andrianañaharem-piferenaiñ' ahiko,
hampisamban' Añahare o rafelahikoo.
¹¹ Ko vonoe'o hey iereo,
tsy mone haliño ondatikoo;
ampirererero ami'ty haozara'o,
vaho afotsaho, ry Talè, fikala'ay.
¹² ty amo hakeom-palie' iareoo,
o saontsim-pivimbi'e, ee t'ie ho tsepaheñe am-pirengenvoha'e, naho amo
fatse vaho fandañitse aaka' iareoo.
¹³ Mongoro an-kaviñerañe,
zamano ho modo,
hampandrendrehañe te mifehe
am' Iakobe ao t'i Andrianañahare,
sikala añ'olo' ty tane toy aña, Selà
¹⁴ Mimpoly haleñe iereo,
mañaolo hoe amboa,
vaho mbeo-mbeo an-drova atoy,
¹⁵ Mihelahela avao, mipay haneñe,
vaho mitromoroñe naho tsy vontsy.
¹⁶ Aa naho zaho, ho saboeko ty haozara'o; Eka, hipoñafako te maraiñe
ty amy fiferenaiña'oy;
amy te Ihe ro tambohoko,
fitsolohako añ'andron-kaloviloviako.
¹⁷ Ry Haozarako,
hisaboako am-pandrengeañe:
amy te mpikalañ' ahy t'i Andrianañahare,
i Andrianañaharem-piferenaiñ' ahiy.

60

Ho a i Talè, Onin-tsabo' i Davide ty hotakotake nanoe'e amy Arame Naharaime naho i Arame Tsobay; naho ty nibaliha' Ioabe, ie ginio'e t'i nte-Edome rai-ale tsy roe-arivo lavy amy Vavatanen-tsiray. ¹ Ry Andrianañahare nifarie'o, dinemo'o, nifomboa'o; ehe sotraho zahay.

- ² Nampiezeñezeneñ'e ty tane;
- nabenta'o; melaño o jeba'eo, fa miozoñozoñe.
- ³ Nampañaoniña'o fisotriañe ondati'oo; nampitohofa'o divay mampivem-bèñe.
- ⁴ Nanolora'o viloñe
o mañeveñe ama'oo;
- honjoneñe ty ami'ty hatò. Selà
- ⁵ Soa te ho hahàñe o kokoa'oo;
rombahao am-pità'o havana; toiño raho.

6 Nitsara ami'ty hamasiña'e
 t'i Andrianañahare:
 Hitreñe raho, ho zaraeko ty Sekeme,
 vaho ho zehoko ty vavatane' i Sokote;
 7 ahiko t'i Gilàde, naho ahiko t'i Menasè; fiaron-dohako t'i Efraime,
 kobaiko t'Iehodà*;
 8 Koveta fisasako t'i Mòabe;
 fampipohan-kanako t'i Edome
 miroharohà ty amako, ry Pilisty.
 9 Ia ty hampihova ahy
 amy rova fatratsey?
 Ia ty hiaolo ahy mb' Edome mb'eo?
 10 Tsy Ihe hao ry Andrianañahare
 ty nahafary anay?
 Tsy hitraofa'o fionjonañe hao,
 ry Andrianañahare o lahindefo'aio !
 11 Oloro amy rafelahiy zahay,
 fa tsy vente'e ty fandrombaha' ondatio.
 12 I Andrianañahare ro fahareketa'ay,
 Ie ty handialia o rafelahi'aio.

61

Ho a i Talè, Sabo' i Davide, arabe' ty marotaly 1 Janjiño ty koiko, ry Andrianañahare;
 haoño o halalikoo.
 2 Boak' añ'olon-tane aña ty ikoihako Azo, naho opo ty troko;
 iaolò mb'an-damilamy abo te amako.
 3 Amy te Ihe ro fipalirako,
 haboañe fatratse aolon-drafelahiko eo.
 4 Hitoboke an-kivoho'o ao nainai'e raho;
 hipalirako añ'alo' o ela'oo. Selà
 5 Fa jinanji'o o nifantàkoo
 ry Andrianañahare;
 tinolo'o ty lova' o mpañeveñe
 amy tahina'oio.
 6 Tompeo andro ty andro' i mpanjakay,
 ho tarirats' an-tariratse o tao'eo.
 7 Hiambesatse añatrefan' Añahare
 eo nainai'e;
 afantoho hañambeñe aze
 ty fiferenaiñañe naho ty hatò.
 8 Le ho bangoeko an-tsabo nainai'e ty tahina'o,
 ie henefeko boak' andro o nifantàkoo.

62

Ho a i Talè, amy Iedotone, Sabo' i Davide 1 I Andrianañahare avao ty fitamà'
 ty fiaiko am-pitsiñañe,
 boak' ama'e ty fandrombahañe ahy.
 2 Ie avao ro lamilamiko
 naho ty fandrombahañe ahy;
 i haboam-pipalirakoy;

* 60:7 Fot 49:10

tsy hasiotsiotse raho.

³ Pak'ombia ty ho boroboñafe' areo t'indaty? Hanjevoa'areo iaby hoe t'ie rindriñe mitondritse, ndra kijoly migavengaveñe.

⁴ Ty hamotsahañe aze ami'ty haabo'e avao ro fikilia'iareo : mpitea volam-bande; mitata am-palie, f'ie mamatse añ'ova ao Selà

⁵ I Andrianañahare avao ty liñisa'o ampitsiñañe, ty fiaiko toy; boak' ama'e ty fisalalàko.

⁶ Ie avao ro lamilamiko naho fandrombahañe ahy; ty kijoliko abo; tsy hasiotse raho.

⁷ I Andrianañahare ty ampipohañe ty fandrombahañe ahy, naho ty engeko; ty lamilamin-kaozarako;

fipalirako t'i Andrianañahare.

⁸ Miatoa ama'e nainai'e, ondatio, adoñaño añatrefa'e ty arofo' areo;

fitsolohan-tika t'i Andrianañahare. Selà

⁹ Toe hakoahañe avao o ana' i Dameo, lañitse o ana' ondatio;

ie atraok' am-pilanjâne eo, le maivañe te ami'ty kofòke.

¹⁰ Ko iatoa'o ty fikatramoañe, naho ko manao fañiran-kafoake am-pikamerañe.

Ndra te mionjoñe o varao ko ampirampian' arofo.

¹¹ Nitsara indraike t'i Andrianañahare, tsinanoko indroe ty hoe:

An'Andrianañahare o haozarañeо,

¹² vaho ama'o, ry Talè, ty fiferenaiñañe, songa tambezé'o mañeva o fitoloña'eo t'i ondaty.

63

Sabo' i Davide, ie tam-patram-bei' Iehoda ¹ Ry Andrianañahare, Ihe ro Andrianañahareko;

hitsoek' azo raho;

miheahea azo ty fiaiko,

misalala azo ty sandriko

hoe an-tane kánkañe vozake

tsy aman-drano,

² Ho treako amy miavakey ao rehe, hahaisake ty haozara'o naho ty enge'o.

³ Toe soa te amo haveloñeо

ty fiferenaiña'o,

hisabo Azo o soñikoo.

⁴ Hañandriañe Azo t'ie mbe veloñe; i tahina'oy ty hañonjonako tañañe.

⁵ Anjañe ty fiaiko hoe aman-tso-kena naho solike,

vaho mandrenge Azo
 an-tsoñy mifale ty vavako,
⁶ ie mahatiah y Azo am-pandreañe ao,
 naho mitsakore Azo am-pijilovan-kaleñe.
⁷ Ihe ro mpañolotse ahiko,
 naho an-kalon'ela'o ao ty hirebehako.
⁸ Mipitek' ama'o ty fiaiko;
 manohañe ahy ty fità'o havana.
⁹ Fe hajoroboñe an-tsikeokeok'ao
 ze mipay handrotsake ty fiaiko;
¹⁰ Havariñe an-kaozara' i fibaray iereo
 ho tsindrohe' ty farasy.
¹¹ Andriañahare ty irebeha' i Mpanjakay,
 mirañorañoa ze hene mifanta ama'e;
 fe hampidiñeñe ty faliem-pandañitse.

64

Ho a i Talè, Sabo' i Davide ¹ Janjiño ty feoko, ry Andrianañahare,
 ami'ty fitreontreoñako;
 ambeno ty fiaiko
 ami'ty fihembaña'e o rafelahio.
² Aetaho raho ami'ty fikililia'
 o tsivokatseo;
 amo fikitrohan-drati' o lo-tserekeo.
³ O maniom-pameleke hoe fibara
 vaho mañohatse entam-bola-mafaitse
 hoe t'ie ana-pale,
⁴ hañohara' iareo añ'etake ty vañoñe;
 tifire'iereo amy zao tsy aman-tahotse.
⁵ Mifañosike t'ie mikitroke, mikinia hampibitrotse fandri-bo añ'etake,
 ami'ty hoe: Ia ty hahaisake?
⁶ Tsikarahe' iereo ze tsihavokarañe,
 Fa nañeneke safiry soa lahatse.
 Toe miheatse ty añ'ova' ondaty ao,
 naho ty arofo'e.
⁷ F'ie hañiririan' Añahare ana-pale
 aniany avao le ho fere
⁸ hampitsikapy iareo;
 sesehe' o famele'iareo avao,
 songa mibioñe aña ty mahaisake iareo.
⁹ Le hene hirevendreveñe ondatio,
 hitalily o fitoloñan' Añahareo
 vaho hañarahara o tolon-draha'eo.
¹⁰ Hifale am' IEHOVÀ o vantañeo,
 hipalitse ama'e;
 vaho hene handrenge aze
 o mahity añ'arofoo.

65

Ho a i Talè; Takasy, Sabo' i Davide. ¹ Mitamà azo e Tsiône ao ty sabo,
 ry Andrianañahare:
 vaho ama'o ty ifantàñe.

- ² O ry Mpiganjin-kalaly,
mitontoñe ama'o ze kila sandriñe.
³ Maozatse te amako o sata tsi-vokatseo,
fe o fandilara'aio, le takona'o.
⁴ Haha t'indaty joboñe'o
vaho ampitotohe'o
himoneñe an-kiririsa'o ao:
ho heneke ty hasoa añ'akiba'o ao zahay,
an-kivoho'o miavake ao.
⁵ Fitoloñañe mampañeveñe
ro anoiña'o anay an-kavantañañe,
ry Andrianañaharem-
pandrombahañañe anay,
Ihe ro fatokisa' ze olon-tane iaby,
naho o an-driake tsietoitaneo.
⁶ Ie ami'ty haozara'o ro nampijadoñe
o vohitse misadia hafatrarañe;
⁷ Ihe ro mampitsiñe ty fitroña' o riakeo, ty figodobo' o kinerakeo,
vaho ty fivoamboaña' o borizañe.
⁸ Mampañeveñe o mpimoneñe añ'olon-taneo o vilo'oo; vaho ampire-
behe'o
ty fionjona' o maraiñeо naho o haleñeо.
⁹ Tilihe'o ty tane toy
naho tondraha'o rano:
vaho fanjaka ty nampamokara'o aze
amyakan'Añahare miheneheney;
nañalankaña'o *ampemba,
zay ty fañajaria'o i taney.
¹⁰ Anoe'o lonte soa o hato'eo, amata'o o vavahali'eo:
lotrahe'o ami'ty ereke,
tahie'o ty fitovoa'e.
¹¹ Sabakae'o ami'ty havokara'o ty taoñe,
ampsopatsopahen-tslike o oloñolo'oo;
¹² Mitsirtsioke o fiandrazañe
am-patrambeio;
vaho misikim-pirebehañe o vohitseo.
¹³ Misaroñe biby fiandrazeñe o hivokeo,
miravak' ampemba o vavataneo;
mitreñe an-kaehake le misabo.

66

- Ho a i Talè, Sabo an-Titike, Takasy* ¹ Mipoñafa rebek' aman'
Andrianañahare, ry hene tane toy !
² Isabò ty volonahe' i Tahina'ey,
toloro engeñe mitoabotse.
³ Anò ty hoe aman' Añahare : Ra'elisy o tolon-draha'oo !
Ami'ty hajabahinan-kaozara'o ty hitsolofiña' o rafelahi'oo aolo'o eo.
⁴ Hene hitalaho ama'o ty tane toy,
naho hisabo fandrengeñañe ama'o;
ho bangoe' iereo ty tahina'o. Selà
⁵ Antao hañisake o fitoloñan'Añahareo:

* **65:9** Ndra ze atao vare, tsako, bajiry n. t. i.

mampañeveñe o ana'ondatio o sata'eo.

⁶ Nabali'e ho tane kànkañe i riakey,
nitsaham-pandia' iareo i oñey;
añe ty nirebehan-tika.

⁷ Manjaka an-kaozara'e nainai'e re,
jilovem-pihaino'e o fifeheañeo,
we te tsy hiroharoha' o mpiolao. Selà

⁸ Andriaño t'i Andrianañaharen-tika
ry ondatio,
ipoñafo feom-pandrengeañe;

⁹ Ie mitañe an-tika veloñe, naho
tsy apo'e hasitse o fandian-tikañe.

¹⁰ Fa namente anay rehe,
ry Andrianañahare, fa natrana'o hoe fitranaham-bolafoty.

¹¹ Nasese'o an-karato ao, vaho nampibabe'o faloviloviañe
o hàto'aio.

¹² Nampiningire'o ambone' ty
añambone'ay t'indaty,
zahay nisibek' afo naho rano,
fe naaka'o ho an-kavokarañe.

¹³ Himoak' añ'anjomba'o ao raho
hinday engan-koroañe;
hañenefako o nifantàkoo,

¹⁴ ze vinolan-tsoñiko vaho rineham-bavako t'ie niankohéke.

¹⁵ Hengaeko kobatroke horañe, an-katòen' añondri-lahy,
hisoroñe bania naho oselahy. Selà

¹⁶ Mb'etoa hijanjiñe ry mpañeveñe
aman' Añahare iabio,
le ho talilieko o nanoe'e an-kavelokoo.

¹⁷ Nitoreo am-bavako,
le nampionjoneko an-delako.

¹⁸ Ie mahatrea hakeo an-troko ato,
le tsy hijanjiña' i Talè.

¹⁹ Fa toe mijanjiñe ahy
t'i Andrianañahare
haoñe'e i feon-kalalikoy.

²⁰ Andriañeñe t'i Andrianañahare,
amy te tsy ambohoa'e i filolofakoy,
vaho tsy afaha'e amako
ty fiferenaiña'e.

67

Ho a i Talè, amo marovanio; onin-tSabo, Takasy ¹ Toe hasoan' Añahare
tika naho tahie'e,

kinokinohe'e amantika i lahara'ey, Selà
² Ho fohineñe an-tane atoy o lala'oo,

amo kilakila 'ndatio ty fandrombah'a'o.

³ Ho renge' ondatio rehe
ry Andrianañahare;

hene handrenge Azo ondatio.

⁴ Hifalea' o fifeheañeo
naho hisaboe'iereo an-kaehake;
fa ho zakae'o ami'ty hiti'e ondatio,

vaho hiaoloa'o o fifeheañe
an-tane atoio. Selà

⁵ Ho renge' ondatio rehe
ry Andrianañahare;
fonga handrenge Azo ondatio.

⁶ Fa nahatoly sabo ty tane, nitahy antika t'i Andrianañahare,
i Andrianañaharen-tikañey.

⁷ Tahien' Añahare tikañe; soa te hañeveñe ama'e ze hene olon-tane.

68

Ho a i Talè, Sabo' i Davide. Onin-tsabo ¹ Hiongake t'i Andrianañahare,
le hiparaitake o rafelahi'eo;

vaho hibioñe aolo'e eo o malaiñe Azeo.
² Hambañe ami'ty fampisaohañe

hatoeñe, isaoho aña ka;
manahake ty fitranaha' o karafo tantele aolo' afoo,
ty hikoromaha' o tsivokatseo
añatrefan'Añahare.

³ Ho ehake o vañoñe,
hirebeke añañatrefan'Añahare eo,
hiriñariña an-kobaiñe.

⁴ Misaboa aman' Añahare,
bangò i tahina'ey;
onjono i Mpiningitse miranga
i montombeiy, IÀ ty tahina'e;

vaho mitreñà añañatrefa'e eo.
⁵ Raem-bode-rae naho mpañomey to
amo vantotseo t'i Andrianañahare
an-kivoho'e miavake ao.

⁶ Ampimoneñan' Añahare
añañakiba ao ty jorý;
akare'e mb'an-kavokarañe o rinohipo;
fe mitobok' an-tane kirikintàñe ao
o mpitrabikeo.

⁷ O Andrianañahare, ie niaoloa'o ondati'oo, ie nihofiha'o firanga
i fatram-beiy, Selà

⁸ niezeñezene i taney, nihotrake i likerañey aolo' i Andrianamboatse,
Nihondrahondra ty Sinay añañatrefa' i Abo Tia, Andrianañahare' Israele eo.

⁹ Nanondraha'o oran-joba,
ry Andrianañahare;
nivent'e o i lova'o navozoy,
¹⁰ Nitobok' ao i mpirai-lia'oy,
nifahana'o ami'ty havokara'o
o rarakeo, ry Andrianamboatse.

¹¹ Nitaroñe t'i Talè;
mitozantoza o rakemba mitalily
i entañeio.

¹² Nitriban-day mb'eo o mpanjakan-
dahindefoñe! Nivoratsake;
le ho zarae' i tambatse an-kiboho'e ao o kinopakeo,

¹³ ie mandre am-bàlan'añondry ao, le manahake
ty elan-deho misarom-bola-foty;
mimilemiletse volamena o volo'eo.

¹⁴ Ie nampivarakai' i El-Sadai

i mpanjaka rey,
 le niavy an-Tsalmone ty oram-panala.

¹⁵ Vohin' Añahare ty vohy Basane;
 vohitse lako-lengo'e ty haboa' i Basane;

¹⁶ Inoñe ty ikiraña' areo
 ry haboañe maro-lengo'eo,
 i vohitse nirien'Añahare himoneña'ey?
 Eka himoneñe ao nainai'e t'IEHOVÀ.

¹⁷ Añ'ale'ale o sareten' Añahareo,
 arivo-añ'arivo'e;
 ama'e ao an-kamasiña'e t'i Talè
 manahake e Sinay aña.

¹⁸ Nionjoñe añ'abo eñe rehe,
 nikozozote'o an-drohy
 o fandrohizañeо,
 nandrambe ravoravo am'ondatio,
 vaho amo mpiolao,
 himoneña' Ià, Andrianañahare.

¹⁹ Andriañeñe t'i Talè mpivave o kilankan-tikañeо boak'andro,
 i Andrianañaharem-
 pandrombahantikañey. Selà

²⁰ Andrianañaharem-pañaha an-tika
 t'i Andrianamboatse;
 Toe a IEHOVÀ Talè
 ty famotsorañe an-kavilasy.

²¹ Le hanorotoro ty loha' o rafelahi'eo
 t'i Andrianañahare,
 ty kovo-doha minankanankañe
 amo hakeo'eo.

²² Hoe t'i Talè:
 Hampoliko o e Basaneo,
 hahereko boak' an-keraheran-driak' ao,

²³ Ho demohem-pandia'o an-dio
 o rafelahi'oo,
 hanañ'anjara an-dion-drafilahy ka
 o lelan' amboa'oo.

²⁴ Fa niisa' iareo o fañaveloa'oo
 ry Andrianañahare,
 ty fionjonan' Añahareko, toe
 i Mpanjakakoy, mb'amy miavakey ao.

²⁵ Miaolo o mpisaboo,
 manonjohy o mpititikeo;
 añivo'e ao o somondrara
 mampikantsankantsàñe o kantsàñeо :

²⁶ Andriaño am-pivory ao
 t'i Andrianañahare,
 i IEHOVÀ boak'am-pigoangoña' Israele.

²⁷ Ingo t'i Beniamine tsitso'e,
 miaolo iareo,
 o roandria' Iehodào am-pirimboña'eo, o roandria' i Zeboloneo,
 o roandria' i Naftalio.

²⁸ Fa linilin' Añahare'o ty haozara'o;
 mihaozara! Ry Andrianañahare,
 nañenefa'o ho anay zay,

29 ty kiboho'o e Ierosalaime aña,
 ty ibanabanà' o mpanjakao ama'oy.
 30 Endaho o biby hako am-bindao,
 o añombelahy maroo
 rekets' o dronga' ondatioo,
 songa mandialia tseram-bolafoty; navarakai'e ondaty tea alio.
 31 Hiavotse e Mitsraime ao o sorotà'eo,
 halisa hañity fitàñe aman'Añahare
 t'i Kose*.
 32 Misaboa aman'Andrianañahare,
 ry fifehea' ty tane toio;
 rengeo an-tsabo t'i Talè; Selà
 33 I miningitse andindi'
 o likerañe haehaeo,
 Inay, ampionjone'e i fiarañanaña'ey,
 i fiarañanañañe ra'elahi.
 34 Iantofo te an'Andrianañahare
 ty haozarañe
 ambone' Israele eo ty ahe'e
 an-dikerañe ao ty hafatrara'e.
 35 Mampañeven-drehe,
 ry Andrianañahare, an-toe'o miavake ao;
 I Andrianañahare' Israele,
 ro mpanolotse haozarañe
 naho hafatrarañe am'ondati'eo.
 Andriañeñe t'i Andrianañahare !

69

Ho a i Talè, Sabo' i Davide ami'ty feo : O Talìfokeo.

1 Rombaho raho ry Andrianañahare
 fa nizilike añ'ovako ao ty rano.
 2 Milempotse an-ditsake lalek' ao raho,
 tsy ao ty ho liàñe;
 fa nijolofoñe an-drano lalek' ao
 naho mandipotse ahy o alon-driakeo.
 3 Mahamokotse ahy ty fitañiako,
 maike ty am-peoko ao;
 milesa o masokoo amy fisalalako
 an'Andrianañaharekoy.
 4 Mandikoatse o volon-dohakoo
 ty malaiñe ahy tsy am-bente'e;
 maro ty te handrotsak' ahiko,
 ie rafelahiko tsy an-dengo'e;
 havahako hao ty tsy nikamereko?
 5 O Andrianañahare, arofoana'o
 ty hadagolako,
 vaho tsy mietak' ama'o o tahikoo.
 6 Tsy zaho abey ty hisalara'
 o misalala Azoo,
 ry IEHOVÀ, Talè' i Màroy;
 ee te tsy zaho ty himeñara'

* **68:31** Kose: Etiopia; Tane atimo' i Mitsraime

o mipay Azoo,

ry Andrianañahare' Israeleo.

⁷ Amy te Ihe ro nahatantezako rabioñe;
manaroñe ty tareheko ty hasalarañe.

⁸ Fa ambahiny aman-drolongoko
raho naho alik' amo anan-drenekoo.

⁹ Amy te namotsek' ahiko
ty fahimbañako amy anjomba'oy;
le nidoñe amako ty inje'
o mañinje Azoo.

¹⁰ Zaho nitañy aña'ovako ao
naho nililitse, ninjare tiñe amako.

¹¹ Ie nanoeko lamba-gony ty sikiko, le nirabioñeñe.

¹² Mivolambolañe ahy o miambesatse an-dalambeio;
vaho ibekoa' o jikeo.

¹³ Fa naho zaho, Ihe ty ihalaliako,
ry IEHOVÀ, ami'ty andro mete,
ry Andrianañahare ami'ty habeim-piferenaiña'o, toïño raho
ami'ty hatòm-pandrombaha'o.

¹⁴ Ihahao amo litsakeo,
le ko apo'o hijoroboñe,
avotsoro amo malaiñe ahio,
vaho amo rano lalekeo.

¹⁵ Ee t'ie tsy hopoe' o fisorotombaňeo,
ndra hagodra' i tsikeokeokey;
ndra hitsiteha' ty vava' i koboñey.

¹⁶ Toïño raho ry IEHOVÀ,
ami'ty hasoan-kafatraram-pikokoa'o;
mitoliha amako ami'ty
harà'elahim-piferenaiña'o.

¹⁷ Ko aetak' ami'ty mpitoro'o
ty lahara'o, fa ampoheke,
masikà te manoiñe.

¹⁸ Harineo ty fiaiko, vaho jebaño;
vilio amo rafelahikoo.

¹⁹ Arofoana'o ty tiñe'ko, ty hameñarako, naho ty hasalarako;
añatrefa'o eo ze hene rafalahiko.

²⁰ Fa nahakoretse ty troko o rabioñe'o,
lifon-kasiloke raho;
nipay tretre, fa tsy nitendreke;
naho mpañohò, fa tsy nahatre'a.

²¹ Hete! finaha' iareo yoreke raho
vaho finantso' iareo vinegra
amy haran-dranoakoy.

²² Ho fàndrike ty fandambaňane aña'atrefa' iareo;
ie mierañerañe te mikoropoke.

²³ Haieñe o fihaino' iareoo,
tsy hahaisake,
vaho ampiozoño nainai'e o toha'eo.

²⁴ Adobaño am' iereo ty haviñera'o,
le ampitsepaho ami'ty fifombo'o
miforoforo.

²⁵ Hangoakoake ty tobe' iareo;

tsy himoneña' ondaty o kiboho'eo.
²⁶ Amy te sarerahe'e i linafa'oy,
 vaho nindrae' iereo ty fanaintaiña'
 o vinonotrobo'oo.
²⁷ Tompeo tahiñe ty hakeo' iareo,
 le ko apo'o hifoak' an-kavantaña'o ao.
²⁸ Faoho amy boken-kaveloñey iereo,
 tsy hitrao-pisokitse amo vañoñeo.
²⁹ Misotry naho marare raho;
 ampañonjono ahy añ'abo ey
 ty fandrombaha'o, ry Andrianañahare.
³⁰ Ho bangoeko an-tsabo
 ty tahinan' Andrianañahare,
 naho honjoneko am-pañandriañañe.
³¹ Ie ho no' IEHOVÀ mandikoatse ty vosy valo-ay reke-tsifa naho hotro.
³² Ho oni' o mpirèkeo le ho ehake;
 ry mpipay an' Andrianañahare,
 misotrafa añ'arofo.
³³ Fa mahajanjiñe o rarakeo t'IEHOVÀ,
 vaho tsy sirikae'e o an-drohio.
³⁴ Misaboa Aze ry likerañeо naho
 ty tane toy,
 ry riakeo naho ze hene misorok' ao.
³⁵ Fa ho rombahen'Añahare ty Tsionne,
 naho hamboare'e o rova' Iehodào
 vaho himoneña ao iereo ho hanañañe.
³⁶ Ho lovae' ty tiri' o mpitoro'eo,
 himoneña' o mikoko i tahina'eio*.

70

Ho a i Talè, Sabo' i Davide Faniahiañe ¹ Hahao raho ry Andrianañahare,
 Malisà hañolots' ahy ry IEHOVÀ.
² Ehe ampimeñaro naho verevereo o mipay ty fiaiko;
 hampibalih'e mb'eo, vaho ho salareñe o falefale amy faràrekoio.
³ Hampipoliañe an-kameñarañe
 ze manao ty hoe: Hý! Hý!
⁴ Ampirebehañe ze hene mipay Azo,
 hifale ty ama'o;
 le hitolom-panao ty hoe
 o mpitea ty fandrombaha'oo:
 Onjono t'i Andrianañahare.
⁵ Fe poie'e naho rarake raho;
 Malisà mb'amako ry Andrianañahare;
 Ihe ro mpañolotse naho mpañaha ahy; taentaeno ry IEHOVÀ.

71

¹ Ihe ry IEHOVÀ, ro itsolohako;
 ko apo'o ho salareñe,
² Votsoro ami'ty havantaña'o,
 naho hahao;
 atokilaño amako ty ravembia'o

* **69:36** Sab 5:11, 119:132, Ies 56:6

vaho rombaho.

- ³ Ehe t'ie ho vato fimoneñako,
ho fimpoliako;
fa nafanto'o ty handrombahañe ahiko;
Ihe ro lamilamiko naho rova fiaroko.
⁴ Avotsoro an-tañan-do-tsereke raho,
ry Andrianañahareko
ami'ty fivontitira' ty mpandilatse
naho i mpampisoañey.
⁵ Fa Ihe ro fitamàko, ry IEHOVÀ TALÈ;
ty natokisako boak'ami'te nahajalahy.
⁶ Ihe ty nirampiako
boak'an-kovin-dreneko ao;
Ihe ty nañakatse ahy an-tron-dreneko;
Rengeko nainai'e rehe.
⁷ Filatsà' i mèroy raho,
f'Ihe ro fipalirako maozatse.
⁸ Pea' ty fibangoñañe naho ty fiasiañ'Azo
lomoñandro ty vavako,
⁹ Ko aitoa'o raho naho fa bey;
ko mamorintseñe ahy naho
milesa ty haozarako.
¹⁰ Fa nikinia' o rafelahikoo;
vaho mitrao-pikilily ahy
o mivoñoñe ty fiaikoo,
¹¹ ami'ty hoe:
naforintsen' Añahare,
horidaño arè vaho tsépaho amy t'ie
po-pañiolotse.
¹² Ry Andrianañahare, ko ihànkaña'o,
ry Andrianañahareko,
malisà hañolots' ahy.
¹³ Ho salareñe naho mongoreñe
o manisý ty fiaikoo;
le hoboñañ' inje naho hameñarañe
o mipay hijoy ahikoo.
¹⁴ Fa naho zaho, hitama nainai'e
vaho honjoneko avao
ty fandrengeako Azo.
¹⁵ Ho talilie' ty vavako o havantaña'oo,
naho o fandrombaha'o lomoñandroo,
fe nofiko ty hamaro'e.
¹⁶ Hindeseko o tolon-draha'o ra'elahio,
ry IEHOVÀ TALÈ;
ho taroñeko ty havantaña'o, ty Azo avao.
¹⁷ Ry Andrianañahare, fa nanare'o ahy boak' ami'ty nahajalahy ahy;
pake henaneo,
taroñeko avao o raha fanjaka fanoe'oo.
¹⁸ Aa ndra t'ie bey naho fotivolo,
ry Andrianañahare, ko farie'o
ampara' te atalilikò añ'afeafe
ty haozara'o;

ty hafatrara'o amy ze hene ho avy.
¹⁹ Pak' andindiñe añe ty havantaña'o,
 ry Andrianañahare.
 Ihe namonitse o raha ra'elahir:
 ry Andrianañahare,
 ia ty mañirinkiriñe ama'o?
²⁰ Ihe nampahatrea ahiko
 haemberañe maro naho hasotriañe;
 ro hameloñ'ahy,
 hañakatse naho hampipoly ahy
 hirik' an-kerakeran-tane ao.
²¹ Ehe, onjono ty engeko,
 vaho mitoliha hañohò ahy.
²² Ho rengeko ami'ty mandalina ka,
 ty ami'ty hatò'o, ry Andrianañahareko;
 ho saboeko ami'ty marovany,
 ry Masi-Toka' Israele.
²³ Hipoñake an-drebeke o soñikoo,
 ie mandrenge Azo an-tsabo,
 naho i fiaiko jineba'oy.
²⁴ Ho talilie' ty lelako lomoñandro
 o havantaña'oo,
 fa salatse, toe meñatse
 o mipay hijoy ahikoo.

72

A i Selomò ¹ Toloro amy mpanjakay ty fizakà'o, ry Andrianañahare,
 vaho amy ana' i mpanjakaiy ty havantaña'o,
² Hizaka'e an-kahiti'e ondati'oo,
 o mpisotri'oo an-katò.
³ Hinday fanintsiñañe
 am' ondatio o vohitseo,
 naho havañonañe o haboañeo.
⁴ Ho mei'e to o rarake am'ondatioo,
 ho rombahe'e ty ana' o poi'eo,
 vaho ho demohe'e ty mpamorekeke.
⁵ Hañeveñe ama'o iereo
 naho mbe ey i androy,
 vaho mbe eñe i volañey,
 amy ze hene tariratse.
⁶ Ie hizotso manahake ty orañe
 an-teteke vaho tinatake eo,
 hoe ereke mampiboboke ty tane.
⁷ Hiraorao amo andro'eo o vañoñeo:
 vaho am-pierañerañañe vokatse
 ampara' te mimosaoñe i volañey.
⁸ Ho fehè'e ty boak' an-driake eñe,
 pak'an-driak' aña ka;
 le boak' amy sakay pak'amo olon-taneo.
⁹ hilokoloko ama'e o mpimoneñe
 am-babangoañeo;
 vaho hitsela lemboke o rafelahi'eo.
¹⁰ Handroroñe ama'e o mpanjaka'

i Tarsiseo naho o tokonoseo;
 hañenga ama'e o mpanjaka' i Tsebà
 naho i Sebào.
¹¹ Eka, hibokokoa' ze kila mpanjaka,
 hene fifeheañe ro hitoroñe aze.
¹² Himbae'e ty rarake te mitoreo,
 naho i mpisotriy,
 vaho i tsy amam-pañimbay.
¹³ Hiferenaiña'e ty maifoifo naho o poi'eo, vaho ho rombahe'e
 ty fiai' o mavomavoo.
¹⁴ Ho jebañe'e ami'ty famorekekekeañe
 naho amo hasiahañeо ty fiai'iareo,
 fa sarotse am-pivazohoa'e eo ty lio' iareo.
¹⁵ Ho velon-dre!
 hatolotse aze ty volamena' i Sebà; añonjono halaly ama'e nainai'e,
 andriaño lomoñandro.
¹⁶ ho vakots' ampemba i taney, an-dengon-kaboañe ey,
 le hihelakelake hoe e Lebanonone aña
 o havokara'eo;
 vaho handrevake hoe ty ahe' i taney
 o boak'an-drovao.
¹⁷ Tsy ho tampetse nainai'e ty tahina'e; tsy ho modo aolo' i àndroy ty
 tahina'e;
 vaho hifampitata ty ama'e ondatio,
 ze kilakila ondaty hanao aze soa-tata.
¹⁸ Andriaño t'IEHOVÀ Andrianamboatse,
 Andrianañahare' Israele,
 Ie avao ro manao raha tsitantane.
¹⁹ Bangoeñe nainai'e i tahina'e
 lifo-bolonahetsey;
 mañatseke ty tane toy ty enge'e.
 Ie zay! naho Amena!
²⁰ Migadoñe eo ty filolofa' i Davide, ana' Iesae.

Fange Faha III

Sabo 73 - 89

73

Sabo' i Asafe ¹ Toe soaen' Añahare t'Israele
 naho o malio aña'arofoo.
² Aa naho zaho,
 didý tsy ho napolatitse o tombokoo;
 ho nidorasitse o liakoo.
³ Ie nitsikirike o mpievoñevóñeo*,
 naho nitreako ty havokara' o lo-tserekeo,
⁴ Ie tsy manaintaiñe te mihomake,
 jangañe ka ty sandri' iareo.
⁵ Tsy ampoheke manahake ondatio;
 mbore tsy tokoen-draha
 manahake ondaty ila'eo.
⁶ Aa le miravake fiebotseborañe
 am-bozo'eo;
 manaroñ' iareo hoe sikiñe

* **73:3** Iob 21:7, Iir 12:1-2, Sab 73:17 92:6-7

o hasiahañe mandoviakeo,
⁷ Mampibotiritse o fihaino'eo ty solike,
 etsake naho tampe-draha-irieñe ty tro'e.
⁸ Manivetive iereo, mikinia famorekekeeañ' an-karatiañe.
⁹ Fa najado' iareo hiatreatre o likerañe
 o falie' iareoo,
 mikariokariok' an-tane atoy
 o famele' iareoo.
¹⁰ Aa le mimpoly atoy ondati'eo,
 naho genohe' iereo i rano era'ey.
¹¹ Le hoe iereo :
 Aia te haharofoanan' Añahare?
 mahilala hao i Andindimoneñey?
¹² Inay ie, o lo-tserekeo—
 ie mierañerañe manombo vara avao.
¹³ Toe tsy vente'e ty nañalioveko ty troko;
 naho nanasa tañañe an-kalio-tahiñe.
¹⁴ Nalovilovy lomoñandro raho;
 vaho nililoveñe boa-maraiñe.
¹⁵ Lehe ataoko te, zao ty ho volañeko;
 hete! tsy ho nahity amo tariran' ana'oo.
¹⁶ Fa ie nitsakoreako,
 haharendreke o raha zao,
 le nihamokorañe o masokoo,
¹⁷ Ampara' te niziliheko
 an-toen'Añahare miavake ao;
 vaho nahaisake ty figadoña' iareo.
¹⁸ Toe apo'o an-tane malama iereo;
 ampikorovohe'o mb'an-karotsahañe ao.
¹⁹ Hoke! akore ty fiantoa' iareo anianike,
 Fa binotsa' ty firevendreveñañe.
²⁰ Hoe nofy t'ie tsekake; ry TALÈ,
 ie miyañon-dRehe
 le ho heje'o vintañ' iareo.
²¹ Fa nikokentrekokentreñe ty troko naho niteveke ty an-tsapavoako ao,
²² Akore ty hanèko naho
 ty habahimoako, hoe biby añatrefa'o eo.
²³ Fe mpiama'o nainai'e raho;
 rinambe'o ty tañako havana,
²⁴ Hiaoloa'o ami'ty fanoroa'o,
 vaho ho rambese'o
 mb'añ'engeñe mb'eo.
²⁵ Ia ro ahiko an-dikerañe ao,
 naho tsy Ihe?
 le tsy amam-pisalalàko an-tane atoy naho tsy Ihe.
²⁶ Milesa ty nofoko naho o ovakoo,
 fa i Andrianañahare ro haozaran-
 troko naho ty anjarako nainai'e.
²⁷ Toe hihomake ze lavits' Azo;
 songa aitoa'o ze miamboho
 ama'o hañarapiloa'e.
²⁸ Fe soa ho ahy ty fañarineako
 aman'Añahare,
 fipalirako t'i IEHOVÀ TALÈ,

hataliliko iaby o tolon-draha'oo.

74

Fanoroa' i Asafe ¹ Ry Andrianañahare,
 ino ty ifaria'o anay zafe-anake?
 Ino ty ifomboa'o o añondry fiandraze'oo?
² Tiahio i valobohòke vinili'o haehaey,
 i foko jineba'o ho lova'oy !
 naho ty vohi' i Tsioné fimoneña'oy.
³ Aonjono o fandia'oo
 mb'amy hakoahañe nainai'ey,
 jinoi' i rafelahiy ze hene raha
 an-toe' i miavakey ao*.
⁴ Niroharoha añivo' o famantaña'oo
 o rafelahi'oo;
 najado' iareo ty vilo' iareo ho viloñe.
⁵ Sata'e ty maonjom-pekoñe
 aña'ala matahetse ao;
⁶ Ie henaneo, mamatsike
 am-pekoñe naho rabosàke
 o varamba'e nitsenèñe an-tsokitseo.
⁷ Finorototo' iereo pak'an-tane
 i efe'o miavakey;
 nitivae' iereo i fimoneñan-
 tahina'o masiñey.
⁸ Hoe ty fisafirin-tro'iareo:
 Antao haharo ambaneñe iaby iereo;
 Fonga nitomontoe' iareo
 o toem-pivorin' Añahare an-taneo.
⁹ Tsy mahatrea o vilo'aio zahay;
 tsy amam-pitoky ka; naho
 tsy ama'ay ty mahafohiñe te hombia.
¹⁰ Pak'ombia ry Andrianañahare,
 te mbe hanítse avao i rafelahiy?
 Ho tsambolitio' o malaiñ'azo nainai'e hao i tahina'oy†?
¹¹ Ino ty nanitaha'o ty fità'o?
 I fitàn-kavana'oy?
 Afaho boak' aña'araña'o ao ty fità'o,
 vaho mongoro?
¹² Toe mpanjakako boake haehae
 t'i Andrianañahare,
 mitoloñe fandrombahañe an-tane atoy.
¹³ Riniaria'o an-kaozarañe i riakey
 vaho dinemo'o an-drano ao
 o loha' i fañaneñeio.
¹⁴ Hinoto'o o loha' i fañanen-driakeio,
 hamahana'o o mpimoneñe
 am-patrañeo.
¹⁵ Nipoñafe'o o rano mitsirtsiokeo
 naho o sakao;
 nimaihe'o o oñe mikararake nainai'eo.

* **74:3** Sab 79:1-13 † **74:10** Sab 74:18

16 Azo ty antoandro, Azo ka ty haleñé;
 fa nihajarie'o o hazavàñeо naho i àndroy
 17 Najado'o iaby o fiefetsefe' ty tane toio,
 nanoe'o ty asotry naho ty asara.
 18 Tiahio, ry IEHOVÀ,
 te niteratera i rafelahiy,
 vaho nitivae' o lo-tserekeo i Tahina'oy.
 19 Ko atolo'o ami'ty biby hèko ty deho'o,
 ko haliño'o nainai'e o nanilofe'oo.
 20 Ambeno i fañinay,
 fa atseke kibohon-kasiahane
 o toetse maieñé' an-taneo !
 21 Ko hampolie'o an-kasalarañé
 o demokeo!
 fa hibango i tahina'oy
 o misotrio naho o poie'eo.
 22 Miongaha, ry Andrianañahare,
 ihalalio o azoo;
 tiahio ty fiterà' i dagolay
 lomoñandro.
 23 Ko haliño ty feo' o rafelahi'oo;
 mitoabotse nainai'e ty fifandragaragà'
 o mitroatse ama'oo.

75

Ho a i Tale, Sabo' i Asafe, takasy ami'ty feo : Ko Mandrotsake ¹ Fa nañandriañé Azo zahay
 ry Andrianañahare !
 fa nañandriañé Azo,
 fa marine i tahina'oy,
 fa nitaroñeñé o fitolona'o fanjakao.
² Ie amotoañako andro;
 le hizaka ami'ty fahiti'e raho.
³ Mitranake ty tane toy
 naho ze kila mimoneñé ao,
 Zaho ty nampijadoñé o faha'eo. Selà
⁴ Hanoeko ty hoe amo mpirengevokeo:
 Ko mandroharoha!
 le amo lo-tserekeo:
 Ko mañonjon-tsifa.
⁵ Ko zonjoeñé añ'abo o tsifa' areoo,
 vaho ko mivolañé an-kagàn-kàtoke.
⁶ Fa tsy boak'atiñana ndra ahandrefa
 ndra am-patrambey aña ty fañonjonañé.
⁷ I Andrianañahare ro mizaka;
 afotsa'e ty raike le aonjo'e ty raike.
⁸ Am-pità' IEHOVÀ ao ty fitovy
 pea divay mandroso, lifo-pilaroañé;
 le ampidoañé'e;
 toe ho drofote' ze fonga lo-tsereke
 an-tane atoy,
 vaho hagodra' iareo o karafo'eo.
⁹ Fa naho zaho, ho talilieko nainai'e,

ho rengeko an-tsabo t'i Andrianañahare' Iakobe.
¹⁰ Fonga ho kitsihoko ty tsifa'
 o lo-tserekeo,
 fe honjoneñe ty tsifa' o vantañeо.

76

Ho a i Talè, Sabo' i Asafe, Titiheñe ami'ty marotaly ¹ Fohiñe e Iehodà ao
 t'i Andrianañahare;
 ra'elahy e Israele ao i tahina'ey.
² E Salema ao ty kivoho'e;
 e Tsiône ao ty fimoneña'e.
³ Teo ty nampipeñafa'e
 o ana-pale nibebañeo,
 o kalan-defoñeo, o fibarao,
 naho o hotakotakeo. Selà
⁴ Mireandrean-drehe, am-bolonahetse, mandikoatse ty vohitse aman-
 tsindroke.
⁵ Nivoloseñe o fanalolahio,
 ie nilañake ty rotse, ndra raik' amo lahi-maozatseo
 tsy nahaisake ty fità'e.
⁶ Ami'ty trevo'o,
 ry Andrianañahare' Iakobe,
 le sindre nitsikorak' an-drotse
 ty mpiningitse reke-tsoavalà.
⁷ Ihe le Ihe avao ro añaeveñañe!
 Ia ty mahafitroatse añatrefa'o eo te ihe ro viñetse?
⁸ Nampijanjiñe'o boak' an-dikerañe aña
 ty zaka,
 nihembañe ty tane toy vaho nitsiñe,
⁹ ie nitroatse hizaka t'i Andrianañahare
 handrombake o mpisotri' ty tane toio. Selà
¹⁰ Toe handrenge Azo
 ty haboseha' ondatio,
 ho sadiañe'o ty tsy niritse
 amo haviñerañeo.
¹¹ Mifantà am'IEHOVÀ
 Andrianañahare' areo, le henefo;
 Songa mañengà amy
 Mampañeveñey o mañohok' azeo.
¹² Aitoa'e ty kofò' o roandriañeo;
 irevendreveña'
 o mpanjaka' ty tane toio.

77

Ho a i Talè, ami'ty Iedotone, Sabo' i Asafe
 Ty feoko mb'aman' Añahare
 naho itoreovako;
 ty feoko mb'aman' Añahare,
 yaho nanokilañä'e ravembia!
² Amy andro nahampohek' ahiy
 t'ie nipay i TALÈ;
 an-taña nahity, tsy nigebañe te haleñe;
 nifoneñe tsy hohöeñe ty foko.

3 Ie mahatiah y raho, ry Andrianañahare
 le mitretretretre, ie tsakorèko,
 le mitoirañe ty troko. Selà
 4 Tana'o tsy hikòpoke o holi-masokoo;
 embetse raho tsy mahafivolañe.
 5 Nereñereko o andro taoloo,
 o taoñe haehaeo,
 6 Tiahiko o nititihako an-kaleñeo;
 mifañaoñe ami'ty troko raho,
 le hoe ty fitsakorean-troko:
 7 Haitoa' i Talè zafe-anake hao?
 le lia'e tsy hisohe'e hao?
 8 Fa modo kitro añ'afe'e hao
 ty fiferenaiña'e?
 Fa nilesa kitro-katroke hao
 i nampitamae'ey?
 9 Nihaliñon'Añahare hao ty fatariha'e?
 nagabe'e an-kaviñerañe ao hao
 i fitretreza'ey? Selà
 10 Le hoe raho : Zao ty halemeako:
 Ie ataoko ho mete miova
 ty fitàn-kavana' i Andindimoneñey.
 11 Ho tiahiko ty fitoloña' Ià,
 hahatsikaitse o raha tsitantane
 nanoe'o haehaeo.
 12 Ho hene tsakorèko o fitoloña'oo,
 hereñerèko o tolon-draha'oo.
 13 Ry Andrianañahare, masiñe* ty lala'o;
 ia ty ndrahare ra'elisy
 hañirinkiriñe aman' Añahare?
 14 Ihe ro Andrianañahare
 mitolon-kalatsàñe!
 fa naboa'o am' ondatio ty haozara'o.
 15 Nijebañem-pità'o ondati'oo,
 o tarira' Iakobe naho Iosefeo. Selà
 16 Nahatrea Azo o ranoo,
 ry Andrianañahare,
 ie nahatrea azo i ranoy
 le nivalitaboake !
 nitabohazake i lalekey.
 17 Nampikojojooke orañe o rahoñeo;
 nigorogodoiñe i likerañey,
 nimb'etia mb'atia ka o ana-pale'oo.
 18 Tam-po' i tangololahiy
 ty fivola' i ampi'oy;
 nampireandreañe' i helatsey
 ty voatse toy!
 nihondrahondra naho niozoñozoñe
 ty tane toy.
 19 Nitoañe' i lala'oy i riakey,
 i rano jabajabay ty nilalan-tsile'o;
 vaho tsy nioniñe o liam-pandia'oo.
 20 Narahe'o hoe lia-raike ondati'oo, am-pità' i Mosè naho i Aharone.

* 77:13 Ies 35:8

78

Fanoroa' i Asafe ¹ Tsendreño o fañòhakoo ry ondatiko,
 atokilaño mb'am-pivolañam-bavako
 o ravembia' areoo.
² Ho sokafeko ty vavako handrazaña'e:
 ho lañoneko razan-tsaontsy
 miheotse boak'an-kaehae'e;
³ o jinanjin-tika naho fohin-tikañe vaho natalilin-droae aman-tikañe.
⁴ Aa le tsy haetantika amo ana' iareoo,
 fa hatalilin-tika amo tariratse ho avio
 ty fandrengeañe IEHOVÀ, naho ty haozara'e vaho o fitoloña'e
 ra'elahy nifonire'eo.
⁵ Fa noriza'e e Iakobe ao ty taroñe naho najado'e e Israele ao t'i Hake
 linili'e aman-droaen-tikañey,
 hañanara' iareo o ana' iareo,
⁶ hampahafohina' iareo
 ty tariratse ho avy,
 naho o ajaja mbe hasamakeo,
 hitroara' iareo hañoke o ana'eo,
⁷ soa te ho aman'Añahare ty fatokisa'e, vaho tsy handikofa' iareo
 o fitoloñan' Añahareo,
 fe hambena' iere o lili'eo;
⁸ naho tsy hitsikombe o roae' iareoo; tariratse mitangingìñe naho miola,
 tariratse tsy nampifahatse stroke,
 tsy nigahiñe aman' Añahare ty arofo'e.
⁹ Nimpitam-pale ninday fale
 o ana' i Efraimeo
 f'ie niamboho tañ' andro' i hotakotakey.
¹⁰ Tsy nambena' iareo
 i fañinan' Añaharey,
 vaho nifoneñe tsy hañavelo amy Tsara'ey.
¹¹ Nihaliño' iareo o fitoloña'eo—
 o halatsàñe naboa'e am' iareoo,
¹² o raha tsitantane nanoe'e añatrefan-
 droae' iareo e Mitsraimeo, an-tete' i Tsòañe ao.
¹³ Finatsi'e i riakey naho nampisorohe'e mb'eo iereo!
 najoja'e hoe votry i ranoy.
¹⁴ Le niaoloa'e an-drahoñe iereo
 te antoandro,
 naho an-kazavàñ'afó te haleñe
 am-para' te niporea.
¹⁵ Finoi'e o vato am-patrañe,
 finaha'e rano bey manahake i an-dalekey;
¹⁶ Nampitotsaha'e torahañe ty lamilamy vaho nampikararaha'e rano hoe
 oñé.
¹⁷ Fe mbe nandilara' iareo,
 niola amy Abo Tiañey
 am-babangoañ' aña.
¹⁸ Nitsohe' iereo an-stroke
 t'i Andrianañahare,
 nihalaly mahakama
 ty amy hadrao'iareo.
¹⁹ Toe, nandrabio' iareo

t'i Andrianañahare, ami'ty hoe:
 Mahafañalankañe fandambañañe
 an-dratraratra ao hao
 t'i Andrianañahare,
²⁰ Eka, finofo'e i vato
 nampidoandoan-dranoy,
 vaho nampanganahanae'e o torahañeo.
 Aa vaho hahafanjotsoa'e mofo ka?
 he ho fahana'e hena hao ondati'eo?
²¹ Aa ie jinaji' IEHOVÀ,
 le niforoforo ty fifombo'e,
 naho namiañañe afo t'Iakobe,
 vaho nionjoñe am' Israele ty haviñerañe,
²² Amy t'ie tsy natoky an'Andrianañahare,
 vaho tsy niatoa' iareo ty fandrombaha'e;
²³ Fe linili'e o rahoñe amboneo,
 naho sinoka'e o lalambein-dindìñeо,
²⁴ nampikojojoaha'e mane ho kamae'iereo;
 nanjotsoa'e ampemban-dikerañe.
²⁵ Nikama ty mofom-panolalahy ondatio! nampidobaña'e mahakama
 naheaneñe!
²⁶ Nampikofaohe'e an-dikerañe ey
 ty tiok' atiñanañañe vaho
 nitehafe'e an-kaozarañe i tiok' atimoy.
²⁷ Nampidoañe'e am' iareo
 ty hena hoe lemboke,
 voroñe amañ'elatse
 mira amo fasen-driakeo!
²⁸ nampivotrahe'e aivo'
 ty tobe'e ao,
 niarikoboñe i Toem-pimoneña'ey.
²⁹ Aa le nikama iareo vaho nianjañe
 amy te nanjotsoa'e ty hasiji' iareo.
³⁰ Ie mboe nibòro ty drao' iareo,
 mbe tam-palie' iareo ao i henay,
³¹ le nihelofe' ty haviñeran' Añahare
 navetra'e o nanjofak' am'iereo,
 vaho nampihotrahe'e o jinoboñ' Israeleo.
³² Ie amy zay iaby, mbe nitolon-kakeo iereo, tsy niantoke
 o fitoloña'e fanjakao.
³³ Aa le nampigadoña'e an-kamodoañe
 ty andro' iareo,
 naho an-kebahebake ty tao' iareo.
³⁴ Ie zinevo'e iereo, naho nipay aze,
 nisoloho vaho nitsoeke
 an'Andrianañahare,
³⁵ le nahatiahys te lamilami' iareo
 t'i Andrianamboatse,
 naho t'ie Mpijkeba' iareo
 i Andrianañaharen-dindimoneñey.
³⁶ Fe kinabea' iareo am-palie;
 vaho nandañitse am-pameleke.
³⁷ Toe tsy nifahatse ama'e o arofo' iareoo,

naho tsy nigahiñe amy fañìna'ey.

³⁸ Fe amy fitretreza'ey,
le hinaha'e o hakeo' iareoo,
naho tsy rinotsa'e;
beteke natoli'e ty haviñera'e,
vaho tsy fonga nitroboa'e o fifombo'eo !

³⁹ Nitiahi'e te nofotse avao iareo,
tioke mihelañe naho tsy mibalike.

⁴⁰ Impire hao ty niodia' iareo
am-patrambey aña,
vaho nampioje'Aze an-dratraratra aña?

⁴¹ Eka, niamboho naho nitsok' an'Andrianañahare iereo,
vaho nanigike i Masi' Israeley

⁴² Tsy nitiahi' iereo ty fità'e,
i andro nijebaña'e iareo
amy rafelahiy,

⁴³ Ie nampipoha'e e Mitsraime aña
o vilo'eo naho
an-tete' i Tsòañe ao o halatsà'eo.

⁴⁴ Nafote'e ho lio o saka' iareoo,
vaho tsy nimete kamaeñe
o toraha' iareoo.

⁴⁵ Nañiraha'e laletse nifamorohotse,
namotseke, naho sahoñe nandrotsake.

⁴⁶ Natolo'e amo oletseo
ty havokara' iareo,
amo valalao ty tolim-pitoloña' iareo.

⁴⁷ Rinotsa'e ami'ty havandra
ty vahe' iareo, naho
an-drano-panala o sakoa' iareoo.

⁴⁸ Nengae'e amy havandray
o añombe' iareoo,
vaho an-kelatse nibelabela
o mpirai-tro' iareoo.

⁴⁹ Nahitri'e am'iereo ty fiforoforoa'e;
fifomboñañe naho haviñerañe vaho hankàñe; firimboñan' anjely mpan-
drotsake.

⁵⁰ Nampimirae'e lalañe i haviñera'ey;
tsy navotso'e am-pihomahaña
ty fiai'iareo,
fa napo'e ho zamanen-kiria
ty havelo' iareo

⁵¹ Binaibai'e ze hene tañoloñoloña'
i Mitsraime, ty lohan-kaozara'iareo
an-kiboho' i Kame ao.

⁵² Nonjone'e hoe añondry ondati'eo;
vaho niaoloa'e mb'am-babangoñañe aña hoe lia-raike.

⁵³ Nindese'e tsy nolañeñe,
le tsy nihembañe iereo,
vaho nampiopoe' i riakey o rafelahio.

⁵⁴ Nindese'e mb'an-tane'e miavake mb'eo, sikala'ami'ty vohitse
vinilim-pità'e havana toy.

⁵⁵ Rinoa'e aolo' iareo ka o kilakila'ndatio;

le zinara'e an-taly ty lova' iareo,
vaho nampitobea'e amo akiba'
iareoo o fifokoa' Israeleo.

⁵⁶ F'ie nangala-pañahy naho niola aman'Añahare Andindimoneñe, vaho
tsy nambena' iereo o taro'eo;

⁵⁷ Te mone nibalintoa naho nañorike
ty tsy fatokisan-droae' iareo;
niolake hoe fale mibatriotse.

⁵⁸ Ie nikai-jaka ama'e
amo tamboho' iareo;
vaho nampamarahy aze
amo raham-pahasive'iareoo.

⁵⁹ Nahajanjiñe t'i Andrianañahare
le nifombo vaho niheje'e vintañe t'Israele.

⁶⁰ Le naforintse'e ty kivoho'e e Silo ao, i akiba nanoe'e
himoneña'e añivo'ondatoy.

⁶¹ Nasese'e mb' am-pandrohizañe
añe ty haozara'e,
le am-pit ' o rafelahio ty enge'e.

⁶² Natolo'e ami'ty fibara ka ondati'eo,
naha-fiforoforo Aze i lova'ey.

⁶³ Nabotse' ty afo o ajalahi'eo;
naho tsy nanan-tsabo haonjo e
o somondrara'eo.

⁶⁴ Nampikorovohem-pibara
o mpisoro' iareoo,
naho tsy nahafandala o remavoi' iareoo.

⁶⁵ Niva o e amy zao t'i TAL 
hoe nirotse,
manahake ty fanalalahy niopo n-divay.

⁶⁶ Nampipolie'e an-dafa o rafelahi'eo,
le nametsaha'e hasalara e tsy modo
kitro katroke.

⁶⁷ Mbore nifarie'e ty kivoho' Iosefe;
le tsy jinobo'e ty tarira' i Efraime.

⁶⁸ Fe ginene'e ty fifokoa' Iehod 
i vohy Tsion  nikokoa'ey.

⁶⁹ Rinanji'e hoe o haboa eo
i toe'e miavakey,
manahake ty tane naore'e ho nainai'e
tsy ho modo toy.

⁷⁰ Jinobo'e ka t'i Davide mpitoro'e,
rinambe'e amo golobon'a ondrio.

⁷¹ Boak' am-piaraha e o a ondry
mampinonoo ty nendesa'e aze
hiaraha'e o tiri' Iakobe ondati'eo,
naho Israele lova'ey

⁷² Nifahana'e a ' arofo-va ona e le niaoloa'e am-pit  e mahimba e.

o kilakila 'ndatio* ty lova'o;
 fa tiniva' iereo i anjomba'o Masiñey
 zinevo' iereo ho am-botri-am-botry
 t'Ierosalaime .
² Finaha'e ami'ty fañova' o mpitoro'oo
 o voron-dikerañeo;
 naho ami'ty nofo' o nigahiñ' ama'oo
 o bibi' ty tane toio.
³ Nadoandoñañe hoe rano mb'eo mb'eo
 e Ierosalaime ao ty lio' iareo;
 ie tsy amam-pandenteke.
⁴ Fifosà' o am-paripari'aio zahay,
 mandrabioñe naho mitsikike anay o mañohok' anaio.
⁵ Pak'ombia ry IEHOVÀ?
 ho viñera'o nainai'e hao?
 Sikal'ombia ty mbe hibebañe
 hoe afo ty famarahia'o?
⁶ Adobaño amo kilakila ondaty tsy
 mahafahiñ'Azoo ty haviñera'o;
 naho amo tane tsy mikanjy i tahina'oio.
⁷ Fa nabotse' iereo t'Iakobe, naho
 nanoeñe tanàn-taolo ty fimoneña'e.
⁸ Ko tiahie'o ama'ay o hakeon-drae'aio,
 ampisalakao anay masika
 o fiferenaiña'oo,
 fa nafotsak' ambane.
⁹ Imbao, ry Andrianañaharem-
 pandrombahañ' anay!
 Ty amy enge' i tahina'oy;
 avotsoro, vaho saroño
 o hakeo'aio ty amy tahina'oy.
¹⁰ Aa vaho akore ty atao' o kilakila
 ondatio ty hoe :
 Aia t'i Andrianañahare' iareo?
 Ampahafohino o fifeheañe
 ampahaisaha'ay
 ty famaleañe o liom-pitoro'o nadoñañe.
¹¹ Ampiatrefañ' Azo
 ty fitretretretre' o miprohio;
 ty ami'ty harà' elahin-kaozara'o;
 hahao o tinendre havetrakeo.
¹² Le valeo im-pito añ'araña'
 o mañohok' anaio, o tivetive
 nafokafoka'e ama'oo ry Talè.
¹³ Soa te hañandriañe Azo nainai'e zahay ondati'o naho
 añondrim-piandraza'oo ,
 vaho hatalili'ay amy ze hene tariratse
 kitro añ'afe'e ty enge'o.

* ^{79:1} Sab 79:6-7; 74:1-23, Ies 63:18, Iir 51:51, Fir 1:10, Dan 8:13, 11:31, Mat 24:15

80

Ho a i Talè, ami'ty feo: Antsivam-pivory, titiheñe amo Marovanio. Sabo' i Asafe. ¹ Toloro ravembia ry Mpiarak' Israele,

ry Mpiaolo' Iosefe hoe t'ie lia-raike;
ry Mpiambesatse ambone' o kerobeo,
mireandreaña !

² Tsekafo añatrefa' i Efraime naho
i Beniamine naho i Menase ty haozara'o vaho mb'etoa hañimba anay !

³ Ry Andrianañahare, Ampolio zahay
naho ampireandreaño laharañe,
soa te ho tra-drombake zahay.

⁴ O ry IEHOVÀ Andrianañahare' i Màroy,
pak'ombia ty mbe hiviñera'o
ty halali' ondati'oo?

⁵ Nazots'o mofon-dranom-pihaino,
naho nampigenohe'o ranomaso
am-pitovy telo.

⁶ Ampanivetivè'o ondaty mañohok'anaio; vaho vereverè' o rafelahi'aio.

⁷ Ry Andrianañahare' i Màroy.

Ampolio zahay,
ampireandreaño ty lahara'o,
soa t'ie ho tra-drombake.

⁸ Nitsongoe'o boak'e Mitsraime ty vahe;
rinoa'o o kilakila'ndatio naho naketsa'o.

⁹ Nihatsafe'o ty tane aolo'e eo,
naho nampandaleke o vaha'eo,
vaho nanitsife'o i taney.

¹⁰ Nikopahe' i alo'ey o vohitseo;
naho o tsampa'eo o mendoraveñe ra'elgio.

¹¹ Nandrevake mb'amy riakey* o ra'eo,
naho pak'amy sakay aña o tora'eo.

¹² Aa vaho akore ty nandrotsaha'o o fahe'eo, hitimpona' ze miary eo,

¹³ Troattroae' ty lambon' ala,
vaho abotse' ze misitsitse an-kivoke ey.

¹⁴ Ry Andrianañahare' i màroy,
Ehe, Mibaliha, mijilova boak' an-dikerañe ao naho vazoho vaho tiliho ty
vahe toy,

¹⁵ Eka! i tora'e naketsam-pitàn-kavana'oy, i ana-dahy nampaozare'o ho
Azoy,

¹⁶ finorototo' ty afo, finira,
mihomake ami'ty fitrevohan-dahara'o.

¹⁷ Anampezo fitàñe indatim-pitàn-kavana'oy, i ana' ondaty nampifatrare'o
ho Azoy.

¹⁸ Vaho tsy hiambahoaa'ay;
Ehe sotraho, hikanjia'ay ty tahina'o.

¹⁹ Ry IEHOVÀ Andrianañahare' i Màroy; Ampolio zahay,
ampireandreaño ama'ay ty lahara'o,
vaho ho tra-drombake.

* **80:11** Riake: i Mediteraney

81

Ho a i Talè, Sabo' i Asafe Titiheñe amo Marovanio ¹ Misaboa
 aman'Añahare haozaranika;
 mipazaha an-drebeke aman'Añahare' Iakobe.

² Araho an-tsabo !
 Pehopeho ty kantsàñe;
 titiho ty jejo mamy-feo reketsé marovany.

³ Tiofo amy jiri-bolañey ty antsiva,
 amy pea-bolam- pamantañan-tikañey.

⁴ Fañè* ho a i Israele;
 sepèn' Andrianañahare' Iakobe.

⁵ Noriza'e am'Iehosefe[†] ho taroñe,
 ie niavotse le nanitsike ty tane' i Mitsraime;
 naho tsinanoko ty saontsy tsy napotako.

⁶ Nahahako an-tsoro'e eo i kilankañey,
 navotsotse amy lietsey o fità'eo.

⁷ Kinanji'o t'ie niampopheke,
 le rinombako;
 nanoiñe azo am-pikafiran' ampiñe ao;
 nitsoheako an-drano Meriba aña. Selà

⁸ Janjiño ry ondatiko, le ho toroako,
 ry Israele, hera ho haoñe'areo.

⁹ Tsy ho ama'ndrahare hafa rehe,
 tsy hitalaho
 amo saren-drahare ila'eo.

¹⁰ Zahò IEHOVÀ Andrianañahare'o
 ninday azo boak'an-tane' Mitsraime aña.
 atañatañao ty falie'o, le hetsaheko.

¹¹ Fe nihiritsiritse amako ondatikoo
 vaho nanjehats' ahy t'Israele.

¹² Aa le napoko horihe' iereo
 ty hagàn' arofo' iareo,
 homb'am-pisafiri' iareo avao.

¹³ Aa naho nijanjiñe ahy ondatikoo!
 naho nañavelo amo lalakoo t'Israele,

¹⁴ le ho nampitsolofiñeko aniany
 o malaiñe iareoo;
 vaho ho natoliko ty tañako hiatatre
 o rafelahi' iareoo!

¹⁵ Nioniñe te tsy to añatrefa' IEHOVÀ
 o malaiñe azeo,
 fe ho nainai'e eo t'Israele.

¹⁶ Le hanjotsoa'e ampemba soa iereo,
 naho hanjañeko an-tantelo boak'am-bato ao.

82

Sabo' i Asafe ¹ Mijohañe am-pivorim-panalolahy
 t'i Andrianañahare;
 mizaka añivom-pizaka eo.

² Pak'ombia ty mbe izakà' areo ami'ty tsy hiti'e,
 hañonjonañe o tsivokatseo? Selà

* **81:4** Sor 23:24, Num 10:10, 29:1 † **81:5** Iehosefe: Iosefe tinovoñ' i tahinan'A'har

3 Meo tò o rarakeo naho o bode-raeo;
 tohaño ty zo' o poie'eo naho o misotrio.
 4 Hahao o mahàtrao naho o malorèo;
 avotsoro am-pità' o lo-tserekeo.
 5 Tsy mahilala iereo, naho tsy mahafohiñe, mirererere aña'ieñe ao avao;
 fa naveve iaby o faha' ty tane toio.
 6 Nanao ty hoe raho: Mpizaka* nahareo
 songa anak' i Andindimoneñey.
 7 Fe hikoromake hoe ondaty avao,
 hikorovoke manahake ty raike
 amo roandriañeo.
 8 Miongaha, ry Andrianañahare,
 zakao ty tane toy,
 fa kila ho lovae'o o fifeheañeo.

83

Sabo' i Asafe, Takasy 1 Ko mianjiñe ry Andrianañahare
 ko mimosy vaho ko mañamahama,
 ry Andrianamboatse!
 2 Heheke, miroharoha o rafelahi'oo,
 mivoala-doha o malaiñe Azoo.
 3 Hikililie' iareo ondati'oo;
 mivory hikinia o mipalitse ama'oo.
 4 Antao, hoe iereo, haitoan-tika
 tsy ho fifeheañe ka.
 soa tsy ho tiahy ka ty aña'ara' Israeley.
 5 An-stroke miraike t'ie mikinia,
 mifañina fanjeharañe ama'o.
 6 O kiboho' i Edome naho Ismaeleo;
 i Moabe, naho o nte Hagio,
 7 i Gebale naho i Amone,
 naho i Amaleke;
 i Pilisty vaho o mpimone' i Tsoreo.
 8 Rekets' am' iareo ka t'i Asore;
 le fitañe am'iareo o ana' i Loteo. Selà
 9 Ampanahafo amy nanoa'o amy Midiane,
 amy Sisera vaho am' Iabene
 an-torahan-Kisone aña,
 10 i narotsake Endora aña rey,
 ninjare litsake amy taney.
 11 Ampihambaño amy Orebe
 naho amy Zeèbe o roandria'eo,
 fonga hanahak' i Zebake naho i Tsalmonà
 o ana-dona' iareoo
 12 ie nanoa'iareo ty hoe:
 Antao hitavañe o fiandrazen' Añahareo!
 13 O Andrianañahareko,
 anò hoe talion-deboke iereo,
 hoe kafokafo miatre-tioke !
 14 Manahake ty afo mamorototo ala,
 naho ty foroha mampisolebatse
 o vohitseo;

* 82:6 elohim: a'hare maro, mpizaka, anjely,

¹⁵ Aa le horidaño amy tangololahi'oy;
le ampihembaño ami'ty tio-bei'o.
¹⁶ Liforo hasalarañe ty vinta' iareo,
hipaia'e ty tahina'o*, ry IEHOVÀ.
¹⁷ Ie ho salareñe naho
hangebakebake nainai'e,
eka ho meñareñe naho hikoromake.
¹⁸ Hahafohina' ondatio te Ihe avao,
ro kanjieñe ty hoe IEHOVÀ,
Andindimone' ty tane toy.

84

Ho a i Talè: Sabo' o Ana' i Korao; amo Marotalio ¹ Honh! hamotsontane
ty kivocho'o
ry IEHOVÀ' i Màroy !
² Misalala ty foko, eka tsipike ty sihisihy
ty amo kiririsa' IEHOVÀO.
Mirebek' aman' Añahare
veloñe ty troko naho ty sandriko.
³ Hehe, nahatrea traño ty jorioke,
naho halañe ho aze i tintiñey,
hañopake o ana'eo
amo kitreli'oo ry IEHOVÀ' i Màroy,
Mpanjakako naho Andrianañahareko!
⁴ Haha o mimoneñe añañomba'o ao,
mandrenge Azo nainai'eo. Selà
⁵ Haha t'indaty naho ihe ro haozara'e,
añañarofo'iareo
o lalam-pamantañañe.
⁶ Ie miranga am-bavatanem-
pirovetañe* ao,
le ampanjarie'e tane manganahana,
vaho saroña' i oran-jobay fañanintsiñe!
⁷ Mañavelo an-kaozarañe
orihen-kafatrarañe iareo,
songa miatrek' an'Andrianañahare
e Tsiône ao.
⁸ Ry IEHOVÀ Andrianañahare'
i Màroy, janjiño ty halaliko;
toloro ravembia,
ry Andrianañahare' Iakobe. Selà
⁹ Vazohò ry Andrianamboatse
Mpikalan-defo'aiy,
isaho ty lahara' i noriza'oy.
¹⁰ Soa te ami'ty andro arivo,
ty andro raik' an-kiririsa'o ao;
hamake te mpañamben-dalam-
bein' anjomban'Añahareko raho,
ta te himoneñe an-kiboho'
o lo-tserekeo.
¹¹ Masoandro vaho fikalañe

* **83:16** Sab 44:21-22, 74:18, Ies 52:5, Iir 23:26-27 * **84:6** Heb: Baka

t'IEHOVÀ Andrianañahare,
 Mpanolotse falalàñe nahō engeñē
 t'IEHOVÀ: tsy eo ty raha soa
 ho tana'e amo mañavelo
 an-kavantañañeo.
¹² O ry IEHOVÀ i Màroy,
 haha t'indaty miato ama'o.

85

Ho a i Talè : Sabo' o Ana' i Korao ¹ Ry IEHOVÀ nisohe'o ty tane'o;
 nafote'o ty fañondevoza' Iakobe;
² napo'o ty tahi'ondati'oo
 Fonga nakopo'o o hakeo' iareoo; Selà
³ nasita'o iaby ty fifombo'o;
 niamboho'a'o ty fiforoforoan-kaviñera'o.
⁴ Ampolio zahay ry Andrianañaharem-
 pandrombahañ' anay,
 vaho apoho ty helo'o ama'ay.
⁵ Ho viñera'o nainai'e hao zahay?
 Hampitoie'o an-tariratse kitro
 añ'afe'e hao, o helok'añ'arofo'oo?
⁶ Tsy ihe hao ty hameloñe anay indraike,
 hirebeha' ondati'oo?
⁷ Atorò anay ty fiferenaiña'o,
 ry IEHOVÀ,
 toloro o fandrombaha'oo.
⁸ Ho tsendreñeko ty ho tsarae' IEHOVÀ
 Andrianañahare;
 fa fañanintsiñe ty taroñe'e am'
 ondati'eo nahō amo noro'eo;
 le ee abey t'ie tsy hibalintoa mb'an-kadagolàney.
⁹ Toe marine' o mañeveñe ama'eo
 ty fandrombaha'e,
 hitobea' o enge'eo an-tanen-tikañ' ao.
¹⁰ Mifañaoñe ty fiferenaiñañe
 nahō ty hatò;
 mifañondroke ty havantañañe
 nahō ty filongoañe.
¹¹ Mivoañe hirik'an-tane ao ty hatò,
 mijilo hirik'an-dikerañe aña
 o havantañañeo.
¹² Eka, hanjotsø ty soa t'IEHOVÀ,
 vaho hañomey ty voka'e ty tane'ay toy.
¹³ Hiaolo Aze ty havañonañe,
 hañajaria'e lalañe ho liam-pandia'e.

86

Halali' i Davide ¹ Atokilaño ty ravembia'o
 ry IEHOVÀ, le toiño raho,
 fa rarake nahō misotry.
² Ambeno ty fiaiko, fa mañorike Hake,
 Ihe ry Andrianañahareko, rombahø

o mpitoro'o mipalitse ama'oo.
³ Tretrezo raho, ry Talè,
zaho mitoreo lomoñandro.
⁴ Ampifaleo ty fiaim-pitoro'o,
fa Ihe, ry Talè, ro añonjonako troke.
⁵ Amy te Ihe, ry Talè, ro soa,
naho veka'e hañaha hakeo,
vaho lifotse fiferenaiñañe
ho amo mikanjy Azo iabio.
⁶ Toloro ravembia, ry IEHOVÀ, i halalikoy,
vaho haoño ty feom-pisoloohoako.
⁷ Hikanjiako ami'ty androm-pañemberañ' ahiko,
amy te hanoiña ahy rehe.
⁸ tsy eo ty fanalolahy hambañ'ama'o ry Talè;
vaho tsy eo ty fitoloñañe
manahake o Azoo.
⁹ Ze kila ondaty nitsenè'o,
ro homb' ama'o mb'eo hitalaho,
ry Talè, hibango ty tahina'o.
¹⁰ Jabahinake 'n-Iheo,
mpanao raha tsitantane;
Ihe avao ro Andrianañahare.
¹¹ Anaro ahy i lala'oy, ry IEHOVÀ,
hitsontihako ami'ty hatò'o;
anò tro-tokan-draho hañeveñako
i tahina'oy.
¹² Hañandriañe Azo raho, ry Talè
Andrianañahareko, an-kaliforan' troke,
vaho ho bangoeko nainai'e ty tahina'o.
¹³ Hinakinake ty hafatram-pikokoa'o amako, naho navotso'o ami'ty
halalen-tsikeokeok' ao ty fiaiko.
¹⁴ O Andrianañahare, fa mitroatse
amako o mpirengenvokeo;
vaho mipay hañe-doza amako
o lo-tsereke miotrañe,
ie tsy nampijadoñ' azo aolo' ty maso' iareo.
¹⁵ Fa Ihe, Talè, ro Andrianañahare
bey tretré naho hasoa,
malaon-kaviñerañe,
vaho lifo-piferenaiñañe naho ty hatò.
¹⁶ Mitoliha amako, le matariha,
ehe, andivao amo mpitoro'oo ty haozara'oo
vaho rombahö ty anak'am-pata'o.
¹⁷ Ehe, anoloro vilon-tsoa,
hahaisaha' o malaiña ahikoo hisalara'e,
amy te Ihe, ry IEHOVÀ, ro nañimba ahy
vaho nañohò ahy.

ry rovan'Añahareo : Selà

⁴ Ho talilieko i *Rahabe naho i Bavele o mahafohiñe Ahikoo; heheke ty Pilistý, naho i Tsore, miharo amy Kose; Nisamak' aña ty raike toy.

⁵ Fe ho volañeñe ty hoe e Tsioné ao : Intoy naho intia ro toly ama'e ao, i Andindimoneñey ty mañoreñ' aze.

⁶ Hañiake t'IEHOVÀ, ho volilie'e ondatio: Nisamak' ao toy. Selà

⁷ Aa le hanao ty hoe o misaboo naho o mitsolio, hene ama'o o fandoparakoo.

88

Sabo' o ana' i Kora, Ho a i Talè, titiheñe ami'ty feo: Ty Hasotria' o Hasilofaño. Fanoroa' i Hemane nte-Ezrà. ¹ Ry IEHOVÀ, Andrianañaharem-pandrombahañe ahiko,

itoreovako handro an-kaleñe añatrefa'o,

² Ehe te hiatrek' azo ty halaliko; atokilaño mb'amy fikaihakoy ty ravembia'o;

³ Fa losotse ty hasosoram-piaiko, vaho manòto-kibory* ty haveloko.

⁴ Volilieñe amo migodoñe mb'an-davak' ao raho; hoe ondaty nипitso-pañimba.

⁵ Mihoriñe amo vilasio raho, manahake o vinono mitsalalampatse an-kiborio, o tsy tiah'i'o kañeо, o naito am-pità'oo.

⁶ Navotra'o ami'ty loho herakerak' ao an-toe'e mimoromoroñe an-dalek' ao.

⁷ Napok' amako o fifombo'oo, naho naniloke ahy o kinera'oo. Selà

⁸ Fa naveve'o lavitse ahy o rañekoo, nampirihie'o ahiko. migoboñe atoan-draho tsy mahafiakatse;

⁹ Mitike amy hasotriakoy o masokoo. fa nikanjieko boak'andro, ry IEHOVÀ; fa namelarako tañañe.

¹⁰ Hanoa'o raha tsitantane hao o loloo? Hitroatse hañandriañ' Azo hao o angatseo? Selà

¹¹ Ho talilieñe an-donak' ao hao ty fiferenaiña'o? an-tsikeokeok' ao hao ty figahiña'o?

¹² Hampahafohineñe am-pimoromoroñañe ao hao o halatsà'oo,

* 87:4 Mitsraime zay * 88:3 Seoly : tsikeokeoke

naho an-tanem-pandikofañe
ao hao ty havañona'o?

¹³ Aa naho zaho, ihe ry IEHOVÀ ty itoreovako; mifanalaka ama'o boak'andro o halalikoo.

¹⁴ Ry IEHOVÀ akore te farie'o ty fiaiko?
Ino ty añetaha'o laharañ' amako?

¹⁵ Nalovilovy ho nikenkan-draho
ampara' ty nahajalahy ahiko,
fa nivavèko ty hetraketa'o,
vaho voretra.

¹⁶ Fa nandipotse ahy
ty fifombo'o miforoforo;
vaho fa nañito ahy
ty firevendreveñañe ama'o.

¹⁷ Niropak' amako lomoñandro hoe rano, le nanaron-kohok' ahy.

¹⁸ Toe nampihankàñe'o amako
ty mpikoko naho rañetse;
atehenako ty hamoromoroñañe.

89

Fanoroa' i Etane nte-Ezrà ¹ Ho saboeko nainai'e
ty fiferenaiña' IEHOVÀ,
hampahafohineko am-bava
ze hene tariratse mifandimbe
ty figahiña'o.

² Fa hoe raho: mioreñe nainai'e
ty fiferenaiñañe,
najado'o andindiñe ao ty figahiña'o.

³ Nanoeko fañina amy jinobokoy,
nifanta amy Davide mpitorokoy:

⁴ Hajadoko pak'añ'afeafe'e o tarira'oo,
naho hatroako amo hene tariratseo
ty fiambesam-panjakà'o. Selà

⁵ Ho rengè' o likerañe o halatsà'oo
ry IEHOVÀ, naho ty figahiña'o
am-pivori' o noro'oo.

⁶ Fa ia an-dikerañe ao ty
mañirinkiriñe am' IEHOVÀ?
Ia amo ana' o manjofakeo ty
hambakambañe am' IEHOVÀ?

⁷ I Andrianañahare
añeveña' ty fivori' o noro'eo;
hene ilatsa' o miariseho' azeo.

⁸ Ry IEHOVÀ Andrianañahare' i Måroy,
ia ty mañirinkiriñe azo?

Ry IÀ maozatseo, ohoñe'ty figahiña'o.

⁹ Fehe'o ty fitroña' o riakeo,
ie mitroatse o alo'eo le ampipendreñe'o.

¹⁰ Dinemodemo'o ty Rahabe
manahake o vinonoo;
binaibaim-pitàn-kaozara'o o rafelahi'oo.

¹¹ Azo o likerañe, Azo ka ty tane toy;
ty voatse toy naho ty halifora'e.

Ihe ro nañoreñe iareo.

¹² Ty avaratse naho ty atimo,
songa nitsenè'o;
rebehe' i Tabore naho i Kermone
ty tahina'o.

¹³ Maozatse ty sira'o, fatratse ty fità'o,
mionjoñe ty fitàn-kavana'o.

¹⁴ Ty havañonañe naho ty hatò
ro fioreñam-piambesa'o;
iatrefa' ty fiferenaiñañe
naho ty havantañañe.

¹⁵ Haha t'ondaty mahafohiñe
i fipoñafam-peoy,
Hañavelo ami'ty fireandreas-
dahara'o iereo, ry IEHOVÀ;

¹⁶ I tahina'oy ty hitreña' iareo
lomoñandro,
ie onjoñe' ty havantaña'o.

¹⁷ Ihe ro enge' ty haozara'iareo,
mañonjoñe ty tsifa'ay ty fañosiha'o.

¹⁸ A i IEHOVÀ ty fikalan-defo'ay,
a i Masi' Israeley ty Mpanjaka'ay

¹⁹ Teo ty nitsarae'o añ'aroñaroñe
amo noro'oo, ty hoe:
fa nimbako i fanalolahiy;

fa nonjoneko ty jinoboñe am' ondatio,
²⁰ nitreako t'i Davide mpitoroko;

i norizako amy soliko miavakeiy.

²¹ Ho gañe ama'e ty tañako,
hampaozatse aze ka ty sirako

²² Tsy hamañahy aze o rafelahio,
tsy hampilovilovy aze i anan-karatiañey.

²³ Ho demoheko añatrefa'e
o rafelahi'eo,
yaho ho zevoñeko o malaiñ'azeo.

²⁴ Ho ama'e ty figahiñako naho
ty fiferenaiñako,
ty añarako ro fañonjonañe ty tsifa'e.

²⁵ Hasampeko amy riakey ka ty fità'e,
naho ty fitàn-kavana'e amo sakao.

²⁶ Ho kanjie'e ami'ty hoe: Ihe ro Raeko,
Andrianañahareko, vaho
ty lamilamim-pandrombahañe ahiko.

²⁷ Hanoko tañoloñoloñako re
ho talèm-panjaka' ty tane toy.

²⁸ Hambenako ami'ty fiferenaiñako nainai'e, le hijadoñe ama'e ty
fañinako.

²⁹ Haoreko tsy ho modo nainai'e
o tarira'eo,

ho mira amo
andron-dikerañe ty fiambesa'e.

³⁰ Aa naho zehare' o ana'eo i Entakoy
naho tsy mañavelo amo fepèkoo,

31 naho lilare' iareo o fañèkoo, vaho tsy mitañ' o fandiliakoo,
 32 Le ho tiliheko an-kobaiñe ty fiolà' iareo,
 naho am-pòfoke o tahi' iereoo.
 33 Fe tsy hasintako ama'e
 ty fiferenaiñako,
 vaho tsy hivalik' ami'ty figahiñako.
 34 Tsy ho tivaeko i fañinakoy,
 ndra hañova ze naakan-tsoñiko.
 35 Teo ty nifantàko ami'ty hamasiñako,
 —zaho tsy handañitse amy Davide—
 36 Tsy ho modo nainai'e i tiri'ey,
 vaho manahake i masoandro aolokoy i fiambesa'ey;
 37 hioreñe nainai'e re manahake i volañey,
 vaho higahiñe manahake
 i valolombelon-dikerañey. Selà
 38 Fe sinoi'o aña raho, nifarieñe,
 niviñera'o i noriza'oy.
 39 Novohe'o ty fañina'o amy mpitoro'oy; nitivae'o an-debok'ao ty sabakan-
 enge'e.
 40 Fonga tinorotosi'o o kijoli'eo
 narotsa'o iaby o rova'eo.
 41 Ikopaha' ze hene miary eo;
 Andrabioña' o mifankarine ama'eo.
 42 Naonjo'o ty tañan-kavana'
 o malaiñe azeo;
 nampirebehe'o o rafelahi'e iabio;
 43 Mbore nafote'o i lelam-pibara'ey
 le tsy ampijohañe'o an-kotakotak' ao.
 44 Najihe'o ty enge'e, naho
 navokovoko'o an-tane eo i fiambesa'ey.
 45 Nitomore'o o andron-katora'eo, kinolopo'o hasalaran-dre. Selà
 46 Pak'ombia ry IEHOVÀ?
 Hietake nainai'e v'iheo?
 Sikala ombia ty hiforoforoa'
 ty fifombo'o hoe afo?
 47 Tiahio ty habori' o androkoo,
 akore ty hakoahañe nitsenè'o
 ze kila ana' ondaty !
 48 Ia t'indaty veloñe tsy ho liàn-kavilasy,
 ho haha'e ami'ty haozara'
 i kiboriy hao ty fiai'e? Selà
 49 Aia o fiferenaiña'o haehaeo, ry Talè,
 ze nifantà'o amy Davide ami'ty figahiña'o?
 50 Tiahio ry Talè, ty fañivañivañe
 i mpitoro'oy,
 ie otroñeko aña arañako ondaty maroo,
 51 ie kinizakiza' o rafelahi'oo, ry IEHOVÀ,
 ie ninjè' iareo o lia' i noriza'oio;
 52 Andriañeñe nainai'e t'IEHOVÀ.
 Ie zay, naho Amena.

Fange Faha IV

90

Ty Filoloha' i Mosè, Ondatin' Añahare ¹ Ry Talè, Ihe ni-fimoneña'ay amo tarira'ay iabio.

² Ie mboe tsy toly o vohitseo
mboe tsy tsinene'o ty tane toy
naho ty voatse toy,
boak' an-kaehae hambo'e aña
pak' an-kitro añ'afe'e aña,
Ihe ro Andrianañahare.

³ Ampolie'o mb'an-debok' ao ondatio
ami'ty hoe:
Mimpolia ry ana'ondaty.

⁴ Fa arivo taoñe am-pivazoho'a ty andro raike
toe hoe omale te nihelañe, ie
manahake ty fiambenañe an-kaleñe.

⁵ Sinao'o aña hoe an-tsorotombake iereo, le miròtse,
f'ie maraiñe, le hoe ahetse mipitsipitsike.

⁶ Mioboñoboñe te maraindraíne
mbore mitombo,
ie hariva miheatse vaho miforejeje.

⁷ Toe mongore' ty haviñera'o zahay,
mampangebahebak' anay ty fifombo'o.

⁸ Fa napo'o añatrefa'o o tahi'aio,
am-pireandrean-dahara'o eo
o hakeo'ay mietakeo.

⁹ Fonga mihelañe ami'ty fifombo'o
o andro'aio;

fa nagado'ay hoe fiselekaiñañe o tao'aio.

¹⁰ Ty andro' o tao'aio le fitompolo taoñe;
mete ho valo-polo, t'ie maozatse;
fe hamokorañe naho
fangoakoahañé avao ty enge'e,
migadoñe aniany, vaho mitiliñ'aña.

¹¹ Ia ty mahafohiñe ty haozara'
o haviñera'oo?
naho ty fañeveñañe mañeva Azo
ty ami'ty fifombo'o?

¹² Aa le anaro zahay hañiake o andro'aio,
hahazoa'ay arofo mahihitse.

¹³ Mimpolia ry IEHOVÀ ! Ombia?
iferenaiño o mpitoro'oo

¹⁴ Eneño an-kafatraram-pikokoa'o
te maraindray zahay,
hirebeha'ay naho hifalea'ay amo
hene andro'aio.

¹⁵ Ampifaleo mira amo andro
nampisotria'o anaio,
naho amo taoñe nahaisaha'ay haratiañe.

¹⁶ Fa halange amo mpitoro'oo
o fitoloña'oo,
naho ty enge'o amo ana' iareoo.

¹⁷ Ho aman-tika ty fañisoha' i Talè Andrianañahare'ay;

ajadoño ty tolom-pit  'ay;
eka aore   o satam-pit  'aio.

91

- ¹ I mpimone   am-pipalira'
i Andindimone  eiy,
ty hitoetse a  'alo' i El-Sadai ao,
² Hanoako ty hoe t'IЕHOV  :
Ty fiampirako, ty rova fitsolohako,
i Andriana  ahare fiatoakoy.
³ Ie ty mpa  aha azo boak'
am-bitsom-pamandri-boro  e ao,
naho boak' amy biloka mahahomakey.
⁴ Haholonkolo' e am-bolon-ela' e ao rehe,
ambane' o ela'eo ty hipalira'o;
fikalan-defo naho fikala-meso
ty hat  'e.
⁵ Tsy hahahemba  ' azo
ty hetraketrak' an-kale  e,
ndra ty ana-pale mihiriri  e
an-tari  androke.
⁶ Ndra ty kiria mitinga  e a  'ie  e ao
ndra ty angorosy mamotsake
naho antoandro.
⁷ Arivo ty mete hikorovok' a  ' ila'o eo,
le rai-ale ty am-pit  n-kavana'o eo,
f'ie tsy hitotok' azo.
⁸ O fihaino'oo avao ro hisamba,
hahaisake ty fandilova  e o lo-tserekeo.
⁹ Amy te IЕHOV  , fitsolohako,
i Andindimone  ey,
ty nanoe'o fimone  a  e,
¹⁰ Tsy hidoi  e ama'o ty hank  ane,
tsy hitotofan-angorosy ty akiba'o,
¹¹ Fa hafanto' e ama'o o anjeli'eo,
ha  ambe  e azo amo lia'o iabio;
¹² ha  notrotroa' e am-pit  'e ao,
tsy mone hadasi'o ami'ty vato ty fandia'o.
¹³ Ho li  'o ty liona naho ty fandrefeala;
ho hitsakitsahe'o ambanem-pandia'o eo
ty liona-tora' e naho i mere  ey.
¹⁴ Kanao ifahara' e koko, ho hahako,
havotrako an-kaboa  e ey
amy te fohi' e ty a  arako.
¹⁵ Ho kanjie' e, le ho toi  eko;
hindrezako te am-poheke,
ho votsorako vaho ho tolorako asi  e.
¹⁶ Hene  eko halava' havelon-dre;
vaho hampa  oni  eko aze
ty fandrombahako.

92

Sabo. Ho titiheñe ami'ty Sabotse ¹ Soa ty mañandriañe IEHOVÀ,
 ty misabo vaho mibango
 o tahina'oo ry Andindimoneñey,
² ty hitalily ty fiferenaiña'o
 boa'maraiñe;
 naho ty figahiña'o an-kaleñe,
³ ami'ty marovany folo-taly,
 naho ami'ty mandalina,
 vaho ami'ty fandrimotam-peon-jejo-bory.
⁴ Amy te Ihe ry IEHOVÀ ro mahaehak' ahy amo fitoloña'oo,
 irebehako o tolom-pità'oo.
⁵ Akore ty hajabahina' o tolon-draha'oo
 ry IEHOVÀ,
 toe miheatse o fivetseyetse'oo !
⁶ Tsy aman-kilala t'indaty mineñe,
 tsy maharendreke zao ty dagola:
⁷ t'ie mitiry hoe ahetsé o lo-tserekeo,
 naho fonga miraorao o tsy vokatseo,
 f'ie hafatse ho rotsaheñe kitro katroke.
⁸ Fa Ihe ry IEHOVÀ ro an-digiligy eñe
 nainai'e donia.
⁹ Heheke o rafelahi'oo ry IEHOVÀ;
 Ingo te hikoromake o malaiñ' Azoo;
 Fonga hibaibay ze mpanao raty.
¹⁰ Fa naonjo'o ty tsifako
 manahake ty an-drimo,
 fa hinosotse solike vao raho.
¹¹ Le hahatrety fisalalako
 amo rafelahikoo' o masokoo
 vaho ho tsanoñen-tsofiko
 ty fañiriako amo tsereheñe
 mivoalatse amakoo.
¹² Handrevake hoe satrañe o vantañe,
 manahake ty fitiria' o akao
 e Libanoneo ty hitomboa'e;
¹³ Tinongy añ'anjomba' IEHOVÀ ao,
 hitroñe an'kiririsan'Añahare eo.
¹⁴ Mbe hiregorego iereo te antetse,
 ho lifo-dranoke naho hirimboñe,
¹⁵ hitaroñe te vañoñe t'IEHOVÀ,
 lamilamiko, tsy ama'e ty tsy to.

93

¹ Hifehe t'IEHOVÀ, hisikim-bolonahetse, hisaron-kaozarañe t'IEHOVÀ, toe
 hidiañe,
 Eka, mioreñe ty voatse toy, tsy hasitse.
² Fa norizañe haehae i fiambesa'oy,
 boake tsietoimonek' aña 'n-Iheo.
³ Fa mionjoñe o afó-ranoo, ry IEHOVÀ,
 nipoña-peo o sorotombaha'eo;
 mañonjoñe ty fitroña'e i fiepoepoañey.
⁴ Ambone' ty fitroña' o alon-driakeo,

naho o kinerake jabajaba an-driakeo
ty hara'elahi' IEHOVÀ an-digiligy eñe.

⁵ Toe niventeñe o taro'oo;
mañeva havaheñe nainai'e
ty anjomba'o, ry IEHOVÀ,

94

¹ O ry IEHOVÀ,
Andrianañahare mpamale-fate,
ry Andrianañahare, mpañome-to:
mireandreaña.

² Miongaha, ry Mpizaka' ty tane toio;
lilovo ami'ty fañeva'e o mpirengenvokeo.

³ Sikal' ombia o lo-tserekeo, ry IEHOVÀ :
pak'ombia ty mbe hitreña' o tsivokatseo?

⁴ Mifatatiake, manotratsotrake;
mijiajia iaby o mpanao ratio.

⁵ Demohe' iereo ondati'oo ry IEHOVÀ,
volevole' iereo ty lova'o.

⁶ Vonoe' iereo ty vantotse
naho ty renetane,
naho mañoho-doza amo bode-raeo;

⁷ vaho manao ti-hoe: Tsy vazoho' Ià;
tsy mañaoñe t'i Andrianañahare' Iakobe.

⁸ Mañaraharà ry borololo am' ondatio;
naho o dagolao, ombia t'ie hahafohiñe?

⁹ Tsy mahajanjiñe hao i nambole o ravembiaoy?
Tsy mahavazoho hao i Mpitsene fihainoy?

¹⁰ Tsy hanoro hao i Mpandilo o fifeheañeo?
ie mañòke hilala am'ondatio.

¹¹ Arofoana' IEHOVÀ
ty fitsakorea' ondaty;
t'ie kofòke avao.

¹² Haha t'indaty lilove'o ry Ià,
naho i anara'o amy Tsara'oy;

¹³ homea'o fitofañe an-tsan-kasotriañe,
ampara' te nihaliañe koboñe
o lo-tserekeo.

¹⁴ Tsy ho farie' IEHOVÀ ondati'eo;
tsy haforintse'e i lova'ey.

¹⁵ Mbe himpoly ami'ty hahiti'e o zakao,
le hene hañorik' aze o vañoñ' añ'arofoo.

¹⁶ Ia ty hitroatse amo tsereheñe ho ahy? Ia ty hijohañe amo mpanao ratio
ho amakoo?

¹⁷ Naho tsy IEHOVÀ ty nañimb' ahy
le ho nitobe am-pitsiñañe ty fiaiko.

¹⁸ Ie anoeko ty hoe :
Midorasitse ty tomboko;
le manozañ' ahy ty fiferenaiña'o
ry IEHOVÀ.

¹⁹ Ie mañotrotro ty hamahimahin-troke, le mampanintsíñe ty fiaiko
o fañohòa'oo.

²⁰ Mete hiharo-rehak' ama'o hao

ty fitobohan-katsivokarañe—
 ie mikitro-draha hatao'e fañè, ²¹ naho mirañadrañake hañè-doza
 ami'ty fiai' o vañoñeo,
 vaho mañozoñe ty lio tsy aman-kila.
²² Fe haboam-pitsolohako t'IEHOVÀ,
 vaho lamilamy fipalirako
 t'i Andrianañahareko.
²³ Nampolia'e ty hatsivokara' iareo, vaho ho mongora'e ty amo
 fikotriha'iareoo; toe ihañitoa' IEHOVÀ Andrianañaharentika.

95

- ¹ Antao hisabo am' IEHOVÀ;
 Antao hipoña-peo amy
 lamilamim-pandrombahan-tikañey.
² Ntao hiatrek'Aze am-pañandriañañe,
 antao hirebek' ama'e an-tsabo.
³ Andrianamboatse jabahinake t'IEHOVÀ,
 naho Mpanjaka ra'elahy ambone'
 ze fanalolahy iaby.
⁴ Am-pità'e ao o hatsikeokeo'
 ty tane toio,
 Aze ka o lengom-bohitseo.
⁵ Aze i riakey, ie ty namboatse aze,
 nitsenèm-pità'e i tane maikey.
⁶ Mb'etoa, hiambane vaho hitalaho,
 antao hanongalek' añatrefa'
 IEHOVÀ Mpitsene antikañe.
⁷ Amy te ie t'i Andrianañaharentikañe;
 itika ro ondatim-piandraza'e,
 naho ty lia-raim-pità'e;
 Anito, naho janjiñe' areo i fiarañanaña'ey !
⁸ Ko mañagàñe arofo,
 manahake te Meriba* aña,
 tañ'andro' i Masa† am-babangoañ' aña;
⁹ Ie nazizin-droae' areo,
 naoveove'iareo ndra te nioni'iereo
 o fitoloñakoo.
¹⁰ Efa-polo taoñe te nalaiñeko i tariratsey
 le nanoeko ty hoe: foko miola an-troke,
 fa tsy apota' iareo o satakoo;
¹¹ Aa le nifanta ami'ty fifomboko:
 Toe tsy himoaha'iareo ty fitofàko.

96

- ¹ Misaboa sabo vao am' IEHOVÀ !
 mitakasia am' IEHOVÀ, ty tane toy iaby.
² Misaboa am' IEHOVÀ, bangò i tahina'ey;
 taroño boak'andro i fandrombaha'ey.
³ Atalilio aivo' o fifeheañeo ty enge'e,
 o sata'e mahalatsao añivo' ondaty iabio.
⁴ Amy te ra'elahy t'IEHOVÀ

* 95:8 Meriba: fiody Avo. 17. 7: † 95:8 Massah: fitsohañe Avo. 17. 7

vaho ho rengeñe añ'abo;
revendreveñen-dre
te amy ze ndrahare iaby.

⁵ Fahasive o ndrahare' ondatio,
fa IEHOVÀ ro namboatse o likerañeo.

⁶ Hasiñe naho volonahetse ro aolo'e,
haozarañe naho hatsaratseake
ro añ'anjomba'e miavake ao.

⁷ Manolora am' IEHOVÀ, ry foko' ondatio,
toloro engeñe naho haozarañe t'IEHOVÀ.

⁸ Atoloro am' IEHOVÀ
ty enge mañeva i tahina'ey;
mibanabanà, le miziliha an-kiririsa'e ao.

⁹ Mitalahoa am' IEHOVÀ
an-tsiki-miambake!
mitititiha añatrefa'e eo, ty tane toy.

¹⁰ Talilio amo fifeheañeo ty hoe:
Mifehe t'IEHOVÀ;
toe mioreñe ty voatse toy, tsy hasiotse,
ho zakae'e mira ondatio.

¹¹ Le hifale o likerañeo,
hirebeke ty tane toy;
hitroñe ami'ty halifora'e i riakey;

¹² Hitreñe i hivokey,
naho ze he'e ama'e ao;
fonga hisabo an-kaehake
o hatae añ'alao,

¹³ añatrefa' IEHOVÀ eo, fa ho totsake re,
ho avy hizaka ty tane toy;
ho zakae'e an-kahiti'e* ty voatse toy
vaho ondatio ami'ty figahiña'e

97

¹ Mifehe t'IEHOVÀ,
hirebeke ty tane toy,
hifale o tokonose maroo.

² Ie arikoboñen-drahoñe naho hamoromoroñañe;
havantañañe naho ty hatò ro ioreña'
i fiambesa'ey.

³ Miaolo Aze ty afo, mamorototo
o rafelahi'eo mb'etia mb'eroa.

⁴ Nihazavae' o hela'eo ty voatse toy;
niisa' ty tane toy le nihondrahondra.

⁵ Nitranake hoe karafo o vohitseo
ami'ty niatrefa' IEHOVÀ,
añatrefa' i Talè' ty tane toy iaby.

⁶ Mitalily ty havantaña'e o likerañeo,
vaho fonga mahaoniñe ty enge'e ondatio.

⁷ Hene salatse ze mitoron-tsare sokitse,
o misenge raha kòakeo;

miambanea ama'e ry ndrahare iabio!

⁸ Nahajanjiñe ty Tsionne le niehake,

* **96:13** Sab 98:9, Top 17:31, Ben 19:11

nirebeke o anak'ampela Iehodào,
ty amo fizaka'oo ry IEHOVÀ.

⁹ Amy te Ihe, ry IEHOVÀ,
ro Andindimone' ty tane toy;
vaho onjoneñe andigiligi'
ze hene ndrahare rehe.

¹⁰ Hejeo o haratiañeo ry mpikoko IEHOVÀ; ambena'e ty fiai' o noro'eo,
avots'o'e an-taña' o lo-tserekeo.

¹¹ Ararake ho a' o vantañeo ty hazavàñe,
ho a' o mahity arofoo ty hafaleañe.

¹² Mirebeha am' IEHOVÀ, ry vantañeo,
vaho andriaño i tahina'e masiñey.

98

Sabo 1 Takasio sabo vao t'IEHOVÀ
fa nahafonitse raha fanjaka;
nahazoa'e fandrebahañe i fità'e havanay naho i sira'e masiñey.

² Fa nampahafohine' IEHOVÀ
i fandrombaha'ey;
naboa'e ampahaisaha'
o kilakila 'ndatio ty havantaña'e.

³ Nitiah'i'e ty fiferenaiña'e
naho ty figahiña'e amy anjomba' Israeley,
fonga nahaoniñe ty fandrombahan'
Andrianañaharentika ze olon-tane.

⁴ Mipoñafa am' IEHOVÀ, ry tane toy iaby,
Mirañorañoa an-drebeke,
eka mandrengea an-tsabo.

⁵ Sabò t'IEHOVÀ arahen-jejo-bory,
i jejo-boriy mañara-takasy;

⁶ Reke-trompetra naho fivolañ' antsiva—
mipozaha an-drebek' añatrefa'
IEHOVÀ Mpanjaka.

⁷ Hitroñe ami'ty halifora'e i riakey,
ty voatse toy
vaho o mpimoneñe ama'eo.

⁸ Hitehateha-taña o sorotombakeo,
le hitrao-pisabo an-kaehake
o vohitseo,

⁹ añatrefa' IEHOVÀ eo
fa homb'eo re hizaka ty tane toy.
ho zakae'e an-kavantañañe
ty voatse toy,
naho an-kahiti'e ondatio.

99

¹ Mifehe t'IEHOVÀ,
hinevenevetse ondatio;
ie miambesatse añivo o kerobeo,
miozoñozoñe ty tane toy.

² Jabahinake e Tsiône ao t'IEHOVÀ;
andindimone' ze kila ondaty.

³ Bangoe' iereo i tahina'o ra'elisy

naho mampañevey, fa masiñe.
⁴ Mpikoko hatò ty haozara' i mpanjakay
—fa najado'o ty zaka-mira;
fa nihenefe'o ty zaka
naho ty havantañañe amy Iakobe ao.
⁵ Onjono t'IEHOVÀ Andrianañaharentika;
midrakadrakàfa am-pitongoàm-
pandia'e eo; masin-dre.
⁶ Mpiamo mpisoro'eo
t'i Mosè naho i Aharone,
mpitraok' amo mpikanjy
i tahina'eio t'i Samoele,
sindre nitoreo am' IEHOVÀ
yaho nitoiña'e.
⁷ Nitsara'e hirik'amy rahoñe nijoalay;
norihe' iereo o taro'eo
naho i fañè natolo'e iareoy.
⁸ Ry IEHOVÀ Andrianañahare'ay,
natoi'o iareo,
Andrianañahare nañaha ty hakeo' iareo,
fe nililove'e o nanoe' iareoo.
⁹ Onjono t'IEHOVÀ Andrianañaharentika
vaho mitalahoa amy vohi'e miavakey,
amy te masiñe t'IEHOVÀ
Andrianañaharentika.

100

Sabom-Pañandriañañe ¹ Mitreña am' IEHOVÀ
ry tane bey toy!
² Toroño an-kafaleañe t'IEHOVÀ;
miheova an-tsabo mb'añatrefa'e.
³ Fohino te Andrianañahare t'IEHOVÀ ;
Ie ty nanao antika, fa tsy itika,
aze tika, ondati'e naho lia-rai-piandraze'e.
⁴ Iziliho o lalambei'eo
am-pañandriañañe,
an-kiririsa'e ao am-pandrengeañe;
andriaño, bangò ty tahina'e.
⁵ Amy te soa t'IEHOVÀ;
nainai'e ty fiferenaiña'e
naho ty figahiña'e amo tariratse iabio.

101

Sabo' i Davide ¹ Ho saboeko ty fiferenaiñañe
naho ty fizakàn-to,
Ihe ry IEHOVÀ ro isaboako
² Hambenako ty lalan-kavañonañe;
ombia rehe te homb'amako?
Handenako an-kazavàn-troke an-trañoko ao.
³ Tsy ampipohako raha tsy manjofake
aolo' o masokoo.
hejeko ty sata' o mpiolao;
tsy hipitek' amako zay.

- ⁴ Hitotse ahy ty tro mirioñe;
hamoeako ze atao raty.
- ⁵ Ze mifosa ondatio, ie ty harotsako;
hejeko ty maso miengeñe
naho ty troke mikoìboke.
- ⁶ Amo migahiñe an-tane atoio
o masokoo,
hiharoa' iareo fimoneñañe,
hitoroñe ahy ty mañavelo an-kahiti'e.
- ⁷ Tsy hitobok' an-trañoko ao
ty mitolom-pamañahiañe;
tsy ho tambatse aolo' o masokoo
ty mpivolam-bande.
- ⁸ Ho zamaneko boa-maraindray
o lo-tserek' amy taneio;
haitoako ami'ty rova' IEHOVÀ
o mpitolon-katsivokarañeо.

102

- Halali' ty mpisotry,* ¹ ie andeme'e vaho mandoa toreo aman'Añahare.
Ry IEHOVÀ, janjiño ty halaliko;
le ampomb'ama'o ty toreoko.
- ² Ko aeta'o amako ty lahara'o
añ'andron-kaloviloviañe.
atokilaño amako ty ravembia'o;
malisà hanoiñe ahy
ami'ty andro ikanjiako.
- ³ Mihelañe hoe hatoeñe o androkoo;
miforehetse hoe an-toñak' ao o taolakoo.
- ⁴ Pinaoke hoe ahetsé ty troko
vaho miheatse
toe andikofako ty mitozin-kaneñe.
- ⁵ Mipitek' an-taolako ao ty holiko
ty ami'ty volam-piselekaiñako.
- ⁶ Hoe tangongo am-patrañe aña raho,
hoe vorondolon-dratrarastra.
- ⁷ Mandre an-tsareke raho;
manahake ty tivoke miereñereñe
an-tampènake ey.
- ⁸ Mañinje ahy lomoñandro o rafelahikoo;
mamàtsy ahiko o mpirengevok'amakoo,
- ⁹ Fa nihaneko hoe ampemba ty lavenoke,
vaho linaroko firovetse ty finomako,
- ¹⁰ ty ami'ty haviñera'o naho ty fifombo'o,
fa rinambe'o raho le nahifi'o aña.
- ¹¹ Manahake ty fipononòran-talinjo
o androkoo;
vaho miheatse hoe boka raho.
- ¹² Nainai'e eo rehe ry IEHOVÀ,
ty Tahina'o an-tarirats' an-tariratse.
- ¹³ Hiongake rehe hitretre i Tsioné,
fa tsatoke te hisohe'o,

ie tondroke i nifantañañey.

¹⁴ No' o mpitoro'oo o vato'eo; mbore kokoa' iereo o lembo'eo.

¹⁵ Soa te hañeveña' o fifeheañeo
ty tahina' IEHOVÀ, naho

ze hene mpanjaka' ty tane toy ty enge'o;

¹⁶ fa nitratrañahe' IEHOVÀ ty Tsîône
ie niboak' amy enge'ey.

¹⁷ Nihaõe'e ty halali' o poi'eo;
vaho tsy niamboho'a'e ty toreo' iareo

¹⁸ Ho patereñe ho a ty tariratse
mandimbe,
soa te handrenge Ià

ondaty mboe tsy nanoeñeo*:

¹⁹ Nivazohoe'e boak'an-toe'e masiñe ankaboañ' aña,
nisary ty tane toy boak' an-dikerañe
eñe t'IEHOVÀ,

²⁰ hijanjiñe ty fiñeõeom-pirohy,
hañaha o nafatse havetrakeo

²¹ soa te ho talilie' ondaty e Tsîône ao
ty tahina' IEHOVÀ,

naho ty enge'e e Ierosalaime ao,

²² ie mifanontoñe ondatio,
naho o fifeheañeo hitoroñe IEHOVÀ.

²³ Nado'e deme'e raho añivon-dalañe eo;
nitomore'e o androkoo.

²⁴ Hoe raho, Ry Andrianañahareko, ehe, ko ampisintahe'o
añivo' o androkoo raho; mitakatse ze kila tariratse o tao'oo.

²⁵ Haehae rehe ro nañoreñe ty tane toy,
satam-pitâ'o o likerañeo.

²⁶ Ho momoke iereo, fa nainai'e eo rehe;
fonga hikoneatse hoe sikiñe hambo'e,
ampilimbeze'o hoe sarimbo

vaho ho vaoe'o iereo.

²⁷ Fe tsy mihotike rehe,
tsy mbia higadoñe o tao'oo.

²⁸ Le lia'e ho eo o anam-pitoro'oo,
le hijadoñe añatrefa'o eo o tiri'eo.

103

Sabo' i Davide ¹ Andriaño t'IEHOVÀ, ry troko;
naho ze hene amako;

bangò ty tahina'e masiñe !

² Andriaño t'IEHOVÀ ry troko, le ko haliño o hasoa'e iabio.

³ I mpañaha ze hene hakeo'oy, ie mpanaha ze atao arete'oy.

⁴ I mijebañe ty fiai'o boak'an-koboñ'aoy,
ie mañohò azo am-piferenaiñañe
naho am-pitretrezañe,

⁵ ie mahaeneñe ty havelo'o an-draha soa,
naho vaoe'e hoe vantio ty hajalahi'o.

⁶ Manao ty hahiti'e t'IEHOVÀ
naho mitolon-kavantañañe

* **102:18** Sab 22:31

amy ze hene volevolèn-draha.

⁷ Nampahafohine'e amy Mosè o sata'eo
o tolon-draha'eo amo ana' Israeleo.

⁸ Miferenaiñe naho mitretre t'IEHOVÀ,
malaon-kaviñerañe,
vaho enim-pikokoa-migahiñe.

⁹ Tsy handilo nainai'e re,
tsy hangazoña'e kitro katroke
ty fifombo'e.

¹⁰ Tsy nanoe'e mañeva o tahin-tikañe,
tsy nililove'e ty amo hakeo' tikañe.

¹¹ Fa mira ami'ty haabo' i likerañey
ami'ty tane toy,
ty hajabajaba' ty fiferenaiña'e
amo mañeveñ'ama'eo;

¹² Mira ami'ty halavi' i atiñanañey
amy ahandrefañey,
ty halavi' ty nampisitahe'e amantika o fiolàn-tikañe.

¹³ Hambañe ami'ty halèm-pon-drae
amo ana'eo
ty fitretreza' IEHOVÀ amo mañeveñe ama'eo,

¹⁴ amy te arofoana'e ty vintan-tika;
tiahi'e t'ie lemboke.

¹⁵ Aa naho ondaty,
hoe ahetsé o andro'eo
hoe voñe an-kivok' ao ty fandrevaha'e;

¹⁶ ie iarian-tioke, le tsy eo ka,
vaho tsy mahatiah y aze i toe'ey.

¹⁷ Fe boake haehae tsy amam-pipotora'e aña, sikal'ami'ty tsy modo aña,
ty fiferenaiña' IEHOVÀ amy ze mañeveñe ama'e,

naho i havantaña'ey

amo ana' o anakeo—

¹⁸ ho amy ze miambene i fañina'ey
vaho mahatiah y o taro'eo hanoa'e.

¹⁹ Fa naore' IEHOVÀ
an-dindiñe ao ty fiambesa'e,
vaho mamehe ze he'e i fifehea'ey.

²⁰ Andriaño t'IEHOVÀ, ry Anjeli'e, ra'elahy an-kaozarañe,
mitoloñe amo tsarae'eo,
mañaoñe ty fiarañanaña' o tsara'eo.

²¹ Andriaño t'IEHOVÀ,
ry hene lahin-defo'eo,
ry mpitoro'e mpanao
o satrin' arofo'eo.

²² Andriaño t'IEHOVÀ, ry hene sata'e
tok'aia tok'aia amy fifehea'eio.
Andriaño t'IEHOVÀ, ry fiaiko.

104

¹ Andriaño t'IEHOVÀ, ry troko;
ry IEHOVÀ Andrianañahareko,
jabahinake rehe,
asiñe naho volonahetse ro misaroñ' azo,

- ² ihemiholonkon-kazavañe hoe sarimbo;
velare'o hoe tèmetse o likerañeo.
- ³ Ampandrè'e an-drano ao o faham-batsa'eo, anoe'e sarete'e o rahoñeo,
draidraite'e añ' ela' o tiokeo.
- ⁴ Anoe'e ira'e o tiokeo,
mpitoro'e o afo mibelañeo.
- ⁵ Naore'e amo faha'eo ty tane toy,
soa tsy hasiotse nainai'e donia.
- ⁶ Siniki'o hoe saroñe i lalekey;
nijohañe ambone' o vohitseo ty rano;
- ⁷ Nibionñe iereo te trinevo'o,
nibororoñe mb'eo ami'ty fivolan' ampi'o;
- ⁸ Nionjoñe o vohitseo,
nilempotse o vavataneo,
mb'amo toetse tinendre'o ho a iareoo
- ⁹ Jinado'o efetse tsy hililara'e;
tsy mone hibalike hañampo ty tane toy.
- ¹⁰ Añirahe'e rano migoangoñañe
o goledoñeo;
mikararak' añivo' o vohitseo;
- ¹¹ ampinome' iereo rano
o bibin-kivoke iabio;
afa-karan-drano o borìke lìo.
- ¹² Mimoneña añ'olo' iereo eo
o voron-dikerañeo;
mivilañe an-tsinga-katae ey.
- ¹³ Tondraha'e hirik'amo efe'e amboneo
o vohitseo;
mahaeneña ty tane toy
o vokam-pitoloña'eo.
- ¹⁴ Ampitiria'e ahets'e o añombeo,
vaho añañe, vale' ty fitoloña' ondatio, hampahavokare'e haneñe ty tane,
¹⁵ naho divay hampifale ty arofo' ondaty, naho solike hañamendo ty
lahara'e,
vaho mahakama hahavaño ty arofo'e.
- ¹⁶ Enen-drano o hatae' IEHOVÀO,
o *mendorave' i Lebanonone nambolè'eo,
- ¹⁷ ama'e ao ro anoa' o voroñeo traño;
naho ty fañaoke, anakao ty akiba'e.
- ¹⁸ Ho a o ose lì-o o vohitse aboo;
fiampiram-panaloke o tevañeo.
- ¹⁹ Nanoe'e fifotoañañe i volañey; apota' i àndroy ty toem-pitsofora'e.
- ²⁰ Tinendre'o i ieñey,
mivotrake te haleñe ty fitingatingàña' ze hene biby añ'ala ao.
- ²¹ Mitreñe, mitsatsa hena o liona tora'eo,
mipay ty hane'e aman' Añahare.
- ²² Ie manjirike i àndroy, mipolotse iereo vaho mandre an-dakato'e ao.
- ²³ Miavotse mb'am-pitoloña' e mb'eo
ondatio, ampara' te haleñe.
- ²⁴ O ry IEHOVÀ, akore ty hamaro'
o fitoloña'oo!
kila nanoe'o an-kihitse;

* **104:16** sedera: hatae mafe mandrevake

manitsike ty tane toy o vara'oo.
 25 Indroke i riakey, jabajaba mihenehene,
 ifamorohotam-biby tsy hay iaheñé—
 ty kede naho ty bey.
 26 Ama'e ty ionjonan-dakam-bey,
 naho i fañaneñé nitsenè'o hihisa aoy.
 27 Songa mandiñ' Azo
 hamahana'o haneñ' an-tsa'e.
 28 Anjotsoa'o, le atonto' iareo,
 sokafe'o ty fità'o, vaho
 hene ànjan-draha soa.
 29 Aeta'o ty lahara'o, le lonjetse iereo;
 sintone'o ty kofò'e, le mihomake
 mimpoly an-debok' ao.
 30 Irahe'o t'i Arofo'o, mioreñé iereo,
 vaho vaoe'o ty tarehe' ty tane toy.
 31 Tsy mb'ia ho modo ty enge' IEHOVÀ;
 ho rebehe' IEHOVÀ o fitoloña'eo,
 32 Mampititititike ty tane toy te vazohoe'e,
 mahatoeñé o vohitseo te edrè'e.
 33 Ho saboeko t'IEHOVÀ
 kanao mbe velon-draho;
 ho rengèko an-tsabo t'i Andrianañahare
 katao mbe mahakofòke.
 34 Toe mamy t'ie itsakoreakoo,
 ifaleako t'IEHOVÀ.
 35 Ho mongoreñé an-tane atoy
 o mpanan-tahiñeo
 le tsy ho eo o lo-tserekeo.
 Andriaño t'IEHOVÀ, ry troko.
 Treño t'IÀ †.

105

¹ Andriaño t'IEHOVÀ,
 kanjio ty tahina'e;
 amphafohino ondatio o fitoloña'eo.
² Isabò, rengeo an-tsabo;
 talilio o raha fanjaka nanoe'eo.
³ Mitreña, amy tahina'e masiñey;
 ampirebehañ' añ'arofo' o mipay IEHOVÀO.
⁴ Paiavo t'IEHOVÀ naho ty haozara'e;
 tsoeho nainai'e ty lahara'e.
⁵ Tiahio o raha fanjaka nanoe'eo, o halatsañeo, naho
 o fizakam-palie'eo.
⁶ Ry tarira' i Avrahame mpitoro'eo, ry ana' Iakobe jinobo'eo;
⁷ Ie t'IEHOVÀ Andrianañaharentika;
 mahaatseke ty tane toy o fandilia'eo.
⁸ Toe tiahí'e nainai'e i fañina'ey,
 i tsara linili'e pak'an-tarira'e fah'arivo'e,
⁹ i nanoe'e amy Avrahamey,
 naho i nifantà'e am' Letsakey,

† 104:35 HALÀ'IÀ: HALELOIA; ZE ATAO TY HOE TREÑO

10 vaho niventè'e am'Iakobe ho fañè,
 amy Israele ho fañina nainai'e:
 11 ami'ty hoe : Hatoloko azo ty tane'
 Kanàne, ty anjara lova'o.
 12 Ie ondaty mbe nitsiampeampe,
 toe nitsiampe, mbore nirenetane ama'e,
 13 ie nitsatsà-tane mb'an-tane, boak'am-pifeheañe raike
 sikal'am'ondaty ila'eo.
 14 tsy nimetea'e ho lovilovie' ondatio;
 le trinevo'e o mpanjakao ty am' iereo:
 15 Ko mitsipaoke o norizakoo;
 le ko joie' areo o mpitokikoo.
 16 Le nikanjie'e san-kerè o taneo,
 fonga nifolahe'e o tahon-kaneñeo;
 17 Nirahe'e t'indaty hiaolo iareo,
 Iosefe naletake ho ondevo.
 18 Jinoi' iareo am-bahotse o fandia'eo,
 najo am-po viñe ao i sandri'ey,
 19 ampara' ty andro nañenefañe
 i nitokia'ey,
 namente aze ty tsara' IEHOVÀ.
 20 Nafanto' i mpanjakay le nabalake re,
 hinaha' ty mpifehe' ondatio,
 21 Nanoe'e talèn' anjomba'e naho mpamandroñe o vara'eo,
 22 nifehe o roandria'eo an-tsatri'e,
 nanoro hihitse amo androanavio.
 23 Nimoake e Mitsraime ao ka t'Israele,
 nitaveañe an-tane' i Kame aña t'Iakobe.
 24 Le nampanaranaha'e ondati'eo;
 vaho nampaozare'e
 ambone' o rafelahi'iareoo
 25 Nampifotere'e ty arofo' iareo
 halaiñe ondati'eo,
 hikinia o mpitoro'eo.
 26 Nirahe'e t'i Mosè mpitoro'e,
 i Aharone jinobo'ey.
 27 Nanoe' iereo añivo' iareo eo
 o raha tsitantane'eo,
 naho halatsàñe an-tane' i Kame ao.
 28 Nañitrifa'e ieñe,
 le nampimoromoroñe'e,
 vaho tsy niolà' iareo o tsara'eo.
 29 Novae'e ho lio ty rano' iareo,
 naho zinama'e o fia' iareoo.
 30 Nisamborian-tsahoñe ty tane' iareo,
 aña'efem-pandrea' o mpanjaka' iareoo.
 31 Nitsara re, le niropahen-daletse,
 naho nandrambañe ty tane' iareo
 ty haon-doha.
 32 Tinolo'e havandra hisolo orañe,
 naho afo nilebaleba an-tane' iareo.
 33 Finofo'e o vahe'eo naho o sakoa'eo,
 vaho tsineratsera'e o hatae an-tane' iareoo.
 34 Nisaontsie'e, le nimb'eo o betratrao,

naho ty kijeja tsy fotofoto;
³⁵ hene navorembore' iereo ze naindoñe
 an-tane' iareo ao,
 fonga nabotseke ty vokan-tane' iareo.
³⁶ Nampivetrahe'e iaby ka
 o tañoloñoloñan-tane' iareoo,
 ze hene lengom-boan- kaozara'iareo.
³⁷ Le nakare'e reketse volafoty
 naho volamena t'Israele,
 leo raike tsy nitsikapy amo rofoko'eo.
³⁸ Nifale t'i Mitsraime t'ie niakatse,
 fa nivotraha' ty fihembañañe.
³⁹ Nandafihà'e rahoñe ho fialofañañe,
 naho afo ho fañazavàn-kaleñañe.
⁴⁰ Nihalaly iereo le nanjotsoa'e
 hatrakatrake,
 nampieneña'e mahakaman-dikerañañe.
⁴¹ Sinoka'e i lamilamiy,
 le nidoandoñañe ty rano
 nikararake an-dratraratra ao hoe saka.
⁴² Fa nitiahi'e i tsara'e masiñe amy Avrahame mpitoro'ey.
⁴³ Le naaka'e am-pirebeñañe ondati'eo,
 am-pazake o jinobo'eo;
⁴⁴ natolo'e ty tane' o kilakila ondatio,
 vaho rinambe' iareo ho lova
 o nimokora' ondatioo:
⁴⁵ soa t'ie hañambeñañe o fañè'eo
 vaho hañorike i Tsara'ey.
 Treño t'IÀ !

106

¹ Treño t'IEHOVÀ;
 andriaño t'IEHOVÀ, amy te Ie ro soa;
 nainai'e ty fiferenaiña'e.
² Ia ty mahatalily o sata fanjaka'
 IEHOVÀo?
 ndra hahafitsey o enge'e iabio?
³ Haha ze mahafiambeñañe ty hatò,
 naho mitolom-panao ty fahiti'e.
⁴ Tiahio raho, ry IEHOVÀ,
 naho isohe'o ondati'oo;
 itiliho amy fandrombaha'oy.
⁵ Hahatreavako ty firaoraoa' o jinobo'oo,
 hirebeke ami'ty hafalea' i fifehea'oy,
 hitrao-pitreñañe amy lova'oy.
⁶ Nindre nandilatse amo roae'aio zahay;
 nanao hakeo, nitolon-karatiañañe.
⁷ Tsy nihaoñe' o rae'ay e Mitsraimeo
 o halatsà'oo;
 tsy nitiahi' iereo o fiferenaiña'o vokatseo,
 te mone niola amy Abo Tiañe,
 an-dRiake Mena* añe.

* **106:7** Riake Mena: ndra: 'Riake Vondro' (and. 9 naho 22 ka)

⁸ Fe rinomba'e ty amy tahina'ey, hampaharofoana'e ty haozara'e.

⁹ Trinevo'e i Riake Menay,
le nimaike,
vaho niaoloa'e, nitoañe o lalekeo
hoe te fatram-bey.

¹⁰ Le rinomba'e boak'an-taña'
i malainē iareoy,
naho jineba'e am-pitā' i rafelahi.

¹¹ Nopoe' i ranoy o rafelahi'eo; tsy nanisàñe honka'e.

¹² Aa le natokisa' iareo o tsara'eo, nisaboeñe ty enge'e.

¹³ Fe nihaliño' iereo anianike o sata'eo
tsy nahaliñe o famerea'eo.

¹⁴ Le niazo' ty hasiji-mena
an-jerezere tane aña;
nazizi' iereo am-babangoañe ao
t'i Andrianañahare.

¹⁵ Aa le nitolora'e i nihalalie' iereoy,
fe nañiraha'e haborokàñe ty fiai'iereo.

¹⁶ Ie nitsikirike i Mosè an-tobe ao,
naho i Aharone navahe' IEHOVÀ,

¹⁷ le nisokake i taney niteleñe i Datane;
naho nandembeke ty fehe' i Abirame.

¹⁸ Nisolebare' ty afo añivo' i rimboñey;
niforototoe' i firebarebàney o tsivokatseo.

¹⁹ Nitsene bania e Korebe aña iereo,
naho nilokoloko amy sare trinanakey;

²⁰ aa le natakalo' iereo sare bania
mivazakota ahetsé, ty engen' Añahare.

²¹ Nihaliño' iereo t'i Andrianañahare
mpandrombake iareo,

I nanao raha fanjàka e Mitsraimey,

²² raha tsitantane an-tane' i Kame
vaho raha naharevendreveñe
an-dRiake Mena aña.

²³ Aa le nanao ty hoe t'ie harotsa'e:
naho tsy te nijohañe an-jebañe añatrefa'e eo
t'i Mosè jinobo'e, nampivioñe
i haviñera'ey tsy hanjamana'e.

²⁴ Niheje' iereo amy zao i tane nirieñey;
tsy natokisañe o tsara'eo,

²⁵ f'ie niñeóñe o an-kijà ao,
tsy hinao' iereo ty fiarañanaña' IEHOVÀ.

²⁶ Aa le nifanta
te hampikorovohe'e an-jerezere tane ao,

²⁷ naho havarakai'e amo fifeheañe
ty tarira' iareo
vaho haparatsà'e amo taneo.

²⁸ Mbore nireketse amy Baale-Peore iereo
vaho nampibotseke haneñe
nisoroñañe an-dolo.

²⁹ Aa le nampiviñere' iereo
amo fitoloña' iareoo,

yaho natorotsi'e an-kiria.

³⁰ Niongak' amy zao t'i Pinekase

le nijebañe,
vaho nisebañeñe i angorosiy.
³¹ Nivolilien-ko havañonañe ama'e zay.
ho a ze hene tarira'e mifandimbeo.
³² Nampiviñera' iareo ka
amo rano mpilie-drokoñeo,
le niazom-boiñe ty am'iereo t'i Mosè;
³³ amy t'ie nikai-jaka amy arofo'ey,
le kamaike ty niakatse am-pivimbi'e ao.
³⁴ Tsy nifongore' iareo ondatio,
amy nandilia' IEHOVÀ hanoeñey,
³⁵ Te mone nifañaoñe amo kilakila'ndatio
naho nizatse o sata'eo,
³⁶ naho nitoroñe o saren-drahare'eo
ze nanjare fandrik' am' iereo,
³⁷ naho nasoro' iereo amo kokolampao o anadahi'iareoo naho o anak'
ampela'iareoo,
³⁸ vaho nampiorike lio-maliñe,
ty lion' anadahy naho anak'ampela,
ie nasoro' iereo amo saren-drahare'
i Kanànao, vaho vinetan-dio i taney.
³⁹ Aa le nihativa am-pitoloñañe,
nañarapilo amo fisafiria'iareoo.
⁴⁰ Toly ndra niviañe am'ondatio
ty haviñera' IEHOVÀ,
vaho niheje'e i lova'ey.
⁴¹ Natolo'e am-pità' o fifeheañeо iereo,
hifehea' o rafelahi'eo.
⁴² Niforekeke'
o nifankalaiñe am'iereo
le nareke ambane' fità'iareo.
⁴³ Beteke rinomba'e, f'ie nizehatse an-tsafiry,
vaho nilempotse an-kakeo.
⁴⁴ Ie nivazoho'e ty falovilovi' iareo,
naho jinanji'e o fitoreova' iareoo,
⁴⁵ le nitiah'i'e ty am' iereo i fañina'ey naho niselekaiñe, ty amo hene
fiferenaiña'eo;
⁴⁶ ie nampitretreze'e amo nanese
iareo am-pandrohizañeо.
⁴⁷ Rombaho zahay ry IEHOVÀ
Andrianañahare'ay,
vaho atontono boak' amo fifeheañeо, hañandriaña'ay ty tahina'o masiñe,
vaho hitreñe amo enge'oo.
⁴⁸ Andriañeñe t'IEHOVÀ,
Andrianañahare' Israele,
boak'an-kaehae'e pak'an-kaehae'e;
vaho hene hiredoñe ami'ty hoe ondatio:
Ie Zay, [†] Treño t'IA.

Fange Fahā V

107

- ¹ Andriañeñe t'IEHOVÀ,
amy te Ie ro soa;
nainai'e ty fiferenaiña'e.
- ² Ano zay ry jineba' IEHOVÀ—
ry nijebañe'e am-pitàn-drafelahy,
- ³ vaho hinoloholo'e hirik' amo taneo,
boak'atiñanañe naho ahandrefañ' añe,
boak' avaratse vaho hirik' amy riakey.
- ⁴ Nirererere ambabangoañ' añe iereo,
an-dratraratra ao,
tsy nahaonin-drova fimoneñañe.
- ⁵ Nisalikoeñe naho taliñiereñe,
nitoirañe añ'ova ao ty fiai' iareo.
- ⁶ Le nitoreo am' IEHOVÀ
an-kaloviloviañe
naho hinaha'e amo hasotria'iareoo,
- ⁷ Nindese'e mb'an-dalam-bantam-beo
higodañe mb'an-drova fimoneñañe añe.
- ⁸ Handriañe' iereo t'IEHOVÀ
ty amy fiferenaiña'ey
naho o fitoloña'e fanjaka
amo ana'ondatooo,
- ⁹ fa nieneñe'e ty fiaiñe taliñiereñe,
nanjañe'e raha soa ty stroke nilimpoa.
- ¹⁰ Teo ty nitozòke añ'ieñe ao
naho an-talinjon-kavilasy ao,
rinohy an-kasotriañe naho vý,
- ¹¹ amy t'ie niody amo fepèn'Añahareo,
vaho nañovok' i famerea'
i Andindimoneñey.
- ¹² Aa le nampibokohe'e ty arofo' iareo
am-pitromahañe,
nampidaleandaleañe
tsy amam-pañimba.
- ¹³ Le nitoreo am' IEHOVÀ
t'ie niankoheke,
le rinomba'e amo fikoretañe;
- ¹⁴ naaka'e boak' añ'ieñe naho
an-talinjon-kavilasy ao,
vaho nipoñafe'e o silisilio.
- ¹⁵ Handriañe' iareo t'i IEHOVÀ
ty amy fiferenaiña'ey
naho o halatsañe nanoe'e
amo ana' ondatooo,
- ¹⁶ amy te pinaratsà'e
o lalam-bey torisikeo
naho pinozapiza'e o doda viñeo.
- ¹⁷ Nampisotriañe o seretseo
ty amo fiolà'eo, naho o tahi'eo.
- ¹⁸ Nampangori' ty fiai' iareo
ze atao hâneñe,
ie nitotoke o lalam-bein-kavilasio.
- ¹⁹ Le nitoreo am' IEHOVÀ

t'ie niampoheke,
vaho rinomba'e amo haemberañeо.
²⁰ Nahitri'e i tsara'ey nahajangañe iareo
vaho navotso'e amy kiboriy.
²¹ Andriañe' iereo t'IEHOVÀ
ty amy fiferenaiña'ey
naho o halatsañe fanoe'e
amo ana'ondatooo,
²² Ee t'ie hibanabana sorom-
pañandriañañe
naho hitalily o fitoloña'eo an-drebeke;
²³ Ao ty mizotso mb'an-tsambo
an-driake ey;
o mpanao balibalik' an-drano mieneneo,
²⁴ Fa niisa' iareo o sata' IEHOVÀO,
o halatsàñe fanoe'e an-dalekeo.
²⁵ Amy tsara'ey, nitroatse ty tio-bey,
nampitoabotse o alon-driakeo.
²⁶ Nionjomb'an-dindimb'eo iereo,
vaho nizotso mb'an-dalek' ao;
nitranak' ami'ty hekoheko'e ty fiai'iareo.
²⁷ Nivembeñe, nisiotsiotse hoe jike;
fonga nilesa ty hihi' iareo.
²⁸ Nitoreove' iareo t'IEHOVÀ
an-kasosorañe,
vaho natsoa'e an-kasotriañe.
²⁹ Nampipendreñe'e i tio-beiy,
le nitsiñe o onjan-driakeo.
³⁰ Niehake iereo te nibànatse,
vaho nitehafe'e mb'amy fipalirañe
nisalalaeñey.
³¹ Handriañe' iereo t'IEHOVÀ
ty amy fiferenaiña'ey, naho
o halatsañe fanoe'e
amo ana' ondatooo.
³² Ee t'ie honjone' iareo
am-pivori' ondatoo
vaho handrenge Aze ami'ty
fiambesa' o androanavio.
³³ Afote'e ho ratraratra o sakao, naho ho tane kankañe o torahañeо;
³⁴ ho fatran-tsira ty tane kobokara,
ty ami'ty tsihavokara'
o mpitobok' ama'eo.
³⁵ Ampanginakinahe'e o tane mihedatseo, vaho ampanganahanae'e o
kirikintañeо;
³⁶ hampitobe'a e o limpoañeо,
hañoreña'iareo rova fímoneñañe.
³⁷ Handrarake an-teteke ao iereo,
naho hambole tetem-bahe,
vaho hanonton-tsabo yokatse;
³⁸ Tahie'e ka iereo hanaranàha'e maro,
le tsy apo'e hiha-rítse o añombe'eo.
³⁹ Ie nitaketrake iereo,
ninìke ami'ty famorekekeña,

naho fanilofañe, vaho anahelo;
⁴⁰ ampidoaña'e ìnje o roandriañeo, ampiriorio'e am-bangý
 tsy aman-dalañe aña,
⁴¹ toe aonjo'e ambone' o hasotriañeo
 i rarakey,
 vaho anoe hoe lia-raike o hasavereña'eo.
⁴² Isa' o vantañeo zay le mifale,
 fonga mamìm-bava ka ty hatsivokarañe.
⁴³ Ia ty mahihitse, hiharaharà'e?
 ie ro mahafohiñe ty fiferenaiña' IEHOVÀ.

108

Onin-tSabò' i Davide, titiheñe

- ¹ Migahiñe ty troko,
 ry Andrianañahare,
 hisaboako; handrengeako,
 eka, boak' añovako ao.
² Mibarakaoha ry valiha naho jejo-bory!
 hitsekafako ty manjirik' andro.
³ Hañandriañe Azo raho ry IEHOVÀ,
 añivo' o fifeheañeo;
 ho rengeko an-tsabo aivo' ondatio.
⁴ Amy te abo te amy likerañe eñey
 ty fiferenaiña'o;
 vaho mb'an-drahoñe ey ty figahiña'o.
⁵ Mionjona! ry Andrianañahare, mb'andindìn-dikerañe aña,
 naho ty enge'o mb' ambone' ty tane toy.
⁶ Soa te hahàñe o kokoa'oo,
 rombahö am-pità'o havana,
 vaho toiño raho.
⁷ Nitsara ami'ty hamasiña'e
 t'i Andrianañahare:
 Hitreñe raho, ho zaraeko ty Sekeme
 ho tsahareko ty vavatane' i Sokote.
⁸ Ahy t'i Gilade, Ahiko t'i Menasè; naho fikalan-dohako t'i Efraime,
 vaho kobaiko t'Iehodà*;
⁹ Sajoa fisasàko t'i Moabe,
 apoko amy Edome ty hanako;
 ambone' i Pilistý ey ty hitreñako.
¹⁰ Ia ty hinday ahy mb'amy
 rova fatratsey ao?
 Ia ty hiaolo ahy mb' Edome mb'eo?
¹¹ Fa naforintse'o hao zahay,
 ry Andrianañahare?
 Tsy hitraofe'o fionjoñe hao o lahin-defo'aio, ry Andrianañahare?
¹² Ehe oloro amo rafelahio,
 fa tsy vente'e ty fandrombaha' ondatio.
¹³ Hampanjofak'anay t'i Andrianañahare,
 ie ty handialia o rafelahi'aio.

* **108:8** Fot 49:10, Sab 60:7

109

Ho a i Talè, Sabo' i Davide ¹ Ry Andrianañaharem-pandrengeako, Ko mianjiñe,

² fa nasoka' iareo amako ty vava raty
naho ty vavam-pamañahiañe
fa nifosa ahy an-dela mibodiake.

³ Niarikoboña' iareo am-pivolam-palaiñañe;
vaho nialy amako tsy am-poto'e.

⁴ Manisý ahy iereo ho valem-pikokoako,
zaho mpitalaho.

⁵ Tinambe' iareo raty hasolo ty soa naho falaiñañe hasolo ty fikokoako.

⁶ Tendreo ty lo-tsereke hifehe aze,
ampijohaño am-pitàn-kavana'e
ty mpañinje,

⁷ ie zakaeñe, ampiboaho te voa,
le hatao tahiñe i fisolohoa'ey.

⁸ Ho tomoreñe o andro'eo,
vaho ho tavaneñe i fitoloña'ey.

⁹ Le ho bode-rae o ana'eo vaho ho ramavoy ty vali'e.

¹⁰ Ho mpangatake miriorio o ana'eo;
hipay ty lintse'iareo am-bangiñe aña.

¹¹ Hifetreha' ty mpampisongo
ze hene vara'e;
naho ho volose' o ambahinio
ty tolin-kamokora'e.

¹² Ee t'ie tsy ho am-piferenaiñañe,
naho leo raike tsy hitretre
o ana'e bode-raeo

¹³ Haitoañe o tiri'eo,
vaho ho faopaoheñe
ami'ty tariratse handimbe ty añara' iareo.

¹⁴ Le ho tohineñe am' IEHOVÀ
ty hakeon-drae'e;
naho tsy ho faoheñe ami tahin-drene'e.

¹⁵ Ho aolo' IEHOVÀ nainai'e abey iereo,
soa te hapitso'e an-tane atoy
ty fitiahiañe iareo.

¹⁶ Amy te namoea'e ty hiferenaiñe,
te mone nampisoñañe ondaty rarake naho poie'e, naho ty mioremeñe,
hañohofa'e loza.

¹⁷ Ie nimpitea onjitse, le nifotetse ama'e, nalain-tata re, le nihàンkaña'e.

¹⁸ Nanaroñe aze hoe sarimbo
ty fañompà'e;
nizilik' an-tro'e ao hoe rano,
naho hoe solik' an-taola'e ao.

¹⁹ Ho ama'e manahake
ty lamba iombea'e, naho hoe
ty sadia fidiaña'e.

²⁰ Zay ty paia' o malaiñe ahio
hanoe' IEHOVÀ amako,
o mañofoke ty fiaikoo.

²¹ F'Ihe, ry IEHOVÀ Talè,

ano amako sazò i tahina'oy;
 ami'ty hasoa ty fiferenaiña'o, ihahao,
²² fa misotry naho rarake,
 naho fere ty troko añ'ovako ao;
²³ zaho mimian-koe talinjo mitibake
 vaho nahifik' añae hoe valala.
²⁴ Mitrezontrezo ty ongoko fa mililitse;
 vaho boroka ty sandriko,
 tsy aman-tsolike.
²⁵ Ifosàñe, te isa' iareo,
 le akofikofi'iareo loha.
²⁶ Imbao raho, ry IEHOVÀ
 Andrianañahareko; rombahao raho
 ty amy fiferenaiña'oy.
²⁷ Hahafohina' iareo t'ie i fità'oy,
 te Ihe ry IEHOVÀ, ro mitoloñe.
²⁸ Angao hamàtse iereo,
 f'ihe mitahia;
 ie mitroatse le ho salatse,
 fe ho fale ty mpitoro'o.
²⁹ Hampisikineñe hameñarañe
 o mpanesek' ahikoo,
 naho hiholonkoñan-kasalarañe
 hoe sarimbo.
³⁰ Honjone' ty vavako fañandriañañe t'IEHOVÀ;
 ho rengeko añivo' i màroy.
³¹ Amy t'ie mijohaña
 am-pitàn-kavana' ty poie'e,
 hañaha'e amo mpanisi' azeo.

110

Sabo' i Davide ¹ Hoe t'IEHOVÀ amy Talèkoy:
 Miambesara an-tañan-kavanako etoa,
 ampara' te anoeko atimpahé'o
 o rafelahi'oo.
² Hirahe' IEHOVÀ boak'e Tsioné ao
 ty kobain-kaozara'o:
 Mifehea añivon-drafelahi'o eo!
³ Hahimbañe ondati'oo amy andron-kaozara'oy,
 ami'ty havolonahen-kamasiñañe;
 boak'an-kovim-panjirik' andro ao;
 ama'o ty zono-katora'o.
⁴ Nifanta t'IEHOVÀ, vaho tsy hilesa:
 Mpisoroñe nainai'e rehe, ami'ty famosora' i Melkizedeke.
⁵ I Tale am-pitàn-kavana'oy ty
 handemoke mpanjaka
 amy andron-kaviñera'ey.
⁶ Hizaka'e añivo' o fifeheañeo ré,
 le ho lipore'e lolo ty ao,
 ho hotohotoe'e an-tane mienene
 ty loha maro.
⁷ Hikama rano an-torahañe
 añ'olon-dalañe eo re,

vaho hampiandrae'e ty añ'ambone'e.

111

- 1** ♫ Treño t'IÀ !
andriañeko t'IEHOVÀ
an-kaliforan-troke
♪ añivo' ty favori' o vañoñeo,
naho amy valobohòkey.
- 2** ♪ Jabahinake o tolon-draha' IEHOVÀ;
♩ hene biribirie' o mifale ama'eo.
- 3** ♩ Lifots' engeñe naho volonahetse
o sata'eo,
♩ nainai'e ty havantaña'e.
- 4** ♪ Nanoe'e ho tiahy
o fitoloña'e tsitantaneo;
♩ matarike naho mpanolots'arofo
t'IEHOVÀ.
- 5** ♪ Anjotsoa'e mahakama
o mañeveñe ama'eo;
♩ ho tiahi'e nainai'e i fañina'ey,
- 6** ♪ Fa naboa'e am' ondati'eo
ty haozara' o fitoloña'eo,
♪ amy nanolora'e iareo
ty lova' o kilakila 'ndatiody.
- 7** ♪ To naho mahity o satam-pità'eo; ♪ vantañe iaby o fandilia'eo.
- 8** ♪ Ie noriza'e tsy ho modo nainai'e donia,
♪ fa nanoeñe am-pigahiñañe
naho an-kavañonañe.
- 9** ♪ Nihitrife'e fijebaññañe ondati'eo
♪ linili'e ho nainai'e i fañina'ey
♩ masiñe naho mampañeveñe ty tahina'e.
- 10** ♪ Fifotoran-kihitse ty fañeveñañe am' IEHOVÀ;
♪ hene mahilala ze mañorike aze.
♩ mizoñañe nainai'e ty fandrengeañe aze.

112

- 1** ♫ Treño t'IÀ.
Haha t'indaty mañeveñe am' IEHOVÀ,
♪ mahafale aze o taro'eo.
- 2** ♪ Hanjofak' an-tane atoy o tarira'eo;
♩ Ho soa-tata ty taminga' o vañoñeo.
- 3** ♩ Vara naho hanañañe
ty añ'anjomba'e ao,
♩ vaho nainai'e ty havantaña'e.
- 4** ♪ Anjirihan-kazavàñe añ'ieñe ao
ty vañoñe,
♩ matarike re, lifo-tretrè vaho vantañe.
- 5** ♪ Tahie'e t'indaty matarike
naho mampìndrañañe,
♩ naho mandahatse o tolon-draha'eo an-kahiti'e;
- 6** ♪ Le lia'e tsy hasiotse re;
♪ ho tiahy nainai'e o vañoñeo.
- 7** ♪ Tsy hampitsonevotse aze ty talily raty;

1 migahiñe ty arofo'e,
 IEHOVÀ ro fatokisa'e.
 8 ♂ Mioreñe ty arofo'e,
 tsy ho hemban-dre
 ♀ ampara' te sambae'e o rafelahi'eo.
 9 ♀ Fa nandiva'e mbeombeo,
 nanolora'e o rarakeo,
 ♀ nainai'e ty havantaña'e;
 ♂ haonjoñe an-kasiñe ty tsifa'e.
 10 ♂ Ho trea' ty tsivokatse,
 le hitarik'aiñe,
 ♀ hivaza-kota vaho hitranake;
 ♂ ho mongotse ty fañiria' o lo-tserekeo.

113

1 Treño t'IÀ.
 mandrengea, ry mpitoro' IEHOVÀ,
 bangò ty tahina' IEHOVÀ.
 2 onjoneñe ty tahina' IEHOVÀ,
 henane zao naho nainai'e donia.
 3 Boak' ami'ty fanjiriha' i àndroy
 pak'ami'ty fitsofora'e,
 le bangoañe ty tahina' IEHOVÀ.
 4 Andigiligi' ze hene fifeheañe t'IEHOVÀ,
 andindi' o likerañeо ty enge'e.
 5 Ia ty mañirinkiriñe IEHOVÀ
 Andrianañaharentika,
 Mpiambesatse an-dindìñe aña,
 6 Mibotreke re hivazohoa'e
 o likerañeо naho ty tane toy.
 7 Ampitroare'e boak' an-debok' ao
 o rarakeo vaho ongaha'e
 am-botren-ditsak' ao ty mpisotry,
 8 hampindreza'e fiambesatse
 amo roandriañeо,
 amo ana-dona' ondati'eo
 9 Ampitaiae'e aña'anjomba'e ao
 ty betsiterake, hifalea'e te renen' anake. Treño t'IÀ !

114

1 Ie niakatse e Mitsraime t'Israele,
 ty anjomba' Iakobe boak' am'onday
 hafa fisaontsio
 2 le nanoe'e toetse miavake t'Iehodà
 naho boriza'e t'Israele.
 3 Nañente i riakey, le nibioñe,
 nimpoly t'Iordane;
 4 Nitrekotreko hoe añaondrilahy
 o vohitseo,
 hoe anak-añondry o tambohoo.
 5 Akore, ry riakeo te mibioñe?
 ry Iordane, te miesoñe?
 6 ry vohitseo, te mitsamboatsamboañe
 hoe añaondrilahy,

ry tamboho, hoe anak-añondry?
⁷ Mihondrahondrà, ry tane toy,
 añatrefa' i Tale,
 aolo' i Andrianañahare' Iakobey,
⁸ ie nampañova ty vato ho sihanake, i lamilamiy ho rano mifororoake.

115

¹ Tsy zahay ry IEHOVÀ,
 tsy zahay fa i tahina'oy,
 ro anolorañe engeñe,
 ty amy fiferenaiña'o
 naho ty figahiña'o.
² Ino ty atao' o kilakila 'ndatio ty hoe: Aia t'i Andrianañahare' iareo?
³ Andindiñe ao t'i Andrianañaharentika;
 anoe'e iaby ze satrin' arofo'e.
⁴ Volamena naho vola-foty ty fitalahoa' iareo, satam-pità' ondaty.
⁵ Amam-bava iereo, fe tsy mivolañe,
 ama-maso, f'ie tsy mahatre;a;
⁶ aman-tsofy, f'ie tsy mahatsanoñe;
 aman' oroñe, f'ie tsy mahaàntsoñe;
⁷ aman-tañà, f'ie tsy maharambe,
 aman-tomboke, f'ie tsy mahalia;
 tsy mahalefe fiñeoñeoñañe o feo'eo.
⁸ Ho hambañe ama'e ty mamboatse aze, Eka! ze hene mpiato ama'e.
⁹ Ry Israele, atokiso IEHOVÀ!
 Ie ty mpañimba naho kalan-defo' iareo.
¹⁰ Ry tarira' i Aharone, atokiso IEHOVÀ!
 Ie ty mpañimba naho kalan-defo' iareo.
¹¹ Ry mañeveñe am' IEHOVÀ,
 atokiso IEHOVÀ!
 Ie ty mpañimba naho kalan-defo' iareo.
¹² Fa nitiahî' IEHOVÀ tika, ho tahie'e;
 ho soae'e ty anjomba' Israele, ho soae'e ty anjomba' i Aharone,
¹³ ho tahie'e o mañeveñe am' IEHOVÀ,
 ndra ty kede ndra ty bey.
¹⁴ Hampivangongoe' IEHOVÀ nahareo,
 inahareo naho o tiri' areoo,
¹⁵ hampanintsiña' IEHOVÀ,
 Andrianamboatse i likerañey
 naho ty tane toy.
¹⁶ O andikerañeo!
 a IEHOVÀ o likerañeo,
 fe natolo'e amo ana' i Dameo
 ty tane toy.
¹⁷ Tsy mandrenge IÀ o vilasio,
 ndra ia ia mizotso mb'am-bangìñe ao;
¹⁸ Fe hañandriañe IÀ tika henane zao ho nainai'e nainai'e.
 Treño t'IÀ !

116

¹ Kokoako t'IEHOVÀ amy te janji'e
 ty feoko naho o halalikoo,
² Amy te nanokilaña'e ravembia,

le ho tokaveko Amy ze hene androko.
³ Nivandire' o talin-kavilasio raho,
 nazi' i tsikeokeokey;
 nizò fikoretañe naho anahelo.
⁴ Le nikanjiek ty tahina' IEHOVÀ:
 Ehe, r'IEHOVÀ, hahao ty fiaiko!
⁵ Matarike t'IEHOVÀ naho mahity;
 Eka, mpitretre t'i Andrianañaharentika.
⁶ Arova' IEHOVÀ o trentrañe,
 nizo havoretra raho fe rinomba'e.
⁷ Mimpolia mb'am-pitofà'o ao ry fiaiko,
 fa nampiraorao azo t'IEHOVÀ.
⁸ Fa navots'o an-kavetrahañe ty fiaiko,
 tsy ho foy rano o masokoo, tsy hitsikapy o tombokoo,
⁹ t'ie hitsontik' añatrefa' IEHOVÀ,
 an-tanen-kaveloñe ao.
¹⁰ Nahatoky avao ndrà te nataoko ty hoe: Mafe ty fisotriako.
¹¹ Hoe raho te nianifañe:
 Fonga Remborake ondatio.
¹² Akore ty hañavahako am' IEHOVÀ?
 ami'ty habein-kasoa'e amako?
¹³ Ho zonjoñeko
 ty fitovim-pandrombahañe
 vaho hikanjy ty tahina' IEHOVÀ.
¹⁴ Havahako o nifantàko am' IEHOVÀ,
 añatrefa' ondati'e iabio.
¹⁵ Sarotse am-pihaino' IEHOVÀ
 ty havilasi' o noro'eo.
¹⁶ Ry IEHOVÀ, toe mpitoro'o raho, fetrek'oro'o,
 ty anan' anak'ampata'o;
 fa nabala'o o rohikoo.
¹⁷ Hengaeko sorom-pañandriañañe,
 vaho ho kanjiek ty tahina' IEHOVÀ.
¹⁸ Hondrohako am' IEHOVÀ
 o nifantàkoo,
 Eka, añatrefa' ondati'e iabio.
¹⁹ An-kiririsan'anjomba' IEHOVÀ eo,
 añivo'o ao, ry Ierosalaime.
 Treño t'IÀ!

117

¹ Rengeo t'IEHOVÀ ry kilakila'ndatio,
 onjono, ry hene ondatio.
² Amy te ra'elahy ty fiferenaiña'e antikañe, nainai'e donia ty hatò' IEHOVÀ.
 Treño t'IÀ.

118

¹ Andriaño t'IEHOVÀ amy te Ie ro soa!
 nainai'e ty fiferenaiña'e.
² Anò ty hoe ry Israele :
 nainai'e ty fiferenaiña'e.
³ Anò ty hoe ry anjomba' i Aharoneo :
 nainai'e ty fiferenaiña'e.
⁴ Anò ty hoe ry mpañeveñe am' IEHOVÀ :

nainai'e ty fiferenaiña'e.

⁵ Nalovilovy raho, le nitoreo am' IÀ;

nanoïñe ahiko t'IÀ,
le navotra'e an-gadagadaña eo.

⁶ Amako t'IEHOVÀ, tsy ho hemban-draho,
ino ty hanoa'ondatio?

⁷ Amako t'IEHOVÀ, mpañolotse ahiko,
le ho sambaeko o malaiñ' ahio.

⁸ Hamake t'ie mipalitse am' IEHOVÀ,
ta te misazok' am' ondatio.

⁹ Kitra'e mitsolok' am' IEHOVÀ,
ta te mirampy amo roandriañeo.

¹⁰ Hene miarikoboñe ahy o fifeheañeo
fe iatoako ty tahina' IEHOVÀ.

¹¹ Miarikatok' ahy iereo,

eka, toe misambory amako,
fe iatoko ty tahina' IEHOVÀ.

¹² Niropak' amako hoe rene-tantele iereo,
f'ie hakipike hoe fatike mirehetse;
toe iatoako ty tahina'IEHOVÀ.

¹³ Nanafasiotse ahy iereo* hikorovohako,
fe nañimb' ahy t'IEHOVÀ.

¹⁴ IEHOVÀ ro haozarako naho saboko,
ie ro fandrombahaña[†] ahy henane zao.

¹⁵ Inao ty feom-pirebehañe naho
fandrombahaña an-kivoho' o vañoñeo ao: mavitrike ty fitoloñam-pitàn-
kavana' IEHOVÀ. ¹⁶ Mizonjoñe ty fitàn-kavana' IEHOVÀ;

mahimbaña ty fitàn-kavana' IEHOVÀ.

¹⁷ Tsy hikenkan-draho fa ho veloñe,
hataliliço o sata' IEHOVÀ.

¹⁸ Nanilofe' là am-pandilovan-draho,
fe tsy natolo'e an-kavilasy.

¹⁹ Sokafo ho ahy
o lalam-bein-kavantañañeo,
hizilihako, hañandriañako IEHOVÀ.

²⁰ Intoy ty lalam-bei' IEHOVÀ, hiziliha'o vañoñeo.

²¹ Andriañekoo amy te tinoi'o,
fa Ihe ro fandrombahaña ahy.

²² I vato nado' o mpandrafitseoy le fa talèm-batolahy‡.

²³ Sata' IEHOVÀ zay,
le fiain-tane am-pihainon-tikaña.

²⁴ Itoy ty andro tsinene' IEHOVÀ,
antao hirebeke naho hifale ama'e.

²⁵ Ry IEHOVÀ,
Ehe, rombaho zahay henaneo!

ry IEHOVÀ,
Ehe, ampiraoraò henane zao!

²⁶ Andriañeñe ty mitotsak' ami'ty tahina' IEHOVÀ!§
mañandriañe azo zahay
boak'añ'anjomba'IEHOVÀ ao.

* **118:13** Heb: rehe † **118:14** Avo 15:2 ‡ **118:22** Heb: kalan-kotsoke, Top 4:11 § **118:26** Mat 21:9, Jao 12:13, Its 18:18-20

- ²⁷ Andrianañahare t'IEHOVÀ,
Ie ty nanolotse hazavàñe amantika;
mireketa reke-tsampaña
amo mpamonje sabadidakeo*, mivovotse
mb' an-tsifa' i kitreliy mb'eo.
- ²⁸ Ihe ro Andrianañahareko,
le andriañekoo;
Andrianañahareko rehe, ho zonjoñeko.
- ²⁹ Andriaño t'IEHOVÀ amy te ie ro soa!
nainai'e ty fiferenaiña'e.

119

- ¹ ♫ Alefe*
- Haha o vantañe amy lia'eio,
o mañavelo amy HÀ'IEHOVÀio.
- ² Haha o miambene o taro'eoo,
ty mitsoek' aze an-kaliforañ' arofo;
- ³ Tsy manao ty hatsivokarañe
t'ie manonjohy o lala'eo.
- ⁴ Fa najado'o o fepè'oo
hañorihan-tika an-joton-troke.
- ⁵ Hizoñañe abey o liakoo,
hañambenaço o fañè'oo !
- ⁶ Le tsy ho salaren-draho
naho hotsohotsoeko iaby o fepè'oo,
- ⁷ Handriañeko rehe an-kalio-troke,
handrendreke o fizaka'o too.
- ⁸ Hambenako o fañè'oo;
ko farie'o zafe-anake.

- ▣ Bete†
- ⁹ Akore ty hañaliova' ty ajalahy i lia'ey?
hambena'e amo tsara'oo.
- ¹⁰ Nitsoehoko rehe an-kaàmpoon-troke;
vontitiro raho tsy handifike o fepè'oo.
- ¹¹ Fa nahajako an-trok' ao o saontsi'oo
tsy handilatse ama'o.
- ¹² Andriañen-dRehe, ry IEHOVÀ;
anaro ahy o fañè'oo.
- ¹³ Nitaroñe' o soñikoo
ze hene fizakam-palie'o.
- ¹⁴ Firebehako ty lala' o taro'oo hambañ' amy ze atao vara iaby.
- ¹⁵ Ho tsatsihoko o fepè'oo, vaho ho biribirieko o lala'oo.
- ¹⁶ Hifaleako‡ o fañè'oo,
tsy handikofako o tsara'oo.

- ▣ Gimele§
- ¹⁷ Matariba amy mpitoro'oy,
hahaveloñ' ahy hañoriike o tsara'oo.

* **118:27** Sabadida-Sokemitraha, 15 Saramañitse * **119:1** Mifandime ami'ty abody Hebreo,
nalahatse kivalo sindre mifototse am-peo raike ty valo. Alef: 'A' ami'ty abode Hebreo: Añombelahy
† **119:8** Bete: 'B' ami'ty Hebreo: anjomba, traño ‡ **119:16** Sab 119:24,35,47,70,77,92,143,174, Rom
7:22 § **119:16** Gimele: 'G' Hebreo; rameva, fandia

- ¹⁸ Sokafo o masokoo hahatrea raha fanjaka amy Tsara'oy.
¹⁹ Mpitaveañe an-tane atoy raho;
 ko aeta'o amako o fandilia'oo.
²⁰ Demoke ty fiaiko
 salalakeo lomoñandro o fizaka'oo.
²¹ Trevohe'o o mpitrotroabokeo—
 o fokompàtse mandridrìke amo fetse'oo.
²² Asitaho amako ty rabioñe
 naho ty teratera,
 fa ambenako o taro'oo.
²³ Ndra te mitoboke,
 mikabo-draha amako o roandriañeo,
 mininike o fañè'oo ty mpitoro'o.
²⁴ Eka, mahaehak' ahy o taro'oo;
 toe mpamere ahy.

- ²⁵ *Dàlete**
²⁵ Mipitek' an-debok' ao ty fiaiko;
 ampisotrafo amo tsara'oo.
²⁶ Ie nataliliko o satakoo,
 le natoi'o, anaro ahy o fañè'oo.
²⁷ Ampaharendreho ahy
 ty lala' o fepè'oo,
 hitsakoreako o fitoloña'o fanjàkao.
²⁸ Mitronake am' anahelo ty fiaiko;
 ampahozaro amo tsara'oo.
²⁹ Ampisitaho amako
 ty lalan-dremborake;
 atorò ahy am-patarihañe o Tsara'oo.
³⁰ Fa jinoboko ty lalam-pigahiñañe,
 naho fa nalahako o fizakà'oo.
³¹ Ie mipitek' amo taro'oo;
 ry IEHOVÀ,
 ko anga'o ho salareñe.
³² Hilaisako ty lala' o fandilia'oo, amy t'ie nanibake ty troko.

- ³³ *He†*
³³ Anaro ahy, ry IEHOVÀ,
 ty lala' o fañè'oo;
 le horiheko pak' am-pigadoñako.
³⁴ Omeo hilala raho,
 hañambenako o Tsara'oo,
 le horiheko an-kaliforan-troke.
³⁵ Ampandiao ahy ty oloñolo'
 o fandilia'oo,
 amy t'ie mahafale ty troko.
³⁶ Ampitokilaño amo fañè'oo ty troko
 tsy hitomboa'e am-patitiañe.
³⁷ Avioño o masokoo tsy hañente
 ty tsy vente'e;
 ampahimbaño amo lala'oo.
³⁸ Henefo amy mpitoro'oy o saontsi'oo,

* 119:24 Dalete: 'D' Hebreo; lalan-traño † 119:32 He: 'h' Hebreo: Hehekel; taña-mizonjo

ty amy fañeveñako ama'o.

³⁹ Ahankaño aña ty ìnje'
o mampangebahebak' ahikoo,
amy te soa o fizakà'oo.
⁴⁰ Hete ! salalaeko o fepè'oo!
ihetsefo amo fahiti'oo.

↑ *Vav*‡

⁴¹ Ampombao amako ty fiferenaiña'o ry IEHOVÀ,
ty fandrombaha'o ty amo saontsi'oo;
⁴² hahafitoiñako ty mañorohoro ahiko,
fa iatoako o tsara'oo.
⁴³ Ko sintone'o am-bavako
ty tsara-to, fa salalaeko o nafè'oo,
⁴⁴ Le hambenako lomoñandro o Tsara'oo, eka, nainai'e donia;
⁴⁵ Hijelanjelañe am-pidadàñe raho,
amy te hotsohotsoeko o fepè'oo.
⁴⁶ Ho talilieko añatrefam-panjaka
o taro'oo le tsy ho salatse,
⁴⁷ Hifaleako o fandilia'oo
toe kokoako.
⁴⁸ Zonjoñeko amo fandilia'oo o tañakoo,
fa kokoako, vaho haereñerek o fañè'o.

↑ *Zene*§

⁴⁹ Tiahio i nitsaraeñe amy mpitoro'oiy,
amy t'ie nampitamae'o.
⁵⁰ Zao ty mampanintsiñe ahy
amo faloviloviakoo,
te nahajangañe ahy o saontsi'oo.
⁵¹ Mitolom-piteratera ahy
o mpirengevokeo,
fe tsy mivik' amo Tsara'oo raho.
⁵² Tiahiko o fizakà'o haehaeo,
ry IEHOVÀ, fa nahaeneñ' ahy.
⁵³ Filoroloro-mena ty mamihiñe ahiko
ty amo lo-tsereke
mampipoke i Tsara'oio.
⁵⁴ O fañè'oo ro fisaboako an-kialo fitaveañako.
⁵⁵ Tiahiko ami'ty haleñe
ty tahina'o ry IEHOVÀ,
vaho oriheko o Tsara'oo.
⁵⁶ Zao ty ahy
te ambenako o fepè'oo.

¶ *Khète**

⁵⁷ IEHOVÀ ro anjarako;
fa nifanta t'ie hañorike o tsara'oo.
⁵⁸ Fa nipaiako an-kaampon-troke
ty fañisoha'o; tretrezo raho
ty amo nampitama'oo.
⁵⁹ Nitsakoreko o liakoo le nampitoliheko mb'amo taro'oo o tombokoo.
⁶⁰ Nalisa raho tsy nihenekeneke

‡ 119:40 Vav: 'V' : Heb: kitro, fahañe § 119:48 Zaine: 'Z' : Heb: fialiañe, lasary * 119:56 Khete: 'Kh' : Heb: kijoly

hañambeñe o fandilia'oo.

⁶¹ Mamejañe ahiko ty hafo' o lo-tserekeo, fe tsy andikofako o Tsara'oo.

⁶² Mitroatse antetsalen-draho

hañandriañe Azo

ty amo fizakà'o vantañeo.

⁶³ Ràñeko o mañeveñe ama'o iabio,
naho o mpañorike o pepè'oo.

⁶⁴ Lifotse ty fiferenaiña'o ty tane toy,
ry IEHOVÀ; anaro ahy o fañè'oo.

▀ *Tète*†

⁶⁵ Fa nisoae'o ty mpitoro'o, ry IEHOVÀ,
ty amo enta'oo.

⁶⁶ Anaro hilala naho hihitse,
amy te atokisako o fandilia'oo.

⁶⁷ Nandifike hey raho le nalovilovy,
fe ifaharako o saontsi'oo henane zao.

⁶⁸ Soa rehe, mpanao ty soa;
anaro ahy o fañé'oo.

⁶⁹ Mamoroñe vande amako
o mpinefonefokeo,
fe hene ahajako an-troke ao o pepè'oo.

⁷⁰ Vondrake hoe sabora ty tro' iareo,
fe mahanebanembañ' ahiko o Tsara'oo.

⁷¹ Nahasoa ahiko te nisilofeñe,
hianarako o fañè'oo.

⁷² Fanjaka amako ta ty volamena naho
ty volafoty aña'arivo'e o Tsaram-palie'oo.

▀ *Ieòde*‡

⁷³ Namboatse naho nitsene ahy o fità'oo; toloro hilala hianarako
o fandilia'oo.

⁷⁴ Ho isa' o mañeveñe ama'oo raho le hifale, fa o tsara'oo ty fitamako.

⁷⁵ Apotako ry IEHOVÀ,
te vantañe o fizakà'oo,
naho figahiñañe ty nanotria'o ahy.

⁷⁶ Ehe ohò ami'ty fikokoa'o migahiñe,
ty amy nafè'o amy mpitoro'oy.

⁷⁷ Ampombao mb'amako ty fitretreza'o hahaveloñ'ahy,
fa ifaleako o Tsara'oo.

⁷⁸ Salaro o mpiebotsebotseo,
ie nañadroadro ahy tsy vente'e;
fa ereñèreko o pepè'oo.

⁷⁹ Ampimpolio amako o mañeveñe ama'oo, naho o mahafohiñe o taro'oo.

⁸⁰ Hahity amo fañè'oo abey ty troko,
tsy mone ho salareñe.

▀ *Kafe*§

⁸¹ Ho mokoreko fiaiñe o fandrombaha'oo,
ty amy fisalalàko o enta'oo.

⁸² Mampilesa o masokoo o saontsi'oo; anoako ty hoe:
Ombia ty añoho'a'o ahy?

⁸³ Ndra t'ie hoe gorogoron-divay an-katòeñe ao, tsy haliñoko o fañè'oo.

† 119:64 Tete: T tsotra, Heb : mereñe ‡ 119:72 Yode: 'iè' Heb: fita mivokeñe § 119:80 Kaf:
'K ndra Kh' Heb: Lelam-pitañe

- ⁸⁴ Fire ty andro' i mpitoro'oy?
 Ombia te ho zakae'o
 o mpanao samporerak' ahikoo?
- ⁸⁵ Fa nihaly koboñe ho ahiko
 o mpitrotroabokeo,
 o tsy mañaoñe o Tsara'oo.
- ⁸⁶ Migahiñe iaby o fandilia'oo;
 ampisoañe' iereo am-pamañahiañe,
 imbao raho!
- ⁸⁷ Didý tsy nifaohe'iareo an-tane atoy,
 fe zaho, tsy apoko o fepè'oo.
- ⁸⁸ Hetsefo raho ami'ty fiferenaiña'o,
 hañorihako o tarom-palie'oo.

↳ *Làmede**

- ⁸⁹ Nainai'e, ry IEHOVÀ, ty fijadoña'
 o tsara'oo an-dindìñe ao;
- ⁹⁰ Manitsike ze hene tariratse
 mifandimbe ty figahiña'o;
 kanao norize'o ty tane,
 mijadoñe zay.
- ⁹¹ O fizakà'oo ty ijohaña' iareo henaneo;
 kila mitoroñ' azo.
- ⁹² Naho tsy nahaehak'ahy o Tsara'oo
 le ho nihomak' amy hasotriakoy.
- ⁹³ Tsy ho haliñoko ka o fepè'oo,
 fa iereo ro nanotrafa'o ahiko.
- ⁹⁴ Kanao azo raho, rombahö;
 fa nitsikaraheko o fepè'oo.
- ⁹⁵ Fa hañè-doza amako o lo-tserekeo,
 fe ho tsakorèko o taro'oo.
- ⁹⁶ Nitreako te hene higadoñe ze atao safiry; fe toe milañelàñe o fandilia'oo.

↳ *Meme†*

- ⁹⁷ Hirý! ty fikokoako o Tsara'oo‡!
- Kinañeko lomoñadro.
- ⁹⁸ Mampahihitse ahy ambone'
 o rafelahikoo o fandilia'oo,
 fa amako nainai'e.
- ⁹⁹ Andikoareko an-kilala ze hene mpañok' ahy,
 amy te ereñereko o taro'oo.
- ¹⁰⁰ Milikoatse ty faharendreha' o taoloo ty ahiko,
 amy te ambenako o fepè'oo.
- ¹⁰¹ Ampiholiareko amy ze lalan-draty iaby
 o tombokoo;
 hañorihako o tsara'oo.
- ¹⁰² Tsy nisitahako o fizakà'oo,
 amy te Ihe ty mañòk' ahy.
- ¹⁰³ Akore ty hamami' o saontsi'oo
 an-dañilañiko ao,
 lombolombo te ami'ty tantele
 am-bavako ao!
- ¹⁰⁴ O fepè'oo ro mampandrendrek'ahy,

* 119:88 Lamede: 'L' Heb: Kobaiñe † 119:96 Mem: 'M' Hebreo: rano ‡ 119:97 Toe Hake:
 a.113,119,127,163,165,167

fonga hejeko ze lalam-bilañe.

♪ Nòne§

- 105 Failo amo tombokoo o tsara'oo,
naho hazavàñe añ'oloñoloko eo.
106 Fa nifanta raho vaho hajadoko
te hambenako o fizakà'o vantañeo.
107 Loho miatra-draha raho;
Ampisotraho amo tsara'oo
raho ry IEHOVÀ.
108 Iantofo ry IEHOVÀ
o banabanam-bavakoo,
vaho anaro ahy o fizakà'oo.
109 An-tañako ao nainai'e ty fiaiko,
fe tsy ho likofeko o Tsara'oo.
110 Nampidreña-pandrike ho ahy
o lo-tserekeo,
fe tsy nivihako o fepè'oo.
111 Linovako ho nainai'e o taro'oo,
le irebeha' ty troko.
112 Fa natokilako ty troko
hañoriha'e nainai'e o fañè'oo,
pak'am-pigadoña'e aña.

¤ Sameke*

- 113 Hejeko ty milolohe roe,
fe kokoako o Tsara'oo.
114 Ihe ro fipalirako naho kalan-defoko;
o tsara'oo ro fisalalàko.
115 Misitaha amako ry lo-tserekeo!
hiambenako o fandilian' Añaharekoo!
116 Tozaño amo saontsi'oo raho,
soa te ho veloñe;
le ko ampisalareñe amy fitamàko.
117 Tohaño le ho tra-drombake,
hitoloñako amo fepè'oo nainai'e.
118 Aforintseo ze mandifike
amo fepè'oo,
fa vande ty famañahia' iareo.
119 Ado'o hoe taim-pira
ze fonga tsy vokatse an-tane atoy;
zay ty ikokoako o taro'oo.
120 Mititititik' an-kahembañañe ama'o
o nofokoo;
fa mampañeveñe ahy o fizakà'oo.

♪ Aine†

- 121 Fanoeko ty hatò naho ty havantañañe,
ko anga'o amo mpañelok' ahio.
122 Tsoeho ho an-kasoa
ty mpitoro'o,
ko ado'o hanindria'
o mpirengenvokeo

§ 119:104 None: 'N' Hebreo; fia, tabiry
† 119:120 Aine: ze feo itolorañe; fihaino

* 119:112 Samekh: 'S' masioñe Heb: fikalañe, fatike

¹²³ Ilesà' o masokoo ty fandrombaha'o
naaho o saontsi'o vañoñeo.
¹²⁴ Anò am-piferenaiña'o ty mpitoro'o,
vaho aòho ahy o fañè'oo.
¹²⁵ Mpitoro'o raho,
toloro hilala handrendrehako o taro'oo.
¹²⁶ Tondroke ty hitoloña' IEHOVÀ;
fa nivalik' amo Tsara'oo iereo.
¹²⁷ Toe kokoako mandikoatse
o volamenao
o fandilia'oo, ambone' ty volamena ki'e,
¹²⁸ vaho iantofako te vantañe
te amy ze he'e o fepè'oo;
fonga hejeko ze lalam-bàlañe.

¤ Pe‡

¹²⁹ Fanjaka o taro'oo;
le ifahara' ty troko.
¹³⁰ Minday hazavàñe ty famentarañe o tsara'oo;
mampandrèndreke ty bànoke.
¹³¹ Nitañataña vava raho,
nisefosefo amy fisalalàko
o fandilia'oy.
¹³² Mitoliha amako le tretrezo,
ie anoe'o amo mikoko i tahina'oio.
¹³³ Alaharo amo fetse'oo ty liako;
le ko apo'o ho fehen-kakeo
inoñ'inon-draho.
¹³⁴ Jebaño ami'ty famorekekea' ondatio, hañorihako o fepè'oo.
¹³⁵ Ampireandreaño amy mpitoro'oy
ty lahara'o,
vaho aòho ahy o fañè'oo.
¹³⁶ Mikararake rano hoe torahañe
o masokoo,
ami'ty tsy fañoriha' iareo o Tsara'oo.

¤ Tsadý§

¹³⁷ Vantan-dRehe, ry IEHOVÀ,
naaho vañoñe o fizakà'oo.
¹³⁸ Fa nafanto'o an-kahiti'e o taro'oo,
naaho am-pigahiñañe ra'elahy;
¹³⁹ Mametrak' ahiko ty fahimbañako,
ami'ty fandikofa' o rafelahikoo o tsara'oo.
¹⁴⁰ Vata'e niventèñe o nafè'oo,
vaho ikokoa' ty mpitoro'o.
¹⁴¹ Kede raho naaho mavoeñe,
fe tsy haliñoko o fepè'oo.
¹⁴² Toe marentane nainai'e tsy modo
o havantaña'oo;
vaho to o Tsara'oo.
¹⁴³ Tendrek' ahiko ty hasotriañe
naaho ty haloviloviañe,
fe mahafale ty troko o fandilia'oo.

‡ **119:128** Pe: 'P' ndra 'F' te Hebreo : Falie misokake § **119:136** Tsadike: 'Ts' te Hebreo: vantañe,
vintañe

¹⁴⁴ Vantañe nainai'e o taro'oo;
toloro hilala hivelomako.

¶ Kòfe*

¹⁴⁵ Fa nitoreo an-kaampon-troke:
toiño raho ry IEHOVÀ; hañorihako o fañè'oo.

¹⁴⁶ Mikanjy Azo, ehe rombahao,
fa hambenako o taro'oo.

¹⁴⁷ Mañampitso t'ie mitroatse
naho mikaike; misalala o tsara'oo.

¹⁴⁸ Mitamà o fijilovan-kaleñeo o masoko, mañereñere' o nafè'oo.

¹⁴⁹ Janjiño ty feoko amo fiferenaiña'oo;
isotrafo, ry IEHOVÀ, ty amo nafe'oo.

¹⁵⁰ Fa mitotoke o mpiikitro-draha ratio,
o mitotse amo Tsara'oo.

¹⁵¹ Marine rehe ry IEHOVÀ,
naho hene to o fandilia'oo.

¹⁵² Fa nirendreko haehae o taro'oo
fa najado'o ho nainai'e.

¶ Rèse†

¹⁵³ Vazohò ty fisotriako
vaho imbao,
fa tsy haliñoko o Tsara'oo.

¹⁵⁴ Alañalaño ty entako, vaho jebaño;
sotrafo ty amo nafè'oo.

¹⁵⁵ Lavitse o lo-tserekeo ty fandrombahañe, fa tsy paia' iereo o fañè'oo.

¹⁵⁶ Ra'elahy o fiferenaiña'oo ry IEHOVÀ;
bodaño raho ty amo taro'oo.

¹⁵⁷ Maro ty mampisoañe ahiko
naho o malaiñ'ahio,
f'ie tsy mivike amo taro'oo.

¹⁵⁸ Treako o mivalikeo, toe hejeko;
amy te tsy ambena' iareo o fetse'oo.

¹⁵⁹ Vetsevetseo ty fikokoako o fepè'oo;
velomo raho ry IEHOVÀ,
ty amo fiferenaiña'oo.

¹⁶⁰ Ty jabajaba amo Tsara'oo, le t'ie vañoñe, hene mijadoñe nainai'e o
fizakà'o vantañeo.

¶ Sine‡

¹⁶¹ Mampisoañ'ahy tsy aman-tali'e
o roandriañeo,
fe mañeñeñe amo tsara'oo ty troko.

¹⁶² Firebehako o fetse'oo,
manahake t'ie anjòam-barabey.

¹⁶³ Hejeko naho mañalik'ahy
o lañitseo,
kokoako o Tsara'oo.

¹⁶⁴ Mandrenge Azo im-pito ami'ty andro raho ty amo fizakà'o mahitio.

¹⁶⁵ Fañanintsin-tsoa amo mikoko
o Tsara'oo, tsy eo ty hahatsikapy iareo.

¹⁶⁶ Salalaeko i fandrombaha'oy,

* **119:144** Kofe: 'K' Hebreo. gadon-doha, masoandro † **119:152** Resh: 'R' Hebreo; añambone

‡ **119:160** Sin : 'S' ,Hebreo, vilo' masy, famotse

ry IEHOVÀ, hene ambenako o fandilia'oo.

¹⁶⁷ Ambena' ty fiaiko o taro'oo,

le toe kokoako.

¹⁶⁸ Tanako o pepè'oo naho o taro'oo,

aolo'o eo iaby o liakoo.

¶ Tave§

¹⁶⁹ Ehe te hiatreke azo o torekoo,

ry IEHOVÀ;

andrendreho te fahareko o tsara'oo.

¹⁷⁰ Hiheo añatrefa'o eo abey o halalikoo;

avotsoro ty amo fetse'oo.

¹⁷¹ Hampipoñake fandrengeañe

o soñikoo, amy te anare'o ahy o fañè'oo.

¹⁷² Hisaboe' ty lelako o nafè'oo,

amy te hene vantañe o pepè'oo.

¹⁷³ Ee te ho veka'e hañimba ahiko

ty fità'o, fa jinoboko o lili'oo.

¹⁷⁴ Fisalalàko i fandrombaha'oy, ry IEHOVÀ, mampinembanembañ'ahy
o Tsara'oo.

¹⁷⁵ Sotrafo ty fiaiko handrenge azo,

vaho ampañimbao ahy o fizakà'oo.

¹⁷⁶ Nivike hoe añondry motso raho;

tsoeho o mpitoro'oo,

fa tsy likofeko o pepè'oo.

120

Sabo-Pionjonañe ¹ Zaho niampoheke,
le nikanjy IEHOVÀ, vaho tinoi'e.

² O ry IEHOVÀ,

apitsoho an-tsoñin-dremborake ty fiaiko, boak' ami'ty lela mamañahy.

³ Inon-ty homeañ' azo,

ino ka ty hanoeñe ama'o

ty lela letra'e tia?

⁴ ana-pale masiom-panalolahy,
naho forohan' andrabey!

⁵ Hankàñe amako te mañialo

e Mèseke* aña,

naho ty fimoneñako an-kiboho'

i Kedàre[†] ao !

⁶ Loho hatr'ela'e ty nitraofam-piaiko
ami'ty kivoho' o malaim-pilongoaño.

⁷ Toe mpitea filongoan-draho;
fa ie ivolañako, aly avao ty onjone' iereo.

121

Sabo-Pionjonañe ¹ Andrandrako mb'amo vohitseo
o masokoo,
aia ty hiboaha' ty fañimbañ' ahiko?

² Hirik'am' IEHOVÀ o fañolorañ' ahikoo,

§ 119:168 Tav: 'T' fiasiañe Hebreo; viloñe * 120:5 Meseke: kinozotse an-kère'e † 120:5
Kedare: hamoromoroñañe, haniñe

I namboatse i likerañey naho ty tane toiy.
³ Tsy henga'e hasitse o fandia'oo,
 tsy hirotse i Mpañaro azoy;
⁴ Eka, tsy hidròdreke, tsy hirotse
 ty Mpitamiri' Israele.
⁵ IEHOVÀ ro Mpañambeñ' azo,
 IEHOVÀ ro fialofa' ty fitàñ-kavana'o;
⁶ Tsy hipisañe ama'o i tariñandrokey,
 ndra i volañey te haleñe.
⁷ Hañaro azo amy ze fonga haratiañe
 t'IEHOVÀ;
 vaho ho tamirie'e ty fiai'o.
⁸ Harova' IEHOVÀ ty fiengà'o
 naho ty fiziliha'o
 henane zao vaho nainai'e donia.

122

Sabo-Pionjonañe. A i Davide. ¹ Nandia-taroba raho,
 te nanoa' iereo ty hoe:
 Antao hiheo mb'añ'anjomba' IEHOVÀ.
² Fa mijohañe amo lalam-bei'oo
 ty fandia'ay, ry Ierosalaime!
³ Hehe t'Ierosalaime, rova niranjieñe
 soa-fifamatotse.
⁴ Ie ty ionjona' o rofòkoo, o rofòko' IÀ-o,
 ty amy nitaroñañe am' Israeley,
 hañandriaña'iareo ty tahina' IEHOVÀ.
⁵ Ao ty nampitroarañe fiambesam-pizakàñe, o fiambesa' i tarira' i
 Davideio.
⁶ Mihalalia fañanintsiñe am'Ierosalaime: hiraorao o mikoko Azoo.
⁷ Fañanintsiñe ty ho an-kijoli'o ao,
 naho fierañerañañe
 amo anjomba'o mitiotiotseo.
⁸ O longokoo naho o rañekoo,
 le hataoko ty hoe: Fañanintsiñe ama'o.
⁹ I anjomba' IEHOVÀ
 Andrianañaharentikañey,
 ho paiako ty hampibobodo azo.

123

Sabo-Pionjonañe ¹ Ampiandraeko ama'o o masokoo,
 ry Mpiambesatse an-dikerañe ao.
² Hehe te manahake ty fañentean' ondevo
 ty fitàñ-talè'e,
 naho ty mason' anak' ampatañe
 ty fitàñ-drakemba'e,
 ro iandràm-pihainon-tika
 t'IEHOVÀ Andrianañaharen-tika,
 ampara' te tretreze'e.
³ Ferenaiño zahay ry IEHOVÀ,
 tretrezo, fa loho natsafen-tsirika.
⁴ Etsake ty fanivativà' o mpiaiñ'

añoleñañe o fiai'aio,
vaho ty injé' o mpirengevokeo.

124

Sabo-Pionjonañe. A i Davide. ¹ Naho tsy IEHOVÀ ty nañimba antika —
ano ty hoe r'Israele—
² Naho tsy nañolotse' antika t'IEHOVÀ,
ie naname an-tikañe ondatio,
³ le ho nagodra' iereo veloñe
ami'ty fisolebaran-kabosehañe;
⁴ le ho nandempotse antika o ranoo,
ho nisorotombak' amo ain-tikañe
i torahañey,
⁵ Eka ho nalipo' o rano mitroñe
o ain-tikañe,
⁶ Andriaño t'IEHOVÀ, fa tsy napò'e tika
ho fitsatsàm-pamotsi' iareo.
⁷ Niborofotse tika hoe voroñe
am-bitsom-pitsindro-boroñe,
nipototse i fandrikey, le nibotafotse tika.
⁸ Fañimbàn-tikañe ty tahina' IEHOVÀ,
Andrianamboatse i likerañey
naho ty tane toy.

125

¹ Sabo-Pionjonañe
Hambañe amy Vohi-Tsiôney
o mpiato am' IEHOVÀo,
tsy hasiotse, fa himoneñe nainai'e.
² Manahake ty figoloboña' o vohitseo
t'Ierosalaime,
ty añoñoña' IEHOVÀ ondati'eo,
henane zao vaho nainai'e.
³ Tsy hidok' ambone' ty tane' o vantañe
ty kobain-karatiañe,
tsy mone hañiti-fitañe ami'ty raty
o vañoñe.
⁴ Hasoao, ry IEHOVÀ, ondaty soao
naho o vantañ' arofoo.
⁵ Fe ty amo mitsile mb'an-dalañe mikelokelokeo, le ho kozozote' IEHOVÀ
añe mindre amo mpanao ratio.
Fañanintsiñe am' Israele.

126

¹ Sabo-Pionjonañe
Ie mampoly ty fandrohiza' i Tsiône t'IEHOVÀ;
le hanahake te mañinofy tikañe.
² Hitsitsihe' ty hehe o falien-tikañe,
naho ty rebeke o famelen-tikañe;
vaho hisaontsieñe amo fifeheañe ty hoe:
Nanao raha jabajaba ho a iareo t'IEHOVÀ.
³ Eka, nitolora'IEHOVÀ raha ra'elahy,

lifo-kaehake tikañe.

⁴ Afotero ty haondevo'ay ry IEHOVÀ,
manahake o torahañe atimo añaeo.

⁵ Hitoly sabo an-kaehake

o mitongy an-drano-pihaino !

⁶ Ty minday tabiry ho tongiseñe
am-pirovetañe

ro hibalik' an-drebeke hanese
o fitoboroña'eo.

127

¹ Sabo-Pionjoña' i Selomò

Naho tsy IEHOVÀ

ty mandranjy ty anjomba,

tsy manjofake ty itromaha'

o mpandrafitseo.

Naho tsy IEHOVÀ ty mañambeñe i rovay,

tsy vente'e ty hijilova' o mpigaritseo.

² Tsy vara te mañaleñaleñe

naho hifonen-droro te haleñe,

hikama ty mofom-pitoloñañe;

amy te atolo'e rotse o kokoa'eo.

³ Toe lova boak'am' IEHOVÀ o ajajao,

ty toli-troke ro tambe.

⁴ Hoe ana-pale am-pitàm-panalolahy

o amorin-katora'eo

⁵ Haha t'indaty naho atsak' irezay

i trañon'ana-pale'ey;

tsy ho salatse t'ie mifanaontsy

amo rafelahi'eo an-dalam-bey ey.

128

¹ Sabo-Pionjonañe

Hene haha ondaty mañeveñe

am' IEHOVÀ, ie mañavelo amo lala'eo.

² Ho kamae'o ty fitoloñam-pità'o,

le ho ehave vaho hierañerañe.

³ Hanahake ty vahe mirotrarotra

ty tañ'anjomba'o añ'akiba'o ao,

hoe zeite* tora'e

miariseho ty fandambaña'o o ana'oo.

⁴ Eka, zay ty fitahiañe ondaty

mañeveñe am' IEHOVÀ.

⁵ Hañasoa azo boake Tsîône ao t'IEHOVÀ

le ho oni'o ty hasoa' Ierosalaime

amy ze hene andro hiveloma'o;

⁶ Eka, ho isa'o o anan' ana'oo.

Fañanintsiñe am' Israele.

129

¹ Sabo-Pionjonañe

* ^{128:3} Ze'ite: hatae Oliva

Beteke nisilofen-draho
boak'ami'ty nahajalahy ahiko—
ano ty hoe r'Israele—
 2 Beteke niforeforèñe
sikal'amy te zaho niajalahy,
f'ie tsy nahagioke ahy.
 3 Nitrababe' o mpitrabakeo
ty sakamamovoko,
nanoe' iareo lava o vavahalioo.
 4 Vantañe t'IEHOVÀ;
navitso'e ty namahora' o lo-tserekeo ahy.
 5 Hampolieñe an-kasalarañe
ze malaiñe i Tsioné.
 6 Ie hampanahafeñe ami'ty ahetse
an-tafo traño eo,
hiheatse aolo' ty hibeiza'e,
 7 toe tsy hahaeneñe
ty fità' i mpanatakey,
ndra ty araña' i mpifehe' o fehe'eo.
 8 Vaho tsy anoë' o mpandrioñeo ty hoe:
Ho ama' areo ty fañanintsi' IEHOVÀ!
Itatà'ay ami'ty tahina' IEHOVÀ!

130

1 Sabo-Pionjonañe
 Boak'an-dalek' ao ty nitoreovako
 ama'o ry IEHOVÀ;
 2 Ry Talè, haoño ty feoko !
 Ampijanjijo'o ravembia'oo
 ty feon-kalaliko.
 3 Lehe Ihe r'IEHOVÀ ro namolily hakeo,
 ia, ry Talè, ty ho nahafijohañe?
 4 Fe ama'o ty fañafahan-kakeo;
 soa te hañeveñañe.
 5 Mitamà IEHOVÀ raho,
 mandiñe ty troko,
 o tsara'oo ro salalaeko.
 6 Mitamà i Talè ty fiaiko
 mandikotse ty mpandiñe maraindraiñe,
 eka, ty mpandiñe maraindraiñe.
 7 O Israeleo, mitamà IEHOVÀ,
 am' IEHOVÀ ao ty fikokoa-migahiñe
 ama'e ty fijebañañe mihenehene.
 8 Ie ty hijebañañe Israele
 amo fonga hakeo'eo.

131

1 Sabom-Pionjonañe, a i Davide
 Ry IEHOVÀ,
 tsy mirenge ty troko,
 tsy miandra o masokoo;
 tsy ahoako o raha loho jabajabao,

yaho ze loho sarots' amako.
² Toe nampipendreñē naho
 nampitsiñē ty fiaiko raho,
 manahake ty ajaja notaen-drene'e,
 ie hoe ajaja maota ty fiaiko.
³ O ry Israeleo, itamao t'IEHOVÀ
 henane zao vaho nainai'e.

132

¹ Sabo-Pionjonañē
 Ry IEHOVÀ, tiahio t'i Davide
 ty amo falovilovia'eo.
² Ty nifantà'e am' IEHOVÀ,
 ty nititha'e amy Tsitongerè' Iakobey:
³ Toe tsy hizilik' an-kibohon-
 trañoko ao raho
 ndra hijoñe am-pandreako
 nivelareñē ho ahiko ao:
⁴ Tsy homeiko roro o masokoo,
 tsy hidrodreke o voho-masokoo,
⁵ ampara' te hahatreavako toetse t'IEHOVÀ,
 akiba ho a i Tsitongerè' Iakobey.
⁶ Jinanji'ay e Efrata* zay,
 tendrek' an-kodobo' i alay :
⁷ Antao hionjoñe mb'an-Kivoho'e ao;
 antao hitalaho
 am-pitongoàm-pandia'e eo.
⁸ Miongaha ry IEHOVÀ,
 miheova mb'am-pitofà'o mb'eo,
 Ihe naho
 i vatam-pañinan-kaozara'oy.
⁹ Ho lafihen-kavantañañē
 o mpisoro'oo,
 hipoñak' an-kaehake o noro'oo.
¹⁰ Ty amy Davide mpitoro'oy, ko ampitolihe'o aña
 ty lahara' i noriza'oy.
¹¹ Nifanta mahity amy Davide t'IEHOVÀ,
 vaho tsy hafote'e, ty hoe:
 Hampiambesareko
 ami'ty fiambesam-panjakà'o eo
 ty boak' am-pañova'o ao;
¹² lehe ambe' o ana'oo i fañinakoy
 naho ty taroko anareko iareo,
 le hiambesatse amy fiambesam-panjaka'oy nainai'e o ana' iareoo.
¹³ Toe jinobo' IEHOVÀ ty Tsioné, i fañiria'e ho fimoneña'ey:
¹⁴ Etoy ty fitofako nainai'e tsy modo;
 atoa ty himoneñako, fa fisalalàko—
¹⁵ Hogogoeko ty riha'e, ho eneñeko mahakama o mahàtra'eo.
¹⁶ Hampisikineko fandrombahañañē
 o mpisoro'eo,
 hisabo an-drebeke o noro'eo.

* 132:6 Efrata; havokarañē

¹⁷ Ao ty hampitiriako ty tsifa' i Davide;
ao ty nañajariako failo' i norizakoy.

¹⁸ Haombeko hasalarañe o rafelahi'eo,
fe hipelapelatse añambone'e eo
ty sabaka'e.

133

¹ Sabo-Pionjonañe, a i Davide
Akore ty hasoa naho ty hafanjàka' ty fitraofañ' ìna' o mpirahalahio!

² Manahake ty solike sarotse
añambone'e eo,
miroroñe an-tsomotse,
an-tanteahe' i Aharone mb'eo,
mitsirtsiock' añ' olon-tsaro'e mireparepay.

³ Hambañe ami'ty mika' i Kermone
mivotrak' amo vohi' i Tsiôneo;
amy nañoriza' IEHOVÀ fitahiañey,
eka! haveloñe nainai'e.

134

¹ Sabo-Pionjonañe
Antao! hañandriañe IEHOVÀ ry hene mpitoro' IEHOVÀ mitoroñe haleñe
añ'anjomba' IEHOVÀ.

² Zonjono mb'an-toetse
miambake mb'eo o fità' areoo,
vaho Andriaño t'IEHOVÀ.

³ Hitahy azo hirik'e Tsioné ao t'IEHOVÀ
mpandranjy i likerañey naho ty tane toy.

135

¹ Treño t'IÀ. Bangò ty tahina' IEHOVÀ;
mandrengea, ry mpitoro'IEHOVÀ,

² Ry mpijohañe añ'anjomba'IEHOVÀ,
an-kiririsan' anjomban' Añahareo,

³ Rengeo, t'IÀ, amy te soa t'IEHOVÀ;
sabò i tahina'ey ty amy volonahe'ey.

⁴ Amy te jinobo' IÀ ho am-bata'e t'Iakobe, ho vara'e t'Israele.

⁵ Fantako te ra'elahy t'IEHOVÀ,
le mandikoatse ze atao 'ndrahare
iaby t'i Talè.

⁶ Manao ze satri'e t'IEHOVÀ,
an-dindiñe aña naho an-tane atoy,
amy riakey vaho an-tsikeokeoke ao.

⁷ Ampionjone'e hirik' añ'olon-tane aña
ty mika; anoa'e helatse o orañeó
vaho akare'e boak'an-driha'e ao ty tioke.

⁸ Zinama'e o tañoloñoloña' i Mitsraimeo, ndra ondaty ndra biby.

⁹ Nañiraha'e vi洛ne naho halatsàñe mb'añivo'areo ao, ihe 'nio, ry
Mitsraime,

amy Parò vaho amo mpitoro'e iabio.

¹⁰ Narotsa'e ty fifeheañe maro,
binaibai'e o mpanjaka fanalolahio,

11 i Sikone, mpanjaka' o nte Emoreo,
 nahoh i Oge, mpanjaka' i Basane,
 vaho o fonga fifeleha' i Kanàneo;
 12 Le natolo'e ho lova ty tane' iareo,
 ho lova' Israele, ondati'eo.
 13 Ry IEHOVÀ, tsy modo ty tahina'o,
 ty fitiahiañ' azo ry IEHOVÀ,
 le nainai'e donia.
 14 Fa homei' IEHOVÀ to ondati'eo
 le ho tretreze'e o mpitoro'eo.
 15 Volafoty nahoh volamena
 o raham-pahasive' o kilakila 'ndatoo,
 ty sata-pitâ' ondaty.
 16 Ie manam-bava, fe tsy mirehake,
 ama-maso, fe tsy mahatrea;
 17 aman-tsofy, fe tsy mahatsanoñe,
 vaho tsy mahakofòke o vava'iareoo.
 18 Ho hambañe am'iereo o mpanao iareoo, Eka, ze hene miato am'iereo.
 19 Ry anjomba' Israele,
 Andriaño t'IEHOVÀ;
 ry akiba' i Aharone, andriaño t'IEHOVÀ;
 20 ry kivoho' i Levio, andriaño t'IEHOVÀ;
 ry mpañeñe am'IEHOVÀ,
 andriaño t'IEHOVÀ.
 21 Andriaño boak'e Tsiône ao t'IEHOVÀ,
 ry mpimoneñe e Ierosalaimeo.
 Treño t'IÀ.

136

- 1 Andriaño t'IEHOVÀ
amy te Ie ro soa;
nainai'e ty fiferenaiña'e.
- 2 Andriaño t'i Andrianañaharen-droandriañe.
Nainai'e ty fiferenaiña'e.
- 3 Andriaño ty Talèn-talè:
Nainai'e ty fiferenaiña'e.
- 4 Ama'e, toe ie avao ro mitolon-draha ra'elisy tsitantane,
Nainai'e ty fiferenaiña'e.
- 5 Ie nanao i likerañey amy hilala'eiy,
nainai'e ty fiferenaiña'e.
- 6 Ie namelatse ty tane toy
ambone' i riakeiy,
nainai'e ty fiferenaiña'e.
- 7 Ie namboatse o hazavàñe jabajabao,
nainai'e ty fiferenaiña'e,
- 8 i àndroy hamehe te antoandroo,
nainai'e ty fiferenaiña'e,
- 9 i volañey nahoh o vasiañeo
hifelek' an-kàleñe;
nainai'e ty fiferenaiña'e.
- 10 Ie nanjamañe o tañoloñoloñan-

te Mitsraimeo,
nainai'e ty fiferenaiña'e.
11 vaho nañakatse Israele am' iereo ao,
nainai'e ty fiferenaiña'e.
12 an-dela-pitá'e maozatse
naho an-tsirañe natora-kitsi'e;
nainai'e ty fiferenaiña'e.
13 Ie nampisalahañe i Riake Menaiy,
nainai'e ty fiferenaiña'e.
14 vaho nampisorohe'e mb'añivo'e
mb'eo t'Israele,
nainai'e ty fiferenaiña'e.
15 Fe naopo'e amy Riake Menay
t'i Parò naho o lahin-defo'eo;
nainai'e ty fiferenaiña'e.
16 Ie niaolo ondati'eo hiranga i tane
babangoañeiy,
nainai'e ty fiferenaiña'e.
17 Ie nandrotsake
o mpanjaka fanalolahio,
nainai'e ty fiferenaiña'e.
18 naho nanjevoñe
o mpanjaka nanan-kasiñeо:
nainai'e ty fiferenaiña'e.
19 i Sikone mpanjaka' o nte Emoreo,
nainai'e ty fiferenaiña'e.
20 i Oge mpanjaka' i Basane,
nainai'e ty fiferenaiña'e.
21 vaho natolo'e ho lova ty tane' iareo,
nainai'e ty fiferenaiña'e.
22 ho lova' Israele mpitoro'ey.
nainai'e ty fiferenaiña'e.
23 Ie nahatiahы antika
amo hasotrian-tikañeoy,
nainai'e ty fiferenaiña'e.
24 naho nañaha antika
amo rafelahin-tikañeо,
nainai'e ty fiferenaiña'e.
25 Ie mamahañe ze hene raha veloñe.
nainai'e ty fiferenaiña'e.
26 Andriaño t'i Andrianañahare'
i likerañey!
Nainai'e ty fiferenaiña'e.

137

- 1** Tañ'olon-tsaka e Bavele eo,
ty nitoboha'ay naho nirovetse,
t'ie nahatiahы i Tsiône.
- 2** Amo sohihy añivo'eo ty nandradoradoa'ay o marovani'aio,
- 3** Teo ty nihalalia' o mpanese anaio sabo, naho nipaia' o mpampisoañ'
anaio
rebeke, ami'ty hoe :
Isabò o sabo' i Tsiôneo.

- ⁴ Aa vaho akore ty hisaboentika
ty sabo' IEHOVÀ an-tanen' ambahiny atoy?
- ⁵ Naho haliñoko rehe ry Ierosalaime,
le angao ho kombimba ty sirako havana.
- ⁶ Adono hipitek' ami'ty lañilañiko
ty lelako, naho tsy mahatiahы azo raho,
lehe tsy aonjoko ambone' ze
mahafale ahiko iaby t'Ierosalaime.
- ⁷ Tiahio ry IEHOVÀ ty kabò'o
amo nte Edomeo tañ'andro' Ierosalaime:
Rotsaho! hoe iereo,
akoromaho pak'amo mananta'eo!
- ⁸ Ry anak-ampela' i Bavele, harotsake rehe, haha ty hañavak'azo amy
nañondroha'o ama'aio.
- ⁹ Fale ty handrambe o anak'ajaja'oo,
handretsake iareo an-damilamy eo.

138

- ¹ Sabo' i Davide
Andriañeko rehe ry IEHOVÀ,
an-kaliforan-troke,
ho saboeko añatrefa' o jomakeo.
- ² Mibotreke mb'amy anjomba'o
miavakey raho
naho mibango ty tahina'o
ty amy fiferenaiña'o naho ty hatò'o,
amy te nonjone'o i tsara'oy,
i tahina'oy ambone' ze he'e.
- ³ Nanoñe ahiko rehe
amy andro nitokavekoy;
nosihe'o an-kaozarañe ty fiaiko.
- ⁴ Hañandriañ' Azo
ze hene mpanjaka' ty tane toy, r'IEHOVÀ,
naho janjiñe'iereo o entam-palie'oo.
- ⁵ Ho saboe' iereo o lala' IEHOVÀo,
fa ra'elahy ty enge' IEHOVÀ.
- ⁶ Ndra te onjoneñe t'IEHOVÀ,
mbe haoñe'e ty mireke,
le arofoana'e o mpirengenvokeo.
- ⁷ Ndra t'ie manjenge añivo'
o faloviloviañe,
Ihe ro mameloñe ahiko,
atorakitsi'o mb'ami'ty
haboseha' o rafelahikoo ty fità'o, vaho mandrombak'ahy ty fità'o havana.
- ⁸ Ho henefe' IEHOVÀ ty nisafirie'e ho ahy,
nainai'e, ry IEHOVÀ ty fiferenaiña'o,
ko ado'o o tolom-pità'oo.

139

- ¹ Ho a i Talè, Sabo' i Davide.
Ry IEHOVÀ, fa nitsikarahe'o raho,
mbore arofoana'o.

- ² Arofoana'o ty fitobohako
naaho ty fiongahako;
oni'o ty ereñeren-troko
ndra te tsietoitâne aña.
³ Vandroñe'o o liakoo,
naaho o fandreakoo;
hene arofoana'o o lalakoo.
⁴ Ie mbe tsy an-delako ao ty fivolako,
Hete! ry IEHOVÀ, kila arofoana'o.
⁵ Nifahera'o raho—
ao lo eo naaho amboho ao;
vaho nisazoha'o fitâñe.
⁶ Loho fanjâka amako i hilala zay, abo, tsy takako.
⁷ Aia ty hombako hisitak' amy Arofo'oy?
Aia ty hibotitsihako o lahaba'oo?
⁸ Ie mionjom-b'an-dikerañe mb'eo raho,
eo rehe;
naaho alafiko an-kerakerak' ao
ty fandreako, hehe t'ie eo;
⁹ Ie rambeseko o ela' i maraiñeio,
naaho mitoetse aña' olon-driake
tsietoitane aña,
¹⁰ eo ka ty hitehafam-pitâ'o ahy,
naaho hanazok' ahiko ty fitâ'o havana.
¹¹ Ie anoeko ty hoe,
Toe hanafotse ahy ty ieñe,
vaho hivalike ho haleñe
ty hazavâñe amako,
¹² Fe ndra o hamoromoroñañe
ro tsy maieñe ama'o,
mireandreañe hoe i àndroy ty haleñe,
hàmbañe ty hazavâñe naaho ty ieñe.
¹³ Tsinene'o o añovakoo;
nanenoñ' ahy an-tron-dreneko ao.
¹⁴ Andriañeko rehe,
fa an-karevendreveñañe naaho halatsâñe
ty nitsene'o ahiko;
fanjâka o satam-pitâ'oo,
toe apota' ty fiaiko.
¹⁵ Tsy nietak' ama'o o taolakoo, ie nanoeñe an-kafitse ao,
naaho nitseneñe an-kahimbañe
an-kalalefan-tane ao,
¹⁶ Nivazohom-pihaino'o
o nanoeñe ahikoo,
naaho nipatereñe amy boke'oy
ze hene andro norizañe ho ahy,
ie mboe tsy teo ty raike.
¹⁷ Miheotse amako o fivetsevetse'oo
ry Andrianañahare!
Mienene t'ie mitraoke !
¹⁸ Ie imaneako iake, le andikoara'e ty ia' o faseñeio.
ie tsekake, le mbe ama'o eo.
¹⁹ Ehe ohoño loza o lo-tserekeo,
ry Andrianañahare !

Mihankàña amako arè,
 ry ondaty mpampiori-dioo,
²⁰ Injè' iareo an-keloke rehe,
 manoñoñe Azo tsy vente'e
 o malaiñ'Azoo;
²¹ Tsy hejeko hao o tsy tea azoo,
 ry IEHOVÀ?
 Tsy hifangantoreko hao
 o miatreatre ama'oo?
²² Toe hejeko am-palai-mena;
 fonga volilieko ho rafelahiko.
²³ Tsikaraho raho, ry Andrianañahare,
 arofoano ty troko;
 tsoho vaho arendreho
 o fitsakoreakoo.
²⁴ Vazoho, he amako ao ty fiolañe,
 vaho iaolò mb'an-dalañe nainai'e mb'eo.

140

¹ Ho a i Talè, Sabo' i Davide.
 Avotsoro am' ondaty lo-tserekeo raho, ry IEHOVÀ;
 arovo am'ondaty piaroteñeo;
² o mikilily añ'arofo'e ao
 nahó mikitrok'aly lomoñandroo.
³ Nisioñe' iereo ty famele' iareo hoe mereñé;
 an-tsoñi'iareo ty vorem-pandrefeala. Selà
⁴ Arovo tsy ho am-pità' o lo-tserekeo raho ry IEHOVÀ;
 arovo amy 'ndaty mitrotrofiakey,
 ty mikinia hampidorasitse o liakoo.
⁵ Nañetake fandrike ho ahy
 o mpikavokavokeo; nahó taly;
 nahó namelara' iareo harato
 añ'olon-dalañeo vaho
 nampibitsoke fandri-boñe amako. Selà
⁶ Hoe raho am' IEHOVÀ,
 Ihe ro Andrianañahareko.
 Janjiño, ry IEHOVÀ,
 o feon-kalalikoo.
⁷ Ry IEHOVÀ Talè,
 faozaram-pandrombahañe ahiko,
 Mpanaroñe ty lohako
 añ-andron-kotakotake.
⁸ Ko toiñe'o, ry IEHOVÀ,
 ty fisalalà' o tsy vokatseo,
 ko osihe'o ty fikililia'iareo
 tsy mone hirohake. Selà
⁹ Le ty loha' o miarikoboñ' ahikoo:
 ho rongoñeñe
 ty fikotrihan-tsoñi'iareo,
¹⁰ nahó hararadrarak' am' iereo
 ty foroha mirekake;
 vaho havokovoko añ'afo
 an-koboñe ao, tsy hitroatse ka.

- ¹¹ Tsy hitoera' ty mpikatramo ty tane toy;
ho vandroñen-doza
ondaty mpiloa-tiñakeo.
- ¹² Fantako te mpanozañe o misotrio
t'IEHOVÀ, naho ty zo' o rarakeo.
- ¹³ Toe mañandriañe ty tahina'o
o vantañeo,
vaho himoneñe añatrefa'o eo o vañoñeo.

141

- ¹ Sabo' i Davide
Ry IEHOVÀ, mikanjy azo raho,
mb'etoa an-taentaeñe;
toloro ravembia ty feoko te koiheko.
- ² Ano rame añatrefa'o eo o halalikoo,
hoe soron-kariva ty fizonjo' o sirakoo.
- ³ Ampijadoño mpañambeñe ty vavako,
ry IEHOVÀ,
ambeno ty lalambein-tsoñiko.
- ⁴ Ko avi'o mb'an-karatiam-beo ty troko,
hitoloñako sata-raty rekets' ondaty mitolon-katsivokarañeo;
ko apo'o ho haneko
ze raha mafiri' iareo.
- ⁵ Ee te handrаратehak'ahy an-kalèn-tro
ty vañoñe, naho hañendak' ahy,
toe solik' añambone zay,
lonike te tsy hifoneñan-dohako;
Fa tsy apoko ty halaliko ty amo sata rati' iareoo.
- ⁶ Ie avokovoko añ'ilan-kereretsak' ao
o mpizaka'iareoo,
le ho tsanoñe' iareo te nañeva o volakoo.
- ⁷ Hambañe ami'ty fitrabahañe naho
fitrobohan-tane,
ty fampivarakaïhañe am-bavan -
kibory ao o taola'aio.
- ⁸ Fe mitolik' ama'o o masokoo,
ry IEHOVÀ, Talè;
fa ama'o ty fipalirako—
ko alonga'o ty fiaiko.
- ⁹ Arovo raho amy fandrike
nampibitsoheñe ho ahikoy;
naho amo fandri-bo' o mpanao ratio.
- ¹⁰ Hivariñe an-karato' iareo avao o lo-tserekeo, te zaho miary eo.

142

- ¹ Fañòha' i Davide; ty Halali'e tan-dakato ao
Mitoreo am-peo am' IEHOVÀ raho,
hihalaly tretre am'IEHOVÀ ty feoko.
- ² Adobako añatrefa'e ty toreoko;
volañeko añatrefa'e o mahaferenaiñe ahikoo.
- ³ Ie nitairañe añaovako ao ty troko,
niarofoana'o ty liako,

amy lalan-tsileke fijelanjelañakoy
ty nañetaha' iareo fandrike.

⁴ Toliho mb'an-tañan-kavanako
le vazohò, te tsy eo ty mañaoñ' ahy.
tsy eo ty hipalirako;
tsy ahoa'ondaty ty fiaiko.

⁵ Nitoreo ama'o raho ry IEHOVÀ,
ami'ty hoe : Ihe ro fitsolohako, ty anjarako an-tanen-kaveloñ' ao.

⁶ Janjiño ty fikaikaihako
fa loho mirèke; hahao amo mpanao
samplerak' ahii, fa fatratse te amako.

⁷ Akaro am-balabey ao ty fiaiko hibangoako ty tahina'o;
hiropak' amako o vañoñeo
ami'ty fatariha'o amako.

143

¹ Sabo' i Davide
Ry IEHOVÀ, janjiño ty filolohako,
atokilaño mb'amo halalikoo
ty ravembia'o ty amo figahiña'oo naho o havantaña'oo.

² Ko ampanesefe'o an-jaka ty mpitoro'o;
fa tsi-mbia tsy ho añatrefa'o ty veloñe.

³ Fa nampisòañe ty fiaiko o rafelahio,
nigorè'e an-tane ty haveloko;
nampitoboheñe añ'ieñe ao,
manahake t'ie nilolo ela.

⁴ Aa le mitsikorak' amako ty troko;
mioremeñe ty añovako ao.

⁵ Tiahiko o andro taoloo,
niniheko iaby o fitolona'oo tsakorèko o satam-pità'oo.

⁶ Ahitiko mb'ama'o o tañakoo;
limpoañe ty ama'o ty fiaiko hoe tane mivaràkivaràky. Selà

⁷ Toiño masika ry IEHOVÀ;
fa mimoremoretse ty troko.
ko aeta'o amako ty lahara'o
hera hanahake o mizotso
mb'an-kaly aoo.

⁸ Ampitsanoño ahy ty fiferenaiña'o
te maraiñe,
amy te Ihe ro iatoako.

ampandrendreho ty lala hombako,
fa ama'o ty fañonjonañe ty fiaiko.

⁹ Ihahao amo rafelahikoo,
ry IEHOVÀ; Ihe ro fitsolohako.

¹⁰ Anaro ahy ty hanao o satri'oo,
Ihe ro Andrianañahareko;
le ampiaolò ahy an-tane mira
ty Arofo'o soa.

¹¹ Isotrafo amy tahina'oy, ry IEHOVÀ,
afaho amo hasosorañeо,
ty amy havantaña'oy.

¹² Aitò amako o rafelahikoo
ty amy fiferenaiña'oy, vaho

fonga rotsaho o mitsibore ty fiaikoo,
fa mpitoro'o raho.

144

- ¹ a i Davide
 Andriañeñe t'IEHOVÀ lamilamiko,
 mpañoke o tañakoo hialy,
 ty rambon-tañako hihotakotake,
² i mpiferenaiñe ahy naho rovakoy,
 ie tambohoko abo
 naho ty Mpañahañ'ahy,
 ty kalan-defoko naho fipalirako,
 mpampiambàne' ondatikoo amako.
³ O ry IEHOVÀ,
 inoñ' ondatio te haoñe'o,
 naho o ana'ondatio t'ie tsakorè'o?
⁴ Fa hoe kofòke t'indaty; talinjo mihelañe o andro'eo.
⁵ Avohoro o likera'oo ry IEHOVÀ
 le mizotsoa;
 paoho o vohitseo hahatoeñe.
⁶ Ahiririño mb'eo ty helatse
 hampiparatsiahe'o,
 iraho mb'eo o ana-pale'oo
 hampibaibay iareo.
⁷ Ahitsio hirik'añ'abo aña ty fità'o; avotsoro raho naho hahao
 amo alon-driake ra'elgio,
 naho am-pitá' o ambahinio,
⁸ fa bodiak' avao ty falie' iareo, vaho fitàn-kavanam-pamañahy
 ty fitàn-kavana' iareo.
⁹ Ho saboeko sabo vao rehe
 ry Andrianañahare;
 hititihako marovany folo-taly
 hibekobekoako fandrengeañe,
¹⁰ ie tolora'o rombake o Mpanjakao, naho mamotsotse i Davide
 mpitoro'oy ami'ty fibara mijoy.
¹¹ Hahao raho naho avotsoro
 am-pitá' ondaty alik'amakoo,
 fa mandañitse avao ty falie' iareo, vaho ty fitàn-kavana' iareo
 ro fitan-kavanam-bilañe.
¹² Soa te ho hatae toratora'e o anadahin-tikañeо
 ami'ty hatora' iareo
 vaho ho fahan-kotsoke niranjieñe
 ami'ty satan' anjomba
 o anak-ampelan-tikañeо.
¹³ Le ho pea o rihantikañeо,
 mañakatse ze hene karazam-bokatse,
 naho hitombo aña'arivo
 o añaondrin-tikañeо,
 le aña'aleale ty an-teten-tikaña'ao;
¹⁴ Le hitohetse iaby ty añaomben-tika,
 naho tsy ho an-keba'e o kijolio,
 tsy ama'e ao ty hasese aña,
 vaho tsy ho an-dalan-tikañe ey ty koi-doza.

15 Haha t'indaty mitoetse hoe zay;
fale t'indaty naho
IEHOVÀ ro Andrianañahare'e.

145

- 1** Sabo Fibangoañe. A i Davide
Honjoneko rehe,
ry Andrianañahareko, ry Mpanjaka,
hibango ty tahina'o mb'an-jafe'afe'e.
2 Handriañeko boak' andro,
le hibango ty tahina'o nainai'e donia.
3 Hinakinake t'IEHOVÀ, rengène añ'abo,
tsy taka-tsikaraheñe ty hajabahina'e.
4 Ho bangoe' ty tariratse raik' ami'ty ila'e o tolon-draha'oo;
naho hitaroñe o fitoloña'o jabajabao.
5 Ty ha'raelahim-bolonahe' ty enge'o vaho o tolon-draha'o mahalatsao
ro fitsakoreako.
6 Ho talilie' ondatio ty haozaram-panoe'o mampañeveñe,
vaho ho taroñeko ty hajabahina'o.
7 Ho talilie' iereo ty fitiahiañe o havokaran-kasoa'o;
hirebeha' iereo ty havantaña'o.
8 Matarike t'IEHOVÀ, naho lifo-tretrè,
malaon-kaviñerañe
vaho lifo-piferenaiñañe.
9 Kila hasoà' IEHOVÀ;
ambone' ze hene anoe'e o fitretreza'eo.
10 Fonga handrenge Azo o tolon-draha'oo, ry IEHOVÀ;
vaho hañonjoñe Azo o noro'oo.
11 Ho saontsie' iereo
ty volonahem-pifehea'o,
vaho hitalily o haozara'oo,
12 hampandrendreke o ana' ondatio
o fitoloña'e ra'elahio,
naho ty hafanjàka' ty enge' i fifehea'ey.
13 Fifeheañe tsy modo ty fifehea'o,
naho manitsike o tariratse iabio
ty fameleha'o.
14 Songa tohaña' IEHOVÀ o mikorovokeo,
sindre atroa'e o mibokok' ambaneo.
15 Kila fihaino miandrandra ama'o,
vaho anjotsoa'o mahakama an-tsa'e.
16 Manoka-pitàn-drehe mañeneke
ty fañiria' ze hene raha veloñe.
17 Vantañe amo lala'e iabio t'IEHOVÀ
naho matarik' amy ze hene fitoloña'e.
18 Marine' ze mikanjy aze iaby t'IEHOVÀ;
ze hene mikanjy aze an-katò.
19 Ho henefa'e ty fisalalà'
o mañeveñe ama'eo;
ho janjiñe'e ka ty toreo' iareo
vaho ho rombahe'e.
20 Ambena' IEHOVÀ ze hene mikoko aze,
fe fonga ho rotsahe'e o lo-tserekeo.

21 Hivolam-pandrengeañe am' IEHOVÀ ty vavako,
le kila nofotse ro hibango ty tahina'e
masiñe nainai'e donia.

146

- 1** Treño t'IÀ!
Rengeo t'IEHOVÀ, ty troko.
2 Ho rengeko t'IEHOVÀ kanao veloñe;
hisabo an'Andrianañahareko
te zaho mbe atoy.
3 Ko iatoa' areo o roandriañeo,
naho o ana-ondatio
fa tsy maha-rombake.
4 Miakatse mb'eo ty kofò'e,
mimpoly mb'an-tane ao;
modo amy andro zay avao
ty fañereñerea'e.
5 Haha naho t'i Andrianañahare' Iakobe
ro mpañimb' aze.
naho IEHOVÀ Andrianañahare'e
ro fisalalà'e,
6 I nanao i likerañey naho ty tane toiy,
i riakey, naho ze he'e ama'e ao,
i mitan-ty hatò nainai'ey,
7 I mpañomey to o volevoleñeo,
i manjotsø mahakama
amo salikoeñeo.
IEHOVÀ ro mpañaha o mirohio,
8 Mampibeake ty goa t'IEHOVÀ;
onjone' IEHOVÀ o mivohotseo,
kokoa' IEHOVÀ o vantañeo.
9 Ambena' IEHOVÀ o ambahinio,
onjone'e ty bode-rae naho ty vantotse,
fe akelokelo'e ty lala' i lo-tserekey.
10 Hifehe nainai'e t'IEHOVÀ, Andrianañahare'o, ry Tsiône,
mb'am-pigadoñan-tariratse aña,
Treño t'IÀ.

147

- 1** Treño t'IÀ! Amy te soa ty fijejoañe
aman' Añaharentika;
toe fanjàka naho mañeva
ty fandrengeañe Aze.
2 Ampitomboe' IEHOVÀ t'Ierosalaime :
atonto'e o añombelahi-mavo'
o nte-Israeleoo.
3 Jangane'e ty mikoretse añ'arofo, ho bandie'e o fere'eo.
4 Volilie'e ty ia' o vasiañeo;
songa kanjie'e ami'ty añara'e.
5 Jabahinake i Talèn-tikañey,
ra'elahy an-kafatrarañe;
tsy taka-jehèñe ty hilala'e.
6 Tohaña' IEHOVÀ o mirèkeo,
gorè'e an-tane ty lo-tsereke.

7 Sabò am-pañandriañañe t'IEHOVÀ;
 Rengeo t'i Andrianañahare
 am-piarahañe marovany,
 8 Ie ty mpandafike rahoñe
 an-dikerañe eñe,
 naho mpañajary orañe an-tane atoy,
 naho mampitiry ahetse am-bohitse ey.
 9 Fahana'e hâneñe o bibio,
 naho o ana-koàke migagakeo.
 10 Tsy ty haozara' o soavalao
 ty mahahaha Aze,
 tsy ty kitson-dahilahy ro ifalea'e.
 11 Ondaty mañeveñe ama'eo
 ro noro' IEHOVÀ,
 o mpitamà ty hafatram-pikokoa'eo.
 12 Rengeo t'IEHOVÀ, ry Ierosalaime;
 onjono t'i Andrianañahare'o, ry Tsîone.
 13 Fa nampifatrare'e
 o sikadan-dalam-bei'oo;
 tahie'e o ajalahy ama'oo.
 14 Ampierañerañe'e o efe-tane'oo,
 vaho ampieneña'e ampemba* soa.
 15 Ahitri'e mb'an-tane atoy o fetse'eo, mipirirítse o taro'eo.
 16 Anjotsoa'e oram-panala
 hoe volon' añondry;
 afiafia'e hoe lavenoke ty fanala.
 17 Afitse'e ami'ty minjikio'e ty havandra'e, ia ty mahafijohañe miatreke
 ty fangoratsaha'e.
 18 Irahe'e mb'eo o tsara'eo
 le mitranake iereo;
 ampitiofe'e o tio'eo, vaho
 ampidoañe'e rano.
 19 Talilie'e am' Iakobe ty tsara'e;
 am' Israele o fañè'eo naho o fepè'eo†.
 20 Tsy nanoe'e zay o tane ila'eo;
 tsy fohi' iereo o nafè'eo.
 Treño t'IÀ.

148

1 Treño t'IÀ. Rengeo t'IEHOVÀ,
 hirik'an-dindiñe aña,
 jejò ry an-dikerañe.
 2 Treño ry hene anjeli'eo,
 jejò ry lahialen-dikerañe.
 3 Treño, ry andro naho volañe,
 mandrengea aze,
 ry vasiañe mipelapelatse eñe.
 4 Treño ry likerañe an-tiototseo
 naho o rano ambonen-dikerañe.
 5 Bangoeñe ty tahina' IEHOVÀ,
 amy t'ie nandily, le nioreñe iereo.

* 147:14 Kità: Karazam-bare-boley † 147:19 Rom 2:20, 3:2, 9:4

6 Toe noriza'e tsy ho modo nainai'e;
 nampijadoñe lily tsy ho lilareñe.
 7 Rengeo t'IEHOVÀ boak' an-tane
 ry fañane jabajaba an-driak' ao
 naho ry laleke iabio,
 8 ry helatse naho havandra,
 fanala naho tsitsiñe,
 ry tio-bey mañeneke o tsara'eo,
 9 ry vohitseo naho ze hene haboañe,
 o hatae miregoregoo naho
 o mendoraveñe iabio*,
 10 ry biby lio naho ze fonga hare,
 ry biby milalio naho voroñe mitiliñe,
 11 ry mpanjaka' ty tane toio
 naho ze kila ondaty,
 ry roandriañe naho mpifehe' ty tane toio,
 12 ry ajalahy naho somondrarao, ry androanavy naho ajajao;
 13 Hene mibango ty tahina' IEHOVÀ;
 fa i tahina'ey avao ro onjoneñe;
 ambone' ty tane toy
 naho o likerañe ty enge'e.
 Ty enge' o noro'e iabio,
 o ana' Israeleo 'nio,
 ondaty marine azeo.
 Treño t'IÀ!

149

1 Treño t'IÀ.
 Takasio sabo vao t'IEHOVÀ,
 ty enge'e ami'ty favori' o noro'eo.
 2 Hifalea' Israele i Mpañoreñ' azey;
 hirebeha' o ana' i Tsiôneo
 ty Mpanjaka' iareo.
 3 Hibango i tahina'ey an-tsinjake,
 ho saboe' iereo am-pititihañe
 marovany naho kantsàñe.
 4 Fa mahafale IEHOVÀ ondati'eo;
 hampihamine'e fandrombahañe
 o mirèkeo.
 5 Hampipoña-pandrengeañe o noro'eo,
 hisabo an-kaehak' an-tihi'iareo eo.
 6 Ho am-palie' iareo ty fañonjonañe
 an' Andrianañahare,
 vaho am-pitá' iareo
 ty fibara sambe-lela'e,
 7 hamale fate amo fifeheañe,
 naho handilo ondatio,
 8 handrohy o mpanjaka' iareoo
 an-tsivilisily,
 o roandria'iareoo an-dangoke viñe,
 9 hametsahañe am' iereo i zaka pinatetsey;
 ho fandrengeañe ze hene noro'e.

* 148:9 Eretse: hatae bey

Treño t'IÀ.

150

¹ Treño t'IÀ.

Mandrengea an'Andrianañahare

an-toe'e miavake ao;

Jejòeñe ty hajabahinan-kaozara'e!

² Rengeñe o fitoloña'e maozatseo;

Jejò i hajabahina'ey!

³ Ireng eo am-pipopòn' antsiva;

Jejò an-dokanga naho marovany !

⁴ Ireng eo an-tsinjak'

arahen-kantsàñe,

Jejò amo maro-talio naho an-tsoly!

⁵ Ireng eo ami'ty fikantsàn-kantsàñe;

Jejò ami'ty figodebom-pinga bey

⁶ Hene mandrengea IÀ

ze mahakofòke.

Treño t'IÀ !

Razan-tSaontsy

Fiaolo

¹ O razan-tsaontsi' i Selomò ana' i Davide, mpanjaka' Israeleo :
² Haharendrehañe ty hihitse
 naho ty anatse;
 hahafohinañe o saontsy minday hilàlao,
³ hañanarañe filieram-batañe,
 havañonañe, zaka-to, naho tsy firiphiañe,
⁴ haringatañe amy trentrañey,
 hampahihitse naho hampahilala
 o tora'eo;
⁵ hijanjiña'e ty mahihitse hanompea'e hilala,
 le ho verène an-kihitse ty maharendreke,
⁶ hahavaky o hatòm-bolañeo,
 naho o fandrazañañe,
 ty enta' o mahihitseo vaho
 o razan-tsaontsi'eo.
⁷ Ty fañeveñañ'am' IEHOVÀ ro fifotoran-kilala*,
 fe malain-kihitse naho anatse ty gege.

Hatahata ty amo Rañetse Tsivokatseo

⁸ O anake, tsendreño, ty fameren-drae'o,
 naho ko ado'o ty fañòhan-drene'o;
⁹ Ie firavahañe soa an-doha'o eo
 vaho hareñañe am-bozo'o eo.
¹⁰ O anake, ihe edrè' o tsivokatseo, ko miantoke.
¹¹ Ie manao ty hoe :
 Antao hindre ama'ay;
 antao hivoñon-dio,
 hiambotrak' am'ondaty mahitio tsy aman-tali'ey;
¹² hagodran-tika veloñe iareo
 manahake i kiboriy, ty vata'e iaby,
 hambañe amo mivariñe an-kòak' aoo;
¹³ Hahaisake ze atao vara soa,
 hañatsafan-draha kinopake
 amo akiban-tikañe;
¹⁴ Mipiteha ama'ay arè, sindre hitraok' an-koroñé raike.—
¹⁵ O anake, tsy iharoan-dia iereo,
 kalaño ty tombo'o
 tsy ho ami'ty lala' iareo;
¹⁶ fa milay mb'an-katsivokaram-b'eo
 o tombo' iareo
 malisa hampiori-dioo.
¹⁷ Toe tsy vente'e ty amohàm-pandrike†
 ambane' ty masom-boroñé eo !
¹⁸ fe o liom-bata'eo ty iampira' iareo,
 ty fiai'iareo avao ty amandroña'iareo.
¹⁹ Zay ty sata' o mpitavam-barà

* 1:7 Rzs 9:10, Sab 111:10 † 1:17 Heb: andamahan-karato

am-patiti'eo,
asinta'e ty fiai' i mitañ' aze'ey.

- Mikaike t'i Hihitse*
- ²⁰ Mikok' an-dalambey eo t'i Hihitse;
poñafe'e an-tameañe ey i fiarañanaña'ey.
- ²¹ Mikaik' ami'ty fangovovoha'ondatio,
mametse saontsy
an-dalam-pizilihañ'an-drova eo:
- ²² Pak'ombia ry seretseo ty mbe
ho tea'o ty firoerano'o?
naho mbe hifale ami'ty famokafoka'e o mpanivetiveo,
vaho mbe halain-kilala o gegeo?
- ²³ Mibaliha ty amy fañendahakoy,
Hadoako ama' areo ty añ'ovako ao; hampahafohineko anahareo o entakoo.
- ²⁴ Amy te nikoike raho, f'ie nifoneñe;
nahitiko ty tañako,
fe leo raike tsy nañaoñe,
- ²⁵ fonga nifarie' areo o fañerekoo,
vaho niamboho'a' areo o endakoo,
- ²⁶ Aa le zaho ka ty hiankahake
ami'ty hankà'areo,
vaho ho kizaheko t'ie mianifañe,
- ²⁷ ie vovo'a' ty favorombeloñe
hoe te tiobey,
naho iambovoa' ty hankàñe
manahake te talio,
ie iambotraha' ty haloviloviañe
naho ty halonjerañe,
- ²⁸ Hikaik' ahy amy zao iereo
fe hamoeako
hitsoek' ahy fa tsy hahaoniñe.
- ²⁹ Amy t'ie nalain-kilala, tsy nijoboñe
ty fañeveñañe am' IEHOVÀ,
- ³⁰ nitambolitritrie' iereo ty fañerèko,
vaho tsinambolitio' iereo o fitrevokoo,
- ³¹ Aa le hagedra' iareo
ty voka' o sata' iareoo,
naho ho etsa-kilily,
- ³² Ie mañoho-doza amo trentrañeо
t'ie miambaho, nahо
mandrotsake o dagolao t'ie midada.
- ³³ Fe ho soa fimoneñe
ty mitsendreñe ahiko
vaho hiaiñ'añ'oleñañe,
tsy ho hemban-kankàñe.

2

- Ty Hasoa o Hihitseo*
- ¹ O anake, nahо iantofа'o
o fivolakoo vaho akafi'o añ'ova'o ao o likoo,
- ² nahо añilaña'o sofiñe ty hihitse,
nahо anokilaña'o troke ty hilala,

3 naho kaihe'o ty fitsikarahañe,
 naho pazahe'o ty faharendrehañe
 4 naho itsoeha'o hoe volafoty
 ikodebea'o hoe vara mikafitse :
 5 Le ho rendre'o
 ty fañeveñañ' am' IEHOVÀ
 vaho hitendreke ty fahafohinañe an'Andrianañahare.
 6 Fa manolo-kihitse t'IEHOVÀ
 boak'am-palie'e ao ty hilala
 naho ty faharendrehañe.
 7 Añaja'e hihitse maharongatse
 amo vantañeo,
 fikalan-dRe amo mpañavelo
 an-kahitiañeo,
 8 arova'e o lalan-katòo,
 naho ambena'e ty lala' o noro'eo.
 9 Le ho fohi'o ty havantañañe
 naho ty hatò, naho ty hamiràñe,
 vaho ze lalañe soa;
 10 Hizilik' añ'ova'o ao ty hihitse,
 naho hahafale ty tro'o ty hilala;
 11 Hañambeñ' azo ty filieram-batañañe,
 hijilova' ty faharendrehañe;
 12 hasita'e ami'ty lalan-karatiañe,
 amy t'indaty mivolam-bilañañe,
 13 amo miveve boak' amo lalan-kahitiañeoo, hijarabajaraba
 amo lalan-kaieñeo,
 14 amo mirebek' ami'ty hatsivokarañeo,
 naho mifale ami'ty hamengohan-
 karatiañeo,
 15 ie mikelokeloke an-dia,
 vaho miridrike an-dalaña;
 16 Hamotsots'azo ami'ty tsimirirañe,
 ami'ty karapilo mitsiriry an-drehake,
 17 i namorintseñe ty valin-katorà'ey,
 vaho mandikoke i fañinan' Añahare'ey.
 18 Migodroñe mb'am-pihomahañe ao ty akiba'e,
 minday mb'an-kavilasy ao o lala'eo;
 19 Le lia'e tsy mimpoly
 ze miheo mb'ama'e ao,
 tsy ho taka'e ka o lalan-kaveloñeo.
 20 Aa le handenà'o ty lala' o soao,
 naho hifahara'o o lala' o vantañeoo.
 21 Fa hitoboke amy taney o vañoñeo,
 vaho himoneñe ao o malio-tahiñeo;
 22 Fe haitoañe amy taney o lo-tserekeo,
 vaho ho voroteñe o mpamañahio.

3

Miatoa am' IEHOVÀ

- 1 O anake, ko haliñ o entakoo
 le ampañambeno ty tro'o o lilikoo,
 2 Le halavan'andro naho taon-kavelo

vaho fierañerañañe ty hatovoñ' ama'o.
³ Ko ado'o hieng'azo ty fatarihañe
 naho ty hatò;
 rohizo am-bozo'o eo,
 sokiro an-takelan-tro'o ao,
⁴ hahaoniña'o hamaràm-bintañe
 vaho tahinañe soa
 ampivazohoan' Añahare naho ondatio.
⁵ Miatoa am' IEHOVÀ
 an-kaampon-tro'o
 vaho ko iatoa'o ty hilala'o;
⁶ Iantofo amy ze hene lia'o,
 le ho vantañe'e o lala'oo.
⁷ Ko manao mahihitse a maso'o;
 mirevendreveña am' IEHOVÀ
 vaho ihankaño ty hatsivokarañe,
⁸ ie ho fijangañan-tsandri'o,
 vaho fameloman-taola'o.
⁹ Iasio t'IEHOVÀ amo vara'oo,
 naho ami'ty lohavoa' o nampitomboe'oo;
¹⁰ Le handopolopo, hamopòke
 ty an-driha'o ao
 vaho handopatse divay vao o sajоa'oo.
¹¹ O anake, ko sirikae'o
 ty fandilova' IEHOVÀ
 ko heje'o o fañendaha'eo,
¹² fa lilove' IEHOVÀ ty kokoa'e,
 hambañe ami'ty rae
 i anadahy ampokofe'ey*.

Toe Vara

¹³ Haha t' indaty mahaonin-kihitse,
 naho t'indaty itomboan-kilala,
¹⁴ fa lombolombo ty fitomboam-bolafoty
 ty fibodobodoa'e,
 vaho ambonem-bolamena ty havokara'e.
¹⁵ Sarotse te amo safirao†
 vaho tsy amo salalae'oo
 ty mañirinkiriñ'aze.
¹⁶ Lava-havelo ty am-pitàn-kavana'e
 vara naho asiñe ro am-pitàn-kavia'e.
¹⁷ Lalam-panintsiñañe o lala'eo,
 vaho fierañerañañe
 o lalam-pandia'eo.
¹⁸ Hataen-kavelon-dre
 amo mivontititse ama'eo;
 naho hene haha ze mamejañe aze.

Ty Hihin-Añahare amo Voatseo

¹⁹ Hihitse ty nañoriza' IEHOVÀ
 ty tane toy;
 Hilala ty nampijadoña'e
 o likerañeo;

* **3:12** Iob 3:11-12, Heb 12:5-6 † **3:15** ze vatosoa

²⁰ O hilala'eo ro ampiborahañe o lalekeo, vaho ampitsopaha' o rahoñeo mika.

Fiarovañe To

²¹ O anake, asoao tsy hisitake am-pahatreava'o ao o raha zao : vontitiro ty hihitse to

naho ty filieram-batañe,

²² hamelombeloñe ty tro'o, naho handravake ty vozo'o.

²³ Le handena'o an-kanintsiñe ty lia'o, vaho tsy hikotrofotse ty tombo'o.

²⁴ Tsy ho hembañe te mandre; eka ie mihitsy, ho mamy ty firoro'o.

²⁵ Ko mianifañe te ivotraha' ty mampangebahebake, ndra ty fampiantoañe o lo-tserekeo te mifetsake.

²⁶ fa IEHOVÀ ro hatokisa'o naho hitañe ty tombo'o tsy ho fandriheñe.

²⁷ Ko tana'o ami'ty mañeva ty soa, naho an-taña'o ty mahaeneñe aze.

²⁸ Ko manao ty hoe am'ondatio: Akia hey, le mibaliha, vaho hamaray ty hanolorako azo— ie ama'o ao avao.

²⁹ Ko mikitro-draty am' ondatio, ie mimoneñe am-patokisañe marine' azo.

³⁰ Ko liera'o tsi-aman-tali'e ty ondaty tsy nanjoam-boiñe.

³¹ Ko tsikirihe'o t'indaty piaroteñe vaho ko joboñe'o o sata'eo;

³² tiva am' IEHOVÀ ty mengoke; fe itraofa'e safiry ty vantañe.

³³ Nafà' IEHOVÀ ty akiba' o lo-tserekeo, fe tahie'e ty kivoho' o vantañeo.

³⁴ Toe ati'e o mpanitseo, fe isohe'e ty mpireke.

³⁵ Handova hasiñe o mahihitseo, fa onjone' o seretseo ka ty mahasalatse.

4

Fañòhan-dRoae

¹ Tsanoño ry anake, ty fanoroan-drae, itsendreño hahazoa' areo hilala;

² fa nanolorako fiohan-tsoa:

aa le ko apo' areo ty Fañòhako

³ Zaho anadahin-draeko, nitrotrotrotro, bako tokañe ampahaisahan-dreneko,

⁴ le nanareñe ahy ty hoe:

ampifaharo an-tro'o ao o entakoo;

tambozoro o lilikoo hiveloma'o

⁵ Manaña hihitse; mitohà hilala:

ko mañaliño,

vaho ko miambaho

amo volam-bavakoo;

- ⁶ Ko apo'o, le harova'e;
ikokò, le hambena'e.
⁷ Hihitse ty lohà'e,
aa le manàña hihitse,
eka, mangalà hilala
amy ze hene famoria'o.
⁸ Onjono re le honjone'e rehe;
hiasia'e te fihine'o.
⁹ Hampihamine'e voñe vinanditse
an-doha'o,
ho tolora'e sabaka fanjàka.

Ko Enga'o ty Lalan-kato

- ¹⁰ Mitsanoña ahy, anake,
vaho iantofo o entakoo,
hañamaraoña ty taon-kavelo'o.
¹¹ Fa nitalifirako mb'an-dalan-kihitse; naho nitehafeko
mb'amo lalan-kavantañaño.
¹² Ie mitsontike,
tsy ho sebañeñe o lia'oo;
ihe milay, tsy hitsikapy.
¹³ Vontitiro ty anatse le ko apo'o, ambeno amy t'ie ro havelo'o.
¹⁴ Ko mitsile mb'añ'oloñolo' o lo-tserekeo vaho ko andenà'o ty lala' o
tsivokatseo.
¹⁵ Ihankaño, ko miary eo,
iholiaro vaho mihelaña.
¹⁶ Ie tsy miroro hey
naho tsy mandilatse;
tinavañ' am'iereo ty firotse
ampara' te mitsikapy.
¹⁷ Fihina' iereo ty lintsen-karatiaña
vaho genohe' iereo ty divain-kasiahña.
¹⁸ Manahake ty hazavà'
i manjirik' àndroy
ty lala' o vantañaeo,
ie mihamazava erike ampara'
te mipisañe.
¹⁹ Hoe firoromoroñaña
ty lala' o lo-tserekeo,
ie tsy maharendreke te mahatsikapy.
²⁰ O anake, tsendreño o fivolakoo;
anokilaño sofý o lañonakoo.
²¹ Ko enga'o hihake amo maso'oo; f'ie ahajao an-tro'o ao.
²² Amy t'ie haveloña amo maharendrekeo,
toe fijanganaña ho an-tsandri'iareo iaby.
²³ Ambeno am-pilozohaña ty tro'o,
fa boak'ama'e
o fanganahanan-dranon-kaveloñaeo.
²⁴ Asioro ama'o ty vava mengoke,
vaho ihankaño o soñy mikelokeo.
²⁵ Ampañenteo mahity o maso'oo,
vaho ampivantäño mañaolo
o holi-maso'oo.
²⁶ Jilovo ty fombàn-tombo'o, le hijadoña soa o lia'oo.

²⁷ Ko mivio mb'an-kavana
ndra mb'ankavia;
fa ampandifiho ty raty o tombo'oo.

5

Hatahata amo Haleořaňeo

- ¹ O anake, tsendreño ty hihiko;
atokilaño mb'am-pahilalako ty sofi'o,
² hifejaña'o ty filie-batañe, naho hañaja hilala o soñi'oo.
- ³ Mitsopa-tantele ty soñin-tsimirirañe,
vaho malama te amo solikeo ty vava'e;
- ⁴ f'ie mafaitse te amo vahon-tsoiňeo am-para'e,
masioňe hoe fibara sambe-lela'e.
- ⁵ Mizotsø mb'am-pikoromaham-beo
o tombo'eo,
mitaliftse mb'an-tsikeokeok' ao ty lia'e.
- ⁶ Tsy haraharae'e i lalan-kaveloňey; mihelahela o lala'eo, fe amoea'e.
- ⁷ Aa le mitsanoňa ahy henaneo ry anake, vaho ko mivike amo entam-bavakoo.
- ⁸ Ahankaňo lavits' aze ty lala'o,
vaho ko itotofa'o ty sariran-akiba'e;
- ⁹ tsy mone hatolo'o ami'ty ila'e ty enge'o,
naho o tao'oo amy mifajifajiy,
- ¹⁰ mbore hampiboboke ty ambahiny
ty haozara'o,
vaho mb'aň'akiba' ty alik'ama'o
o nimokora'oo;
- ¹¹ Hiňeoňeon-drehe
aň'andron-kònka'o,
ie mihomake ty nofo'o naho ty sandri'o,
- ¹² ami'ty hoe:
Akore te nalaim-pandilovan-draho,
naho niheje' ty troko o endakeo!
- ¹³ Tsy nitsendreňeko ty fiaraňanaňa'
o mpaňanakoo,
tsy nanokilaňako sofiňe
o mpaňoke ahikoo.
- ¹⁴ Fa an-titotse ho nianto raho,
aňivo' ty fivory naho i valobohòkey.
- ¹⁵ Minoma rano an-kadaha'o avao
rano midoaňe boak'an-tatefatse'o ao.
- ¹⁶ Hienene mb'an-dalambez mb'eo hao
ty rano'o migoangoaňeo?
rano hitsiritsiok' an-damoke eo?
- ¹⁷ Ehe t'ie azo,
fa ko andiva'o ami'ty ambahiny.
- ¹⁸ Ho soa-tata ty fipotitiaha'o,
vaho irebeho ty valin-katora'o.
- ¹⁹ Hiraňe mikoko re,
renen-kira maintelèňe—
hampaheneňe azo nainai'e o fatroa'eo,
i fikokoa'ey avao ty hilosora'o.
- ²⁰ Akore, anake, t'ie tsepahe' ty karapilo?

naho fihine' ty arañan' ambahiny?
 21 Sindre añatrefam-pihaino' IEHOVÀ
 o lala' ondatio,
 Songa tsikarahe'e o lalan-tsile'eo.
 22 Ho fandrihe' ty hatsivokara'e
 ty lo-tsereke,
 vaho hamihîne aze am-bahotse
 o hakeo'eo.
 23 Hikenkan-dre fa po-hilala,
 ty halosoran-kagegea'e ty hampivike aze.

6

Hatahata amo Hagegeañeо

1 O anake, ie nampipok' antoke am'ondatio,
 lehe nañoho-pitâne hitsoake
 ty ambahiny,
 2 ie finandri' ty entan-tsoñi'o, vinandibandi' ty fireham-bava'o,
 3 Ano zao, ty anake toke: Mivotsora, ie fa nihotrak' am-pitâ' ondatio: akia,
 mireha ama'e,
 imaneo halaly indatiy!
 4 Ampifoneño roro o maso'oo, tsy hidrodreke o vohomaso'oo.
 5 Mibolitira hoe hirañe an-tañañe,
 naho hoe kibo am-pitâm-pikehe.
 6 Akia mb'ami'ty vitike, ry tembo,
 haraharao o sata'eo vaho mahihira!
 7 Ie tsy amam-pifehe, tsy amam-pisary,
 tsy amam-pandily,
 8 fe kotepe'e ami'ty asara ty hane'e,
 vaho atonto'e am-pitatahañe
 o lintse'eo.
 9 Pak' ombia rehe te mbe hitozoke,
 ty mpitsorotake tia?
 Ombia t'ie hitroatse amy firoroa'o?
 10 Mikonkòñe kedeke, miroro tsi-ampe, mifehefare hitofa'o heike:
 11 le hiambotraha' ty hararahañe
 hoe malaso,
 vaho ty hapoiañe hoe lahifihaty.
 12 Ty lahi-tembo naho i lahiaga:
 i mpañariok' am-bava vilañey,
 13 ami'ty maso mipie,
 an-tomboke mitsao tane,
 an-drambo-taña manondrotondro,
 14 ie am-pikitrohan-draty an-tro'e nainai'e, ro mbore mikilily,
 mitolom-pamitse fifalaiñañe;
 15 Aa le, hiambotraha' ty hankâñe
 ami'ty manao zao le ho demoke
 tsy lefe jangañeñe.
 16 Eneñe ty raha heje' IEHOVÀ, Eka, fito ro tiva ama'e:
 17 ty fihaino mievoñevoñe,
 ty fameleke mandañitse,
 ty fitâne mampiori-dio-maly,
 18 ty troke mikitro-karatiañe, ty fandia mifajifajy mb'an-katsivokarañe,

- ¹⁹ ty mpitalily vilañe, mikofòke lañitse, naho ty mampiboele fi-fankalaiñañe an-drolongo'e.
- ²⁰ O anake, ambeno ty lilin-drae'o, vaho ko apo'o ty fañòhan-drene'o.
- ²¹ Ifeheo an-tro'o ao nainai'e; rohizo am-bozo'o eo.
- ²² Hiaoloa'e te mijelanjelañe, ie mändre, hambena'e; tsekake le ivesovesoa'e.
- ²³ Toe failo o lilio, naho hazavàñe t'i Hake*, vaho lalan-kaveloñe o endake fanoroañoeo.
- ²⁴ Hikalañe azo tsy homb' amy tsimirirañey, ami'ty lela-malama' i karapiloy.
- ²⁵ Ko irie'o an-troke, ty hamontramontre'e, asoao tsy ho tsepahe' ty vohomaso'e.
- ²⁶ Vonga-mofo ty tamben-tsimirirañe, fa naho vali' ondaty, le i fiaiñe sarotsey ty itsindroha'e.
- ²⁷ Naho otroñe' ondaty añ'araña'e ao ty afo, tsy hirehetse hao ty saro'e ?
- ²⁸ Mete lia'ondaty hao ty vae mirekake, tsy hahamae' o fandia'eo?
- ²⁹ Zay ty fifandian-tihy ami'ty vali' ondaty: tsy mete tsy lilloveñe ty mitsapa aze.
- ³⁰ Tsy injè' ondatio ty mpampikametse te mikizo hampahaeneñe ty fiai'e saliko,
- ³¹ fa ndra ie, naho tsepake, ro hañavake im-pito, fonga hondroha'e ze vara añ'akiba'e ao.
- ³² Akore ty hagegea' ty mañarapilo an-drakemba: fa sata' ty handrotsa-batañe.
- ³³ Vono-troboke naho hasalarañe ty ho zoe'e, vaho tsy ho faopaoheñe ka i inje'ey.
- ³⁴ Mampiforoforo ondaty ty famarahiañe, tsy hapo'e amy andro hamalea'e fatey.
- ³⁵ Tsy handrambesa'e ondroke, tsy mahatèke aze t'ie ampitoboroñan-dravoravo.

7

Fisarihan-tsie Kanao Vali'Ondaty

- ¹ O anake, ambeno o entakoo, vaho akafiro ama'o ao o fepèkoo;
- ² Fejaño o likoo vaho miveloma, naho i Fañòhakoy manahake ty sainte maso'o;
- ³ Arohizo an-drambon-taña'o, sokiro an-takelan-tro'o.
- ⁴ Anò ty hoe ty hihitse; Rahavaveko rehe; vaho tokavo ty hoe:

* 6:23 Sab 119:105

Rañetse, ty hilala,
⁵ hikalaña' iareo azo
 tsy ho ami'ty tsimirirañe,
 tsy ho amy ambahiny malama firehakey.
⁶ Zaho an-dalan-keden-akibako ao nitilihitse an-tsingararakarake,
⁷ naho nisamba añivo' o trentrañe,
 nijiloveko an-teñateña' o gaon-dahio,
 ty ajalahy tsy aman-dron-doha,
⁸ nitsake ty lalañe mioza an-kotso'e mb'eo,
 vaho nikopile mb'an-dalan-tsileke mb'añ'akiba'e mb'eo,
⁹ am-palipalitsieñe, ie ni-hariva ty andro,
 amy haien-kaleñe nimoromoroñey.
¹⁰ Le heheke ty rakemba mifanalaka ama'e, mihamiñe hoe tsimirirañe,
 hakalitahañe ty an-tro'e ao.
¹¹ Ie mitazataza naho miola,
 tsy mimoneñe añ'akiba'e ao o tombo'eo;
¹² mbore an-dalañey, mbore an-kiririsa,
 mijike amy ze atao fitsileañe.
¹³ Fejañe'e i lahiy naho orofa'e
 vaho anoe'e ty hoe an-tarehe miriñake:
¹⁴ Amako ty soron-kanintsíñe vaho navahako anindroany o nifantàkoo;
¹⁵ aa le niakatse raho hifañaoñan-tika,
 hitsoehako ty tarehe'o;
 heheke te tendreke.
¹⁶ Fa nilafihako i tihikoy, an-dený maviabiake boak' e Mitsraime.
¹⁷ Fa namitsezako rame* ty fandreako,
 yoñem-bahoñe naho romba†.
¹⁸ Antao ito higenoke ty hatea
 ampara' te porea' ty maraindray;
 antato hifalefale an-katea.
¹⁹ Tsy añ'anjomba ao ty valiko,
 fa nifokofoko aña,
²⁰ Ninday drala an-koroñe, vaho tsy himpoly naho tsy zava-volañe.
²¹ An-tsiriry maro ty anigiha'e;
 an-tsoñi'e mamolavola
 ty anjira'e aze.
²² Orihe' i ajalahiy amy zao,
 misítse mb'eo hoe añombe ho lentañe,
 hoe ty gege an-dongòke ho liloveñe,
²³ ampara' te trofahañ' ana-pale ty ate'e;
 hoe kibo mibororoñe
 mb'am-palàñe mb'eo,
 amoea'e t'ie famoeam-piay.
²⁴ Ie amy zao ry anakoo, tsanoño raho, vaho tsendreño ty entam-bavako.
²⁵ Ko ado'o hivio mb'an-dala'e mb'eo ty tro'o;
 ko mandifike mb'añ'oloñolo'e mb'eo;
²⁶ amy te maro ty tsinipo'e nifotsake,
 vaho tsifotofoto o navetra'eo.
²⁷ Minday mb'an-Tsikeokeoke mb'eo
 ty akiba'e,
 mizotso mb'añ' akiban-kavilasy ao.

* 7:17 Heb: more, boak' ami'ty hoe mire † 7:17 Heb: kinamone

8

Ty Falalà' i Hihitse

- ¹ Tsy mikoike hao ty hihitse,
tsy mañonjom-piarañanañañe hao
ty hilala?
- ² An-kaboañe ey, añ'olon-dalañe eo, am-pitsileañe eo ty ijohaña'e;
- ³ añ'ilan-dalam-bein-tsariran-drova eo
ami'ty fiziliha' o lalam-beio
ty ikoha'e ty hoe:
- ⁴ Ry ondatio, ikanjiako,
ty feoko mb'amo ana' ondatio.
- ⁵ Ry trentrañeо, mioha hakarafitoañe;
naho, ry seretseo, mandrendreha an-troke.
- ⁶ Mitsanoña hitaroñako raha
aman-kasiñe;
vaho hañakatse volam-bantañe
kanao misokake o soñikoo;
- ⁷ Hivolán-katò ty vavako;
fa tiva amo soñikoo o haratiañeо.
- ⁸ Songa mahity o entam-bavakoo,
tsy ama'e ty mikeloke
ndra mengoke.
- ⁹ Ie vantañe amy mahihitsey vaho mahity ami'ty maha-onin-kilala.
- ¹⁰ Rambeso o fañòhakoo, fa tsy volafoty; naho ty hilala fa tsy volamena
nitsoheñe;
- ¹¹ Fa lombolombo' o hangeo ty hihitse,
vaho tsy eo ty salalaeñe mañirinkiriñ'aze.
- ¹² Zaho, hihitse, ro miharo-toboke
ami'ty filieram-batañe,
vaho manjo hilala naho fitalifirañe.
- ¹³ Malain-karatiañe ty fañeveñañe am' IEHOVÀ.
hejeko ty firengeañe, ty fibohabohañe,
ty satan-karatiañe, naho ty vava mitera.
- ¹⁴ Amako ty fanoroañe,
naho ty hihitse do'e,
Zaho o hilalao; ahy o haozarañeо.
- ¹⁵ Zaho ty ifehea' o mpanjakao,
naho anoa' o mpifeheo lily vantañe.
- ¹⁶ Zaho ty ifeleha' o mpifelekeo
naho o roandriañeо,
ze hene mpizaka-to.
- ¹⁷ Kokoako ze mikoko ahiko, naho
handrèndrek' ahy ze mitsoek' ahy.
- ¹⁸ Rekets' amako ty vara naho ty asiñe;
hanàñañe tsy modo naho havañonañe.
- ¹⁹ Soa te amo volamena ty havokarako
eka ndra volamena ki'e,
vaho ambone' ty volafoty jinoboñe
o firegoregoakoo.
- ²⁰ Manjotik' an-dalam-bantan-draho,
añivo o oloñolon-kavantañañeо,
- ²¹ hampandovàko vara o mpikoko ahio, naho hatseheko o kipondi' iareoo.

*I Hihitse tam-Pifotorañe aña**

- ²² Tsinene' IEHOVÀ raho
ho fifotoran-dala'e,
ty valoham-pitoloña'e haehae zay.
- ²³ Tsietoimoneke zay ty nañorizañ' ahiko,
tam-baloha'ey,
taolo te nioreñe ty tane toy.
- ²⁴ Ie mboe tsy teo o lalekeo ty niterahañ' ahy,
ie mboe tsy nidoadoañan-drano
o loharanoo.
- ²⁵ Ie mboe tsy nipetake o vohitseo,
taolo o tambohoo, te naterake;
- ²⁶ Ie mboe tsy niforoñe'e ty tane toy
naho o hivokeo,
ndra ty debole valoha' ty tane toy.
- ²⁷ Ie nampijadoñe o likerañeo,
teo raho,
Ie nanokitse ty bontoly
ami'ty tarehe' i lalekey eñe,
- ²⁸ Ie natobe'e an-toe'e ey o likerañ' amboneo,
naho nampitosire'e o loha-rano' i làlekeio.
- ²⁹ Ie nifahera'e i riakey,
tsy handilara' o ranoo i nandilia'ey;
ie tinendre'e o faha-ty tane toio,
- ³⁰ Le nirekets' ama'e raho fa natokisañe, naho nampifaleako lomoñandro,
nainai'e nirebek' aolo'e.
- ³¹ Nihisa an-tanem-pimoneña'e
vaho naehak' ahy o ana' ondatio.
- ³² Ie amy zao, ry anake, mitsendreña ahy:
Haha ze mañorike o lalakoo.
- ³³ Mitsanoña fañòhañe
naho mahihira, vaho ko mifoneñe.
- ³⁴ Haha t'indaty mitsendreña ahy,
ty misary nainai'e an-dalam-beiko eo
mandiñe an-dahin-dalako eo.
- ³⁵ Ze tendrek' ahiko tendre-kaveloñe,
vaho tolora' IEHOVÀ fañisohañe;
- ³⁶ Fe ze losotse ahy mijoy vatañe;
fonga mikoko havilasy ze malaiñe ahy.

9

Ty Sabadidak' i Hihitse

- ¹ Fa nandranjy i akiba'ey
t'i Hihitse, fa rinamerame'e i faha'e fito rey.
- ² Fa nandenta, fa linaro'e ty divai'e,
fa hinalanka'e i fandambaña'ey.
- ³ Fa nirahe'e o anak'ampata'eo,
hikaike boak' an-digiligin-kaboa'
i rovay ey.
- ⁴ O ry tahitahiñe, mitsilea mb'etoa!
le hoe re amy seretsey,

* **8:21** Jaona 1.1-3; Its 30:4; Ko I 1:24,30

⁵ Mb'etoa ikamao o hanekoo
na ho inomo i divay linalokoy,
⁶ Apaho ty hagegeañe na ho miveloma,
mañaveloa an-dalan-kilala.

Anatse Ankababa'e

⁷ Mizò inje ty mañendake mpanivetive;
tendreke joy ty mitrevoke ty lo-tsereke.
⁸ Ko mañendake ty mpamokafoka
hera halaiñ'azo;
Trevohe'o ty mahihitse le hikokoa'e.
⁹ Anaro o mahihitseo
le hiha-mahihitse avao;
ampandrendreho ty vantañe
le hitombo an-kilala.
¹⁰ Ty fañeveñañe am' IEHOVÀ
ro fifotoran-kihitse,
vaho ty fahafohinañe i Masiñey
ro faharendrehañe*.
¹¹ Zaho ty fampitomboañe o andro'oo, fampitompeañe taoñe o havelo'oo.
¹² Ie mahihitse, hañimbañ' azo i hihatsey;
Ihe manivetive ty hivave izay.

Ty Fañambara' i Dagola naho ty Fampitama'e

¹³ Mamantsiñe ty rakemba gege,
ie tsotra tsy mahafohin-draha,
¹⁴ Mitobok' an-dalam-bein-akiba'e eo,
am-pitobohañe amo haboa' i rovaio,
¹⁵ mikaike ze miary eo,
amo mañavelo an-kavantañañe:
¹⁶ O ry trentrañaeo, mitsilea mb'etoa!
le hoe re amy tsy aman-kilalay:
¹⁷ Mamy ty rano nikamereña,
vaho mafiry ty mofo kamaeña
añ'etak' ao.
¹⁸ Fe tsy apota'e te lolo ty ao, te an-tsikeokeok' ao o nampihovae'eo.

10

Taron-Kilala' i Selomò

¹ O razan-dreha' i Selomò.
Mahaehak' an-drae ty anake karafito,
fe mañore an-drene'e ty anadahy gege.
² Tsy manjofake ty vara niazo
an-kalo-tsere'e,
fa mañaha an-kavilasy ty havantañañe.
³ Tsy apo' IEHOVÀ ho saliko ty vañoñe,
fe aveve'e ty hadrao' o lo-tserekeo.
⁴ Minday hararahañe ty satan-taña migebañe, fe mampañaleale
ty fità' i mavitrikey.
⁵ Anake mahihitse ty manontoñe ami'ty asara, fe minday hasalarañe ty
anake
miroro am-pitatahañe.
⁶ Fitahiañe ro añambone' o vantañaeo,

* 9:10 Rzs 1:7

fe mañeta-piaroteñe
ty vava' o lo-tserekeo.

⁷ Mahahaha ty fitiahiañe o vantañeo,
fe hihomake ty añara' o lo-tserekeo.

⁸ Mañaon-dily ty arofo' o mahihitseo*,
fe hianto ty gege mitolom-bolañe.

⁹ Midraidraitse am-panintsiñañe
ty mpañavelo an-kavañonañe,
fe ho fohiñe ty mitsontike
an-dala mikelokeloke.

¹⁰ Mampioremeñe ty mañieke,
vaho ho gorène ty gege mivolambolañe.

¹¹ Tsiritsiriohen-kaveloñe ty falie' o vañoñeo, fe mañeta-piaroteñe
ty vava' o lo-tserekeo,

¹² Mitrobo fifandierañe ty falaiñañe,
fe mandembeke ze atao fiolàñe
ty fikokoñañe.

¹³ Tendrek' am-pivimbi' o mahilalao
ty hihitse,
fe mañeva ty lambosi'
i po-hilalay ty kobaiñe.

¹⁴ Mañaja hilala o mahihitseo,
fe antitotse ty fiantoañe ty vava' o dagolao.

¹⁵ Kijoly maozatse ty varam-pañaleale; fampiantoañe o rarakeo ty
hapoia'iareo.

¹⁶ Havelo ty tambe' o vantañeo,
vaho fandilovañe
ty karama' o lo-tserekeo.

¹⁷ Mañori-dàlan-kaveloñe
ty mañaoñ' anatse,
fe mandridrike ty tsy mipaok'endake.

¹⁸ Aman-tsoñy mandañitse
ty mañetake falaiñañe,
vaho gege ty mampiboele dramotse.

¹⁹ Tsy po-tahiñe ty maro rehake,
mahihitse ka ty maha-tam-pivimby.

²⁰ Volafoty hiringiri'e
ty famele' o vantañeo;
fe tsy vente'e ty tro' o lo-tserekeo.

²¹ Mamahañe maro ty fivimbi'
o vantañeo,
fe mampivetrake ty dagola
te tsy aman-kilala.

²² Ty fitahia' IEHOVÀ ro mampañaleale,
vaho tsy tovoña'e anahelo.

²³ Fihisà' ty seretse ty mikilily,
fe hihitse ty ho amy t'indaty mahilala.

²⁴ Hifetsak' amy lo-tserekey
ty ihembaña'e, fe hatolotse amy vantañey ty fisalalà'e.

²⁵ Ie misaok' aña ty talio,
tsy eo ka i lo-tserekey,

* **10:8** Hos 14:9

fe mijadoñe nainai'e o vañoñeo.

²⁶ Hoe kile[†] amo fihitsikeo,
naho hatoeñe amo fihainoo,
ty tembo amo mpañirak' azeo.

²⁷ Fañalavañe andro
ty fañeveñañe am' IEHOVÀ,
fe ho tomoreñe ty tao'o lo-tserekeo.

²⁸ Hafaleañe ty fisalala'o vantañeo,
fe ho modo ty fitamà' o lo-tserekeo.

²⁹ Rova maozats' amo mahitio
ty làla' IEHOVÀ,
f'ie firotsahañe amo mpanao ratio.

³⁰ Le lia'e tsy hasiotse o vantañeo,
fe tsy himoneña' o tsereheñeo i taney.

³¹ Mamoa hihitse ty falie' o vañoñeo,
fe haitoañe ty lela mitera.

³² Apota' ty fivimbi' o mahitio
ze mete akareñe,
fe mengoke ty vava' o lo-tserekeo.

11

¹ Tiva am' IEHOVÀ ty fandanjàñe vilañe,
fe no'e ty vato to.

² Ie avy ty firengeañe,
pok'eo ka ty hasalarañe;
fe mpiamo mpirakeo ty hihitse.

³ Miaolo o vantañeo ty havañona'e,
fe mampianto i lahiaga
ty fikelokeloha'e.

⁴ Tsy vente'e añ'andron-kankàñe ty vara,
fe mamotsotse an-kavilasy
ty havantañañe.

⁵ Mampahity ty lala' o malio tahiñeo
ty havantaña'e,
fe mikorovok' ami'ty haratia'e
o lo-tserekeo.

⁶ Mañaha ty vañoñe i havantaña'ey,
fe hamahotse o piaroteñeo
ty fatiti'iareo.

⁷ Ie mate ty lo-tsereke,
momoke o fañiria'eo,
vaho voroke ty fitamà' i tsy mahitiy.

⁸ Votsorañe amy falovilovia'ey ty vantañe,
le mb'eo handimbe aze ty lo-tsereke.

⁹ Mijoy ty rañe'e am-bava'e ty tsi-aman-Kàke ,
fe hilala ty mañaha o vañoñeo.

¹⁰ Ie miraorao o vantañeo,
mirebeke ty rova;
ie momoke ty lo-tsereke,
inay ty firiñariñan-kobaiñe.

¹¹ Mionjoñe ty rova tatae' o vañoñeo,

[†] 10:26 Khomtse: vinegra

fe rotsahe' ty vava' o lo-tserekeo.

¹² Po-hilala ty maniva ondaty,
fe mianjiñe t'indaty mahilala.

¹³ Mb'eo mb'eo i mpitolom-bolañey
mampiborake ty nitangogoeñe,
fe mahakafi-draha ty migahiñe.

¹⁴ Ie po-panoroañe, mihotrake o borizañe,
fe fandreketañe t'ie mitolom-pisafiry.

¹⁵ Toe hisotry ty miantoke
songon' ambahiny,
fe soa fiaro ty malai-mañoho-pitáñe.

¹⁶ Asieñe ty rakemba matarike,
vaho manontom-barä ty fanalolahy.

¹⁷ Mañasoa ty tro'e t'indaty matarike,
fe mijoy ty vata'e ty mpampisoañe.

¹⁸ Mikarama hakoahañe ty lo-tsereke,
fe ho soa tambe
ty mitongy havantañañe.

¹⁹ Ho veloñe ty mifahatse
an-kavañonañe,
fe hihomake ty mañean-karatiañe.

²⁰ Tiva am' IEHOVÀ
ty mengok' an-troke,
fe ifalea'e ty mañavelo an-kahiti'e.

²¹ Tsy mikalafo te* tsy ho po-lafa
ty lo-tsereke,
fe ho haha ty tiri' o vantañe.

²² Hoe bange volamena
ami'ty oron-dambo
ty ampela montramona
tsy mahalie-batañe.

²³ Ty hasoa avao ty fisalala' o vañoñe;

fe haviñerañe ty fitamà' i lahiaga.

²⁴ Eo ty fampiparaitahañe
mbe mampitombo avao;
eo ty matity ami'ty mañeva,
f'ie ho rarake.

²⁵ Hiraorao t'indaty matarike,
vaho ho tondrahañe ka ty manondrake.

²⁶ Honjire' ondatio ty matity ampemba,
fe fitahiañe ty ho añambone'
i mandetak' azey.

²⁷ Osiheñe ty mitsoe-kasoa,
fe ami'ty mipay haratiañe,
zay ty ho zoe'e.

²⁸ Hihotrake ty miato vara,
fe handrevake hoe ravets-atae
maindoñe o vantañe.

²⁹ Handova tioke ty mpanolo-tsotry
añ'anjomba'e,
le hitoroñe ty mahihi-troke ty dagola.

* **11:21** Heb: ama'e ty tañako!

30 Hataen-kaveloñe ty vokare' o vantañeo,
vaho mpandrekets'arofo ty mahihitse.

31 Kanao ho tambezeñe an-tane atoy
o vantañeo,
àntsake ty tsereheñe naho opiaroteñeo.

12

1 Mikoko hilala ty mpitea lafa,
fe gege ty malaiñ-endake;

2 Hanjo fañisohañe am' IEHOVÀ
ty matarike, fe hafà'e ty mpikinia.

3 Tsy mahafioreñe ondaty ty halo-tserehañe,
fe tsy hasiotse ty vaha'o vañoñeo.

4 Sabakan-engem-bali'e ty rakemba soa,
fe hoe hamomohañe an-taola'e ao
ty mahasalatse.

5 To ty fivetsevetse' o vantañeo;
fe mitarik' an-dama ty fanoroa'
o lo-tserekeo.

6 Famandroñan-dio ty entam-bola'
o raty tserekeo,
fe hañaha ty vañoñe o saontsi'eo.

7 Rotsaheñe o lo-tserekeo le tsy eo,
fe hijadoñe ty anjomba' o mahitio.

8 O hihi'eo ty anambezañe ondatio,
fe ho sirikaeñe ty mengok' an-troke.

9 Hàmake t'ie mirè-batañe,
naho manaña mpitoroñe raike,
ta t'ie mieva ho bey fe tsy aman-kaneñe.

10 Haoñe' ty vantañe ty fiai' i bibi'ey,
fe fampisoañañe avao
ty tretre' i rati-tserekey.

11 Ho enen-kaneñe ty mpiava' i tane'ey,
fe po-hilala ty mañeañe ty tsy vente'e.

12 Tsikirihe' o rati-tserekeo
ty fikopahan-karatiañe,
fe mamokatse ty vaha' o vantañeo.

13 Fandrihe' ty fiolàn-tsoñi'e ty lahiaga,
fe hibolititse amy haloviloviañey ty vañoñe.

14 Mahaenen-kasoa t'indaty
ty vokam-palie'e,
vaho himpoly ama' ondaty
o fitoloñam-pità'eo.

15 Mahity amo maso'eo ty gege,
fe mijanjim-panoroañe ty mahihitse.

16 Fohiñe aniany ty filoa-tiña' i dagola,
fe lembefe' i mahihitse ty mahasalatse.

17 Mampiboake havantañañe
ty mikofòke hatò,
fe famañahiañe ty manara-bande.

18 Eo ty manoantoañe an-drehake,
hoe fitomboham-pibara,

fe minday fijanganañe
ty famele' o mahihitseo.
¹⁹ Hijadoñe nainai'e ty fivimbin-katò,
fe aniany avao ty lelan-dremborake.
²⁰ Famañahiañe ty an-tro' o mpikililio,
fe haehake t'ie mpifampilongo.
²¹ Tsy mizò raty ty vantañe,
fe lifo-kasotriañe ty tsereheñe.
²² Tiva am' IEHOVÀ ty soñy mandañitse,
fe no'e o mitoloñe am-pigahiñañeo.
²³ Mañaja hihitse ty hendre,
fe mitazataza hagegeañe ty tron-dagola.
²⁴ Hifeleke ty fità' o mahimbañeo, vaho hondevozeñe ty taña migebañe.
²⁵ Mampidrodretse ty arofo' ondaty
ty fivazobazorañe ama'e ao,
fe mampanintsiñe aze ty talily soa.
²⁶ Manoro an-drañe'e ty vantañe,
fe mampivike o lo-tserekeo ty lala'iareo.
²⁷ Tsy atono' i tembo ty nitsatsà'e;
fe vara ami'ty mpifanehake o hanaña'eo.
²⁸ Tendrek' an-dalam-bantañe
ty haveloñe,
vaho tsy aman-kavetrahañe i oloñolo'ey.

13

¹ Miantoke ty lafan-drae'e
ty ajaja karafito,
fe tsy mañaon-trevoke ty mpiteratera.
² Ty havokaran-tsaontsi' ondatio
ro ikama'e raha mafiry,
fe tsihavokarañe ty fañiria'
o mpitroboo.
³ Mahatan-kavelo ty mahambeñe
ty falie'e;
mianto ka ty mampidañadaña fivimby.
⁴ Tea-haneñe ty votroo, fe tsy mahazo;
ho anjañeñe ka ty mavitrike.
⁵ Malain-dremborake ty vañoñe,
fe manao ty hameñarañe naho hasalarañe ty lahiaga.
⁶ Mahambeñe i an-dalam-bantañey
ty havañonañe,
fe mamotsake ty mpanan-kakeo
o hatsivokarañeo.
⁷ Eo ty miamoke ho mpañefoefo
fe poi'e;
eo ka ty manao ho rarake
f'ie mpañaleale.
⁸ Mahajebañe ty fiai' ondaty o vara'eo,
fe tsy mañaom-pañembàñañe
ty rarake.
⁹ Mirebeke ty failo' o vantañeo, fe hakipeke ty jiro' i lahiaga.
¹⁰ Fifandierañe avao ty ente'

ty fibohabohañe,
fe hihitse ty rambese'
ty mañaom-bere.

¹¹ Mikepake ty vara niazo
an-tsata koake,
fa mampitombo ka ty mitromake hanontoña'e.

¹² Mampikoretse arofo
ty fitamañe nihàンkañe,
fe hataen-kaveloñe ty salala niheneke.

¹³ Hanaña' i tsaray songo ty manirìka aze,
fe ho tambezeñe
ty mañeveñe amo lilio.

¹⁴ Figoangoañan-kavelo
ty Fañòha' o mahihitseo
hiholiara'e o fandrin-kavilasio.

¹⁵ Tendreke fañisohañe ty hilala soa,
fe tomoantoañe ty lala'
o manao bodongeroo.

¹⁶ Hene mitoloñe an-kilala ze hendre,
fe hagegeañe ty aboa' i dagolay.

¹⁷ Mivariñ'an-dama ty irake vilañe,
fe fijanganañe ty mpihitrike migahiñe.

¹⁸ Hararahañe naho hasalarañe
ty hizò ty tsi-mañaon-dafa,
iasiañe ka ty miantok' endake.

¹⁹ Mamy an-troke ty fisalalàñe heneke,
fe mamparitsike i dagola
ty isitaha'e ty raty.

²⁰ Miha-mahihitse te miharo lia
ami'ty mahihitse,
f'ie halovilovy te mpiami'ty gege.

²¹ Tokoen-kasotriañe ty aman-kakeo,
fe firaoraoañe ty anambezañe
o vantañe.

²² Mampandova amo anan' ana'eo
ty vañoñe,
fe mihaja ho a o vantañe
ty vara' opiaroteñe.

²³ Bey ty havokarañe an-tane-hoba' i rarakey,
fe ifaopaoha' ty tsy-hatò.

²⁴ Malaiñ-anake ty mampipoke fikiso,
fe mikoko aze ty mipiso
am-pahimbañañe.

²⁵ Mahaeneñe ty tro'e
ty mahakama' i vantañey,
fe kefoke ty fisafoa' i lahiaga.

14

¹ Mandranjy ty akiba'e
ty rakemba mahihitse,
fe arotsa' ty minè an-taña'e ty aze.

² Mañeveñe am' IEHOVÀ

ty mañavelo an-kahiti'e,
 fe manirika aze ty mengok' amo lala'eo.
³ Am-bava' i dagola ty kobay
 ho an-dambosi'e,
 fe mañaro ty mahihitse o fivimbi'eo.
⁴ Ie tsy eo añombe, koake ty riha'e;
 Toe mahavokatse ty haozaran' añombe.
⁵ Tsy mandañitse ty mpitalily migahiñé,
 fe mikofòke habodiake
 ty mpitarom-bande.
⁶ Mipay hihitse ty mpanivetive
 fa tsy mahatrea,
 fe mora ami'ty mahafohiñé
 ty hitendreke hilala.
⁷ Mihankaña ami'ty fiatrefañé i minèñey,
 fa tsy ho oni'o eo ty soñy mahilala.
⁸ Ty hihi' i mahilalay :
 le t'ie mahatsikarake ty lia'e,
 fe hakalitahañé ty hagegean-dagola.
⁹ Sirikae' ty minèñé ty fisolohoañé,
 fe amo vañoñeo ty fiharoan-drehake.
¹⁰ Fohi' ty stroke ty hafaim-piai'e,
 vaho tsy itraofa' ty ambahiny
 ty firebeha'e.
¹¹ Harotsake ty akiba' i rati-tserekey,
 fe hiraorao ty kivoho' o vañoñeo.
¹² Eo ty làlañé atao' ondaty ho vantañé,
 f'ie migodañé mb'an-kavilasy ao*.
¹³ Mikoretse ty arofo
 ndra t'ie miankahake,
 vaho migadoñ' an-kontoke ty rebeke.
¹⁴ Atsake o sata'eo ty midisa-voly,
 fe mahaeneñé t'indaty soa i azey.
¹⁵ Kila iantofa' ty seretse,
 fe tsakorè' ty hendre o lia'eo.
¹⁶ Mihilotse ty mahihitse
 vaho iholiara'e ty raty,
 fe mijikajika naho mitsidaredare
 ty dagola.
¹⁷ Manao raha tsi-roe-tafa-toe
 ty mora boseke,
 vaho tsambolitioheñé ty mikinia.
¹⁸ Mandova hagegeañé ty seretse,
 fe sabakaen-kilala ty hendre.
¹⁹ Hidrakadrakak' anatrefa' ty soa ty raty,
 naho an-dalambei' o vantañeo ty tsereheñé.
²⁰ Heje' ty rañe'e i rarakey,
 fe maro ty mikoko i mpañalealey.
²¹ Aman-tahiñé ty manirika ondaty,
 haha ka ty matarike amo poi'eo.

* **14:12** Rzs 16:25

- ²² Tsy hidridrike hao ty mpikilily?
Fe fiferenaiñañe naho hatò
ro amo misafiry hasoao.
- ²³ Amam-bokatse ze hene fitoloñañe,
fe mahararake ty soñy mikofofoake.
- ²⁴ Sabaka' o mahihitseo ty vara'e;
fe hagegeañe ty hanè' o dagolao.
- ²⁵ Mpañaha aiñe ty mpitaroñe mahity,
fe mpikitro-draha ty mikofò-bande.
- ²⁶ Fañarovañe fatratse ty fañeveñañe
am' IEHOVÀ,
vaho amam-pipalirañe o ana'eo.
- ²⁷ Havelo migoangoñañe ty fañeveñañe
am' IEHOVÀ,
toe fampiariañe o fandri-kakoromahañe.
- ²⁸ Enge' i mpanjakay ty borizañe maro;
ampopheke ka ty ana-donake
tsy ama' ondaty.
- ²⁹ Ampón-kilala ty malaon-kaviñerañe;
fe mpañonjo hagegeañe ty mora boseke.
- ³⁰ Mahavelon-tsandriñañe ty arofo hendre,
fe mahavoroke taolañañe ty farahy.
- ³¹ Mitera i Andrianamboatse aze
ty mamorekeke o rarakeo,
fe miisy Aze ty mitretre mahatra.
- ³² Arotsa' ty fandilara'e ty rati-tsereke,
fe am-pitsalohañe ty vañoñe te mivetrake.
- ³³ Mimoneñe añ'arofo' i mahilalay
ty hihitse,
fe abentabenta' o dagolao ty antrok' ao.
- ³⁴ Mañonjom-pifeheañe ty havañonañe,
fe mañinje o borizañe ty hakeo.
- ³⁵ Osihe' ty mpanjaka ty mpitoroñe
mitoloñe an-kihitse,
fe atretr'e an-kaviñerañe
ty manao hasalarañe.

15

- ¹ Mampitolike habosehañe
ty rehake malea,
fe mitrobo haviñerañe ty volam-peha'e.
- ² Mitolon-kilala an-katò ty famele' i mahihitse,
fe mipororoake hagegeañe
ty vava' i dagola.
- ³ Manitsike ze hene toetse
o fihaino' IEHOVÀO,
misary ty raty naho ty soa.
- ⁴ Hataen-kaveloñe ty fameleke mamere,
fe mampikoritoke troke
naho ama'e ty hamengohañe.
- ⁵ mañinje ty fañohan-drae'e ty dagola,
fe mahilala ty mañaoñ' anatse.

- ⁶ Vara bey ty añ'anjomba' o vañoñeo,
fe manolo-tsotry
ty tombom-baro' i lahiaga.
- ⁷ Mampiboele hilala
ty fivimbi' o mahihitseo;
fe tsy zay ty tro' i dagola.
- ⁸ Veta am' IEHOVÀ
ty fisoroña' o lo-tserekeo,
fe ifalea'e ty halali' o vantañeo.
- ⁹ Tiva am' IEHOVÀ ty taro' i lahiaga,
fe kokoa'e ty mañean-kavantañañe.
- ¹⁰ Mampalovilovy
ty mandrike amy lalañey te lafaeñe,
mikoromake ty malainñ' endake.
- ¹¹ Mivañavaña añatrefa' IEHOVÀ
ty tanen-dolo naho i tsikeokeoke,
sandrake ty arofo' ondaty!
- ¹² Tsy kokoa' ty mpanivetive te ereteñe;
tsy tilihe'e ty mahihitse.
- ¹³ Mampaviake vintañe ty arofo misomobotsòboke,
fe mahafola-paiañe ty troke ngoma.
- ¹⁴ Mpitsoeke hilala ty troke maharendreke,
fe mampibotseke hagegeañe
ty vava' i dagola.
- ¹⁵ Fonga mavoiñe ty andro' o misotrio,
fe mitolon-tsabadidake ty arofo minembanembañe.
- ¹⁶ Hàmake ty kedeke mitrao-pañeveñañe
am' IEHOVÀ,
ta ty vara-bey reketse hekoheko.
- ¹⁷ Kitra'e anjotsoañe añañe
am-pikokoañe,
ta te anozoañe temboay vinondrake am-palaiñañe.
- ¹⁸ Mitrobo hotakotake ty mpiloa-tiñake,
fe mampipendreñe fifandierañe
ty malaon-kaviñerañe.
- ¹⁹ Iremberembeam-patike
te añ'oloñolo' i votro,
fe dinamoke ty lala' i vañoñey.
- ²⁰ Mahafale an-drae ty anake mahihitse,
fe mañinje rene t'indaty gege.
- ²¹ Hagegeañe ty mahaehake i seretse,
fe vantan-dia t'indaty mahilala.
- ²² Milesa ty safiry po-panolo-kevetse,
fe mahaeneke te maro mpanoro.
- ²³ Mahafale ondaty te mahafanoiñe
ty falie'e,
akore ty hasoa' ty saontsy tandrife.
- ²⁴ Mañambone ty lala' o mahihitseo,
iholiara'e i tsikeokeoke ambane ao.
- ²⁵ Hombota' IEHOVÀ ty akiba'
o mpirengevoko,
fe ajado'e ty efe-tane' i vantotsey.

26 Tiva am' IEHOVÀ o fikitrofañeo,
 fe hiringiry ty saontsy mampanintsy.
 27 Manolo-tsotry ty akiba'e
 ty mamory an-katramo,
 fe ho veloñe ty malaim-bokàñe.
 28 Mañereñere ty hanoiña'e
 ty arofo' i vantañey,
 fe mampipororoake haratiañe
 ty falie' i lahiaga.
 29 Lavitse o raty tserekeo t'IEHOVÀ,
 fe janji'e ty halali' o vañoñeo*.
 30 Mahafale arofo ty fihaino miloeloe,
 vaho solik' an-taolañe ty talily soa.
 31 Amo mahihitseo ty himoneña' ty aman-dravembia mitsendreñë
 anatse mahaveloñe.
 32 Mañinje ty vata'e ty malaiñ' endake,
 fe manonton-kilala
 ty mitsatsike fanoroañe.
 33 Fañòhañe hihitse ty fañeveñañe
 am' IEHOVÀ,
 miaolo ty asiñe te mireke.

16

1 A ondatio ty fisafirin-arofo,
 fe a IEHOVÀ ty famaleam-pameleke.
 2 Malio am-pihaino' ondaty
 ze hene sata'e,
 fa mpandanja arofo t'IEHOVÀ.
 3 Apoho am' IEHOVÀ o fitoloña'oo,
 le hijadoñe o safiri'oo.
 4 Kila tsinene' IEHOVÀ
 ho ami'ty fanoa'e,
 ndra o lo-tserekeo ho an-tsan-kòheke.
 5 Fonga tiva am' IEHOVÀ o mpibohabohao,
 tsy kalafo t'ie tsy ho po-lafa.
 6 Mampanintsiñe fiolañe
 ty fiferenaiñañe naho ty hatò,
 Fisitahañe ami'ty raty ty fañeveñañe am' IEHOVÀ.
 7 Ie no' IEHOVÀ ty sata' ondaty,
 le hampanintsiñe'e o rafelahi'eo.
 8 Hàmake ty kedekede an-kavañonañe,
 ta ty tambe bey tsy an-kahiti'e.
 9 Misafiry ty lala'e ty tro' ondaty,
 fe tehafe' IEHOVÀ o lia'eo.
 10 Fañentoan' Añahare
 ty am-pivimbi' i mpanjakay;
 tsy hiota ty falie'e te mizaka.
 11 A IEHOVÀ o vatom-pandanja
 naho balantsio;
 hene sata'e o vato an-koroñeo.
 12 Tiva amo mpanjakao ty mpanao raty,
 fa norizañe an-kahiti'e i fiambesa'ey.

* 15:29 Rzs 28:9

¹³ Mahafale o mpanjakao
ty fivimby mahity,
vaho isohe'e ty misaontsy
an-kavantañañe.

¹⁴ Mpisangitrike fikoromahañe
ty haviñeram-panjaka,
fe hampanintsiñe aze
t'indaty mahihitse.

¹⁵ Haveloñe ty filoeloean-daharam-panjaka,
naho hoe rahoñe minday oran-dohataoñe
ty fañisoha'e.

¹⁶ Soa hatò ty ahazoan-kihitse
ta ty volamena! naho ty hijobon-kilala
te ami'ty volafoty.

¹⁷ Ty ihankaña'e haratiañe
ro lala' o vantañaeo,
vaho mahavontits' aiñe
ty mahambeñe i lia'ey.

¹⁸ Miaolo ty firotsahañe
ty firengevohañe,
vaho iaoloa' ty troke miebotsebotse
ty fihotrahañe.

¹⁹ Hàmake te mpiamo rarake
an-troke mirekeo,
ta te mitraok' amo mifanjara
o kinopake am-pibohabohañaeo.

²⁰ Hene hanjo hasoa ze mañaoñe i tsaray,
haha ty miato am' IEHOVÀ.

²¹ Atao mahatsikarake ty mahihitse añ'arofo;
mahafañosike fañòhañe ty saontsy malea.

²² Ranon-kavelo migoangoañe ty hilala
amy ze manañ'aze;
fe hagegeañe ty fandafàñe i dagola.

²³ Mañòke ty falie' i mahihitsey ty tro'e,
vaho tompea'e fañòhañe o fivimbi'eo.

²⁴ Hoe papy tantele
ty saontsy mampanintsy,
mamy añ'arofo naho
mampijangan-taolaña.

²⁵ Eo ty lalañe atao' t'indaty ho vantaña,
fe fikoromahañe ty figadoña'e*.

²⁶ Mifanehake ho aze ty fiai' ondaty,
vaho azim-palie'e.

²⁷ Mikabo-draha t'i Beliale1, afo misolebotse ty am-pivimbi'e ao.

²⁸ Mampiboele hotakotake
t'indaty mengoke,
mampifananarake mpiatehena ty bisibisike.

²⁹ Risihe' t'indaty piaroteñe ty rañe'e,
vaho kozozote'e mb'an-dalan-tsy soa.

³⁰ Mikinia raha mengoke
ty mpipie maso,

* **16:25** Rzs 14:12

vaho mampifetsake haratiañe
ty mpimontso.
³¹ Sabakan-engeñe ty maroi-foty;
oniñe an-dalan-kavañonañe eo.
³² Lombolombo ty fanalolahy
ty malaon-kaviñerañe,
vaho ambone' ty mpitavañe rova ty mahafeleke ty tro'e.
³³ Tora-tsato-piso am-pe,
IEHOVÀ avao ro Mpanampake.

17

- ¹ Hàmake ty pilipito'e maike
am-pianjiñañe,
ta ty anjomba lifo-takataka mitraoke
falaiñañe.
² Ty ondevo mitoloñ' an-kahiti'e
ty hifehe ty anake mahasalatse,
ie hifanjara lova aman-droahalahy.
³ Tranaheñe an-tsinihara ty volafoty
naho an-daforo ty volamena,
vaho IEHOVÀ ro mpitsòk' arofo.
⁴ Mañaon-tsoñin-tsereheñe ty lo-tsereke,
tsatsihe' i remborake ty lela manivetive.
⁵ Mañinje i Andrianamboatse aze
t'ie mañinje o rarakeo;
tsy ho po-lafa ty mitohàke
ami'ty hankàñe.
⁶ Sabakan-ingen-droanjia o afe'eo,
vaho enge' o anakeo o rae'eo.
⁷ Tsy mañeva i dagola ty enta-soa-fehe;
lombolombo zay ty soñy vilañe
an-droandriañe.
⁸ Vatosoa am-pihainom-pahazo aze
ty falalàñe,
mampitombo mb'atia mb'aroa.
⁹ Mpipay hatea ty mpanaroñe fiolàñe,
fe mampiria rañetse
te mamereñ' indroe.
¹⁰ Laleke ty itrofaha' ty endake
ami'ty mahihitse,
ta ty lafa zato ami'ty dagola.
¹¹ Mipay fiodiañe avao ty mpiola,
aa le hañitrifañe irake masiake.
¹² Hàmake hifnampe ami'ty lambon'ala nalæeñ-anake,
te ami'ty dagola aman-kagegea'e.
¹³ Tsy ho po-hekoheko ty akiba'
ty mamereñe raty ami'ty soa.
¹⁴ Hoe mampipororoake rano
ty fifotoram-pifandierañe,
aa le apoho i lietsey
tsy hiforehetse ho aly.
¹⁵ Songa tiva am' IEHOVÀ

ty mañatò ty lo-tsereke naho
 ty mamàtse ty vantañe.
¹⁶ Aia ty dagola te hinday drala
 an-taña'e hikaloa'e hihitse
 kanao tsy an-tro'e ao ty hilala.
¹⁷ Mikoko nainai'e ty rañetse,
 fe nasamake ho an-tsam-poheke ty rahalahy.
¹⁸ Miroe-rano ty manò-taña
 hiantofa'e ty songon-drañetse.
¹⁹ Mpitea fiolàñe ty mpikoko lietse,
 vaho mikai-rotsake ty mandranjy
 lalambey abo.
²⁰ Tsy mahatre a hasoa
 ty mengok' an-troke;
 vaho mihotrak' an-kaloviloviañe ao
 ty aman-dela mamañahy.
²¹ Ho aman'anahelo
 ty misamake ty minè;
 vaho tsy aman-kaehake ty rae' i gegey.
²² Aoly soa ty arofo mifale,
 fe mahamain-taolañe ty hafola-po.
²³ Mandrambe vokañe boak'am-pisafoa
 ty lahiaga,
 hampikelokeloke ty lalam-bantañe.
²⁴ Añatrefa' ty mahatsikarake
 ty hihitse,
 fe mihilohilo mb'añ'olo-tane aña
 ty maso' i dagola.
²⁵ Mañembetse an-drae
 ty hagegean'ana-dahy,
 vaho hafairañe amy nitoly azey.
²⁶ Tsy mahaso te liloveñe ty malio-tahiñe,
 naho ty andafañe roandriañe
 ty amy havañona'ey.
²⁷ Malea fisaontsy ty mahilala,
 mahalie-troke t'indaty maharendreke.
²⁸ Ndra i seretsey ro atao mahihitse
 naho mahafianjiñe,
 mbore atao hendre
 t'ie mahatan-tsoñy.

18

- ¹ Mañean-drao ty mirery,
 tsambolitio'e ze atao vere-to.
- ² Tsy no' i dagolay ty faharendrehañe,
 fa ty mampiboake ty heve'e avao.
- ³ Ie pok'eo ty tsivokatse,
 mipotítse eo ka ty teratera,
 vaho indrezan-kasalarañe ty injé.
- ⁴ Rano laleke ty fisaontsim-palie' ondaty, torahañe mibobobobo
 ty figoangoañan-kihitse.
- ⁵ Tsy mahaso te osiheñe ty raty,

hikihoañe ty vañoñe an-jaka.

⁶ Mikaidraha o soñi' i dagolao,
naho mikai-tampify ty vava'e.

⁷ Fiantoa' i seretsey ty vava'e,
vaho mpamandrike ty fiai'e o soñi'eo.

⁸ Kenoke mafiry
ty fivolam-pitolom-boetse,
migodoñe mb'añ'ova' ondaty ao.

⁹ Rahalahi' ty mpijoy,
ty mpilesa am-pitoloña'e.

¹⁰ Fitalakesañ'abo fatratse
ty tahina' IEHOVÀ,
milay mb'ama'e ao ty vantañe
vaho onjoneñe tsy takatse.

¹¹ Rova fatratse ty varam-pañaleale,
naho hoe kijoly abo aña'ereñere'e ao.

¹² Aolo' ty ikorovoha' ondaty
ty fiebotseboran-tro'e,
fe miaolo' ty hasiñe ty firehañe.

¹³ Ie manoiñe aolo' t'ie mitsanoñe:
le hagegea'e naho hasalara'e.

¹⁴ Mahafeake hasilofañe ty tro' ondaty,
fa ia ka ty mahaleo ty fikoretan' arofo.

¹⁵ Mitoha hilala ty tro' i mahatsikarake,
vaho mañotsohotso hihitse
an-dravembia'e ty mahilala.

¹⁶ Anokafan-dalañe
ty ravoravo' ondaty,
manese aze hiatreke ty bey.

¹⁷ Heveren-ko to ty mitalily valoha'e,
ampara' te pok'eo ty mañody aze.

¹⁸ Abala' ty tora-tsato-piso
ty fifandierañe,
ie mampivike ty mpifanjomotse.

¹⁹ Mora ty mandreketse rova fatratse,
ta ty rañetse torifike,
vaho hoe tsotso-bim-pitilik'abo
ty fifanjomorañe.

²⁰ Ty havokaram-palie' ondaty
ro mahaenem-pisafoa,
o vokam-pivimbi'eo ro maha-anjañe.

²¹ Manandily ami' ty haveloñe naho ami'ty havilasy ty fameleke,
hikama amo vokare'eo ze mikoko aze.

²² Mahaonin-kasoa ty tendreke valy,
vaho isohe' IEHOVÀ.

²³ Mihalaly tretré ty rarake,
fe sotrafe' ty mpitsikafo.

²⁴ Mianto t'indaty lako rañetse,
fe ao ty ate-hena mipiteke soa
te ami'ty rahalahy.

19

- ¹ Ambone' ty dagola
aman-tsoñy mengoke,
ty rarake mañavelo an-kahiti'e.
- ² Tsy mahasoa ty fiaiñe
te tsy aman-kilala,
mandilatse ty malisa am-pandia.
- ³ Mampianto ty lia'e ty hanè' ondaty,
ie mitrevok' IEHOVÀ an-tro'e.
- ⁴ Mpanovon-drañetse o varao,
fe pitso-drañetse t'ie rarake.
- ⁵ Tsy ho po-lafa ty mpitalily vilañe,
vaho tsy himolaotse ty mavande.
- ⁶ Amam-pandomboke maro ty matarike,
kila mifandrañetse ami'ty mpanolo-ravoravo.
- ⁷ Falai' o rahalahi'e iabio ty rarake—
sandrake t'ie farien-drañe'e!
Heañe'e fe tsy eo.
- ⁸ Mpikoko ty tro'e ze mitoha hihitse,
ho tendreke hasoa ty mpangazon-kilala.
- ⁹ Tsy ho po-lilo ty mpanao kitomboke,
le hihomake ty mpandañitse.
- ¹⁰ Tsy mañeva ty seretse
ty miaiñ' añaoleñañe,
naho ty ondevo
ty hifehe ana-donake.
- ¹¹ Mampalaon-kaviñerañe
ty fitsikaraha' ondatio,
vaho enge'e ty miheve fiolàñe.
- ¹² Manahake ty fitreñan-diona
ty haviñeram-panjaka,
fe hoe mìka aña'ahetse eo ty fañisoha'e.
- ¹³ Fianto aman-drae'e ty ajaja votro,
vaho fitsopatsopahañe nainai'e
ty fitreontreon-drakemba.
- ¹⁴ Lovaeñe aman-droae ty vara
naho anjomba,
fe boak'am' IEHOVÀ ty valy hendre.
- ¹⁵ Mampilañak' an-droro ty havotroañe,
vaho ho silofen-kerè ty tro' i tembo.
- ¹⁶ Mahatam-piay ty mahatan-dily,
fe hihomake ty mitsidaredare
ami'ty lia'e.
- ¹⁷ Mampisongo am' IEHOVÀ
ty mitretre i rarake,
le ho tambeze'e i fatariha'ey.
- ¹⁸ Lilovo o ana'o, kanao mb'e
amam-pitamàñe;
fe ko ilosoran-dafa.
- ¹⁹ Tsy mete tsy liloveñe ty midabadoa;
f'ie haha'o, tsy mahay tsy indrai'o.
- ²⁰ Mijanjiña fanoroañe,

le miantofa endake,
vaho hahihitse rehe am-para'e.
21 Maro ty safirin-tro' ondaty,
fe hijadoñe ty famerea' IEHOVÀ.
22 Ty paiañe ama'ondaty le ty fiferenaiña'e;
Hàmake t'ie rarake ta te remborake.
23 Minday mb'an-kaveloñe
ty fañeveñañe am' IEHOVÀ;
hiaiñ'añoleñan-dre, tsy ho zoem-boiñe.
24 Alipo' ty votro am-pinga ao ty taña'e,
fe tsy ahere'e mb'am-bava.
25 Lafao ty mpiteratera,
hianara' ty seretse fañahy,
fe endaho ty maharendreke,
hitovoñañe ty hilala'e.
26 Ty mampianto rae,
naho ty manao soike aman-drene,
le anadahy manalatse naho mahameñatse.
27 Mijihera tsy hañaoñ' endake, anake,
le handifihe'o ty tsaran-kilala.
28 Maneratera ty hatò ty mpitalily votro,
vaho lifo-karatiañe ty vava' o lo-tserekeo.
29 Ampihentseñen-dilo ty mpandrabioñe
naho lafa ty lambosin-dagola.

20

1 Mpamerevere ty divay,
mpañotakotake ty toake,
vaho tsy mahihitse i nampivihe'ey.
2 Ty fampangebaheban-kaviñera'
i mpanjakaiy,
le manahake ty firohafan-diona;
mamoe aiñe ty mitrabik' aze hiboseha'e.
3 Havañona' ondaty te miholiatse
añ-ali-drokoñe,
fe manjehatse avao o dagolao.
4 Tsy mitrabak' asotry ty tembo;
ie famara-manta,
mangatake tsy mahazo.
5 Rano laleke ty fisafirian' arofo' ondaty,
fe mampiboak' aze ty mahihitse.
6 Maro ty mihaboke ho mpiferenaiñe,
fa ia ty mahatendreke ondaty migahiñe.
7 Mañavelo an-kahiti'e ty vantañe;
haha o ana'e manonjohy azeo!
8 Tsongàe' ty mpanjaka
miambesatse an-jaka ao am-pihaino'e
ze atao haratiañe iaby.
9 Ia ty mahafisaontsy ty hoe:
Fa nampikanitsoheko ty troko;
vaho malio tahin-draho?
10 Songa tiva am' IEHOVÀ

ty vato-pandanja vilañe
naho ty kapoake valañe.

¹¹ O sata'eo ro andrendrehañe i zatovo,
hera mikasokàsoke naho to i fitoloña'ey.

¹² Ty ravembia mahajanjiñe,
naho ty fihaino mahaoniñe,
songa namboare' IEHOVÀ.

¹³ Ko manao hatea rotse,
tsy mone ho rarake;
Avotiriho o fihaino'oo
le ho eneñe mahakama.

¹⁴ Raty, raty, hoe ty mpivily;
ie mienga le isengea'e.

¹⁵ Eo ty volamena
naho ty vatosoa tsifotofoto;
fe safira ty fivimby nahatendreke hilala.

¹⁶ Rambeso ty saro' ty nitsoak' ambahiny, tambozoro ho antoke t'ie tsy
fohiñe.

¹⁷ Mamy ty mofo niazo t'ie namañahy,
fa ho atseke faseñe aniany ty vava'e.

¹⁸ Tolo-kevetse ro mahajadoñe safiry,
Mañolots' añ'aly ty fanoroan-kihitse.

¹⁹ Mampiborake tangogo
ty mpikanifo ke mitsatsà;
aa le ko mirekets'ami'ty mpangaradadake.

²⁰ Ze mamatse rae naho rene,
hikipeke an-kiaeñe ao ty failo'e.

²¹ Ty lova tinaentaeñe am-baloha'e,
tsy ho tahieñe am-para'e.

²² Ko manao ty hoe: Ho valeko i ratiy; mahaliñisa IEHOVÀ,
Ie ty handrombak' azo.

²³ Tiva am' IEHOVÀ ty vato-lanja tsy mira; vaho tsy vokatse o fandanjàñe
vilañe.

²⁴ Alaha' IEHOVÀ o lia' ondatio; aia arè ty haharendreha' ondaty i lala'ey?

²⁵ Fandrike ty ikofofoaha' t'indaty,
ty hoe: Masiñe! ie aña i fantay
vaho añontanea'e.

²⁶ Manònga o lo-tserekeo
ty mpanjaka mahihitse;
le ampivarimbariñe'e ama'e ty larò.

²⁷ Failo' IEHOVÀ ty arofo' ondaty,
Fonga karaofe'o añova'eo.

²⁸ Mahafijadoñe ty fiferenaiñañe
naho ty hatò i mpanjakay;
togaña'e am-patarihañe i fiambesa'ey.

²⁹ Enge' o ajalahio o haozara' iareoo;
maroi-foty ty volonahe' o androanavio.

³⁰ Mamaopao-karatiañe
ty fofoke mamonotroboke,
naho mañalio o añova'eo ty lafa.

21

- ¹ Hoe kadahan-drano am-pitâ' IEHOVÀ
ty arofo' i mpanjakay; tehafe'e an-tsatri'e.
- ² Mahity am-pihaino' ondaty o sata'eo;
fe Mpandanja arofo t'IEHOVÀ.
- ³ No' IEHOVÀ ambone' ty soroñe
ty havañonañe naho ty hatò.
- ⁴ Fihaino mievoñevoñe
nahô arofo miebotse:
ro failo' o lo-tserekeo—hakeo zay.
- ⁵ Minday havokarañe ty fisafiri'
o mavitrikeo;
fe mitarike mb'am-pilâñe
ty fanaentàeñañe.
- ⁶ Ty ahazoam-barâ am-pamelem-pandañitse
le evoñe mihelañe mb'am-pikoromahañe.
- ⁷ Ho kozozoteñe aña o lo-tserekeo
ty amo fijoia'eo,
fa ifoneña' iareo ty tsy hanao ty hiti'e.
- ⁸ Mikelokeloke ty lala' ondaty mengoke;
fe mahity ty fitoloña' ty malio añ'arofo.
- ⁹ Hâmake te mitoboke
an-kotson-tapenak' ao,
ta te miharo akiba aman-drakemba
tea-trabike.
- ¹⁰ Mipay haratiañe ty tro' i tsivokatsey,
fa tsy mahaonin-tretrè
am-pihaino'e ty rañe'e.
- ¹¹ Ie lafañe ty mpañinje,
mihamahihitse t'ie trentrañe,
ie anareñe ty mahihitse,
mitombo ty hilala'e.
- ¹² Misamba ty akiba' i lo-tserekey
ty vantañe;
avari'e mb'am-piantoañe i tsivokatsey.
- ¹³ I manjenjen-dravembia
ami'ty fitoreo' o rarakeo,
ty mbe hikaike fe tsy ho toiñeñe.
- ¹⁴ Fañanintsin-kaviñerañe
ty ravoravo añ'etake,
nahô filoa-tiñake ty vokâñe añ'araña ao.
- ¹⁵ Ie anoeñe ty hatò, ehave o vañoñeo,
fe mangebahebake o mpikitroke haratiañe.
- ¹⁶ Hitofa am-pivorian-dolo ao t'indaty mandrike amy lalan-kilalay.
- ¹⁷ H'onday poi'e ty mpitea haravoñañe;
tsy ho mpañaleale ty mpikoko divay
nahô menake.
- ¹⁸ Vilin'ai' ty vantañe ty tsivokatse,
le tsoa' ty vañoñeo ty mpamañahy.
- ¹⁹ Hâmake t'ie mimoneñe
an-dratraratra aña,
ta t'ie miharo aman-drakemba
mandietse nahô mora boseke.
- ²⁰ Mihaja añ'anjomba' o mahihitseo

ty vara sarotse naho ty menake;
fe abotse' ty dagola o azeo.

²¹ Manjo haveloñe naho havañonañe
vaho hasiñe
ty mitoha havantañañe naho fiferenaiñañe.

²² Mitroatse an-drovam-panalolahy
ty mahihitse, vaho arotsa'e
ty hafatrarañañe niatoa'e.

²³ Mitan-ty fiai'e tsy ho am-poheke
ty mahambeñe falie naho fameleke.

²⁴ Manivetive ty añara'e avao ty mpirohake naho mpievoñevoñe ;
ie mitoloñe am-pitrotroaboha'e.

²⁵ Mañe-doza amy tembo ty fañiria'e,
amy te tsy mete mitoloñe o taña'eo.

²⁶ Hadrao lomoñandro ty lahiaga,
fe matarike ty vantañe, tsy mangazoñe.

²⁷ Tiva ty fisoroña' o tsivokatseo;
antsake te engae'e miharo kinia.

²⁸ Hikenkañe ty mpitalily vilañe,
fe mitolom-pitaroñe ty mañaoñe.

²⁹ Manao tarehe mahavany ty rati-tsereke,
fe itsakorea' ty vantañe ty hombà'e.

³⁰ Tsy eo ty hihitse,
ndra ty faharendrehañe,
ndra ty safiry mahafiatreatre am'IEHOVÀ.

³¹ Hentseñeñe ho ami'ty androm-pihotakotahañe ty soavalà,
fe a IEHOVÀ ty fandrebahañe.

22

¹ Paiaeñe mandikoatse ty vara jabajaba
ty añarañe soa,
vaho ambone' ty volafoty
naho ty volamena ty fañisohañe.

² Ty ihambaña' ty mpañefoefo
naho ty rarake:
songa sata' IEHOVÀ Andrianamboatse.

³ Mizò hankañe ty maharendreke
vaho mipalitse,
fe misorok' avao ty seretse
vaho liloveñe.

⁴ Ty tambem-piambaneañe
naho ty fañeveñañe am' IEHOVÀ,
ro vara naho hasiñe vaho haveloñe.

⁵ An-dala' ty mengoke
ty fatike naho ty fandrike;
ihankaña' ty mahambem-piaiñe.

⁶ Anaro ty ajaja ty lala' homba'e,
le tsy handriha'e te bey.

⁷ Fehè' ty mpañaleale ty rarake,
ondevo' ty mampisongo ty mpisongo.

⁸ Handrofotse haemberañe
ty mitongy hatsivokarañe,

vaho hipoke ty kobain-kaboseha'e.

⁹ Soa tata ty matarike,
amy te andiva'e mahakama ty rarake.

¹⁰ Soiho aña o mpañinjeo,
le hibioñe ty mah'ankoheke;
hijihetse ka ty sotasota naho inje.

¹¹ Rañe' ty mpanjàka
ty mpikoko arofo-malio
vaho rei-tave ty saontsi'e.

¹² Mihaja hilala o fihaino' IEHOVÀ,
fe havalintsingora'e
ty fivola' o mpamañahio.

¹³ Hoe ty votro: Liona ty alafe ao!
havetra'e an-dalañe ey raho.

¹⁴ Kadaha laleke ty vava' i tsimirirañey;
mihotrak' ao ze iviñera' IEHOVÀ.

¹⁵ Mifehefehe an-tro' ty ajalahy ao
ty hagegeañe,
f'ie anoë' ty kobaim-pandilovañe soike.

¹⁶ Songa mahararake ty famorekekeñañe
o rarakeo hanontonan-teña,
naho ty fanolorañe ami'ty mpañaleale.

¹⁷ Atokilaño ty ravembia'o
naho janjiño ty fitaro' o mahihitseo;
vaho itsakoreo o fañòhakoo,

¹⁸ Toe mahasoa azo te hampireketa'o,
soa t'ie ho veka'e am-pivimbi'o.

¹⁹ Soa te hatokisa'o t'IEHOVÀ,
ty nampaharendrehako azo anindroany,
eka ihe 'nio!

²⁰ Tsy fa nanokirako famereañe
naho fampandrendrehañe telopolo?

²¹ hampalangesañe ama'o ty hiti'e
naho ty hatò,
hahatoiña'o an-katò ty nañirak'azo.

²² Ko kamere'o o rarakeo amy te poie,
ko demohe'o an-dalambey eo
ty mpisotry;

²³ fa mihalaly ho a iareo t'IEHOVÀ;
vaho ho tavane'e ty fiai'
ze mitavañe am'iereo.

²⁴ Ko mirañetse amo mandoviakeo,
vaho ko mirekets'amy t'indaty miforoforo.

²⁵ kera ho zatse o sata'eo,
vaho hifehefehe am-pandrik' ao ty fiai'o.

²⁶ Ko mpiamo mpano'-tañañe
ndra mianteke mpisongoo.

²⁷ Naho tsy ama'o ty hañavaha'o aze,
akore te hasinto'e i tiyh ambane'oy?

²⁸ Ko avi'o ty vorovoro haehae
najadon-droae'oo,

²⁹ Mahaoniñe ondaty mavitrike

am-pitoloña'e hao rehe?
ho mpitorom-panjàka re,
tsy hijohañe aolo' o tsotrao.

23

- ¹ Ie miambesatse hitrao-pikama
ami'ty mpifehe,
biribirio ty añatrefa'o eo,
- ² vaho tohorø meso ty tretra'o
naho mpanao avetse rehe.
- ³ Ko lelalelae'o o raha mafiri'eo,
fa mahakama mahatsikapy.
- ⁴ Ko mamokotse vatañe ho mpañaleale,
ijihero am-pisafiri'o.
- ⁵ Ampihelañe'o fihaino hao ty tsy eo?
fa toe mitsene elatse
manahake ty vantio ty vara
mitiliñe mb'an-dindiñe eñe.
- ⁶ Ko kamae'o ty hène' o matitio,
ko irie'o o aze mafirio;
- ⁷ Fa hambañe ami'ty fañereñere'e
añ'ova'e ao ty ie: hoe re ama'o;
Mikamà naho minoma!
fe tsy ama'o ty tro'e.
- ⁸ Hilañe'o i pilipito'e nitsopehe'oy,
vaho hianto i fañandriaña'oy.
- ⁹ Ko misaontsy am-pitsanoña' ty seretse,
fa ho sirikae'e ty hihi' o enta'oo.
- ¹⁰ Ko avi'o ty nifaritsohañe haehae,
vaho ko miaribañe ty tanem-bode-rae,
- ¹¹ amy te maozatse ty mpijeba' iareo;
hitohaña'e ty ama'o.
- ¹² Ampiantofo filie-batañe ty arofo'o,
vaho volan-kilàla o ravembia'oo.
- ¹³ Ko ahàンkañe ami'ty ana'o ty lilo;
fa tsy mahavetrake ty lafan-kobaiñe.
- ¹⁴ Ie pisoe'o an-kobaiñe,
ho haha'o an tsikeokeok' ao ty tro'e.
- ¹⁵ O anako, naho mahihitse ty tro'o,
ho ehake ty troko,
- ¹⁶ vaho hirebeke ty añ'ovako ao
naho mahafivolañe ty hiti'e o soñi'oo.
- ¹⁷ Ko apo'o ho tsikirihen-tro'o
ty mpandilatse,
fe imaneo lomoñandro
ty fañeveñañe am' IEHOVÀ.
- ¹⁸ Toe ey ty ho avy,
vaho tsy haitoañe ty fisalalà'o.
- ¹⁹ O anako, mitsanoña naho mahihira,
vaho avantaño mb'amylalañey ty tro'o.
- ²⁰ Ko mitraok' amo
mpitolom-pitrini-divaio,

ndra amo mpamotseke henao;
²¹ fa songa hivarin-ko rarake
 ty mahake naho i jike;
 vaho hisikin-tsirodea ty poie.
²² Tsendreño ty rae nisamak' azo,
 vaho ko injè'o ty rene'o t'ie bey.
²³ Vilio ty hatò le ko aletake;
 ikalò hihitse naho anatse vaho hilala.
²⁴ Handia taroba ty rae' i mahitiy;
 vaho hifalea'e i ana-dahy karafito nampiareñe'ey.
²⁵ Ampiehafo ty rae'o naho i rene'o;
 hampinembanembañ' i nisamak' azoy.
²⁶ O anake, atoloro ahiko ty tro'o,
 le ampifaleo amo satakoo o maso'oo.
²⁷ Kadaha laleke ty tsimirirañe,
 vaho vovoñe maifitse ty karapilo.
²⁸ Mivoñoñe ao re hoe malaso,
 vaho ampitomboe'e am'ondatio
 ty hatsivokarañe.
²⁹ Ia ty mioremèñe, ia ty mihontoke?
 Ia ty ampoheke? Ia ty mitoreo?
 Ia ty vinonotroboke tsy amam-poto'e;
 Ia ty ama-maso mandofiry?
³⁰ O mihenekenke an-divaio,
 o mitolom-pitsopeke divay linaloo.
³¹ Ko hentea'o ty hamena' ty divay,
 ty fimilomilo'e am-pitovy ao,
 ty falamam-pioriha'e.
³² Ie am-para'e mitifatse hoe lapetake
 vaho mihehetse hoe fandrefeala.
³³ Hahaoniñe sahàtse o maso'oo,
 vaho hivolán-kamengohañaे
 ty ron-doha'o.
³⁴ Le hanahake ty mitsalalampatse
 aivo' i riakey rehe,
 naho ty mandre ambone'
 ty bodan-dain-dakañe eo.
³⁵ Namofok' ahy iereo,
 fe tsy manaintaiñe;
 linafa'e fe tsy nireiko!
 Ombia te ho tsekake hipaiako indraike?

24

- ¹ Ko kirañe'o o lo-tserekeo,
 ko mañiry ho mpiam' iareo.
- ² Fa mikiroke hapiaroteñe
 ty ron-doha'iareo,
 vaho mivolan-tsiroe-tafatoe o soñi'eo.
- ³ Hihitse ty mahafonitse anjomba,
 vaho hilala ty añorizañe aze;
- ⁴ Fahafohinañe ty mahapea o efe'eo
 amy ze hene vara soa naho mahafale.

5 Maozatse t'indaty mahihitse,
 manovon-kafatrarañe ty mahilala;
 6 amy te fiaoloñañe mahihitse
 ty ifanehafa'o amo ali'oo,
 vaho minday fandrebahañe
 ty hamarom-piaolo.
 7 Loho ambone' i seretsey ty hihitse;
 ie tsy manoka-palie an-dalam-bey eo.
 8 Hatao mpikitro-draha
 ty mikilily hanao raty.
 9 Hakeo ty mikitro-kagegeañe,
 vaho tiva am'ondatio ty mpañinje.
 10 Vata'e tsy an-kaozaran-drehe t'ie mitoirañe añ'andron-kaemberañe.
 11 Hahao o kozozotem-
 bam-pandentañe mb'eo,
 ie midaliendalieñe
 mb'am-panjamanañe mb'eo,
 Ehe, kalaño!
 12 Aa naho manao ty hoe rehe,
 Inao! tsy napota'ay 'nio!—
 Tsy mahatsikarake zay hao
 i Mpandanja arofoy?
 tsy arofoana' i Mpañambem-piai'oy hao?
 Tsy havaha'e am'ondatio hao o sata'eo?
 13 O anako, mihinana tantele, amy te soa,
 eka, mamy an-dañilañy ao
 ty tantele boak' am-papi'ey.
 14 Maharendreha te zay ty hihitse
 ami'ty fiai'o; ie trea'o
 le ho tendrek' ama'o ty ho avi'o,
 vaho tsy haitoñañe ty fisalalà'o.
 15 Ko vandroñe'o, ty tsereheñe tia,
 ty anjomba' i vañoñey;
 ko joie'o ty akiba imoneña'e;
 16 fa mikorovoke im-pito ty vantañe,
 le mbe mitroatse avao;
 fe mivembeñe añ'andron-kankàñe
 o lo-tserekeo.
 17 Ko irebeha'o ty fihotraha' o rafelahi'oo,
 vaho ko ado'o hifalea' ty tro'o
 i fitsikapia'ey.
 18 fa ho vazoho' IEHOVÀ
 naho ho alihe'e
 vaho havi'e tsy ho ama'e i haviñera'ey.
 19 Ko angovita'o o tsivokatseo,
 le ko itsikiriha'o o lo-tserekeo;
 20 fa tsy aman-ko tamae'e ty tsereheñe;
 le hakipe ty failo' i borololoy.
 21 O anake, mañeveña
 am' IEHOVÀ naho amy mpanjakay,
 le ko mitraok' amo mpiolao,
 22 fa hivovo'a' ty feh' ohatse,

vaho ia ty hahafohiñe
 ty fifetsaham-piantoñaे
 hanoe' i roroey?
²³ Manoly o tsara retoañe ka
 o mahihitseo:
 Tsy mete an-jaka ao ty firihiñaे.
²⁴ Ze manao ty hoe amo aman-kakeoo:
 'Vantan-drehe,' ro honjira' i màroy;
 vaho ho heje' o fifeheañeo;
²⁵ fe ho ehake o mahafañendakeo
 vaho ho soa tata.
²⁶ Orofeñe o fivimby mahatoiñe
 an-kahiti'eo.
²⁷ Henefo heike ty fitromaha'o alafe'e ao
 naho halahalao o tete'oo,
 vaho ranjio amy zao ty akiba'o.
²⁸ Ko sesehe'o, tsy amam-poto'e t'indaty;
 vaho ko mamañahy am-pivimby.
²⁹ Ko manao ty hoe:
 Hanoako hambañe amy nanoa'e ahikoy;
 sindre havahako ty amy sata'ey.
³⁰ Niozàko ty tete' i tembo,
 niariako ty tanem-balobo' i seretse;
³¹ hehe t'ie nioboñobom-patike;
 nilafihan-kisatse i taney,
 vaho narobake ty kijolim-bato'e.
³² Ie nitreako le naereñereko,
 nenteako vaho nitendrek' anatse.
³³ Firotse kede, mandre betebeteke,
 mañohom-pitañe hiroro,
³⁴ le hikovovoke mb'ama'o ty hararahañe,
 vaho hoe lahin-defoñe ty hapoia'o.

25

¹ Tovo' ty razan-tsaontsi'
 i Selomò iretiañaе,
 o nitsikombean-droandria'
 i Kez'kia, mpanjaka' Iehodao.
² Engen'Añahare ty mampikafi-draha,
 naho volonahe' o mpanjakao
 ty mañotsohotso.
³ Ty haabo' i likerañey,
 ty halale' ty tane toy,
 zay ty hasaro-pitsikarahañe
 ty arofom-panjaka.
⁴ Afaho amo volafotio ty taim-pira'e,
 le ho amam-panefea'e finga ty mpanefe;
⁵ asitaho añatrefa' i mpanjakay
 o tsereheñeo,
 le hijadoñe an-kavantañañe
 ty fiambesa'e.
⁶ Ko mañonjom-bata
 añatrefa' i mpanjakay,

ndra mijohañe an-toe' o aman-kasiñeo;

⁷ Hàmake te anoeñe ama'o ty hoe:

Miheova mb'aolo atoa,
ta t'ie hareke añatrefa' o roandriañe
niisam-pihaino'oo,

⁸ ko malisa hanese sisy;
fa inoñe ty hanoe'o ampara'e,
t'ie ampisalara' indati?

⁹ Mifandahara hey am'indatiy
le ko borahe'o ty tsikenta' ondaty;
¹⁰ tsy mone hinje'e te mahajanjiñe,
vaho tsy ho modo ty halolo-lahi'o.

¹¹ Hoe raketa volamena
niravaheñe volafoty
ty saontsy soa mañeva.

¹² Hoe bange volamena naho
ravake volamena ki'e,
ty endake an-kihitse
an-dravembia mahafijanjiñe.

¹³ Hambañe ami'ty hanintsim-panala
am-bolam-binta
ty irake lili-po amo mpañirak' azeo;
ie ampanintsiñe'e ty arofo' o talè'eo.

¹⁴ Hoe rahoñe miharo tioke
tsy amañ'orañe
ty misenge ravoravo tsy atolo'e.

¹⁵ Mete handreketse ty mpifehe
ty fahaliñisañe,
naho mahafipoza-taolañe
ty fisaontsy malea.

¹⁶ Ihe tendreke tantele,
mikama ze mahaeneñe,
kera habodàja'o te mitipak' eratse.

¹⁷ Soa re te tsy siak' añ'akiban-drañe'o ao o fandia'oo,
tsy mone ho etsak' azo, vaho ho heje'e.

¹⁸ Hoe kobaiñe, naho fibara,
vaho ana-pale masioñe
ty manara-bande ama' ondaty.

¹⁹ Hoe nife folake ndra fandia mikoletra
ty fiatoñañe ami'ty mpamañahy
an-tsam-poheke.

²⁰ Hoe mañafa-tsaroñe
añ'andro manintsy,
ndra ty vinegra nalaro sokay
ty mibeko ami'ty milendène.

²¹ Ie saliko ty rafelahi'o,
anjotso mahakama;
ie taliñiereñe, fahano rano;
²² zay ty hamotria'o foroha mirekake

añ'ambone'e eo,
vaho hanambe azo t'IEHOVÀ.

²³ Minday orañe ty tiok' avaratse,
naho minday laharañe miloroloro

ty lela manao tsikony.

²⁴ Hàmake himoneñe
añ'ilan-tampenak' ao,
ta te añ'anjomba mitraoke
aman-drakemba mpitrabike.

²⁵ Hoe rano manintsy
ami'ty maran-drano,
ty talily soa boak'an-tsietoitâne aña.

²⁶ Hoe rano manganahana
nileoren-ditsake,
naho vovoñe ñitivaeñe,
ty vantañe miheve ty lo-tsereke.

²⁷ Tsy mahasoa te mikama tantele maro,
vaho tsy enge'o t'ie mandrenge vatañe.

²⁸ Hoe ty fiboroboñafañe an-drova
tsy aman-kijoly,
t'indaty tsy maha-lie-batañe

26

¹ Hoe fanala añ'asara,
ndra orañe an-tsam-pitatahañe,
ty tsy fañevà' i dagolay fiasiañe.

² Hoe ty fikepakepha' ty hitikitike
naho ty fitiliñam-polinjà,
ty tsy ipetaham-patse
te tsy amam-bente'e.

³ Ty fikiso ho ami'ty soavala,
naho ty laboridy ho ami'ty borìke,
vaho ty kobaiñe ho an-dambosi' i dagola.

⁴ Ko toiñe'o ami'ty hanè'e i seretse,
hera hanahak' aze.

⁵ Valeo mañeva' i hagegea'ey ty dagola,
tsy mone hahihitse ami'ty maso'e.

⁶ Hoe mañitsike tomboke
naho migenoke voreke,
ty mampisangitrike taratasy
am-pitân-dagola.

⁷ Maletraletra ty fandia' i kepeke,
naho ty razan-drehak' am-bava'
o seretseo.

⁸ Hoe mañombe vato am-piletse,
ty miisy i gegegege.

⁹ Hoe fatike mipok' an-taña' i jike,
ty razan-drehak' am-bava' i dagola.

¹⁰ Ie mampitoloñe ty seretse,
le manahake te mañeke mpandrioñe.

¹¹ Hoe amboa mimpoly ami'ty loa'e,
ty dagola mamereñe ty hagegea'e.

¹² Tsy fa nahaisake ondaty mahihitse
am-pihaino'e hao rehe?

bey ty fitamà' i seretsey ta ty aze.

¹³ Hoe ty votro,

Inao liona ty an-damoke eo!

Midada an-dalañe ey ty liona!
¹⁴ Manahake ty figavingavin-dalañe
 amo soavili'eo,
 ty tembo am-pandrea'e eo.
¹⁵ Ajo' i votro am-po finga ao ty taña'e,
 fe tsy lefe'e ty minday aze mb'am-bava'e.
¹⁶ Mahihitse ami'ty maso'e ty tembo,
 te ami'ty fito-lahy manoiñe
 an-kavantañañe.
¹⁷ Hambañ' ami'ty mitsepak' amboa an-tsofi'e,
 ty mpandrioñe mihilintsioñe
 ami'ty aly tsy aze.
¹⁸ Hoe ty derendereñe mañiririñe
 raha mibelañe, naho ana-pale,
 vaho fampihomahañe,
¹⁹ ty mamitake ondaty ami'ty hoe:
 Nisolesole avao raho.
²⁰ Mate ty afo tsy aman-katae,
 modo ka ty dabasida tsy aman-tsikotsiko.
²¹ Hoe sarebò ami'ty foroha mirekake,
 naho hatae ami'ty afo,
 ty famiaña' i mpanao tsikoniy
 hañolaña'e aiñe.
²² Hoe kenoke mafiry
 ty fivolam-pitàngogo,
 ie migodoñe mb'añ'ova lalek' ao.
²³ Hoe valàñe-tane nihamineñe
 taim-piram-bolafoty
 ty fameleke amprehetan-
 kelok' an-troke ao.
²⁴ Añonohonoa' ty famele'e i falaiña'ey,
 fe añaja'e famañahiañañe ty an-tro'e ao.
²⁵ Ndra t'ie mirehake fañisohañe,
 ko iantofa'o,
 fa pea tiva fito ty an-tro'e ao.
²⁶ Aeta'e am-pitake ty halò-tsere'e,
 fe hiboak' am-pivory ao ty haloloa'e.
²⁷ Higodoñe an-koboñe ao ty nihaly aze,
 himpoly ama'e ty vato navarimbari'e.
²⁸ Heje ty famele' i remborake o jinoi'eo,
 mampianto ka ty falie manao kabeake.

27

- ¹ Ko irengevoha'o ty hamaray,
 fa tsy fohi'o ze mete haboa' ty andro.
² Angao ho tsiririe' ty ila'e
 fa tsy ty falie'o,
 ty alik'ama'o fa tsy o fivimbi'oo.
³ Mavesatse ty vato; midogìñe ty faseñe,
 fe mavesatse te am'iereo
 ty haembera' i dagola.
⁴ Toe masiake ty habosehañe,
 sorotombake ty loa-tiñake,

fa ia ka ty mahafiatreke ty famarahiañe.

⁵ Hàmake ty endak' am-batraike,
ta ty hatea mietake.

⁶ Vente'e ty fikobokoboan-drañetse,
ta ty oroke maro' i rafelahiy.

⁷ Malay tantele ty ànjañe,
fe mamy ami'ty saliko ze atao mafaitse.

⁸ Hoe foly mandifik' ami'ty traño'e,
t'indaty mandridrike ami'ty akiba'e.

⁹ Mampinembanembañ' arofo
ty rano mañitse naho ty rame,
vaho masasaro-tron-drañetse
ty famerea'ondaty.

¹⁰ Ko aforintse'o ty rañe'o
naho ty rañen-drae'o,
vaho ko mamonje ty anjomban-drahalahi'o
naho mivovò ama'o ty hankàñe;
kitra'e ty mpitrao-tanàñe marine eo,
ta ty rahalahy aña.

¹¹ Mahihira rehe anake,
naho ampiehafo ty troko,
hahavaleako ze mitombok' ahy.

¹² Mahaonin-kankàñe ty mahilala
le miampitse,
fe misibeke mb'eo ty forom-po,
vaho mijale.

¹³ Rambeso ty sarimbo' i
nitsoake ambahiniy,
le ifihino ho antoke ty amy ampela tsy fohiñey.

¹⁴ Ty mitata rañetse am-pazake
te terak' andro,
hatao ho fatse ama'e.

¹⁵ Hambañe ami'ty fitsopatsopan'
andro avy,
ty rakemba mitribahatse;

¹⁶ hamejan-tioke t'ie hamejañ'aze,
hoe mamihiñe menak' am-pitàn-kavana.

¹⁷ Maniom-by ty vy,
vaho andrañita' ondaty ty vintan-drañe'e.

¹⁸ Hikama ty voa'e
ty mañalahala sakoñañe,
vaho hasiñeñe ty miatrake i talè'ey.

¹⁹ Manahake ty tarehen-drano hetsoroen-daharañe,
ty hetsoroen' arofo' ondaty t'ondaty.

²⁰ Tsimbia tsy etsake ty tsikeokeoke
naho ty hankàñe,
le liae tsy eneñe ty fihaino' ondaty.

²¹ Am-patañe ty volafoty
vaho an-toñake ty volamena,
fitsoehañe ondaty ty engeñe atolots'aze.

²² Ndra te demoheñe amañ'ana-deo
an-deoñe mitraoke tsako lisaneñe

ty dagola,
 mbe tsy hisitak' ama'e ty hanè'e.
²³ Rendreho soa o hare'oo,
 vaho dareo o lia-rai'oo,
²⁴ fa tsy nainai'e ty vara,
 naho tsy ho añ'afe'afe'e
 ty sabakam-bolonahetse.
²⁵ Ie fa tinatake i ahetsey,
 naho mitiry o tiritiri'eo,
 vaho natontoñe ty ahetse am-bohitse ey;
²⁶ ho siki'o o anak-añondrio,
 vaho ho vilin-teteke o ose-lahio;
²⁷ mahaeneñe ty fikama'o i rononon' osey,
 naho ho hane' o keleia'oo,
 vaho ho famahanañe o anak-ampata'oo.

28

- ¹ Mibotatsake ty tsivokatse,
 ndra te tsy horidañeñe,
 fe mahafiato hoe liona tora'e
 o vañoñeо.
² Kanao miola ty tane, maro ty mpifele'e
 fe mahatam-pahendre'e
 t'indaty mahilala naho maharendreke,
³ T'indaty rarake mamorekeke ty poi'e,
 le hoe oram-bey tsy manisa hane.
⁴ Tsiririe' o tsereheñeо ty mifary Hàke,
 f'ie atreatrè' ty mahatàn-Kake.
⁵ Tsy apota' o ratio ty hatò,
 f'ie kila fohi' ty mitsoeke IEHOVÀ.
⁶ Hàmake te rarake
 mañavelo an-kavantañañe,
 ta te mpañefoefo mengok' an-tsata.
⁷ Mahatan-Kàke ty anake mahihitse,
 fe manalatse an-drae'e
 ty mirañetse amy mahake.
⁸ Ty mampitombo vara ami'ty fañonjona'e ty anam-bola angala'e
 ro manontoñe aze
 ho ami'ty miferenaiñe amo rarakeo.
⁹ I mitan-tsofy tsy hitsanoña'e Hake,
 tiva ka ty fisolohoa'e*.
¹⁰ Hijoñe an-davake hinali'e ao avao
 ty mampandifike o vantañeо
 mb'an-dalan-karatiam-beo,
 fe ho soa lova o vañoñeо.
¹¹ Mahihitse am-pihaino'e ty mpañaleale,
 fe mahatsikarak' aze ty rarake mahilala.
¹² Ipoñafen-drebeke te mandreketse ty vañoñe,
 fe mikafikafitse ondatio
 naho mióngake ty lo-tsereke.
¹³ Tsy hiraorao ty mañetake ty fiolà'e,
 fe ho tretrèzeñe ty misoloho

* **28:9** Iob 15:29, Ies 59:1-2, Jao 9:31, Jn I 3:22

naho mifoneñe.

¹⁴ Haha t'indaty mitampompotse,
fa hihotrak' an-karatiañe
ty gañe añ'arofo.

¹⁵ Manahake ty fitrè' i lionay
naho i dobe mihitrihitry,
ty mpifehe lo-tserek' am'ondaty rarakeo.

¹⁶ Po-hilala ty mpifehe mamorekeke,
fe ho lava-havelo
ty malaim-baras tsy mahity.

¹⁷ Hahitrike mb'an-koboñe ao
ty mivave lio-màliñe,
tsy eo ty hañimb'aze.

¹⁸ Ho rombaheñe
ty mañavelo an-kalio-tahiñe,
fe hikoroyoke aniany
ty mañorike lala-mengoke.

¹⁹ Ho enen-kaneñe ty miava ty tane'e,
fe hizò hararahañe
ty mpañañañe hakoahañe.

²⁰ Ho soa tata t'indaty migahiñe,
fe tsy ho po-lafa ty mihepakepake
ho mpitsikafo.

²¹ Tsy soa ty mirihy,
naho mete hampandilatse ondaty
ty mofo pila'e.

²² Mpañaam-baras tsy ama' maso-migioke,
fe tsy rendre'e te hiambotraha'
ty hararahañe.

²³ Hanjo fañisohañe am-para'e
ty mañendake ondaty,
mandikoatse ty mpanao kabeake
am-pameleke.

²⁴ Ze mampikametse aman-drae'e
ndra aman-drene'e
vaho manao ty hoe: Tsy fiolàñe zay;
ro mpiami' ty mpijoy.

²⁵ Mpitrobo fitrabihañe ty mpitrotroaboke,
fe miraorao ze miato am' IEHOVÀ.

²⁶ Minè ty miato aman-tro'e,
fe haha ty mañavelo an-kihitse.

²⁷ Ho tampe-draha-irieñe
ty mamahañe o rarakeo,
fe hizò fatse maro ty mikipe maso.

²⁸ Ie mitroatse o lo-tserekeo,
mietake ondatio;
fa ie mihomake,
le mihavelo o vañoñeo.

29

¹ Haitoañe aniany, tsy amañ'aoly,
ty gan-katoke beteke endahañe.

² Ie miraorao o vantañe,

mirebeke ondatio,
fa ie mifehe ty lo-tsereke,
miñeoeñoñe ondatio.

³ Mahaeħak' an-drae
t'indaty mikoko hihitse,
fe mampianto vara
ty mpiaman-tsimirirañe.

⁴ Ampijadoña' i mpanjakay an-katò
ty tane'e,
fe mihotrake t'ie mandrambe vokàñe.

⁵ Mandafike harato ho am-pandia'e eo
t'indaty mitsiriry rañetse.

⁶ Fiolàñe ty mamandrike i lo-tserekey,
fe misabo naho mirebeke ty mahity.

⁷ Haoñe' ty vantañe ty zo' o rarakeo,
fe tsy apota' i lo-tserekey
i hilala zay.

⁸ Mamofotse ty rova,
ondaty mañivañivao,
fe mampivio-kabosehañe o mahihitseo.

⁹ Ie mifandietse ami'ty dagola
ty mahihitse,
le ifanampea' ty filoroloroañe naho fanivetiveañe tsy mijihetse.

¹⁰ Heje' o mpampiori-dioo ty vañoñe;
le i vantañey, paia' iareo ty fiai'e.

¹¹ Fonga abora' i dagolay ty tro'e,
fe kalaña' i mahihitsey
am-pianjiñañe ao ty aze.

¹² Ie mañaom-bande ty mpifehe,
miha raty iaby o roandria'eo.

¹³ Ty fihambaña' i rarakey
naho o mpamorekekeo:
IEHOVÀ ty mañazava
ty fihaino' i roe rey.

¹⁴ Ie mizaka o rarakeo an-kahiti'e
ty mpanjaka,
le hijadoñe kitro añ'afe'e i fiambesa'ey.

¹⁵ Mpanolo-hihitse ty kobay
naho ty endake,
fe manalatse rene
ty anake manao tsidaredare.

¹⁶ Ie mionjoñe o tsivokatseo,
mitombo ty fiolàñe,
fe ho sambae' i vañoñey
ty fifotsaha' iareo.

¹⁷ Lilovo ty ana'o, le hampanintsiña'e,
vaho hampinembanembæ'e ty arofo'o.

¹⁸ Ie po-aroñarom-pitokiañe,
le hahifi' ondatio aña
ty filieram-batañe,
haha ka ze mahatan-Kàke.

¹⁹ Tsy mahafanoro ty ondevo

t'ie saontsieñe avao,
ndra te azo'e tsy haoñe'e.
20 Inao t'indaty taentaeneñ
am-pisaontsi'e,
bey fitamàñe ty dagola te ama'e.
21 I mañaonkaom-pitoroñe
boak'amy faha-ajaja'eiy,
ro hanjo aze mpandova am-para'e.
22 Mpitrobo fitribahañe ty boseke,
vaho lako fiolàñe ty mpidabadoa.
23 Mamotsake ondaty ty habohaboha'e,
fe asiñeñe ty mpireke añ'arofo.
24 Malaim-batañe ty mpireketse
ami'ty mpampikametse,
tsanoña'e i sisiy, f'ie tsy mitalily.
25 Miafara ho fandrike
ty fihembañañe ama' ondaty;
fe honjoneñe ty miato am' IEHOVÀ.
26 Maro ty mipay ty fañisoham-pifehe,
fa IEHOVÀ ro ahazoa' t'indaty to.
27 Tiva amo vañoñeøo t'indaty tsy to;
fe veta amy lo-tserekey
ty vantañe am-pañaveloa'e.

30

Fitaro' i Agore

1 Ty fitaro' i Agore, ana' Ieake :
onin-drehake,
tinaro' indatiy am' Itiele,
*am' Itiele naho i Okale :
2 Derendereñe te am'ondaty iabio raho;
tsy amako ty hilala' ondaty,
3 mbore tsy nianarako ty hihitse,
vaho tsy amako ty fahafohinañe
i Masiñey.
4 Ia ty nionjom-b'an-dikerañe mb'eo
vaho nizotso?
Ia ty nahatontoñe o tiokeo
an-taña'e mivokeñe?
Ia ty nañolonkoloñe o ranoo
an-tsaro'e ao?
Ia ty nampijadoñe o hene olon-taneo?
Ia ty tahina'e,
naho ty tahinan'ana'e? Naho fohi'o!
5 Fonga niventeñe o tsaran' Añahareo;†
ie fikalañe amo mitsolok' ama'eo.
6 Ko tovoña'o o tsara'eo‡,
fa ho trevohe'e,
vaho ho zoeñe t'ie bodiake.
7 Roe ty raha ihalaliako ama'o;

* **30:1** ndra ty hoe: Mokotse raho ry A'hare, vaho midazidazitse † **30:5** Sab 12:6, 18:30 ‡ **30:6**
Its 4:2 12:32, Ben 22:18-19

ko ifoneña'o ampara' ty hivetrahako:
⁸ Ahankaño amako ze vande
 nahoharemborake,
 le ko atolots'ahy ndra hararahañe
 ndra varabey,
 fahano ahy ty anjarako,
⁹ tsy mone ho vontsin-draho
 vaho hitety Azo, ami'ty hoe:
 Ia ze o IEHOVÀ zao?
 ke ho rarake raho nahohampikametse,
 vaho hitera ty tahinan' Añahareko.
¹⁰ Ko fosà'o ami'ty tombo'e
 ty mpitoroñe,
 kera hamatse azo re,
 vaho ho voa-hakeo rehe.
¹¹ Eo ty tariratse mitety an-drae,
 nahohtsy mitata rene;
¹² ty taminga malio amo maso'eo
 fe mboe tsy nisasa ami'ty haleora'e,
¹³ ty tariratse mievoñevoñe amo maso'eo
 —akore ty fiandra' o holi-maso'eo!
¹⁴ Eo ty taminga hanam-pibara ho famotsi'e
 nahomeso ho vaza'e,
 hampibotsek' o misotry an-tane atoio,
 nahohrarake am'ondatio.
¹⁵ Roe ty anake vave' ty oletse,
 'meo, meo.'
 Telo ty raha mitolom-piereñe:
 efatse ty tsy mahafivola ty hoe:
 'eneñe zay!'
¹⁶ Tsy mahafivola ty hoe: 'Soa zay'
 ty tsikeokeoke, i beitsiterake,
 i tane tsy enen-dranoy,
 vaho ty afo
¹⁷ Ty maso miteratera rae,
 tsy mete avoho-drene,
 ho tsimohe' o koàke am-bavataneo,
 vaho habotse' ty tsimalaho tora'e.
¹⁸ Telo ty raha loho mahalatsa ahy,
 efatse ty tsy rendreko;
¹⁹ ty liam-bantio an-dindiñe eñe,
 ty lia' ty mereñe an-damilamy eo,
 ty lala' o sambo añivo riakeo,
 vaho ty sata' ondaty ami'ty somondrara.
²⁰ Zao ty satan-karapilo:
 Mihinañe re nahohamò-bava
 vaho manao ty hoe:
 'Zaho tsy nanao raty.'
²¹ Ambane' raha telo
 ty mampañezeñezeneñe i taney,
 ambane' ty efatse re tsy mahaleo:
²² ambane' i trètreke
 t'ie ty mpanjaka,

vaho ty dagola, t'ie etsa-kaneñe,
²³ ambane' ty rakemba tsy kokoañe
 t'ie engaen-dahy,
 vaho ty anak-ampatañe
 mandova aman-drakemba'e.
²⁴ Efatse ty raha kede' ty tane toy,
 songa mahihitse:
²⁵ Foko tsy maozatse o vitikeo,
 fe halankañe'e ami'ty asara ty haneñe;
²⁶ fifokoa tsy fatratse o trandrakeo,
 fe mpandranjy traño am-bato ao;
²⁷ tsy amam-panjaka o valalao,
 fe mirodo ki-pirimbo-ki-pirimboñe.
²⁸ Mete tsepahem-pitáñe ty tsàtsake,
 f'ie añ'anjombam-panjaka ao.
²⁹ Telo ty raha midoegadoega:
 efatse ty mitoandratoandra:
³⁰ ty liona, ie maozatse amo biby iabio,
 tsy eo ty itsolofiña'e;
³¹ i akoholahiys, naho ty oselahy,
 vaho ty mpanjaka miatreke
 i valobohòn-dahindefo'ey.
³² Naho nanao hagegean-drehe
 nañonjom-batañe, ke nikilily,
 le tehafo am-pitáñe ty falie'o.
³³ Toe miova ho dibera
 ty ronono trobotroboeñe,
 naho mahatontom-piantsonañe
 te komondroeñe,
 vaho mampiforoforo haviñerañe
 t'ie troboeñe.

31

¹ Ty enta' i Lemoela Mpanjaka,
 ty onin-drehake nanaren-drene'e aze:
² Anhan ry anako!
 Anhan ry anake tañ' ovako ao!
 Anhan ry anako nafantoko!
³ Ko atolo'o aman' ampela ty haozara'o,
 ndra amo mpandrotsake mpanjakao o sata'oo.
⁴ Tsy mañeva ty mpanjaka, ry Lemoela,
 tsy sazo' i mpanjakay ty mikama divay,
 ndra o mpamelek' arivoo
 ty hilelalela toake;
⁵ kera hinoñe naho handikoke i liliy
 vaho hañamengoke
 ty zo' o anan-kasotriañeo.
⁶ Anjotsò toake ty heta'e,
 vaho divay ty voretra añ'arofo,
⁷ angao hinon-dre
 hañaliñoa'e ty hararaha'e,

§ **30:31** Heb: midiañe am-bania.

tsy ho tiahya ka o hasotria'eo.
⁸ Manokafa falie hisolo ty moañe,
 ho ami'ty zo' o anam-pamàrañe iabio.
⁹ Manokafa falie
 vaho mizakà an-kahiti'e;
 ambeno ty zo' o rarake naho mavomavoo.

*Figadoña'e: Tolorañ'Asy ty Rakemba**

¹⁰ Ia ty mahaonin-drakemba mañeva?
 Ie sarotse te amo safirao.
¹¹ Atokisa' ty trom-bali'e,
 ie tsy ho po-vara.
¹² Hasoa'e fa tsy mañànto,
 amy ze hene andro fiveloma'e.
¹³ Paia'e ty volon-añondry
 naho ty vinda,
 vaho an-kafaleañe ty ifanehafa'e am-pitâñe.
¹⁴ Manahake o lakam-pañondrañeo,
 boak'añe ty añandesá'e mahakama.
¹⁵ Mitroatse te mbe haleñe,
 hamahañe o keleia'eo,
 vaho handiva amo anak' ampata'eo.
¹⁶ Ereñerè'e ty teteke vaho vilie'e;
 ambolea'e tanem-bahe ami'ty vokam-pitâ'e.
¹⁷ Midian-kafatrarañe,
 naho ampaozare'e o sira'eo.
¹⁸ Oni'e te soa o balibalie'eo,
 tsy mikipe haleñe i failo'ey.
¹⁹ An-dravem-pitâ'e ty fañareta'e,
 le tana'e an-delam-pitâ'e ty antsòli'e.
²⁰ Velare'e amo rarakeo ty sira'e,
 vaho ahiti'e amo mavomavoo o fita'eo.
²¹ Tsy hembaña'e i fanalay
 amo keleia'eo;
 fa songa misiki-mañabasà o ana'eo.
²² Anjaira'e saroñe ty vata'e,
 hene leny naho malómavo o siki'eo.
²³ Fohiñe an-dalam-bey eo ty vali'e,
 ie mitrao-piambesatse
 amo androanavi' i taneio.
²⁴ Mitenóñe lamba leny re vaho aleta'e,
 tolora'e sokotry o mpanao takinakeo.
²⁵ Haozarañe naho havantañañe
 ro fisiki'e, itohafa'e ty ho avy.
²⁶ Sokafe'e an-kihitse ty falie'e,
 le fañòham-patarihañe
 ty am-pivimbi'e eo.
²⁷ Halahalae'e soa o satan-keleia'eo,
 vaho tsy kamae'e ty mofon-kavotroañe.
²⁸ Miongake o ana'eo mañandriañ' aze,
 naho mandrenge aze i valie'ey.
²⁹ Maro ty ampela manao soa,

* 31:9 milahatse ami'ty abode hebreo ty 10-31.

fe fonga ilikoara'o.

³⁰ Mpamañahy ty hasoa vintañe,
kòake ty hamotramotràñe,
fe rengèñe ty rakemba mañeveñe
am' IEHOVÀ.

³¹ Atoloro aze ty havokaram-pità'e!
le handrenge aze an-dalam-bey eo
o sata'eo.

Mpañoke

1

¹ Ty taro' i Mpañokey,
ana' i Davide, mpanjaka e Ierosalaime ao.

² Hakafoahan-kafoake, hoe i Mpañokey,
Hakafoahan-kafoake! Fonga kafoake!

³ Ino ty tombo'e ho a ondatio
amo fifanehafa'e ambane' i àndroy?

⁴ Mihelañe ty tariratse raike,
mbore limbezen-tariratse,
fe nainai'e eo ty tane toy.

⁵ Manjiriike ka i àndroy,
mitsofotse i àndroy,
mihiririñe mb'am-panjiriha'e añe.

⁶ Mitiroke mañatimo,
le mibalike mañavaratse;
mikariokariok' avao i tiokey,
vaho mimpoly amo faria'eo.

⁷ Songa mivariñe mb'an-driake mb'eo
o sakao fe tsy atseke i riakey;
mb'amy fikararaha' o torahañeoy,
le mb'eo avao ty fikararaha' iareo.

⁸ Hene mahamamake,
tsy lefe' ondaty volañeñe,
tsy mahaetsa-pihaino t'ie vazoho,
mbore tsy mahaenen-dravembia
te ijanjiñañe.

⁹ Mbe ho avy indraike i fa añey,
naho mbe hanoeñe avao ze fa nanoeñe,
vaho tsy ambane' i àndroy
ty atao vao.

¹⁰ Eo hao ty mete hanoeñe ty hoe,
Heheke! vao itoy? Ie fa teo avao,
haehae taolon-tikañe añe.

¹¹ Tsy tiah y o raha taoloo,
naho o raha hifetsakeo,
vaho tsy hahatiah y irezay
o hanonjohio.

¹² Zaho, i mpañokey, le fa mpanjaka Israele e Ierosalaime ao, ¹³ le nimanean-troko ty hañotshotso nahe hikodebe an-kihitse ze hene fitoloñañe ambanen-dikerañe atoa; toe tolon-draha mahamokotse ty natolon' Añahare am'ondatio hifanehafa'e. ¹⁴ Nitreako iaby ze fitoloñañe ambane' i àndroy; le hehe t'ie fonga kafoake vaho fañeañan-tioke.

¹⁵ Tsy mete ahity ty mengoke,
vaho tsy lefe iaheñe ty tsy eo.

¹⁶ Hoe raho am-batako: Ingo fa natontoko mandikoatse ze hene mpifehe'
Ierosalaime taolo ahy ty fahaoniñañe ra'elisy; vaho nandifotse ty troko ty
hihitse nahe hilala. ¹⁷ Le nampitoloñeko ty troko hahaoniña'e hihitse nahe

hahafohiñe ty hadagolà naho ty hagegeañe. Nirendreko t'ie fañeañan-tioke ka.

¹⁸ Amy te minday hasosoram-bey
ty hihitse maro,
vaho mampitombo haoreñañe
ty fitomboan-kilala.

2

¹ Hoe raho an-troko ao, Antao arè, hitsoek' azo an-kafaleañe, hahatreia ty soa. Te mone, hakafoahañe avao. ² Hoe raho ty amo fiankahafañe, Hagegeañe! naho ty amo hafaleañe, Ino ty atao'e? ³ Kinodebe' ty ereñereko ty hañonkòñe ty troko ami'ty divay, ie nitehafen-kihitse ty fitsakoreako; naho ty hangazoñako o hadagolàñe ampara' te hahatreavako ze mahasoa o ana' ondatio, hitoloña'e ambanen-dikerañe atoa amo andron-kaveloma'e tsy ampe' ampeo. ⁴ Nitratrañahoko o fitoloñakoo; nandranjy anjomba ho ahy, vaho namboleako tetem-bahe; ⁵ Namboarako goloboñe naho ala-vondro, vaho namboleako ze hene karazan-katae mamoa-voa. ⁶ Nihaliako antara hanondrahako o hatae mitiry amy alaio. ⁷ Nivily ondevo lahy naho ampela, naho nanañe ondevo terak' an-trañoko ao; toe nanam-piharo stroke naho mpirai-lia maro te amy ze hene taoloko e Ierosalaime ao. ⁸ Natontoko amako ka ty volafoty naho ty volamena naho ty vara' o mpanjaka naho tane fehekoo; nahazoako mpibeko lahilahy naho ampela, vaho ze mahanembanembañe ty tro' o ana' ondatio: sakeza tsifotofoto. ⁹ Aa le nitoabotse, nandikoareko ze hene taoloko e Ierosalaime ao; vaho nifahatse amako i hihikoy.

¹⁰ Tsy eo ty nitanako amo masokoo
ze hene naina'e;
tsy nikalañeko ami'ty troko
ze atao finembanembàñe,
fa nahafale ty troko o fitoloñako iabio,
zay ty nanambe ahy
amo hene tolon-drahakoo.

¹¹ Ie amy zao hinaraharako
ze hene nanoen-tañako
naho o fifanehafañe nanoekoo,
le ingo fonga hakafoahañe,
naho fañeañan-tioke,
fa tsy aman-tombo'e
ty ambane' i àndroy.

¹² Aa le nitolike raho
hañarahara ty hihitse naho ty
hadagolàñe naho ty hagegeañe;
fa inom-bao ty hanoe'
ze manonjohy i mpanjakay?
Ts'ino naho tsy o fa noeñeo avao.

¹³ Nizoeko amy zao te likoare'
ty hihitse ty hadagolàñe
manahake ty andikoara'
ty hazavàñe ty ieñe.
¹⁴ Añambone'e eo ty fihaino' o mahihitseo,
fe mañavelo añ'ieñe ao ty dagola.
Nirendreko amy zao te raik' avao
ty toly mifetsak'am' iereo iaby.

¹⁵ Aa hoe raho am-batako,
Ze mifetsak' amy dagolay
ty hidõñe amako kañe;
aa vaho inom-barè
ty maha-loho mahihitse ahy?
le hoe raho an-troko ao,
hakafoahañe ka ie iaby zay.

¹⁶ Toe tsy eo ty tsy ho modo fitiahiañe
ty mahihitse naho i dagola,
songa ho haliñō amo andro mbe ho avio.
sindre hivetrake ty dagola
naho i mahihitse.

¹⁷ Aa le nalaim-piaiñe raho, fa nahangoae ahy ze fonga fanoeñe ambane' i àndroy, fa hene kafoake, fañeañan-tioke avao. ¹⁸ Eka, nihejeko ze fonga fitoloñako nifanehafako ambane' i àndroy, ie tsy mete tsy hene hengako am'indaty manonjohy ahiy. ¹⁹ Ia ty mahafohiñe, ke t'ie ondaty mahihitse, he dagola? Fe fonga ho fehe'e o nifanehafako naho nisafirie' ty hihiko ambane' i androio. Kafoake ka zay. ²⁰ Aa le nitolike raho, nadoko hioremeñe ty troko amo hene tolon-draha nitoloñeko ambane' i androio, ²¹ Eo t'indaty nitoloñe an-kihitse naho hilala naho fahimbañañe, vaho atolo'e amy tsy nitoloñe ama'ey i anjara'ey. Hakafoahañe naho haloloañe! ²² Ino ty ho azo' ondaty amo fifanehafa'e iabio naho amo fimeanean-tro'e nitoloña'e ambane' i androio? ²³ Fa amo hene andro'eo, le fonga atsa-panaintaiñañe naho hasosorañe o fitoloña'eo; tsy mitofa o fitsakorea'eo ndra te haleñe. Kafoake ka zay. ²⁴ Tsy eo ty mahasoa ondatio ta te mikama naho minoñe vaho manao an-tro'e te soa o fitoloña'eo. Zay ka ty nitreako boak'am-pitàn' Añahare, ²⁵ amy te ia ty hikama naho ia ty hifale mandikoatse ahy? ²⁶ Toe toloran' Añahare hihitse naho hilala vaho hafaleañe ze no'e am-pivazohoa'e eo; f'ie ami'ty mpanao hakeo ro ampitoloña'e fanontonañe naho fampitoboroñañe, hanolora'e amo noron' Añahareo. Toe hakoahañe ka zay, fañeañan-tioke.

3

¹ Songa namantañañe ty sa'e,
Sindre namotoañañ' andro
ze nisatrie'e ambanen-dikeraña atoa:
² androm-pisamahañe,
androm-pihomahañe,
androm-pambleañe naho
androm-pañombotañe i namboleñey;
³ androm-pamonoñañe,
naho androm-pañamelañañe;
androm-pandrebahañe mañambane
naho androm-pandranjiañe mañambone;
⁴ androm-pirovetañe,
naho androm-piankahafañe;
androm-pangololoihañe
naho androm-pitsinjahañe;
⁵ androm-pañiririñam-bato,
naho androm-panontonam-bato;
androm-pamejañañe naho
androm-pifoneñañe tsy hamejañe;

6 androm-pikodebeañe,
 naho androm-pahamotsoañe;
 androm-pañajañe
 naho androm-pañariañe;
 7 androm-pandrovitañe,
 naho androm-panjairañe;
 androm-pianjiñañe,
 naho androm-pisaontsiañe;
 8 androm-pikokoañe
 naho androm-pihejeañe;
 androm-pialiañe vaho androm-panintsiñañe.

9 Ino ty tambem-pieke amy nitromaha'ey? 10 Fa nitreako ty tolon-draha'
 natolon' Añahare amo ana' ondatio, hitoloñañe. 11 Kila nanoe'e mañeva
 ty sa'e; vaho napo'e an-tro'e ao ty atao nainai'e donia, fe tsy ho taka'
 ondaty ty fitsikarahañe ty satan' Añahare boak' am-baloha'e pak'am-
 pigadoña'e.

12 Apotako te tsy eo ty mahasoa ta t'ie hifale naho hinembanembañe
 naho mbe amañ'aiñe; 13 mbore falalàñ' Añahare te songa hikama naho
 hinoñe vaho hifale amo fitoloña'eo ondatio.

14 Fantako te tsy modo nainai'e
 ze anoen' Añahare;
 tsy mete tompeañe vaho
 tsy mete angalañe;
 nanoen'Añahare zao,
 hañeveña' ondatio añatrefa'e eo.

15 Ze eo, le fa teo;
 naho mbe ho avy ze fa teo;
 vaho tsoehen'Añahare o horidañeñe.

16 Mbore nizoeko ambane' i àndroy,
 amy toem-pizakañey
 te eo ka ty haratiañe,
 vaho amy toen-kavantañañey
 ty haloloañe.

17 Hoe raho an-troko ao,
 ho zakaen' Añahare
 ty vañoñe naho ty raty,
 fa kila namotoaña'e ze safiry
 naho ze hene fitoloñañe.

18 Hoe raho an-troko ao
 ty amo ana'ondatio:
 Mitsoke iareo t'i Andrianañahare
 hahaoniña' iareo te biby avao.

19 Hambañe ty toli'ondaty
 naho ty toli' o bibio;
 Manahake ty fihomaha' ty raike
 ty hiantantirira' ty ila'e.
 Hambañe avao ty fikofò' iareo,
 aa le tsy aman-tombo'e amo bibio
 t'indaty; toe fonga hakoahañe.

20 Fonga homb'an-toetse raike:
 sindre boak'an-debok' ao vaho
 songa mibalike mb'an-debok' ao.

21 Ia ty mahafohiña ke

hañambone ty arofo' ondaty he
 hañambane mb'an-tane ao ty tro' o bibio?
²² Aa le nitreako te tsy eo ty mahasoa
 ta te hene mifale amo fitoloña'eo ondatio,
 ie tambe' iareo;
 fa ia ty hampandrendrek' aze
 te inoñe ty hanonjohy aña?

4

¹ Aa le niharaharaeko indraike ze forekekeñe iaby ambane' i àndroy:

hehe ty ranomaso' o forekekeñeo,
 ie tsy amam-pañohò;
 naho am-pità' o mpamorekekeo
 ty hafatrarañe;

f'ie tsy amam-pañimba.

² Aa le nandrenge o vilasy
 fa nihomakeo raho,
 ambone' o veloñe mbe amañ'aiñeo.

³ Eka, lombolombo i roe rey
 ty mbe lia'e tsy eo,
 ie mbe tsy nahaoniñe ty sata-raty
 anoeñe ambane' i àndroy.

⁴ Nitreako indraike te o fitoloñañe iabio naho ze tolon-draha mahatafetse, le voaka' ty fifampsikiriha' ondaty naho i rañe'ey. Hakafoahañe naho fañeañan-tioke ka zao.

⁵ Mamihim-pitañe ty dagola,
 vaho abotse'e ty nofo'e.

⁶ Hàmake ty fianjiñañe mahapea-pitàñe,
 ta ty fitàn-droe pea
 fitromahañe naho fañeañan-tioke.

⁷ Nenteako indraike o hakafoahañe ambane' i àndroy.

⁸ Teo ty raike tsy amam-paha-roe;
 toe tsy nanañ' anake, tsy aman-drahalahy:
 fe tsy mbia tsy heneke o fitoloña'eo;
 vaho tsy mahaene-pihaino'e ty vara;
 Tsie, hoe re, Ia ze o itoloñako zao,
 malorè ty fiaiko tsy hanjo ty soa?

hakafoahañe ka zao
 mbore fifanehafañe mahaore.

⁹ Hàmake te roe ta t'ie raike;
 amy te soa fitombo ty fitoloña' iareo.

¹⁰ Ie mikorovoke ty raike,
 honjone' i rañe'ey;
 fe feh'ohatse te mikorovoke ty bangìñe
 tsy manañ' ila hampitroatse aze.

¹¹ Tovo izay, ie mitrao-pandreañe ty roe
 le mafana: fa ino ty hampafana aze t'ie raike?

¹² Mete hiambotraha' t'indaty
 ty raike ie miereñereñe,
 fe hijohañe hiatrek' aze ty roe;
 tsy rofondrofoteñe aniany
 ty taly telo-randra.

¹³ Ndra kitra'e ajalahy

rarake mahihitse
ta t'ie mpanjaka antetse gege
tsy mañaoñe hatahata.

¹⁴ Toe niboak'am-balabey ao re
ho mpanjaka;
ie nirarake te nitoly am-pifehea'e ao.
¹⁵ Nitreako te niarimboe'
ze hene veloñe ambane' i àndroy,
i ajalahy tsinara valoha'ey,
i handimbe azey,
¹⁶ naho te tsifotofoto ondaty
am-boriza'e ao,
f'ie tsy ho loho onjone'
o manonjohy azeo.
Toe hakafoahañe ka zao
vaho fañeañan-tioke.

¹⁷ Ambeno ty lia'o mb'añ'anjomban' añahare mb'eo, harineo hijan-jiñe'o, Hàmake zay ta te mañenga ty soro' o seretseo, ie tsy apota'e te manao raty.

5

¹ Ko meke am-palie, naho ko malisa an-tro'o ty hisaontsy ndra inoñe aman' Añahare: fa an-dindiñe ao t'i Andrianañahare, ihe an-tane atoy, aa le anò tsy ampeampe o enta'oo.

² Mahavynofy ty fímaneam-pitoloñañe;
fe foñiñe ami'ty hamaron-tsaontsi'e
ty feo' i gegey.

³ Ihe mifanta aman' Añahare,
ko malaoñe hañavake;
fa tsy ifalea'e ty dagola:
ondroho i nifantà'oy.

⁴ Hàmake t'ie tsy mifanta,
ta te mifanta tsy mañavake.

⁵ Ko metè'o hañakeo azo ty vava'o;
le ko manao amy Irakey te nilosotse:
fa ino ty hiviñeran' Añahare amy feo'oy,
handrotsaha'e o satan-taña'oo?

⁶ Fa hakafoahañe ty halàko nify
naho ty hamaro saontsy:
mone mañeveña aman'Añahare.

⁷ Ie isa'o ty famorekekeñañe o rarakeo,
naho ty fampitavanano jo naho hatò
amariparitse aña, ko ilatsa'o:
fa jilove' i mpifelek' azey ty mpifehe
vaho ambone ka ty bei'iareo.

⁸ Amy te itraofa' iabikey
ty tombo' i taney:
toe mitoroñe i mpanjakay i tetekey.

⁹ Tsy mahaeneñe ty mpitea-vola ty vola;
vaho ty mpikoko firegoregoañe
t'ie miegoego:

hakafoahañe ka zay.

¹⁰ Ie mitobake ty havokarañe,

maro ka o mampibotsek' azeo:
 aa le ino ty tombo'e ho a i temp'o'ey
 ta te ho sambae'e am-pihaino avao?
11 Mamy ty firota' ty mpifanehake,
 ndra te kede ty kamae'e ndra te bey:
 fe tsy apo'e hirots'e
 ty havontsiña' i mpañalealey.

12 Eo ty haratiañe manivontivoñe nitreako ambane' i àndroy, te mijoy ty mpañefoefo o vara ahaja'eo. **13** Ie nikapaike i varay, amy te navaridì'e ami'ty tsy vara, le nahatoly ana-dahy f'ie an-tañam-polo. **14** Hambañe amy niboaha'e an-kovin-drene'ey, t'ie hiboridañe ka te himpoly, ndra loli'e tsy ho tintinem-pitâ'e amy fitromaha'ey. **15** Haratiañe manivontivoñe ka zay, te manahake ty nitolia'e ty himpolia'e: aa le ino ty tombo' ty fitromahañe hahazoñañe tioke? **16** Mikama añ'ieñe ao amo hene andro'eo, amy t'ie lako haemberañe naho hasilofaña vaho habosehaña. **17** Ingo, ty nitreako ho soa naho mañeva aze, t'ie mikama naho mitohoke vaho hifale ami'ty hasoa' i tolon-draha itoloña'e ambane' i àndroy amo andro tsy ampeampe iaiña'eo, o natolon' Añahare azeo: fa zay ty anjara'e. **18** Naho ondaty nitoloran' Añahare vara naho hanaña le nimea'e lily hikama naho handrambe anjara, vaho hirebek' amy nifanehafa'ey; toe falalàñ' Añahare zay. **19** Le tsy beteke haereñere'e o andro iveloma'eo, amy t'ie ampitoloñen' Añahare an-kafalean-stroke.

6

1 Eo ty haratiañe nitreako ambane' i àndroy, toe mandrambañe am'ondate, **2** eo t'indaty nitoloran' Añahare drala naho vara vaho asiñe, ie tsy po-draha irien-stroke, fe tsy nitoloran' Añahare ty haozaraña hahafikama'e, te mone hane' ty ambahiny; hakafoahañe zay vaho arendraty. **3** Ndra te misamak' anake zato indatiy, naho maro taoñe ty iaiña'e, ndra firefire, fe tsy enen-kasoa ty tro'e, naho tsy eo ty handeveñe aze, le hàmake t'ie niboloñañe, **4** ho koake ty fiavi'e naho himoromoroñe ty fiengà'e, vaho ho kolopofe' ty ieñe i tahina'ey; **5** le lia'e tsy ho isa'e i àndroy vaho hamoea'e; f'ie ty mitofa soa ta i raikey; **6** eka ndra te indroe veloñe arivo taoñe i raikey, ie tsy nanjo hasoa; tsy kila hikovovoke mb'an-toetse raike mb'eo hao? **7** Hene ho am-palie'e avao ty fitoloña' ondaty, te tsy eneñe i hatea-hane'ey. **8** Aa inoñe ty mahazòke' ty dagola i mahihitse? ino ty fitombo' i rarakey, t'ie mahafitsontike añatrefa' o veloñe? **9** Hamake ty onim-pihaino, te ami'ty fisalalan-stroke; hakafoahañe ka zay vaho fimanean-tioke. **10** Ze hene eo le fa nitoloraña añaraña, le fa arofoanaña te inoñe ondatio, vaho tsy aze ty hifandietse amy maozatse te ama'ey. **11** Maro ty raha manovoñe o hakoahañe, aa le ino ty tombo'e ho a ondatio? **12** Ia ty mahafohiña ze mahaso ondatio ami'ty havelo'e, amo taoñe tsy ampeampe iveloma'e hoe evoñe, ie mihelañe hoe talinjo avao? Fa ia ty hahatalily am'ondate ty hanonjohy aze, ambane' i àndroy?

7

1 Ambone' ty fahosotse sarotse
 ty tahinaña soa;
 naho ty androm-pihomahaña,
 ta ty andro nisamahaña.
2 Hàmake t'ie mb'an-traño fandalàña
 ta te mb'añ'anjomba fisabadidahaña,

fa zay ty figadoña' ze kila ondaty,
ee te hapo' ty veloñe an-tro'e ao zay.

³ Ambone' ty fiankahafañe

ty haemberañe;

fa mete ho fale ty arofo

ndra te lonjetse ty laharañe.

⁴ Añ-anjombam-pandalàñe ao

ty arofo' o mahihitseo,

le an-trañom-piankahafañe ao

ty tro' o dagolao.

⁵ Hàmake t'ie mijanjiñe

ty fañendaha' ty mahihitse,

ta te mitsanoñe ty sabo' o mineñeо.

⁶ Hambañe ami'ty pipipiham-patike

ambane' valàñe eo,

ty fitohafa' i dagola;

hakoahañe ka zay.

⁷ Toe mampinè' ty mahihitse

ty famorekekeñañe,

vaho mamorek' arofo ty vokàñe.

⁸ Ambone' ty fifotoran-draha

ty figadoña'e,

le ambone' ty stroke misenge

ty arofo mahaliñe.

⁹ Ko malisa ho viñetse añ'arofo rehe,

amy te mimoneñe am-banian-dagola ao

ty habosehañe.

¹⁰ Ko manao ty hoe,

Ino ty nahasoa o andro taoloo

te amo henanekeo?

toe tsy aman-kihitse i ontane'o zay.

¹¹ Raha soa te mitraoke an-kihitse ty lova,

toe tombo' o mahaisake i androio.

¹² Manahake ty fañarova' ty vara

ty fañambena' i hihitsey;

fe ty hasoa' o hilalao,

arova' i hihitsey ty fiai' o manañ' azeo.

¹³ Haraharao ty fitoloñan' Añahare;

ia ty mahay mañity ty nimengoha'e.

¹⁴ Mifalea añ'andro vokatse, vaho mitsakorea añ'andron-kankàñe;

songa nanoen' Añahare itoy naho iroy, soa tsy ho oni' ondaty ndra inoñ' inoñe amo hanonjohy azeo. ¹⁵ Hene nitreako amo haveloko koakey; eo

t'indaty vaño mihomak' amy havantaña'ey, eo ka ty lo-tsereke mañalava andro amy haratia'ey. ¹⁶ Ko loho vantañe; ko losore'o ty hihitse; Ino ty

hampiantoa'o ty vata'o? ¹⁷ Ko loho tsereheñe, naho ko manao gege; ino ty hivetraha'o aolo' ty andro'o? ¹⁸ Soa re te fahara'o iroy, vaho tsy asita'o

itoy, fa horihe' ty mañeñe aman' Añahare i roe rey. ¹⁹ Mampaozatse ty mahihitse ambone' ty mpifehe folo an-drova ao, ty hihitse. ²⁰ Fa toe

tsitantane t'indaty vañoñe mitolon-kavantañañe le lia'e tsy mandilatse. ²¹ Aa le ko loho haoñe'o ze fonga enta saontsieñe, tsy mone ho janji'o

mamatse azo ty mpitoro'o; ²² amy te beteke, fohi' ty vata'o te ihe namatse ty ila'e. ²³ Fa hene nitsoheako an-kihitse, le hoe raho: Ho paiako ty

hihitse, fe nihàñkañe amako. ²⁴ Tsietoitane aña naho miheatse o raha fa nifetsakeo, ia ty hahatendreke aze? ²⁵ Natoliko ty troko handrèndreke naho hitsikarake vaho hikodebe ty hihitse naho ty lengo' o rahao, naho ty hahafohinako ty haratia' ty hadagolàñe, vaho ty hanè' o hagegeañe; ²⁶ le nitreako te mafaitse te ami'ty havilasy ty rakemba amam-pandrike, ie harato ty tro'e, naho silisilim-pandrohizañe o taña'eo; hiponiora' ty mahafale an' Andrianañahare; fe ho tsepahe'e ty mpanan-tahiñe. ²⁷ Ingo, itoy ty nitreako, hoe ty mpañoke, ie tovoñañe ami'ty raha raike ty ila'e, hamoliliañ' aze; ²⁸ ie nitolom-pipay ty troko, fe mbe mboe tsy naharendreke; fa nahatrea ondaty raik' ami'ty arivo raho, fe tsy nahatrea rakemba raik' amy rezay iaby. ²⁹ Inao, te zao avao ty nitreako, te nanoen' Añahare mahity t'indaty, f'ie mikitro-draha maro.

8

¹ Ia ty manahake i mahihitsey?
Ia ty maharendreke ty ango'e?
Mahaloeloe ty lahaba' ondaty ty hihitse,
vaho mampiova ty hagàm-binta'e.

² Mañòk' azo raho hiambeñe ty taro' i mpanjakay ty amy nifantà'o aman' Añaharey. ³ Ko malisa mienga amy fañatrefañe azey; le ko mifahatse ami'ty raha raty, amy te anoe'e ze satrie'e. ⁴ Aa kanao manandily ty saontsi' i mpanjakay, ia ty hanao ama'e ty hoe: Ino o anoe'oo? ⁵ Tsy ifetsahan-dilo ty mañamben-dily, amy te mahatsakore ty andro naho ty lily ty arofo mahihitse. ⁶ Kila manañe ty andro'e naho ty lili'e; ndra te mavesatse am' ondatio ty haemberañe. ⁷ Kanao tsy fohiñe ty ho avy; ia ty mahatalily aze te inoñe ty hifetsake. ⁸ Tsy a' ondaty ty lily hanebañe ty fitiofa' i tiokey; naho tsy anaña'e lily i androm-pikoromaha'ey; tsy eo ty famotsorañe amo alio; vaho tsy mahafipolotse ami'ty haratiañe o mitoloñe ama'eo. ⁹ Fonga nitreako, naho nitoloñe' ty troko ze hene fitoloñañe ambane' i àndroy atoy; ie nanan-dily amy t'indaty t'indaty vaho nijoia'e.

¹⁰ Nitreako ka ty fileveña' o tsereheñe, ie fa nimoake naho nienga i toetse miavakey, ie nandikofañe amy rova nanoeñe zaiy; hakoahañe ka zay. ¹¹ Naho tsy andilova' ty zaka aniany ty sata raty, le mañatsake ty tro' o ana' ondatio ty hanao raty; ¹² aa ndra te mitolon-kanao raty in-jato ty mpanan-tahiñe, vaho mihamaro avao o andro'eo—mbe apotako te hanintsiñe o mañeveña aman' Añahareo, o miambane añatrefa'eo; ¹³ fe po-panintsiañañe ty tsereheñe, naho tsy hihalava hoe talinjo o andro'eo, ami'ty tsy fañeveña'e aman' Añahare.

¹⁴ Eo ty hakafoahañe fanoeña ambone' ty tane toy; te eo ty mifetsak' amo vaño ze mañeva ty sata' o ratio; vaho eo te mizo i ratiy ty sazò' ty fitoloña' o vantañe—hoe raho: Hakoahañe ka zao. ¹⁵ Aa le nonjoneko ty haravoñañe, amy te tsy ambane' i àndroy etoy ty hahasoa ondaty ta te mikama naho minoñe vaho mifale, fa irezay ty ho mpipitek' ama'e amy fitoloña'ey amo hene andro natolon' Añahare aze hiveloma'e ambane' i androio.

¹⁶ Ie napoko an-troko ty handrèndreke hihitse, hahatreava'e o fitoloñañe fanoeña an-tane atoio—ndra te eo ty tsy mirotse handro ndra haleñe o fihaino'eo, ¹⁷ le hene nioniko o fitoloñan' Añahareo, le tsapako te tsy lefe tsikaraheñe o fitoloñañe nanoeña ambane' i àndroio; ndra te imanea' ondatio pay, tsy ho isa'e; vaho ndra te hanoe' i mahihitsey ty hoe: "Fa fohiko!", mbe lia'e tsy niisa'e.

9

¹ Toe fonga rinambeko an-troko ao zao, le ho taroñeko te songa am-pitàn' Añahare ao o vantañeo naho o mahihitseo vaho o fitoloña'eo; tsy fohi' ondaty ke te fikokoañe ke falaiñañe ty hiatrefa'e. ² Kila ifetsahañe. Raike ty hizo i vantañey naho i tsereheñey, ho ami'ty soa, ami'ty malio naho ami'ty tsy malio; ho ami'ty mañenga soroñe naho ami'ty tsy misoroñe. Hambañe amy vantañey ty ho ami'ty mpanan-kakeo; vaho ho amy mifantay naho amy mihembam-pantay. ³ Zay ty haloloñañe anoeñe ambane' i àndroy, te raik' avao ty toli' ie iaby. Mbore lifo-karatiañe ty arofo' o ana' i Dameo, vaho añ'ova' iareo ao ty hadagolañe manitsike ty havelo' iareo, ie aña le migodam-ban-kavilasy ao. ⁴ Fe manan-ko tamae'e ze mpiamo veloñeo, amy te hamak' amboa veloñe ta te liona mate. ⁵ Fohi' o veloñeo te hikenkañe, fe tsy mahapota-draha o fa nihomakeo; ie tsy hanan-tambe ka, fa motso ty fitiahiañe iareo. ⁶ Fa ho momoke ty fikokoa' iareo naho ty falai'iareo, vaho ty fahimbaña' iareo; le tsy hanañ' anjara ka iereo amy ze anoeñe ambane' i àndroy. ⁷ Akia, ikamao an-kafaleañe ty mahakama'o, naho inomo am-pinembanemban-troke ty divai'o; fa nòn' Añahare o fitoloña'oo. ⁸ Ee te ho foyt nainai'e o siki'oo, naho ko apo'o tsy ho an-doha'o eo ty solike. ⁹ Mifalea, rekets' i valy kokoa'oy amo haveloñeo, amo hene androm-piai'o mihelañe natolo'e azo ambane' i àndroio, amy te zay ty anjara'o an-kaveloñe ao, naho amo tolon-draha ifanehafa'o ambane' i androio. ¹⁰ Ze tendreham-pità'o hanoeñe, le anò ami'ty haozara'o; amy te tsy amam-pitoloñañe ndra safiry ndra hilala ndra hihitse ty an-tsikeokeoke hañaveloa'o ao. ¹¹ Nitreako indraik' ambane' i àndroy te tsy a i masikay ty mifandriadriake, naho tsy a i fanalolahiy ty hotakotake, tsy a i mahihitsey ty mahakama, tsy a i mahilalay ty vara, vaho tsy a i mahimbañey ty isokey, fa songa ifetsahan' andro naho toly. ¹² Toe tsy apota' t'indaty ty namotoñañe aze. Hoe fiañe nizo an-karato raty, naho voroñe tsinepak' am-pandri-bo, ty fiporengetañe ondaty amy andron-kekoheko ivovoa'ey. ¹³ Zao ka ty nitendrek' ahy ho hihitse ambane' i àndroy, le nijabajaba amako. ¹⁴ Teo ty rova kede ama' ondaty tsy fire. Nivotrake eo amy zao ty mpanjaka ra'elisy, nañarikatoke naho nandranjy fanongañe jabajaba haname aze. ¹⁵ Tendrek' ama'e ao t'indaty mahihitse fe rarake, ie ty nandrombake i rovay amy hihi'ey, fe leo raike tsy nahatiah y indaty rarakey. ¹⁶ Aa le hoe raho, Ambone' ty ozatse ty hihitse; fe sirikaeñe ty hihi' i rarakey vaho tsy haoñeñe o enta'eo.

¹⁷ Hamake ty saontsi' i mahihitsey janjiñeñe am-pianjiñañe, ta ty tazatazam-pifehe amo dagolao. ¹⁸ Ambone' o faliañ' alio ty hihitse, fe maharotsake ty hasoa maro ty mpanan-tahiñe raike.

10

¹ Mampitrotrotse ty menam-pañemboke ty laletse mate; le mavesatse te ami'ty hihitse naho ty asiñe, ty hagegeañe kede. ² Mitolike mb'an-kavàna ty arofo' i mahihitsey, mb'ankavia ka ty tro' i dagolay. ³ Ndra te mijelanjelañe an-dalañe eo ty derendereñe, kanao po-hilala, aboa'e amy màroy ty hagegea'e. ⁴ Naho miforoforo ama'o ty haviñera' ty mpifehe, ko apo'o ty toe'o, amy te mañafa-tsirìka-mena ty hamora-fo. ⁵ Eo ty haratiañe nitendrek' ahy ambane' i àndroy, hoe lilatse aboa' ty mpifehe.

⁶ Onjoneñe mb'an-toetse ambone
ty seretse maro,
ie mitozoke ambane eo o mpañalealeo.

⁷ Nahatrea ondevo miningi-tsoavalala raho,
vaho ty ana-donake
mañavelo an-tane eo hoe ondevo.
⁸ Mete hivariñe ama'e ao
ty mihaly koboñe;
naho mete hehere' ty mereñe
ze misorodidy kijoly.
⁹ Mete joie' ty vato ty mihaly aze;
le mete hizo fere ty mampitserake hatae.
¹⁰ Naho malomo ty viñe,
ie tsy sioña'e ty lela'e,
le añ'ozatse ambone ty ifanehafa'e;
lombolombo'e ty hihitse mahatafetetse.
¹¹ Ie hehere' ty mereñe
tsy nampipendreñeñe;
le an-koheke i mpitroboy.
¹² Matarike o entam-palie' i mahihitseio,
fe mampibotseke ty dagola o soñi'eo.
¹³ Mifototse an-kagegeañe
o fivolam-bava'eo,
naho migadon-ko haratian-dagola;
¹⁴ mangaradadak' avao ty minè.
Tsy fohi' ondatio ty ho zoeñe,
ia ty mahatalily ama'e ty hanonjohy aze?
¹⁵ Akore ty hamokora' i dagolay
amy fitromaha'ey, kanao tsy fohi'e
ty homba'e mb'an-drova mb'eo.
¹⁶ Hoy hoy ty ama'o, ry tane,
naho ajaja ty mpanjaka'o
vaho mpanao bedidake maraindray
o ana-dona'oo!
¹⁷ Haha rehe ry tane,
te roandriañe ty mpanjaka'o,
vaho mikama ami'ty evae'e
o ana-dona'oo hihaozara'e
fa tsy ty himamoa'e!
¹⁸ Havotroañe ty mahakolemake tafo;
tañañe ledra'e
ty mahatsopatsopake traño.
¹⁹ Natao hampiakahake ty sabadidake;
te hahafale fiay ty divay,
vaho te hamale ze he'e ty drala.
²⁰ tovo'e: Ko mamatse ty mpanjaka
am-pitsakorea'o ao,
naho ty mpiefoefo
an-trañom-pandrea'o ao;
ke hinday ty feo'o i voron-tiokey,
hera haboele' i amañ'elatsey i enta'oy.

11

¹ Ahifiho ambone' o ranoo ty mofo'o,
le ho tendrek'azo andro maro aña.
² Zarao fito o vara'oo, he valo,

fa tsy fohi'o ze hankàñe
 mete hifetsak' an-tane atoy.
³ Ie milodolodo o rahoñeo,
 le adoa'e mb'an-tane atoy ty orañe;
 aa ke mihorokodoboke mañatimo
 ty hatae, he mañavaratse,
 le amy ideboña'ey ty handrea'e.
⁴ Tsy hitongy ty mpisamba tioke;
 vaho tsy hanatake ty mpijilo rahoñe.
⁵ Kanao tsy apota'o ty lala' i tiokey,
 naho tsy fohi'o ty fitiria'
 o taolañe an-kovi' i mivesatsey,
 le tsy fohi'o ka ty fitoloñan' Añahare
 mpamboatse ze he'e.
⁶ Tongiso maraindray o tabiri'oo,
 vaho ko mampi-po pitâñe te hariva;
 amy te tsy fohi'o ty ho lefe,
 ke ty etoañe ke i eroañey,
 hera ho soa iaby iereo roroe.
⁷ Mamy o hazavâñeo,
 naho mahafale fihaino
 ty mahaoniñe i àndroy.
⁸ Aa ndra te veloñe maro-taoñe t'indaty
 ee te hirebeha'e iaby,
 le ho tiahî'e abey
 o andron-kamoromoroñañeo,
 t'ie ho maro,
 toe hakoahañ' iaby ty ho avy.
⁹ Mandià taroba ry ajalahy,
 ihe mbe tora'e,
 ee te hampahaehak' azo ty tro'o
 amo andron-katora'oo.
 Oriho ty fisalalam-po'o
 naho ty fañiria' o maso'oo,
 fe mahafohina t'ie hampiatrefen'
 Añahare an-jaka ty amy hene rezay.
¹⁰ Ano soike o halorèan-tro'oo,
 vaho ampihankaño ami'ty sandri'o
 ty falovilovia'e;
 fa toe mihelañe ty hatorañe
 naho ty haañom-piaiñe.

12

¹ Tiahio i nitsene azo
 an-tsan-kajalahi'o,
 aolo' ty fivotraha' o andron-kasotriañeo,
 naho ty hitotofa' i taoñe hanoe'o ty hoe:
 Tsy mahafale ahiko irezay;
² aolo' ty fañamaieñañe ty hazava'
 i àndroy naho i volañey vaho o vasiañeo,
 naho ty fibaliha' o rahoñeo
 ie fa aña i orañey;
³ amy andro hihondrahondrà'

o mpañambeñ' anjombao,
 naho hibokobokoha' ondaty maozatseo,
 naho hitroara' o mpandisañeo
 amy t'ie tsy ampe,
 vaho mihamiaeñe tsy hahaisaha'
 ondaty mitilihitse amo lalan-kedeo;
⁴ ie mirindriñe o lalam-ban-dalam-beio,
 naho migeongeoñe avao
 o vato fandisanañeo,
 naho mahatsekake ondaty
 ty feom-boroñe,
 vaho hene namptsiñeñe o anak' ampela mpibekoo;
⁵ eka, mahahembañe ondatio
 te an-kaboañe ey,
 mirevendreveñe t'ie an-damoke eo;
 mikò-foty o mahabiboo,
 fe mikozozotse avao i valalay,
 vaho milesa i vahen' amaloy;
 amy te migodañe mb'añ'akiba'e
 nainai'e mb'eo ondatio,
 ie midraidraitse an-dalañeo
 o mpandàlao;
⁶ aolo' te tampake i fole volafotiy,
 naho foy i korobo volamenay,
 naho señak' am-bava' i vovoñey
 ty fitovy,
 naho nipozak' an-kadaha eo
 i larom-pitarikey,
⁷ naho mibalike mb'an-tane
 niboaha'e ao i debokey,
 vaho mimpoly mb'
 aman'Andrianamboatse azey
 i kofòkey.
⁸ Habibin-kakafoahañe zay,
 hoe t'i Mpañoke; kila kafoake.

⁹ Tovo i hihi'ey, nanare' i Mpañokey hilala ondatio, ie nandanja naho nañotsohotso vaho nañity razan-tsaontsy maro. ¹⁰ Nitsoeke fisaoantsy mahafale i Mpañokey, vaho nanokitse tsara-to am-palangesañe. ¹¹ Hoe fitsipoke ty fisaoantsi' o mahihitseo, toe fati-by soa oreñe o razan-drehakeo, o natolo' i Mpiarak' añondriio.

¹² Aa, le mitaoa ry anake
 amo mandikoatse irezaio,
 fa tsy ho modo ty fanoañe boke maro,
 vaho mahamamake o nofotseo
 ty halako-pihotsohotsoañe.

¹³ Ty figadoña'e, ie hene jinanjiñe:
 Mañeveña aman'Añahare,
 vaho ambeno o lili'eo;
 ho a' ze kila ondaty zay.

¹⁴ Hendesen' Añahare mb'an-jaka
 ze hene sata, ze he'e mietake,
 ndra t'ie soa ndra te raty.

Sabo Talango'e

1

¹ Ty Sabo talango' i Selomò.

Kokoa'e

² Apoho hañorok'ahy re
amo orok' am-palie'eo!
Fa soa te amo divaio ty fikokoa'o.
³ Mandrifondrifoñe
o mena-pañosora'oo,
rano máñitse nailiñe ty tahina'o,
zay ty ikokoa' o somondraraao azo.
⁴ Kozozoto raho, antao halisa;
Nandese' i mpanjakay mb'añ'efets'
efen'anjomba'e ao.

Rañe'eo

Hañonjoñ' azo zahay naho hirebeke, honjone'ay ambone' ty hamañin-divay.
An-kahiti'e ty fikokoa' iareo azo.

Kokoa'e

⁵ Mainte raho, naho ginoke,
ry anak'ampela' Ierosalaimeo,
manahake o kiboho' i Kedareo,
hambañe amo lamba' fañefe' i Selomoo.
⁶ Ko mangarek' ahy ami'ty hamaintelèñeko,
ie nisamb' ahy i àndroy.
Niboseha' o ana-dahin-drenekoo raho,
nampañalahala' iareo
o tanem-baheo,
vaho namoeako ka
i tanem-bahekoy!
⁷ Saontsio amako,
ry fikokoam-piaiko,
Aia ty fiandraza'o,
i fampandrea' o an'tsingilingilieñey?
Amy te ino ty hitsikombeako ty mpisaron' tarehe marine' o lia-rain-drañe'oo?

Rañe'eo

⁸ Aa naho tsy fohi'o,
ry hatsomerentseren'ampelao,
le tinoño ty lia' i lia-raikey
vaho andrazo marine' o kibohom-piarakeo o vik'ose'oo.

Mpikoko

⁹ Ry kokoako, Ampanahafeko ami'ty renen-tsoavala amo sarete' i Paròo,
¹⁰ Fanjaka o fifi'oo ty amo hangehangeo,
ty vozo'o miravake vatosoa.
¹¹ Hitsenea'ay bangem-bolamena
nihamineñe volafoty.

- Kokoa'e*
- ¹² Ie nandre an-tihi'e eo i mpanjakay,
ro nañakara' i ramekoy i hañi'ey.
- ¹³ Hoe sandrifén-drame mandre añivo'
o nonokoo i kokoakoy.
- ¹⁴ Fitoborom-boñen-tseva
an-tanem-balobo' i En-Gedy ao
i kokoakoy.

- Mpikoko*
- ¹⁵ Akore ty hamozohozo'o, o kokoakoo,
Hen! ty hatrenotreno'o;
deho o maso'oo.

- Kokoa'e*
- ¹⁶ Toe tsomerentseren-drehe kokoakoo, vata'e miehañé;
maindoñe ty fandream-tikañé;
- ¹⁷ Mendoraveñé o fahan-trañon-tikañeo,
akao o tapena'eo.

2

- Mpikoko*
- ¹ Somontsoin-tSaròne raho,
vare-mañim-bavatàne.
- ² Manahake o mañidè am-po' fatikeo
i kokoakoy amo somondraraao.

- Kokoa'e*
- ³ Manahake ty takoko* amo hatae añ'alao
ty kokoako amo ajalahio.
Tsy nahay avao raho te nitoboke
an-talinjo'e eo,
nimamy an-pitsopehañ'aze o voa'eo.
- ⁴ Nasese'e mb'añ'anjomban-
tsabadidake mb'eo raho
le nampialofe'e ambanen'
alokalom-pikokoa'e ao.
- ⁵ Fahano zizimo† raho,
ampanintsño an-takoko,
fa nampitoiram-pikokoan-draho.
- ⁶ Iondanan-dohako ty fità'e havia,
mamelek' ahy ty fitàñ-kavana'e.
- ⁷ Afantoko ama' areo
ry anak'ampela' Ierosalaimeo,
ty amo farasio naho o tsakan-kivokeo;
ko tsekafe' areo
ndra ampibarakaohe' areo
o fikokoañeo am-para' te irie'e!

Ambara' t'i Mpikoko i Kokoa'ey,

- Kokoa'e*
- ⁸ Inao i kokoakoy!
Heheke, mb' etoan-dre,
mitsamboatsamboañé amo vohitseo,

* 2:3 Poma † 2:5 Valòboke

mbore vokane'e o tambohoo.

Mpikoko

- ⁹ Manahake o farasio ndra ty fanaloke tora'e i kokoakoy;
hehe t'ie mijohañe an-kalo'
o kijolin-tikañeo,
mitangirik' amo lalan-kedeo,
mitilihitse amo tsingarakarakeo.
¹⁰ Tinoi' i kokoakoy raho ami'ty hoe: Miongaha ry kokoako,
i hatsomerentserekoy, antao:
¹¹ fa nihak' aña i asotriy,
fa tampetse i orañey, le aña.
¹² Misodeha an-tane ey o voñeo,
le fa totsake ty sam-pañetefañe,
vaho fa mivolañe an-tanen-tika atoy
i lovey.
¹³ Fa somaraveñe o voa' i sakoañeio,
naho mibotiboty iaby o vaheo,
vaho mampiboele o harifondrifo'eo;
miavota ry kokoako,
ry tsaratseake, misitaha mb'etoa.

Mpikoko

- ¹⁴ O dehoko, an-tseram-batoo:
an-tsifitsifi' o tevañeo,
ee te ho treako ty tarehe'o,
lonike te hitsanoñe ty feo'o,
ry talango am-peo naho soa vintañeo.
¹⁵ Tsepaho ho antika o fanalokeo,
o fanaloke bory mampianto
tanem-baheo,
fa mamòñe i tanem-bahen-tikañey.

Kokoa'e

- ¹⁶ Ahiko i kokoakoy, aze ka raho:
ie mampiandrazeñe amo vindao.
¹⁷ Ampara' te mitiotioke i àndroy
vaho misomarike o talinjoo, ry kokoako, mitoliha, tsikombeo i farasiy
ndra i fanaloke tora'e
an-tevam-bohitsey.

3

Ipaia' i Kokoa'e Haleñe

- ¹ Ie haleñe an-tihiko atoy,
nipaiako i kokoam' piaikoy,
nisalala aze raho fa tsy tendreke;
² Hitroatse henaneo
hikariokariok' an-drova ao,
amo lala'eo naho an-kiririsa'e eo;
ho tsoeheko i kokoan' aikoy.
Pinaiko fa tsy nitrea.
³ Nizoe' o mpañambeñeo raho,
ie nañariofa' iereo fisamba i rovay.
Nioni' areo hao i kokoam-piaikoy?

⁴ Ie vaho nihelañako,
le nitendrek' amy kokoam-piaikoy;
nivihineko le tsy navotsoko ampara' t'ie naseseko mb'añ'anjomban-
dreneko mb'eo, mb'añ'efe i nampiareñ' ahikoy.

⁵ Afantoko ama' areo
ry anak'ampela' Ierosalaimeo,
ty amo farasio ndra o fanaloke
an-kivokeo:
ko tsekafe' areo ndra barakakaofe' areo
o fikokoañeo ampara' te irie'e.

Androm-Pañambaliañe Ty Fañotroñañe i Enga Vaoy

⁶ Iam-bao o mionjo' mb'etoa
hirik'am-patrambeio,
hoe hatoeñe mihorondemboke,
nembohe' ty tsotse naho mañidè
vaho ze hene hamañim-bom-pibalibalike?

⁷ Hehe t'ie i horantsa' i Selomoy,
iaoloa' ty fanalolahy enim-polo
amo lahitsiai' Israeleo.

⁸ Songa mpitam-pibara, vañoñ'añ'aly,
fonga ama-mesolava am-pe'e eo
ty amo fangebahebahan-kaleñeo.

⁹ Nitsenè' i Selomò ho aze
ty horantsa'e an-katae' i Libanone.

¹⁰ Nanoe'e volafoty o anakore'eo,
volamena i voho'ey,
malo-mavo i fiambesa'ey,
fikokoañe ty nihamina' o anak' ampela' Ierosalaimeo ty aña'ate'e ao.

¹¹ Mionjona, ry anak' ampela' i Tsioneo, sambao i Selomò mpanjaka
misabaka
i nampisabakaen-drene'e
amy androm-pañengam-bali'eiy,
amy andro nahafale i arofo'eiy.

4

Mpikoko

¹ Akore ty hahomozohozo'o,
ry kokoakoo, toe tsomerentsereñe;
deho am-boho' o marerarera'oo
o fihaino'oo;
hoe lia-rain-ose mivotse
am-pizotsoa' i Gilade o maròi'oo.

² Hoe ty rene'añondry hintsike mitroatse
am-panasañe o famotsi'oo,
songa aman-drahamba'e,
leo raik' ama'e tsy doñ-anake.

³ Hoe fole-mena o fivimbi'oo
vaho fanjaka o falie'oo.
Hoe vakim-boan-draketamena roe
o fitendrean' aoli'oo an-kalo
o marerarera'oo.
⁴ Manahake ty fitilik'abo' i Davide
ty fititia'o, rinanjy am-bato miriritse,

iradoradoa' ty fikalan-defoñe arivo,
songa fikalam-panalolahy.

⁵ Hoe fanaloke tora'e o fatroa'oo,
sarake hambañe mihota am-bindia ao.

⁶ Ampara' ty fanintsiñañ' andro,
an-kalavaen-talinjo,
homb'am-bohin-tsotse mb'eo raho,
mb'an-kaboan-drame mb'eo.

⁷ Solanto'e rehe, ry mami' ty troko,
tsy aman-kila.

⁸ Mindreza lia amako
boake Libanone aña
ry enga-vaoko,
ehe itraofo hirike Libanone aña;
mizotsoa boak'an-dengo' i Amane ey,
boak'an-kaboa' i Senire,
an-digiligi' i Kermone eñe,
boak'amo fipaliram-parasio,
o vohim-panalokeo.

⁹ Fa tinava'o ty troko, ry rahavaveko,
enga-vaoko;
kinizo'o an-driom-paom-pihaino'o,
ami'ty bange'o raik' am-pititia'o eo.

¹⁰ Fanjaka ty fikokoa'o,
rahavaveko, enga-vaoko!
loho soa te amo divaio ty fikokoa'o,
naho ty harifondrifon-drano mañi'o
te amy ze atao emboke!

¹¹ Mitsopatsopake
ty hamamim-papy tantele
o fivimbi'oo, ry enga-vaokoo,
habobo naho tantele
ty ambane' famele'o ao.
Manahake ty harifondrifo' i Libanone
ty hamañin-tsaro'o.

¹² Goloboñe mihily ty zaiko, enga-vaoko.
Loha rano mifahetse,
figoangoan-drano mikapeke.

¹³ Raketa miregorego soa
o hataen-golobo'oo,
naho voan-katae fanjaka,
mañi-dè mitrao-tseva:

¹⁴ Rame miharo ahemañitse,
hazomañitse naho somoroñe,
naho ze hene hatae marifondrifoñe,
mitraoke tsotse naho vahoñe
vaho ze atao hafiriañe.

¹⁵ Rano migoangoañe
an-goloboñe ao rehe,
vovon-drano mamy mitsirtsioke
boake Libanone aña.

Kokoa'e

¹⁶ Mitsekafa ry avaratse, mb'etoy ry atimo! Tiofo i golobokoy,
hampiboeleañe o hamañi'eo.

Ee te hizilik' an-golobo'e ao i kokoakoy hitsopeke o voa'e mafirio.

5

Mpikoko

¹ Fa nimoak' amy golobokoy raho,
ry zaiko, enga-vaoko;
fa natontoko ty rameko
naho o mañi-dèkoo;
fa nihaneko ty papi-tanteleko
naho ty tanteleko;
fa ninomeko ty divaiko
naho ty rononoko.

Mpirañetse

Mikamà, ry rañetseo, naho minoma;
minoma am-pidadañe, ry mpikokoo.

Ipaia' i Kokoa'e Haleñey

² Niroro raho fe nañente ty troko.
Inay! Mañonkòñe i kokoakoy:
Sokafo raho ry zaiko, mami'ty fiaiko,
ty dehoko, ginoke tsy aman-kila.
Kotsa' ty zono ty lohako,
ty voloko ami'ty hamandoa' i haleñey.
³ Fa nafahako ty saroko—
mbe haombeko hao?
Fa sinasako o tombokoo—
mbe ho lotoeko hao?
⁴ Nazili' i kokoakoy ami'ty hiri'
i sikadañey ty fità'e;
vaho nampiponaponake o aña'ovako ao.
⁵ Niongake raho hanokàfako i kokoakoy,
nitsopatsopake rame o tañakoo,
rame mitsirtsioke o rambo-tañakoo,
amo fitanañ' i sikadañeio.
⁶ Nisokafeko i kokoakoy,
fe nitolik' ane i kokoakoy, fa nienga;
toe nilesa ty troko amy saontsi'ey;
pinaiko fe tsy nahatrea,
kinoiko fe tsy nanoiñe.
⁷ Nitendrek' ahy o mpigaritseo,
ie nañariofe' iereo i rovay;
linafa' iereo, vinonotrobo' iereo;
tinava' o mpigari-kijolio i sarokoy!
⁸ Ry anak' ampela' Ierosalaimeo,
ifantako, naho isa' areo i kokoakoy,
ino ty hisaontsia' areo?
Zaho toiram-pikokoañe.

Rañe'eo

⁹ Mpikoko manao akore i mpikoko azoy,
ry hatrenotrenon' ampelao?
Mpikoko manao akore i mpikoko azoy,
ie namantok' anay.

Koko'a'e

¹⁰ Miloeloe i kokoakoy
mbore volovoloeñe,
miambak' ami'ty alen-dahy.

¹¹ Volamena hiringiri'e ty añambone'e;
mitaporetaporetse o maroi'eo,
hamaintem-bolon-drelove.

¹² Hoe deho añ'olon-torahañe eo
o fihaino'eo,
sinasa an-dronono,
soa fimoneñe am-pitoboha'eo.

¹³ Hoe tihin-ahemañitse,
kijolin-kamañirañe, o fiambina'eo;
vinda mitsopake rame o soñi'eo.

¹⁴ Bodam-bolamena o fità'eo,
ibangoan' *tarsise,
hoe te nifen-drimo nivàñeñe, niravahañe safira ty fañòva'e.

¹⁵ Bodan-tsinihara nandreketam-bolamena ki'e o fandia'eo.
Manahak' i Libanone ty vinta'e, ami' ty hasoa' o mendorave'eo.

¹⁶ Loho mamy ty falie'e;
vata'e mahasinda;
ie i kokoakoy naho i rañekoy,
ry anak'ampela' Ierosalaimeo.

6

Rañe'eo

¹ Nimb'aia i kokoa'oy,
ry maintelèn'ampelao?
Nitsile mb'aia i kokoa'oy,
hindreza'ay fipay?

² Nizotso mb'an-golobo'e mb'eo
i kokoakoy,
mb'am-pilafiham-pahafiriañe mb'eo, hiarake an-golobo'e ao,
nahohanontoñe o voñem-bindao.

³ A i kokoakoy raho, vaho ahiko re,
ie miarak' am-baremañitse ao.

Mpikoko

⁴ Hamotsontane rehe, kokoako,
manahak' i Tirzà,
nahohasoa' Ierosalaime,
amam-bolonahetse hoe lahialen-defoñe
mañonjom-borovoro.

⁵ Atoliho mb'eo hoekeo o maso'oo,
fa mampivalitaboak' ahy; manahake ty lia-rain'ose mikararake
mañambane i Gilade mb'eo o volo'oo.

⁶ Lia-rain' añondri-vave mionjoñe boak' ampanasañe ao o nife'oo,
songa reke-pihambañe,
ndra raike tsy jeña.

⁷ Hoe vakim-boan-draketamena
ty fitendrean' aoli'o
an-kalo' o marerarerera'oo.

⁸ Mete ho enempolo ty valim-panjaka,

* ^{5:14} Tarsise: beryle: vato soa

naho valompolo o sakeza'eo
 vaho somondrara tsy fotofoto;
⁹ fa ihe ry dehoko, ry homozohozo'e,
 tsy amañ'ohatse, bako tokan-drene'e,
 mitoratsik' amy nisamak' azey.
 Ie nizoe' o somondrarao
 le natao' iareo soa-tata,
 nandrenge aze ka o valim-panjakao
 naho o sakezao.

Rañe'eo
¹⁰ Ia o miboake hoe t'ie andro manjirikeo? motsotsore
 hoe i volan-dorisay,
 mikotritriake hoe i àndroy,
 mahalatsa hoe valobohòke
 mirañoraño an-kobaiñe?

Kokoa'
¹¹ Nizotsø mb'añ'ala-vondron-tsakoa
 mb'eo raho
 hisary o fitirim-bao am-bavataneo,
 hañenteako ke mibotiboty o vaheo,
 he mamòñe o raketao.
¹² Niambovo amako te
 navatra' ty troko an-tsarete ao,
 hehe te aña'ilako eo ty roandria.

7

Rañe'eo
¹ Mibaliha, mibaliha, ry nte-Solàme; mimpolia, mimpolia, hisamba'ay azo.

Mpikoko
 Inom-bao ty angarefa' areo
 i nte-Solamey
 hoe te itsinjaha'e i *Mahanaime?
² Fanjaka o fandia'o mihànao,
 ry anak' ampelan-droandria!
 hoe hange nitoloñem-pitàm-pitsene mahimbañe
 ty hahomozohozom-pe'o.
³ Fitovy bontoly ty foe'o,
 ie le lia'e tsy po-divay milaro;
 fitoboron' ampemba iarikatoham-bindra
 o araña'oo.
⁴ Fanaloke tora'e o fatroa'oo,
 ana-kambam-panalon-drene'e.
⁵ Hoe fitilik'abo aman-tsifan-drimo
 ty fititia'o.
 O antara' i Kesbone marine' i lalam-bei'
 i Bate-Rabimeio o fihaino'oo.
 I fitilik'abo' i Libanoney mitolike
 mbe Damesèke ty fiantsona'o.
⁶ Misabaka azo manahake
 i vohi-Karmeley ty añambone'o,
 le mahasinda i mpanjakay o firandra'eo.

* **7:1** Mahanaime: toben-dahindefoñe, he mpitsinjake

⁷ Akore ty hatsomerentsere'o
naho ty hatrenotreno'o ry kokoako,
toe mahafale!
⁸ Mitroatse hoe voanio ty sandri'o,
le mitoboro hoe o voa'eo o fatroa'oo.
⁹ Aa hoe raho: Hanganiheko i voanioy,
naho ho rambeseko o voa'eo;
fa hanahake ty voam-bahe o fatroa'oo,
naho minday ty harifondrifom-boasare
ty sehaseha'o,
¹⁰ Hoe divay fanjaka ty lañilañi'o;
malama ty fisorogoda'e ho a i kokoakoy,
hoe mitsirtsioke mora
am-pivimbim-pirotse.

Kokoa'e
¹¹ A i kokoakoy raho
naho amako ty fañiria'e.

Ambara' i Kokoa'e t'i Mpikoko
¹² Antao, kokoako, homb' an-kaloke
mb'eo, hialeñe amo kialoo.
¹³ Antao hañaleñaleñe,
mb'an-tanem-bahe mb'eo
handrèndreke ty fibotibotia' o vaheo,
ke te miborake o voñe'eo,
hera mamolera o raketao;
ao ty hanjotsoako ama'o ty hateako,
ry kokoako.
¹⁴ Mañakatse ty hañi'e o vahenamaloo,
hene raha mafiry ty an-tsariran-tikañe eo,
ty vao naho ty haehae,
songa nahajako ho azo, ry kokoako.

8

¹ Ho ni-soa naho ni-rahalahiko rehe,
i ninono am-patroan-drenekoy!
Ie amy zay, naho nitendrek' ama'o alafe'e ao raho vaho nañorok' azo,
le tsy ho nifosae' ondatio.
² Ho nikozozoteko mb'añ' anjomban-
dreneko mb'eo,
mb'amy nañoke ahikoy.
ho nampinomeko divay mandrove,
naho ty ron-draketako.
³ Iondana' ty lohako ty fità'e havia,
vaho mañohoñ' ahy ty fità'e havana.
⁴ Afantoko ama' areo,
ry anak' ampela' Ierosalaimeo;
ko mampitsekake fikokoañe
am-para' te irie'e.

Figadoña'e: Saontsim-pifampikokoña'e Rañe'eo
⁵ Ia o mionjombetoy
misazok' amy fikokoa'eio?

Mpikoko

Nampivañoneko ambane' i takokoy rehe; amy nampitsongoa'o i rene'o; teo ty nitsongoa' i nahatoly azoy .

Kokoa'e

⁶ Apetaho hoe voli-fitomboke
añ'arofo'o ao raho,
hoe alama am-pitâ'o eo;
fa mira ami'ty haozaran-kavilasy
ty fikokoñañe,
manahake ty hagàñe i tsikeokeokey
ty famarahiañe;
msolebotse o lel'af'o'eo,
toe lel'af'o milebaleba.

⁷ Rano tsifotofoto tsy mahasaoke ty fikokoñañe; naho
tsy mahaopo aze ty fisorotombahañe;
ie hatolo' t'indaty ze hene vara
añ'anjomba'e ao hahazoa'e
fikokoñañe, le ho vata'e onjirañe.

Rañe'eo

⁸ Manan-jay ampela zahay
f'ie mbe tomoe-nono,
hanoe'ay akore i zai'aiy amy andro
fifofoñañe azey?

⁹ Naho kijoly re le handranjia'ay
fitilik'abo volafoty;
ie lalambey, le harikatoha'ay
varamba-mendoraveñe.

Kokoa'e

¹⁰ Kijoly raho,
hoe fitilik'abo o nonokoo;
hoe t'ie minday fañanintsiñe
am-pihaino.

¹¹ Nanan-tondam-bahe
e Baale-Kamone ao t'i Selomò;
nafondro'e ama' ondaty.
Songa mañondroke volafoty arivo
ama'e ty amo voka'eo.

¹² Aoloko eo i tanem-bahekoy,
azo ry Selomò i arivoy,
roan-jato ty a o mpañalahala
i voka'eo.

Mpikoko

¹³ O ry mpimoneñe an-goloboña'e ao,
te hijanjiñe ty fiarañanaña'o
o mpiamakoo,
ehe ampitsanoño ahy!

Kokoa'e

¹⁴ Mipitsiha ry kokoakoo,
manahake o fanalokeo naho o farasy
ambone vohitse iregoregoan-kafirio.

Iesaià

¹ I aroñaroñe nioni'Iesaià* ana' i Amotse† ty am' Iehodà‡ naho Ieros-alaimē§ tañ'andro' i Ozià*, Iotame†, Iakaze‡, naho Iekizkia§ mpanjaka' Iehodà.

² Mitsanoña ry likerañeo,
manolora sofiñe ty tane toy,
fa mitsara t'IEHOVÀ.
Nañabey naho nampitombo anake raho,
f'ie niola.

³ Apota ty añombelahy ty tempo'e, naho
ty borike ty lokaloka' i mpanehak' azey;
fe tsy mahafohiñe t'Israele*,
tsy maharendreke ondatikoo.

⁴ Ry boriza aman-kakeo,
ondaty mijiny tahiñeo, tirim-panao raty,
anake mitolon-kamengohañe!
fa nifarie' iereo t'IEHOVÀ,
nitsambolitio' iereo t'i Masi' Israele,
aliheñe iereo vaho midisa-voly.

⁵ Ino ty mbe hanilofañe anahareo,
ie mbe mitolom-piola avao?
Marare iaby ty añambone,
hene toirañe ty arofo.

⁶ Boak'an-dela-pandia pak'añambone'e,
tsy ama'e ty janga, fa fere,
vonotroboke naho bae miborentatse:
tsy nitindrieñe, tsy nibandieñe,
tsy nihosoren-tsolike.

⁷ Mangoakoake ty tane' areo;
finorototo' ty afo ty rova' areo;
fa nabotse' ty ambahiny añatrefa' areo
ty tane' areo; le koake,
hoe t'ie navalitaboam-pisorotombañe.

⁸ Le nengañe hoe kijà an-tetem-bahe ey
ty anak'ampela' i Tsione,
hoe kibohotse an-tanem-bazavo ao,
hoe rova arikatohem-paname.

⁹ Naho tsy sinisa' IEHOVÀ i Mâroy sehanga'e tikañe, le ho ni-hoe Sedome†,
ho nanahake i Amorà‡.

¹⁰ Janjiño ty tsara' IEHOVÀ,
ry mpifehe' i Sedome;
toloro ravembia i Tsaran'
Añaharen-tikañey, ry nte-Amorà.

¹¹ Inoñ'amako o soroñe mitozantozañeo?
Hoe t'IEHOVÀ: Fa mahaetsak'ahy

* **1:1** Iesaià: Ty fandrombaha' IEHOVÀ † **1:1** Amotse: Maozatse ‡ **1:1** Iehodà: fandrengea' IEHOVÀ § **1:1** Ierosalaime: Aroñarom-panintsiñañe * **1:1** Ozia: ty haozara' IEHOVÀ; ty anak'ose'e † **1:1** Iotame: Ty Hafonira' IEHOVÀ ‡ **1:1** Iakaze: Mpitavañe § **1:1** Iekizkia: ty hafatrara' IEHOVÀ * **1:3** Israele: mpifanehak' aman' Añahare † **1:9** Sedome: ty tsikotsiko'e; ty simà'e ‡ **1:9** Amorà: Ondaty miola

o añondrilahy engaeñe horoañeo,
 naho o safom-biby vinondrakeo;
 tsy mahafale ahy ty liom-bania
 ndra o vik'añondrio,
 ndra o añondrilahio.

¹² Ie mb'etoa nahareo hiatrek' amako,
 ia ty nipay am-pitâ' areo te
 ho lialiâ' areo o kiririsakoo?

¹³ Ko añenga'areo raha koake ka;

ie enga tiva amako;

O jiribolañeo, o Sabatao§,
 o fivory koiheñeo:

Tsy leoko o fivori-miavake
 milaro haratiañeo.

¹⁴ Heje' ty troko o jiri'bola' areoo
 naho o takataka-tinendre' areoo;
 Ie manosots' ahy, hejeko ho vaveñe.

¹⁵ Naho amelara'areo tañañe,

le ho takonako ty masoko;

Eka ndra t'ie mitolon-kalaly,

tsy ho tsanoñeko, fa pea lio o fitâ' areoo.

¹⁶ Miandroa, miliova;
 asitaho tsy ho aolo' masoko
 ty halò-tserem-pitoloña' areo;
 mijihera amo fanoañe ratio.

¹⁷ Mianara hanao ty soa; tsoeho ty hato,
 avotsoro o forekekeñeo,
 omeo to ty bode rae,
 mihalalia ho a o vantotseo.

¹⁸ Antao hisaffiry arè, hoe t'IEHOVÀ:
 ndra te mena mandofiry ty hakeo' areo,
 le ho foty matsatsaoke;
 ndra t'ie mena mañabasà,
 le hanahake volon'añondry.

¹⁹ Ie miato naho tsy manjehatse,
 ro hikama ty hasoa' i taney.

²⁰ F'ie mandietse vaho miola,
 le habotse' ty fibara;
 zay ty nitsaraem-palie' IEHOVÀ.

²¹ Akore te nanjare karapilo
 i rova matoey!
 ie nilifotse ty hatò,
 nimoneñe an-kavañonañe,
 te mone mpañoho-doza henaneo.

²² Fa tai'e avao ty volafoti'o,
 botsa-drano ty divai'o.

²³ Mpikitro-karatiañe o ana-dona'oo,
 mpirañetse ami'ty malaso;
 songa mpitea vokàñe
 naho mpañori-tambe;
 tsy mea' iereo to ty bode rae,
 vaho tsy atrefe' iareo ty entam-bantotse.

24 Aa le hoe t'i TALÈ, IEHOVÀ' i Mâroy,
i Hafatrara' Israeley:
Hete! Hafahako amako o rafelahikoo,
vaho ho valèko o malaiñe ahikoo;
25 Le hahimpako ama'o ty tañako,
naho ho lioveko hoe amañ'asidra
ty taim-bi'o,
vaho hafahako iaby o kanki'oo;
26 Le hampoliko o mpizaka'oo
manahake tam-baloha'e añe,
naho o mpanolo-keve'oo
hambañe am-pifotora'e añe:
vaho hatao ty hoe rehe:
Rova-Kavantañañe, Posetse Matoe.
27 Ho jebañeñe ami'ty hatò ty Tsione,
naho an-kavantañañe o aze mimpolio.
28 Fe hitrao-pirotsahañe
o mpanan-kakeo naho mpanan-tahiñe,
vaho ho hotomomoheñe
ze mienga IEHOVÀ.
29 Toe hisalara' iereo o kile nisalalañe,
vaho himeñara' areo o goloboñe nivihañe.
30 Hanahake ty kile
aman-drave'e miheatse nahareo,
naho hoe goloboñe tsy aman-drano.
31 Ho pipìke ty maozatse,
ho tsipelats'af o tolon-draha'eo;
hiharo hiforehetse iereon-droroe,
le tsy eo ty hampikipeke.

2

1 Ty tsara nioni' Iesaia ana' i Amotse
ty am' Iehodà naho Ierosalaime:
2 Ho tondrok' amo andro honka'eo te haoreñe ankaboa' o vohitseo
ty vohin-anjomba' IEHOVÀ,
honjoneñe ambone' o haboañe,
vaho hikovovoke mb'ama'e mb'eo
ze kilakila ondaty.
3 Maro ty rofòko homb'eo hanao ty hoe:
Antao, hionjoñe mb'ambohi' IEHOVÀ,
mb'añ'anjomban'Añahare' Iakobe*;
hañòha'e antika o lala'eo,
hañaveloan-tika o oloñolo'eo;
amy te hionjoñe boake Tsione ao
ty Hâke,
naho boak' Ierosalaime ao
ty tsara'IEHOVÀ.
4 Ie ty hizaka añivo' o kilakila' ndatio,
naho hifandahatse ami'ty maro;
le ho pehe' iareo ho lelan-dasarý
o fibara' iareoo
naho ho fibira miporengotse,

* **2:3** Iakobe; mpisolo am-pamañahiañe

o lefo' iareoo;
 tsy hifañonjom-pibara
 ami'ty fifeheañe ty fifeheañe
 vaho tsy hioke hialy ka.

5 O ry anjomba' Iakobeo, mb'etoy, hañaveloan-tika ami'ty fireandrea'
 IEHOVÀ.

6 Fa naforintse' ondati'oo i anjomba' Iakobey
 fa àtsake ty sata' o tatiñanañeo iereo,
 naho o mpisikily manahake
 o nte-Pilistioo[†],
 vaho mifañoho-pitâñe
 amo anan'ambahinio.

7 Pea volafoty naho volamena
 ty tane' iareo;
 tsifotofoto ty vara'e,
 tsitsike soavala ka ty tane' iareo,
 tsy vatse iaheñe o sarete'eo;

8 Lifo-tsamosampo ka ty tane' iareo;
 italahoa'iareo o satam-pitâ' iareoo,
 o fitolon-drambom-pitâ'eo.

9 Nafotsake ty fokonontsoa,
 narèke ondatio;
 aa le ko ihevea'o.

10 Mimoaha am-bato ao,
 mietaha an-debok' ao,
 am-pirevendreveñañe am'IEHOVÀ,
 naho ami'ty enge' i volonahe'ey.

11 Hareke ty fiebotsebo' ondatio,
 havokok' ambane ty fibohabohà'ondatio,
 IEHOVÀ avao ro honjoneñe
 amy andro zay.

12 Fa manañ'andro amo mpirengevokeo
 naho amo mpitahebokeo
 t'IEHOVÀ i Màroy
 naho amy ze hene mitoabotse;
 fa songa harèke;

13 naho amo mendorave'
 i Lebanon[‡] iabio,
 o miligiligy amboneo,

naho amo kile' i Basane[§] iabio,

14 naho amo vohitse abo iabio,
 naho amy ze hene haboañe mionjoñe,

15 Naho amo tilik'abo iabio,
 naho amo fahetse matahetseo,

16 Naho amo hene sambo' i Tarsiseo,
 vaho amo sare mahafalefaleo.

17 Habotreke ty fitoabora' ondaty,
 le haketrake ty fitrotroabora'ondatio;
 IEHOVÀ avao ty honjoneñe amy andro zay.

18 Vata'e hasiots'añe o hazomangao.

19 Himoak' an-davan-damilamy ao ondatio, naho an-dakato an-tane ao,

[†] **2:6** Pilisty: Mpimoneñe an-kialo [‡] **2:13** Lebanon: rame fisy [§] **2:13** Basane: am-pamotsy ao; ami'ty tsifa ao

ami'ty fañeveñañe am' IEHOVÀ,
naho ami'ty engem-bolonahe'e,
ie hiongake hañozoñozoñe ty tane toy.

²⁰ Amy andro zay, le haria' ondatio

amo sorao naho amo kananavio
o hazomanga volafoty naho
o hazomanga volamena

nitsenè' iareo ho fitalahoñaeo.

²¹ Hitsifira'e an-tseram-bato ao,
naho am-bato tringitringieñe ao,
amy fihondrahondra'e am' IEHOVÀy,
naho amy engem-bolonahe'ey,
ie miongake hañozoñozoñe ty tane toy.

²² Ko iatoa'o ondatio,

o mikofòk' an-doak'oro'eo:
fa ho volilien-ko inon-dre?

3

¹ Hehek' arè te
afaha' IEHOVÀ TALÈ' i màroy
am' Iehodà naho am' Ierosalaime
ty fitoñoñe naho ty kobay,
ze mahakama an-driha ao iaby,
naho ze hene haja rano,

² Ty fanalalahy naho ty lahindefoñe,
ty mpizaka naho ty mpitoky,
ty mpisikily naho ty androanavy,

³ Ty mpifeleke limampolo
naho ty manan-kasy,
ty mpanolo-kevetse,
ty kalitake vaho
ty mahay lañonañe.

⁴ Ho tolorako ajaja ho roandria'e,
ho felehe' o anak'ajajao iereo.

⁵ Ho forekekèñe ondatio,
sindre ondaty ami'ty ilae'e,
songa ami'ty rañe'e
hijiajia amo androanavio ty ajaja,
naho amo vañoñeо ty tembo.

⁶ Le hangazoñe t'indaty ty rahalahi'e
añ'anjomban-drae'e ao:
Manan-tsikin-drehe: feheo zahay,
le angao ho ambane' fità'o eo
ty fianto toy.

⁷ Hifanta amy andro zay re:
Zaho tsy ho mpanaha;
amy te tsy ama-mahakama
ndra saroñe ty an-trañoko ao,
aa le ko ampifehè'o ahy ondatio.

⁸ Amy te nikoletra t'Ierosalaime
nihotrake t'Iehodà: songa mandietse IEHOVÀ
ty fameleke naho ty fitoloñañe,
hanigike o fihainon-enge'eo.

9 Manisý iareo ty vintan-dahara' iareo;
 ie misenge hakeo manahak' i Sedome, tsy aeta' iareo.
 Hekoheko amo tro' iareoo,
 fa nikai-kañkàñe am-bata'e.
 10 Misaontsia amo vantañeo ty hoe, Soa!
 fa ho kamae'e o vokam-pitoloña'eo.
 11 Feh'ohatse amo lo-tserekeo: ho silofeñe:
 fa havahañe ama'e o satam-pitá'eo.
 12 Le ty am'ondatikoo, ty ajaja ro TALÈ'e,
 naho ampela ro mpifeleke.
 O ry ondatikoo, ampandilare'
 o mpifehe'areoo,
 abotse'iereo o lala ho norihe'areoo*.
 13 Miongake t'IEHOVÀ hitaroñe,
 mijohañe eo hizaka ondatio.
 14 Ho zakae' IEHOVÀ
 o androanavi'ondati'eo
 naho o roandria'eo;
 Amy te nabea' areo
 i tanem-balobokey;
 añ'anjomba'areo ao o tinavañe
 amo rarakeo.
 15 Ino ty atao' areo,
 kanao mampidemoke ondatikoo,
 vaho mandisañe ty lahaba' o rarakeo?
 hoe ty nafè' IEHOVÀ TALÈ' i màroy.
 16 Mbore tinovo' IEHOVÀ ty hoe:
 Kanao mitoandratoandra
 o anak'ampela' i Tsioneo,
 naho miebotsebotse
 am-bozo midagaritse
 naho ama-maso mikiroke,
 ie mitsapiotsapiok' am-piotroñañe,
 vaho am-pikantsakantsañañe
 ty tombo' iareo,
 17 le ho silofe' i TALÈ lañao
 ty an-gadon-doha'
 o anak'ampela' i Tsioneo†,
 vaho habora' IEHOVÀ ty fimeñara' iareo.
 18 Hafaha' i TALÈ amy andro zay
 o mohara soa' iareo mikoriñeo,
 o ravak' an-doha'eo,
 o tsiandetse bontolio,
 19 o rojoo, o bangebangeo
 o saron-doha mihofahofao,
 20 o satro-beio, o ravam-pandiao,
 o ravan-dohao,
 o fibandian'arañañe, o kiviroo,
 21 o bangeo naho o kavin' oroñe,
 22 o saravio, naho o salampiñeo,
 o kitambio
 naho o haro-pitintiñañe,

* 3:12 Ies 9:16 † 3:17 Tsioneo: Fitiahiañe; naonjoñe; lonake

²³ o hetsoroo, o lamba leny marerarerao,
o sabakao vaho o tsingararakarakeo.

²⁴ Ho tondroke te ho limbeze' ty fitrotrotse ty harifondrifoñe;
handimbe ty fiètse ty hafotse;
handimbe ty volo mirandra ty loha peake;
handimbe ty marerarerera ty gony;
hisolo ty montramontra ty soba.

²⁵ Ho zamaneñe am-pibara o lahilahi'oo,
an-kotakotak' ao o lahindefo'oo.

²⁶ Handala naho hangololoike
o lalam-bei'eo;
ho farien-dre le hitozoke an-tane eo.

4

¹ Amy andro zay, ho fihine' ty rakemba fito ty lahilahy, hanao ty hoe:
Ty mahakama'ay avao ty ho kamae'ay,
naho ty saro'ay avao ty hiombea'ay;
fe angao ho tokaveñe ami'ty tahina'o
zahay, hañafahañe ty hasalara'ay.

² Ho fanjaka naho hanañ'engeñe
ty tora-mionjo' IEHOVÀ amy andro zay,
vaho ho fisengeañe naho volonahe'
ty nibotitsike am'Israele* ty voka' i taney.

³ Ho tondroke te hatao miavake
ze sehangae'e amy Tsione ao naho
ze honka'e am' Ierosalaime ao,
eka, ze hene sinokitse ho veloñe
e Ierosalaime ao,

⁴ ie fa sinasa' i TALÈ
amo anak'ampela' Israeleo
ty haleora'e;
naho fa nimongore'e ty lio'
Ierosalaime boak' aña'ate'e ao
ami'ty arofon-jaka naho
ami'ty arofom-piforehetañe.

⁵ Le hanoe' IEHOVÀ ambone'
ze akiba ambohi' i Tsione eo naho
ambone' o firimboña'eo ty rahoñe
an-katoeñe te handro,
vaho ty fireandreañ' afo milebaleba te haleñe;
le ho ey ty lafike[†] ambone' o engeñe iabio.

⁶ Le ho eo ka ty bandrabandra naho antoandro amy hatrevohañey,
naho fipalirañe vaho fitampinañe
ami'ty tio-bey naho amo oraño.

5

¹ Ho bekoeko i kokoakoy,
toe beko' i rañeko,
ty amy tanem-balobo'ey,
Aman-tanem-bahy ankaboan-
kobokara añe i kokoakoy.

² Nitrabahe'e, nahoro'e boak'ao o vato'eo,

* ^{4:2} Ioe 3:5, Oba 1:17 † ^{4:5} Heb: Hopa: fialofa'e naho i engavao'ey

naketsa'e ao ty vahe soa-joboñe,
 rinanji'e tilik'abo an-teñateña ao,
 vaho nitsenea'e fipiritan-divay:
 le nitamà'e valoboke,
 f'ie namokatse valoboke vilañe.

³ Ie henane zao ry mpimoneñe e
 Ierosalaime ao, ry ondati' Iehodào,
 ihalaliako : mizakà añivoko naho
 i tondam-balobokoy.

⁴ Ino ka ty hanoako
 amy tetem-bahekoy,
 ze mboe tsy nanoako?
 Ie nitamàko hamokatse valoboke
 soa, ro nañomey valoboke lo?

⁵ Aa ie zao, hampahafohineko anahareo
 ty hanoako amy tanem-bahekoy;
 hombotako i fahe'ey, le horoañe;
 le harotsako ambane i kijoli'ey,
 ho lialiña.

⁶ Hampangoakoaheko,
 tsy ho birabiraeñe, tsy havaeñe ka;
 fa hitirian-kisatse naho fatike:
 ho lylieko ka o rahoñeo
 ty tsy hampahavy orañe.

⁷ Ty anjomba'Israele,
 ty tondam-bahe' IEHOVÀ' i Màroy,
 ondati' Iehodào, i hatae ifalea'ey,
 nipay to re fe nizò fanjamanañe;
 nitsoeke havañonañe fe inao ty kaikaike.

⁸ Hankàñe amo mampifanoitoy
 kibohotse an-kivoho,
 naho tonda toen-tetekeo,
 ampara' t'ie tsy malalake,
 vaho bangy rehe añivo' i taney.

⁹ Amo sofikoo ao! hoe t'IEHOVÀ' i Màroy,
 Toe maro ty anjomba ho kòake,
 ty jabajaba naho ty fanjaka
 tsy ho ama' ondaty.

¹⁰ Eka, hamokatse sajoa raike
 ty tanem-bahe folo lasarý,
 le hahafoe tsikotoke raike
 ty tabiry zahetse raike.

¹¹ Hekoheko amo mitroatse handro
 hitolon-kamamoñaño;
 o mihenekeneke halem-bey
 ampara' t'ie solebareñ-divaio.

¹² Amo takataka' iareo
 ty marovany naho ty mandolina,
 ty fikantsakantsàñe vaho ty divay:
 fe tsy oni'iareo ty sata' IEHOVÀ,
 mbore tsy ereñere' iareo
 o fitoloñam-pità'eo.

¹³ Aa le misese mb'an-drohy ondatikoo,

amy te po-hilala,
salikoeñe o androanavi' iareoo,
vaho miforejeje ami'ty hataliñiere'e
ty valobohò' iareo.

¹⁴ Aa le nienatse ty fañiria' i tsikeokeokey,
nigorobahe'e ty vava'e tsy taka-zeheñe;
hijoloboñe ao ty enge' iareo,
ty fivoamboa'e, ty fikoraha'e,
rekets' i mirebekey.

¹⁵ Haketrake ty fokonon-tsoa,
harèke ty fanalolahy,
vaho hampiambaneña ty fhaino'
o mievotsevotseo:

¹⁶ Ty hatò ro añonjonaña
IEHOVÀ' i Màroy,
ty havañonaña ro añamasiñaña
i Andrianañahare Masiñe.

¹⁷ Hierañeraña am-piandrazaña ao
o anak'añondrio,
naho hihinaña amo tete-
lovodovo' o vondrakeo ty mpirererere.

¹⁸ Feh'ohatse amo mpikozozo-kakeo
an-taly hòakeo,

naho o tahiñeo hoe an-talin-tsarete:
¹⁹ Ie manao ty hoe: Ee t'ie halisa,
hanaentaeña i fitoloña'ey,
hahaoniña'ay aze,
le ee te hitotoke eo ty fanoroa'

i Masi' Israeley
homb'etoy hahafohina'ay Aze!

²⁰ Hekoheko ami'ty manao te raty ty soa, naho soa ty raty,
o misolo ty ieñe ho hazavàña
naho ty hazavàña ho ieñeo;
o manao ty mafaitse ho mamy
vaho ty mamy ho mafaitseo.

²¹ Hankàña amo mahihitse
am-pahaoniña'eo*,
naho o mahilala am-pahaisaha'eo!

²² Feh' ohatse o fanalolahy am-pinon-divaio, naho ondaty maozatse
am-pampilaroaña toakeo;

²³ ie mañatò ty lo-tsereke
hahazoam-bokàña
vaho mañafake ty havañona'
o vantañeo!

²⁴ Aa le manahake ty fipiloran-afó
ty ahetse,
naho ty fampibotseha' ty lel'afó
ty kafokafo'e,
ty hañamomohaña ty vaha' iareo,
vaho hiboele hoe deboke o voñe' iareoo;
fa napo' iareo ty Hà' IEHOVÀ' i Màroy,
naho nimavoe' iareo

* 5:21 Rzs 3:7

ty nafè' i Masi' Israeley.

²⁵ Toly ndra miforoforo am' ondati'eo
ty haviñera' IEHOVÀ,
naho natora-kitsi'e am' iereo ty fità'e,
naho trinabotrabo'e;
nihondrahondra iaby o tambohoo,
natao litsake an-dalambeey eo
ty lolo' iareo.

Amy hoe zay iaby
mbe tsy nivike ty haviñera'e,
vaho mbe mihiity avao ty fità'e.

²⁶ Hañonjo kobaiñe amo kilakila ondaty tsietoitaneo Re,
naho hifioke ama'e boak'
añ'olo-ty tane toy añe, le hehe,
hiherereake mb'etoy masika.

²⁷ Tsy ho am' iereo ty ho mokotse
ndra hitsikapy;
tsy eo ty hiroro ndra hirotse;
tsy habalake ty sadiam-bania' iareo,
vaho tsy hianto ty fihilin-kana' iareo;

²⁸ Masioñe o ana-pale'eo,
fonga mivohotse o fale'eo,
hoe vato-pilake o tombon-tsoaval'a'eo,
vaho talio o larò'eo;

²⁹ Hirohake hoe liona vave iereo,
hiroharoha hoe anan-diona,
Eka, mitrè iereo mitsepake i horoñeñey,
naho hendese'e añe,
ie tsy amam-pandrombake.

³⁰ Hitròñe amy andro zay iereo, manahake ty fitròña' i riakey,
ie mahaisake i taney,
heheke ty hamoromoroñañe,
naho faloviloviañe,
ndra i hazavañey
ro ampigodoñen-drahoñe.

6

Ty Vohi'IEHOVÀ

¹ Tamy taoñe nihomaha' i Oziày, le nitreako miambesatse am-piambesatse abo naho nonjoneñe t'i TALÈ vaho naaatseke i anjombay ty saravi'e. ² Nijohañe ambone'e ey o seràfeo*; songa aman' elatse eneñe, ty roe nanakoñe ty lahaba'e, ty roe nanaroñe o fandia'eo vaho nitiliñe ty roe. ³ Ie nifampikoike ty hoe : Masiñe, masiñe, masiñe, t'IEHOVÀ' i Màroy; lifotse ty enge'e ty tane bey toy. ⁴ Nampiezenezeñe o tokonañeo i feonkoike, vaho natsafe' ty hatoeñe i anjombay.

⁵ Le hoe raho, Hankàñe amako, rebake, fa ondaty maleo-tsoñy, vaho añivo' ondaty maleo-pivimby ty itobohako; fa nahatre a i Mpanjakay, IEHOVÀ' i Màroy, o masokoo. ⁶ Nitiliñe mb' amako amy zao ty seràfe ninday vato mirekake am-pitâ'e, ie rinambe'e an-tsadrò boak'amy kitreliy ao, ⁷ le

* **6:2** Serafe:anjely ambane' lohà' o kerobeo

natoho'e ami'ty soñiko naho nanao ty hoe: Hehe, tinoho' ty raha toy o fivimbi'oo, vaho finaoke o tahi'oo.

⁸ Tsinanoko ka ty fiarañanaña' i TALÈ nanao ty hoe: Ia ty hiraheko, vaho ia ty homb'eo ho anay? Le hoe raho: Intoy raho; iraho! ⁹ Le hoe re: Akia, le saontsio am'ondaty retoañe:

Toe mijanjiñe nahareo fe sy mahafohiñe,
mañente fe tsy mahaoniñe.

¹⁰ Ampibobòho ty arofo' ondaty retoa,
le ampivalagìño o ravembia' iareoo,
akipeo o fihaino' iareoo;
tsy mone hahaisake o fihaino' iareoo,
naho hitsendreñe o ravembia' iareoo,
naho hahafohiñe o arofo' iareoo,
vaho himpoly ho jangañeñe.

¹¹ Le hoe raho:
O TALÈ, pak'ombia?
Le hoe ty natoi'e:
Ampara' te kòake o rovao
tsy amam-pimoneñe,
naho tsy ama'ondaty o anjombao,
vaho vata'e ratrаратra i taney,
¹² ie fa naveve' IEHOVÀ aña ondatio,
vaho maro ty toetse hoakoake
añivo' i taney.
¹³ Aa ndra te i faha-folo'ey ro sehanga'e,
mbe habotseke avao;
fe manahake te mbe eo ty foto'
o mendoraveñeо naho o kileo
t'ie firañe,
le i tiry miavakey ty ho foto'e.

7

¹ Tondroke tañandro' i Akhaze ana' i Otame, ana' i Ozià, mpanjaka' Iehodà, te nionjoñe haname Ierosalaime t'i Retsine* mpanjaka' i Arame† naho i Pèkae‡ ana' i Remaliàho§, mpanjaka' Israele, f'ie tsy naharotsake aze. ² Natalily amy anjomba' i Davidey ty hoe: Nitraok' amy Efraime t'i Arame. Le ninevenevetse ty arofo'e naho ty arofo' ondati'eo, manahake ty fañezenezeñan-tioke o hatae aña'lao.

³ Aa le hoe t'IEHOVÀ am'Iesaià, Akia henaneo, mifanalakà amy Akhaze, ihe naho i Sear'iasobe* ana'o, am-pigadoña' ty talaha' i antara amboney, an-damo' i tondam-panasay eo; ⁴ le isaontsio ty hoe:

Mitaoa, mianjiña, ko hembañe,
ko mangonotse
ty amy foroha mahatoeñe roe rey,
ami'ty fidabadoà' i Retsine
rekets' i Arame,
naho ty ana' i Remaliaho.

⁵ Amy fikiniàn-draty nanoe' i Arame
naho i Efraime

* ^{7:1} Retsine; mpañitrike talily; soa fisatria † ^{7:1} Arame: enge, ty mpamañahy; fatse ‡ ^{7:1} Pekae: i mpanokakey; ie midada § ^{7:1} Remialaho: ty fañonjonañe IEHOVÀ * ^{7:3} Sear'iasbe: himpoly o nisisao

vaho ty ana' i Remaliaho ama'oy,
ami'ty hoe:

⁶ Antao hionjoñe haname Iehodà,
hampalovilovy aze,
hamakian-tika jeba
vaho hatroan-tika ty ana' i Tabeale[†]
ho mpanjaka añivo'e ao.

⁷ Hoe t'IEHOVÀ TALÈ: Tsy hitroatse re,
vaho tsy ho tondroke zay.

⁸ I Damesèke[‡] ty loha' i Arame,
I Retsine ty loha' i Damesèke;
(le añate ty taoñe enim-polo
lim' amby ty hikorovoha'
i Efraime tsy ho ondaty ka;)

⁹ Fehe' i Someròne[§] t'i Efraime,
le fehè' ty ana' i Remaliaho ty Someròne.
Aa naho tsy gañe ty fatokisa'areo,
le toe tsy hioreñe.

¹⁰ Aa le nitsara amy Akhaze indraike t'IEHOVÀ nanao ty hoe:

¹¹ Mihalalia viloñe am'IEHOVÀ Andrianañahare'o;
ke ami'ty halale' i tsikeokeokey,
he ami'ty haabo i likerañey.

¹² Aa hoe t'i Akhaze: Zaho tsy hihalaly, tsy hitsoke IEHOVÀ. ¹³ Aa le hoe
re:
Janjiño arè ry anjomba' i Davide :
Loho kede ama'areo hao ty hanosotse ondaty, kanao tsohe' areo ka
ty fahaliñisan' Añahareko?

¹⁴ I TALÈ arè ro hanolo-biloñe anahareo:
Heheke! hiareñe i somondraray,
naho hitoly ana-dahy,

vaho hatao'e Imanoele* ty añara'e.

¹⁵ Habobo naho tantele ty ho hane'e
ampara' te fohi'e ty mikiho ty raty,
vaho hijoboñe ty soa.

¹⁶ Aolo' ty haharendreha' i ajajay
ty hitribahatse ty raty, hijoboña'e ty soa,
le ho farieñe ty tane' i mpanjaka roe irevendreveña'o rey.

¹⁷ Hasese' IEHOVÀ ama'o naho am'ondati'oo
naho aman' anjomban-droae'o
ty mpanjaka' i Asore,
ami'ty andro mbe lia'e tsy nifetsake sikal'ami'ty nienga' i Efraime t'Iehodà.

¹⁸ Ho tendreke amy andro zay
te ho tiofe' IEHOVÀ i laletse
añ'olo' i saka' i Mitsraimey[†]
naho i rene-tantele an-tane' i Asorey.

¹⁹ Homb'eo iereo hipetake
amo goledoñe bangiñeо naho
an-tsifi' o vatoo naho
amy ze atao fatike vaho

[†] 7:6 Tabeale: Andrianañahare soa [‡] 7:8 Gony pea lio; hoe afó mirebareba [§] 7:9 Somerone:
vohi-pijilovañe ^{*} 7:14 Imanoele: Andrianañahare-Amantika [†] 7:18 Mitsraime: Egípte,
mpamorekeke

amo tane fiandrazañe iabio.
²⁰ Amy andro zay, le ho hitsifa' i TALÈ
 ami'ty fiharatse nikaramae'e boak' alafe' i Sakay aña,
 (i mpanjaka' i Asorey 'nio),
 ty maroin'añambone naho ty volon-tomboke, vaho hafaha'e ka ty tanteahetse.
²¹ Ho tondroke amy andro zay te
 hihare kiloa raike
 naho añondry roe t'indaty;
²² Eka, ho tendreke te,
 ami'ty hamaro ronono homei'e
 le hikama deron-kabobo re;
 toe hikama habobo naho tantele
 ze hene sehangae amy taney.
²³ Ho tondroke amy andro zay te ze toetse amam-bahem-baloboke arivo,
 mañeva volafoty arivo,
 ty ho hisatse naho fatike avao.
²⁴ Hinday fale rekets' ana-pale
 ze homb'eo, amy te
 ho ropiteke naho fatike avao i taney.
²⁵ Ze hene tamboho nitrabahe' ty fangaly taolo le tsy homba'o ami'ty
 fatahora'o fatike naho ahe-draty,
 le ho fiandrazan' añombe
 naho fandialiàn' añondry ty ao.

8

¹ Le hoe t'IEHOVÀ amako: Mandrambesa takelake bey vaho sokiro an-tsokitse lahi'e ty hoe:

Malisa ty fikopake,
 masika ty tsindroke,
² le ho rambeseko ho amako
 ty valolombelo matoe hamolily,
 i Orià* mpisoroñe
 naho i Zekarià† ana' Ieberekiaho‡.

³ Aa le nimb'amy rakemba mpitokiy raho; niaren-dre vaho nisamak' ana-dahy. Le hoe t'IEHOVÀ amako, Itokavo ty hoe Maher-salal-kas-baze§, ⁴ amy te aolo' ty aharendreha' i ajajay ty hikoike ty hoe 'Raeko' naho 'Reneko,' le fa nasese' i mpanjaka' i Asorey aña ty vara' i Damesèke naho ty fikopahañe i Somerone. ⁵ Nitsara amako indraike t'IEHOVÀ nanao ty hoe:

⁶ Kanao nitsambolitio'ondaty retiañe
 ty rano' i Siloake* mitsirtsioke moray,
 vaho mirebeke amy Retsine
 naho ty ana' i Remaliaho;

⁷ Inao arè te hampandipore' i TALÈ am'iareo ty rano' i Saka
 maozatse naho beiy:
 i mpanjaka' i Asorey amy ze hene enge'e; hanginahina amo talaha'e iabio,
 hitoabotse ambone' ze hene fitroara'e;

⁸ Hifaoke mb'e Iehodà re,
 handopatse vaho hiranga mb'eo,
 Eka ho takare'e ty fititia; hibànatse hañatseke i tane'oy

* **8:2** Orià: IEHOVÀ ro fañiloko † **8:2** Zekarià, he Zakarià: ty fitiahiañe IEHOVÀ ‡ **8:2**
 Ieberekiaho: mitongaleke am' IEHOVÀ § **8:3** Maher-salal-kas-baze: oniño ty and. 1 * **8:6**
 Siloake, tsampa, fialia, kalan-defo

ami'ty fivela' o ela'eo, ry Imanoele.

⁹ Mijeñajeñafa ry ondaty; Midemoha!

Manolora ravembia,

ry an-tsietoitane añe;

miteveha sadia f'ie ho demoheñe;

misadia fe ho demoheñe;

¹⁰ Misafiria safiry, fe tsy hanjofake;
mañotsohotso firefeañe, f'ie tsy hijadoñe
fa ama'ay t'i Andrianañahare.[†]

¹¹ Nametse amako t'IEHOVÀ
am-pitâ'e maozatse,
nañeretse ahy tsy hanjotike
ami' ty lala' ondaty retiañe, ami'ty hoe:

¹² Ko ano ty hoe: 'Kilily,'
o raha iaby atao' ondaty
retiañe ho fikililiañeo;
ko hembañe'o ty fihembaña' iareo,
le ko ihebakebaha'o.

¹³ Hamasiño t'IEHOVÀ' i Måroy,
ie ty ihembaña' areo,
ie ty añaeveña' areo.

¹⁴ Ho fitsolohañe re,
fe ho vato fikotroforañe
naho lamilamy fitsikapiañe
amy anjomba roe' Israele rey;
ho fandrike naho koboñe
amo mpimoneñe e Ierosalaimeo.

¹⁵ Hitotohitse ty maro, hikorovoke
ho sèrañe, ho fandriheñe vaho ho tsepake.

¹⁶ Vahoro i fañinay,
liteo ho a o mpiamakoo ty fañòha'e.

¹⁷ Le handiñe IEHOVÀ raho,
I mañeta-daharañe amy anjomba'
Iakobey: Ama'e ao ty fitamàko.

¹⁸ Intoy raho naho o anake natolo'
IEHOVÀ ahikoo!
Viloñe naho halatsañe e Israele atoy
boak' am' IEHOVÀ' i Måroy,
I mimoneñe am-Bohi-Tsioney.

¹⁹ Ie sigihe'iereo ami'ty hoe: Ipaiao amo jinio naho amo doany
miñeñeoeñoñe naho mitreontreoñe; Aa tsy ho paiae' ondatio hao t'i
Andrianañahare'e? Hantsaka fañahin-dolo hao o veloñe? ²⁰ Mb'an-Kàke
naho i fañinay! Naho tsy milahatse ami'ty tsara toy ty enta' iareo, le tsy
nanjirihan' andro. ²¹ Hiranga aze iereo, am-poheke naho hasalikoañe,
aa ie milingoa, le ho boseke vaho hamatse i mpanjaka' iareoy naho
ty 'ndrahare' iareo. Aa ke hiandranda iereo, ²² hera hitolike an-tane,
le haronje am-paloviloviañe naho am-pigodoñañe, an-kamoromoroñañe
naho an-kaferenaiñañe vaho añ' ieñe ao.

²³ Ie amy zao, tsy ho an-kamoromoroñañe ao ka i naloviloviy;
nimavoe'e ty tane' i Zebolone
naho ty tane' i Naftale te taolo,
fe honjone'e ty enge'e añ'andro añe,

[†] 8:10 Heb: Imano El

le hampilifore'e volonahetse
ty an-dala' i riakey, alafe' Iordaneiy‡
amy Galilà§' o kilakila' ndatioy.

9

- ¹ Mahaoniñe failo ra'elahy
ondaty midebedebe an'ieñeo;
mireandreañe amo mpimoneñe
an-kamoromoroñañe i hazavàñey.
- ² Fa nampitomboe'o i fifeheañey,
fa nonjone'o ty firebeha' iareo;
mandia-taroba ama'o iereo manahake
ty hafaleañe an-tsan-kavokarañe,
naho ty firoharoha' o lahindefoñe
mizara ty nikopaha' iareoo.
- ³ Fa pinoza'o i joka fijinia' ey,
naho ty boda an-tsoro'e eo,
vaho ty kobaim-pamorekeke aze,
manahake tañ'andro' i Midiane*.
- ⁴ Le ze hana nikodokodoy
am-pidabadoà'e,
ze saroñe navarimbariñ'an-dio,
le hatao firehetse, fanodorañ'añ'afó.
- ⁵ Fa samake ho antika ty Ajaja,
natolots'antika ty Ana-dahy,
antsoro'e eo ty fifeheañe;
ty fanoñonan-tahina'e le:
Mpañoke Fanjàka,
Andrianañahare Tsitongerè,
Rae Nainai'e,
Roandrian-kanintsiñe.
- ⁶ Tsy ho modo ty fitomboa' i
fifeleha'ey naho ty fierañerañañe
amy fiambesa' i Davidey
naho amy fifehea'ey†,
hañoreñ' aze vaho hampijadoñe aze
an-kavantañañe naho havañonañe,
henane zao ho nainai'e donia;
ty fahimbaña' IEHOVÀ' i Màroy
ro hañeneke zay.
- ⁷ Nañitrike tsara am'Iakobe t'i TALÈ
le nivotrak' am' Israele eo.
- ⁸ Fohi' ze hene ondaty;
toe i Efraime vaho o mpimoneñe
e Someroneo,
ie manao am-pirengevohañe naho
fitrotroabohañe ty hoe:
- ⁹ Fa nirotsake o birìkeo,
f'ie ho rafite'ay am-bato vinàñe;
fa finira o sakoañe,
f'ie ho soloa'ay mendoraveñe.

‡ 8:23 Iordane : sakam-pizakañe § 8:23 Galilà : larò; fivarimbariññañe * 9:3 Midiane: zaka;
saroñe † 9:6 Ies 16:5, Sab 2:1-12,45:6, Milk 5:2, Lk 1:32

10 Aa le hatroa' IEHOVÀ o rafelahi'eo
hiatatre i Retsine;
vaho havitra'e ho raike o malaiñ'azeo,
11 ho atiñanañe ey o nte-Arameo
naho ahandrefañe ey o nte Pilistio‡;
vaho habotse' iareo am-palie mitañataña t'Israele.
Ie amy zay iaby mbe tsy mivio
ty haviñera'e,
fa mbe mitora-kitsy ty fità'e.
12 Fe mboe tsy mitolike amy
Mpandafa' iareoy ondatio,
vaho mboe tsy nitsoehe' iareo
t'IEHOVÀ' i Måroy.
13 Aa le ho kitsife' IEHOVÀ
ami'ty andro raike
ty loha naho ty rambo' Israele,
ty ran-tsatrañe naho ty vinda.
14 Ty androanavy naho ty iasiañe
ro lohà'e;
ty mpitoky mañòke vande:
ie ty rambo'e.
15 Amy te mampandilatse ondaty retoa
o mpinday iareoo§;
vaho najoroboñe o endese' iereoo;
16 Aa le tsy ifalea' i TALÈ o ajalahi'iareoo,
vaho tsy ho tretreze'e
o bode-rae naho vanto' iareoo;
fa songa tsy aman-Kake, tsy yokatse,
fonga hagegeañe ze asam-palie'e.
Amy hoe zay iaby
mboe tsy mitolike ty haviñera'e,
naho mbe mitora-kitsy ty fità'e.
17 Misolebotse hoe afo ty hatsivokarañe;
forototoe'e iaby ty fatike
naho ty hisatse;
eka, mimiañe añ'ala matahetse ao,
vaho mivarimbariñe mb'an-dindiñe ey
an-katoeñe mijoala.
18 Ty amy fombo miforoforo' IEHOVÀy, hotomomoke i taney;
naho hoe famahañan'afó avao ondatio,
leo raike tsy mandrombake
an-drahalahi'e.
19 Apitso' ty raike ty fità'e havana;
abotse'e ty fità'e havia, f'ie tsy eneñe;
songa avorembore' ty nofon-tsira'e ondatio,
20 Agedra' i Menasè t'i Efraime;
vaho i Efraime t'i Menasè;
itraofa' iareo fiatrehke Iehodà.
Ie amy hoe zay iaby
mboe tsy mitolike ty haviñera'e,
naho mbe mitorakitsy ty fità'e.

‡ **9:11** Pilistio: o mpimoneñe an-kialoo § **9:15** Ies 3:12

10

¹ Hankàñe amo manampa-pepètse tsivokatseo,
naho o mampipatetse famorekekeeañeo;

² Ty mampivike o misotrio
tsy hahazoa'e to,
vaho mitavaña ty zo' o rarake am'on datikoo,
hihaofa' iareo o vantotseo,
hitsatsà' iareo o bode-raeo!

³ Aa le ino ty hanoe' areo
amy androm-pitilihañey,
naho amy hekoheko hifetsake boak'añey?
fa hipay imba ama'ia nahareo?
vaho hapo' areo aia ty vara' areo?

⁴ Ino ty hanoeñe,
naho tsy hitsilofiñe amo tsinepakeo,
ndra hitsingoritritse amo vinonoo?.
Amy hoe zay iaby,
mboe tsy mitolike ty haviñera'e,
mbore mbe mitora-kitsy ty fità'e.

⁵ O Asore, kobain-kaviñerakoo,
ry dodan-katorifihako am-pità' iareoo:

⁶ Hiraheko haname ty fifeheañe
tsy vokatse,
hafantoko am'ondaty iviñerakoo, hikopaha'e naho hitsindroha'e vaho
handialia'e hoe fotake an-dalaña eo.

⁷ Tsy apota'e zay,
toe tsy am-pitsakorean-tro'e;
fe ty handrotsake ro firefea'e,
ty hañito fifeheañe maro.

⁸ Fa hoe re: Tsy songa mpanjaka
hao o roandriakoo?

⁹ Tsy hambañe amy Karkemise*
hao ty Kalnè†?

Naho amy Kamate‡ ty Arpade§?

Vaho amy Damesèke ty Somerone?

¹⁰ Manahake ty nitakaran-tañako
o borizaña an-tsamposampo tsieo,
ie maro te amo hazomanga e
Ierosalaime naho e Someroneo.

¹¹ Aa tsy hanoeko am' Ierosalaime naho
o hazomanga'eo hao,
ty nanoeko amy Somerone reketse
o hazomanga'eo?

¹² Aa le ho tondroke te
ie nihenefa' i TALÈ
ty fitoloña'e am-bohi' i Tsioney eo
naho am' Ierosalaime eo,
le hanao ty hoe:
Ho liloveko o vokan' arofo
irengevoha' i mpanjaka' i Asoreio

* **10:9** Karkemise: rova' i mpañambaney † **10:9** Kalnè: ty fahafonirantika; vata'e ie avao

‡ **10:9** Kamate: haviñerañe, fiforoforoñañe; kijoly § **10:9** Arpade: ty hazavam-pijebañañe

naho o engen-dahara'e mievoñevoñe,

¹³ ami'ty nanoe'e ty hoe:

Ami'ty haozaran-tañako naho ami'ty hihiko ty nanoako zay,
toe mahilala raho;

fonga nafahako ty efe-tane'ondatio
naho nikamereko ty vara' iareo,
vaho nampitsingoro o mpimone' iareoo
hoe asam-panalolahy;

¹⁴ Le nitakaren-tañako manahake te
nitrañom-boroñe ty vara'

ze hene ondaty;

hoe fitontonan-atoly naforintseñe
ty nanontonako ty tane toy iaby;
tsy teo ty nañetseke elatse,
ndra nanoka-bava, ndra nivolañe.

¹⁵ Hiebotsebotse amy mitañ'azey

hao ty fekoñe?

Hitsingevongevo amy mandronje azey
hao ty lasý?

Manahake ty kobaiñe manjonjoñe
ty mivontitse ama'e,
naho ty fitoñoñe mañongake ty raha tsy hatae.

¹⁶ Aa le hañitrike haborokàñe amo
vondra'eo t'i TALÈ, IEHOVÀ' i Mâroy;
le ho viañeñe ambane' i enge'ey eo
ty hatomomohañe hoe afo mamorototo.

¹⁷ Hinjare afo ty failo' Israele

naho lel'afو i Masi'ey;
hiforehetse hampitomontoñe
o fati'eo naho o hisa'eo
añate ty andro raike.

¹⁸ Ty enge' i ala'ey

naho i tete'e kobokaray ty
hagodra'e stroke naho tsandriñe;
manahake ty finiha' t'indaty siloke.

¹⁹ Ho tsiampe ty hatae sisa añ'ala'e ao,
ndra ajaja ty hahavolily aze.

²⁰ Ho tondroke amy andro zay te tsy
hiato amy namofoke iareo ty sengaha'
Israele naho o nandrifitse amy
anjomba' Iakobeio;
fe IEHOVÀ Masi' Israele

ty hiatoa' iareo ami'ty hatò.

²¹ Himpoly ty sehanga'e, ty honka' Iakobe, mb'aman' Añahare Tsiton-
gereñe.

²² Fa ndra te mira ami'ty faseñe
an-driakey ondati'oo ry Israele,
ty sehanga'e avao ty himpoly;
fa fanjamanañe

lifo-kavañonañe ty tinendre.

²³ Famongorañe do'e, toe najadoñe,
ty hafetsa' i TALÈ, IEHOVÀ' i Mâroy,

añ'ivo i tane iabiy.

24 Aa le hoe t'i TALÈ, IEHOVÀ' i Màroy:
O ry ondatiko mpimoneñe e Tsioneo,
ko hembañe amy Asore,
ndra te fofohé'e an-doda,
naħo aňonjona'e kobay handafà'e azo
ami'ty sata' i Mitsraime.

25 Fa hanintsiñe aniany
o heloko miforoforoo,
vaho ho amy fandrotsahañe iareoy
ty habosehako.

26 Le ho tsekafe' IEHOVÀ' i Màroy ama'e
ty karavantsy,
manahake ty nanjamanañe i Midiane
am-bato' i Orebe^{*} aňe;
naħo ho ambone' i riakey ey ty kobai'e,
vaho honjone'e manahake ty nanoe'e amy Mitsraime.

27 Ie amy andro zay, hihintsáne tsy
ho antsoro'o eo ty kilanka'e,
naħo tsy ho an-kàto'o eo ty joka'e,
toe hipozake amy havondrahañey i jokay.

28 Fa nivotrak'e Aiate[†] re,
fa nirangae'e ty Migrone[‡];
e Mikmase[§] ao ty nampipoha'e
o harao'eo;

29 Nitsahe' iereo i hebam-bohitsey;
nialeñe e Gèbà^{*} aňe;
nihondrahondra t'i Ramae[†];
nibotafotse aňe ty Gibae[‡] i Saole[§].

30 Mampikoiaha feo
ry anak' ampela' i Galime^{*}:
manokilaña ravembia ry Laise[†]!
Ry Anatote[‡] mahaferenaiñe!

31 Fa nivoratsake ty Madmenae[§];
fa mitsoloke o mpimone' i Gebimeo^{*}.

32 Hitofa e Nobet[†] ao re te anito,
haňonjo-haok' amy vohi' i anak'ampela'
i Tsione an-kaboa' Ierosalaimey.

33 Eka, ho birae' i TALÈ, IEHOVÀ' i Màroy
an-kaviñerañe o tsampa'eo;
le ho firañe aňe o mijoalao,
vaho ho tomoreñe o mininginingio.

34 Ho fira'e am-biñe o ala matahetseo,
le hideboñe hoe fanalolahy t'i Lebanonie.

* **10:26** Orebe: Koake † **10:28** Aite: ora raike; fihaino; rano hanahana ‡ **10:28** Migrone:
hembañe; teteke; tretrake § **10:28** Mikmase: i mpadafay * **10:29** Gibà: tamboho; fitihike

† **10:29** Ramae: Naonjoñe; mierañerañe ‡ **10:29** Gibae: tamboho § **10:29** Saole: linily;
talaha; fihomahañe * **10:30** Galime: o mamotrio; o manaroñe † **10:30** Laise: Lione ‡ **10:30**

Anatote: toiñe; sabo; hararahañe § **10:31** Madmenae: habein-tolotse; ty fiherentseñañe sikiñe

* **10:31** Gebime: valala; haabo † **10:32** Nobe: lañonañe; fitokiañe

11

¹ Hitiry ami'ty foto' Iisày* ty singa'e,
vaho hitomiry boak'am-baha'e ty tora'e.

² Hipetak' ama'e ty Arofo' IEHOVÀ,
ty arofon-kihitse naho faharendrehañe,
ty arofom-panoroañe naho haozarañe,
ty arofon-kilala naho ty fañeveñañe
am' IEHOVÀ.

³ Ty fañeveñañe am' IEHOVÀ
ro mahafale ty arofo'e.
Tsy ty isam-pihaino'e ro hizaka'e,
tsy ty fijanjiñan-dravembia'e
ro hisafiria'e;

⁴ Fa an-kavantañañe
ro hizaka'e o rarakeo,
vaho an-kahiti'e ro handilia'e
o mpirèke an-tane atoio.
Ho lafae'e ami'ty kobaim-palie'e i taney,
le ho zamane'e ami'ty kofòm-pivimbi'e
o tsereheñeo.

⁵ Hidian-kamarentane ty vania'e
vaho hiteveke figahiñañe o toha'eo.

⁶ Hitrao-pimoneñañe ty marambolo
naho ty anak'añondry,
hiharo fandreañe ty farasy
naho ty anak'ose;
hifampireketse ty sarake
naho ty liona vaho ty vosy;
Anak'ajaja ty hiarake iareo.

⁷ Hitrao-pihinañe ty añombe rene'e
naho ty dobe[†];
hiharo fandreañe o ana' iareoo,
vaho hihota-ahetse manahake
ty añombe ty liona.

⁸ Hihisa ambonen-davan-dapetake
ty ajaja minono,
hajo' ty anak'ajaja an-doan-davam-boae ao ty taña'e.

⁹ Tsy ho amy vohiko miavakey iaby ty hijoy ndra ty hamono;
fa ho tsitsike ty faharendrehañe
IEHOVÀ ty tane toy,
manahake ty haatsa-drano' i riakey[‡].

¹⁰ Ie amy andro zay, hitroatse ho viloñe am'ondatio ty Vaha' Iesày,
le hipay Aze o Kilakila'ndatio,
vaho ho lifots'engeñañe ty toe-pitofà'e.

¹¹ Ho tondroke amy andro zay te
hahiti' i TALÈ fañindroe'e ty fità'e
hampolia'e ty sehang'a ondati'eo,
Ty henka' i Asore, naho
ty boake Mitsraime, naho
ty boake Patrose§, naho

* **11:1** Iisay: ravoravo; banabana † **11:7** Dobe: Biby romotse jabajaba ‡ **11:9** Kab 2:14

§ **11:11** Patrose: falie pea koba; t'ie ho rotsake

ty boake Kose*, naho
 ty boak' Elame†, naho
 ty boake Sinare‡, naho
 ty boake Kamate, vaho
 ty boak' amo tokonose andriakeo.

12 Le hampitroara'e viloñe o fifeheañeo,
 hatonto'e o naparatsake boak' Israeleo,
 vaho favori'e o naparaitake am' Iehodà hirik' an-kotsok' efa' ty tane toio.

13 Hisitake amy Efraime ty fihàña'e,
 naho haitoañe ty helo' Iehodà;
 tsy hitsikirike i Efraime t'Iehodà,
 le tsy hañembetse Iehodà t'i Efraime.

14 F'ie hitsirtsioke am-pivariña'
 o nte-Pilisty ahandrefañeo;
 hitrao-pamaoke o anan-tatiñanañe;
 songa hampitora-kitsie' iereo fitàñe
 t'i Edome§ naho i Moabe*;
 vaho hiambane am' iereo t'i Amone†.

15 Ho mongore' IEHOVÀ ty lela'
 i ria' i Mitsraimey;
 le ami'ty tio'e mae mihiboboke
 ty añelahelà'e ambone' i Oñey ty fità'e
 vaho ho fofohe'e ho torahañe fito,
 hampitsaha'e ondatio an-kana.

16 Le ho ami'ty sehanga ondati'e boak' Asoreo ty lalañe dinamoke,
 manahake tamy niakara' o ana' Israeleo
 i Mitsraime.

12

1 Ty hoe ty hatao'o amy andro zay :
 Mandrenge Azo raho, ry IEHOVÀ fa ndra t'ie niviñera'o,
 nivioñe aña ty fitrotrofiah'a'o,
 mbore nañohòa'o.

2 Toe fandrombahako t'i Andrianañahare;
 hiantoke raho le tsy ho hembañe,
 fa Ià*, IEHOVÀ ro haozarako naho saboko
 ie ro fandrombahañe ahy henaneo†.

3 Aa le an-kaehake ty itariha' areo o rano migoangoam-pandrombahañe.

4 Le ty hoe ty hatao' areo
 amy andro zay: andriaño t'IEHOVÀ, kanjio i Tahina'ey;
 ampahoniño o kilakila ondatio
 o fitoloña'eo,
 vaho taroño ty haandikera' i tahina'ey,

5 Misaboa am' IEHOVÀ,
 ty amo raha fanjaka anoë'eo;
 ehe te hene hahaoniñe zay
 o an-tane atoio.

6 Mipazapazaha, poñafo ty sabo,
 ry nte-Tsioneo,

* **11:11** Kose: nte-Etiopia; mainte † **11:11** Elame: ajalahy; somondrara; tangogo ‡ **11:11** Sinare:
 Itaoà i mirotsey § **11:14** Edome: mena, an-tane; ty ami'ty lio * **11:14** Moabe: aman-drae'e
 † **11:14** Amone: t'indaty; ty ana' ondatiko * **12:2** Ià: fampiboriañe ty hoe IEHOVÀ † **12:2** Avo
 15:2, Sab 118:14

amy te jabahinake añivo' areo ao
t'i Masi' Israele.

13

- ¹ Ty fetse nioni' Iesaià ana' i Amotse
ty amy Bavele*:
² Ampitroaro viloñe am-bohits'abo ey, ipoñafo feo,
mañelahelà fitañe, himoaha' iareo
an-dalam-bein-droandriañe ao.
³ Fa liniliko o neferakoo
naho kinoiko o manjofakoo,
o mahimbañe nahoh rototseo
ty amy habosehakoy.
⁴ Inay ty rehoreho am-bohitse eñe,
hoe ondaty mitozantozañe!
Inao ty fikoraha' ty fitontona' o
fifehea' o kilakila 'ndatio!
Tehafe' IEHOVÀ' i Màroy
o valobohòkeo hihotakotake.
⁵ Boak' an-tsietoitane aña iereo,
boak' am-pigadoña' i likerañey aña,
—IEHOVÀ, nahoh o fialiam-pifombo'eo—
handrotsake i tane iabiy†.
⁶ Mangololoiha;
fa antitotse ty andro' IEHOVÀ;
toe fandrotsahañe boak' amy
El-Sadai ty hivotraha'e;
⁷ Hene higebañe amy zao o fitañe,
vaho songa hitranake ty arofo' ondaty.
⁸ Hangebahebake iereo; hamihîñe iareo
ty hativontivoñe nahoh ty fisintosintoñe;
le hanahake ty fitsongoan-ampela
ty fanaintaiñà' iareo;
ho veren-draha hifampitorítotse;
ho tarehe mibelabela-afó ty lahara' iareo.
⁹ Inao, antitotse ty andro' IEHOVÀ,
hasarerahañe, filoroloro
nahoh fifombo miforoforo,
hampangotomomoke i taney,
vaho hamongotse
o lo-tsereke ama'eo.
¹⁰ Le tsy hañomey ty hazavà'e
o vasian-dikerañeo
nahoh o fitoboroña'eo,
ho maieñe i àndroy te manjirike,
vaho tsy hampaviahe' i volañey
ty hazavà'e.
¹¹ Ho liloveko ty tane toy
ty amo hakeo' iareoo,
o tsy vokatseo ty amo tahi' iareoo,
le haziko ty firengevoha'
o mpiebotsebotseo,

* **13:1** Bavele: hadabañe; filaroñañe † **13:5** Ies 24:1-23, 34:1-17, 63:1-19, 66:1-24

vaho hazevoko ambane ty fireñeta'
o mpamorekekeo.

12 Hanoeko loho sarotse ta ty volamena
hiringiri'e t'indaty;
le ambone' ty vongam-bolamena' i Ofirey‡ ondatio.

13 Aa le hampiezeñezeñeko o likerañeo,
naño hahifikifike tsy ho amy toe'ey
ty tane toy,
ty ami'ty fifombo' IEHOVÀ' i Måroy,
amy andron-kaviñera'e miloroloroy.

14 Ho tondroke amy zay t'ie hanahake
ty farasy rinoake
naño ty añondry tsy amam-pamory
sindre milay mb'an-tane'e mb'eo,
songa himpoly mb'am'ondati'eo.

15 Ho tomboheñe iaby ze zoeñe,
vaho hene hampikorovohem-pibara
ze tsinepake.

16 Ho demodemoheñe añatrefam-
pihaino'iareo o anak'ajaja' iareoo;
ho kopaheñe ty anjomba' iareo, vaho
ho vahorañe ty rakemba' iareo.

17 Eka, ho troboheko am' iareo
o nte-Madaio§,
o tsy mañaom-bolafotio;
ndra volamena tsy ifalea'e.

18 Ho trofrofahem-pale o ajalahio;
tsy ho ferenaiña' iareo
ty vokan-koviñe;
tsy ho tretrezem-pihaino'e o ajajao.

19 I Bavele amy zao,
i volonahe' o fifeheañey,
i fisengea' o nte-Kasdio* fanjakay:
le hanahake ty fandrotsahan'Añahare
i Sedome naño i Amorà.

20 Le lia'e tsy ho amam-pimoneñe,
vaho tsy hañialo ao
o tariratse mifandimbeo;
tsy hañoren-kivoho eo t'i nte-Arabe†,
tsy hamahetse goloboñe ao o mpiarakeo.

21 Toe ho fandrea' o fanalokeo;
ho àtseke ty ontsoñontsoñe
o anjomba' iareoo,
himoneñe ao o voron-tsatrañe,
vaho hitsinjake ao o lolo miogogoo.

22 Hañaoalo añ'anjomba-hara' iareo ao
o maràmboloo naño o amboa sirasirao
an-toe' iareo fanjakao;
fa antitotse ty amotoañañe aze,
vaho tsy haesoñe o andro'eo.

‡ **13:12** Ofire: tane kobokara § **13:17** Maday: fañaranañe; zaka; saroñe
kokolampa; ndra malaso † **13:20** Arabe: mihamaro; mitongy fiolâñe;

* **13:19** Kasdy: hoe

14

- ¹ Aa ie tretreze' IEHOVÀ t'Iakobe,
 naho joboñe'e t'Israele, vaho
 hampimoneñe'e an-tane' iareo eo;
 le hirekets' am' iereo ty renetane,
 hipitek' amy anjomba' Iakobey.
- ² Ho rambese' o kilakila' ndatio
 naho hasese'iareo mb'an-toe' iareo mb'eo;
 ie ho fanaña' i anjomba' Israeley
 ho mpitoroñe lahy naho ampela
 an-tane' IEHOVÀ ao;
 naho ho tsepahe'iareo
 o namahotse iareoo;
 vaho ho fehè' iareo o namorekeke iareoo.
- ³ Ho tendreke amy andro hampanintsiña' IEHOVÀ anahareo amo fiore-
 meña' areoo,
 naho amo haorea' areoo,
 naho amo fitromahañe
 namorekekeañañe anahareoo,
- ⁴ t'ie ho ente' areo amy mpanjaka'
 i Baveley aña ty tafatoño toy,
 ami'ty hoe:
 akore te nijihetse i mpamorekekey!
 naho nipendreñe i fidabadoañey!
- ⁵ Fa pinoza' IEHOVÀ ty fitoño'
 o lo-tserekeo, ty kobai' o mpifeheo,
- ⁶ I nitolom-pamofoke ondatio
 ami'ty haboseha'ey,
 i nameleke ondatio ami'ty haviñera'e
 an-tsarerake tsy nimete kalañeñey.
- ⁷ Manintsiñe iaby ty tane toy,
 vaho mitsiñe;
 ie ampiopoñafan-tsabo.
- ⁸ Eka mirebeke ty ama'o o sohihio,
 naho o mendorave' i Lebanonoe:
 Kanao nazevon' ambane rehe,
 tsy mitroatse ama'ay ty mpamira.
- ⁹ Mangetseketeke ty ama'o
 ty tsikeokeoke
 hifanalaka ama'o amy figodaña'oy;
 ampibarakaofe'e ty ama'o o angatseo,
 o nifeleke tan-tane atoio;
 songa miongake amo fiambesa'eo
 o mpanjakam-pifeheañe.
- ¹⁰ Songa mifañontane ama'e
 manao ty hoe:
 Toe maleme manahake anay rehe !
 Ihe hambañe ama'ay !
- ¹¹ Fa nampanjotso azo mb'an-kibory
 mb'atoy ty firegevoha'o,
 reketse ty fikoraha' o karara'oo;
 Nalamake ambane'o ao o oletseo,
 vaho mañohoñe azo o kànkáneo.

¹² Akore ty nideboña'o boak'
andikerañey, ry vasian-kandro,
ana' ty fanjirik'andro !
Finira mb'an-tane,
ihe nimpamotsake o fifeheañeo.

¹³ Nanoe'o an-tro'o ao ty hoe :
Hionjoñe mb'andikerañe mb'eo raho,
ambone' o vasian' Añahareo
ty hañonjonako ty fiambesako,
vaho hiambesatse am-bohim-pivory eo, amo ila'e avaratseo;

¹⁴ Hionjoñe ambonen-dikera'
o rahoñeo raho,
hihambañako amy Abo-Tia.

¹⁵ Te mone hazotso
mb'an-tsikeokeoke ao rehe,
pak'am-para' i halale' i koboñeyi.

¹⁶ Hisamb' azo o hahaisake azoo,
hañarahara ty hoe: Itiañe hao indaty
nampiezeñezene ty tane toiy,
i nampihondrahondra o fifeheañeoy;

¹⁷ Ty nanao ty tane toy ho ratraratra,
naho nandrotsake o rova'eo;
vaho tsy nanokake ty vala-bei'e
himpolia' o narohi'eo?

¹⁸ Songa mirotse ami'ty enge'e
o mpanjaka' o fifeheañeoo, ie iabikey,
sindre an-kibori'e ao.

¹⁹ F'ihe ka, ro navokovoko boak'
an-kibori'o ao hoe tsampañe tiva,
an-tsaro' ty vinono, tinomboke fibara,
mihotrake mb'amo vato an-koboñeo
hoe lolo linialiam-pandia.

²⁰ Tsy hitrao-pileveñe am' iereo,
amy te narotsa'o ty tane'o
vaho zinama'o ondati'oo;
toe tsy ho tiahieñe ka
ty tarira' o lo-tserekeo.

²¹ Mihentseña hanjamañe o ana'eo
ty amo hakeon-droae' iareoo;
tsy mone hitroatse
hitavañe ty voatse toy iereo,
hanitsike o rova an-tane atoio.

²² Zaho, hoe t'IEHOVÀ' i Màroy,
ty hitroatse am' iereo,
vaho haitoako amy Bavele
ty añarañe naho ty sehanga'e,
ty tariratse naho ty tamingañe,
hoe t'IEHOVÀ.

²³ Hatoloko ho fanaña' ty trandrake,
ho babangoa-mangenakenake;
le ho piopioheko am-pamafa-
karotsahañe, hoe t'IEHOVÀ' i Màroy.

²⁴ Nifanta' IEHOVÀ' i Màroy ty hoe:

Toe ho tondroke ze fitsakoreako;
hijadon-ko do'e ze aereñereko.

²⁵ Ho folaheko an-taneko ao ty Asore,
ho lialiàko am-bohiko eo;
habalake ty joka'e am' iareo,
vaho havotsotse an-tsoro' iareo
ty kilanka'e.

²⁶ Zay ty safiry nalahatse
ho a' ty tane bey toy
vaho itoy ty taña natora-kitsike
amo fifeheañe iabio.

²⁷ Naereñere' IEHOVÀ' i Màroy,
ia ty hahakalañe aze?
Napololotse ty fità'e,
ia ty hampipoly aze?

²⁸ Tamy taoñe nahavilasy i Akhaze* mpanjaka, ty niheova' ty entañe toy.

²⁹ Ko mandia-taroba, ry Pilistý iabio,
amy te pinozake ty kobaiñe nandafa azo,
fa boak' am-baha' ty mereñe
ty hitiria' ty lapetake,
ie ka ty hamoa fandrefeala mibela, mitiliñe.

³⁰ Hikama o loho rarakeo, naho
hàndre am-pipalirañe ao o poi'eo;
ho vonoeko ami'ty kerè o vaha'oo,
zay ty hanjamanañe ty honka'o.

³¹ Mañaoaloa ry lalambey,
mikoiha ry rova;
mitranaha ry Pilistý, nahareo iaby;
hehe te boak' avaratse aña ty hatoeñe,
tsy ama'e ty mitakàtrotse
am-pirimboña'e.

³² Akore arè ty hamaleañe
o ira' i fifeheañeio?
Te naore' IEHOVÀ t'i Tsione
le hitsoloke ama'e ondati'e misotrio.

15

¹ Ty entañe ty amy Moabe.
Amy haleñe androtsahañe i Arey,
mongotse ty Moabe;
amy haleñe androtsahañe i Kirey,
mongotse ty Moabe.

² Nionjoñe mb'amy Baite* mb'eo re,
mb'amy Dibone[†],
naho o haboañeо hirovetse;
mb'amy Nebò[‡] naho i Medeba[§],
mañaoło t'i Moabe;
sola peake ze hene añambone,
hinitiske ze fonga somatse.

* 14:28 Akhaze: mpitavañe * 15:2 Baite: anjomba † 15:2 Dibone: lifon-kilala ‡ 15:2 Nebo:
Misaontsy, ndra mitoky § 15:2 Medeba: rano: fandalañe; mangoangoañe

³ Misikin-gony an-dalañe eo;
 songa mangololoike,
 mangolhoy ty rovetse
 o an-tafon' anjomba
 naho an-tameañe.
⁴ Mikaikaike ka ty Kesbone*
 naho i Elalè†;
 tsanoñeñe pak'e Iatsà‡ ty feo' iareo;
 mikointsañe o lahin-defo' i Moabeo;
 mitoirañe an-tro'e ao ty fiai'e.
⁵ Tolihe' ty troko t'i Moabe,
 ie mitriban-day mb'e Tsoare§ mb'eo o sehanga'eo,
 i kiloa telo taoñey;
 fa amy fitroara' i Lotitey* eo ty
 angololoihā' iareo am-panganihañe,
 amy lala' i Koronaimey†
 ty ikoiha' iareo hazolava.
⁶ Koake o rano' i Nimrimeo‡;
 hene niforejeje ty ahetsé,
 niheatse o bokao,
 tsy aman' antsetra.
⁷ Aa le hasese' iareo
 mb'an-Torahan-Tsohihy mb'eo
 ty vara nivokare' iereo,
 ty vokatse nahaja' iareo an-driha ao.
⁸ Nanitsike i Moabe pak'añ'efe-tane'e aña i koikey,
 i fañaoloa'ey pak' Eglaimē§,
 i fangololoiha'ey pake Birelime*.
⁹ Atse-dio ty rano' i Dimone†;
 fe mbe ho tompeako ty Dimone,
 ty liona amo hivoratsake boake Moabeo,
 naho amo sehanga' i taneio.

16

¹ Ahitriifo mb'amy mpanjaka' i taney
 o vik'añondry boak' an-tseram-
 bato miatreke i fatrambeiiio,
 mb'am-bohin' anak'ampela'
 i Tsione mb'eo.
² Ie amy zao manahake ty voroñe naronje boak' an-traño' iareo ao,
 o anak' ampela' i Moabe
 amy fitsaha' i Arnoneio.*
³ Atorò, tampaho ty heve'o;
 manalinjò hoe te haleñe
 an-tsingilingilin'andro;
 aetaho o naitoañe;
 ko aboake ty mipalitse.

* **15:4** Kesbone: fahimbañañe; fifanehafaña † **15:4** Elalè: soroñe amy Andrianañahare ‡ **15:4**
 Iatsà: fifandieraña § **15:5** Tsoare: kedekedeke; bory * **15:5** Lotite: nanoña varamba † **15:5**
 Koronaime: fifombo; fandoan-tiñake ‡ **15:6** Nimrime: mafaitse; fiolña § **15:8** Eglaimē:
 nitsopahé i riakey; antara roe * **15:8** Ty vovo' o añondrilahio, o maozatseo; † **15:9** Dimone:
 amy menay eo * **16:2** Arnone: firebeñañe; fireandrea' i androy

4 Adono hañialo ama'o ao ry Moabe o naitoañe amako,
ehe ampitsoloho
ami'ty tarehe' i mpamaokey.

Fa aña ty mpisenge hery,
nijihetse i fikopahañey,
le finaoke amy taney o mpamorekekeo.

5 Haoreñe am-pikokoa-migahiñe
ty fiambesatse,
le hiambesatse ama'e ty mpizaka
an-kavantaña'e, an-kivoho' i Davide ao,
ie ty hipay ty hatò
vaho halisa amy fahiti'ey.

6 Fa jinanji'ay ty firengevoha'
i Moabe;
ie loho miebotsebotse,
ty amy fitoabora'e naho ty hakavokavo'e,
ty harobodroboha'e, vaho
ty fisengea'e kafoake.

7 Aa le hangololoike ho a i Moabe
t'i Moabe, songa hangoihoy;
ho a ty mofo-mami' i Kir-karesete[†]
ty hiroveta' areo, tsipike ty anahelo.

8 Miforejeje o tonda' i Kesboneo,
naho ty vahe' i Sibmà[‡],
fa pinekapeka' o roandria'
o kilakila' ndatooo
o hatae fanjàka'eo;
o nahatakatse Iazare[§] añeo,
nikariokarioke an-dratraratra ao;
le nandrevake o tsampa'eo,
nitsake i riakey.

9 Aa le hindre hirovetse ami'ty firoveta'
Iazare raho ty amy vahe' i Sibmày;
ho tondrahako ranomaso rehe
ry Kesbone, naho i Eleale;
ty amy havokaran'asara'oy naho ty fitataha'o, fa inay ty koike aly.

10 Fa tinavañe amy tonda-kobokaray
ty hafaleañe naho ty rebeke;
tsy aman-tsabo
o tondam-baheo, tsy amam-pazake;
tsy eo ty handialia divay
amo fipiritañeo;
fa nampitsiñeko ty koikoi' iareo.

11 Aa le hanoiñe hoe marovany
amy Moabe ty troko,
naho ho a i Kir-karesete o añ'ovakoo.

12 Le ho tondroke te, ho oniñe midazidazitse ankaboa'ey t'i Moabe,
ie mizilike amo navahe'eo hihalaly,
f'ie tsy haharongatse.

[†] **16:7** Kir: kijoly; haresete; rova' i àndroy [‡] **16:8** Sibmà: fiovañe; fandrohizañe [§] **16:8** Iezare:
lotse; mpañolotse, mpañimba

13 Zay ty nitsarà' IEHOVÀ ty amy Moabe haehae. **14** Hoe ka t'IEHOVÀ henaneo:
 Tsy hahamodo telo taoñe,
 ami'ty fañiahan'androm-pikarama, le ho sirikaeñe ty enge' i Moabe
 naho i valobohò'ey; le ho potrapotra'e avao ty ho sisa vaho tsy hanjofake.

17

1 Ty entañe ty amy Damesèke:
 Hehe te nasintake amy Damesèke
 ty maharova aze,
 fa ho votrem-porompotse.

2 Naforintseñe o rova' i Aroereo*,
 ho fandream' añondry,
 tsy eo ty hañembañe iareo.

3 Ho modo ka ty kijoli-abo' i Efraime,
 naho ty fifehea' i Damesèke;
 fa hanahake ty enge' o nte-Israeleo
 ty sisa' i Arame, hoe t'IEHOVÀ' i Måroy.

4 Ie amy andro zay, le hanoeñe matify
 ty volonahe' Iakobe, vaho hinike
 ho boroka ty havondra' i sandri'ey.

5 Le hanahake ty fanontonam-panatake
 o tsako miadaoroo,
 ie manifo o tsakoo an-tsira'e eo;
 eka le hanahake ty fañoroñañe ty voto'e ambavatane' i Rafà† ao.

6 Fe mbe hapoke eo ty nengañe,
 manahake ty fañintsañañe zaite‡,
 t'ie telo ndra roe ty an-dengo'
 i singa'e amboney,
 lime ndra efatse ty an-katae miregorego,
 hoe t'IEHOVÀ, Andrianañahare' Israele.

7 Amy andro zay,
 hañaoñe i Namboatse azey t'indaty, naho hampiandra fihaino
 mb'amy Masi' Israeley

8 Tsy ho haoñe'e o kitrelio,
 o satam-pitá'eo,
 vaho tsy ho tolihe'e
 o nitsenen-drambo-pitá'eo,
 ndra o Asereo§,
 ndra o kitrelin' embokeo.

9 O rova'e maozatseo amy andro zay,
 le ho koake hoe tsampa'e napoke añ'ala,
 hoe singa'e nadoke ty amo ana' Israeleo,
 vaho hangoakoake ty ao.

10 Amy te nihaliño'o
 t'i Andrianañaharem-pandrombahañ' azo,
 le nandikofa'o ty Lamilamin-kaozara'o;
 aa le hambole hatae soasoa rehe,
 vaho haketsa'o ho an-drahare
 ambahiny ty tora-katae.

* **17:2** Aroere: montoñe; tanan-taolo † **17:5** Rafa: aoly, fanahañe ‡ **17:6** Zaite : hoe satrañe hanem-boa'e (olive) § **17:8** Asere: hafaleañe

11 Nifahera'o amy andro nambolè'o azey, maraindray re ro ampamoñea'o
i tiri'oy;
fe votrim-porompotse ty ho voka'e,
amy andron-kasilofañe naho fanaintaiñañey.
12 Hedey! ty fikoraha' o mitozantozañeо, mitroñe manahake ty fitroña' i
riakey;
nahò ty fidabadoà'
o kilakila 'ndatio hambañe
ami'ty fisorotombahan-drano bey!
13 Le hitabatrhoake manahake
ty fitotsaha' ty rano bey o fifeheañeo;
fe hendaha'e, le hioratse aña iereo,
vaho ho horidañeñe hoe kafo'e
am-bohitsey añatrefa' i tiokey,
manahake ty fibòn-deboke
miviombio aolo' ty tiobey.
14 Ie hariva, hehe te hekoheko;
ie miporea' ty maraindray
le tsy eo;
zay ty anjara' o mañaoke anaio,
vaho ty tambe' o mampikametse ama'aio.

18

1 Hankàñe, ty tane aman'elatse
miñiñiñiñe, alafe' o toraha' i Koseo*;
2 Ie mampañitrike sorotà mb'an-driake,
an-dakam-bindà lava
ambone' o ranoo!
Dàñe ry mpihitrike, masikà,
mb' an-tane' ondaty abo naho
aman-kolitse mendoo; ondaty
mampangebahebake ty ao naho ty aña;
ondaty gañe vaho mandialia,
i tane' iareo zarazaraen-torahañey.
3 Ry hene mpimoneñe ami'ty voatse toio,
ry mpitoboke an-tane ao,
ie mitroatse an-kaboa' o vohitseo
ty viloñe, le mahaisaha;
nahò mipopò i antsivay, mijanjiña.
4 Fa hoe ty nafè' IEHOVÀ amako:
hitàn-kahendrean-dRaho,
vaho hijilojilo boak'am-
pimoneñako atoy,
hoe hatrevohan-tsingilingilieñe
an-tariñandroke,
manahake raho-mika
an-katrovoham-pitatahañe,
5 aolo' i fitatahañey, ie fa nihintsam-boñe,
ie mihamatoe i valoboke makiray,
le ho hitsikitsifem-pibira
miporengotse o singa'eo,
handrantsañe o tsampa'e mandrevakeo.

* **18:1** Kose: nte-Eteopia; mainte

6 Harongoñe eo iereo ho a o voro-pitsindroke am-bohitseo, naho ho a o bibin-kivokeo; le ho ama'e o voro-pitsindrokeo naho asara, vaho hiasotry ama'e ze hene bibi' ty tane toy.

7 Ie amy andro zay, hanese ravoravo am' IEHOVÀ' i Màroy ondaty abo naho aman-kolitse mendoo, ondaty mampangebahebake ao naho añeo; foko gañe vaho mandialia, an-tane zarazaraen-torahañe; mb'an-toen-tahina' IEHOVÀ i Màroy: mb'ambohi-Tsione mb'eo.

19

1 Ty entañe ty amy Mitsraime. Hehe te mijoñe an-drahoñe mihititioka ty lay t'IEHOVÀ homb'e Mitsraime mb'eo; mitroetroe o hazomanga' i Mitsraimeo ami'ty fiatrefa'e, mitranake ama'e ao ty arofo' i Mitsraime.

2 Hampifañatrefeko amo nte-Mitsraimeo o nte-Mitsraimeo; songa hifandrapake ami'ty rahalahi'e, sindre amy mpitrao-tanàñe ama'ey, rova ami'ty rova, fifeheañe ami'ty fifeheañe.

3 Le ho kafoake ama'e ao ty kofò' i Mitsraime; ho mongoreko ty fikililia' iareo, vaho ho troboe' iareo o jinio naho o angatseo, o doanio naho o trombao.

4 Le hatoloko am-pitàm-pifehe mitrotrofiake o nte-Mitsraimeo, mpanjaka tsy tame ty hifehe iareo, hoe t'i TALÈ, IEHOVÀ' i Màroy.

5 Ho ritse ty rano' i riakey, ho hendatse naho maike i oñey.

6 Hitrotrotse o sakao; hihakede ampara' te kànkanañe o torahañeo; hiforejeje ty bararata naho ty vindra.

7 O sale añ'olo' i Sakaio, o am-binàñe' i Sakaio, ho kirikitàñe ze teteke an-tamboho' i Sakay eo, hisaoke, tsy ho eo ka.

8 Handala amy zao o mpamintañeo, le hangoihoy iaby ze mpanora-binta amy Sakay; vaho hitike ty mpandamake harato amo ranoo.

9 Ho salatse ka o mpandrare leny matifio,

naho o mpanenoñe hasim-potio;
10 amy te hianto o mananta'eo,
 fonga ho lonjetse o mpikaramao.

11 Toe seretse o roandria' i Tsoaneo*;
 tsy manjofake ty fanoroa'
 o mpanolo-heve' mahihi' i Parò†.

Akore ty hatao'o amy Parò:
 Ana' o mahihitseo raho,
 ana' o mpanjaka haehaeo?

12 Aia v' iereo?
 Aia ze ondati'o mahihitse zao?
 Ampitaroño ama'o,
 ee te ho fohi' iareo ty nisafirie'
 IEHOVÀ' i Màroy amy Mitsraime.

13 Fa nigegèñe o roandria' i Tsoaneo;
 fa nifitaheñe o ana-dona' i Nofeo‡;
 fa nampandrihe' o natao ho vato-kotso'eo
 o fifokoa' i Mitsraimeo.

14 Nilaroe' IEHOVÀ ty fañahim-piolahañe;
 naho nampivembe' iareo ty Mitsraime
 amo fitoloña'e iabio,
 hoe mpijke midaleandaleañe amy loa'ey.

15 Le tsy ho aman-tolon-draha
 ty Mitsraime,
 ze mete hanoe' ty loha ndra ty ohy,
 ty ran-tsatrañe ndra ty vinda.

16 Hanahake ty ampela' i Mitsraime
 amy andro zay: hitititike vaho
 ho hembakembañe amy
 fihelahelam-pità' IEHOVÀ' i maroiy,
 ie ahelahela'e ambone' iareo ey.

17 Hampangebahebake i Mitsraime
 ty tane' Iehodà,
 ndra ia ia mitalily
 ro hinevenevetse,
 ty amy fisafirie' IEHOVÀ' i Màroy
 nañereñere aze.

18 Ho lime ty rova an-tane Mitsraime ao
 ty hisaontsy an-tsaontsi' i Kanàne§
 amy andro zay,
 songa hifanta ami'ty tahina'
 IEHOVÀ' i Màroy;

hatao Rovam-Pandrotsahañe ty raike.

19 Amy andro zay ho añivon-tane' Mitsraime ao ty kitrely
 am' IEHOVÀ,
 naho ty vatolahy am' IEHOVÀ
 amy efe-tane'ey,

20 ho vilom-pitaliliañe IEHOVÀ' i Màroy, an-tane Mitsraime ao;
 fa hitoreo am' IEHOVÀ iereo
 ty amo mpanao sarererakeo,

* **19:11** Tsoane: hetseke † **19:11** Parò: mpampibaibay; mpañaoke ‡ **19:13** Nofe: papin-tantele;
 mañevo, mitsopake § **19:18** Kanàne: mpibalibalike; ty mpampireke

vaho hañitrifa'e Mpandrombake
 naho ty Maozatse hañaha iareo.
21 Hampahafohine' IEHOVÀ
 i Mitsraime ty Fañova'e,
 naho ho fohi' o nte-Mitsraimeo
 t'IEHOVÀ amy andro zay;
 hitalahoa'iereo reke-tsoroñe naho enga,
 hifanta am' IEHOVÀ vaho hañavake.
22 Ho lafae' IEHOVÀ t'i Mitsraime,
 ho fofohé'e naho ho melañé'e;
 himpoly am' IEHOVÀ iereo,
 le hihalaly ama'e
 vaho ho jangañé'e.
23 Ho eo henane zay ty lalan-damoke
 boake Mitsraime aña pak' Asore,
 le homb'e Mitsraime ty nte-Asore,
 naho homb'Asore ty nte-Mitsraime;
 vaho hitrao-pitalaho
 amo nte-Asoreo o nte-Mitsraimeo.
24 Ho rai-toko-telo amy Mitsraime
 naho amy Asore t'Israele henane zay,
 fatarihañé añivon-tane ao, amy te
25 nitahie' IEHOVÀ i Måroy, ami'ty hoe:
 Soatahy t'i Mitsraime ondatikoo,
 naho i Asore, satan-tañako,
 naho Israele lovako.

20

1 Amy taoñe nanamea' i Tartane* i Asdodey†, (ie nampañitrife' ty mpanjaka' i Asore), le nialia'e ty Asdode vaho tinava'e; **2** ie amy taoñe zay, le nitsara am' Iesaià ana' i Amotse t'IEHOVÀ nanao ty hoe: Akia, abalahohiafake an-toha'o eo i lamban-gonyi vaho apolitiro am-pandia'o o hana'oo. Nanoe'e zay, nañavelo nihalo tsy aman-kana. **3** Le hoe t'IEHOVÀ: Manahake te nañavelo tsy aman-tsaroñe, tsy aman-kana telo taoñe ty mpitoroko Iesaià, t'ie ho viloñe naho halatsañe amy Mitsraime naho amy Kose, **4** le ho kozozote' ty mpanjaka' i Asore o miprohi' i Mitsraimeo naho o hasese boake Koseo, hibongy vaho tsy ho aman-kana, ty kede naho ty bey, tsy ho aman-tsaro ty voli'e ho ami'ty hasalara' i Mitsraime. **5** Ho lonjetse naho meñatse iereo ty amy Kose, fitamà' iareo, naho i Mitsraime fisengea' iareo. **6** Le hanao ty hoe ty mpimoneñe aña'olo-tane atoy amy andro zay: Heheke o nitamaen-tikañeo,

* **20:1** Tartane: mpifehe bey (zenerale) † **20:1** Asdode: Mañiliñe; midegañé; mikizo

i nipitsihan-tika nipay olotse
hivotsoran-tika amy
mpanjaka' i Asoreiy;
tika 'nio! aia ty hivoratsahan-tika?

21

¹ Ty entañe ty amy fatram-bei' i riakeiy:
Manahake ty famaoha' o tio-bey tatimoo,
ie miboak' an-dratraratra
hirik' an-tane mampangebahebak' aña.

² Naboak' amako ty aroñaroñe
mampioremeñe:

Ty mpamañahy mamañahy,
ty mpamaoke mamaoke.

Mionjona ry Elame!
Miarikoboña, ry Maday!

Fa hene nampitsiñeko
o fiselekaiñañe.

³ Aa le mikoritoke avao ty vaniako;
mamihiñe ahy ty fitsongoañe,
manahake ty fitsongon' ampela mañèñe; mikoretse raho le tsy mahat-
sanoñe,
mioreke tsy mahafañente.

⁴ Mifejofejo ty troko;
mampirevendreveñ'ahiko ty tahotse;
nivalike ho fineveneverañe
i palipalitsieñe nisalalaeko.

⁵ Nihalankañañe i fandambañañey,
nalamake i tihiy, nikama naho ninoñe;
Miongaha ry roandriañaeo,
hosoro o fikalan-defoñaeo.

⁶ Fa zao ty nafè' i TALÈ amako:
Akia, ajadoño ty mpijilo;
adono hitalily ze talake'e.

⁷ Nahaisake firimoñañe re
reketse mpiningi-tsoavala ki-roe roe, mpijom-borike
naho mpitoboke an-drameva;
mitsendreñe amy zao re, mitsatsike.

⁸ Nikaikaihe'e hoe liona: O TALÈ,
Mitolom-pijagarodoñe am-pitalakesañ' abo atoy raho te handro,
le mijohañe am-pijilovako ey te haleñe.

⁹ Heheke ondaty lia-raikeo,
mpiningi-tsoavala kiroe-roe.
Manoiñe ka re manao ty hoe:
Rotsake, Rotsake t'i Bavele;

fonga nivolentsa an-tane eo
o sareñ-drahare'eo.

¹⁰ O ry linisakoo, ry anako
an-toem-pamofohakoo,
Hampahafohineko anahareo o raha
tsinanoko am' IEHOVÀ' i maroio,
i Andrianañahare' Israeley.

11 Ty entañe ty amy Domà*: Mikoike amako ty boak'e Seire†: O mpigaritseo, manao akore i haleñey? O mpijiloo, akore ty haleñe toy?

12 Hoe i mpigaritsey: Hiporea' ty maraindray, fa ho avy ka ty haleñe— ihe hañontane le mañontanea; mibaliha indraike!

13 Ty entañe ho amy Arabe‡: Amo rongo-matahe' i Arabeo ty hitbea' areo ry mpivorontsa' i Dedaneo§.

14 Ry mpimone' i Temao*, anjotsò rano i taliñiereñey: Salakao ama' mahakama o nivoratsakeo.

15 Ie nilaisa' iareo o fibarao, i mesolava napotsoañey, naho i fale nibitokey, vaho ty fanindria' i aliy.

16 Fa zao ty nafè' i TALÈ amako: Añate ty taoñe raike, ami'ty fañiahampikarama, le ho hene modo ty enge' i Kedare†.

17 Le tsy ho ampeampe ty sengaha' o mpitàm-paleo, o lahilahy manjofake amo ana-Kedareoo; fa zay ty nitsara' IEHOVÀ, Andrianañahare' Israele.

22

1 Ty entañe ty amy Vavatanem-Pahaoniñañey: Ino ty maniloke azo henaneo gea, t'ie miañambone mb'an-tafo mb'eo iaby!

2 Atsa-koràke rehe, Ty rova mivalitsikotake, ty positse mirebeke tia! Toe tsy zinamam-pibara o nibaibay ama' areoo, tsy nitsingoro an-kotakotake!

3 Fonga nitrao-pivoratsake ty mpifehe' areo, f'ie tsinepake tsy am-pale, hene miharo-rohy ze nitendreke ndra te niherereake aña.

4 Aa le hoe raho, Aviho amako o fihaino'oo; apoho hangololoike ty tañy; ko imanea'o hohò, ty amy fandrotsahañe i anak'ampela' ondatikooy.

* **21:11** Doma: tondrahen-jono † **21:11** Seire: volovoloe; ose; kokolampa; tio-bey ‡ **21:13** Arabe: hariva; liolio; koake § **21:13** Dedane: ty arañä'e; firañetañe; mpizaka * **21:14** Tema: hatea; fahafonirañe; heneke † **21:16** Kedare: hainte'e; fandalañe, hontoke

- ⁵ Fa ho andron-kankàñe,
fandialiañe naho ampoheke,
am-bavatanem-Pahoniñañe ao
boak' amy TALÈ IEHOVÀ' i Màroy;
ty fandrotsahan-kijoly,
vaho ty fikaikaihañe o vohitseo.
- ⁶ Nitintiñe i trañon'ana-paley t'i Elame
reketse sarete naho ondaty
naho mpiningi-tsoavalà,
vaho nañafake i sarom-pikalan-
defoñey t'i Kire*.
- ⁷ Ho tondroke te ho tsitsike sarete
o vavatane' areo fanjàkao,
vaho hilahatse an-dalam-bey eo
o mpiningi-tsoavalao.
- ⁸ Hinalo'e ty saro' Iehodà.
Nitolihe'o amy andro zay
o fialiañe añañomban'alao;
- ⁹ Nisamba' areo o jeba'e an-drova' i Davideo t'ie maro; vaho nitoha rano
añañantara ambane ey nahareo.
- ¹⁰ Nivolilie' areo o anjomba' Ierosalaimeo,
vaho nakoroma' areo ty anjomba ila'e
hanosohañe i kijoliy.
- ¹¹ Nandranjia' areo talaha añaivo' i kijoly roe rey hitañe ty rano' i antara
antetsey—fe tsy niatoa' areo i namboats'azey,
tsy nihañoñe' areo i nisafiry aze haehaey.
- ¹² Amy andro zay nikoike fangololoihàñe, naho fandalàñe, t'i TALÈ,
IEHOVÀ' i Màroy,
naho fampikovohan-doha,
vaho fisikinan-gony;
- ¹³ Te mone: rebeke naho hafaleañe,
tombok'añombe
naho fandentàñ' añañondry,
fikamàñ-kena naho finoman-divay:
Antao hikama naho hinoñe,
ke ho mate maray!
- ¹⁴ Aa le naboa' IEHOVÀ' i Màroy
an-tsifiko ao ty hoe :
Toe tsy amam-pañeferañe i hakeo zay
ampara' t'ie mihomake,
hoe t'i TALÈ, IEHOVÀ' i Màroy.
- ¹⁵ Hoe t'i TALÈ, IEHOVÀ' i Màroy:
Akia mb'amy mpamandroñey,
mb'amy Sebnà[†], mpifehe' i trañoy mb'eo:
- ¹⁶ Ino ty zo'o atoy?
Ia o azo atoio,
te nihalia'o kibory etoa ho am-bata'o,
ie andavaha'o lonake an-kaboañe ey,
naho kaokaohe'o ho azo
ty fimoneña'o an-damilamy ao?
- ¹⁷ Inao! havokovoko' IEHOVÀ

* **22:6** Kire: rova, kijoly, fivory † **22:15** Sebna: i mitofay; i am-pandrohizañey

am-pivokovokoam-panalolahy aña rehe;
eka ho gore'e an-jitse,
¹⁸ havarimbari'e vaho havoebroe'e
hoe labole mb'an-tane miratrarastra aña;
aña ty hihomaha'o,
ho aña ka o sareten' enge'oo,
ty hasalarañ' anjomban-TALÈ'o tia.
¹⁹ Ho roaheko rehe tsy ho an-toe'o,
le hafotsako ho ambanen-tsaranga'o ao.
²⁰ Ho tondroke amy andro zay te
ho kanjieko t'i Eliakime[‡]
ana' i Hilkià§, mpitoroko.
²¹ Le haombeako ty sarimbo'o,
hadiako ama'e ty sadia'o,
vaho hapoko am-pità'e eo i nifelehe'oy;
ie ty ho rae' o mpimone' Ierosalaimeo,
naho i anjomba' Iehodày.
²² Hanoeko an-tsoro'eo i lahin-dakilèn' anjomba' i Davidey;
ie manokake, tsy eo ty handrindry;
ie mandrindriñe tsy eo ty hanokake.
²³ Haoreko hoe fàntake an-toe'e mafe eo;
ie ty ho fiambesam-bolonahetse
añ'anjomban-drae'e ao.
²⁴ Le hasampe' iareo ama'e iaby
ty engen-anjomban-drae'e,
o tariratseo naho o tamingañe,
ze fonga anam-pitiheke naho
ze hene fitovy naho o sajoao.
²⁵ Amy andro aña zay, hoe t'IEHOVÀ' i Màroy,
le hitrànkäne i fantake nazitse
an-toe'e mafey,
hipoñake le hideboñe,
vaho hipitsoke ama'e o kilankañe
tama'eo; fa nitsara t'IEHOVÀ.

23

¹ Ty entañe ty amy Tsore*: mangolalaiha ry lakam-bein-Tarsiseo[†]; narotsake re: pok'anjomba, tsy amam-pitolia; natalili' o boake Kitio[‡].
² Mianjina ry mpimoneñ' aña'olotse aña; ry natsafe' o mpanao takina' i Tsidone§, mpitsake i riakeio.
³ Ty tabiri' i Sihore* an-drano mieneneo, ty voka' i Sakay ty tambe'e; ie ty ni-tsena' o kilakila' ndatio.
⁴ Mimeñara ry Tsidone; fa mivolañe i riakey,

[‡] **22:20** Eliakime: fiheren-kovel' i A'hare § **22:20** Hilkia: Anjarako t'i Andrianañahare * **23:1** Tsore: haozarañe; vato; masioñe † **23:1** Tarsise; fitsakoreañe, fihotshotsoañe ‡ **23:1** Kity: o mamonotrobokeo; volamena § **23:2** Tsidone: mañoro, maminta; tsinindroke * **23:3** Sihore: mainte; am-poheke; I saka Nailey

manao ty hoe ty haozara' i riakey:
 Mboe lia'e tsy nitsongo raho,
 tsy niterak'ajaja; tsy nañabey ajalahy,
 tsy nañotroñe somondrara.

⁵ Ie pok' e Mitsraime aña i taliliy,
 le hioremeñe iereo ty amy enta' i Tsore.

⁶ Mitsaha mb'e Tarsise mb'eo;
 mangoihoa ry mpimoneñ'añ' olotseo.

⁷ Itoy hao i rova nirebeha' areoy,
 i nioreñe haehaey? i naneseañe o fandia'eo hitaveañe an-tsietoitaney?

⁸ Ia ty nikilily zao ty amy Tsore,
 i mpanolon-tsabakam-panjakay?
 Ie sindre ana-donake o mpandetakeo,
 songa niroandria' ty tane toy
 o kinanga'eo?

⁹ Ereñere' IEHOVÀ' i Måroy zay,
 hanivàñe ty firengevoha'
 ze hene engeñe,
 hamotsaha'e ze fonga onjoneñe
 an-tane atoy.

¹⁰ Manginahinà an-tane'o eo
 an-tsata' i Sakay,
 ry anak'ampela' i Tarsise!
 fa tsy eo ty mikalañe.

¹¹ Natora-kitsi'e ambone' i riakey
 ty fità'e,
 nakopikopi'e o fifeheañe;
 fa linili' IEHOVÀ ty amy Kanàne
 te ho mongoreñe o fipalira'eo.

¹² Le hoe re: Tsy hirenge ka,
 ry anak'ampela' i Tsidone demokeo,
 miongaha, mitsahà mb'e Kity mb'eo;
 fe tsy hahazoa'o fitofañe ty aña.

¹³ Hehe ty tane' o nte-Kasdio—
 ondaty tsy teo
 amy nandahara' i Asore aze
 ho amo ampatrambeioy;
 natroa' iareo o rafi-panamea' iareoo, nakorenda' iareo o anjomba'eo;
 nampangoakoahé' iereo.

¹⁴ Mangolalaiha ry lakam-bei' i Tarsiseo,
 fa rotsake i fiampira'oy.

¹⁵ Ho tondroke amy andro zay te
 haliño fitom-polo taoñe ty Tsore,
 ami'ty androm-panjaka;
 ie peake i fitom-polo taoñe zay
 le hifetsake amy Tsore i sabon-karapiloy.

¹⁶ Tintino i marovaniy,
 mañariaria an-drova ao,
 ry karapilo tsy tiah; titiho feo mamy,
 isabò sabo maro, hahatiahiañe azo.

¹⁷ Aa ie peake i taoñe fitompolo rey
 le ho tendreke te ho tilihe' IEHOVÀ

t'i Tsore,
 le himpolia'e i nanambezañe azey,
 hanitsike o kila fifeheañe ambone' ty tane toy amy hakarapiloa'ey.
¹⁸ Havalike ho miavake am' IEHOVÀ
 o kilanka'eo naho o tambe'eo;
 tsy hahaja, tsy hakafitse;
 fa ho a o mpimoneñe
 añatrefa' IEHOVÀ
 o tombom-baro'eo,
 hahaeneñañe mahakama
 vaho ho an-tsaroñe mañeva.

24

- ¹ Heheke ampangoakoahé' IEHOVÀ i taney, ampiantoe'e, aotakota'e,
 vaho aparatsia'e o mpimone'eo:
- ² ty mpisoroñe naho ty fokonontsoa,
 ty ondevo naho ty tale;
 ty anak'ampatañe naho ty rakemba;
 ty mpivily naho ty mpandetake;
 ty mpampindrañe naho ty mpindrañe,
 ty mampisongo naho ty mpisongo.
- ³ Hene ho korenadaheñe i taney,
 hakopake malio, fa nafè' IEHOVÀ i tsaray.
- ⁴ Mioje i taney naho miforejeje, miheatse naho midrodremotse ty voatse
 toy,
 fonga mitike o nonjoneñe an-tane atoio.
- ⁵ Tiniva' o mpimone'eo i taney,
 nandilatse Hâke iereo,
 niotake amo fañèo,
 vaho nivalike amy fañina tsy modoy.
- ⁶ Aa le nabotsem-patse i taney,
 naho sesehen-kakeo
 o mpitoboke ama'eo,
 toly ndra minike o mpimone' i taneio,
 vaho tsy ampe ty sengaha'e;
- ⁷ Tsy vaño ty divay vao,
 miheatse o vahéo;
 hene miselekaïñe o mpifalefaleo.
- ⁸ Mijihetse ty firebeha' o kantsàñeо,
 migadoñe ty fikoraha' o mpirebekeo,
 milesa ty hafalea' o marovanio.
- ⁹ Tsy minon-divay an-tsabo iereo;
 mafaitse ty toake amo mikam'azeo.
- ¹⁰ Nakoromake i rova nitsamborohotakey;
 songa mirindriñe ze anjomba,
 tsy hiziliha'ondaty.
- ¹¹ Firovetañe ty an-dalañe ey,
 ty amy divaiy;
 nagoboñe ze hene hafaleañe,
 fa nafahañe ty firavoravoa' i taney.
- ¹² Nengañe hoake i rovay,
 kinaboke ho fianto o lalambei'eo
- ¹³ Fa zay ty ho ie añivo' ty tane toy,

anteñateña' ondatio, manahake ty fañozoñozoñan-tsakoa,
naño ty fitimponañe ty sisa ami'ty fanontonañe valoboke.

¹⁴ Mampipoña-peo iereo, misabo an-drebeke;
mirañoraño o boak' an-driakeo
mañonjoñe ty volonahe' IEHOVÀ.

¹⁵ Aa le mandrengea IEHOVÀ
ry an-kazavañe aña,
ty tahina' IEHOVÀ,
Andrianañahare' Israele,
ry aña'olon-driakeo.

¹⁶ Boak' antsietoitane aña
ty nahajanjiña'ay sabo:
Enge ho a i vantañey!
Fe nataoko ty hoe: Minike raho,
mitike avao; feh'ohatse amako!
Mikinia o mpikitro-drahao;
eka vata'e mikitroke ty mpikilily.

¹⁷ Ama'o ry mpimone' ty tane toio
ty harevendreveñañe,
i koboñey, vaho i fandrikey.

¹⁸ Aa le ho tondroke te,
hikapotrake an-koboñe ao
ze ampivoratsahe' ty talili' i hekohekoy;
naño ho tsepahe' ty fandrike ze manganike boak' an-koboñe ao;
fa misòkake o lalan-kede aña'abo eñe
vaho miezeñezeneñe o faha' ty tane toio.

¹⁹ Señake ty tane toy, mangorobagorobañe;
nampigavengaveñañe ty tane toy.

²⁰ Mivembeñe hoe ondaty jike
ty tane toy;
mitroetroe hoe kibohotse;
mavesatse ama'e o fiolà'eo,
ie hikorovoke tsy hitroatse ka.

²¹ Ho tondroke amy andro zay te
ho lilove' IEHOVÀ i valobohòn-dikerañey,
an-dindiñ' aña,
naño o mpanjaka' ty tane toio,
an-tane atoy.

²² Hatontoñe, manahake ty añoroñañe
mpirohy am-balabey ao,
naño hagabeñe am-porozò ao;
ie naña-modo andro maro ao
vaho ho liloveña.

²³ Ho meñatse i volañey,
ho salatse i àndroy;
fa hifehe am-bohi-Tsione ey
t'IEHOVÀ, toe e Ierosalaime ao*,
le haboak' amo mpifehe'ondati'eo ty enge'e.

25

¹ Ry IEHOVÀ, Andrianañahareko Rehe,

* **24:23** Ies 12:6, 16:5, 46:13, 52:8, 59:20, Sab 102:16, Iek 43:7-9, Ioe 3:17, 4:17, Mik 4:7-8, Tsf 3:14-17,
Zek 1:16-17, 2:10, 8:3-8, 14:1-11, Top 1:6-7, Ben 21:1-27

hañonjoñ'Azo raho,
ho bangoeko ty tahina'o,
ty amo fitoloña'o tsitantaneo;
ihe nisafiry haehae
am-pigahiñañe naho an-katò.

² Fa nanoe'o votre ty rova,
naho fianto i rova fatra-piaroy;
tsy rova ka i anjomban' ambahiniy,
vaho tsy hamboareñe ka.

³ Aa le hañonjoñe Azo
ondaty manjofakeo,
hañeveñe ama'o
o rovam-pifeheañe mitromoroñe.

⁴ Fa nifipalira' o rarakeo rehe,
fitsoloha' o misotrio,
fiampirañe an-tio bey,
fialofañe amy hatrovohañey;
naho hoe tio-bey an-kijoly
ty fikofoha' o maharevendreveñeo.

⁵ Manahake ty hatrevohañe
an-tane maike eo,
ty hampitsiña'o ty fikoraha'
o ambahinio;
hambañe ami'ty talinjon-drahoñe
amy fipisañañey,
ty hampijomohoñe
ty fibekoa' o mangosasàkeo.

⁶ Ami'ty vohitse toy ty hañalankaña'
IEHOVÀ' i Màroy sabadidake
amo raha mafirio ze kila ondaty,
takataka aman-divay natadrètse,
ty vondrake pea' ty betron-taolañe,
vaho divay soa-filomboke.

⁷ Le hagedra'e ami'ty vohitse toy ty fikolopofañe ami'ty vinta' ze kila-
ondaty
naho ty marerarera mandrongoñe
o fifeheañeo.

⁸ Hatele'e ho mongotse ty havilasy,
vaho ho faohe' i Rañandria IEHOVÀ
amy ze hene laharañe ty ranompihaino;
hafaha'e ami'ty tane toy
ty sirika'ondati'eo;
zay ty nitsarà' IEHOVÀ.

⁹ Ho tseizeñe amy andro zay,
ty hoe: Toe Ie t'i Andrianañaharentika
nitamañe handrombake an-tikañey,
Ie IEHOVÀ niliñisan-tikañey, antao hifale naho hirebeke
amy fandrombaha'ey.

¹⁰ Fa ami'ty vohitse toy
ty hitofa' ty fità' IEHOVÀ,
vaho ho lialiàñe an-toe'e eo t'i Moabe,
hambañe ami'ty fandialiàñe

ty ahetsé an-ditsake ao.

¹¹ Le ho velare'e añivo'iareo o fità'eo ,
manahake ty famelara'
ty pilaño hilañoa'e,
fe harèke ty firengevoha'e
rekets' o taña-politi'eo

¹² naho harotsa'e ambane o kijoli'o fatratse mitiotiotseo, eka, halama'e;
hazevo'e an-tane, le an-deboke ao.

26

¹ Amy andro zay le ho takasieñe
e Iehodà ao ty sabo toy:

Manan-drova maozatse tika;
tinendre'e ho fandrombahañe
o kijoly naho fikalañañe.

² Sokafo o lalam-beio,
himoaha' i fifeheañe vantañe
mpitam-patokisañey.

³ Hambena'o am-pierañerañan-to,
ze amam-pitsakoreañe mifahatse ama'o,
amy t'ie miato ama'o.

⁴ Iatò nainai'e t'IEHOVÀ,
amy te lamilamy tsy mb'ia ho modo t'IEHOVÀ, Ià.

⁵ Fa nakapotra'e
o mpimoneñe an-kaboañañe,
linama'e ambane' i rova miligligiy,
nilamahe'e an-tane eo,
eka, mb'an-deboke ao.

⁶ Ho lian-tomboke,
ty fandia' o mpisotrio,
ty fidraidraita' o boròkao.

⁷ Lalañe mira ho amo vañoñaeo izay
ihe, ry Andindimoneñe,
ro mañajary ty lala' o vantañaeo.

⁸ Toe an-dala' o fizaka'oo
ry IEHOVÀ, ty nitamà'ay Azo;
i tahina'oy naho ty fitiahiañe Azo
ro fisalalàn'arofo'ay.

⁹ Nirie' ty fiaiko rehe te haleñe;
eka, nitsoek'azo an-troko ato;
amy te, ie ifetsaha' o fizaka'oo ty tane toy,
le hioke havantañañe ondatio.

¹⁰ Ndra te isoheñe o lo tserekeo,
tsy ho hai'e o havañonañañe;
fa hikitro-karatiañe
an-tanen-kavantañañe ao,
vaho tsy ho oni'e ty volonahe' IEHOVÀ.

¹¹ Mionjoña añ'abo ey ty fità'o,
ry IEHOVÀ, f'ie tsy isa' iareo;
zoe' iareo an-kasalaraña
ty fahimbaña'o am' ondatio;
eka, ho forototoen-afó o rafelahi'oo.

¹² Ry IEHOVÀ,

toloro fierañerañan-jahay;
 fa toe Ihe ro nanao
 ze hene fitoloña'ay.

¹³ Ry IEHOVÀ Andrianañahare'ay,
 fa nifehèn-drotompo ila' te ama'o zahay,
 f'Ihe avao ty toñone'ay tahinañe.

¹⁴ Tsy ho veloñe o mateo,
 tsy hitroatse o loloo;
 zay ty namara'o naho nandrotsaha'o iareo
 vaho fonga nimodoe'o
 ty fitiahiañe iareo.

¹⁵ Nonjoneñe amo kilakila ondatio rehe,
 ry IEHOVÀ,
 eka nitoabotse amo kila taneo;
 iasiañe pak' añ'olotse tsietoimone'
 ty tane toy aña.

¹⁶ Ry IEHOVÀ, ie niampopheke
 te nipaia' iareo Azo,
 ampianjifieñe ty nampidoandoaña' iareo
 halaly ama'o ty amy fandilova'o iareoy.

¹⁷ Manahake ty rakemba mitsongo,
 ie mitotoke ty hisamaha'e,
 ie manaintaiñe vaho mikoaike
 amo fitsongoa'eo;
 hoe zay zahay ry IEHOVÀ tañ'atrefa'o eo.

¹⁸ Toe nivesatse zahay,
 nangotsokotsoke,
 fe hoe tioke avao ty naboloa'ay;
 tsy nañeneke famotsorañe amy taney;
 mbore tsy nahatoly ondaty ho
 mpimone' ty tane toy.

¹⁹ Ho veloñe o nivetrake ama'oo,
 hitroatse i sandriko nihomakey,
 mivañona naho misaboa
 ry mpitoboke an-deboke ao,
 fa zono maraindray o zono'oo,
 vaho haboloa' i taney o niloloo.

²⁰ Antao ry ondatiko,
 mirovà añ'anjomba'o ao,
 arindrino o lalañe amboho'oo
 mietaha hey ampara' te heneke
 i fifomboañey.

²¹ Heheke! miakatse i toe'ey t'IEHOVÀ
 handilo o mpimoneñ' an-tane atoio
 ty amo hakeo'eo;
 haboa' i taney ty lio niorike ama'e,
 vaho tsy ho lembefa'e ka o vinono'eo.

27

¹ Amy andro zay, le amy fibara'e
 mitrotrofiake ra'elahy naho maozatsey
 ty handilova' IEHOVÀ i fañaneñey,

toe i mereñe mibotatsakey;
ty fañaneñe, i mereñe mivanditsey;
vaho ho vonoe'e i fañanen-driakey.

² Ie tondroke i andro zay:

Tetem-bahe fanjàka! Isabò!

³ Zaho IEHOVÀ ty miambéñe aze,
tondrakoko rano erike;
ambenako haleñe nahohandro
tsy mone ho joieñe.

⁴ Tsy mifombo ty an-troko ao,

Ie mea'e hisatse nahohatike raho,
le ho lialiako, haharoko forototoeñe.

⁵ Nahoh tsy zay, ee te hiatoa'e ty haozarako, hifampilongo amako;
ehe t'ie hifampirañetse amako.

⁶ Ho tondroke ty andro te hamahatse t'Iakobe,
hibotiboty nahohitaroke t'Israele;
vaho ho tsitsi-kavokarañe
ty an-tarehe' ty tane toy.

⁷ Linafa'e hao re manahake ty
nandafa'e o nandafa azeo?
He vinono re hambañe ami'ty
nanjamane'e o namono azeo?

⁸ Fandroahañe, faneseañe mb'eo aña
ty nihotakotaha'o am' iereo;
amy kofò'e mangosasàkey
ty nampisitaha'e iareo
amy andro' i tioke atiñanañeyi.

⁹ Fa zay ty vilin'ai' Iakobe ty amo tahi'eo,
zao ty havokarañe handopolopo
ty amy nañahàñe o hakeo'eoy:
te ho fonga dorodemohe'e
ty vato' o kitrelio,
tsy hitroatse ka o hazomangao
nahoh o sare' i àndroio.

¹⁰ Miereñereñe i rova soa-fikalañey,
kialo koake nahonaforintseñe
manahake i fatrañey,
ho fiandraza' o anak'añombeo,
eo ty andrea' iareo,
eo ty añolira' iareo o tsampa'eo.

¹¹ Hapekañe o tsampa'e niforejejeo;
homb'eo o rakembao handrehetse aze;
amy t'ie tsy ondaty mahilala,
aa le tsy hiferenaiña' i Namboatse iareoy,
tsy hitretreza' i Nitsene iareoy.

¹² Ho tondroke amy andro zay te hanatake boak' amy fikararaha' i
Oñey pak' amy Toraha' i Mitsraimey t'IEHOVÀ, le hatontoñe kiraikiraike*
nahareo, ry ana' Israeleo. ¹³ Le ho popoheñe amy andro zay ty antsiva
jabajaba vaho hikovovoke mb' etoa o nimotsa an-tane' i Asoreo nahoh
o nampitsirantsiràñe an-tane Mitsraimeo hitalahoa' iareo am' IEHOVÀ amy
vohi-miavake e Ierosalaimey.

* 27:12 Iir 3:14-15

28

¹ Hankàñe amy sabaka-pisengea'

o mpijike' i Efraimeoy,

naho amy fiheararam-boñe'e nifanjaka

ami'ty hatsomerentsere'ey,

i an-doham-bavatane vondra'

o niopo-divaioy.

² Heheke te manañe ty maozatse

naho ty fatratse t'i TALÈ,

hoe tio-bein-kavandran-gadaboñe,

tangololahy mampianto,

hoe fisorotombahan-drano mienene,

ty hamokovokoam-pita'e aze

an-kasiahäne mb'an-tane mb'eo.

³ Ho lialiàm-pandia i sabaka niebotsebora'

o mpijike mena' i Efraimeoy.

⁴ Le i voñe an-doham-bavatane vondrakey ro hIheatse amy hasoa-vinta'ey,

naho i sakoa loham-boan' asaray, ie vata'e isake naho am-pitâ'e ao, ro
habotse'e.

⁵ IEHOVÀ' i Måroy ty ho halam-

boñem-bolonahetse amy andro zay,

Sabaka fanjaka ho a' ondaty sehanga'eo;

⁶ naho ty arofo tò amy miambesatse an-jakay,

Vaho haozarañe ho amo manebañe

i hotakotake an-dalam-beiy.

⁷ Avembèn-divay naho ampidaleandaleañen-toake ka retoñañe:

ampisiotsioren-toake ty mpisoroñe

naho ty mpitoky; alihen-divay iereo, avembèn-toake;

mitoantoañe añ'aroñaroñe iereo, mikolitre kolitre t'ie mizaka.

⁸ Mañàmpo o fans ambane

ty loa naho leotse,

ie tsy aman-toetse malio.

⁹ Ia ty hañòha'e hilala,

naho ia ty hampalangese'e i taliliy?

O vaho notàñe amy rononoio hao?

O vaho nasitake am-patroao hao?

¹⁰ Fa, fañè manovom-pañè, fañè am-pañè,

patetse am-patetse, pätetse am-patetse,

kede atoy, kede aroy.

¹¹ Toe am-pivimby mibedobedo,

naho am-pamelem' ambahiny,

ty hisaontsia'e am'onatio,

¹² ie nanoeñe ty hoe: Fitofañe toy;

ampitofao o mokotseo;

zao o fanintsiñañe;

fe tsy nañaoñe iereo.

¹³ Aa le hoe ty hitsara' IEHOVÀ:

Fañè tovoñam-pañè, fañè am-pañè,

patetse am-patetse, patetse am-patetse,

kede ty atoy, kede ty aroy.

Soa te ie mandeha iereo ro

hitoboly, ho pozahéñe,

ho fandriheñe, vaho ho tavaneñe.

14 Aa le janjiño ty tsara' IEHOVÀ
ry mpanivetive mifeleke ondaty
e Ierosalaime ao retoa.

15 Ami'ty natao' areo ty hoe:
nilahatse amy Havilasiy zahay,
vaho niñañina amy Tsikeokeokey;
le ie misoroke atoy ty kiria mamaooke
le tsy homb'ama'ay zay;
fa ipalira'ay ty fandañirañe,
itsoloha'ay i remborake;

16 Aa le hoe t'i TALÈ IEHOVÀ :
Heheke te mampipoke faham-bato
e Tsione eo raho, vato tsinòke;
vaton-kotsoke sarotse, soa fijadoñe;
Tsy ho tsòtseke ty mpiato ama'e.

17 Hanoeko talim-panjeheañe ty hatò,
naho havantañañe ty fampimiràñe,
ho faopaohen-kavandra
ty fipaliram-bodiaké,
vaho handoparan-drano i fiampirañey.

18 Ho mongoreñe ty fañina' areo
amy Havilasy,
tsy hijadoñe ty filahara' areo
amy Tsikeokeoke;
ie mitoañe mb'eo ty kiria mamaooke,
le ho lialià'e nahareo.

19 Ndra mbiambia ty hirangà'e,
le ho fihine'e nahareo,
fa boak' andro ty hitoaña'e,
handro an-kale;
vaho ho vata'e maharevendreveñe
ty andrendrehañe ty tali'e.

20 Loho bory ty fandreañe,
tsy mete ihitsiañe,
kede ty am-pohe' i bodoy
tsy mete isafononohañe.

21 Hiongake hoe tam-bohi-Peratsime*
t'IEHOVÀ,
hitroñe manahake tam-bohi' i Gibone† ,
hanoe'e ty fitoloña'e
—tolon-draha boidy,
hihentseña'e ty sata'e—sata àlike!

22 Ie amy zao, apoho ty fanivetiveañe,
hera ho fihineñe o tali-randra' areoo,
fa tsinanoko amy TALÈ, IEHOVÀ' i Màroy
te fa tsinè ty fandrotsahañe i tane iabiy.

23 Mijanjiña naho tsendreño ty feoko;
haoño vaho janjiño o entakoo.

24 Mitrabake nainai'e hao ty mpitongy?
ho troboe'e naho ho fantaña'e
nainai'e hao i taney?

* 28:21 Perazime: fizarazarañe † 28:21 Gibeone: fititike; tamboho; naonjoñe

- 25** Ie fa nampirae'e i taney,
tsy handraraha'e vañemba[‡] hao
naho amitseza'e vihinja\$?
Tongise'e am-piriritañe ty vare-bolè*,
le an-toe'e eo ty vare-horodè†,
vaho añ'olotse ey ty kosemete‡.
- 26** Amy t'ie anareko hisafiry,
mañòke aze t'i Andrianañahare'e.
- 27** Tsy lisanem-baoñe ty vañemba,
tsy aodiñ' an-daròn-tsarete ty vihinja,
fe kimokimohen-doda ty vañemba
naho lisaneñ' akalo ty vihinja.
- 28** Demoheñe ty vare-bolè hanoañe mofo,
fa tsy lisaneñe nainai'e,
eo ty mandialia aze an-tsarete
reketse soavalà ambone'e eo,
fe tsy hotomomohe'e.
- 29** Boak' am' IEHOVÀ' i Màroy ka izay,
miambake ty fanoroa'e,
tsy amañ'ohatse ty hihi'e.

29

- 1** Hekoheko ry Ariele*, ry Ariele†,
ty rova nitobea' i Davide!
Tovoño taoñe an-taoñe,
ampitoitoio o sabadidakeo!
- 2** Le handesako haemberañe ty Ariele,
le ho fandalàñe naho firovetañe ty ao,
ie hanahake Ariele amako.
- 3** Le ho arikatohako rehe;
ho arikoboñako votre abo,
hatroako ama'o ty rafi-panameañe
- 4** Le hafotsak' ambane rehe,
hisaontsy boak'an-tane ao,
hirik'an-deboke itsalalampa'o ao
ty hipetropetroha'o,
hanahake ty feon' angatse
boak' an-tane ao
ty antseñàntseña'o,
vaho higeongeoñe boak' an-demboke ao
ty filañona'o.
- 5** Fa hanahake ty deboke mibò
o rafelahi'o maroo,
le hoe kafo mihofa
o mampangebahebake tsifotofotoo—
eka, hafetsak' aniany, ami'ty manao zao.
- 6** Hitilike anahareo t'IEHOVÀ' i Màroy
reketse hotroke naho fanginikinihañe,
naho fitromoroñañe, naho tangololahy,

‡ 28:25 Heb: kètsake § 28:25 Heb: kamone * 28:25 Heb: kità † 28:25 Heb: sehorà ‡ 28:25 Kosemete: karazam-bare-bolè * 29:1 Ariele: añaram-binta' Ierosalaime † 29:1 Ariele: kitrely; hazava ndra liona' IEHOVÀ

naho tiobey vaho ty lel-afó mamorototo.

⁷ Le ty valobohò' o fifeheañe iaby
mialy amy Arieleo,
o mifandrapake ama'eo,
naho o rafem-pañarikatohañe azeo,
naho o mampalovilovy azeo,
le hanahake ty nofy,
ty aroñaroñe an-kaleñe;

⁸ Le ho hambañe ami'ty saliko mañinofy, heheke t'ie mikama,
f'ie tsekake, mbe mikolempa ty tro'e; naho ty fañinofisa' ty taliñiereñe,
heheke t'ie minon-drano,
ie mibarakaoke hehe te mbe miheahea,
tsy afake i harandrano'ey,
hanahake zay ty valobohò' o fifeheañe iaby haname i vohi-Tsioneio.

⁹ Mijimejimeñña naho midebedebea,
migoà vaho mitambara ho fèy!
jike iereo, fa tsy an-divay!
mivembeñe fa tsy an-toake!

¹⁰ Fa nadoa' IEHOVÀ ama' areo
ty fañahy mampilañake ty roro;
fa nakipe'e ty fihaino' areo, (o mpitokio); naho fa kinolopo'e
ty añambone' areo (o mpioniñeo).

¹¹ I hene aroñaroñey le ho ama'areo
hoe tsara am-boke linite,
ie atolo'areo ami'ty mahay mamaky,
ami'ty hoe: Ehe, vakio toy,

le hoe ty hatoi'e: Tsy mete fa linite.
¹² Le ie atolo'areo ami'ty tsy mahay,
ami'ty hoe: Vakio toy,
le hanoa'e ty hoe: Tsy mahay raho.

¹³ Hoe t'i TALÈ:
Kanao mañarine ahy am-palie,
ondaty retoañe
naho miisy ahy am-pivimby,
ie ahanka' iareo lavits'ahy o arofo'iareoo, vaho lili' ondaty avao

ty añoña'iareo ho fañeveñañe amako‡;

¹⁴ Inao, hanoeko raha mampañeveñ
indraike ondatio: halatsañe mahadaba;
ho mongotse ty hihi' o mahihi' iareoo
naho hikafitse ty hilala'

o mahilala' iareoo.

¹⁵ Hankàñe amo mañetake ty fikinià'iareo laleke tsy ho oni' IEHOVÀO,
amo mikitroke raha añ'ieñeio,
naho manao ty hoe:

Ia ty mahavazoho' antika? ndra:

Ia ty maharofoanañe antika?

¹⁶ Hete! akore ty hamengoha' areo!

Hasiñeñña manahake i mpanao valàñe taney hao i litsakey?

hanao ty hoe amy namboatsey

hao i namboareñey:

Tsy ihe ty namboatse ahy.

‡ 29:13 Mat 15:8-9, Mar 7:6-7

Ndra hanao amy nandrafitse azey ty hoe: Tsy mahilala rehe?

¹⁷ Tsy aniany avao hao te havalike
ho tonda kobokara ty Lebanoné,
vaho hatao ala i teteke kobokaray?

¹⁸ Amy andro zay,
ho janjiñe' o kareñeñeo ty tsara
am-boke ao,
le boak'ami'ty fimoromoroña'e
naho ty fanalinjoña'e ao
ty hahaisaha' ty fihaino' o feio.

¹⁹ Hañonjon-karebehañe am' IEHOVÀ
o tretram-poo,
naho handia taroba amy Masi'Israeley
o rarake am'ondatio.

²⁰ Fa hihelañe aña i mpitrotrofiakey,
naho hijihetse i mpañinjey,
toe fonga haitoañe
o mahimbam-panao ratio;

²¹ O mampandilatse ondaty
an-tsaontsy,
naho mamandrike
i mizaka an-dalam-beiy,
vaho mikatramo ty vantañe
an-dreha-borosodeo.

²² Aa le hoe t'IEHOVÀ
mpijebañe i Avrahame,
ty amy anjomba' Iakobey:
Tsy ho salatse t'Iakobe henane zao,

vaho tsy hiko-mavo i lahara'ey,

²³ Ie isa' o ana'eo o satan-tañako
añivo'eo, le havahe'iereo ty añarako
Eka! hiasia' iareo i Masi' Iakobey,
vaho hañeveñe

amy Andrianañahare' Israele.

²⁴ Le hahilala o mandilatse an-trokeo,
vaho hañaom-pañanarañe
o miñeoñeoñeo.

30

¹ Hankàñe amo anake miolao,
hoe t'IEHOVÀ,
misafiry iareo fe tsy ahiko;
mandahatse tolon-draha,
fa tsy an-Troko,
ie hanovoñe hakeo naho tahiñe.

² O mijelañe mb'e Mitsraime mb'eo
fe tsy nañontane am-bavakoo;
hitsoloha' iareo ty kijoli' i Parò
naho hipalitse an-talinjo' i Mitsraime.

³ Aa le hifotetse ho hameñarañe
ty kijoli' i Parò,
vaho ho salatse nahareo te mipalitse
an-talinjo' i Mitsraime.

⁴ Toe e Tsoane* ao o roandria'eo,
naho e Kanese† ao o sorotà'eo.

⁵ Hene ho salatse
ty am' ondaty tsy mahasoao,
tsy mañimba tsy mampitombo,
te mone heñatse naho injé.

⁶ Ty entañe ty amo bibi' atimoo.
ie hiranga tane manosotse naho
mañore, ami'ty hirifa' o liona
rene'eo naho i liona lahi'ey, ty lapetake
naho ty fandrefeala mibelañ'afó;
asese' iareo an-tsorom-borike tora'e
ty vara' iareo, naho an-trafon-
drameva ty fanaña' areo,
mb'am'ondaty tsy hahasoa.

⁷ Kafoake ty imba' i Mitsraime,
toe tsy manjofake,
aa le nitokaveko ty hoe:
Rahabe‡ mihiisetse.

⁸ Akia arè, sorato an-takelake
añatrefá' iareo eo,
vaho sokiro am-boke ao,
ho amo andro añaeo
ho fitaliliañe nainai'e.

⁹ Amy t'ie ondaty miola,
anake mavande,
ajaja tsy mete mitsanoñe
o Tsara' IEHOVÀO;

¹⁰ ie manao amo mpioniñeo ty hoe:
Ko mioniñe, naho amo mpitokio,
Ko mitoky ama'ay ty hahiti'e;
taroño ama'ay ty raha mora,
mitokia famañahiañe.

¹¹ Isitaho o lalañeo, idisaho i lalam-bantañey, ajihero tsy ho aolo'ay
t'i Masi' Israele.

¹² Aa le hoe t'i Masi' Israele,
kanao tsambolitio' areo ty tsara toy,
naho miato ami'ty famorekekeñañe
naho ty hamengohañe,
vaho mipitek' ama'e;

¹³ le ho ama' areo i hakeo zay,
manahake ty heba an-kijoly te higorobañe,
ie miboenatse an-kijolim-bato abo ey,
vaho migorogodeboñe amy zao
ty fihotraha'e;

¹⁴ ie hiparaitsake hoe valañem-panao valañe tane,
le akore ty fipoñafa'e kanao
tsy ahatreavañe ndra tsila'e
amo biliti'e niparatsakeo
hahatintinañe vaen'afó
boak'am-patañe ao,
ndra ty hanilofañe rano hirik' an-kadaha ao.

* 30:4 Tsoane: fihetseke † 30:4 Kanese: rinoake ty falalañe ‡ 30:7 Rahabe: haozarañe mirengevole

15 Aa hoe t'i TALÈ IEHOVÀ, Masi' Israele;
ty fisolohoañe naho fitofañe
ty maharombake anahareo;
toe fianjiñañe naho fatokisañe
ro haozara' areo.

Fe tsy nipaoke nahareo

16 te mone ty hoe: Aiy avao!
hioratse an-tsoavala zahay! —
toe hivoratsake nahareo! naho,
Hiningitse an-tsoavala lahi'e
mahafitsontike zahay—
aa le hipirirítse ka o
mañoridañe anahareoo!

17 Arivo ty hibioñe
ami'ty fañembaña' ty raike,
hitriban-day nahareo ami'ty
fañembaña' ty lime, ampara' t'ie
miereñereñe hoe hazolahy
an-kaboañe eñe,
hoe viloñe ambone vohitse ey.

18 Toe mandiñe te hañisoke
anahareo t'IEHOVÀ;
hitretrèza'e boak' añ'abo ao.
Fa Andrianañaharen-katò t'IEHOVÀ;
haha iaby o mitamà Azeo.

19 Ry ondaty e Tsione,
mpimoneñe e Ierosalaimeo,
tsy hirovetse ka nahareo;
le hatarike ama'o
ty amy feom-pikaiha'oy,
hanoïñe kanao mahajanjiñe azo.

20 Aa ndra t'ie nazotso' i TALÈ
mofon-kasotriañe
naho ranon-kaloviloviañe,
tsy hietake an-kotsok' ao ka
i Mpañòke azoy.
le ho isam-pihaino'oo i Mpañana'oy;
21 Ho janjiñen-dravembia'o ty saontsy
am-boho'o ao manao ty hoe:
Intoy ty lalañe, añavelò,
naho itsile'o mb'ankavana
ndra mb'ankavia.

22 Le ho tivà' areo o sare-sokitse
nipakoreñe volafotio,
naho o sare trinanake
nohoñem-bolamenao,
ho faohe' areo aña
hoe raha maleotse;
vaho hanoa'o ty hoe, Soike!

23 Le ho tolora'e orañe ty tabiry
ho tongise'o an-tane eo,
hampitomboañe
mahakama boak' an-tane ao,
ho kobokara vaho hiregorego;

hangadagadañe ty fiandraza'
o añombe'oo amy andro zay.

²⁴ Mbore hihinañe hane nisorobaeñe
o añombe naho birìke mpitrabake taneo,
ie fa nitsongae' ty letsoro naho firango.

²⁵ Kila vohitse abo,
nahō ze hene haboañe,
ro hikararahan-drano an-torahañe—
amy androm-panjamañey,
ie mihotrake o fitalakesañ' aboo.

²⁶ Hanahake ty hazavà' i àndroy i volañey,
le ho impito ty hazavà'e i àndroy,
mira ami'ty hazavan-andro fito,
amy andro ampibandia' IEHOVÀ
ty fere' ondati'eoy,
vaho hampimelañe'e o naràn-dafa'eo.

²⁷ Hehe te mb'atoy boak' an-tsietoiañe
ty tahina' IEHOVÀ,
miforoforo ami'ty haviñera'e,
milodolodo o hatoe'eo;
pea-pifombo o fivimbi'eo,
vaho hoe afo mamorototo i famele'ey.

²⁸ Torahañe manganahana ty kofò'e,
mahatakatse am-bozo,
ho tsongà'e§ o kilakila'ndatio
ami'ty tsikelom-pandrebahañe;
vaho ho am-balañorà' ondatio
ty laboridy mampandilatse.

²⁹ Hanan-tsabo hoe amy haleñe
fañambena'areo i sabadidakey nahareo;
nahō hafalean-stroke manahake
ty fionjonañe
am-peon-tsoly mb'am-bohi' IEHOVÀ
mb'an-damilami' Israele mb'eo.

³⁰ Le hampijanje' IEHOVÀ
ty fiarañanaña'e lifots' engeñe,
nahō hampahaisaha'e
ty fivangoam-pità'e mañambane
ami'ty fitrotrofiaha' i haviñera'ey
ami'ty fisotratràhan' afo hamorototo,
ami'ty fiporitsahan-drahoñe
nahō ty fikojojoahan' orañe
vaho ty havandra-gadaboñe.

³¹ Hampangebahebake i Asore
ty fiarañanaña' IEHOVÀ
ie fofohe'e an-kobay.

³² Le ze fandafàn-kobaim-pandilovañe
apao' IEHOVÀ ama'e,
harahem-pikantsañañe nahō jejo-bory; le am-piekotsekòran-kotakotake,
ty hialia'e am' iareo.

³³ Fa nihajarieñe haehae ty Topete,
hinalankañe ho a' i mpanjakay,

laleke naho mangorabake;
afô manodotse an-katae tsifotofoto;
viañe' ty kofò' IEHOVÀ, hoe
t'ie fifororoahan-tsolifara.

31

- ¹ Feh-ohatse amo mizotso mb'e
Mitsraime mb'eo hipay olotse,
miato aman-tsoavalà,
nahô mirampy an-tsarete kanao maro,
vaho amo mpiningitse ama'eo
katao maozatse;
f'ie tsy mitolike amy Masi' Israele,
tsy paia' iareo t'IEHOVÀ!
- ² Fa mahihitse ka re hindesa'e hankàñe,
vaho tsy hampoli'e o tsara'eo;
f'ie hiongake hiatatre
ty anjomba' o lo-tserekeo
nahô ty fañimba' o mikitro-karatiañeo.
- ³ Ondaty 'nio o nte-Mitsraimeo
fa tsy Andrianañahare,
nahô nòfotse o soavala'eo fa tsy angatse;
aa le hatora-kitsi' IEHOVÀ ty fità'e,
le hitsikapy ty mpañimba
nahô hikorovoke i imbaeñey,
vaho songa hitrao-pihotrake.
- ⁴ Fa hoe t'IEHOVÀ amako:
Hambañe ami'ty liona
nahô ty liona tora'e,
ie mitromoroñe ambone' i nitsàtsa'ey,
ndra te maro ty mpiarak'añondry
nikoiheñe ty ama'e,
tsy mañembañe aze ty feo' iareo,
tsy mañembetse aze ty fikorà' iareo;
zay ty hizotsoa' IEHOVÀ' i Mâroy
hialia'e am-bohi-Tsione,
nahô an-kaboa'e eo;
- ⁵ Manahake ty fihelahela' o voroñeo,
ty hañarova' IEHOVÀ' i Mâroy t'Ierosalaime;
katao mañaro, mamotsotse,
kanao ihelaña'e ambone, mandrombake.
- ⁶ Mitoliha amy loho niolà' areoy,
ry ana' Israeleo.
- ⁷ Ie amy andro zay,
songa hañary ze sare-sokim-bolafoti'e
nahô o sarens-draha volamena'eo,
o tsinene am-pitañe aman-kakeoo.
- ⁸ Toe hampikorovohe' ty fibara
tsy a' ondaty ty Asore;
ty fibara tsy a' ondaty ty hamotsek' aze;
aa le tsy hibotatsaha'e i fibaray,
vaho ho mpitorom-pamorekèke
o ajalahi'eo.

9 Hihelañe aña am-pirevendreveñañe i hafatrara'ey,
naho hitsolofiñe amy saiñey
o mpifehe'eo, hoe t'IEHOVÀ,
an-Tsione ao ty afo'e vaho
e Ierosalaime ao ty toña'e.

32

- 1** Oniño te hifelek' an-kavañonañe
ty mpanjaka,
vaho hifehe an-katò o roandriañeo.
2 Le hanahake ty fipalirañe
ami'ty tioke t'indaty,
naho hoe fitampiñañe ami'ty lihits' orañe,
hoe rano mitsirtsioke an-tane kàンkañe,
hambañe ami'ty tevam-bato ialofañe
an-tane kirikintañe ao.
3 Le tsy hakipe ty fihaino' o mahaisakeo;
vaho hitsendreñe ty ravembia mahajanjiñe.
4 Haharendre-kilala
ty fivetsevetse bei-àreke,
hiaren-tsaontsy ty famele' o mènekeo.
5 Tsy hatao vañoñe ka ty dagola,
le tsy hatao matarike ty tsivokatse;
6 Amy te mivolam-borosode ty gege,
mikitro-draha raty ty tro'e,
hitoloñe tsy aman-Kake,
hivolañ' ota am' IEHOVÀ,
kefohe'e ty tro' i saliko,
vaho kapaihe'e ty fitovi' i taliñiereñey.
7 Tsy vente'e ty harao' o tsivokatseo;
kiniae'e loza an-tambaimbaiñe
o rarakeo,
ndra te mivolam-to i misotriy.
8 Misafiry fatarihañe ty matarike,
naho i fatariha'e ty ijadoña'e.
9 Miongaha ry rakemba miagarègañeo,
janjiño o feokoo;
ry anak'ampela mitabonìtseo
anoloro sofiñe o lañonakoo.
10 Ho ampoheke nahareo
te peake ty taoñe tovoñañ' andro
ry tsidaredareo;
fa tsy hamokatse o vaheo,
tsy ho toly i fanontonañey.
11 Mitititiha, ry miaiñañoleñañeo, mimahimahiña ry mian-
drañandrañañeo; mañametsametsà, miboridaña,
misikina gony an-tohake
12 Mikabokaboha araña
ty amo tonda nisoao,
naho amo vahe niregoregooo,
13 ty amy tane-hoba' ondatikoy,
ie itiriam-patike naho hisatse;
eka, ty amo anjomba mitsinjakeo

vaho i rova mandia taròbay.
14 Fa kòake i anjombam-panjakay,
babangoñañe i rova nitsitsike ondatiy;
fa lakato nainai'e ty haboa
naho ty fijilovañ'abo
fa fitsamboañam-birike lý
naho fiandraza' o lia-raikeo
15 ampara' te adoañe amantika
ty Arofo boak' añ'abo,
ie ho tete-kobokara ty ratraratra,
vaho atao ty hoe ala ty tonda vokatse.
16 Himoneñe am-patrambey ao
amy zao ty hatò,
vaho hañialo an-tonda kobokara ao
ty havantañañe.
17 Hamokatse fierañerañañe
ty havañonañe,
hahatoly fianjiñañe naho fatokisañe
nainai'e ty hamarentane.
18 Hitoboke
añ'akibam-pañanintsiñe ondatikoo,
naho am-pipaliran-tsoa,
vaho am-pitofâñe mipendreñe.
19 Manahake te mihotrake
ty amy havandray i alay;
t'ie harèke ambane i rovay.
20 Haha nahareo mpitongy
añ'olon-drano iabio,
o mampidada ty tombo' o añombeo
naho o borikeo.

33

1 Hankàñe ama'o ty mpandrotsake,
ihe tsy rinotsake;
ty mpamañahy, ihe tsy nifañahieñey!
ie migadoñe ty fikopaha'o,
le ho kopaheñe,
ie itroara'o o famañahia'oo,
le ho fañahieñe.
2 O ry IEHOVÀ, toloro arofo zahay;
fa mandiñe Azo;
ehe te Ihe ho fità' iareo boa' maraiñe,
naho ty fandrombahañañe anay
an-tsan-koheke.
3 Mampitriban-day ondatio
i feon-koràkey;
mibaibay o fifeheañeo ami'ty fióngaha'o.
4 Ahoro'e ty kinopa'areo
manahake ty añoroña' ty beañe;
hoe fifamorohotan-kijeja
ty IEHOVÀ
ro toe vara'e.
7 Inao! mangoihoy an-tameaña ey

ty lahitsiai' iareo,
mangololoike o sorotàm-pañanintsiñeo.
⁸ Vahiny o lalañeо tsy amam-pañavelo,
nifotera'e i fañinay,
tsinambolitio'e o rovao,
tsy haoñe'e ondatio.
⁹ Mandala o taneo vaho miforejeje;
salatse ty Lebanon, miheatse;
hoe fatran-tane ty Sarone*
mihintsam-boa ty Karmelet†
naho i Basane‡.
¹⁰ Hiongake amy zao raho, hoe t'IEHOVÀ;
honjonen-dRaho henaneo,
ho rengen-dRaho henane zao.
¹¹ Mampiareñe kafo'e nahareo,
hisamake forompotse;
hamorototo anahareo hoe afo
ty kofò'areo.
¹² Ho tomomoheñe hoe sokày ondatio,
hoe fatike finira, nitomontoñe añ'afó,
¹³ Mijanjiña ry an-tsietoitane añe,
ino o nanoekoo?
Ry marine eo, iantofo o haozarakoo.
¹⁴ Mirevendreveñe o mpanan-kakeo
e Tsioneo
fihine' ty fihikitike ty tsy aman-Kake.
ia aman-tika ty hahafitoboke
amo afo mamorototoo,
ia aman-tika ty hahafimoneñe
amo afo manoba nainai'eo?
¹⁵ I mpañavelo an-kavantañañe,
naho misaontsy an-kavañonañey;
ie tsy mañaoñe ty varam-pikatramoañe,
i mañelahela fitañe
tsy handrambesa'e vokàney,
ty manjenjen-dravembia tsy ho janjiña'e
ze o fampiorihan-dio zao,
ie mikipe fihaino tsy hahaisaha'e
ty raty.
¹⁶ Himoneñe an-kaboañe ey re,
kijolim-bato ty ho fipalira'e,
hazotso ama'e ty mahakama'e,
tsy hisike ty rano'e.
¹⁷ Ho isam-pihaino'o ami'ty
hatsomerentsere'e i mpanjakay;
ho oni' iareo ty tane mitakatse añe.
¹⁸ Hañerehere ty tro'o ty fangebahebahañe:
Aia i mpamoliliy, aia i mpandanjay?
Aia i mpañiake o fitalakesañ'abooy?
¹⁹ Tsy ho isa'o ka ondaty mangosasàkeo;
ondaty aman-tsaontsy

* 33:9 Sarone: ty monto'e; ty sabo'e † 33:9 Karmelet: añondry vosy; fitatahañe; ‡ 33:9 Basane: ami'ty nife; ndra aman-tsifa

miheotse tsy fohiñeo,
o amam-pameleke mibedobedo
tsy rendre'o.

²⁰ Vazohò t'i Tsione,
i rovam-pamantaña-masin-tikañey;
ho isam-pihaino'o te fimoneñañe
mierañerañe t'Ierosalaime,
kijoly tsy hahoroñe,
amam-pàntake tsy hombotañe,
aman-taly tsy ho tampaheñe.

²¹ Hindre aman-tikañe ami'ty volonahe'e, t'IEHOVÀ,
an-toetse amañ'oñé
naho torahañe mibànatse;
tsy handenà' ty lakañ' am-pivey,
tsy ho rangaen-tsambo.

²² Toe mpizakan-tika t'IEHOVÀ
Mpandily antika t'IEHOVÀ,
Mpanjakan-tika t'IEHOVÀ;
Ie ty handrombake an-tika.

²³ Fa migebañe o talin-tsambo'oo,
tsy mitàñe i fahan-daiy,
tsy mamela-day;
Akore ty habei' o kinopake zaraeñeo
kanao andivañe amo kepekeo.

²⁴ Tsy hanao ty hoe ty mpitoboke ao:
Siloke raho;
Hafahan-kakeo ondaty mimoneñe aoo.

34

¹ Mitotoha hijanjiñe ry fifeheañeo, mitsendreña ry ondatio!

Mitsanoña ry tane, naho ze halifora'e;
ty voatse toy naho ze hene aboa'e.

² Iforoforoa' IEHOVÀ o fifeheañeo*,
ifomboa'e iaby o lahindefo'eo;
fa zinama'e iereo,
nasese'e ho mongoreñe.

³ Havokovoko alafe ao o vinono am'iareoo,
hakare' o loloo ty fañati-fofo'e,
hidoandoañe amo vohitseo ty lio' iareo,

⁴ Ho momoke i valobohòn-dindiñey,
le hapeleke hoe †tiyh o likerañeo;
hene hihintsañe ty fifamorohota' iareo manahake ty fiforejejen-dravem-
bahe,
vaho i miheatse an-tsakoañey.

⁵ Fa àtsa-dio andikerañe ao ty fibarako, hehe t'ie mizotso mb' Edome
mb'eo henaneo hizaka,
mb'am'ondaty nafàko harotsakeo.

⁶ Etsa-dio ty fibara' IEHOVÀ,
nampivondrahen-tsolike,
ami'ty lio' o añondrio naho o oseo,
ami'ty safom-boan-kobatroke;

* ^{34:2} Iir 30:11 † ^{34:4} Heb: boke-peleke

fa manañe fisoroñañe e Botsrà aña
 t'IEHOVÀ,
 naho fanjamanañe an-tane Edome ao.
⁷ Hindre ama'e hizotso o ndrimoo,
 o baniao rekets' o maozatseo;
 le ho kotsa-dio ty tane' iareo,
 vaho ho bobohen-tsoli like ty debo' iareo.
⁸ Fa aman'andro hamalea'e t'IEHOVÀ,
 taoñe hañondroha'e i Tsione.
⁹ Hovaeñe ho lokotara o toraha'eo,
 ho solifara o lembo'eo;
 hene hifotetse ho lokotara milebaleba
 o tane'eo.
¹⁰ Tsy hakipeke handro ndra haleñe, hitolom-pionjoñe avao ty hatoe'e;
 ho koake an-tariratse an-tariratse,
 tsy hirangañe nainai'e donia.
¹¹ Ho fanañan-tangongo
 naho sama ty ao,
 ho fimoneñam-borondolo naho koake, ho vavare'e ama'e ty talin-
 kakoahañe
 naho ty talim-polò hakapaihañe.
¹² O roandria'eo, tsy eo ty ho kanjieñe
 ho mpanjaka;
 kila ho mongotse o ana-dona'eo.
¹³ Fatike ty hitiry amo fijilova'e fatratseo, hisatse naho ropiteke amo
 kijoli'eo;
 ho fitoboha' o fanalokeo,
 naho ty fanozora' o voron-tsatrañe.
¹⁴ Ho fikaoña' ty farasy naho ty fanaloke, hikoike o hamaroa'eo ty ose-lý;
 Eka, hitoboke ao ty voron-dolo,
 ho tendreke ao ty fitofa'e.
¹⁵ Hamboare' i lapetakey ty traño'e
 naho hifana ao, naho hamoy,
 vaho hatonto'e ambane' talinjo'eo,
 hifamory ao ty vantio,
 songa amam-bali'e.
¹⁶ Kodebeo ty boke' IEHOVÀ, le vakio:
 tsy am'iereo ty ho motso,
 sindre ho amam-bali'e;
 i falie'ey ty nandily,
 le i arofo'ey ty nanontoñe iareo.
¹⁷ Niazo'e an-tsapake iareo,
 le zinaram-pitá'e am'iereo an-taly
 o anjara'eo;
 ho fanaña' iareo nainai'e,
 tariratse an-tariratse
 ty fimoneña' iareo.

35

- ¹ Hifale ty ratraratra naho ty paipaiñe, hirebeke i vavataney,
 vaho hitaroke hoe dokonose;
- ² Handrevake re vaho hirañaraña
 an-drebeke naho sabo;
 hatolots'aze ty enge' i Lebanon,

ty hafanjàka' i Karmele naho i Sarone; hahaisake ty enge' IEHOVÀ iereo,
ty volonahen' Añaharen-tika.

³ Haozaro o fitàn-kengeo

le hafatraro o ongotse mikoletrao,

⁴ Ano ty hoe o embetse an-trokeo: Manintsiña, ko hembañe!

hehe te ho avy t'i Andrianañahare' areo, aman-tambe naho famalean'
Añahare handrombake.

⁵ Le hibeake ty fihaino' o goao

naho ho sokafeñe ty ravembia' o gïñeo;

⁶ Hitsamboañe hoe hirañe ty kepeke

vaho hisabo an-kaehake ty famele' o moañe; higoangoañan-drano ty
fatrambey naho ty torahañe am-bavatane eo.

⁷ Hifotetse ho antara ty tane maike,

naho rano manganahana o paipaiñe;

hitiria' ty vinda o korontsom-panalokeo, vaho handimbe o ahetseo

ty tongoahara naho ty sale.

⁸ Ho eo ty lalan-gadagadañe,

ty fañaveloañe hatao ty hoe

ty Lala-Piavahañe*,

tsy homb'ama'e ty tsy malio;

ie ho amo mpañavelo amy lalañey,

vaho tsy hihezeñe aze ty dagola.

⁹ Tsy ho ama'e tyiona,

tsy hanganike ama'e ty biby romotse;

tsy ho zoeñe ao iereo,

fa ho fañaveloa' o jinebañe

¹⁰ le himpoly o vinili' IEHOVÀ,

hipoña-tsabo mb'e Tsione mb'eo;

naho hafaleañe tsy modo ty ho añ'ambone' iareo ;

Hitendreke firebehañe naho haravoña vaho hihelañe aña ty hontoke

naho ty fiselekaiñañe.

36

¹ Aa ie amy taom-paha folo-efats-ambi' Iekizkia mpanjakay le naname ze
hene rova' Iehodà nihofatrareñe t'i Senakeribe* mpanjaka' i Asore vaho
tinava'e. ² Nirahe' i mpanjaka' i Asorey boake Lakise[†] mb'am' Iekizkia e
Ierosalaime ao t'i Rabsakè‡ reketse lian-dahin-defo ra'elisy, le nijohañe
an-talaha-drano miboak' amy antara amboney, amy lalan-tetem-panasa-
lambay ey. ³ Niavotse mb'ama'e mb'eo t'i Eliakime, ana' i Hilkià, mpifelek'
i anjombay naho i Sebna mpanokitse vaho Ioake§ ana' i Asafe, mpamolily.

⁴ Hoe t'i Rabsakè tam' iereo, Volaño henaneo am' Iekizkia: Hoe ty
saontsi' i mpanjaka ra'elisy, i mpanjaka' i Asorey. Ajado' areo ami'ty
inom-bao ze o fatokisa' areo zao? ⁵ Hoe raho: fivolan-kòake hao ty atao
safiry naho ozatse hahafialy? Aa le ia ty iatoa' areo, kanao miola amako?

⁶ Hehe te iatoa' areo i fitoñom-bararata vinonotrobokey, i Mitsraime; ie
itoñona' ondaty am-pitâne le trofake: zay t'i Parò mpanjaka' i Mitsraime
amy ze hene miato ama'e. ⁷ Aa naho manao ty hoe amako nahareo: IEHOVÀ
Iiatoa'ay t'i Andrianañahare'ay. Aa tsy ie hao ty nañafaha' Iekizkia o

* 35:8 Sab 77:13 * 36:1 Senakeribe: roipiteke mandrotsake † 36:2 Lakise: i midraidraitse,
mahafiaovotse ‡ 36:2 Rabsakè: Talen-droandriañe § 36:3 Ioake: filongoa; rahalahi' IEHOVÀ

toe'e ankaboañeo naho o kitreli'eo vaho nanao ty hoe am' Iehodà naho Ierosalaime te amy ze o kitrely zao ty italahoa' areo? ⁸ Aa ehe manoa kizè amy taleko mpanjaka' i Asorey, le hatoloko azo ty soavala ro'arivo, naho mete'o ty hampijoñe mpiningitse ama'e. ⁹ Akore arè ty hampiambohoa'o ty mpifehe, faragidro' o mpitoron-talèkoo? te hapite'o amy Mitsraime ty fiatoa'o hahazoa'o sarete naho mpiningitse! ¹⁰ Aa vaho nionjoñe mb'an-tane atoy hao raho handrotsak' aze tsy ama' IEHOVÀ? Toe nanao ty hoe amako t'IEHOVÀ: Mionjona haname o tane zao le rotsaho.

¹¹ Aa le hoe t'i Eliakime, i Sebnà, naho Ioàke amy Rabsakè, Ehe, misaontsia amo mpitoro'oo an-tsaontsi' i Arame, fa hai'ay; le ko misaontsy ama'ay an-tsaontsi' Iehodà, am-pijanjiña' ondaty ambone' o kijolioo. ¹² Fa hoe t'i Rabsakè: Aa vaho nirahe' i talèkoy raho hivolañe amy tale' areoy naho ama' areo avao o entako zao, le tsy am' ondaty mitoboke ambone' o kijolioo, o nozoñeñe hitraoke ama' o hikama ty fiamonto'e naho hinoñe ty rano faria'eo?

¹³ Aa le niongake t'i Rabsakè vaho pinaza'e ty koike, ami'ty saontsi' Iehodà ty hoe: Janjiño ty saontsi' i mpanjaka ra' elahiy, ty mpanjaka' i Asore! ¹⁴ Hoe i mpanjakay, Ko apo' areo ho fañahie' Iekizkia, fa tsy ho lefe'e rombaheñe. ¹⁵ Ko ado' areo hampiatoa' Iekizkia am' IEHOVÀ ami'ty hoe: Toe hamotsotse an-tika t'IEHOVÀ, le tsy hatolotse am-pità' i mpanjaka' i Asorey ty rova toy. ¹⁶ Ko haoñe' areo t'Iekizkia; fa hoe ty mpanjaka' i Asore, mifampilongoa amako le miavota mb'etoy; fa songa hikama ami'ty vahe'e t'indaty, naho sindre ami'ty sakoa'e t'indaty vaho hene hinon-drano boak' an-tsajoa'e t'indaty, ¹⁷ ampara' te homb'eo raho hanese anahareo mb'an-tane manahake ty tane' areo, tanen-ampemba naho divay, tane ama mahakama naho tanem-bahe. ¹⁸ Ko apo' areo hampivihe' Iekizkia ami' ty hoe: Handrombake antika t'IEHOVÀ. Fa ia amo 'ndrahare' o kilakila' ndatio ty nandrombake ty tane'e am-pità' i mpanjaka' i Asorey? ¹⁹ Aia o ndrahare' i Kamate* naho i Arpadeo†? Aia o ndrahare' i Sefarvaimeo‡? Fa navotso' iareo an-tañako hao t'i Somerone? ²⁰ Ia amo ndrahare' i tane rey iabio ty nañaha aze an-tañako, te havotso' IEHOVÀ an-tañako t'Ierosalaime?

²¹ Fe nianjiñe avao iereo, leo volañe raike tsy natoi' iareo aze, amy linili' i mpanjakaiy, ty hoe: Ko itoiñañe. ²² Nomb' am' Iekizkia t'i Eliakime ana' i Kilkeia mpifeleke i anjombay naho i Sebnà mpanokitse naho Ioàke ana' i Asafe§ mpamolily, an-tsaroñe riatse, vaho nitaroñe i enta' i Rabsakèy.

37

¹ Aa ie nahajanjiñe zay t'Iekizkia, le rinia'e o siki'eo naho nisaron-gony vaho nimoak' añ'anjomba' IEHOVÀ ao. ² Nirahe'e mb'am' Iesaià mpitoky ana' i Amotse amy zao t'i Eliakime mpifeleke i anjombay, naho i Sebnà mpanokitse naho o zokem-pisoroñe songa nisaron-gony. ³ Le hoe ty enta' iareo ama'e: Hoe t'Iekizkia: Androm-poheke naho trevoke vaho teratera ty andro toy; fa antitotse ho samake o ajajao fe tsy eo ty haozarañe hahatoly. ⁴ He ho janjiñe' IEHOVÀ Andrianañahare'o o saontsi' i Rabsakè nañiraham-panjaka' i Asore tale'eo hanigike an' Andrianañahare veloñe, vaho hendaha' IEHOVÀ Andrianañahare'o i saontsy jinanji'ey; ehe mihalalia ho amy ze sehangae mbe eo. ⁵ Aa le nivotrak' am' Iesaià eo o mpitoro' Iekizkiao. ⁶ Le hoe t'Iesaià am' iareo: Zao ty ho saontsie' areo amy tale' areoy: Hoe ty nafè' IEHOVÀ: ko hembañ' amo entañe jinanji'oo,

* ^{36:19} Kamate: habosehañe; hatrofohañe; kijoly † ^{36:19} Arpade: fireandream-pijebañañe

‡ ^{36:19} Sefarvaime: boke roe; mpanokitse roe § ^{36:22} Asafe: mpanontone

amo niteratera' o mpitoro' i Mpanjaka' i Asoreo Ahikoo. ⁷ Inao te hajoko ama'e ty fañahy, le hijanjiñe tolom-boetse naho himpoly an-tane'e aña vaho hampikorovoheko am-pibara an-tane'e ao.

⁸ Aa le nibalike mb'eo t'i Rabsakè, vaho zoe'e nifañotake amy Libnà* ty mpanjaka' i Asore, fa tsinano'e t'ie nienga i Lakise. ⁹ Le hoe ty jinanji'e ty amy Tirhakà†, mpanjaka' i Kose, Miavotse mb'etoa re hialy ama'o. Ie jinanji'e zay le nañitrike am' Iekizkia ty hoe: ¹⁰ Ty hoe ty ho saontsie' areo am' Iekizkia mpanjaka' Iehodà: Asoao tsy henga'o hanigìke azo t'i Andrianañahare iatoa'o, hanao ty hoe: Tsy hatolotse am-pitàm-panjaka' i Asore t'Ierosalaime. ¹¹ Inao, tsy jinanji'o hao ty nanoa' o mpanjaka' i Asoreo amo hene taneo? ie nampangotomomohe'e; aa havotsotse hao nahareo? ¹² Fa rinomban-drahare'e hao o rinotsan-droaekoo: i Gozane‡ naho i Harane§, naho i Retsefe* vaho o ana' i Edene† e Telasareo‡? ¹³ Aia ty mpanjaka' i Kamàte naho ty mpanjaka' i Arpade naho ty mpanjakan-drova' i Sefarvaime, ty a i Henà vaho Ivà?

¹⁴ Aa ie rinambe' Iekizkià i taratasy am-pità' o nampihitrifeñeo naho vinaki'e; le nionjomb' aña' anjomba' IEHOVÀ mb'eo t'Iekizkia, vaho vinela'e añatrefa' IEHOVÀ. ¹⁵ Nihalaly am' IEHOVÀ t'Iekizkia ami'ty hoe: ¹⁶ Ry IEHOVÀ' i Måroy, Andrianañahare' Israele, mpiambesatse ambone' o kerobeo; Ihe ro Andrianañahare, Ihe avao, amy ze kila fifeleha' ty tane toy; ry Andrianamboats' i likerañey naho ty tane toy. ¹⁷ Atokilaño ty ravembia'o ry IEHOVÀ naho janjiño; abolanaho o fihaino'oo ry IEHOVÀ vaho vazohò; inao ze hene enta' i Senkeribe, nahitri'e hañinje an' Andrianañahare veloñe. ¹⁸ O ry IEHOVÀ, Toe fonga nampangoakoahé' o mpanjaka' i Asoreo o fifeheañeo naho o tane' iareeo, ¹⁹ vaho naretsa' iareo aña' afo ao o ndrahare' iareeo amy t'ie tsy Andrianañahare, fa sata-pitá' ondaty, hatae naho vato; aa le finongo'e. ²⁰ Ie henaneo ry IEHOVÀ Andrianañahare'ay, rombaho am-pità'e zahay, soa te ho fohi' ze kila fifeleha' ty tane toy te Ihe ro IEHOVÀ, Ihe avao.

²¹ Aa le nahitri' Iesaià ana' i Amotse am' Iekizkia ty hoe: Hoe ty nafè' IEHOVÀ, Andrianañahare' Israele: Amy te ihe ro nihalaly amako ty amy Senkeribe mpanjaka' i Asore, ²² le hoe ty tsara nafè' IEHOVÀ ama'e: Fa nanirika azo i anak' ampela' i Tsioney, nitohafa'e an-drabioñe; vaho nikofikofi-doha amboho'o ao i anak' ampela' Ierosalaimey.

²³ Ia ty sinigì'o naho tineratera'o?
Ia ty nañonjona'o feo?
Toe nampiandrae'o mañambone ey
o maso'oo, hiatreatrea'o
t'i Masi' Israele!

²⁴ O mpitoro'oo ty nañamavoa'o
i TALÈ, ami'ty hoe:
Amo hatsifotofoton-tsaretekoo
ty nitroarako ankaboa' o vohitseo,
an-tsifitsifi' i Lebanon ao;
fonga finirako ze mendoraveñe abo;
naho ze akao soa;

* 37:8 Libnà; foty, mangarahara † 37:9 Tirhakà: mpandohy; mpañontane; mpisamba derañe
‡ 37:12 Gozane: volon'añondry; fiandrazañe; § 37:12 Harane: Tane am-bohibohitse * 37:12
Retsefe: solike an-dalañe; vae mibelabela † 37:12 Edene: fivaraneahañe; hafaleañe ‡ 37:12
Telasare: tavaneñe mb'eo; mamotry

nizilihako i haboañe lavitse ama'ey,
ty ala-vondro an-goloboñe kobokara.

²⁵ Nihaly raho vaho ninon-drano,
le ami'ty lelam-pandiako ty nañamaihako ze hene saka' i Mitsraime.

²⁶ Mboe tsy jinanji'o hao?

Tsietoimoneñe zay ty nisafiriako
taolo añe t'ie naereñereko;
ie o tafetetse henaneo;

te hafotetse ho kivotrevotre mangoakoake o rova nifatrareñeo.

²⁷ Aa le ni-kede ozatse o mpimone'eo,
niampuheke vaho nisalatse,
nanahake ty ahetsé an-kivoke ey,
hoe rongoñe antsetra,
hoe ahetsé ambone anjomba,
mae t'ie mbe tsy matoe.

²⁸ Fe apotako o fiambesa'oo, naho
o flavota'oo,
o fimoaha'oo vaho
o famantsiña'o amakoo.

²⁹ Aa kanao nitazataza'o,
naho nañambone mb'amo
sofiko toañe ty korà'o,
le hanoeko am-piantsoña'o ao
ty porengoko,
naho am-pivimbi'o ty laboridiko,
vaho hampolieko mb'amy lalañe
nomba'o mb'etoañey.

³⁰ Le zao ty ho viloñe ama'o:
hikama o raha mitiry avao nahareo
ami'ty taoñe toy;
le ze mijirike ama'e
ami'ty taom-paharoe;
le mitongisa ami'ty taom-pahatelo naho manataha, amboleo valoboke
vaho ikamao ty voka'e.

³¹ Le hamahatse mañambane ty hengaha' i anjomba' Iehodà ,
vaho hamoa mañambone.

³² Fa boake Ierosalaime ao
ty hiavota' ty honka'e
vaho hirik' am-bohi-Tsione
o mahafibotàfotseo;
ho henefe' ty fahimbaña'
IEHOVÀ' i Màroy.

³³ Aa le hoe t'IEHOVÀ ty amy
Mpanjaka' i Asorey:
tsy himoake an-drova atoy re,
ndra hitifitse ana-pale,
tsy hiatrefa'e am-pikalañe
ndra hampitoabora'e votren-tane.

³⁴ I lalañe nomba'e mb'etoañey,
ty himpolia'e mb'eo,
tsy himoake ami'ty rova toy re, hoe t'IEHOVÀ
³⁵ Fa harovako naho ho rombaheko
ty amako ty rova toy,

vaho ty amy mpitoroko Davidey.

³⁶ Aa le nionjom-beo ty anjeli' IEHOVÀ nanjamañe ty Rai-hetse-tsi-valo-ale-tsi-lime arivo an-tobe' o nte-Asoreo; le ie nivañoñe maraindray t'indaty, hehe te fonga nidondom-pate ty ey. ³⁷ Niavotse amy zao t'i Senkeribe mpanjaka' i Asore, nimpoly vaho nitoboke e Ninevèy ao. ³⁸ Le teo t'ie niloloke añ' anjomba' i Nisroke[§] ndrahare'e ao, te namatsik' aze am-pibara ty Adrameleke* naho i Sarezere† ana'e vaho nifiotse mb' an-tane Ararate‡ añae. I Esar-kadone[§] ana'e ty nandimbe aze ho mpifeleke.

38

¹ Ie amy andro rezay, natindry fa heta'e t'Iekizkia; le nimb'ama'e mb'eo t'Iesaià ana' i Amotse, nanao ty hoe: Hoe t'IEHOVÀ: Hajario ty anjomba'o fa toe hivetrake, tsy ho veloñe. ² Nampitolihe' Iekizkia mb' an-drindriñe ty lahar'a'e vaho nihalaly am' IEHOVÀ, ³ ty hoe: Mihalaly ama'o, ry IEHOVÀ, tiahio henaneo ty fandenako añatrefa'o an-kavantañañe naho an-kaliforan-troke, vaho nanao ze mahity am-pahaoniña'o; aa ie nangololoike ty rovetse, ⁴ nivotrak' am' Iesaià ty tsara' IEHOVÀ nanao ty hoe: ⁵ Akia saontsio am' Iekizkia ty hoe: Hoe t'IEHOVÀ, Andrianañaharen-drae'o Davide. Fa jinanjiko i halali'oy, nitreako o ranom-pihaino'oo; ingo ho tovoñako taoñe folo lim' amby o andro'oo. ⁶ Ho hahako am-pitam-panjaka' i Asore rehe naho ty rova toy vaho harovako ty rova toy; ⁷ le zao ty ho viloñe ama'o boak'am' IEHOVÀ, te ho henefa' IEHOVÀ i raha tsinara'ey: ⁸ Heheke te hampibiliheko soritse folo amo soritse fa nilia'eo ty talinjom-panondro-andro' i Akhaze. Aa le nibalik' amy soritse folo fa nomba'ey i androy.

⁹ Inao ty sinoki' Iekizkia mpanjaka' Iehodà, t'ie natindry an-tihy vaho nijangañe amy arete'ey.

¹⁰ Hoe raho: Ami'ty tsipinde-mena'
o androkoo ty ijoñako
an-dalambein-tsikeokeoke eo;
kinalañ' amako o andro tsy nirikoo.

¹¹ Hoe raho: tsy ho treako t'Ià,
Eka, Ià an-tane' o veloñe;
tsy ho isako ka t'indaty mindre amo mpimone' ty tane toio.

¹² Nombotañe vaho nasitake amako
hoe kibohom-piarak' añondry ty kijàko;
nahoronkoroñe hoe te asam-panenoñe ty fiaiko:
tinampa'e amy tenoñey raho,
handro an-kaleñe
ty hamongora'o ty fiaiko.

¹³ Nifeahako pak'ami'ty maraiñe,
manahake ty liona,
fe mbe nipozapozake iaby o taolakoo, añivo ty handro naho ty haleñe
ty nampigadoña'o ahy.

¹⁴ Mikora hoe tivoke naho aliotse raho;
mikò hoe deho;
nimokore' ty fiandrandràko o masokoo.
O ry IEHOVÀ, voatindry raho,
Ihe abey ro tsoako.

§ 37:38 Nisroke: aly; vente'e; sigike; marefo * 37:38 Adrameleke: sarimbo; engeñe † 37:38 Sarezere: roandriañ'afó; mpamandroñe ‡ 37:38 Ararate: ozoñe mampititititike § 37:38 Esar-kadone: mpandrebake; hafaleañe;

¹⁵ Ino ty ho volañeko? Nametse amako re mbore nanoe'e; hiezañe amo hene androkoo raho, ami'ty hafairam-piaiko.

¹⁶ O TALÈ, irezay o mahajangañe ondatio, mampanintsiñe ty troko rehe; vaho mameñoñ' ahy.

¹⁷ Tsy nanjo fañanintsin-draho te mone haaferon' aiko; fe o fikokoa'o ahikoo ro nañaha'o ahy amy kobon-kamodoañey; vaho fonga nahifi'o amboho'o ao o hakeokoo.

¹⁸ Tsy mahafandrenge Azo ty tsikeokeoke, tsy hañonjoñe azo ty havilasy; tsy mahafitamà ty figahiña'o ty migodañe mb'an-koak' ao.

¹⁹ O veloñeo, o veloñeo, ie ro mandrenge Azoo, manahake ty anoeko henaneo; ampandrendrehen-drae amo keleia'eo ty figahiña'o.

²⁰ Handrombak' ahy t'IEHOVÀ; le hitiha'ay ami'ty marovany añ'anjomba' IEHOVÀ ao o sabokoo, amo hene andro hiveloma'aio.

²¹ Fa hoe ty natao' Iesaià: Ampangalao garaton-tsakoa hapakotse amy honay himeara'e.

²² Nanao ty hoe ka t'Iekizkia: Ino ty viloñe hampionjoñ' ahy mb' añ' anjomba' IEHOVÀ mb'eo?

39

¹ Ie amy zay, nampañitrike taratasy naho ravoravo am' Iekizkia t'i Merodak-baladane* ana' i Baladanet†, mpanjaka' i Bavele; amy te jinanji'e t'ie natindry vaho nibodañe. ² Nifale t'Iekizkia vaho natoro'e iareo ty trañom-barä'e, ty volafoty, ty volamena, naho o fampafiriañe, i menake sarotsey naho i trañom-pikalaña'e iabiy naho ze hene nioniñe amo vara'eo; tsy añ'anjomba'e ao ndra am-pifehea'e iaby ty tsy natoro'e. ³ Aa le niheo mb' am' Iekizkia mb'eo t'Iesaià nanao ty hoe: Ino ty nisaontsia' indaty rey? Le aia ty nihirifa' iareo te nimb' ama'o? Le hoe t'Iekizkia: Boak' am-pifelehañe tsietoitane aña t'ie nimb' amako mb' etoy; hiriike e Bavele aña. ⁴ Le hoe re: Ino ty niisa' iareo añ'anjomba'o ao? Nanoñe ty hoe t'Iekizkia: Fonga niisa' iereo ze añ'anjombako ao, tsy amo varakoo ty tsy nitoroako. ⁵ Aa le hoe t'Iesaià am' Iekizkia: Janjiño ty tsara' IEHOVÀ i Märoy:

⁶ Toe ho avy ty andro, te hendeseñe mb'e Bavele mb'eo ze he'e añañ anjomba'o ao naho o vara nahajan-droae'o ho ami'ty andro toio, leo raike tsy hapoke, hoe t'IEHOVÀ. ⁷ Le o anake hiboak' ama'oo, o hasama'oo, ro hasese mb'eo ho vositse añañ anjombam-panjaka' i Bavele ao.

* ^{39:1} Merodake: solo ho mafaitse; † ^{39:1} Baladane: tsy aman-jaka; Bel: Tale

8 Le hoe ty natoi' Iekizkia am' Iesaià: Soa i tsara' IEHOVÀ nisaontsie'oy, ie nañereñere ty hoe; Amy te hanjo fierañerañañe naho havañonan-draho amo androkoo.

40

1 Hohò, Hohò, ondatikoo,

hoe t'i Andrianañahare' areo.

2 Saontsio fañohòañe t'Ierosalaime,
vaho koiho ama'e te fa heneke ty ali'e*;
te jinebañe o hakeo'eo,
amy t'ie nandrambe indroe
am-pitàn' Añahare
ho vale' o hene tahi'eo.

3 Inao ty fiarañanañañe mikoike :
Anataho lalañe am-patrambey aña t'IEHOVÀ.

Ampimirao lalambey an-dratraratra
aña t'i Andrianañahare.

4 Haonjoñe iaby ze atao goledoñe,
naho haketrake iaby o tambohoo
ho vàñeñe ze manongatonga,
naho hampimiraeña ze migodeogodeoñe;

5 le haboake ty enge' IEHOVÀ, vaho hiharo handrendrek' aze
ze atao nofotse, zay ty nitsaram-palie' IEHOVÀ.

6 Inao ty fiarañanañañe manao ty hoe: Koiho, le hoe ty natoi'e:
Ino ty ho koiheko?

Ahetse iaby ze atao nofotse,
le hoe voñe an-teteke ao ty hasoa'e.

7 Miheatse o ahetsøo,
mihintsañe o voñe'eo,
kanao tiofe' ty kofòn' Añahare, toe ahetsøe ondatio.

8 Miheatse o ahetsøo,
mihintsañe o voñe'eo,
fe mijadoñe nainai'e †
ty tsaran' Añaharen-tikañe.

9 O ry Tsione mpitaroñe entan-tsoao
mañambonea vohitse abo;
ry Ierosalaime mpanese talily soao
poñafo an-koike ty fiarañanaña'o, aonjono, le ko hembañe;
saontsio ty hoe o rova' Iehodào :

Ingo t'i Andrianañahare' areo !

10 Hehe, te hitotsak' an-kaozarañe
t'i TALÈ IEHOVÀ; hifehe am-pit'a'e;
Ingo, te ama'e i tambe'ey, añatrefa'e o vale-soa'eo.

11 Manahake ty mpiarake
miandrazañe i mpirai-lia'ey naho
manontontoñe o vik'añondri'eo am-pit'a'e
ie otroñe'e aña'raña'e eo, vaho manehak' ty mampinono mora mb'eo.

12 Ia ty nanovy o ranoo an-dela-pit'a'e,
naho nanjehe i likerañey an-kiho'e,
naho nañiake ty debo' ty tane toy
am-pañaranañañe,

* **40:2** ndra ty hoe: ty fiatran-draha'e † **40:8** Pe I 1:24-25

naho nandanja o vohitseo
 am-pandanjâne,
 vaho o tambohoo am-balantsy?
 13 Ia ty nanoro i Arofo' IEHOVÀ,
 he ia ty mpañana'e mañòk' aze?
 14 Ia ty niharoa'e safiry,
 ia ty nampahafohiñe aze,
 ia ty nanoro aze i lalam-bantañey,
 naho nampandrendreke aze ty hilala
 vaho nañòke aze i oloñolon-kihitsey?
 15 Toe tsopake an-tsajoa ao
 ze kilakila ondaty,
 iaheñe hoe deboke
 am-pingam-balantsy,
 vaho lanjaeñe hoe lemboke o tokonoseo.
 16 Tsy ampe horoañe ty Lebanoné,
 tsy mahaenen-kisoroñañe o bibi'eo.
 17 Hoe hakoahañe añatrefa'e
 o fifeheañ' iabio, volilien-ko tsy vente'e, ie ambane' ty hatao kapaike.
 18 Hirinkiriñe'o ama' ia arè
 t'i Andrianañahare?
 vintan' inoñe ty hampanahafe'o ama'e?
 19 Hera i sarens-draha natrana' i mpitseney,
 naho nipakora' i mpanefe-volamenay
 volamena,
 vaho nandranjia' i mpanefe-volafotiy
 silisily volafoty?
 20 Le eo ty rarake tsy mahalefe enga,
 joboñe'e ty hatae tsy ho momoke;
 paiae'e ty mpandranjy mahimbañe handranjy sarens-draha tsy hitroetroe.
 21 Tsy fohi'o hao? Tsy jinanji'o hao? Tsy natalily ama'o am-pifotora'e aña
 hao?
 Tsy nirendre'o hao
 o manànta' ty tane toio?
 22 Ie ty miambesatse ambone' ty
 fibontolia' ty tane toy,
 o mpimone'eo ro manahake kijeja;
 Ie ty mandamake o likerañeo
 hoe lamba fañefetse,
 vaho mameletse iereo
 hoe kivohom-pañialoañe.
 23 Ie ty mamotsake roandriañe ho hakoahañe, naho ampinjarie' ho tsy
 vente'e o mpizaka' ty tane toio.
 24 Ie vaho nitongisañe,
 aniany te nararake;
 le namahatse an-tane ao
 o taho'eo;
 vaho miheatse t'ie tiofe'e,
 endese' o tangololahio aña
 hoe ahe-maike.
 25 Aa le hampanahafe' areo ama' ia
 te Zaho ro hambañe ama'e?
 Hoe i Masiñey.

- ²⁶ Ampiandrando mb'añ'abo ey o fihaino'oo, mahaisaha: ia ty nam-boatse iareo?
 I mañakatse ty havasiaña' iareo
 ami'ty ia'ey,
 hene kanjie'e amy tahina'ey,
 naho amy hara'elahin-kaozara'ey
 vaho am-panjofahan-kafatrara'e,
 leo raike tsy mikipe.
- ²⁷ Ino ty atao'o ty hoe, O Iakobe,
 naho saontsie'o ty hoe: Ry Israele,
 Mietake am' IEHOVÀ ty liako,
 tsy ahoan' Añahareko o zokoo.
- ²⁸ Mboe tsy fohi'o hao?
 Tsy jinanji'o hao te tsy mitoirañe, tsy mokotse
 t'i Andrianañahare nainai'e,
 IEHOVÀ Andrianamboatse o olon-taneo?
 Tsy taka-tsikaraheñe o hilala'eo.
- ²⁹ Ampaozare'e o midazidazitseo;
 vaho hafatrare'e o tsy maozatseo.
- ³⁰ Ndra te toirañe
 naho màmake o ajalahio,
 vaho mikoletra ty fanalolahy;
- ³¹ Ho vaoen-kaozarañe o mahaliñe IEHOVÀ;
 hionjoñe amañ'elatse hoe vantio;
 hilay fa tsy ho vozake,
 hinokitse fa tsy ho toirañe.

41

- ¹ Mianjiña, hijanjiña' areo ahy,
 ry tokonoseo,
 ampaozareñe ondatio;
 hañarinea' iareo mb'etoy, hisaontsy;
 Antao hototoke mb'eo hitsarañe.
- ² Ia ty nampitsekake i boak' atiñanañey
 hitroara'e an-kavañonañe?
 Ie apo'e aolo'e ey o kilakila ondatio naho ampiambanè'e o mpanjakao?
 Idemohe' i fibara'ey ho deboke, ahofahofa i fale'ey hoe t'ie kafo'e.
- ³ Niheañe'e iereo, nirefe tsy an-joy;
 an-dalañe mbe lia tsy niliam-pandia'e.
- ⁴ Ia ty nitsakore vaho nahatafetetse?
 Ie nikanjy o tariratseo am'baloha'e aña.
 Zaho IEHOVÀ, ty valoha'e,
 vaho ho fara'e, Ie Raho.
- ⁵ Nañeveñe o tokonoseo te nahaoniñe; nihondrahondra o olon-taneo;
 nitotoke iereo vaho nimb'atoy.
- ⁶ Mifañimba o mpifankarineo,
 songa manao aman-drahalahi'e :
 Mihaozara.
- ⁷ Aa le hafatrare' i mpandranjiy
 ty mpitsene volamena,
 risihe' i mpamañe aña'ana-batoy
 i mipeke renem-batoy;
 le i fanodirañey

ata'e ty hoe: Soa zao.
 Rekete'e am-pati-by tsy hitroetroe.
⁸ F'ihe Israele, mpitoroko,
 Iakobe jinoboko,
 tirin' Avrahame Rañeko;
⁹ Ie rinambeko añ'olo' ty tane toy aña
 naho nitoka azo añ-tsietoitane aña,
 nanao ty hoe ama'o: Mpitoroko rehe,
 jinoboko fa tsy nifarieko;
¹⁰ Ko hemban-drehe,
 fa indrezako,
 ko mijilojilo:
 Zaho ro Andrianañahare'o;
 le hampaozareko
 toe hañimb' azo raho;
 Eka, ho tohanako an-tañan-kavanant
 kavantàñako.
¹¹ Toe fonga ho salareñe naho aliheñe
 ze navaivay ama'o;
 harotsake o nañatreatre azoo,
 hafotsake tsy ho vente'e.
¹² Ho paia'o fa tsy ho isa'o
 o nifañotokotok' ama'oo;
 ho hakoahañe o nialy ama'oo,
 vata'e kòake.
¹³ Amy te Zaho IEHOVÀ
 Andrianañahare'o ty mikalañe
 ty fità'o ankavana, hanoako ty hoe:
 Ko mirevendreven-drehe,
 Zaho ty hañolotse azo.
¹⁴ Ko hembañe ry oletse Iakobe,
 ry ondati' Israeleo, fa holoreko,
 hoe t'IEHOVÀ Mpijkebañe azo,
 i Masi' Israeley.
¹⁵ Ingo rinanjiko ho fandisañan-drehe,
 reketse nife masioñe;
 ho lisane'o o vohitseo, ho demohe'o,
 vaho hanoe'o kafo o tambohoo.
¹⁶ Ho tsongae'o,
 le hahofa' i tiokey mb'eo,
 naho haboele' i tangololahiy;
 naho hirebeha'o ty tahina' IEHOVÀ,
 handia-taroba amy Masi' Israeley.
¹⁷ Mipay rano o rarakeo naho o poi'eo,
 fe tsy eo,
 kantañe an-karan-drano'e
 ty famele' iareo;
 zaho IEHOVÀ ty hanoiñe iareo,
 Tsy haforintseko;
 zaho Andrianañahare' Israele.
¹⁸ Hanokafako torahañe
 o haboan-diolioo,
 naho rano manganañana
 añivo' o vavataneo;

hanoako sihanake lifo-drano
ty fatrambey
naho rano mipororoake o tane kankañeo.

19 Hapoko an-dratraratra ao
ty mendorave* naho ty roy,
ty akao naho ty olive;
hadoko an-diolio ao ty sohihy†,
reketse ty harandranto, vaho ty kobaiñe.

20 Soa t'ie hahaisake naho haharendreke
hitsakore naho hitrao-kilala
te nanoem-pitâ' IEHOVÀ zao,
vaho tsinene' i Masi' Israeley.

21 Aboaho ty enta' areo, hoe t'IEHOVÀ;
akaro ty filiera' areo,
hoe t'i Mpanjaka' Iakobe.

22 Ee t'ie hakare'areo,
hitsey ama'ay o hifetsakeo;
o raha taoloo, te inoñe?
Atalilio hitsakorea'ay,
hahafohina'ay ty figadoña'e;
he taroño ama'ay o raha ho avio.

23 Itokio o raha mbe hiheo amy añeio,
hahafohina'ay t'ie ndrahare;
ke anò ty soa, he anò ty raty, hisamba'ay, hitraofa'ay fañeveñañe.

24 Toe tsy manjofake nahareo,

koake o sata' areoo.
Avivivioke ty mifale ama'areo.

25 Fa nitsekafeko i tavaratse añey,
le fa pok'eo,
boak' am-panjiriha' i àndroy añe;
ie hitoka ty añarako vaho
hivotrak' amo mpifeheo hoe an-dietse,
manahake ty fandialàm-panao
valàñe-tane i lietsey.

26 Ia ty nitsey boak' am-baloha'e
haharendreha'ay:
naho haehae añe,
hahavolaña'ay t'ie to?
Toe tsy amam-mpitaroñe,
eka, leo raike tsy mitalily,
toe tsy eo ty mahajanjiñe o lañona'oo.

27 Zaho ty valoha'e nañitrik' amy Tsione
ty hoe: Heheke, ingo iereo;
vaho hiraheko mb'e Ierosalaime mb'eo
ty hinday talily soa.

28 Mañente raho, fe tsy ama' ondaty;
naho tsy amam-pamere,
ie ho nañontaneako hahavalea'e.

29 Heheke fonga tsy vokatse, tsy jefa'e
o sata' iareoo, toe tioke naho hakoahañe avao
o sare fatrana' iareoo.

* **41:19** Toe: "erez, sità, hadase," "atese semene." † **41:19** Toe: "berose, tidhare," vaho "te'esore."

42

¹ Intoy ty mpitoroko tohañako,
ty jinoboko toe mahafale stroke,
le nakofòko ama'e ty troko
ie ty hinday ty hatò amo kilakila' ndatio.

² Tsy hikoikoike re tsy hampipoña-peo,
le tsy hampijanjiñe'e an-dalañey
ty fiarañanaña'e;

³ tsy ho potora'e ty vinda pineke
vaho tsy hakipe'e ty lamese milihiliry;
hampiboaha'e ty hatò ami'ty figahiña'e.

⁴ Tsy ho toiran-dre, tsy ho demoke,
ampara' te najado'e an-tane atoy ty hatò;
naho hitamà i Hake o olon-taneo.

⁵ Hoe t'IEHOVÀ Andrianañahare
Mpamboatse o likerañeo
naho nandafike iareo,
I namelatse ty tane toy naho
ze miboak' ama'ey,
ie mampikofòke ondaty ama'eo
vaho manolotse arofo
amo midraidraitse aoo.

⁶ Zaho IEHOVÀ, ty nitok'azo
an-kavañonañe,
nitintineko ty taña'o
naho nampitsoloheko,
vaho natoloko ho fañina
am'ondatio,
ho hazavàñe amo kilakila' ndatio,

⁷ hanokake ty fihaino fey
hañakatse o miprohy am-balabeio
naho o mitozòke alafem-porozò añ'ieñeo.

⁸ Zaho IEHOVÀ, zay ty añarako;
tsy hatoloko ami'ty ila'e o volonahekoo,
ndra amo hazomangao ty engeko.

⁹ Heheke fa nihelañe o raha haehaeo,
o raha vaoo o tseizeko henaneo;
Ie mbe tsy mipoteake
ty ho taroñeko ama' areo.

¹⁰ Misaboa sabo vao am' IEHOVÀ,
ibangò ry añ'olo-tane añeo;
ie mizotso mb'an-driakey,
naho ze he'e ama'e ao, o tokonoseo,
vaho o mpimoneñe ama'eo.

¹¹ Hampionjonem-peo ty fatram-bey
naho o rova ama'eo,
o tanàñe añialoa' i Kedareo*,
naho hañonjo Hake t'i Selà,
vaho hipaza-kafaleañe boak' ankaboa' o vohitseo.

¹² Ho rengè' iereo t'IEHOVÀ,
vaho hitsey ty enge'e amo tokonoseo.

¹³ Hionjom-b'eo hoe fanalolahy t'IEHOVÀ,

* **42:11** Kedare; mainte; hontoke

ho troboe'e am-pamarahiañe
hoe lahin-defoñe;
hikaikaike naho hisehaseha[†],
hisenge amo rafelahi'eo ty haozara'e.

¹⁴ Loho ela ty nitsiñako,
nihendre vaho nifoneñe;
f'ie henane zao, hikoiake
hoe ampela mitsongo;
hisañasaña naho hisehaseha.

¹⁵ Ho koahoko o vohitseo
naho o haboañeo,
vaho ho forejejeko o ahe'eo;
hanoeko tokonose o oñe'eo,
naho ho riteko o antara'eo.

¹⁶ Hendeseko mb'an-dalañe
tsy nifohi' iareo o goao;
hiaoloako añ'oloñoloñe tsy nahazatse iareo;
hanoeko hazavàñe aolo' iereo eo ty ieñe,
hampiraeko ze tomoantoañe.
hanoeko iaby vaho tsy hapoko
ampara' t'ie fonitse.

¹⁷ Hampiambohoeñe an-kasalarañe,
o miato an-tsamosampo sinokitseo,
ze manao amo sare nitranahañeo,
'ndrahare'ay nahareo'.

¹⁸ Mijanjiña ry kareñeñeo,
mahaisaha ry fey, hahavazohoa' areo.

¹⁹ Ia ty goa naho tsy i mpitorokoy?
ndra kareñe manahake
i irako nafantokoy?
Ia ty fey mandikoatse i nampanintsínekoy,
naho goa te amy mpitoro' IEHOVÀ?

²⁰ Mahaisake raha maro nahareo
fe tsy mahaoniñe,
misokake o raven-tsofio
fe tsy mahatsendreñe.

²¹ Niehake t'IEHOVÀ,
ty amy havañona'ey,
honjoñe'e naho ho renge'e i Tsara'ey.

²² Fe ondaty nikamereñe
naho nivoloseñe retoa,
songa tsinepake an-koboñe ao,
naetake am-balabey ao;
natao ho fitsatsàñe tsy amam-pandrombake, fikopahañe,
le tsy eo ty manao: Ampolio.

²³ Ia ama' areo ty hanolo-ravembia
amy zay?
Ia ty hitsendreñe naho hijanjiñe
amy ze aña zay?

²⁴ Ia ty nanolotse Iakobe ho kopahené,
naho Israele ho amo mpamaokeo?
tsy IEHOVÀ hao? I nanoantika hakeoy,
tsy nete nañavelo amo lala'eo iereo,

[†] 42:13 Satan-drakemba mitsongo

tsy norihe' iareo o Tsara'eo.
²⁵ Aa le nadoa'e ama'e
 ty haforoforon-kaviñera'e,
 naho ty hafatrararan-kotakotake;
 naho namiaña'e afo nañarikatok'aze
 fe tsy hinao'e, vaho nampiforehete'e,
 tsy rinambe' ty arofo'e.

43

¹ Aa le hoe t'IEHOVÀ
 namboatse azo, ry Iakobe,
 i nitsene azoy, ry Israele;
 ko hembañe fa nijebañe azo raho,
 fa nikoihako ami'ty tahina'o,
 Ahiko rehe.
² Ie mitsake o ranoo rehe,
 hindrezako,
 ie miranga saka,
 tsy handipora'e;
 ie misorok' afo am-pandia
 tsy ho mae,
 le tsy hiviañe ama'o ty firebareba'e.
³ Zaho IEHOVÀ Andrianañahare'o,
 t'i Masi' Israele, i Mpijkebañe azoy;
 natoloko ho vilin'ai'o ty Mitsraime,
 i Kose naho i Sebà* ho azo.
⁴ Aa kanao sarotse am-pañenteako,
 naho mañevo asiñe, vaho kokoako;
 le lahilahy maro ty ho tolorako ho azo,
 vaho rofoko ho solom-piai'o.
⁵ Ko hembañe, fa indrezako;
 hendeseko boak'atiñanañe aña ty tiri'o,
 vaho hatontoko boak' ahandrefañe aña.
⁶ Hanao ty hoe raho amy avaratsey:
 Hahao, naho ami'ty atimo: Ko tana'o,
 endeso boak'e tsietoitane aña
 o ana-dahikoo,
 naho boak' añ'olo' ty tane toy
 o anak'ampelakoo—
⁷ ze hene kanjieñe ami'ty añarako,
 o tsineneko ho ami'ty engekoo,
 o naoreko vaho namboarekoo.
⁸ Akaro boak' ao ondaty goa
 am-pihainoo,
 o giñe an-dravembiao.
⁹ Hene mifanontone o kilakila' ndatio,
 songa mivory ondatio;
 ia am' iereo ty mahafitsey zay,
 hitaroñe aman-tika o raha haehaeo?
 Ampiboafo o valolombelo' iareoo
 hahazoa' iareo to; hijanjiñañe,

* ^{43:3} Seba: mpijke; mpifotetse, fandrohizañe;

hanoañe ty hoe: To zay.

¹⁰ Inahareo ro valolombeloko,
hoe t'IEHOVÀ,
naho ty mpitoroko jinoboko;
hahafohina' areo naho hatokisa' areo ahy,
haharendreke te Ie raho;
tsy eo ty 'ndrahare niforoñené taoloko,
vaho tsy eo ty hanonjohy ahy.

¹¹ Zaho le Zaho avao t'IEHOVÀ;
le naho tsy Zaho,
tsy eo ty mpandrombake.

¹² Fa nitaroñe raho, naho nandrombake,
naho nañoke, te tsy aman' Andrianañahare ila'e nahareo;
aa le inahareo ro valolombeloko,
hoe t'IEHOVÀ,
Zaho ro Andrianañahare.

¹³ Eka, boak' amy àndro zay,
le fa ie raho,
vaho tsy eo ty hahatavañe ty an-tañako;
hitoloñe raho, le ia ty mahasebañe.

¹⁴ Hoe t'IEHOVÀ mpijebañe anahareo,
ty Masi' Israele:
inahareo ro nañitrifako e Bavele aña,
le fonga nafotsako ho gike iareo
naho o nte-Kasdy mitreñe o laka'eo.

¹⁵ Zaho IEHOVÀ, Masi' areo,
i mpamboats' Israeley, ty Mpanjaka' areo.

¹⁶ Aa hoe t'IEHOVÀ
mpamboatse lalañe mitsake i riakey,
naho oloñoloñe mitoañe
o rano mitroñeo;

¹⁷ I mpañakatse i sarete reke-tsoavalaiy,
o lahindefoñe naho haozara'eo—
miharo fandreañe ao iereo,
tsy hitroatse ka,

fa mongotse, nakipeke hoe lamese.

¹⁸ Ko mitsakore o raha taoloo,
ko mañereñere o raha haehaeo.

¹⁹ Heheke te manao raha vao raho,
hitiry ami'ty manao zao;
aa tsy ho rendre' areo hao?
hanatahako lalañe ka

ty am-patrañe aña,
naho saka an-dratraratra ao.

²⁰ Hiasy ahy o biby an-kivokeo,
o fanalokeo naho o voron-tsatrañeo,
ty amo rano nanoeko am-patrañeo,
naho o saka an-dratraratrao,
hanjotsaoko rano ondaty jinobokoo;

²¹ Ho talilie' ondaty namboareko ho ahikoo, ty engeko.

²² Fe tsy nikanjy ahy nahareo, ry Iakobe,
namokoreko nahareo ry Israele.

²³ Tsy nisoroña'o ty añondri'o;
tsy niasia'o amo engaeñeo;

tsy nampijinieko engan-kaneñ,
 tsy nivozaheko ami'ty tsotse.
²⁴ Tsy nibanabana'o fare naho drala,
 tsy nañaeneñ' Ahy ty safom-pisoroña'o;
 te mone nampavesare'o amako o tahi'oo,
 vaho namokore'o amo hakeo'oo.
²⁵ Zaho le Zaho avao ty namaoke
 o fiolà'o amakoo.
 vaho tsy ho tiahiko ka o hakeo'oo.
²⁶ Ajoño am-pitiahia'o ao raho,
 antao hifanesek; mitalilia hahazoa'o to.
²⁷ Nandilatse i rae'o valoha'ey,
 vaho manan-kakeo amako
 ondati-aivo'oo;
²⁸ Aa le vinetako o ana-dona'
 i toetse miavakeio,
 nengaeko am-patse t'Iakobe,
 vaho an-teratera t'Israele.

44

- ¹ Aa le janjiño heike
 ry Iakobe mpitoroko,
 ry Israele jinoboko.
² Hoe t'IEHOVÀ namboatse azo,
 i namoroñe azo an-koviñ' aoy,
 le ty hañimb'azo:
 ko hemban-drehe ry Iakobe mpitoroko,
 naho ry Iesorone* jinoboko.
³ Fa hañiliñako rano i kirikintàney,
 naho rano mitsirtsioke
 an-tane maike eo;
 hadoako amo tiri'oo ty Troko,
 naho amo tarira'oo ty fañanintsiko.
⁴ Le hitiry añate ahetse ao iereo
 manahake ty sohihy añolon-tsaka ey.
⁵ Hanao ty hoe ty raike:
 A IEHOVÀ raho,
 le hitoka ty añara'e
 ho Iakobe ty raike;
 ty ila'e hanokitse am-pità'e eo t'ie
 a IEHOVÀ, vaho
 hatao'e Israele ty añaram-binta'e.
⁶ Hoe t'IEHOVÀ, Mpanjaka' Israele
 naho ty Mpijkeba'e, t'IEHOVÀ' i Mâroy;
 Zaho ro valoha'e,
 Zaho ro figadoña'e,
 le tsy eo t'i Andrianañahare
 naho tsy Zaho avao.
⁷ Ia ty manahak' ahy—angao ho koihe'e naho ho taroñe'e, hamolily
 amako—
 boak' amy nampijadoñako o matoetoeo!
 He adono re hitoky o viloñe ho avio,

* ^{44:2} Iesorone: mpandrombake, mpamotsotse: añara' Israele, Its 32:15, 33:5 33:26

o raha mbe tsy nifetsakeo.

⁸ Ko hemban-drehe, ko mahimahiñe,
tsy fa nitaroñeko haehae hao?

Mbore nikohako?

Inahareo ro valolombeloko:

Ia t'i Andrianañahare añ'ilako?

Ia ka ty Lamilamy? ie alik' amako.

⁹ Songa tsy manjofake o mpamoroñe sare'ndrahareo,
vaho tsy vara o mahasinda iareoo;
tsy maharendreke o mpitalili' iareoo,
tsy mahafohiñe, hisalara'e.

¹⁰ Ia ty namoroñe ty 'ndrahare,
ndra nampitranake saren-draha
tsy jefa'e?

¹¹ Toe ho meñatse iaby o mpirimboñe ama'eo, mentsake ondaty
nandranjy iareoo;
angao hifanontone iereo,
songa hijohañe ey hirevendreveñe,
sindre hitrao-kasalarañe.

¹² Manefe fekoñe ty mpanefe,
tolone'e am-baen' afo,
foroñe'e ami'ty ana-bato,
anoe'e an-tsirañe maozatse;
miha-kerè re, milesa i haozara'ey;
tsy minon-drano, midazidazítse.

¹³ Mamavatse taly ty mpandranjy;
sokire'e am-penisily;
lamae'e am-pandama,
patere'e an-kompà,
vaho tsene'e ho sarem-binta'ondaty
an-katsomerentseren-dra-olombelo,
hitoboha'e añ'anjomba ao.

¹⁴ Firae'e ho aze ty mendoraveñe,
rambese'e ty varo naho ty kobaiñe;
beize'e ka ty hatae raike añ'ala ao,
ambolè'e ty kintsy,
vaho mamahañe aze i orañey.

¹⁵ Minjare raha mete oroa' ondaty,
aa le angala'e hamindroa'e;
eka viañe'e naho anokona'e mahakama;
mbore andranja'e ndrahare,
naho mitalaho ama'e,
anokira'e hazomanga

vaho midrakadrakak' ama'e.

¹⁶ Olora'e añ'afø ao ty ila'e;
ikama'e i henay
ie mitono ty ila' i henay, le anjañe,
eka, amindroa'e le manao ty hoe:
Hiry! Mafana raho fa nitendrek'afo.

¹⁷ Ty sisa'e amboare'e 'ndrahare,
toe sare'e; mibaboke re italahoa'e,
naho ihalalia'e, manao ty hoe:
Hahao raho, fa 'ndrahareko rehe?

¹⁸ Tsy apota'e, tsy mahilala;
 fa nakipe'e ty maso'iareo, tsy hahaisake,
 naho ty tro'e tsy haharendreke.

¹⁹ Tsy eo ty mitsakore an-troke
 te tsy ama'e ty hihitse ndra hilala
 hanoa'e ty hoe:
 Toe finorototoko añ'afô ao ty ila'e;
 eka fa nanokonako ahandro o vae'eo;
 fa nahandroako hena naho nihinañe;
 aa vaho handranjiako raha tiva ty sisa'e?
 Hibabohako hao ty foto-katae?

²⁰ Lavenoke ty itamboavokaha'e,
 nampivike aze ty tro'e finitake,
 tsy haharombaha'e aiñe,
 hanao ty hoe: Tsy vande hao
 ty an-tañan-kavanako toa?

²¹ Tiahio o raha zao ry Iakobe,
 naho ry Israele, amy te mpitoroko;
 Zaho ty nitsene azo, fetrek'oro ko rehe;
 ry Israele, ehe ko andikofa'o.

²² Fa finaoko hoe rahoñe milodolodo o fiolà'oo,
 naho hoe mika-mikopoke o tahi'oo,
 mibaliha amako fa njebañeko.

²³ Misaboa ry likerañeo,
 fa nifonira' IEHOVÀ;
 mamantsiña, ry goledoñe lalekeo;
 mipoñafa sabo ry vohitseo,
 ry ala naho ze hatae ama'e ao;
 amy te jineba' IEHOVÀ t'Iakobe,
 vaho rengè'e t'Israele.

²⁴ Hoe t'IEHOVÀ Mpijkeba'o,
 i nitsene azo an-koviñe aoy.
 Zaho IEHOVÀ
 Andrianamboatse ze he'e;
 I mandafike o likerañeoy, Zaho raike;
 I mamelatse ty tane toiy, Zaho avao.

²⁵ I mampijiañe ty sahà' i remborakey,
 naho mahaboseke o mpisikilio;
 naho mampidisa-voly o mahihitseo,
 vaho mampigege o hilala'eoy;

²⁶ I mañatò ty saontsi' i mpitoro'ey
 naho mañeneke ze atoro' o ira'eoy;
 ie mitalily am'Ierosalaime ty hoe:
 Ho fimoneñañe;
 naho amo rova' Iehodào : Hamboareñe, vaho hatroako o mangoakoake
 ama'eo.

²⁷ Ie manao amy lalekey ty hoe:
 Maiha, vaho ho maiheko ka o saka'oo;

²⁸ Ie anoe'e ty hoe i Korese[†]: Mpiarak'añondriko re,
 hanoe'e iaby ze mahafale ty troko;
 hanoe'e ty hoe t'Ierosalaime:

[†] 44:28 Korese: hoe osa; hoe mpandova

Ho rafeteñé!
naho i anjomban' Añaharey :
Haoreñé o mananta'oo.

45

¹ Hoe t'IEHOVÀ amy Korese noriza'ey, ie nihafatrareko ty fità'e havana,
hampibabohañé aolo'e eo

o kilakila ondatio,
vaho hampibalaha'e
ty am-bania' o mpanjakao;
hanokafa'e o lalam-bey añatrefa'eoo,
tsy harindriñé ka o sikadañeo:

² Hiaolo azo raho, naho
hampimiraeko o migoledogoledoñeo;
ho tseratseraheko o lalam-bey torisikeo;
vaho ho pozapozahoko o sikadam-bio;

³ Hatoloko azo o hanañan-kaieñeo,
naho ty vara mikafitse an-toetse
mietake ao, soa te ho fohi'o
te Zaho IEHOVÀ;

i mikanjy azo ami'ty tahina'oy;
t'i Andrianañahare' Israele.

⁴ Iakobe mpitorokoy,
naho Israele jinobokoy,
ty nikanjiako azo an-tahinañé,
Zaho ty nanolotse azo añarañé
ndra te tsy apota'o.

⁵ Zaho IEHOVÀ vaho tsy aman-tovo,
tsy eo t'i Andrianañahare
naho tsy Zaho avao;
Zaho ty nampidiañé azo ndra te nofi'o.

⁶ Soa te ho fohi'
o am-panjiriha' i àndroy
pak' am-pitsofora'eo
te tsy eo ty hatovoñ'ahy;
Zaho IEHOVÀ, vaho tsy aman-tovo.

⁷ Zaho ty mamoroñé o hazaváñeo,
naho mamboatse o ieñeo;
amboareko ty fierañerañañé,
vaho foroñeko ty hankàñé;
Zaho IEHOVÀ o manao ze he'e zao.

⁸ Mikojojoaha ry likerañeo,
boak'ambone ey,
ampidoaño havañonañé ry rahoñeo;
misokafa ry tane,
hampamokarañé fandrombahañé,
ampitrafo fitiry ama'e ty havantañañé;
Zaho IEHOVÀ, ty namoroñé aze.

⁹ Hankàñé amy mifandietse
amy Mpamboatse azey,
manahake ty valàñe-tane amo valàñe-tane an-taneo!
hanao ty hoe hao ty lietse

amy mpamoroñe azey,
Inom-bao o amboare'oo?
ndra: ino' o tsenè'oo t'ie
tsy aman-tanañe?

¹⁰ Hekoheko amy manao ty hoe
aman-drae'ey: Ino o nasama'oo?
ndra amy rakembay,
Ino ty nitsongoe'o?

¹¹ Hoe t'IEHOVÀ, t'i Masi' Israele,
Namboatse azey:

Añontanea'o ahy hao o raha ho avio;
halohi'o hao raho amo ana-dahikoo,
naho amo fitoloñakoo?

¹² Zaho, ty namboatse ty tane toy;
nahoh nitsene ondaty ama'e;
Zaho, le o tañakoo, ty nandafike
o likerañeo vaho liniliko
o havasiaña' iareoo.

¹³ Fa nitsekafeko an-kavañonan-dre,
nahoh ho hene vantañeko o fombà'eo;
Ie ty hamboatse i rovakoy,
vaho havotso'e hidada,
tsy amam-bili'e tsy aman-tambe,
o naseseo,

Hoe t'IEHOVÀ' i Måroy.

¹⁴ Hoe t'IEHOVÀ:
Homb'ama'o mb'eo,
ty fitoloña' i Mitsraime,
nahoh ty kilanka' i Kose
nahoh o nte-Sevày miojalao, ie ho azo:
hañorik' azo iereo, hitsake mb'eo an-tsivilisily,
nahoh hilokolokoa' iareo hihalaly ama'o ami'ty hoe: Toe ama'areo t'i
Andrianañahare,
nahoh tsy eo ty hatovoñ' Aze;
tsy aman' Añahare ila'e.

¹⁵ Toe Andrianañahare mietake Rehe
ry Andrianañahare' Israele
Mpandrombakeo.

¹⁶ Ho salatse iereo, eka,
fonga ho an-tamberen-tane;
hitrao-dia am-pivotemboteñañe
o mpitsene hazomangao.

¹⁷ Ry Israele, ie rinomba' IEHOVÀ
am-pandrombahañe tsy modo le
tsy ho salatse ndra daba nainai'e donia.

¹⁸ Fa hoe t'IEHOVÀ Mpamboatse
o likerañeo: (i Andrianañahare
namoroñe ty tane toy, ie toe nitsene vaho nampijadoñ' azey.) Tsy
namboare'e ho koake.

fa namboatse iareo himoneñañe;
Zaho IEHOVÀ vaho tsy aman-tovo.

¹⁹ Tsy nivolañe añetake raho,
an-toetse maieñe ao;
tsy nanoeko ty hoe ty tiri' Iakobe:

Ipaiao hoe voa-nè,
Fe mpitaron-kavañonan-draho, IEHOVÀ,
Mpikoike entam-bantañe.

²⁰ Mifanontona mb'etoañe;
mañarinea t'ie nahabotitsike
amo kilakila ondatioo!
Tsy aman-kilala ze misalika voñe
naho mihalaly aman-drahare
tsy maharombake.

²¹ Taroño, aboaho ty enta' areo; angao t'ie hisafiry!
Ia ty nahafitoky zao haehae zay? Ia ty nitsey aze taolo bey aña?
Tsy Zaho, IEHOVÀ hao? Tsy aman' Añahare naho tsy Zaho, t'i Andri-
anañahare vantañe
naho Mpandrombake—
tsy eo naho tsy Zaho avao.

²² Mitoliha amako ry hene olon-taneo,
soa te ho rombaheñe,
amy te Zaho ro Andrianañahare,
le tsy aman-tovo.

²³ Nifanta am-batako,
niboak'am-bavako ao an-
kavantaña'e ty tsara
vaho tsy hibalike ka, soa te amako
ty hitongalefa' ze kila ongotse, ty hifantà' ze hene fameleke.

²⁴ Ho taroñeñe ahy ty hoe: Am' IEHOVÀ ao avao ty fandrebahañe
naho ty haozarañe.
Homb'ama'e mb'eo ondatio,
fonga hinañanaña o malaiñe Azeo.

²⁵ Am' IEHOVÀ ao, kila hahazo to
ty tiri' Israele,
vaho hirañaraña an-kobay!

46

¹ Mibotreke ty Bele*,
Midrokoke ty Nebò; vavè' o bibio,
o añombe mijiny kilankañe, ty sare'e; nampilogologoeñe o raha endese'
areoo o biby mokotseo.

² Mibokoboko iereo, mitrao-piondreke,
tsy nitafete' iareo i kilankañey; vaho
songa naseo mb'am-pandrohizañe aña.

³ Mijanjiña ahy ry anjomba' Iakobeo,
naho ry sehangan' anjomba' Israeleo,
o nivesareko boak'am-pisamaha'eo,
o notroñeñe boak' an-koviñe ao

⁴ pak' an-ka'anterañe, Zaho ro Ie,
ho babèko pak' a maròy foty rehe;
Zaho ty namboatse, zaho ty hinday;
eka hotroñeko mbore hampipalireko.

⁵ Ia ty hampañirinkiriña' areo amako,
naho hampihambaña'areo,
vaho hampanahafa' areo,
soa te hifañoronkoroñe?

* ^{46:1} Bele: ty Tale' i Bavele; mpandrotsake

⁶ Mandrarake volamena
boak' an-kotrañe ao ty ila'e,
naho mandanja volafoty am-balantsy;
vaho mañarama mpanefe volamena
hañamboare'e ndrahare,
hibokobokoa'e naho hitalahoa'e.
⁷ Jinie' iereo an-tsoroke, endeseñé,
apo' iereo amy toe'ey,
ie mijagarodoñe eo, tsy hienga i toe'ey;
eka, ndra t'ie kaikaiheñé
tsy mete manoiñé,
tsy haharombak' aze
amy hasosora'ey.
⁸ Tiahio le mijadoña;
ampolio an-stroke ao, ry mpanan-kakeo.
⁹ Tiahio o raha taoloo, eka haehae;
te Zaho ro Andrianañahare
naho tsy aman-tovo;
Zaho ro Andrianañahare
vaho tsy eo ty hambañé amako,
¹⁰ Mitaroñe ty figadoña'e hirik'am-baloha'e,
boake haehae aña o mbe tsy nanoeñeo,
ami'ty hoe: Hijadoñe ty ereñereko,
vaho hene hanoeko
ze mahafale ty troko;
¹¹ Ho tokaveko boak' atiñanañe aña
ty voroñe mipay hena;
t'indaty nisafirieko boak'
an-tsietoitane aña;
eka fa nivolan-dRaho le ho henefeko,
niereñeren-dRaho vaho hanoeko.
¹² Haoño raho, ry gan-katokeo,
ry lavitse havañonañe.
¹³ Hendeseko marine eo
ty havantañako, tsy ho lavitse,
tsy halaoñe i fandrombahakoy;
vaho hatoloko amy Tsione
ty fandrombahañé, ho a' Israele engeko.

47

¹ Mizotsoa, mitoboha an-debok' ao,
ry anak'ampela' i Bavele;
mitozoha an-tane eo
tsy amam-piambesatse,
ry anak'ampela' i Kasdý;
fa tsy hatao mitrotrotro
ndra sakoly ka rehe.
² Rambeso i vato fandisanañey
naho lisano i tsakoy;
afaho o lamba marerarerera'oo,
voloso o mireparepao,
aonjono ty an-kitso'o eo,
itsaho o sakao.
³ Haboake ty fibongia'o;

ho trea ty fimeñara'o;

hamale fate raho

vaho tsy eo ty hanebañe ahy.

⁴ I Mpijkeba'ay, IEHOVÀ' i Màroy
ty tahina'e, i Masi' Israeley.

⁵ Mitoboha am-pitsiñañe ao,
akia mb'an-kamoromoroñañe ao,
ry anak'ampela' o Kasdio,
tsy hatao mpanjakam-pifeheañe ka rehe.

⁶ Niboseke am'ondatikoo raho,
vinetako i lovakoy,
vaho natoloko am-pit  'o,
fa tsy niferenai  'o, nanoe'o mavesatse amo antetseo ty joka'o.

⁷ Ie nanoe'o ty hoe,
Ho mpanjaka-ampela nainai'e raho,
le tsy nahaja'o an-troke ao o raha zao,
vaho tsy nitiahi'o ty figadoña'e.

⁸ Aa le tsano  o izao,
ty mpa  ori-kadrao,
ty mpiai  'a  oleña  ne,
ty manao an-tro'e ao ty hoe:

Tsy hitoboke ho remavoin-draho,

hamoeako ty fahamotsoan' anake.

⁹ Fa hivotrak'ama'o ami'ty andro raike
o raha roe zao:
ty hamotsoan' anake,
naho ty ha-remavo  ne;

am-pa  narana  ne pea t'ie hifetsake

ndra te tsifotofoto' o famoreha'oo,

naho maozatse ty fisikilia'o.

¹⁰ Natao'o mahaso-a-ro ty hal  -tsere'o, ihe nanao ty hoe:

Tsy eo ty mahatre-a ahy.

Songa nampikeloke azo ty hihi'o

naho ty hilala'o;

ie nanao ty hoe an-troke ao: Zaho ro ie,

vaho tsy ie naho tsy zaho avao.

¹¹ Aa le hifetsake ama'o ty raty;
tsy ho lefe'o troboe  ne hisitaha'e;
hidoi  ne ama'o ty hank  ne;

tsy ho lefe a  fera  ne;

hivov   ama'o ty fi  nto, aolo' te apota'o.

¹² Mijad  na ar   amo fisikilia'oo,
naho amo fitozantozam-pamoreha'oo,

o nitolo  ne'o ampara' ty nahakede azoo;

ke ho tambeza'e, he hahafitroboe'o.

¹³ Ie nimokore' o fikilia'oo;

angao hiongake henaneo ar  

o mpa  androo, naho

o mpa  rike vasia  eo, naho

o mpahay vola  eo,

handrombak' azo amo hifetsak' ama'oo.

¹⁴ Heheke, fa manahake ty ahetsi iereo,

ho forototoen' afo;
 ie tsy haharombake ami'ty
 haozara' i firebareba'ey;
 tsy ama'e ty vaen' afo hitaraña'e,
 toe tsy ho afo hamindroañe.

¹⁵ Hoe zay iereo ama'o, o nifanehafa'oo;
 songa hirererere mb'an-toe'e mb'eo
 o nitrao-balibalike ama'o
 boak' ami'ty naha-ajaja azoo,
 tsy ho amam-pandrombake rehe.

48

¹ oJanjiño zao, ry anjomba' Iakobe,
 ie tokaveñe ami'ty tahina' Israele,
 ry niboak' ami'ty figoangoa' Iehodà;
 o mifanta ami'ty tahina' IEHOVÀ
 naho mitalily i Andrianañahare' Israeleo, fe tsy an-katò,
 tsy an-kavantañañe.

² Ie manao ho mpiamy rova miavakey, naho mpiato aman' Añahare'
 Israele,
 IEHOVÀ' i Måroy ty tahina'e.

³ Fa nitaroñeko haehae o raha taoloo;
 eka fa nionjoñe boak'am-bavako ao,
 nitaroñeko le tsipaepae'e te nifetsake;

⁴ Amy te napotako
 t'ie mitangingiñe,
 naho viñe ty tali-bozin-kato'o,
 Vaho torisike ty lahara'o;

⁵ Aa le nivolañako boake taolo aña,
 ie mbe tsy nitondroke le nitaroñako,
 tsy mone hatao'o ty hoe;
 Nihenefa' i hazomangakoy,
 naho i sare pinateko an-kataey,
 vaho, i raha natranakoy
 ty nandily zay.

⁶ F'ie nahajanjiñe,
 heheke iaby o raha zao:
 aa vaho tsy ho taroñe' areo?
 F'ie nitaroñeko raha vao henaneo,
 raha mietake mbe tsy nifohi'o.

⁷ Nifonireñe henaneo, fa tsy haehae,
 tsy nijanjiña'o taolo' ty andro toy,
 tsy mone hatao'o ty hoe t'ie nifanta'o.

⁸ Eka, tsy jinanji'o tsy napota'o;
 toe tsy nisokake o ravembia'oo
 haehae zay;

fe napotako t'ie hikabo-draha,
 ihe natao mpiola boak' an-koviñe ao.

⁹ Aa le ty añarako ty hampihankàñe
 o fifombokoo,
 i fandrengeañe ahiy ty ifoneñako,
 tsy mone haitoako rehe.

10 Ie hinasohasoko, fa tsy hoe volafoty;
nitsoheko an-toñan-kaloviloviañe ao*.

11 Zaho, eka zaho, ty hanao zay;
fa akore te ho tivaeñe ty añarako?

toe tsy hatoloko ami'ty ila'e o engekoo.

12 Haoño raho ry Iakobe,
ry Israele kinanjiko;
Zaho ro Ie, Zaho ty fifotora'e,
naho Zaho ty figadoña'e.

13 Eka, nandaharen-tañako
ty faha' ty tane toy,
nilamahen-tañako havana o likerañe;
ie tokavako, mitrao-piongake.

14 Mitontoña, ie iaby, vaho mijanjiña:
ia am' iereo ty nitsey o raha zao?
Hanao ty satrin-arofo'e e Bavele aña
t'i kokoa' IEHOVÀ,
ie hisenge ty sira'e amo nte-Kasdio.

15 Zaho le Zaho avao ty nivolañe,
eka Zaho ty nitoka aze,
Zaho ty nanese aze,
Ie ty hampiraorao o lala'eo.

16 Mitotoha amako le janjiño:
Boak' am-baloha'e raho
tsy nivolañe añ'etake;
ie vaho namoroñe le tao raho;
ie amy zao fa nañirak' ahy
naho i Arofo'ey t'IEHOVÀ TALÈ

17 Hoe t'IEHOVÀ, Mpijebañe azo,
t'i Masi' Israele;
Zaho IEHOVÀ, Andrianañahare'o,
I mpañòke azo ho ami'ty hasoa'oy,
I mpiaolo azo an-dalan-kombà'oy.

18 Naho ho nihaoñe' areo o lilikoo!
le ho nanahake o oñeо ty fierañeraña'o,
vaho hoe onjan-driake ty havantaña'o.

19 Le ho nira amo faseñeо o tiri'oo,
o tariram-pañova'oo
ami'ty hamaro' ty haminjilita'e;
naho tsy napitsoke
ndra naitoañe aoloko ka ty tahina'e.

20 Iakaro i Bavele,
Ivoratsaho o nte-Kasdio;
am-peo-pisaboañe, tseizo, pazapazaho, koiho pak' aña'olo' ty tane toy;
Ano ty hoe:
Fa jineba' IEHOVÀ ty mpitoro'e Iakobe.

21 Ie tsy nitaliñiereñe te niaoloa'e hitsake o fatram-beio;
Nampipororoaha'e rano i vatoy;
tsinera'e i lamilamiy vaho
nidoandoañe i ranoy.

22 Po-panintsiñañe, hoe t'IEHOVÀ,
o tsivokatseo.

* **48:10** Its 8:2-16

49

¹ Ry tokonoseo, mijanjiña ahiko;
mitsendreña ry ondaty tsietoitâneo;
fa nikanjy ahy sikal' an-tron-dreneko ao
t'IEHOVÀ; boak'an-kovin-dreneko ao
ty nitoñona'e ty añarako.

² Fa nanoe'e arara masioñe ty vavako; an-talinjom-pitâ'e ao ty nañetaha'e;
nanoe'e ana-pâle vinâne; an-trañom-pale ao ty nampikafira'e;

³ Le hoe re tamako:
Mpitoroko rehe, Israele;
Ihe ty fandrengeañe ahy.

⁴ Fe hoe raho : Nifanehake ami'ty tsy
havokaran-draho; nahamodo ty haozarako
tsy jefa'e naho tsy vente'e; toe IEHOVÀ ty hahazoako to, naho
aman'Añahareko ao
ty tambem-pitoloñako.

⁵ Aa hoe t'IEHOVÀ henanekeo— ie nitsene ahy an-koviñ' ao ho mpitoro'e,
hampipoliako t'Iakobe,
ndra te tsy natontoñe t'Israele, fe aman-kasy am-pihaino'IEHOVÀ raho vaho
haozarako t'i Andrianañahareko.

⁶ hoe re: Raha loho-kede ho azo
te ho mpitoroko hampionjoñe o fifokoa' Iakobeo, hampipoly o tarira'
Israeleo;
te mone hatoloko azo
ty ho failo' o kilakila ondatio, hahatsitsifañe ty fandrombahako
pak' añ' olo' ty tane toy aña.

⁷ Hoe t'IEHOVÀ— t'i Mpijeba' Israele, i Masi'ey—
amy nisirikaeñey, amy falai' o kilakila ondatiyo, amy mpitorom-pifehey;
ho isa' o mpanjakao le hióngake, vaho hibàboke o ana-donakeo,
am' IEHOVÀ migahiñey, i Masi' Israele nijoboñe azoy;

⁸ Hoe ty nafè' IEHOVÀ :
Añ'andro mete ty nitsanoñako azo,
añ'androm-pandrombahâñe
te nitolorako; harovako rehe,
vaho hatoloko ho fañina am'onatio,
hañavao i taney,
hampandova'o o lova mangoakoakeo;

⁹ mitsey amo mpirohio ty hoe : Miakara.
vaho amo añ'ieñeo, ty hoe : Miboaha.
Hihinañe añ'olon-dalañe eo iereo,
ho fiandraza' iareo o haboañe iabio.

¹⁰ Ie tsy ho kerè ndra maran-drano,
tsy ho pisañen-katrevoohañe
ndra tariñandroke;
fa hiaolo iareo ty Mpitrertrè,
ho tehafe'e mb'an-drano
manganahana mb'eo.

¹¹ Le hanoeko lalañe o vohiko iabio,
vaho haonjoñe ambone o lalan-damokeo.

¹² Toe ho boake tsietoitane aña retoañe;
ho boak' avaratse aña retiañe
naho ahandrefañe aña reroañe,
vaho hiboak'e Sinime* aña reroy.

* 49:12 Sinime: Tane atimo

13 Misaboa ry andikerañe ao !
 mandià taroba ry tane !
 mipoñafa beko ry haboañeo !
 fa ohoñe' IEHOVÀ ondati'eo,
 tretreze'e o mpisotri'eo.

14 Fe hoe t'i Tsione:
 Nifarie' IEHOVÀ raho,
 vaho nandikofa' i TALÈ.

15 Ho haliño' ty rakemba hao
 ty ana'e minono;
 tsy ho ferenaiña'e hao
 ty ana-dahi'e boak' an-kovi'e ao?
 Eka ndra t'ie mañaliño,
 Zaho tsy hañaliño azo.

16 Hehe t'ie sinokiko an-dela-tañako;
 Añatrefako eo nainai'e o kijoli'oo.

17 Malisa o ana'oo; fa mienga
 o mpandrotsake naho mpamaoke azoo.

18 Andrandrao fihaino,
 le mañisaha mb'eo mb'eo: ie mifanontone iaby te mb'ama'o mb'etoañe.
 Amy te zaho veloñe, hoe t'IEHOVÀ,
 hene ho hamíñe'o hoe bange,
 vaho ho ravaha'o hoe an'enga-vao.

19 Fa rinotsake naho malio
 vaho mangoakoake
 o tane'oo,
 fe maifitse rehe henane zay
 ty amo mpimoneñeo,
 vaho ho lavitse azo o nampigedrañe azoo.

20 Mbe hibiske an-dravembia'o ao
 o anam-pandalà'oo, ty hoe:
 Maifitse amako ty toe'o toy;
 añałalahao toetse himoneñako.

21 Hitsakore ty hoe rehe an-trok'ao:
 Sinama' ia o retoañeo, Zaho nimotso anake naho nibangiñe,
 nasese vaho mpirererere avao?

Ia ty nañabey o retoañe?
 izaho naforintseñe:
 boak'aia o retoañeo?

22 Hoe t'i TALÈ IEHOVÀ:
 Ingo fa hañonjon-tsirañe
 amo kilakila ondatio raho,
 naho hajadoko am' ondatio ty viloko,
 naho hindese' iareo añ'araña'e ao
 o ana-dahi' areoo,
 vaho hasese' iereo añ' èga
 o anak' ampela' areoo.

23 Ho roae-mpañotroñe iareo
 o mpanjakao,
 hampinono iareo o valim-panjakao,
 hidrakadrakake ama'o iereo,
 laharañe mb'an-tane,
 hitsela ty deboke am-pandia'o eo;
 vaho ho fohi'o te Zaho IEHOVÀ,

le tsy ho salatse ze mahaliñe ahy.

²⁴ Ho tavaneñe ami'ty fanalolahy
hao ty tsindro'e,
havotsotse amy nahagiokey hao
o tsinepa'eo?

²⁵ Fa hoe t'IEHOVÀ:
Toe ho tavaneñe amy fanalolahiy
o narohi'eo,
naho havotsotse amy mitrotrofiakey
o hinoro'eo;
hatrefeko ty miatreatre azo,
vaho ho rombaheko o ana'oo.
²⁶ Ho fahanako amo nofo'eo avao
o mpamorekeke anahareoo;
ho mamoe' ty lio'e avao,
hoe t'ie divay mamy;
ho fohi' ze hene nofotse te
Zaho IEHOVÀ ro Mpandrombak' azo,
naho t'i Mpijkeba'o, t'i Manjofa' Iakobe.

50

¹ Hoe t'IEHOVÀ:

Aia ty takelam-panarahañe
naneseako an-drene' areo?
Ia amo mpampisongo amakoo
ty nandetahako anahareo?
Toe niletahañe ty amo tahi' areoo,
vaho o fiolà' areoo
ty naneseañe ty rene' areo.

² Akore te tsy teo ty ondaty,
te zaho nimb'eo?
Ie nikaike, tsy teo ty ho nanoiñe?
Bory hao ty sirako tsy hahafijebañe?

Aa vaho po-kaozarañe hao raho
tsy haharombake?
Heheke maiheko i riakey te endahako; anoeko ratrаратra o sakao;
mantiñe o fia'eo kanao tsy an-drano,
mate' ty arandrano.

³ Sikinako mainte o likerañe,
añombeako gony ho saroñe.

⁴ Fa natolo' i TALÈ, IEHOVÀ ahiko
ty famele' o nanàrañe,
hampanintsiñako an-drehake
o mondetseo;
barakakaofe'e boa-maraiñe
tsekafe'e o sofikoo
hitsanoñe hoe t'ie mpioke.

⁵ Fa nisokafe' i TALÈ, IEHOVÀ o sofikoo,
le tsy nanjehatse, tsy niamboho.

⁶ Natoloko amo mpandafao ty lambosiko,
naho amo mpañono-boloo ty fifiko; tsy naetako ami'ty ònjitse naho
ami'ty rora ty tareheko.

⁷ Hañolotse ahy t'i TALÈ, IEHOVÀ,
aa le tsy nisalatse;

nampigañeko hoe vato-paike ty tareheko,
 le fantako te tsy ho meñatse;
⁸ fa marine ao i Mpañatò ahikoy.
 Ia ty hifañotake amako?
 Antao songa hiongake;
 Ia ty rafelahiko?
 Angao re hitotoke amako.
⁹ I TALÈ, IEHOVÀ ro mpañolotse ahy;
 ia ka ty hamatse ahy?
 Fonga hihamodo hoe tsirodea; ho vazañem-pizara.
¹⁰ Ia ama' areo ty mañeveñe am' IEHOVÀ,
 naho mañorike ty feo' i mpitoro'ey?
 Aa ndra t'ie mañavelo añ'ieñe
 ie tsy aman-kazavàñe,
 le hiatoa'e ty tahina' IEHOVÀ,
 vaho hirampia'e t'i Andrianañahare'e.
¹¹ O ry mpamiañe afoo,
 o mpisikiñe vaen-afoo,
 mandià amo lebaleban' afo' areoo,
 amo vaen'afو niviañe' areoo.
 zao ty hizò anahareo an-tañako
 t'ie handre an-anahelo.

51

¹ Haoño raho, ry mpañori-kavantañañe,
 ry mipay IEHOVÀ; itoliho i lamilamy
 nampitserahañe anahareoy,
 naho i koboñe nihaliañe anahareoy.
² Haraharao t'i Avrahame rae' areo,
 naho i Sarae* nisamake anahareo
 am-panaintaiñañe,
 amy t'ie nirery avao te tinokako,
 le nitahieko vaho nampitozantozañeko.
³ Fa nohoñe' IEHOVÀ t'i Tsione;
 hene nampanintsiñe'e o tanan-taolo'eo,
 naho nampanahafe'e amy Edene
 o ratraratra'eo,
 le hambañe amy golobo' IEHOVÀy o liolio'eo;
 ho tendrek' ao
 ty firebehañe naho ty hafaleañe,
 ty fañandriañañe naho ty feom-pisaboañe.
⁴ Haoño raho ry ondatiko,
 toloro ravembia ry fifeheako;
 fa hiboak' amako ty Hàke, vaho havereko ami'ty havañonako ho failo'
 ondatio.
⁵ Fa marine ty havantañaako,
 fa mionjom-beo ty fandrombahako,
 vaho hizaka ondatio o sirakoo;
 handiñe ahy o tokonoseo,
 hiato ami'ty sirako.
⁶ Andrandrao mb'andikerañe eñe
 o fihaino' areoo,

* **51:2** Sarae: rakemba: bey; panjaka; ana'e maro

le isao ty tane ambane atoy;
 fa himosaoñe hoe hatoeñe o likerañeo,
 naho hihamodo hoe saroñe ty tane toy,
 naho hihomake hoe zay ka ondatio;
 fe ho nainai'e donia ty fandrombahako vaho le lia'e tsy haitoañe ty
 havantañako.

⁷ Mañaoña ahy ry mahafohin-kavañonañeo, ry ondaty mitan-Kake
 añ'arofoo;

ko ihembaña'areo ty ifañembaña'ondatio,
 vaho ko ilonjera' areo o injé'iareoo.

⁸ Ie ho hanem-bararaoke hoe lamba,
 naho habotsen-oletse hoe volonañondry;
 fe nainai'e kitro añ'afe'e ty havantañako,
 naho pak' an-tariratse tsitso'e aña
 ty fandrombahako.

⁹ Mivañona, Mivañona,
 mañombea haozarañe ry fità' IEHOVÀ!
 Mivañona manahake o andro taoloo
 manahake o tariratse haehaeo.
 Tsy Ihe hao ty nampitseratserake
 i Rahabae? ty nitomboke i fañaneñey?

¹⁰ Tsy Ihe hao ty nañamaike i riakey,
 o rano' i laleke mangonkoñeo;
 mbore nanoa'o lalañe an-daleke ao
 hitsaha' o jinebañeo?

¹¹ Aa le himpoly o vinili' IEHOVÀ fiaiñeo, higodañe an-tsabo mbe Tsione
 mb'eo,
 nainai'e hilolohe hafaleañe, naho handia taroba an-kaliforan-kaehake,
 vaho hihelañe aña ty haoreañe
 naho ty fiselekaiñañe.

¹² Zaho, le Zaho ty mañohò anahareo,
 Ia-mb'arè rehe te ho hembañe am'ondaty
 tsi-mahay tsy hivetrakeo,
 naho amo ana-ondaty nanoen-ko ahetseo?

¹³ Nihaliño'o hao t'IEHOVÀ,
 Andrianamboatse azo,
 I namelatse o likerañeo
 naho nañoreñe o faha' ty tane toio?
 ihe miriatsandry lomoñandro
 ty amy haleveleve' i mpamorekeke
 mihentseñe handrotsakeiy!
 Fa aia ty haromota' i mpamolevoley?

¹⁴ Ho hahàñe aniany ty nasese-androhy;
 tsy hizotso mb' am-pihomahañe
 mb'an-tsikeokeoke ao,
 vaho tsy hieren-kaneñe.

¹⁵ Zaho IEHOVÀ Andrianañahare'o,
 ty mampivalitaboake i riakey
 vaho nampitroñe o onja'eo—
 IEHOVÀ' i Màroy ty tahina'e.

¹⁶ Fa najoko am-palie'o ao o volakoo;
 naho nanakoñeo azo
 ami'ty talinjon-tañako,

hampijadoña'o i likerañey,
naho hañoreña'o ty tane toy,
vaho hanoa'o ty hoe t'i Tsione:
Ondatiko 'n-iheo.

¹⁷ Mivañona, Mivañona,
mitroara ry Ierosalaime,
fa ninoma'o am-pitâ'
IEHOVÀ i fitovim-piforoforoa'ey;
ie gineno'o reketse karafo'e
ty fitihem-pivembeñañe,
vaho nikapaihe'o.

¹⁸ Tsy eo ty hiaolo aze
ami'ty hatozantoza'
o anake nisamahe'eo;
tsy eo ty mañoho-pitañe aze
amo ana-dahi'e tsifotofoto nibeize'eo.

¹⁹ O raha roe zao ty hifetsak' ama'o;
ia ty handala azo?
Ty fangoakoahaña naho ty fandrotsahaña,
ty kerè vaho ty fibara;
aia ty hañohòako azo.

²⁰ Fa toirañe o ana-dahi'oo,
mifitake amo lohan-dala'o iabio,
hoe fanaloke tsinepake an-karato;
lifore' ty fifombo' IEHOVÀ,
ty fañendahan' Añahare'o.

²¹ Ehe janjiño zao ry mpisotry, naho
ry mpijike—fe tsy an-divay;

²² Hoe t'IEHOVÀ TALÈ
naho i Andrianañahare'o milozoke
ty am' ondati'ey:
Hehe te rinambeko am-pitâ'o
ty fanovim-pivembeñañe,
naho ty fitovin-kaviñerako;
le lia'e tsy hinoma'o ka;

²³ Fa hapoko an-taña'
o mamorekeke azoo;
o nanao ty hoe ami'ty sandri'oo:
Mibaboha handialià'ay;
le nampanahafe'o amy taney
ty lambosi'o, vaho amy damokey
hijelajelaña'iareo.

52

¹ Mivañona, mivañona,
aombeo ty haozara'o ry Tsione;
sikino o saro'o fanjàkao,
ry Ierosalaime, rova miavakeo;
fa tsy himoak' ama'o ka henane zao
o tsy nisavatseo naho o tsy malioo.

² Ahifikifiho o debokeo;
miongaha, miambesara, r'Ierosalaime;
mibalaha amo taly am-bozo'oo,

ry anak' ampela' i Tsione mirohio.

³ Hoe t'IEHOVÀ;

Ie naletake tsy amam-bili'e;
vaho tsy drala t'ie hijebañañe.

⁴ Fa hoe t'i TALÈ, IEHOVÀ:

Nañavelo mb'e Mitsraime mb'eo
heike ondatiko taoloo, nitaveñañe aña;
vaho finorekeke' o nte-Asoreo
tsy aman-dengo'e.

⁵ Aa inoñe arè ty hanoeko atoy,
hoe t'IEHOVÀ, kanao nasese mb'eo
tsy amam-bili'e ondatikoo?

Mangolalaike o mpifele' iareoo,
hoe t'IEHOVÀ,
vaho nainai'e terateraeñe
ty añarako*, toe lomoñandro.

⁶ Aa le hahafohiñe ty añarako ondatikoo;
vaho ho fohi' iareo amy andro zay,
te Zaho ty manao ty hoe: Intoy raho.

⁷ Fanjaka amo haboañeо
o fandiam-pañitrike talily soao,
ty mitsey fierañerañañe,
ty mitaroñe entan-tsoa,
ty mikoike fandrombahañe
vaho manao amy Tsione ty hoe:
Mifehe t'i Andrianañahare'o.

⁸ Inao ty mpijilo' areo! Mampipoña-peo, mitrao-pisaboañe;
fa ho isam-pihaino' iareo ty fibaliha' IEHOVÀ mb'e Tsione ao.

⁹ Mipoñafa an-drebeke,
miredoña an-tsabo,
ry tanan-taolo' Ierosalaime;
fa nañohò ondati'eo t'IEHOVÀ,
jineba'e t'Ierosalaime.

¹⁰ Hinalo' IEHOVÀ ty fità'e masiñe
am-pihaino' o kilakila' ndatio;
vaho hahaoniñe ty fandrombahan'
Añaharen-tika o aña'olo-ty tane toy iabio.

¹¹ Miavota, Miengà, miakara boak' ao,
ko mitsapa raha maleotse;
miakara boak' añaivo'e ao,
miliova, ry mpinday o harao' IEHOVÀ.

¹² Tsy halisa hiavotse nahareo,
naho tsy hivoratsake mb'eo;
amy te hiaolo anahareo t'IEHOVÀ
vaho hivoly anahareo
t'i Andrianañahare' Israele.

¹³ Ingo, hiraorao i mpitorokoy,
hongaheñe naho honjoneñe
mb'andindiñe aña.

¹⁴ Manahake te nimaro ty nitoritotse ty ama'o— ie dinemoke i lahara'ey,
hoe tsy ondaty, naho ty fañova'e
hoe tsy ana'ondaty—

* ^{52:5} Sab 74:10, 74:18, Avo 20:7, Its 5:11

15 ie henaneo ro hampitsekake fifeheañe maro,
mijomohòñe ama'e o mpanjakao;
amy te ho isa' iareo
o mboe tsy nitalilañeo,
vaho ho oni' iareo o mboe
tsy jinanji'iareo.

53

- 1** Ia ty hiantoke ty taro'ay?
naboak' ama'ia ty fità' IEHOVÀ?
- 2** Ie nitiry añatrefa'e eo
hoe toran-katae,
hoe vahatse an-tane maike.
Ie tsy naràm-bintañe
tsy amañ'asiñe te nisambà'ay;
tsy ni-soa-vintañeahasinda anay.
- 3** Nisirikaeñe, nitorifiha' ondaty,
lahilahy nalovilovy,
nahafohim-pandalàñe,
hoe itakonan-tarehe; nimavoeñe
vaho tsy nañaoñe Aze tikañe.
- 4** Toe nivavè'e o haorean-tikañeo,
nendese'e o hasilofan-tikañeo;
fa nataon-tika t'ie vinango,
linafan'Añahare, nisilofeñe.
- 5** O fiolàñ-tikañeo ty nandratañe aze,
o tahin-tikañeo ty nandemohañe aze;
tama'e ty fandilovañe ninday
fanintsiñañe aman-tikañe;
o fere'eo ro mahajangañ'antika.
- 6** Songa nandrike hoe añondry
sindre nitsile amy lia'ey;
fonga nampivavè' IEHOVÀ aze
o hakeon-tikañeo.
- 7** Niforekekeñe naho nampiambaneñe,
f'ie tsy nanoka-palie;
hoe anak'añondry tantalieñe ho lentaeñe,
hambañe ami'ty fitsìn'añondry
añatrefa' o mpañitsikeo,
t'ie tsy nanoka-palie.
- 8** Fiforeforeañe naho zaka
ty naneseañe aze;
Ia ty ho nahafitoky ty loak'andro'e
kanao naitoañe an-tanen-kaveloñe;
ie pinaoke ty amo fiolà' ondatikoo.
- 9** Nampindrezeñe amo tsereheñeo ty kibori'e,
vaho niharoe'e havilasy o mpañalealeo,
amy t'ie tsy nijoy,
vaho tsy tam-palie'e ao ty famañahiañe*.
- 10** F'ie ninò' IEHOVÀ
ty handemoke aze
naho ty haniloke aze,

* 53:9 Pe I 2:22

aa ie nañenga ty fiai'e
 ho efe-tahiñe,
 le hahavazoho tariratse,
 naho hitompeañ'andro,
 vaho hiraorao am-pitá'e
 o satrin' arofo' IEHOVÀO.
¹¹ Ho isa'e ty vokam-paloviloviam-piai'e
 le hanintsiñe;
 ty hilala' i mpitoroko vantañey
 ro hañavantañey ty maro;
 ie ty mivave o tahi' iareoo.
¹² Aa le hitolorako tambe añivo'
 o manjofakeo,
 le handivà'e amo fanalolahio
 i nikopaheñey,
 amy te nadoa'e an-kavilasy ty fiai'e,
 naho vinolily amo mpanan-kakeoo,
 nilogologoe'e ty tahi' o maroo,
 vaho jineba'e o manan-tahiñeo.

54

- ¹ Mirebeha ry betsiterake,
 ihe tsy nanaranake,
 mipoñafa sabo,
 mipazapazaha ry tsy nitsongo!
 Fa maro ty ana' i vahiniy, te amo ana' i amam-balioo,
 hoe t'IEHOVÀ.
² Itàro ty toen-kiboho'o,
 tibaho o lamba fañefen' akiba'oo,
 naho ko tomoreñé;
 halavao o tali'oo,
 vaho haozaro o tsato'oo.
³ Amy t'ie hañivake mb'ankavana,
 naho mb'ankavia;
 naho handova o kilakila' ndatio o tarira'oo,
 vaho hampimoneñañey o rova mangoakoakeo.
⁴ Ko hemban-drehe fa tsy ho salatse,
 ko meñatse, fa tsy hinjèñé,
 toe ho haliño'o ty hameñaran-katora'o,
 vaho tsy ho tiahi'o ka
 ty fañinjeñañey i haramavoi'oy.
⁵ Fa tañanjomba'o i Mpamboatse azoy,
 IEHOVÀ i Màroy ty tahina'e;
 t'i Masi' Israele ro Mpijkeba'o,
 t'i Andrianañahare' ty tane toy
 ro fikanjiañey Aze.
⁶ Fa nitok'azo t'IEHOVÀ hoe valy
 naforintseñey naho mihontoke,
 aa kanao valin-katora'e,
 hapoke hao?
 hoe t'i Andrianañahare.
⁷ Andro bory ty namorintseñako azo;
 fe am-piferenaiñañey jabajaba
 ty hanontonako azo.

8 Fifomboañe fohe
ty nañetahako ama'o ty tareheko;
fe am-pikokoña migahiñe nainai'e
ty hiferenaiñako,
hoe t'IEHOVÀ Mpijkeba'o.

9 Toe rano' i Noake amako itoy;
amy te hamboña ami'ty nandiliako te tsy hañàmpo ty tane toy ka i rano'
i Noakey,
le nititiheko ka t'ie tsy hibosehako
vaho tsy ho trevoheko.

10 Fa hafahañe o vohitseo,
naho haveve o haboñaño;
fe tsy hieng'azo ty fiferenaiñako,
vaho tsy hovaeñe i fañinam-pilongoakoy,
hoe t'IEHOVÀ mpiferenaiñ'azo.

11 O ry malorè avalitaboa' i tio-beiy,
ie tsy amam-pañohò,
heheke te harafeko am-bolo soa
o vato'oo, naho ho tsenèko
an-tsafira o faha'oo.

12 Hanoeko roy o tilik'abo'oo,
le am-bato mañabasà o lalam-bei'oo,
vaho am-batosoa o olotsolotseo.

13 Hene hanare' IEHOVÀ o ana'oo;
vaho hampitomboeñe
ty fierañeraña' o keleia'oo.

14 Horizañe an-kavantañañ-drehe;
hitots'azo ty famorekekeñañe,
tsy hihembaña'o,
tsy hitotok' azo ka o fandrotsahañaeo.

15 Mete hifanontone iereo,
fa tsy ty amako;
hikorovoke añatrefa'o eo
ze mikitroke azo.

16 Zaho 'nio ty nanao i mpanefe
mitiotioke vaen'afoy,
Ie añakara'e fialiañe hitoloña'e;
nanoeko ka ty mpijoy hijoia'e.

17 Tsy hanjofake ze fialiañe
namboareñañe haname azo;
naho fonga hafà'o ze fameleke
hitroatse hiatreatre azo an-jaka.
zay ty lova' o mpitoro' IEHOVÀo,
vaho tamako ty havantaña' iareo
hoe t'IEHOVÀ.

55

1 O ry taliñiereñe!
Mb'an-drano mb'etoa!
Ry tsy aman-dràlao, mb'etoa mivily,
vaho mikama,
eka, ikalò divay naho ronono
tsy aman-drala, tsy amam-bili'e.

2 Inoñe ty andrita' areo drala

amo tsy mahakamao, naho itoloña' areo o tsy mañenekeo?
 Haoño raho, mitsatsiha,
 vaho kamao ty soa,
 ampifaleo ty fiai' areo ami'ty betro'e.
³ Atokilaño amako o ravembia' areoo;
 Mijanjiña, hahaveloñe ty tro' areo,
 vaho hanoako fañina tsy modo, o fiferenaiña' i Davideo.
⁴ Ingo, t'ie nanoeko mpañalañalañe
 amo kilakila'ndatio,
 mpiaolo naho mpameleke ondaty.
⁵ Ingo! ho koike'o ty tane tsy fohi'o,
 vaho hilay mb'ama'o mb'eo
 ty tane tsy mahafohiñe azo, ty am' IEHOVÀ, Andrianañahare'o,
 i Masi' Israeley, ihe nitolora'e engeñe.
⁶ Paiao t'IEHOVÀ ie mbe mete ho oniñe, ikanjio te mbe marine eo.
⁷ Ee te hapo' i tsereheñey o sata rati'eo vaho hado' i mengokey o fikinià'eo;
 himpoly mb'am' IEHOVÀ hitretreza'e,
 naho mb'aman' Añahare
 hilosora'e tàha.
⁸ Toe tsy fitsakoreako o vetsevetse' areoo,
 vaho tsy lalako o lala' areoo,
 hoe t'IEHOVÀ.
⁹ Mira ami'ty maha ambone' ty tane toy
 o likerañe
 ty ha-andikera' o lalakoo
 te amo sata' areoo,
 naho o ereñerekoo
 te amo fitsakorean-tro' areoo.
¹⁰ Hambañe ami'ty fiavi' o orañeо naho
 o oram-panala boak' andindiñeо
 ie tsy mibalike, naho tsy
 tondraha'e hey o taneo
 hampamokara'e naho hampitovoña'e, hamahana'e doria ami"ty mpi-
 tongy naho ampemba ami'ty mikama,
¹¹ Toe zay ty fiakara' ty entako
 am-bavako ao;
 ie tsy holy mañomaño amako, fa ho fonire'e o satrikoo,
 vaho ho henefe'e ty namantohako.
¹² Hiavotse an-kafaleañe nahareo, vaho hampionjoneñe
 am-pierañañe;
 ho poñafe' o vohitseo ty sabo aolo' areo,
 le hene hiteha-tañañe
 ze hatae am-patrañe aña.
¹³ Hitovoñañe hisolo ty fatike
 ty mendoraveñe, vaho handimbe
 ty hisatse ty beifelañe.
 Ho fitiahiañe IEHOVÀ zay,
 ho viloñe nainai'e tsy modo, tsy haitoañe.

vaho ho bentareñe ty havañonako. ² Haha t'indaty manao zao
 naho ty ana'ondaty
 mivontititse ama'e;
 te ambena'e i SABOTSEY
 tsy hañotà'e faly, vaho
 tana'e ty fità'e tsy hanoe'e raty. ³ Tsy apo'e hanao ty hoe,
 i renetane mpirekets' am' IEHOVÀ:
 Toe havi' IEHOVÀ am'ondati'eo raho;
 vaho tsy hado'e hanao ty hoe ty vositse:
 Inao! Hatae maike raho. ⁴ Fa hoe ty nafè' IEHOVÀ:
 O vositse mpitañ' o SABATAKOO,
 naho mijoboñe o mahafale ahikoo,
 vaho mifahatse amy fañinakoy: ⁵ Ho tolorako lily
 naho tahinañe an-trañoko ao
 naho am-po'o rindrikoo
 ambone' ze atao anadahy
 naho anak' ampela:
 hitolorako tahinañe tsy ho modo,
 tsy haitoañe nainai'e ⁶ Le o renetane mpirekets' am' IEHOVÀ hiatrak' Aze,
 hikoko ty tahina' IEHOVÀ ho mpitoro'eo,
 ze mañambeñe i SABOTSEY tsy haniva aze,
 vaho mifahatse amy fañinakoy: ⁷ Ie ro hendeseko
 mb'amy vohiko miavakey mb'eo,
 vaho hampifaléko an-kivohom-
 pitalahoako ao;
 ho rambeseñe amy kitrelikoy
 ty enga' holora' iareo
 naho o fisoroña' iareoo;
 amy te hatao: Anjombam-pitalaho'a'
 ze kila ondaty ty kivohoko. ⁸ Hoe t'i TALÈ, IEHOVÀ,
 Mpanontone o naitoañe
 amo ana' Israeleo,
 Mbe eo ty havoriko ho ama'e
 amo fa natontoko. ⁹ O ry biby an-kivok' ao,
 mb'etoa hampibotseke,
 eka ry hene biby añ'ala ao. ¹⁰ Goa o mpijilo'eo,
 Songa tsy aman-kilala;
 Sindre amboa bobo tsy maha-hiake;
 mañinofy t'ie mibabòfoke, mpitea-roro. ¹¹ Eka matity o amboao,
 tsy apota'iareo ty atao etsake, toe mpiarak'añondry
 tsy mahafohiñe, o retiañe;
 songa mitsile mb'an-dala'e mb'eo
 sindre mampitombo ty aze avao
 pak' an-tsitso'e. ¹² Antao, hoe iereo, Hangalake divay,
 hampiboboke ty tron-tika an-toake;
 le hanahake ty andro toy avao
 ty hamaray, fe ampitoaboreñe.

fe tsy eo ty mitsakore t'ie nampiengañe amy raty ho aviy.
² Mimoak' am-pierañerañañe ao re,
mitofa am-pandrea'e eo iereo,
o mpañavelo an-kahiti'eo.
³ Fe miharinea ry anam-pamoreke,
ry tirim-pandrañaotse naho karapilo.
⁴ Ia ty solè' areo?
Ia ty ampivañavaña' areo vava,
naho ibolobeaha' areo?
Tsy anam-piolàñe hao ry
tirim-pandañirañe?
⁵ Inahareo mpañiri-mena ambane' kileo
ambane ze hatae mandrevakeo;
o mpamono ajaja am-bavataneo,
ambane' o tevam-batoo.
⁶ Amo vato nivañeñe an-goledoñ' ao
ty anjara'o, mañeva azo zay,
mbore nañiliña'o engan-drano,
nibanabanà'o engan-kaneñe.
Hitsiñe amy tsaraeñey hao raho.
⁷ Fa nalafi'o ambone vohitse mitiotiotse eo ty tihi'o;
le nimb'eo hañenga soroñe,
⁸ nañoreñ'ajiba amboho lalañe naho tsotsoke ao;
ie nañafa-tsaroñe fa tsy amako,
niañambone, namelatse i tihi'oy,
le nilahatse am' iereo
vaho nitea'o ty tihi' iareo
te nitsikaoreñe.
⁹ Nomba'o reke-tslike i mpanjakay,
le nampitomboe'o o rano-mañi'oo,
nampihitrife'o aña o sorotà'oo,
ihe nihotrake mb'an-tsikeokeoke ao.
¹⁰ Nahamokotse azo ty halava' i lia'oy;
f'ie tsy nanao ty hoe:
Po-pitamañe.
Nisolebatse indraike ty fañiria'o,
vaho tsy nilesa.
¹¹ Ia ty nihembaña'o naho nañeveña'o?
Akore te nandañira'o naho
tsy nitiahie'o vaho tsy nitsakorea'o?
Kanao hatr'ela'e ty nitsiñako
ihe tsy mañeveñe amako.
¹² Ho taroñeko ty hamarentane'o,
naho o fitoloña'oo—
f'ie tsy ho vara ama'o.
¹³ Ihe mitoreo,
hahahah' azo hao o raha nahoro'oo;
fa fonga hasiotsion-tioke,
ho vavèn-kofòke mb'eo;
fa ho fanaña' i mitsoloke amakoy i taney, vaho ho lovae'e i vohiko
miavakey.
¹⁴ Le ho kouheñe ty hoe:
Ahifiho mañambone,

Aobòño ambone ey,
afaho iaby ze sebañe
an-dala' ondatikoo.

¹⁵ Fa hoe ty nafè' i Antiotiotsey,
i Andindimoneñe mpimoneñe
an-tsi-fimodoañey,
ie kanjieñe ty hoe: Masiñe.

Zaho mpitoboke amy abo naho masiñey—mpiamako ty mibàboke
naho ty mirèke añ'ova'e ao,
hameloñe ty arofo miambane,
vaho hampibodaña ty troke misoloho.

¹⁶ Toe tsy hifañotakotake nainai'e raho,
vaho tsy ho boseke kitro katroke;
hera hamoe'ay o troke aolokoo,
naho o arofo nitsenèkoo.

¹⁷ Ty haratia' i fihaña'ey ty nibosehako naho nandafàko,
nietake am-pifomboan-draho;
f'ie nitolom-piola
ami'ty fombàn-tro'e.

¹⁸ Fa nitreako o sata'eo,
fe ho jangañeko;
naho hiaoloako, vaho ho vaoeko ama'e
naho amo mpandala'eo ty fañohòañe.

¹⁹ Zaho ty mitsene o vokam-pivimbio;
fanintsiñañe, fanintsiñañe,
amy tsietoitaney naho
amy marivoy, hoe t'IHOVÀ,
vaho ho melañeko.

²⁰ Fa manahake i riake mivalitaboakey
o lo-tserekeo;
amy te tsy mete mipendreñé,
vaho aretsa' o ranoo mañambone
ty leotse naho loto.

²¹ Tsy am-pierañerañañe
o rati-tserekeo.
hoe t'i Andrianañahareko,

58

¹ Mikoiha, ko mifoneñe,
mipoñafa-feo hoe antsiva, vaho
taroño am'ondatikoo ty fiolà' iareo,
naho am' Iakobe o tahí'eo.

² Boak'andro iereo manao te mipay ahy,
le mintse mifale handrendreke
o satakoo, manahake t'ie
fifeheñañe mpanao havantañañe,
hoe mbe lia'e tsy naforintse'e
o fañèn' Añahare'eo,
vaho mipay zaka to amako,
inao mahafale iareo ty
mañarine aman'Añahare.

³ Ino ty nililira'ay,
ihe tsy mahavazoho anay?
Akore te nijoie'ay o tro'aio

fe tsy nihaoñe'o?

Inao! amy androm-pililira' areoy
ro mbore mitolon-draha,
naho mampifanehake mpitoroñe.

⁴ Isao te fañòlañe naho fifandierañe avao ty fililira' areo, hanjevoña' areo
an-komondron-kalo-tserehañe.

Tsy ho janjiñeñe an-dindimoneñe ey
i fililira' areo anindroaniy.

⁵ Zao hao o fililirañe jinoboko
ho androm-pilieram-batañe?
T'ie ho fihohòfañe hoe bararata hao,
naho ho fandafishañe gony naho
lavenoke ambañe eo?
Zay hao ty atao' areo ho lilitse,
ho andro no' IEHOVÀ?

⁶ Tsy itoy hao o fililirañe joboñekoo?
ty fañahàñe o silisilin-kalo-tserehañe o naho ty hampibalahañe
o tali-randran-jokao,
ty hamotsorañe o forekekèñe o naho ty hampipozahañe
ze hene ana-joka?

⁷ Tsy ty handivàñe ty mahakama'o
amo salikoeñeo hao, naho
ty hampihovàñe añ'anjomba'o ao
i mavomavo natao'o soike rezay, naho
ty hanikinañe ty miboridañe
te oni'o, vaho tsy iambohoa'o
ty nofots'aman-dio'o?

⁸ Ie amy zao hipelatse ty hazavà'o
manahake te manjirik' andro,
le halisa ty fijangaña'o,
hiaolo azo ty havañona'o,
vaho hanehak' azo ty enge' IEHOVÀ.

⁹ Hikanjy rehe henane zay,
le hanoïñe azo t'IEHOVÀ;
hikaik'olotse le hanoe'e ty hoe:
Intoy raho.

Naho asita'o añivo'o ao i jokay, i tondro-soñiy
naho o tambaitambaiñe,

¹⁰ Le ie ferenaiña'o o salikoo
naho eneñe'o o foreforèñe,
le hanjirike añ'ieñe ao ty hazavà'o vaho hivalike ho tsipinde-mena
ty fimoromoroña'o.

¹¹ Hiaolo azo nainai'e t'IEHOVÀ, le ho eneñe'e ty fiai'o an-tsang-kerè,
vaho hampaozare'e o taola'oo.

Ho goloboñe soa-tondrake rehe,
naho torahañe tsy mai-drano.

¹² Hamboare' o boak'ama'oo
o tanàn-taoloo le hatroa'o o fahan-tariratse maroo,
vaho hatao mpamboatse jebañe rehe,
mpanomonty o lalam-pimoneñañe.

¹³ Aa naho avì'o amy SABATAY
ty fandia'o
tsy hañeañe o tolon-draha'oo

amy androko masiñey;
 naho tokave'o ty hoe 'mahafale'
 o SABOTSEO, ty andro masi' IEHOVÀ,
 naho amañ'engeñe, le iasia'o,
 tsy hañorike o lala'oo, naho
 tsy hipay ty mahafale azo, vaho
 tsy hisaontsy o enta'oo;
¹⁴ Ie hifale am' IEHOVÀ,
 le hampiningirako azo
 o haboa' ty tane toio, vaho
 ho fahanako ami'ty lova' Iakobe rae'o;
 zay ty nitsaraem-palie' IEHOVÀ.

59

- ¹ Toe tsy nitomoreñé ty fità' IEHOVÀ
 tsy haharombake,
 mbore tsy mavesatse i ravembia'ey,
 tsy hahajanjiñe;
- ² Fe nampisitake anahareo
 aman'Añahare' areo o tahi' areoo
 naho naeta' o hakeo' areoo
 amy lahara'ey nahareo,
 tsy hahajanjiñe.
- ³ Fa vinetan-dio o fità'oo,
 naho haratiañé o rambom-pità'oo;
 fa nireha-bande o soñi'oo,
 vaho miñeōñeon-kalò-tserehañé o lela'oo.
- ⁴ Tsy eo ty manisý an-kavañonañé,
 tsy eo ty mihalaly an-kahiti'e;
 miato an-kafoahañé,
 naho mivolam-bande,
 mampiareñé fikitrofañé iareo,
 mampiboloñañé haloloñañé.
- ⁵ Ie mañatoly atolim-pañaneñé,
 mandrare fararotse;
 mate ty mitsopeke o atoli'eo,
 vaho ipoñafan-dapetake ze foy.
- ⁶ Tsy hanoen-tsaroñé o fararo'eo,
 vaho tsy ho sikina'ondaty
 o tolom-pità'eo;
 toe satan-karatiañé ty fifanehafa' iareo,
 am-pità' iareo ty tolom-piaroteñé.
- ⁷ Milay mb'an-kaloloñañé mb'eo
 ty fandia' iareo,
 naho malisa hampiori-dio màliñé;
 vetsevetse raty ty fitsakorea' iareo,
 an-dala' iareo ty fangoakoahañé
 naho ty fandrotsahañé.
- ⁸ Nofi' iareo ty lalam-pifampilongoñañé,
 vaho tsy vantañé o oloñolo' iareoo;
 tsy tendreke fañanintsiñe ze mizilike ao.
- ⁹ Toli-ndra lavits'antika ty havantañañé,
 vaho tsy mahatratse an-tika ty hatò;

mipay hazavàñe tika,
fe hehe t'ie hamoromoroñañe.
10 Tsapatsapaen-tika i rindriñey
manahake te goa,
eka mitsapatsapa hoe tsy amam-pihaino;
mitotohitse an-tsipinde-mena
hoe am-palipalitsieñe;
itika hoe lolo an-toetse maieñe ao.
11 Mañaolo hoe dobe tika,
mangololoike hoe deho;
mipay ty vantañe fa tsy eo;
ty fandrombahañe,
fe mitòtse aman-tika.
12 Fa mitoabotse añatrefa'o eo
o fiolà'aio,
mbore manisý anay o tahi'aio;
toe aolo'ay eo o fandilara'aio,
vaho fohi'ay o ota-fali'aio:
13 mandilatse naho mitety IEHOVÀ
miambaho aman'Añahare'ay
tsy mañorike Aze,
mivolam-pamorekekeñañe
naho hamengohañe,
mikinia naho mañakatse
entan-dremborake boak'an-troke ao.
14 Naolake ami'ty hatò, midisa-voly
naho mijohañe eñe ty havañonañe;
mitsikapy an-gadagadañe ey ty fahiti'e,
vaho tsy mete mizilik' ao ty havantañañe*.
15 Milesa ty havañonañe,
ze mienga ty haratiañe
manao ty vata'e ho injahéñe;
vazoho' IEHOVÀ,
le heje'e t'ie po-kavantañañe.
16 Nioni'e te tsy eo ty ondaty,
vaho nilatsa t'ie tsy am-pañalañalañe;
aa le i fità'ey ty nandrombake ho Aze;
i havantaña'ey ty nanozañe Aze.
17 Niombea'e ty havañonañe
hoe sarom-by
naho añambone'e eo ty sabakam-pandrombahañe;
nisaroñe lambam-pamaleam-pate
ho fisaro'e, vaho
nisaravy fahimbañañe ho sarimbo.
18 Mira amo sata' eo, ty havaha'e:
Fiforoforoañe amo malaiñe Azeo,
Fañondroke amo rafelahi'eo;
Fañavahañe amo tokonoseo.
19 Zay ty añeveña' o tahandrefañe
ty tahina' IEHOVÀ, i enge'ey,
boak' am-panjirihan' andro aña;
fa hanao vovòn-tsorotombake

* **59:14** Amo 5:7

ty hankàñe, hasio' ty kofò' IEHOVÀ.
20 Le hitotsak' e Tsione ty mpijebañe[†]
 ho amo mpiamboho fiolàñe
 am' Iakobeo, hoe t'IEHOVÀ.
21 Aa naho Zaho, le zao ty fañinako
 am' iereo, hoe t'IEHOVÀ:
 Ty Troko ama'o naho
 o tsara najoko am-palie'oo,
 ro tsy hienga am-palie'o,
 ndra am-palie' o tiri'oo,
 ndra am-palie' o tariran-tiri'oo,
 henane zao naho nainai'e tsy modo,
 hoe t'IEHOVÀ.

60

- 1** Miongaha, miloeloea;
 fa totsake o hazava'oo
 fa nanjurik' ama'o ty enge' IEHOVÀ.
2 Toe hanaroñe ty tane toy
 ty hamoromoroñañe
 naho amo kilakila ondatio ty ieñe ngeo'e,
 fe hitosàke ama'o t'IEHOVÀ vaho ho oniñe ama'o ty enge'e.
3 Hañavelo mb'amo hazava'oo
 o kilakila ondatio*,
 naho mb'ami'ty fireandream-panjiriha'o
 o mpanjakao.
4 Ampiandrao mb'eo mb'eo o fihaino'oo, le mahaoniña, hene mifanon-
 toñe, mivovotse mb'ama'o mb'eo
 boak'e tsietoitane aña o ana-dahi'oo,
 vaho hotroñe' o mpiatrak' azeo
 o anak' ampela'oo.
5 Ho oni'o amy zao naho haviake, hitepotepo vaho hienatse ty arofo'o;
 Fa hasese ama'o ty havokara' i riakey,
 hitotsake ama'o ty vara' o fifeheañeo.
6 Handrakotse' azo ty rameva aña'aleale;
 hikararake boake Seba aña
 o rameva tora' i Midiane naho Eifàeo[†]
 hanese volamena naho rame,
 hitalily ty enge' IEHOVÀ.
7 Sindre hatontoñe ama'o
 ze lia-rai' i Kedare‡,
 songa hitoroñe azo
 ty añondrilahi' i Nebaiote§,
 hionjom-b'an' kitreliko mb'eo fa mañeva;
 ho rengèko ty akibam-bolonaheko.
8 Ia o mitiliñe hoe rahoñe? hoe deho mamonje o traño'eo.
9 Toe handiñe ahy o tokonoseo,
 naho hiaolo hinday o ana-dahi'oo
 boake lavitse aña o sambo' i Tarsosio,
 reketse ty volafoti'iareo

† 59:20 Ies 24:23 * 60:3 Ies 60:19-20, Ben 21:23-24 † 60:6 Eifà: mokotse, vozake ‡ 60:7

Kedare: mainte; fandalañe § 60:7 Nebaiote: saontsy; toky; taroke

vaho ty volamena'iareo,
 mb'amy tahina' IEHOVÀ Andrianañahare'o,
 naho mb'amy Masi' Israeley,
 fa ie ro hanolotse' engeñe ama'o.

¹⁰ Harafi' o renetaneo o kijoli'oo,
 naho hiatrak'azo o mpanjaka'eo;
 toe linafako an-kabosehan-drehe,
 fe am-pañosihañe ty niferenaiñako.

¹¹ Hisokake nainai'e o lalam-bei'oo,
 tsy harindriñe handro ndra hale,
 hañendesa' ondaty ama'o
 ty vara' o kilakila' ndatio,
 vaho hivovora' o mpanjaka'eo.

¹² Hirotsake ty fifeheañe naho
 ze famelehañe tsy mitoroñe azo;
 eka ho vata'e fianto i fifeheañe rezay.

¹³ Homb'ama'o mb'eo ty volonahe'
 i Lebanone, o mendoraveñeo,
 o harandrantoo, o mañario,
 naho o kintsiñeo,
 hampisomontia' iareo i toeko miavakey;

le hanoeko fanjaka ty atimpaheko.
¹⁴ Hidrakadrakake mb'ama'o mb'eo
 ty ana' o nampisoañe azoo,
 hibokoke an-dela-pandia'o eo
 o nanítse azoo;
 vaho hanoa' iereo ty hoe:

ty rova' IEHOVÀ,
 ty Tsione' i Masi' Israeley.

¹⁵ Aa kanao naforintseñe
 naho ni-falai' ondaty rehe,
 vaho tsy nirangaeñe,
 le hanoeko fiaintane nainai'e,
 hafaleañe tariratse an-tariratse.

¹⁶ Ho riote' areo ty ronono' o fifeheañeo
 hinono am-patroam-panjaka
 vaho ho fohi'o te
 Zaho IEHOVÀ ro Mpandrombak' azo,
 naho Zaho Tsitongerè' Iakobe
 ro Mpijkebañe azo.

¹⁷ Hindesako volamena
 hasolo ty torisike,
 naho torisike hasolo ty hatae,
 naho viñe fa tsy vato;
 hanoeko fierañerañañe o mpifehe'oo,
 vaho havantañañe o mpizaka'oo.

¹⁸ Tsy ho rey an-taneko ao ka
 ty hotakotake, ndra fangoakoahañe
 ndra fiantoañe am-po fahe'o ao;
 fa hatao'o ty hoe
 Fandrombahañe o kijoli'oo,
 naho fandrengeañe o lalam-beio.

¹⁹ Tsy i àndroy ka ty hitsavavàk' ama'o te handro,

vaho tsy ty hadorisa' i volañey
 ty himilemiletse ama'o;
 fa hireandreañe ama'o nainai'e t'IEHOVÀ,
 naho ho enge'o t'i Andrianañahare.
20 Le lia'e tsy hiroñe i àndroy,
 naho tsy hisitake ka i volañey;
 fa IEHOVÀ ty ho failo'o nainai'e,
 vaho ho modo o androm-pandalà'oo.
21 Hene ho vantañe ondati'oo
 ho lova' iareo nainai'e ty tane;
 ie singa namboleko,
 ty satan-tañako, handrengeañ' Ahiko.
22 Hinjare arivo ty tsitso'e,
 naho fifeheañe jabajaba ty kede*;
 Zaho IEHOVÀ ty hanaentaeñe aze
 ami'ty andro'e.

61

1 Amako t'i Arofo' i TALÈ, IEHOVÀ;
 ie noriza' IEHOVÀ hinday talily soa amo mpirèkeo;
 nirahe'e hamolonkoñe ty jagobo,
 hitaroñe fidadàñe amo am-balabeio, naho fañahañe amo mirohio;
2 hitsey ty taom-pañisoha' IEHOVÀ
 naho ty androm-pañondrohan'Añahare, hañohòa'e o mihontokeo,
3 hamahana'e ze mirovetse e Tsione ao,
 hampisabakae'e voñe
 halimbe ty lavenoke,
 tavon-kaehake hasolo ty fandalàñe,
 saravim-bolonahetse
 halimbe ty hamonjèrañe.
 Hatao kilen-kavañonañe,
 ty fambolèa' IEHOVÀ hisengea'iareo ty volonahe'e.
4 Le hamboare' iareo o tanàn-taoloo,
 hatroa' iareo o nangoakoake haehaeo,
 vaho ho vaoe' iareo o rova niantoeñeo,
 o nibangý fa tariratse maro zay.
5 Hiavotse hamahañe o lia-rai'oo
 o ambahinio,
 le ho mpiava'o naho mpañeteke
 o vahe'oo ty renetane.
6 Fe hatao mpisoro' IEHOVÀ nahareo,
 hatao ondatio ty hoe:
 Mpiatrak' an'Andrianañahare'ay;
 ho kamae' areo ty vara' o fifeheañeo,
 vaho ho sengè' areo ty volonahe' iareo.
7 Kanao ni-roe ty hasalara' areo,
 naho nirebeha' iareo ty hoe:
 Anjara' iareo ty fivoteboteñañe,
 le hanañe roe an-tane' iareo ao,
 vaho ho nainai'e am' iareo ao
 ty hafaleañe.
8 Fa mpitea ty hatò zaho IEHOVÀ;

* **60:22** Ies 41:14, Dan 2:34-44

hejeko ty kametse naho ty lilatse;
 hondrohako ami'ty hahiti'e iereo,
 naho hanoako fañina tsy modo.

⁹ Ho fohiñe amo kilakila ondatio
 o tarira' iareoo,
 naho am'ondatio o taminga' iareoo;
 hapota' ze mahaoniñe
 t'ie ty tiry nitahie' IEHOVÀ.

¹⁰ Handia taroba am' IEHOVÀ raho,
 hirebek' aman' Añahareko ty troko;
 amy te siniki'e sikim-pandrombahañe,
 Nasaro'e sarimbom-pandrebahañe,
 le sinabaka'e hoe fañombeam-pañenga i sabaka'ey,
 vaho nihaminañe hoe enga-vao amo bange'eo.

¹¹ Toe hambañe ami'ty fampitiria'
 i taney o hatae'eo naho
 ty fampiporotsaha' ty goloboñe
 o nitongiseñe ama'eo;
 ty hampipitsiha' i TALÈ, IEHOVÀ
 fandrebahañe naho engeñe añatrefa'
 ze kilakila'onday.

62

¹ Tsy hitsin-draho ty amy Tsione,
 tsy hitofa ty am' Ierosalaime;
 ampara' te mionjom-beo am-pireandreañe ty fandrebaha'e,
 naho manahake ty firebarebam-pañilo
 ty fandrombaha'e.

² Ho isa' o fifeheañe ty fandreketa'o,
 naho o mpanjaka iabio ty enge'o;
 vaho ho kanjieñe tahinañe vao rehe,
 ze ho toñonem-palie' IEHOVÀ.

³ Ie ho sabaka soa am-pità' IEHOVÀ ka,
 naho banetram-panjaka
 an-dela-pitàn' Añahare.

⁴ Tsy hatao Naforintseñe ka rehe, naho
 tsy ho tokaveñe ty hoe mangoakoake ka ty tane'o;
 fa hoe ty hatao azo: An-Kafaleako,
 naho ty tane'o: Manam-baly;
 amy te ifalea' IEHOVÀ,
 vaho hanam-baly ty tane'o.

⁵ Hambañe ami'ty fañengà' ajalahy
 ty somondrara miehañe,
 ty hañengà' o ana-dahi'oo azo;
 vaho manahake ty firebeha'
 ty mpañenga amy enga-vao'ey,
 ty hifalean' Añahare'o ama'o.

⁶ Fa nampijadoñeko ambone'
 kijoli'o ey ty mpijilo, ry Ierosalaime,
 tsy hianjiñe handro an-kaleñe iereo;
 ko mitofa ry mpanohiñe IEHOVÀO,

⁷ vaho ko apo' areo t'ie hitofa,

ampara' te oriza'e,
eka ampara' te hanoe'e fandrengea'
ty tane toy t'Ierosalaime.

⁸ Fa nifanta am-pità'e havana t'IEHOVÀ, an-tsiran-kaozara'e:
T'ie tsy ho fahanako amo ampemba'oo
o rafelahi'oo, naho
tsy hinoman' ambahiny ka
o divay nitoloñe'oo.

⁹ O nanontoñe azeo ty hikama ama'e,
naho handrenge IEHOVÀ,
vaho o nitimpoñe azeo ty hinoñe ama'e,
an-kiririsan-toeko miavake eo.

¹⁰ Iziliho, iziliho o lalam-beio, hajario ty lala' ondatio;
ampitoabòro, ampitoaboro i tatakey, hene aveveo o vatoo, zonjò viloñe
ambone' ondatio ey.

¹¹ Ingo fa nikoike pak'añ'olon-tane aña
t'IEHOVÀ, Ano ty hoe t'i Tsione anak'ampela : Ingo, mb'eo ty fandrom-
baha'o; rekets' i tambe'ey,
ama'e ka ty vale-soa'e.

¹² Hatao ty hoe iereo :
Ondaty masiñe, jineba' IEHOVÀ.
Ho tokaveñe ty hoe rehe :
Tsinoeke;
Rova tsy Naforintseñe.

63

¹ Ia o mb'atoy hirik' Edome,
reketse lambam-Botsrà nimenaeñeo?
i minday engeñe amo saro'eoy,
i maràm-bintañ' ami'ty
ha'ra'elahin-kaozara'ey?
—Zaho mivolañe ami'ty hatò,
fatratse te handrombake.—

² Aa vaho ino ty mahamena o saro'oo,
naho ty sarimbo'o, manahake ty
mpandia divay an-tsajoa ao?

³ Zaho avao ty nandalia
i fanindrian-divaiy,
fa ondatio, leo raike tsy nimpiamako;
eka ho liàko ami'ty fifomboko,
naho hatsafeke ami'ty fiforoforoako;
naho nifitse amo sikikoo ty lio' iareo
vaho hene kinomatraoko o sarokoo,

⁴ Toe androm-pañavahañe ty an-troko ao,
fa tondroke ty taom-pijebañako.

⁵ Nenteako te tsy teo ty hañolotse,
niisako an-kalatsañe
fe tsy teo ty hanozañe;
aa le ty tañako avao ty ninday
fandrombahañe ho ahiko,
nanozañ'ahy ty fifomboko.

⁶ Le niliako an-kaboseke ondatio,
naho nimamoeko am-poroforo,

vaho naretsako an-tane ty haozara' iareo.

⁷ Ho taroñeko ty fiferenaiña' IEHOVÀ,
 naho ty fijejoañe IEHOVÀ,
 ty amo hene raha fanjàka
 natolo' IEHOVÀ antikañe,
 naho i fatariha'e ra'elahy
 amy anjomba' Israeley,
 i natolo'e iareo
 ty amo fitretreza'eoy naho
 amo fiferenaiña'e bey heneheneo,
⁸ amy natao'e, ty hoe; Toe ondatiko iereo, anake tsy handañitse;
 Ie ro nandrombake iareo.
⁹ Amo haferenai' iareo iabio, le niferenaiña'e, naho nandrombake
 iareo ty anjelim-piatrefa'e;
 ty fikokoa'e, toe i haleñ'arofo'ey
 ty nijebaña'e iareo
 naho notroñe'e vaho nivavè'e
 amo hene andro taoloo.

¹⁰ Fe niola iereo, nanjehatse
 amy Arofo'e masiñey;
 aa le nifotetse re ho rafelahi' iareo;
 ie avao ty nialy am' iereo.

¹¹ Nitiahi' ondati'eo amy zao
 o andro taolo faha' i Mosèo:
 Aia i nampitroatse iareo
 amy riakey rekets' i mpiara-lia-rai'ey?
 Aia i nampijoñe i Arofo'e Masiñey
 am' iereoy?

¹² ie nanehake ty fitàn-kavana' i Mosè
 am-pità'e lifots'engeñey;
 ie nandriatse i rano aolo' iareoy,
 hanoe'e tahinañe tsy modo ho aze;
¹³ ie niaolo iareo hitsake i lalekey hoe te
 soavalà ampatrañey, tsy hitsikapy?
¹⁴ Manahake ty fizotsoan' añombe
 mb'am-bavatane mb'eo,
 ty nampitofà' i Arofo' IEHOVÀ iareo;
 zay ty niaoloa'o ondati'oo,
 hanoe'o tahinañe bey volonahetse.

¹⁵ Mijilova boak' andikerañ'añe,
 mivazohoa boak' amy akiba'o
 miavake lifots'engeñey;
 aia ty fahimbaña'o,
 naho o haozara'o ra'elahio,
 ty fitrekotrekon-kovi'o,
 naho o fiferenaiña'o ahio?
 nisebaneñe hao?
¹⁶ Ihe ro Rae'ay;
 ndra te nofi' i Avrahame
 naho amoea' Israele; Ihe ry IEHOVÀ ro Rae'ay,
 i Mpijkeña Anay Haehaey ro tahina'o.
¹⁷ O ry IEHOVÀ,
 ino ty ampandilara'o anay o lala'oo

naho mampigañe ty tro'ay
 tsy hañeveñe ama'o?
 Mibalihà amo mpitoro'oo,
 amo fifokoan-dova'oo.
¹⁸ Didý tsy ho rinoa' iareo
 ondaty navahe'o iabio,
 fa linialia' o rafelahi'aio
 i toe'o miavakey*
¹⁹ Fa ninjare hoe mbe lia'e
 tsy nifehe'o zahay,
 amy te tsy nitokaveñe amy Tahina'oy.
 Ehe te ho riate'o o likerañeo,
 hizotsoa'o mb'etoa,
 naho hiezeñezeneña añ'atrefa'o eo
 o vohitseo,

64

¹ Manahake ty famorototoan'
 afo o rongoñeo,
 ty afo mampitroatroake rano.
 Hampaharofoanañe o malaiñ'Azoo
 ty tahina'o, hihondrahondra'
 o kilakila' ndatio ami'ty fiatrefa'o,
² Ie nanoa'o raha tsitantane tsy nipaia'ay
 —Ehe te hizotso Rehe,
 te hiozoñozoñe o haboañeo
 ami'ty fiatrefa'o!—
³ ie tsy jinanji' ondatio taolo,
 tsy napotan-dravembia
 tsy nioni-pihaino,
 t'i Andrianañahare naho tsy Ihe,
 Ie mitoloñe ho a o mandiñe Azeo.
⁴ Fitilihe'o ty mitolon-kavantañañe an-kaehake, o mahatiah y Azo amo
 lala'oo —eka, mifombo Rehe te mandilatse zahay.
 Fe ami'ty fiatoa'ay amo lala'o haehaeo
 ro hahazoa'ay rombake.
⁵ Songa ninjare hoe ondaty tiva zahay,
 sindre hoe tsirodea maleotse ty havantaña'ay;
 miheatse manahake ty raveñe,
 vaho maniotsiotse anay aña
 hoe i tiokey o hakeo'aio.
⁶ Leo raike tsy mikanjy ty tahina'o,
 ty mitrobo vatañañe handrambe Azo;
 fa naeta'o ama'ay ty lahara'o,
 vaho nagedra'o ty amo tahi'aio.
⁷ Hoke, ry IEHOVÀ,
 Ihe ro Rae'ay; zahay ro lietse,
 Ihe ro mpitoloñe anay,
 Ie songa satam-pità'o.
⁸ Ko loho viñetse ry IEHOVÀ,
 vaho ko mahatiah y hakeo nainai'e;

* **63:18** Sab 74:1-23, 79:1-13, Iir 51:51, Fir 1:10, Dan 8:13, 11:31, Mat 24:15

heheke, vazohò henaneo,
te hene ondati'o zahay.

⁹ Fa nanjare ratraratra o rova'o miavakeo,
fatrambey ty Tsione,
mangoakoake t'Ierosalaime.

¹⁰ I anjomba'ay miavake naho fanjakay,
i nitalahoan-droae'aiy,
le fa finorototo' ty afo;
vaho fonga navatambia ho forompotse
o raha soa'ao.

¹¹ Mbe hifoneña'o hao ry IEHOVÀ
ty amy raha rezay?
hianjiñe hao Rehe hanotry anay
an-tiñake.

65

¹ Tsoehe' o tsy nañontane Ahio raho,
nitendreke o tsy nipay Ahikoo;
Le nataoko ty hoe:
Intoy raho, Intoy raho;
ami'ty fifeheañe tsy tokaveñe
ami'ty añarako.

² Fa nañity tañañe lomoñandro raho
am'ondaty mañarinjeño,
o mijelanjelañe an-dalañe tsy mahasoao,
mañorike ty fitsakorea' iareo avao;

³ Ondaty mikai-jaka an-daharako
nainai'eo, ie manao soroñe
an-goloboñe ao, vaho mañemboke
ambone birike eo;

⁴ O mpitozòke an-kibory ao,
naho mañialo añ'etake ao;
o milintseñe henan-dambo*,
vaho ron-draha veta
am-pinga'eo.

⁵ Ie manao ty hoe: Mijohaña ey rehe,
ko mitotoke amako,
amy te masiñe te ama'o raho;
hatoeñe añ'oroko ao iereo,
afó miforehetse lomoñandro.

⁶ Hehe t'ie sinokitse aoloko eo,
tsy hianjiñe raho ampara' te hondroheko, eka, havahako añ'araña' iareo
ao

⁷ o hakeo' areoo,
mitraoke amo tahin-droae' areoo,
hoe t'IEHOVÀ,
ie nibanabana an-kaboañe ey,
naho niteratera ahy amo vohitseo;
le haranako añ'araña' iareo hey
ty fitoloña' iareo.

⁸ Hoe t'i IEHOVÀ:
Manahake te zoeñe ami'ty
angazora'e ao ty ranom-baloboke,

* **65:4** Oni: Ies 66:17

le hoe ty saontsy: Ko joieñe, fa aman-tata;
zay ka ty hanoeko ty amo mpitorokoo,
fa tsy ho fonga rotsaheko.

⁹ Fa hampiakareko am' Iakobe ty tiry,
naho haboako am' Iehodà
ty mpandova o vohikoo;
le handova aze o jinobokoo,

vaho himoneñe ao o mpitorokoo.
¹⁰ Ho golobon-dia-raike t'i Sarone,
le ho fandream-piray stroke
ty vavatane' i Akore[†],
ho a ondaty mipay Ahikoo.

¹¹ Fe, ry mpitsambolitoke am'IEHOVÀ naho mandikoke i vohiko miavakeio,
naho mañalankañe kitrelim-
pitahiañe, vaho mampilaro divay
am-pañaranañe pea ho ami'ty vintañe,

¹² Hoireko ho am-pibara nahareo,
fonga hitsingoro am-pizamanañe;
amy te nitokaveko, fe tsy nanoiñe,
le tsy nihaoñe' areo t'ie nitaroñe;
te mone nanoe'areo ze raty a masoko ao,
jinobo' areo ty tsy maha-fale Ahiko.

¹³ Aa le hoe t'i TALÈ, IEHOVÀ:

Hikama o mpitorokoo,
fe ho kerè nahareo;
hinoñe o mpitorokoo,
fe haran-drano nahareo;
hirebeke o mpitorokoo,
fe ho salatse nahareo;

¹⁴ Eka hisabo ami'ty hafalean-tro'e
o mpitorokoo,
f'ie hirovetse am-pioremeñan'arofo,
naho hangoihoy ami'ty fandalàn-stroke.

¹⁵ Hapo' areo ho fatse amo jinobokoo ty añara' areo:
zay ty hanjamana' i TALÈ, IEHOVÀ azo;
fa hanoe'e tahinañe hafa o mpitoro'eo.

¹⁶ Aa le hitata aman' Añaharen-katò
ze hitata vatañe an-tane atoy;
le hifanta aman' Añaharen-katò
ze hifanta an-tane atoy;
amy te aña o hasotriañe taoloo,
fa naetake amo masokoo.

¹⁷ Ingo, mandranjy likerañe vao
naho tane vao raho;
naho tsy ho tiahy ka o raha taoloo,
vaho tsy ho tohinem-betsevetse.

¹⁸ Aa le mifalea naho mirebeha nainai'e
amy hitseneakoy;
ingo, hamboareko firebehañe t'Ierosalaime
naho hafaleañe ondati'eo.

¹⁹ Le hifaleako t'Ierosalaime,
naho hitrao-pirebeke am'ondatikoo;

[†] 65:10 Akore: tolon-tsotry

vaho tsy ho janjiñeñe ama'e ka
 ty feom-pangololoihañe,
 naho ty feom-pirovetañe.
20 Tsy eo ty anak'ajaja
 tsy hahatrats' andro,
 ndra ty ondati-bey tsy ho eneñe andro;
 le hatao tora'e ty mihomake t'ie zato taoñe,
 vaho hatao fokom-patse aman-
 kakeo ze tsy mahatratse ty hazato tao'e.
21 Handranjy anjomba iereo,
 naho himoneña'e;
 hambole an-tanem-bahe iereo
 vaho hikama amo voa'eo.
22 Ie tsy hamboatse, hitoboha' ty ila'e
 vaho tsy hitongy, habotse' ty hafa;
 fa ho mira ami'ty andron-katae
 ty andro' ondatikoo,
 ho losore' o jinobokoo havelo
 o satam-pit 'iareoo.
23 Tsy hifanehake ami'ty fianto iereo,
 tsy hisamake ho an-kank  ne,
 fa ho tahie' IEHOV   o tabiri' iereoo,
 naho o tarira' iareoo.
24 Ie amy zay, aolo' te hikanjy iereo,
 le hanoi  ne raho; ie mbe misaontsy,
 le fa nahatsanon-dRaho.
25 Hitrao-pihina  ne ty farasy
 naho ty a  nondry,
 hihina  n'ahetse manahake ty a  nombe o lionao,
 le deboke ty li  ne ' o mere  neo
 f'ie tsy hijoy, tsy hanao raty ndra
 aia'aia am-bohiko masi  n' ao,
 hoe t'IEHOV  .

66

1 Hoe t'IEHOV  :
 Fiambesako i likera  ney,
 atimpaheko ty tane toy;
 aia ar  e ty tra  o ho lefe' areo rafete  ne
 ho Ahiko?
 Aia ty toetse mete ho fitof  ko?
2 Toe kila satan-ta  nako ;
 zay ty nampiboaha  ne
 o fitol  nan' A  nahareo, hoe t'IEHOV  ;
 fe ondaty zao ty henteako:
 ty rarake a  n'arofo mikoretse,
 naho minevenevetse amo volakoo.
3 Hoe ma  n  e-doza ama' ondaty
 ty mitombok' a  nombe;
 hoe mamolake vozon' amboa
 ty ma  n  enga vik'a  nondry;
 hoe ma  n  enga lion-dambo
 ty ma  n  enga mahakama;

hoe te mitata sampondraha ty mañemboke; eka fa jinobo'iareo ty lala'iareo, naho mampinembanembañe ty tro'iareo o raha'e mam-pangoriñeo.

o raha tiva'iareoo.

⁴ Zaho ka ty hijoboñe ty fandilovañe iareo, vaho hafetsako am'iereo ty ihembaña' iareo; amy te, nikanjy raho, fe leo raike tsy nanoiñe; nitaron-dRaho, fe tsy amam-pañaoñe, te mone nanoe' iareo haloloañe aolo' o masokoo, vaho jinobo' iareo ty tsy maha fale ahiko.

⁵ Mijanjiña ty tsara' IEHOVÀ ry mpinevenevetse amo tsara'eo: fa nanao ty hoe o rolongo malaiñe anahareoo, o nandroak' anahareo ami'ty añarakoo, ami'ty hoe: Itolorañ'engeñe abey t'IEHOVÀ, hisamba'ay ty firebeha' areo.

F'ie ho salatse.

⁶ Inay ty feon-koràke boak'an-drova ao, inao ty feo boak' amy anjombay, ty fiarañanaña' IEHOVÀ mañondroke avake amo rafelahi'eo:

⁷ Ie mbe tsy nitsongo le fa nisamake, ie mbe tsy niavy i fanaintaiña'ey le nahatoly ana-dahy.

⁸ Ia ty nahajanjiñe i hoe zay?

Ia ty nahaisake i rahay?

Hiterake añ'andro raike hao ty tane?

Aboake aniany hao ty fifeheañe?

Fe vata'e nitsongo ty Tsione, le nasama'e o ana'eo.

⁹ Hampitsongoeko hao,

le tsy hampisamaheko?

hoe t'IEHOVÀ;

Zaho mpampisamakey hao

ty handrindriñe i hoviñey?

hoe t'i Andrianañahare.

¹⁰ Mitraofa rebeke am' Ierosalaime, le itraofo fifaleañe ry mpikoko aze iabio; irebeho an-kaehake ry mandala azeo.

¹¹ Soa t'ie hinono vaho hiareare

ami'ty fatroa' o fañohòa'eo;

hir iota' areo an-kafaleañe miheatse,

ami'ty havokara' o enge'eo.

¹² Hoe t'IEHOVÀ: Ingo, ho taroñeko fierañerañañe hoe oñe, naho ty enge' o fifelehañe

hoe torahañe mandopatse.

Hinono nahareo, ho vaveñe añ'ila'e, vaho honkoñeñe añ'ongotse eo.

¹³ Manahake ty fañohòan-drene'e

ty ana-dahy, ty hañohòako anahareo;
e Ierosalaime ao t'ie hanintsiñe.

14 Ie isa' areo le hifale añ' arofo,
naho hiraorao o taola' areoo
hoe ahetsé tora'e;
naho ho fohiñe te mpañimba
o mpitoro'eo ty fità' IEHOVÀ,
vaho hatreatrè'e o rafelahi'eo.

15 F'inao! Ho totsake aman' afo t'Iehova, naho hoe tangololahy o sarete'eo,
hamalea'e am-piforoforo ty haviñera'e, naho añ' afo mirebareba ty
fitrevoha'ey;

16 Fa añ' afo ty hiatrefa'IEHOVÀ zaka,
naho am-pibara'e ze hene nofotse;
fa maro ty ho zamane' IEHOVÀ.

17 Ze mañamasim-batañe naho
miefetse himoaha'e an-goloboñe ao,
sindre mañorike ty añivo ao,
milintseñe henan-dambo*,
ty mampangorý, naho ty kotika,
le fonga hatraoke ho mongoreñe,
hoe t'IEHOVÀ.

18 Toe hene apotako ze sata' iareo
naho o vetsevetse' iareoo,
le ho tondroke te songa hatontoko
ze fifelehañe naho fameleke;
ie homb'eo hahaisake ty engeko.

19 Le hanoeko fanoroañe am'iereo ao,
naho hafantoko amo nahafirimatseo,
ty hañavelo mbe Tarsise, mbe Pole†,
mbe Lode‡ mpitàm-pale, mbe Tobale§
naho mbe Iavane*,
mb'amo tokonose tsietoitaneo,
o mboe tsy nahajanjiñe o engekoo
ndra nahaisake o volonahekoo; vaho
ho koiha'iereo amo fifeheñaño ty engeko;
20 vaho hampiavote' iareo boak' amo
kilakila' ndatio o longo' areoo
ho fañenga am'IEHOVÀ
ambonen-tsoavalà, naho an-tsarete,
naho an-tsarete mitafo,
naho miningitse borìke,
vaho ambone' ty biby masika
mb' am-bohiko miavake
mb'e Ierosalaime mb'eo, hoe t'IEHOVÀ,
manahake ty fibanabana' o ana' Israeleo o enga' iareoo
am-pinga malio mb'añ'anjomba' IEHOVÀ.

21 Boak' am' iereo ao ty hangàlako
mpisoroñañe naho nte-Levy,
hoe t'IEHOVÀ.

22 Fa hambañe amy te ho añatrefako

* **66:17** Ies 65:4, Sor 11:7, Its 14:8 † **66:19** Pole: voa-maike; fandrotsaha ‡ **66:19** Lode:
fisamahañe; fanaranàhañe § **66:19** Tobale: ty tane toy; fivalitsikotahañe * **66:19** Iavane:
Mpamañahy; ty mahafioremeñe

nainai'e o likeram-baoo
 naho i tane vao hanoekoy,
 hoe t'IEHOVÀ,
 te hifahatse eo ka ty tiri' areo
 naho ty tahina' areo.

²³ Ho tondroke ka te boak'ami'ty jiri-bolañe pak' am-pipeaha'e,
 naho hirik' an-tSABATA pak' an-tSABATA,
 le homb'añatrefako eo ze hene veloñe,
 hitalaho, hoe t'IEHOVÀ.

²⁴ Hiavotse ka iereo hisamba o fate' ondaty niola amakoo;†
 tsy ho modo ty oletse ama'e,
 tsy hakipeke ty afo ama'e,
 ie hampangorý ze ataonofotse.

† **66:24** Ies 24:6, 34:2-3, Sab 110:6, Iir 25:33

Iirmeà

¹ Ty enta' Iirmeà* ana' i Kilkia† mpiamo mpisoroñe nte-Anatote‡ an-tane' Beniamineo§, ² ie nivotraha' ty tsara' IEHOVÀ tañ'andro' Iosià* ana' i Amone†, mpanjaka' Iehodà, amy taom-paha folo-telo-ambi' i fifehea'ey. ³ Niheova'e ka tañ'andro' Iehoiakime‡ ana' Iosià, mpanjaka' Iehodà pak'ami'ty fimodoa' ty taoñe faha folo-raik'ambi' i Tsidkià§ ana' Iosià mpanjaka' Iehodà, ampara' ty faneseañe Ierosalaime* an-drohy aña amy volam-paha-limey.

⁴ Aa le niheo amako ty tsara' IEHOVÀ nanao ty hoe: ⁵ Ihe mbe tsy tsineneko an-trok' ao le nifantako; aolo' ty niboaha'o an-koviñ' ao le navahako, vaho tinendreko ho mpitoky amo kilakila' ndatio.

⁶ Le hoe ty nataoko, Ehe Talè IEHOVÀ! Zaho tsy mahafivolañe, fa mbe anak' ajaja. ⁷ Aa hoe t'IEHOVÀ amako: ko manao zao, t'ie Anak' ajaja; fa ze amantohako azo ty handenà'o le ndra inoñ' inoñe ty hatoroko azo, ty ho taroñe'o. ⁸ Ko ihembaña'o; fa mpiama'o raho handrombak' azo, hoe t'IEHOVÀ.

⁹ Nahiti' IEHOVÀ amy zao ty fità'e, le nedrè'e ty vavako; vaho nanao ty hoe amako t'IEHOVÀ: Ingo te napoko am-palie'o ao o entakoo;

¹⁰ Oniño te androany
ty nampijadoñako azo
ambone' o fifelehañeo naho o fifeheañeo.
Ty hañombotse naho hampigorobañe,
ty hamotsake naho handrotsake;
ty handranjy vaho hambole.

¹¹ Mbore nimb'amako ty tsara' IEHOVÀ nanao ty hoe: O Iirmeà, mahaisake ino v-iheo? le hoe ty asako: Mahatreya ty tsampa-mahabibo.

¹² Le hoe t'IEHOVÀ amako, Toe nahaonin-drehe; fa jilojiloveko† o volakoo hahatafeterako aze.

¹³ Niheo amako fañindroe'e ty tsara' IEHOVÀ, nanao ty hoe: Inoñe o isa'oo? le hoe raho, Mahatreya valañe mikokèntrekokèntreñe raho; le boak' avaratse ey ty fihilañam-bava'e.

¹⁴ Aa le hoe t'IEHOVÀ tamako: Ho boroboñafe' ty hekoheko boak' avaratse aña amy ze hene 'ndaty an-tane atoy. ¹⁵ Ingo ho koiheko iaby ze fifokoa' o fifeheañe avaratseo, hoe t'IEHOVÀ, homb' atoy, songa hampipoke ty fiambesam-panjaka'e an-dalam-bey fimoahañe am' Ierosalaime, naho amy ze fonga kijoly miarikoboñe aze, vaho amy ze hene rova' Iehodà. ¹⁶ Aa le ho taroñeko te hizakako ty hatsivokara' iareo; amy te naforintse' iareo raho, naho mañemboke aman' drahare ila'e, vaho mitalaho amo sata-pità'iareoo avao.

¹⁷ Ihe arè, mampidiaña vania vaho miavòta, saontsio ze hene amantohako azo; ko ifimpìña'o, tsy mone hampitsolofíñeko añatrefa'iereo.

¹⁸ Hehe te nanoeko rova finatratse rehe, bodam-biñe, naho kijoly torisike,

* **1:1** Iirmeà: Fañonjonañe IEHOVÀ † **1:1** Kilkia: Andrianañahare ty anjarako ‡ **1:1** Anatote: Vale; sabo; hararahañe § **1:1** Beniamine: anam-pitan-kavana * **1:2** Iosià: Ty afo' IEHOVÀ † **1:2** Amone: Migahiñe, to ‡ **1:3** Iehoiakime: famaleam-pate' IEHOVÀ (ndra fañoriza'e, ndra ty fiheren-ko velo'e) § **1:3** Tsidkia: ty hato' IEHOVÀ * **1:3** Ierosalaime: Aroñarom-panintsiañae † **1:12** Sakede: Mahabibo; Sakade: mijilo

amo tane iabio, amo mpanjaka' Iehodao, amo roandria'eo, amo mpisoro'eo, vaho am' ondati' i taneio. ¹⁹ Toe hialia' iereo; fe tsy hahagioke, amy te ama'o raho, hoe t'IEHOVÀ, hañahako azo.

2

¹ Le niheo amako ty tsara' IEHOVÀ, nanao ty hoe: ² Akia mikoiha andravembia' Ierosalaime ao ty hoe:

Hoe t'IEHOVÀ:

tiahiko ty hatea' i hatora'oy,
ty fikokoa'o, ihe nienga-vao;
i fireketa'o amako an-dratraratray
an-tane mboe tsy nitongisañe aña.

³ Niavake am' IEHOVÀ t'Israele,
ty lohavoan-kavokara'e;
hanan-kakeo ze mampibotseke ama'e
hankàñe ty hizò iareo, hoe t'IEHOVÀ.

⁴ Mijanjiña ty tsara' IEHOVÀ,
ry anjomba' Iakobe*, naho
ry hene fifokoan'anjomba' Israele;

⁵ Hoe t'IEHOVÀ:
Ino ty tsi-havañonañe nizoe'
o roae' areoo amako,
kanao nihankaña'e,
vaho nañorike ty tsy jefa'e,
vaho nifotsake ho kafoake?

⁶ Mbore tsy nanao ty hoe iereo:
Aia t'IEHOVÀ nanese antika niakatse
an-tane Mitsraime†,
niranga i fatram-beiy,
i tanen-diolio naho koboñey,
i tanem-paosa an-talinjon-kavilasiy,
tane mb'e lia'e tsy nitsahe 'ondaty,
vaho tsy fimoneña' ty ana' ondaty.

⁷ Nendesako mb'an-tane mamokatse,
hikama' areo ty hasoa'e;
fa ie nizilik' ao te mone tiniva' areo i tanekoy,
vaho vineta' areo i lovakoy.

⁸ Tsy nanao ty hoe o mpisoroñeo:
Aia t'IEHOVÀ?
Namoea' o mpamandroñe Hàke iabio raho,
nandilatse ahy o mpiarakeo‡,
nitoky añamy Baale§ o mpitokio,
vaho nañorike raha tsy vara.

⁹ Aa le hiatreatreako, hoe t'IEHOVÀ,
vaho hatreatrèko o anan'ana' areoo.

¹⁰ Mitsahà mb'an-tokonosen'
te-Kitìmeo* aña naho mandrendreha
naho ampañitrifo mb'e Kedare† mb'eo
vaho mitsoeha,
hera ho oni' areo te fa teo, o hoe zao:

* ^{2:4} Iakobe: Tomitse; Gegeña hahazoñañe † ^{2:6} Egipte: Mpamorekeke, mampisotry ‡ ^{2:8} Iir 10:21, 12:10-11, 50:6-7 § ^{2:8} Baale: Talè, Tompo * ^{2:10} Kitime: mamolake; mamonodroboke kedeke; volamena; † ^{2:10} Kedare: hamoromoroñañe, hontoke

11 Tane aia ty nañova o 'ndrahare'eo,
ie toe 'ndrahare tsie avao?
fe nasolo' ondatiko raha tsy manjofake ty enge' iareo.

12 Ilatsao ry likerañeo,
minevenevèra naho mijehàra,
hoe t'IEHOVÀ.

13 Nanao hakeo roe ondatikoo:
Nifarie' iareo raho,
i Rano Veloñe[‡] migoangoañey,
hihalia'iareo kadaha,
kadaha señake tsy mahatan-drano.

14 Ondevo hao t'Israele?
Fetrek'oro hao?
Aa le ino ty idohirañ' aze?

15 Fa nitroñe ama'e o liona tora'eo,
nipoña-peo hampangoakoak' i tane'ey,
kòake iaby o rova'eo,
tsy amam-pimoneñe.

16 Hinara' o ana' i Nofe[§]
naho i Tak'penkeseo* ty hevo'o.

17 Tsy zao hao ty tali' i raha zay,
te naforintse'o t'IEHOVÀ
Andrianañahare'o,
i niaolo azo amy lalañei.

18 Ino mb'arè ty atao'o an-dalam-b'e Mitsraime aña,
hitohoke ty ranon-tSikore[†] hao?
Ino ka ty hanoe'o an-dalañe mb'e Asore mb'eo, he hitrinike i ranon-tSàkay
hao?

19 Ty halò-tsere'o avao ty hitrevok' azo,
naho hañendak' azo ty fidisa-voli'o;
mahaoniña arè, vaho mahaisaha
te raha raty naho mafaitse
ty fitsambolitio'o an' Andrianañahare'o,
naho te tsy ama'o
ty fañeveñañe Amako,
hoe t'i Talè, IEHOVÀ i Måroy.

20 Fa pinozako haehae ty joka'o,
rinafadrafako o vahotseo,
le hoe rehe: Tsy ho toroñeko, te mone nandrea'o vaho nanao hakarapi-
loña ambone' ze hene haboaña
naho ambane' ze fonga hatae mandrevake

21 Ie naketsako am-bahem-panjàka,
toe am-boa'e soa do'e;
inom-barè ty nifotera'o ho hatae
tsy jefa'e, ho vahe alik'amako?

22 Aa ndra te ihe mikitroñe an-kiliny,
vaho milipotse an-tsavony ao,
mboe komatrao amako o tahi'oo,
hoe t'i Talè, IEHOVÀ.

23 Aa vaho ino ty atao'o ty hoe:
Tsy aman-kila raho, zaho tsy nihitrike

[‡] **2:13** Jao 4:10,11, 7:38 [§] **2:16** Nofe: papin-tantele; ze mitsopatsopake * **2:16** Tak'penkese:
fanjiziañe mietake † **2:18** Sikore: Hamainte'e

mb'amo Baaleo?
 Isao ty sata'o am-bavatane ao,
 mahafohina o anoe'oo;
 kiloan-drameva malisa rehe,
 manivalativala o lala'eo;
²⁴ tamanam-birike lý zatse am-patrañe ao,
 mañantson-tioke am-pañirian-tro'e,
 ia ty mahafikalañe i fitongoña'ey?
 Tsy ho mokotse ty mipay aze,
 ho oni' iareo amy fivola'ey.
²⁵ Tano o fandia'oo tsy ho afa-kana,
 ty tretra'o tsy haran-drano;
 fe hoe rehe:
 Tsy aman-ko tamaeñe, Aiy!
 amy te nikoko ambahiny raho,
 le tsy mete tsy heañeko.
²⁶ Hambañe ami'ty hasalara'
 ty mpikizo, ie tendreke,
 ty hameñara' ty anjomba' Israele:
 ie naho o mpanjaka'eo, o roandria'eo,
 o mpisoro'eo, vaho o mpitoki'eo.
²⁷ Ie manao ami'ty hatae ty hoe:
 Raeko rehe, naho ami'ty vato:
 Ihe ty niterak' ahy,
 toe nampiatre-boho amako iereo
 fa tsy ty laharañe;
 fe an-tsa maha am-poheke
 ro hanoa'iareo ty hoe:
 Miongaha, rombahō zahay.
²⁸ Aia heike o 'ndrahare tsinene'o
 ho azoo? Angao hiongake iereo,
 naho mete handrombak' azo
 an-tsan-kanka'o ao;
 fa mira ami'ty hamaro' o rova'oo
 ty ndrahare'o, ry Iehodà.
²⁹ Akore t'ie miatatre ahiko?
 Ie fonga nanao hakeo amako,
 hoe t'IEHOVÀ.
³⁰ Tsy jefa'e ty nandafàko o ana' areoo,
 ie tsy mete avohotse;
 toe nabotsem-pibara' areo
 o mpitoki'areoo,
 hoe namotsahan-diona.
³¹ Ry tariratseo, inao ty tsara' IEHOVÀ:
 Nifatram-bey am' Israele hao raho?
 ndra tane migobon-kaiem-bey?
 Ino ty atao' ondatikoo ty hoe:
 Votsotse zahay; tsy homb'ama'o ka?
³² Handikofa' ty somondrara hao
 o rava'eo, ndra ty enga-vao o saro'eo?
 Fe haliño' ondatikoo
 andro tsy fotofoto raho.
³³ Ino ty ihamina'o

ty lalam-pipaia'o koko?
Toe nanare'o amo sata-rati'oo ka
o kalalijakeo.

³⁴ Mbore oniñe an-jipo'o ao
ty liom-piai' o rarake vañoñeo;
tsy nirendre'o t'ie niboroboñake ama'o;
ie amy hoe rezay ³⁵ manao ty hoe:
Zaho tsy aman-kakeo;
fa mitolik' amako ty haviñera'e—
ingo mikai-jaka amako rehe
ami'ty atao'o ty hoe:
Tsy aman-tahin-draho.

³⁶ Ie mikanifokanifo ke avao
ami'ty fiovà'o lalañe;
Toe ho salare' i Mitsraime ka
manahake ty hameñara'o amy Asore.

³⁷ Boak' atoy ty hiakara'o,
taña-mitan-doha;
fa napo' IEHOVÀ o niatoa'oo,
vaho tsy hiraorao am' iereo rehe.

3

¹ Saontsieñe te, ie mitsey valy t'indaty naho mifanarak' ama'e i rakembay,
naho engae' t'indaty ila'e,
ho mete hao te himpolie'e i valoha'ey?
Tsy haniva i taney hao?
F'ihe nanao hakarapiloañe ami'ty
mpikoko maro,
mbore te himpoly amako!
hoe t'IEHOVÀ.

² Ampiandrao mb'an-kaboañe liolio ey
o fihaino'oo le mahaisaha:
Aia rehe te tsy niolorañe?
Nitoboke añ'olon-dalañe eo nitsinginiotse am'iareo,
manahake ty Arabe* am-babangoañe aña;
vaho nandeora'o amy hatsimirira'o
naho ami'ty haloloa'o i taney.

³ Toly ndra nahànkñañe i orañey,
naho tsy nahavy ora-mamaratse;
toe nanao laharan-kalalijake rehe,
mifoneñe tsy ho salatse.

⁴ Aa tsy nitoreova'o aniany
ami'ty hoe: Ry Aba,
Nirañeko Rehe te zaho nitora'e.

⁵ Ho tana'e nainai'e hao ty kaboe'e?
ifahara'e pak'an-kamodoañe aña hao?
Inay ty saontsi'o,
fe nitoloñe'o raha raty
vaho i nipaia'oy avao ty norihe'o.

⁶ Le hoe t'IEHOVÀ amako
tañ'andro Iosià, mpanjaka: Niisa'o hao
i nanoe' Israele mpidisa-voliy?

* ^{3:2} Arabe: hariva; liolio; kòake

Songa vinonje'e ze vohitse abo
naho ambane' ze hatae mandrevake,
vaho nanao hakarapiloañe ao.

⁷ Le hoe raho, Ie fonga nanoe'e,
le himpoly amako; f'ie tsy nimpoly,
vaho nahatrea zay ka t'Iehodà
rahavave'e mpahay fañahy.

⁸ Le nitreako te ndra t'ie tsineiko reke-takelam-pisarahañe ty amo fonga
fañarapiloa' Israele mpidisa-volio,
le tsy nañembañe Iehodà,
rahavave'e mpiolay zay;
ie nimb'eo nañarapilo ka.

⁹ Ty amy fitsihelatsihela' i reñeley,
fonga nileore'e i taney,
vaho niolora'e ze hatae naho vato;

¹⁰ Ie amy zay, mboe tsy nimpoly
amako ami'ty haliforan'arofo'e
i rahavave'e Iehodà mpamañahiy
fa an-kalitake avao, hoe t'IEHOVÀ—

¹¹ Le hoe t'IEHOVÀ amako,
Niventè' Israele mpidisa-voliy te
mbe ambone' Iehodà
mpamañahiy ty havañona'e.

¹² Akia, tseizo mañavaratse o tsara
zao ami'ty hoe:
Mimpolia ry Israele mpidisa-volio,
hoe t'IEHOVÀ;
Tsy hibosehako, fa hitretrezako,
hoe t'IEHOVÀ,
tsy ho tanako nainai'e ty farahiko.

¹³ Iantofo avao o hakeo'oo, o nandilara'o
am' IEHOVÀ Andrianañahare'oo,
ie naboele'o amy ze hene ambahiny ambane' ze hatae mandrevake o
sata'o,

naho tsy nihaoñe'o ty feoko,
hoe t'IEHOVÀ.

¹⁴ Mimpolia ry anake mpidisa-volio,
hoe t'IEHOVÀ;
fa Tañanjomba'areo raho,
naho hengaeko boak'an-drova ao
ty raik' ama' areo,
ty roe boak' am-pifokoañ' ao[†],

vaho haseseko mb'e Tsione[‡] mb'eo;

¹⁵ Le ho tolorako mpiarake
milahatse ami'ty troko,
hamahana'e hilala naho hihitse.

¹⁶ Ho tondroke t'ie nanaranake vaho
nanitsike i taney
amo andro añaeo, hoe t'IEHOVÀ,
te tsy hanao ty hoe ka iereo:
Ty vatam-pañina' IEHOVÀ;
tsy ho tendreke an-tsaiñe;

[†] 3:14 Isa 27:12 [‡] 3:14 Fampitiahiañe natroatse

tsy ho saontsieñe;
 tsy ho tiliheñe; vaho
 tsy hanoeñe ka.

¹⁷ Amy andro zay, hatao' iareo ty hoe
 fiambesa' IEHOVÀ t'Ierosalaime;
 le kila fifeheañe ty hifanontone
 mb'amy tahina' IEHOVÀ
 mb'e Ierosalaime mb'eo;
 vaho tsy hañaveloa' iareo ka
 i fanjeharan-tron-kaloloañey.

¹⁸ Hiharo-lia ami'ty anjomba' Israele
 ty anjomba' Iehodà amy andro zay,
 vaho hindre lia boak' an-tane
 avaratse aña pak' amy tane
 natoloko an-droae' areo ho lovay.

¹⁹ Le hoe raho:
 Akore t'ie havotrako amo anakoo,
 naho hatoloko tane soa,
 ty lova loho fanjaka amo fifeheañeo?
 Le ho tokave'oo ty hoe: Raeko, raho,
 vaho tsy hivike ami'ty fañorihañe ahy.

²⁰ Toe manahake ty rakemba misita-baly am-pamañahiañe ty namañahia'o
 ahy,
 ry anjomba' Israele!

hoe t'IEHOVÀ.
²¹ Inay ty fiarañanañañe boak'
 an-kaboañe maliolio eñe,
 ty fangoihoa' o ana' Israele misolohoo,
 amy te nimengohe' iereo ty lala' iareoy,
 nandikofa' iereo t'IEHOVÀ
 Andrianañahare' iareo:

²² Mimpolia ry anake manjehatseo,
 le ho jangañeko ty fanjehara' areo.
 Itoan-jahay mb'ama'o,
 amy te Ihe ro IEHOVÀ Andrianañahare'ay.

²³ Toe sahàtse avao o vohitseo,
 o fifandragaragàñe an-kaboañeo.
 Toe am' IEHOVÀ Andrianañahare'ay
 ty fandrombahañe Israele.

²⁴ Fa nabea' i hameñarañey mifototse ami'ty nahatora anay
 o raha nitoloñan-droae'aio,
 o lia-rai'eo, o mpirai-tro'eo, naho
 o ana-dahi'eo vaho o anak'ampela'eo.

²⁵ Antao hibabok' an-keñatse,
 hisaron-tsalatse;
 fa nanao hakeo am' IEHOVÀ
 Andrianañaharentika tika naho
 o raentikañeo, boak' ami'ty
 naha-ajaja antika pake henane,
 vaho tsy norihentika ty fiarañanaña' IEHOVÀ Andrianañaharentika.

le mimpolia amako,
 naho asitaho aña'atrefako eo
 o raha tìva'oo, vaho ko mitroetroe,
² naho ifanta'o ty hoe:
 Amy te veloñe t'IEHOVÀ!
 ami'ty fahiti'e naho ty hatò'e
 naho ty havañonañe,
 le ie ty hifampitata' o fifeheañeo
 vaho hifampirengea' iareo.
³ Fa hoe t'IEHOVÀ am'ondati' Iehodào
 naho am' Ierosalaime:
 Trabatrabàho o moka' areoo,
 vaho ko mitongy amo fatikeo.
⁴ Misavara ho am' IEHOVÀ,
 afaho ty ofoke aña'arofo' areo ao,
 ry ondati' Iehodào naho mpimoneñe
 e Ierosalaimeo, tsy mone
 hionjom-beo hoe afo ty habosehako,
 hisolebatse tsy mete vonoeñe,
 ami'ty hatsivokara' o sata'areoo.
⁵ Kaikaiho e Iehodà ao,
 naho tseizo e Ierosalaime ao, ty hoe:
 Popòho amy taney ao ty antsiva;
 mifanontona,
 antao himoake amo rova fatratseo!
⁶ Atroaro mb'e Tsione ty viloñe,
 mipalira, ko mihenekeneke, fa minday
 hekoheko boak' avaratse aña raho,
 naho fandrotsahañe jabajaba.
⁷ Fa niakatse an-drongoñe ao ty liona,
 fa nionjoñe i mpandrotsake fifeheañey,
 fa niavotse an-toe'e ao
 hampangoakoake ty tane'o,
 ho harakarake avao o rova'oo,
 tsy ho amam-pimoneñe.
⁸ Ie amy zay, misikina gony, miroveta,
 vaho mangololoia: Fa mboe
 tsy nivike aman-tika ty haviñera'IEHOVÀ.
⁹ Amy andro zay, hoe t'IEHOVÀ,
 te hilesa ty fahavania' i mpanjakay
 naho o roandriañeo;
 ho latsa o mpisoroñeo vaho
 ho veren-draha o mpitokio.
¹⁰ Aa le hoe raho, Ry Talè, IEHOVÀ,
 akore te nifañahie'o ondaty retoa
 naho Ierosalaime, amy ty hoe:
 Hanintsiñe nahareo,
 ie fa totofem-pibara ty fiaiñe!
¹¹ Ie amy zay ho taroñeñe am'ondaty
 retoa naho am' Ierosalaime ty hoe:
 Ho hirik' ankaboa' i liolio am-patrambeiy ty tioke mihiboboke
 mb'amo anak' ampela' ondatikoo,
 tsy t'ie hanonga ndra hañororoke—

¹² tioke lombolombo izay ty homb'eo
boak' amako;
fa hivolañako zaka henaneo.
¹³ Heheke! Mionjoñe hoe rahon-dre,
o sarete'eo hoe tangololahy;
masika ta ty vantino o soavalao—
feh'ohatse tika! fa mianto!
¹⁴ Ry Ierosalaime, sasao añ'arofo'o ao
o haloloaño eo soa te ho rombaheñe,
pak'ombia te mbe himoneñe ama'o
ao o fikililia'o ratio?
¹⁵ Inao, mikoike boak'e Dane* aña
ty fiarañanañañe; vaho mitsey hankàñe
ty boak' am-bohi' Efraime aña.
¹⁶ Talilio o fifeheaño, henaneo!
ikooho am'Ierosalaime;
hirike tsietoitane aña o mpañarikatokeo
hipoña-peo amo rova' Iehodào.
¹⁷ Fa niarikoboña' iareo manahake
o mpivoñon-tondao, amy t'ie niola
amako, hoe t'IEHOVÀ.
¹⁸ O sata'oo naho o fitoloña'oo
ty naneseañe o raha zao;
hankàñe ama'o; akore ty hafai'e!
kanao mahatakatse ty arofo'o.
¹⁹ Ty añ'ovako, ty añ'ovako!
ty haloviloviako!
Hete! Ty troko! Ty troko!
Midebodebo amako ao;
zaho tsy mahafitsiñe;
amy te ihe, fiaiko, ty nahatsanoñe
i fipopòn' antsivay, i kaik' aliy.
²⁰ Vinonje' ty hekoheko ty hankàñe,
fonga nimongoreñe i taney;
rotsake ami'ty manao zao
o kibohokoo,
ami'ty tsi-maemae-laletse
o rindrin-kivohokoo.
²¹ Ampara' te ombia ty mbe
hahatreavako i viloney,
ty hahatsanoñako ty feo i antsivay?
²² Toe dereñe ondatikoo,
tsy mahafohiñe ahy;
ajaja minè, tsy mahilala.
Kante an-katsivokarañe,
ie tsy mahay manao soa.
²³ Nenteako ty tane toy
t'ie nihoake tsy amam-bintañe,
yaho mb' andikeramb'eo
fe nipo-kazavàñe ty ey.
²⁴ Nenteako o vohitseo le nizoeko
te niezeñezene,
vaho fonga nivembèñe o haboaño.

* ^{4:15} Dan: Zaka; ty Mpizaka

²⁵ Nenteako le hehe t'ie tsy ama' ondaty,
leo raike,
vaho hene niborofotse o voron-tiokeo.

²⁶ Nenteako,
le ingo te paimpaiñe
i tane ni-kobokaray,
fonga narotsake añatrefa' IEHOVÀ o rovao,
aolo' ty haviñera'e miforoforo.

²⁷ Fa hoe t'IEHOVÀ:
Ho koake iaby i taney
fe tsy ho fonga mongoreko.

²⁸ Handala' ty tane toy,
nahohaeñe o likerañe eñe;
ty amo volakoo;
naereñereko, le tsy hiheve,
vaho tsy hibalihako.

²⁹ Songa mivoratsake ty lay
o rovao ami'ty fikoraha' o mpiningi-
tsoavalao naho o mpitam-paleo,
iziliha' iareo ty matahetse;
anganiha' iareo o vatovaloeñe;
nengañe hoake iaby o rovao,
leo ondaty raike tsy mimoneñe ao.

³⁰ Le ihe tinavañey,
Ino ty atao'o kanao
misiki-mena mañabasà,
nahohiravake bange volamena,
vaho ampiboenare'o loko o maso'oo?
Tsy vente ty ihamina'o vatañe,
songa malaiñe azo o sipa'oo,
toe hañè-doza ama'o.

³¹ Fa nahatsanoñe hoe fikoiahan' ampela mitsongo raho,
ty fanaintaiña' i misamake
i tañoloñolo'eiy,
ty fikoiaha' ty ana' i Tsione misehaseha,
mañiti-tañampolo manao ty hoe:
Hankàñe amako!
Mitoirañe añatrefa' o mpamoonoo
ty fiaiko!

5

¹ Mikariokarioha amo lala' Ierosalaimeo,
mijilojilova vaho mahaoniña!
Tsíkaraho o kiririsaeo
ke hahaisake ondaty
manao ty hahiti'e, mipay ty hatò—
le hiheveako.

² Ndra te manao ty hoe,
Amy te veloñe t'IEHOVÀ;
manao fanta vilañe re.

³ Ry IEHOVÀ, tsy mitsoeke ty hatò
hao o fihaino'oo?
Linafa'o iereo f'ie tsy nalorè;
nimongore'o fe tsy mete avohotse;

nanoe' iareo gañe ta ty vato
o tarehe' iareoo;
mifoneñie tsy hisoloho.

⁴ Le hoe raho, rarake avao iereo, gege;
tsy fohi' iareo ty lala' IEHOVÀ,

⁵ o lilin' Andrianañahare' iareoo,
Homb'amo roandriañeo arè raho,

tsy mete tsy rendre' iereo
o sata' IEHOVÀO,

o lilin' Andrianañahare' iareoo.

F'ie songa nampipozake i jokay,

nandrafarafake o talirandrañeo.

⁶ Toly ndra hampibaibay iareo
o liona boak' añ'alao,

hanjaman' iareo ty maràmbolo

boak' an-dratraratra ao.

Mijilojilo o rova'eo ty farasi-lahi'e;

ie mandrimidrimitse ze miakatse

—amy ty hamaro' o fiolà' iareoo,

fa losotse ty fidisa-voli' iareo.

⁷ Aa vaho akore ty hiheveako azo?

Fa nieng'ahy o ana'oo

naaho nifanta amo ndrahare tsie'eo;

ie nampianjañeko,

le nifandrañaotse, vaho nikovovoke

mb'añ' akiban-tsimirimiram-beo.

⁸ Soavala lahi'e mpilelalela iereo, songa mitreñie amy tañanjomban-drañey.

⁹ Tsy ho lafaeko hao? Hoe t'IEHOVÀ;

tsy hondroheko hao

ty fifeheañe manahake zao?

¹⁰ Soroho o tondam-bahe'eo le fongoro,

fe anisao;

holiro o tsampa'eo amy te tsy a' IEHOVÀ.

¹¹ Toe songa nitsambolitiok' ahy

ty anjomba' Israele

naaho ty anjomba' Iehodà, hoe t'IEHOVÀ;

¹² nanoe'e entam-bande t'IEHOVÀ,

ami'ty hoe: Tsy Ie;

tsy hiambotraha' ty raty tika,

vaho tsy hizò fibara ndra kerè.

¹³ Kafoake avao o mpitokio,

tsy am' iareo i tsaray;

aa le zay ty hanoañe iareo.

¹⁴ Hoe t'IEHOVÀ

Andrianañahare' i màroy:

Kanao sinoa' areo i entañe zay,

le hanoeko afo am-palie'o ao o volakoo,

naaho hatae ondaty retoañe,

hamorototoeko iareo.

¹⁵ Hampiambotraheko ama'o ty

fifeheañe boake tsietoitane aña,

ry anjomba' Israele, hoe t'IEHOVÀ.

Fifeheañe lava havelo, fifelehañe haehae,

tane aman-tsaontsy tsy fohi'o,
vaho tsy hapota'o ze taroñe'e.

¹⁶ Hoe kibory misokake
ty trañon-ana-pale' iareo,
songa fanalolahy.

¹⁷ Habotse' iareo ty nivokare'o
naho ty mahakama'o;
hagedra' iareo o ana-dahi'oo
naho o anak'ampela'oo;
ho kamae' iareo o lia-rai'oo
naho o mpirai-tro'oo:
ho genohe' iareo o vahe'oo
naho o sakoa'oo;
ho demohe' iareo am-pibara
o rova fatratse iatoa'oo.

¹⁸ Fa ndra amy andro rezay, hoe t'IEHOVÀ,
tsy ho fonga mongoreko.

¹⁹ Aa ie manao ty hoe iereo:
Ino ty nanoe'IEHOVÀ Andrianañahare-tika
amantika i hene raha zay?
le hoe ty havale'o:
Hambañ'amy namorintseña' areo Ahiy, naho nitoroñe
'ndrahare ila'e an-tane' areo ao,
t'ie hitoroñe ambahiny
an-tane tsy anahareo.

²⁰ Koiho añ'anjomba' Iakobe naho tseizo e Iehodà ao ty hoe:

²¹ Janjiño zao ry ondaty gege,
tsy mahilalao;
amam-pihaino fe tsy mahaoniñe,
aman-dravembia f'ie tsy mahajanjiñe.
²² Tsy mañeveñe amako hao nahareo?
hoe t'IEHOVÀ;
Tsy mihondrahondra añatrefako etoa
hao nahareo?
Napoko ho fañefetse amy riakey
i faseñey,
ho sebañé nainai'e tsy hisorohañé;
aa ndra te mitoabotse o onja'eo
tsy hahafitroatse,
ndra te mitroñe tsy haha-fitsaka aze.

²³ F'ie manjehatse naho miola
ty arofo'ondaty retoa,
miveve vaho mienga.

²⁴ Tsy noe' iereo añ'arofo ao ty hoe:
Antao hañeveñe am' IEHOVÀ
Andrianañaharentika,
ie mampahavy orañe an-tsa'e,
i orañ'asotriy naho i oram-panjakay
vaho tana'e ho antika
o hereñandro namantañeñe ho
fitatahañeo.

²⁵ Fa nampihake irezay o hakeo'oo,
le nampisitake ty hasoa ama'o o tahi'oo.

²⁶ Toe zoeñe am'ondatikoo o lo-tserekeo,
mijilo hoe mpitsepa-boroñe
le mikopete; mampibitsoke fandri-bo; mamandrike ondaty.
²⁷ Manahake ty kipa pea voroñe,
o kivoho' iareo lipo-kiniao;
aa le nitoabotse ty enge
naho ty vara' iareo.
²⁸ Vondrake naho sometsetse,
mitombo am-pikitrohan-draty,
tsy zakae' iereo ami'ty hatò
ty enta' i bodey hampiraorao aze,
vaho tsy arova' iareo ty zo' o rarakeo.
²⁹ Tsy ho lilloveko hao iereo? hoe t'IEHOVÀ,
tsy ho valeko fate hao
ty fifeheañe manahake itone?
³⁰ Raha mahavereñe naho haloloañe
ty nifetsake amy taney:
³¹ mitoky vilañe o mpitokio,
vaho mañorike o mpitokio
ty fifehea' o mpisoroñe;
zay ty tea' ondatikoo,
fa ino ty hanoe'areo am-pigadoña'e?

6

¹ Mipitsiha mb'am-pipalirañe mb'eo
ry ana' i Benamineo,
boak' an-teñateña' Ierosalaime ao;
popòho e Tekoa* aña i antsivay,
vaho ampitroaro fanairañe
e Bete-hak'kereme† eñe;
fa hirik' avaratse ty hankàñe,
ty fandrotsahañe jabajaba.
² I soa vintañe naho malemey,
i anak'ampela' i Tsioney ro haitoako.
³ Hivotrak' ama'e o mpiarakeo
rekets' o lia-rai'eo,
hampitroatse fiarikatohañe
ami'ty kivoho' iareo, le songa hiandrazañe an-toe'e.
⁴ Ihentseño aly;
miongaha hanameantika aze
an-tsingilingiliñeñe.
Feh' ohatse amantika, fa miroñe i àndroy,
mihalava o talinjon-karivao!
⁵ Miavota hanamean-tika haleñe,
handrotsahantika o anjomba'eo!
⁶ Hoe t'IEHOVÀ' i Màroy:
Firao o hatae'eo;
atroaro am'Ierosalaime
ty fanongàm-panameañe;
toe rova tsy mete tsy lillovañe,
fa forekeke avao ty ama'e ao.

* **6:1** Tekoa: Antsiva mietake † **6:1** Bete-hak'kereme: kivoho an-tanem-bahy

⁷ Manahake ty fitana' o vovoñeо
ty hamamin-drano'e,
ty fitana'e ho veloñe o haloloa'eo;
janjiñeñe ama'e ao ty tazataza
naho ty tsiborohetoke;
añatrefako eo nainai'e
ty hasiloke naho ty fere.

⁸ Mitaoa ry Ierosalaime,
kera ho alik'amako nahareo,
ie hampangoakoaheko
ho tane tsy amam-pimoneñe.

⁹ Hoe t'IEHOVÀ' i Måroy:
Ho vata'e tsindrohe'iareo ty sisa' Israele
hambañe amy t'ie vahé;
ozaño am-pita'o indraike i tsampa'ey
manahake ty mpanifo valoboke.

¹⁰ Ia ty ho volañeko naho hatahataeko,
hahafijanjiña' iareo?
Hehe, domoke o ravembia' iareoo,
tsy mahatsendreñe;
Hete! fañinjeañe am'iereo
ty tsara' IEHOVÀ,
tsy mahafale' iareo.

¹¹ Fe lifo' ty fiforoforo' IEHOVÀ raho;
mahamokotse ahy ty mitañ'aze;
adoaño amo ajaja an-dalañeо,
naho amo ajalahy mifañosoñeо;
songa ho rambeseñe ie mirovaly,
o zoke'eo rekets' o androaňavio.

¹² Ho limbeze' ty ila'e o anjomba'iareo,
o tetekeo miharo amo rakemba' iareoo;
fa hatora-kitsiko amo mpimoneñe
amy taneio ty tañako, hoe t'IEHOVÀ.

¹³ Songa mitavañe hitomboa'e ty tsitso'e am'iareo
pak'ami'ty loho bey;
fonga mpikatramo ty mpitoky sikal'ami'ty mpisoroñe.

¹⁴ Nitaha' iareo tsidaredare
ty fere' ondatikoo, ami'ty hoe,
Fañanintsiña, Fañanintsiña,
ie tsy eo ty Fanintsiñañe.

¹⁵ Toko'e ho nahasalatse iereo
ty hativàñe nanoe'iereo,
f'ie tsy mahay meñatse.
Aa le hikorovoke amo mikorovokeo
amy androm-pandilovañey iereo,
vaho hitsikapy, hoe t'IEHOVÀ.

¹⁶ Hoe t'IEHOVÀ: Mijohaña an-dala
mifanivalañe eo le mahaisaha,
mañontanea o oloñoloñe haehaeo,
te aia i lalam-bantañey; vaho añavelò,
hahatendreha' areo fitofan' arofo.
Fa hoe iareo: Zahay tsy homb'eo.

¹⁷ Mbore nampitroarako mpijilo,

nanao ty hoe : Haoño ty feo' i antsivay!
Hoe ka iereo: Zahay tsy hañaoñe.

¹⁸ Aa le mijanjiña ry fifeheañeo
vaho mahafohina ry valobohòkeo,
ty haseseke am'iareo:

¹⁹ Tsanoño ry tane; Inao!
handesako hankàñe ondaty retoa,
ty toli' o fikinià' iareoo,
amy t'ie tsy nañaoñe o volakoo;
mbore nifarie' iareo i Fanoroakoy.

²⁰ Hanoeko inoñe o rame boake Sebao,
naho o fare boake tsietoitaneo?
Tsy noko o enga' oroa' areoo,
tsy mahafale ahy o fisoroña' areoo.

²¹ Aa le hoe t'IEHOVÀ:
Hehe te mampipoke vato mahatsikapy
aolo' ondaty retoa raho,
hampsikapy roae reketsé keleiañe;
fonga ho mongotse
ty mpimoneñe miharo rañetse.

²² Aa le hoe t'IEHOVÀ:
Heheke, ondaty mangovovoke mb'etoy
boak'an-tane avaratseo,
fifeheañe jabajaba ty hahetseketsé
boake tsietoimoneñe aña.

²³ Vontitire' iareo ty fale naho ty lefoñe,
masiake iereo, tsy miferenay,
manahake ty fitroña' i riakey
ty fikoraha' iareo;
naho miningitse soavala,
miriritse hoe lahin-defo miatrek'aly,
ama'o ry anak' ampela' i Tsione!

²⁴ Ie nitsanoña'ay talily,
dredra'e o taña'aio;
mamihiñe anay ty lovilovy,
ty haorean-drakemba mitsongo.

²⁵ Ko miakatse mb'an-tetek' ao,
ko mañavelo an-damoke eo;
amy te mampiboele harevendreveñañe
mb'etia mb'atia ty fibara' i rafelahiy.

²⁶ O ry anak' ampela' ondatiko,
misikìna gony,
vaho milalilalia an-davenoke;
miroveta hoe t'ie bako tokañe,
mandalà añ'aferon'ate,
amy te hivovò amantika i mpandrotsakey.

²⁷ Nanoeko mpañasohaso
naho mpitsòke am'ondatikoo rehe,
hahafohina'o naho hitsikaraha'o o sata'eo.

²⁸ Fonga mpiola manjehatse iereo,
mb'eo mb'eo mamokafoka avao;
torisike naho viñe, songa tsivokatse.

²⁹ Mitioke mafe o famoforañeo,

forototoe' ty afo i firakey,
 tsy lefe ty fitoloñam-pitranahañe,
 amy te tsy mete ho faoheñe ama'e
 o halò-tserehañeo.
³⁰ Atao ty hoe taim-bolafoty iereo,
 amy te naforintse' IEHOVÀ.

7

- ¹ Ty tsara nahitri' IEHOVÀ am' Iirmeà,
 manao ty hoe:
- ² Mijohaña an-dalambein'
 Anjomba' IEHOVÀ eo,
 le koiho ty entañe toy, ami'ty hoe:
 Mijanjiña ty tsara' IEHOVÀ
 ry Iehodà iabio,
 o mimoak' amo lalam-bey retoio
 hitalaho am' IEHOVÀ.
- ³ Hoe t'IEHOVÀ' i Måroy:
 t'i Andrianañahare' Israele,
 ahitio o lia' areoo
 naho o fitoloña' areoo,
 le hampimoneñeko an-tane atoy.
- ⁴ Ko iantofa' areo ty reha-bande
 manao ty hoe:
 Ty Anjomba' IEHOVÀ,
 ty Anjomba' IEHOVÀ,
 ty Anjomba' IEHOVÀ.
- ⁵ Eka, naho toe avanta' areo o lala'areoo
 naho o fitoloña'areoo;
 naho toe manao ty hato
 añivo' t'indaty naho i rañe'ey;
- ⁶ Naho tsy forekeke' areo ty ambahiny,
 ty bode rae, vaho ty vantotse;
 le tsy mampiori-dio-màliñe
 an-tane atoy,
 vaho tsy mañori-drahare ila'e
 ho ami'ty fañelohañe anahareo;
- ⁷ Le hampimoneñeko an-tane atoy,
 ie tane natoloko an-droae'areo ho
 nainai'e donia.
- ⁸ Fe hehe t'ie miantoke
 ty rehan-dremborake tsy manjofake.
- ⁹ Mampikametse,
 mañoho-doza, mandrañaotse,
 manao fanta vilañe,
 mibanabana amy Baale,
 vaho mañorike ndrahare ila'e
 tsy nifohi' areo!
- ¹⁰ Mbore mb'etoy, mijagarodoñe
 añañatrefako ami'ty anjomba tokaveñe
 amy añañarakoy toy, manao ty hoe:
 Votsotse zahay, hitoloña' areo
 o hativàñe iabio.
- ¹¹ Aa vaho lakato' malaso

am-pahaoniña' areo hao
 ty anjomba tokaveñe ami'ty añarako toy?
 Heheke! zaho, eka zaho ty nahatrean,
 hoe t'IEHOVÀ.

¹² Akia arè, mb'amy ni-toeko
 e Silòy*,
 i nampimoneñako i añarakoy valoha'ey,
 vaho oniño ty nanoako aze
 ty amy haloloa' ondatiko Israeleoy.

¹³ Ie henane zao,
 amy te fonga nanoe' areo i sata rezay,
 hoe t'IEHOVÀ, le nitaroñe,
 toe nañaleñale te nivolañe,
 fe tsy nañaoñe nahareo,
 vaho nitokaveko f'ie tsy nanoiñe.

¹⁴ Aa le hanoeko amy anjomba tokaveñe
 amy añarakoiy, i fiatoa' areoy,
 i toetse natoloko anahareo
 naho an-droae' areoy,
 hambañe amy nanoeko e Siloy.

¹⁵ Havokovokoko tsy ho treako nahareo,
 hambañe ami'ty nandroahako
 o rolongo' areo iabio,
 ze hene tarira' i Efraime.

¹⁶ Aa naho ihe, ko mihalaly
 ho a' ondaty retoañe,
 ko añonjonan-koike ndra solo, solo
 vaho ko manao ondati-aivo amako
 fa tsy ho haoñeko.

¹⁷ Tsy oni'o hao ty anoe' iareo
 amo rova' Iehodao
 naho amo lala' Ierosalaimeo?

¹⁸ Mangàla-katae o ajajao,
 mamiañe afo o rae'eo,
 mañajary bokon-koba o rakembao
 hamboara' iareo vonga-mofo
 i mpanjaka-ampelan-dikerañey;
 vaho añiliña' iareo enga rano
 o ndrahare ila'eo,
 hampibosek' ahy.

¹⁹ Zaho hao o sigihe' iareoo?
 Hoe t'IEHOVÀ,
 Tsy iereo avao ho ami'ty hasalara'iareo?

²⁰ Aa le hoe t'i Talè, IEHOVÀ:
 Inao! Hailiñe ami'ty toetse toy
 ty habosehako naho ty fifomboko,
 am'ondatio naho amo hareo,
 amo hatae ankivokeo
 naho ami'ty vokatse an-tane atoy;
 ho forototoeñe, tsy lefe akipeke.

²¹ Hoe t'IEHOVÀ' i Màroy,
 i Andrianañahare' Israeleoy:

* ^{7:12} Silò: niraheñe; i rovay: fierañerañañe,

Tovoño amo fisoroña' areoo,
amo enga-koroa' areoo
ty fikama' areo i hena'ey.

²² Fe tsy nivolañeko o roae' areoo
tsy nililioko amy andro
naneseako iareo boak'an-tane
Mitsraime añey
ze o enga orañaeo naho o fisoroñañaeo.

²³ Fe hoe ty nandiliako iareo,
Haoño ty feoko[†]
le ho Andrianañahare' areo raho,
naho ho ondatiko nahareo;
vaho añavelò iaby o lalañe
nililiakoo, soa te hiraorao.

²⁴ F'ie tsy nañaoñe iereo,
tsy nanongilan-dravembia,
te mone nañavelo
ami'ty fikililian-tro' iareo,
añ'ereñeren' arofo-lo,
vaho nidisa-voly fa tsy nionjoñe.

²⁵ Boak'amy andro niakaran-droae' areo i Mitsraimey am-para' ty andro
toy,

le nañitrike o mpitoroko mpitoky iabio
mb'ama' areo nañaleñaleñe te niraheñe;

²⁶ f'ie tsy nañaoñe ahy,
tsy nanokilan-dravembia,
toe nampigàn-kàtoke avao;
maro ty haratiañe nanoe'iereo
te aman-droae'iareo.

²⁷ Hene saontsio am'iareo o entañe zao,
f'ie tsy hijanjiñ'azo;
ho koihe'o, f'ie tsy hanoiñe azo.

²⁸ Hanoa'o ty hoe :
Itoy ty fifeheañe tsy nañorike
ty fiarañanaña' IEHOVÀ
Andrianañahare' iareo,
tsy nañaom-panoroñañe;

modo ty hatò, naito am-pivimbi'iareo.
²⁹ Hitsifo o maroi'oo, naho ahifiho aña;
añonjono an-kaboañe
maliolio ey ty fandalañe,
fa nifarie' IEHOVÀ vaho naforintse'e
ty tariratse nampiforoforo azey.

³⁰ Fa nanao raty am-pahatreavako
o ana' Iehodao, hoe t'IEHOVÀ;
napo'iareo añ'anjomba kanjieñe
amy añarakoy
o raha tiva' iareoo, handeots' aze.

³¹ Mbore rinanji' iareo o tamboho'
i Topete[‡] am-bavatanen'ana' i Hinomeo§, hañoroañ' añ'afó ao
o ana-dahi' iareoo

[†] 7:23 Fot 26:5, Avo 19:5, Jao 3:36, Rom 6:16, Heb 4:11, 5:9, Ben 22:14 [‡] 7:31 Topete: langoro;
fifoterañe § 7:31 Hinome: Ingo ie; vara'e; fangololoihañe

naho o anak' ampela' iareoo—
ie tsy nililieko, tsy naereñèreko.

³² Aa le ho tondroke ty andro,
hoe t'IEHOVÀ,
t'ie tsy hanoeñe Topete ka,
tsy ho vavatanen'ana' i Hinome,
fa ty vavatanem-panjamanañe,
amy te handeveñe e Topete ao iereo
am-para' te tsy aman-toetse.

³³ Ho fihina' o voron-tiokeo
naho o bibi' ty tane toio ty lolo'
ondaty retoa;
vaho tsy eo ty handroake iareo.

³⁴ Hajiheko amo rova' Iehodao
naho amo lala' Ierosalaimeo
ty feon-kafaleañe naho ty feom-pirebeñañe,
ty feom-pañenga naho ty feon' engavao,
fa ho kòake i taney.

8

¹ Amy andro zay, hoe t'IEHOVÀ,
le hakare' iareo boak'an-kibori'e ao
ty taola' o mpanjaka' Iehodào, naho
ty taola' o roandria'eo, naho
ty taola' o mpitokio, naho
ty taola' o mpisoroñeo, naho
ty taola' o mpimone' Ierosalaimeo,
² ie havarakaike añatrefa' i androy
naho i volañey
vaho i valobohòn-dikerañe nitea' iareo
naho nitoroñe' iereo
naho norihe' iereo
naho nitsoehe' iereo
vaho nitalahoa' iareo;
tsy hahoroñe tsy haleveñe,
fa hadoñe ho forompotse
ambone' tane eo.

³ Ho joboñe' o romoromom-pokom-patse honka'e
amo tane nandroahako iareo iabioo
ty fivetrahañe aolo' ty fivelomañe,
hoe t'IEHOVÀ' i Måroy.

⁴ Tovoño am' iereo ka ty hoe: Hoe t'IEHOVÀ:
Tsy hitroatse hao ty mikorovoke?
Tsy himpoly hao ty mibotriatse?

⁵ Inoñ'arè ty nampivio' ondati' Ierosalaime retoa t'ie nainai'e am-pitsileañ'
año?
vontitire' iereo ty fitake,
mifoneñe tsy himpoly.

⁶ Nitsendreñe raho, nahatsanoñe
t'ie tsy nisaontsy ty hato,
leo raik' am'ondate tsy misoloho
manao ty hoe: Ino o nanoekoo?
Songa mivio am-pombà'e mb'eo,
manahake ty soavalà mirefe aly.

⁷ Eka apota' ty sama andikerañ' eñe
o famantaña'eo;
ambena' ty ongongo naho ty foly
vaho ty tsiriry o fiampaneña'eo,
fe tsy fohi' ondatikoo ty lili' IEHOVÀ.

⁸ Akore te atao' areo :
Mahihitse zahay,
vaho aman-tika ty HÀ' IEHOVÀ?
Fe hehe te nanoe' i fanoki-bìla'
o mpanoki-dilioy fandañitse.

⁹ Nisalareñe o mahihitseo,
lonjetse iereo vaho tsinepake:
nifarie' iereo ty tsara' IEHOVÀ;
inoñ'arè ze o hihitse am' iereo zao?

¹⁰ Aa le hatoloko am'ty ila'e
o tañanjomba'iareoo,
naho amo mpitavañeo o tete'iareoo;
amy te songa matiti-mena,
ty kede naho ty bey;
sindre mpikatramo
ty mpitoky pak'am-pisoroñe.

¹¹ Loho maivañe ty nanindria' iareo
ty rare' i anak' ampela' ondatikoy
ami'ty hoe: Fañanintsiñe, Fañanintsiñe;
aia ze o fanintsiñañe zao?

¹² Nimeñatse hao iereo te niota-faly?
Aiy avao! tsy nahasalatse iareo,
vaho tsy mahay minanake;
aa le hikorovoke amo mikorovokeo
naho hafetsake ambane
amy andro fitilihañe iareoy, hoe t'IEHOVÀ.

¹³ Toe ho mongoreko hoe t'IEHOVÀ:
Ho po-balòboke o vaheo,
tsy ho amam-boa o sakoañeo,
naho hiheatse o rave'eo,
vaho hihelañe aña o nitolorakoo.

¹⁴ Ino ty andrarean-tika tobole?
Mifanontona,
antao hizilik' amo rova fatratseo
naho hianjiñe ao;
fa nampianjiñe antika t'IEHOVÀ Andrianañaharentika,
vaho nanjotsoa'e ranon-afero
ho fikamañe, amy te nanao
hakeo am' IEHOVÀ tika.

¹⁵ Nipay fierañerañañe tika
fe tsy nanjo hasoa;
naho andro fijanganañe,
fe hehe t'ie hebahebake!

¹⁶ Janjiñeñe boake Dane
ty fikofòn-tsoavala;
manginikinike iaby i taney
ami'ty kofò' o soavala lahi'eo;
amy t'ie pok' eo mampibotseke

i taney naho ty halifora'e;
 ty rova naho o mpimone'eo.

¹⁷ Le ingo, hañirahako mereñe,
 toe fandrefeala tsy mete avere,
 hañehetse anahareo, hoe t'IEHOVÀ.

¹⁸ Tsy lefe melañeñe ty halendeñako! mitoirañe amako ao ty troko.

¹⁹ Inao ty feon-kaikai' o anak' ampela' ondatikoo boak' an-tsietoitane aña,
 tsy e Tsione ao hao t'IEHOVÀ?

Tsy ama'e ao hao i Mpanjaka'ey?
 Ino ty nampiboseha'iareo ahy
 amo sare-soki' iareoo,
 naho amo sampsosampon' ambahinio?

²⁰ Añe i fitatahañey, modo i asaray,
 fe tsy voa-rombake tika.

²¹ Mangirifiry ami'ty fangirifiria' o anak' ampela' ondatikoo raho;
 miharovetse; fosatse;
 mamihiñe ahy ty haemberañe.

²² Tsy aman-kosotse hao ty Gilade*?
 Po-panaha hao ty ao?
 Inoñ' arè ty tsy nahatotòtse
 ty fijangana' i anak' ampela'ondatikoy?

²³ Ee t'ie ni-rano ty lohako,
 naho niganaganake o masokoo,
 hirovetako handro an-kaleñe
 o nizamaneñe
 amy anak' ampela' ondatikoy.

9

¹ Ee te tam-babangoañe aña raho,
 an-kialo' o mpandroakeo,
 hisitahako ondatikoo,
 hihankañako lavitse!
 Fa songa mpandrañaotse
 firimboñam-pamañahy.

² Ampibitsohe' iereo o famele'eo,
 ie ty falem-pandañira'iareo;
 maozatse amy tane'ey iareo,
 fe tsy ami'ty hatò;
 boak'an-draty mb'an-katsivokarañe;
 alik'am' iereo raho, hoe t'IEHOVÀ.

³ Mifampitaoa ry mpitrap-tanàñe
 naho ko miato rahalahy;
 fa songa kalitake ty mpilongo,
 vaho sindre mifañosoña amo mpidramotseo o rañetseo.

⁴ Sambe mifamañahy o mpirai-moneñe,
 tsy mivolan-to,
 nanare' iereo handañitse o famele' iareoo; mamoza-batañe ami'ty
 fikitrohan-draty.

⁵ Añivom-pamañahiañe ao ty akiba'o;
 ifoneña' iareo o fikatramoañaeo
 tsy hañaoña ahy, hoe t'IEHOVÀ.

* **8:22** Gilade: votrin-talily; bokobokon-taroña

- 6** Aa le hoe t'IEHOVÀ' i Màroy:
 Ho tranaheko iereo,
 ho tsoheko iereo;
 fa ino ka ty ho nanoeko,
 amy anak'ampela' ondatikoy.
- 7** Ana-pale mamono ty famele' iareo,
 mivola-pitake;
 saontsiem-palie'e filongoañe ty mpiama'e, fe ikinia'e an-troke ao.
- 8** Tsy ho lilloveko hao iereo ty amy rezay?
 hoe t'IEHOVÀ;
 tsy ho valèko fate hao
 ty fifelehañe manahak' itoañe?
- 9** Hirovetako naho hangololoihako
 o vohitseo,
 naho handalàko o fiandrazañe
 am-patrambeio,
 fa napoke ho tomontoñe,
 tsy iranga' ondaty;
 tsy ahatsanoñam-pimàn' añombe;
 songa niborofotse aña o voron-dikerañe o naho o bibio, nibioñe.
- 10** Hanoeko votrem-porompotse t'Ierosalaime, lakatom-panaloke;
 vaho hampangoakoahoko
 o rova' Iehodào ho po-pimoneñe.
- 11** Ia ty mahihitse haharendreke zao?
 Ia ty nitsaram-palie' IEHOVÀ, hitalilia'e? Ino ty nampangoakoake i taney
 ho ratraratra tsy firangàñe?
- 12** Le hoe t'IEHOVÀ :
 Amy t'ie nifary i Hàke
 napoko aolo' iereoy,
 naho tsy nañaoñe ty feoko*,
 vaho tsy nañavelo ama'e;
- 13** te mone nitsontike
 ami'ty hagàñ' arofo' iareo,
 naho amo Baaleo,
 i nañanaran-droae' iareoy;
- 14** aa le hoe t'IEHOVÀ' i Màroy,
 i Andrianañahare' Israeley:
 Ingo hanjotsako vahontsoy ondaty retoañe,
 vaho hampinomeko ranon' afero.
- 15** Habaratsàko amo fifeheañe iereo,
 amo tsy nifohi' iareo naho o rae' iareoo;
 vaho hampañoridañeko fibara,
 ampara' te mongoreko.
- 16** Hoe t'IEHOVÀ' i Màroy: Tsakoreo,
 koiho o rakemba mpandalao, homb'atoy; ampañitrifo o rakemba ma-
 hafibekoo,
 hiheo mb'etoa;
- 17** Itaentaeño hangoihoy ho antika
 higanaganaha' o fihainon-tikañeо,
 vaho hikararahan-drano
 o holi-mason-tikañeо.
- 18** Fa janjiñe e Tsione ao

* 9:12 Iir 7:23

ty feom-pirovetañe:

Hete! rotsake tika!

Vata'e salatse, fa nienga i taney tika,
fa narobake o akiban-tikañeo.

¹⁹ Ehe, janjiño ty tsara' IEHOVÀ

ry rakembao,

le ampitsendreño o ravembia' areoo

ty tsaram-palie'e:

Songa anaro fangololoihane

o anak' ampela'eo,

vaho fiojeñañe o mpiama'eo.

²⁰ Fa nizilik' amo lafinetio ty havilasy,

nimoak' añañ'anjomban-tikañ'ao,

ho zamane'e an-dalañe eo

o anan-tikañeo,

naho an-kiririsá ao o ajalahio.

²¹ Isaontsio: Hoe t'IEHOVÀ—

Hiforetrake hoe taik-ombe amontoñe ey

ty lolo' ondatio,

naho manahake ty voton-tsako

nipoke boak'an-taña' i mpanatakey,

vaho tsy eo ty hanontoñe.

²² Hoe t'IEHOVÀ:

Ee te tsy hirenge ami'ty hihi'e

ty mahihitse,

naho tsy hisenge ty haozara'e

ty maozatse,

vaho tsy hiebotsebotse ami'ty vara'e

ty mpañaleale.

²³ F'ie zao ty hirengea' ty mpirenge:

t'ie maharendreke naho mahafohiñ' ahiko, te Zaho IEHOVÀ,

Mpanolots' arofo naho ty hato,

vaho ty havantañañe an-tane atoy;

fa irezay ty teako, hoe t'IEHOVÀ.

²⁴ Ingo, ho tondroke ty andro,

hoe t'IEHOVÀ, te ho fonga lloveko

o sinavatse mboe tsy sinavatseo.

²⁵ I Mitsraime naho Iehodà,

naho i Edome, naho o ana' i Amoneo naho i Moabe[†],

vaho ze hene mpimoneñe am-patrambey añañe mpañitsike ty maròy

añañ'ilam-panda'e eo;

fa songa tsy sinavatse o fifeheañeo,

sindre tsy sinavatse añañ'arofo ao

ty anjomba' Israele.

10

¹ Inao ty entañe tsarae' IEHOVÀ

ama' areo ry anjomba' Israeleo;

² Hoe t'IEHOVÀ:

Ko mizatse ami'ty sata' o fifeheañeo,

vaho ko hakahaka'areo o vilon-dikerañeo; ndra te ampifimpìñe'e o
kilakila' ndatio.

[†] 9:25 Moabe: boak' aman-drae'e

³ Toe kafoak' avao o sata'ondatooo;
amy te hatae finira añ'ala ao
ty fitoloñam-pitàm-pandranjy
am-pekoñe.

⁴ Ihamina' iareo volafoty naho volamena
ampireketa'iareo fati-biñe
ami'ty ana-bato, tsy hitroetroe.

⁵ Hoe bodan-katae
najadoñe antetem-bazavo ao,
tsy mivolañe, tsy mete tsy tintineñe
vaho tsy mahay mitsontike.
Ko ihembaña' areo,
fa tsy mete manao raty zay,
vaho tsy ama'e ty manao soa.

⁶ Tsy eo ty mañirinkiriñ' Azo r'IEHOVÀ
Jabahinake Rehe; vaho mitiotiotse
an-kaozarañe i tahina'oy.

⁷ Ia ty tsy hañeveñe ama'o,
ry mpanjaka' o fifeheañeo?
Toe mañeva Azo;
fa tsy eo ty mañirinkiriñe Azo amo hene mahihitse amo fifelehañeo
naho amo borizà'iareo iabio.

⁸ Toe fonga votro mineñe,
ie foto-katae ty fañòhan-kafoa'e;

⁹ Nendeseñe boake Tarsise* aña,
ty volafoty pinepeke,
naho hirik' Ofaze† aña ty volamena,
ty satam-pitsene naho
satam-pitam-pitolom-bolamena;
manga naho malomàvo ty saro'iareo;
sata' o mahimbañeo.

¹⁰ Fe IEHOVÀ ro Andrianañahare to,
Ie t'i Andrianañahare veloñe,
naho t'i Mpanjaka nainai'e;
miezeñezeñe ty tane toy,
ami'ty haviñera'e
vaho tsy leo' o kilakila' ndatio
ty fifomboa'e.

¹¹ Hoe ty ho saontsie'o am' iereo:
Ho modo an-tane atoy
naho ambanen-dikerañe ao
o 'ndrahare tsy namboatse
o likerañeo naho ty tane toio.

¹² Ie namboatse ty tane toy
amy haozara'ey,
Ie nampijadoñe ty voatse toy
amy hihi'ey
vaho Ie nandafike o likerañeo
amy faharofoana'ey;

¹³ I fiarañanaña'ey
le ikoboboahañe o ranon-dikerañeo,

* **10:9** Tarsise: fitsakoreañe; fihotsohotsoañe † **10:9** Ofaze: volamena ki'e

naho mampionjoñe ty evoñe
 aña'olo-ty tane toy;
 amboara'e ampiñe o oraño,
 vaho ampiakare'e an-driha'e ao i tiokey;
¹⁴ Songa tembo ondatio, tsy aman-kilala,
 sindre ampisalareñe ty amo saposampon-draha'eo
 ty mpitolom-bolamena,
 remborake o sare natrana'eo,
 tsy aman-kofòke.

¹⁵ Kafoake irezay, satam-pamerevere;
 hiambotraha' ty fandrotsahañe
 amy androm-pitilihañey.

¹⁶ Tsy hoe zay t'i Anjara' Iakobe;
 Ie ty Mpañoreñe ze he'e,
 naho kobain-dova'ey t'Israele,
 IEHOVÀ' i Måroy ty tahina'e.

¹⁷ Ahoroño amo taneo ty harao' areo,
 ry mpifeake amy arikatokey.

¹⁸ Fa hoe t'IEHOVÀ:
 Hehe te ho pilereko an-tane atoy
 henaneo o mpimone' i taneio,
 le ho fihineko, haharendreha' iareo.

¹⁹ Hankàñe amako ty fanaintaiñako!
 Leveleve ty fereko; fe hoe raho:
 Toe hasilofeñe toy, tsy mete tsy ifeahako.

²⁰ Rotsake i kivohokoy, tampake iaby o tali'eo;
 fonga nienga ahy o anakoo, tsy ao;
 tsy eo ka ty handafike i kibohokoy,
 naho hampitroatse o efe'eo.

²¹ Fa votro o mpiarak'añondrio,
 tsy nañontane IEHOVÀ;
 aa le tsy miraorao,
 vaho miparaitak' aña o añondri' iareoo‡.

²² Inao ty talily, Hehe te mb'etoa,
 ty fikoraham-bey
 boak'an-tane avaratse aña,
 hampangotomomoke
 o rova' Iehodào,
 ho fimoneñam-panaloke.

²³ Ry IEHOVÀ,
 apotako te tsy am' ondatio ty fombà'e;
 tsy am'ondaty mpañaveloo
 ty hanehake o fandia'eo.

²⁴ Endaho raho, ry IEHOVÀ,
 le an-katò;
 tsy ami'ty filoroloroa'o
 hera hampiminjikio'o.

²⁵ Adoaño amo kilakila' ondaty tsy mahafohiñe Azoo ty haviñera'o,
 naho amo fifokoa tsy mikanjy i tahina'oio§;
 fa nabotse' iareo t'Iakobe,

‡ **10:21** Iir 2:8, 12:10-11, 50:6-7, Iek 34:1-23, Ti II 4:3-4, Pe II 2:1-22 § **10:25** Sab 11:4, Mik 4:5

eka vinaza' iareo naho nagedra' iareo,
vaho nampangoakoahé' iareo
i fimoneñá'ey.

11

- ¹ Ty tsara nivotrak' am' Iirmeà,
boak'am' IEHOVÀ, manao ty hoe:
² Janjiño ty tsara' ty fañina toy,
naho mitaroña am' ondati' Iehodào,
naho amo mpimone' Ierosalaimeo;
³ vaho ano ty hoe:
Hoe t'IEHOVÀ,
t'i Andrianañahare' Israele:
Fatse t' indaty tsy mañaoñé
o tsara' ty fañina toio,
⁴ I nandiliako an-droae' areo amy andro
nampiengako an-tane Mitsraime
boak' an-toñam-biy, ami'ty hoe:
Haoño ty feoko*, naho anò
ze hene andiliako; soa te h'ondateko nahareo,
vaho ho Andrianañahare' areo raho;
⁵ hampijadoñeko i fañina natoloko
an-droae' areoy, homeako iareo ty tane
orikorehen-dronono naho tantele,
ie o henaneo.
Le hoe raho, Amena[†], ry IEHOVÀ.
⁶ Le hoe t'IEHOVÀ amako:
Hene tseizo amo rova' Iehodào
naho amo lala' Ierosalaimeo
o tsara zao, ty hoe:
Mijanjiña o tsara' i fañinaio, vaho ano!
⁷ Fa hinatahatako soa o roae' areoo
amy andro nañakarako iareo
an-tane' Mitsraimey, pak' androany,
boa-marinay te mitolom-
pitaroña ama' areo ty hoe:
Haoño ty feoko.
⁸ F'ie nañajife avao iereo,
tsy nanokilan-dravembia,
songa nitsontike ami'ty
fanjeharan-tro'e raty;
aa le fonga nafetsako am' iereo
o tsara' ty fañina toio,
i nandiliako hanoeñey,
f'ie tsy nipaoke.
⁹ Le hoe t'IEHOVÀ amako:
Zoeñé am'ondati' Iehodao, naho amo mpimone'Ierosalaimeo ty kinia.
¹⁰ Ie nibalike mb'amo hakeon-droae'
iareoo avao,
ami'ty tsy fañaoñañe o volakoo;
vaho nienga hañorike 'ndrahare ila'e hitoroña iareo;
songa nivalike amy fañina nanoeko

* **11:4** Oni: Iir 7:23 † **11:5** Amena: Ie zay

aman-droae'ey
ty anjomba' Israele naho
ty anjomba' Iehodà.

¹¹ Aa le hoe t'IEHOVÀ:
Ingo handesako ty raty
tsy hahafipoliorañe;
aa ndra t'ie hikaikaik' ahy
Zaho tsy hañaoñe.

¹² Ie amy zao hiheo mb'eo
o rova' Iehodào
naho o mpimone' Ierosalaimeo
hikoikoike amo 'ndrahare ila'e
fañenga' iareoo;
f'ie toe tsy haharombake
amy san-kasotriañey.

¹³ Fa mira ami'ty ia' o rova'oo
o 'ndrahare' areoo, ry Iehodà;
vaho mifandrae ami'ty ia' o lalañe
e Ierosalaimeo
o kitrely natroa' areo amy raha tivaio,
o kitrely fisoroña' areo amy Baaleo.

¹⁴ Aa le ko mihalaly ho a' ondaty retoa,
naho ko añonjona'o soloho;
fa tsy hitsanon-draho amy andro ikaikaiha' iareo
te malovilovy.

¹⁵ Ino ty anoe' i kokoakoy an-kivohoko ao, kanao nanoa'e hakarapiloña
amy màroy?
ie tsy sazo azo i henam-pisoroña'o miavakey?

Amy te mampirebek'azo
ty manao hatsivokarañe.

¹⁶ Tinoño' IEHOVÀ ty hoe ty añara'o,
Hatae olive mandrevake,
fanjaka am-boa'e, soa vintañe.
Am-pikorahan-kotakotake
t'ie namiañe afo ama'e,
vaho fonga pinozapozake o tsampa'eo.

¹⁷ IEHOVÀ' i Màroy, i nañetsa azoy
ty namatse hekoheko ama'o,
ty amy hatsivokara' ty kiboho' Israeley,
naho ty kivoho' Iehodày,
ie fa nifetsak'ama' iareo
ami'ty fanigliha' iareo ahy
amy fisoroña' iareo amy Baaley.

¹⁸ Tinolo' IEHOVÀ hilala ama'e raho,
vaho nirendreko;
naboa'o amako ty sata' iareo.

¹⁹ Fe nihoe anak'añondry nitrotrotrotro raho te nitantalieñe mb'eo ho
lentañe;
le tsy napotako t'ie nikilily ahy,
ami'ty hoe: Antao hamira i hataey
rekets' o voa ama'eo;
ie haitoan-tika an-tanen-kaveloñe,
tsy ho tiahý ka ty añara'e.

20 O ry IEHOVÀ' i Måroy,
ry mpizaka an-katò,
ry mpitsoke ova naho stroke,
ehe te ho treako ty hañondroha'o am' iareo;
Ihe ro niborahako ty toreoko.

21 Aa le hoe t'IEHOVÀ ty am'ondaty nte-
Anatote mipay ty fiai'o, manao ty hoe:
Ko mitoky ami'ty tahina' IEHOVÀ
tsy mone hivetrak' am-pit  ay.

22 le hoe t'IEHOVÀ' i Måroy:
Toe ho lilloveko:
hampikoromahem-pibara' o ajalahio,
hampivetrahe' ty ker   o ana-dahy
nahoa anak'ampela' iareoo;

23 Toe tsy hapoke sehang'a'e,
fa hametsahako hank  ne
amo nte-Anatoteo:
ty taom-pitiliha  ne iareo.

12

1 Vantan-dRehe, ry IEHOVÀ,
ndra te ino ty ho nifandierako,
f'ie mbe te hisafiry ama'o:
Ino ty mampiraorao

ty lala' o lo-tserekeo?
Akore te hene miera  era  ne
o mikitro-draha ratio*

2 Tinongi'o iereo, eka, le nivahatse;
mitombo, le hehe te mamoa;
ie marine azo am-palie,
fe lavits'azo an-stroke.

3 Toe arofoana'o raho ry IEHOVÀ,
mahavazoh   ahy,
nahoa mitsoke ty troko ke mb'ama'o;
aveveo hoe a  ondry ho lent  ne iereo,

4 avaho ho amy androm-panjamana  ey.
Ampara' te ombia i taney te handala,
nahoa o hatae an-kivoke eio te hiheatse?
Fonga nasintak' a  e o bibio nahoa o voro  eo ami'ty hatsivokara'

o mpimone  eo,

ie manao ty hoe:

Tsy ho vazoho'e ty figado  a'ay.

5 Ihe nitrao-pilay amo mpikovovokeo,
le nahamokotse azo,
aia ty hifandriadriaha'o amo soavalao?
Aa ihe mikorovok' an-tane manintsi  ne,

hanoe'o akore te a  'ala-matahetse

e Iordane ao?

6 Ndra o rolongo'oo,
nahoa ty anjomban-droae'o,
songa nama  ahy azo ka,
sindre nikorak' ama'o;

* **12:1** Sab 73:3

ko iantofa'o ndra te anoe'e
saontsy mora.

⁷ Fa naforintseko ty akibako,
fa nifariekò i lovakoy;
fa natoloko am-pitan-drafelahi'e
i kokoan' aikoy.

⁸ Fa nanjare liona añ'ala ao amako
i lovakoy,
kanao nañaoloa'e, hejeko.

⁹ Hoe vorom-banda mpitsatsa amako
i lovakoy.

Miatreatre añariary aze
o vorom-pamaokeo.

Akia, fonga atontono o bibin-kivokeo,
endeso mb'etoa hamotseke.

¹⁰ Mpiarake maro ty nampianto
i tanem-balobokoy,
fa linialia' iareo i tetekoy,
nanoeñe ratraratra i tondako soay[†].

¹¹ Nampangoakoheñé, Bangiñé!
mitoreo aoloko eo;
nampibabañoaheñé iaby i taney,
amy te tsy haoñe' ondaty an-troke.

¹² Fa nivotraham-pampianto
ze hene haboañe am-patram-bey aña;
amy te mamotseke boak'añ'efe' i taney aña pak'amy aña ka ty fibara'
IEHOVÀ,

fonga tsy aman-kanintsiñé
ze atao nofotse.

¹³ Nandrarak' ampemba[‡] iereo,
fe nitatake fatike;
nifanehake,
f'ie tsy miraorao;

aa le imeñaro ty havokara' areo,
ty amy haviñera' IEHOVÀ miforoforoy.

¹⁴ Hoe t'IEHOVÀ:
Ty amo raty mañohok' ahio,
o mitsapa i lova nampandovaeko
ondatiko Israeleio,
toe ho voroteko an-tane' iareo, hombotako am'iereo
ty anjomba' Iehodà.

¹⁵ Aa ie aña ty nañombotako iareo,
le ho tretrezeko indraike;
vaho hampoliko, songa mb'an-dova'e,
sindre mb'an-tane'e.

¹⁶ Ie amy zao, naho toe ianara' iareo
ty sata' ondatikoo, ty hifanta ami'ty añarako: Kanao veloñe t'IEHOVÀ,
hambañe amy nañanara' iareo ondatiko
ty hifanta amy Baale,
le haoreñé aivo' ondatikoo ka iereo.

¹⁷ F'ie naho tsy mañaoñe iereo,

[†] **12:10** Sor 26:22, Isa 27:10, Iir 10:21 [‡] **12:13** Ampemba: toe karazam-bare

le ho voroteko i fifeheañe zay,
hombotañe naho harotsake,
hoe t'IEHOVÀ.

13

¹ Hoe t'IEHOVÀ amako: Akia, mikaloa sokotry lande, le sadiaño, vaho ko alo'o an-drano. ² Aa le nivily sokotry raho ty amy tsara' IEHOVÀ, vaho nadiako. ³ Nomb' amako fañindroe'e ty tsara' IEHOVÀ nanao ty hoe:
⁴ Endeso i sokotry vinili'oy, o an-toha'oo, le miongaha, akia mb'e Perate* aña vaho akafiro an-tseran-damilamy ao. ⁵ Aa le nimb' eo raho nañetak' aze e Perate ao amy nandilia' IEHOVÀ.

⁶ Ie aña ty andro maro, le hoe t'IEHOVÀ amako, Miongaha, akia mb'e Perate mb'eo vaho rambeso i sokotry nililiako haetak'ao. ⁷ Aa le nimb'e Perate mb'eo raho vaho hinaliko naho rinambeko amy nañetahakoy i sokotriy; naheoko t'ie nianto, tsy vara ka. ⁸ Le niheo amako ty tsara' IEHOVÀ nanao ty hoe:

⁹ Hoe t'IEHOVÀ:

Hambañe amy zay ty hamongorako
ty fiebora' Iehodà, naho
ty firengevoha' Ierosalaime,
¹⁰ ondaty lo-tsereke retoañe,
o mifoneñe tsy hijanjiñe o volakoo,
o manjotik' ami'ty fanjeharan'arofo'eo,
naho mañorike ndrahare ila'e hitoroña'e naho hitalahoa'e;
aa le hifandrae ami'ty sokotry toy iereo,
ie tsy vente'e.

¹¹ Fa hambañe ami'ty fidiañañe
ty sokotry an-toha'ondaty,
ty nampidiañako amako
ty anjomba' Israele iaby,
naho ze hene anjomba' Iehodà,
hoe t'IEHOVÀ,
soa te ho amako iereo, h'ondaty
naho tahinañe, naho engeñe,
vaho volonahetse;
f'ie mihiritsiritsitse avao.

¹² Atovoño am' iereo o tsara zao: Hoe t'IEHOVÀ Andrianañahare' Israele:
Songa ho peañen-divay o zonjoñe. Le ie manao ty hoe iereo: Aa tsy apota'ay hao te sindre hatsafen-divay o zonjoñe? ¹³ Le hanoa'o ty hoe:
Hoe t'IEHOVÀ:

Ingo ho liporeko hamamoañe ze hene
mpimone' ty tane toy: o mpanjaka
miambesatse am-piambesa' i Davideo[†],
naho o mpisoroñe, naho o mpitokio,
vaho o mpimone' Israele iabio.

¹⁴ Ho ifampidiosieko iereo,
o roaeo amo ana'eo, hoe' t'IEHOVÀ;
tsy hiheveako, tsy ho tretrezeko,
tsy ho ferenaiñeko;
te mone ho rotsaheko.

¹⁵ Mijanjiña naho manolora ravembia,

* **13:4** Perate: Saka mampiraorao † **13:13** Davide: Ikokoña

ko mibohaboha; fa nitsara t'IEHOVÀ.

¹⁶ Toloro engeñe t'IEHOVÀ
Andrianañahare' areo,
aoło' ty firoña'e ho maieñe,
aoło te mitsikapy an-tongoa-vohitse eo
o fandia' areoo,
le ie mipay hazavàñe nahareo
ro hafote'e ho talinjon-kavilasy,
ie hampimoromoroñe'e.

¹⁷ Fe naho tsy mañaoñe nahareo,
le hiharovetse aña'etake ty troko
ty amy firengevohañe zay;
higanaganaham-pangololoihañe
o masokoo,
vaho hikararake o rano-masokoo,
amy te nasese an-drohy aña i lia-rai' IEHOVÀ.

¹⁸ Taroño amy mpanjakay naho amy
mpanjaka-ampelay ty hoe:
Mitoboha ambane,
fa nazetse o sabakan'enge' areo fanjakao.

¹⁹ Migabeñe o rova atimoo,
vaho tsy eo ty hanokake iareo;
songa nasese am-pandrohizañe t'Iehodà;
sindre nendeseñ' aña an-drohy.

²⁰ Ampiandrao o fihaino'oo,
isaho o mb'etoy boak' avaratse eio;
aia i lia-raike natolots' azoy,
i lia-rai'o fanjakay?

²¹ Ino ty hatao'o naho tendre'e
ho ambone' lohà'o o nirañe'o taoloo;
o naò'oo?

Tsy hamihîñe azo hao ty fikoretañe
hoe fitsongoan' ampela?

²² Aa naho atao'o an-tro'o ao ty hoe:
Ino ty nifetsaha' iretoñañe amako?
Ty habei' hakeo'o ty nañaloañe i siki'oy,
naho ty maha tsi-an-kana o tomi'oo.

²³ Mahay mañova ty holi'e hao
ty nte-Kose[‡],
ndra i hapepoa'ey ty fosa?
Aa naho mete zay, le ho lefe'areo
mpanao ratio ka ty hanao soa.

²⁴ Aa le hampiboeleko iereo
manahake ty karafo ampihelaña'
i tion-dratraratray.

²⁵ Toe toli'o toy, ty nañaranako ama'o, hoe t'IEHOVÀ;
amy te nihaliñe'o raho,
vaho niatoa'o ty remborake.

²⁶ Aa le hatsingako ambone' lahara'o eo
o siki'oo hampiboake ty fimeñara'o.

²⁷ Fa nitreako o hativa'oo:

[‡] 13:23 Kose: hamainten-gero'e

ty fifandrañaota'o,
 ty fitrem-pitsinginiora'o,
 ty haleoran-kakarapiloa'o,
 amo tamboho an-kivoke eio,
 nitreako o hativà'oo.
 Hankàñe ama'o, ry Ierosalaime,
 ampara' te ombia t'ie mbe haleotse?

14

¹ Ty tsara' IEHOVÀ am' Iirmeà
 ty amy hasalikoañey.

² Mandala t'Iehodà,
 midegañe o lalam-bei'eo,
 ie mibotrek' an-kontoke ty amy taney;
 vaho mionjoñe ty firoveta' Ierosalaime.

³ Nirahe' o roandriañeo o keleia'eo
 hitoha rano:
 ie pok'an-kadaha eo, tsy manjo rano; mimpoly am-binta kapaike,
 salatse naho daba, misaron-doha,

⁴ O taneo mivarakivaraky,
 tsy niavy an-tane ty orañe,
 miolitsolitse ty mpiava, misaron-doha.

⁵ Miterak' an-kivoke ey ka ty fanaloke,
 fe aforintse'e, ie tsy aman' ahetse.

⁶ Miereñereñe an-kaboan-diolio eñe
 ty borìke ly, misefosefo hoe fosa;
 milesa o maso'eo,
 amy te tsy eo rongoñe.

⁷ Aa ndra te asisi' o tahí'aio zahay,
 ry IEHOVÀ, mitoloña ty amy tahina'oy;
 toe maro o fidisa-voli'aio,
 naho anañä'o hakeo.

⁸ Ry fitamà' Israele, t'i Mpandrombak' aze an-tsan-kaoreañe,
 manao akore te ihe ro manao
 ambahiny an-taneo,
 manahake ty mpitaveñañe mañialo ao
 te haleñe?

⁹ Mañino Rehe ro hoe ondaty daba,
 hoe fanalolahy tsy maharombake?
 F'ie añivo'ay Rehe, ry IEHOVÀ,
 vaho kanjieñe ami'ty tahina'o,
 ko aforintse'o.

¹⁰ Hoe t'IEHOVÀ am'onday retoñañe:
 Toe nitea' iereo ty mirererere,
 tsy kinala' iareo o fandia'eo;
 aa le tsy no' IEHOVÀ,
 ho tiahí'e henane zao o hakeo'eo,
 vaho ho llove'e o tahí' iareoo.

¹¹ Le hoe t'IEHOVÀ amako:
 Ko ihalalia'o ty hasoa' ondaty retoa,

¹² Ie mililitse, tsy ho tsanoñeko
 o fitoreo'eo;
 ie mañenga soroñe naho enga
 mahakama, tsy ho noko;

te mone ho mongoreko am-pibara,
naho an-kerè vaho an-kiria.

13 Le hoe raho: Ee Talè, IEHOVÀ!
Inao ty filañona' o mpitokio:
Tsy hizò fibara nahareo,
tsy ho tendreke hasalikoañe;
fa ho tolorako fierañerañañe
tsy modo ami'ty toetse toy.

14 Aa le hoe t'IEHOVÀ amako:
Mandañitse ami'ty añarako o mpitokio*;
tsy nahitriko tsy nililiako, tsy nivolañako;
itokia' iareo aroñarom-bande,
naho sahàtse, naho raha kafoake,
vaho ty famañahian-tro' iareo avao.

15 Aa le hoe t'IEHOVÀ:
O mpitoky mitoky ami'ty añarakoo:
Tsy niraheko, fe hoe ty asa'iareo:
Tsy ho an-tane atoy ty vi-lava
naho ty kerè.

Aa le ty fibara naho ty hasalikoañe
ty higadoña' i mpitoky rey.

16 Le hahifik' an-dala' Ierosalaime ey
ondaty itokia' iareoo,
ami'ty mosare naho amy fibaray;
le tsy hanam-pandeveñe,
ie naho o vali'eo, naho o ana-dahi'eo,
vaho o anak' ampela'eo;
fa hadoako am'iereo ty haloloa' iareo.

17 Le isaontsio o tsara zao:
Ehe te hitsiririàhan-drano maso
handro an-kaleñe o masokoo;
vaho ko ajihetse ;
amy te dinemo' ty fanjevoañe ra'elahy
i somondrara anak' ampela' ondatikoy,
ami'ty fere mahatindry.

18 Zaho mb'an-kivok' añe:
hehe ty zinamam-pibara,
ie mimoak' an-drova ao,
ingo ty nanilofen-kerè!
mikariokariok' amy taney
o mpitokio naho o mpisoroñe
fa tsy mahafohiñe.

19 Vata'e nifarie'o hao t'Iehodà?
Heje' ty arofo'o vintañañe hao ty Tsione?
Ino ty nandafa'o anay
ho po-pijanganañe?

Ie nandiñe fanintsiñañe fe po hasoa,
naho fitsaitsaihañe, te mone hankàñe.

20 Iantofa'ay ry IEHOVÀ, o halò-tsere'aio,
naho o tahin-droae'aio; toe anaña'o hakeo.

21 Ko malaiñ'anay Rehe, ty amy tahina'oy!
ko mavoe'o ty fiambesan'enge'o;

* **14:14** Ies 9:14, Iir 23:11-36, 27: 14,16, Iek 21:34, 22:28

mahatiahia, ko ivaliha'o
i fañina'o ama'ay!
22 Ahavian'orañe hao o raha
tsy jefa' o kilakila'ndatioo?
O likerañeо hao ty mampikojojoake orañe?
Tsy Ihe hao, ry IEHOVÀ
Andrianañahare'ay?
Tsy Ihe hao ty fitamà'ay?
Toe Ihe ro Mpanao ze he'e zao!

15

- 1** Le hoe t'IEHOVÀ amako:
Ndra te nijohañe añatrefako eo
t'i Mosè naho i Samoele,
tsy ho nitolike mb'am'ondaty retoa ty troko
soiho aña iereo tsy ho treako, aseseo aña.
2 Ie amy zao, naho isaontsia' iareo,
ty hoe: Homb'aia zahay?
le hanoa'o ty hoe: Hoe t'IEHOVÀ:
O havetrakeo mb'am-pivetrahañe,
O ho amy fibaraio, mb'amy fibaray,
O hampisalikoeñeо le mb'amy mosarey,
O ho an-drohio, le mb'am-pandrohizañ' aña.
3 Efatse ty hafantoko am' iareo:
hoe t'IEHOVÀ
hanjevoñe ty fibara naho
hirepake ty amboa naho
hampibotseke naho hamongotse o voron-dikerañeо naho
o bibi' ty tane toio.
4 Le hanoeko fangebahebahañe
amy ze fifehea' ty tane toio,
ty amy Menasè*, ana' Iekizkia†
mpanjaka' Iehodà,
o nanoe'e e Ierosalaimeo.
5 Ia ty hiferenaiñ' azo ry Ierosalaime?
Ia ty handal' azo?
Ia ty hivike hañontane ty fanintsiña'o?
6 Fa nifarie'o raho, hoe t'IEHOVÀ,
toe nidisa-voly;
zay ty añitiako ama'o ty tañako,
handrotsahako;
mahamokotse ahy ty miheve.
7 Itsongako an-tsikelo
an-dalambei' i taney;
ampandalàko anake,
vaho ho mongoreko ondatikoo
amy te tsy ambohoa'e o sata'eo.
8 Ho maro te amo fasen-driakeo
o ramavoi'iareoo aoloko eo;
afetsako am'iereo, ami'ty renen' ajalahy

* **15:4** Menasè: i nandikofañey; bey haliño † **15:4** Iekizkia: ty haozara' IEHOVÀ

ty mpampianto an-tsipinde mena;
hivovò ama'e ty fihepakepahañe
naho ty firevendreveñañe.

⁹ Miforejeje ty nisamake fito;
midegañe ty fiai'e;
fa nimotake i andro'ey
t'ie mb'e nandia-loha,
meñatse re naho salatse;
vaho haseseko ami'ty fibara ty sehanga'e
añatrefa' o rafelahi' iareoo,
hoe t'IEHOVÀ.

¹⁰ Feh'ohatse amako ry reneko,
te nahatoly ahy h'ondaty trabiheñe,
mpampitrobo i tane iabiy!
tsy nampisongo raho, tsy misongo;
fe fonga mamàtse ahy.

¹¹ Hoe t'IEHOVÀ:
havotsoko ho an-kasoa rehe;
hampihalalieko ama'o
ty rafelahy an-tsan-kankàñe naho añ'andron-kasotriañe.

¹² Mahafolake ty viñe boak' avaratse hao
ty viñe naho ty torisike?

¹³ Hatoloko ho fikopahañe
tsy amam-bili'e ty vara naho fanaña'o,
pak' añ'efe'o iaby ty amo hene' tahi'oo.

¹⁴ Le hampaneseko o rafelahi'oo
mb' an-tane tsy fohi'o;
fa niviañeñe an-doak-oroko ao ty afo hisolebats' ama'o.

¹⁵ Ihe ry IEHOVÀ ro maharofoanañe,
tiahio raho vaho aereñereo,
vaho valeo o mpanao sarerak' ahio;
ko asese'o mb'eo ty amy fiferenaiña'oy; mahaoniña te Ihe ro nahafeahako
inje.

¹⁶ Nitendreke o tsara'oo vaho nihaneko;
le nahafale ahiko
toe naharebeke ty troko o tsara'oo;
amy te nitokaveñe ami'ty tahina'o,
ry IEHOVÀ Andrianañahare' i màroy.

¹⁷ Tsy nitobohako i favorim-pitohàkey,
tsy nirañaraña an-kobaiñe,
fa mitobok' am-bangiñe ao ty amy fità'oy; ie nilifore'o hatorifihañe.

¹⁸ Akore te silofeñe nainai'e o rarekoo,
ie tsy mitsaitsaïke o ferekoo,
tsy mete ho melañe?
Hanao torahañe mamitak' amako

hao Rehe, hoe rano misike?

¹⁹ Aa le hoe t'IEHOVÀ:
Naho himpoly rehe,
le ampibalihekò indraike,
hijohaña'o añatrefako eo;
aa naho akare'o ami'ty kafoake ty vente'e,
le ho sorotàko;
adono hitoliha' iareo, fa ko itoliha'o.

20 Le hanoeko kijoly torisìke
am'ondaty retoa;
hialy ama'o iereo, fa tsy hahagioke,
Ho ama'o raho handrombak' azo
naho hañaha azo, hoe t'IEHOVÀ.
21 Havotsoko am-pità' o lo-tserekeo,
naho ho jebañeko an-dela-pità'
ty mampangebahebake.

16

1 Nimb'amako ty tsara' IEHOVÀ
nanao ty hoe:
2 Ko mañenga valy,
ko misamak' ana-dahy ndra
anak'ampela an-toetse atoy.
3 Fa hoe t'IEHOVÀ ty amo
ana-dahy naho anak'ampela terake
ami'ty toetse toio,
naho i rene'e nisamake iareo,
naho i rae'e nampiareñe iareo
an-tane atoiy:
4 T'ie hivetrak' am-pikoromahañe
mahaferenay,
tsy eo ty handala, tsy haleveñe,
fa hapoke hoe forompotse
ambone-tane eo,
ho zamane' ty fibara naho ty saliko;
ho hane' o voron-dikerañeo
naho o biby an-tane atoio ty lolo' iareo.
5 Le hoe t'IEHOVÀ:
Ko iziliha'o ty anjombam-pandalàñe,
ko mb'eo hirovetse ndra hañohò;
fa nafahako am' ondaty retoa ty
fanintsiñako, hoe t'IEHOVÀ,
ty fiferenaiñako naho ty fitretrezako.
6 Songa hivetrak' an-tane atoy
ty kede naho ty bey;
tsy haleveñe,
tsy hirovetañe,
tsy handilian-tsandriñe,
tsy hañitsifañe;
7 Tsy hamolahañe mofo ty mpandala,
hampanintsíñe aze ty amy raza'ey;
tsy hanjotsoañe fitovim-pañoñohañe hinoma'e ty aman-drae'e ndra rene'e.
8 Ko imoaha'o ka ze anjomba
manao sabadidake, iambesara'o,
hikama ndra hinoñe.
9 Fa hoe t'IEHOVÀ i Måroy,
i Andrianañahare' Israeley:
Toe hajiko an-toetse atoy,
añatrefam-pihaino'o eo
naho amo andro'oo,
ty feon-kafaleañe, naho

ty feom-pirebehañe, naho
ty fiarañanaña' i mpañengay vaho
ty fiarañanaña' i engañey.

¹⁰ Aa ie saontsie'o am'ondaty retoa
o tsara iaby zao,
vaho manao ty hoe ama'o iereo,
Akore te zahay ro nitsarà' IEHOVÀ
o hankàñe jabajaba zao?

Ino o hakeo'aio?
Ino ty tahiñe nanoe'ay amy
IEHOVÀ Andrianañahare'ay?

¹¹ Le ty hoe ty havale'o ami'iereo:
Amy te nifarien-droae'areo raho
hoe t'IEHOVÀ, naho nanjontike
mb'aman 'ndrahare ila'e,
nitoroñe iareo naho nitalahoñaẽ,
fe nieng'ahy, vaho tsy
mañambeñe i HÀ-koy.

¹² Lombolombo ty nanoen-droae' areo
ty haratiañe nanoe' areo,
songa mañorike ty fanjeharan-tro'e raty,
fa tsy mañaoñe ahy.

¹³ Aa le hahifike boak'an-tane atoy
mb'an-tane tsy nifohi' areo
ndra o rae' areoo;
añe nahareo ro hitoron-drahare
ila'e handro an-kaleñe;
fe tsy ho soaeko.

¹⁴ Rendreho arè, te ho tondroke ty andro, hoe t'IEHOVÀ, te tsy ho volañeñe
ka ty hoe: Kanao veloñe t'IEHOVÀ nañakatse o ana' Israeleo an-tane
Mitsraime aña,

¹⁵ Te mone: Kanao veloñe t'IEHOVÀ
nampipoly o ana' Israeleo
boak' an-tane avaratse aña,
naho amo hene tane nandroahako iareoo;
Ie hampoliko an-tane' natoloko an-droae'eo.

¹⁶ Ie amy zay, hampisangitrifeko
mpamintañe maro,
hoe t'IEHOVÀ,
le ho vintañe'iereo;
heneke zay le hampañitrifeko
mpañoro maro,
le ho horoñe' iereo amy ze hene vohitse
naho amy ze fonga tamboho,
vaho boak'amo tseran-damilamio.

¹⁷ Fa amo sata' iareo iabio o masokoo,
tsy mietak' an-tareheko iereo;
mbore tsy mikafitse amo masokoo
ty fandilara' iareo.

¹⁸ Hondroheko indroe hey ty hakeo
naho tahi' iareo;
amy t'ie nañota-faly an-taneko;
nilipore' iareo amy lovakoy o faten-

draha'e mampangorìñeo
vaho o raha tivao.
19 Ry IEHOVÀ, haozarako naho
kijoliko fatratse,
toe fipalirako an-tsan-kasotriañe,
ama'o ty hañaveloa' o fifeheañe
boak' añ'olo-ty tane toio
hanao ty hoe:
Nandova vande avao o rae'aio,
raha kafoake, tsy amam-bente'e*.
20 Hamboara' ondaty 'ndrahare hao
ty vata'e, ie tsy andrianañahare?
21 Mahaoniña arè te hampahafohineko
ami'ty indraike toy te haboako am' iereo
ty tañako, naho ty haozarako;
vaho ho fohi' iareo te IEHOVÀ ty añarako.

17

1 Fa sinokitse am-panokiram-by
ty hakeo' Iehodà,
safira masioñe ty loha'e,
pinatetse an-takelan'arofo' iareo,
naho ami'ty tsifan-kitreli' iareo eo.
2 Ie tiah'iereo o ana' iareoo,
le ho tiah'iareo ka ty kitreli' iareo
naho o Asere' iareo
añ'ila' ze hatae antsetra an-kaboañe eio.
3 O ry vohipo an-kivoke ey,
hatoloko ho fikopake o fanaña'oo
naho ze fonga vara'o,
rekets' o toem-pisoroña'o amo haboañe manitsike ty tane'oo.
4 Le ihe, toe o vata'oo,
ro hapitsok' amy lova natoloko azoy;
vaho hampitoroñeko o rafelahi'o
an-tane tsy fohi'oo;
amy te namiaña'o afo
hilebaleba nainai'e ty an-doak'oroko ao,
5 Hoe ty nafè' IEHOVÀ:
Fatse t'indaty miato ama' ondaty,
naho manao ty nofotse ho haozara'e,
vaho misitak' am' IEHOVÀ ty arofo'e.
6 Ho hambarañe ami'ty rongoñe
an-dratraratra aña,
tsy ho oni'e ty fitotsaha' ty soa;
amy t'ie himoneñe am-paimpaiñe
an-diolio aña,
an-tane sira tsy amam-pimoneñe.
7 Haha t'indaty miato am'IEHOVÀ;
naho IEHOVÀ ro fiantofa'e.
8 Hanahake ty hatae namboleñe
añ'olon-drano eo re,

* **16:19** Sab 147:19 Isa 2:3 Jao 4:22, Rom 2:20, 3:2,

mamelatse o vaha'eo marine rano ao,
ie tsy ho tendre-tariñandroke,
fa handrevake o rave'eo;
naho tsy ho mahimahin-dre an-taom-paosa, vaho le lia'e tsy hijhetse o
voa'eo.

⁹ Milikoatse ze he'e
ty famañahia' o arofoo*,
losotse ty hasilo'e—
ia ty mahafohiñe aze?

¹⁰ Zaho IEHOVÀ ty mpitsikarak' arofo,
mpitsò-troke,
mpanambe ondatio mira amo sata'eo,
tsahatse ty havokara' o fitoloña'eo.

¹¹ Hambañe amo hatrakatrake mamana
anake tsy natera'eo,
ty manontom-bara tsy an-kahiti'e;
hieng' aze irezay añivo' o andro'eo,

ie ho dagola ampara'e.

¹² Ry fiambesan-engeñe
nonjoneñe tam-baloha'e añe,
ry toe'ay miavakeo,

¹³ ry fitamà' Israeleo, ry IEHOVÀ!
Hene ho salatse ze mieng'Azo;
ho sokireñe an-tane eo
ze mivik' ama'o,
amy te naforintse' iareo t'IEHOVÀ,
loharano veloñey†.

¹⁴ Afaho ry IEHOVÀ le ho jangan-draho;
rombahao vaho ho rombake;
amy te Ihe ro fandrengeako.

¹⁵ Inao ty fatao' iareo amako:
Aia ty tsara' IEHOVÀ,
ampombao mb'etoa henaneo.

¹⁶ Fa naho zaho, tsy nalisa hisitake
ami'ty maha-piarak'ahy ama'o;
tsy nirieko ka ty andron-kankàñe;
arofoana'o te nalange añatrefa'o eo
ze niakatse an-tsoñiko.

¹⁷ Ko mamangebahebak' ahy,
amy te Ihe ro fipalirako
añ'andron-kankàñe.

¹⁸ Ee te ho salareñe o mampisoañe ahy,
fe ko ampisalaren-draho;
ee te hembereñe iereo,
fe ko ampisosoren-draho,
aseseo am'iereo ty andron-kekoheko,
vaho rotsaho an-drotsake roe.

¹⁹ Hoe t'IEHOVÀ amako:
Akia, mijohaña an-dalambei'
o ana' ondatio,
am-piziliha' o mpanjaka' Iehodào
naho am-piengà' iareo eo,

* ^{17:9} Rzs 11:20, 17:20, Iir 7:24, 18:12, 23:17, † ^{17:13} Iir 2:13

naho amo lalambei' Ierosalaimeo;
²⁰ vaho isaontsio ty hoe:
 Janjiño ty tsara' IEHOVÀ
 ry mpanjaka' Iehodà, naho
 ry Iehodà iaby, naho
 ry hene mpimone' Ierosalaimeo,
 ze fonga mimoak' an-dalam-bey retoañe:
²¹ Hoe t'IEHOVÀ: Mitaoa!
 ko minday entañe ami'ty andro Sabotse,
 naho ko mampizilike ndra inoñ'inoñe
 amo lalambei' Ierosalaimeo;
²² Ko añakaran-kilankañe ty anjomba'o ami'ty andro Sabata,
 naho ko mitolon-draha,
 vaho avaho ty andro Sabotse,
 amy nandiliako aman-droae'areoy;
²³ Ie tsy nañaoñe,
 tsy nanokilan-dravembia,
 te mone nampigam-pititia,
 tsy hijanjiñe
 tsy handrambe fanoroañe.
²⁴ Ho tondroke ka te,
 ie mahafitsendreñe ahy,
 hoe t'IEHOVÀ,
 te tsy anjilihañ' entañe amo lalam-bei'
 ty rova toio ami'ty andro Sabotse,
 fe hambenañe ho masiñe
 ty andro Sabotse, tsy hitoloñañe;
²⁵ Ie amy zay himoaham-panjaka
 naho roandriañe o lalam-bei' ty rova toio hiambesatse amy fiambesa' i
 Davidey,
 miningitse sarete naho soavalà,
 ie naho o roandria'eo,
 naho ondati' Iehodao,
 naho o mpimone' Ierosalaimeo;
 vaho nainai'e ho fimoneñañe ty rova toy.
²⁶ Hivotse boak'amo rova' Iehodào,
 naho hirik' am-paripari' Ierosalaime,
 naho boak'an-tane' i Beniamine,
 naho boak'an-tane petrake,
 naho boak'am-bohibohitse,
 vaho boak' atimo aña,
 songa minday enga ho lorañe,
 naho soroñe naho enga mahakama,
 naho tsotse vaho engam-pañandriañañe
 mb'añ'anjomba' IEHOVÀ mb'eo.
²⁷ Fe naho mañamatamsatsa ahy nahareo
 tsy hampiavake o andro Sabatao,
 ami'ty tsy fimoahañe amo lalam-bei' Ierosalaimeo reke-kilankañe
 ami'ty andro Sabotse;
 le hamiañako afo o lalam-beio,
 ze hamorototo o anjomba' Ierosalaimeo, vaho tsy hakipeke.

18

¹ Ty tsara niheo am' Iirmeà boak' am' IEHOVÀ, manao ty hoe: ² Miongaha, mizotsoa mb'an-kiboho' i mpanao valàñe-taney mb'eo, le hampijanjifeko azo eo o entakoo. ³ Aa le nizotso mb'añ'anjomba' i mpanao valàñe taney mb'eo, le nizoeko eo re nifanehak' amo larò'eo. ⁴ Aa ndra mbia'mbia aman-kandra i valàñe am-pità' i mpanao valàñe-taneiy, le namboare'e indraike ho valàñe hafa, ty amy ze natao' i mpanao valàñe taney soa hanoeñe. ⁵ Le niheo amako ty tsara' IEHOVÀ, nanao ty hoe: ⁶ Ry anjomba' Israele,

Aa vaho tsy mete hanoeko ama' areo
hao ty sata' i mpanao valàñe-taney?
hoe t'IEHOVÀ.

Ingo, te hambañe ami'ty lietse
am-pità' i mpanao valàñe taneio,
inahareo an-tañako,
ry anjomba' Israele.

⁷ Ie volañako ami'ty fifeheañe,
naho ami'ty fifelehañe,
t'ie haombotse, naho harotsake,
vaho hahomake,
⁸ fe iambohoa' i fifeheañe nafakoy
o hatsivokara'eo,
le hivalik'amy raty ho nafetsako ama'ey.

⁹ Le ie volañeko i fifeheañe naho ty fifelehañe,
t'ie harafetse naho haoreñe;
¹⁰ f'ie manao raty amasoko eo,
tsy mañaoñe ty feoko;
le haneñenako i soa nitaroñeko
hitahiako azey.

¹¹ Aa le saontsio am'ondate' Iehodào,
naho amo mpimoneñe e Ierosalaimeo,
ty hoe: Hoe t'IEHOVÀ:
Inao, hañajariako hankàñe,
naho ikitrohako hekoheko;
Mitoliha!
songa amy fitsilea'e tsy vokatsey,
vaho ovao o sata' areoo
naho o fitoloña' areoo.

¹² Fa hoe iereo: Famoeam-piay zay;
fa hañavelo amo fisafiria'aio zahay,
sindre hañorike ty fanjeharan'arofo'e*.

¹³ Aa le hoe t'IEHOVÀ:
Añontaneo amo fifeheañe henaneo,
ia ty nahajanjiñe i hoe zay;
toe nanao halatsàñe i somondrara
ana' Israeley.

¹⁴ Hipotak' amy vato an-kivokey hao
ty fanala' i Lebanon?

Mb'ia te nasintake i rano manintsy mikararake boak'añ'ambahiniy?

¹⁵ Fe nandikok' ahy ondatikoo,
nañembok' an-drahare tsy vente'e;
nampitsikapy iareo amo lala'eo,

* **18:12** Fot 8:21, Sab 141:1, Rzs 32:6, Iir 4:4, 7:24, 16:12, 17:9, 23:17, Lke 6:45, Heb 3:12

amo lalan-taoloo,
hitsilea' iareo añ'oloñoloñe ao,
fa tsy an-dàmoke;

¹⁶ Hanoeñe halatsañe ty tane' iareo,
fikosihañe nainai'e;
Songa ho vereñe ty mioza ama'e,
vaho hikofikofi-doha.

¹⁷ Haboeleko manahake t'ie an-tioke
atiñanañe añatrefa' o rafelahi' iareoo;
hiambohoako,
fa tsy hampiatrefako laharañe,
amy androm-peh'ohatsey.

¹⁸ Le hoe iereo,
Antao hikitro-draha am' Iirmeà;
fa tsy ho modo amo mpisoroñe ty Hàke
naho amo mpitokio i tsaray.

Antao hanjevoñe aze am-pameleke,
fa leo raik' amo enta'eo
tsy ho haoñen-tika.

¹⁹ Haoño raho ry IEHOVÀ, vaho
janjiño ty feo' o mpikilily ahikoo.

²⁰ Ty raty hao ty añavahañe ty soa?
amy te nihalia' iareo koboñe ty fiaiko.
Tiahio i niongahako añatrefa'o eo
nitaliliako hasoa,
hampiholiarañe iareo amy haviñera'oy.

²¹ Aa le aseseo mb'an-kerè o keleia'eo, ampikovovoho mb'an-kaozara'
i fibaray mb'eo;
le ampifandalao o ana'eo
o rakembao ho ramavoiñe;
naho ampizevo hivetrake ondati'eo,
vaho ampitrobahem-pibara
an-kotakotak' ao o ajalahi'iareoo.

²² Ee te ho janjiñeñe boak'añ'anjomba' iareo ty kaikaike,
ie ampivovoa'o firimboñan-dahin-defoñe; amy te nihalia' iareo koboñe
hitsepak' ahy,
vaho nañetaha' iareo fandrike
o tombokoo.

²³ Fe arofoana'o, ry IEHOVÀ,
ze hene fikilia' iareo hañè-doza amako,
ko ihevean-kakeo vaho ko faopaohe'o tsy ho añatrefa'o o tahi'iareoo;
f'ie rotsaho aolo'o eo,
ondroho amy andron-kaviñera'oy.

19

¹ Hoe t'IEHOVÀ: Miviliaña zonjo-tane raike amy mpanao valañe-
taney, le mindesa roandria' ondatio, naho zokem-pisoroñe; ² vaho mion-
jona mb'am-bavatane' i Ben-Hinome, mb'am-pimoahañe an-dalambe
atiñanam-b'e, le saontsio eo o tsara ho taroñeko ama'oo, ³ ami'ty hoe:
Janjiño ty tsara' IEHOVÀ,
ry mpanjaka' Iehodào,
naho ry mpimone' Ierosalaimeo;
hoe t'IEHOVÀ' i Màroy,

Andrianañahare' Israele:
 Ingo fa hampomboko hankàñe
 ty toetse toy, hampitsantsàñe
 ze fonga ravembia hijanjiñe aze;
⁴ amy te naforintse' iereo raho,
 naho nampialihe' iereo ty toetse toy,
 naho nañemboke tsotse
 aman-drahare ila'e
 tsy nifohi' iereo ndra o roae' iareoo,
 ndra o mpanjaka' Iehodào;
 nilipore' iereo lio-màliñe ty toetse toy;
⁵ le nandranjia' iareo tamboho t'i Baale, hamorototo o ana' iareoo aña' afo
 ao
 ho soroñañe amy Baale;
 ie tsy nililieko, tsy nitaroñako
 naho tsy nimoak'am-pitsakoreakeo ao.
⁶ Aa le ho tondroke ty andro,
 hoe t'IEHOVÀ,
 te tsy ho tokaveñe ty hoe Tofete
 ty toetse toy, ndra ty hoe
 Vavatanen' ana' i Hinome,
 te mone ty Vavatanem-panjamanaña;
⁷ Le ho koahoko ami'ty toetse toy
 ty fanoroan-keve' Iehodà
 naho Ierosalaime;
 le hampikorovoheko fibara
 aña'atrefa' o rafelahi' iareoo,
 naho am-pitá' o mipay ty fiai' iareoo;
 vaho ho fahanako ami'ty lolo' iareo o voron-dikerañeo
 naho o bibi'ty tane toio;
⁸ naho hanoeko halatsaña ty rova toy,
 naho fikosihañe;
 le hene ho vereñe ze miary eo vaho
 hikosike ty amo hekoheko iabio;
⁹ le hampikamaeko iareo
 ty sandri' o ana-dahi'eo naho
 ty nofo' o anak'ampela'eo,
 naho songa hikama ty nofo' o rañe'eo, amy fañarikatohañey naho amy
 fanjirañey, vaho amy haloviloviañe hanoe' o rafelahi'e mipay ty
 fiai' iareooy.
¹⁰ Ie amy zao, jeñaho am-pahaisaha' indaty mindre ama'o rey i
 zonjoñey, ¹¹ vaho ano ty hoe:
 Hoe t'IEHOVÀ' i Màroy:
 Hanahake zay ty hampidemohako
 ondaty retoa naho ty rova toy,
 hambañañe ami'ty fampijeñafañañe
 ty zonjòm-panao valàñe tane,
 t'ie tsy ho lefe amboareñe ka;
 le halenteke e Tofete ao iereo
 amy t'ie tsy ho aman-tanem-pandeveñañe.
¹² Zay ty hanoako ami'ty toetse toy,
 hoe t'IEHOVÀ,
 naho amo mpimone'eo,

soa te hampanahafeko amy Tofete
ty rova toy,
13 le ho hambañe amy Tofete
o anjomba' Ierosalaimeo, naho
o anjombam-panjaka' Iehodà fa vinetao,
toe ze hene anjomba nañemboke amo valobohòn-dikerañeo,
vaho nidoañañe enga-rano
amo 'ndrahare ila'eo.

14 Ie pok'eo boake Tofete t'Iirmeà, amy nañiraha' IEHOVÀ aze hitoky; le nijohañe an-kiririsa' i anjomba' IEHOVÀ eo nanao ty hoe am'ondaty iabio:
15 Hoe t'IEHOVÀ' i Màroy, Andrianañahare' Israele: Inao, te hafetsako
ami'ty rova toy naho amo tanà'e iabio o haliforan-kankàñe nitseizakoo;
amy t'ie nampigan-kàtoke, tsy nijanjiñe o entakoo.

20

1 Ie jinanji' i Paskore* ana' Imere†, mpisoroñe, loham-pifehe añ' Anjomba' IEHOVÀ ao, i nitokie' Iirmeà, **2** le nampandafa' i Paskore t'Iirmeà, vaho najo'e an-dangoke an-dalam-bei' i Beniamine añ' Anjomba' IEHOVÀ ao. **3** Ie amy loaf' àndroy naho nakare' i Paskore amy longòkey t'Iirmeà, le nanoe' Iirmeà ty hoe, Tsy Paskore ty nanoe' IEHOVÀ i tahina'oy fa Magòremisabibe‡. **4** Fa hoe t'IEHOVÀ: Ingo hanoeko harevendreveñañe ami'ty vata'o naho amo hene rañe'oo rehe; le ho isam-pihaino'o ty ho korovohem-pibaran-drafelahi' iareo, naho fonga hatoloko am-pitàm-panjaka' i Bavele t'Iehodà naho hasese'e an-drohy mb'e Bavele mb'eo vaho ho zevoñe'e am-pibara. **5** Hatoloko iareo ze hene haja' ty rova toy; o havokara'e iabio, naho o raha sarobili'e iabio, eka, ze fonga vara' o mpanjaka' Iehodà ty hatoloko am-pità' o rafelahi'eo; ho kopahe' iereo, ho rambese' iereo vaho hendese' iareo mb'e Bavele aña. **6** Le ihe, Paskore, naho ze fonga añ' anjomba'o ao ro hasese mb'am-pandrohizam-b'eo; le ho avy e Bavele aña rehe, naho hihomake aña, vaho haleveñe aña, Ihe rekets' o rañe'o iaby nitokia'o entam-bilañe.

7 Ry IEHOVÀ, nazi'o raho le nimeteako, niambotraha'o, vaho nahagioke; zaho fitohàfañe lomoñandro, mañabiañe ahy ie abikey.

8 Ie mivolan-draho le mitazataza, mikoiake ty hoe:

Joy naho fandrotsahañe; aa le sirikaeñe naho injeañe lomoñandro raho ty amy tsara' IEHOVÀ

9 Ie anoeko ty hoe, tsy hivolañe aze raho, tsy hirehak' ami'ty tahina'e ka, toly ndra afo ty mihiboboke an-troko, migabeñe an-taolako ao, naho mokotse avao raho t'ie tanañe ao, vaho tsy feleko.

10 Tsinanoko ty tangogo' i màroy, mangebahebake mb'atia mb'etia: Manirikà, eka ho sirikae'ay; mamandroñ'ahy o rañeko iabio ke hitsikapy: He ho fañahien-dre, hoe iereo,

* **20:1** Paskore: mampigaraboke loake; hafotia † **20:1** Imere: misaontsy; añondry ‡ **20:3** Magoremisabibe: iarisehoa' ty tahotse

Toe ho felen-tika, ho valen-tikañe.

¹¹ Fe mindre amako t'IEHOVÀ
hoe fanalolahy;
aa le hitsikapy o mpampisoañe ahio,
naho tsy hahalefe,
akore ty ho fisalara' iareo
kanao tsy zary vaho ho fañonjirañe
tsy ho haliño kitro katroke.

¹² Ry IEHOVÀ' i Màroy,
ry Mpitsoke o vantañeo,
Mpivazoho añ'ova naho añ'arofo ao,
ehe te ho treako ty famalea'o fate iareo;
fa Ihe ty nampibentarako ty amako.

¹³ Sabò t'IEHOVÀ, rengeo t'IEHOVÀ;
fa hinaha'e am-pità' o lo-tserekeo
ty fiai' o rarakeo.

¹⁴ Fatse i andro nahatoly ahikoy;
ehe te tsy ho tahieñe
i andro niterahan-drenekoy.

¹⁵ Ozoñeñe t'indaty ninday talily
an-draeko, nanao ty hoe:
Nisamake lahilahy rehe, nahafale aze.

¹⁶ Ehe te hanahake o rova narotsa' IEHOVÀ tsy mete nisolohoo indaty zay;
Ee t'ie hijanjiñe kaikaike te maraiñe,
naho hazolava te tsipinde-mena.

¹⁷ Amy t'ie tsy vinono'e boak'
an-koviñ' ao;
soa te ho ni-kiboriko ty reneko,
ie nainai'e ho ni-bei-troke.

¹⁸ Aa vaho ino ty niakarako
i hoviñey hahatreavako
haemberañe naho hasotriañe,
hampibotsehan-kasalarañe o androkoo?

21

¹ Ty tsara' IEHOVÀ am'Iirmeà, ie nirahe' i Tsidkià ama'e t'i Paskore ana'
i Malkià* naho i Tsefanià† ana' i Maaseia‡ mpisoroñe nanao ama'e ty hoe:

² Ehe, mihalalia ho anay am' IEHOVÀ; amy te maname aly aman-tika t'i
Nebokadnetsare§ mpanjaka' i Bavele*; hera hitoloñe ho antika t'IEHOVÀ
manahake i hene fitoloña'e fanjaka rezay, hampihakañe aze aman-tika.

³ Le hoe t'Iirmeà am' iereo: Ty hoe ty ho saontsie' areo amy Tsidkià: ⁴ Hoe
t'IEHOVÀ Andrianañahare' Israele:
Inao! hafoteko o fialiañe

ampità' areoo,
o fialia' areo amy mpanjaka' i Baveleio,
naho amo nte-Kasdy† mamalañe
anahareo alafe' o kijolioo,
fa hatontoko an-drova atoy iereo.

⁵ Le Zaho avao ty hialy ama' areo

* **21:1** Malkia: Ià mpanjakako, mpañeretse ahy † **21:1** Tsefanià: IEHOVÀ ro tsikoko ‡ **21:1**
Maaseia: ty fitoloña' IEHOVÀ § **21:2** Nebokadnetsare: Ranomaso, hoihoi-jaka * **21:2** Bavele:
rapadrapake, fivalintsingoahañe; † **21:4** Kasdy: hoe kokolampa; hoe malaso

am-pità' natorakìtsy naho
 an-tsirañe maozatse, naho
 an-kaboseke mileveleve,
 vaho am-pifombo miforoforo.

⁶ Le ho lafaeko o mpimone' ty rova toio,
 ndra ondaty ndra biby;
 hampihomahe' ty angorosy jabajaba.

⁷ Ie heneke, hoe t'IEHOVÀ,
 le haseseko am-pità' i Nebokadnetsare
 mpanjaka' i Bavele naho
 am-pità' o rafelahi'eo, naho
 am-pità' o mipay ty fiai'eo
 t'i Tsidkià mpanjaka'Iehodà
 naho o mpitoro'eo, naho
 ze ondati' an-drova atoy sinisa' i
 angorosiy naho i fibaray,
 naho i hasalikoñaey;
 vaho ho lafae'e an-kasiom-pibara,
 le tsy hihevea'e,
 tsy hiferenaiña'e,
 vaho tsy hitretreza'e.

⁸ Le hoe ty hatao'o am'ondaty retoa:
 Hoe ty nafè' IEHOVÀ:
 Hehe te apoko aolo' areo eo
 ty lalan-kaveloñe naho
 ty lalam-pikoromahañe.

⁹ Ze tambatse an-drova atoy
 ho vonoe' ty fibara naho ty kerè,
 vaho ty angorosy;
 fe ho veloñe ze miakatse,
 miambane amo nte-Kasdy
 mañarikatok' anahareoo,
 le ho tamben-ali'e ty fiai'e.

¹⁰ Fe nampiatrefeko ami'ty rova toy
 ty tareheko ho hekoheko fa tsy hasoa, hoe t'IEHOVÀ;
 ie hatolotse am-pità' i mpanjaka' i
 Baveley, vaho ho forototoe'e amañ'afo.

¹¹ Le i anjombam-panjaka' Iehodày,
 janjiño ty tsara' IEHOVÀ;

¹² Ry anjomba' i Davide, hoe t'IEHOVÀ:
 Ano ty hatò boak'andro,
 vaho avotsoro am-pità' ty
 mpamorekeke i nikamereñey,
 tsy mone hionjoñe hoe afo ty habosehako,
 hamorototoako tsy ho lefe vonoeñe,
 ty amo haloloam-pitoloña' areoo.

¹³ Hehe te miatrek'azo raho
 ry mpimoneñe am-bavatane ao,
 hoe t'ie vato a montoñe ey,
 hoe t'IEHOVÀ;
 amy ty fatao' areo ty hoe:
 Ia ty hizotso haname anay?

ndra ia ty himoak' añ-akiba'ay atoa.

¹⁴ Toe ho liloveko ty amo vokam-pitoloña' areoo,
hoe t'IEHOVÀ;
naho hamiañako afo i ala'ey,
vaho fonga ho tomontoñe
ze mañohok' aze.

22

¹ Hoe t'IEHOVÀ: Mizotsoa mb'añ' anjombam-panjaka' Iehodà mb'eo,
vaho saontsio eo o entañe zao: ² ami'ty hoe: Janjiño ty tsara' IEHOVÀ,
ry mpanjaka' Iehodà miambesatse am-piambesa' i Davide, ihe naho
o mpitoro'oo vaho ondati'o mimoak' an-dalam-bey retoañe. ³ Hoe
t'IEHOVÀ: Ano ty hatò naho ty havantañañe, naho avotsoro am-pità'
o mpamorekekeo o nikamerañe, naho ko isengea'o hery, ko mijoy ty
renetane, ndra ty bode-rae, ndra ty vantotse, vaho ko mampiori-dio-
màliñe an-toetse atoy. ⁴ Aa naho toe anoe' areo i tsaraeñey, le himoak'
amo lalambei' ty anjomba toio o mpanjaka hiambesatse am-piambesa'
i Davideo, hiningitse sarete naho soavala, ie naho o mpitoro'eo naho
ondati'eo. ⁵ F'ie tsy mañaoñe o tsara zao le hifantako am-batako, hoe
t'IEHOVÀ, te hangoakoake ty anjomba toy. ⁶ Aa hoe t'IEHOVÀ amy anjomba'
i mpanjaka' Iehodà:

Gilade* amako rehe,
ty andengo' i Libanone†;
f'ie toe hanoeko fatrañe,
rova tsy amam-pimoneñe.

⁷ Ampihentseñako mpandrotsake,
songa amam-pialiañe;
ho fira'e' iereo o mendoraveñe soao,
vaho havokovoko' iareo añ' afo ao.

⁸ Fifeheañe maro ty hiary ami'ty rova toy, naho hifanao aman-drañe'e ty
hoe:

Aa vaho akore o nanoe' IEHOVÀ
ty rova jabajaba toio?

⁹ Le hanoiñe ty hoe iereo:
Amy t'ie nifary ty fañina' IEHOVÀ
Andrianañahare' iareo,
niambane aman-drahare ila'e,
nitorioñe iareo.

¹⁰ Ko roveta' areo ty mikoromake,
ko mangololoike ho aze;
fe poñafo ty hoihoy i misesey,
amy te tsy himpoly ka,
tsy ho isa'e ka i tane nihirifa'ey.

¹¹ Fa hoe t'IEHOVÀ
ty amy Salome‡ ana' Iosià,
mpanjaka' Iehodà,
i nandimbe an-drae'e Iosiay,
i nionjoñe boak' ami'ty toetse toiy:

t'ie tsy himpoly atoy ka;
¹² fa amy tane aneseañ' aze ho miprohiy
ty hikoromaha'e,

* ^{22:6} Gilade: talily mitoboro, atiñana' Iordane. † ^{22:6} Libanone: Fidadañam-bohitse abo e Pilistý ‡ ^{22:11} Salome: fonitse; mete

vaho tsy ho isa'e ka ty tane toy.

¹³ Hankàñe t'indaty mandranjy
ty anjomba'e tsy an-kavantañañe,
naho o efe'eo tsy an-katò,
mampitolom-pitoroñe tsy an-tambe, vaho tsy atolo'e aze o karama'eo;
¹⁴ I manao ty hoe, hatratrañako
ty trañoko naho ampalalàheko o efe'eo;
le anampaha'e lalan-kedekede,
naho temere'e mendoraveñe o rindri'eo,
vaho lokoe'e mena mañabasà.

¹⁵ Mahafehe hao rehe kanao
mpisenge mendoraveñe?
Tsy nikama naho ninoñe hao o rae'o
nitoloñe an-katò naho an-kahiti'e
vaho nierañerañe?

¹⁶ Nitaroñe'e ty enta' o rarakeo
naho o poi'eo; nisoa henane zay.
Tsy zay hao ty faharendrehañe ahy?
hoe t'IEHOVÀ.

¹⁷ Toe ami'ty fihàña'o avao
o fihaino'oo naho ty arofo'o,
naho ami'ty fampiorihan-dio-màliñe naho famorekekeñañe vaho fika-
tramoñañe.

¹⁸ Aa le hoe t'IEHOVÀ ty am' Iehoiakime
ana' Iosià, mpanjaka' Iehodà:
tsy hirovetañe ty hoe:
Hoihoy ty rahalahiko,
Hoihoy ty rahavave!

Tsy hangololoia'iareo ty hoe:
Aa! ry talè, ndra, Aa! ty enge'e!

¹⁹ Ie haleveñe am-pandeveñam-borike ao
ho kozozoteñe vaho havokovoko alafe' o lalam-bei' Ierosalaime ao.

²⁰ Mionjona mb'e Libanone
naho mikoiakoiaha,
poñafo e Basane§ aña ty fiarañanaña'o;
vaho mangololoia e Abarime* aña
fa fonga demoke o sakeza'oo.

²¹ Nivolañe ama'o raho ami'ty firaoraoa'o
fa hoe rehe, Zaho tsy hitsanoñe,
sata'o tamy naha ajalahy azoy
ty tsy nañaoñe ty feoko.

²² Ho faopaohe' i tiokey ze mpiara'o iaby,
le homb' ampandrohizañe aña
o sakeza'oo;
vaho ho meñare'o naho salare'o ze fonga haratia'o.

²³ Ry mpimoneñe e Libanone ao,
mpikafitse amo mendorave'eo,
akore ty fatariha'o naho mivovo ama'o o fikoritahañe manahake
ty fitsongoan' ampela.

²⁴ Kanao velon-dRaho hoe t'IEHOVÀ,
Ndra te nibangem-pitombok' an-

§ **22:20** Basane: am-pamotsy ao, ami'ty nife * **22:20** Abarime: Fizilihañe; Mpijoñe

tañan-kavanako eo t'i Koniaho[†]
 ana' Iehoiakime, mpanjaka' Iehodà,
 le ho nasintako amako,
²⁵ vaho ho natoloko am-pitâ'
 o mipay ty fiai'oo,
 eka! am-pitâ' o ihembaña'oo,
 toe am-pitâ' i Nebokadnetsare
 mpanjaka' i Bavele,
 vaho am-pitâ' o nte-Kasdio.
²⁶ Le hahifiko mb'an-tane
 tsy nisamaha'o aña,
 ihe naho ty rene'o nahatoly azo;
 le aña ty hihomaha'o.
²⁷ Fe i tane salalae' iereo himpoliañey, tsy himpolia' iereo ka.
²⁸ Ondaty sirikaeñe hao ty Koniaho,
 sinihara jeñake?
 Karabiba tsy paiañe?
 Akore te nariañe aña,
 ie naho o amori'eo,
 mb'an-tane tsy fohi' iareo?
²⁹ O ry tane, ry tane, ry tane!
 Janjiño ty tsara' IEHOVÀ.
³⁰ Hoe t'IEHOVÀ:
 Sokiro tsy ho aman'anake t'indaty tia,
 ondaty tsy hiraorao añ'andro'e;
 amy t'ie tsy ho aman-dahilahy o
 tiri'eo ze hierañe am-piambesa'e,
 am-piambesa' i Davide eo,
 ndra hifehe e Iehodà ao.

23

¹ Hankàñe amo mpiarake manjamañe naho mampibaibay o añondrim-piandrazakoo*! hoe t'IEHOVÀ. ² Aa le hoe t'IEHOVÀ Andrianañahare' Israele amo mpiarake mamahañe ondatikoo: Fa nampivarakaihe' areo i lia-raikoy, vaho rinoa' areo aña; tsy sinari' areo; aa le hisariako ty amo haloloam-pitoloña' areo, hoe t'IEHOVÀ. ³ Le zaho ty hanontoñe ty sehanga' i lia-raikoy boak' amo fifeheañe nandroahako iareoo, le hampoliko mb'an-golobo'e mb'eo; vaho hiraorao vaho hanaranake. ⁴ Le hampitroareko mpiarake hisary iareo naho hamahañe iareo[†]; ie tsy ho hembañe ka, tsy hiroreke, vaho tsy ama'e ty hirereke, hoe t'IEHOVÀ.
⁵ Ingo ho tondroke ty andro, hoe t'IEHOVÀ,
 t'ie hampitirieko amy Davide
 ty tora-mionjo-bantañe,
 ie ty ho mpanjaka hifeleke naho hiraorao,
 vaho hizaka amy taney an-katò
 naho an-kavañonañe.
⁶ Ho rombaheñe amo andro'eo t'Iehodà,
 vaho hiaiñañoleñañe t'Israele;
 le zao ty tahina'e hikanjiañe aze:
 IEHOVÀ Havantaña'ay.

* 22:24 Koniaho: Haozara' IEHOVÀ * 23:1 Iek 34:6,12, Zek 10:2, Mat 9:36, Jao 10:12 † 23:4 Iir 3:14-17, Mik 2:12, 7:14

⁷ Aa le ingo ho tondroke ty andro hoe t'IEHOVÀ, te tsy hanoe' iereo ty hoe: Kanao veloñe t'IEHOVÀ nañakatse o ana' Israeleo boak' an-tane' Mitsraime aña; ⁸ fe: Kanao veloñe t'IEHOVÀ nañavotse naho niaolo ty tirin' anjomba' Israele boak'an-tane avaratse aña, hirik'amo hene fifeheañe nandroahako iareo, le himoneña' iareo ty tane'iareo.

⁹ Aa ty amo mpitokio:

Rofotse ty troko aña'ovako ao,
miripidripike iaby o taolakoo,
hoe te ondaty jike,
manahake t'indaty nimamoe' ty divay,
ty am' IEHOVÀ naho o tsara'e masiñe.

¹⁰ Amy te manitsike i taney
o mpañakarapiloo;
itañia' i taney i fatsey,
mikantañe o fiandrazañe am-patrambeio; mengoke am-pañaveloañe
iareo

naho välañe an-kaozarañe;

¹¹ Tsy aman-Kàke
ndra mpitoky ndra mpisoroñe;
eka, ndra aña'akibako ao ty nahatreavako
ty haloloa' iareo, hoe t'IEHOVÀ.

¹² Aa le halama o lala' iareoo,
haronje ami'ty haleñe iereo
vaho hivarinjonjok' ao;
fa hafetsako am' iereo ty hankàñe,
eka, ty taom-pitilihañe iareo,
hoe t'IEHOVÀ.

¹³ Mbore nahatre ahativañe amo mpisoro'
i Someroneo[‡] raho:
i Baale ty fitokia' iareo,
mampanan-kakeo Israele ondatikoo.

¹⁴ Toe vata'e haloloañe ty nitreako amo mpitoky e Ierosalaimeo:
mpifandrañaotse,
mpañavelo an-dañitse,
ampahozare' iareo ty fità' o lo-tserekeo,
soa tsy eo ty hibalintoa
amy hatsivokara'ey;

songa hanahake Sedome[§] amako iereo,
manahak' i Amorà* o mpimone'eo.

¹⁵ Aa le hoe t'IEHOVÀ' i Màroy
ty amo mpitokio:
Ingo hifahanako vahontsoy,
ampinomeko manahin-afero;
fa boak' amo mpitoki' Ierosalaimeo ty namelaran-katemboañe nahatsit-
sike ty tane.

¹⁶ Hoe t'IEHOVÀ' i Màroy:
Ko haoñe' areo ty lañona' o mpitoky
mitoky ama' areoo,
o mitarik' anahareo mb'an-koakeo;
ty aroñaron-tro'e avao ty saontsie' iereo f'ie tsy boak'am-palie' IEHOVÀ.
¹⁷ Mitolom-panao ty hoe amo malaiñe

[‡] 23:13 Somerone: ankaboam-pijilovañe [§] 23:14 Sedome: ty tsiko' iareo * 23:14 Amorà:
Mpiola

Ahio iereo: inao ty tsara' IEHOVÀ:
 Hierañerañe nahareo;
 naho amo manjotik' am-panjeharan-tro'eo ty hoe:
 Tsy ho tendrek' ama' areo
 ty hekoheko.

¹⁸ Fa ia ty nijohañe am-pivori'
 IEHOVÀ ao hahaoniñe,
 hijanjiñe o tsara'eo?
 Ia ty nañaoñe i nafè'ey,
 naho nahafitsendreñ'aze?

¹⁹ Ingo fa nionjoñe am-piforoforoa'e
 ty tio-bei' IEHOVÀ,
 eka, hiviombio an-doha' o lo-tserekeo ty tangololahy.

²⁰ Tsy himpoly ty haviñera' IEHOVÀ
 ampara' t'ie mahaheneke,
 ampara' te fonire'e i satrie'ey,
 ho fohi' areo do'e zay
 amo andro honkahonka'eo[†].

²¹ Tsy nafantoko o mpitoky retoa,
 f'ie mihitrihity;
 tsy nivolañeko, f'ie mitoky avao[‡].

²² Aa naho nijohañ' ampivoriko ao,
 le ho nampijanjiñe' iareo ondatikoo
 o entakoo, himpolia'iareo
 boak'amy lalan-kelokelo'iareoy
 vaho hiamboho'a' iareo o sata' rati' iareoo,

²³ Andrianañahare atoañe avao hao raho, hoe t'IEHOVÀ,
 fa tsy Andrianañahare aña ka?

²⁴ Eo hao ty mahafietake
 am-pipalira'e ao tsy ho treako?
 hoe t'IEHOVÀ.
 Tsy manitsike i likerañey naho
 ty tane toy hao raho? hoe t'IEHOVÀ.

²⁵ Fa tsinanoko ty saontsi' o mpitoky
 mpandañitse ami'ty añarakoo, ami'ty hoe:
 Nañinofy raho, nañinofy raho.

²⁶ Ampara' te mb'ia te ho an-tro'
 i mpitoky vilañey
 ty hitokia'e vande,
 ty hitoky ty famañahian-tro'e avao.

²⁷ Fisafiria' iareo ty hampañaliñoañe ondatikoo ty añarako amo nofi' iareo
 ifampisaontsia' iareoo,
 manahake ty nandikofa' o roae'eo
 ty añarako ty amy Baale.

²⁸ Ty mpitoky mañinofy,
 apoho hitalily i nofi'ey;
 le ty manañe i entakoy, soa re te
 hitaroñe am-pigahiñañe.
 Inoñ' ami'ty ampemba hao ty ahetse? hoe t'IEHOVÀ;

²⁹ Tsy manahake ty afo hao o volakoo? hoe t'IEHOVÀ;
 naho hoe ana-bato mampikotekoteke

[†] 23:20 Iir 30:24, Dan 12:10 [‡] 23:21 Iir 14:14-15, 23:32, 28:15, 29:9

ty lamilamy?

³⁰ Aa le inao! hejeko o mpitokio, hoe t'IEHOVÀ,
ie mifampikametse o entakoo.

³¹ Inao hatreatreko o mpitokio,
hoe t'IEHOVÀ
ie mañetseke ty famele'e hitoky ty hoe: Hoe ty tsara'e.

³² Inao! toe hejeko o mitoky
nofin-dremborakeo, hoe t'IEHOVÀ,
ie mitalily vaho mampandilatse ondatikoo amo vande'eo
naho amo fikanifoha'eo;
ie tsy niraheko, tsy linilikò;
mbore tsy mahasoa ondaty retoa,
hoe t'IEHOVÀ.

³³ Aa naho manao ty hoe ama'o ondaty retoa, ndra ty mpitoky, ndra
ty mpisoroñe: Ino ty nafè' IEHOVÀ? le isaontsio ty hoe, Fetse inoñe! Fa
ho farieko nahareo, hoe t'IEHOVÀ. ³⁴ Le ty mpitoky ndra mpisoroñe ndra
ze ondaty mete hanao ty hoe: Ty nafè' IEHOVÀ; toe ho lloveko rekets' i
anjomba'ey indatiy. ³⁵ Fe songa hifanaontsy ty hoe aman-drañe'e naho
aman-drahalihi'e: Ino ty navale' IEHOVÀ? ndra Ino ty nitsarae' IEHOVÀ?
³⁶ fe tsy ho tiahi' areo ty nafè' IEHOVÀ; fa sambe hisaontsy ty enta'e avao
ondatio ho fetse, ie nimengohe' areo[§] ty tsaran' Añahare veloñe, IEHOVÀ'
i Måroy, Andrianañaharentikañe. ³⁷ Ty hoe ka ty hatao' areo ami'ty
mpitoky: Ino ty natoi' IEHOVÀ azo? naho Ino ty nitsarae' IEHOVÀ? ³⁸ Fe
anoe'areo ty hoe: Ty nafè' IEHOVÀ; le hoe t'IEHOVÀ: kanao taroñe' areo
ty hoe: Ty nafè' IEHOVÀ, ie nafantoko ama' areo ty hoe: Tsy ho saontsie'
areo ty hoe: Ty nafè' IEHOVÀ; ³⁹ Ingo toe handikofako nahareo, haitoako
tsy ho añ' atrefako eo rekets' i rova natoloko aman-droae' areoy; ⁴⁰ vaho
hapoko ama' areo ty injé tsy ho modo naho ty hasalarañe kitro katroke tsy
ho haliño.

24

¹ Nitoroa' IEHOVÀ, te ingo ty haroñe roe pea sakoañe napok' aolo'
i anjomba' IEHOVÀ y eo; ie fa nasese' i Nebokadnetsare mpanjaka' i
Bavele boak' Ierosalaime ao mb' am-pandrohizañe aña t'Iekonià* ana'
Iehoiakime mpanjaka' Iehodà naho o ana-dona' Iehodào, rekets' o
mpandranji'eo naho o mpanefe'eo, vaho nendese'e mb'e Bavele mb'eo.

² An-karoñe raik' ao ty sakoañe fanjaka, manahake o sakoañe matoeo,
vaho sakoañe vata'e raty, tsy mete kamaeñe, o amy haroñe ila'eio.

³ Le hoe t'IEHOVÀ amako: Ino o isa'o eeo, Iirmeà? Aa hoe raho, Sakoañe;
ty sakoañe soa, toe fanjaka; naho ty raty, vata'e lo tsy ho kamaeñe ami'ty
haratia'e.

⁴ Le niheo amako ty tsara' IEHOVÀ nanao ty hoe: ⁵ Hoe t'IEHOVÀ,
Andrianañahare' Israele, hambañe amy sakoañe soa reroy ty fisareako
o ana' Iehodà nampiakareko an-toetse toy mb'an-tane' o nte-Kasdioo
ho ami'ty hasoa. ⁶ Fa hapetako am' iereo an-kasoa o masokoo, naho
hapoliko mb'an-tane atoy, vaho haràfiko fa tsy harotsako; hamboleko
fa tsy hombotako. ⁷ Hitolorako arofo hahafohiñe ahy, te Zaho IEHOVÀ;
le ho ondatiko iereo, vaho ho Andrianañahare' iareo raho; amy t'ie
himpoly amako an-kaliforañ' arofo. ⁸ Le ty amo sakoañe raty tsy mete
kamaeñe; hoe t'IEHOVÀ: Toe haitoako t'i Tsidkià, mpanjaka' Iehodà, naho

§ 23:36 Isa 24:5, Dan 7:25 * 24:1 Iekonia: fihentseñañe, figahiña' IEHOVÀ

o roandria'eo naho ty sehanga' Ierosalaime, o napok' an-tane atoio vaho o mpañialo an-tane Mitsraimeo. ⁹ Hanoeko fangebahebahañe amo fifehea' ty tane toy iabio ho an-kaloloañe; ho inje naho oha-drehake, fikizahañe naho fatse, amy ze hene toetse handroahako iareo. ¹⁰ Vaho hahitriko am' iereo ty fibara naho ty kerè naho ty angorosy ampara' t'ie mongotse amy tane natoloko iareo naho an-droae' iareoy.

25

¹ Ty tsara nimb' am' Iirmeà ty amo hene ondati' Iehodào amy taom-paha' efa' Iehoiakime ana' Iosia, mpanjaka' Iehodà, ty taom-baloha' i Nebokadnetsare mpanjaka' i Bavele; ² vaho nitseize' Iirmeà mpitoky amy ze fonga ondati' Iehoda naho amy ze hene mpimone' Ierosalaime, ty hoe:

³ Sikal' amy taom-paha folo-telo-ambi' Iosia, ana' i Amone, mpanjaka' Iehodà, ampara' ty andro toy, i taoñe roapolo telo amby rezay, le niheo amako ty tsara' IEHOVÀ, naho nitaroñeko ama' areo, eka boak' andro naho beteke te nitaroñe, f'ie tsy nañaoñe. ⁴ Toe nafanto' IEHOVÀ ama' areo i mpitoky mpitoro'e iaby rezay, nañampitso te niraheñe—f'ie nihiritsiritse avao, tsy nanokilan-dravembia hijanjiñe— ⁵ nanao ty hoe: Songa mimpolia, boak' ami'ty fitsilea'e raty, naho ami'ty haratia' o sata'eo, vaho imoneño i tane natolo' IEHOVÀ anahareo naho aman-droae' areo, ho nainai'e tsy modo, ⁶ le ko mañean-drahare ila'e hitoroñañe naho hitalahoañe, le ko mampibosek' ahy amo satam-pità' areoo, vaho tsy ho lafaeko. ⁷ F'ie tsy nañaoñ' ahy, hoe t'IEHOVÀ; te mone nampiforoforo ahy amo satam-pità' areoo ho ami'ty fiantoañe.

⁸ Aa le hoe t'IEHOVÀ i Måroy: Amy te tsy midare o volakoo nahareo, ⁹ le inao te hampañitrifako ze hene fifokoañe avaratse aña naho i Nebokadnetsare mpanjaka' i Bavele, mpitorokoy vaho hendeseko hiatreatre ty toetse toy naho o mpimoneñe ama'e ao naho o fifeheañe mañohok' azeo, le hampangoikoiañe ho halatsàñe naho fikosasahañe vaho ho kòake nainai'e. ¹⁰ Mbore hajiko tsy ho am' iereo ty feon-kafaleañe naho ty feompirebehañe, ty feom-pañenga-valy naho ty feon-engangao, ty feom-batom-pandisañe, naho ty hazavàm-païlo. ¹¹ Ho koake iaby i taney, naho ho halatsàñe vaho hitoroñe ty mpanjaka' i Bavele fitompolo taoñe o fifeheañe retoa. ¹² Ie heneke i taoñe fitompolo rezay, le ho liloveko ty mpanjaka' i Bavele, naho i fifehea'ey, naho ty tane' o nte-Kasdio hoe t'IEHOVÀ ty amy hakeo' iareo; vaho hanoeko fangoakoahañe kitro katroke. ¹³ Le hafetsako amy taney ze hene volañe tsineiko ama'e, ze sinokitse ami'ty boke toy, ze nitokia' Iirmeà amo fifeheañe iabio. ¹⁴ Fifeheañe maro naho mpanjaka foloay ro hañondevo iareo; vaho havaleko am'iereo o sata' iareoo naho ty fitoloñam-pità' iareo.

¹⁵ Hoe t'IEHOVÀ Andrianañahare' Israele, amako; Rambeso an-tañako ty fitovin-divaim-pifomboko toy, vaho ampinomo ze hene fifeheañe añirahako azo. ¹⁶ Le hikama iereo vaho hivembèñe mb'atia mb'etia, hoe dagola, ty amy fibara hahitriko am'iereo.

¹⁷ Aa le rinambeko am-pità' IEHOVÀ i fitoviyy vaho songa nampikamaeko o fifeheañe nañiraha' IEHOVÀ ahio: ¹⁸ Ierosalaime naho o rova' Iehodà naho o mpanjaka'eo naho o roandria'eo, hanoeñe fianto, halatsàñe, fikosihañe, vaho fatse; le fa ie henaneo; ¹⁹ i Parò* mpanjaka' i Mitsraime, naho o mpitoro'eo naho o roandria'eo, vaho ze hene ondati'e; ²⁰ naho ondaty mifamorohotse iabio; o mpanjaka' i Oze† iabio, naho o mpanjaka' ty tane'

* ^{25:19} Parò: mampiparaitake; ty mpijoy † ^{25:20} Oze: anatse; tsara

o nte-Pilistò‡ iabio, naho i Askelone§, i Azà*, i Ekrone†, naho ty sehanga' i Asdode‡; ²¹ i Edome naho i Moabe vaho o ana' i Amoneo; ²² o mpanjaka' i Tsore§ iabio naho o mpanjaka' i Tsidone* iabio, naho ze hene mpanjaka' o tokonose alafe' i riakeio; ²³ i Dedane† naho i Temà‡ naho i Boze§, naho o mañitsike ty olo-maroi'e iabio; ²⁴ o mpanjaka' i Arabe* iabio vaho o mpanjaka o fikokoa-mitraok' an-dratraratra aña iabio; ²⁵ o mpanjaka' i Zimry† iabio, o mpanjaka' i Elame‡ iabio naho o mpanjaka' o nte-Maday§ iabiooo; ²⁶ o mpanjaka avaratse aña iabio, ty marine naho ty lavitse, ty raike mitraok' ami'ty ila'e; vaho ze kila fifehea' ty tane toy ambone' tane atoy; le handimbe finomañe am' iereo ty mpanjaka' i Sesake*.

²⁷ Le hoe ty ho tseize'o am' iereo: Hoe t'IEHOVÀ' i Màroy, i Andrianañahare' Israeley: Minoma naho mimamoa naho mandoà vaho mikorovoha, amy t'ie tsy hiongake ka ty amy fibara' hahitriko ama' areoy.

²⁸ Ie amy zao, naho ifoneña' iareo tsy handrambe i fitovi am-pità'o hinoma'e, le hoe ty hanoe'o am' iereo: Hoe t'IEHOVÀ' i Màroy: Toe hikama' areo. ²⁹ Heheke te mamototse minday hankàñe ami' ty rova tokaveñe ami'ty añarako toy raho, Hapoke tsy ho lilloveñe ka hao nahareo? Toe tsy ho hahàñe amy fandilovañey; amy te ho tokaveko fibara ze kila mpimone' ty tane toy, hoe t'IEHOVÀ' i Màroy. ³⁰ Aa le itokio o entañe iaby zao, vaho ano ty hoe:

Hirohake boak'andikerañe aña t'IEHOVÀ,
naho hipoña-piarañanañañe boak'
añ' akiba'e miavake ao;
hitroña'e i lia-rai'ey;
hipazake manahake o mpandia valobokeo
amo kila mpimone' ty tane toio;

³¹ Inay ty pazake pak'añ'olo' ty tane toy,
fa manan-kabò amo kilakila' ndatio
t'IEHOVÀ,
fonga ho zakae'e ze atao nofotse;
ty amo lo-tserekeo,
fa nitolora'e ami'ty fibara,
hoe t'IEHOVÀ.

³² Hoe t'IEHOVÀ' i Màroy,
Hehe te mionjoñe boak' am-pifeheañe
pak'am-pifeheañe aña o haratiañeo,
vaho tio-baratse jabajaba ty honjoneñe
boak' an-tsietoitane' an-tane atoy aña.

³³ Hirik'añ'olo'ty tane toy pak' aña'ila' ty tane toy aña o ho zamane' IEHOVÀ amy andro zay†; tsy hirovetañe, tsy hambineñe, tsy haleveñe; fa ho forompotse ambone' tane eo.

³⁴ Mangolalaiha ry mpiarakeo,
naho mangololoiha,
vaho milomoloaña an-davenok' ao,

‡ 25:20 Pilisty: o mpañialoo;moneñe an-kialo § 25:20 Askelone: tahiñe; hakeo * 25:20 Azà: maozatse: ose † 25:20 Ekrone: Maliolio; riniatse ama'e ‡ 25:20 Asdode: fibotitirañe, midegañe; kizo § 25:22 Tsore: (Tiro), ozatse; lamilamy; masioñe * 25:22 Tsidone: Mañoro, mitsàtsa; mamintañe † 25:23 Dedane: firañetañe; mpizaka ‡ 25:23 Temà: sinda; hafonirañe; figadoñañe § 25:23 Boze: mavoeñe; hinaoke * 25:24 Arabe: mifandrimbo; mandrarake, kinia † 25:25 Zimry: Zimran: sabo; mpisabo; vahe ‡ 25:25 Elame: ajalahy, somondrara; tsikentaañe § 25:25 Maday: fanjeheañe; fizakañe; sikiñe * 25:26 Sesake: gony pea folem-bare † 25:33 Isa 66:16,24, Ben 19:17-21

ry lohà' i mpirai-liay
fa tondroke ty androm-pandentañe
naho fampiparatsiahañe anahareo,
ie hivolentsa manahake ty sini-hara.

³⁵ Ho po-pivoratsahañe o mpiarakeo,
tsy eo ty hipitsiha' o mpiaolo'
i lia-raikeio!

³⁶ Inay ty fikoikoiha' o mpiarakeo,
naho ty fangololoiha'
o mpiaolo' i lia-raikeio!
fa nihotomomohe' IEHOVÀ
ty fiandraza' iareo.

³⁷ Le hampitsiñeñe o goloboñe nipendreñeo,
ty amy haviñera' IEHOVÀy.

³⁸ Niavote'e manahake ty liona
i fipalira'ey;
fa kòake ty tane' iareo ty amy
hasiha' i fibara nampisoañey,
naho ty amy fiforoforoan-kaviñera'ey.

26

¹ Ie tam-baloham-pifehea' Iehoiakime ana' Iosia, mpanjaka' Iehodà, le niheo eo ty tsara' IEHOVÀ manao ty hoe: ² Hoe t'IEHOVÀ: Mijohaña an-kiririsan'anjomba'IEHOVÀ eo vaho tseizo amo rova' Iehodà iaby mi-heo mb'eo hitalaho añ'anjomba' IEHOVÀO, ze hene entañe lileko azo hitaroñañe; leo tsara raike tsy hapo'o. ³ Hera hañaoñe iereo, songa hiamboho amo sata rati'eo; soa te hihahak' amy hekoheko nisafirieko hanoeñe am' iereo ty amo haloloam-pitoloña' iareooy. ⁴ Le hoe ty hanoa'o: Hoe t'IEHOVÀ: Aa naho tsy mijanjiñe ahy, hañavelo amy Hàke tinaroko añatrefa' areoy, ⁵ hitsendreñe i saontsi' o mpitoky mpitoroko niraheko ama' areo, nampañampitsoeñe naho niraheñeo, fe tsy hinao' areoy; ⁶ aa le hampanahafeko amy Silò ty anjomba toy, vaho hanoeko fatse amy ze kila fifeheañe an-tane atoy ty rova toy. ⁷ Jinanji' o mpisoroñeo naho o mpitokio vaho ondaty iabio i tsara nisaontsie' Iirmeà añ'anjomba' IEHOVÀy. ⁸ Ie fonga nihenefa' Iirmeà taroñe i nandilia' IEHOVÀ aze ho saontsieñe am' ondaty iabio, le namihíñe aze o mpisoroñeo naho o mpitokio vaho ze hene ondaty, nanao ty hoe: Toe havetrake rehe. ⁹ Ino ty nitokie'o amy tahina' IEHOVÀy ty hoe: Hanahake i Silo ty anjomba toy, vaho hangoakoake ty rova toy, tsy ho amam-pimoneñe? Le hene niropak' am' Iieremea ondaty añ'anjomba' IEHOVÀO.

¹⁰ Ie nahajanjiñe i hoe zay o roandria' Iehodào, le niakatse ty anjomba' i mpanjakay vaho nimoak' añ' anjomba' IEHOVÀ ao; niambesatse ami'ty fizilihañe amy lalam-bey vao' i anjomba' IEHOVÀy eo. ¹¹ Le nisaontsy amo roandriañeo naho amo hene' ondatio o mpisoroñeo naho o mpitokio, nanao ty hoe: Mañeva havetrake t'indaty tia; amy te nitokie'e raty ty rova toy, i jinanjin-dravembia' areoy.

¹² Le nitaroñe' Iirmeà o roandriañeo naho ze hene' ondaty eo nanao ty hoe: Nirahe' IEHOVÀ raho hamàtse ty anjomba toy naho ty rova toy amy tsara jinanji' areo iabiy. ¹³ Avantaño arè o sata' areoo naho o fitoloña' areoo, vaho haoñó ty fiarañanaña' IEHOVÀ Andrianañahare' areo; le hihahak' amy hankàñe nitseiza'e t'IEHOVÀ. ¹⁴ Fa naho zaho, heheke te am-pità' areo; ano amako ze mete naho mahity am-pihaino' areo. ¹⁵ Fe

mahafohina an-katò te ie añohofa' areo loza, le ho lio-màliñe ama' areo naho an-drova atoy vaho amo mpimone'eo; fa toe nirahe' IEHOVÀ ama' areo raho hivolañe i hene tsara zay an-dravembia' areo ao.

¹⁶ Aa le hoe o roandriañeo naho ze hene' ondaty amo mpisoroñeo naho amo mpitokio: Tsy mañeva ho vonoeñe ondatio; amy te nitaroñe amantika ami'ty tahina'IEHOVÀ Andrianañaharen-tika. ¹⁷ Niongak' amy zao ty ila' o androanavi' i taneio vaho nisaontsy amy favori' ondatiyo nanao ty hoe: ¹⁸ Nitoky tañ' andro' i Kizkià mpanjaka' Iehodà t'i Mika nte-Morasete vaho nitaroñe ty hoe amy ze hene ondati' Iehodà:

Hoe t'IEHOVÀ' i Måroy:

Ho rokafeñe hoe hatsake ty Tsione,
naho ho kivotrivotry t'Ierosalaime,
vaho hanahake o ankaboañe aña'alao
ty vohi' i anjombay

¹⁹ Nañoho-doza ama'e hao ty Kizkia mpanjaka' Iehodà naho Iehodà iaby? Te mone nañeveñe am' IEHOVÀ nihalaly ty fañisoha' IEHOVÀ, vaho nihahak' amy fe-hohatse nitsarae'e am' iereo t'IEHOVÀ? Aa kera hampivotrahan-tika hankàñe o fiaintikañeo.

²⁰ Teo ka t'indaty nitoky ami'ty tahina' IEHOVÀ, i Orià* ana' i Semaia†, boak'e Kiriate Iearime; le nitokie'e fatse ty rova toy naho ty tane toy manahake i sinaontsi' Iirmeà abikey; ²¹ fa ie nahatsanoñe o enta'eo t'Iehoiakime mpanjaka naho o fanalolahi'e iabio, naho o roandria'e iabio, le nipay hañoho doza ama'e i mpanjakay; fe nahajanjiñe zay t'i Oria le nihembañe vaho nivoratsake mb'e Mitsraime mb' eo; ²² le nampihitrife' Iehoiakime mb'e Mitsraime mb'eo t' indaty; i Elnatane‡ ana' i Akbore§ rekets' ondaty tsy ampeampeo ty nimb'e Mitsraime aña; ²³ le nendese' iereo boake Mitsraime aña t'i Orià naho nasese' iareo am' Iehoiakime mpanjaka; zinevo'e am-pibara vaho navokovoko'e an-kibori'o ana' ondatio.

²⁴ Fe nañimba Iirmeà ty fità' i Ahikame* ana' i Safane†, tsy nitolorañe am-pitá'ondatio ho vonoeñe.

27

¹ Niheo am' Iirmeà ty tsara' IEHOVÀ ami'ty fifotoram-pifehea' Iehoiakime ana' Iosia, mpanjaka' Iehodà, nanao ty hoe: ² Hoe t'IEHOVÀ amako: mañamboara bandy naho joka, le ano ampititia'o eo; ³ naho ampañitrifo amy mpanjaka' i Edomey* naho amy mpanjaka' i Moabey, naho amo ana' i Amoneo, naho amy mpanjaka' i Tsorey, vaho amy mpanjaka' i Tsidoney am-pitá' o niraheñe mb'amy Tsidkia mpanjaka' Iehodà e Ierosalaime mb'etoio; ⁴ vaho ampitaroño amo talè'eo iereo hinday ty hoe: Hoe t'IEHOVÀ' i Måroy, i Andrianañahare' Israeley: Saontsio ty hoe o talè' areoo: ⁵ Zaho ty namboatse ty tane toy, ondatio naho o biby an-tarehe' ty tane toio ami'ty haozarako ra'elahy naho an-tañako natorakitsy; vaho hatoloko ami'ty atao mahity a' masoko. ⁶ Ie amy zao fa natoloko am-pitá' i Nebokadnetsare mpanjaka' i Bavele, mpitoroko, o tane iaby retoañe; vaho hatoloko aze ka o hare an-kivokeo hitoroñe aze. ⁷ Le hitoroñe aze naho i ana'ey vaho i zafe'ey ze kila' fifeheañe ampara' te tondroke ty andro' i tane'ey; vaho hondevoze' ty tane maro naho mpanjaka ra'elahy.

* 26:20 Oria: IEHOVÀ ro hazavako, ndra afoko † 26:20 Semaia: Mahajanjiñe IÀ; mañorik' aze ‡ 26:22 Elnatane: Tamben'Añahare § 26:22 Akbore: Valavo; mamonotroboke * 26:24 Ahikame: longo mañonjoñe, mamale-fate † 26:24 Safane: bitro; valavo ly; soñi' iareo * 27:3 Edome: lio mena, hoe hamenan-tane.

⁸ Ie amy zay, ze fifeheañe naho fifelehañe mifoneñe tsy hitoroñe i Nebokadnetsare mpanjaka' i Bavele, vaho tsy hanolotse ty fititia'e ambane' ty joka' i mpanjaka' i Baveley: le ho tiliheko am-pibara naho an-kasalikoañe vaho angorosy i fifeheañey, hoe t'IEHOVÀ, ampara' te nampangotomomoheko am'pità'e. ⁹ Aa inahareo, ko haoñe' areo o mpitoki' areoo naho o mpañandro' areoo naho o mpañinofi' areoo naho o mpisikili' areoo vaho o jini' areo manao ama' areoo ty hoe: Tsy ho toroñe' areo i mpanjaka' i Baveley; ¹⁰ amy t'ie mitoky vande, hampisitahañe anahareo lavitse ty tane' areo; zaho ty handroake anahareo mb'eo, hivetrake aña. ¹¹ Fe ze fifelehañe minday ty fititia'e ambane' ty joka' i mpanjaka' i Baveley, naho mitoroñe aze, le hengako hidõne amy tane'ey i fifelehañe zay, hoe t'IEHOVÀ; le havae'e vaho himoneñe ao. ¹² Aa le hene vinolako amy Tsedkià mpanjaka' Iehodà i tsaray, ami'ty hoe, Ampiambaneo ami'ty jokam-panjaka' i Bavele ty fititia' areo, vaho itoroñe naho ondati'eo, le miveloma. ¹³ Ino ty hikoromaha'o, ihe naho ondati'oo, ami'ty fibara, ty hasalikoañe, vaho ty angorosy, amy nitsarae' IEHOVÀ amy ze fifeheañe tsy mete hitoroñe ty mpanjaka' i Bavele? ¹⁴ Aa le ko haoñe' areo o enta' i mpitoky misaontsy ama' areoio ty hoe: Tsy hitoroñe ty mpanjaka' i Bavele nahareo. Ie mpitoky mandañitse ama' areo. ¹⁵ Amy te tsy niraheko, hoe t'IEHOVÀ, ie mitoky vilañe ami'ty añarako, soa te ho roaheko aña vaho hikorokomake, inahareo rekets' o mpitoky mitoky ama' areoo. ¹⁶ Nivolañeko ka o mpisoroñeo, naho ondaty iaby retoa ty hoe: Hoe t'IEHOVÀ: Ko mañaoñe ty saontsi' o mpitoki' areo ie mitoky ty hoe: Ingo, fa hampolieñe boak'e Bavele aña aniany o fingan' anjomba' IEHOVÀio, f'ie mitoky vande. ¹⁷ Ko ijaniñañe; toroño ty mpanjaka' i Bavele, le miveloma, fa akore te hampangoakoahenye ty rova toy? ¹⁸ Aa naho toe mpitoky iereo, naho am' iereo ao ty tsara' IEHOVÀ, le ehe t'ie hihalaly am' IEHOVÀ i Måroy henaneo, te tsy hasese e Bavele aña o fanake sisa amy anjomba' IEHOVÀ naho amy anjomba' i mpanjaka' Iehodà vaho e Ierosalaimeo. ¹⁹ Fa hoe t'IEHOVÀ i Måroy ty amo fahañeo naho i riakey naho o fototseo naho ze harao'e ila'e mbe an-drova atoa; ²⁰ o tsy nendese' i Nebokadnetsare mpanjaka' i Baveleo, ie nasese'e boak' Iersosalaime ao pake Bavele aña an-drohy t'Iekonia ana' Iehoiakime, mpanjaka' Iehodà naho o roandria' Iehodà naho Ierosalaimeo; ²¹ eka, hoe t'IEHOVÀ i Måroy, o fanake sisa aña anjomba' IEHOVÀ ao naho aña anjomba' i mpanjaka' Iehodà Ierosalaimeo; ²² toe hendeseñe mb'e Bavele mb'eo, le hidõne aña ampara' ty andro hitilhako iereo, hoe t'IEHOVÀ, zay vaho hakareko boak' ao le hampoliko mb'an-toetse atoy.

28

¹ Aa ie tamy taoñey avao, amy fifotoram-pifehea' i Tsidkia mpanjaka' Iehodà, amy volam-paha lime' i taom-pahefatsey, le nisaontsy amako aña anjomba' IEHOVÀ ao añañatrefa' o mpisoroñeo naho ondaty iabio t'i Kananiaho*, ana' i Azore†, mpizaka nte-Gibone‡, nanao ty hoe: ² Hoe ty enta' IEHOVÀ i Måroy, Andrianañahare' Israele, Fa pinozako i jokam-panjaka' i Baveley; ³ añañate' ty roe taoñe do'e le fonga hampoliko an-toetse atoy ze fana' i anjomba' IEHOVÀ nakare' i Nebokadnetsare mpanjaka' i Bavele an-toetse atoy naho nendese'e mb'e Bavele aña, ⁴ vaho hampoliko an-toetse atoy t'Iekonia, ana' Iehoiakime, mpanjaka' Iehodà

* **28:1** Kananiaho: falalàñe; tretre; ravoravo' Ia † **28:1** Azore: mpañolotse; oloreñe ‡ **28:1** Gibone: Ankaboa; fitovy; ze onjoneñe

naho o mpirohi' Iehodà iaby nasese mb'e Bavele mb'eo hoe t'IEHOVÀ; toe hampipozahoko i jokam-panjaka' i Baveley.

⁵ Aa le hoe t'Iirmeà mpitoky amy Kananiaho mpitoky añatrefa' o mpisoroñeo naho aolo ze hene ondaty nijohañe añ' anjomba' IEHOVÀ eo, ⁶ hoe t'Iirmeà mpitoky: Ie zay! ehe te hanoe' IEHOVÀ zay! ehe te ho henefe' IEHOVÀ o saontsy tinoki'oo, te hampoli'e o fana' i anjomba' IEHOVÀio, naho ie iaby nasese an-drohy mb'eo rezay, boake Bavele pak' an-toetse atoy! ⁷ Fe janjiño hey ty tsara ho taroñeko an-dravembia'o, naho an-dravembia' ondaty iabio: ⁸ O mpitoky taoloko naho taolo'o haehaeo ro nitoky fatse ami'ty fifeheañe maro, naho fifelehañe jabajaba ty ami'ty aly naho hankàñe vaho angorosy. ⁹ Ty mpitoky mitoky fierañerañañe, ie tondroke ty saontsi' i mpitokiy, le ho fohiñe te toe nirahe' IEHOVÀ i mpitoky zay.

¹⁰ Aa le rinambe' i Kananiaho am-pititia' Iirmeà eo i boday vaho pinoza'e, ¹¹ vaho nilañoñe añatrefa' ondaty iabio t'i Kananiaho nanao ty hoe: Hoe t'IEHOVÀ, Hambañe amy zay ty hampipozahako am-pititia' o kilakila' ndatio añate' ty taoñe roe garagadoñe ty joka' i Nebokadnetsare mpanjaka' i Bavele. Le nisitak' iareo t'Iirmeà.

¹² Aa ie nandimbe i nampipozahé' i Kananiaho am-pititia' Iirmeà mpitoky i jokaiy, le niheo am' Iirmeà ty tsara' IEHOVÀ nanao ty hoe:

¹³ Akia, saontsio amy Kananiaho ty hoe, Hoe t'IEHOVÀ: Fa pinoza'o o joka hataeo; fe hamboare'o joka viñe hasolo aze. ¹⁴ Le hoe t'IEHOVÀ' i Mâroy, i Andrianañahare' Israeley: Fa napoko am-pititia' o fifeheañe iaby retoa ty joka viñe hitoroña' iareo i Nebokadnetsare mpanjaka' i Bavele; toe hitoroña aze iereo vaho natoloko ama'e ka o hare an-kivoke eio. ¹⁵ Le hoe t'Iirmeà mpitoky amy Kananiaho mpitoky: Mahajanjiña hey ry Kananiaho; tsy nañirak' azo t'IEHOVÀ; vaho ampiatoa'o ami'ty vande ondaty retoa.

¹⁶ Aa le hoe t'IEHOVÀ: Inao! hiraheko hiakatse ty tarehe' ty tane toy rehe; toe hihomak' ami'ty taoñe toy ty amy tarom-piolañe nanoe'o am' IEHOVÀy.

¹⁷ Aa le nikoromak' amy volam-paha-fito' i taoñeyi avao t'i Kananiaho mpitoky.

29

¹ Intoy ty enta' i taratasy nampihitrife' Iirmeà mpitoky boak' Ierosalaime mb'amo sehangan-droandriañe an-drohy aña naho amo mpisoroñeo naho am'ondaty iaby nasese' i Nebokadnetsare mpanjaka' i Bavele mb'am-pandrohizañe aña boak' Ierosalaime ao mb'e Bavele añaeo, ² ie fa nienga' Ierosalaime t'Iekonia mpanjaka naho i rene-mpanjakay naho o mpifelekeo, naho o roandria' Iehodà naho Ierosalaimeo naho o mpandranjio vaho o mpanefeo, ³ am-pitá' i Elasà*, ana' i Safane ana' i Gemarià†, ana' i Kelkià nirahe' i Tsidkia mpanjaka' Iehodà mb' amy Nebokadnetsare mpanjaka' i Bavele, nanao ty hoe: ⁴ Hoe t'IEHOVÀ' i Mâroy, t'i Andrianañahare' Israele, amo mpirohy iabio, o nampaneseko an-drohy boak' Ierosalaime mb'e Bavele mb'eo: ⁵ Andranjio anjomba le imoneño, amboleo ankoboñe ao vaho ikamao ty voka'e; ⁶ mañengà valy naho misamaha ana-dahy naho anak'ampela; androroto enga-vao o ana-dahi' areoo le atoloro amo mpañengao ty anak' ampela' areo, hisamaha' iareo ana-dahy naho anak' ampela; vaho manaranaha aña fa ko miketrake. ⁷ Ampanintsiño i rova nampaneseko anahareo an-drohiy vaho mihalalia am' IEHOVÀ ho aze; amy te i fierañeraña'ey ty hierañeraña' areo. ⁸ Fa hoe t'IEHOVÀ'

* 29:3 Elasà: ty fitoloñan'Añahare † 29:3 Gemarià: Fahafonira' IEHOVÀ

i Màroy, i Andrianañahare' Israeley; Ko apo' areo hamañahy anahareo o mpitoky naho mpañandro añivo' areoo, vaho ko haoñe' areo onofy nampañanofiseñe iareoo. ⁹ Ie mitoky vilañe ama' areo ami' ty añarako; fa tsy niraheko, hoe t'IEHOVÀ.

¹⁰ Aa hoe t'IEHOVÀ: Ie heneke ty fitompolo taoñe e Bavele ao, le ho tiliheko naho hanoeko i hasoa nivolañeko ama' areoy, t'ie hampoliko an-toetse atoy.

¹¹ Toe apotako ty fisafiriako ho anahareo, hoe t'IEHOVÀ, fisafiri-am-pierañerañañe fa tsy hankàñe, hanolorako fitamàn-tsoa naho fisalalàñe. ¹² Hikanjy ahy nahareo,

le hombeo raho;
hihalalia'areo, vaho ho tsanoñeko.

¹³ Hipay ahy le ho rendre' areo
naho mitsoek' an-kaampon' arofo‡.

¹⁴ Ho oni' areo raho, hoe t'IEHOVÀ,
naho hafoteko ty fandrophizañañe anahareo, naho hatontoko boak' amo hene
tane naho hirik' amo toetse iaby
nandroahako anahareoo, hoe t'IEHOVÀ; le hampoliko mb'amy toetse
nampaneseko anahareo mb'am-pandrohizañey.

¹⁵ Ami'ty natao' areo ty hoe: Fa nampitroara' IEHOVÀ mpitoky e Bavele ao tika. ¹⁶ Aa hoe t'IEHOVÀ ty amy mpanjaka miambesatse am-piambesa' i Davidey naho ty am'ondaty iaby mpimoneñe an-drova atoio, o rolongo' areo tsy nindre nienga ama' areo mb' am-pandrohizañ' añaeo, ¹⁷ hoe t'IEHOVÀ i Màroy: Inao te hampañitrifeko am' iereo ty fibara, ty hasalikoañe, naho ty angorosy, vaho hampanahafeko ami'ty sakoa mangeñe tsy mete haneñe ty amy haratia'ey; ¹⁸ naho horidañeko am-pibara naho saliko naho kiria naho hampandronje-ronjèko mb'amy ze kila fifehea' ty tane toy ho fatse naho halatsañe, ho fikosihañe, vaho fañinjeañe amo fifelehañe iaby niroaheko iareoo; ¹⁹ amy t'ie tsy nanaoñ' o volakoo, hoe t'IEHOVÀ, ie nañitrifako o mpitoky mpitorokoo, nañaleñañe te namantoke, f'ie tsy nimete nijanjiñe, hoe t'IEHOVÀ. ²⁰ Aa le mijanjiña ty tsara' IEHOVÀ ry am-pandrohizañañe aña iaby nampaneseko boak' Ierosalaime mb'e Bavele mb'eo. ²¹ Hoe t'IEHOVÀ i Màroy, t'i Andrianañahare' Israele, ty amy Akabe§ ana' i Kolaià, naho i Tsidkià ana' i Maaseià*, i mitoky vande ama' areo aman' añarako rey: Inao t'ie haseseko am-pità' i Nebokadnetsare mpanjaka' i Bavele; vaho ho vonoe'e añatrefam-pihaino' areo; ²² le ho toñone' ze hene mpirohi' Iehodà e Bavele ao ty fatse ami'ty hoe: Hanoe' IEHOVÀ hambañe amy nanoa'e amy Akabe naho amy Tsidkià, i nampiforototoe' ty mpanjaka' i Bavele aña'afó ao rey; ²³ amy t'ie nitoloñe haloloañe e Israele ao, naho nanao hakarapiloañe amo tañanjomban-drañe'eo naho nisaontsy vilañe ami'ty añarako, f'ie tsy nandiliako; toe maharendreke raho naho mahatalily, hoe t'IEHOVÀ.

²⁴ Le ty amy Semaià† nte-Nekelamý‡, isaontsio ty hoe, ²⁵ Hoe ty nafè' IEHOVÀ i Màroy, i Andrianañahare' Israeley: Amy te ihe nanokitse taratasy ami'ty añara'o amy ze hene' ondaty e Ierosalaime ao naho amy Tsefanià ana' i Maaseià mpisoroñe, vaho amo mpisoroñe iabio, nanao ty hoe: ²⁶ Fa nanoe' IEHOVÀ mpisoroñe rehe hisolo' Iehoiada§ mpisoroñe, soa te ho amam-pisary ty aña' anjomba' IEHOVÀ ty amy ze dagola mitoky,

‡ 29:13 Its 4:29, 24:7, 30:10, Ioe 2:12 § 29:21 Akabe: Rahalahin-drae * 29:21 Maaseia: sata' IEHOVÀ † 29:24 Semaià: mpijanjiñe naho mpañorike Ià ‡ 29:24 Nekelamý: mpañinofe; hevohevo § 29:26 Iehoiada: ty fahafoinañe IEHOVÀ

hampijoñe aze am-balabey naho an-dongòk' ao. ²⁷ Aa vaho akore te tsy nendaha'o t'Iirmeà nte-Anatote, ie manao ho mpitoky ama' areo, ²⁸ naho nampañitrife'e ama'ay e Bavele atoy ty hoe: Mbe ho ela ty fandrohizañe; mandranja anjomba, le imoneño; le mambolea an-godoboñe ao vaho kamao ty voka'e?

²⁹ Le vinaki' i Tsefanià mpisoroñe an-dravembia' Iirmeà mpitoky i taratasy zay. ³⁰ Niheo am' Iirmeà amy zao ty tsara' IEHOVÀ nanao ty hoe: ³¹ Ampisangitrifo amo hene am-pandrohizañeo ty hoe: Hoe t'IEHOVÀ ty amy Semaia nte Nekelamý: Amy te nitoky ama' areo t'i Semaia, f'ie tsy nirahoko, vaho nampiantofa'e anahareo ty haremborake, ³² le hoe t'IEHOVÀ: Inao! ho lloveko t'i Semaia nte Nekelamý naho o tiri'eo; ie tsy hanañe ty hitrao-pimoneñe am' ondaty retoa, vaho tsy ho isa'e ty soa hanoeko am' ondatikoo, hoe t'IEHOVÀ; ty amo fiolañe tinaro'e am' IEHOVÀ.

30

¹ Ty tsara niheo am'Iirmeà boak' am' IEHOVÀ, manao ty hoe: ² Inao ty nitsara' IEHOVÀ, Andrianañahare' Israele: Sokiro am-boke ao ze hene tsara nitaroñeko ama'o. ³ Amy te ho tondroke ty andro, hoe t'IEHOVÀ, te hafoteko ty fandrohiza' ondatiko Israele naho Iehodao, hoe t'IEHOVÀ; le hampoliko mb'amy tane natoloko aman-droae' iareoy, vaho ho fanaña' iareo. ⁴ Le iretoañe o entañe nitsarae' Iehova am' Israele naho am' Iehodao. ⁵ Hoe t'IEHOVÀ:

Toe nahajanjiñe feom-pihondrahondrañe, naho fangebahebañan-jahay, fa tsy fanintsiñañe.

⁶ Añontaneo henaneo, maharendreha hera misamake ty lahilahy; akore arè te treako mitam-pisafoa manahake ty rakemba mitsongo ondaty iabio, ie sindre miha-fosaposatse o laharañeo?

⁷ Hoy abey ty hara'elahi' i àndroy, tsy añirinkiriñañe, ho andron-kankàñe am'Iakobe, f'ie ho rombaheñe ama'e.

⁸ Ho tondrok' amy andro zay, hoe t'IEHOVÀ' i Måroy, te hampipozahoko am-pititia'o ty joka'e, naho ho rafadrafateko o rohi'oo; vaho tsy hañondevo azo ka ty ambahiny; ⁹ fe songa hitoroñe IEHOVÀ Andrianañahare'e naho i Davide mpanjaka'e, ie hampitroareko ho a iareo.

¹⁰ Aa le ko hemban-drehe ry Iakobe mpitoroko, hoe t'IEHOVÀ; naho ko lonjetse, ry Israele; fa toe ho rombaheko boake tsietoitane aña, naho ty tiri'o boak' an-tanem-pandrohizañe aña, le himpoly t'Iakobe naho hianjiñe naho hierañerañe, vaho tsy eo ty hañembañe aze.

¹¹ Amy t'ie indrezako, hoe t'IEHOVÀ, handrombahako; le ho fonga mongoreko o fifeheañe nampiparatsiahako azoo, fa tsy hampigadoñeko ka rehe; te mone ho lafaeko ami'ty hatò,

vaho tsy ho rotsaheko ho mongotse*.

12 Aa hoe t'IEHOVÀ:

Toe tsy lefe jangañeñe ty farare'o,
vaho mahaferenaiñe o fere'oo.

13 Tsy eo ty mihalaly ho azo,

hampibandiañe o naratseo,
tsy amañ'aoly mahamelan-drehe.

14 Songa nañaliño azo o sakeza'oo,
tsy ipaia'iareo; fa vinonotroboko

hoe zinevo' ty rafelahy,

ami'ty fandafam-pampisoañe;

ami'ty hajabajaba' o hakeo'oo

ami'ty fitoabora' o tahi'oo.

15 Ino ty ikoikoiba'o ty hasilofa'o,

tsy mete mitotòtse o rare'oo,

fa ty haloza' o hakeo'oo,

vaho ty hamaro' o tahi'oo

ty nanoako ama'o o raha rezao.

16 F'ie songa habotseke

o mampibotsek' azoo,

naaho o rafelahi'o iabio,

sindre hasese am-pandrohizañe aña;

naaho ho fikopahañe o mikopak' azoo,

vaho fonga hatoloko ho tsindroheñe

ze mitsàtsa azo.

17 Hampijangañeeko,

vaho ho melañeko o fere'oo,

hoe t'IEHOVÀ;

amy te natao' iareo

añombe-lahy mavo rehe ami'ty hoe:

Ty Tsione, ie tsy paia'ondatio.

18 Aa hoe t'IEHOVÀ:

Inao! hafoteko ty fandrohizañe

o kiboho' Iakobeo,

naaho ho ferenaiñeeko o kivoho'eo;

naaho hamboareñe ambone' i tamboho'ey i rovay,

vaho hajadoñe amy toe'ey

eo i anjombay.

19 Hiboak'am'iereo ty fañandriañañe,

naaho ty fiarañanaña' o mifaleo;

vaho hampitomboeko fa tsy haketrake,

hampiraoraoeko iereo le tsy ho kede.

20 Hanahake te taolo o ana'eo,

naaho hioreñe aoloko eo

ty valobohò' iareo,

vaho fonga ho lloveko

ze mamorekeke iareo.

21 Ho raik' am'iereo ty mpiaolo' iareo,

naaho ho hirik' am'iereo ao ty mpifehe' iareo; naaho hampañarineko amako
re,

toe ie ty hañarivo ahy;

fa ia ty hahavany hitotok' amako? hoe t'IEHOVÀ.

* **30:11** Iir 46:28, Isa 34:2, 45:17, Amo 9:8,

- ²² Ho ondatiko nahareo, vaho
ho Andrianañahare' areo raho.
- ²³ Heheke ty talio-lahi' IEHOVÀ, fa mionjoñe mb'eo ty filoroloroa'e,
tangololahy mikafokafoake;
miviombio ami'ty loha' o lo-tserekeo.
- ²⁴ Tsy hibalike ty haviñerañe miforoforo' IEHOVÀ, ampara' te nihenefe'e
naho sikal'amy te fonitse i nisatrien' arofo'ey;
ho rendre' areo zay amo andro honka'eo[†].

31

- ¹ Amy andro zay, hoe t'IEHOVÀ,
le ho Andrianañahare' ze hene fifokoa'
Israele raho, vaho h'ondatiko iereo.
- ² Hoe t'IEHOVÀ:
Nitendreke falalàñe am-patrambey aña ondaty nasisa' i fibaraio,
fa naseseko mb'am-pitofa'e
mb'eo t'Israele.
- ³ Niheo amako t'IEHOVÀ
boak' an-tsietoitane aña. nanao ty hoe: Eka, fa nikokoako rehe
am-pikokoañe tsy ho modo;
zay ty nitaonako azo
an-kafatraram-pikokoañe.
- ⁴ Hamboareko indraike
le ho fonireñe rehe
ry somondrara' Israele;
ho tintine'o indraike o kantsà'oo,
naho hionjo-mb'an-tsinjake
mindre amo mpifaleo.
- ⁵ Hambole vahe amo vohi' i Someroneo indraike nahareo;
hitongy o mpitongio,
vaho hifale t'ie mahatoly sabo.
- ⁶ Ho tondroke ty andro,
te ho koihe' ty mpijilo ambohi'
i Efraime ey, ty hoe:
Miavota, antao hionjo
mb'e Tsione, mb'am' IEHOVÀ
Andrianañaharen-tika mb'eo.
- ⁷ Fa hoe t'IEHOVÀ:
Misabòa an-kafaleañe r'Iakobe,
vaho mikoiha añivo o beim-pifeheañe; Mitaroña, mandrengea, le ano ty
hoe:
Ry IEHOVÀ, rombahö ondati'oo,
i sehanga' Israeley.
- ⁸ Oniño t'ie hendeseko boak'an-tane
avaratse aña,
hatontoko boak'añ'olo' ty tane toy,
rekets' o goao naho o kepekeo,
o savereñe rekets' ana'eo,
vaho o mitsongo fa hisamakeo—
valobohòke jabajaba ty himpoly mb'atoy.
- ⁹ Ie homb' atoy an-kololoike,
le hiaoloako an-kohò;
hampombako mb'añolon-torahañe mikararake mb'eo,

an-dalam-bantañe tsy hahatsikapy;
amy te rae' Israele raho,
naho tañoloñoloñako t'i Efraime.

¹⁰ Mahajanjiña ty tsara' IEHOVÀ,
ry fifeheañeo, vaho tseizo amo tokonose tsietoitaneo
ty hoe: I nampivarakaike Israeley
ro manontoñe aze, naho mañotroñ'aze manahake ty fañotroña'
ty mpiarake i lia-rai'ey.

¹¹ Amy te vinili' IEHOVÀ ty fiai'Iakobe,
naho jineba'e am-pità'
i maozatse te ama'ey.

¹² Aa le homb' atoy iereo hisabo
an-kaboa' i Tsione ey,
naho hiloeloe ami'ty hasoa' IEHOVÀ;
ami'ty mahakama, naho ami'ty divay
naho ami'ty menake, ami'ty tora' o lia-raike naho mpirai-trokeo;
le ho goloboñe soa tondrake ty fiai' iareo, vaho tsy hinike ka.

¹³ Ie amy zay, hisalale an-tsinjake
ty somondrara,
naho hitraok' ami'ty bey ty ajalahy;
ie hafoteko ho hafaleañe
ty fioremeña' iareo,
naho hohoñeko,
vaho ho limbezeko firebehañe
ty fihontofa' iareo.

¹⁴ Ho liporeko solike
ty arofo' o mpisoroñeo,
vaho hahaeneñe ondatikoo o hasoakoo, hoe t'IEHOVÀ.
¹⁵ Hoe t'IEHOVÀ:

Inay ty fiarañanañañe e Ramà* aña,
fangololoihañe naho firovetañ'afero,
Angoihoie' i Rakele[†] o amori'eo;
tsy mete ohoñen-dre ty amo ana'eo,
amy t'ie tsy eo.

¹⁶ Hoe t'IEHOVÀ: Kalaño ty fiarañanaña'o
tsy hirovetse, naho
o fihaino'oo tsy hitsirike ranomaso;
fa ho tambezañe ty fitromaha'o,
hoe t'IEHOVÀ; vaho himpoly
boak' an-tane' i rafelahiyy iereo.

¹⁷ Aman-ko tamaeñe o herone'oo,
hoe t'IEHOVÀ;
le himpoly an-tane' iareo o ana' areoo.

¹⁸ Toe tsinanoko ty fikoaiha' i Efraime:
Fa linafa'o,
toe finiake hoe dronga tsy folake,
ampitoliho raho le ho tafa-tolike,
amy te Ihe ro IEHOVÀ
Andrianañahareko.
¹⁹ Aa ie nampitolihen-draho le nisoloho,
ie nanaren-draho le pinaoko ty feko;

* **31:15** Ramà: mionjoñe; pendreñe † **31:15** Rakele: Vali' Iakobe; añondry

nisalatse, eka nimeñatse,
amy te tsy nivavèko ty injen-katorako.

²⁰ Anak'isoko hao t'i Efraime?

Ajaja nahasinda hao re?

Fa beteke mivolañe aze raho,

le vata'e tiahiko;

mikoritoke ho aze ty troko,

vaho ho tretrezeko, hoe t'IEHOVÀ.

²¹ Añoreño fanoroañe,

ampijadoño bodam-pamantarañe;

reketo mb'amy damokey ty arofo'o,

i lalañe nomba'o mb'eoy;

mimpolia ry somondrara' Israele,

mibaliha mb'amo rova'o retoañe.

²² Ampara' te ombia t'ie hiambaho,

ry anak'ampela midisa-volio?

Fa namboatse raha vao an-tane atoy t'IEHOVÀ:

Ho tsikarikarie' ty ampela ty lahilahy.

²³ Hoe t'IEHOVÀ i Måroy, t'i Andrianañahare' Israele: Mbe hindrai' iareo an-tane' Iehodà ao naho amo rova'eo, ie hafoteko ty fandrohizañe iareo, ty saontsy manao ty hoe:

Hitahy azo t'IEHOVÀ,

ry kivohon-kavantañañe,

ry vohin-kamasiñañe.

²⁴ Songa hitrao-pimoneñe ao t'Iehodà, vaho amo rova'eo o mpitongio naho o mpiarake lia-raikeo. ²⁵ Fa hanjañeko ty fañova mokotse le hampieneñeko ty sandry mitìke. ²⁶ Nitsekak' amy zao raho le nañente, vaho nimamy amako i firoroakoy.

²⁷ Inao! ho tondroke ty andro, hoe t'IEHOVÀ, te ho tongiseko ami'ty tabiri' ondaty naho ami'ty tabirin-kare ty anjomba' Israele naho Iehodà. ²⁸ Ie amy zao, hambañe amy nisarieko iareo ho voroteñe naho harotsake vaho ho silofeñey; ty hisarieko iareo hamboareñe naho hamboleñe, hoe t'IEHOVÀ.

²⁹ Tsy ho saontsie' iereo ka amy andro zay te

Nikama valoboke mìtsa ty roae,

vaho mangitsy ty nife' o ana'eo.

³⁰ F'ie fonga hampihomahe' o hakeo'eo; ze ondaty mikama valoboke mìtsa, le o famotsi'eo ty hangìtsy.

³¹ Inao, ho tondroke ty andro, hoe t'IEHOVÀ te hanoeko fañina vao amy anjomba' Israeley naho i anjomba' Iehodà[‡]; ³² tsy hanahake i fañina ni-lahareko an-droae' iareo tañ'andro nitanako am-pitâñe nañakarako iareo an-tane Mitsraimey; ie nivalik' amy fañinakoy, ndra t'ie nitañanjomba' iareo[§], hoe t'IEHOVÀ. ³³ Fe zao ty fañina hanoeko amy anjomba' Israeley naho fa modo i andro rezay, hoe t'IEHOVÀ, hapoko añ'ova' iareo ao ty Hâke le ho sokireko añ'arofo' iareo ao; naho ho Andrianañahare' iareo raho vaho h'ondatekiko iereo; ³⁴ tsy songa hifañoke ka ondatio naho o rañe'eo ami'ty hoe: Mahafohina IEHOVÀ fa hene hahafohiñe ahy, mifotots' an-tsitso'e pak' ami'ty bey hoe t'IEHOVÀ; fa hapoko ty tahi' iareo le tsy ho tiahiko ka o hakeo' iareoo.

³⁵ Hoe t'IEHOVÀ,

mpanolotse i àndroy hañazava ty andro,

[‡] **31:31** Heb 8:8-12, 10:16-17 [§] **31:32** Ies 54:5, 56:5, Iek 16:8, Hos 2:19 Jao 3:29, Ko II 11:2-3, Efe 5:25-27, Ben 3:12, 19:8

naho o pepè' i volañey vaho o vasiañeoo
 ho failo amo haleñeo,
 i mpitrobo i riakey,
 hampitroñañe o onjao,
 IEHOVÀ' i Måroy ty tahina'e.

36 Naho mienga tsy ho añatrefako
 i fañè rezay, hoe t'IEHOVÀ,
 le hijihetse tsy ho fifeheañe
 aoloko eo ka ty tiri' Israele.

37 Hoe t'IEHOVÀ:
 Naho lefe zeheñe i likerañey, naho
 mete tsikaraheñe o mananta' ty tane toio,
 zay vaho haitoako ka ze hene tiri' Israele
 ty amo fonga sata' iareoo, hoe t'IEHOVÀ.

38 Inao te ho tondroke ty andro,
 hoe t'IEHOVÀ,
 te hamboareñe ho a IEHOVÀ
 i rovay boak' am-pitalakesañ'abo
 i Kanànele*, pak' an-dalambein-kotskey.

39 Mbore ho kozozoteñe mahity mb'an-
 kaboa' i Garebet† i taly fanjeheañey,
 vaho hiolake mb'e Goà‡ mb'eo.

40 Le havaheñe am' IEHOVÀ
 i hene vavatanen-dolo naho lavenokey,
 naho o teteke iaby pak' an-toraha' i
 Kidroneys mb'eo, pak' an-kotso'
 i lalambein-tsoavalala mianiñanañeio;
 ie tsy hombotañe ka, tsy hafetsake
 ambane nainai'e kitro aña'afe'e.

32

1 Niheo am' Iirmeà amy taom-paha-folo' i Tsedkià mpanjaka' Iehodày,
 an-taom-paha-folo-valo-ambi' i Nebokadnetsare, ty tsara' IEHOVÀ. **2** Ie
 amy zay namalavalanya Ierosalaime o lahin-defo' i mpanjaka' i Baveleio,
 vaho hinily an-kiririsa' o mpigaritseo, aña'anjomba' i mpanjaka' Iehoday
 t'Iirmeà; **3** amy te nagabe' i Tsidkia, mpanjaka' Iehodày, ao ami'ty hoe:
 Ino ty itokia'o ami'ty hoe: Hoe t'IEHOVÀ: Inao! hatoloko am-pitá' ty
 mpanjaka' i Bavele ty rova toy vaho ho tavane'e; **4** naho tsy hipolititse
 am-pitá' o nte-Kasdio t'i Tsidkia mpanjaka' Iehodà, te mone hasese am-
 pitám-panjaka' i Bavele ao, naho hisaontsy ama'e, falie am-palie, vaho
 hahaisake o fihaino'eo o fihaino'eo, **5** le ho tantalie'e mb'e Bavele mb'eo t'i
 Tsidkia, vaho hadok' aña' ampara' te tiliheko, hoe t'IEHOVÀ; le tsy hiraorao
 nahareo naho hialy amo nte-Kasdio.

6 Aa le hoe t'Iirmeà, Niheo amako ty tsara' IEHOVÀ nanao ty hoe: **7** Ingo
 homb' ama'o mb'eo t'i Kanemeale*, ana' i Salome rahalahin-drae'o hanao
 ty hoe: Vilio ho azo ty tondako e Anatote aña'; amy te azo ty zom-pijebañe
 hañavake aze.

8 Aa le niheo amako t'i Kanemeale ana-drahalahin-draeko an-kiririsam-
 pigaritse ty amy tsara' IEHOVÀ nanao amako ty hoe: Ehe, kalò i tondako e

* **31:38** Kanànele: falalañe; tamben'Añahare † **31:39** Garebe: Olatse ‡ **31:39** Goà: ty fitsapa'e;
 ty fitroña'e § **31:40** Kidrone: lompolombo, mampanahelo * **32:7** Falalan'Añahare

Anatote aoy, an-tane' i Beniaminey; amy te azo ty zom-pandova, le azo ty fijebañañe aze, ivilio ho azo.

Ie amy zao, napotako te nitsarae' IEHOVÀ, ⁹ le viniliko amy Kanemeale ana-drahalahin-draekoy i tonda e Anatotey vaho linanjako ama'e ty drala'e, sekelem-bolafoty folo-fito' amby. ¹⁰ Pinateko amy zao i takelakey le liniteko naho nikoike valolombeloñe vaho linanjako ama'e am-balantsy i volafotiy. ¹¹ Le rinambeko i takelam-pikalaoñey, i linitey rekets' o fañèo naho o fepè'eo naho i misokakey ¹² vaho natoloko amy Baroke[†] ana' i Nerià[‡], ana' i Makseià i takelam-pikalaoñey am-pahaisaha' i Kanemele ana-drahalahin-draekoy, naho añ'atrefa' o valolombeloñe nanonia' i takelam-pikalaoñeyio, vaho aolo' ze hene nte-Iehodà niambesatse an-kiririsam-pigaritse eo.

¹³ Le nafantoko añatrefa' iareo t'i Baroke ami'ty hoe: ¹⁴ Hoe t'IEHOVÀ' i Mâroy, t'i Andrianañahare' Israele: rambeso o takelam-pikalaoña retoy, o linito, naho o takelam-pikalaoña misokakeo, vaho apoho am-po sini-hara ao, hahareta'e andro maro. ¹⁵ Ami'ty nafè' IEHOVÀ' i Mâroy, t'i Andrianañahare' Israele, te: Mbe hikaloña naho handetahaña an-tane atoy indraike o anjombao, o tondao, vaho o tanem-baheo.

¹⁶ Aa naho fa natoloko amy Baroke ana' i Nerià i takelam-pikalaoña rey, le nihalaly am' IEHOVÀ raho ami'ty hoe: ¹⁷ Eka, ry Talè, IEHOVÀ! Toe nitsenè'o an-kaozara'o jabahinake naho am-pità'o natorakitsy i likerañey naho ty tane toy; tsy eo ty sarotse tsy lefe'o; ¹⁸ Ihe mpampiboake fiferenaiñañe ami'ty arivo naho mañondroke ty hakeon-droae añ'araña' o anake manonjohi' iareoo; ry Andrianañahare ra'elahy naho maozatse, IEHOVÀ' i Mâroy ty tahina'e; ¹⁹ foloaingitrok' am-pañeretaña, manjofak' am-pitoloñañe; mibolanak' amo sata' ondaty iabio o fihaino'oo, songa hanambeza'o mira ami'ty vokam-pitoloña'e; ²⁰ ie nampipoha'o viloña naho raha tsitantane an-tane' Mitsraime aña, naho pake henane e Israele ao naho am'ondate, vaho nahazoa'o Tahinaña, le ie henanekeo. ²¹ Nakare'o am-biloña naho halatsaña boak' an-tane Mitsraime aña ondati'oo, am-pitaña maozatse naho an-tsiraña natorakitsy vaho an-karevendreveñañe mampangebahebake; ²² naho nitolora'o o tane atoio, i nifantà'o an-droae' iareo hanoloraña iareoy, tane orikorihen-dronono naho tantele; ²³ vaho nimoak' ao iereo nandrambe aze; f'ie tsy nañaoña ty fiarañanaña'o naho tsy nañavelo amo Fanoroa'oo; Leo raike ty nanoe' iareo amo hene nililia'oo; aa le nampifetsaha'o o fonga hekoheko zao; ²⁴ heheke o tambohoo, fa nimoak' an-drova atoy o hitavaña azeo; fa natolotse am-pità' o nte-Kasdy mialy ama'eo ty rova toy; toe fa tondroke i tsinara'o rezay; le hehe te vazoho'o. ²⁵ Fe hoe Rehe tamako, ry Talè, IEHOVÀ, Ikalò an-drala i tetekkey, naho koiho ty valolombeloña; le hehe fa natolotse am-pità' o nte-Kasdio ty rova toy.

²⁶ Niheo am'Iirmeà amy zao ty tsara' IEHOVÀ nanao ty hoe; ²⁷ Ingo te Zaho IEHOVÀ, Andrianañahare' ze atao nofotse iaby, inoña ty tsy ho lefeko?

²⁸ Aa le hoe t'IEHOVÀ: Inao! hatoloko am-pità' o nte-Kasdio ty rova toy, naho am-pità' i Nebokadnetsare mpanjaka' i Bavele, ho tavane'e; ²⁹ ho mb' atoy o nte-Kasdy hialy ami'ty rova toio naho hamiañ' afo ami'ty rova toy vaho ho forototoe' iereo, rekets' o anjomba fañenga' iareo amy Baale antafo'e eo, ie nampidoñañ' enga-rano amo ndrahare ila'eo hampiboseha' iareo Ahy. ³⁰ Toe nitolon-kaloloña a' masoko ao, boak'ami'ty naha-tora'e, o ana' Israeleo naho o ana' Iehodao, ie nitolom-pampibosek' ahy ami'ty

[†] 32:12 Baroke: I tahie'ey [‡] 32:12 Nerià: jiro, fanilo' IEHOVÀ

fitolom-pit ' iareo, hoe t'IEHOV . ³¹ Fa nikai-jaka ami'ty habosehako naho ami' ty fifomboko boak' ami'ty na ore n ' aze pake henaneo ty rova toy, toly ndra ho sintoneko boak' a atrefan-tareheko eo, ³² ty amo fonga haratia' o ana'Israeleo naho o ana' Iehod , ze nanoe' iereo hampibosek' ahy; ie, o mpanjaka' iareoo, o mpiaolo' iareoo, o mpisoro' iareoo naho o mpitoki' iareoo naho ondati' Iehodao vaho o mpimone' Ierosalaimeo. ³³ Ie nampitolihe' iereo amako ty voho fa tsy ty tarehe; le ndra te nanareko, ie na ampitso naho na oke, le tsy na ao ne handrambesa' iareo fa ha ne. ³⁴ Fe nado' iareo amy anjomba tokave ne ami'ty a arakoy o raha veta' iareo naniva azeo. ³⁵ Mbore naore' iereo o haboa' i Baale am-bavatanen' ana' i Hinomeo, hampisoroha ' amy Moleke  o ana-dahi' iareoo naho o anak' ampela' iareoo; ze tsy nandiliako vaho tsy nimoak' am-pitsakoreako ao t'ie hanao i hativ ne zay; hampanan-kakeo Iehod .

³⁶ Ie amy zao, hoe t'IEHOV  Andriana ahare' Israele, Ty rova toy, ie atao' areo ty hoe t'ie natolotse am-pit ' i mpanjaka' i Baveley naho amy fibaray naho amy hasalikoa ey vaho amy angorosi; ³⁷ Inao! hatontoko amy ze hene fifehea ne nandroahako iareo ami'ty habosehako naho ami'ty fifomboko naho ami'ty fiforoforoako vaho hampoliko an-toetse atoy, hampimone ako am-panints a ne; ³⁸ le ho ondatiko iereo naho ho Andriana ahare' iareo raho; ³⁹ naho hitolorako arofo toka ne naho lala ne raike, soa t'ie ha eve ne amako nainai'e; an-kasoa ho a iareo naho o ana' iareo hanonjohio; ⁴⁰ naho hanoako fa ina tsy ho modo, tsy hiambohoako, fa ho soaeko; vaho hampipohako fa eve ne ty an-tro' iareo ao tsy hiamboho ahy. ⁴¹ Eka, hirebehako naho hampiraoraoeko vaho ho vol ko an-tanen-kat  atoy a -kaampon-troko naho an-kaliforam-piaiko.

⁴² Le hoe t'IEHOV : Hamba ne amy na endesako o hank ne jabajaba rezao am' ondaty retoa, ty ha andesako ze hene hasoa nampitamako.

⁴³ Hikalo ne an-tane atoy o tetekeo, i atao' areo ty hoe; Mangoakokey, tsy ama' ondaty tsy amam-biby; fa natolotse am-pit ' o nte-Kasdio. ⁴⁴ Hivily tonda an-drala ondatio, hanokitse naho hamolitomboke takelam-pana antane, le hikaike valolombelo ne an-tane' i Beniamine ao, naho am-paripari' Ierosalaimeo, naho amo rova' Iehod , naho amo rova an-kabo ne a eo, naho amo rova am-bavataneo, vaho amo rova atimoo, amy te hampoliko ty fandrohiza' iareo, hoe t'IEHOV .

33

¹ Niheo am'Iirme  fa indroe' ty tsara' IEHOV , ie mbe nirindri ne an-kiririsam-pigaritse ao, nanao ty hoe:

² Hoe t'IEHOV  Andrianamboatse,
IEHOV  na ore ne, hampijado ne aze,
IEHOV  ty tahina'e.

³ Kanjio raho, le ho toi eko,
hitaro ne raha fanjaka
naho miheotse tsy fohi'o.

⁴ Aa hoe t'IEHOV 
Andriana ahare' Israele :
O anjomba' ty rova toio, naho
o anjomba' o mpanjaka'Iehod ,
o narotsake ho tambohom-pa arova ne
amo firampia eo naho o fibarao,
⁵ ie mialy amo nte-Kasdio,

ro mone hiliporañe lolo'ondaty
 zinamako ami' ty habosehako,
 naho ami'ty fifombokoo,
 ty amo fonga haloloañe nañetahako tarehe ami'ty rova toio.

⁶ Inao ! handesako fijanganañe
 le ho melañeko;
 vaho haborako am' iereo ty haliforan-kanintsiñe naho hatò.

⁷ Hafoteko ty fandrohiza' Iehodà
 naho ty fandrohiza' Israele,
 vaho haoreko manahake tam-baloha'e.

⁸ Ie ho lioveko amo halò-tserek' iabio,
 i nampanan-tahiñe iareo amakoy;

vaho hapoko iaby ty hakeo' iareo,
 i nandilara' iareo amako rezay;

o nañotà' iareo faly amakoo,

⁹ ho tahinam-pampirebehañ' ahy

naho engeñe vaho volonahetse,

añatrefa ze fifehea' ty tane toy,
 le hañeveñe naho hinevenevetse

ze hahajanjiñe ty hasoa

hanoeko am' iereo;

amy ze hene hasoa

naho fierañerañañe hanoako.

¹⁰ Hoe t'IEHOVÀ: Mbe ho janjiñeñe an-toetse atoy, i atao' areo ty hoe:
 Mangoakoake, tsy ama' ondaty, tsy amam-biby naho amo rova' Iehodà
 naho an-dàmo' Ierosalaime ey; amy bangìñe tsy ama' ondaty, tsy amam-
 pimoneñe, tsy aman-kàrey,

¹¹ ty feom-pirebehañé, naho

ty feon-kafaleañe,

ty feom-pañenga naho

ty feon'engaeñe,

ty fiarañanaña' o manao ty hoe:

Andriaño t'IEHOVÀ' i Màroy,

fa soa t'IEHOVÀ, nainai'e ty fiferenaiña'e;

vaho o minday engam-pañandriañañe mb'añ'anjomba' IEHOVÀ mb'eoo.

Amy te hampoliko ty fandrohiza' i taney manahake tam-baloha'ey,

hoe t'IEHOVÀ.

¹² Hoe t'IEHOVÀ' i Màroy,

Mbe ho eo indraik' ami'ty toetse mangoakoake toy,

ie tsy ama'ondaty, tsy aman-kàre, naho amo hene rova'eo,

ty kivohom-piarake mampàndre o lia-rai'eo. ¹³ Amo rova am-bohitseo
 naho

amo rova am-bavataneo naho

amo rova atimoo naho

an-tane' i Beniamine ao naho

am-paripari' Ierosalaimeo vaho

amo rova Iehodao, ty hirangà' o lia-raikeo ambane' ty fitàñe mañiake
 iareo, hoe t'IEHOVÀ.

¹⁴ Inao! ho tondroke ty andro, hoe t'IEHOVÀ, te ho henefako i tsara
 soa nitsaraeko amy anjomba' Israele naho i anjomba' Iehodàiy. ¹⁵ Ie
 amy andro rezay naho amy sa zay, ty hampitiriako toran-kavañonañe t'i
 Davide, le ie ty hitoloñe an-katò naho an-kavantañañe amy taney. ¹⁶ Ho

rombaheñe amy andro rezay t'Iehodà, vaho hierañerañe t'Ierosalaime; le hoe ty hitokavañe aze,
IEHOVÀ Havantañañ-tika.

¹⁷ Fa hoe t'IEHOVÀ: Le lia'e tsy haitoañe amy Davide t'indaty miambesatse amy fiambesa' i anjomba' Israeleiy; ¹⁸ vaho le lia'e tsy haitoañe amo mpisoroñe nte-Levio t'indaty hanolotse engan-koroñañe, naho hañoro enga-mahakama, vaho hisoroñe nainai'e añatrefako eo.

¹⁹ Niheo am' Iirmeà ty tsara' IEHOVÀ manao ty hoe:

²⁰ Hoe t'IEHOVÀ: Naho lefe' areo valiheñe ty fañinako amy àndroy, naho ty fañinako amy haleñey, soa te tsy ho aman-kandro,

tsy ho aman-kaleñe o famantaña'eo;

²¹ zay vaho mete mivalike amy fañinako amy Davide mpitorokoy, naho tsy hanañ'anake hamelek' amy fiambesa'ey;

vaho amo mpisoroñe nte-Levy mpiatrak'Ahio.

²² Hambañe amy te tsy mete iaheñe ty havasiañañ-dikerañe, vaho tsy lefe zehèñe o fasen-driakeo; ty hampitomboako

ty tarira' i Davide mpitorokoy,

naho o nte-Levy mpiatrak' ahio.

²³ Niheo am' Iirmeà ty tsara' IEHOVÀ manao ty hoe: ²⁴ Tsy nioni'o hao ty saontsi' ondaty retoa manao ty hoe: O fifokoañe roe jinobo' IEHOVÀ rey, le fa naitoa'e? Aa le mavoe' iereo ondatikoo*, t'ie tsy ho fifeheañe añ'atrefa' iareo ka.

²⁵ Hoe t'IEHOVÀ:

Naho tsy nifañina ami'ty andro

naho ty haleñey,

naho tsy tinendreko fañè i likerañey

naho ty tane toy:

²⁶ le ho farieko ty tiri' Iakobe

naho ty a i Davide mpitorokoy,

vaho tsy ho rambeseko amo tiri'eo

ty ho mpifeleke o tarira' i Avrahame, Ietsake, naho Iakobeo;

fe toe hampoliko ty fandrophiza' iareo, vaho hiferenaiñako.

34

¹ Ty tsara niheo am' Iirmeà boak' am' IEHOVÀ, ie nialy am' Ierosalaime naho amo rova'e iabio t'i Nebokadnetsare mpanjaka' i Bavele naho o lahin-defo'e iabio naho o fifeheañe an-tane felehe'e iabio vaho ondaty iabio, nanao ty hoe: ² Hoe t'IEHOVÀ, i Andrianañahare' Israeleiy: Akia misaontsia amy Tsidkia, mpanjaka Iehodà, ty hoe: Hoe t'IEHOVÀ: Inao! hatoloko am-pità' i mpanjaka' i Baveley ty rova toy vaho hampangotomomohe'e an' afo; ³ le tsy hibotatsak' am-pità'e rehe, fa toe ho tsepahéne vaho hasese am-pità'e; le ho isam-pihaino'o o fhaino' i mpanjaka' i Baveleio naho hisaontsie'e falie am-palie vaho hañavelo mb'e Bavele mb'eo rehe. ⁴ Fe janjiño ty tsara' IEHOVÀ ry Tsidkia mpanjaka' Iehodà: Hoe t'IEHOVÀ ama'o: Tsy hampihomahem-pibara rehe; ⁵ f'ie hikoromake an-kanintsine, le manahake ty nañembohañe aman-droae'o, o mpanjaka taolo niaolo

* ^{33:24} Sab 83:3-4, Iek 28:24-26, 36:2-6

azoo, ty hañoroa' iereo emboke ho azo vaho handala, ami'ty hoe: Hoy aba! Inay i tsara nitaroñekoy, hoe t'IEHOVÀ.

⁶ Aa le hene nisaontsies' Iirmeà mpitoky amy Tsidkia mpanjaka' Iehodà e Ierosalaime ao i tsara zay, ⁷ ie nialia' o lahindefo' i mpanjaka' i Baveleio t'Ierosalaime naho o rova sisa' Iehodà iabio, i Lakise* naho i Azekà†; amy te iereo avao ty rova nihafatrareñe sisa amo rova' Iehodào.

⁸ Ty tsara' IEHOVÀ niheo am'Iirmeà, ie fa nifañina amo hene' ondaty e Ierosalaime ao t'i Tsidkia, t'ie hikoiham-pamotsorañe, ⁹ te songa ho haha' ondaty ze mpitoro'e lahilahy, sindre ondaty ty ampela-mpitoro'e, ie lahilahy nte-Evre ndra ampela nte-Evre; soa tsy eo ty hitañe o nte-Iehodà rahalahi'eo an-drohy; ¹⁰ le songa nañaoñe o roandriañe naho ondaty iaby niantoke i fañinam-pamotsorañeio te hene ondaty ro hañaha ty ondevo-lahi'e naho fonga ondaty ty ondevo-ampela'e, tsy hanoeñe ondevo ka; Eka, nivohotse iereo vaho namotsotse. ¹¹ Ie aña, le nifotetse naho nampipolie' iareo ondevo'e lahilahio naho ondevo'e ampelao, o navotsotseo; vaho nampiambanea' iareo ho ondevo lahy naho ondevo ampela; ¹² aa le niheo am'Iirmeà boak' am' IEHOVÀ ty tsara' IEHOVÀ manao ty hoe: ¹³ Hoe t'IEHOVÀ, i Andrianañahare' Israeley: Nanao fañina aman-droae' areo raho tañ' andro nañakarako iareo an-tane Mitsraime, boak' an-trañom-pañodevozañ' aña ami'ty hoe: ¹⁴ Ie modo ty fito taoñe le tsy mete tsy hene havotso'o ze rahalahi'o nte-Iehodà naletak' ama'o, ie fa nitoroñe azo enen-taoñe, le tsy mahay tsy haha'o ama'o; fe tsy nañaoñe ahy o roae' areoo, tsy nanokilan-dravembia. ¹⁵ Aniany nahareo te nibalintoa, nanao ty hiti'e a-masoko, songa nitsey famotsorañe amo rahalahi'eo t'indaty; vaho nifañina amako añatrefako añ' anjomba tokaveñe amy añarakoy; ¹⁶ f'ie nivalike, naniva ty añarako, nampibalihe' areo, songa ondaty ty ondevo'e, sindre ondaty ty ondevo-ampela'e, o fa navots'o' areo hidada ho mb'an-satri'e mb'eo; vaho nanoe' areo ondevo-lahi' areo naho ondevo-ampela. ¹⁷ Aa le hoe t'IEHOVÀ: Kanao tsy nañaoñe ahy, amy tsey fidadàñey, songa ondaty an-drahalahi'e, sindre ondaty an-drañe'e; le hitseizako fidadàñey, hoe t'IEHOVÀ, ho amy fibaray naho i angorosiy naho i hasalikoñañey, vaho hampitsololoheko amy ze kila fifehea' ty tane toy nahareo.

¹⁸ Le hatoloko am'on daty nivalik' amy fañinakoio, o tsy nañeneke i tsaram-pañina nanoe' iereo aolo' ahy eoy, ie tinori' areo roe i ana-bosi y vaho niranga anteñateña i vaki'e rey— ¹⁹ o roandria' Iehodao, naho o roandria' Ierosalaimeo, o vositseo naho o mpisoroñe, vaho ze hene ondati' i taneio, ze niranga añivo' ty vaki' i ana-bosi y eo— ²⁰ hatoloko am-pità' o rafelahi'eo iereo naho am-pità' o mipay ty fiai'iareoo; vaho ho fihina' o voron-dikerañe naho o bibi' ty tane toio ty lolo' iareo. ²¹ Le hatoloko am-pità' o rafelahi' iareoo naho am-pità' o mipay ty fiai' iareoo, naho am-pità' o lahindefo' i mpanjaka' i Bavele fa nihankañ' am' iareoio, t'i Tsidkia mpanjaka' Iehodà naho o roandria'eo. ²² Inao! handily raho, hoe t'IEHOVÀ, le hampibaliheko mb' an-drova mb'atoy iereo; hialia' iareo, naho hitavana' iareo, vaho hamorototoa' iareo aña'afó; le hampangoakoahoko o rova' Iehodao ho tsy amam-pimoneñe.

35

¹ Ty tsara' IEHOVÀ niheo am' Iirmeà tañ'andro' Iehoiakime ana' Iosia, mpanjaka' Iehodà, manao ty hoe: ² Akia mb' aña' anjomba' o nte-Rekao*

* ^{34:7} Lakise: i mañavelo naho miaññe ho aze † ^{34:7} Azekà: haozara' o kijollio * ^{35:2} Rekà: tseake; sarete tarihen-tsoavalà 4

mb'eo naho isaontsio, vaho endeso mb'añ' anjomba' IEHOVÀ ao, añ'efe'e raik' ao, vaho anjotsò divay hikama' iareo. ³ Aa le nendeseko t'Iazanià† ana' Iirmeà, ana' i Habazinia‡, naho o roahalahi'eo rekets' o ana'e iabio, vaho ty haampon' anjomba' o nte-Rekao. ⁴ Le nampihovaeko añ'anjomba' IEHOVÀ ao, añ'efe' o ana' i Kanàne§ ana' Igdalia* ondatin' Añahareo, marine' ty efe' o roandriañeo, ambone' ty efe' i Maaseià, ana' i Salome, mpiamben-dalañe; ⁵ naho nazotsoko aolo' o anak' anjomba' i Rekàbeo ty korobo naho fitiheke, vaho nanoeko ty hoe: Mikamà divay. ⁶ Fa hoe ty lie' iereo, Tsy hikama divay zahay ty amy nafè' Ionadabe† ana' i Rekabe rae'ay ama'aiy, ty hoe: Tsy hikama divay nahareo, inahareo naho o ana' areo kitro kattrokeo; ⁷ vaho ko mañoreñe anjomba ndra mitongy tabiry, ko mambole vahe, naho ko atao hanañañe zay; fa himoneñe an-kibohotse amo fonga andro hiañá' areoo, soa t'ie hitoboke andro maro an-tanem-pañialoa'areo ao. ⁸ Le nihaoñe'ay ty fiarañanaña' Ionadabe ana' i Rekabe rae'ay amo nafe'e anay iabio, te tsy hinon-divay amo hene andro'aio, zahay o vali'aio, o ana'aio, naho o anak' ampela'aio. ⁹ Aa le tsy namboatse anjomba himoneña'ay zahay, tsy aman-tanem-bahe ndra teteke ndra tabiry; ¹⁰ f'ie mpitobok' an-kibohotse ao, naho mañaoñe vaho mitoloñe o nafe' Ionadabe rae'aio. ¹¹ Aa ie nionjoñe haname an-tane atoy t'i Nebokadnetsare mpanjaka' i Bavele, le hoe zahay: Antao hionjoñe mb'e Ierosalaime ao, aolo' o lahindefon-te-Kasdio naho aolo' o nte-Arameo; aa le mimoneñe e Ierosalaime atoan-jahay.

¹² Aa le hoe ty tsara' IEHOVÀ niheo am'Iirmeà: ¹³ Hoe ty nafè' IEHOVÀ' i Màroy, i Andrianañahare' Israeley: Akia mb' am' ondati' Iehodao naho o mpimone' Ierosalaimeo, le ano ty hoe: Tsy hitsendreñe hilala hao nahareo hañaoñe o volakoo? hoe t'IEHOVÀ. ¹⁴ Ty nafè' Ionadabe ana' i Rekabe, amo ana'eo, ty tsy hikama divay, le fa ambenañe, vaho tsy ikama' iareo pake henane, amy t'ie mañoñe ty fetsen-drae' iareo; fe nitaroñeko mañampitso am-pitaroñañe nahareo fe tsy nijanjiñe ahy. ¹⁵ Le niraheko ama' areo ka o mpitoky mpitoroko iabio, nampihitrifeko handro nanao ty hoe: Songa mimpolia amo sata' rati'eo ondatio, naho ahitio o fitoloña' areoo, naho ko mañorin-drahare ila'e ho toroñeñe, soa te himoneña' areo ty tane natoloko ama'areo naho aman-droae' areo toy; f'ie tsy nanokilan-dravembia, tsy nañaoñ' ahy. ¹⁶ Toe nihenefe' o ana' Ionadabe ana' i Rekabe ty fetse nafen-drae' iareo ama'e, fe tsy nañaoñe ahy ondaty retoñañe; ¹⁷ aa le hoe t'IEHOVÀ, i Andrianañahare' i màroy, i Andrianañahare' Israeley: Ingo te hafetsako am'Iehodà naho amo mpimone' Ierosalaimeo ze fonga hekoheko tsineiko am'iereo; amy t'ie nivolañeko, f'ie tsy nijanjiñe, kinoiko fe tsy nanoiñe.

¹⁸ Le hoe t'Iirmeà amy anjomba' o nte Rekabeo: Hoe t'IEHOVÀ' i Màroy, i Andrianañahare' Israeley: Amy te nihaoñe' areo ty saontsin-drae' areo Ionadabe, vaho nambena' areo o fañè'e iabio, vaho nanoe' areo ze hene nandilia'e; ¹⁹ le hoe t'IEHOVÀ' i Màroy, i Andrianañahare' Israeley: Tsy haitoñañe am' Ionadabe, ana' i Rekabe ty lahilahy hijohañe añatrefako nainai'e donia.

36

¹ Ie amy faha-efa-tao' Iehoiakime ana' Iosia, mpanjaka' Iehodà, le niheo am' Iirmeà ty tsara' IEHOVÀ nanao ty hoe: ² Mangalà boke-peleke

† 35:3 Iazanià: i ho janjiñe' IEHOVÀ ‡ 35:3 Habazinia: fañetahañe ty fikalan-defo'IA § 35:4 Kanàne: lifo-palalàñe * 35:4 Igdalia: ty hajabahina' IEHOVÀ † 35:6 Ionadabe: matarike

le sokiro ao ze hene tsara nivolañako ty am' Israele naho Iehodà vaho o hene fifeheañeo sikal' amy andro nivolañeko ama'o faha' Iosiay pake henanekeo. ³ Kera ho janjiñe' ty anjomba' Iehodà ze hene hankàñe nisafirieko hanoañe; ke sindre hibalintoa amo sata' rati'eo ondatio, vaho hapoko ty hakeo' iareo naho o tahi' iareoo.

⁴ Aa le kinoi' Iirmeà t'i Baroke ana' i Nerìà; vaho sinoki' i Baroke amboke-pelek' ao boak' am-palie' Iirmeà ze hene tsara nitsara' IEHOVÀ ama'e.

⁵ Le hoe t'Iirmeà amy Baroke: sinebañe raho tsy himoak' añ'anjomba' IEHOVÀ ao; ⁶ akia arè, mamakia amy boke-peleke nanokira'o o tsara' IEHOVÀ boak'am-bavakooy, an-dravembia' ondaty añ'anjomba' IEHOVÀ ao ami'ty androm-pililirañe; mbore vakio an-dravembia' Iehoda miakatse o rova'eo iaby. ⁷ Hera hibanabana solo ho am' IEHOVÀ, naho songa hibalik' amo sata-rati'eo; amy te miforoforo ty haviñera' IEHOVÀ naho ty fifomboa'e nitaroñeñe am' ondaty retoa. ⁸ Aa le nanoe' i Baroke ana' i Nerìa i hene nandilia' Iirmeà mpitoky ama'ey, le vinaki'e amy bokey ty tsara' IEHOVÀ añ'anjomba' IEHOVÀ ao.

⁹ Aa ie ami'ty volam-paha-sive' i taom-paha-lime' Iehoiakime ana' Iosia mpanjaka' Iehoday, le nambarañe fililirañe añatrefa' IEHOVÀ : naho nimb' e Ierosalaime mb'eo ondati' Ierosalaimeo naho ze hene boak' amo rova' Iehodao. ¹⁰ Le vinaki' i Baroke amy bokey o saontsi' Iirmeào, añ'anjomba' IEHOVÀ, añ'efe' i Gemaria ana' i Safane mpanokitse, an-kiririsa ambone, amy fimoahan-Dalam-bey Vao' i anjomba' IEHOVÀiy, an-dravembia' ze fonga ondaty.

¹¹ Aa ie jinanji' i Mikaielho ana' i Gemaria, ana' i Safane ze hene tsara' IEHOVÀ boak' amy bokey, ¹² le nizotso mb' añañ'anjomba' i mpanjakay mb'eo, añañ'efe' o mpanokitseo; le heheke te hene niambesatse ao o roandriañeo— i Elisama*, mpanokitse, naho Delaia† ana' i Semaià, naho i Elnatane ana i Akbore, naho i Gemaria, ana' i Safane, naho i Tsidkia ana' i Kananià‡, naho o roandriañe iabio. ¹³ Le tinaro' i Mikaielhos ze hene tsara jinanji'e amy Baroke, ie namaky i bokey an-dravembia' ondatio. ¹⁴ Aa le nampihitrife' o roandriañe iabio t'Iehodý* ana' i Netanià† ana' i Selemia, ana' i Kosy‡, mb' amy Baroke hanoa'e ty hoe: Endeso am-pitá'o i peleke vinaki'o an-dravembia' ondatiyo, vaho mb'etoy. Aa le rinambe' i Baroke ana' i Nerìa am-pitá'e amy zao i pelekey vaho nimb' am' iereo ao. ¹⁵ Le hoe iereo ama'e: Miambesara vaho ivakio an-dravembia'ay. Aa le vinaki' i Baroke an-dravembia' iareo. ¹⁶ Ie amy zao, naho hene jinanji' iereo i tsaray, le nifampitolik' an-kahembaññañe vaho nanao ty hoe amy Baroke: Tsy mete tsy hene taroñe'ay amy mpanjakay o tsara zao. ¹⁷ Le nañontane i Baroke iereo, ty hoe, Ehe, isaontsio, akore ty nanokira'o o tsara iaby zao? boak'am-palie'e hao? ¹⁸ Le hoe ty natoi' i Baroke: Hene sinaontsi'e amako am-palie' o tsara retoñañe, vaho sinokiko an-drano-mainte amo bokeo. ¹⁹ Le hoe o roandriañeo amy Baroke, Akia, mietaha, ihe naho Iirmeà, vaho ko apo'o ho fohi' ondaty te aia.

²⁰ Aa le nimoak' amy mpanjakay an-kiririsa'e ao iereo; fa nado' iareo añañ'efe' i Elisama mpanokitse ao i pelekey; vaho tinaro' iareo an-dravembia' i mpanjakay i tsara iabiy. ²¹ Aa le nampihitrife' i mpanjakay t'Iehodý hangalake i pelekey; le nalae'e añañ'efe' i Elisame mpanokitse ao naho vinaki' Iehodý an-dravembia' i mpanjakay vaho an-dravembia'

* **36:12** Elisama: Andrianañahare mijanjiñe † **36:12** Delaia: o mahatra' IEHOVÀ ‡ **36:12** Kananià: Falalà' IEHOVÀ § **36:13** Mikaielho: Mikà; rarake; mireke * **36:14** Iehodý: ty fandrengeñañe IEHOVÀ † **36:14** Netania: tolots' IEHOVÀ ‡ **36:14** Kosy: nte-Etiopiae: hainte'e

o roandriañe iaby nijohañe marine i mpanjakaio. ²² Niambesatse añañomban' asotry ao i mpanjakay amy volam-pahasivey, ie nisodotse añañatrefa'e eo ty toko-pamindroañe. ²³ Aa naho nivakia' Iehody ty fange'e efatse ndra telo, le tinori'e amy kelelahi'ey vaho nahifi'e amy afo amy tokoiy, ampara' te fonga niforototoe' ty afo amy toko-pamindroañey i pelekey. ²⁴ F'ie tsy nahahembañe iareo, leo raike tsy nandriatse sikiñe, ndra i mpanjakay ndra o mpitoro'e nahajanjiñe i tsaraio. ²⁵ Mbore nihalaly amy mpanjakay t'i Elnatane naho i Delaia vaho i Gemaria tsy hampiforehete'e i pelekey; fe tsy hinao'e; ²⁶ vaho linili' i mpanjakay t'Ierakmeele§, ana' i mpanjakay, naho i Seraià, ana' i Azriele*, naho i Selemià†, ana' i Abdile‡ ty hitsepake i Baroke mpanokitse naho Iirmeà mpitoky; f'ie naeta' IEHOVÀ.

²⁷ Ie finorototo' i mpanjakay i pelekey, naho o tsara' sinoki' i Baroke am-palie' Iirmeà le niheo am' Iirmeà ty tsara' IEHOVÀ nanao ty hoe: ²⁸ Mangalà peleke indraike, le hene isokiro i tsara tamy peleke valoha'e nisodore' i mpanjaka' Iehodaiiy. ²⁹ Le hoe ty ho saontsie'o am' Iehoiakime mpanjaka' Iehodà: Hoe t'IEHOVÀ: Fa noroa'o i pelekey, amy ty hoe, Ino ty nanokira'o ao ty hoe te tsy mete tsy hivotrak' atoy ty mpanjaka' i Bavele handrotsake o tane atoio, vaho ho mongore'e ze fonga ondaty naho hare ama'e? ³⁰ Aa le hoe t'IEHOVÀ ty am' Iehoiakime mpanjaka' Iehodà, t'ie tsy hanan-kiambesatse amy fiambesa' i Davidey; vaho havokovoko antariñandroke ey ty lolo'e te handro, vaho amy fanalay te haleñe. ³¹ Le ho liloveko, ie naho o tiri'eo naho o mpitoro'eo ty amo hakeo' iareoo, vaho hafetsako am' iereo naho amo mpimone' Ierosalaimeo, naho am'ondate' Iehodao, ze hene hankàñe nivolañako; o tsy hinao' iereoo.

³² Aa le nandrambe peleke ila'e t'Iirmeà, le natolo'e amy Baroke, mpanokitse, ana' i Nerià; vaho hene sinoki'e ao boak'am-palie' Iirmeà o tsara' i peleke noroa' Iehoiakime mpanjaka' Iehodaio; mbore tinovo'e tsara maro manahak' izay.

37

¹ Nifehe ho mpanjaka t'i Tsidkia nandimbe i Konia* ana' Iehoiakime ana' Iosia nanoe' i Nebokadnetsare, mpanjaka' i Bavele, mpanjaka an-tane Iehodà. ² F'ie ndra o mpitoro'eo ndra ondati' i taneio tsy nañaoñe ty tsara' IEHOVÀ nisaontsie'e añam' Iirmeà mpitoky.

³ Nirahe' i Tsidkia mpankaja t'Iehokale ana' i Selemia naho i Tsefania† mpisoroñe ana' i Maasaia am' Iirmeà mpitoky nanao ty hoe: Ehe, halalio ho anay t'IEHOVÀ Andrianañaharentika.

⁴ Ie amy zay nifampitamboemboeñe am'ondatio t'Iirmeà; ie mboe tsy nagodoñe am-balabey ao, ⁵ le niakatse an-tane Mitsraime o lahindefo' i Paroo‡, aa ie jinanji' o nte-Kasdy nañarikatoke Ierosalaimeo i talily ty am' iereoy le nisitak' am' Ierosalaime.

⁶ Le niheo am'Iirmeà ty tsara' IEHOVÀ: ⁷ Hoe t'IEHOVÀ Andrianañahare' Israele: Zao ty ho saontsie' areo amy mpanjaka' Iehodà nañirak' anahareo amako hañontane: Himpoly mb'an-tane'e e Mitsraime aña o lian-dahindefo' i Parò nionjoñe hañolotse anahareoo; ⁸ le hibalike mb'etoa o nte Kasdio hialy ami'ty rova toy hitavañe vaho hamorototo aze amañ'afó.

§ ^{36:26} Ierakmeele: ty fitretrezan'Añahare * ^{36:26} Azriele; Fañoloran' Añahare † ^{36:26} Selemià: Ahare fanintsíñako ‡ ^{36:26} Abdile: evoñe; rahon' Añahare * ^{37:1} Konia: haozara' IEHOVÀ † ^{37:3} Tsefania: IEHOVÀ ro fiaropapiko ‡ ^{37:5} Paro: Mpampiparaitake; mpampianto

⁹ Hoe t'IEHOVÀ, Ko mamañahy vatañe ami'ty hoe: Tsy mahay tsy hienga antika o nte-Kasdio. Fa tsy hienga! ¹⁰ Ndra te fonga zinama'areo o lahindefon-te-Kasdy mialy ama'areoo, vaho tsy aman-tsehanga'e naho tsy ty fere an-kiboho'e ao, le ie ty ho nitroatse hamorototo ty rova toy amañ'afó.

¹¹ Aa ie nisitake Ierosalaime o nte-Kasdio ty amy lian-dahin-defo' i Paròy, ¹² le niakatse Ierosalaime t'Iirmeà hionjoñe mb'an-tane' i Beniamine aña handrambe ty anjaran-tane'e añivo' ondaty ao. ¹³ Ie pok' an-dalambei' i Beniamine eo le tsinepa' ty mpijilo atao Iiria[§] ana' i Selemia ana' i Kanania t'Iirmeà ami'ty hoe, Mitotse mb' amo nte-Kasdio ni-heo. ¹⁴ Le hoe t'Iirmeà: Vande zay; zaho tsy misitake mb' amo nte-Kasdio. Fe tsy nihaño'e; aa le sinambo' Iiria t'Iirmeà vaho nasese'e mb'amo roandriañe. ¹⁵ Niviñera' o roandriañe t'Iirmeà, le finofo' iareo vaho najo' iareo an-drohy añ'anjomba' Ionatane* silikitera ao, fa nanoeñe valabey ty ao.

¹⁶ Aa ie fa najoroboñe añ'efets' efe' i valabeiy t'Iirmeà naho nitambatse ao andro maro t'Iirmeà, ¹⁷ le nampihitrife' i Tsidkia amy zao re le nampihovañ' aze naho natola'e añ'anjomba'e ao vaho nañontane aze, ty hoe: Hera ao ty tsara boak' am' IEHOVÀ? Toe ao! hoe t'Iirmeà, fa hoe re: Hasese am-pitàm-panjaka' i Bavele rehe. ¹⁸ Tinovo' Iirmeà amy Tsidkia mpanjaka' Iehodà ty hoe, Ino ty tahiko ama'o ndra amo mpitoro'oo ndra am' ondati'oo te nagodo'o am-po porozò ao? ¹⁹ Aia ka o mpitoki'o nitoky ama'o ty hoe: Tsy ho avy haname azo naho ty tane toy ty mpanjaka' i Baveleo.? ²⁰ Aa le ijanjiño abey, ry taleko mpanjaka: Ehe, tsendreño o halalikoo, le ko ampipolieñ' ahy mb'añ'anjomba' Ionatane silikitera mb'eo, tsy mone hivetrake ao.

²¹ Aa le nandily t'i Tsidkia, naho najò' iareo an-kiririsa' o mpigaritseo t'Iirmeà; vaho nanjotsoañe vonga-mofo boak' andro hirik' an-dalampanoñak' ao ampara' te fonga nikapaike ty mofo' i rovay. Aa le nidoñe an-kiririsam-pigaritse ao t'Iirmeà.

38

¹ Aa le jinanji' i Sefatia* ana' i Matane[†], naho i Gedalia ana' i Pasore[‡], naho Iokale[§] ana' i Selemia, naho i Pasore ana' i Malkia ty tsara nisaontsie' Iirmeà am' ondaty iabio ami'ty hoe, ² Hoe t'IEHOVÀ: Ho zamanem-pibara, naho ty hasalikoña naho ty angorosy ze midoñe an-drova atoy; fe ho veloñe ze mionjomb' amo nte-kasdio mb'eo, le hengañe ama'e ty fiai'e ho tsindroke vaho ho veloñe. ³ Hoe t'IEHOVÀ, Toe hatolotse am-pitá' ty lia-rain-dahindefo' i Baveleyi ty rova toy vaho ho tavaneñe.

⁴ Le hoe i roandriañe rey amy mpanjakay, Ehe, mihalaly ama'o zahay te havetrake indatiy; amy te mokore'e ty fità' o lahindefo sisa an-drova atoio, naho ty fità' ondaty iabio, ie taroñe'e i tsara zay le t'ie tsy mipay ty hahasoa ondaty retoa fa ty hampiantoa'e. ⁵ Le hoe t'i Tsidkia mpanjaka am' iereo, Ingo, am-pitá' areo re: fa ia' mbaو ty mpanjaka te hahafiatrek' ama' areo?

⁶ Aa le rinambe' iereo t'Iirmeà vaho nagodo' iareo an-kadaha' i Malkia ana' i mpanjakay, an-kiririsam-pigaritse ao naho nazotso' iareo an-taly

§ ^{37:13} Iiria: ty fañeveñañe amy IEHOVÀ * ^{37:15} Ionatane: natolon'Añahare * ^{38:1} Sefatia: IEHOVÀ Mpizaka † ^{38:1} Matane: tolotse arofo; orañe ‡ ^{38:1} Pasore: mampigorobake; hafotiañe § ^{38:1} Iokale: maozatse; fonitse

t'Iirmeà. Tsy aman-drano i kadahay, fa fotake, vaho nilempotse an-ditsak' ao t'Iirmeà.

⁷ Aa ie jinanji' i Ebed-meleteke nte Kosy, vositse, añ'anjomba' i mpanjakay te najo' iareo an-kadaha ao t'Iirmeà—ie tandalam-bei' i Benamine eo i mpanjakay, ⁸ le niakatse añ'anjombam-panjaka ao t'i Ebed-meleteke vaho nisaontsy amy mpanjakay ty hoe, ⁹ O ry talèko mpanjaka, Hekoheko raty ty nanoe' ondaty reo amy fonga fitoloña' iareo am' Iirmeà mpitokiy, ie najorobo an-kadaha ao; toe hihomak' an-toe'e ao re ty amy mosarey, ie tsy ama-mofa ka ty an-drova atoy. ¹⁰ Aa le nafanto' i mpanjakay amy Ebed-meleteke nte Kosy ty hoe: Angalao ondaty telo-polo atoy, vaho akaro an-kadaha ao t'Iirmeà mpitoky, tsy mone hihomake.

¹¹ Aa le nampindreze' i Ebed-meleteke ama'e i ondaty rey, le nizilik' añañ'anjomba' i mpanjakay ambane' i trañom-baray le nandrambe tsirodea naho tsikotita, vaho nazotso' iareo an-taly mb'am' Iirmeà amy kadahay.

¹² Le hoe t'i Ebed-meleteke nte-Kosy am' Iirmeà, Ano an-kilek' ao o tsirodea naho tsikotitao ty amo taliò. Le nanoe' Iirmeà. ¹³ Aa le tinari' iareo mañambone amo taliò t'Iirmeà, naho naaka' iareo an-kadahay, vaho nidok' an' kiririsam-pigaritse ao t'Iirmeà.

¹⁴ Nampisangitrife' i Tsidkia am' Iirmeà mpitoky vaho nendese'e mb'an-dalambey faha-telo añañ'anjomba' IEHOVÀ ao, le hoe i mpanjakay am' Iirmeà. Hañontane raha ama'o raho le ko añañetaha'o ndra inoñ' inoñe.

¹⁵ Le hoe t'Iirmeà amy Tsidkia, Aa naho taroñeko, tsy hañohofa'o loza hao? Aa ndra te toroako, ho haoñe'o hao? ¹⁶ Aa le nanao fanta añañ' etake am' Iirmeà t'i Tsidkia mpanjaka ami'ty hoe, Kanao veloñe t'IEHOVÀ nitsene i sandrin-tika retoa, tsy havetrako rehe, naho tsy hatoloko am-pitá' ondaty mipay ty fiai'oo.

¹⁷ Aa le hoe t'Iirmeà amy Tsidkia, Hoe t'IEHOVÀ, Andrianañahare' i màroy, i Andrianañahare' Israele: Ie hiakatse mb'amo roandriam-panjaka' i Baveleo ey, le ho veloñe ty fiai'o, naho tsy ho forototoe' ty afo ty rova toy; vaho ho velon-drehe naho i anjomba'oy. ¹⁸ Fa naho tsy hiavotse mb'amo roandriam-panjaka' i Baveleo rehe, le hatolotse am-pitá' o nte Kasdio ty rova toy vaho ho tomomohe' iareo afo, ihe tsy ho votsorem-pitá' iareo.

¹⁹ Aa hoe t'i Tsidkia mpanjaka am' Iirmeà, Atahorako o nte Iehodà nivalike mb'amo nte-Kasdioo, hera hanese ahy am-pitá' iareo ho kizaheñe.

²⁰ Fa hoe t'Iirmeà: Tsy hasese' iereo. Ehe, mivohora am' IEHOVÀ ty amy nivolañakoy soa te hierañeran-drehe vaho ho veloñe ty fiai'o. ²¹ F'ihe mifoneñe tsy hionjoñe mb'eo, le zao ty tsara' IEHOVÀ natoro'e ahy: ²² Inao! ze rakemba sisa añañ'anjombam-panjaka' Iehodà ao ro songa hakareñe mb'amo roandria' i Baveleo: Le ty hoe ty ho asa' i rakemba rey:

O rañe'oo ty nañosik'azo,
vaho nandrekets' azo,
aa hehe te nilempotse an-ditsak' ao o fandia'oo
le nitsambolitio' iareo.

²³ Hene hakare' iereo mb'amo nte Kasdio o valy naho ana'oo; le tsy ho votsortse am-pitá' iareo rehe fa ho rambesem-pitá' i mpanjaka' i Baveley, vaho ihe ty hamorototoañe ty rova toy an' afo.

²⁴ Le hoe t'i Tsidkia am'Iirmeà, Ao tsy hampahafohine'o am'ondate i rehake zay le tsy ho mate rehe. ²⁵ Aa naho rendre' o roandriañeo te nifanaontsy tika, naho ivotraha' iareo l manao ty hoe: Ehe saontsia am'aay i nitaroñe'o amy mpanjakaiy naho i nisaontsia' i mpanjakaiy, le ko añañetaha'o, tsy hañohofa'ay loza: ²⁶ Le ty hoe ty hatoi'o, I entako

amy mpanjakay: Ie nihalaliako te tsy hampibalike ahy mb'añ'anjomba' Ionatane mb'eo hivetrak' ao.

²⁷ Ie amy zao sindre niropak' am' Iirmeà o roandriañeo nañontane aze, le tinaro'e am'iareo i entañe iaby nampisaontsie' i mpanjakaiy. Aa le nado' iareo ty fisaontsiañe ama'e; vaho tsy nioni' iareo ty vente'e.

²⁸ Nimoneñe an-kiririsam-pigaritse ao amy zao re ampara' ty andro' nitavanañe Ierosalaime.

39

¹ Ie tsinepake t'Ierosalaime ami'ty volam-paha-folo' i taom-paha-sive' i Tsidkia mpanjaka' Iehodà le nifajifajy mb'e Ierosalaime naho nañarikatok' aze t'i Nebokadnetsare mpanjaka' i Bavele naho o fonga lahindefo'eo; ² le pinonak' ami'ty andro faha-sive' i volam-paha-efa' i taom-paha folo-raik' ambi' i Tsidkiay, i rovay. ³ Le songa nimb'an-dalambey Añivo mb'eo o roandria' i mpanjaka' i Baveleo vaho niambe-satse eo t'i Nergale-saretsere*, i Samgar-nebo†, i Sarsekime‡, vosi'e, i Nergal-saretsere, mpanao sahàtse, vaho o roandria' i mpanjaka' i Baveley ila'e iabio.

⁴ Ie niisa' i Tsidkia mpanjaka' Iehodà naho o lahindefo'eo, le niboratsake mb'eo, niakatse i rovay haleñe mb'angolobo' i mpanjakay, niranga mb'an-dalambey añivo' i kijoly roe rey, vaho niavotse mb' aña' Arabà§ mb'eo.

⁵ F'ie nihoridaña' o lian-dahin-defon-Kasdio le nitratse amonto' Ieriko* ey t'i Tsidkia, naho tsinepa' iereo, naho nasese mb'amy Nebokadnetsare mpanjaka' i Bavele e Ribla† an-tane' i Kamate‡ aña: vaho zinaka'e. ⁶ Le zinama' ty mpanjaka' i Bavele e Ribla o ana-dahi' i Tsidkiao añatrefam-pihaino'e eo; zinevo'e iaby ka o roandria' Iehodà. ⁷ Ginoa'e amy zao ty fihaino' i Tsidkia, le vinaho'e an-torisike haneseña' aze mb'e Bavele mb'eo. ⁸ Finorototo' o nte-Kasdio ty anjomba' i mpanjakay naho o anjomba ondatooo, vaho narotsa' iareo ty kijoli' Ierosalaime.

⁹ Nasese' i Nebozaradane, mpifehem-pigaritse an-drohy mbe Bavele aña ze sehanga' ondaty nisisa an-drova ao, naho o nifotetse ho ama'eo vaho ze honka' ondaty nisisa ao. ¹⁰ Nenga' i Nebozaradane§ an-tane Iehodà ao ty ila' o rarake tsy amam-panañañeo vaho nitolora'e tanem-bahe naho teteke henane zay.

¹¹ Linili' i Nebokadnetsare mpanjaka' i Bavele t'i Nebozaradane, mpifehe mpigaritse, ty am' Iirmeà, ty hoe, ¹² Rambeso le atrao naho ambeno soa vaho ko ijoiañe fa ano ama'e ze hatoro'e, ¹³ Aa le nañirake t'i Nebozaradane, mpifehem-pigaritse naho i Nebo-saz'haban*, vosie loha'e, naho i Nergale†-saretsere, vosi'e mpanao sahàtse, rekets' o roandriam-panjaka' i Baveley ila'e iabio, ¹⁴ nampihitrife' iereo naho rinambe' iareo an-kiririsam-pigaritse ao t'Iirmeà, naho nafanto' iereo amy Gedelia‡, ana' i Ahikame, ana' i Safane ty hampoly aze, himoneña'e am'ondate'e.

¹⁵ Niheo am' Iirmeà ty tsara' IEHOVÀ, ie nirindriñe an-kiririsam-pigaritse ao, nanao ty hoe: ¹⁶ Akia saontsio t'i Ebed-meleke§, nte-Kose ty hoe: Hoe ty nafè' IEHOVÀ i Màroy, i Andrianañahare' Israeley: Ho henefako ami'ty

* 39:3 Nergale-saretsere:mpamandron-drala † 39:3 Samgar-nebo: fibara mitoky § 39:3 Sarsekime: tale' ty hajan-tsaroñe § 39:4 Arabà: forototo; i vavatane lalek' atimoy * 39:5 Ieriko: ty vola'e; ty harifondrifo'e † 39:5 Riblà: fifandierañe; enge'e; fiareñañe ‡ 39:5 Kamate: haviñerañe; havotrohañe; kijoly § 39:10 Nebozaradane: Voka' ty Zaka, Fitokia'e * 39:13 Nebosazhaban: tsara; mivoamboañe; † 39:13 Nergale: Fanalolahy ‡ 39:14 Gedalia: IEHOVA ro mampanjofak' ahy § 39:16 Ebed-meleke: mpitorom-panjaka

rova toy i tinarokoy ho hankàñe ama'e fa tsy ho fañasoàñe, vaho ho heneke añatrefa'o amy andro'ey. ¹⁷ Fe ho hahako rehe amy andro zay, hoe t'IEHOVÀ, tsy hatolotse am-pitâ' ondaty ihembaña'oo, ¹⁸ toe harovako tsy hampikorovohem-pibara; ty fiai'o ty ho tsindro'o amy te niato amako, hoe t'IEHOVÀ.

40

¹ Ty tsara niheo am'Iirmeà boak' am' IEHOVÀ, ie navotsò'i Nebozaradane mpifehem-pigaratse e Ramà* aña, ie fa nasese'e an-drohy mindre amo mirohy boak' Ierosalaime naho Iehodào ho mb' ampandrohizaña e Bavele aña.

² Natola' i mpifehe mpigaritsey t'Iirmeà vaho hoe ty asa'e ama'e: IEHOVÀ Andrianañahare'o ty nitsara o hankàñe zao ami'ty toetse toy; ³ le ie henanekeo, fa nihenefa' IEHOVÀ i tsinara'ey amy te nandilatse am' IEHOVÀ nahareo vaho tsy hinao' areo ty fiarañanaña'e. Toly ndra nifetsake i nitsaraeñey. ⁴ F'ie henaneo, Ingo te hahako ama'o aniany o rohy am-pitâ'oo. Aa ie te hindre lia amako mbe Bavele mb'eo, miavia vaho hatràko soa, f'ie tsy te hindre amako mb'e Bavele aña le apoho. Inge, añatrefa'o eo o tane iabio; mañaveloa amy ze atao'o ho soa naho mahity.

⁵ Ie mbe tsy nitolike, le hoe re, Molia amy Gedalia ana' i Ahikame ana' i Safan; tinendre' i mpanjaka' i Baveley ho mpifeleke o rova' Iehodaoy, vaho mimoneña ama'e, am'ondatio; he mañaveloa mb'amy ze ereñere'o hombaña. Aa le tinolo' i mpifehe mpigaritsey anjara mahakama naho ravoravo vaho nampomba'e mb'eo.

⁶ Aa le nimb'amy Gedelia ana' i Ahikame e Mitspà† aña re vaho nitrao-pimoneñe am'ondaty nengañe an-taneo. ⁷ Ie songa jinanji' o mpiaolon-dahindefoñe am-patrambeio, ie naho o mpiama'eo, te tinendre' i mpanjaka' i Baveley t'i Gedalia ana' i Ahikame ho mpifeleke i taney, naho nampifeheañe aze ondatio naho o rakembao vaho o ajajao; o loho rarake amy taney tsy nasese mb'e Bavele mb'eo, ⁸ le nimb' amy Gedalia e Mitspà aña iereo rekets' Ismaele‡ ana' i Netania§, naho Iohanane* naho Ionatanet† sindre ana' i Karea‡, i Seraia§ ana' i Tankomete*, o ana' i Ofay† nte-Netofào‡ naho Iezania§ ana'ty nte-Maakà*, ie vaho ondat'iareoo.

⁹ Le nanao fanta am' iereo naho amo lahin-defo'eo t'i Gedalia ana' i Ahikame ana' i Safane, ami'ty hoe, Ko ihembaña' areo ty mitoroñe o nte-Kasdio. Imoneño i taney naho toroño ty mpanjaka' i Bavele, le ho soa tahi. ¹⁰ Aa naho zaho, le himoneñe e Mitspà hijohañe añatrefa' o nte-Kasdy hivotrak' aman-tikañ' atoio; f'inahareo: anontono divay naho ty vakats' asotry naho menake, le ahajao an-tsajoa' areo ao, vaho imoneño o rova felehe' areoo.

¹¹ Manahake zay ka, ie jinanji' o nte-Iehodà e Amone naho Edomeo naho o an-tane ila'eo te nampipoke honka'e e Iehodà ao ty mpanjaka' i Bavele vaho tinendre'e t'i Gedalia ana' i Ahikame, ana' i Safane ho mpifelek' iareo, ¹² le nimpoly boak' amo fonga tane niparatsiaha' iareoo mb'an-tane' Iehodà mb' amy Gedalia e Mitspà ao ze hene nte Iehoda, le nanontoñe divay vaho vakats' asara tsifotofoto.

* **40:1** Rama: Naonjoñe; Fanintsiññañe † **40:6** Mitspà: fitalakesañ'abo; fañanjoanjoañe ‡ **40:8** Ismaele: Andrianañahare mahajanjiñe § **40:8** Ravoravo' IEHOVÀ * **40:8** Iohanane: matarike, mpiferen'ay † **40:8** Ionatane: Natolon'Añahare ‡ **40:8** Karea: Sola, pea-bolo; § **40:8** Seria: Roandria' IEHOVÀ * **40:8** Tankomete: Fañohòñe; fisolohoañe † **40:8** Ofay: Mokotse ‡ **40:8** Netofà: mañevoñe ahazoan-dro § **40:8** Iezania: Fahañe boak' amy IEHOVÀ * **40:8** Maakà: famorekekeñañe

¹³ Niheo mb'amy Gedalia e Mitspà mb'eo t'Iohanane ana' i Karea naho ze hene mpiaolon-dahin-defo an-kaloke, ¹⁴ nanao ama'e ty hoe, Tsy fohi'o hao te nafanto' i Baalise[†] mpanjaka' o nte-Amoneo t'Ismaele ana' i Netania hañoho-doza ama'o? F'ie tsy niantofa' i Gedalia ana' i Ahikame. ¹⁵ Aa le natola' Iohanane ana' i Karea t'i Gedalia e Mitspà ao, le nanoe'e ty hoe, Ehe, angao handenàko mb'am' Ismaele ana' i Netania mb'eo hamono aze, fa tsy ho fohi' ondaty. Ino ty hañohofa'e loza ami'ty fiai'o? hampiparaitahañe o hene nte-Iehodao, toe ho mongotse ty sehanga' Iehodà. ¹⁶ Fe hoe t'i Gedelia ana' i Ahikame am' Iehonane ana' i Karea, Ko manao zao, ihe andañira'o Ismaèle.

41

¹ Ie amy volam-paha-fitoy, le nivotrak' amy Gedalia ana' i Ahikame e Mitspà ao t'Ismaele ana' i Netania, ana' i Elisama tirim-panjaka, ie mpiamo roandria' i mpanjakaio, reketse ty lahilahy folo, vaho nitrao-pikama e Mitspa ao. ² Niongak' amy zao t'Ismaele ana' i Netania naho i folo lahy nindre ama'e rey, vaho linihi' iereo fibara t'i Gedalia ana' i Ahikame, ana' i Safane; vinono iereo i noriza' i mpanjaka' i Baveley ho mpifehe' i taneiy. ³ Zinama' Ismaele ka ze nte-Iehodà mpiama'e ao, o niharo amy Gedalia e Mitspào naho o nte-Kasdy nizoeñeo, o lahin-defoñeo.

⁴ Ie herone amy namonoa'e i Gedaliay, ie tsy eo ty naharendreke, ⁵ le totsake eo t' indaty valompolo boake Sekeme* naho boake Silò[†] naho hirike Somerone, an-tanteahetse hinaratse naho sikiñe riniatse, vaho an-tsandriñe linililily, ninday enga mahakama naho embok' am-pitâne homb'añ'anjomba' IEHOVÀ mb'eo. ⁶ Aa le niavotse i Mitspà t'Ismaele ana' i Netania hifanalaka am' iereo, nangololoike ty rovetse t'ie nañavelo mb'eo; ie nigadoñe am' iereo, le hoe ty asa'e ama'e: Antao homb'e Gedalia ana' i Ahikame mb'eo. ⁷ Aa ie naneñateña i rovay le zinama' Ismaele ana' i Netania rekets' o mpiama'eo vaho namokovoko iareo am-po kadaha ao. ⁸ Fe nizoeñe am' iereo t'indaty folo nanao ty hoe amy Ismaele, Ko avetra'o fa aman-kaja mikafitse an-tonda ao, ty vare-bolè, naho ampemba, naho menake vaho tantele. Aa le napo'e, tsy vinono'e miharo amo rolongo'eo.

⁹ I kadaha najorobo' Ismaele i lolo amy Gedalia rezay le ty nanoe' i Asa[‡] mpanjaka ty amy Baasa[§] mpanjaka' Israeley; le natsafe' Ismaele ana' i Netania ama'e ao o vinonoo.

¹⁰ Le fonga nendese' Ismaele an-drohy aña ty sehanga' ondaty e Mitspà ao, o anak' ampela' i mpanjakaio naho ze kila ondaty nengañe e Mitspà ao, o nafanto' i Nebozaradene mpifehe mpigaritse amy Gedalia, ana' i Ahikame; aa le nasese' Ismaele ana' i Natania an-drohy vaho nienga hitsake mb'amo ana' i Amaneo aña.

¹¹ Aa ie jinanji' Iohanane ana' i Karea naho o mpifehen-dahindefo mpiama'eo ty halò-tsereke nanoe' Ismaele ana' i Netania, ¹² le nendese'iereo o lahilahy iabio naho nionjoñe mb'eo hifangantotse am'Ismaele ana' i Netania, vaho nitendrek' ama'e an-drano-bey e Gibone eo. ¹³ Le ie niisa' o hene ondaty nindre am' Ismaeleo t'Iohanane ana' i Karea, naho o mpifehe lahin-defoñe nindre ama'eo, le nifale, ¹⁴ naho songa niamboho vaho niveve mb' am' Iohanane ana' i Karea mb'eo ondaty nasese' Ismaele an-drohy boake Mitspào. ¹⁵ Fe niborafitse am' Iehonane t'Ismaele ana' i Netania reketsé ty ondaty valo, nimb' amo ana' i Amoneo mb'eo.

[†] 40:14 Baalise: Firebehañe; tale mirengevoke * 41:5 Sekeme: Ampaha'e; nimpoly maraindray † 41:5 Silò: niraheñe ‡ 41:9 Asa: Mpanaha; famelañe § 41:9 Baasa: Lel'afó; Fañafahan-deotse

¹⁶ Aa le nendese' Iohanane, ana' i Karea, naho ze hene mpifehe lahin-defoñe nindre ama'e, ty sisa' ondaty rinambe'e am'Ismaele ana' i Netania, boak'e Mitspàao—ie fa vinono'e t'i Gedalia ana' i Ahikame naho o mpiama'eo—o lahilahio naho o lahindefoñe naho o rakembao, naho o ajajao, naho o positse nendese'e boake Giboneo, ¹⁷ le nienga, vaho nañialo an-kialo' i Kimhame* marine i Betlekhemet† aña, hiavotse mb'e Mitsraime aña, ¹⁸ ty amo nte-Kasdio, amy t'ie nihembaña' iereo, ty amy namonoa' Ismaele ana' i Netania t'i Gedalia ana' i Ahikame, i nampifelehe' i mpanjaka' i Baveley i taneiy.

42

¹ Aa le nañarivo mb'eo o mpifehe lahindefoñe iabio, naho Iohanane ana' i Karea, naho Iezanià ana' i Hosaià*, vaho ze hene ondaty, ty bey naho ty kedeke, ² nanao ty hoe am' Iirmeà mpitoky, Ehe te ho no'o ty halali'ay t'ie hisoloho ho anay am' IEHOVÀ Andrianañahare'o, ho amako o hene sehanga'e retoa; amy te nengañe tsy ampeampe tika nimaro, ie o isam-pihaino'oo; ³ soa te hatoro' IEHOVÀ Andrianañaha 42 re'o ama'ay ty hañaveloa'ay naho ty hanoe'ay.

⁴ Aa le hoe t'Iirmeà mpitoky am' iereo, Fa tsinanoko nahareo; toe ho halalieko am' IEHOVÀ Andrianañahare' areo ty amy saontsi' areoy; ie amy zao, ze tsara hatoi' IEHOVÀ ama' areo ty hitaroñako; tsy eo ty ho tanako ama' areo.

⁵ Aa le nanao ty hoe am' Iirmeà iereo, Ehe te ho valolombeloñe vantañe naho migahiñe añivo-tika t'IEHOVÀ, naho tsy hanoe'ay ze hene tsara hañiraha' IEHOVÀ Andrianañahare'o ama'ay añama'o. ⁶ Ke t'ie ho soa he te ho raty, ho haoñe'ay ty fiarañanaña' IEHOVÀ Andrianañaharentika amantoha'ay azoy; soa te hañasoa anay ty hañaoñe ty fiarañanaña' IEHOVÀ Andrianañaharentika.

⁷ Aa ie nimodo ty folo andro, le niheo am' Iirmeà ty tsara' IEHOVÀ. ⁸ Le kinoi'e t'Iohanane ana' i Kerea naho o mpifehen-dahin-defoñe mpiama'eo naho ze hene ondaty, ty kede naho ty bey ⁹ vaho nanoe'e ty hoe: Hoe t'IEHOVÀ, Andrianañahare' Israeley, ie namantoha' areo ahy hañenga i halali' areoy añatrefa'e. ¹⁰ Aa naho toe himoneña' areo o tane toio, le haoreko fa tsy harotsako; hamboleko fa tsy hombotako; le hanintsiñeko ty amy hankàñe nanoeko ama' areoy. ¹¹ Ko hembaña' areo i mpanjaka' i Babilone irevendreveña' areoy; ko miria-tsandry ty ama'e; hoe t'IEHOVÀ; toe hindre ama' areo raho handrombake naho hamotsotse anahareo ampit'a'e. ¹² Le ho tolorako tretrè soa te hiferenaiña' le hampolie'e mb'an-tane' areo ao. ¹³ F'ie mone hanao ty hoe: Tsy himoneña'ay ty tane toy; amy te tsy haoñe' areo ty fiarañanaña' IEHOVÀ Andrianañahare' areo; ¹⁴ vaho manao ty hoe: Aiy! hañavelo mb'e Mitsraime mb'eo zahay, tsy hahaisak' aly, tsy hahajanjiñe antsiva, tsy hifeake kerè; le aña ty himoneña'ay; ¹⁵ le janjiño ty tsara' IEHOVÀ, ry sehanga' Iehodà: Hoe t'IEHOVÀ i Màroy, i Andrianañahare' Israeley; naho toañe' areo o lahara' areoo higodañe mb'e Mitsraime mb'eo hisese aña; ¹⁶ le ho takare' i fibara ihembaña' areoy an-tane Mitsraime ao, vaho hañoridañe anahareo e Mitsraime aña i hasalikoañe marimarihe' areoy; vaho hikoromak' aña. ¹⁷ Zay ty hifetsak' amy ze fonga ondaty mampitoañe ty lahara'e mb'e Mitsraime mb'eo hitaveañe aña; ho zamane' ty fibara, ty hasalikoañe, naho ty angorosy; vaho tsy ho aman-tsehanga'e ndra ty hahabotafotse ami'ty feh'ohatse

* ^{41:17} Kimhame: hambañe am' iereo. † ^{41:17} Betlekhemet: Anjomba' ty mofo * ^{42:1} Hosaia: ty fandrombaha' IEHOVÀ

hafetsako ama'e. ¹⁸ Fa hoe t'IEHOVÀ i Måroy, i Andrianañahare' Israeley: Manahake ty nampidoañañe ty habosehako naho ty fiforoforoako amo mpimone' Ierosalaimeo, ty hampidoañañe ama' areo ty fileveleveako naho mimoake e Mitsraime aña; le ho fokom-patse, ho halatsañe, ho ozoñe naho injé; vaho tsy ho isa' areo ka ty toetse toy.

¹⁹ Hoe ty nitsarà' IEHOVÀ ama'areo ry sehangá' Iehodào; Ko mimoak' e Mitsraime ao; mahafohina te hinatahatako anindroany. ²⁰ Fe nifañahie' areo ty tro'areo; ami'ty nañirahañ' ahy mb'am' IEHOVÀ Andrianañahare' areo, ami'ty hoe: Ihalalio ho anay t'IEHOVÀ Andrianañaharentika vaho itaroño ndra inoñ' inoñe saontsie' IEHOVÀ Andrianañaharentika, le hanoe'ay. ²¹ Aa le ie i tinaroko ama' areo anindroaniy; fe tsy haoñe' areo ty fiarañanaña' IEHOVÀ Andrianañahare' areo ami'ty inoñ' inoñe namantoha'e ahy ho ama'areo. ²² Mahafohina an-katò t'ie hampihomahem-pibara naho ty mosare vaho ty angorosy amy toetse tea' areo hombañe hañialoa' areoy.

43

¹ Ie nigadoñe ty saontsi' Iirmeà am'ondaty iabio, ze hene tsara' IEHOVÀ Andrianañahare' iareoo, i namantoha' IEHOVÀ Andrianañahare' iareo aze ho am' iareoy, i tsara iaby rezay; ² le hoe ty asa' i Azaria* ana' i Hosaia naho Iohanane ana' i Karea, vaho ondaty mirengevoke iabio, Mandañitse rehe! tsy nirahe' IEHOVÀ Andrianañaharentika rehe hanao ty hoe, Ko mañavelo mb'e Mitsraime mb'eo hañialo aña, ³ fe sinigi' i Baroke ana' i Neria ama'ay rehe, hanese anay am-pitá' o nte-Kasdio, hañohofa' iareo loza vaho hinday anay an-drohy mb'e Bavele aña.

⁴ Le tsy hinao' Iohanane ana' i Karea naho o mpifehen-dahin-defoñe iabio, naho ze hene ondaty ty fiarañanaña' IEHOVÀ, ty himoneña' iereo an-tane Iehodà ao. ⁵ Fe rinambe' Iohanane ana' i Karea naho o mpifehen-dahin-defoñe iabio ze fonga sehangá' Iehodà nimpoly boak' amo fifelehañe iaby nandroahañe iareoo hañialo an-tane' Iehodà ao; ⁶ ondatio, o rakembao, o ajajao naho o anak' ampelam-panjakao, vaho ze hene ondaty napo' i Nebozaradane mpifehe mpigaratsey amy Gedalia ana' i Ahikame ana' i Safane ao, naho Iirmeà mpitoky, vaho i Baroke ana' i Neria; ⁷ le niloak' an-tane Mitsraime ao, amy t'ie tsy nañaoñe ty fiarañanaña' IEHOVÀ, vaho nivotrake e Takpanese† eo.

⁸ Aa le niheo am' Iirmeà e Takpanese ao ty tsara' IEHOVÀ nanao ty hoe: ⁹ Andrambeso vato jabajaba am-pitá'o vaho akafiro am-po' ty lietse an-dalam-bein' anjomba' i Parò e Takpanese ao, ampahaisaha' ondati' Iehodà eo; ¹⁰ vaho ano ty hoe am'iereo: Hoe t'IEHOVÀ i Måroy, t'i Andrianañahare' Israele: Inao! hampañitrifeko i Nebokadnetsare mpanjaka' i Bavele mpitorokoy, naho hapoko amy vato nakafiko rey eo ty fiambesa'e vaho halama'e am'iereo i lambam-pañalofa'ey. ¹¹ Homb' atoy re handafa ty tane Mitsraime; ho zamaneñe ze ho am-pikoromahañe, ho rohizeñe ze ho am-pandrophizañe, vaho ho lafàm-pibara ze ho am-pibara. ¹² Le hamiañ' afo añ' anjomban-drahare' i Mitsraime ao raho le ho forototoe'e irezay, naho hasese'e mb'an-drohy aña iereo, naho ho valoñe'e ty tane Mitsraime manahake ty amaloña' ty mpiarake ty saro'e, vaho hiakatse am-panintsiñañe. ¹³ Ho rotsahe'e ka o vatolahi' i Betsemese‡ an-tane Mitsraimeo; vaho ho hotomomohe'e añafo o akiban-drahare' i Mitsraimeo.

* ^{43:2} Azaria: i mahajanjiñe IEHOVÀ † ^{43:7} Takpanese: fihembañañe; mizotso ‡ ^{43:13} Betsemese: Anjomba' i àndroy

44

¹ Ty tsara niheo am' Iirmeà ty amo nte-Iehodà iaby nañialo an-tane Mitsraimeo, o nimoneñe e Migdole* naho e Takpanese naho e Nofe† vaho an-tane' i Patroseo‡, nanao ty hoe:

² Hoe t'IEHOVÀ i Mâroy, i Andrianañahare' Israeley, Fa niisa' areo i fonga hankâñe nafetsako am' Ierosalaime naho amo hene rova' Iehodao; le heheke t'ie mangoakoake henaneo naho tsy imoneña' ondaty, ³ ty amy halò-tsereke nanoe' iereo hampibosek' ahy, ie niheo mb'amo ndrahare ila'eo, nañenga naho nitoroñe iareo, o tsy nifohi' iereoo; ie ndra nahareo, ndra o roae' areoo; ⁴ ndra te nampihitrifeko ama' areo o mpitoky mpitoroko iabio nañampitso t'ie niraheñe ninday ty hoe: Ehe, ko anoe' areo o raha tiva hejekoo. ⁵ F'ie tsy nañaoñe, tsy nanokilan-dravembia, tsy nibalintoa amo hatsivokarañe, hijihera' iareo ty fañembohañe amandrahare ila'e. ⁶ Aa le nidoandoañe ty fiforoforoan-kabosehako, vaho namorototo an-drova' Iehodà ao naho an-damo' Ierosalaime ey, ampara' t'ie nangoakoake naho kafoake, vaho ie henaneo.

⁷ Aa le hoe t'IEHOVÀ, t'i Andrianañahare' i mâroy, t'i Andrianañahare' Israele; Akore ty anoe' areo ty haloloañe jabajaba zao hampiantoa' areo fiaiñe hañitoa' areo am' Iehodà ze ondaty naho rakemba, ajaja naho anak' ajaja minono, soa te leo raike tsy ho sisâne ama' areo; ⁸ amy te sinigi' areo raho amo satam-pità' areoo, ty fañenga' areo aman-drahare ila'e an-tane Mitsraime ao, i nisesea' areoy; soa t'ie haitoâne vaho ho fokom-patse naho titse amo kilakila' ondati' ty tane toio? ⁹ Nihaliño' areo hao ty fitoloñandratin-droae' areo naho ty sata-rati' o mpanjaka' Iehodà naho ty sata-rati' o vali'eo, naho ty sata-rati' areo naho ty sata-ratin-tañanjomba' areo, o nanoe' iereo an-tane' Iehodà ao naho an-dala' Ierosalaimeo? ¹⁰ Mboe tsy nireke pake henane, mbore tsy mañeveñe, tsy mañavelo an-Kâke ndra amo fañè najadoko aolo' areo, añatrefan-droae' areo.

¹¹ Aa le hoe t'IEHOVÀ i Mâroy, t'i Andrianañahare' Israele; Inao te hatreatrèko ama' areo ty tareheko ho ami'ty hankâñe, le fonga haitoako t'Iehodà; ¹² naho haitoako ty sehanga' Iehodà niatre-daharañe mbe Mitsraime mb'etoy hitaveañe, naho songa ho mongoreñe, toe hikoromak' an-tane Mitsraime atoa nahareo, ho zevoñem-pibara naho ty hasalikoañe, fonga hivetrake, ty kede naho ty bey, ami'ty mesolava naho ty kerè; le ho fatse, naho fampangebahebahañe naho fanirañe vaho fañinjeañe. ¹³ Amy te ho liloveko o mañialo an-tane Mitsraimeo, manahake ty nandilovako Ierosalaime, ami'ty fibara naho ty kerè vaho ty angorosy, ¹⁴ leo raike tsy hipotatsake ndra hahatambeloñe amo sehanga' Iehodà nitaveañe mb' an-tane Mitsraime hañialo añaeo vaho himpoly mb'an-tane' Iehodà aña, mb'amy fañiria' iareoy; amy te tsy eo ty himpoly aña naho tsy o tsy ampe mahapolititseo avao.

¹⁵ Aa le nanoiñe am' Iirmeà ondaty nahefahiñe te nañenga amo 'ndrahare ila'eo o vali'eo naho o rakemba nizorazora eio naho i valobohòkey vaho ze hene ondaty nimoneñe an-tane Mitsraime e Patrose ao, ami'ty hoe, ¹⁶ I tsara nisaontsie'o ama'ay ami'ty tahina' IEHOVÀ: Tsy hañaoñe azo zahay. ¹⁷ Fa tsy mete tsy hanoe'ay ze fonga enta' nakare' o vava'aio, ty hañemboke amy mpanjaka-ampelan-dikerañey, naho ty hampidoañañe enga-rano, fa zay ty sata'ay, zahay naho o roae'aio, o mpanjaka'aio, o roandria'aio an-tane' Iehodà naho an-dala'

* **44:1** Migdole: fitalakesañ'abo † **44:1** Nofe; Papin-tantele; mitadretse, mipoke ‡ **44:1** Patrose: vava lifo-koba; sigiheñe hijoy

Ierosalaime ao; amy t'ie ninen-kaneñe henane zay, vaho nijangañe, vaho tsy nizo hankàñe. ¹⁸ Fe mifototse ami'ty nampipoha'ay ty fañengañe amy mpanjaka ampelan-dikerañey, naho ty fampidoaña'ay enga rano, le nipo-vara, vaho nizamanem-pibara naho ty kerè. ¹⁹ Aa vaho zahay avao hao ty mañenga amy mpanjakan-dikerañey naho mañiliñe enga-rano ama'e? Mamboatse mofomamy ami'ty vinta'e naho mampidoañe engan-drano ama'e hao zahay naho tsy eo valy?

²⁰ Aa le hoe t'Iirmeà am'ondaty iabio, amo lahilahio naho amo rakembao naho amy ze fonga ondaty nanoiñe aze amy hoe zay: ²¹ O tsotse nañemboha' areo an-drova' Iehodà naho an-dala' Ierosalaimeo, inahareo naho o rae' areoo naho o mpanjaka' areoo naho o roandria' areoo naho ondati' i taneio; tsy niarofoana' IEHOVÀ hao, tsy nizilik' am-pitsakorea'e ao hao? ²² Ampara te tsy nileo' IEHOVÀ o sata-rati' areoo, naho o raha tiva nanoe' areoo; toly ndra ninjare kòake ty tane' areo, toe halatsañe, vaho fatse, tsy amam-pimoneñe pake henaneo. ²³ I fañenga' areo irezay, o hakeo' areo am' IEHOVÀ, t'ie tsy nañaoñe ty fiarañanaña' IEHOVÀ, te tsy nañavelo an-Kàke, ndra amo fañè'eo, ndra amo fitaroña'eo: ie ty nifetsaha' o hekoheko zao ama' areo henaneo.

²⁴ Tinovo' Iirmeà ty hoe am' ondaty iabio, naho amo rakemba iabio: Janjiño ty tsara' IEHOVÀ, ry hene Iehodà an-tane' Mitsraime atoio: ²⁵ Hoe t'IEHOVÀ i Mâroy, t'i Andrianañahare' Israele: Fonga nisaontsy am-palie nahareo naho o tañanjomba' areoo vaho nihenefem-pitâ' areo ami'ty hoe, Toe hanoe'ay o fanta nititihe'aio naho hañenga amy mpanjaka-ampelan-dikerañey, naho hañily enga rano ama'e; Toe hajado' areo o nifantà' areoo vaho ho henefe' areo o fititiha' areoo.

²⁶ Ehe tsendreño ty tsara' IEHOVÀ, ry Iehodà mpañialo e Mitsraime atoañ' iabio; Ingo fa nifanta amy añarako ra'elahi raho, hoe t'IEHOVÀ, te le lia'e tsy ho toñoneñe am-palie' ondaty nte-Iehodà an-tane Mitsraime atoao ty añarako ami'ty hoe, Kanao veloñe t'i Talè IEHOVÀ. ²⁷ Inao! haratiañe ty añambenako iareo, fa tsy fañasoàñe; vaho fonga ho mongore' ty fibara naho ty hasalikoañe ze lahilahi' Iehodà an-tane' Mitsraime atoy, ampara' te tsy aman-tsehang'a'e. ²⁸ Fe hipolititse amy fibaray ty honka'e tsy ampe boak'an-tane Mitsraime atoa homb'an-tane' Iehodà mb'eo, soa te ho fohi' i hengaha' Iehodà nivotrak' an-tane Mitsraime hañialoa'ey, te, ty tsara' ia ty ho to, ke ty ahy he ty a iareo?

²⁹ Le inao, ty viloñe ama' areo, hoe t'IEHOVÀ, te toe hitilihako antoetse atoy, hahafohina' areo te vata'e hijadoñe ama' areo ho ami'ty hankàñe o entakoo: ³⁰ fa hoe ty nafè' IEHOVÀ: Ingo te hatoloko am-pitâ' o rafelahi'eo naho am-pitâ' o mipay ty fiai'eo t'i Parò-Kofrà mpanjaka' i Mitsraime, hambañ' amy nanolorako i Tsidkia, mpanjaka' Iehodà, am-pita' i Nebokadnetsare mpanjaka' i Bavele, rafelahi'e nipay t'y fiai'e.

45

¹ Ty enta' Iirmeà mpitoky natao'e amy Baroke ana' i Nerià, ie sinoki'e am-boke ao o tsara boak' am-palie' Iirmeà retoa, an-taom-paha-efa' Iehoiakime ana' Iosià, mpanjaka' Iehodà, manao ty hoe:

² Hoe t'IEHOVÀ, Andrianañahare' Israele ama'o ry Baroke: fa nanao ty hoe rehe: ³ Feh'ohatse amako henane zao! fa nitovoña' IEHOVÀ fioremeñañe ty fangirifiriako; mahamamak' ahy ty fiñeõeoko, le tsy mahatreo fitofâñe. ⁴ Ty hoe ty ho saontsie'o ama'e, Hoe t'IEHOVÀ: Inao! fa ho rotsaheko i niranjiekoy, vaho hombotako o nambolekoo, i hene taney 'nio. ⁵ Aa le mipay raha ra' elahy ho am-bata'o v' iheo? Ko tsoehe'o fa ingo,

hametsahako hankàñe iaby ze atao nofotse, hoe t'IEHOVÀ; fe hatoloko azo ho tamben'ali'o ty fiai'o amy ze hene toetse hañaveloa'o.

46

¹ Niheo am'Iirmeà, mpitoky ty tsara' IEHOVÀ ty amo fifeheañeo; ² ty amy Mitsraime, i mpirai-lian-dahin-defo' i Parò-Neko* mpanjaka' i Mitsraimey, ie añolo' i Saka-Perate† e Karkemise ao, le ginio' i Nebokadnetsare mpanjaka' i Bavele, amy taom-paha-efa' Iehoiakime ana' Iosià mpanjaka' Iehodày.

³ Ihentseño ty fañeba
naho ty fikalan-defo,
vaho itotoho i hotakotakey.

⁴ Aombeo laboridy o soavalao,
naho miningira, ry mpiningi-tsoavalao;
mijohaña eo reketse kalan-doha;
fotio o lefoñeo, aombeo o sarom-bio.

⁵ Akore t'ie treako hoe
lonjetse naho miambaho?
Finofok' ambane o fanalolahí'eo,
fa nitriban-day mb'eo,
vaho tsy nitolik' am-boho,
fa niarikatoha' ty firevendreveñañe,
hoe t'IEHOVÀ.

⁶ Tsy hahafiorotse ty masìka,
tsy hahafivoratsake ty fanalalahy;
mitsikapy vaho mikorovoke
mb'avaratse añe iereo,
marine i Saka-Peratey.

⁷ Ia ty hambañ'am'Ieore‡ mitroattroakey,
manahake o saka misorotombake hanginahina'eo?

⁸ Manahake Ieore t'i Mitsraime
amy fitabattroaha' o rano'eoy;
ie manao ty hoe:
Hitroatse raho, hanginahina naho
hampiopo ty tane toy,
toe harotsako i rovay naho
o mpimoneña ama'eo.

⁹ Mionjona ry soavalao,
mionara ry sareteo;
ampivavarò mb'etoy o fanalolahio,
o nte-Kose naho nte-Pote§
mahafitam-pikalan-defoñeo,
o nte-Lode* mahataña naho
mahafibitsoke faleo.

¹⁰ Amy te hanañ' androm-pañondroha'e
t'i Talè IEHOVÀ i Màroy,
hamalea'e fate o rafelahi'eo,
hampibotsehaña i fibaray
ampara' te etsake
naho mamo ami'ty lio' iareo;

* **46:2** Neko: Kepeke; gioke † **46:2** Perate : (Heb) misorotombake § **46:7** Ieore : I Niley Egipte,
saka mikararake § **46:9** Pote: Fale; ana' i Kame; ondaty Afrika * **46:9** Lode: Antara

fa manao soroñe t'i Talè,
IEHOVÀ' i Måroy,
an-tane avaratse, marine' i Saka-Peratey.

¹¹ Mionjona mb'e Gilade[†] mb'eo,

mitohà fatevo[‡]

ry anak' ampela' i Mitsraimeo;
fonga tsy jefa'e o aoly anoe'oo,
toe tsy eo ty hampijangañe azo.

¹² Fa jinanji' o kilakila' ndatio

ty fisalara'o,
vaho manitsike ty tane toy

ty fikoikoiha'o,

fa nitsikapy amy maozatsey

ty fanalolahy, sindre nihotrake.

¹³ Ty tsara' IEHOVÀ am' Iirmeà mpitoky, te hanao akore ty hionjona' i Nebokadnetsare mpanjaka' i Bavele mb'an-tane Mitsraime mb'eo handafa aze?

¹⁴ Tseizo' areo e Mitsraime ao,

koiho e Migdole,

koiho-lava e Nofe

naho e Tafanese, vaho ano ty hoe:

Mijohaña vaho mihentseña

fa hampibotsek' añ'ariary azo i fibaray.

¹⁵ Akore te nafaoke aña o maoza'oo?

Ie tsy nahafitroatse amy te

tinindri' IEHOVÀ ambane.

¹⁶ Maro ty tsinikapi'e;

eka songa mifampikorovoke

vaho manao ty hoe :

Miongaha, antao himpoly

mb'am'ondatin-tika mb'eo,

mb'an-tane nahatoly an-tikañe aña,

hienga ty fijoia' i fibaray.

¹⁷ Ty hoe ty nikohe' iereo aña:

Koràk' avao t'i Parò

mpanjaka' i Mitsraime;

Napo'e hihelañe aña i ni-fantañañey.

¹⁸ Kanao velon-dRaho hoe i Mpanjakay,

IEHOVÀ' i Måroy ty tahina'e,

Toe hanahak' i Tabore[§] am-bohitsey

naho i Karmelete^{*} añ'olon-driake aña,

Ty higodaña'e mb'etoy.

¹⁹ O ry anak'ampela mpimoneñe

e Mitsraime ao, mivatia handenà'o

mb'am-pandrohizañe aña,

fa ho tanàn-taolo ty Nofe,

hampangoakoahéñe

tsy ho amam-pimoneñe.

²⁰ Kiloa fanjaka t'i Mitsraime

fe boak' avaratse aña

[†] **46:11** Gilade: Taroñe mivotry; Talily mibokoke [‡] **46:11** Heg; Tsoriy [§] **46:18** Tabore: joboñe;
mikanitsoke; vonotroboe ^{*} **46:18** Karmelete: añondry vosy; tsako vokatse

ty lale-boròñe hamongotse—toe ho avy.

²¹ Manahake ty sarak' an-jolok' ao,
o lahin-defo mpikarama aňivo'eo,
fa nivalike ka iereo;
niharo nibotatsake,
tsy nahafijohaňe,
fa tondroke ty andron-kankà' iareo,
ty androm-pitilihaňe iareo.

²² Hoe mereňe ty fikosasaha'e
ie misoroke o lahindefo'eo,
mikovovoke mb'am-pisorohaň'aze
o lahindefoňeo, ie mitoaň' aze
am-pekoňe hoe mpaňatsak' ala.

²³ Hinatsa' iareo i alay, hoe t'IEHOVÀ,
fa tsy lefe volilieňe;
amy t'ie maro te amo valalao,
mitozantozaňe.

²⁴ Nisalareňe ty anak' ampela'
i Mitsraime;
fa natolotse am-pitâ' ondaty
avaratse aňe.

²⁵ Hoe t'IEHOVÀ' i Måroy, t'i Andrianaňahare' Israrele, Ho lìloveko t'i Amone nte-No[†] naho i Parò, naho i Mitsraime, rekets' o 'ndrahare'eo, naho o mpanjaka'eo; toe i Parò naho ze miato ama'e. ²⁶ Hatoloko am-pitâ' o mipay ty fiai'eo naho am-pitâ' i Nebokadnetsare mpanjaka' i Bavele naho am-pitâ' o mpitoro'eo; ie aňe, le ho fimoneňaňe indraike re manahake te taolo, hoe t'IEHOVÀ.

²⁷ Aa le ko hemban-drehe
ry Iakobe mpitoroko,
naho ko lonjetse ry Israele;
fa ho rombaheko boake tsietoitane aňe, naho ty tiri'o
an-tanem-pandrohiza' iareo;
himpoly t'Iakobe, naho hieraňeraňe,
le tsy eo ty haňembaňe aze ka.

²⁸ Ko hemban-drehe ry Iakobe mpitoroko, hoe t'IEHOVÀ,
fa mpiama'o raho;
ho fonga mongoreko o fifeheaňe
nandroahako azoo,
f'ihe tsy ho mongoreko;
ho lìloveko an-jaka-to,
fe tsy hapoko tsy ho lìloveňe[‡].

47

¹ Ty tsara' IEHOVÀ niheo am' Iirmeà mpitoky ty amo nte-Pilistio taolo' ty nandafa' i Parò i Azà*.

² Hoe t'IEHOVÀ:
Heheke t'ie hióngake
boak' avaratse eňe ty rano,
hinjare torahaňe manganahana,
toe hampanginahina i taney naho
handifotse ze hene ama'e
naho i rovay naho

* 46:25 No: mangaro; mandrara ‡ 46:28 Oni: Iir 30:11 * 47:1 Aza: fatratse

o mpimoneñeo;
 hirovetse ondatio, vaho
 sindre hangololoike ty tañy
 ze mpimoneñe amy taney.
³ Ami'ty kodoin-dian-kotro' o maozatseo,
 ty fitrakotrako' o sareteo,
 ty kodoikodoi' o larò'eo
 le tsy mitolike mb'an-keleia'e
 o roae'eo, ie mavozo am-pitâñe;
⁴ Fa tondroke ty andro te fonga
 hampiantoañe o nte-Pilistio,
 ie hañitoa'e amy Tsore naho amy
 Tsidone ze mpañolotse sisa;
 amy te ho kopahé' IEHOVÀ o nte-Pilistio,
 naho ze sehanga'e an-tokonose'
 i Kaftore[†].
⁵ Hasolàñe ty nifetsak' amy Azà;
 fa naitoañe ty Askelone.
 Ry honka' i vavatane' iereoy:
 ampara' te 'mbia ty handilindilia'o
 ty sandri'o?
⁶ O ry fibara' IEHOVÀ,
 ampara' te ombia vaho hitsiñe?
 miombea an-traño'o ao,
 mitofà, naho mihendrea.
⁷ Akore ty hitafa'e kanao nandily t'IEHOVÀ ?
 i Askelone naho i olon-driakey
 ty nitendrea'e.

48

¹ Ty amy Moabe*,
 hoe t'IEHOVÀ' i Måroy,
 t'i Andrianañahare' Israele:
 hankàñe t'i Nebo[†]! fa peake,
 nisalareñe t'i Kiriataime[‡] fa tsinepake;
 nimeñareñe ty Misgabe[§]
 vaho mioremeñé.
² Tsy eo ka ty enge' i Moabe;
 nikinia raty aze o e Kesboneo*: Antao hampipitsok'aze tsy ho fifeheañé,
 hampitsiñeñé ka rehe, Medmene[†],
 hañoridañ'azo i fibaray.
³ Inao ty koike boak'e Koronaime[‡]
 fikopahañé naho fandrotsaham-bey.
⁴ Rotsake t'i Moabe,
 nipoñafe' o keleia'eo ty koiake.
⁵ Hitolom-pirovetse iereo te hanganike
 ty fitroara' i Lokote[§]

* 47:4 Kaftore: Halañe: tokonose bontolie * 48:1 Moabe: boak' aman-drae'e; Ana' i Lote
 † 48:1 Nebo: vohitse e Moabe ao; ‡ 48:1 Kiriataime: rova hambaré § 48:1 Misgabe; fipalirañe
 an-tiotiotse ey * 48:2 Kesbone: mikirroke † 48:2 Medmene: votrin-ditsake ‡ 48:3 Koronaime:
 rova amandakato roe,boseke § 48:5 Lokote: nanoeñé gorodoñé

ami'ty fizotsoa' i Koronaime
ty nahajanjiña' iareo
ty fikaiham-pandrotsahañe.

⁶ Mitribaha, handrombaha' areo fiaiñe,
mihambaña ami'ty kile
an-dratraratra aña.

⁷ Ho tsepaheñe ka nahareo ami'ty
fiatoa' areo amo tolon-draha' areoo,
naho amo vara' areoo;
hasese am-pandrohizañe aña ty Kemise*,
o mpisoro'eo rekets' o roandria'eo.

⁸ Songa hiambotraha' i mpitavañey
o rovao, ndra rova raike tsy hahavoratsake;
ho momoke i vavataney,
hampiantoeñe i montoñey,
ami'ty saontsi' IEHOVÀ.

⁹ Toloro elatse t'i Moabe, hiborifita'e,
fa hampangoakoaheñe o rova'eo,
ie tsy ho amam-pimoneñe.

¹⁰ Hozoñeñe t'indaty mitoloñe
ho a' IEHOVÀ am-pitañe milesa,
hafàtse ty mitañe i fibara'ey
tsy ho aman-dio.

¹¹ Fa nierañerañe sikal' am-pahajalahy
aze t'i Moabe,
naho fa nitadrètse amo karafo'eo,
tsy nañiliñañe an-jonjoñ'an-jonjoñe,
vaho le lia'e tsy nasese
am-pandrohizañe aña;
aa le mbe ama'e ty hafira'e,
vaho tsy niova ty harifondriffo'e.

¹² Aa le, ingo ho tondroke ty andro, hoe t'IEHOVÀ, te hampanitrifeko
ama'e ty mpañiliñe, ze hañiliñe aze; ho fonga kapaihe' iareo o fitovi'eo,
vaho ho foie' iereo o zonjò'eo. ¹³ Ho salatse amy Kemose t'i Moabe,
manahake ty nisalara' Israele amy Betelet[†] fatokisa' iareoy.

¹⁴ Akore te anoë' areo ty hoe:
Ondaty maozatse zahay,
fanalolahy añ'aly'?

¹⁵ Mianto t'i Moabe, fa nionjoñe
mb'amo rova'eo, fa nizotso
mb'am-pizamanam-b'eo o ajalahy jinobo'eo,
hoe t'i Mpanjaka,
IEHOVÀ' i Måroy ty tahina'e.

¹⁶ Fa antitotse ty hekoheko' i Moabe,
malisa i feh-oha'ey.

¹⁷ Mandalà aze ry mañohok' azeo,
ano ty hoe ama'e ry mahafohiñe
i tahina'ey:

Akore te pinozake i kobaiñe
maozatsey, i doda fanjakay.

* ^{48:7} Kemise: Mpampireke; tale' i Moabe † ^{48:13} Betele: Akiban'Añahare

18 O ry anak'ampela mimoneñe
e Dibone[‡] ao,
mizotsoa amo enge'oo,
mitoboha an-kataliñiera'o eo,
fa nionjomb'ama'o mb'eo
ty mampikoromake i Moabe,
fa songa narotsa'e o rova'o fatratseo.

19 O ry mpimone' i Arore[§],
mijohaña amy lalañey, vaho mijilova;
añontaneo i mioratsey, ty hoe:
Inom-bao o nifetsakeo?

20 Nisalareñe t'i Moabe, le mioremeñe;
mangololoiha vaho mikoiha;
tseizo e Arnone* ao te mianto t'i Moabe.

21 Fa niambotraha' ty zaka o tane amontoñeo, t'i Kolone[†], Iatsà[‡], vaho
i Mefaate[§], **22** Le i Dibone*, i Nebo[†], naho i Bet'diblataime[‡]. **23** Le i
Kiriataime[§] naho i Bet'gamole* vaho i Bet'meone.[†] **24** Le i Keriote[‡] naho i
Botsrà[§] vaho o hene rova an-tane' i Moabeo, o lavitseo naho o maríneo.

25 Fa nipitsok' aña ty tsifa' i Moabe, pinozake i sira'ey, hoe t'IEHOVÀ.

26 Ampimamò, amy te nampiebore'e am' IEHOVÀ ty vata'e; fa hitorokosek' amy loa'ey t'i Moabe, vaho ho rabioñeñe. **27** Aa tsy nandrabioña'o hao t'Israele? Nizoeñe amo malasoo hao? amy te mikofi-doha
ama'e rehe ndra 'mbiambia isaontsia'o.

28 O ry mpimoneñe e Moabe ao,
Miavota amo rovao naho mimoneña an-tseran-kereretsake ao, vaho
mihambaña ami'ty deho manao traño aña'ilam-bava' i koboñey.

29 Fa jinanji'ay ty firengevoha'
i Moabey;
toe mpitoabotse, amy fibohaboha'ey,
naho ty fiengaña'e
vaho ty fitrotroabohan'arofo'e.

30 Haiko o habose'eo,
hoe t'IEHOVÀ, t'ie kafoake,
tsy naха-pi-draha o fikoiboha'eo.

31 Aa le hangoihoiako ty Moabe;
eka hikoiako ty halifora' i Moabe;
hihontofa' ty troko o nte-Kir'kereseo*.

32 Mandikoatse ty firoveta' Iazere[†]
ty hitañiako azo, ry vahe' i Sibmà[‡];
nikazazake nahafitsake i riakey
o tsampa'oo,
nitakare' iareo ty ria' Iazere;
amo voa' o asarao,
naho amo vahe'oo ty niambotraha'
i mpandrotsakey.

‡ **48:18** Dibone: minike § **48:19** Arore: liolio, ndra kile * **48:20** Arnone: torahañe
misorotombake † **48:21** Kolone: hontoke, lafenete ‡ **48:21** Iatsà: lie-drokoñe § **48:21**
Mefaate: mañazava * **48:22** Dibone: lifo-kilala † **48:22** Nebo: mpitsara, mpitoky ‡ **48:22**
Bet'diblataime: akiba mofon-tsakoa roe § **48:23** Kiriataime: rova hambañe * **48:23**
Bet'gamole: akiba' ty nisara-nono † **48:23** Bet'meone: akiba fimoneña' (i Baale) ‡ **48:24**
Keriote: anjomba maro § **48:24** Botsrà: an-kasotriañe * **48:31** Kir'kerese: rovam-balañe tane
† **48:32** Iazere: mpañimba ‡ **48:32** Sibmà: mibalintoa, tsinepake

³³ Tinavañe amy tonda kobokaray ty hafaleañe naho ty firebehañe, vaho an-tane' Moabe; fa najiheko tsy hiboak' amo fipiritañeо ty divay; tsy eo ty handialia aze an-koike, tsy ho fifandian-taroba i korakey.

³⁴ Boak' ami'ty fikoiba' i Kesbone§ pak'e Eleale*, sikal'am' Iazere ty nikaiha' ty fiarañanaña' iareo; boak'e Tsoare† pak'e Koronaime, hoe tamanañe telo taoñe; fa ho kòake ka ty Rano' i Nimrime‡. ³⁵ Mbore hajiheko amy Moabe, hoe t'IEHOVÀ, ty mañenga amo haboañeо, naho i mañemboke aman-drahare'ey. ³⁶ Aa le mangolalaike ho a i Moabe manahake o solio ty foko vaho mandala hoe firirio ho a ondati' i Kir'kereseо ty troko; fa mongotse ty vara natonto'e.

³⁷ Fonga peake o añamboneo, songa hinaratse o tateahetseo; sindre linily o fitañeо vaho gony ty sikin-tohake. ³⁸ Tsitsik' ambone' tafo' i Moabe naho mandrambañ' an-tameañe ey, le firovetañe avao ty ao; fa finoiko hoe karabiba tsy rei-tave t'i Moabe, hoe t'IEHOVÀ. ³⁹ Akore ty fivolentsa'e, mangololoiha! Akore te niamboho t'i Mobe! salatse re! Aa le ho fiankahafañe naho fiantoañe avao t'i Moabe amo mañohok' azeo.

⁴⁰ Fa hoe ty nafè' IEHOVÀ:

Ingo te eo ty hitiliñe hoe vantio,
havela'e amy Moabe o ela'eo.

⁴¹ Fa tinavañe o rovao,
tsinepake o fipalirañe maozatseo,
le hanahake ty tron' ampela mitsongo
ty arofo' o fanalolahi' i Moabeo
amy andro zay.

⁴² Le haitoñaе tsy ho karaza' ondaty
t'i Moabe, amy t'ie nirengevok' amy IEHOVÀ.

⁴³ Firevendreveñañe naho i koboñey,
vaho i fandrikey ty ho ama'o,
ry mpimoneñe e Moabe ao,
hoe t'IEHOVÀ.

⁴⁴ Hikapotrak' an-koboñe ao ty mibotatsak' amy mampihebakebakey,
naho ho tsepahe' ty fandrike ty mahafiakatse amy koboñey;
fa hafetsako ama'e, eka, amy Moabe,
ty taom-pitilihañe iareo, hoe t'IEHOVÀ.

⁴⁵ Mijagarodoñaе tsy an-kaozarañe an-kàlo' i Kesbone ao o nipoliotseo,
fa nionjoñe boake Kesbone ty afo,
naho boak' añivo' i Sihone§ ao ty lel'afó,
ze namorototo ty lahara' i Moabe,
vaho ty hevo' o mpikoràkeo.

⁴⁶ Hankàñe ama'o ry Moabe!
Fa mibalake ondati' i Kemoseo*,
amy te nasese mb'an-drohy mb'eo
o ana-dahi'eo
naho mb'am-bahoram-b'eo
o anak'ampela'eo.

§ **48:34** Kesbone: fifanehafañe, fahimbañañe * **48:34** Eleale: aonjoñañe aman'Añahare
 † **48:34** Tsoare: kedeke ‡ **48:34** Nimrime: mafaitse, fiolàñe § **48:45** Sihone: mikorake,
 troatroake, rakaraka * **48:46** Kemose: mampiambane

47 Fe hafoteko amo andro honka'eo ty fandrohiza' i Moabe,
hoe t'IEHOVÀ.
Zay ty figadoñam-pizakañe i Moabe.

49

- 1** Ty amo nte-Amoneo.
Hoe t'IEHOVÀ:
Tsy aman'ana-dahy hao t'Israele?
Tsy amam-pandova hao re?
Inoñ' arè ty itavana' i Meleke* i Gade?
naho ty imoneña' ondati'eo
an-drova' iareo ao?
- 2** Aa le ho tondroke ty andro,
hoe t'IEHOVÀ,
te hampijanjiñeko koin'aly
e Rabà†' o ana' i Amoneo‡ ;
ie ho votre mangoakoake
le ho hotomomoheñe aña'afó
o anak' ampela'eo;
naho hapitso' Israele
o nampipitsok' azeo, hoe t'IEHOVÀ.
- 3** Mangoihoa ry Kesbone,
fa rotsake t'i Aia§;
mikoeakoeaha ry anak' ampela' i Rabà,
misikina gony, mandalà,
mihelohelo amo goloboñeo,
fa homb'am-pandrohizañe añaé
t'i Meleke,
o mpisoro'eo rekets' o roandria'eo.
- 4** Ino ty irengea'o am-bavatane ao,
i vavatane'o mitsirtsiokey,
ry anak' ampela midisa-volio?
Ihe miato vara, manao ty hoe:
Ia ty haname ahy?
- 5** Inao, hampangebahebak'azo raho,
hoe t'i Talè, IEHOVÀ' i Màroy,
boak' amo mañohok' azo iabio;
naho songa haronje' ty roake mb'eo,
tsy eo ty hanontoñe ty mibaratsake.
- 6** Fa ie añaé, le hampoliko boak' an-drohy añaé o ana' i Amoneo, hoe t'IEHOVÀ.
- 7** Ty amy Edome; hoe 'IEHOVÀ' i Màroy:
Fa kapaike hao ty hihitse e Temane* ao?
Fa mongotse hao ty veren-tsoa'
o maharendrekeo?
Fa nilosotse am' iareo hao ty hilala?
- 8** Miridaridà, mibalintoà, mitoboha
an-dalek' ao, ry mpimone' i Dedaneo†;
fa hapoko ama'e ty feh'oha' i Esave‡,
ty andro andilovako aze.

* **49:1** Meleke: mpanjaka † **49:2** Rabà: maozatse, ra'elahy, mirenetse ‡ **49:2** Amone:
tariratse; toe tarira' i Lote § **49:3** Aia: votre * **49:7** Temane: atimo, Afrika; fonitse † **49:8**
Dedane: o araña'eo; firañetañe; mpizaka ‡ **49:8** Esave: ty manao, ty mamonitse

⁹ Aa naho nimb'ama'o mb'eo
ty mpanontoñe valoboke,
tsy ho nisisà' iareo hao
ty ho tsindroheñe?

Naho ty malaso an-kaleñe,
tsy ho namaok' am-para' te nieneñē?

¹⁰ F'ie finaopaoko t'i Esave, nampikorendaheko o fikafira'eo,
le tsy ho lefe'e ty hietake;
fa tinavañe o tiri'eo,
songa tsy eo o rolongo'eo,
naho o rañe'eo, vaho i vata'ey.

¹¹ Fario o anam-bode-rae'oo,
fa ho velomeko;
naho angao hiato amako o ramavoi'oo.

¹² Fa hoe t'IEHOVÀ:
Ingo, ndra te tsy tinendre
hinoñe amy fitoviy ty ila'e,
toe hinoñe ama'e avao;
aa le tsy ho lilovañe ka v'iheo?
Tsy hapoke tsy ho lilovan-drehe,
toe tsy mahay tsy hinoñe.

¹³ Fa nifanta ami'ty vatako raho,
hoe t'IEHOVÀ,
te ho hadabàñe ty Botsrà§,
fañinjeañe, ratraratra, naho fatse;
vaho ho koake nainai'e donia o rova'eo.

¹⁴ Fa nahatsanon-talily boak'am' IEHOVÀ raho, fa nampihitrifeñe amo
kilakila' ondatio ty minday ty hoe:
Mifanontona, mionjona haname aze,
vaho miongaha mb'an-kotakotake mb'eo.

¹⁵ Inao, hafotsako ho kedekedeke
amo fifeheañe rehue,
naho ho fañamavoa' ondatio.

¹⁶ Fa namañahy azo ty fangebaheba'o:
ty firengevohan' arofo'o,
ihe mpimoneñe an-tseratseram-bato ao, mitobok' an-kaboañe ey;
aa ndra te nanoe'o antiotiotse ey,
mira ami'ty vantio ty akiba'o,
mbe hampizotsoeko boak'ey,
hoe t'IEHOVÀ.

¹⁷ Ho liolio kòake t'i Edome,
hene ho latsa ze mioza ama'e,
hikosìk' amo hekoheko nizoe'eo.

¹⁸ Hanahake ty fandrotsahañe
i Sedome* naho i Amorà† naho
o rova nañohoke iareoo,
hoe t'IEHOVÀ,
tsy himoneña' ondaty,
tsy hañialoa' ty ana'onday.

¹⁹ Ingo hionjoñe hanahake ty liona boak'an-drongoñe matahetse añ'olo'
Iordaney mb'an-goloboñe soa fahetse mb'eo; fa hampitribaheko an-day

§ **49:13** Botsrà: toe-kasotriañe, fijalea * **49:18** Sedome: sodotse, forototo † **49:18** Amorà:
mpiola

boak' ama'e amy zao, vaho ho tendrèko hifehe aze ze nijoboñeñe; fa ia ty hambañ' amako? Ia ty haneseke ahy? Vaho ia ty mpiarake hahafijohañé hiatrek' ahiko? ²⁰ Aa le inao ty safiri' IEHOVÀ, ty nisafirie'e i Edome; naho ty ereñere naereñere'e amo mpimone' i Temaneo; toe ho kozozote'e aña ndra o kede amy lia-raikeio, vata'e hampangoakoahé'e am'iereo o fiandraza' iareoo. ²¹ Manginikinike ty tane ami'ty fikodoim-pikorovoha' iareo; inay ty koeake, janjiñe an-dRiake Mena aña ty feo'e. ²² Ingo t'ie hionjoñe mb'eo naho hitsikefañé hoe vantio vaho havela'e amy Botsrà o ela'eo; le hanahake ty fidebom-pon-drakemba mitsongo ty arofo' o fanalolahi' i Edomeo amy andro zay.

²³ I Damesèke: ‡ Angoae ty Kamate§ naho i Arpade*; ty amy talili-raty jinanji' iareo,
ie tranahe' ty hebakebake,
mitroñe i riakey tsy mete pendreñene.

²⁴ Niforetrake t'i Damesèke,
nitolike re hivoratsake,
fe manjitse aze ty fineveneverà'e;
fioremeñañé naho teveteveke
ty mamihiñe aze,
manahake ty ampela mitsongo.

²⁵ Akore te hangoakoake
i rova nirengèñey,
i rova nahafale ahiy?

²⁶ Aa le hikorovok' an-tameañé ey
o ajalahi'eo,
vaho fonga hampianjiñeñe amy andro zay
o lahin-defoñeo,
hoe t'IEHOVÀ' i Måroy.

²⁷ Hamiañako afo ty kijoli' i Damesèke,
hampibotseke o anjomba'
i Ben-hadadeo†.

²⁸ Ty amy Kedare‡ naho or fifehea' i Katsore§ linafa' i Nebokadnetsare mpanjaka' i Baveleo, hoe t'IEHOVÀ;
Miongaha, mionjona mb'e Kedare,
vaho koreñdaho o anan-tatiñanañeo.

²⁹ Ho kopahe' iereo ty kivoho
naho o lia-rai' iareoo,
ho tavane' iareo ho am-bata'e
o lamban-temetseo, naho o vara' iareoo, naho o rameva' iareoo;
vaho ho korahéñe ama'iareo, ty hoe, Hankàñe mb'etia mb'eroa!

³⁰ Miorata aña, miherereaha!
mañialoa an-dalek' ao,
ry mpimoneñé e Katsore ao,
hoe t'IEHOVÀ;
fa nisafirie' i Nebokadnetsare mpanjaka' i Bavele,
vaho naereñere'e talin-dia.

³¹ Miongaha, mionjona mb'amý fifeheañé mierañerañey, i
miaiñañoleñañey;
hoe t'IEHOVÀ;
I tsy aman-kijoly, tsy aman-tsikadañey;

‡ 49:23 Damesèke: haroñe pea-dio hoe mirehetse
rindry * 49:23 Arpade: hazava' ty fijebañañé

§ 49:23 Kamate: habosehañé; miforoforo;

† 49:27 Ben-Hadad: Ana' Korake; Hafalea

‡ 49:28 Kedare: ieñé, embetse § 49:28 Katsore: kiririsa, ahe-maike

mpimoneñe am-bangiñe.

³² Hakopake o rameva' iareoo,
ho tongañe o añombe' iareo mitozantozañeо; vaho hampiparatsiaheko
mb'amo tioke iabio
o mihitsike ty am-bala'eo,
haseseko hankàñe boak'an -dafi'e iaby, hoe t'IEHOVÀ.

³³ Ho poakorom-panaloke ty Katsore, hoakoake nainai'e kitro-katroke,
ie ho po-pimoneñe,
ndra ty ana' ondaty tsy hañialo ao.

³⁴ Ty tsara' IEHOVÀ niheo am' Iirmeà mpitoky ty amy Elame ami'ty
fifotoram-pifehea' i Tsidkia' mpanjaka' Iehodà, manao ty hoe: ³⁵ Hoe
t'IEHOVÀ i Màroy;
Inao! ho pekañeko ty fale' i Elame,
ty fiaolon-kaozara' iareo.

³⁶ Le hatreatrèko amy Elame i tiok'efatse boak' an-kotsok' efa' i likerañey
rey,
naho hampiparaitahoko
mb'amy tioke rey iereo;
vaho tsy eo ty fifeheañe tsy higodañe'
o naronje boak' Elameo.

³⁷ Le hampirorehoko añatrefa' o rafelahi'eo t'i Elame,
naho aolo' o mipay ty fiai'iareoo;
naho hametsahako hankàñe,
naho ty haboseko miforoforo;
hoe t'IEHOVÀ;

vaho hañitrifako fibara hañoridañe iareo ampara' te mongotse;

³⁸ le hapoko Elame ao ty fiambesako
vaho ho rotsahoko boak'ao
ze mpanjaka ndra roandriañe,
hoe t'IEHOVÀ.

³⁹ Fe ho tondrok' amo andro honka'eo te hampoliko o naseñe hirik' i Elame,
hoe t'IEHOVÀ.

50

¹ Ty entañe nitsarae' IEHOVÀ ty amy Bavele, tane' o nte-Kasdioy, añañam'
Iirmeà mpitoky.

² Taroño amo kilakila' ndatio, tseizo;
añonjono vorovoro, koiho
vaho ko ampikafireñe ty hoe:
Tinavañe ty Bavele, salatse t'i Bele*,
lonjetse ty Merodake†;
songa nampisalareñe
o sareñ-drahare'eo,
dinemoke o hazomanga'eo.

³ Amy te boak' avaratse añañ
ty fifeheañe haname aze,
ty hampangoakoake i tane'ey,
ampara t'ie tsy amam-pimoneñe;
fonga nañariok' añañ
ndra ondaty ndra hare.

⁴ Amy andro zay, naho amy sa zay,

* **50:2** Bel: ndra Baale: 'ndrahare' i Bavele † **50:2** Merodake: Fisolohoañe mafaitse

hoe t'IEHOVÀ,
 le homb' atoy o ana' Israeleo,
 ie naho o ana' Iehodao,
 hangololoike ty rovetse te mañavelo, vaho ho tsoehe' iereo t'IEHOVÀ
 Andrianañahare' iareo.
⁵ Hañontanea' iareo ty lalañe
 mb'e Tsione mb'eo,
 naho hampiatrefe'iareo laharañe;
 Homb'eo iereo hireketse am' IEHOVÀ
 ami'ty fañina tsy modo nainai'e,
 tsy ho haliño.
⁶ Fa añondry motso ondatikoo; nampandrifihe' o mpiara' iareoo;
 nampidadà' iereo amo haboañeo;
 nirererere am-bohitse pak' an-kaboañe, nandikofa' iareo ty fitofà' iareo.
⁷ Fonga nampibotseke iareo
 ze nifanendrek' ama'e;
 le nanao ty hoe o malaiñ' iareoo:
 Tsy aman-kakeo zahay;
 amy t'ie ro nandilatse
 am' IEHOVÀ, fimoneñan-kavantañañey,
 am' IEHOVÀ fitaman-droae'iareo.
⁸ Miridriha boake Bavele ao,
 naho iakaro ty tane o nte-Kasdio‡, vaho itsikombeo ty oselahy
 miaolo' i lia-rai'ey.
⁹ Inao! ho troboeko
 hionjoñe hiatrek' i Bavele
 ty firimboñam-pifeheañe ra'elisy
 boak' an-tane avaratse aña;
 miriritse ama'e iereo,
 le ho tavaneñe amy zao;
 hanahake o amy fanalolahy mahimbañeo
 o anam-pale'iareoo,
 tsy ama'e ty himpoly mañomaño;
¹⁰ Ho kopaheñe t'i Kasdy;
 hahaeneñe ze hene mamaok' ama'e;
 hoe t'IEHOVÀ:
¹¹ Ty hafalea'areo,
 naho ty firebeha'areo:
 ry mpampikopake i lovakoio,
 ty fitreko'a'reo le
 hoe tamana aña'ahetse,
 vaho misehaseha hoe soavalala mirefe;
¹² Hangirifiry ty fisalaran-drene'o,
 ho meñatse i nahatoly azoy;
 ho tsitso' o fifeheañeo, fatram-bey,
 tane karakankaiñe vaho liolio.
¹³ Ami'ty haviñera' IEHOVÀ
 le tsy himoneñañe,
 fa ho vata'e bangìñe;
 ho latsa iaby ze miary amy Bavele,
 hikosàke amo hekoheko'e iabio.
¹⁴ Ampiririto hialy amy Bavele

‡ 50:8 Iir 51:6, 45, Isa 48:20, 2Kor 6:17 Ben 18:4

añ'ariari'e eo ry mahatam-paleo,
ahiririño, ko manisa ana-pale;
amy te anaña' IEHOVÀ tahiñe.

15 Mirohafa añ'arikatoke aze,
fa miambane re;
mihotrake o faha'eo,
rebake o kijoli'eo;
zay ty fañondroha' IEHOVÀ,
Mamalea fate! hambañe amy nanoe'ey
ty hanoañe ama'e.

16 Aitò amy Bavele ty mpandrarake,
naho i mpita-meso am-pitatahañey,
ie ihembaña'e ty fibaram-panindry,
songa hitolike mb'am'ondati'eo,
sindre handripake mb'an-tane'e mb'eo.

17 Añondry miparaitake t'Israele,
niroahe' o lionao aña;
Ty valoha'e nampibotsek' aze,
i mpanjaka' i Asorey
naho ami'ty figado'e toy
t'i Nebokadnetsare mpanjaka' i Bavele
ro nampipekañe o taola'eo.

18 Aa le hoe t'IEHOVÀ i Màroy,
t'i Andrianañahare' Israele:
Inao! ho liloveko ty mpanjaka' i Bavele
naho i tane'ey,
manahake ty nandilovako
i mpanjaka' i Asorey.

19 Le hampoliko mb'am-piandraza'e mb'eo t'Israele,
hihinañe e Karmele naho e Basane ao,
vaho hahaeneñe ty tro'e
ty an-kaboa' i Efraime naho i Gilade.

20 Amy andro rezay naho amy sa zay,
hoe t'IEHOVÀ,
ho kodebène ty hakeo' Israele fe tsy ho eo, naho ty tahi' Iehodà, fa tsy
hahaoniñe;
amy te ho hahàko ty hakeo'
o napoko ho sehanga'eo.

21 Mionjona mb'an-tane' Merataime§,
atreatréo,
naho o mpimoneñe e Pekodeo*,
mongoro,
vata'e rotsaho, hoe t'IEHOVÀ,
ano iaby o nandiliako azoo.

22 Inao, ty hotakotak' amy taney,
naho ty fandrotsaham-bey.

23 Akore te finira naho pinozake
ty ana-bato' ty tane toy!
Akore te nampangoakoahené
añivo' o fifeheañeo ty Bavele!

24 Ie nandaharako fandrike,

§ 50:21 Merataime: indroe niola * 50:21 Pekode: Fitilihañé

toe tsinepake ka, ry Bavele,
 fe tsy napota'o;
 nivazohoen-drehe vaho nitratse,
 amy te ihe nifangatotse am' IEHOVÀ.

²⁵ Fa sinoka' IEHOVÀ ty fañaja'e,
 vaho nakare'e o fialian-kaviñera'eo;
 ty fitoloñañe tsy mete tsy anoë' i Talè, IEHOVÀ, an-tane o nte-Kasdio.

²⁶ Itameo boak'an-tsietoitane aña,
 sokafo o riha'eo,
 atontono mañambone kivotre kivotre, vaho rotsaho; ko anisa'o ndra
 inoñe.

²⁷ Fonga lentao o vosi'eo,
 ampizotsò mb'am-panjamanaña ao;
 feh' ohatse ama'e !
 fa tondroke ty andro' iareo,
 ty androm-pandilovañe.

²⁸ Inay! ty feom-pipilotse naho o nandrifitse boak'an-tane Baveleo, hitsey
 e Tsione ao ty fañondroha' IEHOVÀ Andrianañaharentika,
 i vale-fate'e ty amy anjomba'eiy.

²⁹ Koiho hifanontone hiatreke i Bavele
 o mpitam-paleo, o mampibitsoke fale iabio; mitobe aña'arikatoke aze;
 ko ado' areo te ho eo ty hiborofotse;
 ondroho ty amo sata'eo,
 avaleo ama'e o fonga fitoloña'eo,
 fa nirengevohe'e t'IEHOVÀ,
 i Masi' Israeley.

³⁰ Aa le hikorovok' an-tameaña eo
 o ajalahi'eo,
 songa hampianjiñeñe amy andro zay
 o lahin-defo'eo, hoe t'IEHOVÀ.

³¹ Inao! miatre azo raho
 ty mpitoabotse tia,
 hoe t'i Talè, IEHOVÀ' i Måroy;
 fa tondroke ty andro'o,
 ty namotoañako handilo azo.

³² Hitsikapy naho hikorovoke
 i loho mpiriharohay,
 tsy ho amam-pañongake;
 le ho viañeko afo o rova'eo,
 vaho ho forototoe'e o faripari'e iabio.

³³ Hoe t'IEHOVÀ' i Måroy,
 naharo forekekeñe o ana' Israeleo
 naho o nte-Iehodao;
 fa tinambozò' o nitsepak' iareo,
 nifoneña' iareo tsy hamotsots' iareo.

³⁴ Maozatse ty Mpijkeba' iareo,
 IEHOVÀ' i Måroy ty tahina'e,
 ho henefa'e ty fisalala' iareo,
 hampitofa'e i taney,
 vaho ho troboe'e o mpimone' i Baveleo.

³⁵ hoe t'IEHOVÀ
 Hebae' ty fibara o nte-Kasdio,
 naho o mpimone' i Baveleo,

naho o roandria'eo,
vaho o mahihi'eo.

³⁶ Ohare' ty fibara o mpandañitseo,
hampidagolàñe iareo;
Hebaem-bi-lava o fanalolahio,
hampidemòhañe iareo.

³⁷ Ho amo soavala' iareoo ty fibara,
naho amo sarete'eo,
naho amo ambahiny iaby añivo' iareoo,
fa hanahake ty rakemba iereo;
amo vara'eo ty meso-lava,
vaho ho voloseñe.

³⁸ Hafaosa amo rano'eo, fa ho riteñe,
amy t'ie tanen-tsamosampon-draha,
vaho renge' iareo o irevendreveña' iareoo.

³⁹ Aa le hitrao-pitobok' ao
ty fosa naho ty farasy,
hiantraño ao ka o voron-tsatrañeo;
le tsy ho fimoneñañe kitro-katroke,
tsy hañialoañañe mb'an-tariratse
an-tamingañe.

⁴⁰ Ho hambañe amy nandrotsahan' Añahare i Sedome naho i Amorà
vaho o mañohoke iareoo,
hoe t'IEHOVÀ;
tsy himoneña' ondaty,
tsy hañialoa' ty ana' ondaty.

⁴¹ Inao! hitotsake boak' avaratse aña ondatio, fifeheañe jabajaba naho
mpanjaka maro
ty ho troboeñe boak'an-tsietoitane aña.

⁴² Vontitire' iereo ty fale naho ty lefoñe, mpampisoañe tsy miferenaiñe;
mitroñe hoe i riakey ty feo' iareo,
mijon-tsoavalà;
miriritse hoe ondaty hihotakotake,
ama'o ry anak' ampela' i Bavele.

⁴³ Fa jinanji' ty mpanjaka' i Bavele
ty tally iareo,
vaho migebañe o fità'eo;
namihin'aze ty halonjerañe,
ty fanaintaiñan-ampela mitsono.

⁴⁴ Inao! eo ty hionjoñe hoe liona boak'amo rongo-matahe' Iordaneo
mb'an-goloboñe mifahetse mb'eo;
f'ie ho roaheko amy zao,
vaho ho tendrèko hamehe aze ze joboñeko; fa ia ty rahambako?
Ia ty hamotoañ' andro ho ahy?

Le ia ty mpiarake hahafiatrek' ahiko?

⁴⁵ Aa le mahajanjiña ty safiri' IEHOVÀ nisafirie'e i Bavele,
naho ty ereñere niereñere'e
i tane' o nte-Kasdiroy;
toe ho kozozote'e mb'eo
ndra ty kede amy lia-rai'ey, hampangoakoah'e ty am'iereo i fiandraza'
iareoy.

⁴⁶ Hampirihindrihie' i Taney ty koike
manao ty hoe: Fa rinambe ty Bavele;

vaho ho janjiñeñé amo fifeheañeo
ty fikoaihañe.

51

- ¹ Hoe t'IEHOVÀ: Inao!
hetsefeko amy Bavele naho amo mpimone' i Leb-Kanaio ty kofom-pijoy.
- ² Le hañitrifako ty ambahiny hanongañé aze, naho hampikapaike i tane'ey;
fa hiarikoboñé hiatreatre aze iereo
amy andron-kankà'ey.
- ³ Ko mei'o t'ie hampibitso-pale,
naho ty hiongaha' ty aman-tsarom-by;
tsy sisáne o ajalahi'eo,
fonga rotsaho o valobohò'eo,
- ⁴ hitsingoro an-tane' o nte Kasdio,
ie tinombok' an-dala'iareo eo.
- ⁵ Fe tsy niramavoin' Añahare'e,
IEHOVÀ i Måroy, t'Israele naho Iehodà;
ndra te lifo-kakeo aolo' i Masi' Israeley
i tane' iareoy.
- ⁶ Itribaho ty lay i Bavele ao*,
songa mandrombaha aiñe,
ko mirotsak' amy fandilovañé azey;
fa tondroke ty andron-kaviñera' IEHOVÀ; hañondroha'e ho valen-kakeo'e.
- ⁷ Toe ni-fitovy volamena am-pitá' IEHOVÀ t'i Bavele, hene nampimamoe'e
ty tane toy†; ninome' o kilakila' ndatio ty divai'e,
izay ty maha-dereñe iareo.
- ⁸ Nideboñé ami'ty manao zao ty Bavele, rotsake ! angololoih !
Añendeso aoly o fangirifiri'eo,
hera hahsarik' aze.
- ⁹ Nañosora'ay famelañé t'i Bavele,
f'ie tsy nahajangañé aze, ifario,
antao songa himpoly mb'an-tane'e aña;
fa mitakatse i likerañey ty fizakañ'aze,
toe mionjomb'an-dindiñé aña.
- ¹⁰ Fa nihenefa' IEHOVÀ ty fañavantañañé anay; antao hitalily e Tsione ao
ty fitoloña' IEHOVÀ Andrianañaharentika.
- ¹¹ Sioño o ana-paleo, atsafo o traño'eo,
fa nitroboe' IEHOVÀ ty tro'
o mpanjaka' i Madaio;
fa safiri'e ty mandrotsake i Bavele;
ho famalea' IEHOVÀ,
ho fañodrohañé i anjomba'ey.
- ¹² Aonjono viloñé amo kijoli' i Baveleo, ampaozaro o mpijiloo,
atroaro o mpañambeñeo,
ampihentseñó mpamandroñé;
fa naereñerè' IEHOVÀ naho nihenefa'e i nitsara'e amo mpimone' i Baveleoy.
- ¹³ O mpiambesatse añ' olon-drano maro,
am-barä tsifotofotoo,
fa tsatoke ty figadoña'o,
ty fizehem-pikatramoa'o.
- ¹⁴ Fa nifanta am-pañova'e t'IEHOVÀ' i Måroy: Toe ho tsitsifeko ondaty

* **51:6** Oni: Iir 50:8 † **51:7** Ben 17:1-18

mira amo kijejao rehe;
ie hipoña-tsabo ama'o.

¹⁵ I namboatse ty tane toy ami'ty haozara'ey, i nañoreñe ty voatse toy
ami'ty hihi'ey,

naho nandafike o likerañeo
ami'ty hilala'e;

¹⁶ ie mañotroke i fiarañanaña'ey

le mitroñe o rano an-dikerañeo; ampionjone'e boak'añ'olon-tane aña
o evoñeo; ano'e ampiñe i orañey,
vaho akare'e amo riha'eo i tiokey.

¹⁷ Zoeñe te biby t'indaty tsy aman-kilala; songa salatse ty mpanefe
volamena
ty amo sare sokire'eo,
te vande avao i trinana'ey,
mbore tsy mahakofòke.

¹⁸ Hakoafañe iereo, satam-pamerevere;
ie ho mongotse ami'ty andro
fandilovañe iareo.

¹⁹ Tsy manahake zay ty Anjara' Iakobe, amy te Ie ro Mpamboatse ze he'e,
naho ty kobain-dova'e,
IEHOVÀ' i Màroy ty tahina'e;

²⁰ Ihe ro dodako naho fialiañ' aliko,
ie rekets'Azo le hampagomokomoheko ty fifelehañe
naho hampikimokimoheko ty fifeheañe.

²¹ Ie ama'o raho, le andemodemoheko soavala naho i mpiningi'ey,
naho ama'o le hampikimokimoheko
ty sarete rekets' i mpijoñe ama'ey;

²² Ie ama'o le hampibaibaieko
t'indaty naho ty ampela,
naho ama'o le hañimokimoheko
ty androanavy naho ty tora'e;
vaho ie ama'o le handemoheko
ty ajalahy naho ty somondrara.

²³ Ie ama'o le hampagomokomoheko ty mpiarake naho ty lia-rai'e,
ie ama'o le handemoheko
ty miproake naho o katraka'eo,
ie ama'o le hañimokimoheko
o mpifeheo rekets' o sorota'eo.

²⁴ Le hondrohako amy Bavele
naho amo hene mpimone' i Kasdio,
ze fonga halò-tsereke nanoe' iereo
e Tsione ao ampahaoniña'o eo,
hoe t'IEHOVÀ.

²⁵ Inao atreatreko rehe, ry vohitse mandrotsake, hoe t'IEHOVÀ,
ty mampianto ty tane toy iaby;
le hatora-kitsiko ama'o ty sirako,
naho havarimbariko
hizotso o tsera-batoo rehe,
vaho hanoeko vohitse finorototo.

²⁶ Le tsy hangala' iareo ama'o
ty vato-kotsoke,
ndra ty vato hanoeñe manantañe;
fa hangoakoake kitro-katroke,

hoe t'IEHOVÀ.

²⁷ Añonjono vilõñe i taney,
popoho añivo' o fifeheañeo ty antsiva, añambaho fifeheañe hiatatre aze,
koiho hifanontone ama'e
ty fifehea' i Ararate[‡], i Miny§,
naho i Askenaze*:
tendreo mpiaolo hiatrek'aze;
ampionjono mb'eo o soavalao
hoe kijeja mifamorohotse.

²⁸ Ambaho ho ama'e o fifeheañeo,
o mpanjaka' o nte-Madaio, o mpifele'eo,
o sorotà'eo, reketse ze hene tane fehe'e.

²⁹ Aa le manginikinike vaho mañore i taney;
amy te mijadoñe o ereñereñ' arofo' IEHOVÀ amy Baveleo,
te hampangoakoahé'e ty tane' i Bavele,
tsy ho amam-pimoneñe.

³⁰ Malain-kialy o fanalolahi' i Baveleo; mikonenak' am-pipalirañe ao;
fa milesa ty haozara' iareo,
hoe t'ie rakemba;
nampiforeheteñe o akiba'eo,
pinozake o sikada'eo.

³¹ Milay hifanojo ami'ty mpijilo raike
ty raike,
naho hifanampe ami'ty ìrake raike
ty raike,
hitalily amy mpanjaka' i Baveley
te fa tinavañe an-kots'o'e valo i rovay;

³² fa tinambozòtse o fitsahañeo,
fa finorototo o vindao,
vaho vorombeloñe o lahin-defoñeo.

³³ Hoe t'IEHOVÀ' i Màroy,
t'i Andrianañahare' Israele:
Ho toem-pifofohañe t'i Bavele
amy androm-pamofohañey;
aniany te ho tendreke
ty sam-pitatahañe aze.

³⁴ Fa nampigedrañ'ahy t'i Nebokadnetsare, mpanjaka' i Bavele, dinemo'e
raho,
napo'e eo hoe korobo kapaike,
nagodra'e an-tsatan-drimo,
naatsa'e an-tro'e ao o mafirikoo,
vaho sinao'e raho.

³⁵ Ee te ho amy Bavele
ty hekoheko nanoañe ahy
naho amonofokoo,
hoe ty asa' o mpimone' i Tsioneo;
naho ho amo nte-Kasdio ty lioko,
hoe t'Ierosalaime.

³⁶ Aa le hoe t'IEHOVÀ,
Inao! te hañalañalañe ho azo raho,
naho hampañondrohako ty do'e

‡ 51:27 Ararate: ty fatse mampihondrahondra
Askenaze: afo mandakake

§ 51:27 Miny: vinolily; veka'e

* 51:27

naho ho maiheko i oñe'ey
vaho ho riteko i rano'e migoangoañey.

³⁷ Hanoeñe votre t'i Bavele,
lakatom-panaloke,
halatsañe naho fikosihañe,
tsy amam-pitoetse.

³⁸ Hañaolo hoe liona tora'e iereo; hitromoroñe hoe ana-diona mena.

³⁹ Ie misolebotse ty drao'iareo,
le hazotsoko am'iereo ty takataka; hampimamoeko iereo hitsipoñapoña,
naho hirota'e firotse kitro-katroke,
vaho tsy hivañoñe, hoe t'IEHOVÀ.

⁴⁰ Hampiambanèko hoe anak' añondry ho lentañe,
hoe añondrilahy naho oselahy.

⁴¹ Hete! fa tinavañe ty Sesake,
fa nijihetse ty enge' ty tane bey toy!
Akore te fa halatsañe amo fifeheañe t'i Bavele.

⁴² Fa nitroare' i riakey t'i Bavele,
nilipore' ty fitroatroaha' o onja'eo.

⁴³ Fa mangoakoake o rova'eo,
kàンkañe i taney naho liolio,
tane tsy imoneña' ondaty,
tsy irangà' ty ana' ondaty.

⁴⁴ Toe ho liloveko t'i Bel e Bavele ao,
naho hampiakareko am-bava'e ao
o nagedra'eo,
vaho tsy hikararake mb'ama'e mb'eo ka o fifeheañe;
eka, fa nideboñe ty kijoli' i Bavele.

⁴⁵ O ry ondatikoo,
mandripaha boak'ama'e ao[†],
mipolitira, songa ondaty mirombahapiañe,
ami'ty haviñera' IEHOVÀ miforoforo.

⁴⁶ Ko ado'o hifatsike o arofo' areoo,
ko irevendreveñe ty amy tolom-bolañe
ho janjiñe amy taney;
fa ho pok'eo ty talily bokòke
ami'ty taoñe raike,
le ty tolom-boetse, an-taon-kafa
naho ty fandrakarakañe amy taney
ie hifandrapake ami'ty mpifeleke
ty mpifehe.

⁴⁷ Aa le oniño, te ho tondroke ty andro hizakako o sare niatoa' i Baveleo,
naho fonga ho salareñe i tane'ey;

vaho hifitafita ama'e ao o aze zinamañe.

⁴⁸ Le hisaboe' i likerañey naho ty tane toy,
naho ze hene am'iereo ao, ty Bavele;
fa hiambotraha' o mpamaoke
boak' avaratseo, hoe t'IEHOVÀ.

⁴⁹ Eka, hikorovoke t'i Bavele
ty amo tinomboke e Israeleo,
toe nideboñe ty amy Bavele
o nihomak' amy tane iabiio.

[†] 51:45 Oni: Iir 50:8, Ben 18:4

⁵⁰ Ry nahafipolotse amy fibaray, mandripaha, ko tambatse ao, tiahio t'IEHOVÀ boak' an-tsietoitane aña, vaho ampiziliho aña'arofo' areo ao t'Ierosalaime.

⁵¹ Salatse zahay fa nahatsanoñ' inje, manafotse ty tarehe'ay ty hameñarañe; amy te nimoahan' ambahiny ty toe-masin' anjomba' IEHOVÀ ‡.

⁵² Aa le oniño te ho tondroke ty andro, hoe t'IEHOVÀ, te ho lilloveko o sare niatoa'eo; vaho hanitsike i tane'ey ty fitoreova' o nifereo.

⁵³ Ndra te hitoabotse mb'andikerañe ey t'i Bavele, naho hafatrare'e i tambohon-kaozara'ey, mbe hiboak' amako, hionjoñe mb'ama'e mb'eo o mpampiantoo, hoe t'IEHOVÀ.

⁵⁴ Inay ty koeake boak'e Bavele, naho ty harotsahañe jabajaba hirik'an-tane' o nte-Kasdioo!

⁵⁵ Fe hampiantoe' IEHOVÀ t'i Bavele, naho hajihe'e i fikorahañe ama'ey, ie mitroñe hoe rano mitabohazake o onja' iareeo,

i fipoñafa' ty fivalitaboaham-peo'iareoy;

⁵⁶ Ie mivotrak'ama'e i mpandrotsakey, amy Bavele, naho ho tsepaheñe o fanalolahi'eo, ho tseraheñe o fale'eo;

fa Andrianañahare mpamale fate t'IEHOVÀ, toe hene hondroha'e.

⁵⁷ Hampimamoeko o roandria'eo naho o mahihi'eo, o mpifeheo naho o mpifelekeo, vaho o fanalolahio; le hirotse firoroan-kitro-katroke, tsy hivañoñe ka, hoe t'i Mpanjaka, IEHOVÀ' i Måroy ty tahina'e.

⁵⁸ Hoe t'IEHOVÀ' i Måroy: ho vata'e rotsaheñe o kijoly mateve' i Baveleo; naho ho forototoe' ty afo o lalam-bei'e mitiotiotseo; aa le tsi-vara ty fitoloña' ondatio, vaho afo ty himokora' o fifeheañe.

⁵⁹ Ty saontsy nafanto'Iirmeà mpitoky amy Seraia§ ana' i Nerià, ana' i Maseia, ie nindre lia amy Tsidkia mpanjaka' Iehodà mbe Bavele mb'eo amy taom-paha-efam-pifehea'ey. (Talèm-pañalankañ' anjomba t'i Seraia.)

⁶⁰ Fonga sinoki' Iirmeà am-boke-pelek' ao o hankàñe hifetsak' amy Baveleo, o hene entañe sinokitse ty amy Bavele retoañe. ⁶¹ Hoe t'Iirmeà amy Seraia: Ie loake e Bavele aña rehe le mahaoniña te ho vakie'o am-peo abo o hene tsara zao, ⁶² le ano ty hoe, Ihe ry IEHOVÀ, ro nitsara ty amy

‡ ^{51:51} Sab 79:1-7, Fir 1:10, Dan 8:13, 11:31 § ^{51:59} Seraia: ty roandria' IEHOVÀ

toetse toy, ty hañitoañe aze, tsy ho amam-pañialo, ndra ondaty ndra hare, f'ie hangoakoake nainai'e kitro-katroke. ⁶³ Ie vaho migadoñe ty famakiañe ty boke toy, le handrohiza'o vato, vaho hahiriri'o añivo' i Perate ao; ⁶⁴ le ano ty hoe: Zao ty hilempora' i Bavele, tsy hitroatse ka, ty amy hankàñe hafetsako ama'e; vaho hitoirañe iereo. Zay ty figadoña' ty enta' Iirmeà.

52

¹ Ni-roapololo taoñe raik' amby t'i Tsidkia te niorotse nifehe, vaho nifeleke folo-tao-raik' amby e Ierosalaime ao; i Kamitale*, ana' Iirmeà nte-Libnà, ty tahinan-drene'e. ² Nanao ty hatsivokarañe am-pivazohoa' IEHOVÀ re, hambañe amo nanoe' Iehoiakime iabio. ³ Aa ie ami'ty haviñera' IEHOVÀ am' Ierosalaime naho am' Iehodà, le tsy mete tsy nanoe'e soike tsy ho aña'trefa'e eo.

Niola amy mpanjaka' i Baveley t'i Tsidkia. ⁴ Aa ie ami'ty andro faha-folo' i volam-paha-folo' i taom-paha-sivem-pifehea'ey, le nivotrak' e Ierosalaime ty Nebokadnetsare mpanjaka' i Bavele, ie naho ze hene lahin-defo'e haname aze, naho nitobe niatrek' aze; vaho nandranjy rafe-pitroarañe aña'riary aze. ⁵ Aa le niarikatoheñe ampara' ty taom-paha-folo-raik' ambi' i Tsidkia mpanjaka i rovay. ⁶ Ie amy andro faha-sive' i volam-pah-efatsey, te nisilofe' ty kerè i rovay, le tsy ama mofo ondati' i taneio. ⁷ Vinaky amy zao i rovay naho songa nivoratsake ty lay o lahindefоñeo, niavotse i rovay haleñe nimb'an-dalambey añaivo' ty kijoly roe, marine ty golobo' i mpanjakay—ie amy zao niarikoboñe i rovay o nte-Kasdio—le norihe'iereo ty lalam-bañ' Arabà mb'eo. ⁸ Fe nihoridañe' o mpirai-lian-dahin-defon-te-Kasdio i mpanjakay vaho tsinepa' iareo a' monto' Ieriko eo t'i Tsidkia; le hene nandripàk' aze o lahindefо'eo. ⁹ Rinambe' iareo amy zao i mpanjakay naho nasese mb'amy mpanjaka' i Baveley mb'e Ribla an-tane Kamate aña; le zinaka'e. ¹⁰ Zinama' i mpanjaka' i Baveley o ana' i Tsidkiao aolom-pihaino'eo; le zinevo'e ka o roandria' Iehodà e Riblà ao. ¹¹ Ginoa'e amy zao o fihaino' i Tsidkiao; naho vinaho' i mpanjaka' i Baveley an-torisike, naho nendese'e mb'e Bavele aña vaho najo'e an-drohy ao am-para' ty andro nivetraha'e.

¹² Ie amy andro faha-folo' i volam-paha-limey, an-taom-paha-folo-sive-ambi' i Nebokadnetsare, mpanjaka' i Bavele, le nivotrake e Ierosalaime ao t'i Nebozaradane, mpifehem-pigaritse, mpijohañe aña'trefa' i mpanjaka' i Baveley; ¹³ le nampangotomomohe'e ty anjomba' IEHOVÀ naho ty anjomba' i mpanjakay, vaho finorototo'e amañ' afo ze hene anjomba' ondati-bey. ¹⁴ Nakoroma' o lahindefо nte-Kasdy mpiamy mpifehem-pigaritseio, o kijoly iaby niarikatoke Ierosalaimeo. ¹⁵ Le nendese' i Nebozaradane mpifehem-pigaritsey an-drohy mb'eo ty ila' o rarake am'ondate naho o honka'e androvao, naho o nivalike mb'amy mpanjaka' i Baveleo vaho ty sehanga' o mpitoloñeo. ¹⁶ Fe nenga' i Nebozaradane ho mpañalahala vahe naho mpiarake o loho rarake amy taneio.

¹⁷ Le pinzapozza' o nte-Kasdio o fahañe torisike aña'anjomba' IEHOVÀ naho o foto'eo naho i tante-rano torisike aña'anjomba' IEHOVÀ, vaho nendese' iereo mb'e Bavele aña ze hene torisike ama'e, ¹⁸ naho o valàñeo naho o sajoam-porohao naho o fiharatan-tsokotsokoo naho o fitovio, o finga'eo vaho o fanake torisike fitoroña' iareo iabio, vaho fonga nasese. ¹⁹ Le nitavane' i mpifehem-pigaritsey ka o soakazoo naho o endraendrao

* ^{52:1} Kamitale: alok' ami'ty hatrovoha'e

naho o kovetao naho o fitovio naho o mpitan-jiroo naho o koroboo; ze am-bolamena ty Amy volamena'ey vaho ze am-bolafoty ty Amy volafoti'ey.

²⁰ I fahañe roe rey, i tante ranoy, i añombelahy torisike folo-ro'amby ambane' i riakey naho o foto'eo, o nitsenè i Selomò añ'anjomba' IEHOVÀO—tsy nian-danja ty torisike amy hene fanake rezay. ²¹ Le i fahañe rey, sindre kiho folo-valo' amby ty haabo'e, kiho'e folo-ro'amby ty taly nahaffiary aze; vaho rambom-pitañe efatse ty hateve'e, ie nikòake ty am-po'e ao.

²² Halañe torisike ty ambone'e eo; lime kiho ty haabo' i halañey, tama'e ka ty tsingarakarake naho o saren-dagoa niaripitek' ama'eo, songa torisike; nihambañe ami'ty raike i faharoey rekets' o dagoa'eo. ²³ Sivam-poloneñ'amby ty dagoa aña' ila'alafe'e eo, zato ty dagoa niariary aze amy tsingarakarakey.

²⁴ Le rinambe' i mpifehem-pigaritsey t'i Seraia, mpisorom-bey naho i Tsefania, mpisorom-paha-roe, naho ty mpiamben-dalañe telo; ²⁵ le nalae'e boak' an-drova ao ty mpifehe tinendre ambone' o lahindefoñeo naho ty lahilahy fito amo mpahaoniñe ty lahará i mpanjakaio, ze nitendrek' an-drova ao; naho ty silikitera' ty mpifeleke i màroy, i mpikoike ondati' i taneio; vaho lahilahy enempolo am'ondati' i taneio, ze nizoeñe amy rovay. ²⁶ Nasese' i Nebozaradane mpifehem-pigaritsey mb'amy mpanjaka' i Baveley e Riblà mb'eo iereo, ²⁷ le zinevo' i mpanjaka' i Baveley; navetra'e e Riblà an-tane Kamate eo. Aa le nasese boak'an-tane'e ao t'Iehodà.

²⁸ Iretoa ondaty nasese' i Nebokadnetsare an-drohio: amy taom-paha-fitoy, telo-arivo-tsi-roapolo-telo' amby amo nte-Iehodao; ²⁹ amy taom-paha-folo-valo-ambi' i Nebokadnetsarey, ondaty valonjato-tsi-telopolo-ro' amby boak' Ierosalaime ao; ³⁰ amy taom-paha-roapolo-telo-ambi' i Nebokadnetsarey le nasese' i Nebozaradane mpifehem-pigaritsey an-drohy ty nte-Iehodà fiton-jato-tsi-efapolo-lim' amby; nitontoñe ho ondaty efats' arivo-tsi-enen-jato.

³¹ Aa le nifetsak' amy andro faha-roapolo-lim' ambi' i volam-paha-folo-ro' ambi' i taom-paha-telo-polo-fito-ambi' ty fandrohiza' Iehoiakine mpanjaka' Iehodà, te nampiavote' Ivil-merodake mpanjaka' i Bavele amy taom-baloham-pifeleha'ey ty añambone' Iehoiakine mpanjaka' Iehodà vaho nakare'e am-balabey ao. ³² Nisaontsy mora ama'e, vaho naonjo'e ambone' ty fiambesa' o mpanjaka ila'e niharó ama'e e Baveleo ty fiambesa'e. ³³ Novae'e o sikim-pirohi'eo vaho nanjotsoañe mahakama añatrefa'e nainai'e amo hene andro niaiña'eo. ³⁴ Le i fiveloma'ey, nitolom-pamahañe aze boak' andro amo hene andro niaiña'eo ty mpanjaka' i Bavele ampara' ty andro nihomaha'e.

Firovetañe

1

1 ¶ Akore ty habangìñem-pitoboha'
o rova nilifots' ondatio!

Heheke te hoe ramavoiñe henaneo,
ie nijabajaba amo fifeheañe!
Ie nianak'ampelam-panjaka añivo'
o faritseo le fa forekekeñe henane zao.

2 ▷ Mafaitse ty fangoihoia'e te haleñe;
ranomaso avao ty am-pifi'eo;
ie añivo' o fonga sakeza'eo
ro po-mpañohò;

sindre namitak'ate aze o rañe'eo
songa rafelahi'e henaneo.

3 ¶ Nasese an-kaloviloviañe t'Iehodà,
naho ampañondevozañe losotse;
amo kilakila ondatio ty imoneña'e
henane zao,
tsy mahaisake fitofañe ;
fa nahatratse aze iaby
o mpañoridañ' azeo,
añivo' o halovilovia'eo.

4 ¶ Hene mandala o lala' i Tsioneo
amy te tsy ama'e ty mamonje
o sabadidake namantañañe*;
songa vahiny o lalam-bei'eo,
miselekaiñ' avao o mpisoro'eo;
mihontoke o somondrara'eo,
fa finaha manahin-ka.

5 ¶ Fa nanoeñe talè'e henaneo o rafelahi'eo, miraorao henane zao o
malaiñe azeo,
f'ie nampisotrie' IEHOVÀ
ty amo fiolà'e tsifotofotoo;
fa nasese mb'an-drohy mb'eo
aolo' o rafelahi'eo o keleia'eo.

6 ¶ Fonga napo' i anak'ampela' i Tsioney
ty volonahe'e;
ie hoe bakaralahy, tsy manjo
fiandrazañe o roandria'eo;
nibotafotse po-kaozarañe
aolo' i mpañoridañey.

7 ¶ Tiahî' Ierosalaime,
ze hene vara'e añ'andro taolo,
ie nisotry naho nirererere,
ie mijoeñe am-pitan-drafelahi'e ao,
ie pitsom-pañolotse,
vaho nisamba i fihotraha'ey
o malaiñ'azeo,
nikizake i harotsaha'ey.

8 ¶ Niota faly t'Ierosalaime,

* **1:4** Sor 23

aa le ìnjen-dre henaneo;
 mavoe' o niasy aze iabio,
 fa niisa' iareo ty fimeñara'e;
 miselekain-dre vaho miamboho,
⁹ ¶ An-tsiki'e leny ao ty haleora'e;
 tsy hinao'e t'ie ho figadoña'e;
 nahalatса ty nihotraha'e,
 ie tsy amam-pañohò.

O ry IEHOVÀ, vazohò ty fisotriako,
 ie ireñeta' ty rafelahy!

¹⁰ ¶ Fa natorakitsi' o mpalaiñe azeo ambone' o vara'e iabio o fità'eo;
 niisa'e iaby ty fipoñafa'
 o kilakila' ndatio i toe'e miavakey,
 o nirarà'o tsy himoake
 am-pivori'oo.

¹¹ ¶ Songa mitoreo ondati'eo,
 mitsoeke mofo;
 natsalo' iareo mahakama ty vara' iareo
 ho famelomam-piaiñe.
 Vazoho ry IEHOVÀ, mahaoniña
 ty tsy fanjofahako henaneo.

¹² ¶ Tsy ahoa' areo hao zao,
 ry mpiary mb'eo?
 Paiao naho oniño, he ao ty hontoke
 manahake o fihontoke
 nafetsak' amakoo,
 ie naretsa' IEHOVÀ amako
 amy andron-kaviñera'e
 miforoforo zao.

¹³ ¶ Nampihitrica'e afo boak' andikerañey,
 le niteveke lalek' an-taolako ao;
 nandafifa'e harato o tombokoo;
 nampolie'e mb'eo naho
 nenga'e fiain-drifi'e,
 yaho mitoirañe lomoñandro raho.

¹⁴ ¶ Hoe vinahotse an-joka o fiolàkoo,
 mirohy am-pità'eo,
 mivandibanditse
 pak'am-bozoko eo;
 mampinike ty haozarako;
 natolo' i Talè am-pita' o tsy lefeko ijohañañe.

¹⁵ ¶ Hene naforintse' i Talè
 o lahindefoko añivoo;
 nitaroñe'e amako ty andro
 ho demohe'e o ajalahikoo;
 fa linialia' i Talè hoe
 am-pipiritan-divay i anak-ampela mieha' Iehodày.

¹⁶ ¶ Rovetako i raha rezay;
 midoandoan-drano-maso avao
 o masokoo;
 fa lavits'ahy ty mpañohò,
 ty hampitsekake ty fahavaniako;
 bangiñe o anakoo,

ty amy nandreketa' i rafelahiy.

17 **¶** Mañity tañañe t'i Tsione,
fa tsy eo ty hañohò aze;
fa nandilia' IEHOVÀ
ty am'Iakobe o mpañohok' azeo
ty hifandrafelahy ama'e;
nunjare raha maleotse añivo' iareo
ao t'ierosalaime.

18 **¶** To ty a IEHOVÀ,
amy te niolàko o entam-palie'eo;
mijanjiña arè ry kilakila' ondatio
vaho isao o halovilovikoo;
te nisese mb'am-pandrohizamb'eo
o somondrarakoo naho o ajalahikoo.

19 **¶** Kinaiko o sakezakoo
fe nifañahie' iareo;
namoe'aiñe an-drova ao o mpisoroko
naho o androaanavikoo
ie nitsoeke mahakama
hameloma'e fiaiñe.

20 **¶** Hehe, ry IEHOVÀ t'ie
an-koheke;
mikoreokoreoke ty troko,
mifihiñe amako ao ty foko,
amy hafairañe nilosotsey.
Mampandala an-dalañe eo ty fibara;
hoe fihomahañe ty añ'anjomba ao.

21 **¶** Jinanji' iereo ty fitoreovako,
zaho pitso-pañohò;
jinanji' o rafelahiko iabio
o feh'ohakoo;

ehake iereo te nanoe'o zay.
Ampitsatoho i andro nitseize'oy,
le hanahak' ahy iereo.

22 **¶** Ampombao aolo'o eo ze fonga
fitoloñan-dratí' iareo;
le ano am' iereo o nanoe'o amakoo,
ty amo fiolàñe iabio;
amy te lako toreo raho vaho
midazidazítse ty troko.

2

1 **¶** Hedèy te nakopo' i Talè an-drahoñe ao t'i Tsione amy haviñera'ey!
Naretsa'e boak' an-dikerañey
pak' an-tane eo
ty hatsomerentsere' Israele,
vaho nandikofa'e ty fatimpaha'e
amy androm-pifomboa'ey.

2 **¶** Fa nagedra' i Talè
tsy aman-tsehang'a'e o kiboho' Iakobeo,
vaho tsy niferenaiña'e;
fa nafetsa'e ambane eo o kijoly fatrats'
i anak' ampela' Iehodàio;

ie nafotsa'e an-tane;
tiniva'e i fifeheañey
naho o roandria'eo.

³ ¶ Fa naitoa'e an-kaviñerañe

mena ty tsifa' Israele;

nasita'e aolo' i rafelahiy

ty fità'e havana;

vaho finorototo'e hoe

afó misolebatse t'Iakobe,

afó mangotomomoke mb'eo mb'eo.

⁴ ¶ Nabitso'e hoe rafelahy ty fale'e,

najado'e hoe ravetro ty fità'e,

vaho zinama'e iaby ze nisoa am-pihaino;

an-kivoho' i anak'ampela' i Tsioney

ty nampidoandoña'e

ty haviñera'e hoe afó.

⁵ ¶ Fa ninjare rafelahy t'i Talè henanekeo,

fa nigenohe'e t'Israele;

hene nabea'e o sokemitraha'eo,

rinotsa'e o fipalirañe fatratseo;

vaho nampitomboe'e amy

anak'ampela' Iehodày

ty fangololoihañey naho fandalàñey.

⁶ ¶ Hinatsakatsa'e i kivoho'ey

hoe t'ie nigoloboñey;

nampiantoe'e i toem-pivori'e namotoañañey;

nampahaliñoe' IEHOVÀ e Tsione ao

o Famantañañeo naho o SABATAO,

vaho ninjè'e ami'ty fitorifiha'

i fifomboa'ey i mpanjakay

naho o mpisoroñeo.

⁷ ¶ Navokovoko' i Talè i kitreli'ey,

nampangorìñe Aze i toe'e niavakey;

napo'e am-pitan-drafelahy

o rindrin' anjombao:

ie nikorake añ'anjomba'

IEHOVÀ ao, manahake

te añ'androm-pivory miavake.

⁸ ¶ Sinafiri' IEHOVÀ ty handrotsake

ty kijoli' i anak'ampela' i Tsioney;

fa kinazazà'e ty taly,

tsy nampoli'e ty fità'e

tsy handrotsake;

nampirovete'e iaby ty fahañey

naho ty rindriñey;

mitrao-pinike iereo.

⁹ ¶ Nalentek' an-tane ao

o lalam-bei'eo;

fa rinotsa'e vaho pinoza'e

o sikada'eo;

songa an-tane tsy mitan-Kàke

i mpanjaka'ey naho o roandria'eo;

eka tsy manjo aroñaroñey boak'

am' IEHOVÀ o mpitoki'eo.

10 Mitozòke an-tane eo
ty androanavi' i Tsione,
mijomohoñe,
nampibobò deboke añ'ambone'eo;
midian-gony am-baniañe;
miondre-doha' mb'an-tane
o somondrara mieha' i Tsioneo.

11 Milesa o masokoo ty amo ranomasoo, mioremeñe ty troko;
fa nadoañe an-tane ty ateko,
ty amy fandrotsahañe
i anak'ampela' ondatikoy,
ty amo anak'ajajao naho o mpinono
mitoirañe an-dalan-drovao;

12 Hoe iereo aman-drene,
aia ty tsako naho ty divay?
ie tsipike hoe mate an-dala' i rovay ey
ie midoañe añ'arañan-drene'e ao
ty fiai' iareo.

13 Akore ty havereko azo?
Añoharako ami'ty inon-drehe
ry anak'ampela' Ierosalaime?
Ino ty hañirinkiriñako ama'o
hañohòako azo,
ry anak'ampela' i Tsione?

Fa mienene manahake i riakey
ty fere'o, ia ty hahamelañe azo?

14 Nahaisak' aroñarom-bande
naho hagegeñañe ho azo o mpitoki'oo;
vaho tsy nabora' iareo o tahi'oo,
hampipoliañe azo boak'an-drohy ao,
fa fetsen-dremborake ty niisa' iareo,
toe talim-pandroahañe.

15 Songa miteha-pitañe ama'o
ze miary eo;
sindre mikosake naho mikofikofi-doha amy
anak'ampela' Ierosalaimey
manao ty hoe:

Itoy hao i rova nitokaveñe ty hoe:
Fahafoniran-Kasoa Vintañe,
ty firebeha' ty tane-bey toiy?

16 Nampidañadaña falie ama'o
o fonga malaiñe azoo;
mikosasàke naho mikodrítse nife
manao ty hoe:

Fa nabean-tika;
itoy 'nio i andro nitaman-tikañey,
fa tendreke, le isake.

17 Fa nanoe' IEHOVÀ i naereñere'ey;
fa nihenefa'e i fetse najado'e
añ'andro taoloy;
fa naretsa'e ambane eo le tsy niferenaiña'e;
vaho nampirebehe'e ama'o o rafelahi'oo;

naonjo'e ty tsifa' o malaiñ'azoo.

¹⁸ ✱ Mitoreo añ'arofo amy Talè iereo:
O ry kijoli' i anak'ampela' i Tsioney,
ampikararaho ranomaso hoe
sorotombake handro an-kaleñe;
ko ampahazoe'o fiaiñe ty fañova'o;
ko ampitofa'o o fihaino'oo.

¹⁹ ♂ Miongaha, mikoeaha te haleñe,
ami'ty fiorota' o fijilovañeo;
adoaño ty arofo'o hoe
rano añatrefan-dahara' i Talè;
añonjono fitañe ama'e ho ami'ty fiai'
o keleia'o mitoirañe ami'ty kerè
an-doha o lalañeо iabio.

²⁰ ♀ Hehe ry IEHOVÀ biribirio:
ia o nanoa'o o raha zaoo?
Habotse' o rakembao hao
o tolin-tsabo'eo?
o ajaja otroñe'e am-pitâñeo?

Ho zamaneñe an-toe' i Talè miavak' ao hao
ty mpisoroñe naho ty mpitoky?

²¹ ♀ Ty tora'e naho ty androanavi-bey,
songa mändre an-tane an-dalañe eo;
o somondrarakoo naho o ajalahikoo,
fonga zinevo' i fibaray;
binaibai'o amy andron-kaviñera'oy
zinama'o fa tsy niferenaiña'o.

²² ♂ Kinoi'o hoe añ'androm-
pivory miavake,
o hekoheko miariseho ahikoo;
vaho leo raike tsy nahabotatsake,
tsy nanisañe amy andron-kaviñera'
IEHOVÀy;
o notroñekoo naho nibeizekoo
ro fonga nabea' i rafelahi.

3

¹ ✱ Ondaty nahatrea hasotrian-draho
amy kobain-kaviñera'ey.

² Niaoloa'e naho nampomba'e
mb'an-kamoromoroñañe ao
fa tsy mb'an-kazavàñe.

³ Toe nafote'e amako lomoñandro
lomoñandro ty fità'e.

⁴ ♂ Nanoe'e hambo'e o nofokoo
naho o holikoo;
sindre pinekapeka'e o taolakoo.

⁵ Nanoa'e hàlañe, nañarikatoha'e afero
naho haloviloviañe.

⁶ Nampitobohe'e an-toetse maieñe
ao raho, hoe lolo-ela.

⁷ ♂ Narindri'e ao tsy hahafionjoñe;
nanoe'e mavesatse o silisilikoo.

⁸ Aa naho mikoikoike hipay imba,

le sikadaña'e alafe ao i halalikoy.
 9 Nikalaña'e am-bato vinañe o liakoo,
 nampikelokelofe'e o oloñolokoo.
 10 ¶ Hoe amboa romotse mamandroñe
 ahy, hoe liona añ'etaketak' ao.
 11 Natsile'e iaby o fombàkoo,
 naho nirimidrimite'e ty sandriko;
 nanoe'e babangoañe.
 12 Fa habitso'e ty fale'e, le nohara'e amako ty ana-pale.
 13 ¶ Nampitrofahe'e ambaniako ao
 o ana-tsotsòke boak' an-trañon'
 ana-pale'eo.
 14 Fa finjè'ondatikoo raho,
 bekobekoa' iareo lomoñandro.
 15 Finaha'e hafairaañe
 vaho natsafe'e vahon-tsoy.
 16 ¶ Finoifoi'e am-bato o nifikoo;
 nalembe'e an-davenok' ao raho.
 17 Nampihankàñe'o
 lavi-panintsiñañe ty haveloko;
 nihaliñoko ze o hasoa zao.
 18 Le hoe raho, Fa modo ty
 haozarako, ty fitamàko am' IEHOVÀ.
 19 ¶ Tiahio ty haloviloviako
 naho ty hasotriako,
 ty vahon-tsoy naho afero.
 20 Toe tiahi' ty fiaiko,
 vaho mibotrek' amako ao.
 21 Ty hoe ty apotam-pitsakoreako,
 mampitamà ahiko, te
 22 ¶ le lia'e tsy mijihetse ty fiferenaiña' IEHOVÀ
 tsy mb'ia hilesa o fiferenaiña'eo.
 23 Vao boak'andro;
 ra'elahy ty figahiña'o.
 24 IEHOVÀ ty anjarako, hoe ty troko,
 aa le ie ty fitamàko.
 25 ¶ Soa t'IEHOVÀ amo mahaliñe azeo;
 amy arofo mipay Azey.
 26 Mahasoa ondatio te mitama,
 t'ie handiñe am-pianjiñañe
 ty fandrombaha' IEHOVÀ.
 27 Hasoa am'ondatio ty mivave
 ty jokan-katora'e.
 28 ¶ Angao re hiambesatse am-bangiñe
 ao, hianjiñe,
 amy te ie ty nandafik' aze.
 29 Hatoho'e an-debok' ao ty falie'e,
 hera ama'e ty fitamañe.
 30 Soa re te hatolo'e amy mandrara-
 tehak' azey ty fiambina'e;
 angao ampiliporeñ' inje.
 31 ¶ Fa tsy hañito nainai'e t'i Talè.
 32 Aa ndra t'ie ty mampioremeñe,

mbe hiferenaiña'e
amy hafatraram-pikokoa'ey.

³³ Tsy mora ama'e ty mandafa,
ndra ty mandilo o ana'ondatio;

³⁴ ↗ Ie ampidemoheñe am-pandia,
ze mpirohi' ty tane toy;

³⁵ ie tsy omen-to ondatio añatrefa'
i Andindimoneñey,

³⁶ ie ampikelohéñe ty enta' ondatio—
tsy arofoana' i Talè hao?

³⁷ ↘ Ia ty nitaroñe naho nahafetsake zao,
naho tsy i Talè ty nametse?

³⁸ Tsy boak'am-palie' i Abo Tiañey hao ty hankàñe naho ty soa?

³⁹ Akore ty itoreova'ondaty veloñeo,
o lahilahio ty amo tahi'eo?

⁴⁰ ↗ Antao hañotsohotso hitsoke
o lalan-tikañeo,
vaho himpoly mb'am' IEHOVÀ mb'eo.

⁴¹ Antao hañonjoñ' arofo am-pitáñe mb'aman'Añahare an-digiligy aña.

⁴² Toe nandilatse zahay naho niola;
toly ndra tsy napo'o.

⁴³ ♂ Nikolopok' an-kaviñeran-drehe
te nañoridañe anay;
tsy niferenaiña'o t'ie nanjamañe.

⁴⁴ Nisaron-drahon-dRehe,
tsy himoahan-kalaly.

⁴⁵ Nanoe'o romoromo'e naho forompotse zahay
añivo' o kilakila'ndatio.

⁴⁶ ↗ Songa midañadaña falie ama'ay
o malaiñ'anaio.

⁴⁷ Fa nifetsak' ama'ay ty hebakebake
naho i koboñey,
ty famongorañe naho fandrotsahañe.

⁴⁸ Mitsirtsioke rano o masokoo,
amy fandrotsahañe
i anak'ampela' ondatikoy.

⁴⁹ ↗ Midoandoañe mañambane
o masokoo,
vaho tsy mijihetse, tsy mitroatse,

⁵⁰ Ampara' te mivazoho mañambane
t'IEHOVÀ,
mitalake boak' an-dikerañe aña.

⁵¹ Mampihontoke ty troko o masokoo
ty amo hene anak'ampelan-drovakoo.

⁵² ↗ Fa nikehe ahy hoe kibo,
tsy amam-poto'e o malaiñ'ahio.

⁵³ Naitoa' iareo an-koboñe ao ty fiaiko,
vaho nandretsa-bato amako.

⁵⁴ Nandipotse ty lohako o ranoo
vaho nanoeko ty hoe: Opo raho!

⁵⁵ ↗ Kinanjiko ty tahina'o ry IEHOVÀ,
boak' an-koboñe loho lalek' ao.

⁵⁶ Jinanji'o ty feoko;

ko aeta'o amy ravembia'oy
i fitoreokoy hahafikofohako.
57 Nitotok' ahy Rehe amy andro
nikanjiako azoy; le hoe Rehe:
Ko hemban-drehe.
58 ♫ Ry Talè, nañalañalañe'o
o entan' aikoo;
fa jineba'o ty fiaiko.
59 Ry IEHOVÀ, fa nivazoho'o
ty nasarañ' ahy; ehe izakao.
60 Fa nioni'o ty fitrotrofiah'a iareo
naho ty fikitroha' iareo amako.
61 ♪ Fa jinanji'o ty injé' iareo, ry IEHOVÀ,
naho o fikililia' iareo ahy iabio,
62 Ty fivimbi' o nitroatse amakoo,
ty fikinià' iareo ahy lomoñandro,
63 Vazohò iereo te miambesatse,
naho t'ie mionganke;
zaho bekobekoa' iareo.
64 ▲ Mbe hondroha'o, ry IEHOVÀ,
ty amo satam-pitá' iareoo.
65 Kolopofo ty arofo' iareo,
ametsaho fatse!
66 Horidaño an-kaviñerañe
vaho mongoro
ambanan-dikera' IEHOVÀ eo.

4

1 ♪ Akore te nikomavo o volamenao,
hete! niova o volamena ki'eo!
Hene nadoandoña'e aolo' ze lalan-drova eo o vato soao.
2 □ Mañeva volamena hiringiri'e
mira amo lanja'eo
o ajaja' sarots' i Tsioneo;
akore t'ie oharañe am-balàñe-tane
henaneo,
asam-pitám-panao valàñe-tane!
3 ▲ Ndra o fanalokeo ro manolotse nono, hampinono o ana'eo,
fe ampisoañeñe manahake
o voron-tsatrañe am-patrañ'añe
ondatikoo henane zao.
4 ♫ Mipitek' an-dañilañi'e
ty lela' o anak'ajajao
amy harandrano'ey;
mangata-kaneñe o ajajao,
fe tsy amam-panisa.
5 ▲ Mikoromak' an-dalañe
o nitakataka raha mafirio;
mitambozótse votren-davenoke
o nibeizeñe an-tsikiñe malo-mavoo,
6 ▲ Fa lombolombo' ty nandilovañe
i Sedome ty nandafañe ondatikoo,
ie aniany te narotsake,
ie fitàn-draike tsy zinonjoñ' ama'e.

7 ¶ Nikotritriake hoe fanala o roandria'eo,
foty te aman-dronono;
nilikoatse o safira
pinilak' amo vonga'eo,
ty filoeloem-binta' iareo.

8 Mainten-geroke hoe molale
o tareheo henaneo;
tsy fohiñe an-dalañey iereo,
fa niforejeje amo taola'eo ty holi' iareo,
mipipike hoe hatae maike.

9 ♪ Falefale i tinombom-pibaray
te amo trinofan-kasalikoañe,
ie mitike avao ty fiai' iretoañe,
ie tsy taka-tsindroheñe o tondao.

10 ¶ O fitan-drakemba mpitretre'eo
fa nahandro o ana'eo;
nunjare flintse'e,
ami'ty famongorañe
o anak' ampela' ondatikoo.

11 ♫ Nihenefa' IEHOVÀ i fifombo'ey;
fa nadoa'e i haviñera'e miforoforoy,
vaho namiañe afo e Tsione ao
ze namorototo o mananta'eo.

12 ♪ Tsy nahafiantoke
o mpifehe' ty tane toio,
ndra o mpimone' ty voatse toio,
t'ie hahafimoak' an-dalambei'
Ierosalaime ao,
ty rafelahy ndra ty sadia-vahe.

13 ♪ Ie iaby zay
le ty amo hakeom-pitoki'eo
naho o tahim-pisoro'eo,
ie nampiorihe' iareo lio-màliñe.

14 ♪ Ie nirererere hoe goa
an-dalan-drova ao;
tsy teo ty nahavany hitsapa o siki'eo
ami'ty hativa'e.

15 ♪ Soike! Veta!
ty nitazataza' ondatio am' iareo;
Soike! Añe! ko mitsapa!
aa le gike naho mpirererere iereo;
le hoe ty natao' o kilakila' ndatio:
Tsy hitobok' atoy ka iereo.

16 ♪ Nampivarakaihe' ty haviñera' IEHOVÀ,
tsy ho haoñe'e ka;
tsy niasia' iareo o mpisoroñe,
tsy nisohe' iareo o androanavio.

17 ♪ Fa milesa o fihaino'aio,
mitolom-pijilojilo imba tsy vente'e;
nitalake avao zahay
nitama fifeheañe tsy maharombake;

18 ♪ Ie nitinoñe o lia'aio,
zahay tsy naha-jelanjelañe amo lala'aio;

mitotoke ty figadoña'ay,
voa-iake o andro'aio,
vaho an-titotse ty fimodoa'ay.

¹⁹ ¶ Nasika te amo tsimalahoo
o nihofik' ama'aio;
linafa' iareo am-bohitsey,
vinandro' iareo an-dratraratra ao.
²⁰ ¶ O kofòn'ai'aio, o noriza'IEHOVÀO
le fa tinavañe an-kobo' iareo ao—
ie nataon-tika ty hoe: Ambanen'alo'e ao
ty himoneñan-tika
añivo' o kilakila' ndatiody.

²¹ ¶ Mirebeha, mifalea
ry anak'ampela Edome,
ihe mimoneñe an-tane Oze ao;
fe hiary ama'o ka i fitoviy;

ho jike rehe vaho hañalo-batañe, hiboridañe.

²² ¶ Fa heneke ty fandilovañe o hakeo'oo, ry anak'ampela' i Tsioneo,
tsy hasese'e mb'an-drohy aña ka;
fe ho lillove'e o tahi'oo
ry anak'ampela Edomeo,
fonga habora'e o hakeo'oo.

5

¹ Tiahio, ry IEHOVÀ,
i nifetsak' ama'ay zay;
vazohò vaho oniño ty fisalara'ay!

² Natolotse amo ambahinio ty lova'ay,
amo rene-taneo o akiba'aio.

³ Bode zahay henaneo, toe bode rae;
remavoiñe o rene'aio.

⁴ Tsy mete tsy vilie'ay ty rano hinome'ay; kaloeñe o hatae avori'aio.

⁵ Ampisoañeñe o hatò'aio;
màmake zahay tsy maharendre-pitofañe.

⁶ Fa nanolo-pitâñe amy Mitsraime zahay
naho amy Asore,
hitakara'ay mofo mahàtsake.

⁷ Nandilatse o roae'aio; tsy eo ka iereo;
zahay avao ty mivave o hakeo'eo.

⁸ Fehe' o ondevoo, fe tsy eo
ty hamotsots'anay am-pità' iareo.

⁹ Mampamoe' aiñe
ty ahazoa'ay haneñe,
amy fibara an-dratraratray.

¹⁰ Mahamainte ty holi'ay hoe toñake
I kerè matrovokey. ¹¹ Vahorañe e Tsione ao o rakemba'aio, naho amo rova'
Iehodào o somondrara'aio.

¹² Aradorado am-pità'e o roandriañe;
tsy iasiañe ty lahara' o androanavio.

¹³ Azitse handisañe ty ajalahy
naho midaleandaleañe o jolingao te
mijiny hatae.

¹⁴ Napo' o androanavio ty lalam-bey,

nado o ajalahio ty bekobeko.

¹⁵ Nijihetse ty hafalean' arofo'ay;
nifotetse ho fandalàñe o tsinja'aio.

¹⁶ Po-tsabaka zahay; feh'ohatse fa niota!

¹⁷ Zay ty mahasiloke o tro'aio,
zay ty mahalopelope o fihaino'aio;

¹⁸ toe i Vohi-Tsione mangoakoakey;
mitingañ' ao o farasio.

¹⁹ Fa Ihe ry IEHOVÀ,
nainai'e tsy modo ty fifehea'o;
pak'amo tariratse fara-mandimbeo
ty fiambesa'o.

²⁰ Akore t'ie naforintse'o?
Amoea'o andro maro hao zahay?

²¹ Ampolio ama'o, ry IEHOVÀ,
hibodaña'ay; vaò manahake o andro taoloo o andro'aio—

²² Fa naitoa'o zafezanake,
naho loho niviñera'o.

Iekezkèlè

¹ Tamy andro faha-lime ty volam-pahefa' i taom-paha-telo-poloy, zaho nitraok' amo naseseo, añ'olon-tsaka Kebare* eo, le nisokake o likerañeo vaho niaroñaroñeko i Andrinañahare. ² Tamy andro faha-lime' i volañeiy, i taom-paha-lime naha aman-drohi' Ioiakine† mpanjakay, ³ le niheo am' Iekezkèlè‡ mpisoroñe ana' i Bozy§, an-tane' o nte-Kasdio*, añ' olon-tsaka Kebarey, ty tsara' IEHOVÀ, vaho tama'e ty fità' IEHOVÀ.

⁴ Zaho nañente, le hehe te boak' avaratsey ty tio-bey: rahoñe jabajaba niarisehoam-palipalitsieñe, le nitolom-pitsopèlatse boak'ama'e ty afo, vaho an-teñateña' i afoy ty mañirinkiriñe ty vato-voñe miloeloe. ⁵ Hoe raha veloñe efatse ty añivo'e eo le hoe sandri' ondaty. ty vinta' iareo.

⁶ Songa aman-daharañe efatse, sindre amañ' elatse efatse. ⁷ Nahity o fandia'eo, le nihoe tombon-temboay o fandia'eo vaho nitsopelatsopelatse hoe torisike vinañe, ⁸ ie amam-pitá'ondaty efatse ambane' o ela'eo amo ila'e efatseo. Le hoe zao ty laharañe naho ty ela' i efatse rey: ⁹ nifañoza ty ela' iareo; songa nisitse mahity miaolo, tsy niolake ty fisitsira'e. ¹⁰ Aa ty amo vintan-dahara'eo: le songa aman-dahara' ondaty i efatse rey, sindre tarehen-diona ty añ'ila ankavana'e naho tarehen' añombe ty ankavia' i efatse rey, vaho sambe aman-tarehem-bantio i efatse rey; ¹¹ izay i tarehe'e rey. Nivelatse ambone eo o ela'eo; songa amañ' elatse roe nifampitakatse ami'ty ela' ty ila'e, le elatse roe ka ty nanaroñe i sandri'ey, ¹² songa nionjoñe mahity mb'eo, ze nimba' i arofoy ty nimba'e, tsy nivioñe am-pañaveloañe. ¹³ Ty vinta' i raha veloñe rey le hoe vaen-afø mirekake, manahake failo mihelohelo mb'etia mb'atia amo raha veloñe; nireandreañe i afoy, vaho nipelatse boak' añ'afø ao ty helatse. ¹⁴ Nipelapelatse mb' eo hoe fipelan-kelatse i raha veloñe rey.

¹⁵ Ie nañente i raha veloñe rey raho, le nahatrea te songa aman-darò an-tane añ'ila i raha veloñe efatse rey. ¹⁶ Aa ty amy vinta' o larò naho ty fitseneañe iareo, le hoe am-bintañe berile miloeloe, nihambam-bintañe iaby i efatse rey, rinanjy hoe larò aña'ate' ty larò. ¹⁷ Ie nañavelo mb'aman-dra aia aia amo zoro-tane efatseo le tsy nivioñe te nionjoñe. ¹⁸ Abo naho naharevendreveñe o bandin-darò'eo amy te tsitsike maso o zanti'eo.

¹⁹ Ie nisitsitse i raha veloñe rey le nandeha ka i larò rey aña'ila' iareo eo; aa ie nionjoñe mb'añ'abo mb'eo i raha veloñe rey le nionjoñe ka i larò rey. ²⁰ Ndra aia' aia nandenà' i arofoy, ty nandenà' iareo, le nindre nionjoñe am' iereo i larò rey; amy te tañate' o larò'eo ty arofo' i raha veloñe rey. ²¹ Ie nisitse le nisitse ka ty larò; ie nijohañe le nitsangañe ka ty larò; vaho ie nionjo boak' an-tane eo, le nindre nionjoñe ka i larò rey; amy te tam-po' o larò ao ty arofo' o raha veloñe.

²² Ambone' ty loha' o raha veloñe le ty nanahake tafo-bokoke, niloeloe hoe kristaly, milañelañe ambone' o loha'eo. ²³ Ambane' i bokokey le nivelatse mahity o ela' iareoo, ty raike mb'amy ty raike, le amañ' elatse roe, nanaroñe ty vata'e ty raike, vaho elatse roe ka ty nanaroñe ty aña'ila' i vata'ey. ²⁴ Ie nisitse iereo, le tsinanoko hoe fitroñan-drano bey

* ^{1:1} Kebare: haozarañe † ^{1:2} Ioiakine: ty haozara' Ià, ty fiherentseña'e ‡ ^{1:3} Iekezkèlè: ty Haozaran'Andrianañahare § ^{1:3} Bozy: ty falaiñako * ^{1:3} Kasdy: hoe kokolampa ndra malaso

o ela'eo, manahake ty fiarañanaña' i El-Sadai, le ty feom-pivalitsikotàhan-dahindefoñe; ie nitsangañe iereo le napoke mañambàne o ela'eo. ²⁵ Aa ie niboak' amy bokoke ambone' loha' iareo eiy ty fiarañanañañe, le nijohañe eo vaho naradorado' iareo o ela'eo.

²⁶ Ambone' ty bokok' ambone' o loha' iareoo le nihoe fiambesatse, naho hoe safira t'ie nirendreheñe; vaho niambesatse ambone' i hoe fiambesatsey ty nirendreke te amam-binta' ondaty. ²⁷ Le nitreako hoe t'ie am-bolontorisike mileoloe, hoe afo ty ama'e ao naho miariseho. Boak' amo hoe vania'eo mañambone, naho hirik' amo hoe vania'eo mañambane, le hoe afo t'ie nenteako, vaho niarisehoam-pireandreañañe. . ²⁸ Manahake ty àvañe an-drahoñe an-gobon' andro ty niboaha' ty fireandreañe niariseho aze, ie mañirinkiriñe ty vinta' ty enge' IEHOVÀ. Aa ie nitreako le nibabok' an-tareheko vaho tsinanoko ty fiarañanaña' ty mitsara,

2

¹ nanao amako ty hoe, O ana' ondatio, miongaha am-pandia, le hivolañako. ² Aa ie nisaontsia'e le nimoak' amako ty Tioke nampitroatse ahy an-tomboke naho tsinanoko i nitsara amakoy. ³ Le hoe re tamako, O ana'ondatio, hiraheko mb' amo ana' Israeleo rehe, mb'amo fifokoa mpiola niola amakoo; songa niola amako naho o roae'eo, pake henanekeo. ⁴ Aa le hiraheko rehe mb'amo ana-dahy gan-tarehe naho fatra-poo, le hoe ty ho asa'o ama'e, Hoe ty nave' IEHOVÀ Talè; ⁵ aa ke hijanjiñe iereo, he tsy hañaoñe, amy t'ie anjomba mpiola; fe ho oni'iareo te tañivo'iareo ao ty mpitoky. ⁶ Aa ihe ana' ondatio, ko ihembaña'o, ko irevendreveña'o o saontsi'eo fa mpiola iereo, aa ndra te mpiama'o ty fatike naho hisatse, naho kalengo ty imoneña'o, ko hembaña'o o saontsi'eo, vaho ko miriatsdry aolo'e eo, fa akiba miola iereo. ⁷ Le ho taroñe'o am' iereo o volakoo, ke hijanjiñe he tsy hañaoñe, amy t'ie mpiola.

⁸ Aa ihe ka, ana' ondatio, tsendreño ty ho volañeko; ko miola rehe manahake ty fiolà' i anjomba mpiolay; sokafo ty falie'o, vaho kamao o azotsokoo. ⁹ Aa le nenteako te ingo ty fitañe nahitrik' amako, naho tama'e ao ty boke peleke; ¹⁰ navela'e amako, ie sinokitse añ'ate'e naho alafe'e*, naho nisokireñ' ama'e ao ty fandalañe naho ty fhontohañe, vaho ty hankàñe.

3

¹ Le hoe re tamako, O ana' ondatio, kamao o zoe'oo, kamao ty boke peleke toy, vaho akia misaontsia aña'anjomba Israele. ² Aa le sinokako ty vavako vaho nafantso'e ahy i pelekey. ³ Le hoe re amako, O ana' ondatio, ampihinano ty sarotro'o, vaho atsafo an-tsarotro'o ao ty peleke atoloko azo toy. Aa le nihaneko; vaho nimamy hoe tantele am-bavako ao*.

⁴ Le hoe re amako, O ana' ondatio, akia mimoaha aña'anjomba' Israele ao vaho isaontsio o fivolakoo. ⁵ Tsy nahitrike am' ondaty laledrehake ndra saro-pisaontsio rehe, fa mb'amy anjomba' Israele; ⁶ tsy amo kilakila' ondaty aman-dañonañe miheotseo, ndra amam-pivola-aliheñe tsy haharendreha'o ty saontsi'e. Aa naho nampihitrifeko amy zay, toe ho nañaoñe azo iereo. ⁷ Fe tsy te hijanjiñ' azo i anjomba' Israele; amy t'ie tsy te hijanjiñ' ahy; songa mamporohotse naho gan-troke ty anjomba' Israele. ⁸ Ingo te nampionsoñontsoñeko ty lahara'o hatreatrè'o ty lahara' iareo, naho nanoeko gañe ty fatram-bei'o hiatreatrea'e ty panda' iareo. ⁹ Mira

* ^{2:10} Apo 5:1 * ^{3:3} Sab 19:10, 119:103, Apo 10: 9-10

ami'ty hamafen-tsafira[†] te amo vato-pilakeo ty nanoeko ty fatram-bei'o; ko lonjetse amo fangarefa' iareoo, ndra t'ie akiba-piola. ¹⁰ Nitovoña'e ty hoe, Rambeso añ'arofo'o ao naho janjiño an-dravembia'o ze hene tsara ho taroñeko; ¹¹ akia mimoaha añivo' o mpirohio naho saontsio vaho talilio, Hoe ty nafè' IEHOVÀ Talè—ke hijanjiñe iereo, he tsy hañaoñe.

¹² Aa le rinambe' i Tiokey mañambone raho vaho tsinanoko ambohoko ao ty feon-tsortombahañe: Rengène ty enge' IEHOVÀ an-toe'e eo; ¹³ naho ty feom-pifañoza' o ela' i raha veloñe reio naho ty feo' o larò rekets' am' iareoo, vaho ty fipoñafan-kotroke ra'elahy. ¹⁴ Le nongahe' i Tiokey naho nasese'e mb'eo, vaho nandeha amañ-embetse, aman-troke mitsovovoke; fa naozatse tamako ty fità' IEHOVÀ. ¹⁵ Le nivotrak' amo mpirohy mpimoneñe e Telavive[‡]ao raho, añ'olo i saka Kebarey eo, naho nitoboke am-piambesara' iareo, vaho nidok' eo an-kalonjeran-troke fito andro.

¹⁶ Aa naho nimodo ty fito andro, le niheo amako ty tsara' IEHOVÀ nanao ty hoe: ¹⁷ O ana'ondatio, fa tinendreko ho mpijilojilo amy anjomba' Israeley, aa ie mijanjin-tsara boak' am-bavako ao, le hatahatao ty amako iereo.

¹⁸ Aa naho anoeko ty hoe ty lo-tsereke[§]: Toe hihomake rehe, f'ie tsy hatahatae' o tsy talilie'o, tsy amantopantohe'o i tsereheñey hienga o sata'e ratio, handrombak' aiñe, aa le hikenkañe amo hakeo'eo indaty lo-tserekey, fe ho paiako am-pitá'o ty lio'e. ¹⁹ Aa naho hatahatae' o ka i lo-tserekey, naho tsy ambolitio'e i sata'e ratiy ndra itsilea'e i fañaveloa'e ratiy, le hikenkañe amo tahi'eo re, fe naharombak' ain-drehe. ²⁰ Ie ka, naho mifotetse amy hamarentane'ey t' indaty vantañe vaho mandilatse, naho ampiopheko fampitsikapiañe aolo'e eo, le hikenkan-dre; aa kanao tsy hinatahata'o, le hikenkañe amo hakeo'eo ie tsy ho tiahya ka o sata soa nanoe'eo, fa ho paiako am-pitá'o ty lio'e. ²¹ Aa naho hatahatae' o ka i vañoñey tsy handilatse vaho tsy manao tahin-dre, le toe ho velon-dre, amy te nihaoñe'e i nahatahata'oy; vaho naharombak' ain-drehe.

²² Tamako ty fità' IEHOVÀ; le hoe re tamako, Akia mb'amy montoñey aña vaho ho volañeko. ²³ Aa le nióngake raho nimb' amy montoñey mb'eo; ingo nijohañe eo ty enge' IEHOVÀ, hambañe amy enge nirendreko añ'olon-tsaka Kebare añey; vaho nibabok' an-daharako. ²⁴ Le nizilik' amako i Arofoy, naho natroa'e an-tomboko eo; vaho nitsara amako, nanao ty hoe, Akia, misikadàña an-kivoho'o ao, ²⁵ le ihe ana'ondaty, oniño te hapok' ama'o ty taly vaho hamahotse azo iereo tsy mone hiavotse mb' am'ondatio; ²⁶ le hampipiteheko an-dañilañi'o eo ty famele'o, le ho moan-drehe tsy hahaendake ondatio; amy te anjomba miola iereo. ²⁷ Fe naho hivolañe ama'o raho le ho sokafekeo ty falie'o vaho hanoa'o ty hoe: Hoe t'IEHOVÀ Talè; aa ze mete hijanjiñe, angao hijanjiñe; le ze mifoneñe tsy hijanjiñe, apoho hifoneñe; amy t'ie anjomba miola.

4

¹ Ihe ka, ana' ondatio, angalao birike vaho apoho aolo'o eo vaho sokiro ama'e ty sarens-drova, toe Ierosalaime; ² le ampiarikoboño mpialy, andranjio kijolim-pikalañe, vaho amotrio tamboho hahàlañe aze; itseneo tobe hiatrek' aze, vaho bodem-pidosy añariariañe. ³ Angalao endraendra ka le ajadoño ho kijoly viñe añivo'o naho i rovay eo; atoliho ama'e ty

[†] 3:9 toe diamondra [‡] 3:15 Telavive: tamboho kobokara; ndra amam-boa manta ndra voto-tsako

[§] 3:18 Iek 18:20-32, 33:8-20

lahara'o ho fañarikatohañe, le ihe ty hanarokohok' aze ho viloñe amy anjomba' Israeley.

⁴ Ie amy zao, mihoriràña ankavia, hibabe o hakeo' i anjomba' Israeleio; mira amo andro andrea'o ama'eo, ty hibabea'o o tahi'eo. ⁵ Fa tinendreko ho mira amo taom-pandilara' iareoo ty ia' ty andro ama'o; aa le telon-jato-tsi-sivam-polo andro ty hivavea'o ty hakeo' i anjomba' Israeley. ⁶ Ie nihenefa'o zay vaho hihoriraña'o ankavana hivavea'o o tahi' i anjomba' Iehodàio; efa polo andro; andro raik' ami'ty taoñe raike, ty tinendreko ho azo. ⁷ Hampitolihe'o mb'amy fanameañe Ierosalaimey ty lahar'a'o, tsy ho aman-tsaroñe ty sira'o, vaho hitokia'o. ⁸ Ingo fa hapetako ama'o ty rohy, tsy hivariña'o mb' ami'ty ila'e, ampara' te nihenefa'o ty androm-pañarikatoha'o. ⁹ Mindesa vare-bolè, vare hordea, mahalay, ampemba, le kosemete* naho ajoño am-balàñe, vaho anokono mofo; fa mira amo andro ihoriraña'o añila'oo, i telon-jato-tsy-sivam-polo rey, ty hikamà'o. ¹⁰ Ty mahakama ho kamae'o le ho aman-danja, roapol sekelet† ami' ty andro raike; hikama'o erike. ¹¹ Rano ka ty ho kamae'o ami'ty fañarana'e, ty am-paha-ene' ty hine‡, hikama'o erike. ¹² Aa le ho kamae'o hoe mofom-bare-hordea, vaho hatoko'o am-piamonto' ondaty añatrefa' iereo eo. ¹³ Le hoe t'IEHOVÀ, Hanahake zay ka ty hikama' o ana' Israeleo aman-deotse ty mofo iareo, amo kilakila' ndaty handroahako iareoo.

¹⁴ Le hoe raho, Ehe ry IEHOVÀ Talè! Toe mbe tsy nileoreñe ty fiaiko; fa boak' ami'ty naха' ajaja ahy am-para' te henane, mboe tsy nihinanako o raha nimate avao, ndra o nirimitem-bibio; mbore tsy nimoak' am-bavako ao ty hena faly. ¹⁵ Aa le hoe re amako, Ingo, arè, fa tinoloko taik'ombe hasolo ty fiamonto' ondaty, le atokono ama'e ty mofo'o. ¹⁶ Natovo'e ty hoe: O ana'ondatio, toe ho pozaheko ty boda-mofo e Ierosalaime ao, le ho kamae' iareo ty mofo an-danja am-pivazobazotse; naho ho kamae' iareo an-kapoake ty rano, an-kalonjerañe; ¹⁷ amy t'ie tsy ho ene-mofo naho rano, naho hifampitalahatse aman-tofotse vaho hinike ty amo hakeo'iareoo.

5

¹ Ihe ka, ry ana' ondatio, mandrambesa fibara masioñe, le antsatans-drezom-piharatse ty ampañoza'o aze ami'ty añambone'o naho antanteahe'o; angalao balantsy handanjañe aze, vaho zarao i maroiy. ² Ty faha-telo'e ty horoa'o amañ' afo añivo' i rovay amy androm-pigadoña' i fanameañeiy; rambeso ty faha-telo'e ka le tseratseraho mb'eo mb'eo amy fibaray; le ty faha-telo'e ty hampiboelea'o amy tiokey, fa hitarihako mesolava hañoridañe iareo. ³ Angalao tsy ampeampe ama'e ka le feheo andifintsiki'o ao. ⁴ Angalao indraike, vaho afetsaho amy afoy ao, ho forototoe' i afoy; fa boak' ao ty afo hamorototo ze fonga anjomba' Israele. ⁵ Hoe t'i Talè IEHOVÀ: Itoy t'Ierosalaime! fa navotrako anteñateña' o kilakila ondatio ao, naho fifeheañe maro ty mañohok' aze. ⁶ F'ie niola amo hene fepèkoo ami'ty nanoa'e halò-tsereke mandikoatse o kilakila'ndaty mañohok' azeo; fa tsy nañaoñ' o fepèkoo naho o fañèkoo iereo vaho tsy nañaveloa' iareo. ⁷ Aa le hoe t'IEHOVÀ Talè: Amy te nilosore'o fidabadoàñe o fifeheañe mañohok' azoo, amy t'ie tsy nañavelo amo fepèkoo naho tsy nitambozotse o fañèkoo, mbore tsy nañoriike o fañèm-pifelehañe miarikatok' azoo; ⁸ le hoe t'IEHOVÀ Talè: Oniño te Zaho, toe Zaho, ty miatreatre azo, naho hametsake zaka añivo'o ao añatrefa' o kilakila'ndatio. ⁹ Le hanoeko ama'o

* ^{4:9} Kosemete: karaza' ty vare-bolè abo † ^{4:10} Sekele: kapoake raike naho vaki'e {vare}

‡ ^{4:11} Hine: 4 litatse: 1/6 hine = 2/3 litatse

ao ty mbemboe tsy nanoeko, vaho tsy hindraiko hanoeñe ka, ty amo halotsere' areo iabio. ¹⁰ Aa le ho hane' o rae'eo añivo'o ao o ana'eo naho ho hane' o ana-dahi'eo o roae'eo; fa hametsahako zaka, vaho haboeleko amo tiokeo ze sehang'a areo. ¹¹ Aa kanao velon-dRaho, hoe t'IEHOVÀ Talè: amy te nileore'o amo raha'o mampangorio i toeko miavakey, le hisitahako ka; le tsy hanisà' ty masoko, mbore tsy ho ferenaiñako. ¹² Ty fahatelo'o ro havetra' ty angorosy naho habotse' ty hasalikoañe añivo'o ao; naho hampikorovohem-pibara añariary azo ty faha-telo'o, naho haboeleko amy ze hene tioke ty fahatelo, vaho ho tariheko fibara ty voho' iareo.

¹³ Zay ty himodoa' ty habosehako naho ty hañenefako am' iereo ty fiforoforoako, vaho hanintsin-dRaho; le ho rendre' iareo te Zaho IEHOVÀ ty nitsara an-joton-troke, ie fa nondrohako am' iereo i fileveleveakoy. ¹⁴ Tovo'e, hanoeko halatsañe naho titse, añivo' o kilakila' ondaty mañohok' azoo, am-pahaoniña' ze mandrioñ' azo iaby. ¹⁵ Aa le ho fañinjeañe naho fandrabiñan-drehe, ho fampandrendrehañe naho halatsañe amo kilakila'ndaty miarikoboñe azoo, ie ondrohako zaka an-kaboseke naho amporoforo vaho añ' endake mikeloke; Inao! te Zaho IEHOVÀ ty nitsara. ¹⁶ Ie hahitriko am' iereo o ana-palen-kasalikoañe mahafate mampandrotsakeo, ze hiraheko handrotsake, le hindraeko ama' areo ty hasalikoañe, naho ho pozahoko ty boko-mofo' areo, ¹⁷ naho hampisangitrifako ty mosare naho ty biby hako; le ho rangae' ty angorosy naho ty lio hampandala azo, vaho hendeseko ama'o ty fibara. Zaho, IEHOVÀ ty nitsara.

6

¹ Le niheo amako ty tsara' IEHOVÀ nanao ty hoe: ² O ana' ondatio, ampitoliho amo vohi' Israeleo ty tarehe'o naho itokio, ³ ami'ty hoe: Ry vohi' Israeleo, tsanoño ty tsara' IEHOVÀ Talè: Hoe t'IEHOVÀ Talè amo vohitseo naho o haboañe, o torahañe naho o vava-taneo; Inao! Zaho, toe Zaho, ty hinday fibara ama' areo vaho harotsako o toets'abo areoo.

⁴ Hangoakoake o kitreli' areoo, naho ho foy o fañemboha' areoo, vaho havokovokoko ambane eo o zinamañeño añatrefa' o sampsampo' areoo.

⁵ Le ho rohoteko aolo' o sampsampo'eo ty lolo' o ana' Israeleo; vaho hampivarakaiheko añ'ariari' o kitreli' areoo o taola' areoo. ⁶ Ho fonga koromaheñe o rova an-toe-pimoneña' areoo, naho songa ho koaheñe o haboañe; soa te ho voravoraeñe naho farieñe o kitreli' areoo, naho ho hene pozahéne o sampsampo' areoo le hijihetse, naho sindre ho firaëñe ze fañemboha' areo vaho ho faopaoheñe iaby o fitoloña' areoo.

⁷ Hikorovok' am-po'o ao o binaibaio, haharendreha' areo te Zaho IEHOVÀ.

⁸ Fe hampipohako ty sehang'a'e, soa te hadoñe ho anahareo ze nahapoliotse amy fibaray amo fifeheañe, *, ie avarakaheñe amo taneo. ⁹ Le hahatiah y ahoy o nahafipoliotse mb'amo kilakila' ndatooo, amy naneseañe iereo mb' am-pandrophizañe añey, amy te nahafikoretse ahoy ty hakarapiloan' arofo' iareo, ie nieng' ahoy, naho ty fihaino' iareo mañarapilo mb'amo sampsampo; le nampalaim-bintañe ahoy am' iereo ze haratiañe nanoeñe amo halòtsere' iareo iabio. ¹⁰ Le ho fohi' iareo te Zaho IEHOVÀ; te tsy ami'ty tsy vente'e ty nivolañako te hanoeko o hankàñe zao.

¹¹ Aa hoe ty nafè' IEHOVÀ Talè: Mamofoha fitañe, mandialia am-pandia'o, le ano ty hoe: Hoy abey! o halò-tsere' i anjomba' Israeleo, ie hampikorovohe' ty fibara naho ty hasalikoañe vaho ty angorosy.

¹² Hampivetrahe' ty angorosy o lavitseo naho ho koromahem-pibara o marineo; le hampihomahe' ty mosare o honka'e arikoboñeñe; zay ty

* **6:8** Sor 26:38-40

hampanintsiñe ty fiforoforoako. ¹³ Le ho fohi' areo te Zaho IEHOVÀ, ie mifitafita am-poto' o sampsosampo'eo ondati' iareo zinamañeo, ambone' ze hene tamboho eo, an-dengo' ze vohitse iaby, naho ambane' ze hatae mandrevake vaho ambane' ze kile mangonkòñe—o toetse nibanabanae' iareo emboke marifondrifoñe amo sampsosampo'eo. ¹⁴ Le hatorakitsiko am'iereo ty sirako, hanoeko hoake i taney, mandikoatse i fatram-bey mb'e Diblày añey[†], amy ze hene fitobea" iareo; vaho ho fohi' iareo te Zaho IEHOVÀ.

7

¹ Niheo amako indraike ty tsara' IEHOVÀ nanao ty hoe: ² Inao koahe, ana' ondatio, hoe t'IEHOVÀ Talè, amy tane' Israeley: Ty figadoñañe! fa tondrok' an-kotso' efats' i taney i fanamperañey. ³ Toe tondroke ama'o ty figadoñañe, le hahitriko ama'o ty habosehako vaho hondrohako ama'o ze hene sata'o. ⁴ Tsy hihevea' o masokoo naho tsy hitretrezako; fa havahako ama'o o sata'oo ie ho añivo'o eo o hativa'oo; le ho fohi' areo te Zaho IEHOVÀ.

⁵ Hoe t'IEHOVÀ Talè, Hekoheko! toe fa tondroke ty hankàñe. ⁶ Toe avy ty figadoñañe, pok'eo ty fanamperañey; ihe ty nitsekafa'e, inao t'ie tendreke. ⁷ Mihitrik' azo ty maraindraïñe, ry mpimoneñe amy taney; tondroke ty famantañañe, mitotoke ty andro, i andron-kankàñey fa tsy ho fifanointoin-kafaleañañe amo vohitseo. ⁸ Fa ho kofohoko ama'o aniany ty fiforoforoako naho ho riteko ama'o ty habosehako; ho zakaeko amo sata'oo vaho haoboko ama'o ze fonga hativà'o. ⁹ Tsy hiheve o masokoo naho tsy hiferenaiñako; hondrohako o sata'oo ie añivo'o ao o hativà'o; vaho ho fohi'areo te Zaho IEHOVÀ ty mandafa.

¹⁰ Hehe ty andro, ingo fa totsake; tsatoke ty toly; mamoñe ty boda, mibotiboty ty firengevohañe. ¹¹ Fa nitroatse ho kobain-karatiañe ty hasiahañe; tsy ho sisaeñe, tsy eo i maroy, ndra vara, ndra hanaña ndra inoñ' aman' engeñe. ¹² Fa tsatoke ty sa, an-titotse ty andro; ko apo'o hirebeke ty mpikalo, ndra hirovetse ty mpandetake; fa fonga hidonén-kaviñerañe i valobohò'ey. ¹³ Tsy himpoly amy naleta'ey ty mandetake ndra te sambe veloñe; fa ho a' i màroy i aroñaroñey, vaho tsy himpoly; tsy hampifatrarem-bata'e ty halò-tserem-piai'ey.

¹⁴ Fa napopò'iareo i antsivay, fonga veka'e, fe leo raike tsy mionjo mb'an-kotakotak' aña, fa amy valobohò'ey iaby ty habosehako. ¹⁵ Alafe'e ao ty fibara, am-po'e ao ty angorosy naho ty mosare; hampivetrahe' ty fibara i ankivokey vaho habotse' ty hasalikoñañe naho ty kiria ty an-drova ao. ¹⁶ Ze mivoratsak' ama'e ty hipetake amo vohitseo hoe dehom-bavatane, fonga hangoihoy amo hamengoha'eo. ¹⁷ Sindre mavozo o fitañeо, songa maleme hoe rano o ongotseo. ¹⁸ Hisikin-gony, naho hisarom-pititititihañe; amo lahabarañe iabio ty hasalarañe, vaho amy ze hene añambone ty hakovohañe. ¹⁹ Haretsha' iareo an-damoke eo o volafoti'eo naho hoe raha maleotse o volamena'eo; tsy maharombake amy andron-kaviñera' IEHOVÀ ty volafoty naho volamena' iareo; tsy mahaeneñe ty fiai' iareo irezay, tsy mahaatsake o sarotro'eo, fa nampitsikopian-kakeo. ²⁰ Kanao nafote' iere o ho firengevohañe ty enge' i harea'ey vaho nanoe' iere sare' o hativa' iareoo naho o raha mampangoriñeo; f'ie nanoeko tiva am' iere, ²¹ naho hatoloko ho tsindroke am-pitàn' ambahiny naho amo tsivoatsolo' ty tane toy ho fikopahañe; naho ho tivae' iere ²² vaho hiombohoeko ty tareheko, le ho tivà' iareo i toeko miavakey, ie hifoaha' ty malaso haniva aze.

[†] 6:14 Diblày: mofo vong'a'e

²³ Aa le amboaro silisily, amy te tsitsike hakeo naho lifo-dio i taney vaho atse-doa-tiñake i rovay. ²⁴ Ie amy zao, hindeseko mb' etoa ty lombolombon-kabibim-pifeheña'e ty anjomba' iareo; naho hajihoko ty fibohaboha' o maozatseo; vaho ho leoreñe o toe' iareo miavakeo. ²⁵ Pok'eo ty hankàñe; hipay fanintsiñañe iereo, fa tsy ho eo. ²⁶ Hekoheko hatovon-kankàñe, naho talily vaho taroñe; ie hipay aroñaroñe ami'ty mpitoky, fa nilesa amo mpisoroñoeo ty Hàke vaho amo androanavio ty vere. ²⁷ Ampangololo i mpanjakay, ampisikino halonjerañe i ana-donakey naho ampinevenevereñe ty fità'ondati' i taneio; hanoeko hambañe amo sata'eo, naho ho zakaeko mira ami'ty fañeva'e; vaho ho fohi' iareo te Zaho IEHOVÀ.

8

¹ Ie tamy andro faha-lime' i volam-pahaene' i taom-pahaeneñey, zaho nitobok' an-kibohoko ao, naho niambesatse aoloko eo o roandria' Iehodào, te niheo amako ty fità' IEHOVÀ Talè. ² Aa le naheoko ty manahake vinta' ondaty, naho hoe afo ty ambane' o toha'eo, vaho hoe fireandream-torisike vinañe ty ambone' o toha'eo. ³ Nahiti'e amako ty nanahake fitàñe naho rinambe'e raho ami'ty orim-bòloko; naho naonjo' i Tiokey añivo' ty tane toy naho i likerañey vaho nendese'e añ' aroñaron' Añahare mb'e Ierosalaime mb'amy fimoahañe an-kiririsa añate'e miatrek' avaratsey mb'eo, amy fitoboha' i sarem-pamarahiañe manigike farahieñey, ⁴ le ingo te tao ty engen' Añahare' Israele, manahake i aroñaroñe nitreako a montoñe añey.

⁵ Le hoe re tamako, O ana' ondatio, ampiandrao mañavaratse o fihaino'oo. Aa le niandra nañavaratse raho, le inge, avara' i fimoaham-ban-kitreliy, an-tsarirañe eo i sarem-pamarahiañey. ⁶ Le hoe re tamako, O ana' ondatio, isa'o hao o anoe' iereoo? o hativañe jabajaba anoe' i anjomba' Israele atoa handroahañ' ahy lavitse i toeko miavakeio? F'ie hahaisake hativañe lombolombo izay.

⁷ Aa le nendese'e mb'an-dala' i kiririsay; ie nenteako, le ingo ty hirike amy rindriñey. ⁸ Le hoe re amako, O ana' ondatio, halio o rindriñeo; aa ie nihalieko i rindriñey, hehe ty lalañe. ⁹ Le hoe re amako, Miheova, hahaisake ty haleoran-kativañe* anoe' iareo am-po'e ao. ¹⁰ Aa le nimoahako vaho nahatrea, te ingo nanitsike i rindriñey ty sare-sokitse ze karazan-draha milaly naho biby mampangoriñe naho ze fonga sampaosampo' i anjomba' Israeley, ¹¹ le nijohaña añatrefa' irezay eo ty androanavy fitompolo' i anjomba' Israeley, naho añivo' iereeo eo ty nijohaña' Iaazanià ana' i Safane, songa fitàñe amam-pañembohañe vaho nionjoñe mañambone ty rahon-katoen-emboke nilodolodo. ¹² Le hoe re tamako, O ana'ondatio, isa'o hao o anoe' o androanavin' anjomba' Israeleo añ'ieñeo, songa ondaty an-dakaton-tsare ao? fa hoe iereo, Tsy mahavazoho an-tika t'IEHOVÀ; fa naforintse' IEHOVÀ ty tane toy. ¹³ Natovo'e ty hoe amako: Mitoliha indraike, hahaoniñe t'ie manao hativañe mandako zay.

¹⁴ Nente'e amy zao raho mb' amy fimoahañe an-tsariran' anjomba' IEHOVÀ mitolik' avaratsey mb'eo, le hehe ty rakemba maro miambesatse eo mirovetse amy Tamoze†. ¹⁵ Le hoe re amako, O ana' ondatio, oni'o hao zao? aa le mitoliha indraike hahaoniñe mandikoatse zay.

* **8:9** Iek 6:4, Its 4:19, 17:3, Mp II 23:4-11, Fi II 14:5, Iob 31:29, Iir 19:13, 44:17, Fip 7:42 † **8:14**
Tamoze: 'ndrahare o nte-felistio; mietake; forototo

¹⁶ Aa le nendese'e mb'an-kiririsa añate' i anjomba' IEHOVÀy, le hehe ty lahilahy roapolo-lim' amby varañe am-pimoahañe an-kivoho' IEHOVÀ eo, añivo' ty lapalapa naho ty kitrely, miambaho i kivoho' IEHOVÀ, mitolik' atiñanañe ty lahara' iareo, mijoro amy masoàndroy. ¹⁷ Le hoe re amako, Mahaoniñe v'iheo, ana' ondatio? Raha maivañe amy anjomba' Iehodày hao ty anoe' iereo o hativañe anoe' iereo atoañaeo? te tsitsife' iereo fikatramoañe ty tane mbore mibalike hanigìke ty habosehako, ie mitohotseva añ'oro'e eo. ¹⁸ Aa le Zaho ka ty hanolotse leveleve; le tsy hiheve ty masoko, vaho tsy hiferenaiñako, le ndra t'ie mipoña-toreo an-tsofiko ao, tsy hanoin-dRaho.

9

¹ Aa le napaza'e am-piarañanañañe an-tsofiko ao ty hoe, Ampombao mb'etoy o mpifehe' ty rova toio, songa minday fialiañe mpijoy am-pità'e. ² Le ingo te nimb' etoy ty lahilahy eneñe boak' amy lalambey ambone mitolike mañavaratsey, songa indaty ninday fialiam-panjamanañe am-pità'e, ty raike nisikin-damba leny reketsé tsifan-drano-mainte añ'ila'e eo; aa le nimoak' ao iereo nijohañe marine' i kitrely torisikey eo. ³ Le nionjoñe boak' an-toe'e ambone' o kerobeo ty engen' Añahare' Israele naho nivotrak' an-tsarirañe eo vaho kinoi'e indaty misaroñe lamba-leny minday tsifan-drano-mainte añ' ila'eoy; ⁴ le hoe t'IEHOVÀ tama'e, Akia rangao i rovay, maneñateñà Ierosalaime, vaho tomboho alama ze ondaty miselekaiñe naho mitoreo ty amo hativañe anoeñe añivo'eo. ⁵ Le hoe re amo ila'eo, am-pitsanoñako, Akia oriho re miranga amy rovay naho lafao; ko imetea'o hiheveam-pihaino, vaho ko mitretre. ⁶ Zamano ty bey naho o ajalahio naho o somondrarao, o ajajao vaho o rakembao, fe ko harineañe ze tinombok' alama; mifotora an-toeko miavak' eo. Aa le nafoto' iareo am'ondatio, amo androanavy aolo' i kivohoio. ⁷ Le hoe re am' iereo, Leoro i anjombay vaho atsafo an-dolo' o zinamañeо i kiririsay; mionjona! Aa le nimb'eo iereo nampibaibay amy rovay ao. ⁸ Ie amy zao, naho fa zinama' iareo ondatio, zaho avao ty eo, le nihotrak' an-tareheko raho nipazake ty hoe, Hoke! ry IEHOVÀ Talè! ho fonga rotsahe'o hao ty sehanga' Israele ami'ty fampidoaña'o am' Ierosalaime o haviñera'oo?

⁹ Aa hoe re amako, Losotse o hakeo' anjomba' Israele naho Iehodào, naho pitsa-dio i taney vaho lipo-keloke i rovay, ie nanoe' iereo ty hoe, Naforintse' IEHOVÀ ty tane toy, vaho tsy mahavazoho t'IEHOVÀ. ¹⁰ Aa naho zaho, tsy hiheve ty masoko, tsy hitretre, fa hondrohako am'iereo o sata' iareoo.

¹¹ Hehek' amy zao indaty misaroñe lamba-leny reketsé tsifan-drano-mainte añ'ila'eoy, namolily ty hoe, Nanoeko i namantoha'o ahiy.

10

¹ Nañente raho, le ingo, amy lañelañe ambone' ty añambone' o kerobeoy te niboak' ambone' iareo ey ty raha hoe safira, nibentatse ho fiambesatse. ² Le hoe re amy misikin-damba leniy: Akia, añivo' o larò mininike ambane' o kerobeo naho atsafo vaen' afo boak' añivo' o kerobeo ty fità'o roe vaho aparatsaho ambone' i rovay.

Aa le nimb'ao re, ampahatreavako. ³ Nijohañe ankavana' i kivohoy o kerobeo amy nimoaha' indatiy, naho nahatsake i kiririsa añate'ey i rahoñey; ⁴ le nionjoñe boak' amo kerobeo ty enge' IEHOVÀ nijohañe an-tsarira' i lalañey, naho nilifore' i rahoñey i kivohoy, vaho nañatseke i kiririsay ty fireandrea' ty enge' IEHOVÀ. ⁵ Le jinanjiñe an-kiririsa

alafe'e ao ty fangotrohan' ela' o kerobeo manahake ty fiarañanañan' Andriampañontroñe, t'ie mitsara. ⁶ Aa ie namantoke am'indaty misikindeniy ami'ty hoe: Andrambeso afo boak' añivo' o larò mininike añivo' o kerobeoo, le nimoak' ao re nijohañe añivo' o larò mininikeo. ⁷ Ie amy zao, nahiti' ty kerobe ty fità'e boak' añivo' o kerobeo mb' amy afo an-teñateña' o kerobeoy le nandrambesa'e naho natolo'e am-pitá' i nisikin-deniy, rinambe'e vaho niavotse. ⁸ Niloneak' amy zao, amo kerobeo ambane' o ela'eo ty manahake te fità' ondaty.

⁹ Aa ie nañente raho, hehe ty larò efatse marine o kerobeo, songa larò raike i kerobe rey, le hoe vaton-Tarsise ty volo' i larò rey. ¹⁰ Le ty vinta' iareo, hambañe i efatse rey, manahake te añate' ty larò ty larò. ¹¹ Ie nandeha le nionjomb'amy ze joro-tane tea'e, tsy nivio t'ie nandeha, fa amy ze nitoliha' ty loha'e ty norihe' iereo le tsy niviombio am-pandenañe. ¹² Tsitsike fihaino ty sandri' iareo, o pa'eo, o fità'eo, o ela'eo, naho o larò'eo, vaho añariari' i larò efatse rey. ¹³ Tsinanoko te nitokaveñe ty hoe Larò-Mpininike i larò rey. ¹⁴ Songa aman-daharañe efatse: laharan-kerobe ty valoha'e; lahara' ondaty ty faharoe; tarehen-diona ty fahatelo; vaho tarehem-bantio ty fahefatse.

¹⁵ Niongake i kerobe rey. Ie i raha veloñe nitreako añ'olo' i saka Kebarey rey. ¹⁶ Aa naho mañavelo i kerobe rey le mindre lia ama'e i larò rey; aa ie onjone' i kerobe rey o ela'eo hiavotse i taney mb' añ' abo ey, le tsy mivike tsy ho rekets' ama'e i larò rey. ¹⁷ Ie mitsangañe, le mijohañe ka iretoañe; ie mionjoñe, le mañambone ka iretoa; fa am' iareo ao ty arofo' o raha veloñe.

¹⁸ Nienga i sariran-kivohoy amy zao ty enge' IEHOVÀ nijohañe ambone' i kerobe rey. ¹⁹ Nonjone' i kerobe rey o ela'eo henane zay le nienga i taney am-pahatreavako eo; ie niavotse le niaoloa' i laro rey, naho nijohañe am-pimoaha' i lalambeiy atiñana' i anjomba' IEHOVÀ eoy; vaho ambone' iereo eo ty engen' Añahare' Israele.

²⁰ Ie i raha veloñe nitreako ambanen' Andrianañahare' Israele añ' olon-tsaka Kebarey; le napotako t'ie kerobe. ²¹ Songa aman-daharañe efatse naho elats' efatse; vaho hoe fità' ondaty ty ambane' ela'eo. ²² Le nihambañe amo laharañe nitreako añ' olo-tsaka-Kebareo ty vintan-dahara' iareo, ty vinta' iareo naho ty fañova' iareo, songa nionjoñe mahity mb'am-piatrefa'e.

11

¹ Nonjone' i Tiokey raho vaho nente'e niakatse mb' an-dalambey atiñana' i anjomba' IEHOVÀ miatreke maniñanañe; le ingo am-pimoahañe i lalambeiy t'indaty roapolo-lim' amby; tama'e ao Iaaazanià ana' i Azore* naho i Pelatià† ana' i Benaià‡, roandria' ondatio. ² Le hoe re amako, O ana' ondatio, iretoañe o mpikitro-draha raty naho mpanoro heve-kaloloañe ami'ty rova toio, ³ ie manao ty hoe: Tsy marine antika ze o fandranjiañe anjomba zao; etoañe i valañey, itika ro hena'e. ⁴ Aa le itokio, mitokia ry ana'ondatio.

⁵ Nivotrak'amako amy zao i Arofo' IEHOVÀ nanao ty hoe, Isaontsio ty hoe: Hoe t'IEHOVÀ, Fa nanoa' areo ty hoe ry anjomba' Israele, amy te apotako o raha mizilik' am-pitsakorea' areoo. ⁶ Fa nampitomboe' areo ty zinamañe an-drova atoy, vaho nitsitsife' areo lolo o lalañe. ⁷ Aa le hoe ty nafè' IEHOVÀ Talè; O zinamañe nirohote' areo an-damoko, ie ty

* **11:1** Azore: mpañimba, ndra i olorañey † **11:1** Pelatià: ty fandrombaha' IEHOVÀ ‡ **11:1** Benaia: Ana' IEHOVÀ

nofo'e, le i rovay ty valàñe fe hakareko boak'ao nahareo. ⁸ Irevendreveña' areo i fibaray, aa le ty fibara ty hampombàko mb'ama' areo, hoe t'IEHOVÀ Talè. ⁹ Ie hakareko boak'ao le haseseko am-pitàn-ambahiny naho hampijadoñeko zaka. ¹⁰ Hampikorovohe' ty fibara, ho zakaeko añ' olo' Israele aña, hahafohina' areo te Zaho IEHOVÀ. ¹¹ Tsy ho valàñe' areo ty rova toy, vaho tsy inahareo ty ho nofo'e am-po'e ao, fa tsy mete tsy zakaeko añ' olon-tane' Israele aña, ¹² vaho hapota' areo te Zaho IEHOVÀ; ie tsy nañavelo amo fañèkoo, naho tsy nañorike o zakakoo, fa o fepèm-pifeheañe mañohokeo§ ty orihe' areo.

¹³ Ie nitoky raho le nihomake t'i Pelatià ana' i Benaià. Aa le nitoke an-tareheko, nipazake ty hoe: Hete! ry IEHOVÀ Talè! hagadoñe hao ty sehanga'Israele?

¹⁴ Le niheo amako ty tsara' IEHOVÀ nanao ty hoe, ¹⁵ O ana' ondatio, toe o longo'oo, eka o roahalahi'oo, o lahilahim-pifokoa'oo, vaho ze hene anjomba' Israele, ro nanoa' o mpimone' Ierosalaimo ty hoe, Ihankaño t'IEHOVÀ; fa natolots' anay ty tane toy ho fanaña'ay. ¹⁶ Aa le ano ty hoe: Hoe ty nafè' IEHOVÀ Talè, Ndra te nahifiko tsietoitane aña iereo, añivo' o kilakila ondatio ao, naho naparaitako amo fifeheañe, mbe ho fitsoloha' iareo kede an-tane homba' iereo raho. ¹⁷ Aa le ano ty hoe, Hoe t'IEHOVÀ Talè, hatontoko am'ondatio nahareo, naho havoriko boak' amo fifeheañe nampiparaitsahañe anahareoo, vaho hitolorako ty tane' Israele. ¹⁸ Le homb'eo iereo, fonga hañondroke o haleora'eo naho o hativa'e ama'eo. ¹⁹ Le ho tolorako arofo raike naho haziliko ama' areo ty arofo vao; naho hakareko amo nofo' iareoo ty troke gañe vaho ho tolorako arofo nofotse; ²⁰ hañaveloa' iareo amo fañèkoo naho hambena' iareo o fepèkoo, hañeneke irezay; le h'ondatiko iereo vaho ho Andrianañahare' iareo raho. ²¹ Fe ty amo mpañorike ty fisalalan' arofo'e mpilelalela o haleora'eo naho o hativa'eo, le hondroheko an-doha' iareo ty sata'iareo, hoe t'IEHOVÀ Talè.

²² Ie amy zao, nonjone' i kerobe rey o ela'eo naho o larò mpirekets' ama'eo; vaho ambone' iareo eo ty engen' Andrianañahare' Israele, ²³ le nionjoñe boak' añivo' i rovay ty enge' IEHOVÀ, nijohañe ankaboa' i vohitse atiñana' i rovay eñey. ²⁴ Modo zay le nongahe' i Tiokey raho vaho nendeseñ' añ' aroñaroñe amy Tion' Añaharey mb'an-tane o nte-Kasdio mb'amo mpirohio mb'eo. Aa le niakatse amako nañambone mb'eo i aroñaroñe nitreakoy. ²⁵ Ie amy zay nataliliko amo mpirohio iaby o tsara naboa' IEHOVÀ amakoo.

12

¹ Nimb' amako indraike ty tsara' IEHOVÀ nanao ty hoe: ² O ana'ondatio, mimoneñe añivo' i anjomba miolay n'iheo, amo amam-pihaino tsy mahaisakeo, o aman-dravembia tsy mahajanjiñe, amy t'ie anjomba miola. ³ Ie amy zao ry ana' ondatio, hentseño raha ho vave'o antoandro ampahaisaha' iareo vaho mivevea boak' an-kivoho'o mb'an-kibohotse ila'e mb'eo ampaharendreha' iareo; f'ie tsy hahaoniñe kanao anjomba mpiola. ⁴ Aa le akaro atoandro o kilanka'oo ampahaisaha' iareo, hoe enta-piseseña; le hionjom-beo rehe naho hariva am-pahaisaha' iareo, manahake o misese mb'eo tsy himpolio. ⁵ Mihalia amy rindri'oy am-pahaisaha' iareo, vaho ivaveo t'ie miakatse. ⁶ Le am-pahaisaha' iareo ty itarazo'o mb'eo am-palipalitsieñe; ho kolopofa'o ty lahara'o tsy hahaisake tane, fa nanoeko viloñe amy anjomba' Israele rehе.

⁷ Aa le nanoeko i nandiliañ' ahikoy: nakareko o kilankakoo naho handro, entañe mañeva faneseañe, le ie hariva, hinaliko an-tañako i rindriñey le nakareko amy harivay vaho tinarazoko an-tsoroko am-pahaisaha' iareo.

⁸ Ie maraindray niheo amako ty tsara' IEHOVÀ nanao ty hoe, ⁹ O ana' ondatio, tsy fa nañontane azo hao i anjomba' Israeley, i anjomba miolay, ty hoe: Ino o anoe'oo? ¹⁰ Isaontsio ty hoe, Hoe ty nafè' IEHOVÀ Talè, I hafatsey, le ho amy roandria' Ierosalaimey naho i anjomba' Israele iaby añivo iereo ao. ¹¹ Ano ty hoe, viloñe ama'areo raho, hambañe amy nanoekoy ty hampanoeña iareo. Hiakatse iereo vaho hisese mb'am-pandrohizaña aña. ¹² Ho tarazoe' i roandria añivo' iareoy te maiem-potots-azo ty enta'e antsoro'e eo, vaho hiavotse; ho halie' iareo i kijoliy hañakatse irezay; ho takona'e ty lahara'e tsy ho isam-pihaino'e i taney. ¹³ Fe halafiko ama'e ty haratoko, naho ho tsepaheña amy fandrikoy, vaho haseseko mb'e Bavele mb'eo, mb'an-tane' o nte-Kasdio; fe tsy ho isa'e amy t'ie ho vilasy aña*. ¹⁴ Le songa haboleko mb'amo tiokeo o miarikoboña azeo, o mpañolotse azeo naho ze hene firimoña'e; vaho ho tariheko am' iereo ty fibarako. ¹⁵ Le ho fohi' iareo te Zaho IEHOVÀ, ie aparatsiako añivo' o kilakila' ndatio aña vaho hampivarakaiheko amo taneo. ¹⁶ Fe hanisàko tsy ho amy fibaray naho amy hasalikoañey naho amy angorosiy t'indaty tsiampe; soa ho talilie' iereo amo kilakila' ndaty handenà' iareo aña ty halò-tsere' iareo; le ho fohi' iareo te Zaho IEHOVÀ.

¹⁷ Niheo amako indraike ty tsara' IEHOVÀ nanao ty hoe: ¹⁸ O ana' ondatio, mihondrahondrà te mikama o mahakama'oo, vaho minoma an-titititike naho an-donjetse; ¹⁹ le ano ty hoe am' ondati' i taneio, Hoe ty nafè' IEHOVÀ Talè ty amo mpimone' Ierosalaime naho an-tane' Israeleo. Ho kamae' iareo an-kalonjeraña ty mofo' iareo vaho ho nome' iereo am-pirevendreveñaña ty rano' iareo, amy te ho koaheña amy taney ze hene ama'e ty amy haloloa' o mpimoneña amy'eo. ²⁰ Hampangoakoahenä ka o rova amampimoneña, naho ho ratraratra i taney; vaho ho fohi' areo te Zaho IEHOVÀ.

²¹ Niheo amako ty tsara' IEHOVÀ nanao ty hoe; ²² O ana' ondatio, Ino ze o oha-dreha' areo an-tane Israele ao manao ty hoe, Nihalavaeña o androo, vaho sindre milesa ze atao aroñaroña? ²³ Aa le ano ty hoe: Hoe ty nafè' IEHOVÀ Talè; Hajihoko o razan-drehake zao, vaho tsy ho toñone' iereo an-tane Israele ao ka, fa ano ty hoe: Fa mitotoke ty andro naho ty hañenefaña ze hene aroñaroña. ²⁴ Le tsy eo ka ty aroñaroña vilaña ndra fañandroampikabeak' añ'anjomba' Israele ao. ²⁵ Amy te Zaho IEHOVÀ, Hivolán-dRaho le hifetsake i tsara ho volañekoy; tsy ho tambatse ka, fa amo andro'oo ry anjomba miolao, ie taroñeko ty tsara le hanoeko, hoe t'IEHOVÀ Talè.

²⁶ Niheo amako indraike ty tsara' IEHOVÀ nanao ty hoe: ²⁷ O ana' ondatio, Inao ty asa' i anjomba' Israeley manao ty hoe: Mboe haehae aña i aroñaroña oni'ey, toe amy ze aña zay o andro itokia'eo. ²⁸ Aa le ano ty hoe, Hoe ty nafè' IEHOVÀ Talè; Tsy amo entako henane zao ty ahàñkaña, fa tsy mete tsy henefeña o tsara nanoekoo, hoe t'IEHOVÀ Talè.

13

¹ Niheo amako ty tsara' IEHOVÀ manao ty hoe; ² O ana' ondatio, Mitokia amo mpitoki' Israele mitokio, le ano ty hoe o mitoky boak' an-tro'e ao avaoo, Mijanjiiña ty tsara' IEHOVÀ; ³ Hoe t'IEHOVÀ Talè, Feh'ohatse amo mpitoky dereñe mañoriike ty tro'e avao ie tsy mahatreya raha! ⁴ Ry Israele, Hoe fanalok' an-tanan-taolo eo o mpitoki' areoo. ⁵ Tsy niañambone

* **12:13** Iir 34:6-7, 52:11, Mp II 25:7

mb'amo heba'e ao nahareo; tsy nandranjia' areo ty fahetse hahafitroara' i anjomba' Israeley an-kotakotake amy andro' IEHOVÀ. ⁶ Raha tsy vente'e naho fisikiliañe vilañe ty niisa' iereo, ie manao ty hoe: Hoe t'IEHOVÀ; ie tsy nirahe' IEHOVÀ, fe liñisa' iareo ho venteñe i entañey. ⁷ Tsy aroñarom-bilañe hao ty niisa' areo, tsy fisikilian-dremborake hao ty nijoroa' areo? ie manao ty hoe, Hoe t'IEHOVÀ.—Izaho tsy nivolañe.

⁸ Aa le hoe ty nafe' IEHOVÀ Talè; Kanao nisaontsy hakoahañe nahareo naho nahaisake vande; le atreatreko hoe t'IEHOVÀ Talè. ⁹ Le hatreatre' ty tañako o mpitoky mpandrendre-draha kafoake naho misikily vandeo, tsy ho mpiamo favori' ondatikoo, mbore tsy ho sokirañe amy fanokira' i anjomba' Israeley naho tsy himoaha' iareo ka ty an-tane' Israele, hahafolina' areo te Zaho IEHOVÀ Talè. ¹⁰ Amy te sinigì' iareo ondatikoo ami'ty hoe: Fanintsiñañe; ie tsy eo ty fanintsiñañe; eo ty mandrafits rindriñe naho ipakora'e sokay. ¹¹ Ano ty hoe amo mampipakotse aze antsokaio te hihotrake zay; ho avy ty orañe handopatse, naho ihe ry havandra ro hagnitrike ami'ty hagadaboñe, hampihotrak' aze vaho tio-baratse ty handriatse aze. ¹² Aa ie mideboñe i rindriñey tsy hañontaneñañe ty hoe hao, Aia i fotake napako' areo ama'ey? ¹³ Aa le hoe ty nafè' IEHOVÀ Talè, Toe hampandriateko tio-bey am-pifomboko naho an-kabosehako, añ'oram-pandopatse vaho havandra gadaboñe, hamotsek' aze ampiforoforoako. ¹⁴ Aa le harotsako i kijoly nipakore' areo an-tsokaiy vaho hadeboko antane eo, naho songa hiboake o faha'eo naho hidoiñe; ho mongoreñe añivo'e ao nahareo vaho ho fohi' areo te Zaho IEHOVÀ. ¹⁵ Toe zay ty hañenefako ty habosehako amy kijoliy, naho amo nampipakotse sokay ama'eo, vaho hanoako ty hoe: Tsy eo ka i kijoliy rekets' o nampipakotse azeo, ¹⁶ naho o mpitoki' Israele mitoky am' Ierosalaimeo, ie manao te mahaoniñañe fanintsiñañe ho aze, ie po-panintsiñañe, hoe t'IEHOVÀ Talè.

¹⁷ Ihe ka, ana' ondatio, ampiatrefo mb' amo anak' ampela'ondati'oo ty lahar'o, mb'amo mitoky ty an-tro'e ao avaoo; itokio fatse, ¹⁸ ami'ty hoe, Hoe ty nafè' IEHOVÀ Talè; Hankàñe amo mitrebek' ankalan-kihoke naho fikolopofan-doha ho ami'ty bey naho ty kede iabio hañoroña' iareo fiaiñe! Ho horoñe' areo ka hao ty arofo'ondatikoo hañarova' areo ty tro' areo? ¹⁹ Fa tineratera' areo am'ondatikoo raho hahazoa'o vare mahaatsam-pitâñe tsy ampeampe naho tsila-mofo, hanjamana'o ty havelo' ondaty tsy ho vinonoo, vaho hamahanam-piay tsy ho vinelo, ami'ty fandañira' areo am'ondatiko mitsanom-bandeo.

²⁰ Aa le hoe ty nafè' IEHOVÀ Talè, Inao! hejeko o bandem-pitañe fitsatsa'areo ondaty veloñe hoe t'ie voroñe; ho riateko am-pitâ' areo iereo vaho havotsoko o veloñe, Eka! o haveloñe horoñe' areo hoe voroñe. ²¹ Ho riateko ka o masoara' areoo naho ho hahako am-pitâ' areo ondatikoo, le tsy ho am-pitâ' areo horoñeñe ka, vaho ho fohi' areo te Zaho IEHOVÀ. ²² Aa kanao aman-dañitse ty nahalonjera' areo ty arofo' o vantañe, o tsy nampanahelokoo; naho nihofatrare' areo ty fitâ' o lo-tserekeo tsy hiviha'e amo sata'e ratio, hiveloma'e; ²³ le tsy ho oni' areo ka o aroñarom-bandeo, ndra ty fisikiliañe; fa havotsoko am-pitâ' areo ondatikoo vaho ho fohi' areo te Zaho IEHOVÀ.

14

¹ Aa le nivotrahan' androanavi' Israele raho, niambesatse aoloko eo.
² Le niheo amako ty tsara' IEHOVÀ nanao ty hoe: ³ O ana' ondatio, fa nampionjone' ondaty retiañe ambone' o arofo'eo ty haleora'e naho najado'e aolon-dahara'e eo ty vato fitsikapian-kakeo; aa vaho hañontane

ahy hao iereo? ⁴ Aa le isaontsio ty hoe, Hoe ty nafè' IEHOVÀ Talè, Ze ondati' i anjomba Israele nampitroatse o saposampo'eo an-tro'e ao naho nampijadoñe ty vato-fitsikapian-kakeo'e añ'atrefan-dahara'e eo vaho miheo ami'ty mpitoky mb'eo, le Zaho IEHOVÀ ty hamale i mivotrake eo ty ami'ty hamaro' o 'ndrahare'eo, ⁵ handrambesako añ'arofo'e ao ty anjomba' Israele, amy t'ie songa alik' amako ty amo saposampo'eo.

⁶ Aa le ano ty hoe i anjomba' Israeley, Hoe ty nafè' IEHOVÀ Talè, Misolohoa naho miambhoa amo saposampo' areoo, vaho ampiambohò amo hativà' areoo o lahara' areoo. ⁷ Le ze ondatin' anjomba' Israele ndra renetane mañialo e Israele ao fa nivike tsy mañorike ahy naho nampitroatse o 'ndrahare'eo añ'arofo'e ao, naho nampijadoñe ty vato-fitsikapian-kakeo'e aolon-dahara'e eo, vaho miheo amy mpitokiy hañontane ty amako, le zaho IEHOVÀ ty hamale aze am-batako; ⁸ le hatreatreko am'ondaty zay ty tareheko naho hatroako ho viloñe naho razan-drehake vaho haitoako am' ondatikoo, hahafohina' areo te Zaho IEHOVÀ. ⁹ Aa ie nifañahieñe i mpitokiy naho nisaontsie'e i entañey, le Zaho IEHOVÀ ty namañahy i mpitokiy, naho hatorakitsiko ama'e ty tañako vaho ho rotsaheko am'ondatiko Israeleo. ¹⁰ Ho vavè' iareo o tahi'iareo; le ho mira amy hakeo' i bahimo ama'ey ty tahi' i mpitokiy, ¹¹ soa tsy handifik' amako ka ty anjomba' Israele, naho tsy haniva vatañe amo fiolà'e iabio, f'ie h'ondatiko, vaho ho Andrianañahare' iareo raho, hoe t'IEHOVÀ Talè.

¹² Niheo amako indraike ty tsara' IEHOVÀ, nanao ty hoe: ¹³ O ana' ondatio, ie mandilatse amako i taney ami'ty halòm-piola'e, naho atorakitsiko ama'e ty tañako hamolahako ty boda-mofo'e naho ampihitrifako hasalikoña vaho añitoako ondaty naho hare; ¹⁴ aa ndra te anteñateña'e ao ondaty telo retia: i Nòake, i Daniele, naho Iobe, le ty fiai' iareo avao ty havotsotse ty amy havantaña' iareoy, hoe t'IEHOVÀ Talè. ¹⁵ Aa naho ampirangako bibiromotse i taney hijoy ampara' te mangoakoake vaho tsy irangà' ondaty ty amy bibiy; ¹⁶ le ndra te añivo'e ao indaty telo rey, amy te velon-dRaho hoe t'IEHOVÀ Talè, tsy hahahaha o ana-dahi'eo ndra o anak'ampela'eo iereo; fa ty fiai' i telo rey avao ty ho votsotse, vaho ho rotsaheñe i taney. ¹⁷ Aa naho handesako fibara i taney vaho hanao ty hoe: O fibarao, irangao o taneo, hañitoako ze ondaty naho biby; ¹⁸ le ndra te an-teñateña ao indaty telo rey, amy te Zaho veloñe, hoe t'IEHOVÀ Talè, le tsy hahahaha ndra ana-dahy ndra anak'ampela, fa ty fañova' iareo avao ty ho haha. ¹⁹ Aa naho ampañitrifeko angorosy i taney vaho adoako amy taney ty fiforoforoako an-dio, hañitoako ze ondaty naho biby, ²⁰ ndra te añivo'e ao t'i Noake naho i Daniele vaho Iobe, amy te velon-dRaho, hoe t'IEHOVÀ Talè, le tsy hahavotsotse anadahy ndra anak' ampela iereo fa ty fiai'iareo avao ty ho hahà' ty havañona' iareo.

²¹ Aa le hoe t'IEHOVÀ Talè, Sandrake te ampañitrifeko am' Ierosalaime o zakako efatse mangirifirio: i fibaray, i hasalikoña, i biby romotsey, naho i angorosy, hañitoaña ama'e ze ondaty naho biby. ²² Fa inao! hapoke ao ty sehang'a' o ana-dahy naho anak' ampelao, ze hakareñe ama'e; hehe! t'ie mb' ama' areo mb'eo, le ho isa' areo ty sata naho fitoloña' iareo vaho hohòñeñe ty amy hankàñe nafetsako am' Ierosalaimey, naho ze hene raha nandesako ama'e. ²³ Aa le hohòñe' iereo nahareo naho oni' areo ty sata naho fitoloña'e, le ho fohi' areo te tsy nanoeko tsy amam-poto'e ze he'e nanoeko ama'e, hoe t'IEHOVÀ Talè.

15

¹ Le niheo amako ty tsara' IEHOVÀ nanao ty hoe: ² O ana'ondatio, Ino ty

andikoara' i vahey ty hatae bey? Ino ty singa'e te amo hatae añ'alao? ³ Hangalam-baramba hao handranjian-draha? Handrambesam-pantake hao hampiradoradoam-balàñe? ⁴ Hehe te ahiflik' aña'afó ao ho fandrehetse; tomontoe' ty afó aña'ila'e roe, vaho ho mae ty añaivo'e ao. Mañeva fitoloñañe hao? ⁵ Inao! ie tsy ho nañeva hampitoloñañe te ni-ary, àntsake t'ie mae ro tsy maha-pi-draha kanao finorototo. ⁶ Aa hoe ty nafè' IEHOVÀ Talè: Hambañe ami'ty vahe amo hatae aña'ala ao, ie natoloko aña' afó ho fandrehetse, ty nanolorako amo mpimone' Ierosalaimo. ⁷ Hampiatrefeko am' iereo ty tareheko; ndra te miakatse ami'ty afó iereo mbe ho forototoe' i afoy avao; vaho ho fohi' areo te Zaho IEHOVÀ, ie hatreatreko am' iereo ty tareheko. ⁸ Hampangoakoahoko i taney ty amy nifotera' iareo ahy hoe t'IEHOVÀ Talè.

16

¹ Niheo amako indraike ty tsara' IEHOVÀ nanao ty hoe: ² O ana'ondatio, tohino t'Ierosalaimo ty amo hativà' iareoo, ³ le ano ty hoe, Hoe t'IEHOVÀ Talè am' Ierosalaimo: Boak' an-tane' i nte-Kanàney* ty nihirifa'o naho ty fifokoa'o; nte-Amore† ty rae'o, vaho nte-Kite‡ ty rene'o. ⁴ Le i fisamahañe azoy, amy andro nahatoly azoy, tsy tinampake ty foe'o vaho tsy nisasaëñe an-drano rehe hañalio azo; tsy nozañan-tsira, tsy nifolokoñañe. ⁵ Tsy niferenaiñam-pihaino, tsy nanoañe leo raik' amy rezay; fe nariañe amoka aña ty fiai'o hoe te tsy vara, amy andro nisamahañ'azoy.

⁶ Niary ama'o raho vaho nizoeko te nandeotse azo ty lio'o, le hoe ty asako ama'o, Aa ndra t'ie ami'ty lio'o, miveloma, Eka mbe tamo lio'oo rehe te nataoko ty hoe; miveloma, ⁷ naho nampanaranahaeko ho maro manahake o ahetsé an-kivokeo, le nitombo naho nihaabo, naho nihamineñe ravake fanjaka; nivoatse o nono'oo vaho nihalava o volo'oo; fe nihalo vaho nibongy.

⁸ Niary ama'o raho nisary naho ingo te tondrok' ama'o ty san-katea; aa le narongoko ama'o ty sarimboko naho nisaroñako ty heña'o; le nifanta ama'o vaho nifañina ama'o, hoe t'IEHOVÀ Talè, le ninjare Ahiko rehe; ⁹ sinasako an-drano, eka kinotriko ama'o ty lio'o, vaho nañiliñako menake. ¹⁰ Nisikinako an-tsamat-bahotse, naho nampiombeako holitse, naho nadíako lamba leny marerarera, vaho nasaroko lande. ¹¹ Nampiradoradoako bije, naho niravahako o sira'oo, vaho rava-binanditse am-bozo'o eo. ¹² Nanoako bange aña'oro'o naho kiviro an-tsofi'o eo vaho sabaka homozohozo an-doha'o eo. ¹³ Zay ty nañaminañ' azo am-bolafoty naho volamena; naho nisaroñ' azo an-dený marerarera naho lande naho an-tsamat-bahotse; ie nihinañe bom-bare-bolè soa, reketse tantele naho menake, naho nimontramona vaho nionjon-ko evaem-panjaka. ¹⁴ Niboele amo kilakila' ndatio ty hatsomerentsere'o; amy te niginohe' ty engeko nanoako ama'oy, hoe t'IEHOVÀ Talè.c

¹⁵ Fe niatoa'o ty hasoa-vinta'o, naho nihisa an-karapiloañe ty amy faràmbinta'oy vaho fonga nadoa'o amy ze niary eo ty hatsimirira'o; hene niantofa'o ze nimb'ama'o. ¹⁶ Nihamine'o amo siki'oo ty kitrely tsaratseake naho nanoa'o hakarapiloañe; kanao tsy ho oniñe ty mañirinkiriñe zay, vaho tsy ho trea ka. ¹⁷ Le rinambe'o ka o firavahan-tsomerentsere'oo, i volamena naho volafoty natoloko azoy, nitsene'o sare' ondaty vaho nanoa'o hakalalijahañe, ¹⁸ le rinambe'o o siki'o maro-voloo hanikina'o

* **16:3** Kanàne: mpampibalibalike; mpampireke † **16:3** Amore: mafaitse; mpiola; mpivavatse
‡ **16:3** Kite: ondaty folake; mpañeveñe

aze, vaho nengae'o ama'e i menakoy naho i tsotsekoy; ¹⁹ i mofoko natoloko azoy; i bon-kaneñe soay, naho i menake reketse tantele nafahako azoy le nazots'o ama'e ami'ty harifondrifo'e; zay ty ie, hoe t'IEHOVÀ Talè. ²⁰ Mbore rinambe'o ka o ana-dahi'oo naho o anak' ampela'oo, o sinama'o ho Ahikoo, vaho nisoroña'o habotseke. Ata'o ho raha kede hao o hakarapiloa'oo? ²¹ Zinama'o o anakoo toe nisoroñe'o amo sampsampon-drahao, ie nampirangae'o. ²² Aa amy ze hene hativà'o naho amo fonga hakarapiloa'oo le nandikofa'o o andron-katanora'oo ie nibongy naho nihalo vaho nileore' i lio'oy.

²³ Ie aña iaby i halotsere'oy (hankàñe ama'o, hoe t'IEHOVÀ Talè), ²⁴ le songa niranjie'o tamboho, naho nitsenea'o kitrely o lalañe; ²⁵ nanoe'o am-pifotoran-damoke eo o kitreli'o iabio, naho vineta'o ty hamotsotsora'o, naho vinela'o amy ze fonga niary eo o voro-pe'oo, vaho nampitomboe'o ty hatsimirira'o. ²⁶ Nifandrañaote'o o ana' i Mitsraimeo, o maromaso mpañarine azoo, vaho nampitomboe'o ty hakarapiloa'o hanigike ty habosehako. ²⁷ Inao, arè, natorakitsiko ama'o ty tañako naho naketrako ty fanahanako vaho tinoloko an-tsattrin' tro' o malaiñe azoo, o anak' ampelante Pilisty§ salatse ami' ty hatsimirira'oo. ²⁸ Mbore nanoa'o hakarapiloañe amo ana' i Asoreo* amy t'ihe tsy nieneñe; mbe nanoe'o hatsimirirañe avao fa tsy nietsake. ²⁹ Nampitomboe'o an-tane Kenàne aña naho amo nte-Kasdio ka ty hakarapiloa'o, fe mbe tsy nahaeneñ' azo.

³⁰ Akore ty hamavozoan-tro'o, hoe t'IEHOVÀ Talè, te ihe mitolom-panao irezay, toe satan-karapilo-mena, ³¹ namboare' o akiba'oo an-doha' ze hene lalañe, naho songa nandranjia'o tamboho ankaboa' ze atao tameañe! fe tsy nanahake o tsimirirañe rehe kanao nalaín-tambe. ³² Hoe tañanjomba maromaso mpamonje ambahiny hisolo i vali'ey! ³³ Toe fonga tambezañe o karapiloo, fa ihe ka manambe o miolots' ama'oo, vaho banabanae'o hitotok' azo tok' aia tok'aia ty amo hatsimirira'oo. ³⁴ Aa le mifamotetse amo ampela ila'eo ami'ty hakalalija'o; tsy eo ty manahak' azo, kanao mpanolon-tambe fa tsy toloren-tambe, toe mifamotetse.

³⁵ Ie amy zao ry karapilo, tsanoño ty tsara' IEHOVÀ. ³⁶ Hoe ty nafè' IEHOVÀ Talè: Kanao nadoañe ty haloloa'o naho naboak' amo sakeza'oo o heña'o ty amy hakarapiloa'o naho o sampsampo tiva'oo vaho ty amy lio' o keleia'o nibanabana'oo; ³⁷ ie amy zao, henteo te sindre hatontoko o sipa'o nifalea'oo, eka! ze fonga nitea'o, reketse o niheje'oo; vata'e hatontoko hiatatre azo boak' an-kotso-valo, le haborako o heña'oo, hahatreavañe ze hene fiboridaña'o. ³⁸ Le ho zakaeko: hoe rakemba vinamba naho nampiori-dio ty hizakàñe azo; vaho hafetsako ama'o ty liom-kaviñerañe naho farahy. ³⁹ Le haseseko am-pità' iareo naho ho rotsahe' iareo o toe'o aboo naho ho demohe' iareo o kitreli'oo, le hampikorendahe' iareo ka o siki'oo naho hitavañe ty haraom-bolonahe'o vaho hapo' iereo mibongy naho mihalo rehe. ⁴⁰ Hendese iereo haname azo ka i lahialeñey, hametsabato ama'o vaho hitombok' azo am-pibara. ⁴¹ Ho forototoe' iareo añ' afó o anjomba'oo naho hizaka azo añatrefan-drakemba maro; le hazìko rehe tsy hanao tsimirirañe, tsy hanambe ka. ⁴² Zay ty hampanintsîne ty fifomboko ama'o naho hampienga ty famarahiako ama'o le hitsîne raho vaho tsy ho boseke ka.

⁴³ Amy t'ie nandikoke ty san-katora'o naho nanigìke ty habosehako ty amy rezay; le inao! navahako an-doha'o eo o sata'oo, hoe t'IEHOVÀ Talè; soa tsy fonga hatovo'o amo hativà' o ila'eo o haloloañe zao.

§ 16:27 Pilisty: O mpañialoo

* 16:28 Asore: ondaty fale; mañavelo; mañente

44 Inao, te ze hene mpanoñon-drazan-drehake ro hanao o razan-drehake zao ty ama'o: Hambañe aman-drene'e ty anak' ampela'e. **45** Ihe anak' ampelan-drene'o ty malaim-baly naho amory; ihe ka i rahavaven-droahavave'o nalaim-baly naho o keleia'ey; nte-Kite ty rene'o naho nte-Amore ty rae'o. **46** I Somerone[†] rahavave'o, toe zoke'o, rekets' o anak' ampela'eo ro mimoneñe an-taña'o havia eo; vaho zai'o t'i Sedome[‡] mitobok' an-taña'o havana eo rekets' o anak' ampela'eo. **47** Toe tsy norihe'o ty sata' iareo, naho tsy nanoe'o ty sata rati' iareo, fe hoe raha biliti'e ama'o t'ie nilombolombo' iareo ami'ty haleora' o sata'o iabio. **48** Amy te velon-dRaho, hoe t'IEHOVÀ Talè, mbe lia'e tsy nanoe' i Sedome zai'o naho o anak'ampela'eo o nanoe'o naho o anak'ampela'oo. **49** Inao! zao ty hakeo' i zai'o Sedomey: firengevohañe naho hatemboañe vaho fitobahan-kavotroañe ty ama'e naho o anak'ampela'eo, naho tsy nampahozare'e ty fitàm-pisotry ndra o rarakeo. **50** Nitrotroaboke iereo, nanao hativañe añatrefako eo; aa kanao nataoko te hasoaa, le nakareko aña. **51** Le i Somerone, ndra te tsy nanoe'e ty an-tsasan-kakeo'o; toe nampitomboe'o mandikoatse iereo o haloloa'oo, le hoe nañavantañ' o zoke'oo o fonga hativañe nanoe'oo. **52** Aa ihe nizaka o rahavave'oo, vaveo ty hasalara' o hakeo nanoe'oo, ie nilosore'o ty hativà' iareo; toe vantañe te ama'o iereo; mimeñara vaho vaveo heike o fislara'oo amy te nivantañe'o o rahavave'oo.

53 Aa ie afoteko ty fandrohiza' iareo, ty fandrohiza' i Sedome rekets' o anak'ampela'eo naho ty fandrohiza' i Somerone mitraok' amo anak'ampela'eo, le habalako ka ty fandrohiza' o mapirohi'oo añivo' iareo ao; **54** soa te ho vave'o ty fislara'o, vaho ho meñare'o o fonga sata nanoe'oo, ihe nimpahohò iareo. **55** Ie mitampoly amy toe' iareo valoha'ey t'i Sedome rekets' o anak'ampela'eo, naho mibalike mb'amy fanoe' iareoy ka t'i Somerone miroanak'ampela'e, le himpoly an-toe'o haehae ka rehe naho o anak'ampela'oo. **56** Tsy nati' ty vava'o hao t'i Sedome rahavave'o tamy ihe nimpirengovokey? **57** taolo' te nitendreke ty halò-tsere'o, manahake tañ' andro ninjè' o ana'o Arame[§] miariseho azoo, naho o anak'ampela' o nte-Pelisity mañohoke azoo: o mpañamavo azo nainai'eo. **58** Fa nivavè'o o haloloa'oo naho o hativa'oo hoe t'IEHOVÀ.

59 Aa le hoe ty nafé' IEHOVÀ Talè, Hanoko ama'o hambañe amy nanoe'oy, ie nitsambolitio'o i fantay hivaliha'o amy fañinay. **60** Fa ho tiahiko i nifañinako ama'o tañ' andron-katora'oy vaho hajadoko ama'o ty fañina tsy ho modo. **61** Ho tiahiko' amy zao o sata'oo, le ho salatse naho ho rambese'o indraike i rahavave'o rey, ty zoke'o naho ty zai'o; le hatoloko azo iereo ho anak'ampela, fa tsy amy fañina'oy. **62** I fañinakoy ty hajadoko ama'o, le ho fohi'o te Zaho IEHOVÀ, **63** soa te ho tiahiko', naho ho meñatse, vaho tsy hanoka-bava ka ty amy fislara'oy, ie fonga hahako o sata-rati'oo, hoe t'IEHOVÀ Talè.

17

1 Le niheo amako ty tsara' IEHOVÀ nanao ty hoe: **2** O ana'ondatio, taroño ty razan-drehake, naho saontsio tafatoño ty anjomba' Israele, **3** ami'ty hoe, Hoe ty nafé' IEHOVÀ Talè, Nivotrake e Libanone ao ty vantio ra'elahi, amañ' elatse jabajaba naho elatse lava, nohoñem-bolo maro-volo vaho nipetake an-tsampa' ty mendorave loho abo; **4** tsinongo'e ty lengo'e naho nente'e mb' an-tane bey tsena mb'eo; vaho navotra'e an-drovam-pampibalibalik'

[†] **16:46** Somerone: Vohitse fijilovañe [‡] **16:46** Sedome: ty tsikotsiko'e; ty fipakora'e [§] **16:57** Arame: i tane avara'atiñana Pilisity

ao. ⁵ Nangala'e ka ty tabiri' i taney naho tinongi'e an-teteke kobokara ao; napo'e marine rano bei-henehene eo, vaho najado'e hoe solo hotse. ⁶ Nibotiboty re, ninjare vahe maro tsampa'e nandrevake naho petrake, vaho nitolike ama'e o singa'eo, fe ambane'e ao o vaha'eo. Aa le ninjare vahe re; nitirian-tora'e naho nampitakare'e mb'eo mb'eo o singa'eo.

⁷ Teo ka ty vantio ra'elahy amañ' elatse jabajaba naho volo maro; le heheke te natola' i vahey mb'ama'e o vaha' eo, vaho nahiti'e mb'ama'e o tora'eo boak' amy vavahaly namboleañe aze hanondraha'ey. ⁸ Toe nitongise'e an-tane soa marine rano mihenehene, hitiria' o tora'eo, hiegoego ho vahe soa. ⁹ Ano ty hoe: Hoe ty nafè' IEHOVÀ Talè, Hiraorao v'izay? Tsy hombota'e hao o vaha'eo naho hampiantoe'e o voa'eo vaho hapo'e hiforejeje—le sindre hiheatse o raven-doha-tao'eo? Le ndra haozaram-bey ndra ondaty mitozantozañe tsy hahafitroats' aze boak' ambahatse. ¹⁰ Oniño, t'ie aketsa eo, hihaveloñe hao? Tsy hiheatse amy zao hao naho iozà' i tiok'atiñanañey? Toe hiforejeje amo vavahaly nitiria'eo.

¹¹ Niheo amako indraike ty tsara' IEHOVÀ nanao ty hoe: ¹² Saontsio henaneo i anjomba miolay: Fohi' areo hao ty ango' i taliliy? Taroño am' iereo ty hoe: Hehe fa nivotrake e Ierosalaime ty mpanjaka' i Bavele, naho rinambe'e i mpanjaka'ey naho o roandria'eo, vaho nasese'e mindre ama'e mb'e Bavele mb'eo; ¹³ le rinambe'e ty tiri' i fifeheañey naho nifañina'e vaho nampifanta'e; fa rinambe'e ka o fanalolahi' i taneio, ¹⁴ soa te hafotsak' ambane i fifeheañey tsy hiongake ka, soa te ho tana'e ty nifañina'e vaho hirekets' ama'e. ¹⁵ F'ie niola ami'te nirahe'e mb'e Mitsraime mb'eo o sorotà'eo, hañomeza' iareo soavalà naho ondaty maro. Hiraorao hao re? Hapoke hipoliotse hao ty manao zay? Hadoñe hivongaritse hao i nivalik' amy fañina'ey? ¹⁶ Aa kanao velon-dRaho hoe t'IEHOVÀ Talè, le amy fimoneña' i mpanjaka' nañoreñ' aze ho mpanjakay, ie tsinambolitio'e i nifantà'ey naho nifotera'e i fañina'ey, le añivo' i Bavele ao ty hihomaha'e. ¹⁷ Le tsy hahafañolotse aze t'i Parò amo lahin-defoñe mitozantozañe naho amy valobohò'ey, ie amotria' iareo tamboho, naho andranjia'e fikalañe fatratse hañitoa'e t'indaty maro, ¹⁸ ie nañamavo i fantay, nivalike amy fañinay, naho nanolo-pitàñe mbore nanao ieaby rezay, toe tsy hipoliotse. ¹⁹ Aa le hoe ty nafè' IEHOVÀ Talè; Kanao velon-dRaho, le hafoteko añ'ambone'e eo i nifantàko nitsambolitio'ey naho i fañinako navalí'ey. ²⁰ Le halafiko ama'e ty haratoko, naho ho tsepaheñe an-koboko ao, le Zaho ty hanese aze mb'e Bavele aña, hizaka aze amo fandilarañe niolà'e amakoo. ²¹ Sindre hampikorovohe' ty fibara o gike ama'eo naho o fonga lahin-defo'eo, naho songa hampiparatsaheñe mb'amo tiokeo mb'eo ze sehang'a'e; ho fohi' areo te Zaho IEHOVÀ ty nitsara.

²² Hoe ty nafè' IEHOVÀ Talè; Ho tsongoeko ka ty tora'e an-tiotio' i talý aboy, naho haoreko; ho harateko boak' an-tora'e fatratse ty lengo'e maleme, vaho haketsako an-tamboho abo mininginingy ey; ²³ amy vohitse abo' Israeley ty hamboleako aze le hitiry tsampa'e naho hamoa voa vaho hinjare talý fanjaka; le sindre himoneñ' ambane'e ao ze karazam-boroñe; naho songa hitsolok' an-kalo' o tora'eo ze raha mitiliñe. ²⁴ Le ho rendre' ze hene hatae am-patrañe ao te Zaho IEHOVÀ ty nampideboñe i hatae nijoalay, naho naonjoko ty hatae bory; nampiforejejèko ty hatae leñe vaho nampiraoraoeko ty hatae maike; Zaho IEHOVÀ ty nitsara naho nanao.

18

¹ Niheo amako indraike ty tsara' IEHOVÀ nanao ty hoe; ² Ino ty tea' areo

ho saontsieñé, ie manoñoñé o razan-drehake zao ty amy tane' Israeley, manao ty hoe; Nikama valoboke makira o roae'eo vaho mangitsy ty nife' o amori'eo? ³ Aa kanao velon-dRaho, hoe t'IEHOVÀ Talè, le tsy hanam-pototse ka nahareo hanoñoñé i razan-drehakey e Israele ao. ⁴ Oniño te kila ahy ze arofo; fonga ahy ty fiain-drae naho ty fiain'anake; ze ondaty manao hakeo ro hihomake. ⁵ Fa naho vantañe t'indaty, manao ty hahiti'e naho ty havañonañe, ⁶ tsy mikama an-kaboañe ey, naho tsy miandra fihaino amo sampsampon' anjomba' Israeleo naho tsy mandeotse ty valin-drañe'e, vaho tsy mitotoke rakemba miambolañe, ⁷ tsy mamorekeke ondaty, fe mañavak' amy mpampisongoy ty nampitsaloha'e, tsy mampikametse, fe mamahañe ty kerè ami'ty mahakama'e vaho manaroñe ty mihalo an-tsikiñé; ⁸ tsy mampisongo hangala'e ana'e naho tsy mandrambe tombo'e, manintake ty fità'e ami'ty hatsivokarañe, le manao zaka to añivo' t'indaty naho t'indaty, ⁹ vaho mañavelo amo fañèkoo naho mitàna o fepèkoo hanao ty hiti'e. Vañon-dre tsì-mete tsy ho veloñe, hoe t'IEHOVÀ Talè.

¹⁰ Aa ie mahatoly anake ho malaso ndra mpampiori-dio ¹¹ (ndra te tsy manao ndra raik' amy raha rezay ty rae'e); ie mifanjotse an-kaboañe ey, mamahotse ty valin-drañe'e, ¹² mamorekeke ty rarake naho ty poi'e, mikizo, tsy mañavake songo, miandra amy ze sampsampon, mbore manao hativàñe, ¹³ mitake ana'e naho mampisongo naho mangala tombo'e, aa vaho ho velon-dre? Toe tsy ho veloñe; hativàñe iaby i nanoe'e rezay; tsy mahay tsy havetrake, vaho ho ama'e ty lio'e.

¹⁴ Aa ie misamak' anake maharendreke o hene hakeo nanoen-droae'eo, le ndra te oni'e tsy orihe'e, ¹⁵ tsy mikama am-bohitsey, tsy miandra amo sampsampon' Israeleo, tsy mandeotse ty valin-drañe'e, ¹⁶ naho tsy mamorekeke ondaty, tsy mitana ty tsinoa'e, tsy mampikametse, te mone fahana'e ty saliko, saroña'e sikiñé ty miboridañe ¹⁷ naho sintone'e ty fità'e tsy hanindry ty rarake, tsy mandrambe ana'e, tsy mampitombo, ie manao ze nandiliako iaby vaho mañavelo amo fañèkoo, le tsy hihomake an-tahindra'e, fa toe ho veloñe.

¹⁸ Ty rae'e ka, ie namorekeke am-pampisoañañe, naho nitavañe andrahalahi'e, vaho nanao ty tsy havokarañe am' ondati'eo; oniño t'ie tsy mete tsy hikenkañe ty amo hakeo'eo. ¹⁹ Aa naho manao ty hoe nahareo, Aa vaho akore te tsy vavè' i ana'ey ty tahin-drae'e? Amy te niaiña' i anakey o lilio, naho ty havañonañe, naho nivontitire'e iaby o fañèkoo, vaho nanoe'e, le toe ho veloñe.

²⁰ T'indaty manao hakeo ty hihomake. Tsy hivave ty tahin-drae'e ty ana'e, vaho tsy hivave ty hakeon' ana'e ty rae; fa ty havañona'i vantañey ro aze, naho ty haratia' i lo-tserekey ro aze. ²¹ Aa naho iambohoa' i raty tserekey* o hakeo nanoe'eo naho mifahatse amo hene fañèkoo vaho mañavelo an-kamarentane naho an-kahiti'e, toe ho velon-dre fa tsy hivetrake. ²² Tsy ho volilieñe ama'e o fiolàñe iaby nanoe'eo; o havañonañe anoe'eo ro hiveloma'e.

²³ Paiako hao ty fihomaha' o lo-tserekeo? hoe t'IEHOVÀ Talè, Tsy hàmake te apo'e o sata'eo, soa te ho veloñe? ²⁴ Fa naho mienga i havantaña'ey ty vantañe naho manao hakeo, vaho fonga anoe'e ty sata tiva' o tsivokatseo, ho veloñe hao? Toe tsy ho volilieñe ama'e ze hene havantañañe nanoe'e, fa i fiolàñe nandilara'ey naho o tahiñe nanoe'eo ty hivetraha'e.

²⁵ Aa naho anoa' areo ty hoe: Tsy mira ty lala' i Talè. Mijanjiña arè ry anjomba' Israele: Ty lalako hao ro tsy mira? kera ty anahareo ro

* **18:21** Iek 3:18-21, 33:8-20

mengoke. ²⁶ Naho apo' ty vantañe ty havantaña'e vaho manao hakeo, le hihomake re; o tahiñe nanoe'eo ty hivetraha'e. ²⁷ Ie ka, naho aforintse' i tsivokatsey o tsy havokarañe nanoe'eo, vaho mañavelo ami'ty fahiti'e naho ty havantañañe le hirombak'aiñe. ²⁸ Kanao nioni'e naho fonga nado'e o fiolàñe nanoe'eo, le toe ho veloñe; tsy hihomake. ²⁹ Aa ie henaneo, naho hanao ty hoe ty anjomba' Israele, tsy vantañe ty lala' i Talè; Ry Anjomba' Israele, tsy mahity hao o lalakoo? Toe ty lala' areo ro tsy vantañe. ³⁰ Aa le ho zakaeko nahareo ry anjomba' Israele, songa ty amo sata'eo, hoe t'IEHOVÀ Talè. Misolohoa vaho iambohò o fiolà' areoo, tsy mone hampiantoe' o tahi' areoo. ³¹ Ahifiho tsy ho ama' areo ze fonga fiolàñe niolà' areo, naho itseneo stroke vao, vaho arofo vao; fa ino ty hivetraha' areo, ry anjomba' Israele? ³² Toe tsy mahafale ahy ty fihomaha' i mikoromakey, hoe t'IEHOVÀ Talè; aa le mimpolia soa te ho veloñe.

19

¹ Inao koahe, añonjono fandalàñe o roandria' Israeleo, ² le ano ty hoe: Ia ty rene'o? Toe liona vave'e añivo' o lionao, ie nandre amo lionao nañabey o amori'eo. ³ Nibeize'e ty raik' amo ana'eo, le ninjare liona tora'e, nioke hitsepake i tsindrokey; nabotse'e ka t'indaty. ⁴ Jinanji' o kilakila' ndatio ty ama'e; le finandri' iareo an-koboñ' ao, vaho nendeseñe am-porengotse mb'an-tane Mitsraime aña. ⁵ Ie nionin-drene'e amy fandiñisa'e azey, t'ie po-pitamàñe, le nangake raike ka amo ana'eo, vaho nibeize'e ho liona tora'e. ⁶ Nitingatinga amo lionao re ninjare liona tora'e, nihazatse nipay tsindroke; vaho namotseke ondaty. ⁷ Narotsa'e o kijoli' iareo fatratseo, naho nampangoakoahé o rova' iareoo; nilatsà' i taney naho ze fonga ama'e ao ty feom-pitroña'e. ⁸ Niambotraha' o kilakila' ndaty boak' amy ze hene fifelehañe mañohok' azeo, le nandafiha' iareo harato, namandrike aze an-kobo' iareo ao. ⁹ Niporengote' iareo naho najoñe an-kipa viñe ao, vaho nasese mb'am-panjàka' i Bavele mb'eo; vinaho' iareo aña tsy ho tsanoñañe am-bohi' Israele ao ka ty feo'e.

¹⁰ Nanahake vahe an-tanembalobok' ao ty rene'o, naketsa añ' olon-drano eo; nandrevake vaho niegoego ty amy rano mangahanahao. ¹¹ Nanoeñe kobaim-pifehe ty ra'e fatratse; nitiotiotse ambone o tora'e fatratseo; niningongo ambone eo o tora'e maroo. ¹² F'ie nombotañe an-keiske, naho nahifik' an-tane eo; nimaihe' i tiok'atiñanañey o voa'eo; nipekañeñe o tsampa'eo, niforejeje i foto'e maozatsey, vaho nitomontoñe' ty afo. ¹³ Naketsa am-patrañe aña re henaneo, an-tane maike amam-paipaiñe. ¹⁴ Niakatse an-tsampa'e lava ty afo, namorototo o voa'eo, le tsy amantsampa maozatse re hanoeñe kobaim-pifeheañe.

Fandalàñe toy, toe ho fandalàñe.

20

¹ Tamy andro faha-folo' i volam-paha-lime' i taom-paha-fitoy, le nivotrak' amako ty ila' o androanavi' Israeleo hañontane IEHOVÀ, vaho niambesatse aoloko eo. ² Niheo amako amy zao ty tsara' IEHOVÀ nanao ty hoe: ³ O ana' ondatio, misaontsia amo androanavi' Israeleo ty hoe: Hoe ty nafè' IEHOVÀ Talè: Niheo mb'etoy hao nahareo hañontane ahy? Amy te Zaho veloñe, hoe t'IEHOVÀ Talè, tsy hañontanea' areo. ⁴ Te hizaka iareo hao rehe? Ho zakae'o hao, ry ana' ondaty? Tohino ami'ty haloloan-droae' iareo: ⁵ Le ano ty hoe: Inao ty nafè' IEHOVÀ Talè; Amy andro nijoboñeko Israele, naho nañonjon-tsirañ' ami'ty tirin' anjomba' Iakobe, naho nampahafohineko

iareo raho an-tane Mitsraime aña, ie nañonjonako sirañe, nanao ty hoe: Zaho IEHOVÀ ro Andrianañahare' areo; ⁶ amy andro nizonjoako sirañe am-panta t'ie hakareko an-tane Mitsraime ao pak'an-tane nihentseñeko ho a iareo, tane orikorihen-dronono naho tantele, ty loho fanjaka amy ze hene tane, ⁷ le hoe raho am' iereo, Fonga ahifiho aña ze hativañe mahasinda fihaino, vaho ko mileotse amo sampsampo' i Mitsraimeo; Zaho IEHOVÀ Andrianañahare' areo.

⁸ F'ie niola amako, toe nanjehatse, songa tsy nimete nañifike ty hativañe am-pihaino'e, naho tsy napo' iareo o sampsampo' i Mitsraimeo; aa le hoe raho, hakofòko am' iereo ty fiforoforoako, vaho ho henefako ama'e ty habosehako añivo-tane Mitsraime ao. ⁹ Ie amy zao, ty añarako ro nitoloñako, tsy ho tivaeñe añatrefa' o kilakila' ndaty añivo' iareoo, ie aolo' iareo eo ty nampahafohineko ahy, amy nampiakareñe iereo an-tane Mitsraimey. ¹⁰ Aa le nakareko an-tane Mitsraime ao vaho nenteko mb'am-patrambey aña; ¹¹ le nitolorako o fañèkoo vaho nitaroñako o fepèkoo, o mahaveloñe ondaty mañavelo ama'eo. ¹² Nitolorako o SABATEKOO ka ho viloñe* añivo' iareo naho Zaho, haharendreha' iareo te Zaho IEHOVÀ ro Mpampiavake iareo.

¹³ Fe niola amako an-dratraratra aña ty anjomba'Israele; tsy nañavelo amo fañèkoo, naho nimavoe' iereo o fepèkoo, o maha-veloñe ondatio t'ie ambenañe, vaho loho nitivà' iareo o SABATEKOO; aa le hoe raho: Hakofòko am' iereo ty haviñerako am-patram-bey aña le ho mongoreko. ¹⁴ F'ie nitoloñeko avao tsy ho tivàñe añatrefa' o kilakila' ndatio ty añarako, ie am-pahaoniña' iareo ty nañakarako iareo. ¹⁵ Aa le mbe nazonjoko am' iereo am-patrañe ao ty tañako naho nifanta te tsy hampiziliheko amy tane orikorihen-dronono naho tantele natoloko iareoy—ty enge' ze hene tane; ¹⁶ amy te nitsambolitio' iareo o fepèkoo naho tsy nañavelo amo fañèkoo, te mone tiniva' iareo o SABATEKOO; ie nañorike sampsampon-draha ty arofo' iareo.

¹⁷ Ie amy hoe zay, niferenaiña' o masokoo le tsy nizamaneko, vaho tsy nimongoreko am-patrambey aña; ¹⁸ fa hoe raho amo ana'eo an-dratraratra aña: Ko añaveloa' areo o fañèn-droae' areoo le ko ambena' areo o fepè'eo vaho ko mandeo-batañe amo sampsampo' iareoo. ¹⁹ Zaho IEHOVÀ Andrianañahare' areo. Mañaveloa amo fañèkoo, ambeno o fepèkoo vaho ano; ²⁰ hamasiño o SABOTSEKOO; ie viloñe añivoko naho nahareo, hahafohina' areo te Zaho IEHOVÀ Andrianañahare' areo.

²¹ Ndra te zay, niola amako o ana'eo: tsy nañavelo amo fañèkoo, tsy nañambeñe o fepèkoo hanoeñe, o mahaveloñe ondaty t'ie anoeñe, vaho nileora' iareo o SABOTSEKOO; le hoe raho: ho nadoako am' iereo am-patrambey ao ty fiforoforoako hampanintsiñe ty habosehako. ²² Fe sin-intoko ty tañako naho nañalañalañe ty amy añarakoy tsy mone ho tivàñe añatrefa' o kilakila' ndatio, ie am-pahaoniña'e eo ty nañakarako iareo, ²³ Toe nizonjoñako sira ka am-patrambey aña nifanta t'ie haparatsiako amo kilakila' ndatio vaho haboeleko añivo' o fifeheañe; ²⁴ amy te tsy nanoe' iereo o fepèkoo, naho tsinambolitio' iereo o fañèkoo, naho tiniva' iareo o SABATEKOO, vaho norihem-pihaino' iareo o sampsampon-droae'eo. ²⁵ Ie amy zay, tinoloko fañè tsy ho lefe, naho fepè tsy mahaveloñe†, ²⁶ le nileorako amo banabana' iareoo, ie nampirangà' iareo añ'afó ao ze manoka-koviñe, hampangoakoahako iareo, vaho hahafohiñe te Zaho IEHOVÀ.

* **20:12** Fvt 31:13-17, Iek 20:20 † **20:25** Sab 81:12, 30:28, Fip 7:42, Rom 1:24-28, Te II 2:11

²⁷ Ie amy zay, ry ana'ondaty, misaontsia amy anjomba' Israeley le ano ty hoe: Inao ty nafè' IEHOVÀ Talè: Inao ka ty niterateràndroae' areo ahy ie niola amako hoe zao, ²⁸ ie naseseko an-tane nañonjonako sirañe hanolorako iareo, naho niisa' iareo ze hene haboañe naho hatae mandrevake naho nañenga soroñe ey, naho nibanabana enga hanigiha' iareo ahy, nañemboke ty mandrifondrifoñe, vaho nañiliñ' engan-drano. ²⁹ Aa le nanoeko ty hoe, Inoñe ze o haboañe omba' areo zao? Vaho natao Bamà[‡] ty añara' i aoy ampara henaneo. ³⁰ Aa le ano ty hoe i Anjomba' Israeley, Inao ty nafè' IEHOVÀ Talè: Hera nileore' ty satandroae' areo? Ke manao hakarapiloña manahake ty hativa' iareo? ³¹ Ie mañenga, naho ampirangà' areo añ'afó o ana-dahi' areoo, naho mandeobatañe amo sampsosampo' areoo pake henane; aa vaho hañontanea' areo hao raho ry anjomba' Israele? Amy te Zaho veloñe, hoe t'IEHOVÀ Talè, tsy hañontanea' areo. ³² Le lia'e tsy hipaoke o fitsakorea' areoo ie atao' areo ty hoe: Hitsikombe o kilakila'ndatio tika, o fifokoam-pifeheañe mitoroñe vato naho hataeo. ³³ Kanao velon-dRaho hoe t'IEHOVÀ Talè, toe an-taña maozatse naho an-tsira natora-kitsy naho am-pifombo nadoañe, le tsy mahay tsy ho feheko nahareo; ³⁴ le hakareko am' ondatio naho hatontoko boak' amo fifeheañe nampiparatsiahañe anahareo, an-taña maozatse naho an-tsira natorakitsy vaho am-pifombo nadoañe. ³⁵ Le haseseko mb'am-patrambei' ondatio mb'eo, vaho ao ty hizakàko tarehe miatre-daharañe, ³⁶ manahake ty nizakako o roae' areo am-patram-bei' i Mitsraimeo, zay ty hañodiako anahareo, hoe t'IEHOVÀ Talè. ³⁷ Le hampiarieko ambane kobaiñe; naho haseseko mb'ami'ty fifehea' i fañinay ao; ³⁸ naho ho tranaheko ama' areo ao o mpiolao naho o nikitrok' ahio; hakareko amy tane nitaveaña' iareo fa tsy himoake an-tane' Israele ao, vaho ho fohi' areo te Zaho IEHOVÀ.

³⁹ Aa inahareo ry anjomba' Israele, hoe ty nafè' IEHOVÀ Talè: Akia songa mitoroñe o sampsosampo'eo, ndra t'ie nainai'e, naho tsy te hañaoñe ahy, fe ko tiva' areo amo enga' areo naho sampsosampo' areoo ty añarako masiñe.

⁴⁰ Fa amy vohin-kamasiñako an-kaboa' Israele eoy, hoe ty nafè' IEHOVÀ Talè, eo ty hitoroña' ze hene anjomba' Israele ahy amy taney, ie iaby amy taney ao; le ao ty hiantofako iereo, le ao ty hipaiako ty enga' areo, ty lohavoa banabanae' areo, miharo amo harao' areo miavakeo. ⁴¹ Ho noko ty amo raha marifondrifoñe nahareo, ie fa nakareko am' ondatio, naho fa natontoko amo fifeheañe nampiparatsiahañe; vaho havahe' areo raho am-pihaino' o kilakila'ndatio. ⁴² Le ho fohi' areo te zaho IEHOVÀ ie haseseko mb'an-tane' Israele mb'amy fifeheañe nañonjonako sirañe hanolorako aze aman-droae' areo añey. ⁴³ Eo ty hahatiahia' areo o sata' areoo naho o fitoloña' areo iabio, o nandeotse anahareoo; toe hampangorý anahareo ty sandri' areo ampahaisaha' areo ty amo haloloña nanoe' areoo. ⁴⁴ Le ho fohi' areo te Zaho IEHOVÀ, ty nañalañalañe ho anahareo ty amy añarakoy, fa tsy ty amo halò-tsere' areoo naho tsy ty amo fitoloña' areo maleotseo, ry anjomba' Israele, hoe t'IEHOVÀ Talè.

21

¹ Niheo amako ty tsara' IEHOVÀ nanao ty hoe: ² O ana' ondatio, ampiatrefo miañatimo ty lahara'o le mitaroña mañatimo vaho mitokia amy alay naho amy tane atimoy; ³ le ty hoe ty hataro'o amy ala atimoy, Janjiño ty tsara' IEHOVÀ. Inao ty nafè' IEHOVÀ Talè: Ingo te hamiañe afó ama'o raho, hamorototo ze hatae antsetra ama'o ao naho ze hatae maike;

[‡] 20:29 Bamà: haboañe

tsy hakipeke i lel'afó mibelabelay le ho mae iaby ze tarehe atimo pak' avaratse aña. ⁴ Le ho oni' ze hene nofotse te Zaho IEHOVÀ ro namiañe aze; ie le lia'e tsy ho vonoeñe. ⁵ Aa le hoe ty asako, Ry IEHOVÀ Talè! Ty hoe ty asa' iareo ty amako: Tsy mpandrazan-drehake hao re?

⁶ Le niheo amako ty tsara' IEHOVÀ nanao ty hoe: ⁷ O ana'ondatio, ampiatrefo mb'e Ierosalaime ty lahar'o naho tseizo mb'amo toetse miavakeo; mitokia mb'an-tane Israeley, ⁸ naho ano ty hoe an-tane Israele ao, Inao ty nafè' IEHOVÀ: Hiatrek' azo raho, naho hapontsoako an-traño'e ty fibarako vaho hapitsoko ama'o ty vaño naho ty tsivokatse. ⁹ Aa kanao haitoako ama'o ndra ty vantañe ndra ty lo-tsereke, le hiakatse i traño'ey i mesolavay mb'amy ze fonga nofotse boak' atimo pak' avarats' aña; ¹⁰ vaho ho rendre' ze atao nofotse iaby te Zaho IEHOVÀ ty nampitsoake fibara amy traño'ey; le tsy hampoliko ka. ¹¹ Miselekaiña ry ana'ondatio, am-pikoretan-troke, am-pievoñañe mafaitse aolom-pihaino' iareo eo. ¹² Aa ie manao ty hoe ama'o iereo, Ino o iselekaiña'oo? le hanoiñe ty hoe rehe, Ty amy talily niazokoy, fa songa hiharofotse ze arofo, sindre higebañe ze fitàñe, sambe hitoirañe ze stroke, vaho hene ho letra'e hoe rano ze ongotse. Hehe te hirik' ao re naho ho heneke hoe t'IEHOVÀ Talè.

¹³ Le niheo amako ty tsara' IEHOVÀ: ¹⁴ O ondatio, mitokia ami'ty hoe: Hoe ty nafè' IEHOVÀ:

Ty fibara! fa rinañitse i fibaray,
vaho nampimilomilotse;

¹⁵ Sinioñe hanjamana'e,
nikotriñeñe hitsopelatse hoe helatse!

Hirebeke hao tika, anako? Ihe nañovoke ty kobaiñe naho ze atao tsipilo? ¹⁶ Fa natolotse ho kotriñeñe i mesay, ho vontitireñe am-pitañe; fa nisioñeñe, fa mimilomilotse i fibara hatolots' am-pità' i mpamonoiy.

¹⁷ Miroveta, angololoïho ondatikoo, ry ana' ondatio, ze hene roandria' Israeleo, fa nasese am-pibara rekets' ondatikoo. Hete! Mipaoha fey ! ¹⁸ Ho pok' eo ty fitsohañe, aa vaho ho ovohe'e hao ty kobaiñe? tsy hanao zay ka, hoe t'IEHOVÀ Talè.

¹⁹ O ondatio, mitokia, mitehafa fità am-pitañe, ampandafao fañintelo'e ty fibara, i fibara' o hanjevoñañeoy, i fibaram-panjevoñam-bey hañarikatoke iareoy, ²⁰ hampiranake arofo, ie maro ty hitsikapy naho hikorovoke, t'ie ampiatreferko ami'ty lengom-pibara an-dalambei' iareo iaby. Hehe te nampimilemireñe, nisioñeñe hanjamanañe. ²¹ Lafao mb' ankavana, paoho mb'ankavia! ndra aia'aia ty añohara' i lelam-pibara'oy. ²² Zaho ka ro hampipeke tañañe hañenefañe ty fifomboko; Zaho IEHOVÀ ty nivolañe.

²³ Niheo amako ty tsara' IEHOVÀ: ²⁴ O 'ndatio, tendreo lalañe roe horihe' i fibaram-panjaka' i Baveley; songa mfototse amy taney aña. Andranjio pilake amy tsempa'e mitsile mb'amy rovaiy mb'eo; ²⁵ atorò ty lalañe homba' i fibaray mb'amy Raba*, o nte-Amoreo mb'eo naho mb'e Iehodà am' Ierosalaime nifatrareñey mb'eo. ²⁶ Fa mijohañe am-pitsileañe eo ty mpanjaka' i Bavele, misikily, akatrokatro'e o ana-paleo, imanea'e ontane ty sareñ-draha, biribirie'e ty ate. ²⁷ Tsatok' am-pità'e havana ao ty tamben-kizè' Ierosalaime, hampitroara'e famofohan-dalañe, hikaike fanjamanañe, hikoike aly, hampirampia'e bodam-pamofohañe an-dalambey eo, naho hamotry fanongàñe vaho handranjy rafem-panameañe. ²⁸ Toe

* ^{21:25} Raba: jabajaba; maozatse; mpandietse

hatao' iereo t'ie sikily vilañe, ty amo nanao fanta jadoñeo; f'ie nampitahieñe o hakeoo, hitsephahañe iareo.

²⁹ Aa le hoe t'IEHOVÀ Talè: Kanao nitiahie'areo o hamengoha'areoo, ie afam-domboke o tahi'areoo, naho zoeñe amo sata'areo iaby o hakeo'areoo. Amy te fa nitiahieñe nahareo, le fa rinambe am-pitañe. ³⁰ Le ihe ry roandria lo-tsere' Israele, fa tondroke i andro'oy, an-tsa' hampigadoñan-kakeo, ³¹ hoe ty nafè' IEHOVÀ Talè, Endaho i sabakay, afaho i halambolamenay; tsy ho tambatse eo henaneo. Aonjoñe i epakey, afotsake i mitiotiotsey. ³² Hafoteko, hafoteko, hafoteko le tsy hanoeñe ka! ampara' te totsak' eo ty manan-jo hanolorako Aze.

³³ Aa ihe, ana' ondatio, mitokia, le ano ty hoe, Hoe ty nafè' IEHOVÀ Talè ty amo ana' i Amoneo, ty amy fañinjea' iareoy, ty hoe: Ry fibara, ry fibara tsinoake hanjamañe: nikotriñeñe hamongotse, pak' am-para'e, ty amy fimilomilora'ey. ³⁴ Ie taroñen' aroñarom-bilan-drehe, anikiliañe vande, hampipetahañe azo am-pititha' o lo-tsereke ho vonoeñeo, ie fa tsatoke ty andro' iareoo, an-tsam-pigadoñan-kaloloñañe. ³⁵ Ampolio an-traño-meso'e ao re! Amy namoroñañe azoy, an-tane nihirifa'o aña ty hizakako azo. ³⁶ Hakofòko ama'o ty hatorifihako, ho tiofeko ama'o ty afom-piforoforoako, naho haseseko am-pità' ondaty bibi'e, za-panjevoñañe. ³⁷ Ho fandrehetañ' afo rehe, ho añivon-tane ao ty lio'o, tsy ho tiahya ka, fa Zaho IEHOVÀ ty nitsara.

22

¹ Niheo amako indraike ty tsara' IEHOVÀ: ² O ana' ondatio, hizaka v'iheo? ho zakae'o hao i rovan-diyo? Aa le tseizo ama'e o fonga sata-tsivokatseo. ³ Ano ty hoe, Hoe ty nafè' IEHOVÀ Talè: Ty rova tia! Mpampiori-dio ty an-tro'e ao, fa tondroke ty andro'e; i mitsene sampsampo hanisý aze, hileora'ey. ⁴ Fa ota faly rehe amo lio nampiorihe'oo, nitivae' o sampsampo niranjie'oo; nampitotohe'o o andro'oo, vaho nampigadoñe'o o tao'oo: aa le nonjirako amo kilakila'ndatio, ho fitohafañe amo hene fifeheañeo. ⁵ Hañonjitse azo iaby ty marine naho ty lavitse, ihe mavovintañe, lifo-pivalitsikotahañe.

⁶ Heheke, o roandria' Israeleo, ie songa aman-ozatse, ro tama'o ao hampiori-dio. ⁷ Ama'o ao ty nañamaivaña' iareo rae naho rene; añivo'o ao ty namorekeke'a' iareo renetane; ama'o ty nañota' iareo bode rae naho vantotse. ⁸ Tsinambolitio'o o raha màsikoo vaho tiniya'o o SABATEKOO. ⁹ Tama'o ao o songa mpanao dramotseo hampiorike lio; le ama'o ao ty nifanjora'e an-kaboañe ao: añivo'o ao ty nanoa'e hakarapiloñañe. ¹⁰ Ama'o ao ty nañafake ty heñan-droae'e; songa nampisalatse ty ampela ampiambola'e; ¹¹ songa nañarapilo ami'ty valin-drañe'e; sindre nimba'e ty anak' ampelan-drahavaven-tañanjomba'e naho sambe nampireke ty rahavave'e, ty anak' ampelan-drae'e. ¹² Le ama'o ao ty nandrambe vokañe hampiorike lio, le ihe ty nangalak' ana-bola reke-tovo'e naho namorekeke an-drañe'o naho nañaramamo, vaho nandikok' ahy hoe t'IEHOVÀ Talè.

¹³ Oniño arè te niteha-tañan-draho amy fikatramoa'o nampitomboa'o vara naho amo lio'o añivo'oo. ¹⁴ Hahavontititse hao ty arofo'o, ho fatratse hao o fità'oo amo andro hitoloñakoo? Zaho IEHOVÀ ty nitsara naho hañeneke. ¹⁵ Haparatsieko añivo' o kilakila' ndatio rehe naho haboele amo fifeheañeo, vaho ho forototoeko ama'o ty haleora'o. ¹⁶ Le haniva vatan-drehe am-pahaisaha' o kilakila'ndatio, vaho ho fohi'o te Zaho IEHOVÀ.

¹⁷ Niheo amako ty tsara' IEHOVÀ nanao ty hoe, ¹⁸ O ana'ondatio, fa ninjare taim-by amako ty anjomba' Israele: songa torisike naho kankiñe, naho viñe vaho firak' am-po toñak' ao; taim-bolafoty iereo. ¹⁹ Aa le hoe ty nafè' IEHOVÀ Talè: Amy te sindre taim-by amako nahareo, le inao! t'ie hatontoko añivo' Ierosalaime ao. ²⁰ Manahake ty amoriañe volafoty naho torisike naho viñe naho firake vaho kankiñe anteñateña' i toñakey, haniofañ' afo hampitranak' aze ro hamoriako anahareo ami'ty habosehako naho ami'ty fifomboko, haniofako vaho hatranako. ²¹ Eka hatontoko vaho ho tiofeko ama' areo ty afon-kabosehako, ie hitranake aivo'e ao. ²² Manahake ty fampitranahañe volafoty am-po toñak' ao, ty hampitranahañe anahareo am-po'e ao; vaho ho fohi' areo te Zaho IEHOVÀ ty nampidoañe ty habosehako ama' areo.

²³ Le niheo amako ty tsara' IEHOVÀ, nanao ty hoe, ²⁴ O ana'ondatio, ano ama'e ty hoe, Tane tsy nilioven-drehe, naho tsy nahavian' orañe amy andron-kabosehakoy. ²⁵ Mikitro-draha raty añivo'e ao o mpitoki'eo, manahake ty liona mitroñe, hañoridañe ty tsatsa'e, hampibotseke sandriñe, hitavañe vara naho asiñe; maro ty nampinjarie' iareo ramavoiñe añivo'e ao. ²⁶ Mijoy o Fanoroakoo o mpisoro'eo* naho tivà' iareo o rahako miavakeo: tsy ambaha' iareo ty masiñe ami' ty tsotra, mbore tsy toroa' iareo te ino ty faly naho ty tsy faly, naho nanakona' iareo maso o SABATEKOO vaho tivaeñe am' iereao raho. ²⁷ Manahake ty fitriboam-parasy i tsindro'ey o roandria' eo, hampiori-dio naho hampianto sandriñe, hitavañe. ²⁸ Le fa pinako' o mpitokio sokay zay, mionim-bande naho manikily fandañirañe, ami'ty hoe: Hoe t'IEHOVÀ Talè, fe tsy nitsara t'IEHOVÀ. ²⁹ Mamorekeke ondati' i taneio iereao, naho mampikametse; mbore tsoborè' iareo o rarakeo naho o poi'eo vaho manindry ty renetane tsy aman-kahiti'e. ³⁰ Aa le nipay ondaty am' iareo ao raho hamboatse i kijoliy mañambone, hijohañe an-jeba'e ao ho amy taney añatrefako eo, tsy handrotsahako aze; f'ie tsy nahatreia. ³¹ Aa le nadoako am' iareo ty habosehako; nifongoreko amy afom-pifombokoy: o sata' iareoo avao ty nadoako ami'ty añambone' iareo, hoe t'IEHOVÀ Talè.

23

¹ Niheo amako indraike ty tsara' IEHOVÀ nanao ty hoe: ² O ana'ondatio, teo ty ampela roe niharo rene, ³ songa nanao hakarapiloañe e Mitsraime aña, nanao hatsimirirañe ami'ty hasomondrara'e; tinindry aña o nono'eo naho vinonotroboke o loha-nonon-kasomondrara'eo. ⁴ Ty añara' iareo: Oholà* ty zoke'e naho Oholibà† ty zai'e; tamako iereao, naho nisamak' ana-dahy naho anak' ampela. Ty añara'eo: I Somerone t'i Oholà vaho Ierosalaime t'i Oholibà.

⁵ Aa le nanao hakarapiloañe t'i Oholà, ie tamako ro ninenakena'e o sakeza'eo, o nte-Asore marine azeo, ⁶ o nisikiñe mangao, ty mpifehe naho ty mpameleke, sindre ajalahy maràm-bintañe, mpiningi-tsoavalà. ⁷ Aa le nifandrantoa'e, ondaty volovoloeñe amo nte-Asoreo, ze hene ondaty nikokoa'e; vaho nandeo-batan-dre amo fonga samposampo'eo. ⁸ Toe tsy napo'e o hakarapiloa'e nanoe'e e Mitsraime añaeo; ie niolotse am'iereo te mbe an-katòra'e, naho vinonotrobo' iereao o nonon-kasomondrara'eo, vaho naobo' iareo ama'e ty hakarapiloa' iareo. ⁹ Aa le naseseko am-pità' o sakeza'eo, am-pità o nte-Asore nikokoa'eo. ¹⁰ Nampikorendahe'

* 22:26 Tsf 3:4, Lke 16:16 * 23:4 Oholà: kivoho'e; kibohom-pandrañaotse; † 23:4 Oholibà: ty kibohoko, ampela ao

iereo ty heña'e; tinava' iareo o ana-dahi'eo naho o anak' ampela'eo vaho vinono' iereo am-pibara; ninjare tolom-bolan-drakemba i zaka nafetsa' iareo ama'ey.

¹¹ Ie nirendre' i Oholibà, le nilikoara'e ty zoke'e ami'ty hatea'e vilañe naho ami'ty haloloan-kakàrapiloa'e; ¹² nikenakenahe'e o nte-Asore mpirañe'eo, o mpifehe naho mpamelek' an-tsikim-panjakao, o mpinday soavala miningi-tsoavalao, songa ajalahy soa-vintañe. ¹³ Nizoeko amy zao re te naleotse, te songa lalan-draike ty nitsilea' iareo roroe, ¹⁴ naho t'ie nampitoabotse o hakarapiloa'eo amy naharendreha'e sare lahilahy sinokitse an-drindriñey, saren-te-Kasdy nilokoeñe antsetra, ¹⁵ misadia o toha'eo, sabaka mirebareba ty añ' ambone'e eo, songa hoe ana-donake, hambam-bintañ' amo nte-Bavele nisamak' an-tanen-te-Kasdý añeo, ¹⁶ le nitsinginiotse am' iareo re te niisam-pihaino'e, le nampihitrife'e mb'am' iereo an-Kasdy añe. ¹⁷ Nomb' ama'e mb' eo o nte-Baveleo nifandiatihy ama'e, naniva aze ami' ty hakarapiloañe, le naleotse ty ama'e vaho nivitsok' am' iereo ty tro'e. ¹⁸ Aa le niborahe'e o hakarapiloa'eo vaho naboa'e ty heña'e; vaho nialik' ama'e raho, hambañe ami'ty nialiha' ty troko amy zoke'ey. ¹⁹ Mbore nampitomboe'e o hakarapiloa'eo ie nitiahi'e o andron-kasomondrara'eo, ie nanao hatsimirirañe an-tane Mitsraime añe. ²⁰ Aa le nireñele amo hamaromaso'eo, ie hoe nofom-borìke ty nofo' iareo naho hoe rom-pilahian-tsoavala ty niakatse am' iareo. ²¹ Nitiahi'o ty haloloan-kasomondrara'o, ie vinonotrobo' o nte-Mitsraimeo o lohanono'oo naho o nonon-kasomondrara'oo.

²² Ie amy zao ry Oholibà, hoe ty nafè' IEHOVÀ Talè: Inao, hatroako ama'o o sakeza'oo, o nampipitsoke ty fikokoa'oo vaho hampiatreatreko azo, ie boak' añ' ila'o iaby, ²³ o nte-Baveleo, naho o nte-Kasdy iabio, o roandriañe, naho o mpifeheo, naho ze hene nte-Asore rekets' ama'eo; ie songa ajalahy maràm-bintañe; sindre mpifehe naho mpameleke vaho mpanjaka bey fiaintane; fonga mpiningitse soavala. ²⁴ Ie haname azo am-pialiañe, an-tsarete, an-dogidogy vaho an-dahiale, hamalañe azo am-pikalan-defo naho am-pikalam-pibara, vaho an-tsabaka iaby, le hafantoko am' iereo ty zaka vaho ho zakae' iereo rehe amo lili' iareoo. ²⁵ Hampiatreatreko ama'o ty farahiko naho ampiondroñondroñañe ty hanamea' iareo azo; hampipitsohe' iareo o fiantsoña'oo naho o ravembia'oo; hampikorovohem-pibara ze sisa ama'o; hasese' iareo añe o ana-dahi'oo naho o anak' ampela'oo; vaho ho tomontoñe' ty afo o sehanga'oo. ²⁶ Hampikorendahe' iareo o siki'oo vaho ho tavane' iereo o rava'o fanjakao. ²⁷ Aa le hagadoko ty haloloa'o, naho o hakarapiloa'o boak'an-tane Mitsraime añeo, tsy hiandrà'o maso, tsy ho tiahi'o ka t'i Mitsraime. ²⁸ Fa hoe ty nafè' IEHOVÀ Talè: Inao! haseseko am-pità' o malaiñ' azoo rehe, am-pitàñe mampangoriñe ty tro'o; ²⁹ le hanoe'e am-palai-mena rehe naho ho fonga tavane' iareo o fitoloña'oo vaho hado' iareo mihalo naho mijageanjageañe; le hendaheñe hiboridañe ty hakarapiloa'o, ty haloloa'o naho o hatsimirirà'oo. ³⁰ Hanoeko ama'o i rezay ami'ty nandenà'o mbeo' mbeo nanao hakarapiloañe amo kilakila' ndatio naho t'ie naniva vatañe amo sampusampo' iareoo. ³¹ Kanao norihe' o i satan-joke'oy, le hadoko an-taña'o eo i fitovi'ey. ³² Inao ty nafè' IEHOVÀ Talè:

Hinome'o i fitovin-joke'o
laleke naho mangorabakey;
ho fitohàfañe naho fandrabioñañe
amy t'ie pea mitepatepa.

³³ Ho lipore' ty hamamoña
naho ty fanaintaiñan-drehe
ty amy fitovin-kalatsaña
naho firotsahañaey,
i fitovin-joke'o Someroney.

³⁴ Toe hinome'o naho ho kapaihe'o,
ho tantae'o ty hara'e vaho
ho rangote'o o nono'oo;
fa nitaron-dRaho hoe t'IEHOVÀ Talè.

³⁵ Le inay ty nafè' IEHOVÀ Talè: Amy te nandikofa'o raho vaho nahifi'o am-boho'o ao, le vaveo o haloloa'oo naho o hakarapiloa'oo.

³⁶ Le hoe ty nafè' IEHOVÀ amako; O ana' ondatio, Ho zakae'o hao t'i Oholà naho i Oholibà, hitaroña'o o hativa' iareoo? ³⁷ T'ie nanao havambàñe, le am-pitá' iareo eo ty lio, nanao hakarapiloañe amo sampsampa'e, mbore nampiarie' iareo añ'afó ao o ana-dahy sinama' iareo amakoo, habotse'e. ³⁸ Tinovo' iareo amako te nileore' iareo amy andro zay avao i toeko miavakey vaho tiniva' iareo o SABATEKOO. ³⁹ Amy t'ie vinono' iareo amo sampsampa' iareoo o ana-dahi'eo le nimoake amy toeko miavakey amy àndroy avao, naniva aze; vaho hehe te añivo' i kivohokoy ty nanoa' iereozay, ⁴⁰ vaho nampihitrife'o mb'ama'o ondaty boake tsietoitane añeo; ie nañiraha'o, le nitotsake eo iereo, ie niandroa'o, nitentea'o maso naho niravaha'o bangebangue, ⁴¹ le nitobok' an-tihy fanjaka eo rehe, ie nañalankañe fandambañañe aolo'e eo, le napò'o ama'e ty rameko naho o solikoo. ⁴² Tama'e ao ty nijanjiñañe ty feom-balobohòke am-bodomomok' ao; le nendeseñe ho mpiamo lahilahy tea vintañe, o jike boak' am-patrañe añeo, niravahe' iareo o fità'eo vaho sinabaka' iareo halan-engeñe ty añambone' iareo.

⁴³ Le hoe raho t'ie nimokora' i hakarapiloa'ey, Aa vaho mbe hañarapilo ka iareo? ⁴⁴ amy te nivotrak' ama'e iereo hoe mpipay tsimirirañe, zay ty niharoa' iareo tihy amy Oholà naho i Oholibà, i hakalalijahan-drakemba rey. ⁴⁵ Aa le ho zakae' ondaty vantañe iereo amy lili' o vinambaoy, naho amy lilin-drakemba mampiori-dioy, amy t'ie nanao havambàñe vaho am-pitá' iareo ty lio.

⁴⁶ Aa hoe ty nafè' IEHOVÀ Talè; haseseko am' iereo ty lahialeñe, le hatoloko haronjeronje vaho ho kopaheñe. ⁴⁷ Ho retsahe' i lahialeñey vato, naho hizamañe am-pibara; hampibaibai' iareo o ana' dahie'o naho o anak' ampela'eo vaho hamorototo o anjomba' iareoo amañ' afó. ⁴⁸ Zay ty hanjikerako ty fandrantoñañe amy taney, soa hene hanareñe o ampelao tsy hañorike ty fandrantoa' areo. ⁴⁹ Le hondroha' iareo ama' areo ty haloloa' areo, naho ho vavè' areo ty hakeo' o sampsampa' areoo; vaho ho fohi' areo te Zaho IEHOVÀ Talè.

24

¹ Niheo amako indraike, amy andro faha-folo' i volam-paha-folo' i taompahasiveiy, ty tsara' IEHOVÀ nanao ty hoe: ² O ana' ondatio, sokiro ty añara ty andro: ty andro henanekeo: fa niarikatohe' ty mpanjaka' i Bavele ami'ty andro toy t'Ierosalaime. ³ Le saontsio an-tafatoño i anjombam-pioly ami'ty hoe: Hoe ty nafè IEHOVÀ Talè;

Atokono ty valañe,

atokono vaho añiliño rano;

⁴ atontono ama'e o patets-enao,
ze fonga vonga'e soa,

i hèto'ey naho i soro'ey;
vaho liforo taolañe mafiry.

⁵ Endeso ty lengo' i lia-raikey,
aobo ambane'e ao o taolañeo,
le atokono soa vaho ampikotrokotroheñe ampara' te masake naho o
taolañeo.

⁶ Le hoe ty nafè' IEHOVÀ Talè: Hankàñe amy rovan-dioy, amy valàñe
ama-taim-piray ie mbe tsy niakara' i taim-piray, akaro kiraikiraike o
vonga'eo, tsy anoraham-pida. ⁷ Fa mb'e ama'e ty lio'eo; nadoa'e am-bato
eo, fa tsy naili'e an-tane eo handembeke aze an-deboke. ⁸ Hañonjona'e
ty haviñerako naho hanigike ty fañondrohako; le napiteko am-bato eo i
lio'ey tsy ho lembefañe. ⁹ Aa le hoe ty nafè' IEHOVÀ Talè: Hekoheko amo
rovan-dioo! Handrehetako afo misolebotse, ¹⁰ añoboño hatae, amiaño afo,
masaho i henay, alaro fampafiriañe, vaho forototò o taola'eo; ¹¹ apok'
am-baen-afó eo i valàñe kapaikey ampara' te mae, hampirekake ty
torisi'e, hanodotse ty harefe'e hitranak' ao, hampitomontoñe i harefe'ey.
¹² Nahamokotse aze avao fa nilesa, tsy niakatse i harefe'e maroy; mb' añ'
afoy o harefe'eo. ¹³ Kanao nimaneako kotriñe amy hareñele'o maleotsey,
ihe nifoneñe tsy halio, le toe tsy halio amo haleora'oo ampara' te heneké
ty fiforoforoako. ¹⁴ Zaho IEHOVÀ ty nitsara. Hifetsake zay, Zaho ty hanao,
tsy hipotake, tsy hitretre, tsy hiheve. O sata'oo naho o fañaveloa'oo ty
izakako azo, hoe t'IEHOVÀ Talè.

¹⁵ Le niheo amako ty tsara' IEHOVÀ nanao ty hoe: ¹⁶ O ana' ondatio,
Ingo te hahàko ama'o ty fañiriam-pihaino'o indrai-mipaoke; fa tsy handala
rehe tsy hangololoike, vaho tsy ampiorihe'o ranom-pihaino. ¹⁷ Mioremeña
aman-tsiñe, ko mandala vilasy, rohizo ami'ty añambone'o ty sabaka'o, le
hanao o fandia'oo, naho ko manakom-pivimby ambone, vaho ko mikama
ty hane' ondaty mandala. ¹⁸ Aa le nitaliliako amy maraiñey ondatio, le
nivetrake hariva i valikoy; vaho nanoeko amy loak' àndroy i nandiliañe
ahi.

¹⁹ Le hoe ondatio amako, Tsy ho taroñe'o ama'ay hao o anoe'o ama'ay
zao? ²⁰ Le tinoiko ty hoe, Niheo amako ty tsara' IEHOVÀ nanao ty hoe:
²¹ Ano ty hoe amy anjomba' Israeley, Hoe t'IEHOVÀ Talè, Inao! ho tivàko
i toeko miavakey, ty enge' o haozara' areoo, ty fisalalàm-pihaino' areo,
naho ty ravoravon-tro' areo; hampikorovohe' ty fibara o ana-dahy naho
anak' ampela nado' areo añeo. ²² Le hanoe' areo i nanoekoy, tsy hitakom-
pivimby vaho tsy ho kamae' areo ty hanem-piferenaiña' ondaty. ²³ Apoho
añambone' areo eo ty sabaka, vaho ampihanao o fandia' areoo; tsy
handala, tsy hirovetse; fe hinike ty amo tâhi' areoo, vaho hifampitoreo.
²⁴ Le ho viloñe ama' areo t'Iekezkèle, ampanahafo amo nanoe'eo ty
hanoe'areo: ie tondroke zay le ho fohi' areo te Zaho IEHOVÀ Talè.

²⁵ Ie amy zay ry Ana'ondatio, amy andro hitavanako ty haozara' iareoy,
ty firebehan-enge'e, ty fisalalàm-pihaino'e naho ty fitsakorean'arofo'e, o
ana-dàhy naho anak' ampela' areoo. ²⁶ Le homb' ama'o amy andro zay
ty nahafipoliotse, hampijanjiñ' azo an-dravembia. ²⁷ Amy andro zay, le
ho sokafem-palie rehe ty amy nahavoratsakey; tsy ho moañe ka, naho ho
viлоñe am' iereo, vaho ho fohi' iareo te Zaho IEHOVÀ.

25

¹ Niheo amako ty tsara' IEHOVÀ nanao ty hoe, ² O ana'ondatio, atrefo
o nte-Amoneo vaho itokio, ³ le ano ty hoe amo nte-Amoneo, Janjiñ
ty tsara' IEHOVÀ Talè, Inao ty nafè' IEHOVÀ Talè: Amy t'ie nanao ty

hoe, Haotý! amy toeko miavakey, ie nitivaeñe; naho an-tane' Israele, ie nampangoakaheñe; naho amy anjomba' Iehodà, ie nasese mb'am-pandrohizañe aña; ⁴ ingo arè te hatoloko ho fanaña' o nta-tiñanañe rehue, le havotra' iareo ama'o ao ty tobe' iareo, naho hañoreñe fimoneñañe; ho kamae' iareo ty namokara'o vaho handriotse o ronono'oo. ⁵ Le hanoeko fitobean-drameva ty Raba, naho fañialoan-dia-raike t'i Amone; vaho ho fohi' areo te Zaho IEHOVÀ. ⁶ Aa inao ty nafè' IEHOVÀ Talè, Amy t'ie niteha-pitâñe naho nampikodoim-pandia ami'ty firebehan-tro'o ami'ty fanirika'o ty tane' Israele, ⁷ ingo arè te zaho ty hanorakitsike ama'o ty sirako, hanolotse anahaero ho fikopaha' o kilakila 'ndatio, naho haitoako am'onratio, naho ho mongòreko amo taneo, naho harotsako, vaho ho fohi'o te Zaho IEHOVÀ.

⁸ Inao ty nafè' IEHOVÀ Talè: Amy te manao ty hoe t'i Moabe* naho i Seire†: Hehe te manahake o kilakila 'ndatio ty anjomba' Iehodà; ⁹ aa Inao te ho sokafe ko boak' amo rovao ty ila' i Moabe, añ' ila' o rovao aña' olon-tane'e eo, o tane mahasindao: i Bet'haiesimote‡ naho i Baalmehone§ vaho i Kiriataime*, ¹⁰ le hatoloko rekets' o nte-Amoneo ho fanaña' o nta-tiñanañe, tsy ho tiah amo kilakila' ndatio ka o nte-Amoneo. ¹¹ Hametsahako zaka ty Moabe; hahafohina'e te Zaho IEHOVÀ.

¹² Hoe ty nafè' IEHOVÀ Talè; I nanoe' i Edomey†, ie namale fate ami'ty anjomba' Iehodà, (ndra t'ie voa-zaka) vaho nañava-kabò ama'e; ¹³ le hoe ty tsinara' IEHOVÀ Talè: Hatorakitsiko amy Edome ty tañako le haitoako ama'e t'indaty naho hare naho hampangoakaheko boak'e Temane‡ vaho habaibam-pibara t'i Dedane§. ¹⁴ Le hapoko amy Edome ty kabòko ampitâ' ondatiko Israeleo, naho hanoeñe Edome ao ty amy habosehako naho fiforoforoako; vaho ho fohi' iareo ty fañondrohako, hoe t'IEHOVÀ Talè.

¹⁵ Hoe ty nafè' IEHOVÀ Talè; Aa kanao namale fate vaho nañava-kabò an-stroke manirika o nte-Pilstio ty amy fifeheña' iareo vintañe nainai'ey ¹⁶ le inao ty nafè' IEHOVÀ Talè: Ingo hatorakitsiko amo nte Pilistio ty tañako naho haitoako o nte-Kereteo* vaho harotsako ty honka'e aña' olon-driake eo. ¹⁷ Hampifetsahako zaka jabajaba iereo rekets' endake miforoforo; vaho ho fohi' iareo te Zaho IEHOVÀ, ie hampipohako avake.

26

¹ Ie am-baloham-bola' i taom-paha-folo-raik'ambiy, te niheo amako ty tsara' IEHOVÀ nanao ty hoe: ² O ana'onratio, Kanao nanao ty hoe ty Tsore* ty am' Ierosalaima: Hike! rotsake, i ni-lalambei' o kilakila' ndatioy; fa midañadaña mb'amako: ho vontsy ty ama'e raho henaneo, ie fa nikoahañe, ³ aa le hoe t'IEHOVÀ Talè; Inay te atreatrèko, ry Tsore, vaho hampanameako azo ty fifeheña' maro manahake ty ampitroare' i riakey o onja'eo. ⁴ Ho demohe' iareo ty kijoli' i Tsore naho hampikoromahe' iareo o fitalakesañ' abo'eo; mbore ho haoreko ama'e ty debo'e vaho hampanahafeko ami'ty tarehen-damilamy. ⁵ Ho fandafihañe harato añivo' i riakey, vaho ho fañaoha' o kilakila' ndatio amy te Zaho ty nitaroñe, hoe t'IEHOVÀ Talè. ⁶ Ho zamanem-pibara o anak' ampela'e an-tetekeo le ho fohi' iareo te Zaho IEHOVÀ.

* 25:8 Moabe: boak'aman-dra'e † 25:8 Seire: volovoloeñe; ose; kokolampa; ‡ 25:9 Bet'haiesimote: akiba am-patrañe aña § 25:9 Baalmehone: i Andraharen-kibohotse * 25:9 Kiriataime: an-drova mpihambañe † 25:12 Edome: hamenañe; hamenan-dio ‡ 25:13 Teman: i atimoy; Afrika; ginoke § 25:13 Dedane: ty araña'e; firañetañe; mpizaka * 25:16 Kerete: mpamira, mpandrovitse * 26:2 Tsore: maozatse; vato; masioñe

⁷ Fa hoe ty nafè' IEHOVÀ Talè; Oniño te hampivotraheko amy Tsore t'i Nebokadnetsare, mpanjaka' i Bavele, ty mpanjaka' o mpanjaka avaratse aneo, reketse soavala naho sareté, naho mpiningi-tsoavalà, naho o liandahin-defo'eo, vaho i valobohòkey. ⁸ Ho zamanem-pibara o anak' ampela'o an-kivokeo; naho handranja'e rafi-panameañe, naho hampitoabora'e tamboho vaho hañonjona'e fikalañe. ⁹ Hampitroara'e lamasinañ' aly amo kijoli'eo, vaho hampikoromahe'e am-pekoñe o fitalakesañ' abo'eo. ¹⁰ Ty debo' i fitozatozan-tsoavalà'ey ty handembeke azo, hiezeñzezeñe o kijoli'oo ami'ty fikoraha' o mpiningi-tsoavalao, naho amo larò'eo, naho amo sareteo, amy fimoaha'e amo lalam-bei'oo manahake ty fiziliha' ondaty amo heban-kijolin-drova' rotsakeo. ¹¹ Hampitrobohe'e an-tombon-tsoavalà ze hene lalan-damo' iareo; ho fonga zamane'e am-pibara ondati'oo vaho songa hideboñe an-tane o sampsampon-kaozara'oo. ¹² Ho kamere' iereo o vara'oo le fonga hikopà' iareo o kilanka' areoo; hampiantoe' iareo o kijoli'oo, vaho harotsake o anjomba' areo sarotseo; vaho halafi' iareo am-po' i ranoy ao o vato naho boda naho debo'oo. ¹³ Hajihoko ty feon-tsabo'o; vaho le lia'e tsy ho janjiñeñe ka ty fivola' o marovani'oo. ¹⁴ Hanoeko hambañe ami'ty lamilamy miloeloe, ho fandafihane harato; toe tsy haoreñe ka, amy te Zaho IEHOVÀ ty nivolañe, hoe t'IEHOVÀ Talè.

¹⁵ Hoe ty nafè' IEHOVÀ Talè amy Tsore: Toe hampitroetroe o tokonoseo ty figaragadebo'o, ie mikaikaiko o nifereo, ie henek' añivo'o ao i fizamanañey. ¹⁶ Ie amy zay songa hizotso amo fiambesa'eo o roandria' i riakeio naho hambine' iareo o sarimbo' iareoo, naho hafaha' iareo o saro'e soa vinahotseo, hisikiñe fitititithañe; hitozòke an-tane eo hitolom-PIHONDRAHONDRAÑE vaho ho daba ty ama'o! ¹⁷ Le hañonjom-bekompandalàñe ama'o iereo, ami'ty hoe:

Akore ty firotsaha'o,
Ry nimoneñam-piandriakeo?

Ty rova team-bintañe,
naozatse amy riakéy,
ie naho o mpimone'eo,
ze nampirevendreveñe
o mpitobok' ama'ao iabio.

¹⁸ Aa le hanginikinik' amy andro
fideboñia'oy o tokonoseo,
hiriatsandry ami'ty hamongora'o,
o tokonose an-driak' añaeo.

¹⁹ Fa hoe ty nafè' IEHOVÀ Talè: Hanoeko rova bangiñe rehe, manahake o rova mangoakoakeo; hampionjoneko hisaroñe azo ty tsikeokeoke; vaho rano maro ty handipots' azo. ²⁰ Ie hampizotsoeko mindre amo mizotso mb'an-kiborio ao, hitraok' am'ondaty taoloo, naho hadoko am-pigadoñan-tsikeokeok' ao, manahake o tanan-taolo haehaeo, miharo amo migodañe mb'an-donakeo, soa tsy ho amam-pimoneñe ka rehe te hatoloko engeñé i tanen-kaveloñey. ²¹ Hanoeko fangebakebahan-drehe, le tsy ho eo in-tsasa, ndra te paiaeñé tsy ho oniñe ka, hoe t'IEHOVÀ Talè.

27

¹ Niheo amako indraike ty tsara' IEHOVÀ nanao ty hoe: ² Ie amy zao ana' ondatio, onjono fandalañe t'i Tsore, le ano ty hoe t'i Tsore, ³ O ry mpimoneñe am-pitolia' o riakéy, mpanao balike ho am' ondaty antokonose maroo, inao ty nafè' IEHOVÀ Talè:

O Tsore! hoe ty asa'o:

ginoke an-katsomerentseren-draho.

⁴ Anteñateña' i riakey o efe-tane'oo
naho nahafonitse ty hatsaratsea'o
o mpandranji'oo.

⁵ Hene nanoe' iereo ami'ty nato' i Senire* o varamban-daka'oo;
nangalak' amo mendorave' i Libanoneo,
hamboara' iareo o bodan-dai'oo.

⁶ Amo kobai' i Basaneo†
ty nandranjia' iareo o fivei'oo;
an-tsifa boak' amo tokonose' i Kitio
ty nitsenea' o nte-Asoreo o fiambesa'oo,

⁷ Lamba leny marerarera
soa vinahotse boake Mitsraime aña
ty nalama'o ho lai'o;
manga naho malo-mavo boak'
an-tokonose' i Elisà‡ ty nanaroñe azo.

⁸ Nimpivei'o o nte-Tsidoneo§
naho o nte Arvadeo*;
tam-po'o ao, ry Tsore,
ondaty mahihi'oo,
o ni-mpanehak' azoo.

⁹ O androanavi' i Gebaleo†
naho o mahihi'eo ty nanosoke
o varakivaraky ama'oo;
songa tama'o ao o sambon-driakeo
rekets' o mpiandria'eo
nifanakalo kilankañe ama'o.

¹⁰ Nimpitraok' amo lahindefo'oo, o nte-Paraseo‡ naho o nte-Lodeo§
rekets' o nte-Poteo*, ondaty mpialy; naradorado' iareo ama'o o fikala' iareo
naho o aron-doha'eo; naràm-bintañe ama'e rehe. ¹¹ Niariary an-kijoli'o eo
o lahindefo'oo mindre amo nte-Arvadeo, naho tam-pitalakesañ' abo'o ao
o nte-Gamadeo†; naseba' iareo amo rindri'oo mb'atia mb'atia o fikalan-
defo'eo; nifonira' iareo ty hamontramontra'o.

¹² Nimpanao balibalik' ama'o t'i Tarsise‡ amy fibobobodoam-baráey;
navaro' iareo an-tsena'o ao ty volafoty, viñe, kankiñe, vaho firake.

¹³ Nimpanao balike ho azo t'Iavane naho i Tobale vaho i Meseke§, nanao
takinak' ama'o ami'ty fiai'ondaty naho ami' ty valàñe torisike. ¹⁴ Nanao
kinanga amo tsena'oo ty anjomba' i Togarmà* rekets' o soavalà'eo naho
soavalan-aly vaho borìke. ¹⁵ Nimpanao balik' ama'o o nte-Dedaneo,
tokonose tsiefa ty nikalo am-pitá'o eo; nibanabana tsifa-foty naho mañary.

¹⁶ Nanao takinak' ama'o ka t'i Arame amo hatsifofoton-draha tsinene'oo,
nanao takinak' an-drobikà naho malòmavo naho raha soa vinahotse naho
leny marerarera naho hareañe vaho hange. ¹⁷ Nanao balik' ama'o ka
t'Iehodà naho ty tane' Israele; nendese' iareo vare-bole boake Minite†
mb'an-tsena'o ao, naho raha mafiry naho tantele naho menake vaho solike.

* 27:5 Senire: labozim-pandreañe; miovaova † 27:6 Basane: ami'ty nife; nifem-biby bey

‡ 27:7 Elisà: Añondrin'Añahare; I Mpañolotse § 27:8 Tsidone: mpañoro; mpamintañe;

* 27:8 Arvade: mpirererere † 27:9 Gebale: efe-tane; ‡ 27:10 Parase: mpandily, mpizara;
kitroke; § 27:10 Lode; fisamahañe; tariratse * 27:10 Pote: ana' i Kame, ana' i Noake

† 27:11 Gamade: kana; ondaty mahasibeke ‡ 27:12 Tarsise: fitsakoreañe; fitsohañe § 27:13

Meseke: I nikozozoteñe aman-kère * 27:14 Togarmà: taolañe iaby † 27:17 Mininte: vinolily;
nihentseñañe

¹⁸ Nikalo ama'o ka t'i Damesèke[‡] ami'ty fibodobodoan-draha namboare'o, ami'ty vara tsy efa, naho divay boak'e Kelbone[§] vaho volonañondry mikotritriake. ¹⁹ Nikaloeⁱ V'Dane naho Iavane nte-Ozale viñe niloeloe, le amo kilanka'o iabio ty sena naho vinda mañitse. ²⁰ Nanao balik' ama'o t'i Dedane: lamba fanoeñe an-tsarete. ²¹ O nte-Arabeo* naho o roandria' i Kedareo[†] nanao takinak' ama'o amo vik' añondrio, o añondrilahio, vaho amo ose-lahio, nimpikalo i raha rey iereo. ²² I Sebà[‡] naho i Raama[§] mpanao balike; nanao takinak' amo tsena'oo an-tsakày naho vatosoa vaho volamena. ²³ Songa nifanakalo ama'o ty Karane* naho i Kanè[†] naho i Edene[‡], o mpampibali' i Sebao, i Asore vaho i Kilmade[§]. ²⁴ Nilahatse ama'o ami'ty raha maro i mpanao takinak' ama'o rezay; tañate' ty kilanka'o ao ty sarimbo manga naho lamba soa vinahotse naho vata pea fisiky fanjaka, finehe taly naho rinanjy ami'ty mendoraveñe. ²⁵ Ihe ty nampionjoñe o sambo' i Tarsiseo, o mpanao takinake ho azoo; nipea rehe, nitoabotoabotse añivo' i riakey ao. ²⁶ Ninday azo nitoañe riake laleke o mpivei'oo, fe namolak' azo añivo' o riakeo i tiok' atiñanañey. ²⁷ Ty vara'o, o tsena'oo, o fifampikalao'oo, o mpivei'oo, o mpaneha'oo, o mpandite-laka'oo, o mpanao balibalik' ama'oo, ze hene lahin-defo'o ama'o, ze fonga valobohò'o ama'o, songa hijoroboñe am-po' o riakeo ao amy androm-pirotsaha'oy. ²⁸ Hihondrahondra o mpañohok' azoo ami'ty feon-toreo'o o mpanehakeo. ²⁹ Songa hitzotso amo sambo'eo o mpitàm-piveio, o mpifanehake am-piveio, sindre hijohañe an-tamboho eo o mpanehake an-driakeo ³⁰ naho hipoña-piarañanañañe, ho janjiñeñe ama'o ao ty fangololoihañe, vaho hampibobò debole amo añambone iereoo hidrakadrakak' an-davenok' ao: ³¹ Hifandriritse maròy ty ama'o, naho hisikiñe lamban-gony, vaho hirovetse an-kaferon'arofo naho hangoihoy an-kafairañe. ³² Amy fangololoihañey ty hañonjonam-bekom-pandalàñe ho azo am-pirovetañe, ami'ty hoe; Ia ty mañirinkiriñe i Tsore, hambañe amy rinotsake anteñateña' i riakeiy? ³³ Ie nionjoñe boak' an-driak' ao o kilanka'oo, le nilifore'o ty fifokoñañe maro; nampañefoefo o mpanjaka' ty tane toio

[‡] 27:18 Damesèke: gony pea-dio; miforehetse § 27:18 Kelbone: vondrake; kobokara * 27:21
Arabe: mampitombo; mikitro-draty; † 27:21 Kedare: mpivily an-taña'o; hontoke ‡ 27:22
Sebà: fitofañe; fanta § 27:22 Raama: ampiñe; folo'ay; haratiañe * 27:23 Karane; tane
am-bohibohitse † 27:23 Kanè: ndra Kalnè: ty fahahenefan-tika ‡ 27:23 Edene: hafalea;
haravoravaña § 27:23 Kilmade: mañòke ndra mianatse

ami'ty hatsifotofoto'
 o kilanka'oo, naho o balibali'oo. ³⁴ Amy andro namolaha' i riakey
 azoy an-kalale' o ranoo ao,
 le fonga nirotsake
 ty fifampibalibalihañe naho
 i valobohòke ama'oy. ³⁵ Songa nidaba ty ama'o
 o mpimoneñ'an-tokonose añaeo,
 naho niazo' ty anifañe o mpanjaka'eo
 nitsololòk' an-daharañe. ³⁶ Mikosìke azo
 o mpanao takinak' añivo' ondatioo;
 fangetraketrahañe nainai'e rehe,
 vaho le lia'e tsy ho ao ka.

28

¹ Niheo amako indraike ty tsara' IEHOVÀ nanao ty hoe, ² O ana'ondatio,
 saontsio ty hoe ami'ty roandria' i Tsore, Hoe ty nafè' IEHOVÀ Talè:
 Amy t'ie nañonjoñe ty tro'o,
 nanao ty hoe:
 zaho ro 'ndrahare,
 mpiambesatse am-piambesan-
 ndrahare eo,
 anteñateñan-driak' ao;
 te mone ondaty rehe
 fa tsy Andrianañahare,
 najado'o ho arofon'añahare ty tro'o;
³ toe mahihitse te amy Daniele rehe;
 tsy eo ty bisibisike
 hahafietaha' iareo ama'o;
⁴ ami'ty hilala'o naho ami'ty faharendreha'o
 ty nanontona'o vara, naho
 namoria'o volamena naho volafoty
 an-driha'o ao;
⁵ ty haliforan-kihi'o, o fibalibali'oo
 ty nampitomboa'o fanaña, vaho
 mitoabotse ty tro'o ty amo varao.
⁶ Aa le hoe ty nafè' IEHOVÀ Talè amy te nampijadoñe'o ho ndrahare ty tro'o:
⁷ Ingo arè te hampihitrifeko
 ama'o ty ambahiny,
 ondaty maozatse amo kilakila' ndatio,
 le ho tarihe' iereo
 ami'ty hafanjakan-kihi'o
 o fibara'eo,
 vaho ho tivà' iareo ty fireandrea'o.
⁸ Hagado' iareo mb'an-
 tsikeokeok' ao rehe,
 hihomak' ami'ty
 fivetraha' o zinamañe
 an-teñateñan-driakeo.
⁹ Aa mboe hatao'o añatrefa'
 i mpamono azoy hao ty hoe:
 zaho o ndrahare zao?
 Ihe ondaty avao,
 fa tsy Andrianañahare,

am-pità' i mañè-doza ama'oy.

¹⁰ Hikoromak' ami'ty fivetraha'
o tsy sinavatseo rehe,
am-pitàn-ambahiny;
amy te Zaho ty mitaroñe,
hoe t'IEHOVÀ Talè.

¹¹ Niheo amako ty tsara' IEHOVÀ nanao ty hoe: ¹² O ana'ondatio, añonjono
bekom-pandalàñe ty mpanjaka' i Tsorey ami'ty hoe:

Hoe t'IEHOVÀ Talè:
Nivolim-pitombon-kafoniran-drehe,
nilifo-kilala,
vaho niginok' an-katsomerentserañe.

¹³ Te Edene, golobon'Añahare ao rehe,
nisikine ze hene vatosoa;
ty odeme, ty pit'dà, ty diamondra,
ty tarsise, ty sohame, ty iasefè,
ty safira, ty nòfeke, ty barekate;
vaho nitseneñañe ama'o am-bolamena
an-tsata' ty mandolina naho ty soly,
amy andro nañoreñañe azoy.

¹⁴ Nimpanàkon-drehe
ry kerobe norizañey,
Zaho ty nampijadoñ' azo
tamy vohi-masin' Añaharey;
nihelohelo amo vato milebalebao.

¹⁵ Nitalango an-tsata'o iaby
boak' ami'ty andro nañoreñañ' azo,
ampara' te nitendrek' ama'o ty hakeo.

¹⁶ Nahalipo-tiñak' azo
ty fitoaboram-pibalibali'o,
naho nandilatse rehe;
aa le navokovokoko boak'amy
vojin'Añaharey,
vaho naretsako aman-keloke
amo vato milebalebao rehe
ry kerobe mpanakoñeo.

¹⁷ Nañonjoñe azo an-tro'o,
ty hamotsotsore'oy,
naniva azo ty hilala'o
ty amy filoeloea'oy;
nafetsako an-tane eo rehe;
napoko añatrefa' o mpanjakao, haharendreha' iareo azo.

¹⁸ Fa nitivae'o i toe'o miavakey
amo tahi'o tsifotofotoo,
amo hakeom-pibalibali'oo;
aa le nañakarako afo boak'am-po'o ao,
ze nahaforototo azo,
tinenoko ho lavenok' an-tane eo
am-pahaoniña' ze hene mahaisake.

¹⁹ Songa nilatsa' ze nahafohiñe azo
amo kilakila'ndatio;
nivarata rehe vaho tsy ho eo ka.

²⁰ Niheo amako ty tsara' IEHOVÀ nanao ty hoe: ²¹ O ana' ondatio ampiatrefo mb'e Tsidone ty lahara'o le mitokia ama'e ²² ty hoe, Hoe ty nafè' IEHOVÀ Talè:

Heheke te miatrek'azo raho ry Tsidone;
le ho rengeñe añivo'o ao raho;
naho ho fohi' iareo te Zaho IEHOVÀ,
ie ametsahako zaka,
vaho haveheñe ama'e.

²³ Hañitrifako angorosy
naho lio amo lala'eo
naho hitsingoritritse añivo'e ao o fereo,
ty asam-pibara miarikoboñe aze,
vaho ho fohi' iareo te Zaho IEHOVÀ.

²⁴ Aa le lia'e tsy ho aman-droi-piteke
i anjomba' Israeley,
ndra fatike hampinòtse aze
boak' amo mpiarikoboñe malaiñe azeo;
vaho ho fohi' iareo
te Zaho IEHOVÀ Talè.

²⁵ Hoe ty nafè' IEHOVÀ Talè: Ie atontoko amo hene nampiparatsiahako aze añaeo ty anjomba' Israele, naho fa nampiavaheko am-pihaino' o kilakilla' ndatio ²⁶ le himoneña' iareo i tane natoloko amy mpitoroko Iakobeiy. Hiaiñañoleñañe jereo naho hañoreñe kivoho naho hañalahala tanem-bahe le himoneñ' an-kanintsiñe ao, ie fa nametsahako zaka o mpamaoke mañohoke iareo vaho ho fohi' iareo te Zaho IEHOVÀ Andrianañahare' iareo.

29

¹ Amy andro faha-folo-ro'ambi' i volam-paha-folo' i taom-paha-foloy le niheo amako ty tsara' IEHOVÀ nanao ty hoe: ² O ana'ondatio, ampañatrefo amy Parò mpanjaka' i Mitsraime ty lahara'o vaho mitokia ama'e naho amy Mitsraime iaby. ³ Itaroño ty hoe, Hoe ty nafè' IEHOVÀ Talè:

Oniño te miatreatre azo raho ry Parò,
mpanjaka' i Mitsraime,
ty fañaneña jabajaba mitsalalampatse
añivo'o saka'eo,
manao ty hoe: Ahiko o sàkakoo,
fa namboareko ho ahy.

⁴ Aa le hajoko am-balañorà'o ao
ty porengotse vaho hampipetaheko
an-tsisi'o eo o fian-tsaka'oo,
le hakareko boak' añivo'
o saka'oo
rekets' o fian-tsaka'o mipiteke
amo sisi'o iabio,

⁵ vaho hahifiko an-dratraratra aña,
ihe naho o fian-tsaka'o iabio
hideboñe a' moka aña,
tsy hatontoñe, tsy havory;
fa natoloko ho fihina' o bibin-kivokeo
naho o voron-dikeraña.

⁶ Ie amy zay ho fohi' ze hene mpimoneña e Mitsraime ao te Zaho IEHOVÀ, amy t'ie nitahom-bararata amy anjomba' Israeley. ⁷ Rinambe' iareo am-pitàn-drehe le nipekañe nandriatse ty fità' iareo iaby; aa ie niato ama'o le nifolake nampikoletrake o toha' iareoo. ⁸ Aa le hoe ty nafè' IEHOVÀ Talè:

Inao te hendesako fibara hañitoako ze ondaty naho hare ama'o ao. ⁹ Le ho bangiñe naho koake ty tane Mitsraime; vaho ho fohi' areo te Zaho IEHOVÀ, amy ty natao'o* ty hoe, Ahiko i sakay, zaho ty nañoreñe aze, ¹⁰ le oniño te atreatrèko rehe, naho o saka'oo, vaho hampangoakoaheko ty Mitsraime ho vahiny boak' am-pitilik'abo' i Sieney† pak'añ'efe-tane' i Kose aña. ¹¹ Leo fandia' ondaty tsy hiranga ao; tsy ho rangaen-tombom-biby, vaho tsy ho amam-pimoneñe am-para' ty efa-polo taoñe. ¹² Le hanoeko bangiñe añivo' o fifeheañe vahinio ty Mitsraime, naho ho koak' añivo' o rova narotsakoo o rova'eo; naho hampiparatsiaheko añivo' o kilakila' ndatio aña o nte-Mitsraimeo naho havitavítako amo fifeheañeo, ¹³ le hoe t'IEHOVÀ Talè: Naho modo i taoñe efa-polo rey le hatontoko boak' am' ondaty nampivarakahako iareo o nte-Mitsraimeo. ¹⁴ Le hampibiliheko ty fandrohizañe i Mitsraime, naho hampoliko mb'an-tane' Patrose‡ mb'eo, mb'an-tane fimoneña' iareo, f'ie ho fifiheañe mireke. ¹⁵ Hireke re te amo fifelehañe ila'eo; tsy hañonjom-batañe ka ambone' o fifeheañe ila'eo, fa hafotsako tsy hifehea' iareo o kilakila' ndatio ka. ¹⁶ Toe tsy ho fiatoa' ty anjomba' Israele ka re, hampitiahie'e o hakeo'eo, ie orihe' iereo fiaino, fa ho fohi' iareo te Zaho IEHOVÀ Talè.

¹⁷ Aa ie amy andro valoha' i volam-baloha' i taom-paha-roapolo-fitambiy, le niheo amako ty tsara' IEHOVÀ ami'ty hoe: ¹⁸ O ana'ondatio, Nampitoroñe' i Nebokadnetsare mpanjaka' i Bavele fitoroñam-bey amy Tsaore o lahin-defo'eo; songa peake o añambone'eo naho sindre nivoloseñe o soro'eo; fe tsy nitambezen-dre ndra i lia-rai'ey ty amy Tsore, amy fitoloñañe nanoe'e ama'ey. ¹⁹ Aa le hoe ty nafè' IEHOVÀ Talè: Ingo, atoloko am-pità' i Nebokadnetsare mpanjaka' i Bavele ty tane' Mitsraime; le hendese'e o valobohò'eo naho ho kopahe'e o vara'eo, vaho ho rambese'e o hare'eo; zay ty ho tamben-dahin-defo'e. ²⁰ Fa natoloko aze ty tane Mitsraime ty amy fitoloñañe nitoroña'ey, amy te nitoroñe ahy hoe t'IEHOVÀ Talè.

²¹ Amy andro zay, le hampitäröke ty tsifa' i anjomba' Israeley raho, le hatoloko azo ty fisokafam-palie añivo' iareo ao; vaho ho fohi' iareo te Zaho IEHOVÀ.

30

¹ Niheo amako indraike ty tsara' IEHOVÀ nanao ty hoe: ² O ana'ondatio, mitokia ami'ty hoe: Hoe ty nafè' IEHOVÀ Talè:
Mangololoiha! Feh' ohatse ty andro!

³ Antitotse i àndroy,
mitotoke ty andro' IEHOVÀ,
andro higoboñe;
ty andro' o kilakila' ndatio.

⁴ Hiambotrak' amy Mitsraime ty fibara,
Fangirifiriam-bey e Kose ao,
ie hitsingoritritse e Mitsraime ao
o zinamañeo,
hasese' iareo aña o valobohò'eo,
vaho harotsake o faha'eo.

⁵ Hitrao-pihotrak' ama'e am-pibara
t'i Kose naho i Pote naho i Lode
naho ondaty mifanamboentamboeñeo

* **29:9** Heb: natao'e † **29:10** Siene; rogoñe; harafelahiañe ‡ **29:14** Patrose: falie lifon-kobo; ho rotsake

naho i Kobe*,
rekets' ondati' i tane mpiama'eo.

⁶ Hoe ty nafè' IEHOVÀ: Songa hikorovoke
ze mpanohañe i Mitsraime,
hipoñake ka ty firengevoha'e
amo haozara'eo,
hampihotrahe' ty fibara iereo
boak' am-pitalakesañ' abo' i Siene,
hoe t'IEHOVÀ Talè.

⁷ Ho koaheñe amo fifeheañe
harotsakeo iereo,
vaho hitrao-pijoiañe amo rova
ho joieñe o rova'eo.

⁸ Le ho fohi' iareo te Zaho IEHOVÀ,
t'ie namiañe afo e Mitsraime ao
naho fonga ho folake o mpañolo'eo.

⁹ Hionjoñe boak' amako amy andro zay
ty niraheñe an-tsambo maro
hampangebahebake
o nte Kose manintsíñe,
le hirevendreveñe manahake
tañ'andro' i Mitsraime;
fa heheke te ho tondroke.

¹⁰ Hoe ty nafè' IEHOVÀ Talè,
hajihoko ty valobohò' i Mitsraime
am-pitá' i Nebokadnetsare
mpanjaka' i Bavele.

¹¹ Ie rekets' ondati'eo;
le hendeseñe hampianto i taney
o maozatse amo kilakila' ndatioo
naho hapontsoa'iareo fibara
t'i Mitsraime,
vaho hañatseke i taney ami'ty vinono.

¹² Ho maiheko o sakao,
le hatoloko am-pitá'
o tsereheñe i taney;
vaho ho joieko i taney
naho ze hene ama'e ao
am-pitán'ambahiny.
Zaho IEHOVÀ ty nitsara.

¹³ Ty hoe ty nafè' IEHOVÀ Talè:
Ho fonga joieko o sarendraha,
hajihoko ka o sampsampo' i Nofeo†
tsy ho aman-droandriañe ty
tane' Mitsraime, vaho
hapoko an-tane Mitsraime ty anifañe.

¹⁴ Hanoeko bangiñe ty Patrose
le hamiañako afo ty Tsoane‡,
vaho hafetsako amy No ty zaka.

¹⁵ Hakofòko amy Sine§ ty fifomboko,
i haozara' i Mitsraimey;

* 30:5 Kobe: Ondaty raike mañohoke Egipte † 30:13 Nofe: papi-tatnele; ze mitsopatsopake

‡ 30:14 Tsoane: fihetseke § 30:15 Sine: rongoñe

naho haitoako ty valobohò' i No.

¹⁶ Hampirehetako afo ty Mitsraime;
hanaintaiñe ty Sine, hitori-anjake ty No,
ho forekekène boak' andro t'i Nofe,

¹⁷ Hampihotrahem-pibara o ajalahi'
i Avene* naho i Pi-Beseteo†,
vaho hasese aña aman-drohy i rova rey.

¹⁸ Hanoeñe maieñe ty andro

e Tapanekese‡ ao
ie hampipozaheko
ty joka' o nte-Mitsraimeo,
naho hijihetse ama'e
ty habohabohan-kaozara'e;
ie hikopaha' ty rahoñe,
vaho hasese am-pandrohizañe aña
o anak'ampela'eo.

¹⁹ Zay ty hametsahako zaka

amy Mitsraime;
vaho ho fohi' iereo te Zaho IEHOVÀ.

²⁰ Aa ie amy andro faha-fito' i volam-baloha' ty taom-paha-folo-raik'ambiy, le niheo amako ty tsara' IEHOVÀ nanao ty hoe: ²¹ O ana'ondatio, fa pinozako ty sira' i Parò mpanjaka' i Mitsraime; le Inao, t'ie tsy nibandieñe amañ' aoly, tsy naholonkoloñe ho melañe, hahafitam-pibara.

²² Aa le hoe ty nafè' IEHOVÀ Talè; Oniño te hatreatrèko t'i Parò mpanjaka' i Mitsraime, naho ho pozaheko i sira'ey, i maozatsey, i nifolakey; vaho havotsoko am-pità'e ty fibara'e. ²³ Le hampiparaitaheko amo kilakila'ndatio o nte-Mitsraimeo, vaho hampiboelèko amo fifeheañe. ²⁴ Le hampaozareko o sira' i mpanjaka' i Baveleo, naho hapoko am-pità'e ty fibarako, fe ho pozaheko o sira' i Parò, vaho hitretretretre manahake ty fañitoza ondaty fere mitarik' aiñe taolo'eo. ²⁵ Aa le hampaozareko ty sira' i mpanjaka' i Baveley, fe hiradorado ambane o sira' i Paroo; le ho fohi' iareo te Zaho IEHOVÀ, ie atoloko am-pitam'-panjaka' i Bavele ty fibarako vaho hatorakitsi'e an-tane Mitsraime. ²⁶ Le habaratsako amo kilakila'ndatio o nte-Mitsraimeo, naho havarakaiko amo fifeheañe, vaho ho fohi' iareo te Zaho IEHOVÀ.

31

¹ Aa tamy taom-paha-folo-raik'ambiy amy andro valoham-bolam-paha-teloy, le niheo amako ty tsara' IEHOVÀ nanao ty hoe: ² O ana' ondatio, saontsio t'i Paro mpanjaka' i Mitsraime naho i volobohò'ey:
Mañirkiriñ'ama' ia rehe
amo fitoabora'oo?

³ Hehe ty mpanjaka' i Asore ie ni-mendoraveñe e Libanone aña
aman-tsampa'e fanjaka,
amañ'aloce mangonkoñe,
niningongo nañambone;
nitiotiotse amo tsampañe boda'eo
o lengo'eo.

⁴ Namahañe aze o ranoo;
nampandigiligy aze mañambone i lalekey;

* **30:17** Avene: hakeo; haozara; vara; anahelo † **30:17** Pi-Besete: akiba 'nahare' ampela Besete
‡ **30:18** Tapanekese: Oniño Ier. 2.16: fañahy

niariary am-pandia'eo o saka'eo,
nahitri'e mb'amo hene hatae
an-kivokeo o fikararaha'eo.

⁵ Aa le fonga niandikera' ze hatae
an-kivokey ty haabo'e,
nihamaro o tsampa'eo,
nihalava o tora'eo
ty amo rano'e maroo,
le nampitakare'e mb'eo.

⁶ Rinare' o hene voron-dikerañeo
amo tsampa'eo o traño'eo,
naho añ'alo' o tora'eo
te niteraha' o bibin-kivokeo o ana'eo,
vaho nitsolok' ambane talinjo'e eo
ty valobohò' o fifeheañe iabio.

⁷ Nihamim-batan-dre amy hara'elahi'ey,
ami'ty fandrevaha' o tsampa'eo,
amy te nahatakatse rano maro o vaha'eo.

⁸ Tsy nanaroñe aze o mendorave
an-golobon' Añahareo,
tsy nanahake o tora'eo o akaoo,
vaho tsy nañirinkiriñe o tora'eo
ty nonoke;
leo hatae raik' an-golobon' Añahare ao
tsy nihambañe amy ha'fanjàka'ey.

⁹ Zaho ty nampitsomerentseren' aze,
ami'ty fandrevaha' o ra'eo;
vaho sindre nitsikirik' aze
ze hatae Edene ao,
an-golobon' Añahare ao.

¹⁰ Aa le hoe ty nafè' IEHOVÀ Talè: amy t'ie nañonjom-batañe añ'abo ey
naho nampiningongoetse mb'an-drahoñe ey ty lengo'e, vaho nirengenvoke
ty arofo'e ami'ty fitoabora'e; ¹¹ le fa natoloko am-pità' i maozatse amo
kilakila' ndatioy; ie ty hiatreatre aze; amy t'ie fa finirako ambane ty
amo haloloa'eo. ¹² O ambahinio, ty maozatse amo kilakila'ndatio, ty
hañatsak' aze naho hapo'e eo; hideboñe amo vohitseo o tora'eo, naho
amo vavataneo, naho hipozake marine o saka' i taneio o ra'eo; le hisitak'
amy talinjo'ey ze hene ondati' ty tane toy, vaho haforintseñe. ¹³ Hidoñe
amy firotsaha'ey ze kila voron-dikerañeo, vaho ho amo tsampa'eo ze hene
bibin-kivoke, ¹⁴ soa te tsy ho amo hatae añ'olon-drano ty hionjom-batañe
ty amy haandikera'ey, ndra hampitiotiotse o tsampa'eo ambone' o bodan-
tora'eo, naho tsy hitroatse hijoalajoala añivo' o ra'eo ze hene mpikama
rano; fonga hatolotse am-pihomahañe iereo, pak'an-tsikeokeo' ty tane toy
añivo' o ana'ondaty fa nigodañe an-kiborio.

¹⁵ Aa hoe t'IEHOVÀ Talè; Amy andro nizotsoa'e mb'an-tsikeokeok' aoy,
le nampandalako; nakopoko ho aze i lalekey, naho sinebako o fisorotom-
baha'eo, le hene nijihetse o ranoo; le nihontoke ho aze t'i Libanone,
vaho fonga nitoirañe o hatae an-kivokeo. ¹⁶ Nampihondrahondraeko o
kilakila' ndatio ami'ty feom-pideboña'e, ie navokovokoko an-tsikeokeok'
ao hitraofa'e amo mizotso mb'an-koboñeо; naho nohòñeñe o hene hatae
Edeneo, naho o fanjàka amo hatae e Libanoneo; ze hene mpisi-drano, an-
tsikeokeo' ty tane toy ao. ¹⁷ Nitrao-pizotso ama'e mb'an-tsikeokeoke mb'eo
o zinamam-pibarao; naho o nimpitam-pialia'eo, o nimoneñe ambane' i

talinjo'ey añivo' o kilakila' ndatooo. ¹⁸ Ia arè ty añirinkiriña'o an-drengé naho ami'ty hajabahina'o añivo' o hatae Edeneo? F'ihe ho firaené rekets' o hatae Edeneo, homb' an-tsikeokeo-ty tane toy ao; händre añivo' o tsy sinavatseo, mindre amo zinamam-pibarao. Zay ty amy Parò naho ondati'e iabio, hoe t'IEHOVÀ Talè.

32

¹ Aa ie amy androm-baloha' ty volam-paha-folo-ro' ambi' i taom-paha-folo-ro-e-ambiy, le niheo amako ty tsara' IEHOVÀ manao ty hoe: ² O ana'ondatio, ampionjono bekom-pandalàñe t'i Parò mpanjaka' i Mitsraime le ano ty hoe,

Hambañe ami'ty liona tora'e
añivo' o kilakila' ndatio rehe,
nahó manahake ty trozoñe an-driak' ao,
ie nitsititiak' amo saka'oo,
nahó nitsoborè'o am-pandia o ranoo,
vaho linoto'o o fitsirtsioha'eo.

³ Aa hoe ty nafè'IEHOVÀ Talè:
Ami'ty firimboñam-pifokoañe maro
le halafiko ama'o ty harato,
vaho hampionjoneñe
an-karatoko boak' ao.

⁴ Le hafetsako an-tamboho eo,
nahó havokovokoko an-kivoke eo,
hampivotraheko ama'o
o voron-dikerañeo,
vaho ho vontsiñeko ama'o iaby
ze kila bibi' ty tane toy.

⁵ Le hapoko amo haboañeо ty nofo'o,
nahó ho liporeko ami'ty haleora'o
o vavataneo.

⁶ Ho tondrahako amo lio'o
midoandoañeо i tane ilañoa'oy,
pak' am-bohitse ey;
vaho ihe ty hibanara' o sakao.

⁷ Aa ie nampimongoreko,
ho kolopofako i likerañey
nahó hanoeko maieñe o vasia'eo;
ho saroñeko rahoñe i àndroy,
vaho tsy hañomey ty hazavà'e i volañey.

⁸ Hampimoromoroñeko ze hene hazavàñe
mireandreañe an-dikerañey ey ty ama'o,
vaho hapoko an-tane'o ao ty ieñey,
hoe t'IEHOVÀ Talè.

⁹ Hampilonjereko ty arofo' ondaty maro, ie hafetsako amo kilakila'
ndatio ty firotsaha'o, amo fifeheañe mboe tsy fohi'oo. ¹⁰ Vaho hampi-latsàko ty rofòko maro, hampangebahebaheñe ty ama'o o mpanjaka'eo, ie ahelahelako aolo' iareo eo ty fibarako, ie hitolom-pihondrahondra, songa hirombak' aiñe, amy andro hikorovoha'oy. ¹¹ Aa hoe ty nafè' IEHOVÀ Talè: Hiambotrak' ama'areo ty fibaram-panjaka' i Bavele. ¹² Ty fibara' o fanalolahio ty hampihotrako ondati'oo; songa lahitsiay amo kilakila'
ndatio;
Ho rotsahe' iareo

ty firengevoha' i Mitsraime,
vaho kila haitoañe i valobohò'ey.

¹³ Ho fonga zamaneko o hare'eo
boak' amo rano'e maroo;
le lia'e tsy ho lotoem-pandia' ondaty
ndra hòtrom-biby.

¹⁴ hampidreteko o saka'eo,
hampsirtsioheko hoe menake
o toraha'eo,
hoe t'IEHOVÀ Talè.

¹⁵ Ie hampangoakoahoko ty tane'
i Mitsraime,
ho tavaneñe aña ty havokara' i taney,
naho lafaeko iaby o mpimoneñe,
le ho fohi' iereo te Zaho IEHOVÀ.

¹⁶ Zay i bekom-pandalàñey le ho saboe' iereo; ho saboe' o anak'
ampela' o kilakila' ndatio, vaho ho bekoe' iereo amy Mitsraime naho amo
valobohò' iabio, hoe t'IEHOVÀ Talè.

¹⁷ Ie amy androm-paha-folo-lim' ambi' i volañeiy amy taom-paha-
folo-roe ambiy, le niheo amako ty tsara' IEHOVÀ, manao ty hoe: ¹⁸ O
ana' ondatio, mibekoa amy valobohò' i Mitsraimey le afetsaho ambane,
mb'an-tsikeokeoke mb'eo, ie naho o anak'ampela' o fifeheañe maozatseo,
hitraofa'e amo migodañe an-koboñe.

¹⁹ Ia ty andikoara'o ami'ty
hamontramonta'r?
Mizotsoa rehe, hampipololoraña
amo tsy nisavareñe.

²⁰ Hikorovok' añaivo' o zinamam-pibarao iereo; natolotse amy meso-
lavay; endeso mb'etoy re naho ze hene ondati' e. ²¹ Hisaontsy ama'e naho
amo mpañolots' azeo ty maozatse amo fanalolahy boak' an-Tsikeokeokeo
ami'ty hoe: fa nigodañe ao iereo, mitsalalampatse amo tsy nisavareñe,
vinonom-pibara.

²² Ao ty Asore naho o mpirai-lia'e iabio; miarikoboñe aze o kibori'eo; kila
zamañe, tsiningorom-pibara; ²³ an-tsikeokeo' i koboñey o kibori' iareoo.
Mandre mañohoke o kibori'eo o mpirai-lia'eo. Fonga mifitak' ao o lahin-
defo'eo. Fa zinamañ'an-kotakotak' ao, ie nañembañ' ondaty an-tane o
veloñe.

²⁴ Ao t'i Elame* rekets' o fonga lahin-defo'eo miarikoboñe i kibori'ey.
Songa vinono, nampikorovohem-pibara, nigodañe ambane tane ao o tsy
nisavareñe. Nampirevendreveñe' iereo ondaty an-tanen-kaveloñeo, f'ie
mitrao-kasalaraña amo nigodañe an-koboñeo henaneo. ²⁵ Nandranjam-
pandreaña t'i Elame añaivo' o navetrakeo rekets' i valobohò'ey. Fonga
mañohok' aze eo o kibori'eo, songa tsy nisavareñe, linihim-pibara ty amy
fangebahebaha' iareo ondaty an-tanen-kaveloñey. Aa le vavè' iareo ty
hameñaraña mindre amo mizotso an-koboñeo, ie napok' an-teñateña' o
nikoromakeo.

²⁶ Ao t'i Meseke Tobale vaho o valobohò'eo; sindre arikatohe' o
kibori'eo, songa tsy nisavareñe, zinamam-pibara ie nampivorombelo'
ondaty an-tanen-kaveloñeo ao. ²⁷ Toe tsy hitrao-pandreañ' amo fanalolahy
nitsingoritritse amo tsy nisavareñeo iereo, o nigodañe an-Tsikeokeok' ao
rekets' o fialia' eeo naho miondam-pibara ambane' o añambone'eo, ie

* **32:24** Elame: ajalahy; ampela miehaña; tsiko

amo taola'eo o hakeo'eo ami'ty nampitsololoha' iareo ondaty an-tane o veloñeo. ²⁸ Hete! ho folahéñ an-teñateña' o tsy nisavareñeo rehe vaho hipololotse amo zinamam-pibarao.

²⁹ Ao t'i Edome, naho o mpanjaka'eo, vaho o roandria'eo; songa mandre amo binaibaim-pibarao rekets' o haozara'eo; hitrao-pitsalalampatse amo tsy nisavareñeo, o fa nigodañe an-koboñeo.

³⁰ Ao ka o roandria' tavaratseo, ie iaby, naho ze hene nte-Tsidone, ze fa nigodañe mañambane aña mitraok' amo zinamañeo naho ami'ty fange-baheba' iareo, salatse iereo amo haozara'eo; mandre ami'ty tsy fisavara' iereo ao rekets' o zinamam-pibarao, mivave o fisalara'eo mindre amo migodañe mb'an-koboñeo. ³¹ Hahaisake iareo t'i Parò ie hampitsiñen amy valobohò'ey; eka, i Parò naho o fonga lia-rai'eo songa binaibaim-pibara, hoe t'IEHOVÀ Talè. ³² Amy te nitsitsifeko an-tanen-kaveloñe ao ty fangetraketraha'e, le handre añivo' o tsy nisavareñeo amo zinevom-pibarao t'i Parò naho i valobohò'ey, hoe t'IEHOVÀ Talè.

33

¹ Niheo amako ty tsara' IEHOVÀ manao ty hoe: ² O ana' ondatio, misaontsia amo ana' ondati'oo vaho ano ty hoe: Naho endesako fibara i taney, naho mangalake ondaty boak' amo efe'eo, ondati' i taney, naho hajadoko ho mpijilo' iareo; ³ le ie oni'e te miheo mb'amy taney mb'eo i fibaray, ho tiofe'e i antsivay hitalily am'ondatio, ⁴ le ndra ia ia mahajanjiñe ty fipopò' i antsivay fe tsy mañaoñe i hatahata'ey; vaho maniotse aze aña ty fitorotosi' i fibaray, le ho ama'e ty lio'e. ⁵ Jinanji'e ty feo i antsivay fe tsy hinao'e i hatahatay; ho ama'e i lio'ey, ie ho nandrombak'ay te hinao'e i hatahatay. ⁶ Aa naho oni' i mpijiloy te miheo mb'eo i fibaray fe tsy tiofe'e i antsivay le tsy hatahataeñe ondatio, aa naho asiom-pibara t'indaty boak'am' iereo ao, le hendeseñe ty amo tahi'eo indatiy; fe ho paiako am-pitá' i mpijiloy ty lio'e.

⁷ Ihe, ry ana' ondatio, ty najadoko ho mpijilo i anjomba' Israeley; aa le ho janjiñe'o ty taroñem-bavako vaho ho hatahatae'o ty amako iereo. ⁸ Aa naho volañeko i lo-tserekey ty hoe, O ty lo-tsereke tia, toe havetrake rehe; aa naho tsy hatahatae'o i lo-tserekey ty amo sata-rati'eo, le hivetrake amo hakeo'eo re, fe ho paiako am-pitá'o ty lio'e. ⁹ Aa naho talilie'o* i lo-tserekey o sata-rati' eo, hibalintoa'e, fe tsy amboho'a'e i sata'ey, le hikenkañe amo tahi'eo, fe ho rinomba'o ka ty fiai'o.

¹⁰ Aa ihe ry ana'ondatio, misaontsia amy Anjomba' Israeley: Le ano ty hoe: Hoe nahareo: Amantika o fiolàñe naho tahin-tikañeo, le fa mampinike an-tika. Aa vaho akore arè ty hiveloman-tika? ¹¹ Ano ty hoe am'iereo: Kanao velon-dRaho, hoe t'IEHOVÀ Talè, Tsy mipay ty fikoromaha' o lo-tserekeo raho, fa t'ie hibalintoa amo sata'eo ho veloñe; mitoliha arè, mibalintoña amo sata-rati' areoo, fa ino ty hihomaha' areo ry anjomba' Israeleo? ¹² Tovoño ty hoe, Ry ana' ondatio, ano ty hoe o ana' ondati'oo; Tsy haharombake ty vaño ty havañona'e amy andro iolà'ey; naho tsy hahatsikapy ty lo-tsereke i halò-tsere'ey amy andro ifotera'ey; vaho tsy hahaveloñe i vañoñey ty havañona'e amy andro andilara'ey. ¹³ Ie anoeko ty hoe i vañoñey, Toe ho velon-drehe; fa iatoa'e i havañona'ey vaho mandilatse, le tsy ho tiah y i hamarentane'ey; fa i hakeo nanoe'ey, ty hihomaha'e. ¹⁴ Aa naho hataoko ty hoe i lo-tserekey: Tsy mete tsy hikoromake rehe; le ie mibalintoa amo tahi'eo, naho manao

* ^{33:9} Fft 2:17, 3:4, Iek 3:18-21, 18:20-30

ty fahiti'e naho ty havantañañe, ¹⁵ naho avaha' i lo-tserekey i natsoa'ey, naho ampolie'e i nikamere'ey naho añaveloa'e o fañèn-kaveloñeo vaho tsy mandilatse ka, le toe ho velon-dre, fa tsy hikoromake. ¹⁶ Leo raik' amo hakeo nanoe'eo tsy hivoliliañe. Fa nanoe'e i havañonañey naho i havantañañey, le ho velon-dre.

¹⁷ Fa hoe o ana-dahi' ondati'oo, Tsy mahity ty sata' i Talè; toe i sata' iareoy ty tsy mahity. ¹⁸ Naho miamboho amy havañona'ey ty vañoñe naho manao hakeo, le hivetrake. ¹⁹ Naho mibalintoa amo sata-rati'eo ty lo-tsereke, vaho manao ty havantañañe naho ty havañonañey; le ho velon-dre. ²⁰ Fa anoe' areo ty hoe, Tsy vantañe ty lala' i Talè. Ry anjomba' Israele, Ho zakaeko nahareo, songa ty amo sata'eo.

²¹ Aa amy andro faha-lime' i volam-paha folo' i taom-paha-folo-ro' ambi' i fandrohiza'aiy, le niheo amako ty nahapolititse am' Ierosalaime, le nanoa'e ty hoe, Fa rotsake i rovay. ²² Toe tamako ty fità' IEHOVÀ amy haleñe aolo' ty nivotraha' i napolititsey, nanokake ty vavako aolo' t'ie nipok' amako amy maraiñey; aa le nisokake ty vavako le tsy nimoañe ka.

²³ Niheo amako ty tsara' IEHOVÀ nanao ty hoe: ²⁴ O ana' ondatio, hoe ty saontsi' ondaty mimoneñe an-dratraratra' Israele ao, Raike t'i Avrahame, le nifanaña'e i taney, fe maro tikañe, vaho natolotse an-tika ho fanañañe i taney. ²⁵ Aa le isaontsio ty hoe, Hoe ty nafè' IEHOVÀ Talè; Fikamà' areo ty raha aman-dio naho fiandrà' areo o sampsampo' areoo, vaho mampioridio; aa ho fanaña' areo hao i taney? ²⁶ Ie miato amy fibara' areoy, mikitrodraha raty, vaho songa mandeotse ty tañanjomban-drañe'e; aa vaho ho hanaña' areo hao i taney? ²⁷ Isaontsio ty hoe: Inao ty nafè' IEHOVÀ Talè: Kanao velon-dRaho, toe ho tsingoroem-pibara o an-dratraratrao, le ho fahanako o bibio hampibotseke ty an-kivok' ao, naho hampivetrahe' ty angorosy o an-kijoly vaho an-dakatoo. ²⁸ Fa hanoeko ratrarastra naho bangiñe i taney, le hijihetse ty firengevoha' i haozara'ey; le ho koake ty vohi' Israele, tsy ho amam-piranga. ²⁹ Le ho fohi' iereo te Zaho IEHOVÀ, naha-bangiñe naho ratrarastra i taney ty amo haloloñañe nanoe' iereo.

³⁰ Aa ihe, ry ana' ondatio, Mbe mifosa azo marine' o kijolio naho andala' o anjombao o ana-dahi' ondati'oo, sambe mivesoveso an-drahalahi'e ty hoe: Antao ito hijanjiñe ty tsara aboak' IEHOVÀ. ³¹ Aa le hiropak' ama'o hoe firimboñà' ondaty hiatrek' azo ondatikoo naho ho janjiñe' iereo o saontsi'oo, fe tsy hanoe' iereo; amy te mitsiriry avao o falie'eo, naho mañorike ty fitsikiriha' iareo o tro'eo. ³² Ingo manahake te mpibekompikokoaña am' iereo rehe, talango-am-peo, mahafititike marovany; toe tsendreñe' iareo o saontsi'oo, fe tsy hanoe' iereo. ³³ Aa ie mifetsake zay; (heheke te ho tondroke), le ho fohi' iereo te tañivo' iareo ao ty mpitoky.

34

¹ Niheo amako ty tsara' IEHOVÀ nanao ty hoe: ² O ana' ondatio; mitokia amo mpiarak' añondri' Israeleo, mitokia ty hoe amo mpiarakeo, Hoe ty nafè' IEHOVÀ Talè: Hankàñe amo mpiarak'añondri' Israeleo*, ie mamaham-batañe avao! tsy ho fahana' o mpiarak' añondrio hao o lia-rai'eo? ³ Riote' areo ty ronono'e, sikina' areo o volon-añondrio, lentà' areo o vondrakeo; fe tsy fahana' areo i lia-raikey. ⁴ Tsy ampaozare' areo ty maleme, naho tsy ampijangañañe ty marare, naho tsy bandie' areo ty folake, naho tsy ampoli' areo i nandifikey, vaho tsy paia' areo i nimotsoy; te

* ^{34:2} Iir 10:21

mone fisengean-kery naho fampisoañañe ty fifeleha' areo, ⁵ ie mibarakaik' aña fa tsy amam-piarake; aa le fitsindro' o bibin-kivokeo henaneo amy t'ie nibaratsake. ⁶ Nirereke o añondrikoo, nirererere amo vohitse iabio, naho amo hene haboañeo; songa nibarakaik' ambone' ty tane toy i lia-raikoy, vaho tsy teo ty nipay ndra nitsoeke.

⁷ Aa le janjiño ty tsara' IEHOVÀ ry mpiarake; ⁸ Kanao velon-dRaho hoe t'IEHOVÀ Talè, amy te ninjare fitsindrohañe i lia-raikoy, fihinana' ze biby an-kivok' ao, ie tsy amam-piarake; tsy pinai' o mpiarakeo i lia-raikoy, fa namaham-batañe o mpiarakeo, le tsy finaha' iareo i lia-raikoy; ⁹ inao arè, ry mpiarakeo, janjiño ty tsara' IEHOVÀ. ¹⁰ Hoe ty nafè' IEHOVÀ Talè: Oniño te atreatrèko o mpiarakeo; le ho paiako am-pità' iareo i lia-raikoy naho haziko tsy ho mpamahañe i lia-raikoy ka; vaho tsy hamaham-batañe ka o mpiarakeo; fa ho hahako am-palie' iareo i lia-raikoy, tsy ho fitsindroke.

¹¹ Hoe ty nafè' IEHOVÀ Talè; Inao, etoan-dRaho, ho paiako o añondrikoo, toe ho kodabaeko. ¹² Hambañe ami'ty fitsoeha' ty mpiarake i lia-rai'ey ami'ty andro maha-añivo' o añondri'e nifampiriariar, ty hidabadabaeko o añondrikoo handrombahako iareo amy ze hene toetse nibaratsaha' iareo an-kopok' andro migoboñey. ¹³ Le hampoliko boak' amo kilakila'ndatio iereo naho hatontoko boak' amo fifelehañe naho haseseko mb'an-tane' iareo ao vaho handrazeko amo vohi' Israeleo, marine' o sakao naho amy ze fonga kialo amy taney ao. ¹⁴ Ho fahanako am-piandrazañe maindoñe, naho ho golobo' iareo o haboa' Israeleo; ao ty handrea' iareo an-goloboñe soa; naho aña ahetsé vokatse; amo vohi' Israeleo ty hiandraze' iereo. ¹⁵ Ho fahanako i lia-raikoy vaho hampàndreko, hoe t'IEHOVÀ Talè. ¹⁶ Ho tsoeheko o nandifikeo, naho hampoliko indraike o rinoakeo naho ho bandieko ze nifolake vaho hampaozareko o nisilokeo, fa ho rotsaheko o vondrakeo naho o maozatseo, vaho hifahanako zaka.

¹⁷ Aa naho inahareo, ry lia-raiko, hoe ty nafè' IEHOVÀ Talè: Inao, t'ie hizaka añaivo' ty lia-raike naho ty lia-raike, vaho añaivo' ty añondri-lahy naho ty ose-lahy. ¹⁸ Atao' areo ho minjilite'e hao te nihàne' areo ty fiandrazañe soa, vaho nilialià' ty tombo' areo ty sisa' i fiandrazañey? le ie ninon-drano mitoratsike ro nandeotse ty sisa' i ranoy an-tombo' areo?

¹⁹ Aa le mihiñañe o nilalian-tombo' areoo o añondrikoo, vaho minoñe amo nileoren-tombo' areoo.

²⁰ Aa le hoe ty nafè' IEHOVÀ Talè am' iereo: Inao! Izaho le Zaho avao ty hizaka añaivo' o añondry vondrakeo naho o añondry boròkao; ²¹ amy te naronje' areo ami'ty ila'o naho an-tsoro'o, naho dinodo' areo an-tsifa ampara' te nabaratsa'o mb'alafe aña. ²² Ho rombaheko i lia-raikoy, naho le lia'e tsy ho fitsindrohañe ka; ie hizaka añaivo' ty añondry naho ty añondry. ²³ Le hampitroareko ty mpiarake hifehe iareo, le ho razañe'e, ty mpitoroko Davide zay; ie ty hiarake, ie ty ho mpiara' iareo. ²⁴ Zaho IEHOVÀ ty ho Andrianañahare' iareo, vaho i mpitoroko Davidey ty ho roandria' iereo; Zaho IEHOVÀ ty nitsara.

²⁵ Hampijadoñeko fañinam-pañanintsiñe iereo, vaho haziko alafe' i taney aña o biby maolao; ie hiaññañoleñañe am-patrambey ao naho hiroro aña'ala ao. ²⁶ Le hitolorako fitahiañe naho toetse mañohoke i vohikoy, hampahaviako an-tsa'e ty orañe naho ty oram-pañanintsiñe.

²⁷ Hamoa voa o hatae an-goloboñeo, naho hañakatse ty havokara'e ty tane, hierañerañe an-tane'e ao iereo vaho ho fohi' iereo te Zaho IEHOVÀ, ro nampibarabijo ty talirandran-joka' iareo naho nampipitsoke iareo am-pità' o nañondevoo. ²⁸ Ie le lia'e tsy ho' fitsatsà' o kilakila' ndatio ka naho tsy habotse' o bibin-taneo; te mone hiaññañoleñañe, vaho tsy eo ty

hañembañe. ²⁹ Hampitiriako ty hatae maro-tea; ie tsy ho mongore' ty kerè an-tane ao ka, vaho, ie tsy hivave ty hasalara' o kilakila' ndatio. ³⁰ Ho fohi' iereo te IEHOVÀ Andrianañahare' iareo raho, ty mpañimba' iareo; toe ondatiko i anjomba' Israele, hoe t'IEHOVÀ Talè. ³¹ Inahareo, ry añondriko, ry lia-raim-piandrazeko, toe ondaty, le Zaho ro Andrianañahare' areo, hoe t'IEHOVÀ Talè.

35

¹ Mboe niheo amako ty tsara' IEHOVÀ nanao ty hoe: ² O ana' ondatio, atrefo ty vohi-tSeire vaho itokio, ³ ami'ty hoe: Hoe ty tsara' IEHOVÀ Talè: Ry Vohi-tSeire, atreatrèko rehe, vaho hatorakitsiko ama'o ty tañako hampangoakoahako azo ho tane bangý. ⁴ Fonga ho rotsaheko o rova'oo le ho vahiny rehe vaho ho fohi'o te zaho IEHOVÀ; ⁵ amy t'ie nitan-keloke nainai'e naho nanolotse o ana' Israeleo ami'ty haozaram-pibara amy andron-kekoheko' iareoy, amy sam-pigadoñan-kaloloañey; ⁶ kanao velon-dRaho hoe t'IEHOVÀ Talè, le hañentseñako lio, hañoridañe azo ty lio; toe niheje'o ty lio'o, vaho lio ro hañotioty azo. ⁷ Le hampangoakoahoko naho ho babangoañeko t'i Seire, vaho haitoako ama'e ty miranga naho ty mimpoly. ⁸ Hatsefeko zamañe o vohi'eo, an-kaboa'o ey naho ambavatane'o ao; vaho an-tsaka'o iaby ao ty hikorovoha' o zinevom-pibarao. ⁹ Hampangoakoahoko nainai'e naho tsy hatroatse ka o rova'oo; vaho ho fohi'o te Zaho IEHOVÀ.

¹⁰ Amy te ihe nanao ty hoe, Ho ahiko i fifelehañe roe rey naho i tane roe rey, ho tavane'ay; fe tao t'IEHOVÀ. ¹¹ Aa kanao velon-dRaho hoe t'IEHOVÀ Talè, le ho toloñeko amy haviñerañe naho amy fikirañañe nitoloña'o an-karafelahiañey, vaho ho fohi' iereo te zaho ty nizaka azo. ¹² Le ho fohi'o te Zaho IEHOVÀ ty nahatsanoñe ty fifosa nanoe' areo amo vohi' Israeleo ami'ty hoe: Kanao nengañe bangiñe, le natolotse antika habotseke. ¹³ Niebotsebotse amako am-bava rehe, vaho nampitoabore'o rehake; hene tsinanoko. ¹⁴ Hoe ty nafè' IEHOVÀ Talè: Toly ndra hirebeke ty tane-bey toy naho koahoko rehe, ¹⁵ manahake ty nirebeha'o amy lovan-anjomba' Israele, t'ie nangoakoake; zay ka ty hanoako azo; ho bangiñe ka rehe, ry Vohi-Seire, naho i Edome iaby, eka ie iabike; vaho ho fohi' iereo te Zaho IEHOVÀ.

36

¹ O ana'ondatio, Itokio ami'ty hoe o vohi' Israeleo: O ry vohi' Israeleo, janjiño ty tsara' IEHOVÀ. ² Hoe ty nafè' IEHOVÀ Talè: Kanao nanao ty hoe ty ama'o i rafelahi: Hede! fa amantika o haboañe haehaeo; ³ Le itokio ami'ty hoe: Hoe ty nafè' IEHOVÀ Talè: Amy t'ie nampangoakoahé' iereo naho nagedra' iereo añ' ila'o iaby soa te ho fanaña' o kilakila' ndaty p, naho fa rinambem-pivimbim-pitolom-bolañe vaho nifosae' ondatio; ⁴ ie amy zao, ry vohi' Israele, janjiño ty tsara' IEHOVÀ Talè: Hoe t'IEHOVÀ Talè amo vohitseo naho amo haboañe, amo sakao, amo vavataneo, amo mangokoakeo naho amo tane babangoañe vaho amo rova naforintseñeo, ie fitsindroha' o sehangan-kilakila' ondaty mañohok' azeo, ⁵ aa le inao ty nafè' IEHOVÀ Talè: Toe nivolañe ami'ty afom-piforoforoam-pamarahiako o kilakila'ondaty ila'eo naho i Edome iaby, o nitavañe i taney ho aze an-kafalean-troke iabio, ami'ty firengevoham-pañiria'e, hanifike aze aña ho tsindrokeo. ⁶ Aa le mitokia mb'an-tane' Israele naho misaontsia amo vohitseo naho amo haboañe naho amo sakao vaho amo vavataneo, ty hoe: Inao ty nafè' IEHOVÀ Talè: Ingo te nivolañe am-parahy naho foroforo

raho ty amy hasalarañe nifeaha'o vave, ⁷ aa le hoe ty nafè' IEHOVÀ Talè: Fa nañonjon-tsirañe Raho, toe hivave ty hasalara'e o kilakila'ndaty mañohok' anahareoo.

⁸ Inahareo ka, ry vohi' Israeleo, habarabijo' areo o tsampa'o naho o voka'eo le mamokara ho am'ondatiko Israeleo, ie antitotse te hitotsak'eo.

⁹ Ingo fa Mpíama' areo raho, naho hitolihako le ho trabaheñe vaho tongiseñe, ¹⁰ le hampitomboeko ama' areo t'ondaty, i hene anjomba' Israeley, eka ie iaby; vaho songa himoneñañe o rovao, le hamboareñe o haran-koakeo. ¹¹ Hampitomboeko ama'areo ty ondaty naho hare, hiraorao naho hangetseketeke; naho hampimoneñako manahake i tama'areo haehaey, naho hanoeko soa te am-pifotora' areo, vaho ho fohi' areo te Zaho IEHOVÀ. ¹² Hampañaveloeko ama' areo t'indaty, toe ondatiko Israeleo, le ho fanaña' iareo, ho lova' iareo vaho tsy hampirovete'o anake ka henane zay.

¹³ Inao ty nafè' IEHOVÀ Talè: Amy t'ie manao ty hoe; Mampibotseke ondaty rehe vaho nampihontofe'o o fifehea'oo, ¹⁴ aa le tsy hampibotseke ondaty ka rehe, vaho tsy hampandalà'o ana-dahy ka o fifehea'oo, hoe t'IEHOVÀ Talè. ¹⁵ Mbore tsy hampijineko azo ka ty hasalara' o kilakila' ndatio naho tsy ho vavè'o ty inje' ondatio vaho tsy hampsikapie'o ka o fifehea'oo, hoe t'IEHOVÀ Talè.

¹⁶ Niheo amako indraike ty tsara' IEHOVÀ manao ty hoe, ¹⁷ O ana' ondatio, Fa nileore' o sata'eo naho ty fitoloña' iareo i anjomba' Israele mimoneñe an-tane' iareoy; niatrek' ahy hoe fandeoran' ampela am-piambolañe ty sata' iareo. ¹⁸ Aa le nadoako am' iereo ty fifomboko ty amo lio nampiorihe' iereo an-taneo, naho o saposampo nanivà' iareo azeo; ¹⁹ le nabaratsako amo kilakila' ondatio vaho niparaitak' amo fifeheñaeo; o sata'iareoo naho o fitoloña'iareoo ty nizakako iareo. ²⁰ Aa ie nimoak' amo kilakila' ndatio, le tiniva' iareo i añarako masiñey; ie nanoa' ondatio ty hoe, Ondati' IEHOVÀ iretoñañe, ie fa nienga i tane'ey. ²¹ Aa le nitretrezeko i añarako masiñe nitivae' i anjomba' Israeley amo kilakila'ndaty nañaveloa'eoy.

²² Aa le saontsio ty hoe i anjomba' Israeley, Inao ty nafè' IEHOVÀ Talè: Tsy ty ama' areo ty anoako zao, ry anjomba' Israeleo, fa ty amy añarako masiñe tiniva' areo añivo' o kilakila'ndaty nañaveloa' areoo. ²³ Le ho masiñeko i añarako ra'elahi, i tiniva' areo añivo' o kilakila'ndatiyo, i vineta' areo anteñateña' iereoy; vaho ho fohi' o kilakila'ndatio te Zaho IEHOVÀ, hoe t'IEHOVÀ Talè, naho avahe' areo añatrefam-pihaino' iareo eo raho. ²⁴ Le ho rambeseko amo kilakila'ndatio nahareo, naho hatontoko boak' amy ze hene fifelehañe, vaho ho enteko mb'an-tane' areo mb'eo.

²⁵ Le ho fitsezako rano malio, naho halio amo haleora' areo iabio, vaho ho lioveko amo saposampo' areoo. ²⁶ Ho tolorako arofo vao nahareo, naho hampizilihako troke vao; naho hafahako am-pañova' areo ao i troke mamàtoy, vaho ho tolorako arofo nofotse. ²⁷ Aa le hajoko ama' areo t'i Troko* naho hampañoriheko o lilikoo soa te hambena' areo o fañèkoo, hitoloña' areo. ²⁸ Le himoneña' areo i tane natoloko aman-droae' areoy naho ho ondatiko nahareo vaho ho Andrianañahare' areo raho. ²⁹ Ho votsorako amo haleora' areoo; naho ho tokaveko i ampembay hamokara'e vaho tsy halamako ama' areo ty hasalikoñañe. ³⁰ Hampiregoregoeko ka o voan-kataeo, naho ty havokara' o tetekeo, tsy hinjè' ty kerè ka nahareo añivo' o kilakila'ndatio. ³¹ Ho tiahi' areo amy zao o sata-rati' areoo naho o fitoloñañe tsy vokatseo, vaho ho heje' areo vintañe am-pahaoniña' areo eo ty fiai' areo ty amo hakeo naho haloloa' areoo. ³² Tsy ty ama' areo ty

* ^{36:27} Iek 11: 19-20, 37:14, Iir 31:32, Rzs 1:23, Lke 11:13, Rom 8:14-16, Gal 5:22,23, Pe I 1:2, Jn I 3:24

anoako zay, hoe t'IEHOVÀ Talè, maharendreha; mimeñara naho misalara amo sata' areoo, ry anjomba' Israeleo.

³³ Hoe ty nafè' IEHOVÀ Talè: amy andro nañaliovako anahareo amo fonga tahi' areoo, fa hampimoneñako o rovao, vaho hamboareñe o tane hoakeo.

³⁴ Ho rokafeñe i tane bangiñey, ie napoke ho ratraratra amo mpiary azeo;

³⁵ ie nanoeñe ty hoe: Nihambañe an-tane Edene ty tane liolio toy taolo; vaho ni-fatratse i rova mangoakoake naho bangiñe reroañe. ³⁶ Le ho fohi' o kilakila' ndaty nengañe mañohok' anahareoo te Zaho IEHOVÀ ty namboatse o niantoo, vaho nambole i niliolioy; Zaho IEHOVÀ ty nitaroñe, Zaho ty hitoloñe.

³⁷ Hoe ty nafè' IEHOVÀ Talè: Zay ty hitsoeha' i anjomba' Israeley t'ie hitoloñe, le ho maroeko hoe lia-raike. ³⁸ Manahake o añondry miavakeo, o añondry an-tsabadidam-pitalahoa' Ierosalaimeo, ty hanitsifañe lia-rai' ondaty o rova hoakeo; vaho ho fohi' iareo te Zaho IEHOVÀ.

37

¹ Tàmako amy zao ty fità'IEHOVÀ, le nendese'e an-Tio' IEHOVÀ vaho navotra'e añivo' ty vavatane lifo-taolañe, ² le nampañariarie'e mb'eo mb'eo am' iereo ao, le nizoeko te maro ty ambone' i taney vaho nivata'e maike. ³ Le hoe re amako, O ana'ondatio, mete ho veloñe hao o taolañe reo? Le hoe ty natoiko: Ihe ry IEHOVÀ Talè ro maharofoanañe.

⁴ Le hoe re amako: Mitokia amo taolañe, ami'ty hoe: O ry taola-maikeo, Inao ty tsara' IEHOVÀ. ⁵ Hoe ty nafè' IEHOVÀ Talè amo taolañe retoañe: Inao! t'ie hampizilihañe tioke vaho ho veloñe; ⁶ le hapetako ama' areo ty lahin-ozatse naho handafihakonofotse, naho hasaroko holitse naho hajoko ama' areo ao ty kofòke, le ho veloñe, vaho ho fohi' areo te Zaho IEHOVÀ.

⁷ Toe nitokiako amy nandiliañe ahiy, aa naho nitoky, inay ty feo, hehe te nikarankaràñe vaho nifamitrañe o taolañe, taolañe ami'ty taolañe. ⁸ Ie nenteako, hehe te aman-dahin-ozatse, naho nipetak' am' iereo ty nofotse vaho nisaroña' ty holitse f'ie mboe tsy aman-kofòke. ⁹ Le hoe re amako, Mitokia amy tiokey; itokio ry ana'ondatio, vaho ano ty hoe i tiokey, Hoe ty nafè' IEHOVÀ Talè: Mb' etoa boak' amo tioke efatseo, ry Tioke, le mikofoha amo zinamañe reo, ho veloñe. ¹⁰ Aa le nitokiako amy namantoha'e ahiy, naho nizilike am'iereo ao ty tioke nahaveloñe vaho nitroatse am-pandia'e ty lian-dahin-defoñe mitozantozañe. ¹¹ Le hoe re amako, O ana'ondatio, Toe o anjomba' Israele iabio o taolañe; Heheke, hoe iereo, fa mikàntañe o taola'aio, naho motso ty fitamà'ay, vaho vata'e naitoñañe. ¹² Aa le itokio ami'ty hoe; Hoe ty nafè' IEHOVÀ Talè, Heheke ondatikoo, manokake o kibori' areoo raho vaho hakareko an-kibori' areo ao, mb'an-tane' Israele mb'eo, ¹³ le ho fohi' areo te Zaho IEHOVÀ, ie sokafe ko o lona' areoo, ry ondatikoo, naho akareko boak'an-kibori' areo ao, ¹⁴ naho hakofoko ama' areo ao ty Tioko, vaho ho veloñe, le hampitofàko an-tane' areo eo; ie amy zay ro hahafohiñe te Zaho IEHOVÀ ty nitsara naho nitoloñe, hoe t'IEHOVÀ.

¹⁵ Niheo amako indraike ty tsara' IEHOVÀ nanao ty hoe: ¹⁶ Ihe ry ana'ondatio, mandrambesa kobaiñe vaho isokiro ty hoe: Ho a Iehodà, naho o ana' Israele rañe'eo; le mandrambesa kobaiñe tovo'e, le isokiro ty hoe: Ho a Iosefe, ty kobai' i Efraime naho i hene anjomba' Israele mpiama'ey: ¹⁷ le avitraño, ty raik' amy raikey soa te ho raike; vaho ho raik' am-pitá'o ao.

¹⁸ Aa ie misaontsy ama'o o ana' ondatikoo, hanao ty hoe: Tsy hatoro'o anay hao ty lengo'e? ¹⁹ Le ty hoe ty ho asa'o am' iereo: Inao ty nafè' IEHOVÀ Talè: Oniño te ho rambeseko ty kobai' Iosefe boak' am-pitá' i Efraime rekets' o

fifokoa' Israele rañe'eo naho hatraoko ama'e naho haharoko amy kobai' Iehodà ho kobiñe raike, vaho ho raik' an-tañako ao. ²⁰ Aa le ho am-pita'o ao añatrefam-pihaino' iareo eo i kobiñe hisokira'o rey, ²¹ le hanoa'o ty hoe, Hoe ty nafè' IEHOVÀ Talè, Ingo ho rambeseko amo kilakila'ndatio o ana' Israeleo, amy nomba' iareo añey, le hatontoko boak' etia naho eroa vaho hampoliko mb'an-tane' iareo ao. ²² le hanoeko fifeheañe raike iereo am-bohibohi' Israeleo ao; naho mpanjaka raike ty ho mpanjaka' iareo iaby; le lia'e tsy ho fifelehañe roe ka iereo vaho tsy ho zaraeñe ho fifeheañe roe ka. ²³ Tsy haniva-vatañe amo sampsampa'eo naho amo raha veta' iareoo naho amo fiolà' iareo iabio ka iereo fa ho rombahoko amo kibohotse iaby nandilara' iareoo naho ho lioveko ho ondatiko vaho ho Andrianañahare' iareo raho.

²⁴ Ho mpanjaka hifehe iareo t'i Davide mpitoroko, le ho raik' avao ty mpiara' iareo; hañaveloa' iareo o likoo naho hañambeñe vaho hitana o fañekoo. ²⁵ Himoneña' iareo i tane natoloko am' Iakobe mpitorokoy, i nimoneñan-droae' areoy; toe himoneñe ao iereo rekets' o ana'eo naho o anan'ana'eo nainai'e kitro aña'afe'e, le ho mpifehe' iareo nainai'e t'i Davide mpitoroko. ²⁶ Mbore hanoako fañinam-panintsñañe, ho fañina tsy modo; hajadoko iereo naho hampidobodoeko vaho haoreko ho nainai'e añaivo' iareo ao i toeko miavakey. ²⁷ Ho am' iereo ao i kivohokoy, le Zaho ty ho Andrianañahare' iareo vaho h'ondatiko iereo. ²⁸ Le ho fohi' o kilakila'ndatio te Zaho IEHOVÀ ty mampiavake Israele ie añaivo' iereo ao nainai'e i toeko miavakey.

38

¹ Le niheo amako ty tsara' IEHOVÀ nanao ty hoe: ² O ana'ondatio, atrefo ty Goge* an-tane' i Magoget[†], roandria' ty rova-bey Meseke naho i Tobale vaho itokio ³ ami'ty hoe: Inay ty nafè' IEHOVÀ Talè, Inao ry Goge, roandria' ty rova bei' i Meseke naho i Tobale t'ie atrefeko; ⁴ hampibaliheko naho ho porengoteko o valañorà'oo, vaho ho kozozoteko mb'eo rekets' o lahindefo'o iabio, soavala naho mpiningitse, songa misikiñe fikalañe, valobohòke jabajaba songa an-kalan-defo naho fañaro-sirañe, sambe mitam-pibara. ⁵ Hitraok' am'iareo t'i Parase, i Kose vaho i Pote, songa amam-pikalañe naho fañaron-doha. ⁶ I Gomere‡ naho ze hene lian-dahin-defo'e; ty anjomba' i Togarmà boak' an-tsietoitane avaratse aña naho ze fonga firimboña'e naho ondaty maro mihipok' ama'oo. ⁷ Mañalankàña, le mihentseña, ihe naho o valobohòke nifanontone ama'oo, vaho ifeheo! ⁸ Ie modo ty andro maro le ho tilihen-drehe hitoroñe amy figadoñan-taoñey, haname i tane nivotsoreñe amy fibaraiy, o hinoloholo amo kilakila'ndatioo, mb' am-bohibohi' Israele mb'eo, ie nainai'e niratraratra; f'ie nakareña amo fifelehañe maroo vaho songa miaiñ' añaoleñañe. ⁹ Hionjom-beo hoe tio-bey rehe hanahake rahoñe manaroñe i taney, ihe naho ze hene firimboña'o naho o valobohòke mihipok' ama'oo.

¹⁰ Hoe ty nafè' IEHOVÀ Talè: hifetsak' amy andro zay, te, hionjo-mb' aña' arofo'o ao ty saontsy, hikitrok' an-tsafiry raty: ¹¹ hanao ty hoe: Hionjoñe mb'amy tane aman-tanañe tsy aman-kijoliy raho; haname o mitofao, o miaiñoleñañe, o songa mimoneñe tsy mifahetseo, tsy misikadañe tsy aman-dalambez, ¹² hikopahako naho hitsindrohako, hampitoliha'o fitàñe mb'amo tane nangoakoake fa imoneñañe naho mb'am' ondaty natontoñe amo kilakila'ndatio, ie aman' añaombe naho vara, mpimoneñe

* ^{38:2} Goge: tafo, saroñe † ^{38:2} Magog: saroñe; milevoñe ‡ ^{38:6} Gomera: mahafonitse

añivo' ty tane toy. ¹³ Hañontane azo t'i Seba naho i Dedane naho o mpanao balibali' i Tarsise, rekets' o ana-donak'ama'eo, Nivotrake eo hitavane vara hao? Nampirimboñe valobohòke hitsindroke hao, hitarazo volafoty naho volamena mb'eo, hinday hare naho kilankañe, hitavane fikopaham-bey?

¹⁴ Aa le mitokia, ry ana' ondatio, taroño amy Goge ty hoe: Inao ty nafè' IEHOVÀ Talè: Amy andro hiaññañoleña' ondatiko Israeleoy; tsy ho fohi'o hao? ¹⁵ Le hitandroake eo rehe boak' an-toe'o añ'ilà avaratse aña, ihe rekets' ondaty mitozantozañe, songa miningi-tsoavalà, valobohòke jabajaba vaho firimboñan-dahindefon-dra'elahy, ¹⁶ haname ondatiko Israeleo hoe rahoñe mampikopoke i taney, amo andro honka'eo, ie hendeseko mb'an-taneko mb'eo, hahafohina' o kilakila'ndatio ahy, le havahen-draho ty ama'o añatrefam-pihaino' iareo eo, ry Goge.

¹⁷ Aa hoe ty nafè' IEHOVÀ Talè: Tsy ihe hao ty nampisaontsieko o mpitorokoo, o mpitoki' Israeleo, ie nitoky tañ' andro zay t'ie tsy mete tsy ho tehfeko mb'am' iereo mb'eo? ¹⁸ Aa amy sa-panamea' i Goge ty tane Israele, hoe t'IEHOVÀ Talè: hitroatroake ty fiforoforoako. ¹⁹ Fa ty famarahiako naho fifomboko ty nivolañako, Toe ho fañozokozoñañe jabajaba ty an-tane' Israele ao amy andro zay, ²⁰ kanao sindre hititititike añatrefako eo ze fiañe an-driak' ao naho o voron-dikerañe, naho o bibin-kivokeo, naho ze raha milalilaly misitsitse an-tane eo, naho ze kila ondaty ambone' ty tane toy, mbore hihotrake o vohitseo, hihintsañe o tevañe vaho hikoromak' an-tane eo ze kijoly iaby. ²¹ Le ho ikoiheko fibara ambone' o haboako iabio, hoe t'IEHOVÀ Talè; vaho fonga hañatsake ty rahalahi'e ze fibara' ondaty. ²² Hizakako añ' angorosy naho an-dio, naho hampahavieko ama'e naho amo mpirai-lia'eo naho amo valobohòke mindre ama'eo ty orañe mampiopo, naho ty havandra gadaboñe, vaho ty afo amam-ponde. ²³ Le honjoñen-dRaho naho havacheñe naho ho rendrem-pihainom-pifeheañe maro, vaho ho fohi' iareo te Zaho IEHOVÀ.

39

¹ Aa le mitokia amy Goge ry ana' ondatio, le ano ty hoe: Inay ty nafè' IEHOVÀ Talè: Inao t'ie atreatreko ry Goge, roandrian-drovabei' i Meseke naho i Tobale; ² hampitolihoko naho haronjeko mb'eo naho ho rambeseko boak' an-kotsokotsoke fara' i avaratsey vaho haseseko hiatreatre o vohi' Israeleo; ³ ho takapiheko boak' am-pit'a'o havia ty fale'o, vaho hampipopohoko boak' am-pit'a'o havana o ana-pale' oo. ⁴ Ie hitsingoro amo vohi' Israeleo, ihe naho o lia-rai'o iabio naho i valobohòke mihipok' ama'oy; hatoloko amy ze hene karaza-voroñe naho amy ze fonga mpitiliñe vaho amo bibin-kivokeo habotse'e. ⁵ Hitsingoritritse amy ze montoñe iaby rehe; amy te Zaho ty nivolañe, hoe t'IEHOVÀ Talè. ⁶ Hahitriko amy Magoge ty afo, naho amo mimoneñe amo tokonoseoo. vaho ho fohi' iareo te Zaho IEHOVÀ.

⁷ Zay ty hampahafohineko añivo' ondatiko Israeleo ty tahinako masiñe naho tsy ho tivâñe ka ty añarako masiñe vaho ho fohi' o fifeheañe te Zaho IEHOVÀ ro Masiñe am'Israele ao. ⁸ Hehe te tondroke, naho toe ho heneke, hoe t'IEHOVÀ Talè, i andro nivolañakoy.

⁹ Hiakatse mb'eo o mpimoneñe amo rova' Israeleo le ho viañe' iereo afo hamorototo o fialiañe, o fikalañan' arañañe, o fañaron-tsirao, o fale naho ana-paleo, o kobaiñe naho lefoñe vaho harehe' iareo aña' afo hahamodo fito taoñe; ¹⁰ le tsy eo ty hitoha hatae an-kivok' aña, ndra hamira hatae aña'ala ao; fa harehe'e aña' afo ao o fialiañe; naho ho

kopaheñe o nikopak' iareoo, vaho ho kamereñe o nikametse am' iareoo, hoe t'IEHOVÀ Talè.

¹¹ Hifetsak' amy andro zay te ho tolorako toetse e Israele ao ho kibori' i Goge, i vavatanem-pitsàhañe atiñana' i riakeiy; ze hanebam-pitsake; ao ty handeveña' iareo i Goge naho i valobohò'ey; vaho ho tokaveñe ty hoe: Vavatanem-balobohò' i Goge. ¹² Fito volañe ty handeveña' i anjomba' Israeley iareo hañalio i taney. ¹³ Eka hene handenteke iareo ze ondati' i taney, le hahazoako engeñe vaho ho andro añonjonañe ahy hoe t'IEHOVÀ Talè. ¹⁴ Ho joboñe' iereo ondaty mahafitoloñe, hiranga i taney mindre amo mpitsàkeo handenteke ze mbe midoñe ambone tane eo, hañalio aze; toe hitsoke mifototse ami'ty volam-paha-fito iereo. ¹⁵ Aa naho iranga' t'indaty vaho ie mahaisake taola' ondaty, le hañoreña'e vorovoro marine aze eo ampara' te naleve' o mpandentekeo am-bavatane' i Valobohò' i Gogey ao. ¹⁶ Le hatao Hamonà* ka ty añara' i rovay; zay ty hañaliova' iareo i taney.

¹⁷ Aa ihe, ana'ondatio, hoe ty nafè' IEHOVÀ Talè: Misaontsia amy ze fonga karazam-boroñet nafo amy ze hene bibin-kivoke: Mitontona, mb'etoa; songa hivory añ' ila' i fisoroñakoy, i hisoroñako ho anahareoy, fisoroñam-bey an-kaboa' Israele ey, hihinana' areo nofotse naho hinoma' areo lio. ¹⁸ Habotse' areo ty nofo' o fanalolahio naho hinoñe ty lio' o roandria' ty tane toio; hoe t'ie añondrilahy naho ose-lahy vaho añombelahy songa vinondrake e Basane ao. ¹⁹ Fonga hamotseke solike ampara' te etsake, naho hinon-dio ampara' te mamo amy soroñe nisoroñako ho anahareoy ²⁰ ie hampivontsiñeñe am-pandambañako eo amo soavalao naho amo sarete maozatseo vaho amo lahin-defoñe iabio, hoe t'IEHOVÀ Talè.

²¹ Aa le hajadoko amo kilakila' ndatio ty engeko, naho ho oni' o kilakila' ndatio i zaka nafetsakoy vaho ty tañako napetako am' iareo. ²² Le ho fohi' i anjomba' Israeley te Zaho IEHOVÀ, Andrianañahare' iareo henane zay vaho nainai'e. ²³ Ho fohi' o kilakila' ndatio te niseše mb' am-pandrohizañe aña ty anjomba' Israele ty amo hakeo'eo amy t'ie niola amako, le naetako am' iereo ty tareheko naho natoloko am-pitá' o rafelahi' iareoo, vaho fonga nitsingorom-pibara. ²⁴ Mira ami'ty haleora' iareo naho ami'ty fiolà' iareo ty nanoeko am' iareo, vaho nañetahako tarehe.

²⁵ Aa le hoe ty nafè' IEHOVÀ Talè: Hampoliko henane zao ty fandrohiza' Iakobe naho ho tretrezeko iaby ty anjomba' Israele vaho ho farahieko ty añarako masiñe. ²⁶ Ie amy zay, ho haliño' iereo ty fisalara' iareo ty amo fiolàñe niolà' iareo amakoo ie fa mierañerañe an-tane' iareo ao, ie tsy eo ty mpañembañe, ²⁷ naho hampoliko hirik' amo kilakila' ndatio iereo, naho hambineko boak' an-tane' o rafelahi'eo vaho ho toloreñ' asindraho am-pahaisaham-pifeheañe maro; ²⁸ le ho fohi' iereo te Zaho IEHOVÀ Andrianañahare' iareo, ty nanese iareo mb'am-pandrohizañe aña añivo' o kilakila' ndatio naho natontoko boak' an-tane' iareo aña naho leo raike tsy hapoko ²⁹ vaho tsy hañetahako tarehe ka fa hakofòko amy anjomba' Israeley ty Tioko, hoe t'IEHOVÀ Talè.

40

¹ Ie amy taom-paha roapololim' ambi' i fandrohiza'aiy, amy loha-taoñey, amy andro valoha' i volañeiy, le amy taom-paha-folo-efats' ambi' ty fandafañe i rovay, le tamako amy andro zay ty fità' IEHOVÀ vaho nendese'e mb'eo. ² Ie amo aroñaron' Añahareo, le nendese'e mb'an-tane' Israele aña

* **39:16** Hamonà: valobohòke † **39:17** Apo 19:17,18,21

naho napo'e ambone' ty vohitse mitiotiotse eo, vaho ama'e ey ty firafin-drova mañatimo. ³ Teo ty nendese'e ahy, le ingo t'indaty hoe tarehen-torisike ty vinta'e, nitintiñe taly leny am-pitâ'e naho kobaim-panjeheañe; nijohañe an-dalambey ey. ⁴ Le hoe indatiy tamako: O ana' ondatio, mahaisaha am-pihaino, naho mijanjiña an-dravembia, vaho ajadoño an-tro'o ao ze he'e haboako, fa nendeseko etoañe hanoroako azo; hene taroño amy anjomba' Israeley ze oni'o.

⁵ Ingo ty kijoly alafe' i anjombay mañarikatoke aze; ampitâ' indatiy ty kobaim-panjeheañe, enen-kiho-lava ty andava'e, kiho raike itovoñam-pohem-pitañe i kiho zay; aa le zinehe'e ty ampohe' i kijoliy: kobaiñe raike, naho ty haabo'e: kobaiñe raike.

⁶ Niheo mb'amy lalambey mitolik' atiñanan-dre le niañambone' i fanonga'ey, vaho zinehe'e ty tokona' i lalambeiy, kobaiñe raike ty ampohe'e, le ty tokona'e ila'e: kobaiñe raike ty ampohe'e. ⁷ Le ty trañom-pigaritse, kobay raike ty andava'e naho kobay raike ty ampohe'e; kiho lime ty añivo' i traño rey, vaho kobay raike ty takona' i lalañe amy lavaranga' i lalambey niatreke i anjombaiiy.

⁸ Zinehe'e ka ty tokona' añate' i lalambey, kobaiñe raike. ⁹ Le zinehe'e ty treha' i tokonan-dalambeiy: kiho valo; naho o tolà'eo: kiho roe; vaho niatreke i anjombay ty fiziliha' i lalambeiy.

¹⁰ Trañom-pigaritse telo ty añ'ila' i lalambey atiñanañey etoy naho telo añ' ila'e aroy, mira ty zehe' i telo rey; vaho sindre aman-jehen-tolàñe mira ty añ'ila'e atoy naho ty añ'ila'e aroy. ¹¹ Zinehe'e ka ty am-pohe' i fizilihan-dalambeiy: kiho folo; naho ty andava' i lalambeiy: kiho folo-telo' amby. ¹² Ty jeba'e aolo' o efe-trañoo le kiho raik' añ'ila'e atoy naho kiho raik' añ'ila'e eroy; i efe-traño rey le enen-kiho añ'ila'e etoy naho enen-kiho ty eroy. ¹³ Zinehe'e ka ty lalambey boak' ami'ty tafon-efe-traño raike pak' an-tafo' i raikey; kiho roapolo-lim'amby, an-dalañe niatre-dalañe. ¹⁴ Nanoe'e tolàñe ka, kiho enempolo, le nanahake zay o lalambey sisa añ'ariari' i kiririsaio. ¹⁵ Le boak'an-tarehe' i lalam-pizilihañey pak' an-tarehe' ty figadoña' i efe-pizilihañey, limampolo kiho. ¹⁶ Songa reke-pikatohañe o lalan-kede amy efe-traño rey naho amo tolà'e añate' i lalambeio mb'eo mb'eo, le zay ka amo mivokokeo, vaho mañariary o efe-traño am-po' iareoo o lalan-kede'eo; sindre aman-tsatrañe o tolàñe.

¹⁷ Nendese'e an-kiririsa añate'e ao raho, le ingo ty efe-traño naho ty dalaze am-bato hara'e tsaratseak' añ' ariari' i kiririsay; efe-traño telopolo ty niatreke i dalazey. ¹⁸ Tañ'ila' o lalambeio i damokey ty amy halava' o fizilihañeyo, i damok' ambaney zay. ¹⁹ Zinehe'e maniñana boak' am-piatrefa' i lalambey ambaney pak'am-para' i kiririsa añate'ey, kiho zato, vaho hoe zay ka ty mañavaratse.

²⁰ Le nizehe'e ty andava naho ty am-pohe' i lalambein-kiririsa' alafe'e nitolik' avaratsey. ²¹ Telo ty trañom-pigaritse añ'ila'e etoy naho telo ty añ'ila'e eroy; ie mira amo nizeheñe amy lalambey valoha'ey naho o tolañe naho o vokokeo; kiho limampolo ty andava'e le kiho roapolo-lim' amby ty ampohe'e. ²² Mira amo nanjeheañe amy lalambey nitolik' atiñanañeo o lalan-kede'eo naho o lavaranga'eo vaho o satra'eo; fanongañe fito ty mañambone ama'e le aolo' iareo eo i lavaranga'ey. ²³ Manahake i lalam-bey atiñanañey le mitolik' amy lalam-bein-kiririsa añate'e ty lalambey avaratse, ie zinehe'e boak'an-dalambey pak'an-dalambey tandrife: le kiho zato.

²⁴ Ie amy zay nendese'e mañatimo, le inge ty lalambey mitolik' atimo: zinehe'e o tolà'eo naho o voko'eo, le nira amy nizehèñe rey. ²⁵ Manahake o ila'eo o lalan-kede niariary aze naho o voko'eo; kiho limampolo ty andava'e naho kiho roapololim' amby ty am-pohe'e. ²⁶ Fito ty fanongañe miañambone ama'e, le aolo' iareo o voko'eo; nitemeren-tsatrañe o tolà'eo, ty añ'ila'e etoy naho ty añ'ila'e eroy. ²⁷ Teo ty lalambey nitolik' atimo amy kiririsa añate'ey; zinehe'e ty boak'an-dalambeypak' an-dalambeypak' atimo, zato kiho.

²⁸ Nendese'e nizilik' an-dalam-bey atimo mb'an-kiririsa añate'ey mb'eo; le zinehe'e i lalam-bey atimoy ie nira amy nanjeheañe o ila'eo; ²⁹ mira amy nanjeheañe rey ka o efe-traño'eo, naho o tolà'eo naho o voko'eo; mañariary aze naho o voko'eo o lalan-kede'eo; kiho limampolo ty andava'e vaho roa-polo-lim' amby ty am-pohe'e. ³⁰ Vokoke ty nañariary aze, kiho roapololim' amby ty an-dava'e naho kiho lime ty ampohe'e. ³¹ Miakatse an-kiririsa alafe'e ao o voko'eo, hene aman-tsatrañe o tolà'eo, valo ty fanongañe miañambone ama'e.

³² Nendese'e mb'añ'ila atiñana' i kiririsa añate'ey mb'eo raho; le zinehe'e i lalambeiy t'ie nira amo ila'eo. ³³ Mira ami'ty zehe' o ila'eo ka o efe-traño'eo, naho o tolà'eo, naho o voko'eo; mañariary aze naho o voko'eo o lalan-kede'eo; kiho limampolo ty andava'e naho kiho roapololim' amby ty ampohe'e. ³⁴ Miakatse mb' an-kiririsa alafe'e mb'eo o voko'eo, sindre reke-tsatrañe o tolà'eo añ'ila'e etoy naho añ'ila'e eroy; valo ty fanongañe miañambone ama'e.

³⁵ Le nendese'e mb'amy lalam-bey avaratsey mb'eo, naho zinehe'e te mira ami'ty zehe' o ila'eo: ³⁶ o efe-traño'eo, o tolà'eo naho o voko'eo; vaho mañariary aze o lalan-kede'eo; kiho limampolo ty andava'e naho kiho roapololim' amby ty ampohe'e. ³⁷ Mimoak' an-kiririsa alafe'e ao o tolà'eo; nitemeren-tsatrañe o tolà'eo añ'ila'e etoy naho añ'ila'e eroio, valo ty fanongañe miañambone ama'e.

³⁸ Añivo o tolà' i lalambeiy ty fizilihañe mb'ami'ty traño-kede; ao ty fanasañe o hisoroñañe. ³⁹ Le amy fizilihañey ty rairay roe añ'ila'e etoy naho ty roe añ'ila'e eroy, handentàñe o soroñaeo, o engan-kakeoo naho o engan-tahiñaeo. ⁴⁰ Rairay roe ty añ'ila' alafe' i fanongañe mimoak' an-dalam-bey avaratsey; naho rairay roe ty añ'ila'e ka, amy fizilihañe i lalambeiy ao. ⁴¹ Aa le rairay efatse ty añ'ila'e etoy, naho rairay efatse ty añ'ila' ty lalambey eroy; rairay fudentàñe valo. ⁴² Nanoeñe vato tsinerake i rairay efats' o soron-koroñañe rey, kiho raike tsy tampa'e ty andava'e naho kiho raike tsy tampa'e ty ampohe'e, vaho kiho raike ty haabo'e; ie ambone'e eo ty fampipohañe haraom-pandentàñe engan-ko lorañe naho soroña. ⁴³ Nirekets' añ' ariari' i trañoy ty porengotse maro, sindre zehem-pitáñe ty andava'e; naho amy rairay rey i hena hisoroñañey.

⁴⁴ Alafe' i lalambeiy añate'ey an-kiririsa' añate'ey añ'ila' i lalambey avaratsey ty trañom-pisabo miatrek' atimo, teo ka ty añ'ila' i lalambey atiñanañey miatrek' avaratse. ⁴⁵ Le hoe re amako, Ty traño miatrek' atimo toy le a o mpisoroñañe mitoloña amy anjombaio. ⁴⁶ I traño miatrek' avaratsey le a' o mpisoroñañe mitoroña amy kitreliio; o ana' i Tsadoke kinoik' amo ana' i Levio ro hitotok' am' IEHOVÀ hiatrak' azeo.

⁴⁷ Zinehe'e ka i kiririsay, kiho zato ty andava'e naho kiho zato ty ampohe'e, efa-mira; aolo' i anjombay ty kitrely.

⁴⁸ Le nendese'e mb'am-piziliha' i anjombay raho, vaho zinehe'e o tolà' i fizilihañeyio: kiho lime ty añ'ila'e etoy naho kiho lime ty añ'ila'e eroy; kiho telo ka ty am-pohe' i lalambeiy añ'ila'e etoy naho telo kiho ty añ'ila'e

eroy. ⁴⁹ Kiho roapoloy ty andava' i fizilihañey, naho kiho folo-raik' amby ty ampohe'e; fanongañe ty fimoahañe; tsotsòke raike ty aña'ila' o tolà'eo etoy naho raike ty eroy.

41

¹ Heneke zay le nendese'e mb' amy kivohoy mb'eo vaho nanjehe o tolà'eo: kiho eneñe ty ampohe' ty ila'e naho kiho eneñe ka ty aña'ila'e, ie treha' i voko'ey. ² Kiho folo ty ampohe' i lalañey naho kiho lime ty aña'ila' i lalañey naho kiho lime ka ty ila'e; zinehe'e ka ty andava'e le kiho efapolo; naho kiho roapoloy am-pohe'e.

³ Nimoak' ao amy zao re nanjehe o tolà' i lalambei'eo, kiho roe; le i lalañey, kiho eneñe; naho kiho fito ty ampohe' i lalañey. ⁴ Le zinehe'e ka ty andava'e: kiho roapoloy; naho kiho roapoloy ampohe'e aolo' i kivohoy eo; le hoe re tamako, Ítoy i toetse masiñe do'ey.

⁵ Heneke zay le zinehe'e ty rindri' i anjombay: kiho eneñe; le ty ampohe' o efe-traño'eo, kiho efatse mañarikatoke i anjombay amo ila'e iabio. ⁶ Telo mifaningitse o efe-traño'eo, telo-polo ty am-pidadaña'e raike; nampiziliheñe an-drindri' i anjomba nandranjiañe o efe-traño aña'ariary azeoy iereo, soa te hirampy amy trañoy fa tsy hirampy an-drindri' i kivohoy. ⁷ Nibey ty am-pohe' o efe-traño niarikatokeo naho o lalañe mioza amo efe-trañoo naho ambone te amo ambaneo, aa le nitombo nañambone ty treha' o trañoo naho o lalañe. Ty fanongañe boak' ambaney pak' amboney le niranga i aña'ivo'ey.

⁸ Nitreako te nañarikatoke i anjombay ty lavaranga naonjoñe; kobay raike, toe kiho eneñe, ty nitakare'e hifamitrañe ami'ty mananta' o efe-trañoo. ⁹ Ty treha' i rindriñe alafe' o efe-trañoo, le kiho lime; mira amy zay ty malalak' aña'ivo' o efe-trañoo naho i anjombay. ¹⁰ Ty treha' o efe-traño mañarikatoke i anjombaio mizehe kiho roapoloy. ¹¹ Misokak' antoetse malalake ty lala' o efe-trañoo; miatrek' avaratse ty lala'e raike naho miatrek' atimo ty lala'e ila'e; vaho kiho lime ty treha' i malalake miariary ama'ey.

¹² I traño aolo' i kiririsan-kivoho ahandrefa'ey, le kiho fitom-polo ty ampohe'e; kiho lime ty hateve' i rindri'e mañariary azey vaho kiho sivam-polo ty andava'e.

¹³ Zinehe amy zao i kivohoy, kiho zato ty andava'e; naho kiho zato ka ty an-dava' i kiririsa'ey naho i trañoy rekets' o rindri'eo. ¹⁴ Ty treha' i fiatrefa' i Anjombaiy naho o kiririsa'e atiñanañe, le zato kiho.

¹⁵ Zinehe'e amy zao ty andava' i traño miatreke i kiririsa ahndrefañey naho o oloñolo'e aña'ila'e atoy naho aña'ila'e aroio; zato kiho.

I kivohoy, i toe'e añate'ey, naho o lavaranga miakatse an-kiririsao; ¹⁶ le o tolà'eo, naho o lalan-kede milentekeo, o oloñolo'e mañariari' i telo mañambone rey tandrife i lalambeiiio, vaho nitemerem-baramba ty añariari' i kivohoiy, mifototse an-tane mionjoñe pak'amo lalan-kedeo, vaho o tokonan-dalan-kedeo, ¹⁷ le nitakatse ty malalak' ambone' i lalambeiy, sikal'am-po' i anjombay ao; ie alafe'e etoy naho mañariary o rindriñe añate'eo ty nipateran-tsare: ¹⁸ kerobe naho satrañe; aña'ivo' ty kerobe naho ty kerobe ty satrañe; songa manan-daharañe roe o kerobeo; ¹⁹ lahara' ondaty ty miatreke ty satrañe naho tarehen' ana-diona ty miatreke i satrañe aña'ila'ey. Sinokitse aña'ariari' i kivohoy iaby irezay; ²⁰ mifototse an-tane eo pak' ambone' i lalambeiy ty nanitsihañe kerobe naho satrañe, vaho an-drindri' i toetse miavakey eo.

²¹ Efa-mira o tolàn-dalambein-kivohoo, le mañirinkiriñe i nitreako zay ty aolo' i toetse miavakey eo. ²² An-katae ty kitrely, kihò telò ty haabo'e naho kihò roe ty an-dava'e, le an-katae o kotso'e añate'eo naho i an-dava'ey vaho o rindri'eo; le hoe re amako, Itoy ty latabatse aolo' IEHOVÀ eo. ²³ Songa aman-delan-dalambey roe i kivohoy naho i toetse miavakey. ²⁴ Sindre amam-baramba roe I lalañe rey, varamba miviombio; amam-baramba roe' i lalañe raikey naho varamba roe ka i lalañe ila'ey. ²⁵ Nipatereñe am' iereo, amo lalambei' i kivohoio, ty kerobe naho ty satrañe, hambañe amy nanoañe o rindri'eyo; nanoeñe lapalapam-baramba ty aolo' i fizilihañe alafe'ey. ²⁶ Teo ty lalan-kede nilenteke naho satrañe añ'ila'e roe, andrindríñe añ'ila' i fizilihañey, naho amo efe-traño añ'ila' i anjombaio vaho amo lapalapa'eo.

42

¹ Nendese'e mb'an-kiririsa alafe'e ao raho, mañavaratse mb'eo; le nente'e mb'amo efe-traño miatreke i kiririsay aolo' i traño avaratseio. ² Kihò zato ty andava' i fiatrefa'e avaratsey, tama'e ty lalambei'e, naho kihò limam-polo ty am-pohe'e, ³ ty toe'e le añate' i kiririsay an-kiho roapolò naho miefetse amy damok' an-kiririsa alafe'ey, vaho mifanongoa in-telo mañambone rekets' o lavaranga'eo. ⁴ Aolo' o efe-trañoo ty lalañe, kihò folo ty treha'e naho kihò zato* i lalañey; mitolik' avaratse o fiziliha'ey. ⁵ Bory o efe-traño amboneo fa nitomore' o lavarangañeo mandikoatse ty nangala'e amy ambaney naho amy añivoy, ⁶ ie telò mifanongoa, fe tsy aman-tsotsòke manahake o efe-traño an-kiririsao; zay ty nampihàンkañe i ambone' o mananta'ey te amy añivoy naho i ambaney. ⁷ Mifamalahañe amo efe-trañoo, an-kiririsa alafe'e, pak' amo efe-trañon-kiririsa alafe'eo ty kijoly, kihò limampolo ty andava'e; ⁸ amy te kihò limampolo ty andava' o efe-traño an-kiririsa alafe'eo, vaho kihò zato ty ila'e miatreke i kivohoy. ⁹ Ambane' i efetse rey añ'ila'e atiñanañe ty fizilihañe am' iereo boak'an-kiririsa' alafe'e.

¹⁰ Ami'ty treha' i rindrin-kiririsa maniñanañe, tandrife' i toetse miavakey naho tandrife' i trañoy, le misy efe-traño, ¹¹ le an-dalañe aolo'e eo ty hambañe amo efe-traño avaratseo, le mira amo azeo ty an-dava'e naho ty am-pohe'e, naho hambañe ty namoareñe o fiakara'eo vaho o fiziliha'ey. ¹² Añ'ila o fiziliha' i efe-traño atimo reio ty fizilhañe am-pigadoña' i lalañey eo, toe i lalañe mioza aolo' i kijoliyy momb'amy fizilihañe atiñanañe rey.

¹³ Le hoe re tamako, I efe-traño avaratse rey naho i efe-traño atimo rey tandrife i kiririsay ro traño miavake, toem-pikamà' o mpisoroñé miatreke IEHOVÀ o enga miavake do'eo; ao ty hampipoha' iareo o enga miavake do'eo: o enga mahakamao, o engan-tahiñeo, naho o engan-kakeoo: miavake i efetsey. ¹⁴ Ie mizilik' ao o mpisoroñeo, le tsy hiavotse i toetse miavakey mb'an-kiririsa alafe'e ao iereo, naho tsy apo' iareo eo hey o sikiñe nitoroñé iareoo, amy t'ie miavake; vaho hisikiñe hafa, hionjona' iareo mb'an-toe' ondatio mb'eo.

¹⁵ Aa ie niheneffe'e zehe ty toe' i kivohoy, le nendese'e niakatse mb' amy lalam-bey miatrek' atiñanañey raho le nizehe añ' ariary aze. ¹⁶ Zinehe'e amy kobaim-panjeheañey i lafe'e atiñanañey, kobay liman-jato amy kobaim-panjeheañey, le nitolike re ¹⁷ nanjehe ty lafe'e avaratse, kobay liman-jato amy kobaim-panjeheañey, le nitolike ¹⁸ nanjehe ty lafe'e atimo, kihò liman-jato amy kobaim-panjeheañey. ¹⁹ Nitolike mb' ahandrefañe

* ^{42:4} Heb: raike

vaho nanjehe kobay liman-jato amy kobaim-panjeheañey. ²⁰ Aa le hene zinehe'e i lafe'e efatse rey, toe niarikatohe' ty kijoly, liman-jato ty andava'e le liman-jato ty am-pohe'e, hampiambake ty masiñe ami'ty tsotra.

43

¹ Heneke zay, le nendese'e mb'an-dalambeý mb'eo raho, mb' an-dalambeý miatrek' atiñanañe. ² Indroy te nimb' etoy boak' an-dalañ' atiñanañe ty engen' Andrianañahare' Israele; le nanahake ty fitroñandrano maro ty fiarañanaña'e; vaho nireandreañe ami'ty enge'e i taney. ³ Ty aroñaroñe nitreako toy, le manahake i aroñaroñe nitreako t'ie nimb' am-pandrotsahañe i rovay mb'eo; manahake i aroñaroñe nitreako marine i saka Kebarey i aroñaroñey, vaho nihotrak' an-tareheko eo. ⁴ Nizilik' an-kivoho ao ty enge' IEHOVÀ, hirik' an-dalambeý miatrek' atiñanañey.

⁵ Nampionjone' i Tiokey raho, le nampizilihe'e amy kiririsa añ'ate'ey; le indroke ty enge' IEHOVÀ nandifotse i kivohoy. ⁶ le tsinanoko ty nitsara amako boak' amy kivohoy ao, fa nijohañe marine' ahy eo t'indaty. ⁷ Hoe re amako: O ana' ondatio, atoy ty toe' i fiambesakoy naho ty fitimpahan-tomboko amy himoneñako añivo' o ana' Israeleo nainai'e doniay; vaho le lia'e tsy handeotse ty añarako masiñe ka ty anjomba' Israele, ke iereo he o mpanjaka'eo, amo hakarapiloa'eo, naho amo lolom-panjaka' iareo an-kaboañe ey, ⁸ ie napo' iareo marine' i fizilihakoy ty fiziliha' iareo, naho o tolà'eo tandrife' o tolàkoo, naho kijoly tsotra avao ty nañefets' ahy am' iereo; vaho nileore' iereo ty añarako masiñe amo haloloañe nitoloñe' iareoo; zay ty namongorako iareo amy habosehakoy. ⁹ Aa ehe te hahifi' iareo aña o hakarapiloa' iareoo henane zao naho hafahañe lavits' ahy ty lolo' o mpanjaka' iareoo, himoneñako añivo' iareo ao nainai'e donia.

¹⁰ Ihe, ana' ondatio, atorò amy anjomba' Israelei y kivohoy; ampanjeheo' iareo i nisareañe aze, hampisalarañ' iareo amo tahi'eo, ¹¹ Aa naho fonga imeñara' iareo o nanoe' iereoo, le ampandrendreho iareo ty sare' i kivohoy, i filahara'ey, naho o fiakara'eo, naho o fiziliha'eo, vaho i sare'e iabiy; le ampahafohino iareo o hene fañè'e naho fepè'e ty amo sare'eo, le patero am-pahaisaha'eo, hañambena' iareo vaho hañenefa' iareo i hene nisareañey naho o fañè'eo.

¹² Zao ty fepè' i kivohoy: masiñe do'e i toetse mañariary an-kaboa' i vohitsey rey. Inay, zay ty Hàke ty amy kivohoy.

¹³ Le ingo ty zehe' i kitreliy an-kiho'e—o kiho zao le toe kiho raike mitovoñe ty treham-pitâñe: kiho raike ty halale' i foto'ey naho kiho raike ty am-pohe'e, vaho zehe raike ty rira'e mañarikatok' aze; zao ty haabo' i kitreliy. ¹⁴ Kiho roe ty boak'an-tane pak' an-drira'e ambane, kiho raike ty am-pohe'e; le kiho efatse ty boak'an-drira'e kede pak' andrina'e bey, vaho kiho raike ty am-pohe'e. ¹⁵ Kiho efatse ty fañoroa' i kitreliy; naho tsifa efatse ty mitolik' ambone boak' amy kitreliy eo. ¹⁶ Kiho folo-ro'amby ty an-dava' i kitreliy, le folo-ro'amby ty am-pohe'e; efa-mira i ila'e efatse rey. ¹⁷ Efa-mira ka i lavaranga'ey, kiho folo-efats' amby ty an-dava'e, naho kiho folo-efats' amby ty am-pohe'e, naho antsasa' ty kiho'e ty fitemerañe mañarikatok' aze, kiho raike ty foto'e mañariary aze; mitolik' atiñanañe i fanongà'ey.

¹⁸ Le hoe re amako, O ana' ondatio, hoe ty nafè' IEHOVÀ Talè: Inao o fañè' i kitreliy amy andro handranjiañe azey, hañengàñe soroñe, naho

hamitsezan-dio. ¹⁹ Ho tolora'o amo mpisoroñe nte-Levy, tarira' i Tsadoke*, mpitotok' amakoo, hitoroñe ahy, hoe t'IEHOVÀ Talè, ty bania ho engankakeo. ²⁰ Le handrambesa'o ty lio'e naho hatente'o amy tsifa efatse rey, naho an-kotso-efats' i olotse rey vaho an-drira'e mañarikatok' aze: zay ty hañaliova'o naho hañefera'o aze. ²¹ Ho rambese'o amy zao i bania engankakèoy, vaho horoa'o amy toetse tinendre añ'anjomba ao alafe' i toetse miavakey eyi.

²² Amy andro faharoey le hibanabana'o ty oselahy tsy aman-kila ho engan-kakeo, hañeferañe i kitreliy manahake ty nañeferañe aze amy baniay. ²³ Ie fa heneke i fañeferañey le hengae'o ty bania tsy aman-kandra naho ty añondrilahy tsy aman-kila boak'an-dia-raike ao, ²⁴ le hisoroña'o añatrefa' IEHOVÀ, naho hafitse' i mpisoroñey ama'e ty sira, le hengae' iereo ho soroñe am' IEHOVÀ.

²⁵ Boak' andro, ho fito andro ty hañajaria'o ty oselahy ho engan-kakeo; le halankañeñe ka ty bania naho ty añondrilahy tsy aman-kandra boak'an-dia-raike ao. ²⁶ Fito andro ty hañeferañe i kitreliy hañalio aze, zay ty fanokanañe aze. ²⁷ Ie heneke i andro rey, mifototse amy andro fahavaloy mb'eo, le hisoroña' o mpisoroñeo o engan-koroa' areoo amy kitreliy naho o engam-panintsíñha' areoo vaho ho noko nahareo, hoe t'IEHOVÀ Talè.

44

¹ Nendese'e nibalike mb'an-dalambeý alafe' i toetse miavake miatrek' atiñanañey mb'eo raho; f'ie nirindriñe. ² Le hoe t'IEHOVÀ amako: Hagabeñe ty lalañe toy, tsy ho sokafeñe, le tsy himoak' ama'e t'indaty; amy te fa nizilik' ao t'IEHOVÀ Andrianañahare' Israele, aa le harindriñe zay. ³ I roandriañey avao ty hiambesatse ao hikama mahakama añatrefa' IEHOVÀ ty amy maha-roandriañe aze; hizilike mb'amy ana-piziliha' i lalambeiy re, vaho ama'e ka ty hienga'e mb'eo.

⁴ Nendese'e niary amy lalambeý avaratsey raho, mb' añ' aolo' i kivohoy mb'eo; nenteako le indroke nandifotse i kivoho' IEHOVÀY ty enge' IEHOVÀ; vaho nibaboke an-tareheko.

⁵ Le hoe t'IEHOVÀ amako: O ana' ondatio, arendreho soa, le isaho am-pihaino naho janjiño an-dravembia ze he'e ho volañeko ama'o ty amo fañè' i kivoho' IEHOVÀIO naho o fañòha'eo; arendreho o mete hampihovañe amy kivohio, vaho o rarañe tsy himoak' amy toetse miavakeio. ⁶ Le saontsio ty hoe o mpiolao, i anjomba' Israele, inao ty nafè' IEHOVÀ Talè: Ry anjomba' Israele, fonga ajihero o hakarapiloa'oo, ⁷ ty amy nampihova'o an-toeko miavake ao o ambahiny tsy nisavareñe añ'arofo naho tsy afak' ofoke an-tsandiñeo, hañota-faly amy anjombakoy, ie nengae'o amako o hènekoo, ty safo'e naho ty lio'e. Tovo' ze haloloañ' iaby nivaliha' areo amy fañinakoy; ⁸ vaho tsy namandroñe o raha masikoo; te mone nampivandroñe' iareo ze nisatrie' areo avao i toeko miavakey. ⁹ Aa le hoe t'IEHOVÀ Talè: Tsy himoak' amy toeko miavakey ty ambahiny tsy nisavareñe añ'arofo naho tsy afak' ofok' an-tsandiñeo, amo renetane mitraok' amo nte-Israeleo iabio.

¹⁰ Le hivave ty lafa' iareo o nte-Levy nihàñkañe amakoo, ie nandifik' amako t'Israele naho nandrike mb' amo sampsampon-draha' iareoo.

¹¹ Ho mpañambiñe an-toeko miavake ao iereo, hisary o lalambein-kivohoo, hampikasokasok' amy kibohokoy ao; handenta o engan-koroañeo naho o fisoroña' ondatio, hiatrake ondatio, hitoroñe iareo. ¹² Amy te nitoroñe' iareo aolo' o saren' drahare' iareoo, naho ninjare bolokon-kakeo

* ^{43:19} Tsadoke: to, nañatoañe

fampitsikapieñe i anjomba' Israeley, le nizonjoeko haoke hoe t'IEHOVÀ Talè, vaho ho vavè' iereo o hakeo' iareoo. ¹³ Tsy hitotok' amako iereo, tsy hitoroñe ahy ho mpisoroñe, tsy hañarine o raha masikoo naho o raha loho miavakeo; fa hivave fisalarañe ty amo hatsivokarañe nanoe' iereoo. ¹⁴ F'ie ho tendrèko ho mpigaritse i kivohokoy, naho hikotrokotrok' ama'eo, ze hene kasokasoheñe ama'eo.

¹⁵ Fe o mpisoroñe nte-Levy ana' i Tsadoke namandroñe i toeko miavakey, ie nandifik' amako o nte-Israeleoo ro hitotok' amako hitoroñ' ahy, hijohañe añatrefako hañenga ty safo'e naho ty lio amako, hoe t'IEHOVÀ Talè; ¹⁶ Ie ro himoak' amy toeko miavakey ao, hitotok' amy fandambañakoy hitoroñe ahy vaho hamandroñe o ahikoo.

¹⁷ Ie mizilik' amo lalambein-kiririsa' añateo, le hisikiñe lamba leny naho tsy ho amam-bolonañondry t'ie mitoloñe an-dalambein-kiririsa añate'e naho amy trañoy. ¹⁸ Ho aman-tsabaka leny ty añambone' iareo, naho koloty leny ty ambania'e; vaho tsy hisikiñe ze hahatera-liñetse. ¹⁹ Le ie miakatse mb'an-kiririsa alafe'e ao, mb'an-kiririsa ama' ondaty mb'eo, le hafaha' iareo hey o sikiñe nitoroñañe naho halafike amo efetsefse miavakeo; le hiombe saroña ila'e, tsy mone hampiavake ondatio amo siki'eo.

²⁰ Tsy hañara-doha iereo, naho tsy hapoke ho lava o maroi'eo; fe ho tomotomoreñe o maroin' añambone'eo. ²¹ Tsy hinon-divay ty mpisoroñe t'ie mizilik' an-kiririsa añate'e ao. ²² Tsy hañenga vantotse iereo, ndra ty narian-dahy, fa somondrara tariran' anjomba' Israele ndra ty vantotse remavoi' ty mpisoroñe. ²³ Haò' iereo ondatikoo ty hañambahaañe ty masiñe ami'ty tsotra, vaho hampandrendreheñe ty faly naho ty malio.

²⁴ Ie eo ty fandierañe le hizaka' iareo; hizaka amo fepèkoo; naho hañambeñe Hake naho o fañèko amo hene famantañakoo vaho ho masiñe' iereo o SABATEKOO.

²⁵ Tsy haniva vatañe iereo ami'ty hizilihañe an-dolo ao; f'ie mahazo mandeo-batañe naho rae ndra rene, ana-dahy naho anak'ampela, vaho rahalahy ndra rahavave tsy manambaly. ²⁶ Ie malio, le hañiahañe fito andro. ²⁷ Ie amy andro iziliha'e i toetse miavakey, an-kiririsa' añate'e ao, hitoloña'e amy toetse miavakey, le hengae'e i engan-kakeo'ey, hoe t'IEHOVÀ Talè.

²⁸ Zay ty ho lova iareo; Zaho o lova' iareoo fa tsy ho tolorañe fanañañe e Israele ao; Zaho ro fanaña' iareo. ²⁹ Ho kamae' iereo ty enga-mahakama, naho ty engan-kakeo, naho ty engan-tahiñe, vaho ho a iareo ze raha natokañe e Israele ao. ³⁰ Le ho a o mpisoroñeze hene karazan-dohava, naho ze fonga enga ndra inoñe ty karaza'e boak'amo enga' areo iabio; hatolo' areo amo mpisoroñe ka ty loha-voa fanoñaha' areo, soa te hipetak' añ'anjomba' areo ty fañanitsiñe. ³¹ Tsy ho kamae' o mpisoroñe ty raha nimate boboke ndra rinimitse, he voroñe ke biby.

45

¹ Ie zarae' areo an-tsapake i taney ho lova, le havike amy taney ty hatolotse ho miavake am' IEHOVÀ: ty andava'e ho kiho ro-ale-tsi-lime-arivo naho rai-ale ty am-pohe'e; hiavake pak'añ'efe'e valo zay. ² Avahañe ama'e ty efa-mira ho a i toetse miavakey, liman-jato naho liman-jato, tsaratseake izay ; vaho hiarikatoke aze ty limampolo kiho ho toetse malalake. ³ Amy zinehey, anjeheo ro-ale-tsi-lime-arivo ty an-dava'e, naho rai-ale ty am-pohe'e hiavake do'e fa ama'e ao i toetse miavakey. ⁴ Zay ty hiavake amy taney, tane ho a o mpisoroñe, o mpitoroñe i toetse miavakey jinoboñe

hiatrake IEHOVÀ; ho toetse hanoeñe anjomba, naho toetse miavake ho a' i toetse miavakey. ⁵ Tovo izay, ty ro'ale-tsi-lime-arivo, naho ty rai-ale ho ampohe'e ho a o nte-Levio, o mpitoloñe amy anjombaio, ho hanañaña'e, naho trañom-pigaritse roapolò.

⁶ Ho tendrè' o hañeneke i anjomba' Israele y anjara fanaña' i rovay ho lime-arivo ty am-pohe'e naho ro-ale-tsi-lime-arivo ty an-dava'e mifamalahañe amy navike ho a i toetse miavakey.

⁷ Le ho a i roandriañey ty tane mifañefetse amy toetse miavakey naho amy fanaña' i rovay, añ'ila roe irezay, oza'e i navike ho a' i toetse miavakey naho i fanaña' i rovaiy, mañandrefañey pak' amy efe-tane ahandrefañey, naho maniñana pak' amy efe-tane atiñanañey, ty halava'e ho mira ami'ty halavam-pizaràñe raike mifototse amy efe'e ahandrefañey pak' añ' efe atiñanañey. ⁸ Ho fanaña'e e Israele ao i tane zay. Le tsy ho forekekè' o roandriakoo ondatikoo henane zay; fa hatolo' iareo amy anjomba' Israele y taney ty amo fifokoa'eo.

⁹ Aa hoe ty nafè' IEHOVÀ Talè, Soa zay ry roandria' Israeleo! Apoho ty samporeràhañe naho ty famorekekeñañe, ano ty hiti'e naho ty havantañañe; ajihero ty fandroaha' areo ondatikoo, hoe t'IEHOVÀ Talè. ¹⁰ Ho balantsy to, efà do'e naho bâte do'e ty hitoloña' areo. ¹¹ Ho fañaranañe mira ty efà naho ty bâte, ho fahafolo' ty homère ty bâte vaho fahafolo' ty homère ka ty efà; fañaranañe foto'e ty homère. ¹² Ho roapolò gerà ty sekele; le sekele roapolò naho sekele roapolò-lim' amby vaho sekele fololim' amby ty hatao'areo manè.

¹³ Zao ty ho enga hengae' areo: ty fah' enen' efà boak' ami'ty homèrembare bolè, naho ty fah' enen' efà boak' ami'ty homere ampemba. ¹⁴ Le ty fañè' o menakeo ty bate: hengae' areo ty faha-folo' ty bâte boak' ami'ty kore (folo ty batè ama'e), toe homère raike zay, amy te folo bâte ty homere; ¹⁵ naho anak' añondry raike boak' ami'ty lia-raike roan-jato, hirik' amo fiandraza' Israele soa tondrakeo; ho engam-bare naho engan-koroañe, naho engam-panintsñañe, hañeferañe iareo, hoe t'IEHOVÀ Talè. ¹⁶ Songa hañenga i enga zay amy roandria' Israeley ondaty amy taneio. ¹⁷ Ho lili' i roandriañey ty hanolotse o engan-koloraño naho o enga mahakamao, naho o enga-ranoo amo sabadidakeo naho amo jiri-bolaño vaho amo SABOTSEO; ze hene famantañañe an-tsa'e tinendre ho a i anjomba' Israeley, le ie ty hanolotse o engan-kakeoo naho o enga-mahakamao naho o enga horoaño vaho o engam-panintsñaño, hañefera'e ty anjomba' Israele.

¹⁸ Hoe t'IEHOVÀ Talè: Ho rambese' areo amy andro valoham-bolañey ty bania tsy aman-kandra hañefera'o i toetse miavakey. ¹⁹ Le handrambe amy lio' i engan-kakeoiy i mpisoroñey vaho hatente'e amo tolàn-kivohoo naho an-kotsok' efà' i faha' i kitreliy rey, naho amo tolà' i lalan-kiririsa añate'eio. ²⁰ Ano zay ka amy andro faha-fitoy ho amo nandilatse iabio naho ho amy tsotray; zay ty hijebaña' areo i kivohoy.

²¹ Amy andro faha-folo-efats' ambi' i volam-baloha'ey, ty hanoa' areo i Pasakey, ho takataka fito andro; fa mofo tsy aman-dalivay ty ho kamaeñe.

²² Amy andro zay ty hanolora' i roandriañey ho aze naho ho a ze hene' ondati' i taney ty bania soron-kakeo. ²³ Hañajaria'e enga hisoroñañe am' IEHOVÀ amy andron-tsabadidake fito rey, le bania fito, naho añondri-lahy fito tsy aman-kila boak' andro amy andro fito rey; vaho ty oselahy boak' andro ho engan-kakeo. ²⁴ Le songa hajarie'e engan' ampemba efà raike i bania rey, sindre efà raike i añondrilahy rey, naho sambe hine menake raike ty efà'e.

²⁵ Ie ami'ty andro fahafolo-lim' ambi' i volañe faha-fitoy, t'ie hañenga manahake i tsaraeñey amy sabadidake fito àndroy ty engan-kakeo, o engan-koloraño, i ampembay, vaho i menakey.

46

¹ Hoe ty nafè' IEHOVÀ Talè: harindriñe amo andro eneñe fitoloñaño i lalam-bein-kiririsa añate'e miatrek' atiñanañey; le ho sokafeñe ami'ty andro Sabotse; ho sokafeñe ka re ami'ty andron-jiri-bolañe. ² Hizilik' amy anam-pizilihañe alafe' i lalambeiy i roandriañey naho hijohañe marine i tolà' i lalambeiy; le halankàñe' o mpisoroño i engan-koroañey naho i engam-panintsiña'ey, le hitalaho amy fiziliha' i lalambeiy eo re, vaho hienga mb'eo, fe tsy harindriñe ampara' te hariva i lalambeiy. ³ Manahake zay ty hitalaho' ondati' i taneio an-dala' i lalambeiy añatrefa' IEHOVÀ eo amo SABOTSEO vaho amo peabolaño. ⁴ Anak' añondry eneñe tsy aman-kandra naho ty añondrilahy tsy aman-kila ro hengae' i roandriañey horoañe am' IEHOVÀ ami'ty andro SABOTSE. ⁵ Ho efà raike ty engan' ampemba amy añondrilahiy, naho hengae'e ze tea'e amo anak' añondrio, vaho arahe' ty hine menake ty efà. ⁶ Le ho bania tsy aman-kandra, naho vik' añondry eneñe vaho ty añondrilahy, songa tsy aman-kila, ty hengaeñe amy andro valoham-bolañey. ⁷ Hajarie'e ampemba efà raike i baniay, naho efà' raike i añondrilahiy, naho ze zoem-pitá'e o vik' añondrio, vaho songa hine menake raike ty efà. ⁸ Aa ie mizilik' ao i roandriañey, le amy anam-piziliha' i lalambeiy ty iziliha'e vaho ie ka ty hienga'e.

⁹ Fa naho miheo mb'añ'atrefa' IEHOVÀ mb'eo amo andro namantañaño ondati' i taneio le ze mizilik' an-dalambez avaratse ao hitalaho ro hiavotse mb' amy lalambez atimoy mb'eo; naho ze mizilike an-dalambez atimoy ro hiavotse mb' an-dalambez avaratse mb'eo; tsy hibalike mb'amy lalambez niziliha'ey re, fa i tandrife azey ty hiavota'e. ¹⁰ Aa naho i roandriañey, amy fimoaha' iareoy ty iharoa'e fizilike; naho amy fiavota' iareoy ty hienga'e.

¹¹ Amo takatakao naho amo sabadidake namantañaño, le ampemba efà raik' ami'ty bania ty hengaeñe, naho songa efà raike ty añondrilahy naho ze tram-pitá'e ho a o anak' añondrio; sindre menake hine raike ty efà. ¹² Aa ie banabanae' i roandriañey ty engan-tsattrin' arofo'ey, ndra te engan-koroañe ndra sorom-panintsiñañe ty engae'e am' IEHOVÀ an-tsatri'e, le ho sokafeñe ho aze i lalambez miatrek' atiñanañey, le halankañe'e i engan-koroa'ey naho i sorom-panintsiña'ey, hambañe amy sata'e ami'ty andro Sabotsey, le hienga, vaho harindri' iareo i lalambeiy t'ie fa nienga.

¹³ Halankaño boak' andro ty engan-koroañe am' IEHOVÀ, ty vik' añondry tsy aman-kandra, hajario boak' andro maraindraiñe. ¹⁴ Ihalankaño boak' andro ka ty engan' ampemba, ty am-paha-ene' ty efà naho ty menak' am-paha-telo' ty hine ihanaña' i bon' ampembay, ho enga-mahakama am' IEHOVÀ nainai'e naho fañè tsy modo. ¹⁵ Zay ty hañajariañe ty anak' añondry naho i engan' ampembay vaho i menakey boak' andro ho engan-koroañe nainai'e.

¹⁶ Hoe ty nafè' IEHOVÀ Talè; Ie atolo' i roandriañey anjara ty ana'e le ho lova'e zay; ho a o ana'eo amy t'ie fanañañe linova. ¹⁷ Fe atolo'e ami'ty mpitoro'e i lova'ey, le ho aze am-para' ty taom-pamotsorañe vaho himpoly amy roandriañey; f'ie ampandova'e amo ana'eo le a iareo zay. ¹⁸ Tsy handrambe ami'ty lova' ondatio i roandriañey; tsy hamorokeke ty amy lova' iareo; fe boak' amy lova'ey avao ty hatolo'e amo ana'eo, tsy mone havik' amo lova'eo ondatikoo.

¹⁹ Aa le nampizilihe'e amy fizilihañe añ'ila' i lalambeiy raho; mb'amo efets' efetse miavake ho a' o mpisoroñe miatrek' avaratseo; le ingo ty toetse am-boli'e eo mañandrefañe. ²⁰ Le hoe re tamako: Atoy ty fahandroa' o mpisoroñe o engan-kakeoo naho o soron-tahiñe, naho ty hanoñafa' iareo o engan' ampembao, soa tsy añandesña mb'an-kiririsa alafe'e ao, hampiavake ondatio.

²¹ Nendese'e mb'an-kiririsa alafe'e mb'eo raho, vaho niaoloa'e am-piariañe i kotsok'efa' i kiririsay rey; ingo te songa aman-toetse i hotsoke rey: ²² an-kotsok'efa' i kiririsay le toetse mitafo sambe kihō efapolo ty andava'e naho telopolo ty am-pohe'e; mira habey i toetse efatse an-kotsoke rey. ²³ Añate'e ao, añariari' i toetse efatse rey le niarikatohe' ty kijolimbato, naho nandrafetañe toem-panokonañe ty am-poto' o kijolio. ²⁴ Le hoe re tamako: Toem-panokoñe ahandroo ty ao, ho fahandroa' o mpitoro' i kivohoio o fisoroña' ondatioo.

47

¹ Nendese'e nibalike mb' am-piziliha'i kivohoy mb'eo raho; le ingo te nikararàke boak' ambanen-tokona' i kivohoy ty rano, maniñanam-beo, amy te miatrek' atiñanañe i kivohoy; naho nidoandoañe boak' atimo' i kitreliy i ranoy, ambane' ty rindry atimo' i kivohoy. ² Aa le nampiakare'e mb'amy lalambey avaratsey raho, naho niaoloa'e niary mb'amy lalambey alafe'e miatrek' atiñanañey; vaho ingo i rano nitsirtsioke boak'añ'ila'e atimoy.

³ Nionjoñe mb'atiñanañe mb'eo indatiy reketsé taly am-pitá'e, nanjehé kihō arivo naho niaolo ahy nitsake i ranoy; an-tsokose eo ty halale' o ranoo. ⁴ Nanjehé kihō arivo indraike re, naho niaolo ahy nitsake i ranoy; añ'ongotse eo i ranoy. Mbore nanjehé kihō arivo vaho niaolo ahy nitsake i ranoy; ambania eo i ranoy. ⁵ Nanjehé kihō arivo indraike re, le nisorotombake tsy nahafitsahako, fa nionjoñe i ranoy; rano mañeva lañoeñe, fa saka tsy lefe soroheñe. ⁶ Le hoe re tamako: O ana' ondatio, isa'o hao?

Vaho nampibalihe'e mb'añ'olo' i sakay mb'eo raho. ⁷ Aa naho nampibaliheñe, le hehe te hatae maro ty añ'olo' i oñey etoy naho eroy. ⁸ Le hoe re amako, Mikararake mb' an-tane atiñanañe aña o rano retoa, aa ie mizotso mb'amy Arabà mb'eo naho mandoak' an-driak' aña, amy riake mitrotròtsey ao, le ho jangañe i ranoy. ⁹ Ie amy zay, ho veloñe ze fifamorohotañe ndra aia'aia andenà' o rano retiñañe; fiañe vasiañeñe ty ho ao, fa ty fañamelañañe ze he'e ty ikararaha' o rano retoam-b'etoy; vaho ho hene veloñe ze takare' ty oñey toy. ¹⁰ Ie amy zay, hijohañe añ'olo'e eo o mpamintañe; boak' Engedy* pak' Eneglaimet† ty ho famelaran-karato; naho ho maro karazañe manahake o fiañe an-driake beio, ami'ty fitozantoza'e. ¹¹ Fe tsy ho melañe ka o tane'e mangitsakitsakeo naho o motsemotse'eo, fa ho famokaran-tsira. ¹² Hitiry añ'olo' i oñey etoy naho añ'olo'e eroy ze hene hatae mete kamaeñe, tsy hiheatse o rave'eo, naho tsy hihintsañe o voa'eo; ho añom-boa boa-bolañe amy te boak' an-toetse miavake ao o rano'eo; ho fikamañe o voa'eo, naho ho aoly o rave'eo.

¹³ Hoe ty nafè' IEHOVÀ Talè: Zao ty ho efe-efe' o tane ho zarae' areo amo fifokoa folo-ro'ambi' Israeleo ho lova'e amy taneio; roe ty ho anjara' Iosefe. ¹⁴ Le ho lovà' areo, ty raike naho ty ila'e, ty amy nañonjonako haockey t'ie

* **47:10** Engedy: rano migoangoa' i anak' añondriy: añ'olotse ahandreña i riake matey † **47:10** Eneglaimet: rano migoangoa' i bania roe rey: rova añ'olo i riake matey

tsy mete tsy hatoloko an-droae' areo; aa le mitsatok' ama' areo ty tane toy ho lova.

¹⁵ Itoy ty ho efe' i taney: mañavaratse boak'amy riake jabajabay, miary e Ketlone[‡], pak'ami'ty fimoahañe e Tsedade[§], ¹⁶ i Kamate*, i Berotate[†], i Sibraime[‡] (añ'ilá' i Damesèke naho añ' ilá' i Kamate eo); vaho i Katsarehatikone[§] añ'olo' i Kavrane* añe. ¹⁷ Ty efe'e boak' amy riakey ty hifototse e Katsarenone[†] le mb' añ' efe' i Damesèke; le avaratase, mañavaratse ty efe-tane' i Kamate, zay ty ho ila'e avaratse.

¹⁸ Le ty efe'e atiñanañe, añivo' i Kavrane naho i Damesèke naho i Gilade[‡] naho an-tane Israele mañolotse Iordaney; miranga boak' an-driak' atiñanañe pake Tamare[§]; zay ty ho efe'e atiñanañe.

¹⁹ Le ty efe'e atimo: boak'e Tamare pak' an-tane manginakina' i Meribà e Kadese* mañolotse i torahañe mb' an-driake jabajabay mb'eo; zay ty efe'e atimo.

²⁰ Ty efe'e ahandrefañe: le i riake jabajabay ty ho efe'e ampara' te tandrife i jebam-bohi' i Kamatey. Zay ty ho efe'e ahandrefa.

²¹ Ifanjarao ama' areo i taney, amo fifokoa' Israeleo. ²² An-tsapake ty anjarañe aze, ho lova' areo naho a o renetane[†] mañialo ama' areoo, o fa nahatoly anak' ama' areoo, le volilio ho nte-Israele, hiharo lova ama' areo amo fifokoa' Israeleo. ²³ Ho tolora' areo lova amy fifokoañe añialoa'ey o rene-taneo, hoe t'IEHOVÀ Talè.

48

¹ Zao ty tahina' o fifokoañeо: Boak'añ'ilá'e avaratse mañorike ty lala' i Ketlone, hirike Kamate, pake Katsernane—zay ty efe' i Damesèke le avara'e ty Kamate—boak' amy atiñanañey pak' amy Riakey ty a' i Dane—raike.

² Mifoza amy Dane, ty efe'e atiñanañe pak'añ'efe'e ahndrefa, amy Asere—raike.

³ Mioza añ'efe' i Asere, boak'amy efe'e atiñanañey pak'añ'efe'e ahndrefa amy Naftaly—raike.

⁴ Mifañefetse amy Naftaly ty efe'e atiñanañe pak'añ'efe'e ahndrefa amy Menasè—raike.

⁵ Mifañefetse amy Menasè boak' amy efe'e atiñanañey pak'añ'efe'e ahndrefa amy Efraime—raike.

⁶ Mifañefetse amy Efraime boak' amy efe'e atiñanañey pak'añ'efe'e ahndrefa amy Reobene—raike.

⁷ Mifañefetse amy Reobene boak' amy efe'e atiñanañey pak'añ'efe'e ahndrefa ty a' Iehodà—raike.

⁸ Mifañefetse am'Iehodà boak'amy efe'e atiñanañey pak'añ'efe'e ahndrefa ty haví' areo: ro'ale-tsi-lime-arivo ty am-pohe'e, le mira amo lova ila'eo ty an-dava'e: boak'amy efe'e atiñanañey pak'añ' efe'e ahndrefa; añivo'e ao i toetse miavakey.

⁹ Ty haví' areo ho a' IEHOVÀ le ro'ale-tsi-lime-arivo ty an-dava'e naho rai-ale ty am-pohe'e. ¹⁰ Ama'e ao ty anjara miavake ho a' o mpisoroñeо, ro'ale-tsi-lime-arivo ty avara'e, naho rai-ale ty ahndrefa'e naho rai-ale ty atiñana'e vaho ro'ale-tsi-lime-arivo ty atimo'e; añivo'e ao i toetse miavake

^{‡ 47:15} Ketlone: kivoho mahahembañe ^{§ 47:15} Tsedade: Ila'ey; i fitsindroha'ey ^{*} ^{47:16} Kamate: haboseha; hatrovoha; kijoly ^{† 47:16} Berotate: ty ana' i Havilasy ^{‡ 47:16} Sibraime: fiovañe; fandrophizañe ^{§ 47:16} Katsarehatikone: kiaolo aivo; fiherentseña ^{*} ^{47:16} Kavrane: loake; fidadañe; hafotiañe ^{† 47:17} Katsarenone: kialo aman-drano ^{‡ 47:18} Gilade: ty votrim-pitalily ^{§ 47:18} Tamare: Satrañe ^{*} ^{47:19} Kadese; hamasinañe ^{† 47:22} Isa 14:1, 56:6-8, Rom 11:17-26, Efe 2:19, 3:6, Apo 21:12

ho a' IEHOVÀ, ¹¹ ie ty ho a' o mpisoroñe ana' i Tsadoke navaheñeo, ie nahafitambozòtse o fepèkoo naho tsy nandrifik' amy nandrifiha' o nte-Israeleoy, amy nandrifiha' o nte-Levio; ¹² ho anjara miavake do'e ho a' iereo i tane natolotsey, naho ioza'e ty a' o nte-Levio.

¹³ Le amo nte-Levio i mioza an-tane' o mpisoroñey: ro'ale-tsi-lime-arivo ty an-dava'e naho rai-ale ty am-pohe'e; ho ro'ale-tsi-lime-arivo ty andava'e naho rai-ale ty am-pohe'e. ¹⁴ Tsy haletake, tsy hatsaloke, tsy hafindra ty tane fanjàka toy; fa a IEHOVÀ, toe miavake.

¹⁵ I lime-arivo sisa am-pohe'e eoy, ie ro'ale-tsi-lime-arivo ty andava'e, ty hatao tane tsotra ho a' i rovay, ho fimoneñañe, ho tameañañe; le añivo'e ao i rovay. ¹⁶ Le zao ty ho zehe'e: ty ila'e avaratse efats' arivo-tsi-liman-jato, le efats' arivo-tsi-liman-jato ty atimo; le efats' arivo-tsi-liman-jato ty atiñanañe; vaho efats' arivo-tsi-liman-jato ty ahandrefa. ¹⁷ Roanjato-tsi-limampolo ty ho amparipari' i rovay mañavaratse, naho roanjato-tsi-limam-polo mañatimo, naho roanjato-tsi-limam-polo ty maniñanañe naho roanjato-tsi-limam-polo ty mañandrefañe. ¹⁸ Ty sisa rai-ale maniñana naho rai-ale mañandrefa mioza ami'ty andava' i navike ho miavakey; le ho famahanañe mahakama amo mpitoloñe an-drovao. ¹⁹ Hiava aze o mpitoroñe an-drova ao boak' amo hene fifokoa' Israeleoo. ²⁰ I hene ro'ale-tsi-lime-arivo naho ro'ale-tsi-lime-arivo efa-miray ro haambake ho a' i toetse miavakey naho ho a i rovay.

²¹ Ho a i roandriañey ty sisa'e: ty añ'ila'e roe' i toetse miavakey miharo amy rovay, aolo i ro'ale-tsi-lime-arivo' i anjara mb'amy efe'e atiñanañe aney, vaho mañandrefañe aolo i ro'ale-tsi-lime-arivo pak'añ'efe'e ahandrefa; mioza amo anjara' o fifokoañe; zay ty amyi roandriañey, añivo'e ao i navike ho a i miavakey rekets' i toe' i kivoho miavakeiy. ²² Le ho añivo' ty tane' i roandriañey ty tane o nte-Levio naho ty tane' i rovay. Ty sisa añivo' ty tane' Iehodà naho i Beniamine ro a i roandriañey.

²³ Le o ila' o fifokoañe: Ho a i Beniamine, ty boak'añ'efe'e atiñana pak'añ'efe'e ahandrefa—raike; ²⁴ mioza an-tane' i Beniamine ty efe'e atiñanañe pak'añ'efe'e ahandrefa amy Simone—raike.

²⁵ Mioza an-tane' i Simone ty efe'e atiñanañe pak'añ'efe'e ahandrefa, am' Isakare—raike.

²⁶ Mioza amy tane' Isakare boak' añ'efe'e atiñanañey pak'añ'efe'e ahandrefa, amy Zebolone—raike.

²⁷ Mioza an-tane' i Zebolone boak' añ'efe'e atiñanañey pak'añ'efe'e ahandrefa, amy Gade—raike.

²⁸ Ty efe' i Gade le ty ila'e atimo mañatimo, amy Tamare pak'an-drano' i Meribà-Kadese mb'amy torahañey vaho pak' an-driake jabajaba aña.

²⁹ Ie i tane ho zarae' areo an-tsapak' am-pifokoa' Israele ho lova' iareo, vaho zay ty fizarañe aze, hoe t'IEHOVÀ Talè.

³⁰ O fiavotañe amy rovaio: mañavaratse le kobay efats' arivo-tsi-liman-jato ty zehe'e. ³¹ Ho tokaveñe amo tahinam-pifokoa' Israeleo o lalambeindravao*; ty lalambey telo avaratse: ty lalam-bei' i Reobene, raike; ty lalambei' Iehodà, raike; naho ty lalambei' i Levy, raike.

³² Naho atiñanañe: kobay efats' arivo-tsi-liman-jato naho lalambey telo; ty lalambei' Iosefe, raike, ty lalambei' i Beniamine, raike, ty lalambei' i Dane, raike.

* **48:31** Iek 47:22-23, Apo 21:12

³³ Naho atimo, efats' arivo-tsi-liman-jato, naho lalambey telo; ty lalambei' i Simone, raike; ty lalambei' Isakare, raike; ty lalambei' i Zebolone, raike.

³⁴ Naho ahandrefa, efats' arivo-tsi-liman-jato, naho lalambey telo; ty lalambei' i Gade, raike; ty lalambei' Asere, raike; ty lalambei' i Naftaly, raike.

³⁵ Kobaiñe rai-ale-tsi-valo-arivo ty mañarikatoke aze, le ho tokaveñe ty hoe ty añara' i rovay:

Ama'e ao t'IEHOVA.[†]

[†] **48:35** Iek 43:7,9, Isa 24:23, Apo 21:3, 22:3

Daniele

1 Tamy taom-paha-telo' Iehoiakime* mpanjaka' Iehodày, le nionjomb'e Ierosalaimet[†] mb'eo t'i Nebokadnetsare[‡] mpanjaka' i Bavele vaho niarikoboñe'e. **2** Natolo' i Talè am-pità'e t'Iehoiakime, mpanjaka' Iehodà reketse ty ila' o fàna' i anjomban'Añahareio vaho nendese'e mb'añ'akibandrahare'e an-tane Sinare aña, naho nazili'e an-drihan-kibohon-drahare'e ao o fanakeo. **3** Le nisaontsie' i mpanjakay amy Aspenaze§, mpifehem-pitoro'e, ty hañandesa'e ana' Israele naho trim-panjàka vaho ana-donake; **4** ze ajalahy tsy aman-kila tsy aman-kandra, maràm-bintaña, naòke amy ze atao hilala, mahihitse am-paharendrehaña naho mahimbaña am-pitsikarahaña naho maozatse am-bataña hahafijohaña añ' anjomba' i mpanjakay vaho haòke ami'ty fanokiraña naho fisaontsi' o nte Kasdìo. **5** Le tinendre' i mpanjakay ho a' iareo ty anjara boak' andro amo raha mafiri' i mpanjakaio naho amy divay fikama'ey; zay ty famahanaña iareo telo taoña, soa t'ie modo le hiatrake i mpanjakay. **6** Am' iereo o ana' Iehodào: i Daniele*, i Kananià†, i Misaele‡ vaho i Azarià§; **7** le tinolo' i mpifehe' o mpitoroñeyo añañraña: natolo'e amy Daniele ty hoe Beltsatsare*; le amy Kananià ty hoe: Sadrake† naho amy Misaele ty hoe: Mesàke‡ vaho amy Azarià ty hoe: Abednego§.

8 Fe naereñere' i Daniele an-troke te tsy handeo-bataña amy anjara mahakama' i mpanjakaiy naho amy divay fikama'ey; aa le ni-halalie'e i mpifehem-pitoroñey t'ie tsy handeo-bataña. **9** Ie amy zao, natolon'Añahare amy Daniele, añaamy mpifehem-pitoroñey, fiferenaiñaña naho falalàña. **10** Le hoe i mpifehem-pitoroñey amy Daniele, añaeveñako i talèko mpanjakay, ie fa nanendre ty mahakama' areo naho ty finoma' areo; amy t'ie mahaisake ty lahara' areo monjemonjetse te amo ajalahi'e ila'e mitraoke' ama' areoo, le ho ozoña' areo ty lohako añañatrefa' i mpanjakay.

11 Aa le hoe t'i Daniele amy Meltsare*, nampifeleha' i mpifehem-pitoroñey i Daniele naho i Kananià, i Misaele, vaho i Azarià, **12** Ehe, venteo heike ami'ty andro folo abey o mpitoro'oo, le fahano añaña ho fihina'ay naho rano ho finome'ay. **13** Le ampisarieña añañatrefa'o eo henane zay o tarehe'aio naho ty lahara' o ajalahy mpikama amy anjara' i mpanjakaio; le ano ty amy hahaoniña'o o mpitoro'oo. **14** Aa le niantofa'e, vaho nivent'e andro folo; **15** ie nimodo i folo àndroy, le nisoa vintaña naho sometsetse ty sandri' iareo te amo ajalahy nihinaña ami'ty anjara mahakama' i mpanjakaio. **16** Aa le nasita' i mpiatrakey ty anjara mahakama naho divay ho namahana'e iareo vaho nanjotsoa'e vokan-teteke.

17 Le tinolon' Añahare hilala naho hihitse amy ze atao taratasy naho fitsikarahaña i ajalahy efatse rey; mbore naharendreke ze aroñaroñe naho nofy iaby t'i Daniele. **18** Naho nitampetse i andro natao' i mpanjakay ho faneseaña iareo rezay, le nampihovà' i mpifehem-pitoroñey añañatrefa' i Nebokadnetsare eo. **19** Nifanaontsy am' iereo i mpanjakay, fe tsy teo ty

* **1:1** Iehoiakime: haonjo' IEHOVÀ † **1:1** Ierosalaimet: aroñarom-panintsiñaña ‡ **1:1** Nebokadnetsare: ranomaso/fitoreo-jaka § **1:3** Aspenaze: fiovaña * **1:6** Daniele: A'hare mpizaka ahy. † **1:6** Kananià: Falalaña; fitretrezaña ‡ **1:6** Misaele: paiaña, nisongoeña § **1:6** Azarià: ie antetse; famongora' ondatio * **1:7** Beltsatsare: mañaja vara añ'etake † **1:7** Sadrake: maleme; loha-nono ‡ **1:7** Mesake: mitarik' an-kaozaraña § **1:7** Abednego: mpitoron-kazavaña; miloeloe * **1:11** Meltsare; mpamandroñe; mpiatrake

nañirinkiriñe i Daniele naho i Kananià naho i Misaele vaho i Azarià; aa le nijohañe añatrefa' i mpanjakay iereo. ²⁰ Nioni' i mpanjakay te nilikoare' iereo im-polo ze hene ambiasa naho mpañorik'andro am-pifehea'e ao ami'ty hihitse naho hilala. ²¹ Nitoloñe ao ampara'ty taom-baloha' i Korese t'i Daniele.

2

¹ Ie tan-taom-paharoe' ty fifehea' i Nebokadnetsare, le nañinofy t'i Nebokadnetsare, naho nembereñe ty arofo'e vaho nibioñe ty firota'e. ² Aa le linili' i mpanjakay te songa koiheñe o ambiasao naho o mpañorik' androo vaho o nte-Kasdio, hanoro o nofi'eo amy mpanjakay. Aa ie nimbeo nijohañe añatrefa' i mpanjakay eo, ³ le hoe i mpanjakay am' iereo: Nañinofy raho, vaho angareñe ty troko haharendreke i nofy. ⁴ Aa le nisaontsy amy mpanjakay o nte-Kasdio an-tsaontsi' Arame ty hoe: Ry mpanjaka, lava-ohatse; taroño amo mpitoro'oo i nofy vaho hirazaña'ay. ⁵ Tinoi' i mpanjakay amo nte-Kasdio ty hoe: Fa mijadoñe ty nisafiriako, naho tsy ampahafohineñ' ahy i nofy naho ty fandrazaña'e, le ho tseratseraheñe nahareo vaho hanoeñe votren-deotse o akiba' areoo. ⁶ F'ie atoro' areo i nofy naho i fandrazaña'ey le handrambe tambe naho ravoravo naho asiñe ra'elisy amako; aa le atorò i nofy naho i fandrazaña'ey. ⁷ Nanoiñe fañindroe'e iereo, ami'ty hoe: Ehe te hataro' i mpanjakay amo mpitoro'eo i nofy, vaho ho razañe'ay. ⁸ Nanoiñe ty hoe amy zao i mpanjakay: Apotako an-katò t'ie manao jomà-lava, fa oni' areo te nihelañe amy tiahikoy. ⁹ Aa naho tsy ampahafohineñ' ahy i nofy, le raik' avao ty hizakàñe anahareo, amy te vata'e mañentseñe lañitse naho talily mengoke ho lañonà' areo amako, hañovàñe i rahay; aa le taroño amako i nofy handrendrehako hera ho razañe' areo. ¹⁰ Le tinoi' o nte-Kasdio amy mpanjakay, ty hoe, Leo raik' am' ondati' ty tane toio tsy hahafiboak' i raha' i mpanjakaiy ama'e, fa mbe lia'e tsy nañontaneam-panjaka ami' ty ambiasa ndra mpañandro ndra nte-Kasdy ndra roandria ndra mpifeleke ty manahake zay. ¹¹ Toe raha tsitantane ty paia' i mpanjakay, vaho tsy eo ty mahafanoro aze amy mpanjakay naho tsy o anjelio, ie tsy mitrao-pimoneñe ami'ty nofotse. ¹² Niviñetse amy zao i mpanjakay le niforoforo vaho linili'e te ho fonga mongoreñe ze ondaty mahihitse e Bavele ao. ¹³ Naboele i tsey zay naho ho navetrake ondaty mahilalao, vaho pinai' iareo ka t'i Daniele naho o mpiama'eo havetrake.

¹⁴ Nañavohavo an-kihitse amy Arioke* mpifehem-pigarim-panjakay t'i Daniele, ie fa nionjoñe hanjamañe ondaty mahilala' i Baveleo; ¹⁵ nisaontsie'e ty hoe amy Arioke mpifele' i mpanjakay: Akore hao te taentaeñe i lili' tsinei' i mpanjakay? Aa le nampahafohine' i Arioke t'i Daniele.

¹⁶ Nimoak' ao amy zao t'i Daniele, nihalaly amy mpanjakay hanolora'e andro handrazaña'e amy mpanjakay. ¹⁷ Nimb'añ' akiba'e mb'eo amy zao t'i Daniele, nampahafohiñe i mpiama'e rey: i Kanania naho i Misaele vaho i Azarià, ¹⁸ hihalalia' iareo fiferenaiñañe amy Andrianañaharen-dikerañey ty amy raha mietakey, soa tsy ho fonga mongoreñe miharo am' ondaty mahilala ila'e e Baveleo t'i Daniele naho i mpiama'e rey. ¹⁹ Naboak' amy Daniele añ' aroñaron-kaleñe i nietakey vaho nandriañe'e t'i Andrianañaharen-dikerañey. ²⁰ Hoe t'i Daniele:

Andriañeñe nainai'e donia
ty tahinan'Añahare,
fa Aze ty hihitse naho haozarañe;

* ^{2:14} Arioke: Abo, lava, ra'elisy

²¹ Ie ty minday fañovan'andro naho sà:
manitake mpifehe naho
mampijadoñe mpifeleke;
toroa'e hihitse ty mahihitse naho
hilala o mahilalao;

²² aboa'e ty miheatse naho ty mietake;
arofoana'e o añ'ieñe,
vaho imoneñan-kazavàñe.

²³ Ihe ry Andrianañaharen-droaeko,
ty isolohoako naho anolorako engeñe
amy te tinolo'o hihitse naho haozarañe,
le nitoroa'o henaneo i nihalalia'ay,
ami'ty naboa'o ama'ay
ty enta' i mpanjakay.

²⁴ Ie amy zao, nimb'amy Arioke, i nafanto' i mpanjakay hamono o
mahihitse e Baveleoy mb'eo t'i Daniele nanao ty hoe: Ko zamaneñe
o mahihi' i Baveleo; aseseo amy mpanjakay raho, hanoroako aze i
fandrazañañey. ²⁵ Aa le nendese' i Arioke mb'añatrefa' i mpanjakay
mb'eo amy zao t'i Daniele le nanoa'e ty hoe: fa nahatrea ondaty amo
mpirohi' Iehodào raho ze hampahafohiñe i mpanjakay i fandrazañañey.

²⁶ Tinoi' i mpanjakay ty hoe amy Daniele natao Beltesatsarey: Ihe
hao ty hahafandrendrek ' ahy i nofy nitreakoy naho i fandrazaña'ey?

²⁷ Nanoiñe ty hoe aolo' i mpanjakay t'i Daniel, Ty ipaia' i mpanjakaiy,
le tsy mahafboak' aze amy mpanjakay ty mahihitse ndra mpañandro
ndra ambiasa ndra mpitoky; ²⁸ fe andikerañe ao t'i Andrianañahare
mpampiborake raha tsitantane; Ie ty nampiboak' amy Nebokadnetsare
mpanjaka o raha hifetsak' amo andro honka'eo. Zao ty nofi'o, naho
o aroñaron' añambone'oo t'ie tam-pandreañe ao: ²⁹ Ihe ry mpanjaka,
an-tihi'o eo te nonjoneñe o ereñere'oo haharendreke ze hifetsak' amy
añey, vaho nampibentatse o hifetsakeo i Mpampiborake o tsikentañe.

³⁰ Aa naho amako, tsy ho nahaborake i mietakey amy ze hihitse mete ho
amako mandikoatse ze amo veloñe iabio, fe hatoroko amy mpanjakay i
fandrazañañey hahafohina'o o ereñeren' arofo'oo.

³¹ Nahatrea sarens-draha jabajaba rehe, ry mpanjaka. Toe ra'elahy ty
habei' i sarey vaho losotse ty fireandrea'e, ie nijohañe añ'atrefa'o eo,
mbore nampañeveñe i sandri'ey. ³² Volamena ki'e ty loha' i sarey, volafoty
ty tratra'e naho o sira'eo; torisike ty tro'e naho o tòha'eo; ³³ viñe o
kitso'eo vaho nizara o tombo'eo, ty ila'e viñe naho tane lietse ty ila'e.

³⁴ Nisambae'o le nihatsafeñe tsy am-pitâñe ty vato namofoke o tomboke
viñe naho lietseo, nampidemoke iareo. ³⁵ Le nivolentsa amy zao i viñey,
i lietsey, i torisike, i volafoty, vaho i volamenay; manahake o kafo'e ant-
tane-panongañ' asarao; nasio' i tiokey mb'eo, le ndra loli'e tsy nitendreke
ka. Le nitombo ho vohitse mitiotiotse nahalifotse ty voatse toy i vato
nidoiñe amy rahaiy. ³⁶ Zay i nofy, le ho taroñe'ay ama'o i fandrazaña'ey.

³⁷ Mpanjakam-panjaka rehe ry mpanjaka, amy te natolon' Añaharen-
dikerañe azo, ty fifeheañe, ty haozarañe, ty hafatrarañe, vaho ty engeñe.

³⁸ Le natolo'e am-pitâ'o ze hene fimoneña' o ana'ondate, o biby an-
kivokeo, naho o voron-dikerañe; vaho hene nampifehe'e azo. Ihe i
añambone volamenay.

³⁹ Manonjohy azo, le hitroatse ka ty fifeheañe ambane' ty azo, vaho
hañorike zay ty fifeheañe fahatelo, hifeleke i hene taney i fifeheañe

torisìkey. ⁴⁰ Haozarañe manahak' o viñeo ty fifeheañe fah'efatse; naho hambañe ami'ty viñe mampidemoke naho mamofoke i he'e rezay, ty hampidemoha'e naho ty hamofoha'e. ⁴¹ Le i nahaoniña'o o tomboke naho rambo'eoy, ty ila'e ni-liem-panao valàñe tane, ty ila'e viñe, le hazarazara i fifeheañey, fe ho ama'e ty haozara' i viñey, ie nioni'o te nifangaro amy liem-panao valàñe-taney ty viñe. ⁴² Le manahake te nizara ho viñe ty ila' o rambo-tombo'eo naho lietse ty ila'e, le haozatse ty ampha' i fifeheañey vaho harantsañe ty ila'e. ⁴³ Aa i nioni'oy, i viñe nitraoke lietsey: Hifangaro añamo tiri' ondatio iereo, fe tsy hifampipiteke, manahake ty tsy iharoa' ty viñe naho ty lietse.

⁴⁴ Ie añ'andro i mpanjaka rey, le hampitroatse fifeheañe tsy ho mengoke nainai'e t'i Andrianañaharen-dikerañe, le tsy ho limbezam-pifokoa' ondaty i fifeheañe zay, fe fonga ho demohe'e naho habotse'e o fifeheañeo, vaho ie ty hijadoñe nainai'e[†]. ⁴⁵ Le ami'ty nahaoniña'o te hinatsake tsy am-pitâñe amy vohitsey ty vato nandemoke i viñey naho i torisikey naho i lietsey naho i volafotiy vaho i volamenay; ie ty nampiboahan' Añahare ra'èlahiy amy mpanjakay ty hifetsak' amy ze aña. Toe to inofiy, naho vantañe i fandrazaña'ey.

⁴⁶ Aa le nihotrake naho nibabok' an-dahara'e naho nire-batañe añ'atrefa' i Daniele eo t'i Nebokadnetsare mpanjaka vaho linili'e t'ie hisoroñañe naho hañembohañe. ⁴⁷ Nanao ty hoe amy Daniele i mpanjakay; Toe Andrianañaharen' drahare t'i Andrianañahare vaho Talèm-panjaka naho Mpampiborake raha mietake t'i Andrianañahare'o, kanao nabenta'e ama'o i raha mietakey. ⁴⁸ Aa le nonjone' i mpanjakay t'i Daniele naho nitolora'e ravoravo fanjaka maro vaho nanoe'e mpifehe' i hene faritane' i Baveley naho mpifeleke o fonga mpifehe' o mahîhi' i Baveleoo. ⁴⁹ Nihalaly amy mpanjakay t'i Daniele, vaho najado'e ho mpamandroñe o raham-paritane' i Baveleo t'i Sadrake naho i Mesake vaho i Abednegò; le tan-dalambei' i mpanjakay t'i Daniele.

3

¹ Nanao sarendraha volamena t'i Nebokadnetsare mpanjaka, kiho enim-polo ty haabo'e, le kiho eneñe ty am-pohe'e; natroa'e ami'ty monto' i Dorà*, am-paritane' i Bavele ao. ² Le nirahe' i Nebokadnetsare ty koike hanontoñe o beio, naho o sorotà'eo, naho o fiaoloo, o mpizakao, o mpamandroñe, o kominteo, o prejidào, vaho o mpifehe faritaneo hiatreke ty fañorizañe i sare nampitroare' i Nebokadnetsare mpanjakay. ³ Aa le natontoñe amy fañorizañe i sare nampitroare' i Nebokadnetsare mpanjakaiy o beio, naho o sorotà'eo, naho o fiaoloo, o mpizakao, o mpamandroñe, o kominteo, o prejidào, vaho o fonga mpifehe faritaneo. Aa ie nijohañe añ'atrefa' i sare nampitroare' i Nebokadnetsare mpanjakaiy ey, le ⁴ hoe ty tsinei' i mpikokey: Andiliañe ama' areo ry ondaty, ry fifeheañe naho ry fisaontsy, ⁵ te ie mahajanjiñe ty feon' antsiva naho soly naho marovany naho jejobory naho kantsâñe naho mandalina vaho ze hene raha mañomey feo, le hibaboke naho hitalaho amy sare volamena natroa' i Nebokadnetsare mpanjakaiy; ⁶ fe havokovoko am-po' toñake misolebatse ao amy oray avao ze tsy mibaboke naho mitalaho ama'e. ⁷ Aa ie nahajanjiñe ty feo' i antsivay naho i soliy naho i marovaniy naho i

[†] **2:44** Dan 7:1-28, Sab 22:28, Iir 30:11, Ioe 4:16, Oba 1:15-17, Kab 3:12-13, Tsf 3:8, Kag 2:22, Ben 11:15 * **3:1** Dorà: tariratse; fimoneñañe

jejoboriy naho i kantsàñey naho i mandalinay vaho o mpañomey feo iabio, le hene nibaboke ze ondaty, fifeheañe naho fameleke niambane amy sare volamena natroa' i Nebokadnetsare mpanjakay.

⁸ Ie añe, le nitotoke eo ty nte-Kasdy ila'e nanisý o nte-Iehodàò ⁹ nisaontsy amy Nebokadnetsare mpanjaka ty hoe, Ry mpanjaka, lava ohatse. ¹⁰ Fa nandily rehe, ry mpanjaka, te ze ondaty mahajanjiñe ty feo' i antsivay naho i soliy naho i marovaniy naho i jejoboriy naho i kantsàñey naho i mandalinay vaho o mpañomey feo iabio, ty hibaboke naho hitalaho amy sare volamenay; ¹¹ vaho ze tsy mibaboke, tsy mitalaho, ro hafetsak' an-toñake mirebareba ao. ¹² Eo o nte-Iehodà ila'e nampamandroñe'o o raham-paritane' i Baveleoo: toe i Sadrake naho i Mesake vaho i Abednegò; tsy mañaoñe azo indaty rey ry mpanjaka; tsy miambane amo ndrahare'oo, naho tsy mitalaho amy sare volamena natroa'oy. ¹³ Aa le niviñetse amporoforo t'i Nebokadnetsare vaho linili'e te hasese mb'eo t'i Sadrake naho i Mesake vaho i Abednegò. Aa le nasese mb' añatrefa' i mpanjakay mb' eo indaty rey. ¹⁴ Nanao ty hoe am' iereo t'i Nebokadnetsare: O ry Sadrake naho i Mesake vaho i Abednegò, to hao t'ie tsy miisy o 'ndraharekoo, naho tsy mitalaho amy sare volamena natroakoy? ¹⁵ Aa ie mahajanjiñe ty feo' i antsivay naho i soliy naho i marovaniy naho i jejoboriy naho i kantsàñey naho i mandalinay miharo amo mpañomey feo iabio, ho veka'e hibaboke naho hitalaho amy sare volamenay vi' nahareo henane zay? Fa naho tsy italahoa' areo, le havokovoko an-toñake misolebatse ao amy oray avao. Andrianañahare aia ty hahahaha anahareo an-tañako? ¹⁶ Aa hoe ty natoi' i Sadrake naho i Mesake vaho i Abednegò amy Nebokadnetsare mpanjakay: Ry Nebokadnetsare, tsy anay ty hamale azo amy ontane zay. ¹⁷ Mahaoniña, te mahahaha anay amy toñake mibelañey t'i Andrianañahare toroñe'ay, vaho mahafipoliora'e am-pitá'o zahay ry mpanjaka. ¹⁸ Fa naho tsie, ehe mahafohina, ry mpanjaka, t'ie tsy hitalaho amy 'ndrahare'oy, ndra hiisy i sare volamena natroa'oy. ¹⁹ Nilifom-piforoforoañe amy zao t'i Nebokadnetsare le niloroloro amy Sadrake naho i Mesake vaho i Abednegò ty lahaba'e, le nanoiñe, naho nandily te hanoeñe im-pito ty hamae' i toñakey. ²⁰ Linili'e amy zao o fanalolahy am-pirimboñan-dahindefo'eo ty handrohy i Sadrake naho i Mesake naho i Abednegò, vaho hamokovoko iareo amy toñake milebalebay ao. ²¹ Rinohy reketse saroñe naho sikiñe naho sabaka naho ze lamba ila'e am' ondaty rey vaho nafetsak' anteñateña' i toñake misolebatsey ao. ²² Aa kanao am-bodongero'e ty nandilia' i mpanjakay, ie niloho mae i toñakey, le navetran-del'afó ondaty nandrambe i Sadrake naho i Mesake vaho i Abednegò. ²³ Aa le nihotrak' an-drohy an-toñake nibebañ' ao indaty telo rey: i Sadrake naho i Mesake vaho i Abednegò. ²⁴ Nilatsa t'i Nebokadnetsare, mpanjaka, le niongak' amy zao nisaontsy amo mpanolo-keve'eo ty hoe: Tsy telo hao t'indaty nafetsan-tika an-drohy amo afoo? Hoe ty natoi' iareo amy mpanjakay; Eka 'nio, ry mpanjaka. ²⁵ Hoe ty natoi'e: Heheke, mahatreo ondaty efatse midada ao raho, songa midraidraitse amy afoy ao, tsy ama'e ty miante, vaho manahake t'i Anak' Andrianañahare ty vinta' o fahefatseo. ²⁶ Nitotok' am-bava' i toñake misolebatsey t'i Nebokadnetsare, nanao ty hoe: o ry Sadrake naho i Mesake vaho i Abednegò, ry mpitoron' Añahare Andindimoneñe, miakara mb'etoy. Aa le nienga boak' an-teñateña' i afoy t'i Sadrake naho i Mesake vaho i Abednegò. ²⁷ Le nihimpoke eo o beio naho o sorotà'eo naho o fiaoloo, o mpizakao, o mpitam-bolao, o kominteo, o prejidào vaho o mpifehe faritaneo hisamba ondaty tsy nanaña'

i afoy lilio, leo raik' amo maròy añambone' iareoo tsy nimae, tsy niova ka o sarimbo' iereoo, vaho tsy nipitek' am' iereo ty imbon' afo. ²⁸ Le hoe ty saontsi' i Nebokadnetsare: Andriañeñe t'i Andrianañahare' i Sadrake naho i Mesake vaho i Abednegò, ie nañirake i anjeli'ey hañaha o mpitoro'e mpiato ama'eo mbore nifotetse amy saontsim-panjakay, namoe ay tsy hitoroñe ndra hitalaho ami'ty ndrahare ila'e naho tsy t'i Andrianañahare' iareo avao. ²⁹ Aa le mitsey raho, te ho fonga tseratseraheñe ze miteratera an' Andrianañahare' i Sadrake naho i Mesake naho i Abednegò, vaho hatao vongan-deotse ty akiba'e, amy te tsy eo ty drahare ila'e mahahaha manahake zao. ³⁰ Aa le nonjone' i mpanjakay am-paritane' i Bavele t'i Sadrake naho i Mesake vaho i Abednegò.

³¹ I Nebokadnetsare mpanjaka, ho amo kilakila' ndaty naho fifeheañe vaho fisaontsy mpimoneñe an-tane-bey atoio; Ampitoaboreñe ama' areo ty fañanintsiñe. ³² Tsy mete tsy aboeleko o viloñe naho raha tsitantane nanoen' Añahare Andindimoneñey amakoo.

³³ Jabahinake o vilo'eo, naho
mitozantozañe o fitoloña'e mahalatsao!
Nainai'e i fifehea'ey, vaho
boak'an-tsa mb'an-tsa i fifeleha'ey :

4

¹ Ie nihendre añ'akibako ao avao, zaho Nebokadnetsare, vaho niraorao añ' anjombam-panjakako ao, ² le nañinofy ty nampirevendreveñ' ahy, vaho nitsobore ahy am-pandreako ao o ereñereñe naho aroñaroñe andohakoo. ³ Aa le liniliko te songa hasese aoloko eo ze mahihi' i Bavele hampiboahañe amako ty fandrazaña' inofiy. ⁴ Nimoak' ao o ambiasao naho o mpañandroo naho o nte-Kasdio naho o mpitokio vaho nataliliko am' iereo i nofy; fe tsy natoro' iareo ahy i fandrazaña'ey. ⁵ Ie an-tsehang'a'e aña te niatrek' ahy t'i Daniele, i natao Beltesatsare ty añañara'ey—i tahinan-draharekoy, fa ama'e ao ty Arofon' Añahare Masiñe; le añañatrefa'e eo ty nitaliliako i nofy. ⁶ Ry Beltesatsare, tale' o mahihitseo; fa nirendreko te ama'o ao i Arofon' Añahare Masiñey, le tsy ao ty raha mietake mikafitse ama'o; atalilio o aroñaro' i nofy nitreakoy naho ty fandrazaña' azeo. ⁷ Inao o aroñaron-dohako tan-tihi: nahatrea hatae añivo' ty tane toy, an-tiotiotse eñe i lengo'ey. ⁸ Nitombo i hataey le nihaftaratse, naho nahatakatse andikerañe ey ty haabo'e, vaho pak' añ'olo' ty tane toy ty fahaisahañe aze. ⁹ Fanjaka o rave'eo, niegoego o voa'eo, ama'e ao ty haneñe ho a ze kila raha; ambane an-talinjo'e ao ty nialofa' o bibin-kivokeo naho o ra'eo ty nimoneña' o voron-dikerañe, le hene nifahàna'e ze atao nofotse. ¹⁰ Nitreako amy aroñaron-dohako am-pandreakoy te ingo ty mpijilo miavake nizotso boak' andikerañe aña; ¹¹ nikoike ami' ty hoe; Firao o hataeo, birao o ra'eo, ahintsaño o rave'eo vaho aparatsaho o voa'eo; ampisitaho boak' ambane'e ao o bibio naho amo ra'eo o voroñeo; ¹² fe apoho an-tane eo i foto'ey naho o vaha'eo; bandio viñe naho torisike le apoho añ'ahetse maindoñindon-kivok' ao; le ty zonon-dikerañe ty handèñ' aze; naho hitrao-pàhañe amo bibin-kivo' ty tane toio; ¹³ ampiovaeñe tsy ho tro' ondaty ty arofo'e, ho tolorañe fom-biby; vaho ampiarieñe ambone'e ty taom-pito. ¹⁴ Ami'ty saontsi' i mpijiloy ty ijadoña' i rahay naho i zakay ty amy saontsi' o miavakeo hahafohina' o veloñeo te mifelek' am-pifehea' ondatio t'i Andindimoneñe naho tolora'e amy ze satri'e, vaho oriza'e ambone ze mirek' am' ondatio. ¹⁵ Zaho

Nebokadnetsare ty nahatrea inofy zay; aa le ihe Beltesatsare: taroño i fandrazaña'ey, fa ndra te leo raik' amo mahihitse amy fifeheakoio tsy nahafiboak' i fandrazaña'ey, le ihe ro mahalefe kanao ama'o ty Arofon' Añahare Masiñe.

¹⁶ Nianjiñe eo avao t'i Daniele, i natao Beltesatsare ty tahina'ey; amy te nañembetse aze ora raike i naereñère'ey. Aa le nisaontsy ama'e i mpanjakay nanao ty hoe: O Beltesatsare, ko ampañaliheñ' azo i nofiy ndra i fandrazaña'ey. Aa le nanoiñe ami'ty hoe t'i Beltesatsare, Ry talèko, ee te ho an-drafelahi'o i nofiy, naho ho amo mpikinia azoo i fandrazaña'ey.

¹⁷ I hatae nioni'o nitombo naho nihofatratsey, ie nahatakatse andikerañe eñe ty haabo'e, hahaisaha' ty tane toy iaby; ¹⁸ i aman-draveñe fanjaka naho amam-boa nirokorokoy, tama'e ty hâne' ze he'e, nitobok' ambane'e ao o bibin-kivokeo, naho nimoneñe amo ra'eo o voron-dikerañe: ¹⁹ Ihe 'nio, ry mpanjaka ro nitombo nihamaozatse, le nitoabotse nahatakatse antiotiots' eñe ty enge'o, vaho pak' añ'olo' ty tane toy ty fifehea'o. ²⁰ Le i nioni' i mpanjakaiy, ie nanao ty hoe ty mpijilo miavake nizotso boak' andikerañe ao: Firao o hataeo le mongoro; angao an-tane ao i foto'ey naho o vaha'eo, naho bandiem-by naho torisike amo ahetsé maindoñindoñe an-kivokeo naho apoho handeñ' aze i zonon-dikerañey ie hitraok' anjara amo bibin-kivokeo ampara' te niary ambone'e ty taom-pito. ²¹ Inao ty famentabentarañ' aze ry mpanjaka: Nivotrak' amy talèko mpanjakay ty fizakà' i Andindimoneñey; ²² t'ie ho roaheñe boak' am' ondatio; le hitraok' amo bibin-kivokeo ty fimoneña'o naho ho fahanañe amo ahen-kivokey manahake o añombeo, naho hampiandroeñe amy zonon-dikerañey, vaho taom-pito ty hiary ambone'o ampara' te fohi'o te mifelek' ambone' ty fifehea' ondatio t'i Andindimoneñey vaho atolo'e amy ze tea'e. ²³ Le ie nandiliañe te hengàñe an-tane ao i foto-katae'ey rekets' o vaha'eo, le mbe ho tanañe ho azo ty fifehea'o, hahafohina'o te i Likerañey ty mifeleke.

²⁴ Aa le iantofo o fanoroakoo, ry mpanjaka vaho apitsoho an-kavañonañe o tahi'oo, naho am-piferenaiñañe o rarakeo o hakeo'oo; zay ty mete hañalava o androm-pibodobodoa'oo.

²⁵ Fe nifetsak' amy Nebokadnetsare mpanjaka irezay. ²⁶ Ie nimodo ty volañe folo-ro' amby, naho nidraidraitse ambone' ty anjombam-panjakàm-pifehea' i Baveley, ²⁷ le hoe ty nisaontsie' i mpanjakay: Tsy itoy hao i Bavele ra'elahi naoreko ho anjombam-pifehea' ty haozaran-kafatrarako ho ami'ty engen-kajabahinako? ²⁸ Mbe tam-palie' i mpanjakay i saontsy zay te nivotrake boak' an-dindimoneñe ao ty fiarañanañañe nanao ty hoe: Ry Nebokadnetsare mpanjaka, inao ty fetse ama'o fa nieng' azo i fifeheañey, ²⁹ ie ho soireñe hienga ondatio, naho ho amo bibin-kivokeo ty fimoneña'o, le ho fahanañe ahetsé manahake o añombeo, naho ho kotsae' ty zonon-dikerañey vaho taom-pito ty hiary ambone'o ampara' te fohi'o te mifelek' amo fifehea' ondatio t'i Andindimoneñey vaho tolora'e amy ze satri'e. ³⁰ Nihenek' amy Nebokadnetsare amy ora zay i rahay le nasitake am' ondatio re, naho nikama ahetsé manahake o añombeo, naho nampandroe' i zonon-dikerañey ty fañova'e ampara' te nitiry ho volombantio o maroi'eo, vaho hoe hohom-boroñe o hoho'eo. ³¹ Aa ie nimodo i fets' androy le zaho Nebokadnetsare ty nampiandra maso mb' an-dikerañe ey naho nampolieñe amako ty faharendrehako naho nandriañeko t'i Abo Tiañe naho nibangoeko vaho nirengèko i Veloñe nainai'ey, Fifeheañe tsy mbian-ko modo i fifehea'ey; vaho miranga ze hene sa i fifeleha'ey;

³² le volilieñe ho tsy vente'e

ze kila mpimone' ty tane toy,
 naho hene anoe'e ze satrie'e
 amy lahialen-dikerañey naho
 amo mpimone' ty tane-bey toio;
 vaho tsy eo ty hikalañe ty fità'e
 hanao ama'e ty hoe: Inoñ' o anoe'oo?

³³ Ie henane zay, nampoly amako ty hilalako, le nimpoly ami'ty havolonahem-pifeheako ao; nimpoly amako iaby ty engeko naho ty habaranjibaranji'e; nipay ahy o mpifehem-paritanekoo naho o androanavikoo; le nampoly amako ty fifeheako, vaho nampitoaboreñe amako ty engeñe. ³⁴ Ie amy zao, mibango naho mañonjoñe vaho mandrenge i Mpanjakan-dikerañey, zaho Nebokadnetsare, amy te hene to o fizakà'eo le hai'e ty mampireke o mañavelo am-pirengevohaño.

5

¹ Nanao sabadidake jabajaba t'i Belsatsare mpanjaka ho ami'ty arivo' o roandria'eo vaho ninon-divay aña'atrefa' i arivoy. ² Naho nitsopek' i divaiy t'i Belsatsare, le linili'e te hasese ama'e o fanake volamena naho volafoty nendesen-drae'e Nebokadnetsare boak' amy kivohon' Añahare e Ierosalaime añaio, hikamà' o roandria'eo naho o vali'eo vaho o sakeza'eo. ³ Aa le nase se mb'eo o fanake nendeseñe boak' an-kivohon' anjomban' Añahare e Ierosalaime añaeo naho nikama ama'e i mpanjakay naho o roandria'eo naho o vali'eo vaho o sakeza'eo. ⁴ Ie nigenoke divay naho nandrenge o 'ndrahare volamena naho volafoty, torisike naho viñe vaho vatoo, ⁵ le nisodehañe eo amy zao ty rambo-pitá' ondaty, nanokitse aolo' ty fitam-pailo amy pako' i rindriñe aña' anjombam-panjakay vaho niisa' i mpanjakay ty ila' i fitañe nanokitsey. ⁶ Nikòfoty amy zao i mpanjakay naho nitsobore aze i fitsakorea'ey, nibalake ka ty kitambe an-toha'eo, vaho nifamango o ongo'eo. ⁷ Nikoik' amy zao i mpanjakay t'ie haneseañe ambiasa naho nte-Kasdý vaho mpitoky. Nisaontsy amo mahihi' o Baveleo i mpanjakay ami'ty hoe: Ze mahavaky ty sokitse tiañe naho hanoro ahy i fandrazaña'ey, le ho sikinañe malò-mavo naho ho ravaheñe silisily volamena ty fititia'e, vaho ho mpifehe ty faha-telo' ty fifeheañe toy. ⁸ Songa niheo mb'eo ondaty mahihi' i mpanjakaio, fe tsy nahavaky i sokitsey, tsy nahabentatse i fandrazaña'ey amy mpanjakay. ⁹ Nangonotse amy zao t'i Belsatsare mpanjaka naho niova laharañe, vaho veren-draha o roandria'eo. ¹⁰ Ie amy saontsi' i mpanjakay naho o roandria'ey le nimoak' amy efe-tsabadidakey ty vali' i mpanjakay, le hoe ty enta' i vali'ey, Ry mpanjaka, lava-havelo: ko ado'o hitsobore azo o vetsevetse'oo, ndra hikomavo o lahara'oo. ¹¹ Am-pifehea'o ao t'indaty, le ama'e ty Arofon' Añahare Masiñe; ie fahan-drae'o ty nitendrehañe hazavàñe, hilala naho hihitse; vaho manahake ty hilalan' Añahare ty nizoeñe ama'e; ie ty nanoe' i Nebokadnetsare mpanjaka, rae'o, i rae'o mpanjakay, roandria ambone' ze hene ambiasa naho mpañandro naho nte-Kasdý vaho mpitoky, ¹² amy te nioniñe amy Daniele, i natao' i mpanjakay Belsatsarey, ty arofo loho ambone, ty hilala mitiotiotse; rendre'e iaby ty nofy naho ty fandrazañañe naho ty fampiborahañe ze raha mietake, vaho ty fandevenañe hakahaka. Aa le ampikanjo t'i Daniele, hanoro i fandrazaña'ey. ¹³ Aa le nase se aña' atrefa' i mpanjakay t'i Daniele naho hoe ty saontsi' i mpanjakay amy Daniele: Ihe hao i Daniele anam-pirohi' Iehodà nendesen-draeko boake Iehodà? ¹⁴ Fa tsinanoko ty ama'o, te ama'o ty Arofon' Añahare Masiñe, naho te nizoeñe ama'o ty hazavàñe naho ty faharendrehañe vaho

ty hihitse ambone. ¹⁵ Ie henaneo fa nasese amako o mahihitseo, naho o mpañandroo hamaky o sokitseo hampahafohiñe ahy ty fandrazaña'e, fe tsy naboa' iareo amako ty famentabentarañ' aze. ¹⁶ Aa le tsinanoko ty ama'o, te mahafitaroñe ty mietake, vaho mahafibalake ty sarotse; aa ie mahavaky i sokitsey naho mahaborake i fandrazaña'ey amako, le hasaroñe malò-mavo, naho ho ravaheñe silisily volamena i fititia'o, vaho ho mpifehe faha-telo' ty fifeheañe toy. ¹⁷ Hoe ty natoi' i Daniele añatrefa' i mpanjakay, Tano ama'o o tambeo naho atoloro ami'ty ila'e o ravoravoo fe ho vakieko ama'o o sokitseo, ry mpanjaka, vaho ho razañeko ama'o. ¹⁸ Ry mpanjakao, Natolon' Añahare Andindimoneñe ao amy Nebokadnetsare rae'o ty fifeheañe naho ty volonahetse, naho ty engeñe vaho ty fikantsoñañe; ¹⁹ le amy volonahetse natolotse azey ty nampañeveñe naho nampihondrahondra ze kilakila ondaty naho fifeheañe naho fameleke añatrefa'e; le navetra'e ze satri'e, naho nitana'e ho veloñe ze satri'e, le naonjo'e ze satri'e, vaho nafotsa'e ze satri'e. ²⁰ F'ie nitoabotse ty arofo'e naho nihagàñe am-pirengenvohañe ty tro'e, vaho nitoloñe an-kavokavoke, le nafotsak' amy fiambesam-pifehea'ey vaho nasintak' ama'e ty enge'e ²¹ le rinoake boak' amo ana' ondatio naho nampindrezeñe amo bibio ty arofo'e, naho amo borike li-io ty akiba'e; nampikaman' aze ty ahetsé hoe añombe, naho nampandroe' i zonon-dikerañey ty fañova'e ampara' te nifohi'e te felehen' Añahare o fifehea' ondatio vaho ampijadoñe'e ho mpifehe ze satri'e. ²² Fa ihe ry Belsatsare, ana'e, tsy nampireke arofo ndra te hene nifohi'o; ²³ te mone nitroatse hiatreatre i Talèn-dikerañey naho nasese añatrefa'o eo o fana' i anjomba'eo naho songa ninon-divay ama'e rehe naho o roandria'oo, o vali'oo naho o sakeza'oo; le nirengè'o o 'ndrahare volamena naho volafoty, an-torisike, hatae naho vato, ze tsy mahatre, tsy mahatsanoñe. tsy maharendrekeo, vaho mbe lia'e tsy niasia'o t'i Andrianañahare, ie hene am-pitá'e ao ty fiai'o naho o fitoloña'oo. ²⁴ Aa le nampañitrifeñe boak' añatrefa'e ty lela-pitañe, vaho nisokireñe o sokitseo. ²⁵ Le izao ty sokitse nipatere'e: Mene*, Mene, Tekele†, Parase‡. ²⁶ Inao ty fandrazaña'aze: Mene: Vinolilin' Añahare ty fifehea'o vaho nagado'e. ²⁷ Tekèle: Linanja' am-pandanjan-drehe vaho nizoeñe te tomotse. ²⁸ Parase: fa zinara' i fifeheañey vaho natolotse amo nte-Maday§ naho nte-Paraseo*. ²⁹ Aa le namantoke t'i Belsatsare, vaho nisikina' iareo malò-mavo t'i Daniele, naho niravahenê silisily volamena ty am-pititia'e eo, vaho nitsey ty ama'e t'ie ro mpifehe faha-telo' i fifeheañey. ³⁰ Amy haleñey te navetrake i Belsatsare mpanjaka' o nte-Kasdio.

6

¹ Nandrambe i fifeheañey ami'ty tao'e faha-enempolo-ro'amby t'i Dariavese*. ² Ni-no' i Dariavese ty hañoriza'e mpifehe zato-tsy-roapolo amy fifeheañey hanitsifañe i fanjakàñey, ³ le ambone' iereo ty mpifeleke telo—raik' am' iereo t'i Daniele—vaho mitalily am' iereo i mpifehe rey, soa tsy ho tsoborèñe i mpanjakay. ⁴ T'i Daniele toy ty nisoheñe ambone' ze hene mpifehe naho mpifeleke ty amy arofo tsitantane ama'ey; le sinafiri' i mpanjakay te hanoe'e ambone' i fifeheañey iaby. ⁵ Aa le pinai' o mpifelekeo naho o mpifeheo ty hampsikapy i Daniele am-pitoloña'e amy

* 5:25 Mene: voaiake † 5:25 Tekele: linanja ‡ 5:25 Parase: Zinara § 5:28 Maday: zehe; lili'e; rakoke * 5:28 Parase: ty mandily, mpiningy soavala ** 6:1 Dareiavaise: ty mampandrendre-batañe

fifeheañey, fe tsy nahatendreke ty hikiniàñe aze ndra ze lila'e ty amy figahiña'ey, vaho tsy naharendrehan-kila ndra tahiñe. ⁶ Aa le hoe i ondaty rey, le lia'e tsy hahaonin-dilatse amy Daniele tia tika, naho tsy t'ie ho onintika amy lilin' Añahare'ey avao.

⁷ Aa le nihitrihitry mb'amy mpanjakay mb'eo i mpifehe naho mpifeleke rey nanao ty hoe ama'e: Ry Dariavese mpanjaka, lava havelo. ⁸ Songa mitrao-safiry o mpamele-pifeheañeo, o mpizakao, o mpifeheo, o beio, vaho o sefoo te honjoneñe ty tseim-panjakàñe hañatò te ze hihalaly amandrahare ia' ia ndra ama' ondaty, naho tsy ama'o avao ampara' te modo ty andro telopolo, ry mpanjaka, le havokovoko an-dakaton-diona ao. ⁹ Aa le iantofo i tsey zay henaneo, ry mpanjaka, vaho soniavo o sokitseo tsy hiova, ty amy lili' i Maday naho i Parase tsy mete mihotike. ¹⁰ Le nanonia i sokitsey, hampijadoña'ho lily, t'i Dariavese. ¹¹ Aa ie nifohi' i Daniele te nisoniaveñe i sokitsey le nizilik' añ' anjomba'e ao; toe nisokake mb'e Ierosalaime i lalan-kede am-batsey, le nitongaleke re in-telo boak'andro, niloloke vaho nañandriañe añatrefan' Añahare'e eo amy t'ie lili'e.

¹² Aa le nifanontone indaty rey naho naharendreke te niloloke vaho nihalaly aman' Añahare'e t'i Daniele. ¹³ Niharinea' iereo amy zao i mpanjakay le nitalily i tseim-panjakañey: Tsy vaho nañatò ty tsey hao ry mpanjaka, te ze hihalaly aman' Añahare' iaia ndra ama' ondaty naho tsy ama'o avao añate' ty andro telopolo ro havokovoko an-dakaton-diona ao? Hoe ty natoi' i mpanjakay: To i hoe zay ty amy lili' o nte-Maday naho nte-Parase tsy mihotike. ¹⁴ Aa le hoe ty natoi' iareo añatrefa' i mpanjakay, Tsy mañaoñe azo t'i Daniele, anam-pandrohiza' o nte-Iehodào, ndra i tsey najado'oy, te mone mihalaly in-telo ami'ty andro. ¹⁵ Ie nahajanjiñe i entañe zay i mpanjakay le loho navesatse ama'e naho napite'e amy Daniele ty arofo'e hañaha aze; vaho nifanehak' ampara' te tsofots' andro hañafaha'e. ¹⁶ Fe niropak' amy mpanjakay indaty rey, nanao ty hoe amy mpanjakay, Mahafohina, ry mpanjaka, inay ty lili' Maday naho i Parase te tsy mete ovañe ze tsey ndra fañè najado' i mpanjakay. ¹⁷ Aa le nandily i mpanjakay, le nasese mb'eo t'i Daniele, vaho navokovoko an-dakaton-diona ao. Nanao ty hoe amy Daniele amy zao i mpanjakay: Handrombak' azo abey t'i Andrianañahare toroñe'o nainai'e. ¹⁸ Nendeseñe amy zao ty vato, le nikapefeñe ty vava' i lakatoy; vaho vinoli-tombo' i mpanjakay amy bange fitombo'ey naho ami'ty fitombo' o roandria'eo soa tsy hovaeñe ty amy Daniele. ¹⁹ Noly añ' anjomba'e ao i mpanjakay, nandre tsy nikama; le tsy nañendesan-draha, vaho nihàンkañe ama'e ty rotse. ²⁰ Aa le nañaleñaleñe i mpanjakay nitroatse te nangararak' atiñana vaho nihitrihitry mb'an-dakato' o lionao mb'eo. ²¹ Ie nandoak' amy lakatoy eo, le nikoik' an-kalonjeram-piarañanañañe amy Daniele, le hoe ty napaza' i mpanjakay amy Daniele, ry Daniele mpitoron' Andrianañahare veloñe, naharombak' azo amo lionao hao t'i Andrianañahare fitoroña'o nainai'e? ²² Le hoe t'i Daniele amy mpanjakay, lava ohatse, ry mpanjaka; ²³ Nañirake ty anjeli'e t'i Andrianañahareko; nampitsiteke ty vava' o lionao tsy hijoy ahy, amy t'ie naliq hakeo añatrefa'e, naho toe tsy nandilatse ama'o raho ry mpanjaka. ²⁴ Nivaranehak' amy zao i mpanjakay naho linili'e te avotañe amy lakatoy t'i Daniele. Aa le nakareñe an-dakato ao t'i Daniele, vaho tsy nizoem-pere amy t'ie niato aman' Añahare'e. ²⁵ Linili' i mpanjakay te hampiatrefeñe aze o nanisý i Danieleo. Le fonga navokovoko amy lakaton-dionay naho o vali'eo rekets' o ana'eo. Ie mbe tsy niponak' antane' i lakatoy iereo le fa niambotraha' o lionao vaho pinekapekañ' iaby o

taola'eo.

²⁶ Nanokitse amo hene ondaty naho fifeheañe vaho fameleke mpi-moneñe amy taneio t'i Dariavese Mpanjaka: Ampitomboeñe ama' areo ty fañanintsiñe. ²⁷ Zaho ro mitsey aman' ndra aia'aia amo fonga fifeheñañe am-pifeheakoo: asoao te hinevenevetse am-pañeveñañe añatrefan' Añahare' i Daniele ondatio,
 Ie t'i Andrianañahare veloñe nainai'e
 le tsim-bia ho rebake i fifehea'ey
 naho i fifeleha'ey nainai'e donia. ²⁸ Mpandrombake re, Mpañaha,
 naho Mpanao viloñe tsitantane
 vaho mitoloñe raha mahalatsa
 andikerañe ao naho an-tane atoy.
 Ie ty nandrombake i Daniele
 ami'ty haozara' o lionao. ²⁹ Nitahieñe t'i Daniele am-pifeleha' i Dariavesey
 naho am-pifehea' i Korese nte-Parase.

7

¹ Amy taom-baloha' i Belsatsare mpanjaka' i Baveley, nahaoniñenofy naho aroñaroñe aña'ambone'e, am-pandrea'e ao t'i Daniele; sinoki'e i nofy vaho mitalily o renen-tsara'eo. ² Hoe t'i Daniele: Nitreako aña' aroñaron-kaleñe, te inge nitorotositse amy riake jabajabay ty tiok'ef'a' i likerañey. ³ Le niakatse amy riakey ty biby ra'elahy efatse, tsy nifannahake. ⁴ Hoe liona reketse elam-bantio ty valoha'e; nañente raho ampara' te nonorañe o ela'eo, naho nongaheñe an-tane eo, naho nampijohañañe an-tombo'e hoe ondaty vaho tinolotse fo'ondaty. ⁵ Indroñañe ty biby faharoe hoe dobe, nivoalatse ami'ty ila'e raike, le tam-bava'e ao, tañivo' o nife'eo ty pake telo; vaho hoe ty tsinara ama'e: Miongaha, mampibotseha nofotse tsifotofoto. ⁶ Modo zay le nahatre aña' raike ka, hoe nemare*, ninday elamboroñe efatse an-dambosi'e eo; efatse ka ty loha' i bibiy, vaho nimeandily. ⁷ Ie aña, le nitreako aña' aroñaron-kaleñe te inge ty biby fahefatse mampangebahebake naho mampirevendreveñe naho loho maozatse; ama' nife viñe jabajaba, mampibotseke, mampipozake vaho mandialia ty sisa o tombo'eo; miambak' amo biby taoloo re, ie aman-tsifa folo. ⁸ Hinaraharako o tsifa'eo, le hehe te nipotitsik' aña'ivo' o ila'eo ty tsifa kedekede, le nombotañe añatrefa'e eo ty tsifa'e telo teo; le hehek' ami'ty tsifa toy ty maso manahake ty fihaino' ondaty, naho vava mivolam-pirengetañe.

⁹ Nañente raho ampara' te
 nampivotrahañe fiambesatse,
 naho niambesatse i Haehaey,
 foy matsatsaoke hoe volovaso o saro'eo
 vaho hoe volon' añaondry ki'e
 o maroin'añaambone'eo;
 mirebareba lel'afó i fiambesa'ey,
 afo misolebatse o larô'eo.

¹⁰ Mikararàke boak' ama'e ty oñe afo;
 arivo aña'arivo'e ty niatrak' aze,
 ale aña'ale'e ty nijohañe añatrefa'e;
 najadoñe i zakay
 vaho sinokake o bokeo.

¹¹ Nisamba avao raho, ty amy feo-pivolam-pirengevohañe nivolàñe' i tsifaiy; nañente ampara' te vinono i bibiy naho niantantiritse i sandri'ey

* ^{7:6} Nemare: farasy bey mpibotsek' añaombe

vaho natolotse ho sodorañe añ'afó. ¹² Nafahañé amo biby ila'eo ty lili' iareo, f'ie tinovoñ' andro naho sa hivelomañé. ¹³ Nitolom-pañente añ' aroñaron-kalen-draho ampara' te indroñañ' an-drahon-dikerañe ty nimb'eo manahake ty Ana'ondaty, Nimb'amy Haehaey, vaho nampañatrefeñe ama'e. ¹⁴ Le nitoloran-dily naho asiñe vaho ty fifeheañé. Hitoroña' ze kila ondaty, fifeheañé naho fameleke. Fandiliañe nainai'e tsy ho modo i fandilia'ey; vaho tsy mbia harotsake i fifehea'ey.

¹⁵ Nihohokòhok' an-troke ao, zaho Daniele vaho nañembañ' ahy o aroñaron-dohakoo. ¹⁶ Niharineako ty raike amo nijohajohañeo vaho nañontaneako ty dika tò i hoe zay iaby. Aa le nitaroñe'e naho nirazañe'e amako. ¹⁷ Fifeheañé efatse i biby jabajaba efatse hitroatse boak'an-tane atoy rey. ¹⁸ Fe ho rambese' o noro' i Abo Tiañeio i fifeheañey vaho ho fanaña' iareo nainai'e, toe an-tsa-an-tsa i fifeheañey. ¹⁹ Ie amy zay te ho nahafahiñé ty hatò' i biby fahefatsey raho, i niambak' amy ila'e iaby reiy. Nampirevendreveñé; viñé o nife'eo naho torisike o hoho'eo. Nabotse'e naho dinemo'e vaho linialia' ty tombo'e ze nisia; ²⁰ naho o tsifa folo an-doha'eo naho i tsifa nipotítse vaho nampihintsáñé i telo ila'e reiy, i nanañe maso naho vava hivolaña'e raha mahasintoñey, i hoe zoke' i ila'e reiy te henteañe. ²¹ Nitolom-pisamba raho le nialy amo noro'eo i tsifay naho nahagioke ²² ampara' te niavy i Haehaey, vaho nimean-to o noro' i Andindimoneñéio. Totsak' amy zao ty sa' nampanañañé o noro'eo i fifeheañey. ²³ Inao ty talili'e:

Ho fifeheañé fah'efatse
an-tane atoy i biby fahefatsey;
hiambak' amo fifeheañé iabio,
fa fonga habotse'e ty tane toy,
le ho lialia'e, vaho ho demohe'e.
²⁴ Mpanjaka folo ty hitroatse amy
tsifa folo rey;

eo ka ty hitroatse hanonjohy iereo,
naho hiambak' amo taoloo
vaho hafotsa'e ty mpanjaka telo.

²⁵ Hiteratera i Andindimoneñey re,
naho ho mokore'e o noro' i Abo Tiañeio
vaho hikinia hañova sa naho lily,
vaho hatolotse am-pitá'e iereo
handritse ty sa naho o sa-o
vaho ty vakin-tsa.

²⁶ Fe hajadoñé ty zaka,
le hasintak' ama'e ty lili'e,
vaho ho vata'e rotsaheñé
ho mongoreñé kitro katroke.

²⁷ Hatolotse am'ondate' noro' i Andindimoneñéio i fifeheañey
naho ty lily naho ty enge'
ze hene fifeheañé ambanen-dikerañe.
Ho nainai'e ty fifehea'iareo;

songa hitoroñe naho hivohotse am'iareo
ze kila fifelehañe.

²⁸ Nigadoñe eo i fandrazañañey, le nirevendreveñe am-pitsakoreako ao, zaho, Daniele, naho nikofoty ty vintako, fe nifaharako an-trok' ao i entañe zay.

8

¹ Ie amy taom-paha-telo' i Belsatsare mpanjakay le nahatrea aroñaroñe nanonjohy i nitreako teoy, zaho Daniele. ² Añ' aroñaroko ao, le nitreako t'ie an-kijoli' i Sosane*, am-paritane' i Elame† aña; tendrek' amy aroñaroñey te añ'olo' i saka Olaiý‡ . ³ Nampiandraeko maso vaho nitreako te ingo ty añondrilahy nijohañe marine i sakay ey, roe ty tsifa'e, le ndra t'ie niabo, nilikoatse ty haabo' ty raike, i tsitso'ey ty niabo t'ie nitiry. ⁴ Nitreako i añondrilahiy te namango nañandrefañe o tsifa'eo, naho nañavaratse, naho nañatimo vaho tsy eo ty biby nahafiatatre aze, vaho tsy eo ty nahafitsoak' an-taña'e; fa nanoe'e ze nisatri'e le nitoabotoabotse. ⁵ Aa ie nitsakore raho te ingo boak' ahandrefañe aña ty oselahy nihelañe ambone' ty tarehe' ty tane-bey toy naho tsy nioza tane; nanan-tsifa raike ra'elahi añivo' o maso'eo i oselahiy. ⁶ Nimb' amy añondrilahy amantsifa'e roe nitreako nijohañe aolo' i sakay eiy re, vaho nihoridaña'e an-kaozarañe miforoforo. ⁷ Nitreako te nitotohe'e i añondrilahiy le niviñera'e naho nidasíñe'e vaho nipozahe'e i tsifa'e roe rey, le tsy nahalefe hitroatse añañatrefa'e i añondrilahiy; aa le nafetsa'e an-tane vaho linialia'e, le tsy eo ty naharombak' i añondrilahiy an-taña'e. ⁸ Nitoabotoabotse amy zao i oselahiy, le ie an-dengo' ty haozara'e ro pinozake i tsifa'e ra'elahi; niboake nandimbe aze an-toe'e eo ty tsifa efatse niatreke i tiok' efa' i likerañey rey. ⁹ Nipotítse ama'e ty tsifa kedekedeke; nitombo ho bey mañatimo naho maniñanañe vaho mb' an-tane mahasinday. ¹⁰ Nitoabotse mb' amy valobohòn-dahin-defon-dikerañey re naho navokovoko'e mb'an-tane atoy ty ila' i màroy naho o vasiañe, vaho linialia'e ambane. ¹¹ Eka, nizonjoñe nahatakatse ty handiligi' i mpifehe' i valobohòkey, kanao tinava'e ama'e i fisoroñañe boak' àndroy vaho naretsa'e ambane i toe'e miavakey. ¹² Fiolàñe ty nanolorañe aze i valobohòkey naho i sorom-boak' àndroy. Nafetsa'e ambane ty havañonañé§ naho nanoe'e ze nisatri'e vaho niraorao. ¹³ Le tsinanoko te nitsara t'i Masiñe. Hoe ka ty Masiñe raike amy nitsaray, Ampara' te ombia o aroñaroñeñeo: i sorom-boak' àndroy, i fiolàñe mandrotsakey, ty hanolorañe i toetse miavakey naho i valobohòke ho lialiàm-pandiay?* ¹⁴ Le hoe re tamako, Ampara' te modo ty hariva naho ty maraindray ro-arivo-tsi-telon-jato, zay vaho heferañe i toetse miavakey.

¹⁵ Ie fa niaroñaron-draho, Daniele naho nimaneako rendreke, le nizoeko nijohañe aoloko eo ty amam-binta' ondaty. ¹⁶ Tsinanoko t'indaty añivo' i Olay nikoike ty hoe: Ry Gabriele†, ampandrendreho ondaty toañe i aroñaroñey. ¹⁷ Nitotoke mb'amy fijohañako mb' eo re, le ie niharine, niriatsandry raho nibabok' an-tareheko. Aa hoe re tamako, O ana' ondatio, maharendreha te an-tsa honka'e i aroñaroñey. ¹⁸ Ie nisaontsie'e le nilañake ty roro an-tane an-tareheko le nedrè'e vaho nampitroare'e. ¹⁹ Hoe re, Ho taroñeko ama'o ty hifetsak' amo andro honkan-katorifihañe; ie toe ho amy sa honka'ey. ²⁰ I añondrilahy

* ^{8:2} Sosane: voñen-katae mañetse; hafaleañe † ^{8:2} Elame: ajalahy; ampela miehañe; etake
‡ ^{8:2} Olaý: haozarañe; dagola § ^{8:12} Ies 59:14 * ^{8:13} Dan 11:31, Mat 24:15 † ^{8:16} Gabriele:
I Andrianañahare ro haozarako

nioni'o aman-tsifa'e roey le ty mpanjaka' i Madaý naho i Parase. ²¹ I dromatsey le ty mpanjaka' Iavâne[‡]; ty tsifa'e ra'elahy aňivo' o maso'eo ty mpanjaka'e valoha'e. ²² Aa ie nipozake, le niongake handimbe aze ty efatse, avaho fifelehaňe efatse ka ty hitroatse boak' amy fifeheaňey, fe tsy amy haozara'ey. ²³ Amo andro sengaha' i fifeheaňeio, ie fa heneke o fiolao, le hampitroa-bataňe ty mpanjaka an-daharam-pisenge-hery, mahafohiňe onin-tsaontsy miheotse. ²⁴ Hampaozareňe i lili'ey, fe tsy amy haozara'ey; le hahalàtsa ty fandrotsaha'e; hiraorao re, naho hanao ze satri'e, vaho ho rotsahe'e o maozatseo naho ondaty miavakeo. ²⁵ Amy fahilala'ey le hiraorao ty famaňahiaňe am-pit  e ao, naho hirengevok' an-tro'e ao naho am-pilongoaňe ty handrotsaha'e ty maro; hitroatse amy Tal  ' o taleoy ka re, fe hianto tsy am-pit  e. ²⁶ Ie i aroñaron-kariva naho maraiňey, le to i nitaroňeňe ama'oy; aa le liteo i aroñaroňey fa mbe ho amo andro maro a  eo. ²⁷ Nitoiran-draho Daniele naho nisilok' andro maromaro, vaho nitroatse nitoroňe i mpanjakay. Nampaňeveňe ahy i aroñaroňey, fe tsy eo ty hampalange aze.

9

¹ Amy taom-baloham-pifehea' i Dariavese ana' i Akraseh  se tarira' o nte-Medaio, ie nanoeňe mpanjaka an-tane' o nte-Kasdio; ² amy taom-baloham-pifehea'ey, le na  otsohotso amo bokeo raho, Daniele, ty ami'ty ia' o taoňe tsinara' IEHOV   am' Iireme   mpitokio, ty haha-heneke ty fangoakoahaňe Ierosalaime, le fito-polo taoňe. ³ Aa le natoliko aman' A  ahare Tal   ty tareheko, hipaiako an-tsolo naho halaly, an-dilitse naho gony vaho lavenoke.

⁴ Aa le nihalaly am' IEHOV   Andriana  ahareko, nisoloho ami'ty hoe: Ie henane zao ry Tal   Andriana  ahare jabahinake ma  neva fa  neveňaňe, mpit  m-pa  n  na naho miferenaiňe amo mikoko Azo naho miamb  ne o lili'oo; ⁵ nandilatse zahay, nanao hakeo naho tahiňe, fa niola vaho nih  nkaňe amo fandilia'oo naho o fep  'oo. ⁶ Tsy nihaoňe'ay o mpitoky mpitoro'oo, ie ami'ty tahina'o iereo te nisaontsy amo mpanjaka'aio naho amo mpifehe'aio naho amo roae'aio vaho amo hene' ondaty i taneio. ⁷ Ry Tal  , Azo ty havantaňaňe, anay ty fisalaran-daharaňe, manahake henanekeo; le am' ondati' Iehod   naho o mpimone' Ierosalaimeo vaho am' Israele iaby, o marineo naho o tsietoitane a  eo amo fonga tane nandroaha'o iareo ty amy lilatse nandilara' iareoo. ⁸ Ry Tal   toe ama'ay ty fisalaran-daharaňe, amo mpanjaka'aio naho amo mpifehe'aio, vaho amo roae'aio, ty amo ota-faly nanoe'ay ama'oo. ⁹ Amy Tal   Andriana  ahare'ay ty fiferenaiňaňe naho ty fampipohan-kakeo, fe niola zahay, ¹⁰ naho tsy nihaoňe'ay ty fiara  anaňa' IEHOV   Andriana  ahare'ay ha  aveloa'ay amo Tsara'e najado'e a  atrefa'ay am-pitoky mpitoro'eo. ¹¹ Fonga nandilatse amy fetse'oy t'Israele, niamboho tsy nahajanjiňe ty fiara  anaňa'o; zay ty nifetsaha' i fatsey ama'ay naho i fanta sinokitse amy Tsara' i Mos  , mpitoron' A  aharey, ty amo haota-faly nanoe'ay ama'eo. ¹² Fa nampihenefe'e o tsara nitsarae'e ama'ao, naho amo mpizaka nifelek' anaio, amo hank  nkaňe nafetsa'e ama'ao; o le lia'ey tsy nanoeňe ambanen-dikeraňe iabio le fa nanoeňe am' Ierosalaime. ¹³ Ie sinokitse amy Tsara' i Mos   ao, le nidaiňe ama'ay o hekoheko rezao, fa tsy pinai'ay ty lahara' IEHOV   Andriana  ahare'ay hiamboho'a'y o hakeo'aio, haharendreke ty hat  . ¹⁴ Aa le nampihitrife' IEHOV   i fandilovaňey vaho nafetsa'e ama'ay; amy te

[‡] 8:21 Iavane: Mivore: mae, tozantoza; Grike

vantañe amo fitoloñañe anoe'e iabio t'IEHOVÀ Andrianañahare'ay, zahay nañatola amy fiarañanaña'ey. ¹⁵ Ie amy zao, ry Talè Andrianañahare'ay, Ihe nañakatse ondati'oo an-tane Mitsraime am-pitañe maozatse naho nahazoa'o tahinañe midodea, manahake henane zao; toe nandilatse zahay vaho nañota faly. ¹⁶ Ry Talè, ty amo havañona'o iabio, ehe ampitoliho tsy homb' an-drova'o Ierosalaime, vohi'o miavakey, ty haviñera'o naho ty fiforoforoa'o; amy te sirikae' ondaty mañohok' anaio t'Ierosalaime naho ondati'oo ty amo hakeo'aio naho o tahin-droae'aio. ¹⁷ Ie amy zao, ry Andrianañahare'ay, janjiño ty halali' i mpitoro'oy naho o fisolohoa'eo, vaho ampiareandreaño ty lahara'o, ty ama'o, ry Talè, ty amy toe'o miavake nampangoakoaheney. ¹⁸ Ry Andrianañahareko, atokilaño ty ravembia'o le mijanjiña; sokafo o fihaino'oo vaho vazohò ty fangoakoaha'ay naho i rova tokaveñe ami'ty tahina'oy; toe tsy ty havañona'ay ty itaroña'ay halaly añatrefa'o, fa o fiferenaiña'o tsi-fotofotoo. ¹⁹ Mijanjiña, ry Talè; mañahà hakeo, Rañandria; haoño vaho mitoloña ry Talè; ko mihàンkañe, ry Andrianañahareko, ty amy tahina'oy, amy te kanjieñe ami'ty tahina'o i rova'oy naho ondati'oo.

²⁰ Ie nivolañe naho niloloke vaho nisoloho amo tahikoo naho amo hakeo' ondatiko Israeleo, vaho nitaron-kalaly añatrefa' IEHOVÀ Andrianañahareko ty amy vohi-masin' Añaharekoy; ²¹ aa ie mbe nivolañe am-pilolofañe, va'e amy fisoroñañe harivay, le nihela-pitiliñe amako t'i Gabriele nitendrek' amako amy aroñaroñe valoha'ey vaho nañedre ahy. ²² Nampandrendrehe'e naho nisaontsia'e ty hoe: Ry Daniele, nivotrake etoan-draho hampahafohiñ' azo i aroñaroñey. ²³ Ie vaho nihalaly, le nahitrike i tsaray, le ingo te pok' etoan-draho hañoke azo; fa vata'e kokoandrehe; aa le fohino o tsarao naho rendreho o aroñaroñeo. ²⁴ Fa najadoñe am' ondati'oo naho amy rova'o miavakey ty hereñandro fitompolo hampijihetse i fiolày, hampigadon-kakeo, hañefetse o tahiñeo, hampizilike havantañañe tsy ho modo nainai'e, naho hanjitse ty aroñaroñe naho ty fitokiañe, vaho horizañe i Masiñe do'ey. ²⁵ Mahafohina arè naho maharendreha t'ie hifototse ami' ty fitseizañe i tsara hampipolieñe ondatio hamboatse Ierosalaimey, am-para' i Mpifehe Tinendrey, le ho hereñandro fito naho hereñandro enempolo-ro' amby, vaho hamboareñe indraike i damokey naho i kijoliy, an-tsam-poheke. ²⁶ Aa ie modo i hereñandro enempolo-ro'amby rey le haitoañe tsy amam-panañañe i Norizañey; le homb'eo ondati' i mpifelekeio handrotsake i rovay naho i toetse miavakey; le hoe fisorotombañañe ty ho figadoña'e le fampangoakoahañe ty nalahatse ampara te heneke i aliy. ²⁷ Hanoe'e fañina mijadoñe amy màroy ho ami'ty hereñandro raike; fe añivo' i hereñandroy re ro hampijihetse i soroñey naho i engay, le añ'elan-draha tiva ty hampangoakoah'e, ampara' te nadoañe amy mpampangoakey* i famongorañe nafetsey.

10

¹ Ie tan-taom-paha-telo' i Kòrese mpanjaka' i Parase, le nibentareñe amy Daniele natao Beltesatsare ty tsara; to i tsaray, toe hotakotake jabajaba; nioni'e i tsaray vaho nahafahiñe i aroñaroñey. ² Ie tañ' andro zay, nandala telo hereñandro garagadiñe, izaho Daniele. ³ Tsy nihinan-kàne mafiry naho tsy nizilik' am-bavako ao ty hena ndra divay; vaho le lia'e tsy nihoso-batañe am-para' te niheneke i hereñandro telo do'ey. ⁴ Aa ie amy andro faha-roa-polo-efats' ambi' i volam-baloha'ey, le tañolo' ty oñe

* ^{9:27} Mat 24:15

jabajaba atao Kidekele* raho; ⁵ ie naandrako o masokoo le nitreako te ingo t'indaty misikin-dený naho miè-bolamena ki'e boak'e Ofaze†; ⁶ nanahake ty vatosoa' i Tarsise‡ ty sandri'e, naho hoe helatse ty lahará'e, naho hoe failo o fihaino'eo, naho hoe volon-torisike solanto'e o fità'eo naho o fandia'eo, vaho nanahake ty firedoña' i màroy ty fiarañanaña'e. ⁷ Zaho Daniele avao ty nahatre a i aroñaroñey, le tsy nahaisake i aroñaroñey ondaty nindre amakoo, fa fangebahebahañe ty nivotrahañe naho nitriban-day vaho nietak' aña. ⁸ Le nidoñe eo avao raho nañente i aroñaroñey ra'elahi, vaho ni-po-kaozarañe, nikomavo ty vintako, le tsy nahatan-kafatrarañe. ⁹ Tsinanoko ty fiarañanaña' o tsara'eo, le izaho nitsanoñe ty fiarañanaña' o tsara'eo ro nampilañahen-droro an-tareheko, ty pandako nitolik' an-tane.

¹⁰ Nañedre ahy amy zao ty fitàñe nampihohok' ahy añ'ongotse naho an-dela-tañañe. ¹¹ Le hoe re tamako, O Daniele, ondaty toe kokoañeo, tsendreño ty tsara hitaroñako, le mitrahàña naho mijohaña; fa nampi-hitrifeñe ama'o raho. Ie nisaontsie'e i tsaray le nijagaridiñe an-tititiñe avao raho. ¹² Le hoe re amako, Ko hemban-drehe, Daniele, fa boak' amy andro valoha' i nanolora'o arofo hahafohiñe, naho nampisotrie'o aña' atrefan' Añahare ty fiai'oiy, le fa jinanjiñe o enta'oo, vaho o saontsi'oo ty nivotrahako etoñañe; ¹³ fe nanebañe ahy andro roapolo-raik' amby ty roandria mpifehe' i Parase; ie amy zay niheo amako mb'eo t'i Mikaele§, raik' amo mpifehe amboneo, nañolotse ahy tsy ho paiañe amo mpanjaka' i Paraseo ka. ¹⁴ Pok' etoan-draho hampahafohiñe azo ty hifetsak' am' ondati'oo amo andro honka'eo, fe mbe andro maro aña i niaroñaroñañey. ¹⁵ Aa ie nisaontsy i tsaray amako, le nitolik' mb'an-tane raho vaho nijomohõñe. ¹⁶ Le ingo te nitsapa o soñikoo ty hambam-bintañ' ami'ty ana'ondaty; le nanoka-bava, nanao ty hoe amy nijohañe aoloko eoy: Ry Talèko, mampioremeneñe ahy i aroñaroñey vaho tsy mahatàn-kafatrarañe. ¹⁷ Fa aia ty mpitoron-Talèko t'ie hahafivolañe amy Talè? Aa izaho henane zay, le tsy aman-kery vaho tsy nahakofòke. ¹⁸ Nimb' amako indraike indaty manahake i ana' ondatiy, nañedre naho nañohò ahy. ¹⁹ Hoe re, Ko hemban-drehe, ry toe kokoañeo, fañaintsiñe ama'o, mifalea, naho mijangaña. Ie nisaontsy amako le nihafatratse vaho nanoeko ty hoe: Ehe isaontsio ry Talèko fa nampahozare'o. ²⁰ Aa le hoe re, Fohi'o hao ty nivotrahako ama'o etoy? Amy t'ie tsy mete tsy mibalike hialy amy roandria' i Parasey; le ie engako, ho avy ka ty roandria' Iavane. ²¹ Fe ho razañeko ama'o i misokitse amy boken-katòy; zaho tsy amam-pañolotse amy raha rezay, naho tsy i Mikaele roandria'oy avao.

11

¹ Aa ty amako, ie tan-taom-baloha' i Dariavese nte-Madà le nitroatse hañosike naho hampaozatse aze. ² Ie henane zao le haboako ama'o ty hatò. Inay, fa ho mpanjaka telo ty e Parase ao, fa hanontoñe vara bey te amy telo rey iaby ty fah'efatse; le i hafatrara'ey añaamo vara'eo ty hampitrobotrobo'e i màroy haname Iavane. ³ Hiongak' amy zao ty mpanjaka mahimbañe, le ho felehe'e ty fifeheañe jabajaba vaho hanoe'e ze satri'e. ⁴ Fa ie mifehe, le ho foluheñe i fifehea'ey vaho ho zaraeñe amo tiok'efa' i likerañeio, fe tsy amo tarira'eo, ndra amy fifeheañe nifelehe'ey; fa hombotañe ho amo ila'e tsy a' iareoo i fifehea'ey.

* **10:4** Kidekele; fiarañanañañe masio; feo † **10:5** Ofaze: volamena ki'e ‡ **10:6** Tarsise: miereñere; mihotsohotso § **10:13** Mikaele: mireke; Aia ty hambañ' amy Ia?

⁵ Le i mpanjaka' i atimoiy, ty raik' amo mpifele'eo ro hampifatra-batañe naho handikoatse aze vaho hihaozatse; ho bey henehene i fifehea'ey. ⁶ Fa ie migadoñe i sa zay, le hifampipiteke iereo; fa homb' amy mpanjaka' i avaratsey ty anak' ampela' i atimoy hifañina, fe tsy ho tana'e ty hafatraram-pità'e; tsy hahafitroatse ka i lahilahiy ndra i fità'ey, fa haitoañe rekets' o nanese azeo naho i nisamak' azey, vaho o mpañimb' aze amy andro zaio. ⁷ Fe boak' ami'ty singam-baha'e ty hitroara' ty raik' amy fiambesa'ey naho hivotrak' amy mpirai-lian-dahindefoñey naho himoak' an-kijoly fatra' i mpanjaka avaratsey naho hanoe'e am' iereo ze satri'e, vaho hahagioke; ⁸ le fonga ho tavane'e naho hendese'e am-pandrohizañe mb'e Mitsraime aña o ndrahare' iareoo, rekets' o roandria'eo, naho o fanake volafoty naho volamena sarotseo, ie hahatam-bàtañe taoñe maromaro amy mpanjaka' i avaratsey. ⁹ Zay ty himoaha' i mpanjaka' i atimoy i fifeheañey vaho himpoly an-tane'e aña. ¹⁰ Fe hitrobo-vatañe o ana'eo naho hatonto' iareo ty hatozantozan-dian-dahindefoñey naho hihererereake mb'eo, le hisorotombake, naho hiranga, naho hitolike vaho haname i kijoli'e fatratsey an-kaviñerañe. ¹¹ Aa le hiforoforo amy zao i mpanjaka' i atimoy naho haname aze vaho hialy ama'e, amy mpanjaka' i avaratsey, aa ndra t'ie valobohòke ro havotra'e amy montoñey, toe hene hatolotse am-pità'e i valobohòkey. ¹² Aa ie fa nasese'e i valobohòkey, le hirengevole ty arofo'e, vaho añ' ale añ' ale ty hafetsa'e ambane, fe tsy hampanjofak' aze. ¹³ Ie aña, le hatonto' i mpanjaka avaratsey ty lahi-ale mandikoatse i teoy, le ie am-pigadoñan-tsà naho taoñe ro hañoridañe mb'eo reketse lian-dahialen-defoñe mitozantozañe naho haraotse tsifotofoto. ¹⁴ Fe maro ty hitroatse haname i mpanjaka' i atimoy amy sa zay; o ana-piaroteñe am'ondati'oo ty hitroatse hañenefa' iareo i aroñaroñey, fe hihotrake. ¹⁵ Aa le homb'eo ty mpanjaka' i avaratsey hamotry tamboho naho hitavañe ty rova maòzatse, le tsy hahatañ' aze o fità'atimoo, ndra i lia-raike jinobo'ey, ie ho po-haozarañe tsy hahafitroatse. ¹⁶ Hanao ze satri'e i haname azey, naho tsy eo ty hahafiatrek' ama'e, ie hijohañe amy tane engeñey, vaho fanjamanañe ty ho am-pità'e. ¹⁷ Hampiatrefe' e laharañe homba'e mb'eo reketse ze hene haozaram-pifehea'e naho hifañina'e: hatolo'e aze ty anak' ampelandrakemba, hampimomohañe aze; fe tsy hijohañe ho aze i ampelay vaho tsy ho tohaña'e. ¹⁸ Aa le hampitolihe'e mb'amo tokonoseo ty lahara'e, le ho tavane'e ty maro, fe hampijihetse ty fañinjea'e ty roandriañe vaho hafote'e ama'e i fañinjea'ey. ¹⁹ Hampitolihe'e laharañe mb' amo kijoly an-tane'eo, fe hitsikapy re toe hikoromake vaho tsy ho tendreke ka. ²⁰ Hitroatse handimbe aze ty hampiranga mpamori-haba ami'ty enge' i fifeheañey; f'ie modo ty andro tsy ampe le ho folake tsy aman-kaboseke tsy aman-aly.

²¹ Handimbe aze ty lo-tsereke; tsy hatolotse ama'e ty asi' i fifeheañey; f'ie hivotrake eo am-pilongoañe le ho azo'e an-kabeake i fifeheañey. ²² Lahindefo tsifotofoto ty hisaok' añatrefa'e hoe sinaon-tsorotombake, vaho ho pozaheñe; eka, ndra i ana-dona' i fañinaiy. ²³ Ie nifandrimboñe, te mone hitolom-pamañahiañe, vaho hitroatse naho hihaozatse am-borizàñe kedekedeke. ²⁴ Hivotrak' amo toetse vondrak' amy faritaneio re an-tsampierañerañañe; vaho hanoe'e am' iereo ty tsy nanoen-drae'e, ndra o roaen-drae'eo; ho zarae'e am' iereo ty tsindroke, ty kopake, naho ty vara; eka hikinia ty fikilia'e amo rova fatratseo fe am-para' i àndroy avao. ²⁵ Ho trobotrobo'e ty hafatrara'e naho ty hahavania'e hiatreke i mpanjaka' i atimoy ami'ty hatozantozan-dahin-defo'e; hihàroke hihotakotake ty

mpanjaka' i atimoy an-dia-rain-dahin-defo jabajaba naho maozatse; fe tsy hahafijohañe, amy t'ie hikinià' iareo. ²⁶ Eka, o mitrao-pikama ama'eo ty handrotsak' aze, naho hisaok' aña i lia-rain-dahin-defo'ey, vaho lako ty hitsingoritritse am-pizamanañe. ²⁷ Le ty amy mpanjaka roroey, hifamañahy avao ty arofo' iareo, vaho hifandañitse am-pandambañañe eo, fe tsy hiraorao; amy te i andro tinendrey avao ty higadoña'e. ²⁸ Ie mimpoly mb'an-tane'e mb' eo, amam-baras tsifotofoto, le te hiatreatre i fañina miavakey ty tro'e, naho hanoe'e ze satri'e, vaho himpoly an-tane'e aña. ²⁹ Ie añ'andro tinendre le hibalike, vaho hivotrak' atimo ao; fe tsy ho hambañe amy taoloy i henane zay. ³⁰ F'ie tamè o sambo' i Kitio le hanahelo naho himpoly vaho hatorifi'e i fañina miavakey; aa le hanoe'e ze satri'e naho hibalike vaho hitrao-kilily amo namorintseñi i fañina miavakeio. ³¹ Hanontoñe lahin-defon-dre, le ho leore' iareo i toetse miavakey naho i rova fatratsey, vaho hapitso' iareo i fisoroñañe boak' àndroy, handimbeza' iareo fiterateràñe mampangoakoake*. ³² Hanao kabeake re hampanankakeo o mifotetse amy fañinaio, fe hihaozatse ondaty mahafohiñe an' Andrianañahare'eo vaho hitoloñe. ³³ Hampahilala i màroy o mahihitse am'ondatio, fe hampikorovohem-pibara naho afo, naho fandrohizañe, vaho fikopahañe andro maro. ³⁴ Ie mikorovoke le holorañe fañolorañe kedeke, fe an-tsiriry ty hipiteha' i màroy am' iereo. ³⁵ Hitsikapy ka ty ila' o mahihitse am' iereo, ho tranaheñe naho lioveñe naho fotieñe ampara' ty sa honka'e, fa mbe aña i andro tinendrey. ³⁶ Hanao ze satri'e i mpanjakay, hitoabotse naho hisenge ambone' ze atao ndrahare naho hilañoñe haterateràñe mahatangoangoa aman' Andrianañaharen-drahare vaho hiraorao am-para' te heneke i hatorifihañey, fa ho henefeñe ze tinendre. ³⁷ Tsy hahoa'e t'i Andrianañaharen-droae'e, ndra ty fikokoan-ampela, ndra ty fañisohan' añañare ia'ia; fa hitoabotoabotse ambone' ze kila raha. ³⁸ Te mone hiasia'e ty ndraharen-toem-pàtratse, ndrahare tsy nifohin-droae'e; hiasie'e am-bolamena naho volafoty naho vato-soa vaho hareñañe saro-bily. ³⁹ Hitraok' amo mpiaman-drahare kihàfao re hamboatse fipalirañe maozatse, le hampitoabore'e ty enge' iareo naho hampifelehe'e ty maro vaho ho zarae'e i taney hahazoa'e tombo'e. ⁴⁰ Aa ie migadoñe i sa zay le hikapàke ama'e ty mpanjaka atimo, fe hampibobo tangololahy ama'e an-tsarete ty mpanjaka avaratse reketsé soavala vaho sambo maro, hene hivotraha'e o taneo, ho sorotombahe'e ami'ty firanga'e mb'eo. ⁴¹ Homb' amy tane rengèñey re le hihotrake ty fifeheañe maro, fe iretoañe ty hipolatitse am-pitá'e: i Edome† naho i Moabe vaho ty talen' ana' i Amone‡. ⁴² Hatorakitsi'e amo taneo ty fità'e vaho tsy hahafandrifitse ama'e ty tane Mitsraime. ⁴³ Fonga ho fehè'e o vara volamena naho volafotio naho ze raha saro-bili' i Mitsraime; le ho atimpahe'e o nte-Lobio naho o nte-Kosio. ⁴⁴ Fe hitsobore aze ty talily boak' atiñanañe naho avaratse aña; aa le hionjomb'eo re am-poroforo mandofiry handrotsake naho hanjamañe ty maro. ⁴⁵ Hajado'e añivo' o riakeo naho i vohitse miavake fanjàkay o sokemitrahan-drova'eo vaho higadoñe ty fiai'e, tsy amam-pañolotse.

12

¹ Ie henane zay, hiongake t'i Mikaele, roandriañe ra'elahy mpañolots' o ana' ondati'oo, fa ho san-kasotriañe mbe tsy nizò boak' am-pifotora'

* ^{11:31} Dan 8:13, 9:27, Mat 24:15 † ^{11:41} Edome: mena, hoe tane; lio ‡ ^{11:41} Amone: foko; ana' ondatikoo

ondatio ampara' henaneo; fa ho rombaheñe amy sa zay ondati'oo, ze hene oniñe sinokitse amy bokey ao. ² Maro amo mirotse an-debokeo ty ho vañoneñe, ty ila'e ho mb'an-kaveloñe nainai'e, vaho ty ila'e mb'an-kañasalarañe naho falaiñañe tsy modo. ³ Hireandreañe manahake ty hazavà' i lañelañen-dikerañey o mahilalao; naho hoe o vasiañe nainai'eo o mampitolike ty mårø mb'an-kavañonañe. ⁴ Aa ihe ka ry Daniele, akafiro i tsaray, naho liteo i bokey ampara' ty figadoñan' andro; maro ty hibelobelo an-day vaho hitombo o hilalao. ⁵ Nañente raho, Daniele, le indroa ty roe ila'e nijohañe ey, ty raik' añ' olo' i oñey etoa naho ty raik' añ' olo' i oñey eroa. ⁶ Le hoe ty raike amy misikin-dený ambone' o rano' i oñeio, Ombia ty ho figadoña' i raha mahalatsa rey? ⁷ Tsinanoko amy zao indaty nisikin-dený ambone' o rano' i oñeio eiy, ie nañonjo ty fità'e havana naho ty fità'e havia mb' andikerañe ey le nifanta amy Veloñe an-tsa' an-tsay te ho sa raike naho sa roe vaho sa vaki'e; aa ie nagado' iareo ty fampiparatsahañe ty haozara' ondaty miavakeo, le ho heneke iaby irezay. ⁸ Tsinanoko fe tsy nirendreko; le hoe raho, Ry Talèko, ino ty fahahenefañe o raha zao? ⁹ Aa le hoe re, Akia, Daniele, fa milite o tsara zao vaho fa vinoli-fitomboke pak' an-tsam-pahahenefañe*. ¹⁰ Hiefetse ho foy matsatsaoke ty maro te tranaheñe; fe hiharaty o lo-tserekeo; leo raik' amo tsereheñe tsy haharendreke, fa o mahihitseo ro hahafohiñe. ¹¹ Ie mifototse amy fanjiherañe i fisoroñañe boak' androiy pak' amy fampitroarañe i fiterateràñe mampangoakoakey le ho andro arivo-tsi-roanjato-tsi-sivampolo. ¹² Haha ty mahaliñe vaho mahatratse i andro fah' arivo-tsi-telon-jato-tsi-telopololim' ambiy. ¹³ Hañavelo ampara' ty hamodoan-drehe le hitofa vaho hitroatse mb'amy anjara'oy an-tsehangan'andro aña.

* **12:9** Dan 12:4, Ben 20:3

Hosèa

1 Niheo amy Hosea* ana' i Bierý† ty tsara' IEHOVÀ faha' i Ozià naho Iotame naho i Akhaze‡ naho Khizkiia§ mpanjaka Iehodà, vaho Iarobàme* ana' Ioàse†, mpanjaka' Israele‡.

2 Ie namotsotse nitsara amy Hosea t'IEHOVÀ, le hoe t'IEHOVÀ amy Hosea, Akia mañengà karapilo ho vali'o, ty anak' ampela boak' an-kàrapiloañe ao; fa toe mpanao hakarapiloan-kalalijake naho miambaho am' IEHOVÀ o taneo. **3** Aa le nimb'eo re nañenga i Gomere§, ana' i Diblaime*, le niarendre vaho nisamaha'e anadahy. **4** Le hoe t'IEHOVÀ ama'e, Toñono ty hoe Iezreèle† ty añara'e; fa tsy ho ela te havaleko ami'ty anjomba' Iehò‡ ty lio' Iezreèle, vaho hagàdoko ty fifehean' anjomba' Israele. **5** Ie amy andro zay, ho pozaheko ty fale' Israele am-bavatane' Iezreèle ao. **6** Niareñe indraike re nahatoly anak' ampela, le hoe re tama'e, Toñono ty hoe Lorokamà§ ty añara'e: fa tsy ho ferenaiñako ka ty anjomba' Israele, toe tsy iheveako. **7** Fe ho tretrezeko ty anjomba' Iehodà le ho rombaheko añam' IEHOVÀ Andrianañahare' iareoy, fa tsy ho rombaheko am-pale ndra fibara ndra hotakotake ndra soavala ndra mpiningi-tsoavala.

8 Aa ie notañe'e t'i Lorokamà, le niareñe indraike nisamak' anadahy. **9** Le hoe re, Toñono ty hoe Loamý* fa tsy ondatiko nahareo vaho tsy ho Andrianañahare' areo raho.

2

1 Fe mbe ho mira amo fasen-driakeo ty ia' o ana' Israeleo, ze tsy ho mete zeheñe ndra iaheñe; ie amy zay, amy tane nanoañe ama' areo te Tsy ondatiko nahareoy, ty hafetse am' iereo te Anan' Añahare Veloñe. **2** Le hifanontoñe o ana' Iehodà naho o ana' Israeleo, naho ho tendrè' iareo ty mpiaolo raike ho a iareo, vaho hitombo an-tane eo: fa jabajaba ty andro' Iezreèle.

3 Anò amo roahalahi' areoo ty hoe: Amý*, naho aman-droahavave' areo ty hoe; Rohamà†

4 Mifanjomora aman-drene' areo;

mifangatora;

fa tsy tañanjombako,

vaho tsy vali'e raho.

Aa le ampañafaho an-tarehe'e eo

o hakarapiloa'eo naho

añivo' o fatroa'eo

o fandrañaota'eo;

5 tsy mone ho holireko,

naho hapoko manahake

i andro nahatoly azey,

naho hanoeko hoe tane ratraratra,

* **1:1** Hosea: mpandrombake; fitsolohañe † **1:1** Bierý: ty vovoko ‡ **1:1** Akhaze: mpitavañe § **1:1** Khizkiia: haozara' IEHOVÀ * **1:1** Iarobàme: mpandietse ondaty † **1:1** Ioàse:

ty mamoe'ay, he miforehetse ‡ **1:1** Israele: mpifanehak' aman'Añahare § **1:3** Gomere:

mahafonitse; mahaheneke * **1:3** Diblaime: Sakoañe maroan-tsinga'e † **1:4** Iezreèle: Miongake

t' IEHOVÀ; ty hazavà'e ‡ **1:4** Iehò: Ie ze Ie § **1:6** Lorokamà: tsy nitretrezañe * **1:9** Loamý:

tsy ondatiko * **2:3** Amý: ondatikoo † **2:3** Rohamà: niferenaiñañe

naho hadoko an-tane maik' aña
vaho havetrako an-karan-dranoañe.

⁶ Tsy hiferenaiñako ka o ana'eo
fa anak'amontoñe.

⁷ Toe nanao satan-tsimirira ty rene'iareo
nimeñatse i nampiareñe iareoy;
ie nanao ty hoe,
ho paiako aña o sakezako
mamahañe ahy mofo naho rano,
ty volon'añondry naho ty leniko,
ty menake vaho ty finomakoo.

⁸ Aa le ingo, ho faherako fatike ty lala'o,
vaho hañoreñako kijoly
tsy hahatreava'e ty homba'e.

⁹ Himanea'e orik' amy zao o sakeza'eo
fe tsy ho tra'e;
ho paia'e iereo fa tsy ho trea'e;
hanao ty hoe amy zao re,
Homb'eo raho himpoly
mb'amy valiko valoha'ey mb'eo,
fa nisoa te amo henaneo i henane zay.

¹⁰ Fa namoea'e te nanjotsoako
ampemba naho divay vaho menake;
le nampitomboeko ama'e
ty volafoty naho volamena
nañamboare' iareo Baaleo.

¹¹ Hibalike raho le hendeseko
ty ampembako aña'andro'e
naho ty divaiko an-tsa'e,
vaho hasintako i volon'añondrikoy
naho i leny natoloko aze
hanaroña'e ty fihaloa'ey.

¹² Ie henane zao, le ho boraheko ty fimeñara'e am-pahaisaha' o sakeza'eo,
le tsy eo ty hahavotsots' aze an-tañako.

¹³ Fonga hajiheko o hafalefalea'eo,
o sabadidam-pitontona'eo[‡],
naho o pea-bola'eo, naho o fitofa'eo
vaho o hene androm-pamantaña'eo.

¹⁴ Ho firaeko aña o vahe'eo
naho o sakoa'eo;
i natao'e ty hoey, Tàngeko 'nio,
natolo' o sakezakoo ahiko;
aa le hafotsako ho ratraratra zay
ho fihina' o bibin-kivokeo.

¹⁵ Hampitiliheko ama'e ty andro' o Baaleo,
i nañoroa'e tsotse rezay,
ie niravake o bange'eo naho o fomela'eo,
naho nitsoeke o sakeza'eo
vaho nandikok' ahy, hoe t'IHOVÀ.

¹⁶ Aa le ingo t'ie ho sigiheko,
naho hendeseko mb'am-patrambey

[‡] 2:13 Sabadidam-pitontonañe: P'sake, Halimampolo, Kibohotse

mb'eo vaho hidiby aze an-troke.

¹⁷ Le hatoloko aze ty tanem-bahe boak'añe,
naho ty vavatane' i Akore§
ho lalam-pampitamàñe;
ie hisabo aña manahake
tañ'andron-katora'e,
hambaña amy andro niakara'e
an-tane Mitsraime* añey.

¹⁸ Amy andro zay, hoe t'IEHOVÀ, le ho kanjie'o raho ami'ty hoe Valiko,
vaho tsy hatao'o Baale ka. ¹⁹ Fa hasintako am-bava'e ao ty añara' o Baaleo,
vaho tsy ho toñoneñe ka o añara'eo. ²⁰ Ie amy andro zay, hanoeko fañina
añivo' iereo naho o bibin-kivokeo naho o voron-dikerañeo, naho o milaly
an-tane eoo; le ho pozaheko ty fale naho ty fibara naho ty fihotakotaha'
ty tane toy vaho hampiroteko am-pierañerañañe. ²¹ Le ho fofoko ho
ahy nainai'e; eka ho fofoko ho ahy an-kavantañañe naho an-katò naho
an-kafatraram-pikokoañañe naho fiferenaiñañe; ²² ie fofoko ho ahy am-
pigahiñañe, le ho fohi'o t'IEHOVÀ.

²³ Ie amy andro zay, hoe t'IEHOVÀ,
le hamale raho, ho toiñeko o likerañeo,
vaho ho valè' iereo i taney;

²⁴ le hamale i ampembay
naho i divaiy naho i menakey ty tane;
vaho ho valé' iareo t'Iezreèle.

²⁵ Le ho tongiseko ho ahy an-tane ao re;
naho ho ferenaiñako i tsy niferenaiñañey
naho hataoko amo tsy ni-ondatikoo ty hoe : Ondatiko rehe;
vaho hanoa' iareo ty hoe:
Andrianañahareko.

3

¹ Le hoe t'IEHOVÀ amako; Akia rehe: Ikokò ty rakemba ikokoan-tsakeza'e,
ie toe karapilo, manahake ty fikokoa' IEHOVÀ o ana' Israeleo, ie mitolik'
aman-drahare ila'e vaho mpitea mofom-balòboke. ² Aa le viniliko ho
ahiko re ami'ty volafoty folo-lim'amby naho ampemba omere raike naho
tampa'e; ³ le hoe raho ama'e, Himoneñe amako andro maro rehe; fa tsy
hihisa ankarapiloañe ka, naho tsy hiharo amy t'indaty ila'e; le hoe zay ka
izaho ama'o. ⁴ Amy te himoneñe andro maro tsy amam-panjàka tsy aman-
Talè, tsy aman-tsòroñe, tsy aman-tsamosampo, tsy aman'efode* vaho tsy
aman-terafeme† o nte-Israeleo. ⁵ Ie modo zay, le himpoly o ana' Israeleo,
hipay IEHOVÀ Andrianañahare' iareo, naho i Davide mpanjaka' iareo; vaho
hañeveñe am' IEHOVÀ naho i fatariha'ey amo andro sehanga'eo.

4

¹ Janjiño ty tsara'IEHOVÀ: ry ana' Israeleo;
amy te atreatré' IEHOVÀ o mpimoneñe an-tane atoio.
Fa tsy aman-katò,
tsy mitretrè, tsy mahafohiñe
an' Andrianañahare ty an-tane ao.

² Te mone fàtse, naho lañitse,
naho hohodan-doza,

§ ^{2:17} Akore: am-poheke * ^{2:17} Mitsraime: Mpamorekeke; hasotriañe * ^{3:4} Efode: hareañe
† ^{3:4} Terafime: sare fihalaliañe

naho kametse,
vaho hakarapiloña ty itoloña' iareo,
le mifanoitoy ami'ty lio ty lio.

³ Aa le handala ty tane, naho
fonga hinike ze mpimoneñe ao,
naho o bibin-kivokeo
naho o voron-dikerañeo;
vaho hasese aña ka o fian-driakeo.

⁴ Asoao tsy ho liereñe
tsy ho endakendaheñe,
fa manahake ty mpifandietse
ami'ty mpisoroñe ondatikoo.

⁵ Aa le hikorovoke antoandro rehe,
le hindre hihotrak' ama'o ty mpitoky
naho haleñe, vaho havetrako ty rene'o.

⁶ Rotsake ondatikoo fa po-hilala,
aa kanao narinjène'o ty hihitse
le hariako amo fisoroñañeo rehe;
kanao nandikofa'o
o Tsaran'Añahare'oo,
le ho haliñoko ka o ana'oo.

⁷ Ie nampitoaboreñe iereo
àntsake t'ie nandilatse amako;
aa le hafoteko ho fisalarañe ty asi' iareo.

⁸ Fihinana' iareo o engan-kakeo' ondatikoo,
vontitire' iereo an-tro'e ao o tahi' iareoo.

⁹ Le zao ty ho ie te
hira ami'ty ondaty ty mpisoroñe;
sindre ho liloveko ty amo sata'eo,
vaho hondroheko ty amo fitoloña'eo.

¹⁰ Hikama iereo fe tsy ho anjañe;
hanao hakarapiloña fe tsy hitombo,
amy te napo' iereo ty hañaoñe
am' IEHOVÀ

¹¹ Mitavañe arofo ty hakarapiloña,
naho ty divay, vaho i divay vaoy.

¹² Mihalaly hevetse am-poto-katae'eo ondatikoo,
vaho manoiñe ty kobai' iareo;
fa nampandilatse iareo
ty fañahin-kakarapiloña,
vaho nifarie'iereo t'i Andrianañahare'iareo.

¹³ Mañenga soroñe am-bohitse ey iereo
naho mañembok' an-kaboña ey,
ambane' o kileo naho o talio,
vaho o mendoraveñeo,
o mañaloke soao;
aa le manao hakarapiloña ka
o anak' ampela' areoo,
vaho mandrañaotse
o ana-drahavavem-bali' areoo.

¹⁴ Tsy ho tiliheko o anak'ampela' areoo
t'ie manao hakarapiloña,
naho o ana-drahavavem-bali' areoo,
t'ie mandrañaotse;

fa mitrao-pañenga amo tsimirirañe iereo, vaho miharo soroñe amo
kalalijakeo;
toe hihotrake ondaty tsy aman-kilalao.

¹⁵ Aa ndra te manao hakarapiloan-drehe Israele, ko ampandilare'o
t'Iehodà;
ko migodañe mb'e Gilgale, naho
ko mionjomb'e Bet'avène* mb'eo,
vaho ko mifanta ty hoe
Kanao veloñe t'IEHOVÀ.

¹⁶ Fa midisa-voly manahake
ty fidisa-violin-kiloa t'Israele;
aa vaho ho fahana' IEHOVÀ
hoe añondri-lahy midada iereo?

¹⁷ Kanao mitolon-tsamposampo
t'i Efraime†; adono ey.

¹⁸ Fa maseñe ty divai' iareo;
le mitoloñe hakarapiloañe avao;
tea' o mpifehe'oo ty haloloañe
te ami'ty engeñe.

¹⁹ Fa kinolopo' i tiokey añ'ela'e ao iereo
le ho salatse ty amo fisoroña' iareoo

5

¹ Inao, ry mpisoroñeo,
mitsendreña ry anjomba' Israeleo,
manokilaña ravembia ry anjomba'
i mpanjakay, fa ama' areo i zakay;
amy t'ie fandrik' amy Mitspà*
naho harato nalafike ho amy Tabore†;
² vaho mpiola miheotse t'ie mandenta
ndra te nendahako.
³ Fàntako t'i Efraime naho
tsy mietak' amako t'Israele;
fa manao hakarapiloan-drehe Efraime,
vaho maleotse t'Israele.
⁴ Tsy ho safirie' iareo ty himpoly aman'Añahare' iareo;
fa añivo' iareo ao ty fañahin-kakarapiloañe,
vaho tsy fohi' iereo t'IEHOVÀ.
⁵ Mitalily an-dahara'e
ty fiebotsebora' Israele;
toly ndra hitsikapy an-kakèo
t'Israele naho i Efraime;
hiharo hihotrak' am' iereo ka t'Iehodà.
⁶ Hendese' iereo ty lia-rai' iareo
naho o mpirai-tro' iareoo
ho paia' iereo t'IEHOVÀ,
fe tsy ho oniñe, fa nisitake.
⁷ Fa niola am' IEHOVÀ iereo,
naho nahatoly anak'amontoñe;
aa le habotse' ty pea-bolañe

* **4:15** Bet'avene: trañon-kakoahañe † **4:17** Efraime: mahavokatse; mitombo * **5:1** Mitspa:
fitilik'abo; anjoanjo † **5:1** Tabore: talango'e; hiringiry;

reke-panañañe.

⁸ Tiofo e Gibà[‡] i antsivay

naho e Ramà[§] i soliy;

koiho e Bet'avene ty hankàñe:

mitoliha ry Beniamine*.

⁹ Ho koaheñe t'i Efraime

amy andro fandilovañey;

fa nampahafohineko o fifokoa'

Israeleo ze toe hifetsake.

¹⁰ Manahake ty mpameve vorovoro

o roandria' Iehodào;

hadoandoako am' iereo hoe rano

ty habosehako.

¹¹ Forekekèñe t'i Efraime demok' an-jaka;

ie nañorike haloloañe an-tsatri'e.

¹² Aa le ho bararaok' amy Efraime raho,

naho haloloañe amy anjomba' Iehodày.

¹³ Ie nahaoniñe i arete'ey t'i Efraime,

naho i fere'ey t'Iehodà,

le nihitrike mb' Asorey mb'eo,

naho nisangitrife'e i mpanjaka Iaribey[†];

f'ie tsy hahajangañ' azo,

vaho tsy ho melañe'e i fere'oy.

¹⁴ Ho liona amy Efraime raho,

naho liona tora'e amy anjomba' Iehodày;

Zaho le Zaho avao ty handrimitse

vaho hienga;

hinday raho le ia ty haharombake.

¹⁵ Homb'eo raho himpoly

mb'añ'akibako aña,

ampara' t'ie miantoke o hakeo'eo,

naho mipay ty tareheko;

ie am-poheke ro hitsoek'ahy.

6

¹ Antao, himpoly am' IEHOVÀ tika;

Ie ty nandrimitse,

naho ie ty hampijangañe antika,

Ie ty namofoke, naho ie ty hampidiañe antika.

² Afake roe andro le hampiveloma'e, amy andro fahateloy ro
hampitroara'e, himoneñan-tika am-pivazoho'a'e eo.

³ Le hahafohiñe tika,

naho himane hahafohiñe IEHOVÀ;

Mionjoñe re manahake ty manjirik'andro;

le hivotrak' amantika

manahake o orañeо,

i oram-pigadoñañey,

naho i orañe aolo an-tane atoiy.

⁴ Ry Efraime, ino ty hanoako ama'o?

Ry Iehodà, ino ty hanoako azo?

Hoe mika ty hasoa'o;

‡ 5:8 Gibà; haboañe § 5:8 Ramà: ambone, miereñereñe * 5:8 Beniamine: am-pitan-kavana

† 5:13 Iaribe: mpamale fate

mimeatse aña te maraindray
manahake o misafononokeo.
⁵ Aa le nihatsafako añamo mpitokio,
nizamanako añamo fivolam-bavakoo;
hoe fipelaran-kelatse ty fizakañ' azo.
⁶ Toe fiferenaiñañe ty paiako,
fa tsy soroñe;
naho ty fahafohinañe an'Andrianañahare
te amo engan-koroañe.
⁷ Fe manahake i Dame
ty nivaliha' iareo amy fañinay;
zay ty niolà' iareo amako.
⁸ Rova' o mpikitro-draha ratio t'i Gilade*,
tsitsike lian-dio.
⁹ Hoe firimbo-malaso mivoñoñe ondaty,
ty fañohofa' i favorim-pisoroñey
loza an-tevan-dala' i Sekème† eo;
toe haloloañe ty anoe' iereo;
¹⁰ Naharendreke haleorañe añ'anjomba'
Israele ao raho;
zoeñe e Efraime ao ty hatsimirirañe,
naho naniva vatañe t'Israele.
¹¹ F'ie nifotoañeko san-kavokaran-
drehe r'Iehodà,
ie hampoliko ty fandrohizañe ondatikoo.

7

¹ Ie ho nanàha Israele raho,
le niafa-takoñe ty hakeo' i Efraime,
naho ty halò-tsere' i Somerone*;
fa nitolom-pamañahiañe;
mimoak' ao ty mpikizo
vaho mitavañe alafe eo
ty malaso mpifañosoñe.
² Toe tsy tsakoré' iareo añ'arofo ao
te hene tiahiko ty halò-tsere' iareo;
miarikoboñe iareo ty sata' iareo,
ao' ty tareheko eo.
³ Ampifalea' iareo i mpanjakay
amo sata-rati' iareoo,
naho o roandriañe amo fandañira'eo.
⁴ Fonga mpandrañaotse
manahake ty toñake finana' i mpanoñakey
ie tsy nasoro'e sikal'ami'ty fibokobokoan-kòba ampara' ty fiboenara'e.
⁵ Tañ' andro' i mpanjakan-tikañey,
nisilofe' ty hamaen-divay o roandriañe,
ie nañoho-pitañe amo mpandrabioñe.
⁶ Fa hinalankañe hoe toñake
ty arofo' iareo,
ie mirekak' avao te haleñe ie mirotse avao i mpanoñakey;
le ie maraindray, miforehetse

* 6:8 Gilade: fitaboran-talily (sisie) † 6:9 Sekeme: tevan-kaboa, hatoke; anjara * 7:1 Somerone: vohi-fitalakesañe

hoe afo milebaleba.

⁷ Manao hamaen-toñake iaby,
fa finorototo' iareo o mpizaka'eo;
le fonga nihotrake o mpanjaka'eo;
leo raike tsy mikanjy ahy.

⁸ Efraime: mpitraok' amo ambahinio,
hoe mokary tsy navalike t'i Efraime.

⁹ Nabotse' o ambahinio ty haozara'e,
fe amoea'e;
eka etia naho atia ama'e ty maròy foty,
fe tsy rendre'e.

¹⁰ Mitalily an-dahara'e ty fisengea' Israele,
fe mboe tsy nimpoly am' IEHOVÀ
Andrianañahare'e,
vaho mb'e mboe tsy mipay Aze iereo
amy hoe zay iaby.

¹¹ Manahake deho minè t'i Efraime,
tsy mahafohiñe;
koihe' iereo ty Mitsraime
vaho mionjomb'e Asore mb'eo.

¹² Handafihako harato iereo te mañavelo;
ho tariheko mañambane
manahake o voron-dikerañeo;
ho liloveko iereo amy
nitalilieñe amy favori' iareoy.

¹³ Hankàñe ama'e! fa nandripàke amako;
firotsahañe am' iereo fa niola amako!
Ho nijebañeko
f'ie nifosa vande.

¹⁴ Mboe tsy nitoreo amako
boak'añ'arofo iereo,
ndra t'ie mangolalaik' am-pandreañ'ao;
nifanontoñe ty amy ampembay
naho i divay vaoy,
fe iambohoa' iareo raho.

¹⁵ Ndra t'ie naòko, naho
nampifatrareko o sira' iareoo,
mbe ikinia' iareo haratiañe avao.

¹⁶ Nibalike iereo, fe tsy mañambone
hoe fale am-pañahy;
ho tsingoroem-pibara o roandria'eo
ami'ty firengevoham-pamele' iareo,
zay ty ho fandrambioñañe
iareo an-tane Mitsraime aña.

8

¹ Ano am-palie'o eo i antsivay,
hihelañe mb'añ'anjomba' IEHOVÀ
mb'eo re hoe vantio,
amy t'ie nivalik' amy fañinakoy
vaho niola amo Fanoroakoo.

² Hitoreo amako hao t'Israele:
Ry Andrianañahare,
fa nahafahiñ'Azo zahay.

³ Fa nahifi' Israele aňe ty soa;
horidaňe' o rafelahio iereo.
⁴ Nampijadoňe mpifeleke iereo,
fe tsy boak' amako;
manam-pifehe, fenofiko;
nanoe' iereo ndrahare avao o volafoty naho volamena' iareoo, soa te
haitoaňe.
⁵ I bania'oy ry Somerone, ty naňitoaň' azo;
misolebotse ama'o ty habosehako;
ampara' te ombia t'ie hahatakatse
lio-hakeo?
⁶ F'ie boak' am' Israele;
rinanjim-pitoroňe;
toe tsy Andrianaňahare;
le ho demoheňe i bania' i Somerone rey.
⁷ Nitongy i tiokey iereo,
vaho ho tatahe' iereo ty tangololahy;
tsy hanam-bokatse iereo;
tsy hiborake ty taho'e
fe ndra t'ie hamokatse,
habotse' ty ambahiny.
⁸ Fa nagodraňe t'Israele;
le hoe fanake tsy vara
amo kilakila' ondatio,
⁹ amy te nionjomb'Asore mb'eo,
i borike lý mirerererey;
manambe sakeza t'i Efraime.
¹⁰ Aa ndra t'ie nandeta-vataňe amo fifeheaňeo, hatontoko henaneo,
ie fa ninike ty amy nampijiniam-panjaka
naho o roandriaňeo.
¹¹ Nampitombo kitrely handilara'e
t'i Efraime; hakeo ama'e i kitrely rey.
¹² Sinokiko ama'e ty raha maro amy
Fanoroakoy
fe natao'e ho raha ankafaankafa.
¹³ Banabanae' iereo soron-draho,
isoroňa' iareo hena naho kamae'e;
fe tsy no' IEHOVÀ;
ho tiah'i'e o tahi' iareoo,
vaho ho vale'e o hakeo' iareoo;
himpoly mb'e Mitsraime mb'eo iereo.
¹⁴ Amy te nandikofa'Israele i Mpitsene azey, vaho nandranjy anjomba bey;
fa nampitombo kijoly t'Iakobe*;
aa le hañirahako afo o rova'eo,
fonga habotse'e o anjomba'eo.

9

¹ Ko mirebeke ry Israele,
ko miriňariňa an-kobaiňe
manahake ondatio;
nisitak' aman'Aňahare'o rehe,
nitea'o ty tamben-karapilo

* ^{8:14} Iakobe: tomitse; misolo am-pitake

an-toe-panongàñe eo.

² Tsy hahaeneñe iareo o toe-pamofoha'eo naho o fipiritan-divaio, vaho hifotetse ama'e ty divay vao.

³ Tsy ho tambatse an-tane' IEHOVÀ ao; fa hibalike mb'e Mitsraime mb'eo t'i Efraime, naho hilintseñe hèneñe tsy malio e Asore aña.

⁴ Ie tsy mañilin-divay am' IEHOVÀ, naho tsy ho no'e ka o fisoroña' iereoo, fa hoe mofom-pandala, fonga tiva ze mikama ama'e: a' iareo avao zay, fe tsy mete mimoak' amy anjomba' IEHOVÀ ao ty mahakama' iareo ty amo arofo' iareoo.

⁵ Ino ty hanoe' areo amo sabadidam-pitontonañe?

naho amo andro namantaña' IEHOVÀ?

⁶ Ingo te nisitaha' iereoo ty fandrotsahaña; fe hatonto' i Mitsraime, haleve' i Mofe* ho lovae' o hisatseo ze nisoa amo volafoti' iareoo;

fatike ty hitiry amo kivoho' iareoo.

⁷ Fa tondroke o androm-pitilihañe? fa pok'eo o androm-pamaleañe; hapota' Israele zay; dagola ty mpitoky, minè t'indaty entoen-stroke, ty amy fitoabora' o hakeo'oo, bey ty falaiñañe azo.

⁸ Mpijilojilon' Añahareko t'i Efraime fe fandri-bom-pitsindroke o sata' i mpitokiy iabio, toe falaiñañe aña'anjomban'Añahare'e ao.

⁹ Fa pok' an-dalek' ao iereoo, naniva vataña manahake tañ'andro' i Gibà; toly ndra ho tiahí'e o hakeo'eo vaho ho tilihe'e o tahí'eo.

¹⁰ Tendrek' ahy hoe valòboke an-dratraratra aña t'Israele; nitreako o rae'eo hoe loham-boan-tsakoa amy fifotora'ey; fe nimoake e Baal-peore†

naho nañamba-bataña ho ami'ty hasalaraña, vaho naniva vataña mira amo raha kokoa' iareoo.

¹¹ I Efraime: hitiliñe aña hoe voroñe ty enge' iareo, ho po-pisamahaña, naho hakoahaña an-koviñe ao vaho tsy am-piareñañe.

* **9:6** Mofe: akiba o vañoñeño † **9:10** Baal-Peore: Talen-kiriike, Andrian-davake

¹² Ndra t'ie mañabey anake, hampandalàko,
tsy hahatoly lahilahy raike;

Eka! hankàñe am'iereo ka te isitahako.

¹³ I Efraime, manahake ty nahatreavako
i Tsore, ie tinongy an-tane fanjàka;
fe hakare' i Efraime ho amy
mpanjamañey o ana-dahi'eo.

¹⁴ Atoloro iareo, ry IEHOVÀ
ze satr'i'o hatolotse:
toloro hòviñe mampiboloña
naho fatroa kapaike.

¹⁵ E Gilgale iaby o hakeo'eo,
tañe ty namotorako falaiñañe am' iareo,
ami'ty halò-tsere' o sata'eo ty
handroahako iareo amy anjombakoy,
tsy hikokoako ka;

fonga mpiola o roandria'eo.

¹⁶ Linafa t'i Efraime, maike o vaha'eo,
tsy hamokatse voa ka iereo;
aa ndra t'ie mahatoly,
haitoako ty sabon-koviñe noro' iareo.

¹⁷ Hahifin'Añahare aña iereo,
ami'ty tsy fañaoña' iareo Aze;
vaho ho mpirererere amo
kilakila'ondatio aña‡.

10

¹ Vahe nandrevake t'Israele,
niregorego o voa'eo,
ie nitombo o famokara'eo,
le nampitombo'e ka o kitreli'eo;
mira ami'ty havokara' i tane'ey
ty nampisomontie o samposampo'eo.

² Fa mizara ty arofo' iareo;
fa hivave hakeo iereo;
ho hatsafe'e o kitreli' iareoo,
ho rotsahe'e o samposampo'eo.

³ Hanao ty hoe iereo te aniany,
Tsy amam-panjàka zahay,
ami'ty tsy fañeveña'ay am' IEHOVÀ;
fa ho nanao inoñe ho antika
ty mpanjaka?

⁴ Mivolambolaña avao iereo,
manao fanta vilaña naho mifañina;
aa le hitiry hoe lombiry
am-bavahalin-tete' iareo ty zaka.

⁵ Mihondrahondra o mpimone'
i Someroneo ty amo bania' i Bet'aveneo;
handala i baniay ondatio,
naho o mpisoroñe
nañonjoñe azeo, ty amy enge'ey,
fa niakatse aña zay.

‡ 9:17 Its 28:36

6 Ie hasese mb'e Asore aña
ho ravoravo am' Iarebe mpanjaka;
ho salareñe t'i Efraime,
vaho ho meñatse t'Israele
ty amo fañòha'eo.

7 I Somerone: fa naitoañe i mpanjaka'ey,
manahake ty vore
mihafoñ' ambone rano eo.

8 Ho rotsaheñe o kitreli' i Aveneo,
ty hakeo' Israele;
hitiry amo kitreli'e iabio ty fatike
naho ty hisatse,
le hanoeñe ty hoe o vohitseo,
Lembefo zahay;

naho o haboañe,
Mitraboha ama'ay.

9 Ry Israele, fa nandilatse
hirik'añ'andro' i Gibà rehe;
nijihetse ey avao iereo;
Tsy nahafivohotse ondaty mirengevoke e Gibà ao i hotakotakey.

10 Ho lilloveko an-tsatriko;
vaho hifanontoñe haname iareo
o kilakila' ondatio,
le ho rohizeñe ty amy
hakeo roe zay iereo.

11 Kiloa finolake t'i Efraime,
tea'e ty mandisañe;
le nampiariako ambone' i hèto'e fanjàkay
ty ana-joka, hitariha' i Efraime,
hitan-dasarý t'Iehodà, vaho
ho bonabonahe' Iakobe o boko'eo.

12 Mitongisa havantañañe,
mitataha fiferenaiñañe;
bonabonaho o moka' areoo;
fa tondroke ty fipaiañe IEHOVÀ,
ampara' t'ie totsake eo
hampidoñañe havañonañañe ama' areo.

13 Navae' areo ty halò-tsereke,
nitatahe' areo ty hakeo,
ho kamae' areo ty vokam-pandañirañe,
amy te niatoa'o o sata'oo,
naho ty hatsifotofoto' o fanalolahi'oo.

14 Aa le hitroatse añivo' ondati'oo
ty fifandragaragàñe;
fonga ho rotsake o rova fatratseo,
manahake ty nandrotsaha'
i Salmane* i Bet'arbele†,
tañ'andro' i hotakotakey;
dinemoke rekets' an-drene'e o ana'eo.

15 Hambañe amy zay ty hanoa' i Betele o halò-tsere' areoo;
ho vata'e aitoañe ty mpanjaka' Israele
te maraindray.

* **10:14** Salmane: mampilongo; fonitse; tambe † **10:14** Bet'arbele: Filonadonan'Andrianañahare

11

- ¹ Ie mbe ni-ajaja t'Israele, le nikokoako vaho tinokako hiakats' i Mitsraime i ana-dahikoy.
- ² Ie nikanjienko iereo àntsake te nihàンkañe, nisoroñe amo Baaleo, vaho nañembok' amo sampsampoo.
- ³ Zaho ty nañoke i Efraime hitekeñe, rinambeko an-tañañe, fe tsy napota'iereo te zaho ty nampijangañe.
- ⁴ Tinariko an-tali'ondaty, am-bahem-pikokoañe, le nanahake ty mpañaka-joka an-kàto' iareo raho vaho finahako mora.
- ⁵ Apoho himpoly mb'an-tane Mitsraime re, naho ho mpanjaka'e t'i Asore, amy t'ie mifoneñe tsy himpoly amako.
- ⁶ Hininininike amo rova'eo i fibaray, handrotsake tyakan-dala'e, naho hampibotseke, ty amy fikililia'iareo.
- ⁷ Imanea' ondatikoo ty hiola amako, ndra t'ie mikaike mb' añ'Abo-Tia, leo raike tsy mañonjoñ' Aze.
- ⁸ Akore ty hampipohako azo, ry Efraime? Akore ty hanolorako azo, ry Israele? Akore te hampanahafeko amy Admà* ?
- ndra t'ie hanoeñe hoe Tsibiìme[†]? mikoretse ty an-troko ao, naho hene niviañeñe o fiferenaiñakoo.
- ⁹ Tsy hafetsako ty hasiahan-kaviñerako, tsy hibalike mb'amy Efraime handrotsake; amy te Andrianañahare raho, fa tsy ondaty; t'i Masiñe añivo' areo ao; tsy ho pok'eo an-kabosehañe raho.
- ¹⁰ Hañavelo am-pañorihañe IEHOVÀ iereo; hitroñe manahake o lionao re; aa ie mitromoroñe, le hitititike boak' ahandrefañ'añe ty ana'dahy maro.
- ¹¹ Hanahake o voroñeo ty hiborofota' iareo boake Mitsraime aña, naho hoe deho hirik' an-tane Asore aña; ie hapoko añ'anjomba' iareo ao, hoe t'IEHOVÀ.

12

- ¹ Mañarikatoke ahy an-dañitse

* **11:8** Admà: hamenañe; hoe lio † **11:8** Tsibiìme: biby lý hoe añondry

t'i Efraime, naho am-pamañahiañe
 ty anjomba' Israele;
 Fa mbe mifehe aman'Añahare t'Iehoda,
 naho migahiñe amo noro'eo.

² Mandrazan-tioke t'i Efraime,
 mañeañe tiok'atiñanañe;
 ampitoabore'e vande naho joy
 lomoñandro,
 mbore milahatse amy Asore,
 mbore mañondrañe menake amy Mitsraime.

³ Manan-kabò am' Iehodà ka t'IEHOVÀ,
 o sata'eo ro hitiliha' Iakobe;
 o fitoloña'eo ro hañondroha'e aze.

⁴ Rinambe'e an-tomi'e an-koviñe ao
 i zoke'ey,
 le nifanehak' aman' Añahare an-kaozara'e;

⁵ Eka nigore'e i anjeliy vaho nahatañe*;
 nirovetse re naho nitoreova'e;
 i nioni'e e Betele[†] añey,
 le ao ty nitsara'e aman-tika.

⁶ Eka, IEHOVÀ, Andrianañahare' i màroy; IEHOVÀ ty tahina'e.

⁷ Aa le mimpolia mb'aman'Añahare'o;
 tambozoro ty fatarihañe naho ty hatò,
 vaho itamao nainai'e t'i Andrianañahare'o.

⁸ I mpampibalibalikey,
 balantsim-pamañahiañe ty am-pità'e ao; tea'e ty mikatramo.

⁹ Hoe t'i Efraime,
 Toe fa mpañaleale raho,
 nahatreva vara maro;
 tsy eo ty haharendreke tahiñe amako,
 ndra hakeo amo fitoloñakoo.

¹⁰ Zaho IEHOVÀ Andrianañahare'o
 boak' an-tane' i Mitsraime aña;
 mbe hampimoneñeko an-kibohotse rehe
 manahak' amo andro namantañañeo.

¹¹ Nisaontsieko o mpitokio,
 nampitomboeko aroñaroñe,
 vaho nandrazañe am-pitàm-pitoky.

¹² Aman-tahiñe hao t'i Gilade?
 toe hakoahañe,
 ie nañenga bania e Gilgale ao;
 eka, votrim-bato
 am-bavahali' o hatsakeo o kitreli'eo.

¹³ F'ie nilay mb'an-tete' i Arame‡ aña t'Iakobe,
 nitoroñe ho a i tañamjomba'ey,
 eka nimpiarake ty amy vali'ey.

¹⁴ Mpitoky ty nañendesa' IEHOVÀ t'Israele boake Mitsraime ao,
 vaho mpitoky ty nañarovañ' aze;
 nikai-jaka añ'afero t'i Efraime;
 aa le hapoke ama'e ty lio'e;
 vaho hondrohe' i Talè'e ama'e ty inje'e.

* **12:5** Fot 32:28 † **12:5** Betele: Anjomban'Añahare ‡ **12:13** Arame: haabo; soa; mpamañahy; fatse

13

- ¹ Ie nisaontsy ama-nevenevetse t'i Efraime
le nonjoneñ e Israele ao,
fe nizoeñ te aman-kakeo
ty amy Baale, vaho nihomake.
- ² Ie henanekeo, mitolom-pandilatse avao,
nampitranake sarendraha ami'ty volafoti' iareoo, ty amo hilala' iareo, toe
samosampon-draha,
fitoloña' ty kante;
anoa'iareo ty hoe: Angao horofa'
o mpanao soroñeo i bania rey.
- ³ Aa le hanahake
ty zono maraindray iereo,
naho i mika am-pangoàñ'andro
mihelañey;
hambañe an-kàfo'e asiotsion-talio boak'an-toe-pifofohañe eo,
vaho hatoeñe boak'an-toñak' ao.
- ⁴ Fa izaho IEHOVÀ Andrianañahare'o
boak' an-tane' i Mitsraime aña;
aa le tsy hahafohin-drahare ila'e nahareo naho tsy Zaho;
fa tsy eo ty mpandrombake
naho tsy Zaho avao.
- ⁵ Napotako an-dratraratra aña rehe,
an-tane kankañe aña.
- ⁶ Ie nifahanaña le niboboke, toe nianjañe, le nikavokavok' an-troke,
zay ty nandikofa' iareo ahy.
- ⁷ Aa le liona am' iereo raho henaneo,
hanampohako hoe farasy aña'olon-dalañaeo.
- ⁸ Hipoke am' iereo raho hoe dòbe mandala
handrimitse ty saron'arofo' iareo;
vaho habotseko hoe liona;
ho rimiteko hoe biby hako.
- ⁹ Ry Israele, mampianto vatan-drehe,
fa amako ty fañolorañ'azo.
- ¹⁰ Aia ty mpanjaka'o
handrombak' azo an-drova'o iaby?
Naho o mpizaka'oo nanoe'o ty hoe :
Añomezo mpanjaka naho roandriaña?
- ¹¹ Tinoloko mpanjaka rehe ami'ty habosehako;
vaho nasintako ami'ty fifomboko.
- ¹² Mifamahotse ty tahi' i Efraime,
mihaja ao o hakeo'eo.
- ¹³ Hivotrak'ama'e
ty fitsongoan' ampela;
ie ana-dahy tsy mahilala,
tsy ho nihenekenek' ambavan-koviñe ao.
- ¹⁴ Ho jebañeko ami'ty haozara'
i Tsikeokeokey hao?
ho vilieko aiña amy Havilasiy?
O Havilasio, aia o angorosi'oo?
O Tsikeokeokeyo,
aia o fandrotsaha'oo?*

* **13:14** Ko I 15:55

Mietak' amo masokoo ty tretre.
15 Ndra te ie mibobobodo amo vindao,
 ho avy ty tiok'atiñanañe;
 hivovo boak' am-patram-bey ao
 ty tio' IEHOVÀ,
 le ho maike i rano'e manganahanay,
 ho ritse i loha-rano'e nigoangoañey,
 ho haofe'e ty an-driha'e ao
 hañakatse ze hene vara'e sarotse.

14

1 Ho vave' i Somerone o tahi'eo,
 amy t'ie niody aman'Añahare'e;
 hampikorovohem-pibara;
 ho demoheñe an-damilamy
 o anak' ajaja' iareoo,
 ho boraheñe an-drimitse
 o rakemba mivesatseo.

2 Ry Israele, mimpolia mb'am' IEHOVÀ
 Andrianañahare'o;
 fa nampihotrake azo o hakeo'oo.

3 Andeso saontsy, le mibaliha mb'am'IEHOVÀ: ano ty hoe:
 Fonga afaho o hakeoo, rambeso an-kasoa,
 vaho hengae'ay ty banian-tsoñi'ay*.

4 Tsy haharombak' anay t'i Asore;
 izahay tsy hiningitse an-tsoavalà,
 le tsy hanao ty hoe amo sata-pità'aio:
 Ry ndrahare'ay.

Fa ama'o ty hahaoniña'
 ty bode-rae fiferenaiñañe.

5 Ho jangañeko ty fidisa-voli' iareo;
 hikokoako an-tsatin-tro,
 fa mitolike ty habosehako.

6 Hanahake ty zono am' Israele raho;
 ie hidorenake hoe antake mandriake,
 vaho hirifondrifoñe hoe Libanone.

7 Handrevake o ra'eo,
 nahohanahake ty andramahe ty enge'e,
 vaho hoe Libanone ty harifondrifo'e.

8 Himpoly iaby o mialok' ama'eo;
 ho tolorañ' aiñe manahake i ampembay,
 le hiraorao hoe vahe,
 vaho handrifondrifoñe
 hoe ty hamañiran-divai' i Libanone.

9 Le hanao ty hoe t'i Efraime:
 Hanoeko inoñe ka o sampsosampoo?
 Fa nitsanoñeko nahohijiloveko,
 Manahake ty kile maindoñe ama'o raho,
 amako ty aharendreha'o voa.

10 Ee te hahafohiña o raha zao ty mahihitse,
 nahohaharendreke o mahilalao.
 Amy te vantañe o lala' IEHOVÀo,

* **14:3** Heb 13:5

ie orihe' o yañoñeo,
fe itsikapia' o miolao.

Ioèle

¹ Ty tsara' IEHOVÀ niheo am' Ioèle* ana' i Petoelet: ² Janjiño ry androanavio, toloro ravembia
ry hene mpimone' o taneo,
he t'ie nizoeñe añ'andro' areo,
ndra tañ'andron-droae' areo hao? ³ Atalilio amo ana' areoo,
le ampitalilio o ana' areoo amo ana' iareoo,
vaho o ana' iereeo amo tariratse añeo.
⁴ Nabotse' ty kijeja
ze nenga' ty marambolo,
nihane' ty voantane ze nenga i kijeja,
vaho nikapaihe' ty beañe
ze nenga' ty lambotane. ⁵ Mitsekafa ry jike le miroveta;
mangololoiha ry mpinon-divaio,
ty amy divai-vao napitsoke
am-palie' areo. ⁶ Fa nivotrak' an-taneko atoy ty fòko maozatse, mitozan-
tozañe;
hoe nifen-diona o famotsi'eo,
vazan-diona ra'elahy ⁷ Fa napo'e ho forompotse o vahekoo,
nikorendahe' e ty sakoako;
niholira'e malio naho nahifi'e aña,
le foyt iaby o ra'eo. ⁸ Mangoihoia manahake ty somondrara
misikin-gony ty amy valin-katòra'ey. ⁹ Fa naitoañe amy anjomba' IEHOVÀY
i enga-mahakamay, naho i engan-dranoy;
mandala o mpisoroñe mitoroñe IEHOVÀO. ¹⁰ Finaoke i tetekey, mitañy ty
tane;
finongotse i ampembay;
nimaiheñe i divay vaoy,
kapaike i menakey.
¹¹ Mioremeña ry mpihare,
mangololoiha ry mpañalahala vahe,
ty amy ampembay naho i tsakoy;
amy te mikirikintàñe i tetekey. ¹² Fa maike i vahey,
mongotse i sakoañey;
niforejeje ka i raketay‡, i sasaviy,
i takokoy, naho ze hene hatae
an-kivoke ey;
aa le niheatse amo ana'ondatio
ty hafaleañe.
¹³ Midiaña vaho mandalà ry mpisoroñe;
mangololoiha ry mpitoron-kitrely;
antao hialeñe an-gony ry mpitoron'
Añahareko;
fa napitsok' amy anjomban'
Añahare' areoy ty enga-mahakama
naho ty enga rano. ¹⁴ Añamasíño lilitse,
koiho ty fivory miavake,
atontono o androanavio,

* **1:1** Ioèle: manatry; mandily † **1:1** Petoele: Falien'Añahare; nosihe'e ‡ **1:12** Heb: mimone:
ampongabeindañitse

naho ze kila mpimone' ty tane toy,
 mb' añ'anjomba' IEHOVÀ
 Andrianañahare' areo,
 vaho mitoreova am' IEHOVÀ. ¹⁵ Hankàñe ty andro!
 fa tondroke ty andro' IEHOVÀ,
 le hoe firotsahañe boak' amy
 El-Sadai ty hivovoa'e. ¹⁶ Tsy fa naitoañe aolom-
 pihaino' areo hao ty mahakama?
 ty haehake naho ty firebehañe boak'
 añ'anjomban'Añaharen-tikañe ao? ¹⁷ Nimomok' am-bokon-tane ao
 ty tabiry, nikapaiheñe o rihao,
 nikoromake o kiboho-mahakamao;
 fonga niheatse i ampembay. ¹⁸ Akore ty fañaoloa' o hareo!
 lonjetse o mpirai-tron'añombeo
 kanao tsy amam-piandrazañe;
 eka, malorè o lia-rain-añondrio. ¹⁹ Ry IEHOVÀ, ihe ro itoreovako
 fa finorototo' ty afo o fiandrazañe
 am-patrambeio;
 vaho nampangotomomohe' i lel'afoy
 ze kila hatae an-kivok' ao. ²⁰ Ihe ro isehasehà'
 o biby am-patrañe,
 fa maike iaby o sakao,
 vaho fa hinotomomo' i afoy
 o fiandrazañe an-dratraratratrao.

2

¹ Popòho e Tsione ao ty antsiva,
 koiho an-kaboako miavake ey ty hazolava;
 ee te hihondrahondra iaby
 ondaty an-tane atoio,
 fa hitsatoke ty andro' IEHOVÀ;
 toe fa an-titotse; ² Andro maieñe naho mimoromoroñe,
 andro mandrahoñe naho aman-talinjo
 mihanake am-bohitsey
 manahake t'ie manjirik'andro;
 ondaty mifamorohotse naho fàtratse;
 mboe lia'e tsy niañ'ohatse;
 vaho le lia'e tsy ho limbezañe,
 ampara' ty taon-tariratse maro aña. ³ Mamorototo aolo'e eo ty afo,
 vaho mivoly ama'e ty soba miforehetse,
 ie hoe golobo' i Edene* ty aolo'e eo
 le liolio, mangoakoake ty amboho'e;
 tsy eo ty mahaborifitse ama'e. ⁴ Manahake o soavalao iereo,
 naho o mpiningi-tsoavalao,
 zay ty fitsondemboha' iareo. ⁵ Manahake ty fitrakotrakon-tsarete mi-
 trantràñe an-dengom-bohitse ey,
 hoe ty fikosisiha' ty lel'afyo
 mipilotse ahetsé,
 naho ondaty maozatse miriritse hialy. ⁶ Mampalorè ondatio te zoeñe;
 fonga mikò-foty o laharañe.
⁷ Manahake o fanalolahio ty filaisa' iareo,

* ^{2:3} Edene: Hafalea; Finembanembañe

anganiha' iareo o kijolio hoe lahin-defoñe,
 songa mandrodo amy lala'ey,
 tsy eo ty mivitsok' am-pidadaña'e. ⁸ Tsy mifampikititse iereo
 fa songa mitrokotroko amy lala'ey;
 aa ndra te mipenkañe ty singa
 ipaoha'e, ie tsy fere. ⁹ Herereafe' ty rova,
 mirimatse an-drindriñe,
 manganike mb'anjomba ao;
 mitsoropoke an-dalan-kede hoe malaso. ¹⁰ Manginikinik' aolo'e eo ty tane,
 miozoñozoñe o likerañeo;
 mikò-mainte i àndroy naho i volañey,
 le asita' o vasiañeo o fimilemile'eo. ¹¹ Mampipoña-piarañanañañe
 añatrefa'
 o lahindefo'eo t'IEHOVÀ;
 amy te ra'elahy o lahindefo'eo,
 fatratse o mañorike o tsara'eoo;
 toe jabajaba ty andro' IEHOVÀ
 vaho mampangebahebake,
 Ia ty mahafifeak' ama'e? ¹² Ie amy zao, hoe t'IEHOVÀ,
 itoliho an-kaliforan'arofo,
 naho am-pililarañe, am-pirovetañe,
 vaho am-pangololoihañe. ¹³ Mandrovita arofo fa tsy sikiñe,
 le mitoliha am' IEHOVÀ
 Andrianañahare' areo,
 fa matarike naho miferenaiñe,
 malaon-kaviñerañe naho ra'elahy
 an-kafatraram-pikokoañe,
 vaho teñene'e ty fametsahan-kankàñe. ¹⁴ Ia ty mahafohiñe, hera hibalike
 re
 naho hiheve, vaho hamopoke fañanintsiñe am-boho'e eo,
 añengao mahakama naho enga-rano
 am'IEHOVÀ Andrianañahare' areo. ¹⁵ Popoho e Tsione ao i antsivay,
 añamasiño lilitse, koiho ty fivory miavake; ¹⁶ Atontono ondatio; hamasiño
 ty fivory,
 arokandrokaño o androanavio,
 atolaho o ajajao
 rekets' o milomolomo am-patroao,
 ampiakaro an-kivoho'e i mpañengay,
 boak' an-kiboho'e ao i enga-vaoy. ¹⁷ Ehe te hiharovetse añivo' i fizilihañey
 naho i kitreliy o mpisoroñe
 mpitoro' IEHOVÀO, hanao ty hoe:
 Ferenaiño ondati'oo, ry IEHOVÀ,
 le ko atolo'o ho arinjeñeñe
 o lova'oo hamokafoka' o kilakila' ndatio;
 aa vaho akore t'ie hampiboele
 am'ondatio ty hoe:
 Aia t'i Andrianañahare' iareo? ¹⁸ Nikirañe i tane'ey amy zao
 t'IEHOVÀ, vaho ferenaiña'e ondati'eo, ¹⁹ Hanoiñe t'IEHOVÀ
 hanao ty hoe am'ondati'eo:
 Ingo te hampañitrifeko ampemba vao
 naho divay vao vaho menake,
 haha-anjañe anahareo,
 le tsy hanoeko ho fañinjea'

o kilakila' ondatio ka. ²⁰ Fa hasitako lavitse anahareo
 o 'ntavaratseo,
 naho haronjeko mb'an-tane
 harake naho bangïñe aña;
 hitolike mb'amy riak' atiñanañey o mpiaolo'eo, naho o am-boli'eo mb'an-
 driak' ahandrefañey,
 le hionjoñe ty imbo'e
 vaho hiambone ty fitrotrora'e,
 amy te ra'elahy o nanoe'eo. ²¹ Ko hemban-drehe ry tane;
 mifalea naho mandià taroba;
 amy te fanjàka o fitoloña' IEHOVÀ. ²² Ko matahotse ry bibin-kivokeo;
 fa mbe haindoñindoñe
 o fiandrazañe am-patrambeio,
 mbe hamoa ty voa'e o hatae'eo,
 songa hamokatse
 ty sakoa naho ty vahe. ²³ Mirebeha ry ana' i Tsioneo,
 mifalea am' IEHOVÀ Andrianañahare' areo,
 fa havantañañe ty mampahavy
 i ora-mafaitsey,
 toe hampahavia'e orañe,
 i aloy naho i orañ'asotriy
 manahake te taolo. ²⁴ Ho lifotse ampemba o rihao,
 vaho handopatse divay
 naho menake o sajoao. ²⁵ Havahako ama' areo o taoñe nabotse'
 o valalao, naho o maramboloo,
 naho o beañevo vaho o voan-taneo,
 i mpirai-lian-dahin-defoñe
 niraheko ama' areoy. ²⁶ Ho eneñe mahakama nahareo,
 toe ho anjañe, naho ho rengè' areo
 ty tahina' IEHOVÀ
 Andrianañahare' areo,
 amy hasoa tsitantane nitoloña'ey;
 vaho tsy ho salatse ka ondatikoo. ²⁷ Le ho fohi' areo te añivo' Israele
 ao raho[†],
 le Izaho, IEHOVÀ Andrianañahare' areo
 ro tsy aman-tovo'e,
 vaho tsy ho salatse ka ondatikoo.

3

¹ Ie heneke zao, hadoako amy ze atao nofotse ty Troko;
 le hitoky o ana-dahio
 naho o anak'ampela' areoo,
 naho hañinofy o androanavi' areoo,
 vaho hahaoniñe aroñaroñe
 o ajalahi' areoo; ² Le hailiko amo mpitoroñe,
 naho amo anak' ampatañe
 ty Troko amy andro rezay. ³ Hampiboahako raha tsitantane
 an-dindiñe ey, naho an-tane atoy,
 lio naho afo, vaho hatoeñe mijioala. ⁴ Hafotetse ho ieñe i àndroy,
 naho ho lio i volañey,
 aolo ty fitotsaha' i andro' IEHOVÀ jabajaba

[†] **2:27** Ies 24:23

naho mampangebahebakey. ⁵ Ie amy zay, ho rombaheñe ze mikanjy ty tahina' IEHOVÀ; fa hipolititse an-kaboa' i Tsione ao naho e Ierosalaime ao ty ila'e amy nafè' IEHOVÀ, vaho ho kanjie' IEHOVÀ o sehanga'eo.

4

¹ Inao, hampoliko amy andro rezay, naho amy sa zay, ty fandrohiza' Iehodà naho Ierosalaime, ² naho hatontoko boak' amy ze hene fifeheañe, naho hampizotsoeko mb'am-bavatane' Iehosafate* mb'eo, vaho eo ty himoahako an-jaka ty am' ondatikoo naho i lovako Israeley, ie nampibaratsaheñe amo kilakila' ondatio aña naho nanjarañe i tanekoy. ³ Vinili' iareo aman-kitsapake ondatikoo, kinalo' iareo tsimirira ty ajalahy naho navaro' iareo ty somondrara ho divay hinoma' iareo. ⁴ Inoñ'amako rehe Tsore naho Tsidone, naho ze hene toe' i Pilisty? Hañavak' amako hao? Aa naho Hañavake le hafoteko aniany naho masìka an-doha' areo i ondro' areoy, ⁵ amy te tinava' areo o volafotiko naho volamenakoo, naho nendese' areo an-kibohon'drahare' areo mb'eo o fànakò sarotseo, ⁶ naho naleta' areo amo nte-Ievanio o ana' Iehodà naho o ana' Ierosalaimeo haneseañe iareo lavitse ty tane' iareo aña. ⁷ Inao fa hampionjoneko boak' antane nandetahañe iareo, vaho havàhako an-doha' areo o sata' areoo, ⁸ fa haletako am-pità' o ana' Iehodà o ana-dahi' areoo naho o anak' ampela' areoo, vaho haleta' iereo amo nte-Sevào, ondaty tsietoitane añaeo, fa zay ty tsinara' IEHOVÀ. ⁹ Tseizo ty hoe o kilakila'ondatio:

Mihentseña hialy;
 tsekafo o fanalolahio,
 ampañarineo ze hene lahindefoñe;
 ampionjono mb'etoa; ¹⁰ Tefeo ho fibara o lelan-dasari' areoo,
 naho ho lefoñe o fibira' areoo,
 ampanò ty hoe o mavozoo:
 Maozatse raho; ¹¹ Malisà! mb'etoy
 ry kilakila' ondaty mañohokeo;
 ampizotsò o fanalolahi'oo ry IEHOVÀ. ¹² Mitrobotroboa ry kilakila ondatio,
 mionjona mb'am-bavatane' Iehosefate,
 fa ao ty hitobohako hizaka
 o kilakila ondaty miarisehoo. ¹³ Sonjono ty fitatahañe,
 fa matoe i vokatsey,
 miziliha, mandialià, fa pea i fipiritañey,
 naho mandopatse o sajoao,
 fa bey ty haloloa' iareo. ¹⁴ Rehoreho, fikorakorahañe
 ty am-bavatanem-panàmpan-kevetse,
 fa mitotoke ty andro' IEHOVÀ
 am-bavatanem-panàmpan-kevetse. ¹⁵ Hampaieñeñe i àndroy naho i
 volañey,
 vaho hasinta' o vasiañeо o filoeloea'eo. ¹⁶ Le hitroñe boak'e Tsione ao
 t'IEHOVÀ,
 hampipoña-piarañanañañe
 boak'e Ierosalaime ao;
 le hihondrahondra o likerañeo
 naho ty tane toy;
 fa fitamà' ondati'eo t'IEHOVÀ
 naho ty fipalira-maoza' o ana' Israeleo. ¹⁷ Aa le ho fohi' areo te Zaho IEHOVÀ

* ^{4:2} Iehosafate: IEHOVÀ ro Mpizaka

Andrianañahare' areo,
 mpimoneñe e Tsione, vohi-masiko,[†] ao,
 aa le hiavake t'Ierosalaime,
 vaho tsy hiranga ama'e ka o ambahinio. ¹⁸ Ie amy andro zay,
 hampitsopatsopake divay vao o vohitseo,
 le horikorihen-dronono o haboañeo,
 naho hene hikararahan-drano
 o saka' Iehodào, le higoangoña boak' añ'anjomba' IEHOVÀ ao ty rano
 hanondrake ty vavatane' i Sitime. ¹⁹ Ho babangoña t'i Mitsraime,
 naho ho rattrotrattro bangý t'i Edome,
 ty amy hasiaha' iareo amo ana'Iehodào,
 ie nampiorike lio-màliñe
 an-tane' iareo eo. ²⁰ Fa himoneñe nainai'e t'Iehoda;
 naho tariratse an-tariratse t'Ierosalaime ²¹ Le ho lioveko ty lio'iareo mboe
 tsy nilioveko
 fa himoneñe e Tsione ao t'IEHOVÀ.

[†] **4:17** Ies 12:6, Iek 48:35, Mik 4:7, Tsf 3:14-16

Amose

1 Ty enta' i Amose*, mpiamo mpiarake e Tekoao†, ty nioni'e am' Israele faha-i Ozià‡ mpanjaka' Iehoda nahoh faha Iarobame§ ana' Ioase* mpanjaka' Israele, taoñe roe taolo' i fanginikinihan-taney. **2** Hoe re:
 Mitroñe boake Tsione ao t'IEHOVÀ;
 nahoh mipoña-piarañanañañe
 hirike Ierosalaime aña;
 nahoh hangoihoy ty fiandraza'
 o mpiarakeo,
 vaho hiheatse ty andingo' i Karmele†. **3** Hoe ty nafè' IEHOVÀ:
 Ty ami'ty fiolàñe telo' i Damesèke‡
 nahoh i fah'efa'ey,
 le tsy hapoko ty fandilovañe aze,
 ami'ty namofoha' iareo i Gilade§
 am-pamofohañe viñe. **4** F'ie hañitrifako afo mb'añ'anjomba'
 i Kazaele*
 ze hamorototo o anjomba'
 i Benhadadeo†. **5** Ho pozahoko ty sikada' i Damesèke,
 le haitoako o mpimoneñe
 am-bavatane' i Avene‡ eio,
 nahoh i mpitan-kobaiñe aña'anjomba'
 i Edene aoy;
 vaho hasese an-drohy mb'e Kire§
 mb'eo o nte-Arameo,
 hoe ty nafè' IEHOVÀ. **6** Hoe ty nafè' IEHOVÀ:
 Ty ami'ty fiolàñe telo' i Azà*,
 nahoh i fah'efa'ey,
 le tsy hapoko ty fandilovañe aze,
 fa nasese' iereo an-drohy ze hene mpimoneñe,
 vaho naonjo' iereo mb'e Edome mb'eo, **7** Aa le hañitrifako afo ty kijoli' i Azà,
 ze hampangotomomoke o anjomba'eo. **8** Haitoako amy Asdode† o mpimone'eo
 nahoh i mitan-kobaiñe e Askelone aoy
 nahoh hampitoliheko hiatreke
 i Ekrone ty tañako;
 vaho hihomake ty sehanga' o nte-Pilstio,
 hoe t'IEHOVÀ, Talè. **9** Hoe ty nafè' IEHOVÀ:
 Ty ami'ty fiolàñe telo' i Tsore,
 nahoh i fah'efa'ey,
 le tsy hapoko ty fandilovañe aze,
 amy te fonga nasese' iareo mb' Edome

* **1:1** Amose: Mavesatse; Mijiny † **1:1** Tekoa: Antsiva; nañatoñañe ‡ **1:1** Ozià: ty haozara' IEHOVÀ; ndra vi'e § **1:1** Iarobame: mpiatreatre am'onday * **1:1** Ioase: monjetse ndra miforehetse † **1:2** Karmele: añondrivosy; fitatahañe; rifo ‡ **1:3** Damesèke: gony pea lio; hoe miforehetse § **1:3** Gilade: ty venten-talily * **1:4** Kazaele: i mahonañe an'Andrianañahare † **1:4** Benhadade: Ana' i Hadade: korake; ‡ **1:5** Avene: hakeo; ozatse; vara; hasotriañe § **1:5** Kire: rova, kijoly; fivory * **1:6** Azà: Maozatse; Ose-lahy † **1:8** Asdode: vore: ina; hàlatse

o an-drohio, vaho tsy
 nitiahi' iareo i fañinam-piroahalahiy; ¹⁰ Aa le hañitrifako afo ty kijoli' i
 Tsore,
 ze hampibotseke o anjomba'eo. ¹¹ Hoe ty nafè' IEHOVÀ:
 Ty ami'ty fiolàñe telo' i Edome,
 naho i fah'efa'ey,
 le tsy hapoko ty fandilovañe aze,
 amy te hinorida'e am-pibara
 i rahalahi'ey naho nifoneña'e tsy hitretre;
 le nainai'e nandriatse i fifomboa'ey
 vaho nitolom-piloroloro avao. ¹² Aa le hañirahako afo t'i Temane[‡],
 hamorototo o anjomba' i Botsrào[§]. ¹³ Hoe ty nafè' IEHOVÀ:
 Ty ami'ty fiolàñe telo' i Amone,
 naho i fah'efa'ey
 le tsy hapoko ty fandilovañe aze,
 amy te nirimite' iareo o rakemba'
 i Gilade nivesatseo,
 hampientareñe ty efe-tane' iareo. ¹⁴ Aa le hamiañako afo ty kijoli' i Rabà*
 hampangotomomoheñe o anjomba'eo,
 hitraofa'e fikoiakoiahañe
 amy andron-kotakotakey,
 naho tio-bey añ'andro' i tangololahiy; ¹⁵ le hisese mb'am-pandrohizañe
 añe
 i mpanjaka'ey, ie naho o roandria'eo,
 hoe t'IEHOVÀ.

2

¹ Hoe ty nafè' IEHOVÀ:
 Ty ami'ty fiolàñe telo' i Moabe*,
 naho i fahefa'ey
 le tsy hapoko ty fandilovañe aze,
 amy te niforototoe' ho sokay
 ty taola' i mpanjaka' i Edomey; ² aa le hañitrifako afo t'i Moabe,
 ze hampangotomomoke o anjomba'
 i Kerioteo[†]; le hikoromak' ami'ty
 fivalitsikotahañe t'i Moabe,
 reketse fikoiakoiahañe
 naho ty fipopò' i antsivay; ³ vaho haitoako añivo'e ao i mpizakay,
 le fonga hatraoko fizamanañe
 o roandria'eo, hoe t'IEHOVÀ. ⁴ Hoe ty nafè' IEHOVÀ:
 Ty ami'ty fiolàñe telo' Iehoda,
 naho i fahèfa'ey
 le tsy hapoko ty fandilovañe aze,
 amy te tsinambolitio' iareo
 o Tsara' IEHOVÀ
 naho tsy nambena' iareo o fañè'eo, vaho nampandilatse iareo ty fandañira'
 iareo
 ie nañaveloan-droae' iareoo. ⁵ fe hamotraheko afo t'Iehoda,
 hamorototo o anjomba' Ierosalaimeo. ⁶ Hoe ty nafè' IEHOVÀ:
 Ty ami'ty fiolàñe telo' Israele,

[‡] 1:12 Tamane: i Atimoy; Afrika; fonitse § 1:12 Botrà: hasotriañe, famorekekeña * 1:14
 Rabà: jabajaba; manandily; tea aly * 2:1 Moabe: an-drae'e † 2:2 Keriote: o rovao; o fikoihañe

naho i fah'efa'ey
 le tsy hapoko ty fandilovañe aze,
 amy te naleta' iareo
 ho volafoty o vantañeo,
 naho ho hana o rarakeo; ⁷ Dorodemohe' iereo ami'ty debo' ty tane toy ty
 añambone' o rarakeo,
 naho mañolake ty lala' o mpirekeo;
 ao ka t'indaty naho ty rae'e
 songa miolotse ami'ty somondrara raike, haniva ty añarako masiñe. ⁸ Ie
 màndre añ'ila' o kitrelio
 an-tsikiñe tsinoake,
 vaho minoñe ty divai' o nandilovañe an-kibohon-drahare' iareo ao.
⁹ F'izaho ty nanjamañe o nte Amoreo aolo' iareo eo,
 ie nira ami'ty haabon-tsivokon-tsifake;
 nanahake o vaovio ty haozara'e;
 fa rinotsako o voa'e amboneo,
 naho o vaha'e ambaneo. ¹⁰ Ie nakareko an-tane Mitsraime ao ka,
 naho niaoloakoefa-polo taoñe
 am-pirangañe i fatrambeiy,
 soa te hanaña' areo ty tane' o nte Amoreo. ¹¹ Mbore nibeizeko ho mpitoky
 ty ila' o ana' areoo,
 naho ho nte Nazire[‡] ty ila'e,
 tsy to hao zay, ry ana' Israeleo?
 hoe t'IEHOVÀ. ¹² Fa nazi' areo o nte Nazireo
 ty hinoñe divay,
 vaho linili'o o mpitokio ami'ty hoe:
 Ko mitoky. ¹³ Inao t'ie ho tindrieko ambane
 manahake ty fanindrian-tsarete
 pea ampemba. ¹⁴ Hilesa ty favoratsaha' o malisao,
 naho tsy hitoloñe ty haozara' o fatratseo
 vaho tsy haharomba-piaiñe ty fanalolahy, ¹⁵ mbore tsy hahafijohañe ty
 mpitam-pale;
 naho tsy hahafioratse
 ty mahafilay am-pandia,
 naho tsy haharombak'aiñe
 ty mpiningi-tsoavalà; ¹⁶ vaho hitriban-day tsy an-tsaroñe
 ty lahi-tsi-ai' o fanalolahio,
 hoe t'IEHOVÀ.

3

¹ Mijanjiña ty nitsarà' IEHOVÀ
 ry ana' Israeleo,
 ry hene foko nakareko
 an-tane' i Mitsraimeo, ami'ty hoe: ² Inahareo avao ty napotako amo kila
 foko ty tane toio;
 aa le fonga havaleko ama' areo
 o hakeo' areoo. ³ Mahay miharo lia hao ty roe
 naho tsy milahatse hey? ⁴ Hitroñe aña'ala ao hao ty liona
 naho tsy aman-tsats'a'e?
 Hañaolo boak' an-dakato'e ao hao

[‡] 2:11 Nazire: Jinoboñe ndra naambake

ty liona tora'e naho tsy nahatsepake? ⁵ Mete hikoropok' am-pandri-bo
 an-tane eo hao ty voroñe,
 naho tsy ama'e ty fitake?
 Hidraitse an-tane eo hao i bitsokey,
 ie tsy aman-ko tsepaheñe? ⁶ Naho tiofeñe an-drova ao i antsivay,
 tsy hangebahebake hao ondatio?
 Ie hizò hankàñe ty rova,
 tsy ho sata' IEHOVÀ hao? ⁷ Toe tsy hanao ndra inoñ'inoñe
 t'IEHOVÀ, Talè, naho tsy borahe'e
 amo mpitoro'e mpitokio heike
 o safiri'e mietakeo. ⁸ Fa nitroñe i lionay,
 ia ty tsy ho hembañe?
 Fa nitsara t'IEHOVÀ, Talè,
 ia ty tsy hitoky? ⁹ Tseizo amo anjomba' i Asdodeo
 naho amo anjomba an-tane'
 Mitsraime añeo ty hoe:
 mitontona am-bohi' i Somerone eo,
 naho mahaisaha ty fifandraparapahañe añivo'e ao vaho o forekekeñe
 ama'e aoo. ¹⁰ Fa tsy fohi' iareo ty hanao ty hiti'e,
 hoe t'IEHOVÀ,
 ie mañaja fikatramoaña, naho fampikameraña añ'anjomba' iareo ao. ¹¹ Aa
 hoe t'IEHOVÀ, Talè:
 Hiarikatohe' ty rafelahy i taney
 naho harotsa'e o hafatrara'oo,
 vaho ho kopahe'e o anjomba'oo. ¹² Hoe t'i IEHOVÀ:
 Manahake ty añakara' ty mpiarake
 ami'ty montsilin-diona
 ty tombo'e roe ndra ty silan-tsofi'e,
 ty haneseañe o ana' Israele
 mimoneñe e Someroneo,
 reketse ty indran-tihy
 ndra ty tombom-pandreañe. ¹³ Mijanjiña, le asisio ty anjomba' Iakobe,
 hoe t'IEHOVÀ, Talè Andrianañahare' i màroy;
¹⁴ fa amy andro hañondrohako
 o fiolà' Israeleoy,
 le ho valeako o kitreli' i Beteleo*,
 naho ho kitsifañe i tsifan-kitrely rey
 vaho hipok' an-tane eo. ¹⁵ Hatraoko lafa i anjomban'asaray
 naho i anjomban'asotriy,
 hikoromake ka o anjomba aman-tsifao;
 toe hirotsake o anjomba jabajabao,
 hoe t'IEHOVÀ.

4

¹ Janjiño o tsara zao ry añombe' i Basane*
 ambohi' i Sameroneo,
 ie forekeke' areo o rarakeo,
 naho pirite' areo o poi'eo,
 vaho manao amo roandriañe ty hoe:
 Añendeso hinoman-tika. ² Fa nifanta ty amy hamasiña'ey

* 3:14 Betele: Anjomba mandrifondrifoñe * 4:1 Basane: aman-tsifa (nife jabajaba foty)

t'IEHOVÀ, Talè:
 Toe ho tsatok' ama' areo ty andro
 t'ie hasese mb'eo am-porengotse,
 ty sehang'a' areo am-bintañe. ³ Hipororoak' amo heba'eo nahareo
 songa rakemba hifanoitoy mb'eo,
 vaho hahifike mb'e Karmone[†] aña
 hoe t'IEHOVÀ. ⁴ Mb'e Betele mb'atoy, le mandilara
 mb'e Gilgale[‡] le ampitombò hakeo;
 banabanao o enga' areoo te maraindray,
 ty faha-folo'e aña'andro fahatelo'e; ⁵ naho añengao sorom-pandrengeaña
 milaro lalivay\$,
 le tseizo o banabanan-tsatin-trokeo,
 vaho isengeo,
 fa zay ty tea' areo, ry ana'Israeleo,
 hoe t'IEHOVÀ, Talè. ⁶ Fa nitolorako nife malio
 amo rova' areo iabio,
 naho tsy fahampeañe mofo
 aña'anjomba' areo,
 fe tsy nimpoly amako nahareo,
 hoe t'IEHOVÀ. ⁷ Nampihakañecko ama' areo ty orañe,
 te mbe volañe telo aña i fitatahañey,
 le nampahaviako orañe ty rova raike
 fa tsy nampahaviako ka ty rova raike;
 toetse raike ty nahazo orañe,
 niforejeje ka i tsy nahavia'ey. ⁸ Aa le nitoha rano hinoma'e mb' an-drova
 raike aña ty rova telo ndra roe,
 fa tsy naheaneñe,
 mboe tsy nimpoly amako avao
 nahareo, hoe t'IEHOVÀ. ⁹ F'ie linafako an-tio-maike
 naho an-tromambo;
 le nabotse' ty kijeja
 ty hamaroa' o golobo' areoo,
 naho o tanem-bahe' areoo,
 vaho o voanio' areoo;
 fe tsy nimpoly amako, hoe t'IEHOVÀ. ¹⁰ Nahitriko ama' areo ty angorosy
 manahake o tan-tane Mitsraime añaeo,
 zinamako am-pibara o ajalahi' areoo,
 naho tinavako o soavala' areoo,
 nampionjoneko mb'am-piantsona' areo ao ty fitrotròra'e;
 fe tsy nimpoly amako, hoe t'IEHOVÀ. ¹¹ Finongoko ty ila'e ama' areo
 manahake ty namongoran'Añahare
 i Sedome* naho i Amorà[†],
 ie nihoe foroha mirekake tsinoake
 amy afoy ao;
 fe mboe tsy nimpoly amako
 hoe t'IEHOVÀ. ¹² Toly ndra inao ty hanoeko ama'o
 ry Israele;
 kanao tsy mete tsy hanoeko,
 le miwentseña hifañaoñe
 aman' Añahare'o ry Israele. ¹³ Inao, i mpitsene o vohitseo

* ^{4:3} Karome: anjomba ‡ ^{4:4} Gilgale: larô; mivarimbariñe; votry § ^{4:5} Oniño: Sor 2.11

* ^{4:11} Sedome: ty tsikotsiko' iareo; † ^{4:11} Amorà: ondaty miola

naho mpamboatse o tiokeoy,
 I mampiborake o vetsevetse'eo am'ondatoy.
 I mampiboake ty manjirik'andro
 ami'ty fimoromoroñe,
 I midraidraitse amo toets'ambone'
 ty tane toioy;
 IEHOVÀ Andrianañahare' i màroy
 ty tahina'e.

5

¹ Janjiño o entañe honjoneko
 ho bekom-pandalàñe ama' areoo,
 ry anjomba' Israele: ² Nihotrake ty somondrara' Israele;
 tsy hahafitroatse ka:
 mifitak' an-tane'e eo avao,
 tsy eo ty mahaongak' aze. ³ Fa hoe ty nafè' IEHOVÀ, Talè:
 Ty rova nampionjoñe ty arivo
 ro hengañe zato;
 naho ty nampionjoñe zato
 ro sisàñe folo,
 amy anjomba' Israeley. ⁴ F'ie hoe ty nafè' IEHOVÀ
 amy anjomba' Israeley:
 Paiavo raho, soa t'ie ho veloñe; ⁵ Fa ko mipay i Betele,
 naho ko mb'e Gilgale mb'eo,
 vaho ko mitsake mb'e Beersèba*
 amy te hasese mb'an-drohy
 aña t'i Gilgale,
 naho ho tanan-taolo t'i Betele. ⁶ Tsoeho t'IEHOVÀ, soa te ho veloñe;
 tsy mone hisolebora'e hoe afo,
 ry anjomba' Iosefe,
 hamorototo i Betele,
 ie tsy ama'e ty hahafikipek'aze. ⁷ O ry mamotetse ty zaka ho vahontsoy,
 vaho mametsake ty havantañañe an-tane, ⁸ Miandrà mb'amy Namboatse
 i vasiam-pito rey
 naho i Telo-miriritsey;
 mb'amy mamalike ty fimoromoroñan-kavilasy ho maraiñey,
 mb'amy mampaiène ty andro ho haleñey;
 mb'amy mpikanjy o ranon-driakeo
 hañiliña'e an-tarehe' ty tane toiy;
 IEHOVÀ ty tahina'e. ⁹ Ampibiloe'e amo maozatseo
 ty fandrotsahañe,
 vaho miambotrak' amy rova
 fatratsey ty fandrebahañe. ¹⁰ Heje' iereo ty mpañendak' an-dalambey eo,
 vaho falai' iareo
 ty misaontsy an-kavañonañe. ¹¹ Aa kanao lialià' areo o rarakeo, naho
 angala' areo fehen-ampemba,
 naho andranjia' areo traño
 am-bato vinaky,
 toe tsy himoneña'areo;
 nambolèa' areo tanem-bahe soa,
 f'ie tsy hinoman-divay.

* ^{5:5} Beerseba: vovom-pañina; vovo faha-fito

¹² Toe apotako te maro o fandilara' areoo naho jabajaba o ota-fali' areo; helofa' areo o vantañeo, naho mangala-vokàñe, vaho ampiotahe' areo an-dalambey eo o rarakeo.

¹³ Aa le hianjiñe avao o mahilalao amy andro zay amy te ho hekoheko i sa zay.

¹⁴ Paiao ty soa, fa tsy ty raty, soa te ho veloñe; vaho hañimba anahareo t'IEHOVÀ Andrianañahare' i màroy, ty amy saontsi' areoy. ¹⁵ Hejeo ty raty naho kokò ty soa, vaho añorizo zaka to an-dalambey eo; hera hanolots' arofo amo sehanga' Iosefeo t'IEHOVÀ Andrianañahare.

¹⁶ Aa le hoe t'IEHOVÀ, Talè Andrianañahare' i màroy: Fangololoihañe ty ho amo lalan-drovao, vaho ho koiheñe an-damoke ey ty hoe, Hankàñe! hankàñe! le hikoke o mpihareo, handala, naho o mahay mikoiakeo, hangoihoy.

¹⁷ Le firovetañe ty ho amo tanem-bahe iabio, amy te hiranga añivo'o ao raho, hoe t'IEHOVÀ.

¹⁸ Hankàñe ama' areo misalala ty andro' IEHOVÀ? Ho inoñ' ama' areo ty andro' IEHOVÀ? Ho fimoromoroñañe fa tsy hazavàñe.

¹⁹ Manahake t'indaty mibotatsak' ami'ty liona te mone mizò amboa romotse; ndra mizilik' añ'anjomba ao naho miato an-drindriñe eo ty fità'e vaho tsipohe' ty fandrefeala.

²⁰ Tsy haieñe hao ty andro' IEHOVÀ fa tsy hazavàñe?

Toe ho fimoromoroñañe fa tsy ho aman-kazavàñe ndra piti'e.

²¹ Hejeko, toe mampangorý ahy o sabadida' areo miavakeo, tsy noko o fivorim-pamantaña' areoo[†].

²² Aa ndra t'ie mañenga soron-koroañe rekets' enga-mahakama amako, tsy ho noko;

vaho tsy ho haoñeko o engam-pilongoa' areoo naho o vinondra' areoo.

²³ Asitaho amako ty fikoraha' o saboo;

[†] 5:21 Mp I 12:32-33

le tsy ho tsanoñeko ty feo fititiha' areo.

²⁴ Te mone ampikararaho hoe rano ty hatò,
naho hoe torahañe tsy-mai-drano
ty havantañañe.

²⁵ Aa vaho nisoroñe naho nañenga-mahakama amako an-dratraratra
añe hao nahareo tamyefa-polo taoñe zay, ry Anjomba' Israele? ²⁶ Toe nibabè'
areo ty kibohom-panjaka' areo, naho o sampsampo' areoo, i vasian-
drähare[‡] nitsenè' areoy. ²⁷ Aa le haseseko an-drohy mb'ankalo' i Damesèk'
añe, hoe t'IEHOVÀ. I Andrianañahare' i màroy ty tahina'ey.

6

¹ Hankàñe ry mierañerañe e Tsione ao, naho o mipalitse ami'ty vohi' i
Someroneo,
o roandriam-pifeheañe valoha'e
iatoa' ty anjomba' Israele!

² Mionjona mb'e Kalnè mb'eo le isao,
akia henane zay mb'e Kamate jabajabay;
vaho mizotsoa mb'e Gate
nte-Pilistiy mb'eo.

Ho soa te amy fifeheañe retiañe hao iereo?
mandikoatse ty efe-tane' areo
hao ty a iareo?

³ Ry mampihàンkañe i andron-kankàñey
vaho mampitotoke
i fiambesan-karotsahañey;

⁴ o mitsalalampatse am-pandreañe nihamineñe hafotia-nife
naho mihitsy an-kidori' iareo,
vaho mikama anak'añondry
boak' amy lia-raikey

naho sarake boak' añivon-jolokeo;

⁵ o mititike marovany arahem-peo
vaho mamoroñe raham-pititihañe,
manahake i Davideo;

⁶ o minon-divay an-tsini-hara
naho mihosotse menake soao,
fe tsy iroveta'e ty hasotria' Iosefe.

⁷ ie amy zao, hasese mb'an-drohy mb'eo ho mpiaolom-pirohy,
vaho hafahañe añe ty sabadida'
o mpihity an-telo-antarao.

⁸ Fa nifanta amam-bata'e t'IEHOVÀ, Talè;
le hoe t'IEHOVÀ Andrianañahare' i màroy,
Hejeko ty fiebotsebora' Iakobe,
naho mampangorý ahy o anjomba'eo:
aa le hatoloko añe
i rovay rekets' o ama'e iabio.

⁹ Ie henane zay, naho lahilahy folo ty sisa añ'anjomba raike, fonga
hihomake. ¹⁰ Ho rambese' i rahalahin-drae'e kiraikiraike iereo hañakara'e
añ'anjomba'e ao hañoroa'e, le ty hoe ty hanoe'e amy añ'anjomba aoy,
Mbe ama'e hao rehe? le ty hoe ty hatoi' ty ao, Aiy! vaho hoe ka i raikey.
Mianjiña, fa tsy volañeñe ty tahina' IEHOVÀ.

¹¹ Inao fa handily t'IEHOVÀ

[‡] 5:26 Ies 59:15, Ti II 4:4

te ho tseratseraheñe o anjombao
 vaho ho hotohotoeñe o kibohotseo.
¹² Hilay ambatovato hao o soavalao?
 hitari-dasarý eo reketsé katràka
 hao t'indaty?
 Mañino te nafote' areo ho voreke
 ty havañonañe,
 vaho ho vahon-tsoy
 ty vokan-kavantañañe?
¹³ Ry mpirebek' amo raha tsy vente'eo,
 manao ty hoe:
 Tsy ty haozara'ay avao hao
 ty nahavontitse tsifa?
¹⁴ Inao arè, ry anjomba' Israeleo
 te hatroako haname anahareo
 ty fifeheañe,
 hoe t'IEHOVÀ Andrianañahare' i màroy,
 le ho silofe' iereo
 boak' am-piziliha' i Kamate eo
 pak' an-tsaka' Arabà aña.

7

¹ Zao ty natoro' IEHOVÀ, Talè, ahy, Ingo, namboare'e fifamorohotam-balala te nitovoñañe i ampemba afaray, le hehe t'ie nandimbe ty fitataha' i mpanjakay i tinogy an-doha-taoñey. ² Aa naho hene nabotse' iareo ze ahetsé amy taney eo, le hoe ty asako tama'e,
 Ry IEHOVÀ, Talè, ehe apoho;
 akore ty hahafijohaña' Iakobe?
 Ie kede.

³ Aa le napo' IEHOVÀ;
 Tsy hanoeñe zay, hoe t'IEHOVÀ.

⁴ Ie aña le inao ka ty naboa' IEHOVÀ, Talè: Heheke te kinanji' IEHOVÀ,
 Talè ty zaka añ'afó;
 finorototo'e i laleke beiy
 vaho namototse nampigodrañe i taney.

⁵ Aa le hoe raho, Ry IEHOVÀ, Talè, Aziro! iambaneako;
 aia ty hijohaña' Iakobe, ie kede?

⁶ Aa le nado' IEHOVÀ:
 Tsy hanoeñe ka zay, hoe t'IEHOVÀ, Talè.

⁷ Zao ka ty natoro'e ahy, ingo te nijohaña ambone kijoly nanoeñe antalin-kahity eo t'i Talè, reketsé ty talin-kahity am-pitá'e ao. ⁸ Le hoe t'IEHOVÀ amako, O Amose, ino o isa'oo? Le hoe raho, Talin-kahity. Aa hoe t'i Talè;
 Hehe, hapoko añivo' ondatiko
 Israeleo ty talin-kahitiko;
 tsy hiheveako ka.

⁹ Ho koake o toets' abo' Ietsakeo,
 naho hanoeñe bijon-draha
 o toe' Israele miambakeo;
 vaho hitroatse amy anjomba' Ieroboame raho reketsé fibara.

¹⁰ Nampañitrik' am' Ieroboame mpanjaka' Israele t'i Amatsià mpisoro'
 i Betele, nanao ty hoe, Nikinia azo t'i Amose añ' anjomba' Israele ao; tsy leo' o taneo ze fonga saontsi'e. ¹¹ Fa hoe ty asa' i Amose,

Inao, hampihomahem-pibara
t'Ieroboame,
vaho tsy mete tsy hasese
mb'am-pandrohizañ' aña
boak' an-tane'e ao t'Israele.

¹² Aa le hoe t'i Amatsià amy Amose, Ry mpioniñeо, akia, mitribaña anday mb'an-tane' Iehoda mb'eo, le kamao aña o mahakama'oo, vaho aña ty itokia'o, ¹³ fa ko mitoky ka e Betele ao, amy t'ie ty toe-masi' i mpanjakay vaho rova-bei' ty fifeheañe toy.

¹⁴ Aa le hoe ty natoi' i Amose amy Amatsià, Izaho tsy mpitoky, tsy anam-pitoky, fa mpihare naho mpañalahala sakoa; ¹⁵ vaho rinambe' IEHOVÀ ami'ty fañarahañe i lia-raikey, le hoe t'IEHOVÀ amako, Akia, mitokia am' ondatiko Israeleo. ¹⁶ Janjiño arè ty tsara' IEHOVÀ: Hoe ty asa'o:
Ko mitoky am' Israele vaho
ko mampipoke saontsy
amy anjomba' Ietsakey.

¹⁷ Aa le hoe ty nitsarà' IEHOVÀ;
Ho tsimirira an-drova ao ty vali'o,
naho hampikorovohem-pibara
o ana-dahi'oo naho
o anak-ampela'oo,
naho ho zarazaraeñe ty tane'o;
naho hikoromak' an-tane tiva eo rehe;
toe hasese mb'am-pandrohizañ' aña
boak'an-tane'e ao t'Israele.

8

¹ Zao ty natoron' Añahare Talè ahy; Ingo ty vakoa pea havokaran' asara.
² Le hoe re, O Amose, ino o isa'oo? Le hoe raho, Ty vakoam-boan'asara.
Vaho hoe t'IEHOVÀ amako,
Fa tondrok' am'ondatiko Israeleo
ty figadoña'e; ie tsy hapoko ka.

³ Ie amy andro zay handimbe o sabo aña'anjombao ty bekom-pandala,
hoe t'IEHOVÀ, Talè:
ho pea lolo atoy naho aroa i taney;
le havokovoko
am-pianjiñañe aña iereo.

⁴ Mahajanjiña ry mpigedrañe o rarakeo,
ry mpañito o poi'e amy taneio,
⁵ ie manao ty hoe, naho aña i pea-bolañey
le haletan-tika i ampembay;
naho modo i andro Sabotsey
le ho sokafen-tika o an-drihao,
ho tomoreñe ty kapoake,
naho honjoneñe i dralay,
vaho hampivilañeñe
am-pañahy o balantsio.

⁶ Ho kaloen-tika drala o rarakeo
naho hana roe o poi'eo,
vaho haletan-tika reke-kafo'e i ampembay.

⁷ Fe nifanta ami'ty volonahe' Iakobe t'IEHOVÀ,
Le lia'e tsy halinoko o sata' iareoo.

⁸ Tsy hampiozoñozoñe i taney hao zay:

hampandala o hene mpimoneñeo?
 hanganahana manahake i Sakay, hivalitaboake vaho hiketrake indraike
 manahake i saka' i Mitsraimey.
⁹ Ho tondrok' amy andro zay,
 hoe t'IEHOVÀ, Talè, te, hampitsoforeko
 an-tsipinde-mena i androy,
 vaho ho lombofako ieñe ty tane toy
 aña'andro mazava;
¹⁰ naho hafoteko ho fandalàñe
 o sabadida' areoo
 naho ho firovetañe o sabo' areoo;
 fonga hampisikineko gony ze tohake, naho ho peaheko ze hene añaambone;
 le hampangololoiheko
 hoe t'ie ni-tañoloñoloñañe,
 vaho hafaitse ty androm-pigadoña'e.
¹¹ Ingo, ho tondroke ty andro,
 hoe t'IEHOVÀ, Talè,
 te hiraheko an-tane atoy ty san-kerè,
 fa tsy ty hasaliko-mahakama,
 naho tsy ty hataliñieren-drano,
 fa ty fijanjiñañe o tsara' IEHOVÀO;
¹² hirererere boak' an-driake pak'
 an-driak' aña ondatio,
 naho boak' avaratse vaho hianiñanañe,
 hibelobelo mb'etia mb'eroa
 hipay ty tsara' IEHOVÀ fa tsy ho isa'e*.
¹³ Ho toirañen-keahaea
 o somondrara maintelèneo
 naho o ajalahio.
¹⁴ Le o mifanta amy hakeo' i Someroneio ami'ty hoe:
 Kanao veloñe ty 'ndrahare' i Dane;
 naho, Katao veloñe ty sata' i Beërsèbae;
 le hikorovoke, tsy hitroatse ka.

9

¹ Nitreako nijohañaña aña'ila' i kitreliy
 t'i Talè, le hoe re: Vangò o tokona'eo,
 hiezeñezeneña' o tsotsò'eo,
 hampidemodemohañañe o loha'eo;
 vaho ho zamaneko am-pibara ty sisa'e;
 tsy ho aman-tsehang'a'e hioratse;
 tsy hipoliotse ty honka'e. ² Ndra t'ie mihaly mb'an-Tsikeokeok' ao, le
 hakare' ty tañako,
 ndra t'ie manganike mb'an-dindi-mb'eo, hampizotsoeko. ³ Ndra t'ie
 mietak' an-kaboa' i Karmele ao,
 ho kodebèko le hakareko boak'ao;
 ndra t'ie mikafitse am-pahaisahako ambane' i riakey ao,
 le ho tokaveko boak' ao i fañaneñey
 handrimita'e. ⁴ Aa ndra te misese mb'an-drohy aolo'
 o rafelahi'eo mb'eo iereo,
 boak' aña ty hitokavako i fibaray
 hanjamaña;

* ^{8:12} Iir 5:13, Hos 8:12, Iek 34:3-10

hentea' o masokoo ho an-kankàñe,
 fa tsy ho ami'ty hasoa. ⁵ Ie mipaoke i taney t'IEHOVÀ, Talè' i màroy,
 hitranaha'e, le miharovetse
 iaby o mpimoneñeo;
 ie hionjoñe manahake ty fisorotombahañe,
 naho hizetse manahake
 i Saka' i Mitsraimeiy. ⁶ I mpandranjy o fanonga'e andikerañeo,
 naho nañoreñe i tafo'e bontoly
 ambone' ty tane toy;
 I mikanjy o ranon-driakeo
 vaho adoandoa'e an-tarehe' ty tane toiy;
 IEHOVÀ ty tahina'e. ⁷ O ry ana'Israeleo, tsy ho hambañe amo tiri' i Kosio
 amako hao nahareo? hoe t'IEHOVÀ.
 Tsy Zaho hao ty nañakatse Israele
 an-tane' i Mitsraime ao?
 Naho o nte-Pilistio boake Kaftore
 naho o nte-Arameo boake Kire? ⁸ Inao! miatreatre o fifeheañe lifotse
 hakeoo o fihaino' IEHOVÀ, Talèo,
 vaho harotsako an-tarehe' ty tane toy*,
 fa tsy ho fonga mongoreko
 ty anjomba' Iakobe, hoe t'IEHOVÀ. ⁹ Inao te mandily raho,
 vaho ho tsararaheko amo kilakila' ondatio
 ty anjomba' Israele
 manahake ty fitsararahañe tsako an-tsikeloo,
 fa leo voa'e raike tsy hipok' an-tane. ¹⁰ Songa havetram-pibara
 o mpanan-tahiñe am'ondatikoo,
 o manao ty hoe: Tsy hitotofa'e, tsy hifanalaka ama'ay ty hankàñe.
 ¹¹ Haonjoko amy andro zay ty kiboho'
 i Davide nikoromakey
 naho hakatoko o vinàkio;
 naho hatroako o nihotrakeo,
 vaho hamboareko manahake
 tañ'andro taolo; ¹² Le ho fanaña' iareo ty sehanga' i Dame†
 naho o kilakila' ondaty kanjieñe
 ami'ty añarakoo,
 hoe t'IEHOVÀ mpanao zay. ¹³ Inao, ho tondroke ty andro,
 hoe t'IEHOVÀ,
 te ho losore' ty mpitrabake ty mpanatake
 naho ty mpandia valoboke
 ty mpitongy tabiry;
 le hamopoke divay mamy o vohitseo,
 hikararake boak'an-kaboañeo. ¹⁴ Le hafoteko ty fandrohiza'
 ondatiko Israeleo,
 naho haore' iereo o tanàn-taoloo,
 himoneña' iareo;
 naho hambole tanem-baloboke,
 naho hinoñe divay ama'e,
 naho hañalahala golobon-traka,
 vaho ho kamae' iareo o voka'eo. ¹⁵ Ie hamboleko an-tane' iareo eo,
 vaho tsy hombotañe amy tane'
 natoloko iareoy ka,
 hoe t'IEHOVÀ Andrianañahare.

* ^{9:8} Ies 34:2, Iir 30:11, 46:28, Dan 2:44, Tsf 3:8, Kag 2:22, Lke 4:5-6 † ^{9:12} Fof 15:17

Obadià

¹ Ty aroñaro' i Obadià*: Hoe ty nafè' IEHOVÀ, Talè amy Edome:
 Nahajanjiñe entañe boak' amy IEHOVÀ zahay,
 le fa nampihitrifeñe amo kilakila'
 ondatio ty sorotà, nanao ty hoe:
 Miongaha, antao hitroatse hihotakotake. ² Inao te hafotsako ho kede
 amo fifeheañeo rehe;
 ho vata'e mavoeñe. ³ Fa namañahy azo ty firengevohan'arofo'o,
 ihe mpimoneñe an-tseratseram-bato ao;
 an-kaboañe ey ty fimoneña'o
 ihe mitsakore ty hoe añ'arofo ao:
 Ia ty hanjotso ahy mb'an-tane mb'eo? ⁴ Aa ndra t'ie mizonjoñe mb'añ'abo
 ey hirae'o am-bantio,
 naho ajado'o amo vasiañeo eñe ty akiba'o,
 mbe hazotsoko boak' ey, hoe t'IEHOVÀ. ⁵ Ie nivotraha' ty mpampikametse,
 naho ty malaso an-kaleñe
 — akore ty fandrotsahañe anahareo—
 tsy ho nampikametse am-para'
 t'ie nietsake hao?
 Aa naho nivotrak' ama'o
 ty mpanontoñe valoboke,
 tsy ho nenga'e hao ty ho tsindroheñe? ⁶ Akore ty fivolosañe i Esave,
 ty fikodebeañe o vara nakafi'eo. ⁷ Fa nanese azo pak' añ'efe-tane eo
 o mpirimboñ' ama'oo;
 nifañahie' o nifampilongo ama'oo
 vaho nahagioke;
 fa nampipoke fandrik' ambane'o ao
 o mpitraq-pikama ama'oo;
 (tsy ama'e ty hilala!) ⁸ Ie amy andro zay, hoe t'IEHOVÀ,
 tsy ho mongoreko Edome ao hao
 o mahihitseo
 naho am-bohi' Esave ty faharendrehañe? ⁹ Hiroreke o fanalolahi'oo ry
 Temane,
 amy te ho fonga haitoañe am-pizamanañe
 am-bohi' i Esave eo ondatio. ¹⁰ Hañoloñe azo ty fisalarañe
 ty amy nampisoaña'o
 an-drahalahi'o Iakobey,
 vaho haitoañe zafe-zanake rehe. ¹¹ Ihe nijagarodoñe eo amy andro zay,
 amy andro nendese' o ambahinio
 mb'eo o vara'ey
 naho nizilike an-dalambei'e mb'eo o alik'ama'oo,
 vaho nanoe' iereo tsatopiso t'Ierosalaime
 —ihe nimpama' iareo. ¹² Ho nisoa t'ie tsy nisamba an-drahalahi'o amy
 andron-kekoheko'ey,
 tsy ho nirebeke amy andro

* ^{1:1} Obadià: Mpitoro' IEHOVÀ

naha-rotsake o ana' Iehodaoy;
mbore tsy nimete ty nisaontsie'o añ'ebotsebotse amy andron-kankàñey.
¹³ Tsy nimete ty nimoaha'o an-dalambei' ondatikoo amy andron-kekoheko' iareoy;
Eka, tsy ho nisambà'o ty fisotria'e amy andron-kankà'iareoy,
ndra nampipao-pitâñe amo fanaña'iareoo amy andro nitarañen-doza'
iareoy. ¹⁴ Tsy nimete ty nijohaña'o am-pitsileañe eo
hamonoa'o ze napoliotse mb'eo;
naho tsy ho nasese'o o sehanga'eo
amy andron-kasotriañey. ¹⁵ Fa mitotok' amo kilakila' ondatio
ty andro' IEHOVÀ:
hambañe amo sata'oo ty hanoeñe ama'o.
habalik' añ'ambone'o eo o fitoloña'oo ¹⁶ Fa manahake ty ninoma' areo
amy vohiko miavakey,
ty hinoma' o ambahinio nainai'e;
ie hinoñe nahohigenoke,
vaho hanahake te mbe lia'e tsy teo. ¹⁷ F'ie ambohi' i Tsione ao
ty nahapoliotse[†], ie ho miavake;
vaho ho fanaña'Iakobe o vara'iareoo. ¹⁸ Le ho afo ty anjomba'Iakobe,
naho lel'afó ty anjomba'Iosefe,
naho ho ahetsé ty anjomba'i Esave,
le ho viañe'iereo ty ao, hamorototo iareo,
vaho tsy hengañe honka'e ty añ'anjomba'i Esave ao; fa nitsara t'IEHOVÀ.
¹⁹ Ho a o tatimoo ty vohi' i Esave,
naho i monto' o nte-Pilisty ambane eio,
ho fanaña'iareo ty tete' i Efraime,
naho ty tonda' i Somerone,
vaho ho fanaña'i Beniamine t'i Gilade. ²⁰ Ho fanaña'o nirohizañe amy
valobohò'o nte-Israeleoy ty a o nte-Kenàneo,
pak'e Tsakrefate aña;
vaho ho fanaña'o miprohi' Ierosalaime
e Sefaradeo o rova atimoo. ²¹ Homb'an-kaboa' i Tsione mb'eo o
mpandrombakeo hizaka ty vohi' i Esave;
vaho ho a IEHOVÀ i fifeheañey[‡].

[†] **1:17** Ies 4:2-3, Ioe 2:32, Ben 14:1 [‡] **1:21** Sab 2:8, Dan 2:44, Zek 14:9, Ben 11:15

Ionà

¹ Niheo am' Ionà* ana' i Amitày† ty tsara' IEHOVÀ, nanao ty hoe:
² Miongaha, akia mb'e Ninevè, rova jabajaba mb'eo, le koiho; amy te mionjoñe añatrefako eo ty halò-tsere' iareo. ³ Fe niavotse t'Ionà nipotatsake mb'e Tarsise‡ aña hienga ty fiatrefañe IEHOVÀ naho nizotso mb'e Iafò§ mb'eo naharendreke sambo hionjoñe mb'e Tarsise aña; aa le finondro'e ty fañaveloa'e naho nijoñ' ama'e ao hindreza'e mb'e Tarsise mb'eo hisitake ami'ty fiatrefañe am' IEHOVÀ.

⁴ Fe nampivovo tio-bey amy riakey t'IEHOVÀ, le nivalitaboak' amy zao i riakey, kanao ho niperitsake i samboy. ⁵ Nangebahebak' amy zao o mpiandriakeo, naho songa nikanjy ty 'ndrahare'e, vaho nahifi' iareo andriak' ao ty haraotse am-po' i samboy ao, hañamaivañe aze. Fe nijoñe aña'ate' i samboy t'Ionà; nandre, niròtse. ⁶ Aa le niheo ama'e mb'eo ty talen-tsambo nanao ty hoe; Ino ty atao'o ry mpirotseo? Miongaha, kanjio o 'ndrahare'oo, hera hiferenaiña'e tsy hihomake. ⁷ Le nifanao ty hoe ondatio, Antao hanao parè handrendreke te ia ty tali' o hekoheko zao aman-tika. Aa ie nanao kitsapake, le nitsatok' am' Ionà. ⁸ Le hoe ty asa' iareo ama'e, Ehe, itaroño, Ino ty nifetsaha' o hankàñe zao amantika; Ino o tolon-draha'oo? Le boak' aia v'iheo? Aia ty tane'o? naho karaza' ondaty inoñe? ⁹ Le hoe re am' iereo, nte-Evrè raho, mpañeveñe am' IEHOVÀ, Andrianañaharen-dikerañe, Andrianamboatse i riakey naho i tane maikey. ¹⁰ Nirevendreveñe amy zao ondatio, vaho hoe ty asa' iareo tama'e, Ino o nanoa'o zao? Fa nifohi' ondatio t'ie nibotriatse amy fiatrefañe IEHOVÀ amy nisaontsia'ey.

¹¹ Aa le hoe iereo tama'e, Hanoe'ay inon-drehe hampipendreñe i riakey? fe mbore nitabohazake ty fivalitaboaha' i riakey. ¹² Le hoe re am' iereo, rambeso raho, avokovokò an-driak' ao; zay vaho ho pendreñe tsy ama'areo i riakey, fa apotako te zaho ty nahavia' o tio-beio. ¹³ Te mone nivèy mafe o lahilahio hihereñe mb'an-tane, fe tsy nimete; nidabadoa avao i riakey, nitròñe am' iereo. ¹⁴ Aa le nitoreove' iereo am' IEHOVÀ ty hoe: Miambane ama'o zahay ry IEHOVÀ, ehe, ko ampikoromahe'o ty ami'ty fiai' t'indaty toy, vaho ko apo'o ama'ay ty lio-màliñe, amy te Ihe ry IEHOVÀ ro manao ty satrin-arofo'o. ¹⁵ Rinambe' iereo amy zao t'Ionà le nahifike an-driak' ao; vaho nijihetse amy fitroña'ey i riakey. ¹⁶ Vata'e nañeveñe am' IEHOVÀ ondatio naho nañenga soroñe am' IEHOVÀ vaho nifanta.

2

¹ Ie amy zao fa nihentseñe' IEHOVÀ ty fiañe jabajaba nampigodrañe Ionà. Tam-pò' i fiañey telo andro naho telo haleñe t'Ionà. ² Nihalaly am' IEHOVÀ Andrianañahare'e, an-tro' i fiañey ao t'Ionà, ³ ami'ty hoe, Nitoreo am' IEHOVÀ amy fisotriakoy, le tinoi'e; nikoiake boak' an-Tsikeokeok' ao, vaho jinanji'o ty feoko. ⁴ Fa navokovoko'o an-daleke ao raho, an-teñateña' o riakeo ao; nandipots' ahy o kinera'eo;

* **1:1** Ionà: Deho, mpamorekeke; mپijoy † **1:1** Amitày: mahity; mañeveñe ‡ **1:3** Tarsise: fiereneñereñañe; fibiribiriañe § **1:3** Iafò: fanjaka; tsomerentserene

niary amboneko eo ze hene alo'o naho onja'o. ⁵ Aa le hoe raho, nahifike tsy ho isam-pihaino'o; fa ho toliheko indraike i kivoho'o miavakey. ⁶ Niarikoboñe ahy o ranoo, pak'an-troko, niariseho amako i lalekey; vinandibandi' o lomotseo ty lohako. ⁷ Nizotso mb' am-baha' o vohitseo; nañarikatok'ahy kitro katroke o tsotsò' ty tane toio; fe nakare'o boak' an-kibory ao ty haveloko, ry IEHOVÀ Andrianañahareko. ⁸ Ie nitoirañe an-troko ao ty fiaiko, le nahatiah y IEHOVÀ, vaho niheo mb'ama'o an-kivoho'o miavake ao ty halaliko. ⁹ Tsambolitio' o mpañaon-kakoaham-bandeo ty fiferenaiñañe ama'e. ¹⁰ Fe hañenga soroñe ama'o raho am-peom-pañandriañañe; havahako i ni-fantàkoy, fa boak' am' IEHOVÀ ty fandrombahañe.

¹¹ Aa le nafanto' IEHOVÀ i fiañey, vaho naloa'e an-tamboho ey t'Ionà.

3

¹ Niheo am' Ionà fañindroe'e ty tsara' IEHOVÀ, nanao ty hoe: ² Miavota mb'e Ninevè, i rova jabajabay mb'eo, vaho tseizo ama'e ty saontsy hatoroko azo. ³ Aa le niongake t'Ionà, nañavelo mb'e Ninevè mb'eo ty amy tsara' IEHOVÀ. Rova jabajaba ty Ninevè kanao lia telo andro te rangæñe. ⁴ Namototse naneñateña i rovay t'Ionà lia andro raike vaho nikoike ty hoe: Ie heneke ty efa-polo andro le ho rotsake t'i Ninevè. ⁵ Aa le niantok' an' Andrianañahare ondati' i Ninevèo, le nitsey lilitse vaho nisikin-gony, ty loho bey pak' an-tsits'e. ⁶ Niheo amy mpanjaka' i Ninevè i tsaray, le niongake amy fiambesa'ey naho nahifi'e añe ty sarimbo'e naho nisaron-gony vaho nipisetse an-davenok' ao. ⁷ Nampitsitsife'e tsey ty Nineve ami'ty hoe: Ami'ty fandilia' i mpanjakay naho o roandria'eo: Ehe ko apoke hitsopeke ndra inoñ' inoñe ze ondaty ndra hare, ze mpirai-troke ndra lia-raike; ko meañe hihinañe ndra hinon-drano, ⁸ le ampisaroñan-gony ondatio naho o hareo, sindre hipona-toreo aman' Añahare; songa hitolik' amo sata rati'eo naho amo halò-tsere'e am-pitá'eo. ⁹ Ia ty hahafohiñe he hitolike t'i Andrianañahare naho hiheve, hiomboho amy haviñera'e miforoforoy, tsy hihomahan-tika?

¹⁰ Aa naho nahavazoho o fitoloña' iareoo t'i Andrianañahare, t'ie niomboho amo sata rati'eo, le napo'e i hankàñe nitsarae'e ho nanoe'e am' iereoy, vaho tsy nanoe'e.

4

¹ Fe vata'e nampangoae' Ionà zay le niloho boseke, ² vaho nilolok' am' IEHOVÀ, nanao ty hoe: Mihalaly ama'o, ry IEHOVÀ, tsy ie hao i nivolañeko te mbe tan-taneko añey? Zaho nihitrike ty lay mb'e Tarsise mb'eo fa napotako te Andrianañahare matarike rehe, mpiferenaiñañe, malaon-kaviñerañe, naho lifotse fiferenaiñañe, vaho habalintoa'o i hankàñe ho nanoe'oy. ³ Ie amy zao ry IEHOVÀ, ehe asitaho amako ty fiaiko, fa hamake t'ie hikenkañe ta te ho veloñe. ⁴ Aa le hoe t'IEHOVÀ, Mañeva hao o habose'oo? ⁵ Niakatse i rovay t'Ionà, niambesatse añ' ila' atiñana' i rovay

ey le nandranjy lapalapa vaho niambesatse ambane'e añ' alok' ao am-para' te isa'e ze hifetsak' amy rovay.

⁶ Nañalankañe vatavo amy zao t'IEHOVÀ Andrianañahare; le nampilàie'e ambone' Ionà eo hañaloke ty añaambone'e hampanintsîne aze amy fifombo'ey. Le nampivarân-ehake Ionà i vatavoy. ⁷ Fe nihajarien' Añahare oletse te nanjirike i loak' àndroy nijoy i vatavoy, nahaforejeje aze. ⁸ Ie nionjoñé i àndroy le nampitiofen' Añahare ty tio-bey atiñanañe matrevoke. Nipisañe añaambone' Ionà i àndroy le nitoirañe vaho nihalaly te hampihomahéñe ami'ty hoe: Hamake te hikenkan-draho ta te ho veloñe. ⁹ Le hoe t'i Andrianañahare am' Ionà: Mañeva azo hao ty hifombo amy vatavoy? le hoe re: Eka sazo ahy ty habosehako; hàmake t'ie ho mate. ¹⁰ Le hoe t'IEHOVÀ, Nitretreze'o i vatavo tsy nifanehafa'oy, naho tsy nampitirie'oy, ie nitiry haleñe vaho nimomok' an-kaleñe; ¹¹ aa tsy ho ferenaiñako ka hao t'i Ninevè, i rova jabajabay, toe ama'e ao t'indaty mandikoatse rai-hetse-tsi-ro-ale, tsy mahafohiñe ty fità'e havana ami'ty havia'e, miharo hare tsifotofoto?

Mikà

¹ Ty tsara' IEHOVÀ niheo amy Mikà* nte-Moresete† tañ'andro' Iotame‡ naho i Akhaze§ vaho Iekezkia* mpanjaka' Iehoda; i nioni'e ty amy Somerone† naho Ierosalaimey‡. ² Kila mijanjiña ry ondatio; mañaoña ry tane, naho ze hene ama'e ao;
 fa hanesek' anahareo t'IEHOVÀ Talè, i Talè boak'añ'anjomba'e miavakey. ³ Heheke te miavotse i toe'ey t'IEHOVÀ, hizotso mb'etoa,
 handialia o haboa' ty tane toio§. ⁴ Hitranak' ambane'e eo* o vohitseo, naho ho vaky o vavataneo,
 manahake ty takafotse añatrefa' ty afo eo, naho rano nadoandoañe am-piroroñañe. ⁵ Fonga ty amo fiolà' Iakobeo†, naho o tahi' i anjomba' Israeleio‡; Ino i hakeo' Iakobey?
 Tsy i Somerone hao?
 Aia o ankaboa' Iehodao?
 Tsy e Ierosalaime hao? ⁶ Aa le hanoeko fivotrim-porompotse an-tetek' ao ty Somerone, ho tanem-bahe; naho haparatsiako am-bavatane ao o vato'eo, vaho haboako o mananta'eo. ⁷ Ho demodemoheñe iaby o sampsampo'eo, le ho forototoeñe añ'afó ao o nibanabanaeñe ama'eo; ho rotsaheko iaby o sarendrahare'eo, fa natonto'e an-tamben-karapilo, le hibalike ho tamben-tsimirirañe. ⁸ Aa le hangoihoy naho hikoakoiake raho, hihalo naho hibongy te handeha; hanao fitrèn-drimo vaho fandalàm-boron-tsatrañe. ⁹ Tsy lefe hahàñe o fere'eo, fa nandakake mb'e Iehoda ao; fa nahatakatse ty lalambei' ondatikoo; Eka, pak' e Ierosalaime ao. ¹⁰ Ko taroñ'e o e Gate aña, ko mirovetse; mivarimbariña an-davenok' ao ty amy anjomba' i Ofrày§. ¹¹ Mihelaña mb'eo ry mpimoneñe e Safire ao*; ami'ty hameñaram-piboridaña'o; tsy lefe ty favoratsaha' o mpimone' i Tsa'ananeo†; mangololoike ty Bete'haetsele‡ hasinta'e ama'o ty fijohaña'o. ¹² Mifeak' am-pitamàñe hasoa o mpimone' i Maròteo§ fe nivotrak' an-dalambei'

* **1:1** Mikà: rarake; mpirike † **1:1** Morestete; Fanaña' i Gate ‡ **1:1** Iotame: ty havantaña' IEHOVÀ § **1:1** Akhaze: mpitavañe * **1:1** Iekezkia: Haozara' IEHOVÀ † **1:1** Somerone: Vohi-pijilovañe ‡ **1:1** Ierosalaime: Aroñarom-pañanintsiñe § **1:3** Ies 26:21 * **1:4** Sab 97:5 † **1:5** Iakobe: tomitse; mpanolo aman-kalitake ‡ **1:5** Israele: mpifanehak' amy Talè § **1:10** Afrà; mivolaña, mikofòke * **1:11** Safire; Mpizaka † **1:11** Tsa'anane: fihetseke; ondaty mirotse ‡ **1:11** Bete'haetsele: Anjombam-pifankarine § **1:12** Marote: Hafairañe

Ierosalaime eo boak' am' IEHOVÀ
 ty hankàñe. ¹³ Feheo amo sareteo o soavalao,
 ry mpimone' i Lakìse*,
 ihe namototse ty hakeo'
 i anak' ampela' i Tsioney†,
 vaho nizoeñe ama'o
 o fiolà' Israeleo. ¹⁴ Aa le ho banabanae'o ravoravom-piavotañe ty
 Moresete-Gate;
 ho famañahiañe amo mpanjaka'
 Israeleo o anjomba' i Akzìbeo‡. ¹⁵ Mbore haseseko ama'o ty mpitavañe,
 ry mpimone' i Maresà;
 himoak' Adolame§ ao ty enge' Israele. ¹⁶ Mipeaha rehe, miharata
 ty amo anake mahafale azoo;
 indrao ty hasola'o hifanahak' ami'ty koáke, ie hieng'azo mb'an-drohy
 mb'eo.

2

¹ Hankàñe amo mpikilily
 hatsivokarañeo,
 o mikitro-draha an-tih'i eo!
 Ie berabera andro le mañeneke
 kanao am-pità' iareo ty haozarañe. ² Mihañe teteke, le mitavañe,
 naho anjomba, le minday;
 aa le forekekè' iereo
 ty fokontokoñe rekets' i akiba'ey,
 vaho t'indaty naho i lova'ey. ³ Aa le hoe ty nafè' IEHOVÀ:
 Inao, safirieko hekoheko ty fifokoañe toy,
 le tsy haha-votsø-bozoñ' ama'e nahareo,
 vaho ko mañavelo an-drengevoke;
 fa ho san-kankàñe. ⁴ Amy andro zay le handrazan-drehake
 ty ama'o iereo,
 naho handala am-pirovetañe ty hoe:
 Vata'e rotsake zahay;
 novae'e ty anjara' ondatikoo,
 akore ty nanintaha'e amako!
 Tsy ho navaha'e o tete'aio? te mone zarae'e. ⁵ Aa le tsy eo ty hikozozotse
 talim-panjeheañe an-kitsapak' ami'ty valobohò' IEHOVÀ ho azo.
⁶ Ko mitaroñe, hoe ty taroñe' iareo;
 Tsy hitaroña'iareo o raha zao,
 tsy mone ho salareñe.
⁷ Hoe ty volañeñe ry anjomba' Iakobe,
 Tsy mahaliñe hao t'i Arofo' IEHOVÀ?
 Sata'e hao rezao?
 Tsy mahasoa ty mpañavelo an-kavantañañe hao o volakoo?
⁸ Fe nitroatse ho rafelahy omale ondatikoo; endahe' areo ty sarimbo reketse
 ty akanjo' ondaty mitoañe am-panintsíñañeo,
 o mimpoly boak'añ'alió.
⁹ Ampisitahe' areo o rakemba' ondatikoo; songa boak' aña'anjomba'e soa
 fihamiñe; asinta' areo amo keleia' iareoo kitro-katroke ty engeko.
¹⁰ Miongaha! Akia! fa tsy fitofa' areo ty atoy; i haloera'ey ty maharotsake

* ^{1:13} Lakise; ty veloñe amam-bata'e avao † ^{1:13} Tsione; Vato fampitiahiañe; toetse masy

‡ ^{1:14} Akzibe; Mpandañitse, mpamañahy; § ^{1:15} Adolame: ty taro' iareo; ty tsindro'e;

am-pandrotsahañe mitivontivoñe.

¹¹ Naho teo ty mpañorike tioke naho vande, nandañitse ami'ty hoe:
Hitaroñe divay naho toake
ama' areo raho,
ie ty hatao mpilañoñe
am'ondaty retoañe.

¹² Toe havoriko rehe, ry Iakobe, ihe iaby;
toe hatontoko ty sengaha' Israele;
hatraoko hoe añondry
am-piandrazañe ao;
manahake ty lia-raik' an-golobo'e ao;
higoreongoreoñe ty am'ondatio.

¹³ Miakatse aolo' iareo mb'eo
t'i Mpampiboroboñake;
miboroboñake mb'eo iereo,
mivavatse mb'an-dalambey
naho miakatse aña;
vaho miary aolo mb'eo ty Mpanjaka' iareo, IEHOVÀ ty mpiaolo' iareo.

3

¹ Le hoe raho:

Ehe, mijanjiña ry roandria' Iakobe,
naho o lohà' i anjomba' Israeleio,
tsy inahareo hao ty hahafohiñe ty hatò?

² Ry mpalain-ty soa, naho mpitea haratiañe; ry mampikorendake ty holi'
iareo,
naho ty nofotse boak'an-taola' iareo.

³ Ry mpampibotseke ty nofo' ondatikoo, mpañolitse iareo, mpampipozake
o taola'eo, naho manoritory iareo ho am-balàñe,
hoe hena an-tsajoa.

⁴ Hitoreo am' IEHOVÀ iereo henane zay,
f'ie tsy hanoiñe;
eka, haeta'e am' iereo ty lahara'e
amy andro zay,
ty amy haloloan-tsata' iareoy.

⁵ Hoe ty nafe' IEHOVÀ
ty amo mpitoky mampandilatse ondatikoo; mikoike ty hoe:
Fierañerañañe,
kanao ahazoa'e ty ho tifarem-pamotsi'e;
fe hentseñe'e aly
ty tsy mampijon-draha am-palie'e ao.

⁶ Aa le ho haleñe ama' areo zay,
tsy amañ'aroñaroñe,
naho ho ieñe ama' areo,
tsy hisikiliañe;
ho tsofots' andro amo mpitokio,
himoromoroñe am' iereo te handro.

⁷ Ho salatse o mpioniñe,
vaho ho tangòke o mpisikilio;
eka, hanakom-palie iereo,
amy te tsy manoiñe t'i Andrianañahare.

⁸ Fe mañatsak' ahy ty haozaran'
Arofo' IEHOVÀ, naho ty hatò,

vaho ty hafatrarañe,
hitsey am' Iakobe i fiolà'ey,
naho am' Israele i hakeo'ey*.
⁹ Ehe, janjiño zao, ry talen' akiba' Iakobeo, naho ry talèn' anjomba'
Israeleo,
ry mpalain-kavantañañe,
vaho mpañamengoke ze atao zaka-to;
¹⁰ Ie mamboatse i Tsione an-dio,
naho Ierosalaime an-katsivokarañe.
¹¹ Mpizaka mipay tambe o mpiaolo'eo;
mipay karama te mañòke[†] o mpisoro'eo, naho mpitoky mpangala falitse o
mpitoki'eo;
inao, miato am' IEHOVÀ iereo,
manao ty hoe:
Tsy añivon-tika hao t'IEHOVÀ?
Toe tsy hifetsahan-kankàñe!
¹² Aa le inahareo ro itrabahañe i Tsione hoe tonda,
naho Ierosalaime ho votrim-porompotse,
vaho ty an-tamboho'
i vohi' i anjombaiy ho ala.

4

¹ F'ie amo andro honka'eo,
le horizañe ho abo amo vohitseo
ty vohin-anjomba' IEHOVÀ,
haonjoñe ambone' o haboañaeo;
vaho hivotse mb'ama'e mb'eo ondatio. ² Le homb'eo ty fifeheañe maro
hanao ty hoe:
Antao hionjom-b'am-bohi'IEHOVÀ mb'eo,
mb'amy anjomban'Añahare'Iakobey.
hañòha'e antikañ' o sata'eo,
hañaveloan-tika o lala'eo.
Hionjoñe boake Tsione ao ty Hàke,
vaho hirike Ierosalaime ao ty tsara' IEHOVÀ, ³ hizaka añivo' o kilakila
ondatio
vaho ho toroa'e lily o foko maozatse
tsietoitane añaeo.
Le ho pehe' iareo ho fangaly o fibarao
naho ho fañeteke o lefo' iareoo.
Tsy hifañonjom-pibara o rofokoo,
vaho tsy hiòke hialy ka. ⁴ Songa hiambesatse ambane'
ty vahe'e t'indaty naho ambane' i sakoa'ey eo,
tsy ao ty hahahembañe iareo,
fa nitsara ty falie' IEHOVÀ' i Màroy. ⁵ Sindre hanjotik' ami'ty añaaran-
drahare'e o kilakila' ondatio;
fe hañavelo ami'ty tahina' IEHOVÀ
Andrianañaharen-tika
nainai'e donia tika*. ⁶ Hatontoko amy andro zay, hoe t'IEHOVÀ,
ze mikoletra,
naho havoriko ty nasiotse aña
vaho i nanilofakoy. ⁷ Hanoeko sehanga'e i nikoletray
naho fifeheañe maozatse i nasiotsey.

* ^{3:8} Fi II 24:20, Jao 16:8 † ^{3:11} Jao 10:12 * ^{4:5} Zek 10:12

ie ho fehe' IEHOVÀ am-bohi' i Tsione ao,
 henane zay naho ho nainai'e añe. ⁸ Le ihe, ry Fitalakesañ'Abo i Lia-Raikey[†],
 ty haboa' i anak' ampela' i Tsioney;
 eka, homb'ama'o mb'eo re;
 hitotsake eo i fifeheañe taoloy,
 ty fifeleha' i Anak' ampela' Ierosalaimey. ⁹ Ino ty ikoiakoiaha'o?
 Tsy amam-panjaka hao?
 Nihomake hao i Mpanoro azoy,
 ihe fihine' ty fanivontivoñañe
 manahake ty fitsongoan-drakemba? ¹⁰ Minioniòra, mañeña, hisamaha'o,
 ry anak' ampela' i Tsione,
 manahake ty ampela mitsongo;
 fa hiavote'o henaneo i rovay,
 himoneñe an-kivok' ao,
 am-para' te mandoake e Bavele ao;
 añe rehe ho hahañe;
 añe ty hijebaña' IEHOVÀ azo
 am-pitá' o rafelahi'oo. ¹¹ Ie henanekeo maro ty fifeheañe
 mifanontoñe hialy ama'o,
 manao ty hoe:
 Ee t'ie ho tivaeñe, naho hahafisamba i Tsione o fihainon-tikañe. ¹² Fa tsy
 fohi' iareo ty ereñere' IEHOVÀ;
 naho tsy apota' iareo ty safiri'e;
 Ie ro nanontoñe iereo hoe ampemba
 an-toem-pamofohañe eo. ¹³ Miongaha, mamofoha,
 ry anak' ampela' i Tsione;
 fa hanoko viñe ty tsifa'o,
 naho hanoko torisike o hotro'oo;
 handemodemoke t'indaty maro;
 vaho hengae'o am' IEHOVÀ
 o nivokare' iareo tsy too;
 ho amy Talè' ty tane bey toiy ty vara' iareo. ¹⁴ Mifanontona am-
 pirimboñañe,
 ry anak' ampelam-pirimboñañe
 fa vinandro' iareo tika;
 nilafae' iareo an-kobaiñe ty fiambina' i Mpizaka' Israeley.

5

¹ Fa ihe ry Betlekheme* Efràtae[†],
 ty loho kede añivo' o
 arivo lahi' Iehodao;
 boak' ama'o ty hionjoñe ho ahy,
 ty ho mpifehe' Israele,
 ie haehae añe o fionjona'eo,
 faha-tsietoimoneñe añe. ² Aa le hatolo'e añe iereo
 ampara' te nahatoly anake i mitsongoy,
 himpoly amy zao ty sehanga' o longo'eo mb'amo ana' Israeleo mb'eo.
³ Hiongake re, le hampiandraze'e[‡]
 ami'ty haozara' IEHOVÀ,
 ami'ty volonahe' i Tahina'

* 4:8 heb: Migdale-edere * 5:1 Betlekheme: anjomba' mahakama † 5:1 Efràtae:
 havokaram-bey; mamokatse ‡ 5:3 Iek 34:13-14

IEHOVÀ Andrianañahare'ey;
 hiaiñ' aňoleñañe iereo, amy t'ie ho ra'elahy pak'aň'olo' ty tane toy henane zay. ⁴ Ie ty ho faňanintsin-tika,
 naho maname ty tanen-tika o nte-Asoreo,
 handialia o anjomban-tikañeo,
 le hampitroaren-tika ama'e
 ty mpiarake fito,
 naho ty mpiaolo valo boak' am'ondatio. ⁵ Harahe' iereo am-pibara ty tane Asore§,
 naho ty tane' i Nimrode*
 amo lalambei'eo
 naho havotso'e amo nte-Asoreo tika,
 ie mivotrak' an-tanen-tika ao,
 mandialia aňate' o efe-tanen-tikañeo. ⁶ Ho aňivo' o kilakila'ondatio aňe ty sehanga' Iakobe,
 hoe zono boak' am' IEHOVÀ,
 hoe oran-joba amo ahetseo,
 tsy nitamà' ondaty,
 tsy niliñisa' o ana'ondatio. ⁷ Ho am-po' o fifeheañeo ty sehanga' Iakobe
 aňivo' o kilakila' ondatio ao,
 hanahake ty liona aň'ate' o bibin-alao,
 naho ty ana-diona aňivo'
 o aňondry lia-raikeo ao,
 ie miranga ro mandialia
 naho mandrimidrimitse
 vaho tsy eo ty handrombake. ⁸ Honjoneñe ambone' o rafelahi'oo ty fità'o,
 vaho haitoañe iaby o malaiñ' Azoo. ⁹ Ie amy andro zay, hoe t'IEHOVÀ,
 te hapitsoko aňivo' o ao o soavala'oo,
 vaho ho rotsaheko o sarete'oo. ¹⁰ Haitoako ka o rova' i taneio,
 vaho fonga hahotrako ambane
 o kijoly fatratseo; ¹¹ Haitoako am-pità'o
 ze atao famorehañe; ihe tsy ho amam-pisikily ka; ¹² Ho firaeko o hatae sinoki'oo,
 naho o vato mitroatse aňivo' o aoo,
 soa tsy hitalahoa'o ka o satam-pità'oo. ¹³ Hombotako boak' aňivo' o ao ka o samposampo'oo;
 vaho ho rotsaheko o rova'oo. ¹⁴ Le hondrohako amo kilakila' ondatio ty vale-fate an-kabosehañe,
 naho am-piforoforoañe amo tsy naňaoñeo.

6

¹ Janjiňo henaneo ty nafè' IEHOVÀ:
 Miongaha, aboaho amo vohitseo o enta'oo, ampitsanoňo o haboaňeo ty fiarañanaña'o. ² Mitsendreña ry vohitseo, ty sisì' IEHOVÀ,
 ry manantaňe maoza' ty tane toio,
 fa manan-kabò am'ondati'eo t'IEHOVÀ,
 ie toe hifanjomotse am'Israele. ³ O ry ondatikoo,
 ino ty nanoako azo?
 Akore ty nahamokorako azo?
 Atalilio. ⁴ Zaho naňakatse azo

§ 5:5 Asore: fale; manjotike; i maňentey * 5:5 Nimrode: fiolâñe; fanalolahy

an-tane Mitsraime aña,
 nijebañ'azo an-trañom-pañondevozañe,
 le nampiaoloeko azo t'i Mosè* naho i Aharonet† vaho i Miriame‡. ⁵ O ry
 ondatikoo, tiahio henaneo i nikinià' i Balake§ mpanjaka' i Moabey*,
 naho ty natoi' i Balame† ana' i Beore‡ aze boake Sitime§ pake Gilgale*,
 hahafohina' areo o sata-vanta' IEHOVÀO. ⁶ Akore ty hiatrefako IEHOVÀ?
 ty hiambaneako aman' Añahare
 Andindimoneñey?
 Hiatrefako an-tsoron-koroña hao,
 an-temboay hao? ⁷ Ho no' IEHOVÀ hao t'ie kobatròk' arivo?
 ndra torahañe rai-ale mikararàke menake?
 hatoloko hao ty tañoloñoloñako
 ty amy fiolàkoy?
 ty vokan-troko ty amo hakeom-piaikoo? ⁸ Fa natoro azo, ry koahe, ty hasoa,
 naho ty ipaia' IEHOVÀ:
 te hanoe'o ty hiti'e,
 t'ie ho tea fiferenaiñañe,
 vaho hirè-batañe hindreza'o fañavelo aman' Añahare'o. ⁹ Mikoik' amy
 rovay
 ty fiarañanaña' IEHOVÀ,
 hañaoñe ty tahina'o ty mahihitse.
 Janjiño i Kobaiñey, naho i nanendre azey. ¹⁰ Mbe amam-baran-
 katsiyokaraña hao
 ty aña'akiba' i lo-tserekey?
 naho i kapoa-tomotse tivay. ¹¹ Ho volilien-ko hiringiri'e hao raho
 t'ie amam-balantsy vilañe,
 naho amam-batom-pamañahiañe an-koroña ao? ¹² Ie pea katramo o
 mpañalealeo,
 naho mivolam-bande o mpimone'eo,
 vaho mamañahy am-bava'e ao ty lela' iareo. ¹³ Aa le ho silofeko rehe,
 ho zevoñeko ambane, hampibangiñ' azo
 ty amo tahi'o maroo. ¹⁴ Hikama rehe fa tsy ho anjañe;
 hasalikoaña mampikoritoke
 ty an-tro'o ao;
 hanao an-driha rehe fa tsy hahafihaja,
 vaho hatoloko ami'ty fibara ze nakafi'o. ¹⁵ Hitongy rehe fe tsy hanatake;
 handia olive fe tsy hihosotse
 amy menakey;
 naho hampipiritse valoboke,
 fe tsy hinome'o ty divai'e. ¹⁶ Nitambozora' areo o fañè' i Omrio†;
 naho nitàñ' o sata' i Akabeo‡,
 naho nañavelo amo fisafiri' iareoo;
 aa le hampangoakoaheko rehe,
 hampikosihañe o mpimoneñeo,
 le ho vavè' areo ty injé' ondatikoo.

7

¹ Hankàñe amako! fa manahake

* ^{6:4} Mosè: nakareñe; † ^{6:4} Aharone: mpañoke; abo; an-koazara ‡ ^{6:4} Miriame: Fiolañe
 § ^{6:5} Balake: mpandrotsake * ^{6:5} Moabe: boak' aman-drae'e † ^{6:5} Ty antetse am'onatio;
 ty famongora'e ‡ ^{6:5} Beore: mirehetse; dagola; minèñe § ^{6:5} Sitime: fatike * ^{6:5} Gilgale:
 larò; mivariñe; votry † ^{6:16} Omri: voton-tsako ‡ ^{6:16} Akabe: Rahalahin-drae

i nipòk' amo vokan' asara fa natontoñeoy,
 tsy am-pirotorotom-baloboke ho haneñe; ndra valoham-boa hampilelalela
 ty fiaiko. ² Fa nifaoheñ' an-tane atoy t'indaty
 mañori-Kake,
 tsy ao ty mahity am'ondatio;
 songa miampitse handrendreke lio,
 sindre mifañoroñe an-karato
 o mpirahalahio. ³ Fità-roe ty mahatafetetse o sata rati'eo;
 ipaia' i roandriañey naho
 takea' i mpizakay ty vokâñe;
 aboa' ty bey ty fikitrohan-tro'e,
 vaho rarè' iereo hitraoke. ⁴ Hoe hisatse ty soa am'iereo,
 hoe vovom-patike ty mahity ama'e;
 i andro ampitsatohe'o mpijiloy:
 tondroke ty fitilihañe azo;
 ho doboñe iereo henane zay. ⁵ Ko miato rañetse,
 ko mirampy aman-atehena;
 amy màndre añ'araña'o eoy,
 itaò o soñi'oo. ⁶ Fa mañamavo an-drae'e ty ana-dahy,
 miatatre an-drene ty anak' ampela,
 ty vinanto-ampela aman-drafoza'e ampela; rafelahi'ondatio t'indaty
 añ'akiba'e ao.
⁷ Aa naho zaho, hitamà IEHOVÀ;
 ho liñisako i Andrianañaharem-pandrombahakoy; hijanjiñe ahy t'i
 Andrianañahareko.
⁸ Ko mirebeke ahy, ry mpalaiñ' ahio, ndra t'ie mikorovoke, mbe hitroatse;
 ndra mitobok' añ'ieñe ao,
 IEHOVÀ ro hazavàko.
⁹ Ho vavèko ty haviñera' IEHOVÀ
 amy t'ie nandilatse ama'e,
 ampara' te ihalalia'e ho ahy,
 naho ampijadoña'e zakam-pañisohañe; ie hakare'e mb'an-kazavàm-b'eo,
 vaho ho treako ty havantaña'e.
¹⁰ Ho oni' i rafelahikoy zay,
 vaho ho saroña' ty hasalarañe
 ty nanao amako ty hoe:
 Aia t'IEHOVÀ Andrianañahare'o?
 Ho sambae' o masokoo, ie ho lialiñe hoe fotak' an-dalañe eo henane zay.
¹¹ Ho androm-pampitroarañe o kijoli'oo amy andro zay, hibolea' i Hake
 mb'eo mbe'o.
¹² Ho androm-pitotsahañ' ama'o,
 boak' Asore naho i Mitsraime,
 boake Mitsraime pak'amy sakay*; eka, boak'an-driake pak'an-driake, vaho
 boak'am-bohitse pak'am-bohitse,
¹³ Le ho koake i taney ty amo mpimone'eo,
 ho vale' ty hatsivokaram-pitoloña' iareo.
¹⁴ Araho an-kobai'o ondati'oo,
 i lia-rain-dova'o rerek' añ'ala ao,
 an-teñateñan-tane marorok' aoy;
 andrazo mb'e Basane† naho mb'e Gilade‡ mb'eo iereo manahake tañ'andro
 haehae.
¹⁵ Manahake tañ'andro nañakarako azo

* ^{7:12} Eofrate † ^{7:14} Basane: tsinila, tsifa ‡ ^{7:14} Gilade: fitoaboran-talily

an-tane Mitsraime ao,
le hampibohako raha fanjaka.

¹⁶ Ho oni' o kilakila' ondatio le ho salatse ndra te maozatse; hamihim-palie
am-pitâñe vaho ho valagîñe an-dravembia.

¹⁷ Ie hitsela deboke hoe mereñe,
hititititike t'ie miakatse an-kijoly ao hoe merembitike hirik' an-tane ao;
hangebahebake t'ie miheo mb'am' IEHOVÀ Andrianañaharentika,
vaho hañeveñe ama'o iereo.

¹⁸ Ia t'i Andrianañahare hañirinkiriñe Azo,
Mpañafa-kakeo, naho mampipoke ty fiolà' o honkahonkan-dova'eo!
Tsy tana'e nainai'e ty haviñera'e, vaho
ifalea'e ty fiferenaiñañe.

¹⁹ Hiferenaiña'e indraike tika,
ho lialiàm-pandia'e o hakeon-tikañe; Eka! hahifi'o an-driake lalek' ao o
tahi' iareoo.

²⁰ Ho tolora'o havantañañe t'Iakobe,
naho fiferenaiñañe t'i Avrahame,
i nifantà'o aman-droae'ay haehae zay.

Nakòme

¹ Ty talily i Ninevè*. Ty boken' aroñaro' i Nakòme† nte-Elkose‡.

² Mpamarahy t'i Andrianañahare,
Mpamale fate t'IEHOVÀ;
Mpañondroke miforoforo t'IEHOVÀ;
Mpañava-kabò amo rafelahi'eo t'IEHOVÀ,
ie mañaja haviñerañe amo malaiñe azeo.

³ Malaon-kaviñerañe t'IEHOVÀ,
ra'elahy ty haozara'e,
fe tsy hapò'e tsy ho lafaeñe
o aman-kakeoo;
IEHOVÀ: amo tangololahio
o lala'eo, naho ami'ty tio-bey ao;
o rahoñe ro debom-pandia'e.

⁴ Endaha'e i riakey le ampimaihe'e,
ampikarakankaiñe'e o sakao;
rinotsake t'i Basane naho i Karmele;
miheatse ty voñen-katae' i Libanone.

⁵ Miezeñezeñe aolo'e eo o vohitseo,
mitranake iaby o haboañeo,
forototo ty tane toy ami'ty fiatrefa'e,
ty voatse toy naho ze mpimoneñe ama'e ao.

⁶ Ia ty mahafijohañe añatrefa'
o fifombo'eo?
Ia ty mahatambeloñe amy
fiforoforoan-kaviñera'ey?
Ailiñe hoe afo ty filevelevea'e,
avokovoko'e ambane iaby ze vato.

⁷ Soa t'IEHOVÀ, fipalirañe
añ'andron-kankàñe;
arofoana'e iaby o miato ama'eo. ⁸ F'ie an-tsortombahañe mivovò,
ty hamongora'e i toe'ey,
vaho ho roahe'e mb' an-kamoromoroñañe ao o rafelahi'eo. ⁹ Ino ze o
fikilia' areo am' IEHOVÀ zao?
Fa harotsa'e,
tsy hiongake fañindroe'e ty hekoheko. ¹⁰ Fa manahake ty fivandiram-
patike
naho ty hamamo'a o jikeo,
ty hampangotomoheñe iereo hoe ahe-maike. ¹¹ Boak' ama'o ty niavia'
i nikitro-draha am' IEHOVÀ,
ie mañeretse hatsivokarañe. ¹² Hoe t'IEHOVÀ:
ndra t'ie lifo-kaozarañe,
naho mitozantozañe,
mbe hampikorovoheñe,
vaho hihelañe aña;
fa ndra te nanilofeko rehe,
tsy ho silofeko ka. ¹³ Hapozako ama'o henaneo ty joka'e,
vaho ho rafadrafateko o tali-randra'oo. ¹⁴ Fa nandily ty ama'o t'IEHOVÀ,

* **1:1** Ninevè: soa vintañe; mete † **1:1** Nakome: mpañohò; veka'e hisoloho ‡ **1:1** Elkose: ty figahiñan'Añahare

te tsy ho tongisañe ka ty tahina'o;
 le haitoako amy akiban-drahare'oy
 ty sare sokin-katae
 naho ty sare natranake;
 f'ie hanoako kibory,
 amy t'ie tsy manjofake.

2

¹ Hehek' an-kaboañe ey
 o fandia' i mpinday talily soaio,
 i mampiboele fifampilongoañey!
 O ry Iehodà, anò o sabadidake miavakeo, henefo o nifantà'oo;
 amy te tsy hiranga ama'o ka
 ty Beliale, fa naitoañe. ² Fa nitroatse añ'atrefan-dahara'o eo
 ty mpandrotsake,
 tano i kijoliy, jilovo i lalañey,
 mitokia an-kaozarañe, avorio o hafatrara'oo. ³ Vaòe' IEHOVÀ ty enge'
 Iakobe
 naho ty volonahe' Israele;
 fa nampikoake iareo o mampikoakeo,
 vaho jinoi' iareo o singam-bahe'eo. ⁴ Ho mena mañabarà ty fikalan-defo'
 o fanalolahio,
 misikiñe mena iaby o lahin-defo'eo,
 afo amam-bý miloeloe o sarete'eo
 amy andro fhentseña'ey,
 vaho miriñariña iaby o lefon-ambilazoo; ⁵ Mitrakotrako amo lalañeo o
 sareteo,
 mifaniotsiotse an-diolio eo;
 manahake ty fañilo ty vinta' iareo,
 ie mihelatse mb'etia mb'eroa. ⁶ Tiah'e i mpiaolo rey;
 mamingañe iereo te miloka;
 malisa t'ie handrombake i kijoliy,
 fa nihentseñeñe ty fikala'e, ⁷ Misokake o lalam-pikalañañe i sakaio
 vaho rinava'e i anjombay. ⁸ Fa nivloseñe i mpanjaka ampelay,
 fa nasese aña,
 miñeñoñe o feon-deho-fona
 o anak' ampata'eo,
 ie mamofok' arañañe; ⁹ Manahake o antara haehaeo
 t'i Ninevè, ie mihelaña aña;
 mijohaña, mitsangana!
 fe leo raike tsy mitoli-boho. ¹⁰ Kopaho o volafotio,
 hafo o volamenao
 amy te tsy ho revo ty an-driha ao,
 fanake tsifotofoto ty ao. ¹¹ Kapaike re, mangoakoake naho mavo,
 mitranake ty arofo,
 mifampigaiñe o ongotseo,
 mikoritoke iaby ze fisafhoa,
 mikò mainte iaby o vintañe.¹² Aia i lakaton-dionay,
 ty famahanaña o liona tora'eo,
 i fipiapià' i lionay naho i liona-vavey
 naho i ana-dionaiy,
 ie tsy amam-pañembañe? ¹³ Nahaeneñe o ana'eo ty rinimi' i lionay,
 nahatseke o vali'eo o vinono'eo,

natsafe'e tsindroke o lava'eo,
 lenofotse riniatse an-dakato'eo. ¹⁴ Miatreatre azo raho, hoe t'IEHOVÀ' i
 Màroy
 Haonjoko an-katòeñe o sarete'eo,
 habotse' i fibaray o liona tora'oo;
 le haitoako ami'ty tane toy o tsindro'oo,
 vaho tsy ho janjiñeñe ka
 ty fiarañanaña' o ira'oo.

3

¹ Hankàñe amy rova mpampiori-dioy,
 lifotse vande naho vara kinopake,
 le lia'e tsy modo o tsindroheñe. ² Inay ty karavantsy!
 Inao ty fikatrakatrà' o laròn-tsareteo;
 heheke ty fitsapiotsapio' o soavalao,
 naho o sarete mitrakotrakoo. ³ Mañoridañe o mpiningitse soavalao,
 mimilomilotse i fibaray;
 mipelapelatse i lefoñey;
 zinamañe i lahialeñey,
 tsifotofoto o votrin-doloo,
 o fañova mifitakeo;
 ie mitsikapy amo fateo; ⁴ ty ami'ty hamaro' o hakarapiloa'
 i tsimirira kenakenakeio,
 i hekohekom-pamorekey,
 i mandetake fifeheañe amo
 hakalalijaha'eoy,
 naho hasavereñañe amo famoreha'eo. ⁵ Inao! miatreatre azo raho,
 hoe t'IEHOVÀ' i Màroy,
 le hatsingako an-doha'o eo o siki'oo,
 naho haboako amo kilakila'ondatio ty fihalo'o
 vaho amo fifeheañe ty heña'o. ⁶ Hafetsako ama'o ty raha mampangorý,
 hanivà'e azo, ie hanoeko fisambàñe. ⁷ Ie amy zao, hene handripak' ama'o
 ze maharendrek' azo, hanao ty hoe:
 Fa mangoakoake ty Ninevè;
 ia' ty handala aze?
 aia ty hahatreavako mpañohò ho azo. ⁸ Soa te amy No-amone v'iheo,
 Ie nitoetse añivon-tsaka eoy,
 naho niarikatohen-drano,
 i riakey ty nañaro aze,
 naho i ranoy ty ni-kijoli'e? ⁹ I Kose naho i Mitsraime ty nanolo-kaozarañ'
 ama'e tsy nete ritse;
 nimpañolots'aze t'i Pote naho i Lobý*. ¹⁰ F'ie nasese mb'eo,
 nisese mb'am-pandrohizañe aña,
 fonga naretsak' an-doha' o lalan-drovao ey o anak' ajaja'eo;
 nanoe' iereo tsato-piso o roandria'eo,
 vaho rinohy an-tsilisily iaby
 o ana-dona'eo. ¹¹ Toe ho jike ka rehe, vaho hiàmpitse;
 ie hipay fitsolohañe ty amy rafelahiy. ¹² Manahake o rotseo
 ze hene golobo'o mifahetse,
 ie ezeñezeñeñe ro mihintsañe
 mb'am-paliem-pikama ao. ¹³ Oniño te hambañe aman'ampela

* ^{3:9} Lobý: taliñiereñe

ondaty añivo'oo;
 midañadaña ho a o rafelahio
 o lalambein-tane'oo;
 hampangotomomohe' ty afo o sikada'eo. ¹⁴ Mitariha rano ho amy
 fiarikoboñañey, haozaro o kijolio;
 mionjona amo lietseo,
 lialiao i pakotsey,
 vontitiro i mòlim-birìkey; ¹⁵ Hamorototo azo ao ty afo,
 hañito azo i fibaray,
 habotse'e manahake i valalay;
 mifamorohota hoe kijeja,
 mivorovoroa hoe sy. ¹⁶ Nampamasiañe'o mandikoatse
 o vasian-dikerañeо
 o mpibalibalik' ama'oo;
 miofoke i kijejay vaho mitiliñe aña. ¹⁷ Hoe valala o mpigari'oo,
 mifamorohotse hoe kijeja
 o mpifehe'oo, ie mitobe an-kijoly eo
 naho manintsiñe ty andro,
 fe mipitsik' aña te mafana-voho,
 vaho tsy fohiñe ty tane nombà'e. ¹⁸ Mirotse o mpiara'oo ry mpanjaka'
 i Asore, mitofa o roandria'oo;
 mivarakaik' am-bohitse ey ondati'oo,
 vaho tsy eo ty hanontoña'o. ¹⁹ Tsy hay melañeñe ty bae'o,
 mahaferenay o fere'oo;
 fonga hitehateha-pitàñe ty ama'o
 o mahajanjiñe i talili'oio;
 fa ia ty tsy nifetsaha' o fampisoaña'o
 nitoloñeñe nainai'eo?

Kabakòke

- ¹ Ty entañe nioni' i Kabakòke* mpitoky. ² O ry IEHOVÀ, pak'ombia ty hitoreovako, Ihe tsy mijanjiñeo?
 naho ipoñafako feo, ami'ty hoe: Varata! Tsy rombahe'o!
- ³ Ino ty ampahaisaha'o ahy
 o tsy fanjofahañeo,
 naho ampandrendreha'o ty
 halonjerañe, naho ty harotsahañe,
 vaho ty halò-tserehañe aoloko ey?
 eo ka o mpiolao naho o mpandietseo.
- ⁴ Aa le repake t'i Hake,
 vaho tsy miboake ho vantañe o zakao;
 fa arikoboña' o tsivokatseo o vañoñeo,
 aa le zaka vilâñe avao ty mandeha.
- ⁵ Sambao o kilakila' ondatio,
 le maharendreha naho mañararaharà,
 llatsao fa hanoeñe amo andro' areoo
 ty fitoloñañe tsy hiantofa' areo,
 ndra t'ie italilañe.
- ⁶ Inao! te hampitroareko o nte-Kasdìo,
 i fifeheañe mafaitse naho malisay,
 o hangovovoke hitsaha'e
 i tane bey heneheneio
 hitavana'e o akiba tsy a iareoo.
- ⁷ Ie mampangebahebake naho
 mampirevendreveñe;
 miboak' am-bata'e ty hionjona'
 ty zaka naho ty enge'e.
- ⁸ Masika te amo farasio o soaval'a'eo,
 ie maola te amo amboa-hako
 an-kaleñeo,
 mitsapiotsapioke o mpiningitseo,
 boake tsietoitane aña o mpining'i'eo;
 miherereake hoe hondria
 malisa t'ie hanao revozeake.
- ⁹ Fonga hihofike mb'eo am-bodongero'e o azeo, miatre-daharañañe mana-
 hake i tiok' atiñanañey hanontom-pirohy hoe faseñe.
- ¹⁰ Ie mpanivetive mpanjaka,
 inje' iareo o roandriañe,
 itohafa' iareo ze rova fatratse,
 ampirampia' iereo tane le mitavañe.
- ¹¹ Mihelañe hoe tioke ty arofo'iareo,
 fa voa hakeo, amy te sampsampo'e ty haozara'e.
- ¹² Tsy taolo' ty atao andro hao rehe
 ry IEHOVÀ Andrianañahareko masiñe?
 tsy ho mongotse zahay.
 Ry IEHOVÀ, toe tinendre'o ho zakaeñe re,
 Ihe Lamilamy, ro nañory aze ho lloveñe.
- ¹³ Amam-pihaino mikotritriake rehe,

* ^{1:1} Kabakòke: mpanazoke; mpanao ringa

tsy mañeva azo ty hivazoho haratiañe;
 tsy mete mioniñe hatsivokarañe;
 akore te metea'o o mañoho-dozao?
 Ihe mianjiñe avao, t'ie abotse' i lo-tserekey t'indaty vantaña te ama'e;
¹⁴ Ie anoe'o hoe fian-driake ondatio,
 hoe raha milalilaly tsy amam-pifehe.
¹⁵ Fonga tarihe'e am-porengotse,
 kozozote'e an-karato,
 naho manontoñe an-jarifa,
 vaho mirebeke am-pitreñañe,
¹⁶ Misoroñe amo harato'eo,
 naho mañemboke amo jarifa'eo,
 amy t'ie ro mahavondrake ty anjara'e,
 naho mahatobàke o mahakama'eo.
¹⁷ Aa ho koahe'e hao o harato'eo?
 ho zamane'e nainai'e hao o fifeheañe
 fa tsy hanisa?

2

¹ Hijohañe am-pijilovako eo raho,
 hijadoñe am-pitalakesañ' abo ey,
 hañilo mb'alafe'e mb'eo
 handrèndreke ze ho tsarae'e amako,
 naho ze hatoiko t'ie hiveroke.
² Nanoñe ahy t'IEHOVÀ ami'ty hoe:
 Sokiro i aroñaroñey,
 bakabakafo an-takelake,
 hahavakia'ondaty milay.
³ Ho amy andro namantañañ' azey i tokiy,
 i figadoñañey ro enta'e,
 le tsy handañitse
 ndra t'ie tambatse, liñiso,
 toe ho tondroke le tsy hihenekeneke.
⁴ Heheke ty miebotsebots' an-troke,
 tsy vañoñe ty ama'e ao;
 fe veloñe amy fatokisa'ey ty vantaña.
⁵ Mbore fañahie' ty divay ty mpirengevooke
 tsy ho tamàñe aña'akiba'e ao,
 fa ampienare'e hoe i Tsikeokeokey
 ty fañiria'e, manahake o vilasio
 t'ie tsy mb'ia tsy etsake,
 fa atonto'e ama'e ze hene fifeheañe,
 ampitoabore'e ama'e ze kila ondaty.
⁶ Aa vaho tsy songa handrambe
 razan-drehake ama'e irezay,
 handrabioñe aze an-titse,
 ami'ty hoe: Hankàñe
 amy nanontoñe ty tsy azey!
 akore ty hatrela' ty nilogologoa'e tsoake!
⁷ Tsy hitroatse amy zao hao
 o mipay avak' ama'oo?
 tsy ho tsekake hao o mampinevenevetse azo?
 ihe ho fikopaha'e.

8 Aa kanao nikopahe'o o kilakila'ondatio,
le ho volose' o sehanga' ondatio ka rehe;
ty amo lio' ondatio,
naho i heloke nanoañe amy taney,
naho amy rovaiy,
vaho amo hene mpimoneñeo.

9 Hekoheko amy mpikatramo vara
ho a i anjomba'eiy,
hañonjona'e ambone ey i kiboho'ey,
hivotsora'e ami'ty haozara' o ratio!

10 fa nikinia'o hasalarañe ty akiba'o
hañitoa'o t'indaty maro,
vaho amam-kakeo am-bata'o.

11 Hikoike boak'an-drindriñe ao ty vato,
hanoiñe aze i tsotsòke boak' an-katae aoy:

12 Hankàñe! ty mpamboatse rova an-dio,
ie mañoren-tanàñe an-tahiñe.

13 Inao! tsy IEHOVÀ i Màroy
ty amokora' ondaty ho ami'ty afo,
naho ty amozaha' o fifeheañeo
ho an-kakoahañe.

14 Toe ho lifotse ty fahafohinañe
ty enge' IEHOVÀ ty tane toy,
manahake ty fañampoan-drano i riakey*.

15 Hankàñe ami'ty mampigenoke i rañe'ey,
ie izonjoña'e i zonjòney, hampijik' aze am-bòreke, hisamba'e i heña'ey!

16 Àtsan-kasalaran-drehe fa tsy engeñe, minoma ka, ho zoeñe t'ie tsy
sinavatse,
hitoliha' ty fitovim-pitàn-kavana' IEHOVÀ,
ho losore' ty hameñarañe ty enge'o.

17 Hanaroñ' azo ty fijoiañe i Libanone,
naho ty fanjamanañe biby
nampalý iareo;
ty ami'ty lio' ondatio naho
ty fampiantoañe i taney, i rovay,
vaho o mpimoneñeo ao iabio.

18 Ino ty tombo' i sare-sokitsey,
ie tsinene ty nanao aze, sare nitranahañe naho mpañoke vande;
t'ie iatoa' i mpandranjy azey
hanoe'e samposampo moañe?

19 Hekoheko ami'ty manao ty hoe
ami'ty hatae: Mañentea!
naho amy vato moañey: Miongaha!
Mahafanoro hao zay?
Hehe t'ie nohoñem-bolamena naho
volafoty, fe tsy aman-kofòke.

20 Añ'anjomba'e masiñe ao t'IEHOVÀ;
mianjiña añatrefa'e eo ry an-tane-bey atoy.

3

1 Ty fikora' i Kabakoke mpitoky,

* **2:14** Ies 11:9

nanoeñe añ'onin-tsabo*.

² Ry IEHOVÀ, fa tsinanoko i nilañona'oy
vaho hemban-draho; sotraho o fitoloña'oo
ry IEHOVÀ, añivon'andro zao;
ampahafohino anteñateñan-tsa,
ihe viñetse mahatiahia fiferenaiñañe.

³ Niboak' amy Temane†
t'i Andrianañahare,
hirik'am-bohi-Parane‡ i Masiñey. Selah
nanitsike o likerañeo ty volonahe'e,
nandramban-tane ty enge'e.

⁴ Mireandreañe hoe i àndroy;
mitsipelatsipelatse ty fità'e;
mikafitse ao i haozara'ey.

⁵ Miaolo Aze ty angorosy,
mimilemiletse am-pandia'eo ty afo.

⁶ Ie mijohañe, manginikinike i taney,
Ie mivazoho, minevenevetse o fifeheañeo;
mikoromak' amy zao o vohitse nainai'eo,
mibokoke o haboañe haehaeo,
aze o lalañe haehae'eo.

⁷ Treako te misotry o kiboho' i Kosìo,
nitititike o lamban-dalan-kiboho'
i Midianeo.

⁸ Ry IEHOVÀ, nañatsembe Azo hao o sakao?
Niviñera'o hao o torahañeo?
Nampiforoforo Azo hao i riakey?
t'ie miningitse soavalà nah
saretem-pandrombahañe.

⁹ Zonjoñe'o ty taram-pale'o,
lilie'o ho liforen' ana-pale. Selà
Torie'o saka ty tane toy.

¹⁰ Nahaisak' azo o vohitseo le nihembañe, nanginahina i sorotombakey,
nampipoña-peo i lalekey,
vaho naonjo'e mb'añ'abo o taña'eo.

¹¹ Nijihetse aña'kiba'e eo i àndroy
naho i volañey,
ami'ty filoeloea' o ana-pale'o
nihiririñe mb'eoo,
naho ami'ty fimilomiloran-defo'o.

¹² Linialia'o an-kaviñerañe i taney;
trinabotrabo'o an-keloke o kilakila'ndatio.

¹³ Nionjomb'eo rehe handrombake ondati'oo,
hamotsotse i Noriza'oy;

dinem'o ty loha-traño' o tsivokatseo,
nampikorendahe'o boak'

ami'ty manàntañe pak'am-bozo'e. Selà

¹⁴ Trinofa'o amo kobai'eo avao
ty loha' o mpifehe'eo,
o mpivovo amako hoe tangololahio;
ie miankahake hampibotseke

* 3:1 Sigionote: onin-tsabo † 3:3 Temane: atimo, Afrika; fonitse ‡ 3:3 Parane: soa vinta;
engeñe; fihaminañe

o mahaferenaiñe o añ'etake ao.

¹⁵ Linialia'o amo soavala'oo i riakey
amy fitoaboran-drano bey heneheney.

¹⁶ Tsinanoko le ninevenevetse ty troko,
nampitititike o soñikoo
i fiarañanañañey,
nizilik' an-taolako ao ty fimomohañe,
nihondrahondra raho am-pijohañako eo
handiñisako i andro hankàñey,
ty hitroara' o haname anaio.

¹⁷ Aa ndra te tsy mamòñe i sakoañey,
naho tsy mamo a o vahéo;
mianto te mitoloñe amo oliveo,
tsy mamokatse haneñe o tetekeo,
aitoañe amo golobo'eo o añondrio,
vaho po-pirai-tròke ty an-jolok' ao,

¹⁸ mbe hirebek'am' IEHOVÀ nainai'e raho
handia-taroba aman'
Añaharem-pandrombahañ' ahy.

¹⁹ Haozarako t'IEHOVÀ Andrianañahareko hanoe'e tombon-tsarake o
tombokoo,
hanjotike an-kaboañe ey.
Ho amy talèn-tsakèray: anoeñe am-pititihañe.

Tsefanià

¹ Niheo amy Tsefanià* ana' i Kosý ana' i Gedalià† ana' i Amarià‡, ana' i Kizkià§ faha' Iosià* ana' i Amone, mpanjaka' Iehoda ty tsara' IEHOVÀ:

² Toe ho faopaoheko ami'ty tarehe'
ty tane toy ze he'e, hoe t'IEHOVÀ.

³ Ho mongoreko ondatio naho o bibio;
ho fongoreko o voron-dindìñeo,
naho o fian-driakeo,
naho o vato mahatsikapio
mindre amo lo-tserekeo;
vaho haitoako an-tane atoy ondatio,
hoe t'IEHOVÀ. ⁴ Hatora-kitsiko ty tañako, am' Iehoda naho
amo hene ondaty e Ierosalaimeo;
le haitoako ami'ty toetse toy
ty sisa' i Baale,
naho ty tahina' o mpisorom-
pahasiveo rekets' o mpisoro'eo; ⁵ o mitalaho amy fifamorohotan-dindiñey
an-tafo'eo;
o mitalaho naho mifanta am' IEHOVÀ vaho mifanta amy Malkameo†;

⁶ o mitolike tsy mañoriķe IEHOVÀ;
naho o tsy mipay IEHOVÀ
vaho tsy mihalaly ama'eo. ⁷ Mianjiña am-piatrefa' IEHOVÀ, Talè;
fa antitotse ty andro' IEHOVÀ,
fa nihentseñe fisoroñañe
jabajaba t'IEHOVÀ,
vaho hene tinendre'e o hambarà'eo. ⁸ Aa ie tondroke ty androm-pisoroña'
IEHOVÀ, le ho lloveko o roandriañeo,
naho o ana-donakeo, vaho ze ondaty
misikin-damban'ambahiny iaby. ⁹ Amy andro zay ka, le ho fonga lafaeko
o mitsamboan-tokonañe
naho mampikobake ty anjomban-
talè'e am-pikatramoañe
vaho am-pamañahiañe. ¹⁰ Ie amy andro zay, hoe t'IEHOVÀ:
Inay ty kaikaike boak'an-dalam-beim-piañe ao,
naho ty fangololoihañe
amy efetse faharoey;
vaho fandrihindrihiñañe am-bohitse ey. ¹¹ Mangoihoia ry mpimone' i
Maktese‡,
fa mibalake iaby o mpanao balikeo,
fa naito iaby o niragorago volafotio. ¹² Ie amy andro zay, le ho kodebèko
am-pailo t'Ierosalaime;
le ho lloveko ondaty miagarègañe,
ie manao ty hoe:
Tsy hanao soa t'IEHOVÀ,
mbore tsy hanao raty. ¹³ Le ho kopuheñe o vara'eo,

* **1:1** Tsefanià: IEHOVÀ ro fitsolohako † **1:1** Gedalià: I Andrianañahare ro engeko ‡ **1:1** Amarià: hoe t'IEHOVÀ; havañona' IEHOVÀ § **1:1** Kizkià: haozara' IEHOVÀ * **1:1** Iosià: ty afo' IEHOVÀ; ty fampijangaña'e † **1:5** Malkame: ty sampaosampo' o nte-Amoneo ‡ **1:11** Maktese: leoñe; goledoñe laleke

naho hangoakoake o akiba'eo;
 eka, handrafetse anjomba iereo
 fe tsy himoneña'e,
 hambole tanem-bahe
 f'ie tsy hinoñe amy divai'e. ¹⁴ Toe an-titotse ty andro
 ra'elahi' IEHOVÀ,
 mitotoke vaho mihitrike,
 ty feo mafaitse ty andro' IEHOVÀ,
 ty hampangoihoy i fanalolahiy. ¹⁵ Andron-kaviñerañe i andro zay,
 andro kankàñe naho faloviloviañe,
 andro famaopaohañe
 naho fampikoahañe,
 andron-kamoromoroñañe
 naho migoboñe, andro milodolodo
 vaho ieñe mangeoñe, ¹⁶ Andro' i antsivay naho ty hazolava,
 amo rova fatratseo
 naho amo fijilovañ' aboo. ¹⁷ Hampalovilovieko ondatio,
 hijimenjimeña'e hoe goa,
 amy te nandilatse am' IEHOVÀ;
 hikararàke hoe deboke ty lio' iareo,
 naho hoe forompotse o nofo'eo. ¹⁸ Tsy haharombake iareo
 ty volafoti' iareo ndra ty volamena,
 amy andron-kaviñera' IEHOVÀy,
 fonga ho forototoe' ty afom-pamarahia'e
 ty tane toy;
 toe hampijadoñe'e figadoñañe,
 eka, figadoñan-kankàñe,
 amo mpimoneñe an-tane atoio.

2

¹ Mitontòna, Eka, mitontòna
 ry fifeheañe tsy aman-kenatseo,
² Ie mbe tsy mifetsake i zakay,
 ie mihelañe hoe kafo'e i àndroy,
 aolo' te mivovo ama' areo
 i haviñerañe miforoforo' IEHOVÀy,
 aolo' te tojeha ama'o
 ty andron-kaviñera' IEHOVÀ,

³ Tsoeho t'IEHOVÀ, ry mpirèk' an-tane atoio, ry mpañorike o lili'eo;
 paiao ty havantañañe,
 kodebeo ty firèham-batañañe,
 hera hampipalireñe
 amy andron-kaviñera' IEHOVÀy.

⁴ Fa haforintseñe ty Azà,
 naho hangoakoake t'i Askelone,
 ho roaheñe an-tsipinde t'i Asdode,
 vaho hombotañañe t'i Ekrone.

⁵ Hankàñe amo mpimoneñe
 añ'olon-driak' añeo, o nte-Kereteo,
 fa atreatre' ty tsara' IEHOVÀ;
 ry Kanàne, tane' o nte-Pilistio,
 ie harotsako tsy ho amam-pimoneñe. ⁶ Le ho fiandrazañe, oboñobom-
 piarake,

naho golobon'añondry, i añañ'olon-driakey.

⁷ Ho a i sehangan'anjomba' Iakobey
i olotsey, ie handrazeñe ama'e,
naho hirotse an-kiboho' i Askelone
te haleñe;
fa hitilike iareo t'IÉHOVÀ Andrianañahare' iareo,
vaho hampoli'e ty fandrohiza' iareo.

⁸ Fa tsinanoko ty inje' i Moabe,
naho ty natì' o ana' i Amoneo,
ie nañamavo ondatikoo,
naho niebotsebotse te nitare' iareo
ty nifaritsoha' iareoy.

⁹ Aa kanao velon-draho hoe t'IÉHOVÀ' i Måroy, t'i Andrianañahare' Israele,
le hanahake i Sedome t'i Moabe,
naho hoe Amorà o ana' i Amoneo,
ho monton-kisatse, naho kobon-tsira,
vaho hangoakoake nainai'e;
ho kopahe' ty sehangá' ondatikoo,
ho lovae' ty honka' o borizákoo.

¹⁰ Zay ty hamaleañe iareo
ty amy firengevohañey
amy t'ie nañinje naho nitoabotse
am'ondati' IÉHOVÀ' i märoio.

¹¹ Hampañeveñe iareo t'IÉHOVÀ,
ie hampidazidazitse ze fonga
ndrahare' ty tane toy.
Songa hitalaho ama'e

boak' an-toe'e eo ondatio naho ze hene tokonose'
o kilakila'ondatio.

¹² Ry nte-Kosic:
ie ho zamanem-pibarako ka,

¹³ le hatora-kitsi'e mb'amo avaratse añaeo
ty fità'e, le ho rotsahe'e t'i Asore;
vaho hampangoakoahé'e t'i Ninevè,
ie ho maike hoe ratraratra.

¹⁴ Handre añaivo'e eo ze karazam-biby mpiray troke am-piandrazañe ey,
hitobòk' amo lahin-dala'eo
ty vorondolo naho ty lagoro;
ie hivolañe an-dalan-kede eo;
ho rotsake o tokona'eo fa holirañe
o mendoraveñe fitemerañe.

¹⁵ Itoke i rova nirebeke
t'ie niaiñ'añ'oleñañey,
ie nitsakore an-troke ao ty hoe,
zaho avao, tsy aman'añ'ilako;
akore t'ie hoake henaneo,
toetse fandream-biby!
Sindre hikosike naho hañelahela-fitàñe ze hiary eo.

3

¹ Hankàñe amy maleotse naho tìvay,
i rova mamorekekey.

² Tsy hinao'e i fiarañanañañey,
tsy rinambe'e i lafay,

tsy niatoa'e t'IEHOVÀ;
tsy niharinea'e t'i Andrianañahare.

³ Liona mitroñe o roandria ama'eo
amboa-hako o mpizaka'eo;

ndra loli'e tsy apo' iareo am-para' te maray.

⁴ Ondaty jagarigary naho mpikitroke o mpitoki'eo,
fa tiniva' o mpisoro'eo i miavakey,

naho nivalike amy Hàke*.

⁵ Vantañe añivo'e ao t'IEHOVÀ,
ie tsy mandilatse;
abo'a'e an-kazavàñe boa-maraiñe
tsy milesa ty hatò'e;

fe tsy mete salatse ty mengoke.

⁶ Toe naitoako o fifeheañeo,
bangiñe o rova'eo;
nampikoahoko o lala'eo am-para' te
tsy amam-pañavelo ty ey;

rotsake o rova'eo, po-sehang'a'e,

leo raike tsy mimoneñe ao.

⁷ Nanao ty hoe raho:

Va'e hañeveñe amako rehe?
handrambesa'o lafa,
soa tsy haitoañe o akiba'oo;
amy ze he'e nametsahako ama'ey!

fe nalisa iereo, naniva ze fonga sata'iareo.

⁸ Aa le liñiso raho, hoe t'IEHOVÀ,
ampara' i andro hanjehazehako anahareoy, fa hoe ty safiriko:
hatontoko o kilakila' ndatio,
havoriko o fifeheañeo
hampidoañako ty

habosehako miforoforo;

ho fonga forototoe' ty afom-pamarahiako ty tane toy.

⁹ Eka hampikotritriaheko am'ondatio ty soñi' iareo, soa te hene
hikanjy ty tahina' IEHOVÀ,
hitoroñe Aze am-pitraofañ'ina.

¹⁰ Boak' alafe' o saka' i Kosio aña
ty hanesea' iareo o mpipay Ahikoo;

o anak' ampela' i nampiparaitahekoio ro ho banabanaeñe amako.

¹¹ Amy andro zay, tsy hanalatse azo o fitoloña'oo, o niolà'o amakoo,
fa hasintako añivo'o ao o mpitreñe
am-pirengevohañeo,
ie tsy hibohaboba ka

amy vohiko miavakey.

¹² Le hapoko añivo'o ao t'indaty
misotry naho rarake,
hitsoloke amy tahina' IEHOVÀy.

¹³ Tsy handilatse tsy handañitse
ty sengaha' Israele;
le tsy ho oniñe am-palie'e ao ty
famelem-pamañahiañe:
fa hikama iereo vaho handre,
le tsy ho amam-pañembañe.

* ^{3:4} Tsf 22:26, Lke 16:16

¹⁴ Misaboa, ry anak' ampela' i Tsione:
mipazaha ry Israele;
mifalea naho mirebeha an-kaampon-troke
ry anak' ampela' Ierosalaime.

¹⁵ Fa nafaha' IEHOVÀ o nañozoñañ' azoo;
fa sinoi'e aña o rafelahi'oo;
IEHOVÀ ro mpanjaka' Israele añivo'o ao;
tsy hahaonin-karatiañe ka rehe.

¹⁶ Amy sa zay, ho tseizeñe
am' Ierosalaime ty hoe: Ko hembañe;
naho amy Tsione:
Ko mampigebam-pitâñe.

¹⁷ Añivo'o ao t'IEHOVÀ Andrianañahare'o, ie Fanalolahy maharombake
hirebek' ama'o an-kafaleañe,
hianjiñe aman-koko;
handia taroba aman-tsabo.

¹⁸ Hatontoko o mihortoke
o sabadidam-pamantañañeoo,
o mpiama'o mivave i injéio.

¹⁹ Inao, ie tsatoke i andro zay
songa ho toloñeko o manindry azoo,
le ho rombahoko i mikoletray,
naho hatontoko i niroaheñey,
vaho hafoteko ho engeñe naho tahinañe an-tane atoy ty fosalara' iareo.

²⁰ Hampolieko amy andro zay nahareo,
amy sa anontonako anahareoy,
Toe hanoako tahinañe naho engeñe
añivo ze hene ondati'ty tane toy,
naho ampoliko añatrefam-pihaino' areo, ty fandrohizañe anahareo,
hoe t'IEHOVÀ.

Kagày

¹ Tamy taom-paha-roe' i Dariavese* mpanjakay, amy volam-paha-eneñey, amy valoha' i volañey, le niheo amy Zerobabele† ana' i Sealtiele‡ mpifehe' Iehodà naho am' Iehosoa§ ana' Iehotsadake* mpisorombey ty tsara' IEHOVÀ añamy Kagày† mpitokiy, nanao ty ti-hoe:

² Hoe ty nafè' IEHOVÀ i Màroy,

Manao ty hoe ondaty retoañe, Mboe tsy tondroke i àndroy, ty andro hamboareñe ty anjomba' IEHOVÀ. ³ Niheo eo amy zao añamy Kagày mpitokiy ty tsara' IEHOVÀ nanao ty hoe: ⁴ Sam-piagaregaña' areo amo akiba' areo soa tinemetseo hao henaneo, ie mangoakoake ty anjomba toy? ⁵ Aa le hoe ty nafè' IEHOVÀ i màroy, Itsakoreeo o sata' areoo: ⁶ Bey ty tinongi' areo fa kede ty nivokareñe; mikama fe tsy ànjañe; minoñe fe tsy etsake; misikiñe fe tsy mafana; vaho mandrambe tambe an-koroñe loadoake ty mpitoroñe. ⁷ Hoe ty nafè' IEHOVÀ i Màroy, Vetsevetseo o sata' areoo.

⁸ Mionjona mb'amy vohitsey mb'eo naho añandeso hatae le amboaro i anjombay hahafale ahy, hahazoako engeñe, hoe t'IEHOVÀ. ⁹ Mipay maro nahareo fe tsy ampeampe ty oniñe; ie endese' areo moly le tiofeko aña. Akore arè? hoe t'IEHOVÀ i Màroy: Toe napoke ho kòake i kivohokoy, ie songa milay mb'añ'akiba'e mb'eo. ¹⁰ Toe ie ty añajà' i likerañey zono, naho itambozora' i taney havokarañe. ¹¹ Nitokavako hasalikoañe ty tane toy naho o vohitseo naho o vare-boleo naho o divaio naho o menakeo naho o famokara' ty tane toio, naho ondatio naho o hareo vaho ze fonga fitoloñam-pitâne.

¹² Aa le jinanji' i Zerobabele, ana' i Sealtiele, naho Iehosoa, ana' Iehotsadake, mpisorom-bey, naho ze sehanga' ondaty iaby ty fiarañanaña' IEHOVÀ Andrianañahare' iareo naho o tsara naboa' i Kagày mpitoky, namantoha' IEHOVÀ Andrianañahare' iareoo, vaho nañeveñe am' IEHOVÀ ondatio. ¹³ Le nitaroñe' i Kagày ira' IEHOVÀ am' ondatio ty nafe' IEHOVÀ: Ama' areo raho, hoe t'IEHOVÀ. ¹⁴ Nitroboe' IEHOVÀ amy zao ty arofo' i Zerobabele, ana' i Sealtiele, mpifele' Iehodà naho ty arofo' Iehosoa, ana' Iehotsadake, mpisorom-bey naho o tro' ondaty sehanga'e iabio, Vaho niheo mb'eo nitoloñe amy anjomba' IEHOVÀ i Màroy, Andrianañahare' iareoy, ¹⁵ amy andro faha-roapolo-efats-ambi' i volam-pah-ene' i taom-paharoe' i Dariavese mpanjakaiy.

2

¹ Niheo amy Kagày mpitokiy amy volam-pahafitoy, amy andro faha-roapolo-raik' ambi' i volañei, ty tsara' IEHOVÀ manao ty hoe: ² anò ty hoe amy Zerobabele, ana' i Sealtiele, naho am' Iehosoa, ana' Iehotsadake, mpisorom-bey, vaho amo sehanga'ondatio: ³ Ia ty honka ama' areo nahaisake ty anjomba toy amy enge'e taoloy? akore ty fahaoniña' areo aze henanekeo? Hera tsy vente'e am-pihaino' areo? ⁴ Fe mihaozara henane zao ry Zerobabele, hoe t'IEHOVÀ; le mihaftara ry Iehosoa, ana' Iehotsadake, mpisorom-bey, naho mihaozara ry hene ondati' o taneo, hoe t'IEHOVÀ vaho mifanehafa, fa himbaeko, hoe t'IEHOVÀ i Màroy. ⁵ Kanao

* ^{1:1} Dareavase: mampaharendre-batañe † ^{1:1} Zerobabele: renetane e Bavele ‡ ^{1:1} Sealtiele: hinalaly ama'E, he natolo'E § ^{1:1} Iehosoa: mpandrombake; mpamotsotse * ^{1:1} Iehotsadake: natroatse; i mpihevey † ^{1:1} Kagay; Sabadidake; takataka miavake

nampijadoñeko i tsara nifañinàko ama' areo t'ie niavotse i Mitsraimey te mimoneñe ama' areo ao ty Troko: le ko mirevendreveñe. ⁶ Fa hoe ty nafè' IEHOVÀ' i Màroy: Indraik' avao, le anianike te hozoñozoñeko i likerañey naho ty tane toy, naho i riakey vaho o tamboho maikeo; ⁷ le hampiezeñezeneñeko o kilakila' ondatio, naho homb'atoy iaby ze vara soa' o fifeheañeo vaho hatsafeko engeñe ty anjomba toy, hoe t'IEHOVÀ' i Màroy. ⁸ Ahiko o volafotio, Ahiko ka o volamènão, hoe t'IEHOVÀ' i Màroy. ⁹ Handikoatse ty enge' i taoloy ty enge' i anjomba manonjohiy, hoe t'IEHOVÀ' i Màroy; vaho hampanintsiñeko ty toetse toy, hoe ty nafè' IEHOVÀ' i Màroy.

¹⁰ Niheo amy Kagày mpitoky amy faha-roapolo-efats'ambi' i volam-pahasivey, amy taom-paha-roe' i Dariavesey ty tsara' IEHOVÀ manao ty hoe: ¹¹ Hoe ty nafè' IEHOVÀ' i Màroy: Añontaneo o mpisoroñeo ty amy Hâke, ty hoe: ¹² Ie minday hena navaheñe an-kitambe'e ao vaho mioza ami'ty mofo ndra ampemba ndra divay ndra menake ndra amy ze atao mahakama i kitambey, hiavake hao re? Tsie, hoe ty natoi' o mpisoroñeo. ¹³ Le hoe t'i Kagày: Aa ie tsapae' ty nileoren-dolo i raha rezay, halio hao re? Haleotse re, hoe ty natoi' o mpisoroñeo. ¹⁴ Nanoïñe amy zao t'i Kagày nanao ty hoe: Zay ka ondaty retoañe, naho ty fifeheañe miatrek' ahy, hoe t'IEHOVÀ: hambañe ama'e ka o satam-pità' iareo iabio; vaho maleotse o engae' iereoo. ¹⁵ Ie henane zao, haraharao: taolo' ty nampiningirañe ty vato ambone' ty vato añ' anjomba' IEHOVÀ ao, ¹⁶ ie henane zay naho niheomb'am-pitoboroñañe aman-droapolo ondatio, folo avao ty nitendreke; ie nimb'am-pipiritañe mb'eo hañakara'e fitovy limampolo am-pipiritañe ao, le roa-polo avao ty tao; ¹⁷ linafako ty voreke o satam-pità' areoo, naho tromambo, vaho havandra; fe tsy nitolike, hoe t'IEHOVÀ: ¹⁸ Ehe, vetsevetseo henane zao, mifototse amy andro faha-roapolo-efats' ambi' i volam-pahasivey, i andro nañoreñañe ty mananta' i anjomba' IEHOVÀiy—itsakoreo; ¹⁹ ke mbe aman-tabiry ty an-driha ao? Eka, mboe tsy namoa o vaheo, o sakoañeo, o raketao, naho o oliveo—fe henane zao, ho tahieko nahareo.

²⁰ Niheo amy Kagày fañindroe'e amy andro faha-roapolo-efats'ambi' i volañeiý ty tsara' IEHOVÀ nanao ty hoe: ²¹ Saontsio amy Zerobabele, mpanjaka' Iehodà ty hoe: hampiezeñezeneñeko o likerañeo naho ty tane toy; ²¹ havalitsingoreko ty fiambesa' o fifeheañeo naho harotsako ty haozaram-pifeleha' o kilakila' ndatio* ²² vaho hahohoko o sareteo rekets' o mijoeña ama'eo; sindre hikorovoke o soavalao rekets' o mpiningitseo, songa am-pibaran-dongo'e. ²³ Ie amy andro zay, hoe t'IEHOVÀ' i Màroy, ho rambeseko rehe ry Zerobabele, mpitoroko, toe ana' i Sealtiele, hoe t'IEHOVÀ, hanoeko bangem-pitomboke; toe ihe ty jinoboko, hoe t'IEHOVÀ' i Màroy.

* ^{2:21} Dan 2:44

Zekarià

¹ Niheo amy Zekarià* mpitoky ana' i Berekia† ana'Idò‡ amy volam-paha-valo' i taom-paha-ro'e' i Dariavese mpanjakaiy ty tsara' IEHOVÀ manao ty hoe: ² Niviñetse aman-droae' areo t'IEHOVÀ. ³ Aa le isaontsio ty hoe: Hoe t'IEHOVÀ i Màroy: Mimpolia amako, hoe ty nafè' IEHOVÀ' i Màroy, vaho himpoliako ka, hoe t'IEHOVÀ' i Màroy. ⁴ Ko mitsikombe an-droae' areo, o nitseize' o mpitoky taoloo ty hoe: Hoe t'IEHOVÀ' i Màroy: Mifotera amo sata rati' areoo henane zao, naho amo fitoloña' areo ratio; f'ie tsy nijanjiñe, tsy nañaoñe ahy, hoe t'IEHOVÀ. ⁵ O roae' areoo! aia iereo? naho o mpitokio, veloñe nainai'e hao? ⁶ Fa o volakoo naho o fañeko nafantoko amo mpitoky mpitorokoo, tsy ie hao ty nahatakatse o roae' areoo? ie nitolike nanao ty hoe: Toe i nisafirie' IEHOVÀ' i Màroy hanoañe ty amo sata'aio naho o fitoloña'aio zay, ty nafetsake ama'ay.

⁷ Ie amy andro faha-roapolo-efats' ambi' i volam-paha-folo-raik'ambiy, i volan-katsiha an-taom-paha-ro'e' i Dariavesey, le niheo amy Zekarià mpitoky ana' i Berekia, ana' Idò ty tsara i' IEHOVÀ, manao ty hoe: ⁸ Niaroñaroñeko amy haleñey, te ingo t'indaty niningitse soavala mena, nijohañe ambane' ty borodoke§ an-goledoñe ao, naho amboho'e ty soavala mena naho ty mavo naho ty foty. ⁹ Le hoe raho, Hoke ry Talè, Inoñe o reroañe? Aa hoe i irake nisaontsy amakoy, Hatoroko azo ty lengo' iretoñañe. ¹⁰ Nanoiñe amy zao indaty nijohañe amo borodokeoy, ami'ty hoe: Ie o nirahe' IEHOVÀ hañavelo mb'eo mb'eo an-tane atoio. ¹¹ Vinale' iareo ty anjeli' IEHOVÀ nijohañe amo borodokeo ami'ty hoe: Nanjotike mb'eo mb'eo amy taney zahay, le ingo, mipendreñe i taney vaho mitofa. ¹² Nanoiñe amy zao ty anjeli' IEHOVÀ, nanao ty hoe: Ry IEHOVÀ' i Màroy, ombia te ho ferenaiñeñe t'Ierosalaime* naho o rova' Iehodao, o nitorifiha'o i fitopoloo taoñe rezaio? ¹³ Tinoi'IEHOVÀ tsara soa i anjely nisaontsy amakoy, tsaran-kanintsiñe. ¹⁴ Aa le hoe ty natoi' i anjely nifanaontsy amakoy, taroño ty hoe, Hoe t'IEHOVÀ' i Màroy; farahieko t'Ierosalaime naho i Tsione am-parahy ra'elahy. ¹⁵ Loho nahabosek' ahy o kilakila'ondaty miañañoleñañe; ie ni-bosebosehako avao, fe nindræ' iareo i hasilofeñey. ¹⁶ Aa le hoe ty nafè' IEHOVÀ, Mimpoly mb'e Ierosalaime am-piferenaiñan-draho; haoreko ao i kivohokoy, hoe t'IEHOVÀ' i Màroy, vaho ho kozozoteñe am' Ierosalaime ty taly. ¹⁷ Taroño indraike, ty hoe: Hoe t'IEHOVÀ' i Màroy, Hitòbake havokarañe indraike i rovakoy; naho mbe ho tretreze' IEHOVÀ t'i Tsione†, vaho mbe ho joboñe'e‡ t'Ierosalaime.

2

¹ Nampiandraeko maso le nahatreá te ingo ty tsifa efatse. ² Le hoe raho amy anjely nifanaontsy amakoy, Inoñ' o raha zaoo? Le hoe re amako: I tsifa nampiparaitake Iehoda naho Israele vaho Ierosalaime rey. ³ Natoro' IEHOVÀ ahy ty mpandranjy efatse. ⁴ Le hoe ty asako: Hitoloñe inoñe t'ie nitotsak' atoy? Le hoe ty tinaro'e: O tsifa retiañe ty nampivarakaike Iehoda kanao leo ondaty raike tsy nahaongake ty añambone'e; le nivotrak' atoy

* **1:1** Zekarià (Z'eeekariaho): fitiahia' IEHOVÀ † **1:1** Berekia: mavesatse; amam-bente'e ‡ **1:1** Idò: mpiama'e; ozatse; fandrengeañe § **1:8** Heb: Hadase: karazan-katae * **1:12** Ierosalaime: hazavan-arofo, aroñaroñe † **1:17** Tsione: vatolahy fitiahiañe; toetse masy ‡ **1:17** Zek 2:12; Oni: Ies 14:1

i retiañe hañembañe iareo naho handretsake o tsifa' o kilakila' ondaty nampitroatse ty tsifa'e an-tane' Iehoda hampiparatsàke azeo.

⁵ Nampiandraeko maso le nahatrean te ingo t'indaty minday talim-panjeheañe am-pità'e. ⁶ Le hoe raho: Homb'aia v'iheo? Le hoe re amako: Hanjehe Ierosalaime, hahaisake ty am-pohe'e naho ty an-dava'e. ⁷ Aa le ingo nionjom-beo ianjely nisaontsy amakoy, vaho niakatse mb'eo ka ty anjely raike hifanalaka ama'e, ⁸ le nanoe'e ty hoe: Mihitrifa, saontsio ty hoe amo ajalahio: Himoneñe tsy aman-kijoly t'Ierosalaime ty ami'ty hatsifotofoto' ondaty naho añombe ama'e. ⁹ Amy te, Zaho, hoe t'IEHOVÀ ty ho kijolin' afo ama'e hañarikatok' aze; Zaho ty ho enge'e añivo'e ao.

¹⁰ Hoke! mirifata boak' antane avaratse aña, hoe t'IEHOVÀ; fa naboeleko aña manahake o tiok'efa' i likerañeio nahareo, hoe t'IEHOVÀ. ¹¹ Hoke! ry Tsione, mibolitiora ry mpimoneñe amy anak' ampela' i Baveley; ¹² fa hoe ty nafè' IEHOVÀ i Måro, nañirak' ahy hitoha engeñe amo fifeheañe nikopak' azoo: Toe mipaoke ty saintem-pihainoko* ze mitsapa anahareo. ¹³ Ingo te hahelahelako ambone' iereo ty tañako, le ho fikopaha' o nitoroñe iareoo; vaho ho fohi'o te IEHOVÀ ro nañirak' ahy.

¹⁴ Misaboa naho mirebeha, ry anak' ampela' i Tsione; fa ingo ho avy raho himoneñe añivo'o ao, hoe t'IEHOVÀ. ¹⁵ Maro o fifeheañe hirekets' am' IEHOVÀ amy andro zaio ty ho ondatikot†, le himoneñe añivo'o ao raho; vaho hapota'o te IEHOVÀ i MAROY ro nañirak' ahy. ¹⁶ Ho rambese' IEHOVÀ t'Iehoda ho anjara'e amy tane miavakey vaho ho joboñe'e indraike t'Ierosalaime‡. ¹⁷ Mianjiña, ze kila nofotse, añatrefa' IEHOVÀ, ie fa nivañoñe naho niavotse i akiba'e miavakey.

3

¹ Natoro'e ahy amy zao t'Iehosoa mpisorom-bey nijohañe aolo' i anjeli' IEHOVÀ eo, naho i mpañinjey nijagarodoñe an-kavana'e eo hanisý aze.

² Le hoe t'IEHOVÀ amy mpañinjey: Mañendak' azo t'IEHOVÀ, ty mpañinje tia. Eka, itrevoha' IEHOVÀ nijoboñe Ierosalaime; tsy foroa nitsikaoheñ' aña'fo ao hao re? ³ Ie amy zao, nisikin-damba maleotse t'Iehosoa, ie nijohañe añatrefa' i anjeliy eo. ⁴ Aa le nisaontsie'e amo nijohañe aña'atrefa'eo ty hoe: Korendaho ama'e o lamba malotoo. Le hoe ty nanoe'e: Hehe te nafahako ama'o o hakeo'oo, vaho haombeako saroñe mireparepa.

⁵ Le hoe ty asako: Ehe aombeo sabaka mikotritriake ty aña'mbone'e eo, le nisabakae' iereo ty aña'mbone'e vaho nampisikine' iareo, le nijohañe ey i anjeli' IEHOVÀ.

⁶ Hinatahata' i anjeli' IEHOVÀ t'Iehosoa ami'ty hoe: ⁷ Hoe t'IEHOVÀ i MÅroy: Naho aña'veloa'o o lalakoo naho ambena'o o andiliakoo, le ho zakae'o i kivohokoy naho halahalae'o o kiririsakoo vaho hampidadaeko amo mijohanjohañe etoañe. ⁸ Mijanjiña arè ry Iehosoa mpisorom-bey naho ondaty miambesatse añatrefa'oo; fa toe vilõñe ondaty reo; amy te ingo hampionjoneko mb'eo ty Tora-mionjo*, mpitoroko. ⁹ Heheke o vato napoko añatrefa' Iehosao; maso fito ro ami'ty vato raike; ho sokireko ama'e ty sokitse, hoe t'IEHOVÀ i MÅroy: vaho hahako ami'ty andro raike ty tahi' i taney. ¹⁰ Ie amy andro zay, hoe t'IEHOVÀ, le hifampikanjy an-drañetse ondatio, songa ambane' ty vahe'e naho ambane' i sakoa'ey.

* ^{2:12} Its 32:10 † ^{2:15} Ies 14:1, 56:6-8, 60:3, Iek 47:22-23, Jao 10:16, Top 15:17 ‡ ^{2:16} Zek 1:17

* ^{3:8} Ies 4:2, 11:1, Iir 23:5, 33:15, Zek 6:12

4

¹ Nibalik' amy zao i anjely nisaontsy amakoy le nitsekafe'e, manahake ty fampivañonañe 'ndaty miròtse. ² Le hoe re amako, Ino o oni'oo? Le hoe ty asako: Mahatrea fitàm-pailo volamena ki'e, reketséty korobo ambone'e eo, ama'e ty failo fito; fito ty toiô'e, eka fito mb'amy failo fito ambone'e rey; ³ naho hatae olive roe ty aña'ila'e, raike ankavana' i koroboy, le raike ankavia'e. ⁴ Nañontaneako i anjely nifanaontsy amakoy, ty hoe: Inoñe o reroañe, ry talèko? ⁵ Le nanoïñe ahy i anjely nifanaontsy amakoy, ami'ty hoe: Tsy apota'o hao o retiañe? Le hoe raho: Aiy! talèko! ⁶ Le hoe ty navale' i anjeliy amako: Ty tsara' IEHOVÀ amy Zerobabele, manao ty hoe: Tsy an-kafatrarañe, tsy an-kaozarañe, fa an-Troko hoe t'IEHOVÀ' i MÀroy. ⁷ Ia v'iheo, ry haboañe aboo? ie aolo' i Zerobabele eo ro hinjare tane-mira? le hendese'e boak' ao ty vato-fampikatohañe, hikoikoike ty hoe, Fañisohañe, fañisohañe. ⁸ Nimb' amako indraike ty tsara' IEHOVÀ nanao ty hoe: ⁹ Nampipetake o mananta' ty anjomba toio o fità' i Zerobabeleo, le o fità'eo ka ro hamonitse aze; vaho ho fohi'o te nañirak' ahy ama' areo t'IEHOVÀ' i MÀroy. ¹⁰ Ia ty nanirika ty andron-draha pilipito'e? Ho isa' iareo an-kafaleañe o talim-pahity am-pità' i Zerobabeleo, toe o fito retoañe, o fhaino' IEHOVÀ manitsike ty tane toio mb'eo mb'eo.

¹¹ Le nañontaneako ty hoe: Inoñ' o hatae olive ankavana o fitàm-pailo naho ankavia'eo? ¹² Tinovoko fañindroe'e, ty hoe: Ino o singan' olive roe aña'ila' itoiò volamena roe rey, mañiliñe menake volamena boak' ama'eo? ¹³ Natoi'e ami'ty hoe: Tsy fohi'o hao t'ie inoñe? Le hoe ty natoiko: Aiy! ry taleko. ¹⁴ Le hoe re tamako: Ie i roe norizañe ami'ty menake rey*: ie mijohañe aña'ila' i Talè' ty tane toy eo.

5

¹ Nampiandraeko maso indraike vaho nahatrea te ingo ty boke-peleke mitiliñe ² Le hoe re tamako: Ino o oni'oo? le hoe ty natoiko: Mahatrea boke-peleke mitiliñe; roapoloo kihoo ty andava'e, naho folo kihoo ty ampohe'e. ³ Aa le hoe re tamako: Zay ty fàtse mandrambañe ty tarehe' ty tane toy; le songa ho soiheñe aña ze mampikametse ty amy sinokitse amy lafe'e raikey, vaho fonga ho faoheñe aña ze mifantafanta, ie i sinokitse amy lafe'e ila'ey. ⁴ Ampionjoneko mb'eo, hoe t'IEHOVÀ, hiziliha'e ty kiboho' i mpikizoy naho ty kivoho' i mpifanta vilañe ami'ty añarakoy; ie hialeñe amy akibay le habotse'e rekets' o hatae'eo naho o vato'eo.

⁵ Aa le niavotse mb'eo i anjely nifanaontsy amakoy, nanao amako ty hoe: Ampiandrao henaneo o fhaino'oo, le mahaisaha, he ino o miheo mb'eo.

⁶ Le hoe raho: Ino zao? Le hoe re: Ie i fañaranañe mionjom-beoy; le tinovo'e ty hoe: Ie ty vinta' iareo an-tane toy iaby—

⁷ le ingo te nampionjoneñe ty lombo'e firake—vaho amy fañaranañey ty rakemba miambesatse. ⁸ Le hoe re: Zao o hatsivokarañe. Le naronje'e am-po' i fañaranañey ao re, vaho nafetsa'e am-bava'e eo i lombo'e firakey.

⁹ Nampiandraeko maso amy zao naho nahatrea te ingo nimb'eo ty rakemba roe, i tiokey amo ela'eo, ie aman' elan-tsama, vaho nongaha' iareo añaivo' ty tane toy naho i likerañey i fañaranañey.

¹⁰ Aa le hoe ty asako amy anjely nisaontsy amakoy: Hendese' iereo aia i fañaranañey?

¹¹ Le hoe re tamako: Hamboara' iereo akiba an-tane Sinare aña; ie hinalankañe zay le hapok' an-toe'e eo.

* **4:14** Zek 4:3,11, Mat 17:3-4, Ben 11:3-10

6

¹ Nampiandraeko indraike o masokoo le nitalake vaho inge te nimb'eo ty sarete efatse boak' an-jeba' ty vohitse roe; haboan-torisìke i vohitse rey. ² Soavala mena ty tamy sarete valoha'ey, naho soavala mainte ty tamy sarete faharoey, ³ naho soavala foty ty tamy sarete fahateloy vaho soavala maremboke maozatse ty tamy sarete fah' efatsey. ⁴ Aa le hoe ty asako tamy anjely nisaontsy amakoy: Ino o raha reo, talèko? ⁵ Le hoe ty natoi' i anjeliy ahy: Tion-dikerañe efatse mionjomb'eo, boak' amy nijohaña'e aolo' i Talè' ty tane-bey toiy. ⁶ Mionjoñe mb' avaratse aña o an-tsoavala mainteo; manonjohy iareo o foto; vaho mb' atimo mb'eo o maroembokeo. ⁷ Nionjoñe i maozatse rey nipay hijelanjelañe an-tane atoy; le hoe re: Akia, mikariokarioha mb'eo mb'eo an-tane atoy. Aa le nihelahela nanitsike ty tane toy iereo. ⁸ Nikoik' ahy re nanao ty hoe: Hehe te nampanintsiñe ty troko an-tane avaratsey o mb' an-tane avaratseo.

⁹ Niheo amako ty tsara' IEHOVÀ, nanao ty hoe: ¹⁰ Angalao amo mirohio, amo boake Kelday* naho e Tobià† naho e Iedaiào‡, amo boake Bavele añaeo; le amy àndroy avao, miziliha an-kiboho' Iosià§ ana' i Tsefanià*; ¹¹ naho andrambeso volafoty naho volamena vaho mitsenea sabaka fanjàka, le aombeo añambone' Iehosoa mpisorom-bey ana' Iehozadake; ¹² le isaontsio ty hoe: Hoe ty nafè' IEHOVÀ i MÀroy: Ingo t'indaty atao ty hoe Toramionjo†: handrevake boak' an-toe'ey; ie ty hamboatse ty anjomba' IEHOVÀ; ¹³ eka! ie ty handranjy ty kivoho' IEHOVÀ; naho ie ty hivave ty enge'e, naho hiambesatse vaho hifehe am-piambesa'e eo, ho mpisoroñe amy fiambesa'ey; naho añivo' i roroey ty fanoroan-kanintsiñe. ¹⁴ Ho faniahiañe añ' anjomba' IEHOVÀ ao ho a' i Keleme‡, naho i Tobià, naho Iedaià, vaho i Kene§ ana' i Tsefanià, i sabakay. ¹⁵ Homb' eo ka o tsietoitane añaeo hamboatse añ' anjomba' IEHOVÀ ao, vaho ho fohi' areo te nirahe' IEHOVÀ i MÀroy ama' areo raho. Ho tondroke zay naho orihe' areo ty flarañanaña' IEHOVÀ Andrianañahare'areo.

7

¹ Aa ie tan-taom-paha-efa' i Dariavese mpanjakay, le niheo amy Zekarià ty tsara' IEHOVÀ amy andro fahefa' ty volam-pahasivey, toe Safary; ² Ie nampañitrifeñe añ' anjomba' IEHOVÀ ao t'i Sarezere* naho i Regemeleke† rekets' o mpiama'eo, ³ ninday saontsy amo mpisoroñe añ' anjomba' IEHOVÀ i MAROIO, naho amo mpitokio, ami'ty hoe: Handala hao raho amy volam-paha-limey, naho hilie-batañe manahake i nanoeko amy taoñe maro rezaiy? ⁴ Aa le niheo amako ty tsara' IEHOVÀ nanao ty hoe: ⁵ Saontsio ze hene' ondati' i taney naho o mpisoroñe, ty hoe: Ie nililitse naho nandala amy volam-paha-limey naho amy volam-paha-fitoy, i fitompolo taoñe rezay, Zaho hao ty nililira' areo; Toe amako hao? ⁶ Ie mikama, naho minoñe, tsy ho anahareo hao ty fikama' areo naho ho anahareo ty finoma' areo? ⁷ Tsy zay hao o tsara tsinei' IEHOVÀ añaamo mpitoky taoloo, ie nimoneñañe t'Ierosalaime naho niraorao, ie naho o rova' nañohok' azeo, vaho nitobohañe ka i Atimoy naho i Vavataney?

* **6:10** Kelday: ty voatse toy; hereke † **6:10** Tobià: Soa t'i Talè ‡ **6:10** Iedaià: ty fita' IEHOVÀ; iantofañe t' IEHOVÀ § **6:10** Iosià: ty afó' IEHOVÀ; mirehetse t' IEHOVÀ * **6:10** Tsefania: Fietahako t' IEHOVÀ † **6:12** Zek 3:8 ‡ **6:14** Keleme: mañinofy; mihajangañe § **6:14** Kene: falalañe; fanintsiñañe; fitofañe * **7:2** Sarezere: Roandriañ' Afo † **7:2** Rege-meleke: Rañe' i mpanjakay

⁸ Niheo amy Zekarià ty tsara' IEHOVÀ, nanao ty hoe: ⁹ Hoe ty nitsarà' IEHOVÀ' I MÀroy: Manoa zaka-to naho songa mifampitretreza naho mifanao miroahalahy; ¹⁰ ko mamorekeke vantotse, ndra bode-rae, ndra renetane, ndra o rarakeo: ko mifampikinia an-troke. ¹¹ F'ie nifoneñe tsy hañaoñe, naho nampitolike soroke mandietse, vaho nanjenjen-dravembia tsy hitsanoñe; ¹² mbore, nanoe' iereo vato mizitse ty tro' iareo tsy mone hahajanjiñe i Hake, naho o tsara nampisangitrife' IEHOVÀ am-pità' o mpitoky taoloo añamy Arofo'ey; aa le nifetsake eo ty haviñerañe jabajaba' IEHOVÀ' I MÀroy. ¹³ Ie amy zao, kanao nikanjy re naho tsy nañaoñe iereo, le hikanjy ka iereo vaho tsy ho haoñeko, hoe t'IEHOVÀ' I MÀroy; ¹⁴ le nampibaratsiahako an-tangololahy iereo mb'amo kilakila ondaty tsy apota' iareoo. Le nihòake i taney nenga' iereo, naho leo raike tsy nihelohelo ama'e; ie nampangoakoàhe' iereo i tane fanjàkay.

8

¹ Inao ty nitsara' IEHOVÀ' I MÀroy: ² Hoe t'IEHOVÀ' I MÀroy: Farahieko ty Tsione, am-parahy miloroloro, vaho farahieko am-pifombo mandofiry. ³ Hoe t'IEHOVÀ: Himpoly mb'e Tsione mb'eo raho vaho himoneñako ty añivo' Ierosalaime ao; le hatao ty hoe rovan-katò t'Ierosalaime; naho Haboña Miavake ty vohi' IEHOVÀ' I MÀroy. ⁴ Hoe t'IEHOVÀ' I MÀroy: Mbe ho tendreke te hiambesatse an-tamea' Ierosalaime ao o androanavio naho o rakemba beio, songa mitoñoñe kobay am-pità'e ty amy ha'antera'ey. ⁵ Le ho lifotse ajalahy naho ampela o kiririsa' i rovaio mihsa an-kiririsan-drova ao. ⁶ Hoe t'IEHOVÀ' I MÀroy: Aa kanao fanjàka am-pihaino' o sehanga' ondaty retoñaõe zay amy àndroy, tsy ho fanjàka a' masoko ka hao? hoe t'IEHOVÀ' I MÀroy. ⁷ Hoe t'IEHOVÀ' I MÀroy: Oniño te ho rombahoko amy tane atiñanañe añey naho amy tane ahandrefañe añey ondatikoo; ⁸ hampoliko mb'etoa, le himoneña' iareo ty añivo' Ierosalaime ao; h'ondatikoo iereo vaho ho Andrianañahare' iareo an-katò naho an-kavantañan-draho.

⁹ Hoe t'IEHOVÀ' I MÀroy: Haozaro o fità' areoo, ry mahajanjiñe o tsaraem-palie' o mpitoky tañ' andro nampijadoñañe ty fahan' anjomba' IEHOVÀ' I MÀroy amo andro rezooo, soa te hamboareñe i kivohoy. ¹⁰ Ie taolo' i andro rezay, tsy teo ty nañarama' ondaty, tsy teo ty nampitoloñe hâre; vaho tsy nierañerañe ty niavotse ndra ty nimoake ty amy faloviloviañey; ie nampifandiereko an-drañe'e ondatio. ¹¹ F'ie henane zao tsy hanahake tamo andro taoloo amo sehanga' ondaty retoñaõe, hoe t'IEHOVÀ' I MÀroy. ¹² Fa hanintsiñe o tabirio, hamokatse o vaheo, hakare' i taney o nampitomboe'eo naho hatolo' i likerañey o zono'eo; vaho hampandovàko ty sehanga' ondatikoo i hene rezay. ¹³ Ho tondrok' amy zay te manahake ty naña-fokom-patse amo kilakila' ondatio nahareo, ry anjomba' Iehodà naho ry anjomba' Israeleo, t'ie ho rombahoko, le ho fitahiañe; ko hembañe fa hafatraro o fità'oo.

¹⁴ Aa hoe t'IEHOVÀ' I MÀroy: Hambañe amy nisafiriako hanao raty ama' areoy, ie nanigìk' ahy o rae' areoo, hoe t'IEHOVÀ' I MÀroy, vaho tsy niheveako, ¹⁵ ty nisafiriako henane zao ty hanao soa am' Ierosalaime naho amy akiba' Iehoday: ko mangebahebake. ¹⁶ Inao o hanoe' areoo: songa mifanaontsia an-katò; mizakà an-kavantañañe naho am-pilongoañe andalambei' areo eo; ¹⁷ ko mifampikilily añ'arofo; ko inae' areo ty fanta vilañe; fa hejeko iaby zay, hoe t'IEHOVÀ.

18 Niheo amako ty tsara' IEHOVÀ' I MÀroy, nanao ty hoe: **19** Hoe t'IEHOVÀ' I MÀroy: Ty lilitse amy volam-paha-efatsey, naho ty lilitse amy faha-limey, naho ty lilitse amy faha-fitoy, vaho ty lilitse amy faha-foloy, le ho firebehañe naho haravoñañe vaho famantañan-kafaleañe añ'akiba' Iehodà ao; aa le kokò ty hatò naho ty fifampilongoñañe.

20 Hoe t'IEHOVÀ' I MÀroy: Ho tondroke te hivotrake eo ondaty mitozan-tozañeo naho ty mpimoneñe boak' an-drova maro; **21** le hitotsak' ami'ty raike o mpimoneñe ami'ty ila'eo, hanao ty hoe: Antao hipay falalàñe am' IEHOVÀ naho hitsoke IEHOVÀ' I MÀroy; homb'eo ka raho. **22** Toe maro t'indaty, naho fifeheañe maozatse ty homb' atoy hipay IEHOVÀ' I MÀroy e Ierosalaime ao, naho hihalaly fañisohañe am' IEHOVÀ. **23** Hoe t'IEHOVÀ' I MÀroy: ie amy andro zay, le ho rambese' t'indaty folo boak' amy ze hene' fisaoñtsi' o kilalila' ondatio, eka ho fihine' iereo ty saro' ty nte-Iehodà, hanao ty hoe: Hindre ama'o zahay fa jinanji'ay te mitraok'ama' areo t'i Andrianañahare*.

9

1 Fetse; miatrek' an-tane' i Hadrake* mpitofa e Damesèke, ty tsara' IEHOVÀ; (mitolik' am' IEHOVÀ ty fihaino' ondatio naho ze hene' fifokoa'Israele;)

2 naho amy Kamate mpiefetse ama'ey;
naho amy Tsore†
vaho amy Tsidone‡,
amy t'ie mahihitse.

3 Toe namboatse rova fatratse t'i Tsore
le nampitoabotse volafoty hoe deboke naho volamena ki'e hoe fotak' an-damoke.

4 Inao t'ie hampikoahé' i Talè, havatambia'e mb' an-driak' añe ty haozara'e; vaho ho forototoe' ty afo.

5 Hahaisake zay ty Askelone§
vaho hiria-kolitse,
hangirifiry ka t'i Azà*,
naho i Ekrone† ty amy fitamà'e nilesay;
hihomake ty mpanjaka' i Azà le tsy ho amam-pimoneñe ty Askelone.

6 Anak' amontoñe ty hitoboke e Ashdode‡, vaho haitoako ty fisengea' o nte-Pilistio.

7 Hafahako am-bava'e ao ty lio'e
naho an-tsifim-pamotsi'e ao
o raha mampangoriñeo;
fa o sehang'a'eo ty ho an' Andrianañaharen-tika,
ie ty hanoeñe mpiaolo e Iehodà ao,
vaho hanahake ty nte-Iebose§ t'i Ekrone.

8 Hitobe am-piarikatoha' i kivohokoy raho
ty amo lahindefoñeo,
ty amy miary eo naho mibalike
vaho tsy hisoroha' ty mpamorekeke ka, fa ho jilove' o masokoo henane zao.

* **8:23** Jao 2:22 * **9:1** Hadrake: lohan-defo; fale te tretreza'e † **9:2** Tsore: Vato: haozarañe, masioñe ‡ **9:2** Tsidone: mitsatsà; mamintañe § **9:5** Askelone: fikovovohañe am-pitaveañañe

* **9:5** Aaza: ty nihafatrarañe, maozatse † **9:5** Ekrone: nombotañe reke-bahatse ‡ **9:6** Asdone: fipalirañe fatratse § **9:7** Iebose: toe-pamofohañe

9 Mandià taroba ry anak'ampela' i Tsione, mipoñafa ry anak' ampela' Ierosalaime;
Hehe te mitotsak' ama'o ty Mpanjaka'o, Vantan-dre, reketse fandromba-hañe,
mirèke, miningitse borike,
ambone' ty fola-bao,
ana'ty borike vave'e*.

10 Le hapitsoko amy Efraime ty sarete,
naho am' Ierosalaime ty soavala,
naho ho pozaheko o falen-kotakotakeo;
ie hitsara fampilongoañe
amo kilakila' ondatio,
vaho hitakatse an-driake ey
pak' an-driak' aña i fifehea'ey,
naho boak'amy Sakay aña
pak' añi' olo-ty tane toy.

11 Le ihe, ty amy lio' i fañina ama'oiy, hampiavoteko boak' an-koboñe
tsy aman-drano ao
o azo an-drohio.

12 Mimpolia mb'an-drova fatratse mb' eo,
ry mpirohy mitamàñeо;
anito ty ho koihoko te hondroheko
in-droe o azoo.

13 Ampivohoreko hoe te faleko t'Iehodà,
atsafeke amy faley ty Efraime;
naho ho troboeko o ana'oo ry Tsione,
hatreatr'e o ana'oo ry Iavane,
ie hampanahafeko
amy fibaram-panalolahiy.

14 Ho oniñe ambone' iereo eo t'IEHOVÀ, naho hihiririñe hoe helatse i ana-pale'ey;
ho tiofe' IEHOVÀ, Talè i antsivay,
vaho hijoñe an-tangololahi' i atimoy.

15 Ie harova' IEHOVÀ' i MÀroy;
le hampibotseke iereo
handialia o vato-piletseo;
hinoñe iereo naho hiroharoha hoe an-divay; hatsafeñe hoe an-tsoakazo,
kotsa hoe an-kotso' i kitreliy eo.

16 Handrombake iareo amy andro zay t'IEHOVÀ Andrianañahare' iareo
ho lia-rai' ondati'eo,
ho vatosoan-tsabaka'e,
mimilemiletse an-tane'e eo.

17 Akore ty hafanjàka
naho hatsomerentsere' iareo!
Hampiraorao o ajalahio ty ampemba
naho o somondrarao ty divai-vao.

10

1 Ihalilio orañe am' IEHOVÀ,
oran-doha-taoñe am' IEHOVÀ mpitsene i helatsey;
vaho hampikojojoaha'e orañe,
fonga ondaty ty amo mitiry an-tete'eo.

* **9:9** Mat 21:5, Jao 12:15

2 Fa mikora aman-tahiñe o ambiasao,
naho mahaonim-bandé o mpisikilio,
mivolam-bilañe ka o nofio,
tsy jefa' e ty fañohò' iareo;
aa le mirererere hoe añondry iereo,
misotry fa tsy amam-piarake*.

3 Misolebotse amo mpiarakeo
ty habosehako, le ho liloveko o ose-lahio;
fa tiahi' IEHOVÀ' I MÀroy i lia-rai'ey,
i anjomba' Iehoday
ie hanc'e hoe soavalam-bolonahe'e
an-kotakotak' ao.

4 Boak'am' iareo ty vato-lahy,
hirik'am' iereo ty fantake,
boak'am' iereo ty falen-kotakotake,
vaho hirik'am' iereo ao ze mpameleke—hiharo

5 hoe fanalolahy iereo, ho lalia' iereo am-potak' an-dalañe ao t'ie
mihotakotake naho mifandraparapake,
fa mindre am' iereo t'IEHOVÀ vaho
hifandrakaraka o mpiningi-tsoavalao.

6 Hampaozareko ty anjomba' Iehodà,
naho ho rombaheko ty anjomba' Iosefe, hampoliko fa iferenaiñako,
vaho hanahake t'ie tsy nahifiko aña, amy te zaho IEHOVÀ t'i Andri-
anañahare' iareo, le ho toiñeko.

7 Hanahake ondaty manjofakeo t'i Efraime, le hirebeke ty arofo' iareo hoe
an-divay; Eka hahaisake zay o ana'eo
vaho handia-taroba,
hifale am' IEHOVÀ ty arofo' iareo.

8 Ho tsikaoreko, naho hatontoko, amy t'ie nijebañeko, ie hitombo ho mira
ami'ty hamaro'e taolo.

9 Ie aparatsiako amo fifeheañeo,
le hahatiah y ah y an-tsietoitane aña;
naho ho veloñe iereo naho o ana' iareoo,
vaho himpoly.

10 Hampoliko boak'an-tane Mitsraime, naho hatontoko boak' Asore aña;
vaho hendeseko mb'an-tane Gilade
naho mb'e Libanone mb'eo;
ampara' te tsy tsahatse i toetsey.

11 Ho sorohe'e i ria-kaloviloviañey,
ho fofoh'e o onjan-driakeo,
le ho maike o godobo' i sakaio,
naho hafotsake ty enge' i Asore
vaho hipitsok' aña ty kobai' i Mitsraime.

12 Hampaozareko am' IEHOVÀ iereo vaho i tahina'ey ty hidraidraita' iareo,
hoe t'IEHOVÀ.

11

1 Sokafo o lalam-bei'oo ry Libanone
hampibotseha' ty afo o mendoraveñeo.

2 Mangololoiha, ry talý,
fa nideboñe i mendoraveñey;
fa nianto o nanam-bolonahetseo;

* **10:2** Iek 34:5,8

Mangoihoìa, ry kile' i Basane
fa hinatsake i ala matahetsey.

³ Inao! ty fitoreova' o mpiaarakeo,
fa mianto ty enge' iareo;
Inao! ty fitroña' o liona tora'eo,
fa robake ty fisengea' Iordane.

⁴ Hoe t'IEHOVÀ Andrianañahareko: Andrazo i lia-raike ho zamaneñey;
⁵ Vonoe' o mpikaloo iareo fe tsy liloveñe, le manao ty hoe o mandetake iareoo: Andriañeñe t'IEHOVÀ, amy te nahampañarivo ahy; vaho tsy tretreze' o mpiara'eo. ⁶ Aa le tsy ho ferenaiñako ka ty mpimone' i taney, hoe t'IEHOVÀ; Inao, songa haseseko am-pitàn-drañe'e t'indaty naho am-pitam-panjaka'e; ho demohe' iereo i taney, le zaho tsy hamotsotse am-pitá'iareo.

⁷ Aa le nifahanako i lia-raike ho lentañey, o vata'e rarake amy lia-raikeio. Le rinambeko ty kobaiñe roe; ty natao Isoke naho ty natao Vanditse; vaho nandrazeko i lia-raickey. ⁸ Naitoeko añate' ty vola'e raike ty mpiaarake telo; Toe tsy nahaliñe iareo ty troko, vaho nalaiñe ahy ka ty tro' iareo.

⁹ Aa le hoe raho: Tsy handrazeko nahareo adono hivetrake ze hivetrake; apoho haito ze haito; vaho angao hifampihinañe ty nofo'e o sehanga'eo.

¹⁰ Rinambeko i kobaiko atao Isokey, le tsineratserako, hifoterako amy fañina nanoeko am'ondaty iabio. ¹¹ Toe pinozako amy andro zay; vaho nifohi' ze mañaoñe ahy amo misotry amy lia-raikeio t'ie nitsarae' IEHOVÀ.

¹² Aa le hoe ty asako tam' iereo: Naho atao' areo te mañeva le atoloro ahy ty tambeko; fa naho tsie le apoho; vaho linanja' iareo ty volafoty telo-pololo ho tambeko. ¹³ Le hoe t'IEHOVÀ tamako: Afetsaho mb'amy mpanao valàñe taney mb'eo i vili'e sarotse nikaloa' iareo ahikoy. Nendeseko amy zao i volafoty telopoloy vaho nahifiko amy mpanao valàñe taney añ'anjomba' IEHOVÀ ao. ¹⁴ Tsineratserako ka i kobaiko faharoe atao Vanditsey, soa t'ie hibalake ty fifampilongoa' Iehodà naho Israele.

¹⁵ Le hoe t'IEHOVÀ tamako: Rambeso indraike o haraom-piarake gegegeo. ¹⁶ Ingo, hampitroareko mpiaarake tsy hañaoñe o naitoañ' amy taneio naho tsy hitsoeke o tora'eo, naho tsy ho melañe'e o folakeo, vaho tsy ho fahana'e o mbe mijohañe, fa ho kamae'e ty hena' o vondrakeo, naho ho pozapozaha'e o hotro'eo.

¹⁷ Hankàñe amy mpiaarake tsy jefa'
mahafari' i lia-raikeiy!
ho an-tsira'e ty fibara
naho am-pihaino'e havana;
hiforejeje i sira'ey
ho maieñe i fihaino'e havanay.

12

¹ Ty entañe nitsarae' IEHOVÀ am' Israele: Hoe t'IEHOVÀ namelatse o likerañeo, naho nampijadoñe o mananta' ty tane toio vaho mitsene ty arofo' ondaty ama'e ao: ² Inao, te hanoeko fitovim-pivembèñañe t'Ierosalaime naho o mañohok' aze iabio, vaho hampitraofe' iareo ama' Ierosalaime t'Iehodà, naho harikatohe' iareo. ³ Ie amy andro zay, le hanoeko vato fijinie' ze kila ondaty t'Ierosalaime; ho fonga fere-boboke ze mivave aze; vaho hene hitontoñe hiatreatre aze ze fifehea' ty tane toy.

⁴ Amy andro zay, hoe t'IEHOVÀ le ho paoheko ho tangòke o soavalao, naho ho seretse i mpiningi'ey; hanoka-maso amy anjomba' Iehoday raho vaho

ho lafaeko ho goa iaby ze soavala'ondaty. ⁵ Le hitsakore añ'arofo ao o mpifehe' Iehodao hanao ty hoe: Haozarako o mpimone' Ierosalaime aña'm' IEHOVÀ' i MÀroy, Andrianañahare' iareo. ⁶ Hanoeko sadròn' afo añivon-katae ao o mpiaolo' Iehodao, naho hoe failon' afo añivom-pitoboroñan' ampemba ao; ie hamorototo ondaty iaby mañohokeo mb' ankavana naho havia; fe ho fimoneñañe an-toe'e eo indraike t'Ierosalaime, Eka e Ierosalaime ao. ⁷ Ho rombahe' IEHOVÀ heike o kiboho' Iehodao, soa tsy hitoabotse ambone' Iehodà ty enge' i anjomba' i Davidey⁹ naho ty enge' o mpimone' Ierosalaimeo. ⁸ Harova' IEHOVÀ amy andro zay o mpimone' Ierosalaimeo le ho hambañe amy Davide ty mikoletra am' iereo amy andro zay; vaho hanahak' an' Andrianañahare ty anjomba' i Davide, hambañ' amy anjeli' IEHOVÀ aolo' iareoy.

⁹ Ie amy andro zay, ho paiako harotsake ze hene fifeheañe maname Ierosalaime. ¹⁰ Le hakofòko amy anjomba' i Davidey naho amo mpimone' Ierosalaimeo ty arofom-patarihañe naho fisolohoañe; le hisamb' ahy iereo, i trinofa' iareoy vaho hirovetse, manahake t'ie fangololoiham-bakotokañe, ho afero am' iareo manahake t'ie nitañoloñoloña'e. ¹¹ Ie amy andro zay, le ho fandalàm-bey ty e Ierosalaime ao, manahake ty firoveta' i Hadadrimone* am-bavatane' i Megidonet† eo. ¹² Handala i taney, le hifampivike ze hene fifokoañañe; hifampivike ty anjomba' i Davide naho o rakemba' eo; hifampivike ty anjomba' i Natane‡ naho o rakemba'eo; ¹³ hifampivike ty anjomba' i Levý§ naho o rakemba' eo; hifampivike o nte-Simeio* naho o rakemba'eo; ¹⁴ hifampivike ze hene fifokoa sehanga'e naho o tañanjomba'eo.

13

¹ Ho sokafeñañe amy andro zay aña' anjomba' i Davide naho amo mpimone' Ierosalaimeo ty rano migoangoañañe, ty amo hakeo naho haleorañaeo. ² Ho tondrok' amy andro zay, hoe t'IEHOVÀ' i MÀroy, te haitoako amy taney ty aña're' o fahasiveo naho tsy ho tiahieñe ka*; vaho hasintako amy taney o mpitokio naho ty fañahy maleotse. ³ Ie amy zay, ie mbe mitoky avao t'indaty, le hanao ty hoe ama'e ty rae'e naho i rene'e nisamak' aze: Tsy ho velon-drehe, amy t'ie mandañitse amy tahina' IEHOVÀy; aa ie mitoky le ho tombohen-drae'e naho i rene'e nahatoly aze. ⁴ Ie amy andro zay, songa ho salare' o mpitokio o aroñaro'eo t'ie mitoky; vaho tsy hisikintsimbo volovoloeñe hamañahia'e; ⁵ le hanao ty hoe: Tsy mpitoky raho, fa mpiava tane; ie vinili' ondaty h'ondevo'e te nahajalahy. ⁶ Le hanao ty hoe ama'e ty raike: Aa vaho inoñe o fere am-pità'oo? Le hoe ty havale'e: Tañ' anjombam-pikoko ahy ao raho te finofoke. ⁷ Mitsekafa ry fibara hiatreatre i Mpiarakoy, indaty Mpiamakoy, hoe t'IEHOVÀ' i MÀroy; lafao i mpiarakey, le hibaratsàke o añondrio; vaho hafoteko amo kedeo ty tañako. ⁸ Ho tondrok' amy taney iaby, hoe ty nafè' IEHOVÀ te haitoeña vaho hihomake ty roe ampaha-telo'e, le hengañe ao ty am-paha-telo'e. ⁹ Hampisoroheko aña'fo ao i faha-teloy, naho hatranako manahake ty fitranahañe volafoty; ho tokave' iareo ty añarako† naho hotoiñeko, ty hoe: Ondatiko iereo; le hanao ty hoe iereo: IEHOVÀ ro Andrianañahareko.

* **12:11** Hadadrimone: halaly amy Rimone (tsie) † **12:11** Megidone: o voa'e fanjakao; mitaroña

‡ **12:12** Natane: manolotse; manambe; tinambe § **12:13** Levy: Mpiam'a * **12:13** Simeý:

mijanjiñe naho manao; ty engeko * **13:2** Avo 23:13, Its 12:3, Ieh 23:7, Hos 2:17, Tsf 3:9 † **13:9** Tsf 3:9

14

¹ Inao: homb'eo ty andro' IEHOVÀ, le ho zaraeñe añivo'o ao ty kinopak' ama'o ao. ² Fa hatontoko hihotakotak' am' Ierosalaime o fifeheañe iabio*; vaho ho gioke i rovay, ho voloseñe o anjombao naho ho vahoreñe o rakembao vaho hasese an-drohy añe ty vaki-mira' i rovay, fe tsy haitoeñe amy rovay o sehanga'eo. ³ Ie amy zao hionjom' beo t'IEHOVÀ, hialy amo fifeheañeo, manahake i fialia'e añ' androm-pihotakotahañey. ⁴ Hijoñañe ambone' i vohin' Olive miatreke Ierosalaime maniñanañey o fandia'eo amy àndroy, vaho hitserak' añivo'e eo i vohin' Olivey boak' atiñanañe pak' ahandrefa; kanao ho tendreke eo ty vavatane jabajaba;hiveve mañavaratse ty vaki' i vohitsey, naho hañatimo ka i vaki'ey. ⁵ Le hivoratsake mb' amy vavatane' i vohikoy mb'eo nahareo; amy te hahatakatse i Azele† i vavatane' o vohitsey; eka, toe hitrimban-day, manahake ty nibotatsaha' areo amy fanginikinihan-tane añ'andro' i Ozià‡ mpanjaka Iehodaiy; le hitotsake eo t'IEHOVÀ Andrianañahareko—hitraoke ama'o ze hene masiñe.

⁶ Ho tondrok' amy andro zay te tsy ho an-kazavaña, fa figoboñañe; ⁷ le hitsatoke ty andro raik' arofoana' IEHOVÀ, t'ie tsy handro tsy haleñe, le hazava te hariva. ⁸ Ie amy andro zay, higoangoañe boak' Ierosalaime ao ty rano veloñë§: ty vaki'e mb'an-driak' atiñanamb'eo naho ty vaki'e mb'an-driak' ahandrefa mb'eo; ndra te asotry ndra te asara.

⁹ Ho Mpanjaka' ty tane bey toy t'IEHOVÀ *; ho raike t'IEHOVÀ le ho raike i tahina'ey.

¹⁰ Hampimiraeña iaby ty tane boake Gebà pake Rimone atimo' Ierosalaime ey; haonjoñe t'Ierosalaime himoneña'e an-toe'e eo boak' an-dalam-bei' i Beniamine, pak'an-toe' i lalam-bey valoha'ey, pak' amy lalam-beinkotskey, vaho boak' am-pitalakesañ' abo' i Kananèle ey pak'am-pipiritan-divaim-panjaka. ¹¹ Le himoneña' iareo, naho tsy hafâtse ka†; fa hiañ' añoleñañe t'Ierosalaime.

¹² Le zao ty ho angorosy hafetsa' IEHOVÀ amy ze fonga ondaty naname Ierosalaime añ'aly, hihomak' ama'e ty nofo'e ie mbe mijohaña am-pandia'e, naho ho momok' am-pitsatoha'e o fihaino'eo, vaho ho vorok' am-palie'e ao o famele'eo. ¹³ Ho tondrok' amy andro zay te, ho añivo' iareo ao ty fifandragaragàñe boak'am' IEHOVÀ; le songa hitambozòtse ty fitàmpiam'a'e t'indaty, vaho sindre hizonjom-pità hatreatré'e ty fità' ty ila'e. ¹⁴ Hialy e Ierosalaime ao ka t'Iehodà; le fonga hatontoñe ty vara' o kilakila ondaty mañohokeo; volamena, naho volafoty, naho saroñe tsifotofoto. ¹⁵ Le ho hambañe amy angorosy ty angorosi' o soavalao, naho o borike-vosio, naho o ramevao, naho o borikeo, vaho ze hene hare an-tobe' iareo ao.

¹⁶ Le ho tondroke te hionjoñe mb'e Ierosalaime mb'eo boa' taoñe ze sehanga' o kilakila' ondaty naname Ierosalaimeo, hitalaho amy Mpanjakay, am' IEHOVÀ i MÀroy, hamonje i sabadidan-tsokemitrahay. ¹⁷ Ie amy zao, ze fifokoa' ty tane toy tsy hionjomb'e Ierosalaime hitalaho amy Mpanjakay, IEHOVÀ i MÀroy, le tsy hihaviañ' orañe. ¹⁸ Aa naho tsy mionjom'eo ty fifokoa' i Mitsraime, vaho tsy mivotrake eo, le tsy hahazo ka; te mone i angorosy hafetsa' IEHOVÀ amo fifeheañe tsy mamonje i takatakan-kibohotseio. ¹⁹ Zay ty ho fandilovaña i Mitsraime, naho ty fandafañe ze fonga fifelehaña tsy mionjo-mb'an-takatakan-kibohotse mb'eo.

* **14:2** Ioe 3:2, Tsf 3:8, Ben 16:14 † **14:5** Azele: toe marine ‡ **14:5** Ozia: ty haozara' (anak'añondri') i IEHOVÀ § **14:8** Ben 22:1-2 * **14:9** Ies 24:23, Oni: Dan 2:44, Ben 11:15
† **14:11** Ies 60:18, Iir 31:40, Iek 37:26, Amo 9:15, Ben 22:3

20 Ie amy andro zay hisokitse amo fikorintsan-tsoavalao ty hoe, Navahéñe ho am' IEHOVÀ; vaho hanahake o sajoa aolo' i kitreliio o valàñe añ'anjomba' IEHOVÀO.

21 Eka, songa hiavake ho am' IEHOVÀ' I MÀroy ze valàñe e Ierosalaime ao naho e Iehodà ao; le sindre hangalak' am' iereo ao ze mañenga soroñé, ie migodrogodroñé ao; vaho tsy ho eo amy andro zay ty mpanao balik' añañomba' IEHOVÀ' I MÀroy ao.

Malaký

¹ Fetse: ty tsara' IEHOVÀ am' Israele añamy Malaký*.
² Fa nikokoako nahareo, hoe t'IEHOVÀ,
le anoa'areo ty hoe:
Ami'ty akore ty nikokoa'o anay?
Aa tsy nirahalahi' Iakobe† hao
t'i Esave‡? hoe t'IEHOVÀ;
fe nikokoako t'Iakobe, ³ naho nihejeko t'i Esave,
nampangoakoaheko o tamboho'eo,
vaho natoloko amo farasim-
patram-beio ty lova'e. ⁴ Ie amy zao, hoe ty asa' i Edome:
Finofok' ambane zahay fe himpoly,
hamboara'ay o liolioo;
aa hoe t'IEHOVÀ' I MÀroy:
Hamboatse iereo, fe harotsako ambane;
naho hatao tanem-piaroteñe i toetsey,
ie ondaty mahaviñetse IEHOVÀ nainai'eo;
5 Ho isa' o fihaino'areoo,
vaho hanao ty hoe: Jabahinake t'IEHOVÀ
alafe' o efe-tane' Israeleo. ⁶ Miasy an-drae'e ty ana-dahy,
naho ty talè'e ty ondevo,
aa kanao zaho t'i Rae,
aia ty fiasiañe Ahiko?
Katao Talè raho,
aia ty fañeveñañe amako?
hoe t'IEHOVÀ' I MÀroy amo
mpisoroñe manirika ty añarakoo.
Ie anoa'areo ty hoe:
Aia ty nanirikà'ay ty tahina'O? ⁷ Ie mibanabana mofo maleotse amy
kitrelikoy, naho manao ty hoe:
Akore ty nanivà'ay Azo?
Ie atao' areo ty hoe:
Mavo ty fandambaña' IEHOVÀ ⁸ Ie mañenga ty goa hisoroñañe,
tsy haloloñañe hao?
Ie engaeñe ty mikotrile
naho ty manan-kandra,
tsy haratiañe hao?
Ibanabanao amy mpifehe' areoy,
hifalea'e hao? ho no'e hao rehe?
hoe t'IEHOVÀ' I MÀroy. ⁹ Ie amy zao, naho miambane
hihalaly ty fañisohan' Añahare,
hiferenaiña'e hao?
naho banabanae'areo izay?
Ho rambese'e soa v'inahareo?
Hoe t'IEHOVÀ' I MÀroy: ¹⁰ Ia ama'areo ty handrindriñe o lalakoo
tsy mone ho viañeñe an-kitreliko eo ty tsy vente'e!
Tsy mahafale ahy nahareo,

* **1:1** Malaký: irako; anjeliko † **1:2** Iakobe: mpamañahy; tomitse ‡ **1:2** Esave: i mitoloñey, i mahahenekey

hoe t'IEHOVÀ' i MÀroy, vaho tsy noko
 o banabanam-pità' areoo. ¹¹ Amy te boak'am-panjirihan' andro aña
 pak'am-pitsofora'e,
 le ra'elahy amo fifeheañeo ty añarako;
 amy ze fañembohañe naho
 fañengañe mahakama malio ami'ty añarako,
 fa Ra'elahy amo kilakila' ondatio
 ty añarako,
 hoe t'IEHOVÀ' i MÀroy. ¹² F'ie teraterà' areo,
 ami'ty atao' areo ty hoe:
 Nivetàñe ty fandambaña' i Talè,
 naho o vokare'eo,
 vaho tiva o mahakama'eo. ¹³ Mbore atao' areo ty hoe:
 Hete! mahamokotse!
 mbore injè' areo,
 hoe t'IEHOVÀ' i MÀroy,
 endese' areo ty nitavaneñe,
 ty mikotrile, naho ty boròka,
 vaho engae' areo hisoroñañe,
 ho noko am-pità'areo hao? hoe t'IEHOVÀ. ¹⁴ Fàtse ty mpikatramo,
 ie aman-kobatròke amy lia-rai'ey,
 le ie mifanta: i aman-kàndray
 ty engae'e amy Talè,
 Izaho Mpanjaka ra'elahy,
 hoe t'IEHOVÀ' i MÀroy,
 naho añaeveñañe amo fifeheañeo
 ty añarako.

2

¹ Ie henane zao: ho anahareo o lily zao ry mpisoroñeo.

² Aa naho tsy haoñe' areo,
 naho tsy tsakore' areo aña'arofo ao,
 ty handrenge i añarakoy, hoe t'IEHOVÀ,
 le hañitrifako fatse,
 vaho hozoñeko o fitahia' areoo;
 eka, toe fa nozoñeko, amy te
 tsy ifahara' ty tro' areo.

³ Ingo, hendahako o tabiri'areoo,
 le ho hosorako hativàñe o lahara' areoo,
 ty tai' o takataka' areoo;
 ie hisese aña mindre ama'e.

⁴ Fohino arè te nampihitrifeko
 ama' areo ty lily toy,
 soa te ho amy Levý nainai'e i fañinakoy,
 hoe t'IEHOVÀ' i MÀroy.

⁵ Haveloñe naho filongoñañe
 i fañinako ama'ey;
 natoloko aze ho fañeveñañe,
 toe nañeveña'e
 vaho niambane ami'ty añarako.

⁶ Tam-palie'e ao i Hake vantañey*,
 vaho tsy nitendrek' am-pamele'e ao

* ^{2:6} Nek 9:13

ty hatsivokarañe;
 ie nindre nañavelo amako an-kanintsiñe naho an-kavañonañe vaho maro
 ty nampiambohoe'e ami'ty raty.

⁷ Toe fañajàn-kilala ty fivimbim-pisoroñe, vaho ho tsoeheñe am-palie'e ao
 ty Hake;

ie ìra' IEHOVÀ' I MÀroy.

⁸ Fe nitsile amy lalañey nahareo,
 naho nampsikapy ty maro amy Hake;
 nitivae' areo ty fañina' i Levý,
 hoe t'IEHOVÀ' I MÀroy.

⁹ Aa le nisirikaeko naho nimavoeko añatrefa' ze kila ondaty
 amy te tsy nambena' areo o lalakooy,
 vaho mirihy t'ie mañorike Hake.

¹⁰ Tsy raik' avao hao t'i Raentika?
 Tsy Andrianañahare Raike hao ty namboatse an-tika?
 Aa vaho akore te songa
 mifampikatramo aman-drahalahy,
 hiteratera i fañinan-droaentikañey?

¹¹ Fa nanao hatsivokarañe t'Iehodà,
 hativàñe ty nanoeñe e Israele ao
 naho e Ierosalaime ao;
 fa vineta' Iehodà i toetse navahe' IEHOVÀY ie nikokoa'e,
 amy nañenga'e ty anak' ampelan-
 drahare ambahiny ho vali'e.

¹² Haitoa' IEHOVÀ amo kiboho' Iakobeo
 t'indaty manao zay, ie mañenga soroñe
 amy IEHOVÀ' i maroiy.
 he t'ie mpiaolo ke te mpañorike.

¹³ Inao ka ty fanoe'areo:
 atsafe' areo rano-maso ty kitreli' IEHOVÀ, am-pirovetañe, vaho am-
 pangololoihañe,
 amy te tsy haoñe'e i engay,
 tsy no'e ty handrambe an-taña' areo.

¹⁴ Le anoa'areo ty hoe: Aa vaho akore?
 Amy te IEHOVÀ ro valolombeloñe
 añivo'o naho i tañanjomban-
 katora'oy, i fañahie'oy,
 ndra te nirañe'o i valim-pañina'oy.

¹⁵ Aa tsy nanoe'e [nofotse] raike hao?
 Aa manao akore t'ie raike?
 naho tsy te ipaia'e tiry mpañori-Kake.
 Aa le itaò ty arofo' areo,
 ehe te tsy eo ty hifotetse
 amy tañanjomban-katora'ey.

¹⁶ Hejeko ty tsei-valy, hoe t'IEHOVÀ,
 Andrianañahare' Israele,
 naho ty misaroñe tiñake hoe t'ie sikiñe,
 hoe t'IEHOVÀ' I MÀroy;
 aa le itaò o tro' areoo,
 tsy mone hivalike.

¹⁷ Fa nimokore' areo
 t'IEHOVÀ amo enta' areoo.
 le manao ty hoe:

Aa vaho akore ty nampimokora'ay?
 Ami'ty atao' areo ty hoe:
 Hene soa am-pivazohoa' IEHOVÀ eo
 ze manao raty, vaho no'e!
 ndra ty hoe;
 Aia i Andrianañaharen-
 kavantañañey?

3

¹ Oniño t'ie hahitriko i ìrakoy,
 ie ty hañajary ty lalañe aoloko eo;
 le hitotsak' amy zao an-kivoho'e ao
 i Talè paia' areoy,
 toe ty ira' i fañina
 mahafale anahareoy,
 hehe t'ie mb'eo aniany,
 hoe t'IEHOVÀ' i Màroy.

² Fe ia ty hahafeake
 ty andro hitotsaha'e?
 ia ty hahafijohañe t'ie pok'eo?
 ie hoe afo fampitranahañe,
 hoe savonim-panasàñe.

³ Ie hiambesatse hoe mpampitranake
 naho mpañalio volafoty,
 hañefetse o ana' i Levio,
 hampitranake iereo
 hoe volamena naho volafoty,
 hibanabana' iareo enga an-kavantañañe am' IEHOVÀ.

⁴ Ie amy zay ho no' IEHOVÀ o banabana' Iehodà naho Ierosalaimeo,
 manahake tañ'andro taolo,
 naho tan-taoñe haehae.

⁵ F'ie hafetsako am-pizakàñe heike;
 fa valolombeloñe mahimbañe
 raho amo mpamorekeo,
 naho amo mpandrañaotseo,
 naho amo mpanao fanta vilañeо;
 naho amo mpikatramo
 ty tambe' i mpikaramay
 naho i vantotsey naho i bode-raeio;
 naho amo manitake ty ambahiny ami'ty zo'e;
 amy t'ie tsy mañeveñe amako,
 hoe t'IEHOVÀ' i Màroy.

⁶ Izaho IEHOVÀ tsy miova*
 ro tsy mahamongotse anahareo
 ry ana' Iakobeo.

⁷ Sikal' aman-droae' areo
 ty niamboho'a' areo o fañèkoo,
 naho tsy niambena' areo,
 mimpolia amako, le hitolihako,
 hoe t'IEHOVÀ' i Màroy.

Fe hoe nahareo,
 Aa vaho akore ty himpolia'ay?

* ^{3:6} Iak 1:17

- 8** Hampikametse aman' Añahare hao
t'indaty? F'ie nikamera'areo.
Aa hoe nahareo:
Ami'ty aia ty nikamera'ay?
Amo faha-foloo, naho amo engao.
- 9** Silofem-pàtse nahareo,
amy te fonga nikizo ahiko,
Eka naho ty fifeheañe toy iaby.
- 10** Hene aseseo an-driha i fahafoloy,
soa te ama' mahakama ty an-kivohoko ao,
le tsoho raho ty amy zao,
hoe t'IEHOVÀ' i Màroy,
hera hisokafako o lalan-dikerañe
hampidoandañaño fañanintsiñe
tsy hierañañe.
- 11** Le hendahako ty ama' areo
i mampibotsekey tsy hampianto ty vokan-tane' areo;
vaho tsy hañary o voa'e tsy matoeo
o vahe' areo an-tetek' aoo,
hoe t'IEHOVÀ' i Màroy.
- 12** Le hatao' ze hene fifeheañe ty hoe:
Haha nahareo; fa ho tane fanjàka,
hoe t'IEHOVÀ' i Màroy.
- 13** Nanoa'areo saontsy maràñe, hoe t'IEHOVÀ,
mbore manao ty hoe:
Akore ty nañinjea'ay azo?
- 14** Nanao ty hoe nahareo:
Tsy vente'e ty mitoroñe
an'Andrianañahare;
ino ty tombo'e ho antika
t'ie mitañe o fandilia'eo,
naho mañavelo am-pirevendreveñañe
am' IEHOVÀ' i Màroy?
- 15** Ie amy zao, ataon-tika ho haha
o mpiebotsebotseo,
eka onjoneñe o mpikitro-draha ratio,
ie mitsok' an'Andrianañahare,
vaho mipolitise.
- 16** Nifanaontsy amy zao
o mpañeveñe am' IEHOVÀ;
nañaoñe t'IEHOVÀ naho nahajanjiñe,
vaho sinokitse añ'atrefa'e eo
ty bokem-paniahiañe,
ho amo mpañeveñe am' IEHOVÀ,
naho o miisy i tahina'eio.
- 17** Ho ahy iereo, hoe t'IEHOVÀ' i Màroy,
le harovako amy andro amoriako o varakooy;
manahake ty fañarova' ondaty
i ana'e mitoroñe azey.
- 18** Ie amy zay, ho oni'areo ty fiavaha'
ty vantañe ami'ty tsivokatse,
ty mitoroñe an'Andrianañahare

ami'ty tsy mitoroñe Aze.

¹⁹ Inao, ho tondroke ty andro
hirehetse hoe toñake;
ie ho ahe-maike iaby
o mpirengenvokeo
naho o mpanao haloloñaño;

hampirebareba iareo amy andro ho aviy,
hoe t'IEHOVÀ' i Màroy,

vaho tsy hapo'e ndra vahatse ndra singa.

²⁰ Fe ama' areo mpañeveñe ami'ty añarako,
ro hanjiriha' ty andron-kavañonaño,
reketse fijangañaño an-dengon-tsaro'e eo[†];
hionjom-beo nahareo

manahake ty fivoamboañañ-tsarake boak'an-kijoly ao.

²¹ Le ho lialià' areo o lo-tserekeo;
ie ho lavenok' ambane' lelam-pandia'
areo ao amy andro anoeko zay,
hoe t'IEHOVÀ' i Màroy.

²² Tiahio i Ha' i Mosè mpitorokoy,
i nafantoko aze e Korebe añey:

o fañè naho fepetse ho a Israele iabio.

²³ Inao te hiraheko ama' areo t'i Elià[‡]
mpitoky aolo' i andro IEHOVÀ jabajaba
naho maharevendreveñey.

²⁴ Ie ty hampimpoly ty arofon-droae
amo ana'eo, naho o tron'anakeo
aman-droae'iareoo;
tsy mone homb'eo raho handafa
i taney am-pandrotsahañaño do'e.[§]

[†] 3:20 Oniño: Vol 15.38-39 [‡] 3:23 Elià: Andrianañahare; Talè Maozatse § 3:24 Zek 14:13,
Lke 1:16-17, 76

Matio

*Toñon-draza' i Norizañey
Rot 4.18-22; 1 Tan 1.34, 2.1-15; Lke 3.31-34*

1 Intoy ty toñon-droae' IESOÀ*, ana' i Davide, ana' i Abrahàme†.

2 Nisamake Isàka t'i Abraàme naho nisamake Iakobe t'Isàka; nisamake Iehodà naho o roahalahi'eo t'Iakobe; **3** nisamake i Peretse naho i Zerà amy Tamare t'Iehodà; nisamake i Hezrone t'i Peretse, nisamake i Rame t'i Hezrone;

4 nisamake i Aminadabe t'i Rame, nisamake i Nakhsone t'i Aminadabe, nisamake i Salmone t'i Nakhsone. **5** Nisamake i Boaze amy Rakhabé karapilo t'i Salmone; nisamake i Ovede amy Rote t'i Boaze, vaho nisamake i Jesè t'i Ovede.

6 Nisamake i Davide t'Jesè, le nisamake i Solomone amy vali' i Oriay t'i Davide. **7** Nisamake i Rehoboame‡ t'i Solomona; nisamake i Abià t'i Rehoboame; nisamake i Asà t'i Abià. **8** Nisamake i Jehosafate t'i Asà, nisamake i Jorame t'i Jehosafate; nisamake i Ozià t'Jorame. **9** Nisamake i Jotame t'i Ozià; nisamake i Ahaze t'i Jotame, nisamake i Hezekià t'i Ahaz. **10** Nisamake i Menasè t'i Hezekià; nisamake i Amone t'i Menasè; nisamake i Josia t'i Amone. **11** Nisamake i Jekonia miroahalahy amy faneseañe e Babolone añey t'i Josia.

12 Ie nitampetse i faneseañe e Babolone añey, le nisamake i Sealtiele t'i Jekonia; nisamake i Zerobabele t'i Sealtiele; **13** nisamake i Abihode t'i Zerobabele; nisamake i Eliakime t'i Abihode; nisamake i Azore t'i Eliakime.

14 Nisamake i Tsadoke t'i Azore; nisamake i Ahkime t'i Tsadoke; nisamake i Elihode t'i Ahkime. **15** Nisamake i Eleazare t'i Elihode; nisamake i Matane t'i Eleazare; nisamake i Jakobe t'i Matane. **16** Nasama' i Jakobe t'Josefe. I Josefa ty tañanjomba' i Marie, rene' IESOÀ tokaveñe ty hoe: i Mesià ndra i Norizañey§.

17 Aa le tariratse folo efats' amby ty boak' amy Abrahàme pak'amy - Davide; naho tariratse folo efats' amby ty boak' amy Davide sikal'amy faneseañe e Babolone añey, vaho tariratse folo efats' amby ty boak'amy faneseañe e Babolone añey pak' am' IESOÀ.

Ty Nisamaha'e

18 Zao ty nissamahañe IESOÀ: ie vinorovoro' i Josefe ty rene'e naho mbe tsy niolora'e, le tendreke t'ie nivesatse añamy Arofo-Masiñey*.

19 Ondaty vañoñe t'i Josefe vali'ey, ie tsy te hindre-toboke ama'e ndra ty hampiborake aze ho salareñe, ndra ty hamahots' aze havetrake, le nisafirie'e ty hañetake aze. **20** Ie nitsakore zay an-trok' ao, intoy ty anjely nisodehañe ama'e ami'tynofy, nanao ty hoe: O Josefe, ana' i Davide, ko marimariha'o ty handrambe i Marie vali'o amy te nampiareñe' i Arofo Masiñey i ama'ey. **21** Hisamake ana-dahy re naho hatao'o IESOÀ ty añara'e, amy te ie ty handrombake ondatikoo amo hakeo' iareoo.

* **1:** Grika: Iesòse; Malagasy beteke Jesosy; Hebreo: IESOÀ: Mpandrombake, Mpañaha † **1:** Nadika ami'ty Matio nanoeñe an-tsaontsy Hebreo, tsinikombe' i Evan Bohan tan-taoñe faha 1380

‡ **1:7** Mp I 14:21,31 § **1:16** Norizañe: Hinosotse ho lenteheñe, hañefera'e an-dio'e ze ondaty miato. Grika: Kristy; Heb: Mesiake * **1:18** Arofo; Gr: pneuma; Heb kofòke

²² Nanoeñe iaby zay hañeneke ty nampanokira' IEHOVÀ i mpitokiy ami'ty hoe: ²³ Inao, miareñe i somondraray[†] naho hisama-dahy, vaho hatao' areo Imanoela, toe Andrianañahare Amantika, ty tahina'e[‡].

²⁴ Nivañoñe amy firota'ey amy zao t'i Josefe le nanoe'e iaby i namantoha' i anjeli' IEHOVÀ azey vaho rinamb'e i vali'ey. ²⁵ Fe tsy niolora'e ampara' te nisamake i tañoloñoloña'ey vaho nanoe'eIESOÀ ty añara'e.

2

o Mpioniñeo

¹ Ie toly e Betleheme e Iehodà ao t'i IESOÀ, tañ'andro' i Heroda mpanjaka, le inge totsak' e Ierosaleme ty mpañandro* maro boak' atiñanañe aña,
² nanao ty hoe: Aia i Mpanjaka' o Jiosio vaho samakey? Fa tinalake'ay atiñanañe eñe ty vasia'e[†], vaho pok'eo zahay an-dravoravom-piasiañe hitalaho ama'e. ³ Ie jinanji' i Heroda mpanjaka le nitsiborehetoke reketse ze hene mpimone' Ierosaleme[‡]. ⁴ Aa le hene natonto'e o androanavi'eo, vaho nañontanea'e he fohi' iareo ty hisamahañe i Norizañey. ⁵ Hoe ty natoi' iareo: E Betleheme Iehodà ao, ty amy pinatetse amy mpitokiy ty hoe:

⁶ Ihe Betleheme Iehodà,
Efratà, tane' Iehodà,
Inao toe pininite'e
amo fifikoa' Iehodao rehe;
fe hirik' ama'o te hionjom-bamako
ty ho Mpifehe e Israele ao.[§]

⁷ Le kinanji' i Heroda i mpañandro rey naho natola'e vaho nitsikarahe'e am'iereo i andro niboaha' i vasiañey*. ⁸ Nahitri'e mb'e Betleheme mb'eo iereo ami'ty hoe: Akia, hotsohotsò i Ajaja-lahiy, ie rendre' areo, ampahafohino ahy, fa homb'ama'e mb'eo ka raho hitalaho.

⁹ Ie nahajanjiñe i mpanjakay le nienga; naho indroy i vasiañe niisa' iereo atiñanañe aney niaolo iareo ampara' te nipok' amy toetsey, nijohañe ambone' ty toe' i ajajay ey. ¹⁰ Nifale iereo toe nirañorano an-kobay te nahaisake i vasiañey.

¹¹ Aa ie nizilike an-traño ao le nitendreke aze naho i Marie rene'e; naho nitongaleke aolo'e eo, niambane ama'e, nanokake o horo' iareoo naho nibanabana ravoravo ama'e: volamena naho mañi-dè[†] vaho rame[‡].
¹² Hinatahata' ty anjely ami'tynofy iereo, nanoro t'ie tsy hibalike mb'amy Heroda mb'eo, aa le nimpoly mb'an-tane' iareo aña nañorike lalan-kafa.

Nikatsakatsake

¹³ Ie aña, intoy, nisodeha amy Josefe ty Anjeli' IEHOVÀ, nanao ty hoe: Mitroara, rambeso i Ajajalahiy naho i rene'e, mibionña mb'e Mitsraime aña vaho itaveaño ampara' te tohineko, amy te paiae' i Heroda havetrake i Ajajalahiy. ¹⁴ Aa le nendese'e i Ajajay naho i rene'e, ¹⁵ vaho nitambatse aña ampara' te niantantiritse t'i Heroda, hañenefañe ty nampisaontsieñe i mpitokiy ty hoe:

Boake Mitsraime aña ty nitokavako ty Anako.[§]

Fanjamanañ'Ajaja

[†] **1:23** Somandrara: ie mboe tsy nahavany lahy [‡] **1:23** Ies 7:14 ^{*} **2:1** Magos: ie mahihitse, Heb: Rabbi [†] **2:2** Vol 4:17 [‡] **2:3** Ies 60:6 [§] **2:6** Mik 5:1; Jao 7:42 ^{*} **2:7** Vasiañe: anam-panjaka, ndra anjely [†] **2:11** Heb: libanos: karaza hatae mañitse [‡] **2:11** Heb: tovoño ty hoe: Toe mira [§] **2:15** Avo 4:22; Vol 24:8; Hos 11:1

¹⁶ Ie nifohi' i Heroda ty nanoa' i mpañandro rey, le tsy hay aia ty habose'e, toe niojeoje an-troke, vaho linili'e te hahitrike amo roandria'e iabio ty hanjamañe ze hene anak' ajajalahy e Betleheme naho amparipari'e ao ze *nisamake ambane ty tao nisaontsie' i mpañandro reiy te nisamaheñe i ajalahiy.

¹⁷ Niheneke amy zay ty nisaontsie' i Jeremia mpitoky:

¹⁸ Jinanjiñe e Rama ao
ty fiarañanañañe;
fandalañe naho fangololoiháñe mafaitse:
Mirovetse o ana'eo t'i Rahelie, ntt[†]

Noly Mb'e Naz'rete

Lke 2:39

¹⁹ Ie nihomake t'i Heroda, le nitoje amy Josefe e Mitsraime ao ama'nofy ty anjeli' IEHOVÀ ²⁰ nanao ty hoe: Mitroara, rambeso i Ajajalahiy naho i rene'e, le akia mb'an-tane' Israele aña; fa mate o nipay hañoho-doza amy Ajajaio. ²¹ Aa le niongake re, ninday i Ajajay naho i rene'e, nimpoly mb'an-tane Israele mb'eo. ²² Jinanji'e te nandimbe i Heroda rae'e nifeleke e Iehodà ao t'i Horkanose‡, le nimarimarike tsy te homb'eo. Aa le nirisihe' i Anjeliy ami'tynofy re ty hitsile mb'an-tane Gilgale aña. ²³ Ie nandoake ao le nimoneñe an-drova atao Nazareta, hañeneke i nisaontsie' o mpitokio te: Hatao nte-Naz'rete re.§*

3

I Jaona Mpandipotse

Mar 1.2-6; Lke 3.3-6

¹ Nivotrake eo aña'andro rezay t'i Jaona Mpandipotse nitaroñe am-patrambei' Iehodà ao, ² le hoe re: Mitoliha am-pisolohoñañe, fa mitotoke i fifehean-dindiñey! ³ hañeneke i nampisaontsieñe Isaia mpitokiy, ty hoe: Ty fiarañanaña' ty mikoike,
Hajario am-patrambey ao
ty homba' IEHOVÀ, avantaño an-dratratoro ao o lala' i Andrianañaharen-tikañeio.*

⁴ Inge t'i Jaona, nisikim-bolon-drameva† naho nisadian-kolitsena mainte an-toha'e naho betra tra vaho tantele amboròvole ty mahakama'e. ⁵ Le niavotse mb'ama'e mb'eo ty boake e Ierosaleme, naho boak' Iehodà iaby, vaho boak' amy ze hene fifeheañe mañohoke Iordaney, ⁶ ie nisoloho amo tahi' iareoo le nilipotse‡ am' Iordaney, ty amy saontsi'ey. ⁷ Niisa'e te maro amo Fariseo§ naho Tsadokeo* ty nivotrake amy filipora'ey, vaho nanoa'e ty hoe: Ry tiri' ty mereñe! Ia ty nanoro anahareo ty hibotitsike amy haviñeran' Añahare ho tondrokey? ⁸ Mamokara vokam-pisolohoñañe ki'e; ⁹ ko mitsakore an-trok' ao ty hoe: Rae'ay t'i Abraàme; Eka! Ataliliko ama' areo, te lefen' Añahare ty mampitroatse ty ana'e Abraàme boak' amo vato retoñañe.

Mikoi-dava t' i Jaona

Mar 1.7-9; Lke 3:7-9, 16, 17

* ^{2:16} sosoke: roe tao mañambane ty amy fotoañe... † ^{2:18} Iir 31:15 Grika: solo ty "ntt" ami'ty hoe: fe tsy mete hohöen-dre, amy t'ie tsy eo ka ‡ ^{2:22} Gr: tovo'e: toe Argelaose ty aña'a'e § ^{2:23} sabakan-engeñe, f'i natsare: tsampa. * ^{2:23} Zek 9:16; Ies 11:1; Zek 3:8 * ^{3:3} Ies 40:3 † ^{3:4} Rameva: biby bey fihare, finingirañe ‡ ^{3:6} Gr: Batitsos: lipotse an-drano ao. § ^{3:7} tovoño: ndra Farizè * ^{3:7} tarira' i Tsadoke mpisorom-bey faha' i Selemò.

10 Fa mañohatse am-poto-katae eo ty fekoñe; ho firaëñe naho forotoeñe aña'afó ao ty tsy mamoë voa soa. Le hoe i màroy tama'e: Aa naho zay, ino ty hanoe'ay? hoe ty natoi' i Jaona, ee te handiva raike ami'ty tsy manañe ze aman-tsaron-droe. Aa le nimb'eo ondatio hilipotse, naho maro ty nañontane ty hoe: Ino ty hanoe'ay, Le hoe ty natoi'e: Ko hembañe aman-dra ia ia naho ko itrevoha'o vaho mifalea amo azoo. Aa le nañereñere naho nitsakore aña' arofo afa-boiñe ondaty iabio, ty hoe: he IESOÀ t'i Jaona. **11** Hoe ty natoi' i Jaona am' iabikey: Inao, toe ampiliporeko an-tsam-pisolohoañe nahareo, fe ho avy ty fatratse te amako, le tsy sazò ahy ty hampibalake i talin-kana'ey; ie ty handipotse anahareo ami'ty afo' i Arofo Masiñey. **12** Am-pitâ'e ty fanonga'e hamaopaoke ty toem-panonga'e vaho hanontoñe ty ampemba'e am-pañajañ' ao fe ho forototoe'e aña'afó tsy mete akipeke o karafo'eo.

Ty Nliporañe IESOÀ

Mar 1.9-11; Lke 3.21-23

13 Nihiriike e Galilia t'i IESOÀ, nandoake am'Iordaney hilipotse añaamy Jaona. **14** Fe nisarasara t'i Jaona t'ie halipotse le nanao ty hoe: Tsy Ihe hao ty ho nandipots' ahy, te ihe mb' amako? **15** Le hoe ty natoi' IESOÀ aze: Iantofo, amy te mañeva antika ty hañeneke ze havantañañe; aa le nampilipore' i Jaona.

16 Ie vaho nitroatse amy ranoy, le nisokafeñe o likerañeo vaho nivazoho'e nizotso hoe deho i Arofon' Añaharey, nimoneñe ama'e. **17** Le inay ty fiarañanañañe boak' andindîñe ey nanao ty hoe: Intoy ty Anadahiko, i kokoañey, vata'e kokoañe, ie ty ifaleako.

4

Zizy Valoha'e

Mar 1.12, 13; Lke 4.1-4

1 Le nendese' i Arofo Masiñey mb' am-babangoañ' ao t'i IESOÀ ho zizie' i mpañinjey*. **2** Nililitse efapolo andro naho efapolo halen-dre vaho nisaliko, **3** nitotok' ama'e i mpañinjey nanao ty hoe: Kanao Anan' Añahare, rehe, misaontsia amo vato retoañe hiova ho mahakama. **4** Fa hoe ty natoi' IESOÀ aze: Pinatetse ty hoe:

Tsy mahakama avao †ty mahaveloñe' ondaty
fa ze hene tsara‡ miakatse am-palie' IEHOVÀ.§

Zizy Faharoe

Lke 4.9-12

5 Le nindese' i mpañinjey mb'amy rova navaheñey mb'eo naho nampijohañe'e an-digiligi' i anjomba miavakey **6** vaho nanoa'e ty hoe: Naho Andrianañahare rehe, mitsambotraha ambane ey, amy te pinatetse ty hoe:

Fa linili'e ty ama'o o anjeli'eo
ty hitare Azo amo lia'o iabio,
naño*
o fità'iareoo ro hañongake Azo,
tsy mone hidasits' am-bato ty fandia'o
7 Hoe t'i IESOÀ tama'e:

* **4:1** Heb: Hasatane, rafelahi' ty hatò † **4:4** Heb : Afara' ty "avao" solo: ntt ‡ **4:4** Tsara: Gr:
Logos: venten-tsaontsy, § **4:4** Its 8:3 * **4:6** Grika toy Sab 91:11,12

Ko tsohe'o t'IEHOVÀ Andrianañahare'o.[†]

Zizy Fahatelo

Mar 1.13; Lke 4. 5-8

⁸ Aa le nendese' i mpañinjey mb' an-dindim-bohitse aña vaho natoro'e aze ze kila fifehea' ty voatse toy naho ty enge' iareo. ⁹ Le nanoa'e ty hoe: Hene hatoloko Azo o retoñañe naho ibaboha'o an-daharaña. ¹⁰ Fe hoe t'IESOÀ tama'e: Soike ty mpañinje[‡]! fa pinatetse ty hoe:

Hitalaho am'IEHOVÀ Andrianañahare'o rehe, vaho Ie avao ty hitoroña'o.[§]

¹¹ Le nisitake aze i mpañinjey, vaho niharineañ' anjely, niatrak' aze.

Ty Fifotoram-Pitoroña' IESOÀ

Mar 1:14, 15; Lke 4:14,31

¹² Ie jinanji' IESOÀ, te nasese mb'am-balabey ao t'i Jaona, le nimb'e Gilgale mb'eo. ¹³ Niarie'e ty Natseràle le nimoneña e Kapernaome-raità* am-pariparin-tane' i Zebolona aña, ¹⁴ hañeneke ty nisaontsie' Isaia mpitoky ami'ty hoe:

¹⁵ An-tane Zebolona naho an-tane Naftaly, ty lala' i riakey, alafe' Iordaney—

Galilia' o kilakila' ondatio:

¹⁶ Fa nahaisa-kazavaña ra'elahy

ondaty mañavelo añ` ieñeo,

le fa nireandreañan-kazavaña o mitoboke
an-tanen-kamoromoroñaño.[†]

¹⁷ Ie henane zay, namototse nitaroña t'IESOÀ, nanao ty hoe: Misolohoa, fa mitotoke i fifehean-dikerañey.

Nijoboñe o Mpama'e Valoha'eo

Mar 1.16-20

¹⁸ Nidraidaite aña' olo-driake Galilia eo t'i IESOÀ, le nahavazoho mpirahalahy roe, i Simona atao Petrose[‡], naho i Andrea rahalahi'e, nañifike o harato' iareoo an-driake ao, amy t'ie mpiandriake. ¹⁹ Le nanoa' ty hoe: Oriho raho, vaho hanoeko mpañarato ondaty. ²⁰ Aa le nado' iereo amy oray o harato' iareoo vaho nañorike aze.

²¹ Ie nienga mb'eo, le nahavazoho mpirahalahy roe ka: Iakobe ana' i Zebedeele[§] naho i Jaona rahalahi'e, mindre amy Zebedeele rae' iareo, nañajary ty harato' iareo an-dakañañe ao, vaho nikohe'e. ²² Nihepakepake iereo nienga i haratoy naho ty rae'iareo, nañorik' aze.

Nañafake e Galilia aña

Mar 1.39; Lke 4.44

²³ Le nimb'eo mb'eo an-tane Galilia t'i IESOÀ, nañoke am-pivoria' iareo ao, naho nitaroña ty tolotsé soa* i fifehean-dikerañey naho nañafake ze fonga areteña vaho ze hene hasilofaña am' ondatio. ²⁴ Niboele nahatsitsike ty tane' i Sirià ty nitalilieña aze; le nasese mb'ama'e ze hene nitindrien-karazan' areteña maro: o angaran-kokolampaot[†], o volevolen' angatseo naho ze azo ty tsipelatse, vaho jinanga'e. ²⁵ Valobohoke bey ty nañorike aze boake Dekapoly naho i Galilia naho Ierosaleme naho Iehodà vaho alafe' Iordaney aña.

[†] 4:7 Its 6:16 [‡] 4:10 Tovo'e ho a o Grikao: ndra satanose § 4:10 Its 6:13,14; 10:20; Ihs 24:14

* 4:13 Tovo'e ho a o Grikao: Maritima [†] 4:16 Ies 9:1-2 [‡] 4:18 Petrose: Petera § 4:21

Tovo'e Grika: Zabadao ndra Zabadà * 4:23 Tovo'e Grika: ty mavangeleo [†] 4:24 Kokolampa: tea lampo: tea havilasy

5

*Fitatañe
Lke 6.20-26*

¹ Ie tendreke i lahialeñey le nitroatse mb'am-bohitse ey naho niambesatse vaho nimb'ama'e mb'eo o mpiama'eo. ² Nanoka-palie re, naho nañòke ami'ty hoe:

³ Haha o mirèke an-trok' aoo, fa a iareo i fifehean-dikerañey*.

⁴ Haha o miharovetseo fa hohoeñet†,

⁵ Haha o trentrañeo, fa handova ty tane toy.‡

⁶ Haha o mivalingoa naho miheahea
mipay havantañañeo,

fa hanjañeñe.§

⁷ Haha o miferenaiñe,
fa hiferenaiññañe.*

⁸ Haha o malio añ'arofoot†, fa ho isa'iereo t'i Andrianañahare.

⁹ Haha o milozoke fifampilongoañe,‡

fa hatao anan' Añahare.

¹⁰ Haha o samporeraheñe ty ami'ty hatòos, fa a iareo i fifehean-dikerañey.

¹¹ Haha nahareo te injèñe naho ampisoañeñe vaho tambaimbaiñeñe, amy ze fonga haloloañe ty amako, am-bolam-bande. ¹² Mirebeha naho mandià taroba amy te ra'elisy ty tambe' areo andindìñe ao, fa hambañ' amy zay ty nampisoañeñe o mpitoky taoloo.

*Sira naho Jiro**

¹³ Sira' ty tane toy nahareo. Fe naho nàmoñe i siray, inoñe ty haniràñe aze? Toe tsy vara fa hariañe alafe ao ho lialiàm-pandia. ¹⁴ Hazavàñe an-tane atoy nahareo. Tsy lefe aetake ty rova namboareñe am-bohitse ey. ¹⁵ Tsy ameloman-jiro hampikopoke aze añ'etake ao tsy hitapasàha'e, f'ie apeke am-pitàn-jiro eo, hañazava ze hene añ'anjomba ao. ¹⁶ Aa le atsavavaho amy ze fonga ondaty ty hazava' areo, hitoroañe o sata-soa' areo ho rengeñe naho onjoneñe añatrefan-dRae' areo andindìñ'aoo.

Hafonirañe o Lilio

¹⁷ Ko atao'areo te nimb' atoy raho hamaoke Hake, Tsy nimb'atoy handrotsake fa ty hameno aze.† ¹⁸ Eka, to t'itaroñako te, ampara' te miherañañe aña i likerañey naho ty tane toy, tsy ho faopaoheñe amy Hake ndra amo Mpitokio ze ana-tsoritse ndra hiri, amy te kila ho heneke‡. ¹⁹ Ndra iaia miota ami'ty raike amy lily rezay vaho ampiohe'e ami'ty ila'e, ro hatao kabeake amy fifehean-dikerañey; fe ndra iaia mañambeñe vaho mañoke irezay, ty hatao jabajaba amy fifehean-dikerañey.

²⁰ Taroñeko ama' areo, naho tsy mandikoatse ty havañona' o Fariseoo naho o Androanavio ty havantaña' areo§ le tsy hizilike am-pifehean-dikerañ' ao nahareo.

Vono Ndaty

* **5:3** Ies 57:15; 66:2 † **5:4** Ies 61:2; 66:10,13 ‡ **5:5** Sab 37:11; Sab 37:9,11,22,29,34 § **5:6** Ies 55:1-2, Mat 4:4, Jao 6:48-51 * **5:7** Rzs 11:17 † **5:8** Sab 24:3-4 ‡ **5:9** Ies 26:3 § **5:10** Pe I 3:14 * **5:12** Heb: Isam-pange'e ro mamototse hoe zao: Hoe t'i Iesoà amo mpiama'eo henane zay: (Mat 5:13,17,20,25,31,43 6:5,24 7:13, 18:23, 21:33, 23:34) Ndra: Hoe ka ty nanoa'e: 5:27, 6:2,16,19, 7:6,15,24; 10:23,34, 11:11,16, 25:31 † **5:17** Afandra afara' i 5:19 toy ty amy rafetsey ‡ **5:18** Lke 16:17 § **5:20** Mat 23:28, 15:3-9, Mar 7:7-13, Jao 7:19, Top 7:53, Rom 2:23-27, Gal 6:13

²¹ Tsy fa jinanji'areo hao ty nisaontsieñe amo ntaoloo ty hoe:
Ko mañoho-doza*, naho:
Mikai-jaka mampihomake ty mpamono†?

²² Aa hoe raho ama'areo: Hiatre-jaka ty maha-viñetse i mpiama'ey tsy an-dengo'e, naho hampiatrefem-pivory ze manao ty hoe aman-drahalahi'e: Itrotse rehe; vaho mipay afo an-tsikeokeoke ao ze manao aman-drahalahi'e ty hoe: Ty gege tia. ²³ Aa ihe mibanabana an-kitrely vaho tiah'i'o te anaña' ty rañe'o kabò vaho itoreova'e, ²⁴ le adono aolo' i kitreliy eo i enga'oy naho akia, ifampilongo heike, izay vaho hengae'o i banabana'oy.

²⁵ Ampanintsiño masika i rafelahi'oy, ie mbe indreza'o fañavelo andalañe ey, tsy mone hasese'e ami'ty zizy, le hasese'i ziziy amy mpitoroñey, hampijoñe azo am-porozò ao. ²⁶ Eka, to t'italiliako, te tsy hiakatse ao ampara' te avaha'o ty drala honka'e‡.

Hakarapiloañe

²⁷ Fa jinanji' areo i nitsaraeñe am'iereo haehae'ey, ty hoe: Ko mañarapilo.§ ²⁸ Fe hoe raho ama' areo: ze mikiroke ampela hilà'e aze, le fa nanao hakarapiloañe an-trok' ao. ²⁹ Naho mizizy azo ty fihaino'o havana, akatraho vaho ahifiho aña; hasoa ho azo te hianto ty fange'o raike ta te homb' an-tsikeokeoke ao ty vata'o iaby. ³⁰ Tovo'e: Ie manigike azo ty fità'o, kitsiho; hasoa ho azo te ho rebake fange raike ta t'ie havokovoko an-tsikeokeoke ao ary vatañe.

Tsey Valy

³¹ Fa jinanji' areo ty nitsaraeñe amo taoloo te: Ze mitsey valy ro hanolots' aze takelam-pifanarahañe*.† ³² Itaroñeko te ze mañary valy, naho tsy t'ie nañarapilo, le tsi-mete tsyitolorañe takelam-pifanarahañe; naho o hakarapiloañe, mañarapilo i lahilahiy vaho karapilo ty mañenga i nariañey.

Sangy

³³ Toe jinanji' areo ka ty nisaontsieñe amo taoloo,
Ko mifànta vilañe ami'ty añarako,
le avaho am' IEHOVÀ o nifantà'oo.‡?

³⁴ Fe hoe raho ama' areo: ko manao fanta tsy vente'e aman-dra inoñ' inoñe,
ke amy likerañey,

fa ie ty fiambesan' Añahare;

³⁵ he ami'ty tane toy,

amy te ie ty fitongoàm-pandia'e§;

ke am' Ierosaleme,

fa ie ty rovan' Añahare*,

³⁶ he ami'ty añambone'o ie tsy mahafoty ndra mahamainte ty maròy raike. ³⁷ Ehe te ho Eka ty hoe Eka, naho ho Aiy ty hoe Tsie, fa hirik' amy ratiy ze tovo'e.†

Valefate

³⁸ Toe jinanji'areo ty nitsaraeñe amy Hake:
Fihaino soloam-pihaino,

* ^{5:21} Avo 20:13, Its 5:17 † ^{5:21} Its 16:18, Fi II 19:5 ‡ ^{5:26} Drala-honka'e: kodrantes: drala torisike bory hoe drala roe § ^{5:27} Avo 20:14, Its 5:18 * ^{5:31} Tovo'e Grika: ndra libela repodio

† ^{5:31} Its 24:1, Mat 19:9 ‡ ^{5:33} Sor 19:12 § ^{5:35} Ies 66:1 * ^{5:35} Sab 48:2 † ^{5:37} Its 23:21; Sor 19:12

naho fihitsike soloam-pihitsike.[‡]

³⁹ Fe hoe raho ama' areo:
ko vale'o raty ty raty.[§]

Fa ze mandrara-tehake azo am-piambina'o havana, atoliho ama'e ka ty havia. ⁴⁰ Ty te hanesek' azo an-jaka, higaoñe i saravi'oy, afofio ama'e ka ty saro'o. ⁴¹ Ze manjizy azo hañavelo arivo lia, mindreza ama'e ro'arivo. ⁴² Anoloro ty mihalaly ama'o, le ko ifoneña'o ty te hisongo ama'o.

*Fikokoña**

⁴³ Fa jinanji' areo ty nitsaraeñe amo taoloo:
kokò ty marine azo[†], vaho
hejeo ty malaiñe azo.[‡]

⁴⁴ Fa hoe ka raho ama'areo: Kokò o rafelahi'oo, tatao ty mamatse azo, le hasoao ty malaiñe, vaho mihalalia ho a o mampisoña naho mamorekeke azoo, ⁴⁵ soa t'ie ho anan-dRae' areo andindiñe ao; fa songa ampanjirihe'e amo ratio naho amo soao i androy, vaho ampahavie'e amo vantañe naho amo tsy vokatseo i orañey[§]. ⁴⁶ Aa naho o mikoko anahareoo avao ty kokoa' areo, inoñe ty ho tambe' areo? Tsy zay hao ty noe' o mijajiao amo mikoko iareoo? ⁴⁷ Aa naho o longo'areo avao ro añontanea'areo, ino ty noe' o mandikoatse o kilakila'ndatio. ⁴⁸ Aa le mivantaña manahake te vantañe t'i Rae' areo*.

6

Ty Fañasoña

¹ Mitaòa, hera hanoe' areo añatrefa' ondatio o fatariha' areoo, hitsiriria' iareo, f'ie ho po-tambe aman-dRae' areo andindiñe ao.

² Ie mitolon-kavantañañe, ko mikoi-dava ndra mitioke trompetra hiaolo azo manahake o soamiatrekeo* fa noe' iereo an-dalaño naho an-tsena ey o falalà' iareoo soa te ho isa' ondaty. Eka! to ty asako ama'o t'ie fa nandrambe tambe. ³ F'ihe naho manao fatarihañe, ko ampahafohineñe ty fità'o havia ty noe-pità'o havana ⁴ soa te hihaja i fatariha'oy; le i Rae'o mahavazoho añ'etake ro hanambe azo.

Ie Miloloke

Lke 11.2-4

⁵ Ie mihalaly rehe, ko mañonjom-peo, le ko manao soamiatreke lonjetse, mpitea halaly am-pitontonañe ao naho an-kotson-kiririsa ey, miloloke andreham-piriñake hijanjiña' ondaty hilombofa'e. Eka! to t'itaroñako t'ie fa aman-tambe.

⁶ Fa ihe, naho miloloke, miziliha am-pandrea'o ao le agabeño ty lala'o, naho milolofa aman-dRae'o am-bangiñe ao, vaho ho tambezen-dRae'o mivazoho añ'etake ao.

⁷ Inahareo ka, naho mihalaly, ko mibeobeoke manahake o tsereheñe, ie atao'iereo ho janjiñeñe ty amo figaradadàha' iareoo. ⁸ Aa le ko itsikombeañe. Ami'te arofoanan-dRae' areo andindiñe ao o enta' areoo aolo' ty ihalalia'areo?[†]

⁹ Inao ty hilolofa' areo:
Ry Rae'ay andindiñe ao,
ho masiñeñe ty tahina'o.

[‡] 5:38 Avo 21:24; Sor 24:20; Its 19:21 [§] 5:39 Sab 37:1, 8; Rzs 24:19 * 5:42 Lke 6:27, 32 † 5:43 Rzs 8:17, Its 19:18 [‡] 5:43 Tsy atoy, fa ami'ty Fañèm-Pilieram-batañe Komrane 9:21-26 [§] 5:45 Lke 6:35, Top 14:16-17: * 5:48 Fot 17:1, Mp1 8:61, Sab 119:1, Jn1 2:5, Heb 6:1 * 6:2 Tovo'e Grika: ndra ipokrate † 6:8 Ies. 65:24

10 Ho tahieñe ty fifehea'o,
hanoeñe an-dindiñe ao
naho an-tane atoy o satri'oo.
11 Atoloro anay nainai'e ty mahakama'ay,
12 Apoho o tahi'aio,
manahake ty ihevea'ay o anaña'ay hakeoo.
13 Ko minday anay mb'an-kaozaram-panjiziañe,
fa kalaño amy ze atao raty‡,
[toe Azo ty fifeheañe, ty haozarañe vaho ty engeñe nainai'e.]§ Amene.
14 Naho hevè' areo ty hakeo' ondaty, le ho hahà' i Rae'areo andindinéy
ka o tahi'areoo. **15** Fe naho tsy apo' areo ty hakeo' ondaty, tsy ho hahàndRae'areo o tahi'areoo.

Lilitse

16 Ie mililitse, ko manao laharam-pandalàn-tsoamiatreke,
mañamonjetse laharane hisenge te mililitse añatrefa' ondaty. Eka!
to t'itaroñako t'ie fa nahazo tambe. **17** F'ihe, naho mililitse sasao ty
añ'ambone'o; **18** tsy mone ho oni' ondaty t'ie mililitse, naho tsy t'i Rae'o
añ'etake ao, vaho i Rae'o mahavazoho an-kafits'aoy ro hanambe azo.

*Vara**Lke 11.34-36; 12.22-34*

19 Ko mitolom-pamotry vara an-tane atoy, habotse' ty oletse naho ty eno,
ndra hipoñafa' ty mpikizo hañaoke.
20 Mañajà vara andindin' ao, ami'ty tsy hagedra' ty oletse naho ty eno,
mbore tsy ho gorobahe' ty mpikizo hamaoke; **21** fa ami'ty nampipoha'o o
vara'oo, ao ka ty arofo'o.

22 Failo' ty sandry ty fihaino'o*, ie vantam-pañente o fihaino'oo le tsy
haieñe ty sandri'o. **23** Aa naho mitsikirike† o fihaino'oo, le himoromoroñe
iaby ty vata'o; ie maieñe ty zava ama'o ao, le hene haieñe o lala'oo!

24 Tsy eo ty mahafitoroñe talè roe, hera ho falai'e ty raike naho hikokoa'e
ty raike, ke hiasia'e ty raike vaho sirikae'e ty raike; tsy lefe'areo toroñeñe
t'i Andrianañahare naho ty voatse toy.

25 Inao ty itaroñako, Ko marimarihe' areo ty havelo'areo, ty ho kamae'
areo ndra ty hinoma' areo, vaho ty sandri' areo, ty hisafora' areo. Tsy
likoare' ty troke hao ty mahakama, naho ty sandriñe ty sikiñe?

26 Heheke o voron-dikerañe: tsy mitongy, tsy mandrofotse vaho tsy
mañoroñe an-driha, fa fahana' i Rae'areo onjoneñey. Tsy sarotse te
am'iereo v'inahareoo?

27 Ia ama' areo, te mahimahiñe ro mahatovoñe ty haabo'e kiho raike?
28 Aa ino ty marikarihañe amo saroñe? Birèto o befelañe‡ an-tetekeo,
ty fitiri'e; ie tsy mandrorotse, tsy manenoñe, **29** fe itaroñako te, ndra i
Solomona ami'ty enge'e iaby, tsy nihamiñe manahake ty raike ama'e. **30** Aa
naho zay ty ampisikinan' Añahare ty vinda am-bare mizorazora ao, ie
maindoñe androany naho miheatse vaho ahifike an-toñake ao hamaray;
tsy mandikoatse zay hao nahareo ry kede fatokisañe?

31 Aa kanao zay ty itarean' Añahare, ko mihakahaka manao ty hoe:
Ino ty ho hane'ay? ndra, Ino ty ho nome'ay? ndra ino ty ho sikina'ay,
32 amy t'ie hene paie' o sandriñe, vaho arofoanan-dRae' areo ze paia' areo
iaby. **33** Tsoeho hey i Fifehean' Añaharey naho ty havantaña'e; vaho hene

‡ 6:13 Mat 26:41 § 6:13 Sab 145:11,12: * 6:22 Heb: Fihaino: hilala, fatarinhañe † 6:23 Heb:
dagola ndra matity ‡ 6:28 Abeja'e: Gilione

hatolotse anahareo. ³⁴ Ko angovitañe ty hamaraiñe, fa ho vazobazore' i hamaraiñey o azeo. Tsahatse ty andro o haembera'eo.

7

*Zaka' Ondaty**Lke 6.37-42*

¹ Ko mirihy, hera ho zakaeñe. ² Ami'ty fizakañe izakà' areo ty anjakañe anahareo, naho ty fañaranañe añarana' areo ro añaranañe ama'areo. ³ Akore te biribirie'o ty ahetsé am-pihaino' ondatio, fe tsy isa'o i boda am-pihaino'oy? ⁴ Akore ty anoa'o am'indatiy, ty hoe: Eo heike, hañifihako o ahetsé am-pihaino'oo; te mone hehe ty boda am-pihaino'o ao? ⁵ Soamiatreke! Ahifiho aña hey o boda a' maso'oo, zay rehe vaho hahafibiretse, hañifike i ahetsé am-pihainon-drañe'oy.

⁶ Ko atolotse ami'ty amboa ty hena miavake, naho ko apoke aolon-dambo eo o hange' areoo ke ho vazañe'e; hera hitolike handrimitse azo.

*Mihalalia, Mikodebea, Mampikonkoña**Lke 11.9-13*

⁷ Mihalalia aman'Añahare, le ho tolorañe, mikodebea le hahaoniñe, mampikonkòña le hisokafañe; ⁸ amy te songa mahazo ze mihalaly, hahaisake ty mitsoeke; vaho ho sokafañe ty mitrehentreheñe. ⁹ Ia ama'areo, naho ipaia' ty ana'e mofo, ro hañomey aze vato? ¹⁰ Ke ihalalia'e fiañe, ro hanzoa'e mereñe? ¹¹ Aa ndra te raty nahareo ro mahay mifampanjotso raha soa, sandrake t'i Rae' areo andindiñe ao ro hanolotse i Arofo'e Soa amo mihalaly ama'eo.

*Lily Volamena**Lke 6.31*

¹² Aa ndra inoñ' inoñe ty tea' areo hanoe' ondaty ama'areo, anò am'iereo. Fa zay t'i Hake* naho ty tsaram-pitoky.

Ty Lalañe Roe

¹³ Iziliho i lalambe maifitsey, fa mivañavaña ty lalambe naho laleke ty lalañe mb'am-piantoañe mb'eo vaho maro ty mimoake ao. ¹⁴ Mizitse ty lalam-bey naho mikitítse ty oloñoloñe mañity mb'an-kaveloñe mb'eo; Tsy ampeampe ty mahaoniñe aze.

*o Voa'eo**Lke 6.43-45*

¹⁵ Itaò o mpitoky vilañet[†] miheo mb'ama' areo am-bolon' añondrio, te mone amboa romotse ty am-po ao. ¹⁶ O sata'eo ro hahaohinañe iareo; potore' ondaty am-patike hao ty valoboke? Ke amo farehetseo ty sakoañe?

¹⁷ Hene mamoa voa soa ze hatae soa, naho fonga mamoa voa raty ty hatae mimontamontañe. ¹⁸ Tsy mete mamoa voa raty ty hatae soa, naho tsy lefe' ty hatae raty ty hamoa voa soa. ¹⁹ Hene forototoeñe añafo ao ze hatae tsy mamoa voa soa, ²⁰ aa le o voa'eo, toe o sata'eo, ty hahaohinañe iareo.

*Mizilike ao ty Mpañorike Hake**Lke 6.46*

²¹ Amy te tsy ze fonga manao amako ty hoe: Talè, ro himoake amy fifehean-dikerañey, fa ze manao o satrin-dRaeko an-dindiñe ty hiziliike am-pifehean-dikerañey ao. ²² Amy andro zay maro ty hanao amako ty

* **7:12** Hake: i boke lime' i Mosè; ze lilin'Añahare. † **7:15** 7:23, Iir 5:31, 6:13, 14:14, Iek 13:9, Fi II 18:22

hoe: O Talè, Talè, tsy i tahina'oy hao ty nitokia'ay? naho i tahina'oy ty nañaria'ay kokolampa, mbore i tahina'oy ty nanoa'ay raha tsitantane maro? ²³ F'ie hanoako ty hoe: Le lia'e tsy nifàntako nahareo, misitaha amako ty mpitolon-tsereke retia.[‡]

ty Mpamboatse roe

Lke 6.46-49

²⁴ Aa ze hene mahajanjiñe o volako rezao naho itoloña'e, ro razañeko amy t'indaty mahihitse nañoreñe anjomba an-damilamy. ²⁵ Nikojojojoaha' i orañey, naho nifofoha' o tiokeo, f'ie tsy nirotsake, amy te lamilamy ty mananta'e. ²⁶ Ze mahajanjiñe o volakoo, fe tsy tarè'e[§], le hambañe amy t'indaty minèñe nañoren-traño am-paseñe. ²⁷ Nilihitse i orañey, nitorotositse i sorotombakey, namaoke i trañoy i tiokey, naho nihotrake vaho havaràta ty fideboña'e.

Toe aman-dily

²⁸ Ie nitsara i entañe zay t'IESOÀ, le hene nilatsa amy fañoha'ey; ²⁹ amy te an-kaozaram-bey i fitaroña'ey, tsy nanahake o androanavi' iareoo.

8

ty Angamae

Mar 1.40-44; Lke 5.12-14

¹ Ie nizotso boak'am-bohitse ey t'i IESOÀ le norihe' i lahialeñey, ² Intike te pok' eo ty aman' angamae niambane ama'e, nanao ty hoe: O Rañandria, mahajangañ' ahy v'iheo? ³ Nahiti' IESOÀ ty fità'e, nitsapa aze le nanao ty hoe: Satriko t'ie halio, maliova. Le nilioveñe amy haangamae'ey re amy ora* zay. ⁴ Le hoe t'i IESOÀ tama'e: Mitaoa tsy hatalili'o ama' ondaty, fe akia mb'amy mpisoroñey mb'eo, le ibanabanao ty enga linili' i Mosè amy Ha'areoy.

Ty Mpitoro' i Mpifele-jatoy

Lke 7.1-10

⁵ Ie nigodañe mb'e Kapernaome-hamartà ao t'i IESOÀ, le nifanalaka ami'ty mpifehe-zato nihalaly ama'e ⁶ ty hoe: O Rañandria, mändre antrañoko ao i ana-dahikoy, tokoe' ty hakepeket[†], ie deme'e ty amy hasilo'ey. ⁷ Hoe t'i IESOÀ tama'e: Homb'eo raho hañafak'aze. ⁸ Aa hoe ty natoi' i mpifehe-zatoy: O Rañandria, tsy sazò ahy ty homba'o ambane' tafo-trañoko ao, iantofo avao, le ho jangan-dre. ⁹ Mpanan-kakeo raho, naho manan-dily[‡] aman-tsoavala reke-piningitse; ie anoeko ty hoe: Dañel' ami'ty raike le mandeha, Mb'etoa, le pok'eo, vaho amo mpitorokoo ty hoe: Ano zao, le anoe'iereo. ¹⁰ Jinanji' IESOÀ, le nilatsa vaho hoe re amo mpañorike azeo: Eka! to t'ivolañako te mbe tsy nahatreo fatokisambey manahake zao e Israele ao raho. ¹¹ Taroñeko ama' areo te maro ty hitotsake boak' atiñanañe aña naho hirik' ahandañafañe aña hitraopitofañe amy Abraàme naho am' Isaka vaho am' Iakobe amy fifeheandikerañey, ¹² fe hafetsake an-kamoromoroñan-tsikeokeok' ao o ana' i fifeheñañeio; fangololoihañe naho ali-vazañe ty ho ao.

¹³ Le hoe t'i IESOÀ tamy mpifehe-zatoy: Akia; fa ama'o ty amy natokisa'oy, vaho nijangañe amy ora zay i ajalahiyo.

[‡] 7:23 Sab 6:8; Mat 7:15, 13:41-42 [§] 7:26 Mat 7:15,13:41-42 * 8:3 Ora: Gr. naho Heb: 'Hora': ty haela' ty fangen-antoandro ie zaraeñe folo-ro'amby mifototse ami'ty manjirik'andro pake tsofots'andro. [†] 8:6 Tovo'e: toe paralatiko [‡] 8:9 Isosoho: amo Fariseoo, naho

*Ty Rafoza' i Petera Ampela
Mar 1.29.34; Lke 4.38-41*

¹⁴ Ie henane zay, nizilike añ'anjomba' i Petera ao t'i IESOÀ, le naheo'e te natindri' ty hamae-sandriñe i rafoza'e ampelay. ¹⁵ Nitsapae'e ty fità'e le nisitak' aze i firemporempo'ey, vaho nitroatse nitoroñ' aze.

¹⁶ Ie tsatoke i harivay, le nendese' iareo ama'e o vinolevolen-kokolampao naho hinaha'e an-tsara avao, vaho nafaha'e iaby ze hasilo-fañe, ¹⁷ hañenefañe i nisaontsieñe añañam' Isaia mpitoky, noro an-tiahuy, ty hoe:

Toe rinambe'e o hakepehan-tikañeo, vaho nivavè'e o hasilofan-tikañeo. §

*Naho te ho Mpiama'e
Lke 9.57-62*

¹⁸ Ie nivazoho' IESOÀ te niarisehoa' i lahialeñey, le nafanto'e te hitsake mb'alafe i riakey eñe. ¹⁹ Le pok'eo ty androanavy* nanao ty hoe ama'e: O Talè, hañorik' Azo raho ndra aia'aia ty hañaveloa'o. ²⁰ Le hoe ty natoi' IESOÀ aze: Manan-joho o farasio, aman-traño o voron-dikerañeo, fe tsy aman' ankalañe ty añambone' i Ana' ondaty, ana' i tsy nahavanilahiy†. ²¹ Hoe ty nanoa' ty mpiama'e raike: Apoho hey raho hiavotse handentek' an-draeko. ²² Hoe t'i IESOÀ tama'e: Oriho raho; adono handeveña' o mihomakeo o vilasi' iareoo.

*Nipendreñe i Riakey
Mar 4.35-41; Lke 8.22-25*

²³ Nijon-dakañe t'i IESOÀ naho nindre ama'e o mpiama'eo le ²⁴ nikofaoke amy riakey ty tio-bey naho loho nikabokaboke o onjaø vaho natao te hifoifoy i lakaney. ²⁵ Nimb'ama'e mb'eo o mpiama'eo nihalaly ama'e ty hoe: O Talè, rombahao zahay, tsy mone hivetrake. ²⁶ Hoe re tam'iereo: Ino ty ifampitoloha' areo, ry kede fatokisañeo? Niongake re, le trinevo'e i tiokey naho i riakey hitsiñe, le nipendreñe ami'ty manao zao. ²⁷ Nitrea' ondatio le nilatsa vaho nanao ty hoe: Ia v'itoy t'ie manao i satri'ey o tiokeo naho i riakey?

*Anga-draty am-po Lambo
Mar 5.1-17; Lke 8.26-37*

²⁸ Ie tafatsàke i riakey, le niheo mb' an-tane Gadary‡ alafe' i riakey eñe, naho nifankanjò ama'e t'indaty roe vinolevolen-kokolampa hirike amo kiborio, hay aia ty fidabadoà' iareo, kanao tsy nahafiranga mb'eo ondatio. ²⁹ Nitazataza ty hoe ama'e iareo: Inoñe ty iharoan-tika, IESOÀ, Anan' Añahare? Niheo mb'etoañe aolo' i àndroy v'iheo hampisoañe naho handrotsake anay? Hoe t'i IESOÀ am'iereo: Mivoraha boak' ao ty valobohòke lo retia. ³⁰ Nandrazeñe ey hoeke ey ty mpirai-tron-dambo maro, ³¹ le nitoreova' o kokolampao ami'ty hoe: Kanao tsy mete tsy iakara'ay, añomeo lily himoaha'ay amo mpirai-tron-dambo eio. ³² Le hoe re tam' iereo: Soike! Le nifaoke ama'e iereo, nitsamoake amy lambo rey; naho nitsondemboke amy zao i mpirai-tro-damboy nidorasitse mb'an-driake mb'eo vaho niòpo an-drano ao. ³³ Nangebahebake o mpiarakeo le nitriban-day, naho fonga natalili'iereo an-drov'ao, vaho hene nirevendreveñie i rovay. ³⁴ Niavotse mb'eo iereo hanalaka IESOÀ; niisa' iereo naho nihalaly ama'e te tsy hitoam-ban-tane' iareo.

§ 8:17 Ies 53:4 * 8:19 Mpanoki-dily: toe mpañotsohotso naho mpañanatse Hake † 8:20 Ies 7:14 ‡ 8:28 Tovo'e ami'ty Grika: ndra, Ginitrarose

9

*Ty Lahilahy Kepake
Mar 2.1-12; Lke 5.17-27*

¹ HNijon-dakañe t'i IESOÀ, le nimpoly mb'an-tanà'e mb'eo iereo.
² Nendeseñe ama'e ty nisilofa' ty hakepehañe* nandre an-tihî'e eo; nivazoho' IESOÀ ty fatokisa' iareo le hoe re am' indaty silokey: Anake, misomoboha fa hinaha ty figahiñan' Añahare o tahi'oo. ³ Hoe ty nitsakorean' arofo' o androanavy ila'eo: Miteratera itia. ⁴ Nioni' IESOÀ o vetsevetse' iareo, le nanoa'e ty hoe: Ino ty aereñerea' areo raty añ'arofo ao? ⁵ Ty aia ty mora volañeñe, ke ty hoe: Malio hakeo rehe, he ty hoe: Mitroara, mañaveloa? ⁶ Fe, ty hampahafohinañe anahareo te aman-dily an-tane atoy i Ana' ondatiy hañaha tahiñe: le hoe re amy nisilofey: Mitroara, rambeso o tihi'oo vaho mañaveloa. ⁷ Niongake re, nimpoly mb'an-kiboho'e mb'eo. ⁸ Nahaisake i lahialeñey le loho nañeveñe vaho nandrenge an' Andrianañahare mpanolotse faozarañe hitoloñe hoe zay am'ondatio.

*Kinanji'e t'i Matio
Mar 2.14; Lke 5.27, 28*

⁹ Ie nienga t'i IESOÀ, le nahavazoho ondaty niambesatse am-pandambañam-pifampikaloan-drala eo; i Matio† ty tahina'e. Le hoe re tama'e: Antao hañorike ahy. Aa le niongake re nañorike aze.

*Mpanaha To
Mar 2.15-17; Lke 5.29-32*

¹⁰ Nampihova'e añ'anjomba hikama, le ie nikama, intoa typiaroteñé naho lo-tsereke maro am-pandambaña'e eo, le hehe t'ie nitrao-pikama amy IESOÀ naho amo mpiama'eo. ¹¹ Nioni' o Fariseoo zay le nanao ty hoe amo mpiama'eo: Ino ty itraofa' i Talè' areoy fikama amo piaroteñé naho borololoo? ¹² Jinanji' IESOÀ zay, le hoe re: Tsy o jangañeo ro mipay ho tahañe, fa o silokeo. ¹³ Akia, tsatsiho hey i pinatetsey: Fiferenaiñañe ro paiako fa tsy soroñé‡; tsy nivotrake atoy raho hañaha o vantañeo, fa o mpanan-tahiñeo.

*Tsy Mililitse Heike
Mar 2.18-22; Lke 5.33-39*

¹⁴ Le nomb'ama'e mb'eo o mpiamy Jaonao, nanao ty hoe: Manao akore te beteke mililitse zahay naho o Fariseoo, fe tsy mililitse o mpiamy'oo? ¹⁵ Le hoe ty natoi' IESOÀ: Tsy mahafirovetse ndra mililitse o mpiamy mpañengaio t'ie mbe am'iereo? Ho avy ty andro hanintahañe i mpañengay, zay iereo vaho hililitse. ¹⁶ Tsy eo ty mampianto ty ila' ty sikiñe vao ami'ty tsorodea, amy te manibake i tsorodeay i takekey mañindra i riatsey. ¹⁷ Mbore tsy añiliñañe divay vao ty zonjon-kolitse hambo'e, ke hiponake i holitsey le hilongañe i divaiy, vaho hianto i holitsey; aiy! toe ailiñe an-jonjon-kolitse vao ty divay vao le songa mihaja i roroey.

*Nisotrake
Mar 5.21-43; Lke 8.40-56*

¹⁸ Ie sinaontsi'e zay, pok'eo ty roandriañe niambane ama'e, nihalaly ty hoe: O Talè, nisimba aniany i anak' ampelakoy, ehe mihavia,

* **9:2** Tovo'e ami'ty Grika: ndra paralitiko † **9:9** Nabeja'e ami'ty Grika: Matieo ‡ **9:13** Hos 6:6

hampitongoà'o fitàñe, hameloñ'aze. ¹⁹ Niongake t'i IESOÀ le nimbeo, ie naho o mpiama'e ama'eo.

²⁰ Intia, te nimb'am-boho'e ao nitsapa ty riran-tsarimbo'§ ty rakemba nisilofe' ty lio-lava folo taoñe ro'amby; ²¹ ie naereñère an-trok'ao ty hoe: Ndra te i saro'ey avao ty paoheko, le ho haha amy zao. ²² Nitolike t'i IESOÀ le nanoa'e ty hoe: Misomobòha anako, ty aman' Añahare, andriañen-dre, fa nahajangañ' azo o fatokisa'oo. Nijangañe amy oray avao re.

²³ Ie nizilike añ'anjomba' i roandriañey ao, le nahavazoho ondaty maro nandala, ²⁴ le nanoa'e ty hoe: Miavota iaby, vaho ko mirovetse, miroro i ajajampelai fa tsy simba. Fe natao' iareo ho ondaty misole, le hoe iereo, Tsy nitrean-tika hao t'ie nirobake? ²⁵ Aa ie nakare' IESOÀ alafe ao, le niheo mb'ama'e re nitsapa ty taña'e vaho nitroatse i ajajampelai. ²⁶ Niboele amy tane iabiy i talily zay.

Nahaoniñe t'i Goa

²⁷ Nisitake t'i IESOÀ, le nihitrihitry mb'ama'e ty fey roe nikaikaike ty hoe: Tretrezo zahay, ry Ana' i Davide. ²⁸ Ie avy amy anjombay, le nisitsitse mb'ama'e i fey rey, naho nanoa'e ty hoe: ²⁹ Hampijangañe anahareo ty fatokisa' areo. ³⁰ Nibileake amy zao o fihaino' indaty roe reio vaho nahaisake; nafanto' IESOÀ am'iareo ty hoe: Asoao tsy ho fohiñe i raha zay. ³¹ Niavotse mb'eo amy zao iereo nanitsike i taney, haharendrehae'e aze.

Nisaontsy t'i Moañe

³² Nienga t'i IESOÀ, le nassese mb'ama'e t'indaty moañe niangara' ty kokolampa. ³³ Naria'e i kokolampay le nisaontsy i moañey. Nilatsa i lahialeñey, nanao ty hoe: Mbe lia'e tsy niisan-tika e Israele atoa ty manahake zao. ³⁴ Hoe o Fariseoo: Toe i talèn-kokolampay ty añaria'e angadraty.

Tsy Ampe o Mpiekeo

³⁵ Niariary mb'amo rova naho tanàñe iabio re nañoke amo fitontona' iareoo, naho nitaroñe i talili-soay naho nañafake ze hene areteñe vaho ze atao halemeañe. ³⁶ Nivazoho' IESOÀ i lahialeñey, le niferenaiña'e, amy t'ie nifoezapoezake, nandrenàndre ey hoe añondry tsy amam-piarake. ³⁷ Le hoe re amo mpiama'eo: Maro o ampemba mizorazora eio, fe tsy ampe o mpanatakeo. ³⁸ Aa le halalio t'i Talè' o mahakama mizorazorao ty hañiraha'e mpanatake maro hanatake o ampemba'eo.

10

Nañirake i Folo-Roe'Amby rey

Mar 6:7; Lke 9:1

¹ Tsinikao' IESOÀ i mpiama'e folo ro'amby rey naho nomea'e lily amo anga-draty iabio, hañariañe irezay, vaho hampijangañe ze hene hasilofañe naho ze arete-mandrambañe. ² Zao ty tahina' i folo ro'amby nitokaveñe Firaheñe rey:

I Simona atao Petera,
nhaho i Andrea rahalahi'e;

³ i Filipo naho i Bartolomeo;

Iakobe* naho i Jaona rahalahi'e ana' i Zebedeele;
i Tomasy naho i Mat'tý†, ie nifohiñe ho
mpampisongo mpangalak'ana'e;

§ 9:20 Vol 15:37-41, Its 22:12 * 10:3 Heb: tovo'e: atao Jimy † 10:3 tovo'e: toe Matio,

Iakobe ana' i Alofey naho i Tereose;

⁴ i Simona nte Kanana[‡],

vaho i Joda Askareiotà nifotetse azey.

⁵ Nirahe' IESOÀ i folo ro'amby rezay le nafanto'e ami'ty hoe: Ko mañavelo mb'an-tane' o kilakila ondatio, vaho ko migodañe mb'an-drova' o nte Samariao. ⁶ Akia mb'amo añondry nandrike amy anjomba' Israeleio.

⁷ Taroño am'iereo te ho heneke i fifehean-dikerañey. ⁸ Jangaño o marareo, ampolio amo vilasio ty haveloñe, liovo o angamiae, mañaria kokolampa; le ko mandrambe sara, fa am-patarihañe ty nahazoa' areo, matariha ka.

⁹ Ko mamotry vola-mena ndra vola-foty; ndra vara an-kontra' areo; ¹⁰ ndra sikiñe halimbe, ndra hana, ndra kobaiñe am-pita'areo; amy te mañeva rima mahaeneñe ty mpièke.

¹¹ Amy ze tanàñe ndra rova iziliha' areo, aňontaneo, ia t'indaty vañoñe ama'e, le mitambara ao ampara' te mienga. ¹² Ie mizilike aň'anjomba ao, ampanintsiño ami'ty hoe: Hanintsiñe ty anjomba toy, naho Fañanintsiñe amy ze hene mpimoneñe ama'e. ¹³ Ie mañeva i anjombay, le ho ama'e i fañanintsi' areoy, f'ie tsy mañeva le himpoly ama' areo i fañanintsi' areoy. ¹⁴ Naho eo ty tsy mampihova, tsy mañaoñe anahareo, le avoto i anjombay vaho ahintsaño ty debole am-pandia' areo. ¹⁵ Eka! to t'itaroñako te soa ho a i Sodoma naho i Gomora amy andro zay te amy rovay.

Fampisoañañe

¹⁶ Inao, ahitriko hoe añondry aňivo amboa-romotse nahareo; aa le mahihira hoe mereñe vaho manoа hatso-pon-deho. ¹⁷ Itaò ondatio, fa tsy am-pivori' iareo naho amo anjomba fitontona' iareoo ty aneseañe anahareo, ¹⁸ fa amo mpifeheo naho amo mpanjakao, hahafitaroña' areo ahy am' iereo naho amo kilakila'ondatio. ¹⁹ Ie tsepahe' iereo, ko aliheñe amy ze ho saontsie' areo, fa hatolotse amy ora paiañe azey ty ho saontsie' areo. ²⁰ Tsy inahareo ty hisaontsy, fa i Arofo-Masin-dRaekoy ty hitsara aňama'areo.

²¹ Hasesen-drahalahy ty rahalahi'e havetrake, naho ty rae ty ana'e[§]; hitroatse aman-droae'e o anakeo, haneseke iareo ho koromaheñe. ²² Ho fañinjeañe naho fañembañañe amy ze hene fifeheañe nahareo ty ami'ty aňarako, fa ze mahafeake pak' amy figadoñañe nifantañañey ty ho rombaheñe*. ²³ Ie horidañañe ami'ty rova toy, mitribaña an-day mb'ami'ty ila'e. Eka! to t'itaroñako te, tsy ho tsitsi' areo o rova' Israeleo ampara' te totsake i Ana' ondatiy.

²⁴ Tsy ambone' i talè'ey ty mpiòke, naho tsy ambone' i tombo'ey ty ondevo. ²⁵ Mahaeneñe i mpiokey te ho hambañe amy talè'ey, naho te hanahake i tombo'ey ty mpitoroñe. Aa naho natao' iereo Baalzebobe[†] i talèn' anjombay, àntsake o ana' i anjomba'eio. ²⁶ Ko ihembañañe, amy te tsy eo ty tsy haboake ndra mietake ze tsy hampahafohinañe. ²⁷ Ze itaroñako aň'ieñe ao, isaontsio an-kazavàñe ey; naho ze janji'areo an-dravembia, itseizo an-dalambez.

²⁸ Ko mirevendreveñe amo mpamono sandriñe f'ie tsy maha-vono arofo. Te mone eveño i maharotsake stroke naho sandriñe an-tsikeokeok' aoy. ²⁹ Tsy aletake drala raike hao ty foly roe? Fe leo raike ama'e tsy hipoke an-tane naho tsy satrien-dRae'areo an-dindiñe ao. ³⁰ Tsy fa niaheñe iaby hao ze maroin' aňambone' areo? ³¹ Ko mahimahiñe, ie lombolombo' o folio.

[‡] 10:4 tovo'e: toe i Simone Cananajoise § 10:21 Mik 7:6 * 10:22 Mat 24:13, † 10:25 Baalzebobe: samposampo' o nte Pelistio 2Mp 1:2-3

³² Ze mañonjoñe ahy añatrefa' ondatio, ty honjoneko añatrefan-dRaeko andindiñ' ao.[‡]

³⁴ Ko atao' areo te niavy hanese fañanintsiñe an-tane atoy raho; tsy niavy hanese fañanintsiñe fa fibara[§]. ³⁵ Ty hampiavakavahañe ondatio ty nivotrahako atoy,
ty ana-dahy aman-drae'e,
ty anak-ampela aman-drene'e,
ty vinanto-ampela aman-drafoza ampela'e

³⁶ Ho rafelahi'ondaty o kokoa'eo*.

³⁷ Tsy mañeva ahy ze mikoko rae ndra rene mandikoatse ahy, naho tsy mañeva ahy ze mikoko ana-dahy ndra anak-ampela mandikoatse ahy,

³⁸ Tsy mañeva ahy ze tsy mandrambe i hatae ajale'ey vaho mañorik' ahy.

³⁹ Ze mpitea havelo ro hañanto aze, fe ho tendreke amy ze mamoe'ay ty amako. ⁴⁰ Ze mandrambe anahareo, mandrambe ahy, naho ze mandrambe ahy mandrambe i nañirake Ahiy. ⁴¹ Ze mandrambe mpitoky ami'ty tahina' ty mpitoky, ro handrambe ty tambem-pitoky; ze mandrambe ty vañoñe ami'ty tahina' ty vañoñe ro handrambe ty tambe' i vañoñey. ⁴² Ze manjotso rano manintsiñe am-pitovy ami'ty raike amo kedeke retoa ami'ty tahina' ty Firaheko, Eka! to t'ivolañako t'ie tsy mbia ho motso tambe.

11

¹ Ie nagado' IESOÀ ty fañòhañe i mpiama'e folo ro'amby rey, le nienga, vaho nafanto'e ama'e ty hampioke naho hampitao amo rova' iareoo.

t'i Jaona

Lke 7.19-30

² Ie tam-porozò ao t'Jaona, le jinanji'e o fitoloña' IESOÀ le nirahe'e ty mpiama'e roe, ³ hanoa' iareo ty hoe: Ihe hao i ho aviy, ke mbe aña i tamaen-tikañey? ⁴ Hoe ty natoi' IESOÀ am'iareo: Akia, atalilio amy Jaona o niisa' areoo naho o jinanji' areoo: ⁵ Mahaisake o feio, mitsontike o kepekeo, lioveñe o angamaeo, mahajanjiñe o giñeo*, vañoneñe o vilasio vaho votsoleñe o rarakeo[†]. ⁶ Faly ze tsy aliheñe ty amako.

⁷ Naho nañavelo iereo le nitaroñe i Jaona amy lahialeñey t'i IESOÀ: Handrèndreke inoñe ty nihitrifa' areo mb'am-patram-bey aña? Ty vinda natroetroen-tioke hao? ⁸ Ke inoñe ty niakara'areo ho sarieñe? t'indaty misarimbo marerarera hao? Toe añ'anjombam-panjaka ao o mpisaroñe lamba marerarerao. ⁹ Naho zay, inoñe ty niavota' areo ho isaheñe aña? ty mpitoky hao? Eka, itaroñako t'ie lombolombo ty mpitoky. ¹⁰ Ie i nipatereñe ty hoe:

Inay, mañitrike ty ïrako hiaolo Azo raho, ie ty hañajary ty lalañe aoloko.[‡]

¹¹ Eka! to t'itaroñako te, ze nasaman' ampela, tsy ama'e ty nionjoñe ambone' i Jaona Mpandipotse, f'ie ilikoara' ty kede amy fifehean-dikerañey.

¹² Boak'amo andro'eo pake henane, le rembène i fifehean-dikerañey vaho te hitavañ' aze opiaroteñeo[§]. ¹³ Songa mitalily ampara' i Jaona o mpitokio naho i Hake. ¹⁴ Aa naho laha'areo ty hiantoke: ie i Elia ho aviy. ¹⁵ Ze amandravembia hijanjiñe, mijanjiña!

Lke 7.31-35

¹⁶ Razañeko ami'ty tariratse toy ty ajalahy mitoboke an-tsena ao mifampikoike ¹⁷ ty hoe,

[‡] **10:32** Grika: 33Fe ze mitety ahy añatrefa' ondatio, ty hitetiako añatrefan-dRaeko andindiñe ao.

[§] **10:34** Lke 12:51 * **10:36** 1Sam 24:19, Mik 7:6, Lke 12:53 * **11:5** Ies 35:34-36 † **11:5** Ies 61:1 ‡ **11:10** Ies 40:3; Mal. 3:1 § **11:12** Lke 16:17

Nisaboa'ay
f'ie tsy nandrodo;
nangololoiha'ay
f'ie tsy nirovetse.

¹⁸ Pok'eo t'i Jaona, tsy nikama, tsy ninoñe, le hoe iereo: Aman-kokolampa re. ¹⁹ Avy ka i Ana' Ondatiy: mikama naho minoñe, vaho anoeñe ty hoe: Intia ty màhake naho mpigenoke, rañe' o bakakalahio naho o mpanan-kakeoo. Zay ty fizaka' o seretseo o mahihitseo.

Ty Falai' o Rovao

Lke 10.12-15

²⁰ Nikobiha' IESOÀ amy zao o rova nanoe'e o vilo'eo ie tsy nitolike am-pisolohoañe. ²¹ Fatse ama'o Korazina! naho, Hankàñe ama'o Betsaida! Fa naho nanoeñe e Tirò ao naho e Sodoma* aña o viloñe nanoeñe ama' areoo, le ho nitolike amy andro zay iereo am-pisolohoañe, an-gony naho lavenoke. ²² Eka! hoe ty itaroñako te ho mora amy Tirò naho i Sodoma te ama' areo. ²³ Ihe, Kapernaome, hionjoñe mb'andindiñe eñe v'iheo? Toe hazotso mb'an-tsikeokeoke ao, fa naho nanoeñe e Sodoma o viloñe nanoeñe ama'oo, hera mbe ho niteo[†]. ²⁴ Eka! itaroñako te haivañe an-tane Sodoma ta te ho ama'o i andron-jakay.

Ama'e ao ty Fitofàñe

²⁵ Ie henane zay, niongake t'i IESOÀ nanao ty hoe: Rengen-dRehe, ry Aba, Andrianamboatse i likerañey naho ty tane toy, amy te naeta'o amo mahihitseo naho amo mahilalao i tsara zay vaho binenta'o amo mirèkeo[‡]. ²⁶ Eka Aba, toy ie ty nivantañe añatrefa'o.

²⁷ Kila natolotse ahiko boak' aman-dRaeko, tsy eo ty mahafohiñe i Anakey naho tsy t'i Rae, naho tsy ia ty mahafohiñe t'i Rae naho tsy i Anakey vaho ze satri' i Anakey hatòke.

²⁸ Mb'amako mb'etoa ze hene mokotse naho mifeake fitoloñañe, le himbaeko vaveñe ty joka'e. ²⁹ Rambeso ama'areo ty jokako, le mioha amako fa lem-po raho naho mora naho mazava-troke, vaho hahatendreke fitofàñe arofo[§] nahareo, ³⁰ amy te mora ty jokako, vaho maivañe o kilànkakoo.

12

Mitoroñe ami'ty SABOTSE

Mar 2.23-28; Lke 6.1-5

¹ Ie henane zay, niranga vare niriñariña ami'ty andro Sabata t'i IESOÀ. Nisaliko o mpiama'eo vaho nampipototse loham-bare naho kinosokoso' iareo am-pitâñe ho kamaeñe. ² Ie nioni' o Fariseoo, le hoe iareo ama'e: Heheke manao ty faly tsy anoeñe ami'ty Sabotse o mpiama'oo. ³ Hoe ty natoi' IESOÀ: Tsy fa vinaki' areo hao ty nanoe' i Davide, ie nisaliko naho ondat'eo ⁴ aña'anjomban' Añahare ao, ie nikama i mofo-miatrekey*, ze tsy azo kamaeñe naho tsy o mpisoroñeo avao?[†] ⁵ Tsy vinaki' areo amy Hake ao hao te beteke miranga-Hake ami'ty SABATA o mpisoroñe aña'anjomban' Añahareo vaho malio-tahiñe? ⁶ Eka, itaroñako te etoañe ty ambone' i anjombay. ⁷ Aa naho napota' areo ty hoe: Fiferenaiñañe ro paiako fa tsy

* **11:21** Tovo'e ami'ty Grika: ndra Tirao-detere naho Sidomà: a. 22,23 ka † **11:23** Ies 14:13, 14:15 ‡ **11:25** Lke 10:21 § **11:29** Iir 6:16 * **12:4** Mofo' i Kitreley (Pesita) † **12:4** Sa II 21:3-6

soroñe‡, le tsy ho nafà' areo ty malio tahiñe, ⁸ amy te Talè' i SABATAY§ i ana'ondatiy.

*Mañafake t'ie SABATA
Mar 3.1-6; Lke 6.6-10*

⁹ Ie heneke i andro rezay le nienga mb'eo t'i IESOÀ nizilike am-pitontona' iareo ao. ¹⁰ Teo t'indaty mate fitàñe, aa le hoe ty ontane' iareo ama'e: Vantañe hao ty mampijangañe ami'ty SABOTSE? ¹¹ Le hoe re tam'iareo; Ia ama' areo aman' añondry mijoñe an-davake ao ami'ty andro Sabata, ty tsy mañakats' aze? ¹² Lombolombo' zay t'indaty, aa le mete vaho mañeva, ty manao soa ami'ty SABOTSE. ¹³ Aa le hoe re am' indatiy: Ahitio o fità'oo. Napololo'e i fità'ey, vaho nivoatse manahake i ila'ey. ¹⁴ Fe nifandrimboñe o Fariseoo, nikinia ty hañoho-doza ama'e. ¹⁵ Niarofoana' IESOÀ o ereñeren-tro' iareo; le nisitake; maro ty siloke nañorike aze, vaho fonga jinanga'e; ¹⁶ hinatahata'e tsy hampahafohinañe aze, ¹⁷ hampijadoñe ty nampisaon-tsieñe Isaia:

¹⁸ Ingo ty mpitoroko tinendreko,
i jinoboko mampinembanebañe ty trokoy;
hapetako ama'e ty Troko,
vaho ho taroñe'e amo fifeheañe ty hatò.

¹⁹ Tsy ho hemban-dre, tsy hilay,
vaho tsy ho janjiñeñe an-dalañe ey
ty fiarañanaña'e.

²⁰ Tsy ho potora'e ty vindá* demoke, vaho tsy hakipe'e ty lamesa
mañatoeñe ampara' te ajado'e ho nainai'e ty hatò,

²¹ i Tahina'ey ro fitamà'
o kilakila ondatio.†

*Ty Kokolampa
Mar 3.22-27; Lke 11.17-23*

²² Nasese ama'e t'indaty fey naho moañe, niazo' ty kokolampa, le hi-naha'e. Niisa' i lahialeñey ²³ le nilatsa vaho nanao ty hoe: Tsy ie hao i Ana' i Davidey? ²⁴ Nahimbam-pahazo izay o Fariseoo le nanoñe ty hoe: Tsy mañary kokolampa indatiy naho tsy i Baalzebobe talè' o kokolampao avao.

²⁵ Niarofoana' IESOÀ ty vetsevetse' iareo, le nirazaña'e ty hoe: Ho koake ze fifeheañe mifampiria, le tsy hitroatse ze rova ndra anjomba mifanao hereñ' an-tihy. ²⁶ Naho aria' i mpañinjey ty mpañinje, le hifampiria iereo, aia ty hijadoña' i fifehea'ey? ²⁷ Aa naho i Bèlzebobe ro añariako kokolampa, inoñe arè ty tsy androaha' o ana'areoo irezay? Aa le ie ro ho mpizaka anahareo. ²⁸ Fa naho i Arofon' Añaharey ro añariako kokolampa, le toe fa migadoñe i fifehea'ey.

²⁹ Aia ty himoaha' t'indaty añ' anjombam-panalolahy hamaoke o vara'eo naho tsy irohiza'e hey? Zay vaho hakopa'e i anjombay.

³⁰ Mandietse ahy ze tsy mindre amako, naho mifary ahy ze tsy mirekets' amako.

*Ty Lilatse tsy Iheveañe
Mar 3.28-30*

³¹ Aa le itaroñako te fonga hafahañe amo ana' ondatio ze hakeo naho hateràñe, fe tsy hapoke am'ondatio ty fiterateràñe i Arofo Masiñey; ³² ze minday saontsy mamokafoka i Ana' ondatiy, le hiheveañe, fe tsy hahañe

‡ **12:7** Hos 6:6 § **12:8** Fot 2:2-3 * **12:20** Heb: zonim; Hakarapiloña: zonà † **12:21** Ies 42:1-4

ami'ty sa toy ndra amy sa ho aviy ze minday rehake fanambaitambaiñeñe i Arofo-Masiñey.

³³ He hasoao ty hatae ty amo voa'e soao, ke ampimomoho ty hatae ty amo voa'e mimontamontaño; fa inao ty hatò: o voa'eo ty aharendrehañe ty hatae. ³⁴ Ry fiosoñan-dapètakeo! Aia ty hahafivolaña' areo raha soa kanao raty? Isaontsiam-palie ty fandopoaran' arofo. ³⁵ T'indaty soa, boak'amo vara añ'arofo'e soao ro mañakatse hasoa, le t'indaty tsereheñe, hirik'amo vara an-tro'e tsivokatseo ro mampiboake haloloañe.

³⁶ Hoe raho ama' areo, ze hene entañe saontsie' ondaty, le sindre ho volilie'e amy andro zakay.

³⁷ O saontsi'oo ro izakañe azo, naho o sata'oo ro hamàrañe azo.

Mipay Famantarañe

Lke 11.24-26; 29-32

³⁸ Ie henane zay, nimb' amy IESOÀ mb'eo ty ila' o Fariseoo naho Androanavio, nanao ty hoe: Te hahatreo viloñe ama'o boak' andindiñe ao zahay.

³⁹ Tinoi'e ty hoe: Ty tariratse raty naho karapilo ro mitsoetsoeke viloñe; fe tsy hitoloram-biloñe naho tsy ty vilo' i Jonà; ⁴⁰ fa manahake t'ie tan-tro' i fiañe jabajabay telo andro naho telo haleñe, le ho telo andro naho telo haleñe an-tro' tane ao i Ana' ondatiy. ⁴¹ Hitroatse amy zakay o nte-Niniveo mindre ami'ty tariratse toy hamàtse aze, amy t'ie nitolike am-pisolohoañe amy tsei' i Jonà, fe lohà' i Jonà raho.

⁴² Hiongake amy zakay i mpanjaka ampela' i Sebay‡ mindre ami'ty tariratse toy, hamàtse aze, amy t'ie nihiriike añ'olon-tane aña nijanjiñe ty hihi' i Solomona; fe intoy raho, lohà' i Solomona.

⁴³ Ie miakatse amy t'indaty ty anga-maloto, le miranga toetse tsy amandrano mipay fitofàñe fe tsy manjo; ⁴⁴ le hoe re: Himpoliako i kijà nihirifakoy. Ie pok' ao, zoe'e kòake, soa fipalirañe, vaho nihentseñeñe.

⁴⁵ Le angala'e kokolampa fito raty ta ty vata'e, mindre ama'e naho manozitse ao vaho raty te am-baloha'e ty fiai'indatiy. Zay ty ho ie ami'ty tariratse tsivokatse toañe.

o Longo'e Too

Mar 3.31-35

⁴⁶ Ie mbe nisaontsy amy lahialeñey, inao nijohañe alafe ao ty rene'e naho o rahalahi'eo, nipay ty hifanaontsy ama'e. ⁴⁷ Le hoe t'indaty tama'e: Inao, mipay ty hahaisake azo ty rene'o naho o rahalahi'oo. ⁴⁸ Natoi'e ty hoe i nisaontsy ama'ey: Ia o rahalahikoo? naho ia ty reneko? ⁴⁹ Le nahiti'e mb'amo mpiama'eo o fità'eo vaho nanao ty hoe: Iretoañe o roahalahikoo naho o rahavavikoo vaho ty reneko! ⁵⁰ Ze manao ty satrin' arofon-dRaeko andindiñ' ao ro roahalahiko naho roahavaveko vaho reneko§.

13

O Karaza-taneo

Mar 4.1-20; Lke 8.4-15

¹ Nienga i anjombay amy àndro zay t'i IESOÀ, le niambesatse añ'olon-driake eo ² vaho niropadropaha' i lahialeñey ampara t'ie nipay lakañe hijoña'e; le nizorazora an-tamboho ey i lahialeñey, ³ vaho nitaroña'e raha maro am-pandrazañañe ami'ty hoe: Teo t'indaty nañampitso boak' añ' anjomba ao handrarake tabiry; ⁴ Ie nandrarake, nirarake añ'olon-dalañe

‡ 12:42 Tovo'e, Grika; ndra Rezinà de Isterià § 12:50 Lke 8:21

ey ty ila'e, f'ie nitsimòhe' o voroñeo. ⁵ Nirarake am-batovatoeñe ey ty ila'e, fe natify i taney, ie nipitsike le niforejeje amy te tsy nilaleke i taney, ⁶ ie nafana-voho i andro ambone eiy, le nimae naho maike amy t'ie tsy amam-bahatse. ⁷ Teo ty nirarake an-kisatse ao. Nitombo o hisatseo nañaloke aze. ⁸ Ty ila'e nipoke an-tane soa vaho namokatse naho nitombo, zato ty valoha'e, nem-polo ty faharoe, naho telo-polo ty fahatelo. ⁹ Ze amandravembia hijanjiña'e, Mijanjiña!

¹⁰ Nimb'eo o mpiama'eo nanao ty hoe ama'e: Akore te itaroña'o andrazan-drehake? ¹¹ Hoe re: Natolotse ama'areo ty hahafohiñe i Fifehean-dikerañey, fa tsy am'iareo. ¹² Ze manañe, ty ho tompeañe; fa ze tsy manañe, le haloly ama'e ndra ty minjilite'e habohe'e*. ¹³ Zao ty itaroñako am-pandrazañañe: miisake iereo fe tsy mahaisake; mijanjiñe fe tsy mahajanjiñe, ¹⁴ hañenefañe i nampisaontsieñe Isaia mpitoky, ty hoe:
 Ie hijanjiñe, le hahajanjiñe
 fe tsy mb'ia haharendreke,
 Ie misamba le hahaisake
 fe le lia'e tsy hahaoniñe,
¹⁵ fa gañe ty arofo' ondaty retoa,
 naho giñe o ravembia'eo,
 fa nikipeke o fihaino'eo;
 ke hahaisake am-pihaino,
 naho hahajanjiñ' an-dravembia,
 he hahatsikarake añ'arofo,
 naho himpoly hijangañako.

¹⁶ Fe haha o fihaino' areo mahaisakeo naho o ravembia' areo mahajanjiñe. ¹⁷ Eka! to t'itaroñako te maro ty mpitoky naho ty vañoñe nisalala hahaisake o trea' areoo fe tsy nahaisake, vaho hijanjiñe o tsanoñe' areoo, fe tsy nahajanjiñe. ¹⁸ Inao arè ty fampalangesañe i mpandrarakay. ¹⁹ I Ana' Ondatiy ro mpandrarakay. I tabiry nirarake añ'olon-dalañey le ze hene mijanjiñe ty tsara' i fifehean-dikerañey fe tsy maharendreke; pok' eo ty mpañinje mitavañe an-tro'e ze nararake ama'e ao iaby, zay i tabiry nipoke an-dalañe eo. ²⁰ I nipoke am-batovatoeñey, le ty mijanjiñe i tsaray naho mandrambe aze an-kaehake aniany, ²¹ f'ie tsy amam-bahatse mbore aliheñe; naho ifetsaha' ty hasotriañe tsy ampe vaho ty hasosorañe, le ampandikofe' i mpañinjey ty añ'arofo'e ao. ²² I nirarake amo hisatseyo le ty mahajanjiñe i tsaray, f'ie mipay hanontoñe vara bey, le ampañaliñoe' i mpañinjey aze i tsaran' Añaharey vaho tsy mamoa†. ²³ I nirarake antane soay, le ty mahajanjiñe i tsaray naho maharendreke vaho mamoa, toe manao sata soa; hanombo zato ty valoha'e, naho nem-polo ty faharoe, vaho telo-polo ty faha-telo.

o Ahe-dRatio

²⁴ Nitaroña'e oha-drehake tovo'e: Hambañe amy t'indaty mitongy doria soa an-tete'e ao i fifehean-dikerañey. ²⁵ Ie nirotse ondatio, pok'eo i rafelahi'ey nandrarake vind‡,§ an-tetem-bare'e ao vaho nibioñe. ²⁶ Ie nitovoñañe vaho ho niterake i varey le niboake ka i vinday. ²⁷ Niheo mb'amy tempo-tetekey o mpitoro'eo nanao ty hoe: O talè, tsy doria soa hao ty narara'o? Boak' aia arè o vindao? ²⁸ Hoe ty natoi'e: Satan-drafelahiko zay. Le hoe ty asa' o mpitoro'eo: Ho vorote'ay o vindao! ²⁹ Aiy! hoe re,

* ^{13:12} Lke 18:18 † ^{13:22} Lke 21:34, Ti II 3:4 ‡ ^{13:25} Vinda: zonim; Harakapiloñañe: zonà

§ ^{13:25} Tovo'e: ndra Beriagà: hoe vare tora'e

hera hombota' areo o vareo. ³⁰ Angao hey hiharo hitiry ampara' te toly ty sabo, ie amy fitatahañey le ho volañeko amo mpanatakeo, ty hoe, Atontono hey o vindao naho feheo am-pitoboroñañe horoañe, vaho atontoño andriha ao o vareo.

*Voa Nonoke
Mar 4.30-32; Lke 13.18, 19*

³¹ Intoy ka ty nandrazaña'e: I fifehean-dikerañey le añoharañe ami' ty voa-nonoke nindese' t'indaty vaho narara'e an-tete'e ao. ³² Ie ty kede amy ze hene añañe an-kodoboñe ao, fa ie mitiry, ro jabajaba amo rongoñeo vaho mbe mionjoñe ho hatae abo, kanao mitsoloke amo tsampa'eo o voron-dikerañeo.

*Lalivay**

Lke 13.20,21

³³ Nitaroñe'e añ'ohatse ka ty hoe: I fifehean-dikerañey, le manahake ty lalivay¹⁹ najo' ty rakemba ami'ty bom-bare telo fañaranañet[†] ao vaho hene niazom-pamoà'e.

³⁴ Nanoe' IESOÀ amy lahialeñey añ' ohatse iaby izay; fa naho tsy am-pandrazañañe le tsy nitsarae'e, ³⁵ hañenefañe i nampisaontsieñe i mpitokiy, ty hoe:

Ho sokafeko am-pandrazañañe ty vavako; le ho taroñeko tafatòño boak'an-kaehae'e.[‡]

i Ahe-dratiy

³⁶ Nifampiria amy lahialeñey amy zao t'i IESOÀ le nizilike añ'anjomba ao. Nimb'ama'e ao o mpiama'eo nihalaly ama'e te habejañe i fandrazañañe i vindaiy.

³⁷ Nitoiña'e ty hoe: Ondatio ty mandrarake i doria soay; ³⁸ ty voatse toy i tonday; o vantaneo i doria soay; vaho o tsivokatseo o vindao, ³⁹ i mpañinjey i rafelahy nandrarake irezay; i vare rifo mizorazora ey ro figadoña' i sa ho aviy; vaho o anjelio ro mpanatake. ⁴⁰ Manahake ty fanontona' o mpanatakeo i vinday horoañe, ty ho fanamperañe ty sa toy. ⁴¹ Hirahe' i Ana' Ondatiy o anjeli'eo hañombotse amy fifehea'ey ze atao raty naho o mitolon-katserehañeo, ⁴² le hafetsake an-toñake mirebareba ao; fangololoihañe naho ali-vazañe ty ho ao. ⁴³ Ie amy zay, hireandreañe manahake i àndroy\$, am-Pifehean-dRae'e ao, o vañoñeo*. Ze amandravembia mahajanjiñe, Mijanjiña.

Vara Naetake

⁴⁴ Hoe ka t'i IESOÀ amo mpiama'eo: I Fifehean-dikerañey le manahake t'indaty mahatreya vara mikafitse le ami'ty hafalea'e ty amy hasaro'ey, fonga aleta'e o fanaña'eo vaho mivily i taney.

Hange[†]

⁴⁵ Tovo'e, Hambañe ami'ty mpanao balike mpipay vatosoa i fifehean-dikerañey. ⁴⁶ Ie mahatreya ty soa, hene aleta'e o vara'eo le mipeake aze.

Harato

⁴⁷ Razañeñe an-karato an-driake ao i fifehean-dikerañey; mitontoñe ama'e ao ze volom-piañe iaby. ⁴⁸ Ie mirotrarotra le kororohe' iereo

* **13:32** saf'levora; hakeo ty dika'e. † **13:33** Heb: sata: 13 litatse (sihoa raike) ‡ **13:35** Sab 78:2 § **13:43** Dan 12:3 * **13:43** Sab 37:29, 72:7, 75:10, 118:19-20, 146:8, Mal 3:18, Ben 22:11 † **13:44** Hange: perla (Gr) Heb: vatosoa

boak'ao, le miheo mb'ama'e o mpañaratoo mijoboñe ty soa ho an-karo' iareo, vaho aria' iereo o ratio. ⁴⁹ Zay ty ho ie am-panampera' o androo; Homb'eo o anjelio, hameve o tsivokatseo amo vañoñeo, ⁵⁰ vaho havokovoko' iareo an-toñake mirehetse ao. Lako tañy naho ali-vazañe ty ho ao.

Ty Talèn' anjomba

⁵¹ Hoe re am'iereo: Nirendre' areo hao zay? Eka, hoe iareo: ⁵² Aa le, ze fonga mahihitse amy fifehean-dikerañey ro hambarañe ami'ty raen-keleiañe mañakatse ty vao naho ty haehae amo vara'eo.

Falai' o nte Nazaretao

Mar 6.1-6

⁵³ Ie nagado'IESOÀ i tsara rezay, le nienga, ⁵⁴ vaho nigodañe mb'an-tane'e mb'eo le nañoke ondaty am-pitontonañ' ao. Nilatsa iareo nanao ty hoe aña'rofo: Aia ty nahazoa' itiañe ty hihitse naho haozarañe ra'elahy zao? ⁵⁵ Tsy ie ty ana' i mpandrafitsey? tsy atao Marie hao ty rene'e? naho ty rahalahi'e: Iakobe, i Josefa, i Simona, naho i Jodà, ⁵⁶ vaho o rahavavi'eo? tsy amantika iaby v'irezay? Taia arè ty nahazoa' itia o raha iaby zao? ⁵⁷ Aa le nialik' ama'e iereo, vaho hoe t'iIESOÀ tam'iereo: Tsy po-ènge ty mpitoky naho tsy an-tane'e vaho aña'akiba'e ao avao. ⁵⁸ Le tsy nisatri'e‡ ty hanao raha tsitantane ao ty amy haminjikitam-patokisa' iareo.

14

Kinitiske t'i Jaona

Mar 6.14-29; Lke 9.7-9

¹ Ie henane zay, jinanji' i Heroda mpifehe* ty talilyIESOÀ; ² le hoe re amo mpitoro'eo: Iantofako t'ie i Jaona Mpandipotse ro manao o raha tsitantane zao†. ³ Amy te nitsepahe' i Heroda t'i Jaona le rinohi'e am-balabey ao t'ie nañendak' aze tsy hañenga i Herodiasy ho valy, amy t'ie fa vali' i rahalahi'ey, ⁴ hoe t'i Jaona tama'e: Faly ama'o zay. ⁵ Aa le inao, te ho namono aze t'i Heroda, fe nihembañe amy lahialeñey, fa nimpitoky am'iereo t'i Jaona. ⁶ Ie amy takatakam-paniahiañe ty nisamahañe i Heroday le kinoi'e hitrao-pikama ama'e o roandria' i fifelehañey; nitsinjake añaivo' iereo ty anak-ampela'e le niehake t'i Heroda, ⁷ kanao nampitamae'e am-panta te ho mea'e aze ze ihalalia'e. ⁸ Aa ie nitoroandrene'e le nangataha'e ty añaambone' i Jaona Mpandipotse am-panake. ⁹ Nimoremoretse amy zao i mpanjakay, fe ty amy fanta nanoe'e añaatrefa o nambarañeo, le linili'e te hanoeñe; ¹⁰ vaho nampihitrife'e ty hamonoñañe i Jaona am-porozò ao. ¹¹ Nendese' iereo am-panake ty añaambone'e, naho natolotse amy somondraray vaho natolo' i somondraray aman-drene'e. ¹² Nimb'eo o mpiamy Jaonao nitakoñe i fañòvay naho nalentek vaho natalili' o mpiokeo amyIESOÀ.

Ty Namahanan-daño

Mar 6.31-44; Lke 9.11-17; Jao 6.1-13

¹³ Ie jinanji'IESOÀ, le nienga an-dakañe nimb' an-tane bangìñe e Iehoda aña. Aa ie tsinano' i màroy, le norihe' iereo boak' amo rova iabio. ¹⁴ Ie niavotse le nivazoho'e amboho'e ey i lahialeñey naho niferenaiña'e vaho nampijangañe'e ze hene narare ama'e.

‡ 13:58 Gk solo: nilefe'e * 14:1 Heroda Antipasy, Ana' i Heroda mpanjaka, ragova' ty fahefam-paritane' i Palestina, namono i Jaona. † 14:2 Gk: nivañon-ko velon-dre.

¹⁵ Ie hariva, niheova'e o mpiama'eo nanao ty hoe ama'e: Babangoañe ty atoy naho fa miroñe; apoho higodañe mb'amo tanàñe i maroy hitoha ze sindre ipaia'e. ¹⁶ Fe hoe t'i IESOÀ: Ino ty hiavota' iareo? anjotsò mahakama. ¹⁷ Hoe iareo: Tsy ama'e zahay naho tsy mofo lime naho fiañe roe. ¹⁸ Hoe re: Endeso amako zay. ¹⁹ Le nampiambesare'e amy ahetsey ondatio; aa ie niambesatse, le rinambe'e i mofo limey naho i fiañe roe rey, naho nañandriañe te niandra mb' andikerañe ey, le zinara'e naho natolo'e amo mpiama'eo, vaho nazotso' o mpiama'eo amo nitolatolakeo. ²⁰ Hene nikama naho nianjañe, nikamae' iareo ka o fiañeo, ze nisatrieñe. Naho fa nikama le nahoro' iareo ty nifitafita, nahapea mozete folo ro'amby. ²¹ Ty hamaro' o nikamao le lime arivo ty lahilahy, tovo' izay o roakemba naho ajajao.

Nidraidraitse Ambone Rano ey

Mar 6.45-52; Jao 6.14-21

²² Tampetse zay, nampijoñe'e an-dàkañe ao o mpiama'eo hitsake aolo aze mb' amy rova hañaveloa' i maroiy. ²³ Ie nienga' i lahialeñey, le niañambone vohitse vaho nitalaho, ie raike. Ie hariva nijoriñe ey avao, ²⁴ i lakañey añivo' i riakey eñe, nasiotsio' o onjan-driakeo amy t'ie niatretioke. ²⁵ Ie ami'ty fijilovañe fah'efa' i haleñey, le niheo mb'am'iereo mb'eo t'i IESOÀ nidraidraitse ambone' i riakey.[‡] ²⁶ Ie niisa' o mpiama'eo nañavelo ambone rano ey, le nivorombeloñe, fa natao' iareo ho angatse! vaho nikaike am-pirevendreveñañe. ²⁷ Le natoi' IESOÀ ty hoe: Mahatokisa ry ao, zaho 'nio\$. Ko hembañe, ²⁸ Natoi' i Petera ty hoe: O Talè, naho Ihe, ampombao mb'ama'o ambone' o ranoo raho. ²⁹ Mb'etoa, hoe t'i IESOÀ. Aa le nizotso amy lakañey t'i Petera, nandia i ranoy mb'amy IESOÀ mb'eo. ³⁰ F'ie nahaoniñe ty hamafe' i tiokey, le nianifañe naho ho nilipotse vaho nikaike ty hoe: Talè! irombaho. ³¹ Nahiti' IESOÀ amy zao ty fità'e le rinambe'e, vaho nanoa'e ty hoe: Ondaty kede fatokisañe, ino ty nimahimahiña'o? ³² Ie nijoñe an-dakañe ao, le nipendreñe i tiokey, ³³ vaho niambane ama'e o an-dakañe, nanao ty hoe: Toe Anan' Añahare rehe.

Nañafake Maro

Mar 6.53-56

³⁴ Tafa-tsake iereo, nitoly an-tamboho' i Genesareta eo. ³⁵ Aa ie naahafohiñe aze ondati' i taneio le nanitsihañe hitrike i borizañey, naho nendeseñe ama'e ze hene nisilofe' o areteñe ankafankafao. ³⁶ Nihalalia' iareo ke ho no'e t'ie hitsapa ty lifin-tsiki'e; vaho songa nijangañe ze nitsapa aze.

15

Mañoke Hake

Mar 7.1-23

¹ Le niheo mb' amy IESOÀ mb'eo o Fariseoo naho o Androanavio nanao ty hoe: ² Manao akore te mandilatse ty fañè' o ntaoloo o mpiama'oo? ie tsy manasa fitàñe aolo te mihinañe.

³ Le hoe t'i IESOÀ tama'e: Akore te anjehara' areo o tsaran' Añahareo* amo fèpè' areoo? ⁴ ie linilin' Añahare ty hoe:

Iasio ty rae'o naho i rene'o,[†]

naho:

Toe havetrake ze mandafa rae ndra rene.[‡]

[‡] **14:25** Iobe 9:8 [§] **14:27** Avo 3:14 * **15:3** Mat 5:20 † **15:4** Avo 20:12; Its 5:16 ‡ **15:4** Avo 21:15; Sor 20:9

⁵ Fe hoe ty asa' areo, Ze saontsie' t'indaty aman-drae'e naho amandrene'e ty amy ze ho nibanabana'e, le inao fa nengae'e ty amo tahi'eo, le malio-tahin-dre amy hakeo zay, ⁶ vaho tsy miisy rae ndra rene re, le fa tsambolitio' areo o tsaran' Añahareo amo fèpè' areoo. ⁷ Hankàñe, ty soamiatreke, Inao ty nitokia' Isaia ty ama' areo ami'ty hoe:

⁸ Hoe t'IEHOVÀ:

Mitotoke ahy am-palie' ondaty retoa,
naho miisy ahy am-pivimby,
fe mitots' amako ty arofo' iareo,
⁹ vaho ty fañeveña' iareo amako
ro fampioha' ondaty avao. §

¹⁰ Tsinikao' IESOÀ i màroy, vaho nanoa'e ty hoe: Mijanjiña naho mañaraharà: ¹¹ Tsy ty mizilike am-palie'e ao ty mahabote ondaty, fa ze miakatse am-palie'e ro mahativa ondaty.

¹² Niheo mb'ama'e o mpiama'eo, nanao ty hoe: Fohi'o hao te nitorifike amy tsara zay o Fariseoo? ¹³ Hoe ty natoi' IESOÀ: Fonga ho mongorañe ze hatae tsy nambolen-dRaeko an-dindiñe ao. ¹⁴ Apoho iereo, fa miaolo ty goa ty fey; ie tarihe' t'indaty fey ty goa, songa hijoroboñe an-davake ao ie roe. ¹⁵ Tinoi' i Petera: Abejaño ama'ay i tafatòño zay. ¹⁶ Hoe ty natoi' IESOÀ am'iareo: Mbe tsy maharendreke v'inahareoo? ¹⁷ Tsy fohi' areo hao te ze hene mizilike am-palie ro migodañe an-troke ao vaho miakatse amy mahazatse aña? ¹⁸ Fe ze miakatse am-palie le fa nihetsefe' ty arofo, zay ty mahativa ondaty. ¹⁹ Amy te akare' ty troke mengoke ty famañahiaña, ty fañohofan-doza, o fanakezàneo, o fikamerañaeo, ty fidramota' o mpandañitseo, vaho o fatseo. ²⁰ Toe songa mahativa ondaty, fe tsy mahativa ondaty ty fikamañe am-pitaña tsy sinasa.

Ty Rakemba Ambahiny

Mar 7.24-30

²¹ Ie nagado' IESOÀ i tsara zay, le nañavelo mb'an-tane' Tirò naho Sidoma aña. ²² Le niheo mb' ama'e ty rakemba nte-Kanana hirik' an-tane'e aña, nikaike ama'e ty hoe: O Rañandria, Ana' i Davide, tretrezo raho fa volevolèn-kokolampa ty anako ampela. ²³ Tsy nanoiñe ndra tsara raike t'i IESOÀ. Le niharinea' o mpiama'eo, nanao ty hoe ama'e: Ino ty ifaria'o o rakemba mañorike antika an-koikeo? ²⁴ Tinoi' IESOÀ ty hoe: Tsy nirahen-dRaho naho tsy amo añondry motso' i anjomba' Israeleio*. ²⁵ Le niambane ama'e i rakembay nanao ty hoe: O Rañandria imbao raho. ²⁶ Hoe t'i IESOÀ ama'e: Tsy mete te alae' t'indaty ty hane' o keleia'eo hamahana'e amboa. ²⁷ Hoe i rakembay, Beteke milintseñe ty mofo mifitafita boak' am-pandambaña' ty templo' iareo o amboao. ²⁸ Tinoi' IESOÀ ty hoe: O Rakembao, ra'elahy ty fatokisa'o; hanoeñe ama'o i nihalalia'oy. Le nijangañe henane zay i anak-ampela'ey.

Maro ty Nijanganeñe

Mar 7.31-37

²⁹ Nienga t'i IESOÀ, le nimb' am pariparitse alafe' i raike Galiliay mb' ami'ty vohitse mb'eo. Ie nijohañe eo le ³⁰ nanjo ondaty maro nindreza' o kepekeo, o angamaeo, o mikoletrao, naho ty ila'e maro; ie nihotrake am-pandia'e eo le nijangañe'e. ³¹ Nilatsà ondatio te nisaontsy o moañeо naho ninokitse o komboo vaho nahaisake o feio; songa nandrenge an'Andrianañahare.

§ ^{15:9} Ies 29:13; Mar 7:7, Mp II 17:19 * ^{15:24} Mat 10:6

*Mamahañe ty 4000**Mar 8.1-10*

³² Kinanji' IESOÀ hitotoke aze o mpiama'eo, le hoe re: Ferenaiñako iereo, fa nitraoke amako ro' andro boak' amy nitsaha' iareoy vaho tsy amankoko kamaeñe, le tsy te hampañavelo iareo te militse ke hifoezapoezake an-dalañe ey. ³³ Aa hoe o mpiama'eo tama'e: Aia ty hitohàn-tika mofo an-jerezere-tane atoy haha-ànjañe o maro toañe? ³⁴ Natoi' IESOÀ ty hoe: Fire ty mofo ama' areo? Hoe iereo: Fito, naho fiañe tsiampeampe.

³⁵ Aa le nampiambesare' IESOÀ amy ahitsey i lahialeñey, ³⁶ Rinambe'e i vonga-mofo fito rey, nifolahe'e, naho natolo'e amo mpiama'eo vaho nazotso' iereo am'ondatio. ³⁷ Nikama iaby iereo le nianjañe vaho nahoroñe ami'ty haroñe fito i nifitafitay. ³⁸ Efats' arivo ty lahilahy nikama ey, mandikoatse zay o roakemba naho ajajao.

³⁹ Tampetse zay, nijon-dakañe t'i IESOÀ vaho nipotitse an-tane Makedonia aña.

16*Misazoke Viloñe**Mar 8.11,12*

¹ Nimb'ama'e mb'eo o Fariseo naho Tsadokeo hantsaka fañahy aze, hanolora'e viloñe boak' andindiñe ao. ² Hoe ty natoi' IESOÀ: Ry soamiatrekeo, Ie hariva, anoe'areo ty hoe: Kanao mena i likerañey, hazava ty hamaray, ³ ie maraindray, hoe nahareo: Ho avy anito i orañey fa milodolodo i likerañey. Ie fohi' areo o fañè ty tarehe' i likerañeio, akore te tsy rendre' areo ty lili' o sà-o. ⁴ Mipay viloñe ty tariratse tsereheñe toy, fe tsy hitoloram-biloñe naho tsy ty vilo' i Jona mpitoky; vaho nisitake re, nienga mb'eo.

*Ty Fisitaha' IESOÀ**Mar 8.13-21*

⁵ Ie nivotrake añ'olon-driake eo t'i IESOÀ le hoe re amo mpiama'eo, Halankaño mofo, vaho nijon-dakañe mindre amo mpiama'eo, fe nihaliñ o mpiama'eo ty hivaty mofo.* ⁸ le hoe t'i IESOÀ am'iereo: Ino ty itsakorea'areo te tsy nivaty mofo? ⁹ Tsy tiahí' areo hao i mofo limey naho i lahilahy efats' arivo rey vaho ty hamaro' o mozete nisisao?† ¹⁰ ndra i mofo fito' indaty efats' arivo rey, naho ty hamaro i haron-kiseñe rinambe'areo rezay? ¹¹ Aa le maharendreha te tsy mofo sotra i vinolakoy fe inao ty itaroñako: Itaò ty sata' o Fariseo naho Tsadokeo.‡ ¹² Aa le napota'areo te tsy ty lalivay mofo i nitsarae'ey, fa ty fañanara' o Fariseoo naho o Tsadokeo.

*Tsei' i Petera**Mar 8.27-30; Lke 9.18.31*

¹³ Ie nandoake an-tane Siria§ naho an-tane' Filofe* aña t'i IESOÀ, le hoe ty ontane'e amo mpiama'eo: Ino ty saontsie' ondatio ahy? ¹⁴ Le hoe iereo ama'e: Ty ila'e : i Jaona Mpandipotse; ty ila'e, i Elia; vaho ty ila'e, i Jeremia' ndra ty raike amo mpitokio. ¹⁵ Aa hoe t'i IESOÀ tam' iereo: Ia ka ty anoe' areo ahy? ¹⁶ Tinoi' i Simona† ty hoe: Ihe i Norizañey‡, Anak' Andrianañahare veloñe nivotrake ami'ty voatse toy. ¹⁷ Hoe t'i IESOÀ

* ^{16:5} Grk: 6 Aa le hoe t'i Iesoà tam' iereo, Mitaòa, marimariho ty lalivai' o Fariseoo naho ty a o Tsadokeo. 7 Le hoe ty fitsakorean-tro' iareo: Tika tsy ninday mofo 'nio. 8 Ie nahaoniñe,] † ^{16:9} Grika: 10 ‡ ^{16:11} Grika: 12 § ^{16:13} Tovo'e: ndra Kaisaria * ^{16:13} Tovo'e: ndra ty hoe, Filipose † ^{16:16} Tovo'e: nitokaveñe ty hoe, Petrose ‡ ^{16:16} Tovo'e: ty hoe: Kristo

tama'e: Haha rehe Simona Ana' i Jaona amy te tsy nofotse naho lio ty nampibentatse ama'o fa t'i Raeko andindinē ao.

Ty Fivorin' Añahare

¹⁸ Hoe raho ama'o: Vongam-bato§ rehe, naho haoreko* ami'ty lamilamy toy† ty anjombam-pitalahoako. ze tsy hahafitroara' o lalam-beintsikeokeokeo‡. ¹⁹ Le hatoloko azo i lahin-dakilem-pifehean-dikerañey; ze fehè'o an-tane atoy le fa nifeheñe andindinē ao, vaho ze hahà'o an-tane atoy le fa nihahàñe andindinñ'ao. ²⁰ Hinatahata'e amy zao o mpiama'eo ty tsy hitalily am'ondatio te ie i Norizañey.

Ty amy Havilasi'ey

Mar 8.31-33; Lke 9.22

²¹ Namototse nampalange amo mpiama'eo amy zao t'IesoÀ t'ie tsy mahay tsy homb'e Ierosaleme mb'eo hijale ami'ty hatsivokara' ty maro boak' amo mpisoroñeo naho amo roandria' ondatio ampara' te havetrake, f'ie hatroatse ami'ty andro faha-telo.

²² Natola' i Petera le nendaha'e ami'ty hoe: Lonike te ho lavits' Azo izay, Talè ²³ Nitolike t'i IesoÀ, le nitalahara'e naho nanao ty hoe: Soike, ty mpañinje, ko zehare'o; tsy haoñe'o ty tsaran' Añahare, fa o reha' ondatio.

Afoeo, le ho Rombaheñe

Mar 8.34-37; Lke 9.23.25

²⁴ Le hoe t'i IesoÀ amo mpiama'eo: Ze te hañorik' ahy, soa re te hitety vatañe, hijiny i hatae ajaley§, toe hamoe aiñe, vaho hañorik' ahy. ²⁵ Ze te handrombake ty fiai'e ro hamoe aze ty amako, fe ze mamoe ty havelo'e ami'ty voatse toy ty amako ro handrombake aze ho ami'ty havelo' ty voatse ho avy. ²⁶ Ino ty tombo'e ho a ondatio te fonga azo'e ty voatse toy, vaho mamoe'ay kitro katroke? Fampitsalohañe soa ho a ondatio hao ty hahazoa'e o raha momoke henaneo, hanolora'e ty fiai'e hizakà'i tsikeokeokey?

Ty amy Fiavy Faharoey

Mar 8.38-9.1; Lke 9.26-27

²⁷ Fa hitotsake atoy i Anan' Añaharey ami'ty engen-dRae'e an-dindiñe ao rekets' o anjeli'eo hanambe ondatio sindre ty amo sata'eo*. ²⁸ Eka! to t'itaroñako te, tsy handia havilasy o ila'e mijohañe etoañe, ampara' te isa' iareo mitotsake eo i Anak' Andrianañaharey am-pifehea'ey ao†.

17

Ty Fiovàñe

Mar 9.2-13; Lke 9.28.36; 2 Pet 1.17,18

¹ Ie naha-ritse eneñ' andro, le rinambe' IesoÀ t'i Petera naho Iakobe naho i Jaona rahalahi'e, vaho nendese'e mañambone ty vohitse abo hitalaho.

² Ie niloloke, le niova añatrefa' iereo, nireandreañe hoe i àndroy ty holindahara'e vaho nikò-foty hoe volovaso o saro'eo. ³ Ingo nisodeha ama'e t'i Mosè naho i Elia, nifanaontsy, vaho hene tinaro' iareo am' IesoÀ ze hifetsake ama'e e Ierosalem' ao. Nirotse t'i Petera naho o rañe'eo. Nirotse

§ **16:18** GK; Petros (Petera) * **16:18** Grika: petra: Vol 23:9; Its 32:15; Ies 51:1 † **16:18** Heb: solo ty hoe: ama'o ‡ **16:18** Heb: Gehen'na: toe vavatane maleotse fañarian-deotse mirehets'afó nainai'e; helo, helo-afó. § **16:24** ty hatae mitivalañe nandradoradoañe Iesoà, mitroatse aña ty boda'e. * **16:27** Sab 62:12, Rzs 24:12; Oni: Mat 21:44, Jao 5:29, Rom 2:6, Ko II 5:10, Efe 2:10, Tit 2:7,14, Iak 2:14-24, Ben 22:12 † **16:28** Mat 17:2-5

fe tsy nirotse, nañente fe tsy nañente. Niisa' iareo i fañòva'ey naho indaty roe nindre ama'e rey. ⁴ Aa ie nienga, le hoe t'i Petera amy IESOÀ: Soa te etoan-tika; antao hamboatse kivoho telo etoa, ty ho Azo, ty ho a i Mosè, vaho ty ho a i Elia*, amy te tsy napota'e i nisaontsie'ey.

⁵ Ie mbe nisaontsy, intia ty rahoñe mazava nañaloke iareo; nampange-bahebake; jinanji' iareo boak' amy rahoñey ty fiarañanañañe nisaontsy ami'ty hoe: Inao, intia ty Anako kokoako, i norokoy, ama'e ty hafaleako, ivohoro.[†] ⁶ Jinanji' o mpiama'eo zay, le nibaboke, laharane an-tane, fa vata'e nangebahebake. ⁷ Ie nianjiñe i fiarañanañañe zay, le hoe t'i IESOÀ tam'iereo, Mitroara, ko hembañe. ⁸ Niandra iereo, fa tsy nahaoniñe ia ia naho tsy IESOÀ avao. ⁹ Nizotso boak' am-bohitsey t'i IESOÀ le nafanto'e am' iereo ty hoe: Ko mitalily am'ondatio i eveñeveñe nioni' areoy ampara' te nitroatse amy havilasiy i Ana' ondati.

¹⁰ Nañontane aze ty hoe o mpiama'eo: Manao akore te atao' o Androaanavio te ho avy aolo t'i Elia? ¹¹ Tinoi' IESOÀ ty hoe: Toe ho avy aolo t'i Elia, hampiareñe ze he'e. ¹² Taroñeko ama'areo te niavy t'i Elia, fe tsy nifohi' iereo vaho nanoeñe ama'e ze nisatrie' iereo. Zay ka ty hanoe' iereo i Ana' ondati.

¹³ Aa le nirendre' o mpiama'eo t'ie i Jaona Mpandipotse sinaontsi'ey.

Fatokisañe Mar 9.14-29; Lke 9.37-42

¹⁴ Ie nañarine i lahialeñey le nomb' ama'e t'indaty nifantoke amo ongo'eo, ¹⁵ nanao ty hoe: O Talè, ferenaiño raho naho tretrezo i anadahikoy, fa tokoe' ty anga-draty vaho mafe ty fizeke'e. Ampikodrite'e nife, mamore am-bava, mikorovoke boak' an-toe'e mb' an-tane, beteke mihotrake añ'afó beteke an-drano ao. ¹⁶ Nendeseko amo mpiama'oo, f'ie tsy nahajangañe aze. ¹⁷ Hoe ty natoi' IESOÀ: Ty tariratse mengoke tia, hankàñe amo mandietseo, ampara' te ombia ty mbe hindrezako? Sikal' ombia ty hivaveako ty hasosora' areo? Ampombao mb'amako.

¹⁸ Nendese'areo ama'e, aa ie vaho nitalare' IESOÀ le nampanjekè' i mpañinjey naho naretsa'e an-tane vaho nitamborokose'e an-deboke ao, namore. Nañontanea' IESOÀ ty rae' i ajalahiy ty hoe: Sikal' ombia ty nitambozora' i mpañinjey? Le hoe ty rae'e ama'e: hirik' amy andro zay pake henaneo. Beteke ahifi'e añ'afó ndra an-drano ao hañohofa'e loza naho mete, aa naho lefe'o, Talè, ty mañimba ndra ami'ty manao akore, le ehe imbao. Nanjo fañisohañe ama'e indatiy vaho nilifo-piferenaiñañe ho aze, le hoe re tama'e: Naho mahafiato rehe, le hahalefe ndra inoñ'inoñe, amy te kila mora ami'ty mpiato. Aa le nipoña-toreo amy zao ty rae' i ajalahiy nipazake ty hoe: O Rañandria, matoky raho, oloro o hatokisakoo. Ie nioni' IESOÀ te nañaly hiarimboeñe i lahialeñey, le linili'e ty hoe i angadratiy: Ty mpañinje gañe naho moañe tia, inao, lilieko, Iakaro aniany, le ko mimpoly atoy ka; aa le nifaoke ama'e am-pikontsiañe i kokolampay le nampizekè' vaho nado'e deme'e i ajalahiy, kanao maro ty nanao aze ho simba. Rinambe IESOÀ an-taña'e le natroa'e vaho niongake re. Nizilike añ'anjomba ao t'i IESOÀ[#], ¹⁹ le natola' o mpiama'eo t'i IESOÀ, nanao ty hoe: Nañino zahay tsy naharoak'aze? ²⁰ Hoe t'i IESOÀ tam' iereo: Amy t'ie tsy fonitse fatokisañe. Eka! to t'itaroñako t'ie am-patokisañe manahake ty voa-nonoke, naho mianteke, le ho lilie' areo o vohitse eroañeo, ty hoe:

* ^{17:4} Mar 9:4 † ^{17:5} Its 18:15-19 ‡ ^{17:18} Mar 9:20-28

Miviha! le hibioñe re; tsy eo ty ho tânañe ama' areo. ²¹ Fe tsy miakatse naho tsy an-kalaly naho lilitse ty karazan' angatse toy.

*Ty amy Hivetraha'ey
Mar 9.30-32; Lke 9.43-45*

²² Te Galilia ao iereo, le nanao ty hoe t'i IESOÀ: Fe haseseke am-pitâ' ondatio i Ana' ondatiy, ²³ havetra' iereo, fe hitroatse ami'ty andro fahatelo.

o Roroñeo

²⁴ Ie nivotrake e Kapernaome ao, le niheo mb'amy Petera o mpamory vililohao nanao ty hoe: Tsy orihe' i Talè' areoy hao ty fandoavañe i haban'§ Anjombay? ²⁵ Amy nisaontsieñey, nizilike añ'anjomba ao re, fe nifohi' IESOÀ, le hoe re amy Petera: Akore ty heve'o Petera? O mpanjaka' ty tane toio: ia ty ampitoroña' iareo roroñeo? o ana' iareo hao, ke o ambahinio? ²⁶ O ambahinio, hoe t'i Petera. Le hoe t'i IESOÀ tama'e: Aa le haha o anakeo. Tinovo'e ty hoe: Ko ampilonjereñe. ²⁷ Le hoe re amy Petera, akia mb' andriake mb'eo, le añiririño vintañe vaho mamintaña, fa ami'ty vava' i ho vintañe'o valoha'ey ty hanjoa'o ty bogady volafoty*; zay ty hatolo'o ho antika roe.

18

*ty Trentram-po
Mar 9.33-37; Lke 9.46-48*

¹ Niheo mb'amy IESOÀ mb'eo henane zay o mpiama'eo nañontane ty hoe: Ia ty atao'o ho lohâne amy fifehean-dikerañey? ² Tsinikao'e ty anak'ajaja naho navotra'e aivo' iareo ao, ³ le hoe re: To t'itaroñako t'ie tsy mitolike ho hambañe ami'ty ajaja toy, le tsy hizilike amy fifehean-dikerañey.* ⁵ Ze mandrambe ty ajaja manahake toke ami'ty añarako, mandrambe ahy. ⁶ Ze mampitsikapy ty raike amo ajaja mpiato amakoo, le kitra'e andravahambato-pandisanañe ty an-kàto'e vaho avokovoko an-driake laleke ao.

*o Mpampitsikapio
Mar 9.42-48; Lke 17.1-2*

⁷ Hoy abey! amo mpimone' ty voatse toio ty amo fampitsikapiañeo! Toe tsy mahay tsy eo ty mahatsikapy, natovo'e ty hoe: Hekoheko am' indaty mampitsikapiy. ⁸ Naho mamingañ' azo ty fità'o ndra fandia'o, kitsihama'o; fa hàmake himoake an-kaveloñe ao kepeke ndra doñe rehe, ta te hatolotse añ'afó bey tsy modo ao reketse fitâñe roe naho fandia roe. ⁹ Aa naho mampitsikapy azo ty fihaino'o, piritó vaho atambirivirio aña; kitra'e hizilike an-kaveloñe ao fei-pihaino raike, ta t'ie hatolotse añ'afó bey ao reke-pihaino roe.

¹⁰ Asoao tsy ho sirikae' areo ty raike amo anak' ajalahio; fa itaroñako te nainai'e mahaisake o ana' i Raeko andikerañeo o anjeli' iareoo, ¹¹ vaho fa nijihetse tsy handrombak' o rafelahio ka i Ana' ondatiy†.

*ty Añondry Motso
Lke 15.4-7*

¹² Akore ty heve' areo? Ie manañe añondry zato t'indaty, le mandifike aña ty raike, tsy henga'e am-bohitse ao heike hao i sivampolo-sive'

§ **17:24** drakma, haba' i Anjombay ty roe; karama andro raike. * **17:27** Statera (Gr): drakma efatse. * **18:3** Grk: 4Ndra iaia mire-batañe manahake ty ajaja toy ro loha'e amy fifehean-dikerañey † **18:11** Grk: solo ty hoe: Fa toe nimb'atoy i Ana'ondatiyo handrombake ze nimotsos

amby rey, vaho ho mb'eo hitsoeke i nandifikey? ¹³ Ie tendreke, Eka! to t'itaroñako te handian-taroba i raikey te amy sivampolo-sive' amby tsy nandridrike rey. ¹⁴ Amy te tsy lahan-dRae' areo andindiñe ao ty hahamotso raike amo kede retiañe.

Ze Anaña'o Kabò

¹⁵ Ie henane zay, hoe t'i IESOÀ amy Simona atao Petera: Ie manao hakeo ama'o ty longo'o, endaho an-tolake, ie mijanjiñe, le fa azo'o i longo'oy. ¹⁶ Aa naho tsy mañaoñe azo re, aseseho aolo ty ondaty, f'ie tsy mijanjiñe ndra fanta inoñ' inoñe, le anovono roe ndra raike, hiatrefa' ty valolombeloñe telo ndra roe, amy te mahajadoñe saontsy ty valolombeloñe telo ndra roe.[‡] ¹⁷ Aa naho tsy mañaon-titike inoñe ndra sangy inon-dre, le taroño amy favoriy; aa ie mboe tsy mete mijanjiñe i favoriy, le ampanahafo ami'ty añombelahimavo naho ty rafelahy vaho typiaroteñe.

¹⁸ Eka, to t'itaroñako te ze fanta fehè' areo an-tane atoy, ro feheñe andindiñe ao. Naho ze hahà' areo an-tane atoy, ho hahàñe andindiñe ao[§].

¹⁹ Tovoñako ama' areo ty hoe, Naho miharo rehake amy ze ihalalia' iareo ty roe ama' areo an-tane atoy, le hanoen-dRaeko andindiñe ao ho a iareo. ²⁰ Ndra aia aia ivoria' ty telo ndra roe ami'ty añarako le am' iareo ao raho.

o Fiheveañeо

²¹ Le nisitsitse mb'ama'e t'i Petera, nanao ty hoe: O Rañandria, ie manao tahiñe amako ty rahalahiko, hiheveako pak' impito hao?

²² Hoe t'i IESOÀ tama'e: Tsy anoako ty hoe Ampara' ty fito, fa Sikal' ami'ty fitom-polo-fito'amby. ²³ I fifehean-dikerañey, le ampanahafeñe ami'ty mpanjaka niambesatse nifamolily amo mpitoro'eo naho amo mpa-mandro'eo. ²⁴ Ie namototse volily, pok'eo ty nisongo bogady volamena* rai-ale ama'e; ²⁵ aa ie tsy nanan-katolotse, le linili' i talè'ey te haletake reketse keleiañe naho ze hanaña'e iaby, hañavake i songoy. ²⁶ Nibaboke aolo' i talè'ey i mpitoroñey, nitoreo te hifereñaiña'e, handiñisa'e, fa fonga havaha'e. ²⁷ Aa le niferenaiña' i talèy, le vinotso'e vaho hene napo'e.

²⁸ Fa naho niavotse i mpitoroñey le nanjo ty mpitrapo-pitoroñe nanaña'e drala zato[†], le tsinepa'e naho finofo'e vaho hoe ty asa' i kinabokey

²⁹ Matokisa naho mahaliñisa ahy fa hene havahako. ³⁰ F'ie tsy nimete nitsanoñe aze, te mone nase'e mb'am-balabey ao ampara' te fonga hondroha'e. ³¹ Nioni' o mpitrapo-pitoroñeo i nanoe'ey le akore ty haboseha' iareo kanao niheo mb'amy talè'ey nitalily. ³² Aa le kinanji' i talè'ey vaho nanoa'e ty hoe: Ty mpitoroñe fatse toy, tsy hene niheveako hao o songo'oo amy nampihaonkaoñe'o ahiy? ³³ Aa tsy ho nitretreze'o ka hao i mpitoro'o nihalaly ama'oy hambarne amy niheveako azoy?' ³⁴ Niviñera' i talè'ey vaho linili'e t'ie ho samporeraheñe ampara' te hene avaha'e i sinongo'ey. ³⁵ Zay ty hanoan-dRaeko andindiñe ao ama'areo naho tsy songa miheve ty longo'e an-tro-mazava.

19

*Enga valy he Sara-baly
Mar 10.1-16; Lke 18.15-17*

[‡] **18:16** Its 19:15; Jao 8:17, Ko II 13:1, Ti I 5:19, Heb 10:28 § **18:18** Mat 16:19 * **18:24** Talenta, naho vola-foty: 45kg; ie volamena: 91 kg † **18:28** Denarios: drala vola-foty 3,9 gram: karama 1 andro.

¹ Ie nagado'IESOÀ i tsaray, le nienga i Galilia naho nandoake am-paripari' Iehodà alafe' Iordaney aña. ² Norihe' i lahialeñey vaho jinanga'e iaby.

³ Niheo mb'ama'e mb'eo o Fariseoo hitsoke aze, ami'ty ontane ty hoe: Hake hao t'ie hifanarake aman-drakemba'e ami'ty inoñ' inoñe vaho hanolots' aze takelam-pifanarahañé?

⁴ Tinoi'e ty hoe: Tsy vinaki' areo hao te i nanao iareo haehaey, le lahilahy naho ampela ty nitsenea'e;*

⁵ Hoe re:
Aa le hienga ty rae'e naho i rene'e t'indaty
le hifampipiteke ami'ty vali'e;
vaho ho nofotse raike iereo.[†]

⁶ Ie amy zao, tsy roe iereo fa nofotse raike, vaho tsy mete sarahe' ondaty ze fa natraon' Andrianamboatse.

⁷ Le nanao'iareo ty hoe: Aa vaho akore ty nandilia' i Mosè te hitolorañe takelam-pañitoam-baly vaho ampiengañ' aze i akiba'ey?[‡] ⁸ Hoe re tam' iereo: Ami'ty hagàñ' arofo' areo ty nisaontsie' i Mosè ty hitseizam-baly; fa tsy zay ty tam-pifotora'e aña. ⁹ Hoe raho ama' areo: ze mitsey valy, naho mañenga ty hafa, naho tsy t'ie nañarapilo, ro mañarapilo; karapilo ka ty mañenga i narian-dahiy[§].

¹⁰ Le hoe ty asa' o mpiama'eo tama'e: Aa naho zay ty aman-dahilahy naho i vali'ey, hàmake tsy mañenga. ¹¹ Hoe re tam'iereo: Tsy ho a' ze kila ondaty o tsara zao, fa ho a' ze nitolorañe aze. ¹² Amy te eo ty visitse boak' ami'ty nahatoly aze; eo ka ty visitse nivosire' ondaty, vaho eo ty miha-dogalahy ami'ty filiera'e vatañe ty amy Fifehean-Dikerañey. Ze maharambe zay, ee te ho fohi'e!

¹³ Ie amy zay nindeseñé mb'ama'e mb'eo o ajajao hampitongoà'e fitàñe naho tataeñé; f'ie niroahe' o mpiama'eo. ¹⁴ Le hoe ty nanao'IESOÀ: Apoho homb' amako mb' etoñañe o anak' ajajao, le ko sebañeñé, fa a' iareo i fifehean-dikerañey. Eka, hoe ty asako ama'areo, Toe tsy hizilike amy fifehean-dikerañey ty tsy manahake o retoñañe. ¹⁵ Aa le nanampeza'e fitàñe, vaho nienga.

Ty Zatovo

Mar 10.17-27; Lke 18.18-27

¹⁶ Niheo mb'amy IESOÀ mb'eo ty ajalahy niambane ama'e nanao ty hoe: O Talè, inoñe ty raha soa hanoeko hahazoako haveloñe amy voatse ho aviy?*

¹⁷ Hoe ty natoi'e aze: Akore t'ie anoa'o: Soa? Tsy eo ty soa naho tsy raike avao, i Andrianañahare; f'ie te himoake an-kaveloñe ao, ambeno o lilio[†]. ¹⁸ Le hoe re tama'e: Inoñe irezay? Hoe t'i IESOÀ ama'e:

Ko mañoho-doza, ko mampikametse,
ko manao kitomboke am'ondate,

¹⁹ miasia ty rae'o naho i rene'o[‡]

vaho

ikokò ondate manahake ty vata'o.[§]

²⁰ Ty hoe ty natoi' i ajalahiy: Fonga nambenako, inoñe ka ty tsy amako?

²¹ hoe t'i IESOÀ tama'e, Naho te ho vañon-drehe, akia, hene aletaho o fanaña'oo, le anoloro amo rarakeo, le hanam-barà andindìñe ao rehe; vaho mañoriha ahy. ²² Ie jinanji' i ajalahiy i tsaray, le ninankañé mb'eo, fa inao tsy ampeampe ty vara'e.

* **19:4** Fot 1:27 † **19:5** Fot 2:24 ‡ **19:7** Its 24:1 § **19:9** Mat 5:32 * **19:16** Mik 6:8a; Sa I 12:23 † **19:17** Lke 10:28, Jao 12:50, Ben 22:14 ‡ **19:19** Avo 20:12-16 § **19:19** Sor 19:18

²³ Hoe t'i Iesoà tamò mpiama'eo: Eka! to t'itaroñako te sarotse ami'ty mpañaleale ty himoake amy fifehean-dikerañey. ²⁴ Anovoñako ty hoe: mora ty hanjilihañe rameva* am-bolim-pitrebeke ao ta ty mpañarivo am-pifehean' Añahare ao.

²⁵ Nahajanjiñe o mpiama'eo fe loho nidaba, le nanao ty hoe amy IESOÀ: Naho zay, Ia ty haharombake iareo? ²⁶ Nitoliha'e le nanao ty hoe: Naho ondaty, sarotse i rahay; fe kila mora aman' Añahare.

*Tambem-Piama'e
Mar 10.28-30; Lke 18.28-30*

²⁷ Hoe ty natoi' i Petera: Hete! hene nenga'ay hanonjohy Azo, inoñe ty ho anay? ²⁸ Hoe t'i IESOÀ: Eka! to ty taroñako amo mpañorike ahio: ie miambesatse am-piambesam-bolonahe'e eo indatiy† amy androm-pizakañey le hiambesatse amy fiambesatse folo ro'ambi' i foko folo-ro'ambi' Israele rey nahareo. ²⁹ Ze mienga anjomba ndra rahalahy ndra rahavave ndra rae ndra rene ndra valy ndra anake ndra tane, ty ami'ty añarako, ro handrambe in-jato manahake irezay vaho handova i fifehean-dikerañey; ³⁰ maro amo valoha'eo ty ho tsitso'e, naho o am-para'eo ty ho aolo.

20

Eke Teteke Mar 10.31

¹ Ie aña zay le hoe t'i IESOÀ amo mpiama'eo: Ampanahafeñe ami'ty talèn' anjomba, i fifehean-dikerañey, ie nañaleñaleñe nañèke ondaty ho amy tetem-bahe'ey. ² Naè'e ami'ty bogady* raike iereo ho ami'ty andro raike, le nirahe'e mb'an-tetem-bahe'e mb'eo. ³ Niavotse indraike re ami'ty ora faha telo vaho nitendreke ondaty nisarasara an-tsena ao, ⁴ hoe re tam' iereo: Akia mb'an-teteko ao ka, vaho hatoloko anahareo ze mañeva. Le nimb'eo iereo. ⁵ Niavotse indraike re nanao zay ami'ty ora fah' eneñe naho amy faha-sivey, le nampanahafe' amy teoy. ⁶ Niakatse amy ora faha folo-raik' ambiy re nahaoniñe ty ila'e nihenekeneke ey, le hoe ty nanoa'e: Akore t'ie mijohajohañe etoañe lomoñandro? ⁷ Hoe ty natoi' iareo: Ie tsy amam-pañeke, le hoe re am'iereo: Akia mb'an-teteko mb'eo ka. ⁸ Ie hariva, hoe ty asa' i talèn-tetem-bahey amy mpisarim-piekey: Ikoihos hanolorako ty karama' iareo, mifototse ami'ty fara'e, pak' ami'ty valoha'e. ⁹ Nandrambe bogady raike o am-para'eo. ¹⁰ Aa le natao' o valoha'eo t'ie ho nandrambe mandikoatse, te mone songa natolo'e bogady raike. ¹¹ Le nitreontreõne amy talèn-tetem-bahey i valoha'eo rey ¹² ami'ty hoe: Ora raike ty nitoloña' i fara'e retia, fe nampirae'o ama'ay nifanehake ami'ty hatrovoha' i androy. ¹³ Tinoi'e ty hoe ty raike ama'e: O rañeko, Tsy nanoeko ama'o ty tsi-to; tsy nañeke azo ami'ty bogady raike hao? ¹⁴ Rambeso le akia, he satriko ty manolotse ami'ty hengaha'e tia mira amy azoy, ¹⁵ tsy mete hao te hanoeko i satrikoy? maha-mandofirim-pihaino'o hao te zaho matarike? ¹⁶ Aa le ho valoha'eo ty fara'e, vaho ho fara'e ty valoha'eo. Maro ty koiheñe fe tsy ampeampe ty ho joboñeñe.

*ty Havilasi' IESOÀ
Mar 10.32-34; Lke 18.31-34*

¹⁷ Ie narivo' Ierosaleme t'i IESOÀ, le natola'e i mpiama'e folo ro'amby rey, vaho nanoa'e ty hoe: ¹⁸ Inao! mionjoñe mb'e Ierosaleme mb'eo tika; le hatolotse amo Androanavy naho mpisoroñe lohà'eo i Ana' ondatiy vaho

* 19:24 Rameva; toe tali-randra † 19:28 Heb: Dame * 20:2 denariosy

hafà' iereo havetrake, ¹⁹ le hasese amo kilakila ondatio ho lafañe naho hohofan-doza; f'ie hitroatse ami'ty andro fahatelo.

Fahimbaññañe

Mar 10.35-45

²⁰ Nimb'ama'e mb'eo ty tañanjomba' i Zebedia rekets' i ana'e rey, niambane vaho nihalaly ama'e. ²¹ Hoe re tama'e: Inoñe o paia'oo? le hoe re. Te ihe handily ty amo anako roe retoañe te hitoboke am-pitâ'o havâna eo ty raike vaho ankavia'o eo ty raike am-pifehea'o ao. ²² Natoi' IESOÀ ty hoe: Tsy apota' areo ty halali' areo. Lefe' areo hao ty hinoñe amy fitovy hinomakoy[†]? Tinoi' iereo ty hoe: Lefe'ay. ²³ Le hoe re am'iereo: Nomo i fitovikoy, fe ty hiambesatse an-kavanako naho an-kaviako eo, tsy ahiko hatolotse, fa ho a i nihalankañañe aze aolon-dRaey[‡]. ²⁴ Ie jinanji' i folo rey, le nitorifiheñe am-pihaino' iareo i mpirahalahy roe rey. ²⁵ Tsinikao' IESOÀ iereo, le nanoa'e ty hoe: Fohino te fêlehe' o roandria' ze kilakila ondatio iereo, naho mifehe'iareo ka ty bey. ²⁶ Tsy ho zay ty ama' areo, amy te, ze mipay ho bey ama'areo le ampitoroño anahareo, ²⁷ vaho ze te ho jabajaba ama'areo ty h'ondevo' areo, ²⁸ manahake te tsy niavy ho toroñeñe i Ana' ondatiy, fa ty hitoroñe§, hanolo-batañañe ho vilin' ai' i màroy.

Isa' o Feio

Mar 10.46-52; Lke 18.35-43

²⁹ Nigodañe e Hieriko ao iereo, ie norihe' i lahialeñey. ³⁰ Ingo niakatse mb' añ'olon-dalañañe mb'eo ty 'ndaty Fey roe naho nahajanjiñe ty fizakozakoa' i lahialeñey le nañontane ty ama'e, naho nisaontsiañañe te mañavelo mb'eo t'IESOÀ nte-Nazareta, vaho nipoñafa' iereo ty hoe: Ry Ana' i Davide, ferenaiño zahay. ³¹ Fe nendaha' i lahialeñey ami'ty hoe: Mamatsy; te mone nindrae' iereo am-pazake ty hoe: O Rañandria, Ana' i Davide, itretrezo.

³² Nijohañe t'i IESOÀ, le kinanji'e, vaho nanoa'e ty hoe: Inoñe o paia' areo hanoeko? ³³ Hoe iareo: O Rañandria, ty hampibarababeake o maso'aio.

³⁴ Niferenaiña' IESOÀ, le tsinapa'e o fihaino' iareoo, naho nanoa'e ty hoe: Nampijangañañe anahareo ty fatokisa' areo, le nahaisake amy zao iereo naho nandrenge an' Andrianañahare naho nañorike aze vaho hene nañonjoñe an'Andrianañahare ondatio ty am'izay.

21

Ty Figodañañ' am-Pitreñañe

Mar 11.1-10; Lke 19.29-38; Jao 12.12-15

¹ Ie nañarine Ierosaleme, naho nandoake e Beit-Pagè, Ambohi-Oliva eo, le nirahe' IESOÀ ty roe amo mpiama'eo, ² ami'ty hoe: Akia mb'amo mikijoly ey hoek' ey, le ho oni' areo amy zao ty borike mirohy rekets' ana'e, hahao, vaho tantalio mb'amako mb'etoa. ³ Ie isaontsia' t'indaty ndra inoñ' inoñe, le irehafo te ipaia' i Talè, vaho havotso'e homb'eo amy zao.

⁴ I he'e zay, hañenefañe i nampisaontsieñe i mpitokiy ty hoe:

⁵ Taroño ty anak' ampela' i Tsione:
Inge mb'ama'o mb'eo ty Mpanjaka'o,
vantañañe naho lahifihaty,
mireke, miningitse tamanam-borike,
ami'ty kondam-borike, ana' ty borike-vave,*

[†] **20:22** Heb: hifeake ty fijaleañe naho i havilasy hifeahakoy hao? [‡] **20:23** Mar 10:39, Lke 12:50

[§] **20:28** Mar 10:45, Ies 49:1-7 * **21:5** Zek 9:9 : G: anam-biby mpivave kilàンkañe

6 Aa le nimb'eo iereo, nanao i nitoroa' IESOÀy, **7** Nente' iereo i borìke rekets' ana'ey, le nandafiha' ty ila'e ty akanjo naho saro'iareo naho nini-ningitse ama'e t'i IESOÀ, vaho nionjoñe mb'eo **8** Nandamike o saravi'eo andalañe eo ty ila' i màroy, le nibira singan-katae ty ila'e ze nahifike eo ka. O aolo'eo naho o am-boho'e eo **9** songa nikaike ty hoe:

Hosana[†], ry Mpañaha ty voatse toy;
Andriañeñe ty mitotsake
ami'ty tahina' IEHOVÀ;[‡]
Hosana, Mpandromba'ay;
Honjonen-drehe andindiñe aña
naho an-tane atoy!

10 Ie nizilike e Ierosaleme ao t'i IESOÀ le nangetseketeke iaby i rovay, nanao ty hoe: Ia v'izao? **11** Le nifanao ty hoe ondatio: IESOÀ, Mpitoky, nte-Nazareta' i Galiliay.

Ie Nañalio i Anjombay

Mar 11.15-17; Lke 10.45,46

12 Nizilike aña'Anjomban' Añahare ao t'i IESOÀ le nitendreke mpanao balike, le navalitaboa'e o tihim-panakalo volao, naho ty fitoboha' o mpandetake dehoo, **13** vaho nanoa'e ty hoe: Hoe ty pinatetse:
Hatao anjombam-pitalahoa' ze hene fifeheañe ty Akibako\$, te mone lakatom-piaroteñe ty nanoa' areo aze.*

14 Le nimb'ama'e aña'Anjomba ao o feio naho o kepekeo vaho jinanga'e.
15 Niheo mb'eo o mpisorom-beio naho o Androanavio hisamba o raha fanjàka nanoe'eo, ie nikoikoike aña'anjomba ao o ajajao nanao ty hoe: Rengeñe t'i Anan' Añahare. F'ie ninjea' o Androanavio, **16** ami'ty hoe: Tsy janji'o hao ty volàñe' o retiañe? Tinoi'e ty hoe: Eka mahatsanon-draho! Tsy vinaki' areo hao ty hoe,
Hirik'am-bavan' ajaja
naho ajajamena
ty nañoreña'o haozarañe[†]?

17 Nienga re, niavotse mb'e Betania mb'eo naho nialeñe ao, vaho nampalangese'e am'iereo i Fifehean-Dikerañey.

i Sakoañey

Mar 11.11-14, 20-24

18 Ie maraindraiñe, nibalike mb'an-drova mb'eo, nisaliko; **19** Niisa'e ty sakoañe aña'olon-dalañe ey le nitotofa'e, fe tsy nanjò ama'e naho tsy raveñe avao, vaho nanoa'e ty hoe: Le lia'e tsy hiboaham-boa ka. Tsipaepae zay, niforejeje i sakoañey. **20** Vereñe o mpiama'eo te nahaoniñe zay le nanao ty hoe: Inoñe ty nampangèñe i sakoañey anianik' avao?

21 Tinoi' IESOÀ ty hoe: Ie ama-patokisañe, tsy mifejofejo, le tsy vaho o sakoañeo ty hanoe'o zao, fa naho lilie' areo o vohitse eroio ty hoe: Miavota, mivaridiña andriak' aña, le hanoe'e. **22** Ndra inoñ'inoñe ihalalia' areo te milolok' am-patokisañe, le ho azo' areo.

ty Nanolo-dily amy IESOÀ

Mar 11.27-33; Lke 20.1-18

23 Nizilike aña'anjomban' Añahare ao re hañoke le nimb'ama'e mb'eo o roandriañeo naho o mpisorom-beio naho o mpifehe' ondatioo nanao ty hoe: Ami'ty lili'ia ty anoa'o zao? Ia ty nanolots'Azo o haozarañe zao?

[†] **21:9** Hosana: 'ehe rombahō' [‡] **21:9** Sab 118:26 § **21:13** Ies. 56:7 * **21:13** Iir. 7:11

[†] **21:16** Sab 8:2

²⁴ Tinoi' IESOÀ ty hoe: Ontane raike ka ty hañontaneako anahareo, toiño i ahikoy, le hitaroñako ty lily anoeko zao. ²⁵ Ty filipora' i Jaona, boak'aia? hirik' andindiñe ao hao ke boak' am'ondatio? Niñeõeoñe ty hoe iereo, Ino ty hanoen-tika? naho manao ty hoe tika: Hirik' andindiñe ao, le hivolaña'e ty hoe: Aa vaho akore t'ie tsy niantofa' areo? ²⁶ ke manao ty hoe tika: Boak'ama' ondaty, ie ihembañan-tika fa songa miantoke te mpitoky t'i Jaona? ²⁷ Aa le hoe iereo, Tsy fohi'ay. Le hoe re: Zaho ka tsy hanoro anahareo ty lily itoroñako irezay.

Ty Mpirahalahy Roe

²⁸ Aa akore ty heve' areo? Teo t'indaty aman' ana-dahy roe: nimb' ami'ty raike re nanao ty hoe: Akia anake, mañalahalà an-tetem-baheko ao te anito. ²⁹ Hoe ty natoi'e, Aiy! tsy satriko zay. F'ie aňe naneñeñe le nimb'eo. ³⁰ Nimb'ami'ty raike ka re, nanao i hoe zay. Nanoiñe ty hoe re: Intoy raho, Aba. F'ie tsy nimbeo. ³¹ Aa, ia amy roe rey ty nanao ty satrin' arofon-drae'e? Hoe iereo tama'e: I valoha'ey. Le hoe t'i IESOÀ: Eka! to t'itaroñako te hiaolo anahareo mb'am-pifehean-dikerañe ao opiaroteñe naho tsimirirañe, ³² amy te niheo mb'ama' areo an-dalam-bantañe t'i Jaona, fe tsy niantofa' areo. Natoky aze ka opiaroteñe naho o karapiloo; ie niisa'areo zay, le mbe tsy nitolike an-tsoloaho avao hiantok' aze.

Ty Mpamondro

Mar 12.1,12; Lke 20.9-19

³³ Inao ty razan-drehake ty ami'ty mpambole: Teo t'indaty amankasy nañalahala tetembahe, nañarokatoha'e fefe, nañoreña'e fitalakesaň' abo, naho nihalia'e fipiritan-divay, le nafanto'e amo mpitoroñe vaho nienga mb'eo. ³⁴ Ie tsatoke ty sam-panontonan-tsabo, le nahitri'e mb'amo mpiavao mb'eo o mpitoro'eo hangalake i vara'ey. ³⁵ Fe tsinepa' o mpamboleo o mpitoro'eo, trinabotrabo' iereo ty valoha'e, vinono ty faharoe, vaho finetsam-bato ty fahatelo. ³⁶ Nañirake mpitoroñe indraike re, maro te amy valoha'ey, fe hambañe amy teoy ty nanoañe iareo. ³⁷ Fara'e, nasangitri'e am'iereo i ana-dahi'ey ami'ty hoe: Hera hiasia' iareo i anakoy. ³⁸ Ie nitrea' o mpiavao i ana'ey, le nikinia ty hoe: Intoy i mpandovay, antao hañè-doza ama'e, handovan-tika i taney. ³⁹ Aa le rinambe' iereo naho navokovoko' iereo alafe' i tetekey vaho navetrake. ⁴⁰ Aa ie pok'eo i talèn-tanem-bahey, hatao'e akore iareo?

⁴¹ Le hoe iereo tama'e: Ty amo lo-tserekeo, ho zamane'e an-keloke, le hatolo'e ami'ty mpiava ila'e i tanem-bahe'ey, hitolora' iareo an-tsa-do'e ty voka'e.

⁴² Hoe t'i IESOÀ tam' iereo: Tsy vinaki' areo hao i Sokitse Masiñe manao ty hoe:

I vato nadò' o mpandranjjoy
le fa lohan-kotsoke;
boak'am' IEHOVÀ zay,
fiain-tane am-pihaino'ay[‡]?

⁴³ Aa le itaroñako te hasintake ama' areo i fifehean-dikerañey le hatolotse ami'ty fifeheñañe mahavokatse. ⁴⁴ Harettsake ambane ze mihotrake ami'ty vato toy; le ho foifoy ty ideboña'e\$.

⁴⁵ Nahajanjiñe o fandrazañañe o mpisorom-beio naho o Fariseoo, le naharendreke t'ie o tsinara'eo. ⁴⁶ Aa le nipay hitsepake aze iereo, fe nimarimariheñe i lahialeñey, ie nitañe aze ho mpitoky.

[‡] 21:42 Sab 118:22,23 § 21:44 Lke 20:18, Rom 8:10,13, Kol 3:5

22

ty Sabadidam-Pañengàm-Baly

¹ Nitaroñe am'iareo añ' ohatse indraike t'i IESOÀ, ami'ty hoe: ² Sareañe ami'ty mpanjaka nañalankañe sabadidan' enga-vao i fifehean-dikerañey. ³ Nahitri'e mb'amo nambarañe amy sabadidakeio o mpitoro'eo, fe tsy nisatrie'iereo ty homb'eo. ⁴ Mbore nañitrike mpitoroñe ila'e ami'ty hoe, Taroño amo nambarañe ty hoe: Ingo fa nihalankàñeko i sabadidakey, fa nandenta añombe naho voroñe, fonga veka'e: ehe mahavia mb'amy fañengàm-baly. ⁵ F'ie tsinambolitio' iereo vaho niveve aña, teo ty nimb' an-drova mb'eo, teo ty nimb'an-tolon-draha'e aña. ⁶ Rinambe ty ila'e ka o mpitoro'eo, nahivivio' iereo, naho navetra' iereo. ⁷ Jinanji' i mpanjakay, le nandofiry, naho rinoa'e aña i mpamono rezay vaho finorototo'e añ'afó ty anjomba' iareo. ⁸ Le hoe re amo mpitoro'eo: Fa hinajary i enga-vaoy, fe tsy mañeva o nambarañe. ⁹ Akia henaneo mb'amo lalañeо mb'eo, le ambarao ze tendreke hiatreke i sabadidan' enga-valiy. ¹⁰ Niavotse mb'amo lalañeо mb'eo o mpitoroñe, le hene natontoñe ze nizoeñe ndra ty soa ndra ty raty vaho nifonitse mpikama i sabadidan' enga-valiy.

¹¹ Nizilike ao i mpanjakay hisary o nikamao, naho nanjo ondaty tsy nisaroñe sikim-panambaliañe, ¹² le hoe re tama'e: O rañetse, akore ty nimoaha'o atoaña, ihe tsy aman-tsarimbom-panambaliañe? F'ie nitsiñé. ¹³ Le hoe i mpanjakay tamo mpitoro'eo: Rohizo o taña'e naho tombo'eo vaho ajorobo an-kerakeran-tsikeokeoke ao, am-paran-kalalefan-tsikeokeok' ao; amy fangololoihañe naho ali-vazañey. ¹⁴ Maro ty kinanjy, fa tsi-ampeampe ro joboñeñé*.

Tsinoke t'i IESOÀ

Mar 12.13-17; Lke 20.20-26

¹⁵ Niveve hey o Fariseoo, hikilily ty hampidreñam-pandrike aze antsaontsi'e. ¹⁶ Le nirahe' iereo mb'ama'e mb'eo ty ila' o mpiana' iareoo naho ty boak' amo borizà' i Herodao, hanao ty hoe: O Talè, apota'ay te migahin-dRehe, mañoke o lalan' Añahareo an-dili-po, tsy an-kahembañe, vaho tsy mirihy. ¹⁷ Isaontsio ty heve'o: Hake hao ty mandroroñe amy Kaisara, he tsie?

¹⁸ Fe niarofoana' IESOÀ ty famañahia' iareo, le hoe re, Ty soa-miatreke, ino ty anigiha' areo ahy? ¹⁹ Atorò ahy i bogady faroroñey. Le nindesa' iereo drala sotra. ²⁰ Le hoe re tam'iereo: Sare ia naho vinta'ia v'itoy?

²¹ Hoe iereo: A i Kaisara. Le hoe t'i IESOÀ tam' iereo: Ampolio amy Kaisara ze a i Kaisara, naho aman' Añahare ze an' Andrianañahare.

²² Nahajanjiñe iereo le nilatsa naho nisitake aze vaho nibioñe.

Fitsoha' o Tsadokeo

Mar 12.18-27; Lke 20.27-40

²³ Tamy àndro zay, nifañaoñe ama'e o Tsadokeo, o mandietse ty fitroarañ' an' kavilasio, le nañontane aze ²⁴ ty hoe: O Talè, toe nisaontsie' i Mosè aman-tika, t'ie mitrao-pimoneñe ty mpirahalahy naho mihomake ty raike tsy aman' ana-dahy, le ty rahalahi'e ty hañenga i nivali'ey hampitroara'e tiry ho a i rahalahi'ey.† ²⁵ Inao, t'ie fito mirahalahy amantika, nañenga valy ty zoke'e le nivetrake tsy nampipoke tiry, le nengae' i rahalahi'ey i vali'ey. ²⁶ Nanao zay ka i faha-roey naho ty faha-telo, pak'amy faha-fitoy. ²⁷ Ie aña, nihomake i rakembay. ²⁸ Aa kanao fanaña' iareo iaby, ia amy fito rey ty ho vali'e?

* **22:14** Mat 20:16, Iir 3:14 † **22:24** Its 25:5

²⁹ Tinoi' IESOÀ ty hoe iereo: Mandilatse nahareo naho tsy mahafohiñe ndra o pinatetseo ndra ty haozaran' Añahare[‡]. ³⁰ Ie amy androm-pampi-vañonan-ko veloñey, tsy hañenga ampela ty lahilahy, ndra lahilahy ty ampela, fa hanahake o anjelin' Añahare andindìñeo. ³¹ Tsy vinaki' areo hao, ty amy fampitroarañe o vilasioy, i nitsara' IEHOVÀ ama' areoy ty hoe:

³² Zaho IEHOVÀ

ro Andrianañahare' i Abraàme,
naho t'i Andrianañahare' Isaka,
naho t'i Andrianañahare' Iakobe?

Kanao izay, le tsy Andrianañahare' o nihomakeo re, fa a o veloñeo. ³³ Ie nahajanjiñe zay i lahialeñey le nilatsa amy hihi'ey.

Ty Lily Bey

Mar 12.28-34

³⁴ Aa ie nirendre' o Fariseoo te tsy nanan-kavale o Tsadokeo, le nifanontoñe, ³⁵ le hoe ty ontane' ty mpahay Hake ama'e hitsoke aze: ³⁶ O Talè, inoñe ty lily lohà'e amy Hake ao? ³⁷ Le hoe re tama'e:
Kokò t'IEHOVÀ Andrianañahare'o an-kaampon' arofo naho
an-kaliforam-piaiñe vaho
an-kaozara'o iaby.[§]

³⁸ Zay ty lohà'e.* ³⁹ Hambañ'ama'e ty faha-roe:
Kokò ondatio manahake ty vata'o.[†]

⁴⁰ Amy lily roe rey ro iantehera' t'i Hake iaby naho o Mpitokio.

Ana'ia i Norizañey

Mar 12.35-37; Lke 20.41-44

⁴¹ Nifandrimboñe o Fariseoo, le nañontanea' IESOÀ ⁴² ty hoe, Akore ty safiri' areo ty amy Norizañey? T'ie ana' ia? Tinoi' iereo ty hoe: Ana' i Davide. ⁴³ Hoe re tam' iereo: Aa vaho akore t'i Davide, ie añaamy Arofo Masiñey ro nikany aze ty hoe: Talè, ⁴⁴ amy pinatetse ty hoe:
Nitsara amy TALÈKO t'IEHOVÀ ami'ty hoe:
Mitoboha an-tañako havana etoa
ampara' te anoeko atimpahem-pandia'o
o rafelahi'oo[‡]?

⁴⁵ Aa kanao natao' i Davide: TALÈ, inoñe ty maha ana'e aze. ⁴⁶ Tsy nahatoiñe aze ndra volan-draike iereo, le tsy teo henane zay ty nahavany nañontane aze ndra inoñ'inoñe.

23

Ty sata'o Fariseoo

Mar 12.38-40; Lke 20.45-47

¹ Le nitaroñe' IESOÀ amy lahialeñey naho amo mpiama'eo, ² ty hoe:
Fiambesa' o Fariseoo naho o Androanavio ty fiambesa' i Mosè; ³ ze itsara'e, ambeno naho ano; fe ko oriheñe o fepè' iareo ndra o sata' iareoo, amy t'ie misaontsy fa tsy manao*. ⁴ Mitakàroke iereo, manolotse voròngo jabajaba saro-jinie' ty soro' ondaty, f'ie mifoneñe tsy hañionjoñe ndra ty rambom-pitâñe hameve aze. ⁵ Fonga anoe' iereo ho fisambañe o fitoloña' iareoo; itare' iereo ty kontra'iareo, naho halavae' iereo o lifin-tsarimbo' iareoo[†]. ⁶ Tea' iereo ty hñandre an-dohà'e eo amo sabadidakeoo, naho ty ampiambesareñe aolo am-pivory ao, ⁷ naho ty mibaboke an-damoke

[‡] 22:29 Mar 12:24 § 22:37 Its. 6:5 * 22:38 Solò: 38Zay ty lily ra'elahy naho valoha'e.

[†] 22:39 Sor 19:18 [‡] 22:44 Sab 110:1 * 23:3 Mp II 17:34 [†] 23:5 Vol 15:38

ao, vaho ty hikanjiañe ty hoe: Raby. ⁸ Fe ko irie'areo te hanoeñe ty hoe Talè, amy te raike ty Talè' areo, vaho miproahalahy iaby nahareo. ⁹ Tsy ho kanjie' areo ty hoe Rae t'indaty an-tane atoy, fa raike t'i Rae' areo, i andindiñey. ¹⁰ Tsy hatao Mpiaolo ka nahareo, fa raike ty Mpiaolo' areo, i Norizañey. ¹¹ Ty bey ama'areo ty hitoroñe anahareo. ¹² Harèke ty mitoabotse, haonjoñe ty miambane.

¹³ Hankàñe ama' areo Fariseo naho Androanavio, ty mpamañahy! amy te agabe' areo am'ondatio i fifehean-dikerañey; tsy imoaha' areo, le sebañe' areo tsy himoake ao o te hizilikeo.

¹⁴ Hankàñe ama' areo Fariseo naho Androanavio, ty mpamañahy! Abotse' areo naho infanjara' areo ty hanaña' o vantotseo ami'ty kora-lava. Aa le ho fandilovañ' ela ty anahareo.[‡]

¹⁵ Mañariary riake naho tane nahareo hamehe ty tro' ondaty raike ho ami'ty fiantofa'areo, ie mivahotse ao le fa indroe' i taloy ty haratia'e.

¹⁶ Hankàñe ama' areo ry fifañosoña' ty goa, ie atao' areo ty hoe: Tsy hañavake ty mifanta amy anjomban' Añaharey, fe azi'areo hañavake ty mifanta aman-dra inoñ' inoñe natokañe ami'ty firafi' i anjomban' Añaharey!

¹⁷ Ry ondaty dagola naho goao! ty aia ty ambone, o raha natokan-ko amy anjombay, ke i anjombay?

¹⁸ Le tsy ampañavaha'areo ka ty mifanta amy kitreliy, fe azi'areo hañenga ty mifanta amy engaeñe amy kitreliy. ¹⁹ Ty goa; aia ty ambone, i engaeñey hera i kitreliy, i engay ke i anjombay? ²⁰ Ty mifanta amy kitreliy mifanta ama'e naho amy ze he'e ama'e. § ²² Ze mifanta amy fiambesan' Añaharey, mifanta ama'e naho amy mpiambesatse ama'ey.

²³ Hankàñe ama' areo, Fariseo naho Androanavio, Asese' areo ty fahafolo' o añam-poretrakeo, ty beañe, naho ty taikombelahy, fe* apo' areo ty vente' o lili' i Hake zao: ty fatarihañe, ty hatò, naho ty figahiñañe; toe hanoeñe i lily rezay fe tsy handikofañe o ila'eo[†].

²⁴ Ry tirim-piaolo goa, mpanatavañe lale-dronono vaho mpampigedrandon-drameva.

²⁵ Hankàñe ama' areo, Fariseo naho Androanavio, ty mpamañahy! Liove' areo alafe'e ty fitovy naho ty akalañe, f'ie lifo-katramo naho haleorañe ty ao. ²⁶ Ty mpamañahy, liovo hey ty am-po'e ao, le halio ka ty alafe'e.

²⁷ Hankàñe ama' areo, Fariseo naho Androanavio, ty mpamañahy! fa mpihambañe amo kibory nifotieñe, ie fanjàka ho a ondatio ty alafe'e eo, fe minitse taolan-dolo naho hativàñe ty ao. ²⁸ Ie mieva h'ondaty vañoñe añatrefa' ondatio, te mone atsa-pamañahiañe vaho halo-tsereke ty an-tro' areo ao.

²⁹ Hankàñe ama' areo, mpamañahy, Fariseo naho Androanavio! Fa aore' areo ty lona' o mpitokio naho volovoloe' areo ty kibori' o mahitio,

³⁰ vaho manao ty hoe: Naho teo zahay tañ' andron-droae'ay le tsy ho nomei'ay ty hañohofan-doza amo mpitokio. ³¹ Aa le mpitalily vatañe t'ie ana' o mpamono mpitokio. ³² Fanoe' areo o satan-droae' areoo.

³³ Ty mereñe! Tariran-dapetake, akore ty hipotitsiha' areo ty fa' i tsikeokeokey[‡] naho tsy mitolike am-pisolohoañe?

^{‡ 23:14} Toko'e ampifotereñe ty 15/14 ty amy rafi'e; le afindra hanonjohy ty a.32 ty a.16-22 ty amy rafi'e taolo ^{§ 23:20} Gr: 21I mifanta amy anjomban' Añahareiy le mifanta ama'e naho amy mimoneñe ama'ey. ^{*} 23:23 Heb: asosoke: mampikamitse vaho ^{† 23:23} Lke 11:42 ^{‡ 23:33} Grika: tsy eo ty sisa

³⁴ Aa le: Inao, hañitrifako mpitoky naho mahihitse naho Androanavy[§]; ho vonoe' areo ty ila'e, ho lafae' areo am-pivori' areo ao ty ila'e, vaho ho horidañe' areo an-tanañe pak'an-drova. ³⁵ Soa te hene hafetsake ama' areo ze lio miavake nadoañe an-tane atoy, mifototse ami'ty lio' i Abela vañoñey, pak'ami'ty lio' i Zakaria ana' i Barakia vinono' areo añivo' i anjomban' Añaharey naho i kitreliy.

³⁶ Eka! to t'itaroñako te, hidoeñi ami'ty tariratse toy i he'e zay, ³⁷ naho am' Ierosaleme, mpamono mpitoky, naho manintake o niraheñeo; impire hao ty nisalalako hatontoñe o ana'oo, hambañe ami'ty anontona' ty rene akoho o ana'e ambanen' ela'eo, fe tsy nimete nahareo! ³⁸ Aa le hengañe mangoakoake ama'areo o anjomba'areoo; ³⁹ Eka! itaroñako te tsy ho oni' areo raho henane zao, ampara' te hanoe' areo ty hoe:
Andriañeñe ty mitotsak' ami'ty tahina' IEHOVÀ!*

24

Harotsake i Anjombay

Mar 13.1, 2; Lke 21:5,6

¹ Aa ie nienga i Anjomban' Añaharey t'i IESOÀ, naho nañavelo mb'eo, le niharivoa' o mpiama'eo hampisamba' iareo aze o traño añ'anjomban' Añahareo. ² Hoe re: Hene isa' areo o ey hoek'eo! Eka! to t'itaroñako te fonga harotsake vaho tsy hadoñe eo ty vato raike mitongoa ami'ty raike.

Mañontane ty ho avy

Mar 13.34; Lke 21.7

³ Ie niambesatse ambohi' Oliva am-pitalakesañe i Anjomban' Añaharey, le natola' i Petera, i Jaona naho i Andrea, nañontane aze ty hoe: Mbia te ho tondroke irezay? naho inoñe ty ho vilo' te hifetsake i he'e tsaraeñey, he mbia ty hamotora'e naho mbia ty figadoña' ty tane toiy vaho i fitotsaha'oy?

⁴ Natoi' IESOÀ ty hoe: Mitaða tsy hampandifihe' ondaty. ⁵ Amy te maro ty ho pok'eo ami'ty añarako hanao ty hoe: Zaho i Norizañey, hampandrifitse ty maro. ⁶ Ry koahe, Naho mahajanjiñ' aly naho firimboñam-balobohòke, le mitaoa tsy ho dereñe, amy te tsy mahay tsy ho tondroke, fe mboe tsy ie i figadoñañey. ⁷ Hitroatse hiatreatre ty fifeheañe ty fifeheañe, naho ty fifelehañe ty fifelehañe, naho ho eo ty fivalitaboahañe jabajaba, naho san-kasalikoañe hampioje, vaho fanginiginihan-tane an-koe. ⁸ Fifotoram-pitsongoan' ampela irezay.

⁹ Ie ho tantalieñe mb'an-tsamporeraheñe naho havetreke, hinjè' ze kila fifeheañe ty ami'ty añarako. ¹⁰ Ho embetse ty maro, hifampikinia vaho hifampiloroloro. ¹¹ Hitroatse ty mpitoki-vilañe, hampandifike ty maro, ¹² ie mitombo ty haloloañe le hangodafotse ty fikokoa' i màroy. ¹³ Ho rombaheñe ze mahafifeake pak'am-para'e*. ¹⁴ Hanitsike ty tane toy ty fitaroñañe ty Talili-soa toy†, ho fitaliliañe ahy amo kila fifeheañeo, zay vaho ho tondroke i figadoñañey.

¹⁵ Zao i Norizam-Bilañey, ie i Hativàñe Mandrotsake nampisaontsieñe i Daniele, mijagarodoñe amy tsy mete ijohañañey. Mandrendreha ry mpamaky‡; ¹⁶ Ie amy zay, ry e Iehodào, miherereaha mb'am-bohitse aña.

¹⁷ Asoao tsy hizotso handrambe raha an-traño'e ao ty an-tafo traño ey.

¹⁸ Asoao tsy hibalike hipay ty saro'e ty an-teteke aña.

§ **23:34** Mat 13:52 * **23:39** Sab 118:26; Heb: Solo: Andriañeñe i Mpandrombak' anaiy. Ies 60:16,

* **24:13** Mat 10:22, Heb 3:6,14, 10:39, Ben 3:10 † **24:14** Abeja'e ty hoe: i evanjeliy ‡ **24:15** Dan 9:27; 11:31; 12:11

¹⁹ Feh' ohatse amo mivesatseo naho amo mampinonoo amy andro rezay.
²⁰ Mihalalia aman'Añahare te tsy ho ami'ty andro Sabata ty filaisa' areo,
²¹ amy te ho lako fisotriañe henane zay, ze mbe tsy nitendreke boak' am-pifotora' ty tane toy pake henanekeo, Aiy! le tsy hahereñe ka. ²² Aa naho tsy nitomòreñe§ i andro rezay, le tsy ho nanjonofotse ho rombaheñe, fe ty amo jinoboñeo le tsy ampeampe i andro rezay.

²³ Ie henane zay, naho eo ty hanao ty hoe ama' areo: Hehe intoy i Norizañey, ndra Indroa; ko miantoke. ²⁴ Amy te hiongake o mpisare norizañeo naho o mpisare mpitokio, hanolo-tsahàtse naho hadabàñe jabajaba t'ie, naho nimete, ho nampanjike o jinoboñeo.

Ty Fiavy Faharoe

Mar 13.24-27; Lke 21.25-28

²⁵ Aa naho talilie' iereo te, Inai-ie an-jerezere tane aña. Ko miakatse mb'eo; ndra, Inay, an-traño bangiñe ao; ko miantoke. ²⁶ Inao, fa nitaroñako aolo ty hifetsaha'e.*

²⁷ Le hoe t'i IESOÀ amo mpiama'eo: Manàhake ty fihirifa' ty helatse atiñanañe aña vaho isake ahandrefañe eñe, ty hitotsaha' i Ana' ondatiy.

²⁸ Fa amy ze idoña' ty lolo ty itontona' o koàkeo†. ²⁹ Ie henane zay, naho tampetse ty hasilofeñe amy andro rey, le haieñe i àndroy,

naho tsy homei' i volañey ty hazavà'e;

hihintañe hirik' andindiñe eñe

o vasiañeo vaho hiezeñezene ty valobohò' i likerañeo;‡

³⁰ Le hisodehañe andindiñe ey ty vilo' i Ana' ondatiy, naho hene hirovetse§ ze foko' i taney, vaho ho isa' iereo ty fitotsaha' i Ana' ondatiy amo rahon-dikerañeo mindre ami'ty valobohoke ra'elahy naho ambintañe maharevendreveñe*. ³¹ Hampihitrife' ami'ty antsiva ra'elahy naho am-pazake abo o anjeli'eo, hanontoñe o jinoboñeo hirike amo tiok-efa' i likerañey, boak' añolon-dindiñe eñe pak'añ'ila'ka.

o Sakañaño

Mar 13.28-31; Lke 21.29-33

³² Rendreho ty fandrazaña' i sakañaey; ie isa'areo o singa'eo naho o rave'e mibotibotio, le fohi' areo t'ie mitotoke ³³ o lalam-beio. ³⁴ Eka! to t'itaroñako te tsy ho modo ty sa toy, ampara' t'ie heneke iaby†. ³⁵ Hihelañe aña i likerañey naho ty tane toy.

Faha' i Noe

Mar 13.32-37; Lke 21.34-36

³⁶ Mboe tsy eo ty mahaisake i àndroy ndra i oray; tsy o anjelin-dikerañeo, fa t'i Rae avao‡. ³⁷ Hoe ty tinovo' IESOÀ amo mpiama'eo: Hambañe amy faha' i Noey, o andro' i Ana' ondatiio. ³⁸ Manahake te tañ' andro taolo' i fiepoepoan-dranoy, nikama naho ninoñe iereo, namokatse naho nanaranake ampara' i andro niziliha' i Noe amy lakam-poloaiy ao, ³⁹ le tsy napota' iereo naho tsy nisorotombahe' i fiepoepoañey ze namongotse iareo; hoe zay ty hitotsaha' i Ana' ondatiy. ⁴⁰ Ie amy zay, roe lahy ty hiava an-tetek' ey, ho rambeseñe ty raike, hapoke ty raike. ⁴¹ Ampela roe ty handisañe am-pandisanañe eo, ho rambeseñe ty raike, hadoñe ty raike.§

§ **24:22** Heb: ni-tsy-ampeampe * **24:26** Grika: Apoke aolo' i 26 eo ty andine'e toy. † **24:28** Lke 17:37, Ben 19:17-18 ‡ **24:29** Ies 13:10; 34:4 § **24:30** Zek 12:10, 12:14 * **24:30** Dan 7:13,14 † **24:34** Iir 31:35 ‡ **24:36** Mar 13:32 § **24:41** Heb: tovo'e: amy te hafaha' o anjely añ' olo' ty tane toio o boloko fitsikapiañe an-tane atoio, hañavake ty soa ami'ty raty.

⁴² Le hoe t'i IESOÀ amo mpiama'eo: Aa le mijilova: amy te mbe tsy nioni' areo ty ora hihavia' i Talè' areoy. ⁴³ Rendreho zao t'ie nahaoniñe ty ora ho nipoteaha' ty malaso, le ho nijilo; le tsy ho nenga'e poñafeñe i anjomba'ey. ⁴⁴ Aa le mihintseña amy te tsy fohi' areo ty ora hitotsaha' i Ana' ondatiy.

*ty Mpitoroñe Roe
Lke 12.41-48*

⁴⁵ Akore ty heve'areo ty amy mpitoroñe migahiñe nahoh mahihitse, ie nampifehe' ty talè'e o keleia'eo, hamahana'e mahakama ami'ty fotoa'e?

⁴⁶ Haha ty mpitoroñe zoe' i talè'ey manao zay ami'ty fiavi'e. ⁴⁷ Eka! to t'itaroñako, te hampifehe'e aze *o keleia'eo. ⁴⁸ Fa nahoh tsivokatse i mpitoroñey, ie mitsakore an-tro'e ao ty hoe, Miesoñe ty fiavi' i talèkoy; ⁴⁹ nahoh mamototse mandafa o mpitoro' i talè'eo, vaho mitrao-pigenoke nahoh finoñe amo màhakeo, ⁵⁰ le hipoteake ami'ty andro tsy itamà'e aze nahoh ami'ty ora mahatakèke aze i talè'ey, ⁵¹ le haitoa'e nahoh hapo'e an-toe' o mpamañahio ty anjara'e; fangololoihane nahoh fikodrìta-nife ty ho ao.

25

Ty Somondrara Miehañe Folo

¹ Nitaroñe amo mpiama'eo indraike t'i IESOÀ, ami'ty hoe: I fifeheandikerañey, le ampanahafeñe ami'ty somondrara folo; songa ninday ty jirokapoa'e vaho nionjoñe hifanalaka amy mpañengay*. ² Nineñe nahoh votro ty lime, nahihitse nahoh nahimbañe ty lime. ³ Ninday o jiro'eo i lime nineñe rey, f'ie tsy nañandesañe solike, ⁴ Ninday solike an-jonjòñe mindre amo jiro'eo i nahihitse rey. ⁵ Ie niroñoñ' aña i mpañengay, le nilañahen-droro. ⁶ Aa nahoh nivaki-miraleñe, inay ty koike: Inao, hitotsake i mpañengay, antao hifanalaka ama'e. ⁷ Nitroatse amy zao i somondrara rey, nikotepe o jiro'eo. ⁸ Aa hoe i mineñe rey amo mahihitseo: Anoloro solike fa kípeke o jiro'aio. ⁹ Hoe ty natoi' i nahihitse rey: Aiy! hera tsy hahaeneñe ty anay nahoh ty anahareo: Akia hey mb'amo mpanao-balikeo, le ikalò ho anahareo. ¹⁰ Aa ie nitoha hivily aña, nitotsake i mpañengay nahoh nindre ama'e mb' an-tsabadidan-engavao ao o niveka'eo, vaho nagabeñe ty lalam-bey. ¹¹ Ie aña, loneake eo i somondrara mineñe rey nikoike amy lalambeiy ami'ty hoe: Rañandria, isokafo. ¹² Hoe ty natoi'e: Taroñeko ama'areo, toe alik'amako nahareo. ¹³ Aa le mitaoa, fa tsy fohi'areo ndra ty andro ndra ty ora hitotsaha' i mpañengay.

Tambe' ty Lili-po

¹⁴ Hoe ka ty nandrazaña' IESOÀ amo mpiama'eo: Ampanahafeñe amy t'indaty mitaveañe aña; kinanji'e o mpitoro'eo, le nandivà'e vara. ¹⁵ Tinolo'e bogady volamena lime ty raike, nanolora'e bogady volamena roe ty faharoe, vaho raike ty fahatelo; songa ty amy hahalefea'ey; vaho nañavelo amy lia'e aña. ¹⁶ Nimb'eo i nandrambe bogady volamena limey le nahatovoñe lime. ¹⁷ Manahake zay, i nandrambe roey, nimb'eo re nikalo, nandetake, vaho nampitomboe'e [roe]. ¹⁸ Fe nimb'eo i nahazo raikey nihaly an-tane vaho nakafi'e ao i drala' i talè'ey. ¹⁹ Ie roñoñe aña, niloneake ty talè' i mpitoroñe rey vaho nampamolilia'e. ²⁰ Nitotoke mb'eo i nahazo bogady volamena limey le nanoa'e ty hoe: O Talè, tinolo'o bogady volamena lime raho, Heheke te nampitomboeko lime. ²¹ Hoe i talè'ey ama'e: Toe mpitoroñe soa nahoh migahin-drehe, amy te ihe nahambeñe

* ^{24:47} Grika: solo: o hanaña'e iabio * ^{25:1} Heb: tovoño: Nahoh i engaeñey

i tsiampey le hampifehèko maro, miheova mb'am-pirebehan-talè'o atoa. ²² Nañarivo mb'eo ka i nandrambe bogady volamena roey, nanao ty hoe: O talè, tinolo'o bogady volamena roe, ingo, tinompeko roe ka. ²³ Hoe i talè'ey ama'e: Toe mpitoroñe soa naho migahin-drehe, amy te ihe nahambeñé i tsiampey le hampifehèko maro, miheova mb'am-pirebehan-talè'o atoa. ²⁴ Pok'eo i nahazo i raikeiy, nanao ty hoe: O talè, apotako t'ie ondaty gañé, mitatake ty tsy nitongisa'o vaho mampitoboroñe ty tsy nandrarah'a'o. ²⁵ Aa kanao ihembañako, nimb'eo le nahajako i bogady volamena'oy; intoy i azoy ho ama'o. ²⁶ Aa le hoe ty natoi' i talè'ey: Ty mpitoroñe tsivokatse naho tembo toy, ie nifohi'o te mitatake ty tsy nitongisako naho manontoñe ty tsy nandrarahako, ²⁷ aa vaho tsy ho najo'o amo bankeo o dralakoo, le zaho nimpoly ho nahazo ty ahiko rekets' ana'e. ²⁸ Aa le rambeso ama'e i bogady volamenay, vaho atoloro amy nanovoñe bogady volamena limey. ²⁹ I manañey ty ho tolorañe; fe amy tsy manañey, ndra ty kede tinendre ho aze ro haloly ama'e†. ³⁰ Le avokovokò ami'ty fimoromoroñan' ankeokeoke ao i mpitoroñe votroy, ho ama'e ty fangololoihañé naho aly vazañe.

Ty Fizakañe o Kilakila'ndatio

³¹ Ie totsake atoy amañ'enge'e i Ana' ondatiy rekets' o hene navahe'eo, le hiambesatse amy fiambesam-bolonahe'ey‡. ³² Hatontoñe añatrefa'e eo ze kilakila' ondaty, le havahe'e hambañé ami'ty fañavaha' ty mpiarake amo oseo o añondrio. ³³ Hanoe'e an-kavana eo o añondrio naho ankavia'e eo o oseo. ³⁴ Le hoe ty ho tsarae' i Mpanjakay amo ankavana'eo: Mihovà ry nitahien-dRaekoo, lovao i fifehean-dikerañe nihalankañeñe ho anahareo boak' amy namboareñe ty voatse toiy pake henaneoy; ³⁵ amy te nikerè raho le nanjotsoa' areo haneñé; naran-drano le nampinome' areo; niambahiny le nampihovae' areo; ³⁶ nibolositse le nampisikine'areo; nisiloke le nitilihe'areo; ie tam-porozò ao le nimb' amako nahareo. ³⁷ Le hoe ty hatoi' o vañoñe: O Talè, ombia ty nahatreava'ay Azo saliko te naahaanjañ' azo? ndra taliñiereñe te nampikama'ay rano? ³⁸ nibongy t'ie sinalo'ay? ³⁹ natindry t'ie nitilihe'ay, tambalabey te nomb' ama'o ao? ⁴⁰ Hoe ty hatoi' i Mpanjakay am'iareo: Eka! to t'itaroñako te, ndra mbia' mbia nanoe' areo amo misotry retiañe, ndra amo kedekedeke retoñañe, le nanoe' areo amako.

⁴¹ Le hoe ka ty hanoe'e amo an-kavia'eo: Misitaha amako ty fokompatsé, mb' amy afo tsy modoy, mb'amy toetse kinotepe ho anahareo naho i mpañinjey vaho o anjeli'eyo. ⁴² amy te nikerè raho, fe tsy nifahana' areo, naran-drano fe tsy nampinome' areo, ⁴³ niambahiny fe tsy nampizilihe' areo, nihalo fe tsy nampisikine' areo, narare vaho tan-drohy ao fe tsy nitilihe' areo. ⁴⁴ Le hoe ty hatoi' iareo: Ombia ty nifankanja'ay ama'o, ry Talè, te nisaliko, taliñiereñe ndra mpañavelo, nibongy, nisiloke ndra ambalabey ao le tsy tama'o nañimb'Azo zahay? ⁴⁵ Inao ty hatoi'e: Taroñeko ama' areo, ndra mbia' mbia tsy nanoe' areo ami'ty raike amo poie'e retiañe, ndra amo kedekede retoñañe le tsy nanoe' areo amako. ⁴⁶ Aa le homb' am-pihejeañe nainai'e ao iretoa; fe homb' an-kaveloñe nainai'e ao o vañoñe.

26

*Mikilily aze
Mar 14.1,2; Lke 22.1, 2*

† 25:29 Lke 8:18 ‡ 25:31 Zek 13:7, Mar 14:27, Jao 16:32

¹ Ie nagado'IESOÀ i hene tsara zay, le hoe re amo mpiama'eo: ² Fohi' areo naho modo ty roe andro le ho tondroke i Fihelañey vaho hasese am-pitâ' o Jiosio mb' an-katae mb'eo i Ana' ondatiy. ³ Ie amy zao nifanontoñe an-kiririsan' anjomba' i talèm-pisoroñey o mpisorom-beio, naho o Androanavi' ondatio, Kaifa ty tahina' i talè henane zay, ⁴ nikinia hitsepake IESOÀ am-pamañahiañe vaho hañohofan-doza. ⁵ Fe hoe iareo: Tsy hanoeñe amy sabadidakey, hera hidabahorake ondatio.

Hisolo-voiñe i Norizañey
Mar 14.3-9; Jao 12.2-8

⁶ Ie e Kefare-hananià, añ'anjomba' i Simona angamae ao t'i IESOÀ, ⁷ le nisitsitse mb' ama'e ty rakemba ninday menake saro-bily am-pitavoña vaho nadoa'e añaambone'e eo t'ie nidegañe am-pandambañañe eo. ⁸ Fe nitorifiha' o ila'eo ⁹ fa inao mete ho naletake ami'ty vili'e ambone i solike naho nanolorañe o rarakeo. ¹⁰ IESOÀ, ie maharofoanañe ze he'e mioza aman' inoñ' inoñe, nanao ty hoe: Maneseke ty rakemba tia hao nahareo? Ie nanao raha fanjàka naho nañasoa ahy! ¹¹ Ama' areo lomoñandro o rarakeo, fe tsy ho ama' areo nainai'e raho. ¹² I fandeveñañe ahiy ty nañiliña'e solike amo sandrikoo. ¹³ Eka! to t'itaroñako te, ndra aia aia ami'ty voatse toy ty itaroñañe ty talili-soa toy,* le hitaliliañe i nanoe'ey ho fitiahiañe ahiy.

Ty Fañina Famalihañe
Mar 14.10, 11; Lke 22.3-6

¹⁴ Le nimb'amo mpisorom-beio mb'eo ty raike amy folo-ro' amby rey, i atao Jodasy nte-Keriote, ¹⁵ le hoe re: Inoñe ty hanambeza' areo ahy te aseseko ama' areo t'i Iesoà. Aa le nilahare' iareo ty drala volafoty telopolo. ¹⁶ Nifototse amy zay, t'ie nipay ty hanesehañe aze.

Nañalankañe i Fihelañey
Mar 14.12-16; Lke 22.7-13

¹⁷ Ie tañ'andro valoha' ty fañambenañe i Sabadidake Mofo-tsy-aman-Dalivaiy, le niheo mb'amy IESOÀ mb'eo o mpiama'eo nanao ty hoe: Aia ty hañalankaña'ay ho azo ty hikamañe i Fihelañey? ¹⁸ le nanoa'e ty hoe: Akia, mb'an-drova ao mb'ami'ty indaty hanolo-batañe, le anò ty hoe: Hoe t'i Talè: An-titotse ty fotoako, le ama'o ao ty hañambenako i Fihelañey mindre amo mpiamakoo. ¹⁹ Aa le nanoe'o mpiama'eo, vaho hinalanka' iereo i Fihelañey.

I Nifotetse azey
Mar 14.17-21; Lke 22.14, 21-23; Jao 13.21, 22

²⁰ Naho hariva, nidegañe am-pandambañañe eo re mindre amy mpiama'e folo ro'amby rey. ²¹ Ie nikama, le nanoa'e ty hoe: Taroñeko ama' areo te, hifotetse ahy ty raike ama' areo. ²² Niriroke iereo, sindre nanao ty hoe ama'e: O Talè, zaho hao? ²³ Le hoe ty natoi'e: I mindre mampijon-tañañ' amako am-ping'aoy ty handetak' ahiko. ²⁴ Hoe t'i IESOÀ tam' iereo: Toe hionjoñe mb' amy pinatetse ty ama'ey i Ana' ondatiy, fe hekoheko ami'ty indaty te ie ty nifoterañe i Ana' ondatiy! Nisoa ho a' indatiy te tsy naterake. ²⁵ Hoe ty natoi' i Jodasy nandentak' azey: O Raby, zaho hao? Hoe re: Saontsi'o zay.

ty Fandambaña' i TALÈ
Mar 14.22-25; Lke 22.19,20; 1Ko 11.23-26

* ^{26:13} Abeja'e ty hoe: ty evanjely toy,

²⁶ Ie nikama, nandrambe mofo t'i IESOÀ, le nañandriañe, naho finola'e vaho nazotso'e amo mpiama'eo ami'ty hoe: Intoy, ikamao, sandriko toy.
²⁷ Rinambe'e i fitoviy, nandrenge an-dRae'e, le nazotso'e am'iereo vaho nanao ty hoe: Ikamao, inahareo iaby. ²⁸ Lioko ami'ty fañina vao toy, ty hadoñañe ho ami'ty maro ho fañeferan-kakeo. ²⁹ Taroñeko ama' areo te, tsy hinomako ka ty voka' i vahey ampara' ty andro hinomako aze vao mindre ama'areo am-pifehean-dikerañ' ao. ³⁰ Niavotse iereo, nimb' am-bohi-Oliva mb'eo.

Mity aze t'i Petera

Mar 14.26-31; Lke 22.34, 39; Jao 13.37, 38

³¹ Le hoe t'i IESOÀ tamo mpiama'eo: Hene hanahelo ty amako nahareo te anito-hale, fa pinatetse te,
 Ho lafaeko ty mpiarake
 le hiparaitake o añondrio.[†]

³² Naho fa nitroatse amy havilasiy raho, le hiaolo anahareo mb'e Galilia aña. ³³ Tinoi' i Petera ty hoe: Ndra t'ie sindre hioje ty ama'o, zaho tsy ho lendeñé. ³⁴ Hoe t'i IESOÀ: Eka! to t'itaroñako, Aolo' ty kekeo akoholahy[‡] an-kaleñe itoy, le ihe ty hitety ahy in-telo. ³⁵ Hoe t'i Petera ama'e: Naho alahatse t'ie hindre havetrake ama'o, zaho tsy hitety azo. Nanoe' o mpiama'e iabio ka zay.

Getsemane

Mar 14.32-42; Lke 22.40-46

³⁶ Le nindre am'iereo mb'an-toetse atao Getsemane[§] ao t'i IESOÀ vaho nanao ty hoe amy mpiama'e rey: Miambesara etoa hey, fa homb'ey hoek' ey raho hihalaly.

³⁷ Nendese'e t'i Petera naho i ana' i Zebedio roe rey, naho namototse ho monjetse vaho embetse. ³⁸ Le hoe re tam' iereo, Manahelo, te hikenkañe ty fiaiko. Ikalaño naho mitraofa fijilovañe amako. ³⁹ Nivike mora mb'eo re, niankotrake an-daharañe, le nihalaly ty hoe: Ry Raeko, naho mete; apitsoho amako ty fitovy toy; fe tsy ty lahako, fa o satri'oo.

⁴⁰ Nimb'amy mpiama'e rey mb'eo re, le zoe'e nirotse, vaho nanao ty hoe amy Petera: Hete! tsy nete niharо fijilo amako ora raike hao nahareo?

⁴¹ Mijilova naho mihalalia, hera hifoake am-panjiziañ' ao; toe manatry ty troke, fe mavozo ty sandriñe.

⁴² Nimb'eo indraike re nihalaly ty hoe: Naho tsy mahaloly ty fitovy toy amako, naho tsy nòmeko, le hanoeñe abey o satri'oo. ⁴³ Tampetse zay, nibalike re le zoe'e mirotsе iereo fa nigibeñе o fihaino' iareoo. ⁴⁴ Nenga'e indraike le nimb'eo nihalaly i tsaray fañintelо'e; ⁴⁵ vaho niheo mb'amo mpiama'eo, nanao ty hoe: Mirota henaneo, mitofà; Inge fa antitotse i nifotoañañey te haseseke an-tañam-panan-kakeo i Ana' ondatiy. ⁴⁶ Mitroara, antao, heheke fa etoañ' i hifotetse ahiy.

Nifotetse, Tsinepake

Mar 14.43-52; Lke 22.47-53; Jao 18.1-11

⁴⁷ Ie mbe nisaontsy, le niloneake eo t'i Jodasy, mpiamy folo ro'amby rey, reketse firimboñañe amam-pibara naho karavantsy, ie nahitri' o mpisorom-beio vaho o roandria' ondatio. ⁴⁸ F'ie nitolora' i nifotetse azey famantarañe, ty hoe: Ze orofako, ie ty ho tsepahe' areo. ⁴⁹ Niharinè'e amy zao t'i IESOÀ, le nanoa'e ty hoe: Akore, Raby, le norofa'e. ⁵⁰ Hoe t'i IESOÀ

[†] 26:31 Zek. 13:7 [‡] 26:34 Koike: toe tsy akoho fa koik' antsiva [§] 26:36 fipiritañe menake, tamboho-menake

ama'e: Ino o nanoe'oo, Rañetse? Nomb'eo iereo, nañity fitañe amy IESOÀ, nitsepake aze.

⁵¹ Ingo, te nahiti' ty mpiamy IESOÀ ty fità'e nanàrike ty fibara'e naho nibira ty mpitoro' i talèm-pisoroñey, nampikitsike ty ravembia'e, ⁵² le hoe t'i IESOÀ tama'e, Ampiliro an-traño'e ao o meso'oo, fa ho rotsahem-pibara ty mitam-pibara. ⁵³ He atao'o te tsy mahatoka an-dRaeko henaneo naho havotra'e etoa ty Lejionan' Anjely mandikoatse ty folo-ro'amby*? ⁵⁴ Fe aia amy zay ty hahaheneke i Sokitse Masiñey? amy te zao i nisafiriañey.

⁵⁵ Añe zay le hoe t'i IESOÀ tamy màroy: Niakatse hañoridañe malaso, minday fibara naho karavantsy hitsepake ahy hao nahareo? Tsy nitoboke añ' anjomban' Añahare ao handro an-kandro nañoke anahareo tsy amampañembetse hao raho. ⁵⁶ F'ie toe hene anoeñé, hañenefañe ty sinoki' o mpitokio. Le fonga nienga aze o mpiama'eo, nibioñé.

Mpanao Kitomboke Roe

Mar 14.53-63; Lke 22.54,55 63-65; Jao 18.12,18

⁵⁷ Nasese' iareo mb'añ'anjomba' i Kaiafa talèm-pisoroñé mb'eo t'i IESOÀ, le hene nitontoñé ao o Androanavio naho o Fariseoo. ⁵⁸ Nañorike aze trehantreha'e t'i Petera pak' an-kiririsa' i talèm-pisoroñey, le nizilike ao vaho nitobòke marine o mpitoroñeo hahaoniñe ze hizò. ⁵⁹ Nipay mpanao dramotse o mpisorom-beio naho i fivory iabiy hanisy IESOÀ hañoho-doza ama'e, ⁶⁰ f'ie tsy nahaoniñe, ndra te naneseañe mpanao kitomboke maro hiatatre IESOÀ. Fara'e pok'eo ty mpitalily vilañe roe ⁶¹ nanao ty hoe: Vinola' i tìañe ty hoe: Maharotsake i Anjomban' Añaharey raho vaho hamboatse aze indraike naho afake telo andro.

⁶² Niongake amy zao i talèm-pisoroñey, nanao ty hoe: Tsy mahatoiñe v'iheo, amo iseseha' iereoo? ⁶³ Fe nianjiñe avao t'i IESOÀ. Le hoe i talèm-pisoroñey ama'e: Ampifantàko aman' Añahare veloñe rehe ty hivolañe ama'ay naho ihe i Norizañe, Anan' Añaharey. ⁶⁴ Le hoe t'i IESOÀ tama'e: Ie nisaontsie'o; fe itaroñako te ho isa' areo i Ana' ondaty miambesatse am-pitàn-kavanan-kaozarañ' ey miheo mb'etoañe amo rahon-dikerañeo. ⁶⁵ Rinia' i talèm-pisoroñey o saro'eo le nanao ty hoe: Niteratera an'Andrianañahare itia, ino ty ipaian-tika valolombeloñé ka? Songa jinanji' areo i fiteratera'e an'Andrianañahare, ⁶⁶ akore ty fisafiri' areo te hanoeñé? Natoi' iereo ty hoe: Mañeva havetrake re. ⁶⁷ Le nandrora' iereo ty lahara'e naho finofo' iereo ty lambosi'e, vaho rinarateha' ty ila'e, ⁶⁸ nanao ty hoe: Ry Norizañe, mitokia; Ia ty nandafa Azo?

In-Telo Nitety

Mar 14.66-72; Lke 22.55-62; Jao 18.15—27

⁶⁹ Nijohañe am-pimoahan-kiririsa eo t'i Petera, le nimb'ama'e mb'eo ty mpitoro-ampela nanao ty hoe: Toy nitraooke am' IESOÀ nte-Galilia rehe!

⁷⁰ Nandañitse añatrefa' iereo iaby t'i Petera. ie nanao ty hoe: O rakembao, nofiko o enta'oo. ⁷¹ Ie nizilik' amy lalambeiy mb'eo, le nahatre aze ka ty mpitoro-ampela raike, nanao ty hoe amo nijohajohañeo: Nindre amy IESOÀ nte Nazareta t'indaty tia-hòeke. ⁷² Nitety IESOÀ am-panta indraike t'i Petera, nanao ty hoe te namoea'e ondatiy. ⁷³ Tsipaepae' zay, nisitse mb'eo o nijohajohañeo, nanao ty hoe amy Petera: Toe mpiamy fiosoña' i Mpitokiy rehe, adodea' o fisaontsi'oo te mpiam'iareo. ⁷⁴ Namototse nitety naho nifatse re nanao te tsy nifànta'e ndra mbia indatiy. Inay amy zao i

* 26:53 firimboñan-dahin-defoñen-eneñ'arivo

kekeon' akoholahiy. ⁷⁵ Nitiahi' i Petera i saontsi' IESOÀy, te aolo' i kekeoy ro hitety ahy in-telo. Niakatse aña re nangoihoy an-kafairam-piaiñe.

27

Nasese amy Pilato

Mar 15.1; Lke 22.66; 23.1; Jao 18.28

¹ Ie maraindray, le nikilie' o Androanavy bey nahoh roandriañe iabio t'i IESOÀ, t'ie tsy mahay tsy havetrake. ² Rinohi' iareo nahoh nitantalieñe mb' añ'anjomba' i Pilato mpanandily mb'eo;

Naneñeñe t'i Jodasy

Asa 1.18, 19

³ Ie nirendre' i Jodasy nte-Keriotey, te nozoñeñe t'i IESOÀ, le naneñeñe*, vaho nahere'e amy mpisorom-beiy nahoh amo roandria' ondatio i bogady telo-polo rey. ⁴ Hoe re: Nanao hakeo raho, fa nitomaly aman-dio-màliñe, fe hoe ty natoi' iereo: Inoñe ama'ay v'izay? tafetero! ⁵ Aa le nahifi'e amy anjomba miavakey ao i bogady rey, nahoh nienga, nangalake taly vaho nameo-batañe.

⁶ Rinambe' o mpisorom-beio i bogady rey, le hoe ty asa' iareo: Faly tsy mete apoke amy anjomba miavake[†] ao iretoy, fa vilin-dio. ⁷ Le nisafiry vaho natolo' iereo ho ami'ty tete' i mpanao valàñe-taney ho fandeveñañe ambahiny. ⁸ Zay ty nanoañ i tetekey ty hoe kibohon-dio ampara' henane;

⁹ nañeneke ty saontsi' i Zakaria mpitoky nanao ty hoe:

Le hoe raho am'iereo:

Naho soa am-pivazoho'a'reo,
ampitombò ty karamako,
fe nahoh tsy mete, ifoneño.

Aa le linanja' iereo ho amy karamakoy
ty drala volafoty telo polo.

Le hoe t'IÉHOVÀ amako:

Ahifio mb'amy mpanao valàñe-taney zay;
mb' am' indaty mandramerame lietsey.

¹⁰ ty amy nandilia' IÉHOVÀ.[‡]

Nitsoke aze

Mar 15.2-5; Lke 23.2-5; Jao 18.29-38

¹¹ Nijohañe añatrefa' i Pilato eo t'i IESOÀ, le hoe re tama'e: Ihe hao ty Mpanjaka'o Jiosio? Hoe t'i IESOÀ: Saontsi'o zay. ¹² Aa ndra te nitomboke IESOÀ an-tseseke o mpisorom-beio nahoh o roandriañeo, tsy nanoin-dre.

¹³ Hoe t'i Pilato tama'e: Tsy oni'o hao ty hamaron-tsisy sesehe' iereo ama'o? ¹⁴ F'ie tsy nanoñe aze ndra saontsy raike, vata'e nahadaba i ragovay.

Hinaha t'i Barabasy

Mar 15.6-14; Lke 23.17-23; Jao 18.39, 40

¹⁵ Ie amy Sabadidake aman-kasiñe atao Fihelañ' Amboney, fanoe' i Mpandili' i Rovaiy ty hañahàñe amy màroy ty raike amo mpirohio, ze tea' iereo. ¹⁶ Nanam-pirohy seretsersetse t'i Pilato, i Barabasy ty añara'e, rinohy ty ami'ty vono-ondaty, vaho najo'e am-balabey ao. ¹⁷ Ie nifanontoñe iereo, le nanoa' i Pilato ty hoe: Ia ty tea' areo ho hahàñe? i Barabasy, ke IESOÀ atao Norizañey? ¹⁸ tali'e, nifohi' i Pilato te am-palaiñañe tsy aman-tali'e

* ^{27:3} Heb: namototse nisoloho † ^{27:6} Grika: fanontonan-drala ‡ ^{27:10} Zek 11:12-13; Iir 19:1-13;32:6-9

ty naneseha' iareo aze, tovo'e, ¹⁹ ie niambesatse am-piambesam-pizakàñe eo, le nañitrike entañe ama'e ty vali'e nanao ty hoe: Mihalaly ama'o: Ko mivolan-dra inoñ' inoñe hatreatre'o indaty vañoñey, amy te niore raha maro raho ty ama'e ama'nofy aniankale. ²⁰ Navori' o mpisorom-beio naho o Androanavio ondatio hijoboñe i Barabasy, vaho havetrake t'i IESOÀ. ²¹ Aa hoe ty ontane' i Pilato: Ia amy roe rey ty tea' areo ho hahàko ama' areo? Hoe iereo: i Barabasy. ²² Hoe t'i Pilato tam' iereo: Aa naho zay, hataoko akore t'IESOÀ atao Norizañe? Nirihõne' iereo iaby t'ie haradorado. ²³ Hoe t'i Pilato am' iereo: Ino ty sata-raty nanoe'e? Le tinazataza' iereo ty hoe: Aradoradò, Aradoradò, Aradoradò!

²⁴ Ie, nioni' i Pilato te tsy amam-dily handiera'e, naho tsy ama'e ty hampanintsiñe iareo, aolo te hirehetse ty firehoreho ondatio, le nandrambe rano vaho nanasa fitâñe añatrefa' i màroy, nanao ty hoe: votsotse ami'ty lio raho, mitaoa amy ze hanòe'areo. ²⁵ Tinoi' ondaty iabio ty hoe: Ho ama'ay naho amo ana'aio ty lio'e. ²⁶ Le hinaha'e t'i Barabasy;

Natao Sarerake

Mar 15.15-17; Lke 23.24, 25; Jao 19.16

vaho nasese'e am' iereo t'i IESOÀ ho fiaheñe naho silofeñe haradoradoa' iareo. ²⁷ Le nendese' o mpiningin-tsoavalam-pizakañe an-drohy t'i IESOÀ vaho natonto' iareo aolo' ty fañosoña' ondaty maro eo. ²⁸ Nasaro ama'e ty lamba landy naho nikopohañe tsarimbo landy antsetra.

Nikozozoteñe mb'e Golgota

Mar 15.18-22; Lke 23.26-33; Jao 19.17

²⁹ Nirarèñe halam-patike, le nasabaka' iareo añambone'e, le nasiam-bararata ty am-pità'e havana ao, vaho nitongaleke ama'e nikobike ty hoe: Fañanintsiñe ama'o ry Mpanjaka' o Jiosio! ³⁰ Nandrora' iereo ty laharâ'e, naho nandrambe bararata le namiafiakte ty añambone'e. ³¹ Ie nilosoran-kizake, le nafaha' iereo i saroñe mireparepay naho naombe ama'e o siki'eo vaho nandily t'ie haradorado.

Naradorado amy Hatae Ajaley

Mar 15.23-32; Lke 23.33-43; Jao 19.18-24

³² Ie niakatse i rovay, le nitendreke ty ondaty atao Simona nte-Kanana vaho nampitarazoeñ' aze i hatae ajale'ey. ³³ Aa ie nandoake an-toetse atao Golgota, toe Vohe-Kalvary[§] ³⁴ le finantso' iereo divay nalaro afero, f'ie nitsopeke, naho naharendreke, le tsy nimete ninoñe. ³⁵ Pinè' iereo an-katae re le zinara an-tsapake o saro'eo*,† ³⁷ le napetake ambone' i añambone'ey ty nanesehañe aze, ami'ty hoe:

Intoy IESOÀ nte-Nazareta,
Mpanjaka' Israele.

³⁸ Le nampindrezam-piradorado ama'e : ty malaso roe‡, ty raike ankavana'e vaho ty raike ankavia'e eo. ³⁹ Nanitse aze ze niary eo naho nañekotsèko-doha ⁴⁰ nanao ty hoe: Inao! Ihe ho nandrotsake i anjomban' Añaharey naho hamboatse aze ami'ty telo andro, mirombaha! Naho Anan' Añahare rehe, mizotsoa amo hataeo. ⁴¹ Nikizak' aze ka o mpisorom-beio naho o roandria' ondatio, ami'ty hoe: ⁴² Ie nandrombake ty ila'e, fe tsy maharombake ty vata'e. Naho ie i Mpanjaka' Israele, apoho hizotso amo hataeo hatokisa'ay. ⁴³ Iatoa'e t'i Andrianañahare, adono ho hahan'

§ ^{27:33} Songa "haran-doha" Golgota, Kalvary. * ^{27:35} Sab 22:18 ; Jao 19:24 † ^{27:35} Tovo'e:
36 le niambesatse nañambeñe aze, ‡ ^{27:38} Ies 53:9

Añahare henaneo naho tea'e§ amy nanoe'e ty hoe t'ie Anan' Añahare.
44 Nanitse aze hoe zay ka i malaso nitrao-peke ama'e rey.

Ty Havilasi'e

Mar 15.33-37; Lke 23.44-46; Jao 19.28-30

45 Ie ami'ty ora fah'eneñe* fonga nimaieñe i Taney pak' ami' ty ora fahasive†. **46** Le nipazake ty hoe t'i IESOÀ: Eli, Eli, lama sabaktany, ze adika ty hoe: O Andrianañahareko, Andrianañahareko, ino ty namorintseña'o ahy?‡ **47** Hoe ty raike nijohañe eo: Mitoka i Elia toke. **48** Aa le nilay mb'eo amy zao ty nangalake mofo mangefokefoke, naho natsafe'e vinegra vaho natoho'e ama'e ho sitsihe'e. **49** Hoe ka ty ila'e, Eo hey, hentean-tika ke ho avy handrombake aze t'i Elia. **50** Nipazake indraike am-piarañanañañe mafe t'i IESOÀ, vaho nengae'e aman-dRae ty arofo'e.

Reke-Biloñe i Havilasiy

Mar 15.38-41; Lke 23.45, 47-49

51 Le inao! nitori-anjake ho roe boak' ambone mañambane i lamba fièfen' Anjomban' Añaharey. Niozoñozoñe ty tane, naho nifoy o vatoo; **52** Nisokake o kiborio; vaho nitroatse ty fañova maro' o noro'e nirotse an-debokeo; **53** ie niakatse an-kibory naho nimb' amy rova miavakey vaho niboake ami'ty maro. **54** Ie nioni' ty mpifehe zato naho o nitrao-pijohañe ama'e nisary IESOÀ i ozoñozon-taney naho o raha nanoeñe, le nañeveñe naho nanao ty hoe: Toe Anan' Añahare o eio.

55 Nizorazora ey ty roakemba maro amo niatrake IESOÀ hirik' e Galilia pake henane zay. **56** Am' iereo t'i Miriame nte-Magdalà, i Marie rene' Iakobe naho i Josesy, vaho ty rene' i ana' i Zebedia rey.

Nalenteke

Mar 15.42-47; Lke 23.50-55; Jao 19.38-42

57 Ie ho niròñe i àndroy, pok'eo ty mpañarivo nte Arimatea, Iosefe ty tahina'e, mpioke am' IESOÀ, **58** nimb' amy Pilato mb'eo nihalaly ty fañòva' IESOÀ, le linili' i Pilato te hatolotse aze. **59** Nitakone' Iosefe i fañòvay, le niholonkoñe'e an-damba-lande marerarera matify, naho **60** nirohote'e an-donake vaho hinali'e an-damilamy ao, le navarimariña'e mb'am-piziliha' i lonakey ty vato jabajaba.§

62 Amy loak' àndro i Fihelañ' Amboney*, le nimb'amy Pilato mb'eo o mpisorom-beio naho o Fariseoo. **63** Le hoe iereo tama'e: O Roandriañeo, tiahi'ay te ie mbe niveloñe i mpandañitsey le nanoe'e ty hoe t'ie hivañon-ko veloñe naho afake telo andro. **64** Aa le andilio te ho gariteñe pak'ami'ty andro faha telo i kiboriy, kera ho pok'eo o mpiama'eo hañaoke aze, vaho hitalily am'ondatio t'ie nivañon-ko veloñe. Ie ano'e' iereo, le ho lombolombo' i valoha'ey ty famañahiañe fara'e. **65** Hoe t'i Pilato am'iereo: Ipaiao mpigaritse, le ambeno amy ze lefe' areo. **66** Aa le nifonire' iereo ty fañarovañe i lonakey, namoli-tomboke aze vaho nampijadoñe mpañambeñe.

28

Lona-Koake

Mar 16,1-8; Lke 24.1-11

§ 27:43 Sab 22:8 * 27:45 nitsipindemena † 27:45 folakandro do'e ‡ 27:46 Sab 22:1 § 27:60 Gr. ila'e: 61Teo ty Miriame nte-Magdalà, naho i Miriame ila'ey, niambesatse tandrife' i kiboriy.
 * 27:62 Ty andro valoha'i Mofo-Tsi-aman-Dalivay

¹ Ie aña i SABOTSEY naho nangoangoañe i loak'andro'ey, le nomb' an-donake mb'eo hioniñe aze t'i Miriame nte-Magdalà naho i Marie raikey. ² Nanginikinike amy zao ty tane amy te nivotrake an-donake eo boak' andindìñe ao ty anjeli' IEHOVÀ namarimbariñe i vatox vaho nijohañe eo. ³ Hoe helatse ty vinta'e, naho foyt hoe volovaso o saro'eo. ⁴ Nampihondrahondrae'e añ'anifañe o mpigaritseo, le nijohañe ey hoe lolo.

⁵ Hoe i anjeliy tamy roakemba rey, Ko hembañe, apotako te mipay IESOÀ naradoradoy nahareo. ⁶ Tsy atoan-dre, fa veloñe ty amy tsara'ey. Mb'etoa arè hañisake i nandrea'ey, ⁷ le akia aniany, misaontsia amo mpiama'eo t'ie nitroatse amy havilasiy, vaho hiaoloa'e mb'e Galilia mb'eo, vaho ho vazoho' areo aña ty amy nitsara'ey. ⁸ Niakatse i lonakey am-pirevendreveñañe ty amy anjely niisakey i rakemba rey, f'ie nivaranehake ty amy Talè nivañom-beloñey, le nilay hitalily amo mpiama'eo.

Niboake amo Roakemba

⁹ Tojo t'ie nañavelo le nifananpe am' iereo t'i IESOÀ nañontane ty hoe: Ho haha' i Tahinañey abey. Niharinea' iareo, le nibokobokoke te niambane ama'e. ¹⁰ Le hoe t'i IESOÀ tam' iereo: Ko hembañe; talilio o roahalahikoo ty hienga mb'e Galilia mb'eo, vaho aña t'ie hahaisak' ahy.

Nameam-bokàñe o Mpigaritseo

¹¹ Ie nañavelo, nimoake an-drova ao ty mpigaritse ila'e nitalily amo mpisorom-beio i hene nizò rezay. ¹² Nifanontoñe hisafiry amo androanavi' ondatio iereo, naho anoloraña drala maro o lahindefoñe ¹³ ie nanoañe ty hoe: Mitalilia ty hoe: Niavy haleñe o mpiama'eo nampikamets' aze, zahay niroro. ¹⁴ Aa hera t'ie hipok' an-dravembia' i Pilato, le ho rekete'ay, tsy hañembetse anahareo. ¹⁵ Rinambe' iereo i volay vaho nanao i namantohañe iareoy, ie i entañe mikafitse amo Tehodao pake henaney.

Ty Fantoke Rae'elaly

¹⁶ Aña zay, ie fa avy e Galilia aña i mpiama'e folo raik' amby rey, le nisodehañe am' iereo amy vohitse nihalalie' iareoy. ¹⁷ Ie nahaisak' aze le niambane ama'e, f'ie teo ty nifejofejo. ¹⁸ Niharinea' IESOÀ le nanoa'e ty hoe: Fa hene natolotse ahy ze lily andindiñe ao naho an-tane atoy. *I nañirahan-dRae ahiy ty añirahako anahareo. ¹⁹ Akia, † anò mpañoke ze kilakila ondaty, ‡ ²⁰ le anaro iareo ty hañeneke nainai'e ze fonga raha nandiliako anahareo, ſvaho mahaoniña, te ama'areo nainai'e raho ampara' ty figadoña' ty sa. Amena*

* **28:18** Tovo' ty Pesità an-dreha-Aramaika † **28:19** Tampetse eo ty Matio Hebreo, ‡ **28:19** Tovo tafara' ty taoñe 325 CE : Andiporo aman-tahinan-dRae naho i Anakey vaho amy Arofo'e Masiñey ondatio, § **28:20** Tinovo' ty Pesità ty pak' am-para'e * **28:20** Amena: 'Ie zay' ndra 'to i tsinaray'

Marka

Fiaolo

Mat 3.1-11; Lke 3.1-16; Jao 1.19-20

¹ Ty namotorañe ty talili-soa' IESOÀ Norizañey, Anak' Andrianañahare.

² Pinatetse am' Isaia Mpitoky ao ty hoe:

Ingo mañitrike ty irako mb'añ'aolon-dahara'o mb'eo,

ie ty hañajary ty lalañe añatrefa'o eo;*

³ Ty fiarañanaña' i mikokey:

Hajario am-patrambey aña ty fombà' IEHOVÀ,

Avantaño o lala'eo.†

⁴ Zay ty niboaha' i Jaona Mpandipotse am-babangoañe aña nitsey ty filiporam-pisolohoañe ho ami'ty fañafahan-kakeo. ⁵ Le niakatse mb'ama'e mb'eo ty an-tane' Iehodà iaby naho o nte-Ierosalemeo; vaho nilipotse añama'e an-tsaka Iordane ao, songa nibaboke amo hakeo'eo.

⁶ Nisafotse volon-drameva t'i Jaona, naho nidiañe kitamben-kolitse antoha'e, naho nikama bekapàke naho ron-tsý, ⁷ vaho nitaroñe ty hoe: Manonjohy ahy ty fatratse te amako; tsy mañeva ahy ty hibotreke ambane hampidraitse i talin-kana'ey. ⁸ Toe mandipotse anahareo an-drano raho, fa ie ty handipotse anahareo amy Arofo Masiñey.

Filipora'e

Mat 3.13-17, Lke 3.21-22

⁹ Ie amy andro rezay, nihiriike Nazareta e Galilia aña t'IESOÀ, vaho nampilipore' i Jaona am' Iordaney. ¹⁰ Ie vaho nitroatse amy ranoy, le nivazoho'e te nikodriatse i likerañey, naho nizotso hoe deho ama'e i Arofoy ¹¹ vaho niboak'andindiñe ao ty fiarañanañañe nanao ty hoe: Anako kokoako rehe, toe ampokòako.

I Mpanjiziy

Mat 4.1-11; Lke 4.1-13

¹² Tineha' i Arofoy amy zao re mb' an-jerezere tane aña, ¹³ le tan-tane bangiñe añaefa-polo andro re, nizizie' i mpañinjey‡ naho nindre amo bibi-lìo, vaho nitoroña' o Anjelio.

Niorotse Nitoroñe

Mat 4:12-17; Lke 4.14-15; 5.1-11; Jao 1.35;42

¹⁴ Ie najòñ' an-drohy ao t'i Jaona; le nimb'e Galilia mb'eo t'IESOÀ nitaroñe i talili-soan' Añaharey; ¹⁵ ami'ty hoe: Fa heneke ty sa; mitotoke i Fifehean' Añaharey; misolohoa naho atokiso i talili-soay.

Nikanjy Mpiam'a

Mat 4.18-22, Lke 5.1-11

¹⁶ Ie nidraidraitse aña'olon-dria' i Galilia, le nahavazoho i Simona naho i Andrea rahalahi' i Simona nañifike harato an-driake ao fa mpañarato.

¹⁷ Le hoe t'IESOÀ tam' iereo: Mañoriha ahy, vaho hanoeko mpañarato ondaty. ¹⁸ Nado' iereo amy zao o harato' iareoo vaho nañorik' aze.

¹⁹ Ie nisitsitse mb'eo, le nivazoho'e t'Iakobe Ana' i Zebedio naho i Jaona rahalahi'e, an-dakañe ao nanosoke harato. ²⁰ Kinanji'e amy zao; le nenga'

* **1:2** Mal 3:1 † **1:3** Isa 40:3 ‡ **1:13** mpañinje: satana ndra devoly

jereo an-dakañe ao t'i Zebedio rae' iareo naho o mpikaramao, vaho nanonjohy aze.

Nandroake Angadraty

Lke 4.31-37

²¹ Nigodañe mb'e Kapernaome iereo le nizilike am-pitontonañ' ao te SABOTSE vaho nañòke. ²² Nahajagòñe iareo i fañoha'ey, foto'e nanare'e manahake t'ie aman-dily, fa tsy manahake o mpanoki-dilio.

²³ Tam-pitontona' iareo ao t'indaty amam-pañahi-maleotse, nikoikoike ²⁴ ty hoe: Inoñe ty itraofan-tika, ry IESOÀ nte-Nazareta? hanjaman' anay v'o talin-dia'oo? Apotako rehe, t'i Masin' Añahare. ²⁵ Nitrevoke aze t'IESOÀ ami'ty hoe: Mamantsy, iakaro! ²⁶ Nagibigibi' i kokolampay re naho nikontsiañe am-peo, vaho niakatse ama'e.

²⁷ Akore ty halatsà' ie iaby kanao nifañontàne ty hoe: Raha akore v'itoio? Toe fañòhañe vao naho aman-dily! Ie ami'ty halàko lilitse ro mandily o anga-dratio, le ivohora' iareo. ²⁸ Aa le niboile nanitsike i tane mañohoke i Galiliay ty enge'e.

Nañaha Maro

Mat 8.14-17; Lke 4.38-41

²⁹ Niakatse i fitontonañey iereo, le nizilike aña'an-jomba' i Simona naho i Andrea ao rekets' Iakobe naho i Jaona. ³⁰ Natindri' ty hamae sandriñe ty rafoza' i Simona ampela le nisaontsiañe amy zao ty ama'e.

³¹ Nimb'eo re nandrambe ty fità'e naho nongaha'e naho nisitake ama'e i firemporempo'ey, vaho nitoroñe iareo.

³² Ie hariva, naho fa nimotake i àndroy, le nendeseñé mb'ama'e o marare iabio vaho o nangaran-kokolampao, ³³ naho nivorigidiñé an-dalambey eo i rova iabiy, ³⁴ naho nahajangañe ty maro nisilofe' ty areteñé ankafankafa re naho nañary kokolampa maro vaho tsy nenga'e hibeoke o anga-dratio; foto'e napota' iereo.

³⁵ Ie maraindrain-tsikiake naho mbe nangararak' atiñana, le nitroatse, nienga mb'an-toetse bangiñe aña nitalaho. ³⁶ Tsinoe' i Simona naho o mpiama'eo; ³⁷ Naho nitendreke, le hoe iereo ama'e: Hene mipay Azo. ³⁸ Hoe re tam' iereo: Antao hiveve mb' an-tane ila'e, mb'amo tanàñe mañohokeo, hitaroñe aña ka; amy te zay ty talin-diako. ³⁹ Aa le nitsitsife'e ty Galilia nitaroñe am-pitontona' iareo ao, vaho nañary kokolampa.

Ty Angamae

Mat 8.2-4; Lke 5.12-16

⁴⁰ Niheo mb'ama'e mb'eo ty angamae, nitongaleke le nitoreova'e ty hoe: Naho satri'o, mahalio ahy. ⁴¹ Nitretreza' IESOÀ, le nañitia'e fitàñe, nitsapa aze vaho nanao ty hoe: Satriko, maliova. ⁴² Nisitake aze amy zao i haangamæ'ey vaho nalio. ⁴³ Hinatahata'e, naho nampombà'e mb'eo,

⁴⁴ le nanoa'e ty hoe: Asoao tsy hitalily ama'ia ia; akia, miboaha amy mpisoroñey, le engao i fiefera'oy ty amy linili' i Mosèy, ho fitaliliañe iareo.

⁴⁵ F'ie niavotse, le namototse nitsey am-pidadàñe naho naboele'e mbeo' mbeo i entañey, naho tsy nimete nizilike am-palangesañe an-tanañe ao ka t'IESOÀ; f'ie nitoetse am-bangiñe ao vaho niropake ama'e tok'aia tok'aia i màroy.

¹ Ie herone bey, nimpoly mb'e Kapernaomy mb'eo, le nijanjiñeñe t'ie añañanjomba'e ao, ² aa akore ty firopaha' i màroy kanao ninítse tsy am-pitsifirañe ndra an-dalañe eo, ie nitaroñe i tsaray.

³ Niheo mb'ama'e mb'eo ty ninday ty kepeke, nitarazoe' ty efatse. ⁴ Ie tsy nahafitotoke ama'e fa nialindretse, le nahimpa' iereo ty tafo ambone' aze; pinoñapoña' iereo, le nazè' iereo ao ty tihy nandrea' i kepekey. ⁵ Nioni' IESOÀ ty fatokisa' iareo, le nanoe'e ty hoe i kepekey: O anake, fa hinaha o tahi'oo.

⁶ Niambesatse eo ty mpanoki-dily ila'e nitsakore añañarofo ty hoe: ⁷ Akore ty reha' ondatio? Ie miteratera! ia ty mahalio tahiñe naho tsy Raike, i Andrianañahare?

⁸ Napota' IESOÀ añañarofo'e amy zao ty fivetsevetse' iareo, le hoe re am' iereo: Akore te aereñere' areo an-stroke ao o raha zao? ⁹ Ty aia ty mora volañeñe amy kepekey: ke ty hoe: Hinaha o hakeo'oo, he ty hoe: Mitroara, rambeso o tihi'oo le mañaveloa? ¹⁰ Aa soa te ho fohi' areo te aman-dily an-tane atoy i Ana' ondatiy hañalio tahiñe,—Le hoe re amy kepekey: ¹¹ O toke: Mitroara, rambeso o tihi'oo le akia mb'añ'akiba'o aña. ¹² Niongake amy zao re, nandrambe i tihi'ey, vaho nienga añatrefa' iereo iaby; le hene nilatsa naho nandrenge an' Andrianañahare ami'ty hoe: Mbe lia'ay tsy nahatrea ty manahake itoa-hoe.

*Tsinikao'e t'i Matio
Mat 9.9-13 Lke 5.27-32*

¹³ Nienga mb'añ'olon-driake mb'eo indraike re; le hene niropak' ama'e i valobohokey, vaho nanare'e.

¹⁴ Ie nimb'eo, nivazoho'e t'i Levy, ana' i Alfeo, niambesatse ampanontonan-kaba ao, le hoe re ama'e: Oriho raho. Le niongake re nañorike aze.

¹⁵ Ie nidegañe añañanjomba'e ao, le nimaro ty mpanontoñe vili-loha naho bei-hakeo nitrao-pikama amy IESOÀ naho amo mpiama'eo, amy te maro am' irezay ty nañorike aze. ¹⁶ Aa naho nioni' o mpanoki-dilio naho o Fariseoo t'ie nitrao-pikama amo mpanan-tahiñeо naho amo mpamory vili-lohao, le nanao ty hoe amo mpiama'eo: Inoñe ty iharoa'e fikama naho finoñe amo mpamory vili-lohao naho amo bey hakeoo? ¹⁷ Naho jinanji' IESOÀ zay, le hoe re am'iereo: Tsy o jangañeо ro mipay mpanaha fa o marareo. Tsy pok'eo raho hikanjy ty vañoñe hisoloho, fa o aman-kakeoo.

*Lilitse
Mat 9.14-17; Lke 5.33-39*

¹⁸ Mpililitse o mpiama' i Jaonao naho o Fariseoo, le nimb'eo iereo nanao ty hoe ama'e: Aa vaho akore te mililitse o mpiama' i Jaonao naho o mpiamo Fariseoo, fe tsy mililitse o mpiama'oo? ¹⁹ Le hoe t'IESOÀ tam'iereo: Mete mililitse hao o rañem-pañengao ie mbe am' iereo i mpañengay? Kanao am' iereo i mpañengay, tsy mililitse iereo. ²⁰ Toe ho tondroke ty andro hanintahañe i mpañengay am'iereo; hililitse amy andro zay iereo. ²¹ Tsy eo ty manakeke lamba tsy nahanañe ami'ty saron-kambo'e tsy mone hisitake amy saroñey i takekey, vaho hiindra i nikodreatsey. ²² Le tsy añiliñan-divay vao ty zonjòn-kolitse hambo'e, tsy mone hampitòsitse ty divay amy holitse hambo'ey, vaho hianto i zonjòney. Fa ailiñe an-jonjòñe vao ao ty divay vao.

*Mitoloñe ami'ty Sabotse
Mat 12.1-8; Lke 6.1-5*

²³ Teo te indraike, niranga teteke re ami'ty SABOTSE naho nanifo ampemba amy lia' iareoy o mpiama'eo. ²⁴ Le hoe o Fariseoo tama'e: Henhe: akore t'ie manao raha faly ami'ty SABATA? ²⁵ Aa hoe ty natoi'e: Mbe tsy vinaki' areo hao ty nanoe' i Davide, ie nidobo naho nisaliko, ie naho o mpiama'eo: ²⁶ nimoak' aña' Anjomban' Añahare ao faha' i Abiatara Mpisorom-bey le nikama ty mofo miatreke*—ze faly tsy kamaeñe naho tsy o mpisoroñeo avao, vaho nandiva amo mpiama'eo? ²⁷ Hoe re tam' iereo: Ondatio ty nanoañe i SABATAY, fa tsy i SABATAY ondatio; ²⁸ Aa le Talè' o SABATAO ka i Ana' ondatiy†.

3

*Mañaha te Sabotse
Mat 12.9-14; Lke 6-11*

¹ Nizilike am-pitontonañ'ao indraike re le nanjo ty lahilahy kenge-fitâñe. ² Hinare' iereo ke hañafake ami'ty SABATA, hanisia' iareo. ³ Aa le hoe re amy lahilahy kenge-fitañey: Miongaha mb'etoa. ⁴ Le hoe re tam' iereo: Ty aia ty Hake, ty manao raty, he ty manao soa naho SABOTSE*; ty mamono, ke ty mañaha fiaiñe? F'ie tsy nahabeoke. ⁵ Jinilojilo'e an-keloke, le nanahelo ami'ty hagàn-tro' iareo, vaho nanao ty hoe am' indatiy: Ahitio ty fità'o. Le nahiti'e, vaho niareñe ho janga manahake ty ila'e i fità'ey. ⁶ Niavotse o Fariseoo naho niharo fikaoñe amy zao amo mpiamy Herodao nikilily ty hañè-doza ama'e.

*Nañorike aze i Lahialeñey
Mat 12.15-16; Lke 6.17-19*

⁷ Nisitake mb'an-driake ey t'IESOÀ rekets' o mpiama'eo; le nañorike aze ty lahialeñé hirike e Galilia naho boak' Iehodà aña, ⁸ naho hirike Ierosaleme; naho hirik' Edoma naho alafe' Iordaney vaho amparipari' i Tirò naho i Sidona aña—ondaty mitozantozañé, hene nahajanjiñe o hene fitoloña'eo naho nimb' ama'e mb'eo.

⁹ Le sinaontsi'e amo mpiama'eo ty hañajary lakañe ho aze ty amy valobohòkey tsy mone hifanamboentamboeñe. ¹⁰ Akore ty hamaro ty nafaha'e kanao nifanindry ama'e hitsap' aze ze nisilofe' ty areteñe.

¹¹ Ndra mb'ia mb'ia nahatrea aze o anga-maleotseo le niankotrake aolo'e eo nikoràke ty hoe: Ihe i Anan' Añaharey, ¹² fa hinatahata'e tsy hampahafohiñe aze.

*Nijoboñe i Folo Roe Amby Rey
Mat 10.1-4; Lke 6.12-16*

¹³ Niañambone vohitse mb'eo re le tsinikao'e ze satri'e vaho niheoya' iereo. ¹⁴ Tinendre'e ty folo ro'amby ho mpiama'e, hahitri'e hitaroñé, ¹⁵ naho ho aman-dily hañary kokolampa: ¹⁶ Le natovo'e amy Simona ty tahinañe ty hoe: Petera; ¹⁷ naho am'Iakobe ana' i Zebedio naho i Jaona rahalahi' Iakobe; ty nanovoña'e añaran-tsole ty hoe Boanerjesy, toe Anañ' àmpiñe; ¹⁸ naho i Andrea naho i Filipo naho i Bartolomeo naho i Matio naho i Tomasy naho Iakobe ana' i Alfeo naho i Tadeo naho i Simona mahimbañé, ¹⁹ vaho i Jodasy nte-Keriote nifotetse azey.

*ty Bei'o Kokolampa
Mat 12.22-32; Lke 11.14-23*

* 2:26 mofo 12 an-drairay aolo' i toe-miavakey † 2:28 Fot 2:2-3 * 3:4 Its 5:15

²⁰ Nizilike añ'anjomba ao re naho nivorigidiñe indraike i lahialeñey, kanao tsy nilefe ty hikama. ²¹ Ie nahajanjiñe zay o longo'eo, le niheo mb'eo hamihim-pitañe aze, ami'ty asa' iareo ty hoe: Tondren-dre.

²² Nizotso boake Ierosaleme aña o mpanoki-dilio, nanao ty hoe: An-gara' ty belzeboba re, vaho i bein-kokolampay ty añaaria'e kokolampa.

²³ Tsinikao'e hitotok' aze iereo vaho nirazaña'e ty hoe: Aia ty hañaria' i mpañinjey i mpañinjey? ²⁴ Naho mifampiria ty fifeheañey, tsy hijadoñe i fifeheañey. ²⁵ Ie mifamotetse ty anjomba, tsy hahafitroatse i anjombay.

²⁶ Ie mióngake hiatatre vataña'e ty mpañinje naho mifañambake, le tsy hitoetse, fa higadoñe. ²⁷ Tsy eo ty hahazilike aña' anjombam-panalolahy ao hañaoke o vara'eo, naho tsy vahora'e hey i fanalolahi, zay vaho ho volose'e i anjomba'ey.

Mat 12.31-33; Lke 12.10; 1 Jao 5.16

²⁸ Eka! to t'itaroñako te hahañe amo ana' ondatio ze atao hakeo naho ze haterañe iterà' iareo, ²⁹ fe tsy ho hahañe ka ze mitera i Arofo Masiñey, fa ho amam-patse kitro-katroke; ³⁰ ami'ty fivola' iareo t'ie aman' anga-draty.

Ty Filongoan-To

Mat 12.46-50; Lke 8.19-21

³¹ Nipoteake eo o rahalahi'eo naho i rene'e, nijohañe alafe ao, le nañitrike ama'e vaho nitok' aze. ³² Niambesatse añariseho aze i maroy; le hoe ty nitsaraeñe ama'e: Inao, alafe ao ty rene'o naho o rahalahi'oo; ie mipay azo. ³³ Hoe ty natoi'e am' iareo: Ia ty reneko naho o rahalahikoo?

³⁴ Narendre'e amy zao o niambesatse niarikoboñ' azeo, le nanao ty hoe: Hehe ty reneko naho o rahalahikoo! ³⁵ Ndra ia ia manao ty satrin' Añahare, ie ty rahalahiko naho rahavaveko vaho reneko.

4

ty Fandrarahanh-Tabiry

Mat 13.1-23; Lke 8.4-8

¹ Ie niorotse nañoke aña'olon-driake eo indraike le akore ty hamaron-dahialeñe nihipoke ama'ey kanao nijon-dakañe le niambesatse an-driake ey, vaho tañ' olotse, an-tamboho ey i màroy.

² Le nitaroñ'a'e raha maro am-pandrazàñañe, vaho hoe re te nañoke:

³ Inao: Teo te niavotse mb'eo ty mpandrara-tabiry handrarake. ⁴ Ie nandraraké, le nipoke aña' olon-dalañe eo ty ila'e vaho nimb'eo o voroñeo nitsimok' aze. ⁵ Ty ila'e nipoke ami'ty lamilamy marivo tane, le nitiry aniany, amy te tsy nilaleke i taney, ⁶ ie nanjirike i àndroy, le nimae, vaho niforejeje amy te tsy niam-bahatse. ⁷ Nipoke am-patike ao ka ty ila'e, le nitiram-patike nampidageañe aze vaho tsy namoa. ⁸ Ty ila'e nipoke antane hoba, le nitiry naho nandrevake vaho namokatse, teo ty telo-polo, teo ty enim-polo, vaho teo ty zato. ⁹ Le hoe re: Ze aman-dravembia mahajanjiñe, Mijanjiña.

Mat 13.10-17; Lke 8.9-10

¹⁰ Ie nitolake, le nañontanea' o mpiama'eo naho i folo ro'amby rey i nirazañey, ¹¹ vaho nanoa'e ty hoe: Inahareo ro nitolorañe ty tafatoño'i Fifehean' Añaharey, le hene razañeñe o alafe'eo ¹² soa te:

ie miisake, ro hañisake

fe tsy hahaoniñe;

ie mitsendreñe, ro hijanjiñe, fe tsy haharendreke;

ke hitolike, vaho ho hahàñe o tahi'iareoo.*

Mat 13.18-23; Lke 8.11-15

¹³ Le hoe re tam' iereo: Tsy nirendre' areo hao i ohatse zay? aa le akore ty haharendreha' areo o fandrazañañe iabio? ¹⁴ Mandrarake o tsarao i mpandrarakey. ¹⁵ O añ'olon-dalañeo, amy nandrarahaañe i tsaraiy, ie mijanjiñe, pok'eo aniany i mpañinjey manoitse i tsara nararake am' iareoy. ¹⁶ Manahake zay o nararake am-batovatoñeo, ie mahatsendreñe i tsaray le mandrambe aze an-kaehake amy zao; ¹⁷ f'ie tsy amam-bahatse, le aniany avao te mitojeha ty hasilofañe ndra ty fampisoañañe ty amy tsaray le torifike iareo. ¹⁸ I nararake am-patike ao rezay, le o mijanjiñe i tsaraio, ¹⁹ fe mitsamoake ao ty fihakahaka' ty tane toy, naho ty hakalitaha' o varao, naho ty hatea-raha ila'e, ze mahadageañañe i tsaray tsy hamokatse. ²⁰ O retoañe nararake an-tane soao, le mijanjiñe i tsaray naho mandrambe aze vaho mamokatse: eo ty telo-polo, eo ty enim-polo, vaho eo ty zato.

ty Jiro Kapoake

Mat 5.15; Lke 8.16-18

²¹ Le hoe re tam' iereo: Endeseña ho rongonan-karoña hao ty jiro? ke hazilike ambane fandreaña ao? tsy hàmake t'ie apoke am-panampezan-jiro ey hao? ²² Toe tsy ao ty naetake ze tsy ho bentareña, vaho tsy ao ty nitsikoeña ze tsy ho boraheña. ²³ Ze aman-dravembia hijanjiñe, Mijanjiña.

²⁴ Le hoe re tam' iereo: Ereñereo o janjiñe' areoo; fa ami'ty fañarànaña añaràna' areo ro añarànaña ama' areo vaho ho tompeñaña ama'areo mijanjiñe. ²⁵ Ho tovoñeña ze manañe, fa ami'ty tsy manañe ndra ty kedekedek' ama'e ro sintoneña.

Mandrazaña amo Tabirio

²⁶ Le hoe re: Razañeña amy t'indaty mandrarake tabiry an-tane eo i Fifehean' Añaharey, ²⁷ mirotse re te haleña naho mitroatse boak' andro; mitiry naho mitombo i tabiriy, fe tsy apota'e te manao akore. ²⁸ Mampitiry ho aze i taney: i losoy aolo, le i toka-tsofi'ey, vaho zay o voa'e matoe andoha'eo. ²⁹ Ie rifo le ahitri'e i mesoy fa tondroke ty fitatahaña.

O Voa Nonokeo

Mat. 13.31-32; Lke 13.18-19

³⁰ Hoe ka re: Inoñe ty handrazañan-tika i Fifehean' Añaharey? Ohatse manao akore ty ampidodean-tika aze? ³¹ Ampanahafeña ami'ty voa-nonoke, ie amboleañ' an-tane ro kede amy ze tabiry an-tane atoy; ³² f'ie tongisaña, le mitiry naho midorenake mandikoatse ze hatae an-tetek'ao vaho ampandrevahé'e tsampañet[†] hanoa' o voron-dikerañeo traño añ'alo'e ao.

³³ Maro ty fandrazañañe nitsarae'e hoe zay ty amy nahafijanjiña' iareo.

³⁴ Le tsy nitaroña'e naho tsy am-pandrazañañe avao; ie nitolake vaho nampalange ze he'e amo mpiama'eo.

i Riake Nivalitaboakey

Mat 8.23-27; Lke 8.22-25

³⁵ Ie niroñe ho hariva i àndroy, le hoe re am'iereo: Antao hitsake mb'andafe eñe. ³⁶ Nienga i lahialeñey iereo naho nendesen-dre, ie tandakaña ao avao. Nindre lia ama'e ka ty lakaña ila'e.

³⁷ Nikofaok' amy zao ty tio-bey, le trinabotrabo' o onjao i lakaña, ie nañaly ho pea. ³⁸ Tam-boli' i lakaña re nirotse añ-akalaña, le nampivañoneña ami'ty hoe: O Talè, tsy ahoa'o hao t'ie òpo? ³⁹ Nitroatse re

* 4:12 Isa 6:9,10 † 4:32 Eze 17:22

nitrevoke i tiokey naho nanao ty hoe amy riakey, Manintsiña, mipendreña. Le nijihetse i tiokey vaho nipendreña ami'ty do'e. ⁴⁰ Le hoe re tam' iereo: Ino ty ihembaña' areo? Mboe tsy am-patokisañe hao? ⁴¹ F'ie nianifañe, nifanao ty hoe: Ondaty manao akore v'itoio, te ivohora' i tiokey naho i riakey!

5

i Nitokoén-drahay

Mat 8.28-34; Lke 8.26-39

¹ Ie nitoly alafe' i riakey an-tanen-te Gadarene ao ² vaho niakatse i lakañey, le nifanojo ami' t'indaty boak' an-kibory ao niazo' ty angamaleotse, ³ ie mpañialo añivon-kibory ao vaho tsy teo ty naharohy aze ndra am-biñe, ⁴ beteke narohy an-dabaro naho an-tsivilisily fe pinotopoto'e o silisilio naho pinozapoz'a'e i labaroy vaho tsy teo ty nahafamere aze. ⁵ Tankaboañe ey re naho an-kibory ao handro am-pohatse nikontsiañe naho nandritarita sandriñe am-bato. ⁶ Ie tinalake'e eñe t'IESOÀ, le nibiririña'e naho nitogalefa'e, ⁷ nipoña-peo ami'ty hoe: Ino ty itraofan-tika, ry IESOÀ, Anan' Añahare Andindimoneño? Ampifantàko aman' Añahare t'ie tsy hampisoañe ahy, ⁸ ie nanoa'e ty hoe: Miakara am'ondateo ty anga-maleotse tia. ⁹ Hoe ty nañontanea'e; Ia ty añara'o? Tozantoza* ty añarako, hoe re, foto'e maro zahay. ¹⁰ Nitolom-pitoreo ama'e re t'ie tsy handroak' aze hiakatse i taney.

¹¹ Tey hoeke ey ty lia-rain-dambo jabajaba nandrazeñe amy vohitsey, ¹² le hoe ty fikoikoia' iareo: Ampihitrifo mb' amo lamboo zahay hitsamoaha'ay. ¹³ Le napo' IESOÀ naho nivorake vaho nitsoròpoke amo lamboo i anga-draty rey; naho nivarimbariña amo tazoa beio mb'an-driake ao i mpirai-trokey; va'e ro' arivo ty niopo an-driake ao. ¹⁴ Nitsondemboke ty lay o mpiara-damboo, nitalily an-drova naho an-teteke aña, le nimb'eo iereo handrendreke. ¹⁵ Nivotrake amy IESOÀ iereo nisamba i niazo' o kokolampaoy, t'ie nitoboke soa, toe nisaroñe naho niareñe i nangara' i tozantozañey, vaho nirevendreveñe. ¹⁶ Natalili' o nahaisakeo am'iereo ty nanjò i niazon-kokolampay, naho ty amy lambo rey, ¹⁷ vaho nitoreo amy IESOÀ iereo t'ie hienga i tane' iareoy. ¹⁸ Aa ie nijon-dakañe, le nihalalia' i nangara' i kokolampaiy ty hireketa'e. ¹⁹ Fe tsy nimetea'e, hoe re: Mimpolia mb' aman-drolongo'o mb'eo, le italilio o raha ra'elahy nanoe' i TALÈ ama'oo, vaho ty niferenaiña'e. ²⁰ Le nimb'eo re nitalily e Dekapolisy ao i hene raha fanjaka nanoe' IESOÀ ama'ey; vaho fonga nilatsa.

I Jairo

Mat 9.18-19; Lke 8.41-42

²¹ Ie nitsake an-dakañe indraike t'IESOÀ nitoly an-dafe eroy, le nihipoke ama'e i lahialeñey, ie tañ' olon-driake ey. ²² Niheo mb'eo ty raike amo beim-pitontonaño, i Jairo ty tahina'e; ie nitendreke aze, le nibokoke ampandia'e ²³ nihalaly ty hoe: Matindry fa heta'e i anak' ampelakoy, Ehe antao, hanampeza'o fitañe, hijangaña'e ho veloñe. ²⁴ Aa le nindreza'e lia vaho nanonjohy aze i lahialeñey naho nifanisike ama'e.

Ty Ampela Niazo' ty Lke Lava

Mat 9.20-22; Lke 8.43-48

²⁵ Teo ty rakemba niazo' ty lio-lava folo taoñe ro'amby; ²⁶ ie nisotry raha tsiefa ami'ty mpanaha maro, ze fonga nampikapirofe ty vara'e, f'ie

* ^{5:9} Legiona: lahin-defo 6000 mirimbo

tsy nimbæñe, te mone niindra; ²⁷ ie nahatsanoñe ty am' IESOÀ, le nitsifitse amy lahialeñey mb'am-boho'e ao vaho nitsapa i saro'ey. ²⁸ Fa hoe re: Ndra te i saro'ey avao ty tsapaeko, ho jangan-draho. ²⁹ Aa le nimaike amy zao i hila-tsimeivohi'ey, naho napota'e añova'e ao te njangañe amy hasilo'ey.

³⁰ Niarofoana' IESOÀ amy zao te niakaran-kaozarañe, le nitolike amy lahialeñey, nanao ty hoe: Ia ty nipaoke o sarokoo? ³¹ Hoe ty natoi' o mpiama'eo aze: Vazoho'o o lahialeñe mifanihisihy ama'oo, mbore anoe'o ty hoe: Ia ty nitsapa Ahy? ³² Nitolike re, nahavazoho i nanao zay. ³³ Nivorombeloñe amy zao i rakembay naho nitititite, ie nifohi'e i nifonitse ama'ey, le nimb'eo nibaboke añatrefa'e eo vaho hene natalili'e aze ami'ty hatò. ³⁴ Aa hoe re tama'e; O anake, nahahaha azo o fatokisa'oo: akia an-kanitsiñe, le mijangàña amy hasilofa'oy.

*Nattroatse ty Anak'Ampela'i Jairo
Mat 9.23-26 Lke 8.49-56*

³⁵ Ie mbe nitsara, pok'eo o hirik' amy beim-pitontonañeio nanao ty hoe: Fa simba i anak' ampela'oy; inoñe ka ty hitsoborea'o i Talè? ³⁶ Jinanji' IESOÀ i entañe zay, le hoe re amy beim-pitontonañey: Ko hembañe, matokisa avao. ³⁷ Le tsy nimetea'e t'ie horiheñe naho tsy i Petera naho Iakobe vaho i Jaona rahalahi' Iakobe.

³⁸ Ie niloak' aña'anjomba' i beim-pitontonañey, nivazoho'e o fihoren-tseañeo, o nandalao, vaho o nangoihoio. ³⁹ Nizilike ao re, le nanoa'e ty hoe: Akore o fikorahañe naho lako-taño? Tsy simba i ajajampelay, fa miroro. ⁴⁰ Nikakakaka aze iereo, fe fonga nasita'e le nendese'e ty rae naho rene' i ajajampelay vaho i mpiama'e rey, mb'amy ajajampelay. ⁴¹ Rinambe'e ty taña' i ajajampelay, le nanoe'e ty hoe: Talita komy, (ze adika ty hoe: O ajajampelao, hoe raho ama'o, mitroara). ⁴² Nitroatse amy zao i ajajampelay, le nandeha—ie nifolo taoñe ro'amby, vaho nijagòñe an-datsa iereo. ⁴³ Fe hinatahata'e tsy hampahafohiñe ndra ia ia; le nampamahàne'e hèneñe.

6

*Tsy Nañaoñe o nte Nazaretao
Mat 13.53-58; Lke 4.16-30*

¹ Niakatse re, nimpoly mb'an-tane'e aña, le norihe' o mpiama'eo. ² Ie SABOTSE le nañoke am-pitontonañe ao vaho nilatsa i maro nahajanjiñe azey, nanao ty hoe: Taia ty nahazoa' t'indaty tia o raha zao? Akore o hihitse natolots' azeo vaho o raha ra'elisy fonirem-pitá'eo? ³ Tsy ie i mpandrafits' ana' i Marie naho rahalahi' Iakobe naho i Josesy naho i Jodasy vaho i Simonay? Tsy aman-tikañe etoña'e hao o rahavave'eo? Le nisirikae' iereo. ⁴ Aa hoe ty nanoa' IESOÀ: Tsy pok' asy ty mpitoky naho tsy an-tane'e ao, naho amo foko'eo, vaho aña'anjomba'e ao. ⁵ Aa le tsy nahatafete-draha ra'elisy ao re, naho tsy t'ie nahajangañe ty narare tsy ampeampe ampanampezam-pitáñe, ⁶ ie nilatsa ami'ty tsy fatokisa' iareo.

*Ty Namantohañe ty Folo Ro'amby
Mat 10.1, 5-15; Lke 9.1-6*

Aa le nañariary amo tanañe re, nañoke. ⁷ Le tsinikao'e i folo ro'amby rey, naho namototse nañitrike iareo kiroeroe, naho nomea'e lily amo anga-dratio, ⁸ vaho nitoroa'e ty tsy hinday amy liay naho tsy kobaiñe avao; tsy mofo tsy kotrañe naho tsy drala an-tsandrife. ⁹ Mihanà, fa ko misikin-tsaron-droe. ¹⁰ Le hoe re am'iereo: Ndra mbia' mbia t'ie himoak'

añ'anjomba, mitoboha ao ampara' te hiakatse i rovay, ¹¹ naho eo ty toetse tsy mampihova anahareo, naho tsy mijanjiñe, ie mienga ao, le aboño ampandia' areo ty debole ho fanesehañe iareo.

¹² Niavotse iereo nitaroñe ty fisolohoaña, ¹³ naho nañary kokolampa maro naho nañiliñe solike ami'ty natindry tsifotofoto vaho nampijangaña.

Navetrake t'i Jaona

Mat 14.1-12; Lke 9.7-9

¹⁴ Ie nioni' i Heroda (toe niboile mb'eo mb'eo ty tahina' IESOÀ) le hoe re: Toe nivañoñe an-kavilasy t'i Jaona Mpandipotse; zay ty itoloñankaozarañe tsitantane ama'e. ¹⁵ Hoe ty ila'e: I Elia zay, hoe ka o ila'eo: Mpitoky re, manahake o mpitoky taoloo. ¹⁶ F'ie jinanji' i Heroda, le nifahara'e ty hoe : I Jaona kinitisksikolo hay ty nivañombelo.

¹⁷ Toe nampihitrife' i Heroda ty nitsepak' i Jaona, le rinohi'e am-porozò ao, ty amy Herodiasy, vali' i Filipo rahalahi'e, ¹⁸ ie nanoe' i Jaona amy Heroday ty hoe: Tsy Hake ty hanaña'o i valin-drahalahi'oy. ¹⁹ Nitan-kabò ama'e t'i Herodiasy, le ho nañe-doza ama'e, fe tsy nahalefe; ²⁰ amy te nañalike i Heroda t'i Jaona, ie nioni'e te ondaty vaño naho aman-kasy; le nambena'e, vaho niembetse te nijanjiña'e, fe nitea'e ty nitsendreñe aze.

²¹ Tondroke amy zao ty andro nahaheneke zay: i fitiahiañe ty andro nisamahañe i Heroday, le nanoa'e sabadidake o roandriañeo naho o mpandilio vaho o androanavi' i Galiliao; ²² Nimoake ao ty anak' ampela' i Herodiasy, nitsinjake, nahaehake i Heroda naho o nambarañeo. Le hoe i mpanjakay amy somondraray: Halilio amako ze tea'o le hatoloko, ²³ mbore nitangea'e ty hoe: Ndra inoñ' inoñe ihalalia'o, le hatoloko azo, pak'ami'ty vaki' i fehekoy. ²⁴ Niakatse re, nañontane an-drene'e: Inoñe ty hangataheko? le hoe re: Ty loha' i Jaona Mpandipotse! ²⁵ Nihitrike mb'amy mpanjakay mb'eo re, le hoe ty hèta'e: Ehe atoloro'o ahy añ'akala aniany ty añambone' i Jaona Mpandipotse. ²⁶ Akore ty fioremeña' i mpanjakay; fe i fanta natao'ey, naho o nambarañeo, le tsy nimete ifoneñañe. ²⁷ Nañitrike ty lahindefoñe amy zao re, le linili'e ty handesañe i añambone'ey; le nimb'eo re nampikitsike aze am-porozò ao ²⁸ naho nindese'e añ'akalañe ty añambone'e naho natolo'e amy somondraray vaho natolo' i ampelar aman-drene'e. ²⁹ Ie nirendre'o mpiama'eo, le nimb'eo nitakoñe i fañòva'ey vaho nandrohots'aze an-kibory ao.

Nibalike i Folo Roe-amby rey

Lke 9.10

³⁰ Nifanontoñe amy IESOÀ o nirahe'eo le hene natalili' iereo o nanoeñe naho nanare' iereoo. ³¹ Le hoe re tam' iereo: Antao hitolake, hitofa am-bangiñe ao heike. (Amy te maro ty ni-helohelo teo vaho ndra ty fikamañe tsy nilefe.) ³² Aa le nienga an-dakañe mb'am-bangiñe aña iereo, nitolake.

Namahañe ty Lime-arivo

Mat 14.13-21; Lke 9.11-17; Jao 6.1-14

³³ Fe nitalakeseñe ty fiengà' iareo le napota' i màroy naho nihitrihitry am-pandia mb'eo hirik'amo rova iabio, naho niavy aolo vaho niropake ama'e. ³⁴ Ie toly añ'olotse eo t'IESOÀ le naheo'e i lahialeñey, naho niferenaiña'e, amy te nanahake añondry tsy amam-piarake vaho niorotse nañoke raha maro ama'e. ³⁵ Ie roñoñe aña le nimb'ama'e i mpiama'e rey nanao ty hoe: Paipaiñe ty atoy, fa miròñe i àndroy, ³⁶ ampiavoto iereo hihitrike mb'an-tane mañohoke ey, naho mb'amo tanàñeo mb'eo hikalo mahakama. ³⁷ Fe natoi'e ty hoe: Anjotsò mahakama. Fa hoe iereo ama'e:

Hitoha hao zahay hikalo mofo denaria roan-jato hazotso'ay hitsopeha'e?

³⁸ Le hoe re tam' iereo: Fire ty mofo* ama'areo? Akia, oniño. Namolily iereo, le nanao ty hoe: Lime naho fiañe roe.

³⁹ Le hene nampiambesare' IESOÀ an-dròkandrokañe añ'ahetse maindoñe ey; ⁴⁰ vaho ni-ikeike niambesatse ki-zato naho ki-limam-polo.

⁴¹ Rinambe'e i mofo lime rey naho i fiañe roe zay, le niandra mb'an-dikerañe ey, nitata, vaho namolake i mofo rey, le nitolom-panolotse amo mpiama'eo hanjotsoa' iareo, vaho zinara am' iereo iaby i fiañe roe rey.

⁴² Sindre nikama, le nianjañe, ⁴³ vaho nahoro' iareo ami' ty mozete folo ro'amby pea ze nifitafita amy mahakamay naho amo fiañe. ⁴⁴ Lime arivo ty lahilahy nikama amy mofoy.

*Nidratraitse Ambone Riake eo
Mat 14.22-23; Jao 6.15-21*

⁴⁵ Nirahe' IESOÀ amy zao o mpiama'eo hijon-dakañe hitsake aolo mb'e Betsaida mb'eo, ie hampoly i lahialeñey, ⁴⁶ le nampiavote'e an-kanintsíñe i màroy, vaho nienga mb'am-bohitse ey nitalaho. ⁴⁷ Aa ie hariva, le tañivondriake eñe i lakañey, vaho niereñèreñe an-tane ey re. ⁴⁸ Nivazoho'e t'ie nilozoke am-pive fa niatre-tioke; aa ie amy fijilovan-kale fah' èfatsey le nimb'am'iereo mb'eo nidratraitse ambone' i riakey vaho ho nilosora'e; ⁴⁹ aa ie nioni' iereo nanjenge ambone' i riakey le nikoràke fa natao' iereo ho angatse, ⁵⁰ amy te hene nahaoniñe aze vaho nianifañe. Fe hoe ty nisaontsia'e: Mihafatrara, Zaho 'nio, ko hembañe. ⁵¹ Le nijon-dakañe mindre am'iereo re, naho nipendreñe i tiokey, vaho niloho latsa iareo, ⁵² amy t'ie tsy nahatsikarake i mofoy, fa mbe nigaa'rofo.

*Nañafake e Genesareta
Mat 14.34-56*

⁵³ Ie tafatsàke le nitoly an-tane' Genesareta vaho nigaoñe añ'olotse eo. ⁵⁴ Ie vaho niakatse i lakañey, le nifohi' ondatio, ⁵⁵ naho nirimatse mbeo'mbeo amy taney ninday marare an-tihy, mb'amy naharendreha' iereo aze mb'eo. ⁵⁶ Aa ndra aia aia niheova'e, ke an-tanañe, ke androva, he an-kaloke, le nampàndre' iereo an-tameañe ey o natindrio vaho nihalaly t'ie ho tsapaeñe ndra ty aña' ìndran-tsaro'e eo. Le hene nijangañe ze nitsapa aze.

7

*Imaneo ty Hazavañ'Arofo
Mat 15.1-20*

¹ Nihimpoke ama'e o Fariseo naho mpanoki-dily ila'eo nihitrike boak'e Ierosaleme aña; ² le nahaisake te nikama mofo am-pitàñe maleotse o mpiama'e ila'eo, ³ (Toe tsy mikama hey o Fariseoo naho o Jiosy iabio naho tsy manasa an-dili'e am-pañambenañe o satan-droaeo, ⁴ le tsy mikama iereo te boak'an-tsena naho tsy mañalio vatañe, vaho tsiefa o raha rinambe' iereo hambenañe, manahake ty sasa-fitovy naho valàñe vaho gorogoro torisike) ⁵ le hoe ty nañontanea' o Fariseoo naho o mpanoki-dilio aze: Akore te tsy orihe' o mpiama'oo o lilin-droaeo, ie mihinan-kaneñe an-taña maleotse? ⁶ Tinoi' IESOÀ ty hoe: To ty nitokia' Isaia ty ama' areo soamiatrekeo, ami'ty pinatetse ty hoe:

Miasy ahy am-pivimby ondaty retoa,
Fe lavits' ahy ty arofo' iareo,

* **6:38** Mofo: oniño Iek 4:9

7 Borosode ty italahoa'iareo, ie mañanatse fañè'ondaty hoe hatòmbolañe.*

8 Nado'areo o lilin'Añahareo hivontititse amo lilin-droaeo. **9** Tinovo'e ty hoe: Eka, soa avao te nadò'areo ty lilin'Añahare hañambenañe o lilin-droaeo. **10** Fa hoe t'i Mosè:

Miasia an-drae'o naho i rene'o,† naho
Havetrake ze mamatse rae ndra rene.

11 Fe hoe nahareo: Naho anoe' ondaty aman-drae ndra rene ty hoe: Ze amako ho nañimba anahareo ro Korbane (toe: Enga aman' Añahare); **12** le tsy apo' areo hanao ndra inoñ' inoñe re ho aman-drae'e ndra rene'e, **13** aa le mivalike amy tsaran' Añaharey nahareo an-dilin-droae'areo ze mbore taroñe' areo; toe maro ty fanoe' areo hambañe amy zay.

14 Aa le kinanji'e hitotok' aze i maroy naho nanoa'e ty hoe: **15** Tsy eo ty alafe' ondaty, ie mimoake ama'e ao, ty mahativa aze, fa o miakatse ama'eo ty mahativa ondaty.‡

17 Nienga i lahialeñey re le nizilike añ' anjomba ao, naho nañontanea' o mpiama'eo i fandrazañañey. **18** Le hoe re tam' iereo: Tsy maharendreke ka v'inahareoo? Tsy apota' areo hao te tsy mahativa ondaty ze mizilike ama'e ao boak' alafe'e, **19** amy t'ie tsy mijoñe añ'arofo'e fa am-pisafoañe ao, vaho amontoñeñe.§ **20** Le hoe re: Ze miakatse ama' ondaty ro maniva indatiy. **21** Amy te boak'ao, hirike an-tro' ondaty ao ty iakaran-kilily, hakarapiloañe, fikamerañe, fañohofan-doza, havambàñe, **22** fihàñañe, hatserehañe, famañahiañe, hadrao, fikirofañe, fañinjeañe, fiebotseborañe vaho ty hadagolàñe. **23** Boak' ao i hene raty mahativa ondaty rezay.

I Rakemba Grikay

Mat 15.21-28

24 Niongake re, niavotse mb' an-tane Tirò naho i Sidona aña, vaho nizilike añ'anjomba ao, toe laha'e te tsy ho fohi' ondaty, f'ie tsy nahafietake. **25** Nahajanjiñe ty ama'e ty rakemba, ie nangare' ty anga-draty i anak' ampela'ey, le niheo mb'ama'e niankotrake am-pandia'e eo. **26** Nte Grika i rakembay, Siro-foinika ty famosora'e; nihalalia'e ty handroake i kokolampa amy anak' ampela'ey; **27** fe hoe ty natoi' IESOÀ: Soa re te vontsiñe hey o ajajao, fa tsy mete te rambeseñe ty mofo' o ajajao hahifike amo anak' amboao. **28** Tinoi'e ty hoe: Eka, Rañandria, fe ndra o anak' amboa añ' ilam-pandambañañe ro milintseñe ze afitafita' o ajajao. **29** Le hoe re ama'e: Ty amy enta'oy, akia, fa niakats' amy anak' ampela'oy i anga-dratiy. **30** Ie nimpoly añ'anjomba'e ao, zoe'e nàndre an-tiy eo i anak' ampela'ey, fa nimaotse aña i kokolampay.

Mañafake ty Giñe naho Moañe

Mat 15.29-31

31 Nienga an-tane' i Tirò re niranga i Sidona mb'an-driake Galilia mb'eo amparipari' ty atao Dekapolisy. **32** Le nandesañe ty giñe naho saro-drehake, le nihalaliañe te hampitongoà'e fitañe. **33** Natola'e amy lahialeñey, naho nazili'e an-dravembia'e ao o rambom-pità'eo, le nañakatse ranom-pañere vaho napotsapsotsa'e am-pamele'e eo, **34** le niandra mb' an-dikerañe ey naho niselekaiñe vaho nanoa'e ty hoe: Ef'fata, ze midika ty hoe: Misokafa. **35** Nisokake amy zao o ravembia'eo naho nihaha i handram-pamele'ey vaho nalange i saontsi'ey.

* **7:7** Isa 29:13 † **7:10** Avo 20:12 ‡ **7:15** HN:16 Ze aman-dravembia hijanjy. § **7:19** Toe mahakama, fa tsy o raha falio

³⁶ Le linili'e tsy hitalily ama'ia ia, fa ndra te nonjone'e i hatahatay, àntsake te naboele' iereo i taliliy. ³⁷ Tsy aman' ohatse ty hadabà' iareo kanao nanao ty hoe: Hene fonitse ze anoe'e, ampianjiñe'e ty giñe, vaho ampisaontsie'e ty moañe.

8

I Efats'Arivoy

Mat 15.32-39; Mar 6.32-44

¹ Tamy andro zay, ie nialindretse i lahialeñey, naho tsy ama' mahakama, kinanji' IESOÀ o mpiama'eo le nanoa'e ty hoe: ² Ferenaiñako ondaty retoa fa telo andro te niharo amako vaho tsy aman-ko kamaeñe; ³ aa naho ampolieko mb'añ'akiba'e aña, t'ie mifeake, le hitoirañe an-dalañe ey, fa boa-davitse o ila'eo. ⁴ Le hoe ty natoi' o mpiama'eo: Aia ty mofo an-jerezere tane atoy hahaeneñe ondatio? ⁵ Nañontanea'e ty hoe: Fire ty mofo ama' areo? Fito, hoe iereo.

⁶ Nampiambesare'e an-tane eo i màroy, le nandrambe i mofo fito rey naho nañandriañe, le finola'e, naho natolo'e amo mpiama'eo hanjotsoa' iareo, vaho nazotso' iereo am' ondatio. ⁷ Aman' ana-piañe tsiampeampe ka iareo; tinata'e zay le nampanjotsoa'e. ⁸ Nikama iereo le nianjañe; vaho nahoroñe an-karon-kisetse fito i nisisa amo nifitafitaoy. ⁹ Va'e efats' arivo ty teo; le nampolie'e.

¹⁰ Nijon-dakañe amy zao re mindre amo mpiama'eo niondrañe mb' an-tane Dalmanota aña.

Mipay Viloñe o Fariseoo

Mat 15.39—16.4; Lke 11.16, 29; Jao 6.30

¹¹ Pok' eo o Fariseoo nifandietse ama'e, nipay viloñe boak' andindìñe ao hisombeañ' aze. ¹² Niselekaiñe añ'arofo'e re nanao ty hoe: Ino ty paia' ty tariratse toy viloñe? Eka! to t'itaroñako te tsy ho toloram-biloñe ty tariratse toy. ¹³ Nisitaha'e naho nijon-dakañe indraike, nitsake mb'an-dafe eroke.

Ty Lalivai' o Fariseoo

Mat 16.5-12

¹⁴ Nihaliño' iareo ty mivaty mofo, le tsy ama'e naho tsy ty vonga'e raike an-dakañ' ao. ¹⁵ Le nafantopanto'e ami'ty hoe: Mijilova! itaò ty lalivai' o Fariseoo naho ty lalivai' i Heroda. ¹⁶ Le hoe ty vesoveso' iareo: Va'e te tika tsy ama' mofo. ¹⁷ Niarofoana' Iesoà, le hoe re ama'e: Inoñe ty aereñerè' areo te tsy ama' mofo? Mbe tsy mahaisake ndra mahafohiñe hao? Mbe aman-stroke mijadiriñe hao?

¹⁸ Ry amam-pihaino, tsy mahaisake hao?

Ry aman-dravembia, tsy mahajanjiñe hao?*

tsy tiahi'areo hao, ¹⁹ ie namolahañe mofo lime i lime arivoy rey, fire ty mozete pea ty nifitafita natonto' areo? Folo ro'amby, hoe iereo. ²⁰ Aa naho nifolaheko i fito ho a i efats' arivoy rey, fire ty haron-kisetse nipeà'i nifitafitay ty rinambe' areo? Hoe iereo ama'e, Fito. ²¹ Le hoe re tam' iereo: Mbe tsy mahafohiñe hao?

Jinanga'e t'i Fey

²² Toly e Betsaida ao iereo, le nasese ama'e ty goa vaho nihalaliañe t'ie hitsapa aze. ²³ Rinambe'e ty fità' i feiy le nindese'e niakatse i rovay, naho nañakatse fañère am-pihaino'e ao vaho nañontane aze he nahaisake.

* **8:18** Iir 5:21; Eze 12:2

²⁴ Ie niandra le nanao ty hoe: Mahatrea ondaty raho, aheoko t'ie hoe hatae misitsitse. ²⁵ Napeta'e am-pihaino'e indraike o fità'eo, nihiren-dre le niareñe ty fañentea'e, vaho kila niisa'e malange. ²⁶ Nampolie'e mb'an-kiboho'e mb'eo ami'ty hoe: Ko mimoake an-drova ao.

Mitalily t'i Petera

Mat 16.13-20; Lke 9.18-20; Jao 6.67-71

²⁷ Nienga mb' amo tanañe mañohoke i Kaisaria-Filipoo mb'eo t'IESOÀ naho o mpiama'eo; ie nañavelo le hoe ty ontane'e amo mpiama'eo: Atao' ondatio ho ia raho? ²⁸ Natoi' iareo ty hoe: I Jaona Mpandipotse, le ty ila'e: I Elia, vaho o ila'eo: raike amo mpitokio. ²⁹ Le hoe re tam' iereo: Inahareo ka, atao' areo ho ia raho? Tinoi' i Petera ty hoe: I Norizañey 'n-Iheo! ³⁰ Le nafanto'e am'iareo ty tsy hitalily am' ondatio ty ama'e.

Mitoky ty Hivilasia'e

Mat 16.21-23; Lke 9.22

³¹ Le namototse nañoke iareo re, te tsy mahay tsy ho silofen-draha maro i Ana' ondatiy, ho arinjeñe' o roandriañeo naho o mpisorom-beio naho o mpanoki-dilio, le hañohofan-doza, ie aña ty hateloañe vaho hitroatse indraike. ³² Nabeja'e malange i tsaray, fe natola' i Petera le nitrevoha'e. ³³ Nitolike re nijilo o mpiama'eo le nendaha'e ami'ty hoe t'i Petera: Mb'am-bohoko ao ty mpañinje tia! tsy o rahan' Añahareo ty ereñerea'o, fa a' ondatio.

Ty Hasarota'o Fitaliliañeo

Mat 16.24-27; Lke 9.22-26

³⁴ Tsinkao'e i màroy naho o mpiama'eo, le nanoe'e ty hoe: Ze te hañorike ahy, ee t'ie hilie-batañe, handrambe i hatae ajale'ey vaho hanonjohy ahy. ³⁵ Ze te handrombake ty fiai'e ro hamoe aze, vaho ze mitono-vatañe ty amako naho ty amy talili-soay, ty handrombake aze. ³⁶ Ino ty hahasoa ondaty te kila azo'e ty tane toy, te mone ampiantoe'e ty fiai'e? ³⁷ Ino ty hampitsaloha' ondaty ty fiai'e? ³⁸ Aa ndra iaia ty meñatse ahy naho o fivolako ami'ty tariratse vamba naho bey hakeo toio, ty himeñara' i Ana' Ondatiy t'ie mivotrak' etoa aman-drengen-dRae'e rekets' o anjely masiñeo.

9

¹ Tinovo'e am'iereo ty hoe: Eka! to t'itaroñako te amo mijohañe etoñañeo ty tsy hitsope-kavilasy ampara' te isa'e mitotsake ami'ty haozara'e i Fifehean' Añaharey.

Ty Niova'e

Mat 17.1-9; Lke 9.28-36; 2 Pet 1.17-18

² Ie aña ty eneñ' andro, le nente' IESOÀ t'i Petera naho Iakobe vaho i Jaona nañambone vohitse abo mb'eo, nitolake, ie novaeñe aolo' iereo eo.

³ Nireandreañe ty saro'e; nifoty mangotritriake hoe volovaso, hafotiañe tsy lefem-pikotriñe an-tane atoy. ⁴ Nisodehañe am'iereo t'i Elia naho i Mosè, vaho nifanaontsy am' IESOÀ.

⁵ Hoe t'i Petera tamy IESOÀ: O Raby*, fanjaka ty maha etoañ' antika; apoho hamboara'ay kivoho telo: ty ho Azo, ty ho a i Mosè, vaho ty ho a i Elia; ⁶ fe tsy napota'e i nisaontsie'ey, fa nirevendreveñe. ⁷ Le niboake eo ty rahoñe nañaloke iareo, vaho niboak' amy rahoñey ty fiarañanañañe, nanao ty hoe: Anako kokoako toy: Ijanjiño. ⁸ Tsipaepae zay, nañente iereo fe tsy nahaisake ia'ia am'iereo naho tsy IESOÀ avao.

* 9:5 Raby: Talè

⁹ Ie nizotso i vohitsey, le hinatahata'e tsy hitalily aman-dra ia'ia i niisa' iareoy ampara' te vañom-beloñe i Ana' Ondatiy. ¹⁰ Nahaja' iereo an-troke ao i tsara zay vaho nifañontane i hoe: Fivañonam-beloñey.

Mat 17.10-12

¹¹ Le nañontanea' iareo ty hoe: Akore ty fisaontsi' o mpanoki-dilio te tsy mahay tsy ho avy aolo t'i Elia? ¹² Hoe ty natoi'e: Toe avy aolo t'i Elia hañavao ze he'e; fe akore i nipatereñe i Ana' Ondatiy t'ie tsy mete tsy silofen-draha maro vaho sirikaeñe? ¹³ Fe itaroñako, toe niavy t'i Elia, le nanoeñe ama'e ze nisatrie' iereo, hambañe amy nipaterañey.

Nañafake Anga-dRaty

Mat 17.14-21; Lke 9.37-42

¹⁴ Nimpoly mb'amo mpiama'eo mb'eo iereo le nahaisake t'ie niarikoboña' i lahialeñey, naho nanoa' o mpanoki-dilio lie-drokoñe. ¹⁵ Ie hene nahaisak' aze i valobohokey le nilatsa vaho nivavatse mb'ama'e mb'eo hifañontane. ¹⁶ Le hoe ty ontane'e am'iereo: Inoñe o ifandiera' areoo? ¹⁷ Hoe ty natoi' ty boak' amy màroy ao: O Rañandria, nenteko mb'ama'o ty anako niazo' ty kokolampa mahagiñe aze. ¹⁸ Ie azi'e, le roterotè'e naho ampamore'e ty vava'e, ie mivazakota vaho mifimpìñe, aa naho nivolañeko o mpiama'oo ty hañary aze, tsy nilefe'e.

¹⁹ Natoi' IESOÀ ty hoe: Ry tariratse po-fatokisañe, pak' ombia ty mbe hindrezako? Sikal' ombia ty mbe hifeahako? Ampombao mb'amako re.

²⁰ Aa le nasese' iereo mb'ama'e, ie nivazoho'e, le nifetsaha' i kokolampay an-tambioñe i ajalahiy; nikorovoke an-tane eo nitamborokoseke vaho namore. ²¹ Le nañontanea'e an-drae'e ty hoe: Ombia ty nifotora' i fanjeke'ey? Le hoe ty natoi'e: Ampara' ty naха-kede aze. ²² Beteke ahifi'e aň'afó ao naho an-drano ao hañohofa'e loza; aa naho mete'o ty hanao ndra inoñ' inoñe, iferenaiño vaho imbao! ²³ Hoe t'IESOÀ tama'e, Naho mete! Toe hene mete ami'ty mpiato. ²⁴ Nitoreo amy zao ty rae' i ajalahiy ami'ty hoe: Miantoke raho, imbao o tsy fatokisakoo.

²⁵ Naheo' IESOÀ te hihipoke ama'e i lahialeñey le nendaha'e i anga-dratiy ami'ty hoe: Ty kokolampa giñe naho moañe tiañe, lilleko rehe, Iakaro le ko itsamoaha'o ka. ²⁶ Nikontsiañe amy zao re le nagibigibi'e mafe, naho niakatse vaho ni-hoe lolo i ajalahiy kanao natao' i màroy te simba. ²⁷ Fe rinambe' IESOÀ ty taña'e le sinotra'e vaho nitroatse re.

²⁸ Ie nizilike aň'anjomba ao le natola' o mpiama'eo, nañontane aze ty hoe: Akore te tsy nilefe'ay firoake i rahay? ²⁹ Hoe re tam'iareo: Tsy mete mifaoke i karazañe zay naho tsy aman-kalaly.

Mitoky ty Hivilasia'e

Mat 17.22-23; Lke 9.43-45

³⁰ Nienga iereo re le niranga i Galilia, fa laha'e te tsy ho fohi' ondaty, ³¹ amy t'ie nañoke o mpiama'eo, naho nitaroña'e ty hoe: Fa nasese am-pità' ondaty i Ana' Ondatiy hañohofan-doza; ie vinono le hitroatse naho fa modo ty telo andro. ³² Fe tsy napota' iereo i saontsy zay, naho tsy nahavany nañontane aze.

Ty Loha'e amy Fifeheañey

Mat 18.1-5; Lke 9.46-48

³³ Nigodañe e Kapernaome ao iereo, le ie aň'anjomba ao, nañontanea'e o mpiama'eo ty hoe: Inoñe i nisafirie' areo an-dalañey? ³⁴ Nianjiñe iereo, amy te nialy habey amy lalañey. ³⁵ Niambesatse re le kinanji'e i folo ro'amby rey naho nanoa'e ty hoe: Naho eo ty te ho valoha'e, ie ty ho tsitso'e

vaho ho mpitoro' ie iabiy. ³⁶ Nandrambe ajaja re le navotra'e aolo' iareo eo naho nisazoha'e, vaho nanoe'e ty hoe iereo: ³⁷ Ndra ia ia mandrambe ty ajaja hoe toke ami'ty añarako mandrambe ahy, le ndra ia ia mandrambe ahy, tsy zaho ty rambese'e fa i Nañitrike Ahiy.

*Ty Fanoñonañe ty Tahina' Iesoà
Nom 11.26-29; Lke 9.49-50*

³⁸ Hoe t'i Jaona tama'e: O Rañandria, nitrea'ay ty nañary kokolampa ami'ty tahina'o, le nendaha'ay amy t'ie tsy mpañorike an-tika. ³⁹ Le hoe t'IESOÀ: Ko sebañe'o, fa tsy eo ty hahaboa-kaozarañe ami'ty añarako ze mora hanirika ahy. ⁴⁰ Ze tsy mirafelahy aman-tikañe ro mpiaman-tika. ⁴¹ Aa ndra iaia manjotsso rano am-pitovy hinoma' areo amy te a' i Norizañey, Eka! to t'itaroñako t'ie tsy ho motso-tambe.

*Ty Fampitaoañe amo Afo-beio
Mat 18.6-9; Lke 17.1-2*

⁴² Fe ndra ia ia mampitsikapy ty raike amo mpiato kede retoa, hàmake t'ie androhizan-deom-bato am-pititia vaho avokovoko an-driake ao. ⁴³ Naho mamingañe azo ty fita'o, kitsiho aña, fa kitra'e hizilike an-kaveloñe ao dom-pitâñe ta t'ie havokovoko reke-tañan-droe mb' an-tsikeokeoke[†] ao, amo afo tsy hay vonoeñeo—‡ ⁴⁵ Lehe mahatsikapy azo ty fandia'o, aítò, fa hàmake hizilike an-kaveloñ' ao doñe rehe ta te hajoroboñe an-tsikeokeoke ao reke-pandia roe—§ ⁴⁷ Naho mañakeo azo ty fihaino'o, apolitiro, kitra'e himoak' am-Pifehean' Añahare ao tofa-pihaino raike rehe ta te hafetsake an-tsikeokeok' ao amam-pihaino roe, ⁴⁸ amo oletse tsy mateo naho amo afo tsy hay vonoeñeo—* ⁴⁹ Toe kila ho siraeñ' afo, ⁵⁰ Soa o sirao, f'ie botsake i siray, inoñe ty hanirañ' aze? Manàña sira ama' areo ao, vaho mifampilongoa.

10

*Ty Fañengam-baly naho ty Fañitoam-baly
Mat 19.1-12*

¹ Niongake re le nienga vaho nandoake am-paripari' Iehodà alafe' Iordaney aña, naho nihipoke ama'e indraike i lahialeñey, fe ami' ty lili'e, nanare'e avao. ² Nomb'ama'e mb'eo o Fariseoo hitsoke aze ami'ty hoe: Metea' i Hake hao ty hañaria' ondaty valy? ³ Tinoi'e ty hoe: Inoñe ty nandilia' i Mosè? ⁴ Le hoe iereo: Nampanokire' i Mosè takelan-tsei-valy, zay vaho hitsey.* ⁵ Natoi' IESOÀ ty hoe: Ami' ty hagàñ' arofo' areo ro nanokira'e i lily zay. ⁶ Fe boak' am-pifotora' ty voatse toy, nanoe'e lahilahy naho ampela iereo.[†]

⁷ Zay ty talim-pisitaha' ondaty
aman-drae'e naho rene'e,
hireketse amy vali'ey;

⁸ vaho ho nofotse raike ie roe,[‡]

ie tsy roe ka, fa nofotse raike. ⁹ Aa le ze navitran' Añahare, ee te tsy havitso' ondaty.

¹⁰ Ie tañ'anjomba ao, nindrae' o mpiama'eo ontane amy hoe zay.
¹¹ Le hoe re tam' iereo: Ze mañary valy naho mañenga ampela hafa

† 9:43 helo: afo-bey figadoña' ty mpañinje ‡ 9:43 9:44 aman' oletse tsy mete mate, vaho amo afo tsy mete vonoeñeo. § 9:45 9:46 manahake ty tovo i 9:44. * 9:48 9:48 manahake ty tovo i 9:44. * 10:4 Its 24:1 † 10:6 Fot 1:27 ‡ 10:8 Fot 2:24

ro mampañarapilo aze. ¹² Le ze rakemba misitake ami'ty vali'e naho mifanambaly ami'ty hafa ro mañarapilo.

Mitata Ajaja

Mat 19.13-15; Lke 18.15-17

¹³ Ninday ajaja ama'e iereo ho tsapae'e, fe nendaha' o mpiama'eo. ¹⁴ Ie nivazoho' IESOÀ, le niviñetse vaho nanoa'e ty hoe: Adono homb' amako mb'etoañ' o ajajao, ko sebañeñe fa a o hambañe ama'eo i Fifehean' Añaharey. ¹⁵ Eka! to t'itaroñako te tsy hizilike ao, ndra ia ia tsy mandrambe i Fifehean' Añaharey manahake o ajajao. ¹⁶ Aa le notroñe'e iereo naho nanampeza'e fitàñe vaho nitatae'e.

Ty Mpañaleale

Mat 19.16.30; Lke 18.18-30

¹⁷ Ie vaho nionjoñe mb'amy lia'ey, le nilay mb'ama'e mb'eo t'indaty nitongaleke añatrefa'e eo nañontane aze ty hoe: O Talè-soa, Inoñe ty hanoeko handovako haveloñe nainai'e? ¹⁸ Le hoe t'IESOÀ tama'e: Inoñ' ty anoa'o ahy: Soa? Tsy eo ty soa naho tsy Raike : i Andrianañahare.

¹⁹ Fohi'o o lilio:

Ko mañoho-doza,
Ko mañarapilo,
Ko mampikametse,
Ko manao talily vilañe,
Ko midramotse, vaho

Miasia an-drae'o naho an-drene'o. §

²⁰ Le nanoa'e ty hoe: O Talè, hene noriheko ampara' ty naha ajalahy ahy. ²¹ Nitalatse aze t'IESOÀ le nikokoa'e, vaho nanoa'e ty hoe: Poke raha raike rehe: akia, aletaho ze hanaña'o, le añomezo o rarakeo hanaña'o vara andindiñe ao vaho antao hañorik' ahy. ²² Nanahelo re ty amy tsara zay le ninankañe mb'eo an-kamonjerañe amy te bey ty vara'e.

Mampiara-Draha ty Fanañan-Draha

Mat 19.23, 26; Lke 18.24.27

²³ Ie nitolike t'IESOÀ, le nanoe'e ty hoe amo mpiama'eo: Akore ty hasaro' ty himoaha' o mpañefoefoo am-Pifehean' Añahare! ²⁴ Nilatsà' o mpiama'eo i tsara'ey, le nindrai' IESOÀ ty hoe: Ry anake, fihirimbeloñe ty fizilihañe amy Fifehean' Añaharey ao! ²⁵ Mora ty hampandoahañe rameva* an-kirim-pitrebeke ao ta ty hiziliha' o mpañalealeo amy Fifehean' Añaharey. ²⁶ Le tsy an' ohatse ty hadabà' iareo kanao nifanao ty hoe: Ia arè ty ho rombaheñe? ²⁷ Nitalaha' IESOÀ, le nanoa'e ty hoe: Toe tsy lefe' ondaty, fa tsy zay ty aman' Añahare: Kila mete aman' Andrianañahare.

²⁸ Vaho hoe t'i Petera: Hehe, fonga nifarie'ay vaho nanonjohy Azo. ²⁹ Hoe t'IESOÀ: Eka! to t'itaroñako te tsy eo ty nienga akiba, ndra rahalahy ndra rahavave, ndra rae ndra rene, ndra valy ndra anake ndra tane ty amako naho ty amy talili-soay ³⁰ ty tsy handrambe in-jato ami'ty sa toy: anjomba, rahalahy naho rahavave, rene naho anake naho tane, naho fampisoañañe; vaho haveloñe nainai'e amy sa ho aviy. ³¹ Maro ty aolo t'ie ho fara'e; naho ty tsitso'e t'ie ho lohà'e.

Mitoky ty Hivilasi'e Fañintelo'e

Mat 20.17-19; Lke 18.31-34

³² Ie tan-dalañe mbe Ierosaleme mb'eo, le niaolo t'IESOÀ naho nineven-evtse iereo, vaho nihembankembañe o ambohoo; natola'e indraike i

§ **10:19** Avo 20:12-17; Its 5:16-20

* **10:25** Aramaika : gamia: taly ndra rameva

folo ro'amby rey vaho nitalilia'e o hifetsake ama'eo, ami'ty hoe: ³³ Inao! mb'e Ierosaleme mb'eo tikañe; le hasese amo mpisorom-beio nahoh amo mpanoki-dilio i Ana' Ondatiy, le hafatse ho vonoeñe, vaho hatolotse amo kilakila ondatio, ³⁴ honjira' iereo le handrorane nahoh ho lafañe vaho ho vonoeñe f'ie modo ty telo andro le hitroatse indraike.

Firehañe

Mat 20.20-28

³⁵ Niheo mb'ama'e mb'eo t'Iakobe nahoh i Jaona ana' i Zebedio, nanao ty hoe: O Talè, Ehe, ano ama'ay o ihalalia'aio. ³⁶ Hoe re am' iereo: Ino ty paia' areo hanoañe? ³⁷ Le hoe iareo tama'e: Iantofo te, ihe an-drenge'o ao, ehe t'ie hitrao-piambesatse ama'o, ankavana'o eo ty raike nahoh ankavia'o eo ty raike. ³⁸ Le hoe t'IESOÀ tam'iereo: Amoea' areo o halali' areoo: lefe' areo hao ty hinoñe amy fitovy hinomakoy? nahoh hilipotse amy filiporañe handiporañe ahiy? ³⁹ Le hoe iereo tama'e: Lefe'ay. Le hoe t'IESOÀ: Toe hinoma' areo i fitovy hinomakoy, vaho hilipora' areo i lipotse handiporañe Ahiy, ⁴⁰ fe ty hiambesatse ankavanako eo nahoh ankaviako eo, tsy ahiko hatolotse; fa ho a' o nañalankañañe azeo.

⁴¹ Ie jinanji' i folo rey, le nitorifike am' Iakobe nahoh i Jaona. ⁴² Aa le tsinikao' IESOÀ iereo hitotok' aze, vaho nanoa'e ty hoe: Fohi' areo te misenge hery amo kilakila ondatio o atao ho mpanjaka'eo, le mifehe iareo an-keloke o bei'eo. ⁴³ Fa tsy zay ka ty ama' areo; ze te ho lahitsiay ama' areo, ie ty ho mpitoro' areo ⁴⁴ le ze te ho lohà'e ama' areo, ie ty ho fetrek' oro' ie iabiy, ⁴⁵ amy te tsy pok'eo ho toroñeñe i Ana' Ondatiy, fa ty hitoroñe vaho hanolotse ty fiai'e hijebañe ty maro.

i Bartimeo Fey

Mat 20.29-34; Lke 18.35-43

⁴⁶ Nandoake e Jerikò ao iereo, aa ie nienga i Jeriko rekets' o mpiama'eo nahoh i lahialeñey, le teo t'i mpangatake fey atao Bartimeo, toe ana' i Timeo, nikonenake añ' olon-dalañe eo. ⁴⁷ Ie jinanji'e te inay t'IESOÀ nte Nazareta, vaho nikoike ty hoe: Ry IESOÀ Ana' i Davide, tretrezo raho. ⁴⁸ Tsiefa ty nañendak'aze hianjiña'e fe àntsake te nipoñafe'e ty hoe: Ry Ana' i Davide iferenaiño. ⁴⁹ Nijohañe t'IESOÀ le nampikanje'e, aa le kinanji' iereo i feiy ami'ty hoe: Mahasibeha, miongaha fa kanjie'e. ⁵⁰ Nahifi'e aña i saro'ey le niongake nimb'amy IESOÀ mb'eo. ⁵¹ Le hoe ty natoi' IESOÀ aze. Inoñe ty paia'o ahy hanoañe? O Rabony hoe ty asa'e: Ty hahatreavako. ⁵² Hoe t'IESOÀ tama'e, Akia, naharombake azo o fatokisa'oo. Nahaisake amy zao re vaho nañorike IESOÀ amy lia'ey.

11

Misorogodañ' an-dRebeke

Mat 21.1-9; Lke 19.28-38; Jao 12.12-19

¹ Ie nañarine Ierosaleme e Beit-Pagè nahoh Betania am-bohi-Oliva eo iereo, le nahitri'e ty roe amo mpiama'eo ² ami'ty hoe: Akia mb'an-tanañe ey hoekey, le ie mizilike ao ro hahaisake ana-borike mirohy mbe tsy nitongoañe: draito le tantalio mb'amako mb'etoa. ³ Aa nahoh eo ty manao ama' areo ty hoe: Akore ty anoe' areo zao?toiño te ipaia' i Talè, fa hahitri'e mb'etoañe aniany. ⁴ Niavotse iereo, le nahaoniñe ty ana-borike an-dalañe ey nirohy ami'ty lalam-bey, vaho binala' iereo. ⁵ Aa hoe o nijohanjohañeo am' iereo: Ino o anoe' areoo, t'ie mañaha o borikeo? ⁶ Le tinoi' iereo amy nampanoa' IESOÀ; aa le nampionjoneñe. ⁷ Nendese' iereo mb'amy IESOÀ

mb'eo i ana-borìkey le nalafike ama'e o saro' iareoo, vaho ningira'e.
⁸ Nandamake ty sarimbo'e amy lalañey ty maro, naho nandafike ran-katae binira'e an-teteke ao ty ila'e. ⁹ Nikoikoike ty hoe o niaoloo naho o am-bohoo:

Hosana! andriañeñe ty mitotsake ami'ty tahina' i TALÈ! ¹⁰ Andriañeñe ty fifehea'i Davide
 raen-tika hitotsak' eo. Ehe rombahō*, ry Andindimoneñeō.†

¹¹ Nizilike e Ierosaleme ao t'IESOÀ, naho niheo mb' añ' Anjomban' Añahare ao, ie hene nisambae'e le nienga mb'e Betania mb'eo rekets' i folo ro'amby rey amy te niròñe ty àndro.

i Sakoañey

Mat 21.18-19

¹² Amy loak'androy, naho fa niakatse i Betania iereo le nisaliko re, ¹³ le tinalake'e ey hoek'ey ty sakoañe nandraveñe le nomb' ama'e mb'eo ke hahaisake raha ama'e, fa ie avy eo, tsy nanjò naho tsy raveñe avao, amy te tsy san-tsakoña. ¹⁴ Le hoe re tama'e: Ee te tsy hikamañe ka. Jinanji' o mpiama'eo zay.

Ty Nañaliovae i Anjombay

Mat 21.12-17; Lke 19.45-48; Jao 2.13-22

¹⁵ Ie nivotrake e Ierosaleme ao, le nizilike añ'anjomban' Añahare ao vaho nandroake o mpanao balikeo naho o mpipeake añ'Anjomban' Añahareo le navalitsingore'e ty fandambaña' o mpanakalo volao naho ty fiambesa' o mpandetake dehoo; ¹⁶ vaho linili'e te tsy hendeseñe hiranga i Anjombay o kilankañe. ¹⁷ Le nendaha'e ami'ty hoe: Tsy pinatetse hao te Hatao anjombam-pitalahoa' ze kilakila ondaty ty anjombako?‡
 F'ie nanoe'areo lakato-malaso.§

¹⁸ Nahajanjiñe zay o mpisorom-beio naho o mpanoki-dilio, vaho nikinia hañoho-doza ama'e, fe nimarimarihañe i lahialeñey ami'ty halatsà' iareo amo fañohà'eo. ¹⁹ Ie hariva ro niakatse i rovay.

Ty Haozara'o Fatokisañeo

Mat 21.20-22

²⁰ Niary mb'eo iereo te maraindray, le niisa'iareo i sakoañey niheatse boak' am-baha'e. ²¹ Nahatiah y t'i Petera, le hoe re tama'e: O Rañandria, hehe te niheatse i sakoañe nafà'oy. ²² Le hoe ty natoi' IESOÀ: Atokiso t'i Andrianañahare. ²³ Eka! to t'itaroñako te ndra iaia hanao ami'ty vohitse toy ty hoe: Miombota! mivokovokoa an-driake ao, lehe tsy mifejofejo antroke, fe atokisa'e te ho tendreke i natao'ey; le hanoeñe ho aze zay. ²⁴ Aa le hoe ty ivolañako: ze hene ihalalia' areo naho isaboa'areo, matokisa t'ie fa azo' areo, le ho ama' areo. ²⁵ Ie mijohañe eo hihalaly, iheveo hey ze anañan-kakeo, soa te hahan-dRae' areo andindiñe ao ka o tahi' areoo.*

Nampanandili' Iesoà

Mat 21.23-27; Lke 20.1-8

²⁷ Nigodañe mb'e Ierosaleme mb'eo indraike iereo; le nidraidraitse añ'Anjomban' Añahare ao, vaho nomb' ama'e mb'eo o mpisorom-beio naho o mpanoki-dilio naho o roandriañeo, ²⁸ nanao ty hoe ama'e: Lily manao akore, ty anoe'o o raha toañeo? Ia ty nanolotse Azo lily hanao o raha zao? ²⁹ Hoe t'IESOÀ tam' iereo: Inao ty ontaneko ama' areo, ie

* **11:10** Hosana † **11:10** Sab 118:26 ‡ **11:17** Isa 56:7 § **11:17** Irm. 7:11 * **11:25** 26: F'ie tsy miheve le tsy hapon-dRae an-dindiñe ao ka o tahi'areoo.

mahatoiñe ahy le hitaroñako ty lily anoeko o raha rezao. ³⁰ I filipora' i Jaonay: hiri ke andindiñe ao hao, ke boak'am'ondatio? Itoiño hey.

³¹ Aa hoe ty vesoveso' iareo: Ie ataoñ-tika ty hoe: Hirike andindiñe ao, le hatoi'e ty hoe: Akore arè t'ie tsy niantofa' areo? ³² fa naho manao ty hoe ka tikañe: Boak'ama' ondaty—fe nimarimariheñe ondatio amy te fonga nitañe i Jaona ho toe mpitoky. ³³ Aa le hoe ty natoi' iareo am'IESOÀ: Tsy fohi'ay. Le hoe ty navale' IESOÀ: Aa le tsy haborako ka ty lily anoeko irezao.

12

Ty Mpambole Raty Tsereke

Mat 21.33-46; Lke 20.9-19

¹ Aa le niorotse nisaontsy am-pandrazañañan-dre: Teo t'indaty nañalahala tanem-bahe: nañarikatoha'e kijoly, naho nihalia'e fipiritan-divay, mbore nandrafeta'e fitalakesañ' abo, le nafondro'e am-pañalahala valòboke, vaho nitaveañe aña. ² Ie sam-pamaramanta, le namantoke mpitoroñe hangalake amo mpañalahalao ty voka' i tanem-bahe'ey. ³ F'ie rinambe' iereo naho nifofoheñe vaho nampipolie' iereo mañomaño. ⁴ Aa le nañitrifa'e mpitoroñe indraike; fe trinabotrabo' iereo ty añambone'e, vaho nampisalareñe. ⁵ Nañitrifa'e indraike, fe navetrake ty raike; le mbe nimaro ka, vinangovango ty ila'e, nohofan-doza ty ila'e. ⁶ Mbe ama'e ty honka'e, ty ana'e kokoa'e, ie ty sehangam-pirahe'e, fa hoe re: Hiasy i anakoy iereo. ⁷ Fe nikilily ty hoe i mpamondro rey: Intoy i mpandovay, antao hañè-doza ama'e vaho ho antika i lovay. ⁸ Aa le rinambe' iereo naho namono aze, vaho navokovoko' iereo alafe' i tetem-bahey. ⁹ Aa vaho inoñe ty hanoe' i Talèn-tetem-bahey? Hiheo mb'eo re hanjamañe o mpañalahalao, le hatolo'e ami'ty ila'e i tetem-bahey. ¹⁰ Mbe tsy vinaki' areo hao ty Sokitse Masiñe manao ty hoe:

I vato nikihoe' o mpandrafiteoy ie ty talen-kotsoke henaneo.

¹¹ Sata' iTALÈ zay,

le fiain-tane am-pihainon-tikañ' ao.*?

¹² Aa le nipay ty hitsepake aze iereo, f'ie nihembañe amy lahialeñey; nifohi'iereo te nanoa'e jera-fotots'aila am'iereo amy ohatsey, aa le nisitake aze vaho niavotse.

Ondroho amy Kaisara

Mat 22.15-22; Lke 20.20-26

¹³ Le nahitri' iereo mb'ama'e o Fariseo naho o nte Heroda ila'eo hitsepake aze amo tsara'eo. ¹⁴ Pok'eo iereo, nanao ty hoe: O Talè, fohi'ay te vañon-dRehe, tsy mañaon-keve' ondaty, vaho tsy amam-pirihiañe, fa mañoke ty satan' Añahare an-katò; Aa vaho Hake hao ty androroñañe villoha amy Kaisara†, ke tsie? ¹⁵ Handroroñe hao zahay ke tsy handroroñe?

Fe niarofoana'e ty famañahia' iareo, le hoe re ama'e: Ino ty itsoha' areo ahy? Añandesos drala henteako. ¹⁶ Nañandesaañe, le nanoa'e ty hoe, Sare naho soki' ia v'itoio? A i Kaisara, hoe ty asa' iareo: ¹⁷ Aa le natoi' IESOÀ ty hoe: Atoloro amy Kaisara o a i Kaisarao, naho aman' Añahare o an' Andrianañahareo. Le nidaba ama'e iereo.

i Fivañonan-koveloñey

Mat 22.23-33; Lke 20.27-40; Asa 23.8

¹⁸ Nimb'ama'e ka o Tsadoke ila'eo, ie tsy mianteke i fivañonam-beloñey, vaho nitsok' aze, ami'ty hoe: ¹⁹ O Talè, sinoki' i Mosè aman-tika te ie vilasy

* ^{12:11} Sab 118:22,23 † ^{12:14} Mpanjaka' ty Fifeheam-bei' i Roma

ty rahalahi' ondaty, naho mienga valy tsy aman' anake, le ampañengàeñe i rahalahi'ey i vali'ey hameloma'e doria ho amy rahalahi'ey.[‡] ²⁰ Aa le teo ty mpirahalahy fito; nañenga valy ty valoha'e, f'ie nivetrake tsy nampipoke tiry. ²¹ Le vinali' ty faharoe, f'ie ka nihomake tsy nampipoke tiry. Manahake zay ty fahatelo. ²² Leo raike amy mirahalahy fito rey tsy nampipoke doria. Fara'e nihomake ka i rakembay. ²³ Aa ie amy fivañonam-beloñey, naho mitroatse iereo, ia ama'e ty ho vali'e, kanao songa nanambaly aze i fito rey?

²⁴ Hoe t'IESOÀ am'iereo: Inay ie, ty mampandilatse anahareo, te tsy fohi' areo i Sokitse Masiñey ndra ty haozaran' Añahare. ²⁵ Ie mitroatse ami'ty havilasy, tsy mañenga, tsy engaeñe; fa manahake o anjelin-dindìñeo. ²⁶ Le o vilasio, t'ie mitroatse, tsy vinaki' areo hao amy boke' i Mosèy ao te tsinaran' Añahare boak' amy rongoñey ty hoe:

Andrianañahare' i Abraàme raho,

naho t'i Andrianañahare' Isaka, vaho t'i Andrianañahare' Iakobe.[§]

²⁷ Ie tsy Andrianañahare'o vilasio, fa Andrianañahare'o veloñeo, toe mañota nahareo.

Ty Lily Ambone

Mat 22.34-40; Lke 10.25-28

²⁸ Nimb'eo ty mpanoki-dily, nahajanjiñe ty fifandiera' iareoy naho nahaoniñe te vinale'e soa vaho nañontanea'e ty hoe: Ino ty lily ra'elahi' ama'e? ²⁹ Natoi' IESOÀ ty hoe: Zao ty lohà'e:

Mijanjiña ry Israele;

Raike t'i TALÈ

Andrianañaharen-tikañe,

³⁰ Tsy mete tsy kokoa'o

an-kaliforan' arofo,

naho an-kaàtsam-piaiñe,

naho an-kaampom-pitsakoreañe

vaho an-kaozara'o iaby t'i TALÈ,

Andrianañahare'o*.

³¹ Hoe ty faharoe:

Ampirao fikoko ami'ty vata'o ondatio.[†]

Tsy eo ty lily ambone' irezay.

³² Aa hoe ty asa' i mpanoki-diliy tama'e: To i azoy, Talè, mahity i enta'oy te raike t'i Andrianañahare, tsy aman-tovo'e, ³³ le ambone' ze hene engan-koroañe naho soroñe ty fikokoañ' aze an-kaampon'arofo naho an-kaàtsam-paharendrehañe naho an-kaliforan-kaozarañe vaho ty fikokoñañe ondatio mira aman-teña. ³⁴ Nifohi' IESOÀ t'ie nanoñe an-kihitse, le hoe re ama'e: Tsy lavits' azo i Fifehean'Añaharey. Aa le tsy eo ty nahavany ontane aze ka.

Ana' Ia i Norizañey?

Mat 22.41-46; Lke 20:41-44

³⁵ Hoe t'IESOÀ te nañoke añ'Anjomban' Añahare ao: Akore te atao' o mpanoki-dilio te ana' i Davide i Norizañey? ³⁶ Toe asa' i Davide añaamy Arofo Masiñey ty hoe:

Hoe t'i Talè amy Talèkoy:

Miambesara an-tañan-kavanako etoñañe,

ampara' te anoeko fitongoàm-pandia'o o rafelahi'oo.[‡]

[‡] 12:19 Its 25:5 § 12:26 Avo 3:6 * 12:30 Its 6:4,5 † 12:31 Sor 19:8 ‡ 12:36 Sab 110:1

³⁷ Aa ie natao' i Davide, Talèko, ino ty maha ana'e aze? Le nahafale i lahialeñey ty nijanjiñe aze.

Nampiboraha'e

Mat 23.1-36; Lke 11.37-52; 20.45-47

³⁸ Hoe re amo fañoha'eo: Itaò o mpanoki-dily mpitea ty fijelanje-lañañe an-tsaroñe mireparepa naho o fañontaneañe an-tsenao ³⁹ naho ty fiambesatse lohà'e am-pitontonañ'ao naho ty toem-piasiañe amo sabadidakeo, ⁴⁰ o mitamboavokake kibohom-bantotse naho manao koralava hañamahia'eo: ho mafe ty fandilovañe iareo.

Banabanà' i Vantotsey

Lke 21.1-4

⁴¹ Teo re te niambesatse tandrife' ty fampipoham-banabana eo nisamba ty satam-pampipoha' ondatio drala ama'e, le maro ty mpañaleale nampipoke bey. ⁴² Nimb'eo ka ty vantotse rarake, nampipoke drala roe miyahafah'efa'e. ⁴³ Aa le tsinikao'e ho mb'ama'e o mpiama'eo, le nanoa'e ty hoe: Eka! to t'itaroñako te nampipoke maro am-panontonan-drala ao ty vantotse rarake toy te amy ze hene ila'e nañifike amy fanontonañey; ⁴⁴ amy te boak' ami'ty ambim-bar'a'e ty nampipoha' iareo, fe amy hararaha'ey ro nampipoha'e ze fonga hanaña'e, ze hene fiveloma'e.

13

Mitoky t'IESOÀ

Mat 24.1-35; Lke 21.5-36

¹ Ie niavotse i Anjomban' Añaharey, le hoe ty mpiama'e raike: O Rañandria, anh'a anh'a! hehek' o vato jabajabao, o anjomba fanjàkao!

² Tinoi' IESOÀ ty hoe: Isa'o hao o anjomba fanjàka roaño? Leo vato'e raike tsy hapoke ambone' ty ila'e ze tsy hafetsake ambane.

³ Ie niambesatse am-bohi-Oliva, tandrife i Anjomban' Añaharey, le natola' i Petera naho Iakobe naho i Jaona naho i Andrea vaho nañontanea' iareo ty hoe: ⁴ Atalilio: ombia te ho tondroke o raha zao? Inoñe ty ho viloñe t'ie ho heneke?

⁵ Le namototse nitalily am'iareo ty hoe t'IESOÀ: Mitaoa tsy ho verevereñe; ⁶ maro ty hiboak' ami'ty añarako hanao ty hoe, Zaho ro ie, hampandifike ty maro. ⁷ Le ie janji' areo ty amo ali-taneo naho o talilin' alio, ko mahimahiñe, amy t'ie tsy mete tsy ho avy, fe mbe tsy ie i figadoñañey. ⁸ Hiongake hifañatreatre ami'ty fifelehañe ty fifelehañe, naho ami'ty fifeheñañe ty fifeheñañe, naho hiezeñezene ty tane ila'e aña, vaho ho paohe' ty hasalikoañe; ty fifotoram-pitsongoan' ampela avao irezay.

Mat 10.17-22; Lke 21.12-16

⁹ Aa le mitaoa, fa hasese' iereo am-pivory ao, naho ho fofoheñe am-pitontonañ' ao, vaho hajohañe añatrefam-pandily naho mpanjaka eo ty amako ho fitaliliañe ama'e. ¹⁰ Fa tsy mete tsy taroñeñe amy ze kilakila ondaty hey i talili-soay. ¹¹ Aa ie tantalieñe naho seseheñe, ko mimenomenoñe amy ze ho saontsie' areo, le ko mañereñere aolo; fe saontsio ze hatolotse amy ora zay, amy te tsy inahareo ty hisaontsy, fa i Arofo Masiñey.

¹² Hasesen-drahalahy ty rahalahi'e havetrake, le ty rae i ana'e, naho hiongake aman-droae'e o ana'eo hañoho-doza ama'e. ¹³ Kila halaiñe

anahareo ty ami'ty añarako, fe ho rombaheñe ty mahafeake pak' ampara'e.

¹⁴ Aa naho vazoho' areo mijagarodoñe amy tsy mete ijohañañey ty Hativà' o Fandrotsahañaño,* (ehe te mahaoniñe ty mpamaky); le miherereaha an-day mb' am-bohitse mb'eo ze hene e Iehodà ao; ¹⁵ Asoao tsy hizotso ty ambone' anjomba eo himoake añ'akiba ao hañakatse raha. ¹⁶ Asoao tsy hibalike handrambe ty sarimbo'e ze an-teteke aña.

¹⁷ Feh' ohatse ho amo mivesatse naho mampinono amy andro rezaio! ¹⁸ Le mihalalia te tsy ho ami'ty asotry ty hifetsaha'e. ¹⁹ Fa ho sam-poheke mboe tsy nizoeñe an-tane atoy sikal' ami'ty fifotora' ty voatse namboaren' Añahare toy pake henane vaho tsy ho ama'e ka—i andro rezay. ²⁰ Aa naho tsy nampitomots' andro t'i TALÈ, le tsy ho nitendreke nofotse ho rombaheñe; fe o noro'e jinobo'eo ro nañatomora'e i andro rey. ²¹ Ie amy zao, naho eo ty hanao ama' areo ty hoe: Hehe, ingo i Norizañey; naho, Hehe, inge! Ko mianteke, ²² amy te hiongake o norizam-bilañeo, naho o mpitoky sare'eo, hampiboake viloñe vaho halatsàñe handrantoa'e o jinoboñeo naho ho nimete. ²³ Aa le itaò: Ingo fa hene nataliliko ama'areo aolo.

²⁴ Ie amy andro rezay, naho fa aña i san-kaemberañey, le hampaieñeñe i àndroy,
naho tsy hañomey ty hazavà'e i volañey,

²⁵ naho hirarake o vasian-dikerañeo,
vaho ho ozoñozòñeñe
o haozarañañeo.[†]

²⁶ Vaho ho isa' iereo mitotsake amo rahoñeo ey an-kaozarañañey naho engeñe ra'elisy i Ana' Ondatiy. ²⁷ Le hahitri'e mb'eo o anjeli'eo, hanontoñe o jinobo'eo boak'ami'ty fihirifa' o tiok' efatseo, sikala aña' olo' ty tane toy aña pak' aña' indran-dikerañaña.

²⁸ Rendreho ty razañe' o sakoañeo: Ie fa maleme ty lengo'e, naho mibotiboty o rave'eo, le fohi' areo te miha-asara ty taoñey. ²⁹ Hoe zay ka nahareo, ie maharendreke ty fifetsaha' irezay; fohino te mitotoke, vaho fa an-dalam-bey eo. ³⁰ Eka! to t'itaroñako te tsy himosaoñey aña ty fifokoañey toy naho tsy tendreke hey irezay. ³¹ Hisaok' aña i likerañey naho ty tane toy, fa tsy hihelañañey ka o volakoo.

*Mat 25.13-14; Lke 12.35-40; Rom 13.11;
Ef 6.17-18; Kol 4.2; 1 Tes 5.6*

³² Aa ty amy àndroy naho i ora zay, tsy ia ty mahafohiñey ndra o anjely andindiniñeo ndra i Anakey, fa t'i Rae avao.

³³ Mitaoa, mijilova; amy te tsy fohi' areo ty hitondroha' i àndroy.

³⁴ Razañeñe amy t'indaty nañavelo aña; ie nienga ty anjomba'e, naho tinolo'e lily o mpitoro'eo, naho songa nizarae'e fitoloñañey, vaho naman-tok' amy mpigarin-dalambeiy te hijilojilo. ³⁵ Aa le mitaoa, amy te tsy fohi' areo ty hibaliha' i talèn' anjombay, ke hariva, he antets'ale, kera amy kekeon-akohoy, hera maraindray; ³⁶ tsy mone hitojeha re hanjò anahareo mirotse. ³⁷ O itaroñakoo ro taroñeko amy ze hene ondaty: Mitaoa!

14

*Fikililiañey:
Mat 26.1-5; Lke 22.1-2; Jao 11.55-57*

* **13:14** Dan 12:11 † **13:25** Isa 34:4

¹ Ie henane zay, roe andro taolo' i Fihelañey naho i Sabadidake-Mofopo-Dalivaiy, le nipay ty hitsepake IESOÀ am-pamañahiañe o mpisorom-beio naho o mpanoki-dilio hañoho-doza ama'e. ² Fe hoe iereo: Tsy amy sabadidakey, kera hikoràke i màroy.

Fañorizañe: Mat 26.6-13; Jao 12.1-8

³ Ie te Betania añ'anjomba' i Simona angamae ao, nidegañe ampandambaña eo, le niheo mb'ama'e mb'eo ty rakemba ninday rame* saro-bily am-pitavonañe sinihara; nipoñafe'e i fitavonañey vaho nadoa'e añambone'e eo. ⁴ Fe hoe ty nifamondromondroa' ty ila'e: Akore ty fiànton-drano-mañitse toy? ⁵ Ie mete ho naletake denaria† telon-jato vaho natolotse amo rarakeo. Le nendaha' iareo i ampelai.

⁶ Aa hoe t'IESOÀ tama'e: Adono, inoñe ty anirika' areo aze? Ie nañasoa ahy. ⁷ Fa mitraoke ama' areo nainai'e o rarakeo vaho mete hasoàñe ndra mbia mbia tea' areo, fe tsy ho nainai'e ama' areo raho. ⁸ Nanoe'e ze taka'e; nihosora'e aolo' i leveñey ty sandriko. ⁹ Eka! to t'itaroñako te ndra aia aia an-tane atoy ro italiliañe ty talili-soa toy, le ho talilieñe ka i nanoe' i rakembaiy ho fitiahiañe aze.

Mikabo-draha t'i Jodasy

Mat 26.14-16; Lke 22.3-6

¹⁰ Niavotse mb'amo mpisorom-beio mb'eo amy zao t'i Jodasy, mpiamy folo ro'amby rey, hamotera'e aze. ¹¹ Niehake iereo te nahajanjiñe, naho nampitamae' iareo drala. Aa le namototse nipay ty hamotera'e aze re.

Ty Fañalankañañe i Sabadidakey

Mat 26.17-19; Lke 22.7-13

¹² Ie ami'ty andro valoha' i Mofo-po-dalivaiy, ie nisoroña' o mpiama'eo i Fihelañey le hoe ty ontane' iareo ama'e: Aia ty tea'o handenà'ay hañalankañe ty hikama'o i Fihelañey? ¹³ Aa le nirahe'e ty roe amo mpiama'eo ami'ty hoe: Miziliha an-drova ao, le hifanampea' ty lahilahy milolohe sihoan-drano: oriho. ¹⁴ Le ndra aia' aia imoaha'ey, misaontsia amy tompon' anjombay, ty hoe: Hoe t'i Talè: Aia ty trañon' ambahiny hitraofako fikama i Fihelañey amo mpiamakoo? ¹⁵ Le hitoroa'e traño bey reke-barra nihajarieñe, le fa veka'e am-batsa ao, halankaño ao ty antika. ¹⁶ Aa le niavotse o mpiama'eo, nimb'an-drova mb'eo, le nizoe' iereo hambañe amy nitalilia'ey, vaho hinajari' iareo i Fihelañey.

Fifoterañe Mat 26; Lke 22; Jao 13.21-30

¹⁷ Ie hariva le nizilike ao mindre amy folo ro'amby rey. ¹⁸ Aa ie nidegañe eo nikama, le hoe t'IESOÀ: Eka! to t'itaroñako te hifotetse ahy ty raike ama' areo, ty mitrao-pikama amako. ¹⁹ Le nangoae iereo nifandimbe nanao ty hoe ama'e: Zaho hao? naho ty raike: Zaho hao? ²⁰ Tinoi'e ty hoe: Raike amy folo ro' ambiy. I miharo mandò am-pingakoy . ²¹ Toe hienga amy pinatetse ty ama'ey i Ana' Ondatiy; fe hankàñe ami't'indaty mifotetse amy Ana' Ondatiy! Hàmake te tsy nasamake indatiy!

ty Sabadidak' i Talèy

Mat 26.26-69; Lke 22.15-20; 1 Kor 11.23-25

²² Naho nikama iereo le nandrambe mofo re naho nitatae'e, naho nifolahe'e vaho nazotso'e ami'ty hoe: Intoy, sandriko toy.

²³ Ie nandrambe i fitoviy le nañandriañe naho nazotso'e vaho songa nikama ama'e, ²⁴ vaho nanoa'e ty hoe: Intoy ty lioko amy fañinay, ze

* ^{14:3} Miora: lite mañitse fañosoran-dolo, † ^{14:5} Denaria: Talenta raike: volafoty 3,9 gm: tamben'andro

adobañe ho ami'ty maro. ²⁵ Eka! to t'itaroñako te, tsy hinoñe ty voka' o vaheo ka raho ampara' ty andro hinomako aze vao am-Pifehean' Añahare ao. ²⁶ Ie nitakasy sabo raike le niavotse mb'am-bohits' Oliva mb'eo.

*Mitoky ty Hañovoha' i Petera aze
Mat 26.31-35; Lke 22.31-39; Jao 13.36-38*

²⁷ Hoe t'IESOÀ tam'iereo: Hene hitsikapy nahareo te hariva; hoe ty pinatetse:

Ho zevoñeko ty mpiarake,
le hivarakaike o añondrio.[‡]

²⁸ Zaho fa nivañon-ko veloñe, le hiaoloako nahareo mb'e Galilia aña .

²⁹ Hoe t'i Petera tama'e: Ndra te fonga hitsikapy, tsy zaho! ³⁰ Le hoe t'IESOÀ tama'e: Eka! to t'itaroñako, t'ie anito haleñé, aolo' i kekeon' akoholahy faha-roey, ro hitety ahy in-telo. ³¹ Fe nindrai'e ty hoe: Ndra te itraofako havilasy tsy hitety Azo. Le fonga nanao i hoe zay.

*Getsemone
Mat 26.36-46; Lke 22.39-46; Jao 18.1*

³² Nandoake an-toetse atao Getsemone ao iereo, le hoe re amo mpiama'eo: Miambesara etoañe, fa hihalaly raho. ³³ Le nampindreze'e ama'e t'i Petera naho Iakobe naho i Jaona, naho niorotse nangovin-dre vaho nalovilovy; ³⁴ le hoe re tam'iereo: Loho ore ty fiaiko, hoe te hikenkañe; eo hey, mijilova. ³⁵ Nivike re naho nitoke an-tane eo, le nihalaly te, naho nimete ho narirañe ama'e i oray. ³⁶ Hoe re: O Aba§ Rae, kila mete ama'o; ehe ahankaño amako ty fitovy toy; fe tsy ty satriko, fa o satri'oo.

³⁷ Nimb'eo re, le zoe'e nirotse iereo, vaho hoe re amy Petera: O Simona, miroro v'iheo? Tsy nahatan-droro ora raike hao? ³⁸ Mijilova naho mihalalia, tsy mone hijoñe am-panjiziañe ao. Toe veka'e ty arofo, fe maifoifo tynofotse. ³⁹ Nisitake indraike re, nihalaly, naho nahere'e i tsaray. ⁴⁰ Ie nibalike nizoe'e nidefoke eo iereo (amy te nigibeñe o fihaino'eo), le tsy nahatoïñe aze. ⁴¹ Nimb'eo fañintelo'e re, le nanoa'e ty hoe: Miròta hey, mitofà; soa zay, fa tendreke i oray; ingo fa nifotereñe am-pit ' o mpanankakeoo i Ana' Ondatiy. ⁴² Miongaha, antao; hehe fa eo ty mifotetse ahy.

*Nifotere ne
Mat 26.47-56; Lke 22.47-53; Jao 18.1-12*

⁴³ Ie mbe nisaontsy, pok'eo t'i Jodasy, mpiamy folo ro'amby rey, nindre ami'ty firimboña ne boak'amo mpisorom-beio naho o mpanoki-dilio vaho o roandria eo ninday fibara naho kobai e. ⁴⁴ Ie amy zao, fa tinolo' i mifotetse azey am'iareo ty famantara ne, ty hoe: Ty ondrofako, ro ie, Tsepaho, le tantalio mb'eo am-pa ambe e. ⁴⁵ Aa ie pok'eo, ro nimb'ama'e mb'eo, nanao ty hoe: O Raby, Tal ! le norofa'e. ⁴⁶ Nipao-pit  ne ama'e iereo, le namahots' aze. ⁴⁷ Napontsoa' ty raike amo nijohanjoha ne ty fibara'e le binira'e ty mpitoro' i tal m-pisoro ney, na itsike i ravembia'ey.

⁴⁸ Le hoe t'IESOÀ tam'iereo: Niakatse mb'etoa hoe ma orida ne mpikizo hao nahareo minday fibara naho kobai e hitsepake ahy? ⁴⁹ Boak' andro raho ro tama' areo a n' Anjomban' Añahare ao na oke, fa tsy nitsepah'e areo; fe tsy mahay tsy ho heneke o Sokitse Masi eo. ⁵⁰ Nienga aze iereo, vaho nibio e. ⁵¹ Mpanonjohy aze ty ajalahy nisikin-damba-leny nanaro ne i haborida a'ey, fe tsinepa' o ajalahio, ⁵² f'ie nipolititse amy siki'ey, nirimatse a ne am-pihaloa'e.

‡ 14:27 Zek 13.7 § 14:36 Aba: Hebreo:  Av; Ab , Raeko

*Añatrefa' ty Fivory**Mat 26.57-68; Lke 22.54-55, 63-71; Jao 18.12-14*

⁵³ Kinororo' iereo mb'amy talèm-pisoroñey mb'eo t'IESOÀ; le hene nifanontoñe ao o mpisorom-beio naho o roandriañeo vaho o mpanokidilio. ⁵⁴ Norihe' i Petera ey re mb' an-kiririsam-pisorom-bey ao, le nitraopiambesatse amo mpitoroñe namindro añ'afoo.

⁵⁵ Nimanea' o mpisorom-beio naho o mpivory iabio pay ty mpitaroñe hahaseseke IESOÀ, hañohofan-doza ama'e—fe tsy nahaisake. ⁵⁶ Maro ty nanao kitomboke aze f'ie tsy niharo-sisy. ⁵⁷ Le teo ty niongake nanao kipetake aze ami'ty hoe:

⁵⁸ Tsinano'ay ty asa'e ty hoe: Ho rotsaheko ty kivoho rinafi-pitâñe toy, le harafiko añate' ty telo andro ty tsy nanoem-pitâñe. ⁵⁹ Ie amy zay, tsy niharo saontsy avao iereo.

⁶⁰ Aa le niongake añivo eo i talèm-pisoroñey nañontane IESOÀ ty hoe: Akore te Ihe tsy manoiñe o anisia' iretoñaño? ⁶¹ Nianjin-dre, tsy nanoiñe. Nañontanea' i talèm-pisoroñey indraike ami'ty hoe: Ihe hao i Norizañey, ty Ana' i Rengèñey? ⁶² Hoe t'IESOÀ: Ie raho, le ho isa' areo miambesatse am-pitân-kavanana-kaozarañe eo i Ana' Ondatiy*, mitotsake amo rahondikerañeo†. ⁶³ Rinia' i talèm-pisoroñey o saro'eo le nanao ty hoe: Inoñe ty mbe ipaian-tika valolombeloñe? ⁶⁴ Fa jinanji' areo i teratera'ey; akore arè? Le songa namira-vava t'ie mañeva ho vonoeñe, ⁶⁵ vaho nandrora' ty ila'e, le nitakonañe ty lahar'a'e naho nikomondroeñe, naho nanoeñe ty hoe: Mitokia! le rinambe' o mpigaritseo vaho rinarateha'iareo.

*Nitety t'i Petera**Mat 26.69-75; Lke 22.56-62; Jao 18.15-18, 25-27*

⁶⁶ Ie tan-kiririsa ambane ey t'i Petera, le nimb'eo ty raike amo ampela mpitoro' i talèm-pisoroñeo, ⁶⁷ le nahatreia i Petera namindro; hinente'e vaho nanoe'e ty hoe: Toe nimpiamy IESOÀ nte Nazareta ka rehe. ⁶⁸ Fe hoe ty lie'e: Alike amako zay, tsy apotako o enta'o zao, le niakatse mb'an-davaranga mb'eo vaho inay ty kekeon-akoholahiy. ⁶⁹ Ie niisa' i mpitoroñ' ampelay, le hoe re am'ondaty nijohanjohañeo: Toe mpiama' iareo itiañe.

⁷⁰ Fe nandiera'e. Tsi-paepae' zay, nanao ty hoe amy Petera o nizorazorao: Mpiam' iareo vata'e n'iheo fa nte-Galilia. ⁷¹ Fe ndra nifâtse naho nifânta t'i Petera ami'ty hoe: Amoeako ze ondaty saontsie' areo zao. ⁷² Inay ty kekeo faharoe; le nitiah'i' i Petera i nisaontsia' IESOÀ ty hoe: Aolo' te mikekeo fañindroe'e i akoholahiy, le hitety ahy in-telo rehe; nitsakorea'e vaho nangoihoy ty rovetse.

15*Ty Varin-Jaka' i Pilato**Mat 27; Lke 23.1-23; Jao 18.28-19.15*

¹ Ie maraindrain-tsikiake, nivory hisafiry o roandriañeo naho o mpanoki-dilio naho i sinedriona* iabiy vaho o mpisorom-beio, le rinohi' iereo t'IESOÀ, naho nasese vaho natolo' iareo amy Pilato. ² Aa le nañontanea' i Pilato: Ihe hao ty Mpanjaka' o Jiosio? Tinoi'e ty hoe: Ie i saontsi'oy. ³ Nitolon-kitomboke aze ami'ty raha tsiefa o mpisorom-beio.

⁴ Nañontane aze indraike t'i Pilato ami'ty hoe: Tsy manoiñe v'Iheo? Inao

* **14:62** Sab 110:1 † **14:62** Dan 7:13 * **15:1** Sinedriona: Roaem-pitalahoñañe

o raha maro anisia' iareoo? ⁵ Tsy nanoiñe avao t'IESOÀ; le niveren-draha t'i Pilato.

⁶ Ie amy zao lili'e amy sabadidakey ty hamotsotse am'iereo ty mpirohy raike, ze tea' iereo. ⁷ Aa le teo ty atao Barabasy, nitrao-pirohy amo mpialao, namono ondaty amy kidý zay. ⁸ Le nionjom-beo i màroy nihalaly ama'e hanao i fanoe'ey. ⁹ Natoi' i Pilato ami'ty hoe: Satri' areo hao ty hamotsorako i Mpanjaka' o Jiosoy? ¹⁰ Tali'e, nifohi'e te nasese' o mpisorom-beio ama'e am-parahy. ¹¹ Fe trinobo' o mpisorom-beio i màroy, hampañaha'e ho am'iareo t'i Barabasy. ¹² Nindrai' i Pilato am'iereo ty hoe: Hataoko akore arè i atao' areo Mpanjaka'o Jiosoy? ¹³ Le kinorà' iereo, ty hoe: Peho amy hatae ajaley. ¹⁴ Hoe ty nanoa' i Pilato: Manao akore! Ino ty sata-rati'e? fe nindrai' iereo am-pidabadoàñe ty hoe: Peho re! ¹⁵ Aa ie te hampanintsiñe i màroy t'i Pilato, le navotso'e am'iereo t'i Barabasy naho nampandafae'e t'IESOÀ vaho nasese'e ho peheñe aña.

Nampisoañe aze o Lahin-Defoñe

Mat 27.26-31; Lke 23.24-25; Jao 19.16-22

¹⁶ Nendese'o lahin-defoñe mb' amy kijàm-pivoriy[†] ao re, le nikouhe' iereo ze hene mpirai-liao. ¹⁷ Sinaro' iereo malòmavo, naho nandrandañe halam-patike ze nisabakañ' aze, ¹⁸ vaho nañontane aze ty hoe: Talilio ry Mpanjaka' o Jiosio! ¹⁹ Linihi' iereo am-bararata ty añambone'e naho nandrorañe naho nitongalefañe vaho nibokobokoña. ²⁰ Aa ie fa nikobiheñe le nafaha' iereo ama'e i saro malo-mavoy, naho naombe ama'e o saro'eo, vaho nakare' iereo ho peheñe aña.

Pinèke amy Hatae Ajaley

Mat 27.32-44; Lke 23.26-43; Jao 19.17-27

²¹ Le nazi'iereo ty niary eo hirike an-kàloke aña, i Simona nte-Kirenia[‡] (rae' i Aleksandro naho i Rofosy); hitarazo i hatae ajale' IESOÀ.

²² Le nasese' iereo mb'amy toetse atao Golgotay mb'eo re (ze adika ty hoe: an-karandoha). ²³ Nasozo' iereo ama'e ty divay linalo rame[§], fe tsy rinambe'e.

²⁴ Le pinè' iereo; naho zinara' iareo an-tsato-piso o saro'eo, handrendreke ty hahazo. ²⁵ Amy ora faha-teloy ty nipehañe aze ambone' i hatae ajaley. ²⁶ Pinatetse ambone'e eo ty nanisiañ' aze ami'ty hoe:

Ty Mpanjaka' o Jiosio. ²⁷ Nitrao-piradorado ama'e ty malaso roe, ty raike an-kavana'e naho ty raike an-kavia'e.*

²⁹ Songa nanirìka aze ze niary eo, nañekotseko-doha nanao ty hoe: Hoke! Ihe ho nandrotsake i Anjomban' Añaharey naho handrafits' aze añate' ty telo andro, ³⁰ rombahoy vata'o vaho mizotsoa amo hatae ajaleo.

³¹ Hoe ka ty tsikìke nifanoa' o mpisorom-beio naho o mpanoki-dilio: Ie nandrombake ty ila'e ro tsy maharomba-batañe. ³² Adono hizotso amo hatae ajaleo henaneo o Norizañe Mpanjaka' Israeleo ho isake, hiantofantika. Nitety aze ka o naharo nipeheñe ama'eo.

Ty Havilasi' Iesoà

Mat 27.45-56; Lke 23.44-49; Jao 19.28-30

³³ Ie amy ora fah' eneñey, nivotrake amy Tane iabiy ty fimoromoroñañe sikal' ami'ty ora faha-sive. ³⁴ Ie amy ora fahasivey le nipazake ty hoe

[†] 15:16 Petroioma: kijam-pivory, tiribonaly [‡] 15:21 Kirenia: Rova e Afrika avaratse [§] 15:23 Nardose: rame boak'an-dengon-katae atao valeriana; ^{*} 15:27 28Hañeneke i pinatetse amy Boke Masiñey ty hoe: Hiaheñe amo bey hakeoo re, Ies 53:9

t'IESOÀ: Eloy, Eloy, lamà sabaktany, ze adika ty hoe: Andrianañahareko, Andrianañahareko, akore ty namorintseña'o ahy?[†]

³⁵ Ie nahajanjiñe zay o ila'e nisambao, le hoe ty asa'iareo: Inay ie, mitoka i Elia. ³⁶ Teo ty nilay naho nampipea vinegra ami'ty eponjy, le nasindri'e ami'ty bararata vaho naonjo'e ho sitsihe'IESOÀ, le hoe re: Adono, ho isatika hera homb'eo t'i Elia hanjotso aze.

³⁷ Le nampipoña-piarañanañañe t'IESOÀ naho nirofotse ty arofo'e,

³⁸ vaho nitori-anjake ty lamba fañefe' i Anjomban' Añaharey, nivaki-roe boak' ambone pak' ambane. ³⁹ Ie nioni' ty mpifele-jato nijohañe aolo aze eo ty fikaiha'e naho ty fidrohota'e, le hoe ty asa'e: Toe Anan' Añahare ondatio.

Lke 8.2-3

⁴⁰ Ey hoek' ey o roakemba nisambao; ama'e t'i Miriame nte-Magdalà naho i Marie rene' Iakobe Zai'e naho i Josesa vaho i Saloma; ⁴¹ ie nañorike naho nitoroñe aze e Galilia aña; mbore maro ty rakemba ila'e nindre-lia ama'e t'ie nigodañe mb'e Ierosaleme ao.

Ty Nandenteñañe Iesoà

Mat 27.57-61; Lke 23.50-56; Jao 19.38-42

⁴² Ie fa hiròñe i androy, te andro fañalankañañe (ty andro aolo' i SABATAY), ⁴³ le nimb'eo t'Iosefe nte Arimatea, asiñeñe amy Fivori-beiy naho mpitamà i Fifehean' Añaharey, nitoañe mb'amy Pilato ao nihalaly ty fañòva'IESOÀ. ⁴⁴ Nilatsa t'i Pilato te inao fa nivilasy re, le kinanji'e i mpifele-jatoy, vaho nañontane he t'ie toe nivilasy. ⁴⁵ Ie nirendre'e amy mpifele-jatoy, le natolo'e am' Iosefe i fañòvay. ⁴⁶ Nikaloa'e lamba leny, le nazotso'e, naho sinafo'e amy leniy, naho nirohota'e an-donake hinaly andamilamy, vaho namarimbariña'e vato ty lala' i lonakey. ⁴⁷ Nisambae' i Miriame nte-Magdalà naho i Marie rene' i Josesa i nandrohotañ' azey.

16

I Fitroara'e ho Veloñey

Mat 28.1-8; Lke 24.1-10; Jao 20.1-8

¹ Ie aña i SABOTSEY, le ninday hatae mañitse hañosorañe aze t'i Miriame nte-Magdalà, naho i Marie rene' Iakoba, vaho i Salome ² ie nimarain-tskia' i loak' andro' i SABOTSEIY le nivotrak' an-donake eo iereo te manjirik' andro ³ nifañontane ty hoe: Ia ty hamarimbariña i vato an-dala' i lonakeiy ho antikañe? ⁴ Aa ie niandra, nahaisake te fa nivariñe i vato y ndra te nijabajaba. ⁵ Le nizilike an-donake ao iereo naho nahaisake ty ajalahy an-tsaroñe foy mireparepa niambesatse an-kavana eo nampañeveñe iareo. ⁶ Le hoe re tam' iereo: Ko hembañe: ie mipay IESOÀ nte-Nazareta nipeheñey. Fa nitroatse re, tsy ato: Heheke, intia ty nandrohotañ' aze. ⁷ Aa le akia, atalilio amo mpiama'eo naho amy Petera te hiaoloa'e mb'e Galilia mb'eo, vaho ho isa' areo aña ty amy nisaontsia'ey. ⁸ Niavotse naho nipitsike boak'amy lonakey iereo fa nirevendreveñe naho nivaranehake, fe tsy nitalily ama ondaty fa nihembañe.

Figadoña'e lava

Mat 28.1-10; Jao 20.11-18

⁹ Ie fa nitroatse, le amy maraindray loak' andro' i Sabotsey ro nisodehañe hey amy Miriame nte-Magdalà nandroaha'e kokolampa fitoy. ¹⁰ Niongake

[†] 15:34 Sab 22:2

re nitalily amo mpiama'eo, ie niòje nahohirovetse. ¹¹ Ie jinanji' iereo te veloñeho nahaisake, mbe tsy niantok' avao.

Lke 24.13-43; Jao 20.19-23

¹² Ie aña, le an-tsata hafa ty niboaha'e ami'ty roe am'iereo nañavelo mb' am-pariparitse aña. ¹³ Nihitrike mb'eo iereo nitalily amo ila'eo, f'ie mboe tsy niantok' avao.

Mat 28.16-20; Lke 24.44-49; Jn 20.19-23; Fof 1.6-8

¹⁴ Ie aña, le nipoteak' amy folo raik' amby rey nidegañé ampandambañañé eo, le nendaha'e ami'ty tsy nipaoha' iareo nahohi ami'ty hagàn-tro' iareo tsy niantoke o nahaisake aze t'ie nitroatseo. ¹⁵ Le hoe re tam' iereo: Akia, tsitsiho ty tane toy, taroño ami'ty voatse bey toy i talili-soay. ¹⁶ Ho rombaheñé ze mianteke vaho alipotse; fa hafatse ka ze tsi-miato. ¹⁷ Le hanonjohy o mpiatoo o vi洛ne zao: ie ami'ty añarako ro hañary kokolampa; hisaontsy am-pameleke vao; ¹⁸ handrambe mereñé; hikama ranom-boreke tsy an-joy vaho hampijangañé o matindrio ampanampèzam-pitâñé.

Lke 24.50-53; Asa 1.9-11

¹⁹ Ie fa nisaontsy am'iereo t'i Talè, le nirambeseñé mb' andindì-mb' eo vaho miambesatse am-pitân-kavanana' Añahare eo. ²⁰ Le nionjomb'eo iereo, nitalily sikal'aia sikal'aia, ie nifanehake am'iereo t'i TALÈ namente o tsarao am-biloñeho nanonjohy. Amena.

Lioke

Ty Fitaroña' i Lioke

¹ Kanao maro ty nandrambe am-pitâñe handahatse talily amo raha atokisantikañeо ² manahake ty nitaroña' iareo ama'ay, ie nivalolombeloñe boak'am-baloha'e nimpitoroñe i tsaray ama'ay, ³ le satriko ka, ie hinotso-hotsoko boak' am-baloha'e i hene rezay, ty hanokitse talily soa filahatse ho azo, ry roandria Teofilo, ⁴ hahafohina'o ty hatò' i tsara nañohañe azoy.

Mañemboke t'i Zakaria

⁵ Teo tañ'andro' i Heroda mpanjaka' Iehodà, ty mpisoroñe atao Zakaria, am-pirimboña' i Abia*; boak' amo anak' ampela' i Aroneo ty tañanjomba'e, i Elizabeta ty tahina'e. ⁶ Songa vantañe añatrefan' Añahare iereo roroe; tsy amam-pitsikoañe ty fañaveloa' iareo amo lily naho fepè' IEHOVÀO. ⁷ Tsy nanañ' anake fa betsiterake t'i Elizabeta vaho sambe nigain-kantetse ie roroe.

⁸ Aa ie nitoroñe ami'ty naham-pisoroñe aze añatrefan' Añahare ami'ty fifandimbezam-pirimboña'e t'i Zakaria; ⁹ le amy lilim-pisoroñañey, nit-satok' ama'e ty hañemboke, le nimoak' an-kibohon' Añahare ao, ¹⁰ vaho hene nilolok' alafe'e ao i màroy amy fotoam-pañembohañey.

Ty Lañona' ty Anjely

¹¹ Nisodeha ama'e amy zao ty anjeli' i Talè, nijohañe an-kavana' i kitrelim-pañembohañey. ¹² Nianifañe t'i Zakaria te nahaoniñe, nihogòhoke, vaho nidoiña' ty firevendreveñañe. ¹³ Le hoe ty asa' i anjeliy tama'e; Ko hemban-drehe Zakaria fa jinanjiñe i halali'oy le hisama-dahy ama'o t'i Elizabeta tañanjomba'o vaho toñono ty hoe Jaona ty añara'e. ¹⁴ Ho fale naho ehake rehe vaho maro ty hirebek' amy hisamaha'ey, ¹⁵ amy t'ie ho ra'elisy añatrefa' IEHOVÀ, naho tsy hinon-divay ndra toake, vaho ie mbe an-kovin-drene'e ao ro ho lifore' i Arofo Masiñey. ¹⁶ Maro amo ana' Israeleo ty hampitolihe'e amy IEHOVÀ Andrianañahare'ey. ¹⁷ Ie hañavelo añatrefa'eo ami'ty arofo naho haozara' i Elia, hampitolihe'e amo anakeo ty tron-droae naho mb'ami'ty fahihira' o vantañeо o manjehatseo, hampihentseñe ondaty veka'e ho a IEHOVÀ.†

Moañe t'i Zaaria

¹⁸ Aa hoe t'i Zakaria tamy anjeliy; Aia ty haharendrehako t'ie to? Bey raho naho migain-kantetse ka ty valiko. ¹⁹ Tinoi' i anjeliy ty hoe, Zaho n'o Gabriele mpijohañe añatrefan' Añahareo; niraheñe hivolañ' ama'o, hitaroñe o talili-soa zao. ²⁰ Fe inao! ho moan-drehe, tsy hahasontsy ampara' t'ie tafetetse, ami'te tsy natokisa'o o volakoo, ie ho heneke amy nifantañañey.

²¹ Nandiñe i Zakaria ondatio, nilatsa t'ie tambatse amy toetse miavakey ao. ²² Ie niavotse, le tsy nahasaontsy am' iereo naho nioni' iereo te niboahan-draha añ' anjomba miavak' ao, ie nanondrotondro am'iareo, fa le lia'e nimoañe.

²³ Ie amy zao, naho niheneke o andro fitoroña'eo, le nimpoly mb'añ' anjomba'e aña. ²⁴ Aña i andro rezay le niareñe t'i Elizabeta, vali'e, vaho

* **1:5** Abia : (Fi I 24:10) firimboñañe faha-valo, ami'ty fifandimbezam-pisoroñe boa-tSabotse
† **1:17** Mal 3:23,24

nipalitse lime volañe, fa hoe ty asa'e: ²⁵ Zao ty nanoe' IEHOVÀ amako amy andro nivazoho'ey, hañafaha'e amako ty sirika'ondatio.

Fampitama' i Gabriela

²⁶ Ie amy fah'enembola'ey le niraheñe boak' aman'Añahare ao t'i Gabriela anjely homb'an-drova atao Nazareta e Galilia aña, ²⁷ mb'ami'ty somondrara nifofoe' t'indaty atao Iosefe, anjomba' i Davide, Marie ty aña'a' i somondraray. ²⁸ Niheo ama'e i anjeliy nanao ty hoe; Akore ry isoheñe! mitahy azo t'IEHOVÀ.

²⁹ Nitsonevotse amy zao re amy tsara'ey, le nitsakore i fañontanea'ey.
³⁰ Ko hemban-drehe, Marie, hoe i anjeliy fa nanjò fañisohañe aman' Añahare.

³¹ Oniño t'ie hiareñ' an-koviñ' ao

le hisama-dahy,

vaho hatao'o IEZOÀ ty aña'a'

³² Ho fanalolahy re,

le ho toñoneñe ty hoe:

Ana' i Andindimoneñey

naho hatolo' IEHOVÀ Andrianañahare aze ty fiambesa' i Davide rae'e;

³³ le ho fehe'e nainae'e ty anjomba' Iakobe

vaho tsy ho modo i fifehea'ey.

Ty Nivesara' i Marie

³⁴ Le hoe t'i Marie tamy anjeliy; Akore ty hahamete' zay, zaho tsy mahavany lahy? ³⁵ Aa le hoe ty natoi' i anjeliy aze; Hitotsak' ama'o i Arofo Masiñey, hañalok' azo ty haozara' i Andindimoneñey; le ho toñoneñe ty hoe Anan' Añahare i Masiñe hasama'oy.

³⁶ Inao te niaren-dahy ka

t'i Elizabeta longo'o ndra te bey;

fa nem-bolañe henaneo

i natao betsiterakey,

³⁷ Toe tsy eo ty tsy lefen' Añahare.

³⁸ Hoe t'i Marie; Intoy ty anak' ampata' IEHOVÀ; lonike te ho amako i sinaontsi'oy. Le nienga aze i anjeliy.

Nitilike i Elizabeta t'i Marie

³⁹ Niongake amy andro rezay t'i Marie, nikapikapike mb'an-tanàñe ambohibohi' Iehodà mb'eo; ⁴⁰ le nimoak' aña' anjomba' i Zakaria ao vaho nañontane i Elizabeta. ⁴¹ Ie jinanji' i Elizabeta i fañontanea' i Mariey, le nivoañe ty ajaja an-tro'e ao; mbore nilifore' i Arofo Masiñey t'i Elizabeta.

⁴² Le ty hoe ty napaza'e; Haha amy ze atao ampela rehe vaho soatata ty anake hasama'o. ⁴³ Ia ka raho, te nitilihe' ty rene' i TALÈkoy? ⁴⁴ Hete! ie nimoak' an-tsofiko ao i feom-pañontanea'oy le nisondrakak'an-kaehake ty ajaja an-troko ato. ⁴⁵ En-droa, haha i niantoke te ho henefeñe ama'e o raha nitsarae' IEHOVÀ. ⁴⁶ Aa le nanao ty ti-hoe t'i Marie:

Mañonjoñe IEHOVÀ ty fiaiko,

⁴⁷ vaho mirebek' aman'Añahare

mpandrombak' ahy ty troko;

⁴⁸ Nivazohoe'e ty hasotria' i anak'

am-pata'ey, Oniño te hanao ahy

haha ze hene tariratse henane zao.

⁴⁹ Nanao raha fiañ-tane amako i Maozatsey—masiñe ty tahina'e.

50 Ferenaiña'e pak'an-tariratse an-tariratse o mañeveñe ama'eo.
 51 Nampiboaha'e haozarañe ty fità'e;
 naparatsia'e o mpiebotsebotse am-pitsakorean-tro'eo.
 52 Nafotsa'e amo fiambesam-bolo-
 nahe'eo o fanalolahio,
 vaho naonjo'e o mpirèkeo.
 53 Nanjâne'e raha soa o nisalikoo,
 fe nampolie'e hara'e
 o mpañalealeo.
 54 Nimbae'e t'Israele mpitoro'e, hahatiahia'e i fiferenaiñane
 55 nitsarae'e amy Abraàme naho amo
 tarira'e nainai'eoy,
 i nampitamà'e an-droaen-tikañey.
 56 Telo volañe varàñe ty nitoboha' i Marie ama'e ao vaho nimpoly
 mb'añ'anjomba'e aña.

Ty Nisamahañe i Jaona

57 Henek' amy zao o andro nahatoly i Elizabetao, le nisama-dahy.
 58 Jinanji' ondaty mpitrao-tanàñe ama'eo naho o longo'eo t'ie niferenaiña'
 IEHOVÀ, le nitrao-kafaleañe ama'e.
 59 Ie ami'ty andro faha-valo, le naseho savareñe i ajajay, vaho ho
 natao' iereo Zakaria ty añara'e amy te zay ty tahinan-drae'e, 60 fa hoe
 ka ty natoin-drene'e; Aiy! hatao ty hoe Jaona re. 61 Aa hoe ty asa' iareo
 tama'e; Leo raik' aman-drolongo'o tsy nitoñoneñe amy tahinañe zay. 62 Le
 nañatsikatsik' an-drae'e iereo, ami'ty hoe: Ia ty satri'o hitokavañ' aze.
 63 Nipay fanokiran-dre vaho nanokitse ty hoe: I Jaona ty añara'e. Aa
 le hene nidaba. 64 Nisokak' ami'ty manao zao ty falie'e naho nibalake i
 famele'ey vaho nisaontsy am-pandrengeañe an' Andrianañahare.

65 Hene nangebahebake o mpimoneñe nañohoke iareoo, vaho nire-
 hafeñe mb'eo mb'eo ambohibohi' Iehodà ao irezay. 66 Songa nitsakore
 ty hoe aña' arofo ao ze nahaoniñe: Ty ajaja ho akore v'itoio? Le nitahy aze
 ty fità' IEHOVÀ.

Ty Fitokia' i Zakaria

67 Lifotse i Arofo Masiñey amy zao t'i Zakaria rae'e vaho nitoky ty ti-hoe:
 68 Andriañeñe t'IEHOVÀ Andrianañahare'
 Israele, fa nitilihe'e
 vaho jineba'e ondati'eo.
 69 Nampitroara'e
 tsifam-pandrombahañe tika
 aña'anjomba' i Davide mpitoro'e ao,
 70 Nitsara am-palie' o mpitoky miavakeo
 i teo nainai'e am-pifotora' ty voatse toiy,
 71 t'ie ho rombaheñe amo rafelahn-
 tikañeo,
 naho am-pitá' o malaiñe an-tikañeo,
 72 Hiferenaiña'e o roazan-tikañeo, naho ho tiahi'e i fañina'e miavakey,
 73 i fanta nifantà'e amy Abraàme
 raentikañey,
 74 t'ie hatolo'e amantikañe, ie fa vinotso'e amo rafelahintikañeo,
 hitoroñ' aze tsy an-kahembañañe,
 75 am-piavahañe naho
 an-kavantañañe añatrefa'e

amo hene andro iveloman-tikañeo.
⁷⁶ Le ihe, anako, ty hatao Mpitoki'
 i Andindimoneñey,
 amy te Ihe ty hiaolo i TALÈ hañajary
 ty lala homba'e,
⁷⁷ hampahaoniñe ondat'eo ty fandrombahañe
 ie hinahan-kakeo,
⁷⁸ ami'ty fiferenaiñan' Añaharen-tika—
 ie nampitilihe'e an-tika
 i fanjiriha'e boak' añ'aboy,
⁷⁹ Hanolora'e hazavàñe
 o mpitoboke añ'ieñe ao
 naho an-talinjon-kavilasio, hiaoloa'e
 mb'an-dalan-kanintsiñe mb'eo
 o fandian-tikañeo.
⁸⁰ Nitombo i ajajay le nihaozatse an-troke vaho nitoets'am-babangoañe
 aña ampara' ty andro niboaha'e am'Israele.

2

Ty Nisamahañe IESOÀ

¹ Nitsatok' amy andro rezay te niboile mb'eo ty koi-dava' i Aogosto Kaisara hanoeñe vali-boke amy ze kila ondaty. ² Zay ty vali-boke valoha'e nifototse ami'ty naha-bei' i Siria i Kirenio. ³ Aa le nañavelo hisokitse amy rova nihirifa'ey ze hene pato-razañe.

⁴ Niavotse ka t'Iosefe boake Galilia aña hirik' an-drova Nazareta, le nimoake e Iehodà, an-drova' i Davide atao Betleheme ao, amy t'ie tarira naho hasavereña' i Davide, ⁵ hisokitse; mindre ama'e t'i Marie valy fofo'e, ie fa bey stroke.

⁶ Ie aña le tendreke ty andro hitolia'e, ⁷ le nahatoly ty lahilahy tañoloñoloña'e naho nifoloñose'e bandy vaho nampandre'e an-tsoke-mitrahañ' ao, amy te tsy nahaeneñe i traño fanjoàn'ambahiniy.

Nitsey amo Mpiarak'Añondrio ty Anjely

⁸ Teo amy tane zay ty mpiarake nañialo am-piandrazañ'aña, niarake o lia-rai'eo haleñe. ⁹ Tojo te nijohañe añatrefa' iereo eo ty anjeli' IEHOVÀ, naho niarisehoa'e ami' ty fireandream-bolonahe' IEHOVÀ, le hene nireven-dreveñe. ¹⁰ Aa le hoe i Anjeliy tam'iereo: Ko hembañe, Inao ty talili-soan-kafaleam-bey endeseko ama'areo, ho amy ze kila ondaty, ¹¹ t'ie nisamake ho anahareo anindroany androva' i Davide ao ty Mpandrombake, i TALÈ Norizañey*. ¹² Le zao ty viloñe ho anahareo: ho zoe' areo nifoloñoseñe bandi-leny ty ajajamena mandre an-tsokemitrahañ'ao.

¹³ Tsipaepae' zay nisodehañe mindre amy anjeliy i lahialen-dikerañey, nandrenge an'Andrianañahare, nanao rodo-bey ty hoe:

¹⁴ Rengèñe t'i Andrianañahare andindimoneñe aña, naho fañanintsiñe am' ondaty soa-satry an-tane atoio.

Itiliha' o Mpiarak' añondrio

¹⁵ Ie nienga mb'andindìñe mb'eo o anjelio le hoe ty nilahara' o mpiarakeo: Antao ry kiahe mb'e Betleheme mb'eo hiisake i nitendrekey, i nampahafohine' IEHOVÀ an-tikañey. ¹⁶ Nirapirapy mb'eo

* ^{2:11} Mpañefe-hakeo amy lio'ey; naho ho Mpanjaka: Kristos (Gr); Mesiakh (Heb)

iereo, le nahaoniñe i Marie naho Iosefe vaho i ajajamena mandre antokemitrahañey.

¹⁷ Le nahaoniñe aze, le nampaharendrehe' iereo sikal'aia sikal'aia i natalily am'iereo ty amy ajajamenaiy. ¹⁸ Le nilatsa iaby ze ondaty nahajanjiñe o nitalilia' i mpiarake rey. ¹⁹ F'ie hene nahaja' i Marie, ie ninekoneko'a'e añ'arofo'e ao. ²⁰ Nibalike o mpiarakeo, nañonjoñe naho nandrenge an' Andrianañahare, ty amo hene jinanji' iereo naho nioni'iereo, amy nitaliliañey.

Ty Nanavarañe IESOÀ

²¹ Ie nilomoñe ty valo andro le nisavàreñe i Ajajay, vaho nitoñoneñe ty hoe IESOÀ ty añara'e, i tahinañe natolo' i anjeliy taolo ty nampiareñañ' aze an-koviñe aoy. ²² Ie heneke o androm-pieferañe aze ty amy Ha' i Mosèio, le nindese' iareo mb'e Ierosaleme mb'eo, hatolotse amy IEHOVÀ, ²³ amy te pinatetse amy Ha' IEHOVÀ ao ty hoe,

Ze hene lahy tañoloñoloñan' anake ro avaheñe ho amy IEHOVÀ[†]

²⁴ vaho t'ie hañenga soroñe ty amy pinatetse amy Ha' IEHOVÀiy ty hoe: Deho roe ndra ana-boromahilala roe.[‡]

Ty Toki' i Simeona

²⁵ Le teo ty androanavy nte Ierosaleme atao Simeona; vantañe naho mpitalaho. Nitamà ty fañohòañe Israele naho tama'e i Arofo Masiñey.

²⁶ Nentoe' i Arofo Masiñey t'ie tsy ho liàn-kavilasy ampara' te isa'e i Noriza' i TALÈY. ²⁷ Nimoak' añ' Anjomban' Añahare ao re añamy Arofoy.

Aa ie nindesen-droae'e t'IESOÀ anak' ajaja, hanoeñe ama'e ty nafè' i Hake,

²⁸ le notrotroe'e am-pitâ'e naho nisalale aman' Añahare nanao ty ti-hoe:

²⁹ Ry IEHOVÀ, avotsoro hiavotse an-kazavàn' arofo henaneo o mpitoroo

ty amy saontsi'oy; ³⁰ fa nahatrea ty fandrombaha'o o masokoo,

³¹ i nihajarie'o añatrefa' ze kila ondati,

³² Failo fañazavàñe amo fifeheañe, naho ty enge' Israele, ondati'oo.

³³ Latsa amy zao ty rae' i ajajay naho i rene'e amy nisaontsieñey; ³⁴ le nitata iareo t'i Simeona, vaho hoe re amy Marie rene' i ajajay: Ingo, fa norizañe ho fihotrahañe naho fionjonañe ty maro e Israele ao ty ana'o toy, vaho ho viloñe liereñe; ³⁵ (eka ho trofahem-pibara ka ty tro'o), hampibentatse ty vetsevetseren' arofo' ty maro.

Ty Toki' i Anae

³⁶ Teo ka ty atao Ana mpitoky, anak-ampela' i Fanoela, fifokoa' i Asera; ie antetse, fito taoñe avao te nanambaly ami'ty naха somondrara aze; ³⁷ fa vantotse valompolo taoñe efats' amby i rakembay le lia'e tsy nisitak' amy anjomban' Añaharey, fa nitoroñ'aze an-dilitse, nitalaho handro an-kaleñe.

³⁸ Ie nizilik' ao amy oray le nandrenge IEHOVÀ, vaho nitalily aze amy ze hene nitamà ty fijebañañe Ierosaleme.

Nimpoly mb'e Nazareta Mat 2.19-23

³⁹ Ie nihenefe'iereo ze nafè' ty Ha' IEHOVÀ, le nimpoly mb'e Galilia mb'e Nazareta tanà' iareo aña.

⁴⁰ Nitombo i Ajajay, nihaozatse naho niliforen-kihitse vaho ama'e ty falalàñ' Añahare.

E Ierosalaime ao Amy Fihelañey

⁴¹ Nomb'e Ierosaleme boa-taoñe o roae'eo amy sabadidam-Pihelañey.

⁴² Aa ie ni-folo taoñe ro' amby t'IESOÀ le nionjomb'e Ierosaleme mb'eo

[†] 2:23 Avo 13:2 [‡] 2:24 Sor 12:8

iereo ami'ty lili' i sandalam-beiy. ⁴³ Naho niheneke i andro rezay le nimpoly iereo; fe mbe nitambatse e Ierosaleme ao t'IESOÀ anak'ajalahy, le tsy nifohi' Iosefe naho i rene'e; ⁴⁴ natao' iereo t'ie nindre lia amo mpitrapo-liao le nañavelo andro raike hey vaho nipay aze amo longo'eo naho am'ondaty fohiñeo. ⁴⁵ Ie tsy nioni' iereo le nibalike mb'e Ierosaleme mb'eo nipay aze. ⁴⁶ Aa toe nitongoa' ty herone t'ie tendrek' añ' Anjomban'Añahare ao nitoboke añivo' o mpañokeo, nijanjiñe naho nañontane iareo. ⁴⁷ Daban-draha iaby ze nahajanjiñe aze ami'ty hilala'e naho amo fanoiña'eo. ⁴⁸ Ie nioni' iereo le nivaranehake, fe hoe ty nanoandrene'e: O Anake, akore ty nanoa'o zao? Hehe te nioremèn-jahay naho i rae'o nipay Azo! ⁴⁹ Tinoi'e ty hoe, Akore t'ie nitsoek' ahy? Tsy fohi' areo hao t'ie tsi-mahay tsy hitoloñe an-dRaeko? ⁵⁰ Fe nañalike iereo i entañe tinaro'ey. ⁵¹ F'ie nindreza'e fimpoly mb'e Nazareta mb'eo vaho niasia'e. Fonga nifaharan-drene'e añ' arofo'e ao i saontsy zay. ⁵² Nitombo an-tsandriñe naho hilala t'IESOÀ vaho nisohen' Añahare naho ondatio.

ty Mpañajary Lalañe Mat 3.1-12; 14.3-5; Mar 1.1-8; 6.17-20

3

¹ Tamy taom-paha folo-lime-ambi' ty naха mpanjaka i Tiberio Kaisara, ie niragova e Iehodà t'i Pontio Pilato naho mpifeleke e Galilia t'i Heroda, naho mpifeleke e Itoria miharo am-pari' i Trakonitisy t'i Filipo rahalahi'e, naho mpifeleke e Abilena t'i Lisania ² vaho tam'ity naха-talèm-pisoroñe i Anasy naho i Kaiafa, le nivotrake amy Jaona ana' i Zakaria am-babangoañe añе ty saontsin' Añahare. ³ Nitsitsihe'e i tane fari'a' i saka Iordaneiy nitalily ty filiporam-pisolohoañe ho ami'ty fañahàn-kakeo; ⁴ ie pinatetse amy boken-tsara' Isaia mpitokiy ty ti-hoe:

Ty fierañanaña' i mikoike am-patram-bey añey: Hajario ty lala' i TALÈ, Avantaño o oloñolo'eo,

⁵ Lembefañe ze hene goledoñe,

aketrake ze atao vohitse naho tamboho, ho vantañeñe o mikelokelokeo, naho fonga hareneñe

o lalañe tomoantoañe;

⁶ Vaho ho oni' ze kila nofotse
ty fandrombahanañahare.*

⁷ Le hoe re tamy lahialeñe nivovotse mb' ama'e mb'eo halipotsey: O ry Tariran-dapetake! Ia ty nanoro anahareo hibotitsike amy haviñerañe mitotokey? ⁸ Ampiboaho vokatse mañeva solo ho; le ko mamototse mitsakore an-stroke ao ty hoe, Rae'ay t'i Abraàme. Itaroñako te mahafitroatse anake ho a i Abraàme amo vato retoañe t'i Andrianañahare. ⁹ Fa ampoto-katae eo henaneo i fekoñey; le ho firañe vaho hafetsak' añ'afó ao ze hatae tsy mamaoa voa soa.

¹⁰ Aa hoe ty ontane' i lahialeñey ama'e: Ino ty hanoe'ay? ¹¹ Hoe ty natoi'e: Ze aman-tsaroñe roe, soa re te handiva ami'ty tsy ama'e; le hoe zay ka ze manañe mahakama.

¹² Pok'eo ka o mpamory vili-lohao halipotse, nanao ama'e ty hoe: O Mpañoke, ino ty hanoe'ay? ¹³ Le hoe re tam'iereo: Ko mangalake mandikoatse ty linily ho anahareo.

¹⁴ Le hoe ty ontane' o lahin-defoñeo: Izahay ka! Ino ty hanoe'ay? Le hoe re tam'iereo: Ko misenge hery ama'ondaty, le ko manao talily vilañe, vaho mimoneña amo karama'areoo.

* ^{3:6} Ies 40:3-5

¹⁵ Amy fitamà' ondatiyo, le hene niereñere i Jaona añ'arofo te hera ie i Norizañey, ke tsy ie, ¹⁶ le hoe ty natoi' i Jaona am'iareo iaby: Toe alipoko an-drano ao nahareo, fa homb'eo ty maozatse te amako; tsy mañeva ahy ty hañaha o tomin-kana'eo. Ie ty handipotse anahareo an-Tio Masiñe naho añ-Afo. ¹⁷ Am-pità'e ty tsikelo'e, le hahoro'e an-tihy famofohañe ao o vokatseo vaho hatonto'e an-driha o mahakamao, fa ho sodora'e añ'afó tsy hay vonoeñe ty kafo'e. ¹⁸ Mbe maro ty fañosihañe nanoe'e te nitaroñe am'ondatio.

¹⁹ Aa ie nitrevoke i Heroda mpanjaka ty amy Herodiasie valindrahalahi'e naho ze fonga sata raty nanoe' i Heroda, ²⁰ le mbore nahili'e am-balabey ao t'i Jaona, ho tovo' iaby rezay.

Milipotse t'IESOÀ Mat 3.13-17; Mar 1.9-11

²¹ Ie fonga nalipotse ondatio, nilipotse ka t'IESOÀ, niloloke naho nisokake i likerañey ²² vaho nizotso ama'e am-batañe manahake ty deho i Arofo Masiñey, le hoe ty fiarañanañañe hirik'andindiñe ao: Anako rehe, kokoako; Ihe ro mahafale ahiko[†].

Ty Toñon-droae'e aman-dRene'e Mat 1.1-17

²³ Va'e telopolo taoñe t'IESOÀ te namototse i fitoloña'ey; ie natao ana' Iosefe, toe ana' i Hely, ²⁴ ana' i Matate, ana' i Levy, ana' i Melky, ana' Ianà, ana' Iosefe, ²⁵ ana' i Matatiase, ana' i Amose, ana' i Naome, ana' i Esly, ana' i Nangay, ²⁶ ana' i Maàte, ana' i Matatiase, ana' i Semey, ana' Iosefe, ana' Iodase, ²⁷ ana' Ioanase, ana' i Resà, ana' i Zorobabele, ana' i Salatiele, ana' i Nery, ²⁸ ana' i Melky, ana' i Ady, ana' i Kosame, ana' i Elmaodame, ana' i Ere, ²⁹ ana' Iosè, ana' i Eliezere, ana' Ioreime, ana' i Matate, ana' i Levy, ³⁰ ana' i Someone, ana' Iodase, ana' Iosefe, ana' Ionane, ana' i Eliakime, ³¹ ana' i Melease, ana' i Mainane, ana' i Matatae, ana' i Natane, ana' i Davide, ³² ana' Iesày, ana' i Obede, ana' i Boze, ana' i Salmone, ana' i Naasone, ³³ ana' i Aminadabe, ana' i Arame, ana' i Esrome, ana' i Faresse, ana' Iodase, ³⁴ ana' Iakobe, ana' Isaake, ana' i Abraàme, ana' i Tera, ana' i Nakore, ³⁵ ana' i Saroke, ana' i Ragao, ana' i Paleke, ana' i Evre, ana' i Salà, ³⁶ [‡]ana' i Arfaksade, ana' i Seme, ana' i Noe, ana' i Lameke, ³⁷ ana' i Matosalà, ana' i Enoke, ana' Iàrede, ana' i Malelæle, ana' i Kainane, ³⁸ ana' i Enose, ana' i Sete ana' i Dame, anak' Andrianañahare.

Nanjzieñe Mat 4.1-11; Mar 1.12-13

4

¹ Ie niliforeñe amy Arofo Masiñey t'IESOÀ le nibalike boak' am' Iordaney, vaho niaoloa' i Arofoy mb'am-babangoañ' aña, ² efapolo andro te nanjizia' i mpañinjey ie tsy nikama ndra inoñ' inoñe amy andro rezay. Modo zay le nisaliko, ³ vaho hoe i mpañinjey tama'e: Naho toe Anan' Añahare rehe, ampinjareo mofo o vatoo. ⁴ Hoe ty natoi' IESOÀ aze: Pinatetse ty hoe: Tsy mofo avao ty mahaveloñe ondaty*,

⁵ Le nendese' i mpañinjey niañambone vohitse mitiotiotse eñe vaho natoro'e aze amy zao ze kila fifeheañe an-tane atoy. ⁶ Le hoe i Ratiy tama'e: Hatoloko Azo o haozarañe iaby zao naho o enge' iareoo, fa natolots' ahy, vaho hatoloko amy ze satriko; ⁷ le kila ho Azo t'ie hiambane amako etoañe.

⁸ Hoe ty natoi' IESOÀ: Hoe ty pinatetse:

IEHOVÀ Andrianañahare'o ro hitalahoa'o, ie avao ty hitoroñ'a.[†]

* 3:22 Sab 2:7; Fot 22:2; Ies 42:1; Rzs 8:30 ‡ 3:36 Nasosoke ty hoe: ana' i Kainane * 4:4 Its 8:3 † 4:8 Its 6:13, Its 10:20

⁹ Le nendese'e mb'e Ierosaleme mb'eo naho nampiningire'e an-dengom-pitalakesan' abo' i Anjomban'Añaharey vaho nanoa'e ty hoe: Naho toe Anan' Añahare rehe, miponaha ambane ey, ¹⁰ ty amy pinatetse ty hoe: Ho lylie'e amo Anjeli'eo rehe, hañaro azo; ¹¹ vaho, Ho tanatanà' iereo, tsy ho dasirem-bato o fandia'oo.'[‡]

¹² Tinoi' IESOÀ ty hoe: Hoe ty tsara:
Asoao tsy ho tsohe'o t'IEHOVÀ
Andrianañahare'o.◊

¹³ Ie nagado' i mpañinjey i fanjiziañe iaby zay, le nidisak'aze heike.

To Tsara e Galilia ao Mat 4.12; Mar 1.14

¹⁴ Aa le nibalike mb'e Galilia mb'eo t'IESOÀ ami'ty haozara' i Arofoy; le niboele tok'aia tok'aia amy tane nañohokey ty enge'e. ¹⁵ Nañoke amo fitontonañe re le hene nañonjoñ' aze.

Fañorizañe IESOÀ

¹⁶ Nimb'e Nazareta mb'eo re, i rova nahabey azey, le ami'ty lili'e, nizilik' am-pitontonañe ao ami'ty andro SABOTSE, vaho niongake hamaky. ¹⁷ Natolotse aze ty boke' Isaia mpitoky; vinela'e i bokey, vaho nioni'e ao ty nisokirañe ty hoe:

¹⁸ Amako t'i Arofo' IEHOVÀ,
Fa noriza'e hitsey i talili-soay amo rarakeo,
Nafanto'e hikoike famotsorañe amo mpirohio,
naho fampaha-isahañe amo feio, vaho fampidadàñe amo dinemokeo,

¹⁹ hitsey ty taon-joba' IEHOVÀ.*

²⁰ Napele' IESOÀ amy zao i bokey le nahere'e amy mpamandroñey le niambesatse; vaho hene nitalatse aze ty fihaino o am-pitontonañe.

²¹ Le hoe t'IESOÀ tam' iereo: Fa nihenek' anindroany an-dravembia' areo i Sokitse Masiñe zay. ²² Aa le sindre nitalily soa aze vaho nidaba amo tsara soa naakam-palie'eo, fe hoe iareo: Tsy ana' Iosefe v'itoio?

²³ Aa le hoe re tam' iereo: Va'e hatao' areo amako ze oha-drehake zao : O mpanaha, afaho ty vata'o, vaho anò an-tane'o etoan-ka o raha jinanji'ay te nanoe'o e Kapernaomy añaeo. ²⁴ Le tinovo'e ty hoe: Eka! to t'Itaroñako te tsy eo ty mpitoky to-saontsy an-tane'e ao; ²⁵ To ty volako ama'areo te: Maro ty vantotse e Israele ao tañandro' i Elia, ie nagabeñe telo taoñe tsy enim-bolañe i likerañey vaho nandrambañe i Taney ty kerè; ²⁶ fe leo raik' ama'e tsy nañirahañe i Elia naho tsy i rakemba vantotse nte Zarefata e Sidona añaey. ²⁷ Maro ka ty niazo' ty angamæ e Israele ao tañandro' i Elisa mpitoky, fe tsy ama'e ty nafahañe naho tsy i Namana nte-Sore.

²⁸ Ie nahajanjiñe i zay o am-pitontonañe, le fonga nilifo-kabosehañe, ²⁹ naho niongake nanafasiotse aze mb' alafe' i rovay aña, vaho nendese' iereo mb'an-tevam-bohi' i rovay mb'eo hampitsirikoàk' aze an-kereretsak' ao, ³⁰ f'ie nienga, niranga iareo mb'eo.

Nañakara'e Kokolampa Mat 4.13-14; Mar 1.21-23

³¹ Nizotso mb'e Kapernaomy, rova e Galilia aña re naho nañanatse amo SABOTSEO. ³² Le nidaba iereo amy fañoha'ey amy te ninday lily o tsara'eo.

³³ Teo ty lahilahy am-pitontonañe ao nangara' ty kokolampa, nitazataza ³⁴ ty hoe: Hete! Ino ty itraofan-tikañe, ry IESOÀ nte Nazareta? Niavy hanjamañ' anay v' Iheo? Fantako rehe; Ihe i Masin'Añaharey. ³⁵ Trinevo' IESOÀ ami'ty hoe: Mamantsy, iakaro! Aa le nafetsa' i kokolampay añaivo eo

‡ 4:11 Sab 91:11,12 § 4:12 Its 6:16 * 4:19 Ies 61:1,2

re, vaho nifaok' aña fe tsy nijoia'e. ³⁶ Fonga nilatsa, le hoe ty vesoveso' iareo: Aa vaho akore i tsara zay t'ie aman-dily naho haozarañe ro mañendake kokolampa hifaoke. ³⁷ Le niboele nanitsike i fariparitsey ty enge'e.

ty Rafoza' i Simona Mat 8.14-17; Mar 1.29-34

³⁸ Ie nienga i fitontonañey t'IESOÀ, le nizilik' aña'anjomba' i Simona ao. Niremboremboe' ty hamae-sandriñe ty rene' i vali' i Simonay le nihalalia' iareo ty ama'e. ³⁹ Aa le nijohañe ambone'e eo re nitrevoke i hasilokey, vaho nisitak'amy rekambay zay; tsipaepae'e nitroatse re niatrake iareo.

Nanitsike i Galilia Mat 4.23-25; 8.16, 17; Mar 1.32-39

⁴⁰ Ie nimotak'andro, le nendeseñe ze nanañe marare nisilofe'ndra inoñ' inoñe mb' ama'e mb'eo, naho songa nanampeza'e fitàñe vaho nampijangañe'e. ⁴¹ Niakatse ami'ty maro ka o kokolampao nikoiake ty hoe: Ihe i Norizañe, Anan'Añaharey! Le nendaha'e vaho nafanto'e tsy hivolañe amy te napota' iareo t'ie i Norizañey.

⁴² Ie manjirik' andro le nienga mb' an-tane bangìñe mb'eo fe nitsoeha' i lahialeñey, ie nomb' ama'e mb'eo vaho ho nanjitse aze tsy hienga; ⁴³ fe hoe re am'iereo: Tsy mahay tsy mitaroñe i Talili-soam-Pifehean'Añaharey an-drova ila'e ka raho fa zay ty nañirahañ' ahy. ⁴⁴ Le nitaroñe amo fitontonañe e Galilia re.

Vokatse Fiañe Mat 4.18-22; Mar 1.16-20

5

¹ Teo te nifanihisihy ama'e ondatio hijanjiñe ty tsaran' Añahare aña' olo' i oñe Genesaretay* ² le nivazoho'e ty lakañe roe aña' olon-drano ey, ie fa niakatse hanasa harato o tempo'eo. ³ Nijoñe an-daka' i Simona ao re nihalaly te hisitake amy olotsey. Aa le niambesatse an-dakañe ey re nañoke ondatio.

⁴ Ie modo i fañoha'ey, le hoe re amy Simona: Mivevea mb'an-daleke mb'eo vaho ajoño ao o harato' areoo hanarike. ⁵ Le hoe ty natoi' i Simona aze: O Rañandria, nifanehak' avao zahay aniankale le tsy nahazo leo raike; fe amo saontsi'oo, hajoko ao i haratoy. ⁶ Ie nanoe' iereo zay, le nivokatse fiañe nifamorohotse nahariatañe i harato' iareoy. ⁷ Aa le nitsikaore'e o rañe' iareo amy lakañe ila'e eii hañolotse iareo; nimb'eo iereo, le nipeapeà' iareo fiañe i lakañe roe rey, vaho ho nilempotse.

⁸ Ie nahaoniñe zay t'i Simona Petera, le nihotruk' am-pandia' IESOÀ eo nihalaly ty hoe: O Rañandria, misitaha amako fa ondaty bey hakeo. ⁹ Toe niveren-draha t'i Simona naho o rañe'eo ami'ty hamarom-piañe niazo.

¹⁰ Nihoe zay ka t'i Jaona naho Iakobe, ana' i Zebedio mpitrapo-pitoloñe amy Simona. Hoe t'IESOÀ tamy Simona: Ko mahimahiñe fa ondaty ka ty ho tsepahe'o henane zao. ¹¹ Ie toly an-tamboho ey i lakañe rey, le fonga nafoe' iereo vaho nañorik' aze.

Nañafake Angamae Mat 8.1-4, Mar 1.40-45

¹² Ie tan-drova raike t'IESOÀ, intoy ty lahilahy atseke ty angamae; ie nahaisake IESOÀ, le nihohok' an-dahara'e nitoreo ama'e ty hoe: O Rañandria naho satri'o, mahalio ahy rehe. ¹³ Nahiti' IESOÀ ty fità'e, nitsapa aze le nanao ty hoe: Satriko 'nio, maliova; naho niafak' amy zao i haangamae'ey ¹⁴ vaho hinatahata'e tsy hitalily am'ondaty, am'ty hoe: Akia miboaha amy mpisoroñey, le ibanabanào i linili' i Mosèy ami'ty

* ^{5:1} Genesareta: ndra ty hoe Galilia, oñe bey tsy ritse

fahaliova'o ho fitaliliañe. ¹⁵ Fe àntsake te niboile ty enge'e, le niropak' ama'e i lahialeñey hijanjiñe naho ho jangañeñe amo arete'eo. ¹⁶ F'ie nivike mb' am-babangoñañe aña, niloloke.

I Kepekey Mat 9.1-8; Mar 2.1-12

¹⁷ Teo te niambesatse eo ty fariseo naho mpañoche Hake hirik' an-drova e Galilia naho e Iehodà iaby naho boake Ierosaleme aña, le nao'e, vaho tama'e ty haozara' i Talè hampijangañe.

¹⁸ Ie amy zao, nendese' ondaty an-tihy ty lahilahy kepeke, nipay ty hanjilihañe aze ao, hampandreañe aze añatrefa'e eo. ¹⁹ Aa ie tsy naharendreke ty hampitsifirañe aze amy lahialeñey, le nanganik' ambone' i anjombay vaho nazotso' iareo an-tihy, boak'an-tafo mb' añatrefa'IESOÀ, aňivo eo i mararey. ²⁰ Ie nioni'e ty fatokisa' iareo, le hoe re ama'e: O koahe, afa-tahin-drehe. ²¹ Fe nitsakore ty hoe o mpanoki-dilio naho o fariseoo: Ia o miterao? Ia ty mahafa-kakeo naho tsy i Andrianañahare avao? ²² Fe nifohi'IESOÀ ty ereñeren-tro' iareo le tinoi'e ty hoe: Ino o fitsakorean' arofo' areoo? ²³ Ty aia ty mora, ty manao ty hoe: Afake o hakeo'oo? ke ty hoe: Miongaha, maňaveloa? ²⁴ Aa soa te hampahafohineñe anahareo te aman-dily an-tane atoy i Ana' ondatiy haňaha hakeo, le hoe re amy nisilofe' i hakepehañeiy: Inao! Miongaha, tintino o tihi'oo, akia mb' aň' akiba'o aña. ²⁵ Aa le nitroatse añatrefa' iereo amy zao re, nandrambe i nandrea'ey vaho nimpoly, nandrenge an' Andrianañahare. ²⁶ Nilatsa iaby iereo naho nibango an' Andrianañahare, vaho nanao ty hoe am-paňeveñañe: Nahaoniñe raha tsitantane tika anindroany.

I Levy (Matio) Mat 9.9, Mar 2.13, 14

²⁷ Añe zay, le nienga t'IESOÀ naho nahavazoho ty mpamory vili-loha atao Levy, niambesatse am-pandroroñañe ao, le hoe re tama'e: Oriho raho.

²⁸ Aa le nifarie'e ze he'e naho niongake vaho naňorik' aze.

Fitraofa'e ty Mpanan-tahy Mat 9.10-13; Mar 2.15-17

²⁹ Nanao sandalam-bey ho aze aň' anjomba'e ao t'i Levy, le maro ty mpamory vili-loha naho ondaty ila'e nitrao-piambesatse am'iereo. ³⁰ Fe niňeoňeoňe amo mpiama'eo o Fariseoo naho o mpanoki-dili' iareoo ami'ty hoe: Ino ty itraofa' areo fikama naho finoňe amo mpamory vili-lohao naho amo bey hakeoo? ³¹ Tinoi'IESOÀ ty hoe: Tsy o jangaňeo ro mipay mpanaha fa o marareo; ³² Tsy avy hikoike o vantaňeo raho fa o mpandilatseo, hisoloho.

O Fililiraňeo Mat 9.14, 15; Mar 2.18-20.

³³ Le hoe ty asa'iareo tama'e: Akore te mililitse naho miloloke o mpiana' i Jaonao, manao zay ka o amo Fariseoo, fe mitolo-pihinañe naho minoň' avao o Azoo? ³⁴ Hoe ty natoi'IESOÀ: Lefe' areo hao ty hampililitse ty longo' i mpaňengay ie mbe am' iereo i mpaňengay? ³⁵ Mbe ho avy ty andro hanintahañe i mpaňengay; hililitse amy andro zay iereo.

Ty Hambo'e naho ty Vao Mat 9.16; Mar 2.21, 22

³⁶ Hoe ka ty nirazaňa'e: Tsy ia ty manakeke lamba vao ami'ty tsirodea, fa ho riate' i vaoy naho tsy hivitraňe amy tsirodeay ty tampa' i vaoy. ³⁷ Tsy eo ka ty haňiliñe divay vao an-jonjon-kolitse hambo'e ao, kera ho tosire' i divay vaoy i zonjon-kolitse hambo'ey vaho hianto i zonjoňey. ³⁸ Tsy mete tsy ailiň' an-jonjoňe vao ty divay vao. ³⁹ Tsy eo ty minoňe amy elay ty hipay ty vao aniany; fa hoe re: I elay ro soa.[†]

[†] 5:39 Irm 6:16; Mar 7:7-13

Nitifo te SABOTSE Mat 12.1-8; 2.23-28

6

¹ Ie tamy Sabotse valoha'e faharoey*, le niranga teteke naho nitifo lohambare o mpiama'eo naho nanosokosoke aze am-pitâne vaho nikama. ² Aa le hoe ty Fariseo ila'e: Mañino nahareo ro mañota faly ami'ty Sabata?

³ Le natoi' Iesoà ty hoe: Mbe tsy vinaki'areo hao ty nanoe' i Davide te nisaliko—ie naho o mindre ama'eo: ⁴ ie nizilik' añ' Anjomban' Añahare ao nandrambe mofo-fiatreke naho nikama vaho nandiva amo nindre ama'eo, ze faly tsy kamaeñe naho tsy o mpisoroñeo avao. ⁵ Hoe re tam'iereo, Toe Talè' o Sabatao i Ana'ondatiy.

Mañafake te SABOTSE Mat 12.9-14; Mar 3.1-6

⁶ Teo ty Sabata t'ie niheo am-pitontonañ' ao hañoke, le inge ty lahilahy mate-fitàn-kavana. ⁷ Aa le nikirok' aze o mpanoki-dilio naho o Fariseoo ke hañafak' amy Sabotsey, ho talin-kitombok' aze. ⁸ Fe niarofoana' Iesoà ty fitsakorea' iareo, le hoe re am' indaty mate-fitañey: Miongaha, mijohaña añivo etoa. Niongake re naho nijohañe. ⁹ Le hoe t'Iesoà tam' iereo: Inao ty ontaneko: ty fanoan-tsoa[†] hao ke ty fanoan-draty ro mete ami'ty Sabata; ty handrombahañ' aiñe, he ty hañohofan-doza? ¹⁰ Jinilojilo'e iaby, le hoe re am' indatiy: Ahitio o fità'oo. Nahiti'e le nijangañe amy zao i fità'ey. ¹¹ Aa le niloroloro iereo, nikilily hañoho-doza amy Iesoà.

I Firàheñe Rey Mar 3.13-19

¹² Tamy andro zay, nomb' ambohitse mb'eo t'Iesoà nitalaho, le nitolom-pilolok' aman'Añahare ampara' te niporeea' ty maraindray. ¹³ Ie terak' andro, le kinanji'e o mpiama'eo vaho nijoboñe ty folo ro'amby ze nanoe'e ty hoe: Firàheñe: ¹⁴ i Simona ze natovo'e ty hoe Petera, naho i Andrea rahalahi'e, Iakobe naho i Jaona; i Filipo naho i Bartolomeo, ¹⁵ i Matio naho i Tomasy; Iakobe ana' i Alfeo; naho i Simona natao Zelota, ¹⁶ i Jodasy ana' Iakobe vaho i Jodasy nte-K'riote nifotetse azey.

¹⁷ Nindre nizotso am'iereo t'Iesoà, le nijohañe an-tane mira amo mpiama'e nivorigidiñeo, le nimb'eo ka ty lahialeñe hirike e Iehodà naho e Ierosaleme naho o rova añ'olon-dria' i Tiro naho i Sidona añeo, ¹⁸ songa pok'eo hijanjiñe aze naho ho janganeñe amo areteñeo vaho nafaha'e o vinolevolem-pañahy maleotseo. ¹⁹ Fonga te hitsapa aze i màroy, amy te nitolom-piboak' ama'e ty haozarañe nampijangañe ie iaby.

Ty Fitatañe Mat 5.1-12

²⁰ Nampiandra fihaino amo mpiama'eo t'IESOÀ le nanao ty hoe:
Haha nahareo rarakeo Fa anahareo i Fifehean'Añaharey

²¹ Haha o limpoañe henanekeo
fa hanjañeñe.

Haha o mirovetse henanekeo
fa hiankahake.

²² Haha nahareo, naho heje'ondaty, naho aitoa'e, naho onjire'e,
vaho homosokoso'e o tahina' areoo
ty amy Ana'ondatiy.

²³ Mirebeha amy andro zay, vaho mivoàña an-kaehake! Inao jabajaba
o tambe'areo andindiñeo; manahake zay ka ty nanoan-droae'iareo
amo mpitokio.

* **6:1** mamototse an-tSaramañits' indraik' i firimboñam-pisoroñe 24 mpifandimbe rey. (Fi I 24)

† **6:9** Its 5:15

²⁴ Hankàñe ama'areo mpañalealeo!
fa niazo'areo ty fañohòañe.

²⁵ Hankàñe amo anjañe henanekeo!
fa ho saliko.
Hankàñe amo mpiankahake
henanekeo,
fa hirovetse naho handala.

²⁶ Hankàñe ama'areo naho tsiririe'ondaty,
Amy t'ie ty nanoen-droae' iareo amo nieva ho mpitokio.

Lily Nivaoe'e Avo 23.4; Mat 5.39-48; 7.1, 2, 12

²⁷ Hoe ka raho amo mahajanjiñe: Kokò o rafelahi' areoo; hasoào o malaiñe anahareoo. ²⁸ Tatao ze mamatse anahareo le mihalalia ho a o mijoy anahareoo. ²⁹ Ie manampify azo ami'ty fiambina'o t'indaty, atoloro ama'e ka ty haila'e; ie gaoñe'e ty saravi'o, ko tambozoreñ' ama'e ty saro'o. ³⁰ Meo ze mihalaly ama'o; le ko ampipolieñe ty rinambe'e ama'o. ³¹ Ty tea'areo hanoe' ondaty ama'areo, anò am'iareo ka.

³² Naho ze mpikoko anahareo avao ty ikokoa'areo, Ino ty ho tambe' areo? Fa tea' ty mpanan-kakeo ka ty te aze. ³³ Aa naho ze mañasoa anahareo avao ro añañoañe, Ino ty ho tambe' areo? Amy te manao zay ka ty bey hakeo. ³⁴ Naho mampisongo amy ze tamae' areo hahavake avao, ino ty ho tambe' areo? Fa mampisongo amo bey hakeoo o mpanan-kakeoo, hañavaha'iareo mira. ³⁵ Fe kokò ty rafelahi' areo, hasoao, ampisongò, le ko mitamà avake naho ho ra'elisy ty tambe' areo, vaho ho ana' i Andindimoneñey, ie matarik' amo tsivokatseo naho amo tsereheñeo. ³⁶ Mitretreza manahake ty fiferenaiñan-dRae' areo. ³⁷ Ko maniñe, le tsy ho tiñeñañe. Ko mamàtse le tsy hafatse. Mihevea le hiheveañe. ³⁸ Mañomea le ho meañe; ho tolorañe am-pañaranañe pea, nikobakobaheñe naho nihotsokotsòfeñe vaho mipopoke; ami'ty fañaranañe añarana' areo ro añaranañe ama'areo.

Ty Goa miaolo Fey Mat 7.3-5; 16-18

³⁹ Tinovo' IESOÀ ami'ty ohatse toy: Mahay miaolo ty goa hao ty fey? Tsy sindre higodoñe an-kadaha ao v'iieren-droro? ⁴⁰ Tsy ambone' ty mpiana'e hao ty talè? fe ze añoñe ro hanahake an-talè'e.

⁴¹ Aa vaho ino ty angarefa'o ty alife am-pihainon-drahalahi'o ao, fe tsy isa'o ty varamba am-pihaino'o ao? ⁴² Akore ty anoa'o aman-drahalahi'o ty hoe: O koahe hafahako o alife am-pihaino'oo. Fe tsy oni'o i varamba am-pihaino'oy? Soamiatreke! Ahifiho aña hey ty varamba am-pihaino'o ao hahafibribira'o ty hañafake i alife am-pihainon-drahalahi'oy.

O Voa'eo

⁴³ Tsy mamoa voa raty ty hatae soa vaho tsy mamoa soa ty hatae raty. ⁴⁴ Sindre rendrek' ami'ty voa'e ty hatae; tsy hampipotorañe voan-tsakoa ty fatike, ndra filomboke ty lombiry. ⁴⁵ Mañakatse ty soa ami'ty fañajàmbara an-tro'e ao t'indaty soa vaho aboa' i lo-tserekey am-pañajam-baras an-tro'e ao ty hativàñe; fa ty haliforañ' arofo ro fisaontsiam-palie.

ty Fahañe Roe Mat 7.24-27

⁴⁶ Ino ty tokava' areo ahy Talè, Talè; fe tsy manao ze itaroñako? ⁴⁷ Ze mb' amako, naho mijanjiñe o volakoo, vaho anoe'e, le itoroako ty ihambaña'e:

⁴⁸ Manahake t'indaty nañoreñ' anjomba re; nihaly laleke vaho naore'e andamilamy eo o faha'eo. Ie nisorotombaheñe le naronje' i rano-vohitsey mafe i anjombay, f"ie tsy naha-ozoñozoñ' aze, kanao nioreñe am-bato.

49 Ty mijanjiñe tsy manao, ro sarèñe amy t'indaty nañoren-traño am-paseñe tsy amam-pahañe; tinorotosi' i rano vohitsey; le niforetrake, vaho bey-fianto' i trañoy.

ty Mpitoro' i Mpifehey Mat 8.5-13

7

1 Ie nifonitse i nilañone'e añatrefa' i màroy le niheo mbe Kapernaomy mb'eo, **2** le teo ty mpitorom-pifehen-dahin-defon-jato nisoheñe, narare, toe heta'e. **3** Ie nijanjiñe'eIESOÀ, le nirahe'e homb' ama'e ty androanavi' o Jiosio hihalaly ama'e ty homb'eo hampijangañe i mpitoro'ey. **4** Aa ie nifanampe amyIESOÀ, le nimanea' iareo toreo ami'ty hoe: Evae'e te hanoe'o, **5** amy t'ie mpitea ty tanen-tika naho namboatse anjombam-pitontoñañe. **6** Aa le niongake vaho nindre lia am'iereo t'IESOÀ. Ie narine i anjombay, le nampanalakà' i mpifelekey aze o rañe'eo hinday o entañe zao: O Rañandria, ko mañolañ' ay fa tsy sazò ahy te ihe hiheo ambane' ty tafo-trañoko. **7** Mbore ataoko tsy mañeva azo te zaho ro homb' ama'o, fe mitsarà le ho jangañe i mpitorokoy. **8** Zaho ka fehèn-dily vaho mamehe lahindefoñe. Ie ataoko Akia ty raike le mandeha, naho ami'ty raike: Mb'etoa, le avy, vaho amy mpitorokoy: Anò zao, le anoe'e. **9** Ie jinanji'IESOÀ, le nilatsa, naho nitolike, nanao ty hoe am' ondaty nañorik' azeo: Itaroñako te mbe lia tsy nahatreo fatokisam-bey hoe zay ndra e Israele atoy! **10** Ie pok' añ' anjomba ao o nafanto'eo, le nizoe' iereo jangañe i mpitoroñe natindriy.

Ty Bako-Toka' i Vantotse nte-Nainay

11 Ie amy loaf'androy, nigodañe mb' an-drova atao Naina mb'eo t'IESOÀ; le nañorik' aze ty maro amo mpiama'eo naho i lahialeñey. **12** Ie nitotoke i lalambein-drovay, intoy ty takon-dolo boak'ao, ty ana-dahy bako tokandrene'e, vantotse; le nañorik' aze ty valobohòke boak' an-drova ao. **13** Ie nivazoho' i Talè i rakembay le niferenaiña'e naho nanoe'e ty hoe: Ko mirovetse! **14** Nimb'eo re nitsapa i horantsañey vaho nitsangañe o mpitakoñeo le hoe re: O kirahe, hoe raho ama'o: Mivañona! **15** Nitroatse amy zao i nivetrakey naho nisaontsy vaho natolo'e aman-drene'e.

16 Hene niazo' ty anifañe ondatio le nañomey engeñe an' Andrianañahare ami'ty hoe: Mpitoky ra'elisy ty nitroatse amantika*; vaho ty hoe: Nitilike ondati'eo t'i Andrianañahare. **17** Nanitsike Iehodà naho o rova mañohok' aze iabio ty fiboelea' i talily ty ama'ey.

Ty Ontane' i Jaona Mat 11.2-6

18 Natalili' o mpiana' i Jaonao ama'e i hene rezay. **19** Aa le kinanji' i Jaona ty mpiana'e roe le nampihitrife'e mb'amy Talè mb'eo hañontane aze ty hoe: Ihe hao i ho aviy, ke hafa ty ho tamàe'ay? **20** Ie nivotraha' indaty rey le hoe ty asa' iareo: Nirahe' i Jaona Mpandipotse mb'ama'o mb'etoan-jahay hañontane ty hoe: Ihe hao i Ho aviy, kera mbe aña i tamaen-tikañey?

21 Amy oray avao ty nañafaha'e ondaty maro amo areteñeo naho amo hasilofañe o naho amo anga-dratio vaho nampañisake ty goa maro.

22 Le hoe ty natoi'IESOÀ: Akia, atalilio amy Jaona o raha niisa'areo naho nijanjiñeñeo; te mahaoniñe o feio, minokitse o komboo, malio o angamaeo, mijanjiñe o giñeo, miheren-ko veloñe o vilasio vaho taroñeñe amo rarakeo i Talili-soay. **23** Haha ze tsy mitorifike amako.

* **7:16** Its 18:15

Mitsiriry i Jaona t'IESOÀ Mat 11.7-15

²⁴ Ie niavotse i mpiana' i Jaona rey, le nitalily i Jaona amy lahialeñey t'IESOÀ, ami'ty hoe: Hisamba inoñe ty lia'areo mb'am-babangoañe aña? Ty Bararata atroetroen-tioke hao? ²⁵ ke ino ty niakara' areo ho isaheñe? Ondaty misikin-tsoa hao? Toe aña' anjombam-pifehe ao o mpisaroñe lamba marerarerao naho o miaiñ' añaolèñañe; ²⁶ he ino ty niavota' areo ho sambaeñe? Mpitoky hao? Eka! hoe raho ama'areo : lombolombom-pitoky re. ²⁷ Ie nipatereñe ty hoe:

Ingo, iraheko aolon-dahara'o eo
ty hañajary ty lala'o aolo'o.

²⁸ Aa hoe ty entako ama'areo: Amy ze sinaman-droakemba tsy teo ty mpitoky bey te amy Jaona Mpandipotse; fe jabajaba te ama'e ze minjilite'e amy Fifehean'Añaharey. ²⁹ Ondaty nahajanjiñe naho o mpamory vili-lohao, songa nañomey to an' Andrianañahare, amy t'ie niliporeñe ami'ty filipora' i Jaona, ³⁰ fe nifarie'o Fariseoo naho o mpanoki-dilio ty nisafirien' Añahare ho a iareo amy t'ie tsy nimete nilipotse ama'e.

o Tarira'eo

³¹ Inoñe arè ty handrazañako ondati' ty tariratse toio, isareañe ami'ty ino? ³² Ie hambañe ami'ty ajaja mitobok' an-tsena ao mifampikoike ty hoe: fa nitiofa'ay soly fe tsy nitsinjaha'areo; nibekoa'ay fandalañe, fe tsy niroveta'areo.

³³ Aa ie niloneake t'i Jaona Mpandipotse, tsy nikama mofo, tsy ninon-divay le hoe ty asa' areo: Aman-kokolampa re. ³⁴ Ie nivotrake eo ka i Ana' ondatiy mihinañe naho minoñe, le hoe ka nahareo: Hehe! milonja naho migenoke divay ty rañem-pamory vili-loha naho bey hakeo tia. ³⁵ Fe mahazo to amo ana'eo ty hihitse.

Ty Nañosorañe o Fandia'eo

³⁶ Ie amy zay, nañambara IESOÀ ty Fariseo hitrao-pikama. Aa le niheo mb'añ'anjomba'e ao re, niambesatse. ³⁷ Le teo ty ampela beihakeo an-drova ao, ie naharendreke t'ie nandrenàndre nikama aña'anjomba' i Fariseoy, le nandesa'e solike mañitse ami'ty anan-tsinihara. ³⁸ Nijohañe amboho'e eo re nirovetse am-pandia'e, nandè o fandia'eo an-dranomaso'e naho nifòra'e amo volo'eo; le nitolom-pañoroke o fandia'eo vaho ni-hosora'e solike mañitse. ³⁹ Ie nioni' i fariseo nañambara aze le hoe ty tsakore'e: Naho toe nimpitoky ondatio, le ho nifohi'e te ia zay naho ty sata' o ampela mitsapatsapa azeo; t'ie bei-hakeo.

Ty Mpisongo Roe

⁴⁰ Aa le natoi' IESOÀ ty hoe: O Simona, Inao ty ivolañako. Le hoe re: Isaontsio, Talè.

⁴¹ Teo ty mpampisongo amam-pisongo roe. Ty raike nitsepake bogady liman-jato, ty raike limam-polo. ⁴² Aa kanao tsy eo ty hahavaha' iareo, sindre nihevea'e. Toiño raho, ia am' iereo ty ho lako fitea aze? ⁴³ Hoe ty natoi' i Simona: Va'e i nihevea'e beiy. Hoe t'IESOÀ tama'e: To i saontsi'oy.

⁴⁴ Nitolik' amy ampelay re le nisaontsy amy Simona ty hoe: Hehek' o rakembao? Nizilik' aña'anjomba'o atoan-draho le tsy nanjotsoa'o rano hanasàko tomboke, fe o rano-pihaino'eo ro nanasa o tombokoo vaho namaoke aze o maroi'eo. ⁴⁵ Tsy nondrohe'o; fe boak' ami'ty nimoahako atoñañe le lia'e tsy napo'e ty oroke o tombokoo. ⁴⁶ Tsy nañiliña'o menake ty lohako, fe hinoso' ty rakemba tia solike mañitse o tombokoo. ⁴⁷ Aa hoe ty taroko ama'o, O tahi'e nimaroo, fonga nimeatse, amy t'ie bey fikokoañe.

Aa ze niheveañe kede, kede ka ty fitea'e. ⁴⁸ Le hoe re tamy rakembay: Hene nilioveñe o hakeo'oo. ⁴⁹ Aa hoe ty fiñeoñeo' o nitrao-pikama ama'eo: Ia ka ty mbore mañaha hakeo tia? ⁵⁰ Hoe t'IESOÀ tamy ampelai: Nandrombak' azo ty fatokisa'o; akia an-kanintsiñe.

8

O Roakemba Mpiaatrakeo

¹ Ie aña, le nitsitsihe' IESOÀ ze tanañe naho rova, nitaroñe naho ninday ty talili-soa' i Fifehean' Añaharey. Nindre ama'e i folo ro' amby rey ² naho o rakemba ila'e nafahañe kokolampa naho hasilofañeo—toe i Marie atao Magdalena, i nitsamoahan-kokolampa fitoy, ³ naho i Johanae vali' i Kozae, mpamandro' i Heroda, naho i Sosanae vaho ty maro ila'e mpiatrak' aze am-panaña' iareo.

Ty Karazan-Tane Mat 13.1-23; Mar 4.1-25

⁴ Ie nifanontoñe i lahialeñey naho nikovovòke mb'ama'e o boak' amo rovao, le hoe ty nandrazaña'e: ⁵ Niavotse handrarake tabiry ty mpambole, nafitse'e i doriay, le nipok' añ'olon-dalañe eo ty ila'e fe nandaliañe vaho nitsimok' aze o voron-dikerañeo. ⁶ Ty ila'e nipok' an-damilamy eo, ie vaho nitiry le niheatse amy te tsy ni-lène. ⁷ Nipok' am-po fatik' ao ka ty ila'e naho nitrao-fitiry amo fatikeo fe nidageañe. ⁸ Nipok' an-tane hoba ka ty ila'e, le nitiry vaho namoa in-jato. Ie tsinara'e zay, le nipoñafa'e ty hoe: Ze aman-dravembia hijanjiñe, Mijanjiña !

⁹ Aa le nañontanea' o mpiama'eo: Akore i ohatse zay. ¹⁰ Hoe re: Toe natolotse anahareo ty haharendreke o raha mietak' amy Fifehean' Añahareio; f'ie razañeñe amo ila'eo, soa te ndra miiisake iereo tsy hahavazoho, ndra mijanjiñe, tsy hahafohiñe.*

¹¹ Inao koahe ty ampibejañañe i ohatsey: Tsaran'Añahare i tabiry. ¹² O añ' olon-dalañe le o nahajanjiñe; fe mivotrake eo i mpañinjey manintake i tsaray añ'arofo' iareo tsy mone hiantoke vaho ho rombaheñe. ¹³ O an-damilamio, le o mahajanjiñe naho mandrambe i tsaray an-kafaleañeo, f'ie tsy amam-bahatse, miantok' aniany avao vaho misitak' an-tsam-panjiziañe. ¹⁴ O tabiry nipok' amo fatikeoo, le ty mahajanjiñe, fa ie mionjon-dre ro dageañe' o halonjerañeo naho o varao naho o hafalean-kaveloñe atoio vaho tsy mahavañom-boa. ¹⁵ O an-tane soao ka, le o añ' arofo vaño naho vantañe, ie mijanjiñe o tsarao le tambozore'e vaho mahavañom-boa am-pahaliñisañe.

Ty Jiro-Kapoake Mar 4.21-25

¹⁶ Tsy eo ty mammelon-jiro vaho mampikapek' aze am-panake ndra mampizilik' aze ambane fandreañe ao; fe apo'e ambone' ty fasian-jiro ey ho isa' ze mimoak' ao i hazavàñey. ¹⁷ Toe tsy ao ty mihaja ze tsy haakatse, naho ty mikopoke ze tsy ho rendreke vaho haboake. ¹⁸ Ambeno arè ty fijanjiña'areo, fa ze manañe ho tolorañe fe rambeseñe amo tsy manañe o ihaboha'eo.

Ty Toe Longo'e Mat 12.46-50; Mar 3.31-35

¹⁹ Le niheo mb'ama'e ty rene'e naho o rahalahi'eo, fe tsy nahafitotok' aze amy te nialin-drètse. ²⁰ Le hoe ty nanohinañ' aze: Mijohañe alafe'e ao i rene'o naho o roahalahi'oo mipay hahaoniñe Azo. ²¹ Tinoi'e ty hoe:

* ^{8:10} Ies 6:9

Heheke ty reneko naho o rahalahikoo, o mijanjiñe ty tsaran' Añahare vaho mañorik' azeo.

Nipendreñe ty Tioby Mat 8.23-27; Mar 4.35-41

²² Teo ty andro t'ie nijon-dakañe mindre amo mpiama'eo le nanoa'e ty hoe: Antao hitsake mb'andafe' o riakeo eñe, le nimb'eo iereo. ²³ Ie niondrañe mb'eo le ginaon-drotse, naho nizotso amy oñey ty tio-baratse ho nandipotse iereo vaho didý tsy nivarata. ²⁴ Niheo mb' ama'e iereo nampitsekak' aze ami'ty hoe: O Talè, Talè, mate zahay! Nitroatse re nitrevoke i tiokey naho ty fitabohaza' i riakey, le nijihetse vaho nipendreñe. ²⁵ Le hoe re tam' iereo: Aia ty fatokisa' areo? Nianifañe iereo naho nañeveñe, le nifanao ty hoe: Ia itoio, kanao aman-dily hampivohore'e o tiokeo naho o ranoo!

Angatse nitsamoak'an-Dambo Mat 8.28-34; Mar 5.1-20

²⁶ Nitoly an-tane Gerasenay tandrife' i Galilia eñe iereo. ²⁷ Ie nizotso antamboho eo, le nisalakae' t'indaty hirik' an-drova ao niazo' ty kokolampa, tsy nisafotse hatrela'e, mbore tsy nitobok' an-traño fa an-donak' ey avao. ²⁸ Ie nahaisake IESOÀ, le nikoaikoaike naho nibabok' aolo'e eo nitazataza ty hoe: Ino ty itraofako ama'o r'IESOÀ Anan' Añahare Andindimoneñe? Mihalaly ama'o: ko ampisoañe'o. ²⁹ Foto'e, linili' IESOÀ o kokolampao ty hiakatse am'indatiy; fa beteke nifihiñe'e—ie nitambozoreñe naho nirohizen-tsivilisily naho labaro fe rinafadrafa'e o vahotseo, vaho nasiotsio' o kokolampao mb'am-babangoañ' aña.

³⁰ Le hoe ty nañontanea' IESOÀ: Ia ty añara'o? Tozantoza; hoe re, amy te nitsamoahan' angatse maro. ³¹ Nihalalia' iareo te tsy ho lilie'e hijoroboñe an-tsikeokeok' ao. ³² Nandrazeñe ambone vohitse ey ty lambo maro troke raike. Aa le hinalali' iereo te hado'e himoak' am' iareo ao. Le napo'e. ³³ Aa le nifaok' amy lahilahiy o kokolampao naho nitsamoak' amo lamboo. Le nivongaritse mb'amy hereretsakey naho nijoroboñe andrano ao i troke raikey vaho niopo. ³⁴ Ie nitrea' o mpiarakeo le nibijo' ty lay mb' an-drova mb'eo naho mb' an-kalok' aña, nitalily. ³⁵ Aa le nangovovòke mb'eo o hioniñe i nanoeñeio, nivotrak' amy IESOÀ eo, naho nitendreke indaty niakara' o kokolampaoy, ie niambesatse am-pandia' IESOÀ eo nisafonoke naho vory hilala, nampañeveñe iereo. ³⁶ Natalili' o naharendrekeo ty namotsorañe i niazon-kokolampay. ³⁷ Aa le nihalalie' o valobohòke an-tane' Gerasena iabio t'IESOÀ ty hisitake, amy t'ie niazo' ty anifañe. Aa le nijon-dakan-dRe, nimpoly. ³⁸ Nihalaly te ho mpiama'e indaty niakara' o kokolampaoy, fe hoe ty nañitrifa' IESOÀ aze: ³⁹ Mimpolia mb' añ' akiba'o mb'eo vaho atalilio o raha ra'elahy nanoen' Añahareo. Niavotse re nanitsike i rovay nitalily i raha fanjàka nanao' IESOÀ rezay.

Ty Rakemba Nijangañe Mat 9.18-22; Mar 5.21-34

⁴⁰ Ie toly eñe t'IESOÀ, le rinambe' i lahialeñey soa, fa songa nandiñe aze. ⁴¹ Niheo mb'eo amy zao ty androanavy atao Jairo, beim-pitontonañe, nihotrak' am-pandia' IESOÀ eo nihalaly aze hihova mb'añ' anjomba'e ao ⁴² fa heta'e i anak' ampela toka'e miha folo taoñe ro' amby zay.

Aa ie nionjom-b'eo, nitamboemboeñe ama'e i lahialeñey; ⁴³ teo ty rakemba niazo' ty retsilà folo taoñe ro' amby, le fonga naleta'e amo mpanahao ze fiveloma'e, fe tsy teo ty nahafake. ⁴⁴ Nimb' amboho'e ao re nitsapa ty lifin-damba'e[†], vaho nitsintañe amy zao i lio-lava'ey. ⁴⁵ Le hoe t'IESOÀ: Ia ty nitsapa ahy? Songa nandietse vaho hoe t'i Petera

[†] 8:44 Vol 15:37; Mal 4:2

naho o mpiama'eo: O Rañandria, miharombontake naho mañifitse azo i lahialeñey. ⁴⁶ Le hoe t'IESOÀ: Ao ty nipaok' ahy; apotako te niakaran-kaozarañe. ⁴⁷ Aa ie nirendre' i rakembay te tsy lefe ty fietaha'e, le nivorombeloñe, fe niheova'e nihohok' am-pandia'eo nitalily añatrefa' ze hene' ondaty ty foto' i nitsapa'e azey naho t'ie nijangañe ami'ty manao zao. ⁴⁸ Aa hoe t'IESOÀ tama'e: O anake, o fatokisa'oo ro nahajangañ' azo; akia, manintsiña.

ty Anak'Ampela' i Jairo

⁴⁹ Ie mbe nisaontsy t'IESOÀ le pok'eo ty hirik' amy beim-pitontonañey aña nanao ama'e ty hoe: Fa simba i anak' ampela'oy; ko olañe'o ka t'i Talè. ⁵⁰ Ie jinanji' IESOÀ, le hoe ty natoi'e: Ko hembañe, matokisa avao, le ho jangañen-dre. ⁵¹ Ie tsatok' añ' anjomba'e ao, tsy napo'e hizilik' ao naho tsy i Petera naho i Jaona naho Iakobe vaho ty rae naho i rene' i ajajampelai. ⁵² Hene nirovetse naho nandala aze ondatio, fa hoe re tama'e: Ko mirovetse, tsy simba re fa miroro. ⁵³ Aa le nonjira' iareo an-kehe kanao nioniñe t'ie simba. ⁵⁴ Fonga nakare'e, le rinambe'e ty taña' i ajajampelai vaho nikanjia'e ami'ty hoe: O ajajampelao, Mitroara. ⁵⁵ Nibalike ty fiai'e le nitroatse amy zao, vaho nampamahana'e. ⁵⁶ Nilatsa o roae'eo, fe nafantopanto'e tsy hitalily ndra ama' iaia i nanoeñey.

Nahitri'e i Folo-Roe'Amby rey Mat 10.1-14; 14.1-14; Mar 6.6-16, 30-34

9

¹ Kinanji'e hirimboñe eo i folo ro' amby rey, le tinolo'e haozarañe naho lily handroake ze atao kokolampa naho hañaha ze hasilofañe; ² le nirahe'e hitaroñe i Fifehean' Añaharey vaho hampijangañe o marareo. ³ Hoe re am' iareo: Ko minday inoñ' inoñe ami'ty lia'areo, ndra kobaiñe ndra kotrañe ndra vaty ndra drala vaho ko minday saron-droe. ⁴ Mañialoa amy ze anjomba iziliha' areo le hirik'ao ka ro hienga. ⁵ Naho tsy mampiantraño anahareo ty ao, le ie miakatse i rovay, ahintsankintsaño ty lembok' am-pandia'areo hanjehazehàñe iareo.

⁶ Aa le niavotse iereo nanitsike rova, nitsey i talili-soay vaho nampijangañe tok'aia tok'aia.

⁷ Ie jinanji' i Heroda mpizaka o nanoe'e iabio, le nitsimboetse, fa inao nitroatse t'i Jaona, ⁸ hoe ka ty ila'e te, i Elia ty niboake; ty ila'e ka nanao ty hoe: raik' amo mpitoky haehaeo ro niheren-ko veloñe. ⁹ Fa hoe ka t'i Heroda: Nampikitsìheko ty loha' i Jaona, aa ia arè i andrendrehañ' ahy te manao i raha rezay? le nipay ty hahaoniñe aze.

¹⁰ Ie nimpoly i Firàheñe rey le nitalilia' iareo ze hene nanoeñe, vaho natola'e mb'am-patrambei' i rova atao Betsaida ao. ¹¹ Aa ie nifohi' i lahialeñey le norihe'iereo, fe rinambe'e soa naho nitaroñe i Fifehean' Añaharey vaho hene jinanga'e ze nitaha.

Ty Lime Arivo Lahy Mat 14.15-21; Mar 6.35-44; Jao 6.1-14

¹² Ie niròñe i àndroy, niheo mb' ama'e i folo ro'amby rey, nanao ty hoe: Ampiavoto o lahialeñeo homb' amo rovao naho mb' am-pariparitse atoy hañialo naho hivaty; fa loho an-kazihazin-tane atoy tika. ¹³ Hoe ty natoi'e: Anjotsò hikama'e. Natoi' iereo ty hoe: Tsy ama'e zahay naho tsy mofo lime vaho fiañe roe, naho tsy hiavotse hey hivily mahakama ho a ondaty iabio. ¹⁴ Va'e lime arivo ty lahilahey teo. Aa hoe re amo mpiama'eo: Ampiambesaro kilimampolo. ¹⁵ Nanoe' iareo, vaho songa nampiambesareñe. ¹⁶ Rinambe' IESOÀ i mofo lime rey naho i fiañe roe

rey le niandra mb' andikerañe ey naho nañandriañe, le finola'e vaho natolo'e amo mpiama'eo hazotso amy lahialeñey. ¹⁷ Nikama iereo le sindre nianjañe vaho natontoñe an-karoñe folo ro'amby ze sisa nifitafita.

Nitalily ty Hatò Mat 16.13-21; Mar 8.27-31

¹⁸ Teo t'ie nilolok' am-bangiñe ao rekets' o mpiama'eo le nañontanea'e ty hoe: Atao' ondatio ho ia v'o ahoo? ¹⁹ Tinoi' iereo ty hoe: I Jaona Mpandipotse, fa ty ila'e ka manao ty hoe, i Elia, vaho ty ila'e te niheren-ko veloñe ty mpitoky haehae. ²⁰ Hoe re: Aa inahareo? Atao' areo ho ia raho? Tinoi' i Petera ty hoe: I Norizan' Añaharey.

²¹ Hinatahata'e t'ie tsy hivolañe am' ondaty, ²² le hoe re: Tsy mahay tsy hanilofeñe raha maro i Ana' ondatiy, le harinjèñe' o roandriañeo naho o mpisoram-beio naho o mpanoki-dilio vaho ho vonoeñe, fe hampitroareñe ami'ty andro fahatelo.

Ty Mahamokotse Mat 16.24-27; Mar 9.34-38

²³ Aa le hoe re tam' iereo iaby: Naho eo ty te hanonjohy ahy, soa re te hihirimbeloñe naho hitarazo ty hatae ajale'e lomoñandro vaho hañorik' ahy, ²⁴ fa ndra iaia ro te handrombak' ay ro hahamotso aze, le ndra iaia ty mamoe arofo ty amako, ho rombaheñe. ²⁵ Ino ty tombo'e ho a t'indaty te fonga azo'e ty voatse toy, fe, ke t'ie motso, he haitoañe. ²⁶ Aa ndra iaia ty ho meñatse ahy ndra amo entakoo, ty ho meñare' i Ana' ondatiy t'ie mitotsak' ami'ty enge'e naho ty an-dRae'e vaho ty amo Anjely masiñeo. ²⁷ Eka! to t'itaroñako te, amo mijohañe etoañeo ty tsy ho lian-kavilasy ampara' te oni'e i Fifehean'Añaharey.

Ty Niovà' IESOÀ Mat 16.28-17.9; Mar 9.1-9; 2 Pet 1.17, 18

²⁸ Ie modo ty valo andro te nitsara izay, le nampindreze'e ama'e t'i Petera naho i Jaona naho Iakobe vaho nitroa-bohitse hitalaho. ²⁹ Ie niloloke le niova ty vinta'e naho nihafoty nitsipelatsipelatse ty sarimbo'e. ³⁰ Le heheke, te nifanaontsy ama'e ty androanavy roe, i Mosè naho i Elia, ³¹ niboak' am-bolonahetse vaho nisaontsieñe i fivetrahañe ho henefa'e e Ierosaleme añey. ³² Fe nikonkòñe te hirotse t'i Petera naho i rañe'e rey, f'ie nañente le nahaoniñe ty enge'e naho i roe-lahy niharofijohañe ama'e rey.

³³ Ie nienga' aze iereo le hoe t'i Petera ama'e : O Rañandria, soa 'nio te etoan-tikañe; angao hañoreñe kijà telo: Ty ho Azo naho ty ho a i Mosè vaho ty ho a i Elia, fa tsy napota'e i linaño'e. ³⁴ Aa ie mbe nisaontsy, teo ty rahoñe niforoñe nandrongoñe iareo, naharevendreveñe te nisafora' i rahoñey. ³⁵ Hirik'amy rahoñey amy zao ty fiarañanañañe nanao ty hoe: Anako kokoako toy. Ijanjiño! ³⁶ Ie nianjiñe i fiarañanañañey, le IESOÀ avao ty nizoeñe eo. Aa le nidiñe iereo tsy nahabeok' am'ondaty amy andro rezay ndra inoñe amy nioni' iareo rezay.

Ty Ajalahy Nangarañe Mat 17.14-18; Mar 9.14-27

³⁷ Amy loakandroy, ie nizotso i vohitsey le nifanalaka ami'ty lahialeñey. ³⁸ Le hoe ty napazapaza' t'indaty boak' amy lahialeñey ao: O Rañandria, mitoreo ama'o vazohò ty anako bako-tokañe toy. ³⁹ Inao! ie azin-draha le mikoriak' amy zao; avokovoko'e an-tsintosintoñe reke-bore; le fiain-drifi'e te ifaoha'e, toe joie'e. ⁴⁰ Aa le nihalalieko o mpiama'oo ty handroak' aze fe tsy nilefe.

⁴¹ Hoe ty natoi' IESOÀ: Ty tariratse tsy mañaoñe naho mitangingiñe toy, ombiam-bao ty mbe hitraofako naho hifeahako? Endeso mb'etoa i ana'oy.

⁴² Ie niharine mb'eo i ajajay le nigore' i kokolampay naho sinintotsinto'e. Trinevo'IESOÀ i anga-maleotsey le nihaha'e i ajalahiy vaho nahere'e amandrae'e. ⁴³ Aa le hene nivereñe ty amy hara' elahin-kaozaran' Añaharey.

Mitoky Havilasy Mat 17.22-23; Mar 9.30-32

Ie mbe nilatsa amy ze hene fanoe'IESOÀ, le hoe re amo mpiama'eo: ⁴⁴ Ajoño an-dravembia ao o tsara zao, te hafotetse am-pità' ondaty i Ana' ondatiy; ⁴⁵ Fe namoea' iereo i saontsiy, amy te nampietahañe, tsy ho rendreke, le nihembañe tsy te hañontane aze ty amy tsaraeñey.

Ty ho Ra'elisy Mat 18.1-5; Mar 9.33-40

⁴⁶ Le nitsakoreñe am 'iereo ao te ia ty zoke'e. ⁴⁷ Niarofoana'IESOÀ i fivetsevetsen-tro' iareoy le nandrambe ajaja naho navatra'e añ'ila'e eo, ⁴⁸ le hoe re am' iereo: Ndra iaia mandrambe ty ajaja toy ami'ty añarako ro mandrambe ahiko, vaho ndra iaia mampihova ahy ro mampihova i nañirak' ahiy; aa le ty tsitso'areo ty ho zoke.

⁴⁹ Hoe ty natoi' i Jaona, O Rañandria, nitrea'ay ty nandroake kokolampa amy tahina'oy le nendaha'ay amy te tsy mpitrapañorik' ama'ay. ⁵⁰ Hoe t'IESOÀ tama'e: Ko sebaña'o, fa ze tsy mandietse antika ro mone mañimba.

Nañarinjeñe IESOÀ t'i Samaria

⁵¹ Ie an-titotse ty andro hañonjonañe aze le nionjoñe mb' Ierosaleme mb'eo ⁵² naho nañitrike ty hiaolo aze, vaho nimoak' ami'ty rova e Samaria ao iereo hañalankañe ho aze. ⁵³ Fe tsy nampihovaeñe, amy t'ie nitolin-daharañe mb'e Ierosaleme.

⁵⁴ Aa ie nioni' Iakobe naho i Jaona, mpiama'e rey, le hoe iareo: O Rañandria, satri'o hao te handilia'ay afo boak' andindìñe aña hidoiñe ey hampangotomomoke iareo? ⁵⁵ Tinoli'e iereo le nitrevoha'e * ⁵⁶ vaho nionjomb' an-tanañe ila'e mb'eo.

Ty maha Firàheñe Mat 8.18-22

⁵⁷ Ie nañavelo amy lalañey, le nanoañe ty hoe: O Talè horiheko ndra aia aia ty homba'o. ⁵⁸ Hoe t'IESOÀ tama'e: Manan-davake o farasio naho amam-pipetaha'e o voron-dikerañe; fe tsy amy Ana' ondatiy ty fanjoàn' añaambone'e. ⁵⁹ Hoe ka re ami'ty raike: Mañoriha ahy; fe hoe re: O Talè, angao hey handentek' an-draeko. ⁶⁰ Hoe t'IESOÀ tama'e: Adono o vilasio handeveñe ty vilasi' iareo, fa ihe ka, akia, taroño i Fifehean' Añaharey.

⁶¹ Hoe ka ty raike: O Talè, hañorik' Azo raho, fe adono hey hitalily antrañoko ao. ⁶² Aa hoe t'IESOÀ tama'e: Tsy eo ty mitan-dasary t'ie mitolike, ro mañeva i Fifehean'Añaharey.

10

Nahitri'e ty 70

¹ Ie modo zay, le nijoboñe ondaty fitompolo ila'e ka t'i Talè, vaho nirahe'e kiroe-kiroe hiaolo mb'amy ze hene rova naho tane homba'e. ² Le hoe re tam' iereo: Tombo ty vokatse fe tsy ampe ty mpandrofotse; aa le halilio i Talèm-bokatsey ty hañeke ho amy fanatahañey; ³ Akia, iraheko hoe vik'añondry mitoam-parasy. ⁴ Ko mitintin-koro ndra kontrañe ndra hana vaho ko mifañinoñe an-dalañe eo. ⁵ Ze traño iziliha' areo, anò hey ty hoe: Hanitsiñe ty anjomba toy. ⁶ Aa naho ao ty anan-kanintsíñe, le hitoetse ao i fañanintsi' areoy; fe naho tsy zay le himpolia'e. ⁷ Mañialoa amy

* 9:55 +Tsy apota'areo t'ie amam-pañahy inoñe.

trañoy; mikama naho minoma amy ze azotso amy te mañeva ty rima'e ty mpanatake. Ko mitsatsàk' anjomba.

⁸ Ze tanañe omba' areo, naho ampihovae'e: ikamao ze azotso'e.

⁹ Jangaño ze marare, le anò ty hoe: Fa totok' anahareo i Fifehean' Añaharey. ¹⁰ Ze rova anjoà' areo tsy mampihova, le miheovà mb'an-dàmoke mb' eo vaho anò ty hoe: ¹¹ Ndra ty lembo' ty rova' areo manditek' ama'ay ho piohe'ay hanjehazeha anahareo. Fe mahafohina te nitotoha'i i Fifehean' Añaharey. ¹² Itaroñako te haivañe ty hifetsak' amy Sodoma amy andro zay ta ty hizò i rovay.

¹³ Hankàñe ama'o, Korazina! Hankàñe ama'o Betsaida! Fa naho nanoeñe e Tirò naho e Sidona aña o raha jabajaba nitoloñeñe ama'areoo le ho nisoloho haehae vaho ho nitobok' an-gony naho lavenoke. ¹⁴ Haivañe ho amy Tirò naho i Sidona amy zakay ta ty ama' areo. ¹⁵ Ihe ka, ry Kapernaomy, haonjomb' andindìñe aña v' iheo? Te mone hatotse antsikeokeok'ao!

¹⁶ Ze mijanjiñe anahareo mijanjiñe ahy, naho ze malaiñ' anahareo malaiñ' ahy, vaho ze malaiñ' ahy, malaiñe i Nañirak' ahiy.

Ty Fipolia' i 70oy

¹⁷ Nimpoly an-kaehake i fitom-polo rey, le hoe ty asa'iareo: O Rañandria, ndra o kokolampao miambane ama'ay ty amy tahina'oy. ¹⁸ Le hoe t'IESOÀ tam' iereo: Nitreako nidoindoiñe boak' andindìñey hoe helatse i mpañinjey. ¹⁹ Inao! fa tinoloko lily ambone' ty haozara' i rafelahiyy nahareo handialia mereñe naho kalengo fa ndra inoñ' inoñe tsy hijoy. ²⁰ Aa ko irebeha' areo te itsolofiña' o kokolampao, fe mandià-taroba te pinatetse andindìñe ao o tahina' areoo.

²¹ Ie amy ora zay, nilifon-kaehak' añ' arofo t'IESOÀ nanao ty hoe: Mandrenge Azo raho ry Aba, Talèn-dikerañe naho ty tane toy, te naeta'o amo mahihitseo naho amo mahilalao o raha zao vaho nampalangese'o amo anak-ajajao; Eka, Aba, zay ty ninò'o am-pivazohoa'o. ²² Kila natolon-dRaeko ahy, le tsy eo ty mahafohiñe te ia i Anakey naho tsy t'i Rae, naho te ia t'i Rae lehe tsy i Anakey vaho ze ampahafohiñe' i Anakey.

²³ Nitolik'amo mpiama'eo avao le nanao ty hoe: Haha ty fihaino mahaisake o raha isa' areoo; ²⁴ Itaroñako te maro ty mpitoky naho ty mpanjaka nisalala hahaoniñe o oni' areoo fe tsy naahaoniñe, vaho hahajanjiñe o janji' areoo fe tsy nahajanjiñe.

Ty Havelo Nainai'e:

²⁵ Teo te niongake ty mpahay lily nitsoke IESOÀ ami'ty hoe: O Talè, ino ty hanoeko handovàko haveloñe nainai'e? ²⁶ Le hoe re tama'e, Ino ty pinatetse amy Hake ao? Akore ty vaki'o aze? ²⁷ Hoe ty natoi'e: Kokò t'IEHOVÀ Andrianañahare'o an-kaampon'arofo'o, naho an-kaliforam-pañova'o
naho amy ze hene haozara'o
naho am-pitsakorea'o iaby,*
vaho ondatio mira ami'ty vata'o.[†]

²⁸ Le hoe re tama'e: To i natoi'oy, anò, vaho ho veloñe.

Ty nte-Samaria Matarike

²⁹ Aa ie te haniom-batañe, nanao ty hoe am' IESOÀ: Ia v'ondaty zay?
³⁰ Hoe ty natoi' IESOÀ: Teo t'indaty nizotso boake Ierosaleme homb'e

* ^{10:27} Its 6:5 † ^{10:27} Sor 19:18

Hierikò mb'eo nizò malaso nañolits' o siki'eo, nitrabotrabok' aze vaho nampidoñ' aze fiai-drifi'e; ³¹ tojo te nizotso mb'eo amy zao ty mpisoroñe; nizoe'e fe niriràña'e. ³² Nanao zay ka t'i nte-Levy, ie pok'eo, nahaisake fe nanoe'e riom-paoke. ³³ Nivotrak' eo ka ty nte Samaria amy lia'ey, ie niisa'e le niferenaiña'e, ³⁴ nitotok' aze naho namoloñosa"e o fere'eo naho nañiliñä'e solike vaho divay; le nampiningire'e amy borìke'ey, naho ninday aze mb'ami'ty anjomba fanjoàn'ambahiny mb'eo vaho natrahe'e. ³⁵ Ie maraindray, nañakatse bogady roe, le natolo'e amy tompon' anjombay ami'ty hoe: Itahao; ndra firefire ty lany mandikoatse zao le havahako ami'ty fimpoliko. ³⁶ Aa vaho ia amy telo rey ty atao'o nifampilongo amy nizo mpitavañey? ³⁷ Hoe ty natoi'e: I nilem-po ama'ey. Le hoe t'IESOÀ tama'e: Akia, itsikombeo.

I Marta naho i Marie

³⁸ Nañavelo iereo, le nizilik' an-tanañe ao t'IESOÀ naho nampihova aze añañomba ty rakemba atao Martae, ³⁹ niambesatse am-pandia' i Talè nitsendreñe o tsara'eo ty rahavave'e Marie. ⁴⁰ Fe niembetse'amy fitoroña'ey t'i Martae le niheo mb'amy Talè mb'eo nanao ty hoe: O Rañandria, tsy ahoa'o hao te nieng' ahy hikotepe irery ty rahavaveko? Ampañoloro ahy. ⁴¹ Hoe ty natoi' IESOÀ: O Martae, Martae, ihe tsotseke naho tsimboetse ami'ty raha maro, ⁴² raha raike ty paiaeñe; nijoboñe ty soa t'i Marie, le tsy hasintak' ama'ey zay.

Ty Filolohañe Mat 6.9-13; 7.7-11

11

¹ Teo te nitroatse ami'ty fitaloha'e an-toetse zay t'IESOÀ le hoe ty nanoa' ty mpiama'e: O Rañandria, añañohò anay ty hiloloke manahake ty naô' i Jaona o mpiana'eo. ² Le hoe re am' iereo: Naho miloloke nahareo, anò ty hoe:

O Aba,

Havaheñe abey ty tahina'o;

Hitotsak' abey ty fifehea'o,

³ Azotsò lomoñandro ty mahakama mahatsàk' anay.

⁴ Le adono o hakeo'aio, Fa apo'ay ka ty tahi' ze anaña'ay hakeo.

Le ko minday anay mb'am-panjiziañe,

ty Rañetse Mahaheve

⁵ Le nitovoña'e ty hoe: Ia ama' areo ro aman-drañetse miheo mb' ama'e vakimiraleñe mihalaly ty hoe: O koahe, ampitsepaho mofo telo, ⁶ fa pok' amako ao aniany ty rañeko amy lia'ey vaho tsy eo ty hafahako aze? ⁷ Le hanoiñe ty hoe i añañombay: Ko mañembets' ahy, fa migabeñe o lalañeo, naho miharo fandreañe amako o keleìakoo, vaho tsy mahafitroatse raho hañomeako azo ndra inoñe. ⁸ Itaroñako te, ndra t'ie tsy hiongake hañomey ty amy firañetañey, i hatsotseha'ey ty hiongaha'e hañomey ze hene paia'e.

⁹ Aa le hoe ty volako ama'areo: mihalalia, le ho meañe; mitsoeha le ho tendreke, mañonkòña le ho sokafeñe. ¹⁰ Fa ze mihalaly mahazo, ze mikodebe mahatendreke vaho ze mañonkòñe ro sokafañe.

ty Rae Soa Mat 7.7-11

¹¹ Aa naho mangatake mofo ama' iaia ama'areo roae ty ana'e, ho tolora'e vato hao? ke angataha'e fiañe, ho tolora'e mereñe hao hasolo' i fiañey?

12 He ihalalia'e atoly, ho sozoa'e kalengo hao? **13** Aa ndra t'ie raty ro maha-fañome raha soa amo keleia' areoo, mentsake te hatolon-dRae'areo andikerañe ao amy ze mihalaly ama'e i Arofo Masiñey.

i mpañinjey Mat 12.25-30; 43-45; Mar 3.22-27

14 Rinoa'e ty kokolampa moañe le ie nifaok' aña i angatsey, nisaontsy i moañey vaho nilatsa i lahialeñey. **15** Aa hoe ty asa' o ila'eo: I belzeboba, talè' o kokolampao ro androaha'e kokolampa. **16** Ty ila'e ka, nipay viloñe ama'e boak' andindìñe ao hanjiziañ' aze.

17 Aa kanao niarofoana' IESOÀ ty vetsevetse' iareo, le nanoa'e ty hoe: Hangoakoake ze fifeheañe mifañito; le hikoromake ze anjomba mifañavake. **18** Aa lehe mizara i mpañinjey, hanao akore ty hijadoña' i fifehea'ey? ie atao' areo te i belzeboba ro añariako kokolampa. **19** Aa naho i belzeboba ty androahako kokolampa, ia ka ty androaha' o ana' areoo ty a iareo? Ie ro hizaka anahareo. **20** Aa naho ty rambo-pitàn' Añahare ro androahako kokolampa, le fa tendrek' ama'areo i Fifehean' Añaharey.

21 Ie ambena' ty fanalolahy vory fialiañe ty akiba'e, le hanintsiñe o vara'eo. **22** Fa ie iambotraha' ty maozatse te ama'e, mahagiok' aze, le hene ho tavane'e o fialiañe niatoa'eo vaho ho zarae'e o finao'eo.

23 Manjehatse ahy ze tsy mitraok' amako; le mampiparaitake ze tsy mindre manontoñe amako. **24** Ie miakatse am' ondatio ty kokolampa, manilio mb'an-tane tsi-an-drano mipay ty hitofà'e, fe tsy manjò le manao ty hoe: himpoliako i traño niboahakoy. **25** Ie avy ao, zoe'e pinioke vaho soa hamíñe. **26** Aa le miavotse re minday kokolampa fito raty te ama'e, le mitsamoake manozitse ao; raty te amy nifotora'ey ty higadoña' indatiy.

27 Ie mbe nisaontsy, le nampipoña-peo ty rakemba amy lahialeñey, nanao ty hoe ama'e: Haha ty fisafoañe nivesatse azo naho o fatroa ninonoa'oo. **28** Hoe ty natoi'e: Lombolombo' ty haha ze mijanjiñe ty tsaran' Añahare vaho mañambeñe aze.

Ty Vilo' i Jonà Mat 12.39-42

29 Ie niha-famoeboetse eo i màroy le hoe re: Lo-tsereke ty tariratse mipay viloñe toy, fe tsy eo ty viloñe hatolotse naho tsy ty vilo' i Jonà, **30** fa hambañe ami'ty naha-viloñe amo nte-Niniveo t'i Jonà, i Ana'ondatey ami' ty tariratse toy. **31** Hiongake amy fizakañe ty tariratse toy i mpanjaka-ampela atimoy handrabioñe aze, fa niboak'añ' olon-tane aña re hitsendreñey ty hihi' i Solomona; fe hehe te lombolombo' i Solomona ty etoy. **32** Hindre hiongak' ami'ty tariratse toy amy andron-jakay t'i Ninive hañinje aze amy t'ie nisoloho amy koi-dava' i Jonà; fe zoke' i Jonà ty etoañe.

Ty Jiro

33 Tsy eo ty nandrehetse jiro, ze mbore hampikafitse aze ndra hampikolopok' aze ami'ty tsikotòke, fa hapo'e ambone' fasian-jiro ey, ho isa' ze mimoak' ao i hazavàñey. **34** Failom-pañova ty fihaino, ie vantañe ty fihaino'o le lifo-kazavàñe ty sandri'o, fa naho mengoke, le mimoromoroñe iaby ty sandri'o. **35** Aa le mitaoa, he maieñe ty zava ama'o ao. **36** Ie amy zao, naho lifo-kazavàñe ty sandri'o naho tsy maieñe ty ao, le ho lifo-kazavañe, manahake ty añazavam-pailo azo amy fireandrea'ey.

Hankàñe Eneñe

37 Ie mbe nisaontsy, le nañambara aze ty Fariseo, hikama; aa le nizilik' ao re, nidegañe am-pandambaña eo. **38** Fe nilatsa' i Fariseoy naho nioni'e t'ie tsy nanasa hey aolo' te nikama. **39** Aa le hoe t'i Talè tama'e: Hehe ty fanoe'

areo Fariseo, liove' areo ty voho' o fitovio naho o fingao, fe miboboke tity naho haloloañe ty an-trok' ao. ⁴⁰ Ry gege bey! Tsy i nanao ty voho'ey hao ty nanao i am-po'aoy? ⁴¹ Hàmake te anoloran-ko falalàñe o ama'areoo, le ho kila halio ty ama'areo.

⁴² Hankàñe ama'areo Fariseo! fa ampahafoloe' areo ty sakaviro naho ty sakay vaho ze karaza añañe; fe rioña' areo ty hatò naho ty fikokoan' Añahare; mbe ho nanoe'areo irezay, fe tsy ho nado'areo ka ty ila'e.

⁴³ Hankàñe ama'areo Fariseo! Tea' areo ty fiambesatse aolo am-pitontonañe ao naho ty añontanea' ondaty an-tsena ey, ⁴⁴ Hankàñe ama' areo fa manahak' o kibory tsy amam-pamantarañeо, ie lialià' ondaty avao kanao tsy fohiñe.

⁴⁵ Tinoi' ty mpahay lily ty hoe: O Talè, mañinje anay ka 'n-Iheo amy saontsi'oy. ⁴⁶ Hoe ty natoi'e: Hekoheko ama' areo mpahay Hake ka! Amy te ampijinie'areo kilankañe midogiñe t'indaty, le ndra ty anakiky tsy apao' areo amy kilankañey.

⁴⁷ Hankàñe ama'areo! fa amboara' areo kibory o mpitoky vinonondroae' areoo. ⁴⁸ Toe iantofa' areo ty satan-droae' areo, ie ro toe namono, naho inahareo ro namboatse o kibori'eo. ⁴⁹ Izay ty nataon' Añahare ty hoe ami'ty hilala'e, Hañitrifako Mpitoky naho Firàheñe, ho vonoeñe ty ila'e vaho hanilofeñe ty ila'e. ⁵⁰ Aa le hampañavahañe ami'ty tariratse toy ty lio' o mpitoky naorikori'e faha' ty fifotora' ty voatse toio, ⁵¹ mifototse ami'ty lio' i Abela pak' ami' ty lio' i Zakaria vinono añivo' i kitreliy naho ty Anjomban' Añahare eo. Eka! Itaroñako te hampañavahañe ami'ty tariratse toy izay.

⁵² Hankàñe ama'areo mpahay lily! Tinava'areo ty lahin-dakilen-kihitse. Tsy nimoaha'areo, fe sebañe' areo ze mañaly lalañe hizilik' ao.

⁵³ Ie nanao zay, le nanoe' o mpanoki-dilio naho o Fariseoo tsikony naho nimanea' iereo ontane, ⁵⁴ nandiñe hitsepake aze amy ze hiakatse am-palie'e.

12

o Soamañatrekeo Mat 10.26-33

¹ Ie amy zao, naho nivorigidiñe aña'aleale t'indaty vaho nifandialia, le nanoe' IESOÀ ty hoe hey o mpiama'eo: Itaò ty lalivai' o Fariseoo, amy t'ie hasoa-fiatreke. ² Toe tsy ao ty linomboke ze tsy haboake ndra ty nakafitse ze tsy haborake; ³ aa ndra inoñ' inoñe volañe' areo aña'ieñe ao, ty ho janjiñeñe an-kazavàñe ey; vaho ze tsikoe' areo an-dravembia aña'anjomba ao ho tseizeñe an-tampenake ey.

⁴ Taroñeko ama'areo roàñeko ty hoe, ko marimarihañe ze mahay mamono ty sandriñe, fe tsy mahalefe mandikoatse. ⁵ Hatahataeko ty hañeveña' areo: irevendreveño i fa namonoy ro mbe aman-dily hampijoroboñ' azo an-tsikeokeok' ao; eka hoe raho, Añeveño! ⁶ Tsy drala roe hao ty vili' ty tsikisoisoy lime? Fa ndra raik' ama'e tsy andikòfan' Añahare. ⁷ Ndra ty maroi' ty añaambone'areo, fa fonga niaeñe. Aa le ko mahimahiñe, fa mandikoatse ty tsikisoisoy maro nahareo.

⁸ Itaroñako: Ndra iaia miantok' ahy añaatrefa' ondatio, ro hiantofa' i Ana'ondateiy añaatrefa' o anjelin'Añahareo. ⁹ Fe ze mitety ahy añaatrefa' ondatio, ro hitetiako añaatrefa' o anjelin'Añahareo.

¹⁰ Ndra iaia mitsiko i Ana'ondateiy ro mbe hiheveañe; fe tsy hiheveañe ka ze miteratera i Arofo Masiñey.

¹¹ Lehe asese' iereo am-pitontonañ' ao nahareo naho amo zizio ndra amo mpifeheo, ko tsòtsek' ami'ty hatoi' areo naho amy ze ho saontsie'areo; ¹² Fa hanare' i Arofon-kamasiñañey ze ho saontsie'areo amy ora zay.

I Fatitimenay

¹³ Tamy lahialeñey ty nanao ama'e ty hoe: O Talè, saontsio ty rahalahiko ty hifanjara i lovay amako. ¹⁴ Tinoi'e ty hoe: O korahe, ia ty nanendre ahy ho mpizaka ndra mpizara ama'areo? ¹⁵ Le hoe re tam' iereo: Mitaoa naho mitomira tsy ho azo' ty fihañañe, fa tsy miato ami'ty fanaña'e ty havelo' ondaty.

¹⁶ Le hoe ty nirazañe'e: Namokatse soa ty tetem-pañaleale. ¹⁷ Le hoe ty safirin-tro'e: Hanao akore raho henaneo, tsy eo ty hanontonako o hanekoo. ¹⁸ Aa le hoe ty asa'e: Zao arè ty hanoeko: Ho rotsaheko o rihakoo naho ho tratrañàheko, vaho ho tamirieko ao ze hene haneko naho varako. ¹⁹ Le hatàko ty hoe ty troko: O ry troko, nivandroñe'o vara tsifotofoto an-driha ao, ie tsy ho ritse an-taoñ' an-taoñe; aa le mitofà, mikamà, migenoha, vaho mifalea. ²⁰ Fe hoe ty nitsaran' Añahare aze: Ty dagola tia! ampañavaheñe azo anito haleñe ty tro'o, aa le ho an' ia v'o nahaja'oo? ²¹ Hambañe amy zay ty ho amy ze mitamiry vara ho am-bata'e, f'ie tsy mpañaleale aman' Añahare.

Borizan' Añahare Mat 6.25-33

²² Le nanao ty hoe re amo mpiama'eo: Zao ty volako ama'areo: ko tsimboetse ami'ty haveloñe toy, ty ho kamae' areo; ndra ami'ty sandriñe, ze hisaroña'areo. ²³ Zoke' ty mahakama ty haveloñe, naho ty saroñe i sandriñey. ²⁴ Haraharao o koàkeo: tsy mitongy, tsy mandrofotse, tsy aman-jahetse, tsy aman-driha, fe fahanan' Añahare; tsy ambone' o voroñeо hao ty fiai'areo? ²⁵ Aa vaho ia ama'areo te mahimahiñe ro mahatovoñe ty andro hiveloma'e ndra kede? ²⁶ Aa naho tsy mete' areo i raha kedekedey inoñe ty iveobeoha' areo o raha ila'eo? ²⁷ Rendreho o voñeо, ty fitiri'e; ie tsy mitoroñe, tsy manenoñe; Eka, itaroñako te, ndra i Solomona amy ze hene enge'e tsy nañirinkiriñe ty fisafora' ty raik' ama'e. ²⁸ Aa naho zay ty ampisikinan' Añahare o ahetséo, ie amoka aña androany vaho ahifik' an-toñak' ao te hamaray, àntsake ty hanafora'e anahareo, ry kede fatokisañe! ²⁹ Ko mitsoke ty ho kamae'areo ndra hinome' areo, le ko marimarike. ³⁰ Fonga paiae' o kilakila'ondatio rezay vaho arofoanan-dRae'areo te ipaia'areo ka. ³¹ Fe hotsohotsò heik' i Fifehea'ey le hatovoñe ama'areo ze he'e.

³² Ko hembañe, ry mpirai-lia kedeo fa non-dRae'areo ty hanolotse anahareo i Fifeheañey. ³³ Aletaho ty vara' areo le añomeo o rarakeo. Añentseño horoñe tsy mete voroke naho vara andindìñe ao tsy ho ritse, tsy harivoa' ty malaso, tsy ho vorohe' ty oletse. ³⁴ Fa ami'ty nampipohañe o fanaña' areoo, le ao ka ty arofo'areo.

Mitaoà

³⁵ Midiaña vania, le ampireheto o failo' areoo, ³⁶ vaho mihambaña am' ondaty mandiñe ty talè'e himpoly boak' aña engavao añeo: ie pok' eo naho mitrehentreheñe, le ho sokafe' iereo ami' ty manao zao. ³⁷ Haha o mpitoroñe ho zoe' i talè' iareoy mitao amy fiavi'gio! Eka! to t'itaroñako t'ie hidiañe vaho hampiambesatse iareo hikama, le homb'eo re hitoroñe iareo. ³⁸ He t'ie avy petsakaleñe ke mielizava, vaho zoe'e manahake zay, le ho haha i mpitoroñe rezay. ³⁹ Arendreho zao te, ie napota' ty tompon-traño

ty ora ho niloneahe' o malasoo, tsy ho nado'e ho foieñe i akiba'ey. ⁴⁰ Aa le mitaoa, fa ami'ty ora mahatondreñe anahareo ty hitotsaha' i Ana'ondatiy.

Ho Tojeha Mat 24.45-51

⁴¹ Hoe t'i Petera: O Talè, tsinara'o ama'ay v'i ohatsey, ke amy màroy? ⁴² Le hoe t'i Talè: Ia arè ty mpamandroñe migahiñe naho mahihitse, tinendre' ty bei'e hifeleke o añ'anjomba'eo hanonkantsonkañe mahakama ami'ty andro'e? ⁴³ Haha ty mpitoroñe, t'ie zoe' i talè'ey mifanehake hoe zay amy fibali'ey. ⁴⁴ Eka! to t'itaroñako t'ie horiza'e ho mpamandroñe o vara'e iabio. ⁴⁵ Fe naho zao ka ty fitsakorea' i mpitoroñey, te: Tambatse aña i talèkoy. Ie miorotse mamangovango o mpitoroñe, ndra lahy ndra ampela naho mitolon-tsorake vaho mitríke ho jike, ⁴⁶ ie pok'ao i talèm-pitoroñey ami'ty andro tsy itama'e naho ami'ty ora tsy apota'e; le ho trabotrabobe'e i mpamandroñey vaho hatrao'e fitobohañe amo tsereheñe. ⁴⁷ I mpitoroñe nahafohiñe ty satrin'arofo' i bei'ey, fe tsy nañalankañe, naho tsy nanao i satri'ey ro ho kimokimohen-doda. ⁴⁸ Fa ze tsy naharendreke, ndra t'ie nanao ty mañeva fofoke, ro mone ho filopiloreñe. Ze nimeam-bey, bey ka ty ipaiañe; ze nampañajarieñe bey le bey ka ty hampañondrohañe aze.

Te mone Harotsake

⁴⁹ Ty hametsahako afo an-tane atoy ty nivotrahako, le hàmake t'ie niviàñeñe! ⁵⁰ fe am-piliporañe hiliporako, aa le malovilovy ampara' t'ie tondroke. ⁵¹ Atao' areo ho ninday fifampilongoañe amy Taney hao ty flaviko? Tsie, hoe raho, te mone fifampiriàñe. ⁵² Henane zao, hifandietse ty lime mpitraok' anjomba, ho liere' ty telo ty roe naho ho liere' ty roe ty telo. ⁵³ Hifampiria aman-drae'e ty anadahy naho i anadahiy aman-drae'e; ty rene am'ty anak-ampela'e naho i anak-ampelay aman-drene'e; ty rafozan' ampela ami'ty vinanto'e ampela, le i vinantoy aman-drafoza'e.

o San' androo

⁵⁴ Hoe re amy lahialeñey: Ie tendreke rahoñe mionjoñe boak' ahan-drefañe aña, ro manao ty hoe: Ho avy ty orañe; le toe avy. ⁵⁵ Ie mitiok' atimo, le hoe ty asa'areo: Hatrovoke te anito, le eo zay. ⁵⁶ O soamiatrekeo! Mahafitsikarake ty tarehe' i likerañey naho ty tane toy nahareo; fe manao akore te tsy mahatsikarake ty vinta' o sa zao?

⁵⁷ Akore te tsy safirie'areo ty lala-mahity horiheñe. ⁵⁸ Ie indreza'o lia i rafelahi'oy mb' amy ziziy mb'eo, ihe mbe an-dalañey, imaneo filongoañe, tsy mone ho kororohe'e mb'an-jizy mb'eo naho hatolo' i ziziy amo mpandrohio, vaho hafetsa' i mpandrohiy am-balabey ao. ⁵⁹ Atalilikozazo te tsy hiboak' ao rehe ampara-pandroroña'o ze drala honka'e.

13

ty Fisolohoña

¹ Teo amy andro zay, te nitalilieñe amy IESOÀ ty raha nizò o nte Galilia natrao' i Pilato amy nisoroña' iareoy ty lio' iareoo. ² Tinoi' IESOÀ ty hoe: Atao' areo te bey hakeo te amo nte Galilia ila'e iabio hao i nte Galilia nizò i raha zay? ³ Tsie, fa inao ty hatoiko, Hibaibay ka nahareo naho tsy misoloho. ⁴ Aa ty amy folo-valo' amby nideboña' i fitilik-ambo' i Siloama rey, ie fonga nizamañe; atao'areo t'ie bey tahiñe te amy ze hene ondaty ila'e mpimo-neñe e Ierosaleme ao hao? ⁵ Aiy! fa inao: Toe hivetrake hambañ' amy zay ka nahareo naho tsy mibaboke.

⁶ Le hoe re te nandrazañe: Teo t'indaty nampambole sakoañe an-tetem-bahe'e ao. Ie nimb'eo hipay voa, tsy nahatendreke. ⁷ Aa hoe ty asa'e amy mpañalahala tetem-bahe'ey: Hete! fa telo taoñe ty nombako mb'etoa nipay voa amo sakoañe, fe tsy nanjò. Firao aña, ino ty ampiantoa'e o taneo? ⁸ Hoe ty natoi'e aze: O Roandria, Adono hey re ami'ty taoñe toy fa harikoboñeko haly vaho hasian-ditsake; ⁹ hera hamoa. Ie tsy lefe, zay vaho ho fira'e'o.

ty Rakemba Vokoke

¹⁰ Ie nañoke am-pitontonañe ao te SABOTSE t'IESOÀ, ¹¹ le indroy ty rakemba nikomboe' ty angatse folo tao-valo' amby; akore ty fibokofa'e kanao tsy nimete niyatate. ¹² Ie nivazoho' IESOÀ, le kinanji'e ami'ty hoe: O Rakembao, Fa hinaha amo favozoa'oo rehe. ¹³ Le nampitongoa'e fitañe vaho niyatate amy zao re nandrenge an' Andrianañahare.

¹⁴ Akore ty haboseha' i talèm-pitontonañey amy nampijangaña' IESOÀ amy SABOTSEiy kanao linaño'e ty hoe amy màroy: Eneñ'andro ty fitoloña' ondatio, mb'etoa amy zay nahareo ho tahàñe; fa tsy ami'ty andro Sabata.

¹⁵ Natoi' i Talè ty hoe: O ty soamañatreke! Tsy songa mañaha ty añombe'e ndra ty borike an-golobo'e ao ami'ty Sabotse hao nahareo vaho miroak' aze mb' an-drano hinoma'e? ¹⁶ Hehe ty rakemba tia! ana' i Abraàme, ie rinohy i mpañinjey folo taoñe valo' amby; tsy ho hahàñe amo fandrophizañe hao re ami'ty andro Sabata? ¹⁷ Amy saontsi'ey, fonga nisalatse o nanointoiñe azeo; fe niehak' amo hene fanoe'e fanjàkao i màroy.

ty Voam-baro Mat 13.31,32; Mar 4.30-32

¹⁸ Le hoe re: Ampanahafeñe ami'ty inoñ' i Fifehean'Añaharey? Ino ty hañirinkiriñako aze? ¹⁹ Ie ro hambañe ami'ty voam-baro rinao' ondaty naho nafitse'e an-tete'e ao, ie nitiry le nitombo ho hatae bey, vaho nitobe amo tsampa'eo o voron-tiokeo.

Ty Lalivay Mat 13.33-35

²⁰ Hoe ka re: Inon-ty añoharako i Fifehean' Añaharey? ²¹ Ie ro hambañe ami'ty lalivay rinambe' ty rakemba naho nalaro'e ami'ty mona telo fañaranañe ampara' ty nitraofa' i lalivaiy.

Ty Lalañe Maifitse Mat 7.13-14; 21-23

²² Nañoke amo rovao naho amo tanàñe erike t'IESOÀ ami'ty nañaveloa'e mb'e Ierosaleme mb'eo. ²³ Le teo ty nañontane aze: O Rañandria, he tsy ampeampe ty ho rombaheñe? Le hoe re: ²⁴ Imaneo fizilike i lala-maifitsey, amy te maro, hoe raho ama'areo, ty hipay himoak' ao fe tsy hahalefe. ²⁵ Ie miongake mampigaben-dalañe i talèn'anjom bay le hijagarodoñe alafe'e ao nahareo hañonkòñe amy lalañey hanao ty hoe: O Talè, sokafo zahay, le hanao ty hoe re: Tsy fantako te hirik' aia nahareo!

²⁶ Le hanao ty hoe iereo: Nikama naho ninoñe añatrefa'o eo zahay, ihe nañoke an-dalam-bei'ay ey. ²⁷ Fe inao ty ho asa'e, Amoeako t'ie boak' aia! songa midisoa ahy ty lo-tsereke retia! ²⁸ Fangololoihane naho fikodritanife ty ao, ie talakese' areo t'i Abraàme naho Isake naho Iakobe vaho ze hene mpitoky amy Fifehean'Añaharey, f'ie sinoike alafe'e ao. ²⁹ Hipotèake hirik' atiñanañe naho ahndrefañe aña t'indaty naho boak'avaratse vaho atimo aña hiambesatse amy Fifehean' Añaharey. ³⁰ Toe amo am-bohoo ty ho aolo, naho amo lohàñe eio ty ho fara-gidro'e.

Mandala Ierosaleme Mat 23.37-39

³¹ Tamy àndro zay, niheo mb'ama'e mb'eo ty Fariseo ila'e nanao ty hoe: Miengà! mihankàña! fa hañohofa' i Heroda loza. ³² Le hoe ty natoi'e: Akia, misaontsia amy fanalokey ty hoe: Inao! hañary kokolampa naho hanaha hey te anito naho hamaray, vaho hitsatok' amy fitalifirakoy te herone. ³³ Aa le hijelanjelañe te anito naho hamaray vaho herone; fa toe tsy mivetrak' alafe' Ierosaleme ty mpitoky.

³⁴ Ry Ierosaleme, Ierosaleme, mpamono mpitoky naho mpametsa-bato amo niraheñe ama'oo, im-pire hao te ho natontoko o keleia'oo, manahake ty anontona' ty rene-akoho o ana'eo ambane' o ela'eo? f'ie tsy nipaoke.

³⁵ Inge! fa nadoñe ama'areo kòake ty anjomba' areo. Itaroñako te: toe tsy hahaisak' ahy ka nahareo ampara' te avy ty hatao'areo ty hoe: Haha ty mitotsak' ami'ty tahina' IEHOVÀ.*

14

O SABATAO

¹ Teo t'ie nizilik' añ'anjomba' ty mpiamo beim-Pariseoo hikama ami'ty SABOTSE, le fonga nikirok' aze. ² Aa hehe te añatrefa'e eo t'indaty voa ty trinike. ³ Le hoe ty ontane'IESOÀ amo mpahay Hàkeo naho amo Fariseoo: No' i Hake hao ty mampijangañe ami'ty SABOTSE? ⁴ Nianjiñe avao iereo, aa le rinambe'e naho jinanga'e, vaho nampiavote'e. ⁵ Le hoe re tam' iereo: Ia ama' areo naho tafajoroboñ' an-kadaha ao ty birì'e ndra ty añombe'e, ro tsy hañakatse aze aniany ami'ty andro Sabata? ⁶ Aa le tampets' eñoeño iereo amy hoe zay.

Ty Ambahiny Mandribariba

⁷ Ie nirendre'e o nambarañe nifatrifatry hitsotsèfotse aolo eio, le nirazañe'e ty hoe: ⁸ Naho eo ty mañambara azo homb' añ'enga vao aña, ko mitsoretak' aolo ey, ke ampihovae'e ty aman-kasy mandikoatse azo; ⁹ ie amy zay, ho saontsie' i nampihova anahareo roey ty hoe: Ampiambesaro t'indaty toy, le an-tsalamatse ty hinankanankaña'o mb' amboho ao. ¹⁰ Aa naho ambaràñe, miambesara amo èpakeo, ie avy i nitaoñe azoy, le hanoa'e ty hoe: O rañetse, mionjona mb'aolo ey; le hanankasin-drehe añatrefa' o miharo fiambesatse mikama ama'oo. ¹¹ Harèke ty mitrotroaboke, vaho haonjoñe ty mirèke.

¹² Hoe ka re amy nañambara azey: Ie mañalankañe fikama antoandro ndra hariva, ko mikanjy o rañe'oo, ndra o roahalahi'oo, ndra o longo'oo, ndra o mpañaleale marine azoo, tsy mone hambara' iereo ka, le ho vinale i azoy. ¹³ F' ihe manao takataka, koiho o rarakeo, o komboo, o kepekeo vaho o goao. ¹⁴ Le ho soatata rehe amy t'ie tsy hahavale. Hondroheñe ami'ty fivañon-ko velo' o vantañeo i azoy.

ty Sabadidake Bey

¹⁵ Ie nahajanjiñe zay ty niambesatse nitrao-pikama ama'e le hoe ty asa'e ama'e: Soatata ze hikama amy Fifehean' Añaharey. ¹⁶ Le hoe ty natoi'e: Teo t'indaty nañalankañe sabadidake naho nikoike maro, ¹⁷ ie tendreke i sabadidakey le nampihitrife'e mpitoroñe hanao ty hoe amo nañambarà'eo: Antao fa hene hinalankañe. ¹⁸ Fe, songa nihalaly fihankañañe. Hoe ty valoha'e: Fa nivily tane raho le tsi-mete tsy homb'eo hañente aze, aa le mihalaly t'ie hitotse ama'o hey. ¹⁹ Hoe ka ty raike: Nikalo katràka folo raho le hihitrike hibiribiry iareo. Iantofo koahe o halalikoo. ²⁰ Hoe ka ty raike: Nañenga-vao raho, le tsy eo ty hombako

* 13:35 Sab 118:26

mb'eo. ²¹ Aa le nimpoly i mpitoroñey vaho hene natalili'e amy talè'ey. Viñetse amy zao i talen' anjombay le hoe ty asa'e amy mpitoroñey: Masikà, akia mb'an-damoke mb'eo naho mb'añ'oloñolo' o tanàñe o mb'eo le ampihovao mb'etoa o rarakeo, o kepekeo, o feio vaho o komboo. ²² Le hoe i mpitoroñey: O Rañandria, kila heneke i nandilia'oy, fa mbe malalake. ²³ Le hoe i beiy amy mpitoro'ey: Akia mb'an-dalañe mb'eo, naho mb'amo lalan-tsilekeo vaho fonga aziro himoake hahàtseke ty trañoko. ²⁴ Taroñeko te ndra raik' am' ondaty nikoihekoo tsy hitsòpek' o ahandrokoo.

Ty Sata o Mpiama'eo

²⁵ Havorontsan-dahialeñe ty nindre fañavelo am' IESOÀ. Ie nitolike, le nanoa'e ty hoe: ²⁶ Naho eo ty miheo amako fa tsy mahafary rae naho rene naho valy naho anake naho rahalahy naho rahavave, eka, toe ty fiai'e, le tsy mete ho mpiamako. ²⁷ Tsy noko ho mpiamako ka ze tsy mitarazo ty hatae ajale'e naho manonjohy ahy. ²⁸ Aa vaho ia ama' areo, naho mañoreñe fitalakesañ' abo, ro tsy hitoboke hey hañereñere ty ho vili'e, hahaoniñe ke ho fonitse, ²⁹ ke, ie napeta'e o mananta'eo naho tsy nahafonitse, le ho kizahe' ze hisamba, ³⁰ ami'ty hoe: Namototse nañoreñe indatiy fe tsy nahafonitse.

³¹ Ia ka ty mpanjaka, hialy ami'ty mpanjaka hafa, ro tsy hitoboke hey hisafiry, hera, ami'ty rai-ale re ro haharebake ty aman-droe-ale? ³² Aa naho tsie, ie mbe aña ro hañitrifeñe ty hipay filongoañe ama'e. ³³ Aa le tsy lefe ho mpiamako ka t'ie tsy songa mahafoe ze hene fanaña'e.

³⁴ Soa o sirao; f'ie nàmoñe, inon-ka ty hahareizan-tave aze? ³⁵ Tsy mañeva o taneo ndra i zolokey zay, fa hariañe avao. Ze aman-dravembia hijanjiñe, Mijanjiña.

Ty Añondry Motso Mat 18.12-14

15

¹ Hene niropak' am' IESOÀ amy zao o mpamory vili-lohao rekets' o bey hakeoo hijanjiñe aze. ² Le hoe ty fitreontre' o Fariseoo naho o mpanokidilio: Mandrambe mpanan-tahiñe t'indaty tia vaho mitrao-pilintseñe ama'e.

³ Aa le nirazaña'e ty hoe: ⁴ Ia ama' areo aman' añondry zato, ie rereke ty raike, ty tsy hienga i sivampolo sive' amby rey an-tameañe ey heike, hihitrihitry hitsoke i motsoy ampara' te tendreke? ⁵ Ie isa'e, le anoe'e ega vaho ifalea'e, ⁶ le ie pok' añañ anjomba'e ao, atonto'e o rañeo naho o marineo vaho anoe'e ty hoe: Antao hitrao-kaehak' amako, fa nitreako i añondriko nimotsoy. ⁷ Itaroñako te hirebeke ty andindiñe ao ami'ty bei-hakeo misoloho te ami'ty maren-tane sivampolo sive' amby tsy aman-kisolohoa'e.

Ty Tsanganolo Motso

⁸ Ia ka ty rakemba aman-tsanganolo folo, ie motso ty raike ro tsy handrehetse jiro, hipio anjomba hikodebe ampara' te isa'e? ⁹ Ie zoe'e ro mamory o rañeo naho o mpifankarine ama'eo hanao ty hoe: Antao hitrao pinembanembañ' amako; fa nitreako i tsanganolo nimotsoy. ¹⁰ Itaroñako te firebehañe ty añatrefa' o anjelin' Añahareo ami'ty fibaboha' ty mpanan-tahiñe raike.

Ty Anadahy Rereke

¹¹ Tinovo'e ty hoe: Teo t'indaty aman'anadahy roe. ¹² Le hoe ty zai'e aman-drae'e: O aba, atoloro ahy ty anjara lovako. Le zinara'e am' iereo

ty fiveloma'e. ¹³ Ie modo ty andro tsy ampeampe le hene natonton-jai'e naho nifokofoko mb'an-tsietoitane aña vaho nirite'e ami'ty hatsivokarañe o fanaña'eo. ¹⁴ Ie nikapioke, nitondroke ty san-kerè mena amy taney vaho nirota. ¹⁵ Aa le niavotse re, noly amy t'indaty tempo-tane nañirak' aze hiara-dambo an-tete'e aña. ¹⁶ Le naïna'e te ho nañatseke ty tro'e amo hara'e fihafen-damboo, fe tsy eo ty namahañe aze.

¹⁷ Ie nitombalin-dre, le hoe ty fisafiri'e: Firefire amo mpikarama amandraeko aña ro tsy enen-kaneñe, zaho mifeake ty kerè atoy! ¹⁸ Hiavotse raho himpoly mb' aman-draeko aña, le hanoeko ty hoe: Ry aba, amankakeo andindinney naho ama'o raho ¹⁹ le tsy mañev' ahy te hatao ana'o, ehe apoho ho mpiamo tsimañaja'oo. ²⁰ Aa le niongake re nimpoly mb' aman-drae'e aña. Ie mbe eñe te nitalaken-drae'e naho niferenaiña'e; vaho nihitrihitry mb' ama'e mb'eo nametreke ty fititia'e naho norofa'e. ²¹ Fa hoe ty nanoa' i ana'ey: O aba, aman-tahiñe andindinney naho ama'o raho, tsy mañeva ahy ty hatao ty hoe ana'o ka. ²² Fe hoe ty rae'e amo mpitoro'eo: Hitrifo masika kirahe i sarimbo soay le isaroño; añombeo bange o taña'eo naho hana o tombo'eo ²³ le endeso atoy i ana-bosy vinondrakey, lentao; naho antao hikama vaho hifale. ²⁴ Amy te nihomake ty anako toy naho nivañom-beloñe, nimotsso vaho nitrea. Aa le nifale iereo.

²⁵ Tan-tetek' aña i zoke'ey; aa ie nañarine i anjombay, le nahatsanom-peon-kafaleañe naho tsinjake. ²⁶ Le tsinikao'e ty mpitoroñe, naho nañontane ty foto' o raha zao. ²⁷ Le hoe ty nanoa' i mpitoroñey: Nivotrak' atoy i rahalahi'oy; aa kanao nijaranjaiñe i anadahi'ey, le vinonon-drae'o i ana-bosy vinondrakey. ²⁸ Nioroñoroñe amy zao re nifoneñe tsy hizilik' ao; aa le niakatse ty rae'e hañohò aze. ²⁹ Fe hoe re aman-drae'e: Hete, fa haehae ty nitoroñako azo, le tsy nililareko ndra mbia' mbia o lili'oo; fe mbe lia'e tsy nitolara'o ndra ty vi'e hifalefaleako amo rañekoo. ³⁰ Ie niloneake eo i ana-dahi'o nampianto ty harea'o amo tsimirirañeoy, le linenta'o i temboay vinondrakey. ³¹ Aa hoe ty saontsin-drae'e tama'e: O anake, toe amako etoañe nainai'e rehe; fonga azo o hanañakoo. ³² Fe evæ'e t'ie mifale naho mirebeke; amy te nihomake i rahalahi'oy f'ie nibodañe, nirereke fe nitendreke.

16

Ty Mpamandroñe tsy Jefa'e

¹ Tinovo'e ty hoe amo mpiama'eo: Teo ty mpañaleale nitalilieñe te nandritse ty vara'e ty mpamandro-panaña'e. ² Aa le kinanji'e naho nanoa'e ty hoe: Akore ze o tsinanoko ty ama'o zao? Volilio o famandroña'oo, fa tsy ho mpamandroñe ka. ³ Le hoe ty fitsakorea' i mpamandroñey: Inom-barè ty hanoeko kanao hafaha' i talekoy amy famandroñakoy? Tsy lefeko ty miava, le manalats' ahy ty mangatake. ⁴ Inao arè ty hanoeko, soa te, ie navik' ami'ty maha mpamandroñe ahy, le mbe ho rambese' iereo aña' anjomba ao. ⁵ Aa le songa kinanji'e homb'ama'e ze nisongo amy talè'ey, le hoe ty asa'e amy valoha'ey: Fire ty songo'o amy talèko? ⁶ Le hoe re: Solike zato fañaranañe. Le hoe re ama'e: Masika! rambeso o takelan-tsongo'oo le miambesara, sokiro ty hoe: limampolo. ⁷ Le hoe ka re ami'ty raike: Fire ty songo'o? le hoe re: Ampemba zato gony. Hoe ka ty asa'e: Ingo, rambeso o takela'oo, le valom-polo ty isorata'o. ⁸ Aa le rinenge' i bei'ey i mpamandroñe tsy jefa'ey, amy t'ie nampiboake hilala; toe mahilala amy tarira'ey o ana' ty voatse toio te amo anankazavañe. ⁹ Le hoe raho ama' areo: Paiao rañetse arè amo vara tsy

vokatseo, soa te ie milesa, ro mbe ho rambeseñe amo anjomba nainai'eo amy hamodoañey. ¹⁰ Ze vañom-po ami'ty kede, ho vañom-po ami'ty bey; ze tsy to ami'ty kede tsy ho to ami'ty bey. ¹¹ Aa naho tsy malili-po amo vara tsy vokatseo nahareo, ia ty hampamandroñe anahareo o vente'eo. ¹² Le ie tsy vañoñe ami'ty vara' ondaty, ia ty hanolots' anahareo ty anahareo? ¹³ Tsy eo ty mpitoroñe maha-fitoron-droe; ho heje'e ty raike vaho hikokoa'e ty raike; ke ho rañete'e ty raike vaho ho rihie'e ty raike. Tsy mahafitoroñe an' Andrianañahare naho o varao nahareo. ¹⁴ Ie nahajanjiñe i hoe zay o Fariseoo, kanao mpitea-drala, le nikizak' aze. ¹⁵ Aa hoe ty nanoa'e: Mpaniom-batañe am' ondatio nahareo; fe arofoanan' Añahare ty arofo' areo, amy te ze atao' ondatio ho vara ro tiva am-pivazohoan' Añahare.

¹⁶ Pak' amy Jaona naho o Mpitokio t'i Hake; namototse henane zay le tseizeñe i Fifehean'Añaharey, vaho fonga mifanisike hizilik' ao; ¹⁷ haivañe ty hihelaña' i likerañey naho ty tane toy ta ty hamaohañe ndra ty pininïten-tsokitse amy Hake ao.

Sara-baly

¹⁸ Ze mañary valy hañenga ty hafa ro mañarapilo; vaho mañarapilo ka ty mañenga rakemba narian-dahy.

Ty Mpañaleale naho i Lazarosy

¹⁹ Teo ty mpañaleale, mpisaron-tsarimbo malò-mavo naho leny matify, niaiñañoleñañe an-kafalefaleañe handro an-kandro. ²⁰ Teo ka ty rarake atao Lazarosy, atseke bae, nakonenak' añ'ila' ty lalambei'e eo, ²¹ le naina'e te hitsimoke ty nifitafita am-pandambaña' i mpañalealey, te mone o amboao ro nomb' ama'e nitsela o bae'eo. ²² Ie nihomake i rarakey, le nente' ty anjely mb'añ'araña' i Abraàme aña; nihomake ka i mpañalealey, le nalenteke. ²³ Ie nanoen-tsamporerak' an-tanen-dolo ao i mpañalealey le niandra vaho nahatalake i Abraàme rekets' i Lazarosy añ'araña'e eo, ²⁴ vaho nikoiha'e ty hoe: O aba, Abraàme, tretrezo, ehe ampihitrifo t'i Lazarosy handò ty lengon-drambo-pità'e an-drano hampanintsiñe ty lelako; fa loho malovilovy raho añ'afó mirebareba atoy. ²⁵ Fa hoe ty natoi' i Abraàme: O anake, tiahio te hene niazo'o o raha fanjakao ihe mbe niveloñe, fa raty ka ty niazo' i Lazarosy; ohoñen-dre henaneo te ihe malovilovy. ²⁶ Likoare' i hoe zay, najadoñe añivon-tikañ' ey ty herakerake jabajaba tsy lefe ty atoy tsacheñe mb'ama'areo ao vaho tsy hahatsake mb'ama'ay mb'etoy ka ty boak' ey. ²⁷ Le hoe re: Aa naho zay ry raeko, mihalaly ama'o: ampihitrifo mb' añ' anjomban-draeko mb'eo, ²⁸ fa lime ty rahalahiko hitaroñañe, tsy mone ho avy am-peh' ohatse atoy. ²⁹ Aa hoe t'i Abraàme tama'e: Am' iareo t'i Mosè naho o Mpitokio; ampitsendreño. ³⁰ Le hoe ka re: Aiy! ry aba Abraàme; fa naho mb' am' iereo mb'eo ty mivañom-beloñe, le tsi-mete tsy hisolohlo. ³¹ Hoe re tama'e: Naho tsy haoñe' iereo t'i Mosè naho o Mpitokio, le tsy hahafiato ka ndra te eo ty mivañom-beloñe boak' an-kavilasiy.

17

¹ Le hoe re amo mpiama'eo: Tsi-mahay tsy ho avy avao ty mampitsikapy fa hankàñe ami'ty 'ndaty namalañe aze! ² Hamake te anampezam-bato fandisanañe ty fititia'e vaho ajoroboñe an-driak' ao, ta t'ie hanirìka ty raik' amo kedekede retoa.

³ Mitaòa! Ie anaña'o hakeo ty rahalahi'o, endaho, le iheveo t'ie misolohlo.

⁴ Ie mandilatse ama'o im-pito ami'ty andro raike, fe mibalike impito

hihalaly ama'o manao ty hoe: Misoloho raho. Le iheveo. ⁵ Le hoe ty asa' o Firaheñeo amy Talè: Tompeo o fatokisa'aio. ⁶ Tinoi' i Talè ty hoe: Ndra te kede manahake ty voam-baro ty fatokisa' areo le ho saontsie' areo o lamonty eroañeo ty hoe: Miromata le miketsà an-driak' aña, le hano'e.

⁷ Ia ama'areo, te amam-pitoroñe miava ndra miarak' añondry, ie mimpoly boak' an-tetek' aña ro hanoa'e ty hoe: Mb'etoa, miambesara, mikamà? ⁸ Te mone, inao ty hanoa'o: Halankaño o hanekoo, midiaña, le atrao raho ampara' te nihinañe naho ninoñe; zay rehe vaho hihinañe naho hinoñe. ⁹ Handriañe'e hao i mpitoroñe nanao i nandilia'eiy? ¹⁰ Aa inahareo ka, ie fa nañeneke ze hene nandiliañe, anò ty hoe: Mpitoroñe tsy jefa'e zahay, ty nandiliañ' anay avao ty nanoe'ay.

Ty Angamae Folo.

¹¹ Ie nionjoñe mb'e Ierosaleme mb'eo, le nioza aña'efe-tane' i Samaria naho i Galilia naho ¹² nizilik' an-drova ao vaho nifanalaka' ty angamae folo lahy, nijohañe ey ¹³ nampipozake ty hoe: Ry IESOÀ, Tale, ferenaiño zahay. ¹⁴ Nivazoho'e le nanoa'e ty hoe: Akia, miboaha amo mpisoroñe. Aa ie mbe nihitrike mb'eo le nijangañe. ¹⁵ Aa naho nirendre' ty raik' ama'e t'ie nali le nibalike nampipoñake renge aman' Añahare, ¹⁶ naho nihojoke, laharañ' am-pandia, nañandriañe; nte-Samaria indatiy. ¹⁷ Le hoe ty ontane' IESOÀ: Tsy songa nilioveñe hao i folo lahy rey? Aia ty sive? ¹⁸ Tsy nahatendreke raike hao ty hibalike handrenge an' Andrianañahare naho tsy ty ambahiny toy? ¹⁹ Le hoe re tama'e: Mitroara, mañaveloa, fa nahajangañe azo o fatokisa'oo.

Ty Fitotsaha'e Indraike Mat 24.23-28, 37-41

²⁰ Teo te, nañontane aze o Fariseoo ty hitotsaha' i Fifehean' Añaharey; le hoe ty natoi'e: Tsy tendre-biribiry ty hivotraha' i Fifehean' Añaharey; ²¹ tsy eo ty hanao ty hoe: Indroke ie! ndra, Intiañe! Fa toe ama'areo ao i Fifehean' Añaharey.

²² Le hoe re amo mpiama'eo: Ho tondroke ty andro hisalalà' areo hahaisake ty raik' amo andro' i Ana' ondatiio, fe tsy hahaoniñe. ²³ Hoe ty hanoe' iareo. Indrok' ie! ndra Intiañe! ko mandeha, ko mañorike iareo. ²⁴ Ho hambarne ami'ty helatse mitsopelatse aña'ilà' i likerañey naho mireandreañe pak' aña' ilan-dikerañe eñe ka i Ana' ondatiiv amy andro'ey. ²⁵ F'ie tsi-mahay tsy holàñeñe raha maro hey vaho ho tsambolitio' ty tariratse toy.

²⁶ Hambañe ami'ty andro' i Noe ty ho oniñe aña'andro' i Ana'ondatiy: ²⁷ nikama iereo, ninoñe iereo, nañenga valy iereo, le natolotse ho engaeñe iereo pak' amy andro niziliha' i Noe am-po' i samboiy; tojeha amy zao i haempoempoañe nañopo iareo iaby. ²⁸ Hanahake tañandro' i Lota ka: nikama iereo, ninoñe iereo, nivily naho nandetake iereo, nitongy iereo, nañoreñe iereo; ²⁹ fe tamy andro niavota' i Lota i Sodoma, le nidoindoiñ' afó aman-tsolifara boak' andindìñe aña, nampangotomomoke iareo iaby. ³⁰ Ho hambarne amy zay ty andro hisodeha' i Ana'ondatiy.

³¹ Amy andro zay, asoao tsy hizotso hangalake ty vara'e aña'anjomba ao ty an-tafo'e ey; izay ka ty an-tetek'ao, Ee te tsy himpolia'e ze raha ao.

³² Tiahio ty vali' i Lota, ³³ Ndra iaia mipay handromba-piay ro hamoe aze; fe ndra iaia hamoe-piaiñe ro handrombak' aze. ³⁴ Itaroñako te, Roe ty hitrao-tihy amy haleñey le ho rambeseñe ty raike naho hadoke ty ila'e.

³⁵ Hitrao-pandisañe ty roe: ho rambeseñe ty raike naho hapoke ty ila'e.*
³⁷ Le natoi' iareo ty hoe: Aia, Rañandria? Le hoe ty natoi'e: Ami'ty fate ey ty ivoria' o koàkeo.

18

ty Rakemba naho ty Zizy

¹ Aa le nirazaña'e te tsi-mahay tsy mihalaly nainai'e ondatio fa tsy hilesa;
² ami'ty hoe: Teo ty mpizaka an-drova tsy nañeveñe aman' Añahare naho tsy nañaoñe ondaty. ³ Tamy rovay ty vantotse nitolom-pihose aze ami'ty hoe: Ehe meo to amy rafelahikoy. ⁴ Tsy nipaoke hey re, fe an-kaela'e, hoe ty fitsakorean-tro'e: Ndra te tsy mampiholibalà ahy t'i Andrianañahare mbore tsy mpanoin'i ondaty, ⁵ fe ami'ty fitsoborea' i vantotsey ro hitolorako to tsy mone hamono hakeo ahy ty fibelobelo'e mb'etoa boak'andro!

⁶ Tinovo' i Talè ty hoe: Janjiño i saontsim-pizaka kofofoakey. ⁷ Aa tsy ho mean' Añahare to hao ondaty jinobo'eo, ie mitoreo ama'e handro an-kaleñe? Hampandiñisa'e ela hao? ⁸ Itaroñako te homea'e to masika. Fa ie amy zao, naho totsake etoañ' i Ana' Ondatiy, mbe hahatendreke fatokisañe an-tane atoy hao?

ty Fariseo naho ty Mpamory Vili-loha

⁹ Hoe ty nirazañe'e ty amo mpihaboke ho malio tahiñe fe mpañofoke ondatio avao: ¹⁰ Teo te nionjom-b'añ' Anjomban' Añahare mb'eo ty roe hiloloke; ty Fariseo vaho ty mpamory vili-loha. ¹¹ Nijagarodoñe eo i Fariseoy nañosi-batañe ami'ty hoe: O Andrianañahare, mañandriañ' Azo raho te tsy manahake ondaty ila'eo—o mpisenge herio, o tsivokatseo, o karapiloo, antsake o mpamory vili-loha roañe. ¹² Mililitse in-droe ami'ty hereñandro vaho fonga ajoko ao ty fahafolo' ze azoko. ¹³ Nifimpìñe ey ka i mpamory vili-lohay, tsy nahafiandra-pihaino mb' andikerañey, fa namangovango araññañe, nanao ty hoe: Ry Andrianañahare itretrezo fa bei-hakeo. ¹⁴ Itaroñako te, nanjò to indatiy te nizotso mb' an-kiboho'e mb'eo te amy raikey; amy te hareke ze mirengevoke vaho haonjoñe ty mirèke.

Mitata Ajaja Mat 19.13-15; Mar 10.13-16

¹⁵ Teo ty ninday anak'ajaja mb'ama'e ho tsapà'e; f'ie niisa' o mpiama'eo le nendahe' iereo. ¹⁶ F'ie kinanjí' IESOÀ homb' ama'e le nanoa'e ty hoe: Adono homb' amako mb'etoa o anak' ajajao, le ko sebañeñe; fa ho amy ze hambañ' ama'e i Fifehean' Añaharey. ¹⁷ Eka! to t'itaroñako te tsy hizilik' ao ze tsy mandrambe i Fifehean' Añaharey manahake ty anak'ajaja.

Ty Mpañarivo Tòra'e Mat 19.16-30; Mar 10.17-31

¹⁸ Teo ty roandriañe nañontane aze ty hoe: O Talè soa, Ino ty hanoeko handovàko haveloñe nainai'e? ¹⁹ Le hoe t'IESOÀ tama'e: Manao akore te zaho ro atao'o Soa? Tsy eo ty soa naho tsy Raik' avao, i Andrianañahare.

²⁰ Fohi'o o lilio:
Ko mañarapilo, ko mañoho-doza,

ko mikizo, ko manao talily vilañe, miasia an-drae'o naho an-drene'o*?

²¹ Hoe ty natoi' indatiy: Fa nambenako iaby irezay boak' ami'ty nahakedekedek' ahiko. ²² Ie jinanjí' IESOÀ le hoe re ama'e: Mbe poke raha raike rehe: Aletaho iaby o hanaña'oo le manjarà amo rarakeo, naho

* **17:35** 36 Roe ty ho an-tetek'ao, ho rambeseñe ty raike le hapoke ty ila'e. (Mat 24:40) * **18:20**
Avo 20:12-16

hanam-barà andindìñe ao rehe, vaho antao hañorik' ahy. ²³ Ie jinanji' indatiy le nimoremoretse amy te mpañaleale.

²⁴ Aa ie nioni' IESOÀ i fiotsora'ey le hoe re: Hatsembohañe ty hiziliham-pañaleale amy Fifehean' Añaharey! ²⁵ Eka, toe mora ty hampipotirañe tali-randra[†] an-kirim-pitrebek'ao ta ty hiloaha' ty mpañaleale am-Pifehean' Añaharey. ²⁶ Aa le hoe o nahajanjiñeo: Aa vaho ia ka ty mete rombaheñe? ²⁷ Hoe ty natoi'e: Ze tsy lefe' ondaty, lefen' Añahare.

Valesoa t'ie Mitifà-bi-mae Mat 6:33, 19.27-29; Mar 10.28-30

²⁸ Hoe t'i Petera: Vazohò! hene nafoe'ay naho nanonjohy Azo. ²⁹ Le hoe re am' iereo: Eka! to t'itaroñako te, tsy eo ty nampidoñ' anjomba ndra roae ndra roahalahy ndra valy ndra keleiañe ty amy Fifehean' Añaharey, ³⁰ ty tsy handrambe mandikoatse an-tsà zao vaho haveloñe nainai'e amy sa tsy ho modoy.

ty Mafaitse naho ty Mamy Mat 20.17-19; Mar 10.32-34

³¹ Natola'e amy zao i folo ro' amby rey vaho nanoa'e ty hoe: Inao, mionjomb'e Ierosaleme mb'eo tika le ho heneke ze pinate' o mpitokio ty amy Ana'ondatiy. ³² T'ie hafotetse am-pità' o kilakila ondatio ho kobiheñe, ho terateraeñe naho handroràñe, ³³ le ho lafaen-karavantsy vaho havetrake. F'ie hivañom-beloñe ami'ty andro fahatelo. ³⁴ Tsy napota' iareo i hoe zay, ndra loli'e, fa naetake am' iareo i saontsy zay le tsy nifohiñe i enta'ey.

I Goay Mat 20.29-34; Mar 10.46-52

³⁵ Aa ie nitotoke i Hieriko, teo t'indaty fey nitozòk' aña'olon-dalañe ey nangatake. ³⁶ Tsinano'e ty fandrióna' i lahialeñey, le nañontanea'e ty lengo'e, ³⁷ vaho nanoañe ty hoe: Miary ey t'IESOÀ nte-Nazareta. ³⁸ Le nikoiha'e ty hoe: Ry IESOÀ, ana' i Davide, tretrezo raho. ³⁹ Nendaha' o mpiaoloo re hampianjiñ' aze, fe antsake t'ie nikoike ty hoe: Ry ana' i Davide, Iferenaiño! ⁴⁰ Le nijohañe t'IESOÀ vaho nampindese'e mb'ama'e. Ie narine, le nañontanea'e ⁴¹ ty hoe, Ino ty tea'o hanoko? Le hoe re: O Rañandria, ty hahatreavako. ⁴² Hoe t'IESOÀ tama'e, Mahaisaha, fa nampibæk' azo ty fatokisa'o. ⁴³ Nahatre aamy zao re vaho nañorik' aze nañonjoñe an' Andrianañahare, ie hene nahaisake zay i màroy le nandrenge i Abo-Tiáñe.

19

I Zakaiosy

¹ Ie tafazilike t'IESOÀ le ho niranga Ieriko, ² fe inge t'indaty atao Zakaiosy, bei' o mpamory vili-lohao, toe mpañaleale, ³ nipay handrendreke IESOÀ, fa aia te ho nimete amy lahialeñey, ie nibory. ⁴ Aa le nihitrihitry mb'aolo ey re nanganike sakoañe hahaisake, ie hiary mb'eo. ⁵ Aa naho nitandrifea' IESOÀ, le niandra naho niisa'e vaho nanoa'e ty hoe, O Zakaiosy, masikà! mizotsoa, fa tsi-mahay tsy hiantraño ama'o raho te anito. ⁶ Nihavoa re, nizotso naho nampihovae'e aña' anjomba'e ao an-kaehake.

⁷ Ie nahaisake, le niñeóñeñe ty hoe i maroy: Nizilike ao re hiambahiny ami'ty ondaty beihakeo. ⁸ Fe niongake t'i Zakaiosy nanao ty hoe amy Talè: Intoa, Rañandria, hatoloko amo rarakeo ty an-tsasa' o fanañakoo; aa naho eo t' indaty nidramoteko le havahako in-empatse. ⁹ Le hoe t'IESOÀ tama'e: Anindroany te nizilik' ami'ty anjomba toy ty famotsorañe, amy t'ie ka ro

[†] 18:25 Gr: rameva fa niota am-pandikañe

amori' i Abraàme. ¹⁰ Ty hitsoeke naho hañaha o rerekeo ty nivotraha' i Ana'ondatiy atoy.

ty Tsanganolo Folo Mat 25.14-30

¹¹ Ie nahajanjiñe izay iereo, le nitovoña' IESOÀ fandrazañañe amy te nitotoke Ierosaleme naho natao' iereo te hatsatoke aniany i Fifehean' Añaharey, ¹² hoe re, Teo ty ana-donake nañavelo mb' an-tane aña, handrambe fifeheañe, vaho himpoly. ¹³ Aa le kinanji'e ty mpitoro'e folo, nitinolora'e tsanganolo folo vaho nanoa'e ty hoe, Manoa balike ampara' ty fimpoliko. ¹⁴ Ie amy zay, nalaiñe aze o boriza'eo vaho nampihitrife' iereo ty hañorik' aze mb'eo hanao ty hoe: Tsy no'ay itiañe te hifehe. ¹⁵ Aa ie tafampoly, naho fa ama'e i fifeheañey, le nampikanjie'e i mpitoroñe nitolora'e i volay rey hahafohiñe ty niazo' iereo an-takinake. ¹⁶ Avy ty valoha'e nanao ty hoe: O Rañandria, fa nitovoñe tsanganolo folo i tsanganolo'oy. ¹⁷ Le hoe re tama'e: Fanjaka, ry mpitorom-bañoñeo, kanao nalili-po ami' ty pininio'e rehe, mifeleha rova folo. ¹⁸ Avy ka ty faharoe nanao ty hoe: O Rañandria, nitovoñe tsanganolo lime i tsanganolo'o rey. ¹⁹ Le hoe re tama'e: Mamehea rova lime ka. ²⁰ Pok'eo ka ty raike, nanao ty hoe: O Rañandria, intia i tsanganolo'oy fa nakafiko ami'ty masoara. ²¹ Toe nañeveñako fa ondaty sarots'arofo: Mandrambe ty tsy nado'o, naho manifo ty tsy nitongise'o. ²² Aa hoe re ama'e: O vava'oo ty hizakako azo, ty mpitoroñe tembo tia, toe napota'o t'ie mpidiby, mandrambe ty tsy napoko, naho mitatake ty tsy nandrarahako; ²³ Aa vaho akore te tsy napo'o amy bankey i dralakoy, hangalako rekets' ana'e amy fibalikoy? ²⁴ Le hoe re amo nijohañe: Rambeso ama'e i tsanganoloy le atoloro amy amantsanganolo foloy. ²⁵ (Aa hoe ty lie' iareo: O Rañandria, ie amam-bogady folo!) ²⁶ Itaroñako te mbe ho tolorañe ty manañe; fe hapontañ' amy tsy manañey ndra ze ama'e. ²⁷ Aa naho i rafelahiko nalaiñe ty hameheako rey, endeso mb'etoa, zamano añatrefako eo.

Ty Figodañañe an-dRebeke Mat 21.1-9; Mar 11.1-10; Jao 12.12-19

²⁸ Ie fa nitsara, le niaolo am-pionjonañe mb'e Ierosaleme mb'eo. ²⁹ Aa naho nitotoke i Beit-Pagè naho i Betania ami'ty vohitse atao Oliva eo re, le nirahe'e ty mpiama'e roe ³⁰ ami'ty hoe: Akia mb' an-tanañe ey hoek'ey; ie mimoak' ao, le hahaisake ty ana-borìke mirohy, mbe tsy ningira' ondaty; idraito le endeso mb'atoa. ³¹ Lehe eo ty mañontane ty hoe: Ino o añaña' areo azeo? Le anò ty hoe ama'e: Ipaia' i Talè. ³² Niongak' amy zao i nampihitrifeñe rey vaho nizoe' iereo hambarñe amy sinaontsi'ey. ³³ Aa ie nañaha i ana-borìkey, le hoe o tombo'eo: Inoñe ty ampidraita' areo o ana-borìkeo? ³⁴ Ipaia' i Talè, hoe iereo. ³⁵ Le nasese' iereo mb' amy IESOÀ mb'eo, naho nalama' iereo amy ana-borìkey o lamba' iareoo, vaho ningira' IESOÀ. ³⁶ Ie nañavelo le nandafike saroñe an-dalañe ey iereo. ³⁷ Aa naho nitotoke, toe fa am-pizotsoa' i vohitse olivay, le fonga nirebeke o mpiama'e maroo, nandrenge an' Andrianañahare, nipoña-peo ty amo hene raha tsitantane niisa' iareoo ³⁸ ami'ty hoe:
Andriañeñe ty Mpanjaka mitotsak' ami'ty tahina' IEHOVÀ!
Fierañerañañe andindiniñe ao, vaho
engeñe Andindimoneñe ey!*

³⁹ Aa le hoe ty nanoa' o Fariseo ila'e boak' amy valobohòkeio: O Talè, endaho o mpiama'oo. ⁴⁰ Fe hoe ty natoi'e: Itaroñako t'ie mianjiñe, le o vatoo ty hikoikoike.

* **19:38** Sab 118:26; Mat 23:39

⁴¹ Ie nañarine naho nahatalake i rovay, le niroveta'e, ⁴² ami'ty hoe: Aa naho nahafohin-drehe, ndra androany, ty hampanintsiñe azo! f'ie mietak' am-pihaino'o henaneo. ⁴³ Fa hihavia' ty andro hampitroara' o rafelahi'oo fefe-tane hamalavala azo naho hiarikatok' ama'o, vaho havoeboe'e mb'etia mb'atia. ⁴⁴ Le hadasi' iareo an-taneo, ihe naho o keleia'o ama'oo, le tsy hengàñe ama'o ty vato raike ambone' ty ila'e, amy te tsy nirendre'o ty andro nitilihañ' azo.

Nampimisomisoa'e i Anjomba'ey Mat 21.12; Mar 11.15-17

⁴⁵ Ie nimoak' an-Toe Masiñ' ao le nata'e soike o mpanao balikeo naho o mpikaloo ⁴⁶ nanao'e ty hoe: Inay ty pinatetse: Anjombam-pitalahoñañe ty anjombako toy,[†] f'ie nanoe' areo lakato fietaha' ty malaso[‡].

⁴⁷ Ie nañoke boak' andro añ' Anjomban' Añahare ao, le nikilily hañè-doza ama'e o mpisorom-beio naho o mpanoki-dilio vaho o roandriañeo; ⁴⁸ f'ie tsy nahaoniñe ty hanoeñe, fa ama'e iaby ondatio nitsatsike o saontsi'eo.

Ty Filoloha'e naho ty Lili'e Mat 21.23-27; Mar 11.27-33

20

¹ Teo amy andro rezay, ie nañoke ondatio añ'Anjomban' Añahare ao naho nitaroñe i talili-soay, te nimb' ama'e mb'eo o mpisorom-beio naho o mpanoki-dilio mitraoke amo roandriañeo, ² nañontane aze ty hoe: Isaontsio: Lily hirik' aia ty anoe'o o raha zao? ke Ia ty nanolots' Azo o lily zao?

³ Aa le hoe ty natoi' IESOÀ: Hañontaneako raha raike hey, le isaontsio: ⁴ ty filipora' i Jaona—boak' andindiñe aña hao ke hirik' am' ondaty? ⁵ Aa hoe ty vesoveso' iareo: Naho ataontika t'ie nihirik' andindiñ'ao, le hatoi'e ty hoe: Aa manao akore t'ie tsy niantofa' areo? ⁶ Fe naho ataontika ty hoe: Boak' am'ondatio: le hene hametsa-bato aman-tika ondatio ie miantoke te nimpitoky t'i Jaona. ⁷ Aa le tinoi' iereo te tsy fohi' iareo ty nihirifa'e. ⁸ Le hoe t'IESOÀ tam'iereo, Tsy hitaroñako ka ty lily anoeko o raha zao.

Ty Tompo' ty Tonda Fandeorañe

⁹ Namototse nandrazañe talily raike ka re am' ondatio, Teo t'indaty nañalahala tetem-bahe le nafondro'e ami'ty mpiava; le nañavelo mb'eo vaho nitambatse aña. ¹⁰ Ie an-tsa'e, nirahe'e ty mpitoroñe homb' amo mpiavao hitolora'e amy voka' i tetem-bahey, f'ie trinabotrabo' o mpiavao vaho nampolie' iereo mañomaño. ¹¹ Nañiraha'e mpitoroñe raike ka, f'ie linafa' iereo naho nampisilofeñe vaho nampolie' iereo hara'e. ¹² Mbe nañirake ty fahatelo'e: f'ie namonotrobo' iereo vaho nanao soike aze. ¹³ Le hoe ty tombo' i tanem-bahey: Inoñ' arè ty hanoeko? Hiraheko mb'eo ty anak' isoko; ie oni' iereo, le va'e himeñara' iareo maso. ¹⁴ Fa ie nitalake' o mpiavao, le nikinia ty hoe, Intike i mpandovay antao hañè-doza ama'e, le ho antika i lovay. ¹⁵ Aa le nafetsa' iereo alafe' i tondam-bahey re vaho vinono' iereo. Inoñe henaneo ty hanoa' i tombo-tetem-bahey? ¹⁶ Ho mb'eo re hanjamañe o mpiavao vaho hatolo'e am' ondaty ila'eo i tetem-bahey. Ie nirendre' ondatio zay le hoe ty asa' iareo: Hete! Sondia'e any! ¹⁷ Nitolik' am'iareo t'IESOÀ le nanao ty hoe: Abejaño arè i pinatetse ami'ty hoey: I vato nado' o mpamboatseyo ty ninjare fehe-kotsoke.*

* 19:46 Ies 56:7 ‡ 19:46 Irm 7:11 * 20:17 Sab 118:22

18 Dorodòro ze mideboñe amy vato zay; le ho demohe'e ze igodoiña'e.

Nandietse Haba Mat 21.45, 46; 22.15-22; Mar 12.12-17

19 Te ho nitsepak' aze amy ora zay o mpisoram-beio naho o mpanokidilio, fe napota'iareo t'ie ty nitalifira'e i ohatsey le nimarimariheñe i lahialeñey; **20** Aa le nivoñone'iereo naho nañirake mpitampoñe hihaboke havañonañe, hitsepak' aze ami'ty tsara'e hanesea'iereo ami'ty hery naho ty lili' i ragovay. **21** Le hoe ty nañontanea'iareo: O Talè, fohi'ay te to o saontsi'oo naho ty fanoroa'o, naho tsy eo ty irihia'o, vaho mahity ty fitaroña'o i satan' Añaharey. **22** Aa vaho Hake hao ty androroña'ay amy Kaisara ke tsie?

23 Niarofoana' IESOÀ ty hakalitha'iareo vaho nanoa'e ty hoe: Ino ty itsoha' areo ahy? **24** Itoloro drala raike, Sare' ia naho tahina' ia ro ama'e eo? A i Kaisara, hoe iereo. **25** Le hoe t'IESOÀ am'iereo: Atoloro amy Kaisara arè ze a i Kaisara vaho an' Andrianañahare ze an' Andrianañahare. **26** Aa le tsy eo ty nahatsepak' aze amo saontsi'eo añatrefa' ondatio. Toe nahavereñe iereo i toi'ey, vaho nianjiñe.

Mpandietse amy Fivañom-beloñey Mat 22.23-32; Mar 12.18-27

27 Niheo mb'ama'e o Tsadoke ila'eo; o tsy miantoke o fivañonan-ko veloñeo, le hoe ty nañontanea'iareo: **28** O Talè, sinoki' i Mosè aman-tika te, naho vilasy ty rahalahi' ondaty amam-baly, ie mivetrake tsy aman' anake, le soa te hengae'i rahalahi'ey i ramavoiñey, hisamake, hameloñe tabiry ho a i rahalahi'ey.[†] **29** Aa le teo ty fito miroahalahy. Ty valoha'e nañenga valy fe nikoromake tsy aman-tiry, **30** naho ty faharoe; **31** vaho nengae' ty fahatelo ka; manahake zay, songa nihomake i roahalahy fito rey fe tsy nampipoke anake. **32** Honka'e, nivilasy ka i rakembay. **33** Aa vaho ia ty ho vali' i rakembay amy fivañonan-ko veloñey kanao songa nañenga aze ho vali'e i fito rey?

34 Hoe ty natoi' IESOÀ: Mañenga valy naho engaen-dahy o ana' ty tane toio. **35** F'ie volilien-ko mañeva hitakatse i haveloñey naho i fivañonam-beloñey, le tsy hañenga valy naho tsy hanoloram-baly, **36** vaho tsy hihomake ka, fa hanahake o anjelio, mbore ho anan' Añahare kanao ana' i fivañonan-ko veloñey. **37** Le i fivañonam-beloñey, ie i natoro' i Mosè amy talili' i rongoñey, te nikanjia' IEHOVÀ ami'ty hoe :

Andrianañahare' i Abraàme, naho
Andrianañahare' Isaka, vaho

Andrianañahare' Iakobe.[‡]

38 Ie tsy Andrianañahare' o vilasio fa a o veloñeo, amy t'ie kila veloñe ama'e.

Ty Ontane'e amo Mpanoki-dilio Mat 22.41-46; 23.14; Mar 12.35-40

39 Aa le tinoi' o mpanoki-dily ila'eo ty hoe: O Talè, vantañe o saontsi'oo.

40 Nifototse amy zay, tsy eo ty nahavany ontane ama'e ka. **41** Le hoe t'IESOÀ am'iereo: Aa vaho akore te saontsieñe te tiri' i Davide i Norizañey? **42** Amy te toe sinaontsi' i Davide amy boken-Tsaboy ty hoe:

Hoe t' IEHOVÀ amy TALÈkoy:

Mitoboha an-kavanako etoañe,

43 Ampara-panoako fitongoam-pandia'o o rafelahi'oo.[§]

44 Aa kanao natao' i Davide, TALÈ, re, ino ty maha-tiri'e aze?

[†] 20:28 Its 25:5 [‡] 20:37 Avo 3:6 [§] 20:43 Sab 110:1

⁴⁵ Hoe t'IESOÀ amo mpiama'eo añtrefa' i lahialeñey: ⁴⁶ Itaò o mpanokidilio, ie mpidraidraitse an-tsarimbo mirebarebao, mpipay ty hañontanea' ondaty an-tsena ao, mpitea ty fiambesa-tsoa am-pitontonañe ao hia-garegañe, naho ty tiyh aolo amo sabadidakeo ⁴⁷ mbore mpitavañe o trañom-bantotseo vaho loho mpipay tsiriry amo filolofa' iareo mitoitoio. Hekoheko ty fatse am'iereo.

21

Ty Enga' i Vantotsey

Mar 12.41-44

¹ Aa ie niandra, nahavazoho mpañaleale nampigodrom-bola amy fanontonan-dralay; ² nioni'e ka ty vantotse rarake nampijoña drala roe. ³ Le hoe re: Eka! to t'itaroñako te bey ty nengae' ty vantotse misotry tia te am' iabikey; ⁴ fa ami'ty habeim-panaña' iareo ty nampijoña' iareo am-panontonam-baran' Añahare ao; fe ami'ty harotà'e ty nampibiroña'e ty sehangam-piveloma'e.

Ty Ontane Roe

Mat 24.1-3; Mar 13.1-4

⁵ Teo te nivesovesoe' ty ila'e i Anjomban' Añaharey, t'ie nihamineñe vato soa naho ravoravo; le hoe re: ⁶ Ty amo raha isa' areoo, mbe ho tondroke ty andro tsy hampidonañe vato raike ambone' ty ila'e ze tsy haresak' ambane. ⁷ Le nañontanea' iareo ty hoe: O Talè, mbia t'ie ho tendreke? Le inoñe ty ho viñoñe hiaolo ty hifetsaha'e?

Ty Fiavi' IESOÀ Mat 24.4-13; Mar 13.5-13

⁸ Le hoe re: Asoao tsy hampandridriheñe. Fa maro ty ho pok'eo hieva ty añarako, hanao ty hoe: Zaho ty ie, naho ty hoe: Fa antitotse i àndroy. Ko oriheñe. ⁹ Ie mitsanoñ' aly ndra fivalitaboahañe, ko vorombelo; fa tsi-mete tsy ho avy hey zay, fe mbe tsy aniany i hamodoañey. ¹⁰ Le hoe re am'iereo: Fifelehañe ty hitroatse hiatre-pifelehañe naho fifeheañe ty hiatre-pifeheañe. ¹¹ Ho an-koe an-koe ty ezeñezan-tane jabajaba naho san-kasalikoañe vaho hiboake eo ty raha mampirevendreveñe naho ty viñoñe ra'elahy hirik' andindiñe aña.

¹² Fe aolo' irezay, ho tsepahem-pità' iareo nahareo, hanoeñe sampore-rake naho hasese am-pitontonañe naho ambalabey ao vaho hampiatrefeñe mpanjaka naho roandriañe ty ami'ty añarako. ¹³ F'ie hivalike ho fitaroña' areo. ¹⁴ Aa le ampifahàro añ' arofo'areo te tsy hisafiry miaolo ze hatoi' areo, ¹⁵ amy te homeiko falie naho hihitse tsy ho lefe' ty rafelahi' areotoiñeñe ndra rebaheñe. ¹⁶ Le hifotetse ama' areo o raeo naho o rahalahio naho o longoo vaho o rañetseo le havetrake ty ila'areo. ¹⁷ Ho heje' ze kila ondaty nahareo ty ami'ty añarako. ¹⁸ Fe tsy ho po-maròy raike o añambone'areoo. ¹⁹ Ty fahaliñisa'areo ro fandrombaham-piaiñe.

Ty Hangotomomohañe Ierosaleme Mat 24.15-21; Mar 13.14-19

²⁰ Aa naho isa' areo te arikoboñen-dahin-defoñe t'Ierosaleme; le maharendreha te an-titotse ty hampangoakoahen' aze ²¹ Ee te hivoratsake mb'am-bohitse eñe o e Iehodào, naho hitriban-day ze e Ierosaleme ao vaho tsy hizilik' ao o am-pariparits' añaeo. ²² Zay o andro fandilovañe hañenefañe ze hene pinatetse. ²³ Hekoheko ho ami'ty mivesatse naho ty mampinono amy andro rezay! Fa haoream-bey ty hizò amy Taney vaho haviñerañe am'ondaty retoa, ²⁴ ie hatsingoron-delam-pibara naho ho tantalieñe am-bozo-tali-am-baniañe mb' amy ze kila tane aña vaho ho

lialia' o kilakila 'ndatio t'Ierosaleme ampara' te heneke ty sa' o kilakila ondatio.

Ty Fiavy Faharoe Mat 24.29-31; Mar 13.24-27

²⁵ Le hiboak' amy androy naho amy volañey naho amo vasiañeo ty viloñe vaho halovilovy am-pioremèñañe o fifeheañeo ty amy fitroña' i riakey naho ty fivalitaboaha'e; ²⁶ ho tsipike ty anifañe ondatio ami'ty fahoniña'e o hifetsak' an-tane atoio; le hampihendrahendraeñe o haozaran-dikerañeo.* ²⁷ Ho oni' iereo mitotsake mb'eo amy zao amo rahoñeo eñe an-kaozarañe naho engeñe ra'elahy i Ana'ondatiy. ²⁸ Ie mamototse hiboake, le mijohaña naho miandradrà, fa an-titotse ty fijebañañe anahareo.

Famantarañe Mat 24.32-35; Mar 13.28-31

²⁹ Le hoe ty nandrazaña'e: Hehe o sakoañeo naho ze hene hatae. ³⁰ Ie mibotiboty le inao te an-titotse ty lohataoñe. ³¹ Hoe zay ka te isa'areo ty fifetsaha' o tsaraeñeo le fohino te mitotoke i Fifehean' Añaharey. ³² Eka! to t'itaroñako te tsy ho kapioke ty tariratse toy naho tsy heneke hey irezay. ³³ Himiañe aña o likerañeo naho ty tane toy, fe tsy ho modo o volakoo.

Mihalalia Nainai'e Mat 24.36-44; Mar 13.32-37

³⁴ Mitaoa, tsy mone ho lifore' ty hatea-haneñe naho ty hajìke vaho ty hasosorañe amo haveloñe zao ty arofo, hera hitojeha ama' areo i andro zay, ³⁵ toe hanahake fandri-bò ty hivovoa'e amy ze hene mpimoneñe an-tane atoy amy andro zay. ³⁶ Aa le mitaòa naho mihalalia nainai'e t'ie hañeva handrife amo fonga hifetsakeo vaho hijohañe añatrefa' i Ana'ondatiy.

³⁷ Nañoke an-kiririsan'Anjomban' Añahare eo re boak'andro; f'ie haleñe, nienga mb'eo niambesatse am-bohi' Oliva ey. ³⁸ Naho mbe nangararak' atiñanañe le nitontoñe hijanjiñe aze aña Anjomban' Añahare ao i lahialeñey.

22

Nifotereñe

Mat 26. 1-5; Mar 14.1-11

¹ Ie fa antitotse ty Sabadida-Mofo-tsy-aman-dalivay, i atao Fihelañey le ² nipay hanao afero mamitak' ate amy IESOÀ o mpisoram-beio naho o mpanoki-dilio, fe nimarimariheñe i lahialeñey.

³ Ie amy zao, nitsamohe' i mpañinjey ty tro' i Jodasy (ty atao nte-Kariota), mpiamy folo ro' amby rey. ⁴ Aa le nimb' amo mpisoram-beio naho o kapitenio re nikilily ty hanolora'e IESOÀ. ⁵ Niehake iereo, naho nisafiry t'ie hitoloran-drala. ⁶ Le niantofa'e, vaho nandiñe ty hamotets' aze am' iereo, ie tsy amy lahialeñey.

Nañalankañe

Mat 26.17-19; Mar 14.12-16

⁷ Tondrok' amy zao ty Sabadida-Mofo tsy aman-dalivay, ty andro fendantàñe i Fihelañey. ⁸ Le nirahe'e t'i Petera naho i Jaona ami'ty hoe: Akia, halankaño i Fihelañey ho kamaen-tikañe. ⁹ Hoe iereo tama'e: Aia ty zoto'o hañajariañe aze? ¹⁰ Hoe ty natoi'e: Ie mizilik' an-drova ao nahareo le hifanojo ami' t'indaty minday siny pea rano; oriho mb'an-traño imoaha'e ao. ¹¹ Le anò ty hoe amy tompon' anjombay: Hoe t'i Talè

* **21:26** Kag 2:6, 21

ama'o: Aia ty trañon' ambahiny hitraofako fikama ty Fihelañe toy amo mpiamakoo? ¹² le ho toroa'e traño mitratrañaka am-batsa vory haraotse; halankaño ao. ¹³ Nienga iereo, nahaoniñe hambañ' amy tsinara'ey vaho nañalankañe i Fihelañey.

Mitrao-Pikama Mat 26.20, 29; Mar 14.17-25

¹⁴ Ie tondroke i oray, le niambesatse re naho o Firàhe'eo. ¹⁵ Le nanoa'e ty hoe: Nisalala hikama ty Fihelañe toy raho mindre ama' areo aolo' ty haoreako. ¹⁶ Itaroñako te, tsy ihananako ka, ampara' ty hifonira'e am-Pifehean' Añahare ao. ¹⁷ Rinambe'e ty fitovy le nañandriañe nanao ty hoe: Rambeso toy, ifanjotsò, ¹⁸ Itaroñako te tsy hinomako ka ty voa' i vahey henane zao ampara' te tendreke i Fifehean' Añaharey.

Fañina Nivaoeñe Mat 26.26-28; Mar 14.22-24

¹⁹ Nandrambe mofo re le nañandriañe naho nifolahe'e vaho nazotso'e am'iereo ami'ty hoe: Intoy ty vatako banabanaeñe ho anahareo, anò zao ho fitiahiañe ahy. ²⁰ Hoe zay ka i fitoviy, ie fa nikama, nanao ty hoe: Ty fitovy toy ro fañina nivaoeñe ami' ty lioko nadoañe ho anahareo.

Mitoky i Hifotetse azey

²¹ Le hehe te mindre an-tañako am-pandambañañe etoañe ty fitañe hifotetse ahiko. ²² Toe hitoronjo amy nilaharañey i Ana'ondatiy; fe hankàñe am' indaty mifotetse azey! ²³ Aa le hene nifañontàne te ia am'iereo ty hanao zay.

Mialy Habey

²⁴ Mbore nialy vava te ia am'iereo ty atao loha'e. ²⁵ Le hoe t'IESOÀ am'iereo: Manindritindry o kilakila' ondatio ty mpanjaka' iareo, mbore tokaveñe ty hoe matarike o mpifele' iareoo. ²⁶ F'ie tsy hanahake zay, fa hanahake an-jai'e ty bey ama' areo, naho hoe te mpitoroñe ty mpifehe.

²⁷ Aa ia ty bey, i miambesatse am-pandambaña eoy, ke ty manjotso? Tsy i miambesatse mikamay hao? Fe mitraoke ama' areo raho hoe te mpitoroñe. ²⁸ F'inahareo ro nipitek' amako amo fañolañ'ay nizoeñe, ²⁹ le hifañinako manahake ty fifeheañe nifañinan-dRaeko amako, ³⁰ soa te hikama naho hinoñe am-pandambañako am-pifeheako ao nahareo vaho hiambesatse am-piambesan-droandriañe eo hizaka i fifokoa' Israele folo ro' amby rey.

Hanao Jebe aze t'i Petera Mat 26.31-35; Mar 14.27-31; Jao 13.36-38

³¹ O Simona, Simona, toe nangatahe' i Ratiy amako reho tsararahe'e hoe lilañe, ³² fe ihalaliako, te tsy hilesa ty fatokisa'o; le ihe mitampoly, ampahozaro o rahalahi'oo. ³³ Le hoe ty natoi'e aze: O Talè, veka'e hindre ama'o raho ndra ho am-balabey ndra ho an-kibory ao. ³⁴ Hoe t'IESOÀ: Taroñeko ama'o, Petera, Mbe tsy hikoike i akoholahi*y te anito t'ie fa nanao jebe ahy in-telo.

ty Aly ho Avy

³⁵ Le hoe re am'iereo: Ie niraheko tsy aman-koro tsy aman-kotrañe tsy aman-kana; ino ty tsy niheneke ama' areo? Leo raike, hoe iereo. ³⁶ Aa le hoe re tam'iereo: Henaneo, ze aman-koroñe, endeso, izay ka ty kotrañe; le ze tsy amam-pibara ro handetake ty sarimbo'e hikaloa'e. ³⁷ Itaroñako te tsi-mete tsy henefañe amako ze pinatetse ty hoe, Nivolilieñe amo tsereheñeo re;[†]

* 22:34 akoholahy: ty fipopon'antsiva maraindray † 22:37 Ies 53:12

eka, amam-pirefea'e ka ze hifetsak' amako. ³⁸ Hoe o mpiama'eo, O Talè, intoa ty mesolava roe. Soa zay, hoe re.

Niloloke e Getsemane Mat 26.36-46; Mar 14.32-42

³⁹ Le nienga mb'am-bohitse Oliva mb'eo re ami'ty lili'e naho nañorik'aze o mpiama'eo. ⁴⁰ Ie an-toetse eo, le hoe re tam'iereo: Mihalalia tsy hivariñe am-panjiziañe ao.

⁴¹ Nihankaña'e va'e tra-torake, nitafatongaleke naho nihalaly ⁴² ty hoe: O Aba, naho satri'o, asitak' amako ty fitovy toy, fe tsy ty satriko fa ty Azo ro hanoeñe. ⁴³ Le nisodehañe ama'e ty anjely hirik' andindiñe ao nampaozatse aze. ⁴⁴ Kanao nalovolovy, nimanea'e i halali'ey, le hoe fitsopan-dio jabajaba ty liñe'e nipopok' an-tane eo. ⁴⁵ Ie nitroatse amy halali'ey le nimb' amo mpiama'eo mb'eo vaho nizoe'e nirotse ty hontoke. ⁴⁶ Hoe re am'iereo: Ino ty irota' areo? Miongaha, le milolofa tsy mone hijoñe am-panjizieñe ao.

Nifotere' i Jodasy Mat 26.47-56; Mar 14.43-50; Jao 18.2-11

⁴⁷ Ie mbe nisaontsy, hehek' i màroy naho i atao Jodasy, mpiamy folo ro' amby rey, niaolo iareo naho nitotoke IESOÀ vaho nañorok' aze. ⁴⁸ Aa hoe t'IESOÀ tama'e, O Jodasy, ondroke hao ty ifotera'o i Ana'ondatiy?

⁴⁹ Ie nirendre' o mpiama'eo ty hizò, le hoe iereo ama'e: O Rañandria, ho lafà'ay am-pibara hao? ⁵⁰ Le kinitsi' ty raik' ama'e ty ravembia havana' ty mpitoro' i talèm-pisoroñey. ⁵¹ Fe tinoi' IESOÀ ty hoe: Adono amy zao. Le tsinapa'e i ravembia'ey vaho nampijangañe'e.

⁵² Le hoe t'IESOÀ amo nimb'ama'e mb'eo, o mpisorom-beio naho o mpifelek' Anjomban' Añahareo vaho o roandriañeo: Ia ty nihofifa' areo boak' ao reke-pibara naho doda hoe mañoridañe malaso? ⁵³ Nifamoem-boeñe ama'areo añ' Anjomban' Añahare ao boak' andro raho, fa tsy nañitiam-pitâne. Fe henaneo ty ora' areo naho ty haozara' i ìeñey.

Nanao Jebe aze t'i Petera Mat 26.57-75; Mar 14.53-72 Jao 18.15—27

⁵⁴ Rinambe'iereo re, le nikozozôteñe mb'eo vaho nazilik' añ'anjomba' i mpisorom-beiy. Nanonjohy ey t'i Petera. ⁵⁵ Teo ty namiañ' afo an-kiririsa ey naho nitoboke, le niambesatse am' iereo eo t'i Petera. ⁵⁶ Nitrea' ty mpitoroñ' ampela namindro amy afoy re naho niharefe'e, le hoe re: Nimpama'e ka t'indaty tìañe. ⁵⁷ Fe hoe ty lie'e: O Rampela, jebe ahy zay. ⁵⁸ Ie aña, nahaoniñe aze ka ty raike, le hoe re: Mpiam' iareo ka rehe. Hoe t'i Petera: O koahe, tsy zaho zay! ⁵⁹ Ie ho ora raik' aña le eo ty nisikisiky namente ami'ty hoe: Toe nimpindre ama'e re fa nte-Galilia. ⁶⁰ Aa hoe t'i Petera: O korahenofiko z'o saontsie'o zao! Tsipaepae zay, ie mbe nisaontsy, le nikoike i akoholahiy, ⁶¹ le nitolike t'i Talè nitalahatse amy Petera. Aa le nitiahi' i Petera i tsinara' i Talè ama'ey ty hoe: Aolo' ty koihe' i mpikokey, le hanao jebe ahy in-telo rehe. ⁶² Niakatse amy zao t'i Petera nangololoike ty rovetse.

Trinabotraboke Mat 26.67; Mar 14.65

⁶³ Nikobike naho namofoke IESOÀ o lahilahy namonttititse azeo. ⁶⁴ Kinàpe' iereo o fihaino'eo vaho rinarateha' iareo ty lahaba'e, le nañontane aze: Mitokia! Ia o nandafa Azoo? ⁶⁵ Maro ka ty fiteraterà' iereo ama'e.

Añatrefa' o Tehodao Mat 27.1; Mar 15.1

⁶⁶ Naho nanjurike àndro, nivory o roandriañeo, o talem-pisoroñeo reketse mpanoki-dily; le nasese am-pivori'iareo ao re, le nanoañe ty hoe:

⁶⁷ Naho ihe i Norizañey, atalilio. Aa le hoe t'IESOÀ am'iereo: Ndra te itaroñako, toe tsy hiantoke ⁶⁸ le ndra t'ie añontaneako tsy hanoiñe ka. ⁶⁹ Henane zao te hiambesatse‡ an-kavanan-kaozaran' Añahare eo i Ana' ondatiy. ⁷⁰ Aa le hoe ty rodo-bei' iareo: Anan' Añahare arè v'Iheo? Hoe ty natoi'e: Ie saontsie' areo. ⁷¹ Le hoe iereo: Inoñe ka ty ipaian-tika valolombeloñe? kanao sambe nahajanjiñe am-bava'e.

23

Zinaka' i Pilato

Mat 27.2; 11-14; Mar 15.1-15; Jao 18.28-38

¹ Aa le niongake i fifañosoñañey ninday aze mb'amy Pilato mb'eo, ² vaho nanisý aze ami'ty hoe: Nitrea'ay nitrobo ty tane'ay ondatio mbore rinara'e ty fandroroñam-bili-loha amy Kaisara, ie nihàboke t'ie i Norizan-ko mpanjakay. ³ Le hoe ty ontane' i Pilato tama'e: Mpanjaka' o Jiosio v'Iheo? Hoe ty natoi'e aze: Ie saontsie'o.

⁴ Aa le hoe t'i Pilato amo mpisorom-beio naho i firimboñañey: Tsy mahatre a hakeo amo lahio raho. ⁵ Fe nindrae' iereo seseke ami'ty hoe: Ie mammalitsikotake ondatio, mbore nitsitsihe'e oke t'Iehodà hirike Galilia aña pak' etoa. ⁶ Ie jinanji' i Pilato izay le nañontane hera nte Galilia ondatio. ⁷ Ie nifohi'e t'ie borizà' i Heroda, le nampanesefe'e mb'amy Heroda mb'eo, amy te ie ka e Ierosaleme ao henane zay.

Zinaka' i Heroda

⁸ Akore ty haeha' i Heroda te nahaoniñe IESOÀ; fa haehae ty nisalalà'e te hahaisak' aze ty amo hene raha nijanjiñe'e ty ama'eo vaho naina'e te ho nisamba ze viloñe fanoe'e. ⁹ Aa le nimanea'e ontane, fe leo raike tsy natoi'e. ¹⁰ Nijohañe ey avao o mpisorom-beio naho o mpanoki-dilio nitolon-tsisý ama'e. ¹¹ Aa ie fa nikobike aze t'i Heroda naho o lahindefo'eo, naho nikizahé' iereo ami'ty nampiombeañe lamba marerarera, le nampolieñe mb'amy Pilato mb'eo. ¹² Amy àndroy, le lia'e nimpirañetse t'i Heroda naho i Pilato, ie mpifandrafe taolo.

Nahereñ' amy Pilato Mat 27.15-26; Mar 15.6-15; Jao 18.39-19.16

¹³ Natonto' i Pilato o mpisorom-beio, naho o mpifehe ondatio, vaho i màroy, ¹⁴ le hoe re tam'iereo: Nandesa' areo amako t'indaty toy hoe mpanigike ondatio hiola. Aa ndra t'ie nimaneako ontane añatrefa'areo, tsy mahatre tahiñe am'ondatio amo anisia' areo azeo. ¹⁵ Aiy, ndra i Heroda, kanao nampolie'e mb'aman-tika; ndra loli'e tsy nanoe'e hañohofan-doza ama'e. ¹⁶ Aa le ho liloveko re vaho havotsoko. (¹⁷ Toe lili'e ty namotsotse am' iareo ty mpirohy raik' amy Sabadidakey). ¹⁸ F'ie nikoik' an-kapindre ty hoe: Aseseo aña ondatio, le hahao ama'ay t'i Barabasy — ¹⁹ i najòñe ambalabey ao ami'ty fiolà'e an-drova ao naho ami'ty vono-ondatiy.

²⁰ Aa ie te hañaha IESOÀ t'i Pilato le nindrai'e i linaño'ey. ²¹ Fe kinorà' iareo ty hoe: Peho, Peho re! ²² Le hoe re fañin-telo'e am'iereo: Fa akore! Inoñe ty raty nanoe'e? Tsy treako ty talim-pamonoañe aze, ho liloveko vaho hidraitako. ²³ Fe nitolom-pitazataza iereo, nangatake t'ie ho peheñe. Aa le nahareketse aze ty feo' ondatireo naho o mpisorom-beio ²⁴ vaho linili' i Pilato te hanoeñe t'y ipaia' iareoy. ²⁵ Le vinotso'e i rinohy ty amy fiòla naho vono' ondaty pinai' iareoy; vaho natolo'e ami'ty satri' iareo t'IESOÀ.

Pinèk' an-Katae Ajale Mat 27.31-56; Mar 15.20-41; Joa 19.16-30

‡ 22:69 Sab 110:1

26 Ie nindese'iereo, le tsinepa' iereo ty atao Simona nte Kirenia, ie niloneake hirik' am-patrambey aña vaho nampitarazoeñe aze i hatae ajaley, le nañorike t'IESOÀ.

27 Tsifotofoto t'indaty nañorike naho o roakemba nandala naho nirovetse azeo. **28** Nitolik' am' iereo t'IESOÀ nanao ty hoe: Ry anak' ampela' Ierosaleme ko mirovetse ahy fa roveto o vata' areoo naho o ana'areoo. **29** Mahaoniña te ho tendreke ty andro hanoeñe ty hoe: Haha ty beitsiterake naho ty hòviñe tsy nahatoly vaho ty fatroa tsy ninonoeñe. **30** Ie amy zay, hanoe'iereo ty hoe o vohitseo: Mihotraha ama'ay, naho amo haboañeо ty hoe: Rongono zahay.* **31** Aa naho zao ty anoñaе an-katae leñe, hanoeñe akore t'ie maike? **32** Teo ka ty tsy vokatse roe nendeseñe hiharo vonoeñe ama'e. **33** Ie niavy ami'ty toetse atao Ikarandoha eo, le teo ty nipehañe aze naho indaty raty rey, ty raike am-pità'e havana naho ty raike ankavia'e. **34** Le hoe t'IESOÀ: O Aba, iheveo, fa amoea' iareo o anoe' iereo. Nifanjara' iereo ty saro'e vaho nanao tsato-piso†. **35** Fonga nijohañe ey i màroy nisamba; nitrao-panítse aze, ie naho o roandriañe ami'ty hoe: Ie naharombake o ila'eo, soa re te handrombake ty vata'e naho toe ie i Norizañe jinobon' Añaharey. **36** Nanitra aze ka o lahin-defoñeо, le nimb'eo ty nanolotse divay maseñe‡ ama'e, **37** ami'ty hoe: Naho toe Mpanjaka' o Jiosio rehe, rombaho ty vata'o. **38** Pinatetse ambone eo ty sokitse manao ty hoe:
Itoy ty Mpanjaka' o Jiosio.

39 Nikobik' aze ty raik' amy tsivokatse naradorado rey, ami'ty hoe: Naho ihe i Norizañey, rombaho ty vata'o naho zahay. **40** Fe tinoi' i raikey an-trevoke, ami'ty hoe: Ndri i Andrianañahare hao tsy añaeveña'o kanao itraofa'o fàtse? **41** Toe mañeva i an-tikañey le rinamben-tika ty vale' o satan-tikañeо; fe tsy nandilatse ondatio. **42** Le hoe re am' IESOÀ, O Rañandria, mahatiahia ahy te miheo am-pifehea'o ao, **43** Hoe t'IESOÀ tama'e: Eka! to t'itaroñako te, hindre mb'an-tanen-kaveloñ'§ ao tika te anito.

Ty Havilasi' IESOÀ

44 I ora faheneñey henane zay, le hene nihohofa' ty ieñe i Taney sikal' ami' ty ora faha-sive. **45** Nimoromoroñe i àndroy vaho nitori-anjake i lamba fañefetse aña Anjomban' Añaharey.

46 Le nikany am-piarañanañaе mafe t'IESOÀ ami'ty hoe:
O Aba, apoko am-pità'o ao ty troko,*
ie tsinara, le nafoe'e ty arofo'e. **47** Nioni' i mpifele-jatoy o raha nanjò eio le nandrenge an' Andrianañahare ami'ty hoe: Toe ondaty vantañe toy. **48** Ie nahaisake zay i maro nivorigidiñe eiy nisamba o raha nitendrekeo, le nifiotse aña namango arañañe. **49** Hene nijohanjohañe eñe o rañe'eo naho o roakemba nanonjohy aze boake Galilia añaeo nitalake.

Nalenteke Mat 27.57-61; Mar 15.42-47; Jao 19.38-42

50 Teo t'indaty atao Iosefe, mpiamy Sanhedrio, ondaty vantañe naho vañoñe; **51** tsy ninò' indatiy ty safiry naho ty raha nanoe' iareo. Nte-Armatia tanà' Iehodà re vaho mpitamà i Fifehean' Añaharey. **52** Nimb'amy Pilato mb'eo re nihalaly ty fañòva' IESOÀ. **53** Ie nazotso'e, le pinelepele'e an-damba leny, vaho nirohote'e an-donake hinaly an-damilamy mbe tsy

* 23:30 Ies 2:19-20; Hos 10:8; Ben 6:16 † 23:34 Sab 22:18 ‡ 23:36 Sab 69:21 § 23:43 Paradisa (Gr): tane fanjaka manahake i Edena * 23:46 Sab 31:5

nandrohotan-dolo. ⁵⁴ Ie ty andro Fañalankañañet, le fa ho tondroke i Sabatay. ⁵⁵ Norihe' o roakemba nanonjohyIESOÀ boak' e Galilia añaeo re le niisa' iereo i lonakey naho ty nandrohotañe i fañòvay. ⁵⁶ Tafampoly iereo le nañalankañe raha mandrifondrifoñe naho solike, vaho nitofa amy SABATAY ty amy liliy‡.

24

Nivañombelo Mat 28.1-8; Mar 16.1-8; Jao 20.1-10

¹ Ie amy loak'andro' i SABOTSEY, nañaleñaleñe mb'an-donake mb'eo ninday o raha mandrifondrifoñe nihajarie' iereoo. ² Zoe' iareo te nidogeratse i vato-pikalañe i lonakeiy. ³ Nizilik' ao iereo fe tsy nahaisake ty fañòva'IESOÀ Talè. ⁴ Ie mbe nidaba amy raha zay, inge nisodehañe añ'ila'iareo eo ty ndaty roe an-tsaroñe mipelapelatse. ⁵ Nianifañe iereo vaho nampiondre-daharam-ban-tane, fe nanoa' iereo ty hoe. Ino ty paia'areo i veloñey an-tanen-dolo atoy? ⁶ Tsy ato re fa natroatse! Tiahio i nanoa'e ie mbe e Galilia añaey ⁷ t'ie, Tsy mahay tsy hatolotse am-pitâ' o bei-hakeoo i Ana'ondatiy, le ho peheñe an-katae ajale vaho hivañom-beloñe ami'ty andro fahatelo.

⁸ Le nitiahi' iereo i saontsi'ey. ⁹ Ie nibalike boak' an-donake ao le nitalily irezay amy folo-raik' amby rey naho amo ila'e iabio. ¹⁰ I Miriame nte-Magdalà, naho i Johana, naho i Marie rene' Iakoba, vaho ty ila' iereo ro nitalily amo Firàheñeo. ¹¹ Fe nihoe kanifonifok' am'iereo i saontsi' iareoy, le tsy niantofa' iareo; ¹² fe nióngake t'i Petera nihitrihitry ty lay mb' an-donake mb'eo; ie nibokoboko, le i lamban-doloy avao ty nioni'e eo hoek'eo; vaho nimpoly, latsa amy nifetsakey.

an-Dala' i Emaosy Mar 16.12, 13

¹³ Inao! nigodañe mb' an-drova atao Emaosy mb'eo ty roe am' iereo amy àndro zay, eva'e ho enim-polo stadia* hirike e Ierosaleme aña, ¹⁴ nifanaontsy ze hene nitendreke zay. ¹⁵ Aa, ie nivesoveso naho nitsakore, le niharinea'IESOÀ vaho nitraofa'e fañavelo. ¹⁶ F'ie nitakonam-pihaino tsy hahafohiñ' aze. ¹⁷ Le nanoa'e ty hoe: Inoñe o ifanaontsia' areo te mañavelo, kanao manahelo? ¹⁸ le hoe ty natoi' ty atao Kleopasy: Ihe avao hao ty ambahiny e Ierosaleme ao tsy mahafohiñe o raha nifetsak' atoa amo andro rezao? ¹⁹ Ino? hoe re. Le hoe ty natoi' iareo:IESOÀ nte-Nazareta, nimpitoky fatratse am-pitoloñañe naho tsara añatrefan' Añahare naho ondaty iabio; ²⁰ ie nasese' o mpisorom-beio naho o roandrian-tikañeo hafâtse ho vonoeñe, vaho pinè' iereo. ²¹ Fe ie 'nio ty nitamà'ay hijebañe Israele; fa tovo' iaby zay, androany ty andro faha-telo sikal' amy nitendreha' i he'e zay. ²² Eka! nahadaba anay ka ty roakemba'ay ila'e, ie nitsatok' an-donak' aña marain-tsikiake, ²³ fe tsy nioni' iereo ao i fañòva'ey, vaho nibalike nitalily te nahaisake ty fisodehan'anjely nitalily am' iereo t'ie veloñe. ²⁴ Niavotse mb'an-donake mb'eo ty ila'e ama'ay, le nanjo hambañe amy nitalilie' i roakemba reiy, fe tsy nahaisak' aze. ²⁵ Aa le hoe ty natao'e am'iereo: O ry bahimo malaon-stroke, tsy mahafiantoke ze hene saontsi' o mpitokio. ²⁶ Tsy linahatse hao te tsi-mete tsy nifeake irezay i Norizañey vaho hizilik' amy enge'ey? ²⁷ Aa

† 23:54 aolo' i sabadidake P'Sake zay (Sor 23:6) ‡ 23:56 Sor 23:7 * 24:13 Gr. 60 stadia: 11 kilometatse

le mifototse amy Mosè naho o mpitoky iabio, le nampalangese'e ama'e o Sokitse Masiñe iabio, ze mioza ama'e ao.

²⁸ Ie niharine amy rova homba' iareoy, le mitse hionjomb'eo t'IESOÀ. ²⁹ Fe hoe ty nañosiha'iareo aze: Mañialoa ama'ay; ie ho haleñe naho fa miròñe i àndroy. Aa le nimoak' ao re hialeñe am' iereo. ³⁰ Ie niambesatse am-pandambañañe mindre am' iereo, le nandrambe mofo naho nitata naho namolake vaho nazotso'e am' iereo. ³¹ Nibarababeak' amy zao ty fihaino'iareo nahafohiñe aze; f'ie nimosaoñe tsy niisake ka.

³² Aa le nifanaontsy ty hoe iereo: Tsy nimae an-trok' ao hao tika t'ie nilañoñe amy lalañey vaho nampiborake o Sokitse Masiñe?

Tsy Angatse Mar 16.4; Jao 20.19-23; I Kor 15.5

³³ Niongak' amy oray avao iereo, nibalike mb'e Ierosaleme mb'eo, le nifanjo amy folo lahy raik' amby rey tafatontoñe ao miharo amo mpiam' iereo, ³⁴ ze nanao ty hoe: Toe natroatse t'i Talè! mbore nisodehañe amy Simona. ³⁵ Le natalili' iareo i tan-dalaña ey rezay, naho t'ie nifohi' iareo amy namolaha'e mofoy.

³⁶ Mbe nitalily iereo te niloneak' añivo' iereo eo t'IESOÀ, nanao ty hoe: Fañanintsiñe ama'areo. ³⁷ Nitsekake naho nirevendreveñe iereo, hoe te nahaisak' angatse. ³⁸ Fe hoe re tam'iereo: Inoñ' o mampihohokòhok' anahareoo? naho inoñe ty mampivazobazotse ty tro'areo? ³⁹ Hehe o tañakoo naho o tombokoo, zaho 'nio; itsapao vaho mahaoniña, toe tsy ama' nofotse naho taolaña o angatseo manahake o isa'areo amakoo. ⁴⁰ Ie nagado'e i saontsy zay, le natoro'e iareo o fità'eo naho o fandia'eo. ⁴¹ F'ie mbe tsy nahafiantok' avao fa loho ehake naho latsa; le hoe re: Aman-kaneñe hao nahareo? ⁴² Le nanjotsoa' iareo sale-fiaña naho papin-tantele. ⁴³ Rinambe'e vaho nikama añatrefa'iereo.

Ty Fañirahañe Asa 1.3-8

⁴⁴ Le hoe re am'iereo: O entañe zao ty nitaroñako t'ie mbe nitraoke, te tsi-mahay tsy ho heneke i pinatetse ty amako amy Ha' i Mosèy ao naho amo Mpitokio vaho amo Saboo rezay. ⁴⁵ Sinoka'e amy zao ty fivetsevetse' iareo haharendreke o Sokitse Masiñe. ⁴⁶ Le hoe re tam'iereo: Hoe ty pinatetse, te tsi-mete tsy holañeñe naho hivañon-ko veloñe amy andro fahateloy i Norizañey ⁴⁷ vaho ho taroñeñe amy tahina'ey ty fisolohoañe naho ty fañahan-kakeo amo kilakila ondatio mifototse e Ierosaleme ao. ⁴⁸ Valolombeloñe amy raha rezay nahareo.

⁴⁹ Inao, hahitriko ama' areo i nampitaman-dRaekoy; aa le mandiñisa an-drova Ierosaleme ao ampara' te isaroman-kaozarañe hirik' añ' abo.[†]

Ty Fionjona'e Mar 16.19; Asa 1.9

⁵⁰ Aa le niaoloa'e pak' e Betania Anià vaho nañonjom-pitañe, nitata iareo. ⁵¹ Ie nitatae'e, le navik' am' iereo vaho naonjoñe mb' andindiñe aña. ⁵² Nitalaho'a' iareo naho nimpoly mb'e Ierosaleme mb'eo an-kafaleam-bey, ⁵³ vaho nitolom-pandrenge naho nañandriañe an'Andrianañahare añ' Anjomban' Añahare ao. Amena.

Jaona

I Norizañey taolo t'ie Nitoly

¹ Tam-pifotorañe aña t'i Tsara, le nindre aman' Añahare i Tsaray* vaho Andrianañahare i Tsaray. ² Ie taman' Andrianañahare amy fifotorañey. ³ Ie ty nañamboarañe ze he'e; aa naho tsy ie, ndra loli'e tsy ho teo ze eo†. ⁴ Tama'e o haveloñeo‡; le nañazavàñe ondatio i haveloñey; ⁵ mireandreañe añ'ieñey ao i Hazavàñey, le tsy nahatindry aze i ieñey.

Ty Mpiaolo' i Norizañey

⁶ Teo t'indaty nirahen' Añahare, Jaona ty tahina'e. ⁷ Pok' eo re ho valolombeloñe hitalily i Hazavàñey, soa te hatokisa ze kila ondaty. ⁸ Tsy t'ie i Hazavàñey, f'ie ro hitaroñe i Hazavàñey.

Ty Falai' Ondatio aze

⁹ Ie ty Hazavañe to mañazava ze hene ondaty mizilike an-tane atoy. ¹⁰ Tami' ty voatse toy atoy re naho ie ty nañamboarañe ty voatse toy§, fe tsy nahafohiñ' aze ty voatse toy. ¹¹ Nivotrak' amo Azeo re, fe tsy nirambesa' o Azeo.

Ty Natokisa' Ondatio i Norizañey

¹² Fe hene nimea'e lily ho anan' Añahare ze nandrambe aze, ze miato amy tahina'ey, ¹³ ie tsy nareñen-dio, tsy nisatrie' ty nofotse, tsy nisafirie' ondaty, fa i Andrianañahare.

Ty Nisamahañe aze ho Ondaty

¹⁴ Ninjare nofotse i Tsaray, ie namoroñe ty sokemitraha'e aman-tika atoy. Nioni'ay ty enge'e, i volonahetse mañeva ty maha bako-tokañe nampiarenen-dRae azey, ie fonitse hasoa naho hatò. ¹⁵ Nitalily aze t'i Jaona ie nikoi-dava ty hoe: Ie i nanoeko ty hoe, I manonjohy ahiy ro ambone ahy amy t'ie taoloko. ¹⁶ Songa nandrambe amy halifora'ey tika: hasoa atovonkasoa. ¹⁷ Toe i Mosè ty nanolorañe Hake, le IESOÀ Norizañey ty nitotsaha' ty falalañe naho ty hatò. ¹⁸ Tsy eo ty nahatre a an'Andrianañahare ndra mbia' mbia; i bako tokañe añ' arañan-dRae'ey, Ie ty mitaroñe*.

Talily i Jaona Mat 3.1-12; Mar 1.2-8; Lke 3.3-16

¹⁹ Zao ty enta' i Jaona te nirahe' o Tehodao ty mpisoroñe naho nte-Levy hirik'e Ierosaleme aña nañontane aze, ty hoe: Ia v'iheo? ²⁰ Niantoke re, tsy nitety, fa ninà'e ty hoe: Tsy zaho i Norizañey. ²¹ Aa hoe ty ontane' iareo: Ia arè? i Elia v'iheo? le hoe re: Tsy ie raho, I mpitokiy hao? le hoe re: Aiy! ²² Le hoe ty nanoa' iareo: Ia v'iheo, hahatoiñia'ay o nañirak' anaio? Akore ty anoñona'o ty vata'o? ²³ Hoe re: Zaho ty fiarañanaña'

i mikoik' am-patrambey añey, Vantaño ty lala' i TALÈ, amy nisaontsie' Isaia mpitokiy.†

²⁴ Toe irake boak' amo Fariseoo iereo, ²⁵ ie nañontane ty hoe: Akore t'ie mampilipotse, ihe tsy i Norizañey, tsy i Elia, tsy i Mpitokiy? ²⁶ Tinoi' i Jaona ty hoe: Mampilipotse an-drano raho, fe mijohañe añivo' areo ao ty

* **1:1** Fot 1:1; Rzt 8:22-31 † **1:3** Efe 3:9; Kol 1:16; Heb 1:2; Heb 11:3; 2Pe 3:5; Sab 33:6 ‡ **1:4** Haveloñey: fiañey (ze hene maha ondaty) § **1:10** Sab 33:6 * **1:18** Jao 5:37; 6:46; 1Jn 4:12 † **1:23** Ies 40:3

tsy fohi' areo; ²⁷ i manonjohy ahy nanoeñe aolokoy; tsy sazo ahy ty hañaha i talin-kana'ey. ²⁸ Nanoeñe e Betania alafe' Iordaney zay amy fampilipora' i Jaonay.

Milipotse vaho Alipotse Mat 2.13-17; Mar 1.9-11; Lke 3.21, 22

²⁹ Tamy loakandroy, nioni'e te nitotofa' IESOÀ, le hoe re: Heheke o Vik' añondrin' Añahare mpañaha hakeo' ty voatse toio‡. ³⁰ Ie i nitaroñekoy ty hoe: Manonjohy ahy t'indaty ambone te amako amy t'ie taoloko. ³¹ Tsy napotako re: fe ty hampibooahañe aze am' Israele ty nivotrahako atoy hampilipotse an-drano.

³² Le hoe ty nitaroñe' i Jaona: Nahatre arofoy raho, nizotso hoe deho boak'an-dindìñe ey nipetake ama'e. ³³ Ninofiko re, fe nanao ty hoe amako i nañitrik' ahy hampilipotse an-dranoy: Ty isa'o izotsoa' i Arofoy vaho mipetak' ama'e, ie ty mandipotse amy Arofo Masiñey. ³⁴ Le nahatre arofoy vaho mitaroñe te Ie i Anak' Andrianañaharey.

O Mpama'e Valoha'eo

³⁵ Nijohañ'eo mindre ami'ty mpama'e roe t'i Jaona te loak' andro. ³⁶ Aa ie nahaisake IESOÀ nañavelo, le hoe re: Heheke o Vik' añondrin' Añahareo! ³⁷ Jinanji' i mpama'e roe rey i saontsi'ey le nañorike IESOÀ. ³⁸ Nitolike t'IESOÀ, nahavazoho t'ie nañorike vaho nanoa'e ty hoe: Ino ty ipaia' areo? Le hoe iereo tama'e: O Raby, toe: Talè, aia ty imoneña'o? ³⁹ Le nanoa'e ty hoe: Antao, hañisake: Aa le nimb'eo iereo nahaisake i nimoneña'ey le nitambatse ama'e ao amy àndroy, ie va'e tami'ty ora faha-folo§.

⁴⁰ Ty raik' amy roe nahajanjiñe i Jaona naho nanonjohy aze rey le i Andrea, rahalahi' i Simona Petera; ⁴¹ Tendrek' aze hey t'i Simona rahalahi'e le nanoa'e ty hoe: Nioni'ay t'i Mesia, toe: i Norizañey.

⁴² Nindese'e mb'amy IESOÀ mb'eo, le ie nivazoho IESOÀ le nanoe'e ty hoe: Ihe ro Simona ana' i Jaona. Hatao Kefasy rehe, toe: vato)*.

i Filipo naho i Natanaela

⁴³ Ie amy loak' androy te homb' e Galilia ao t'IESOÀ, le nitendreke i Filipo vaho nanoa'e ty hoe: Oriho raho. ⁴⁴ Nte-Betsaida t'i Filipo, ty rova' i Andrea naho i Petera. ⁴⁵ Nirendre' i Filipo t'i Natanaela vaho nanoa'e ty hoe: Fa nifanjo amy sinoki' i Mosè amy Hake naho amo Mpitokioy zahay, IESOÀ nte-Nazareta, ana' Iosefe! ⁴⁶ Hoe t'i Natanaela tama'e: Mete iboahan-draha soa hao ty Nazareta? Antao hisary, hoe t'i Filipo ama'e.

⁴⁷ Ie nivazoho' IESOÀ t'i Natanaela nitotok' aze, le hoe re ty ama'e: Heheke, ty toe ana' Israele, ty tsy am-pamañahiañe! ⁴⁸ Le hoe ty nanoa' i Natanaela: Aia ty naharofoana'o ahy? Tinoi' IESOÀ ty hoe: Ihe mbe tsy kinai' i Filipo le nitreako ambane' i sakoañey. ⁴⁹ Aa le tinoi' i Natanaela ty hoe: O Raby, Anan' Añahare rehe; Ihe ro Mpanjaka' Israele. ⁵⁰ Le ty hoe ty natoi' IESOÀ aze: Amy te nanoako t'ie nahatre azo ambane' i sakoañey hao ro nampiantok' azo? Mbe ho oni'o ty lombolombo'e. ⁵¹ Le tinovo'e ty hoe: Eka! to t'itaroñako te mbe ho oni' areo ty fisokafa' i likerañey naho ty fionjonañe naho ty fizotsoa' o anjelin' Añahareo amy Ana' ondatiy†.

2

Ninjare Divay ty Rano

‡ 1:29 Mat 1:21; Tit 2:14; 1Jn 3:5,8 § 1:39 Ora faha-10: folak' andro maleme * 1:42 Grika Petros (Petera); Heb Kefà : Vato † 1:51 Fot 28:12

¹ Ie tongoa' ty herone le tondroke e Kana e Galilia aña ty enga-valy naho teo ty rene'IESOÀ ²vaho songa nañambaràñe homb' amy enga-vaoy t'IESOÀ naho o mpiama'eo.

³ Ie ho nikapioke ty divay le hoe i rene'IESOÀ ama'e: Tsy aman-divay iereo. ⁴Tinoi'IESOÀ ty hoe: O Rakembao, inoñ'ama'o naho amako zay? Mbe tsy tsatoke ty orako. ⁵Fe hoe ty nafanton-drene'e amo mpitoroñeo: Anò ze ampanoa'e. ⁶Nidoñe marine eo ty sajoa vato eneñe, fañaliova' o Jiosoo, songa nahaarake fañaranañe telo ndra roe. ⁷Hoe t'IESOÀ tam' iareo: Atsafo rano o sajao. Le nipeà' iereo pak'an-tsoñi'e. ⁸Le hoe re tam' iereo: Anovizo henaneo vaho endeso amy talèn-engay. Le nandesa' iareo; ⁹aa naho nitsopeke i rano niova ho divaiy i talèn-tsabadidakey, ie tsy napota'e ty nihirifa'e, fa o mpitoroñe nanovy i ranoio avao ro nahafohiñe, le kinanji' i talen-tsabadidakey i mpañengay ¹⁰vaho nanoa'e ty hoe, Fanjots'o' ondatio aolo ty divay soa, ie nikamaeñe, vaho zay ty masay; fa ihe ka nañaja ty divay soa ampara henane. ¹¹Zay ty lengom-bilo'IESOÀ nanoa'e e Kana' i Galilia aña, nampiboake ty enge'e naho nampiantofa'e o mpiama'eo.

¹²Ie modo zay le nizotso mb'e Kapernaome mb'eo, ie naho i rene'e naho o rahalahi'eo vaho o mpiama'eo, le nitoetse ao andro tsy ampeampe.

Pinio'e i Anjombay

(Mat 21.12; Mk 11.15-19; Lk 19.45-48)

¹³Ie an-titotse i Fihelañ' ambone' o Jiosoy, le nionjomb'e Ierosaleme aña t'IESOÀ. ¹⁴Naho nizoe'e an-kiririsan' anjomban' Añahare ao o nandetak' añombe naho añondry naho dehoo, vaho o mpampikalo dralao mitoboke ey. ¹⁵Aa le namboare'e firison-kafotse naho fonga sinoi'e hiakatse i anjombay mindre amo añondrio naho o añombeo, le nalonga'e o dralam-pampikalo dralao vaho navalihoho'e o talatalao, ¹⁶le hoe re amo mpandetake dehoo: Akaro aña o rahao vaho ko anoeñe kibohon-kilankañe ty anjomban-dRaeko. ¹⁷Le nitiahi' o mpiama'eo i pinatetse, ty hoe: Nampibotsek' ahy

ty fahimbañako amy anjomba'oy.*

¹⁸Tinoi' o Tehodao ty hoe: Inoñe ty viloñe hatoro'o anay, te ihe manao o raha retiañe? ¹⁹Natoi'IESOÀ ty hoe: Rotsaho ty anjomba toy le hatroako añaate' ty telo andro. ²⁰Aa le hoe o Tehodao: Efapolu eneñ' amby taoñe ty namboareñe ty anjomba toy, vaho hatroa'o aña' ate ty telo andro? ²¹Fa i akibam-pañova'ey ty nienta'ey. ²²Aa ie nivañom-belon-dre le nitiahi' o mpiama'eo i tsinara'e am'iereo; le natokisa' iareo o Sokitse Masiñeo naho ty entañe nisaontsie'IESOÀ.

²³Ie te Ierosaleme ao amy Fihelañey, le maro ty niantoke i tahina'ey te nahaisake o raha tsitantane nanoa'eo. ²⁴F'ie tsy nampivave'IESOÀ, amy te kila arofoana'e ondatio; ²⁵vaho tsy nipay mpitalily ondaty, fa arofoana'e ze am'ondatio.

3

i Nikodemosy

¹Teo t'indaty mpiamo Fariseoo, i Nikodemosy ty tahina'e, mpifehe amo Jiosio, ²niheo mb'amyIESOÀ mb'eo hâleñe, le nanoa'e ty hoe: O Tale, fohi'ay te mpañòke hirik' aman' Añahare rehe; amy te tsy eo ty hahatafetetse o viloñe anoe'oo naho tsy aman' Añahare.

* ^{2:17} Sab 69:9

³ Hoe ty natoi' IESOÀ aze: Eka! To o itaroñakoo, naho tsy asamake indraike* t'indaty, le tsy hahaoniñe i Fifehean' Añaharey re. ⁴ Aa hoe t'i Nikodemosy ama'e: Aia ty hahatolia' ondaty, ie fa bey? Hahafimoake an-tron-drene'e ao fañindroe'e hao re hasamake?

⁵ Tinoi' IESOÀ: Eka! to t'itaroñako t'ie tsy asamak' ami'ty rano naho amy Arofoy le tsy hahazilike amy Fifehean' Añaharey. ⁶ Ze nasama' ty nofotse ro nofotse, fe ze nasama' i Arofoy ro arofo. ⁷ Ko ilatsà'o i nitaroñakoy ty hoe: Tsy mahay tsy asamake boak' añ'abo nahareo. ⁸ Mitiok' amy ze nahi'e i tiokey, mahajanjiñe ty feo'e rehe, fe tsy oni'o ty nihirifa'e ndra ty handoaha'e; zay ka ze hene nasama' i Arofoy. ⁹ Hoe ty natoi' i Nikodemosy, Aia ty hahamete izay?

¹⁰ Hoe ty natoi' IESOÀ: Ihe mpañana' Israele hao ro tsy maharendreke o raha zao? ¹¹ Eka! to t'itaroñako te volañe'ay o fohi'aio vaho talilie'ay o nitrea'aio, fe tsy antofe' areo o taro'aio. ¹² Aa naho itaroñako raha an-tane atoio, fa tsy antofe' areo, le aia ty hahatokisa' areo te itaroñako rahandindiñe ao? ¹³ Toe tsy eo ty nionjoñe mb'andindiñe ey naho tsy i nizotso hirik' andikerañey, toe i Ana' Ondatiy. ¹⁴ Manahake ty nañonjona' i Mosè i mereñe am-patrambey aney, ro tsi-mete tsy hañengañe i Ana' Ondatiy. ¹⁵ Soa te, hanan-kaveloñe nainai'e iaby naho tsy ho momoke ze miato ama'e. ¹⁶ Akore ty hakokoan' Añahare ty voatse toy, kanao nitolora'e i lahy bako-toka'ey, soa tsy haito ze miato ama'e fa hanan-kaveloñe nainai'e. ¹⁷ Tsy nirahen' Añahare mb' ami'ty voatse toy hamàtse ty voatse toy i Anakey; fa t'ie ho fandrombahañe ty voatse toy. ¹⁸ Tsy hafàtse ze miato ama'e; fa nafàtse ka ty tsi-miato, amy te tsy natokisa' ty tahina' i Andahi-bako tokan' Añaharey. ¹⁹ Zao o fàtseo, te nivotrak' an-tane atoy i hazavàñey fe nitea' ondatio o ieñeo te amy hazavàñey, ie raty sata. ²⁰ Heje' ze hene mpanao ratio i hazavàñey, ie tsy miheo mb'amy hazavàñey tsy mone ho ventareñe o sata-rati'eo. ²¹ Fe mb'amo hazavàñeo ty manao to, hampidodeàñe o fitoloña'eo, t'ie nanoeñe aman' Añahare.

²² Ie aña, le nomb'an-tane' Iehodà mb'eo t'IESOÀ rekets' o mpiama'eo le nitamañe aña miharo am' iereo vaho nampilipotse. ²³ Nampilipotse e Ainone marine i Saleime aña ka t'i Jaona, amy t'ie maro rano, le nimb'ama'e mb'eo iareo vaho nampiliporeñe. ²⁴ Mbe tsy nafetsak' androhy ao hey t'i Jaona.

²⁵ Ie amy zao nifandietse amo fañaliovañe o Tehodao naho o mpiamy Jaona. ²⁶ Aa le nimb' amy Jaona iereo, nanao ty hoe: O Raby, i nindre ama'o alafe' Iordaneiy, i nitalilie'oy, inao, ie ka ro mampilipotse, le kila mb'ama'e mb'eo. ²⁷ Hoe ty natoi' i Jaona: Tsy maha-rambe ndra inoñ' inoñe t'indaty naho tsy natolots'aze boak' andindiñe aña. ²⁸ Inahareo ro valolombeloñe te nitaroñeko ty hoe, Tsy zaho i Norizañey, fa nahitrike ho fiaolo'e. ²⁹ Talè' ty enga-vao ty mpañenga; mijohañe eo naho mitsendreñe aze ty rañe' i mpañengay, le mahavaranehake aze ty fiarañanaña' i mpañengay; zay ty mañeneke o haehakoo. ³⁰ Mahity te ie ty haonjoñe vaho zaho ty hareke. ³¹ Ambone' ze he'e i hirik' amboney. Le a ty tane toy ty hirik'an-tane atoy, vaho ty tane toy ro fisaontsie'e; lohà' ze he'e i boak' andindiñey. ³² Ze nivazoho'e naho nijanjiñe'e ro taroñe'e; fe tsy eo ty mandrambe i taro'ey. ³³ I niantoke i taro'ey ty namolitomboke te to t'i Andrianañahare. ³⁴ Saontsie' i nahitrin' Añaharey o tsaran' Añahareo, amy te tsy arañen' Añahare ty fanolorañe i Arofoy. ³⁵ Kokoan-dRae i Anakey vaho kila natolo'e am-pità'e. ³⁶ Aman-kaveloñe nainai'e ty miato

* ^{3:3} ndra: boak' ambone

amy Anakey; fe tsy hahaisake i haveloñey ty manjehatse i Anakey, ie mb'e fehe' ty haviñeran' Añahare.

4

Ty Rakemba am-Bovoñe eo

¹ Aa ie niarofoana' i Talè te jinanji' o Fariseoo te namory naho nandipotse mpioke maro te amy Jaona t'IESOÀ, ² (Toe tsy nampilipotse t'IESOÀ, fa o mpiama'eo.) ³ le nienga Iehodà re nibalike mb'e Galilia aña, ⁴ f'ie tsi-mete tsy niranga i Samaria; ⁵ aa le nivotrak' an-drova' i Samaria atao Sikara re, marine' ty toetse natolo' Iakobe am' Iosefe ana'e. ⁶ Teo ty vovo' Iakobe. Nivozak' amy fañavelo'ey t'IESOÀ le niambesatse amy vovoñey; ie fa ho oram-paheneñe.

⁷ Nimb'eo amy zao ty rakemba nte-Samaria hitari-drano, le hoe t'IESOÀ ama'e: Anjotsò rano raho. ⁸ (fa nihitrik' mb'an-drova aña o mpiama'eo hikalo mahakama.) ⁹ Aa hoe i rakemba nte-Samariay ama'e: Aa vaho akore te Ihe Jiosy, ro mipay rano amako: zaho ampela nte Samaria? (amy te tsy mifañaoñe amo nte-Samariao o Jiosio.) ¹⁰ Le hoe ty natoi' IESOÀ, Naho nifohi'o ty falalàñ Añahare naho o nanao ama'o ty hoe: Anjotsò rano, le ho nihalalia'o vaho ho nanjotsoa'e rano veloñe. ¹¹ Hoe re tama'e: O Aba, tsy amam-pavintan-dRehe, laleke o vovoñeo, aia ty hahazoa'o ze o ranon-kaveloñe zao? ¹² Ihe hao ro bey te am' Iakobe raen-tika nanolots' anay ty vovoñe tìañe, ie nikamae' o ana'eo naho o hare'eo? ¹³ Natoi' IESOÀ ty hoe, Ze minoñe ty rano toy mbe haran-drano avao, ¹⁴ fe tsy ho taliñiereñe ka ty mikama i rano homeiko azey; i rano hatoloko azey, le ho vovon-drano ama'e ao higoangoñañe mb'an-kaveloñe nainai'e. ¹⁵ Hoe i rakembay tama'e, O Aba, meo ahy i rano zay tsy haran-dranoako naho tsy hitohàko mb'etoa hitarike.

¹⁶ Hoe re tama'e: Akia, kanjio ty vali'o le mb'etoa. ¹⁷ Tinoi' i rakembay ty hoe: Tsy amam-baly raho. Hoe t'IESOÀ tama'e: To i asa'oy te tsy amam-baly; ¹⁸ ie nanam-baly lime naho tsy vali'o i ama'o henaneoy. Mahity i enta'oy.

¹⁹ Hoe i rakembay tama'e, O Aba, apotako te mpitoky rehe. ²⁰ Fitalahoandroae'ay ty vohitse toy, fa hoe ka nahareo te e Ierosaleme ao ty toem-pitalahoa' ondatio.

²¹ Hoe t'IESOÀ tama'e: O rakemba, atokiso, ho tondroke ty sa tsy hitalahoa' areo aman-dRae, ke ami'ty vohitse toy he e Ierosaleme ao. ²² Tsy fohi' areo ty iambanea' areo fe fanta'ay ty italahoa'ay amy te boak' amo Jiosio ty fandrombahañe*. ²³ Fa ho tendreke ty ora, naho toe ie henaneo, te hitalaho aman-dRae an-stroke naho an-katò o toe mpitalahoo; ie ro paian-dRae hitalaho ama'e. ²⁴ Arofo t'i Andrianañahare, le tsi-mahay tsy hitalaho añ' arofo naho an-katò o mpitalaho ama'eo.

²⁵ Hoe i rakembay tama'e: Apotako te hitotsak' atoy t'i Mesia (i atao Norizañey); ie avy ro ho taroñe'e amantika ze he'e. ²⁶ Hoe t'IESOÀ tama'e: Ie zaho mirehak' ama'o.

Mipoteake o Mpiazza'eo

²⁷ Niloneak' amy zao o mpiama'eo le nilatsa te ie nifanaontsy ami'ty rakemba, fe leo raike tsy nañontane aze ty hoe: Ino ty paia'o? ndra: Akore te isaontsia'o? ²⁸ Nado' i rakembay i vatavo'ey vaho nienga mb'an-drova ao nitalily am'ondate ty hoe: ²⁹ Antao hahaoniñe t'indaty nitalily amako

* ^{4:22} Sab 147:19, Ies 2:3, 14:1, 56:6-8, Eze 47:22-23, Zek 8:23, Rom 2:20, 3:2, 9:4, Ben 21:12, 21:24

ze fonga satako. Hera ie i Norizañey? ³⁰ Niakatse i rovay iereo, nimb'ama'e mb'eo.

³¹ Nanohiñ' aze amy zao o mpiama'eo, nanao ty hoe: O Talè, mikamà. ³² Fe hoe ty nanao'a: Aman-kànen-ko haneñe tsy fohi' areo raho. ³³ Aa le nifamesoveso ty hoe o mpiama'eo: Hera teo ty nanjotso ama'e? ³⁴ Hoe t'IESOÀ tam' iereo, Ty haneko, le ty manao ze satri' i nañitrik' Ahiy vaho ty hañeneke o fitoloña'eo. ³⁵ Tsy fisaontsi' areo hao ty hoe: Mbe aña ty efa-bolañe vaho ho toly ty sabo? Inao ty itaroñako: ampiandrao fihaino, le taringito o tetekeo t'ie rifo te ho tataheñe henanekeo. ³⁶ Fa mitakatse ty rima'e o mpanatakeo, naho manontom-boa ho an-kaveloñe nainai'e, soa te hitrao-pirebeke ty mpitongy naho ty mpanatake. ³⁷ Zay ty mahatò ty tsara manao ty hoe: Mitongy ty raike vaho manatake ty ila'e. ³⁸ Nahitriko hanatake ty tsy nimokora' areo; o ila'eo ty nifanehake vaho niziliha'areo i nivozaha' iareoy.

Atokisa' o nte Samariao

³⁹ Aa le maro amo nte Samaria hirik' amy rovaio ty niantok' aze ty amy enta' i rakembaiy nanao ty hoe: Natalili'e ahiko ze fonga sata nanoeko.

⁴⁰ Aa le nimb' ama'e mb'eo o nte Samariao nihalaly ama'e ty hañialo am'iereo, vaho niambesatse ao roe andro re. ⁴¹ Maro ka ty niantoke ty amo tsara'eo, ⁴² naho nanao ty hoe amy rakembay: Tsy i saontsi'oy avao ty mampiantok' anay, fa nahajanjiñe ka zahay, vaho rendre'ay te toe ie i Norizañey, i Mpandrombake ty voatse toiy.

Rinambe' o nte Galiliao Antalatalasaba

⁴³ Ie heròne, le nienga mb'e Galilia aña. ⁴⁴ (Toe fa natalili' IESOÀ te tsivara an-tane'e ty mpitoky.) ⁴⁵ Aa ie nandoake e Galilia ao le nampihovae' o nte Galiliao —ie fa niisa' iareo o raha iaby nanoe'e e Ierosaleme aña amy sabadidakeio, toe namonje' i sabadidakey ka iereo.

ty Anadahi' i Roandriañey

⁴⁶ Aa le niherem-b'e Kana' i Galilia t'IESOÀ, mb'amy nanoe'e rano ho divay añey. Teo ty roandriañey, te natindri' ty rare e Kapernaome ao ty ana-dahi'e. ⁴⁷ Aa ie jinanji'e te nienga Iehodà mb'e Galilia mb'eo t'IESOÀ, le niheo mb'eo le nihalalia'e ty hizotso mb'eo hañafake i ana'e fa heta'ey. ⁴⁸ Le hoe t'IESOÀ tama'e: Naho tsy mahaonim-biloñe naho halatsàñe nahareo, le tsy miantok' avao. ⁴⁹ Fe nanao' i roandriañey ty hoe: O Aba, ehe mizotsoa, tsy mone hivetrake i anakoy. ⁵⁰ Hoe t'IESOÀ ama'e: Akia, veloñe i ana'oy. Natokisa' indatiy i nitsaràe' IESOÀ ama'ey le nimpoly. ⁵¹ Ie nizotso mb'eo, le nifanalaka ama'e o mpitoro'eo, nitalily te veloñe i ana'ey. ⁵² Aa le nañontanea'e ty ora nitsaitsaihe'e, le hoe iereo ama'e: Omale amy ora faha-fitoy[†] te niafak' ama'e i firemporempoañey. ⁵³ Nifohin-drae'e t'ie i ora nitsaràe' IESOÀ ty hoe: Veloñe i ana'oy. Le niantoke re rekets' o añ'anjomba'e iabio. ⁵⁴ Zay ty viloñe faha-roe nanoe' IESOÀ sikal' amy niakara'e Iehodà mb'e Galilia añey.

5

Mañafak' aña'olon' Antara eo

¹ Nandimbe zay ty sabadidak' o Jiosio le nionjoñe mb'e Ierosaleme mb'eo t'Iesoà. ² Teo ty antara marine' ty lalambein' Añondry e Ierosaleme ao atao Beit-zatà* ami'ty saontsy Hebreo; aman-alokaloke lime. ³ Maro ty

[†] 4:52 folakandro-maràñe : 1:00 ndra 13:00; * 5:2 Betesda: anjombam-palalàñe, rano mañidahida;

matindry nandre ao, ty fey, ty kombo, ty kepeke nandiñe ty fihetse' i ranoy. ⁴ Ie an-tsa'e le mizotso mb'amy antaray ty anjeli' i Talè mitrobo i ranoy; ie troboe'e i ranoy le ze valoha'e milipotse an-drano ao ty ampijangañeñe amy ze hasilofa'e. ⁵ Teo ty lahilahy nikepeke telo-polo taoñe valo' amby. ⁶ Ie nivazoho' Iesoà te nidefoke eo, naho niarofoana'e te haehae ty do'e, le nanoa'e ty hoe: Te ho jangam-b'iheo? ⁷ Hoe ty natoi' i kepekey: O Aba, zaho tsy ama' ondaty hampijoroboñe ahy amo antarao ie ampihalingaliñeñe o ranoo; fa naho mb'eo raho, le eo ty mizotso aolo. ⁸ Hoe t'Iesoà tama'e: Miongaha, rambeso o tihi'oo le mañaveloa. ⁹ Nijangañe amy zao indatiy le rinambe'e i tihi'ey vaho nitrantràñe mb'eo. Toe Sabotse i andro zay.

Kanao SABOTSE

¹⁰ Aa le hoe ty asa' o Tehodao amy jinangañey: SABATA 'nio; faly ty anikeleha'o tihy. ¹¹ Tinoi'e ty hoe: I nampijangañe ahiy ty nanao amako ty hoe: Miongaha, rambeso o tihi'oo le akia. ¹² Le hoe ty ontane' iareo: Ia t'indaty nanao ama'o ty hoe: Rambeso o tihi'oo, le akia, zao? ¹³ F'ie tsy napota' i nafahañey, fa nivik' aña t'IESOÀ le lahialeñe ty an-toetse ao. ¹⁴ Ie aña, nivazoho' IESOÀ añ'anjomban' Añahare ao re le nanoa'e ty hoe: Hehe, t'ie jangañe, ko mandilatse ka, tsy mone hanjo ty lombolombo' i teoy†. ¹⁵ Niavotse indatiy nitalily amo Tehodao te IESOÀ ro nampijangañe aze. ¹⁶ Aa le nampisoañe' o Tehodao t'IESOÀ, nikilily hañè doza ama'e, amy t'ie nanoe'e amy SABOTSEY.

Hambañe aman' Añahare

¹⁷ Fe hoe ty natoi' IESOÀ: Mifanehake sikal' amy zao t'i Raeko vaho mitoloñe ka raho. ¹⁸ Aa le sandrake te nipaia' o Tehodao ty hañohodoza ama'e; tsy t'ie nandilatse amy SABATAiy avao, fa t'ie nanao i Andrianañahare ho Rae'e, hifanahafa'e aman' Añahare.

Hambañe ami'ty Haozara'e

¹⁹ Le hoe ty natoi' IESOÀ: Eka! to t'itaroñako te, tsy mete manao inoñ' inoñe am-bata'e i Anakey, naho tsy ty oni'e anoen-dRae'e; amy te ze trea'e anoen-dRae'e, ie ro anoe' i Anakey. ²⁰ Kokoan-dRae t'i Anake le kila atoro'e aze ze anoe'e vaho ho toroa'e fitoloñañe ra'elahy te amy retoañe hilatsà' areo. ²¹ Fa hambañe amy te ampitroaran-dRae o vilasio naho velome'e, ty ameloma' i Anakey ze no'e.

Hambañe ami'ty Fanaña'e Lily

²² Toe tsy eo ty zakae' i Rae, fa hene natolo'e amy Anakey ze fizakañe ²³ soa te songa hiasy i Anakey, hambañ' amy iasia' iareo an-dRaey. Ze tsy miisy i ana'ey, tsy miisy an-dRae nañirak'aze.

²⁴ Eka! To ty itaroñako te, ze mijaniñe o volakoo naho matoky i nañirak' Ahiy ro aman-kaveloñe nainai'e, vaho tsy mimoak' an-jaka ao; f'ie nienga i havilasiy mb'an-kaveloñe mb'eo. ²⁵ Itaroñako an-katò te, ho avy ty ora, toe fa ie henaneo, te ho janjiñe' o vilasio ty fiarañanaña' i Anan' Añaharey, le ho veloñe o mahajanjiñe azeo. ²⁶ Fa hambañe ami'te aman-kaveloñe am-pañova'e t'i Rae, ty nanolora'e amy Anakey ty hanañe haveloñe am-bata'e; ²⁷ mbore tinolo'e lily hizaka, amy te ie i Ana' ondatiy. ²⁸ Ko idaba' areo, fa ho tondroke ty ora ho janjiñe' ze fonga an-donak' ao i fiarañanaña'ey ²⁹ vaho hiongake boak'ao: ze nanao soa ho amy fivañonam-beloñey; le ze nanao raty ho amy fitroaram-pizakañey. ³⁰ Toe tsy mahatafetetse raho te

† 5:14 Jao 8:11

zaho avao. Ie mitsanoñe ro mizaka, le to o zakakoo amy te tsy ty lahako ro paiako fa ty satrin-dRae nañirak' ahy. ³¹ Aa naho mitalily vatan-draho, tsy ho tò i taliliy.

Ty Talili' i Jaona Mpandipotse

³² Ao ty mitalily ahy, le apotako te to i taroñe talilie'e ahiy. ³³ Fa nañitrik' amy Jaona nahareo, le nitaroña'e ty hiti'e. ³⁴ Tsy rambeseko ze talilie' ondaty ahy, fe ivolañako o raha zao hahazoa' areo rombake. ³⁵ Jiro nirehetse naho nireandrean-dre vaho nisatrie' areo ty hirebeke hey amy hazavà'ey.

Ty Mitaroñe aze

³⁶ Amam-balolombeloñe ambone' i Jaona raho, fa o fitoloñañe nafanton-dRae amako ho henefañeo vaho i fitoloñañe fanoeko ro mitalily ahy te nirahen-dRae.

Ty Taroñe ty aman-dRae

³⁷ I Rae nañirak' Ahiy—Ie ty nitaroñe ahy. Mbe lia' areo tsy nahajanjiñe ty fiarañanaña'e ndra nahaisake i vinta'ey‡, ³⁸ vaho tsy mimoneñe ama' areo ao o tsara'eo amy te tsy atokisa' areo i nahitri'ey. ³⁹ Hotsohotsò o Sokitse Masiñeo; fa atokisa' areo te ama'e ao ty hanaña' areo haveloñe nainai'e; eka, ie i mitalily ahikoy, ⁴⁰ fe mifoneñe tsy homb' amako nahareo hahazo haveloñe.

Mitaroñe i Sokitse Masiñey

⁴¹ Tsy rambeko ty fiasia' ondatio, ⁴² le apotako nahareo, te tsy an-tro' areo ao ty fikokoan' Añahare. ⁴³ Nimb' atoa raho ami'ty tahinan-dRaeko, fe tsy rinambe' areo; naho eo ty miheo mb'ama' areo ami'ty añara'e, le ampihovae' areo. ⁴⁴ Aia ty hahafatokisa' areo, te mifampiasy avao fa tsy mipay ty engeñe boak' aman' Añahare tokañe?

⁴⁵ Ko atao' areo te zaho ty hanisy anahareo añatrefan-dRae; toe eo ty haneseke anahareo: i Mosè tama' areo. ⁴⁶ Aa naho niantofa' areo t'i Mosè le ho natokisa' areo raho amy te zaho i nanokira'ey. ⁴⁷ Aa naho tsy miantoke o soki'eo nahareo, aia ty hatokisa' areo o volakoo?*

ty Lime Arivo Lahy Mat 14.13-21; Mar 6.31-44; Lke 9 11-17

6

¹ Ie aña, le nitsake i riake Galiliay (i atao Tiberiasiy) t'IesoÀ, ² naho norihe' ty lahialeñe amy te nioni' iereo o viloñe nanoe'e amo marareoo.

³ Aa le nitroa-bohitse t'IesoÀ vaho niharo fiambesatse amo mpiama'eo.

⁴ An-titotse henane zay i Fihelañey, i sabadidak' o Jiosoy.

⁵ Ie niandra t'IesoÀ, le nahaoniñe te nañarine aze i lahialeñey, le hoe re amy Filipo: Aia ty hikaloan-tika mofo hikamà' o retoañe? ⁶ Ty hitsok' aze ty nanoa'e izay, fa niarofoana'e ty hanoe'e. ⁷ Tinoi' i Filipo ty hoe: ty mofo azom-bogady roan' jato tsy hahaeneñe iareo t'ie songa hangala falitse. ⁸ Natovo' i Andrea, mpiama'e, rahalahi' i Simona Petera, ty hoe : ⁹ Atoañe ty ajajalahy ama' mofo hordea* lime naho fiañe kedekedeke roe, f'ie haha-inoñe ondaty maro iretoañe?

¹⁰ Le hoe t'IesoÀ: Ampiambesaro ondatio, (toe nisoa ahetsi i toetsey). Aa le niambesatse ondatio—niha-lime arivo ty lahilahy. ¹¹ Rinambe' IesoÀ i mofo rey le nañandriañe vaho zinara'e amo mpiama'eo vaho nazotso' o

‡ 5:37 Jao 1:18 § 5:46 Its 18:18 * 5:47 Lke 16:31 * 6:9 karaza varem-bazaha kamae' ty tsotra

mpiama'eo amo niambesatseo; nanahake zay i fiañe rey; ndra fire' fire ty nipaiaeñe.

¹² Ie nianjañe, le hoe re amo mpiama'eo: Atontòno o nisisa nifitafitao, soa tsy ama'e ty hianto. ¹³ Aa le nahoro' iereo vaho nahapea haron-kisetse folo ro'amby ami'ty tsy nirì' o nikamao amy mofo hordea lime rey. ¹⁴ Ie niisa' ondatio i vi洛ne nanoe' IESOÀ, le hoe iereo: Toe ie i mpitoky hizilik' ami'ty voatse toy.

¹⁵ Ie niarofoana' IESOÀ t'ie fa homb'eo hamihin' aze an-tsenge hery hanao aze mpanjaka, le nivike indraike mb'am-bohitse mb'eo, ie raike.

Midraidraitse Ambone Rano Mat 14.22-33; Mar 6.45-52

¹⁶ Ie hariva, le nizotso mb'an-driake mb'eo o mpiama'eo, ¹⁷ nijon-dakañe hitsake i riakey mb'e Kapernaome aña. Ie maieñe, le mboe tsy niheo mb'am'iereo ey t'IESOÀ. ¹⁸ Nikabo-draha i riakey ami'ty habei' i tioke nangofofokey. ¹⁹ Aa ie fa nivey telopolo ndra roapolo-lim' amby stadia[†], le naheo' iereo te nandia ambone' i riakey ey t'IESOÀ nitotok' i lakañey, vaho nianifañe. ²⁰ Aa hoe re tam' iereo, Zaho 'nio; ko hembañe. ²¹ Aa le nino' iereo ty handrambe aze an-dakañe ao vaho tafatsak' amy zao amy nanandrifeañey i lakañey.

Mofon-Kaveloñe

²² Amy loak' àndroy, le niisa' i maro nijohañe alafen-driakey te tsy eo ty lakañe ila'e naho tsy i raike niharoa' o mpiama'eo fijoñe vaho tsy nitrao-pijoñe amo mpiama'eo amy lakañey t'IESOÀ, fa o mpiama'eo avao ty tao. ²³ (Toe nitoly marine' i nikamà' iareo mofo amy nañandriaña' i Talèiy ty lakañe ila'e hirike Tiberiasy.) ²⁴ Aa ie nioni' i màroy te tsy eo t'IESOÀ naho o mpiama'eo, le nijon-dakañe ka, nitsake mb'e Kapernaome mb'eo hitsoeke IESOÀ.

²⁵ Ie nahaisak' aze an-dafen-driake ey le nanoa' iareo ty hoe: O Talè, mbia ty nitsaha'o atoy? ²⁶ Hoe ty natoi' IESOÀ: Itaroñako an-katò te, tsy o vi洛ne nioni' areoo ty ipaia' areo ahy, fa t'ie nikama amy mofoy vaho nianjañe. ²⁷ Ko ifanehafañe ty mahakama mete momoke, fa i mahakama mahatañe pak'an-kaveloñe nainai'ey, i toe hazotso' i Ana' ondatiy‡, fa ie ty vinoli-tombohen' Añahare Rae.

²⁸ Le hoe ty asa' iareo tama'e: Inoñe ty hanoe'ay hitoloñe amo tolon-drahan' Añahareo? ²⁹ Hoe ty natoi' IESOÀ: Zao ty fitoroñañe an'Andrianañahare, te hatokisa' areo i nahitri'ey.

³⁰ Aa le hoe iereo tama'e: Ino ty vi洛ne hatoro'o, hahaisaha'ay, hiantofa'ay azo? Inoñe ty ho toloñe'o? ³¹ Nikama mana§ an-dratraratra aña o roae'aio, amy pinatetse ty hoe:

Nanjotsoa'e mofo boak' andindìñe aña hikama' iereo.*

³² Le hoe t'IESOÀ tam' iereo: Eka! to t'itaroñako te, tsy i Mosè ty nanjotso i mofo boak' andindìñe añey, fa i Raeko ro mpanjotso ty toe mofo hirik' andikerañe ao. ³³ I mofon' Añaharey, le i nizotso boak' andindìñe aña manolo-kaveloñe ami'ty voatse toiy.

³⁴ Le hoe iereo tama'e, O Talè, azotsò ama'ay nainai'e o mofo zao. ³⁵ Hoe t'IESOÀ tam' iereo: Zaho o mofon-kaveloñe, tsy ho saliko ka ze mitotok' ahy vaho tsy ho taliñiereñe ka ze miato amako. ³⁶ Fa hoe ty nanoako, toe

† 6:19 Stadione: taka-piletse: 185 metatse ndra lika, 60 stadione = 11 kilometatse; Stadia naho maro ‡ 6:27 Mat 4:4, Joa 6:35, 48, 51, 58 § 6:31 Heb: nofi' ay; Avo 13:31 * 6:31 Sab 78:24, 105:40, Nek 9:15

nahaisake ahy nahareo fe tsy mañaoñe. ³⁷ Hene homb'amako ze atolondRaeko ahy vaho tsy haitoako ka ze mb'amako. ³⁸ Le tsy nivotrake boak' andindìñe ao raho hanao ty satriko, fa ty satri' i nañitrik' Ahiy. ³⁹ Inao ty satrin-dRae nañirak' ahy, te leo raike amy ze hene natolo'e, tsy hapoke, fa hatroako amy andro honka'ey. ⁴⁰ Zao ty satrin' arofo' i nañitrik' ahiy, te songa hanan-kaveloñe nainai'e ze miisake i Anakey naho miato ama'e; le zaho ty hañonjoñe aze amy andro honka'ey.

⁴¹ Niñeñeoñe ama'e o Tehodao, ty amy asa'e ty hoe: Zaho i mofo nizotso hirik'andindìñe eiy, ⁴² le hoe iereo: Tsy IESOÀ, ana' Iosefe v'itia, ie fohintika ty rae'e naho i rene'e? Akore arè i asa'e ty hoe, t'ie nizotso boak' andindìñ' aña?

⁴³ Tinoi' IESOÀ ty hoe: Ko mifampiñeoñe avao. ⁴⁴ Tsy eo ty mahalefe ty homb' amako naho tsy akozozòn-dRae nañitrik' ahy; ie amy zay, zaho ty hampitroatse aze amy andro honka'ey. ⁴⁵ Pinatetse amo Mpitokio ty hoe: Hene hanare' IEHOVÀ iareo,[†]

Sindre miheo amako ze nahajanjiñe naho niòke aman-dRae. ⁴⁶ Toe ndra iaia tsy nahaoniñ' an-dRae naho tsy i boak' aman' Añaharey, Ie ty nahavazoho an-dRae. ⁴⁷ Eka! to t'itaroñako te aman-kaveloñe nainai'e ze miato amako. ⁴⁸ Zaho o mofon-kaveloñe. ⁴⁹ Nikama mana am-patrambey aña o roae' areoo, vaho nihomake. ⁵⁰ Intoy ty mofo mizotso hirik' andindìñe ao hikamà' ondatio tsy hihomake. ⁵¹ Zaho o mofo veloñe nizotso hirik' andindìñe; ndra ia' ia mikama i mofo zay ro ho veloñe nainai'e; eka, ty nofoko i mofo hatolokoy, i banabanaeko ho ami'ty havelo' ty voatse toiy.

⁵² Aa le hoe ty lie-droko' o Tehodao: Aia ty hanjotsoa' t'indaty tìa i sandri'ey ho hanen-tika? ⁵³ Le nanoa' IESOÀ ty hoe: Eka! to t'itaroñako, naho tsy ikamañe ty nofo' i Ana' ondatiy naho inomañe ty lio'e, le tsy aman-kaveloñe nahareo. ⁵⁴ Ze mikama ty nofoko naho minoñe ty lioko ro aman-kaveloñe nainai'e, le honjoneko amy andro hengaha'ey. ⁵⁵ Fa toe haneñe o nofokoo naho toe finomeñe ty lioko. ⁵⁶ Ze mikama ty nofoko naho ty lioko ro mimoneñe amako vaho zaho ama'e. ⁵⁷ Hambañe amy nañitrifa' i Rae veloñey ahiy, zaho veloñey aman-dRae, le ze mikama amako, zaho ty hiveloma'e. ⁵⁸ Zao i mofo nizotso hirik' andindìñey. Tsy manahake i mana [‡]nikamaen-droae' iareo ie nihomakey; fa ho veloñe nainai'e ze mikama ty mofo toy. ⁵⁹ I hoe zay ty tsinara'e te nañoke ampitontonañe e Kapernaomy ao.

Mity aze o ila'eo

⁶⁰ Aa le maro amo mpiama'eo, ie nahajanjiñe zay, nanao ty hoe: Maràñe i tsaray, ia ty mahajanjiñe aze? ⁶¹ Ie nioni' IESOÀ i ñeoñe'o mpiama'eo, le nanoa'e ty hoe: Mahatorifik' anahareo v'izay? ⁶² Akore arè naho isa' areo mionjoñe mb'amy nitoe'e taoloy mb'eo i Ana' ondatiy? ⁶³ I Arofoy ty mahaveloñe, tsy mahasoa ndra loli'e o nofotseo; toe arofo naho haveloñe o saontsy itaroñako[§]. ⁶⁴ Fe tsy mañaoñe ty ila' areo. Toe niarofoana' IESOÀ am-baloha'e o tsi-hiatoo, naho i hañenga' azey. ⁶⁵ Le hoe re: Zay ty nitaroñako te, tsy eo ty homb' amako naho tsy natolotse aze boak' aman-dRae. ⁶⁶ Ie amy zay, nifoneñe tsy nindre-lia ama'e ka ty maro amo mpiama'eo.

Ty taro' i Petera

[†] 6:45 Ies 54:13, Irm 31:34 [‡] 6:58 Avo 16:31 [§] 6:63 Jao 6:8, 1Ko 15:45

⁶⁷ Aa le hoe t'IESOÀ amy folo ro' amby rey, He te hisitake ka nahareo?
⁶⁸ Hoe ty natoi' i Simona Petera: O Talè, homb' ama' ia v'izahaio? Ama'o o tsaran-kaveloñe nainai'eo; ⁶⁹ Fa natokisa'ay naho mahafohiñe te Ihe i Masin' Añaharey. ⁷⁰ Hoe ty nanoa' IESOÀ: Tsy zaho hao ty nijoboñe anahareo folo-ro'ambio, fe kokolampa ty raike? ⁷¹ I Jodasy ana' i Simona nte-Kariote, mpiamy folo ro'amby rey i tsinara'ey, ie fa hañeng' aze.

7

Tsy Niantofan-dRoahalahi'e

¹ Añe zay le nañavelo e Galilia ao t'IESOÀ, f'ie tsy te homb'e Iehodà mb'eo amy te nipay hañè-doza ama'e o Tehodao. ² Nitotoke henane zay i sabadida-kivoño' o Jiosoy, ³ le hoe ty asa' o rahalahi'eo ama'e: Isitaho ty eto, akia mb'e Iehodà aña, hahaoniña' o mpiama'oo ka o fitoloñañe anoe'oo, ⁴ amy te tsy mitoloñ' añetake ze te ho fohiñe, fa am-palangesañe. Kanao manao o raha rezao rehe, le atrefo i valobohòkey. ⁵ Toe tsy niantok' aze ka o rahalahi'eo. ⁶ Le hoe t'IESOÀ am' iareo: Mbe tsy tondroke ty androko, fe songa mete ama' areo ze andro. ⁷ Tsy eo ty halaiña' ty voatse toy anahareo fa heje'e ka raho mpanesek' aze ty amy hatsivokara'ey. ⁸ Mionjona mb'amy sabadidakey mb'eo, fe tsy homb' amy famantañañey hey raho amy te mbe tsy heneke o androkoo. ⁹ Ie nanoa'e izay le nitambatse e Galilia ao.

Nipiapia mb'an-tsabadidake mb'eo

¹⁰ Aa naho fa nionjom-ban-tsabadidake mb'eo o rahalahi'eo, le nimb'eo ka re, fe tsy nisorogodañe fa niampitsàmpitse. ¹¹ Nipay aze amy sabadidakey o Jiosio, ie nifanao ty hoe: Aia re? ¹² Lako firehoreho ty ama'e i màroy: hoe ty ila'e: Vañoñe indatiy, hoe ka ty ila'e: Aiy! toe ampandardrihe'e ty màro. ¹³ Fe tsy teo ty nahaboa-drehake aze ami'ty fihembañañe o Tehodao.

Boak' Aman-dRae ty Lili'e

¹⁴ Ie ho nivaky mira i sabadidakey, le nionjomb' añ' anjomban' Añahare mb'eo t'IESOÀ, nañoke. ¹⁵ Nilatsà' o Tehodao le nanao ty hoe: Taia ty nampahilala indatiy o sokitseo, ie tsy nianatse? ¹⁶ Tinoi' IESOÀ ty hoe: Tsy ahy o fañòhakoo, fa a i nañitrik' ahiy*. ¹⁷ Ie no' ondatio ty hanao o satr'i'eo le ho rendre'e i fañòhañey ke hirik' aman' Añahare, he te ahy o volañekoo. ¹⁸ Mipay tsiriry ty mivolañe ty aze; f'ie mipay hañomey engeñe amy nañitrik' azey ro to vaho tsy aman-kakeo. ¹⁹ Tsy i Mosè hao ty nanolotse i Hake ama' areo, fe tsy ama'areo ty mañorike i Hake? Akore t'ie mipay hampivetrap' ahy? †

²⁰ Hoe ty natoi' i màroy: Amañ' anga-draty rehe, ia ze o mipay hañoho-doza ama'oo? ²¹ Hoe t'IESOÀ tam' iereo: Nanao raha raike raho, le hene latsa. ²² Nimea' i Mosè anahareo o savatseo (tsy t'ie hirik' amy Mosè, fa boak' aman-droae); vaho manavatse ondaty ami'ty SABOTSE nahareo. ²³ Aa naho savareñe ami'ty SABATA t'indaty tsy handilara'e ty Hà' i Mosè; mahaviñetse anahareo hao te nampijangañeko fonitse ami'ty SABATA t'indaty? ²⁴ Ko mizaka ami'ty vinta'e, fa mizakà an-jaka tò.

Hirik' aman-dRae i Norizañey

* **7:16** Impito amy Jaona ao i hoe zay: 3:34, 7:16, 8:28, 8:40, 12:49, 14:24, 17:8; Its 18:15-20 † **7:19**
Mat 5:20

²⁵ Le hoe ty ila' o nte Ierosalemeo: Tsy itoy hao i paia' iereo ho vonoeñey?
²⁶ Hehe t'ie milañoñe am-batraike eo fe tsy ivolaña' iareo. Hera toe fohi' o roandriañeo te ie ro toe i Norizañey? ²⁷ Fohintika ty nihirifa' indatiy; aa ie avy i Norizañey, tsy ho fohi' ondaty ty niboaha'e. ²⁸ Aa le nipoña-peo añ'anjomban' Añahare ao t'IESOÀ te nañoke, nanao ty hoe: Eka! Fohi' areo raho mbore rendre' areo ty nihirifako; Tsy nañira-batan-dRaho, fe vañoñe i nañitrik' Ahiy, i amoea' areoy. ²⁹ F'ie fantako, amy te hirik' ama'e, ie ty nañirak' ahy. ³⁰ Nipay hitsepak' aze iereo, fe tsy teo ty hahagaoñ' aze ie mbe tsy nitondroke i ora'ey. ³¹ Le maro am' ondatio ty niantok' aze vaho nanao ty hoe: Ie totsake eo i Norizañey, hanao viloñe maro te amo nanoe' itiañeo hao?

Ty Hienga'e

³² Jinanji' o Fariseoo i nivesovesoe' i màroy, le nañitrike mpifeleke hitsepak' aze o mpisorom-beio naho o Fariseoo. ³³ Le hoe ty nanoa' IESOÀ: Anianike avao raho te ama'areo vaho hienga mb'amy nañirak' ahiy aña.
³⁴ Hipay ahy nahareo fe tsy hahaisake; toe tsy mete' areo hombâne ty hombako. ³⁵ Le hoe ty fifanaontsi' o Tehodao: Aia ty homba'e te tsy ho treatika? Hera homb' amo miparaitak' amo Grika añaeeo, hañòke o Grikao;
³⁶ Inoñe i enta'e ty hoe: Ho paiae' areo raho, fa tsy ho isa' areo; naho, Tsy lefe areo ombañe ty hombako?

Rano Veloñe

³⁷ Ie amy andro honka ra'elahi' i sabadidakeiy, le niongake t'IESOÀ nipazake ty hoe: Ampomb' amako mb'etoa hikama rano ze taliñiereñe. Ze miato amako, ³⁸ hoe i Tsara Masiñey, le higoangoñañe boak' aña'arofo'e ao ty rano veloñe.‡ ³⁹ (i Arofo ho rambese' o mpiato ama'eo i nitsarae'e zay, fe mboe tsy ie i Arofoy, amy te mbe tsy nirengèñe t'IESOÀ.)§

Mifanao Añombelahi-Diba o Tehodao

⁴⁰ Aa le maro amy lahialeñe nahajanjiñe i tsaray ro nanao ty hoe: Toe ie i Mpitokiy. ⁴¹ Hoe ty ila'e: Ie i Norizañey, fa hoe ka ty ila'e: Ho hirike e Galilia aña hao i Norizañey? ⁴² Tsy fa tsinara' o Sokitse Masiñeo hao te ho hirik' amo tiri' i Davideo i Norizañey, naho ho boake Betleheme, rova' i Davide?* ⁴³ Aa le nifampiria ty ama'e ondatio. ⁴⁴ Teo o te hitsepak' azeo, f'ie tsy nipaoham-pitañe.

Nifanointoiñe i Sinoday

⁴⁵ Aa le nibalike mb'amo mpisorom-bey naho Fariseoo mb'eo o mpifelekeo, le hoe ty nanoa' o beio: Akore t'ie tsy nasese'areo? ⁴⁶ Le hoe ty natoi' o mpifelekeo: Mbe lia'e tsy nahafilañoñe manahak' indatiy t'indaty. ⁴⁷ Le natoi' o Fariseoo ty hoe: I nahareo ka hao ty nampandridrihe'e? ⁴⁸ Ia amo roandriañeo naho amo Fariseoo ty miantok' aze? ⁴⁹ Fokom-pàtse i màroy, amy te tsy apota'e t'i Hake. ⁵⁰ Hoe t'i nanoa' i Nikodemosy (i mpiam' iareo nitilike IESOÀ taoloy). ⁵¹ Mamàtse ondaty aolo' te ijanjiñañe hahafohiñe i nanoe'ey hao i Han-tikañey? ⁵² Natoi' iereo ty hoe: Nte-Galilia ka v-iheo? Hotsohotsò naho oniño te tsy itroaram-pitoky ty Galilia. ⁵³ Le hene nimpoly mb'an-kiboho'e mb'eo.

‡ **7:38** Ies 44:3, Iir 2:13, 17:13, Zek 14:8, Sab 36:8-9, Rzd 14:7, Jao 4:10, 6:63, 1Ko 10:4, Ben 7:17, 21:6, 22:1,17 § **7:39** Eze 36:26-27, Ioe 2:28-32, Top 1:4-8, 2:4,33, 10:44-47, 11:15-16, Efe 5:18 * **7:42** 2Sa 7:12, Sab 89:4; Mik 5:1

8

Vinamba ty Ampela

¹ Nomb'am-bohi' Oliva mb'eo t'IESOÀ. ² Le nañaleñaleñe te nibalike mb' añañomban' Añahare mb'eo, naho nihimpok' ama'e i māroy vaho niambesatse re nañoke.

³ Nasese' o mpanoki-dilio naho o Fariseoo ama'e ty rakemba nivamba, aa ie najarodo' iereo añivo' ondatio, ⁴ le hoe iareo tama'e: O Talè, tsinepake ty rakemba toy amy t'ie nivamba. ⁵ Toe nandily antika amy Hake ao t'i Mosè t'ie ifetsaham-bato; ino mb-arè ty asa'o? ⁶ Nanoe' iereo zay hitsoke aze, hamente ty hanesehañe aze. F'ie nibotreke t'IESOÀ, nanokitsokitse andrambom-pità'e an-tane eo, ⁷ Aa ie nimane ontane ama'e iareo, le niongake naho nanoa'e ty hoe: Ty tsy aman-tahiñe ama'areo, ee t'ie ty hametsa-bato aolo. ⁸ Niondreke indraike re, nanokitse an-tane eo* ⁹ O nahajanjiñe, ninankañe kiraikiraike, o zoke'eo aolo ampara' t'ie vahiny le i rakembay ro añivo eo. ¹⁰ Niongake t'IESOÀ, le nanoa'e ty hoe: O Rakemba, aia ho o nanesek' azo'o? Tsy eo hao ty namàtse azo? ¹¹ Leo raike, Talè, hoe re. Le hoe t'IESOÀ ama'e: Zaho ka tsy hañozoñ' azo, akia, ko mandilatse ka.

¹² Tinovo' IESOÀ am'iereo ty hoe: Failo' ty voatse toy raho; tsy hañavelo añañie ao ze mañorike ahy, fa ho an-kazavàn-kaveloñe.

¹³ Aa hoe ty lie' o Fariseoo aze: Ho nitò aia o talili'oo kanao mitalily vatañe. ¹⁴ Tinoi' IESOÀ ty hoe: Ndرا te mitalily vatan-dRaho, to i talilikoy; amy te fantako ty nihirifako naho ty hombako; fe tsy fohi' areo ty niboahako ndra ty hionjonako. ¹⁵ O nofotseo ro fizaka'areo; Zaho tsy mizaka ndra iaia. ¹⁶ Fe ndra t'ie mizaka, to ty fizakako; amy te tsy zaho avao, fa zaho naho i Rae nañitrik' ahiy. ¹⁷ Toe pinatetse amy Hā'areoy te to taroñe t'indaty roe.†

¹⁸ Izaho mitalily vatañey, ty raike, mitalily ahy ka i Raeko nañirak' ahiy.

¹⁹ Aa le hoe iareo tama'e: Aia v'o Rae'oo? Tinoi' IESOÀ: Tsy mahafohiñ' ahy ndra i Raeko nahareo; naho napota' areo raho le ho nahafohiñe an-dRaeko ka.

²⁰ Sinaontsi' IESOÀ amy fanontanan-dralay i hoe zay, ie nañoke añañomban' Añahare ao; le tsy teo ty nipao tañañ' ama'e; amy te mboe tsy nitsatoke ty ora'e. ²¹ Le hoe ty natovo' IESOÀ am'iereo: Hienga raho, ho paiae' areo fe hivetrak' amo hakeo' areo. Tsy lefe' areo hombañe i hombakoy. ²² Le hoe ty asa' o Tehodao: Hera hamoe' fain-dre? Ie manao ty hoe: Ze hombako tsy ho lefe' areo hombañe. ²³ Aa le hoe re tam' iereo: Hirik' ambane ao nahareo; boak' ambone raho. Ami'ty voatse toy nahareo; fe tsy ami'ty voatse toy raho. ²⁴ Aa le hoe ty nitaroñako, t'ie hikoromak' amo hakeo' areoo, fa naho tsy atokisa' areo t'Ie Raho‡, le hihomake antahi' areo. ²⁵ Le hoe iareo tama'e: Ia v'Iheo? Hoe ty nanoa' IESOÀ: I nitaroñako am-baloha'ey. ²⁶ Mbe bey ty ho nitaroñako naho ty hizakako, fe to i nañirak' Ahiy; le taroñeko ami'ty voatse toy o itsanoñakoo. ²⁷ Tsy napota' iereo t'ie nisaontsy i Rae. ²⁸ Aa le hoe ty nanoa' IESOÀ: Ie aonjo' areo i Ana' ondatiy, le ho fohi' areo te ie raho, le tsy eo ty anoeko antsatriko, fa ze ampandrendrehen-dRaeko ahy, zay o volañekoo. ²⁹ Toe amako i nañitrik' Ahiy, le tsy apo'e hiziozio raho, amy te nainai'e fanoeko o raha tea'eo. ³⁰ Ie nisaontsy zay, le maro ty niantok' aze.

³¹ Aa le hoe t'IESOÀ tamo Jiosy mpiato ama'eo: Naho mitoloñe amo fivolakoo nahareo, le toe mpiamako; ³² le ho fohi' areo ty hatò vaho ho

* ^{8:8} Irm 17:13 † ^{8:17} Its 19:15 ‡ ^{8:24} Avo 3:14 , naho amy a.57

hahà' ty hatò. ³³ Hoe ty natoi' iareo aze: Tarira' i Abraàme zahay, le mbe lia'e tsy rinohi' ondaty; Akore arè ty natao'o te, Ho hahañe nahareo?

³⁴ Tinoi' IESOÀ ty hoe: Eka! to ty itaroñako te fonga ondevon-kakeo ze manao hakeo. ³⁵ Tsy mipiteke añ' anjomba ao ty ondevo, fe mimoneñe ao nainai'e ty anake. ³⁶ Aa ie hahà' i Anakey, le ho vata'e votsotse. ³⁷ Apotako t'ie tiri' i Abraàme; f'ie mipay ty hahavetrak' ahy amy te tsy itoera' o volakoo. ³⁸ Taroñeko o nitreako te nindre aman-dRaekoo; vaho anoe' areo ze jinanji' areo aman-drae' areo.

³⁹ Tinoi' iereo ty hoe: Rae'ay t'i Abraàme. Le hoe ty natoi' IESOÀ: Naho àna' i Abraàme, andò o fitoloña' i Abraàmeo; ⁴⁰ f'ie henaneo, mipay hamono ahy—ondaty mitaron-kavantañañe ama' areo, o tsinanoko aman' Añahareo. Tsy nanao zay t'i Abraàme. ⁴¹ Toe anoe' areo ty satan-drae' areo. Aa hoe iereo tama'e: Tsy anak' amonton-jahay; raike ty Rae'ay, i Andrianañahare. ⁴² Hoe t'IESOÀ am' iereo: Aa naho Rae' areo t'i Andrianañahare, le ho nikoko ahy, amy te i Andrianañahare ty niboahako naho ty nivotrahako atoy; le tsy ty satriko ty nipotirako atoy, fa ie ty nañitrike ahy. ⁴³ Akore te tsy apota' areo o rehakoo? toe tsy mahajanjiñe o volakoo nahareo. ⁴⁴ Ie mpiamy mpañinje rae' areoy, vaho tea' areo ty manao ze irìn-drae' areo. Mpañoho-doza boak' am-baloha'e re vaho tsy mijadoñe ami'ty hatò, amy t'ie tsy aman-katò ndra loli'e. Ie mivolam-bande, sata'e i fivola'ey, amy t'ie mpandañitse, toe raem-bande. ⁴⁵ Fe kanao mitaroñe ty hatò raho, tsy iantofa' areo. ⁴⁶ Ia ama' areo ty manisý hakeo amako; fa naho mitaroñe ty hatò, akore te tsy atokisa' areo? ⁴⁷ Mahajanjiñe o saontsin' Añahareo ze aman' Añahare, f'ie tsy mahajanjiñe amy te tsy aman'Añahare. ⁴⁸ Aa hoe ty natoi' o Tehodao aze: Tsy to hao ty asa'ay te nte Samaria rehe naho tokoen' anga-draty? ⁴⁹ Hoe ty natoi' IESOÀ: Tsy aman-kokolampan-draho, fa miisy an-dRaeko, fe tsy iasia'areo. ⁵⁰ Tsy mipay engeñe ho ahy raho, fe ao ty mitsoeke naho mizaka. ⁵¹ Eka! to ty itaroñako te tsy hahaonin-kavilasy ka ty miambéne o volakoo.

⁵² Le hoe o Tehodao tama'e: Rendre'ay henaneo t'ie tokoen-draha. Nivilasy t'i Abraàme naho o mpitokio; le manao ty hoe rehe, Tsy hitsope-kavilasy ka ty mifahatse amo volakoo. ⁵³ Ho bey te amy Abraàme rae'ay hao rehe, ie nihomake? nikoromake ka o mpitokio; aa le manao ho ia rehe? ⁵⁴ Hoe ty natoi' IESOÀ: Naho miisy vatan-draho le kòake i asikoy. Miisy ahy t'i Raeko, i atao' areo ty hoe: Andrianañahare'ay. ⁵⁵ Mbe' mboe tsy fohi' areo re, ie fohipo. Aa naho nataoko t'ie ninofiko, le ho nibodiaké hambañ' ama' areo raho. Toe fantako re vaho ambenako o tsara'eo. ⁵⁶ Niankahake t'i Abraàme te nahaoniñe ty androko; niisa'e le niehake.

⁵⁷ Le hoe o Tehodao tama'e: Tsy limampolo taon-dRehe, aa vaho ho niisa'o t'i Abraàme? ⁵⁸ Hoe t'IESOÀ tam' iereo: Eka! to ty Itaroñako te, taolo te nisamake t'i Abraàme, Zaho ro\$. ⁵⁹ Nandrambe vato amy zao iereo haresak' aze, fe nietake t'IESOÀ, naho niavotse i anjombar'Añaharey.

9

Nampibarabeake ty Fey

¹ Ie niary mb'eo, le nahavazoho ty lahilahy fey, nigoa boak' amy t'ie nitoly. ² Le hoe ty ontane' o mpiama'eo: O Talè, ia ty nanao tahiñe: ondatio, ke o roae'eo te ie nisamake goa? ³ Tinoi' IESOÀ ty hoe: Tsy te aman-kakeo t'indaty tia, ndra o roae'eo, fa te haboak' añama'e ty fitoloñan'

Añahare. ⁴ Tsy mahay tsy manao ty fitoloña' i nañitrik' ahiy tikañe ie mbe antoandro, fa ho avy ty haleñe tsy hahafitoloña' ondaty. ⁵ Kanao mbe ami'ty voatse toy raho, le zaho ro failo' ty voatse toy.

⁶ Ie nanao zay, le nandrora an-tane, le nilitsahe'e i fañerè'ey vaho natente'e am-pihaino'e eo i litsakey. ⁷ Le hoe re ama'e: Akia, misasà añ' antara' i Siloama (ze midika 'niraheñe'). Aa le niheo mb'eo re nisasa, vaho nahaisake te nibalike.

⁸ Hoe o mparine azeo naho ze mpahaisak' aze ie mbe nimpangatake: Tsy itoy hao i mpangatake nitozòkey? ⁹ Ty ila'e nanao ty hoe: Ie 'nio. Hoe ka ty ila'e: Aiy! hambañ' ama'e. Hoe re: Ie raho. ¹⁰ Aa le hoe iareo tama'e: Aa vaho inoñe ty nampibarababeake o maso'oo? ¹¹ Nanoïñe ty hoe re: Nikineke litsake t'indaty itokavañe ty hoe IESOÀ, le nafò'e amo masokoo vaho nanao amako ty hoe: Akia mb'añ'antara' i Siloama aña le misasà. Aa le nomb'eo raho nisasa, vaho mahatre. ¹² Le hoe iereo tama'e: Aia re? Nofiko, hoe re.

¹³ Nindese' iereo mb'amo Fariseoo mb'eo indaty nigoay. ¹⁴ SABOTSE 'nio i andro nanoe' IESOÀ i litsakey naho nampibeake o fihaino'ey. ¹⁵ Mbe nañontanea' o Fariseoo indraike i nahaisaha'e. Le hoe re tam'iereo: Nifora'e litsake o masokoo naho nisasa raho vaho mahatre. ¹⁶ Le hoe ty asa' o Fariseo ila'eo: Tsy aman' Añahare indatiy kanao tsy ambena'e i SABATAY. Hoe ka ty ila'e: Aia, ty hahatafetera' ty mpanan-kakeo raha tsitantane hoe itia? Le nifampiria iareo. ¹⁷ Aa hoe iereo amy nigoay: Ino ty ho talilie'o aze, ie nanokake o maso'oo? Le hoe re: Mpitoky reke.

¹⁸ Fe tsy niantofa' o Tehodao t'ie nigoa vaho nampahaisaheñe, naho tsy kinanji' iareo hey ty roae' i nampahatreavañey ¹⁹ vaho nañontane iareo ty hoe: Ana' areo v'itoio, i natao' areo te nitoly goay? Akore ty ahatreava'e henanekeo? ²⁰ Le hoe ty natoin-droae'e: Apota'ay te ana'ay toke naho t'ie nitoly goa; ²¹ fe amoea'ay ty ahatreava'e henaneo, tsy fohi'ay ty nampibarababeak' aze. Añon-taon-dre, añontaneo, ie ro hitalily vatañe. ²² Zay i sinaontsin-droae'ey amy te nihembañe amo Tehodao, ami'ty nifañinà' o Tehodao te haitoañe amo fitontonañeo ze miantoke t'ie i Norizañey. ²³ Zay ty nanoan-droae'e ty hoe: Añon-taon-dre, añontaneo.

²⁴ Kinanji' iereo fañindroe'e indaty nigoay, le nanoa' iareo ty hoe: Toloro engeñe t'i Andrianañahare; fohi'ay te bey hakeo indatiy. ²⁵ Hoe ty natoi'e: Ke bey hakeo re, tsy apotako. Raha raike ty fantako: nigoa raho, fa mahatre. ²⁶ Nindrai' iareo ontane: Ino ty nanoe'e ama'o? Akore ty nampibarababeahe'e o maso'oo? ²⁷ Tinoi'e ty hoe, Fa vinolako! f'ie tsy nitsendreñe, ino ty hijanjiña' areo indraike? va'e te ho mpiama'e ka? ²⁸ Aa le nonjire' iereo, ami'ty hoe: Ihe ro mpiam' indatiy! mpiamy Mosè zahay. ²⁹ Fohi'ay te nisaontsien' Añahare t'i Mosè, fe ondaty zao, nofi'ay ty nihirifa'e.

³⁰ Tinoi' i lahiy ty hoe: Hete! mahavereñe te tsy fohi' areo ty nihirifa'e, f'ie nampibeak' o masokoo! ³¹ Fohintika te tsy mijanjiñe ty bey hakeo t'i Andrianañahare fe naho mitalaho aman' Añahare t'indaty naho manao ty satrin' arofo'e, le janji'e. ³² Boak'ami'ty fifotoran-tsa, mbe tsy nijanjiñeñe te nampibarababeaheñe t'indaty toly goa. ³³ Aa naho tsy mpiaman' Añahare indatiy, tsy ho nahatafete-draha. ³⁴ Hoe ty natoi' iareo aze, Fonitse hakeo rehe te nitoly, ihe ka ty mañòke anay? Le sinoi' iereo aña.

Hagoàn-Arofo

³⁵ Jinanji' IESOÀ te rinoa' iereo, le hoe re t'ie nitendreke, Atokisa'o hao i ana' Ondatiy? ³⁶ Tinoi'e ty hoe: Ia v'izay, Talè? hatokisako. ³⁷ Hoe t'IESOÀ

tama'e: Fa niisa'o, mbore ie o mirehak' ama'oo. ³⁸ Le hoe re: O Rañandria, miantoke raho! Le niambanea'e.

³⁹ Le hoe t'IESOÀ: Zaka ty nombako mb'ami'ty voatse toy hampahaisake o tsy mahaoniñe, vaho hampigoa o mahaisakeo.

⁴⁰ Nanoa' o Fariseo nindre ama'e naho nahajanjiñe i hoe zaio, ty hoe: Goa ka v'izahay? ⁴¹ Hoe t'IESOÀ am'iereo: Tsy ho nanan-kakeo nahareo naho nifey; f'ie nanao ty hoe: Mahatreah zahay; le mbe tambatse an-kakeo.

10

Mpiarak' añondry Soa

¹ Eka! to ty taroñako t'ie tsy mizilik' amy lalam-bein-jolon' añondriy, fa manganik' an-dàlan-kafa ro mpikizo naho mpampikametse. ² I mizilik' mb'an-dalam-bei' i goloboñeyi ty mpiarake o añondrio. ³ Ie ty sokafe' i mpañambeñey, naho mahatsanoña i fiarañanaña'ey o añondrio, mbore tokave'e ami'ty añara'e o añondri'eo, vaho iaoloa'e boak'ao. ⁴ Ie hene akare'e o azeo le iaoloa'e vaho orihe' o añondrio amy te mahazatse iareo i fiarañanaña'ey. ⁵ Toe tsy horihe' iereo ty ambahiny, fe mandrife, amy te tsy mahazatse iareo ty feo' o ambahinio. ⁶ Nirazañe' IESOÀ am'iereo izay f'ie tsy naharendrek' o tsinara'eo. ⁷ Le nitovoña' IESOÀ ty hoe: Eka! to t'itaroñako te zaho o lalambein' añondrio. ⁸ Mpampikametse naho mpikizo iaby o taolokoo vaho tsy itsanoña' o añondrio. ⁹ Zaho i lalam-beiy: ndra iaia mizilik' añamako ro ho rombaheñé, himoake ao re naho hiakatse vaho hitendreke fiandrazañe. ¹⁰ Kanao mikamoak' ao ty mpikizo le ty hampikametse naho hañè-doza vaho hanjamañe. Avy raho, hanaña' iareo haveloñe, vaho hanañe aze am-bokatse.

¹¹ Zaho i mpiarake soay, mahafoe ty fiai'e ho a o añondrio i mpiarake soay. ¹² Tsy mpiarake i tsimañajay: tsy aze o añondrio, ie trea'e te mipoteake ty farasy, le apo'e o añondrio naho mibioñe naho itsepaha' i farasiy vaho ampiparatsiae'e. ¹³ Mirimatse re fa mpikarama, toe tsy darè'e o añondrio. ¹⁴ Zaho ro mpiarake soa, fantako o ahikoo vaho apota' o ahikoo raho, ¹⁵ hambañe ami'ty faharofoanan-dRaeko ahy naho ty fahafohinako an-dRae, vaho amoeko aiñe o añondrikoo. ¹⁶ Mbe aman' añondry ila'e tsy mpiami' ty zoloke toy raho; tsi-mete tsy hendeseko mb'etoa iereo, ie hitsanoña ty feoko vaho ho lia-raike reketse Mpiarake raike. ¹⁷ Zao ty ikokoan-dRaeko ahy, te amoeko ty fiaiko handrambesako aze indraike. ¹⁸ Tsy t'ie haloli' ondaty amako, fa lahako ty hamoe aze. Amako ty lily hamoeako aze, naho amako ty lily handrambesako aze indraike. Rinambeko aman-dRaeko i lily zay.

¹⁹ Aa le nifanìmpa-kevetse indraike o Tehodao ty amy tsara zay. ²⁰ Maro am' iereo nanao ty hoe: Aman' anga-draty re naho minéñe, ino ty ijanjiña' areo aze? ²¹ Hoe ka ty ila'e: Tsy fisaontsi' ty aman-kokolampa i tsara rezay. Mahabarababeake ty goa hao o kokolampao?

Lie-Drokoñe amy Sabadidam-Pañorizañey

²² Tsatoke asotry e Ierosaleme ao i sabadida-pañorizañey*, ²³ le nidrai-draitse añañomban' Añahare an-kiririsa' i Solomona ao t'IESOÀ ²⁴ vaho nihimpok' ama'e o Tehodao nanao ty hoe: Pak' ombia rehe te mbe hampitarik' aiñe anay? Naho ihe i Norizañey, adodeo. ²⁵ Tinoi' IESOÀ ty hoe: Fa nitaroñako, fe tsy iantofa'areo; mitalily ahy o raha tsitantane anoeko amy tahinan-dRaekoio. ²⁶ Fe tsy iantofa' areo amy t'ie tsy mpiamo

* **10:22** Han'nakà (Heb) Faniahiañe ty nandrebaha' t'Iehoda Makabeasy

añondrikoo. ²⁷ Mitsanoñe ty feoko o añondrikoo naho fantako iereo naho orihe' iereo, ²⁸ naho itolorako haveloñe nainai'e, ie tsy hihomake ka, vaho tsy eo ty hanintake iareo an-tañako. ²⁹ Toe natolon-dRaeko amako, ie ty bey te amy ze he'e; vaho leo raike tsy hahatavañe iareo am-pitàn-dRae. ³⁰ Raike raho naho i Raeko. ³¹ Nandrambe vato indraike o Tehodao, hafetsak' ama'e. ³² Hoe ty natoi' IESOÀ: Maro ty sata-soa nitoroako boak' aman-dRaeko, aia amy rezay ty handretsaha' areo vato? ³³ Natoi' o Tehodao ty hoe: Tsy t 'ie sata soa ty ametsaha'ay vato, fa i terateray, naho amy te Ihe, ondaty, manao ho Andrianañahare.

³⁴ Natoi' IESOÀ ty hoe: Tsy pinatetse amy Hâ'areoy hao ty hoe: Vinolako te ndrañahare nahareo†? ³⁵ Aa naho natao'e ndrañahare o nivotraha' i tsaran' Añahareio—toe tsy mete lilareñe i Sokitse Masiñey— ³⁶ le akore te atao' areo mpiteratera i nimasiñen-dRae naho nañitrike aze mb'ami'ty voatse toiy, amy nataoko te Anan' Añahare Raho? ³⁷ Ko miantok' ahy naho tsy anoeko o fitoloñan-dRaekoo. ³⁸ F'ie anoeko, ndra te tsy haoñe' areo, iantofa o tolon-drahao, hahafohiñe naho haharendreke te amako t'i Rae, vaho ama'e raho. ³⁹ Aa le nipay hitsepak' aze indraike iereo f'ie nibolititse am-pità' iareo.

⁴⁰ Nibalike mb' an-dafe' Iordaney aña re amy nampilipora' i Jaona valoha'ey vaho nañialo eo. ⁴¹ Maro ty nimb' ama'e, nanao ty hoe: Tsy nanao raha tsitantane t'i Jaona, fe hene to i nisaontsie'e indaty tìañe. ⁴² Maro am'iereo ty niantok' aze.

11

i Lazarosy

¹ nTeo t'indaty nisiloke, i Lazarosy nte-Betania, an-drova' i Marie naho i Marta rahavave'e; ² ie i Marie nañosotse solik' amy Talè naho namaoke o fandia'eo amo maroi'eo. I Lazarosy rahalahi'ey ty nisiloke, ³ aa le nampihitrife' i rahavave'e rey ama'e ty hoe: O Talè, Inao! siloke i rañe'oy. ⁴ Ie nahajanjiñe zay t'IESOÀ, le hoe re: Tsy higadoñe an-kamomohañe i hasilofañe zay, fa ho ami'ty engen' Añahare, handrengeañe i Anan' Añaharey. ⁵ Nikokoa' IESOÀ t'i Marta naho i rahavave'ey vaho i Lazarosy. ⁶ Aa naho jinanji'e t'ie niheta'e le mbe nitamañe roe andro an-toe'e eo avao.

⁷ Ie aña le hoe re amo mpiama'eo, Antao hionjomb'e Iehodà indraike. ⁸ O Talè, hoe o mpiama'eo: anianike te nipay hametsa-bato ama'o o Tehoda, aa le hibalike mb'eo v'Iheo? ⁹ Tinoi' IESOÀ ty hoe: Tsy ora folo-ro'amby hao o fangen' antoandroo? Ie mañavelo an-tariñandroke ondatio le tsy hitsikapy amy te isa'e ty hazava' ty voatse toy. ¹⁰ Fa ie manjotike haleñe t'indaty, le hitsikapy amy te tsy ama'e i hazavàñey. ¹¹ Ie nanoe'e zay, le tinovo'e ty hoe: Fa mirotse i rañen-tika Lazarosiy; fe homb'eo raho hanohiñ' aze amy firota'ey. ¹² Aa hoe o mpiama'eo: O Talè, kanao mirotse re, tsy t 'ie mihajangañe hao? ¹³ I havilasi'ey ty nitsarae' IESOÀ; fe natao' iereo te i fitofà'e am-piròtsey ty nienta'e. ¹⁴ Aa le nabeja' IESOÀ ami'ty hoe: Toe fa nivetrake t'i Lazarosy. ¹⁵ Le ehake ty ama'areo raho te tsy aña, hatokisa' areo; antao homb' ama'e mb'eo. ¹⁶ Le hoe t'i Tomasy (atao Didimo) amo mpifañosoñe ama'eo: Antao ka tika hitrao-pihomak' ama'e.

¹⁷ Ie pok'eo t'IESOÀ, zoe'e t'ie fa efats' andro an-donak' ao. ¹⁸ Toe marine' Ierosaleme ty Betania, miha folo-lim' amby stadia avao; ¹⁹ maro amo Tehoda ty nomb'amy Marta naho i Marie mb'eo nañotroñe iareo ty amy

† 10:34 Sab 82:6

rahalahi' iareoy. ²⁰ Ie nirendre' i Marta te nimb'eo t'IESOÀ le niavotse nanalaka aze, fe tambatse añ'anjomba ao t'i Marie.

²¹ Le hoe t'i Marta amy IESOÀ: O Talè, naho teo rehe tsy ho nivilasy i rahalahikoy. ²² Fe apotako, ndra henanekeo te ze halalie'o aman' Añahare, ro hatolon' Añahare Azo. ²³ Hoe t'IESOÀ tama'e: Hitroatse i rahalahi'oy. ²⁴ Hoe t'i Marta: Fantako t'ie hivañom-beloñe amy fivañonam-belo' i andro honka'ey. ²⁵ Hoe t'IESOÀ tama'e: Zaho o fivañonan-koveloneo naho o haveloneo; ho veloñe ze miato amako, ndra te vilasy. ²⁶ Tsy ho vilasy ka ze veloñe miato amako. Atokisa'o v'izao? ²⁷ Hoe re tama'e; Eñ'anio Talè, atokisako te Ihe i Norizañey, i Anan' Añahare nivotrak' ami'ty voatse toiy. ²⁸ Ie nanoe'e zay, le nienga hikoike i Marie rahavave'e vaho natola'e, nanao ty hoe: F'atoy t'i Talè, mikanjy azo. ²⁹ Ie jinanji'e zay le niongak' amy zao vaho nimb'ama'e mb'eo. ³⁰ Mbe tsy nigodañe an-tanàñe ao t'IESOÀ, fa tamy nanalakà' i Martay avao. ³¹ Ie nioni' o Jiosy naho mpañohò mindre amy Marie añ'anjomba'eo t'ie niongake masika naho niavotse, le nanonjohy aze fa natao' iareo t'ie nimb'an-donake mb'eo hirovetse. ³² Ie pok' amy IESOÀ eo t'i Marie, le niisa'e naho nihohok' ampandia'e eo, nanao ty hoe: O Rañandria naho teo rehe tsy ho nihomake i rahalahikoy. ³³ Ie nivazoho' IESOÀ t'ie niharovetse naho te nirovetse ka o Jiosy nindre ama'eo, le niselekaiñe añ'arofo ao vaho nioremeñe, ³⁴ nanao ty hoe: Aia ty nandrohota' areo aze? Hoe iereo tama'e: O Talè, mb'etoañe hivazoho. ³⁵ Nirovetse t'IESOÀ. ³⁶ Le hoe o Tehodao, Hehe ty fikokoa'e aze! ³⁷ Fa hoe ty ila'e: Aa vaho akore ondatio, ie nampibeake ty fihaino' o feio, tsy ho nikalañe indatiy tsy ho nihomake?

Vineloñe t'i Lazarosy

³⁸ Nioreke indraike t'IESOÀ, le nimb' an-donake mb'eo, ie lakato ginabem-bato. ³⁹ Le hoe t'IESOÀ: Adogeràto o vatoo. Fe nanoa' i Marta, rahavave' i nivilasiy, ty hoe : O TALÈ, mitrotrotse re henaneo, fa efats' andro! ⁴⁰ Hoe t'IESOÀ ama'e: Tsy vinolako hao te ihe matoky ro hahaoniñe ty engen' Añahare? ⁴¹ Aa le nadogera' iereo i vatoy. Niandandra t'IESOÀ nanao ty hoe: O Aba, mañandriañe Azo raho fa jinanji'o. ⁴² Fantako te ijanjiña'o nainai'e, fe ondaty mijohanjohañ' etoañe ty nivolañako, hatokisa'e te ihe ro nañitrik' ahy. ⁴³ Ie nanao zay le nipazah'e ty hoe: O Lazarosy, miakara! ⁴⁴ Niakatse i nivilasiy, nivahoren-damban-dolo o fita'e naho fandia'eo, mbore nibandieñe lamba-leny i lahar'aey; vaho hoe t'IESOÀ tam' iereo: Draito, apoho hidrauditse.

Te Hañè-doza Ama'e

⁴⁵ Aa le maro amo Jiosy nitilike i Marieo, ie nahaisak' i nanoe' IESOÀ, ro niantok' aze. ⁴⁶ Fe ty ila'e niheo mb'amo Fariseoo mb'eo nitalily o nanoe' IESOÀ. ⁴⁷ Aa le nanontom-pivory o mpisorom-beio naho o Fariseoo vaho nanao ty hoe: Ino ty hanoen-tika? amy te maro ty viloñe anoe' indatiy. ⁴⁸ Ie apo-tika hitoloñe hoe zay, le hene hiantok' aze, vaho hivotrak'eo o nte Romao hitavañe ty toen-tika naho ty fifehean-tika. ⁴⁹ Aa hoe ty raik' am'iereo, i Kaiafa, talèm-pisoroñe amy taoñey zay: Tsy maha-pi-draha nahareo! ⁵⁰ Tsy aereñere' areo hao te mahasoanahareo te hivilasy ho a ondatio t'indaty raike, ta te fonga ho rotsaheñe i fifeheañey? ⁵¹ Tsy te aze i entañe zay, fa t'ie ni-talèm-pisoroñe amy taoñey ro nitoky te hivetrake ho a i fifeheañey t'IESOÀ, ⁵² vaho tsy ho a' i fifeheañey avao, fa hatonto'e ho raike o anan' Añahare miparaitakeo. ⁵³ Nifototse amy andro zay, le nikinia ty hañoho-doza ama'e iareo

⁵⁴ Aa le tsy nañavelo aivo' o Tehodao ka t'IESOÀ, fa nivike mb'an-tane marine' i fatram-beiy nahohimb'an-drova atao Efraime, vaho nañialo ao rekets' o mpiama'eo. ⁵⁵ An-titotse henane zay i Fihelañ' ambone' o Jiosioy, le niavotse hirik' an-kalok'ao ty maro nionjoñe mb'e Ierosaleme mb'eo aolo' i Fihelañey, hiefetse. ⁵⁶ Aa ie nitsoetsoeke IESOÀ le nifamesoveso o nijohanjohañe añ' anjomban' Añahare aoo, ty hoe: Akore ty heve' areo? Tsy homb' an-tsàndalam-bey atoa hao re? ⁵⁷ Ie amy zao, fa linili' o mpisorom-beio nahohimb'an-drova atao Fariseoo te tsi-mete tsy mitalily ze mahafahiñe ty anjoañ' aze, hitsepaha' iareo.

Nihosorañe i Norizañey Mat 26.6-12; Mar 14.3-9

12

¹ Ie eneñ' andro taolo' i Fihelañey, le nomb'e Betania mb'eo t'IESOÀ, amy nampivañoneñe i Lazarosy amy havilasiy. ² Le nañalankaña' iereo ty mahakama hariva, i Marta ty nitoroñe, le mpiamo nidegañe am-pandambañañe mindre ama'eo t'i Lazarosy.

³ Rinambe' i Marie ty soli-drame* rai-litatse saro-bily nahoso'e ty fandia' IESOÀ vaho nifahe'e ami'ty maroi'e o fandia'eo, le nañatseke i anjombay ty harifondrifo' i solikey.

⁴ Le hoe t'i Jodasy nte-K'riote, raik' amo mpiama'eo, i nikilily hifotetse azey: ⁵ Akore te tsy naletake bogady telon-jato i solikey hatolotse amo rarakeo? ⁶ Tsy t'ie ni-mpitretre'rarekate te nanao zay, fa toe ni-mpikizo. Ie nimpitàn-koroñe vaho nampikamets' ama'e. ⁷ Le hoe t'IESOÀ: Adono, fa nahaja'e ho ami'ty andro andeveñañe ahy o raha zao. ⁸ Mbe ama' areo lomoñandro o rarakeo; fe izaho tsy ho ama' areo nainai'e.

⁹ Aa le maro amo Tehodao ro nahafohiñe t'ie tao vaho nimb'eo, tsy ty amy IESOÀ avao, fa t'ie hahaisake i Lazarosy natroa'e amy havilasiy. ¹⁰ Aa le nikinia hañè-doza amy Lazarosy ka o mpisorom-beio. ¹¹ amy t'ie ty nivevea' ty Jiosy maro, vaho niato am' IESOÀ.

Nigodañe mb'eo am-Pandrebahañe Mat 21.1-9; Mar 11.1-10; Lke 19.29-38

¹² Amy loak'androy, ty valobohoke bey niavy hamonjy i sabadidakey, ie nahajanjiñe te fa hizilike am'Ierosalaime t'IESOÀ, ¹³ ro nandrambe ràntsatrañe nahohimb'an-drova atao Fariseoo te tsi-mete tsy mitalily ty hoe:

Ehe rombah!

Andriañeñe t'i Mpanjaka' Israele!

I mitotsak' ami'ty tahina' IEHOVÀY†

¹⁴ Ie tendrek' ana-borike t'IESOÀ le ninigite, ty amy pinatetse, ty hoe:

¹⁵ Ko hembañe, ry anak-ampela' i Ziona;

Heheke! totsake i Mpanjaka'oy,

minigite ana-borike. ‡

¹⁶ Tsy nirendre' o mpiama'eo hey izay; ie nirèngeñe t'IESOÀ vaho nitiahi' iereo te pinatetse ty ama'e zay nahohimb'an-drova atao Fariseoo: Hehe te milesa nahareo, inao, mañorik' aze iaby ty voatse toy. ²⁰ Tamo nionjomb'eo hitalaho amy sabadidakeio ty nte-Grika ²¹ niheo mb'amy Filipo nte Betsaida' i Galilia mb'eo nipay aze ami'ty hoe: O aba, te hahatreia

* **12:3** Narda: soli-mañitse boak'am-baha-katae † **12:13** Sab 118:26 ‡ **12:15** ZEK 9:9

IESOÀ zahay. ²² Nimb'amy Andrea mb'eo t'i Filipo amy entañe zay, le sinaontsi' i Filipo naho i Andrea am' IESOÀ.

Fañòhañe ty amy Norizañey

²³ Hoe ty natoi' IESOÀ: Fa tondroke ty ora te ho rengèñe i Ana' ondatiy. ²⁴ Eka! to t'itaroñako, naho tsy mipok' an-tane eo ty tabirin' ampemba vaho mate, le midoñe ho tokañe ao avao; fa ie mate ro hamokatse bey. ²⁵ Ze mikoko ty fiai'e ro mampianto aze; f'ie malain-ty fiai'e ami'ty voatse toy ro mañaja aze ho amy haveloñe nainai'ey. ²⁶ Naho eo ty hitoroñ' ahy, soa re te hañorik' ahy; fa amy itoerako ty hitoera' i mpitorokoy; iasian-dRae ze mitoroñe ahy. ²⁷ Embetse ty troko henaneo, inoñe ty ho volañeko? O Aba rombahao ami'ty ora toy raho? fe toe talin-diako ty ora toy. ²⁸ O Aba, rengeo ty tahina'o. Le niboak' andindiñe ao ty fiarañanañañe nanao ty hoe: Fa nirengèko mbore ho rengèko. ²⁹ Nahajanjiñe zay i mào nizorazoray, le hoe iereo: Nangotroke! hoe ka ty ila'e: Nisaontsia' ty Anjely. ³⁰ Hoe ty natoi' IESOÀ: Tsy zaho ty niboaha' i fiarañanañañey, fa inahareo. ³¹ Henane zao o fizakañe ty voatse toio; henaneo ty hañitoañe ty mpifehe' ty voatse toy. ³² Aa ie ongaheñe ami'ty tane toy raho le ho taoneko amako ze kila ondaty. ³³ Ty hampahafohinañe i havilasy ho lià'ey i nisaontsie'ey. ³⁴ Natoi' i mào ty hoe: Jinanji'ay amy Hake ao te ho veloñe nainai'e i Norizañey, aa vaho akore ty anoa'o ty hoe: Tsy mahay tsy hengaeñe i Ana' ondatiy? Ia ze o Ana' ondaty zao? ³⁵ Le hoe t'IESOÀ am'iereo: Mbe tsitrà-pie ty hindrezankazavàñe ama' areo. Mañaveloa t'ie an-kazavàñe, ke hivotrahañ' ieñe; amy te tsy apota' ty mpañavelo añ'ieñe ao ty homba'e. ³⁶ Ie mbe ama' areo i hazavàñey, le iantofo i hazavañey, soa t'ie ho anan-kazavàñe. Ie tsinara' IESOÀ le nienga vaho nietake. ³⁷ Ndra te maro ty viloñe nanoe' IESOÀ añatrefa' iereo, tsy niantoke iereo, ³⁸ hampahaheneke i enta' Isaia mpitoky nitsarae'ey, ty hoe:

Ry IEHOVÀ, ia ty niantoke ty talili'ay?

Vaho nampalangeseñe ama'ia ty fità' IEHOVÀ?§

³⁹ Aa le tsy mete nañaoñe iereo, amy tinovo' Isaia ty hoe:
⁴⁰ Nigoà'e ty fihaino' iareo,
 naho nampigañe'e ty arofo' iareo,
 soa tsy hahaisake ty fihaino' iareo
 ndra hahaoniñe ty arofo' iareo,
 himpolia' iereo ho jangañeko.*

⁴¹ Nitaroñe' Isaia zay, ie nahaoniñe ty enge'e vaho nitalily aze. ⁴² Toe maro amo roandriam-beio ty niantok' aze; f'ie tsy nitalily aze ty amo Fariseoo, hera haitoañe amo fitontonañeo, ⁴³ amy te ninò' iareo ty fandrengea' ondatio ambone' ty fandrengean' Añahare.

⁴⁴ Nikoike ty hoe t'IESOÀ: Ze miato amako, tsy zaho ty atokisa'e, fa i Nañitrik' Ahiy. ⁴⁵ Mahaoniñe i nañirak' Ahiy ty mahaisak' ahy. ⁴⁶ Pok' etoa ho failo ami'ty voatse toy raho, soa tsy hidõñe am-pimoromoroñañe ao o miato amakoo. ⁴⁷ Naho eo ty mijanjiñe o volakoo fe tsy mañambeñe, tsy zaho ty hizak' aze, amy te tsy t'ie hizaka ty voatse toy ty nombako mb'etoñañe, fa ty handrombake ty voatse toy. ⁴⁸ Ty mifary ahy naho tsy mandrambe o volakoo, ao ty hizaka aze; toe hizaka aze amy andro honka'ey o entañe vinolakoo. ⁴⁹ Zaho tsy nivolañe an-joton-troke; fa i Raeko nañitrik' Ahy, Ie ty nanolotse lily ahiko: ze ho volañeko naho ze ho

§ **12:38** Ies 53:1 * **12:40** Ies 6:10

taroñeko. ⁵⁰ Apotako te haveloñe nainai'e o lili'eo; aa ie mivolan-draho, le taroñeko do'e ze tsaraen-dRaeko.

13

Manasa ty Fandia' o mpiama'eo

¹ Taolo' i sabadidak' i Fihelañeiy, ie niarofoana' IESOÀ te an-titotse ty ora hienga'e ty voatse toy mb' aman-dRae'e, fa nikokoa'e o aze ami'ty voatse toio, le mbe nikokoa'e pak'am-para'e. ² Ie fa nikama le napo' i Ratiy antro' i Jodasy nte-Keriote, ana' i Simona, ty hifotera'e; ³ niarofoana' IESOÀ te kila natolon-dRae'e aze am-pità'e naho t'ie nihitrike hirik' aman' Añahare naho himpoly aman' Añahare aña, ⁴ aa le nióngak' amy fikamañey re naho nado'e eo o saro'eo naho nandrambe lamba famorañe vaho nidiañe. ⁵ Le nañilin-drano an-koveta re vaho nanasa o fandiam-piama'eo ze nifora'e amy lamba nidia'ey.

⁶ Aa ie niheo mb'amy Simona Petera, le hoe t'i Petera ama'e: O Rañandria, hanasa o tombokoo v'Iheo! ⁷ Natoi' IESOÀ ty hoe: Tsy fohi'o hey o anoekoo, f'ie ho rendre'o te aña. ⁸ Hoe t'i Petera tama'e: Le lia'e tsy ho sasà'o o tombokoo! Tinoi' IESOÀ ty hoe: Naho tsy isasako, tsy hanañ' anjara' amako rehe. ⁹ Le hoe ty nanoa' i Simona Petera: O Rañandria, tsy o tombokoo avao arè, fa o tañako naho lohakoo ka. ¹⁰ Tinoi' IESOÀ ty hoe: Tsy mipay ho sasañe ka ty nihariry, naho tsy o fandia'eo, fa hene malio. Malio ka nahareo, fe tsy ie iaby. ¹¹ Amy te niarofoana'e i hifotetse azey, zay ty nanoa'e ty hoe: Tsy inahareo iaby ro malio.

¹² Ie niharirie'e o fandia' iareeo, le nisaroñe naho niambesatse indraike vaho nañontane ty hoe: Rendre' areo i nanoakoy? ¹³ Anoe' areo Talè, naho Androanavy, le mete i anoa'areoy, amy te ie raho. ¹⁴ Aa kanao zaho, Talè naho androanavi' areo ro manasa o fandia' areoo, le mifampihariry fandia ka. ¹⁵ Amy te tinoloko fitsikombeñañe, hanoa' areo i nanoakoy. ¹⁶ Eka! to t'itaroñako, te tsy bey te amy mpifehe azey ty mpitoroñe, naho ty nahitrike te amy nañitrikey. ¹⁷ Ie fohi' areo zay, le ho fale t'ie anoe'areo. ¹⁸ Tsy inahareo iaby ty itaroñako, amy te fantako o jinobokoo, fe tsi-mahay tsy ho heneke o Sokitse Masiñe, te Nañonjon-tomitse amako

i niharo nikama amy mofokoy.*

¹⁹ Henane zao, italiliako aolo' ty hitondroha'e, soa t'ie tondroke, le hatokisa' areo t'ie raho. ²⁰ Eka! to t'itaroñako te ze mandrambe ndra iaia ahitriko, le mandrambe ahy, vaho i mandrambe ahiy ro mandrambe i nañitrik' ahiy.

i Nifotetse azey Mat 26.21,22; Mar 14.18,19; Lke 22.21-23

²¹ Ie nanao zay t'IESOÀ, le nidabahorak' añ'arofo'e, naho nanao ty hoe: Eka! to t'itaroñako te hifotera' ty raik' ama' areo. ²² Aa le nifanolitolike o mpiama'eo, fa nofi' iareo i tsara'ey. ²³ Ie amy zao, nirampy añ' araña' IESOÀ i mpiama'e nikokoa' IESOÀ. ²⁴ Aa le tsinikao' i Simona Petera re hañontane i nisaontsie'ey. ²⁵ Le ie niato añ' araña' IESOÀ ro nañontane ty hoe: O Talè, ia v'izay? ²⁶ Hoe ty natoi' IESOÀ: Ty ho tolorako ty pila'e toy naho fa najoko. Aa ie nalò'e i pila'ey le natolo'e amy Jodasy ana' i Simona nte-Keriote. ²⁷ Ie nandrambe i mofoy le nitsamoak' ama'e i mpañinjey. Le hoe t'IESOÀ tama'e: I hanoe'oy, anò masika. ²⁸ Ie amy zao, leo raik' am-pandambañañe eo tsy nahafohiñe ty talim-pisaontsia'e. ²⁹ Natao' ty ila'e te, kanao mpitän-koroñe t'i Jodasy, le va'e nanoa' IESOÀ ty hoe: Kalò

* **13:18** Sab 41:9

o paian-tika amy sabadidakeio; ke nampamahana'e o rarakeo. ³⁰ Aa ie vata'e nandrambe i pila'ey le niavotse; fa haleñe.

Ty Ami' ty Hionjona'e

³¹ Ie niakatse aña, le hoe t'IESOÀ: Henane zao ty andrengeañe i Ana' ondatiy, vaho nahazo hasiñe ama'e t'i Andrianañahare, ³² aa naho mandrenge an' Andrianañahare re, le ho rengen' Añahare ka, vaho ho renge'e aniany. ³³ O ry anakeo, aniany avao ty mbe hindrezako. Le hipia'a'reo, naho hambañe amy nitaroñeko amo Tehodaoy ty hitaroñako, te, Tsy ho lefe' areo hombàñe ty hionjonako; ³⁴ Lily vao ty itaroñako: mifampikokoa; manahake ty nikokoako anahareo ro hifampikokoa' areo. ³⁵ Zao ty hahafohina' ie iaby te mpiamako nahareo: t'ie mifampikoko.

ty Hiteteza' i Petera Mat 26.34,35; Mar 14.30,31; Lke 22.33,34

³⁶ Hoe t'i Simona Petera tama'e: O Rañandria, homb'aia v'Iheo? Natoi' IESOÀ ty hoe: I andenakoy tsy mete' areo tonjohizeñe heike; f'ie hañorik' avao te aña. ³⁷ Hoe t'i Petera ama'e: O Rañandria, aia ty tsy anonjohizako azo henaneo? Hafoeko ho azo ty fiaiko. ³⁸ Tinoi' IESOÀ ty hoe: Hafoe'o ho ahy hao o fiai'oo? To t'itaroñako te mbe tsy hikekeo i akoholahiy naho tsy fa nitety ahy in-telo rehe.

14

Ohoñe'e o Mpiama'eo

¹ Ko mampihohokohok' arofo; miatoa aman' Añahare, iato ka raho. ² Maro ty traño aña'anjomban-dRaeko ao, naho tsy zay ho nivolañako. Hionjoñe raho hañalankañe toetse ho anahareo. ³ Aa kanao homb'eo raho hañajariako toetse, le hibalihako, handrambe anahareo ho amako, soa te amy itoerakoy ty hitoera' areo. ⁴ Apota' areo ty hombako, naho fohi'areo ty lalañe mb'eo.

⁵ Hoe t'i Tomasy tama'e: O Rañandria, Tsy hai'ay ty homba'o; aia ty hahafohina'ay ty lala homba'o? ⁶ Tinoi' IESOÀ ty hoe: Zaho i lalañey, ty hatò vaho ty haveloñe; leo raike tsy homb' aman-dRaeko naho tsy añaamako. ⁷ Aa naho fohi' areo raho, ho fohi' areo ka t'i Raeko; ie henane zao fa mahafohiñe aze vaho mahaisak' aze.

Mihalaly amy Tahina'ey

⁸ Hoe t'i Filipo tama'e: O Rañandria, atorò anay t'i Rae, fa mahaeneñe anay zay. ⁹ Tinoi' IESOÀ ty hoe: Tsy fa ela hao ty nireketan-tika, te ihe mboe tsy mahafohiñe ahiko ry Filipo? Ze nahaisak' ahy fa nahaoniñe an-dRae; aa vaho akore ty atao'o ty hoe: Atorò anay t'i Rae? ¹⁰ Tsy atokisa'o hao te zaho ro aman-dRae vaho amako t'i Rae? Tsy ahy o saontsy itaroñakoo, fa manao o tolon-draha'eo i Raeko mimoneñe an-troko ato. ¹¹ Matokisa te aman-dRae raho naho te amako t'i Rae; ke iantofo ty amo fitoloññaño.

¹² Eka! to t'itaroñako te hanoe' ty mpiato amako o fitoloñakoo, vaho mandikoatse iretoñañe ty hanoe'e, amy te homb' aman-dRaeko mb'eo raho. ¹³ Aa ndra inoñ' inoñe ty ihalalia' areo ami'ty añarako, le hanoeko, soa te ho rengëñe amy Anakey t'i Rae. ¹⁴ Ndra inoñ' inoñe ihalalia' areo ami'ty añarako, le hanoeko.

Ampitama'e i Arofo'ey

¹⁵ Kanao mikoko ahy nahareo, le hañambeñe o lilikoo; ¹⁶ hihalaly aman-dRae raho, vaho hitolora'e Mpañolotse tovo'e himoneñe ama' areo nainai'e. ¹⁷ Ie i Arofon-kavantañañey; i tsy mete rambese' ty voatse toiy

amy te tsy fohi'e mborenofi'e; fe mahafohiñe aze nahareo amy t'ie mitraopimoneñe ama' areo, toe hitraofa'e.

¹⁸ Tsy ho farieko ho bode nahareo fa homb' ama' areo mb'eo. ¹⁹ Tsipaepae' zao tsy ho oni' ty voatse toy ka raho; f'ie ho oni' areo: kanao velon-dRaho, ho veloñe ka nahareo. ²⁰ Amy andro zay, ho fohi' areo te zaho ro aman-dRaeko naho amako nahareo vaho ama' areo raho. ²¹ Ze mamolònkoñe o lilikoo naho mañambeñe aze, ie ty mikoko ahy; le ho kokoan-dRaeko i mikoko Ahiy naho hikokoako vaho hampondrendreheko ahy.

²² Le hoe t'i nanoe' i Jodasy (tsy i nte-Keriote): O Rañandria, akore te zahay ro hiboaha'o fa tsy ty voatse toy? ²³ Tinoi' IESOÀ ami'ty hoe: Hifahatse amo volakoo ty mikoko ahy le hikokoan-dRaeko naho homb'ama'e mb'eo zahay, vaho hanoe'ay ama'e ao ty akiba'ay. ²⁴ Tsy mikoko ahy ty tsy mañambeñe o volakoo. Tsy ahiko i tsara janjiñe' areo amakoy fa an-dRaeko nañitrik' ahy.

²⁵ Izaho mb'e mimoneñe ama' areo atoy ty itaroñako i raha rezay. ²⁶ Le hahitrin-dRaeko ami'ty añarako i Mpañohòy, i Arofo Masiñey; Ie ty hañoke anahareo ze he'e vaho haniah y ze hene tinaroko. ²⁷ Hapoko ama'areo ty fañanintsíñe, hatoloko ty fierañerañako; tsy manahake ty fasozo' ty voatse toy ty fanjotsoako. Ko adoke hiotsetse ty arofo' areo, ko apoke ho hembañe. ²⁸ Fa jinanji' areo i nivolañekoy t'ie hiavotse vaho hibalike mb'ama' areo mb'etoy. Naho nikokoa'areo le ho nirebeke t'ie homb' aman-dRaeko aña fa bey te amako t'i Raeko. ²⁹ Ie ty nivolañeko aolo' te hifetsake, soa t'ie tondroke, le hiantofa' areo. ³⁰ Tsy hivolañe raha maro raho; amy te mb' etoañe i roandria' ty voatse toiy, f'ie tsy manandily amako; ³¹ Aa soa ho fohi' ty voatse toy te mikoko an-dRae raho, le ze andilian-dRae ahy, ty anoeko do'e. Miongaha, antao hiavotse.

15

Vahe to

¹ Zaho ro vahe to, i Raeko ro mpañalahala. ² Fonga afaha'e aña ze singa amako tsy mamo vaho hene tsengoe'e ze mamo, hampiegoego o voa'eo. ³ Fa malio nahareo ty amo tsara nitaroñekoo. ⁴ Mimoneña amako, le zaho ama' areo. Toe tsy hamoa ty singa tsy mipitek' ami'ty foto'e, àntsake nahareo naho tsy mimoneñe amako. ⁵ Zaho ty vahe, singa'e nahareo. Ze mimoneñe amako naho zaho ama'e, ie ty hirotrarotra, fa tsy maha-pidraha t'ie tsy amako. ⁶ Ndra ia' ia tsy mimoneñe amako ro hahifik' aña hoe singa, hiheatse, atontoñe naho ariañe aña'afao ao hiforototo. ⁷ Ie mimoneñe amako, naho mitobe aña'arofo' areo ao o volakoo le ihalalio ze satrie' areo vaho hanoañe. ⁸ Zao ty fandrengeañe an-dRaeko, t'ie mahavokatse bey hamente te mpiamako. ⁹ Manahake ty fikokoan-dRaeko ahy ty fikokoako anahareo. Aa le mimoneña amo fikokoakoo. ¹⁰ Ie ambena' areo o lilikoo le himoneñe am-pikokoako ao, manahake ty fiambenako o lilin-dRaekoo naho mimoneñe am-pikokoa'e ao.

Mpilongo Sarotse

¹¹ Nitaroñako irezay soa te ho ama'areo ty hafaleako vaho ho eneñe ty haeha' areo. ¹² Zao o lilikoo: t'ie mifanao roakolahy hambañe amy nikokoakoy. ¹³ Tsy eo ty mikoko mandikoatse zao t'ie hahafoe ty fiai'e ho an-drañe'e. ¹⁴ Rañeko nahareo naho manao ze andiliako. ¹⁵ Tsy t'ie hanoeko mpitoroñe ka, amy te tsy fohi' ty mpitoroñe ty anoe' i talè'ey;

nataoko rañetse amy te nampandrendrehako ze hene tsinanoko amandRaeko.

¹⁶ Tsy inahareo ty nijoboñe ahy, fa zaho ty nijoboñe anahareo naho tinendreko homb'eo hamokatse vaho hañambeñe o nivokare' areoo; le ndra inoñ' inoñ' ty halalie' areo aman-dRaeko ami'ty añarako ro hatolo'e.

¹⁷ Zao ty andiliako anahareo: mifampikokoa.

ami'ty Voatse toy o Mpiatoo

¹⁸ Naho malaim-bintañe anahareo ty voatse toy, fohino t'ie nalaiñe ahy hey. ¹⁹ Ie nimpiami' ty voatse toy, ho niteà' ty voatse toy o azeo. F'ie tsy mpiami'ty voatse toy, amy te jinoboko boak' ami'ty voatse toy, aa le malaiñe anahareo ty voatse toy. ²⁰ Tiahio o tsara nivolañakoo, te: Tsy bey te amy talè'ey ty mpitoroñe. Aa naho nanoe' iereo samporerake raho, àntsake t'ie ho samporeraheñe. Aa naho folokokoe' iereo o volakoo, le ho tambozore' iereo ka ty anahareo. ²¹ Toe hanoe' iereo ama' areo i hene rezay ami'ty añarako, amy te nofi' iereo i nañitrik' Ahiy. ²² Naho tsy nipok' eo raho nitaroñe am'iereo, le tsy ho nanan-kakeo, fe tsy eo henaneo ty iveroha'e amo tahiñeo. ²³ Ze malaiñe ahy, malaiñe an-dRaeko. ²⁴ Aa naho tsy nanoeko am'iereo ao o fitoloñañe mbe tsy nanoe' ondaty, tsy ho nanan-tahiñe, fe henaneo songa nahaoniñe mbore nañarinjeñe ahy naho an-dRaeko, ²⁵ soa te ho heneke i pinatetse amy Hâ' iereoy manao ty hoe: Tsy aman-tali'e ty nihejea' iareo ahy.*

Ty Fampitama'e i Arofoy

²⁶ Ie avy i Mpañolotsey, i hahitriko ama' areo hirik' aman-dRaey, i Arofon-kavantañañe miboak' aman-dRaey; ie ty hitalily ahy. ²⁷ Hitalily ka nahareo amy te nimpiamako boak' am-pifotora'e aña.

16

¹ Nitaroñako irezay soa t'ie tsy hitsikapy. ² Haitoañe amo fitontonañe nahareo; eka, ho tondroke ty ora, te inao, mitoroñe an'Andrianañahare ze mamono anahareo. ³ Hanoe' iereo amy te tsy naahafohiñe an-dRae naho ahy. ⁴ Fe nitaroñako, soa te, ie tsatoke ty ora'e, le ho tiahi' areo te nivolañeko. Tsy nitaroñako hey i entañe zay am-pifotora'e, itika mbe nitraoke.

Ty Tolon-draha' i Arofoy

⁵ Fe hionjoñe mb'amy nañitrik' ahiy mb'eo raho henaneo, le tsy ama' areo ty mañontane ahy ty hoe: Aia ty homba'o? ⁶ F'ie mioremeñe añ'arofo ty amy entako ama' areoy. ⁷ Fe ivolañako ty hato, te mahasoanahareo t'ie hienga, fa naho tsy mienga le tsy hitotsaha' i Mpañolotsey; aa naho mb'eo raho le hahitriko mb'ama'areo mb' etoan-dre. ⁸ Ie avy, ro hampiheve maso ty voatse toy ty ami'ty tahiñe naho havantañañe vaho fizakàñe. ⁹ O tahiñeo, amy te tsy miato amako iareo. ¹⁰ I havantañañey, fa homb' aman-dRaeko mb'eo raho vaho tsy hahaisak' ahy ka nahareo. ¹¹ I zakay, fa nafàtse ty mpifehe' ty voatse toy.

¹² Mbe maro ty hitaroñako fa tsy leo' areo heike. ¹³ Ie pok' atoy i Arofon-katòy le ie ty hiaolo anahareo amy ze hene hatò. Tsy hisaontsy ty aze, fa o janjiñe'eo avao ty ho taroñe'e vaho haboa'e ama' areo o raha ho avio. ¹⁴ Handrenge ahy re naho handrambe amako vaho hañento ama'areo, ¹⁵ ahiko iaby ze aman-dRaeko, zay ty nitaroñako te hangalak' amy ahikoy re le hentoe'e nahareo.

* ^{15:25} Sab 69:4; 109,3

Hivalike ho Haehake ty Fihonto'areo

¹⁶ Tsy ho isa' areo raho te aniany; fa betebeteke le ho oni' areo indraike. ¹⁷ Hoe ty vesoveso' o mpiama'e ila'eo: Inoñe i tsarae'e amantikañey, ty hoe: Tsy ho oni' areo raho te aniany, le ho oni' areo indraike te aniany, amy te homb' aman-dRaeko mb'eo? ¹⁸ Nindrae' iareo ty hoe: Inoñe ze o Anianike sinaontsi'e zao? Noff'ay i saontsi'ey.

¹⁹ Niarofoana' IESOÀ ty ho nañontanea' iareo vaho nanoa'e ty hoe: Ifañontaneañe hao i asakoy ty hoe: Tsy ho oni' areo raho te aniany; naho ty hoe, Hahaisak' ahy ka nahareo te aniany? ²⁰ Eka, to t'itaroñako t'ie hirovetse naho hangololoike ty tañy, fe hitohàke ty voatse toy. Ho azo ty velo-mihontoke nahareo, fe hifotetse ho firebeñañe ty fihonto' areo. ²¹ Tsimboetse ty ampela mitsongo naho tsatoke i ora'ey; f'ie mahatoly ajajamena le haliño'e i ajale'ey, vaho isoloa'e haehake, amy te toly antane atoy t'indaty. ²² Aa le hiotsòtse hey nahareo henaneo, f'ie ho treako indraike le hirebeke ty arofo' areo vaho tsy hasinta' ondaty ama' areo ty haehake. ²³ Tsy hañontane ahy ndra inoñ' inoñe nahareo amy andro zay. Eka! to t'itaroñako te, ze halalie' areo aman-dRaeko ami'ty añarako ro hatolo'e. ²⁴ Pake henàne tsy eo ty nangataha' areo ami'ty añarako. Mihalalia, le hahazo, hañeneke ty hafalea' areo.

²⁵ Nivolañako am-pandrazañañe irezay; fe antitotse ty andro t'ie tsy handrazaña, fa hitalily malange i Rae. ²⁶ Hihalaly ami'ty añarako nahareo amy andro zay; tsy anoeko ty hoe: Zaho ty hihalaly aman-dRaeko ho anahareo; ²⁷ Aiy! toe ikokoan-dRae ie nikoko ahy, naho natoky te nihirik' aman' Añahare raho. ²⁸ Niboak' aman-dRae raho, nizilik' ami'ty voatse toy, vaho hiavotako ty voatse toy ho mb' aman-dRae.

²⁹ En! hoe o mpiama'eo tama'e, Malange o saontsi'o henaneo, amy te tsy mandrazan-drehake. ³⁰ Rendre'ay henaneo te kila arofoana'o, naho tsy paia'o ty hañontanea' ondaty; zay ty iantofa'ay t'ie hirik' aman' Añahare.

³¹ Tinoi' IESOÀ ami'ty hoe: Miantoke hao henaneo? ³² Toe ho avy ty ora, eka fa tondroke t'ie hiparatsiaké, songa hamonje ty aze, le ho farie' areo ho joriñe raho; f'ie toe tsy ho bangiñe fa itraofan-dRae. ³³ Nitaroñako irezay soa t'ie hierañerañe amako. Halovilovy ami'ty voatse toy nahareo; fe manintsiña, fa rinebako ty voatse toy.

17

Mihalaly ho am-Pañova'e

¹ Ie nitsarae' IESOÀ, le niandrandra mb'andikerañe ey, nanao ty hoe: O Aba, fa tondroke ty ora; rengeo t'i Ana'o, handrengea'e Azo. ² Fa nimea'o lily re hifehe ze kila nofotse, soa te ho tolora'e haveloñe nainai'e ze hene natolo'o aze. ³ Zao o haveloñe nainai'eo, t'ie ho fohi' iereo ry Andrianañahare tokañe to, naho IESOÀ Norizañe nahitri'oy. ⁴ Fa nandrengeako an-tane atoy vaho nihenefako i nampitoloñe'o Ahiy. ⁵ O Aba itoloro engeñeañila'o eo henaneo amy engeñe nindrezan-tika taolo' ty fifotora' ty voatse toiy.

Mihalaly ho a o mpiama'eo

⁶ Fa nampahafohineko ondaty natolo'o ahy boak' ami'ty voatse toio ty tahina'o, ie nifanaña'o, naho natolo'o ahiko vaho nambena' iereo o tsara'oo. ⁷ Fa rendre' iereo henaneo te boak' ama'o ze hene natolo'o ahy, ⁸ ie natoloko o saontsy nimea'o ahikoo, naho rinambe' iereo, naho rendre' iereo to te boak' ama'o raho vaho antofa' iereo te Ihe ro nañitrik'

ahy. ⁹ Ihalaliako; tsy ho ami'ty voatse toy ty ihalaliako, fa ho amo natolo'o ahikoo amy t'ie azo. ¹⁰ Kila azo o ahikoo, naho ahiko o azoo; vaho nahazoako engeñe. ¹¹ Tsy ami'ty voatse toy ka raho, fe ami'ty voatse toy o retoñañe, vaho homb' ama'o mb'eo raho. Ry Aba masiñe, tambozoro an-tahina'o o natolo'o ahikoo, soa t'ie ho raike manahake itikañe. ¹² Zaho nimpiam' iereo, le nambenako an-tahina'o o natolo'o ahikoo; nitambozoreko o natolo'o ahikoo, tsy ia ty nipoke naho tsy i anankamomohañey hampañeneke o Sokitse Masiñeo. ¹³ Mb'ama'o mb'eo raho henaneo; naho taroñeko ami'ty voatse toy o entañe zao, handiforañe am'iereo o haehakoo. ¹⁴ Fa natoloko iareo o tsara'oo le niheje' ty voatse toy, amy t'ie tsy mpiami' ty voatse toy, hambañe amy te zaho tsy mpiami' ty voatse toy. ¹⁵ Tsy ihalaliako te hakareñe ami'ty voatse toy iereo, fa t'ie ho kalañeñe ami'ty raty. ¹⁶ Tsy mpiama' ty voatse toy iereo, hambañe amy te zaho tsy mpiami' ty voatse toy. ¹⁷ Ampiavaho an-katò iereo; o tsara'oo ro to. ¹⁸ Hambañe ami'ty nañiraha'o ahy mb'ami'ty voatse toy, ty nañitrifako iareo mb'ami'ty voatse toy. ¹⁹ Ie ro añamasiñako vatañe, hañavaheko iareo añami'ty hatò.

Mihalaly ho a o Mpiatoo

²⁰ Tsy ho a iretoañe avao o ihalaliakoo, fa ho amo mbe hiato amako ami' ty tsara' iareoo; ²¹ soa te ho raike iaby iereo, hambañe amy te amako Rehe Aba, naho ama'o raho, vaho ho raik' aman-tikañe iereo, hatokisa' ty voatse toy te nañitrik' ahy rehe. ²² Fa natoloko iareo i engeñe natolo'o ahikoy, soa t'ie ho raike, hambañe amy te itika ro raike: ²³ Zaho am'iereo, naho Ihe amako, hamonirañe iareo ho raike; soa te ho fohi' ty voatse toy te nañitrik' ahy rehe vaho nikoko iareo, manahake ty fikokoa'o ahy. ²⁴ O Aba, salalaeko te hindre amako ami'ty hitoerako o natolo'o ahikoo, hahaoniñe i engeñe natolo'o ahiy, amy t'ie nikokoa'o taolo' ty nañoreña'o ty voatse toy. ²⁵ Ry Aba vantañe, ihe tsy nifohi' ty voatse toy, fe fohiko, naho fohi' iretoañe te Ihe ro nañitrik' ahy, ²⁶ naho nampahafohineko iareo i tahina'oy, mbore hampandrendrehoko, soa te ho am' iareo i fikokoañe nikokoa'o ahiy vaho izaho am' iareo.

Finotetse naho Tsinepake Mat 26.47-56; Mar 14.43-52; Lke 22.47-53

18

¹ Ie nitsarae' IESOÀ, le nionjoñe mindre amo mpiama'eo nitsake ty saka Kedrone mb'amy goloboney mb'eo le nizilik' ao rekets' o mpiama'eo. ² Nizatse i toetsey ka t'i Jodasy, i hifotetse azey, fa beteke nitolak' ao t'IESOÀ naho o mpiama'eo. ³ Aa ie nahazo mpirimbon-dahin-defoñe naho mpifeleke hirik' amo mpisorom-beio naho o Fariseoo t'i Jodasy, le niheo mb'eo ninday failo naho jiro vaho fialiañe.

⁴ Kanao fonga niarofoana' IESOÀ ty hifetsak' ama'e, le nimb' am' iereo mb'eo nanao ty hoe: Ia ty paia' areo? ⁵ Tinoi' iereo ty hoe: IESOÀ nte Nazareta. Le hoe re tam' iereo: Ie raho. Nijagarodoñe am'iereo ao ka t'i Jodasy nifotetse ama'e. ⁶ Amy nanoa'e ty hoe: Ie raho, le nidisa-voly iereo, nivaragidiñe an-tane eo. ⁷ Aa le nindrai'e i ontane'ey: Ia v'o paia' areoo? Hoe iereo: IESOÀ nte Nazareta. ⁸ Le tinoi' IESOÀ ty hoe: Fa nanoeko te Ie Raho, aa naho mipay ahy, adono hañavelo iretoañe, ⁹ hampañeneke i nitsarae'ey ty hoe: Leo raike tsy nipoke amo natolo'o ahikoo.

¹⁰ Kanao amam-pibara t'i Simona Petera; napontsoa'e le pinao'e ty mpitoro' i talèm-pisoroñey, nañitsike ty ravembia'e havana. Malikò ty

tahina' i mpitoroñey. ¹¹ Le hoe t'IESOÀ amy Petera: Aziliho an-traño'e o fibara'oo. Tsy hinomeko hao i fitovy nazotson-dRaeko amakoy?

Añatrefa' i Anasy eo Mat 26.69-70; Mar 14.66-68; Lke 22.55-57

¹² Aa le nifihine' i mpirimbon-dahin-defoñey naho i mpiaolo'ey naho o mpifele' o Tehodao t'IESOÀ vaho rinohy. ¹³ Kinozozò' iereo mb'amy Anasy hey re, ie ty rafoza' i Kaifa talèm-pisoroñe amy taoñe zay. ¹⁴ I Kaifay i nanoro o Tehodaoy ty hoe: Mahasoa te ho vilasy ho a' ondatio t'indaty raike.

Ty Nijejoa' i Petera Valoha'e

¹⁵ Nañorike IESOÀ t'i Simona Petera naho ty mpiamy IESOÀ raike. Fa nifohi' i talèm-pisoroñey i mpiama'e zay, le nindre amy IESOÀ re nizilik' an-kiririsan-talèm-pisoroñey ao. ¹⁶ Fe nijohañe an-dalam-bey alafe ao t'i Petera. Niakatse amy zao i mpiama'e nifohi' i taleiy, le nilahatse ami'ty mpañamben-dalañe, vaho nampizilihe'e t'i Petera. ¹⁷ Le hoe i ampela mpitàn-dalañey amy Petera: Tsy mpiam' indatiy ka v'iheo? Hoe re: Aiy! tsy zaho. ¹⁸ Nizorazora eo o mpitoroñeo naho o mpigaritseo, ie fa namiañe afo am-porohañe ao amy te nanara, le namindro; nindre nijohañe am'iereo t'i Petera, namindro.

Ontane' i Talèm-Pisoroñey

¹⁹ Le nañontane IESOÀ ty amo mpiama'eo naho o fañòha'eo i talèm-pisoroñey. ²⁰ Tinoi' IESOÀ ty hoe: Nivolam-beo' mbeo ami'ty voatse toy raho, nainai'e nañoke amo fitontonañeo naho añañomban' Añahare fivoria' o Jiosy iabioo, vaho tsy eo ty nivolañeko añañetake. ²¹ Ino ty añañontanea'o ahy? Añañontaneo o nahajanjiñe i vinolako am'iereoio, fohi' iereo o nitaroñekoo.

²² Ie nanao zay t'IESOÀ, le tinampifi' ty mpigaritse nijohañe eo, vaho nanoa'e ty hoe: Zao hao ty toi'o i talèm-pisoroñey? ²³ Tinoi' IESOÀ: Naho nandilatse an-tsaontsy raho, italilio ty tsy nimete; fe naho nitò, akore t'ie nanampifia'o? ²⁴ Aa le nampanesè' i Anasy an-drohy mb'amy Kaifa talèm-pisoroñey mb'eo re.

Mitety IESOÀ t'i Petera

²⁵ Ie amy zao, namindro ey t'i Petera, le nañontanea'iereo ty hoe: Tsy mpiama'e ka v'iheo? Niliere'e ami'ty hoe: Tsy ie raho. ²⁶ Le hoe ty mpitoron-talèm-pisoroñey, longo' i nikitsihe' i Petera ravembiay: Tsy nitreako nindre ama'e amy ala vondroy v'iheo? ²⁷ Nandietse indraike t'i Petera; vaho nikekeo i akoholahiy.

Ty Balie añatrefa' i Pilato Mat 27.2, 11-14; Mar 15.1-5; Lke 23.1-5

²⁸ Ie nimaraindray, nendese' iereo boak' amy Kaifa mb' amy anjomba i mpizakaiy mb'eo t'IESOÀ, f'ie tsy nimoak' añañombam-pizaka ao tsy mone haleotse tsy mete hikama i Fihelañey. ²⁹ Aa le niakatse mb'am'iereo mb'eo t'i Pilato, nanao ty hoe: Inoñe ty anisia' areo t'indaty tìañe? ³⁰ Le hoe ty natoi' iereo: Naho tsy mpanan-tahin-dre, tsy ho nasese'ay ama'o. ³¹ Endeso re, hoe t'i Pilato, zakao an-dili' areo. Aa le hoe o Tehodao tama'e: Tsy aman-jo hamono ondaty zahay, ³² hañeneke ty tsara' IESOÀ nitaroñe'e ty havilasy hivetraha'ey.

³³ Le nizilik' añañombam-pizakañ' ao indraike t'i Pilato nitsikaotse IESOÀ naho nanoa'e ty hoe: Mpanjaka' o Jiosio v'iheo? ³⁴ Tinoi' IESOÀ ty hoe: Saontsi'o hao, hera nisaontsie' ty ila'e ahy? ³⁵ Hoe t'i Pilato: Jiosy

v-o ahoo? I foko'oy naho o mpisorom-beio ty nanese Azo amako; ino o nanoe'oo?

³⁶ Tinoi' IESOÀ ty hoe: Tsy ami'ty voatse toy ty fifeheako; fa naho ni-hirik' ami'ty voatse toy ty fifeheako, le nialy ho ahy o mpitorokoo tsy hasese amo Tehodao; fe tsy boak' atoañe ty fifeheako. ³⁷ Aa le hoe t'i Pilato ama'e: Mpanjaka v'Iheo! Tinoi' IESOÀ: Saontsi'o te mpanjaka; zay ty nisamahañ' ahy, naho ty nivotrahako ami'ty voatse toy, hitaroñako ty hatò. Hene mahajanjiñe ty feoko ze mpiami' ty hatò. ³⁸ Hoe t'i Pilato tama'e: Ino ze o hatò zao? Ie nanao zay, le niavotse mb' amo Tehodao indraike, nanao ty hoe: Tsy treako ty hakeo ama'e. ³⁹ Fe aman-dily nahareo, ty hañahàko t'indaty amy Fihelañey. No' areo arè te havotsoko ama' areo t'i Mpanjaka' o Jiosio? ⁴⁰ Nindrai' iareo an-tazataza ty hoe: Tsy t'indaty tia fa i Barabasy. Malaso i Barabasy zay.

19

¹ Aa le rinambe' i Pilato t'IESOÀ vaho linapoa'e ² le rinandra' o lahin-defoñeo ty hàlam-patike nasabàka amy añambone'ey naho nisaroña' iareo lamba lava malòmavo ³ vaho nitotok' aze nanao ty hoe: Onjono! Mpanjaka' o Jiosio! mbore rinarateha' iereo.

⁴ Niakatse indraike t'i Pilato le hoe ty asa'e am'iereo: Ingo, ampañatrefeko ama' areo hahafohina' areo t'ie tsy nahatreavako tahiñe. ⁵ Le niakatse t'IESOÀ, ama'e i sabaka fatikey naho i lamba malòmavoy, vaho hoe t'i Pilato: Heheke, ondatio!

⁶ Ie niisa' o mpisorom-beio naho o mpigaritseo, le hoe ty koi' iareo: Peho amo hatae ajaleo re! Peho! Aa hoe t'i Pilato tam' iereo: Rambeso, aradoradò, fa zaho tsy mahatreya ty tahi'e. ⁷ Tinoi' o Tehodao ty hoe: Manan-dily zahay, t'ie tsi-mahay tsy vonoeñe ty amy liliy amy t'ie nanoñom-batañe ho Anan' Añahare.

⁸ Akore amy zao ty firevendreveña' i Pilato te nahajanjiñe zay, ⁹ le niheo mb' an' anjombam-pizakañ' ao indraike re nanao ty hoe am' IESOÀ: Hirik'aia v'Iheo? fe ty tsi' IESOÀ ro tsi'e. ¹⁰ Aa hoe t'i Pilato tama'e: Ifoneña'o hao ty tsy hivolañe amako? Tsy rendre'o hao t'ie aman-dily hañahañe Azo naho lily hampipehañe Azo amy hatae ajaley? ¹¹ Tinoi' IESOÀ ty hoe: Tsy ho nanan-dily amako reho naho tsy natolotse azo hirik' an-dindiñ' aña, aa le i nanese ahy ama'oy ty bey hakeo.

¹² Ty amy hoe zay le nipay ty hañaha aze t'i Pilato, fe tinazataza' o Tehodao ty hoe: Naho hahà'o ondatio, le tsy rañe' i Kaisara. Mpandietse i Kaisara ze hene misenge ho mpanjaka. ¹³ Ie jinanji' i Pilato i entañe zay, le nakare'e t'IESOÀ, vaho niambesatse ami'ty fiambesam-pizakà'e eo ami'ty toetse atao Traintraiñe*, ie atao Gabàta ami'ty Hebreo. ¹⁴ Ty ora faha-telo† amy Fañalankañañe i Fihelañey, le hoe re amo Tehodao: Ingo t'i Mpanjaka' Areo! ¹⁵ Kinorà' iereo ami'ty hoe: Endeso aña, endeso aña, aradoradò. Hoe t'i Pilato am'iereo: Ho peheko hao ty Mpanjaka' areo? Tinoi' o mpisorom-beio ty hoe: Tsy amam-panjaka zahay naho tsy i Kaisara. ¹⁶ Aa le natolo'e iareo ho peheñé‡ amy hatae ajaley t'IESOÀ, naho rinambe' iereo,

Pinatetse Mat 27.32-38, 48, 50; Mar 15.21-26, 36, 37; Lke 23.26-33, 38, 46

* **19:13** Gabatà: traintraiñe, tsahatse ondaty 100. † **19:14** Eo ka ty boke peli'e manao "fah'eneñe"; Fe: Mar 15:25, 33-34 ‡ **19:16** Pineke, ndra naradorado, amy hatae ajaley

¹⁷ vaho niakatse nitarazo i hatae ajale'ey re mb' ami'ty atao Ankaran-doha, toe Golgota ami'ty saontsy Hebreo. ¹⁸ Teo ty nipehañ' aze, nindre ami'ty roe ila'e; songa añ' ila'e, naho añivo t'IESOÀ.

¹⁹ Nanokitse loham-bolañe t'i Pilato le pinè'e amy hataey vaho nabak-abaka'e ty hoe:
IESOÀ nte Nazareta,
t'i Mpanjaka' o Jiosio.

²⁰ Aa le maro ty Jiosy nahavaky i sokitsey, amy te marine i rovay ty nandradoradoañe IESOÀ ie nibakabaka an-tsaontsy Hebreo naho Latina vaho Grika. ²¹ Le hoe o mpisorom-bein-Jiosio amy Pilato: Ko sokire'o ty hoe: Mpanjaka' o Jiosio, fa t'ie nanao ty hoe: Zaho ro Mpanjaka' o Jiosio.
²² Tinoi' i Pilato ty hoe: I pinatekoy ro pinateko.

²³ Ie pinè' o lahin-defoñeò t'IESOÀ, le rinambe' iereo ty saro'e naho tinoriana' iareo efatse, sindre nahazo ama'e o lahin-defoñeò, fe i sarimbo'ey, ie tsy aman-tindrin-jaitse i sarimboy fa tinenoñe raike hirik' ambone, ²⁴ le nilahare' iereo ty hoe: Antao tsy handrovitse aze, fa hanoeñe tsatopiso haharendreke ty ho temp'e; hañenefañe i pinatetse amy Sokitse Masiñey, ty hoe:
Nifanjara' iereo ty sìkiko,

le nanoe'iereo tsato-piso ty saroko. §

Izay ty nanoe' o lahin-defoñeò.

²⁵ Nijohañe marine' i hatae ajale' IESOÀ eo ty rene'e naho ty rahavavendrene'e naho i Marie vali' i Klopa vaho i Miriame nte-Magdalà. ²⁶ Ie nioni' IESOÀ te marine eo ty rene'e naho i mpiama'e kokoa'ey, le hoe re amandrene'e: O Rakemba, Ingo o ana-dahi'oo! ²⁷ Le hoe re tamy mpiama'ey: Ingo ty rene'o. Mifototse amy oray le nampimoneñe' i mpiama'ey ama'e ao re.

²⁸ Añe zay, ie niarofoana' IESOÀ te niheneke henane zay, le hoe re hañenefa'e o Sokitse Masiñeo: Maran-drano raho. ²⁹ Nidoke ey ty vatavo pea divay maseñe, le nilifore' iereo amy divaiy ty voren-driake, naho natrofak' ami'ty seva vaho natohotse am-palie'e. ³⁰ Ie nandrambe i divay maseñey t'IESOÀ le hoe re: Fonitse zay! le nadrodrè'e i añambone'ey, vaho nafoe'e ty arofo'e.

³¹ Amy t'ie andro Fañalankañañe, le tsy azo adoñe ambone' ty hatae ajale eo o loloo fa andro SABATA, toe andro jabajaba i SABATA zay*, le nihalaly amy Pilato o Tehodao te havitsoke ty kitso' iareo soa t'ie ho takoneñe. ³² Aa le nimb'eo o lahin-defoñeò le navitsoke ty kitso' i valoha'ey naho i nindre niradorado ama'ey; ³³ ie niavy amy IESOÀ eo, tendreke te vilasy vaho tsy navitsoke o fandia'eo; ³⁴ te mone tinombo' ty lahin-defoñe an-defoñe ty leme'e vaho napororoake boak' ao ty lio miharo rano.

³⁵ Mitalily ty nahatre, naho to i talili'ey naho fohi'e te mahity i enta'ey, hatokisa' areo. ³⁶ Ie nanoeñe hañenefañe i Sokitse Masiñe manao ty hoe: Leo raike amo taola'eo tsy havitsoke.†

³⁷ Le hoe ka i Sokitse Masiñey:
Ho isa' iereo i trinofa'iereoy.‡

Nalenteke Mat 27.57-60; Mar 15.42-46; Lke 23.50-54

³⁸ Ie añe, le nihalaly amy Pilato t'Iosefe nte-Arimatea, mpiamy IESOÀ (fe añ'etake, ie nihembañe amo Tehodao), ty hitakona'e ty fañòva' IESOÀ.

§ ^{19:24} Sab 22:18 * ^{19:31} SABATA-Bey i Sabadidake Mofo po-Dalivy, Sor 23:5 † ^{19:36} Avo 12:46; Sab 34:20 ‡ ^{19:37} ZEK 12:10

Ninò' i Pilato zay. Aa le nomb'eo re nandrambe ty fañòva' IESOÀ. ³⁹ Nimb'eo ka t'i Nikodemosy, i nitilike IESOÀ tam-baloha'e amy haleñeyi, ninday miora miharo vahoñe zato litatse. ⁴⁰ Nitakone' iereo ty fañòva' IESOÀ le nifolonkoñeñ lamba-leny mitraok' amo raha mañitseo, an-tsata-pandenteha' o Jiosio.

⁴¹ Marine' i nipehañe azey ty goloboñe, le amy goloboñey ty kibory vao mbe lia'e tsy nandrohotan-dolo. ⁴² Aa, kanao Fañalankaña' o Jiosio zay, naho te marîne eo i lonakey, le nirohote' iereo ao t'IESOÀ.

Lonake Haran-kòake Mat 28.1-8; Mar 16.1-8; Lke 24.1-12

20

¹ Ie loak' andro' ty Sabotse le nañaleñaleñe mb'an-donake mb'eo t'i Miriame nte-Magdalà, ie mbe nimaieñe, vaho naheo'e te nasitak' amy lonakey i vato. ² Le nihitrihitry mb'amy Petera naho i mpiama'e nikokoa' IESOÀy mb'eo, nanao ty hoe: Fa tinava' iereo boak' an-donak' ao t'i Talè, le tsy fohi'ay ty nandrohotañ' aze. ³ Niavotse amy zao t'i Petera naho i mpiama'ey nimb' an-donake mb'eo. ⁴ Sindre nilay, fe nilosore' i mpiama'ey t'i Petera vaho niavy an-donake eo aolo. ⁵ Ie nibotreke, niisa'e o lamba-lenio nidoñe eo, f'ie tsy nizilik' ao. ⁶ Pok'eo amy zao t'i Petera nanonjohy aze, le nimoak' an-donak' ao vaho nahaisake te nidoke eo o lamba lenio, ⁷ fe tsy nirekets' amo lamba lenio ty lamba nakolopok' i añambone'ey, f'ie niholoñe tokañe eo. ⁸ Nizilik' ao amy zao i mpiama'e niavy aolo an-donakey, le nahatreya vaho niantoke. ⁹ Mbe tsy nirendre' iereo hey i Sokitse Masiñe manao t'ie tsi-mahay tsy mitroatse amy havilasiy. ¹⁰ Le nimpoly mb'an-kiboho' iareo añe i mpiama'e rey.

Nisodeha'e amy Miriame nte-Magdalà

¹¹ Nijohañe alafe' i lonakey avao t'i Marie, nirovetse; ie mbe niharovetse, nibokoke naho nitilihitse an-donak' ao ¹² vaho nahaoniñe ty anjely roe nisaroñe fisy niambesatse ey, ty atondohà'e eo naho ty antimpahe'e eo, amy nandrohotañe ty fañòva' IESOÀy. ¹³ Le hoe iereo tama'e, O Rakembao, ino ty iroveta'o. Hoe re am'iereo: Nasinta' iereo i Talèkoy, le tsy fantako ty nandrohotañ' aze. ¹⁴ Ie nanoe'e zay le nitolike vaho nahaisake IESOÀ nijohañe eo, fe tsy napota'e t'ie IESOÀ. ¹⁵ Hoe t'IESOÀ tama'e: O Rakembao, inoñe ty angololoiha'o? Ia ty paia'o? Ie natao'e te mpañalahala goloboñe, le nanoa'e ty hoe: O androanavio, naho ninday aze boak' etoan-drehe, taroño amako ty nandrohota'o aze, hitakonako aña. ¹⁶ Hoe t'IESOÀ tama'e: O Marie. Natrefa'e le nanoa'e ty hoe: O Rabony, ze midika ty hoe: Talèko. ¹⁷ Hoe t'IESOÀ tama'e: Ko mitsapa ahy, fa mboe tsy nionjoñe mb' aman-dRaeko, akia mb' aman-drolongoko mb'eo vaho atalilio te: Mionjom-baman-dRaeko naho Rae' areo, mb' aman' Añahareko naho Andrianañahare' areo mb'eo.

¹⁸ Nienga t'i Miriame nte-Magdalà nitaroñe amo mpiama'eo t'ie nahaisak' i Talè naho te nisaontsia'e irezay.

Mipoteak' amo Mpíama'eo Mar 16.14; Lke 24.36-43

¹⁹ Ie hariva amy àndroy, ty loak' andro' i Sabotse naho nagabeñe o lalan' anjomba' niharoa' o mpiama'eo ie nihembañ' amo Tehodaoy, le nisodehañe eo t'IESOÀ, nijohañe añivo' iareo ao nanao ty hoe:

Fañanintsiñe ama'areo. ²⁰ Ie nanoe'e zay, le nitoroa'e o fità'eo naho i leme'ey. Le nifale o mpiama'eo te nahaisake i Talè.

²¹ Nindrae' IESOÀ am'iereo ty hoe: Fañanintsiñe ama'areo. Hambañe ami'ty nañitrifan-dRaeko ahy ty añařahako anahareo. ²² Ie nitsara zay le tinio'e iereo, nanao ty hoe: Rambeso i Arofo Masiñey; ²³ Aa ndra hakeo' iaia ty apo' areo ro hafahañe ama'e; f'ie ho tanañe naho tana' areo.

²⁴ Tsy nitraok' am'iereo t'i Tomasy, atao Didimo, mpiamy folo ro'amby rey, amy nivotraha' IESOÀ. ²⁵ Aa le nitalily ty hoe ama'e o mpiama'e ila'eo: Fa niisa'ay t'i Talè. Fe hoe re: Lehe tsy treako am-pitâ'e eo o olampantsikeo, naho tsy aziliko amo olatseo ty rambo-taňako vaho atsorofoko an-deme'e ao ty taňako, zaho tsy hiantoke.

Ie teo t'i Tomasy 1Kor 15.5

²⁶ Ie nimodo ty valo andro, le tao indraike o mpiama'eo rekets' i Tomasy. Le nivotrak' eo t'IESOÀ, ie nirindriñe o lalañe, nijohañe añaivo' iereo eo, nanao ty hoe: Fañanintsiñe ama'areo. ²⁷ Le hoe re tamy Tomasy: Atakaro mb' etoañe ty rambo-pitâ'o, heheke o taňakoo; le amparo mb'etoañe o fitâ'oo naho ampiziliho an-demeko etoa, vaho ko maňaly tro fa matokisa. ²⁸ Hoe ty natoi' i Tomasy aze: Ry Talèko naho Andrianaňahareko! ²⁹ Hoe t'IESOÀ tama'e: Ihe nahaisak' ahy ro natokisa'o; haha ze miato fa tsy nahaoniñe.

³⁰ Mbe maro ty viloňe nanoe' IESOÀ añařatrefa' o mpiama'eo ze tsy sinokitse ami'ty boke toy. ³¹ Sinoratse ka o retoañe hatokisa' areo te IESOÀ Norizaňey ro Anan' Aňahare vaho i tahina'ey ro anaňa'areo mpiato haveloňe.

21

Niboak' ami'ty Mpíama'e Fito

¹ Añe irezay, le niboak' amo mpiama'eo indraike t'IESOÀ an-driake Tiberiasy eo; le zao ty niboaha'e: ² Nifandrimboňe t'i Simona Petera naho i Tomasy atao Didimo, naho i Natanaela nte-Kana' i Galilia miharo amy ana' i Zebedio rey vaho ty mpiama'e roe ila'e. ³ Le hoe t'i Simona Petera tam' iereo: Hikara fian-draho. Hoe iereo tama'e: Hindre ama'o zahay. Aa le nionjom-beo iereo vaho nijon-dakaňe, fe tsy nahazo leo raik' amy haleňey.

⁴ Aa ie nanjirike i àndroy, nijohañe añařolotse ey t'IESOÀ, fe tsy napota' o mpiama'eo t'ie IESOÀ. ⁵ Le hoe t'IESOÀ tam' iereo: O Anake, nahazo fiaňe v'inahareo? Hoe ty natoi' iareo aze: Aiy. ⁶ Le nanoa'e ty hoe: Ahifiho an-kavana' o lakaňeo i haratoy handrendreke. Aa le nahifi' iereo, fe tsy nahatarike i haratoy ami'ty fifamorohota' o fiaňeo. ⁷ Aa le hoe i mpiama'e nikokoa' IESOÀ amy Petera: I Talè 'nio. Ie jinanji' i Simona Petera t'ie i Talè, le nidiaňa'e ty saro'e, (amy t'ie nihalo), le nijorobo an-driak' ao. ⁸ Nanonjohy amy lakaňey o mpiama'e ila'eo; tsy nilavitse i olon-driakey fa niha-roanjato kiho avao, le nikororohe' iereo i harato vokatse fiaňey.

⁹ Ie nitoly an' tamboho ey iereo, ro nahaoniñe foroha mirekake naho fiaňe misale ama'e vaho mofo. ¹⁰ Hoe t'IESOÀ tama'e: Andeso amo fiaňe niazo' areoo. ¹¹ Niongake t'i Petera le nikororohe'e mb'an-tamboho mb'eo i harato vokatse fiaňe jabajabay, toe zato tsy limampolo telo amby; fe tsy nianto i haratoy ndra te nimaro.

¹² Hoe t'IESOÀ tam' iereo: Antao hikama. Aa ndra iaia amo mpiama'eo tsy nahavany naňontane aze ty hoe: Ia v'iheo? fa nirendreke t'ie i Talè.

¹³ Nisitse mb'eo t'IESOÀ nandrambe i mofoy naho nazotso'e, vaho o fiaňeo.

¹⁴ Zay ty nisodehà' IESOÀ faňintelo'e amo mpiama'eo hirik' amy nitroara'e an-kavilasiy.

Navere' IESOÀ t'i Petera

¹⁵ Ie fa nitendre iereo, le hoe t'IESOÀ amy Simona Petera: O Simona, ana' i Jonà, tea'o mandikoatse o retoañe v' irahoo? Hoe re tama'e: Eka, Talè, arofoana'o te ikokoako. Hoe re tama'e: Fahano o vik' añondrikoo.

¹⁶ Nindrai' IESOÀ ama'e fañindroe'e: Simona, ana' i Jonà, tea ahy v'iheo? Hoe re tama'e: Eñ'anio, Talè, arofoana'o te ikokoako. Hoe t'IESOÀ: Andrazo o vik' añondrikoo. ¹⁷ Mbe nanoe'e fañintelo: O Simona, ana' i Jonà, kokoa'o v'Irahoo? Nangoae t'i Simona amy nanoa'e fañintelo'ey ty hoe: Kokoa'o hao raho? le hoe re tama'e: O Rañandria, kila arofoana'o; fohi'o t'ie kokoako. Hoe t'IESOÀ tama'e: Fahano o añondrikoo. ¹⁸ Itaroñako an-katò t'ie nidiañe te ni-ajalahy, naho nandenà'o ze ni-tea'o, f'ie bey le hahiti'o o fità'oo hampidiaña' ty ila'e hinday azo mb'ami'ty tsy tea'o hombañe. ¹⁹ I hoe zay ty nisaontsie'e ho fitaliliañe aze ty karazan-kavilasy handrengea'e an' Andrianañahare. Ie sinaontsi'e, le hoe re tama'e: Oriho raho.

²⁰ Ie nitolike t'i Petera le niisa'e i mpiòke nikokoa' IESOÀ nanonjohy ee—i nitoñoñe añ'araña' IESOÀ amy sabadidakey, nañontane aze ty hoe: O Talè, ia ty hifotetse ama'o? ²¹ Ie nioni' i Petera, le hoe re amy IESOÀ: O Talè, akore ondaty roañe? ²² Hoe t'IESOÀ tama'e: Naho satriko t'ie handiñe ty fibaliko, akore ama'o zay? Oriho raho.

²³ Aa le niboele amo longoo ty tsara te tsy hivetrake i mpiama'ey; fe tsy nanao ty hoe t'IESOÀ t'ie tsy ho vilasy, fa, Naho lahako t'ie handiñe ty fihereñako, akore ama'o vi'zay?

Ty Figadoña' ty Talili' i Jaona

²⁴ Itoy ty mpiama'e mitalily irezay, naho nanokitse iretoañe. Fohi'ay te mahity i talili'ey. ²⁵ Mbe maro ka ty raha nanoe' Iesoà, t'ie ro hene sinokitse, ataoko te, ndra ty voatse toy tsy nahatsake o boke ho nisokireñeo. Amena.

Tolom-Piràhe'e

Taroñe

¹ I lañonañe valoha'e nanoekoy, ry Teofily, ami'ty nifotora' IESOÀ nanao, naho nañòke ² pak' amy andro nampionjonañe azey, ie fa nanoro o Firàheñe jinobo'e añamy Arofo Masiñeo. ³ Aa naho niheneke i halovilovia'ey le niboak' am' iereo naho niventè'e an-tsata maro, hampatokisañe iareo t'ie veloñe, vaho niisa' iareo efa-polo andro, le nitaroña'e i Fifehean' Añaharey.

⁴ Aa ie nifañaoñe le nafanto'e te tsy hiakats' Ierosaleme fa handiñe i nampitaman-dRaey*: i Jinanji' areo amakoy. ⁵ Nampilipotse an-drano t'i Jaona, fe halipotse amy Arofo Masiñey nahareo te heron-kerone.

⁶ Aa ie nifanontoñe le nañontanea' iareo ty hoe: O Rañandria, Hampolie'o am' Israele henaneo hao i fifeheañey†? ⁷ Hoe re tam' iereo: Tsy anahareo ty hahafohiñe ty andro ndra o sa nalaha n-dRae amy fandilia'eio, ⁸ fe handrambe haozarañe nahareo te ivotraha' i Arofo Masiñey; ho mpitalily ahy e Ierosaleme naho e Iehodà iaby naho e Samaria ao vaho pak' antsietoitane aña.

Ty Fionjona' i Norizañey Mar 16.19; Lke 24.50, 51

⁹ Ie nitsarae'e le nonjoneñe vaho rinambe' ty rahoñe tsy ho am-pahaisaha' iareo. ¹⁰ Ie mbe nitalake mb'andikerañe eñe mb'amy nion-jona'ey, hehe te nijohañe añaña' iereo t'indaty roe nisarom-poty ¹¹ nanao ty hoe, Ry nte-Galilia, akore t'ie miandranda mb' andindiñe ey? IESOÀ nirambeseñe boak' ama' areo mb'andindimb'eoy ro hibalike manahake i nahaisaha' areo aze nionjoñe mb'andikerañe eñey‡.

Ty Fivesarañe i Arofoy

¹² Aa le nibalike mb'e Ierosaleme mb'eo iereo, boak'ami'ty vohitse atao Oliva, mañeva fañaveloan-tSABOTSE boake Ierosaleme. ¹³ Ie nigodañe ao iereo le niañambone mb' aña' efetse ambone ami'ty nitobea' i Petera naho Iakobe naho i Jaona naho i Andrea, i Filipo naho i Tomasy, i Bartolomeo naho i Matio, Iakobe ana' i Alfeo naho i Simona Zelota, vaho i Jodasy ana' Iakobe. ¹⁴ Ie nitraok' ina naho nitolom-pitalaho naho halaly miharo amo Rakembao naho i Marie rene' IESOÀ vaho o roahalahi'eo.

Ty Fañorizañe i Matia Mat 27.7-8

¹⁵ Niongak' añivo' o rolongo amy andro rezay t'i Petera (va'e zato tsy roapolo ty aman-tahinañe nifanontoñe ao) le nanao ty hoe: ¹⁶ Ry longo, tsi-mete tsy niheneke i Sokitse Masiñe nitokie' i Arofo Masiñey am-palie' i Davide i Jodasy niaolo o nitsepake IESOÀoy. ¹⁷ Ie nivolilieñe aman-tika naho nandrambe anjara amo fitoroñañe zao. ¹⁸ (Nahazoan-teteke indatiy amy tamben-tahi'ey, ie nitsirikoake naho niponake, vaho hene niforotrake o tsinai'eo.) ¹⁹ Nanitsike o mpimoneñe e Ierosaleme ao iabio zay vaho tinoka' iereo ty hoe Akeldama i tonday ami'ty saontsi' iareo, midika ty hoe: Tondan-dio. ²⁰ Toe nipatereñe amy boken-Tsaboy, ty hoe: Adono hangoakoake ty traño'e,
tsy hiambesara' ondaty ka,§
vaho:

* **1:4** Lke 24:49, Jao 14:16,26 † **1:6** Lke 1:33 ‡ **1:11** Zek 14:4 § **1:20** Sab 69:25

ho rambese' ty ila'e i fehe'ey.*

²¹ Aa naho ondaty nirekets' amantika amy ze hene andro niziliha' i IESOÀ TALÈ naho niakara'e amantika, ²² mifototse amy nampilipora' i Jaonay pak'amy andro nandrambesañe aze aman-tikañeio; le raik' amy rezay ty ho mpiaman-tika valolombelo' i fitroara'ey. ²³ Aa le nonjoñeñe roe: Iosefe atao Barsabasy (i Josto ty añaram-binta'e), naho i Matia; ²⁴ vaho hoe iereo te nihalaly: Ry IEHOVÀ, mpaharofoanañe ze kila arofo, atorò anay ty jinobo'o amo roe retoañe, ²⁵ handrambesa'e anjara ami'ty fitoroñañe toy naho ty maha-Firàheñe, ie niola t'i Jodasy nivike mb'amy nevae'e ao. ²⁶ Aa le nanoa' iareo tsato-piso naho nitsatoke amy Matia, ie ty nitovo' i Firàheñe folo-raik' amby rey.

2

Tsitsike i Arofo Masiñey

¹ Ie tondroke i andro Halimampoloy, songa nitraok' an-toetse raik' ao, ² le nivovoa' ty feo boak' an-dikerañe ao manahake ty fikofaon-tio-bey nañatseke ty anjomba niambesara' iereo. ³ Le nisodehañe añ'atrefa' iereo ty raha hoe lel-afó nitsiriaria, vaho sindre nivotraha'e. ⁴ Songa nilifore' i Arofo Masiñey vaho namototse nisaontsy an-tsaontsy an-kafaankafa, amy nampisaontsie' i Arofoy.

⁵ Ie henane zay, nañialo e Ierosaleme ao ty Jiosy, ondaty vañoñe boak'amy ze pato-razañe ambanen-dikerañe. ⁶ Ie nahajanjiñe i feo zay le nifanontoñe ho valobohoke, nidaba amy te songa nahajanjiñe ty saontsi'e. ⁷ Sindre nilatsa naho nivereñe vaho nifanao ty hoe: Inao! tsy nte-Galilia v'ondaty iaby milañoñe? ⁸ Aa vaho akore tika ro songa mahajanjiñe ty saontsy nibeizeñe aze? ⁹ Nte Partia naho nte Media naho nte Elama, naho o mpimoneñe e Mesopotamia naho e Iehodà naho e Kapadokia naho e Ponto vaho Asiao; ¹⁰ o Frigia naho Pamfilia, Egipte naho am-paripari' i Libià mañohoke i Kirenà naho ambahiny hiri ke Romao: Jiosy naho o niova ho Jiosio ¹¹ le nte Kreta vaho Arabo, sindre mijaniñe ami'ty saontsi'e te nitaliliañe o fitoloñan' Añahare ra'elahi. ¹² Ie fonga nilatsà naho vata'e niembetse le nifanao ty hoe: Inom-bao ty taly izao? ¹³ Hoe ka ty nikobiha' ty ila'e: Etsa-divai-vao ondatio.

Ty Tsei' i Petera

¹⁴ Niharо nijohañe amy folo raik' amby rey t'i Petera, ie nipoñapeo nanao ty hoe: Ry nte-Iehodao! ry mpimoneñ' e Ierosaleme iabio, mahafohìna vaho tomiro o entakoo: ¹⁵ Tsy jike ondaty retoañe amy fitsakorea' areo azey, ie vaho amy ora fahatelo' i àndroi. ¹⁶ Fa hoe ty nampisaontsieñe i Joela mpitoky:

¹⁷ Ho tondrok' amo andro hengaha'eo, hoe t'i Andrianañahare,
te ho kofòhako boak' an-troko ao
ze atao nofotse,
le hitoky o anadahi' areoo
naho o anak'ampela' areoo,
naho hioniñe aroñaroñe o ajalahi' areoo,
vaho hañinofynofy o adroanavi' areoo.

¹⁸ Hadoako amo mpitoroko lahilahy
naho ampelao ty Troko amy andro rezay, le hitoky iereo.

¹⁹ Ho toroako halatsàñe andindìñe eñe

* ^{1:20} Sab 109:8

naho viloñe an-tane ambane atoy:

Lio naho afo vaho evon-katoeñe.

²⁰ Hafotetse ho fimoromoroñañe
i àndroy naho ho lio i volañey
aolo' ty itondroha' i andro ra'elahy
bei-volonahe' i TALÈY.

²¹ Ie amy zay hene ho rombaheñe
ze mikanjy ty tahina' IEHOVÀ.*

²² Ry nte Israeleo, janjiño o tsara zao: IESOÀ nte Nazareta, indaty
niventèn' Añahare ama' areo amo raha tsi-tantane naho halatsàñe vaho
viloñe nanoen' Añahare añama'e añivo' areoooy, ze toe fohi' areo; ²³ ie
nasese amy fisafirin' Añahare mahatafetetsey naho amy faharofoanan'
Añahare miaoloy le rinambe' areo naho pinèke an-tañan-tsi-aman-Kake
vaho vinono; ²⁴ f'ie natroan' Añahare naho fa navots'o' amo halovilovia' i
Havilasioo, amy t'ie tsy nilefe'e tambozoreñe. ²⁵ Le hoe t'i Davide ty ama'e:
Nitreako te añatrefako nainai'e t'IEHOVÀ,
an-tañan-kavanako eo
le tsy hasiotse raho.

²⁶ Aa le nirebeke ty troko naho nifale ty lelako;
vaho hitofa am-pitamàñe o nofokoo,

²⁷ amy te tsy hado'o
an-tsikeokeok' ao ty fiaiko,
vaho tsy hapo'o ho momoke i Masi'oy.

²⁸ Fa nampandrendrehe'o ahy o lalan-kaveloñeo;
ho lifore'o haehake raho
am-piatrefa'o eo.†

²⁹ Ry longo, hitaroñe i Davide raentika raho, t'ie nivilasy vaho nalenteké,
naho amantika atoy pake henàne i kibori'ey. ³⁰ F'ie nimpitòky, nahafohiñe
te nifanta an-titike añama'e t'i Andrianañahare, hampitroatse boak' amo
tarira'eo ty hiambesatse amy fiambesa'ey.‡ ³¹ Aa kanao nioni'e taolo, le
nitoky i fivañonan-ko velo' i Norizañeiy, te tsy hadòke an-tsikeokeok' ao
ty arofo'e vaho tsy hihomake i fañova'ey.

³² Toe natroan' Añahare IESOÀ zay, valolombeloñe zahay iaby. ³³ Aa ie
nampionjonem-pitàn-kavanán' Añahare, naho nandrambe aman-dRae i
nampitamañey, i Arofo Masiñey, vaho naili'e o isa' areo naho janji' areoo.

³⁴ Toe tsy i Davide ty nonjoneñe mb' andindiñe aña, fa hoe ty natao'e:
Hoe t'IEHOVÀ amy TALÈkoy:

Miambesara an-tañan-kavanako etoa.

³⁵ Ampara' te anoeko fitongoam-pandia'o o rafelahi'oo.§

³⁶ Aa le mahafohìna an-katò ry anjomba' Israele iabio te nanoen'
Añahare TALÈ naho Noriza'e t'IESOÀ pinè' areo.

³⁷ Ie nahajanjiñe, le nitsipoheñe aña' arofo vaho nanao ty hoe amy Petera
naho amo Firàheñe ila'eo: O ry longo, Ino ty hanoe'ay? ³⁸ Le hoe t'i Petera
am'iereo: Misolohoa, le songa milipora amy tahina' IESOÀ Norizañey
hañahàñ-kakeo* vaho andrambesam-palalàñe, i Arofo Masiñey. ³⁹ Ho
anahareo i nampitamàñey naho ho a o ana' areoo vaho ho a o an-
tsietoitane aña iabio, ndra iaia kanjie' IEHOVÀ Andrianañaharen-tika ho
ama'e.

⁴⁰ Aa le tinovo'e tsara maro, nimane taroñe naho osike, ami'ty hoe:
Mirombaha ami'ty tariratse mengoke toy.†

* ^{2:21} Ioè 3:1-5, Rom 10:13 † ^{2:28} Sab 16:8-11 ‡ ^{2:30} Sab 132:11, Sa II 7:12-13 § ^{2:35} Sab
110:1 * ^{2:38} Top 2:40, 3:19,26; Sab 32:1, Iir 31:34 † ^{2:40} Iir 51:6, Fil 2:15, Ben 18:4

⁴¹ Aa le nalipotse an-kafaleañe o niato amy tsara'eio, vaho nitovoñe ondaty telo arivo amy andro zay. ⁴² Ie nifahatse ami'ty fañoha' o Firàheñeo naho am-pilongoañe naho am-pitraofam-pikama[‡] vaho am-pitalahoañe.

⁴³ Fonga nivotraham-pañeveñañe, naho maro ty halatsàñe naho viloñe nanoe' o Firàheñeo. ⁴⁴ Le niharo ao iaby o mpiatoo vaho nifampitraqe amy ze he'e, ⁴⁵ nandetake fanañañe naho vara vaho nifanjara tsahatse ty hampahaeneñe ze nipaia' ondaty iabio. ⁴⁶ Ie nitoloñe an-troke raik' añ' anjomban' Añahare ao boak' andro naho nitsatsà-traño namolamofo vaho nitrao-pikama an-kaehake naho an-tso-po, ⁴⁷ mandrenge an' Andrianañahare naho nisohe' ze hene ondaty; vaho nitovoña' i TALÈ boak' andro o nirombaheñeo.

3

I Petera naho ty Mpangatake Kepake

¹ Nindre nionjomb'añ'anjomban' Añahare mb'eo amy ora fitalahoañe amy siveiy t'i Petera naho i Jaona. ² Le teo ty lahilahy nitakoneñe, nikepeke boak' ami'ty nahatoly aze, ie natobòke boak' andro an-dalam-bei' i anjomban' Añaharey atao ty hoe Fanjàka eo, nihalaly falalàñe amo mizilik' añ' anjomban' Añahareo. ³ Ie nahaoniñe te hizilik' amy anjombay t'i Petera naho i Jaona, le nihalalia'e falalàñe. ⁴ Fe nitalahare' i Petera naho i Jaona, nanao ty hoe ama'e: Mivazohoа mb'etoa. ⁵ Le nihaoñe'e fa nitama raha. ⁶ Le hoe t'i Petera: Tsy amam-bolafoty ndra volamena raho, fe homeiko azo ze amako: Ami'ty tahina'IESOÀ nte Nazareta Norizañey, Midraidraita! ⁷ le rinambe'e ty fitàn-kavana'e naho nongaha'e vaho nihafatratse amy zao o fandia'e naho fange'eo. ⁸ Le nitsamboan-dre naho nitrahañe vaho nitsontike le niharo fizilik' am' iereo mb'añ'anjomban' Añahare ao, mbore nijohañe mbore nitambòtrake vaho nibango an'Andrianañahare.

⁹ Naho nioni' i lahialeñey t'ie nitrantràñe, nisabo an' Andrianañahare, ¹⁰ naho naharendreke i nikonenake nihalaly falalàñe an-dalam-bey Fanjàka' i anjomban' Añahareiy, le niveren-draha naho nilatsa amy nanoañey. ¹¹ Nireketse amy Petera naho i Jaona i nikepeke nampijangañeñey, le nilay mb' am' iereo amy kiririsa atao: A i Solomonay mb'eo ze hene ondaty, fa lifo-kavereñañe.

¹² Ie nirendre' i Petera, le nilañona'e ty hoe am'ondatio: Ry nte Israeleo, ino ty ilatsà' areo o raha zao? ino ty isambà' areo anay hoe te zahay, ami'ty haozara'ay naho ami'ty havañona'ay, ro nampanjotike t'indaty toy? ¹³ I Andrianañahare' i Abraàme naho Isaka vaho Iakobe, i Andrianañaharen-droaentikañey*, ro mandrenge IESOÀ mpitoro'e nasese naho nifarie' areo añatrefa' i Pilato, ie fa nisafiry ty hamotsotse aze. ¹⁴ Tineti' areo i Masiñe naho Vañoñey naho nihalaly te hahàñe ama' areo ty mpamono, ¹⁵ vaho vinono' areo i Rañandrian-kaveloñey, f'ie natroan' Añahare an-kavilasy; valolombeloñe zahay. ¹⁶ Ty fatokisa'e amy tahina'ey ty nampaozare' i tahina'ey ondaty isa' areo naho fohi' areoo; eka, ty fatokisañe ama'e ty naha-arimoen-kajanganañ' aze añatrefa' areo iaby.

¹⁷ Ie amy zao, ry longo, fantako te namoea' areo i nanoe' areoy—hambañe amy nanoe' o bei' areoo. ¹⁸ F'ie ty nañenefan' Añahare o nitaroñe'e am-palie' ze fonga mpitoky haehaeo, te tsi-mahay tsy hijale i

[‡] 2:42 Famolaha-mofo: fitraofam-pikama; * 3:13 Avo 3:6,13,15

Noriza'ey. ¹⁹ Misolohoa arè, mipolia, soa te ho faoheñe o tahi' areoo, naho hitotsake boak' am-piatrefa' IEHOVÀ ty san-kanintsiñe, ²⁰ vaho hirahe'e t'IESOÀ, i Norizañe tinendre ho anahareoy, ²¹ ze tsi-mete tsy ho tanañe andikerañe ao hey ampara' ty sam-pañavaoña ze he'e tsinaran' Añahare am-palie' ze hene mpitoky masiñe boak' am-pifotora' ty voatse toy. ²² Fa hoe t'i Mosè:

Mpitoky hambañ'amako ty hatroa' IEHOVÀ Andrianañahare boak' amo longo'areoo; janjiño ze hene ho saontsie'e ama'areo.

²³ Le hifetsake te haitoañe am' ondati'eo ze tsy mañaoñe i Mpitokiy.[†]

²⁴ Eka, songa nitoky o andro zao ze mpitoky nisaontsy mifototse amy Samoela vaho o nanonjohio. ²⁵ Inahareo ro tarira' o mpitokio naho mpiamy fañina nanoen' Añahare aman-droaentikañey, Ie nanao ty hoe amy Abraàme:

I tiri'oy ro hitahiañe ze kila foko' ty tane toy.[‡]

²⁶ Ie natroan' Añahare ty mpitoro'e IESOÀ le nahitri'e ama'areo hey hampanintsiña'e, amy nampiambohoe'e anahareo o sata tsivokatseo[§].

4

I Petera naho i Jaona Añatrefa'ty Fivory

¹ Ie mbe nisaontsy am'ondatio, le nivotrak' am'iereo o mpisoroñe naho ty beim-pigari' i anjomban' Añaharey naho o Tsadokeo*, ² nitsimboetse te nañoke ondatio naho t'ie nitaroñe ty fivañonan-ko veloñe amy IESOÀ. ³ Nipao-pitañe ama'e iereo le najoñe am-pandrohizañ' ao ampara' ty loak' andro amy te nihaleñe. ⁴ Fe maro amo nahajanjiñe i tsaraio ty niantoke; va'e lime arivo ty ia'indaty rezay.

Nitaroñe añatrefa' i Sinedrionay

⁵ Ie amy loak' àndroy, nivory e Ierosaleme ao o mpifeleke naho roandriañe naho mpanoki-dili' iareoo ⁶ naho i Anasy talèm-pisoroñe naho i Kaifa naho i Jaona naho i Aleksandro vaho ze hene longo' i talèm-pisoroñey. ⁷ Aa ie fa nadoke añivo eo, le hoe ty nañontaneañe: ami'ty lili' ia ndra ami'ty tahina' ia ty nanoe' areo o raha zao?

⁸ Lifotse i Arofo Masiñey t'i Petera nanao ty hoe: O ry mpifehe naho roandria' ondatio: ⁹ Naho ty hasoa nanoe'ay amy lahilahy nideme'e nijanganeñey ty añotsohotsoa' areo anay androany, ¹⁰ le hampahafohine'ay ama'areo naho amo nte Israele iabio te i tahina' IESOÀ nte Nazareta Norizañey, i naradorado' areo fe natroan' Añahare amy havilasiyy, ty ijohaña' t'indaty jangañe toy añatrefa'areo etoa, ¹¹ Ie i vato nadò' areo mpandrafitsey, naho fa vato-lahi'e henaneo.[†]

¹² Le tsy aman' iaia ila'e ty fandrombahañe, amy te tsy nitolorañe tahinañe ila'e ambane' i likerañey ondatio, ze maharombak' antika.

Rinara' i Sinedrionay t'i Petera

¹³ Ie nahaisake ty fahasibeha' i Petera naho i Jaona, naho nahaoniñe te ondaty tsy nianatse naho tsy nioke, le nilatsa vaho nahatiah y t'ie mpiam' IESOÀ. ¹⁴ Aa kanao niisake te nindre nijohañe am'iereo i lahilahy nijanganeñey, le tsy nahatiññe aze iereo, ¹⁵ f'ie nanitak'iareo mb'alafem-pivory ao vaho nisafiry ¹⁶ ty hoe: Hataon-tika akore i lahilahy rey? Ie midodea amo hene mpimoneñe e Ierosalemeo t'ie ro nanoañe raha

* 3:23 Its 18:15-19 † 3:25 Fot 12:3, 22:18, 26:4 § 3:26 Oni Top 2:38 * 4:1 Tsadoke: mpisoroñe tamy Selomò, (1Mpj 1:38) † 4:11 Sab 118:22

tsitantane, tsy lefe-tika liereñe. ¹⁷ Aa, tsy mone ho losotse ty fiboelea'e am'ondatio, antao hañatahata iareo tsy hivolañe i añarañey ama' ondaty ndra iaia.

¹⁸ Le nikanjiañe vaho nililieñe t'ie tsy hivolañe naho tsy hañoke ami'ty tahina' IESOÀ ka. ¹⁹ Fe hoe ty natoi' i Petera naho i Jaona: Tsakoreo hera ho to am-pivazohoan' Añahare, t'ie hañaoñe anahareo ambone' i Andrianañahare[‡]? ²⁰ Amy te tsi-mahay tsy taroñe'ay o raha niisa'ay naho jinanji'aio.

²¹ Aa ie nendahañe indraike, le navotsotse, fa tsy eo ty handafàñe iareo ty am'ondatio, ie hene nandrenge an' Andrianañahare ty amy nitafatendrekey. ²² Nilosotse tyefa-polo taoñe i lahilahy nampiboahañe i vilom-pijangañañeiy.

Ty Filolofa' o Mpiatoo

(Sabo 2.1-2)

²³ Ie nihaha le nimb'amo mpiama' iareoo mb'eo nitalily i nisaontsia' o mpisorom-beiyo naho o roandriañe. ²⁴ Ie nahajanjiñe, le nipoña-peo aman' Añahare nanao kapindre ty hoe: Ry IEHOVÀ, Ihe ro Andrianam-boatse i likerañey naho ty tane toy naho i riakey vaho ze he'e am'iereo ao§, ²⁵ le nanoe'o am-palie' i Davide mpitoro'oy, ty hoe:

Ino ty mampidabadoa o kilakila 'ndatio
naho ty ikaboha'ondatio raha kafoake?

²⁶ Miongake o mpanjaka' ty tane toio,
vaho mifanontoñe o mpifelekeo hiatreke IEHOVÀ naho i Noriza'ey.*

²⁷ Toe ami'ty rova toy ty nifanontona' i Heroda naho i Pontio Pilato naho o kilakila ondatio mindre amo nte Israeleo, hañatreatre i Mpitoro'o masiñey, IESOÀ Noriza'oy. ²⁸ Nanoe' iereo iaby ze sinafirim-pitá'o naho nisatrien' arofo'o taolo hanoeñe. ²⁹ Aa ie henane zao, ry IEHOVÀ, vazohò o hatahata' iareoo, le toloro fahasibehañe o mpitoro'oo hahafitaroña' iareo o tsara'oo, ³⁰ ie añitia'o fitàñe hampijangañe; vaho anoeñe an-tahina' IESOÀ mpitoro'o masiñey ty viloñe naho raha tsi-tantane. ³¹ Ie niloloke iereo, le niezeñezene i toetse nivoria' iereo; le fonga nilifotse i Arofo Masiñey vaho nahasibeke nisaontsy ty tsaran' Añahare.

Nifampandiva o Mpivory Masiñeo

³² Songa nitraok' arofo naho havelo i valobohòm-piantokey, le tsy eo ty nanao te aze o vara'eo fa kila nitraofañe. ³³ Tan-kafatraram-bey ty nitalilia' o Firàheñe i fivañonam-belo' IESOÀ TALÈY, vaho am' iereo iaby ty hasoa mitoabotse. ³⁴ Tsy amam-pisotry iereo, fa ze aman-tane ndra anjomba ro nandeta naho ninday ty vili' i naletakey, ³⁵ le nibanabana'e am-pandia' o Firàheñe vaho hene nitsahareñe am'ondatio songa ty amy paiañey.

³⁶ Teo t'i Josefe, nte-Levy† boake Kiprosy, i natao' o Firàheñe Bar-nabasiy, (ze midika: Anam-pañohòañe). ³⁷ Nanan-tane re, le naleta'e naho nendese'e i volay vaho nazotso'e am-pandia' o Firàheñe.

5

I Ananiasy naho i Safirae

¹ Fe teo t'indaty atao Ananiasy; ie naho i Safirae vali'e ro nandeta-hanañañe, ² le nañaja'e i vili'ey amphafohina' i rakemba'ey naho

‡ 4:19 Ies 29:13, 2 Mp 1719, Mat 15:9 § 4:24 Sab 146:6, Oni Avo 20:11 * 4:26 Sab 2:1,2

† 4:36 Nte-Levy: Fifokoa mpitorom-pisoroñe (Its 21:5)

nañendesa'e vaho napo'e am-pandia' o Firàheñeo. ³ Aa le hoe t'i Petera: O Ananiasy, akore te nilifore' i mpañinjey ty tro'o handañitse amy Arofo Masiñey, ie nañajà'o i vilin-taney? ⁴ Tsy tama'o avao hao t'ie mbe tsy naletake? le ie naletake, tsy ihe ty nanandily ama'e? Akore te nikililie'o an-trok' ao o raha zao? Tsy ondatio ty nandañira'o fa i Andrianañahare. ⁵ Ie jinanji' i Ananiasy i tsaray le nikorovoke eo, nihomake; vaho nivotraha' ty fangebahañe ze hene nahajanjiñe. ⁶ Niongak' amy zao o ajalahio, namolonkoñe naho nitakoñe aze mb'eo vaho nalenteké. ⁷ Ie miha-telo ora* aña, le nizilik' ao ka ty vali'e, fa namoea'e ty nizò. ⁸ Aa hoe ty ontane' i Petera tama'e: Naleta' areo amy vili'e zao v'i taney? le hoe re: Eka, ie. ⁹ Le hoe t'i Petera tama'e: Akore ty nikinia' areo hitsoke ty Arofo' IEHOVÀ? Hehe te an-dalañe eo ty fandia' o nandeveñe i vali'oio, hitakoñ' azo ka. ¹⁰ Le nidoñe am-pandia'e eo re namoe'ay. Naho nizilik' ao i ajalahy rey, zoe' iereo t'ie nivetrake, le nitakone' iareo vaho naleveñe aña'ilá' i vali'ey. ¹¹ Nangebahebake iaby i favoriy naho ze hene nahajanjiñe.

Ty Raha ts-i-tantane nanoe' o Firàheñeo

¹² Maro ty viloñe naho raha ts-i-tantane nanoeñe am-pitá' o Firàheñeo añaivo' ondatio. Ie fonga nitrao-drehak' an-kiririsa' i Solomona ao. ¹³ Tsy nahavany hirekets' am' iereo ka o ila'eo, f'ie nonjone' ondatio. ¹⁴ Antsake te nitovoñe amy TALÈ o mpiatoo; toe lahialeñe: lahilahy naho rakemba. ¹⁵ Aa le nasese aña' olon-dalañe eo o matindrio, fonga nampandreañ' antihiy naho am-pandreañe, hera halofa' ty talinjo' i Petera t'ie niary eo. ¹⁶ Maro ka ty nifanontoñe hirik' amo rova amparipari' Ierosalemeo ninday ty marare naho ze nitokoen-kokolampa vaho hene nijangañe.

Nanoeñe Samporerake o Firàheñeo

¹⁷ Niongak' amy zao ty talèm-pisoroñe naho ze vavea'e amo Tsadokeo, lifo-pamarahiañe, ¹⁸ le nipao-pitañe amo Firàheñeo vaho najorobo' iareo am-balabei' i màroy ao; ¹⁹ fe sinoka' ty anjelin' Añahare amy haleñey o lalam-beim-porozò naho nakare'e vaho hoe ty asa'e: ²⁰ Akia, mijohaña an-kiriran' anjomban' Añahare ey vaho taroño am'ondatio ze hene enta' ty haveloñe toy.

²¹ Ie nahajanjiñe le nimoak' aña' anjomban' Añahare ao te maraindrain-tsikiake, nañoke. Aa naho niavy ao ty talèm-pisoroñe naho o mpiama'eo le kinoi' iereo i favoriy hifanontoñe naho ze hene roandria' o nte-Israeleo, vaho nañitrik' am-porozò ao haneseañe iareo. ²² Fe naho pok'eo o mpifelekeo, tsy nahaoniñe iareo am-porozò ao, le nibalike vaho nitalily ²³ ty hoe: Toe nizoe'ay nigabeñe soa i porozòoy songa nijaridiñe amo lalañeо o mpigaritseo; fa ie sinoka'ay le tsy nahaoniñe ondaty ao zahay.

²⁴ Ie jinanji' i talèn-anjombay naho o mpisorom-beio i hoe zay, le niveren-draha vaho nañarahara ze mete ho nizò. ²⁵ Nimb'eo amy zao ty nitalily ty hoe: Inao, mijohaña aña' anjomban' Añahare ao mañòke ondatio indaty najò' areo an-drohy ao rey! ²⁶ Aa le nimb'eo i mpifehey rekets' o mpañambeñeo nangalake iareo mora fa nihembañe am' ondatio, ke hametsaham-bato. ²⁷ Ie nasese' iareo, le navotra' iereo añatrefa' i favoriy vaho hoe ty ontane' i talèm-pisoroñey am' iereo: ²⁸ Tsy linili'ay mafe hao t'ie tsy hañoke amy añarañe zay? Te mone nitsitsihe' areo t'Ierosaleme amo fañoha' areoo, vaho kililie' areo zahay hivave ty lio' Indatiy!

Mitsey amy Fivory ao o Firàheñeo

* 5:7 Mahavovok' antake

²⁹ Hoe ty natoi' i Petera naho o Firàheñeo: Tsy mete tsy mañorike an' Andrianañahare zahay fa tsy ondaty. ³⁰ Natroan' Añaharen-droaentikañey† t'IESOÀ vinono naho naradorado'areo an-katae‡. ³¹ Ie ro naonjon' Añahare am-pitâ'e havana ho TALÈ § naho Mpandrombake, hanolotse fisolohoañe naho fañahan-kakeo amy Israele. ³² Valolombeloñe amy rezay zahay naho i Arofo Masiñe natolon' Añahare amo mpañorik' azeoy*.

Ty Fañoha'i Gamaliela

³³ Ie nahajanjiñe, le niondroñondroñe naho nikilily t'ie hohofan-doza. ³⁴ Fe nióngake amy favoriy t'i Gamaliela, Fariseo, mpañoke Hake, niasia' ze hene ondaty, le linili'e te hakareñe alafe ao heik' indaty rey. ³⁵ Le hoe re am'iereo: Ry nte-Israeleo, mitaoa amy ze hikililiañe am' indaty rey. ³⁶ Ie omalemale, nitroatse t'i Teodasy le nirengevole h'ondaty vaho nirekets' ama'e t'indaty miha-efa-jato. F'ie vinono le fonga nabaibay o nañorik' azeo vaho nihelañe aña. ³⁷ Ie aña, nióngake nandimbe aze t'i Jodasy nte Galilia amy andro fañiahäne rezay; nampañorihe'e t'indaty, f'ie nihomake naho niparaitake iaby ze nañorik' aze. ³⁸ Aa le hoe ty taroko ama' areo henaneo, isitaho ondatio, apoho; fa naho a ondaty i safiry naho fitoloñañey, le hihotrake; ³⁹ fe naho an'Andrianañahare, tsy ho mete' areo harotsake, hera ho zoeñe te mifanjomotse aman' Añahare.

Vinotsotsotso o Firàheñeo

⁴⁰ Niantofa' iareo i namerea'ey; le kinanji' iareo o Firàheñeo naho nilafaeñe naho nililieñe tsy hivolañe ami'ty tahina' IESOÀ ka, vaho nihahañe. ⁴¹ Nienga i favoriy iereo, niankahake te natao mañeva nisalareñe ho amy tahina'ey. ⁴² Boak' andro iereo tañ' anjomban' Añahare ao naho nitsatsâk' akiba nitolom-pañoke vaho nitaroñe te IESOÀ i Norizañey.

6

Ty Fijoboñañe Mpisary

¹ Tamy andro rezay, ie nihamaro o mpiama'eo le nionjoñe ty fiñeoñeo' o Grikao amo nte-Evreo te tsy naheñe o vanto'eo ty fiatrahäne boak' andro. ² Aa le kinanji' i folo-ro' amby rey i valobohòm-piama'ey*, le nanoa'e ty hoe: Tsy sazò anay te hapoke i tsaran' Añaharey hanjotsoa'ay am-pandambañañe. ³ Ie amy zao ry longo, paiao ama' areo ty lahilahy aman-kasy fito lifotse i Arofoy naho hihitse, hampifehea'ay o raha zao. ⁴ Izahay ka ro hanolo-batañe hitoloñe am-pitalahoañe naho fitoroñañe i Tsaray.

⁵ Ninò' i valobohòkey i tsara zay, le jinobo' iereo t'i Stefana, lahilahy lifo-patokisañe naho i Arofo Masiñey, naho i Filipo, i Prokoro, i Nikanora, i Timona, i Parmena vaho i Nikoleo nte-Antioquia niova ho Jiosy. ⁶ Ie nampiheoveñe añatrefa' o Firàheñeo, le nilolofeñe vaho nanampezam-pitâñe. ⁷ Aa le niraorao o tsaran' Añahareo, naho nivangongo ty iam-piama'e e Ierosaleme ao vaho maro amo mpisoroñe ty nivohotse amy fatokisañey.

Tsinepake t'i Stefana

⁸ I Stefana, lifo-patokisañe naho haozarañañe, nanao halatsàñe naho viloñe ra'elahy añivo' ondatio. ⁹ Fe nitroatse naho nifandietse amy Stefana o mpiamy natao Fitontona' o Lahimidadaoy (o nte-Kireniao miharo amo

† 5:30 Avo 3:15 ‡ 5:30 Its 21:22-23 § 5:31 ONI Top 3:15 * 5:32 Onit: 1Jn 3:24 * 6:2 Top 1:24 Nihalaly aman'A're teo, fe ama'Ondaty henaneo.

nte Aleksandria naho nte Kilkia vaho nte Asiao), ¹⁰ F'ie tsy nahatohetse ty hihitse naho i Arofo nisaontsie'ey. ¹¹ Aa le sinigi' iareo añetake t'indaty hisara ty hoe: Tsinano'ay re nitera i Mosè naho an'Andrianañahare. ¹² Aa le navalitsikota' iereo ondatio naho o roandriañeo naho o mpanoki-dilio, le niambotrahañe, nikozozoteñe vaho nasese mb'am-pivory ao. ¹³ Natroa' iereo ty mpiflo hanao kitombok' aze ami'ty hoe: Tsy apo' t'indaty tia ty manirika ty anjomba miavake toy naho i Hake, ¹⁴ le jinanji'ay nanao ty hoe te ho rotsahe' IESOÀ nte Nazareta ty anjomba toy vaho hovae'e o lilitse nitaroñe' i Mosè aman-tikañeo. ¹⁵ Kiniro' o mpivory iabio le nahaisake te nanahake ty laharan' anjely i lahara'ey.

7

Mitaroñe amy Sinedrionay t'i Stefana

¹ Hoe i talèm-pisoroñey: To v'zao?

² Hoe t'i Stefana: Ry longo, naho ry aba, Inao! Ie mbe te Mesopotamia aña taolo' te nimoneñe e Haraña t'i Abraàme raen-tikañe le niheo ama'e t'i Andrianañahare Rengèñey, ³ le nanao'e ty hoe:

Misitaha an-tane'o naho an-drolongo'o,
mimoaha an-tane hatoroko azo.*

⁴ Aa le niakats' i tane Kaldea aña re nivotrake e Harane. Ie aña, naho fa vilasy ty rae'e, le nampiavote'e homb'an-tane fimoneña' areo atoy henaneo. ⁵ Fe tsy nimea'e lova ama'e, ndra ty tane handiam-pandia'e†, ie mbetsiterake, le nampitama'e te hatolots'aze naho amo tarira'e hanonjohy azeo ho fanañañe zay‡. ⁶ Hoe ty nitsaran' Añahare, t'ie:
Ho renetane an-tanen' ambahiny
o tarira'eo, naho hondevozeñe,
vaho ho volevolèneefa-jato taoñe.

⁷ Fe ho zakaeko ze tane mañondevo iareo,§
hoe t'i Andrianañahare,
ie aña, le hiavotse iereo,
hitoroñe ahy ami'ty toetse toy.*

⁸ Le natolo'e aze ty fañinam-pisavarañe naho nisamake Isaka re le nisavare'e ami'ty andro fahavaloo, naho nisamake Iakobe t'Isaka vaho i androanavy folo ro'amby rey t'Iakobe. ⁹ Ie nikirañe Iosefe i androanavy rey, le naleta' iereo ho ondevo Egipte aña. Fe tama'e t'i Andrianañahare†
¹⁰ nandrombak' aze amy ze fonga haoreñañe naho tinolo'e hihitse naho fañisohañe‡ añatrefa' i Farao mpanjaka' i Egipte le nanoe'e mpamandroñe hifehe i Egipte vaho o aña' anjomba'e iabio. ¹¹ Nandramban-tane Egipte naho Kanana amy zao ty san-kasalikoañe* vaho ty hasotriambey le tsy nahaoniñe mahakama o roaentikañeo. ¹² Ie jinanji' Iakobe te aman-tsako ty Egipte, le nampihitrife'e mb'eo o roaentikañeo amy valoha'ey. ¹³ Ie amy faha roey le nampahafohim-batañ' amo rahalahi'eo t'Iosefe vaho nampandrendreheñe i Farao o longo' Iosefeo. ¹⁴ Aa le nampisangitrife' Iosefe t'Iakobe rae'e naho o longo'eo, i fitom-polo-lime amby rey. ¹⁵ Le nañavelo mb'e Egipte mb'eo t'Iakobe vaho nihomake, ie naho o roaentikañeo†, ¹⁶ le nase mb'e Sekema aña, ie nirohoteñe amy lonake vinili' i Abraàme drala amo ana' i Hamora nte Sekemaio. ¹⁷ Aa naho fa an-titotse ty andro nampitaman' Añahare i nifantà'e

* **7:3** Fot 12:1 † **7:5** Its 2:5 ‡ **7:5** Fot 12:7, 17:8; Oni Fot 13:15, 15:4, 7, 18-21, 24:7, 48:4 § **7:7**
Fot 15:13 * **7:7** Fot 15:14, Avo 3:12 † **7:9** Fot 37:11, 26, 39:2, 39:21 ‡ **7:10** Fot 39:21 § **7:10**
Fot 41:37-46 * **7:11** Fot 41:54, 42:5 † **7:15** Fot 46:5, 49:33, Avo 1:6

amy Abraàmey, le nitombo naho nangetseketeke Egipte aña ondatio. ¹⁸ Loneak'amy zao ty mpanjaka hifehe i Egipte tsy nahafohiñe Iosefe.‡ ¹⁹ Ie ty nañaramamo ondatin-tikañeo am-pamañahiañe naho famorekekeñañe, naho nampiboake o ajajamena' iareoo tsy hahatam-beloñe. ²⁰ Toly henane zay t'i Mosè, le nisoa vintañe am-pivazohoan' Añahare, vaho nitaiàñe telo volañe an-trañon-drae'e ao. ²¹ Aa ie niotañe, rinambe' ty anak' ampela' i Farao naho nibeize'e ho ana'e, ²² le naòke amy ze hene hilala' o nte Egipteo t'i Mosè vaho ni-fanalolahy an-tsara naho fitoloñañe.

²³ Ie fa ho efa-polo taoñe t'i Mosè, le niheo aña'arofo'e ty hitilike o longo'e ana' Israeleo. ²⁴ Ie nioni'e te nisamporeraheñe tsy aman-tali'e ty raike, le nañolots' aze, namale fate i niforekekeñey vaho nañoho-doza amy nte-Egiptey. ²⁵ Natao'e ho rendre'o longo'eo ty fandrombahan' Añahare ampitá'e, f'ie tsy nahafohiñe. ²⁶ Ie niloakandro, niheo am'iereo mb'eo re nanjo ty nifandrapak' aly, le nimanea'e fifampilongoañe ami'ty hoe: O lahireo, miproahalahy nahareoo; Akore te mifampijoy? ²⁷ Fe nanafasiotse aze i namofoke i rañe'eiy, nanao ty hoe:

Ia ty nañory azo ho mpifehe
naho mpizaka anay?

²⁸ Hamono ahy v'iheo,
hambañe amy nanao'o
i nte Egipte omaley?§

²⁹ Ty amy entañe zay, nitriban-day t'i Mosè naho nirenetane e Midiana* aña vaho nisamak' anadahy roe.

³⁰ Ie nimodo ty efa-polo taoñe, le nisodehañe ama'e an-dratrаратram-bohi-Sinaiy aña ty anjeli' IEHOVÀ ami'ty lel'afو an-drongoñet. ³¹ Ie nioni' i Mosè zay le hinarahara'e i nizoeñey; le nañarivoa'e hahaisake vaho nivovo ama'e ty fiarañanaña' IEHOVÀ nanao ty hoe:

³² Zaho o Andrianañaharen-droae' areoo,
t'i Andrianañahare' i Abraàme,
naho Isaka vaho Iakobe.‡

Aa le ninevenevetse t'i Mosè tsy nahavany niisake. ³³ Le hoe t' IEHOVÀ tama'e:

Afaho o hana am-pandia'oo
fa masiñe o toetse ijohaña'oo.

³⁴ Toe niisako ty falovilovia' ondatiko
e Egipt'aoo,
naho tsinanoko ty toreo' iareo
vaho nizotso hañaha iareo.
Antao arè, fa hahitriko
mb'e Egipte mb'eo rehe.§

³⁵ Fe kiniho'iareo ami'ty hoe t'i Mosè:

Ia ty nañory azo
ho mpifehe naho mpizaka anay?*

Ie ty nafanton' Añahare ampitá' i anjely niboak' ama'e amy rongoñei y ho mpifehe naho mpandrombake iareo. ³⁶ Indatiy ty nampiavotse iareo naho nanao halatsàñe naho viloñe tsi-tantane Egipte ao naho amy Riake Menay vaho am-patrambey ao efa-polo taoñe. ³⁷ Ie i Mosè nitaroñe amo nte-Israeleo ty hoe:

Hampitroaren' Añahare ho anahareo

‡ ^{7:18} Avo 1:8 § ^{7:28} Avo 2:13,14 * ^{7:29} Avo 2:15 † ^{7:30} Avo 3:2 ‡ ^{7:32} Avo 3:6 § ^{7:34} Avo 3:6-10 * ^{7:35} Avo 2:14

ty mpitoky hambañe amako
boak'amo longo' areoo.[†]

³⁸ Ie ty nitraok' amy anjeliy amy fivori-bey am-patram-bey añey, niharo amy anjely nisaontsy ama'e am-bohi-Sinaiy vaho taman-droaentikañe; ie ty nandrambe o fetse veloñe nitaroña'e aman-tikañe. ³⁹ Fe, nizeharen-droaentika naho nasiotsio' iareo, vaho nitolike mb'Egipte ty arofo' iareo

⁴⁰ le nanao ty hoe amy Arone:

Andranjio ndrañahare hiaolo anay,
f'i Mosè nañavotse anay añ'Egipte zay,
amoea'ay ty nizò aze![‡]

⁴¹ Nitsene bania iereo henane zay naho nibanabana soroñe amy sarey, vaho nirebek' amy sata-pità' iareoy.

⁴² Aa le niambohoan' Añahare naho nitolora'e ty hitoroñe i fifamorohotan-dindìñey§, ie pinatetse amy bokem-pitokiy:

O ry anjomba' Israeleo,
nañenga biby linenta

vaho soroñe amako efa-polo taoñe
am-patram-bey aña v'inahareo?

⁴³ Te mone nitarazoe' areo
ty kivocho' i Moloka,
naho ty vasia' i Refane ndrañahare'areoy,
o samposampon-draha namboare' areo
ho fitalahoñaeo.

Aa le haseseko

mb'an-kalo' i Bavele aña nahareo*.

⁴⁴ Taman-droaen-tikañe an-dratraratra aña i kivohom-pitaroñañey, namboareñe do'e amy nisaontsie' amy Mosè te hamboare'e hamban-tsata amy niisa'ey. ⁴⁵ Le nampizilihe' o roae'ay nandrambe azeo zay mindre amy Joso, ie tinava' iareo amo kilakila' ndaty nasiotsion' Añahare aolon-dahara' iareoo i Taney; ie zay ampara' i Davide; ⁴⁶ ie nanjò fañisohañe añatrefan' Añahare, le nihalaly ty hahaoniña'e toetse himoneñan' Añahare' Iakobe. ⁴⁷ Fe i Selomò ty nandranjy anjomba ho aze. ⁴⁸ Toe tsy miambesatse ami'ty nanoem-pitâne t'i Andindimoneñe, amy tsara' i mpitokiy:

⁴⁹ Fitobohako i likerañey,
fitongoàn-tomboko ty tane toy.

anjomba manakore arè ty
ho ranjie' areo ho ahiko?

Hoe t'IHOVÀ. Ke, aia ty toetse hitofako?

⁵⁰ Tsy ty tañako hao ty nanao ze he'e zao?[†]

⁵¹ Ry gan-katoke[‡] tsy sinavatse aña'arofo ndra an-dravembia§. Zehare' areo nainai'e i Arofo Masiñey manahak' an-droae' areo avao. ⁵² Ia amo mpitokio ty tsy nisamporerahen-droae' areo? Nañohofa' iareo loza o nitoky ty fitotsaha' i Vañoñeio, i nafote' areo naho vinono' areo anianiy; ⁵³ iereo fa nandrambe i Hake nafè' o anjelioy, f'ie tsy nambenañe*.

Finetsa-Bato t'i Stefana

⁵⁴ Ie jinanji'iereo i hoe zay, le niromotse aña'arofo vaho nampikodri-nife.

⁵⁵ Ie ka, lifotse i Arofo Masiñey, niandrandra nitalake i likerañey vaho

† 7:37 Its 18:15 ‡ 7:40 Avo 32:1,23 § 7:42 Its 4:19, 17:3, Mp II 23:5 * 7:43 Amo 5:25-27

† 7:50 Ies 66:1-2 ‡ 7:51 Avo 32:9, 33:3,5 § 7:51 Sor 26:41, Iir 6:10 * 7:53 Oni Mat 5:20

nahaisake ty engen' Añahare naho IESOÀ nijohañe am-pitàn-kavan'an' Añahare ey. ⁵⁶ Heheke, hoe re, Treako te misokake o likerañeo vaho mijohañe ampitàn-kavan'an' Añahare eo i Ana'ondatiy†.

⁵⁷ Fie nipoña-koràke, nanentsen-dravembia vaho fonga nitrao-pañoridañe aze, ⁵⁸ le naronjeronje' iareo alafe' i rovay, naho nametsa-bato ama'e vaho napo' o valolombeloñeo an-tombo' ty dogalahy atao Saole eo o sarimbo' iareoo. ⁵⁹ Ie nitolom-pametsam-bato amy Stefana, le nikaihe'e ty hoe: Ry IESOÀ TALÈ, rambeso ty troko. ⁶⁰ Ie tafatongaleke, le pinaza'e am-piarañanañañe ty hoe: O TALÈ, ko tiñea'o am'iareo ty hakeo toy. Ie nanao zay le nirotse.

8

¹ Ninò' i Saole ty nañitoañe aze.

Nisamporeraheñe le Niparaitake

Nifototse amy andro zay ty fisamporeraham-bey amy Fivory e Ierosalemey vaho neparatsiaké mb'eo mb'eo e Iehodà naho e Samaria aña iaby, naho tsy o Firàheñeo avao. ² Nandenteke i Stefana ondaty vañoñeo vaho nipoña-pandalàñe. ³ Fe nampivalitaboak' i Fivoriy t'i Saole, nitsatsak' anjomba, nimoake, vaho nikozozótse ty lahy naho ampela mb'am-porozò ao.

I Filipo e Samaria aña

⁴ Aa le nitaroñe i tsaray mbeo mbeo o nipayatakeo. ⁵ Nizotso mb' androva Samaria mb'eo t'i Filipo nitaroñe i Norizañey. ⁶ Songa nihaòñe' ondatio o saontsi' i Filipoo, ie nijanjiñe naho nahaisake o viloñe fanjaka nanoe'eo. ⁷ Nihorentseñe an-tazataza ty kokolampa tsiefa nakareñe am'ondaty nitokoe'eo, naho maro ty kombo vaho ty kepeke nijangañe. ⁸ Le firebehambey ty tan-drova ao.

I Simona Ambiasa

⁹ Tamè rovay henane zay t'indaty atao Simona mpanao sahàtse, nahalatza o nte Samariao, ie nieva ho aman' àsiñe, ¹⁰ nihaóñe' ze hene ondaty, ty bey naho ty kede, le nanao ty hoe: Haozaran-dra' elahin' añahare ondaty zay. ¹¹ Hene nañorik' aze ondatio amy te ela ty namoreha'e amo sahàtse fanoe'eo. ¹² Aa ie niantofa' iareo t'i Filipo amy nitaroña'e i talili-soa' i Fifehean'Añahareiy naho ty tahina' IESOÀ Norizañey, le nilipotse: ondaty naho rakemba. ¹³ Toe niantoke ka t'i Simona le nalipotse, vaho nañorik' i Filipo sikal'aia sikal'aia fa nilatsa t'ie nahaisake o viloñe fanjaka naho raha tsi-tantane nanoeñeo.

¹⁴ Ie jinanji' o Firàheñeo e Ierosalemeo te niantoke ty tsaran' Añahare o nte Samariao, le nañirake i Petera naho i Jaona homb'am'iereo aña. ¹⁵ Ie nizotso mb'eo le nihalaly ho a' iareo, handrambesa'e i Arofo Masiñey; ¹⁶ ie mbe tsy nivotraha'e; fa ami'ty tahina' IESOÀ TALÈ avao* ty nampiliporañe iareo. ¹⁷ Aa le nanampeza' i Petera naho i Jaona fitañe handrambesa' iereo i Arofo Masiñey.

¹⁸ Aa ie nioni' i Simona te i fampitongoam-pitá' o Firàheñeo ro nanolorañe i Arofo Masiñey le nibanabana'e drala, ¹⁹ ami'ty hoe: Anoloro ahy ka o haozarañe zao soa te, ndra iaia hanampezako tañañe ro handrambe i Arofo Masiñey. ²⁰ Hoe ty natoi' i Petera aze: Hindre hikoromak' ama'o o drala'oo kanao sinafiri'o te ho vilie'o drala ty falalàñ' Añahare! ²¹ Tsy aman' anjara, naho tsy mitraok' ami'ty tsara toy rehe, fa

† 7:56 Sab 110; 1 * 8:16 Fil 2:10

tsy vañoñe añatrefan' Añahare ty tro'o. ²² Mibaboha amy haloloañey, naho misolohoa amy IEHOVÀ, he mete ihahàñe amy fitsakorean-tro'oy, ²³ amy te rendreko t'ie aman-kafairan' afero vaho androhizan-kakeo. ²⁴ Aa le tinoi' i Simona ty hoe: Mihalalia amy IEHOVÀ ho ahy, ry aba te tsy hizò ahy i nisaontsia'areoy.

²⁵ Aa ie fa nitaroñe naho nitsey ty tsara' IEHOVÀ, le nibalike mb'e Ierosaleme mb'eo t'i Petera naho i Jaona, nitsey i talili-soay ami'ty rova maro' o nte-Samariao.

I Filipo naho i nte-Kosey

²⁶ Ie amy zay, nitsara ty hoe amy Filipo ty anjeli' IEHOVÀ: Mañatimoa mb'amy lalañe mizotso hirike Ierosaleme mb'e Gaza mb'amy ratraratray mb'eoy. ²⁷ Aa le nióngake nañavelo mb'eo re, naho naheo'e ty nte Etiopia doga-lahy mpanandily bey amy Kandasie mpanjaka-ampela' o nte Etiopiao naho mpamandroñe o vara'e iabio, ie nañavelo mb'e Ierosaleme mb'eo nitalaho, ²⁸ naho nibalike amy zao niambesatse an-tsarete'e ao namaky Isaia mpitoky.

²⁹ Le hoe i Arofoy amy Filipo, Harineo o sarete ey hoeke eio naho ireketo. ³⁰ Nihitrike mb'eo t'i Filipo naho nahajanjiñe aze namaky Isaia mpitoky, le hoe re: Fohi'o hao o vakie'oo? ³¹ Aa hoe re, Aia ty haharendrehako naho tsy amam-panoro? Aa le nampihovàe'e hijoñe ao t'i Filipo hitrao-piambesatse. ³² Ty hoe i nivakie'e amy Sokitse Masiñeyi:

Kinozozòtse hoe añondry

ho lentaen-dre,

Le hambañe ami'ty fitsiña' ty vik'añondry añatrefa' o mpañitsik' azeo, t'ie tsy nanoka-palie.

³³ Nareke naho tsy nimean-tò;

Ia ty haha-volily o tarira'eo,

amy te nasitak'an-tane atoy ty havelo'e;[†]

³⁴ Aa hoe ty ontane' i doga-lahiy amy Filipo: Ehe, ia ty isaontsia' i mpitokiy, ty vata'e ke ty ila'e? ³⁵ Le nanoka-palie t'i Filipo nifototse amy pinatetse amy Sokitse Masiñeyi, nitalilyIESOÀ. ³⁶ Ie nañavelo mb'eo, le nizo rano vaho hoe i doga-lahiy, Intia ty rano, ino ty manebañe ahy tsy halipotse? ³⁷ [‡] ³⁸ Aa le linili'e te hitsangañe i saretey naho sindre nijoñe an-drano ao iereon-droroë, i doga-lahiy naho i Filipo, vaho nalipo'e. ³⁹ Ie nitroatse amy ranoy le nampihelañe' i Arofo Masiñey aña t'i Filipo vaho tsy nioni' i doga-lahiy ka, fe tinonjohi'e an-drebeke i lia'ey. ⁴⁰ Nizoeñé Azota aña t'i Filipo; le niranga mb'eo re nitolom-pitaroñe i talili-soay amy ze hene rova ampara' t'ie nandoak' e Kaisaria aña.

9

¹ Ie mbe nikofòke fitrevohañe naho fanjamanañe amo mpiamy Talèo t'i Saole le niheo mb'amy talèm-pisoroñey mb'eo ² nihalaly taratasy ho amo fitontonañe e Damaskose añaeo, soa te hasese an-drohy mb'e Ierosaleme mb'eo ze mpiamy Lalañey zoe'e aña, ndra lahilahy ndra ampela. ³ Ie nifokofoko mb'eo naho niharine i Damaskose le tojo te niarisehoa' ty hazavàñe nireandreañe boak' andindìñe ey. ⁴ Nidoiñe an-tane eo re vaho nahajanjiñe ty fiarañanañañe nanao ty hoe: Saole, Saole, akore ty ampisoaña'o ahy? ⁵ Ia v'Iheo, Talè? hoe re. Hoe ty natoi'e, Zaho oIESOÀ

[†] 8:33 Ies 53:7,8 [‡] 8:37 Le hoe t'i Filipo: Mete zay, naho atokisa'o an-kaampon' arofo. Nanoïñe ty hoe re: Atokisako te anan' Añahare, t'IESOÀ Norizañe.

samporerahe'oo. ⁶ Aa le mióngaha, iziliho o rovao le ho taroñeñ' ama'o ty tsi-mahay tsy hanoe'o.

⁷ Nijohañe eo ondaty nitrao-dia ama'eo fe tsy nahakofòke, jinanjiñe i fiarañanañañey f'ie tsy nahaisake ndra iaia. ⁸ Nitroatse amy taney t'i Saole, le ndra te nibeake o fihaino'eo tsy nahavazoho. Aa le kinozozò' iereo am-pitâne vaho nimoake e Damaskose ao. ⁹ Telo andro t'ie tsy nahaisake, tsy nikama, naho tsy ninoñe.

¹⁰ Te Damaskose ao ty mpiato atao Ananiasy*; nikanjia' i TALÈ añ' aroñaroñe, nanao ty hoe: O Ananiasy! Intoy raho, Rañandria, hoe re. ¹¹ Hoe t'i TALÈ tama'e: Mióngaha, akia mb'an-dalañe atao Vantañe mb'eo le añontaneo añ'anjomba' i Jodasy ao, ty atao Saole nte Tarsosy, mitalaho, ¹² toe fa nioni'e añ'aroñaroñe t'indaty atao Ananiasy miheo mb' ama'e mb'eo hanampe fitâne ama'e hampibarababeak' aze. ¹³ O TALÈ hoe ty natoi' i Ananiasy, Fa tsinanoko amy màroy indatiy, ty fijoiañe nanoe'e am'ondaty noro'o e Ierosalemeo. ¹⁴ Mbore aman-dily boak' amo mpisorom-beio re homb' etoañe handrohy ze hene mikanjy ty tahina'o. ¹⁵ Fe hoe t'i TALÈ tama'e: Akia! fa haraotse jinoboko ho ahy re hinday ty añarako añatrefa' o kilakila 'ndatio naho amo mpanjakao vaho amo ana' Israeleo. ¹⁶ Fe hatoroko aze ty hara' elahim-pisotriañe ho ama'e ty ami'ty añarako.

¹⁷ Aa le nimb'eo t'i Ananiasy, nizilik' amy anjombay, naho nanampe fitâne ama'e nanao ty hoe: O Saole rahalahy; i TALÈ IESOÀ nisodeha' ama'o an-dalañe nimba'o mb'etoañey ty nañirak' ahy mb' ama'o mb'etoa hampahaisak' azo, le ho lifore' i Arofo Masiñey. ¹⁸ Nihintsañe am-pihaino'e amy zao ty raha hoe sisi'e, le nahaisake naho niongake vaho nalipotse. ¹⁹ Ie nikama le nihaozareñe,

I Saole e Damasikosy naho Ierosaleme

le nindre amo mpiòke e Damaskoseo andro tsiampeampe; ²⁰ vaho aniany avao t'ie nitaroñe i Norizañey amo fitontonañeo te Anan' Añahare t'IESOÀ. ²¹ Hene nilatsa ze nahajanjiñe aze, nanao ty hoe: Tsy itoy hao i nandrotsake ze fonga mpikanjy i tahinañey e Ierosalemey? ie nimb' atoa nikilily ty hanese iareo am-bahotse mb'añ'atrefa' o mpisorom-beio? ²² Nitombo erike ty haozara' i Saole vaho nahadaba o Jiosy nimoneñe e Damaskoseo ty famentea'e te IESOÀ i Norizañey.

²³ Aa naho maro andro añe le nikilily hamono aze o Tehodao, ²⁴ fe nirendre' i Saole i fikiniañey t'ie nitampoñe ty lalam-bei' i rovay handro an-kaleñe hañohofan-doza ama'e. ²⁵ Aa le nasese' o mpiòkeo haleñe vaho nazè' iareo amy kijoliy an-jahetse.

²⁶ Ie pok'e Ierosaleme ao t'i Saole le nimanea'e fireketse amo Firàheñeo, fe hene nihembañe ama'e vaho tsy niantoke t'ie toe mpiama'e. ²⁷ Aa le nendese' i Barnabasy mb' amo Firàheñeo, le natalili'e am' iareo t'ie nahaoniñ' i TALÈ amy lia'ey naho nisaontsia'e, vaho t'ie nahavany nitaroñe ami'ty tahina' IESOÀ e Damaskose añe. ²⁸ Aa le nindre am'iereo re nihelohelo e Ierosaleme ao, ²⁹ nitaroñe ami'ty tahina' i TALÈ am-pahasibehañe naho nifanaontsy naho nifandietse amo Jiosy nte-Heleneo, vaho nimanea' iareo havetrake. ³⁰ Ie nirendre' o mpirahalahio le nasese' iareo mb'e Kaisaria mb'eo vaho nahitri' iereo mb'e Tarsosy añe.

* ^{9:10} Heb Hananiah, Oni Top 9:17, 22:12

³¹ Nierañerañe amy zao ty fivory era' Iehodà naho e Galilia vaho e Samaria aña mbore niraorao naho nañavelo am-pañeveñañe amy IEHOVÀ naho amy fañohòa' i Arofoy vaho niha-maro.

I Enea naho i Dorkasie

³² Ie niranga mb'eo mb'eo t'i Petera, le nizotso mb'amo noro'e e Lidà añaeo. ³³ Teo re te naharendreke t'indaty atao Aenea, ie fa natindry valo taoñe, nisilofe' ty hakepeke. ³⁴ Hoe t'i Petera ama'e, O Aenea, mampijangañ' azo t'IESOÀ Norizañe. Miongaha le halankaño o tihi'oo. Aa le niongak' ami'ty manao zao. ³⁵ Toe nahaisak' aze ze hene mpimoneñe e Lidà naho e Sarona vaho nitolik' amy TALÈ.

³⁶ Te Jopa ao henane zay ty mpiato atao Tabitae (midika: Dorkasie[†]), lifotse fitoloñan-tsoa vaho nainai'e mpitretre o rarakeo. ³⁷ Ie tamy andro rezay, narare vaho nihomake; nampiandroe' iareo naho nirohoteñe antraño ambone ao. ³⁸ Kanao marine i Lidà ty Jopa le ie nifohi' o mpiatoo te e Lidà aña t'i Petera, le nampisangitrife' iereo mb'ama'e t'indaty roe hanohiñe aze ami'ty hoe: O Aba, ehe mb'etoy, le ko mihenekeneke.

³⁹ Aa le niongake t'i Petera nindre lia ama'e; ie pok'ao le nasese amy efetse amboney. Niarikoboñe aze o vantotse iabio, nirovetse, vaho naboa' iereo iaby ty saroñe naho sikiñe namboare' i Dorkasie ie mbe tam' iereo.

⁴⁰ Fonga nampiakare' i Petera, le nanongaleke naho nihalaly, vaho nitolik' amy fañòvay nanao ty hoe: O Tabitae, mitroara. Nabea'e amy zao o fihaino'eo, aa ie niisa'e t'i Petera le nitroatse. ⁴¹ Nanolo-pitañe aze re le nongaha'e, naho kinanji'e o mpiato naho vantotseo vaho natolo'e am'iereo veloñe. ⁴² Nañatseke i Jopa ty fahafohinañe zay vaho maro ty niantoke i TALÈ. ⁴³ Nitambatse e Jopa ao andro maro t'i Petera ami'ty mpandoñ' angozy atao Simona.

10

Kinoi' i Kornelio t'i Petera

¹ Te Kaisaria aña t'indaty atao Kornelio, mpifehe zato amy firimboñañe atao nte-Italiy. ² Ie ondaty vañoñe naho mpañeveñañe aman' Añahare rekets' o añ'anjomba'e iabio, naho mpanolotse falalàñe am-patarihañe amo rarakeo vaho mpitalaho aman' Añahare. ³ Aa ie va'e amy ora fahasive' i àndroiy te nioni'e malange añ' aroñaroñe ty anjelin' Añahare nisodehañe ama'e nanao ty hoe: O Kornelio! ⁴ Ie niisa' i Kornelio le nianifañe vaho hoe ty natoi'e: Akore Roandriañe? Le hoe re tama'e: Fa nionjoñe hoe banabana faniahiañe aman' Añahare o fitalaho'oo naho o falalà'oo. ⁵ Aa le mañitrifa ondaty mb'e Jopa aña vaho kanjio ty atao Simona, i Petera ka ty añara'e. ⁶ Ie mañialo amy Simona mpandon-kolitse ao; añ'olo-driake ey ty anjomba'e.

⁷ Ie nienga i Kornelio i anjely nisaontsy ama'ey, le kinanji'e ty roe amo mpitoro'eo naho ty lahin-defo'e mpañorike Hake amo mpiatrak' azeo, ⁸ le hene natalili'e vaho nampihitrife'e mb'e Jopa aña.

Ty Aroñaro' i Petera

⁹ Amy loak-androy, ie mbe an-dalañe nañarivo i rovay, le niañambone mb'an-tafo mb'eo t'i Petera hitalaho ami'ty ora fah' eneñe. ¹⁰ Ndra nisaliko re te hikama, fe mbe nihalankañeñe, vaho niaroñaroñe. ¹¹ Zoe'e te nisokafeñe i likerañey naho nizotso ty raha jabajaba hoe lamba, nazetse

[†] 9:36 Dorkasie naho Tabitae sambe midika karaza diera (biby ly zoke' ty ose, mahalay naho mahavokoñe)

mb' an-tane atoy an-kotso'e efatse. ¹² Ama'e ao ze fonga bibi' ty tane toy aman-tomboke efatse naho ze raha milaly, vaho voron-dikerañe. ¹³ Le niheo ama'e ty fiarañanañañe nanao ty hoe: Miongaha Petera; lentao vaho mikamà. ¹⁴ Fa hoe t'i Petera, Sondo'e amako Rañandria! Mbe liako tsy nitsopeke raha faly ndra maloto. ¹⁵ Inao i fiarañanañañey fañindroe'e: Ko atao faly ze fa nilioven' Añahare. ¹⁶ Nanoëñe in-telo zay vaho rinambe andindiñe ao i rahay.

¹⁷ Ie naereñere' i Petera ty foto' i aroñaroñe nioni'ey, inay indaty nirahe' i Kornelio rey, nañontane i anjomba' i Simonay ie fa nijohañe an-dalam-bey eo ¹⁸ nikanjy, nañontane he imoneña' i Simona atao Petera.

¹⁹ Ie mbe nitsakore i aroñaroñey t'i Petera, le hoe i Arofoy ama'e: Inay, ipaia' t'indaty telo; ²⁰ mióngaha, mizotsoa mb' ambane ao, le ko miyahakahaka fa indrezo; zaho ty nañitrike iareo. ²¹ Nizotso mb'am' indaty rey t'i Petera, le nanao ty hoe, Zaho ty paia' areo, ino ty talin-dia' areo mb'etoa? ²² Hoe iareo: i Kornelio, mpifehe zato, ondaty vañoñe naho mpañeveñe aman' Añahare, soa talily amy ze hene Jiosy, nitoroa' ty anjely masiñe ty hañitrik' azo homb' añ' anjomba'e aña hijanjiña'e tsara. ²³ Aa le nampihovae' i Petera vaho nanoë'e añ'anjomba.

Añ'Anjomba' i Kornelio t'i Petera

Ie amy loak' àndroy, niavotse le nindre fañavelo am'iereo t'i Petera, naho nitrao-lia ama'e ty ila' o roahalahy nte Jopao, ²⁴ vaho nandoake e Kaisaria ao ami'ty loak' andro. Nitamà iareo t'i Kornelio le fa natonto'e o longo'eo naho o rañe'eo. ²⁵ Nizilike t'i Petera le nanalaka aze t'i Kornelio naho nitongalek' am-pandia'e eo niambane ama'e. ²⁶ F'ie nampiongahe' i Petera ami'ty hoe: Miongaha, ondaty ka raho. ²⁷ Ie nifanaontsy, le nizilik' ao nitendreke ondaty maro tafavory.

²⁸ Hoe re tama'e: Fohi' areo te talia faly amy t'indaty Jiosy* ty hitraoke ndra hitilike ondaty hafa razañe. Fe natoron' Añahare ahy te tsy hataoko tsotra ndra maloto ze ondaty. ²⁹ Aa le tsy niliereko ty homb' eto te nikanjieñe, ie amy zao añaontaneako anahareo ty talim-pañitrifañ' ahiko?

³⁰ Le hoe t'i Kornelio: Ie efats' andro zay ami'ty ora zao, zaho nilolok' an-trañoko ao ami'ty ora faha-sive, le naheoko nijohañe añañatrefako eo t'indaty an-tsaroñe mireandreañe, ³¹ le hoe re: O Kornelio, jinanjiñe i filolofa'oy, vaho tiah y añañatrefan' Añahare o fatariha'oo. ³² Aa le ampañitrifo e Jopa aña t'i Simona atao Petera, mitobok' añ' anjomba' i Simona mpandòñ' angozy, añ' olo-driak' ao. ³³ Le nampihitrifeko amy zao, vaho nahasoa anay ty fitotsaha'o atoy. Intoañe iaby zahay añañatrefan' Añahare hitsendreñe ze hene saontsy nandilia' i TALÈ azo.

Janji' o Ambahinio i Talili-soay

³⁴ Aa le nanoka-palie t'i Petera, nanao ty hoe: Toe oniñe henaneo te tsy mirihy ondaty t'i Andrianañahare, ³⁵ te mone no'e ze ondaty mañeveñe ama'e naho mitoloñe an-kavantañañe, ndra fifeheañ' aia aia ty imoneña'e. ³⁶ I tsara niraheñe amo ana' Israeleoy mitaroñe fifampilongoañe añaam' IESOÀ Norizañey (Ie ro TALÈ ze he'e): ³⁷ Fohi'areo ze raha nañatseke Iehodà, nifototse e Galilia, ie fa aña ty fandiporañe nitaroñe' i Jaonay— ³⁸ ty nañorizan' Añahare IESOÀ nte Nazareta amy Arofo Masiñey naho an-kaozarañe, ie nimbeo mbeo nanao soa naho nampijangañe ze fonga niforekekè' i Ratiy, amy te nañimba aze t'i

* **10:28** Talilin-droae fa tsy Hake; Oni Mat 15:3,9, Mar 7:7-8, Kol 2:14,20,22

Andrianañahare. ³⁹ Valolombeloñe amy ze hene nanoe'e an-tanen-Jiosy naho e Ierosaleme ao zahay, ie vinono' iareo ami'ty nampiradoradoañ' aze an-kataet[†], ⁴⁰ f'ie natroan' Añahare amy havilasiy ami'ty andro fahatelo le naboa'e ho vazoho, ⁴¹ tsy ze fonga ondaty, fa o valolombeloñe jinobon' Añahare aoloo, zahay nitrao-pikama naho finoñe ama'e ie fa nitroatse amy havilasiy[‡]. ⁴² Le linili'e hitaroñe am'ondatio zahay, hitalily an-katò t'ie i norizan' Añahare ho mpizaka o veloñe o vilasioy. ⁴³ Ie ty taroñe' ze mpitoky iaby, te i tahina'e ty handrambesa' ze hene miato ama'e fañahan-kakeo.

⁴⁴ Ie mbe nisaontsy izay t'i Petera, le nivotrak' amo nahajanjiñe i tsaraio i Arofo Masiñey. ⁴⁵ Fonga nilatsa o mpiato sinavatse nindre amy Peterao, amy te nadoañe amo kilakila ondatio ka ty falalà' i Arofo Masiñey, ⁴⁶ ie jinanji' iareo te nilikoliko naho nandrenge an' Andrianañahare, le hoe t'i Petera: ⁴⁷ Ia ty handrara rano am' iretoñañe tsy hilipotse? ie rinambe' iereo manahak' antika i Arofo Masiñey! ⁴⁸ Aa le linili'e t'ie ho liporeñe amy tahina' i Talè IESOÀ; le nihalalie' iereo t'ie hañialo ao andro tsy ampeampe.

11

¹ Jinanji' o Firàheñe o roahalahy nanitsike Iehodà te nandrambe o tsaran' Añahareo ka o kilakila ondatio. ² Aa ie nionjoñe mb'e Ierosaleme mb'eo t'i Petera, le tiniñe'o mpiamy sinavatseio ³ ami'ty hoe: Nihovae'o ty anjomba' o tsy nisavareñe o naho nitraofa'o fikama.

⁴ Fe natalili' i Petera am'iereo boak' am-baloha'e naho nampalangese'e ami'ty filaha'e ty hoe: ⁵ Zaho nilolok' an-drova e Jopa aña, le niaroñaroñe vaho nalangesan-draha. Nitreako ty raha hoe lamba bey nizotso boak' andindiñe ey, nazetse an-kotso-efatse le navotrak' amako. ⁶ Ie hinareko naho nañotsohotso, le naheoko t'ie biby aman-tomboke efa' ty tane toio naho biby hako naho raha milaly vaho voron-tioke. ⁷ Le tsinanoko ty fiarañanañañe nanao amako ty hoe, Miongaha, Petera, Mandentà vaho mikamà. ⁸ Le hoe raho: Sondo'e, Rañandria! Mbe lia'e tsy nizilihandraha faly ndra tsy malio ty am-bavako ao. ⁹ Fe nanoñe fañindroe'e i fiarañanañañe andindiñey ami'ty hoe: Ko atao faly ze fa nilioven' Añahare. ¹⁰ Le hene nanoeñe in-telo ka zay vaho nitariheñe mb'andindiñe eñe. ¹¹ Tsatok' añ' anjomba nitobohako eo amy zao t'indaty telo nahitrik' amako boak' e Kaisaria aña. ¹² Le nisaontsie' i Arofoy ty hindrezako lia fa tsy hivazobazotse. Nitrao-dia amako ka o roahalahy eneñe retiañe te nizilik' añ' anjomba' indatiy. ¹³ Natoro'e anay t'ie nahaisake anjely nijohañe añañomba'e ao nanao ty hoe: Ampisangitrifo ondaty homb'e Jopa aña hikanjy i Simona atao Petera, ¹⁴ ie ty hinday tsara ama'o maharombak' azo naho o añañomba'o iabio. ¹⁵ Ie vaho nitaroñeko, le nivotrak' am' iereo i Arofo Masiñey manahake taman-tikañe am-baloha'e. ¹⁶ Le nitiahiko ty nisaontsie' i TALÈ ty hoe: Toe nampilipotse an-drano ao t'i Jaona, fe halipotse amy Arofo Masiñey nahareo. ¹⁷ Aa kanao natolon' Añahare iareo i falalàñe natolo'e antika niato am' IESOÀ Norizañeyi, le ia v'irahoo, te hanebañe an' Andrianañahare?

¹⁸ Ie nahajanjiñe zay, le nianjiñe iereo, nibango an'Andrianañahare, ami'ty hoe: Fa tinolon' Añahare fisolohoan-ko aman-kaveloñe ka o kilakila ondatio!*

[†] **10:39** Its 21: 22-23 [‡] **10:41** Top 7:31, Jao 5:29, Sabo 96:13, 98:9, Ben 19:11 * **11:18** Oni Top 10:35

Ty Fivory e Antiokia aña

¹⁹ Ie amy zao, fa nañavelo sikal' e Foinika aña naho e Kiprosy aña naho mb'e Antiokia mb'eo ondaty naparatsà' i campisoañañe ty amy Stefana zay nitsey i tsaray, tsy ama' ia naho tsy amo Jiosio avao. ²⁰ Fe ty ila' iereo, o nte Kiprosy naho nte Kirenèo, ro niheo mb'e Antiokia mb'eo nitalily amo Grikao nitaroñeIESOÀ TALÈ. ²¹ Nañimba iareo ty fità' i TALÈ, le maro ty niantoke vaho nitolik' amy TALÈ.

²² Nizilik'am-pijanjiña' i Fivory e Ierosaleme añaey ty talily ty am' iereo, vaho nahitri' iereo mb' Antiokia aña t'i Barnabasy. ²³ Ie pok' aña, naho niisa'e ty hasoan' Añahare, le niehake vaho hene nosihe'e ho lili-po amy TALÈ an-kaampon' arofo. ²⁴ Ondaty vañon-dre, lifotse i Arofo Masiñey naho fatokisaña, vaho maro t'indaty nitovoñe amy TALÈ.

²⁵ Le nionjoñe mb'e Tarsosy mb'eo re nipay i Saole; ²⁶ ie tendreke, le nandese'e mb'Antiokia aña. Aa le naha ritse taoñe raike iereo nifampikaoñe amy Fivoriy naho nañoke ondaty. E Antiokia ao ty namotoraña ty fikanjiaña o mpiama'eo ty hoe : Mpiami-Norizañey.

²⁷ Tam y andro rezay niheo mb'e Antiokia mb'eo ty mpitoky boak' Ierosaleme aña. ²⁸ Niongake ty atao Agabo, mpiam' iereo, naho nitoroa'e añaamy Arofoy te handrambaña ty tane bey toy ty san-kerè. (Le nitendrek' amy andro' i Klaudio mpanjaka izay). ²⁹ Aa le nilahatse o mpiatoo, te songa ondaty ami'ty hahalefea'e ty hisangitri-palalàñe amo roahalahy mimoneñe e Iehodà añaeo. ³⁰ Nanoe' iereo, le nahitri' iereo mb'amo mpiaoloo am-pità' i Barnabasy naho i Saole.

12

Vinono t' Iakobe, Najoroboñe t'i Petera

¹ Ie henane zay, nañity fitàñe t'i Heroda mpanjaka hampisarerake ty ila' i fivoriy. ² Navetra'e am-pibara t'Iakobe rahalahi' i Jaona. ³ Ie nifohi'e te nahafale o Tehodao, le tinovo'e ami'ty nitsephahaña i Petera. Nanoeña amo andro' i Sabadidak' i Mofo tsy aman-dalivaiio zay. ⁴ Tsinepa'e re naho najo'e am-porozò ao naho nanolotse mpiray lian-dahindefoñe efatse hañambéñe aze, ie nisinafiry ty hañakatse aze añatrefa' ondatio naho fa tampetse i Fihelañey. ⁵ Aa le nitambozoreñe am-balabey ao t'i Petera vaho nimanea' i Fivoriy halaly aman' Añahare.

⁶ Ie amy aniankale' ty hanesea' i Heroda, le nirotse añivo' ty lahin-defoñe roe ao t'i Petera nivahoran-tsivilisily roe, vaho nijohañe an-dalam-bey eo o mpigaratse i porozò. ⁷ Tojo te nivotrake eo ty anjeli' IEHOVÀ, le nireandreañe amy trañoy ty hazavàñe. Nedrè'e an-deme'e t'i Petera naho nampitroare'e ami'ty hoe, Miongaha masika! vaho nivitsok' am-pità'e o silisilio. ⁸ Le hoe ty asa' i anjeliy tama'e: Midiaña naho mihanà. Nanoe'e zay. Le hoe re tama'e: Saravio o lamba'oo le mañoriha. ⁹ Niakatse re, nanonjohy avao, fa tsy napota'e te ho tò i nanoe' i anjeliy ama'ey; natao'e te nioniñ' aroñaroñe. ¹⁰ Rinio' iareo ty liam-pigaratse valoha'e naho ty faharoe vaho nigaoñe ami'ty lalam-bey viñe fimoahaña amy rovay ze nisokake ho a iareo an-tsatri'e le niakatse naho nizotso mb'ami'ty lalañe mb' eo vaho nimiañe ama'e i anjeliy.

¹¹ Ie nivañoñe t'i Petera, le hoe re: Apotako henaneo an-katò te nirahe' IEHOVÀ i anjeli'ey hañaha ahy am-pità' i Heroda naho amy ze fitamà' o Jiosy iabio. ¹² Ie naharendreke zay, le nimb' añañ' anjomba' i Marie rene' i Jaona natao Marka, ze nivoria' ty maro nihalaly. ¹³ Aa ie nañonkòñe amy lalam-bey fimoahañey t'i Petera, le nimb'eo ty mpitoroñ' ampela

atao Rodae handrendreke. ¹⁴ Ie nirendre'e ty fiarañanaña' i Petera, le akore ty hafalea'e, kanao tsy nanokake lalañe, te mone nilay aña nitalily te nijohañe an-dalambey ao t'i Petera! ¹⁵ Veren-draha n'iheo, hoe iareo. Fe mbe nitambozore'e te to, le hoe iere: I anjeli'ey 'nio. ¹⁶ Mbe nañonkòñe avao t'i Petera. Aa nahosinoka' iareo i lalañey, nizoe' iere re vaho nilatsa, ¹⁷ le tinondrotondro' i Petera am-pitañe hianjiña' iareo nahosnatalili'e ty nampiakara' i TALÈ aze amy porozòy. Le hoe re: Italilio t'Iakobe nahos o roahalahio; vaho nienga mb'an-toetse hafa aña.

¹⁸ Ie nimaraindray, hay aia ty fivalitaboa' o lahin-defoñeo ami'ty nanjò' i Petera. ¹⁹ Ie nampitsoehe' i Heroda soa fa tsy nioniñe, le nilohize'e o mpigaritseo vaho nampanese'e aña.

Ty Fikoromoha' i Heroda

Nizotso boake Iehodà mb'e Kaisaria aña t'i Heroda le nitambatse ao. ²⁰ Ie amy zao ro nioroñoroñe amy Tirò nahos i Sidona, f'ie nifamantañe le nimb' ama'e mb'eo re, nahos nampivavè' iareo t'i Blasto, mpiatra' i mpanjakay, le nihalaly fifampilongoañe ama'e amy te mpamahañe ty tane' i mpanjakay ty tane' iareo. ²¹ Aa ie amy andro tinendrey, nisikin-dambampanjaka t'i Heroda, niambesatse am-piambesa'e eo nilañoñe am'ondatio. ²² Aa le nipazapazake ty hoe ondatio: Fiarañanañan-drañahare zao fa tsy a ondaty. ²³ Toly ndra pinao' ty anjeli' IEHOVÀ amy zao, ie tsy nandrenge an' Andrianañahare, le nihànen' oletse vaho nihomake.

²⁴ Niraorao avao nahosibole ty tsara' i Talè. ²⁵ Naho niheneke ty lia' i Barnabasy nahos i Saole e Ierosaleme ao le nimpoly vaho nindese' iere t'i Jaona, atao Marka mindre ama'e.

13

Norizañe t'i Saole nahos i Barnabasy

¹ Irezao o mpitoky nahosibole ty tsara' i Antiokiaio: i Barnabasy nahos i Simeona natao Nigera, le i Losio nte-Kirenà nahos i Menahema (i niara-nibey amy Heroda mpanjakay) vaho i Saole. ² Ie nitalaho amy TALÈ nahos nililitse, le hoe i Arofo Masiñey: Aviho ho ahy t'i Barnabasy nahos i Saole ho ami'ty fitoroñañe ikanjiako iareo. ³ Aa ie nililitse nahos niloloke, le nampitongoañe fitàñe vaho nampionjoneñe mb'eo.

⁴ Amy nañiraha' i Arofo Masiñey, le nizotso mb'e Seleokia mb'eo iere vaho nijon-dakañe mb'e Kiprosy. ⁵ Ie toly e Salamisy le nitaroñe i tsaran' Añaharey amo fitontona' o Jiosio. Tam' iere ka t'i Jaona ho mpiatrake.

⁶ Ie niranga i toko-nosey nahosibole Pafo aña, le nifanjò ami'ty mpañorik' andro, mpitoki-vilañe Jiosy atao Bar-Iesosy, ⁷ nireketse amy Sergio Paolo ragova, ondaty mahilala; kinanji' indatiy t'i Barnabasy nahos i Saole fa nipay ty hijanjiñe o tsaran' Añahareo. ⁸ Fe natreatrè i Elima ambiasa (añara'e izay) ie nipay ty hampiamboho i ragovay tsy hiantoke.

⁹ Nilifotse i Arofo Masiñey t'i Saole, i natao Paoliy ka, le niharefe'e t'i Elima ¹⁰ vaho nanoa'e ty hoe: Ty pea ze fonga famañahiañe nahos fitake, ana' i Ratiy tìa! rafelahi' ze atao havañonañe! Tsy mete apo'o hao ty fampikelohañ' o lalam-banta' i Talè? ¹¹ Ingo te ama'o henaneo ty fità'i TALÈ, le ho goa, tsy hahaisake i àndroy heike. Aa le nivotrak' ama'e ami'ty manao zao ty zono nahosieñe vaho nitoantoañe mb'eo re nipay ty hitarik' aze am-pitâñe. ¹² Ie nioni' i ragovay i nanoeñey, le niantoke, toe nahavereñ' aze ty fañòhañe i TALÈ.

Antioquia' i Pisidia

¹³ Aa le nijon-dakañe boake Pafo t'i Paoly naho o rañe'eo nimb'e Perga' i Pamfilia mb'eo, fe nisitak' am'iereo t'i Jaona nimpoly mb'e Ierosaleme aña. ¹⁴ Ie hirikeye Perga le nandoak' Antiokia' i Pisidia, naho niheo am-pitontonañ' ao ami'ty andro Sabotse vaho niambesatse. ¹⁵ Ie nitampetse ty famakiañe i Hake naho o Mpitokio, le nampanohine' o mpifehe' i fitontonañeio ami'ty hoe: O roahalahio, hera aman-tsara mahaosike ondatio, le milañonà. ¹⁶ Niongake t'i Paoly nanondrotondro fitàñe le nanao ty hoe: Ry nte-Israelleo naho ze mpañeveñe aman' Añahareo, mijanjiña! ¹⁷ Jinobon' Añahare' ondati' Israele retoañe o roaen-tikañeo, le nonjone'e ondatio t'ie nitaveañe ho renetane an-tane Egipte ao, vaho am-pionjonam-pità'e ty niaoloa'e iareo nienga i taney; ¹⁸ Miha-efa-polo taoñe ty nañantoaña'e am-patrambey aña. ¹⁹ Ie rineba'e ty fifeheañe fito e Kanana ao, le natolo'e iareo i tane' iareoy ho lova va'e efajato taoñe tsy limampolo. ²⁰ Añe i nitaliliañey, le tinolo'e mpizaka ampara' i Samoela mpitoky, ²¹ ie nihalaly mpanjaka iereo, le tinolo'e i Saole ana' i Kisý, afe' i Benjamina, efapolo taoñe. ²² Ie nasinta'e, le noriza'e t'i Davide ho mpanjaka' iareo. Le hoe ty nitaroñe'e: Nitreako t'i Davide ana' Iesesay, ondaty mañorike ty troko; hene hanoe'e o satrikoo.

²³ Boak'amo tarira' indatio, ty amy tsara'ey, ty nanesean' Añahare am' Israele ty Mpandrombake, IESOÀ. ²⁴ Taolo' ty fiavi'e le nitseize' i Jaona ty filiporam-pisolohaña ho amy ze hene ondati' Israele, ²⁵ aa ie fa ho niheneke ty fitoroña' i Jaona le nainai'e nanoa'e ty hoe: Atao' areo ho ia v'iraho? Tsy ie raho. Hehe t'ie tonjohize' ty tsy mañeva ahy hampidraitse o hana'eo.

²⁶ O rolongo, ana' o tarira' i Abraàmeo, naho ry mpañeveñe aman' Añahare ama' areo, ie nampihiñifaña o entam-pandrombahaña zao. ²⁷ Toe nihenefa' o mpimoneñe e Ierosalemeo naho o mpifehe'eo, ie tsy nahafohiñ' aze ndra ty talili' o Mpitoky vakieñe boa-tSABATAO, fe nihenefa' iareo ami'ty namàra' iareo aze. ²⁸ Aa ndra te tsy nioniñe ty tali' ty hañohofan-doza ama'e, mbe nihalalie' iereo amy Pilato ty hamonoaña aze. ²⁹ Ie hene nifonire' iareo ze pinatetse ty ama'e, le nazotso amy hataey vaho nirohoteñe an-kibory ao, ³⁰ f'ie natroan' Añahare amy havilasiy, ³¹ vaho nahaoniñe aze andro maro o nindre lia ama'e hirikeye Galilia pake Ierosaleme aña. Iereo ro valolombeloña am'ondatio henaneo.

³² Taroñe'ay ama' areo i Talili-soa nampitamaña an-droaentikañey ³³ t'ie nihenefen' Añahare aman-tika ana' iareo, amy nampitroara'e IESOÀ. Ie i pinatetse amy Sabo faharoeiy, ty hoe:

Anako rehe; Anindroany ty nisamahako azo.*

³⁴ Ty hatò' t'ie nampitroare'e amy havilasiy tsy hibalike mb'am-pihomahaña ao ka, ro tsinara ami'ty hoe:

Hatoloko azo o fitahiaña vantaña
naho to' i Davideo.†

³⁵ Hoe ka ty taroñe' ty ila'e:

Ho tana'o tsy hihomake i Masi'oy.‡

³⁶ I Davide, ie fa nitoroñe o mpiharo-nono ama'eo amy natoron' Añahare azey, le nirotse naho nirohoteñe aman-droae'e ao t'ie nihomake. ³⁷ Fe tsy nimomoke i natroan' Añahare amy havilasiy. ³⁸ Aa le mahafohina ry longo, te indatiy ro itaroñaña ty fisolohaña amo tahiñeo, ³⁹ le ie ro añahàñe o mpiatoo amy ze hene raha tsy nilefe' i Hâ' i Mosèy hahàñe.

⁴⁰ Mitaoa arè, kera hizò i nisaontsieñe amo Mpitokio ty hoe:

* 13:33 Sab 2:7 † 13:34 Ies 55:3 ‡ 13:35 Sab 16:10

⁴¹ Oniño ry mpanivetive, mañaraharà vaho mikoromaha, fa hitoloñe am-pitoloñañe amo andro'areeo raho, fitoloñañe tsy hiantofa'ondaty, ndra te eo ty hampalange aze ama'areo. §

⁴² Aa ie niakatse o Jiosio, le nihalalie' ondatio te ho lañoneñe ami'ty SABOTSE here'e i tsara zay. ⁴³ Ie nigadoñe i favoriy, maro amo Jiosio naho amo mpitalaho nivalike ho Jiosio ty nañorike i Paoly naho i Barnabasy ze nitaroña am'iereo, nañosike iareo hifahatse amy hasoan' Añaharey.

⁴⁴ Ie amy SABATA here'ey, didý tsy i rova iabiy ty nifanontoñe hijanjiñe o tsaran' Añahareo. ⁴⁵ Aa naho niisa' o Jiosio i màroy, le niliforem-parahy vaho niliere' iereo o raha nisaontsie' i Paolio. ⁴⁶ Nanoïne ty hoe am-pahavaniañe t'i Paoly naho i Barnabasy: Tsy mete tsy nitaroña'ay hey i tsaran' Añaharey, fe kanao nikihoe' areo le nizaka-vatañe t'ie tsy mañeva i haveloñe nainai'ey, inao arè! mitolik' amo kilakila ondatio zahay ⁴⁷ amy nandilia' i TALÈ anaiy, ty hoe:
Nanoeko hazavàñe amo kilakila
'ndatio rehe,
hinday fandrombahaañe sikal'
añ' olo-ty tane toy aña.*

⁴⁸ Ie jinanji' o kilakila ondatio zay le niehake vaho niasy ty tsara' IEHOVÀ; vaho hene niantoke ze tinendre ho amy haveloñe nainai'ey.

⁴⁹ Le niboile nahatsitsike i taney ty tsara' IEHOVÀ. ⁵⁰ Fe sinigì' o Tehodao o rakemba bey mpitalahoo naho ondaty bei' i rovaio, le trinobo' iereo fampisoañañe amy Paoly naho i Barnabasy vaho rinoa' iereo amy taney. ⁵¹ Aa le nabò' iereo ama'e ty lembok' am-pandia' iareo naho nimb'e Ikonioma aña, ⁵² vaho nilifotse ty ehake naho i Arofo Masiñey o mpiòkeo.

14

A Ikonioma

¹ Ie te Ikonioma aña le nindre nizilik' am-pitontona' o Jiosio, le akore ty lañona' iareo kanao maro amo Jiosio naho o Grikao ro niantoke. ² Fe trinobo' o Jiosy tsy niantokeo ty arofo' o kilakila 'ndatio vaho vinore' iareo afero-añ'ate ty amo miproahalahio. ³ F'ie nitambatse ao andro maro, nitalily i TALÈ am-pahasibehaañe, ie namente i tsaray ami'ty hasoa'e, nanolotse vilõñe naho halatsàñe nanoeñe am-pità' iareo.

⁴ Fe nifañambake ondati' i rovaio; atia o mpiamo Jiosiooo, le etia o nimpiamo Firàheñeo. ⁵ Nikilily ty ila' o Tehodao miharo amo kilakila' ondaty ila'eo naho o bei' iareeo, ty hijoy iareo am-pametsaham-bato, ⁶ ie naharendreke le nibolitse mb'e Derbe naho mb'e Listra, rova i Likaonia naho mb'am-paripari'e ao, ⁷ nitolom-pitaroña i talili-soay.

E Listra naho e Derbe

⁸ Te Listra ao ty lahilahy nikonenake avao, naleme fandia, kepeke boak' an-kovin-drene'e, mb'e lia'e tsy ninokitse. ⁹ Tsinendre'e ty saontsi' i Paoly, le hinare' i Paoly naho nioni'e te nahatsàke hañahàñ' aze i fatokisa'ey, ¹⁰ le napaza'e ty hoe: Miongaha am-pandia'oo! Aa le nitsamboan-dre naho nanjotike. ¹¹ Ie nioni' i lahialeñey i nanoe' i Paoliy, le songa nikontsiañe an-tsaontsy Likaonia, ami'ty hoe: Fa totsak' aman-tikañ' atoy o ndrañahareo misare ondaty! ¹² Natao' iereo Jopitera t'i Barnabasy,

naho Hermese t'i Paoly amy t'ie ty talèn-tsara. ¹³ Nanese añombelahy naho voñe firavahañe mb' an-dalam-bey mb'eo ty talèm-pisoro' i Jopitera mpimoneñe amy anjomba'e miavake aolo' i rovay ey, le naho i lahialeñey ho nisoroñe. ¹⁴ Fe jinanji' i Barnabasy naho i Paoly izay, le nandriatse saroñe vaho nilay anteñateña' i lahialeñey ao nikoike ty hoe: ¹⁵ O roandriañeo, akore ty anoa' areo zao? Ondaty hambam-bintañe ama' areo zahay, minday talily soa ho anahareo, hitaroñe ty hiamboho'a' areo o raha tsy jefa'e retiañe ho mb'aman' Añahare veloñe, i namboatse i likerañey naho ty tane toy naho i riakey vaho ze he'e ama'e ao*. ¹⁶ Toe nado'e hañavelo amy ze homba'e o miprofoko amo tariratse taoloo†. ¹⁷ Fe tsy nenga'e tsy ho amam-pitalily, le tolora'e hasoa naho ampahavia'e orañe boak' andindiné ao naho vole an-tsam-pamokarañe vaho anjotsoa'e mahakama naho hafaleañe mahaeneñe amo arofon-tikañe‡. ¹⁸ Fe didý tsy nahasebañe i lahialeñey hisoroñe am' iereo i saontsy zay.

¹⁹ Lonea amy zao ty Jiosy illa'e boak' Antiokia naho e Ikaonioma nitrobo i lahialeñey, nametsa-bato amy Paoly le kinovovo' iereo alafe' i rovay ey, fa natao t'ie nivetrake. ²⁰ Aa naho niarikoboña' o mpiama'eo, le niongake re nizilik' an-drova ao.

Mibalike mb'e Antioka mb'eo

Ie amy loak' àndroy, nienga rekets' i Barnabasy le nomb'e Derbe mb'eo, ²¹ nitaroñe i talili-soay amy rovay, nampivangongo o mpiòkeo, le nibalike mb'e Listra naho e Ikaonioma vaho Antiokia mb'eo, ²² nañafatratse ty arofo' o mpiòkeo, nandrisike iareo hitoloñe am-patokisañe, ami'ty hoe: Lako hasotry ty hisorohañe hahafizilihan-tika amy Fifehean' Añaharey. ²³ Le nanendre mpifehe amy Fivory iaby rey naho nihalaly an-dilitse, ie nonjone' iareo amy TALÈ natokisa' iareoy.

²⁴ Niranga i Pisidia iereo, le nipok' e Pamfilià aña; ²⁵ nitaroñe i tsaray e Perga vaho nizotso mb'e Atalà mb'eo. ²⁶ Hirik' ao le nijon-dakañe mb'e Antiokia aña, amy nanolorañe iareo an-kasoan' Añahare i fitoroñañe nihenefa' iareoiy.

²⁷ Ie nivotrak'eo, le natonto' iareo i Fivoriy vaho nitalily ze hene nanoen' Añahare añañam' iereo naho ty nanokafa'e lalañe amo kilakila ondatio.

²⁸ Aa le nitambatse ela amo mpiokeo iereo.

15

Ty Fivory e Ierosaleme ao

¹ Teo ty nizotso boak' Iehodà aña nañoke ty hoe amo roahalahio: Ze tsy savareñe amy sata' i Mosèy, le tsy ho rombaheñe. ² Tsy naivañe ty fifandierañe naho fifanointoiña' i Paoly naho i Barnabasy ama'e le sinafiri' iereo ty hañitrike i Paoly naho i Barnabasy naho ty ila'e mb'e Ierosaleme mb'amo Firàheñe naho bey aña ty amy ontane zay. ³ Ie nampionjone' i Fivoriy amy lalañey, le niranga i Foinika naho i Samaria, nitalily ty fisolohoa' o kilakila ondatio vaho naehake o roahalahy iabio.

⁴ Ie nandoake e Ierosaleme ao, le rinambe i Fivoriy naho o Firàheñeo naho o beio, vaho nitalilieñe ze he'e nanoen' Añahare añañam' iereo.

⁵ Fe niongake ty mpiato ila'e amo Fariseo, nanao ty hoe: Tsy mete tsy ampisavareñe ondatio vaho lilieñe hañorike ty Hâ' i Mose.

⁶ Nivory hisafiry i entañe zay o Firàheñeo naho o beio, ⁷ f'ie nifandietse avao, aa le niongake t'i Petera nanao ty hoe: O Roahalahio, fohi' areo

* **14:15** Avo 20:11, Sab 146:6 † **14:16** Oni Top 17:30 ‡ **14:17** Oni Mat 5:45

te nitoroan' Añahare hatrela'e te ho janjiñe' o kilakila ondatio am-bavako ty enta' i talili-soay vaho hiantoke. ⁸ Aa le nitaroñe am' iereo t'i Andrianañahare Mpaharofoanañ' arofo, le nitolora'e i Arofo Masiñey manahake ty nanoe'e aman-tikañe. ⁹ Toe tsy nambaháe aman-tika iereo kanao nefera'e am-patokisañe o arofo' iareoo. ¹⁰ Aa vaho akore ty itsoha' areo an' Andrianañahare, hampitongoà' areo joka am-pititia' o mpiòkeo, ie tsy nileon-tika ndra o roaen-tikañe? ¹¹ Aiy! Atokisan-tika te i hasoa' IESOÀ Talèn-tikañey ro maha voarombak' antika, le hambañe amy zay iereo.

¹² Fonga nianjiñe i màroy, nianjiñe ty nitalilie' i Barnabasy naho i Paoly o viloñe naho halatsàñe nanoen' Añahare añivo' o kilakila 'ndatio añam' iereoo.

¹³ Ie nigadoñe i fitaliliañey, le hoe ty natoi' Iakobe: O roahalahio, ijanjiño, ¹⁴ Fa nitalilia' i Simona i fitilihan' Añahare valoha'ey, handrambesa'e ondaty amo kilakila ondatio ho amy tahina'ey, ¹⁵ mira amo nitsarae' o mpitokio, amy pinatetseio ty hoe:

¹⁶ Ie aña, le hibalike raho
naho hamboareko indraike
i kivoho' i Davide nirotsakey;
ho tsenèko indraike i nikoromakey,
vaho hatroako,
¹⁷ soa te hipay IEHOVÀ ondaty ila'eo
toe ze kilakila ondaty
tokaveñe ami'ty añarako,
¹⁸ hoe t'IEHOVÀ mampahafohiñe
o raha zao boake haehae aña.*

¹⁹ Aa le hoe ty safiriko, te tsy holañen-tikañe o mitolik' aman' Añahare boak' amo kilakila ondatio, ²⁰ fe anokiran-tika taratasy, hifoneña' iareo ze raha nitivae' o hazomangao naho ty hakarapiloña naho ty henam-biby nidadeñañe vaho ty lio[†]. ²¹ Amy te nitaroñeñe haehae amy ze kila rova t'i Mosè, ie vakieñe am-pitontonañ' ao boa-tSABATA.

Entañe ho a o kilakila ondatio

²² Aa le nisatrie' o Firàheñe naho o beio naho i fivory iabiy ty hijoboñe ondaty am'iereo ao, hihitrike mb'e Antiokia aña mindre amy Paoly naho i Barnabasy. Le jinoboñe t'i Joda (atao Barsabasy) naho i Silasy, ondaty mpiaolo amo rahalahio. ²³ Aa le nisokireñe ty hoe am-pita'iareo: Ry Firàheñe naho o roahalahy beim-pivorio, Ho amo rahalahy boak' amo kilakila' ndatio e Antiokia naho e Sirià vaho e Kilkia aña: Talilio' areo: ²⁴ Ie jinanji'ay te boak'ama'ay atoy o tsy nitoroa'aio, nitsibore anahareo an-tsaontsy nañembetse, ²⁵ le natao'ay t'ie nivory am-pitraofan-drehake, te hahasoa ty hijoboñe ondaty tsy ampeampe hampombañe mb' ama' areo mb'eo mindre aman-drañe'ay sarotse, i Barnabasy naho i Paoly— ²⁶ ondaty nihirimbeloñe ty amy tahina' i TALÈ IESOÀ Norizañey. ²⁷ Aa le nampihitrife'ay t'i Joda naho i Silasy hamente o entañe zao am-palie ²⁸ amy te hoe nò' i Arofo Masiñey naho zahay ty tsy hanovoña'ay kilankañe mandikoatse o fañè rezao: ²⁹ Falio ze raha nisoroñañe an-kazomanga naho ty lio naho ze dinageñañe vaho ty fandrañaotañe. Mahasoa anahareo te ifoneñañe. Maniñtsiña.

³⁰ Aa le nampionjoneñe mb'eo iereo naho nivotrake e Antiokia le natonto' iereo i Fivoriy vaho natolotse i taratasiy. ³¹ Ie vinaki' iereo le niehake ty amy fañosihañey. ³² Aa kanao mpitoky t'i Joda naho i Silasy, le

* **15:18** Amo 9:11,12 † **15:20** Fot 22:20, Sor 17:7, Its 32:17,21, 1Ko 10:14,20-22; Vol 25:1-3, Sor 17:7; Fot 9:4, Eze 33:25, Rzt 21:25; Sor 17:10-14

nañosike naho nañafatratse o roahalahio an-tsaontsy maro. ³³ Ie roñoñe aña, le nampañaveloe' o rahalahio himpoly mb'amo nañitrik' iareoo mb'eo‡. ³⁵ Fe nitambatse e Antiokia ao t'i Paoly naho i Barnabasy mindre ami'ty ila'e maro, nañoke naho nitaroñe ty tsara' IEHOVÀ.

Ty Lie' i Paoly amy Barnabasy

³⁶ Ie nahamodo andro tsiampeampe, le hoe t'i Paoly amy Barnabasy: Antao hibalike naho hitilike o roahalahin-tika amy rova iaby nitaroñantika o tsara' i Talèo reio, hañontane iareo. ³⁷ Sinafiri' i Barnabasy ty hinday i Jaona (atao Marka) hitrao-dia, ³⁸ fe nifahara' i Paoly te tsyahasoa te hindeseñie ie nivik' am'iareo e Pamfilià aña naho tsy nindre am-pitoroñe. ³⁹ Aa le akore ty fifanjomora' iareo kanao nifampipitsoke. Nendese' i Barnabasy t'i Marka nijon-dakañe mb'e Kiprosy aña, ⁴⁰ le jinobo' i Paoly t'i Silasy vaho nienga, ie fa nitatae' o roahalahio ho ami'ty hasoa' i TALÈ. ⁴¹ Le niranga mb'e Sirià naho e Kilkia mb'eo re nañafatratse o Fivorio.

16

Nitraofa' i Timoty

¹ Nimb'e Derbe naho mb'e Listra aña t'i Paoly le nanjo ty mpiòke atao Timoty, ana' ty rakemba Jiosy, mpiato; Grika ty rae'e. ² Nitalili-soa aze o rahalahy e Listra naho Ikaoniomao. ³ Niteà' i Paoly ty hindreza'e lia, le rinambe'e vaho nisavare'e ty amo Jiosy nitobokeo, amy te songa nahafohiñe ty rae'e ondatio t'ie Grika. ⁴ Ie niranga i rova rey le nitaroñe o fañè najado' i Firàheñe naho i beim-pivory e Ierosaleme aña rey hambenañeo. ⁵ Aa le niventèñe am-patokisañe o Fivorio vaho nitovoñe lomoñandro.

Ty Koi' Indaty nte Makedoniay

⁶ Nañariary mb'e Frigià naho am-paripari' i Galate iereo, amy te rinara' i Arofo Masiñey tsy hitaroñe i tsaray an-tane' Asia aña. ⁷ Ie pok' e Misià eo, le nipay higodañe mb'e Bitinia fe tsy napo' i Arofo' IESOÀY. ⁸ Aa le rinio' iereo ty Misià vaho nizotso mbe Troasy mb'eo.

⁹ Nisodehañe amy Paoly haleñe añ' aroñaroñe t'indaty nte Makedonia nijohañe eo nihalaly ama'e ty hoe: Mitsahà mb'e Makedonia mb' etoa hañolots' anay. ¹⁰ Ie niaroñaroña' i Paoly, le nikotepe amy zao zahay hionjoñe mb'e Makedonia aña, fa napota'ay ty hatò t'ie kinanjin' Añahare hitaroñe am'iereo i talili-soay.

Ty Fatokisa' i Lidiae

¹¹ Aa le nijon-dàkañe boak' e Troasy naho nivantañe mb'e Samotrakia, vaho nimb'e Neapolia aña amy loak' àndroy. ¹² Boak' ao le nimb'e Filipy, ty rova-fiaolo amy fari' i Makedoniay, fa aman-tobe ty ao. Nitobok' amy rovay andro tsy ampeampe zahay.

¹³ Ie ami'ty andro Sabotse, niavotse i rovay nimb' añ'olon-tsaka mb'eo, fa inao toem-pitalahoña ty ey, le nitoboke nifanaontsy amo rakemba nivorivorio. ¹⁴ Nahatsendreñe ty rakemba atao Lidiae, mpanao balike lamba malò-mavo an-drova atao Tiatira, mpitalaho aman' Añahare; le sinoka' i TALÈ ty arofo'e vaho hinao'e ty nitaroña' i Paoly. ¹⁵ Ie nalipotse naho o añ'anjomba'eo le nambarà'e ami'ty hoe: Naho atokisa' areo ty fiatoako amy TALÈ, le mirovà an-trañoko vaho mañialoa ao. Le nazi'e zahay.

‡ 15:33 34:Fe nikitra' i Silasy ty nitofa ao.

Am-balabey ao t'i Paoly naho i Silasy

¹⁶ Teo t'ie nimb'am-pitalahoam-beo ro nifanojeha ami'ty ampela amam-paňahy nahafitoky, ie nanontoňe vara maro amo talè'eo amy fizeke'ey.

¹⁷ Norihe'e t'i Paoly naho zahay nitazataza ty hoe: Mpitoron' Añahare Andindimoneňey ondati-retia, mpanoro antika i lalam-pandrombahaňey.

¹⁸ Andro maro t'ie nitolom-panao izay. Aa ie niembetse t'i Paoly, nitolike le nanoe'e ty hoe amy angatsey: Lilieko amy tahina' IESOÀ Norizaňey, Iakaro! Le nifaok' ama'e amy oray avao.

¹⁹ Aa ie nirendre' o temp'o'eo te nifaok' am'iereo ka ty fitama' iareo vara, le tsinepa' iereos t'i Paoly naho i Silasy vaho kinovovò' iereos mb' an-tsena mb' aolo' ondaty beio mb'eo, ²⁰ le nasese añatrefa' o bei' i rovaio, naho nanoa' iareo ty hoe: Mampirehoreho ty rova toy ondaty retiaňe, fa Jiosy, ²¹ vaho mandrisike sata faly tsy mete rambesentika ndra hambenan-tika nte-Roma. ²² Aa le nitrao-piongake hiatreatre am' iareo i lahialeňey; naho nihaloe' o beio am'iareo o saro'eo vaho linily t'ie ho fofohen-kobaiňe. ²³ Aa ie kinabokabo' iareo fofoke, le natafasiotse am-pandrohizaňe ao vaho nafantok' amy mpigarim-balabeiy te hambenaňe soa. ²⁴ Kanao izay ty nandiliaňe aze, le najo'e am-po' ty efetse làlek' ao iereos, vaho nazi'e andabarò o fandia'eo.

²⁵ Aa ie nimatokalembey, naho niloloke naho nisabo aman' Añahare avao t'i Paoly naho i Silasy am-pijanjiňa' o mpirohio, ²⁶ le nivovoáty ezeňezen-tane ra'elisy, nahaffiozoňozoňe o faha' i porozòio, songa sinoka'e o lalam-beio vaho sindre binala'e o silisilio. ²⁷ Tsekak' amy firota'ey i mpigarim-balabeiy le naheo'e te nidaňadaňa o lalam-beim-balabeio vaho napontsoa'e ty fibara'e hamoy aiňe amy te natao'e te nibolatitse o rinochio. ²⁸ Fe pinaza' i Paoly ty hoe: Ko mijoy vataňe! Hene atoan-jahay! ²⁹ Aa le nitoka jiro i mpigaritsey naho nihitrike mb'eo nititititike vaho nihotruk' am-pandia' i Paoly naho i Silasy eo. ³⁰ Nakare'e le nanoe'e ty hoe: O androanavio, ino ty hanoeko handrombako fiaiňe? ³¹ Le hoe iereos: atokiso i TALÈ IESOÀ, le ho rombaheňe—ihe naho o aň'anjomba'oo, ³² le nitaroňa'e ty tsara' IEHOVÀ vaho amo aň'anjomba'e iabio. ³³ Nindese'e amy ora' i haleňei y iereos nanasa o fereo, le nalipotse, ie naho o aze iabio; ³⁴ naho nampihovae'e aň'anjomba'e ao iereos naho nanjotssoa'e vaho nirebeke te niatoa'e t'i Andrianaňahare, ie naho o keleia'e iabio. ³⁵ Ie nazava i àndroy, le nirahe' o beio o lahindefoňeo ami'ty hoe: Avotsoro indaty rey.

³⁶ Aa le natalili' i mpigaritsey amy Paoly i entaňey, ami'ty hoe: Fa nampaňitrike ty hoe o beio t'ie ho hahàňe. Miavota arè, maňaveloa am-panintsiňaňe. ³⁷ Fa hoe t'i Paoly am'iereo: Vinangovango' iareo am-batraike tsy aman-jaka, zahay nte-Roma, vaho najo' iareo am-balabey ao. Aa vaho haronjeňe mb'eo hao henaneo am-pianjiňaňe? Aiy! Soa te ie ro homb' etoa haňavotse anay. ³⁸ Ie natalili' i mpigaritse rey amo beio i saontsiy, le nihembaňe te nahajanjiňe t'ie nte-Roma. ³⁹ Aa le nimb' eo iereos nifelek' am' iareo, nanese vaho nihalaly t'ie hiavotse i rovay. ⁴⁰ Niakatse i porozòy iereos le nimb' aň'anjomba' i Lidiae mb' eo naho nahaoniňe o rahalahio naho naňohò iareo, vaho nienga.

Hotakotake e Tesalonika aňe

¹ Ie niranga i Ampifolia naho i Apolonia le nandoake e Tesalonika fa ama'e ao ty Fitontonan-Jiosy. ² Nizilik' am-pitontonaň' ao t'i Paoly

amy lili'ey, le nitoroa'e boak' amo Sokitse Masiñeo ami'ty SABOTSE telo,
³ nampalange naho nampidodea te ts-mahay tsy njale i Norizañey vaho
nitroatse amy havilasiy, ami'ty hoe, IESOÀ itaroñakoy, ie 'nio i Norizañey.
⁴ Niantoke ty ila'e le nirekets' amy Paoly naho i Silasy; nanao zay ka ty
maro amo Grika mpitalahoo, vaho maromaro amo roakemba beio.

⁵ Fe nañitrike ondaty tsivokatse boak' an-tsena ao am-pikirañañe, o
Tehodao, nitrobotrobo i lahialeñey, nampivalitsingorake i rovay; vaho
nifajifajy mb' añ' anjomba' i Jasona hañakaraña iareo mb'amy māroy.
⁶ F'ie tsy nitendreke; le kinororòke mb'añatrefa' o bei' i rovaio mb'eo t'i
Jasona naho ty roahalahy ila'e, vaho nitazataza ty hoe: Hehe te nivotrak'
atox ka o mpampibalitaboake ty tane toio, ⁷ mbore nampihovae' i Jasona.
Mandilatse o lilin-Kaisarao ty sata' iareo le inao eo ze o mpanjaka tovo'e
atao IESOÀ zao. ⁸ Ie nahajanjiñe zay, le nitsiborehetoke i lahialeñey naho
o bein-drovao. ⁹ Le nampandoa' iareo àntoke t'i Jasona naho o rañe'eo
vaho navotsotse.

E Berea ao

¹⁰ Aa le nahitri' o roahalahio aniany amy haleñey mb'e Berea mb'eo
t'i Paoly naho i Silasy. Ie pok' eo le nizilik' am-pitontonan-Jiosy ao.
¹¹ Nivañoñe te amo nte Tesalonikao iretoa, amy t'ie nandrambe o tsarao
am-pahimbañañe vaho nañotsohotso o Sokitse Masiñeo lomoñandro
handrendreke ty hatò' o raha zao.

¹² Aa le maro ty niantoke, miharo ami'ty roakemba maromaro aman-
kasy naho amo lahilahy Griko. ¹³ Aa ie nifohi' o Jiosy nte Tesalonikao
te mbore nitaroñe i tsaran' Añaharey e Berea t'i Paoly, le niheo mb'eo
ka iereo nitrobo i lahialeñey. ¹⁴ Le nampihitrife' o roahalahio pak'an-
driak' añe aniany t'i Paoly, fe mbe nitambatse eo t'i Silasy naho i Timoty.
¹⁵ Nasese' o lahilahio pak' Atena aña t'i Paoly; le nimpoly ninday saontsy
amy Silasy naho i Timoty ty homb'ama'e aña masika.

Atena ao

¹⁶ Nandiñe iareo e Atena ao t'i Paoly fe nitsimboetse aña'arofo t'ie
nahaisake te lifo-kazomanga i rovay. ¹⁷ Aa le nitaroñe lomoñandro amo
Jiosio naho amo mpañeveñe aman' Añahareo am-pitontonañe ao naho
an-tsena ey amy ze nifanampe ama'e. ¹⁸ Nifanaontsy ama'e ka o mpikaro-
kihitse amo Epíkoreo naho amo Stoikao. Hoe ty ila'e: Ino ty ho volañe' ty
mpangaradadake tia? Hoe ka ty ila'e: Hoe t'ie mpitalily ndrañahare hafa,
amy t'ie nitaroñe IESOÀ naho i fivañonambelo'ey. ¹⁹ Rinambe' iereo naho
nasese mb'ami'ty Areopagò mb'eo, le nanao ty hoe: Ehe ampahafohino
anay te inoñe o fañohañe vao saontsie'oo; ²⁰ amy t'ie minday enta
ankafankafa an-dravembia'ay, paia'ay ty hahafohiñe ty lengo' o raha zao.
²¹ (Toe fonga tsy nanao inoñ' inoñe o nte Atenao naho ze ambahiny ao
naho tsy ty hitalily ndra ty hijanjiñe ze atao vao lomoñandro.)

²² Aa le nijohañe aña'ivo' i Vohi-Arese eo t'i Paoly nanao ty hoe: O ry nte
Atenao! Treako t'ie vata'e mpitalaho amy ze he'e. ²³ Izaho nijenlajelañe,
nisamba o fitalaho' areoo, le nizoeko ty kitrely nipatereñe ty hoe: Ho
amy t'i Andrianañahare tsy Fohiñe. Aa le hitaroñako i italahoa' areo fa tsy
apota' areoy. ²⁴ I Andrianañahare nanao ty voatse toy naho ze he'e ama'ey,
ie i Talè i likerañey naho ty tane toiy vaho tsy mpimoneñe an-kibohotse
nanoem-pitâñe re*; ²⁵ mbore tsy atràm-pitâ' ondaty—ino ty paiae'e? Ie ty

* 17:24 Oni Top 7:48

mpanolo-kaveloñe naho arofo vaho ze he'e. ²⁶ Le songa namboare'e andio raike ze foko' ondaty, himoneña'e an-tane atoy, le ie ty nisafiry o sàñ' andro hiraoraoa' iareo, vaho ty efem-pimoneña' iareo; ²⁷ soa te hipay an' Andrianañahare, hitsoek' aze, he ho tendreke, ie tsy lavitse an-tikañ' iaby. ²⁸ Fa ama'e ao tika ro veloñe naho mihetseke vaho manañ' aiñe, manahake ty fitaroña' o mpahay sabo' areoo, ty hoe: Tarira'e ka tikañe. ²⁹ Aa kanao tariran' Añahare tika, le tsy mete ty fitsakorean-tika te ampihambañeñe ami'ty volamena ndra volafoty ndra vato nisokireñe an-kilala naho ami'ty hihi' ondatio i Masiñey. ³⁰ Ie nihevea'e heike an-tsa habahimoñañe, ro taroñen' Añahare henaneo te tsi-mete tsy hene misoloho ondatio ndra aia aia, ³¹ amy te nifotoàña'e andro zaka an-katò ty voatse toy añam' indaty tinendre'ey[†]; ie niventè'e amy ze kila ondaty amy nampitroara'e an-kavilasy.

³² Aa ie jinanji' iereo ty hoe: Fitroarañ' an-kavilasy, le nikobiha' ty ila'e, vaho hoe ka ty ila'e: Mbe hijanjiña'ay indraike. ³³ Aa le nienga iareo t'i Paoly. ³⁴ Fe nipitek' ama'e t'indaty ila'e vaho niato. Tam' iereo t'i Dionisio, mpiamy Areopagoy, naho ty rakemba atao Damarie vaho ty ila'e.

18

E Korinto ao

¹ Ie aña, le nienga i Atena t'i Paoly mb'e Korinto mb'eo. ² Le tendreke ty Jiosy atao Akoila, nisamak' e Ponto, ie vaho nivotrake boak'e Italia rekets' i Prisilae, vali'e, (ami'ty nandilia' i Klaudio te hakareñ' amy Roma ze atao Jiosy.) Le niheova'e, ³ aa kanao nihamban-tolon-draha, le nimoneñe am' iereo ao, nitrao-pitoroñe, fa sindre mpamboatse lamban-kibohotse. ⁴ BoatSABOTSE re nañoke am-pitontonañe ao, nandrekets' o Jiosio naho o Grikao.

⁵ Ie pok'eo boake Makedonia aña t'i Silasy naho i Timoty, le nazin' arofo t'i Paoly hitaroñe amo Jiosio te IESOÀ i Norizañey. ⁶ Aa ie nandietse naho nanivete avao, le nakopi'e o saro'eo, nanao ty hoe: Ami'ty añambone' areo o lio' areoo! Malio raho, fa homb' amo kilakila ondatio henane zao. ⁷ Niakatse re, niheo mb' añañ' anjomba' ty atao Titosy Josto, mpitalaho aman' Añahare, ie nipitek' amy fitontonañey i anjomba'ey. ⁸ Niantoke i TALÈ t'i Krispo, bei' i fitontonañey, naho o añañ' anjomba'e iabio; le maro amo nte-Korinto ro nahajanjiñe naho niato vaho nalipotse.

⁹ Nañento i Paoly haleñe añañ' aroñaroñe t'i TALÈ, ami'ty hoe: Ko hembañe, fa mitaròña, le ko mianjiñe, ¹⁰ amy te mindre ama'o raho vaho tsy ao ty hiambotrak' ama'o hijoy, fa maro ty ondatiko an-drova atoy. ¹¹ Aa le nitoloñe ao taoñe raike tsy enim-bolañe re nañoke o tsaran' Añahareo am'iareo.

¹² Ie nimpifehe' i Akaia t'i Galio, le nifandrimboñe o Tehodao nañoridañe i Paoly, vaho nasese' iareo mb'an-jaka. ¹³ T'indaty tìañe, hoe iareo, manigìke ondatio hitalaho aman' Añahare am-pirangañe Hake. ¹⁴ Ie fa ho nanoka-palie t'i Paoly, le hoe t'i Galio amo Tehodao, Naho ie mioza andilatse ndra halolðañe, ry Tehodao, le ho nitò te nifeahako. ¹⁵ Fe kanao ontane ty amo tsaraø naho o tahinañeo vaho i lili' areoy—le mifandahara, fa tsy ho zakaeko. ¹⁶ Le rinoa'e hisitak' amy fiambesam-pizakañey. ¹⁷ Aa le niambotraha' i màroy t'i Sostena, bei' i fitontonañey le kinabokabo' iereo añatrefa' i fiambesam-pizakañey, fe tsy nihaoñe' i Galio.

Mibalike mb'Antioquia mb'eo

[†] 17:31 Oni Top 10:42

¹⁸ Ie nitambatse ela ao t'i Paoly, le niavotse amo roahalahio, vaho nijondàkañe mb'e Sirià aña mindre amy Prisilae naho i Akoila, ie fa nihitsife'e e Kenkrea ao hey o maroi'eo ami'ty fanta nanoe'e. ¹⁹ Ie nivotrake Efesosy aña, le nenga'e eo iereo, vaho nizilik' am-pitontonañ' ao nifañotsohotso amo Jiosio. ²⁰ Nihalalie' iereo t'ie hitambatse ao, fe tsy nimete. ²¹ Fa hoe re amy fienga'ey: Tsy mete tsy ambenako e Ierosaleme ao i sabadidake fa antitotsey, f'ie hibalike naho non' Añahare; le nijon-dakañe Efesosy ao.

²² Ie nandoake e Kaisaria aña, le nionjoñe mb'eo nifañontane amy Fivoriy, vaho nizotso mb'e Antiokia mb'eo. ²³ Teo hey re, vaho nienga nañariary an-tane Galate naho e Frigià aña nampaozatse o mpiòke iabio.

Ty Fitoroña' i Apolosy

²⁴ Ie amy zao nivotrake Efesosy ao ty Jiosy atao Apolosy, nte Aleksandria; ondaty fonitse hilala, maozatse amo Sokitse Masiñeo. ²⁵ Toe naòke ami'ty lala' i TALÈ indatiy, le naringatse an-stroke, nitalily naho nañanatse IESOÀ an-katò, fe ty fampilipora' i Jaona avao ty nifohi'e. ²⁶ Niorotse nilañoñe an-kasibehañe am-pitontonañ'ao re; aa naho nahajanjiñe aze t'i Prisilae naho i Akoila, le natola' iareo, vaho nampalangesañe an-katò o satan' Añahareo. ²⁷ Ie nisalalae'e ty homb' Akaia mb'eo, le nirisihe' o roahalahio an-tsokitse o mpiòke aña ty handrambe aze. Ie pok' eo le vata'e nimbae'e o nahafiatu amy hasoao. ²⁸ Amy te niliere'e an-ozatse am-batraike ey o Jiosio le naboa'e amo Sokitse Masiñeo te toe IESOÀ i Norizañey.

19

Efesosy ao

¹ Teo t'ie e Korinto aña t'i Apolosy, le niranga i tane aboy t'i Paoly naho nipoteake e Efesosy ao vaho nitendreke mpiòke, ² le nanoa'e ty hoe: Rinambe' areo hao i Arofo Masiñey te niantoke? Aiy! hoe ty natoi' iareo: mbe tsy nijanji'ay i Arofo Masiñey. ³ Aa le hoe re: Ami'ty inoñe arè ty nampiliporañe anahareo? Ty fampilipora' i Jaonay, hoe iareo. ⁴ Aa le hoe t'i Paoly: Toe nandipotse ami'ty fandiporam-pisolohoañe t'i Jaona, hatokisa' iareo i manonjohy azey: IESOÀ izay. ⁵ Ie jinanji' iereo, le nalipotse ami'ty tahina' IESOÀ TALÈ. ⁶ Le nanampeza' i Paoly fitañe naho nivotraha' i Arofo Masiñey naho nilikoliko vaho nitoky. ⁷ Va'e folo ro'amby indaty rey.

⁸ Nizilik' am-pitontonañ'ao t'i Paoly le nilañoñe telo volañe, am-pahavaniañe nitaroñe naho nañosike iareo amy Fifehean' Añaharey. ⁹ Aa ie nihagàñe ty ila'e naho nanjehatse mbore nanivetive i Lalañey añatrefa' i màroy, le nisitaha'e naho nave'e o mpiòkeo vaho nañotsohotso boak' andro an-dakilasi' i Tirano ao. ¹⁰ Nitoloñe' iereo roe taoñe zay, aa le hene nahajanjiñe ty tsara' IEHOVÀ o mpimoneñe Asiao, ndra Jiosy ndra Grika.

O Ana' i Skevao

¹¹ Nitolon-draha tsitantane am-pità' i Paoly t'i Andriañahare, ¹² ie nendeseñé boak' an-tsandi'e ty sarimbo ndra masoara mb' amo silokeo le nifiañe i hasilokey vaho nifaok' aña o angatseo.

¹³ Aa le rinambe' o Jiosy mirererere mpitrobo-angatseo ty fikaikaihañe i tahina' IESOÀ ambone' o vinolevolen-kokolampao, ami'ty hoe: Lilie'ay rehe ami'ty tahina' IESOÀ tseize' i Paoliy. ¹⁴ Nanao zay ka ty anadahy fito' i Skeva, Jiosy, talèm-pisoroñe, ¹⁵ aa le tinoi' i anga-dratiy ty hoe: Fantako t'IESOÀ, apotako i Paoly, fa ia v'inahareoo? ¹⁶ Le niambotraha' indaty niangara' i kokolampaiy naho fonga ginore'e vaho rineba'e, le

nibotatsak' amy anjombay iereo nibongibongy naho nitsiri-dio. ¹⁷ Kanao hene naharendreke zay ndra Jiosy ndra Grika mpimoneñe Efesosy ao le nivotraha' ty eveñe, vaho nonjoneñe ty tahina' IESOÀ TALÈ. ¹⁸ Aa le maro amo nahafiatoo ty nimb'eo nisoloho, vaho namoraborake o sata'eo. ¹⁹ Natonto' ty mpisikily maro ka o boke'eo naho niforototoe' iereo am-batraike. Ie vinolily, le nizoeñe te drakma lime ale ty vili' irezay. ²⁰ Aa le nienatse an-kaozarañe ty tsara' IEHOVÀ vaho nahareketse.

²¹ Ie niheneke, le sinafiri' i Paoly añ'arofo ty hiranga i Makedonia naho i Akaia mb'e Ierosaleme aña; aa hoe re: Naho hirik' aña le tsi-mahay tsy hitilike i Roma ka raho. ²² Aa le nampihitrife'e mb'e Makedonia mb'eo ty mpitoro'e roe, i Timoty naho i Erasto, ie nitambatse an-tane' Asia ao heike.

Ty Hotakotake e Efesosy ao

²³ Ie amy zay, nipoñake ty fitrobotroboañe jabajaba ty amy Lalañey. ²⁴ Teo ty mpanefe vola fotsy atao Demetrio, mpamboatse hazomanga volafotsy ho amy Artemise, ze nampivangongo ty fitoloña' o mpanefeo. ²⁵ Kinoi'e hivory o mpitrapo-tolon-drahao, vaho hoe ty asa'e: O androanavio, fohi' areo te o tolon-drahao ro mampiraorao an-tika; ²⁶ naho isa' areo naho janji' areo te tsy e Efesosy avao fa didý tsy mahatsitsike i Asia ty fañosiha' i Paoly i màroy hiambaho, ie manao te tsy ndrañahare ka o satam-pitàñeo. ²⁷ Aa tsy te i balibalin-tikañey avao ty ho mavoeñe, fa honjirañe ka ty anjomban-drañahare-ampela Artemisey hampifotsak' i fiambesam-bolonahe'ey ie italahoa' i Asia iaby naho ty voatse toy.

²⁸ Ie nahajanjiñe iereo, le nilifom-piforoforo vaho songa nikoràke ty hoe: Ra'elisy t'i Artemise' o nte Efesosio! ²⁹ Aa le nitsitsike fivalitaboahañe i rovay, le nihitrihitry hoe raike mb'an-tameañe ey, naho kinozozo' iareo t'i Gaio naho i Aristarko nte-Makedonia, mpitrapo-lia amy Paoly. ³⁰ Ho naneñateña amy fiharondembohañ' ao t'i Paoly fe tsy napo' o mpiòkeo. ³¹ Nañitrik' ama'e ka ty ila' o bei' i Asia rañe'eo, ty tsy hitoña'e i tameañey. ³² Aa le nikoràke hoe zao ty ila'e naho hoe zay ty ila'e amy te nifamalitaboak' i favoriy vaho ninofi' i màroy ty talim-pivoria'e. ³³ Tamymàroy ty nampibejañe i rahay amy Aleksandro le naronje' o Jiosio mb'aolo mb'eo. Aa le nanondrotondro fitàñeo t'i Aleksandro hiveroke amo nivorio. ³⁴ Fe naho nifohi' i màroy t'ie Jiosy, le niriñõne' iereo an-tazataza añate' ty roe ora ty hoe: Ra'elisy t'i Artemise' i Efesosy!

³⁵ Ie nampianjiñe i lahialeñey ty silikitera' i rovay le hoe ty asa'e: Ry ondaty nte Efesosio, Ia t'indaty tsy mahafohiñe te mpañambeñe ty anjomba' i Artemise ra'elisy nivotrak' atoy boak' andindiñ' aña, ty rova' o nte-Efesosio? ³⁶ Aa kanao tsy hay liereñe, le kitra'e hianjiñe nahareo tsy hanao ty hajagarigariañe, ³⁷ amy te nasese' areo mb'etoa ondaty tsy mpamaok' anjomba miavake vaho tsy mpanivetive an-drañahare-ampela-tikañey. ³⁸ Aa naho te haneseke ondaty t'i Demetrio naho o mpanao satam-pitàñeo, le misokake i zakay, vaho ao o sorotào, angao iereo hifampaneske. ³⁹ Hera t'ie aman-draha hafa tea' areo ho bentareñe, fe am-pivory to ao ty ilaharañe. ⁴⁰ Toe marivo ho sangieñe tika ty amy hotakotak' anindroaniy, ie tsy aman-taly hamolilia'ay ty fañotakotahañe toy. ⁴¹ Ie niheneke i saontsi'ey, le naba'e aña i màroy.

¹ Aa naho nijihetse i koràkey, le nampihitrife' i Paoly mb' ama'e o mpiòkeo naho nifetrehe'e vaho nionjoñe mb'e Makedonia aña.

² Nirangae'e o taneo, nañosike ondatio an-tsara maro vaho nandoake e Grisia aña,

³ Nañialo telo volañe aña re. Aa naho nivoñoñ' aze o Tehodao ie ho nijon-dakañe mb'e Sirià mb'eo, le sinafiri'e ty hibalik' am-pirangañe i Makedonia. ⁴ Nindre ama'e t'i Sopatera ana' i Piro nte Berea naho i Aristarko naho i Sekondo nte Tesalonika naho i Gaio nte Derbe, le i Timoty naho i Tikiko vaho i Trofimo nte-Asia. ⁵ Niaolo anay iereo vaho nandiñe e Troasy ao. ⁶ Aa naho niheneke o andro-Mofo-po-dalivaio le nijon-dakañe boak'e Filipy zahay; ie nimodo ty andro lime le nifanampe am'iereo e Troasy ao vaho nitambats' ao fito andro.

Halen-Tsabate e Troasy

⁷ Ie tsofotse ty andro' i SABOTSEY, ie fa nivory hamolake mofo o mpiòkeo, le nitaroñe am'iereo t'i Paoly, fa satri'e ty hiavotse amy loak' àndroy, aa le nitolom-pilañoñe ampara' te antets' aleñe re. ⁸ Nimaro ty jiro ambatsa nivoria'ay ao, ⁹ le nitobok' an-dalan-kede eo ty ajalahy atao Eotika naho nikonkoñe, aa ie tinohitohi' i Paoly i lañona'ey, le nilañake ty roro i ajalahiy naho nikapotrake intelo riha mb'an-tane mb'eo vaho fola-manta te nongaheñe. ¹⁰ Nizotso mb'eo t'i Paoly nihohok' amy ajalahiy, ie nifihine'e, le hoe re, Ko hembañe, fa ama'e ty fiai'e! ¹¹ Niañambone indraike t'i Paoly namolake mofo naho nikama, le nitolom-pitaroñe ampara' te niporea ty maraindray vaho nienga. ¹² Nindese' iareo veloñe, am-panintsíñañe, i ajalahiy.

Mitata Ondaty nte Efesosio t'i Paoly

¹³ Fa niaolo aze an-dakan-jahay, nionjoñe mb'e Aso mb'eo, hampijoñe i Paoly aña amy namotoaña'ey, ie nañavelo am-pandia. ¹⁴ Aa ie nifanampe ama'ay e Aso ao, le najo'ay vaho nitolom-b'e Mitilena mb'eo. ¹⁵ Nionjoñe boak'ao zahay le niporopotitse tandrife' i Kio te loak' àndro. Amy hamarai'ey ka le nivotrake e Samo, vaho nandoake e Mileto aña amy loak' àndroy. ¹⁶ Sinafiri' i Paoly ty handrioñe i Efesosy tsy handrita'e andro maro e Asia ao, fa sinda te hañambeñe ty andro' i Halimampoloy* e Ierosaleme ao.

Mifanaontsy amo nte-Efesosio t'i Paoly

¹⁷ Nampihitrike Efesosy aña boak'e Mileto re, nikoike o beim-Pivorio. ¹⁸ Ie nitotsak' ama'e, le hoe re: Fohi' areo, boak'amy andro valoha'e nivotrahako Asia atoiy, ty fivelomako ama' areo ze hene sà nitraofantika rezay, ¹⁹ nitoroñe i TALÈ am-pirèhan-troke naho ranomaso maro ndra te teo ty fitsohañe ahy amo fikinià' o Tehodao; ²⁰ tsy nitsikifotse tsy hitaroñako ze mete mañasoa, fe nanoro anahareo an-tameañe vaho ki-anjomba-anjomba. ²¹ Nafèko amo Jiosio naho amo Grikao ty fisolohoña aman'Añahare naho ty fatokisañe IESOÀ Talèntika Norizañey.

²² Ie henanekeo, oniño te mionjoñe mb'e Ierosaleme mb'eo an-troke mirohy lenofiko o raha mete hizò ahy aña; ²³ naho tsy te mañatahata ahy amy ze rova iaby i Arofo Masiñey t'ie mandiñe rohy naho sarerake. ²⁴ Fe tsy volilieko ho vara amako ty fiaiko, hañenefako an-drebeke ty filaisako naho i fitoroñañe rinambeko am' IESOÀ TALÈY, t'ie mitaroñe i talili-soa' o falalàñ' Añahareoy.

* **20:16** Sor 23:10-21

²⁵ Inao, apotako henane zao te tsy hahaisake ty tareheko ka nahareo nindre amako amy fitaroñako i fifeheañey. ²⁶ Ataliliko ama' areo androany, te malio tahin-draho amy ze hene lio' ondaty, ²⁷ le tsy nifimpìñe tsy hitaroñe ama' areo ze fonga famerean' Añahare. ²⁸ Mitaoa, naho itaò o mpirai-lia'e iabio, o nampiandrazo i Arofo Masiñeo, hamahana' areo i Fivorin' Añahare vinili'e amy lio'ey. ²⁹ Apotako te zaho fa nienga, le hizilik' ama' areo ao o amboa romotseo[†] vaho tsy hapo'e i lia-raikey. ³⁰ Toe hiboak' ama' areo ty 'ndaty hiongake naho hivolan-kamengohañe, hanintake ty mpiòke ho am'iereo. ³¹ Aa le mitomira! naho mitiahia te nañeneke ty telo taoñe raho tsy nitroatse namere anahareo haleñe naho handro an-dranomaso.

³² Aa ie henaneo, tolorako aman' Añahare naho ami'ty Tsara' i hasoa'ey, ie ty mahatomambao anahareo, hanolotse anjara lova amy ze hene ondaty navaheñe. ³³ Tsy eo ty nikirañako volafoty ndra volamena ndra sarimbo. ³⁴ Toe fohi' areo te nañeneke o nipaiakoo naho o nitraok' amakoo o tañako retoa. ³⁵ Fa nitoroako amy ze he'e amy fifanehafañe zay, ty hañimbà' areo o malemeo, ie mitiahia ty tsara' i TALÈ IESOÀ manao ty hoe:
Haha ty manjotsa ta ty mandrambe.

³⁶ Ie niheneke i saontsi'ey, le nitongaleke vaho nitrao-pilolok' am'iereo iaby. ³⁷ Sindre nirovetse, namontititse ty fititia'e naho nañondrok' aze. ³⁸ Loho nampihontoke iareo i tsara nanoe'e te tsy ho isa' iereo ka i lahara'ey; le nasese' iereo mb' an-dakañe mb'eo.

21

Mañavelo mb'e Ierosaleme

¹ Ie nifamitsok' am'iereo, le nijon-dakañe naho niranga mb'e Kosy naho mb'e Rodo amy loak' àndroy, boak'ao le nimb'e Patara aña, ² naho nahtendreke lakañe hitsake mb'e Foenika mb'eo zahay le nijoñe vaho nionjoñe an-day. ³ Ie nahatalake i Kiprosy le nenga'ay am-pitàn-kavia, le nionjoñe mb'e Sirià vaho toly e Tirò eo, hanjotsoa' i lakañey i kilanka'e. ⁴ Nitsohe'ay o mpiòkeo, le nañialo am'iereo ao fito andro, ie nitolompanohiñe i Paoly añamy Arofoy ty tsy hionjoñe mb'e Ierosaleme aña.

⁵ Aa ie niheneke o andro'aio, le nionjoñe vaho nanonjohy i lia'aiy. Nanese anay ze hene mpiama'e reke-baly naho anake ampara' te nienga i rovay naho nitongalek' añ' olon-driake eo niloloke. ⁶ Ie nifanolo-pañanintsíñe, le nijon-dakañe, vaho nimpoly iereo.

⁷ Ie nihenefa'ay i lia boak'e Tirò le avy e Tolemaia, naho nifañontane amo mpiama'eo vaho niambahiny am'iereo andro raike. ⁸ Nionjoñe amy maraiñey zahay le nandoake e Kaisaria naho nizilik' añ'anjomba' i Filipo Mpitaroñe, mpiamy fito rey, vaho nañialo ama'e. ⁹ Efatse ty anak' ampela'e somondrara, songa mpitoky.

¹⁰ Ie nandrare tobok' andro maro ao, le nizotso hirik'e Iehodà aña ty mpitoky atao Agabo, ¹¹ niheo mb'ama'ay mb'eo, nandrambe ty fiètse' i Paoly le nandrohy o fità'eo naho o fandia'eo vaho nanao ty hoe: Hoe ty tsara' i Arofo Masiñey: Hambañe amy zao ty handrohiza' o Jiosy e Ierosalemeo ty tompo' ty fiètse toy, haneseañ' aze am-pità' o kilakila ondatio. ¹² Ie jinanji'ay, le nihalaly amy Paoly, zahay naho ondati' i toetseio, ty tsy hionjoñe mb'e Ierosaleme aña. ¹³ Aa hoe ty natoi' i Paoly: Inoñ' o iroveta' areo hampikoretse ty trokoo? Tsy t'ie ho vahoreñe avao, fa toe veka'e hikenkañe e Ierosaleme ao ty amy tahina' IESOÀ TALÈY. ¹⁴ Kanao

[†] 20:29 Mat 7:15-23, 10:16, Lke 10:3, Jao 10:12

tsy lefe nampiantofan-dre, le nado'ay ami'ty hoe: Ty satri' i TALÈ ro hanoeñe.

¹⁵ Añe i andro rezay, le nañalankañe zahay vaho nionjomb'e Ierosaleme mb' eo. ¹⁶ Nindre ama'ay ty ila' o mpiòke e Kaisario, le nendese' iereo mb'amy nte-Kiprosy atao Menasona, mpiòke hatrela'e, hañialoa'ay ama'e.

E Ierosaleme ao

¹⁷ Ie nandoake e Ierosaleme ao, le rinambe' o roahalahio antalatala-saba, ¹⁸ amy loakandroy le niheo mb' am' Iakobe t'i Paoly naho zahay, vaho tao iaby o beio. ¹⁹ Nifañontane am' iereo re vaho hene natalili'e kiraikiraike o raha nanoen' Añahare añivo' o kilakila 'ndatio amy fitoroña'eo. ²⁰ Ie jinanji' iereo, le nandrenge an'Andrianañahare vaho nanao' iareo ty hoe: O rahalahio, henteo te añ'aleale o Jiosy mpiatoo, songa mahimbañe an-Kake. ²¹ Toe nampandrendreheñe am' iereo te ihe mañòke ze fonga Jiosy añivo' o kilakila' ndatio ty hamorintseñe i Mosè, naho manoro te tsy ho savareñe ty ana' iareo vaho tsy horiheñe o lilitseo. ²² Inoñ' arè ty hatao? amy te tsu-mete tsy ho janjiñe t'ie pok'eo, ²³ aa le anò ze hatoro'ay azo: Ama'ay atoañe t'indaty efatse fehè' ty fanta. ²⁴ Endeso i lahilahy rey le itraofo fañeferam-batañe le avaho ty fañè' iareo amy fiharatañe añaamboney; vaho hene hahafohiñe te tsy amam-bente'e i nampahafohineñe azo iareo, f'ie toe mañavelo an-kavantañañe vaho mifahatse' amy Hàke. ²⁵ Aa naho o kilakila ondaty mpiatoo, fa nisokira'ay ty safiri'ay te hifoneña' iareo ze nisoroñañe an-kazomanga, naho ty lio, naho ze nidageañeñe, vaho ze hakarapiloña*.

²⁶ Aa le rinambe' i Paoly indaty rey, ie maraindray le nindre niefetse vaho nizilik' añ'anjomban' Añahare ao nitaroña te heneke o androm-piefera' iareoo ampara' te songa añaengàñe soroñe.

Nigoreñe t'i Paoly

²⁷ Aa ie ho nigadoñe i fito àndro rey, le natrabi' o Jiosy nte-Asia nahaisake iareo añañomban' Añahareo i màroy, hitsepak' aze, ²⁸ ami'ty koike ty hoe: Ry 'ndaty nte Israeleo, oloro! Intoy t'indaty mañòke sikal' aia sikal' aia ty handietse ondatin-tikañeо naho i Hake vaho ty toetse toy, mbore nampizilihe'e amy anjombay o nte-Grikao le naniva ty toetse-miavake toy. ²⁹ (Ie niisa' iereo an-drova ao nindre amy Trofimo nte Efesosy, naho sinafiri' iereo te nendese' i Paoly añañomban' Añahare ao.)

³⁰ Le nivalitsikotake iaby i rovay, naho niropake mb'eo ondatio nitsepak' i Paoly naho kinororò' iereo mb'alafe' i anjomban' Añaharey vaho vinarindriñe o lalam-beio. ³¹ Ie nimanea' iareo havetrake le nahatakatse i talèm-pirai-lian-dahin-defoñey, te nifandrakaraka iaby t'Ierosaleme; ³² aa le ninday lahindefoñe miharo mpifele-jato amy zao re nitsondem-boke te nizotso, nisorogoda mb'am'iareo ao. Ie zoe' i màroy i talè mandroron-dahin-defon-katsaorañe, le napo' iareo ty fikobokobohañ' i Paoly. ³³ Loneake eo i talèy nigore aze, le linili'e t'ie ho vahorañe an-tsivilisly roe, vaho hinerehere'e te ia, naho ze nanoe'e. ³⁴ Le hirik' amy màroy ty nitazataza izay, naho ty nikontsiañ' izao; aa kanao tsy haharendreke ty to amy fitabohazakey, le nampanase'e mb' aña' akibam-piosoñañ' ao. ³⁵ Ie pok' am-panongañe eo, le nonjone' o lahin-defoñeo antsoroke re ty amy haandoviah'a i lahialeñei, ³⁶ amy t'ie norihe' i màroy nikoiake ty hoe: Aseseo!

Ty Fiveroha' i Paoly

* **21:25** Oni Top 15:20

³⁷ Ie ho nazili' o lahin-defoñeo añ' anjomba ao t'i Paoly le hoe re amy talèy: Te hivolañe ama'o raho? Aa hoe re: Mahay Grika v'iheo? ³⁸ Tsy ihe hao i nte-Egipte nañoràke fakomale-bey, ninday 'ndaty mpamono efats' arivo mb' an-dratraratra añey? ³⁹ Hoe t'i Paoly: Jiosy raho, nte Tarsosy e Kilkia aña, tan-drova tsy atao tsotra. Ehe, apoho hitaroñe am' ondatio. ⁴⁰ Nimea'e lily, le nijohañe amy fanongañey t'i Paoly nanondrotondro am'ondatio am-pitâne, le nianjiñe do'e iereo vaho nilañona'e an-tsaontsy Hebreo[†] ty hoe,

22

¹ Ry aba naho roahalahio, janjiño hey o fiverokoo: ² Ie jinanji' iereo te nisaontsy am-pameleke Hebreo, le antsake te nianjiñe. Hoe re: ³ Jiosy raho, nitoly e Tarsosy e Kilkia aña, f'ie nibeizeñe an-drova atoy am-pandia' i Gamaliela naho nanareñe an-tsata to' i Han-droae naho nahimbañe aman' Añahare hambañe ama' areo iaby androany. ⁴ Nampisoañeko pak' am-pihomahañe i Lalañey; narohiko vaho nisioko am-porozò ao ndra lahilahy ndra ampela. ⁵ Valolombeloñ' amy zay i talèm-pisoroñey naho i firimboñan-droandriañey, boak' am' iereo ty nandrambesako taratasy ho a o rahalahio; vaho nionjoñe mb'e Damaskose hinday o aña mirohy mb'e Ierosaleme mb'etoa ho liloveñe.

⁶ Fe nizoeñe amy liako mb'eoy, ie nañarine i Damaskose te tsipinde-mena, te nivovò boak' andindiñey ty hazavàñe nireandreañe añariseho ahy. ⁷ Nikorovok' an-tane raho vaho nahatsanoñe ty fiarañanañañe nanao amako ty hoe, Saole! Saole! Akore te anoa'o samporerak' ahy? ⁸ Ia v'iheo, Rañandria? hoe raho. Le hoe re amako, Zaho IESOÀ nte Nazareta ampisoañe'oy. ⁹ Toe nahaisake i hazavàñey o amakoo, f'ie tsy nahaoniñe i fiarañanañañe nisaontsy amakoy. ¹⁰ Ino ty hataoko, Rañandria? hoe ty asako. Miongaha, hoe t'i TALÈ amako, Le migodaña mb'e Damaskose ao vaho ho saontsieñe ama'o ze he'e tinendre hanoe'o. ¹¹ Aa ie nigoa' ty fireandrea' i hazavàñey, le kinozozò' o nindre lia amakoo an-tañako vaho nimoake e Damaskose ao. ¹² Teo ty atao Ananiasy*, ondaty vañoñe, aman-Kake, niasia' ze kila Jiosy mpimoneñe ao. ¹³ Niheo mb' amako re nijohañe añ' ilako eo, le nanoa'e ty hoe: O rahalahy, Saole, mahaisaha! Le niandra raho nahatre aze amy oray avao. ¹⁴ Le hoe re: Jinobon' Añaharen-droaen-tika[†] rehe hahafohiñe ty satrin' arofo'e naho hahaisake i Vantañey vaho hahajanjiñe i fiarañanañam-palie'ey. ¹⁵ Ho valolombelo'e amy ze kila ondaty rehe, ty amo nioni'o naho jinanji'oo. ¹⁶ Inoñe arè o liñisa'oo? Miongaha, le halipotse, hanasañe o hakeo'oo am-pikanjiañe i tahina'ey. ¹⁷ Ie nibalike mb'e Ierosaleme mb'eo naho nitalaho añ' anjomban' Añahare ao, le niaroñaroñe, ¹⁸ vaho nitreako re nitsara ty hoe amako: Malisà! Akia akaro aniany t'Ierosaleme, fa tsy ho rambese' iereo ty fitalilia'o ahy. ¹⁹ O TALÈ, hoe raho, Fohi' iereo te amy ze hene fitontonañe, zaho ty nandrohy naho namofoke ze niato ama'o. ²⁰ Le ie niorike ty lio' i Stefana valolombelo'o, nisamba ey ka raho niantoke i fihomaha'ey vaho nañambeñe ty sarimbo' o namono azeo. ²¹ Aa le hoe re tamako, Miengà; fa hiraheko mb' amo kilakila ondatio aña.

Nte Roma t'i Paoly

²² Ie nahatsendreñe aze pak' amy tsara zay le nipoña-peo nanao ty hoe: Faoho an-tane atoy ty itrotse tia! fa tsy mañeva ho veloñe! ²³ Nikorake

[†] 21:40 Top 21:40, 26:14 * 22:12 Oni Top 9:10,17 † 22:14 Avo 3:15

naho nañafa-tsaroñe iereo, nampibobò lembok' amy tiokey; ²⁴ le linili' i talè t'ie hagodrañ' aña'akiba ao naho alohizan-karavantsy haharendrehañe ty talim-pikoraha' iareo.

²⁵ Ie natsalalampa' iereo an-drohy, le hoe t'i Paoly amy mpifele-jato nijohañey, Aman-dily hao rehe hamiake ty nte-Roma tsy nafatse? ²⁶ Ie jinanji' i mpifehe zatoy le nimbeo nitalily amy talèy, ty hoe: Ino o anoa'oo? nte-Roma i lahilahiy! ²⁷ Aa le niheo mb'eo ty talè nañontane aze ty hoe: Isaontsio, nte-Roma v'iheo? Eka, hoe ty asa'e. ²⁸ Le hoe i talèy, Viniliko drala maro i fidadàñe zay. Le hoe t'i Paoly: Niterahako. ²⁹ Aa le nisitak' aze amy zao o ho nañody azeo. Nihembañe ka i talèy ie naharendreke te nandrohy ty nte-Roma.

Añatrefa' i Sinedrionay

³⁰ Amy loak' àndroy, ie te hamotopototse soa ty sisì' o Tehodao aze, le hinaha'e amo rohi'eo vaho linili'e hivory o beim-pisoroñeo naho i Sinedriona iabiy; naho nazotso'e mb'eo t'i Paoly vaho najoha'e añatrefa' iareo.

23

¹ Nitalatse amy Sinedrionay t'i Paoly, nanao ty hoe: Ry roahalahiko, fa mpiaiñe an-kazavan-troke añatrefan' Añahare raho ampara' ty andro toy.

² Aa le linili' i Ananiasy mpisorom-bey o narine azeo ty hitampify aze am-palie'e. ³ Le hoe t'i Paoly ama'e: Ho tampifien' Añahare rehe, ty rindri-foty tia. Ihe miambesatse ey handily ahy amy Hake te mone mañota Hake amy nandilia'o ho tampifieñey. ⁴ Hoe ty asa' o narineo: Mañondritse i talèm-pisoron' Añaharey v'iheo? ⁵ Aa hoe t'i Paoly, Ry rahalahio, tsy nirendreko t'ie talèm-pisoroñe, fa pinatetse ty hoe:

Ko injè'o ty mpifehe ondati'oo.*

⁶ Ie nifohi' i Paoly te Tsadoke ty ila' iareo vaho Fariseo ty ila'e, le hoe ty koi'e amy favoriy: Ry roahalahio, Fariseo raho, ana' ty Fariseo. Mijohañ' etoan-draho hizakañe amy fitamañe te hitroatse o mihomakeo. ⁷ Amy fipaza'ey, le nifanointoiñe o Fariseoo naho o Tsadokeo vaho nifanarake i favoriy. ⁸ (Liere' o Tsadokeo ty fivañonam-beloñe, naho anjely, vaho arofo, f'ie fonga ifahara' o Fariseoo.) ⁹ Nipoñak' amy zao ty hozakozake, le niongake vaho nimanea' ty Fariseo mpañoke Hake lietse ami'ty hoe: Tsy oni'ay ty hila' ondatio. Ke tsinara' ty fañahy he ty anjely?

¹⁰ Niindra i hotakotakey, le nihakahaka i talè, hera ho rifodrifoteñe t'i Paoly, le linili'e o lahin-defo'eo ty hizotso mb'eo hanintak' aze an-kaozarañe, hampoly aze mb'añ'akiba aña.

Nikilily Hañè-doza ama'e

¹¹ Ie haleñe, le nijohañe aña'ilà'eo t'i TALÈ nanao ty hoe: Mireareà! Fa hambañe ami'ty nitaroñ'a'o ahy e Ierosaleme ao, ty ho taroñ'e'o e Roma aña.

¹² Amy loak' àndroy le nifañosoñe hikitrok' aze o Tehodao, nifamehe am-panta te tsy hikama ndra hinoñe ampara' te havetra' iareo t'i Paoly.

¹³ Mandikoatse tyefa-polo i nikilily rey. ¹⁴ Niheo mb' amo beim-pisoroñeo naho o roaeo iereo nanao ty hoe: Nifamehe am-panta mijadoñe zahay te tsy hitsope-draha ampara' te vonoe'ay t'i Paoly. ¹⁵ Ie amy zao, ry amo Sinedrionaio, Ehe mihalalia amy talèy ty hanjotsoañe aze ama' areo mintse hamotopotorañe aze, fa veka'e hanjevoñ' aze zahay aolo' t'ie mitotoke.

* ^{23:5} Avo 22:28

¹⁶ Fe tsinano' ty ana-drahavave' i Paoly i famandroñañey le nimb'eo nizilik' aña'anjomba' o lahin-defoñeo nitalily amy Paoly. ¹⁷ Kinanji' i Paoly ty mpifehe zato, le hoe re: Endeso mb'amy talè ao ty ajalahy toy, fa amanko volañe'e. ¹⁸ Aa le nente'e naho nasese amy talèy, nanao ty hoe: Nitok' ahy t'i Paoly miprohy, nihalaly te hendeseñe ama'o ty ajalahy toy fa aman' entañe.

¹⁹ Rinambe' i talèy an-taña'e i ajalahiy le natola'e vaho nañontanea'e ty hoe: Ino ty enta'o ho ahiko? ²⁰ Hoe re: Fa nilahatse hihalaly ama'o o Tehodao ty haneseña i Paoly mb'amy favoriy ao hamaray, hanao sare hañotsohotso aze. ²¹ Ko no'o, amy te amandroña' ty mandako ty efa-polo nifanta te tsy hikama ndra hinoñe ampara' t'ie vinono; fa veka'e henaneo iereo, mandiñe ty fampitamà'o. ²² Aa le napo' i talèy hiavotse i ajalahiy, ie fa nitoroa'e ty hoe: Ko mivolañe ama' iaia i nitalilie'oy.

Nampihitrifeñe mb'aman-dRagova

²³ Kinanji'e ty mpifehe zato roe le natà'e ty hoe: Añajario lahin-defo roan-jato hikatsakatsake mb'e Kaisaria aña, naho mpiningi-tsoavalala fitom-polo vaho mpitam-piletse roan-jato amy ora faha-telo' i haleñey. ²⁴ Toloro soavalala hiningira' i Paoly, le aseseo mb'am-pitsolohañe amy Ragova Feliksa aña.

²⁵ Nanokira'e taratasy hoe zao:

²⁶ Klaudio Lisia: Ho an-dRagova Feliksa, foloingitroke, Fañanintsiñe!

²⁷ Ingo t'indaty tsinepa' o Tehodao, le didý tsy ho vinono' iereo, f'ie nivotrake eo reketse lahin-defoñe nandrombak' aze, ie nirendreko te nte-Roma. ²⁸ Aa zaho te hahafahiñe ty talin-kitomboha' iareo aze, le naseseko mb'amy Sinedriona' iareoy, ²⁹ fe nizoeko te ontane amo lili' iareoo ty nanisiañe aze, le tsy amo sisì'eo ty mañeva hamonoañe ndra handrohizañe aze. ³⁰ Ie nampaharendreheñe te nikililieñe indatiy, le nahitriko mb'ama'o mb'eo amy zao, vaho liniliko o mpanisý azeo te haseseke añatrefa'o ty talin-tsisi' iareo.

³¹ Aa ie namantohañe, le nendese' o lahin-defoñeo t'i Paoly naho nasese mb'e Antipatria mb'eo amy haleñey. ³² Amy loak' àndroy le nampindrezeñe ama'e o mpiningi-tsoavalao vaho nimpoly mb'an-tobe mb'eo ty ila'e. ³³ Ie nipotitse e Kaisaria aña, le natolotse amy Ragovay i taratasiy le nasese ama'e ka t'i Paoly. ³⁴ Vinaki' i ragovay i taratasiy vaho nañontanea'e ty faritse nihirifa'e. Ie rendre'e te nte Kilkia, ³⁵ le hoe re: Hitsanoñako naho avy o mpanisý azoo, le linili'e te hambenañe aña'anjombam-pizakà' i Heroda ao.

24

Zaka añatrefa' i Feliksa e Kaisaria ao

¹ Ie lime andro aña, nizotso mb'e Kaisaria mb'eo t'i Ananiasy mpisorom-bey naho ty ila' o roao vaho ty ondati-aivo atao Tertilo, le nasesek' amy Ragovay ty sisì' iareo amy Paoly. ² Ie tinoka, le niorote' i Tertilo seseke, ami'ty hoe: Oniñe te ihe ro ierañeraña'ay an-kanintsiñe, naho mihafonitse ty fañavaoaña ty fifeheaña toy ty amo falalà'oo, ³ le no'ay an-tsata'e iaby sikal'aia sikal'aia, ry Feliksa, am-pañandriañañe mandigiligy. ⁴ Fe tsy mone hahamokorako, le ihalaliako ty hiferenaiña'o hijanjiñe o enta'ay tsy ampeo. ⁵ Rendre'ay t'ie mpitrobo o lahilahio naho mampiola ze fonga Jiosy an-tane atoy, mbore mpifehe amy firimboñan-te-Nazaretay; ⁶ aa ie nimane haniva i anjomban' Añaharey, le tsinepa'ay ie ho nizaka aze amy lili'aiy. ⁷ Fe nivotrak'eo t'i Lisiouse mpizaka, le am-piaroteñe ty nitavana'e

an-taña'ay, naho nampihitrife'e mb'ama'o atoy, ⁸ vaho linili'e hiatrek'azo o mpanesek' azeo. Ie mahatsikarake rehe, le ho oni'o ty hatò' o anesefa'ay azeo. ⁹ Ninò' o Tehodao i taroñe zay le sinaontsi' iereo te hene to.

Ty Fivero' i Paoly Añatrefa' i Feliksa eo

¹⁰ Ie tinondro' i Ragovay t'i Paoly hisaontsy, le hoe ty natoi'e: Fohiñe te maro taoñe ty nizakà'o ami'ty fifeheañe toy le mahaehak' ahy ty manoiñe ty amako. ¹¹ Mora ho azo ty hahaoniñe te folo-ro'amby andro zay ty nionjonako mb'e Ierosaleme mb'eo hitalaho. ¹² Toe tsy nioni' iereo nifandietse aman-dra iaia raho, tsy nitrobo i màroy ndra añ' anjomban' Añahare, ndra am-pitontonañ' ao ndra an-drova ao. ¹³ Tsy eo ka ty hamenteañe o tiñe anisia' iareo ahy henaneo. ¹⁴ Fe zao ty talilako ama'o te i Lalañe atao' iereo firimboñañey ro itoroñako an' Andrianañaharen-droae'ay* am-patokisako ze hene milahatse amy Hake naho misokitse amo Mpitokio, ¹⁵ le mitamà an' Andrianañahare, ze toe salalae' iareo ka, te toe eo ty fivañonañe amy havilasiy ho a o vañoñeo naho ho a o tsereheñeo. ¹⁶ Le zay ty imaneako lomoñandro t'ie ho aman-stroke mazava tsy amandilatse aman' Añahare naho ama' ondaty. ¹⁷ Ie naha-ritse taoñe maromaro aña, le nibalike mb'etoa raho ninday falalàñe ho an-drofokoko naho hañenga. ¹⁸ Zay ty nanoeko amy anjomban' Añaharey te nizoe' iereo, ie fa nañefe-batañe, tsy an-dahialeñe tsy an-kotakotake, fe teo o Jiosy nte-Asiao; ¹⁹ nisoa t'ie niatrek' azo etoñañe, haneseke, naho toe anaña'e hakeo. ²⁰ Naho tsy zay, ee te ho talilie' ondaty retiañe ze hakeo nioni' iereo amako amy nijohañako añatrefa' i Sinedrionaiy, ²¹ naho tsy i raha raike nikoiheko te nijohañ' añ'atrefa'ey ami'ty hoe: Ty fitroaran-kavilasy ro izakañe ahy miatrek' anahareo henaneo.

²² Fe i Feliksa, ie nahafahiñe soa o raha mioza amy Lalañey ro nampandiñe iereo ami'ty hoe: Ie mizotso mb'etoa t'i Lisia, talè, le ho rendreko soa ty ama'o. ²³ Le linili'e ty mpifehe zato ty hiambéñe aze fe nado'e hidada, mbore tsy nirarà'e hiatrak' aze o rañeo.

I Paoly Am-Balabey Ao

²⁴ Ie aña ty andro tsy ampeampe, le totsak'eo ty Feliksa naho i Drosilae vali'e, Jiosy. Nampikanjieñe t'i Paoly vaho nijanjiña' iereo ty fatokisañe IESOÀ Norizañei. ²⁵ Aa ie nañoke ty havantañañe naho ty filieram-batañe naho ty zaka ho avy le nihondrahondra t'i Feliksa nanao ty hoe: Akia hey rehe, le ho tokaveko an-tsa mete. ²⁶ Nitamà'e ka te ho mea' i Paoly drala, aa le nipaia'e beteke hifanaontsia'e.

²⁷ Ie re nitampetse ty roe taoñe, le nandimbe i Feliksa t'i Porsio Festosy, fa te hañosikosike o Tehodao ty Feliksa, le nenga'e mirohy ao t'i Paoly.

25

Mihalaly Zaka amy Mpanjakabey

¹ Ie fa telo andro te niavy amy faritsey t'i Festosy, le nionjoñe hirik'e Kaisaria mb'e Ierosaleme mb'eo, ² naho naneseke i Paoly ty talèm-pisoroñe naho ty bei' o Jiosio, nanigike aze ³ hañisoke iareo ty ama'e, hañitrifa'e mb'e Ierosaleme mb'eo, (ie ho vandroñe' iareo an-dalañe ey hamono aze). ⁴ Aa le hoe ty natoi' i Festosy: Hambenañe e Kaisaria aña avao t'i Paoly, fa hionjom-beo aniany ka raho. ⁵ Aa le ampindrezo amako ze mete ama' areo hizotso mb'eo, hanisy indatiy naho toe aman-kakeo.

* **24:14** Avo 3:15

⁶ Nitambatse am'iereo re tsy ampe folo ndra valo andro, le nizotso mb'e Kaisaria mb'eo; ie loakandro le niambesatse amy fiambesam-pizakañey, vaho linili'e te hasese t'i Paoly. ⁷ Ie tsatoke t'i Paoly le niarikoboña' o Jiosy nizotso boak'e Ierosalemeo, naho maro naho raty ty sisý nanoe'e, fe tsy nahaventeañe. ⁸ Le hoe ty niveroha' i Paoly: Tsy aman-tahin-dra raike raho ke amy Hake tana' o Tehodaoy he amy anjomban' Añaharey, he amy Kaisara.

⁹ Aa ie te hañosikosike o Tehodao t'i Festosy, le hoe re amy Paoly: Mete'o hao ty hionjoñe mb'e Ierosaleme mb'eo hiatre-jaka amy sisý rezay? ¹⁰ Hoe ty natoi' i Paoly: Aolom-piambesam-pizakà' i Kaisara ty ijoñañako, zay o mañeva ahy ho zakaeñe. Tsy anaña' o Tehodao hakeo, toe fohi'o. ¹¹ Aa naho mpandilatse raho, hera nanao ze mañeva hahafate ahy, le tsy liereko ty hikenkañe. F'ie tsy aman-katò' o anisia' ondaty reo ahio, le tsy eo ty mahafanese ahy am'iereo. I Kaisara ro ikoihako! ¹² Ie nisafiry amo vavea'eo t'i Festosy, le hoe ty asa'e: Kanao nikaihe'o t'i Kaisara. Le i Kaisara ty handenà'o!

Misafiry amy Mpanjakay t'i Festosy

¹³ Ie modo ty andro tsy ampeampe, le niheo mb'e Kaisaria mb'eo t'i Agripa Mpanjaka naho i Berenikae vali'e hifañontane amy Festosy. ¹⁴ Aa ie nitambatse ao andro maro, le nitaròñe' i Festosy amy mpanjakay i Paoly. Hoe re: Ao t'indaty napo' i Feliksa an-drohy. ¹⁵ Aa izaho te Ierosaleme aña, le ninday sisý o mpisorom-beio naho o bein-Tehodao, nipay ahy hañozoñ' aze. ¹⁶ Tinoiko am'iereo te tsy sata' o nte-Romao ty haneseke ondaty aolo' te nifañatrek' amo mpanisý azeo i tinombokey, amy t'ie aman-jo hiveroke amo anisiañe azeo. ¹⁷ Aa ie nimb' etoañe le tsy nandiñe raho fa nitobok' amy fiambesam-pizakàñey amy loak' àndroy vaho linilikoo te hampiatrefeñe etoañe indatiy. ¹⁸ Ie niongake hiatrefa' o mpanisio, le tsy o sata raty nataoko ho nanisiañ' azeo, ¹⁹ fa toe fifandierañe amo fitalaho'a' iareoo naho indaty nihomak' atao IESOÀ volañe' i Paoly te veloñey. ²⁰ Aa ie nataoko te tsy hahafisafiry izay; le nañontaneako ke t'ie mete hañavelo mb'e Ierosaleme mb'eo hiatre-jaka amy sisý zay. ²¹ Fe ami'ty nihalalia' i Paoly te handiñy ty fijanjiña' i Kaisara, le linilikoo t'ie ho tånañe ampara' te haseseko mb' amy Kaisara aña. ²² Aa le hoe t'i Agripa amy Festosy: Te hahatsanoñe indatiy ka raho. Tinoi'e ty hoe: Ho janjiñe'o hamaray.

Paoly Añatrefa' i Agripa

²³ Ie loak' andro, avy eo t'i Agripa naho i Berenikae am-bolonahetse abo, le nizilik' añañombam-pizakàñe ao mindre amo mpifeheo naho am'ondaty bei' i rovaio, vaho nasese mb'eo t'i Paoly ami'ty lili' i Festosy. ²⁴ Hoe t'i Festosy: Ry Agripa mpanjaka naho ry roandriañe mindre mivory etoañ' iabio, hehe ondatio! i nampiatrefa' ty valobohò' o Jiosy e Ierosaleme aña naho e Kaisaria etoañeo amako, i nikoraheñe te tsy mañeva ho veloñey. ²⁵ Ty nitreako, le t'ie tsy nanao inoñ' inoñe hañeva aze havetrake, fe amy t'e nipay zaka amy Kaisara re, le sinafiriko t'ie hasese mb'e Roma aña. ²⁶ Fe tsy amam-bente'e ama'e raho hanokirako amy talèkoy. Aa le zay ty naneseako aze añatrefa' areo etoañe, somandrak' aolo'o etoa ry Agripa mpanjaka, soa te, ie tampetse ty fañotsohotsoañe toy le hanan-ko sokireko, ²⁷ fe ataoko ho tsy fañeva'e ty aneseañe ty mapirohy naho tsy talilieñe hey ty aneseahañe aze.

26

¹ Le hoe t'i Agripa amy Paoly: Mahazo miveroke rehe. Natondro' i Paoly ty fità'e vaho naniom-batañe ami'ty hoe: ² Ry Agripa mpanjaka, ataoko te nisohen-draho t'ie añatrefa'o ethane henaneo, hitaroñe ze fonga sisý nanoe' o Tehodao amako, ³ mentsake te fohi'o soa ze hene lilitse naho fifandiera' o nte-Iehodao. Aa le mihalaly ama'o ty hijanjiñe ahy am-pahaliñisañe.

⁴ Ie amy zao, fohi' o Jiosy iabio ty satam-piaiñako boak' ami'ty naha-ajaja ahy, ndra an-taneko aña, ndra e Ierosaleme ao. ⁵ Aa kanao nahafahiñe ahy haehae iereo, naho nisatrie' iereo ty hitaroñe, le i firimboñam-pitalahoañe fatra-pirekets' ami'ty hatòy, o Fariseoo, ty ni-satan-kaveloko. ⁶ Ie henaneo, ty fitamàko i tsinaran' Añahare aman-droaentikañey ro ijohañako an-jaka etoña. ⁷ Zay ty itoloña' i fifokoañe folo-ro' ambin-tika rey handro an-kaleñe an-kahimbañañe aman' Añahare. I fitamaña zay, ry Mpanjaka, ty anoa' o Tehodao kitombok' ahiko. ⁸ Akore ty atao' areo te tsy mete iantofañe ty fampitroaran' Añahare o havilasio?

⁹ Toe nitsakoreako ka te tsi-mahay tsy hanoeko ze handierako amy tahina' IESOÀ nte Nazareta. ¹⁰ Le zay ty nanoeko e Ierosaleme ao, ie nandrambe lily amo mpisorom-beio, le najoko am-porozò ao ty maro amo noro'eo, vaho ie nañohofan-doza, zaho ty ninday talin-tsara hanesehañe iareo. ¹¹ Beteke nililoveko amo fitontona' iareo iabio naho nilozoheko ty hampiteratera iareo; vaho an-kabosehañe mandoviakte ty nañoridañako mb'an-drova ambahiny aña.

Ty Nahampiato i Paoly

¹² Ie amy zao, nimb'e Damaskose mb'eo raho ami'ty lily naho haozara' o mpisorom-beio. ¹³ Ie nitsipinde-mena amy liay, ry Mpanjaka, le nitreako ty hazavàñe boak' andindiñe ey ambone' ty fireandrea' i àndroy nipisañe añarisehoañe ahy naho amo mpindre lia amakoo. ¹⁴ Nideboñe an-tane iaby zahay le tsinanoko ty fiarañanañañe nitsara amako antsaontsy Hebreo, ty hoe: Saole, Saole, akore ty añañjaha'o ahy? Sarotse ama'o ty mikambia i tsatokey. ¹⁵ Le hoe raho: Ia v'iheo Talè? Zaho IESOÀ ampisoañe'oy, hoe t'i TALÈ. ¹⁶ Mitroara arè, miongaha am-pandia. Inao ty talim-piboahako ama'o, ty hanendreako azo ho mpitoroñe naho valolombeloñe amo nahaoniña'o ahio vaho amo mbe haboako ama'oo, ¹⁷ le ho rombahoko am'onatio naho amo kilakila ondaty añaírahako azoo, ¹⁸ hanokafañe ty fihaino' iareo, hitolike amy ieñey mb'an-kazavàñe*, naho amy fifehea' i mpañinjeiy mb' aman' Añahare, hahazoa' iareo fañahan-kakeo vaho lova amo nampiavaheñe ami'ty fatokisañe ahio.

Mitalily ty amy Fitseiza'e

¹⁹ Ie amy zao, ry Agripa mpanjaka, tsy nizehareko i fañentoan-dindiñey, ²⁰ fa nitaroñeko hey o e Damaskoseo le e Ierosaleme aña naho nanitsik' an-tane Iehodà, vaho nimb' amo kilakila ondatio, soa t'ie hibaboke naho hitolik' aman' Añahare vaho hitoloñe mañeva solohot[†].

²¹ Ie ty talim-pitsepha' o Tehodao ahy tañ' anjomban' Añahare ao naho ty fimanea' iareo hañè-doza amako. ²² Ie amy zao, amy fañoloran' Añahare ahy le mitoloñe pake henane, mitalily ami'ty kede naho ty bey, tsy mitaroñe inoñ' inoñe naho tsy o nisaontsie' o Mpitokio naho i Mosè te ho tondrokeo; ²³ te tsi-mahay tsy njale i Norizañey, naho amy t'ie ty

* **26:18** Ies 42:6-7, 60:2-3, Ben 21:24 † **26:20** Mat 16:27

nivaloha'e nivañon-ko veloñe ro hitaroñe hazavañe am' ondatio vaho amo kilakila ondatio.

Hera Hiantoke t'i Agripa

²⁴ Ie mbe niveroke, le hoe ty nipoñafa' i Festosy, O Paoly, gege rehe; mampikitek' azo ty habein-kilala'o. ²⁵ Aa hoe t'i Paoly: Tsy tondren-draho ry Festosy aman-kasy, fa tsara to naheo hendre o fitaroñakoo. ²⁶ Toe fohi' i mpanjakay i tsaraeñey, le itaroñako am-pidatàñe, naheo iantofako te leo raik' amo raha zao tsy mietak' ama'e amy t'ie tsy nanoeñ' an-kotsok' ao. ²⁷ Ry Agripa Mpanjaka, tsy iantofa'o hao o mpitokio? Apotako t'ie mianteke. ²⁸ Aa hoe t'i Agripa amy Paoly, Hete, didy tsy nandrisik' ahy rehe ho mpiamy Norizañey! ²⁹ Hoe t'i Paoly: He te aniany ke te ela, lonik' aman' Añahare abey te tsy ihe avao, fa ze hene mijanjiñe ahy henaneo ty hanahak' ahy naheo tsy o silisily retoañ' avao.

³⁰ Le niongake i mpanjakay naheo i Ragovay naheo i Berenikae vaho o nindre niambesatse am'iereo ³¹ le nitolake naheo nifamesoveso ty hoe: Tsy nanao inoñ' inoñe indatiy t'ie hañeva havetrake ndra harohy. ³² Le hoe t'i Agripa amy Festosy: Mete ho hinaha indatiy naheo tsy nikaike amy Kaisara.

27

Mijon-Tsambo mb'e Roma t'i Paoly

¹ Ie linily te hiondrañe an-dakañe mb'e Italia mb'eo, le naseo ami' ty mpifehe zato atao Jolio, firimboña' Aogosto t'i Paoly naheo ty miprohy ila'e. ² Nijon-daka' i Adramitiome zahay, ie homb' an-tane añolo' i Asia aña, le nionjoñe mb'eo rekets' i Aristarko, nte Makedonia hirik'e Tesalonika. ³ Ie nidosy e Sidona amy loak' àndroy, le nitretreze' i Jolio t'i Paoly vaho nenga'e homb' amo rañe'eo mb'eo hatraheñe. ⁴ Ie nijon-dakañe boak' ao le nanehake mb' atimo' i Kiprosy amy te niatre tioke. ⁵ Le nitsake i riakey nañolotse i Kilkia naheo i Pamfilia vaho nipok'e Maira-Likia ao. ⁶ Teo ty nanjoa' i mpifehe zatoy ty laka' i Aleksandria hiondrañe mb'e Italia aña, vaho nampijoñe'e ama'e zahay.

⁷ Ie nizenjèñe ey avao andro maro le tsy nimora ty niharinea'ay i Kinido fa tsy nimete i tiokey, le niary ambane' i Kreta tandrife i Salmoda, ⁸ naheo nifanehake mafe nañolotse vaho nipok' an-toetse atao Fipaliran-tsoa, marine' ty rova atao Lasea. ⁹ Ie tambatse eo andro maro, mbore niharaty ty fijoñañe fa aña i Fililirañey*, le hoe ty hatahata' i Paoly: ¹⁰ O 'ndatireo, apotako te ho liàm-baràta an-joy naheo fianto itoy, tsy o kilankañe naheo i lakañey avao, fa o fiain-tikañe. ¹¹ Fe niantoke i kapiteniy mandikoatse ty saontsi' i Paoly i mpifehe zatoy naheo i tompo' i lakañey. ¹² Aa kanao tsy soa fitofàñe ami'ty asotry† i fipalirañey, le nilahatse hanonjohy i liay i màroy, hera mete ho takareñe ty Foiniksa, fipalira' i Kreta, hiasotry aña, ie ankalo' o tiok' atimo-ahandrefa naheo avarats' ahandrefa.

Ty Tio-Bey

¹³ Ie nitiotioke boak' atimo, natao' iareo t'ie i tamañey, le naonjoñe i vato-fatsikey, vaho nañolotse marine' i Kreta. ¹⁴ Tsy tampetampetse zay, kinabokabo' ty tio bey nizotso boak' amy tokonosey, ty rivo-doza atao faok' atiñana, ¹⁵ le tsinepa'e i lakañey, ie tsy nahasoroke

* 27:9 ty fahafolo' i Saramañitsey; (Avo 23:26-32) † 27:12 Asotry naheo an-tane avaratse

i tiokey fa nadoñe haronje'e avao. ¹⁶ Ie nioza añ' alo' ty tokonose atao Klaoda, le nifanehafe'ay ty hitambozòtse i lakan-dozay. ¹⁷ Aa ie tafa-onjoñe, le vinandibanditse taly i lakam-beiy hamihine aze, amy te nihakahakaeñe ke hivariñe mb' am-pasen-kevo ao, naho nazotso o laio vaho napoke hisiotsiotse mb'eo. ¹⁸ Ie loho navoamboa' i faokey te loak'andro, le namototse nañary kilankañe iereo. ¹⁹ Amy andro fahateloy ka navokovoko' iereo am-pitâñe ty harao' i lakañey. ²⁰ Ie andro maro tsy niboak' i àndroy ndra o vasiañeo, naho tsy atao tio-kede ty nikobokoboke, le ndra loli'e ty fisalala'ay te ho rombake.

²¹ Ie songa nifeake tsy aman-kane, le nióngak' añivo' iereo t'i Paoly nanao ty hoe: Ry ondaty reo, ho nisoa naho nihaño' areo i tarokoy, te tsy ho vinotsotse ty Kreta, vaho tsy ho nizo ty fijoy naho fianto toy. ²² F'ie henaneo, osiheko hirearea amy te tsy ama' areo ty ho motso fiaiñe, fa ty lakañey toy avao. ²³ Toe nijohañe añilako eo aniankale i anjelin' Añahare mpametrek' ahy naho itoroñakoy, ²⁴ nanao ty hoe: Ko hembañe Paoly, amy te tsi-mahay tsy hatrefe'o t'i Kaisara, vaho ingo, tinolon' Añahare azo o mindre lia ama'o iabio. ²⁵ Aa le manintsiña, ry ondatio, fa atokisako t'i Andrianañahare te ho zoeñe do'e amy tsinara amakoy. ²⁶ Ie amy zao, tsi-mete tsy hitoañe an-tokonose tika.

Ty Fiantoa' i Samboy

²⁷ Aa ie amy haleñe fahafolo-efats' ambiy, le nasiotsiotse an-driak' Adria ey avao, le amy antetsaleñey, natao' o mpiandakañe t'ie nañarine tane. ²⁸ Nitsoke iereo, le nanjo roapolo tratra; niveve kedekedeke le nitsoke indraike, nanjo folo lim' amby tratra. ²⁹ Aa ie nihembañe te hidasiñe ambato, le nanjotsso vato-fatsike efatse amboho' i lakañey, vaho nisalala ty manjirik' andro.

³⁰ Ie nimane hipotitsike amy lakañey o mpiandriakeo, naho fa nazotso' iareo an-driak' ao i ana-dakañey vaho nanao sare hampijoñe vato-fatsike antondoha'e ao, ³¹ le hoe t'i Paoly amy mpifehe zatoy naho amo lahin-defoñeo: Naho tsy midoñe an-dakañe atoy iereo, le tsy ho rombaheñe ka nahareo. ³² Aa le pinoto' o lahin-defoñeo ty tali' i anan-dakañey vaho napoke hihintsañe aña.

³³ Ie nangarañe i àndroy le songa nosihe' i Paoly ondatio hikama, ami'ty hoe: Fa nifeake naho nitolom-pililitse andro folo-efats' amby tika, tsy nitendre inoñ' inoñe. ³⁴ Aa le iboliboliako hikama fa rombak'ay toy, amy te leo raik' ama' areo tsy ho po-maròy raike ty añambone'e. ³⁵ Ie nanao zay, le nandrambe mofo, nañandriañe an' Andrianañahare añañatrefa' iareo iaby, naho finola'e vaho nikama. ³⁶ Hene nazava-troke vaho nangalake mahakama; ³⁷ aa ie natontoñe le roanjato-tsi-fitom-polo-eneñ' amby ro amy lakañey. ³⁸ Ie niñanjañe, le nampaivañe' iereo i lakañey am-pañariañe i tsakoy an-driak' ao.

³⁹ Ie nazava i àndroy, nialik' am' iereo i taney, f'ie nahatalake vinañe naho faseñe añ'olots'ey ze mete' i lakañey hitoañeñe. ⁴⁰ Aa le nampipitsoheñ' aña o vato-fatsikeo, naho napok' an-driak' ao, naho binatsa' iareo o talim-panehafan-dakañe, naho naonjoñe amy tiokey ty lai-aolo, vaho nigodañe mb' añ' olotse ey. ⁴¹ Fe nidoñe am-pifanampean-driake roe eo i lakañey, le nidevole naho nijihetse am-paseñe ao ty loha'e, tsy nitroetroe, vaho dinorodemo' ty fivalitaboa' o onjao i voli'ey.

⁴² Fisafirie' o lahin-defoñeo ty hanjamañe o mpirohio kera hilaño vaho hibotitsike. ⁴³ Fe te handrombake i Paoly i mpifehe zatoy, le tsy nimea'e

henefeñe i kililiy, vaho linili'e te hijoñe an-drano aolo ze nahay nilaño, hitakare'e i taney. ⁴⁴ Nandrambe varamba o ila'eo naho potepoten-dakañe ka ty ila'e vaho songa ni-tra-drombak' an-tamboho eo.

28

Añ'olo' i Malta

¹ Ie nhahaha amy varatay, le naharendreke te atao Melita i tokonosey. ² Nisoa ty fitretreza' o tombo-taneo: ie namiañe afo naho nanao an-traño anay, amy te niavy ty orañe vaho nangoratsake. ³ Nanontoñe fehen-katae t'i Paoly naho napo'e añ'afó ao, fe nakare' i hafanañey ty mereñe nipitek' am-pitá'e eo. ⁴ Ie niisa' o tombo-taneo i mereñe niradorado am-pitá'ey, le hoe ty vesoveso' iareo: Tsy mete tsy mpamono, ondatio, le ndra t'ie nivotsotse amy riakey tsy nenga' ty toly ho veloñe. ⁵ Fe nahifi'e añ'afó ao i mereñey, le tsy niore. ⁶ Nitokoe' iereo ke hiboenatse hera hikorovoke hikenkañe aniany, f'ie nandiñe ela naho tsy nahaoniñan-joy, le nibalintoa ty fivetsevetse' iareo vaho ndrañahare ka ty nanoeñ' aze.

⁷ Marine eo ty tane' i mpiaolo i tokonoseiy, Poplio ty tahina'e. Nandrambe anay antalatala-saba re naho nanoe'e añ' anjomba'e telo andro. ⁸ Ie amy zao, natindry ty hamae-sandriñe naho niazo' ty tsora-dio ty rae' i Poplio. Nimoak' ama'e ao t'i Paoly, le nihalaly naho nampitongoa'e fitàñe, nampijangañ' aze. ⁹ Heneke zay, le songa nipoteake eo ze narare ila'e amy tokonosey vaho nijanganeñe. ¹⁰ Nanoly fiasiañe ama'ay iereo, le ie ho nionjoñe, natoro' iereo ze he'e pinai'ay.

Poke e Roma

¹¹ Ie nahamodo telo volañe, le nionjoñe ami'ty lakañe niasotry amy tokonosey. Nte-Aleksandria i lakañey le i *Mpihambañe rey ro viloñe andoha'e eo. ¹² Ie nitoly e Sirakosa, le nitofa telo andro. ¹³ Boak' ao, nañariary naho nivotrake e Regioma, aa ie nahamodo andro raike, le namaoke ty tiok' atimo, vaho nipotítse e Potioly aña amy loak' àndroy; ¹⁴ Nanjo roahalahy eo zahay, naho nampihovae' iereo hañialo ao fito andro; zay vaho nionjoñe mb'e Roma mb'eo. ¹⁵ Aa ie nahajanjiñe ty ama'ay o roahalahy añaeo, le nihitrike naho nifanalaka ama'ay an-Tsenan' Apio, amy Hotely Teloy; aa ie tendreke i roahalahy rey t'i Paoly le nañandriañe an' Andrianañahare vaho nirearea an-stroke. ¹⁶ Ie nandoake e Roma ao, le nengañe hiambesatse ie raike t'i Paoly mindre amy lahin-defoñe mpiambeñe azey.

Mitsey e Roma ao t'i Paoly

¹⁷ Ie nimodo ty telo andro le kinai' i Paoly o mpiaolo' o Jiosio, aa naho nifanontoñe, le nanoa'e ty hoe: Ry roahalahy, ndra te tsy nandilatse am'ondateo ndra amo satan-droaen-tikañeo raho, le nasese an-drohy boak' Ierosaleme ao mb'am-pitá' o nte-Romao. ¹⁸ Nalohi' iareo, le ho hinaha amy te tsy aman-taly hamonoañe ahy. ¹⁹ Fe nanjehatse o Tehodao, le nazitse raho hipay to amy Kaisara—tsy t'ie hanese sisý amy tanekoy. ²⁰ Zay ty nikaniako anahareo hifankaoniñe naho hifanaontsy. Fa ty fitamàko Israele ty nandrohizañe ahy amo silisilio.

²¹ Hoe iareo tama'e: Mbe tsy nandrambe taratasy boake Iehodà ty ama'o zahay, vaho tsy amo roahalahy boak' añaeo ty nitalily ndra nisaontsy raha tsy mete ty ama'o, ²² f'ie te hijanjiñe azo, o fivetsevetse'oo, fa i firimboñañe zay, fohi'ay te mavoeñe tok'aia tok'aia.

* **28:11** Gk: Dioskory: i Kastorae, i Poloksa: Alizaoza

²³ Ie nifamantañe andro, le maro ty niheo mb'añ'akiba'e mb'eo, le nampalangese'e am'iereo an-taroñe i Fifehean' Añaharey, le nimanea'e osike ty amy IESOÀ boak' amy Hà' i Mosè naho hirik' amo Mpitokio handro pak' amy haleñey. ²⁴ Niantoke i enta'ey ty ila'e; tsy nipaoke ka ty ila'e.

²⁵ Ie nifanao lie-drokoñe, naho ho niavotse, le nagado' i Paoly ami'ty saontsy zao: To ty nisaontsie' i Arofo Masiñey añam' Isaia mpitoky amandroae' areo, ty hoe:

²⁶ Akia am'ondaty retiañe
naho taroño ty hoe:
Hijanjiñe nainai'e nahareo
fe tsy hahafohiñe,
vaho hitolom-pañisake
f'ie tsy hahaoniñe.

²⁷ Fa gâne ty arofo' ondaty retiañe;
le mivalagîne o ravembia'eo,
mbore nakipe'e o fihaino'eo.
Tsy mone hahaoniñe am-pihaino,
naho hahajanjiñe an-dravembia,
naho hahafohiñe añ'arofo,
naho hibalintoa,
vaho ho jangañeko iereo.†

²⁸ Mahafohina arè, te nafantoke ho amo kilakila' ndatio o fandrombahán' Añahareo, ie ro hijanjiñe! ²⁹ ‡

³⁰ Nimoneñe roe taoñe garagadìñe añañomba nafondro'e ao re vaho nampihovà'e iaby ze niheo mb'ama'e, ³¹ nitaroñe i Fifehean' Añaharey naho nañoke i TALÈ IESOÀ Norizañey am-pidadàñe vaho tsy nisebañene.

† ^{28:27} Ies 6:9,10 ‡ ^{28:29} Ie nanoe'e i hoe zay, le nienga aze o Jiosio, nifanjomotse avao.

Roma

¹ I Paoly, fetrek'oro'IESOÀ Norizañey, kinanjy ho Firàheñe, navaheñe ho ami'ty talili-soan'Añahare ² nampitamà'e taolo amo mpitoki' i Sokitse Masiñeio ³ ty amy Ana'e nasama' ty tarira' i Davide ami'tynofotse, ⁴ niventeñe amy Arofo Masiñey te Anan' Añahare an-kaozarañe ami'ty fivañona'e an-kavilasy, i Talèntika IESOÀ Norizañey. ⁵ Ie ty nandrambesantika hasoa naho ty maha Firahe'e hinday o kilakila ondatio hivohotse am-patokisañe. ⁶ Hirik' am'iareo ka ro nikanjia' IESOÀ Norizañey anahareo. ⁷ Ry hene kokoan' Añahare e Roma nikanjieñe ho noro'eo: Hasoa ama' areo naho ty fañanintsin' Añahare Raentika naho i TALÈ IESOÀ Norizañey.

Te Hitilike e Roma

⁸ Valoha'e, andriañeko t'i Andrianañahareko añam' IESOÀ Norizañey ty ama' areo iaby, te saontsieñe tok' aia tok'aia an-tane atoy ty fatokisa' areo. ⁹ I Andrianañahare toroñeko an-troko amy talili-soa' i Ana'eiy ro valolombeloko te tsy apoko ty fitiahiañ' anahareo ¹⁰ amo filolohakoo, mitolon-kalaly, he mete henaneo, he aña, t'ie ho nañeneke ty liako mb' ama' areo mb'eo naho satrin' Añahare. ¹¹ Salalaeko te hahatreanahareo, handivako ravoravon' arofo hampaozatse— ¹² soa t'ie hohòeñe mindre ama' areo, songa ty amy fatokisa'ey, inahareo naho zaho.

¹³ Tsy teako tsy ho fohi'areo, ry roahalahy, te beteke nisafirieko ty hionjomb'ama' areo mb'eo (fe mbe tsy nanjo lalañe) soa t'ie hanambokatse manahake amo kilakila ondaty ila'eo. ¹⁴ Anaña' o Grikao naho o renetaneo naho o mahilalao vaho o tsy mahilalao songo raho. ¹⁵ Rototse ka raho hitaroñe i talili-soay e Roma ao. ¹⁶ Tsy mahasalatse ahy i Talili-soay, amy t'ie ty haozaran' Añahare maharombake ze hene mahafiato, o Jiosio hey, vaho o Grikao. ¹⁷ Ie ty andrendrehañe ty havantañan' Añahare, am-patokisañe ampitomboam-patokisañe; fa pinatetse te: Fatokisañe ty hiveloma' o vantañeo.*

Ty Haviñeran'Añahare

¹⁸ Toe miboak' andindìñe ey ty haviñeran' Añahare amy ze fonga hatsivokarañe naho tsy havañona' ondaty manindry ty hato ami'ty halotsereha'e, ¹⁹ fa malange am' iereo ze mete ho fohiñe aman' Añahare, fa nampalangesan' Añahare. ²⁰ Toe midodea boak' ami'ty namboareñe ty voatse toy o sata'e tsi-isakeo, ty haozara'e tsy modo, naho t'ie Andrianamboatse, rendreke amo namboareñeo, tole ndra tsy aman-kaveroke iereo. ²¹ Aa ndra t'ie mahafohiñe i Andrianamboatse, tsy andrengea'e ho Andrianañahare, tsy mañandriañe, vaho miha-tsi-vente'e ty fivetsevetse' iareo, mbore mihamacieñe o tro-gege' iareoo. ²² Mihaboke hihitse te mone miha-dagola, ²³ soloa'e sare-ondaty mora momoke, naho voroñe naho biby aman-tombok' efatse vaho biby milaly, ty engen' Añahare tsi-modo.

²⁴ Aa le adòn' Añahare amo draon-tro' iareoo ho ami'ty haleorañe hifaniva vatañe. ²⁵ Atakalo' iareo vande ty hatòn' Añahare vaho mitalaho naho mitoroñe amo namboareñeo, fa tsy aman' Andrianamboatse—I rengèñe nainai'ey. Amena.

²⁶ Zay ty ampipohan'Añahare am-pipaiañe faly iareo: hatsalo' o roakemba' iareoo sata tsy fanoeñe amo fiolorañe mahitio; ²⁷ naho ado'

* ^{1:17} Kab 2:4

o lahilahio ty fiolorañe vantañe aman' ampela hiforehetse hifampipay; ie manao haloloañe aman-dahilahy ty lahilahy, vaho rambese'e am-batañe ty toly mañeva o hakeo'eo.

²⁸ Aa kanao tsy sazò' iareo ty hitambozòtse ami'ty faharendrehañe an' Andrianañahare, le adon' Añahare ami'ty fitsakoreañe mengoke, hanao raha tsy fanoeñe; ²⁹ ie lifo-katsivokarañe, halò-tserehañe, fatitimena, helo-tro, fihàñañe, fañohoan-doza, fifanointoiñañe, famañahiañe, hasiahañe vaho fibisibisihañe; ³⁰ mpidramotse, mpalaiñe an' Andrianañahare, mpiteratera, mpibohaboha naho mpirengevole; mpikitro-draty vaho mpanjeha-drae. ³¹ Ie tsy aman-kilala, mpivalik'am-pañina, tsy mahafikoko vaho po-fiferenaiñañe. ³² Ndra t'ie mahafohiñe ty havantañan' Añahare tsy apota'e te mañeva havetrake ty manao i tsaraeñey, le tsy vaho anoe'e, fa onjone' iereo o mpanao irezaio.

2

¹ Aa le tsy amam-piveroha'e ondatio, ndra iaia rehe mizaka, o fizakà'oo ro amara'o vatañe, amy te ihe mizaka ro mpanao o anoe'eo. ² Toe fohintika te vantañe ty talim-pizakan' Añahare o manao i sata rezaio. ³ He zao ty atao'o, ry ondatio, ie anoe'o o fanoe'o zakae'oo, ho votitsihe'o hao i zakan' Añaharey? ⁴ Ke vasohe'o ty havokaran-kasoa'e, ty fañantoàña'e naho ty fahaliñisa'e*, ie amoea'o te mitaoñe azo hisoloho ty fatarihan' Añahare. ⁵ Fa ty tro'o manjehatse tsy mete misoloho ro mañaja haviñerañe ho azo amy andron-kaviñerañe naho famentabentarañe ty hatòn-jakan' Añaharey, ⁶ ie songa ho tambezeñe ty amo sata'eo t'indaty†; ⁷ le tolora'e haveloñe nainai'e o mipay engeñe naho asiñe naho tsy fihomahañe am-pimanean-kasoao; ⁸ fe fiforoforoañe naho haviñerañe o mpitribàhatseo, o mañarinje ty to naho mitolon-katsivokarañe naho habosehañe vaho hatorifhañe. ⁹ Eka ho valea'e hasiloke naho halovilovy ze fiai' ondaty mpanao raty, ty Jiosy hey vaho ty Grika; ¹⁰ le engeñe naho asiñe naho fañanintsiñe ze hene mpanao soa; ty Jiosy hey vaho ty Grika. ¹¹ Fa tsy mirihy t'i Andrianañahare.

¹² Toe songa hikorokomake alafe' i Hake ze mandilatse alafe' i Hake, vaho sindre ho zakaeñe amy Hake ze manao hakeo ambane' i Hake, ¹³ Tsy ze mpijanjiñe Hake ro malio-tahiñe aman' Añahare, fa ty mañambeñe Hake‡ ro mahazo to; ¹⁴ aa ie mahafañorike ty andilia' i Hake an-dilitse ty ambahiny tsy aman-Kake, le aman-Kake am-bata'e ty tsy aman-Kake, ¹⁵ fa ampalangese' o sata'eo te misokitse an-tro'e ao ty nafe' i Hake, itaroñambetsevetse, ke anisia' ty fitsakorea'e he añatoa'e ¹⁶ amy andro ho zakaen' Añahare añam' IESOÀ Norizañey o mietake am' ondatioo; zay ty talily soa taroñeko.

O Jiosio naho o Lilio

¹⁷ Aa ihe manoñom-batañe ho Jiosy, mpiato amy Hake naho mirengé aman' Añahare; ¹⁸ ihe mahafohiñe o satri'eo naho miantoke ty soa kanao niòke amy Hake, ¹⁹ naho atao'o te mpiaolo' ty goa naho hazavàñe amo añ' ieñeo, ²⁰ mpanoro ty tsi-mahilala, mpañoke ty bahimo, ama'o ty vente' ty hihitse naho ty hatò amy Hake ao§— ²¹ ihe arè, mpañoke ty ila'e, maño-batam-b'iheo? Ihe manoro ty hoe: Ko mikametse*, he mikizo? ²² Ihe manao ty hoe: Ko mañarapilo†; mitsindroke amontoñe ao hao?

* ^{2:4} Pe II 3:9 † ^{2:6} Sab 62:12, oni: Mat 16:27 ‡ ^{2:13} Mat 7:21-27, Jak 2:14-24 § ^{2:20} Sab 147:19, Rom 3:2, 9:4 * ^{2:21} Avo 20:15, Its 20:19 † ^{2:22} Avo 20:14, Its 20:18

Ihe malain-tsikily, va'e mpampikametse añ' anjomba miavake ao? ²³ Ihe mpisenge Hake, hera mañamavo an'Andrianañahare ami'ty fandilara'o Hake? ²⁴ Toe pinatetse te:

Inahareo ro iteratera' o kilakila
ondatio ty tahanan' Añahare.[‡]

²⁵ Toe mahasoa ty savatse, naho oriheñe ty Hake fe naho mpiola amy Hake le mivalike ho tsy fisavarañe i fisavara'oy. ²⁶ Aa naho àmbe' ty tsi-sinavatse o fañè amy Hake aoo, tsy ho volilieñe te afa-boy hao i tsy misavatsey? ²⁷ Toe hizakà' ty tsi-afa-boiñe mahambeñe Hake. Ama'o i pinatetsey naho i savatsey f'ie mpiola amy Hake.

²⁸ Fe tsy maha-Jiosy t'ie alafe'e avao, mbore tsy atao savatse i anoeñe antsandriñey. ²⁹ Toe Jiosy t'ie an-troke ao, naho añ'arofo ao ty savatse to\$, fa tsy an-tsokitse; aa le tsy boak' am'ondatio ty enge'e fa aman' Añahare.

3

Ty Fatokisañe an' Andrianañahare

¹ Inoñe arè ty tombo' ty maha Jiosy; he ino ty mahasoa o savatseo? ² Toe jabajaba tok'aia'aia! Valoha'e, toe nafantoke am'iereo o fepèn' Añahareo*.

³ Hera tsy nahafiato ty ila'e? Hahamodo ty figahiñan' Añahare hao ty tsy fatokisa'e? ⁴ Sondo'e! Ee abey te ho tendreke to t'i Andrianañahare ndra te kila mpandañitse ondatio, amy pinatetse ty hoe:

Soa t'ie ho zoen-to amo tsara'oo
vaho handreketse te mizaka.[†]

⁵ Aa naho onjone' ty hatsivokaran-tika ty hatòn' Añahare, le akore ty hatao-tikañe? te tsy to hao t'i Andrianañahare t'ie mandafa? (manao reha' ondaty rahoo). ⁶ Sondo'e ka! Naho nitò, akore ty hizakà' Añahare ty voatse toy? ⁷ Aa naho ty vandeko ro mampionjoñe ty hatòn' Añahare ho ami'ty enge'e, le inoñe ty amàrañe ahy ho mpanan-kakeo? ⁸ Aa vaho akore t'ie tsy manao ty hoe: (Amy fanambaitambaiñañe anaiy, ie atao' ty ila'e te enta'ay), Antao hanao raty hitotsaha' ty soa? To ty famàrañe iareo.

Ia ty Tsy aman-Tahiñe

⁹ Akore arè? Itika hao ro soa? Aiy! fa niventean-tika aniany te songa fehèn-kakeo ke te Jiosy he te Grika. ¹⁰ Fa pinatetse ty hoe:

Tsy eo ty vañoñe, leo raike;

¹¹ tsy eo ty mahilala,

tsy eo ty mipay an' Andrianañahare.

¹² Fonga nandifike,

songa tsy manjofake; tsy ia ty manao soa, leo raike.[‡]

¹³ Kibory misokake ty tretra' iareo; mitolom-pamañahy ty famele' iareo;
\$Ambane soñi' iareo ao ty vore' o mereñeo.*

¹⁴ Lifotse fatse naho afero
o falie' iareoo.[†]

¹⁵ Malisa te hampiori-dio ty fandia' iareo[‡];

¹⁶ fianto naho hasotriañe
ro amo lala' iareoo;^{\$}

¹⁷ vaho alik'am' iereo ty lalam-panintsiñañe.*

¹⁸ Tsy aolom-pihaino' iareo ty fañeveñañe aman' Añahare.[†]

‡ 2:24 Ies 52:5 § 2:29 1Ko 7:19, Avo 19:5, Its 10:12-16, 30:6-8 * 3:2 Oni Rom 2:20 † 3:4 Sab 51:4 ‡ 3:12 Sab 14:1-3, 53:1-4 § 3:13 Sab 5:9 * 3:13 Sab 140:3 † 3:14 Sab 10:7 ‡ 3:15 Rzt 1:16 § 3:16 Rts 15:9, Iir 23:12 * 3:17 Ies 59:7,8 † 3:18 Sab 36:1

¹⁹ Fohintika te ze tsarae' i Hake ro tsarae'e amy ze ambane' Hake, hampihomboñe ze kila falie, vaho fonga hampivolilieñe aman' Añahare ty voatse toy; ²⁰ fa tsy ama' nofotse veloñe ty hahazo to ampivazoho'a[‡] ami'ty fimanemanea'e Hake; amy te fampandrendrehan-kakeo ty Hake[§].

Havantañañe am-Patokisañe

²¹ Ie henaneo, fa nadodea alafe' i Hake ty havantañañ' Añahare, ie taroñe' ty Hake naho o Mpitokio ²² naho boak' aman' Añahare añamy figahiña' IESOÀ Norizañey ty havantañañe, ho amo hene mitam-patokisañe, le tsy iambakambáhañe; ²³ toe fonga nanao hakeo naho milesa ami'ty engen' Añahare, ²⁴ f'ie nampivantañañe tsi-ambili'e amy fatariha'e añamy fijebañañe amy IESOÀ Norizañey, ²⁵ i sinafirin' Añahare ho takom-boiñe añamy fiatoañe an-dio'ey, hampiboake ty havantaña'e, fa am-pahaliñisa'e ty nirirañen' Añahare o hakeo taoloo, ²⁶ hampidodeà'e amo sa zao ty havantaña'e, t'ie i Vantañey naho ty figahiña' IESOÀ ro fañavantañañe ondaty.

²⁷ Aia arè ty firengeañe? Napoke aña. Ami'ty Hake manao akore? He am-pimanemaneañe? Aiy avao, fa amy Hake miato-patokisañey. ²⁸ Aa le agadon-tika te vantaña'e i fatokisa'ey t'indaty fa tsy am-pimanemanea'e Hake. ²⁹ Aa vaho Andrianañahare' o Jiosio avao hao re? Tsy a' o fokontokoñe ka hao? Eka, toe a o fokontokoñe ka. ³⁰ Inao, Raike t'i Andrianañahare, le fatokisañe ty añavantaña'e o sinavatseo naho fatokisañe ka o tsy sinavatseo. ³¹ Hera faohen-tika am-patokisañe t'i Hake. Aiy, sondo'e! te mone ajadon-tikañe t'i Hake*.

4

Raem-patokisañe t'i Abraàme

¹ Aa ino ty hataon-tika te nioni' i Abraàme raentika am-bata'e? ² fa naho o fimanea'eo ty nañavàntañe i Abraàme, le amam-pisengea'e re, fe tsy añatrefan' Añahare. ³ Ino ty tsarae' o Sokitse Masiñeoo? Natokisa' i Abraàme t'i Andrianañahare vaho nivolilian-ko havantañañe.*

⁴ Ie mitoroñe t'indaty, le tsy atao falalàñe ty tambe'e fa zo'e. ⁵ Fe amy tsy mitoroñe fa miato amy Mpañavantañe ty tsy aman-Kàkeiy, le volilieñe ho havantaña'e i fatokisa'ey. ⁶ Hambañe amy tsarae' i Davide ty haeha' ondaty vinolilin' Añahare ho vantaña tsy ty amy fitoroña'ey:

⁷ Haha o nafahan-kakeoo, naho o aman-tahiñe kinolopokeo.

⁸ Haha t'indaty tsy anaña' IEHOVÀ hakeo.[†]

⁹ O sinavatseo avao hao ro haha, ke o tsy sinavatseo ka? amy nataon-tika te nivolilieñe ho havantañañe amy Abraàme i fatokisa'ey[‡]. ¹⁰ Akore ty namoliliañe aze? Ie fa sinavatse hao, ke ie mbe tsi-afa-boy. Toe ie tsy nisavatse naho mbe tsi-tinampake! ¹¹ Aa le rinambe'e ho viñoñe i savatsey; ho voli-fitombo' i havantañam-patokisa'ey, ie mbe tsy niafa-boiñey. Toly ndra ie ty rae' o mpiato tsy sinavatseo, hamoliliañe iareo ho vantaña. ¹² Ie ka ty rae' o sinavatseo, tsy o niafa-boiñeo avao fa o mañavelo amy fatokisa' i Abraàme raen-tikañey t'ie mbe tsy nisavareñeo.

¹³ Tsy añamy Hake fa amy havantañam-patokisañey ty nampitamañe i Abraàme naho o tarira'eo t'ie ty handova ty voatse toy. ¹⁴ Fa naho ty mpimane Hake ro mpandova le tsy vara ty fatokisañe vaho kòake ty fitamàñe. ¹⁵ Toe minday lafa t'i Hake, fe naho tsy eo lily, tsy eo

* 3:20 Sab 143:2 § 3:20 Avo 20:20, Rom 4:15, 7:7 * 3:31 Sab 105:45, 119:44, Its 28:4, Ies 42:21, Iir 31:33 * 4:3 Fot 15:6; Gal 3:6 † 4:8 Sab 32:1-2 ‡ 4:9 Fot 15:6

zehatse. ¹⁶ Ie amy zao, le fatokisañe añamy fatarihañey, hamenteañe ty nampitamañe ze hene tariratse, tsy ze amy Hàke avao, fa amo mpitrapatokisañe amy Abrahàmeo ka, ie raen-tikañe iaby, ¹⁷ (Fa hoe ty pinatetse: Fa nanoeko raem-pifeheañe maro rehe§)

ie añatrefa' i natokisa'ey, i Andrianañahare mameloñe o nihomakeo vaho mikanjy o raha tsy eoo ho eoy. ¹⁸ Ie ho nilesa ty fosalala'e, mb'e niantofa'e i nampitamañey, t'ie ho raem-pifeheañe maro, ty amy nitsaraeñe ama'ey, te:

Ho mira amy zay o tarira'oo.*

¹⁹ Tsy nimokotse i fatokisa'ey, tsy hinao'e i sandri'e fa hihomakey—ie niha-zato taoñe—naho ty hamodoa' ty trañon' ana' i Sarae; ²⁰ tsy niankanie'e an-tsi-fatokisañe i nampitaman' Añaharey, fe nihafatratse am-patokisañe, nandrenge an' Andrianañahare; ²¹ ie niantoke do'e te lefen' Añahare ty hahafonitse i tsinara'ey ²² le vinolily ho havantañañe ama'e†.

²³ Ie amy zao, tsy ie avao ty nanokirañe te vinolily ho ama'e, ²⁴ fa ho volilieñe ka tika mpiato amy nampitroatse IESOÀ Talèn-tika an-kavilasiy; ²⁵ ie nasese ty amo hakeon-tikañe vaho natroatse hañavantañañe an-tika.

5

Ty Voka' ty Fañomean-To

¹ Aa kanao vinolily ho vantañe tika ty amy fatokisan-tikañey, le an-kanintsiñe tika aman' Añahare añamy Talèn-tika IESOÀ Norizañey, ² le fatokisañe ka ro ahazoan-tika lalañe mb'amy hasoa ijohañan-tikañey, ie mitreñe, misalala ty hahaoniñañe i engen' Añaharey! ³ Tsy zay avao, fa rengen-tika o halovilovian-tikañe, fohiñe te minday fahaliñisañe i haloviloviañey ⁴ naho figahiñañe i fahaliñisañey vaho fitamàñe i figahiñañey, ⁵ ie tsy salare' i fitamàñey, amy te nadoandoañe an-tron-tikañe ao ty fikokoan' Añahare amy Arofo Masiñe natolots' an-tikañey.

⁶ Ie mbe nalejolejo tika, le nivilasy ho a o lo-tserekeo ami'ty sa mete i Norizañey. ⁷ Tsy siake hamoeñ' aiñe ty vañoñe, fe he eo ty mahavany hivetrake hisolo t'indaty soa. ⁸ Fe niventen' Añahare ty fikokoa'e antika, amy te mbe nanan-kakeo tika te nivilasy i Norizañey. ⁹ Aa kanao nivantañe' i lio'ey tika, antsake te ho hahañ' amy haviñerañey! ¹⁰ Ie mbe nimpirafelahy tika ro nifampilongoeñe aman' Añahare amy havilasi' i Ana'ey, sandrake, t'ie nifampilongoeñe ro ho rombaheñe amy havelo'ey! ¹¹ Tsy zay avao, fa IESOÀ TALÈ Norizañey henaneo ty andrengean-tika an' Andrianañahare, i nanjoan-tika fijebañañey.

Havilasy amy Dame, Havelo amy Norizañey

¹² Aa le hambañe amy te indaty raike ty nizilihan-kakeo ami'ty voatse toy naho i havilasiy ty amy tahiñey, te kila hifetsahan-kavilasy, amy te fonga nandilatse; ¹³ Toe tami'ty voatse toy taolo' i Hake o fandilarañeo, fe tsy mahaseke ty tahiñe naho tsy eo ty Hake. ¹⁴ Ndra te zay, nameleke faha' i Dame pak' amy Mosè o havilasio, ndra amo tsy nandilatse am-panjehara' i Dameo, ie fanalinjoa' i hitotsakey.

¹⁵ Fe tsy manahake i tahiñey ty hasoa, fa naho ty hakeo' i raikey ty nahavilasy i màroy, antsake te nitobàke amy màroy ty fatarihan' Añahare, naho ty hasoam-palalà' i raikey, IESOÀ Norizañey! ¹⁶ Eka, tsy ampanahafeñe ami'ty toli' i nandilatsey i falalàñey, amy te nikai-jaka

naho ninday fatse i raikey; fe nandimbe hakeo maro i falalàñey vaho ninday havantañañe. ¹⁷ Aa naho ty tahi' i raikey ty nifehean-kavilasy añañamy raikey, sandrake te hifeleke an-kaveloñe ao o mandrambe i hasoa mitoabotsey naho i ravoravon-kavantañañeio añañamy raike atao IESOÀ Norizañey. ¹⁸ Aa le, hambañe amy te nafà' ty hakeo raike ze kila ondaty, te nivantañen-ko veloñe ami'ty sata-vañoñe raike ka ze hene' ondaty. ¹⁹ Fa manahake ty nampanaña' ty fanjehara' indatiy tahiñe i màroy, ty nañavantaña' i raikey i màroy amy fivohora'ey. ²⁰ Nivotrak' eo ty Hake hampivangogo o tahiñe, aa ndra te nirokoroko o tahiñe, somandrake te niraorao ty fatarihane, ²¹ aa le hambañe amy te hakeo ty nifeleke an-kavilasy, te fatarihane ty hifehe an-kañavantaña mb'an-kaveloñe nainai'e añañamy Talèntika IESOÀ Norizañey.

Mate an-Tahiñe, Veloñe amy Norizañey

6

¹ Aa vaho hanao ty hoe hao tika: Antao hitolom-pandilatse hampitomambao ty hasoa! ² Sondo'e! Akore t'ie nihomake an-kakeo* ro mbe ho veloñ' ama'e? ³ He tsy fohi' areo te itikañ' iaby nilipotse am' IESOÀ Norizañey ro nilipotse amy havilasi'ey. ⁴ Aa le nitrao-pilenteké ama'e tika amy lipotsey mb'an-kavilasy ao, soa te, hambañe ami'te nampitroare' ty engen-dRae an-kavilasy i Norizañey, ty hañaveloantika an-kavelom-bao. ⁵ Aa naho nampireketeñe ama'e tika an-kavilasy manahake aze, le ho mpiamy fivañonan-ko velo'ey ka tika, ⁶ ie fohiñe te naradorado mindre ama'e i vatan-tika hambo'ey, hañitoañe i sandriñe lifo-kakeoy, soa tsy hondevozen-tahiñe ka, ⁷ amy te votsotse an-kakeo ze fa nihomake. ⁸ Aa kanao niharo vilasy amy Norizañey tika, le atokisantika te hindrezañe an-kaveloñe ka, ⁹ fohiñe te natroatse amy havilasiy i Norizañey tsy ho vilasy ka, amy te tsy anaña' i havilasiy lily. ¹⁰ I havilasy nivetraha'ey, le nivetraha'e ty amo hakeoo indraike nahaheneke; fe i haveloñe iveloma'ey, ro iveloma'e aman' Añahare. ¹¹ Iantofo arè te nihomake an-kakeo nahareo, fe veloñe aman' Añahare am' IESOÀ Norizañey. ¹² Aa le ko atolotse ho fehèn-kakeo o sandri' areo ho momokeo, hivohots' amo hadrao'eo. ¹³ Le ko atolo' areo an-tahiñe o fangefange' areoo ho harao-katsivokarañe, fe manolora vatañe aman' Añahare hoe nivelomeñe an-kavilasy; vaho o fangefange' areoo ho haraon-kavantañañe aman' Añahare, ¹⁴ amy te tsy hanan-dily ama' areo o hakeoo†, amy t'ie tsy ambane' ty fimanemanean-dily, fa ambanem-patarihañe.

Ondevon-Kavantañañe

¹⁵ Akore arè? Handilatse hao tika amy te tsy fehèm-pepètse fa ambanem-patarihañe? Aiy, sond'e! ¹⁶ Tsy fohi' areo hao te, ze anolora' areo sandriñe ho mpitoro'e hivohora'o, le ondevo' i vohoraña?—ke amo tahiñe minday mb'am-pikoromahañe, he am-pivohorañe minday havantañañe. ¹⁷ Ty fatarihan' Añahare, inahareo nondevozen-kakeo fe mivohotse añ'arofo amo ventem-pañòhañe nitaroñañe, ¹⁸ le fa hinaha an-kakeo vaho mpitoron-kavantañañe. ¹⁹ Anoeko an-dreha' ondaty ty amy haifoifo' o sandri' areoo: Fa hambañe amy te nafoe'areo hondevozen-kakeo naho tahiñe o fangefangeo hañonjonañe ty hatsivokarañe; t'ie hibanabana o fangefangeo hitoron-kavañonañe mb'am-piavahañe henane zao.

* **6:2** Rom 8:13, Kol 3:3, Pe I 2:24 † **6:14** Fot 4:7, Tit 2:14, Mic 7:19, Sab 130:7-8

²⁰ Ie nitoron-kakeo taolo, le nihaha amy havantañañey. ²¹ Aa le inoñe ty nivokareñe amo raha manalatse anahareo henaneo? kanao ampigadoñe'e an-kamomohañe. ²² Aa ie hinaha an-kakeo naho mivohotse aman' Añahare henaneo, ro mahazo ty hasoa i fiavahañey ie mamokatse haveloñe tsy modo. ²³ Fihomahañe ty valen-kakeo‡, fe haveloñe nainai'e ro fatarihan' Añahare amy Talèntika IESOÀ Norizañey.

7

Fandrazañañe amo Enga Valio

¹ O ry longo, (ie itaroñako o mahafohiñe Hake) nofi' areo hao te fehè' i Hake t'indaty t'ie mbe veloñe? ² Fa ampifetrehe' i Hake amy vali'ey ty rakemba naho mbe veloñe i rangahey, ie mihomake indatiy, le votsotse amy Hake mamahotse aze amy vali'ey. ³ Aa naho anakeza' ondaty ty rakemba manam-baly le atao t'ie tsy vokatse. Fe naho mihomake i vali'ey, le haha amy Hake re, vaho tsy karapilo t'ie engae' ondaty. ⁴ Ie amy zao ry longo, ty Fañòva' i Norizañey ty nivetraha' areo amy Hake, hireketa' areo ami'ty hafa, amy nampitroareñe amy havilasiy, hamokaran-tika ho an' Andrianañahare.

⁵ Itika tamy nofotsey, le nitoloñe an-tsandriñe ao o draon-kakeo nisigihe' i Hake hamokara'e fihomahañe. ⁶ F'ie votsots' amy Hake henaneo, nivetrake amy namahotsey, hitoroñe ami'ty nañavaoe' i Arofoy fa tsy am-pimanemanean-tsokitse hambo'e.

Fifandrakarakañe amo Tahiñeo

⁷ Aa le inoñe ty ho asan-tikañe? Hakeo hao t'i Hake? Sondo'e! Fa tsy ho napotako ty atao tahiñe naho tsy t'i Hake, le tsy ho nihaiko ze atao fitsikirinhañe naho tsy nafé' i Hake ty hoe,
Ko mihañe.*

⁸ I tahiñey, ie nampahazoa' i liliy lalañe, nitrobo ze atao fikirañañe amako, fa naho tsy eo Hake, tsy eo tahiñe. ⁹ Nivelõne hey raho taolo t'ie tsy aman-Kake; fe niavy i liliy, le niboden-ko veloñe o tahiñeo vaho nikenkan-draho; ¹⁰ i fañè ho ninday haveloñey, te mone namono ahy. ¹¹ I hakeoy, ie nampahazoa' i liliy lalañe, namañahy ahy, vaho ie ty namono ahy. ¹² Aa le Masiñe t'i Hake, le miavake naho vantañe vaho soa o lilio.

¹³ Aa vaho fihomahañe amako hao i soay? Sondo'e! Fa i tahiñey, hampiborahañe ty hakeo, nitoloñe fihomahañe amako amy soay, hampidodea' i Hake ty halo-tsere' o tahiñeo.

Hotakotake añ'arofo

¹⁴ Fohintika te arofo t'i Hake, f'ie nofotse naletake hondevon-kakeo. ¹⁵ Tsy apotako o anoekoo; le tsy anoeko o satrikoo, te mone i hejekoy ty anoeko. ¹⁶ Aa naho anoeko i tsy satrikoy, le iantofako te soa t'i Hake. ¹⁷ Ie henaneo tsy zaho ty manao, fa ty hakeo mitoboke an-troko ato. ¹⁸ Apotako te tsy imoneñan-kasoa ty nofoko toy. Toe amam-pisalalan-draho, fe tsy tafete'e ty fanoan-tsoa. ¹⁹ I soa satrieko hanoeñey tsy anoeko, fe i raty hejekoy ty toloñako. ²⁰ Aa naho anoeko i raha hejekoy, le tsy zaho ty mitoloñe, fa o tahiñe mitsotsefotse amakoo.

²¹ Treako amy zao ty lily toy, t'ie manitra hanao soa, amako ty raty. ²² Toe iantofako an-kafalean-troke i Han' Añaharey†; ²³ fe mahatreahake hafa am-pangefangen-tsandriko ato mifandraparapake amy Hake am-pitsakoreako atoañey mandrohy ahy amy ha' o tahiñe am-pangefangekooy.

‡ 6:23 Rom 8:13 * 7:7 Avo 20:17, Its 5:21 † 7:22 Sab 119:16

²⁴ Hete, ondaty mavoin-draho! Ia ty hañaha ahy ami'ty sandrim-pihomahañe toy? ²⁵ Andriañeko t'i Andrianañahare añamy TalèntikaIESOÀ Norizañey. Ie amy zao mitoroñe i Han' Añaharey raho an-troke ao, naho i ha' o tahiñeoy ami'ty sandriko hambo'e toy.

8

Haveloñe añamy Arofoy

¹ Ie henane zao tsy amam-patse o am'IESOÀ Norizañeo, o tsy mañavelo amy nofotsey, fa amy arofoio, ² ie hinaha' i Han' arofo minday haveloñe am'IESOÀ Norizañeyi amy han-tahiñe naho havilasiy. ³ Toe tsy nahalefe i Hake, ie nampaifoifoe' i nofotsey, aa le nihenefan' Añahare amy nañiraha'e i Ana'ey ho hambam-bintañe amo sandriñe maleo-tahiñeo ho engan-kakeo, hamatse o tahiñe an-tsandriñeo, ⁴ soa te ho heneke amantika tsy mpañavelo amy haondaty hambo'ey fa amy Arofoy ty havantaña' i Hake. ⁵ Mifahatse amo raha' i hambo'eio ty fitsakorea' o mipiteke amy hambo'eio, fe amo rahan'arofoo o mpiato amy Arofoio. ⁶ Toe fihomahañe ty vetsevetse mirekets' amy hambo'ey, fe haveloñe naho fañanintsäne ty ereñeren-tro' i mitambozòtse amy Arofoy; ⁷ fa mandrafe aman' Añahare ty fitsakoreañe mipitek' amy hambo'ey, amy te tsy iambanea'e t'i Han' Añahare, toe tsy lefe'e; ⁸ vaho tsy mete mahafale an'Andrianañahare o miato amy sandriñe hambo'ey. ⁹ F'ie tsy amy hambo'ey, fa amy Arofoy, naho toe mimoneñe an-tro' areo ao i Arofon' Añaharey; aa naho tsy ama'e i Arofo' i Norizañey le tsy aze. ¹⁰ Ie ama' areo i Norizañey, ndra te nihomake an-kakeoo i sandriñey, le veloñ' an-kavantañañe ty arofo. ¹¹ Aa ie mañialo ama' areo ao ty Arofo' i nampitroatseIESOÀ amy havilaisiy, le i nañakatse i Norizañey amy fihomahañey ro hameloñe o sandri' areo mora momokeo amy Arofo'e mañialo ama'areoy.

¹² Ie amy zao, ry longo, mpisongo tika: tsy amy hambo'ey t'ie ho veloñe amy modoy, ¹³ f'ie veloñe amy hambo'ey, le tsy mete tsy hihomake; fa naho i Arofoy ro añitoa' areo erike o sata' rati' i hambo'eio, le ho veloñe. ¹⁴ Fa hene anan' Añahare ze tarihe' i Arofon' Añaharey. ¹⁵ Toe tsy nandrambe i fañahim-pandrohizañey nahareo hirevendreveñe, f'ie nandrambe ty Arofom-pamelomañ' anake mahakanjy ty hoe: Àba, Rae. ¹⁶ I Arofoy ty mitaroñe aman-tron-tikañe te anan' Añahare; ¹⁷ aa kanao anake tika le mpandova, toe mpandova aman' Añahare, naho mitrao-pandova amy Norizañey, ie iharoan-tika haloviloviañe, le itraofan' engeñe ka.

Engeñe ho Avy

¹⁸ Apotako te tsy mañeva hoharañe amy engeñe ho bentabentareñe aman-tikañey ty haloviloviañe henanekeo. ¹⁹ Fa mihalantavañe, mandiñe ty fiboaha' o anan' Añahareo ty voatse toy; ²⁰ amy te nondevozeñe ami'ty tsy fanjofahañe o namboareñe, tsy nisatrie'e, fe ami'ty fisafiri' i nampiambane irezay ho am-pitamañe ²¹ t'ie ho hahàñe am-pandevoza' i fimomohañey ka ty voatse toy ho an-kavolonahem-pidatà' o anan' Añahareo. ²² Fohintika t'ie mibabababa naho mitrao-pitoreo am-pitsongoañe pake henaneo ze kila namboareñe. ²³ Tsy ie avao, fa itika aman-dengom-boa' i Arofoy, eka! itika ro mitreontreõe an-troke ao, misalala ty fameloman' anake, ty fijebañañe o sandrin-tikañeo. ²⁴ I fitamàñey ty nandrombahañe an-tika, le tsy atao fitamàñe o fitamàñe isakeo, fa ia ty mitamà ty raha trea'e? ²⁵ Aa ie tamaen-tika i tsy isakey le mihavàtse mandiñe aze.

²⁶ Manahake zay, mañolotse o haifoifoan-tikañeo ka i Arofoy; itika tsy mahay mihalaly ami'ty do'e, fa i Arofoy ro mañalañalañe ho antikañe ami'ty fitreontreño tsy lefe talilieñe. ²⁷ Le i Mpibiribiry trokey ty maharofoanañe ty fitsakorea' i Arofoy, amy t'ie ro mañalañalañe ho a o noro'eo ami'ty satrin' Añahare.

Milikoatse o Mpandrebakeo

²⁸ Fohin-tika te ampifanehafen' Añahare ze he'e hañasoa o mikoko an'Andrianañahareo, o kinanjy amy fisafiria'ey; ²⁹ amy te ze niarofoana'e taolo ro tinendre'e hihambam-bintañe amy Ana'ey, soa t'ie ty ho tañoloñoloñam-piroahalahy maro. ³⁰ Le nikanjie'e ka o tinendre'eo, naho nampivantañe'e o nikanjie'eo, vaho nirengè'e o nampivantañe'eo.

³¹ Akore arè ty hanoen-tika? Kanao mañimba antika t'i Andrianañahare, ia ty hiatreatre? ³² Aa ie tsy nañaro i Bako Toka'ey fa nengae'e ho antikañ' iaby, sandrake t'ie mitraoke ama'e ro hanolora'e ze he'e? ³³ Ia ty hanisý o jinobon' Añahareo? I Andrianañahare ro mañavantañe, ³⁴ Ia ty hamàtse?IESOÀ Norizañey ty nivilasy, eka, toe nampivañonen-ko veloñe; ie am-pitàn-kavananañey? ³⁵ Ia ty hampipitsoke antika ami'ty fikokoa' i Norizañey? haoreañe hao ke haloviloviañe he fampisoñañe ke hasalikoñañe he fihaloñañe ke hankàñe he fibara? ³⁶ Toe pinatetse ty hoe:

Ihe ro anjamanañe anay lomoñandro;
volilien-ko añondry ho lentañe zahay.*

³⁷ Fe amy iaby rezay, mpandrebake ra'elahi tika amy Nikoko antikañey. ³⁸ Le faharako te to, ke havilasy he haveloñe ke anjely he fifeheañe he ze eo henaneo ke ze mb'e aña, ³⁹ he ty añ' abo ey ke ty an-dalek' ao he inoñ' inoñe ami'ty voatse toy, tsyahasintake antikañe amy fikokoan' Añahare amy TalèntikaIESOÀ Norizañey.

9

Ty Fiferenaiña'i Paoly

¹ Mitaroñe ty hatò amy Norizañey raho fa tsy misovo-bolañe; mitraopitaroñe am-pitsakoreako i Arofo Masiñey, ² t'ie lonjetse, naho mitolom-pihontoke ty an-troko atoa, ³ fa nisalalaeko t'ie haitoañe amy Norizañey ty amo longoko ama' nofotseo, ⁴ ie nte-Israele, a' iareo ty fameloman-ko anake, ty engeñe, o fañinao, ty fanolorañe Hàke, i fisoroñañey, vaho o fampitamàñeio; ⁵ a' iareo o raeo, naho boak'am'iareo ami'ty nofotse i Norizañey—i ambone' ze he'ey, i Andrianañahare rengeñe nainai'ey. Amena.

⁶ Fa tsy te nilesa o tsaran' Añahareo, amy te tsy hene nte-Israele t'ie tarira' Israele, ⁷ mbore tsy songa anake t'ie tiri' i Abraàme; fa, Am' Isaka ty ikanjiañe o tiri'oo,*

⁸ aa le tsy o tariratse ama nofotseo ro anan' Añahare, fa o ana' i fitamàñeio ro volilieñe ho tariratse. ⁹ Hoe ty tsara' i fitamàñey, Hibalike ami'ty sa toy raho
le hanañ' ajajalahy t'i Sarahae.[†]

¹⁰ Mbore adodea amy Ribkae, ie nampiareña' Isaka raentika indrai- piolotse, ¹¹ (iereo mbe tsy nitoly, mboe tsy nanao inoñe ndra soa ndra raty, soa te hijadoñe i fijoboñañe sinafirin' Añaharey, tsy amo tolon-drahao fa amy Mpikanjiy), ¹² le hoe ty tsinara ama'e:

* 8:36 Psa 44:22 * 9:7 Fot 21:12 † 9:9 Fot 18:10

Hitoroñe ty zai'e ty zoke'e,[‡]

¹³ amy pinatetse ty hoe:

Nikokoako t'Iakobe
fa nihejeko t'i Esave.[§]

¹⁴ Inoñ'arè ty hatao-tika? Hera aman' Añahare ao ty tsy to. Sondo'e zay!

¹⁵ Fa hoe re amy Mose:

Ho ferenaiñeko ze hiferenaiñako,
le ho tretrezeko ze hitretrezako.*

¹⁶ Aa le tsy ty fisalalà' ondaty, tsy ty filaisa' ondaty, fa i Andrianañahare
mpitretre. ¹⁷ Le hoe i Sokitse Masiñey amy Farao:

Amo safiry zao ty nampionjonako azo,
te ihe ty hampiboahañe ty haozarako,

naho hanitsihañe ty tane toy ami'ty fitaroñañe i añarakoy.[†]

¹⁸ Aa le tretreze'e ze satri'e, naho ampigàñe'e ze laha'e.[‡]

¹⁹ Aa ke hatao' areo amako ty hoe, Inoñe arè ty itiñea'e an-tika?
Ia ty hahasebañe i satri'ey? ²⁰ Hete, ry 'ndaty, ia v'iheo te manoiñe
aman' Añahare? Ho volañe' i namboareñey ty hoe hao i namboatse
azey: Akore ty nanoe'o ahy?[§] ²¹ Hera añana' i mpanao valañe-taney
lily i lietsey, t'ie ami'ty boko'e raike ro itsenea'e sinim-piasiañe naho ty
valañe tsotra? ²² Aa vaho akore t'i Andrianañahare, ie te hamente ty
haviñera'e naho hampandrendreke ty haozara'e, ro nifeake haliñisañe
amo valañen-kabosehañe harotsakeo, ²³ hampahafohinañe ty hafanjàka'
ty enge'e amo valañem-pitretrezañe, o nihentseñe'e taolo ho rengèñe?

²⁴ Itika nikanje'e 'nio, tsy amo Jiosio avao, fa amo kilakila ondatio ka? ²⁵ ie
natovo'e amy Hosea ao, ty hoe:

Ho tokaveko ty hoe: Ondatiko
o tsy ni-ondatikoo,

vaho Kokoa'e, i tsy nikokoañey.*

²⁶ Hifetsake an-toetse nanoña am' iereo ty hoe: Tsy ondatiko nahareo,
t'ie hikanjiañe ty hoe: anak' Andrianañahare veloñe[†].

²⁷ Le hoe ty koi' Isaia ty am'Israele:

Ndra te nira amo fasen-driakeo
ty ia' o tiri' Israeleo,

ty sehang'a'e avao ty ho rombaheñe,[‡]

²⁸ fa hafetsa' IEHOVÀ
an-tane atoy i tsinara'ey;

tsy kalafo naho masika.[§]

²⁹ Le ty amy nitokia' Isaiay:

Naho tsy napo' i TALÈ-i-Màroy tiry tika
le ho nanahake i Sodoma

vaho ho nihambañe amy Gomora.*

³⁰ Inoñe arè ty ho asan-tika? T'ie nitendreke havantañañe o kilakila
ondaty tsy nimane havañonañe, eka, toe havantañañe mijadoñ' am-
patokisañe; ³¹ fa tsy nahatakatse ty havantaña' i Hake ka t'Israele
nimanemane Hàke. ³² Akore? Amy t'ie tsy am-patokisañe fa am-
pimanemaneña, toe nitsikapia' i vato fitsikapiañey[†]. ³³ Hoe ty pinatetse:
Hehe, Apoko e Ziona ao ty vato fitsikapiañe
naho ty vato faminganañe;

[‡] 9:12 Fot 25:23 [§] 9:13 Mal 1:2,3 * 9:15 Avo 33:19b † 9:17 Avo 9:16 [‡] 9:18 Vazoho: Ieh
11:20 [§] 9:20 Ies 29:16, 45:9 * 9:25 Hos 2:25 † 9:26 Hos 1:10b [‡] 9:27 Ies 22; Fot 22:17,
Hos 1:10 [§] 9:28 Ies 10:23 * 9:29 Ies 1:9, Its 29:23; Iir 49:18, 50:40, Amo 4:11 † 9:32 Ies 8:14

fa tsy ho salatse ty miato ama'e‡.

10

¹ O ry longo, ty salalan-troko naho ty halaliko aman' Añahare ty am' Israele, le t'ie ho rombaheñe. ² Ataliliko t'ie maringatse ho aman' Añahare, fe tsy an-kilala; ³ ie tsy nahafoniñe ty hamarentanen' Añahare, te mone nipay ty hañoreñañe ty a' iareo, ie tsy niambane ami'ty havantañañ' Añahare. ⁴ I Norizañey ro firefea' i Hake, hañavantañañe ze hene mpiato.

⁵ Nabeja' i Mosè ty havañonañe mifototse amy Hake, te:
Hitakatse haveloñe ama'e t'indaty mañorike aze.*

⁶ Mbore manao ty hoe ty havantañañe mifototse am-patokisañe:
Ko manao ty hoe añ'arofo ao:
Ia ty hionjoñe mb' andindim-b'eo†
(hampizotso i Norizañey). ⁷ ke: Ia ty hizotso mb'an-tsikeokeok'ao?
(hampitroatse i Norizañey an-kavilasy). ⁸ Aa inom-barè ty enta'e?
Marine azo i tsaray, am-palie'o ao vaho añ'arofo'o ao,‡

Ie i tsaram-patokisañe taroñe'aiy, ⁹ t'ie mitaroñe i TALÈ IESOÀ am-palie, vaho iatoa'o an-stroke ao te vinañon' Añahare amo havilasio, le ho rombahen-drehe. ¹⁰ Toe añ'arofo ao ty atokisa' ondaty hanjoa'e havantañañe, vaho am-palie ty hitaroña'e, hitendreha'e rombake. ¹¹ Hoe i Sokitse Masiñey,

Tsy ho salatse ze miato ama'e.§

¹² Tsy eo ty mampiambake ty Jiosy ami'ty Grika; raike ty TALÈ' iabikey; matarike amo hene mikanjy azeo. ¹³ fa
Hene ho rombaheñe
ze mikanjy ty tahina' i TALÈ. *

¹⁴ Akore ty hahakanja' iareo ty tsy natokisa' iareo? akore ty hahatokisa' iareo ty tsy nijanjiñañe? vaho akore ty hahajanjiña' iareo te tsy amam-pitaroñe? ¹⁵ Akore ty hitaroña' iareo te tsy niraheñe? Pinatetse ao ty hoe: Hoke! ty hafanjàka o fandiam-pinday talili-soan-draha soao!†

¹⁶ Fe tsy hene nañaoñe i talili-soay, fa hoe t'Isaia:
O TALÈ, ia ty niantoke i entam-bola'aiy?‡
¹⁷ Aa le am-pijanjiñañe ty fatokisañe, le an-tsaontsi' i Norizañey ty fijanjiñañe. ¹⁸ Fa hoe raho: ke t'ie tsy nahajanjiñe? Hete!
Fa nanitsike ty tane toy
ty fiarañanaña' iareo,
naho pak'añ'olo' ty voatse toy
ty saontsi' iareo.§

¹⁹ Le hoe raho: Hera tsy nifohi' Israele? Hoe heike t'i Mosè:
Hampikirañeko anahareo
ty tsy fifelehañe,
ty fifeheañe tsy mahilala
ro hampibosehako anahareo*

²⁰ Hoe t'Isaia am-pahavaniañe:
Nizoe' o tsy nipay ahio raho,
Naho nitojo am'onday tsy nañontane ahio.†

²¹ Fe hoe re ty am' Israele:

‡ 9:33 Ies 8:14:15, 28:16 * 10:5 Avo 20:11; Sor 18:5 † 10:6 Its 30:12 ‡ 10:8 Its 30:14 § 10:11
Ies 28:16, 49:23b * 10:13 Ioe 3:5, Top 2:21 † 10:15 Ies 52:7 ‡ 10:16 Ies 53:1 § 10:18 Sab
19:4 * 10:19 Its 32:21 † 10:20 Ies 65:1

Lomoñandro raho nañitsi-tañañe am' ondaty manjehatse naho mitangingiñeo.‡

11

*Naforintseñe hey t'Israeley
(Sabo 69.22; Isa. 29.10)*

¹ Le hoe ty asako, Ke nifarien' Añahare ondati'eo? Sondo'e zay! Zaho ka nte-Israele! tarira' i Abraàme, fifokoa' i Benamina. ² Tsy napon' Añahare ondaty* niarofoana'e haehaeo. He tsy fohi' areo ty nanoe' i Sokitse Masiñey ty amy Elia, ie nitoreo aman' Andrianañahare ty am'Israele?

³ O TALÈ, zinama' iereo o mpitoki'oo,
kinimokimo' iereo o kitreli'oo;
le honka'e raho
vaho te hañe-doza amako iereo.†?

⁴ Aa le ino ty natoin' Añahare aze:
Fa nitanako ho ahy ty lahilaly fito-arivo
tsy nanongaleke amy Baale.‡

⁵ Manahake zay, ao ty sehanga'e henaneo, jinoboñe ami'ty fatariha'e.
⁶ Aa kanao am-patarihañe, le tsy am-pimanemanean-dily; naho tsy zay tsy ho natao fatarihañe i fatarihañey. ⁷ Aa le akore? Mboe tsy rinambe' Israele i paia'ey, o jinoboñe ro nandrambe, fe nampigañeñe ty ila'e, ⁸ ty amy pinatetsey:

Tinolon' Añahare arofo midebedebe iereo
fihaino tsy mahaisake
naho ravembia tsy mahajanjiñe
pake henaneo.§

⁹ Hoe t'i Davide:
Ee te ho fàndrike ty
fandambaña' iareoo, naho koboñe;
naho vato mampitsikapy
vaho fandilovañe am' iareo.

¹⁰ Ehe te haieñe o fihaino' iareoo,
tsy hahaisake; le hivokoke nainai'e o lambosi' iareoo. *

Singa'e Nasisike

¹¹ Aa le hoe raho: Hera nitsikapy naho nikorovoke iereo? Sondo'e zay! te mone ninday fandrombahañe ho amo kilakila ondatio ty fikorovoha' iareo, hampikirañe iareo. ¹² Aa naho vara ho ami'ty voatse toy ty fandilara' iareo, naho hanàñañe ho a o kilakila ondatio ty filesa' iareo, sandrake t'ie fonireñe? ¹³ (Inahareo kilakila' ondatio 'nio ro ivolañako). Aa kanao Firàhe' o kilakila ondatio raho, le ho sengèko i fitoroñakoy, ¹⁴ ke ao ty hampamarahieko amo toe nofokoo, hañahàñe ty ila'e. ¹⁵ Fa kanao minday fifampilongoañe ami'ty voatse toy ty fifariañe iareo, le ho inoñe naho tsy haveloñe boak' an-kavilasy t'ie rambeseñe? ¹⁶ Naho miavake i loha-voay, le miavake ka ty vonga'e. Kanao miavake ty vahatse, le o singa'eo ka. ¹⁷ Aa naho pinekapenkañe ty singa ila'e, le ihe, singan-oliva tsotra ty navitrañe amy iereo vaho natraoke ami'ty vahatse naho ty mena' i hatae olivay, ¹⁸ le ko rengevohe'o o singa'eo, fa naho mirenge, Inao, tsy ihe ty mameloñe o vaha'eo, fa o vahatseo ro mameloñe azo. ¹⁹ Hera hanao ty hoe rehe: Va'e nipenkàñañe o singao hamitrañañe ahy ao.

‡ **10:21** Ies 65:2 * **11:2** Sab 94:14 † **11:3** Mp I 19:10,14 ‡ **11:4** Mp I 19:18 § **11:8** Its 29:3;
Ies 29:10 * **11:10** Sab 69:22,23 † **11:11** Its 32:21

²⁰ Eka; toe pinèkañe iereo ty amy tsy fatokisa' iareo, fa ty fatokisa'o ro ijohaña'o. Aa le ko miriñake fa mañeveña; ²¹ fa kanao nifarien' Añahare o toe singa'eo le mahafary azo ka. ²² Inao ty fatarihan' Añahare naho ty hasarots' arofo'e, ie tsy mihiotse amo nikorovokeo, fe ama'areo ty fatarihan' Añahare naho toe mifahatse amy fatariba'ey, tsy mone haito. ²³ Ie ka, naho tsy mitoloñe an-tsi-fatokisañe, le havitrañe ao, amy te lefen' Añahare ty hamitraña'e indraike. ²⁴ Fa ihe binira amy hatae olivan' alay vaho navitrañe amy hatae oliva navaeñe, mpirafe ama'ey, le antsake te mete havitrañe amy hatae oliva'ey o nisinga'eo.

Ho Voarombake iaby t'Israele

²⁵ Tsy noko, ry longo, ty hamoea' areo o raha miheatse zao, tsy mone hihabo-kikitse ty amy hagoañe nahazo ty ila' Israele ampara' te tafazilike ao o kilakila' ndaty mahahenekeo[‡]. ²⁶ Ie amy zao, hene ho rombaheñe t'Israele, ty amy pinatetsey:

Hiboak' e Ziona ao t'i Mpijkebañe;
le haloli'e am' Iakobe ty halotsere'e;

²⁷ Le zao ty ho fañinako am' iereo naho hahàko o hakeo' iareoo. §

²⁸ Naho i talili-soay, le naitoañe iereo ty ama' areo; f'ie naho o fijoboñañe le ikokoañe ty aman-droae' iareo. ²⁹ Toe tsy hahafeñe o falalàñ Añahareo naho o fikanjia'eo. ³⁰ Fa hambañe ami'ty nanjehara' areo an' Andrianañahare taolo, fe iferenaiñañe henaneo ty amy fanjehara' iareoy, ³¹ le manjehatse ka iereo henaneo, soa t'ie ami'ty fitretrezañe anahareo ro hiferenaiñañe. ³² Kila nagaben' Añahare am-panjeharañae ao soa te hene hiferenaiña'e.

³³ Ee ty halale' o varan' Añahareo,
ty hilala'e naho ty hihi'e!

Tsy hay karaofeñe o zaka'eo,
naho tsy lefe tinoñeñe o lia'eo.

³⁴ Ia ty nahaftiñe ty faharofoana' i Talè?

Ia ty nimpanoro aze? *

³⁵ Ia ty nanolotse ama'e aolo, hañavaha'e? †

³⁶ Fa tama'e, naho añama'e,
vaho ho ama'e ty haliforañe.

aze ty engeñe nainai'e kitro 'afe'e. Amena.

12

Soroñe Veloñe

¹ Aa le osiheko nahareo, ry longo, ami'ty fiferenaiñan' Añahare; ty hibanabana ty sandri' areo ho sorom-beloñe, miavake naho mañevo an' Andrianañahare, zay ty fitoroñañe sazo anahareo. ² Ko mitsikombe ty voatse toy, fa miovà ami'ty fañavaoam-betsevetse, hamentea' areo ty satrin' arofon' Añahare soa naho mahafale vaho fonitse.

³ Fa amy falalàñe natolots' ahiy, le taroñeko ama' areo iaby, t'ie tsy hihaboke hilala mandikoatse ty evà'e, fa sambe mimane faharendrehañe migahiñe ty amy fatokisañe nandivan' Añahare ama'e. ⁴ Ampanahafeñe aman-tika, te maro ty mpitraoke an-tsandriñe raike ao, fe tsy hambampitoloñañe o mpitraoke iabio; ⁵ hoe zay ka tika maro ro fañòva raike amy Norizañey, sindre mifampipiteke, ⁶ naho songa aman-dravoravo

[‡] **11:25** Fot 48:19 [§] **11:27** Ies 59:20,21; 27:9; Iir 31:33-34 * **11:34** Ies 40:13 † **11:35** Job 35:7, 41:11

ankafankafa ty amy falalàñe nitolorañe: he fitokiañe, tsahatse ty fatokisa'e, ⁷ ke fitoloñañe ty amy fitoroña'ey; ie mpañoke le amy fañòha'ey; ⁸ ie mpañosike le amy fañosiha'ey, ie mpanolotse le am-patarihañe; ie mpifehe le am-pahimbañañe; ie mpiferenaiñe le an-kaehake.

Ty Sata' o toe Mpiana'eo

⁹ Ehe te ho po-pamañahiañe o fikokoñaeo; hejeo ty raty, vontitiro ty soa; ¹⁰ Mifampipiteha am-pifampilongoñañe; mifampiambanea am-piasiañe. ¹¹ Ko milealea am-pilozohañañe, mirebarebà an-troke, toroño t'i Talè. ¹² Mirebeha am-pitamàñañe; mifeaha an-kaloviloviañañe, mifahara an-kalaly; ¹³ mandivà amy ze paia' o noro'eo; le mampihova ambahiny.

¹⁴ Tatao o mampisoñañe anahareo; tsipezo rano fa ko mañinje. ¹⁵ Itraofo rebeke o mirebekeo, iharò rovetse o mirovetseo, ¹⁶ Songa miharoa rehake; ko mibokenabokenake fa itraofo o mavomavoo, vaho ko mieva hilala.

¹⁷ Ko valean-draty ty raty ndra aman' ia'ia. Imaneo ty soa am-pivazohoa' ze hene ondaty. ¹⁸ Naho mete, amy ze lefe'o, le mifampilongoa am' ondaty iabio. ¹⁹ O roañetse, ko mamale fate, fa mañivaha ho amy haviñera'e, fa hoe ty pinatetse:

ahiko ty vale-fate, zaho ro hañavake.*

hoe t'i TALÈ. ²⁰ Tovo'e:
Naho saliko i rafelahi'oy, anjotsò;
ie taliñiereñe, fahano rano;

ie anoe'o zay, ro amotrea'o vaen' afo mibela añambone'e eo.†

²¹ Ko milesa ami'ty haratiañe, fa gioho ami'ty soa ty raty.

13

Fiandaliañe amo Fifeheañe

¹ Soa re te sambe hiambane amo mpifehe ambone'eo t'indaty, amy te tsy eo ty fifeheañe tsy boak' aman' Añahare, toe fa norizan' Añahare o fa eoo.

² Aa le ze mandietse ami'ty fifeheañe ro mandietse amy nafèn' Añaharey; vaho mamà-batañañe ty mpanjehatse. ³ Tsy hembañe' o mpifeheo ty mpanao soa, fa ty mpanao raty. Aa tsy ho paia'o hao te tsy ampihembaña' o mpifelekeo? Anò ty soa, le ho renge'e; ⁴ ie mpitoron' Añahare ho ami'ty hasoa'o. Fe mihibàña naho manao raty; amy t'ie tsy mitam-pibara tsy an-dengo'e, fa mpitoron' Añahare, mpamale an-keloke ty mpanao raty.

⁵ Aa le miambanea, tsy te ihaviñerañe avao fa ty amy fitsakorean-trokey ka. ⁶ Zay ty androroña' areo vili-loha, amy t'ie mpitoron' Añahare manao o tolon-draha' iareoo lomoñandro. ⁷ Hene avaho ze nisongoeñe: roroñe ami'ty mañeva roroñe; haba ami'ty mpamori-haba, fañeveñañe ami'ty añaeveñañe, asiñe ami'ty asiñeñe.

Mifampikoko fa An-titotse

⁸ Ko misongo ama'ia'ia, naho tsy t'ie mifampikoko, fa mahaheneke Hake ty fifampikokoñañe. ⁹ Le ty hoe:

Ko mipay vali'onday,
ko mañè-doza, ko mikizo,
ko mihàñe,*

naho ze fañè ila'e ro agadoñe amy tsara ty hoey:
Ikokò ondatio mira ami'ty vata'o.†

¹⁰ Tsy mijoy ondaty ty koko; fa mañeneke Hake ty fikokoñañe.

* **12:19** Its 32:35,43 † **12:20** Rzs 25:21,22 * **13:9** Avo 20:131777; Its 5:17-21 † **13:9** Sor 19:18

¹¹ Ie amy zao; mahafohina ty sa, te tondroke henaneo t'ie ho tsekafeñe ami'ty rotse, fa marine antika henaneo ty fandrombahañe te amy natokisan-tikañey. ¹² Fa ho modo i haleñey, naho an-titotse ty andro, aa le apon-tikañe o satañ' ieñeo vaho mañombe ty fikalan-kazavàñe. ¹³ Antao hanao mañeva ty atoandro, tsy mifandrakaraka, tsy mijike, tsy mipay lamba, tsy manao ze mahameñatse, tsy mifandietse vaho tsy mikirañe. ¹⁴ Fe aombeo i TALÈ IESOÀ Norizañey, le ko añivahañe ty sandriñe hilomolo amo drael'eo.

14

O Malemeo naho o Maozatseo

¹ Ampihovao ty maifoifo am-patokisañe, fa tsy t'ie hifandietse amo raha ereñeren-strokeo. ² Eo ty mianteke te hene kamaeñe, fe mikama añañe avao i malemey. ³ Asoao tsy ho mavoe' i mikamay i tsy mikamay; vaho tsy ho tiñea' i tsy mikamay i mikamay, fa non' Añahare. ⁴ Ia rehe te hanìñe ty mpitoro' ondaty? amy talè'ey ty ijohaña'e ke ikorovoha'e. Toe hijohan-dre fa mahafitroatse aze t'i Andrianañahare.

⁵ Eo ty miisy ty andro raike ambone' ty ila'e; ampirae' ty ila'e ka ze hene andro. Hamake te songa rekets' aña' arofo'e ao. ⁶ I miisy àndroy, miisy aze ho amy TALÈ. I mikamay mikama ho amy TALÈ, am-pandriañañe an' Andrianañahare. Le i mifaly haneñey ro mifaly ho amy TALÈ vaho mañandriañe an' Andrianañahare.

⁷ Tsy aman-tika ty veloñe am-bata'e avao, le tsy eo ty mivetrake am-bata'e. ⁸ Ie veloñe tika, le veloñe amy TALÈ, ie vilasy, le vilasy amy TALÈ; Aa he t'ie veloñe, ke vilasy, le a i TALÈ. ⁹ Zao ty nivilasia' i Norizañey naho nitroara'ey, soa t'ie ro TALÈ' o nihomakeo naho o veloñeo. ¹⁰ Fa ihe, ino ty aniñea'o ty longo'o? he akore te kirofe'o aña' ofoke i longo'oy? Ie songa hijohañe añatrefa' i fiambesam-pizakàn' Añaharey; ¹¹ Fa hoe ty pinatetse: Kanao velon-dRaho, hoe t'i TALÈ, hitongalefa' ze kila ongotse, vaho hiantoke

an' Andrianañahare ze hene fameleke*

¹² Aa kanao sindre hamolily vatañe aman' Añahare ¹³ antao tsy hifanìñe ka, le mifoneña tsy hampipohañe ty raha mahatsikapy ndra ty mahatofotse an-dalan-dongo eo. ¹⁴ Apotako naho iatoako am' IESOÀ TALÈ te tsy eo ty raha faly avao, fa amy mitañ' aze ho faliy, le faly ama'e. ¹⁵ Aa naho mampanahelo ty longo'o ty mahakama'o, ihe tsy mañavelo ankoko. Ko toloram-boiñe ty amy mahakama'oy i nivilasia' i Norizañey. ¹⁶ Aa le ko apoke ho fosaeñe ze atao'o soa; ¹⁷ amy te tsy mahakama, tsy finomañe i fifehean' Añaharey, fa havantañañe naho fifampilongoañe vaho firebehañe amy Arofo Masiñey. ¹⁸ Toe sitran' Añahare naho no' ondatio ty mitoroñe i Norizañey hoe zay.

¹⁹ Antao arè himane ze raha minday fifampilongoañe naho fifampibodobodoañe. ²⁰ Ko rotsaheñe o tolon-drahan' Añahareo ty amo mahakamao. Toe hene malio, fe voiñe ama' ondaty ty mikama hampitorifha'e.

²¹ Hamañeky tsy mikama hena, tsy minon-divay ndra inoñe mahatsikapy o longo'oo. ²² Ifaharo añatrefan' Añahare eo i fatokisa'oy; haha ty tsy mamà-batañe amo atokisa'eo. ²³ Fe voafatse t'ie mikama ty mahatsimboetse aze, amy te tsy am-patokisañe; toe fonga hakeo ze tsy mifototse am-patokisañe.

* ^{14:11} Ies 45:23

15

Ty Fidadañe ao

¹ Aa le mivave o kombimbaeo tika maozatseo, fe tsy t'ie hampiehake vatañe; ² songa hampifale ondaty ami'ty hasoa tika, hampiraorao aze. ³ Tsy nanao ty hampinembam-bata'e i Norizañey; fa hoe ty pinatetse: Nidoñ'amako ty inje' o nañinje azoo.*

⁴ Hene nisokireñe hañòhañe antikañe ze pinatetse haehae[†], soa te hanan-ko tamaeñe amy fahaliñisañey naho amy fañosiha' i Sokitse Masiñey.

⁵ I Andrianañaharem-pahaliñisañey naho fañohòañey abey ro hifampipiteha' areo stroke no' IESOÀ Norizañey, ⁶ soa t'ie hirai-stroke naho songa hirihoñe am-piarañanañañe raike handrenge an'Andrianañahare Rae' i Talèntika IESOÀ Norizañey.

⁷ Aa le mifampihovà, hambañe ami'ty nampiziliha' i Norizañey antika, ho ami'ty engen' Añahare. ⁸ Le itaroñako te mpitoroñe i fisavarañey i Norizañey, ho ami'ty hatòn' Añahare, hamenteañe o nampitamà'e aman-droaeo, ⁹ naho fiferenaiñañe ty handrengea' o kilakila' ndatio an' Andrianañahare, fa hoe ty pinatetse:

Ie rengèko amo kilakila'ndatio, vaho ho saboeko ty tahina'o; [‡]

¹⁰ le tinovo'e ty hoe:

Mitroafa rebeke am' ondati'eo ry kilakila' ondatio.[§]

¹¹ ty tovo'e ka:

Mandrengea i TALÈ ry kilakila ondatio, misaboa aze ry hene ondatio.*

¹² le tinovo' Isaia ty hoe:

Hitotsake ty vaha' i Jese le hitroatse re hifehe o fifeheañeo, ie ty fitamà' o kilakila'ndatio. [†]

¹³ I Andrianañaharem-pitamàñey abey ro handifotse anahareo andrebeke naho an-kanintsiñe am-patokisañey, hampipea'e fitamàñe añamy haozara' i Arofo Masiñey.

Mpitoro' o kilakila'ndatio

¹⁴ O ry longo, iantofako ty ama' areo, te pèa hasoa naho lifo-kilala, hifanoroa' areo. ¹⁵ Teo ty nahasibehako an-tsokitse, haniahiaiko anahareo indraike, i falalàñe natolon' Añahare ahikoy, ¹⁶ ho mpitoro' IESOÀ Norizañey amo kilakila' ndatio; mitoloñe ho mpisoro' i talily soan' Añaharey, soa te ho no'e ty añengaeko o kilakila'ndaty navahe' i Arofo Masiñeo. ¹⁷ Toe nanjo ty hirengeako am' IESOÀ Norizañey amo raha mioza aman' Añahareo, ¹⁸ fe tsy vaniko volañeñe ndra inoñ' inoñe tsy nanoe' i Norizañey añamakoo, le ty hampivohotse o kilakila'ndatio an-tsaontsy naho am-pitoloñañe, ¹⁹ ami'ty haozara' o viloñe naho raha tsitantaneo, ami'ty hafatrara' i Arofo Masiñey. Aa le boak' Ierosaleme pak' amparipari' Ilirkiona aña ty nitaroñeko ami'ty hafonira'e ty talili-soa' i Norizañey. ²⁰ Zay ty nimaneako fitaroñe i talili-soay an-tane mboe tsy nahajanjiñe ty tahina' i Norizañey, tsy handranjiako ami'ty mananta' ondaty. ²¹ Fa hoe ty pinatetse:

O tsy nitaliliañeo
ro hahaoniñe;
vaho o tsy nahajanjiñe,
ro haharendreke. [‡]

* **15:3** Sab 69:9 † **15:4** Ko I 10:11, Ti II 3:16-17 ‡ **15:9** Sa II 22:50; Sab 18:49 § **15:10** Its 32:43 * **15:11** Sab 117:1 † **15:12** Ies 11:10 ‡ **15:21** Ies 52:15

²² Beteke zay ty nanebañe ahy tsy hombàko mb'ama' areo mb'eo.

Fisafiri' i Paoly ty Hitilike e Roma

²³ Aa ie henane zao, amy te tsy aman-toetse hitoroñako an-tane atoa ka, le ami'ty nisalalaeko taoñe maro ty hitilike anahareo, ²⁴ le amy liako mb'e Spainia aña, ty itamako hahaisake anahareo t'ie miary mb'eo, hampionjona' areo, itika fa nifañòhahoha heike.

²⁵ F'ie homb'e Ierosaleme aña hey hitoroñe o noro'eo. ²⁶ Amy te nahaeħake o nte Makedoniao naho o nte Akaiao ty hanolotse amo noro'e misotry e Ierosalemeo. ²⁷ Eka, toe nampinembanembañe iareo, fa mpisongo ama'e. Aa ie nandrambe raha añ'arofo am'iareo o kilakila' ndatio, le avaha' iareo amo raha' ty tane' toio ka; ²⁸ ie nañeneke zay naho fa vinoli-tomboko ho am' iareo i mahakamay, le hiary mb'ama' areo naho mb'e Spaina aña. ²⁹ Fantako t'ie pok' ama' areo ao, le hitotsake eo ami'ty hapeam-pitahia' i Norizañey.

³⁰ Aa le mihalaly ama' areo raho ry longo, ty amy Talèntika IESOÀ Norizañey naho ami'ty fikokoa' i Arofoy, ty hifaneħafantika halaly aman' Añahare ho ahy, ³¹ t'ie ho rombaheñe amo manjehatse e Iehodào, naho ho no' o noro'e e Ierosalemeo ty fitoroñako ho a iareo, ³² hahafionjonako mb'ama' areo mb'eo an-kaehake ami'ty satrin' arofon' Añahare, vaho hanjò hanintsin-stroke ama' areo. ³³ I Andrianañaharem-pierañerañañey abey ho ama' areo iaby. Amena.

16

Fañandriañañe naho Fisalamañe

¹ Ampandrendreheko anahareo t'i Foibe rahavave'ay mpitoro' i Fivory e Kenkrea añey; ² t'ie ho rambese' areo amy TALÈ ami'ty mañeva o noro'eo, naho te himbae' areo amy ze mete hipaià'e, ie fa nañolotse ty maro naho ahy ka.

³ Añontaneo t'i Prisilae naho i Akoila mpiharo tolon-draha amako am' IESOÀ Norizañey. ⁴ I ho namoe fititia hasolo ty fiaiko rey. Tsy zaho avao ty mañandriañe iareo fa ze hene' Fivorin-kilakila ondatio. ⁵ Ao ka ty Fivory aña' anjomba' iareo. Añontaneo i Epaineto rañekoy, i loha-voam-piantoke i Norizañey e Asiay. ⁶ Añontaneo t'i Marie mpifaneħake ho anahareo. ⁷ Añontaneo t'i Androniko naho i Jonia, longoko naho mpiharorohy amako, an-kasiñ' amo Firàheñeo, vaho nimpiamy Norizañey taoloko.

⁸ Añontaneo t'i Ampliato, i kokoako amy TALÈiy. ⁹ Añontaneo t'i Orbano, mpifaneħake ama'ay amy Norizañey, naho i Staky, longoko sarotse.

¹⁰ Añontaneo t'i Apelà, i niventeañe amy Norizañey. Añontaneo o amy Aristoboloo. ¹¹ Añontaneo t'i Herodium longoko. Añontaneo o amy Narkisao, o amy TALÈo. ¹² Salamao t'i Trifena naho i Trifosae, mpifaneħake amy TALÈ ao. Añontaneo t'i Persie isokey, i nitromake mafe amy TALÈiy. ¹³ Añontaneo t'i Rofosy, jinobo' i TALÈ naho i rene'e naho ahiko. ¹⁴ Añontaneo t'i Asinkrito, i Flegona, i Hermes, i Patroba, i Herma, naho o longo am'iereoo. ¹⁵ Salamao t'i Filologo naho i Joliae, i Nerea naho i rahavave'ey, naho i Olimpa, vaho o fonga noro'e am'iereoo. ¹⁶ Mifanalama ami'ty oroke miavake. Hene mañontane anahareo o Fivori' i Norizañey.

¹⁷ Añosihako ry longo, te ho sarisarie' areo o mampiambake naho manebañe an-dietse i fañòhañe nioha' areoio, vaho ihankàño. ¹⁸ Ie tsy mpitoroñe i Talèn-tika Norizañey, fa ty tro'e, le an-kabeake naho tsiriry ty amañahia'e ty arofo' o tsy midareo. ¹⁹ Fa nahatakatse ie iabikey ty talily o

fatokisa' areoo, aa le mahafale ahy nahareo; f'ie teako ho mahihitse ami'ty hasoa vaho halio amo halo-tserehañeo. ²⁰ Fa an-titotse te ho demohen' Añaharem-pierañerañañe ambanem-pandia' areo ao i mpañinjey. Ho ama' areo ty hasoa' i Talèntika IESOÀ Norizañey. ²¹ Añontanea' i Timoty, mpifanehake amakoy, nahareo, hoe zay ka i Losio naho i Jasona, vaho i Sosipatro rolongoko.

²² Manalama anahareo amy Talè ao ka raho, Tertio, mpanokitse ty taratasy toy. ²³ Mañontane anahareo t'i Gaio mpanao añ'anjomba ahy naho ty Fivory atoy iaby. Manalama anahareo ka t'i Erasto, mpamandro' ty rova, naho i Koarto rahalahy. ²⁴ Ho ama' areo iaby abey ty fatariha' Iesoà Norizañey, Amena.

²⁵ Ie amy zao, ho amy Mahafijadoñe anahareo ty amy talili-soako naho ty fitaroñañe IESOÀ Norizañey, ty amy fampibentarañañe i raha miheatse nakafitse haehae' zay, ²⁶ fe naboake henaneo, naho amo pinatem-pitokio ty amy nililien' Añahare nainai'e tsy modoy, le fa ritaroñeñe amo kilakila ondatio hampivohotse iareo am-patokisañe. ²⁷ Aman' Añahare mahihitse tsi-roe-tsi-telo nainai'e abey ty engeñe, añam' IESOÀ Norizañey! Amena.

Korinto I

Fisalamañe

¹ I Paoly, kinanjy ho Firàhe'IESOÀ Norizañey ami'ty satrin' arofon' Añahare, naho i Sostena rahalahy. ² Ho ami'ty Fivorin' Añahare e Korinto aña, ho amo nampiavahe'IESOÀ Norizañeio, o kinanjy ho noro'eo, miharo amy ze hene mpikanjy ty tahina'IESOÀ Talèntika Norizañey ndra aia aia, i TALÈ iareo naho antikañey. ³ Hasoa ama' areo naho fañanitsiñe boak' aman' Añahare Raen-tika nahoIESOÀ TALÈ Norizañey.

Fañandriaññañe

⁴ Andriañeko nainai'e t'i Andrianañahareko ty ama' areo, ty hasoan' Añahare natolotse anahareo am'IESOÀ Norizañey, ⁵ ie ama'e ro niaboeñe amy ze lafi'e iaby an-tsara heneke naho an-kihitse fonitse, ⁶ ie niventèñe ama' areo ty fitaroñañe i Norizañey. ⁷ Aa le tsy eo ty tsy eneñe ama'areo amo falalàñe iabio, hene rototse mitamà ty fiboaha' i TalèntikaIESOÀ Norizañey. ⁸ Ie ty hampijadoñañe anahareo sikal' am-pigadoña'e aña, tsy hanan-kila amy andro' i TalèntikaIESOÀ Norizañey. ⁹ Migahiñe t'i Andrianañahare nikanjy anahareo ho amy fifampilongoañañe amy Ana'e, TalèntikaIESOÀ Norizañey.

Mifañambake am-Pivory ao

¹⁰ Ie amy zao, mañosike anahareo raho ry longo, amy tahina' i TalèntikaIESOÀ Norizañey, ty hiharo saontsy, tsy hifampiriaria, f'ie ho fonireñe ho raike an-kilala naho raike an-tsafiry. ¹¹ O ry longo, fa natalili' o mpiamy Kloadio amako t'ie amam-pifandieraña; ¹² ty anoako zao, le te ao ty manao ty hoe: mpiamy Paoly raho, le ty raike: amy Apolosy raho, naho ty raike: amy Kefasy raho, vaho ty ila'e: zaho amy Norizañey. ¹³ Aa vaho mitsiriaria hao i Norizañey? Pinèke ho anahareo hao t'i Paoly? He nalipotse ami'ty añara' i Paoly? ¹⁴ Andriañeko t'i Andrianañahare te tsy ia ama' areo ty nalipoko naho tsy i Krispo naho i Gaio avao, ¹⁵ ke eo ty hanao ty hoe t'ie nilipotse ami'ty añarako. ¹⁶ (Toe nalipoko ka o añ'anjomba' i Stefanasio. Fa tsy apotako ze ila'e mete ho nampiliporeko.) ¹⁷ Toe tsy nañitrik' ahy handipotse i Norizañey, fa ty hitaroñañe i talili-soay, tsy an-dreha-kante kera hampikoahené i hatae' ajale' i Norizañey.

ty Hihin' Añahare naho ty Haozara'e

¹⁸ Toe borosode amo mikoromakeo ty tsara' i hatae' ajaley, fe haozaran' Añahare amantika rombaheñeo. ¹⁹ Fa hoe ty pinatetse: Ho rotsaheko ty hihi' o mahihitseo, naho hakafitse ty hilala' o mahilalao.*

²⁰ Aia ze o mahihitse zao? Aia ty mahay taratasy? Aia ty mpionimpiheotse ami'ty sa' toy? Tsy nanoen' Añahare hanèñe hao ty hilala' ty tane toy? ²¹ Ie amy hihin' Añaharey, kanao tsy nampahafohiñe an' Andrianañahare ty hihi' ty tane toy, le nisatrien' Añahare ty handrombake ze mahafiantoke ami'ty hagegea' i tsara taroñey. ²² Toe mipay vilõne o Jiosio, naho mitsoe-kihitse o Grikao; ²³ fe mitaroñañe i Norizañe pinèkey zahay: ie boloko fitsikapia' o Jiosio, naho hadagolàñe amo Grikao; ²⁴ fe

* ^{1:19} Ies 29:14; Oni Mat 11:25, Rom 1:22

amo kinanjio, he te Jiosy ke Grika, le ie ty haozaran' Añahare naho ty hihin' Añahare.

²⁵ Fa mahihitse te am'ondatio ty hagegean' Añahare, naho maozatse te am'ondatio ty haifoifoan' Añahare. ²⁶ Haraharao i nikanjañe anahareoy: tsy nimaro ty nahihitse amo nofotseo, tsy nimaro ty fanalolahy, tsy niampeampe ty ana-donake. ²⁷ Fe jinobon' Añahare o gege an-tane atoio hanalatse o mahilalao, naho jinobon' Añahare o maifoifo' ty tane toio hañameñatse o jomakeo; ²⁸ jinobon' Añahare o tsy vara' ty tane toio naho o mavoiñe vaho o atao tsy vente'eo, hampikoaha'e o raha eoo, ²⁹ soa te tsy eo ty nofotse hirengevole añatrefan' Añahare. ³⁰ Ie ro maha am' IESOÀ Norizañey anahareo, Ie ty nanoan' Añahare hihitse naho havantañañe naho fiavahañe vaho fijebañañe an-tika, ³¹ soa te, amy pinatetse ty hoe: Ze mirenge, Ee te i TALÈ ro firengea'e[†].

2

¹ O ry longo, ie nivotrake ama' areo raho, le tsy an-dàn-tsaontsy, tsy an-kihitse ty nitaroñako i nietak' aman' Añaharey. ² Fa nifaharako te tsy hahafohiñe ndra inoñ' inoñe ama' areo ao naho tsy IESOÀ Norizañey vaho ie pinèke. ³ Nimokotse t'ie tama' areo, nihembañe, vaho nisilofe' ty nevenevetse. ⁴ Le tsy an-tsaontsin-kihitse mahasintoñe i rehakoy naho i fitaroñakoy, fa ami'ty fampalangesañe i Arofoy naho añ-ozatse, ⁵ soa tsy hioreñe ami'ty hakante' ondaty ty fatokisa' areo fa ami'ty faozaran' Añahare.

Hihitse amy Arofoy

⁶ Toe mitaroñe hihitse amo àñoñe zahay, fa tsy ty hihi' ty sa toy, ndra ty a o mpifehe' an-tsa toio, ie sindre miha-modo. ⁷ Toe mitaroñe i hihin' Añahare nakafitsey zahay, i hihitse naetake pak' henaney, f'ie norizan' Añahare taolo' ty sa toy hañonjona'e antika, ⁸ ie ninofi' o mpifehe an-tsa toio, fa naho nifohi' iareo, le tsy ho pinè' iareo i Talèn' engeñey. ⁹ Fa hoe ty pinatetse:

Fihaino tsy nahaisake,
ravembia tsy nahajanjiñe,
vaho tsy nizilike añ' arofo'on daty
ze he'e hinalankan' Añahare
ho a' o mikoko azeoo.*

¹⁰ F'ie nibentabentaren' Añahare aman-tikañe añamy Arofo'ey, fa mitsoeke ze he'e i Arofoy, naho o raha miheatse aman' Añahareo. ¹¹ Aa vaho ia am'ondatio ty mahafohiñe ze mitoloñe amy t'indaty ao naho tsy ty arofo am'indatiy? Manahake zay, tsy fohi' ondaty ty faharofoanan' Añahare naho tsy i Arofon' Añaharey.

¹² Ie amy zay, tsy ty fañahi' ty tane toy ty rinamben-tika, fa i Arofo boak' aman' Añaharey, soa te ho fohintika o raha natolon' Añahare antika am-patariha'eo, ¹³ ie o taroñe'aio, tsy an-tsaontsy nanare' ty hihi' ondaty fa amo naò' i Arofo Masiñeio, ie mampidodea o raham' Arofoo amo aman' Arofoo. ¹⁴ Toe tsy maharambe o raham' Arofon' Añahareo ty fañereñerea' ondatio, fa hagegeañe ama'e, tsy eo ty hahafohina'e, amy t'ie rendreke an'arofo. ¹⁵ Mitsikaritse ze he'e ty aman'arofo, fe tsy leo ty ila'e tsikariteñe.

¹⁶ Aa vaho:

Ia ty mahafohiñe ty faharofoana' IEHOVÀ hañòke aze.[†]

Toe aman-tika ty fitsakorea' i Norizañey.

[†] **1:31** Iir 9:23-24 * **2:9** Ies 64:3 † **2:16** Ies 40:13

3

Ty Firiariañe am-Pivory ao

¹ O ry longo, tsy mahafirehake ama' areo raho hoe amo aman' arofoo, fa hoe amo ama' nofotseo; hoe ajaja kede amy Norizañey. ² Nampikamaeko ronono fa tsy hena; amy t'ie mboe tsy nahaleo naho mboe tsy mahaleo avao. ³ Toe mbe amy nofotsey nahareo, ie zoeñe ama' areo ty tsikirike naho ty lietse; aa tsy hatao t'ie amy nofotsey hao, ie hoe ondaty tsotra ty fañaveloa' areo? ⁴ Kanao eo ty manao ty hoe: Mpiamy Paoly raho, naho ty ila'e: Amy Apolosy raho; aa vaho tsy t'ie manahake ondatio avao hao? ⁵ Ia arè t'i Apolosy? Ia ka t'i Paoly? naho tsy mpitoroñe nampiato anahareo, ie sambe nitolora' i TALÈ. ⁶ Nitongy raho, nanondrake t'i Apolosy, fa i Andrianañahare ty nampitombo. ⁷ Aa le sindre ts'inoñe i mpitongiy naho i mpanondrakey, fa i Andrianañahare ty mpampitombo. ⁸ Lia'e raike ty mpitongy naho ty mpanondrake, songa handrambe ty tambe'e mañeva i fitromaha'ey. ⁹ Mpifanehake aman' Añahare zahay; teten' Añahare nahareo, fandranjian' Añahare.

¹⁰ Ty amy falalàñ' Añahare natolotse ahikoy, le hoe talèm-pandranjy ty nandaharako i mananta'ey, le mamboatse ama'e ty ila'e. Aa soa re te sindre mitomitse amy ty hanovoña'ey t'indaty. ¹¹ Fa tsy eo ty mahafañoreñe manantañey ila' i tafa-oreñey, iIESOÀ Norizañey. ¹² Aa naho eo ty handranjy amy manantañey, ami'ty volamena, volafoty, vatosoa, hatae, ahetsé, ndra setra, ¹³ songa hidodea ty sata' ondaty, fa haboa' i androy, amy te ho bentareñe ami'ty afo, vaho i afoty hitsoke ty hasoasata' ondaty. ¹⁴ Ie mahatàñe ty nandranjia' ondaty amy manantañey, le ho tambezeñey. ¹⁵ Ie teno ty sata' ondaty le fianto ama'e. Toe ho rombahendre, fe hoe nitoañe afo. ¹⁶ Tsy fohi' areo hao t'ie kivohon' Añahare, toe imoneña' i Arofon' Añaharey? ¹⁷ Ie rotsahe' ondaty ty kivohon' Añahare, le ho mongoren' Añahare, fa miavake i kivohon' Añaharey; inahareo 'nio.

¹⁸ Asoao tsy hamañahy vatañey. Naho ama'areo ty mihaboke hihitse ami'ty sa toy, soa re te hireke ho bahimo, hiha-hihitse. ¹⁹ Amy te hadagolañ' aman' Añahare ty hihi' ty tane toy. Fa hoe ty pinatetse:

Tsepahé'e ami'ty hakante'e ty mahilala*

²⁰ tovo'e:
Arofoana' i TALÈ ty fitsakorea'
o mahihitseo, te tsy vente'e.†

²¹ Asoao tsy ondaty ty hisengaña, amy te fanaña' areo ze he'e; ²² Ke i Paoly, he i Apolosy, ke i Kefasy, he ty voatse toy, ke ty haveloñe, he ty havilasy, ke o eoo, hera o ho avio; hene anahareo; ²³ a i Norizañey nahareo vaho aman' Añahare i Norizañey.

4

Firàhe'i Norizañey

¹ Ee te zao ty hatao' ondaty, te mpitoro' i Norizañey zahay, mpa-mandroñe o raha mietake aman' Añahareo. ² Mbore paiaeñe amo mpamandroñe t'ie ho zoeñe migahiñe. ³ Tsy loho vente'e amako ty fibiribiria' areo naho ty fañereñerea' ondatio; fa ndra zaho tsy mizaka ty vatako. ⁴ Toe tsy apotako te inoñe ty hanesehañe ahy, f'ie tsy mahahaha ahy, toe i TALÈ ro hizak' ahy. ⁵ Aa le ko mizaka aolo' ty andro'e, ampara' ty fitotsaha' i TALÈ, Ie ty hampalange o raha mietake an-kamoromoroñañeo

* ^{3:19} Iob 5:13 † ^{3:20} Sab 94:11

naho ho bentabentare'e o fisafirin' arofoo; zay vaho songa ho toloran' Añahare ty engeñe mañeva. ⁶ I tsaraeñey ry longo, le fa nirazañeko ami'ty vatako naho i Apolosy ty ama' areo, soa t'ie hioke ama'ay te tsy andikoareñe o sinokitseo tsy mone hibohabohàñe ty raike naho injeñe ty ila'e. ⁷ Aa vaho ia ty nampitoabotse anahareo? Inoñe ama' areo ty tsy rinambe' areo? Aa naho toe nandrambe le inoñe ty irengea' areo hoe tsy nandrambe?

⁸ Fe eneñe nahareo! Toe mpañaleale! Fa mpanjaka ndra te tsy eo zahay! Eka, ho nirieko t'ie nimpanjaka, hitraofa'ay fifeheañe! ⁹ Ataoko te napon' Añahare amboli'e zahay Firàheñe ho sambaeñe, hoe nafatse havetrake; amy t'ie nanoen-ko fisambà' ty voatse toy naho o anjelio vaho ondatio. ¹⁰ Seretse zahay ty amy Norizañey, fe mahihitse amy Norizañey nahareo! Maleme zahay fe maozatse nahareo! Asiñeñe nahareo, vaho mavoeñe zahay! ¹¹ Ampara' ty ora toy, le mifeake naho miheahea zahay, rota, finofopofoke, vaho tsy aman' akiba. ¹² Mifanehake, mitoloñe amo taña'aio; ie onjireñe, itatà'ay; ie samporerahéne, ifeaha'ay; ¹³ ie terateraeñe, imanea'ay taroñe. Natao ho leotse ami'ty voatse toy zahay, forompo' ze he'e pak' henane.

¹⁴ Tsy nisokirako hanalatse anahareo 'nio, fa t'ie ho vereñe hoe anak' isoko. ¹⁵ Aa ndra te ale-ale ty mpañana' areo amy Norizañey, tsy maro ty rae' areo; fa zaho ty nampiareñe anahareo am' IESOÀ Norizañey amy talili-soay. ¹⁶ Aa le osihoko t'ie hihambañe amako. ¹⁷ Zay ty nañitrifako i Timoty anake kokoako naho migahiñe amy TALÈ; ie ty haniahys anahareo o satako amy Norizañeio, manahake ty fañòhako mbeombeo amo hene Fivorio.

¹⁸ Akore te ao ty mirengevole hoe te tsy ho pok' ama' areo raho. ¹⁹ F'ie ho avy aniany naho satri' i TALÈ, le tsy ho rendreko ty enta' o mpitoabotseo fa ty haozara'e. ²⁰ Tsy saontsy i Fifehean' Añaharey, fa ozatse. ²¹ Inoñe arè ty satri' areo? Hinday doda hao t'ie pok'eo, ke fikokoña naho hamoràntroke?

5

Anò Añombelahimavo

¹ Fa miboele te ama' areo ty fifampirañaotañe, toe hakarapiloañe tsy amo kilakila' ndatio: te eo ty miharo-lamba amy valin-drae'ey! ² Akore te iebotsebora' areo! tsy hamake ho nandala? soa te ho naitòañe i nanao zay. ³ Aa naho zaho, ndra te tsy eo am-batañe, le miatreke antroke vaho fa zinakako i nanao zay, manahake t'ie eo. ⁴ Ie mivory amy tahina' IESOÀ Talèntikañey, le ama' areo an-troke raho, ami'ty haozara' IESOÀ Talèntikañey, ⁵ aa le aseseo amy mpañinjey indatiy handrotsahañe i haondati'e hambo'ey, soa te ho rombaheñe ami'ty andro' i TALÈ IESOÀ i arofo'ey.

⁶ Tsy mete ty firoharohà' areo; tsy fohi' areo hao te mahatsitsike ty boko'e ty lalivay kede. ⁷ Kohezo soa o lalivay hambo'eo soa t'ie ho boko'e vao, manahake t'ie tsy aman-dalivay, fa nisoroñañe ho antika i Norizañey, i Fihelan-tikañey* ⁸ Aa le antao hiambleñe i sabadidakey, tsy an-dalivay hambo'e, tsy an-dalivain-kalo-tserehañe naho haratiañe, fa ami'ty tsy aman-dalivai' i hatsò-troke naho hatòy.

⁹ Nisokirako amy taratasikoy te tsy hitrao-drehake amo manao hakarapiloañe, ¹⁰ fe tsy t"ie ze fonga karapilo' an' tane atoy ndra ze mpihàñe

* 5:7 Avo 12:3

naho mpikatramo ndra ze mpañori-pahasive, amy t'ie tsy mahay tsy ho niakatse an-tane atoy. ¹¹ Fe nisokirako te tsy hitraofa'areo ty miantoñoñe ho longo, te mone mpandrañaotse ndra mpitsikirike, ndra mpitorom-pahasive, ndra mpañinje, ndra mpijke, ndra mpikatramo. Ko itraofampikama. ¹² Inoñe ty izakako o alafe'eo? Tsy zakae' areo hao o ama' areoo? ¹³ I Andrianañahare ty hizaka o alafe'eo, fe Aitò ama' areo i tsivokatsey.†

6

Ty Mpireketse Mifanisy

¹ He ama' areo ao ty aman-kabò ami'ty ila'e, ho vani'e hao ty miatre-jaka aolo' o tsy vantañeо, fa tsy añatrefa' o noro'eo? ² Ke tsy fohi' areo te hizaka ty voatse toy o noro'eo? Aa kanao ho zakae' areo ty voatse toy, tsy fievà' areo hao ty hibiribiry ty sisý pilipito'e? ³ Tsy fohi' areo hao t'ie hizaka anjely? Somandrake o raha mioza ami'ty haveloñe toio? ⁴ Aa naho manan-ko zakaeñe ami'ty haveloñe toy nahareo, hampizakae' areo hao ze kede amo Fivorio ao? ⁵ Ty hanalatse anahareo ty nanoako zay. To hao t'ie tsy ama' ondaty mahihitse, mahafizaka añivo' o rolongoo? ⁶ Te mone maneseke rahalahy ty rahalahy, naho toe añatrefa' o tsi-miatoo! ⁷ Aa le gioke nahareo, t'ie mifampiatrek' an-jaka. Tsy hamake anesehan-kakeo? Tsy ndra kitra'e nikatramoeñe? ⁸ Aiy! ndra inahareo ro mandilatse fa mamerevere longo!

⁹ Ke amoea' areo te tsy handova i Fifehean' Añaharey o tsivokat-seo. Asoao tsy ho fañahieñe: fa ke mpañarapilo, ke mpiamo fahasiveo, ke mpila vali' ondaty, ke mpisare ampela, ke mpila-faly, ¹⁰ ke mpampikametse, ke mpitsikirike, ke mpitrini-mena, ke mpiteratera, he mpikatramo, songa tsy handova i Fifehean' Añaharey*. ¹¹ Nanahake zay ty ila' areo. F'ie nampandroañe, navaheñe, vaho nampivantañeñe ami'ty tahina' i TALÈ IESOÀ Norizañey naho amy Arofon' Andrianañaharen-tikañey.

Hakarapiloañe

¹² Sindre azoko anoeñe, fe tsy songa mahasoa. Hene azoko anoeñe, fe tsy meteko hondevozeñe. ¹³ Ty fisafoa ho ami'ty mahakama naho ty mahakama ho ami'ty fisafoa—fe ho rotsahen' Añahare ie roe. Tsy natao ho fiolorañe vilañe ty sandriñe, fa ho a i TALÈ, vaho i TALÈ ho a i fañòvay. ¹⁴ Natroan' Añahare i TALÈ vaho hatroa'e amy haozara'ey ka tika.

¹⁵ Amoea' areo hao te fangefange amy fañova' i Norizañey o sandri' areoo? Aa vaho hangalako ho amy tsimirirañey hao o fangefange' i Norizañeio? Sondo'e zay! ¹⁶ Hera nofi' areo te ze mipiteke ami'ty tsimirirañe ro sandriñe raike ama'e? Fa hoe re: Ho nofotse raike i roroey.† ¹⁷ Le arofo raike ka ty mpipiteke amy TALÈ.

¹⁸ Ibotitsiho o firañaotañeо. Toe alafe'e ao ze fonga hakeo anoe' ondatio, fe mañakeo i sandri'ey ty mpañarapilo. ¹⁹ Ke tsy fohi' areo te kijà' i Arofo Masiñe mimoneñe ama' areo ao ty sandri' areoo, ie ama' areo boak' aman' Añahare? vaho tsy anahareo nahareo, ²⁰ fa vinily sarotse; aa le rengeo antsandri' areo t'i Andrianañahare.

† **5:13** Its 13:5, Oni Its 17:7,12; 19:19; 21:21; 22:21,24; 24:27 * **6:10** Gal 5:19-21, Efe 5:3-5 † **6:16**
Fot 2:24

7

O Fanambaliañeo

¹ Aa ty amo raha sinoki' areoo. Hàmake tsy hipao' ampela ty lahilahy.
² Fe ty amo hakarapiloaño, soa re te songa hanañe ty vali'e ty lahilahy, naho sindre hanañe ty vali'e ty rakemba. ³ Le hañeneke ty lili'e amy vali'ey ty lahilahy, manahake zay ka ty rakemba amy tañanjomba'ey. ⁴ Tsy manandily amy sandri'ey ty rakemba, fa i vali'ey; naho tsy manandily amy sandri'ey ty lahilahy, fa i rakemba'ey. ⁵ Ko mifampifoneñe naho tsy ty amo andro ilahara' areo ho fitalahoñaño, añe zay le miolora tsy mone hazizi' i mpañinjey t'ie tsy maha-lie-batañe. ⁶ Fiheveañe o rehako zay, fa tsy lily. ⁷ Nikitrako te sindre nanahake ahiko ondatio. F'ie songa manañe ty falalàñe natolon' Añahare aze; etia ty aman-tsata zao le eroa ty aman-tsata zay.

⁸ Aa le hoe raho amo tsy amam-balio naho amo vantotseo; Soa ho a iareo ty himoneñe hambañe amako. ⁹ Fa naho tsy mahalie-batañe, le apoho hañenga valy. Hamake t'ie hanambaly ta te hiforehetse.

¹⁰ Le hoe ty atoroko o manam-balio, toe tsy zaho fa i TALÈ, asoao tsy hisitake ami'ty vali'e ty rakemba. ¹¹ (F'ie misitake, soa re te hidoe tsy hanambaly, ke hifampirekets' amy vali'ey indraike.) Vaho tsy hañary ty vali'e ty lahilahy.

¹² Manao ty hoe amo ila'eo raho, fa tsy i TALÈ: Naho eo ty rahalahy amam-baly tsi-mpiato, fe no'e ty mipiteke amy lahilahiy, le tsy haria'e. ¹³ Naho amam-baly tsi-mpiato ty rakemba, ie mbe te hirekets' ama'e, le ehe tsy hampisitahe'e. ¹⁴ Amy te hampiavahe' i rakembay i vali'e tsi-mpiatoy, vaho hampiavahe' i lahilahiy i vali'e tsi-mpiatoy; naho tsy zay tsy ho nali o ana' areoo, f'ie amy zao, miavake. ¹⁵ Aa naho te hifampiria' ty tsi-miato, le apoho homb'eo, fa tsy mpirohy i rahalahiy ndra i rahavavey; fe mikanjy antika hifampilongo t'i Andrianañahare. ¹⁶ Fa aia ty hahafohina'o, ry rakembao, ke ho rombahe'o ty vali'o? Le aia ty hahafohina'o, ry lahilahio, he ho rombahe'o ty tañanjomba'o? ¹⁷ fe soa re te songa mañavelo amy tinendre' i TALÈ azey, amy sindre nikanjian' Añahare azey, zay ty fanoroako amo Fivory iabio. ¹⁸ Nikanjeñe t'ie sinavatse hao? aa le tsy ho faohe'e i fisavara'ey; nikanjeñe t'ie tsy nisavatse hao? soa re te tsy ho savareñe. ¹⁹ Ts'inoñe o savatseo; ts'inoñe ka ty tsy fisavarañe; fa ty fañambenañe o lilin' Añahareo*. ²⁰ Aa le songa mijohañe amy nikanjiañe azey t'indaty. ²¹ Niondevo hao t'ie kinanjy? Ko ahoa'o; fe naho mete'o ty miahaha, le miyahà. ²² Le ty nikanjeñe amy TALÈ ao t'ie ni-ondevo ro haha amy TALÈ; le ty nikanjeñe t'ie midada ka, ro fetrek' oro i Norizañey†. ²³ Vinily sarotse nahareo, aa le ko miondevo ama' ondaty. ²⁴ O ry longo, sambe mimoneña aman' Añahare amy nikanjiañe azey.

Ty Somondra naho ty Vantotse

²⁵ Aa ty amo somondrara, tsy amako ty lili' i TALÈ; f'ie manolo-kevetse amy te niferenaiña' i TALÈ ho matoe. ²⁶ Aa le ataoko te mahaso, ty amo faloviloviañe henaneo, te mijohañe amy azey avao t'indaty. ²⁷ Ihe mirekets' aman-drakemba? ko mipay ho votsortse. Ihe miahaha andrakemba, ko mangala-baly. ²⁸ F'ie mañenga valy, tsy hakeo, lehe engaeñe ty somondrara, tsy aman-tahiñe, fe ho volevolen-draha ami'ty haveloñe toy, ie ho nikalañako.

* ^{7:19} Rom 2:26,29 † ^{7:22} Efe 6:6, Pe I 2:16

²⁹ Fe zao ty volako, ry longo: Tomotse o androo, aa ie henane zao, soa re te hanao hoe tsy manam-baly o amam-balio, ³⁰ naho hoe tsy miharovetse o mirovetseo, naho hoe tsy mirebeke o mirebekeo, naho hoe tsy mahazo o mivilio, ³¹ vaho hoe tsy mijorobo ami'ty haveloñe toy o mitoloñe ama'eo, fa mihelañe ty vinta' ty voatse toy. ³² Kitrako te tsy ni-tsimboetse nahareo. Midare o raha' i TALÈO ty tsy manam-baly, hampiehake i TALÈ. ³³ F'ie midare o raha' ty tane toio i manambaliy, ty hampinembanebañ' i vali'ey. ³⁴ Miambake ka ty rakemba naho ty somondrara; dare' i tsy amam-baly i Talè, ie te hiavake an-tsandry naho an-troke. Fe tsiborehetohe' o raha' ty tane toio i amam-baly, ty hahafale i vali'ey. ³⁵ Ty hahasoa anahareo ty nanoako zao, tsy t'ie hanao bozizy, fa ty hañonjonako ze mañeva, tsy hañembetse ty fiatraha' areo i TALÈ.

³⁶ Fa naho eo ty mitsakore te tsy mañeva i anak' ampela'ey i fanoe'ey, ie fa miha-àñoñe, naho atao'e te toko'e henefañe, le ee te hanoe'e i satri'ey, ie tsy aman-kakeo, apoho hengaeñe. ³⁷ Fe i migahiñe añ' arofo'ey, ie tsy embetse, midada amo azeo, naho fa nanampa-kevetse añ' arofo ao te ho tana'e i somondrara'ey, le manao soa. ³⁸ Aa le manao soa i mampañenga i somondrara'ey, fa lombolombon-kasoa ty tsy mampañenga.

³⁹ Fehè' o lilio ty rakemba ie mbe veloñe ty vali'ey; fe naho vilasy i vali'ey le votsotse re hanambaly ze tea'e amy TALÈ ao. ⁴⁰ Ho soa tata t'ie nitoboke amy zao avao, hoe ty ereñereko, ie ataoko te amako ka i Arofon' Añaharey.

8

Mahakama Soroñeñe an-Kazomanga

¹ Aa ty amo raha banabanaeñe amo hazomangao: ataon-tika te songa aman-kilala tika; mampiebotsebotse ty hilala, fe mampiraorao ty koko.

² Naho eo ty mieva t'ie mahafohin-draha, le mboe tsy ama'e ty hilala do'e. ³ Fe arofoanan' Añahare o mikoko azeo. ⁴ Aa ty amo fikamañe raha nisoroñañe an-kazomangao, fohin-tika te tsitantane atoy ty saposampo, naho te Raike tsi-roe-tsi-telo t'i Andrianañahare. ⁵ Aa ndra te ao ze o ndrañahareo, ke andindiñe añe, he an-tane atoy (toe maro o 'ndrañahareo mbore tsifotofoto o talèo), ⁶ fe aman-tika, raike t'i Andrianañahare, i Rae niboaha' ze he'e naho iveloman-tikañey; Raike ka i TALÈ IESOÀ Norizañey —ie ty nanoeñe ze kila raha, naho itika añama'ey. ⁷ Fe mboe tsy ama' ze hene ondaty i hilala zay. Ty ila'e, ie zatse i hazomangay am-para' henane, ro mikama hoe te binanabana an-kazomanga, vaho mahativa i arofo'ey i haleme'ey.

⁸ Toe tsy fañarineañe aman' Añahare ty mahakama; le tsy mahafotsake t'ie tsy mikama, vaho tsy onjoñe'e te tsy mikama. ⁹ Fe mitaòa, kera ho vato mahatsikapy o maifoifoo ty fidadàn' arofo' areo. ¹⁰ Amy t'ie mahaisak' azo t'indaty, te ihe mahilala ro mikama an-toe' i hazomangay, le va'e mahaosike i tsy maozatse añ' arofoy ty hikama i haneñe binanabana amo raham-pahasiveoy. ¹¹ Aa akore te hianto ty amy hilala'oy i longo'o maifoifo nivilasia' i Norizañey. ¹² Aa ie mandilatse aman-drolongo ro mahafere i arofo'e malemey, le aman-tahiñe amy Norizañey. ¹³ Aa naho hampanankakeo i longokoy ty mahakama, le tsy hikama hena kitro katroke raho, tsy mone hamingan-dongo.

9

Ty Zo o Firaheñeo

¹ Tsy midada hao raho? Tsy Firàheñe v'irahoo? Tsy fa nitreako hao t'IESOÀ Talèntika? Tsy satako amy TALÈ v'inahareo? ² Aa ndra t'ie tsy Firàheñe ami'ty ila'e, toe izay ama' areo, ie tombo-kalama' ty maha-Firàhe' i TALÈ ahy. ³ Inao ty fatoiko amo mandohy ahio: ⁴ Tsy aman-jo hihinañe naho hinoñe v'izahay? ⁵ Tsy zo'ay hao ty minday valy mpiato hindre lia ama'ay manahake o Firàheñe ila'eo, naho i rahalahi' i TALÈ rey vaho i Kefasy? ⁶ Ke zaho naho i Barnabasy avao ty tsy aman-jo hitroatse amy fitoloña'aiy.

⁷ Ia ty lahin-defoñe miato amy vara'ey hihotakotake? Ia ty mambole valoboke tsy mikama amo voa'eo? Ia ty mpiarake tsy mandriotse amy lia-raikey? ⁸ Mivolañe ami'ty haondatiko raho, fa toe tsarae' i Hake, ⁹ ie pinatetse amy Hà' i Mosèy ao ty hoe:

Ko mameo ty añombe mandisam-bare. *

O añombeo hao o ambenan' Añahareo? ¹⁰ Ke itika i nitsarae'ey? Eka! pinate'e ho an-tikañe, soa te hiava am-pitamàñe ty mpiava, naho hitamà ty anjara'e i mpitatakey. ¹¹ Aa naho añ' arofo ty nitongisa'ay ama' areo, ho raha jabajaba hao ty hanifoa'ay ty ho paia' ty sandriñe? ¹² Aa naho aman-dily hitake ama' areo ty ila'e, tsy sandrake zahay? Fe tsy rinambe'ay i lily zay, fa mifeake amy ze he'e, tsy mone ho sebañe'ay ty talili-soa' i Norizañey.

¹³ Tsy fohi' areo hao te mikama amo mahakama' i anjombaio o mpitoroñe amy Masiñeio, naho mitraok-anjara amy kitreliy o mpiastrate i kitreliio? ¹⁴ Natoro' i TALÈ ka te ho veloñe amy talili-soay ty mitaroñe i talili-soay. ¹⁵ Fe tsy nirambesako; toe tsy t'ie handrambe izay ty nanokirako, eka hàmake t'ie hikenkañe ta te ho koaheñe o fisengeakoo. ¹⁶ Ie taroñeko i talili-soay, tsy eo ty isengeako, amy te nafantoke; eka, hankàñe amako naho tsy taroñeko i talili-soay. ¹⁷ Naho satriko i fitoloñañey le ho tambezeñe; fe ndra tsy satriko, tsy mete tsy anoeko avao fa nafantoke amako i fitoroñañey. ¹⁸ Inoñe arè ty tambeko? Te, ie taroñeko i talili-soay, ro atoloko tsi-am-bili'e, soa tsy handrambesako zo amy talili-soay.

¹⁹ Aa ndra t'ie votsortse am' iabikey, niondevo am' ie iabiy, hahareketse ty maro; ²⁰ Tamo Jiosio raho, nanao hoe Jiosy, hahareketse Jiosy; ie ami'ty ambane' Hake le anoeko hoe ambane' Hake, ndra te tsy ambane' Hake, hahareketse ze ambane' Hake; ²¹ ami'ty tsy aman-Kake ro anoako hoe tsy aman-Kake, (toe tsy afake amy Han' Añaharey raho kanao ambane' o Hà' i Norizañey) soa te ho azoko ze tsy aman-Kake; ²² amo maifoifoo raho manao maifoifo, handreketse o maifoifoo. Fonga tsikombèko amy ze lafi'e iaby, hahareketse ty ila'e amo sata'e iabio. ²³ Anoeko ty amy talili-soay, ho mpitraok' amy voka'ey.

²⁴ Tsy fohi' areo hao te songa milay o mpanao tsikaviaviao, fe raike avao ty mandrambe tambe? Milaïsa arè hahagioke. ²⁵ Toe milie-batañe amy ze he'e ty te hahimbañe amo fifandreketañeo. Anoe' iereo ty handrambesañe sabakan-drenge ho lo, fa itikañe ka, i tsy ho momokey. ²⁶ Aa le milay raho, tsy t'ie hañeañe tsy aman-talifireñe; mikomondro, fe tsy t'ie mpamofòtiroke. ²⁷ Ampivohoreko ty sandriko vaho ondevozeko, soa t'ie mitaroñe ami'ty ila'e ro tsy haito.

10

Hatahata ami'ty Talily Taolo' Israeley

* ^{9:9} Its 25:4

¹ Tsy teako hamoea' areo, ry longo, ie songa tambane' i rahoñey naho sindre niranga i riakey o roaen-tikañeo, ² naho fonga nalipotse amy Mosè ao amy rahoñey naho amy riakey, ³ songa nikama i hanen' arofoy, ⁴ sindre ninoñe amy ranon' arofoy; ninoma' iareo i vaton' arofo nañorikey. Toe i Norizañey i vato. ⁵ Fe tsy ninòn' Añahare ty hamaroa'e, vaho binaibai'e an-dratraratra aña. ⁶ Ie fandrazañañe amantika, te tsy hañiry hatsivokarañañe manahake o hadrao' iareoo. ⁷ Le tsy hiato am-pahasive manahake ty ila'e. Hoe ty pinatetse:

Niambesatse ondatio
nikama naho ninoñe,
vaho niongake hihisa.*

⁸ Asoao tika tsy hañarapilo manahake ty nanoe' ty ila' iereo vaho ro'aletsi-telo-arivo ty nizamañañe ami'ty andro raike. ⁹ Asoao ka tika tsy hitsoke i TALÈ, manahake ty nitsoha' iareo vaho nampihomaha' o mereñeo. ¹⁰ Le ko miñeñeoñe manahake ty nanoe' ty ila'e vaho rinotsa' i mpandrotsakey. ¹¹ Toe nanoeña ho fandrazañañe i nifetsake am'iereo rezay vaho sinokitse hañòke antika nitsatoha' o sa honka'e zao. ¹² Aa le mitaoà ry manao te mijohaña, tsy mone hikorovoke.

¹³ Tsy nifetsaham-panjiziañañe ila' ze mahazatse ondatio nahareo; mi-gahiñe t'i Andrianañahare, tsy hapò'e ho zizieñe mandikoatse ze lefe, fa mindre amy fanjiziañey ro hitolora'e ty hihaha' areo, hahafifeake.

Ty Bodomom-pahasive ke ty Sabadidak' i TALÈ

¹⁴ Ie amy zay ry longo, ibolitiro ty fahasive. ¹⁵ Milañoñe hoe am' ondaty mahihitse raho: niniho o entako zao. ¹⁶ Tsy fitraofaña amy lió' i Norizañey hao i fitovim-pañandriañañe andriañen-tikañey? tsy fitraofaña amy fañòva' i Norizañey hao i mofo folahen-tikañey? ¹⁷ Amy te itika maro ro vonga-mofo raike, naho fañòva raike, fa songa ifahana' i vonga raikey. ¹⁸ Oniño t'Israele ty amo nofotseo: tsy mpitraoke amy kitreliy hao o mikama o nisoroñañeo?

¹⁹ Ino ty teako ho volañeñe: Amam-bente'e hao o fahasiveo, manjofake hao o raha soroñeñe amo samposampon-drahao? ²⁰ Inao o entakoo: ty fisoroña' o kilakila' ondatio ro isoroñañe aman-kokolampa fa tsy aman' Añahare, [†] vaho tsy teako t'ie hitraok' amo kokolampao. ²¹ Tsy aharo finomaña ty fitovi' i TALÈ naho ty korobon-kokolampa; tsy atraoke amy fandambaña' i Talèty tihin-kokolampa. ²² Mampamarahy i TALÈ hao tika? Maozatse te ama'e hao tika?

Ty Fidada' o Mpiatoo

²³ Sindre azo anoeña, fa tsy songa mahaso; sambe mete, fe tsy hene mampitombo. ²⁴ Asoao tsy ho eo ty hipay hampiraorao ty vata'e, fa ty ila'e. ²⁵ Kamao ze aletake an-tsena ao fa ko añontaneñañe, hampimarimarihaña ty arofo.

²⁶ A i TALÈ ty tane toy naho ze halifora'e.‡

²⁷ Ihe ambara' ty tsi-miato, naho no'o ty homb' ama'e ao, le ikamo ze azotso'e, fe ty amo hamarimarihañañe, ko mañontane. ²⁸ Aa naho eo ty manao ama'o ty hoe: Nisoroñañe am-pahasive 'n-itoy, le ko ikama'o kanao nisaontsia'e, naho ty amy fitsakoreañey. ²⁹ Fitsakoreañañe, hoe raho, tsy ty azo fa i azey. Fa ino ty izaka' ty ereñeren-tro' ondatio ty fidadako? ³⁰ Aa naho ikamako am-pañandriañañe le ino ty ifosàñ' ahy amy nañandriañakoy?

* **10:7** Avo 32:6 † **10:20** Sor 17:7, Its 32:17 ‡ **10:26** Sab 24:1, 50:12

³¹ Aa ke mikama he minoñe, hera inoñ' inoñe ty anoe' areo, hene anò handrengeañe an' Andrianañahare. ³² Ko mampitorifike o Jiosio ndra o Grikao, ndra i Fivorin' Añaharey, ³³ hambañe ami'ty ampifaleko ze fonga ondaty amy ze raha iaby, ty tsy ipaiako tombo'e ho ahy, fa ho a i màroy, soa t'ie ho rombaheñe. ³⁴ Tsikombeo raho hambañe amy te zaho ka ro mpiamy Norizañey.

11

Ty Sata Mañeva o Fitalahoñaeo

¹ ² Ty andrengeako anahareo ry longo, le t'ie mahatiah y ah y am y ze he'e, naho tambozore' areo o nafèn-droaeo, ami'ty do'e nitaroñako. ³ Fa teako ho fohi' areo te lohà' ze hene 'ndaty i Norizañey*, le lohà' ty rakemba ty lahilahy; le lohà' i Norizañey t'i Andrianañahare†. ⁴ Toe manalatse ty añambone'e ze lahilahy mikolopoke naho mihalaly ndra mitoky. ⁵ Fa manalatse ty añambone'e ka ze rakemba tsy mampikolopoke ty añambone'e t'ie miloloke ndra mitoky—fa hambañe amy te niharatse. ⁶ Aa naho tsy mete mikolopo-doha ty rakemba, le hamake te hiharatse. Fe naho mahasalatse i rakembay te ho harateñe ndra hitsifañe le soa re te hikolopo-doha‡. ⁷ Tsy kolopofa' ty lahilahy ka ty añambone'e, amy t'ie ty vintan' Añahare naho ty enge'e; le ty rakemba ro engen-dahilahy. ⁸ (Toe tsy niboak'ami'ty rakemba ty lahilahy, fa ami'ty lahilahy ty rakemba.) ⁹ Eka, tsy nitsenène ho a ty rakemba ty lahilahy, fa ty rakemba ho a ty lahilahy. ¹⁰ Ty amy tsraeñey le soa re te añambone' i rakemba ty viloñe t'ie amandily, ty amo anjelio. ¹¹ Ie amy zao, amy Talè ao, le tsy mifampiria ami'ty lahilahy ty rakemba, vaho tsy mihaha ami'ty rakemba ty lahilahy. ¹² Le hambañe amy te boak'ami'ty lahilahy ty rakemba te añamy rakemba ka o lahilahio; vaho kila boak' aman' Añahare. ¹³ Mifañaraharà: Mañeva ty rakemba hao ty miloloke aman' Añahare tsy mikolopoke? ¹⁴ Aa tsy anare' o sata' ty tane toio hao te manalatse o lahilahio ty maròy lava? ¹⁵ Fe naho apò' ty rakemba ho lava ty maroi'e, le enge'e; amy te nitoloreñe aze ho fandrakofañe o maroi'eo.

¹⁶ Aa naho eo ty te handietse, tsy aman-dilitse ila'e tika ndra o Fivorin' Añahareo.

Bodomomoke Mahamomoke

¹⁷ Fe amo taroñeñe zao, tsy rengeko nahareo; ie tsy mifanontoñe ho ami'ty hasoa, fa ho ami'ty haraty. ¹⁸ Valoha'e, naho mifanontoñe ho Fivory, inao t'ie mifampiriaria, fe mete hiantofako. ¹⁹ (Toe tsy mahay tsy ama' areo avao ty fifampitolahañe hampidodeañe o niventène ama' areoo.)

²⁰ F'ie mifanontoñe, toe tsy ty hikama i sabadidak' i Talèy, ²¹ fa mikama, songa mandrambe ty mahakama'e heike; le ao ty kerè vaho ao ty jike. ²² Hete! Tsy songa manañe anjomba hao hikamà'e naho hinoma'e? Ke rabioñe' areo ty Fivorin' Añahare, naho salare' areo o rarakeo? Aa ino ty hitaroñako? Ho rengèko amy zay hao nahareo? Tsy hirengèako!

Ty Sabadidak'i TALÈ

²³ Fa rinambeko amy TALÈ, i nitaroñakoy, te nandrambe mofo t'i TALÈ IESOÀ amy haleñe nifoterañe azey; ²⁴ nañandriañe re le finola'e vaho nanao ty hoe: Intoy ty sandriko ho anahareo, anò zao ho fitiahiañe ahy. ²⁵ Hambañ' amy zay, rinambe'e i fitoviy, ie fa nikama, le nanao ty hoe:

* **11:3** Efe 1:22, 4:15, 5:23 † **11:3** Fot 3:16, Ko I 3:23, Jao 14:28 ‡ **11:6** Vol 5:18

Fañina vao ami'ty lioko ty fitovy toy. Anò zao amy fikama' areo aze ho fitiahiañe ahiko. ²⁶ Aa le amy ikama' areo ty mofo toy naho inomañe ty fitovy toy, ro mitaroñe ty havilasi' i TALÈ ampara' ty fitotsaha'e.

²⁷ Aa ndra ia ia mikama amy mofoy ndra minoñe amy fitovi' i Talèy ami'ty tsy fañeva'e, le aman-kakeo ami'ty fañòva naho ami'ty lio' i TALÈ. ²⁸ Aa le tsy mete tsy hitso-batañe heike ondatio vaho hikama amy mofoy naho hinoñe amy fitoviy. ²⁹ Amy t'ie mikama naho minoñe ro mikama naho minoñe fatse ami'ty vata'e naho ie tsy maharedreke i fañovay. ³⁰ Zay ty mampaifoifo naho mahasiloke maro ama'areo, mbore nampiròtse ty ila'e. ³¹ Ie mahafitsò-batañe ami'ty hatò tika le tsy ho zakaeñe. ³² F'ie zakaeñe, lilove' i TALÈ tsy mone hatrao-pàtse ami'ty voatse toy. ³³ Ie amy zao, ry longo naho mifanontoñe hikama, mifandiñisa. ³⁴ Naho eo ty saliko, soa re te hikama añañomba'e aña, tsy mone hivory hafatse. Halahareko ho anahareo ami'ty fiaviko o raha ila'eo.

12

o Falalàñ-Trokeo

¹ Ty amo falalàñ' arofoo, ry longo, tsy teako hamoea' areo. ² Fohi' areo t'ie mbe nifehèa' ty voatse toy*, le nampandriheñe mb'amo raha fahasive moañe, toe nikozozoteñe mb'eo. ³ Aa le ampahafohineko, te tsy ia ty ampivolañe' i Arofon' Añaharey ty hoe: Afatse t'Iesoà, vaho tsy eo ty mahafisaontsy ty hoe: IESOÀ ro TALÈ, naho tsy i Arofo Masiñey.

⁴ Miambakambake o falalàñeo, fe raike i Arofoy. ⁵ Mizarazara o fitoroñañe, fe raike t'i TALÈ. ⁶ Ankafankafa o tolon-drahao fe raike t'i Andrianañahare mifanehake ami'ty halifora' ze he'e, vaho ⁷ songa anolora'e vintañe raike boak' amy Arofoy ho fañasoàñe i mèroy; ⁸ anolora'e tsaran-kihitse amy Arofoy ty raike, le tsaran-kaharendrehañe amy Arofoy ty ila'e, ⁹ le fatokisañe amy Arofoy ty ila'e, naho falalàm-pampijangañe amy Arofoy avao ty ila'e ¹⁰ naho fanoan-draha-tsitantane ty ila'e naho fitokiañe ty ila'e naho fahatsikaritam-pañahy ty ila'e naho fisaontsy-ankafankafa ty ila'e vaho fandikañe fisaontsy ty ila'e. ¹¹ Fe Arofo raike ty manao i hene rezay, songa andiva'e ze satrie'e.

Foto'e Raike, Singa'e Maro

¹² Aa le hambañe amy te raike ty sandriñe fe maro o fangefange'eo, le ndra te maro o fangefange'eo, toe sandriñe raike, manahake zay i Norizañey. ¹³ Toe ami'ty Arofo raike tika ro songa nalipotse amy fañòvay ao—ke Jiosy he Grika, ke ondevo he midada—sindre nampinomeñe amy Arofoy.

¹⁴ Toe tsy raike o fangefange an-tsandriñe fa maro. ¹⁵ Aa naho nanao ty hoe ty fandia: Kanao tsy fitàn-draho, tsy mpiamy fañòvay. Tsy manebañe aze tsy ho mpitraoke amy sandriñey zay. ¹⁶ Le ie manao ty hoe ty ravembia: Kanao tsy fihaino raho, tsy mpiamy fañòvay. Tsy mikalañe aze tsy ho mpitraoke amy sandriñey zay. ¹⁷ Naho ni-fihaino iaby i fañòvay, aia ty hijanjiña'e? Naho ni-fijanjiñañe iaby, aia ty hiantsona'e? ¹⁸ Ie amy zao, songa nalahan' Añahare amy satri'ey o mpitraok' amy fañòvaoio. ¹⁹ Aa naho sindre raha raike avao o fangefangeo, ino ty maha sandriñe aze? ²⁰ Ie amy zao, maro o fangefangeo fe raike ty sandriñe. ²¹ Tsy mahavolañe ty hoe ami'ty fitàñe ty fihaino: Tsy paiako rehe; ndra ty añambone amo fandiao ty hoe: Tsy ipaiako. ²² Fe o mpitrao-tsandriñe atao malemeio ro

* ^{12:2} Efe 2:11, 4:17, Pe I 4:3, Te I 4:5

toe paiañe. ²³ Mbore onjonen-tika o amy sandriñe ataontika ho ambane lohàñeo, naho ampihaminen-tikañe engeñe o fangefange tsy sengeñeo, ²⁴ f'ie tsy paia' o fangefange mahaboleakeo, fa rinanjin' Añahare ho raike i fañòvay vaho tinolo'e asiñe ambone o fangefange tsy aman' asiñe, ²⁵ soa tsy hifañambakambake i fañòvay, fa hene hifampiatrake mira o fangefangeo. ²⁶ Aa ie misotry ty fange'e raike, mindre miore ama'e o fangefangeo; ie asiñeñe ty fange'e, le miharo firebeke ama'e o fangefangeo.

²⁷ Toe fañòva' i Norizañey nahareo, songa fangefange ama'e. ²⁸ Le nitendrèn' Añahare amy Fivoriy ho valoha'e o Firàheñeo; faharoe o mpitokio, fahatelo o mpañokeo, le o raha-tsitantaneo, le o falalàm-panahàñeo, o fañimbàñeo, o fifeheañeo vaho o saontsy ankafankafao.

²⁹ Songa Firàheñe hao? Sindre mpitoky hao? hene mpañoke hao? Sindre mpanao raha tsitantane hao? ³⁰ Fonga amam-palalàm-panahàñeo hao? Sindre misaontsy am-pameleke hao? Hene mpandika hao? ³¹ Fe imaneo o falalàñe amboneo vaho mbe hitoroako ty sata fanjàka.

13

O Fikokoñaño

¹ Ie mirehake am-pamele' ondaty naho anjely raho fe tsy amam-pikokoñañe le feon-torisike mikontsiañe naho fikatsakatsañan-kantsàñe avao. ² Ie mahafitoky naho maharendreke ze hene mietake naho ze atao hilala vaho lifo-patokisañe mahaveve vohitse fe tsy aman-koko, le kafoake. ³ Naho koàheko o varakoo hamahàñako o rarakeo mbore afoeko ho foreheteñe ty sandriko, f'ie tsy aman-koko, le tsy mahaso ahy.

⁴ Mahaliñe ty koko naho matarike, tsy mamarahy ty koko, tsy miebotse-botse ty koko vaho tsy mirengevoke; ⁵ tsy mijaranjaràñe, tsy mipay ty aze, tsy mora boseke, tsy mitorifike; ⁶ tsy ifalea'e ty hatsivokarañe, fe irebeha'e ty hatò; ⁷ Hene vavè'e, fonga iantofa'e, songa tamà'e, sindre ifeaha'e.

⁸ Tsy milesa ty koko; fe hihelañe ty fitokiañe, le hijihetse ty filikolikoañe, vaho hasaok' aña ty hilala. ⁹ Mahafohiñe ty ila'e tika vaho mitoky ty pila'e. ¹⁰ F'ie miboak' eo ty fonitse, le himosaoñe aña o am-paha'eo. ¹¹ Ie niajaja raho, nirehake hoe ajaja, nandrèndreke hoe ajaja, nitsakore hoe ajaja; zaho bey le nadòko o hajajàñeo. ¹² Henaneo mahaisake hoe an-ketsoro malompolombo; ie aña, hifampiatre-daharañe. Maharendreke ty ila'e raho henaneo, f'ie aña ro hahafohiñe hambañe amy te arofoanañe.

¹³ Sehanga'e henaneo, ty fatokisañe, ty fitamàñe, ty fikokoñañe, i telo rezay; fe lohà'e ty fikokoñañe.

14

Hitoky he Hilikokilo

¹ Imaneo fikoko; le salalao o añ' arofoo, àntsake ty fitokiañe. ² Amy te tsy misaontsy ama' ondaty ty milikoliko fa aman' Añahare, le tsy fohi' ondaty; amy te an-tro'e ty isaontsia'e raha mietake. ³ Fe misaontsy am' ondatio ty mpitoky, mampiraorao, mañosike vaho mampanintsiñe. ⁴ Mañasoa ty vata'e ty milikoliko, fe mañonjoñe i Fivoriy ty mpitoky. ⁵ Niteako te songa nilikoliko, fe kitrako t'ie mitoky. Losore' ty mpitoky ty mpilikoliko tsy mampibejañe hañasoa i Fivoriy. ⁶ Ie amy zao ry longo, naho pok' ama' areo ao raho milikoliko, ino ty hañasoa anahareo naho tsy itaroñako famentabentarañe, ndra hilala, ndra fitokiañe, ndra fañòhañe?

⁷ Fa ndra o raha tsy veloñe mañaka-peoo, he soly ke marovany, naho tsy miambakambake o feo'eo, aia ty haharendrehañe ty noe' i soliy ndra i marovaniy? ⁸ Ie popoe' i antsivay ty feo tsy fohiñe, ia ty hihentseñ' aly. ⁹ Inahareo ka, naho tsy ampivolañem-pameleke ty saontsy malange, aia ty aharendrehañe i tsaraeñey? amy t'ie hisaontsy an-tioke. ¹⁰ Va'e tsifotofoto ty karazan-tsaontsy ami'ty voatse toy, leo raike ty tsy aman-dika'e. ¹¹ Fe nahonofiko ty dika' i saontsiy le alike amako i misaontsiy, le ho alike amy misaontsy ka raho. ¹² Inahareo ka, kanao sinda hanam-palalàñ' arofo, imaneo ty hampiraorao i Fivoriy. ¹³ Le soa re te ihalalia' i milikolikoy t'ie hahafandika. ¹⁴ Amy t'ie miloloke am-pameleke hafa, miloloke ty troko, fe tsy mamokatse ty fitsakoreako. ¹⁵ Inoñe aré? Toe hihalaly antroko naho hihalaly am-pitsakoreañe, hisabo an-troko vaho hisabo am-betsevetse. ¹⁶ Naho tsy zay, ie mitata an-trok'ao avao, aia ty hanoe' i tsy niokey ty hoe: Ie zay! amy fañandriaña'oy kanao nofi'e i saontsi'oy. ¹⁷ Ndra te soa i fañandriaña'oy, tsy nahasoa ty ila'e. ¹⁸ Andriañeko t'i Andrianañahare te hene ilikoarako likoliko; ¹⁹ f'ie am-pivory ao, hamake te minday saontsy lime am-pitsakoreañe, hañòhako o ila'eo, ta te milikoliko an-tsara rai-ale.

²⁰ O ry longo, ko miha-ajaja am-betsevetse; eka, manoa hoe ajaja-kede am-palaiñañe, fe miañoña an-kihitse. ²¹ Pinatetse amy Hake ao ty hoe: Am-pameleke ankafankafa naho am-pivimbin' ambahiny ty hitaroñako am'ondaty retiañe; fe ndra te zay, mbe tsy hitsendreñ' ahy iereo, hoe t'i TALÈ.*

²² Aa le nanoen-ko viloñe o likolikoo; tsy ho a o mpiatoo fa ho a o tsi-miantokeo; vaho tsy nanoeñe ho a o tsy miantokeo ty fitokiañe fa ho a o miatoo. ²³ Naho tsy zay, ie songa mifanontoñe ty Fivory, naho sindre milikoliko, vaho ie mizilike ao ty tsy mahafahiñe ndra o tsi-miantokeo, tsy hanoa'e t'ie gegegege hao? ²⁴ Fe naho hene mitoky, le ie mizilike ao ty tsi-miantoke ndra ty bahimo, songa hampiantok' aze, sindre hampamotopotots' aze ²⁵ amy te naborake o mietake an-tro'eo; le hibaboke an-dahara'e eo re hitalaho aman' Añahare vaho hitaroñe ty hoe: Toe ama' areo etoa t'i Andrianañahare!

Fitalahoñañe Mañeva

²⁶ Akore amy zao ry longo? ie mifanontoñe, songa manañña sabo naho lañonañe naho famentabentarañe, naho likoliko miharo fandikàñe, vaho hene hanoeñe ho fampiraoraðañe. ²⁷ Naho eo ty milikoliko he roe, tsy mandikoatse telo, le ifandimbezañe, vaho tsy mete tsy am-pandika. ²⁸ F'ie naho po-pandika, le hianjiñe te am-Pivory ao, fa añ'arofo'e naho aman' Añahare ty hitangongoa'e. ²⁹ Ampilañono ty mpitoky telo ndra roe, le handanjalanja o ila'eo. ³⁰ Ie entoeñe ka ty miambesatse, le hianjiñe ka i valoha'ey. ³¹ Hene mahazo mitoky am-pifandimbezeñë, soa te sindre hianatse, songa hosiheñe. ³² Ie amy zao iambanea' ty arofo'e ty mpitoky. ³³ Amy te tsy fifandrakarakàñe t'i Andrianañahare fa fanintsiñañe. Hambañe amo favori' o noro'eo iabio, ³⁴ le hitam-pianjiñañe am-Pivory o rakembao, tsy apeke hisaontsy fa hiambane, ty amy pinatetse amy Hake aot†. ³⁵ Naho te hañontane iereo, le songa hañontane ty vali'e añ'anjomba'e ao; fa mahasalatse naho misaontsy am-Pivory ao ty rakemba. ³⁶ Hete! Niboak' ama' areo hao i tsaran' Añaharey? Hera, inahareo avao ty nivotraha'e?

* **14:21** Ies 28:11,12 † **14:34** Fot 3:16

³⁷ Naho eo ty mieva ho mpitoky, ndra aman' arofo, soa re te hahatsikarake te lili' i TALÈ o sokirekoo. ³⁸ Aa naho eo ty tsy maharendreke, apoho re tsy hahafohine. ³⁹ Ie amy zao ry longo milozoha fitokiañe vaho ko rarà' areo ty milikoliko; ⁴⁰ fa hene andeñe ami'ty fañeva'e naho am-pahendreañe.

15

Ty Fivañonan-ko velo'i Norizañey

¹ Te hampandrendreke anahareo henaneo, ry longo, i talili-soa nitaroñakoy, i rinambe areoy naho ijohaña' areoy; ² i entañe nitaroñakoy le maharombake te vontitireñe, tsy mone tsy vente'e i natokisa' areoy.

³ Fa nitaroñeko ama' areo ty lohà' i rinambekoy, te nivilasy ho a' o hakeon-tikañeo i Norizañey ty amo Sokitse Masiñeo, ⁴ le nalenteke vaho natroatse amy andro faha-teloy ty amo Sokitse Masiñeo, ⁵ le nisodehañe amy Kefasy vaho amy folo-ro'amby rey. ⁶ Ie aña, le niboak' aman-drolongo mandikoatse ty liman-jato; mbe veloñe ty hamaroa'e henaneo, fe miròtse ka ty ila'e. ⁷ Le nipoteake am' Iakobe re naho amo Firàheñe iabio, ⁸ fara'e nisodehañe amako, zaho hoe ajaja tsy añom-bolañe; ⁹ toe tsitsos' o Firàheñe iabio vaho tsy mañeva hatao Firàheñe, amy te nisamporeraheko i Fivorin' Añaharey. ¹⁰ Fe i fatarihan' Añaharey ty maha zao ahy; naho tsy nizoeñe ho kòake i falalà'e amakoy, fa nitromake mandikoatse iereo iaby; toe tsy zaho, fa ty hasoan' Añahare amako. ¹¹ Aa ke zaho he iereo, nitaroñe zahay vaho niantoke nahareo.

O Fivañonan-ko Veloñeo

¹² Aa naho tseizeñe te nitroatse amy havilasiy i Norizañey, akore te manao ty hoe ty ila'e ama' areo, te, Tsy eo ze o fivañona' o vilasio zao?

¹³ Fe naho tsy ampitroareñe o havilasio, le tsy nitroatse ka i Norizañey.

¹⁴ Aa naho tsy natroatse i Norizañey, le tsy jefa'e o fitaroña'aio vaho kòake ty fatokisa' areo, ¹⁵ mbore zoeñe t'ie valolombelom-bande aman' Añahare, amy te nitaroñe'ay ty aman' Añahare te natroa'e i Norizañey, fe inao tsy natroa'e—ze ho nito naho tsy mivañom-beloñe o vilasio. ¹⁶ Aa naho tsy mitroatse o fañòvao, le tsy natroatse ka i Norizañey. ¹⁷ Aa naho tsy natroatse i Norizañey le tsi-vara ty fatokisa' areo, fa mbe amo hakeo' areoo ¹⁸ vaho fa momoke ka o miròtse amy Norizañeio. ¹⁹ Aa naho ty haveloñe toy avao ty itamantika i Norizañey, le amy ze hene ondaty itika ro lombolombo' ty mahaferenay.

²⁰ Fe toe natroatse amy havilasiy i Norizañey, i loha-voa' o mirotseoy.

²¹ Aa kanao añama' t'indaty o havilasio, le añama' t'indaty ka ty fivañona' o vilasio. ²² Fa hambarñe amy te kila vilasy amy Dame ao, te hene ho velomeñe amy Norizañey, ²³ f'ie songa ami'ty filaha'e: i Norizañey ro sese-lengo'e, mandimbe aze o amy Norizañeio amy fitotsaha'ey, ²⁴ vaho ho tondroke i figadoñañey, ie atolo'e aman' Añahare Rae i fifeheañey, naho fa rinotsa'e ze fonga fandiliañe naho fifelehañe vaho faozarañe. ²⁵ Amy te tsy mahay tsy hifehe ampara' te fonga napoke ambane' o fandia'eo o rafelahi'eo.* ²⁶ I havilasiy ro rafelahy sehang'a'e ho rotsaheñe. ²⁷ Ie kila nampiambanè'e am-pandia'e ao. Aa ie manao ty hoe:

kila nampiambanè'e am-pandia'e ao,[†]

* 15:25 Sab 110:1 † 15:27 Sab 8:6

le malange te tsy añate'e i nampidoñe ze he'e ambane'ey. ²⁸ Ie kila nampiambanèñe ama'e, le i Anakey ro hiandaly amy Nampiambane ze he'e ama'ey, soa te ho andindimone' ze halifora'e t'i Andrianañahare.

²⁹ Aa naho tsy zay, ino ty hanoe' o nilipotse ty amo nivilasio? Naho tsy mitroatse ka o nivilasio, ino ty ilipora' iareo? ³⁰ Akore ka ty fiatrefa'ay feh' ohatse lomoñandro? ³¹ Eka, ry longo, ventèko amy fisengeako amy Talèntika IESOÀ Norizañey, t'ie mikenkañe boak' andro. ³² Aa naho fidalala' ondaty ty nifandrakaraheko o biby hako e Efesosy añaeo le ino ty nitombo'e amako? Naho tsy mivañoñe o vilasio, te mone:
Antao hikama naho hinoñe,
fa hikoromake te hamaray.[‡]

³³ Asoao tsy ho fañahieñe: Toe mañamavo havañonañe ty fiosoñandraty. ³⁴ Mihendrea ami'ty fañeva'e, le ko mandilatse; fa eo ty tsy mahafohiñe an'Andrianañahare. Hanalatse anahareo ty nanoako zay.

I Sandry Nampivañonañey

³⁵ He eo ty hanao ty hoe: Akore ty hahafitroara' o loloo? naho an-tsandry inoñe ty hivotraha' iareo? ³⁶ Ty minè! Tsy ho veloñe i tongise'oy naho tsy mate heike. ³⁷ Le ihe mitongy, tsy i ho vente'ey i tongise'oy, fa ty tabiry—he ampemba, ke ty ila'e. ³⁸ Fe i Andrianañahare ty manolotse vatañe ama'e, ze safiri'e, naho amy ze tabiry t'y ho vata'e.

³⁹ Toe tsy hene hambañe ze atao nofotse; raike ty a ondatio, naho nofotse hafa ty a o bibi-hakoo, naho nofotse ila'e ty a o voroñevo vaho hafa ty a o fiañeo. ⁴⁰ Ao ka o sandrin-dikerañeo naho o sandri' ty tane toio; raike ty engen-dikerañe vaho hafa ty enge' o an-tane atoio. ⁴¹ Raike ty enge' i àndroy le hafa ty enge' i volañey naho hafa ty enge' o vasiañeo vaho mifañambake ty enge' ty vasiañe ami'ty vasiañe.

⁴² Zay ka ty fivañona' o vilasio. Ie tinongy ho an-kamomohañe, fe hitroatse tsy ho an-kamomohañe, ⁴³ tinongy ho an-kamavoñañe f'ie hatroatse ho aman' engeñe; tinongy ho an-kaifoifoñañe fe hatroatse ho aman-kaozaraña, ⁴⁴ tinongy ho aman-tsandri' ty tane toy f'ie hatroatse ho amam-pañòvan' arofo. Kanao eo ty sandri' ty tane toy, ao ka ty añ' arofo. ⁴⁵ Hoe ka ty pinatetse:

Nanoeñe arofo veloñe t'i Dame,[§]

indaty valoha'ey; Arofo mpamelöñe ka t'i Dame tsitso'e. ⁴⁶ Fe tsy i añ' arofoy ty nivaloha'e, fa i an-taney vaho zay i añ' arofoy. ⁴⁷ Boak' an-tane ao indaty valoha'ey vaho boak' andindiñe ao indaty faharoey. ⁴⁸ Manahake i tan-taney o an-taneo vaho hambañe amy an-dikerañey o andindiñeo. ⁴⁹ Le hanahake ty fisikinan-tika ty vinta' i debolekiy, ty hisikinan-tika i vintan-dikerañey.

⁵⁰ Le hoe raho, ry longo, tsy mahalova i Fifehean' Añaharey ty nofotse naho lio vaho tsy mandova ty tsi-fihomahañe ty fihomahañe. ⁵¹ Ingo itaroñako razan-drehake: Tsy songa hiròtse tikañe, fa sindre hiova, ⁵² ami'ty manao zao, ami'ty tsy mahamaiñ'ive, amy feon' antsiva honka'ey. Hipopò i antsivay naho hatroatse tsy ho momoke ka o loloo vaho hiova tikañe. ⁵³ Fa tsy mahay tsy hisikiñe i tsy mihomakey i mihomakey vaho hisikiñe o tsy fikoromahañeo o mete mikoromakeo. ⁵⁴ Aa ie misikiñe ty tsy mete momoke i mihomakey naho misikiñe o tsi-fikoromahañeo ty mikoromake le ho tendreke i tsaraeñe ty hoe:

Nagodra' ty harebahañe ty havilasy.* ⁵⁵ O Havilasio, aia ty fandrebaha'o?

[‡] 15:32 Ies 22:13, 56:12 § 15:45 Fot 2:7 * 15:54 Ies 25:8

O Tsikeokeokeo, aia ty finipoha' o? †

⁵⁶ Hakeo ro finipoha' o havilasio vaho i Hake ro haozara' o tahiñeo.
⁵⁷ Fe andriañeñe t'i Andrianañahare Mpanolotse antika i fandrebahañey añañy Talèntika IESOÀ Norizañey.

⁵⁸ Ie amy zao, ry longo sarotse, migahiñā, mijadoña; mahimbañā nainai'e amo fitoloña' i TALÈ, fohiñē te tsy kafoake ty fitromahañē amy TALÈ.

16

Kipopòke ho a Ierosaleme

¹ Aa ty amy fanontonañē ho amo noro'eoy, manahake i nampanoeko o Fivory e Galateoy ty hanoe' areo: ² Ie amy loak' andro' i SABOTSEY, le sambe mañajà an-driha ao tandrife' ty vokatse* nitahiañ' aze, soa tsy anontonañē ka naho avy raho. ³ Ie mipotitse eo raho, ze sitra'areo an-taratasy, ro hahitriko mb'e Ierosaleme añañ hinday o natonto' areo an-tsatin-troo. ⁴ Aa naho mahasoa ty hombako mb'eo, le hindre lia amako iereo.

Fisafiri' i Paoly amy Fañaveloa'ey

⁵ Ho tiliheko nahareo naho fa niranga i Makedonia, fa ho soroheko ty Makedonia; ⁶ le mete hañialo ama' areo, ke hiasotry ao, hampionjona' areo mb'amy liakoy mb'eo, ndra te homb' aia. ⁷ Toe tsy te hihelañako tilike ami'ty liako henanekeo, fa itamako ty hitambatse ama' areo ao naho satr'i i TALÈ. ⁸ F'ie hañialo e Efesosy añañ hey ampara' i Halimampoloy, ⁹ amy te misokake ho ahy ty lala mangadagadañē mete mahavokatse, fe maro ty misebañē.

¹⁰ Aa naho pok'eo t'i Timoty, le ampitraofo ao tsy an-tahotse, amy te o tolon-draha' i Talè ty anoe'e manahake o fanoekoo. ¹¹ Le ko mete'areo sirikaen-dre, fe ampionjono an-kanintsiñē, hitotsaha'e amako, fa itama'ay naho o longoo.

¹² Le i Apolosy longontikañey, nimaneako osike ty homba'e mb'ama' areo mb'eo mindre amo ralalahio, fe tsy nisatrie'ey ty hañavelo. Toe homb'eo re ami'ty mahamete.

Figadoña'e

¹³ Mitaòa, mifahara am-patokisañē, mifanehafa hoe fanalolahy vaho maozara. ¹⁴ Anò am-pikokoñañē ze hene toloñe' areo.

¹⁵ Miambane ama' areo raho ry longo, (fohi' areo o añañanjomba' i Stefanasio, ty lohavoa' i Akaia naho nijadoné ho mpifanehake hitoroñé o noro'eo;) ¹⁶ te hiambaneñañē o hambañē ama'eo, naho amy ze mpañolotse i fitoloñañey iaby. ¹⁷ Mahaehake ahy ty nikoneha' i Stefanasy naho i Fortonato naho i Akaiko, amy t'ie nañeneke ze tsy niampe tama' areo, ¹⁸ naho nampazava ty troko naho ty anahareo; aa le onjono ty manahake iareo.

Fisalamañē Fara'e

¹⁹ Mañontane anahareo o Fivory e Asia añaño. Salamae' i Akoila naho i Prisilae vaho i Fivory añañanjomba' iareoy, ami'ty haporean' arofo'e amy TALÈ ao. ²⁰ Añontanea' o longo iabio. Mifanalamañē ami'ty oroke miavake.

²¹ Anoniako an-tañako etoañē: לִוְיָה ²² Ee te hafatse ze tsy mikoko i TALÈ. Mb'etoa ry TALÈ! ²³ Ho ama' areo ty hasoa' IESOÀ TALÈ Norizañey. ²⁴ Ama' areo iaby am' IESOÀ Norizañey ty fikokoako. Amena.

† 15:55 Hos 13:14 * 16:2 Rom 15:28

Korinto II

¹ I Paoly, Firàhe' IESOÀ Norizañey ami'ty satrin' Añahare, naho i Timoty rahalahintika. Ho ami'ty Fivorin' Añahare e Korinto ao mitraoke amo noro'e iaby miparaitake Akaia año. ² Hasoa naho fañanintsiñe ama'areo boak' aman' Añahare Raentika naho IESOÀ TALÈ Norizañey.

Andrianañahare-Mpañohò

³ Andrianañeñ' abey t'i Andrianañahare Rae' i Talèntika IESOÀ Norizañey, i Raem-pitretrezañe naho Andrianañahare' ze hene fañohoñañey, toe Andrianañahare. ⁴ Ie ty mañohò anay amo hasotria'ay iabio, hañohoña'ay ka o mioremèñeo, amy fañohoñañe añoñoan' Añahare anaiy, ⁵ Hambañe amy te mitobake ama'ay o hasotria' i Norizañeyio, ty andoparam-pañohoñañe añoamy Norizañey. ⁶ Naho ampalovilovien-jahay, le ho ami'ty fañosihañe naho fandrombahañe anahareo; ie ohòñen-jahay le ho fañosihañe anahareo kanao mifeake ami'ty fijaleañe njalea'ay. ⁷ Tsy mihilotse ty fidalalà'ay anahareo, fohiñe t'ie mitraok' amo fisotria'ao le manahake zay ka amy fañohòañey.

⁸ O ry longo, tsy tea'ay te tsy hapota' areo o feh' ohatse nanoañe anay Asia año, izahay nampilogolgoñañe mandikoatse ty haozara'ay*, vaho ho namoe aiñe. ⁹ Eka, an-tro'ay ao 'nio te voa-fatse havetrake, soa tsy hiato-batañe, fa aman' Añahare mpampitroatse o vilasio; ¹⁰ ie nañaha anay ami'ty fihomaham-bey, toe mamotsotse, naho itama'ay te mbe hañafake anay. ¹¹ Tovo'e ty fañolora'areo: mifanehake ho anay an-kalaly; fa kanao maro ty mihalaly, maro ka ty hañandriañe t'ie voavale.

Mamotoañe t'i Paoly

¹² Inao ty fisengea'ay, ie ventem-pitsakoreañe, te o fitoloña'ay an-tane atoy, antsake ama'areo, le nanoeñe ankazavan-troke naho an-kalio-tahiñe —tsy ami'ty hakante' ty tane toy, fa ami'ty hasoa natolon' Añahare. ¹³ Toe tsy anokira'ay naho tsy o vaki' areo naho fohi' areoo, fe atokisako t'ie haharendreke pak'am-pigadoña'e henaneo, ¹⁴ toe eo ty nirendre' areo ama'ay, te inahareo ro foto' ty fisengea'ay, naho zahay anahareo amy andro' IESOÀ Talèntikañey.

¹⁵ Amy fatokisañe zay, ty nilaharako te hiheo mb'ama' areo mb'eo heike, hahazoa' areo tilike fañindroe'e, ¹⁶ Eka, hiary mb'ama' areo raho naho mb'e Makedonia ao vaho hibalike, hampionjona' areo mb'e Iehodà añe.

¹⁷ Nifejofejo hao raho amy nilaharakoy? He i italicifirakoy ro nisafirieko amy haondaty hambo'ey ao? soa te songa hanoeko ty hoe Eka, Eka naho Aiy avao? ¹⁸ Fe manahake te migahiñe t'i Andrianañahare, le tsy Eka naho Aiy o fivola'ay ama' areoo. ¹⁹ Amy te tsy Eka naho Aiy i Anan' Añahare, IESOÀ Norizañe nitaroña'ay naho i Silasy vaho i Timoty ama' areoy, fa Eka avao ty ama'e ao. ²⁰ Aa ndra fire-fire ty fampitamàn' Añahare, le hene Eka o ama'eo; vaho ie ty anoa'ay Amena amy fandrengea'ay an' Andrianañaharey.

²¹ Fa mampipitike antikañe amy Norizañey t'i Andrianañahare, ie hinoso'e ²² naho vinoli-tombo'e vaho natolo'e an-tron-tikañ' ao i Arofo'ey ho tsaloke. ²³ Aa le koiheko ho valolombelon-troko t'i Andrianañahare te i fiheveako anahareoy ty tsy nombako mb'e Korinto mb'eo heike. ²⁴ Tsy

* ^{1:8} Ko II 4:8-9, 17

te senge'ay hery o fatokisa' areoo, f'ie mpifanehake ama' areo ho ami'ty hafalea' areo, amy t'ie mijadoñe soa am-patokisañe.

2

Iheveo i Niotay

¹ Ie amy zao, tampakevetse amako t'ie tsy homb'ama'areo mb'eo aman'anahelo; ² fa naho zaho ty mampihontoke anahareo, ia ka ty hampiehake ahy naho tsy i nampanaheloekekoo? ³ Ty nanokirako zay, le he te zaho homb'eo, ro mioremeññe amo ho nampirebek' ahikoo; fa atokisako ama'areo iaby te ze mahafale ahy ro mahafale anahareo iaby. ⁴ Toe ankaloviloviañe naho fikoretan-tro naho ranomaso maro ty nanokirako, tsy te hampañore, fa ty hampandrendreke anahareo ty fikokoako miheatse.

⁵ Aa naho teo ty nampañore, le tsy zaho ty nampanaheloe'e, fe, (tsy mone ho losoreko) mete niore'a' areo iaby. ⁶ Fa nahaeneke indatiy i fandilovañe nipaoha' i māroy azey. ⁷ Ie amy zao, soa re te ihevèa' areo naho añohòa' areo, tsy mone t'ie ho opoe' ty hontoke. ⁸ Aa le osiheko, te ho vente'areo ama'e ty fikokoa' areo. ⁹ Ty nisokirako, le ty hitsoke anahareo hera mete mivohotse ndra aman' inoñ' inoñe. ¹⁰ Aa le ze iheyea' areo ro iheyeako ka. Le ze napoko—naho toe eo ty ho niheveañe, le fa niheveako añatrefa' i Norizañey ty ama' areo, ¹¹ tsy mone hamañahy antika i mpañinjey, itika tsy bahimo amo sata'eo.

Marifondrifoñe

¹² Ie nivotrake e Troasy aña raho ty amy talili-soa' i Norizañeyi, le nisokake ho ahiko, amy TALÈ ao, i lalañey, ¹³ fe tsy nazava ty troko, amy te tsy nitreako t'i Titosy rahalahiko. Aa le nangata-dalañe am'iereo vaho nionjomb'e Makedonia mb'eo.

¹⁴ Andriañeñe t'i Andrianañahare, mpiaolo anay am-pandrebahañe nainai'e amy Norizañey, naho aboele'e añama'ay ty harifondrifo' ty fahafohinañe aze tok' aia tok' aia. ¹⁵ Fa aman' Añahare zahay ro hamañi' i Norizañey amo mirombakeo naho amo mikoromakeo; ¹⁶ amy raikey ty haimbon-kavilasy ho am-pihomahañe, le amy raikey ty harifondrifon-kavelo ho aman-kaveloñe vaho ia ty mahatafetetse zay? ¹⁷ Tsy manahake i maro mandetake i tsaran' Añahareiy zahay; fe ami'ty do'e aman' Añahare naho amy Norizañey, añatrefan' Añahare ro itaroña'ay.

3

Sinokitse aña'Arofo ao

¹ Mamototse maniom-batañe indraike hao zahay? ke t'ie, manahake o ila'eo, mipay taratas-pañiniañe ho ama'areo, he taratas-pañiniañe boak' ama'areo? ² Inahareo ro taratasi'ay pinatetse aña' arofo'ay atoañe, fohiñe naho vakie' ze kila ondaty, ³ ie malange te taratasi' i Norizañe toroñe'ayi, tsy sinokitse an-dranomainte fa amy Arofon' Añahare veloñey, tsy antakelam-bato fa an-takelan-tro' ondaty.

⁴ Zay ty fatokisa'ay aman' Añahare añaamy Norizañey. ⁵ Tsy te zahay ro mañeva hivolañe t'ie maha-pi-draha, fa boak' aman' Añahare ty fahalefea'ay, ⁶ Ie ka ty nampahafaritse anay ho mpitoro' i fañina vaoy; ie tsy an-tsokitse, fa amy Arofoy; mahafate i sokitsey, fe mahaveloñe i Arofoy.

⁷ Aa naho an' engeñe ty nitotsaha' i fitoroñam-pihomahañe an-tsokitse pinatetse am-batoy, ie tsy nahafitalatse ty lahara' i Mosè o ana' Israeleo ty amy engen-dahara'ey—ie nipoa-mavo, ⁸ aa tsy handikoatse zay ty enge' o

fitoroñan' arofoo? ⁹ Ie nanañ' engeñe ty fitoroñam-pañozoñañe, sandrake te itoboaran' engeñe ty fitoroñan-kavañonañe. ¹⁰ Aa naho oharañe ami'ty engeñe mitoabotse toy, le tsy aman' engeñe henaneo i nirengène taoloy. ¹¹ Fa naho nanañ' engeñe i mipoa-mavoy, antsake te hanam-bolonahetse i tsy mete modoy.

¹² Aa kanao zay o fitamà'aio, le ra'elahi ty fahavania'ay mitoroñe, ¹³ f'ie tsy manahake i Mosè nikolopofa' ty lamba marerarera an-dahara'e* tsy mone hitolom-pangareke aze o ana' Israeleo ampara' t'ie nimavo, ¹⁴ fe nihagàñe ty fivetsevetse' iareo, naho mbe tsy miafave henanekeo amy famakiañe i fañina taoloy i marerareray, fa amy Norizañey ty fañahañe aze. ¹⁵ Aa ndra henaneo, ndra mb'ia mb'ia vakieñe t'i Mosè le kolopofa' i marerareray ty arofo' iareo. ¹⁶ Fe naho mitolike amy TALÈ t'indaty, le miafave i marerareray†. ¹⁷ I TALÈ 'nio i Arofoy, le añ'Arofo' i TALÈ ao ty fidadàñe. ¹⁸ Fe itikañe iaby, an-daharañe tsy mikolopoke, mañisake hoe an-ketsoro ty enge' i Talè, ro hovaeñe ho hambam-bintañe ama'e aman' engeñe itoaboran' engeñe añamy TALÈ, i Arofoy.

4

Vara an-Tsajoa

¹ Aa kanao anay o fitoroñañe zao, ie niferenaiñañe, le tsy mamoe'ay. ² Toe rarà'ay ze sata naetake ty amy hasalara'ey; tsy miapiapia am-pamañahiañe vaho tsy mengohe'ay o tsaran' Añahareo, fe am-palangesañe ty hatò ro anolora'ay vatañe mb'am-pitsakorea' ze hene ondaty am-pivazohoan' Añahare. ³ Aa naho toe mikolopoke ty talili-soa'ay, le mikolopoke amo mikoromakeo, ⁴ fa nampigoa' ty ndrañaharen-tsa toy* ty fivetsevetse' o tsi-miantokeo, tsy hahaisake ty fireandrea' ty talili-soan' enge' i Norizañey, i vintan' Añaharey. ⁵ Tsy ty vata'ay ro taroñe'ay, fa IESOÀ Norizañey ho TALÈ, le zahay ro fetrek'oro' areo ty am' IESOÀ. ⁶ I Andrianañahare nanao ty hoe: Hipasasàke amo ieñeo ty zava ro mampireandreañe añ'arofo'ay ao i hazavam-paharendrehañe ty engen' Añahare mitapasàke an-dahara' IESOÀ Norizañey. ⁷ Ie ty vara'ay mihaja an-tsajoa-tane ao, hampidodea te boak' aman' Añahare ty hara'elahi' i haozarañey fa tsy hirik' ama'ay. ⁸ Mañarikatoke anay ty famorekekeñañ†, fe tsy demoke; malovilovy, fe tsy mamoe aiñe, ⁹ samporeraheñe fa tsy naforintseñe; zinevo, fa tsy rotsake— ¹⁰ nainai'e endese'ay am-batañe ty havilasi' IESOÀ, soa te halange an-tsandi'ay ka ty havelo' IESOÀ. ¹¹ Le nainai'e seseheñe havetrake ty amy IESOÀ zahay veloñe, soa te hiboak' an-tsandi'ay mora mihomakeo ka ty havelo' IESOÀ.

¹² Aa le mitromake ama'ay ao ty fihomahañe, le ama'areo ty haveloñe. ¹³ Manahake i nisokirañey ty hoe:

Niantoke raho, vaho nivolañe,‡

Toe miato ka zahay nampatokisa' i Arofoy vaho mitaroñe, ¹⁴ fohiñe te i Nampitroatse i TALÈ IESOÀY ro hampitroatse anay miharo amy IESOÀ ka, vaho hampiatrefe'e mitraoke ama' areo zahay. ¹⁵ Inahareo ty nanoañe i he'e rezay, soa t'ie fa niboile ami'ty maro ty hasoa le handopatse ho ami'ty engen' Añahare ty fañandriañañe.

¹⁶ Aa le tsy milesa zahay, fa ndra te mihamomoke ty sandri'ay alafe'e, mihavao boak' andro ty an-tro'ay ao. ¹⁷ Le i hasotriañe maivañe tsy mare-maretse toiy ro mamokatse engeñe tsy ri'e mavesatse tsy aman'ohatse.

* 3:13 Avo 34:33-35 † 3:16 Avo 34:34 * 4:4 Lke 4:6 † 4:8 Ko I 1:8 ‡ 4:13 Sab 116:10

18 Le tsy o isam-pihainoo ty biribirie'ay fa o tsy isakeo, amy te mihelañe o raha isakeo, fe tsy ho modo nainai'e o tsy isam-pihainoo§.

5

Ty Akiba andindiñey aña

1 Fohin-tikañe te, ie arotsake ty kijà imoneñan-tikañ' an-tane atoy, le manañe ty nitsenen' Añahare, anjomba tsy nanoem-pitâñe, nainai'e andindiñe ao. **2** Toe mampitoreotoreo antika ty atoy: ie misalala hisaroñe i kibohon-tika boak' andindiñe añaey, **3** ie iombean-tika, le tsy ho zoeñe mihalo. **4** Eka miselekaiñe tika ami'ty kijà toy, miatra-draha tsy te hihalo, fa te hisaroñe, soa te hagedran-kaveloñe i fa hihomakey. **5** I Andrianañahare ty nañòke antika ho amo raha zao, ie nañomey antika i Arofo Masiñey ho tsòake. **6** Aa le nainai'e maharototse tika, fohiñe t'ie mimoneñe ami'ty sandriñe toy ro mboe tsy amy TALÈ ao. **7** Toe mañavelo am-patokisañe tika fa tsy t'ie mahaisake*. **8** Toe matoky tika, t'ie veka'e hisitake amy sandriñey himoneñe amy TALÈ ao. **9** Aa ke mimoneñe he aña, ilozohan-tika ty hahasitrak' aze. **10** F'ie tsy mahay tsy hiheo añatrefa' i fiambesam-pizakà' i Norizañey, songa handrambe ty valem-pitoloña'e an-tsandi'e, ty amo nanoe'eo, ke te nisoa he niraty†.

Ty Fifampilongoañe

11 Aa kanao fohiñe ty fañeveñañe amy TALÈ, le osihe'ay ondatio; toe midodea aman' Añahare zahay vaho misalala t'ie halange am-pitsakorea' areo ka. **12** Tsy t'ie hirenge indraike, fe hirengea' areo, soa te hahavale o misenge an-tarehe fa tsy an-trokeo nahareo. **13** Aa naho mivali-jere zahay, le aman' Añahare; ie miaren-jahay, le inahareo. **14** Toe azi' ty fikokoa' i Norizañey zahay; aa kanao zao, ie nivilasy ho a i màroy i Raikey, le fonga nihomake. **15** Kila nivetraha'e, soa te tsy ho veloñe am-bata'e ka o veloñeο‡, fa ho amy nivilasy vaho nivañombelo ho a' iareoy.

16 Aa ie henane zao, tsy mahaoniñe ndra iaia amy haondati'ey tika, eka, toe nionin-tika amy haondati'ey i Norizañey, fe tsy zay ty hahafohinañ' aze henaneo. **17** Ie amy zao, ndra iaia ro amy Norizañey ao, ro voatse vao, fa nihelañe aña o hambo'eo, heheke, kila nivaoeñe§, **18** toe hene raha ro boak' aman' Añahare nifampilongo aman-tika añamy Norizañey, vaho natolo'e antika ty fitoroñañe i fifampilongoañey; **19** le zao: te nifampilongo ami'ty voatse toy t'i Andrianañahare añamy Norizañey, naho tsy vinolili'e am'iereo o hakeo' iereoo, vaho nafanto'e ama'ay i tsaram-pifampilongoañey.

20 Toe sorotà' i Norizañey zahay, le hoe zahay ro nikanjian' Añahare anahareo. Aa le ihalalia'ay ty amy Norizañey: Mifampilongo aman' Añahare. **21** Fa nanoen' Añahare soron-tahiñe ho an-tika i tsy nanan-kakeoy, soa te ho an-kavantañan' Añahare tika ama'e ao.

6

1 Aa kanao mifanehake, risihe'ay anahareo ty tsy handrambe ty hasoan' Añahare vaho hilesa. **2** Fa hoe re:
Nitsanoñ' azo raho ami'ty andro mete
vaho nañolotse azo
ami'ty androm-pandrombahañe.*

§ 4:18 Ko II 5:7, Rom 8:24, Heb 11:1,13 * 5:7 Ko II 2:14, 4:18 † 5:10 Mat 16:27, Jao 5:29

‡ 5:15 Rom 14:7-8, Gal 2:20 § 5:17 Rom 6:2-22, Gal 2:20, Efe 4:22-24, Kol 3:10, Jn I 3:9-10 * 6:2
Ies 49:8

Inao, henaneo ty sa mete; Henanekeo i androm-pandrombahañey.

Tsy Hasotria' i Paoly

³ Tsy noe'ay ty hampitsikapy iaia ama-ndra inoñ' inoñe, kera ho tiñeñañey i fitoroñañey. ⁴ Fe, ventè'ay amy ze he'e t'ie mpitoron' Añahare: am-pifeahañey mañore, an-kaloviloviañey, an-koheke, am-pamorekekeñañey, ⁵ am-pofoheñey, am-porozò ao, am-pandragaragàñey, an-kamokorañey, ie azo ty tsareke, le an-kasalikoañey, ⁶ an-kalio-tahiñey, am-paharendrehañey, am-pahaliñisañey, an-tretre amy Arofo Masiñey vaho an-koko tsy voroteñey, ⁷ an-tsara vantañey, an-kaozaran' Añahare, am-pialian-kavañonañey am-pitàn-kavana naho havia, ⁸ he asiñeñey ke mavoeñey, he fosaeñey ke rengèñey; atao mpamañahy f'ie mahity; ⁹ hoe tsy fohiñey fe arofoanañey; hoe mikenkañey fe hehe t'ie veloñey; nililoveñey fe tsy vinono; ¹⁰ hoe mandala f'ie nainai'e mandia taroba; hoe rarake fe mampañaleale ty maro; hoe poi'e te mone kila anay.

¹¹ O ry nte-Korinto! manoka-palie ama' areo zahay, mivañavaña o tro'aio. ¹² Tsy t'ie manebañey anahareo, fe azi' ty añova' areo ao. ¹³ Antao hifampira—hoe mirehake aman' ajaja raho—midañadañà stroke ka.

Tsy Iharoan-joka ty tsy Mpiato

¹⁴ Ko miharo joka amo tsy miatoo. Fa ino ty itraofa' ty havantañey ami'ty tsi-fañorihan-Kake? ke ino ty iharo' ty zava ami'ty ieñey? ¹⁵ He akore ty hitraofa' i Norizañey saontsy amy Beliale? ke ino ty iharo' ty mpiato ami'ty tsy miato? ¹⁶ Aia ty hitraofa' i anjomban' Añaharey amo sampon-drahao? toe Anjomban' Añahare veloñey tika. Fa hoe t'i Andrianañahare:

Himoneñey am' iareo ao raho,
naho ho mbeo'mbeo am' iereo,
le ho Andrianañahare' iareo raho,
vaho h'ondatiko iereo. †

¹⁷ Aa le miakara am'iereo,
vaho miavaha, hoe t'i TALÈ.

Ko mitsapa raha faly,
le hampihovaeko nahareo. ‡

¹⁸ Ho Rae' areo raho, vaho ho ana-dahiko
naho anak-ampelako nahareo,
hoe t'i TALÈ Tsitongerèñey. §

7

¹ Kanao an-tikañey o fampitamañey zao ry longo sarotse, le ehe miefera amy ze raha mahativa sandriñey naho stroke, mañeneke fiavahañey am-pañeveñañey aman' Añahare*.

Mandia Taroba

² Ampihovao an stroke zahay! fa tsy anañey iaia hakeo, tsy nimengohe'ay, tsy nikatramoe'ay. ³ Tsy te hamàtse anahareo ty nanoako zay, ie fa nivolañeyko taolo t'ie an-tro'ay ao, ke te hiharo hivetrake he hitrao-kaveloñey. ⁴ Bey ty fatokisako anahareo naho jabajaba ty fisengeako. Toe enim-panintsin'an-draho, tsipike ty hafaleañey amo hene falovilovia'aio.

⁵ Ie nipoke e Makedonia aña le tsy nahafitofa o sandri'aio, fa nitokoen-draha mb'etia mb' eroa—fihotakotahañey ey naho fihakahakàñey ao. ⁶ Fe,

† 6:16 Sor 26,11,12; Avo 29:45, Iir 31:1, Iek 37:27 ‡ 6:17 Ies 52:11; Iek: 20:34,41 § 6:18 Sa II 7:14; 7:8; Ies 43:6, Hos 1:10 * 7:1 Fot 12:1, Avo 19:5-6, Ben 18:4

i Andrianañahare Mpañohò o voretrao, ro nañohò anay ami'ty fiavi' i Titosy,⁷ toe tsy amy fiavi'ey avao, fa amy fañohòañe nañohoa' areo azey, ie nitalily ty fisalalà' areo, ty firoveta' areo, naho ty zoton-tro' areo ho ahy; ie nonjoneko an-drebeke.

⁸ Aa ndra t'ie nampioremeñako amy taratasiy, tsy aneñenako; (toe naneñeñe hey fe nitreako te tsy nimaremàretse ty nampilendèña' i taratasiy.)⁹ Mirebeke henaneo, tsy t'ie nampioremeñe, fa te ninday anahareo hisoloho i fanaheloy. Toe nanao fanaheloan' Añahare nahareo vaho tsy nijoie'ay.¹⁰ Minday fisolohaña tsy aneñenañe mb'an-drombake ty anahelo satrin' Añahare; fe maha-vetrake ty fandalà' ty voatse toy.

¹¹ Oniño ty fahimbañañe nivokare o raha zao, o fiorèmeñan' Añahare ama' areoo, ty fiveroha' areo, ty fitorifihañe, ty fihembañañe, ty fisalalàñe, ty zoton-tro vaho ty fipaiàn-to! Hene namente ty halio-tahi' areo amy rahay.¹² Aa ndra t'ie nisokirako, tsy i nandilatsey ndra i nandilarañey, fa t'ie halange ama' areo am-pivazohoan' Añahare ty fiasia' areo anay.

¹³ Zay ty nampanintsiñe anay, le tsy vaho i fañohòañey fa nilosore'ay rebeke ty hafalea' i Titosy amy nampibodaña' areo i arofo'eiy.¹⁴ Aa ndra inoñe ty nandrengeako anahareo ama'e, tsy nahasalatse ahy. Fa an-katòn-drehake avao ty nitaroña'ay, le nizoën-ko mahity ty nirengea'ay amy Titosy.¹⁵ Toe nionjoñe ty fiferenaiña'e anahareo Te nahatiah y tsy fanjehara' areo iaby, vaho t'ie nandrambe aze añeveñe naho an-titititike.¹⁶ Aa le irebehako te atokisako amy ze he'e nahareo.

8

o Fatarinhañe

¹ Ie amy zao, ry longo, tea'ay ho fohi' areo ty falalàñ Añahare natolotse amo Fivory e Makedoniao,² ndra t'ie mifeake haloviloviañe, le nandoparem-patarihaña ty haliforan-kaeha' iareo naho ty halosoran-karahara'iareo.³ Eka taroñeko ty fahalefea' iareoy, te nandikoatse ty oza' iareo, ie nanolotse an-tsatin-troke;⁴ naho nihalaly ama'ay andrakadrakake te hitraoke amy fiafrafañe o noro'ey.⁵ Le nanoe' iereo, fe tsy ami'ty natao'ay ho mete, te mone nanolo-tsandry amy TALÈ heike iereo vaho ama'ay ty amy satrin' Añaharey.⁶ Aa le nosihe'ay t'i Titosy; ie fa namototse ro hañeneke ama' areo ka ty fanoloram-palalàñe toy.

⁷ Aa, hambaña amy t'ie miraorao amy ze he'e—am-patokisañe naho tsara, an-kilala naho fahimbañañe, vaho amy fikokoa'areo anaiy—le milikoara amo falalàñe zao ka.⁸ Tsy ivolañako t'ie lily, fe ty amo fahimbaña' o ila'eo, naho ty hamenteako ty fikokoa' areo.⁹ Fohi' areo ty fatarinha' i Talèntika Iesoà Norizañey, ie ni-mpañaleale ro nirèke ho rarake ty ama' areo, soa te i hararaha'ey ro hampañarivo anahareo.¹⁰ Inao ty heveko ty amy rahay: Tombo'e ho anahareo te namototse amy taoñey, le tsy vaho nanao fa nisalalaeñe.¹¹ Aa le henefo i fitoroñañey henaneo, soa te hambaña ami'ty falisà' areo hanao, ty hañenefa' areo amy ze lefe' areo;¹² fa naho eo ty hasindàñe, le ho no'e ty amy hanaña' ondaty fa tsy ty amy tsy fanaña'e.

¹³ Tsy te hampijinieñe ty ila'e le hamaivañañe ty ila'e, fa t'ie hampitsahareñe;¹⁴ ie henaneo, ty havokara' areo ro ho amy ze paia' iareo, soa te ho amy ze paia' areo ka ty hanolora' iareo amo havokara'eo, vaho ho mira.¹⁵ Hoe ty pinatetse:

Tsy nilosoreñe ty nanontoñe maro,

le tsy niereñe ty nanontoñe kede.*

Ty Lili' o Falalañeo

¹⁶ Andriañeñe t'i Andrianañahare, te nazili'e añ'arofo' i Titosy ao ty fahimbañañe ho anahareo hambañe ami'ty ahiko. ¹⁷ Tsy vaho i halali'aiy ty ninò'e, fa amy hasindà'ey ty nihitrica'e mb'ama' areo mb'eo an-tsatri'e, ¹⁸ le nahitri'ay hitraok'ama'e ty rahalahy rengè' o hene Fivorio ty amy talili-soay; ¹⁹ Tsy zay avao, fa tinendre' o Fivorio t'ie hindre lia ama'ay amo falalàñe zao, o vandroñe'aio ho ami'ty enge' i TALÈ naho hampidodea ty hatsotseha'ay hañimba; ²⁰ ie mitao tsy ho tiñeñe amy famandroña'ay o ravoravo jabajaba zaoy, ²¹ fa anolora'ay ty mañeva, am-pivazohoa' i TALÈ, vaho am-pahaisaha' ondatio†; ²² vaho nampindreze'ay am'iereo ty rahalahy beteke niventè'ay naho nioni'ay t'ie maringatse amy ze he'e, mentsake henaneo te mampahimbañ' aze ty fatokisa'e anahareo. ²³ Le i Titosy, Mpirekets' amako naho mpifanehake ama' areo; naho o roahalahio, ie nampihitrife' o fivorio, enge' i Norizañey. ²⁴ Aa le aboaho am' iereo aolo' o Fivorio ty ventem-pikokoa' areo naho ty talim-pirengea'ay anahareo.

9

Fampihentseñañe o Falalàñe

¹ Ty fiatralañe o noro'eo, le tsy loho paiañe ty hanokirañe ama' areo. ² Amy te apotako ty fahimbaña' areo, le isengeako amo nte-Makedoniao, te fa niveka'e tamy taoñe teoy ty Akaia, vaho maro ty nosiheñe ami'ty zoton-tro' areo. ³ Fe nahitri'ay o roahalahio tsy mone ho kòake ty nisengea'ay anahareo amo raha zao, ie fa nanoako ty hoe te mete ho veka'e. ⁴ Hera hindre lia amako mb'eo t'i nte Makedonia hanjo anahareo tsy veka'e, hanalats' anay (tsy nataoko: Nahareo) ie natokisañe. ⁵ Aa le nataoko ho mete te hosiheñe homb'ama' areo mb'eo hey i rahalahy rey hañajary i falalàñe nampitama' areoy, hañentseña'e ho ravoravo fa tsy fatitiañe.

Fañè amo Fanolorañeo

⁶ Inao ty lengo'e: hanatake tsy ampeampe i mitongy kedekedekey, vaho hanatake tsi-fotofoto ty mitongy maro. ⁷ Songa hanolotse ty amy fisafirin' arofo'ey, le tsy am-parahy, tsy an-jizy; amy te non' Añahare ty mpañolotse an-kaehake.* ⁸ Le meten' Añahare ty handipora'e ze atao hasoa, le ie eneñe nainai'e amy ze hene paiae' areo ro hiraorao amy ze fonga tolondraha soa. ⁹ Hoe ty pinatetse:

Naboele'e mbeo' mbeo,

Nifahana'e o rarakeo;

Nainai'e ty havantaña'e.†

¹⁰ Le i mpanolotse tabiry amo mpitongio naho mahakama ho kamaeñey abey ro hanolotse naho hampitombo ty tabiry tongise' areo vaho hampitoabotse ty tolin-tsabon-kavantaña' areo.‡ ¹¹ Le hampitomboeñe amy ze he'e ho am-patarihañe heneke, am-pañandriañañe an'Andrianañahare añañama'ay. ¹² Amy te tsy vaho hamahañe ze paia' o noro'eo avao ty famandroñañe o fiatralañe zao, ie mandopatse ty amo fañandriañañe maro an' Andrianañahareo. ¹³ Ty fanolorañe o fiatralañe zao mamente am'ondate-reo t'ie mandrenge an'Andrianañahare ami'ty anoe' areo ze iantofa' areo te nafe' i talili-soa' i Norizañey, naho t'ie am-patarihañe ty andivañe am'iereo vaho am' iabikey. ¹⁴ Le amo filolofa' iareoo ty

* 8:15 Avo 16:18 † 8:21 Rzs 3:4 * 9:7 Rzs 22:8 † 9:9 Sab 112:9 ‡ 9:10 Isa 55:10-11

himaniña'e anahareo ty amy hasoan' Añahare ama' areo. ¹⁵ Andriañeñe abey t'i Andrianañahare ty amy fatariba'e tsi-amañ'ohatsey.

10

Ty Nañarova'e i Fitoroña'e

¹ Zaho Paoly ty midrakadrakake ama' areo amy tretran' arofo naho fiferenaiñañe amy Norizañey—zaho atao mimalimalitse te mifañatreke, f'ie masibike te aña!— ² Mihalaly te tsy hazi' areo hiatreatre t'ie ao, ie masibike fiatreke o ila'e manao anay ho mpañavelo ami'ty haondaty hambo'eo.

³ Fa ndra t'ie mañavelo amy hambo'ey, tsy i hambo'ey ty fialia'ay. ⁴ Toe tsy boak' amy hambo'ey o fialia'eo fe an-kaozaran' Añahare maharotsake kijoly fatratse; ⁵ afetsa'ay ambane o fitsakoreañe naho ze hene raha mionjoñe hiatreatre ty fahafohinañe an' Andrianañahare vaho rohize'ay ze fonga vetsevetse hivohora'e amy Norizañey, ⁶ ie heneke ty fivohora' areo, le veka'e zahay handilo ze atao fanjeharañe*.

⁷ Isaho o atrefe'areo henaneo? Naho eo ty matoky te a i Norizañey, ee t'ie hitsibo-batañe, he manahake ty maha amy Norizañey aze ty maha amy Norizañey anay. ⁸ Aa ndra t'ie mitolom-pirenge amy nampifeleha' i TALÈ anay hampiraorao anahareoy, fa tsy handrotsake, le tsy isalarako. ⁹ Tsy teako hatao fañembañañe anahareo o taratasikoo. ¹⁰ Peha'e naho maozatse o taratasi'eo, hoe ty ila'e, f'ie mavo-vintañe te miatreke naho sirikaeñe o filañonaña'eo. ¹¹ Soa re te hitsakore te hambañañe ami'ty enta'ay an-taratasy ty fitoloña'ay te miatreke.

¹² Tsy mahavany hitrao-lohàñe ndra hifañòhatse amo ila'e mirengeo zahay. Ie po-hilala kanao mifanjehe vatañe naho mifañòhatse avao. ¹³ Le tsy ho senge'ay ze alafe' o nafaritsoke ho anaio, fa amy nanendrean' Añahare anaiy, ze mahatakate pak' ama' areo ka. ¹⁴ Tsy ho losore'ay fisengeañe hoe t'ie tsy nitakare'ay, amy te toe nahitri'ay pak'ama' areo aña i talili-soa' i Norizañey; ¹⁵ tsy ho sengè'ay ka o alafem-balavala'aio, ami'ty fitoloña' o ila'eo. Fe itamà'ay, ami'ty fitomboa' ty fatokisa' areo, te hielatse ty valavala'ay, hionjoñe ho amy ze lefe, ¹⁶ hitaroña'ay i talili-soay ankàlo' areo ao, fa tsy t'ie hirenge ami'ty fitoloñañe nihenefa' ty ila'e.

¹⁷ Le,
Ze hirenge, ee te amy Talè ty hirengea'e.[†]

¹⁸ Toe tsy i mirengey ty no'e, fa ze rengè' i TALÈ.

11

o Firàheñe Sare'eo

¹ Ee te ho vave' areo hey o hagegeako—ehe ivaveo. ² Ie farahieko am-parahin' Añahare, naho nampañengaeko ty Rañandria, hitolorako ho somondrara miehañe amy Norizañey. ³ Fe mahahembaña ahy, ke, hambaña amy namañahia' i mereñey t'i Haova amy hakalitaha'ey ty hañiamengoha'e ty hatso-po'areo mañeva i Norizañey. ⁴ Aa naho miheo mb'eo ty mitsey IESOÀ ila' i nitaroña'ay*, ndra andrambesa' areo fañahy tsy nirambese' areo ndra talili-soa ila' i natokisa' areoy, hera hiantoke. ⁵ Ataoko te tsy ambane' o Firàheñe mitiotiotseo aman-dra' inoñe raho, ⁶ fa ndra te tsy mahafilañoñe, tsy zay an-kahilala, toe fa nampalangese'ay ama' areo ze he'e. ⁷ Hera nandilatse t'ie nirèke hañonjonañe anahareo,

* **10:6** Jao 3:36 † **10:17** Iir 9:23 * **11:4** Mat 24:5,23-24, Jao 5:43

amy nitaroñako tsy amam-bily i talili-soan' Añaharey? ⁸ Toe nikamereko o Fivory ila'eo, ie nandrambesam-pañehañe hitoroñako anahareo. ⁹ Naho teo ty nipaiako ama' areo, tsy ho nampivavèko ndra ia'ia, fa ie nihirik' e Makedonia aña o rolongoo, le hene nihenefa' iareo i nipaiakoy. Toe fonga nifoneñako tsy hampijiny anahareo vaho mbe hambenako. ¹⁰ Kanao amako ty hatò' i Norizañey le tsy hampsíñeñe am-paripari' i Akaia ao i firengetañe amakoy. ¹¹ Fa manao akore? Tsy kokoako hao nahareo? Arofoanan' Añahare! ¹² Fa ho toloñeko avao o fanoekoo, soa te haitoko ty fijohaña' o mpieva ho hambañe ama'ay amy firoharohà' iareoio. ¹³ Toe firàhem-bande, mpamañahy an-tsata, misare Firàhe' i Norizañey. ¹⁴ Tsy ilatsañe! Fa misare anjelin-kazavàñe ka i mpañinjey. ¹⁵ Aa le tsy mahasovoke te misare mpitoron-kavantañañe o mpitoro'eo, fa hañeva o sata'eo ty figadoña' iareo†.

Mirengetse i Fisotria'ey

¹⁶ Indraeko ty hoe: Ee t'ie tsy hatao seretse, fe naho tsie, le ndra te minè, rambeso avao hisengeako betebeteke. ¹⁷ O volañeko zao, tsy ty amy TALÈ fa am-pirengéan-dagola o fahavaniako mitreñeo. ¹⁸ Kanao maro ty mirengé amy haondati'ey, le hirenge ka. ¹⁹ Toe leo' areo mahihitseo an-kafaleañe ty minè. ²⁰ Lefe' areo ka te ondevozeñe, te abotseke, te haramamoeñe, te irengevohañe, te tampifieñe am-piambina.

²¹ An-kasalarañe ty iantofako te naleme; f'ie amy ze ahavania' ondaty hirenge aman-dra inoñ' inoñe, (toe mivavañoake) le mahasibeke ka. ²² Hebreo v'iereo? Zaho ka! Nte Israele hao? Zaho ka! Tarira' i Abraàme hao? Zaho ka! ²³ Mpitoro' i Norizañey v'iereo? (reha' ty tondreñé), lombolombo' iareo raho: nilosoreko am-pitromahañe, nilikoareko am-pandrohizañe, pinisopiso tsy amañ'ohatse; beteke am-pihembañem-pihomahañe; ²⁴ In-dime te niazoko amo Tehodao i efa-polopoke-raikey‡. ²⁵ Dinabo' ty doda in-telo; finetsa-bato indraike; nijondakañe naho nijoroboñe in-telo; nahamodo ty andro naho haleñe raike an-driak' ao; ²⁶ beteke, an-dia lava; niatre feh' ohatse an-tsaka ao; nampihembañe' o malasoo, niatre-boiñe aman-drofokoko; niatre-doza amo kilakila ondatio, tendre-kankàñe an-drova, hekoheko am-patrambey, varata an-driak' ao, naho feh' ohatse amo longo anife'eo; ²⁷ nimokotse am-pitromahañe naho nanivontivoñe; haleñe maro an-tsareke, nandranco naho kerè, beteke nifeake tsy aman-kàne, nilonjetse vaho nihalo; ²⁸ mandikoatse i alafe'e rezay, le manindry ahy lomoñandro ty fiatrafako o hene Fivorio. ²⁹ Ia ty maifoifo te zaho tsy midazidazitse? Ia ty azizin-draha t'ie tsy mipolepoletse?

³⁰ Aa naho tsy mahay tsy hirengetse raho, le hisengèko o hakepehakoo. ³¹ Arofoanan' Añahare Rae' i TALÈ IESOÀ Norizañey, i andriañene nainai'ey, te tsy mavande raho. ³² Ie te Damaskose ao, le nampamandroñé' ty ragova fehe' i Areta mpanjakay i rova Damaskosey, hitsepak' ahy; ³³ le nazotso an-kàroñe boak'an-dalan-kede amy mànday raho vaho nipoliotse am-pità'e.

12

Ty Aroñaro'i Paoly

¹ Mbe hitolom-pitrèñe raho, ndra te tsy vente'e, fe honjoneko o aroñaroñeo naho o famentabentara' i Talèo. ² Fantako t'indaty amy

† **11:15** Mat 7:15-23, Pe II 2:1-22; Mat 13:41-42 ‡ **11:24** Its 25:3

Norizañey, ie folo taoñe efats' amby zay, (ke am-bata'e, tsy haiko, he tsy am-bata'e, amoeako, fa arofoanan' Añahare), ie nonjoneñe mb'an-dikeram-pahatelo mb'eo. ³ Ty fohiko am'indatiy—ienofiko ke niam-bata'e he tsy niambata'e, fa arofoanan' Añahare— ⁴ ie nampionjoneñe mb' antanen-kavelom-b'eo vaho nahajanjiñe saontsy tsy mete volañeñe, fa faly tsy azo saontsie' ondaty. ⁵ Ho rengeko i nitalilieñey, fe tsy hisenge ty vatako naho tsy amy hakepehakoy. ⁶ Aa ndra t'ie hirenge, tsy hanao minè, fa ty hatò avao ty ho volañeko; fe ifoneñako, kera hañonjona'e ahy ambone' ty isa'ondaty amako naho ze janji'e amako.

Fatike ami'ty Nofotse

⁷ Aa ke ho rengevoheko ty hara'elahi' o famentabentarañeo, le nampitsipohem-patike ty nofoko, ìra' i mpañinjey hamolevole ahiko, hikalañ' ahy tsy hiebotsebotse. ⁸ Fa in-telo ty nihalalieko amy TALÈ t'ie hasitake amako. ⁹ Fe hoe re tamako: Mahaeneñe azo o hasoako, vaho fonireñe an-kavozoñañe o haozarakoo. Aa le ho sengeko an-kaehake i falejolejokoy, soa te himoneñe amako ato ty faozara' i Norizañey. ¹⁰ Aa le mahafale ahy o haifoifoko, o fañinjeañeo, o haemberañeo, o fampisoañañeo, vaho o faloviloviañe ty amy Norizañeyio, toe maozatse raho te màmake.

Ty Fidarea'e amo nte-Korintoo

¹¹ Misare gege raho, fe nizizie' areo. Toko'e inahareo ty nandrenge ahiko; amy te, tsy zai' o Firàheñe mitiotiotseo ndra ami'ty inoñ' inondraho, ndra te tsy manjofake. ¹² Fa nimaneañe am-pahaliñisañe añatrefa' areo o vilom-Piràheñe too—o famantarañeo naho o halatsañeo naho o raha tsitantaneo. ¹³ Aa vaho inoñe ty nahamasay anahareo amo Fivory ila'eo, naho tsy te zaho tsy naloetse ama' areo? Iheveo i nandilarakoy!

¹⁴ Oniño, t'ie veka'e henaneo ty homb' ama' areo aña fañintelo'e; tsy te hampivaveako vaho tsy ipaiako vara, fa inahareo, amy te tsy o ajajao ty mañaja ho aman-droae, fa o roae'eo ho a o ana'eo. ¹⁵ Mahaehake ahy ty hañenga naho hengaeñe ho anahareo, aa naho losoreko ty fikokoako, hazetse hao ty fikokoñañe ahiko?

¹⁶ Ndra te zay, tsy niloerako. F'ie mahay fañahy le nitsepake anahareo an-ka'kalitahañe. ¹⁷ He nañaramamoako amo nañirahakoo? ¹⁸ Nosiheko t'i Titosy vaho nampindrezako ty rahalahy. Nañaramamo anahareo hao t'i Titosy? Tsy añ' arofo raike naho an-dia raike hao o fañaveloa'aio?

¹⁹ Atao' areo t'ie nitolom-piveroke ama' areo hao hatrela zay? Toe añatrefan' Añahare, amy Norizañey ty nitaroña'ay, ry rañetse, hampiraorao anahareo. ²⁰ Ty maha-mahimahiñ'ahy, zaho hiheo mb'eo, he tsy ho treako ami'ty fisalalàko, vaho tsy ho isa' areo ami'ty fañiria' areo ahy; ke eo ty liedietse, ty tsikirike, ty loa-tiñake, ty firahambañe, ty fandrabioñe, ty fitsikotsikoañe, ty evoñevõne, vaho ty havalitsikotahañe.

²¹ Hera te hombako mb'eo indraike, le haketran' Añahareko añatrefa' areo, vaho hirovetako o maro nandilatse mbe tsy nisoloho amy leotseio, o hakarapiloñañe naho ze hasalarañe nanoeñe.

13

Ty Hatahata Honka'e

¹ Ho liako fahatelo mb'ama' areo mb'eo itoy: Am-paliem-balolombeloñe telo ndra roe ty hampijadoñeñe ze hene saontsy*. ² Le o nandilatseo naho o

* ^{13:1} Its 19:15

ila'eo, toe ho taroñeko miaolo, t'ie mbe tsy aña, te hambañe amy vinolako amy fañindroeko teoy, t'ie homb'eo indraike, le tsy ia ty hapoko,³ amy te paia'areo hamenteaña i Norizaña misaontsy aña makoy; ie tsy maleme ama' areo, fa toe maozatse ama' areo.⁴ Toe pinèke amy halemea'ey re fe veloñe an-kaozaran' Añahare. Maleme ama'e ao zahay, fe ho veloñe ama'e ty amy haozaran' Añahare mitoloñe ho anahareo.

⁵ Mitsohà vataña hera amam-patokisaña. Miventea! Tsy fohi' areo hao te aña'arofo' areo ao t'IESOÀ Norizañey[†]?—naho tsy t'ie nilesa amy fitsohañey.⁶ Isalalako te ho fohi' areo te tsy milesa zahay.⁷ Aa le halalie'ay aman' Añahare te tsy handilatse nahareo, tsy te hampiboake anay ho nahatafetetse, fa te hanoe' areo ze mahity, ndra te hatao naito zahay.⁸ Tsy lefe'ay ty mandietse ty hatò, te mone honjone'ay ty hatò.⁹ Ifalea'ay ty haleme'ay naho te inahareo ro maozatse; eka ihalalia'ay t'ie ho fonireñey[‡].¹⁰ Zay i nisokirakoy, zaho tsy ama' areo, soa tsy hisenge hery ama'areo te miatreke, ty amy lily natolo' i TALÈ ahiko ho ami'ty fañasoña, fa tsy ho ami'ty fandrobahaña.

Figadoña'e

¹¹ Ie amy zao, ry longo, mirebeha, mihofonira§, manintsiña, miharoa rehake, mifampilongoa; lonike ho ama' areo i Andriam-pilongoaña naho fikokoña.¹² Mifañontanea aña' oroke miavake.¹³ Songa mañontane anahareo o noro'eo.

¹⁴ Ho ama' areo iaby abey ty hasoa' IESOÀ TALÈ Norizañey, naho ty fikokoan' Añahare, vaho ty fitraofañ' ìna amy Arofo Masiñey. Amena.

[†] **13:5** Rom 8:10, Gal 2:20, Efe 3:17 Kol 1:27 Jn I 4:4 [‡] **13:9** Mat 5:48 § **13:11** Mat 5:48

Galate

Ty Foto' ty Hasoa

¹ I Paoly, Firàheñe, (tsy nirahe' ondatio, ndra t'indaty, fa IESOÀ Norizañey naho i Andrianañahare Rae nampitroatse aze an-kavilasy) ² naho o longo amako atoa iabio,

Ho amo Fivory e Galate añaeo:

³ Hasoa naho Fañanintsîñe boak' aman' Añahare Rae naho i Talèntika IESOÀ Norizañey, ⁴ ie nanolo-piaiñe ty amo hakeon-tikañeo, handrombake antika ami'ty sa raty henaneo, ty amy satrin' Añahare Raen-tikañe; ⁵ ama'e abey ty engeñe nainai'e donia. Amena

Raike—Tsy Roe Tsy Telo—i Talili-soay,

⁶ Mahalatsa ahy te nifarie' areo aniany i nikanyjy anahareo mb'amy hasoa' i Norizañeyi, hitolik' amy ze o talili-soa* ila'e zao, ⁷ tsy t'ie aman' ila'e, fe ao ty mitsibore anahareo hañamengoke ty talili-soa' i Norizañey ⁸ Aa ndra te zahay, ndra te anjely hirik' andindiñe aña ty mitaroñe ama' areo ty talily ila' te amy nitaroñe'ay, le sira naho molale. ⁹ Hambañe amy fivola'ay teoy, le indraeko henaneo, ndra ia t'indaty minday talili-soa ama' areo mandietse i rinambe' areoy, le fatra an-tane.

¹⁰ Mipay fañisohañe am'ondatio hao raho henaneo he aman' Añahare? Ke mipay hahafale ondaty? F'ie te ho nanitra ondaty, le tsy ho nifetrek'oro' i Norizañey.

Kinanjin'Añahare t'i Paoly

¹¹ Hampahafohineko anahareo ry longo, te tsy nifototse am'ondaty i talili-soa itaroñakoy. ¹² Tsy rinambeko ama' ondaty, naho tsy nanarañ' ahiko, fa amy namentabentara' IESOÀ Norizañey ahiy.

¹³ Toe jinanji'areo i fanokeko taolo amo Tehodaoy, te loho nampisoañeko i Fivorin' Añaharey, naho nimaneako rotsake, ¹⁴ vaho nionjoñe amy fitalaho' o Jiosioy mandikoatse o longoko maro mpirai-nono amakoo, ie nilozoheko o lilin-droaekoo. ¹⁵ Aa kanao ninòn' Añahare nañambak' ahy boak' an-tron-dreneko ao, le nikanjie' ty amy hasoa'ey, ¹⁶ hampalangese'e amako i ana'ey, hitaroñako aze amo kilakila' ondatio; ie henane zay tsy niharoako safiry ty nofotse aman-dio ¹⁷ naho tsy nionjomb'e Ierosaleme mb' amo Firàheñe taolokoo mb'eo f'ie nifokofoko mb' Arabia aña; vaho nimpoly mb'e Damaskose ao.

¹⁸ Ie niritse ty telo taoñe le nionjomb'e Ierosaleme mb'eo hifandrèndreke amy Kefasy, vaho nitoboke ama'e ao folo andro lim' amby. ¹⁹ Le tsy nahatreia Firàheñe ila'e raho naho tsy Iakobe, zai' i Talè avao. ²⁰ (Aa ty amo sokireko ama' areoo, le ifantàko añatrefan' Añahare te tsy mandañitse.) ²¹ Ie aña, le nimb'am-paripari' i Sirià naho i Kilkia mb'eo; ²² ie mb'e namoea' o Fivory amy Norizañey e Iehodào ty tareheko. ²³ Toe jinanji' iereo avao te, i nampisoañe antika taloy ro mone mitsey i fatokisañe nimanea'e rotsake heikey. ²⁴ Le nandrenge an' Andrianañahare ty amako.

2

No' o Firaheñeo t'i Paoly

* ^{1:6} Ko II 11:4

¹ Ie folo taoñe efats' amby aña, le nionjomb'e Ierosaleme mb'eo indraike raho nindre amy Barnabasy; nindese'ay ka t'i Titosy. ² Nionjoñe mb'eo te nentoeñe, aa ie natolako ze atao bey am' iereo le nampalangeseke am'iereo ty talili-soa fitaroñako amo kilakila ondatio, ke tsy jefa'e i filaisakoy ndra i nilaisakoy. ³ Fe ndra i Titosy, Grika, mpiamakoy tsy nazi' iereo ho savareñe. ⁴ Ie amy zao pok'eo o roahalahi-anifeo, nijekajeke, nifilo ty fidadàñ-tika am' IESOÀ Norizañey, handrohy an-tika. ⁵ Fe tsy nimete niandaly am'iereo ndra ora raike zahay, soa te hirekets' ama' areo nainai'e ty hatò' i talili-soay. ⁶ Aa le o atao mpiaoloo, (toe tsy ahoako t'ie inoñe, amy te tsy mirihy t'i Andrianañahare)—toe tsy nahatovoñe inoñ' inoñ' amako i mpiaolo rey, ⁷ te mone, ie nahaoniñe te nafantoke amako i talili-soa' o tsy sinavatseoy, manahak' i Petera amo sinavatseo, ⁸ (amy te i nifanehake amy Petera ho Firàheñe amo sinavatseoy ro nifanehake amako ka ho amo kilakila ondatio), ⁹ le ie nioni' Iakobe naho i Kefasy vaho i Jaona, i atao fàhañe rey, i falalàñe natolotse ahikoy, le nañity fitàñ-kavanam-pilongoañe amako naho amy Barnabasy, te zahay ro homb' amo kilakila ondatio, naho iereo mb'amo sinavatseo, ¹⁰ vaho t'ie hahatiah y o rarakeo, fa toe malisa amy zay raho.

Mifañatatre amy Petera

¹¹ Aa ie nivotrake Antiokia ao t'i Kefasy, le natreatreko an-dahara'e fa namà-batañe: ¹² amy t'ie taolo' ty nivotraha' ondaty boak' am' Iakobe aña le nitrao-pikama amo kilakila ondatio, fa naho niloneake eo iereo. nihankan-dre, nivìke amy fihembaña'e o mpiamo sinavatseoo. ¹³ Nitrao-pamañahiañe ama'e o Jiosy ila'eo, kanao sinoike aña amy famañahiañey ka t'i Barnabasy. ¹⁴ Aa naho nitreako t'ie tsy nañavelo an-kavantañañe amy hatò' i talili-soaiy, le hoe raho amy Kefasy añatrefa' iareo iaby: Naho ihe Jiosy ro mañorike ty fanao' o kilakila ondatio fa tsy o Jiosio, le ino ty anoroa'o amo kilakila ondatio ty hañavelo manahake o Jiosio?

Rombaheñe am-Patokisañe

¹⁵ Jiosy tika ami'ty nofotse fa tsy mpanan-kakeo boak' amo kilakila ondatio, ¹⁶ fohiñe te tsy mahavantañe ondaty ty fimanemaneñe Hake, fa ty figahiñá' IESOÀ Norizañey. Aa le niantoke IESOÀ Norizañey tika naho nivantañeñe amy figahinam-patokisa' i Norizañey, le tsy am-pimaneman-Kake, fa tsy eo ty ama' nofotse ty ho vantañe' ty fimanemaneñe Hake. ¹⁷ Aa naho ie mipay ho vantañeñe amy Norizañey ro zoeñe te aman-kakeo; mahampitoron-kakeo i Norizañey hao zay? Sondo'e! ¹⁸ Fa naho atroako indraike i narotsakoy, le mamente-vatañe te mpiola. ¹⁹ I Hake ty namono i fimanemanean-diliy amako*, hivelomako aman' Añahare, ²⁰ niharo niradorado amy Norizañey raho fe tsy zaho ty veloñe, fa mimoneñe amako ato i Norizañey†, vaho ty fivelomako ami' ty nofotse toy henaneo ro ivelomako amy fatokisañe te velome' i Anan' Añahare nikoko vaho namoe-ay ho ahikoy. ²¹ Tsy apoko ty falalàñ' Añahare, fa naho nivantañe' ty fimanemanean-Kake, le tsy vente'e ty nivetraha' i Norizañey.

3

Ke o Fepètseo he ty Fatokisañe

¹ O ry nte-Galate gegeo! Ia ty namoreke anahareo tsy hatokisa' areo ty hatò? ie añatrefam-pihaino' areo ty nampalangesañe ty fipehañe IESOÀ

* ^{2:19} Rom 7:1-25 † ^{2:20} Rom 8:10, Ko II 6:16, 13:5, Efe 3:17, Kol 1:27, Jn 1 3:24

Norizañey. ² Inao ty teako hatoro' areo ahiko: Rinambe' areo ami'ty fimanean-Kake hao i Arofoy? Ke natokisañe i nijanjiñañey? ³ Minè v'inahareoo? Ie namototse amy Arofoy, ho fonireñe amynofotsey hao henaneo? ⁴ Tsy vente'e hao o raha maro nijalea' areoo, toe tsy jefa'e hao? ⁵ I nanolotse anahareo i Arofoy naho mitolon-draha tsitantane añivo' areoy; itoloña'e am-pimanean-Kake hao, ke am-patokisañe i jinanjiñey?

⁶ Hambañe amy Abraàme;
Natokisa'e t'i Andrianañahare
vaho vinolili'e ho havañonañe ama'e.*

⁷ Arendreho arè te toe ana' i Abraàme o amam-patokisañe. ⁸ Aa kanao nitokie' o Sokitse Masiñeo te hampivantañen' Añahare ami' ty fatokisa'e o kilakila ondatio, le tsinara'e amy Abraàme aolo' i talili-soay, ty hoe:
Ama'o ty hitahiañe ze hene fifeheañe,†

⁹ Aa le mindre tahieñe amy Abraàme mpiàtoy o mpiatoo.
¹⁰ Songa nafàtse ze mpimane Hake, fa hoe ty pinatetse:
Sindre afàtse ze tsy mitolom-panao
ze hene pinatetse amy Boke Hakey.‡

¹¹ Malange te tsy ia ty ho vantañe' i Hake añatrefan' Anañahare, fa,
Veloñe amy fatokisa'ey ty vantañe.§

¹² Tsy fatokisañe ty fimanemanean-dily, fe
Iveloma' ty manao irezay.*

¹³ Jineba' i Norizañey amy fatse amy Hake aoiy tika, ie nafàtse ho antika,
fa hoe ty pinatetse:

Fonga afàtse ze aradorado an-katae†

¹⁴ soa te am'IESOÀ Norizañey ty hitotsaha' ty fitahia' i Abraàme amo
kilakila 'ndatio, handrambesa'e am-patokisañe i Arofo nitamañey.

Ty Lily naho ty Fampitamañey

¹⁵ O ry longo, ho razañeko ami'ty fanoe' ondatio: Ndra t'ie fañina'
ondaty, naho fa najadoñe, le tsy eo ty mamaopaoke aze ndra manovoñe
fepetse ama'e; ¹⁶ ie amy zao, nanoeñe amy Abraàme naho amy tiri'ey o
fampitamañeo. Tsy natao ty hoe: Naho amo tiri'eo, hoe t'ie maro, fa ami'ty
raike, ami'ty hoe:

Naho amy tiri'oy.‡

toe i Norizañey. ¹⁷ Zao o taroñekoo: Tsy mahafaoke i fañina nititihen'
Añahare hampikoaha'e i fampitamañey i Hake nanoeñe efa-jato-tsi-telopo
polo taoñe mb'atoiy. ¹⁸ Fa naho miato aman-Kake ty lova, le tsy miato amy
fampitamañey, fe fampitamañe ty nanoloran' Añahare aze amy Abraàme.

¹⁹ Inoñ' arè ty asa' i Hake? Natovoñe ty amo hakeoo, ie norizañe amo an-
jelio am-pitam-pañalañalañe ampara' te nivotrake i Tiry nampitamañey.
²⁰ Tsy mañila t'indaty añivo, fe raike t'i Andrianañahare.

²¹ Aa vaho mifandietse amo fampitamàñ' Añahareo hao t'i Hake?
Sondo'e! Fa naho eo ty hake nitolorañe ze ho nahaveloñe, le i hake zay ty
ho nahavantañe. ²² Fe kila nagabe' i Sokitse Masiñey ambanen-kakeo ao,
soa te hatolotse amo mahafiatoo i nampitamañey, añamy fatokisa'IESOÀ
Norizañey.

²³ Ie mbe tsy pok' atoy i fatokisañey, le rinohy ambane' i Hake
tikañe, narindriñ' ao ampara' te naboake o fatokisañeo. ²⁴ Aa le

* **3:6** Fot 15:6 † **3:8** Fot 12:3, 18:18, 22:18 ‡ **3:10** Its 27:26 § **3:11** Kab 2:4 * **3:12** Sor 18:5
† **3:13** Its 21:23 ‡ **3:16** Fot 12:7; 13:5,22,18, 17:7, 24:7

nimpañoke antika homb' amy Norizañey mb'eo t'i Hake, soa te hivantaña' i fatokisañey. ²⁵ Kanao eo i fatokisañey, le tsy fehè' i mpañokey ka tika.

Anak' Andrianañahare

²⁶ Songa anan' Añahare nahareo amy fatokisa-migahi' IESOÀ Norizañey, ²⁷ le inahareo nalipotse amy Norizañey ro misikiñe i Norizañey. ²⁸ Tsy eo ndra Jiosy ndra Grika, tsy eo ndra ondevo ndra midada, tsy eo ndra lahilahy ndra ampela; amy te hene raike am' IESOÀ Norizañey. ²⁹ Aa ie amy Norizañey, le tarira' i Abraàme, mpandova ty amy nampitamàñey.

4

¹ Hoe ty hatovoko: Tsy mifañòva ami'ty ondevo ty mpandova mbe ajaja, ndra t'ie ty temp'o' ze he'e; ² amy t'ie fehè' o mpañabeio naho o mpañokey ampara' ty andro tinendren-drae'e. ³ Itikañe ka, naho mbe ni-ajaja ro nondevoze' o fañè' ty voatse toio. ⁴ Fa naho nitsatoke ty fañenefañe i saay, le nahitrin' Añahare t'i Ana'e, sinama' ty Rakemba, toly ambane' Hake, ⁵ hijebañe o ambane' Hake aoo, hameloñe an-tika ho anake. ⁶ Aa kanao anake, le fa nahitrin' Añahare añ'arofo' areo ao t'i Arofo' i Ana'ey, mikoike: Aba, Rae. ⁷ Aa le tsy ondevo ka rehe, fa anake; aa kanao anake, le mpandova aman' Añahare, añamy Norizañey.

Endaha' i Paoly

⁸ Ie taolo, mbe tsy nahaftohiñe an'Andrianañahare, naho niondevo' o toe tsy ndrañahareo; ⁹ f'ie mahaftohiñe an' Andrianañahare henaneo—toe i Andrianañahare ty maharofoanañe anahareo—aa mañino te tolihe' areo indraike o fañè maleme naho votroo*? Te hiheren-ko ondevo' irezay indraike v'inahareo? ¹⁰ hañorik' andro naho volañe naho sa vaho taoñe? ¹¹ Imarimarihako he kafoake ty nifanehafako ama' areo.

¹² O ry longo, mihalaly ama' areo, misoloa ahy, manahake ty nisoloako anahareo—ie tsy nanao raty ahy. ¹³ Fohi' areo te an-kasilofan-tsandriñe ty nitaroñako i talili-soay tam-baloha'e. ¹⁴ Le tsy nisirikaeñe naho tsy nampangorì' areo, i nañembetse ahy amy hasilofan-tsandrikoy, fe nampihovae' areo hoe t'ie ni-anjelin' Añahare, toe nanahake IESOÀ Norizañey. ¹⁵ Aia i fañanintsiñe tama' areoy? Mahavolan-draho naho nimete, te ho napoliti' areo o fihaino' areoo vaho natolots' ahiko. ¹⁶ Aa vaho rafelahi' areo hao raho kanao ivolañako ty hatò?

¹⁷ Malisa mipay anahareo iereo, tsy te hañasoa, fa ty hampiria an-tikañe, hipiteha' areo ama'e. ¹⁸ Soa avao te paiañe t'ie hahimbañe nainai'e ho ami'ty hasoa, fa tsy t'ie miatreke avao. ¹⁹ Ry anake, hoe mitsongo te hiterake indraike raho ampara' te miforoñe ama' areo ao i Norizañey. ²⁰ Sinda te ho ama' areo raho henaneo hiovà' ty feoko fa mahasekatse ahy.

I Hagara naho i Saraha

²¹ Mitalilia, ie te ho fehè' i Hake, ke tsy janji' areo t'i Hake? ²² Toe pinatetse te nanañ' anake roe t'i Abraàme, teo ty a i ondevo ampelai, teo ty a i rakemba hahay. ²³ Naterake amo haondatio i anak' ondevoy, fe amy nampitamañey i anan-drakemba hahay; ²⁴ fandrazañañe ami'ty fañina roe iereo: ty raike hirike am-bohi-Sinay miterake fañondevozañe, i Hagara zay. ²⁵ Vohi-Sinay e Arabia añey t'i Hagara, ie manoiñe ho Jerosaleme henaneo, amy t'ie mitoroñe hoe ondevo miharo amo ana'eo. ²⁶ Fe haha t'Ierosaleme ambone ao, ie ty renen-tikañe. ²⁷ Hoe ty pinatetse: Mirebeha ry betsiterake tsy mahatoly!

* ^{4:9} Gal 4:3, Kol 2:8,20

Mipoñafa an-koiake, ry tsy mitsongoo!
 Fa maro ty ana' i bangiy,
 te amy amam-baliy.[†]

²⁸ Le manahak' Isaka, ana' i fampitamañey, tika ry longo. ²⁹ F'ie henane zay, nampisoañe' i naterake amy nofotsey i amy Arofoy, le ie ka henaneo. ³⁰ Aa vaho ino ty pinatetse amy Sokitse Masiñey ao?
 Aitò i ondevo ampelay naho i ana'ey,
 fa tsy hitrao-dova amy ana' i rakembaiy ty ana' i ondevoy.[‡]
³¹ Ie amy zao ry longo, tsy ana' i ondevo ampelay tika, fa amy hahay.

5

Fierañerañañe amy Norizañey

¹ Fidadàñe ty nañahà' i Norizañey antika, aa le mijadoña, soa tsy ho fandrihe' i jokam-pañondevozañey ka.

² Intoy, zaho Paoly o mivolañe ama' areoo, t'ie miafa-boy, le tsy hahasoa anahareo i Norizañey. ³ Atalilikò indraike ze hene lahilahy mamotsoboïñe, t'ie mpisongo, ro voalily hañambeñe ze he'e amy Hake ao. ⁴ Fa nifampiria amy Norizañey nahareo, mipay havantañañe amo fañèo, vaho fa nitraboke amy hasoay. ⁵ F'ie amy Arofoy ro mandiñe am-patokisañe te ho heneke i havantañañe tamàñey. ⁶ Ie am'IESOÀ Norizañey ao, le songa tsy vente'e ty fisavarañañe naho ty tsi-fisavarañañe, fa ty fatokisañe mifanehake am-pikokoñañe.

⁷ Nisoa ty filaisa' areo, fa ia ty nanebañe anahareo tsy hañambeñe ty hatò? ⁸ Tsy boak' amy mpikanjy anahareoy o manigìke anahareo zao. ⁹ Mahaatseke ty boko'e iaby ty lalivay kede. ¹⁰ Iantofako amy TALÈ, t'ie tsy hivetsevetse raha ila'e; fa i mampitsiborehetoke anahareoy ty hivave i fizakàñe azey, ndra te ia. ¹¹ Zaho ka ry longo, naho mbe mitaroña fisavarañañe, inoñe ty ampisoañañe ahy? amy t'ie ho nampikòake ty sirika' i hatae ajaley. ¹² Ee te ho vosireñe ka o mañembetse anahareoo.

¹³ Toe kinanjy ho haha nahareo ry longo, aa le ko afotetse ho filomolorañañe amo nofotseo ty fidadà' areo, fe mifañasoà an-koko. ¹⁴ Toe mahaeneña i Hake ty tsara raike manao ty hoe:

Kokò ondatio manahake ty vata'o.*

¹⁵ Fa naho mifandrimítse naho mifamotseke, mitaoa, hera hifampigodraña!

Haveloñe amy Arofoy

¹⁶ Aa hoe raho: Mihavelo amy Arofoy, le tsy ho haoñe' areo ty hadrao' i nofotsey. ¹⁷ Mpandietse i Arofoy i nofotsey, naho i nofotsey i trokey; mifandietse iereo soa tsy hanoe' areo ze satri'areo, ¹⁸ f'ie iaolòa' i Arofoy, le tsy ambane' i Hake.

¹⁹ Malange ty sata' o nofotseo: ty hakarapiloñañe, haleorañañe, hameñarañañe, ²⁰ fiatoñañe am-pahasive, famorehañañe, fifalaiñañe, filiedrokoñañe, fitsikirihañañe, filoa-tiñake, fifandierañañe, fifampiambahañañe, fifampiriñañe, ²¹ fihàñañe, hamamoñañe, fihisàn-draty vaho o manahake irezaio; inao indraike i hatahata hinatahatako anahareoy, te tsy handova i Fifehean' Añaharey o manao irezaio.[†]

* ^{4:27} Ies 54:1 ‡ ^{4:30} Fot 21:10 * ^{5:14} Sor 19:18 † ^{5:21} Ko I 6:10

²² Le ty vola' i Arofoy: fikokoañe, firebehañe, fañanintsiñe, fahaliñisañe, havantañañe, fatarihañe, figahiñañe, ²³ trentram-po, filierambatañe. Tsy amy Hake ty mandrara irezay. ²⁴ Fa naradorado' o mpiamy IESOÀ Norizañeio i haondaty hambo'ey rekets' o fañiria'e naho hadrao'eo. ²⁵ Kanao veloñe amy Arofoy tikañe, antao hañavelo amy Arofoy ka. ²⁶ Asoao tsy hirengevole, hifanikisiky naho hifampitsikirike.

6

Soao Ondaty iabio

¹ O ry longo, ie tsikapien-kakeo t'indaty, le ihe aman' arofo ro mañareñe aze ami'ty hatsò-po, mitaoa tsy mone ho zizieñe ka. ² Mifampivavea kilankañe, hañenefañe i Ha' i Norizañeiy.

³ Naho eo ty mieva-vatañe ho inoñe, ie tsy vente'e, le mamañahy vatañe. ⁴ Ee te songa hamente o fitoloña'eo, hanaña'e ty ho reng'e an-troke fe tsy ami'ty ila'e, ⁵ fa sindre hinday ty kilanka'e.

⁶ Handiva' i mioke amy tsaray amy mpañokey ze hene hasoa.

⁷ Asoao tsy ho fañahieñe, tsy verevereñe t'i Andrianañahare, fa ho tatahe' ondatio i nitongise'ey. ⁸ I mitongy amy haondati'ey, ro hanatake hamomohañe amy haondati'ey; fa i mitongy amy Arofoy, le i Arofoy ty hanataha'e haveloñe nainai'e. ⁹ Asoao tika tsy hilesa ami'ty fanoan-tsoa, fa hamokatse an-tsa mañeva naho tsy mamoe aiñe. ¹⁰ Aa kanao mbe mete, antao hañasoa ze hene ondaty, àntsake o an-kasavereñam-patokisañeo.

Tsy Votso-boy fa Voatse Vao

¹¹ Hehe ty fibakabaka' o sokin-tañako ho ama' areoo.

¹² O te hisenge hasoa-vintañe amy nofotseio ro manjitse anahareo hañofoke, iholiara' iareo ty fampisoañañe ty amy hatae-ajale' i Norizañeiy.

¹³ Toe tsy ambena' o sinavatseo t'i Hake, fa mipay anahareo hiofoke, hievoñevoña' iareo amo nofo' areoo. ¹⁴ Sondo'e te hirengeako naho tsy amy hatae ajale' i Talèntika IESOÀ Norizañeiy, i nampipehañe ty voatse toy amako, naho zaho ami'ty voatse toiy. ¹⁵ Songa tsy manjofake ndra o fisavarañeo ndra o tsi-fisavarañeo; fa ty fiovàn-ko vao*.

¹⁶ Fañanintsiñe naho fiferenaiñañe amo mañorike i fañè zaio, vaho am' Israelen' Añaharey.

¹⁷ Ie henane zao, ee te tsy ho tsiborehetohe' ondaty, zaho minday ambatako etoa o tombok' alama' IESOÀ. ¹⁸ Ry longo, ho amo arofo' areoo abey ty hasoa' i Talèntika IESOÀ Norizañey. Amena.

* ^{6:15} Kor I 7:19, Rom 2:26-29, Kor II 5:17

Efesosy

¹ I Paoly, Firàhe' IESOÀ Norizañey ty amy satrin' Añahare. Ho amo noro'e Efesosy aña naho migahiñe am' IESOÀ Norizañeio.

² Hasoa ama' areo naho Fañanintsiñe boak' aman' Añahare Raentika naho IESOÀ TALÈ Norizañey.

Jinobon-dRae

³ Andriañeñe t'i Andrianañahare naho Rae' i Talèntika IESOÀ Norizañey, i mitahy antika amy Norizañey amy ze hene falalàn' arofo andindìñe ao, ⁴ ie nijoboñe'e ho ama'e taolo' o mananta' ty voatse toio, am-pikokoñañe ho masiñe tsy aman-kakeo añatrefa'e*, ⁵ ie nisafiry haehae ho antika te ho beize'e ho ana'e añam' IESOÀ Norizañey, ty amy hasoam-pisafiria'ey. ⁶ Ho fandrengeañe ty volonahem-patarihañe nañisoha'e antika amy Ikokoañey.

Jineba' i Anakey

⁷ Ama'e ty fañeferañe antika amy lio'ey, ty fañahan-kakeo ty amy hasoam-pañisoha'e ⁸ nampitoabore'e aman-tika an-kaliforan-kihitse naho faharofoanañañe, ⁹ ie nampahafohine'e i safiry nisatrie'e aña'etake ao, ¹⁰ ze ho henefe'e an-tsà añañoñe: ty fanontonañe amy Norizañey ze he'e andindìñe aña naho an-tane atoy. ¹¹ Ie ka ty nahazoan-tika lova—itika nijoboñeñe haehae ami'ty fandrefea' i mañeneke ze he'e ami'ty ereñeren-tsattrin' arofo'ey, ¹² soa te ho fandrengeañe i asi'ey tika nitamà i Norizañey valoha'e.

Pinate'i Arofoy

¹³ Ama'e ao ka nahareo ie jinanji' areo ty tsaran-katò, i talili-soa nandrombahañañe anahareoy, ie niatoa' areo ro vinoli-fitomboke amy Arofoy Masiñe nampitamaeñey; ¹⁴ i natolotse ho tsoa' i lovantikañeiy ampara' ty fijebañañe o azeo, ho ami'ty fandrengeañe mañeva i asi'ey.

Fañandriañañe naho Halaly

¹⁵ Aa zaho ka, ie tsinanoko ty fatokisañe IESOÀ TALÈ ama' areo, naho ty fikokoa' areo o noro'e iabio, ¹⁶ le tsy adoko ty fañandriañañe ty ama' areo, ie toñonako an-kalàliko ¹⁷ te ho toloran' Añaharen-Talèntika IESOÀ Norizañey, i Raem-bolonahetsey, ty Arofon-kihihitse naho famentaben-tarañañe hahafohinañañe aze, ¹⁸ naho te ho hazavaeñe o fihainon' arofo' areoo†, hahafohina' areo i fampitamàñe nikanjiañañe anahareoy, naho ty vara aman' enge' i lova'e amo noro'eyo, ¹⁹ vaho ty hajabahinan-kaozara'e amantika mpiato, ty amy fitoloña' i hafatraran-kaozara'e ²⁰ nifanehafa'e amy Norizañey, ie vinaño'e an-kavilasy vaho nampiambesare'e am-pitànkavanaugh'e andindìñe ao, ²¹ ambone andikera' ze hene lily naho haozarañañe naho fifeheañañe vaho ze kila tahinañañe toñoneñe, tsy ami'ty sa toy avao, fa amy ho aviy ka. ²² Mbore napo'e ambanem-pandia'e ao ze he'e‡, vaho natolo'e aze ty ho lohà' ze halifora'e amo Fivorio — ²³ i fañòva'ey, ty hahenefa' i mañatseke ze he'e an-kalifora'ey.

2

Sata Hambo'e: Mate aman' Añahare

* ^{1:4} Te I 2:13 † ^{1:18} Lke 24:45 ‡ ^{1:22} Sab 8:6

¹ Fa nivilasy amo tahiñe naho hakeo' areoo nahareo*, ² ie nañavelo antsata' ty voatse toy te taolo, nañorike ty ana-dovàn-kaozara' i tiokey, i fañahy mifanehake an-tro' o anam-panjeharañeo†. ³ Toe hene nimpiam' iereo ka tika taolo amo hadraom-batan-tikañeo, ie nañeneke o nipaia' o nofotseoo naho o fivetsevetseo vaho ni-anan-kabosehañe amo satan-tikañeo, manahake o ila'eo.

Sata Vao: Veloñe aman' Añahare

⁴ Fe i Andrianañahare, mpañaleale am-piferenaiñañe, ty amy fikokoa'e jabajaba nikokoa'e antikañey, ⁵ itika nikoromake an-kakeo ro nampitroara'e ho veloñe mindre amy Norizañey (i hasoa'ey ro mandrom-bake anahareo), ⁶ le naharo'e fionjoñe ama'e tika, naho nampindreze'e fiambesatse andindinë aña am' IESOÀ Norizañey, ⁷ hampalangesa'e amo sa aña eo ty hajabahinan-kasaron-kasoa'e ami'ty fatariha'e aman-tika am' IESOÀ Norizañey. ⁸ I hasoa'ey ty mandrombake anahareo am-patokisañe, toe tsy inahareo, fa ty falalàñ' Añahare, ⁹ le tsy o fitoloñañeo, tsy mone ao ty hiebotsebotse. ¹⁰ Satam-pità'e tikañe: naoreñe am' IESOÀ Norizañey hitoloñe o raha soa hinalankan' Añahare aolo hañaveloan-tikañe ama'eo.

Raike amy Norizañey

¹¹ Aa le tiahio t'ie nimpiamo kilakila ondaty a nofotseo te taolo‡, ie atao' o sinavatseo ty hoe: tsy sinavatse (o fanoeñe an-tsandriñe am-pitáñeo), ¹² mbore tsy tamy Norizañey nahareo henane zay, ni-renetane amy valobohò' o nte-Israeléoy naho ambahiny amo fañinam-pampitamañeo, tsy nanan-ko tamaeñe, vaho tsy aman' Añahare ami'ty voatse toy. ¹³ F'ie henaneo ro am' IESOÀ Norizañey ao, ie ni-tsietoitane aña ro nampañarinea' ty lio' i Norizañey.

¹⁴ Ie ty fifampilongoan-tika, ie nanoen-ko raike i roey, naho rinotsa'e i kijoly nanebañey, ¹⁵ ie finongo'e am-pañòva'e ao i fifampirafelahañey§— toe ty Ha' o fañè'e nalahatse ho fepètseo—hamitraña'e ama'e ty ondaty vao boak' amy roe rey, hampanintsíña'e, ¹⁶ songa ho jebañe'e am-pañova raike aman' Añahare, ie nandrotsake i fifampirafelahañey ami'ty vata'e an-katae ajale eo. ¹⁷ Nimb' atoa re nitaroñe fifampilongoañe amo tsietoitane aña eo naho fañanintsíñe amo marineo*, ¹⁸ ie ro anañan-tika roe lalañe mb'aman-dRae amy Arofo raikey.

¹⁹ Aa le tsy ambahiny, tsy aliheñe ka nahareo, fa borizañe mindre amo noro'eo, naho hasavereñan' Añaharey†, ²⁰ mioreñe ami'ty mananta' o Firàheñe naho mpitokio: IESOÀ Norizañe talèm-bato-kotsókey, ²¹ ama'e ty andrafetañe i anjombay iaby hitomboa'e ho anjomba Masiñe amy TALÈ ao. ²² Ama'e ao ka ty andranjiañe anahareo ho fitobean' Añahare aña my Arofoy.

3

O Raha Mietake amo Fivorio

¹ Zay ty maha miprohi' IESOÀ Norizañey ahy, Paoly, ty ama' areo kilakila ondatio; ² naho toe jinanji' areo i famandroñam-palalàñ' Añahare natolots' ahy ho anahareoy, ³ ie nentoeñe le nampahafohineñe i raha mietakey (i sinokiko bòry teoy, ⁴ ie vakie' areo, ro mete maharendreke ty nioniko amy mietake amy Norizañey), ⁵ ze tsy nampaharendreheñe o ana' ondatio amo sa ila'eo, manahake ty androrota' i Arofoy aze henaneo amo

* 2:1 Efe 2:5, Mat 8:22, Rom 8:6, Kol 2:13, Ti I 5:6, Jn I 3:14, Ben 3:1 † 2:2 Efe 5:6, Kol 3:6 ‡ 2:11 Ko I 12:2 § 2:15 Kol 2:14, 2:20, Top 11:1-3 * 2:17 Ies 57:19 † 2:19 Rom 11:17-24, Ies 54:1

Firàhe'e naho mpitoki'e miavakeo, ⁶ t'ie mpitraq-dova naho mpirimboñe amy fañòvay naho mpiharo* amy fampitamà'e amy IESOÀ Norizañeyi añaamy talili-soay o kilakila ondatio. ⁷ i nanoañe ahy mpitoro'ey amy falalàn-kasoan' Añahare natolotse ahy ami'ty fitoloñan-kaozara'ey, ⁸ eka, zaho, tsitso'e amo noro'e iabio, ty nitolorañe ty hitaroñe amo kilakila ondatio ty vara' i Norizañey tsi-añ'ohatsey, ⁹ hampalangesañe ty fitraofankina mietake, fa nikafitse haehae aman' Añahare Andrianamboatse ze he'e añaamy IESOA Norizañey†; ¹⁰ le o Fivorio ro haharofoana' o fifeheañe naho haozarañe andindìñe henaneo, ty haliforan-kihin' Añahare, ¹¹ i nisafiria'e haehae naho nihenefa'e amy Talèntika IESOÀ Norizañeyi, ¹² ie naho i figahiña'ey ro hahavanian-tika hañarìnne aze am-patokisañe. ¹³ Aa le ihalaliako te tsy ho monjetse amo faloviloviako ho anahareoo, ie toe ho ami'ty enge'areo.

Halaly ho a o nte-Efesosio

¹⁴ Zay ty itongalefako aman-dRae, ¹⁵ boak' ama'e ty fitokavañe ze hene hasavereñañe andindiñe aña naho an-tane atoy tahinañe, ¹⁶ hanolora'e anahareo amo varam-bolonahe'eo ty hafatraran-troke naho haozarañe amy Arofo'ey, ¹⁷ le fatokisañet‡ ty hahafimoneña'i Norizañey añ'arofo'areo ao; ie mivahatse naho mioreñe am-pikokoñañe, ¹⁸ hampaharendreha' areo naho o noro'e iabio, ty ampohe'e naho ty halava'e naho ty halale'e vaho ty haabo'e, ¹⁹ hahafohina' areo i fikokoa' i Norizañey tsy takam-paharendrehañey soa t'ie ho pèa' ty haporean' Añahare.

²⁰ Aa. ho amy mahafonitse loho maro te amo ihalaliañe naho itsakorean-tikañeoy, ie mitoloñe aman-tika i haozara'ey, ²¹ ama'e ty engeñe amy Fivoriy naho am' IESOÀ Norizañey ao pak' an-tariratse tsitso'e, nainai'e donia! Amena.

4

Fitraofañ' Ina amy Fañòva'ey

¹ Aa le ihalaliako, zaho mapirohi' i TALÈ, t'ie hañavelo mañeva i koike nikanjiañe anahareoy, ² nainai'e mireke an-trentram-po naho mifampi-heve am-pikokoñañe, ³ ie ilozoha' areo tambozotse ty fitraofan-kina' i Arofoy, mifampipiteke am-pilongoñañe. ⁴ Raike i fañòvay, naho raike i Arofoy—manahake t'ie kinoike ho amam-pitamàñe raike te nikanjieñe: ⁵ TALÈ raike, fatokisañe raike, filiporañe raike, ⁶ naho Andrianañahare raike, Rae' iabikey, lohà' ze he'e*, kila añaama'e, vaho hene ama'e. ⁷ F'ie songa nitoloreñ' arofo ami'ty nanokantsokaña' i Norizañey falalàñe. ⁸ Zay ty nipatera'e ty hoe:

Ie nionjoñe mb'añ'abo aña,
kinozozò'e an-drohy i fandrohizañey
vaho tinolo'e falalàñe ondatio.†

⁹ Aa kanao nionjon-dre, ino i tsaraeñey naho tsy t'ie nizotso hey mb' an-tsikeokeo' ty tane toy ao? ¹⁰ I nizotsoy, le i nionjoñe andindi' ze hene likerañe, hañenefa'e ze he'ey. ¹¹ Natolo'e ho Firàheñe ty ila'e naho mpitoky ty ila'e naho venje ty ila'e vaho mpiarake naho mpañoke ty ila'e, ¹² hañoke o noro'eo hitoloñe am-pitoroñañe, handranjy ty fañòva' i Norizañey ¹³ ampara' t'ie hene maha-pitraq-kina am-patokisañe, haharendreke i Anan' Añaharey, hitombo ho añañ'ay, amy havañonañe

* **3:6** Rom 11:17-24, Ies 14:1 † **3:9** Jao 1:3 ‡ **3:17** Gal 2:20 * **4:6** Mar 12:32,34, Ko I 8:6, Ti I 2:5, Mar 12:29-34 † **4:8** Sab 68:18

nihenefa' i Norizañey; ¹⁴ ie amy zao tsy ho anak' ajaja ka, havoamboa' ty onja, naho hasiotsio' ze fonga tiom-pañohañe, ami'ty famañahia' ondaty kante an-kalitake naho kilily[‡], ¹⁵ fe am-pitaroñañe ty hatò am-pikokoañe, ty hitomboan-tika ami'ty halifora'e amy Loha'ey ao, toe i Norizañey. ¹⁶ Ie ty andrafetañe i fañòvay iaby hifampikatoke, naho hifandreketa' ze hene fange'e amy fifanozaña'ey, songa mañeneke i fitoroña'ey, hampitomboa'e naho hampiraoraoa'e am-pikokoañe i fañòvay.

Apho i Hambo'ey

¹⁷ Aa le hoe raho, eka afanto'ay naho i TALÈ, ama'areo te tsy hañavelo ami'ty fañaveloa' o kilakila ondatio ka§, ami'ty hakoaham-pivetsevetse' iareoo, ¹⁸ fa maieñe ty fahafohina' iareo, tsy mpiami' ty havelon' Añahare ty amy habahimoñañe an-tro' iereo ao, ami'ty hagañ' arofo' iareo; ¹⁹ ie fa dridra an-troke, nijoroboñe an-kadrao-lo, hitoloñe ze fonga hameñarañe vaho fatiti-mena. ²⁰ Tsy zay ty nioha' areo amy Norizañey, ²¹ ie toe jinanji' areo naho nandrèndreke ama'e, ty amy hatò am' IESOÀ ao, ²² le o satan-kavelo' areo taoloo, korendaho i haondaty hambo'e mihamomoke ty amo drao'e mamañahio, ²³ le mivaoa am-pitsakorean-troke ao, ²⁴ vaho atsetaho indaty nivaoeñey*, tsinene hambam-bintañe aman' Añahare an-kavantañañe naho an-katò miavake.

²⁵ Aa le apitsoho ty fandañirañe, songa mifanaontsia an-kahiti'e[†], fa mpifampipiteke tika. ²⁶ Miboseha fe ko mandilatse[‡], asoao tsy ho tra ty motak' andro ty haviñera' areo§, ²⁷ tsy mone hañomey lalañe i mpañinjey.

²⁸ Asoao tsy hampikametse ka i mpikizoy, fe hitromake am-pità'e amy ze mahasoa, hanaña'e ty hazòtso ami'ty mipay.

Ko Mampioje' i Arofo Masiñey

²⁹ Ehe te tsy hakarem-palie' areo ze entañe tsy vente'e fa ze hampiraorao o ila'eo ami'ty fañeva'e, hañasoa o mpijanjiñeo. ³⁰ Ko ampanaheloe' areo i Arofo Masin' Añaharey, i namoli-fitomboke anahareo ho amy andro fijebañañeiy. ³¹ Apitsoho ama' areo ty afero, ty fombo, ty haviñerañe, ty fiorentseñañe naho ty fanambaitambaiñañe vaho ty halo-tserehañe, ³² fe mifampiferenaiña naho mifampilendëña an-troke vaho mifampihevea manahake ty nañahan' Añahare anahareo amy Norizañey.

5

¹ Aa le mitsikombea an' Andrianañahare hoe anakisoke; ² naho mañaveloa am-pikokoañe, hambañe amy fikokoa' IESOÀ antikañey, ie namoea'e aiñe ho enga naho soroñe mandrifondrifoñe aman' Añahare.

³ Le asoao tsy ho toñoneñe ama' areo ze atao fiolorañe tsy mañeva; naho ze haleorañe ndra fihañañe, amy t'ie tsy mañeva o noro'eo; ⁴ apho ka ze timbo, naho hakanifo ke naho sole maràñe, fa fonga tsy mete; vaho mañandriàña. ⁵ Mahafohina an-katò te tsy aman-anjara amy fifehea' i Norizañey naho aman' Añahare ty mpiolotse ami'ty tsy evà'e naho ty mpanao haloloñañe, vaho ty mihàñe (ie fiatoñañe am-bar).

⁶ Ko mete fañahieñe an-tsaontsy kòake*; ie mikaike ty haviñeran' Añahare amo anam-panjeharañe. ⁷ Le ko ireketañe.

⁸ Ni-hamoromoroñañe[†] nahareo te taolo, fe hazavàñe amy TALÈ ao henaneo. Mañaveloa hoe anan-kazavàñe, ⁹ (Ty voka' o Hazavàñe[‡] le ze

* 4:14 Efe 5:6; Ko II 10:5, 11:3-14, Gal 1:6-9, Ti II 3:1-8, 4:2-4, Pe II 2:2-22, Jod 1:10-19 § 4:17 Ko I 12:2, Iir 10:2 * 4:24 Rom 8:1 † 4:25 Zek 8:16 ‡ 4:26 Sab 4:4 § 4:26 Its 24:15 * 5:6 Efe 4:14 † 5:8 Efe 2:2, 4:18, Kol 3:7 ‡ 5:9 Fil 1:11

hene hasoa naho havantañañe vaho hatò), ¹⁰ mamente ze mahafale' i TALÈ. ¹¹ Ko mitrao-baoñe amo satan-kaieñe tsy vokatseo, fa aboaho§ ambatraike, ¹² toe manalatse, tsy talilieñe o anoe' iereo añ'etakeo.

Mañaveloa mañeva Anan-Kazavañe

¹³ Malange ze he'e aborake an-kazavàñe eo, naho toe mazava ze nampidodeañe; ¹⁴ zay ty nampisaontsie'e ty hoe:
Mivañona ry mirotseo*,
mitroara an-kavilasy,
hitsavavàha' i Norizañey.

¹⁵ Itaò arè ty fañaveloa' areo tsy hanahake o tsy aman-kilalao, fe tsikombeo o mahihitseo, ¹⁶ rombahao o nifotoañañe, fa raty o androo. ¹⁷ Aa le ko misare gege, fa arendreho ze satri' i TALÈ.

Milifora amy Arofoy

¹⁸ Ko manao jike an-divay ie minday haloloañe; fa mihalifora amy Arofoy, ¹⁹ mifampisaontsia an-jejo naho sabo, naho an-takasy miavake, bekò naho titihò aña'arofo ao t'i TALÈ, ²⁰ kila raha ro andriañañe nainai'e aman' Añahare Rae, amy tahina' i Talèntika IESOÀ Norizañey, ²¹ vaho mifampiambanea am-pañeveñañe† i Norizañey.

Rakemba: Miandalia ami'ty Vali'o

²² O roakembao, miandalia amo vali' areoo, hoe amy TALÈ. ²³ Toe lohà' i vali'ey ty lahilahy, hambañe ami'ty maha lohà' i Fivoriy i Norizañey mpandrombak' i Fañòvaiy. ²⁴ Aa le hambañe ami'ty fiambanea' o Fivorio amy Norizañey, ty rakemba amy vali'ey amy ze he'e.

Lahilahy: Ikoko ty Vali'o

²⁵ O ry lahilahio, kokò ty vali' areo, hambañe ami'ty nikokoa' i Norizañey i Fivoriy naho namoea'e aiñe, ²⁶ ie navahe'e naho nikotriñe'e amy fampandroañe rano aña'my tsaray‡, ²⁷ hampiatrefa'e ho Fivory lifots' engeñe, tsy amam-pepo ndra komake ndra lol'i'e hoe izay, f'ie hiavake tsy aman-kila. ²⁸ Ehe mikokoa valy manahake ty vata'o ry lahilahio; mikoko vatañe ty mikoko valy. ²⁹ Toe tsy eo ty malaim-batañe, fa fahana'e naho beize'e hambañe amy Norizañey o Fivorio, ³⁰ amy t'ie mpitraok' am-pañova'e ao:

³¹ Zay ty isitaha' ondaty aman-drae'e naho rene hipiteke ami'ty vali'e, vaho ho fañova raike i roroey.§

³² Tafatoño jabajaba zay, fa i Norizañey naho i Fivoriy ro ivolañako.

³³ F'ie, sindre mikokoa tañanjomba manahake ty vata'e, vaho miasia valy ry rakembao.

6

Ry Anake: Ko Manjehan-dRoae

¹ Ry ajajao, mivohora aman-droae' areo amy TALÈ ao, fa zay ty hiti'e.

² Miasia an-drae'o naho rene'o—ty lily valoha'e minday fampitamañe,

³ soa te ho tahie'e naho ho lava haveloñ' amy Taney ao.* ⁴ O ry rae, ko bosehañe ty anake, fe beizo amy fañohoñañe naho famerea' i TALÈ.

Mpitoroñe

§ 5:11 Jao 16:8 * 5:14 Ies 26:19 † 5:21 Avo 20:20 ‡ 5:26 Ben 19:8-9 § 5:31 Fot 2:24

* 6:3 Avo 20:12, Its 5:16

⁵ O ry ondevoo, mivohora ami'ty mpifehe' areo amy haondati'ey, le ihembaño naho itititihi an-tsò-po, manahake t'ie i Norizañey; ⁶ le ko mitoroñe am-pihainom-bei-lomboke, fe hoe ondevo' i Norizañey, mitoloñe ań' arofo ze satrin' Añahare[†], ⁷ mitoroña am-pilozohañe hoe amy TALÈ fa tsy am'ondaty, ⁸ ie fohiñe te ndra iaia manao soa, ro ho valè' i TALÈ, ke t'ie ondevo, he midada. ⁹ Ry talèo! ano manahak' izay iereo; apoho ty fañembàñañe. Tiahio te andindîne ao t'i TALÈ' iareo naho ty azo, ie tsy mirihy.

Aombeo o Fikalañeо

¹⁰ Hengaha'e, mihaozara amy TALÈ naho ami'ty hafatrara' i haozara'ey. ¹¹ Aombeo ty fikalañan' Añahare fonitse, hatreatrè'areo ty famañahia' i mpañinjey; ¹² amy te tsy mifandrapake ami'ty nofotse naho lio tika, fa amo mpifelekeo, amo aman-dilio, amo mpifeleke an-kamoromoroña' ty voatse toio, vaho amo fañahin-karatiañe ań'aboo. ¹³ Aa le rambeso ze hene fikalan' Añahare, hahafijohaña'o amy andro ratiy, le ie fonga nanoeñe, mijadoña. ¹⁴ Mijohaña arè, ie fa nisadia ty hatò[‡], naho niombe ty fikalañan' arañan-kahitiañe[§], ¹⁵ vaho nihana ty fihentseñañe i talili-soam-pañanintsiñey*, ¹⁶ tovo'e, rambeso ty fikalandefom-patokisañey[†], hampikipefañe o ana-pale mibela' i Ratio, ¹⁷ endeso ka ty sabakam-pandrombahañe[‡] naho ty fibara' i Arofoy, toe i saontsin' Añaharey[§], ¹⁸ vaho nainai'e mihalalia ań'arofo, an-doloke naho halaly iaby. Mijilova am-pigahiñañe naho am-pihalaliañe heneke ho a o fonga noro'eo. ¹⁹ Mihalalia ho ahy ka, t'ie ho tolorañe ty hahafitaroñe am-palie misokake, hahavany hampandrendreke ty tafatoño' i talili-soay, ²⁰ ie sorotà'e androhy; ihalalio teahasibeke fitaroñe ami'ty fañeva'e.

Figodañañe

²¹ Aa, ty haharendreha'areo o fitoloñakoo naho ty amako, le i Tikiko, rahalahy sarotse naho mpitoroñe migahi' i Talèy ro hampahafohiñe anahareo ze he'e. ²² Zay ty nañitrifako aze mb'ama' areo ańe, hitalilia'e anay naho hañoho o arofo' areoo.

²³ Fañanintsiñe amo rolongoo, naho fikokoañe am-patokisañe boak' aman' Añahare Rae naho IESOÀ TALÈ Norizañey. ²⁴ Hasoa amy ze hene mpikoko i Talèntika IESOÀ Norizañey an-koko tsy modo. Amena.

[†] **6:6** Rom 6:16-23 [‡] **6:14** Ies 11:5 [§] **6:14** Ies 59:17 * **6:15** Ies 52:7 [†] **6:16** Sab 28:7
[‡] **6:17** Ies 59:17 [§] **6:17** Ies 11:4

Filipy

¹ I Paoly naho i Timoty, fetrek' oro'IESOÀ Norizañey, amo hene noro'e am'IESOÀ Norizañey e Filipo, naho o mpiaolo vaho mpitoroñeo.

² Hasoa ama' areo naho Fañanintsiñe boak' aman' Añahare Raentika nahoIESOÀ TALÈ Norizañey.

Fañandriañañe naho Filolofañe

³ Andriañañe t'i Andrianañahareko amy ze hene fitiahako anahareo,
⁴ nainai'e ihalaliako an-kaehake amo filolofako ho anahareo iabio, ⁵ amy fitraofan-tika amy talili-soay boak' amy andro valoha'ey pake henaneo,
⁶ le atokisako te i namototse ty fitoloñan-tsoa ama' areoy ro hañeneke* aze ampara' ty andro'IESOÀ Norizañey. ⁷ Toe mañeva ahy te inahareo ro iereñereñako an-stroke, ie itraofan-tika o fañasoañ' ahio ke te an-tsivilisily he am-pañarovako naho famenteako i talili-soay. ⁸ Valolombeloko t'i Andrianañahare te hene itamàko ami'ty halèn' arofo'IESOÀ Norizañey; ⁹ le inao ty halaliko, te hitolom-piraorao an-kahilala naho fitsikarahañe ty fikokoa' areo, ¹⁰ hahafijoboña'areo ty hasoa, hikotritriake tsy aman-tiñe ampara' ty andro' i Norizañey ¹¹ hiegoègo am-pamokaran-kavantañañe† añaam'IESOÀ Norizañey, ho ami'ty engeñe naho fibangoañe an'Andrianañahare.

Mampiraorao i Talili-soay ty Sotry

¹² Aa, teako ho fohi' areo ry longo, o raha nizò ahiko fe nañonjoñe ty fiboelea' i talili-soao, ¹³ ie nanitsike i anjombam-pifeheañey naho o ila'e iabio ty fahafohinañe te i Norizañey ro maha an-drohy ahy, ¹⁴ le nosihe' o silisilikoo ty maro amo rolongo mpiato amy Talèo nampitombo ty fahasibeha' iareo hitaroñe o tsaran' Añahareo tsy an-kahembañañe.

¹⁵ Toe eo avao ty mitsey i Norizañey an-kirañe naho lietse; fe eo ka ty an-tsatry soa; ¹⁶ iretoa an-koko, ie fohi'e te tinendre ho atoan-draho hañarovako i talili-soay, ¹⁷ ireroa ka mitaroñe an-kazavan-stroke, mbore mikinia hañembets' ahy amo silisily retoa. ¹⁸ Atao akore? Tsinoñe, fa amy ze hene sata, ke mieva he an-katò, kanao taroñeñe i Norizañey le hafaleako; eka! toe hirebehako, ¹⁹ amy te apotako t'ie hifotetse ho fañahàñe‡ ahy o fihalalia' areoo naho ty famahàna' i Arofo'IESOÀ Norizañey, ²⁰ ie ilozohako fitamàñe naho fidalalañe te tsy ho salatse ka, ie an-tsibeke fonitse, fa liko, le antsake henaneo, te honjoneko an-tsandriko i Norizañey ke zaho veloñe he vilasy. ²¹ Aa naho amako, haveloñe i Norizañey vaho tombo'e te hikenkañe. ²² Ie veloñe ro mbe hahavokatse te mitromake an-tsandriñe, aa le mañalik' ahy ty hijoboñe! ²³ Mampikititse ahiko: sinda te hiavotse mb'eo hindrezako amy Norizañey, zay ty soa hatò; ²⁴ fe mahasoa anahareo t'ie hitoboke an-tsandriñe atoa. ²⁵ Eka, iantofako, toe apotako t'ie hitoboke naho ho tambatse ama' areo iaby atoa, hampibodobodoeko i fatokisañey hifalea' areo, ²⁶ soa te hionjoñe ty fandrengea' areoIESOÀ Norizañey te itilihako indraike.

²⁷ Ie amy zao: mañaveloa mañeva ty talili-soa' i Norizañey, ke t'ie hitilike, ke tsy avy, le mbe hitsanoñako te mifahatse añ' arofo raike, mifanehake an-tokan-stroke am-patokisañey i talili-soay, ²⁸ tsy hembañé

* ^{1:6} Fot 17:1, Its 18:13, Mp I 8:61, Sab 119:80, Mat 5:48 † ^{1:11} Mat 3:8-10, Rom 6:22, 14:17, Ko II 9:10, Efe 5:9, Gal 5:22, Col 1:10, Heb 12:11, Jak 3:18 ‡ ^{1:19} Iob 13:16

ndra loli'e amo mandietseo, ie mamente am'iareo ty fandrotsahañe, naho ama'areo ty famotsorañe—satan' Añahare zay,²⁹ toe natolotse ama'areo ho fañasoñañe, ty amy Norizañey, te tsy vaho iatoañe fa isotriañe,³⁰ ie mihotakotake hambañe amy niisa' areo amakoy, naho janjiñe' areo amako.

Itsikombeo ty Hatren-tram-po' i Norizañey

2

¹ Aa naho eo ty fañosihañe amy Norizañey, ke eo ty fañohòañe an-koko, ke eo ty fitraofan-kina amy Arofoy, he eo ty halèm-po naho fiferenaiñañe,² le henefo' ty haehako am-piharoan-drehake naho am-pikokoañe raike vaho mifampipiteha arofo naho fivetsevetse.³ Ko manao inoñe am-patitiañe naho firengeañe kòake, fe mifampiasia an-trentram-po;⁴ Ko sindre mañambeñe o azeo avao, fe ampiraoraò ondatio.⁵ Itsakoreo antroke ao i tam' IESOÀ Norizañey, te

⁶ Ie nihambam-bintañ' aman' Añahare,
tsy naereñere'e te hitavane

ty fihambañañe aman' Añahare,

⁷ fe finao'e ty fañòvá'e,
le nandrambe ty vinta' ondaty,
vaho nampihambañañe ami'ty mpitoroñe.

⁸ Ie tendreke te hambam-bitañe ama' ondaty, le nirè-batañe,
nivohotse an-kavilasy—

eka navetrake amy hatae ajaley!

⁹ Toly ndra nonjonen' Añahare,
vaho tinolo'e ty tahinañe ambone' ze kila añarañe,

¹⁰ soa te hitongaleke amy IESOÀ
ze kila ongotse

an-dikerañe aña
naho an-tane atoy

vaho ambane' tane ao,

¹¹ vaho hiantoke
te IESOÀ Norizañe ro TALÈ ze hene fameleke
handrenge an'Andrianañahare Rae.*

¹² Ie amy zao, ry rañetseo, ie mivohotse nainai'e, tsy ami'ty fiatrefako avao, fa àntsake henane te tsy eo, le mifanehafa ami'ty fandrombahañe anahareo, am-pañeveñañe naho fineveneverañet;¹³ toe mitoloñe ama' areo t'i Andrianañahare hilozoha'areo toloñe amy ze satri'e soa.¹⁴ Hene ano, tsy miñeneoñeoñe tsy mandietse,

¹⁵ soa tsy hanan-kakeo, tsy hanan-tahiñe, fa ho anan' Añahare tsy amankandra añaivo' ty tariratse mengoke naho miola toy‡, mipelatse hoe failo ami'ty voatse toy,¹⁶ mivontititse amy tsaran-kaveloñey, hampirebeke ahy an-tsa' i Norizañey t'ie tsy nilay tsi-vente'e vaho tsy nilesa te nifanehake.

¹⁷ Eka, ndra t'ie ampidoañañe hoe ènga-rano ami'ty fisoroñañe naho fitoloñañe amo fatokisa' areoo, le mbe mifale naho mitrao-pirebeke ama' areo iaby.¹⁸ Aa le mifalea ka vaho miharoa firebeke amako.

ty Amy Timoty

¹⁹ Misalala am' IESOÀ TALÈ ao raho, te hampihitrifeñe mb'ama' areo mb'eo aniany t'i Timoty, hampanitsiñe ahy t'ie mitsanoñe ty ama'areo.

²⁰ Fa tsy amako ty mañirinkiriñe aze ami'ty fahimbaña'e miatrake

* ^{2:11} Ies 45:23 † ^{2:12} Sab 2:11 ‡ ^{2:15} Its 32:5

anahareo, ²¹ toe mipay ty aze avao i maroy, fa tsy ty a' IESOÀ Norizañey. ²² Fohi' areo ty namentea'e vatañe, ie hoe anake aman-drae'e te nitraoke amako amy fitoroñañe i talili-soaiy. ²³ Aa le salalaeko ty hañitrike aze aniany naho fa fantako ty amako. ²⁴ Le iantofako amy TALÈ te homb'eo aniany ka raho.

Ty Amy Epafroditō

²⁵ Toe sinafiriko ty hampihitrike i Epafroditō rahalahiko mb'ama' areo mb'eo, mpifanehake naho lahindefo mpiamako, ie toe ìra' areo naho mpiatrak' ahiko, ²⁶ ie nijagobo ty ama'areo, naho nalovilovy te jinanji' areo ty amy fatindri'ey. ²⁷ Toe niheta'e re ho nivetrake, fe niferenaiñan' Añahare, le tsy ie avao fa zaho, hera ho nanahelo an-kontoke. ²⁸ Aa le nihavoa raho te nampolieñe ama'areo, soa t'ie isa' areo indraike ro handia taroba, vaho hampanintsíñe ahy ka. ²⁹ Aa le rambeso amy TALÈ an-kaehake vaho onjono ondaty hoe zaio; ³⁰ amy te ho nametrake aze i fitoloña'e amy Norizañeyi, ie namoy-ay hañeneke i tsy nilefe' areo amy fiatrahaña'e ahikoy.

3

Tsy Iatoañe o Nofotseo

¹ Figadoña'e, ry longo: mirebeha amy TALÈ! Tsy mahatsimboetse ahiko te isokirako indraike, fa fañarovañañe anahareo. ² Itaò o amboao, itaò o mpanao ratio, itaò o mpanao savatse tsieo. ³ Fa itikañe o savatseo, t'ie mitoloñe amy Arofon' Añahare naho mirenge am' IESOÀ Norizañey, vaho tsy miato-nofotse— ⁴ ie ho nanam-piatoako amy nofotsey. He eo ty mihevetsé t'ie ro mpiato amy nofotsey, lombolombo'e raho: ⁵ sinavatse ami'ty andro faha-valo, foko' Israele, tarira' i Benjamin, Hebreo' o Hebreoo; Fariseo ty amy Hake; ⁶ nampisoñañe o Fivorio an-joton-troke; tsy aman-tahiñañe ami'ty fañorihañañe Hake. ⁷ Le ndra inoñ' inoñe ty ho nitombo'e ho ahiko, nadoko ho sira-an-tane ty amy Norizañey. ⁸ Tsy zay avao, fe ataoko ho fonga tsy vente'e te ampanahafeña ami'ty hajabahina' ty faharendrehaña i Talèko IESOÀ Norizañey, aa le hene nifariekó naho nanoeko forompotse, hahazoako i Norizañey ⁹ hahatendreke te ama'e, tsy t'ie nivañone' ty fimanemaneñañe Hake, fa ty figahiña' i Norizañey, ty toe havantañan' Añahare mioreña am-patokisañ. ¹⁰ Eka, te ho fohiko re naho ty faozara' i fivañom-belo'ey naho ty fitraofan-kina amy fijalea'ey, hihambañako amy havilasi'ey, ¹¹ hahatakarako ty fitroarañañe an-kavilasy.

Fimanemaneñañe i Firefeañey

¹² Tsy t'ie nitàkako, toe tsy añon-draho, fe itoañako handrambe i nandrambesa' IESOÀ Norizañey ahikoy. ¹³ O ry longo, tsy t'ie rinambeko. Fe, Amoeako ze amboho ao naho ilozohako takatse o añeo ¹⁴ eka imaneako talifitse ty tambem-pikanjiañ' abon' Añahare am' IESOÀ Norizañey. ¹⁵ Antao arè hiharo rehake, ze hene matoe aman-tikañe, fa naho hafa ty ereñeren-tro'areo, mbe hampalangesen' Añahare avao. ¹⁶ Fe soa t'ie hañavelo mañeva o fa nitakàren-tikañe.

¹⁷ O ry longo, mitraofa ami'ty fañorihañ' ahy, naho rendreho o mpañavelo am-pitsikombeñañe anay. ¹⁸ Fe maro—ie beteke nitalilieko naho mbe taroñeko an-tañy henaneo—ty mañavelo hoe rafelahi' i hatae ajale' i Norizañey. ¹⁹ Ie hijoroboñañe an-karotsahaña ao, ty fisafóa'e ro ndrañahare'e naho ty hameñara'e ro fisengea'e. Mifahatse an-draha an-tane atoy o vetsevetse' iareoo. ²⁰ Boriza' ty andindiña aña tika, aña ty

itamañe mpandrombake, toe IESOÀ TALÈ Norizañey, ²¹ ie ty hañova o sandrin-tikañe mirèkeo, hampihambaña'e amy fañòva'e aman' engeñey amy haozara'e hampiambane ze he'e ama'ey.

4

Fifampilongoaño

¹ Ie amy zay, ry longo-sarotse tamaekoo! ty haehako naho sabakan-drengeko, mijohaña amy TALÈ, ry rañeko. ² Mihalaly amy Eodiae raho naho mihalaly amy Sintikee t'ie hiharo-rehake amy TALÈ. ³ Eka, ry longo-sarotse, ehe imbao i nindre nifanehake amako amy talili-soay rey, naho i Klementa, naho o mpitrapo-toroñe amako ila'eo, ie fa misokitse am-boken-kaveloñe ao o tahina'eo.

Fierañerañañe amy TALÈ

⁴ Mirebeha nainai'e amy TALÈ. Indraeko ty hoe: mañonjona kobaiñe!

⁵ Ee te ho rendre' ze kila ondaty ty hatsò-tro'areo. Fa marine t'i TALÈ.

⁶ Ko emberen' inoñ' inoñe fe amy ze he'e, am-pilolofaño naho halaly mitraofa fañandriañañe, le ampahafohino an' Andrianañahare o fisalala' areoo, ⁷ le ty fañanintsin' Añahare milikoatse ze hene fohiñe abey ro hañambeñe o arofo naho fitsakorea' areoo am' IESOÀ Norizañey.

⁸ Honka'e ry longo, ze atao hatò, ze hene havañonaño, ze mahity, ze hiringiri'e, ze fanjàka, vaho ze soa talily; naho eo ty talango'e, naho eo ty mañeva renge—imoneño. ⁹ Le anò o nirendreke naho rinambe naho jinanjo vaho nioni' areo amakoo, aa lonike te ho ama' areo t'i Andrianañaharen-kanintsiñe.

Hazavan'Arofo ndra te Aia aia

¹⁰ Akore ty firebehako amy TALÈ kanao nivaõeñe indraike ty fiatrala' areo ahy henaneo, toe fa ela, ie ho nanoe' areo avao, fe tsy nahatafetetse heike. ¹¹ Tsy te mipay t'ie nitaroñeñe, fe nioke tsy hieren-draho ndra inoñe ty mizo; ¹² Mahazats' ahy te poie'e, haiko t'ie anjañe. Aa ndra aia' aia, naho aman' inoñ' inoñe le fa niòke, ke te vontsy he saliko, ke mpañarivo he rarake, ¹³ ho tafetereko ze he'e añamy Mpampaozatse* ahikoy.

¹⁴ Fe, soa i nanoe' areoy, t'ie nitraoke amy faloviloviakoy, ¹⁵ le fohi' areo ka, ry nte-Filipio, t'ie niakatse i Makedonia aña naho namototse nitaroñe i talili-soaiy, le tsy eo ty Fivory namahañ' ahy ndra an-tolotse ndra rambe, naho tsy inahareo avao. ¹⁶ Eka ie te Tesalonika aña, tsy indraike avao ty nañitrifa' areo o nipaiakoo. ¹⁷ Tsy t'ie mipay falalàñe, fa i vokatse haroroñe amy rake' areoioy. ¹⁸ Le hene rinambeko ami'ty hapea'e, toe nahaeneñe vaho nahaàtseke, toe rinambeko amy Epafroditò o nahitri' areoo; hañin-kanintsiñe†, soroñe mañeva naho sitran' Añahare. ¹⁹ Aa le hatsafen' Añahareko abey ze hene paiae' areo amy vara'e lifots' engeñey am' IESOÀ Norizañeyi.

Figadoñañe

²⁰ Aa ie henaneo, aman' Añahare Raentika ty engeñey nainai'e donia, Amena. ²¹ Añontaneo ze hene noro'e am' Iesoà Norizañey. Mañontane anahareo o rolongo amako atoio. ²² Salamae' o noro'e iabio, àntsake o añ'anjomba' i Kaisarao. ²³ Ho ami'ty arofo' areo abey ty hasoa' Iesoà Talè Norizañey.

* **4:13** Jao 15:5, Ko II 3:5-6, 12:9, Efe 3:10, Fil 2:13, Heb 13:20-21, Jn I 4:4 † **4:18** Avo 29:18; Ko II 2:14-15, Efe 5:2

Kolosia

¹ I Paoly, Firàhe' IESOÀ Norizañey ty amy satrin' Añaharey, naho i Timoty rahalahintika, ² Ho a o noro'e naho longo migahiñe amy Norizañey e Kolosia añeo:

Hasoa naho Fañanintsiñe ama'areo boak'aman'Añahare Raentikañe.

Fañandriañañe naho Filolofañe

³ Mañandriañe an' Andrianañahare Rae' i Talèntika IESOÀ Norizañey zahay amo halali'ay ho anahareo nainai'eo, ⁴ fa tsinano'ay ty fatokisa' areo IESOÀ Norizañey naho ty fikokoa' areo ondaty noro'e iabio— ⁵ ty fitamàñe nahaja andindìñe aña ho anahareo, i jinanji' areo ami'ty tsaran-katò' i talili-soaiy, ⁶ i fa nitotsake ama' areoy; manahake ty anoe'e ndra aia aia ami'ty voatse toy, ie mitolom-pamokatse vaho miraorao, hambañe amy nanoe'e ama'areo boak' amy andro nijanjiña' areo naho nafohiñe ty hasoan' Añahare an-katò, ⁷ manahake i jinanji' areo ty ama'ay amy Epafra, mpitrapitoñoñe noro'ay naho mpitrapitoñoñe migahi' i Norizañey; ⁸ ie nitalily ama'ay ty fikokoa' areo amy Aroføy.

⁹ Ie amy zao, boak' amy andro nitsanoña'ay, le tsy ado'ay ty miloloke ho anahareo, mihalaly te ho liforeñe am-paharendrehañe o satri'eo amy ze hihitse naho hilala atolo' i Arofo iaby; ¹⁰ hañaveloa' areo mañeva i TALÈ, hañasitra aze amy ze hene sata, hamokatse amy ze fitoloñantsoa, vaho hitombo ami'ty faharendrehañe an'Andrianañahare; ¹¹ ie nampaozareñe an-kaàmpon-kafatrarañe amy haozara'e rengèney ho am-pigahiñane heneke vaho fifeahañe an-kaehake, ¹² ro mañandriañ' andRae nampañeva antika hitraoke ami'ty lova' o noro'eo an-kazavàñe ao, ¹³ ie hinaha'e ami'ty fêhe' i ieñey* naho nasese'e mb'am-pifehea' i Anake kokoa'ey; ¹⁴ ama'e ty fijebañañe antika amy lio'ey, ty fañahàn-kakeo.

Andikèrañe Añe i Norizañey

¹⁵ Ie ty vintan' Añahare tsy isake, ty tañoloñolòña' ze hene namboareñe†, ¹⁶ ie ty namboarañe ze hene andindìñe aña naho an-tane atoy, o isakeo naho o tsy isakeo naho ze kobaiñe naho fifelehañe naho lohàñe vaho fandiliañe; ie naho ho aze ty namboarañe ie iaby rezay‡. ¹⁷ Ie ty taolo' ze hene raha§; ama'e ty ifampireketa' ze he'e. ¹⁸ Ie ty añambone' i fañòvay, i Fivoriy; ty fifotorañe, ty tañoloñolòña' o fitroarañe amy havilasiio, soa t'ie ty ho lohà' ze he'e. ¹⁹ Fa satrin-dRae te ama'e ty himoneña' ty haliforañe, ²⁰ le ie ty fijebañañe ze he'e ho ama'e; o raha an-tane atoio naho o raha andindìñe aña, nifampilongoe'e amy lio'e amy hatae ajaleiy.

²¹ Inahareo nialiheñe taolo, nihelofeñe am-pivetsevetse, nitolon-tsata raty, le nifampilongoe'e henaneo, ²² amy fañòva'e nofotsey añamy havilasiy, hanolora'e anahareo fiavahañe, tsy aman-tahiñe tsy amankandra añatrefa'e, ²³ ie toe mitoloñ' am-patokisañe soa fioreñe naho mijadoñe tsy mivike amy fampitamàñe i talili-soa jinanji' areo naho nitaroñeñe amy ze he'e ambane likerañe atoiy, i nampitrapitoñ' ahiy, zaho Paoly.

Ty Fifanehafa' i Paoly amo Fivorio

* ^{1:13} Lke 11:35, Jao 8:12, 12:46-50, Top 26:18, Efe 5:8 † ^{1:15} Heb 2:6, Ben 3:14 ‡ ^{1:16} Jao 1:3

§ ^{1:17} Rzs 9:22-31

²⁴ Aa le inahareo ro firebehako amo faloviloviako henaneo, ie imaneako heneke ami'tynofoko ty amy fañòva'ey—i Fivoriy—ze tsy niheneke amy filofeha' i Norizañey. ²⁵ Ie ty nampitoroñe ahy amy nampamandroñen' Añahare hañasoako anahareoy, hañeneke i tsaran' Añaharey, ²⁶ i tafatoño naetake amo saao naho amo tariratseoy, fe naboak' amo noro'eo henane zao, ²⁷ hampahafohinan' Añahare ty hasarom-bolonahe' i tafatoñoy amo kilakila ondatio: te ama'areo ao i Norizañey, i fitamàn' engeñey. ²⁸ Ie ty talily risihe'ay ze hene ondaty naho añoha'ay an-kihitse pea, hitolora'ay fonitse amy Norizañey. ²⁹ Ie ty toloñeko, milozoke ami'ty faozara'e mitromake fatratse amako atoañe.

2

¹ Teako ho fohi'areo ty fimaneako ho anaharo naho o e Laodikia añaeo vaho o mbe tsy nifañatre-daharañ' amako iabio, ² hañohòako ty arofo' iareo, ie fa nampivandireñe am-pikokoañe, amy hene vara vokare' ty faharendrehañe pea, ie fohiñe mazava, i hatò mietake aman' Añahare Rae aoy, i Norizañey; ³ ama'e ty ietaha' ze fonga varan-kihitse naho hilala*. ⁴ Itaroñako 'nio, hera ao ty hamañahy am-bolam-pañèdre. ⁵ Aa ndra te tsy eo an-tsandrín-draho, mbe ama' areo an-troke, mirebeke te mahatrea ty fitraofa' areo rehake naho ty fatokisa' areo i Norizañey.

Hamotsorañe mban-kavelo' i Norizañey

⁶ Aa kanao rinambe' areo i TALÈIESOÀ Norizañey, mañaveloa ama'e, ⁷ ie soa fivahatse naho nivoatse ama'e, naho niventène am-patokisañe ty amy naòke, vaho mandopatse fañandriañañe.

⁸ Mitaoa ke eo ty hañamengoke anahareo an-kilala miheatse naho famañahiañe kòake mirampy amo lili' ondatio naho amo sata' foto-ty tane toio†, fa tsy amy Norizañey. ⁹ Ama'e ty imoneña' ty haliforan' Añahare am-pañòva, ¹⁰ le nifonireñe ama'e nahareo, amy t'ie ty lohà' ze hene fifeheañe naho lily.

¹¹ Ama'e ka nahareo ro sinavatse an-tsavatse tsy nanoem-pitàñe fa nampikorendahañe ty fandilia' i haondaty hambo'ey amy sandriñey ami'ty fanavara' i Norizañey, ¹² ie nalenteke mindre ama'e amy lipotsey naho nindre natroatse ama'e am-patokisañe ami'ty fitoloñan' Añahare nampitroats' aze an-kavilasiy. ¹³ Ie nivetrake an-kakeo naho ami'ty tsy fanavara' i nofotsey ro vinelo'e mindre ama'e, le fonga nafaha'e o tahintikañeo, ¹⁴ ie namaopaoke i takelan-tsongoy, o fepetse‡ nanisý antikañe naho nañamengoke antikañeo; nasita'e aña zay, amy nipehañ' aze amy hatae ajaley, ¹⁵ ie nampikorendahe'e ty lili' o mpifeleke naho o mpañadilio, vaho nampiborahe'e ho fisambàñe am-batraike eo, ie fa rineba'e amy hatae ajaley.

¹⁶ Asoao arè tsy iaia ty hapo' areo hanìñe ty fikamañe ndra finomañe, naho o andro nifotoañañe naho o jiri-bolañaeo vaho o Sabatao§ ¹⁷ (toe fanalinjoa' o raha ho avio irezay) —fa ty Fañova' i Norizañey*. ¹⁸ Asoao tsy hikatramoeñe ty tambe' areo, ie sigiheñe hirè-batañe naho hitalaho amo anjelio; ie mitsibezeñe amo raha nitrea'eo, naho mirengevole am-pivetsvetsen-kaondaty hambo'e, ¹⁹ naho tsy mitambozòtse amy Añamboney, i Mpamahañe i Fañòvay iabiy vaho mampirekets' aze amo fange'eo naho amo lahin' ozatseo, hitomboa'e ami'ty fampibodobodoan' Añahare.

* ^{2:3} Ies 11:2, Kol 2:9 † ^{2:8} Kol 1:20, Gal 4:3,9 ‡ ^{2:14} Kol 2:20, Efe 2: § ^{2:16} Iek 45:17

* ^{2:17} Mat 18:15-20; Kol 1:18,24

²⁰ Ie nindre nivilasy amy Norizañey amo sata' foto[†] ty tane toio, akore te mbe manao hoe veloñe ami'ty voatse toy, mañorike o fañè'e manao ty hoe: ²¹ Ko mandrambe! ko mitsopeke! ko mitsapa. ²² Ie ho fonga modo am-pitoloñañe, amy te mifototse ami'ty lily naho fañòha' ondaty[‡]. ²³ Ie toe misare hilala am-pitalahoñañe an-tsatin-troke naho am-pirehañañe vande naho fampalovilovian-tsandriñé; f'ie tsy vente'e, naho tsy mahasebaña ty hadrao' o nofotseo.

3

O Fañè ami'ty Haveloñe vao

¹ Aa naho nindre nitroatse amy Norizañey nahareo, imaneo pay o raha amboneo, amy iambesara' i Norizañey am-pitàn-kavan'an' Añaharey*. ² Tsakoreo o an-dikerañeo, fa tsy o an-tane atoio. ³ Nivilasy nahareoo, le fa nahaja amy Norizañey aman' Añahare ao ty fiai' areo, ⁴ vaho ho tendreke amy Norizañey añ'engeñe ao i havelon-tikañey amy fiboaha'ey.

⁵ Vonò arè o fangen-kaondati' ty tane toy ama'oo; ze hakarapiloñañe, haleoraña, filomoloraña, fitsikirihan-draty, vaho fihàñañe—ie fiatoñañe am-pahasive; ⁶ irezay ty hifetsaha' ty fifombon' Añahare amo anam-panjeharañeo[†]. ⁷ Ie nañaveloa'areo te mbe niveloñe ama'e, ⁸ fe apitsoho aña henaneo, fonga tsy aboak' am-palie' areo ty heloke, ty fifombo, ty inje, ty teratera, naho ty reha-timbo. ⁹ Ko mifandañitse, fa naitoa' areo i haondaty hambo'ey[‡] rekets' o sata'eo, ¹⁰ le fa natseta' areo t'indaty vao, ze mihavao erike am-paharendrehañañe mihafonitse, miyahambambintañañe amy Namboats' azey. ¹¹ Tsy te Grika ndra Jiosy, sinavatse ndra tsy sinavatse, ambahiny ndra sadiavahe, ondevo ndra midada, fe halifora'e i Norizañey, ie ama'e iaby.

¹² Aa kanao jinobon' Añahare nahareo, miavake naho kokoañañe, sikino ty arofo miferenaiña, matarike, mirèke, trentraña, naho mahaliña, ¹³ mifampivavea naho mifampihevea, ie eo ty aman-kabò ama' ia'ia, le mifampihevea hambañañe amy nañahà' i TALÈ anahareoy. ¹⁴ Lombolombo' irezay ty fikokoañañe, ie mamahotse am-pitraofan-kina fonitse. ¹⁵ Ehe ho fehè' ty fañanintsi' i Norizañey o arofo' areoo fa zay ty nikanjiaña anahareo ho fañòva raike: vaho mañandriaña.

¹⁶ O tsara' i Norizañeo[§] abey ty himoneñañe ama' areo ao ami'ty halifora'e; mifañòha naho mifanoroa añ'ampon-kihitse; misaboa sabo, naho beko naho takasy miavake, mañandriañ' an' Andrianañahare añ'arofo. ¹⁷ Aa le ndra inoñ'inoñe anoe' areo, ke an-tsaontsy he sata, le ami'ty tahina' i TALÈ IESOÀ, vaho mañandriañ' an' Andrianañahare Rae añama'e.

Fañè amo Savereñañe

¹⁸ Ry roakembao, miandalia amo vali' areoo, ami'ty eva'e amy TALÈ. ¹⁹ Ry lahilahio, kokò o vali' areoo fa tsy itorifihañañe.

²⁰ Ry ajajao, mivohora aman-droae amy ze he'e, fa zay ty no' i TALÈ. ²¹ Ry aba, ko mañinje anake, hera hahamòhake aze. ²² Ry mpitoroñañe, mivohora amy ze he'e amo temp'o' areo amo haondati'eo, tsy t'ie misamba hipiaia'o tsiriry, fa an-tso-tro mañeveñañe amy TALÈ, ²³ aa ndra inoñe o tolondraha'oo, ihembaño, hoe mpitoro' i TALÈ fa tsy ondaty, ²⁴ le fohino t'ie ho tambeze' i TALÈ amy lovay, amy te IESOÀ TALÈ ro toroña'e areo. ²⁵ Ho valeañe ty amo sata-rati'eo ka o lo-tserekeo fa tsy irihiañañe.

* 2:20 Kol 2:14; Efe 2:15; Kol 2:8, Gal 4:3,9 † 2:22 Ies 29:13; Mat 15:8-9, Mar 7:6-7 * 3:1 Sab 110:1 † 3:6 Efe 2:2, 5:6 ‡ 3:9 Rom 6:6, Efe 4:22 § 3:16 Jao 12:48, Its 18:19, Ben 19:13

4

¹ O rotompoo, anò an-katò naho hamiràñe o mpitoro' areoo fohiñe te aman-Talé andindìñe ao ka nahareo.

Tovo'e fa tsy Liva'e

² Mitoloña an-kalaly, mijilova ama'e, le mañandriaña; ³ naho mihalalia ho anay, hisokafan' Añahare lalañe i tsaray, hitaroña'ay i mietake amy Norizañeiy, ze maha am-bahorañ' ahiko; ⁴ t'ie halange, hahafitaroñako ami'ty evà'e.

⁵ Mañaveloa an-kihitse amo alafeo, rombaho ty andro. ⁶ Ampanintsiño nainai'e ty saontsi' areo vaho hafirio an-tsira, hahafohina' areo ty hanoïñe ze ondaty.

Fisalamañe Fara'e

⁷ Aa naho ty amako, le hitalilia' i Tikiko, rahalahy kokoañe naho mpitoroñe migahiñe vaho mpitrapo-pitoroñe amy TALÈ. ⁸ Ie ty nahitriko, hitalily anay ama'areo vaho hañohò ty arofo' areo. ⁹ Hindre ama'e ty Onesimosy, rahalahy migahiñe naho kokoañe, toe mpiama' areo. Ho talilie' iareo ze he'e atoy.

¹⁰ Salamae' i Aristarko mpitrapo-silisily amako, naho i Marka, longo' i Barnabasy (toe nahazoa' areo lily, rambeso t'ie pok' ao), ¹¹ naho Iesose atao ty hoe Josto. Iereo avao ty boak' amy savatsey amo mpifanehake amako ho amy Fifehean' Añahareio naho toe mpañosik' ahiko. ¹² Salamae' i Epafra, i boak' ama' areoy, i toe mpitoro' IESOÀ Norizañey naho mahimbañe nainai'e an-kalaly ho anahareo, hijadoña' areo, fonitse* am-patokisañe heneke amo hene satrin' Añahareo. ¹³ Le itaroñako t'ie mahimbañe ho anahareo naho ho a i Laodikia vaho i Hierapolia. ¹⁴ Salamae' i Lioke mpanaha ìsoke naho i Demasy.

¹⁵ Salamao o roahalahy e Laodikia añaeo naho i Nimfae naho i Fivory añ' anjomba'ey. ¹⁶ Ie vinaky ama' areo ty taratasy toy, le ampamakio ty Fivory e Laodikia aña ka vaho vakio' areo i amy Laodikiay. ¹⁷ Le saontsio amy Arkipo ty hoe: Ehe tomiro i fitoloñañe rinambe'o amy TALÈY hañenek' aze.

¹⁸ Aman-tañako ty añontaneako, Izaho, Paoly. Tiahio o rohikoo. Fañanintsiñe ama'areo.

* ^{4:12} Sor 22:21, Its 18:13, Sab 119:80

Tesalonika I

¹ I Paoly naho i Silasy vaho i Timoty, Ho ami'ty Fivori' o nte-Tesalonika aman' Añahare Rae naho i TALÈIESOÀ Norizañey: Fierañerañañe naho Fañanintsine.

² Andriañe'ay nainai'e t'Andrianañahare ty ama' areo iaby, manoñoñe anahareo amo halali'aio; ³ le tiahi'ay lomoñandro ty fitoloña' areo am-patokisañe naho ty fitromaha' areo aman-koko naho ty figahiña' areo mitamà i TalèntikaIESOÀ Norizañey añatrefan' Añahare Raentika. ⁴ Fohi'ay ry roahalahy kokoan' Añahareo, te jinobo'e, ⁵ fa tsy nitotsake ama' areo an-tsara avao i talili-soa'aiy; fa aman-kaozara' i Arofo Masiñey vaho am-pireketan-tro añoñe. Fohi' areo ka ty fañaveloa'ay ama' areo. ⁶ Toe nitsikombe anay naho i TALÈnahareo; fa ndra te nanjoan-kaloviloviañe, le rinambe' areo an-kafalea' i Arofo Masiñey i tsaray. ⁷ Aa le nitsikombea' ze hene mpiato e Makedonia naho Akaia aña. ⁸ Le tsy e Makedonia naho e Akaia aña avao ty nampiboelea' areo ty saontsi' i TALÈ, fa toe nikatsakatsake an-toets' aia' aia o fatokisa' areo an' Andrianañahareo vaho tsy anovoña'ay rehake, ⁹ fa italilia' iareo ty hasoam-pampihovà' areo anay, ie nitolik' aman' Añahare naho niamboho ami'ty fahasive, mitoroñe an' Andrianañahare veloñe naho to, ¹⁰ vaho mandiñe i Ana'e andindinéy, i natroa'e an-kavilasiy—IESOÀ mpañaha antika amy haviñerañañe ho aviy*.

2

Ty Fitoroña' i Paoly e Tesalonika

¹ Inahareo, ry longo, ro toe mahafohiñe te tsy nianto i fitiliha'ay. ² Rendre' areo ka t'ie nalovilovy naho nonjireñe e Filipy aña; fe nirearea aman' Añaharen-tika nitaroñe i talili-soan' Añaharey ama'areo ndra te niindra' i fanjeharañey. ³ Toe tsy mifototse am-pandilarañe ndra haleorañe ndra famañahiañe ty fañosiha'ay; ⁴ fe ninòn' Añahare ty fanolorañ' anay i talili-soay; aa ie taroñe'ay le tsy t'ie hahaehake ondaty fa ho an' Andrianañahare mpitsoke o tro'ao. ⁵ Fa fohi' areo te le-lia tsy nanao kabeake an-drehake naho tsy nibatrake hanakona'ay fatitiañe (valolombeloñe t'i Andrianañahare), ⁶ mbore tsy nipay lomboke am'ondatio, ndra ama' areo ndra amo ila'eo. Toe mete ho nañeva anay, kanao Firàhe' i Norizañey ty nampivave anahareo, ⁷ te mone notroñe'ay hoe rakemba mampinono naho manombosombo i ana'ey. ⁸ Akore ty fikokoa'ay anahareo kanao nahaehake anay te tsy vaho handiva i talili-soan' Añaharey fa hamoe-ay ami'ty fañisoha'ay. ⁹ Mete tiahi' areo ry longo ty fitromaha'ay naho ty fifanehafa'ay; ie nitoloñe handro an-kaleñe tsy hiloetse ama' ia'ia, nitaroñe i talili-soan' Añaharey. ¹⁰ Valolombeloñe nahareo naho i Andrianañahare te niavake naho vañoñe vaho naliotahiñe ty fañaveloa'ay ama'areo mpiato. ¹¹ Fohi' areo ka t'ie nañosike naho nañohò vaho nandrisike anahareo kiraikiraike hambañe ami'ty rae amo ana'eo, ¹² hañaveloa' areo hañeva an' Andrianañahare mpikanjy anahareo ho am-pifehea'e naho añ'enge'e ao.

¹³ Ie amy zao, tsy apo'ay ty mañandriañe an' Andrianañahare nainai'e, amy te rinambe' areo i tsaran' Añahare nitaroña'aiy le tsy nandrambe

* ^{1:10} Ben 3:10, Ies 26:20

aze ho tsara' ondaty, fa ami'ty vente'e t'ie tsaran' Añahare mpifanehake ama'areo mpiato*. ¹⁴ Vaho nitsikombe' areo ry longo, o Fivorin' Añahare am'IESOÀ Norizañey e Iehodào, ie nifeake fampisoàñañe am-pitâ' o mpitrao-borizàñañe ama'eo toe o Tehodao, ¹⁵ ie songa vinono' iareo t'IESOÀ TALÈ naho o mpitokio, naho nandroake anay ka; ie tsy non' Añahare vaho fonga mifandiets' ama'ondaty, ¹⁶ ami'ty fisebaña' iareo anay tsy hitaroñe amo kilakila ondatio handrombake iareo, ie manovon-kakeo nainai'e, fa ho takaren-kaviñerañe am-para'e.

Sinebaseba' i mpañinjey t'i Paoly

¹⁷ Fe zahay, ry longo, naho fa nasitake ama' areo hey, an-tsandriñe fa tsy an' arofo, le àntsake t'ie nirototse naho nisalala fatratse te hahaoniñe o laharâ' areoo, ¹⁸ fa sinda homb' ama' areo mb'eo; izaho Paoly mandikoatse te indraike, fe sineba' i mpañinjey. ¹⁹ Ia ty ho fitamà'ay, ty haèha'ay, ty kobay hiriñariñà'ay añatrefa' IESOÀ Talèntika amy fitotsaha'ey? tsy inahareo hao? ²⁰ Eka, inahareo ro enge'ay naho haeha'ay.

3

Nañitrike i Timoty

¹ Aa ie tsy nahafifeake ka zahay, le nilahatse te hadoñe am-bangiñe Atena aña zahay, ² vaho nahitri'ay mb'ama' areo mb'eo t'i Timoty, rahalahintika naho mpitoron' Añahare amy talili-soa' i Norizañeyi, hamente naho hañosike anahareo amy fatokisa' areo, ³ soa tsy ama'areo ty hembere' o faloviloviaña zao; fe fohi' areo te zay ty nanendreañ' antika. ⁴ Ie mbe tama' areo ao le nitaroña'ay te fa antitotse ty hampisarerahaña an-tikañe; ie o oni' areo te zoeñeo. ⁵ Ie amy zay, tsy nahafeake ka raho, le nahitriko ty handrendreke ty fatokisa' areo, hera nazi' i mpañinjey, vaho ho nilesa i fitoloña'ayi.

Nahaosike ty Taro' i Timoty

⁶ Fa ie pok' eo hirik' ama' areo t'i Timoty, le nitalilie'e soa o fatokisa' areo naho i fikokoñaey, vaho t'ie nainai'e mitiah y anahareo an-kaso, mañiry hahaisake anay hambaña ami'ty fisalala'ay hahatreanahareo. ⁷ ie amy zao ry longo, amo faloviloviaña naho fanilofaña anaio fe nampanintsin' anay ty fatokisa' areo. ⁸ Velon-jahay henaneo, amy t'ie mijohaña amy TALÈ ao. ⁹ Akore ty fañandriaña'ay an' Andrianañahare hamale ty hafaleaña hirebeha'ay anahareo añatrefan' Añaharen-tika, ¹⁰ aa le mitolon-kalaly handro an-kalen-jahay hahaisake ty lahara' areo, hañeneke ze tsy eneñe ami'ty fatokisa' areo.

Salalañe

¹¹ I Andrianañahare Raentika vaho i Talèntika IESOÀ abey ro hañavantaña ty lala'ay mb'ama' areo aña; ¹² naho hampitomboe' i TALÈ nahareo naho o ila'e iabio hiraorao an-koko, hambaña ami'ty anay ho anahareo, ¹³ hampijadoña o arofo' areoo tsy aman-tahy, miavake, añatrefan' Añahare naho Raentikaña ami'ty fitotsaha' i Talèntika IESOÀ rekets' o hene noro'eo.

4

Veloñe Hañasitra an' Andrianañahare

* ^{2:13} Heb 13:21

¹ Ie amy zao ry longo, ihalalia'ay, naho risihe'ay amy TALÈ IESOÀ, ty hitomboa' areo nainai'e amo fañaveloañe nañoha'aio, naho hañasitra an' Andrianañahare; ² fa fohi' areo o fanoroañe natolo'ay anahareo añaam' IESOÀ Talèo. ³ Inao ty satrin' Añahare: t'ie hiavake, hisitak' ami'ty fiolorañe tsy mañeva; ⁴ ie songa mahay milie-batañe ho ami'ty fiavahañe naho asiñe, ⁵ tsy hilomoloañe an-kadrao manahake o kilakila' ondaty tsy mahafohiñe an' Andrianañahareo; ⁶ sindre tsy handilatse naho hañaramamo an-drahalahi'e; fa i TALÈ ro mpamale i hene rezay, hambañe amy nimanea'ay hatahata ama' areoy. ⁷ Toe tsy nikanyj an-tika ho an-kaleorañe t'i Andrianañahare fa ho am-piavahañe. ⁸ Aa ze tsy mipaoke, le tsy t'ie mifary ondaty, fa an' Andrianañahare nanolots' anahareo i Arofo Masiñey.

⁹ Aa ty amy fifampirañetañe longo, tsy ipaia' areo sokireñe, ie hohoen' Añahare hifampikoko; ¹⁰ naho toe anoe' areo amo hene longo e Makedoniao. Fe osihe'ay ry longo te hitolom-pitomambao, ¹¹ hinozoha'areo fañavelo am-pianjiñañe, songa manao ty tolon-draha'e naho mitoloñe am-pit  e amy nitoroa'ay, ¹² hañavelo an-kavantañañe amo alafe'eo naho tsy hipay inoñ'inoñe.

Ty Fitotsaha' i TALÈ

¹³ Aa tsy teako ho bahimo nahareo, ry longo, ty amo mir  tseo, hera hihontoke manahake o ila'e tsy aman-ko tam  e  eo. ¹⁴ Aa kanao atokisantika te nivilasy t'IESOÀ vaho nitroatse, le izay ty hindesen' Añahare mindre ama'e ze mirotse am' IESOÀ ao. ¹⁵ Aa hoe ty fivola'ay ama' areo ty amy tsara' i Tal  y, te tsy hiaolo o mirotseo tika mbe ma  ente ami'ty fitotsaha' i TALÈ, ¹⁶ fa i TALÈ vata'e ro hizotso hirik' andind  ne ey an-koike, am-piara  ana  an-tal  n' anjely, naho amy antsivan' Añaharey*; naho hitroatse hey ze nivetrake amy Noriza  ney ao, ¹⁷ vaho ho rambese  ne mb'amo raho  eo mb'eo tika mbe velo  ne hifanampe am'iereo an-draho  ne ey, hifanalaka amy TALÈ amy tiokey. Le ho nainai'e amy TALÈ ao tika  ne. ¹⁸ Aa le mifa  oh  a amy tsara zay.

5

Ty Andro'i TALÈ

¹ Aa ty amo androo naho o sa-ao, ry longo, tsy paia' areo ho sokireñe. ² Fa toe fohi' areo t'ie ho tondroke manahake ty mpamaoke hale  ne ty andro' i TALÈ. ³ Ie manao ty hoe, Fiera  era  a  ne naho Fa  nanints  ne! te mone hiambotrahan-karotsaha  ne, manahake ty fitsongoan-drakemba mivesatse, ie tsy hahabolititse. ⁴ Fe tsy a  nie  ne ao nahareo ry longo, hivovoa' i andro zay hoe malaso. ⁵ F'ie songa an-kazav  ne naho ana' ty atoandro, tsy mpiamo hale  eo ndra o fimoromoro  a  ne. ⁶ Aa ee t'ie tsy hirotsse, manahake o ila'eo, fa hitao naho hilie-bata  ne. ⁷ Mirotse hale  ne o mirotseo naho mamo hale  ne o mpijikeo. ⁸ Aa kanao mpiamo atoandroo, antao ho marea, hampitsetake ty fikala  n' ara  am-patokisa  ne naho fikokoa  ne vaho hisabaka i fitam  m-pandrombaha  ney*.

⁹ Tsy tinendren' Añahare ho an-kavi  era  ne tika, fa t'ie ho rombahe  ne a  amy Tal  ntika IESOÀ Noriza  ney, ¹⁰ ie nivilasy ho antika  ne, le he ma  ente ke mirotse ro hitraofan-tika havelo  ne. ¹¹ Aa le mifa  osih  a, naho mifampiraora  a, hamba  ne ami'ty fanoe' areo avao.

* **4:16** Ies 18:3, 27:13, Ioe 2:15, Amo 3:6, Zek 9:14, Mat 24:31, 1Ko 15:52, Ben 4:1 * **5:8** Ies 59:17

Fañaveloañe Masiñe

¹² Mihalaly ama' areo zahay, ry longo, ty hiasia' areo o mpifanehake ama' areo naho mpifehe vaho mpanoro anahareoo amy TALÈ ao. ¹³ Le aonjono am-pikokoañe o fitoloña' iareoo, vaho mifampilongoa. ¹⁴ Risihe'ay nahareo ry longo, hatahatào o mañarinjeñe, ohoño o mimoremoretseo, imba o midazidazitseo vaho hene ilofihu. ¹⁵ Asoao tsy hamalean-draty ty raty ndra ama' ia ia, fe paiao nainai'e ty hañasoa ty ila'e naho ze fonga ondaty. ¹⁶ Mirebeha avao, ¹⁷ Mihalalia nainai'e, ¹⁸ kila andriañeñe; fa zay ty satrin' Añahare ho anahareo am'IESOÀ Norizañey. ¹⁹ Ko akipeke ty Arofo. ²⁰ Ko mavoeñe o fitokiañe, ²¹ fa biribirio ze he'e; tambozoro ty soa. ²² Ifoneño ze atao haratiañe.

Figadoñañe

²³ I Andrianañaharem-pañanintsiñey abey ro hañeneke ty fiavaha'areo, hañaro ty arofo naho ty fiaiñe vaho ty sandri' areo ho fonitse tsy amankila amy fitotsaha' i Talèntika IESOÀ Norizañey. ²⁴ Migahiñe t'i mikanjy anahareo, Ie ro hañeneke zay.

²⁵ Ry rahalahio, mihalalia ho anay. ²⁶ Añontaneo an' oroke miavake o longo iabio, ²⁷ Afantoko ama' areo amy TALÈ ty hamaky ty taratasoy toy amo longo iabio. ²⁸ Ho ama' areo abey ty hasoa' i Talèntika IESOÀ Norizañey.

Tesalonika II

¹ I Paoly naho i Silasy vaho i Timoty,
Ho amy Fivori' o nte Tesalonika aman' Añahare Raen-tika vaho i
Talèntika IESOÀ Norizañeio:
² Hasoa naho Fañanintsiñe ama' areo boak' aman' Añahare Rae naho i
TALÈ IESOÀ Norizañey.

Fañandriañañe naho Halaly

³ Andriaña'e ay nainai'e nahareo ry longo aman' Añahare fa mañeva,
amy te vata'e mitombo ty fatokisa' areo vaho mitolom-pihavelo ty fi-
fampikokoa' areo, ⁴ ie ty isengea'ay amo Fivorin' Añahareo, toe ty fifeaha'
areo naho ty fatokisa' areo amo fonga fampisoañañe naho faloviloviaña
vavè' areoo,

⁵ ze toe mamente ty fahiti-tom-pizakan' Añahare, te volilieñe mañeva
i Fifehean' Añaharey nahareo, ie toe ampisoañañe. ⁶ Ty havantañan'
Añahare ty andilova'e o mañembetse anahareo, ⁷ naho hampanintsiñe
anahareo nivolevolène vaho zahay, ami'ty fisodeha' IESOÀ TALÈ andindìñe
eñe rekets' o anjeli'eo añ'afó mibebañe ao, ⁸ hamalea'e an-tsotry ze tsy
mahafohiñe an' Andrianañahare, ie tsy mañorike i talily soa' i Talèntika
IESOÀ Norizañey, ⁹ fa ho liloveña am-pimongorañañe nainai'e lavitse ty
fiatrefa' i TALÈ naho ty enge' i haozara'ey, ¹⁰ ie mitotsake atoy ho rengène
amo noro'eo vaho hifalea' o hene mpiatoo amy andro zay, amy te natokisa'
areo i nitaroña'aiy. ¹¹ Le zao ty ihalalia'ay nainai'e ho anahareo, t'ie
ho volilien' Añaharen-tika te hañeva i fikanjiañey naho ho henefa'e ze
hene fisalalan-kasoa naho fitoloñam-patokisañe an-kaozaraña, ¹² soa te
honjoneña ama' areo ty tahina' IESOÀ Talèntikañey, vaho inahareo ama'e
ao, ty amy fatarihan' Añaharen-tika naho i TALÈ IESOÀ Norizañey.

2

I Lahihagan-Kakeoy

¹ Aa le mihalaly ama' areo zahay ry longo, ty amy fiavi' i Talèntika
IESOÀ Norizañey naho i fitontonan-tika ama'ey, ² t'ie tsy hitroetroe
am-betsevetse, tsy ho tsiborehetohe' ty fañahy, ndra ty lañonaña,
ndra ty taratasy atao nihirik' ama'ay manao te nitondroke ty andro'
i Talè. ³ Mitaoa tsy ho fañahie' ndra iaia amy zay, fa tsy ie naho
tsy avy hey i fihàñkañey vaho abentatse indaty tsy aman-Kakey*, i
anam-pandrotsahañey, ⁴ ie hanjehatse naho hiebotse ambone' ze atao
'ndrañahare ndra fitalahoñañe, hitoboke añ' anjomban' Añahare ao hieva
ho Andrianañahare. ⁵ Tsy tiahí' areo hao te nitaliliako te mbe tama'
areo? ⁶ le fohi' areo o misebañe aze henaneo, hampiboake aze an-tsa'e.
⁷ Fa mifanehake añetake ao henaneo i fisitahaña amy Hàkey; fe mbe
mitoloñe avao i mpanebañey ampara' t'ie nasintake aña. ⁸ Haboak'
amy zay i tsi-an-Kakey naho ho rebahe' i TALÈ ami'ty fikofoham-palie'e†
vaho harotsa'e ami'ty fireandrea' i fitotsaha'ey. ⁹ Eka, ie pok' eo i tsy
mañambeña Hàkey, le hatolo' i mpañinjey aze ty haozaraña hitoloñe raha
tsi-tantane maro reke-biloñañe naho sahàtse, ¹⁰ naho ze hene famañahia'
ty hatsivokaraña amo hirotsakeo, ie tsy nandrambe ty fikokoaña ty hatò
hahazoa' iareo rombake. ¹¹ Zay ty amañahian' Añahare iereo, hiantoke

* **2:3** Dan 11:36-39 † **2:8** Ies 11:4

ty vande‡, ¹² le fonga ho zakaeñe o tsy miantoke ty hato te mone mifale an-katsivokarañeo.

Mivontitira

¹³ F'ie tsy mete tsy mañandriañe an' Andrianañahare ty ama' areo nainai'e, ry longo isohe' i TALÈ, amy t'ie nijoboñen' Añahare tam-pifotora'e aña ho rombaheñe ami'ty fampiavaha' i Arofoy vaho ty fatokisañe ty hatò§. ¹⁴ Zay ty nikanjia'e anahareo amy talili-soa'ay, handrambe ty enge' i TALÈn-tika IESOÀ Norizañey. ¹⁵ Aa le mijohaña ry longo, mifahara amo fañòhañe nañoha'aio, ke an-tsara he an-taratasy.

¹⁶ Le i Talèntika IESOÀ Norizañey naho i Andrianañahare Raen-tika mpikoko antika naho nanolotse antika fañohoañe tsy modo naho fitamàntsoa amy fañisoha'ey abey ¹⁷ ro hañosike ty arofo' areo vaho hampijadoñe anahareo amy ze hene tsara naho fitoloñan-tsoa.

3

Mahaliñisa i Norizañey

¹ Honka'e ry longo, mihalalia ho anay te hiboele masika ty tsara' i TALÈ, naho ho rengeñé manahake te ama' areo aña, ² vaho t'ie ho votsorañe am'ondaty lo-tsereke naho tsivokatseo amy te tsy songa mpiato. ³ Fe migahiñe t'i TALÈ, ie ty hañoreñe naho hikalañe anahareo amy ratiy. ⁴ Atokisa'ay amy TALÈ ao t'ie fa manao mbore hanoeñe o fandilia'aio. ⁵ Aa ehe te ho tehafe' i TALÈ mb' amy fikokoan' Añaharey naho mb'amy figahiñá i Norizañey ty arofo' areo.

Hantahanta ami'ty Fiaitsairañe

⁶ Ie amy zao ry longo, lilie'ay ami'ty tahina' i Talèntika IESOÀ Norizañey, t'ie hisitake amy ze longo mañavelo an-kelokeloke, tsy amy fañòhañe rinambe'e ama'ay. ⁷ Fa fohi' areo soa ty fitsikombeañ' anay, ie tsy nikopiso, ⁸ mbore tsy nikama ty mahakama' ondaty tsy vinili'ay fe nitromake naho nifanehake handro an-kaleñe, tsy hampivavea'ay, ⁹ tsy t'ie tsy nanandily, fe nanolo-batañe hitsikombea' areo. ¹⁰ Ie mbe tama' areo le nililie'ay ami'ty hoe: Ehe tsy hikama ty tsy mete mitoloñe. ¹¹ Fa tsinano'ay te ama' areo ty tsy mahalie-batañe, tsy mitoloñe, fa mirañadrañake avao. ¹² Le hoe ty lilie'ay naho osihe'ay amy Talèntika IESOÀ Norizañey o manao zaio: soa re te hitoloñe am-pianjiñañe naho hikama o azeo. ¹³ Ie amy zao ry longo, ko milesa am-panoan-tsoa. ¹⁴ Aa naho eo ty tsy mañaoñe o enta'ay ami'ty taratasy toio, le rendreho vaho ko itraofañe, hisalara'e, ¹⁵ f'ie ko anoe' areo rafelahy, fa torò amy t'ie longo.

Figodañañe

¹⁶ I Talèm-pierañerañañey abey ro hampanintsíñe anahareo nainai'e amy ze sata-soa iaby. Ho ama' areo abey t'i TALÈ. ¹⁷ Ingo ty fañontanean-tañako, zaho Paoly, ty viloko amo taratasiko iabio, zao o sokikoo.

¹⁸ Ty hasoa' i Talèn-tika IESOÀ Norizañey ho ama' areo iaby.
Amena.

‡ 2:11 Jao 9:39, 12:40, Top 7:42, Rom 1:24-28 § 2:13 Efe 1:4

Timoty I

¹ I Paoly, Firàhe' IESOÀ Norizañey, ty amy lilin' Añahare Mpandrombake antikañe naho IESOÀ Norizañe fitamàn-tikañey,

² Ho a i Timoty, toe anako am-patokisañe: Hasoa naho fiferenaiñañe vaho fañanintsiñe boak' aman' Añahare Rae naho i Talèntika IESOÀ Norizañey.

Hatahata amo Mpañana-Kake Sare'eo

³ Inay i nañosihako azoy, zaho nionjoñe mb'e Makedonia aña, le t'ihe hitoboke e Efesosy ao heike, handily o ila'eo tsy hañoke fañòhañe hafa,

⁴ naho tsy ho haoñe'o o talilin-taoloo naho o toñon-droae tsy migadoñeo fa mampifandietse avao, he ho soloa'e i famandroñan' Añahare mitoloñe am-patokisañey. ⁵ Fa ty firefea' o fanoroañe le fikokoñañe boak' añ'arofo hiringiri'e naho hazavàn-troke miharo fatokisañe to; ⁶ teo ty nitsile ami'ty hiti'e naho nidrikiñe mb' an-drehake borosode aña, ⁷ ie te ho mpañoke Hake, fe tsy apota'e ndra ze rehafe'e ndra o raha vontitire'eo.

⁸ Fohintika te soa t'i Hake naho oriheñe ami'ty lili'e, ⁹ tsapa te tsy afetsake ami'ty vantañe t'i Hake fa ami'ty tsy mañaon-Kàke, o mpanjehatseo, o mpiolao naho o tsivokatseo; o aman-tahiñe naho o miteraterao, ho amo mpamono rae naho reneo, o mpañoho-dozao, ¹⁰ o mpandrañaotseo, o sambe-lahy mpifandeotseo, o mpañovok' ondatio, o mpandañitseo, o mpitalily vilañe, vaho ze mpandietse fañòhañe to, ¹¹ ty amy talili-soan' Añahare rengeñe nafantoke amakoy.

Ty Falalà i TALÈ i Paoly

¹² Andriañeko i Talèntika IESOÀ Norizañey mampaozatse ahikoy, amy te natao'e ho migahiñe, vaho najado'e amy fitoroñañey, ¹³ zaho nimpiteratera naho mpampisoañe vaho nimpijoy heike; fe niferenaiñañe amy te nanoeko tsy aman-kilala tsy am-patokisañe, ¹⁴ le nidobañe amako ty hasoa' i Talèn-tikañey reketsye ty fatokisañe naho fikokoñañe am' IESOÀ Norizañey.

¹⁵ Taroñe atokisañe naho mañeva fiantofañe pea, te,

Nivotrake an-tane atoy

t'IESOÀ Norizañe

handrombake o aman-kakeoo,

zaho ty lombolombo'e;

¹⁶ fe zao ty nitretrezañe ahy, ty amy hoe zay, soa te amako hey ty nampalangesa' IESOÀ Norizañey ty fahaliñisa'e do'e, hitsikombea' o hiato ama'eo, hiveloma'e nainai'ey. ¹⁷ Ho amy Mpanjaka tsy ho modo, tsy ho momoke, tsy isakey, i Andrianañahare mahihitse tsy roe tsy teloy abey, ty asiñe naho ty engeñe nainai'e donia. Amena.

Fantoke Valoha'e: Mifanehafa ami'ty Aly Soa

¹⁸ Inao ty fanoroañe hafantoko ama'o, ry Timoty anake, ty amo nitokiañe ama'oo, t'ie mañorike irezay ro hifañotak' amy aly soay, ¹⁹ hifahatse am-patokisañe naho an-kazavàn-troke; ie fa namoea' o ila'eo, le nanao ty fatokisa' iareo ho làka-nijoroboñe. ²⁰ Mpiam' iereo t'i Himeneo naho i Aleksandro ze natoloko hioke amy mpañinjey, tsy hiteratera.

2

ty amo Fitalahoñaeo

¹ Ty añosihako valoha'e le te hanoëne ho a ondaty iabio ty fihalaliañe, filolohañe, fañalañalañañe naho fañandriañañe, ² naho amo mpanjakao naho o fonga mpifeheo, hiveloman-tika am-pianjiñañe naho fanintsiñañe, mañambeñe Hake vaho migahiñe. ³ Fa zay ty soa naho mete am-pivazohoan' Añahare Mpandrombak' antika, ⁴ ie satri'e te ho hene tradrombake ondatio hahatendreke ty faharendrehañe ty hatò. ⁵ Raike* t'i Andrianañahare, naho raike ty Mpañalañalañe añivon' Añahare naho ondatio, indaty atao IESOÀ Norizañey, ⁶ i nanolotse ty fañòva'e ho vilin' ai' ze he'ey, ho fitaliliañe an-tsa do'e. ⁷ Zay ty nanendreañe ahy ho mpitaroñe naho Firàheñe—mivolán-katò raho fa tsy mandañitse—ho mpañoke to naho migahiñe amo kilakila' ndatio.

⁸ Aa le salalàeko te hene hitalaho ondatio ndra aia' aia am-pañonjoñam-pitáñe miavake, tsy an-kaboseke ndra lietse. ⁹ Manahake zay, te hisaroñe ami'ty eva'e o rakembao, ho hendre naho tsò-po, tsy a-maròy mirandrañe tsy am-bolamena ndra hange, vaho tsy misikin-damba marerarerera, ¹⁰ fa mitolon-tsoa† mañeva o rakemba manao ho mpitalaho aman' Añahareo. ¹¹ Ehe te hianjiñe naho hiandaly o rakembao t'ie mioke. ¹² Tsy meiko hañòke ndra hanan-dily ami'ty lahilahy ty rakemba, fa hianjiñe. ¹³ Amy te namboareñe hey t'i Dame, vaho zay i Haova. ¹⁴ Le tsy i Dame ty ni-fañahieñe, fa i rakembay ty finitake vaho nikorovoke an-kakeo. ¹⁵ Ie amy zao, ho rombahen-dre amo fisamahañeo, ie milozoke am-patokisañe naho fikokoñañe vaho fiavahañe mitrao-pilieram-batañe.

3

Mpifehe naho Mpañolotse

¹ Inao ty tsara to: Ie mipay ho mpiaolo t'indaty, ro misalala fitoloñantsoa. ² Aa le tsy mahay tsy halio tahiñe i mpiaoloy, migahiñe amy rakemba'ey, tsy mpijke, hendre, vañoñe, mpitoka-pandrioñe, mahay mañoke; ³ tsy mpitolon-divay, tsy mpandafa, fa mpiheve, trentrampo, votsotse ami'ty hatea drala, ⁴ mahay mandahatse ty anjomba'e, tsy manjehatse o keleia'eo fa miandaly ama'e; ⁵ (aa naho tsy mahafehe ty anjomba'e t'indaty, aia ty hahafiatraha'e ty Fivorin' Añahare?) ⁶ le tsy t'ie vaho namototse ho mpiato, hera hirengevole vaho hifotsake ami'ty fa' i mpañinjey. ⁷ Paiañe t'ie ho to-rehake am'onday alafe'eo, tsy mone hikorovoke ami'ty inje naho ty fandri' i mpañinjey.

⁸ Hambañe amy zay o mpitoroñe, t'ie higahiñe, tsy mpitolom-bolañe, tsy mpigeno-divay, tsy mpipay vokàñe, ⁹ fe tambozore'e an-kazavàm-po o raha mietake amy fatokisañeo. ¹⁰ Soa re te tsoheñe hey, le ie ventèñe te tsy aman-kandra ro ampitoloñeñe.

¹¹ Tsy mete tsy ho hendre ka o rakembao, tsy mpikanifoke, fa mahalie-batañe, naho malili-po amy ze he'e. ¹² Raike avao ty vali' i mpitoroñey, ie mahafehe o keleia'eo naho i anjomba'ey, ¹³ fa mitaka-kavañonañe ty mpitoroñe mitolon-tsoa, naho mahasibek' am-patokisañe, ie amy IESOÀ Norizañey ao.

Ty Mañeva añ'Anjomban'Añahare ao

* **2:5** Ko I 8:6, Efe 4:6, Mar 12:29-34 † **2:10** Mat 16:27

¹⁴ Sokireko ama'o hey o raha zao, amy te salalaeko ty homb'ama'o mb'eo te aniany; ¹⁵ fe ke malaoñe, le ho fohi'o ty fanao añ'anjomban' Añahare ao, i Fivorin' Añahare veloñey, ty fahañe naho manantan-katò. ¹⁶ Fonga miantoke te ra'elahy ty tafatoñom-pañambenañe Hake:
 Ie nabook' an-tsandriñe*,
 Nampivantañeñe añ'arofo†,
 Niisa' o anjelio‡,
 Nitaroñeñe amo kilakila ondatio§,
 Natokisañe ami'ty voatse toy*,
 Rinambe añ'engeñe ao.

4

O Mpañoke Sare'eo

¹ Tsara nadodea' i Arofoy te hifampiria amy fatokisañey ty ila'e antsan-kònka'e aña, ie hañaoñe fañahim-pamañahiañe naho fañòhan-kokolampa, ² boak' ami'ty hasoa-fiatrefam-pandañitse, naho hoe sinodom-by mae o ereñeren-tro' iareoo; ³ ie mandrara fañengam-baly, vaho mandily te tsy kamaeñe ty mahakama nanoen' Añahare ho rambese' o matoky naho mahafohiñe ty hato am-pañandriañañe. ⁴ Hene soa ze namboaren' Añahare, le tsy ao ty ho lèneñe fa rambeseñe am-pañandriañañe, ⁵ ie fa neferañe amy Tsaran' Añaharey* naho an-kalaly†.

Fanolorañe o Mpañoke Too

⁶ Ie toroa'o aman-drolongo, le ho mpitoron-tsoa'IESOÀ Norizañey, finahañe an-tsaram-patokisañe naho amy fañòhañe do'e fañoriha'oy. ⁷ Fe ifoneño o talily borosode mañeva takàhon-drakembao, le mifanehafa ami'ty fañambenan-Kake. ⁸ Fa ndra te ahazoñañe tombo'e kede o fampipoahañ' ozatseo, mahaso amy ze he'e ty fañorihan-Kake, ie minday fampitamàñe ami'ty haveloñe toy naho amy ho tendreke añey. ⁹ Inao ty tsara to, toe mañeva iantofañe: ¹⁰ (toe ifanehafa'ay naho inozoha'ay), t'ie Miato aman-Añahare veloñey,
 Mpandrombake ze kila ondaty,
 sandrake o amam-patokisañeo.

Ko Adoñe o Falalàñe

¹¹ Tseizo naho anaro i tsaraeñey. ¹² Ko apo'o ho mavoe' ondaty ty hazatovo'o, fe anò ze hitsikombea' o mpiatoo azo an-tsara naho fañaveloañe naho fikokoañe naho fatokisañe vaho halio-tahiñe. ¹³ Ampara' te pok'eo raho, imaneo famakiañe, fanoroñañe, naho fañohañe. ¹⁴ Ko ado'o i falalàñe ama'oy, i natolots' azo am-petsem-pitoky am-panampezam-pità' o androanavioy. ¹⁵ Imaneo i raha rezay naho tsatsiho, soa te halange amy màroy ty firaoraða'o. ¹⁶ Mitaò ami'ty vata'o naho amo fañòha'oo. Itoloño, amy t'ie manao ro mandrombake ty vata'o naho o mijanjiñ' azoo.

5

O Vantotseo, O Andranavio, Ondevoo

¹ Ko mitrevoke androanavy, fa ahítio hoe rae naho o gaon-dahio hoe rahalahy, ² o rakembao hoe rene, o somondrarao hoe rahavave, ami'ty hakanitso'e do'e.

* ^{3:16} Heb 10:5 † ^{3:16} Ies 42:1, Iek 36:27, Mik 3:8 ‡ ^{3:16} Sab 91:11 § ^{3:16} Ies 62:11, Mat 24:14, Mar 13:10, Kol 1:23 * ^{3:16} Jao 8:30, Top 2:44, 14:12 * ^{4:5} Sor 11:1-47, Its 14:1-29 † ^{4:5} Ko I 10:31

³ Iasio o ramavoiñeo, o toe vantotseo. ⁴ Aa naho aman' anake ndra afe ty vantotse, le soa re te hioke hey ty hitoloñe ami'ty lilim-pitalahoañe añ'anjomba'e ao, hañavaha'e ty nisongoeñe aman-droae'e, fa zay ty non' Añahare am-pivazoho'a'e. ⁵ Fa mitamà an' Andrianañahare ka i toe vantotsey i nengañe ho vahiniy, ie mitolom-piloloke naho mihalaly handro an-kaleñe; ⁶ fe mikoromake o mierañerañe añ' arimoeñeo ndra t'ie veloñe. ⁷ Afantoho ka irezay soa tsy hinjeañe. ⁸ Aa naho eo ty tsy mamahañe o azeo, àntsake o keleia'e, le fa nifary i fatokisañey vaho lombolombo' ty tsi-miato.

⁹ Ampivolilieñe ho vantotse ze ambone' ty enim-polo taoñe, migahiñe amy tañanjomba'e, ¹⁰ mbore aman' engeñe amo tolon-draha soa'eo, ie fa nahabey anake, naho fa nampiantraño ambahiny, naho fa nanasa ty fandia' o noro'eo, naho fa nanaha o misotrio, vaho fa nahimbampañorike ty fitoloñan-tsoa. ¹¹ Fe liero ty vantotse tora'e, hera ho likoare' ty hadraom-bata'e ty fiatoa'e amy Norizañey, vaho hisalala hanambaly; ¹² mama-batañe iereo amy te napoke i fatokisa' iareo valoha'ey. ¹³ Le amy zay, mizatse mikopiso, mitsatsà-traño; le tsy vaho mihanitse avao fa toe matsindrañe naho mitolom-bolañe; mivolan-draha tsy mañeva. ¹⁴ Aa le osiheko hangala-baly o vantotse tora'eo, hiterake, hañalahala anjomba, soa tsy omen-dalañe i rafelahiy hañinje. ¹⁵ Toe fa nitsile nanonjohy i mpañinjey o ila'eo. ¹⁶ Aa naho aman-dongo vantotse ty rakemba mpiato, soa re te atrafe'e, le tsy i Fivoriy ty hiloetse ama'e, fa o toe vantotseo ro fahana'e.

O Andranavio

¹⁷ Mañeva asiñe indroe o androanavy mifehe soao, àntsake o mpifane-hake amo tsarao naho amo fañòhañeo. ¹⁸ Fa hoe i Sokitse Masiñey: Ko vihine'o ty vavan'añombe mandisañé*,
naho,

Mañeva ty rima'e ty mpièke†.

¹⁹ Ko mañaon-tsisý amy t'indaty bey naho tsy telo ndra roe ty valolombe-loñe‡. ²⁰ Endaho aolo' i màroy ty mitolom-pandilatse, hihembaña' o ila'eo.

Oriheñe fa tsy Irihiañe

²¹ Afantoko añatrefan' Añahare naho IESOÀ Norizañey vaho o anjely jinoboñeo rehe ty hañambeñe irezay, le ko mirihy, ko mañisokisoke aman-dra inoñ' inoñe. ²² Ko meke hanampe fitàñe ama' ondaty, vaho ko mitraoke ami'ty hatsivokara' o ila'eo; vontitiro ty halio-tahi'o. ²³ Ko minondrano avao fa ano divay kede ty ami'ty fisafóa'o naho o fangonora'oo.

²⁴ Malange ty hakeo' ondaty ila'e ie miaolo iareo mb'an-jaka mb'eo, fe mañorike afara ty ila'e. ²⁵ Midodea ka o sata soao, fe ndra tsy zay, tsy hay aetake avao.

6

Osike am' ondevoo

¹ Soa re te songa hanao ty tombo'e ho mañeva asiñe o ambanen-jokampañondevozañeo, soa tsy injéñe ty tahinan' Añahare naho o fañòhañeo.

² Le o aman-tompo mpiatoo, ehe tsy haketra'e ty asiñe ama'e katao mpilon-go, fe antsake te itoroñañe soa, amy te mpiato kokoañe o mpitraoke amy vokatseio. Ianaro naho osiho.

Hatea-vara

* **5:18** Its 25:4; 2 Kor 9:9 † **5:18** Sor 19:13; Its 24:15 ‡ **5:19** Its 17:6, 19:15

³ Aa naho eo ty mañoke raha hafa, tsy miantoke ty venten-tsaontsy nitsarae' i Talèntika IESOÀ Norizañey, naho ty fañòhañe milahatse aman-Kake, ⁴ ie mpibohaboha naho bahimo, mitolom-pañontane raha mampitrabike, mpifandietse saontsy, le mivariñ' am-piriàñe, naho alitroke naho teratera vaho kilily, ⁵ ie mifamotepotetse tsy vente'e am'ondaty aman-kilala vilañeo, o kòake tsy aman-katòo, vaho atao'e te fanontonambara ty fañambenan-Kake. ⁶ Toe mampiraorao ty fañorihañe Hake an-kaehake. ⁷ Amy te tsy eo ty nindesen-tikañe ami'ty voatse toy, vaho tsy eo ty hindesen-tika hiakatse ama'e. ⁸ Ie aman-ko kamaeñe naho saroñe tika, le tsy iereñañe. ⁹ Fe mijoñe am-panjiziañe naho am-pandrike naho am-pipaian-katsivokarañe naho amo raha mavoiñe mampijoro t'indaty an-karotsahañe naho an-koromahañe ao ze misalala ho mpañaleale. ¹⁰ Toe vaha' ze atao haratiañe i hatea varay, le fa nisitak' amy fatokisañey ty ila' o mañiriñe azeo, ie mampitsipo-batañe an-kaoreñañe maro.

¹¹ Aa ihe, zatovon' Añahare, ibotitsiho le heaño ty havantañañe, ty fañorihañe Hake, ty figahiñañe, ty fikokoñañe, ty fifeahañe vaho ty hamoràn-troke. ¹² Mifanehafa amy aly soa' i fatokisañey, tambozoro i haveloñe nainai'e nikanjiañe azoy, i nitaroñe'o soa añatrefam-balolombeloñe màroy. ¹³ Le afantoko ama'o am-pivazohoan' Añahare mpameloñe ze he'e naho IESOÀ Norizañe nitaroñe o talili-soa aolo' i Pontio Pilatoo, ¹⁴ ty hambena'o tsy aman-kandra ndra fitsikoañe i nafantokey*, ampara' ty fitotsaha' i Talèntika IESOÀ Norizañey, ¹⁵ fa an-tsa do'e ty hampibentara' i Tsitongerè tokañe andriañeñey, Mpanjaka' o mpanjakao, Talèn-talè, ¹⁶ Ie avao ro tsy aman-kamodoañe, mimoneñe an-kazavàñe tsy lefe harineañe, mboe tsy niisa' ondaty naho tsy mete isaheñe; ama'e ty asiñe naho ty haozarañe nainai'e. Amena.

Fañòhañe o Mpañalealeo

¹⁷ Lilio o mpañaleale ami'ty haveloñe toio ty tsy hiebotsebotse, tsy hiato vara tsy azo antoke, fa aman' Añahare veloñe mpandogologo amantika ze hene mahaeħake antikañe. ¹⁸ Le ty hanao soa, t'ie ho mpañaleale am-pitoloñan-tsoa[†], matarike, naho veka'e hanolotse, ¹⁹ mamandroñe manantañe soa mihaja ho amy añey, hamejañe i toe haveloñey.

²⁰ O Timoty! ambeno i nafantoke ama'oy, iholiaro ze rehake borosode naho kòake naho o fifandierañe tsy vente'e atao hilalao. ²¹ Ie niantofa' ty ila'e le fa nandrìke amo fatokisañeo. Hasoa ama'o. Amena

* **6:14** Hake zay, Its 17:20, Sab 19:8 † **6:18** Mat 16:27

Timoty II

Fiaolo

¹ I Paoly, Firàhe' IESOÀ Norizañey ami'ty satrin' arofon' Añahare, amam-pitamàn-kaveloñe am' IESOÀ Norizañey. ² Ho a i Timoty, anake kokoako: Hasoa naho tretre vaho ty fañanintsin' Añahare Rae naho i Talèntika IESOÀ Norizañey.

Fañandriañañe i Fatokisa'e

³ Andriañeko t'Andrianañahare italahoako manahak' an-droaeko an-kazavan-stroke, le mahatiahyl azo nainai'e raho am-pilolofako handro an-kaleñe; ⁴ le misalala hahatreya azo amy fitiahiaiko i ranomaso'oy, hahaliforañ' ahy an-kaehake, ⁵ ie tiahiko ty fatokisan-tò an-tro'o ao, ze nimoneñe heike tañova' i Loizae renebei'o naho amy Eonikae rene'o vaho atokisako te ama'o ka. ⁶ Zay ty añosihako azo ty hampibelañe i falalàñ' Añaharey ama'o añamy nanampezan-tañakoy. ⁷ Toe tsy tinolon' Añahare stroke mimalimalitse tika, fa ty arofon-kaozarañe naho ty fikokoña, vaho ty filieram-batañe.

⁸ Aa le ko salareñe ty talili' i Talèntikañey, naho zaho miprohi'e, fe mitraofa amako ami'ty falovilovia' i talili-soay amy haozaran' Añaharey, ⁹ i fa nandrombake antika naho nikanyt antika am-pikanjiañe miavake, tsy ty amo fitoloñan-tikañeo, fa amy satrin' arofo'ey naho i falalàñe natolotse antika am' IESOÀ Norizañey taolo' ty fifotora' o sàoy, ¹⁰ f'ie naboake henane zao ami'ty fitotsaha' i Mpandrombak' antika IESOÀ Norizañey, i nandrotsake i havilasiyy vaho ninday haveloñe naho tsi-fihomahañe mb' an-kazavàñe mb'eo amy talili-soay, ¹¹ i nanendreañe ahy ho mpitaroñe naho Firàheñe naho mpañokey. ¹² I hoe zay ty isotriako o raha zao; fe tsy salatse, fantako i Fiatoakoy, vaho atokisako t'ie mahafihaja i nampañajako azey ampara' i àndroy. ¹³ Tambozoro ami'ty fatokisa'o naho fikoko'a'o am' IESOÀ Norizañey ty vente' o tsara-kanintsiñe tsinano'o tamakoo. ¹⁴ Vontitiro o raha soa natolotse azoo ami' ty fañimbà' i Arofo Masiñe mimoneñe añovan-tikañey.

¹⁵ Apota'o te fonga niamboho ahy i e Asia aña rey miharo amy Figelo vaho i Hermogena. ¹⁶ Ehe te ho tretreze' i TALÈ o añañombà' i Onesiforoseo, fa beteke nampanintsiñe ahiko vaho tsy nahameñatse aze o silisilikoo, ¹⁷ f'ie te Roma le nitsoek' ahy ampara' te nioni'e. ¹⁸ Hatolo' i TALÈ aze abey ty hahaoniña'e tretré amy TALÈ amy andro zay! Ie fohi'o soa o sata maro nitoroña'e ahiko e Efesosy añaeo.

2

Fañosihañe

¹ F'ihe, anako, maozara amy hasoa' IESOÀ Norizañey. ² Le o tsinano'o amako aolo' ty valolombeloñe maroo ro afantoho ama'onday migahiñe hahafañoke o ila'eo ka. ³ Mindreza hasilofañe amako hoe lahin-defo' soa' IESOÀ Norizañey. ⁴ Tsy ia ty mitolon-ko lahindefo ze mifehefehe an-tsata' ty tane toio; fa ty hahafale i nanendre aze ho lahin-defoñey. ⁵ Le i mpimane tsikiaviavy, tsy tambezen-dre naho tsy ilozoha'e o fañèn-tsikiaviavio.

Mpambole Mahafeake

⁶ Tsy mete tsy mandrambe amy voka'ey hey i mpambole nifanehake ama'ey. ⁷ Kinàño o volakoo, le i TALÈ ro hampaharendreke azo amy halifora'ey. ⁸ Tiahio t'IESOÀ Norizañe, nampivañoneñe an-kavilasy naho tiri' i Davide, ty amy talilikò soa ⁹ isotriako falilovañe naho nampijorobo ahy an-drohy atoa hoe mpanao ratiy; fe tsy mirohy ty tsaran' Añahare. ¹⁰ Zay ty ifeahako ze he'e ho amo jinoboñeo, handrambesa' iareo i fandrombañañe am' IESOÀ Norizañey rekets' engeñe tsy ritsey. ¹¹ Inao ty entañe to:

Kanao nindre nivilasy ama'e tikañe,
le ho veloñe mindre ama'e ka.
¹² Naho mahatañe tikañe,
le hindre hifehe ama'e ka.
F'ie lànen-tika, le ho farie'e ka.
¹³ Naho tsy mahafiatō tika,
migahiñe re, fa tsy mete miteti-vatañe.

Mpifanehake Mahimbañe

¹⁴ Aniahio o raha zao, naho imaneo taroñe añatrefan' Añahare le ko mifandietse an-tsaontsy, fa tsy manjofake naho mampivalitaboak' o mpijanjiñe. ¹⁵ Ilozoho ty hiatrefa'o aman' Añahare ho mpifanehake no'e, tsy aman-ko salareñe, naho mahasalàhañe o tsaran-katò; ¹⁶ le iholiaro ty reham-borosode, fa mampihànkäne ondaty ami'ty Hake, ¹⁷ fa handramban-tane hoe angorosy o reha' iareoo. Mpiamá iareo t'i Himeneo naho i Fileto; ¹⁸ songa nandrìke ami'ty hahiti'e, ie nivolañe te fa nifetsake i fivañonan-ko-veloñey, ze mamalike ty fatokisa' o ila'eo, ¹⁹ fe mijadoñe ty mananta-maozan' Añahare, le pinatetse ama'e ty hoe: Arofoana' i Talè o azeo*, naho Tsy mahay tsy hiamboho ty raty† ze manoñoñe ty tahina' i Talè.

Fitovy Miavake

²⁰ Tsy fitovy volafoty naho volamena avao ty ìsake amo anjomba jabajabao fa eo ka o aman-katae naho lietseo, eo ty amam-piasiañe, naho ty aman-katsorañe. ²¹ Aa ze miefe-batañe amy rezay ty ho fitovim-piasiañe, miavake naho mañeva ho fitoloña' i TALÈ, veka'e amy ze hene sata soa. ²² Mibolitira amo draon' ajalahio, le imaneo havantañañe, figahiñañe, fikokoñañe, vaho fifampilongoañe mitraoke amo mpikanjy i TALÈ añ' arofo hiringiri'eo. ²³ Mihankaña amo fifanjeharañe minè, tsy aman-kilalao, ie oniñe te minday fifanjomorañe avao.

Mpitoroñe ami'ty Hamora-fo

²⁴ Tsy hanotratsotrake ka ty mpitoro' i Talè, fa ho lem-po am' ie iabiy, mahay mañoke, naho mahafifeake tivetive, ²⁵ mañity o mpandietseo an-kamoràñ' stroke, ke ho metean' Añahare ty hisolohoa' iareo, handrendreke ty hatò, ²⁶ hisotraha' iareo hibolititse ami'ty fandri-bo' i mpañinje nandrohy iareo hanao ze nahin-stroke.

3

Ty tsy Fatokisañe amo Andro Honka'eo

* ^{2:19} Vol 16:5 † ^{2:19} Sab 34:14, 37:27, Rzs 3:7, 4:24, 14:27, 16:17

¹ Rendreho te ho tondroke an-tsa sehanga'e aña ty hasotriañe. ² Le ho mpikoko-teña naho mpitea vola ondatio, hibohaboha, hirengevoke, hiter-atera, hanjehatse roae, tsy hañandriañe, tsy ho aman-kasy, ³ tsy ho aman-katea, tsy handrae raven-de, ho mpañinje, tsy maha-lie-batañe, tsy mirèke, mpalain-kasoa, ⁴ mpifotetse, mpanao ty tsy nahi'e, mpiebotsebotse, mpitea ty mahafalefale fe tsy mpikoko an' Andrianañahare, ⁵ misare te aman-Kake f'ie mandietse ty haozara'e*. Iholiaro! ⁶ Am' iereo ty miapiapia an-kivoho ao hitsepake ty rakemba seretse milogologo hakeo naho aviovio' ty draq raty, ⁷ nainai'e mioke, fa le lia'e tsy maharendreke ty hatò. ⁸ Hambañe amy nitambolitritria' i Jana naho i Jambra i Mosèy, ty andiera' iretia ty hatò; ondaty maleo-betsevetse; zoeñe koake tsy amam-patokisañe. ⁹ Tsy hiraorao, fa halange amy màroy t'ie tsivokatse, manahake ty nizoeñe amy nitsaraeñe rey.

Fañaveloañe an-kake

¹⁰ F'ie nañorike i fañòhakoy, ty satan-kaveloko, ty firefeako, ty fatok-isako, ty fifeahako, ty fikokoako, ty fahaliñisako, ¹¹ ty fampisoañañe, ty faloviloviañe manahake i nitendreke amako e Antioka naho e Ikonioma naho e Listra aña rezay—Akore o samporerahañe nifeahakoo, fe rinomba' i TALÈ amy iabiy. ¹² Eka, toe fonga ho samporeraheñe ze te hañorike i Hake am' IESOÀ Norizañey†, ¹³ fe hiharaty avao ondaty lo-tserekeo naho o mpamorekeo‡; mamañahy mbore ifañahiañe. ¹⁴ Ihe ka, toloño o nioha'o naho niantofa'oo, fohiñe o nandrendreha'o azeo, ¹⁵ naho te nifohi'o boak' amy naha' ajaja azoy o Sokitse Masiñe mete mampahihitseo, hitaoñe azo mb' am-pandrombahañe t'ie miato am' IESOÀ Norizañey. ¹⁶ Nikofòn' Añahare ze hene Sokitse Masiñe, le mahaso ami'ty fañòhæñe, fañendahañe, fañitiañe vaho fanoroan-kavantañañe, ¹⁷ hahafonirañe ondatin' Añahareo ho veka'e amy ze fitoloñan-tsoa iaby.

4

Nafantoke Hitaroñe i Hake

¹ Aa le afantoko ama'o añatrefan' Añahare naho IESOÀ Norizañey, i hizaka o veloñe o nivilasio amy fitotsaha'ey naho amy fifehea'ey, ² ty hitaroñe i tsaray! ho veka'e he an-tsà'e ke tsy an-tsà'e ty hampiantoke, hañatahata, naho hañosike am-pañohañe pea fahaliñisañe. ³ Toe ho tondroke ty sa' tsy hiantofañe ty mpañohañe vantañe, fa an-draventsofiñe mangilingily ty hanontona' iareo mpañoke tsahatse o draq' iareoo*, ⁴ naho hongañe' ty ravembia' iareo ty hatò, hitolike mb'an-dantom-bolañe. ⁵ F'ihe! migahiña amy ze he'e, feaho ty sarotse, toloño an-tsamat-pitaroñe, henefo i fitoroña'oy.

Ty Fitama'i Paoly Hivetrake

⁶ Toe ailin-koe enga-rano raho henaneo, naho an-titotse ty fiengako. ⁷ Fa nihotakotaheko i aly soay, nihenefeko i tsikiaviaviy, nivontitireko i fatokisañey. ⁸ Mihaja ho ahy henane zao ty sabakan-kavantañañe hatolo' i TALÈ Mpizaka Mahitiy ahy amy andro zay, le tsy amako avao, fa amy ze hene hifale amy fitotsaha'ey.

I Paoly am-Porozo ao

* **3:5** Ti II 3:13, Ies 24:5-6, Mat 24:12, Rom 1:30-31, Te II 2:3-11 † **3:12** Mat 5:10 ‡ **3:13** Mat 24:12, Ben 22:11 * **4:3** Ies 30:10, Iir 5:31, Rom 16:18

⁹ Milozoha homb'amako mb' atoa aniany; ¹⁰ fa naforintse' i Demasy, ie loho mpitea ty voatse toy ro nienga mb'e Tesalonika aña; naho nimb'e Galate aña t'i Kreska vaho nimb'e Dalmatia mb'eo t'i Titosy. ¹¹ I Lioke avao ro amako atoy. Hitrifo t'i Marka vaho ampitraofo ama'o mb'etoa, amy t'ie mahasoa ahy amy fitoroñañey. ¹² Fa nahitriko mb' Efesosy aña t'i Tikiko. ¹³ Ihe mb'etoa, endeso i saroñe nengako añ'anjomba' i Karpo e Troasy añaey, naho o bokeo, àntsake o an-kolitseo. ¹⁴ Loho nijoy ahy t'i Aleksandro mpanefe saba, fa hivalea' i TALÈ mañeva o sata'eo[†]. ¹⁵ Itaò, fa niliere'e mafe o enta'aio.

¹⁶ Tsy eo ty nanozañe ahy amy fikòm-bolako valoha'ey, fonga nifary ahy. Ee t'ie tsy hasesek' am' iereo. ¹⁷ Fe nijohañe amako eo t'i TALÈ nampaozatse ahy, hañenefako i fitaroñañey, hahajanjiña' ze kila fifeheañe. Toe rinombake am-bava' i lionay raho[‡]. ¹⁸ I TALÈ ro hamotsots' ahy amy ze hene sata-raty, handrombake ahy ho am-pifehean-dikera'ey. Aze ty engeñe an-tsa mb'an-tsa. Amena!

Fisalama' i Paoly Honka'e

¹⁹ Añontaneo t'i Prisilae naho i Akoila, vaho o añañomba' i Onesiforio. ²⁰ Nitambatse e Korinto aña t'i Erasto, fa nengako siloke e Mileto aña t'i Trofimo. ²¹ Imaneo fiavy aolo' ty asotry. Mañontane azo t'i Eobolo naho i Poda, naho i Lino naho i Klaodia vaho o longo iabio. ²² I Talè ro hañimba ty tro'o. Ho ama' areo abey ty hasoa. Amena.

[†] 4:14 Sab 28:4, 62:12 [‡] 4:17 Sab 22:21

Titosy

Fiaolon-dRehake

¹ I Paoly, fetrek' oron' Añahare naho Firàhe' IESOÀ Norizañey, ho ami'ty fatokisa' o jinobon' Añahareo naho ty faharendrehañe ty hatò amy fañorihañe Hake, ² misalala i haveloñe nainai'e nampitaman' Añahare tsy mandañitsey, taolo' ty fifotora' o saao, ³ ie naboake an-tsà mañeva i tsara'ey añamy fitaroñañe nafantok' amako ami'ty lilin' Añahare Mpandrombak' antikañey.

⁴ Ho a i Titosy, toe anake amy fatokisañe itraofañey: hasoa, naho fañanintsîne boak' aman' Añahare Rae naho IESOÀ Norizañe Mpandrombak' antikañey.

Orizo ty Mpifehe Mañeva

⁵ Ty talim-pañengako azo homb'e Kreta aña, le ty hañity o raha tsy nihènekeo, naho ty hampijadoñe roandriañe amo hene rovao, amy nafantoko ama'oy, ⁶ ie tsy aman-kila, migahiñe amy tañanjomba'ey, naho aman' anake mpiato, tsy mitangingiñe, tsy mañarinjeñe. ⁷ Toe tsy mahay tsy malio tahiñe ty mpifehe amy te mpamandron' Añahare, tsy mpitea-teña, tsy mora viñetse, tsy loho mpinon-divay, tsy mpandafa, tsy mikiram-bokàñe, ⁸ f'ie mpanao antalatalasaba, mpitea ty soa, mahalie-batañe, malili-po, miavake naho migahiñe; ⁹ mpifahatse ami'ty fañòhañe to milahatse amy tsara atokisañey, hahafitaroña'e ty entan-tsoa-fehe naho hañitia'e o mpandietseo.

¹⁰ Maro ty te hiola, mpivolambolañe naho mpamañahy, somandrake o mpiamo savatseo. ¹¹ Ie tsy mahay tsy hampitsîneñe, fa mandrotsake hasavereñañe heneke, mañoke raha tsy mañeva, hahazoñañe tambe vilañe. ¹² Fa hoe ty mpitoky am' iereo ao: Mpandañitse avao o nte-Kretao, biby raty, vòtro màhake. ¹³ To i talilieñey. Aa le itrevoho, hampatœ' ty fatokisa' iareo, ¹⁴ tsy hiantofa'e o lantom-bolañe Tehodao naho ty fandilia' ondaty mpiamboho ami'ty hatò. ¹⁵ Toe hene hiringiry amo hiringiriñeo, fe tsy eo ty malio amo malotoo naho amo tsi-miatoo, ie sambe maleotse antroke naho am-pitsakoreañe. ¹⁶ Ie mieva mahafohiñe an' Andrianañahare te mone tetize' o sata'eo, mpitangingiñe naho mpiola, milesa amy ze atao asa soa.*

2

Ty Fañòhañe Vañoñe

¹ F'ihe, Taroño ze mañeva atao enta-mahity, ² hahapendreñe o androanavio ho vañoñe, hilie-batañe, higahiñe am-patokisañe, an-koko naho am-pahaliñisañe; ³ manahake zay o rakemba beio, t'ie ho vañondia mpañeveña aman-Kake, tsy mpikanifo, tsy ondevozen-divay, fa mpañoke havañonañe; ⁴ mpanoro o ampelao ho hendre, mpikoko valy naho mpitea anake; ⁵ ie mahalie-troke, tsy aman-kila, mahay mañalahala anjomba, matarike, mpiandaly ami'ty vali'e; soa tsy honjirañe ty tsaran' Añahare.

⁶ Osiho ka o ajalahio te hilie-batañe. ⁷ Le an-tsata'o iaby, mañaveloa ho fitsikombeam-pitoloñan-tsoa*, ho mpañoke vantañe vaho migahiñe,

* ^{1:16} Mat 7:21-23, Pe 2:1-22, Jn I 2:4, Jod 1:4 * ^{2:7} Mat 16:27

⁸ añ'enta mifehe, tsy itiñeñañé, hanalarañe ty mandietse, tsy hinjeañe.

⁹ Osiho ondevoo hiambàne amo temp'o'eo, hampifalea'e an-tsata'e iaby, vaho tsy hanointoiñe; ¹⁰ tsy hampikametse, te mone hitoloñe am-patokisañe do'e, soa te ho bangoe'e amy ze he'e ty fañòhan' Añahare Mpandrombake antikañe.

¹¹ Fa niboake ty hasoan' Añahare minday fandrombahañe ho a ze kila ondaty, ¹² mañoke antika halaiñe ty hatsi-an-Kake naho o hadrao' ty voatse toio; naho ty hilie-batañe an-kavañonañe, vaho hañori-Kake ami'ty sà toy, ¹³ ie liñisantika i fitamàñe andriañañey—i fiboaham-bolonahen' Añahare jabahinakey, IESOÀ Mpandrombake Norizañey, ¹⁴ i namoe'ay hijebañe antika amy ze fonga fandilaran-Kakey†, hañefera'e ho aze ondaty mahimbañe am-pitoloñan-tsoao‡.

¹⁵ Itaroño naho añosiho naho añereto an-dily fonitse vaho ko apo'o honjiren-drehe.

3

Anò ze Mahasoa

¹ Atorò iareo ty hiambane amo mpifeheo, naho amo bei'eo, tsy hanjehatse, vaho halisa amy ze hene fitoloñan-tsoa, ² le tsy hañinje ndra ia'ia, tsy hitrobo, fa ho lèm-po, hiasy ze hene ondaty. ³ Toe ni-seretse ka tika taolo, nanjehatse, finitake, nondevozen-kadrao naho fañiriañe, nañavelo an-ka-lo-tserehañe naho fihàñañe, nirihy, vaho nifankalaiñe. ⁴ Fe niboake ty fatarihan' Añahare Mpandrombak' antika naho mpikoko ondatio. ⁵ Le rinomba'e, tsy ty amo sata soa nanoen-tika an-kavañonañe, fa i fiferenaiña'ey, am-pandroañe i fisamaham-baoy naho ami'ty fañavaoa' i Arofo Masiñey ⁶ ze nadoba'e aman-tikañe añam' IESOÀ Norizañe Mpandrombak' antikañey, ⁷ le itika nivantañeñe amy hasoa'ey, ro nanoeñe mpandova ty amy fitamàñe o haveloñe nainai'eo.

⁸ Tsara-to zay, aa ty amy tsaraeñe, le noko te isaontsia'o am-patokisañe, soa te himanea' o mpiato aman' Añahareo ty hitomitse, hitoloñe sata soa. Mete zay, toe mahasoa ze hene ondaty. ⁹ Fe iholiaro o ontane gegeo, o toñon-droaeo, o ali-vavao, naho ty sotasota ty amy Hake, ie hatsivokarañe naho hakoahañe. ¹⁰ Aitò t'indaty mampiriaria ie fa nerete'o in-droe ndra in-draike, ¹¹ ampahafohino t'ie mengoke naho mpandilatse vaho mamà-batañe.

Figadoña'e

¹² Naho hahitriko mb'ama'o mb'eo t'i Artema ndra i Tikiko le milozoha lia mb'amako e Nikopolia mb'eo, fa sinafiriko ty hitoboke ao te asotry.

¹³ Maringata hampionjone'o mb' eo t'i Zena mpañoke Hake naho i Apolosy soa tsy eo ty ho paiae'iareo. ¹⁴ Hàmake te hizatse sata soa o mpiaman-tikañe, hañeneke o raha paiañe, tsy mone tsy hahavokatse.

¹⁵ Mañontane azo ze hene amako atoa. Salamao ze mikoko antika amy fatokisañey ao. Hasoa ama' areo iaby.

† **2:14** Jn I 3:4, Mat 1:21, Top 3:19, 3:26, 26:18, Rom 6:1-22, Efe 2:1-10, Jn I 3:8, Tit 3:5 ‡ **2:14** Mat 16:27

Filemona

¹ I Paoly, miprohi'IESOÀ Norizañey, naho i Timoty rahalahintika: Ho a i Filemona rañetse naho mpifanehake ama'ay, ² naho i Apiae rahavaventika, naho i Arkipo lahin-defon-tika, vaho i Fivory an'anjomba'oy: ³ Hasoa naho fañanintsîñe ama'areo boak' aman' Añahare Raentika naho i TALÈ IESOÀ Norizañey.

Fañandriañañe naho Filolofañe

⁴ Mañandriañe an'Andrianañahare nainai'e naho manoñoñe azo amo filolofakoo—⁵ amy te tsinanoko ty fatokisa'o amy TALÈ IESOÀ naho ty fikokoa'o o noro'e iabio —⁶ soa te hamokatse ho ami' ty faharendrehañe ze hasoa ama'o amy Norizañey ty fitaroña'o am-patokisañe. ⁷ Toe mahafale naho mañohò ahy ty fikokoa'o, amy nampanintsîñe'o ty arofo' o noro'eoy, ry rahalahy.

Ty Halalie'e i Onesimosy

⁸ Ie amy zao, ndra hoe mirearea amy Norizañey raho handily azo hanao ze mañeva, ⁹ fe o fikokoañe ty ihalaliako, zaho Paoly migainkantetse naho miprohi'IESOÀ Norizañey henaneo, ¹⁰ ie idrakadrakafako i Onesimosy anako nampiareñeko, zaho an-tsivilisily, ¹¹ ie tsy nahasoazote taolo, fa mahasoaz naho ahy henaneo. ¹² Ahitriko mb'eo am-bata'e re, ty troko 'nio, ¹³ ie ho nitanako atoa hitoroñe ahy ty ama'o amo rohy toañe ty amy talili-soay, ¹⁴ f'ie tsy ho nanao inoñ' inoñe naho tsy niera ama'o hey soa tsy ho nazitse ty hasoa ho nanoe'o an-tsatri'o. ¹⁵ Va'e zay ty nifampirià'e ama'o betebeteke handrambesa'o aze indraike ho pak' añafeafe'e aña, ¹⁶ tsy ho ondevo ka, fa lombolombo' ty ondevo, toe rahalahy isoke, mentsake amako, fa somandrake ama'o an-tsandriñe naho amy TALÈ ao.

Ty Fampitama'i Paoly i Filemona

¹⁷ Aa naho atao'o rañe'o raho, le ampihovao re manahake te zaho. ¹⁸ Fe naho eo ty nandilara'e azo ndra anaña'o songo ndra fire-fire, le ampisongò amako. ¹⁹ Zaho Paoly ty manoratse toy an-tañako. Zaho ty hañavake—tsy hataoko ty hoe te nisongoe'o amako ty fiai'o. ²⁰ Eka, ry rahalahy, hasoao raho amy TALÈ ao; ampanintsîño amy Norizañey ty troko. ²¹ Ihe atokisako te hiantoke, ty anokirako, amy te apotako te ho likoare'o i asakoy.

²² Tovo'e, añañalankaño trañion' ambahiny hitobohako, fa o halali' areoo ty itamako te hatolots' ama'areo. ²³ Mañontane azo t'i Epafra, mpindrepiprohy amako am'IESOÀ Norizañey, ²⁴ naho i Marka, i Aristarko, i Demasy, i Lioke, mpifanehake amako.

²⁵ Ty hasoa' i Talè Iesoà Norizañey amo arofo' areoo. Amena.

Hebreo

Ty Fandikoara' i Norizañey o Mpitokio

¹ Haehae zay, nitsara beteke naho an-tsata maro amo roaentikañeo añamo mpitokio t'i Andrianañahare, ² le an-tsa honka'e zao ro nisaontsie'e aman-tika añaamy Ana'ey, i tinendre'e handova ze he'ey, ie ty nanoa'e ty voatse toy*; ³ Ie ty fireandrea' i enge'ey naho ty vinta-to' i fañòva'ey, mpanohañe ze he'e ami'ty haozara' o tsara'eo, ie nañefetse o hakeontikañeo amy fañòva'ey vaho miambesatse am-pitàn-kavana† i Andindi-moneñe andikerañ' aney.

Milikoatse o Irakeo i Anakey

⁴ Ie nampiliokoareñe an-tiotio' o anjelio, le nampandovaeñe tahinañe ra'elahy te am' iareo. ⁵ Fa ia amo anjelio ty nisaontsia'e ndra mb'ia mb'ia ty hoe:

Anako rehe;
anindroany ty nisamahako Azo‡
naho ty hoe:

Ho Rae'e raho, le ho Anako re§?

⁶ Ie ninday ty tañoloñolòña'e ami'ty voatse toy, le hoe ty natovo'e:
Ee te hene hitalaho ama'e
o anjelin' Añahareo.*

⁷ Hoe re ty amo anjelio:
Anoe'e tioke o anjeli'eo, vaho lelan' afo o mpitoro'eo.†

⁸ Fe hoe re amy Anakey:
Nainai'e donia ry Andrianañahare ty fiambesa'o;
Naho kobain-kavantañañe
ty kobaim-pifehea'o.

⁹ Fa nikokoa'o ty havantañañe
naho nalaiñe ty tsy fañambenan-Kake;
Aa le norizen' Añahare,
Andrianañahare'o rehe
an-tavon-kaehake ambone' o rañe'oo,‡

¹⁰ naho :
Ihe ry TALÈ, tam-pifotorañe aña ro nañoreñe o mananta' ty tane toio naho
satam-pita'o o likerañeo.

¹¹ Ho momoke iereo, fe nainai'e eo rehe;
fonga hihamodo hoe saroñe iereo;

¹² le hambañe ami'ty sarimbo
ty hañoronkoroña'o iareo,
eka, hoe sikiñe ty handimbezañe iareo.
F'ihe tsy mihotike,

naho tsy higadoñe o tao'oo.§

¹³ Le ia amo anjelio ndra mb'ia mb'ia ty nanoa'e ty hoe:
Mitoboha an-tañan-kavanako etoa
ampara' te anoeko fitongoàm-pandia'oo rafelahi'oo.*?

¹⁴ Aa vaho tsy songa arofo mitoroñe hao iereo, nahitrike hitoroñe o
handova fandrombahañeo?

* **1:2** Jao 1:3 † **1:3** Sab 110:1 ‡ **1:5** Sab 2:7 § **1:5** Sa II 7:14; Oni Ko II: 17:13 * **1:6** Sab 97:7 † **1:7** Sab 104:4 ‡ **1:9** Sab 45: 6,7 § **1:12** Sab 102: 25-27 * **1:13** Sab 110: 1

2

Hatahata Valoha'e: Mitaoa

¹ Ie amy zay, tsy mahay tsy tomiren-tika am-pininihañe o jinanjintikañeo, tsy mone handifike. ² Aa kanao niventeñe te soa oreñe i tsara nisaontsie' anjeliy, naho fonga nandilovañe ami'ty evae'e o fiolâne naho fanjeharañeo, ³ le aia ty hipolitiran-tika naho amoean-tikañe i rombake jabajaba zay? ie tam-pifotora'e aña ty namotora' i TALÈ fitaroñe, naho niventè' o nahajanjiñeo; ⁴ mbore nitaroñen' Añahare am-biloñe naho halatsâne naho sata tsitantane ankafankafa, vaho amo falalàn' Arofo Masiñeo an-satri'ey.

*Onjoneñe am-Pirekeañe**

⁵ Tsy o anjelio ty nampiambaneña i voatse ho avy isaontsian-tikañey
⁶ fa teo ty nitsaraeñe ty hoe:
 Ino ondatio, te ahoa'o, naho ty ana' ondaty te tilihe'o?
⁷ Nanoe'o ambanevanen'Añahare† heike, mbore sinabaka'o engeñe naho
 hasiñe
 naho tinendre'o ambone' o satam-pità'oo,
⁸ vaho nampivohore'o
 ambanem-pandia'e eo ze he'e.‡

Aa kanao kila nampiambaneña ama'e, le tsy ao ty napo'e tsy hivohotse ama'e. F'ie henanekeo mbe tsy onin-tika te hene nampiambaneña.
⁹ Fe fohin-tikañe i nanoeñe ambanevane' o anjelio heikey, toe IESOÀ, ie nalovilovin-kavilasy ro sinabakan' engeñe naho hasiñe, soa t'ie ami'ty fatarihan' Añahare ro hitsope-kavilasy ho a ze he'e.

¹⁰ Amy t'ie nañeva, le nanoña ze he'e, naho toe ie ty talim-pisia' ze haliforañe, ie minday anake maro mb'an-drenge, ro nifonireñe ankaloviloviaña ho Talèm-pandrombahaña iareo. ¹¹ Aa kanao songa boak' amy Raikey i mpañamasiñey naho o nefera'eo, le tsy manalatse aze te anoa'e longo, ¹² ami'ty hoe
 Ho taroñeko amo rolongokoo
 ty tahina'o§;
 ho bangoeko añivo' o fivorio.*

¹³ tovo'e: Hatokisako re.
 vaho indraike: Intoy raho, naho o amory natolon' Añahare ahikoo.†
¹⁴ Aa kanao itraofa' o anakeo tynofotse aman-dio, le rinambe'e ty hifanahake am' iereo, handrotsake amy havilasi'ey i mpanandily amy havilasiy—toe i mpañinjey; ¹⁵ vaho ho haha'e ze nondevoze' ty fihembañañe amo havilasio amo hene andro niveloma'eo. ¹⁶ Toe tsy nandrambe anjely, fa o tarira' i Abraàmeo ty nandrambesa'e‡. ¹⁷ Aa le tsy mete tsy nihambañeñe amo longo'eo amy ze he'e re, soa te ho mpisorom-bey miferenaiñe naho migahiñe aman' Añahare, hañefetse o tahi' ondatioo. ¹⁸ Aa kanao nitsoheñe an-kalovilovian-dre le lefe'e ty mañimba o tsoheñeo.

3

Mpitoroñe t'i Mosè, Anake t'IESOÀ

¹ Ie amy zao ry longo noro'e, mpitraok' amy fikoihan-dindîñeo, haraharao t'IESOÀ, Sorotà naho Mpisorom-Bey itaroñan-tikañey, ² i nigahiñe

* 2:4 Sab 8:1-9 † 2:7 Sab 8:5 Gr: ambane' o anjelio ‡ 2:8 Sab 8:4-6 § 2:12 Oni: Sab 45:17, Jao 17:6,26 * 2:12 Sab 22.22 † 2:13 Ies 8.17,18 ‡ 2:16 Ies 41:8-9

amy nanendreañ' azey hambañe amy figahiña' i Mosè amy hene anjomba'ey*. ³ F'ie vinolily hañeva àsiñe ambone' i Mosè, hambañe ami'ty anaña' ty mpandranjy traño àsiñe ambone' i trañoy. ⁴ Songa manañe ty mpandrafi'e ze anjomba, fa i Andrianañahare ty Mpamboatse ze he'e. ⁵ Toe nigahiñe amy hene anjomba'ey t'i Mosè, ie nimpitoroñe nitaroñe o mbe ho tsaraeñeo. ⁶ Fa Anake mifehe' i Anjomba'ey i Norizañey; itikañe o añañomba'eo naho tambozoren-tika ty fahasibehañe naho fatokisañe osihe' i fitamañey,

Hatahata ami'ty Tsy Fatokisañé

⁷ ie anoe' i Arofo Masiñey ty hoe:
 Anito, naho janji' areo i fiarañanaña'ey,
⁸ ko mampientetse arofo
 manahake tamy fanighañe
 añ'andro fitsohañe an-dratraratra añey,
⁹ ie nisombean-droae' areoy, naho
 namente vaho nahaisake o fitoloñako efa-polo taoñeo.
¹⁰ Zay ty nibosehako ami'ty tariratse toy, le hoe raho,
 Mandifik' añ'arofo ao nainai'e iereo, mbore tsy fohi' iareo o lalakoo,
¹¹ Aa le nifantàko an-keloke t'ie
 tsy himoak' amy fitofàkoy.†
¹² Mitaoa ry longo, he te ho zoeñe ama'areo ty troke miola, mifañito aman' Añahare veloñe. ¹³ Aa le mifañosiha boak' andro, ampara' i atao ty hoe Anito, tsy mone ama' areo ty hampientere' ty famañahian-kakeo.
¹⁴ Fa mpitraq-dova amy Norizañey tika naho vontitireñe i fifotoram-patokisañey ampara' i hahenefañey, ¹⁵ amy ho tsaraeñey ty hoe:
 Anito, naho janji' areo i fiarañanaña'ey
 ko mampientents' arofo
 manahake tamy fanighañey.‡
¹⁶ Ty ila'e nahajanjiñe ro niola, fa tsy ze hene nampiavote' Mose amy Egipite. ¹⁷ Aa ia ty niviñera'e efa-polo taoñey? Tsy o nandilatseo hao? ie nihotrak' an-dratraratra aña o lolo' iareoo. ¹⁸ Ia ka ty nifantà'e te tsy himoak' amy fitofà'ey ao? toe o tsy niantokeo? ¹⁹ Aa le onin-tika te i tsy fatokisañey ty tsy niziliha' iareo.

4

Fitofañey ho a Ondatin'Añahareo

¹ Antao arè hañeveñé, hera ho zoeñ' ama' iaia ama'areo, t'ie nilesa amy fampitamañe mbe añey: ty fizilihañe amy fitofà'ey ao. ² Toe nitaroñenye aman-tika manahake te tam' iereo i talili-soay; fe tsy nahasoa iareo i tsara nitaroñenye, amy t'ie tsy natrao' o nijanjiñe fatokisañé. ³ Itika miantekeo ro mizilik' amy fitofàñey, (ty amy tsinara'e ty hoe,
 le nifantàko an-kabosehañe
 t'ie tsy himoak' amy fitofakoy ao.*)
 ndra te nifanehafeñé boak' am-pifotora' ty voatse toy o fitoloñañeo.†
⁴ Fa eo ty tsaraeñey ty amy faha-fitoy ty hoe:
 Nitroatse amo hene fitoloña'eo, ami'ty andro faha-fito
 t'i Andrianañahare.‡
⁵ Le tinovo'e ty hoe:

* **3:2** Vol 12:7 † **3:11** Sab 95: 7-11 ‡ **3:15** Sab 95: 7,8 * **4:3** Sab 95:11 † **4:3** Jao 5:17
 ‡ **4:4** Fot 2:2

Tsy himoak' amy fitofàkoy iereo.§

⁶ Aa kanao mbe hizilike ao ty ila'e, naho nilesa ka tsy nizilik' ao ty amy fanjeharañey o nitaroñeñe valoha'eo, ⁷ le nañoriza'e andro indraike atao Anito amy nampisaontsie'e i Davide haehae atoiy amy tsara'ey ty hoe: Anito, naho janji'areo ty fiarañanaña'e ko mampientetse arofo.*

⁸ Aa naho nitolora' i Josoa fitofàñe, tsy ho nitalilie'e andro ila'e afara. ⁹ Inao, toe mbe eo ho a ondatin' Añahareo ty fañambenañe SABOTSE †; ¹⁰ amy te mitofa amo fitolofia'eo ty mizilik' amy SABOTSE'ey, hambañe aman' Añahare amy azey‡. ¹¹ Antao arè himane fizilik' amy fitofàñey, tsy mone hikapotrake am-pitsikombeañe i fanjeharañey.

¹² Toe veloñe naho mahatafetetse o tsaran' Añahareo, masioñe te amy ze fibara sambelela'e, mitrofake pak' ami'ty fifamitraña' ty fañova ami'ty arofo, naho o fangeo amo betro'eo; naho mahatsikarake o fivetsevetse naho safirin' arofoo, ¹³ vaho tsy eo ty namboareñe ze mietake ama'e; fa kila miborake naho mivendratse am-pihaino' i hamolily an-tikañey.

i Mpisorom-bey Ra'elahi

¹⁴ Aa kanao amam-Pisorom-bey nahafiranga o likerañeo tika, toe IESOÀ Anan' Añahare, le antao hifahatse ami'ty iantofan-tikañe. ¹⁵ Amy t'ie tsy amam-Pisorombey tsy mahay milèn' arofo amo halemèn-tikañe, ie nizizieñe amy ze he'e manahak' itika, fe tsy aman-tahiñe. ¹⁶ Antao arè hahasibeke hitotoke mb'amy fiambesan-kasoay, hiferenaiñañe, naho hitretrezañe an-tsang-kasotriañe.

5

¹ Toe tinendre hitoloñe ty am'ondatio, amo raha mioza aman' Añahareo, ze hene mpisorom-bey rinambe am' ondatio, hibanabana naho hisoroñe, hañefetse hakeo. ² Maha-fitretre o tsy mahilalao naho o mandrikeo re, amy t'ie arisehoan-kaosañe ka. ³ Zay ty isoroña'e ty amo hakeo' ondatio, naho o azeo ka. ⁴ Le tsy ia ty mandrambe i engeñey am-bata'e, fe rambese' ze kanjian' Añahare, manahak' i Arone. ⁵ Toe tsy nisenge ho mpisorom-bey ka i Norizañey, fe teo t'ie nanoeñe ty hoe:

Anako rehe, Anindroany
ty nisamahako azo.*

⁶ mbore teo ty nanovoña'e ty hoe:
Mpisoroñe nainai'e rehe ami'ty famosora' i Melkizedeke.†

⁷ Ie tañ' andro ama' nofotse aze, le nibanabana halaly naho hatak' an-toreo miharo ranom-pihaino amy mahahah' aze an-kavilasiy, vaho jinanjin-dre ty amy fiambanea'ey. ⁸ Aa ndra t'ie Anake, niohe' i halovilovia'ey te hivohotse. ⁹ Le ie nifonireñe ro nanoeñe lohàm-pandrombahañe tsy modo ho amo mivohotse ama'eo‡ ¹⁰ naho kinanjin' Añahare ho Mpisorom-bey am-pamosora' i Melkizedeke.

Fañosihañe Hioke amy Arofoy

¹¹ Mbe maro ty ho tsaraeñe ty ama'e, f'ie ho saro-pampidodeañe ty amy hakarèña' areo. ¹² Tsy ho ni-mpañoke hao nahareo henaneo? te mone mipay haòke amo manantam-petsen' Añahareo indraike, vaho mipay ronono fa tsy mahakama vente'e, ¹³ toe tsy zatse o tsaran-kavantañañe ze

§ ^{4:5} Sab 95:11 * ^{4:7} Sab 95: 7,8 † ^{4:9} GRIKA: SABATTISMOS: FAÑAMBENAÑE SABATA ‡ ^{4:10}
Pe II 3:8 * ^{5:5} Sab 2:7 † ^{5:6} Sab 110:4,17,21 ‡ ^{5:9} Jao 3:36, 14:14,23, 15:10, Top 3:22-23

veloñe an-dronono, fa mbe anak-ajaja; ¹⁴ toe ho a o matoeo ty mahakama vente'e, ie fa niòke am-pitoloñañe haha-fañavake ty soa ami'ty raty.

6

¹ Aa le apòn-tikañe o fañòheñe i Norizañey fototseo vaho hitoñañe mb'ami'ty haañonañe*, tsy haoreñe indraike i manantam-pisolohoañe amo sata mateo, naho ty fatokisañe aman' Añahare, ² naho ty fañòheñe i filiporañey, i fanampezam-pitáñey, i fivañonan-ko veloñey, vaho i zaka tsy modoy. ³ Le ie ty hanoen-tika naho sitran' Añahare. ⁴ Aa naho nihazavaeñe, fa nitsopeke i falalàñ-dikerañey, fa nanoen-ko mpitraok' amy Arofo Masiñey, ⁵ nikama amy saontsin' Añahare soay naho amo haozara' i sa ho aviio, ⁶ f'ie midisa-voly: le tsy ho lefe'e ty himpoly hisoloho, ie nampipeke ho am-bata'e indraike i Anan' Añaharey, hamoraborak' aze ho salareñe†. ⁷ Toe tahien' Añahare i tane isiha' i orañe mifiafia betek' ama'ey hitiria' ty àñañe mañasoa o nañalahalàñe azeoy. ⁸ F'ie mamoa fatike naho hisatse‡, le tsy jefa'e, antitotse hafatse, hagadon-ko forototoeñe. ⁹ Aa ndra te taroñeñe, ry rañetse, iantofa'ay raha soa te amy zay, toe raha minday fandrombahañe. ¹⁰ Tsy atao tsy to t'i Andrianañahare handikofa'e o fitoloña' areo aman-koko amy tahina'eio, ie miatrake o noro'eo naho toe mbe mañolotse. ¹¹ Le salalae'ay t'ie songa anjoñañe fahimbañañe hoe zay, pak' amy nitilifireñey hañenefañe i fitamàñey, ¹² aa soa re te tsy mihenekeneke, fa mitsikombe o mpandova' o fitamàñeo am-patokisañe naho am-pahaliñisañe.

To o Fampitaman'Añahareo

¹³ Amy t'ie nampitamaen' Añahare t'i Abraàme, naho tsy teo ty ambone'e hitangea'e, le nifanta amy fañova'ey§, ¹⁴ ty hoe:
Toe fitahiañe, ty hitahiako azo
naho fangitsikitsihañe
ty hampanaranàhako azo.*

¹⁵ Aa ie nitamà am-pahaliñisañe, ro nahazo i nampitamaeñey. ¹⁶ Toe mititik' aman-joke ondatio, le am-panta hamenteañe aze, soa t'ie higadoñe tsy am-pandierañe. ¹⁷ Izay ka t'i Andrianañahare, ie te hampalange amo mpandova' i nampitamañeio te tsy miova i nisafuria'ey, le nivente'e am-panta, ¹⁸ soa te ami'ty raha roe tsy mihotike—ie tsy mahay mandañitse t'i Andrianañahare, le mahazo fañosihañe fatratse tika nibotatsake mb'am-pipalirañe ao hivontititse amy fitamàñe nitaroñeñe aman-tikañey ¹⁹ ie mioreñe naho fatratse hoe vato-fantsike añ' arofon-tikañ' ao, naho mimoake an-kalo' i tsingarakarakeiy, ²⁰ i niziliha' IESOÀ fiaolon-tikañey, ie nanoeñe Mpisorom-bey nainai'e amy famosora' i Melkizedekey†.

7

I Melkizedeke Mpisoroñe

¹ I Melkizedeke 'nio, nimpanjaka' i Salema, mpisoron' Añahare Andindimoneñey, ie ty nifanalaka amy Abraàme nimpoly amy nandreba'a'e i mpanjaka rey naho nitata'e*, ² le nitolora' i Abraàme ty fahafolo' ze he'ey—ie atao Mpanjakan-kavantañañe hey, ty amy dika i tahina'ey, vaho Mpanjaka' i Salema ndra Mpanjakam-panintsíñañe; ³ ie tsy aman-drae, tsy aman-drene, tsy aman-toñon-droae, tsy aman' androm-pifotora'e, tsy

* **6:1** Mat 5:48 † **6:6** Heb 10:26-31 ‡ **6:8** Fot 3:18 § **6:13** Fot 22:16 * **6:14** Fot 22.17

† **6:20** Sab 110:4 * **7:1** FFt 14:17-20

amam-pitamperan-kaveloñe, fe nampanahafeñe amy Anan' Añaharey, mitoetse ho mpisoroñe nainai'e tsy modo.

⁴ Haraharao heike ty hara' elahi' indatiy kanao nitolora' i Abraàme raentika ty faha-folo' o kinopa'eo. ⁵ Le toe lilie' i Hake o tarira' i Levy norizan-ko mpisoroñeo ty hanontoñe am'ondatio, toe amo longo'eo, i faha-foloy, ie boak' am-pisafoa' i Abraàme. ⁶ Le i tsy toñoneñe amandroae' iareoy ty nandrambe ty faha-folo amy Abraàme vaho nitata i nampitamàñey. ⁷ Tsy kalafo te mitata zay ty zoke. ⁸ Naho atoy re le rambese' ondaty mbe hihomakeo i faha-foloy, fe i añey ro taroñeñe te veloñe. ⁹ Aa ie tsaraeñey, i Levy mpandrambe i fahafoloy, ro nandoa ty faha-folo añamy Abraàme, ¹⁰ amy t'ie tampisafoan-droae'e ao te nifanalaka amy Melkizedeke.

Mpisoroñe manahake i Melkizedeke

¹¹ Aa naho nahafonitse ty fisoroña' i Levy (toe ama'e ty nandrambesa' ondatio Hake) le inoñe amy zao ty ipaiañe mpisoroñe hitroatse amy famosora' i Melkizedekey, fa tsy amy famosora' i Aroney? ¹² Aa kanao vaoeñe i famosorañey, tsy mahay tsy vaoeñe ka t'i Hake. ¹³ Amy te foko hafa i tsaraeñey, le tsy ama'e ty nitoron-kitrely. ¹⁴ Toe fohiñe te tarira' i Joda i Talèn-tika, fe tsy nisaontsie' i Mosè fisoroñañe t'i Joda, ¹⁵ miha-malange te mpisoroñe manahak' i Melkizedeke ty nitroatse, ¹⁶ ie tsy nanoeñe am-pepè' i Hake ty am-panoñonan-drae, fa an-kaozaran-kaveloñe tsy modo. ¹⁷ Ty hoe ty nitaroñe'e:

Mpisoroñe nainai'e rehe

Amy famosora' i Melkizedekey[†].

¹⁸ Toe miha-modo i fepetse taoloy ami'ty hamavazoa'e naho ty tsy fahalefea'e, ¹⁹ (amy te tsy eo ty nahatafetera' i Hake), fe nipoteake ty fitamàñ-tsoa, hitotofan-tika aman' Añahare; ²⁰ mbore nanoeñe am-panta, ²¹ (toe tsy fanoeñ' am-panta o mpisoroñeo, f'itoy ro am-panta, ie nanoeñe ty hoe:

Toe nifanta t'IEHOVÀ vaho tsy hihotike:

Mpisoroñe nainai'e rehe.[‡]

²² Antsake t'ie ho fañina soa, amy te mitsoak' aze t'IESOA.

²³ Maro i mpisoroñe rezay, ie tsy mijadoñe am-pitoloña'e fa agadon-kavilasy. ²⁴ Fa itiñañe ka, kanao mitoloñe nainai'e, ro am-pisoroñañe tsy ifandimbezañe. ²⁵ Zay ty talim-pahahenefa'e rombake do'e o mitotok' aman' Añahare añama'eo, ie veloñe nainai'e hihalaly ho a iareo.

²⁶ Mañeva an-tika i Mpisorombey zay: ie masiñe, tsy aman-tahiñe, tsy aman-kila, miavak' amo aman-kakeoo, vaho nonjoneñe ambone' o likerañeo. ²⁷ Ie tsy mipay boak' andro, manahake o mpisoroñe taoloo, ty hañenga soroñe ho amo tahi'eo hey vaho ho amo hakeo' ondatio§. Fa nanoe'e indraik' avao ie nañenga i fañòva'ey. ²⁸ Oriza' i Hake t'indaty aman-kila ho mpisorom-bey; fe i tsara am-panta sinokitse tafara' i Hake ty nañorizañe i Anake nifonireñe ho nainai'ey.

8

Mpañalañalañe ami'ty Fañina Soa

¹ Aa ty amy nitaroñeñe rezay: Inao ty tali'e: Aman-tika i Mpisorombey zay, i nampiambesareñe an-kavanam-piambesa' i Andindimoneñe

† 7:17 Sab 110:4 ‡ 7:21 Sab 110:4 § 7:27 Boak' Andro: toe Yom Kipore, 10 Sa'tse.

andikerañe añey, ² mitoroñe amy efetse masiñey naho ami'ty kivoho to naore' i TALÈ fa tsy ondaty. ³ Toe songa tinendre hañenga banabana naho soroñe o mpisorom-beio; aa le tsy mahay tsy amam-pañenga ka itoy. ⁴ Mbore, ie tan-tane atoy, tsy ho nimpisoroñe, amy te mbe eo ty mpisoroñe maro mañenga banabana ty amy Hâke, ⁵ mitsikombe naho manalinjo o andindiñeo; toe nihatataeñe t'i Mosè, ie ho nañoreñe i kivohoy, ami'ty hoe:

Inao, hoe re, te hene ampanahafe'o amy sare natoro azo am-bohitsey.*

⁶ Fe nahazo fitoroñañe fanjàka te amy zay re henaneo amy te ie ty mpañalañalam-pañina soat[†], mifototse am-pitamàñe soa te ama'e. ⁷ Aa naho tsy nanan-kila i fañina valoha'ey, le tsy nipaiaeñe ty faharoe. ⁸ Fa ninjè'e ami'ty hoe:

Inao, ho tondroke ty andro, hoe t'IEHOVÀ,

te hilaharako fañina vao

amy anjomba' Israele

naho amy anjomba' i Joday—

⁹ tsy manahake i fañina nanoeko

aman-droae' iareo

amy andro nitanatanàko

vaho niaolòako iareo

niakatse an-tane Mitsraimeiy;

amy t'ie tsy nahatañe i fañinakoy,

le niambohoako, hoe t'IEHOVÀ.

¹⁰ Zao ka ty fañina horizako

ami'ty anjomba' Israele,

naho fa aña i andro rey,

hoe t'IEHOVÀ.

Hajoko an-tro' iareo ao i Hâ-koy

naho ho sokireko añ'arofo' iareo ao:

le ho Andrianañahare' iareo raho,

vaho h'ondatiko iereo.

¹¹ Le tsy songa hifañoke o mpitrap-pimoneñeo, naho tsy sindre hanao aman-drahalahi'e,

ty hoe: Mahafohina IEHOVÀ,

amy te fonga hahafohiñe ahy,

ty kede pak' an-joke'e.

¹² Fa ho ferenaiñako ty hatsivokara'iareo,

vaho tsy ho tiahiko ka o tahi' iareoo.[‡]

¹³ Ie nanao ty hoe: Vaoeñe, le fa nampiantere'e i taloy, le fa himosaoñe o raha mihamodo naho miha-antetseo.

9

Fitalahoñañe amy Kija' ty Tane toiy

¹ Toe amam-pañem-pitalahoñañe miavake i fañina taloy, naho toetse miavake an-tane atoy. ² Nihajarieñe ty kibohotse, amy valoha'ey ao i mpitam-pailoy naho i talatalay, vaho i fampiatrefañe mofoy; ie i efetse miavakey. ³ An-kalo' i lamba fañefetse faharoy ty kivoho atao : i Masiñe do'ey, ⁴ ama'e ao i fañembohañe volamenay naho i vatam-pañina nohoñem-bolamena ami'ty lafe'e iabiy, tama'e ao i korojy volamena nañajàñe maney, naho i kobai' i Arone nibotibotiy, vaho i takelam-pañina

* 8:5 Avo 25:40 † 8:6 Heb 9:15, 12:24 (in telo ato) ‡ 8:12 Irm 31:31-34, Oni: Heb 10:16-17

rey; ⁵ nitongoa ama'e eo i kerobe aman-engeñe rey nañaloke i kapem-pañeferañey, fe tsy sindre habeja'ay i tsaraeñey.

⁶ Ie nihajarieñe hoe zay i raha rey, le mimoake boak' andro amy efetse valoha'ey o mpisoroñeo mitoloñe amy fitalahoñaey. ⁷ Fe amy faha-roey, le indraike boa-taoñe ty iziliha' ty mpisorom-bey avao, naho tsy mahay tsy minday lio ho banabanaeñe ty amo tahi'eo vaho ty amo hakeo' ondatio*.

⁸ Abeja' i Arofo-Masiñey te mbe tsy misokake ty homb' amy toetse masiñey ao naho mbe mijadoñe i kibohotse valoha'ey. ⁹ (Fañòharañe ami'ty henaneo izay,) ama'e ty banabanaeñe o enga naho soroñe tsy mahaheneke ty mpitalaho am-pitsakorea'e ao, ¹⁰ amy t'ie mahakama naho finomeñe vaho fisasàñe avao—fañè amo nofotseo, najadoñe ampara' ty sa fañavaoañe.

¹¹ Aa ie totsake eo i Norizañey, mpisorom-bei' o raha fanjàka ho avio, aman-kivoho soa naho fonitse te amy teoy, ie tsy nanoem-pitâñe, vaho tsy ami'ty voatse toy, ¹² le tsy ami'ty lion'ose ndra temboay fa amy lio'ey ty niziliha'e amy toetse masiñey indraike nahafonitse, ie fa ama'e ty fañahàñe tsy modo. ¹³ Aa naho ty lio' o oseo naho o baniao vaho ty lavenon-kiloa nafitse amo maleotseo ro mañefetse ho ami'ty fañaliovañe o nofotseo, ¹⁴ sandrake ty lio' i Norizañey añamy Arofo tsy modoy, ie nengae'e tsy aman-kila aman' Añahare i fañòva'ey, ro hahalio ty arofo' areo amo sata-mateo, hitoroñe an' Andrianañahare veloñe.

¹⁵ Zay ty maha mpañalañala' i fañina vaoy aze, handrambesa' o kinanjio i lova nainai'e nampitamañey—ty amy fañorihan-dio mijebañe iareo amo fandilarañe ambane' i fañina valoha'ey. ¹⁶ Fa amo fañinao, tsy mete tsy henefañe te mate i raha mamente i fañinay. ¹⁷ Toe agado' i raha linentay i fañinay, Amy t'ie tsy mijadoñe naho tsy fa mate heike i raha mamente azey. ¹⁸ Toe tsy niventèñe ka i fañina valoha'ey naho tsy an-dio. ¹⁹ Aa ie nitaròñe' i Mosè am'ondaty iabio ze hene fañè' i Hake, le rinambe'e ty lion-temboay naho ose miharo rano naho hasiñe mena naho seva vaho nafitse'e amy bokey vaho am'ondaty iabio, ²⁰ ami'ty hoe:

Intoy ty liom-pañina

linilin' Añahare ama' areo.[†]

²¹ Mbore nafitse'e amy kivohoy naho amy ze hene voròvom-pitalahoñañe i lioy. ²² Aa naho amy Hake, didý tsy fonga eferan-dio, vaho tsy eo ty fañahàñ-kakeo naho tsy ampiorihan-dio.

Ty lio' i Norizañey

²³ Aa le tsy mahay tsy neferañe amy rezay o sarendrahan-dikerañeo, fe nanao soroñe ambone' izay o raha an-dikerañeo. ²⁴ Tsy nizilik' antoetse masiñe namboarem-pitâñe i Norizañey, (i nitsikombe i toe iey) fa an-dikerañe ao, hiatrefa'e aman' Añahare henaneo ho an-tika. ²⁵ Ie ka tsy hitolom-pañenga i fañòva'ey (manahake ty fimoaham-pisorombey boataoñe reketse ty lio tsy aze); ²⁶ Naho tsy zay, tsy mete tsy nitolom-pilofeke re boak' ami'ty fañamboareñe ty voatse toy. F'ie henaneo an-tsàñ-konka'e toy te niboake indraik' avao hañefetse o tahiñeо amy nisoroña'ey i fañòva'ey. ²⁷ Fa manahake te linahatse ho a ondatio ty hivetrake indraik' avao, vaho i zakay, ²⁸ zay ka i Norizañey, ie nisoroñañe indraik' avao hivave ty hakeo' i màroy‡ ro mbe hitotsake fañindroe'e, tsy ty amo hakeoo, fa ty handrombake o mitamà azeo.

* 9:7 Vol 15:15-28 † 9:20 Avo 24.8 ‡ 9:28 Ies 53:12

10

Ty Fisoroña'e Indraike avao

¹ Amy Hake ao ty fanalinjoañe o raha fanjàka ho avio, fe tsy ty vintanto' o rahao, ie le lia'e tsy fonireñe an-tsoroñe engaeñe boa-tao-boa-taoñe o mitotoke mb'eo. ² Naho tsy zay, tsy ho nijihetse hao o fissoroñañe? amy te tsy ho nioveovèn-tahiñe ka o fa neferaño. ³ Fe amy fisoroñañey ty faniahian-kakeo boa-taoñe, ⁴ fa tsy 'mbia mahahaha hakeo ty lio' o baniao naho o mpirai-liao. ⁵ Aa le hoe re te mizilik' an-tane atoy:

Tsy nipay soroñe naho enga rehe,
fa sandriñe ty añajaria'o ho ahiko;

⁶ Tsy nirei'o tave o enga noroañe
naho o soron-kakeoo.

⁷ Le hoe raho:
Intoy raho, ry Andrianañahare,
nim'b'etoan-draho hanao ty satri'o,

fa amy boke-pelekey ty nanokirañe ahy.*

⁸ Ie nanao ty hoe heike: Tsy paia'o o soroñe naho o banabanao naho o enga oroañe vaho o engan-kakeoo, toe tsy rei'o tave (ze engaeñe ty amy Hàke)† ⁹ le tinovo'e ty hoe: Intoy! nim'b' etoan-dRaho hanao ty satri'o‡. Nasita'e i valoha'ey hampijadoña'e i faharoey; ¹⁰ ie an-tsatri'e ty nañefetse antika amy nañengàñe indraike mahaheneke ty fañòva' IESOÀ Norizañey.

¹¹ Mijohañe eo mitoroñe boak' andro ze hene mpisoroñe mitolom-pañenga i soroñey avao, ze tsimbia mahahaha hakeo. ¹² Fa ie ka, naho fa nañenga soroñe raike, le nahaheneke efe-tahiñe ho nainai'e donia, niambesatse am-pitàn-kavan'an' Añahare eo, ¹³ mandiñe, ampara' te hanoeñe fitongoà-pandia'e o rafelahi'eo§. ¹⁴ Fa i banabana raikey ty namonira'e ho nainai'e tsy modo o nefera'eo. ¹⁵ Taroñe' i Arofo-Masiñey aman-tika ka ty hoe:

¹⁶ Intoy ty fañina hanoko am' iereo
naho modo i andro rezay, hoe t'i TALÈ;
Hajoko añ'arofo' iareo ao i Ha-koy
naho ho sokireko
am-pivetsevetse' iareo ao,

¹⁷ vaho tsy ho tiahiko ka
o hakeo naho tahi' iareoo.*

¹⁸ Ie nafahañe o fandilarañe, le tsy paiañe ka ty engan-kakeo.

Fikanjiañe Hivontitise

¹⁹ Ie amy zao, ry longo, kanao mahasibeke fimoak' amy toetse loho-masiñey tika amy lio' IESOÀ, ²⁰ amy lalañe vao naho veloñe noriza'e ho antikañe misoroke i lamba fañefetsey —toe i fañòva'ey; ²¹ itika amam-Pisoroñe Bey mpifehe i anjomban' Añaharey, ²² le antao hitotok' aze añ' arofo mazava, lifo-patokisañe mahafiato, naho namitsezañe ty amo vetsevetse ratio o tron-tikañe vaho nampandroañe an-drano mikanitsoke† o sandrin-tikañe, ²³ antao hilozohan-tika taroñe i fitaman-tikañey, tsy hitroetroe, (amy te migahiñe ty Nampitama). ²⁴ Le antao hifañaoñe naho hifampañosike hikoko vaho hanao sata soa‡, ²⁵ le tsy hapoke o favorintikañe, manahake ty fanoe' o ila'eo, fe mifañosiha, àntsake te oni' areo mitotoke i andro zay.

* **10:7** Sab 40:6-8 † **10:8** Sab 40:6 ‡ **10:9** Sab 40:8 § **10:13** Sab 110:1 * **10:17** Irm 31:33,34;
Oni Heb 8:8-12 † **10:22** Iek 36:25 ‡ **10:24** Mat 16:27

Hatahata 4 : Hankàñe te Misitake

²⁶ Aa naho mitolom-pandilatse avao tika, ie mahafahiñe ty hatò, le tsy eo ka ty isoroñan-kakeo§, ²⁷ te mone fandiñisañe zaka ankarevendreveñañe, naho fisoloborañ' afo mampitomontoñe o rafelahio*. ²⁸ Vonoeñe tsy an-tretrè ty tsy mañaoñe ty Hà' i Mosè ami'ty valolomboñe telo ndra roe. ²⁹ Lombolombo zay ty fandilovañe mañeva ze mandialia i Anan' Añaharey ambanem-pandia'e, naho manao ty lio' i fañina nañefets' azey ho tsy malio, vaho miteratera i Arofon-kasoay? ³⁰ Fohin-tikañe i nanao ty hoe:

Ahy o famaleañe, zaho ty hañavake

le ty hoe:

Hizaka on†dati'eo t'IEHOVÀ.

³¹ Maharevendreveña te mijoñe am-pitàn' Añahare veloñe ao.

³² Tiahio o andro taoloo, inahareo nihazavaeñe ro nahafeake fihotakotahan-kaloviloviaeñe, ³³ beteke nisambæñe t'ie nonjirañe naho nampisoañeñe, beteke nireketse amo nanoañe i hoe zaio. ³⁴ Amy te niferenaiña' areo, zaho an-drohy, vaho nahaehak' anahareo te nikopahambara, fa nahafahiñe an-troke t'ie amam-barra fanjàka tsy ho modo andindiñe ao. ³⁵ Aa le ko farieñe ty fatokisa' areo, fa bey ty tambe ama'e. ³⁶ Imaneo fahaliñisañe, soa t'ie manao o satrin' Añahareo ro handrambe i nampitamaeñey. ³⁷ Amy te aniany ty hitotsaha'e le tsy hihenekeneke.

³⁸ Ho veloñ' am-patokisa'e ty vantañe,
F'ie misitake, le tsy ho no' ty troko.‡

³⁹ Toe tsy mpiamo mitsilofîñe ho rotsaheñeo tika, fa mpiamo mahafiatoo, hañarovam-piaiñe.

11

O Fatokisañe

¹ Fatokisañe ty mamente o raha tamaeñeo, ty fampibentarañe o raha tsy oniñeo. ² Ie ty nahazoa' o taoloo to. ³ Fatokisañe ty ahaoniñan-tika amy Tsinaran' Añaharey, te tsy nalaha'e amo raha oniñeo o raha miboake amo sào.

Ty Abela, i Enoke, i Noe

(Fot. 4.1-16; 6,6-8.22)

⁴ Fatokisañe ty nañengà' i Abela aman' Añahare soroñe soa te amy Kaina, vaho nitaroñeñe te vantañe, ie nitsaraen' Añahare i banabana'ey, toe misaontsy re ndra te nihomake. ⁵ Fatokisañe ty nampionjoneñe i Enoke tsy handia havilasy, ie tsy nitendreke fa rinamben' Añahare*; ie nitaroñeñe taolo' ty nampionjonañe aze te nisohen' Añahare. ⁶ Tsy mahafale Aze t'ie tsy amam-patokisañe. Amy te ze hañarine aman' Añahare, tsy mete tsy matoky t'ie eo, naho manambe ty mitsoek' aze. ⁷ Fatokisañe am-pañeveñañe ty nandranjia' i Noe lakan-katae ty amy hatahatan' Añaharey o raha mbe tsy rendrekeo, handrombahae'e i hasavereña'ey, ie ty namarañe ty tane bey toy, naho nampandovañe i havantañam-patokisañey.

§ **10:26** Heb 6:6, 9:7, Vol 15:15-28 * **10:27** Ies 26:11 † **10:30** Its 32.35-36 ‡ **10:38** Kab 2,3-4

* **11:5** Fot 5:24

Ty Fatokisa'i Abraàme

(Fot 15.1-6;21.1-7;22.1-14; 48.8-16; 50.22-15)

⁸ Fatokisañe ty niantofa' i Abraàme, ie kinanjy hienga mb'an-tane ho rambese'e afara ho lova, vaho nionjoñe mb'eo tsy nahaftohiñe ty hombà'e.
⁹ Fatokisañe ty nañialoa'e an-tane nampitamaeñey, hoe ambahiny, ie nimoneñe an-kivoho mindre am' Letsake naho Iakobe, mpitrap-lova ama'e amy fampitamàñey. ¹⁰ Toe i rova reke-manantañey ty nitamà'e, i rinanjin' Añahare naho tsinene'ey. ¹¹ Fatokisañe ka, ty nampaozatse i Sarèe hiareñe, naho nahasamak' anake ndra te losotse o taoñe nahampela azeo, ie niantoke te migahiñe i Nampitamay. ¹² Aa le sinama' i fa hihomakey, ty mira ami'ty hatozantoza' o vasian-dikerañeo naho o faseñe añ' olondriake tsy lefe iaheñeo†.

¹³ Songa nivilasy am-patokisañe, tsy tam' iereo o nampitamañeo‡; fe nioni' iereo tsietoimoneñe aña, le nisalalaeñe, vaho niantofa' iereo t'ie renetane, mpañialo an-tane atoy. ¹⁴ Ampalangese' o mitaroñe izaio te mitamà tanen-droae. ¹⁵ Aa naho nimaniña' iareo i tane niboahañey, le nalalake t'ie ho nimpoly. ¹⁶ F'ie nitamà ty soa—toe i andindìñe añaey. Ie amy zay, tsy mahasalatse an' Andrianañahare ty atao Andrianañahare' iareo vaho nihalankàña'e rova.

¹⁷ Fatokisañe ty nañengà' i Abraàme t'Ietsake, ie nitsoheñe; nengae' i nandrambe i fitamañeiy i bako toka'ey, ¹⁸ ie nanoañe ty hoe:

Am' Isaka ty hikanjiañe o tarira'oo. §

¹⁹ Natokisa'e te lefen' Añahare ty hampitroatse ty nihomake, le ao ty nandrambesa'e aze am-pandrazañañe. ²⁰ Fatokisañe ty nitatà' Isaka t'Iakobe naho i Esave amo raha ho avio. ²¹ Fatokisañe ty nitatà' Iakobe fa hihomakey i ana' Iosefe rey vaho nitalaho t'ie niato andoham-pitoño'e. ²² Fatokisañe ty nitokia' Iosefe, ie fa hèta'ey, ty hiavota' o nte-Israeleo vaho toe nafè'e o taola'eo.

Ty Amy Mose

Ftv 2.1-10; 12.31-51

²³ Fatokisañe ty nañetahan-droae' i Mosè aze te nitoly, naho nioni' iareo t'ie ajaja soa*, vaho tsy nahahembañe iareo ty nafè' i mpanjakay. ²⁴ Fatokisañe ty nifoneña' i Mosè tsy hatao ana' ty anak' ampela' i Farao, ie fa niañoñ'ay, ²⁵ te mone jinobo'e ty hifeake fampisoañañe mindre am'ondatin' Añahareo, ta t'ie hanañ'andro hieranerañe an-kakeo; ²⁶ natao'e te vara mandikoatse ty harea' i Egipte ty ìnje' i Norizañey, amy te nitalakese'e i tambe'ey. ²⁷ Fatokisañe ty niengà'e i Egipte, tsy nihembaña'e ty haviñera' i mpanjakay; fe nifeake hoe te niisa'e i tsy isakey. ²⁸ Fatokisañe ty nahahenefa'e i Fihelañey, naho i fitse-lioy, tsy hipaoha' i mpanjaman-tañoloñolòñañey iareo.

Ty Fatokisa'o nte-Israele ila'eo

²⁹ Fatokisañe ty nitoaña' iareo i Riake Menay hoe an-tane maike, fe nagedra'e o nte Egipte nahavany nisoroke ama'eo. ³⁰ Fatokisañe ty nampiforetrake o kijoli' i Jerikòo, ie niariaria' iareo fito andro. ³¹ Fatokisañe ty tsy nitraofa' i Rahaba karapilo fivetrap' amo nanjehatseo ie nandrambe i mpifilo rey am-panintsiñañe.

³² Aa inon-ka ty hataliliko? Fa hilesa ty andro naho taroñeko i Gideona naho i Baraka naho i Samsone naho i Jefta, i Davide ka, naho i Samoela vaho o mpitokio, ³³ ie am-patokisañe ro nampiambane

† 11:12 Fot 15:5, 22:17 ‡ 11:13 Heb 11:39 § 11:18 Fot 21,12 * 11:23 Avo 2:2

fifeheañe, nitolon-kavantañañe, nahazo fampitamàñe, nampsitsiteke ty vavan-diona, ³⁴ namono ty afo nisotratràke, nibolititse ami'ty lelam-pibara, ni-haozareñe te naifoifo, nifanalolahy añ'aly vaho nampitriban-day o lahin-defon' ambahinio. ³⁵ Rinambe' o rakembao o vilasi' iareoo te vinañon-ko veloñe; nisamporerahañe ty ila'e nitoky tsy hahañe, handrambesa' iareo ty fitroarañe soa, ³⁶ nitsoehem-pañinjeañe naho firiso ty ila'e, mbore vinahotse vaho najo am-pandrohizañe ao. ³⁷ Finetsabato iereo, linily lasý, nizizieñe, vinono am-pibara, nirererere an-kolits' añondry naho holits' ose, nibangý, niforekekèñe, nivolevolèñe— ³⁸ tsy nañeva iareo ty voatse toy—nisariosario an-drastraratra aña naho am-bohitse ao naho an-dakato vaho an-kobo' ty tane toy ao.

³⁹ Ie iaby rezay, niventem-patokisañe, fe tsy nandrambe i nampita-maeñey[†]. ⁴⁰ Amy te lombolombon-kasoa ty natolon' Añahare aman-tika, te tsy ho fonireñe iereo naho tsy itika.

12

Mamere o Ana'eo t'i Andrianañahare (Oha 3.11-12)

¹ Aa kanao oniñe t'ie iarisehoa' ty fandrahoñam-balolombeloñe ra'elahy, antao hampipoke ze ilogologoañe naho o hakeo mamehefehe antikañeo, le antao hilay am-pisalalañe i tsikiaviavy nalihatse aolon-tikañey, ² ie faharem-pihaino t'IESOÀ, mpañoreñe naho mpampañeneke i fatokisan-tikañey, ie, ty amy hafaleañe ho azo'e, nifeake i hatae ajaleiy, nanirika i hasalarañey vaho miambesatse am-pitàn-kavanam-piambesan' Añahare eo.

³ Tsakoreo i nahafeake ty fanjehara' o lo-tserekeoy, tsy mone ho mamak' an-stroke nahareo vaho hamoe'ay. ⁴ Mboe tsy nidrikiñe pak' am-piorihan-dio nahareo nigarabiñe amo tahiñe, ⁵ mbore nihaliño' areo i vere tinaroñe ama' areo hoe aman' amory:

O anake, ko sirikae'o ty fandilova' i IEHOVÀ

ndra mamoe'ay te endaha'e,

⁶ fa lilove' IEHOVÀ o kokoa'eo,

vaho lafae'e ze anake no'e.*

⁷ Aa le mifeaha'e lafa; amy te ibeizan' Añahare ho anake, fa ia ty anake tsy lafaen-drae'e? ⁸ Aa naho tsy liloveñe nahareo, ie hene itraofañe, le anak' amontoñe fa tsy anake. ⁹ Toe nanan-droae'e am-batañe tika, ie nandafa naho niambanean-tika; tsy kitra'e hiandaly aman-dRaen' arofo tika soa te ho veloñe! ¹⁰ Toe nilafae' iereo betebetek' avao tika ami'ty natao' iareo hahasoa, antsake te an-kasoa i azey hitraofan-tika an-kamasiña'e. ¹¹ Toe tsy mahafale heike ze fandilovañe, fa manaintaiñe; F'ie aña, mamao havantañañe naho fanintsiñañe o niok' ama'eo[†]. ¹² Aa le

onjono o fitàñe migebañe,

naho o ongotse malejolejoo[‡],

¹³ le avantaño ty fañaveloam-pandia' areo§

tsy hakatsoke i hakepehañey,

fa ho jangañeñe*.

Hatahata tsy Hifankalaiñe

* **11:39** Heb 11:13 * **12:6** Rzs 3:11,12 † **12:11** Its 8:2 ‡ **12:12** Ies 35:3 § **12:13** Rzs 4:26
* **12:13** Iob 5:18, Rzs 3:8

¹⁴ Mimanea fifampilongoaÑe amy ze hene ondaty, naho fiavahaÑe, fa tsy ia ty hahaoniÑe i TALÈ t'ie tsy ama'e. ¹⁵ Mijilova, tsy mone hilesa ami'ty hasoan' Añahare, hera hitiriam-baha-mafaitse hañembetse, haniva ty maro. ¹⁶ He ao ty mañarapilo, ke ty votro manahak' i Esave nandetake i hatañoloñoloña'ey hikama hanen-kedekedeke[†]. ¹⁷ Toe fohi' areo t'ie aÑe, nipay handova i tatay fe niarinjeÑe, tsy tendrek' aze ty hisoloho ndra te nimanea'e an-drano-maso.

¹⁸ Tsy nivotrak' amy vohitse tsy hay tsapaeÑey nahareo, i misotratrake afoy, ndra amy fimoromoroñaÑe naho figoboñaÑey naho amy talio-beiy; ¹⁹ naho amy fipopòn' antsivay, vaho amy feon-tsaray, i nitoreova' o nijanjiÑeo te tsy hisaontsiaÑe i tsaray ka[‡], ²⁰ amy te tsy nileo' iareo i nandiliaÑe ty hoey:
ndra te biby ty mitsapa i vohitsey
le haretSAM-bato.[§]

²¹ Aa akore ty harevendreveñaÑe nizoeÑe eo, kanao nanao ty hoe t'i Mosè:
Mitititik' an-kanifan-draho.*

²² Fe nimb'am-bohi-Ziona mb' etoa nahareo, mb' an-drovan' Añahare veloÑe, Ierosaleman-dikeraÑey, naho mb' an-dahialen' anjely, ²³ mb' amy fivorin-tañoloñoloñaÑe misokitse añaraÑe andindiÑe ao naho mb' aman' Añahare mpizaka ie iabiy, naho mb' amo arofo' o vantaÑe nifoniraÑeo, ²⁴ naho mb' amy IESOÀ, mpañalaÑalam-pañina vao, vaho mb' amy lio nafitse mivolan-draha soa te amy Abelaiy.

²⁵ Asoao tsy ho lâne' areo i misaontsiy. Fa naho tsy nahabolititse o nikiho i nañatahata iareo an-tane atoiy, sandrake o mitsambolitoke i mampitao boak' andindiÑe aoio. ²⁶ Toe nampiozoÑozòÑe ty tane toy i fiarañanaÑa'ey, fa hoe ty nampitamae'e henaneo,
Ho tovoÑako indraike:
te tsy ty tane toy avao
ty hampiezeÑezeÑeko, fa o likeraÑeo ka.[†]

²⁷ I hoe: Ho tovoÑaÑe indraike, mampalange te haveve o mete ezeÑezeÑeÑeo, o raha namboareÑeo, soa te hidõñe eo o tsy mete ezeÑezeÑeÑeo. ²⁸ Aa kanao mandrambe fifeheaÑe tsy mete hasitse tika, le manintsiÑa, hitoroÑe an' AndrianaÑahare ami'ty fañevà'e am-piambaneaÑe naho fañevèñaÑe, ²⁹ amy te
Afo mamorototo
t'i AndrianaÑaharen-tika.[‡]

13

FitoroÑaÑe Non' AndrianaÑahare

¹ MitoloÑa am-pikokoan-dongo. ² Ko ado' areo ty fampiantraÑoaÑe ambahiny, amy t'ie ro nampiantraÑoa' ty ila'e anjely fe tsy nahafahiÑe.

³ Tiahio o an-drohio hoe te mindre mirohy ama'e, naho o samporeraheÑeo kanao an-tsandriÑe ka nahareo. ⁴ Ee te hene hiisy o fanambaliaÑeo vaho tsy ho leoreÑe i tihiy amy te zakaen' Añahare o mpañarapiloo naho o manao fioloram-palio. ⁵ Le asoao tsy ho an-stroke ao ty fikiràÑe, mierañeràÑa amo fanaÑa' areoo, ty amy tsara'e ty hoe:

Le lia'e tsy hienga azo raho

vaho tsy haforintseko.*

⁶ Le hahavany hanao ty hoe tika:

[†] 12:16 Fot 25:32-33 [‡] 12:19 Avo 20:19 [§] 12:20 Its 5:6 ; Avo 19:12-13 ^{*} 12:21 Its 9:19

[†] 12:26 Kag 2:6 [‡] 12:29 Its 4:24 ^{*} 13:5 Its 31:6

I TALÈ ro mpañimb'ahiko;
tsy ho hemban-draho
ino ty hanoe' ondaty amako[†]

⁷ Tiahio o manan-dily ama'areoo, ie nisaontsy ty tsaran' Añahare ama' areo, naho ty havokaram-pañaveloa' iareo vaho tsikombeo ty fatokisa' iareo. ⁸ Tsy mihotike t'IESOÀ Norizañe, ndra omale, ndra androany, ndra nainai'e donia. ⁹ Asoao tsy hampitsile' o fañòhañe ankafankafa mañembetseo[‡]. Mahasoa ty arofo te ampaozareñe am-patarihañe fa tsy amo raha kamaeñe, ie tsy nahasoa o nitoloñe ama'eo. ¹⁰ Aman-kitrely tika tsy anaña' o mpitoron-kivohoo zo ikamañe. ¹¹ Fa oroañe alafe' i tobey ty vata' o biby angala' o mpisoram-beio lio hendese'e amy toetse masiñey ao ty amo hakeoo. ¹² Toe nijale alafen-dalam-bey ao ka t'IESOÀ, hañefera'e ondatio amy lio'ey. ¹³ Antao arè, homb'ama'e, alafe' i tobey aña, hivave o fañinjeañ' azeo. ¹⁴ Tsy aman-drova tsy ho modo atoy tika, fe misalala i hitotsakey. ¹⁵ Aa le ie abey ty hibabanaban-tika engan-tsabo nainai'e aman' Añahare, ty vokam-pivimby[§] mibango i tahina'ey. ¹⁶ Le ko apo' areo ty fanoan-tsoa, naho ty fifañaoñañe, fa non' Añahare t'ie banabanaeñe.

¹⁷ Mivohora amo mpiaolo' areoo, le iambaneo, fa iereo ro mpañambem-piai'areo hoe ondaty tsy mahay tsy hamolily. Efao abey iereo hitoloñe an-kaehake, fa tsy aman' anahelo tsy hahasoa anahareo.

¹⁸ Mihalalia ho anay, fa iantofa'ay te mazava ty tro'ay, toe satri'ay ty hañavelo an-kavañonañe amy ze he'e. ¹⁹ Aa le onjoneko ama' areo ty osike hanao zay, soa te hampolieñe ama' areo masika raho.

²⁰ I Andrianañaharem-panintsiñañey abey, i nampitroatse i Mpiarak' añondry ra'elisy boak'an-kavilasiy, amy liom-pañina tsy modo' IESOÀ Talèn-tika, ²¹ ro hampañeneke* anahareo amy ze hene sata soa hitoroña'areo amo satrie'eo, ie hitoloñe aman-tika[†] ze no'e am-pivazoho'a'e, añam' IESOÀ Norizañey: aze ty engeñe nainai'e tsy modo. Amena.

²² O ry longo, ehe iantofa ty fañisohañe sinokiko bòry toy. ²³ Fohino te navotsotse t'i Timoty rahalahin-tika; aa ie pok' atoy aniany, le hindrezako hitilik' anahareo. ²⁴ Salamao iaby o mpifehe' areoo naho o noro'e iabio. Mañontane anahareo o nte-Italio. ²⁵ Hasoa ama' areo iaby. Amena.

[†] **13:6** Sab 118:6 [‡] **13:9** Efe 4:14 § **13:15** Hos 14:2 * **13:21** Mat 5:48 [†] **13:21** Gal 2:20, Fil 2:13

Iakobe

1 Iakobe, fetrek'oron' Añahare naho i TALÈ IESOÀ Norizañey,
Ho amo foko folo ro'amby miparaitake an-tsese-tane añaeo: Talilio areo.

Tsoke naho Zizy

2 Ee t'ie hatao ho hafaleañe pea, ry longo naho mizo fitsohañe ankafankafa, **3** fohiñe te minday fahaliñisañe ty fitsohañe o fatokisa' areoo. **4** Le apoho ho heneke i fahaliñisañey, soa t'ie ho vañoñe naho fonitse tsy hipay ndra inoñ' inoñe.

5 Aa naho ama' areo ty mipay hilala, soa re te hihalaly aman' Añahare, fa hene atariha'e tsy aman-tiñe, vaho hitolorañe. **6** Ie mihalaly, le am-patokisañe tsy mifejofejo, fa am-panahafeñe ami'ty onjan-driak' asiotsion-tioke, mivalitaboake mb'etia mb'eroa, ty mitroetroe am-patokisañe, **7** Ee te tsy hitamà handrambe ndra inoñ'inoñe amy TALÈ indatiy. **8** Maletroetro amy ze fonga sata'e ty milolohe vatavo roe.

9 Ehe te hirenge ami'ty halohà'e ty longo trentrañe; **10** le amy fañivañ' azey i mpañalealey, ie himosaoñe manahake o voñen' ahetseo. **11** Ie manjirik' an-katrovòha'e reketse tio-mae i àndroy, le miheatse o ahetséo, mihintsañe o voñe'eo vaho mikò-mavo ty hasoa-vinta'e. Hoe zay ty hiforejejea' ty mpañaleale amo fitoloña'eo.

12 Haha t'indaty mahafeake fitsohañe, fa ie ventèñe ro handrambe i sabakan-kaveloñe nampitamà' i Talè o mpikoko azeoy. **13** Aa ie zizieñe t'indaty, ee te tsy hano'e ty hoe: Azizin' Añahare raho. Amy te tsy mete zizien-draty t'i Andrianañahare vaho tsy zizie'e t'ondaty; **14** f'ie songa zizieñe te kozozote' o drao raty manigìk' azeo. **15** Ie miareñe i hasiji'ey le mitoly hakeo; ie añoñ'ay i tahiñey le mampikoromake. **16** Mitaoa tsy ho fitaheñe ry longo sarotse.

17 Boak' ambone aña iaby ze raha soa natolotse naho ze falalàñe, mizotso hirik' aman-dRaen-kazavàñe; ie tsy mihotike, tsy an-kaieñe te mihodiñé*.

18 An-satri'e ty nampiareña'e an-tika ami'ty tsara to, ho karazan-doha-voa amo namboare'eo.

Mitsendreña vaho Manao

19 Aa le soa ry longoko sarotseo te songa havitrik' am-pitsendreñañe naho malea an-tsaontsy vaho malaoñe an-kaviñerañe, **20** amy te tsy mitoloñe ami'ty havantañan' Añahare ty haboseha' ondaty. **21** Apoho iaby arè ze haleorañe naho haratiañe ila'e, vaho rambeso an-trentram-po i tsara tinongy† maharombake ty fiai' areoy.

22 Toloño i tsaray, le ko mijanjiñe avao‡ hamañahy vatañe. **23** Naho mpijanjin-tsara t'indaty, fa tsy mitoloñe, le ampanahafeñe amy t'indaty mihetsoro lahabarañe. **24** Ie mahaisa-batañe naho mienga, ro mañaliño i vintañe nioni'e anianiy. **25** Fe ze mibiribiry i Hake famotsorañe hiringiri'ey§, naho mañambeñe aze, tsy manao fijanjiñam-bei-areke, fa mpifanehak' amy fitoloñañey, ro tahieñe amo sata'eo.

26 Naho eo ty mieva ho mpitalaho, fa tsy vahora'e i famele'ey le mamañahy stroke, vaho kafoake o fitalahoae'eo. **27** Zao ty fitalahoñañe hiringiri'e tsy aman-kila añatrefan' Añahare Rae: le ty fitilihañe bode-rae

* **1:17** Mal 3:6 † **1:21** Mat 13:4-23 ‡ **1:22** Mat 7:24-27, Lke 6:46-49, 8:21, Rom 2:13, Heb 4:11, Ben 22:14 § **1:25** Iak 2:12

naho vantotse amo fisotria'eo, vaho ty fifoneñañe tsy ho pepoe' ty voatse toy.

2

Adono ty Firihiāñe

¹ O ry longo, toloño tsy am-pirihiañe ty fatokisa'areo am'IESOÀ Norizañe Talèn-engen-tikañey. ² Aa naho mimoak' am-pivori' areo ao t'indaty mibange volamena, an-tsaroñe marerarera, vaho mizilik' ao ka ty rarake rotarota, ³ fe ie mañisoke i misaroñe soay, ami'ty hoe: Ingo ty toe-tsoa hiambesara'o, fe amy poi'ey ty hoe: Mijohaña ey hoek'eo, ndra ty hoe: Mikopepaha an-tomboko etoa, ⁴ tsy fa nifampirihy hao, nanao satam-pizaka raty tsereke? ⁵ Tsendreño ry longo sarotse: Tsy jinobon' Añahare hao ondaty rarake am-pihaino' ty voatse toio ho mpañaleale am-patokisañe vaho mpandova i fifeheañe nampitama'e o mikoko azeo? ⁶ Le ndra binote' areo i rarakey. Tsy ty mpiefoefo hao ty mamorekeke naho mikozozotse anahareo mb'an-jaka aña? ⁷ Tsy ie hao ty mañinje i tahinañe aman-kasy ikanjiañe anahareoy? ⁸ Aa naho toe henefe' areo i Häm-pifeheañe amy sokitse masiñey manao ty hoe:

Kokò ondatio manahake ty vata'o,*

le manao soa. ⁹ F'ie mirihy, le mandilatse naho voa-fatse amy Hake, fa mpiola. ¹⁰ Amy te ndra iaia mañambeñe ty halifora' i Hake fe mandilatse lily raike, le voa-zaka am'iaby. ¹¹ I nanao ty hoe:

Ko mañarapilo,

ro nanao ty hoe ka,

Ko mañè-doza.[†]

Fa naho tsy mañarapilo rehe, fe mamono ondaty, le mpañota Hake.

¹² Aa le misaontsia vaho mañaveloa hambañe amo hizakañe amy Hake mampidadaio[‡], ¹³ fa zaka tsy aman-tretrè ty ho amy tsy miferenaiñe. Toe reketen-tretrè ty zaka.

Fatokisañe naho Havokarañe

¹⁴ O korahe, inoñe ty mahasoa ondaty te manao ho mpiantoke f'ie tsy mitoloñe? Haharombak' aze hao o fiantofa'eo? ¹⁵ Aa naho mihalo tsy aman-ko kamaeñe ty rahalahy ndra rahavave, ¹⁶ fe anoa' ty raik' ama' areo ty hoe: Akia, manitsiña, mangatsakatsaha naho mianjaña, fe tsy itolora'o ze paia' i sandri'ey, inoñe ty soa azo'e? ¹⁷ Ie amy zao, mate ty fiantofañe miereñereñe tsy mitoloñe. ¹⁸ Hera eo ty hanao ty hoe, Amam-piantofandrehe, fa fitoloñañe ty ahy. Aboaho amako i fiantofa'o tsy maha-pi-drahay, le haboako ama'o amo satakoo ty fatokisako. ¹⁹ Iantofa'o te raike t'i Andrianañahare[§]! Hasirity! Manao soa, miantoke ka o kokolampao vaho mititititike. ²⁰ Satri'o hao, ry seretse, ty hahafohiñe te tsy vara ty fiantofañe tsy mitoloñe? ²¹ Tsy nivantañe' o fitoloña'eo hao t'i Abraàme raen-tikañe ie nañenga Isaka ana'e an-kitrely? ²² Tsy oni'o hao te nifanehak' amy fatokisa'ey o sata'eo naho nañeneke i fatokisa'ey o fitoloña'eo? ²³ Ie nahafonitse i sokitse masiñe manao ty hoey:

Niantok' an' Andrianañahare t'i Abraàme le nivolilieñe ho havantañañe ama'e*

vaho natao rañen'Añahare[†]. ²⁴ Inao! ampivantañe' i fitoloña'ey t'indaty fa tsy i fiantofa'ey avao. ²⁵ Nanao zay i Rahaba tsimirirañe, tsy

* ^{2:8} Sor 19:18 † ^{2:11} Avo 20:13-14 ‡ ^{2:12} Iak 1:25, Jao 8:32-36 § ^{2:19} Its 6:4 * ^{2:23} Fot 15:6 ‡ ^{2:23} Ies 42:8, Fi II: 20:7

nampivantàñem-pitoloñañe hao re ie nanoe'e añ'anjomba i nahitrike rey vaho nampomba'e mb'an-dalan-kafa mb'eo? ²⁶ Eka, hambañe amy te mihomake ty sandriñe tsy aman'arofo; le mate ka ty fiantofañe tsy arahen-tsata.

3

Famolahañe ty Fameleke

¹ O ry longo, ee te tsy maro ty ho mpañoke; fohiñe te ho lombolombo'e ty fizakañe antika. ² Songa mitsikapy ami'ty sata maro tika. Aa naho tsy fingane' i saontsi'ey t'indaty le vañoñe indatiy mahafehe ty vata'e iaby. ³ Ie aomben-tika añ'oron-tsoavala ty laboridy hañoriha'e antika, le mahafeleke ty vata'e iaby. ⁴ Oniño ka o samboo. Ndra t'ie jabajaba naho aronjen-tiobey, ro tehafem-panehake kede mb'amy ze satri' i mpinday azey hombañe. ⁵ Manao zay i famelekey, ie kedekedeke amo an-tsandriñeo, fe raha ra'elahy ty iroharohà'e. Haraharao ty habei' ty ala viàñe' ty pitsik' afo. ⁶ Afo i famelekey, haliforan-katserehañe; napok' amo haraon-tikañ' ao i famelekey f'ie mahativa i sandriñey iaby, naho mamiañ' afo andalam-pañaveloan-tika, toe ampiforehete' i tsikeokeokey. ⁷ Hene mete folahé' ondatio naho toe fa nifolahe'e ze karazam-biby naho voroñe naho mpilaly vaho o bibin-driakeo, ⁸ fe tsy lefe' ondaty folahéne i famelekey. Haratiañe mitsingoetse re, lifo-boreke mahafate. ⁹ Ie ty andrengean-tika i TALÈ Raentikañey, ie ka ty añonjiran-tika t'indaty namboareñe hambambintañe aman' Añahare*. ¹⁰ Songa am-palie raike ty iakaran-tata naho fàtse. O ry longo, sondo'e t'ie anoeñe! ¹¹ Ampikararahe' ty loharano hirik' am-bava raike hao ty mamy naho ty mafaitse? ¹² O ry longo, mete mamoa takoko† hao ty sakoañe? ndra sakoañe ty vahe? Toe tsy yokaren-drano masiake ty mamy.

Hihitse Roe

¹³ He ama' areo ao ty mahihitse naho mahilala? Ee te ho vente'e amy havañona'ey, t'ie mitoloñe an-katretran-troke mahihitse. ¹⁴ Fe naho añaja'o fikirañañe mafaitse aman-katea-teña ty an-tro'o ao, le ko mibohaboha handañira'o ty hatò. ¹⁵ Toe tsy hirik' añ'abo i hihitse zay, f'ie an-tane, an-kasijin-tsandriñe naho itokoan-angatse. ¹⁶ Aa naho eo ty fitsikirihañe naho fifandierañe, le eo ka ty fivalitaboahañe naho ze fonga atao sata raty. ¹⁷ Hiringiri'e hey ty hihitse boak' andindiñe ao, ie mifampilongo, lem-pò, mete mivohotse, lifo-treträ naho vokatsoa, tsy mitroetroe vaho po-famañahiañe. ¹⁸ Tongisam-pampilongo ampanintsñañe ty tabiry mamoa havantañañe‡.

4

Miambanea aman'Añahare

¹ Hirik'aia o aly naho fifandierañe ama' areoo? Tsy o hasiji' areoo hao ty mitrobo añ'ova ao? ² Mikirañe f'ie tsy manañe, mamono; mihàñe fe tsy mahazo, naho mifandietse vaho mialy, f'ie tsy manañe amy te tsy mihalaly, ³ Mihalaly fe kanao tsy tendreke, vàlañe i hatakey, ie ho nirite'areo an-kadrao avao. ⁴ Ty karapilo! Tsy apota' areo hao te falaiñañe an' Andrianañahare ty firañetañe ami'ty voatse toy?* Aa le ze te ho rañe' ty tane toy manao ty vata'e ho rafelahin' Añahare. ⁵ Hera atao' areo te

* ^{3:9} Fot 1:26-27 † ^{3:12} Grika: oliva ‡ ^{3:18} Fil 1:11 * ^{4:4} Mat 13:22, Lke 4:5-6, 14:33 Rom 12:2,

tsy aman-tali'e ty itsara' i sokitse masiñey t'y hoe: Mañiriñe am-pihàñañe ty Arofo mimoneñe aman-tikañe ao. ⁶ Fe itolora'e fañisoham-bey. Zay ty anoe'e ty hoe:

Zeharen' Añahare ty mpiebotsebotse,
fe tolora'e arofo ty mpirèke.[†]

⁷ Aa le miambanea aman' Añahare. Liero i mpañijnjey, le hibioñe. ⁸ Harineo t'i Andrianañahare, le hitotofa'e. Mandiova fitàñe ry mpanankakeo vaho mañefera arofo ry mpanao sadrò-lahiagao. ⁹ Mihontoha, mandalà naho mangololoih; afotero ho firovetañe ty fitohafa' areo vaho halonjerañe ty haeha' areo. ¹⁰ Miambanea aolo' i TALÈ le hongahe'e.

¹¹ O ry longo, ko mifamokafoka. Ty mañinje Hake naho mizaka Hake ro mañinje rahalahy Vaho mizaka longo; Aa kanao maniñe Hake rehe, le tsy mpañambeñe Hake, fa mpizaka. ¹² Raike t'i Mpanolotse Hake, Ie ty maharombake naho maharotsake. Ia v'iheo te hizaka ondaty?

Rengeñe hao ty Hamaray?

¹³ Hete! ie manao ty hoe: Ke anito, he hamaray, le hionjoñe mb'an-drova an-koe aña zahay, ho tambatse aña taoñe raike hanao takinake vaho hanontom-bara. ¹⁴ Fe tsy apota' areo te inoñe ty ho fiai' areo te hamaray, ie toe zono miboak' aniany vaho mimiañ' aña. ¹⁵ Fe hàmake te hanoe'o ty hoe: Naho satri' i TALÈ, te ho velon-jahay le hanao zao naho zao. ¹⁶ F'ie miroharoha am-pirengevohañe henaneo, toe raty o fisengeañe. ¹⁷ Le aman-kakeo ze mahafohiñe ty soa hanoe'e fe tsy anoe'e.

5

Hatahata amo Mpañalealeo

¹ Hete! ry mpañalealeo, miroveta naho mitoreòva amo hasotriañe hivotrak' ama' areoo. ² Fa momoke ty vara' areo, nihanem-bararaoke o saro' areoo. ³ Herefeñe ty volamena naho ty volafoti' areo, toe ho sesehe' ty harefesa'e, hampibotseke ty nofo' areo hoe afo, ie nahaja' areo ho amo andro honka'eo o vara' areoo. ⁴ Inao! Mitoreo ty rima'e o mpièke nanatake o tete' areoo, ie nahaja' areo avao. Fa nitakats' an-dravembia' i TALÈ i màroy* ty fitoreova' o mpanatakeo. ⁵ Ie toe niagaregañe an-tane atoy naho niaññañoleñañe, nañavondra-troke ho amy andro fandentàñey, ⁶ Mamàtse naho mañoho-doza amy vañoñey, ie tsy nanohetse.

Mifeaha Faloviloviañe

⁷ Mahaliñisa arè ry longo, ampara' ty fitotsaha' i TALÈ. Oniño ty fahaliñisa' i mpiavay ty voka-tsoa' i taney, ie liñisa'e ampara' te avy i loha-orañey naho i oran-jobay. ⁸ Mahaliñisa, mihaozara stroke, fa an-titotse ty fitotsaha' i TALÈ. ⁹ Ko mifamarahy ry longo, tsy mone ho zakaeñe. Hehe te mijohañe an-dalañe eo i Mpizakay. ¹⁰ O koahe, rendreho o mpitoky nisaontsy amy tahina' i Talèio ho fandrazañañe ty fahaliñisañe naho hasotriañe. ¹¹ Ataon-tika haha ty mahafifeake. Toe jinanji' areo ty fahaliñisa' i Joba naho niisa' areo ty nanoe' i TALÈ, fa lifon-kalèn' arofo naho fiferenainañañe t'i TALÈ. ¹² Mandikoatse ie iabiy, ry longo, ko mifanta—he amy likerañey, ke ami'ty tane toy, hera am-panta ila'e, fe anò eka ty eka' areo, naho Aiy! ty tsie' areo, tsy mone hampihotrahan-jaka.

Mihalalia am-Patokisañe

[†] 4:6 Rzs 3:34 * 5:4 Iir 22:13

¹³ Ia ama' areo ro misotry? Soa re te hihalaly. Ia ty ehake? Ehe t'ie hisabo. ¹⁴ Ama'areo ao hao ty siloke? Soa re te hikanjy o bei' i Fivorio hihalaly ho aze, hañosoran-tavoñe amy tahina' i TALÈY, ¹⁵ Ie mihalaly am-patokisañe ro mahajangañe i natindriy vaho hatroa' i TALÈ. Ie nandilatse, le hafahañe. ¹⁶ Aa le mifampiantofa tahiñe vaho mifampihalalia le ho jangañe. Mahatafetetse raha maro ty halaly toloñe' ty vantañe. ¹⁷ Ondaty nira-vintañe amantika t'i Elia, ie nihalaly ty tsy hahavian' orañe, le tsy niavy an-tane atoy naho tsy niritse hey ty taoñe telo-tsi-enem-bolaña. ¹⁸ Ie nihalaly indraike, le nampikojojoahe' i likerañey i orañey vaho nahatoly sabo ty tane.

¹⁹ Ory longo, naho ama' areo ty mandifik' ami'ty hatò, vaho eo ty mampoly aze, ²⁰ Le maharendreha te ze mampitolike ty mpanan-kakeo amy fandilara'e i lalañey ro handromba-piaiñe tsy hihomake vaho handembeke tahiñe maro†.

† 5:20 Its 10:12

Petera I

1 I Petera, Firàhe' IESOÀ Norizañey, Ho amo mañialo naparaitake e Ponto, e Galate, e Kapadokia, e Asia vaho e Bitinia añaeo, jinoboñe **2** ami'ty fisafirin' Añahare Rae, navahe' i Arofoy, ty amy nivohora' areo* am' IESOÀ Norizañey naho fa nifitsezan-dio'e: añonjoñan-kasoa naho hanintsiñe.

Fitamañe Veloñe

3 Andriañeñe t'i Andrianañahare, Rae' i Talèntika IESOÀ Norizañey! Ie am-piferenaiñañe jabajaba, ro nampiareñe antika fañindroe'e ho am-pitamâñe veloñe amy fitroara' IESOÀ Norizañey an-kavilasiy, **4** ho amy lova tsy modo, tsy ho komatrào, tsy hipoa-mavo, nihalankañañe andikerañe aoy ho anahareo **5** arovañe ami'ty haozaran' Añahare ami'ty fatokisañe ho amy rombake haboak' an-tsa honka'ey. **6** Aa le irebeho, ndra t'ie loviloviem-pitsohañe ankafankafa hey amy ipaiañe azey, **7** hamente ty fatokisa' areo sarotse te ami'ty volamena mete momoke, naho nitsoheñe añ' afó handrendrehañe t'ie mandrenge naho misabo vaho miàsy ami'ty fiboahañe IESOÀ Norizañey. **8** Ikokoa' areo ndra te mbe tsy niisake mbore tsy isake heike, f'ie atokisa'o naho irebeha'o an-kaehake tsy lefe talilieñe vaho lifots' engeñe, **9** t'ie mandrambe ty fireteam-patokisa' areo, ty fandrombaham-piañe.

10 I fatokisañey, le nitsoeha' o mpitokio, nitsikaraha' o nitoky i hasoa nivotrak' ama' areoio, **11** le nimanea' iareo pay te ia naho an-tsa inoñe ty nentoe' i Arofo' i Norizañey ty an-tro' iareo ao, ie nitaroñe ty falovilovia' i Norizañey naho i engeñe hanonjohiy. **12** Naboak' am' iareo te tsy iereo fa itika ty nitoroña' iareo o raha nitsarae' o nitaroñe i talili-soay ama' areo henaneo amy Arofo Masiñe niraheñe boak' an-dindiñe añaio—raha salalae' o anjelio hotsohotsoeñe.

Miambaha

13 Aa le diaño ty toham-betsevetse' areo hifanehake, le ilozoho filierambatañe, vaho ifaharo fitamañe ty hasoa hatolotse anahareo ami'ty fiboahañe IESOÀ Norizañey, **14** hoe amory mete avohotse, tsy mitsikombe o hadrao raty nañaveloa' areo am-paha-bahimoañeo. **15** Aa kanao masiñe i Nikanjy anahareoy le miavaha ka amo fañaveloañe iabio; **16** fa hoe ty pinatetse:

Miavaha amy te masin-dRaho†.

17 Aa naho kanjie' areo t'i Rae, ie tsy mirihy fe izaka'e songa amy fitoloña'ey, le mañaveloa am-pañeveñañe ami'ty fañialoa' areo atoy, **18** fohiñe te tsy o raha mora momokeo manahake o volafotio ndra o volamenaoy ty nijebañe anahareo amy haveloñe kòake linova' areo amandroae' areoy, **19** fa ty lio sarots' i anak' añondriy, i Norizañey, tsy amankandra tsy aman-kila, **20** ie norizañe taolo' ty nampijadoñañe ty voatse toiy, fe naboake ama' areo an-tsangkonka'e zao. **21** Ie ty iatoa' areo aman' Añahare nampivañon-ko veloñe aze naho toe nitolora'e engeñe, soa te ho aman' Añahare ty fatokisañe naho ty fitamà' areo.

22 Aa kanao, nañefe-batañe amy t'ie nivohotse ami'ty hatò amy Arofoy hikoko longo tsy mihaboke, le imaneo koko an-troke hiringiri'e, **23** amy

* **1:2** a. 14,22 † **1:16** Sor 11:44, 19:2

t'ie nisamaheñe fañindroe'e, tsy an-tabiry mora momoke, fa amo tsy momokeo, an-tsaran' Añahare veloñe tsy mete modo. ²⁴ fa
 Hoe ahetsé ze kila nofotse,
 manahake o voñen' ahetsé o hene enge'eo;
 miheatse o ahetsé, mihintsáne o voñe'eo,
²⁵ fe tsy mb'ia ho modo ty tsara' IEHOVÀ.[‡]
 Zay i tsara nitaroñeñe ama'areoy.

2

¹ Aa ie fa napoke ze fonga filoa-tiñake, ze hene famañahiañe naho hasoapatiæfañe naho ty fihàñañe vaho ze fañinjeañe iaby, ² manahake te ajajamena, salalao ty ronono hiringiri' i tsaray, hitomboa' areo amy rombakey, ³ kanao fa nitsopeke ty hasoa' i TALÈ,

I Vato Veloñe naho Jinoboñey

⁴ naho nimb'ama'e, i Vato veloñe nado' ondatio fe jinobon' Añahare vaho toe sarotse ama'ey, ⁵ le ampitroareñe ka nahareo vato veloñe, ho anjomban' arofo, naho fisoroñañe miavake, hañenga soron' arofo non' Añahare añam' IESOÀ Norizañey. ⁶ Ty amy pinatetse an-tsokitse masiñe ao:

Ingo, apoko e Tsione ao
 ty vaton-kotsoke jinoboñey,
 vaton-kotsoke sarotse,
 le tsy ho salatse ty miato ama'e.*

⁷ I hasarota'ey ho ama' areo mpiatoo, fe amo manjehatseo le:
 Nivalike ho vato-kotsoke
 i vato nado' o mpandranjjoy†.

⁸ naho ty hoe:
 Ty vato mahatsikapy
 naho ty vato mahasirika.‡

Tsikapie' i tsaray o mpanjehatseo§; fa zay ty nanendreañe iareo.

⁹ Fe tariratse jinoboñey* nahareo, firimboñam-pisoroñe aman-kasy†, fifeheañe miavake‡, famosora nambahañe ho hanaña'e§, hitaroñe ty hasoa' i nikany anahareo hiakatse i ieñey ho ami'ty fireandreaña'e fanjakay. ¹⁰ Amy t'ie tsy nifamosorañe taolo, fe famosoran' Añahare henaneo; tsy nitretrezeñe fe iferenaiñaañe henaneo*.

¹¹ O ry noroko, osiheko hoe t'ie ambahiny naho mpañialo, ty hifoneñe amo raha mahatsontso' i nofotseio naho mifañotakotak' am-betsevetse ao. ¹² Mañaveloa an-kavañonañe amo kilakila' ndatio, ie mañarinjène anahareo hoe tsy vokatse, naho misamba o sata soat†' areooo, ro handrenge an' Andrianañahare amy androm-pitilihañey.

Miambanea amo Mpifelekeo

¹³ Aa le miandalia amy ze fifelehañe noriza' ondatio, ty amy TALÈ; naho ty mpanjaka, amy te manandily; ¹⁴ naho o ragovao amy t'ie nirahe'e handilo o manao ratio vaho handrenge o manao soao. ¹⁵ Zay ty satrin' Añahare, t'ie mitolon-kasoa ro hampitsiñe ty habahimoa' ondaty seretseo, ¹⁶ toe haha nahareo, le ko atao fandrongan-tiñake i fidadàñey, fa

‡ 1:25 Ies 40:6-8 * 2:6 Ies 28:16 † 2:7 Sab 118:22 ‡ 2:8 Ies 8:14 § 2:8 Jao 3:36, Heb 3:18
 * 2:9 Its 10:15, 43:2 † 2:9 Ies 61:6, 66:21 ‡ 2:9 Avo 19:6, Its 7:6 § 2:9 Ies 43:2, Avo 19:5, Tit 2:14 * 2:10 Hos 1:9-10, 2:23; Oni: Ies 65:1, 63:16, † 2:12 Mat 5:16

iambaneo kanao mpitoron' Añahare. ¹⁷ Hene iasio, kokò o rolongoo, mañeveña aman' Añahare, iasio i mpanjakay.

¹⁸ Ry mpitoroñeo, iambaneo o temp'o' areoo am-pañeveñañ àampoñé, tsy t'ie soa naho lem-po avao, fa o mengokeo ka. ¹⁹ Inao ty mañeva isoke, t'ie mpañeveñañ aman' Añahare, ro mifeake sotry te ampisoñañé tsy aman-katò. ²⁰ Ino ty tombo'e t'ie mahafifeake lafa ty amo tahiñeo? Ie manao soa te ampisoñañé vaho mifeak' am-pahaliñisañé, le hisohen' Añahare. ²¹ Inao ty nikanjiañé anahareo, kanao njalea' i Norizañey, itsikombeo, hañoriha' areo o lia'eo‡.

²² Ie tsy nanan-tahiñé§,
naho tsy nioniñé am-palie'e
ty famañahiañé,*

²³ le ie nonjireñé, tsy namale añ' ònjitse; ie njale tsy nañebañé, fe nitolom-piato amy Mpizaka an-katòy. ²⁴ Ie ty nivave o hakeon-tikañeo† am-pañòva'e an-katae ajale eo, hampihomaheñé o tahiñeo soa te ho veloñé an-kavañonañé tika,‡ fa o fere'eo ro mahajangañé anahareo§. ²⁵ Ie nitolom-pandrike hoe añondry*, fe nitampoly amy Mpiarake naho Mpisari' o arofo' areooy henaneo.

3

Ie Mirovaly

¹ Manahake zay ry roakembao, miandalia amo vali' areoo, ke ho jehare' ty ila'e i tsaray, fe ho reketeñé tsy aman-tsara, fa ami'ty sata-soa' i rakemba'ey, ² ie isa'e ty fañaveloa' areo ki'e naho pea fiasiañé. ³ Tsy ty fihaminañé alafe'e, naho ty firandranañé maròy naho ty firagoragoambolamena vaho ty fisaroñañé maviake, ⁴ te mone indaty mikafitse antrok' aoy, hendre naho an-kamoràm-po tsy mete modo, zay ty fihaminan-tsarotse am-pivazohoan' Añahare; ⁵ ie ka ty fihamina' o roakemba miavake taolo mpitamàn' Añahareo, mpiandalys ami'ty vali'e; ⁶ manahake ty niambanea' i Sarahae amy Abraàme, nanao aze TALÈ; toe anak' ampela'e t'ie mitolon-draha soa naho tsy ampitsolofiñen-kahembañañé.

⁷ Ry roandriañeo, mitraofa fimoneñé an-kahilala amo vali' areoo, iasio hoe korobo mareforefo, ie mpitrapo-dova amy falalàñ-kaveloñey, soa tsy ho sebañeñé o halali' areoo.

Falovilovianë ami'ty Fanoan-tsoa

⁸ Hengaha'e, ehe songa hiharo rehake naho arofo, mifampikoko hoe mpilongo naho mifampitretre vaho mifampilèn-troke, ⁹ ko valean-draty ty raty, ndra tera ty tera, fa mitatà, amy te zay ty nikanjiañé anahareo handova fitahiañé. ¹⁰ Aa:

Ze misalala haveloñé, naho fikokoañé,
hahaisahañé andro soa,
tsy mete tsy mitañé
ty famele'e amo haratiañeo naho
o fivimbi'eo tsy hisaontsy famañahiañé;
¹¹ tsy mahay tsy isitaha'e ty raty
naho hanoe'e ty soa;
hitsoeke fifampilongoañé
vaho hañeañé aze.

‡ 2:21 1Ko 11:1, Jn I 2:6 § 2:22 Jao 8:55, 15:10, Ko II 5:21, Jn I 3:5 * 2:22 Ies 53:9 † 2:24 Ies 53:4 ‡ 2:24 Rom 6:2, Pe I 4:1-2 § 2:24 Ies 53:5 * 2:25 Ies 53:6

12 Tolihem-pihaino' IEHOVÀ o vantañeo,
naho janjiñen-dravembia'e
o halali' iareoo,
fe atreatrè' IEHOVÀ an-daharañe
o mpanao ratio.*

13 Ia ty handilo kanao lozohe'areo ty hasoa? **14** Fe, naho ampisoañeñe t'ie vantañeo, mifaleat† le ko hembañe ami'ty fañembaña' iareo vaho ko marimarike‡ **15** fe hamasiño i Norizañey ho Talè añ'arofo ao, nainai'e veka'e hanoiñe an-kamoràn-troke naho fiasiañe ndra iaia mañontane ty talim-pitamà' areo, **16** le mifahara ami'ty hazavan-troke, soa t'ie fosañe hoe mpanao raty, le ho salatse o mañonjitse ty fañaveloa' areo amy Norizañeyio. **17** Ie satrin' Añahare, hàmake te hijale am-panoan-tsoa ta te am-panoan-draty. **18** Nivilasy indraike nahafonitse ty amo tahiñeo i Norizañey, i vantañey ho a o mengokeo, hanese azo mb'aman' Añahare§, ie vinono an-tsandriñe, fe vinañom-beloñe amy Arofoy, **19** izay ka ty nihitrifa'e naho nitsey amo fañahy an-drohio, **20** o nanjehatse haehaeo, amy fandiñisan' Añahare tañandro' i Noey amy nandranjiañe i lakam-poloaiy, ie tsy niampé, toe ondaty valo ty rinombak' añamy ranoy. **21** Zay ty fanalinjoañe i filiporañe mandrombak' anahareo henaneo—tsy ty fañafahan-deotse an-tsandriñe, fa t'ie mifelek' aman' Añahare ho ami'ty hazavan-troke, añamy fivañonam-belo' Iesoà Norizañey, **22** i am-pitàn-kavan'an' Añaharey*; ie fa nizilik' an-dikerañe ao naho nampiambanèñe ama'e o anjelio naho o fifelehañe vaho o haozarañe.

4

Mañaveloa aman'Añahare

1 Aa kanao nilofek' am-pañova'e i Norizañey, le adiaño ho fitalifirañe zay, amy te nijihetse tsy manao hakeo ka* ty nijale an-tsandriñe, **2** soa te amo andro sisa amy nofotseio, tsy hiveloma'e ka o hasijy rati' ondatooo, fa ty satrin' Añahare. **3** Amy te nahatsàke anahareo o andro nitoloñañe amy ze fisatria' o kilakila' ndatio—nifanao haloloañe, hakarapiloañe, hamamoñañe, fihisàñ-draty, figologodrañan-divay, vaho fitalahoam-pahasive tiva. **4** Le hoe te ankafankafa amo mifosao t'ie tsy migodañe tsy nàhy mindre am'iereo mb'an-kaliforan-katsivokarañe ao. **5** F'ie tsy mahay tsy hamolily amy veka'e hizaka o veloñe o vilasioy. **6** Zay ty talim-pitseizañe i talili-soay amo nihomakeo, hizakañe hoe ondaty amy nofotsey vaho ho veloñe añ'arofo ao ty amy natoron' Añaharey.

7 Fa an-titotse ty firefea' ze he'e. Aa le miliera-vatañe vaho mijlova hahafilolofa' areo. **8** Mandikoatse zay, imaneo fifampikokoñañe, fa mahalembeke hakeo maro ty fikokoñañe†. **9** Mifampiantrañoa tsy aman-treetreño. **10** Aa kanao songa nandrambe falalàñe le mitoloña am-pifampitoroñañe hoe mpamandroñe mahimba' o hasoan' Añahare ankafankafao. **11** Ndra iaia misaontsy le manahake t'ie misaontsy o fetsen' Añahareo; ze mitoroñe, le ami'ty haozarañe atolon' Añahare aze, soa te amy ze he'e, ho rengèñe t'i Andrianañahare añañam' IESOÀ Norizañey. Aze ty engeñe naho ty fifeheañe nainai'e donia. Amena.

Faloviloviañe amo Mpiamy Norizañeyio

* 3:12 Sab 34.12-16 † 3:14 Mat 5:10 ‡ 3:14 Ies 8:12 § 3:18 Rom 5:18 * 3:22 Sab 110: 1
* 4:1 Rom 6:2-22, Pe I 2:25 † 4:8 Rzs 10:12

¹² O ry rañetse, ko ilatsa' areo ty fitsohañe aña'afó mifetsake ama'areo, (ie famenteañé anahareo) manahake te nizò raha ankafankafa, ¹³ fe mirebeha t'ie mitraok' ami'ty falovilovia' i Norizañey, handià' areo taroba ami'ty fiboaha' o enge'eo. ¹⁴ Ie injèñe ty amy tahina' i Norizañey, le miyahà, te ipetaha' t'i Arofon-engen' Añahare. ¹⁵ Ehe te tsy ama' areo ty ho lovilovieñé t'ie mpamono ondaty, ndra mpikizo, ndra mpanao raty, ndra mitsoropoke am'ondaty mitoloñe. ¹⁶ F'ie mpiamy Norizañey, ee te tsy ho salatse, te mone mandrenge an' Andrianañahare ty amy tsaraeñey. ¹⁷ Fa tsatoke te hifotots' amy hasavereñan' Añaharey i zakay; aa kanao mamototse aman-tikañé, akore ty hizò o manjehatse amy talili-soan' Añahareio?

¹⁸ Aa katao sarotse ho rombaheñé ty vantañé, akore ty hifetsak' ami'ty tsy aman-Kake naho amy aman-kakeoy? [‡]

¹⁹ Aa ze mijale amy satrin' Añaharey, ee te hampiatoa'e aman' Andrianamboatse migahiñey ty arofo'e, am-pitoloñan-tsoa.

5

O Andranavio naho o Ajalahio

¹ Aa le osiheko o mpiaolo fivory ama' areoo, amy maham-piaolo ahy naho valolombeloñ' amy njalea' i Norizañey vaho mpitraok' amy engeñé haboakey: ² ampiandrazo i lia-rain' Añahare ama' areoy; sario—tsy amanjizy, fa an-dozoke sitran' Añahare; tsy ipaiam-bokañé, fa an-kahimbañáñé; ³ tsy sengean-kery o nampifeheañé anahareoo, fe ano ze hitsikombea' i liaraikey. ⁴ Le ie miboake i Talèm-piarakey, le ho rambese' areo i sabakan-engeñé tsy hikò-mavoy. ⁵ O ry ajalahio, manahake zay, miandalia amo mpiaoloo, naho songa mifampiambanea, vaho aombeo ty hatrentram-po; amy te:

Zeharen' Añahare o mpirengo

fe atariha'e o mpirèkeo.* ⁶ Mitaketraha arè ambanem-pitàn' Añahare maozatse, fa honjone'e ami'ty andro mañèva. ⁷ Afetsaho ama'e iaby ze fihakahakà' areo, fa hiferenaiña'e. ⁸ Miliera vatañé le mahimbaña, fa mitingatinga mbaombao hoe liona mireñetse i rafelahi' areoy, i mpañinjey, mipay ty havorembòre'e. ⁹ Kalaño am-patokisañé migahiñé, fohiñé te songa ampisoñañé hoe zay ka o longo' areo an-tane atoio. ¹⁰ Ie fa nalovilovy betebete nahareo, le i Andrianañahare' o hene hasoaoy, i nikany anahareo ho amy enge'e tsy modo amy Norizañey aoiy, ro hañeneke naho hamente naho hampaozatse, vaho hampijadoñé anahareo. ¹¹ Aze ty fifeheañé nainai'e donia. Amená.

Fisalamañé Fara'e ¹² I Silasy, rahalahy migahiñé amako, ty nisokirako boriborike zao, ho fañosihañé, naho fitaroñañé te zay ty toe hasoan' Añahare ijohaña' areo. ¹³ Mañontane anahareo o e Babilona nitrão-pijoboñañé ama' areoo, naho i Marka, anako. ¹⁴ Mifanalamañaña' aña'ondrom-pikokoñañé. Fañanintsíñé ama' areo iaby amy Norizañey.

Petera II

¹ I Simeona Petera, fetrek'oro naho Firàhe' IESOÀ Norizañey,
Ho amo fa nandrambe fatokisañe mirai-hasiñe ami'ty anay, añaamy ha-vantañan' Añahare naho i Mpandrombak' antikañeio—IESOÀ Norizañey:
² Hasoa naho fañanintsiñe hiregorego ama' areo handrendrehañe an'Andrianañahare naho IESOÀ Talèntikañey.

Ty Fikanjiañe naho ty Fijoboñañe

³ Oniñe te i haozaran' Añaharey ty nanolotse antikañe ze hene paiaeñe ami'ty haveloñe toy naho ami'ty fiambenañe Hake am-paharendrehañe to ie nikany antika ho ami'ty enge'e naho ty hasoa'ey. ⁴ Ie ro nanolora'e an-tika o fampitamañe jabajaba naho sarotseo, soa t'ie ama'e ro hitraok' ami'ty vintan' Añahare naho fa nibolitits' amo drao-lo' ty voatse toio.
⁵ Ie amy zay, milozoha hatovon-kavañonañe ami'ty fatokisa'areo naho hilala amy havañonañey, ⁶ naho filieram-batañe amy hilalay naho fahaliñisañe amy filieram-batañey naho fiasian-Kake amy fahaliñisañey ⁷ naho firañetañe amy fasiañey vaho fikokoñañe amy firañetañey. ⁸ Aa ie ama' areo vaho miraorao, ro isebaña'e tsy halejolejo tsy ho po-bokatse ami'ty faharendrehañe i Talèntika IESOÀ Norizañey. ⁹ F'ie tsy ama'e, le ripeke, toe fey, amy te nandikofa'e ty nañeferañe aze amo hakeo taoloo.
¹⁰ Ie amy zao ry longo, imaneo an-joton-tro ty hañatò i fikanjiañe naho fijoboñañe* anahareoy, amy t'ie mitoloñe am' irezay, le lia'e tsy hitsikapy, ¹¹ vaho hatobake ama'areo ty fizilihañe am-Pifehea-tsy modo' i TALÈ naho Mpañàha an-tika, IESOÀ Norizañey.

Ty Fitokiañe amo Sokitse Masiñeo

¹² Aa le tsy hapoko t'ie ho tiahieñe am'irezay ndra te fa fohi' areo vaho ijohaña' areo ami'ty hatò ze ama' areo henaneo. ¹³ Eka ataoko mañeva ty hañetseketeke ty fitiahia' areo, zaho mbe an-kiboho' ty tsandriñe atoañe, ¹⁴ fa apotako te hadoko aniany ty kibohotse toy, amy nampalangesa' i Talèntika IESOÀ Norizañey amakoy. ¹⁵ Aa le imaneako te zaho fa nonjoneñe aña, ty hahatiahia'areo nainai'e irezay.

¹⁶ Tsy nañorike talily finoromporom-pañahy te nampandrendreha'ay ama'areo ty haozarañe naho fitotsaha[†] i Talèntika IESOÀ Norizañey, f'ie valolombeloñe nahaisake i enge'ey, ¹⁷ ie nandrambe hasiñe naho engeñe aman' Añahare Rae, naho niheo ama'e i fiarañanañañe boak' amy Engembolonahetseiy, nanao ty hoe:

Intoy ty Anak' isoko, O toe norokoo.[‡]

¹⁸ Tsinano'ay i fiarañanañañe boak' andindiñe ey, t'ie nindre ama'e amy vohitse miavakey.

¹⁹ Toe aman-tika o tsaram-pitoky niventeñeo, le mahasoa anahareo ty hitsendreñe, hoe t'ie jiro mireandreañe am-pimoromoroñañe ao, ampara' te manjirike i àndroy vaho mionjoñe i misaron-kazavañey[§]. ²⁰ Le maharendreha hey aña'arofo ao te tsy amy sokitse masiñey ty fitokiañe niboak' ami'ty fisafiria' ondaty. ²¹ Amy te mbe lia'e tsy nanoeñe ami'ty zoton-tro' ondaty ty fitokiañe, fe ondaty nentoe' i Arofo-Masiñeo t'i ninday taroñe boak' aman' Añahare.

* ^{1:10} Mat 20:16, 22:14, Ben 17:14 † ^{1:16} Mar 9:1 ‡ ^{1:17} Mat 17:5 § ^{1:19} Mik 4:1-3, Mar 9:3

2

O Mpañoke Sare'eo

¹ Fe nitraoke am'ondatio o mpitoky sare'eo*, manahake te ho ama' areo ao o mpañoke sare'e hanjilike fañòhañe maharotsake añ' etakeo, ho liere' iareo i TALÈ nivily iareoy, toly ndra hivovoan-karotsahañe masika. ² Le maro ty hañorike o drao-tsivoka' iareoo, le ho sirikaeñe ty am' iereo i lalan-katoy, ³ naho amy hatitia' iareo, ho haramamoe' iereo andrehake manigike, fe tsy mihenekeneke i namàrañe iareo haehaey, vaho tsy miroro ty fandrotsahañe iareo. ⁴ Fa kanao tsy nengan' Añahare o anjely nandilatseo, le nafetsa'e an-tsikeokeok' ao, vaho nasese'e an-tsivilisly mb' an-kamoromoroñañe ao handiñe zaka; ⁵ tsy nihevea'e i voatse taoloy fe rinomba'e t'i Noe, ie valo, mpitaron-kavantañañe, le nempoempoe'e i tanebey tsy aman-Kàkey; ⁶ toe nafa'e ho rotsake ka i rova Sodoma naho Gomora rey ie finorototo'e ho lavenoke, ho fañòhañe o ho veloñe tsy aman-Kake mandimbe iareoo; ⁷ le rinomba'e t'i Lota vañoñe, ze nembere' ty halòtseren-kavelo' o tsivokatseo[†] ⁸ ie nahaisake naho nahajanjiñe o sata' iareo tsivokatseo handro an-kandro nahalovilovy ty arofo-vaño' indaty vantañe nimoneñe am'iereo. ⁹ Arofoana' i TALÈ ty handrombake o vantañe amo fitsohañevo vaho hañajà o tsivokatseo ho an-jaka, ho lilovañe, ¹⁰ mentsake o mampilomolotse i nofotsey ami'ty drao'e tiva malain-ko fehèñevo, ie mijaranjaràñe, manao tsi-nahi'e, vaho tsy mitititike te mañoratse o aman' engèñevo; ¹¹ fe ndra o anjelio, ie milikoatse an-kaozarañe naho hafatrarañe, tsy manisý iareo an-jaka añatrefa' i TALÈ. ¹² F' iretia, le hoe biby tsy mahatsakore, naterake ho tsepahéne naho lentàñe, miteratera o amoea' iareoo, ho mongoreñe ami'ty fandrotsahañ' iareo, ¹³ ho valèmboiñe mañeva ty hatsivokara'e. Tea' iareo ty miagarègañe antoandro. Händra naho pepo, mitsotsefotse ami'ty famañahia' iareo te mitraopikama ama'areo. ¹⁴ Ama-maso pea hakarapiloañe, le lia'e tsy etsapandilarañe; mpampandifike o maletroletroo, an-troke naòke am-patitiamena, anake nafatse! ¹⁵ Nado' iereo i lalañe mahitiy, nitsile mb'an-dala' i Balama ana' i Beora mpitea ty tamben-katsivokarañe ¹⁶ F'ie nendahañe ty amy fandilara'ey, naho nivolañe am-peo' ondaty i borìke moañey hanebañe ty hadagòla' i mpitokiy.

¹⁷ Lohan-drano maike iereo, mika aronjen-tio-bey, nañajàñe añ'ieñe mimoromoroñañe tsy modo. ¹⁸ Ie mivolan-kòak' an-tsenge, misarike iareo an-drao-rati' o nofotseo naho am-pañiriañe lo, o didý tsy nahabotitsike amo mañavelo an-tahiñeo, ¹⁹ mampitamà fierañerañañe, te mone ondevon-katsivokarañe, amy te ondevoze' ty mamahotse aze t'indaty ²⁰ Aa ie nihaha amo haloloa' ty voatse toio ami'ty faharendrehañe i Talè Iesoà naho Mpandrombake Norizañey, naho mbe mifehefehe amy rezay indraike vaho mivahotse ao, le lombolombo' i tam-balòha'ey ty haloloañe henane zay. ²¹ Ho nisoa t'ie tsy naharendreke i lalan-kavañonañey, ta te nanjo vaho niambaho i lily‡ masiñe natolotsey. ²² Toe ho a iareo ty oha-drehake manao ty hoe.

Mimpoly ami'ty loa'e ty amboa§
naho mb'am-pilomolorañe am-potak' ao i renen-dambo sinasay.

* **2:1** Pe II 2:7-8, 21, Mat 7:15-23 † **2:7** Pe II 3:17 ‡ **2:21** Ti I 6:14, Its 17:20, Sab 19: § **2:22**
Rzs 26:11

3

Ty Andro'i TALÈ

¹ O rañetse, intoy ty taratasiko faharoe nisokirako hampitsekake antiahy ty fitsakorean' arofo' areo ki'e, ² haniahay i saontsy nampisaantsieñe o mpitoky miavakeo taloy naho i nandilia' i TALÈ, toe Mpandrombakey, añamo Firàhe' areoo. ³ Maharendreha hey te hivotrake eo amo andro honka'eo o mpanivetiveo hanivetive, hañorike ty drao-rati'e; ⁴ hanao ty hoe: Aia ze o fampitamañe i fitotsaha'e zao? fa sikal' ami'ty nirotandroae'ay le kila mitoloñe ami'ty fanoe'e hirik'ami'ty fifotora' ty voatse toy. ⁵ Ie ifahara'e, le amoea'e te nampiboak' o likerañeo haehae i tsaran' Añaharey*, naho boak' an-drano vaho añivo rano ty nañoreñañe ty tane toy; ⁶ ie ty nandrotsahañañe ty tane toy tañ' andro zay, ie niepoepoendrano. ⁷ Le ty amy tsaray, mihaja ho ami'ty afo o likerañeo naho ty tane toy henaneo, ho amy androm-pizakañañe naho fandrotsahañañe ondaty lo-tserekeoy. ⁸ O rañetse, ko amoea' areo itoy, te hoe arivo taoñe ty andro raike amy TALÈ,

le hoe andro raike ty arivo taoñe.[†] ⁹ Tsy malaoñe amy nampitamae'ey t'i TALÈ, ami'ty fanoe' ty ila'e ty hoe malaoñe; f'ie mahaliñe an-tika, tsy satri'e te ndra iaia ty ho momoke, fa te songa hisoloho[‡]. ¹⁰ Ho tondroke hoe mpikizo an-kaleñañe ty andro' i TALÈ, ie hihelañañe aña e o likerañeo am-pitraontraoñañe, le kila ho tomontoe' ty hamae vaho ho forototoe' ty afo ty tane toy naho o fitoloña'eo. ¹¹ Aa kanao hene hiteno, h'ondaty manao akore v'inahareo am-pañaveloañañe miavake vaho am-pañambenañañe Hake? ¹² ie mitamà naho manaentæñe i andron' Añaharey, ama'e ty hamorototoe' ty afo o likerañeo, vaho fonga hitranak' ami'ty hamae'e. ¹³ Fe ty amy nampitama'ey, le misalala likeram-bao naho tane vao§ imoneñan-kavantañañe tika. ¹⁴ Ie amy zao ry rañetse, kanao liñisañañe, imaneo ty havazohoa'e anahareo an-kazavan-troke tsy aman-kandra tsy aman-kakeo. ¹⁵ Itsakoreo te fandrombahañañe ty fahaliñisa' i Talèntikañey, hambañañe amy nisokira' i Paoly rahalahin-tika sarotsey amy hihitse natolots' azey; ¹⁶ ie mitaroñe i entañe zay amo hene taratasi'eo. Toe ao ty tsy mora rendreke* ie vandibandire' o bàdo naho mañali-foo, hambañañe ami'ty fanoa' iareo o sokitse masiñe ila'eo, himomoha' iareo. ¹⁷ Aa kanao fohi' areo aolo ry rañetse, le mitaoa tsy hikapotrake ty figahiña'areo, hampandridrihe'e ty fandilara' o tsere-heñeo, ¹⁸ F'ie mitomboa ami'ty hasoa naho ami'ty faharendrehaña i Talèntika IESOÀ Mpandrombake Norizañey. Ama'e ty engeñe henaneo naho pak' an-tsa tsy modo! Amena.

* 3:5 Heb 11:3 † 3:8 Sab 90:4 ‡ 3:9 Ti I 2:4 § 3:13 Ies 65:17, 66:22 * 3:16 Ko II 11:6

Jaona I

O Tsaran-Kaveloo

¹ Tam-pifotorañey i Tsaran-kaveloñey, ie i jinanji'ay, niisam-pihaino'ay, nisambà'ay naho tsinapa-pità'ay. ² (Fa naboake i haveloñey le niisa'ay, naho mitalily, vaho itaroña'ay i haveloñe nainai'e aman-dRae ao vaho nabentatse ama'ay.) ³ Taroñe'ay ka o niisa'ay naho jinanji'ao, soa te hitrao-drehak' ama'ay nahareo. Toe miharo rehak' aman-dRae naho amy Ana'e IESOÀ Norizañey zahay. ⁴ Isokira'ay o raha zao, hañenefañe ty haeha'areo.

Mañaveloa amo Hazavañeo

⁵ Zao ty entañe nijinANJI'ay naho itaroña'ay, Toe Hazavàñe t'i Andrianañahare; ie tsy aman' ieñe, ndra loli'e. ⁶ Naho mihàboke t'ie mitrao-drehak' ama'e fe mañavelo amy ieñey ao, le mandañitse, tsy mañavelo an-katò. ⁷ F'ie mañavelo an-kazavàñe, amy te Ie ro an-kazavàñ' ao, le mitrao-drehake tika vaho liove' ty lio' IESOÀ Ana'e amy ze fonga tahiñe. ⁸ Aa naho mieva t'ie tsy aman-kakeo le mamañahy vatañe, vaho tsy aman-tika ty hatò. ⁹ Ie miantoke hakeo, le migahiñe naho vantan-dre hañaha o tahin-tikañeo, hañaliova'e amy ze fonga hatsivokarañ*. ¹⁰ Ie manao te mb'e lia tsy nanao hakeo le mampandañitse aze vaho tsy aman-tika o tsara'eo.

2

¹ Ry keleiakoo, isokirako o raha zao tsy handilara' areo. Aa naho eo ty mandilatse, le manam-pañalañalañe aman-dRae tika, IESOÀ Norizañey, i Vantañey. ² Ie ty fañeferañe o hakeon-tikañeo, tsy ty antikañ' avao fa a ty voatse toy iaby. ³ Zao ty aharendrehañe t'ie mahafohiñe aze, le t'ie mañambeñe o lili'eo*. ⁴ Ie manao ty hoe: Fantako re, fe tsy mañambeñe o lili'eo ro remborake, vaho tsy ama'e ty hatò. ⁵ Aa ndra ia ia mañambeñe o tsara'eo, le fonitse† ama'e ao ty fikokoñañe an' Andrianañahare. Zao ty ahafohinañe t'ie ama'e‡: ⁶ ze manao te mimoneñe ama'e ao, tsy mahay tsy mañavelo amy fañaveloa'ey. ⁷ O ry rañetseo, tsy isokirako lily vao, fa i lily haehae tama' areo am-pifotorañ' añey. I lily taoloy i tsara jinanji' areoy§. ⁸ Tovo'e, isokirako lily vao, ze tò ama'e naho ama' areo, amy te mihelan' aña i ieñey vaho mireandreañe i toe hazavañey. ⁹ Ze manao te an-kazavañe f'ie malain-dongo le mbe añ'ieñe ao. ¹⁰ Mimoneñe an-kazavañe ao ty mikoko rahalahy, le tsy ama'e ty hahatsikapy aze. ¹¹ Fe añ' ieñe ao ty malain-dongo le an-kamoromoroñañe ao ty andenà'e, vaho alik' ama'e ty hombà'e fa nigoà' i ieñey o maso'eo. ¹² Manokitse ama' areo raho ry keleiako, fa votso-kakeo añamy tahina'ey.

¹³ Manokitse ama' areo raho ry aba,
amy te fohi' areo i boak'am-baloha'ey.
Manokitse ama' areo raho ry ajalahio,
fa nahagioke i ratiy.

Nanokitse ama' areo raho ry kabìy,
amy te mahafohiñe an-dRae.

¹⁴ Nanokitse ama' areo raho, ry aba,

* **1:9** Iir 31:34 * **2:3** Jn I 3:6 † **2:5** Fot 17:1, Sab 119:1, Mat 5:48 ‡ **2:5** Jn I 3:24 § **2:7** Jn I 2:24

amy te fohi' areo i boak'am-baloha'ey.
 Nanokitse ama' areo raho ry ajalahy,
 amy te maozatse,
 naho mimoneñe ama' areo ao
 o tsaran' Añahareo,
 vaho fa nahareketse i ratiy. ¹⁵ Ko mikoko ty voatse toy, ndra o raha ami'ty
 voatse toio. Naho eo ty mikoko ty voatse toy, tsy ama'e ty fikokoan-
 dRae*. ¹⁶ Toe tsy boak' aman-dRae fa hirik' ami'ty voatse toy ze
 an-tane atoy iaby—ty hadrao' o nofotseo, ty fihañam-pihaino naho
 ty fisengean-kaveloñe.— ¹⁷ Fa mihelañe aña ty voatse toy naho o ìna
 rati'eo, fe ho veloñe nainai'e ty manao o satrin' Añahareo.

o Mpiteti' i Norizañeio ¹⁸ Ry keleiako, fa sa sahengaha'e toy; ie
 nahajanjiñe te ho avy i norizam-bilañey, toe maro ty norizam-bilañe
 pok'eo henaneo. Zay ty aharendrehañe t'ie fa sa honka'e. ¹⁹ Nienga an-
 tika iereo, fa toe tsy nimpiaman-tika. Naho toe ni-mpitraok' aman-tika le
 mbe ho ni-mpiaman-tikañ' avao; fa zay ty mampidodea te tsy ni-mpiaman-
 tika. ²⁰ Fa nanàvoñe anahareo i Masiñey, vaho hene fohi'areo. ²¹ Tsy
 t'ie tsy mahafohiñe ty hatò ty nisokirako fa t'ie mahafohiñe, vaho tsy
 amam-bande ty hatò. ²² Ia ty remborake naho tsy ty mandietse te IESOÀ
 i Norizañey. Norizam-bilan-dre, mpitety an-dRae naho i Anakey. ²³ Tsy
 aman-dRae ze mitety i Anakey; aman-dRae ka ze miantoke i Anakey. ²⁴ Aa
 le ampimoneño ama' areo ao i jinanji' areo tam-baloha'ey. Ie imoneña'
 i jinanjiñe am-baloha'ey, le himoneñe amy Anakey naho aman-dRae ao
 nahareo. ²⁵ Zao i nampitamae'e antikañey, le i haveloñe nainai'e tsy
 modoy. ²⁶ Nisokireko ama' areo irezao ty amo mipay hamañahio. ²⁷ F'ie,
 toe imoneña' i Fanavonañe niazo' areo ama'ey, le tsy ipaiañe ka te hatoro
 ondaty, fa hitoroa' i Fanavona'ey ze he'e, ie ro to, fa tsy vande—aa ty amy
 nañòha'e anahareoy, le imoneño.

Anak'Andrianañahare ²⁸ Ie amy zao ry keleiako, imoneño, hahatokisan-
 tika amy fiboaha'ey, tsy hitsolofiñe an-kasalarañe te totsake. ²⁹ Kanao
 rendre' areo t'ie vantañe, le fohi' areo te hene mitoloñe ami'ty fahiti'e
 ze anake nampiareñ'e†.

3

¹ Inao, ty hara'elahim-pikokoañe nitoloran-dRae, t'ie atao anak' Andrianañahare! Toe izay ty foto' tsy ahafohina' ty voatse toy an-tika, amy t'ie
 tsy nahafohiñ' aze. ² Ry rañetse, anan' Añahare tika henaneo, fe mbe tsy
 nabentatse t'ie ho inoñe. Fe fohin-tika t'ie misodehañ' eo, le ho hambañe
 ama'e tika, ie ho onin-tika ami'ty vinta'e. ³ Aa ndra ia ia ty mitamañe zay,
 le mañalio vatañe, hambañe amy te ie ro malio.

⁴ Ndra ia ia mitolom-pandilatse ro mañota Hake; toe tahiñe ty fandila-
 rañe Hake. ⁵ Fa fohi' areo t'ie niboake hañaha o hakeon-tikañeo; ie tsy
 aman-tahiñe. ⁶ Tsy mitolon-kakeo ze mimoneñe ama'e ao. Tsy mitolom-
 pandilatse ze nahaisak' aze naho mahafohiñ' aze*.

⁷ O keleiakoo, asoao tsy ho fañahie' ondaty. Vantañe ty mpitolon-
 kavantañañe, hambañe amy te Ie ro vantañet. ⁸ Mpiamy mpañinjey
 ze mandilatse avao, amy te mpandilatse boak' am-baloha'e i mpañinjey.
 Niboake i Anan' Añaharey handrotsake o sata' i mpañijeio‡. ⁹ Tsy mitolom-
 kakeo ty nasaman' Añahare, amy te mimoneñe ama'e ao i doria'ey, vaho

* ^{2:15} Iak 4:4 † ^{2:29} Jn I 3:7-10, 5:4,18 * ^{3:6} Jn I 2:4, Jn III 1:11 † ^{3:7} Jn I 2:29 ‡ ^{3:8} Tit
 2:

tsy hai'e ty mandilatse, amy t'ie nasaman' Añahare. ¹⁰ Zao ty mampalange o anan' Añahareo naho o ana' i mpañinjeio: tsy anan' Añahare ty tsy mpanao havantañañe§ naho ty tsy mikoko rahalahy.

¹¹ Inao i entañe jinanji' areo am-baloha'ey: t'ie hifampikoko, ¹² tsy manahak' i Kaina nimpiamy ratiy, ie namono an-drahalahi'e. Aa ino ty talim-pamonoa'e aze? Ie niraty sata, vaho nivantañe o an-drahalahi'e. ¹³ Ko latsa, ry longo, naho malaiñe anahareo ty voatse toy*. ¹⁴ Fohintika te, nienga i havilasiy homb' an-kaveloñe ao tika mpikoko longo. Mimoneñe an-kavilasy ao ty tsy mikoko. ¹⁵ Ndra ia ia malain-dongo ro mpamono ondaty, le fohi' areo te tsy imoneñan-kaveloñe nainai'e ty mpañoho-doza. ¹⁶ Inao ty aharendrehan-tika fikokoña: toe ie namoeay ho an-tika. Aa le hamoe-ay ho an-drolongo ka tika. ¹⁷ Ze manañe ty vara' ty voatse toy, ie mahaoniñe ty paia' i longo'ey, naho mampigaben-troke, aia te ho ama'e ty fikokoan' Añahare. ¹⁸ Ry keleiakoo, asoao tsy hikoko an-tsaontsy ndra am-pameleke avao, fa an-tsata naho hatò. ¹⁹ Inao ty aharendrehan-tika te mpiama' ty hatò, hampazava troke añatrefa'e eo, ²⁰ ie sisien-troke, jabajaba te amo arofon-tikañe t'i Andrianañahare, kila arofoana'e. ²¹ Ry rañetse, naho tsy mamàtse antika o tron-tikañe, le mirearea mahafañatreke an' Andrianañahare, ²² le ndra inoñ' inoñe ihalalian-tika, ho rambeseñé, amy t'ie mpañambeñé o lili'eo vaho manao ze mahafale am-pivazohoa'e†. ²³ Inao ty lili'e: te atokisan-tika i tahinan' Ana'e, Iesoà Norizañey, naho hifampikoko, hambañe amy nandilia'ey. ²⁴ Mimoneñe ama'e ao ze mpañambeñé o lili'eo, naho ie ro ama'e ao. Le ty ahafohinan-tika te imoneña'e, i Arofo'e natolo'e aman-tikañey‡.

4

Tsoho o Arofoo

¹ Ry rañetse, ko fonga iantofañe ze atao fañahy, fe mitsohà arofo, ke boak' aman' Añahare, amy te maro ty mpitoky vilañe miboele ami'ty voatse toy. ² Inao ty aharendreha' areo i Arofon' Añaharey: ze troke mianteke te nitotsak' ami'ty nofotse t'Iesoà Norizañe ro aman' Añahare; ³ fe tsy aman' Añahare ze troke tsy mianteke te niboak' an-tsandriñe t'Iesoà, ie ro amy mesia-vilañey, i jinanji' areo te ho aviy, vaho fa ami'ty voatse toy henaneo. ⁴ Boak' aman' Añahare nahareo ry keleiako, le fa nahagioke; amy te jabajaba i ama' areoy ta ty ami'ty voatse toy. ⁵ Mpiami' ty voatse toy iereo, naho manao ty reha' ty voatse toy, vaho itsanoña' ty voatse toy. ⁶ Boak' aman' Añahare tika. Mijanjiñe antikañe ze mahafohiñe an' Andrianañahare; tsy mijanjiñe antika ze tsy mpiaman' Añahare. Inay ty aharendrehan-tika ty Arofon-katò naho i fañahin-dilatsey.

Ty Fikokoan' Añahare naho ty Antikañe ⁷ Ry rañetse, antao hifampikoko, fa boak' aman' Añahare ty koko. Ndra ia ia mikoko, le nampiareñen' Añahare vaho mahafohiñe an' Andrianañahare. ⁸ Ndra ia ia tsy mikoko, le tsy mahafohiñe an' Andrianañahare, amy te fikokoña t'i Andrianañahare. ⁹ Inao ty mampidodea ty fikokoan' Añahare amantika: toe nirahen' Añahare mb'ami'ty voatse toy i bako-toka'ey hiveloman-tika. ¹⁰ Inao o fikokoña: tsy te itika ro nikoko an' Andrianañahare fa ie hey ro nikoko an-tika vaho nañitrike i Ana'ey hañefetse o hakeontikañe. ¹¹ Ry rañetseo, kanao zay ty nikokoan' Añahare antika, ehe

§ ^{3:10} Jn III 1:11 * ^{3:13} Jao 15:18-19, 17:14 † ^{3:22} Rzs 28:9, Jao 9:31, Jak 5:16 ‡ ^{3:24} Jao 14:23-24, Top 5:32, Rom 8:7-11

te hifampikoko ka. ¹² Leo raike tsy nahaisak' an' Andrianañahare ndra mbia' mbia, f'ie mifampikoko le mimoneñe aman-tikañ' ao t'i Andrianañahare, naho fonireñe aman-tikañ' i fikokoa'ey. ¹³ Inao ty aharendrehan-tika te mimoneñe ama'e, naho ie amantika, le t'ie nandiva i Arofo'ey aman-tikañe. ¹⁴ Fa niisa'ay naho mitaroñe te nahitrin-dRae i Ana'ey, Mpandrombake ty voatse toy. ¹⁵ Ze mitaroñe IESOÀ t'ie Anan' Añahare, le mimoneñe ama'e ao t'i Andrianañahare naho aman' Añahare ao re. ¹⁶ Fa fohintika naho atokisañe ty fikokoan' Añahare an-tika. Fikokoñañe t'i Andrianañahare, naho mimoneñe aman' Añahare ao ze mimoneñe am-pikokoñañe ao, vaho ama'e ao t'i Andrianañahare. ¹⁷ Inao ty mahaañoñe o fikokoan-tikañe, hahafirearean-tika amy andron-jakay, t'ie mihambañe ama'e an-tane atoy. ¹⁸ Tsy aman-kebahebake ty hatea, le mandroake anifañe ty koko ki'e, fe mioza lovelove ty hemba; mbe tsy fonitse koko ty marimarike. ¹⁹ Mikoko tika, amy te Ie hey ro nikoko an-tikañe. ²⁰ Naho eo ty manao: Kokoako t'i Andrianañahare, f'ie malain-dongo, ro mpandañitse; amy te aia ty hahafikokoa'e an'Andrianañahare tsy isa'e naho tsy kokoa'e hey ty longo'e trea. ²¹ Inao ty nandilia'e an-tika: Tsy mete tsy mikoko longo ty mikoko an'Andrianañahare.

5

Fatokisañe amy Anan'Añaharey

¹ Ndra ia'ia miantoke te IESOÀ i Norizañey, le nampiareñen' Añahare; mikoko i nampiareñey ze mikoko i Nampiareñey. ² Zao ty aharendrehan-tika te mikoko o anan' Añahareo tika: ie mikoko an' Andrianañahare naho mañambeñe o lili'eo. ³ Inao ty fikokoñañe an' Andrianañahare, t'ie mañambeñe o lili'eo*, tsy mavesatse o lili'eo. ⁴ Mpandreketse ty voatse toy ze nampiareñen' Añahare; zao ty fandreketañe mahagioke ty voatse toy: ty fatokisan-tikañe. ⁵ Ia ty mahareketse ty voatse toy? naho tsy i miantoke te IESOÀ ro Anan' Añaharey. ⁶ Intoy ty nitotsak' atoy ami'ty rano naho ty lio, IESOÀ Norizañey; tsy an-drano avao, fa an-drano naho lio. I Arofoy ro mitaroñe, le tò i Arofoy. ⁷ Telo ty mitaroñe: ⁸ i Arofoy, naho ty rano, naho ty lio; vaho mitrao-drehake i telo rey. ⁹ Aa naho non-tika ty enta' ondaty, lombolombo zay ty taron' Añahare, fa zao ty taron' Añahare, t'ie nitaroñe i Ana'ey. ¹⁰ Toe añ'ova' ty miato amy Anan' Añaharey i taroñey, fe nanao aze ho mpandañitse ze tsyi-miato amy anan' Añaharey, ami'te tsy atokisa'e i nitaroñen' Añahare i Ana'ey. ¹¹ Zao i taroñey te tinolon' Añahare haveloñe nainai'e tika; vaho amy Ana'ey i haveloñe zay. ¹² Aman-kaveloñe ty manañe i Anakey; tsy aman-kaveloñe naho tsy ama'e i Anan' Añaharey.

Figadoña'e ¹³ Nanokitse izay ama'areo mpiato amy tahinan' Anan' Añaharey raho, haharendreha' areo t'ie aman-kaveloñe nainai'e. ¹⁴ Inao ty fatokisan-tika añatrefa'e, t'ie mihalaly ndra inoñ' inoñe an-tsatri'e le ijanjiña'e. ¹⁵ Aa ie fohin-tika te hene janji'e o ihalalian-tikañe, le atokisan-tika te fa aman-tika i nihalaliañey. ¹⁶ Naho eo ty mahaoniñe te nanao hakeo tsy mahakoromake i longo'ey, naho ihalalia'e, le ie ty hanoloran' Añahare haveloñe amy aman-kakeo tsy mahahomakey. Toe ao ty tahiñe mahavetrake; tsy manao ty hoe raho t'ie ty ihalaliañe. ¹⁷ Fonga hakeo ze tsy an-kahiti'e, fe eo ty tahiñe tsy mahakoromake. ¹⁸ Fohin-tikañe te tsy mandilatse ka ze nasaman' Añahare[†]; fa arovan' Añahare i nasama'ey,

* ^{5:3} Jn I 5:2, Jn II 1:6, Jao 14:15 † ^{5:18} Jn I 3:6-9

tsy ho paohe' i Ratiy‡. ¹⁹ Fohin-tika t'ie aman' Añahare, fe fonga fehè' i ratiy ty voatse toy. ²⁰ Fohin-tika te nivotrak' atoy i Anan' Añaharey, naho nampandrendrek' antika hahafohinan-tika i Vantañey, naho t'ie amy Vantañey, toe amy Ana'e IESOÀ Norizañey. Ie t'i Andrianañahare to naho haveloñe nainai'e. ²¹ O keleiakoo, ifoneño ty fahasive§.

Jaona II

¹ I Zokey,

Ho ami'ty rakemba jinoboñe naho o ana'eo, o kokoako an-katò; le tsy zaho avao, fa ze hene mahafohiñe ty hatò, ² ie i hatò mimoneñe amantikañe vaho ho aman-tikañe nainai'ey. ³ Hasoa naho fiferenaiñañe vaho hanintsiñe aman-tika boak' aman' Añahare Rae naho hirik' am' IESOÀ Norizañey, anan-dRae, an-katò naho an-koko. ⁴ Vata'e nahaeħak' ahy te nahatreo o ana'o ila'eo nañavelo ami'ty hatò, do'e amy nandilian-dRae antikañey. ⁵ Mañontane azo raho, rakemba, tsy t'ie isokirako lily vao, fa i tàman-tika am-baloha'ey, t'ie hifampikoko. ⁶ Zao o fikokoñaño, t'ie mañavelo am-pañambenañe o lili'eo*. Inao i liliy, hañaveloa' areo amy jinanji' areo tam-baloha'ey.

⁷ Maro ty mpamañahy fa niboele ami'ty voatse toy ze tsy mianteke te niavy an-tsandiñe t'IESOÀ Norizañe. Zay i mpamañahiy, i norizambilañey. ⁸ Mitaoa tsy ho motso ty nifanehafan-tika, soa t'ie handrambe tambe heneke. ⁹ Ndra ia ia milosotse tsy mimoneñe amy fañòha' i Norizañey, le tsy ama'e t'i Andrianañahare[†]; f'ie mifahatse amy fañòhañey, le ama'e t'i Rae naho i Anakey[‡]. ¹⁰ Aa ndra ia ia mitilik' azo tsy minday i fañòhañe zay, ko anoe'o añ'anjomba, vaho ko añontanea'o, ¹¹ amy te mpitraok' amo sata-rati'eo ze mañontane aze.

¹² Aa ndra te maro ty ho nisokirako, tsy teako t'ie an-taratasy naho rano-mainte, fe salalaeko ty hitilike vaho hifañaoñañe ama'o naho hifañatreke hampahaeneñe o haehan-tikañaño. ¹³ Mañontane azo o ana-drahavave'o jinoboñeo.

* **1:6** Jn I 5:3, Jao 14:15 † **1:9** Ti I 6:3 ‡ **1:9** Jn I 1:3, 2:22, 5:20

Jaona III

¹ I Zokey,

Ho an-drañeko Gaio, ikokoako an-katò.

² O rañetse, mitat'azo raho, lonike t'ie hiraorao naho ho jangañe, mira amo fanintsiñan' arofo'oo. ³ Akore ty hafalean-troko, te niloneak' atoy o rolongoo nitaroñe ty hatò ama'o ao, ty fañaveloa'o an-katò. ⁴ Tsy eo ty mahaehak' ahy mandikoatse zao, t'ie mahatsanoñe te mañavelo an-katò o anakoo.

⁵ O rañetse, migahin-drehe amo hene fañimbà'o an-drolongoo antsak' amo ambahinio. ⁶ Fa nitalilie' iareo añatrefa' i Fivoriy ty fikokoa'o. Aa le mahasoaz o azo t'ie ampionjone'o mañeva an'Andrianañahare, ⁷ amy te i Tahina'ey ty niavota' iareo mb'eo tsy nandrambe ndra inoñ' inoñe amo kilakila ondatio. ⁸ Aa le mete aman-tika ty mañimba ondaty hoe zaio, hitraofan-tika fitoloñe ami'ty hatò.

⁹ Nisokireko i Fivoriy, fe tsy mandrambe ty enta-tika t'i Diotrefa, ie te ho mpiaolo añivo' iereo. ¹⁰ Aa naho mb'eo raho le hampanohineko aze o sata anoe'eo ie manambaitambaiñ' antika. Mbore tsy mahaeneñe aze, kanao mitoky tsy handrambe o rahalahio, naho sebañe'e o te hanao zaio, toe aitoa'e amy Fivoriy. ¹¹ O rañetse, ko mitsikombe ty raty fa ty soa. Boak' aman' Añahare ty manao soa; tsy nahaisak' an' Andrianañahare ty mpanao raty*. ¹² Hene mitalily soa i Demetrio, naho ty hatò, naho onjone'ay amy taro'aiy vaho fohi'o te to ty taro'ay.

¹³ Maro ty ho nisokirako, fe tsy teako t'ie an-taratasy ndra rano-mainte te sokireñe. ¹⁴ Misalala hahatreaz o te aniany, hifañòhahohàn-tika laharañ' an-daharañe. Hanintsiñe ama'o. Mañontane azo o rañetseo. Añontaneo an-tahinañe o rañetseo.

* ^{1:11} Jn I 3:6-10

Joda

¹ I Joda, fetrek'oro'IESOÀ Norizañey naho rahalahi' Iakobe, Ho amo nikanjieñe, nambahan' Añahare Rae naho tambozoreñe am'IESOÀ Norizañeyio. ² Ampitoaboreñe ama' areo ty fitretrezañe naho ty fañanintsiñe vaho ty fikokoñañe.

³ Ry roañetse, nilozoheko sokitse i fandrombahañe itraofañey, fe inao ty nataoko: hàmake hañosik' anahareo himane i fatokisañe natoro amo noro'eo indraike nahahenekey. ⁴ Amy te ao t'indaty nitsifitse añetake, ie nipatereñe haehae ty fàtse hizò iareo, ie tsy mañaon-Kake*, mamotetse ty hasoan' Añaharen-tika ho an-kaloloñañe vaho mitety IEHOVÀ Andrianañahare tsi-roe-tsi-telo naho i Talèntika, IESOÀ Norizañey.

⁵ Te haniahys anahareo raho, toe hene nifohi' areo hey, te ie rinomba' i TALÈ ondaty an-tane' Egipte añaeo, le nimongore'e o tsi-niatoo, ⁶ naho nitambozore'e an-drohy tsy modo am-pimoromoroñañe ao ampara' i zaka amy andro jabajabaiy o anjely tsy nitañe ty nañorizañe iareo naho nifary i toe' iareo do'ey; ⁷ hambañe amy Sodoma naho i Gomora naho o rova nañohokeo, ie nivalijere an-karapiloñañe nipaynofotse faly, vaho nanoeñe fandrazañañe, nafàtse ho lovilovieñe añafo ao kitro katroke.

⁸ Toe manahake izay iretiañe, ie mameveta sandriñe amo anofisa' iareoo, mañarinje mpanandily, vaho mañinje o amam-bolonahetseo. ⁹ Fa ndra i Mikaela, talèn' anjely, ie nifañotak' amy mpañinjey t'ie nifandietse amy fañòva' i Mosèy, tsy nahavany hanisý aze aña endake, fa nanao ty hoe: Hitrevoha' t'i TALÈ †! ¹⁰ Fe mañinje o raha tsy apota'e ondaty retiañe, naho o raha nifohi'e boak' an-trokeo, hoe biby tsy mitsakore, zay ty mahamomoke iareo. ¹¹ Hankàñe am'iareo! Ie nitsile an-dala' i Kaina naho nifatrifatry nipay tambe ami'ty fandilara' i Balama vaho mirotsak' ami'ty fiola' i Kòra‡. ¹² Ie vato-haran-driake mietak' amo sabadidam-pikokoa' areoo mitrao-pikama tsy aman-kembañe; tea haneñe avao; rahoñe tsy aman-drano, ahofahofan-tioke; hatae an-tsaramanty tsy mamoa, indroe mate, nombotañe reke-bahatse; ¹³ onjan-driake mivalitaboake mandoa voren-kameñarañe; vasiañe mirererere nañajàñe ieñe mimoromoroña zafezanake.

¹⁴ Ie ondaty nitokie' i Enoke, faha-fito' i Dameo, ami'ty hoe: Heheke, mitotsak' etoa t'i TALÈ aman' aleale' o noro'eo, ¹⁵ hametsake zaka amy ze he'e, hañameloke ze tsi-aman-Kàke ty amo sata tsi-aman-Kàke nitoloñe' iareoo an-kaloloñaeo, naho o tambaimbaiñe nanoe' i mpanan-kakeo tsi-aman-Kàke rezay ama'eo§. ¹⁶ Mpiñeñe o iereo, mpaniñetiñe; mañorike o drao tsi-voka'eo; mivolam-pirengenvahañe o vava'eo, mitsiriry laharañe, hañaramamoa'e.

¹⁷ Ie amy zao, ry rañetse, tiahio i saontsy nente' o Firàhe' i Talèntika IESOÀ Norizañeyio taoloy; ¹⁸ ie nitaroñe ty hoe: An-tsà honka'e, le hitoandra-toandra an-kadrao tsy aman-Kàke o mpanivetiveo. ¹⁹ Ie mpampiriaria—mpañorike ty draon-troke, tsy amañ'Arofo.

²⁰ F'inahareo, ry rañetse, ie mitomambao am-patokisañe miavake do'e naho mitalaho añaamy Arofo-Masiñey, ²¹ tambozoro i fikokoan' Añaharey, itamao ty fiferenaiña' i Talèntika IESOÀ Norizañey minday haveloñe nainai'ey. ²² Rambeso an-tretrè o ila'e mihañahañao. ²³ Rombaho ty ila'e,

* ^{1:4} Mat 13:1-58, 1Te 2:1-17 † ^{1:9} ZEK 3:2 ‡ ^{1:11} Mpz 1:7-11, Pe II 2:6-15 § ^{1:15} Enoka 1:9

isintono boak' añ' afó ao, ferenaiño an-kahembañañe ka o ila'eo, le hejeo ndra ty sikiñe nileore' o nofotseo.

²⁴ Aa le ho amy mahatañ' anahareo tsy hitsikapy naho mahafitroatse anahareo ho tsy aman-kandra, an-kafaleam-bey mb' añatrefan' enge'e mb'eo, ²⁵ Ho aman' Añahare tokañe mahihitse, Mpandrombak' antikañe*, ty engeñe naho volonahetse, fifeheañe vaho haozarañe, taolo' ze sa, henaneo vaho nainai'e donia. Amena.

* **1:25** Tovoño: añam' Iesoà Talèntika Norizañey,

Bentatse

Fiaolo Rehake

¹ Ty namentabentara' IESOÀ Norizañey, ie nitoloran' Añahare, hanoroa'e o mpitoro'eo o tsy mahay tsy ho tendrek' anianio, le nampihitrife'e aman-Anjeli'e ty hampahafohiñe i Jaona mpitoro'e. ² Ie nitaroñe ze hene nioni'e amy tsaran' Añaharey naho amy taro' IESOÀ Norizañey. ³ Haha ty mamaky ty tsaram-pitokiañe toy am-palie naho o mitsendreñe vaho mañambeñe o misokitseo, fa an-titotse ty andro.

Fisalamañe naho Fitatañe

⁴ I Jaona,

Ho ami'ty Fivory fito e Asia ao.

Hasoa ama'areo naho hanintsiñe boak' amy Ao, naho i Tao, vaho i Hitotsake eo naho boak' amo arofo fito aolo i fiambesa'gio, ⁵ naho boak' am' IESOÀ Norizañey, i valolombeloñe migahiñey, ty valoha'e nasamak' amy havilasiy, toe i Talèm-panjaka' ty tane toiy*.

Ho amy Mpikoko naho nañaha antikañe amo hakeon-tikañeо amy lio'eiy, ⁶ vaho nanoe'e mpanjaka naho mpisoroñe aman' Añahare, Rae'e. Aze ty engeñe naho ty haozarañe nainai'e donia! Amena. ⁷ Hehe, t'ie mitotsake eo
mindre amo rahoñeo†;
kila fihaino ro hahaisak' aze,
naho o nitombok' azeo,
vaho hangoihoa' ze hene foko' i Taney‡. Ie zay! Amena. ⁸ Zaho ty A naho
Z§, hoe t'i TALÈ Andrianañahare, i Eo naho i Teo vaho i ho Aviy, i
Tsitongerèñey.

Ty Nanahake i Ana'Ondatiy ⁹ Zaho, toe rahalahi' areo, Jaona, mpitrapoke amy haloviloviañey naho amy fifeahañe vaho fahaliñisañe amy IESOÀ ao, ro tan-tokonose atao Patmo, ty amy tsaran' Añaharey naho ty amy taro' i IESOÀy. ¹⁰ Ie tañ' Arofo ao amy andro ra'elisy zay vaho nahatsanoñe ty fiarañanañañe nipazake hoe antsiva* ambohoko ao ¹¹ nanao ty hoe, Patero am-boke ao ze isa'o le ahitrifo mb'amo Fivory fito rezao: mb'amy Efesosy naho mb'amy Smirna naho mb'amy Pergamosy naho mb'amy Tiatira naho mb'amy Sardisy naho mb'amy Filadelfia vaho mb'amy Laodikia. ¹² Nitolike raho hahatreavako i fiarañanañañe nisaontsy amakoy; aa naho nitolike le nahatre a menorà† volamena fito‡, ¹³ naho an-teñateña' i fitongoàn-jiro rey ey ty nanahake i Ana' Ondatiy§ nisikiñe lamba nahatakatse o fandia'eo vaho nisadiam-bolamena aña'raña'e eo*. ¹⁴ Nifoty hoe volon' añondry foyt o maroin' añaambone'eo, vaho hoe afo miroborobo o fihaino'eo. ¹⁵ Nihoе torisike nikotriñeñe, natranak' an-toñake ao, o fandia'eo†, le nanahake ty fitromoron-drano maro i fiarañanaña'ey‡; ¹⁶ naho am-pità'e havana ao ty vasiañe fito, le niboake am-palie'e ao ty fibara masioñe sambe-lela'e§, vaho nanahake ty fireandrea' i àndroy te tsipinde mena ty lahara'e. ¹⁷ Ie nitreako, le nibabok' am-pandia'e eo hoe

* **1:5** Its 10:17, Sabo 136:3 † **1:7** Dan 7:13 ‡ **1:7** Zek 12:10 § **1:8** A naho Zede : Gr: Alfa naho Omega; Heb: Alef naho Tav (Gen 1:1) * **1:10** Grika: trompetra (le hoe zay iaby) † **1:12** Menorà: fitongoàn-jiro, fito ty jiro'e ‡ **1:12** Zek 4.2-3 § **1:13** Dan 7:13 * **1:13** Dan 10:5
† **1:15** Dan 10:6 ‡ **1:15** Iek 1:24, 43:2 § **1:16** Ben 2:16; Ies 49:2, Heb 4:12

mate, vaho natongoa'e amako ty fità'e havana, nanao ty hoe: Ko hembandrehe. Zaho ro Valoha'e naho ty Fara'e*, ¹⁸ vaho i Veloñey; toe nikenkandraho, fe heheke, veloñe nainai'e donia! Amena. Vaho amako o lahindakilè' i Tsikeokeokey naho i Havilasio. ¹⁹ Aa le sokiro o niisa'oo, o eoo, vaho o mbe hifetsakeo. ²⁰ Ty tafatoño' i vasiañe fito nioni'o an-kavanako eo rey, naho i fitongoàn-jiro volamena fito rey: toe anjeli' i Fivory fito rey i vasiam-pito rey, vaho Fivory fito i fitongoàn-jiro fito rey.

2

Efesosy

¹ Ho amy anjelim*-Pivorin-te Efesosiy, sokiro: Inao! ty tsarae' i mitañe i vasiañe fito rey am-pitàn-kavana'e, ie midraidraitse anteñateña' i fitongoàn-jiro fito reiy. ² Fantako o sata'oo, ty fitromaha'o naho ty fifeaha'o, naho te tsy leo'o o tsereheñeo, naho nitsohe'o o mieva ho Firàheñé fa tsieo vaho nioni'o te remborake. ³ Toe nivave'o naho nifeake, naho nitoroñe'o i añarakoy vaho tsy nikolempa. ⁴ Fe inao ty andierako azo: nifarie'o ty fikokoa'o valoha'e. ⁵ Tiahio arè ty ha'abo nikapotraha'o! Misolohoa, naho anò o nanoe'o am-baloha'eo, tsy mone homb'ama'o aniany raho hanintake i fitongoàn-jiro'oy amy toe'ey, naho tsy ibaboha'o. ⁶ Fe zao ty ama'o, t'ie malaiñe ty sata' o Nikolaitao†, toe hejeko ka. ⁷ Ze aman-dravembia, mijanjiña ty taro' i Arofoy amo Fivorio, le ze maharebake, ro hitolorako hikama amy hataen-kaveloñe anteñateñan-tanen-kavelon' Añaharey‡.

Smirna

⁸ Ho amy anjeli' i Fivorin-te Smirnay, sokiro: Inao ty tsarae' t'i Valoha'e naho i Fara'ey§, i nivilasy fa niboden-ko veloñey:

⁹ Apotako o fitoloña'oo naho i faloviloviañey vaho ty hararaha'o, (toe mpañaleale rehe); naho ty fiteratera' o mieva ho mpitan-Kake fa tsie, te mone fivori' i mpañinjeio. ¹⁰ Ko hembañe amo hampisoñañ' azoo. Ingo, fa hajo' i mpañijey am-pandrohizañ' ao nahareo hitsohañe; naho ho sareraheñe folo andro. Migahiñá pak'an-kavilasy vaho hatoloko azo ty sabakan-kaveloñe.* ¹¹ Ze aman-dravembia, mijanjiña ty taro' i Arofoy amo Fivorio. Tsy hizò voiñe amy havilasy faha-roey† ze maharebake.

Pergamosy

¹² Ho amy anjeli' i Fivory e Pergamo aoy, sokiro: Hoe ty taro' i amam-pibara sambe-lela'e masioñey.

¹³ Apotako o fitoloña'oo naho ty fimoneña'o am-pitoboham-pifehea' i mpañinjey ao; fe tambozore'o ty añarako vaho tsy napo'o i fatokisañ' ahiy ndra tañ' andro' i Antipasy valolombeloko migahiñey, ie vinono añ'ila' areo am-pimoneña' i mpañinjey ao. ¹⁴ Fe inao ty tsy ampe hilierako: te ama'o ao ty mitañe ty fañòha' i Balama nañoke i Balaka hampipoke vato fitsikapiañe aolo' o nte-Israeleo hikamà' iareo o nisoroñañe amantsamposampoo vaho hañarapilo. ¹⁵ Toe ama'o ka o mitañe ty fañòha' o Nikolaitaoo—ie hejeko. ¹⁶ Misolohoa! Tsy mone hivovò ama'o, naho hialy am'iereo amy fibara am-bavakoy. ¹⁷ Ze aman-dravembia, mijanjiña ty taro' i Arofoy amo Fivorio. Ze maharebake, ty hanjotsoako amo mana mietakeo,

* **1:17** Ies 44:6, 48:12 * **2:1** Ndra irake, (and. 8, 12, 18 ka) † **2:6** Nikolaita: sata' i Balame: fañarapiloña, fitalahoña ami'ty andro tsie. ‡ **2:7** Fot 2:9, 3:22,24; Ben 22:2,14 § **2:8** Ies 44:6, 48:12 * **2:10** Ies 63:16, 64:8, Rom 9:25-26 † **2:11** Ben 20:6,14

naho hatoloko aze ty vato fovy, vaho nisokireñe amy vatoy ty tahinañe vao tsy fohiñe naho tsy i mandrambe azey.

Tiatira

¹⁸ Ho amy anjeli' i Fivory e Tiatira aoy, sokiro: Hoe ty tsara' i Anan' Añahare, i amam-pihaino mirebareba hoe afó naho amam-pandia hoe torisike nikotriñeñet. ¹⁹ Fantako o sata'oo, naho i fikokoañey naho i fiatrafáñey, naho i fatokisañey naho o fitoroña'oo, vaho te soa ta o tam-baloha'eo o am-para'eo. ²⁰ Fe inao ty tsy ampeampe atreatreko azo, t'ie mitrao-drehake amy Jezebel, rakemba; ie mieva ho mpitoky naho mañoke naho mampitsile o mpitorokoo hañarapilo vaho hikama o nisoroñañe aman-tsamposampoo. ²¹ Ie nampalalaheko hisoloho amo hakarapiloa'eo, fe nifoneña'e tsy hibaboke. ²² Ingo arè t'ie hafetsako an-tihy, naho mb' an-kaloviloviam-bey o mpifandia-tihy ama'eo, naho tsy isolohoañe o sata'iareoo, ²³ vaho havetrako ami'ty angorosy o ana'eo, hahafohina' o hene Fivorio te zaho ro mpitsikarak' arofo naho vetsevetse, vaho songa hitolorako ty amo sata'eo.

²⁴ Fe hoe raho ama'areo naho amo sehanga'e e Tiatirao, o tsy mitañe i fañòhañe zay, naho tsy mahafohiñe ze o atao raha miheotse amy mpañinjey zao, ty amy isaontsia' iareoy: tsy hampijinieko kilankañe hafa nahareo, ²⁵ fe tambozoro o hanaña' areoo ampara' te avy raho. ²⁶ Ze maharebake naho mahambeñe o fitoloñakoo pak'am-pigadoña'e, ty hitolorako lily amo kilakila' ndatio\$, ²⁷ le ie ty hañarak' iareo an-kobay viñe, (ho demodemoheñe hoe valàñe tane iereo*) manahak' i rinambeko aman-dRaekoy, ²⁸ vaho hatoloko aze i Fanjirik' àndroy. ²⁹ Ze aman-dravembia, mijanjiñña ty taro' i Arofoy amo Fivorio.

3

Sardisy

¹ Ho amy anjeli' i Fivory e Sardisy aoy, sokiro: Hoe ty taro' i aman' arofon' Añahare fito rey naho i vasiañe fito reiy. Apotako o sata'oo, te aman-tahinañe t'ie veloñe te mone nibanítse. ² Mijilova! Haozaro o raha sisao, ie antitotse ho momoke, amy te tsy nirendreko te heneke am-pivazohoan' Añahareko o sata'oo. ³ Tiahio arè o rinambe'o naho jinanji'oo, le ambeno vaho isolohò. Inao ho pok'eo hoe mpamaoke raho! Haha ty mitao naho mañambeñe o saro'eo tsy mone mihalo am-pañaveloa'e, hahaisahañe ty fimeñara'e*. Aa naho tsy mijilo rehe le hisodehañako hoe malaso vaho tsy ho fohi'o ty ora hivotrahako. ⁴ Toe ama'o ka ty tahinañe tsy ampe e Sardisy ao ze tsy nandeotse o saro'eo. Ie hitrao-dia amako hisarom-poty fa mañeva.

⁵ Aa le ze maharebake, ie ro haombe sarom-poty, le tsy ho fòrako amy boken-kaveloñey ty tahina'e, fe hiantofako añatrefan-dRaeko naho aolo' o anjeli'eo i tahina'ey. ⁶ Ze aman-dravembia, mijanjiñña ty taro' i Arofoy amo Fivorio.

Filadelfia†

⁷ Ho amy anjeli' i Fivory e Filadelfia aoy, sokiro: Hoe ty enta' i Masiñey, i vantañey, i aman-dahin-dakile' i Davidey; i manokake le tsy eo ty handrindriñe, naho mandrindriñe vaho tsy eo ty hanokake‡. ⁸ Fantako o sata'oo. Hehe, nampijadoñeko añatrefa'o ty lalañe misokake, tsy eo

* 2:18 Dan 10:5-6 § 2:26 Sab 2:8 * 2:27 Sab 2.9 * 3:3 Boak'amy Ben 16:15 † 3:6 Ies 56:
1-7 ‡ 3:7 Ies 22:22

ty haharindriñe aze; toe aman-kaozarañe kede rehe, fe nambena'o o volakoo vaho tsy nitety ty añarako. ⁹ Heheke, hengaeko boak' am-pivori' i mpañinjey, o mieva ho mpitan-Kake fa tsieo, te mone mpandañitse—hampiatrefako azo, hibàbok' am-pandia'o eo, le ho fohi' iereo te ihe ty nikokoako. ¹⁰ Aa kanao nitana'o i taroko ty amy fahaliñisañey, le ho tanako rehe tsy hiatreke i oram-pisombeañe hifetsake ami'ty voatse toiy, hitsoke o mpimoneñ' an-tane atoio. ¹¹ Heheke! ho avy aniany raho, vontitiro ze ama'o, tsy mone ho tavaneñe i sabakam-bolonahe'oy.

¹² Hanoeko fahañe añ'anjomban' Añahareko ao ze maharebake, ie tsy hiakatse ao ka, naho hisokirako ty tahinan' Añahareko§ naho ty añara' i rovan' Añaharekoy, Ierosaleme vao hizotso hirik' andindìñe eñe boak' aman' Andrianañahareko aña; vaho ty añarako vao. ¹³ Ze aman-dravembia, mijanjiña ty taro' i Arofoy amo Fivorio.

Laodikia

¹⁴ Ho amy anjeli' i Fivori' i Laodikiay, sokiro: Hoe ty enta' i Amena*, ty valolombeloñe migahiñe naho tò, ty Fifotoram-pamboaran' Añahare†. ¹⁵ Apotako o sata'oo, te tsy manintsiñe, tsy mae. Ninoko t'ie nanintsiñe he te nimae! ¹⁶ f'ie kanao boka, tsy manintsy tsy mae, le haporitsako boak' am-bavako ao, ¹⁷ ami'ty atao'o ty hoe: Mpañaleale raho; nitoaboram-bar‡ vaho tsy mipay inoñ'inoñe; fe tsy apota'o te mavovoy naho voretra naho rarake naho goa vaho miboridañe. ¹⁸ Itoroako te hivily amako ty vola-mena nitsohañ'afos, hampañaleale azo, naho lamba foy hanikinañe azo, soa tsy haboake ty hameñaram-piboridaña'o, vaho aoli-maso hatevo o fihaino'oo, hahaisake. ¹⁹ Hene endahako naho lafaeko o kokoakoo, aa le mahimbaña vaho misolohoa*. ²⁰ Intoy raho! Mijohañe an-dalañe eo mitrehentrehe. Ndra ia'ia mahajanjiñe ty feoko naho manokake i lalañey, le hizilike mb'ama'e ao raho hitrao-pikama ama'e, vaho ie amako.

²¹ Hatoloko amy ze maharebake t'ie hitrao-piambesatse amako amy fiambesam-pifeheakoy, manahake te zaho naharebake ro mindre fiambesatse aman-dRaeko am-piambesam-pifehea'e ao. ²² Ze aman-dravembia, mijanjiña ty tsara' i Arofoy amo Fivorio.

4

Fitalahoñañ Andindìñe ao

(Isa 6:1-3) ¹ Ie aña, le nañente, vaho naheoko ty lalañe nisokake andindìñe ey, vaho nanao ty hoe amako i fiarañanañañe hoe antsiva* tsinanoko am-baloha'e nitsara amakoy: Mañambonea mb'etoa, hitoroako ze tsy mahay tsy ho avy henane zao.

² Nitijo amako t'ie añ'arofo, naho inge te nijadoñe an-dikerañe ey ty fiambesatse, vaho eo t'i niambesatse amy fiambesatsey. ³ Hoe vato jaspy† naho karneolas i niambesatsey naho niarikatoke i fiambesatsey ty avañe hoe emarode6 te isaheñe. ⁴ Niariseho i fiambesatsey ty fiambesam-pifeheañe roapolo efats'amby naho amy fiambesatse rey ty androanavy roapolo efats' amby misaroñe lamba foy, le añambone' iareo eo songa an-tsabaka volamena. ⁵ Niboak' amy fiambesatsey ty helatse nitsipelatse naho fikorokodoiñañe naho fiparapapihan-kotroke; vaho nirebareba añatrefa' i fiambesatsey eo ty jiro fito, i tio-fiton'Añaharey. ⁶ Añatrefa'

§ 3:12 Ies 56:5 * 3:14 amena: ie zay † 3:14 Kol 1:15; Heb 1:6, Rzs 8: 22-32 ‡ 3:17 Hos 12:8

§ 3:18 Sab 19:10, 119:72, 127, Rzs 30:5 * 3:19 Rzs * 4:1 Ben 1:10, Mat 24: 31, Te 4:16, Ko 15:52 † 4:3 Jaspys: vatosoa mena, ndra mavo tanora

i fiambesatsey eo ty riake fitaratse, hoe kristaly, naho añivo eo vaho mañohoke i fiambesatsey ty raha veloñe efatse atse-pihaino aolo'e naho amboho'e.

⁷ Manahake ty liona i raha veloñe valoha'ey‡, le manahake ty bania ty raha veloñe faha-roe le hoe amam-binta' ondaty i raha veloñe faha-teloy vaho hoe vantio mitiliñe i raha veloñe fah'efatsey§. ⁸ Songa aman' elatse eneñe* i raha veloñe efatse rey, atse-pihaino añ'ariseho aze naho añate'e ao, ie tsy mitroatse handro an-kaleñe manao ty hoe:

Masiñe, masiñe, masiñe
t'i TALÈ Andrianañahare Tsitongerèñey†,
i teo, naho eo, vaho ho aviy.

⁹ Ndra mbia' mbia te mandrenge naho miasy vaho mañandriañe i miambesatse amy fiambesatsey—i veloñe nainai'e doniay—i raha veloñe rey, ¹⁰ le mibabok' añatrefa' i miambesatse amy fiambesatsey i androanavy roapolo efats' amby rey mitalaho amy veloñe nainai'e doniay, vaho mañifike o sabakam-bolonahe' iareoo añatrefa' i fiambesam-bolonahetsey, manao ty hoe:

¹¹ Mañeva rehe, ry TALÈ,
ty handrambe engeñe,
naho hasiñe, naho haozarañe‡,
amy te Ihe ro namboatse ze halifora'e,
naho an-tsatri'o ty maha-eo iareo vaho t'ie namboareñe.

5

Ty Boke-peleke naho ty Vik'añondry

¹ Le nitreako an-kavana' i miambesatse amy fiambesatsey ty boke-peleke misokitse añ'ate'e naho alafe'e*, linte fitomboke fito. ² Nitreako ka ty anjely fanalolahy, nitsey am-piarañanañañe mafe ty hoe: Ia ty mañeva hanokake i boke-pelekey naho hampipoñake o fitombo'eo? ³ Fe leo raik' andindiñe ey tsy nahasokake i boke-pelekey ndra hahaisake aze, ndra antane, ndra ambane tane ao. ⁴ Aa le nangoihoy ty tañy raho amy te tsy tendreke ty mañeva hanokake naho ty hamaky i bokey ndra ty hahaisake aze. ⁵ Le nanao ty hoe amako ty raik' amy androanavy rey: Ko mirovetse! Hehe, te i Liona, tarira' i Joda Vaha' i Davidey† ty nandreketse‡ naho mahasokake i boke-pelekey naho i fitombo'e fito rey. ⁶ Le naheoko te ingo nijohañe an-teñateña' i fiambesatsey naho i raha veloñe efatse rey vaho i androanavy rey eo ty vik' añondry hoe linenta, aman-tsifa fito vaho maso fito, i Arofon' Añahare fito niraheñe hanitsike ty tane toiy. ⁷ Nimb'eo re nandrambe i boke-pelekey am-pitàn-kavana' i miambesatse amy fiambesatsey. ⁸ Aa ie nandrambe i boke pelekey, le nibabok' añatrefa' i Añondriy i raha veloñe efatse rey naho i androanavy roapolo efats' amby rey, songa nitañe marovany naho fitavonaña.volamena pea ty emboke—o halali' o noro'eo. ⁹ Le nitakasy sabo vao ami'ty hoe:

Mañeva azo ty mandrambe i boke-pelekey
naho hampipoñake o fitombo'eo,
amy t'ie linenta,
vaho ty lio'o ro nahavili' aiñe
anay ho an'Andrianañahare,
boak' amy ze hene foko naho fameleke

‡ 4:7 Dan 7:4 § 4:7 Iek 1:10 * 4:8 Ies 6:2 † 4:8 Ies 6:3 ‡ 4:11 Fi I 29:11 * 5:1 Iek 2:10
† 5:5 Fot 49:9-10, Heb 7:14 ‡ 5:5 Ies 11:1, 10

naho tariratse vaho fifeheañe; ¹⁰ naho nanoe'o fifeheañe naho mpisoroñe
 ho an'Andrianañahare'ay zahay,
 hifehe an-tane atoy\$. ¹¹ Le nitreako, naho tsinanoko amy zao ty
 fiarañanañan'anjely maro niarikoboñe i fiambesatsey naho i raha
 veloñe rey naho i androanavy rey, ale añ'ale naho arivo añ'arivo ty
 ia'e, ¹² songa nampipoña-peo ami'ty hoe:
 Mañeva i Añondry linentay,
 ty handrambe lily
 naho vara naho hihitse
 naho ozatse naho hasiñe
 naho engeñe vaho sitra! ¹³ Le tsinanoko ze hene namboareñe andindìñe
 ey naho an-tane atoy naho ambane' ty tane toy ao, naho an-driak'
 aña, vaho ze he'e am'iereo ao nanao ty hoe amy miambesatse amy
 fiambesatseiy naho amy Vik' añondriy:
 Tata naho hasiñe naho engeñe
 vaho fifeheañe nainai'e donia! ¹⁴ Le tinoi' i raha veloñe efatse rey ty hoe:
 Amena! vaho nibaboke eo i androanavy rey, nitalaho.

6

O Fitombokeo

¹ Nitreako te pinoña' i Vik' añondriy ty raik' amy fitomboke fito rey, le
 tsinanoko ty raik' amy raha veloñe efatse rey nanao am-peon' àmpiñe
 ty hoe: Akia! ² Nañente le naheoko te inge ty soavala foty*! le nitam-
 pale ty mpiningitse ama'e naho nitoloran-tsabaka vaho nionjom-beo hoe
 mpandrebake handrebake.

³ Ie nampipoñake i fitomboke faharoey, le inay ty raha veloñe faha roe,
 nanao ty hoe: Akia! ⁴ le niakatse ka ty soavala mena†, naho nitoloran-
 dily i mpiningitse ama'ey hañakatse ze atao hanintsiñe an-tane atoy,
 hifanjamañe, vaho nitolorañe fibara jabajaba.

⁵ Ie nampipoñake i fitomboke fahateloy, le tsinanoko i raha veloñe
 fahateloy nikoike ty hoe: Akia! Naheoko te, ingo ty soavala mainte‡.
 Nitintiñe balantsy am-pità'e§ i mpiningitse ama'ey. ⁶ Le tsinanoko ty
 fiarañanañañe añivo' i raha veloñe efatse rey nanao ty hoe: Bogady*
 raike ty †kapoa-barem-bazaha, naho bogady raike‡ ty vare hordea telo
 kapoake, vaho ko joieñe ty menak' oliva naho ty divay. ⁷ Ie nampipoñake
 i fitomboke fah'efatsey, le inao, nikoike ty hoe i raha veloñe fah' efatsey:
 Akia! ⁸ Naheoko te inge ty soavala fosaposatse\$, naho Havilasy* ty aña'a
 i mpiningitse ama'ey, vaho nañorik' aze t'i Tsikeokeoke. Le nomean-
 dily ami'ty fahaefa' ty tane toy iereo hanjamañe am-pibara, naho an-
 kasalikoañe naho am-pamongorañe, vaho amo biby hako' ty tane toio†.

⁹ Ie nampipoñake i fitomboke faha limey, le nitreako ambane' i kitreliy
 ty arofo' o vinono ty amy tsaran' Añaharey naho i entañe nitaroñe'
 iereoio. ¹⁰ Le nipazake am-piarañanañañe mafe ty hoe: Pak' ombia? ry
 TALÈ masiñe naho to, t'ie hifoneñe tsy hizaka o mpimoneñe an-tane atoio
 hamale-fate ty lio'ay? ¹¹ Le songa nitolorañe saroñe mireparepa foty, naho
 nitaroññañe t'ie hitofa heike, ampara' te heneke o ho vonoeñe manahake
 iereo amo mpitrapo-pitoroñeo vaho amo longo' iareoo.

§ **5:10** Dan 7:18-27 * **6:2** Zek 6:3 † **6:4** Zek 1:8, 6:2 ‡ **6:5** Zek 6:2 § **6:5** Iek 4:16 * **6:6**
 Denariosy: karama andro raike † **6:6** Kapoake: Litatse: Kopy Bey ‡ **6:6** Karama andro raike
 § **6:8** Iek 6:3 * **6:8** Hos 13:14 † **6:8** Iek 5:12, 17, 14:13-19

¹² Le naheoko t'ie nampipoñake i fitomboke fah' eneñey, heheke ty ozoñozon-tane jabajaba, naho nikò-mainte hoe lamba-gony am-bolon-ose i àndroy, naho nivalike hoe lio i volan-dorisay, ¹³ vaho niponaponak' an-tane o vasian-dikerañeo, hambañe ami'ty fihintsaña' o sakoañe looseñeo t'ie hozongozoñen-tiobey. ¹⁴ Nifampiria hoe boke-peleke nipelepeleheñe i likerañey, vaho naveve boak' amo toe'e iabio o vohitseo naho o tokonoseo. ¹⁵ Le songa nietak' am-po lakato naho am-bato ambohits'ao, o mpanjaka' ty tane toio naho o ana-donakeo naho o mpañalealeo, naho o mpifeheo naho o maozatseo naho ze hene ondevo naho midada, ¹⁶ nanao ty hoe amo vohitseo naho amo vatoo: Miambotraha ama'ay naho ampietaho[‡] ami'ty lahara' i miambesatse am-piambesatsey naho amy fifomboa' i Vik' añondriy, ¹⁷ amy te tondroke ty sa ra'elahn-kaviñera' iareo vaho ia ty hahafijohañey?

7

Jiosy 144.000

¹ Ie aña, le nitreako ty anjely efatse nijohañe an-kotso efa' ty tane toy, nikalañe ty tiok' efa' ty tane toy, tsy hitiofa' i tiokey ty an-tane atoy ndra amy riakey ndra amy ze hatae. ² Nitreako ka ty anjely nionjoñe hirik' am-panjiriha' i àndroy eñe ninday ty fitombon' Añahare-veloñe. Kinoi'e am-piarañanañañe mafe i anjely efatse nitoloran-dily hijoy ty tane toy naho i riakey rey, ami'ty hoe: ³ Ko joie' areo hey ty tane toy naho i riakey naho o hataeo ampara' te vinoli-fitombo'ay am-pelahandry* o mpitoron' Añahareo. ⁴ Le tsinanoko ty ia' o viniloñe amy voli-fitombokeio, boak' amy ze hene fifokoa' o ana' Israeleo le rai-hetse-tsi-efats'ale-tsi-efats' arivo. ⁵ O vinoli-tombok' am-poko' i Jodao, 12 000

vinilo am-poko' i Robene: 12 000

vinilo am-poko' i Gade: 12 000 ⁶ vinilo am-poko' i Asere: 12 000

vinilo am-poko' i Naftaly: 12 000

vinilo am-poko' i Manasè: 12 000 ⁷ vinilo am-poko' i Simeone: 12 000

vinilo am-poko' i Levy: 12 000

vinilo am-poko' Itsakare: 12 000 ⁸ vinilo am-poko' i Zebolone: 12 000

vinilo' am-poko' Iosefe: 12 000

vinilo am-poko'i Beniamine: 12 000

ty Valobohóke boak'amy ze hene tane

⁹ Ie aña, le naheoko te inge nizorazora aolo' i fiambesam-pifeheañey naho aolo' i Vik' añondriy ty valobohòke mitozantozañe tsy lefe iaheñe, boak' amy ze hene fifeheañe naho foko naho ondaty vaho fameleke, andamba-foty mireparepa reketse ran-tsatrañe am-pitá'e, ¹⁰ nirihoñe am-piarañanañañe mafe ty hoe:

An'Andrianañaharen-tika

miambesatse amy fiambesatsey

naho amy Vik' añondriy ty fandrombahañe. ¹¹ Le hene nizorazora, niariseho i fiambesatsey naho i androanavy rey naho i raha veloñe efatse rey o anjelio, vaho nibabok' an-daharañe añatrefa' i fiambesatsey iereo nitalaho aman' Añahare, ¹² ami'ty hoe:

Ie Zay! Sitra naho engeñé naho

hihitse naho fañandrianañe

naho hasiñe naho ozatse vaho hafatrarañe

aman' Andrianañaharen-tikañe

[‡] 6:16 Hos 10:8 * 7:3 Ben 9:4, 14:1, 22:4

nainai'e donia. Amena! ¹³ Le hoe ty nañontanea' ty raik' amy androanavy rey: O misaron-damba foty mireparepao, ia iereo, vaho boak'aia? ¹⁴ Hoe ty natoiko, O androanavio, ihe ro mahafohiñe. Le hoe re tamako: O retoañe i niboak'amy haloviloviam-bey heneheney rezay, le fa sinasa' iareo o saro-mireparepa' iareoo vaho nampangotritria-heñe ami'ty lio' i Vik' añondriy. ¹⁵ Aa le:

Miatreke i fiambesan' Añaharey iereo,
mitoroñe aze aña'anjomba'e ao
handro an-kaleñe;
vaho halàma' i miambesatse
amy fiambesatseiy am'iereo
i kivoho'ey. ¹⁶ Tsy ho saliko ka naho
tsy mb'ia ho taliñiereñe, vaho
tsy hipisañe am'iereo i androy,
ndra ze hatrovohañe, [†] ¹⁷ amy te ho mpiarak' iareo‡ i Vik' añondry
añoivo' i fiambesam-pifeheañeiy;
naho hiaoloa'e mb'an-drano veloñe
manganahana§ mb'eo,
vaho fonga ho faopaochen' Añahare am-pihaino'iareo
ze ranom-pihaino.*

8

I Fitomboke faha fitoy

¹ Ie pinoña' i Vik' añondriy i fitomboke faha-fitoy, le nianjiñe an-tsasak' ora i andindìney.

² Le nitreako i anjely fito mpijohañe añatrefan' Añahare rey t'ie nitolorañe antsiva fito.

³ Pok' eo ty anjely tovo'e nijohañe amy kitreliy eo nitañe ty fañembohañe volamena, naho nitolorañ' emboke maro hengae'e mitraok' amo halali' o noro'e iaboo amy kitreliy volamena añatrefa' i fiambesatseiy,

⁴ vaho nionjoñe añatrefan' Añahare boak' am-pitá' i anjeliy ty hatoe' i embokey, rekets' o halali' o noro'eo. ⁵ Le rinambe' i anjeliy i fañembohañey, naho natsafe'e afo boak' amy kitreliy, naho nafetsa'e an-tane atoy; le niparapapiahen' àmpiñe reketse figorogodoiñe, naho fibilobilon-kelatse vaho fanginikinihan-tane.

O Antsivao

⁶ Le nihentseñe hitioke i anjely fito nitintiñe i antsiva fito reiy.

⁷ Nitioke i anjely valoha'ey le pok'eo ty havandra naho afo miharo lio, ze nafetsak' an-tane atoy, naho niforehetse ty faha-telo' ty tane toy naho niforototo ty faha-telo' o hataeo vaho fonga nipiloreñe ze ahetsé maindoñe.

⁸ Nitioke i anjely faharoey, le navokovoko an-driak' ao ty raha jabajaba hoe vohitse niroborobo' ty afo, naho niova ho lio ty faha-telo' i riakey ⁹ le nimate ty fahatelo' o raha veloñe an-driakeo, vaho nirotsake ty fahatelo' o samboo.

¹⁰ Nitioke i anjely fahatelo naho niponake boak' andindìñ' ey ty vasiañe jabajaba niforehetse hoe failo naho nidoñe ami'ty fahatelo' o sakao vaho amo rano manganahanao: ¹¹ Le tsaraeñe te mañendrake ty añara' i vasiañey, naho nivorehe' i mañendrakey ty faha-telo' o ranoo vaho maro t'indaty binaibai' i ranoy ty amy hafai'ey.

† 7:16 Ies 49:10 ‡ 7:17 Iak 34:23 § 7:17 Iir 2:13, 17:13 * 7:17 Ies 25:8

¹² Nitioke ianjely fa' hefatsey, le pinaoke ty fahatelo' i àndroy, naho ty fahatelo' i volañey, naho ty fahatelo' o vasiañeo, vaho naieñe ty faha-telo' iareo; tsy nipisañey ty andro ami'ty faha-telo'e, le nanao zay ka i haleñey*.

¹³ Le nitreako naho tsinanoko ty vantio nitiliñe an-teñateña' i likerañey eñe nikoik' am-peo mafe ty hoe: Hankàñe! Hankàñe! Hankàñe amo mpimoneñe an-tane atoio, ie ho poñafe' i antsiva ila'e ho tiofe' i anjely telo reiy!

9

¹ Nitioke ianjely faha limey, le nitreako ty vasiañe nigodoiñe antane eo hirik' andindiñe ey, vaho natolotse aze ty lahin-dakilè' i vovontsikeokeokey. ² Sinoka'e i tsikeokeokey, le niforoake hirik' an-koboñ'ao ty hatoeñe hoe boak' an-toñake jabajaba. Nimaie' i hatoeñe naporoa' i Tsikeokeokeiy i àndroy naho i tiokey. ³ Le niboak' amy hatoeñey mb'an-tane atoy ty valala vaho nitoloran-dily hambañe ami'ty lily amo halafia' ty tane toio. ⁴ Nitsaraeñe te tsy ho joieñe ty ahets' an-tane atoy, ndraze raha antsetra naho ze hatae, fa ondaty tsy minday i vilon' Añaharey an-dahara'e eo avao. ⁵ Le nimean-dily iereo tsy hanjamañe iareo, fa t'ie hampisoñañe lime volañe. Ty fanaintaiña' iareo le ty fanaintaiña' ty kalengo mamantike ondaty. ⁶ Hipay hikenkañe ondatio amy andro rezay, fe tsy hahaoniñe; hisalala hibanitse, fe handifiha' ty havilasy.

⁷ Nanahake soavala veka'e hialy ty vinta' i valala rey, naho hoe sabakambolamena ty an-doha' iareo vaho nanahake tarehe ondaty ty tarehe' iareo.

⁸ Nanahake maroin-drakemba ty volo' iareo, vaho hoe nifen-diona ty nife' iareo. ⁹ Hoe fikalañan' arañañe viñe o fikala' iareoo, le nanahake ty fikorokodoin-tsoavalan-tsarete maro mioratse mb'añ'aly ty fikofaokofaon' ela' iareo. ¹⁰ Hambañe amo kalengoo ty solo' iareo naho minipoke; toe aman-dily hañehetse ondaty añate' ty lime volañe o solo' iareoo.

¹¹ Amam-panjaka mifehe iereo, ty anjeli' i Tsikeokeokey: i Abadona ty añara'e ami'ty Hebreo, naho Apoliona* ty añara'e ami'ty Grika.

¹² Heneke i hankàñe raikey, Inao! fa hizo hankàñe roe henane zao.

¹³ Nitioke ianjely fah' eneñey, le tsinanoko ty feo boak' an-tsifaefa' i kitrely volamena añatrefan' Añaharey ¹⁴ nanao ty hoe amy anjely fah' eneñe nitintiñe i antsivaiy, Hahao i anjely efatse mirohy amy saka jabajaba Eofratay rey. ¹⁵ Le navotsotse ty anjely efatse nihentseñeñe ho ami'ty ora naho àndro naho volañe vaho taoñe, hanjamañe ty faha-telo' ondatio.

¹⁶ Ro'arivo-hetse ty iam-piningi-tsoavalal nirimboñe. Tsinanoko ty ia' iareo. ¹⁷ Zao ty vinta' o soavalao naho o mpiningitse ama'e nitreako amy aroñaroñeio: amañ'afó naho manga antetse vaho vaton-tsolifara o fikalañ' araña' iareoo; naho hoe lohan-diona ty loha' o soavalao, naho miforoak' am-bava' iareo ty afo naho hatoeñe vaho solifara. ¹⁸ Nanjamañe ty faha-telo' ondaty an-tane atoy i telo rezay, i afoy naho i hatoeñey vaho i solifara niforoake boak' am-bava' iareoy. ¹⁹ Amy te am-bava' o soavalao naho amo ohie'o ty haozara' iareo; fa hoe mereñe aman-doha'e, ty ohí' iareo le irezay ty fijoia' iareo.

²⁰ Mbe tsy nisoloho amo satan-taña' iareoo o sehanga' ondaty tsy nizamane' i angorosy rezaio; tsy nijihetse ami'ty filokolokoañe amo kokolampao naho amo sampsampo volamena naho volafoty naho torisike naho vato vaho hataeo, ie tsy mahatreanaho tsy mahatsanoñe vaho

* ^{8:12} Avo 10:21, Ies 50:3, Iir 4:23-29, Zek 13:8, Ioe 2:10, 3:4, 4:15 * ^{9:11} Apoliona, Abadona: Mpandrotsake

tsy mahilala[†]; ²¹ vaho tsy nibaboha' iareo o fañohofan-dozao ndra o famorehañeo ndra o hakarapiloañeo ndra o fampikamerañeo. Fa amo andro' i fiarañanaña' i anjely faha-fitoio, ie vaho hitioke i antsivaiy, le ho heneke i tafatoñon' Añahare nitaroñe'e amo mpitoky mpitoro'eoy.[‡]

10

Ty Anjely naho ty Boke-peleke Kede ¹ Nitreako ka ty anjely fanalolahy nizotso boak' andindiñe ey, nisaron-drahoñe, naho añambone'e eo ty havañe, naho nanahake i àndroy ty vinta'e, vaho hoe bodan' afo o fandia'eo; ² nitintiñe boke-peleke kedekedeke nisokake am-pitâ'e. Natroa'e ambone' i riakey ty fandia'e havana, naho an-tane eo ty fandia'e havia, ³ vaho nipazak' am-piarañanañañe manahake ty fitroñan-diona. Ie nikoike le nivolañe ka ty feon-kotroke fito. ⁴ Aa naho nivolañe i àmpiñe fito rey, le ho nanokitse raho, fe tsinanoko ty fiarañanañañe boak' andindiñe ey nanao ty hoe: Liteo i vinola' i àmpiñe fito reiy, le ko sokireñe. ⁵ Ie amy zay, nañonjom-pitàn-kavana mb' andindiñe ey* i anjely nitreako nijohañe ambone' i riakey naho an-taney, ⁶ nifanta amy veloñe nainai'e doniay[†], amy namboatse o likerañeo naho ze am' iereo ao naho ty tane toy rekets' o ama'eo naho i riakey vaho ze ama'ey[‡], ty hoe: Tsy ho roñoñe ka ty ora! ⁷.

⁸ Le nisaontsy amako indraike i fiarañanañañe tsinanoko boak' andindiñey, ami'ty hoe: Akia, rambeso i boke-peleke misokak' am-pitâ'i anjely mijohañe an-driake ey naho an-taney. ⁹ Aa le niheo mb'amy anjeliy mb'eo raho le nivolañako, hitolora'e i boke kedey. Le hoe re tamako: Intoy, kamao[§]. Hampafaire'e ty fisafoa'o, f'ie ho mamy hoe tantele am-palie'o ao. ¹⁰ Rinambeko am-pitâ'i anjeliy i boke kedekedekey vaho nihaneko. Nireiko tave amy t'ie nimamy hoe tantele am-bavako ao*, f'ie nateleko le nafaitse ty troko. ¹¹ Le hoe ty nitsara'e: Tsy mete tsy mitoky indraike rehe añañatrefa' ondatio naho fifeheañe naho fisaontsy vaho mpanjaka maro.

11

¹ Tinolotse bararata hoe kobay fanjehean-draho, vaho nisaontsieñe ty hoe: Miongaha, zeho i kivohon' Añaharey naho i kitreliy vaho o mpitalaho aoo, ² fe apoho ty kiririsa' i anjombay, ko zehè'o fa natolotse amo kilakila ondatio. Ho lialiàñeefa-poloro' amby volañe i rova miavakey.

Ty Valolombeloñe Roe

³ Le ho tolorako lily ty valolombeloko roe, hitoky arivo tsy roan-jato tsy enim-polo andro misikin-gony. ⁴ Ie i hatae oliva roe* naho i fitongoàñ-jiro roe mijohañe añañatrefa' i TALÈ' ty tane toy rey. ⁵ Naho eo ty te hijoy iareo, le miporoak' afo ty falie' iareo hamorototo o rafelahi'eo. Aa ndra iaia ty te hanjevoñe iareo le tsy mete tsy zay ty hampibanirañe aze. ⁶ Aman-dily hampikiteke i likerañey iereo tsy hahavia' ty orañe amo andro hitokia' iareoo; vaho aman-dily amo ranoo hañova aze ho lio, naho ty hampipaoke an-tane atoy ze fonga angorosy ndra mbia 'mbia satrie' iareo.

⁷ Ie heneke ty fitalilia' iareo, le hialia' i biby miakats' an-tsikeokeokey le handrebake naho hañè-doza am' iereo, ⁸ vaho hapok' an-dala' i rova

[†] **9:20** Sab 115:4-7, 135:15-17, Dan 5:23 [‡] **9:21** Nafindra boak' amy 10:7 ^{*} **10:5** Fot 14:22, Its 32:40 [†] **10:6** Dan 12:7 [‡] **10:6** Neh 9:6; Avo 20:11, Sab 146:6, Ben 4:11 [§] **10:9** Iek 2:1-10, 3:1-27 ^{*} **10:10** Iek 3:3 ^{*} **11:4** Zek 4:3

jabajaba razañeñe ty hoe Sodoma naho Egipte amy nipehañe i TALÈ' iareoy ty fañòva' iareo. ⁹ Aa le handritse telo andro naho tampa'e ty ila' ondaty naho rofoko naho fameleke vaho fifeheañe hisamba i fañòva' iareo reio ie hifoneñe tsy handenteke iareo an-kibory. ¹⁰ Le hitohàfa' ze fonga mpimoneñe an-tane atoy naho hifale vaho hifampsaloche falalàñe amy te nisamporerahe' i mpitoky roe rey o mpimoneñe an-tane atoio.

¹¹ Ie ritse ty telo andro naho tampa'e, le nizilik' am' iereo ao ty Kofòbelon' Añahare le nitroatse am-pandia, vaho nitsipike ty anifañe ze na-haisake iareo. ¹² Nahajanjiñe ty fiarañanañañe nipazake boak' andindìñe ey i roroey nanao ty hoe am' iereo: Miambonea mb'etoy. Aa le nionjomb' andindimb'eo mb'amy rahoñey iereo am-pisamba' o rafelahi'eo. ¹³ Tamy oray avao ty fanginikinihañe jabajaba nampihotrake ty faha-folo' i rovay. Ondaty fito-arivo ty nikoromak' amy fanginikinihañey le nangebahebake o ila'eo, nañomey engeñe an'Andrianañaharen-dikerañey.

¹⁴ Añe i hankàñe faha-roey; Inao, fa ho tondroke ty faha-telo.

Ty Antsiva faha Fito

¹⁵ Nitioke i anjely faha-fitoy le hoe ty fipoñam-piarañanañañe maro andindìñe ey:

Fa a' i Talèn-tikañey, toe i Noriza'ey
o fifehea' ty voatse toio henane zao,
ie ho fehe'e nainai'e donia[†].

¹⁶ Aa le nibabok' an-daharañ' eo i androanavy roapolo-efats'amby mpiambesatse am-piambesam-pifehea' iareo añatrefan' Añahare rey, vaho nitalaho aman' Andrianañahare, ¹⁷ nisabo ti-hoe:
Mañandriañe Azo zahay,
ry TALÈ Andrianañahare,
Tsitongerène,
I eo, naho teo,
amy te rinambe'o
o haozara'o jabahinakeo
vaho fa mifehe.[‡]

¹⁸ Nidabadoa o kilakila ondatio;[§]
Fe tondroke ty haviñera'o,
naho ty androm-pizakañe o nivilasio naho ty androm-panambezañe
o mpitoro'o mitokio,
naho o noro'oo vaho
ze hene ondaty miisy ty tahina'o,
ndra ty bey ndra ty kede—
vaho ty handrotsake
o mpandrotsa' ty tane toio.

¹⁹ Sinokak' amy zao i kivohon' Añahare andindìñey le tendrek'
amy kibohotsey i vatam-pañina'ey, naho eo ty fibilobiloan-kelatse am-piparapapiahañe naho fikorokodoiñan-kotroke naho ty fanginikinihan-tane vaho ty fañavandrañan-gadaboñey.

12

Ty Rakemba naho i Fañaneñey

¹ Tendrek' andindìñe eñe amy zao ty viloñe jabajaba: ty rakemba misaroñe i àndroy, naho ambanem-pandia'eo i volañey vaho añambone'e

[†] **11:15** Ben 12:10, Sab 2:8, 22:28 mbe mitohy [‡] **11:17** Tohi'e; Dan 2:44, 7:13-14, Oba 1:15-21, Kag 2:22, Zek 14:9 [§] **11:18** Sab 2:1

eo ty sabaka amam-basiañe folo ro'amby. ² Nivesatse re le nikoiakoiak' ami'ty fanaintaiñam-pitsongoa'e vaho nañène te hisamake. ³ Le nisode-hañe andindiñe eñe ty viloñe tovo'e: Inge ty fañaneñe mena ra'elahy, aman-doha fito naho tsifa folo* vaho sabakam-pifeheañe fito amy loha'e rey. ⁴ Piniopio' ty ohi'e ty fahatelo' o vasian-dikerañe vaho nahirirì'e mb'an-tane atoy. Le nijagarodoñe aolo' i rakemba hisamakey i fañaneñey, hampibotseke i ana'ey vata'e toly. ⁵ Le nisamak' anadahy re†, ty lahilahy hifehe ze hene tane an-kobay viñe‡; fe hinaoke mb'aman' Añahare naho mb'amy fiambesa'ey aña i Ana'ey. ⁶ Nibotatsake mb'am-babangoañe aña amy zao i rakembay mb'ami'ty toetse hinalankan' Añahare ho aze; le hatraheñe ao ampara' te ritse ty andro arivo-tsi-roanjato-tsi-enempolo.

⁷ Nipoak' amy zao ty hotakotak' andindiñe ey: nifandrapak' amy fañaneñey t'i Mikaele naho o anjeli'eo; namale amañ'aly ka i fañaneñey naho o anjeli'eo, ⁸ f'ie tsy nahagioke, mbore tsy nanjoañe toetse andindiñe ao. ⁹ Nahifik' ambane i fañaneñe jabajabay—i fañaneñe haehae atao: devoly naho mpañinjey, ie mampandridrìke ty voatse toy iaby. Rinoake mb'an-tane atoy re, le nindre siniots' ama'e o anjeli'eo. ¹⁰ Le tsinanoko ty fiarañanañañe mafe andindiñe ao nanao ty hoe:

Fa totsake henaneo ty fandrebahañe

naho ty haozarañe

naho ty fifehean' Añaharen-tikañe§,

vaho ty lili' i Noriza'ey.

Amy te navokovoko ambane

ty mpanisý o roahalahin-tikañe,

ie nanisia'e añatrefan'Añaharen-tika eo handro an-kaleñey,

¹¹ Rineba' iareo ami'ty lio' i Vik'añondriy

naho ami'ty tsaram-pitaroña' iareo;

tsy nikokoa' iareo ty fiai'iareo

ndra te niatre-kavilasy.

¹² Mirebeha arè ry likerañe vaho o mpimoneñe am' iereoo!

Feh'ohatse an-tane atoy naho amy riakey,

fa nimb'ama' areo ao i mpañinjey!

lifo-pifombo, amy te apota'e

te tomotse o andro'eo.

¹³ Ie niisa' i fañaneñey te tafa-toke an-tane, le nisamporerahe'e i rakemba hisamake i lahilahiy. ¹⁴ Fe tinolotse elatse roe boak' amy bantio ra'elahiy i rakembay, hitiliña'e hisitak' an-tarehe' i fañaneñey mb' andratraratra aña mb'amy toe'e mb'eo; aña re ro hatraheñe taoñe raike naho taoñe roe vaho vaki-taoñe*. ¹⁵ Le nafotroa' i fañaneñey ty rano boak' amy montsili'ey hoe sorotombake hañoridañe i rakembay hasio'e amy fisorotombahañey. ¹⁶ Fe nañolotse i rakembay ty tane toy naho sinoka' i taney ty vava'e niteleñe i saka nafotroa' i fañaneñey hirik'am-bava'ey. ¹⁷ Akore ty fidabadoà' i fañaneñey amy rakembay, kanao nionjoñe amy zao re hialy amo ana'e sisao—o mañambeñe o lilin' Añahareo naho mitambozòtse ty taro' IESOÀ Norizañey. ¹⁸ Le nijagarodoñe amy faseñe añ'olon-driakey re.

13

Ty Biby boak'An-Driak' ao

* **12:3** Dan 7:7,8,20,24 † **12:5** Ies 26:17, 66:7; Mik 4:9-10 ‡ **12:5** Sab 2:9 § **12:10** Ben 11:15

* **12:14** Dan 7:25, 12:7

¹ Treako amy zao ty biby nitroatse boak'an-driak' ao, aman-tsifa folo naho loha fito, naho nisampe amy tsifa'e rey ty sabakan'enge folo, vaho ninday añaran-kateraterañe i loha'e rey. ² Nanahake ty farasy i biby nanteakoy, naho hoe aman-tombom-bera vaho hoe vavan-diona ty vava'e. Natolo' i fañaneñey aze ty haozara'e naho ty fiambesam-pifehea'e vaho ty lily mitiotiotse, ³ le hoe pinaratsake ty loha'e raike ho naха-valaenkañe aze, fe nijangañe i fere ho nahafatey, vaho fonga nañorike i bibiy an-dàtsa ty voatse toy, ⁴ nitalaho amy fañaneñe nañomey lily i bibiy, mbore niambane amy bibiy le nanao ty hoe: Ia ty mañirinkiriñe i bibiy? Ia ty hahafialy ama'e?

⁵ Nomeam-bava re hivolambolañe firengeañe naho titse, vaho nomeandily hifehea'e volañeefa-poloro'amby; ⁶ aa le sinoka'e ty montsili'e niteratera an' Andrianañahare, nañinje ty tahina'e naho i kivoho'ey vaho o mpimoneñe andindiñe. ⁷ Natolots'aze ty hialy amo noro'eo naho handrebake, naho ty lily hifehea'e ze hene foko naho ondaty naho fameleke vaho fifelehañe. ⁸ Hene hiambane amy bibiy ze mpimoneñe an-tane atoy, ze tsy misokitse amy boken-kavelo' i Vik' añondry vinono am-pifotora' ty voatse toy i tahina'ey. ⁹ Ze aman-dravembia, mijanjiña:

¹⁰ Ze hasese an-drohy
le mb'am-bahorañe aña ty haneseañe aze,
ze ho vonoe' ty fibara,
le am-pibara ty hampivetrahañe aze*.
Inao ty fahaliñisañe
naho ty fatokisa' o noro'eo.

Ty Biby Boak'an-Tane ao

¹¹ Naheoko te indroke ty biby tovo'e nidagaritse boak' an-tane ao, amantsifa roe hoe añondry f'ie nivolañe hoe fañaneñey. ¹² Toloñe'e iaby o lili' i biby valoha'e añatrefa'io; fonga ampitalahoe'e amy biby valoha'e nanam-père ho nahafate nimelañey ty tane toy naho o mpimoneñe ama'eo. ¹³ Le anoa'e viloñe jabajaba, ie mampanjotso afo boak' andindiñe ey pak'an-tane atoy aña'atrefa' ondatio; ¹⁴ le fitahe'e o mpimoneñe an-tane atoio amo viloñe natolots' aze hanoe'e añatrefa' i bibiy, hanjizy o mpimoneñe an-tane atoio handranjy ty sare' i biby amam-perem-pibara nibodan-ko veloñey. ¹⁵ Le nitoloran-dily hampikofoke ty sare' i bibiy, hampivolañe i sarem-bibiy vaho hañohofa'e loza amy ze fonga mifoneñe tsy hiambane amy sarem-bibiy. ¹⁶ Le hene ampitombohe'e viloñe am-pitän-kavana'e eo ndra an-dahara'e eo ty kede naho ty bey, o mpañalealeo naho o rarakeo, o fokonontsoao vaho ondevoo, ¹⁷ tsy hahavily ndra hahaletake naho tsy ama'e i viloñey, ndra ty aña'ra' i bibiy, ndra ty ia' i aña'ra'ey. ¹⁸ Inao ty hihitse. Soa re te hamolily ty ia' i bibiy ty mahilala, amy t'ie ty ia' ondaty, toe Enen-jato-tsi-enem-polo-eneñ' amby i ia'ey.

14

I Añondry naho i 144.000 rey

¹ Le naheoko te indroy i Vik' añondriy mijohañe am-bohi' i Tsione ey, vaho ama'e i rai-hetse-tsi-efats'ale-tsi-efats' arivo minday i tahina'ey naho i tahinan-dRae'ey an-dahara'e rey. ² Le tsinanoko boak' andindiñe aña ty feo hoe fitroñan-drano maro, naho ty fivolan-kotroke mikorokodoiñe, vaho hoe feom-pititike mititike o marovani' iareoo ka i feo tsinanokoy;

* ^{13:10} Iir 15:2, 43:11; Fot 9:6; Dan 7:1-28 = Ben 13:1-13

³ le nitakasie' iereo sabo vao añatrefa' i fiambesam-pifeheañey naho añatrefa' i raha veloñe efatse rey naho i androanavy rey, vaho tsy eo ty nahafianatse i saboy naho tsy i rai-hetse-tsi-efats' ale-tsi-efats' arivo vinili-aiñe an-tane atoy rey. ⁴ Tsy nandeo-batañe ami'ty ampela irezay, fa hahiringiri'e. Mañorike i Vik' añondriy iereo ndra aia aia ty ombà'e, ie jinebañe am'ondatio ho loha-voa aman' Añahare naho ho amy Vik' añondriy. ⁵ Ie tsy nahaoniñam-bande am-palie, vaho tsy aman-kila.

Ty Anjely Telo

⁶ Nitreako amy zao ty anjely tovo'e nitiliñe an-teñateñan-dikerañe eñe minday i talili-soa tsy modoy, hitsey amo mpimoneñe an-tane atoio naho amy ze kila fifeheañe naho foko naho fameleke vaho ondaty, ⁷ le hoe re am-piarañanañañe mafe, Mañeveña aman' Añahare vaho toloro engeñe, amy te tsatoke ty oram-pizakà'e. Mitalaho amy namboatse i likerañey naho ty tane toy naho i riakey vaho o rano midoandoañeoy.*

⁸ Nanonjohy i anjeliy ty faharoe, nanao ty hoe: Rotsake! Rotsake i Babolone[†] foloaingitrokey, i nampinoñe o kilakila' ndatio ami' ty divain-kadraon-kakarapiloa'ey.

⁹ Nanonjohy iareo ty anjely tovo'e, ty fahatelo, nipoña-peo ami'ty hoe: Ndra ia ia mitalaho amy bibiy naho amy sare'ey vaho mandrambe viloñe ke an-kandri'e he an-taña'e eo, ¹⁰ le ie ka ty hinoñe ty divaim-pifombon' Añahare an-keri'e do'e amy fitovin-kaviñera'ey vaho ho samporeraheñe aña' afo aman-tsolifara añatrefa' o anjely masiñeо naho aolo' i Vik' añondriy. ¹¹ Le hionjoñe nainai'e kitro katroke ty hatoe' i fampisoñañ' iareoy; tsy ho amam-pitofañe ndra handro ndra haleñe o mitalaho amy bibiy naho amy sare'eo, vaho ze mandrambe i viro' i añara'eyi. ¹² Inay ty hifeaha' o noro'e [‡] am-patokisa' IESOÀO; ie mpañambeñe o lilin' Añahareo .

¹³ Le tsinanoko boak' andindìñe ey ty fiarañanañañe nanao ty hoe: Sokiro: Haha ze vilasy mivetrak' amy TALÈ ao henane zao. Eka! hoe i Arofoy, hitofa amo fitoloña'eo iereo, amy te mañorike iareo o fitoloña' iareoo.

Ty Fanatahañe ¹⁴ Nañente raho le indroke ty rahoñe foy, naho niambesatse amy rahoñey ty manahake i Ana' Ondatiy§, añambone'e eo ty sabakam-bolonahetse volamena, vaho am-pitá'e eo ty fanatahañe masiñe. ¹⁵ Niavotse i kibohotsey ty anjely raike nikoike am-peo mafe amy niambesatse amy rahoñey, ty hoe: Mamatsiha amo fanataha'oo vaho manataha fa tondroke ty sam-panatahañe, amy t'ie matoe, veka'e ho tataheñe ty voka' ty tane toy. ¹⁶ Aa le nafatsi' i niambesatse amy rahoñey mb'an-tane atoy i fanataha'ey le tinatake ty tane toy.

¹⁷ Niavotse i kibohotse andindìñe eñey ty anjely tovo'e ninday fanatahañe masiñe ka. ¹⁸ Niakatse boak'amy kitreliy ka ty anjely nanan-dily ami'ty afo, le kinanji'e am-piarañanañañe mafe i amam-panatahañe masiñey, ty hoe: Mamatsiha amo fanataha'o masiñeо vaho atontono o voaloboke mirokoroko am-bahe' ty tane toio, fa ginoke o valobo'eo. ¹⁹ Aa le navio' i anjeliy mb' an-tane atoy i fanataha'ey le natonto'e o am-bahe' ty tane toio vaho nafetsa'e amy fipiritan-divain-kaviñeran' Añahare jabajabay. ²⁰ Le linialia alafen-drova ao i fipiritan-divaiy vaho

* **14:7** Avo 20:11, 31:13,17 Viloñe † **14:8** Ies 21:9, Oni: Iir 51:8 ‡ **14:12** Ben 12:17 § **14:14** Dan 7.14

nidoandoañe boak' amy fipiritan-divaiy ty lio nahafionjoñe pak' an-daboridi' o soavalao sikal' ami'ty arivo-tsi-enen-jato stadione* aña.

†

15

¹ Le naheoko andindiñe ey ty viloñe tovo'e, ra'elahy naho nam-pañeveñe: ty anjely fito minday ty feh' ohatse fito honka'e, ie ro mahaheneke ty haviñeran' Añahare.

² Le nitreako ty raha hoe riake fitaratse miharo afo, le niriñariña amy riake fitaratsey o naharebake i bibiy naho i sare'ey vaho ty ia' i añara'eio, mitañe o marovanin' Añahareo, ³ misabo i sabo' i Mosè mpitoron' Añaharey naho ty sabo' i Vik' añondriy ami'ty hoe:
Foloaingitroke naho mahalatsa o sata'oo
ry TALÈ Andrianañahare, Tsitongerèñe.

To naho mahity o lala'oo,
ry Mpanjaka' o noro'oo.

⁴ Ia ty tsy hañeveñe ama'o, ry TALÈ,
naho hibango ty tahina'o?
Amy te Ihe avao ro masiñe. Le homb'ama'o mb'eo ze hene
fifeheañe hitalaho añatrefa'o eo,
fa midodea o havantaña'oo*.

Ty Anjely Fito Minday Feh'Ohatse Fito

⁵ Ie aña le naheoko te nisokafeñe i kivoho an-kiboho' i Taroñe andindiñeiy. ⁶ Niakatse i anjombay amy zao i anjely fito ninday feh' ohatse fito rey; misaroñe leny mikotritriake, miloeloe naho nidian-tsikimbolamena añ'araña, ⁷ vaho natolo' ty raik' amy raha veloñe efatse rey amy anjely fito rey ty finga volamena fito pea' ty haviñera' i Andrianañahare veloñe nainai'e doniay. ⁸ Le nampoe' ty hatoe' i engen' Añaharey naho i haozara'ey i kibohotsey, vaho tsy eo ty nahafizilik' amy kibohotsey ampara' te niheneke i feh' ohatse fito' i anjely fito reiy.

16

Ty Fitovin-kaviñeran'Añahare

¹ Le tsinanoko ty fiarañanañañe mafe boak' amy kibohotsey nanao ty hoe amy anjely fito rey: Akia, adoaño amy taney i finga mitañe ty haviñeran' Añahare fito rey. ² Aa le nimb'eo i anjely valoha'ey, nandoveve i finga'ey an-tane atoy, vaho nifetsake am'ondatio ty bae mangirifiry, mamolevole ze ninday ty vilo' i bibiy naho nitalaho amy sare'ey. ³ Nañiliñe i finga'ey amy riakey ty anjely faharoe le niova ho lio, hoe lion-dolo, vaho fonga nizamañe ze raha veloñe an-driak' ao. ⁴ Nampidoàla i finga'ey amo sakao naho amo rano mangahananao ty anjely fahatelo, vaho nivalike ho lio irezay. ⁵ Le tsinanoko i anjeli' o ranoo y nanao ty hoe:

Vantan-dRehe, ry eo naho teo,

Ry Masiñey ami'ty fizakà'o

o raha rezao, ⁶ fa nampiorihe' iereo ty lio' o noro'oo naho o mpitokio, vaho nanjotsoa'o lio hinome' iereo

fa zay ty mañeva. ⁷ Le inay boak'amy kitreliy ty hoe:

Eka, ry TALÈ Andrianañahare,

* **14:20** Henteo amy Jaona no. 6 eo † **14:20** Nafindra amy toko'e itoboha'e, aolo' i 17 eo ty 14.

* **15:4** Iir 10:6-7, 86:9

Tsitongerèñey, vantañe naho to o fizakà'oo. ⁸ Nadoveve' i anjely fah' efatsey amy àndroy i finga'ey, le nitoloran-dily hanodotse ondatio aña'afó. ⁹ Sinòda' ty hatrovohañe ondatio fe hinotohoto' iereo ty tahinan' Añahare aman-dily amy feh' ohatse rey; mbore tsy nisoloho hitolora' iareo engeñe. ¹⁰ Nadoa' i anjely faha limey ami'ty fitoboha' i bibiy i finga'ey, le najoroboñe an-kamoromoroñañe ao i fifehea'ey, ie nihota-lela an-kaloviloviañe, ¹¹ vaho namatse an' Andrianañaharen-dikerañe ty amy fangirifiria' iareo naho o baeo, f'ie tsy nisoloho amo sata'eo ¹² Nadoandoa' i anjely fah' eneñey amy saka jabajaba Eofratay i finga'ey, le nimaiheñe o rano'eo hañajariañe lalañe hombà' o mpanjaka boak' am-panjiriha' i àndroy añaeo. ¹³ Le nitreako niboak' am-bava' i fañaneñey naho am-bava' i bibiy vaho am-bava' i mpitoky sare'ey ao ty fañahy raty telo hoe sahoñe, ¹⁴ fañahin-kokolampa mpanao viloñe tsitantane; mionjoñe mb' amo mpanjaka' ty tane-bey toio iereo, hanontoñe iareo hialy amy andro jabajaban' Añahare Tsitongerèñey. ¹⁵ *.

¹⁶ Le natonto' iareo an-tane atao an-tsaontsy Hebreo ty hoe: Har'magedòñet eo. ¹⁷ Naili' i faha-fitoy amo tiokeo i finga'ey, le niboak'an-kibohotse ao ty fiarañanañañe mafe hirik'amy fiambesatsey nipazake ty hoe: Fonitse zay! ¹⁸ le inay ty fibilobilon-kelatse naho feo naho fikorokodoiñan-kotroke, vaho ty fanginikinihan-tane jabajaba naho ra'elisy kanao tsy teo ty nanahak' aze boak' am-pifotora' ondaty an-tane atoy. ¹⁹ Nivaki-telo i rova ra'elisy, naho nirotsake o rova' o fifeheañeo, naho nitiahieñe añañatrefan' Añahare i Babolone Jabajabay hanjotsoa'e ty fitovy pea' i divain-kalevelevean-kaviñera'ey. ²⁰ Songa nirimatse aña o tokonoseo naho tsy nioniñe ka o vohitseo. ²¹ Le nihorodoboke boak' andindìñe ey ty havandra gadaboñe sindre talenta raike nilantsidantsiñe am'ondatio, kanao namàtse an' Andrianañahare ty amy hankàñ-kavandray ondatio ami'ty halosora' i feh' ohatsey.

17

Ty Rakemba Miningitse ami'ty Biby

¹ Nomb' amako mb'eo ty raik' amy anjely fito amam-pinga fito rey nanao ty hoe: Mb' etoñañe, hitoroako ty zaka hifetsak' amy tsimirirañe folo-ay mitobok' amo rano marooy, ² i nanoa' o mpanjaka' ty tane toio hakarapiloñañe naho nahamamo o mpimone' ty tane toio amy divain-kakarapiloa'ey*. ³ Le nindese' i anjeliy aña' arofo mb'an-dratraratra aña raho. Le nitreako ty rakemba ninigitse ami'ty biby mena mañabasà, àtseke ty añaram-piterateràñe, aman-doha fito naho tsifa folo. ⁴ Nisaroñe lamba malò-mavo naho mena mañabarà i rakembay vaho nihamineñe volamena naho vatosoa naho hange, vaho an-taña'e ao ty fitovy volamena pea hativañe milaro ty haleoran-katsimirira'e†. ⁵ Nipatereñe am-pela-handri'e eo ty añarañe, toe tafatoño:

Babolone Jabajaba, Renen-Tsimirirañe naho o raha tiva' ty tane toio. ⁶ Le naheoko i rakembay te jike ami'ty lió' o noro'eo naho ami'ty lió' o ninday ty taro' IESOÀO, aa ie nisambaeko, le niloho latsa. ⁷ Le hoe i anjeliy tamako: Inoñ' o ilatsà'oo? Hatoroko azo ty raha mietak' amy

* **16:15** Nampolieñe amy 3:3 ao toy. † **16:16** Vohi-pizamanañe; ty nandreketa' i Debora i Sisera naho i valobohò'ey * **17:2** Iir 51:7 † **17:4** Iek 23:33

rakembay naho ty amy biby aman-doha fito naho tsifa folo minday azey. ⁸ I biby nitrea'oy le teo, fa tsy eo, vaho fa hiakatse boak' antsikeokeok' ao mb' am-pirotsaha'e mb'eo. Hahalatsa o mpimoneñe an-tane atoy tsy pinatetse amy boken-kaveloñe tam-pifotora' ty voatse toio, [‡]t'ie hahaisake i biby teo naho tsy eo vaho mbe ho aviy. ⁹ Inao ty itsakoreañe an-kihitse: I loha fito rey ro vohitse fito § iambesara' i rakembay, ¹⁰ naho mpanjaka fito, fa nihotrake ty lime, eo ty raike, mbe tsy niavy ty raike; fa ie avy, le tsy mahay tsy ho eo betebeteke. ¹¹ I biby teo, fa tsy eoy; ie ty mpanjaka faha valo, mireketse amy fito rey, vaho mb'am-pirotsahañe ao. ¹² I tsifa folo niisa'o rey, le mpanjaka folo mboe tsy nandrambe fifeheañe, f'ie mahazo lily ho mpanjaka mindre amy bibiy ora raike. ¹³ Raike ty firefea' iareo vaho hatolo' iareo amy bibiy ty haozarañe naho ty lili' iareo. ¹⁴ Hialy amy Vik' añondriy iareo, fa ho rebahe' i Vik' añondriy, amy te Ie ro Talèn-drotompo* naho Mpifehem-panjaka, le kinanjy naho jinoboñe vaho migahiñe o mpiama'eo. ¹⁵ Le hoe re tamako: O rano niisa'o itoboha' i tsimirirañeio, le ondaty naho valobohòke naho fifeheañe vaho fameleke. ¹⁶ Le i tsifa folo niisa'o amy bibiy rey ro halaiñe i tsimirirañey, hampidoñ' aze ho vahiny naho miboridañe; habotse' iereo ty nofo'e vaho hamorototo aze añ'afó. ¹⁷ Fa nentoen' Añahare añ' arofo' iareo ty hañeneke i satri'ey, naho hitrao-drehake vaho hanolotse ty fifehea' iareo amy bibiy ampara' te heneke o saontsin' Añahareo. ¹⁸ I rakemba niisa'oy, le i rova jabajaba mifehe o mpanjaka' ty tane toio.

18

Ty Firotsaha'i Babolone

¹ Añe zay le nahatrea anjely tovo'e nizotso boak' andindìñe aña amandily ra'elisy vaho nihazavae' ty enge'e ty tane toy. ² Le nikoihe'e ampiarañanañañe mafe ty hoe:

Rotsake! Rotsake t'i Babolone Jabajaba*!
ie fa akiban-kokolampa henaneo, naho
lakato' ze fonga anga-draty, vaho
zoho' ze hene voroñe maleotse naho mampangory. ³ Fa hene ninoñe amy
divain-kadraon.
kakarapiloa'ey ze kilakila ondaty.
naho fonga niolots' ama'e
o mpanjaka' ty tane toio,
vaho nitampe-draha irieñe
o mpanao balibali' ty tane toio
amy halosoran-katea-mena'ey. ⁴ Tsinanoko ka ty fiarañanañañe boak'
andindìñe ey nanao ty hoe:
Miengà ama'e ry ondatiko, tsy
hitraok' amo hakeo'eo,
naho tsy handrambe o angorosi'eo[†]; ⁵ fa mitoabotse pak'andindìñe ey o
tahi'eo vaho tiahin' Añahare o sata-rati'eo. ⁶ Ondroho ama'e mira
ami'ty natolo'e;
le avaho ama'e in-droe' o fitoloña'eo;
vaho trobotrobò in-droe

[‡] **17:8** Dan 12:1 § **17:9** amam-bohitse fito: Roma * **17:14** Its 10:17 * **18:2** Ies 21:9 † **18:4**
Iir 51:6, 9, 45; Iir 50:8, 13, 28

i fitovy nilaroe'ey. ⁷ Ampanahafo ami'ty nienge'e naho ty fierañerañan-tro niaiña'e,
ty samporerahañe naho anahelo
hatolotse aze.
Inao ty fisengean-tro'e :
Miambesatse raho
fa mpanjaka-rakemba,
Tsy vantotse,
vaho tsy hahatre a fioremeñañe. ⁸ Aa le hivovo ama'e añ' andro raike o
hankà'eo: ty angorosy, ty hòntoke, vaho ty kerè,
le ho hotomomohe' ty afo;
amy te maozatse i TALÈ Andrianañahare
mizaka azey. ⁹ Ie isa' o mpanjaka' ty tane toio, ie nifandia-tihy ama'e
naho ni-mpitraok' amy fiagaregaña'ey, ty hatoe' i fanodorañ' azey,
le hangololoike ty tañy naho handala, ¹⁰ hizorazora eroan-koe am-
pirevendreveñañe i sarerahañ' aze, hanao ty hoe:

Hoy hoy abey, Ry rova jabajaba! I Babolone rovan-kaozarañey!

Ie ora raik' avao te pok'eo ty fizakañ'azo. ¹¹ Mirovetse naho mandala aze
o mpampibalibali' ty tane toio, amy te tsy eo ka ty hikalo o kilanka'
iareoo: ¹² entañe volamena naho volafoty naho vatosoa naho hange,
le leny marerarera naho malo-mavo, le lande naho mena mañabara,
naho ze karazan-katae malàñe, naho ze fanake aman-tsifan-drimo‡,
naho ze fanake aman-katae sarotse, le torisike naho viñe naho vato
sanga; ¹³ le kanely§ naho fampafiriañe naho soli-pañosorañe naho
rame le divay naho solik' oliva, le mona'e naho vare-bolè le añombe
naho añondry; le soavala naho sarete le ondevo vaho fiai' ondaty.
¹⁴ Nisitak' azo o voka-tsoa nirien-tro'oo, naho nihàンkañe ama'o, tsy
ho isa'o ka ze atao tave naho o raha fiain-taneo. ¹⁵ Hañarafiake eñe
o nanao balibalike amy raha rezaio, o nimpañaleale ty ama'eo, am-
pirevendreveñañe amy halovilovia'ey, le hangoihoy ty rovetse vaho
handala ¹⁶ ty hoe:

Hoy! Hoy! i rova ni-ra'elahi,
nisaron-dený marerarera malo-mavo
naho mena mañabarañe,
vaho niragorago volamena
naho vatosoa vaho hange! ¹⁷ fa ora raik' avao ty nahakafoake
o vara beio!

Nitrobàke eñe ze fonga mpinjon-dakañe naho ze hene mpañavelo an-
tsambo naho o mpiandriakeo naho ze fonga mitoloñe amy riakey, ¹⁸ songa
nipazapazake ty hoe t'ie nanjò ty hatoe' i sinodotsey:

Aia ka ty hañirinkiriñe i rova jabajaba zay? ¹⁹ le nampibobò deboke
añambone'e, naho nangoihoy ty rovetse vaho nitoreo ty hoe:

Hoy! Hoy, I rova foloingitrokey!
ze nampañaleale ze nanan-tsambo
an-driak' aña eñamy vara'ey!
amy te ora raik' avao
ty nampikoahañ' aze! ²⁰ Irebeho ry likerañe!
naho ry noro'e naho Firàheñe
vaho mpitokio!

‡ 18:12 toe tsifa' ty elefanta (biby jabajaba) § 18:13 kanely: holi-katae mañitse fampafiriañe

Inahareo ro nizakàñ' Añahare aze. ²¹ Ie amy zao, rinambe' ty anjely fanalolahy ty vato bey hoe vato-fandisanañe jabajaba, le navoko-voko'e an-driake eñe nanao ty hoe:
 Zay ro handretsahañe i Babolone
 rova jababajay ambane tsy ho oniñe ka. ²² Le tsy ho janjiñeñe ama'o ao ka
 ty feo' o mpititike marovanio,
 naho o sairio,
 naho o mpitiroke soly naho antsivao,
 naho tsy ho trea ama'o ka
 ze mpitsene an-satam-pitãñ'inoñ'inoñe,
 vaho tsy ho janjiñeñe ama'o ao ka
 ty fikosaokosaom-bato fandisañe. ²³ le tsy hiiloilo ama'o ao ka
 ty hazavàm-pailo,
 mbore tsy ho janjiñeñe ama'o ao ka
 ty fifañòhahohà' i engavaoy
 naho i mañengay;
 ni-fanalolahy an-tane-bey atoy
 o mpanao balibalik' ama'oo,
 amy te nampikalitahe' o famoreha'oo
 o fifeheañeo,
²⁴ naho ama'e ao ty nahatendrehañe
 ty lio' o mpitokio naho o noro'eo,
 vaho ze hene vinono an-tane atoy*.

19

Haleloia

¹ Añe irezay le tsinanoko ty fipoñafam-peom-balobohòke andindìñe ao, nirihoñe ty hoe:

Haleloia*!

Fandrombahañe naho enge,

naho haozarañe

ho an'Andrianañaharen-tikañe ² amy te mahity naho vantañe o fizakà'eo†, le fa nafà'e i tsimirirañe jabajaba

nandeotse ty tane toy

amo hakarapiloa'ey

vaho navale'e ama'e

ty lio' o mpitoro'eo‡. ³ Nindrai' iereo ty hoe:

Halelo-Ia!

Hihobobòke nainai'e donia o hatoe'eo. ⁴ Songa nibaboke naho nitalaho aman' Andrianañahare mpiambesatse amy fiambesa'ey i androanavy roapol-efats' amby rey naho i raha veloñe efatse rey, nanao ty hoe:

Amena, Haleloia! ⁵ Le niboak' amy fiambesatsey ty fiarañanañañe nanao ty hoe:

Rengeo t'i Andrianañaharen-tikañe

ry mpitoro'e iabio, naho o mañeveñe ama'eo, ndra ty kede ndra ty bey!§

⁶ Tsinanoko amy zao ty nanahake feom-balobohòke, nanahake ty fitroña' ty rano misorotombake naho nanahake ty fiparapapiahan' àmpiñe ra'elahy, nanao ty hoe:

* **18:24** Mat 23:30, Lke 11:50 * **19:1** Heb: aleloia: jejò t'IEHOVÀ † **19:2** Sab 19:9 ‡ **19:2** Its 32:43 § **19:5** Sab 115:13

Haleloia! Fa mifehe t'i TALÈ Andrianañahare, Tsitongerèñe. ⁷ Antao hifale naho hirebeke vaho hanolots' engeñe ama'e!

Fa tsatoke ty enga-vao' i Vik'añondriy,* vaho fa nihamiñe i enga-vao'ey,[†] ⁸ le natolotse aze ty hiombea'e leny marerarera mikinokinoke mitoratsike.

Toe o satan-kavañona' o noro'eo i leny marerareray.[‡] ⁹ Le hoe re tamako: Patero: Haha o ambarañe ho mb'amy sabadidam-panambalia' i Vik' añondrii! Le hoe re amako: Tsara ton' Añahare zay. ¹⁰ Le nibabok' am-pandia'eo raho niambane. Fe hoe re: Mitaoa! Mpitrao-pitoroñe ama'o naho amo longo'o mitañe ty taro' IESOÀ raho. Mitalaho aman' Añahare! Amy te arofom-pitokiañe ty fitaroñañe IESOÀ.

Ty Mpiningitse Soavala Foy ¹¹ Le naheoko te nisokake i likerañey naho niheo mb'etoa ty soavala foy, naho kanjieñe ty hoe Migahiñe naho To i mpiningitse ama'ey naho an-kavantañañe ty fizaka'e vaho fialia'e§. ¹² Hoe afo misotratràke o fihaino'eo, naho sabakam-bolonahetse maro ty añambone'e eo. Sinokitse ama'e ty tahinaña tsy fohi' ondaty naho tsy ie*. ¹³ Misikin-damba mireparepa nalipotse an-dio re, le atao Tsaran' Añahare i tahina'ey[†]. ¹⁴ Nañorik' aze an-tsoavala foy o lahin-defon-dikerañe o nisaron-dený marerarera mitoratsike mikinokinoke.[‡] ¹⁵ Miakats'am-palie'e ty fibara masioñe§ hañatsake o kilakila ondatio, le ho fehè'e an-kobay viñe.* naho ie ty mandialia ty fipiritan-divaim-piforoforon-kaviñeran' Añahare, Tsitongerèney. ¹⁶ Misokitse an-tsaro'e eo naho am-pe'e eo ty hoe: Mpanjakam-panjaka naho Talèn-talè.

Ierosaleme Vao Izk 48.30-35 ¹⁷ Le naheoko ty anjely nijohañe amy àndroy nikoike am-piarañanañañe mafe amy ze hene voroñe mitiliñe an-teñanteñan-dikerañe ty hoe: Mb' etoy, mitontona amy sabadidake jabajaban' Añaharey, ¹⁸ hitimpoñe ty nofom-panjaka, naho ty nofo' o mpifehen-dahin-defoñe naho ty nofo' o fanalolahio naho ty nofon-tsoavala naho o mpiningitse ama'eo naho ty nofo' ze hene ondaty, ty ondevo naho ty midada, ty kede vaho ty bey.[†] ¹⁹ Le nitreako te nifanontoñe hialy amy miningitse soavalay naho amy firimboña'ey i bibiy naho o mpanjaka' ty tane toio naho o fifañosoña' iareoo. ²⁰ Le tsinepake i bibiy naho nindre ama'e i mpitoky sare'e nanao viloñe tsitantane añatrefa'e naho namañahy o nandrambe ty vilo' i bibiy vaho nitalaho amy sare' eioy. Navokovoko veloñe amy antara mirebareba afo manodotse solifaray ao ie roe, ²¹ le vinono amy fibara miakatse am-palie' i mpiningitse soavalaiy o ila'eo, vaho nahaetsake o voroñe iabio ty nofo' iareo.

20

Arivo Taoñe

¹ Le naheoko ty anjely nizotso boak' andindiñe ey nitañe ty lahin-dakilen-tsikeokeoke naho am-pitâ'e ty silisily jabajaba. ² Tsinepae'e i fañaneñey, i mereñe jabajaba haehaey, i atao devoly naho mpañinjey, vaho rinohi'e arivo taoñe. ³ Najorobo'e an-tsikeokeok' ao re le vinarindri'e

* ^{19:7} Mat 22:1-12 Toe an-Tane † ^{19:7} Ies 61:10 ‡ ^{19:8} Mat 22:11-14 § ^{19:11} Top 10:42

* ^{19:12} Ben 2:17 † ^{19:13} Jao 1:1, 14 ‡ ^{19:14} Ben 19:7 8 § ^{19:15} Ies 49:2 * ^{19:15} Sab 2:9

† ^{19:18} Isa 56:9; Eze 39:4; Mat 24:28; Lke 17:37

naho vinoli-tombohe'e, tsy hamañahy o kilakila ondatio ampara' te heneke i arivo taoñey. Ie aña le tsy mahay tsy hahâñe betebeteke. ⁴ Le nahatreia fiambesatse maro* raho, naho niambesarañe, vaho nomean-dily hizaka; nitreako ka ty arofo' o kinitiske ty amy fitaliliañeIESOÀ naho i tsaran' Añahareio, ie tsy nitalaho amy bibiy ndra amy sare'ey vaho tsy nandrambe i vilo'ey an-dahara'e ndra am-pitâ'e, le niboden-ko veloñe vaho niharo nifehe amy Norizañey arivo taoñey. ⁵ (Fe tsy nitroatse ho veloñe hey o nivilasy ila'eo naho tsy nipeake i arivo taoñey.) Ie ty fivañonan-ko veloñe valoha'e. ⁶ Haha naho masiñe ze aman' anjara amy fivañonan-ko veloñe valoha'ey, toe tsy anaña' i havilasy faharoey lily, fa ho mpisoron' Añahare naho i Norizañey, hitrao-pifehe ama'e arivo taoñey.

Hankà' i mpañinjey

⁷ Ie modo i arivo taoñey zay, le ho hahâñe boak'an-drohy ao i mpañinjey ⁸ vaho hiakatse hamañahy ze fifeheañe an-joro-efa' ty tane toy—i Goga naho i Magoga†—hanontona'e hialy. Mira amo faseñe añ'olon-driakeo ty ia'iareo. ⁹ Nionjoñe mb'ambone' ty treha' i Taney iereo nañarikoboñe ty tobe' o noro'eo naho i rova kokoañey. Fe nidoiñe boak' andindîne ey ty afo nampibotseke iareo. ¹⁰ Le navokovoko amy antara-afó aman-tsolifaray i mpañinje namañahy iareoy, hatraoke amy bibiy naho i mpitoky sare'eiy, vaho halovilovy handro an-kaleñe nainai'e kitro-kattroke.

Fizakañe o Nihomakeo

¹¹ Le nahatreia fiambesam-pifeheañe foty jabajaba naho i Mpambesatse ama'ey raho. Nibotatsake nisitak' i lahara'ey ty tane toy naho i likerañey, ie tsy nanjoañe toetse ka. ¹² Le nahatreia o nikoromakeo, ty bey naho ty kede, nizorazora añatrefa' i fiambesatsey, vaho sinokake o bokeo; sinokake ka ty boke raike, i boken-kaveloñey, vaho zinaka ty amo sinokitse amo bokeoo ty amo sata'eo o nivilasio.

¹³ Nafoe' i riakey o vilasy ama'eo, le naloa' i Havilasy naho i Tsikeokeokey o vilasy am'iereo, vaho zinaka, songa ty amo fitoloña'eo. ¹⁴ Navokovoko amy antara afoy ao ty Havilasy naho i Tsikeokeokey. Ie i havilasy faharoey‡: i antara-afoy. ¹⁵ Le nafetsak' amy antara afoy ze tsy nioniñe sinokitse amy boken-kaveloñey ao.

21

¹ Le nahatreia likerañe vao naho tane vao* raho, fa songa nimosaoñe aña i likerañe valoha'ey naho ty tane valoha'e toy, ie tsy aman-driake. ² Le nahatreia i Rova Miavakey, Ierosaleme vao, nizotso hirik' andindîne aña boak' aman' Añahare, hinalankañe hoe enga vao soa hamîñe, ho a i vali'ey. ³ Le tsinanoko ty fiarañanañañe mafe boak' amy fiambesatsey nanao ty hoe: Ingo te am'ondatio ty kivohon' Añahare, ie hitrao-pimoneñe am' iereo; ho ondati'e iereo naho ho am' iareo ao t'i Andrianañahare ho Andrianañahare' iareo†, ⁴ naho ho faopaohe'e am-pihaino' iareo ze atao ranomaso, naho tsy ho aman-kavilasy ka, ndra fandalâñe, ndra firovetañe ndra fangirifiriañe, fa nimosaoñe aña o raha taoloo.

⁵ Le hoe i Mpambesatse amy fiambesatsey: Heheke, kila vaoeko. Hoe ka re: Patero, fa añoñe naho to o tsara zao. ⁶ Le hoe re tamako: Fa heneke! Zaho i A naho i Zedey, i Fifotorañey naho i Figadoñañey. Hazotsoko tsy amam-bili'e boak' amy ranon-kaveloñey migoangoañey ze taliñiereñe.

* **20:4** Ben 19:14 † **20:8** Iek 38:2 ‡ **20:14** Ben 2:11, 20:6, 21:8 * **21:1** Ies 65:17, Oni: Ies 66:22; Iir 31:33, Iek 37:27, Fi 6:18 † **21:3** Sor 26:11-12; Oni: Ies 7:14, 8:8,10, Iir 31:33, Iek 37:27, Fi II 6:18

⁷ Ho lovae' ty maharebake irezay, le ho Andrianañahare'e raho vaho ho anako re. ⁸ Fe o mahimahiñe o naho o ts-i-miatoo naho o lo-tserekeo naho o mpañoho-dozao naho o mañarapiloo naho o mpamorekeo naho o mpiato am-pahasiveo vaho ze hene harembokeh ro hanañ' anjara amy antara manodotse an-tsolifaray ao. Zay ty havilasy faharoe.

⁹ Le nimb'eo ty raik' amy anjely fito nitam-pinga fito pea i hankàñe fito honka'e rey nisaontsy amako, nanao ty hoe: Mb'etoa, hatoroko azo ty enga vao, ty vali' i Vik' añondriy. ¹⁰ Le nendese'e añ'arofo mb'am-bohitse jabajaba naho mitiotiotse aña, naho natoro'e ahy i rova miavakey, Ierosaleme mivotrake hirik' andindìñe ao boak' aman' Añahare, ¹¹ aman' engen' Añahare, vaho hoe vato saro-bily, hoe vato jaspy nikantsokantsoñe hoe kristaly ty hazava'e. ¹² Ama'e ty kijoly ra'elahy naho abo reketse lalam-bey folo ro'amby, naho anjely folo ro'amby amy lalam-bey rey, vaho pinatetse am' iereo ty tahina' i foko folo-ro'ambi' i ana' Israele reiy[‡]. ¹³ Telo ty lalam-bey atiñanaña, naho telo ty lalam-bey avaratse, naho telo ty lalam-bey atimo, vaho telo ty lalam-bey ahandrefa. ¹⁴ Le fahañe folo ro'amby ty ioreña' i kijoli' i rovaiy, naho am'iereo i tahinaña folo-ro'ambi' i Firàheñe folo-ro'ambi' i Vik' añondriy reiy.

¹⁵ Le amy nisaontsy amakoy ty kobay fanjeheañe volamena, hanjehi i rovay naho o lalam-bei'eo vaho i kijoli'ey. ¹⁶ Nalahatse hoefa-mira i rovay vaho mira ty andava'e naho ty am-pohe'e. Zinehe'e amy kobaïy i rovay le 12 000 stadione, mira ty andava'e naho ty am-pohe'e vaho ty haabo'e. ¹⁷ Le zinehe'e i kijoliy, kiho zato tsy efapolo efats' amby ampanjehea' ondaty—fa zay ty norihe' i anjeliy. ¹⁸ Le vato jaspy ty firafi' i kijoliy naho volamena ki'e hoe fitaratse mikantsonkantsoñe i rovay. ¹⁹ Le nihamine' ze hene karazam-bato soa ty faha' i kijoli' i rovaiy. Jaspy ty faha' i valoha'ey, safira ty faharoe, kalkedona ty fahatelo, emerode ty fah' efatse, ²⁰ sardoniksa ty faha lime, karnelia ty fah' eneñe, krisolita ty fahafito, berila ty faha valo, topaze ty faha sive, krisopraso ty fahafolo, jakinta ty fahafolo-raik' amby, ametista ty fahafolo-ro' amby. ²¹ Le hange folo-ro'amby i lalam-bey folo ro'amby rey, sindre hange raike i lalam-bey rey, vaho volamena ki'e hoe fitaratse mangarahara o lalan-drovao.

²² Tsy nahatrea toetse miavake ao raho, amy te i TALÈ Andrianañahare, Tsitongerèñey, naho i Vik' añondriy ro kiboho'e. ²³ Le tsy paia' i rovay hipisaña ama'e i àndroy ndra i volañey, fa hazavae' ty engen' Añahare; vaho i Vik' añondriy ro failo'e. ²⁴ I hazavà'ey ro hañaveloa' o rinombake amo fifeheañe[§], vaho hinday o volonahe'eo mb'ama'e o mpanjaka' ty tane toio. ²⁵ Tsy harindriñe ka o lalam-beio te antoandro, amy te tsy ho aman-kaleñe ty ao, ²⁶ vaho hindeseñe mb'ama'e mb'eo ty engeñe naho ty asi' o fifeheañe, ²⁷ le tsy mb'ia hizilik' ao ndra inoñ' inoñe maleotse ndra o mpanao hativàñe o mpanaõitseo*, fa o misokitse am-boken-kavelo' i Vik' añondrio[†] avao.

22

I Sakan-Kaveloñey

¹ Le natoro'e ahy i saka aman-dranon-kaveloñey, mikantsokantsoñe hoe kristaly mikararake boak' am-piambesan' Añahare naho amy Vik'

[‡] **21:12** Iek 47:22-23, 48:31-34 [§] **21:24** Ies 60:3 * **21:27** Ben 22:15, Te 2 2:11 † **21:27** Dan 12:1

añondriy, ² añivo' i damokey naho aña'olotse roe' i sakay ty hataen-kaveloñe mamao karazam-boa folo ro'amby, naho mamao am-bolañ' am-bolañe, vaho aoly mahajangañe o kilakila' ondatio o rave' i hataeio. ³ Le tsy ho amam-pàtse ka, naho ama'e ao i fiambesan' Añahare naho a i Vik' añondriy, vaho hitoroñe aze o mpitoro'eo, ⁴ ho isa' iereo ty lahar'a'e vaho ho am-panda' iareo i tahina'ey ⁵ Toe tsy ho aman-kaleñe ty ao, naho tsy ho paiaeñe ty jiro ndra ty hazavà' i àndroy, amy te hireandreaña' i TALÈ Andrianañahare, vaho hifehe nainai'e donia iereo.

⁶ Le hoe re tamako: Migahiñe naho to o tsara zao. Fa nañitrik' i anjeli'ey t'i TALÈ Andrianañahare' o arofom-pitokio, hanoro o mpitoro'eo o raha an-titotse ho tendrekeo. ⁷ Inao! ho avy aniany raho! Haha ty mañambeñe o entam-pitokia' ty boke toio.

Figado'e naho Tata

⁸ Zaho Jaona, ty nitsanoñe naho nahatre airezay; aa ie nahatsanoñe naho nahatre, le nibaboke hitalaho am-pandia' i anjely nanoro ahy irezaiy. ⁹ Fa hoe re tamako: Ko manao zao! mpitrapo-pitoroñe ama'o naho amo rolongo mpitokio vaho amo mañambeñe o tsara' ty boke toio raho. Mitalahoa aman' Añahare!

¹⁰ Le hoe re tamako: Ko litéa'o ty tsaram-pitokiañe ami'ty boke toy*, fa an-titotse ty àndro. ¹¹ Adono hitolon-kakeo ty mpanao hakeo naho hitoloñe an-kaleora'e ty maleotse, naho mbe hanao ty hahiti'e o mahitio; vaho hitàn-ty flavaha'e o noro'eo.

¹² Inao! ho avy aniany raho! vaho amako o tambekoo, hañavahako ondatio, songa ty amo sata'eo†. ¹³ Zaho i A naho Zedey, ty valoha'e naho ty fara'e, i fifotorañey naho i figadoñañey. ¹⁴ Haha o mañambeñe o lili'eo‡, fa hanan-dily amy hataen-kaveloñey, naho hahazilike amo lalam-beindrovao.§ ¹⁵ Alafe ao o amboao naho o mpamorekeo naho o karapiloo naho o mpamonoo naho o mpilolok' an-tsamosampoo vaho ze mikoko vande naho o bodiakeo*.

¹⁶ Zaho, IESOÀ, ty nañitrike i anjelikoy hitaroñe irezay ama'areo, ho amo Fivorio. Zaho i vahatse naho tarira' i Davidey†, i Mpitarik' andro mireandreañey.

¹⁷ Manao ty hoe i Arofoy naho i Enga Vaoy: Mb'etoa! Le ano ty hoe ry mijanjiñe: Mb'etoa! le ampombao mb'etoa ty taliñiereñe; vaho adono hanovy amy ranon-kaveloñe tsy amam-bili'ey ze manàtry.

¹⁸ Inao ty hatahata'ay amy ze mijanjiñe o tsaram-pitokiañe ami'ty boke toio, ie anovoñañe, le hatovon' Añahare ama'e o feh' ohatse misokitse ami'ty boke toio, ¹⁹ naho anintoñañe ty tsara' ty bokem-pitokiañe toy, le ho sintonen' Añahare ama'e ty anjara'e amy hataen-kaveloñey naho amy rova miavakey, ty amo sinokitse ami'ty boke toio.

²⁰ Hoe ty mitaroñe iretoañe: Eka! homb'eo masika raho. Amena.
Mb'etoa ry IESOÀ TALÈ. ²¹ Ty hasoa' IESOÀ TALÈ ho ama'areo iaby. Amena.

* **22:10** Dan 12:4 † **22:12** Mat 16:27, Jao 5:29 ‡ **22:14** Mat 19:17 § **22:14** Ie taolo te natambatse o boke ami'ty Heneke toy, le ie ty andine'e toy ty amy Tertoliane (CE 208) naho i Sipriane (CE 251) * **22:15** Ben 21:27, Te II 2:11 † **22:16** Ies 11:1, 10, Ben 5:5